


Dios
pejumelivaisibaxuto
pejanalivaisibaxuto



New Testament in Guahibo

Dios pejumelivaisibaxuto pejanalivaisibaxuto

New Testament in Guahibo

copyright © 2011 Wycliffe Bible Translators, Inc.

Language: Guahibo

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guahibo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 21 Feb 2024 from source files dated 29 Jan 2022
bc03f416-faf8-5000-bfb5-5ca8a3fa98cf

Contents

SAN MATEO	1
SAN MARCOS	74
SAN LUCAS	117
SAN JUAN	193
HECHOS	243
ROMANOS	309
1 CORINTIOS	339
2 CORINTIOS	371
GÁLATAS	391
EFESIOS	404
FILIPENSES	414
COLOSENSES	421
1 TESALONICENSES	428
2 TESALONICENSES	434
1 TIMOTEO	437
2 TIMOTEO	445
TITO	451
FILEMÓN	455
HEBREOS	457
SANTIAGO	481
1 SAN PEDRO	489
2 SAN PEDRO	498
1 SAN JUAN	504
2 SAN JUAN	511
3 SAN JUAN	512
JUDAS	514
APOCALIPSIS	517

Pexanialivaisi Jesucristo pelivaisi, San Mateo peyaquinaelivaisi

*Jesucristo pijasalinaivimi yabara pelivaisi
(Lc 3.23-38)*

¹ Mapalivaisije Jesucristo pijasalinaivimi pelivaisi. Jesucristo rabaja Davidpijinē pemomoxiyajuvēnēnē. Davidpijinē pijinia Abrahampijinē pemomoxiyajuvēnēnē. ² Copiaya Abrahampijinēmi xaina pexēnato. Pevēnē Isaac. Isaacpijinē juya pexēnato xaina. Pevēnē Jacob. Jacobpijinē juya pexi xaina. Pexiyajuvēnēnē pevēnē Judá. Judápijinē pematapijinēbeje, pejuyapijivi ata, xaina. ³ Judápijinē juya pexēnato beje xaina. Itsanē pevēnē Fares. Itsanē Zara. Bajaraponēmibeje penapijiva pevēnē Tamar. Farespijinē juya pexēnato xaina. Pevēnē Esrom. Esrompijinē juya pexēnato xaina. Pevēnē Aram. ⁴ Arampijinē juya pexēnato xaina. Pevēnē Aminadab. Aminadabpijinē juya pexēnato xaina. Pevēnē Naasón. Naasónpijinē juya pexēnato xaina. Pevēnē Salmón. ⁵ Salmónpijinē juya pexēnato xaina. Pevēnē Booz. Boozpijinē penapijiva pevēnē Rahab. Boozpijinē juya pexēnato xaina. Pevēnē Obed. Obedpijinē penapijiva pevēnē Rut. Obedpijinē juya pexēnato xaina. Pevēnē Isaí. ⁶ Isaípijinē juya pexēnato xaina. Pevēnē David. Bajaraponēmi nacuaevevtsinēmi. Davidpijinē yacajēreta Uriáspijinē pijavami. Nexata bajarapajivibeje juya pexēnato xainabeje. Pevēnē Salomón. ⁷ Salomónpijinē juya pexēnato xaina. Pevēnē Roboam. Roboampijinē juya pexēnato xaina. Pevēnē Abías. Abíaspijinē juya pexēnato xaina. Pevēnē Asa. ⁸ Asapijinē juya pexēnato xaina. Pevēnē Josafat. Josafatpijinē juya pexēnato xaina. Pevēnē Joram. Jorampijinē juya pexēnato xaina. Pevēnē Uzías. ⁹ Uzíaspijinē juya pexēnato xaina. Pevēnē Jotam. Jotampijinē juya pexēnato xaina. Pevēnē Acaz. Acazpijinē juya pexēnato xaina. Pevēnē Ezequías. ¹⁰ Ezequíaspijinē juya pexēnato xaina. Pevēnē Manasés. Manaséspijinē juya pexēnato xaina. Pevēnē Amón. Amónpijinē juya pexēnato xaina. Pevēnē Josías. ¹¹ Josíaspijinē juya pexi xaina. Pexiyajuvēnēnē pevēnē Jeconías. Jeconías pematapijinē, pejuyapijivi ata, xaina. Pamatacabi Israel nacuapijivi cobecēbiaya caponatsi Babilonia nacuayabelia, bajarapamatacabi naexana Jeconíaspijinē.

¹² Bajaraxuacujinae Jeconíaspijinē juya pexēnato xaina. Pevēnē Salatiel. Salatielpijinē juya pexēnato xaina. Pevēnē Zorobabel. ¹³ Zorobabelpijinē juya pexēnato xaina. Pevēnē Abiud. Abiudpijinē juya pexēnato xaina. Pevēnē Eliaquím. Eliaquimpijinē juya pexēnato xaina. Pevēnē Azor. ¹⁴ Azorpijinē juya pexēnato xaina. Pevēnē Sadoc. Sadocpijinē juya pexēnato xaina. Pevēnē Aquím. Aquimpijinē juya pexēnato xaina. Pevēnē Eliud. ¹⁵ Eliudpijinē juya pexēnato xaina. Pevēnē Eleazar. Eleazarpijinē juya pexēnato xaina. Pevēnē Matán. Matánpijinē juya pexēnato xaina. Pevēnē Jacob. ¹⁶ Jacobpijinē juya pexēnato xaina. Pevēnē José. Bajaraponēmi María pamona. Bajarapovami Jesús pena, ponē yabara: “Cristo, ponē Dios athēbēvetsica itorobatsi jivi pecapanepaexa,” jaitsi.

¹⁷ Nexata Abrahampijinēmita petaxuxuabicujinae jivi penaexanaponaejava, trečenēta naexana Davidpijinē. Bajaraxuacujinae icatsia Davidpijinēmita petaxuxuabicujinae jivi penaexanaponaejava, trečenēta icatsia naexana Jeconíaspijinē. Pamatacabi Israel nacuapijivi cobecēbiaya caponatsi Babilonia nacuayabelia, naexana Jeconíaspijinē. Bajaraxuacujinae icatsia Jeconíaspijinēmita petaxuxuabicujinae jivi penaexanaponaejava, trečenēta pijavata naexana Jesucristo jane baja, ponē Dios athēbēvetsica itoroba jivi pecapanepaexa.

*Pacuenia Jesús naexana yabara pelivaisi
(Lc 2.1-7)*

¹⁸ Jesucristo itsa naexana mapanacuataje, naexana mapacueniaje. Copiata Josébeje Mariabeje najumejaitabeje penapitsinexabeje. Nexata baja María jejai Josébeje penapitsinexabeje. Bajaraxuacujinae penapitsivajēnaeyabeje, María nayapētane penacoxitsijava Espiritu Santo pejamatabēcueneta. ¹⁹ José, María jane baja pamonanaxa, bitso penajamatabēcueneriviabinē. Bajaraxuata José apo jitsipae daxitajivi pitabarata pevajanupaebijava María penacoxitsijava. Nexata picani José bēpēnēta jamatabējumai tsaponaponae: —Itsanējavabelia María nacoxita. Nexata ajumejibia copatsianajē. Apo pitsinē baja tsane María tajavanexa, jamatabējai picani bēpēnēta tsaponaponae José.

²⁰ Pamatacabi abaxē José bajarapacuenia najamatabēxainaponapona, majitsinaebota José tsitanaitajētatsi Dios pitorobinētsica, ángel. Nexata ángel jumaiti Joséjavabelia: —José, xamē raja Davidpijinē pemomomē. Pētsa cujunavame nepitsijava María nijavanexa. Tsipaji raja panacueto María yacotaponapona, Espiritu Santo saya pejamatabēcueneta nacoxita. ²¹ Bajarapova exanaena penacuetonēyo. Vēnērubianame bajarapanacuetonēyo Jesús. Tsipaji raja bajaraponē capanepaena daxita pijajivi pibisiacuene

pejanaeneconimivecua. ²² Bajarapacuenia María penacuetonëyo exanaena pecopiapatsinexa pacuenia baja cajena bajayata Diosojumepaebinëmi profetanëmi Dioso pejamatabëcueneta tajëvelia vajunupaeba. Profetanëmi bajayata tajëvelia bajarapanacuetonëyo yabara jumaitsi mapacueniaje:

²³ Petiriva apo naperabëquenatsinejeva pebijavabelia, nacoxitsiana. Exanaena penacuetonëyo. Vënërubianatsi Emanuel. “Emanuel,” pejaijume: “Dioso nacayajava,” pejaijume,

jai bajayata tajëvelia profetanëmi Dioso pejamatabëcueneta, jai ángel majitsinaebota Joséjavabelia.

²⁴ Nexata José piamajitsinaecujinae naëcota. José jumecovënëta pacuenia itorobatsi ángel. Nexata baja José pijaboyaberena María barëpata pijavanexa. ²⁵ Itsiata abaxë José apo imoxoyobi pijava penamataxainaenacuetonëyo pevecuanaexanaevajënaeyatsi. Bajarapanacuetonëyo jane baja José vënëruba JESUS.

2

Pacuenia tulupu perubenaejava pecanaëcobivi najetarubena petaenexa Jesúsnëyo yabara pelivaisi

¹ Jesús naexana Belén tomarata, Judea nacuata peecaetomarata. Bajarapamatacabi nacuaevetsinë Herodes Judeanacua eveta. Nexata Jesús penaexanaecujinae, pebijivi, tulupu perubenaejava pecanaëcobivi, pata tajënacujavavetsina. Pata Jerusalén tomarajavabetsina. ² Tulupu perubenaejava pecanaëcobivi yanijobapona jivijavabelia:

—¿Detsa jota barëcatsi panacuetonëyo naexana judíovi pepo pevetsinënexa? Payapëtaniji bajaraponëyo penaexanaejava. Tsipaji baja cajena pataniji bajaraponëyo penaexanaejavata penaitajëtsituluputo. Bajarapatuluputo pataniji patajanacuatareca. Bajaraxuata paponainajë mabetsinaje patataenexa bajaraponëyo, bajaraponëyo pitabarata yayataeya patamatabacabëta patatonubenaenexa, jai tsaponae jivijavabelia tulupu perubenaejava pecanaëcobivi.

³ Nexata Herodes, Judeanacua pevetsinë, vënëlivaisitane tulupu perubenaejava pecanaëcobivi bajarapacuenia pejumaitsaponaejava jivijavabelia Jesúsnëyo yabara. Nexata Herodes bitso najamatabëxaina. Daxita Jerusalén tomarata pejinavanapaevi ata bitso najamatabëxaina. ⁴ Nexata Herodes junata daxita sacerdotevi penamatacaitorobivi, judíovi pecujarubivi yajava, penacuaetsinexa Herodes pijabota. Nexata Herodes jumaitsi penacuaetsivijavabelia:

—Bajayata profetanë tajëvelia itsa vajunupaeba Cristo penaexanaejavanexa, ¿detsa jota yabara: “Bajarajota Cristo naexanaena,” jai? jai Herodes.

⁵ Nexata penacuaetsivivi jumaitsi Herodesjavabelia:

—Belén tomarata raja naexanaeyapaeba, Judea nacuata peecaetomarata. Bajayata baja cajena Diosojumepaebinëmi profetanëmi tajëvelia vajunupaeba bajaraponë penaexanaejavanexa Belén tomarata. Bajayata Diosojumepaebinëmi profetanëmi peyaquinaelivaisita bajaraponë penaexanaejavanexa yabara tajëvelia jumaitsi mapacueniaje:

⁶ Belén tomarata naexanaena jivi pepo pevetsinënexa. Bajaraponë jane baja evetsiana Dioso pijajivi, Israel nacupijivi. Bajaraxuata Judea nacuata penaetomaraxi, daxita tomaraxivecua, Be léntomara cajena bitso peyayataetomaratsi tsane, jai baja cajena mapacueniaje bajayata tajëvelia Diosojumepaebinëmi profetanëmi peyaquinaelivaisita, jai penacuaetsivivi Herodesjavabelia.

⁷ Bajaraxuacujinae Herodes muetsia junata tajënacuaetsina pepatsivi, tulupu perubenaejava pecanaëcobivi. Nexata Herodes jumaitsi tulupu perubenaejava pecanaëcobivijavabelia:

—¿Detsa baja pajumetobeje xaina bajarapatuluputo penaitajëtsicujinae? jai.

⁸ Nexata petsipaebicujinaetsi Herodes itorobalia bajarapamonae Belén tomarabelia. Herodes jumaitsi tulupu perubenaejava pecanaëcobivijavabelia:

—Paponaremelia Belén tomarabelia. Xaniavaetsia pajaitsinane bajaraponëyo. Itsa pacaxitarabianame, panevajunucaponaeremena. Nexata xanë ata nalianë tsane. Yayiataeya tamatabacabëta tonanucuejitsianë bajaraponëyo pitabarata, jai Herodes tulupu perubenaejava pecanaëcobivijavabelia.

⁹ Nexata jane baja tulupu perubenaejava pecanaëcobivi ponalia Belén tomarabelia. Nexata bajarapamonae namutualia najetarubenaejavata, jemata icatsia napebota tuluputo, patuluputo bajarapamonae tane pijanacuatareca. Nexata bajarapatuluputo bajarapamonae matacanajetarucatsi. Matapania itsajota Jesúsnëyo pena barëcatsi pematatsënëatsia, bajarapatuluputo rucojopa. ¹⁰ Tulupu perubenaejava pecanaëcobivi itsa tane bajarapatuluputo, bitso barëya. ¹¹ Nexata bajarapamonae boyalia itsa joneya,

tane Jesúsnëyo, pena yajava. Nexata tulupu perubenaejava pecanaëcobivi yaiyataeya pematabacabêta tonubenajunua Jesúsnëyo pitabarata. Bajaraxuacujinae pecapatsicajonixi matapana, penamatamotsijavanê pejebicajonixi. Nexata Jesúsnëyo rajuta orojava. Rajutanua petuxujuvijavabeje. Itsajava inciensovênêjava. Itsajava mirravênêjava. ¹² Bajaraxuacujinae tulupu perubenaejava pecanaëcobivi meravi majitsinaebota Dioso itavetatsi penaviabiyaniwa nacuaevetsinë Herodesjavabelia. Nexata tulupu perubenaejava pecanaëcobivi saicaya namutua baja naviaba pijanacuayabereca.

Pacuenia José barênajetabajirava Jesúsnëyo Egipto nacuayabelia yabara pelivaisi

¹³ Tulupu perubenaejava pecanaëcobivi penaviabicujinae, Dioso pijaángel meravi José majitsinaebota tsitanaitajêtatsi. Nexata ángel jumaitsi Joséjavabelia:

–José, nonotapunare baja. Barëponare baja penacuetonëyo, pena yajava. Barênajetabajiravare Egipto nacuayabelia. Bajarajotalia barëponaponaname. Matapania icatsia ita catsipaebianatsi, barênaviatsiaremena. Tsipaji raja nacuaevetsinë Herodes tsiquirinëyo tsimaxêrenajitsiatsi pebeyaxuabinexatsi, jai ángel Joséjavabelia.

¹⁴ Nexata José nonotapuna. Piamajitsinaemeravi baja José barëpona Jesúsnëyo, pena yajava. Barênajetabajirava Egipto nacuayabelia. ¹⁵ Bajarajotalia José barëponapona bajayajebi. Matapania baja Herodes ita têpa, José barëpatsijitsiarena Israel nacuayaberena. Bajarapacuenia tocopiapatatsi tsipaji baja cajena bajayata Diosojumepaebinëmi profetanëmi Dioso pejamatabêcueneta tajêvelia jumaitsi Jesús yabara mapacueniaje: “Taxênato icatsia junsiaarenajê penaviatsinexa Egipto nacuaverena,” jai ra Dioso, jai baja cajena bajayata tajêvelia profetanëmi Jesús yabara.

Pacuenia nacuaevetsinë Herodes pijajivi itoroba pebinacuetoxi pebeponaenexa yabara pelivaisi

¹⁶ Nacuaevetsinë Herodes picani jumaitsi tulupu perubenaejava pecanaëcobivijavabelia: “Itsa pacaxitajarabianame bajarapanacuetonëyo, panevajunucaponaremena,” jai picani Herodes Jesúsnëyo yabara. Itsiata tulupu perubenaejava pecanaëcobivi caxitajarabi ata Jesúsnëyo, apo vajunucaponae Herodesjavabelia. Nexata Herodes ita yapêtane tulupu perubenaejava pecanaëcobivi apo pevajunucaponaejavatsirena, caxitajarabi ata Jesúsnëyo, Herodes bitso anaepana. Nexata Herodes pijajivi itoroba. Jumaitsi:

–Pabeponaname daxita pebinacuetoxi Belén tomarata, Belén tomarajumavelia penaebonêjava ata. Daxita papebinacuetoxi abaxê apo xainae acueyabi pavaibeje, pabeponaname. Pejananaexanaenacuetoxi ata pabeponaenane, jai Herodes pijajivijavabelia.

Bajarapacuenia Herodes pijajivi itoroba pebinacuetoxi pebeponaenexa, Jesúsnëyo picani peyajavabeyaxuabinexatsi. Tsipaji tulupu perubenaejava pecanaëcobivi Herodesjavabelia tsipaeba paepatota taxuxuaba petaejava tuluputo. ¹⁷ Itsa bajarapacuenia pebinacuetoxi beponatsi Belén tomarata, copiapata jane baja pacuenia baja cajena Diosojumepaebinëmi profeta Jeramíaspjinê bajayata tajêvelia yaquina pebinacuetoxi pebejavonexatsi yabara. Bajayata baja cajena profeta Jeramíaspjinê peyaquinaelivaisita tajêvelia jumaitsi mapacueniaje:

¹⁸ Belén tomarajumaverena, Ramá tomarata, ayaicuenia matanueyabiana. Raquelpijiva pemomoxi pexi matanueyabiana. Itavetsi atatsi tsane, itsiata apo copatsi tsane bitso penajamatabêxainaejava. Tsipaji pexi totêpaenatsi, jai bajayata tajêvelia profeta Jeramíaspjinê peyaquinaelivaisita pexoxibeponaejavonexatsi yabara bajarapatomarata.

¹⁹ Nacuaevetsinë baja Herodes pepuatêpae, Dioso icatsia pijaángel itoroba Joséjavabelia. Nexata ángel meravi majitsinaebota José tsitanaitajêtatsi Egipto nacuata. ²⁰ Nexata ángel jumaitsi Joséjavabelia:

–José, nonotapunare. Barëponaname baja tsiquirinëyo, pena yajava. Barênaviaremelia baja icatsia Israel nacuayabelia. Têpa rabaja ponê picani jamatabêbeyaxuabatsi tsiquirinëyo, jai ángel majitsinaebota Joséjavabelia.

²¹ Nexata baja José nonotapuna. Barëpona tsiquirinëyo, pena yajava. José icatsia barênaviata Israel nacuayabelia. ²² Nacuaevetsinëmi Herodespijinê pexênato pevênê Arquelao. Nexata Arquelao eveta Judeanacia paxa pevênamuto. Nexata José ita vênêlivaisitane nacuaevetsinëmi Herodespijinê pexênato pevetsijava Judeanacia, José cuju- nava Jesúsnëyo pebarëponaejava Judea nacuayabelia. Majitsinaebota José Dioso itavetatsi Jesúsnëyo pebarëponaeyaniwa Judea nacuayabelia. Nexata José barëpona Jesúsnëyo Galilea nacuayabelia. ²³ José ita barêpata Jesúsnëyo Galilea nacuayabelia, Nazaret tomarata barêpatajopa pebarêecaenexa Nazaret tomarata. Bajarapacuenia José Nazaret tomarata ita barêeca Jesúsnëyo, copiapata jane baja pacuenia baja cajena bajayata Diosojumepaebivimi profetavi tajêvelia jumaitsi. Diosojumepaebivimi profetavi bajayata baja cajena tajêvelia jumaitsi Jesús yabara mapacueniaje: “Ponê Dioso itorobijitsiatsica jivi pecapanepaenexa,

bajaraponë yabara jivi jumai tsane: ‘Mara ponëje Nazaret tomarapijinëje,’ jai tsane,” jai baja cajena bajayata tajëvelia profetavimi Jesús yabara.

3

Pacuenia Juan jivibautisabinë Dioso pitorobilivaisi jivi tsipaeba petusato nacuata yabara pelivaisi

(Mr 1.1-8; Lc 3.1-9, 15-17; Jn 1.19-28)

¹ Jesús itsa baja xaina bejamatabëcuene treinta pavalbeje, Juan jivibautisabinë najetaruca Judea nacuatatosajava. ² Juan jivibautisabinë Dioso pitorobilivaisi jivi tsipaebanajetaruca. Jumai tsanajetaruca mapacueniaje:

—Dioso rabaja pijajivi pevetsimatacabinexa, imoxoyo baja pevajëna pecopiapatsinexa. Nexata baja pacopabare pibisiacuene paneexanabiabijava. Panajamatabëcuene pënëyorore Diosojavabelia, jai tsanajetaruca Juan jivijavabelia.

³ Bajarapacuenia Juan Dioso pitorobilivaisi jivi itsa tsipaebanajetaruca, copiapata jane baja pacuenia Diosojumepaebinëmi profeta, Isaíaspijinë, bajayata tajëvelia yaquina Juan pelivaisi. Juan jivibautisabinë Dioso pitorobilivaisi jivi tsipaebanajetaruca yabara, yaquina. Profeta Isaíaspijinë peyaquinaelivaisita tajëvelia jumaitsi mapacueniaje: Tanejumulivaisipaebinë vavajai tsane petusato nacuata. Jumaitsi tsane jivijavabelia: “Jivi baxaneba panamutoverena najetarucaejitsa petuxanenë. Batoroviaexananua namuto. Bajara pijinia pacuenia paxamë ata panajamatabëcuene xaniavaere pepo petuxanenë pepatsivajënaeyarena,” jai tsane tanejumulivaisipaebinë,

jai profeta Isaíaspijinë bajayata peyaquinaelivaisita Dioso pitorobilivaisi Juan jivi tsipaebanajetarucaejavanexa yabara.

⁴ Juan naxatata camellonata pexanaejava. Naepacëta cuerobocoto. Pexaejava ëbosese, jabëra yajava. ⁵ Juan petsipaebilivaisi pejumetaenexatsi, muxunapatabiabatsi Jerusalen tomarapijivi, Judea nacuapijivi ata, Jordánmene imoxoyopijivi ata. ⁶ Nexata bajarapamonaepibisiacuene pexanaejavami, rovalia Diosojavabelia navecuapaebapona. Nexata bajarapamonaen Juan bautisabapona Jordán meneta.

⁷ Jivibitsaëttoxaneto pata Juanjavaberenapebautisabinexa picani Juan. Bajarapamonaepo jumecovënëtsi ata Dioso pitorobilivaisi, jamatabëcuene navëxaniabiaya jamatabëjumaitsi:

—Juan itsa nacabautisabiana, Dioso nacacapanepaena, jamatabëjai.

Nexata Juan itsa tane ayaibitsaëttoxaneto fariseovi, saduceovi ata, pepatsijavarena Juan picani pebautisabinexa, nexata Juan jumaitsi bajarapamonaejavabelia:

—¡Panajamatabëcuene navëxaniabivi! Pacuenia jomo rëcëpa itsa tane isoto petajunenajetarucaejava, bajara saya paitsimë. Dioso rabaja papecananeconitsia exanaematacabinexa, pacaimoxoyotapona. Itsiata acuenebi tsane panevecuapanepaenexa Dioso papecananeconitsia exanaematacabinexa. ⁸ Itsa pajitsipame Dioso papecacapanepaejava, pacopabare pibisiacuene paneexanabiabijava. Dioso pajumecovënëtavanapare. Nexata daxitajivi pacayapëtaena pepacune baja panecopabijava pibisiacuene paneexanabiabijavami. Pacayapëtaenanua panenajamatabëcuene pënëyorotsijava Diosojavabelia.

⁹ Jamatabëcuene navëxaniabiaya pëtsa panajumaitsimë: “Vaxaitsi cajena Abrahampijinë pemomoxitsi. Nexata Dioso nacacapanepaena,” panajamë pëtsa. Abrahampijinë picani papemomoxi atomë, itsiata pibisiacuene itsa paexanavanapame, nexata bajarapacuenepo pacatonamatamotsi tsipae Diosojavabelia papecacapanepaenexa. Dioso baja cajena caëjëpatsi jivi pexanaenexa mapaibotonëmi ataje, Abrahampijinë bepemomoxi Dioso petaenexa. Nexata bajarapamonaen ata Dioso itsa apo jumecovënëtsi, Dioso apo capanepae tsipae. Nexata pacopabare pibisiacuene paneexanabiabijava papecacapanepaenexa Dioso. ¹⁰ Peubinaenë pexainaenë itsa apo tonacuaisitsi pexaniacuai, nicata sipalita daxita ponaenë apo tonacuaisitsi pexaniacuai. Nexata baja penicatsicujinae itsa niona bajaraponaenë, caetuata. Xuaba isotojavabelia. Nexata bajaraponaenëmi tajuatsi. Bajara pijinia pacuenia paxamë ata Dioso pacaxuabiana inferniabijava papecacapanepaenexa, Dioso apo panejumecovënëtsivi. ¹¹ Xanë raja saya jivi bautisabaponajë merata. Tsipaji baja bajarapamonaen copaba pibisiacuene pexanabiabijava. Najamatabëcuene pënëyorotanua Diosojavabelia. Itsiata baitsi jane ponë tacovëverena najetarucaena, tabautisabivi Espiritu Santo tsijamatabëjoneyaexanaenatsi, pitarunutsicotia yajava. Xanë raja saya beveliyajamatabëcuene nënë bajaraponëvecua. Nexata bajaraponë vecuaauranë pijazapato ata tatoncaponaenexa bepijajivitonëcuenianë. ¹² Arrozxainanë baja itsa vereta arroz pesiricaejava, jëaba arroz pejëabijavata pepitsinexa ëpexu. Nexata pijaarroz pejëabijavata, saicaya tsatapona ëpexu pesivecuca. Nexata ëpexu xaniavaeteta peetsibojavabelia. Pesi pijinia

penetapona vayafuabelia petajuitsinexa. Bajara pijinia pacuenia paxamë ata Dioso pejumecovënëtsivivecua Dioso pacatsatsiana papecaxuabinexa infiernojavabelia panenaxuabinexa baja daxitamatacabijavabelianexa. Pamonaë pijinia Dioso pejumecovënëtsivi, Dioso capanepaenatsi pijanacuayabetsia. Pamonaë pijinia Dioso apo jumecovënëtsi, Dioso naneconitsiaexanaenatsi daxitamatacabijavabelianexa apo pevereverecaeisotojavabelia, jai Juan daxita bajarapamonaëjavabelia.

Pacuenia Juan bautisaba Jesús yabara pelivaisi

(Mr 1.9-11; Lc 3.21-22)

¹³ Jesús naropota Galilea nacujavaverena. Nexata pata Jordán menejavaberena. Jordán menejavata Juan ponapona. Nexata Jesús pata Juanjavaberena pebautisabinexatsi Juan.

¹⁴ Juan picani apo jitsipae pebautisabijava Jesús. Juan nexata jumaitsi Jesúsjavabelia:

—¿Detsa xuajitsia patame tacabautisabinexa? Xamë rajane biji xanë benebautisabame, jai Juan Jesúsjavabelia.

¹⁵ Itsiata Jesús jumaitsi Juanjavabelia:

—Aeconoxae itsiata pacuenia baja cavajëtatsi, netoexanaename. Xanepana vajaexanaenexa daxita Dioso vajanacaitorobicuena, jai Jesús Juanjavabelia.

Nexata baja Juan jejai pebautisabinexa Jesús. ¹⁶ Nexata jane baja Juan bautisaba Jesús. Jesús pebautisabicujinaetsi nonotajuna menevetsina. Bajarapaepatota Jesús tane athëbëtatsia itaboxo penapatsijava. Nexata Jesús tane Espiritu Santo perunaëjavatsica beucucuto. Tsimatarunaicatsi. ¹⁷ Nexata Juan jumetane athëbëvetsica Dioso pejumaitsijava: “Mara ponë taxë nato tasivanëje. Sivajamatabëcuenebarëyanë bitso,” pejaijava.

4

Pacuenia Jesús jamatabëcueneëjëbatsi dovathi yabara pelivaisi

(Mr 1.12-13; Lc 4.1-13)

¹ Jesús pebautisabicujinaetsi, Espiritu Santo ponaëyaexanatsi petusato nacuyabelia. Bajarabelia ponaëyaexanatsi pejamatabëcueneëjëbinexatsi dovathi.

² Nexata petusato nacuata Jesús ponapona cuarenta pamatacabibeje, cuarenta pameravibeje yajava. Bajara pijinia pamatacabibeje Jesús apo xae pexaejava. Nexata Jesús bitso piajani. ³ Nexata dovathi Jesús imoxoyotatsi pejamatabëcueneëjëbinexatsi Jesús picani pibisiacuene pexanaenexa. Dovathi jumaitsi Jesúsjavabelia:

—Itsa pepacune Dioso pexënatomë, itorobare mapaihtonëje penaexanaenexa pan, jai dovathi.

⁴ Jesús nexata jumaitsi dovathijavabelia:

—Jume raja. Dioso raja pejumelivaisibaxutota jumaitsi mapacueniaje: “Jivi raja apo namatavenonaë ëpexaejava pexanaenexa. Jivi raja namatavenona daxita Dioso pejumelivaisi ata pejumecovënëtsinexa pexanaenexa matababi apo pevereverecaëjava,” jai raja Dioso pejumelivaisibaxutota, jai Jesús dovathijavabelia.

⁵ Bajaraxucujinae icatsia Jesús barëliatsi dovathi Jerusalén tomarabelia. Barëjunayatsi templo matatuyabetsia. ⁶ Nexata templo matatutatsia dovathi icatsia jumaitsi Jesúsjavabelia:

—Itsa pepacune Dioso pexënatomë, jirevaremeca irabereca. Bajarapacuenia jirevaremeca irabereca tsipaji xamë nitsacueneyaniva pecaevetsinexa Dioso pejumelivaisibaxutota jumaitsi mapacueniaje:

Dioso itorobianica pijaängelevi pecaevetsinexa. Nexata ángelevi pecobeta cayotsiana pecatuxtsaquitsianiva ibotonëjavabelia, jai Dioso pejumelivaisibaxutota xamë pecaevetsinexa ángelevi, jai dovathi Jesúsjavabelia.

⁷ Jesús nexata icatsia jumaitsi dovathijavabelia:

—Jume raja. Dioso raja pijinia pejumelivaisibaxutota jumaitsi mapacueniaje: “It-sajivi ata jamatabëcuenenavëxaniabiaya pijacuata apo bejamatabëjumaitsi: ‘Xanë Dioso jamatabëcueneëjëtsianajë. Nexata exanaenajë pacuene bitso netsiyai tatëpaenexa. Itsiata Dioso neyavenonaena tavecupanepaenexa bajaraxua. Nexata bajarapacuenia yapëtaenajë Dioso tane yavenonaëjava,’ apo bejamatabëjai,” jai Dioso pejumelivaisibaxutota, jai Jesús dovathijavabelia.

⁸ Jesús icatsia barëliatsi dovathi pinijitsutoxanetojavabelia. Barëjunayatsi bajarapatsutojumabetsia. Nexata bajarapatsutojumavetsica dovathi Jesús tsitajëtatsi daxitanacuanë. Daxita bajarapanacuanëta daxitacuene pexanaëjava yajavatsitajëtatsi. ⁹ Nexata icatsia dovathi jumaitsi Jesúsjavabelia:

—Ayaijamatabëcuenenënë netaëya taitabarata nematabacabëta itsa netonucajunuame, nexata daxita mapanacuanëtaje, daxitacuene xua xaina, cayajavarajutsianatsi, jai dovathi Jesúsjavabelia.

¹⁰ Nexata Jesús jumaiṡi dovathijavabelia:

–Dovathi, nevēcuanatixire. Dioso raja pejumelivaisibaxutota jumaiṡi mapacueniaje: “Daxitajivi vajēcae pematabacabēta caenē pepo petuxanenē Diosojavabelia. Tonacuenebinua bajaraēponēnēxa,” jai raja Dioso pejumelivaisibaxutota, jai Jesús dovathijavabelia.

¹¹ Nexata baja dovathi Jesús vecuaponatsi. Bajaraxuacujinae ángelevi patsica Jesús peyavenonaenexatsi.

Pacuenia Jesús Galilea nacuata taxuxuaba Dioso pitorobilivaisi jivi petsipaebijava yabara pelivaisi

(Mr 1.14-15; Lc 4.14-15)

¹² Jesús vėnėlivaisitane Juan peetsijavatsi penaneconitsivi pejebabiabibota. Nexata Jesús pona Galilea nacuyabelia. ¹³ Itsiata Jesús apo ponapone Nazaret tomarata. Ponapona Capernaum tomarata. Capernaum tomara eca Zabolónvėnė nacuabeje Neftalivėnė nacuabejejavata. Capernaumtomara eca pucaxanetoitapata. ¹⁴ Bajarapacuenia Jesús itsa patajopa Capernaum tomarata Dioso pitorobilivaisi jivi petsipaebinexa, copiapata jane baja pacuenia bajayata Diosojumepaebinė profeta, Isaiaspijnė, tajėvelia yaquina Jesús pelivaisi. Dioso pitorobilivaisi Jesús Capernaum tomarata jivi petsipaebijavanexa yabara, Isaiaspijnė peyaquinaelivaisita tajėvelia jumaiṡi mapacueniaje:

¹⁵⁻¹⁶ Zabolón nacuapijivi, Neftali nacuapijivi ata, Jordánmene itsapanaverenapijivi ata, bitso apo yapētae Dioso pitorobilivaisi. Galilea nacuata pejinavanapaevi ata, itsaxuayo jinavanapa ayaibitsaētoxonetonė apo judíovi, bitso apo yapētae Dioso pitorobilivaisi. Daxita bajarapanacuanėpijivi pexaniajailivaisi, Dioso pitorobilivaisi, apo peyapētaexae, bepitaquirinacuanėjava jinavanapa. Nexata pacuenia pinijicotiخانeto itayotsipatsi pataenexa xaniavaetsia, bajara pijinia pacuenia bajarapamonae jamatabėcueneitayotsianatsi itsa tsipaebianatsi Diosojavabelia pecapanepaelivaisinexatsi,

jai tajėvelia Isaiaspijnė peyaquinaelivaisita Dioso pitorobilivaisi Jesús petsipaebijavanexa yabara bajarapanacuanėpijivijavabelia.

¹⁷ Nexata Capernaum tomarata Jesús taxuxuaba Dioso pitorobilivaisi jivi petsipaebijava. Dioso pitorobilivaisi Jesús itsa tsipaeba, jivijavabelia jumai tsaponae mapacueniaje:

–Dioso rabaja papecaevetsimatacabinexa, imoxoyo baja pevajėnae pecopiapatsinexa. Nexata baja pacopabare bibisiacuen paneexanabiabijava. Panajamatabėcuenepėnyorore Diosojavabelia, jai tsaponae Jesús jivijavabelia.

Pacuenia Jesús junata cuatro ponėbeje dujuai peyamatajucabiabivi yabara pelivaisi

(Mr 1.16-20; Lc 5.1-11)

¹⁸ Jesús najetaruca Galilea pucaxaneto itapaya. Nexata Galilea pucaitapata Jesús taenuta anijanėbeje nacaebananėbeje, Simónbeje Andrésbeje. Simón itsavėnė Pedro. Bajaraponėbeje daxitamatacabi canacujitsia dujuai yamatajucabiababeje. Dujuai peyamatajucabiabijavatabeje, yamatajucaponaponabeje. ¹⁹ Nexata Jesús jumaiṡi Simónbeje Andrésbejejavabelia:

–Naxanitsia. Panepėnaponarebeje. Nexata pacacujarubianatsibeje jivi panejucaenexabeje. Pacuenia dujuai peyamatajucabiabamebeje, bajarapacuenia jivi pajucaename Dioso pijajivinexa, jai Jesús.

²⁰ Nexata Simónbeje Andrésbeje dujuai peyamatajucabiabijavamibeje, bajarajota puenetabuatabeje. Nexata baja naponabeje Jesús pepėta.

²¹ Bajaraxuacujinae icatsia bebeliayo pevajėnaeyabelia Jesús barėpona. Icatsia taenuta anijanėbeje nacaebananėbeje, Zebedeo pexėnatobeje. Bajaraponėbeje Santiagobeje Juanbeje. Pijajeraėnėta paxa yajava xanebaponaponabeje dujuai peyamatajucaejavanexabeje. Nexata icatsia Jesús junata Santiagobeje Juanbeje. ²² Nexata bajarajota paxa puentanutabeje jera yajava. Santiagobeje Juanbeje naponabeje baja Jesús pepėta.

Pacuenia Jesús livaisi tsipaeba jivi ayaibitsaētoxonetojavabelia yabara pelivaisi

(Lc 6.17-19)

²³ Jesús jane baja najetaruca daxita Galilea nacujava. Dioso pitorobilivaisi tsipaeba pona judíovi penacaetuatabiabibonėjava. Jesús tsipaeba pona jivijavabelia pexanialivaisi. Tsipaeba pona Dioso pijajivi pevetsijavanexa. Jamatejemayaexanaponanua daxitaviriavitane pexainaevimi. ²⁴ Nexata daxita Siria nacujava pejinavanapaevi ata vėnėlivaisitanetsi Jesús. Jesús tocatpatatsi daxitaviriavitane pexainaevi. Tocapatatsinua dovathi peyajavajinavanapaevi. Tocapatatsinua pedevacaibivitsi. Tocapatatsinua petabusipacuenabivitsi. Jesús nexata jamatejemayaexanapona daxita bajarapamonae. ²⁵ Nexata Jesús pėnaponatsi jivi ayaibitsaētoxoneto Galilea nacuapijivi, Decápolis nacuapijivi ata, Jerusalėn tomarapijivi ata, Judea nacuapijivi ata, Jordánmene itsapanaverenapijivi ata.

5

Pacuenia Jesús jivi livaisi tsipaeba petsutoyenepanajavata yabara pelivaisi
(Lc 6.20-23)

¹ Jesús ita tane jivibitsaëtoxaneto, nexata junaya petsutotsia. Bajarapatsutoyenepanata epatota ecaya. Nexata bajarajota Jesús pijajivi matatoyorotsia nacaetuatsi. ² Nexata Jesús taxuxuaba livaisi petsipaebijava. ³ Jesús jumaitsi pijajivijavabelia mapacueniaje:

—Jamatabëcuenebarëya tsavanapae tsane pamonaë picani mapanacuata yajamatabëcuenebëjai tsavanapae pibisiacuene pexanabiabijava. Bajarapamonae jonena Dioso pijanacuayabetsia.

⁴ Jamatabëcuenebarëya tsavanapae tsane pamonaë picani mapanacuata bejamatabëjiobi tsavanapae itsamonae pibisiacuene petoexanaëxaetsi. Bajarapamonae Dioso jamatabëcuene yavenonaenatsi.

⁵ Jamatabëcuenebarëya tsavanapae tsane pamonaë apo jamatabëbëjai tsabiabi mapanacuata, itsacueniababiabi atatsi itsamonae. Apo cuenecanaviatabibinua. Bajarapamonae jinavanapaena Dioso pijanacuata tsia pacuenia Dioso najumecapanepaëya jumaitsi bajarapamonae yabara.

⁶ Jamatabëcuenebarëya tsavanapae tsane pamonaë mapanacuata bitso daxitacuene matatoxenetsia jitsipabiaba pexanaenexa Dioso pitorobicueniatsi. Dioso baja cajena yavenonabiabianatsi pexanaenexa bajarapacueni.

⁷ Jamatabëcuenebarëya tsavanapae tsane pamonaë mapanacuata itsamonae ata itaxutotsoniataeyabiaba. Dioso nexata juya itaxutotsoniataeyabiabianatsi bajarapamonae.

⁸ Jamatabëcuenebarëya tsavanapae tsane pamonaë mapanacuata ëpexaniacuene pexanaenexa najamatabëxainabiaba. Bajarapamonae taena Dioso.

⁹ Jamatabëcuenebarëya tsavanapae tsane pamonaë mapanacuata penaitoyavimi ata, nabarajamatabëcuene xanepanaëyaexanapona. Bajarapamonae yabara: “Taxi,” jai tsane Dioso.

¹⁰ Jamatabëcuenebarëya tsavanapae tsane pamonaë mapanacuata bejiobiaexanabiabatsi Dioso pitorobicueniatsi pexanabiabijava yabara. Bajarapamonae jonena Dioso pijanacuayabetsia.

¹¹ Patajajivixamë, itsamonae pibisiacuenia ita pacabaracuaicuaijai, itsiata pajamatabëcuenebarëyamë tsavanapae tsane. Bajarapamonae pacabejiobiaexanaë ata tsane, najumetsënëtsiaya pacabaracuaicuaijai atanua tsane, itsiata pajamatabëcuenebarëyamë tsavanapae tsane. ¹² Bajara tsipaji pacuenia panevajënaëyapijivimi ata, Diosojumepaëbivimi profetavi, bajayata bejiobiaexanatsi. Nexata pasivajamatabëcuenebarëyamë tsavanapae tsane paxamë ata bajarapacuenia ita pacaexanaëna. Tsipaji raja athëbëtatsia itsamatacabi Dioso pacarajutsiana bitso pexaniacuene, jai Jesús pijajivijavabelia.

Pacuenia Dioso pejumecovënëtsivi mapanacuata pejamatabëcuene beyajo, bepecotianua, yabara pelivaisi

(Mr 9.50; Lc 14.34-35)

¹³ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Yajobenoxanepana vajaëxabinexa pevi piabejeyaniva. Paxamë rabaja pijinia bepajajomë tsavanapae mapanacuapijivijavabeliaje, mapanacuapijivi bitso piabejeyaniva pibisiacuene pexanaëneconi yabara. Paxamë xaniavaetsia panetsipaëbavanapaëxae Dioso pejumelivaisi, bajarapamonae bitso pibisiacuene apo exanaë. Itsiata yajo pexaicaëjavami ita ajibi tsipae, ¿detsa nexata pacuenia icatsia naxaicaëyaexanaëjitsipa? Acuenebi. Itsacueniejavayonexa ata baja apo xanepanaë tsipae. Saya pexuabinexa, jivi petaxunanonobinexa, xanepanaëjitsipa. Bajara pijinia paxamë ata paitsimë tsipae ita pacopatsipame Dioso pejumecovënëtsijava. Pajamatabëcuene saëjibimë tsipae. Nexata itsacueniejavayonexa ata, apo paxanepanaë tsipae.

¹⁴ Pacuenia piaitayotsicotia itayota piaitaquirijavata, bajara pijinia pacuenia paxamë ata Dioso panejumecovënëtsivi pajamatabëcuene itayotsianame pajamatabëcuene itaquirivimi. Bajarapacuenia pajamatabëcuene itayotsianame ita patsitajinavanapaënaë xaniavaetsia daxitajivi pitabarata. Petsutojumata peëcaetomara acuenebi penacaranatecaëjava tsipae.

¹⁵ Itsajivi ata lámparabë pitanojotsicujinaë, apo etsi cajoniënëalia. Biji rajane athëbëyo etsia daxitaboënë pitayotecaënexa. ¹⁶ Bajara pijinia pacuenia paxamë ata paitsimëre. Xaniavaetsia patsitajinavanapare daxitajivi pitabarata. Nexata bajarapamonae pacacuene taëna pexaniacuene paneexanavanapaejava. Nexata bajarapamonae ita pacacuene taëna pexaniacuene paneexanavanapaejava, jumai tsane paxamë yabara paneaxa Diosojavabelia: “Diosomë, bitso ayaijamatabëcuene nëmë. Yavenonabiabame nijajivi,” jai tsane bajarapamonae paneaxa, athëbëtatsia peëcaënjavabelia, jai Jesús pijajivijavabelia.

Pacuenia Jesús tsipaeba pijajivi bajayata Dioso Moiséspijinêta penajumecopatsilivaisi yabara pelivaisi

¹⁷ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Pëtsa panesivajamatabêjumaitsimê: “Maponê patajopaje piajibiaeaexanaenexa Dioso Moiséspijinêta penajumecopatsilivaisi. Palivaisi ata Diosojumepaebivimi profetavi bajayata tsipaebapona piajibiaexanaenexa,” panesivajamatabêjamê pëtsa. Apo patajopaeñê tajibiaeaexanaenexa bajarapalivaisibeje. Biji rajane patajopajê taexanaenexa jane baja daxita pacuenia tajêvelia nevajunupaeba bajarapalivaisitabeje. ¹⁸ Xaniajanê pacuenia pacatsipaebijitsiatsi. Dioso Moiséspijinêta penajumecopatsilivaisi epatua itsalivaisicuenia, caeitaneoyo ata, Dioso apo itothianae tsane. Pacuenia baja Dioso najumecapanepaeya jumaitsi, bajarapacuenia tsitecaena. Nexata copiapatsiana daxita xua Dioso tajêvelia najumecapanepaeya jumaitsi bajarapalivaisitabeje. ¹⁹ Nexata pajivi jumecovênêtsi ata Dioso Moiséspijinêta penajumecopatsilivaisi, itsiata itsa apo jumecovênêtsi caelivaisiyo bajarapajuvênêlivaisiyo, naneconitsiana Diosojavabelia. Bajarapajivi itsa itavetsiananua itsamonae ata pejumecovênêtsiyaniva bajarapalivaisiyo, nexata bajarapaneconi yabara bajarapajivi beveliajamatabêcuenejivi taenatsi daxitajivivecua Dioso pijanacuatatsia. Pajivi jumecovênêta daxita bajarapalivaisi, itsa tsipaebanua itsamonae ata pejumecovênêtsinexa bajarapalivaisi, nexata bajarapajivi ayaijamatabêcuenejivi taenatsi Dioso pijanacuatatsia. ²⁰ Xaniajanê pacuenia pacatsipaebijitsiatsi. Paxamê xaniavaetsia Dioso pajumecovênêre. Xaniavaetsia Dioso pajumecovênêre judíovi pecujarubivi Dioso pejumecovênêtsijava mata-toxenetsia. Xaniavaetsia Dioso pajumecovênêre fariseovi ata Dioso pejumecovênêtsijava matatoxenetsia. Paxamê xaniavaetsia Dioso itsa apo pajumecovênêtsimê tsane, nexata pacuenia bajarapamonae apo jone tsane Dioso pijanacuayabetsia, bajara paxamê ata paitsimê tsane. Apo panajonemê tsane Dioso pijanacuayabetsia, jai Jesús pijajivijavabelia.

Pacuenia Jesús muxujioba pijajivi pecopatsinexa penabaraanaepanabiabijava yabara pelivaisi

(Lc 12.57-59)

²¹ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Paxamê rabaja payapêtaneme pacuenia bajayata Moiséspijinê jumaitsi panijasalinaivimijavabelia. Moiséspijinê bajayata panijasalinaivimijavabelia jumaitsi mapacueni-aje: “Pëtsa pabeyaxuabame jivitonê. Pajivi beyaxuaba jivitonê, bajarapajivi pananeconitsiaexanaename,” jai Moiséspijinê panijasalinaivimijavabelia. ²² Itsiata baitsi jane xanê pacatsipaebatsi mapacueniaje. Pajivi baraanaepana itsajivijavabelia, bajarapajivi naneconita Diosojavabelia. Nutsianatsi Dioso pitabarata penaneconitsiaeaexanaenexatsi. Pajivi itsajivi bijatane pibisiacuenia, bajarapajivi naneconita Diosojavabelia. Bajarapaneconi yabara nutsianatsi itsajota nacaetuatabiaba tomara pevetsivi. Nexata naneconitsiaeaexanaenatsi. Pajivi itsajivi pitoyaxae, anaeya jumaitsi: “Xamê saya bitso pecamatajemabinê,” jai, bitso tsiaiyatsi. Bajarapaneconi yabara bajarapajivi Dioso naneconitsiaeaexanaenatsi inferno isotojavabelia.

²³ Itsa paponame altarvênêjavajavabelia panerajutsinexa ofrenda Diosojavabelia, nexata bajarapaepatota itsa panajamatabênapitame itsajivijavabelia itsacueni paneexanaejava, nexata mapacuenia paexanaenameje. ²⁴ Altarvênêjava pitabarata abaxê papuenerere ofrenda panerajutsijavanexa Diosojavabelia. Paponare caecuenia pajivijavabelia pananeconitame panenabarajamatabêcuene xanepanaenexabeje icatsia. Bajaraxacujinae icatsia panaviatsiaremena altarvênêjavajavaberena panerajutsinexa jane baja ofrenda Diosojavabelia.

²⁵ Itsa pananeconitame itsajivijavabelia, nexata itsa pacacapona bajarapajivi jueznêjavabelia papecaneconitsinexa, namutua xaniavaetsia panabarêcuaicuajamêrebeje panenasivajamatabê xanepanaenexabeje xua yabara picani pacaneconitsijitsia. Bajarapacuenia xaniavaetsia panabarêcuaicuajamêrebeje papecanutsiyaniva jueznê pitabarata. Tsipaji raja jueznê itorobijitsipa policiavi panijaneconi yabara papecacaponanexa pananeconitsivi pejebabiabiboyabelia. Nexata policiavi pacananeconitsiaexanetsipa pananeconitsivi pejebabiabibota. ²⁶ Xaniajanê pacuenia pacatsipaebijitsiatsi. Nexata pananeconitsivi pejebabiabibota itsa pacananeconitsiaexanetsipa, bajaraverena bepijia apo papitsapaemê tsipae. Matapania pamatamotsipame daxita xua yabara pacananeconitsiaexaneta, papitsapaejitsipame, jai Jesús pijajivijavabelia.

Pacuenia Jesús pijajivi muxujioba penacojiobinê itsava pejaitsiyaniva pijavavecua yabara pelivaisi

²⁷ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Paxamē rabaja payapētaneme pacuenia bajayata Dioso Moiséspijinēta penajumecopatsilivaisi jumaitisi. Dioso Moiséspijinēta penajumecopatsilivaisi jumaitisi mapacueniaje: “Pētsa jaitame itsava nijavavecua,” jai. ²⁸ Itsiata baitsi jane xanē mapacuenia pacatsipaebatsije. Ponē petiriva itsa taenuta, nexata itsa jamatabējumaitisi: “Jema xania tavitota pibisiacuene apo caexanaetsi mapovajavabeliaje,” itsa jamatabējai, bajaraponē naneconita Diosojavabelia. Nexata najēpaeya naneconitabeje Diosojavabelia ponēbeje pepacuene itsavajavabelia pibisiacuene pevitota exana pijavavecua.

²⁹ Panecujuaitaxutota panetaejava yabara pibisiacuene itsa paexaname, panaitaxuto-cajure. Tajē baja paxuare. Xanepana panenavecuaxuabinexa bajarapaitaxuto, padaxitaperabētojivimē Dioso papecaxuabiyanima infiernojavabelia. ³⁰ Panecujuacobeta pibisiacuene itsa paexaname, panacobecaure. Tajē baja paxuare. Xanepana panenavecuaxuabinexa, bajarapacobe padaxitaperabētojivimē Dioso papecaxuabiyanima infiernojavabelia, jai Jesús pijajivijavabelia.

Pacuenia Jesús pijajivi muxujioba penacojobinē pijava pexuabiyanima yabara pelivaisi (Mt 19.9; Mr 10.11-12; Lc 16.18)

³¹ Icatsia Jesús jumaitisi petsutoyenenapanajavata pijajivi ayaibitsaētoxanetojavabelia:

—Bajayata Dioso Moiséspijinēta penajumecopatsilivaisi jumaitisi mapacueniaje: “Ponē jamatabēxuaba pijava, copiaya toyaquinae cuyalatobaxuto pijavajavabelia. Toyaquinae pijava pitavetsilivaisi. Nexata xuacujinae xuabi pijava,” jai bajayata Dioso Moiséspijinēta penajumecopatsilivaisi. ³² Itsiata baitsi jane xanē mapacuenia pacatsipaebatsije. Ponē pijava xuaba, itsanējavabelia bajarapova pevitota pibisiacuene apo vecuaxanae atatsi, bajaraponē naneconita Diosojavabelia pijava pexuabixae. Petiriva pamona pexuabixae, nacojobijitsipa itsanējavabelia. Nexata jane baja bajaraponē pijava pibisiacuene vecuaxanaejitsipatsi itsanējavabelia. Tsipaji abaxē bajaraponē pijavacuenia Dioso totanetsi. Nexata pijinia ponē pita bajaraponē pexuabicovēvami, bajaraponē ata pibisiacuene exana pevitota. Tsipaji abaxē bajaraponē pijavacuenia Dioso totanetsi, jai Jesús pijajivijavabelia.

Pacuenia Jesús pijajivi muxujioba, Jesús pijajivi itsa navajunupaeba xua exanaejitsia, itsajumeyo ata yajava pejumaitisyaniva jivi pejumexaniataenexatsi yabara pelivaisi

³³ Icatsia Jesús jumaitisi petsutoyenenapanajavata pijajivi ayaibitsaētoxanetojavabelia:

—Paxamē rabaja payapētaneme pacuenia bajayata Moiséspijinē jumaitisi panijasalinaivimijavabelia. Panijasalinaivimi penajumetsētētsisyaniva, bajayata Moiséspijinē panijasalinaivimijavabelia jumaitisi mapacueniaje: “Itsa baja pepacuene najumecapanepaeya panavajunupaebame xua paexanaejitsiamē, itsamona papecajumexaniataenexa itsa pajumaitsimē: ‘Xaniajanē raja. Cajumaitisitsi mapacueniaje Dioso pitabarata,’ itsa pajamē, pētsa epatua panajamatabēcopatame bajaraxua paexanaejevamē,” jai bajayata Moiséspijinē panijasalinaivimijavabelia. ³⁴ Itsiata baitsi jane xanē mapacuenia pacaitorobatsije. Najumecapanepaeya itsa panavajunupaebame xua paexanaejitsiamē, roviaia panavajunupaebare. Pētsa pematatsēna itsajumeyo ata yajava pajumaitsimē jivi papecajumexaniataenexa. Papecajumexaniataenexa itsajivi pētsa pajumaitsimē mapacueniaje: “Xaniajanē raja. Cajumaitisitsi mapacueniaje Dioso pitabarata,” pajamē pētsa. Pētsa pajumaitsimēnua: “Xaniajanē raja. Cajumaitisitsi mapacueniaje athēbēnacua pevēnēta,” pajamē pētsa. Tsipaji bajarajotatsia Dioso eca pijatronovēnējavata, itsajota ecabiaba pitorobinexa pijajivi. ³⁵ Pētsa pajumaitsimēnua: “Xaniajanē raja. Cajumaitisitsi mapacueniaje mapairajē pevēnēta,” pajamē pētsa. Tsipaji raja Dioso pijaira. Pētsa bajarapacuenia pajumaitsimē Jerusaléntomara ata pevēnēta. Tsipaji Jerusaléntomara Dioso pepo nacuaeveštinē pijatomara. ³⁶ Pētsa pajumaitsimēnua: “Xaniajanē cajena. Itsa apo xaniajanē tsane, nexata nacaevetsianajē tanematathinaxuabinexamē tatēpaenexa,” pajamē pētsa. Tsipaji panematabocoto ata Dioso eveta. Nexata paxamē apo pacacaejēpae caematanatoyo ata panenamatananojiaiaexanaenexa, panenamatanatsaejiaiaexanaenexa ata. ³⁷ Itsa pepacuene paexanaejitsiamē, “Jājā, exanaenajē,” pajamē roviaia. Itsa apo pajamatabēxanaemē, “Jume, apo exanaenē tsane,” pajamē roviaia. Pematatsēna pētsa pajumaitsimē itsajumeyo ata jivi papecajumexaniataenexa. Tsipaji bajarapajume dovathi pejamatabēcueneta pajumaitsimē tsipae, jai Jesús pijajivijavabelia.

Pacuenia Jesús pijajivi muxujioba pecueneccanaviatsisyaniva itsajivi itsacueniabi atatsi yabara pelivaisi

(Lc 6.29-30)

³⁸ Icatsia Jesús jumaitisi petsutoyenenapanajavata pijajivi ayaibitsaētoxanetojavabelia:

—Paxamē rabaja payapētaneme pacuenia bajayata Dioso Moiséspijinēta penajumecopatsilivaisi jumaitisi. Bajayata Dioso Moiséspijinēta penajumecopatsilivaisi jumaitisi mapacueniaje: “Pajivi itsanē itaxutobijanatsi, juya bajarapajivi namatamoitaxutobijianae.

Pajivi ata itsanë vonotanabiabatsi, juya bajarapajivi namatamovonotanabiabi,” jai bajayata Dioso Moiséspijinëta penajumecopatsilivaisi. ³⁹ Itsiata baitsi jane xanë mapacuenia pacaitorobatsije. Itsanë itsa jamatabëpacabia, pëtsa panayajivibiame. Itsanë itsa pacaitabarapacabixuaba anaeya, nexata icatsia itsanenia ata papecaitarapacataxubinexa, panaitabaracaevere. ⁴⁰ Itsajivi itsa pacaneconitsijitsia jueznëjavabelia paneamoneyabijamatabëcuene papecavecupitsinexa panijacamisa, nexata patocopare panijacamisajumavelia panenaxatatsijava ata papecavecupitsinexa. ⁴¹ Vajabitsaë itsa pacaponaeyaexana pijajava anijakilómetrobejecuenia, nexata patocaponare pematatsënëa ata. Cuatro pakilómetrobejecuenia ata patocaponare. ⁴² Bitso bepejibijivi itsa pacavajëta itsacuenjavayo, parajure. Itsa pacacovaeta, patsicopare. “Jume,” pajamë pëtsa, jai Jesús pijajivijavabelia.

Pacuenia Jesús pijajivi muxujioba piasivanexa pitoyavi atatsi yabara pelivaisi
(Lc 6.27-28, 32-36)

⁴³ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:
—Paxamë rabaja payapëtaneme pacuenia bajayata Dioso Moiséspijinëta penajumecopatsilivaisi jumaitsi mapacueniaje: “Pasivamëre papecayapëtaenë bitso. Paitoyamëre papecaitojavi,” jai bajayata Dioso Moiséspijinëta penajumecopatsilivaisi. ⁴⁴ Itsiata baitsi jane xanë mapacuenia pacaitorobatsije. Pasivamëre papecaitojavi ata. Pamonaë ata pibisiacuenia pacabaracuacuajai, bajarapamonae paxamë xaniavaetsia pabaracuacuajamëre. Pamonaë ata pacaitoya, bajarapamonae pexaniacuene patoexanare. Pamonaë ata pibisiacuenia pacabijatanë, pibisiacuene pacaexanaë ata, patovajëre Diosojavabelia peyavenonaenexatsi. ⁴⁵ Bajarapacuenia nexata paneaxa, athëbëtatsia peecaenë, papeximëcuena patsitajinapanapeneme. Bajaraponë, paneaxa, yavenonabiaba daxitajivi. Nexata pexaniajamatabëcuenevi, pibisijamatabëcuenevi ata, najëpaeya pijapabianë petonaxaniabinexatsi icotia copata. Bajarapacuenia pijinia ema ata copata. ⁴⁶ Itsa pasivamë tsipae ëpapecaasivavi, nexata pexaniacuene apo paxainaemë tsipae Diosojavabelia. Pataneme rabaja. Gobierno pejamatabëcueneta impuestomatamo peyanijobabiabivi bitso pibisiacuene exana. Itsiata bajarapamonae ata asiva piasivavitsi. ⁴⁷ Xaniavaetsia itsa pacopiapitsipame ëpaneyapëtaevi, nexata pexaniacuene apo paexanaemë tsipae pamonaë Dioso apo pejumecovënëtsivivecua. Tsipaji Dioso apo pejumecovënëtsivi ata xaniavaetsia copiapiabiaba peyapëtaevitsi. ⁴⁸ Pacuenia jamatabëcueneitsi pejamatabëcuenexanepanaenë, paneaxa, athëbëtatsia peecaenë, bajara paxamë ata pajamatabëcueneitsimëre, jai Jesús pijajivijavabelia.

6

Pacuenia Jesús pijajivi muxujioba pexaniacuene pexanaenexa yabara pelivaisi

¹ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:
—¡Xania baja tsane! Pëtsa pexaniacuene paexaneme saya jivi papecauenetaenexa, “Maponë bitso pexaniajamatabëcuenerëje,” papecasivajamatabëjainexa saya paneexanaejava yabara. Bajarapacuenia itsa paexanaejitsipame, nexata paneaxa, athëbëtatsia peecaenëjavabelia, apo paxainaemë tsipae itsacuenjavayo ata, pexaniacuenejavayo, papecarajutsinexa athëbëtatsia. ² Bajaraxuata itsa payavenoname bepejibivi, pëtsa panavajunupaebame daxitajivijavabelia paneyavenonaejava bepejibivi. Itsamonae xua exana, navajunupaebabiaba daxitajivi pitabarata judiovi penacaetuatabiabiabonëjava, callejava ata. Bajarapamonae navajunupaebabiaba bepejibivi peyavenonaejava, bepexaniajamatabëcuenevi saya petanexatsi jivi. Xaniajanë pacuenia pacatsipaebijitsiatsi. Pamonaë bajarapacuenia navajunupaebabiaba, bajarapacuenia penavajunupaebabiabixae, Diosojavabelia apo xainae tsane athëbëtatsia perajutsijavanexatsi. ³ Itsa payavenoname bepejibivi, pëtsa panavajunupaebame itsajivijavabelia ata, bitso papecayapëtaevijavabelia ata. ⁴ Muetsia payavenonare bepejibivi. Nexata paneaxa, pavenonaemë muetsia paneexanaejava ata, pacarajutsiana bepejibivi muetsia paneyavenonaematamo, jai Jesús pijajivijavabelia.

Pacuenia Jesús pijajivi tsipaeba pacuenia Diosojavabelia vajëcaejitsia yabara pelivaisi
(Lc 11.2-4)

⁵ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:
—Itsa pavajëcame Diosojavabelia, pëtsa pavajëcame pacuenia itsamonae vajëcabiaba. Bajarapamonae saya jema vajëcabiaba Diosojavabelia jivi petanexatsi Dioso bepejumecovënëtsivi. Bajarapamonae jitsipabiaba nucaeya pevajëtsinexa Diosojavabelia daxitajivi

pitabarata judíovi penacaetuatabibonèjjava, calle penaepacaxitarabijava ata. Bajara-pacuenia vajècabiaba Diosojavabelia Dioso bepejumecovènètsivi petaenexatsi jivi. Xaniajanè pacuenia pacatsipaebijitsiatsi. Pamonaè bajarapacuenia exanabiaba, bajarapacuenia pexanaexae, Diosojavabelia apo xainae tsane athèbètatsia perajutsijavanexatsi. ⁶ Nexata paxamè Diosojavabelia itsa pavajècame, pacaenèmè canacujitsia, pajonemeya panijaboyalia. Pabaupaxatare. Bajaraxuacujinae pavajècare paneaxajavabelia. Nexata paneaxa pacayajava tsane bajarajota. Nexata paneaxa, papecataenè muetsia paneexanaejava ata, pacarajutsiana bajaraxua paneexanaematamo.

⁷ Itsa pavajècame Diosojavabelia, pètsa napèna pavajècame saya piapianexa panevajècaejava pacuenia Dioso apo peyapètaevi vajècabiaba. Dioso apo peyapètaevi jamatabècuenenavèxaniabiaya jamatabèjumai tsabiabi: “Itsa bitso apia vajavajècaejava Diosojavabelia, nexata matapania Dioso nacajumetaena vajavajècaejava,” jamatabèjai tsabiabi Dioso apo peyapètaevi. ⁸ Pètsa bajarapacuenia paxamè pajamatabècuenèitsimè. Panevajècaevajènaeya ata raja paneaxa, Dioso, yapètane xua panamatavenoname. ⁹ Bajaraxuata itsa pavajècame Diosojavabelia, pavajère mapacueniaje:

Taxamè, athèbètatsia neecaenè, jitsipajè pecayiyataejava daxitajivi. ¹⁰ Jitsipajè naxantsiayo pecopiapatsijava daxita nijajivi nevetsijava mapanacuataje. Jitsipajè daxitajivi mapanacuata nejtitsipaecuenia pecatoexanabiabinexa, pacuenia baja athèbètatsia nijajivi nejtitsipaecuenia catoexanabiaba, bajarapacuenia pecatoexanavanapaenexa mapanacuapijivi ataje. ¹¹ Ajena, pamatacabinexa, panerajure pataxaejavanaxa pacuenia panamatavenonajè. ¹² Panevecuajibiaexanare pibisiacuenie pataexanaenecunimi. Pacuenia paxanè pajamatabècuenecaevajè, pabara-jamatabècuenexanepanana, itsamonaè paxanèjavaberena pibisiacuenie patanexanaejava, bajara pijinia pacuenia xamè ata nitabarata pibisiacuenie pataexanaejava jamatabècuenecaevare. Panebarajamatabècuenie xanepanarena. ¹³ Panevecuatsare dovathi patanejamatabècueniejèbiiyaniva. Panecapanepare jane pibisiacuenie. Pamatacabi xamè taxuxuabianame daxita nijajivi nevetsijava mapanacuataje, nejamatabècuenesaèta evetsianame. Nexata nijajivi jumai tsane xamè yabara: “Dioso cajena bitso ayajamatabècuenenè,” jai tsane. Bajarapacuenia nijajivi evetsianame daxitamatacabijavabelianexa, pajamè tsane mapacueniaje itsa pavajècame Diosojavabelia,

jai Jesús pijajivijavabelia.

¹⁴ Jesús icatsia jumaiitsi pijajivijavabelia:

—Nexata paxamè itsamonaè pibisiacuenie pacaexanae ata, pajamatabècuenecaevare. Pabarajamatabècuenexanepanarena. Nexata paxamè itsamonaè pibisiacuenie papecaexanaejava, itsa pajamatabècuenecaevianame, itsa pabarajamatabècuenexanepanaenamenua, nexata paneaxa, athèbètatsia peecaenè, pitabarata pibisiacuenie paneexanaejava jamatabècuenecaeviana. Pacabarajamatabècuenexanepanana. ¹⁵ Paxamè itsa apo pajamatabècuenecaevimè tsane itsamonaè pibisiacuenie papecaexanaejava, itsa apo pabarajamatabècuenexanepanaemènu tsane, nexata paneaxa ata apo jamatabècuenecaevi tsane. Apo pacabarajamatabècuenexanepanana tsane, pitabarata pibisiacuenie paneexanaejava, jai Jesús pijajivijavabelia.

Pacuenia Jesús pijajivi tsipaeba pacuenia Jesús pijajivi exanaejitsia pamatacabibeje Diosojavabelia vajètaona pexaejava xaenejeva yabara pelivaisi

¹⁶ Icatsia Jesús jumaiitsi petsutoyenepanajavata pijajivi ayaihitsaètoxanetojavabelia:

—Itsa apo paxaemè panexaejava pamatacabibeje pavajècame Diosojavabelia, pètsa pajinavanapame panaitabaraquiatsinejevamè, panamatatiatsinejevamènu. Itsamonaè Diosojavabelia itsa vajècabiaba pexaejava xaenejeva, pamatacabibeje vajècabiaba Diosojavabelia, apo naitabaraquiatabiabi, apo namatatiatabiabinu. Bajarapacuenia jinavana-pabiaba pamatacabibeje vajècabiaba Diosojavabelia tsipaji saya bajarapamonaè jitsipa petaevitsi pesivajamatabèjumaiitsinexatsi: “Mapamonaèje Dioso bitso pejumecovènètsivi. Diosojavabelia bitso pevajècaevi pexaejava xaenejeva. Nayapètane Diosojavabelia bitso pevajècaejava. Tsipaji naitabaraquiatsinejeva, namatatiatsinejevanua, jinavanapa,” pesivajamatabèjainexatsi petaevitsi. Xaniajanè pacuenia pacatsipaebijitsiatsi. Bajarapamonaè pexaejava xaenejeva vajècabiabi ata Diosojavabelia, itsiata bajaraxua apo tonamatamotsitsi Diosojavabelia. Tsipaji saya jivi petaenexatsi Dioso bepejumecovènètsivi, bajarapacuenia vajècabiaba. ¹⁷ Paxamè itsa apo paxaemè panexaejava pamatacabibeje pavajècame Diosojavabelia, itsiata panaitabaraquiare. Panamatatiarena xaniavaetsia. ¹⁸ Bajarapacuenia paexanaename jivi peyapètaeyaniva Diosojavabelia panevajècaponeajava panexaejava paxaenejevamè. Caenè paneaxa, papecaevajavanè, yapètaena. Nexata bajaraponè itsamatacabi pacarajutsiana panijamatamo, jai Jesús pijajivijavabelia.

Pacuenia Jesús pijajivi tsipaeba xaniavaetsia Dioso petonacuenebavanapaenexa it-samatacabi ayajava pexainanexa athëbëtatsia yabara pelivaisi

(Lc 12.33-34)

¹⁹Icatsia Jesús jumaitsi petsutoyenepanajavata pijajivi ayabitsaëttoxanetojavabela:

–Pëtsa pacaetuatoname ayajava panexainaejavanexa mapanacuataje. Tsipaji pacatobijianaejitsipa piucubaxaevi. Pacatotasibijitsipatsinua. Pacatonacobetoxotsipanua penacobetoxotsivi. ²⁰Dioso jane xaniavaetsia patonacuenebavanapare. Nexata Diosojavabela ayajava pexaniacuene paxainaname athëbëtatsia. Nexata bajarajotatsia apo pacatobijianae tsane piucubaxaevi. Apo pacatotasibitsinua tsane. Penacobetoxotsivi ata apo pacatonacobetoxotsi tsane. ²¹Panacuatatsia pacatoxaniavaeta panexainaejavanexa, bajarapanacua panejamatabëëthëtovetsina pajamatabënjavanapaname, jai Jesús pijajivijavabela.

Pacuenia vajaitaxuto belámparabë yabara pelivaisi

(Lc 11.34-36)

²²⁻²³Icatsia Jesús jumaitsi petsutoyenepanajavata pijajivi ayabitsaëttoxanetojavabela:

–Lámparabë bo ënëtuatujëta itayoteca xaniavaetsia vajataenexa. Bajara pijinia itsi paneitaxuto ata. Paneitaxutoxanepanaexae xaniavaetsia panatsivajënaetaneme. Itsa paitaxutobejemë tsipae, nexata xaniavaetsia apo panatsivajënaetaemë tsipae. Pacatsitaaitaquiri saya tsipae. Bajara pijinia itsi panejamatabëcuene ata. Dioso itsa pacajamatabëcuenëitayota, pajitsipaname paneexanabiabinexa pacuenia Dioso pacaitoroba. Nexata xaniavaetsia pajinavanapaname. Itsa panajamatabëxainaejitsipame bitso panexainaejava ëpaxamënexa, nexata bitso pajamatabëcuenëitahirimë tsipae, jai Jesús pijajivijavabela.

Pacuenia Jesús pijajivi muxujioba bitso pejitsipaeyaniva palata yabara pelivaisi

(Lc 16.13)

²⁴Icatsia Jesús jumaitsi petsutoyenepanajavata pijajivi ayabitsaëttoxanetojavabela:

–Itsajivi ata acuenebi caecuenia petonacuenebijava anijanëbeje pijatuxanenëbejevavabela. Caenëjavabela, ponë jitsipa petonacuenëbinexa, tonacuenëbijitsipa. Ponëjavabela apo jitsipae petonacuenebijava, apo tonacuenëbi tsipae. Bajara pijinia itsi pajivi bitso jitsipa Dioso. Pajivi bitso jitsipa Dioso, nexata itsa tonacuenëba Dioso, acuenebi bitso pejitsipaejava palata, jai Jesús pijajivijavabela.

Pacuenia Dioso pijajivi eveta mapanacuataje yabara pelivaisi

(Lc 12.22-31)

²⁵Icatsia Jesús jumaitsi petsutoyenepanajavata pijajivi ayabitsaëttoxanetojavabela:

–Xaniajanë pacuenia pacatsipaebijitsiatsi. Pëtsa pasivanajamatabëxainame ëpanexaejava, ëpanepaejava ata, panevënjavanapanaenexa. Pëtsa pasivanajamatabëxainamenue ëpanenaxatabijavanexa ata. Apo jinavanapaetsi cajena ëvajaxaejavanexa. Apo jinavanapaetsinua ëvajapanerabëxatabinexa. ²⁶Pataema baratsuimonae pepunaevi. Apo ubi pexaejavanexa. Apo notsinua penaveretaponaejava peetsinexa bota. Itsiata Dioso, paneaxa, athëbëtatsia peecaenë, rajutabiaba pexaejavanexa. ¡Paxamë rabiji bitsoyo Dioso pacaasiva baratsuimonae matatoxenetsia papecarajutsinexa daxita xua panamatavenoname! Bajaraxuata pëtsa bitso pasivanajamatabëxainame ëpanexaejavanexa. ²⁷¿Detsa jane ponë paxamëyajuvënënë cajëpatsi pijacujiruta medio metrocuenia matavëjëa penavitsabiaexanaenexa? Ajibi. Bitso jamatabëbëjai ata tsipae pevitsabinexa, itsiata apo navitsabiaexanae tsipae pijacujiruta.

²⁸Bajaraxuata pëtsa bitso pasivanajamatabëxainame ëpanenaxatabijavanexa. Pacanaëjëre pacuenia vitsabapona pematono vayofojava. Bajarapamato apo natsijumanacuenebi. Penaxatatsijavanexa ata apo natsijumaexanae. ²⁹Bajayata nacuaevevtsinëmi Salomónpijinë, bitso pexainanëmi. Naitabëtsiaya naxatabiaba bitso pexaniavirijavanë. Itsiata baitsi jane Salomónpijinë penaitabëtsijava matatoxenetsia bitso aitaë mapamatotonoxije. ³⁰Paxamë bevelia panejumecovënëtsivi Dioso, asaëya bepajumecovënëtime Dioso papecaevevtsijava. Ajena pitsijavata vayafota tanetsi pexaniaponamatotonoxi. Bajaraxuacujinae, caematacabibejucujinae, tajuatsi baja bajarapaponamatotonoximi. Pacuenia Dioso aitaëyaexana ponamatotonoxi, bajarapijinia pacuenia paxamë ata Dioso pacaxatabiana piatabëjjava itsa pajumecovënëtime Dioso. ³¹Bajaraxuata pëtsa jamatabëbëjaiya pajamatabëjumaitsimë: “¿De tsaeta xua xaenatsi? ¿De tsaeta xua matavëjëa apaenatsi? ¿De tsaeta xua naxatabianatsi?” pajamatabëjamë pëtsa. ³²Pamonae Dioso apo pejumecovënëtsivi, bajarapacuenia bitso sivanajamatabëxainabiaba ëpexaejavanexa, ëpanaxabijavanexa ata. Itsiata baitsi jane paneaxa paxainame, athëbëtatsia peecaenë. Bajaraponë yapëtane daxita xua panamatavenoname.

³³ Bajaraxuata, daxita xua panamatavenoname, matatoxenetsia, Dioso pijacuene bitso pasivanajamatabêxainabiabianame panetoxanavanapaenexa pacuenia Dioso pacaitoroba. Nexata Dioso pacarajutsiana daxita xua panamatavenoname. ³⁴ Itsa baja pajamatabêcuenebêjamê ajena pitsijavata itsacuenejavayo yabara, pêtsa caecuenia payajavajamatabêcuenebêjamê xua yabara meravia pitsijavata pacatocopiapatsijitsia. Tsipaji xua caematacabi canacujitsia nacatocopiapatabiaba vajajamatabêcuenebêjainexa, ayaijava baja tsabiabi. Bajaraxuata ajena pitsijavata apo besivajamatabêcuenebêjaitsi xua meravia pitsijavata nacatocopiapatsijitsia, jai Jesús pijajivijavabelia.

7

Pacuenia Jesús pijajivi muxujioba pitaxutotsoniataenexa itsamonae ata, pacuenia bajarapamonae ata Dioso itaxutotsoniatanetsi, yabara pelivaisi
(Lc 6.37-38, 41-42)

¹ Icatsia Jesús jumaitsi petsutoyenepanajavata pijajivi ayaibitsaêtoxanetojavabelia:

–Pêtsa panataneme pepacuene bepaneaneconijibivi. Nexata itsamonae pibisiacuene pexanaejava xaniavaetsia payapêtaenejevamê, pêtsa pabaracuaicuajamê mapacueniaje: “Bajarapitsipibisiacuene pexanaevi, Dioso bitso ayaicuenia naneconitsiaexanaenatsi,” pajamê pêtsa. Tsipaji paxamê ata pijinia bajarapitsineconi itsa paxainame, Dioso bitso ayaicuenia pacananeconitsiaexanaejitsipa. ² Itsamonae pexanaejava xaniavaetsia payapêtaenejevamê, pêtsa pabaracuaicuajamê mapacueniaje: “Bajarapitsicuene pexanaevi Dioso naneconitsiaexanaenatsi,” pajamê pêtsa. Tsipaji paxamê ata bajarapitsicuene itsa paexaname, itsamonae pijinia bajarapacuenia pacabaracuaicuajai tsipae. ³ Bajaraxuata paxamê pepacuene bepaneaneconijibivi nataeya pêtsa pamuxujiobame itsajivi pijaneconi yabara. Tsipaji raja apo payapêtaemê paxamê ata pijinia paneconivajêto paxainame. ⁴ Nexata paxamê ata ayaineconixaneto itsa paxainame, nexata itsajivijavabelia apo bepajumâitsimê: “Papibisiacuene exaname, copare baja,” apo bepajamê. ⁵ Yamaxêitojorobiaya saya bepexaniajamatabêcuenevi nataeya pacuaicuajamê tsabiabi. Itsamonae pijaneconi yabara pabaracuaicuajamê tsabiabi. Itsiata pijinia paxamê ata paneconivajêto paxainame, apo payapêtaemê. Paxamê copiaya pacopabare pibisiacuene paneexanabiabijava. Bajara jane xuacujinae paitavetsianame itsamonae ata pibisiacuene pexanaejava pecopabinexa, jai Jesús pijajivijavabelia.

⁶ Icatsia Jesús jumaitsi petsutoyenepanajavata pijajivi ayaibitsaêtoxanetojavabelia:

–Pêtsa matavêjêa patsipaebaponame Dioso pejumelivaisi, pamonae patsipaebi atamê, apo yayiatæ bajarapalivaisi. Tsipaji saya capocaponabiaba bajarapalivaisi. Vaxaitsi itsanê pijaaviri pexaejavanexa rajutsi atatsi tsipae, saya nacaitoya tsipae. Nacasinjit-sipanua. Bajara pijinia jamatabêcueneitsi pamonae apo yayiatæ Dioso pejumelivaisi, patsipaebi atamê. Pacuenia marrano ata itsa rajutsipatsi perlavênêjava, bitso penamata-motsijava, saya taxunanonobijitsipa, bajara saya jamatabêcueneitsi bajarapamonae, jai Jesús pijajivijavabelia.

Pacuenia Jesús pijajivi tsipaeba pacuenia Diosojavabelia vajêtaaponaejitsia yabara pelivaisi
(Lc 11.9-13; 6.31)

⁷ Icatsia Jesús jumaitsi petsutoyenepanajavata pijajivi ayaibitsaêtoxanetojavabelia:

–Pavajêtaponare Diosojavabelia bajayajebi ata pacuenia bajayajebi ata pajaitsipame panecaxitajarabinexa itsa pacatonaxuaba itsacuenejavayo. Pavajêtaponare Diosojavabelia asaëyata pacuenia asaëyata padocodocotsipame baupa papecatobaupatsinexa itsa baupa xatatanuta. ⁸ Bajarapacuenia asaëyata pavajêtaponare Diosojavabelia tsipaji pajivi vajêtabiaba, rajutabiabatsi. Pajivi ata jaitabiaba, caxitajarabiabiaba. Pajivi ata baupa docodocotabiaba, tobaupatabiabatsi.

⁹ Paxamê papebijivimê panexi panexinaevi. Panexênatonêyo itsa pacavajêta panbê, apo panacoxirajutsimê tsipae iboto. ¹⁰ Itsa pacavajêta dujuainêyo, apo panacoxirajutsimê tsipae jomo. ¹¹ Paxamê paneajamatabêcuenebêji ata, payapêtaneme panenacoxirajutsinexa pexaniajava. Paneaxa, athêbêtatsia peecaenê, bitso biji cajena pexaniajamatabêcuenenê paxamê matatoxenetsia. Bajaraponê pacarajutsiana pexaniacuene itsa pavajêtame.

¹² Xua pexaniacuene, paxamê pajitsipame itsamonae papecatoexanaenexa, copiya paxamê bajarapapexaniacuene patoexanare bajarapamonaejavabelia. Bajarapajamatabêcuene jêpa Dioso Moiséspijinêta penajumecopatsilivaisi. Diosojumepaebivimi profetavi peyaquinaelivaisianê ata jêpa bajarapajamatabêcuene, jai Jesús pijajivijavabelia.

Tsiquiribaupayo epatajêrêtsialia yabara pelivaisi
(Lc 13.24)

¹³ Icatsia Jesús jumaitsi petsutoyenepanajavata pijajivi ayaibitsaêtoxanetojavabelia:

—Pajonemeya tsiquiribaupayojavalia panepatsinexa Dioso pijanacuayabelia. Tsipaji pinijibaupa, pinijnamutonua, pata infiernojavabelia. Nexata jivi ayaibitsaëtoخانetonë bajaraxuayo jonepona. ¹⁴ Pabaupa tsiquiribaupayo, tsiquirinamutoyonua, bajarapanamuto pata maticabi apo pevereverecaejava pexainaevi pijanacuayabelia. Nexata saya caejiviyobeje bajaraxuayo jonepona, jai Jesús pijajivijavabelia petsutoyenepanajavata.

Pacuenia peubinaenë itsa nacuaita, nayapëtane pavirianaecuenë yabara pelivaisi
(Lc 6.43-44)

¹⁵ Icatsia Jesús jumaisi petsutoyenepanajavata pijajivi ayaibitsaëtoخانetojavabelia:
—Xania panayajivitaema. Pamonae saicayacuenia Dioso pejumelivaisivecua jivi tsipaebapona, bajarapamonae najumetsënëtsiaya pacajumai tsabiabi: “Paxanë raja Dioso patanitorobicuenia livaisi jivi patsipaebaponajë,” pacajai tsabiabi. Bajarapamonae Dioso pejumecovënëtsivi cuenecatayea najonena paxamëjavaberena. Itsiata baitsi jane pacuenia nevëthë pianaepanaevi jamatabëcuenëtsi, bajara jamatabëcuenëtsi. Jamatabëpacacopsiaexana Dioso panejumecovënëtsijavami. ¹⁶ Vaxaitsi rabaja yapëtanetsi mapacuenëje. Peubinaenë itsa nacuaita, yapëtanetsi ponaecuai xanepana vajaxaenexa. Nexata bajarapona cuaixanetsi. Ponaë pijinia pibisiacuai nacuaita, yapëtanetsi piabejecuene. Nexata bajarapona apo cuaixaetsi. Nexata pacuenia peubinaenë itsa nacuaita, nayapëtane ponaecuai xanepana vajacuaixanexa, bajara pijinia pacuenia paxamë yapapëtaenema pacuenia jamatabëcuenëtsi bajarapamonae itsa pacuenaenama xua exanavanapa. Uvaru apo paucutsimë cucunanaeta. Higovënëcuaito ata apo paucutsimë jomovaënaeta. ¹⁷ Nexata ponaë pexanianaë, pexaniacuai pijinia nacuaita vajaxaenexa. Ponaë pijinia pibisianaë, ëpiabejecuai nacuaita. ¹⁸ Pexanianaë pexaniacuai nacuaita. Apo nacuaitsi piabejecuai. Pibisianaë pijinia apo nacuaitsi pexaniacuai. ¹⁹ Daxita ponae aenë nacuaitsi pibisiacuai, apo vajaxaecuai, yapëtanetsi. Nexata daxita bajaraponaenëmi nicatatsi. Nexata tajuitatsi isotota. ²⁰ Bajara pijinia pacuenia paxamë ata yapapëtaenema itsa pacuenaenama xua exanavanapa pamonae saicayacuenia Dioso pejumelivaisivecua jivi tsipaebapona, jai Jesús pijajivijavabelia.

Pacuenia daxitajivi apo jone tsane Dioso pijanacuayabetsia yabara pelivaisi
(Lc 13.25-27)

²¹ Icatsia Jesús jumaisi petsutoyenepanajavata pijajivi ayaibitsaëtoخانetojavabelia:
—Daxita pamonae: “Tajatuxanenë,” tanejaivi ata, itsa apo jumecovënëtsi tsane taxa Dioso, athëbëtatsia peecaenë, nexata apo jone tsane taxa Dioso pijanacuayabetsia. Itsiata pamonae exanavanapa taxa, athëbëtatsia peecaenë, pejisipaecuenia, ëbajarapamonae jonena taxa pijanacuayabetsia. ²² Pamaticabi copiapatsiana pijaneconi pexainaevi Dioso penaneconitsiaexanaematacabinexa, bajarapamaticabi jivi ayaibitsaëtoخانetonë nejumaisi tsane: “Patajatuxanenë, xamë baja cajena nejamatabëcueneta jivi patsipaebabiabajë Dioso pejumelivaisi. Nevënëtanua dovathi jivivecua pacapitsapaponajë. Nevënëtanua pinijicuene pataexanaejavanë, Dioso pesaëta paexanaponajë,” nejai tsane jivi ayaibitsaëtoخانetonë. ²³ Itsiata baitsi jane xanë jumaisinë tsane bajarapomonaëjavabelia: “Apo pacayapëtaetsi cajena paxamë. Panevecuaponare pibisiacueneta jivi patsipaebabiabajë tsane bajarapomonaëjavabelia, jai Jesús pijajivijavabelia.

Pacuenia Jesús livaisi tsipaeba anijanëbeje bo pexanaenëbeje pelivaisicuenia yabara pelivaisi

(Mr 1.22; Lc 6.47-49)

²⁴ Jesús icatsia jumaisi petsutoyenepanajavata pijajivi ayaibitsaëtoخانetojavabelia:
—Pajivi nejumecovënëtsiana patacatsipaebilivaisi, nexata itsa exanaena taitorobicuenia, apo nacueratsi tsane. Bajarapajivi piatajairata pijabo bepexanetsinë tsane. Tsipaji ponë pijabo exanaejitsia, peyapëtaexae itsajota pijabo exanetsijitsia pebubutsijavanexa, nexata baja bajarajota apo exanetsi pijabo. Nexata pijabo exaneta bitso piatajairata. Nexata bajaraponë bo pexanaejava apo nacueratsi. ²⁵ Bo peveretetsicujinaë ayaiemaxaneto jopa. Menianë avajubua tsaponae. Ira bubuta. Ayajovibo bitso bubujai pijabojavaberena. Itsiata pijabo apo toxuabitsitsia. Tsipaji pijabo exaneta piatajairata. ²⁶ Pajivi nejumetaë ata patacatsipaebilivaisi, apo nejumecovënëtsi tsane, nexata itsa apo exanaë tsane taitorobicuenia, bajarapajivi nacueratsiana. Pacuenia tajetabota bo pexanetsinë nacuerata bo pexanaejava, bajara itsi tsane. Ponë tajetabota pijabo exaneta, yapëtaë ata emarapae pecopiapatsijavanexa, bajaraponë nacuerata bo pexanaejava. ²⁷ Tsipaji bo peveretetsicujinaë ayaiemaxaneto jopa. Menianë avajubua tsaponae. Ira bubuta. Ayajovibo bitso bubujai pijabojavaberena. Pijabo nexata toxuabayatsi. Pepacuene baja nexata bomi abeje, jai Jesús mapacueniaje pijajivijavabelia.

²⁸ Itsa baja Jesús najumevereta petsutoyenepanajavata bajarapalivaisi petsipaebi-
java, pejumetaevitsi bitso jamatabëcuenenabenajaca. ²⁹ Jesús pejumetaevitsi bitso ja-
matatabëcuenenabenajaca tsipaji Jesús livaisi tsipaeba pinijijamatabëcuene pexainanenëcuenia.
Apo tsipaebi pacuenia judíovi pecujarubivi tsipaebabiaba.

8

*Pacuenia Jesús jamatejemayaexana bajayajebi bitso peperabëtsabanaenë yabara pelivaisi
(Mr 1.40-45; Lc 5.12-16)*

¹ Itsa baja Jesús runaica petsutojumavetsica, jivi ayaibitsaëtoxaneto pënaponatsi. ² Nexata imoxoyotatsi bajayajebi bitso peperabëtsabanaenë. Pitabarata pematabacabëta tonucatsi. Bitso peperabëtsabanaenë jumaitsi Jesúsjavabelia:

—Jesús, cacaejëpa raja tanejamatejemayaexanaexamë. Itsa jitsipame, nejamateje-
mayaexanare mapavitanevecuaje, jai bitso peperabëtsabanaenë.

³ Nexata Jesús pecobeta perabëjayalia bitso peperabëtsabanaenë. Jesús jumaitsi bajara-
ponëjavabelia:

—Jājā, jitsipajë cajena. Jamatejemamë rabaja, jai Jesús bajayajebi bitso peper-
abëtsabanaenëjavabelia.

Bajarapacuenia Jesús pejumaitsijavata peperabëtsabanaenëmi baja per-
abëxanepananajereca. ⁴ Nexata icatsia Jesús jumaitsi bajaraponëjavabelia:

—Nejumetaema. Pëtsa tsipaebame itsajivijavabelia ata tacajamatejemayaexanaejava.
Naitajëtsiaremelia jane sacerdotenëjavabelia, templojota penacuenebinëjavabelia. Nex-
ata jivi yapëtaena pepacuenia baja pecavecuajibijava niavitanejavami. Diosonexa ra-
juremelia ofrenda sacerdotenëjavabelia pecavecuajibiaexanaexae niavitanejavami. Ba-
jara tsipaji pacuenia bajayata vajasalinainëmi Moisésipjinë nacaïtoroba. Nexata sacer-
dotenë cataena pecavecuajibijava baja niavitanejavami, jai Jesús bajaraponëjavabelia.

*Pacuenia vajabitsaë pijacapitán pijabota petonacuenebaponaponaenëtsi, Jesús tojamate-
jemayaexana yabara pelivaisi
(Lc 7.1-10)*

⁵ Itsa baja Jesús pata Capernaum tomarabelia, Romano nacuapijivajabitsaëvi pijacapitán
Jesús imoxoyorenatsi pevajëtsinexatsi. ⁶ Vajabitsaëvi pijacapitán bitso ayaicuenia vajëta
Jesúsjavabelia. Jumaitsi:

—Petuxanenë, tajajivitonë raja tajabota camata boboca. Bitso cuenabatsi. Pinijicuenia
navixaetaeyabiaba, jai.

⁷ Nexata Jesús jumaitsi capitánjavabelia:

—Xanë ponaenajë nijaboyabelia. Nexata catojamatejemayaexanaenatsi nijajivitonë, jai
Jesús.

⁸ Nexata capitán jumaitsi Jesúsjavabelia:

—Petuxanenë, xanë raja bitso beveliajamatabëcuenenënë xamëvecua. Nexata apo
xanepanae tsipae nejonëjava tajaboyabelia. Nexata saya maveliaje ënijume itorobare. Nex-
ata tajajivitonë netojamatejema tsane. ⁹ Xanë ata xainajë taneitorobabiabivi taneitoro-
bicuenia tajumecovënëtabiabinëxa. Xanë ata juya xainajë vajabitsaëvi tajajivi taitoro-
bicuenia tanetoexanabiabinëxa. Nexata ita itorobajë caenë vajabitsaenë pepatsinëxa xanëjavaberena,
bajaraponë ponabiaba. Itsa junarenajë itsanë vajabitsaenë pepatsinëxa xanëjavaberena,
bajaraponë patabiabarëna. Itsa itorobajë tajajivitonë tanetoexanaenëxa itsacuenëjavayo,
nexata netoexanabiaba. Bajara pijinia pacuenia xamë ata nexanaenëxa cacaejëpa. Nex-
ata saya maveliaje ënijume itorobare saya ënijumeta tajajivitonë tanetojamatejemayaex-
anaenëxamë, jai capitán Jesúsjavabelia.

¹⁰ Jesús ita jumetane bajarapacuenia capitán pejumaitsijavatsi, nexata Jesús ja-
matatabëcuenenabenajaca. Nexata Jesús jumaitsi pepënaponaeivitsijavabelia:

—Xaniajanë pacuenia pacatsipaebijitsiatsi. Israel nacuapijivi nejumecovënëtsi
ata, itsiata caeto ata apo caxitajarabaxuabinë xanëjavaberena bitso tanesivanaja-
matatabëcuenecopatsinë pacuenia mapacapitán nesivajamatatabëcuenecopatsiaya jumaitsije.

¹¹ Nexata pacatsipaebatsi paneyapëtaenëxa. Apo judíovi ata raja, ayaibitsaëtoxanetonë
daxitanacuanëpijivi, Dioso jumecovënëtsiana. Nexata apo judíovi ata capanepaenatsi
Dioso pijanacuayabetsia. Nexata bajarapamonae Dioso pijanacuataetsia, Abrahampijinë
yajava, nabaniana. Isaacpjinë ata, Jacobpjinë ata yajava, nabaniana. ¹² Itsiata baitsi jane
judíovi, pamonaë picani Dioso athëbëtsatia toxaniavaetatsi peyajavajinavanapaenëxatsi,
bajarapamonae caranata apo jumecovënëtsi Dioso. Nexata bajarapamonae
infernójavabelia Dioso xuabianatsi. Bajarajota nuena. Navonosiniana bitso
penavixaetaexae, jai Jesús mapacueniaje pepënaponaeivitsijavabelia.

¹³ Nexata icatsia Jesús jumaitsi capitánjavabelia:

—Ponare baja nijaboyabelia. Catoexanatsi rabaja pacuenia xanëjavaberena nesivanajamatabëcopatsiaya jumaitsimë tacatoexanaenexa, jai Jesús capitánjavabelia.

Nexata bajarapaepatota capitán pijabotalia pijajivitonë baja tojamatejematsi.

Pacuenia Simón Pedro pijava pena Jesús tojamatejemayaexana yabara pelivaisi
(Mr 1.29-31; Lc 4.38-39)

¹⁴ Jesús pona Pedro pijaboyabelia. Nexata Pedro pijabota Jesús taeyabuata Pedro pijava pena peromaebanucaejavatsi camata. ¹⁵ Nexata Jesús cobejayata peromaebanucaevatsi. Jesús pecobejayatsijavata, bajarapova vecuaajibitsireca baja domae. Nexata baja bajarapova jamatejema. Jesúsbana pexaejava bajarapova toexanatsi.

Pacuenia ayaibitsaëto jivi, piavitanevi, Jesús jamatejemayaexana yabara pelivaisi
(Mr 1.32-34; Lc 4.40-41)

¹⁶ Itsa baja ajena meravitsia, Jesúsjavaberena tocapatatsi ayaibitsaëto dovathi peyavajivanavanapaevi. Caejumeta saya Jesús caecuenia dovathi vecuacapsapa bajarapamonae. Bajarajota jamatejemayaexananua daxita piavitanevi. ¹⁷ Bajarapacuenia Jesús itsa exana, copiapata jane baja pacuenia Jesús yabara bajayata Diosojumepaebinëmi profeta Isaiaspijinë tajëvelia vajunupaeba. Profeta Isaiaspijinë bajayata tajëvelia jumaitsi mapacueniaje: “Bajaraponë nacavecuajibiaexanaena vajaavitanejavami,” jai bajayata tajëvelia Isaiaspijinë Jesús yabara.

Pacuenia picani Jesús jamatabëpënaponatsi itsamonae yabara pelivaisi
(Lc 9.57-62)

¹⁸ Nexata Jesús itsa tane jivi ayaibitsaëto pematatoyoronejavatsi, pijajivi junata pepënxuabinexatsi pucaxaneto itsapanabelia. ¹⁹ Nexata bajarapaepatota judíovi pecujarubinë Jesús imoxoyorenatsi. Judíovi pecujarubinë jumaitsi Jesúsjavabelia:

—Petuxanenë, itsabelia poname, capënaponaenatsi cajena, jai.

²⁰ Nexata Jesús jumaitsi judíovi pecujarubinëjavabelia:

—Itsa nepënaponaejitsipame, apo napatabiabimë tsipae tajabota nenacueraevetabibinexa. Tsipaji tajabo apo xainanenë. Namu pijamëthëanë xaina pepatabiabibinexa pe-majitabibinexa. Baratsui ata pematapenanë xaina. Itsiata baitsi jane xanë, Daxitajivi Pematapijinë, itsajavabelia ata apo xainanenë itsajota nacueraevetabibijitsianë, jai Jesús judíovi pecujarubinëjavabelia.

²¹ Nexata Jesús pijajiviyajuvënë jumaitsi Jesúsjavabelia:

—Tajatuxanenë, caeepatoy abaxë necopare tamëthëtsinexa taxa petëpaenë, jai.

²² Jesús nexata jumaitsi pijajivitonëjavabelia:

—Naxanitsia. Nepënaponare. Copare matabi apo pevereverecejave apo pexainaevinexa pemëthëcaenexatsi nijamonaemi itsa tëpa, jai Jesús pijajivitonëjavabelia.

Pacuenia Jesús itaveta joviboxaneto, malataca yajava, piyajivami yabara pelivaisi
(Mr 4.35-41; Lc 8.22-25)

²³ Jesús, pijajivi yajava, runa jera ënëabereca. Nexata Jesús pijajivi jerata yajavanajetaruca pucajava. ²⁴ Nexata jemata pinijijoviboxaneto najetaruca. Malatacaxanetonë bitso ayai. Nexata malataca jera ënëaberena mera epabajarabapona. Itsiata Jesús jamatejema majitanuca. ²⁵ Nexata Jesús pijajivi yaitavabatsi pemajitanucaenë. Jesús pijajivi jumaitsi:

—¡Patatuxanenë, panecapanepare! ¡Vaxaitsimi rabaja yaothopaenatsi! jai Jesús pijajivi.

²⁶ Nexata Jesús jumaitsi pijajivijavabelia:

—¿Detsa xuajitsia bitso pajunavame? ¿Tsipaji apo payapëtaemë Dioso papecaevetsijava? jai Jesús pijajivijavabelia.

Nexata Jesús namatacotapuna. Pinijijumeta itavetaxuaba jovibo, malataca yajava. Nexata baja daxita puca vainae ecaxuaba. ²⁷ Nexata Jesús pijajivi itsa tane bajaraxua, jamatabëcuenenabenajaca. Nexata Jesús pijajivi najumaitsi:

—¿De meta tsipaji maponëje? ¡Itaveta jovibo, malataca yajava! ¡Jumecovënëtatsi baja rovia maponëje! ¡Nexata baja jovibo, malataca yajava, ajibi tsaxuabi! najai Jesús pijajivi.

Pacuenia Gadara tomarapijinëbeje, dovathivi peyjavaponaponanenëbeje, Jesús vecuacapsapa Gerasa nacuata yabara pelivaisi
(Mr 5.1-20; Lc 8.26-39)

²⁸ Jesús pijajivi barëpata pucaxaneto itsapanabelia, Gerasa nacuyabelia. Jesús itsa pata Gerasa nacuata, Gadara tomarapijinëmibeje pitsaparenabeje jivimëthëanëjavaverena. Imoxoyorenatsibeje Jesús. Bajaraponëbeje dovathivi peyjavaponaponanenëbeje. Bitso anaepanabiababeje. Nexata itsajivi ata apo ponabiabi bajaraxuayo perucaenamutojava. ²⁹ Nexata dovathivi peyjavaponaponanenëbeje vavajaibeje.

—Jesús, Dioso pexënatomë, ¿detsa xua namatavenoname paxanëbejejavabereña? ¿Dioso tsaja daxitajivi penaneconitsia exanaematacabinexavajënaeya patame patanenaneconitsiaexanaexamëbeje? jaiube Jesúsjavabelia dovathivi peyjavaponaponanëbeje.

³⁰ Nexata bajarajota, imoxoyo petsutojavata, marranobitsaëtoخانeto xaevanapa.

³¹ Nexata dovathivi bitso vajëca Jesúsjavabelia. Jumaitsi:

—Itsa panexuabijitsiamë maponëbejevecuaje, panetocopare patajonenexa marranobitsaëtoخانetojavabelia, jai.

³² Nexata Jesús jumaitsi dovathivijavabelia:

—Paponare baja panejonenexa marranobitsaëtoخانetojavabelia, jai.

Nexata bajaraponëbeje dovathivi vecuapitsapatsibeje. Nexata baja marranobitsaëtoخانetojavabelia junua dovathivi. Nexata daxita bajara pamarranobitsaëtoخانetomi cujinaeyeca. Pucaxaneto itapajanituareca othopareca. Bajarajota daxita marranobitsaëtoخانetomi meneta bubuna.

³³ Bajara pamarranobitsaëtoخانetomi pevetavanapaevi, rëcëpeca. Itsa bajarapamonae Gadara tomarabelia pata, tsipaeba pacuenia tane. Tsipaebanua pacuenia Jesús dovathivi vecuapitsapa dovathivi peyjavaponaponanëbeje. ³⁴ Nexata daxita bajarapatomarpijivi ponarena Jesúsjavabereña. Nexata itsa tanetsi Jesús, daxita bajarapamonae jumaitsi Jesúsjavabelia:

—Pexaniacuene pacavajëtatsi. Ponare baja patajanacuavecuja, jai bajarapamonae Jesúsjavabelia tsipaji cujunavatsi.

9

Pacuenia Jesús jamatejemayaexana petabusipacuenabinëtsi yabara pelivaisi (Mr 2.1-12; Lc 5.17-26)

¹ Jesús runareca jera ënëabereca. Nicabilia puca itsapanabelia. Pata nexata pijatomarabelia. ² Bajarajota Jesús tocapatatsi petabusipacuenabinëtsi. Pacamayota bocabiaba, yavëtarapatatsi. Jesús jamatabëcueneyapëtane pacuenia sivanajamatabëxainatsi petocapatsivitsi. “Nacatojamatejemayaexanaenatsi cajena,” pesivajamatabëjajivatsi Jesús jamatabëcueneyapëtane. Bajaraxuata petabusipacuenebinëtsijavabelia Jesús jumaitsi mapacueniaje:

—Tajabananë, jamatabëcuenebarëyamëre. Pibisiacuene rabaja nexanaeneconimi cavëcuajibiaexanatsi, jai Jesús petabusipacuenabinëtsijavabelia.

³ Nexata judíovi pecujarubivi itsa jumetaeyena bajarapacuenia Jesús pejumaitsijava, najamatabëxainena.

—Maponë Jesúsje Dioso apo pejitsipacuenia cuacuajiai, jamatabëjai tsenae judíovi pecujarubivi Jesús yabara.

⁴ Jesús jamatabëcueneyapëtane judíovi pecujarubivi bajarapacuenia pesivanajamatabëxainaejavatsi. Nexata Jesús jumaitsi judíovi pecujarubivijavabelia:

—Panësvivanajamatabëxainame xanëjavabereña pibisiajamatabëcuene. ⁵ Paxamë apo pacacajëpae ata itsajivi pibisiacuene pexanaeneconi panevecuajibiaexanaenexa, pacacajëpa picani saya jema panejumaitsinexa petabusipacuenebinëtsijavabelia mapacueniaje: “Cavëcuajibiaexanatsi rabaja pibisiacuene nexanaeneconimi,” panejainexa. Tsipaji itsajivi ata apo yapëtae tsipae saya jema panejumaitsijava. Itsiata baitsi jane itsa apo pacacajëpae panejamatejemayaexanaenexa petabusipacuenebinëtsi, acuenibe panejumaitsinexa bajaraponëjavabelia mapacueniaje: “Nonotapunare. Nijacamayo pire. Ponare baja,” panejainexa. Tsipaji bajarapacuenia pajumaitsimë ata, itsa apo jamatejema tsipae bajaraponë, nexata daxitajivi pacayapëtaejitsipa apo papecacajëpaeacuene panejamatejemayaexanaenexa, jai nexata Jesús judíovi pecujarubivijavabelia.

⁶ Icatsia Jesús jumaitsi judíovi pecujarubivijavabelia:

—Xanë Daxitajivi Pematapijinënë, mapanacuata necaëjëpa tavecuajibiaexanaenexa itsajivi pibisiacuene pexanaeneconimi ata pacuenia baja exanajë maponëjavabeliaje. Nexata patanecueneyapëtaenexamë tanecaëjëpaeacuene tavecuajibiaexanaenexa itsajivi pibisiacuene pexanaeneconimi ata, pataema pacuenia jamatejemayaexanaejitsianë maponëje, jai Jesús judíovi pecujarubivijavabelia.

Nexata icatsia Jesús jumaitsi petabusipacuenabinëtsijavabelia:

—Nonotapunare baja. Nijacamayo pire. Nijaboyabelia baja ponare, jai Jesús.

⁷ Nexata bajarapacuenia Jesús pejumaitsijavata, petabusipacuenabinëmitsi nonotapuna. Pijaboyabelia baja pona. ⁸ Nexata jivi itsa tane bajaraxua, junava cajena bitso. Nexata bajarapamonae jumaitsi Diosojavabelia:

—Diosomë, bitso ayajamatabëcuenenëmë. Tsipaji jivi caëjëpaeayaxaname pinijicuene pexanaenexa, jai.

*Pacuenia Jesús pijajivitonēnexa junata Mateo yabara pelivaisi
(Mr 2.13-17; Lc 5.27-32)*

⁹ Jesús baja vecuapona itsajota jamatejemayaexana petabusipacuenabinētsi. Nexata Jesús penajetarucaejavata taeyeta Mateo. Mateo gobierno pejamatabēcuene impuestomatamo pematamoyanijobabiabinē. Pabota jivijavabelia Mateo impuestomatamo matamoyanijobabiaba, bajarapabota eca Mateo. Nexata Jesús jumaitsi Mateojavabelia:

–Mateo, nepēnaponare, jai.

Jejai Mateo. Nexata nonotapuna. Mateo baja napona Jesús pepēta.

¹⁰ Nexata Mateo junata Jesús pebarēnabaninexa pijabota. Nexata Mateo pijabota Jesús pexaejava naxane. Mateo pijabota naena ayaibitsaēto gobierno pejamatabēcuene jivijavabelia impuestomatamo petomatamoyanijobivi. Itsamonae ata nanabane, piagamatabēcuenebejevi. Jesús pijajivi nayajavaeca bajarapamesajavata. ¹¹ Nexata fariseovi itsa tane bajarapacuenē, jamatabēcuenenavēxaniabiaya jumaitsi Jesús pijajivijavabelia:

–Papecacujarubinē rabaja Jesús naneconita Diosojavabelia. Tsipaji gobierno pejamatabēcueneta impuestomatamo pematamoyanijobabiabivijavata, piagamatabēcuenebejevijavatana, naxaeyeca pexaejava, jai fariseovi Jesús pijajivijavabelia.

¹² Jesús nexata jumetaeyeca bajarapacuenia fariseovi pejumaitsijava. Nexata Jesús jumaitsi fariseovijavabelia:

–Pevaēbinē raja apo vaēbi pejamatabējemavi. Pevaēbinē raja piavitanevi vaēba. Bajara pijinia xanē ata itsinē. Sivapatajopajē tajunatsinexa pibisijamatabēcuenevi pecapanepanexatsi Diosojavabelia. ¹³ Paponare. Palebianame Dioso pejumelivaisibaxuto. Nexata payapētaename pajamatabēcuene yabara jumaitsi Dioso pejumelivaisibaxutota mapacueniaje: “Jitsipajē paneitaxutotsoniatatejava itsamonae. Apo jitsipaeñē saya patanetobeyabiabijavamē dajubicuene ofrendacuenia patanerajutabiabinexamē,” jai Dioso pejumelivaisibaxutota. Xanē raja apo sivapatajopaenē tajunatsinexa pamonaē baja aneconijibi tsavanapae. Biji rajane sivapatajopajē tajunatsinexa pijaneconi pexainaevi. Junataponajē bajarapamonae pecopabinexa pibisiacuene pexanaejava penajamatabēcuenepeñēyorotsinexa Diosojavabelia, jai Jesús fariseovijavabelia.

Pacuenia Jesús yanijobatsi pamatacabibeje jivi vajētaona Diosojavabelia pexaejava apo pexaeyabiabixae yabara pelivaisi

(Mr 2.18-22; Lc 5.33-39)

¹⁴ Juan pijajivi Jesús imoxoyorenatsi. Nexata Juan pijajivi jumaitsi Jesúsjavabelia mapacueniaje:

–Petuxanenē, paxanē pataxaejava apo paxaeyabiabinē pamatacabibeje pavajētaonajē Diosojavabelia. Bajara pijinia itsi fariseovi ata pamatacabibeje vajētaona Diosojavabelia. Pexaejava apo xaeyabiabi. ¿Detsa xuajitsia xamē nijajivi pamatacabibeje vajētaona Diosojavabelia pexaejava xaeyabiaba? jai Juan pijajivi Jesúsjavabelia.

¹⁵ Nexata Jesús jumaitsi Juan pijajivijavabelia:

–Pamonae junatatsi penacasabifiestajavabelia penanabaninexa, apo atsovi pexaejava itsa abaxē yajavaecatsi pejananacasabinē. Itsiata baitsi jane pejananacasabinē itsa tsimaxēpatsipatsi pevecuacaponanexatsi itsajavabelia, nexata bajarapamonae pexaejava apo xae tsipae. Tsipaji bitso najamatabēxainaejitsipa pevecuacaponaxaetsi. Bajara pijinia itsi tajajivi ata. Tayajavaponaponaeepato abaxē apo atsoabiabi pexaejava pamatacabibeje Diosojavabelia vajētaona. Itsiata pamatacabi xanē necaponaena bajarapamonaevecua, nexata jane baja bajarapamatacabi pexaejava apo xae tsane bitso tanesivanajamatabēxainaxae, jai Jesús Juan pijajivijavabelia.

¹⁶ Nexata Juan pijajivi perujumatabēcuene baja penavecuacopatsinexa, Jesús livaisi tsipaeba comparacióncuenia, Juan pijajivi pejumecovēnētsinexa ēpejanalivaisi. Jesús petsipaebilivaisi. Juan pijajivi anijajamatabēcuenebeje pexainaeyaniva, perujumatabēcuene baja pecopabinexa, Jesús livaisi tsipaeba comparacióncuenia. Perujumatabēcuene yabara Jesús jumaitsi Juan pijajivijavabelia mapacueniaje:

–Itsajivi ata raja apo catsatarutsi pejanapana perujunaxatatsiesetojavabelia. Itsa catsatarutsipa pejanapanata perujunaxatatsiesetojavabelia, nexata pejanapana yanarobotsipa perujuesetojavaverena. Nexata biji bitso pinijivojoto titinaejitsipa. ¹⁷ Itsajivi ata pijinia apo epacae pejanavinoranē perujubocodoranējavabelia bajayajebi peyajebinxexa. Pejanavinoranē itsa epacaejitsipa perujubocodoranējavabelia, nexata pejanavinoranē yatititibia tsipae. Tsipaji perujubocodoranē apo yanayeretsi tsipae. Tsipaji pejanavinoranē pejumalitsēxē abaxē xaina. Nexata itsa yatititibia tsipae, naxuabijitsipa vinoranēmi. Bajaraxuata bepaca pejanavinoranē pejanabocodoranējavabelia. Nexata vinoranē peyaxanepanexa bajayajebi ata pejanabocodoronēta, jai Jesús Juan pijajivijavabelia.

Bajarapacuenia Jesús jumaitsi Juan pijajivi pejumecovënëtsinexa ëpejanalivaisi, Jesús petsipaebilivaisi, perujujamatabëcuene baja pecopabinexa.

Pacuenia Jesús copiaya namutoepatota jamatejemayaexana piavitaneva, pacuenia icat-sia cotocaevi toasaëyaexana jairo pexënatovayo, petëpaevayomi, yabara pelivaisi (Mr 5.21-43; Lc 8.40-56)

¹⁸ Jesús livaisi petsipaebanuaejavata Juan pijajivijavabelia, judíovi penacaetuatabi-abibo pevetsinë parena Jesúsjavaberena. Nexata bajaraponë Jesús pitabarata yaiyataeya pematabacabëta nucajunua. Jumaitsi Jesúsjavabelia:

—Taxënatovayo rabaja aeconoxae netotëpa. Itsiata baitsi jane itsa poname tajaboyabelia, nexata itsa netoperabëjayatsianame necobeta, icatsia netoasaë tsane, jai bajaraponë Jesúsjavabelia.

¹⁹ Nexata Jesús nonotapuna. Judíovi penacaetuatabi-abibo pevetsinë pepëta Jesús, pijajivi yajava, napona. ²⁰ Nexata Jesús namutua penajetaruaejavata, pepënëverena imoxoyotatsi petiriva, piavitaneva. Bajarapova pijanacuene pecapunaecujinaetsi doce baja pavaibeje xaina. Nexata bajarapova Jesús pepënëvelia ponataba, jivibitsaëtoxaneto tuatujëjavalia. Nexata bajarapova tojayataba Jesús penaxatatsijavacopia. ²¹ Bajarapacuenia tojayataba Jesús penaxatatsijavacopia tsipaji bajarapova jamatabëjumaitsi mapacueniaje:

—Itsa tojayatabianajë Jesús penaxatatsijavacopia, nexata tavitanëjavami nevecuaajibi tsane, jamatabëjai bajarapova.

²² Nexata Jesús napënëyorotaxuaba. Taenuta bajarapova. Nexata Jesús jumaitsi bajarapovajavabelia:

—Jamatabëcuenebarëyamëre. Xamë nesivajamatabëjumaitsimë: “Itsa tojayatabianajë Jesús penaxatatsijava, nexata tavitanëjavami nevecuaajibi tsane,” nesivajamatabëjamë. Bajaraxuata jamatejemamë baja, jai Jesús bajarapovajavabelia.

Bajarapacuenia Jesús pejumaitsijavata bajarapova jamatejema baja. ²³ Bajaraxuacujinae Jesús jane baja pata judíovi penacaetuatabi-abibo pevetsinë pijaboyabelia. Nexata Jesús itsa pata, tane pevajënae pepatsivi, flauta piobivinexa itsabelia caponaejitsia petëpaevayo pemëthëtsinexa piobinexa. Tanenua jivi bitso pinijicuenia pematantueyabavanapaejava petëpaevayo.

²⁴ Nexata Jesús jumaitsi bajarapamonaejavabelia:

—Papitsapare mapabovecuaje. Pejanava raja apo tëpae. Saya raja majita, jai Jesús tsipaji yapëtane Jesús piasaëyaexanaejavanexa bajarapovayo.

Nexata saya bajarapamonae Jesús jumeapocaponatsi bajarapacuenia pejumaitsijava. ²⁵ Jesús nexata bajarapamonae bovecua pitsapaeyaexana. Nexata itsaxuayolia petëpaevayo boca, Jesús joneya. Cobepita petëpaevayo. Bajarapovayo baja namatacota. ²⁶ Nexata daxita bajarapanacuapijivi Jesús vënëlivaisitanetsi piasaëyaexanaejava petëpaevayomi.

Pacuenia Jesús itaxutoxaniavaeta bitso pitaxutotsëcënaenëmibeje yabara pelivaisi

²⁷ Itsa baja Jesús pona judíovi penacaetuatabi-abibo pevetsinë pijabovecua, anijanëbeje bitso pitaxutotsëcënaenëbeje Jesús pënaponatsi. Bajaraponëbeje vavajaiya jumai tsaponaebeje Jesúsjavabelia:

—¡Jesús, Davidpijinë pemomo, paneitaxutotsoniataemabeje! jaiibeje tsaponae Jesúsjavabelia.

²⁸ Itsa baja Jesús joneya pabojavabelia pona, nexata bajaraponëbeje pënajoneyatsibeje. Nexata Jesús bajarajota jumaitsi bajaraponëbejejavabelia:

—¿Payapëtanemebeje tsaja tanecaëjëpaecuene patacaitaxutoxanepanaeja exanaejavanexabeje? jai Jesús bitso pitaxutotsëcënaenëbejejavabelia.

Nexata bitso pitaxutotsëcënaenëbeje jumaitsibeje Jesúsjavabelia:

—Jājā, payapëtanijibeje cajena, jaiibeje.

²⁹ Nexata Jesús itaxutojayata bitso pitaxutotsëcënaenëbeje. Jesús jumaitsi bitso pitaxutotsëcënaenëbejejavabelia:

—Pacuenia baja xanëjavaberena nesivanajamatabëcuene copatsiaya panesivanajamatabëxainamebeje patacaitaxutoxaniavaetsinexabeje, bajarapacuenia pacatoexanatsibeje, jai Jesús.

³⁰ Nexata bitso pitaxutotsëcënaenëmibeje itaxutoxanepanabeje baja. Bajaraxuacujinae Jesús asaëya jumeitaveta bajaraponëbeje. Jumaitsi:

—Pëtsa panavajunupaebamebeje itsamonaejavabelia patacaitaxutoxaniavaetsijavabeje, jai Jesús.

³¹ Itsiata saya ajena bajarapabovecua pitsapaliabeje, navajunupaebaponabeje. Pacuenia Jesús itaxutoxaniavaetatsibeje, navajunupaebaponabeje daxita bajarapanacuajava.

Pacuenia Jesús natsipaëbiaexana apo pecuaicuaijainëmi yabara pelivaisi

³² Itsa baja bovecua pitsapabeje ponëbeje Jesús itaxutoxanepanaeyaexana, bitso pitaxutotsëcënaenëmibeje, nexata icatsia itsamonae Jesús tocaparenatsi apo pecuaicuai-jainë. Bajaraponë dovathi peyajavaponaponae. ³³ Nexata apo pecuaicuaijainë Jesús dovathi itsa vecuacapsapa, cuaicuajai baja xaniavaetsia. Nexata petaevitsi bitso jamatabëcuenenabenajaca. Najumaitsi bajarapamonae:

—Caeto ata cajena Israel nacuata itsajivi ata apo tae mapitsicueje, najai bajarapamonae.

³⁴ Itsiata baitsi jane fariseovi jamatabëcuenenavëxaniabiaya jumaitsi Jesús yabara:

—Mara ponëje dovathi jivivecua capitsapabiaba dovathivi pepo penamatacaitorobinë pesaëta, jai fariseovi Jesús yabara.

Pacuenia Jesús itaxutotsiatane jivi yabara pelivaisi

³⁵ Jesús najetaruca daxita tomaranëjava, tsiquiritomaraxijava ata. Nexata bajarapatomaranëjava judiovi penacaetuatabiabinonëjava pexanialivaisi Jesús jivi tsipaebanajetaruca. Tsipaebanajetaruca daxita Dioso pijajivi pevetsijavanexa. Piavitanevi ata Jesús jamatejemayaexanapona, daxitaviriavitane pexinaevimi. ³⁶ Jesús jivi itsa tane, itaxutobejibiatane. Tsipaji jivi bitso baja cajena cuerana. Apo caëjëpaetsinua jivi penatoexanaexa itsacueñjavayo ata. Jesús jivi sivajamatabëjumaitsi mapacueniaje:

—Pacuenia itsi ovejabitsaëtoxaneto itsa toajibitsi pevetsinëtsi, bajara itsi mapamonaeje, sivajamatabëjai Jesús.

³⁷ Nexata Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Pabita peubijava penaveretsijava abaxë bitso ayajjava sajina penotsinexa. Tsipaji saya caejiviyobeje penotsivi. Bajara pijinia itsi jivi ata Diosojavabelia penajamatabëcopabivinexa. Abaxë sajina ayaibitsaëtoxaneto. Itsiata baitsi jane Dioso panetonacuenebivi pacaëjiviyomëbeje saya. ³⁸ Bajaraxuata Diosojavabelia pavajëcabiabare icatsia itsamonae Dioso pijajivi pitorobinexa papecayavenonaeñexa, jai Jesús pijajivijavabelia.

10

Pacuenia Jesús pijajivi ayaibitsaëtoxanetoyajuvënëvi itapeta saya doce ponëbeje apóstolevinexa yabara pelivaisi

(Mr 3.13-19; Lc 6.12-16)

¹ Jesús pijajivi ayaibitsaëtoxanetoyajuvënëvi junata saya doce ponëbeje Jesús pëbarënaeacuatuinexa. Jesús pijajivi pecaëjëpaejamatabëcuenetsi jamatabëcuenecaëjëpaeyaexana dovathi peyajavajinavanapaevi pevucacapsapaponaenexa, pejamatejemayaexanaponaenexanua daxitaviriavitane pecapunaevitsi.

² Mara doce ponëbeje Jesús pijajivi, apóstolevi, pevënëñeje. Itsanë pevënë Simón. Itsavënë bajaraponë Pedro. Itsanë pevënë Andrés, Simón pejuyapijinë. Itsanëbeje pijinia Santiagobeje Juanbeje nacaebananëbeje, Zebedeo pexënatobeje. ³ Itsanë pevënë Felipe. Itsanë Bartolomé. Itsanë Tomás. Itsanë Mateo, impuestomatamo gobiernone pejamatabëcuene jivijavabelia petomatamoyanijobinëmi. Itsanë pevënë Santiago, Alfeo pexëñato. Itsanë pevënë Lebeo. Bajaraponë itsavënë Tadeo. ⁴ Itsanë Simón, celotenë. Itsanë pevënë Judas Iscariote. Bajaraponë bexëjavabelia canajetsijitsiatsi Jesús pijavajabitsaë pecobeyabelia pebeyaxuabinexatsi.

Pacuenia Jesús pijajivi itoroba Dioso pitorobilivaisi jivi petsipaebanajetarubenaenexa yabara pelivaisi

(Mr 6.7-13; Lc 9.1-6)

⁵ Jesús pijajivi pitorobivajënaeya jumaitsi pijajivijavabelia mapacueniaje:

—Pëtsa paponame apo judiovi pijanacuayabelia. Pëtsa paponame Samaria nacuata pënaetomaranëjavabelia ata. ⁶ Paponare jane Israel nacuapijivijavabelia. Pacuenia ovejabitsaëtoxaneto pevetsinëtsi vecuanaxuabavanapa, bajara pijinia pacuenia Israel nacuapijivi Diosovecua naxuabavanapa. ⁷ Patsipaebanajetarubenaename bajarapamonae imoxoyo baja pevajënae pecopiapatsijavanexa Dioso pijajivi pevetsimatacabinexa. ⁸ Pajamatejemayaexanaponaenamenua piavitanevi. Pasaëyaexanaponaenamenua petëpaevimi ata. Pajamatejemayaexanaponaenamenua bajayajebi bitso peperabëtsabanaevi. Pevucacapsapaponaenamenua dovathi peyajavajinavanapaevi. Amoneya raja pacaëjëpaeyaexanatsi bajarapacuenia paneexanaponaenexa. Bajaraxuata amoneya jivi pajamatejemayaexanaponaenename. Pëtsa pamatamoyanijobame panejamatejemaya exanaejamatabëcuene, jai Jesús pijajivijavabelia pitorobivajënaeya.

⁹ Jesús icatsia jumaitsi pijajivijavabelia pitorobivajënaeya:

—Panijanamutonexa pëtsa pacaponame palata. ¹⁰ Pëtsa pacaponame panijadoro ata. Saya pajumaponaenename caenaxatatsi. Panenataxuxatatsijava ata, pataxunaponaenename

caejava. Naeboyo ata pëtsa pacaponame. Pamonaejavabelia livaisi patsipaebianame, pacarajutsiana panexaejava. Bajarapacuenia pacarajutsiana tsipaji pajivi xaniavaetsia itsanëjavabelia tonacueneba, bajarapajivi juya pexaejava barajutatsi.

¹¹ Itsa papatabiabianame pinijitomarata, tsiquiritomarayojavata ata, bajarajota pajitabiabianame ponë peyayataenëtsi. Nexata bajaraponë pijabota pamajitabiabianame. Pëtsa panatixitaponame itsaboyabelia panemajitsinexa. Matapania icatsia itsajavabelia itsa paponaname, bajarapabovecua papitsapaename. ¹² Itsa pabota papatsijitsiamë, ajena pajonejitsiamëlia, pajumaitsimë tsabiabi tsane: “Diosojavabelia raja pacatovajëtsijitsiatsi xaniavaetsia panejinavanapaenexa,” pajamë tsabiabi tsane. ¹³ Itsa bajarapabopijivi pacacopiapitsiana xaniavaetsia, nexata pacuenia Diosojavabelia patovajëtime, yavenonaenatsi Dioso. Itsiata baitsi jane itsa apo pacacopiapitsi tsane xaniavaetsia, nexata pëtsa patovajëtime Diosojavabelia peyavenonaenexatsi. ¹⁴ Itsa apo pacacopiapitsi tsane, itsa apo jitsipaenua tsane papecanamuxunaevetsinexa panetsipaebilivaisi, bajarapabo pavecuaaponaname. Bajarapatomara ata baja pavecuaaponaname. Nexata baja itsa paponaejitsiamë bajarapatomaravecua, paneponaejavënae, bajarapatomarata panataxuatsapërevërbianame. Bajarapacuenia itsa panataxuatsapërevërbianame, bajarapatomarapijivi yapëtaena Diosojavabelia penaneconitsicuene apo papecacopiapitsixae papecanamuxunaevetsinexa panetsipaebilivaisi. ¹⁵ Xaniajanë pacuenia pacatsipaebijitsiatsi. Pamatacabi Dioso naneconitsiaexanaena daxita pijaneconi pexinaeavi, bajarapamatacabi Dioso ayaicuenia naneconitsiaexanaenatsi patomarapijivi apo pacacopiapitsi tsane. Paneconivajëtota bajayata Dioso naneconitsiaexana Sodoma tomarapijivimi, Gomorra tomarapijivimi ata, bajarapanconivajëto matatoxenetsia itsamatacabi Dioso naneconitsiaexanaena patomarapijivi apo pacacopiapitsi tsane, jai Jesús pijajivijavabelia pitorobivajënaeya.

Pacuenia Jesús pijajivi bejiobiaexanaejitsiatsi yabara pelivaisi

¹⁶ Icatsia Jesús jumaitsi pijajivijavabelia:

—¡Xania panayajivitaename! Pacaitorobianatsi raja bitso pibisiacuene pexanabiabivijavabelia. Pacuenia ovejaxi tsiyayitsi itsa jinavanapa pianaepanaevi nevëthë tuatuajëata, bajarapaitsimë tsane. Nexata pacuenia unupijivi nayajivitaeyajinavanapa pitsacueniabiyanivatsi, bajara paitsimë tsane. Pacuenia ata ucucu aneconijibia jinavanapa, bajara paitsimë tsavanapae tsane. ¹⁷ Xania baja tsane. Patajajivixae më raja jivi pacaneconitsiana papecananeconitsiaexanaenexa. Nexata itsajota nacaetuatabiaba tomara pevetsivi, bajarabelia pacacaonaena. Judiovi penacaetuatabiabibonëjaya pacajumatitibabeyabiabiana penaneconitsivi pejumaconitabiabimacata. ¹⁸ Patajajivixae më pacanubiananua nacuaeetsivi pitabarata, presidentevi pitabarata ata. Bajarajota nexata xanë talivaisi patsipaebianame bajarapomonejavabelia, apo judiovi ata pitabarata. ¹⁹ Itsiata baitsi jane itsa pacanubiana nacuaeetsivi pitabarata, pëtsa pajamatabëbëjamë panenayajivicuaicuaijainexa bajarapomonejavabelia. Tsipaji raja paepatota panayajivicuaicuaijamëjitsia, bajarapaepatota Dioso pejamatabëcueneta pacacuaicuaijaiyaexanaena. ²⁰ Itsa panayajivicuaicuaijamë tsane, paxamë panijacuata apo pacuaicuaijamë tsane. Espiritu Santo raja pacacuaicuaijaiyaexanaena.

²¹ Itsamonae pematapijivi, pejuyapijivi ata, canajetsiana nacuaeetsivijavabelia pebeyaxuabinexatsi. Itsamonae naxocicanajetsiana nacuaeetsivijavabelia pebeyaxuabinexatsi. ²² Daxita nacuapijivi pacaitoya tsane patajajivixae më. Pajivi bejiobiaexanae atatsi tsane, itsiata itsa casaë tsaponaponae tsane tanejumecovënëtsijava, bajarapajivi capanepaenatsi Dioso pijanacuayabetsia. ²³ Itsa patomarata pacabejiobiaexanaena, bajarapatomaravecua parëcëpecaename itsatomarabelia. Xaniajanë pacuenia pacatsipaebijitsiatsi. Daxita Israel nacuata penaetomaranëjaya abaxë patsipaebiveretsinejevamë pexanialivaisi, xanë, Daxitajivi Pematapijinënë, itacarajeta icatsia patsianicajë.

²⁴ Itsajivi ata apo jamatabëcuenematatoxenetsi pecujarubinëtsi. Itsajivi ata pijinia itsanë itsa pijajivitonë, apo jamatabëcuenematatoxenetsi pijatuxanenë. ²⁵ Pacuenia pecujarubinë itsamonae copiaya bejiobiaexanatsi, bajarapacuenia icatsia bajaraponë pecujarubivi ata bejiobiaexanaenatsi. Pacuenia petuxanenë copiaya bejiobiaexanatsi, bajarapacuenia icatsia pijajivitonë ata cotocaevi bejiobiaexanaenatsi. Xanë panijatuxanenënë: “Beelzebú, daxita dovathivi pijatuxanenënë,” nejai tsabiabi itsamonae. Nexata pijinia patajajivixae më bitso pibisiavënëta paxamë ata cotocaevi pacajunatabiabiana, jai Jesús pijajivijavabelia.

Pacuenia Jesús pijajivi tsipaeba pecujnaviyanova pebeyaxubijavatsi yabara pelivaisi
(Lc 12.2-7)

²⁶ Icatsia Jesús jumaitsi pijajivijavabelia:

–Pëtsa pacujunavame jivi, pacaatiobi ata. Daxita xua jivi muetsia pibisiacuene exana, hexëajavabelia cueneyapëtaeponaenatsi daxitajivi. ²⁷ Palivaisianë muetsia vajaepatojavata pacatsipaebaponatsi, bajarapalivaisianë paxamë pinijijumeta patsipaebaponae name jivi penacaeuatabiabiavata. ²⁸ Pëtsa pacujunavame jivibeve ata. Bajarapamonae pacabeyaxuabi ata tsipae, acuenebi matavëjëa papecaitsacueniabinexa pepo panejamatabëcuenejavabelia. Biji rajane pacujunavare Dioso, ponë caëjëpatsi papecaxuabinexa infernojavabelia papecabeyaxuabicujinae.

²⁹ 'Anijanëbeje baratsuitobeje namatamota saya caepalatanëyo. Itsiata baitsi jane caenë ata baratsuito Dioso pepëya jemata muetsia apo jopaetsica petëpaenë. Tsipaji paneaxa, Dioso, asiva baratsui ata. ³⁰ Dioso cajena bitso pacaasiva baratsui matatoxenetsia. Nexata panematanatoxi ata, caematanatoyo canacujitsia, Dioso namatajëta. ³¹ Bajaraxuata pëtsa pacujunavame itsacuenejavayo ata. Tsipaji paxamë Dioso bitso pacaasiva baratsuitoxi matatoxenetsia, jai Jesús pijajivijavabelia.

Pacuenia Jesús pijajivi apo benayavajunuaxainae Jesús pijajivicuene yabara pelivaisi (Lc 12.8-9)

³² Icatsia Jesús jumaitsi pijajivijavabelia:

–Daxita pamonaë tajajivi, jivi pitabarata itsa navajunupaebiana tajajivicuene, xanë ata vajunupaebianajë bajarapamonae tajajivicuene taxa, athëbëtatsia peecaenëjavabelia. ³³ Pamonaë jumai tsane itsamonaejavabelia: “Xanë cajena Jesús apo pijajivitonënë,” jai tsane, nexata pijinia bajarapamonae yabara xanë jumaitsinë tsane taxa Diosojavabelia: “Mara pamonaë apo tajajivije,” janë tsane, jai Jesús pijajivijavabelia.

Pacuenia Jesús apo penajuajumecovënëtsixae, nacaemonaë ata apo najamatabëcuenejëpae tsane yabara pelivaisi

(Lc 12.51-53; 14.26-27)

³⁴ Icatsia Jesús jumaitsi pijajivijavabelia:

–Pëtsa panesivajamatabëjumaitsimë mapacueniaje: “Jesús rabaja patsica mapanacuayabetsicaje daxitajivi mapanacuataje najamatabëcuenejëpaeya pejinavana-paeyaexanaenexa,” panesivajamatabëjamë pëtsa. Bajaraxuanexa apo patsinëtsica. Biji rajane xanë tapatsixaetsica mapanacuayabetsicaje, jivi itsa nejumecovënëtsiana, apo najamatabëcuenejëpae tsane pamonaëjavabelia apo nejumecovënëtsi, nacaemonaë ata. Napijavajabitsaë tsane namataenetsia. ³⁵ Xanë apo tanenajuajumecovënëtsixaebeje, pebibeeje paxabeje apo najamatabëcuenejëpaebeje tsane. Petirivabeje ata, pexënatoyobeje xanë apo tanenajuajumecovënëtsixae penabeje apo najamatabëcuenejëpaebeje tsane. Pamebeje ata pecopenabeje apo najamatabëcuenejëpaebeje tsane. ³⁶ Nexata xanë apo tanenajuajumecovënëtsixae, caejivi canacujitsia bepijavajabitsaëjivi taenatsi pijamonaejivi ata.

³⁷ 'Pajivi nejumecovënëtsi ata, apo niasiva tsane paxa, pena ata, piasivajava matatoxenetsia, bajarapajivi apo tajajivi tsane. Pajivi nejumecovënëtsi ata, apo niasiva tsane pexënatoyobeje, pexënatoyo ata, piasivajava matatoxenetsia, bajarapajivi apo tajajivi tsane. ³⁸ Pajivi nejumecovënëtsi ata, pecajunavi apo nepënaponaë tsane pebeyaxuabixaejitsiatsi xanë tajumelivaisi yabara, bajarapajivi apo tajajivi tsane. ³⁹ Pajivi nayavajunuaxaina tajajivicuene pebejioxiaexanaeyanivatsi, pebeyaxuabiyaniavatsinua, bajarapajivi naxuabi-ana daxitamatabijavabelianexa. Itsiata baitsi jane pajivi beyaxuabatsi tajajivixae, bajarapajivi daxitamatabijavabelianexa Dioso capanepaenatsi, jai Jesús pijajivijavabelia.

Pacuenia Dioso matamotsijitsiatsi pamonaë xaniavaetsia copiapita Jesús pijajivi yabara pelivaisi

(Mr 9.41)

⁴⁰ Icatsia Jesús jumaitsi pijajivijavabelia:

–Pajivi pacacopiapitsiana patajajivixae, bajaraxua xanë taniji tanecopiapitsijava. Pajivi necopiapitsiana, bajaraxua taxa Dioso tane pecopiapitsijavatsi. ⁴¹ Diosojumepaëbinë Dioso matamotsianatsi petonacuenebimatamo. Nexata pajivi xaniavaetsia copiapita Diosojumepaëbinë, bajarapajivi ata Dioso matamotsianatsi. Nexata xuavajëto Diosojumepaëbinë Dioso matamotsianatsi, bajara pijinia xuavajëto Dioso matamotsianatsi pajivi copiapita Diosojumepaëbinë. Pajivi ata exanabiaba Dioso pitorobicueniatsi, bajarapajivi ata Dioso matamotsianatsi. Nexata pajivi xaniavaetsia copiapita pajivi exanaponapona Dioso pitorobicueniatsi, bajarapajivi ata Dioso matamotsianatsi. Nexata xuavajëto Dioso matamotsianatsi pajivi exanaponapona Dioso pitorobicueniatsi, bajara pijinia xuavajëto bajarapajivi Dioso matamotsianatsi.

⁴² Pajivi yavenonaëna tajajivi, tsiquirijavayo ata mera rajutsiana piapaenexa, bajarapajivi pepacuene matamotsianatsi Dioso, jai Jesús pijajivijavabelia.

11

Pacuenia Juan jivibautisabinē itoroba pijajiviyajuvēnēvi Jesúsjavabelia yabara pelivaisi (Lc 7.18-35)

¹ Jesús baja najumevereta pijajivi doce ponēbejejavabelia livaisi petsipaebijava. Nexata baja Jesús pona livaisi petsipaebinexa bajarapanacuata penaetomaranējava.

² Bajarapamatacabi Juan jivibautisabinē naneconitsiaponapona penaneconitsivi pejebabibibota. Nexata Juan venēlivaisitane Dioso pesaēta Jesús pinijicueene pexanaponaējava. Bajaraxuata Juan itoroba pijajiviyajuvēnēvi Jesúsjavabelia. ³ Juan itoroba pijajivi peyanijobinexa Jesúsjavabelia. Nexata Juan pijajivi jumaiti Jesúsjavabelia:

—¿Xamē tsabaja Cristomē? ¿Xamē tsabaja tajēvelia cavajunupaebapona nepatsijavanexatsica daxitajivi necapanepaenexa? Itsa apo Cristomē, ¿abaxē tsaja pacopiaevetavanapaenajē itsanē pepatsinexatsica? jai Juan pijajivi Jesúsjavabelia.

⁴ Nexata Jesús jumaiti Juan pijajivijavabelia:

—Paponare baja. Patsipaebianame Juan pacuenia baja pataneme taexanaponaējava. Patsipaebianamenua pacuenia baja pajumetaneme tatsipaebilivaisi jivijavabelia. ⁵ Apo petaevimi ata itaxutoxaniavaetaponajē xaniavaetsia petaenexa. Petabusipacuenabivitsinua daxita jinavanapaeyaexanaponajē. Bajayajebi bitso peperabētsabanaevinua vecuaajibiaexanaponajē. Bitso pemuxusipanaevinua jumetaeyaexanaponajē baja xaniavaetsia pejumetaenexa. Petēpaevimi ata icatsia asaēyaexanaponajē. Pexanialivaisinua pecapanepaelivaisinexatsi pibisiacueene pexanaeneconimivecua tsipaebaponajē bepejio-bivijavabelia. Daxita bajaraxua taexanaponaējava patanetaejavamē, patsipaebianame Juanjavabelia. ⁶ Pajumaitisimēnuu tsane Juanjavabelia: “Jesús raja jumaiti: ‘Jamatabēcuenebarēya pajivi tsiteca jumecovēnēta xanē Dioso pexēnatocuenenē, jai raja Jesús,’ pajamē tsane Juanjavabelia, jai Jesús Juan pijajivijavabelia.

⁷ Itsa baja Juan pijajivi naviabalia, nexata bajarapamonaē pecovēta Jesús taxuxuaba jivijavabelia petsipaebijava Juan pelivaisi. Jesús jumaiti jivijavabelia mapacueniaje:

—Itsa paponame petusato nacuyabelia, pamatacabi Juan ponapona petusato nacuata, ¿detsa pitsicueene pajamatabēnaponaremelia panetaenexa bajarajotala? ¿Paponaremelia tsaja saya panetaenexa musuli penajēabijava jovibota? ⁸ Itsa apo paponamēlia panetaenexa musuli penajēabijava jovibota, ¿detsa nexata pitsicueene panetaenexa paponaremelia? ¿Paponaremelia tsaja saya panetaenexa naitabētsiaya pexaniajava penaxatatsinē? Paxamē rabaja payapētaneme mapacuenieje. Pamonae naitabētsiaya pexaniajava naxatababiaba, bajarapamonaē jinavanapa nacuanē pevetsivi pijabonējava. ⁹ ¿Detsa nexata xua pajamatabēnaponaremelia panetaenexa petusato nacuyabelia? Paponaremelia raja panetaenexa Diosojumepaebinē profetanē. Xaniajanē pacuenia pacatsipaebijitsiatsi. Juan itsa pataneme, pepacueene jane baja pepo profetanē, Diosojumepaebinē, pataneme. Nexata saya bevelia profetanē apo pataemē. ¹⁰ Juan pexanaejavanexa, bajayata tajēvelia Dioso pejumelivaisibaxutota vajunupaeba. Dioso tanejumaitisijava ata xanējavaberena Juan yabara, Dioso pejumelivaisibaxutota jumaiti mapacueniaje:

Itorobianajē nevajēnaeyabelia tanejumelivaisipaebinēnexa, jivi pecatsivajēnae najamatabēcuenexaniavaetsinexa, jai bajayata Dioso pejumelivaisibaxutota tapatsivajēnaeya Juan tanelivaisi paebanajetarucaejavanexa yabara.

¹¹ Xaniajanē pacuenia pacatsipaebijitsiatsi. Juan ayaijamatabēcuenenē mapanacuataje. Nexata bajayata Juan pevajēnaeya paprofetavi jinavanapa, itsanē ata Juan apo jamatabēcuenematatoxenetsitsi. Itsiata baitsi jane pajivi beveliajamatabēcuenejivi ata, itsa nejumecovēnēta tacapanepaejavanexa, bajarapajivi ayaijamatabēcuenejivi Dioso exanaenatsi Juan matatoxenetsia.

¹² Juan jivibautisabinē petaxuxuabijavaveliacujinae, Dioso pitorobilivaisi jivi petsipae-banajetarucaejava mapamatacabijavaberena ataje, ayabitsaētoxaneto picani jivi jitsipa Dioso pitorobilivaisi pejumecovēnētsinexa. Itsiata itsamonae pesaēta caranapona bajarapamonaē pejumecovēnētsiyaniva Dioso pitorobilivaisi. ¹³ Juan penaexanaevajēnaeya, daxita Diosojumepaebivimi profetavi tajēvelia vajunupaebapona itsamatacabi Dioso pijajivi pevetsijavanexa. Dioso Moiséspijinēta penajumecopatsilivaisi ata, tajēvelia vajunupaeba Dioso pijajivi pevetsijavanexa. ¹⁴ Itsa baja jamatabēpajumecovēnētame, pajumecovēnēre xua aeconoxae pacatsipaebijitsiatsi. Dioso pejumelivaisibaxutota tajēvelia jumaiti mapacueniaje: “Eliaspijinē icatsia patsiana,” jai. Bajarapacuenia tajēvelia itsa jumaiti, Juan jivibautisabinē yabara jumaiti. Tsipaji pacuenia jamatabēcueneitsi profeta Eliaspijinē, bajara jamatabēcueneitsi Juan ata. Nexata Juan pepatsivajēnaeya, tajēvelia yapētanetsi pacuenia Juan exanaejitsia. ¹⁵ Pajivi jamatabēnejumeyapētane patacatsipaebilivaisi, nenamuxunaevetsi xaniavaetsia, jai Jesús jivijavabelia.

¹⁶ Jesús icatsia jumaitsi jivijavabelia:

—¿Detsa meta pacuenia yapêtaeyaexanaenajê itsamonaejavabelia bajarapamonae xaniavaetsia papecayapêtaenaexa pacuenia paxamê pajamatabêcueneitsimê tsavanapae? Jumaitsinê meta tsane paxamê yabara mapacueniaje: “Bajarapamonae abaxê saya bepejevaxijivixi, pajivixi tomara tuatuajêjava banamuxusitenavanapa. Pejevaxijivixi itsa namuxusitenavanapa, bavavajai tsenae penajua namuxusitenaevijavabelia.
¹⁷ Pevavajajavata bajumaitsi: “Pacatoobecatsi picani flauta. Itsiata apo payavajibimê. Pacatonaxêanecatsi picani penemuxunanuevajinexa ata. Itsiata apo panuemê, bajai tsenae pejevaxi penajua namuxusitenaevijavabelia. Bajara saya jamatabêcueneitsi pamonae aeconoxae jinavanapa mapanacotaje,” janê meta tsane paxamê yabara. ¹⁸ Juan jivibautisabinê Dioso pitorobilivaisi jivi tsipaebanajetaruca. Pexaejava itsajavata apo xaeyabiabi, pamatacabibeje Diosojavabelia vajêtaona. Vinora ata apo apaeyabiabi. Nexata bajaraponê yabara jamatabêcuenenavêxaniabiaya pajumaitsimê tsabiabi: “¡Juan raja dovathi yajavaponapona!” pajamê tsabiabi jamatabêcuenenavêxaniabiaya. ¹⁹ Bajaraxuacujinae icatsia xanê, Daxitajivi Pematapijinênê, najetarucajê. Itaxutojema xaniji. Matavêjêa apaeyabiabajêna. Nexata xanê yabara icatsia jamatabêcuenenavêxaniabiaya pajumaitsimê tsabiabi: “¡Pataema maponêjel! Ayajjava xaeyabiaba. Ayaira matavêjêa apaeyabiabanua piaitajibinexa. Barênajamatabêcuenejêpanua gobierno pejamatabêcuene impuestomatamo pematamoyanijobabiabivi. Pamonae ata piagamatabêcuenebejevi, barênajamatabêcuenejêpa,” pajamê tsabiabi xanê yabara. Itsiata baitsi jane xuanê paxanêbeje Juanbeje paexanaponajêbeje, bajaraxuanê Dioso pejamatabêcueneta pataxanaejabeje itsamonaex xaniavaetsia yapêtaena. Nexata daxita bajarapamonae yapêtaena pacuenia Dioso paneyapêtaeyaexanabeje pepacuene pepo pexaniajaijamatabêcuene, jai Jesús mapacueniaje jivijavabelia.

Pacuenia Jesús jumaitsi patomarapijivijavabelia apo jumecovênêtsitsi yabara pelivaisi (Lc 10.13-15)

²⁰ Itsatomaranêjava Dioso pesaêta Jesús pinijicuene pexanaejavanê navitsia exanapona. Itsiata bajarapatomaranêpijivi apo copabi pibisiacuene pexanabiabijava. Apo namatabêcuenepênêyorotsi Diosojavabelia. Nexata Jesús ajumesaêya jumaitsi bajara patomaranêpijivijavabelia:

²¹ ¡Bitso bepajobimê tsane paCorazín tomarapijivimê! ¡Bitso bepajobimê tsane paBetsaida tomarapijivimê ata! Pinijicuene Dioso pesaêta taexanaejavanê patae atamê, itsiata apo panejumecovênêtsimê. Apo pacopabimê pibisiacuene paneexanabiabijava. Apo panajamatabêcuenepênêyorotsimê Diosojavabelia. Bajayata Tiro tomarapijivimi, Sidón tomarapijivimi ata, petuatuajêta bajarapitsipinijicuene itsa tsitaexanaejitsipajê, nexata bajarapamonaemi copabijitsipa pibisiacuene pexanaejava. Najamatabêcuenepênêyorotsipa Diosojavabelia. Bajarapamonaemi nexata pibisiacuene pexanabiabineconi bitso yajamatabêcuenebêjai tsipae. Nexata Diosojavabelia petsitanajamatabêcueneitajêtsinexa peyajamatabêcuenebêjajava pibisiacuene pexanabiabineconi, naxatabijitsipa piayopapaêbêrêjavanê. Enaejitsipa irata. Ipumana ata natsimataothocaejitsipa bitso peyajamatabêcuenebêjaixae pibisiacuene pexanabiabineconi. ²² Xaniajanê pacuenia pacatsipaebijitsiatsi. PaCorazín tomarapijivimê, paBetsaida tomarapijivimê ata, patae atamê pinijicuene Dioso pesaêta taexanaejavanê, apo panejumecovênêtsimê. Nexata pamatacabi Dioso naneconitsiaexanaena daxita pijaneconi pexainaevi, bajarapamatacabi bitso ayacuena Dioso pacananeconitsiaexanaena. Paneconivajêtota bajayata Dioso naneconitsiaexana Tiro tomarapijivimi, Sidón tomarapijivimi ata, bajarapaneconivajêto matatoxenetsia Dioso bitso ayacuena pacananeconitsiaexanaena. ²³ Paxamê paCapernaum tomarapijivimê, jamatabêcuenenavêxaniabiaya pajamatabêjumaitsimê tsabiabi: “Vaxaitsi cajena ayajamatabêcuenevitsi. Nexata Dioso nacacapanepaena athêbêabetsia,” pajamatabêjamê tsabiabi. Itsiata baitsi jane athêbêabetsia Dioso apo pacacapanepae tsane. Dioso raja pacaxuabiana infernojavabelia apo patanejumecovênêtsixaemê. Bajayata Sodoma tomarapijivimijavata itsa exanaejitsipajê Dioso pesaêta pinijicuene taexanaejava, pacuenia paxamêjavata exanaponajê, nexata Sodoma tomarapijivimi copabijitsipa pibisiacuene pexanaejava. Najamatabêcuenepênêyorotsipa Diosojavabelia. Nexata bajarapamonae Dioso apo verebiabi tsipaetsi pibisiacuene pexanaeconi yabara. Nexata abaxê mapamatacabi ataje jivi jinavanapaejitsipa bajarapatomarata. ²⁴ Xaniajanê pacuenia pacatsipaebijitsiatsi. Pamatacabi Dioso naneconitsiaexanaena pijaneconi pexainaevi, ayacuena Dioso pacananeconitsiaexanaena. Tspaji Dioso pesaêta navitsia pinijicuene taexanaponejava patae atamê, apo panejumecovênêtsimê. Nexata Sodoma

tomarapijivimi matatoxenetsia Dioso bitso ayaicuenia pacananeconitsiaexanaena, jai Jesús patomarapijivijavabelia apo jumecovênétsitsi.

Pacuenia Jesús pijajivi junata pejamatabêcuenesaëyaexanaenexa pejamatabêcuenecueranaëjavavecua yabara pelivaisi
(Lc 10.21-22)

²⁵ Jesús pevajêtsijavata paxa Diosojavabelia jumaitsi:

—Axa, nevetsinë athêbêtatsi. Nevetsinë mapanacuajava ataje. “Ayaijamatabêcuenenêmê bitso,” cajaitsi. Tspiji pamonaë bitso apo penacujarubivi ata, yapêtaeyaxanaenane nevetsijavanexa daxita nijajivi mapanacuataje. Bajarapamonaë yapêtaeyaxanaenane pex-anialivaisi, xanê talivaisi, palivaisi vecumatayatatame bitso peyapêtaevi mapanacuapijilivaisije. Bajarapalivaisi vecumatayatatame bitso penacujarubivi ata mapanacuapijicueneyabaraaje. ²⁶ Bajarapacuenia exaname tspiji baja exaname nejitsipaecuenia, jai Jesús paxa Diosojavabelia pevajêtsijavata.

²⁷ Icatsia Jesús jumaitsi pijajivijavabelia:

—Taxa Dioso baja cajena netocopata tayapêtaenexa daxitacuene. Itsajivi ata apo nejamatabêcueneyapêtaë pacuenia xanê jamatabêcuenetsinë, Dioso pexênatonê. Caenê taxa Dioso nejamatabêcueneyapêtane. Itsajivi ata apo jamatabêcueneyapêtaë pacuenia taxa Dioso jamatabêcuenetsi. Caenê xanê, pexênatonê, jamatabêcueneyapêtaniji. Pamonaë tojitsipajê tayapêtaeyaxanaenexa pacuenia taxa Dioso jamatabêcuenetsi, bajarapamonaë ata yapêtaeyaxanaponaenajê. ²⁸ Pabita penacuenebabiabinê, piarevejava pejotabiabinê, bitso bavemaxêcuerana. Bajara pijinia pacuenia paxamê ata bitso itsa pajamatabêcuenecueraname pibisiacuene paneexanabiabijava yabara, xanêjavaberena paponare paneajamatabêcuenesaënexa icatsia. ²⁹ Bueyubeje banavêsjumacaevetabeje pet-sivêsjumabuatsinexatsibeje yugovênêjava penacuenebinxabeje. Bajara pijinia pacuenia paxamê ata panajamatabêcuenecaevere patacatsijamatabêcuenebuatsinexa patacatsipaebilivaisi. Panejumecovênêtsianame pacuenia pacaitorobatsi patanetonacuenebinxamê. Nexta panevajênayaelia panejamatabêcueneyapêtaëponaenane. Tspiji xanê xaniavaetsia pacatsipaebaponaenatsi. Xanê beayaijamatabêcuenenê apo nataenê. Nexata bajarajota panajamatabêcueneevetsianame paneajamatabêcuenesaënexa icatsia. ³⁰ Pacuenia bueyu tsivêsjumabuatsi yugovênêjava petoyapêxanepanaenexatsi penacuenebijava, bajara pijinia pacuenia paxamê ata pacatoyapêxanepanaeyaxanaenatsi paneexanaenexa xua pacaitorobijitsiatsi, jai Jesús pijajivijavabelia.

12

Pacuenia Jesús pijajivi trigoxu namutua siricanajetarubena penacueraevetsimatocabita yabara pelivaisi
(Mr 2.23-28; Lc 6.1-5)

¹ Judiövi penacueraevetsimatocabita Jesús, pijajivi yajava, najetaruca trigo pabianêjava. Jesús pijajivi bitso piajani. Nexata trigoxu siricanajetarubena. Xuxaeyabuatapona. ² Nexata fariseövi tane Jesús pijajivi pesiricanajetarubenaëjava trigoxu. Nexata fariseövi jumaitsi Jesúsjavabelia:

—Taema mapamonaëje. Dioso Moiséspijinêta penajumecopatsilivaisi vajanacaitavetsicueni nijajivi exana. Apo nacaitavetsi ata trigoxu vajaxaëjava, itsiata ajena penacueraevetsimatocabixae, nijajivi apo hexanaë mapacueneye, jai fariseövi Jesúsjavabelia.

³ Nexata Jesús jumaitsi fariseovijavabelia:

—Ajena, penacueraevetsimatocabita, tajajivi bajarapacuenia exanaë ata, itsiata apo pibisiacuene. Tspiji bitso piajani. ¿Apo palebimê tspiji Dioso pejumelivaisibaxuto paneyapêtaenexa pacuenia vajasalinainê Davidpijinê, pebarêponaevi yajava, exana pamatacabi bitso piajani? ⁴ Davidpijinê joneya Dioso pijatemploboyalia. Nexata Dioso pijatemplobonêta, mesajumata, bobena Diosonexa ofrendacuena petojebipanbêanê. Bajarapanbêanê apo tocopatsitsi picani Davidpijinê, pijajivi ata, pexaenexa penaneconitsiyaniava Diosojavabelia. Êsacerdotevi picani tocopatatsi pexaenexa. Davidpijinê apo sacerdotenê ata, pijajivi barêxae ata bajarapanbêanê, itsiata apo vënananeconitsi Diosojavabelia. ⁵ ¿Apo palebimê tspiji Dioso Moiséspijinêta penajumecopatsilivaisi paneyapêtaenexa pacuenia jumaitsi sacerdotevi yabara? Sacerdotevi templobota penacuenebivi, penacueraevetsimatocabita ata apo nacueraevetabiabi. Penacueraevetsimatocabita sacerdotevi nacuenebabiabi ata templobota, itsiata apo naneconitsi Diosojavabelia. ⁶ Xanê cajena ayaijamatabêcuenenê. Nexata Dioso netojitsipa jivi taneyaiyataenexa temploba matatoxenetsia. ⁷ Dioso pejumelivaisibaxutota jumaitsi mapacueniaje: “Jitsipajê paneitaxutotsoniataenexa itsamonae ata. Apo jitsipañê cajena saya patanetobeyabiabinexamê dajubicuene ofrendacuena patanerajutabiabinexamê,” jai Dioso pejumelivaisibaxutota.

Xua yabara jumaiti bajarapacuenia, apo pajumeyapëtaemë baja cajena. Tsipaji itsa pajumeyapëtaejitsipame xua yabara jumaiti, nexata tajajivi ata paitaxutotsoniataejitsipame. Nexata tajajivi trigoxu pexaejava yabara apo panejumaitsimë tsipae: “Dioso Moiséspijinëta penajumecopatsilivaisi vajanacaitavetsicuene nijajivi exanapona,” apo panejamë tsipae. Tsjipaji tajajivi apo naneconitsi Diosojavabelia. Tsjipaji tajajivi bitso pijaianixae, trigoxu xane. ⁸ Nexata xanë, Daxitajivi Pematapijinënë, netoxanepana cajena tatsipaebinxae xua xanepana jivi pexanaenexa penacueraevetsimatacabita ata, jai Jesús mapacueniaje fariseovijavabelia trigu pabianëjavata.

Pacuenia Jesús jamatejemayaexana pebi pecobetsaquenaenë yabara pelivaisi
(Mr 3.1-6; Lc 6.6-11)

⁹ Trigo pabianëjavata Jesús livaisi petsipaebicujinae fariseovijavabelia, Jesús baja vecuapona pabianë. Nexata Jesús joneya judíovi penacaeuatabiabiboyalia. ¹⁰ Nexata bajara-jota pebi naeca, pecobetsaquenaenë. Itsamonae fariseovi bajarajota jamatabëneconitatsi Jesús. Nexata Jesús naitaxutocaevetatsi xua yabara neconitsijitsiatsi. Nexata fariseovi Jesús jamatabëcuenejëbiaya yanijobatsi mapacueniaje.

—¿Vajanacueraevetsimatacabita ata tsaja xanepana piavitanevi vajajamatejemayaex-anaenexa? jai fariseovi Jesúsjavabelia.

¹¹ Jesús nexata jumaiti fariseovijavabelia:

—Paxamëyajuvënëvi pijaoveja itsa tojopaejitsiparecatsi meramëthëareca, penacueraevetsimatacabita ata ponaejitsipa. Nexata jutsipaina pijaoveja. ¿Baja tsabaitsi jane? ¹² ¡Biji ra jivitonë bitso namatamota oveja matatoxenetsia! Bajaraxuata itsiata nacatoxanepana vajaexanaenexa pexaniacuene vajanacueraevetsimatacabita ata, jai Jesús fariseovijavabelia.

¹³ Nexata Jesús jumaiti pecobetsaquenaenëjavabelia:

—Namaxërovire, jai Jesús.

Itsa bajaraponë namaxërovita, pacuenia itsanenai cobeitsi, bajara cobeitsi. Cobexanepanareca baja. Pecobetsaquenaevajami baja ajibi. ¹⁴ Nexata fariseovi itsa tane Jesús pecobexanepanaeayaexanaejava pecobetsaquenaenë, fariseovi anaepana. Nexata pitsaparena judíovi penacaeuatabiabibovecua. Nexata jane baja fariseovi najumejaita Jesús pebeyaxuabinexatsi.

Pacuenia Diosojumepaebinë profetanë bajayatami tajëvelia vajunupaebatsi Jesús yabara pelivaisi

¹⁵ Jesús jamatabëcueneypëtane pacuenia fariseovi sivanajamatabëxainatsi. Jesús picani fariseovi jamatabëbeyaxuabatsi. Nexata baja Jesús bajarapamonae vecuapona itsajavabelia. Jivi ayaibitsaëttoxaneto Jesús pënaponatsi. Jesús nexata jamatejemayaexana daxita piavitanevi. ¹⁶ Jesús jumeitaveta bajarapamonae petsipaebiyaniya itsamonaejavabelia Jesús Dioso pexënatocuene. ¹⁷ Bajarapacuenia Jesús pejamatejemayaexanaevi itsa jumeitaveta petsipaebiyaniya itsamonaejavabelia, copiapata jane baja pacuenia bajayata Diosojumepaebinëmi profeta Isaíaspijinë tajëvelia jumaiti. Dioso pejumaitisijava Jesús yabara profeta Isaíaspijinë bajayata tajëvelia jumaiti mapacueniaje:

¹⁸ Maponë taitapetsinë, taitorobicuenia exanabiaba. Bajaraponë tasivanë. Sivajamatabëcuenebarëyanë. Espíritu Santo runaeyaexanaenicajë bajaraponë pematatsënëatsica. Bajaraponë apo judíovijavabelia tsipaebiana tananeconitsiaexanaevanexa daxita pibisiacuene pexanaevi. ¹⁹ Bajaraponë itsajivijavabelia ata apo jumeanaenotsi tsane. Livaisi itsa tsipaebapona, pinijijumeta apo vavajai tsane. ²⁰ Pamonae xanë tajumelivaisi pejumecovënëtsijava abaxë apo ajamatabëcuenesaë ata, itsiata bajaraponë bajarapamonae apo xuabi tsane. Capanepaena. Pamatacabi tocopiapatsianatsi bajaraponë pijajivi pevetsimatacabinexa, xaniavaetsia bajaraponë evetsiana daxita pijajivi. ²¹ Nexata daxitajivi, apo judíovi ata, sivanajamatabëcueneopatsianatsi bajaraponë pecapanepaenexa, jai bajayata tajëvelia profeta Isaíaspijinë Dioso pejumaitisijava Jesús yabara. Bajarapacuenia bajayata tajëvelia jumaiti Isaíaspijinë peyaquinaebaxutota.

Pacuenia itsamonae Jesús yabara jamatabëcuenenavëxaniabiaya jumaiti: “Beelzebú raja pesaëta Jesús dovathi jivivecua capitsapapona,” jai yabara pelivaisi

(Mr 3.20-30; Lc 11.14-23; 12.10)

²² Jesús tocapatatsi bitso pitaxutotscënaenë, apo penatsipaebinë. Bajaraponë dovathi yajavaponapona. Bajaraponë Jesús jamatejemayaexana. Xaniavaetsia baja nexata tane. Natsipaebanua baja. ²³ Jivi itsa tane Jesús pejamatejemayaexanaejava bajaraponë, jamatabëcuenenabenajaca. Nexata jivi najumaiti Jesús yabara:

—¿Matsaeta ponë Davidpijinë pemomoje, Dioso pitorobinëtsicaje? najai bajarapamonae Jesús yabara.

²⁴ Nexata fariseovi itsa jumetane bajarapacuenia jivi pejumaitsijava, fariseovi jumaiti jivijavabelia:

—Mara ponë Jesúsje, dovathi jivivecua capitsapabiaba Beelzebú pesaëta. Beelzebú raja daxita dovathivi pitorobinë, jai fariseovi jivijavabelia jamatabëcuenenavëxaniabiaya Jesús yabara.

²⁵ Jesús jamatabëcueneyapëtane pacuenia fariseovi sivanajamatabëxainatsi. Nexata Jesús jumaiti fariseovijavabelia:

—Nacaenacuapijivi ata itsa navecuanatsanaejitsipa penasivanavajabitsaëtsinexa, namataenetsia naverebiabijitsipa nacaenacuapijivi ata. Bajara pijinia itsipae nacaetomara-pijivi ata. Itsa navecuanatsanaejitsipa penasivanavajabitsaëtsinexa, nexata namataenetsia naverebiabijitsipa nacaetomarapijivi ata. Bajara pijinia itsipae nacaemonae ata. Itsa navecuanatsanaejitsipa penasivanavajabitsaëtsinexa, nexata namataenetsia naverebiabijitsipa nacaemonae ata. ²⁶ Bajara pijinia itsipae dovathi ata. Dovathi jivivecua itsa capitsaponaejitsipa pijajivi, dovathivi, nexata beprijavajabitsaëñ taejitsipatsitsi pijajivi. Itsajamatabëcuene vecuaxainaejitsipa pijajivi. Pesaë ata apo xainaponae tsipae. ²⁷ Paxamë ata panijajivi dovathi jivivecua capitsapabiaba. Nexata xanë Beelzebú pesaëta dovathi jivivecua itsa capitsapabiabajë, ¿detsa nexata ponë pesaëta panijajivi ata dovathi jivivecua capitsapabiaba? Caenë rabaja Dioso pesaëta. Nexata panijajivi ata pacayapëtane bajarapacuenia jamatabëcuenenavëxaniabiaya panejumaitsijava xanë yabara. ²⁸ Espiritu Santo raja pesaëta xanë dovathi jivivecua capitsapabiabajë. Nexata baja picani jivi beyapëtane Dioso baja petaxuxuabijava pijajivi pevetsijava paxamë tuatuajëta, jai Jesús fariseovijavabelia.

²⁹ Fariseovi pecanaëjëtsinexa Jesús bitso piasaëñëcuene dovathi matatoxenetsia, Jesús icatsia jumaiti fariseovijavabelia mapacueniaje:

—Itsajivi ata apo caëjëpaetsi pejonenexa bitso piasaëñë pijaboyalia peyacajëretsineja xua xaina pijabota. Itsiata itsa patsipa bajaraponë matatoxenetsia bitso piasaëñë, nexata cobecëtabuatsipatsi. Taxucëtabuatsipatsi yajava. Matapania bajarapacuenia yacajëretsipatsi daxita xua xaina pijabota.

³⁰ Pajivi apo neyavenonaeyacaetuatsi jivi Diosojavabelia, bajarapajivi betajavajabitsaëjivi. Tspaji apo taneyavenonaeyacaetuatsixae, jivi nevecuanacayajata Dioso picani pejumecovëñëtsiviminexa.

³¹ 'Bajaraxuata pacatsipaebijitsiatsi, Dioso caëjëpatsi daxisajivi pibisiacuene pexanaeconimi pevecuaajibiaexanaenexa. Pibisiacuena jivi Dioso baracuaicuaijai ata, bajarapaneconi ata Dioso caëjëpatsi pevecuaajibiaexanaenexa. Itsiata baitsi jane pajivi pibisiacuena baracuaicuaijai Espiritu Santo, pacuenia paxamë pajumaitimë, Dioso apo vecuaajibiaexanae tsane bajarapaneconi. ³² Pajivi pibisiacuena nebaracuaicuaijai ata, xanë. Daxisajivi Pematapijinëñ, bajarapaneconi ata itsiata Dioso vecuaajibiaexanaenatsi itsa vajëta Diosojavabelia. Itsiata baitsi jane pajivi pibisiacuena baracuaicuaijai Espiritu Santo, bajarapaneconi Dioso apo vecuaajibiaexanae tsanetsi. Daxitamatacabijavabelianexa apo vecuaajibiaexanae tsanetsi bajarapaneconi, jai Jesús fariseovijavabelia.

Pacuenia peubinaenë itsa nacuaita, nayapëtane pavirianaecuene yabara pelivaisi (Lc 6.43-45)

³³ Icatsia Jesús jumaiti fariseovijavabelia:

—Pexaniavirianaenë itsa ubatsi, nacuaita pijinia pexaniacuai. Ponaë pijinia pibisianaë, nacuaita pibisiacuai. Caevirianaë canacujitsia yapëtanetsi itsa nacuaita. ³⁴ Bajara pijinia pacuenia paxamë ata dovathi papijajivimë, panayapëtaneme paneajamatabëcuenebejejava. Nexata apo pacacaëjëpae panecuaicuaijainexa pexaniacuene yabara. Pajamatabëcuene bëpënë panejamatabëëthëtota panajamatabëxainame, panecuivojotuatina pitsapa panecuaicuaijainexa. ³⁵ Itsamonae pijinia majamatabëcueneitsije. Pacuenia vajuabinaë, pexaniaenae, pexaniacuai pijinia nacuaita, bajara pijinia jamatabëcueneitsi itsamonae. Ponë pexaniajamatabëcueneñ, pexaniacuene yabara cuaiacuajai. Tspaji pexaniajamatabëcuene xaina pejamatabëëthëtota. Ponë pijinia pibisiamatabëcueneñ pibisiacuene yabara cuaiacuajai. Tspaji pibisiamatabëcuene najamatabëxaina pejamatabëëthëtota. ³⁶ Xaniajanë pacuenia pacatsipaebijitsiatsi. Pamatacabi Dioso naneconitsiaexanaena daxita pijaneconi pexainaeivi, caejivi canacujitsia, naneconitsiaexanaponaena caejumeyo canacujitsia pibisiacuena pecuaicuaijajava yabara. ³⁷ Pibisiacuena panecuaicuaijajava yabara Dioso pacananeconitsiaexanaena. Pexanialivaisi itsa pacuaicuaijamë tsabiabi tsane, nexata paneconijibimë tsane Diosojavabelia, jai Jesús fariseovijavabelia.

Pacuenia pibisiajamatabëcuenevi Jesús picani itorobatsi Dioso pesaëta pinijicuene pexanaejava petsitaexanaenexa yabara pelivaisi
(Mr 8.12; Lc 11.29-32)

³⁸ Fariseovi, judiövi pecujarubivi ata, jumaitsi Jesúsjavabela:

–Jesús, pajitsipajë patataenexa Dioso pesaëta pinijicuene nexanaejava, patacayapëtaenexa pepacuene Dioso athëbëvetsica peccaitorobinëcuenetsica, jai bajarapamonae.

³⁹ Jesús nexata jumaitsi bajarapamonaejavabela:

–Bitso pibisiacuene paneexanaevi, Dioso panejumecovënëtsijavami panecopabivi. Paneitorobame picani Dioso pesaëta pinijicuene taexanaejava patacatsitaexanaenexa pataneyapëtaenamë Dioso pepacuene athëbëvetsica taneitorobinëcuenetsica. Itsiata baitsi jane Dioso pesaëta pinijicuene taexanaejava apo pacatsitaexanae tsanetsi. Bajayata pacuenia Diosojumepaebinëmi profeta Jonáspijinë exanatsi, bajara épitsicuene taneexanaejava pacatsitajëtsianatsi. ⁴⁰ Bajayata Jonáspijinë boca ayainë dujuainë pënëta acueyabi pamatacabibeje, acueyabi pameravibeje yajava. Bajara pijinia pacuenia xanë ata, Daxitajivi Pematapijinë, bocaenajë mëthëta acueyabi pamatacabibeje, acueyabi pameravibeje yajava. ⁴¹ Bajayata Nínive tomarapijivimi itsa jumetane Dioso pitorobilivaisi, Jonáspijinë petsipaebilivaisi, copaba pibisiacuene pexanaejava. Najamatabëcuene pënëyorota Diosojavabela. Copiapatsiana rabaja Dioso papecananeconitsia exanaematacabinexa daxita panijaneconi panexinaevi. Panijaneconi panexinaevi pacanubiana Dioso pitabarata. Nexata bajarapamatacabi Nínive tomarapijivimi nonobapunaena Diosojavabela papecanconitsinexa Dioso apo panejumecovënëtsivi. Xanë majotaje ponaponajë, bitso ayaijamatabëcuenenë Jonáspijinëmi matatoxenetsia. Nexata pacatsipaebi atatsi Dioso pejumelivaisi, itsiata apo panejumecovënëtsimë. Apo panajamatabëcuene pënëyorotsimëna pibisiacuene paneexanaejavavecu. Bajaraxuata ayaneconi paxainame Diosojavabela. ⁴² Pamatacabi Dioso naneconitsiaexanaena pijaneconi pexinaevi, bajayata peponaponaeвами, Saba nacuapijivi pevetsivami, nonotapunaena Diosojavabela papecaconitsinexa Dioso apo panejumecovënëtsivi. Bajarapova pacaneconitsiana. Tsipaji bajayata bajarapovami tajë nacuatabuverena ata muxunarena pejumetaenexa Salomónpijinë, bitso daxitalivaisi peyapëtaenëmi, petsipaebilivaisi. Xanë majotaje ponaponajë, bitso ayaijamatabëcuenenë Salomónpijinëmi matatoxenetsia. Nexata pacatsipaebi atatsi Dioso pejumelivaisi, itsiata apo panejumecovënëtsimë. Apo panenamuxunaevetsimëna. Bajaraxuata Dioso pacaneconitsiaexanaena, jai Jesús tajëvelia fariseovijavabela, judiövi pecujarubivijavabela ata.

Pacuenia dovathi jivitonë pevejamatabëpitsapaecuujinaetsi, icatsia naviarena pecovëyaberen
petsijamatabëcaenexatsi icatsia yabara pelivaisi
(Lc 11.24-26)

⁴³ Jesús jumaitsi fariseovijavabela, judiövi pecujarubivijavabela ata:

–Dovathi itsa vejamatabëpitsapa jivitonë, nexata dovathi jinaruta petseviiranëjava. Jaitapona itsanëjavabela petsijamatabëjonexa penacueraevetsinexa bajaraponëjavata. Itsa apo caxitajarabi ponëjavabela tsijamatabëjonejitsia, nexata dovathi jamatabëjumaitsi: ⁴⁴ “Naviatsianajë meta icatsia tajabomijavabela, paboverena pitsapajë,” jamatabëjai dovathi, ponëjavaverena pitsapa icatsia petsijamatabëjonexatsi. Dovathi baja caevëa itsa naviarena, caxitajaraba peyjavaponaponaeñemitsi. Nexata peyjavaponaponaeñemitsi pejamatabëthëto, dovathi tane bepënësjinecaebo, bepënëxaniavaetetsibo, bepiracajuetetsibo. ⁴⁵ Nexata dovathi icatsia sivapona peyjavapatsinexarena itsadovathi, sieteponëbeje. Bajarapadovathivi bitso piacujirubejevi copiaya padovathi matatoxenetsia. Daxita bajarapadovathivi pebi tsijamatabëjunuatsi peyjavaponaponaeenexa. Belia jane baja pebi dovathivi bitso bejiobiaexanatsi. Copiaya abaxë caenë itsa tsijamatabëcatsi pacuenia bejiobiaexanabiabatsi, matatoxenetsia bejiobiaexanatsi. Bajara pijinia pacuenia tocopiapatsianatsi pamonaeeconoxae jinavanapa, piacujirubejevi, jai Jesús fariseovijavabela, judiövi pecujarubivijavabela ata.

Pacuenia Jesús pejuyapijivi, pena yajava, nubena bojumavelia yabara pelivaisi
(Mr 3.31-35; Lc 8.19-21)

⁴⁶ Jesús abaxë jivi livaisi itsa tsipaeba bo ënëtuatujëalia, pata Jesús pejuyapijivi, pena yajava. Nexata bojumavelia nubena bajarapamonae. Jamatabëbarëcuaicuaijaiti picani Jesús. ⁴⁷ Nexata itsajivi Jesús tsipaebatsi.

–Patajatuxanenë, ena raja, nejuyapijivi yajava, nuca bojumaverena. Bajarapamonae pina jitsipa pecabarëcuaicuaijajava, jaiti Jesús.

⁴⁸ Nexata Jesús jumaitsi petsipaebijivitsijavabela:

—¿Detsa pitsijamatabëcuenevi taena, tajuyapijivinuua? jai Jesús.

⁴⁹ Nexata Jesús pecobeta itaropita pijajivi. Jumaitsi petsipaebijivitsijavabelia:

—Mara jane pamona taenajivije, tajuyapijivinuua. ⁵⁰ Tsipaji raja pajivi exana taxa, athëbëtsia peacaenë, pitorobicueniatsi, bajarapajivi cajena tajuyapijinë, tajuyapijiva, taenana, jai Jesús petsipaebijivitsijavabelia.

13

Pacuenia Jesús jivi livaisi tsipaeba pabi peubinë pelivaisicuenia yabara pelivaisi
(Mr 4.1-9; Lc 8.4-8)

¹ Jesús baja itsa najumevereta jivijavabelia livaisi petsipaebijava, pitsapa baja bajarapabovecu. Pona baja itsajavabelia. Nexata Jesús ecojopa pucaxaneto itapata. ² Nexata pucaitapata jivi ayaibitsaëttoxaneto Jesús itaxutuanacaetuatatsi. Nexata Jesús runareca jera ënëabereca. Ecareca jera ënëtareca. Daxita jivibitsaëttoxaneto nubena tajetabovelia. ³ Nexata Jesús daxitacuenë livaisianë tsipaeba jivijavabelia. Jesús jumai tsaponae bajarapamonaejavabelia mapacueniaje:

—Peubinë pona pabiabelia peubinexa. ⁴ Nexata itsa pata pabita, peubixu pexucayajabajarabicuenia ubanajetaruca. Pexucayajabajarabijavata itsaxu othopa pabi tuatujëjiva penajetarucaenamutojumata. Nexata bajarajota pata baratsui. Xane bajarapaxumi juvinejeva. ⁵ Itsaxu pijinia othopa ibopananëjumata, itsajota bitso ira apo aitayaë. Nexata bajarapaxu bepijia juva. Tsipaji bitso ira apo aitayaë. ⁶ Nexata icotia bitso itsa ataju, nexata bajarapaxu juvi ata, tsaquenapona. Tsipaji irabereca bitso apo atabunepiapiareca. ⁷ Itsaxu pijinia othopa xanëebacabomijavata. Nexata peubixu xanëebotonë caecuenia itsa yajavajuva, bitso xanëebotonë matacënënatsi peubijavami. ⁸ Itsaxu pijinia othopa pexani-airata. Bajarapaxu itsa juva, vitsaba. Xaniavaetsia nacuaita. Itsabotonë capitsapa cien paxutoyobeje tsaponae. Itsabotonë capitsapa sesenta paxutoyobeje tsaponae. Itsabotonë capitsapa treinta paxutoyobeje tsaponae. ⁹ Pajivi jamatabënejumeyapëtane patacatsipae-bilivaisi, nenamuxunaevetsi xaniavaetsia, jai Jesús bajarapalivaisi petsipaebijivavabelia.

Pacuen yabara Jesús jivijavabelia livaisi tsipaeba ëcomparacióncuenia yabara pelivaisi
(Mr 4.10-12; Lc 8.9-10)

¹⁰ Jesús pijajivi imoxoyotatsi. Nexata Jesús pijajivi jumaitsi Jesúsjavabelia:

—Patajatuxanenë, jivijavabelia livaisi itsa tsipaebame, ¿detsa xuajitsia tsipaebame ëcomparacióncuenia? jai Jesús pijajivi.

¹¹ Nexata Jesús jumaitsi pijajivijavabelia:

—Paxamë rabaja xaniavaetsia Dioso pacayapëtaeyaexana Dioso papijajivimë papecaevetsijava. Itsiata itsamonae apo yapëtae bajarapacuenë. ¹² Pajivi xaniavaetsia nejumeyapëtane tatsipaebilivaisi, bajarapajivi icatsia itsalivaisi pematatsënëa Dioso yapëtaeyaexanaenatsi. Itsiata pajivi apo jitsipae pematatsënëa pejumeyapëtaeponaenexa tatsipaebilivaisi, bajarapajivi xuayovajëto jumeyapëtane picani, nacofënëtsiana. ¹³ Bajaraxuata livaisi itsa tsipaebajë bajarapamonae, ëcomparacióncuenia tsipaebajë. Nexata bajarapamonae tae ata Dioso pesaëta pinijicuenë taexanaejava, itsiata apo yapëtae pajamatabëcuene yabara exanajë pinijicuenë taexanaejava. Namuxunaevetsi ata tatsipaebilivaisi, itsiata apo jumeyapëtae pajamatabëcuene xaina tatsipaebilivaisi. ¹⁴ Bajarapacuenia apo jumeyapëtae tsipaji jane baja tocopiapatatsi pacuenia bajayata tajëvelia Diosojumepabinëmi profeta Isaiaspjinë yaquina. Dioso pejumajitsijava apo tanejumeyapëtaevinexa yabara, bajayata profeta Isaiaspjinë peyaquinaelivaisita jumaiitsi mapacueniaje:

Bajarapamonae picani jumetaena. Itsiata apo jumeyapëtae tsane xua yabara tsipaebianatsi. Bajarapamonae taena picani. Itsiata apo yapëtae tsane pajamatabëcuene xaina petaejava. ¹⁵ Bajarapamonae ajamatabëcuenetaja tsane. Bajaraxuata benamuxuacabiaya pejinavanapaevi tsane. Benaitaxutotsaquebiaya pejinavanapaevi tsane. Itsa bajarapacuenia apo itsipae, nexata yapëtaejitsipa pajamatabëcuene xaina xua taena. Jumeyapëtaejitsipana palivaisi jumetaena. Pejamatabëthëtojavavetsina jumeyapëtaejitsipa. Nexata xanëjavaberena najamatabëcuenepënëyorotsipa perujujamatabëcuenevecua. Nexata xanë jamatabëcuene xanepanaeyaexanaejitsipajë, jai bajayata tajëvelia Isaiaspjinë peyaquinaelivaisita xua yabara tsipaebajë bajarapamonae apo tanejumeyapëtaevanexa yabara.

¹⁶ Itsiata baitsi jane paxamë baja pajamatabëcuenebarëyamë. Tsipaji payapëtaneme pajamatabëcuene xaina xua pataneme. Pajumeyapëtanemenua pajamatabëcuene xaina palivaisi pajumetaneme. ¹⁷ Xaniajanë pacuenia pacatsipaebijitsiatsi. Bajayatami ayaibitsaëto profetavimi necopiaevetanapa tanetaenexa picani tapatsijavatsica. Itsamonae ata aneonijibia pejinavanapaevi Dioso pitabarata, necopiaevetanapa picani

tanetaenexa tapatsijavatsica. Itsiata apo netaenejeva, daxita bajarapamonaemi tēpa baja. Jamatabējumetaeyabiabanua picani palivaisianē baja aeconoxae paxamē pacatsipae-baponatsi. Itsiata apo jumetaenejeva bajarapalivaisianē, bajarapamonaemi tēpa baja, jai Jesús pijajivjavabelia.

Pacuenia Jesús yapētaeyaxana pijajivi pajamatabēcuene xaina palivaisi tsipaeba peubinē pelivaisicuenia yabara pelivaisi

(Mr 4.13-20; Lc 8.11-15)

¹⁸ Icatsia Jesús jumaitsi pijajivjavabelia:

– Xaniavaetsia panenamuxunaevere panejumeyapētaenexa pajamatabēcuene xaina palivaisi pacatsipaebatsi pabita peubinē pelivaisicuenia. ¹⁹ Pamonae jumetae ata Dioso pejumelivaisi, itsiata itsa apo jumeyapētae pejamatabēēthētota, bajarapamonaē bepiothopaexu pabi tuatuaējēva penajetarucaenamutojumata. Nexata najetaruca dovathi. Nexata bajarapamonaē tsijamatabējuvinejevatsi, dovathi vecuapitatsi bajarapalivaisimi, petsijamatabēubilivaisimitsi. ²⁰ Pacuenia pijinia itsi paxu othopa ibopananējumata, itsajota bitso ira apo aitayāē, bajara tsijamatabēcueneitsitsi itsamonae Dioso pitorobilivaisi. Bajarapamonaē jumetane Dioso pitorobilivaisi. Nexata picani bajarapalivaisi barēyaya jumecovēnēta. ²¹ Itsiata baitsi jane pacuenia irabereca apo atabunepiireca paxu othopa ibopananējumata, nexata nabijiana, bajara tsijamatabēcueneitsitsi bajarapamonaē Dioso pitorobilivaisi. Tspijaji pepacuenē pejamatabēēthētovetsina apo jumecovēnētsi bajarapalivaisi. Nexata apo ajamatabēcuenesaē tsavanapae bajayajebi pejumecovēnētsinexa bajarapalivaisi. Nexata itsa tocopiapatatsi daxita petoayapēbecueneitsi, itsa yalivaisibatsinua Dioso pitorobilivaisi yabara, nexata pejumecovēnētsijava bajarapalivaisi bepijia copaba. Pevajēnaeyabelia apo jumecovēnētavanapae. ²² Pacuenia pijinia paxu othopa xanēebacabomijavata, itsa juva, bitso matacēnēnatsi xanēebotonē, bajara tsijamatabēcueneitsitsi itsamonae Dioso pitorobilivaisi. Jumetane picani bajarapamonaē Dioso pitorobilivaisi. Itsiata baitsi jane bitso jamatabēcueneenatsi mapanacuapijicuenē yabaraje. Tspijaji najamatabēxaina ayajiva palata pexainaenexa. Nexata pijacuata najamatabēcueneyamaxēitoroba. Bajaraxuata Dioso pitorobilivaisi apo tovitsabitsi pejamatabēēthētota. Nexata pacuenia itsi pabita piacuaijibibotonē, bajara itsi bajarapamonaē. Tspijaji Dioso xaniavaetsia apo tojinavanapae. ²³ Pacuenia pijinia itsi paxu othopa pexaniairata, bajara tsijamatabēcueneitsitsi itsamonae Dioso pitorobilivaisi. Bajarapamonaē jumetane Dioso pitorobilivaisi. Jumeyapētanenua. Nexata pevājēnaeyabelia tsijamatabēcuenevitsabaponatsi Dioso pitorobilivaisi. Nexata pacuenia peubijava capit-sapa itsabotonē cien paxutoyobeje tsaponae, itsabotonē sesenta paxutoyobeje tsaponae, itsabotonē treinta paxutoyobeje tsaponae, bajara tsijamatabēcueneitsitsi bajarapamonaē Dioso pitorobilivaisi, jai Jesús pijajivjavabelia.

Pacuenia peubijava tuatuaējē piabejejava juva yabara pelivaisi

²⁴ Dioso apo pejumecovēnētsivi, pamonae najinavanapa Dioso pejumecovēnētsivijavata, itsamatacabi Dioso naneconitsiaexanaena. Nexata jivi peyapētaenexa bajarapamonaē Dioso penaneconitsiaexanaejavanexa, Jesús comparaciōncuenia livaisi tsipaeba jivi ayabit-saētōxanetojavabelia. Jesús jumaitsi mapacueniaje:

– Mara pacuene jēpaje Dioso pijajivi pevetsijavaje. Pabi pexainaenē, ēpexaniaviriatrigoxu uba pijapabita. ²⁵ Itsiata baitsi jane daxitajivi pemajitsijavata meravī, pabi pexainaenē pijavabit-saenē tojnuatsi pijapabita. Nexata toubatsi trigo tuatuaējēva pibisaviirijava, betrigobotonē pecataejava. Bajaraxuacujinae vemaxēpona baja. ²⁶ Nexata trigoxu juva. Vitsaba. Itsa baja trigobotonē namatonota, nexata matapania bajarajota nayapētane pibisaviirijava yajava penamatonsijava. ²⁷ Nexata pabi pexainaenē pijajivi pata pē-sipaebinexatsi. Pabixainaenē pijajivi jumaitsi: “Nijapabita ubame ēpexaniaviriatrigoxu. ¿De tsæta pacuenia pitsapa pibisaviirixu pibisijava peyajavajuvinexa trigojava?” jai pabixainaenē pijajivi. ²⁸ Nexata pabixainaenē jumaitsi pijajivjavabelia: “Tajavajabit-saenē raeta bajaraxua uba,” jai. Nexata pabixainaenē pijajivi jumaitsi: “¿Jitsipame tsajia bajaraxua pataxunaejava?” jai. ²⁹ Itsiata baitsi jane pabixainaenē jumaitsi pijajivjavabelia: “Jume. Tspijaji panexunaejavata payajavaxunaejitsipame trigobotonē. ³⁰ Copatsianatsi abaxē penacuait-sinexa. Nexata penotsimatacabi itorobianajē tanetonotsivi copiaya pecaetuat-sinexa piabejejava. Pēpacunuanē exanaena. Bajaraxuacujinae bajaraxua tajuitsiana. Bajaraxuacujinae ētrigoxu netonotsiana taetabiabibota tanetoetsinexa,” jai pabixainaenē pijajivjavabelia, jai Jesús jivi ayabit-saētōxanetojavabelia.

Pacuenia mostaxutoyo pejuvicujinae, mostazanae bepijia vitsaba yabara pelivaisi
(Mr 4.30-32; Lc 13.18-19)

³¹ Jesús livaisi tsipaeba comparacióncuenia jivi ayaibitsaëtoxanetojavabelia. Jumaitsi macpaueniaje:

—Dioso raja pijajivi pevetsijava maitsije. Pacuenia mostazaxutoyo pejuvicujinae, bepíjia vitsaba mostazanae, bajara pijinia itsane Dioso pijajivi ata. Bepíjia Dioso pijajivi ayaibitsaëtoxaneto naexanaena. Pabi pexainaenë mostazaxu uba pijapabita. ³² Mostazaxu raja bitso tsiquirixutoxi daxita peubixuvecua. Itsiata baitsi jane mostazanae itsa juva, bepíjia vitsaba. Caevaita pinijinae naexana itsapeubinaenë matatoxenetsia. Nexata baratsui ata pata bajaraponaeta. Pematapenanë exana bajaraponaemaxërananëjáva. Bajara pijinia itsane jivi ata. Bepíjia ayaibitsaëto Dioso pijajivi naexanaena, jai Jesús jivi ayaibitsaëtoxanetojavabelia.

Pacuenia pan pexanaematabënexa, levaduravënëjáva fufunaeyaexana yabara pelivaisi (Lc 13.20-21)

³³ Jesús livaisi tsipaeba comparacióncuenia jivi ayaibitsaëtoxanetojavabelia. Jumaitsi macpaueniaje:

—Dioso raja pijajivi pevetsijava maitsije. Pacuenia pan pexanaematabënexa, levaduravënëjáva yacaëjépa daxitanacuanëjáva. Petiriva pan pexanaenexa, acueyabi patarroxanetoheje trigobenonë matajërëba levaduravënëjavata. Nexata pan pexanaematabënexa, ayaimatabë ata, levaduravënëjáva pijinia tsiquirijavayo ata, itsiata levaduravënëjáva yacaëjépa daxitamatabëjáva. Nexata levaduravënëjáva fufunaeyaexana daxita panmatabënexa. Bajara pijinia itsi Dioso pijajivi pevetsijava. Yacaëjépa daxitanacuanëjáva Dioso pijajivi pevetsicuenia, jai Jesús jivi ayaibitsaëtoxanetojavabelia.

Pacuenia Jesús jivi livaisi tsipaebabiaba comparacióncuenia yabara pelivaisi (Mr 4.33-34)

³⁴ Jesús itsa tsipaeba jivijavabelia Dioso pijajivi pevetsijavanexa, livaisianë tsipaebapona écomparacióncuenia. ³⁵ Bajarapacuenia Jesús jivi livaisianë itsa tsipaebapona écomparacióncuenia, tocopiapatatsi jane baja pacuenia Diosojumepaebinë profetanë bajayata tajëvelia yaquina Jesús petsipaebaponaejavanexa yabara. Jesús comparacióncuenia jivi livaisi petsipaebaponaejavanexa yabara, profetanë peyaquinaebaxutota jumaitsi macpaueniaje:

Jivi itsa tsipaebajë, livaisi tsipaebianajë comparacióncuenia. Tsipaebianajë pitsicuenia Dioso nacua pexanaejavaveliacujinae itsajivi ata abaxë apo yapëtae, jai tajëvelia bajayata profetanë peyaquinaebaxutota Jesús jivi livaisi comparacióncuenia petsipaebaponaejavanexa yabara.

Pacuenia Jesús pijajivi yapëtaeyaexana pajamatabëcuene xaina palivaisi tsipaeba trigobotonë tuatujéa pejuvijava pelivaisicuenia yabara pelivaisi

³⁶ Jesús naviabiaexana jivi ayaibitsaëtoxaneto. Bajaraxuacujinae Jesús boya joneya. Bajarapabota Jesús pijajivi imoxorenatsi. Nexata Jesús pijajivi jumaitsi:

—Patajatuxanenë, panetsipabeare pajamatabëcuene xaina palivaisi tsipaebame jivi ayaibitsaëtoxanetojavabelia. Baitsi palivaisi tsipaebame trigobotonë tuatujéa pejuvijava pelivaisicuenia, jai Jesús pijajivi.

³⁷ Nexata Jesús jumaitsi pijajivijavabelia:

—“Ponë uba pexaniaviriatrigoxu,” itsa janë, xanë rabaja, Daxitajivi Pematapijinënë, yabara nayabarajumaitsinë. ³⁸ “Pijapabi,” itsa janë, mapanacua yabaraje jumaitsinë. “Pexaniaviriatrigoxu,” itsa janë, Dioso pijanacuayabetsia pejonevinexa yabara jumaitsinë. “Pibisiavirijava pejuvijava,” itsa janë, dovathi pijajivinexa yabara jumaitsinë. ³⁹ “Pijavajabitsaënë, ponë pabi pexainaenë toubatsi pibisiavirijava pejuvinexa,” itsa janë, dovathi yabara jumaitsinë. “Penotsimatacabi,” itsa janë, mapanacua peverevere-caejavanexa yabara jumaitsinë. “Tanetonotsivi itorobianajë,” itsa janë, ángelevi yabara jumaitsinë. ⁴⁰ Nexata pacuenia piabejéjáva caetuata pexuabinexa isotojavabelia, bajara pijinia pacuenia tocopiapatsianatsi dovathi pijajivi pexuabinexatsi isotojavabelia mapanacuaje peverevereacematacabi. ⁴¹ Bajarapamatacabi xanë, Daxitajivi Pematapijinënë, itorobianajë tajaángelevi taevetsinacua tanetovecuajutsinexa daxita pamona pibisiacuenia pexanabiabivi. Pamonae ata itsamonaejavabelia pibisiacuenia exanaeyaexana, bajarapamonae ata taevetsinacua netovecuajutsiana tajaángelevi. ⁴² Bajarapamona xuanianatsi infernojavabelia. Bajarajota nuena. Navonosiniana bitso penavixae-taexae. ⁴³ Pamonae jumecovënëtsiajinavanapa Dioso pitorobicueniatsi, bajarapamona perabënitayotsiana taxa Dioso pijanacuatatsia. Pacuenia matacabipijijuameto naitayota, bajarapacuenia perabënitayotsiana. Pajivi jamatabënejumeyapëthane, patacatsipaebilivaisi nenamuxunaevetsi xaniavaetsia, jai Jesús pijajivijavabelia.

Pacuenia pebi caxitajaraba bitso penamatamotsijavanë, itsanë irata pemëthëtetsijavami, yabara pelivaisi

⁴⁴ Icatsia Jesús comparacióncuenia jumaitsi pijajivijavabelia:

–Pebi irata mëthëteta bitso penamatamotsijavanë. Bajaraxuanë bitso xanepana. Nexata juya itsanë bexëajavabelia bajaraxuanë caxitajarabeta irata. Nexata abaxë bajaraponë apo jutsi bajaraxua. Abaxë saya mataaceteta bajarajota. Nexata jamatabëcuenebarëyaya pona pijaboyabelia. Nexata xuacujinae bajaraponë canajeta daxita pexainaejavaximi. Nexata bajaraponë yacomuata bajarapaira. Tsipaji xua bajaraponë caxitajarabeta irata, bitso xanepana. Bitso namatamota. Nexata pacuenia bitso xanepana, bitso namatamotanua, xuanë bajaraponë bajarapaira yacomuata, bajara pijinia itsi Dioso pijajivi pevetsijava. Bitso xanepana. Bitso namatamotanua, jai Jesús pijajivijavabelia.

Perlavënëjava bitso penamatamotsijava yabara pelivaisi

⁴⁵ Icatsia Jesús jumaitsi pijajivijavabelia:

–Pacuenia itsi bitso pexaniavirijava perlavënëjava, bajara pijinia itsi Dioso pijajivi pevetsijava, bitso pexaniacuene. Perlavënëjavanë pecanajetarutsinë jaitapona pexaniavirijavanë juya pecanajetaponaenexa. ⁴⁶ Nexata itsa caxitajarabaxuaba pexaniaviria-perlajava, bitso penamatamotsijava, pona pijaboyabelia pecanajetsinexa daxita pexainaejavami. Nexata comuata bajarapaperlajava, jai Jesús pijajivijavabelia.

Dujuai peyamatajucaejava yabara pelivaisi

⁴⁷ Icatsia Jesús comparacióncuenia jumaitsi pijajivijavabelia:

–Dujuai peyamatajucaejavata, pibisiaviriadujuai itsa yamatajuta, bavecuatsatapona. Bajara pijinia itsi Dioso pijajivi pevetsijava.

Dioso pijajivi vecuatsatapona apo pejumecovënëtsivitsi pexuabinexa infernojavabelia. Dujuai peyamatajucaejava manuaeneta copareca. Nexata daxitaviriadujuai yamatajuta. ⁴⁸ Itsa vënëca bajaraxua, nexata juta tajetabojavabelia. Bajarajota itapetapona pexaniaviriadujuai. Pexaniaviriadujuai jebapona bemapirejavabelia. Pibisiaviriadujuai pijinia xuabapona. ⁴⁹ Bajara pijinia itsane nacua pevereverecaematacabi. Angelevi ponaena. Nexata pibisiacuene pexanaevi saicaya tsatsianatsi pexuabinexatsi. Dioso pijinia pitorobicueniatsi pejinavanapaevi saicaya tsatsianatsi pecapanepaenexatsi. ⁵⁰ Nexata pibisiacuene pexanaevi xuabianatsi infernojavabelia. Bajarajota nuena. Navonosiniana bitso penavixaeataxae, jai Jesús pijajivijavabelia.

Bitso penamatamotsijavanë, pejanajavanë, perujujavanë ata, yabara pelivaisi

⁵¹ Jesús yanijoba pijajivijavabelia.

–¿Panejumeyapëtaneme tsabaja daxita xua yabara pacatsipaebatsi? jai Jesús.

Nexata Jesús pijajivi jumaitsi:

–Jājā, pacajumeyapëtanetsi rabaja, jai.

⁵² Nexata Jesús jumaitsi pijajivijavabelia:

–Ponë judiövi pecujarubinë ata, itsa nejumecovënëta, bajaraponë ata tajajivitonë tsane. Nexata pacuenia bo pexainanë pijabovécua jutapona bitso penamatamotsijavanë, pejanajavanë, perujujavanë ata, bajara pijinia jamatabëcueneitsi tsane ponë nejumecovënëtsiana, judiövi pecujarubinë ata. Tsipaji bajaraponë yapëtaena pexanialivaisianë jivijavabelia petsipaebinexa. Bajaraponë yapëtaena xanë talivaisianë, pejanalivaisianë, perulivaisianë ata, jai Jesús pijajivijavabelia.

Pacuenia Jesús naviatu pijanacuayabelia, Nazaret tomarabelia, yabara pelivaisi
(Mr 6.1-6; Lc 4.16-30)

⁵³ Jesús baja penajumeveretsicujinae jivijavabelia livaisianë petsipaebijava comparacióncuenia, pona baja icatsia itsajavabelia. ⁵⁴ Jesús baja naviatu pevitsabinacuayabelia. Nexata Jesús pevitsabinacuata taxuxuaba livaisi petsipaebijava judiövi penacaetuatabibibota. Nexata pejumetaevitsi sivajamatabëcuenenabenajacatsi. Nexata bajarapamonae Jesús jamatabëcueneaeabiatanetsi. Bajarapamonae Jesús yabara najumaitsi mapacueniaje:

–¿De tsaeta jota maponë nacujaruba peyapëtaenexa mapalivaisije? ¿De tsaeta pacuenia caëjëpatsi mapacuenia Dioso pesaëta pinijicuene pexanaenexaje? ⁵⁵ Maponëje vaxaitsiyajuvënëne, carpinteronëmi pexënato. Maponëje María pexënato. Bajaraponë pejuyapijivi, Santiago, José, Simón, Judas. ⁵⁶ Papetiriavi ata vajatomonara jinavanapa, maponëje pejuyapijivi. ¿Detsa verena nexata capitsapa palivaisianë nacatsipaebapona maponëje? najai bajarapamonae Jesús yabara.

⁵⁷ Nacaetomarapijivixae, bajarapamonae Jesús apo jumexaniataetsi. Nexata Jesús jumaitsi bajarapamonaejavabelia:

—Bajara maitsabiabije. Diosojumepaebivi profetavi itsanacuapijivi yaiyataeyabiabatsi. Itsiata pijanacuapijivi, pijamonae ata, apo yaiyataeyabiabitsi, jai Jesús pijatomarapijivi-javabelia.

⁵⁸ Jesús pevitsabitomarata pejinavanapaevi apo jumecovënëtsitsi. Bajaraxuata Jesús Dioso pesaëta pinijicuene pexanaejava bajarapatomarata bitso apo tsitaexanae.

14

Pacuenia Juanpijinë jivibautisabinëmi beyaxuabatsi yabara pelivaisi

(Mr 6.14-29; Lc 9.7-9)

¹ Herodes, Galileanacua pevetsinë. Nexata Herodes Jesús vënëlvaisitanetsi Dioso pesaëta pinijicuene pexanaponaejava. ² Nexata Herodes pijajivijavabelia jamatabëcuenenavëxaniabiaya jumaitsi Jesús yabara:

—Juanpijinëmi raeta jivibautisabinëmi icatsia asaë petëpaecujinae. Bajaraxuata caëjëpatsi Dioso pesaëta pinijicuene pexanaenexa, jai Herodes Jesús yabara.

³ Bajarapacuenia Herodes jumaitsi tsipaji abaxë Juanpijinë itsa asaë, Herodes pijajivi, vajabitsaëvi, itoroba Juanpijinë pevatabinexatsi. Nexata vajabitsaëvi Juanpijinë cobecëtsiaya caponatsi penaneconitsivi pejebabiabiboyabelia. Bajarapacuenia Herodes pijajivi itoroba Herodes pijava, Herodíasva, pejamatabëcueneta. Herodíasva picani copiatata pita Felipe, Herodes pejuvapijinë. Nexata Herodes pejuvapijinë pijava yacajërëta. ⁴ Nexata Herodes pejuvapijinë pijava peyacajërëtsixae, Juanpijinë abaxë itsa apo vaetabitsi, Herodes muxujioba. Juanpijinë jumaitsi Herodesjavabelia:

—Acuenebi raja nejuvapijinë pijava nepitsijava, jai Juanpijinë Herodesjavabelia.

⁵ Bajarapacuenia Juanpijinë Herodes pemuxujibixae, Herodes picani jamatabëbeyaxuabatsi Juanpijinë. Itsiata baitsi jane abaxë apo beyaxuabitsi. Tsipaji Herodes cujuna jivi. Daxitajivi Juanpijinë yapëtanetsi Diosojumepaebinëcuene.

⁶ Nexata Herodes itsa najamatabënapita penaexanaematacabi, fiesta exana. Herodes junata jivi ayaibitsaëto. Nexata bajarapafiestamatacabi pejionëyo, pijava pexënatoyo, pijacujirucuenia caevayo yavajiba daxita Herodes pejunatsivi pitabarata. Nexata Herodes bitso barëritajitsipa peyavajibijava pejionëyo. ⁷ Nexata Herodes najumecapanepaeya pexaniajajumeta jumaitsi pejionëyojavabelia:

—Xua jitsipame nevajëtsianame. Nexata itsa nevajëtsianame, itsacuenejava ata carajutsianatsi, jai Herodes najumecapanepaeya pejionëyojavabelia.

⁸ Nexata bajarapovayo pena pitorobicueniatsi jumaitsi mapacueniaje Herodesjavabelia: —Nerajure platota Juan jivibautisabinë pematobocoto, jai bajarapovayo Herodesjavabelia.

⁹ Bajarapacuenia Herodes pejionëyo itsa jumaitsitsi, Herodes bejamatabëjiobi tsanajetsireca. Herodes nexata acuenebi: “Jume,” pejaijava. Tsipaji baja najumecapanepaeya jumaitsi pejionëyojavabelia pexaniajajumeta daxita Herodes pejunatsivi pitabarata. Nexata Herodes jejai. ¹⁰ Nexata Herodes pijajivi, vajabitsaëvi, itoroba penaneconitsivi pejebabiabiboyabelia pevësiucutaxuabineaxatsi Juanpijinë. ¹¹ Bajaraxuacujinae vajabitsaëvi Juanpijinë pematobocoto tocaparenatsi platota. Nexata Herodes rajutsiaexana pejionëyojavabelia. Bajarapova juya pena rajuta. Nexata baja Herodíasva yapëthane capanepaeya baja Juanpijinë pebeyaxuabijavatsi.

¹² Nexata Juanpijinë pijajivi parena itsajota Juanpijinë boca petëpaenë. Pitatsi petëpaenë. Nexata Juanpijinë pijajivi mëthëtatsi. Bajaraxuacujinae bajarapamonae pona Jesúsjavabelia petsipaebinexa Juanpijinë pebeyaxuabijavatsi.

Pacuenia Jesús pexaejava rajuta cinco mil ponëbeje yabara pelivaisi

(Mr 6.30-44; Lc 9.10-17; Jn 6.1-14)

¹³ Jesús vënëlvaisitane Juanpijinë pebeyaxuabijavatsi. Nexata Jesús ëpijajivi jerata barëpona itsabelia ajibi jivi. Itsiata baitsi jane jivi ayaibitsaëtoxaneto yapëthane itsabelia Jesús pona. Nexata pijatomaranë vecuapona. Matatsënëa najetarubena pepëjajitsivitsi Jesús. ¹⁴ Itsa Jesús nonotajuna jeravecua, tane jivibitsaëtoxaneto. Nexata Jesús itaxutobejibiatane bajarapamonae. Tocapatatsi piavitanevi. Nexata Jesús tojamatejemayaexana piavitanevi. ¹⁵ Itsa baja caniviyo tsaponae, Jesús pijajivi cujibarenatsi. Nexata Jesús pijajivi jumaitsi:

—Caniviyo rabaja bitso. Majotaje ajibi pexaejava. Tsipaji itsajivi ata pijabo apo xainae. Itorobare baja jivi peponaenexa tomaraxijavabelia pecomuacaenexa pexaejava, jai Jesús pijajivi.

¹⁶ Nexata Jesús jumaitsi pijajivijavabelia:

—Apo beponae raja abaxë. Paxamë parajure pexaejava, jai Jesús pijajivijavabelia.

¹⁷ Nexata Jesús pijajivi jumaitsi:

—Paxainajé saya cinco papanbêbeje, anijanëyojebe dujuainëyojebe yajava, jai.

¹⁸ Nexata Jesús jumaitsi pijajivijavabelia:

—Panetocarenamëre pan maberenaje, dujuainëyojebe yajava, jai Jesús.

¹⁹ Nexata Jesús itoroba daxitajivi penaenexa ponajavata. Nexata Jesús pita cinco papanbêbeje, anijanëyojebe dujuainëyojebe yajava. Athëbëa benaëcotsia. Jumaitsi Diosojavabelia:

—Pexaniacuene panetoexaname. Panerajutame pataxaejava, jai Jesús Diosojavabelia.

Bajaraxuacujinae Jesús pan epatsicacapona. Pijajivijavabelia rajuta bajarapapan. Nexata juya Jesús pijajivi tsicobetsana jivijavabelia. ²⁰ Daxita xaniavaetsia nabane. Bajaraxuacujinae Jesús pijajivi caetuata pan, dujuai yajava, jivi peyajuvenëcopabejebijavanë. Nexata vënëba doce xuabeje bemapirecuenia pexanaejavanë. ²¹ Pamona pexaejava xane, ayaibitsaëtoxaneto. Cinco mil ponëbeje namatajëtatsi xaniavaetsia. Petiriavi, pejevaxi ata, apo namatajëtsitsi.

Pacuenia Jesús mene itaboxoya najetaruca yabara pelivaisi

(Mr 6.45-52; Jn 6.16-21)

²² Jesús jivi ayaibitsaëtoxaneto pexaejava perajutsicujinae, Jesús pijajivi bepijia runaeyaexanareca jera ënëbereca. Jesús pijajivi copiata itoroba penicabinexa puca itsapanabelia, Betsaida tomarabelia. Nexata Jesús abaxë caenë nacopatanuca bajarajota. ²³ Itsa baja jivi napëvereta penaviabijava, Jesús junaya petsutojumabetsia caenë pevajëtsinexa Diosojavabelia. Nexata Jesús yameravibatsi bajarapatsutojumatatsia.

²⁴ Bajarapaepatota Jesús pijajivi jerata epatua nabuatapona pepatsinexa puca itsapanabelia. Nexata Jesús pijajivi pevajënaeverena joviboxaneto najetaruca, malataca bitso ayai. Nexata malataca mene epabajarabapona jera ënëberena. Nexata mera vënëcapona jera ënëberena. ²⁵ Bajaraxuacujinae bajayacunua, ajena matabijitsia, Jesús pijajivi pecovëvelia imoxoyotanajetaruca. Jesús najetaruca mene itaboxoya. ²⁶ Jesús pijajivi itsa tanetsi mene itaboxoya penajetarucajava, nabenajaca. Vavajai pecajunavi.

—jPetëpaenë raeta pejumape najetaruca! jai Jesús pijajivi.

²⁷ Nexata Jesús jumaitsi pijajivijavabelia:

—Xanë raja. Pëtsa panecujunavame. Pajamatejemamëre saya, jai Jesús pijajivijavabelia.

²⁸ Nexata Pedro jumaitsi Jesúsjavabelia:

—Tajatuxanenë, itsa pecacuene xamë, nexata nejunaremelia talianexa mene itaboxoyalia, xamëjavabelia, jai Pedro.

²⁹ Nexata Jesús jumaitsi Pedrojavabelia:

—Renamëre baitsi baja, jai Jesús.

Pedro nexata jeravecua runareca meniabereca. Lia mene itaboxoyalia pepatsinexa Jesúsjavabelia. ³⁰ Itsiata baitsi jane Pedro itsa tane jovibo piasaëjava, bitso cujunavataba. Nexata bubunanajereca. Pedro ajena bubunanajereca, vavajai.

—jTajatuxanenë, nevaetabare! jai Pedro.

³¹ Bepijia Jesús cobepitajaraba. Jumaitsi Pedrojavabelia:

—Tsiquirijavayo saya nejumecovënëtame tacaevetsijava. ¿Detsa xuajitsia nejumeeabitataneme? jai Jesús.

³² Nexata baja Jesúsbeje Pedrobeje jera ënëbelia itsa nonoliabeje, joviboxanetomi baja ajibi tsaxuabi. ³³ Nexata daxita jerata peponaevi pematatabacabëta tonubena Jesús pitabarata. Jumaitsi bajarapamona:

—Xaniajai rabaja. Xamë Dioso pexënatomë, jai bajarapamona Jesúsjavabelia.

Pacuenia Jesús jamatejemayaexana piavitanevi Genesaret nacuata yabara pelivaisi

(Mr 6.53-56)

³⁴ Jesús, pijajivi yajava, pata puca itsapanabelia. Pata Genesaret nacuata. ³⁵ Genesaret nacuapijivi itsa yapëtanetsi Jesúscuene, nexata daxita bajarapanacuajava vajunupaebatsi pepatsijava. Nexata tocapatatsi daxita piavitanevi Jesúsjavaberena. ³⁶ Piavitanevi pecapat-sivi pinijicuenia jumai tsabiabi Jesúsjavabelia:

—Pexaniacuene bitso netoexanare. Tocopatsianame maponëje pecatojayatsinexa naxatatsijavacopia, jai tsabiabi.

Nexata daxita pamona Jesús penaxatatsijavacopia tojayataponatsi, jamatejema tsapona piavitanejavavecua.

15

Pacuenia Jesús tsipaeba xua jivi jamatabëcuenebijianatsi yabara pelivaisi

(Mr 7.1-23)

¹ Fariseovi, judiövi pecujarubivi yajava, pata Jerusalén tomaraverena. Bajarapamona Jesús imoxoyorenatsi. Nexata bajarapamona jumaitsi Jesúsjavabelia:

² –Jesús, nijajivi naneconita Diosojavabelia. Tsipaji nijajivi apo jume-covënëtsiajinavanapae vajasalinaivi pijacuene. Nijajivi itsa xane pexaejava, xane anijatonë napëna nacobequiatsinejeva, jai bajarapamonae Jesúsjavabelia.

³ Nexata Jesús jumaiti fariseovijavabelia, judíovi pecujarubivijavabelia ata:

–Paxamë apo pajumecovënëtsimë Dioso pitorobilivaisi saicaya vajasalinaivi pijacuene panecatsitecaenexa. ⁴ Dioso Moiséspijinëta penajumecopatsilivaisi jumaiti mapacueniaje: “Axa yayiataema. Ena ata yayiataema. Pajivi pibisiacuenia bijatane paxa, pena ata, bajarapajivi pabeyaxuare,” jai Dioso Moiséspijinëta penajumecopatsilivaisi. ⁵ Itsiata baiti jane paxamë jivi pamuxubijapenetabiabame peyayataeyaniva paxajivi, penajivi ata. Paxamë jivijavabelia pajumaitimë tsabiabi mapacueniaje: “Axa, ena ata, itsa cavajëta neyavenonaenexa, nexata itsa apo jitsipiagemë neyavenonaenexa, jumaitimë tsane mapacueniaje: ‘Daxita xua pacarajutsipatsibeje picani patacayavenonaenexabeje, daxita bajaraxua tsipaebajë baja tarajutsinexa Diosojavabelia. Nexata acuenebi patacara-jutsinexabeje,’ jamë tsane neyavenonaenexa,” pajamë tsabiabi jivijavabelia. ⁶ Nexata caranata Dioso pejumaitisjume: “Axa yayiataema. Ena ata yayiataema,” pejajume jivi pejumecovënëtsijavami paxamë pacopatsiaexanaponame. Tsipaji paxamë patsipaebaponame saicaya vajasalinaivi pijalivaisi. ⁷ ¡Paxamë saya jivi paneyamaxëitojorobivi! Diosojumepaebinëmi profeta Isaíaspijinë baja cajana bajayata tajëvelia xaniavaetsia pacavajunupaeba. Bajayata Dioso tajëvelia pejumaitisjiva paxamë yabara, profeta Isaíaspijinë peyaquinaelivaisita jumaiti mapacueniaje:

⁸ Bajarapamonae nejitsipaena saya pijumeta. Itsiata pepo tanejitsipaejamatabëcuene nevecuatajë tsane. ⁹ Saya baiti bajarapamonae pijajumaitisita tsane: “Pacajitsipatsi,” nejai tsane itajara. Itsiata apo xaniajai tsane. Bajarapamonae saya jivi tsipaebaponaena pejamatabëcuene pijalivaisi. Pepo taitorobilivaisi apo tsipaebi tsane, jai tajëvelia Isaíaspijinë peyaquinaelivaisita Dioso pejumaitisjiva paxamë yabara, jai Jesús fariseovijavabelia, judíovi pecujarubivijavabelia ata.

¹⁰ Nexata icatsia Jesús junata jivi. Jumaiti jivijavabelia:

–Panenamuxunaevere xaniavaetsia patanejumeyapëtaenexamë patacatsipaebilivaisi.

¹¹ Xua jivi xane pecuibovojotota, pexaevajënaeya napëna anijatonë apo nacobequiatsi ata, apo jamatabëcuenebijianaetsi. Apo vënananeconitsi Diosojavabelia. Baiti rajane xua jivi pecuibota pibisiacuenia cuaicuajijai, bajara jane xua jivi bajamatabëcuenebijianaetsi, jai Jesús bajarapamonaejavabelia.

¹² Nexata Jesús pijajivi imoxoyorenatsi. Jesús pijajivi jumaiti:

–Patajatuxanenë, ¿yapëtaneme tsabaja fariseovi pecabaraanaepanaejava itsa cajumetane bajarapacuenia nejumaitisjiva? jai Jesús pijajivi.

¹³⁻¹⁴ Nexata fariseovi yabara Jesús jumaiti pijajivijavabelia:

–Panamuxjemare saya bajarapamonae. Bajarapamonae saya apo yapëtae. Bajarapamonae bepitatsëcënaevi. Nexata bepematacaponaevi pitatsëcënaevi pijinia. Pitatsëcënaenë itsa matacaponaejitsipa itsanë pijinia pitatsëcënaenë, nexata najuajopaejitsiparecabeje mëthëxanetovjavareca. Pabita piabejejava itsa juva, nexata yatabutopaya jonatsi vajaveretsinexa. Bajara pijinia pacuenia taxa, athëbëtatsia peecaenë, verebiabianatsi daxita bajarapamonae, jai Jesús pijajivijavabelia fariseovi yabara.

¹⁵ Pedro nexata jumaiti Jesúsjavabelia:

–Patajatuxanenë, paneyapëtaeyaexanare pajamatabëcuene xaina palivaisi tsipaebame jivijavabelia. Palivaisi baiti jumaitimë: “Xua jivi xane pecuibota, apo jamatabëcuenebijianaetsi,” jamë, jai Pedro Jesúsjavabelia.

¹⁶ Nexata Jesús jumaiti:

–¿Paxamë ata tsarovia abaxë apo panejumeyapëtaemë? ¹⁷ Daxitacuene xua jivi xane pecuibovojotota, junua pecotsorotubareca. Bajaraxuacujinae vecuapitsapatsi. ¹⁸ Baiti rajane xua jivi pecuibuatsina pitsapa pecuaicuajinexa pacuenia najamatabëxaina pejamatabëëthëtovetsina, bajara jane xua jivi jamatabëcuenebijianaetsi. ¹⁹ Tsipaji rajaba jivi pejamatabëëthëtojavavetsina pitsapa pibisiacuenia pejamatabëxainaenexa. Pitsapa jivi pebeyaxuabijamatabëcueneenexa. Pitsapa pebi pijava pevecuanamatayajitsi jamatabëcueneenexa. Pitsapa petirivijavabelia pebi penaperabëquenetsiatae jamatabëcueneenexa. Pitsapa penacobetoxotsijamatabëcueneenexa. Pitsapa itsamonae pexanaejava yabara najumetsënëtsiaya pepaebijamatabëcueneenexa. Pitsapa itsamonae yabara najumetsënëtsiaya pebaracuaicuajijai jamatabëcueneenexa. Daxita bajarapajamatabëcuene pitsapa jivi pejamatabëëthëtojavavetsina. ²⁰ Daxita bajarapajamatabëcuene jivi jamatabëcuenebijianaetsi. Jivi raja pexaejava xae ata, anijatonë napëna nacobequiatsinejeva, apo jamatabëcuenebijianaetsi, jai Jesús pijajivijavabelia.

Pacuenia Jesús itsanacuapijiva pexénatoyo tojamatejemayaexana yabara pelivaisi (Mr 7.24-30)

²¹ Jesús baja Genesaret nacuavecua pona. Naropota itsanacuayabelia, itsabelia eca anijatomarabeje, Tiro tomarabeje Sidón tomarabeje. Jesús baja pata bajarapanacuayabelia. ²² Nexata bajarapanacuata ponopona cananeaviriava. Bajarapova apo judíova. Bajarapova Jesúsjavaberenata pata. Pinijijumeta bajarapova jumaitisi Jesúsjavabelia:

—¡Petuxanenē, Davidpijinē pemomomē, nitaxutotsoniataema! Taxénatovayo dovathi yajavaponapona. Bitso bejiobiayaexanabiabatsi, jai bajarapova Jesúsjavabelia.

²³ Itsiata Jesús apo jumepitsi. Nexata Jesús pijajivi imoxoyorenatsi. Jesús pijajivi jumaitisi Jesúsjavabelia:

—Patajatuxanenē, ponaeyaexanare baja mapovaje. Bitso raxua nacapēvabanajetaruca, jai Jesús pijajivi.

²⁴ Nexata Jesús jumaitisi bajarapovajavabelia:

—Dioso baja cajena nitoroba tayavenonaenexa ejudíovi, Israel nacuapijivi, pamona Dioso tane beoveja. Tsipaji bajarapamonae Diosovecua naxuabavanapa, jai Jesús bajarapovajavabelia.

²⁵ Itsiata bajarapova imoxoyorenatsi Jesús. Bajarapova Jesús yayiyataeya pematatababēta nucajunua Jesús pitabarata. Nexata bajarapova jumaitisi Jesúsjavabelia:

—¡Petuxanenē, neyavenonare! jai.

²⁶ Nexata Jesús jumaitisi bajarapovajavabelia:

—Apo xanepanae copiaya xamē itsanacuapijivamē tacayavenonaenexa. Abaxē copiaya veyavenonajē tajanacuapijivi, judíovi. Xamē copiaya itsa cayavenonaejitsipatsi, nexata pacuenia pejevaxi pexaejavaminexa yacajērētsipajē tarajutsinexa avirixijavabelia, bajara itsinē tsipae, jai Jesús bajarapovajavabelia.

²⁷ Itsiata baitisi jane bajarapova ajumesaē tsaponae. Icatsia jumaitisi Jesúsjavabelia:

—Xaniajamē rabaja picani. Itsiata neyavenonare. Tsipaji avirixi ata baxane pexainenētsi pexaejacaemesa bēxēpanareca piothopaepērē. Bajara pinijia pacuenia itsiata itsanacuapijiva atanē, neyavenonare, jai bajarapova Jesúsjavabelia.

²⁸ Nexata icatsia Jesús jumaitisi bajarapovajavabelia:

—¡Petiriva, bitso najamatabēcuenecopatame Diosojavabelia pecayavenonaenexa! Nexata pacuenia jumaitisimē, bajarapacuenia Dioso baja cajena catonexanaena, jai Jesús.

Bajarapapatota bajarapova pexénatovayo Jesús pejamatabēcueneta tojamatejematsi baja pijabotalia.

Pacuenia Jesús jamatejemayaexana ayaibitsaētoخانeto piavitanevi yabara pelivaisi

²⁹ Itsa panacuata eca Tiro tomarabeje Sidón tomarabeje, Jesús baja vecuapona. Nexata Jesús najetaruca Galilea pucaxaneto muxubērēa. Nexata Jesús petsutojumabetsia junaya. Nexata petsutojumatatsia Jesús ecojopa. ³⁰ Nexata jivi ayaibitsaētoخانeto pata Jesúsjavaberenata. Tocapatatsi pejayujayunaevi. Tocapatatsinua bitso pitaxutotsēcēnaevi. Tocapatatsinua apo pecuaicuaijaiivi. Tocapatatsinua penabejenaevi. Tocapatatsinua ayaibitsaētoخانeto piavitanevi. Bajarapamonae tojebatsi Jesús pitabarata. Nexata Jesús jamatejemayaexana daxita bajarapomonae. ³¹ Nexata jivi jamatabēcuenenabenajaca itsa tane pecuaicuaijaijava apo pecuaicuaijaiivimi. Jesús xanepanaeyaexana penabejenaevimi ata. Xanepanaeyaexana pejayujayunaevimi ata. Itaxutoxanepanaeyaexana bitso pitaxutotsēcēnaevimi ata. Nexata jivi itsa tane bajarapacueni, jumaitisi Diosojavabelia: “Diosomē, bitso ayaijamatabēcuenenēmē, paIsrael nacuapijivinē patajaDiosomē,” jai bajarapomonae.

Pacuenia Jesús rajuta pexaejava bejamatabēcuene cuatro mil pajivibeje yabara pelivaisi (Mr 8.1-10)

³² Jesús jivi ayaibitsaētoخانeto pēnainavanapatsi. Nexata Jesús junata pijajivi. Jumaitisi pijajivijavabelia mapacueniaje:

—Netsitabejiobi baja rovia mapamonaeje. Tsipaji baja ajena acueyabi pamatacabibeje xaina xanējavata pejinavanapacujinae. Pamarue baja tovereverecatsi. Pexaejava xaenejeva, apo jitsipañē taitorobijava peponaenexa pijabonējavabelia. Namuto epatua meta cuenabijitsipatsi piajani, jai Jesús pijajivijavabelia.

³³ Nexata Jesús pijajivi jumaitisi:

—¿Detsa jane pacuenia pexaejava tocaxitarabianatsi mapajivibitsaētoخانetoje? Majotaje ajibi pexaejava. Tsipaji itsajivi ata pijabo apo xainae majotaje, jai Jesús pijajivi.

³⁴ Nexata Jesús yanijoba pijajivijavabelia.

—¿Detsa papanbēbeje paxainame? jai.

Nexata Jesús pijajivi jumaitisi:

—Siete papanbēbeje paxainajē, dujuainēxi yajava, jai.

³⁵ Nexata Jesús itoroba daxitajivi penaenexa irata. ³⁶ Nexata Jesús pita siete papanbëbeje, dujuainëxi yajava. Nexata Jesús jumaiti Diosojavabelia:

—Pexaniacuenene panetoexaname. Panerajutame pataxaejava, jai.

Bajaraxuacujinae Jesús epaticacaponna pan, dujuainëxi yajava. Nexata Jesús pepaticacaeapan rajuta pijajivjavabelia. Nexata juya Jesús pijajivi tsicobetsana bajarapajivi bitsaëttoxanetjavabelia. ³⁷ Daxita bajarapamonae nabane xaniavaetsia. Nexata peyajuvënëcopabijavanë Jesús pijajivi caetuata. Vënëba siete xuabeje bemapirecuenia pexanaejavanë. ³⁸ Pamonae pexaejava xane, ayaibitsaëttoxaneto. Cuatro mil ponëbeje namatajëjëtatsi xaniavaetsia. Petiriavi, pejevaxi ata, apo namatajëjëtatsi. ³⁹ Pexaacujinae pexaejava, Jesús baja naviabiyaxana jivi. Nexata Jesús runareca jera ënëabereca. Pona baja Magdala nacuyavelia.

16

Pacuenia fariseovibeje saduceovibeje Jesús itorobatsi Dioso pesaëta pinijicuenene pexanaejava petsitaexanaenexa picani yabara pelivaisi

(Mr 8.11-13; Lc 12.54-56)

¹ Fariseovibeje saduceovibeje pata Jesúsjavaberena. Nexata bajarapamonae Jesús jamatabëcuenëjëbiaya itorobatsi picani pinijicuenene pexanaejava Dioso pesaëta Jesús petsitaexanaenexa. Bajarapacuenia picani Jesús itorobatsi peyapëtaenexatsi Dioso pepacuenene athëbëvetsica pitorobinëcuenetsitsica.

² Nexata Jesús jumaiti bajarapamonaejavabelia:

—Pamatacabi caniviyo itaboxo tsobia, paxamë pajumaitsimë tsabiabi: “Meravia pexaniamatacabi tsane. Tspaji itaboxo tsobia,” pajamë tsabiabi. ³ Pamatacabi bajayacunua nacuaiboxo itacaënanuca, pajumaitsimë tsabiabi: “Ajena anacuayajitsia daxita matacabi. Tspaji nacuaiboxo itacaënanuca,” pajamë tsabiabi. Payapëtaneme picani xaniavaetsia pacuenia matacabi itsijitsia. Tspaji itarërëbo pepitsapaexae, payapëtaeyabiabame. Itsiata baitsi jane patae atamë Juan jivibautisabinëmi pexanaponeajava, xanë ata taexanaponeajava patae atamë, itsiata apo payapëtaemë Dioso athëbëvetsica taneitorobinëcuenetsica. ⁴ Bitso pibisijamatabëcuenene xaina pamonae copaba Dioso pejumecovënëtsijavami. Bajarapamonae picani nitoroba Dioso pesaëta pinijicuenene taexanaejava tatsitaexanaenexa taneyapëtaenexa pepacuenene Dioso athëbëvetsica taneitorobinëcuenetsica. Itsiata baitsi jane Dioso pesaëta pinijicuenene taexanaejava, apo tsitaexanaenë tsane. Pacuenia bajayata Diosojumepaëbinë profeta Jonáspijinë exanatsi, bajara ëpitsicuenene taneexanaejava, tsitajëtsianajë, jai Jesús petëpaecujinae icatsia Dioso piasaëyaexanaejavanexatsi yabara.

Jesús baja nexata bajarapamonae vecuapona.

Pacuenia Jesús pijajivi muxujioba fariseovi petsipaëbilivaisi pejumecovënëtsianiva yabara pelivaisi

(Mr 8.14-21)

⁵ Jesús pijajivi nicabilia puca itsapanabelia. Nexata nacofënëta pamarue. Apo caponae pan. ⁶ Nexata Jesús pijajivi muxujioba pejumecovënëtsianiva fariseovi, saduceovi ata, itsa tsipaebatsi saicayacuenia Dioso pejumelivaisivecua. Jesús jumaiti pijajivjavabelia mapacueniaje:

—Panëjumetaema. Xania panayajivitaema fariseovi pijalevadura. Panayajivitaema saduceovi ata pijalevadura, jai Jesús pijajivjavabelia.

Bajarapacuenia Jesús jumaiti fariseovi petsipaëbaponaëlivaisi, saduceovi ata petsipaëbaponaëlivaisi, Jesús pijajivi pejumecovënëtsianiva. ⁷ Itsiata Jesús pijajivi apo jumeyapëtaetsi. Bajaraxuata Jesús pijajivi nabarëcuaicuaijai bajarapacuenia Jesús pejumait-sijume yabara. Jesús pijajivi jamatabëcuenenavëxaniabiaya najumaiti:

—Jesús nacajumaiti: “Xania panayajivitaema fariseovi pijalevadura. Panayajivitaema saduceovi ata pijalevadura,” nacajai. Baja raeta pacuenia Jesús nacajumaiti pan apo vajacaponaeaxae, najai Jesús pijajivi jamatabëcuenenavëxaniabiaya.

⁸ Jesús pijajivi jamatabëcueneyapëtaene bajarapacuenia jamatabëcuenenavëxaniabiaya pejumaitisijava levadura yabara. Nexata Jesús jumaiti pijajivjavabelia:

—¿Detsa xuajitsia panajumaitsimë: “Baja raeta pacuenia Jesús nacajumaiti pan apo vajacaponaeaxae,” panajamë? ¿Apo payapëtaemë tspaji tanecaëjëpaejava taexanaenexa pan itsa namatavenonatsi! ⁹ Paxamë abaxë apo panëjumeyapëtaemë. ¿Apo panajamatabënapitsimë tspaji pacuenia exanajë pamatacabi pan namatavenonatsi? Tsicobetsanajë cinco papanbëmimeje cinco mil ponëbeje pexaenexa. ¿Detsa xuabeje pavënëbame peyajuvënënacopabijavanë bemapirecuenia pexanaejavanë? ¹⁰ ¿Apo panajamatabënapitsimënuu tspaji pacuenia tsicobetsanajë siete papanbëmimeje

cuatro mil pajivibeje pexaenexa? ¿Detsa xuabeje bajarapamatacabi pavënëbame peyajuvënënacopabijavanê bemapirecuenia pexanaejavanê? ¹¹ Itsa pacajumaitsitsi: “Xania panayajivitaema fariseovi pijalevadura. Panayajivitaema saduceovi ata pijalevadura,” itsa pacajaitsi, pan yabara apo pacajumaitsitsi, jai Jesús pijajivijavabelia.

¹² Nexata jane baja Jesús pijajivi xaniavaetsia jumeyapêtanetsi. Nexata Jesús pijajivi najumaitsi: “Xania panayajivitaema fariseovi pijalevadura. Panayajivitaema saduceovi ata pijalevadura,” nacajai tsaena Jesús, fariseovi, saduceovi ata, itsa nacatsipaeba saicayacuenia Dioso pejumelivaisivecua vajajumecovënëtsiyaniva, najai Jesús pijajivi.

Pacuenia Pedro jumaitsi Jesúsjavabelia: “¡Xamê raja Cristomê!” jai yabara pelivaisi (Mr 8.27-30; Lc 9.18-21)

¹³ Jesús, pijajivi yajava, najetaruca Cesarea de Filipovënë tomaramuxunenia. Nexata Jesús pijajivijavabelia jumaitsi mapacueniaje:

–Xanê, Daxitajivi Pematapijinênê. ¿Detsa jivi jumai tsabiabi xanê yabara? ¿De tsaeta xanê ponênê? jai Jesús pijajivijavabelia.

¹⁴ Nexata Jesús pijajivi jumaitsi:

–Itsamonae xamê yabara jumai tsabiabi: “Juanpijinêmi raeta jivibautisabinêmi icatsia asaê,” jai tsabiabi. Itsamonae pijinia jumai tsabiabi: “Diosojumepaebinêmi raeta, profeta Eliaspjinê, ponêmi bajayata ponapona, icatsia asaê,” jai tsabiabi. Itsamonae pijinia jumai tsabiabi: “Diosojumepaebinêmi raeta profeta Jeremiaspijinê, ponêmi bajayata ponapona, icatsia asaê. Itsa jume, nexata meta bajayata Diosojumepaebivimi profetavimiyajuvënëne icatsia asaê,” jai tsabiabi itsamonae xamê yabara, jai Jesús pijajivi.

¹⁵ Nexata Jesús jumaitsi pijajivijavabelia:

–¿Detsa nexata paxamê pajamatabêitsimê xanê yabara? ¿Detsa xanê ponênê? jai Jesús pijajivijavabelia.

¹⁶ Nexata Simón Pedro jumaitsi Jesúsjavabelia:

–Xamê cajena Cristomê, athêbêvetsica Dioso pecaitorobinêtsica jivi necapanepaenexa. Xamê Dioso piasaêtsaponaponaenê pexênatomê, jai Pedro Jesúsjavabelia.

¹⁷ Jesús nexata jumaitsi Pedrojavabelia:

–Simón, Juan pexênatomê, xamê jamatabêcuenebarêyamê. Tsipaji itsajivi ata apo cayapêtaeyaexanae xanê taneypêtaenexamê Cristocuenenê. Biji rajane taxa, athêbêtsatsia peecaenê, cayapêtaeyaexana. ¹⁸ Nexata catsipaebianatsi mapacueniaje. Xamê rabaja Pedromê, beibotomê. Pacuenia ibopanaxanetojumata pexanetsibo bajayajebi ajamatabêsaê tsecae, bajara pijinia itsane tajajivi tanejumecovënëtsivi Cristocuenenê. Nexata dovathi apo jamatabêcuenematatoxenetsitsi tsane. ¹⁹ Pacuenia baupaevetsinê evetsiaexanatsi lla-vianê, bajara pijinia pacuenia caevetsiaexanaenatsi athêbênacuapijilivaisianê. Xua itavetsianame mapanacuataje, bajaraxua Dioso ata athêbênacuatsi itaveta. Xua tocopat-sianame pexanaenexa mapanacuataje, bajaraxua Dioso ata athêbênacuatsia tocopata pexanaenexa, jai Jesús Pedrojavabelia.

²⁰ Nexata Jesús pijajivi jumeitaveta petsipaebiyaniya itsajivijavabelia ata: “Mara ponê Cristoje, Dioso athêbêvetsica pitorobinêtsica jivi pecapanepaenexa,” pejaiyaniva.

Pacuenia Jesús tajêvelia navajunupaeba pebeyaxuabijavanexatsi yabara pelivaisi (Mr 8.31-9.1; Lc 9.22-27)

²¹ Jesús pebeyaxuabijavanexatsi, tajêvelia navajunupaeba pijajivijavabelia. Jumaitsi mapacueniaje:

–Ponaejitsianê Jerusalén tomarabelia. Nexata bajarajotalia nebejiobiaexanaena judíovi pijaancianovi, sacerdotevi penamatacaitorobivi ata, judíovi pecujarubivi ata. Bajaraxuacujinae nebeyaxuabiana. Itsiata baitsi jane tatêpacujinae, acueyabi matacabita, icatsia asaênê tsane, jai Jesús tajêvelia pijajivijavabelia.

²² Nexata Pedro junata Jesús pebarêponatabinexa pesaicaeyojavabelia. Nexata Pedro pesaicaeyojavatalia jumaitsi Jesúsjavabelia:

–¡Tajatuxanenê, Dioso caixatutotsoniataena bajarapamonae pecaexanaeyaniva daxita pacuenia tajêvelia navajunupaebame! jai Pedro Jesúsjavabelia.

²³ Nexata Jesús Pedrovecua napënëyorotaxuaba. Taenuca pijajivi penaeyavabelia. Nexata Jesús napënëyorotsia jumai tsanuca Pedrojavabelia:

–¡Dovathi, nevecuanatixire! Nejamatabêcueneêjêbijitsipame. Necopare Dioso taneitorobicuenia taexanaenexa. Xamê apo jitsipaemê pacuenia Dioso jitsipa taexanaenexa. Saya jitsipame pacuenia jivi jitsipa taexanaenexa, jai Jesús.

²⁴ Nexata Jesús jumaitsi pijajivijavabelia:

–Pajivi jitsipa tanepênaponaejava, bajarapajivi copatsi pejitsipaecuenia penajamatabêxainabiabijavami. Exanaponapona taitorobicuenia. Najamatabêcueneveretsinua, bejiobiaexanaejitsia atatsi, beyaxuabijitsia atatsinua, Dioso pejumelivaisi yabara

pijamatabēcuenesaē tsaponaponaenexa. Nexata jane baja xuacujinae nepēnaponaena. ²⁵ Pajivi exanaponaena penatojitsipacuenia, apo xainae tsane matacabi apo pevereverecaejava. Pajivi xanē tajamatabēcueneta copata penatojitsipacuenia pexanaejavami, bajarapajivi xainaena matacabi apo pevereverecaejava. ²⁶ Pajivi exanaponaena penatojitsipacuenia, bajarapajivi Diosovecua naxuabiana. Nexata bajarapajivi daxitacuenae xainae ata, mapanacuapijicueje, itsiata nacuerata. Tsipaji pexainacuenae apo capanepae tsanetsi Diosojavabelia. Tsipaji acuenebi tsane itsajivi ata pematamotsinexa penaxuabiyaniwa Diosovecua. ²⁷ Xanē, Daxitajivi Pematapijinē, yajavapatsianicajē taxa Dioso pijapenivenivenaecotia. Yajavapatsianicajēnua tajaängelevi. Nexata matamotaponaenajē caejivi canacujitsia, tanetonacuenēbivi. Naneconitsiaexanaenajē pijinia pijaneconi pexainaeivi. ²⁸ Xaniajanē pacuenia pacatsipaebijitsiatsi. Daxita paxamē patēpaenejevamē, xanē, Daxitajivi Pematapijinē, tajajivi ayaiBITSaētoXaneto naexanaena. Nexata paxamēyajuvēnēvi pepuatae tsane xanē tajajivi ayaiBITSaētoXaneto taevetsijava, tēpaena, jai Jesús pijajivijavabelia.

17

Pacuenia Jesús caeepatoyo perabēnivenivenataba yabara pelivaisi
(Mr 9.2-13; Lc 9.28-36)

¹ Jesús petēpaējavanexa tajēvelia penavajunupaebicujinae, seis pamatacabibecujinae, Jesús pijajivi, acueyabi ponēbeje, barējunaya pinijitsutoXanetojumabetsia. Jesús barējunaya mapamatabēxēyoje: Pedro, Santiago, Juan. Bajarapamatabēxēyo Jesús barējunaya pinijitsutoXanetojumabetsia. Santiago raja pejuyapijinē Juan. ² Nexata petsutojumatsia Jesús perabēnivenivenareca bajarapamonae pitabarata. Pacuenia matacabipijijumeto banaitayota, bajarapacuenia Jesús itabaranaitayota. Penaxatatsijavareca, daxita nivenivenaeaya niojai. ³ Nexata bajarajota Jesús pijajivi tane bajayata petēpaenēmibeje, Moiséspijinēbeje Elíaspijinēbeje. Jesús barēcuaiCuaijaisi bajaraponēbeje. ⁴ Nexata Pedro jumaisi Jesúsjavabelia mapacueniaje:

—iPatajatuxanenē, pijacuaxae panebarēponame! Itsa jitsipame, pacatoexanaenatsi acueyabi pabobērētobeje. Itsabobērēto xamēnexa tsane. Itsabobērēto Moisésnexa tsane. Itsabobērēto Elíasnexa tsane, jai Pedro Jesúsjavabelia.

⁵ Itsa abaxē Pedro cuaiCuaijai tsanucuae, penaitayotsiitarērēbo mataacataxuabatsi daxita bajarapamonae. Nexata bajarapamonae jumetane bajarapaitarērēbojavavetsica Dioso pejumatsijava: “Mara ponē taxēnato, tasivanēje. Bitso sivajamatabēcuenearbayanē. Pajumetaema bajaraponē,” pejaijavatsica bajarapamonae jumetane.

⁶ Jesús pijajivi itsa jumetane bajarapacuenia Dioso pejumatsijavatsica, irataeya othopa irata. Jesús pijajivi bitso najunaviaca. ⁷ Nexata Jesús imoxoyolia pijajivi. Jayalia. Jumaisi pijajivijavabelia:

—Panonobapunare. Pētsa pajunavame, jai Jesús pijajivijavabelia.

⁸ Nexata Jesús pijajivi itsa naēcobarēcēpalia Jesúsjavabelia, ajibi baja Moisésbeje Elíasbeje. Caenē baja Jesús nuca.

⁹ Nexata Jesús pijajivi itsa barērunanucaponaica petsutojumavetsica, jumeitaveta pijajivi. Jumaisi pijajivijavabelia:

—Pētsa patsipaebame itsajivi ata pacuene pataneme. Matapania xanē, Daxitajivi Pematapijinē, icatsia asaēnē tsane tatēpacujinae, nexata jane baja matapania patsipaebianame, jai Jesús pijajivijavabelia.

¹⁰ Nexata Jesús pijajivi yanijoba Jesúsjavabelia. Jumaisi:

—Patajatuxanenē, ¿detsa xuajitsia judiovi pecujarubivi jumai tsabiabi: “Bajayata ponēmi ponapona, Elíaspijinē, petēpacujinae icatsia asaē tsane. Bajaraponē copiata patsiana. Bajaraxuacujinae patsiana Cristo, pepo vajanacapanepaenēnexa jane baja,” jai tsabiabi? jai Jesús pijajivi.

¹¹ Nexata Jesús jumaisi pijajivijavabelia:

—“Copiata Elíaspijinē patsiana. Nexata bajaraponē jamatabēcuenexanetsiana daxitajivi,” itsa jai, Juanpijinēmi jivibautisabinēmi yabara jumaisi. Xaniajai rabaja pacuenia judiovi pecujarubivi jumaisi. ¹² Xaniajanē pacuenia pacatsipaebijitsiatsi. Elíaspijinē rabaja patajopa. Itsiata jivi apo yapētaetsi ponēcuene. Nexata pacuenia jivi jitsipa pexanaenexa bajaraponējavabelia, exana baja. Beyaxuabatsi. Bajara pijinia pacuenia xanē ata, Daxitajivi Pematapijinē, nebejiobiaexanaena bajarapamonae, jai Jesús pijajivijavabelia.

¹³ Nexata Jesús pijajivi jumeypētanetsi. Nexata Jesús pijajivi jamatabējumaisi:

—“Elíaspijinē rabaja patajopa,” itsa jai Jesús, Juanpijinēmi jivibautisabinēmi yabara jumaisi, jamatabējai Jesús pijajivi.

Pacuenia Jesús jamatejemayaexana pejevaxinē, dovathi peyajavaponaponaenē, yabara pelivaisi

(Mr 9.14-29; Lc 9.37-43)

¹⁴ Jesús pijajivi, acueyabi ponēbeje, barēnaviata petsutojumavetsica. Nexata bajarapatsutoxanetotabuta vajēnaeevetatsi jivi ayaiBITSaētoXaneto. Nexata pebi Jesús imoxyorenatsi. Bajaraponē Jesús yayiyataeya pematatabacabēta nucajunua Jesús pitabarata. Bajaraponē jumaitsi Jesúsjavabelia:

¹⁵ —Jesús, netoitaxutotsoniataema taxēnatonēyo. Netodevacaiababiabatsi raja. Bitso bejiobi tsabiabi. Anijatōnē isotuabelia natajuitabiaba. Itsajavata menialia jopabiabalia. ¹⁶ Nijajivjavaberena picani capatajē tanetojamatejemayaexanaenexa. Itsiata baitsi jane apo caējēpaetsi tanetojamatejemayaexanaenexa, jai bajaraponē Jesúsjavabelia.

¹⁷ Nexata Jesús jumaitsi pijajivjavabelia:

—¡Paxamē baja rovia apo pajumecovēnētšimē Dioso papecayavenonaejavanexa! Bjaraxuata apo pacajamatabēcuenecaējēpae pejevaxinē panevecuacapsapaenexa dovathi. ¡Panaejamatabēcuenetajavi baja rovia! Pexaniajailivaisivecua saicayacuenia panajamatabēxainame. ¿Detsa paepatojebi abaxē paxamējavata ponaponaenajē? ¿Detsa paepatojebi abaxē paxamējavabelia ajamatabēcuenesaēnē tsaponaponaē tsane patanejumecovēnētšinexamē? Panetocarenamēre pejevaxinē, jai Jesús pijajivjavabelia.

¹⁸ Nexata Jesús itaveta dovathi pejevaxinē pevecuacapsapaenexatsi. Nexata baja pejevaxinē dovathi vecuapitsapatsi. Pejevaxinē baja jamatejema.

¹⁹ Bjaraxuacujinae Jesús pijajivi barēcuacuajjaisi pijaepatojavata. Jesús pijajivi jumaitsi:

—Patajatuxanenē, ¿detsa xuajitsia meta paxanē apo panecaējēpae patavecuacapsapaenexa dovathi? jai Jesús pijajivi.

²⁰ Nexata Jesús jumaitsi pijajivjavabelia:

—Apo pacacaējēpae pejevaxinē panevecuacapsapaenexa dovathi. Tšipaji xaniavaetsia apo pajumecovēnētšimē Dioso papecayavenonaejavanexa. Xaniajanē pacuenia pacatsipaebijitsiatsi. Paxamē tšiquirjavayo ata itsa pajumecovēnētšipame Dioso papecayavenonaejavanexa, nexata pacacaējēpaejitsipa Dioso pesaēta pinijicueane paneexanaenexa. Nexata itsa pajumaitšimē tšipae mapatsutoxanetojavabeliaje: “Vecuanatixire majotaje. Itsajavabelia ecaename,” itsa pajamē, pacajumecovēnētšipa. Nexata natixitsipa. Nexata paxamē paneexanaenexa itsacunejavayo ata, apo pacatsitaayapēbeje tšipae itsa pepacueane xaniavaetsia pajumecovēnētšipame Dioso papecayavenonaejavanexa. ²¹ Mara paviridovathije apo jitsipae pepitsapaejava. Matapania panexaejava apo paxaemē tšipae pamatacabibeje asaēyata Diosojavabelia pavajētaponame dovathi pepitsapaenexa, pitsapaejitsipa, jai Jesús pijajivjavabelia.

Pacuenia icatsia Jesús tajēvelia navajunupaeba pebeyaxuabijavanexatsi yabara pelivaisi
(Mr 9.30-32; Lc 9.43-45)

²² Jesús abaxē pijajivi itsa barēponapona Galilea nacuata, pijajivjavabelia tajēvelia navajunupaebapona pebeyaxuabijavanexatsi. Jesús pijajivjavabelia jumaitsaponae macuenaiaje:

—Xanē, Daxitajivi Pematapijinēnē, necanajetsiana itsamonae pecobeyabelia. ²³ Bjarapamonae nebeyaxuabiana. Itsiata baitsi jane tanebeyaxuabicujinae, acueyabi matacabita, icatsia asaēnē tsane,” jai tsaponae Jesús pijajivjavabelia.

Nexata Jesús pijajivi itsa jumetanetsi bajarapacuenia Jesús penavajunupaebaponaejava petēpaejavanexa, Jesús pijajivi bitso najamatabēxaina.

Pacuenia Jesús matamota impuestomatamo yabara pelivaisi

²⁴ Jesús, pijajivi yajava, pata Capernaum tomarata. Nexata Capernaum tomarata impuestomatamo pematamoyanijobabiabivi pona Pedrojavabelia. Nexata bajarapamonae yanijobatsi Pedro.

—Pedro, ¿xaniajai tsaja? ¿Panijatuxanenē impuestomatamo apo matamotabiabi, paimpuestomatamo judōvi matamobabiaba templobo pevetsivjavabelia? jaisi.

²⁵ Pedro nexata jumaitsi:

—Jājā. Matamotabiaba cajena, jai.

Nexata Pedro joneya Jesús peecaeboyalialia. Nexata Pedro pejonejavatalia Jesús peecaeboyalialia, Jesús jumaitsi Pedrojavabelia:

—Pedro, ¿detsa xamē jamatabēcuenētšimē? Nacuaevetsivi palata pepitsinexa, pijajivi itoroba impuestomatamo petoyanijobinexatsi. ¿Detsa nexata pamonaejavabelia nacuaevetsivi pijajivi yanijobabiaba impuestomatamo? ¿Nacuaevetsivi tsaja pijamonaejavabelia? Itsa jume, ¿saicayavjavabelia tsaja, nacuaevetsivi pevetsinacuata pejinavanapevijavabelia? jai Jesús Pedrojavabelia.

²⁶ Pedro nexata jumaitsi Jesúsjavabelia:

—Nacuaevevtsivi raja pijajivi impuestomatamo yanijobabiaba saicayavijavabelia, nacuaevevtsivi pevetsinacuata pejinavanapaevijavabelia. Apo yanijobabiabi nacuaevevtsivi pijamonaevjavabelia, jai Pedro Jesúsjavabelia.

Jesús nexata jumaitsi Pedrojavabelia:

—Pacuenia nacuaevevtsivi pijamonae apo matamotsitsi impuestomatamo, bajara pijinia pacuenia xanē ata apo jitsipañē picani tamatamotsinexa impuestomatamo templobo pevetsivijavabelia taxa Dioso pijatemploboxae. ²⁷ Itsiata baitsi jane xamē matamotsianame itsajivi ata vajanacabaraanaepanaeyanivabeje. Liamēre pucaxanetojavabelia. Ējēbianame culupabota. Padujuainēyo copiaya catoxaena, jutsianame. Pecuibota cax-itjarabianame palatanēyo. Bajarapapalatanēyota caējēpaena vajamatamotsinexabeje impuestomatamo xanē tamatamotsinexa, xamē ata nematamotsinexa. Nexata bajarapapalatanēyo caponaename impuestomatamo nematamotsinexa templobo pevetsivijavabelia, jai Jesús Pedrojavabelia.

18

Pacuenia Jesús pijajivi jumaitsi: “¿Detsa ponē paxanēyajuvēnēnē panevecuaayajiamatabēcuenenē?” jai Jesúsjavabelia yabara pelivaisi

(Mr 9.33-37; Lc 9.46-48)

¹ Jesús baja itsa najumevereta Pedrojavabelia pecuaicuaijajava impuesto yabara, daxita Jesús pijajivi imoxoyorenatsi. Nexata Jesús pijajivi jumaitsi Jesúsjavabelia:

—Patajatuxanenē, ¿detsa ponē paxanēyajuvēnēnē bitso ayajiamatabēcuenenē tsane daxitavecua Dioso pijanacuatsia? jai.

² Nexata Jesús junata pejevaxinēyo. Pijajivi tuatujēta nuteta pejevaxinēyo. ³ Jesús nexata jumaitsi pijajivijavabelia:

—Xaniajanē pacuenia pacatsipaebijitsiatsi. Mapapejevaxinēyoje beveliajamatabēcuenenēyo nataeya najamatabēcuenecopata Diosojavabelia Dioso pevetsinexatsi. Nexata paxamē itsa apo panajamatabēcuenepēnēyorotsimē tsane perujujamatabēcuenecua beveliajamatabēcuenēvi panenataenexa pacuenia mapapejevaxinēyo itsije, nexata apo pajonemē tsane Dioso pijanacuayabetsia. ⁴ Nexata ponē jitsipa Dioso pijanacuatsia ayajiamatabēcuenenē penaexanaenexa daxitavecua, bajaraponē beveliajamatabēcuenenē natae, pacuenia mapapejevaxinēyo jamatabēcuenēitsije. ⁵ Pajivi copiapita tanejumecovēnētsijiviyo, mapitsijamatabēcuenējiviyoje, bajaraxua xanē taniji tanecopiapitsijava, jai Jesús pijajivijavabelia.

Pacuenia Jesús pijajivi muxujoba itsajivi ata pibisiacuene pexanaeyaexanaeyaniva yabara pelivaisi

(Mr 9.42-48; Lc 17.1-2)

⁶ Jesús jumaitsi pijajivijavabelia:

—Pajivi pibisiacuene exanaeyaexanaejitsipa mapitsipejevaxijivixi ataje, tanejumecovēnētsiyajuvēnējiviyo, bajarapajivi Diosojavabelia bitso naneconitsipa. Nexata Dioso ayaicuenia bajarapajivi naneconitsiaexanaejitsipatsi. Nexata pajivi najamatabēxaina pibisiacuene pexanaeyaexanaenexa tanejumecovēnētsivijavabelia, abaxē pibisiacuene exanaeyaexanaenejeva, bevēsicētatsi ibotoxanetojavabelia. Nexata bajarapajivi yamaēya, ibotoxaneto yajava, bexuarecatsi pucaxaneto tuatujēareca. Bajarapajivi bexuarecatsi bitso penaneconitsiyaniva Diosojavabelia pibisiacuene itsa exanaeyaexana tanejumecovēnētsiyajuvēnēvi. ⁷ ¡Dioso bitso naneconitsiaexanaenatsi mapanacupijivi pibisiacuene pexanaevi! Pibisiacuene vajanacaexanaeyaexanae jamatabēcuenenexa, navita mapanacuataje. Bajarapajamatabēcuenē tsitecaponaena pevājēnaeyabelia. Nexata pajivi pejamatabēcueneta itsamonae pibisiacuene exanaeyaexana, bajarapajivi bitso Dioso naneconitsiaexanaenatsi.

⁸ Bajaraxuata panecobeta, panetaxuta ata, pibisiacuene itsa paexaname, panacobe-cacure. Panataxucacure. Tajē panavecuaxuare. Itsiata xanepana panejonenexa cobemataxucaeya, taxumataxucaeya ata, apo pevereverecaenacuajavabelia. Biji rajane apo xanepanae tsipae anijacobebeje, anijataxubeje ata yajava, panejonenexa apo pevereverecaesotojavabelia. ⁹ Paneitaxutota panetaejava yabara ata pibisiacuene itsa paexaname, panaitaxutocajure. Itsiata xanepana panejonenexa pacaeitaxutojivimē apo pevereverecaenacuajavabelia. Biji rajane apo xanepanae tsipae anijaitaxutobeje yajava panejonenexa infiernojavabelia, jai Jesús pijajivijavabelia.

Pacuenia Jesús pijajivi livaisi tsipaeba oveja penaxuabinē pelivaisicuenia yabara pelivaisi
(Lc 15.3-7)

¹⁰ Jesús jumaitsi pijajivijavabelia:

–Itsamona mapanacuata bijiaya taeyabiaba mapitsipejevaxijivixi ataje, tanejume-covënëtsijivixi. Saya beveliamatabëcuenevi taeyabiaba. Pëtsa bajarapacuenia paxamë ata bijiaya pataneme tanejumecovënëtsivi. Bijiaya pëtsa pataneme mapitsipejevaxinëyo ataje, tanejumecovënëtsijiviyö. Tspaji bajarapamonaë ángelevi yajavajinavanapa peyavenon-abiabinexatsi. Bajarapaángelevi taxa Dioso, athëbëtatsia peecaenë, pitabarata jinavanapa.

¹¹ Xanë, Daxitajivi Pematapijinëné, patajopajë tacapanepaenexa daxita Diosovecua naxu-abiaya pejinavanapaevimi, jai Jesús pijajivijavabelia.

¹² Jesús icatsia jumaitsi pijajivijavabelia:

–Pacanaëjere mapacueneje. Pebi xainaëjitsipa cien ponëbeje oveja. Nexata itsa toya-juvënënaxuabijitsipatsi caenë, oveja pexainaenë puenetsipa noventa y nueve ponëbeje oveja. Bajaraxuacujinae jaitsipa petonaxuabinëtsi. ¹³ Xaniajanë pacuenia pacatsipaëbjitsiatsi. Bajaraponë itsa caxitajarabijitsipa pijaoveja, petonaxuabinëmitsi, bitso barëyataejitsipa. Nexata noventa y nueve ponëbeje, apo petonaxuabivitsi, pesivajamatabëcuenebarëyajava, matatoxenetsia bitso sivajamatabëcuenebarëya tsipae petonaxuabinëmitsi. ¹⁴ Bajara pijinia pacuenia paneaxa ata, athëbëtatsia peecaenë, apo jitsipae pevecuanaxuabinexatsi caejivi ata mapitsipejevaxijivixi ataje, tanejumecovënëtsivi, jai Jesús pijajivibelia.

Pacuenia Dioso pejumecovënëtsijivi bebarajamatabëcuenexanepana, itsacueniabi atatsi itsajivi, yabara pelivaisi

(Lc 17.3)

¹⁵ Icatsia Jesús jumaitsi pijajivijavabelia:

–Itsanë Dioso pejumecovënëtsinë pibisiacuene papecatoexanaejava, itsa pavënëlivaisitaename, xaniavaetsia payanijobianame caenëjavata. Nexata xaniavaetsia itsa panabarëcuacuajamëbeje, panabarajamatabëcuene xanepanaenamebeje. ¹⁶ Xaniavaetsia itsa apo pacabarëcuacuajajai tsane, nexata Dioso pejumecovënëtsinë pajunatsianame caenë, anijanëbeje ata, paneyajavaponaenexa pibisiacuene papecatoexanaenëjavabelia pemuxujobinexatsi. Nexata bajaraponëbeje pacajumetaena xaniavaetsia paenabarëcuacuajajava pibisiacuene papecatoexanaenëjavabelia. Bajarapacuenia itsa paexanaename, nexata pacuenia Dioso pejumelivaisibaxutota jumaitsi, paexanaename. ¹⁷ Ponë pibisiacuene pacatoexana, itsa apo namuxunaevetsi tsane paneyajavaponaenëbeje ata pemuxujobijava, nexata daxita Dioso pejumecovënëtsivi penacaetuatsijavata, payanijobianame papibisiacuene pacatoexana. Nexata ponë pibisiacuene pacatoexanaena, daxita Dioso pejumecovënëtsivi muxujobianatsi. Bajaraponë itsa apo namuxunaevetsi tsane, muxujobi atatsi Dioso pejumecovënëtsivi, nexata bajaraponë pataename Dioso apo pejumecovënëtsinëcuenia. Panavecuaitavetsianame pepatsiyanima panenacaetuatsijavata, jai Jesús pijajivijavabelia.

¹⁸ Icatsia Jesús jumaitsi pijajivijavabelia:

–Xaniajanë pacuenia pacatsipaëbjitsiatsi. Xua jivi paitavetsianame pexanaeyaniva mapanacuataje, bajaraxua Dioso athëbënacuatsia ata itaveta. Xua jivi patocopat-sianame pexanaenexa mapanacuataje, bajaraxua Dioso ata athëbënacuatsia tocopata pexanaenexa, jai Jesús pijajivijavabelia.

¹⁹ Icatsia Jesús jumaitsi pijajivijavabelia:

–Pacatsipaëbjitsiatsinua mapacueniaje. Mapanacuata paanijanëmëbeje itsa panajamatabëcuenejëpamebeje xua pavajëtsijitsiamëbeje Diosojavabelia, nexata taxa, athëbëtatsia peecaenë, pacajumecovënëtsianabeje xua pavajëtamëbeje. ²⁰ Tspaji itsajota anijajivibeje, acueyabi ata, nacaetuata, tanejumecovënëtsivi, bajarajota xanë bajarapamonaë yajavae-caenajë, jai Jesús pijajivijavabelia.

²¹ Nexata Pedro imoxoyolia Jesús. Pedro jumaitsi Jesúsjavabelia:

–Tajatuxanenë, panetsipaebame rabaja. Panejumaitsimë mapacueniaje: “Itsajivi Dioso pejumecovënëtsijivi pibisiacuene itsa pacaexanaena, pajamatabëcaevianame. Barajamatabëcuenexanepanaeya pataename. Itsa pavënëlivaisitaename pibisiacuene papecatoexanaejava, xaniavaetsia payanijobianame caenëjavata. Nexata xaniavaetsia itsa panabarëcuacuajamëbeje, panabarajamatabëcuene xanepanaenamebeje,” panëjamë. ¿Detsa xuabeje pibisiacuene nexanae ata, pibisiacuene netoexanae atanua, jamatabëcaevianajë barajamatabëcuenexanepanaeya tataenexa bajarapajivi? ¿Siete tsaja xuabeje ata? jai Pedro Jesúsjavabelia.

²² Jesús nexata jumaitsi Pedrojavabelia:

–Siete xuabejenexa yabara apo jumaitsinë. Biji rajane siete pasetentabeje pibisiacuene pacaexanae ata, pibisiacuene pacatoexanae atanua, pajamatabëcaevare barajamatabëcuenexanepanaeya panetaenexa, baitsi cuatrocientos noventa xuabeje ata, jai Jesús Pedrojavabelia.

Ponē apo jitsipae pebarajamatabēcuenexanepanaenexa itsanējavabelia yabara pelivaisi

²³ Jesús livaisi tsipaeba comparacióncuenia pijajivjavabelia. Jumaitsi mapacueniaje: —Dioso pijanacuatatsia pijajivjavabelia exanaena pacuenia nacuaevevsinē pijajivjavabelia baexana. Nacuaevevsinē jitsipa piamoneyabivitsi pematamotsinexatsi xua amoneyabatsi. ²⁴ Nexata itoroba pijajivi petotsipaebaponaenexatsi daxita pamona amoneyabatsi. Nexata pijajivi tobarēparenatsi ponē bitso ayaijava amoneyabatsi, baitsi millones de pesos piamoneyabinētsi. ²⁵ Nexata bajaraponē apo xainae pematamotsijavanexatsi. Nexata nacuaevevsinē itoroba pijajivi. Jumaitsi: “Mara ponē bitso ayaijava niamoneyabaje. Nexata pacanajetaxuabianame dajubicuenia itsamonaejavabelia amoneya petonacuenebaponaenexa daxitamatacabijavabelianexa. Daxita pexi, pijava ata, pecobcovē ata yajava, pacanajetaxuabianame. Bajarapacuenia pitsianajē tsiquirijavayo ata taneamoneyabijavamatamo,” jai nacuaevevsinē pijajivjavabelia. ²⁶ Nexata ponē amoneyaba, nacuaevevsinē pitabarata pematatabcabēta nucajunua. Piniijicuenia vajēta nacuaevevsinējavabelia. Jumaitsi: “Nejamatabēcuenevere abaxē. Camatamotsianatsi rabaja daxita xua camoneyabatsi,” jai. ²⁷ Nexata nacuaevevsinē itaxutotsioniatane piamoneyabinētsi. Nexata nacuaevevsinē jumaitsi piamoneyabinētsijavabelia: “Daxita rabaja taneamoneyabijavamē, iquinajē. Nexata baja apo nematamotsimē tsane,” jai nacuaevevsinē piamoneyabinētsijavabelia. Bajaraxuacujinae copata baja penaviatsinexa. ²⁸ Nexata bajaraponē penaviatsinexa, ajena pitsapalia nacuaevevsinē pijabovecua, caxitarabaxuaba itsanē penajuanaacuenebabiabinēbeje nacuaevevsinē pijajava. Bajaraponē nexata jamatabējumaitsi: “Maponē tsiquirijavayovajēto niamoneyabi ataje, yanijobianajē tanematamotsinexa,” jamatabējai. Nexata cuibocamisavaetaba. Cuibocuet-saca asaēyata. Jumaitsi bajaraponējavabelia: “Nematamore taneamoneyabijavamē,” jai. ²⁹ Nexata piamoneyabinētsi bajaraponē pitabarata pematatabcabēta nucajunua. Piniijicuenia vajēta. Jumaitsi: “Nejamatabēcuenevere abaxē. Camatamotsianatsi raja itsiata daxita xua camoneyabatsi,” jai. ³⁰ Itsiata baitsi jane bajaraponē piamoneyabinētsi apo itaxutotsioniatane. Barēpona baja penaneconitsivi pejebabiabibojavabelia penaneconitsiaexanaenexa. Bajarapacuenia pematamotsinexatsi daxita piamoneyabijavatsi. ³¹ Nexata nacuaevevsinē pijajivi itsa tane bajarapacuenia pexanaejava penajua nacuenebabiabinēbejejavabelia, bajarapamonae bitso najamatabēxaina. Nexata nacuaevevsinē pijajivi ponalia petsipaebinexa bajaraxua pijatuxanenējavabelia. ³² Nexata nacuaevevsinē pijajivi itsa tsipaebatsi, itoroba icatsia pijajivi petojunatsinexatsi bajaraponē. Nexata itsa tocatapatsi, nacuaevevsinē jumaitsi bajaraponējavabelia: “Nijamatabēcuenebejenē baja rovia. Catoiquinatsi rabaja picani taneamoneyabijavamē. Tsiipaji pinijicuenia nevajētame. ³³ Pacuenia caitaxutotsioniatanetsi, bajara pijinia pacuenia itaxutotsioniataejitsipame pecaamoneyabinē,” jai nacuaevevsinē. ³⁴ Nexata nacuaevevsinē bitso baraanaepana millones de pesos piamoneyabinētsijavabelia. Nexata nacuaevevsinē jumaitsi pijajivjavabelia: “Bajaraponē pacaponaeremelia penaneconitsivi pejebabiabibojavabelia penaneconitsiaexanaenexatsi. Bajarajota naneconitsiaponaponaena ēpematamoveretsijavabelianexa daxita taneamoneyabijava,” jai nacuaevevsinē, jai Jesús pijajivjavabelia.

³⁵ Jesús icatsia jumaitsi pijajivjavabelia:

—Bajara pijinia pacuenia paxamē ata taxa, athēbētatsia peecaenē, pacaexanaena, itsa apo pajamatabēcaevimē tsane panebarajamatabēcuene xanepanaenexa pamonaē pacait-sacueniaba, jai Jesús pijajivjavabelia.

19

Pacuenia Jesús jivi livaisi tsipaeba penacojiobinē pijava pexuabianiva yabara pelivaisi (Mr 10.1-12; Lc 16.18)

¹ Jesús pijajivi pemuxujiobicujinae pebarajamatabēcuene xanepanaenexa itsamonaē itsacueniabi atatsi, Jesús baja pona Galilea nacuaevecua. Jesús nexata pata Judea nacua-yabelia, Jordānmene itsapanavelia. ² Jivi ayabitsaētoxaneto pēnaponatsi. Bajarajotalia Jesús jamatejemayaexana pivavitane.

³ Nexata fariseovi Jesús imoxoyorenatsi. Jamatabēcueneējēbiaya yanijobatsi. Jesús bijiaya itsa jumecanaviata, peneconitsinexatsi picani. Nexata fariseovi jumaitsi Jesúsjavabelia:

—¿Xanepana tsaja penacojiobinē pijava pexuabinexa itsacuenejavayo ata yabara? jai fariseovi.

⁴ Jesús nexata jumaitsi fariseovijavabelia:

—¿Apo palebimē tsiipaji paneyapētaenexa pacuenia Dioso pejumelivaisibaxutota jumaitsi? Pamatacabi Dioso taxuxuaba nacua pexanaejava, bajarapamatacabi Dioso exana pebi, pijava yajava. ⁵ Nexata Dioso pejumelivaisibaxutota jumaitsi mapacueniaje: “Pebi itsa nacojioba pijavajavabelia, banatsata paxavecua, pena atavecua. Nexata Dioso tane

anijajivimibeje becaejivi,” jai Dioso pejumelivaisibaxutota. ⁶ Nexata Dioso apo tae beani-jajivibeje. Becaejivi saya tane Dioso. Bajaraxuata itsanē ata apo bexuabi pijava. Tsipaji Dioso pejamatabēcueneta napitsiaexanatsibeje, jai Jesús fariseovijavabelia.

⁷ Nexata icatsia fariseovi jumaiti Jesúsjavabelia:

—¿Detsa xuajitsia bajayata Moiséspijinē copata penacojiobinē petoyaquinaenexa cuyalato-baxuto pijava pitavetsilivaisi pexuabinexa bajarapacuenia? jai fariseovi.

⁸ Jesús nexata jumaiti fariseovijavabelia:

—Paneajamatabēcuenetajaxae, Moiséspijinē pacatocopata bajarapacuenia paneexanaenexa panexuabinexa panijavajivi. Itsiata baiti jane Dioso pexanaejivibejevaveliacujinae, apo tocopatsi picani bajarapacuenia pexanaenexa. ⁹ Nexata mapacuenia pacatsipaebianatsije. Ponē pijava xuaba, itsanējavabelia bajarapova pevitota pibisiacuene apo vecuaexanae atatsi, bajaraponē naneconita Diosojavabelia pijava pexuabixae. Nexata pijava pexuabinē itsa nacojioba icatsia itsavajavabelia, bajaraponē pibisiacuene exana pevitota. Tspiji pepo pijavavecuua jaita itsava. Dioso cajena abaxē bajaraponē pexuabiva pijavacuenia totanetsi. Ponē ata itsanē pexuabiva pita, bajaraponē ata pibisiacuene exana pevitota. Tspiji itsanē pijavami pita, pova abaxē Dioso totanetsi itsanē pijavacuenia, jai Jesús fariseovijavabelia.

¹⁰ Nexata Jesús pijajivi jumaiti Jesúsjavabelia:

—Itsa bajarapacuenia pebi apo tocopatsi itaxutojema pijava pexuabinexa, nexata meta baja apo benacojiobi, jai Jesús pijajivi.

¹¹ Jesús nexata jumaiti pijajivijavabelia:

—Daxitajivi apo nejumeyapētae tsane xua yabara jumaitsinē. Itsiata nejumeyapētaena pamonaē Dioso jamatabēcueneyavenonatsi. ¹² Apo caejamatabēcuene raja xua yabara pe-bijivi apo nacojiobi. Itsamonae penabejenaenē naexana. Nexata apo caējēpaetsi pena-cojiobijava. Itsamonae jivi pejamatabēcueneta bepenabejenaenēcuenia exanatsi. Nexata apo caējēpaetsi penacojiobijava. Itsamonae ēDioso pijacuene petonacuenebinexa, apo nacojiobi. Nexata ponē jamatabēcuenecaējēpatsi nacojiobinejeva peponaponaenexa ēDioso pijacuene petonacuenebinexa, bajaraponē nejumecovēnētsi, jai Jesús pijajivijavabelia.

*Pacuenia Jesús jumaiti pejevaxijivixijavabelia yabara pelivaisi
(Mr 10.13-16; Lc 18.15-17)*

¹³ Jesúsjavaberena itsamonae pejevaxijivixi tocapataponatsi Jesús pecobeta pejayatapon-aenexa. Petovajētsinexatsinua Diosojavabelia, tocapataponatsi. Nexata Jesús pijajivi itaveta pexi pecapatsivi. Jesús pijajivi jumaiti pexi pecapatsivijavabelia:

—Pētsa patocapataponame panexi Jesúsjavaberena, jai.

¹⁴ Nexata Jesús jumaiti pijajivijavabelia:

—Pētsa paitavetame. Pacopare pejevaxijivixi pepatsinexa xanējavaberena. Mapitsipeje-vaxijivixije jumeabinejeva, xaniavaetsia bajumecovēnēta palivaisi tsipaebatsi. Nexata pamonaē jitsipa pejonejava Dioso pijanacuayabetsia, bajara pijinia pacuenia jumeabine-jeva, xaniavaetsia bejumecovēnēta Dioso pejumelivaisi, jai Jesús pijajivijavabelia.

¹⁵ Jesús nexata pecobeta jayatapona pejevaxijivixi, caejiviyo canacujitsia. Bajaraxuacu-jinae Jesús baja pona bajarapanacuavecuua.

*Pacuenia pevejēato, bitso pexainaenē, cuaicuajiai Jesúsjavabelia yabara pelivaisi
(Mr 10.17-31; Lc 18.18-30)*

¹⁶ Pevjēato pata Jesúsjavaberena. Nexata pevejēato jumaiti Jesúsjavabelia:

—Petuxanenē, pexaniajamatabēcuenenēmē. ¿Detsa pitsicuene, pexaniacuene, exanaen-najē taxainaenexa matakabi apo pevereverecejava? jai pevejēato.

¹⁷ Jesús nexata jumaiti pevejēatojavabelia:

—¿Detsa xuajitsia: “Pexaniajamatabēcuenenēmē,” nejamē? Ajibi raja itsapebi ata pexa-niamatabēcuenenē. Caenē rabaja Dioso pexaniajamatabēcuenenē. Itsiata itsa jitsipame nexainaenexa matakabi apo pevereverecejava, jumecovēnēre pacuenia Dioso pejumeli-vaisita itoroba jivi pejumecovēnētsinexa, jai Jesús pevejēatojavabelia.

¹⁸ Nexata pevejēato jumaiti Jesúsjavabelia:

—¿Detsa palivaisi nexata jumecovēnētsianajē? jai.

Nexata Jesús jumaiti pevejēatojavabelia:

—Dioso pejumelivaisibaxutota jumaiti mapacueniaje: “Pētsa beyaxuabame jivitonē. Pētsa jaitame itsava nijavavecuua. Pētsa nacobetoxotame. Pētsa itsamonae pexanaejava yabara najumetsēnētsiaya paebame. ¹⁹ Axa yayiataema. Ena ata yayiataema. Asivamēre itsajivi ata pacuenia xamē nijacuata nasivamē,” jai Dioso pejumelivaisibaxutota, jai Jesús pevejēatojavabelia.

²⁰ Pevjēato nexata jumaiti Jesúsjavabelia:

—Daxita rabaja bajarapalivaisianē jumecovēnētājē. ĶDetsa xua netosaica abaxē taex-
anaenexa? jai pevējēato.

²¹ Nexata Jesūs jumaitsi pevējēatojavabelia:

—Itsa jitsipame pepacuene nejamatabēcuenexanepanaejava, neja-
matabēcuenevitsabijavanua, nexata ponare. Canajetsianame daxita xua xainame.
Bajarapamatamomi tsicobetsanaename bepejiobivi. Nexata bajarapacunia xainaname
bitso nexainaejava Dioso pijanacuatsia. Bajaraxuacujinae nepēnaponaname, jai Jesūs
pevējēatojavabelia.

²² Nexata pevējēato itsa jumetane bajarapacunia Jesūs pejumaitsijava,
najamatabēcainaeya baja vecuapona Jesūs. Tsipaji pevējēato daxitacuene bitso pexainaenē.
Nexata pevējēato apo jamatabējumecovēnētsi palivaisi Jesūs tsipaeba.

²³ Nexata pevējēato pecovēta Jesūs jumaitsi pijajivijavabelia:

—Xaniajanē pacunia pacatsipaebijitsiatsi. Ponē bitso daxitacuene pexainaenē,
tsiayapēbejtsi bitso penajamatabēcuenecopatsinexa Diosojavabelia pecapanepaenexatsi
Dioso pijanacuayabetsia. ²⁴ Icatsia matavējēa pacajumaitsitsi. Pacunia camello acuenēbi
pejonejava palutaetoitaxutovojuotulia, bajara pijinia pacunia bitso pexainaenē acuenēbi
tsane pejonejava Dioso pijatomarabetsia, jai Jesūs pijajivijavabelia.

²⁵ Jesūs pijajivi itsa jumetane bajarapacunia Jesūs pejumaitsijava, bitso
jamatabēcuenenabenajaca. Jesūs pijajivi jumaitsi Jesūsjavabelia:

—ĶDetsa nexata pitsivi panepaena Diosojavabelia bitso pexainaevi ata itsa apo panepae
tsane Diosojavabelia? jai.

²⁶ Jesūs asaēya naēcota pijajivijavabelia. Jumaitsi pijajivijavabelia:

—Jivi raja apo caējēpaetsi pijacuata penacapanepaenexa Diosojavabelia. Caenē Dioso
caējēpatsi. Dioso raja caējēpatsi daxitacuene pexanaenexa, jai Jesūs pijajivijavabelia.

²⁷ Nexata Pedro jumaitsi Jesūsjavabelia:

—Patajatuxanenē, paxanē rabaja pacopatajē daxitacuene pataxainaejavami. Nexata
baja pacapēnainavanapatsi. ĶDetsa xua meta panerajutsiana? jai Pedro Jesūsjavabelia.

²⁸ Nexata Jesūs jumaitsi pijajivijavabelia:

—Xaniajanē pacunia pacatsipaebijitsiatsi. Pamatacabi daxitacuene pejanajava icatsia
naexanaena, xanē, Daxitajivi Pematapijinēnē, ecaenajē tronovēnējavata taevetsinexa daxi-
tajivi. Bajarapamatacabi paxamē ata, doce paponēmēbeje patanepēnainavanapaevimē, pae-
naename, pacaenēmē canacujitsia, panijatronota vajanajuavevetsinexa xua evetsianajē.
Nexata paxamē paenaename jueznēcuenia pananeconitsiaexanaenexa pijaneconi pex-
ainaevi. Pananeconitsiaexanaename Israelpijinēmē pexi, doce ponēmibeje, pemomoxi.

²⁹ Daxita pamonae tajamatabēcueneta pueneta pijabomi, pematapijivi ata, pejuyapijivi
ata, paxa ata, pena ata, pijava ata, pexi ata, pijairanē ata, Dioso nexata bajarapa-
monae rajutsianatsi ayajjava bitso pepuentsijavanēmē matatoxenetsia. Caejavayomi-
jamatabēcuenē tsaponae, rajutsianatsi cien xuabeje tsaponae pevājēnaeyabelia. Rajut-
sianatsinua matacabi apo peverevecaejava. ³⁰ Pamonae aeconoxae mapamatacabitaje
ayajjamatabēcuenēvi tanetsi, bajarapamonae itsamatacabi Dioso beveliajamatabēcuenēvi
exanaenatsi. Pamonae pijinia mapamatacabitaje beveliajamatabēcuenēvi tanetsi, baja-
rapamonae itsamatacabi Dioso ayajjamatabēcuenēvi exanaenatsi, jai Jesūs pijajivijavabelia.

20

*Pacunia Jesūs livaisi tsipaeba pabi pexainaenē petonacuenebivitsi najēpaeya pematamot-
sijava pelivaisicuenia yabara pelivaisi*

¹ Icatsia Jesūs jumaitsi pijajivijavabelia:

—Aeconoxae Dioso pejumelivaisi comparaciōncuenia pacatsipaebianatsi
patanejumeyapētaenexamē. Dioso pijajivi pematamotsijava pijanacuatsia,
jēpa mapalivaisije. Pabixaneto pexainaenē ponapona. Ajena matacabi
tsarucaponae, naropota jivi pejaitsinē petonacuenebinexatsi uvavēnējava peubipabita.

² Caxitajarabaxuaba baja nexata jivi. Junata petonacuenebinexatsi. Caematacabi
matamotsiapaeba caedenario. Jejai nexata bajarapamonae. Nexata itoroba
pijapabiabelia petonacuenebinexatsi.

³ Bajaraxuacujinae juameto baja tajē itsa
rucaina, a las nueve, naropota icatsia. Taenuba tomara tuatujēta pebijivi, saya
jema pejinavanapaevi.

⁴ Nexata jumaitsi bajarapamonaejavabelia: “Paxamē ata
paponaremelia tajapabiabelia. Panetonacuenebianame. Pacamatamotsianatsi
raja xaniavaetsia,” jai pabixainaenē.

⁵ Nexata bajarapamonae ata ponalia
petonacuenebinexatsi. Bajaraxuacujinae, matonejeepatota, junata icatsia itsamonae.
Bajarapamonae ata ponalia petonacuenebinexatsi. Bajaraxuacujinae, bejamatabēcuenē a
las tres, junata icatsia itsamonae. Bajarapamonae ata ponalia petonacuenebinexatsi.

⁶ Bajaraxuacujinae, caniviyo, bejamatabëcuene a las cinco, pabixainaenë icatsia pona tomara tuatujäëreca. Caxitajarabaxuaba icatsia pebijivi, saya jema pejinavanapaevi. Nexata pabixainaenë jumaitsi bajarapamonaejavabelia: “¿Detsa xuajitsia saya daxitamatacabi pajinavanapame panacuenebinejevamë?” jai. ⁷ Nexata bajarapamonaevi jumaitsi: “Tsipaji itsajivi ata apo panejunatsi patatonacuenebinexa,” jai. Nexata pabixainaenë jumaitsi: “Paxamë ata paponaremelia tajapabiabelia patanetonacuenebinexamë. Pacamatamotsianatsi raja xaniavaetsia,” jai pabixainaenë. Nexata bajarapamonaevi jejai. Ponalia petonacuenebinexatsi. ⁸ Nexata baja juameto itsa tabujuniya, pabixainaenë jumaitsi pijajivitonëjavabelia: “Junare baja tanetonacuenebivi. Matamobare baja. Copiaya matamobare pamonaevi pepacotocaevi pejonevi. Pamonaevi pepacopiaya pejonevi cotocaevi matamobianame,” jai pabixainaenë pijajivitonëjavabelia. ⁹ Nexata pamonaevi pepacotocaevi junua a las cinco penacuenebinexa, parena pematamobinexatsi. Nexata caenë canacujitsia matamobatsi caedenario. ¹⁰ Nexata daxita pamonaevi bajayacunua pepacopiaya junua penacuenebinexa, pepacotocaevi juya parena pematamobinexatsi. Nexata bajarapamonaevi jamatabëjumaitsi: “Caedenario meta pematatsënëa vaxaitsi nacamatamobiana. Tsjipaji copiaya vaxaitsi junuatsi vajanacuenebinexa,” jamatabëjai bajarapamonaevi. Itsiata baitsi jane bajarapamonaevi ata, caenë canacujitsia, matamobatsi caedenario tsaponae. ¹¹ Nexata bajarapamonaevi penacuenebimatamo baja itsa nota, baranaepana pabixainaenëjavabelia. ¹² Jumaitsi bajarapamonaevi: “Mapamonaevi cotocaevi pepatsivi, nacueneba saya caehora. Paxanë baja rovia ayaicuenia panacuenebajë. Icotia daxitamatacabi panetsajava. Itsiata mapamonaevi matamobame pacuenia panematamobame,” jai bajarapamonaevi. ¹³ Itsiata baitsi jane pabixainaenë jumaitsi bajara pamonaevajuvënëjavabelia: “Itsacuenejavayo ata pibisiacueni apo pacaexanaetsi. Patacajunatsijavata patanetonacuenebinexamë, caedenario pacatsipaebatsi patacamatamotsinexa patanetonacuenebimatamomë. Nexata baja bajarapamonaevi pacarajutsi. ¹⁴ Panijamatamo baja papitame. Paponare baja panijabonëjavabelia. Pamonaevi cotocaevi junua tanetonacuenebinexa, bajarapamonaevi ata matamobajë pacuenia patacamatamobatsi. Bajarapacuenia matamobajë pacuenia xanë jitsipajë. ¹⁵ Tajapalataxae, netoxanepana pacuenia jitsipajë tarajutsinexa. ¿Pacobeacëbame tsaja bajarapamonaevi ayajiva tarajutsixae? jai pabixainaenë petonacuenebivitsi yajuvënëjavabelia. ¹⁶ Bajara pijinia pacuenia Dioso ata, pacuenia jitsipa, exanaena pijajivijavabelia. Pamonaevi mapanacuata ayajamatatabëcuenevi tanetsi, bajarapamonaevi itsamatacabi Dioso bevelijamatatabëcuenevi exanaenatsi. Pamonaevi pijinia mapanacuata bevelijamatatabëcuenevi tanetsi, bajarapamonaevi itsamatacabi Dioso ayajamatatabëcuenevi exanaenatsi. Bajarapacuenia Dioso exanaena tsipaji picani jivi ayaibitsaëtoxaneto Dioso junata. Itsiata bajarapamonaevajuvënëvi, caejiviyobeje saya, Dioso jumecovënëta, jai Jesús pijajivijavabelia.

Pacuenia icatsia Jesús tajëvelia navajunupaeba pebeyaxuabijavanexatsi yabara pelivaisi (Mr 10.32-34; Lc 18.31-34)

¹⁷ Jesús pona Jerusalén tomarabelia. Nexata Jesús, pijajivi ayaibitsaëto yajava, naje-taruca namutua, itsamonae yajava. Nexata bajarapamonaevueca epijajivi, doce ponëbeje, Jesús junata pimoxoyotsinexatsi. Nexata Jesús pebeyaxuabijavanexatsi, tajëvelia navajunupaeba pijajivijavabelia. Jesús jumaitsi mapacueniaje:

¹⁸ —Panejumetaema. Mara Jerusalén tomarabelia ponatsije. Bajarajotalia xanë, Dax-itajivi Pematapijinë, tanevaetabinexa necanajetsiana sacerdotevi penamatacaitorobivi pecobeyabelia. Necanajetsiana judiövi pecujarubivi pecobeyabelia ata. Nexata xanë neneconitsiana tanebeyaxuabinexa. ¹⁹ Bajaraxuacujinae icatsia necanajetsiana itsanacuaverena pepatsivi pecobeyabelia. Bajarapamonaevi necanecaponaena. Nejumatiubavena penaneconitsivi pejumaconitabiabimacata. Bajaraxuacujinae cruzajavabelia necobematabiabarutsiana tatëpaenexa. Itsiata baitsi jane tanebeyaxuabicujinaevi, acueyabi matacabita, icatsia asaënë tsane, jai Jesús pijajivijavabelia tajëvelia penavajunupaebijavata pebeyaxuabijavanexatsi.

Pacuenia Santiagobeje Juanbeje pena vajëta Jesúsjavabelia pexaniacueni petoexanaenexatsi yabara pelivaisi

(Mr 10.35-45)

²⁰ Santiagobeje Juanbeje paxa pevënë Zebedeo. Nexata bajaraponëbeje pena barëliatsibeje Jesúsjavabelia. Bajarapova pematatabacabëta nucajunua Jesús pitabarata. Vajëta pexaniacueni petoexanaenexatsi. ²¹ Nexata Jesús jumaitsi bajarapovajavabelia:

—¿Detsa pitsicueni jitsipame tacatoexanaenexa? jai Jesús.

Nexata bajarapova jumaitsi Jesúsjavabelia:

—Pamatacabi daxitacuene evetsianame, tocopatsianame taxēnatobeje nemuxuneneta penaecaenexabeje panenajuaevevetsinexa. Itsanē tocopatsianame necujanenia peecaenexa. Itsanē tocopatsianame netsavenononia peecaenexa, jai bajarapova Jesúsjavabelia.

²² Nexata Jesús jumaitsi Santiagobeje Juanbejejavabelia:

—Paxamēbeje apo payapētaemēbeje xua pavajēcaeyaexanamebeje ena xanējavaberena. ¿Pacacajēpabeje tsaja panenacaevetsinexabeje papecabeljioviaexanaenexabeje pacuenia xanē nacaevetsianajē tanebejioviaexanaenexa? ¿Pacacajēpabejenua tsaja panenacaevetsinexabeje papecabeyaxuabinexabeje pacuenia xanē nacaevetsianajē tanebeyaxuabinexa? jai Jesús Santiagobeje Juanbejejavabelia.

Nexata Santiagobeje Juanbeje jumaitisibeje:

—Jājā, panecajēpabeje cajena, jaibeje.

²³ Nexata icatsia Jesús jumaitsi Santiagobeje Juanbejejavabelia:

—Paxanijamēbeje rabaja. Paxamēbeje pacabejioviaexanaenabeje pacuenia xanē nebejioviaexanaena. Pacabeyaxuabianabejenua pacuenia xanē nebeyaxuabiana. Itsiata baitsi jane xua panevajētamebeje panenaecaenexabeje, itsanē tacujanenia, itsanē tatsavenononia, bajaraxua Dioso apo netocopatsi patacatocopatsinexabeje. Tspijai raja taxa Dioso ēpitapetsivinexa abaxē bajaraxua toxaniavaeta, jai Jesús Santiagobeje Juanbejejavabelia.

²⁴ Nexata diez ponēbeje Jesús pijajivi vēnētane pepēya bajaraxua Santiagobeje Juanbeje Jesúsjavabelia pevajēcaejavabeje. Nexata bajarapamonae jamatabēcuenebaraanaepana Santiagobeje Juanbejejavabelia. ²⁵ Nexata Jesús daxita pijajivi junata. Jesús jumaitsi pijajivijavabelia:

—Payapētaneme rabaja pacuenia nacuaevetsivi exana. Eveta caenacua canacujitsia. Nexata nacuaevetsivi pijajivicuenia eveta pamonaē jinavanapa pevetsinacuanējava. Nexata bajarapanacuanē pevetsivi ayaijamatabēcuenivi nataeyabiaba. Xua jamatabēitoroba pevetsinacuanējava pejinavanapaevi petoexanaenexatsi, ajumesaēya itorobabiaba petoexanaenexatsi. ²⁶ Pētsa paxamē bajarapamonae cuenejēpaeya bajarapacuenia paexaname itsamonaejavabelia. Biji rajane ponē paxamēyajuvēnēnē jitsipa ayaijamatabēcuenenē penaexanaenexa daxita paxamēvecua, bajaraponē daxita paxamē bepanijajivitonēcuenia bepacayavenonabiaba. ²⁷ Ponē paxamēyajuvēnēnē jitsipa penaexanaenexa papecanamatacaitorobinēnēnē, bajaraponē daxita paxamē bepanijajivitonēcuenia bepacayavenonabiaba. ²⁸ Tspijai rabaja xanē ata, Daxitajivi Pematapijinē atanē, apo patajopaenē jivi tanyavenonaenexa. Biji rajane xanē patajopajē tayavenonaenexa daxitajivi. Patajopajē tasivatēpaenexa jivi ayaibitsaētoxaneto pibisiacuene pexanaenecomimi taneconimatamotsinexa, jai Jesús pijajivijavabelia.

Pacuenia Jesús itaxutoxanepanaeyaexana bitso pitaxutotsēcēnaenēbeje, apo petaenēbeje, yabara pelivaisi

(Mr 10.46-52; Lc 18.35-43)

²⁹ Jesús, pijajivi yajava, pitsapa Jericó tomaravecua. Nexata jivi ayaibitsaēto pēnaponatsi. ³⁰ Panamutojava Jesús najetaruca, bajarapanamutojavata ecabeje bitso pitaxutotsēcēnaenēbeje, apo petaenēbeje. Nexata bajaraponēbeje ita jumetanebeje bajarapanamutua imoxoyo Jesús penajetarucaejava, vavajaiibeje tsecae.

—Jesús, Davidpijinē pemomomē, paneitaxutotsoniataemabeje! jaibeje tsecae pitaxutotsēcēnaenēbeje.

³¹ Jivi picani jumeitavetsibeje pemoyanexabeje tsecae. Itsiata biji bitsoyo orijibia vavajaiibeje tsecae.

—Jesús, Davidpijinē pemomomē, paneitaxutotsoniataemabeje! jaibeje tsecae Jesúsjavabelia.

³² Nexata Jesús muxunanucojopa. Junata pitaxutotsēcēnaenēbeje. Jesús jumaitsi bajaraponēbejejavabelia:

—¿Detsa xua pajitsipamebeje patacaexanaenexabeje? jai.

³³ Nexata bajaraponēbeje jumaitisibeje Jesúsjavabelia:

—Jesús, pajitsipajēbeje pataitaxutoxanepanaejavabeje, jaibeje tsecae.

³⁴ Nexata Jesús itaxutotsoniatane bajaraponēbeje. Jesús itaxutojayata bajaraponēbeje. Bajarajota caecuenia bajaraponēbeje itaxutoxanepanabeje baja. Nexata bajaraponēbeje Jesús pepēta naponabeje.

21

Pacuenia Jesús pata Jerusalén tomarata yabara pelivaisi
(Mr 11.1-11; Lc 19.28-40; Jn 12.12-19)

¹ Jesús baja pijajivi barëimoxoyotanjataruca Jerusaléntomara. Barëpata baja Betfagé tomarata. Patsutojumata nubena olivonaenë, bajarapatsutoyenepanata eca Betfagétomara. Nexata Betfagé tomarata Jesús jumaiti pijajivitonëbejéjavabelia mapacueniaje:

²—Paponarebeje mapatomarayo ecaliajéjavabelia. Bajarajotalia, ajena papatsiaremeliabeje, pataenutsianamebeje burro pecëtanutsinëtsi, pexënatonëyo yajava. Paisinaenamebeje bajarapaburrobeje. Payamaëyacarenamëbeje tsane. ³ “¿Detsa xuajitsia burrobeje paisinamebeje?” itsa pacajaibeje tsane itsajivi, nexata pajumaitisimëbeje tsane: “Vajatuxanenë raja namatavenona. Aeconoxae raja icatsia canaviatsiarena,” pajamëbeje tsane, jai Jesús pijajivitonëbejéjavabelia.

⁴ Bajarapacuenia Jesús itsa jumaiti, tocopiapatatsi jane baja pacuenia Diosojumepaebinëmi profetanë bajayata tajëvelia yaquina Jesús pepatsijavanexa yabara Jerusalén tomarata. Jerusalén tomarata Jesús pepatsijavanexa yabara, profetanëmi bajayata peyaquinaelivaisita jumaiti mapacueniaje:

⁵ Pajumaitisimë tsane Jerusalén tomarapijivijavabelia: “Pataename pepo paneevetsinë paxamëjavaberena penajetarucaejava. Beveliajamatabëcuenenëcuenia najetarucaena. Pejanaburroyota yapatanajetarucaena,” pajamë tsane Jerusalén tomarapijivijavabelia,

jai bajayata tajëvelia profetanëmi peyaquinaelivaisita Jerusalén tomarata Jesús pepatsijavanexa yabara.

⁶ Nexata Jesús pijajivitonëbeje liabeje. Jumecovënëtabeje pacuenia Jesús itorobatsibeje. ⁷ Yamaëya carenabeje burro, pexënatonëyo yajava. Nexata bajarapaburrobeje Jesús pijajivi tsijumajeba pijacama,” pajamë tsane Jerusalén tomarapijivijavabelia,

jai bajayata tajëvelia profetanëmi peyaisajumavelia penaxatabijavanë. Jesús yanajetaruca burrota. ⁸ Panamutuarena Jesús najetaruca, bajarapanamutuarena jivi ayaibitsaëttoxaneto, pijacamisajumavelia penaxatabijavanë, Jesús pevajënaeya namutua yerequejebapona. Itsamonae naemaxërananë, pebaxu yajava, ucubaba. Nexata namutua Jesús tsivajënaeitabëtsiaya jebaponatsi yayiataeya pecopiapitsinexatsi. ⁹ Jesús penajetarucaejavata jivi ayaibitsaëttoxaneto Jesús pevajënaeya namataxainaeya najetarubena. Itsabitsaëttoxaneto Jesús pecovëya cotocaevanajetarubena. Daxita bajarapamonae vavajai tsanajetarubena. Jumaiti tsanajetarubena:

—¡Dioso yavenonaenatsi maponëje, pepo nacuaevetsinëmi Davidpjinë pemomo! ¡Dioso yavenonaenatsi maponë najetarucaje nacua pevetsinënexa Dioso pejamatabëcueneta! Nexata vaxaitsi pexaniajamatabëcuene rajutatsi Diosojavabelia, jai tsanajetarubena bajarapamonae.

¹⁰ Nexata Jesús itsa pata Jerusalén tomarata, daxita Jerusalén tomarapijivi jamatabëcuenenabenajaca. Nexata nayanijoba.

—¿Detsa meta maponë najetarucaje? najai bajarapamonae.

¹¹ Nexata jivi jumaiti:

—Jesús ra manajetarucaje, Diosojumepaebinë profetanë. Galilea nacuata peecaetomara, Nazaret tomarapijinë, jai bajarapamonae.

Pacuenia Jesús Jerusalén tomarata templobovecua pitsapaeyaexana pecanajetabiabivi, pecomuacabiabivina, yabara pelivaisi

(Mr 11.15-19; Lc 19.45-48; Jn 2.13-22)

¹² Jesús itsa pata Jerusalén tomarata, joneya temploboyalía. Nexata templobota Jesús tane pecanajetabiabivi, pecomuacaevinua. Nexata daxitaiti:

—Jesús ra manajetarucaje, Diosojumepaebinë profetanë. Galilea nacuata peecaetomara, Nazaret tom bajarapamonae Jesús pitsapaeyaexana templobovecua. Palata pecambiabibiata pejamesanëmi Jesús topënyorobajaraba. Ucuo pecanajetabiabivi ata penabiabijavanëminua topënyorobajaraba.

¹³ Jesús jumaiti bajarapamonaejavabelia:

—Dioso baja cajena pejumelivaisibaxutota mapatemplobo yabara tajëvelia jumaiti mapacueniaje: “Tajabo raja jivi xanëjavaberena penavajëcaebo tsane,” jai Dioso pejumaitisijava Dioso pejumelivaisibaxutota. Itsiata baitsi jane paxamë yamaxëitojorobiaya panenacobe-toxotsinexa panacaetuatabiabame mapabotaje, jai Jesús templobota pecanajetabiabivijavabelia.

¹⁴ Bajarajota templobota Jesús imoxoyorenatsi pitaxutotsëcënaevi, pejayujayunaevinua. Nexata Jesús bajarapamonae xanepanaeyaexana. ¹⁵ Templobota nubena sacerdotevi. Nubena judiovi pecujarubivina. Bajarapamonae taenubena Jesús pitaxutoxanepanaeyaexanaejava pitaxutotsëcënaevi. Taenubenanua Jesús pexanepanaeyaexanaejava pejayujayunaevi. Jumetaenubenanua pejevaxi templobota pevavajajavata

pejumaitsijava Jesús yabara: “¡Dioso yavenonaenatsi maponėje, pepo nacuaevevtsinēmi Davidpijinē pemomo!” pejaijava Jesús yabara. Bajaraxuata sacerdotevi baraanaepanatsi Jesús. Judíovi pecujarubivi ata baraanaepanatsi Jesús.

¹⁶ Nexata bajarapamonaē jumaitsi Jesúsjavabelia:

—¿Tsipaji apo jumetaemē mapapejevaxi xamē yabara pejumaitsaponaejavaje? ¿Apo necajumeitavetsi? jai.

Nexata Jesús jumaitsi bajarapamonaējavabelia:

—Jājā. Jumetaniji picani. Itsiata apo jumeitavetsinē. ¿Paxamē tsipaji Dioso pejumelivaisibaxuto apo palebimē paneyapētaenexa pacuenia tajēvelia jumaitsi xanē yabara bajarapapejevaxi pevavajaijavanexa? Dioso pejumaitsijava xanējavaberena, tajēvelia Dioso pejumelivaisibaxutota jumaitsi mapacueniaje:

Pejevaxi, mitoapaenacuetoxi ata, naxēanaeyaexanaename penaxēanaejavata xamējavaberena pecajumaitsinexa: “Ayaijamatābēcuenenēmē bitso,” pecajainexa,

jai Dioso pejumelivaisibaxutota xanējavaberena Dioso pejumaitsijava. Bajaraxuata mapapejevaxije jumaitsi bajarapacuenia, jai Jesús sacerdotevijavabelia, judíovi pecujarubivijavabelia ata.

¹⁷ Nexata baja Jesús bajarapamonaēvecua pona. Jerusalén tomaravecua pitsapa. Navi-alia Betania tomarayojavabelia. Nexata Jesús Betania tomarayota majita.

Pacuenia Jesús bijataenuta hígueranae piacuaijibixae yabara pelivaisi
(Mr 11.12-14, 20-26)

¹⁸ Jesús pijajivi Betania tomarata pebarēmajitsicujinae, meravia pitsijavata, bajayacunua, Jesús pijajivi barēlia icatsia Jerusalén tomarabelia. Jesús nexata namutua penajetarucaejavata, piajani. ¹⁹ Jesús nexata taenuta hígueranae namuto muxuneneta. Nexata Jesús imoxoyolia hígueranae, pecuai itsa xaina, pexaenexa. Pecuai itsiata apo xinae hígueranae. Ēpebaxu saya tsanuca. Bajaraxuata nexata Jesús jumaitsi hígueranaejavabelia:

—¡Xamē baja apo nacuaiimsimē tsane! jai Jesús.

Bajarapacuenia Jesús pejumaitsijavata, bepijia hígueranae tēpanajereca yatabutopaya.

²⁰ Nexata Jesús pijajivi itsa tane bajaraxua, jamatabēcuenenabenajaca. Nexata Jesús pijajivi nayanijoba.

—¿Detsa pacuenia maponae bepijia tēpanajerecaje? najai.

²¹ Nexata Jesús jumaitsi pijajivijavabelia:

—Xaniajanē pacuenia pacatsipaebijitsiatsi. Itsa pajamatābējumaimsimē tsipae Dioso yabara: “Dioso nejumecovēnētsiana xua vajētsianajē Diosojavabelia,” itsa pajamatābējamē tsipae, nexata paxamē ata pacacaējēpaejitsipa paneexanaenexa pacuenia exanajē mahígueranaejavabeliaje. Itsiata ēbajarapacuenē paneexanaenexa, apo pacacaējēpae tsipae. Pematatsēnē itsacuenējavānēnua paneexanaenexa, pacacaējēpaejitsipa. Nexata itsa pajumaitsimē tsipae mapatsutojavabelia ataje: “Natixire majotavecuaaje. Pucaxanetojavabelia jopare,” itsa pajamē tsipae, pacajumecovēnētsipa. Nexata mapatsuto ataje paneitorobicuenia pacajumecovēnētsipa. ²² Nexata daxitacuenē xua pavajētsianame Diosojavabelia, pasivajamatābējumaimsimē tsane mapacueniaje: “Xua vajētājē Diosojavabelia, pepacuenē Dioso nejumecovēnētsiana,” pasivajamatābējamē tsane. Nexata xua pavajētsianame Diosojavabelia, Dioso pacajumecovēnētsiana, jai Jesús pijajivijavabelia.

Pacuenia Jesús caējēpatsi daxitacuenē pexanaenexa yabara pelivaisi
(Mr 11.27-33; Lc 20.1-8)

²³ Jesús junua templobotalia. Nexata templobota Jesús jivi livaisi tsipaeba. Nexata templobota Jesús imoxoyorenatsi sacerdotevi, judíovi pijaancianovi yajava. Nexata bajarapamonaē jumaitsi Jesúsjavabelia:

—¿Jipatsa pejamatabēcueneta pecanajetabiabivi, pecomuacaevinua, capitsapame mapetemplobopanabovecuaje? jai bajarapamonaē Jesúsjavabelia.

²⁴ Nexata Jesús jumaitsi bajarapamonaējavabelia:

—Xanē copiaya caejumeyo pacayanijobianatsi. Itsa paxamē panejumecanaviatsianame, nexata xanē juya pacatsipaebianatsi ponē nitoroba taexanaenexa bajarapacuenē. ²⁵ ¿Jipatsa jane pejamatabēcueneta Juanpijinē jivi bautisabaponapona? ¿Dioso tsaja pejamatabēcueneta? Itsa jume, ¿jivi tsaja pejamatabēcueneta? jai Jesús bajarapamonaējavabelia.

Nexata epamonaē nabarēcuaicuaijai. Najumaitsi:

—¿De meta pacuenia jumecanaviatsianatsi? Vaxaitsi itsa jumai tsipaetsi: “Dioso raja pejamatabēcueneta,” itsa jai tsipaetsi, nexata Jesús nacajumai tsipae: “¿Detsa nexata xujajitsia apo pajumecovēnētsimē Juanpijinē pepaebilivaisi?” nacajai tsipae. ²⁶ “Jivi raja saya pejamatabēcueneta Juanpijinē jivi bautisabaponapona,” itsa jai tsipaetsi, nexata jivi belia nacabeyejebijitsipa. Bajarapacuenia nacabeyejebijitsipa tsipaji raja Juanpijinē

yabara daxitajivi sivajamatabējumaitsi: “Juanpijinē raja pepacuene Diosojumepaebinēmi,” sivajamatabējai, najai sacerdotevi, judiovi pijaancianovi yajava.

²⁷ Nexata saya bajarapamonaē jumaitsi Jesúsjavabelia:

–Apo payapētaenē ponē Juanpijinē itorobatsi jivi pebautisabaponaenexa, jai.

Nexata Jesús jumaitsi bajarapamonaējavabelia:

–Nexata xanē ata apo pacatsipaebi tsanetsi ponē nitoroba taexanaenexa bajarapacuene, jai Jesús.

Pacuenia Jesús jivi livaisi tsipaeba anijanēbeje pexēnatobeje pexainanē pelivaisicuenia yabara pelivaisi

²⁸ Jesús icatsia jumaitsi sacerdotevijavabelia, judiovi pijaancianovijavabelia ata:

–Panejumecanaējētsianame palivaisi aeconoxae pacatsipaebijitsiatsi. Pebi xaina anijanēbeje pexēnatobeje. Nexata pexēnatojavabelia jumaitsi: “Taxēnato, ajena netonacuenebianame tajauvacabota,” jai pexēnatojavabelia. ²⁹ Nexata bajaraponē paxajavabelia jumaitsi: “¡Jumel! ¡Apo jitsipaenē tanacuenebijava! jai. Itsiata xuacujinae bajaraponē icatsia najamatabēxaina. Nexata jamatabējumaitsi: “Xanē baja rovia pibisijamatabēcuene najamatabēxainajē. Nexata baja ponajē taxa tatonacuenebinexa,” jamatabējai. Naropota baja penacuenebinē. ³⁰ Bajaraxuacujinae pexēnatobeje pexainanē pona icatsia itsanē pexēnatojavabelia. Bajaraponējavabelia ata jumaitsi: “Taxēnato, ajena netonacuenebianame tajauvacabota,” jai pexēnatojavabelia. Nexata jejai itajara pexēnato. Itsiata apo ponaē. ³¹ ¿Detsa ponē bajaraponēbejeyajuvēnēnē paxa jumecovēnēta? jai Jesús bajarapamonaējavabelia.

Nexata bajarapamonaē jumaitsi Jesúsjavabelia:

–Copiata ponē paxa itorobatsi, apo jejai ata, itsiata paxa tonacueneba, bajaraponē paxa jumecovēnēta, jai.

Nexata Jesús jumaitsi bajarapamonaējavabelia:

–Xaniajanē pacuenia pacatsipaebijitsiatsi. Bajara pijinia itsane pamonaē copabiana pibisiacuene pexanabibijavami, pamonaē najamatabēcuenepēnēyorotsiana Diosojavabelia. Impuestomatamo gobiernu pejamatabēcuene petomatamoyanijobabiabivimi ata jonena Dioso pijanacuayabetsia itsa najamatabēcuenepēnēyorota Diosojavabelia. Petiriavi palata pepitsinexa pemitota pibisiacuene pexanabiabivimi ata jonena Dioso pijanacuayabetsia itsa najamatabēcuenepēnēyorota Diosojavabelia pibisiacuene pexanabiabijavamivecua. Itsiata baitsi jane paxamē apo pajonemē tsane. ³² Juanpijinē jivibautisabinē patajopa Dioso pejumelivaisi papecatsipaebinexa panenajamatabēcuene pēnēyorotsinexa pibisiacuene paneexanabiabijavavecua. Itsiata paxamē apo pajumecovēnētisimē bajarapalivaisi. Itsiata bajarapalivaisi jumecovēnēta impuestomatamo gobiernu pejamatabēcuene pematamoyanijobabiabivimi. Petiriavi palata pepitsinexa pemitota pibisiacuene pexanabiabivimi ata jumecovēnēta bajarapalivaisi. Paxamē patae atamē bajarapamonaē pejumecovēnētisijava, itsiata apo panajamatabēcuenepēnēyorotsimē panejumecovēnētisinxexa Dioso, jai Jesús bajarapamonaējavabelia.

Pacuenia exana pijamatabēcuenebejevi, itsanē pijauvacababo petoevetsivi, yabara pelivaisi

(Mr 12.1-12; Lc 20.9-19)

³³ Icatsia Jesús jumaitsi sacerdotevijavabelia, judiovi pijaancianovijavabelia ata:

–Xaniavaetsia panemuxanaevere mapalivaisije. Pijaira pexainanē pijairata uba ayaiabacoboxaneto uvavēnējava. Bajaraxuacujinae pijaira matatoyorotsia, ibopanaxantonē mataropotsia pefaratsijavata, yacaranata. Bajarapayacaranatsijava athēbēabetsia apia jivitonē matatoxenetsia. Bajaraxuacujinae irata mēthē cueyeta. Nexata pecueyetsimēthējavata exana uvacuairēmene pecayujucabiabijanexa. Bajaraxuacujinae pijauvacababo tuatujētā exananuta piapiabotsia, penacuaitsimatacabi itsa tonaveretatsi, athēbēyo pevetabiabecaenexa pijauvacababo.

Nexata bajaraponē itsamonae evetsiaexana pijauvacababo. Uvacababo pexainanē jumaitsi petoevetsivitsijavabelia: “Pamatacabi cuainaveretsiana, natsicobetsatsianatsi. Pamatacabi raja cuainaveretsiana, tajajivitonē itorobiarenajē xua panetotsatsianame tanetopitsinexa,” jai uvacababo pexainanē petoevetsivitsijavabelia. Nexata uvacababo pexainanē tajē nacuyababelia pona. ³⁴ Itsa baja uvacababo pexainanē yapētane pecopiapatsijava uvacui penaveretsimatacabi penotsinexa, nexata uvacababo pexainanē itoroba pijajivi. Itoroba petoevetsivitsijavabelia petsicobetsatsinexatsi. ³⁵ Nexata uvacababo pexainanē pijajivi uvacababo petoevetsivitsi totaicsi. Caenē bajarapamonaēyajuvēnēnē toconibabiatsi. Itsanē pepacuene tobeyaxuabatsi. Itsanē lbotonēta totseconatsi. ³⁶ Nexata uvacababo pexainanē icatsia itsabitsaēto pijajivi itorobalia. Bajara icatsia pacuenia exana uvacababo pevetsivi.

³⁷ Nexata uvabacabo pexainaenē itoroba icatsia pexēnato jane baja. Uvabacabo pexainaenē jamatabējumaitsi: “Netoyaiyataena meta taxēnato,” jamatabējai. ³⁸ Itsiata baitsi jane uvabacabo petoevetsivitsi uvabacabo pexainaenē pexēnato ata apo toyaiyataetsi. Itsa tane uvabacabo pexainaenē pexēnato, bajarapamonae najumaitsi: “Mara ponēje paxa pevēnamuto paxa pijauvabacabo pitsipaje. Naxanitsia. Beyaxuabatsi. Nexata raja vaxaitsi vajauvabacabo tsane,” najai uvabacabo petoevetsivitsi. ³⁹ Nexata icatsia uvabacabo pexainaenē pexēnato ata tovaetabatsi. Caponaliatsi bajarapauvabacabo pēnēyavelia. Nexata uvabacabo pexainaenē pexēnato ata bajarapacuenia icatsia tobeyaxuabatsi, jai Jesús.

⁴⁰ Nexata bajarapalivaisi yabara Jesús yanijoba sacerdotevijavavelia, judíovi pijaancianovijavavelia ata. Jesús jumaitsi:

—Uvabacabo pexainaenē itsa patsiarena, ¿de tsaeta xua exanaena uvabacabo petoevetsivitsijavavelia? jai Jesús bajarapamonaejavavelia.

⁴¹ Nexata bajarapamonaejavavelia Jesús jumaitsi:

—Pijauvabacabo raeta pexainaenē apo itaxutotsoniatae tsane. Nexata verebiabiana bajarapamonaemi pibisiacuene pexanaevi. Nexata icatsia itsamonae evetsiaexanaena bajarapauvabacabo. Nexata uvacuai penaveretsimatacabi bajarapamonaejavavelia itsa nota, tsicobetsatsianatsi pacuenia baja tocajētatsi uvabacabo pexainaenē perajutsinexatsi, jai bajarapamonaejavavelia.

⁴² Nexata Jesús jumaitsi bajarapamonaejavavelia:

—Payapētaneme rabaja pacuenia Dioso pejumelivaisibaxutota tajēvelia jumaitsi xanē yabara. Iboti pelivaisicuenia Dioso pejumelivaisibaxutota jumaitsi xanē yabara mapacueniaje:

Paiboto itsamonae boexanaevi naitaxutojematabuatsiana petsitaabejexaetsi itajara, bajarapaboto itsanē pitsiana. Nexata bajarapabotota xaniavaetsia nayaētsiana botabu daxita itsaibo matatoxenetsia. Vajatuxanenē Dioso raja exanaena bajarapacuenia. Nexata bitso nacatsita pexaniacuene tsane bajarapacuenia, jai tajēvelia Dioso pejumelivaisibaxutota xanē yabara.

Bajarapacuenia tajēvelia Dioso pejumelivaisibaxutota itsa jumaitsi, paxamē apo patanejumecovēnētsijavanexamē yabara jumaitsi. Dioso taneitapetsijava daxitajivi tacapanepaenexa yabara ata jumaitsi. ⁴³ Nexata pacuenia uvabacabo pexainaenē icatsia itsamonae evetsiaexanaena, bajara pijinia pacuenia Dioso exanaena paxamējavavelia. Xua picani Dioso pacaevetsiaexana, copiarucaena. Nexata juya itsamonae Dioso evetsiaexanaena bajaraxua, pamonaejavavelia xaniavaetsia jumecovēnēta Dioso pitorobicueniatsi. ⁴⁴ Pamonaejavavelia apo nejumecovēnētsi Dioso pexēnatocuenenē, bajarapamonaejavavelia bitso bejamatabējijobi tsane apo tanejumecovēnētsixae. Pacuenia ibotojumata pefirapeaejivi, itsa tsapatecatsi, pevixae bitso yanabejijobita, bajara itsane. Pamonaejavavelia naneconitsiaexanaenajē, bajarapamonaejavavelia pepacuenia naxuabiana daxitamatacabi javavelianexa. Pacuenia iboto pematacēnēbinētsi apo asaē, bajara itsane, jai Jesús bajarapamonaejavavelia.

⁴⁵ Sacerdotevi penamatacatorobivi, fariseovi yajava, itsa jumetane bajarapacuenia Jesús pejumajitsijava, bajarapamonaejavavelia jamatabējumai tsenae: “Vaxaitsi yabara raeta jumaitsi,” jamatabējai tsenae bajarapamonaejavavelia. ⁴⁶ Nexata picani bajarapamonaejavavelia Jesús jamatabēvaetabatsi. Itsiata bajarapamonaejavavelia jamatabējumaitsi: “Bajaraponē jivi tanetsi Dioso jumepaebinētsi. Nexata nacaitacueniabijitsi paxaitsi itsa vaetabijitsipatsi maponēje,” jamatabējai tsenae bajarapamonaejavavelia. Bajaraxuata Jesús apo vaetabitsi.

22

Pacuenia Jesús jivi livaisi tsipaeba penacasabifesta pexanaenē pelivaisicuenia yabara pelivaisi

(Lc 14.15-24)

¹⁻² Jesús icatsia livaisi tsipaeba sacerdotevijavavelia, judíovi pijaancianovijavavelia ata. Bajarapacuenia Jesús tsipaeba bajarapamonaejavavelia peyapētanexa pacuenia itsamatacabi itsijitsia, pamatacabi Dioso pijajivi evetsiana. Jesús jumaitsi mapacueniaje:

—Pepo nacuaevevtsinē fiesta exana pexēnato petonacasabifestanexatsi. ³ Nexata nacuaevevtsinē jumaitsi pijajivijavavelia: “Pamonaejavavelia baja tajēvelia junatajē, patsipaebare baja tanetopatsinexarena fiestanexa jane baja,” jai nacuaevevtsinē pijajivijavavelia. Pijajivi baja nexata pona petsipaebinexa. Itsiata pejunatsivi apo jitsipae peponaejava. Nexata nacuaevevtsinē pijajivi naviabarena petsipaebinexa pijatuxanenējavavelia. ⁴ Nexata nacuaevevtsinē itsamonae icatsia pijajivi itorobalia pesivaponaenexalia. Nacuaevevtsinē jumaitsi pijajivijavavelia: “Pajumaitsimē tsane tajunatsivijavavelia: ‘Veretejeba rabaja panexaejavanexa. Beyaxana rabaja baca penasitsivi, becerro yajava. Daxita rabaja veretejeba panenabaninexa. Naxanitsia. Daxita pina paponaeremelia,’ pajamē

tsane tajunatsivijavabelia,” jai nacuaevevsinē pijajivijavabelia. ⁵ Itsiata baitsi jane bajarapamonae icatsia sivaponae atalia, nacuaevevsinē pejunatsivi apo jejai. Pejunatsiviyajuvēnēnē itsanē pona pijapabianējavabelia. Itsanē pijinia pona penavijatsinexa. ⁶ Itsamonae nacuaevevsinē pijajivi taicatsi. Bejiobiaexanatsi pibisiacuenia. Beyejebatsi baja belia. ⁷ Bajaraxuata nexata nacuaevevsinē bitso baraanaepana pejunatsiviyavijavabelia. Nexata nacuaevevsinē itorobalia vajabitsaēvi pebenexa pamonae tobeyejebatsi pijajivi. Itorobanua pijatomaranēmi ata petotajuitsinexa. ⁸ Bajaraxuacujinae nacuaevevsinē icatsia pijajivijavabelia jumaitsi: “Daxitacuenē baja picani veretejebiaexanajē taxēnato penacasabifiestanexa. Itsiata baitsi jane tajunatsivimi apo netopatsirena. ⁹ Paponaremelia pinijallexanetonējavabelia. Nexata daxita pamonae pacaxitajarabaponae name bajarapacallexanetonējava, pajunataponaename taxēnato penacasabifiestajavaberena pepatsinexa,” jai nacuaevevsinē pijajivijavabelia. ¹⁰ Nexata nacuaevevsinē pijajivi ponalia. Najetarubena callexanetonējava. Junataponā daxita pamonae caxitajarabaponā. Junataponā pijamatābēcuenēbejevi, pejamatābēcuenēxanepanēavi ata. Nexata bajarapamonae barēpona fiesta pexanaebojavabelia. Nexata pabota fiesta exana, vēnēca jivi.

¹¹ Nexata nacuaevevsinē jonena bajarapaboyarena petaenexa petopatsivitsi. Daxita pamonae topatatsi, jumapata xua banaxataba itsa pona penacasabifiestajavabelia. Nexata nacuaevevsinē taenuta bajarajota itsanē, saicayaviriajava penaxatatsinē. Apo naxatatsi xua naxataba daxita. ¹² Nexata nacuaevevsinē jumaitsi bajaraponējavabelia: “¿Detsa xuajitsia najunuame apo nenaxatatsinē pacuenia daxita naxataba penacasabifiestajavaberena penajonevi?” jai nacuaevevsinē. Nexata bajaraponē moya nuca. ¹³ Nexata nacuaevevsinē jumaitsi mesa pevetsivijavabelia: “Maponē pataxucēreje. Pacobecēre yajava. Paxuaremelia bopēnēyabelia, pitaquirijavabelia. Bajarajotalia nuena. Navonosiniana bitso penavixaetaexae,” jai nacuaevevsinē. ¹⁴ Pacuenia fiesta pexanaenē ayaibitsaētoxaneto junatsi ata, caejiviyobeje saya topatatsi, bajara pijinia itsi Dioso pejunatsivi ata. Dioso picani ayaibitsaētoxaneto junata pijajivinexa. Itsiata saya caejiviyobeje jumecovēnētatsi, jai Jesús sacerdotevijavabelia, judíoovi piijaancianovijavabelia ata.

Pacuenia Jesús jamatabēcuenējēbiaya yanijobatsi impuestomatamo pematamotsijava yabara pelivaisi

(Mr 12.13-17; Lc 20.20-26)

¹⁵ Fariseovi nacaetuata penabarēcuaicuaiajinexa. Bajarapamonae najamatābēcuenējēpa Jesúsjavabelia jamatabēcuenējēbiaya peyanijobinexa. Nexata Jesús bijiaya itsa jumecanaviata, Jesús picani peneconitsinexatsi nacuaevevsinējavabelia. ¹⁶ Nexata fariseovi itoroba pijajivi, Herodes pijajivi yajava, Jesúsjavabelia jamatacuenējēbiaya livaisi peyanijobinexa. Nexata fariseovi pijajivi, Herodes pijajivi yajava, Jesúsjavabelia jamatabēcuenējēbiaya jumaitsi:

—Jesús, payapētaniji cajena nexaniajaicuene, xua yabara tsipaebabiabame livaisianē. Pexaniajaicuene tsipaebabiabame pacuenia Dioso jitsipa jivi petojinavanapaenexatsi. Petuxanevi ata xamē apo cununavimē. Apo auramē livaisi netsipaebabiabijava. Nexata daxitajivi najēpaeya livaisi tsipaebabiabame. ¹⁷ Panetsipaebare pacuenia najamatābēcuainame mapacuene yabaraje. ¿Xanepana tsaja vajamatamotsinexa impuestomatamo Romanonacua pepo pevetsinējavabelia? Itsa jume, ¿apo xanepanae tsaja vajamatamotsinexa? jai bajarapamonae jamatabēcuenējēbiaya Jesúsjavabelia.

¹⁸ Itsiata baitsi jane Jesús jamatabēcuenēyapētane bajarapamonae jamatabēcuenējēbiaya peyanijobijavatsi peneconitsinexatsi picani. Nexata Jesús jumaitsi bajarapamonaejavabelia:

—Paneyamaxēitorobovi, ¿detsa xuajitsia jamatabēcuenējēbiaya paneyanijobame?

¹⁹ Panetsitajēre pitsipalatanēyota pamatamotabiabame impuestomatamo, jai Jesús bajarapamonaejavabelia.

Nexata bajarapamonae Jesús tocaponarenatsi palatanēyo. ²⁰ Jesús itsa tane bajarapalatanēyo, nexata jumaitsi bajarapamonaejavabelia:

—¿Jipatsa mapitabaraje, pevēnēnuā, ruca mapapalatanēyomutaje? jai Jesús.

²¹ Nexata bajarapamonae jumaitsi Jesúsjavabelia:

—Romanonacua raja pepo pevetsinē pitabara, pevēnēnuā, jai.

Nexata Jesús jumaitsi bajarapamonaejavabelia:

—Nexata parajutabiabianame Romanonacua pepo pevetsinē pijajava. Parajutabiabianame pijinia saicaya Diosojavabelia Dioso pijajava, jai Jesús.

²² Nexata Jesús xaniavaetsia itsa jumecanaviata, bajarapamonae jamatabēcuenēnabenajaca bajarapacuenia Jesús pejumaitsiyavata. Nexata baja copatatsi Jesús jamatabēcuenējēbiaya peyanijobijavatsi. Naviaba baja bajarapamonae.

Pacuenia Jesús tsipaeba jivi petēpaecujinae icatsia piasaējavanexa yabara pelivaisi
(Mr 12.18-27; Lc 20.27-40)

²³ Saduceovi saicaya itsalivaisi xaina. Bajarapamonae jamatabēcuenenavēxaniabiaya jumai tsabiabi: “Petēpaevi rabaja petēpaecujinae, icatsia apo asaē tsane,” jai tsabiabi. Nexata saduceovi imoxoyorenatsi Jesús. Saduceovi Jesúsjavabelia jumaiti mapacueniaje:

24 –Jesús, Moiséspijinē bajayata vajanacatoyaquinaelivaisi, jumaiti mapacueniaje: “Ponē pematapijinē pepua penacojiobinē baja, totēpatsi pexi xainaenejeva, nexata juyapijinē bepita pematapijinēmi pijavami. Bajarapacuenia juyapijinē bepita pematapijinēmi pijavami pexi pexainaenexa bajarapovajavabelia. Nexata pexi itsa xainabeje, bematapijinēmi pexi petanexa daxitajivi,” jai Moiséspijinē bajayata vajanacatoyaquinaelivaisi.

²⁵ Nexata jinavanapa ēnacaemonae siete ponēbeje paxanējavata. Pepo matapijinē copiyava nacojioba. Nexata bajaraponē pijava vecuatēpa pexi xainaenejeva. Nexata pematapijinēmi pepēnarucaenē pita pematapijinēmi pijavami. ²⁶ Nexata icatsia bajaraponē ata tēpa pexi xainaenejeva bajarapovajavabelia. Nexata icatsia itsanē tuatujēmatapijinē pita bajarapova. Bajara icatsia ponē ata tēpa pexi xainaenejeva bajarapovajavabelia. Bajarapacuenia tēpa daxita siete ponēmibeje nacaemonae, bajarapova pepitaponae. Itsiata itsanē ata pexi apo xinae bajarapovajavabelia. ²⁷ Bajaraxuacujinae bajarapova ata tēpa baja. ²⁸ “Jivi raja petēpaecujinae, Dioso icatsia asaēyaexanaenatsi,” jamē. ¿Detsa nexata ponē bajarapomonaeyajuvēnēnē pijava tsane bajarapova bajarapamatacabi? Daxita pamonaē siete ponēmibeje nacaemonae pitapona picani bajarapovami, jai saduceovi Jesúsjavabelia.

²⁹ Nexata Jesús jumaiti saduceovijavabelia:

–Paxamē saya pajamatābēcuenenavēxaniabame. Paxamē raja apo payapētaemē pacuenia Dioso pejumelivaisibaxutota jumaiti. Apo payapētaemēnua pacuenia Dioso caējēpatsi daxitacuenē pexanaenexa. Bajaraxuata jamatabēcuenenavēxaniabiaya paneyanijobame: “¿Detsa ponē pitsiana bajarapova?” panejamē. ³⁰ Pamatacabi raja petēpaevimi Dioso icatsia asaēyaexanaenatsi, apo nacojiobi baja tsane. Bajarapamatacabi itsajivi ata pexēnatoyo apo canajetsi tsane pebjjavabelia petonacojiobinexatsi. Bajarapamonae nacojiobinejeva, jinavanapaena athēbētatsia pacuenia ángelevi jinavanapa. ³¹ Itsa pepacuenē paxamē xaniavaetsia paneyanijobame paneyapētaenexa Dioso icatsia piasaēyaexanaejavanexatsi petēpaevimi, nexata pacatsipaebianatsi. Paxamē rabaja payapētaneme pacuenia bajayata Dioso jumaiti. Abraham baja peputatēpae, Isaac ata baja peputatēpae, Santiago ata baja peputatēpae, bajarapamonae yabara bajayata Dioso jumaiti Moiséspijinējavabelia mapacueniaje: ³² “Xanē rabaja abaxē Abraham pijaDiosonē. Isaac ata pijaDiosonē. Jacob ata pijaDiosonē,” jai baja cajana Dioso bajayata petēpaevimi yabara. Bajarapacuenia Dioso pejumaitisixae, nayapētane bajarapomonae bajayata tēpae ata, Diosovecua apo penaxuabijava. Aeconoxae ata bajarapomonae Dioso yajavajinavanapa athēbētatsia, jai Jesús saduceovijavabelia.

³³ Jivi ayaibitsaētōxaneto itsa jumetane bajarapacuenia Jesús pejumaitisijava saduceovijavabelia, jivi bitso jamatabēcuenenabenajaca Jesús petsipaebilivaisi yabara.

Palivaisi bitso jivi bejumecovēnēta daxita Dioso pitorobilivaisianē pejumecovēnētsijava matatoxenetsia yabara pelivaisi
(Mr 12.28-34)

³⁴ Saduceovi Jesús peyanijobijumetsi, xaniavaetsia Jesús jumecanaviata. Nexata baja moya saduceovi. Nexata fariseovi itsa vēnētane saduceovijavabelia Jesús xaniavaetsia pejumecanaviatsijava, nexata fariseovi nacaetuata penabarēcuaicuaijainexa. Nexata fariseovi najumejaita pacuenia yanijobijitsia Jesúsjavabelia. ³⁵ Nexata fariseoviyajuvēnēnē, judiōvi pecujarubinē, Jesúsjavabelia jamatabēcuenējēbiaya yanijoba. Jumaiti Jesúsjavabelia mapacueniaje:

³⁶ –Jesús, ¿detsa palivaisi bitso jivi bejumecovēnēta daxita Dioso pitorobilivaisianē pejumecovēnētsijava matatoxenetsia? jai.

³⁷⁻³⁸ Jesús nexata jumaiti judiōvi pecujarubinējavabelia:

–Palivaisi bitso jivi bejumecovēnēta daxita Dioso pitorobilivaisianē pejumecovēnētsijava matatoxenetsia, jumaiti mapacueniaje: “Pasivamēre panijatuxanenē panijaDioso daxita panejamatabēēthētojavavetsina, daxita panejamatabēcueneta ata, daxita panenajamatabēxainaesaēta ata,” jai. Bajarapalivaisi bitso jivi bejumecovēnēta daxita Dioso pitorobilivaisianē pejumecovēnētsijava matatoxenetsia. ³⁹ Bajaraxuacujinae pecotocaevilivaisi, palivaisi bitso jivi bejumecovēnēta, jumaiti icatsia mapacueniaje: “Pasivamēre itsajivi ata pacuenia paxamē panijacuata panasivamē,” jai. Bajarapalivaisi ata jivi bitso bejumecovēnēta. ⁴⁰ Pajivi jumecovēnēta bajarapalivaisibeje, Dioso baja tanetsi pejumecovēnētsijivicuene daxita Dioso pitorobilivaisianē. Nexata palivaisi ata bajayata Dioso Moiséspijinēta najumecopata, bajarapalivaisi ata pejumecovēnētsijivicuene Dioso

tanetsi. Diosojumepaebivimi profetavi ata palivaisianë bajayata tsipaeba, bajarapalivaisi ata pejumecovënëtsijivicuene Dioso tanetsi, jai Jesús judíovi pecujarubinëjavabela.

Pacuenia Jesucristo yabara Davidpijinë bajayata tajëvelia: "Tajatuxanenë," jai, yabara pelivaisi

(Mr 12.35-37; Lc 20.41-44)

⁴¹ Fariseovi penacetauatsijavata, fariseovijavabela Jesús pijacuata nayabarajumaitsi mapacueniaje:

⁴² —¿Detsa pacuenia pasivanajamatabëxainaname Cristo ita patsianica? ¿Jipatsa pexënato tsane? nayabarajai Jesús pijacuata fariseovijavabela.

Nexata fariseovi jumaitsi Jesúsjavabela:

—Davidpijinë pemomo tsane, jai.

⁴³ Nexata Jesús jumaitsi fariseovijavabela:

—Pajamatabëcuenenavëxaniabame raja. Cristo raja Dioso pexënato. Bajayata Dioso pejumaitsiyava Cristo yabara, Davidpijinë Espiritu Santo pejamatabëcueneta tajëvelia jumaitsi mapacueniaje:

⁴⁴ Dioso jumaitsi tajatuxanenëjavabela:

"Ecare abaxë tacujuanenia. Vecatsivajënae jumecovënëtsiaexanaenatsi abaxë copiaya nijavajabitsaë nitorobicuenianexa," jai Dioso tajatuxanenëjavabela, jai bajayata tajëvelia Davidpijinë mapacueniaje Cristo yabara.

⁴⁵ Nexata Davidpijinë bajayata Cristo yabara: "Tajatuxanenë," ita jai, nexata Cristo, Davidpijinë apo pemomo. Tsipaji baja cajena saicaya Cristo Dioso pexënato, nayabarajai Jesús pijacuata fariseovijavabela fariseovi pecanaëjëtsinexa Cristo Dioso pexënatocuene.

⁴⁶ Nexata itsanë ata fariseoviyajuvënënë Jesús apo jumepitsitsi caejumeyo ata. Bajaraxucujinae fariseovi, saduceovi ata, cujunava Jesúsjavabela baja jamatabëcuenejëbiyaya livaisi peyanijobijava.

23

Pacuenia Jesús tsipaeba fariseovijavabela, judíovi pecujarubivijavabela ata, bajarapamonae penaneconitsijava Diosojavabela yabara pelivaisi

(Mr 12.38-40; Lc 11.37-54; 20.45-47)

¹ Jesús jumaitsi jivi ayaibitsaëtojavabela, pijajivijavabela ata:

² —Judíovi pecujarubivi, fariseovi ata, Dioso tocopatatsi jivi xaniavaetsia peypapëtaeyaxanaponanexa pajamatabëcuenelivaisi xaina Dioso Moiséspijinëta penajumecopatsilivaisimi.

³ Nexata pajumecovënëtsianame daxita pacuenia bajarapamonae pacatsipaebapona. Itsiata baitsi jane pëtsa paexaname pacuenia bajarapamonae exanavanapa. Tsipaji xua bajarapamonae pacaitaveta paxamë paneexanaeyaniva, bajaraxua itsiata bajarapamonae exanabiaba. ⁴ Palivaisianë ayapëbeje itsajivi ata pejumecovënëtsinexa, bajarapalivaisianë pacatsipaebabiaba panejumecovënëtsinexa. Pamonae bajarapacuenia pacatsipaeba, itsanë ata bajarapamonaeyajuvënënë apo jamatabënajinae pexanaenexa bajarapacuenia.

⁵ Daxita xua bajarapamonae exana, exanabiaba saya jivi petaenexatsi. Bajarapamonae jamatabëjumai tsabiabi: "Bajaraxua ita exanaenatsi, jivi nacayiyataena," jamatabëjai tsabiabi. Bajarapamonae pitapata, pecofiata ata, becajonixicuenia pexanaejavaxita yacajonia cëbarubejebabiaba Diosojumelivaisi peyaquinaebaxutoxi. Bajarapamonae itsamonae matatoxenetsia pijajumanavaitabënexa, piapiafleco pijanavatabuyalia cëbarubabiaba. Bajarapacuenia bitso jitsipabiaba pexanabiabinexa. ⁶ Bajarapamonae ita najunatatsi fiestajavabela penanabaninexa, nexata jitsipabiaba penaenexa pexaniavirijavanëta. Nexata natsiitapetabiaba penaenexa peyayataevitsi penaenexa petsinubijavanëta. Bajarapamonae ita najoneyabiaba judíovi penacetautabiabibota, jitsipabiaba penaenexa peyayataevitsi penaenexa petsinubijavanëta. ⁷ Bajarapamonae bitso jitsipabiaba jivi pebajacobinexatsi yayiyataeya callejava ata. "Patanecujarubinë," pejaijavatsi ata, bitso jitsipabiaba, jai Jesús mapacueniaje fariseovi yabara, judíovi pecujarubivi ata yabara.

⁸ Icatsia Jesús jumaitsi jivi ayaibitsaëtojanetojavabela, pijajivijavabela ata:

—Pëtsa paxamë pajitsipame jivi papecajumaitsinexa paxamëjavabela: "Patanecujarubinë," papecajinexa. Tsipaji daxita paxamë bepanacaemonaemë Dioso panejumecovënëtsivixae. Xanë, caenënë Cristonë, athëbëvetsica Dioso taneitorobinëtsica jivi tacapanepaenexa, panexainame patacucujarubinëxexa. ⁹ Itsanë ita pacacujaruba, "Axa," pajamë pëtsa bajaraponëjavabela. Tsipaji caenë paneaxa paxainame, ponë eca athëbëtsatsia.

10 Pëtsa pajitsipame itsamonae papecajumaitsinexa: “Jivi pevetsinë,” papecajinexa. Tsi-paji xanë, caenënë Cristonë, patacaevetsinë. 11 Ponë paxamëyajuvënëne pacavecuayai-jamatabëcuenenë, bajaraponë pacayavenonabiaba padaxitamë. 12 Pajivi daxitajivi mata-toxenetsia pijacuata ayaijamatabëcuenëjivi natane, bajarapajivi itsamatacabi daxitajivive-cua beveliajamatabëcuenëjivi Dioso exanaenatsi. Pajivi pijinia daxitajivivecua pijacu-ata beveliajamatabëcuenëjivi natane, bajarapajivi itsamatacabi daxitajivi matatoxenetsia ayaijamatabëcuenëjivi Dioso exanaenatsi, jai Jesús jivi ayaibitsaëtoخانetojavabelia, pijajivi-javabelia ata.

13 Jesús icatsia jumaitsi fariseovijavabelia, judíovi pecujarubivijavabelia ata:

—¡Paxamë saya jivi paneyamaxëitojorobivi! ¡Paxamë judíovi panecujarubivi, pafariseovimënua, ayaineconi panatsixainame Diosojavabelia! Pacuenia bo babaupaxatata jivi pejonayaniva, bajara bepacuenia paxamë paexaname. Itsamonae jitsipae ata pejonenexa Dioso pijanacuayabetsia, apo pacopatsimë pejonenexa saicayalivaisi panecujarubixae. Paxamë ata apo pajitsipamë panejonenexa Dioso pijanacuayabetsia.

14 ¡Paxamë saya jivi paneyamaxëitojorobivi! ¡Paxamë judíovi panecujarubivi, pafariseovimënua, ayaineconi panatsixainame Diosojavabelia! Yamaxëitojorobiaya pave-cuanotabiabame pamonajivi pevecuatëpaevanëtsi pecobecovëjavaximi. Bajaraxuacujinae pinijicuenia itajara Diosojavabelia pavajëcabiabame. Itsiata pepo panexaniajija-matabëcueneta apo pavajëcabiabimë Diosojavabelia. Bajarapacuenia pavajëcabiabame saya jivi papecataenexa Dioso itajara bitso bepanejumecovënëtsivi. Bajaraxuata bitso ayaicue-nia Dioso pacananeconitsiaexanaena pamatacabi Dioso naneconitsiaexanaena daxita pamonae Dioso apo pejumecovënëtsivi.

15 ¡Paxamë saya jivi paneyamaxëitojorobivi! ¡Paxamë judíovi panecujarubivi, pafariseovimënua, ayaineconi panatsixainame Diosojavabelia! Palivaisi pacajinavanapame, caejivi ata panejumecovënëtsiaexanaenexa, papecacuenëjëpaenexanua, ayaicuenia daxita-java jivi patsipaebarutame. Nexata pajivi pacajumecovënëta, bajarapajivi pevajënaeyabelia bitso naneconitapona Diosojavabelia. Nexata paxamë panejamatabëcueneta bajarapajivi paxamë matatoxenetsia bitso Dioso naneconitsiaexanaenatsi pexuabinxatsi infieriojavabelia.

16 ¡Paxamë apo payapëtae atamë, Dioso pejumelivaisi jamatabëcuenenavëxaniabiaya pacu-jarubabiabame itsamonae! Nexata paxamë panecujarubijamatabëcueneta bajaraponae pananeconitsiaexaname Diosojavabelia. ¡Bajaraxuata ayaineconi panatsixainame Diosojavabelia! Paxamë jivijavabelia jamatabëcuenenavëxaniabiaya pajumaitsimë tsabiabi: “Pajivi itsanëjavabelia najumecapanepaeya jumaitsi pejumexaniataenexatsi: ‘Catoexanae-natsi pepacuene. Cajumaitsiitsi cajena templobo pevënëta,’ jai, apo itsacuene. Bajarapajivi pejumaitscovëya apo exanae ata, itsiata apo naneconitsi Diosojavabelia,” pajamë tsabiabi. “Pajivi rajane itsanëjavabelia jumaitsi pejumexaniataenexatsi: ‘Catoexanae-natsi pepacuene. Cajumaitsiitsi cajena templobopijiorojavanë pevënëta,’ jai, bajara jane xua abeje. Nexata bajarapajivi exanae pejumaitscovëya penaneconitsiyaniva Diosojavabelia,” pajamë tsabiabi jivijavabelia. 17 Pajamatabëcuenenavëxaniabame raja saya bajarapacuenia itsa pajumaitsimë. Biji rajane templobo beyaiyatanetsi bajarapatemplobopi-jiorojavanë matatoxenetsia. Bajarapaorojavanë ata yayiatanetsi. Tsi-paji bajarapaorjavanë templobopijiorojavanë. 18 Jamatabëcuenenavëxaniabiaya pajumaitsimë tsabiabinua: “Pajivi itsanëjavabelia najumecapanepaeya jumaitsi pejumexaniataenexatsi: ‘Catoexanae-natsi pepacuene. Cajumaitsiitsi altarvënëjava pevënëta,’ jai, apo itsacuene. Bajarapajivi pejumaitscovëya apo exanae ata, itsiata apo naneconitsi Diosojavabelia,” pajamë tsabiabi. “Pajivi rajane pejumexaniataenexatsi itsanëjavabelia jumaitsi: ‘Catoexanaenatsi pepacuene. Cajumaitsiitsi altarvënëjavajumata pebuatsiofrenda pevënëta,’ jai, bajara jane xua abeje. Nexata bajarapajivi pepacuene exanae pejumaitscovëya penaneconitsiyaniva Diosojavabelia,” pajamë tsabiabinua jivijavabelia. 19 Paneamatabocotajavi, bepanei-tatsëcënavanapaevinua panejamatabëthëtota. Biji rajane beyaiyatanetsi altarvënëjava, bajarapaaltarvënëjavajumata pebuatsiofrenda matatoxenetsia. Bajarapaofrenda ata yayiatanetsi. Tsi-paji altarvënëjavajumata boca. 20 Pajivi jumaitsi: “Cajumaitsiitsi altarvënëjava pevënëta,” jai, caecuenia yajavavënëjona bajarapaaltarvënëjavajumata pebocaeofrenda. 21 Pajivi pijinia najumecapanepaeya jumaitsi pejumexaniataenexatsi: “Cajumaitsiitsi templobo pevënëta,” jai, caecuenia yajavavënëjona bajarapatemplobota peponaponanë Dioso. 22 Pajivi pijinia najumecapanepaeya jumaitsi pejumexaniataenexatsi: “Caju-maitsiitsi athëbëtsia panacua pevënëta,” jai, caecuenia yajavavënëjona Dioso pijatrono. Caecuenia yajavavënëjonanua Dioso, ponë ecabiaba bajarapatronota pitorobabiabinexa pijajivi.

²³ ¡Paxamë jivi paneyamaxëitojorobivi! ¡Paxamë judíovi panecujarubivi, pafariseovimënu, ayaineconi panatsixainame Diosojavabelia! Panenacanabijava diez xuabejeyajuvënëjava, caejavayo, parajutabiabame ofrendacuenia Diosojavabelia. Daxitaviria panebujavaxi ata, diez xuabejeyajuvënëjava, caejavayo, parajutabiabame ofrendacuenia Diosojavabelia. Bajarapacuenia parajutabiabi atamë, apo pajumecovënëtsimë itsalivaisianë, Dioso papcatonajumecopatsilivaisianë, palivaisianë picani bitso Dioso pacatojitsipa panejumecovënëtsinexa. Bajarapalivaisianë picani pacaitoroba itsamonaejavabelia pexaniacuene panetoxanabiabinexa. Pacaitorobanua picani paneitaxutotsoniataeyabiabinexa itsamonae ata. Pacaitorobanua picani xaniavaetsia panenajamatabëcueneocopatsinexa Diosojavabelia. Bajarapacuenia picani bepaexanavanapame pacopatsinejevamë bajaraxua, ofrendacuenia panerajutabiabijava Diosojavabelia. ²⁴ ¡Paxamë apo payapëtae atamë Dioso pejumelivaisi, jamatabëcuenenavëxaniabiaya pacujarubabiabame itsamonae! Palivaisianë Dioso najumecopata panejumecovënëtsinexa, bajarapalivaisianë yajuvënëlivaisixi, saya bevelijamatabëcueneelivaisixi, pacaasaëmë tsavanapae. Palivaisianë picani Dioso bitso pacatojitsipa panejumecovënëtsinexa, caranata panamuxujematame. Nexata panecujarubivi panecujarubicuenia pexanavanapaxae, panecujarubivi ata naneconita Diosojavabelia pacuenia paxamë pananeconitame Diosojavabelia.

²⁵ ¡Paxamë jivi paneyamaxëitojorobivi! ¡Paxamë judíovi panecujarubivi, pafariseovimënu, ayaineconi panatsixainame Diosojavabelia! “Najamatabëcuenebijianaejitsipajë Diosojavabelia,” panejamatabëjaitisabiabixae, panecaxaevajënae panecaxaenëanë, taza ata, naniavelia paquiatabiabame xaniavaetsia panijasalinaucuenia. Tsipaji jamatabëcuenenavëxaniabiaya pajamatabëjumaitsimë tsabiabi: “Itsa caxaejitsipajë xaniavaetsia quiatsinejevanë, Diosojavabelia naneconitsipajë,” pajamatabëjamë tsabiabi. Itsiata baitsi jane panejamatabëëthëtota bëpënëa panajamatabëxainabiabame pibisiacuene. Panajamatabëxainabiabame itsanë pecobecovë paneyacajërëtsinexa. Panajamatabëxainabiabamenua panexainanenexa ayajjava èpaxamënu. ²⁶ Paxamë pafariseovimë, bepaneitaxutotsëcënaevi panejamatabëëthëtota. Pajivi quiata pecaxaenë, taza yajava, piaxuirajibinexa, copiaya xaniavaetsia quiata pënëvelia. Bajaraxuacujinae xaniavaetsia quiata pejumavelia. Bajara pijinia pacuenia paxamë ata copiaya Dioso pacajamatabëcuenequiatsi panejamatabëcuenexuirajibinexa. Nexata bajaraxuacujinae pacajamatabëcuenecaëjèpaena paneexanaenexa èpexaniacuene pacuenia Dioso pacaitoroba.

²⁷ ¡Paxamë saya jivi paneyamaxëitojorobivi! ¡Paxamë judíovi panecujarubivi, pafariseovimënu, ayaineconi panatsixainame Diosojavabelia! Itsajota jivimëthëanë bobena, jivimëthëanëjumavereca itsamonae caiquina peniojairata bajarapacuenia pitabëtsinexa. Itsiata baitsi jane bëpënëareca petëpaevimi petsabanaejava, pesi yajava, abeje. Bajaraxua apo jitsipaetsi vajajaysinexa. Bajara pijinia paxamë ata Dioso patsitajamatabëcueneitsimë. ²⁸ Itsamonae naniavelia itsa pacatane, pacatane bepapexaniajamatabëcuenevimë itajara. Itsiata baitsi jane panejamatabëëthëtota bëpënëa panajamatabëxainabiabame jivi paneyamaxëitojorobinexa. Itsajava ata pematatsënëa pibisiacuene paneexanaenexa, panajamatabëxainabiabame.

²⁹ ¡Paxamë saya jivi paneyamaxëitojorobivi! ¡Paxamë judíovi panecujarubivi, paxamë ata pijinia pafariseovimë, ayaineconi panatsixainame Diosojavabelia! Bajayata panijasalinaivi Diosojumepaebivimi profetavi beyejeba. Nexata mëthëca. Nexata mapamatacabitaje bajarapaprotetavimi pemëthëanëjumavereca bo paexanabiabame itabëtsiaya, jivi itsa tane, panajamatabënapitabiabinexa bajarapaprotetavimi. Pamonamei ata bajayata tëpa, pamonae aneconijibia pejinavanapavimi Dioso pitabarata, pemëthëanëjumavereca aeconoxae mapamatacabitaje itabëtsiaya parubabiabame itsacuenejavaxi. ³⁰ Bajarapacuenia itabëtsiaya paneexanaecujinae, jivjavabelia pajumaitsimë tsabiabi mapacueniaje: “Vajasalinaivimi bajayata pibisiacuene exana. Beyaxuababiaba profetavimi. Paxonë bajarapamatacabiti pajinavanapae atanë tsipae, apo payavenonaenë tsipae bajarapamonaemi pebeyabiabijava profetavimi,” pajamë tsabiabi. ³¹ “Vajasalinaivimi beyaxuababiaba profetavimi,” panejaixae, panavajunupaebame papemomoxicuenemë bajayata pamonamei beyaxuababiaba profetavimi. Bajarapamonaemi papemomoxixaemë, pacuenia bajarapamonaemi jamatabëcueneitsi, bajara paxamë ata pajamatabëcueneitsimë. ³² Paxamë ata papibisijamatabëcuenevixaemë, xanë ata jamatabëpanebeyaxuabame. ¡Panebeyaxuare paneveretsinexa xua panijasalinaivimi taxuuba!

³³ ¡Paxamë bitso pibisiacuene paneexanaevi! Pacuenia jomo rëcëpeca itsa tane petajuenajetarucæjava isoto, bajara paitsimë. Itsiata apo papanepaemë tsane infiernovecua panijaneconi yabara. ³⁴ Paxamë picani pacaitorobianatsi Diosojumepaebivi profetavi. Pacaitorobianatsinua picani bitso Dioso pijacuene peyapëtaeayaxanaevitsi. Pacaitorobianatsinua picani xanë talivaisi papecatsipaebivinexa. Itsiata baitsi jane bajarapamon-

aeyajuvēnēvi itsamonaē pabeyaxuabaponaēname. Itsamonaē cruzajavabelia pacobe-matabiaxababiabianame. Itsamonaē pajumatitibabeyabiabianame penaneconitsivi panejumaconitabiabimacata judíovi penacaetuatabiibonējava. Itsamonaē pabarapon-abiabianame itsa tomaranējavabelia ata panebejiobiaexanaenexa. ³⁵ Bajarapacuenia nexata paxamē ayaineconi panatsixainaēname Diosojavabelia. Daxita pamonaē aneconijibia pejinavanapaevimi Dioso pitabarata, bajayata panijasalinaivimi beyaxuababiaba. Nexata bajarapaneconimi yajava paxamē pacatsijumajopaena. Dioso pitabarata aneconijibia pejinavanapaevimi, panijasalinaivimi pebeyaxuabaponaējava, taxuxuaba Abelpijinēta. Bajaraxuacujinaē icatsia pevājēnaeyabelia beyaxuabapona itsamonaē ata, Dioso pitabarata aneconijibia pejinavanapaevimi. Nexata hexēajavaberena ata Berequiaspijinē pexēnatomi, Zacaríaspijinē, panijasalinaivi beyaxuaba. Zacaríaspijinēmi panijasalinaivimi beyaxuaba templobopanabota, templobobeje altarvēnējavabeje tuatuajēta. ³⁶ Xaniajanē pacuenia pacatsipaebijitsiatsi. Daxita pamonaēmi Dioso pitabarata aneconijibia pejinavanapaevimi, panijasalinaivimi beyaxuababiaba. Bajarapaneconimi yajava, paxamē aeconoxae panejinavanapaevi, pacatsijumajopaena Dioso papecananeconitsiaexanaenexa, jai Jesús judíovi pecujarubivijavabelia, fariseovijavabelianua.

Pacuenia Jesús najamatabēxainaēya sivanua Jerusalén tomarapijivi yabara pelivaisi (Lc 13.34-35)

³⁷ Jesús najamatabēxainaēya sivanua Jerusalén tomarapijivi. Jumaitsi pesivanuejavata mapacueniaje:

—¡PaJerusalén tomarapijivimē, pabeyabiabame Diosojumepaebivimi profetavi! ¡Ibtonēta ata patseconabiabame bajarapacuenia panebeyaxuababiabinexa Diosojumelivaisi pecaponaēvi paxamējavaberena! ¡Pacuenia vacara banacoxicaetuata pecorofotobēxēpanaberena, bajara pijinia pacuenia xanē ata picani bitso jitsipabiabajē patacaetuatsinexa, patacacapanepaenexa picani panijaneconivecua! ¡Itsia baitsi jane paxamē apo pajejamē cajena! ³⁸ Panejumetaema. Dioso rabaja pacacopata papecaevetabiabijavami. Nexata baja panijatemplobota Dioso apo ponaponaē. ³⁹ Xaniajanē pacuenia pacatsipaebijitsiatsi. Paxamē rabaja apo panetaemē tsane matavjēja. Matapania itsa panejumecovēnētsianame Cristonēcuenenē, Dioso taneitorobinētsica, icatsia panetaename. Itsa panesivajamatabējumaisimēna tsane: “Dioso, bitso yavenonare maponē najetarucaje, nejamatabēcueneta penjatarucaenē,” itsa panesivajamatabējamē tsane xanē yabara, nexata jane baja icatsia panetaename itsa patsianicajē, jai Jesús mapacueniaje najamatabēxainaēya pesivanuejavata Jerusalén tomarapijivi.

24

Pacuenia Jesús pijajivi tajēvelia tsipaeba itsamatacabi itsanacuapijivi templobo pexuabijanexatsica yabara pelivaisi (Mr 13.1-2; Lc 21.5-6)

¹ Jesús pitsaparena temploboverena. Itsa baja Jesús vecuaponaējitsia templobo, pijajivi imoxorenatsi. Nexata Jesús pijajivi jumaitsi:

—Patajatuxanenē, templobo nataema pemuxuneneta penaeboxanetonē ata, jai.

² Nexata Jesús tajēvelia vjunupaeba itsamatacabi itsanacuapijivi bajarapoboxanetonēmi pepenetsijavanexatsica. Jesús jumaitsi pijajivijavabelia mapacueniaje:

—Xaniajanē pacuenia pacatsipaebijitsiatsi. Daxita raja poboxanetonē pataneme, bajarapoboxanetonēmi itsamatacabi itsanacuapijivi penetsianica irabetsica. Nexata paibotonē catsanaruba mapoboxanetonētaje, itsaiboto ata pejumavereca apo bocae tsane, jai Jesús tajēvelia pijajivijavabelia.

Pacuenia itsijitsia Jerusalén tomarata, daxitanacuanējava ata, mapanacua pecopiarucaevājēnaēje yabara pelivaisi

(Mr 13.3-23; Lc 21.7-24; Lc 17.22-24)

³ Jesús eca petsutojumata, patsutojumata olivonaenē apaaxayo. Jesús itsa eca petsutojumata, nexata pijajivi pijaepatojavata imoxoyorenatsi peyanijobinexatsi. Nexata Jesús pijajivi jumaitsi:

—Patajatuxanenē, pajitsipajē patanetsipaebinexamē patayapētaenexa paepatota copiapatsijitsia xua vjunupaebame. ¿Detsa peneta pitsicuene pataenajē icatsia itsa patsijitsiamētsica? ¿Detsa peneta pitsicuene pataenajē mapanacua ata itsa vereverecaējitsiaje? jai Jesús pijajivi.

⁴ Nexata Jesús tajēvelia vjunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Xania panayajivitaename. Pëtsa panacopatame itsajivi ata papecayamaxëitojorobinexa. ⁵ Tsipaji raja peyamaxëitojorobinexa, ayaibitsaëto patsiana hexanë itajara tsane. Bajarapamonae najumetsënëtsiaya jumai tsane: “Xanë raja Cristonë, athëbëvetsica Dioso taneitorobinëtsica jivi tacapanepaenexa,” jai tsane. Bajarapamonae jivi ayaibitsaëto yamaxëitojorobiana. ⁶ Vajabitsaë pexanaejava imoxoyonacuanëjáva, tajënacuanëjáva ata, pavënëlivaisitaename. Itsiata pëtsa pajunavame. Bajara peneta itsane mapanacua pevereverecaevajënaeje. Itsiata baitsi jane bepijia bajarapamatacabi mapanacuae abaxë apo vereverecajuni tsane. ⁷ Mapanacuae pevereverecaevajënaeje peneta copiaya itsaviriavi nabena itsaviriavijavabelia. Itsanacuanëpijivi pijinia nabena itsanacuanëpijivijavabelia. Ayaijaniboxaneto najetaruaena itsanacuanëjáva. Vitancuene ata najetaruaena itsanacuanëjáva. Ira najëabiana ayaicuenia itsanacuanëjáva. ⁸ Daxita bajarapacuenie itsa pataename, saya abaxë taxuxuabaponaena piayaicuenie, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

⁹ Icatsia Jesús taxëvelia vajunupaeba pacuenia itsamatacabi itsijitsia mapanacuataje. Jesús jumaiti pijajivijavabelia mapacueniaje:

—Nexata paxamë pacacaponae nacuaevetsivijavabelia papecabejiobiaexanaenexa. Nexata pacabeyejebiana. Daxitanacuanëpijivi pacaitoya tsabiabi tsane patajajivixaemë. ¹⁰ Nexata bajarapamatacabi jivi ayaibitsaëto navecuacopabiana tanejumecovënëtsijava. Namataenetsia naitoya tsane. Namataenetsia nacanajetsiana nacuaevetsivi pecobeyabellia. ¹¹ Nexata ayaibitsaëto najetarubenaena jivi petsipaebaponaevinexa saicayalivaisi Dioso pejumelivaisivecua. BeDiosojumelivaisipaebivicuenia tsipaebaponaena. Bajarapamonae yamaxëitojorobiana jivi ayaibitsaëto xaneto. ¹² Jivi pibisiacuenie pexanavanapaevi, pevajënaeyabellia ayaibitsaëto xaneto tsaponae tsane. Nexata ayaibitsaëto Dioso pejumecovënëtsivi, namataenetsia penaasivajava vereverecaponaena. ¹³ Itsiata pajivi ajamatabëcuenesä tsane Dioso pejumecovënëtsijava petëpaejavabelianexa, bajarapajivi Dioso capanepaenatsi. ¹⁴ Itsamonae daxita nacuanëjáva tsipaebiana jivi peyapëtaenexa imoxoyo baja pevajënae Dioso pijajivi pecapanepaejavanexa. Bajaraxuacujinae jane baja mapanacua vereverecaenaeje, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

¹⁵⁻¹⁶ Icatsia Jesús tajëvelia vajunupaeba papiayaicuenie itsamatacabi copiapatsijitsia Jerusalén tomarata. Jesús jumaiti pijajivijavabelia mapacueniaje:

—Diosojumepaebinëmi profeta Danielpijinë piayaicuenie tajëvelia pevajunupaebilivaisi bajayata yaquina. Xua panijatomaranëmi vereverecaeyaexanaejitsiatsi, bajaraxua pelivaisi yaquina. (Pajivi lebiana mapalivaisije, yapëtaena papiayaicuenie vajunupaeba mapalivaisitaje.) Nexata paxamë itsa pataename bajarapapiayaicuenie penucaejava templobota, nexata Judea nacua pejinavanapaevi pëtsa nubena. Naxanitsiayo rëcëpecaena petsutonëjavabelia. ¹⁷ Pajivi pijabojumata athëbëyo ecaya, itsa vënëlivaisitaena bajarapapiayaicuenie penucaejava templobota, bajarapajivi perunaecujinaetsica, bepijia najetabajiraviana. Pëtsa joneya pijaboyalia pejutsinexa pecobecovë. ¹⁸ Pajivi pijinia nacuenebaponapona pijapabita, itsa vënëlivaisitaena bajarapapiayaicuenie penucaejava templobota, bepijia najetabajiraviana. Pëtsa navata pijaboyabellia pejutsinexa pejutsinexa natabajiraviana. ¹⁹ ¡Papetiriavi penacujeto yacotajinavanapa, bitso bejiobi tsane bajarapamatacabi! ¡Bitso nabejobitsiaya jinavanapaena! ¡Papetiriavi ata mitopaenacuetoxi isajinavanapa, bitso bejiobi tsane bajarapamatacabi! ²⁰ Bajaraxuata tajëvelia Diosojavabellia pavajëcare piyapëbejematacabi papecatocopiapatsiyaniva bajarapapiayaicuenie. Nexata pamatacabi parëcëpecaename, pexaniamatacabi Dioso pacatocopsiansiana bitso nabejobitsiaya paneponaeyaniva. Pavajëcarenuva penacueraevetsimatacabi bajarapapiayaicuenie papecatocopiapatsiyaniva, nexata papecatoayapëbejeyaniva. ²¹ Tsipaji raja bajarapamatacabi bitso jivi bejiobi tsane. Pabejobicuenie abaxë jivi caeto ata apo tae Dioso nacua pexanaecujinae, bajarapabejobicuenie taena. Bajaraxuacujinae icatsia itsamonae bejiobiaexanae atatsi tsane, itsiata bajarapacuenia bitso apo bejiobiaexanaetsi tsane. ²² Dioso epatua yatuucutsiana jivi bitso nabejobitsiaya pejinavanapaematacabanëminexa bitso jivi nabejobitsiaya pejinavanapaeyaniva. Dioso epatua itsa apo yatuucutsi tsipae bitso jivi nabejobitsiaya pejinavanapaematacabanëminexa, caejivi ata apo asaë tsipae. Itsiata baitsi jane Dioso piavixaxae pijajivi, pitapetsivi, Dioso epatua yatuucutsiana bitso jivi nabejobitsiaya pejinavanapaematacabanëminexa, jai Jesús pijajivijavabelia tajëvelia pevajunupaebijavata papiayaicuenie itsamatacabi copiapatsijitsia mapanacuataje.

²³ Icatsia Jesús tajëvelia navajunupaeba icatsia pepatsijavexatsica. Jesús jumaiti pijajivijavabelia mapacueniaje:

—Nexata itsajivi yamaxëitojorobiaya itsa pacajumaiti tsane: “Pataema. Mara Cristo nucaje,” itsa pacajai tsane, pëtsa pajumecovënëtaeme. Itsa pacajumaitsinua tsane: “Bajarajota nuca Cristo,” itsa pacajai tsane, pëtsa pajumecovënëtaeme. ²⁴ Itsamonae jumai

tsane: “Xanë raja Cristonë,” jai tsane. Itsiata jemajai tsane. Itsamonae jumai tsane: “Diosojumepaebinënë raja, profetanënë,” jai tsane. Itsiata jemajai tsane. Bajarapamonae itajara exanaena pinijicuene pexanaejavanë peyamaxëitojorobinexa saya jivi. Nexata bajarapacuenia itsamonae yamaxëitojorobaponaenatsi. Itsiata pamonaepacuenie Dioso pijajivi, Dioso pitapetsivitsi, bajarapamonae apo yamaxëitojorobi tsanetsi. ²⁵ Tajëvelia rabaja maje pacatsipaebatsije. ²⁶ Nexata itsamonae itsa pacajumai tsane: “Cristo raja ponapona petusato nacuatatia. Naxanitsia. Panataename,” itsa pacajai tsane, pëtsa paponaremelia. Itsa pacajumaitsinua tsane: “Cristo raja ponapona mapaënëyatuucutsibotaje. Naxanitsia. Panataename,” itsa pacajai tsane, pëtsa pajumecovënëtame. ²⁷ Payapëtaneme rabaja mapacuenie. Yamaxë itsa nivejai tsajuni athëbëvetsica, caecuenia jivi bacotiatane daxitajava. Bajara pijinia peneta pacuenia daxitanacuanëpijivi caecuenia netaena pamatacabi patsianicajë xanë, Daxitajivi Pematapijinënë. ²⁸ Payapëtaneme rabaja mapacuenie ataje. Quequeremonae bepijia bayapëtanë itsajota petuxutsaebinë boca. Nexata bajarajota bepijia banacaetuaana. Bajara pijinia pacuenia daxitanacuanëpijivi tajajivi bepijia yapëtaena tapatsijavatsica. Nexata bepijia nacaetuaana xanëjavaberena, jai Jesús pijajivijavabelia tajëvelia penavajunupaebijavata icatsia pepatsijavanexatsica.

Pacuenia Jesús tajëvelia navajunupaeba icatsia pepatsijavanexatsica petëpacujinae yabara pelivaisi

(Mr 13.24-37; Lc 21.25-33; 17.26-30, 34-36)

²⁹ Jesús tajëvelia navajunupaeba itsamatacabi icatsia pepatsijavanexatsica. Jesús jumaitsi pijajivijavabelia mapacueniaje:

—Xanë tapatsivajënaetsica jivi taena pecujunavicuene. Jivi nabejobitsiaya jinavana-paena. Nexata jivi nabejobitsiaya pejinavanapaematacabicujinae, matacabipijijuameto aitaquiri tsane. Meravipijijuameto ata aitaquiri tsane. Tulupu ata othopaenica irabetsica. Daxitacuene, xua rubena athëbëtatsia, najëabiana. Xaniavaetsia apo rubenae tsane. ³⁰ Bajaraxuacujinae jane baja xanë athëbëvetsica najetarucaenjë, Daxitajivi Pematapijinënë. Nexata daxitaviriavi mapanacuapijivi natsinuena pecajunavi pijaneconi yabara. Nexata bajarapaepatota, xanë, Daxitajivi Pematapijinënë, jivi netaena athëbëvetsica itarërbota tanajetarucaejava. Patsianicajë daxitacuene taevetsinexa. Tanivenivenacotia yajavapatsianicajë. ³¹ Bajaraxuacujinae trompeta itsa najumetsiana ayajumeta, itorobianajë tajaängelevi. Angelevi daxitanacuanëjavaverena xanëjavaberena netocaetuatsiana tajajivi, pamonaepacuenia Dioso pitapetsivitsi, jai Jesús pijajivijavabelia tajëvelia penavajunupaebijavata itsamatacabi icatsia pepatsijavanexatsica.

³² Jesús tajëvelia navajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Pacanaëjere pacuenia itsi higeranae. Itsa maxëranajuva, nexata pejanabaxu pitsapa. Nexata bajarapacuenia payapëtaneme vai baja imoxoyo pevajënae pejonenexa. ³³ Bajara pijinia pacuenia peneta itsa pataename pecopiapatsijava xua tajëvelia vajunupaebajë, nexta payapëtaename imoxoyo baja tavajënae tsane tapatsijavanexatsica. ³⁴ Xaniajanë pacuenia pacatsipaebijitsiatsi. Pitsijamatabëcuenevi aeconoxae mapamatacabitaje jinavanapa, bajarapitsijamatabëcuenevi abaxë, bexëjavabelia ata, apo vereverecae tsane. Matapania xua tajëvelia vajunupaebajë itsa baja copiapatsiana, bajarapamonae jane baja vereverecaena. ³⁵ “Itaboxo, ira yajava, tsitecaena daxitamatacabijavabelianexa,” jamatabëjai ata tsane itsamonae, itsiata jamatabëcuenenavëxaniabiana. Tsipaji jemata itaboxo, ira yajava, vereverecaena. Nexata palivaisi pacatsipaebatsi, apo najumetsënëtsinë tsane. Nexata xua tajëvelia vajunupaebajë, pacuenia baja najumecapanepaeya jumaitsinë, daxita bajaraxua copiapatsiana, jai Jesús pijajivijavabelia.

³⁶ Icatsia Jesús jumaitsi pijajivijavabelia:

—Itsajivi ata apo yapëtae pamatacabita, paepatota ata, copiapatsijitsia daxita xua tajëvelia vajunupaebajë. Athëbëpijivi ata, angelevi, apo yapëtae. Xanë, Dioso pexënato atanë, apo yapëtaenë. Caenë taxa Dioso yapëtanë, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

³⁷ Jesús icatsia tajëvelia navajunupaeba itsamatacabi icatsia pepatsijavanexatsica. Jesús jumaitsi pijajivijavabelia mapacueniaje:

—Pacuenia bajayata jemata itsi pamatacabi Noëpijinë ponapona, bajara icatsia jemata itsane pamatacabi xanë, Daxitajivi Pematapijinënë, patsianicajë. ³⁸ Pamatacabi Noëpijinë ponapona ira pebutusivajënaeya, jivi picani xaniavaetsia jamatejema pexaejava xevanapa. Apaevanapanua. Nacojobapona itsamonae. Itsamonae pexënatoyonë pebijavabelia canajetapona petonacojobinexatsi. Bajarapamonae jamatejema saya jinavanapa. Nexata bajarapamatacabi Noëpijinë ëpijamonae pinijibarcoxanetojavabelia barëjunua.

³⁹ Daxitajivi abaxë itsiata apo yapëtae paepatota tocopiaapatsijitsiatsi peyabubutsijavanexatsi. Nexata itsajivi ata yapëtaejeva jemata ayaiaemaxaneto itsa jopa ira pebubutsinexa, yapëtane jane baja. Bajarapamatacabi bubuna daxitajivi. Bajara pijinia pacuenia itsajivi ata yapëtaejeva xanë, Daxitajivi Pematapijinënë, tapatsijavanexatsica, jemata patsianicajë. ⁴⁰ Nexata bajarapamatacabitata anijanëbeje najuanacuenebanucaenabeje pabita. Itsanë tanejumecovënëtsinë tsane. Itsanë apo tanejumecovënëtsinë tsane. Nexata tanejumecovënëtsinë pitsianatsi ángelnë. Apo tanejumecovënëtsinë copatanutsianatsi. ⁴¹ Bajara pijinia itsane petirivabeje ata. Najuaucabanucaenabeje caejavata. Nexata tanejumecovënëtsiva pitsianatsi ángelnë. Apo tanejumecovënëtsiva copatanutsianatsi.

⁴² Nexata nejamatabëcuenevetsiaya panecopiaevetavanapaename. Tsipaji raja apo panevajënaeyapëtaemë tsane paepatota xanë panijatuxanenënë icatsia patsijitsianëtsica. ⁴³ Pacanaëjërë mapacueneje. Bo pexainaenë itsa yapëtaejitsipa paepatota meravi pijaboyaberena patsijitsia pecobecovë petonacobetoxotsinënexatsi, nexata naëcotsiaya vajënaevetsipa. Apo copatsi tsipae pijaboyaberena petojoneyanivatsi penacobetoxotsinënexa. ⁴⁴ Bajara pijinia pacuenia paxamë ata najamatabëcuenevaniavaetsiaya panecopiaevetavanapaename. Tsipaji xanë, Daxitajivi Pematapijinënë, paepatota apo panejamatabënajinaemë tapatsijavanexatsica, jemata icatsia patsianicajë, jai Jesús pijajivijavabelia tajëvelia penavajunupaebijavata itsamatacabi icatsia pepatsijavanexatsica.

Pacuenia Jesús pijajivijavabelia livaisi tsipaeba petuxanenë pijajivitonëbeje pelivaisicuenia yabara pelivaisi

(Lc 12.41-48)

⁴⁵ Jesús livaisi tsipaeba pijajivijavabelia petuxanenë pijajivitonëbeje pelivaisicuenia. Bajarapacuenia pijajivijavabelia tsipaeba copiaevetsiaya petonacuenebanavanapaenexatsi icatsia pepatsimatacabitsicajavabelianexa. Jesús jumaitis mapacueniaje:

–Petuxanenë pijajivitonë, ponë xaniavaetsia pijatuxanenë pecovëta tonacuenebaponaponaena, majamatabëcueneitsi tsaneje. Bajaraponë itsajamatabëcuene xainaenejeva, copiaevetaponaponaena pijatuxanenë pepatsijavabelianexa. Bajaraponë pijatuxanenë pijajivi pecovëta toevetaponaponaena piabatabiabinexa pexaejaya caematacabi canacujitsia pacuenia pijatuxanenë itorobatsi. ⁴⁶ Bajaraponë bitso barëya tsane pamatacabi pijatuxanenë patsiana, xaniavaetsia pijajivi petoovetaponaponaexae pecovëta. ⁴⁷ Xaniajanë pacuenia pacatsipaebijitsiatsi. Ponë xaniavaetsia tonacuenebiana pijatuxanenë pecovëta, bajaraponë evetsiaexanaenatsi daxita xua xaina pijatuxanenë. ⁴⁸ Itsa bajaraponë pijamatabëcuenebejenë tsipae, nexata pijatuxanenë pecovëta jamatabëjumaitis tsipae: “Tajatuxanenë ajibi tsarucae tsane bajayajebi,” jamatabëjai tsipae. ⁴⁹ Nexata toconibabeyabiabijitsipa pijatuxanenë pijajivi. Ayajava xaeyabiabijitsipa. Naapaeyabiabijitsipanua plaitajivivita. ⁵⁰ Nexata itsajota apo jamatabënajinae tsipae pijatuxanenë pepatsijavanexa, patsipa pijatuxanenë. ⁵¹ Nexata bajaraponë ayaicuenia naneconitsiaexanaejitsipatsi pijatuxanenë. Pacuenia jivi peyamaxëitojorobabiabivi, Dioso ayaicuenia naneconitsiaexanaenatsi, bajarapacuenia pijatuxanenë naneconitsiaexanaejitsipatsi. Nexata natsinuejitsipa. Navonosinijitsipanua bitso penavixaeataexae, jai Jesús pijajivijavabelia petuxanenë pijajivitonëbeje pelivaisicuenia petsipaebijavata.

Bajarapacuenia Jesús tsipaeba pijajivi xaniavaetsia pecopiaevetavanapaenexatsi Jesús icatsia pepatsimatacabitsicajavabelianexa.

25

Pacuenia Jesús pijajivi livaisi tsipaeba diez papejanavabeje pijalámparabëxi pecaponaevi pelivaisicuenia yabara pelivaisi

¹ Jesús icatsia jumaitis pijajivijavabelia:

–Pamatacabi icatsia patsianicajë, tajajivi peyapëtaexae tapatsijavanexatsica, jamatabëcueneaitavaya necopiaevetavanapaena. Itsamonae tajajivi yapëtae ata tapatsijavanexatsica, itsiata jamatabëcueneaitavaya apo necopiaevetavanapae tsane. Bajarapacuenia yabara pacatsipaebianexi mapalivaisije. Diez papejanavabeje yapëtane itsava pejanava penacasabijavanexa. Nexata diez papejanavabeje pijalámparabëxi, caeva canacujitsia, xaniavaeta penaponaenexa. Nexata capona pijalámparabëxi pabojavabelia eca penacasabivanexa. Bajarajota vajënaevetsijitsia pepatsijava penacasabinënexa. Nexata itsa ponabeje penacasabijivibejenexa, bajarapapejanavi penaponaenexa bajarapajivibeje pepëta penacasabifitestajavabelia. ²⁻⁴ Bajarapamonaeyajuvënëvi, cinco povabeje, yapëtae ata picani petsicaponaejavanexa aceiteranë pijalámparabëxinexa, itsiata apo tscaponae itsa tovereverecatsi aceitera peepatsinexa icatsia pijalámparabëxijavabelia. Cinco pijinia povabeje peyapëtaexae petsicaponaejavanexa aceiteranë pijalámparabëxinexa, tscapona. ⁵ Nexata bajarapapetirivai itayotena pijalámparabëxita. Bajayajebi picani

vajënaeevetena penacasabinënexa pepatsijava. Nexata pijalámparabëxita paaceiteranë capona, tovereverecaponatsi baja. Tsipaji penacasabinënexa abaxë cuenenajemata pepatsinexa. Nexata baja daxita bajarapapetiriavi belia itamajitsipana. Nexata baja majita. ⁶ Bajaraxuacujinae ayameravi tuatuajëta jumetane pevavajajava. “iNajetaruca rajane baja penacasabinënexa! iPapitsaparemena jane baja panecopiapitsinexa!” peajijava jumetane. ⁷ Nexata daxita bajarapapetiriavi nonobapuna pecopiapitsinexa jane baja. Papetiriavi aceiteranë tscapona, epaca pijalámparabëxijavabelia. Caeva canacujitsia pijalámparabëxi ayaicotia exana. ⁸ Nexata papetiriavi apo tscaponae aceiteranë, jumaiti aceiteranë petsicaponaevijavabelia mapacueniaje: “Panenarajure tsiquirijavaxi aceiteraxi. Tsipaji patajalámparabëxi panetoitacaëcaënazona,” jai bajarapamonae. ⁹ Itsiata aceiteranë petsicaponaevi jumaiti: “Jume. Apo caëjëpae. Paxanë ata meta apo panetocaëjëpae tsipae. Paponaremelia. Panijacuata pacomuare itsajotalia canajetabiaba aceiteranë,” jai aceiteranë petsicaponaevi pijalámparabëxinexa. ¹⁰ Nexata papetiriavi aceiteranë apo tscaponae pijalámparabëxinexa, ponalia aceiteranë pecomuacaenexa. Nexata pecovëta penacasabinënexa patanajetaruca. Nexata papetiriavi aceiteranë tscapona pijalámparabëxinexa, nazona baja penacasabifestanexa pexanaebojavabelia. Pejonecujinaelia baupaxatata. ¹¹ Bajaraxuacujinae aceiteranë pijalámparabëxi petsicomuacaevi pata. Nexata bajarapapetiriavi jumaiti penacasabinënexajavabelia: “iPanetobaupare! iPanetobaupare! jai tsanubenae bojumavelia. ¹² Nexata penacasabinënexa jumaiti: “Xanijananë pacuenia pacatsipaebijitsiatsi. Apo pacayapëtaetsi cajena paxamë,” jai bajarapapetiriavijavabelia, jai Jesús mapalivaisije pijajivijavabelia.

¹³ Jesús icatsia jumaiti pijajivijavabelia:

—Pacuenia cinco povabeje peyapëtaexae, aceiteranë tscapona pijalámparabëxinexa, bajara pijinia pacuenia paxamë ata paneyapëtaexae, jamatabëcueneaitavaya panecopiaeve-tavanapaename. Tsipaji apo payapëtaemë tsane pamatacabita, paepatota ata, xanë, Daxitajivi Pematapijinënë, icatsia patsijitsianëtsica, jai Jesús pijajivijavabelia.

*Pacuenia Jesús pijajivi livaisi tsipaeba pijapalata pijajivi pevetsiaexanaenë pelivaisicue-nia yabara pelivaisi
(Lc 19.11-27)*

¹⁴ Jesús icatsia jumaiti pijajivijavabelia:

—Tacovëta patajajivimë, itsamonae ata, pamonae tajajivi, panetonacuenebianame. Nexata pamatacabi icatsia patsianicajë, pacuenia pacasionajamatabëxainaejitsiatsi, aeconoxae pacatsipaebianatsi. Patsipaebianatsi comparacioncuenia mapacueniaje. Petuxanenë itsa ponaejitsia tajënacuyavelia, junata pijajivi. Evetsiaexana pijapalata peto-evetsinexatsi pecovëta.

¹⁵ Caenë canacujitsia evetsiaexanazona petocanacuenebinexatsi pecovëta pacuenia bajarapamonae caëjëpatsi. Nexata petuxanenë pijinia evetsiaexana cinco mil ponëbeje pepovi, bitso penamatamotsivi. Itsanë pijinia evetsiaexana dos mil ponëbeje. Itsanë pijinia evetsiaexana mil ponëbeje. Bajaraxuacujinae petuxanenë pona tajënacuyavelia.

¹⁶ Nexata jane baja ponë evetsiaexana cinco mil ponëbeje, canacueneba jane baja pecovëta bajarapapalata. Nexata pematatsënëa topitsapatsi icatsia itsacinco mil ponëbeje. Nexata baja daxitata diez mil ponëbeje caejavata. ¹⁷ Bajara pijinia pacuenia itsanë canacueneba dos mil ponëbeje. Nexata pematatsënëa topitsapatsi icatsia itsados mil ponëbeje. ¹⁸ Itsiata baitsi jane ponë toevëta mil ponëbeje, pona pematayatsinexa pijatuxanenë pijapalata. Matayatsia mëthëteta irata.

¹⁹ Bexëa nexata najetaruca petuxanenë. Junata pijajivi peyapëtaenexa pacuenia to-evetatsi pecovëta pijapalata. ²⁰ Copiaya pata ponë cinco mil ponëbeje evetsiaexanatsi. Nexata bajaraponë tocanaviata pijatuxanenëjavabelia diez mil ponëbeje. Jumaiti bajaraponë pijatuxanenëjavabelia: “Nevetsiaexaname cinco mil ponëbeje tacatoevetsinexa. Bajara macatocanaviatatsi bajarapapalataje. Catocanaviatatsi yajava icatsia itsacinco mil ponëbeje, xua nacanabajë bajarapapalata,” jai bajaraponë pijatuxanenëjavabelia. ²¹ Nexata petuxanenë jumaiti: “Xanepana rabaja. Xaniavaetsia netoevetaponaponame. Itsajamatabëcuene apo najamatabëxainamemë. Tsiquirijavayo ata xaniavaetsia neto-evetame. Nexata aeconoxae caevetsiaexanaenatsi pematatsënëa ayajijava. Jonemena xanëjavaberena barëyaya neponaponae exana xanëjavata,” jai petuxanenë pijajivitonëjavabelia. ²² Bajaraxuacujinae pata ponë dos mil ponëbeje evetsiaexanatsi. Nexata bajaraponë jumaiti pijatuxanenëjavabelia: “Nevetsiaexaname dos mil ponëbeje tacatoevetsinexa. Bajara macatocanaviatatsi bajarapapalataje. Catocanaviatatsi yajava icatsia itsados mil ponëbeje, xua nacanabajë bajarapapalata,” jai bajaraponë pijatuxanenëjavabelia.

²³ Nexata petuxanenē jumaitsi: “Xanepana rabaja. Xaniavaetsia netoebetaponaponame. Itsajamatabēcuene apo najamatabēxainaemē. Tsiquirijavayo ata xaniavaetsia netoebetame. Nexata aeconoxae caevetsiaexanaenatsi pematatsēnēa ayaijava. Jonemena xanējavaberena barēyaya neponaponaenexa xanējavata,” jai petuxanenē pijajivitonējavabelia. ²⁴ Icatsia pata ponē evetsiaexana mil ponēbeje. Bajaraponē jumaitsi pijatuxanenējavabelia: “Cacueneyapētanetsi. Xamē nijajivi apo itaxutobejiobiataeyabiabimē. Xamē nijajivi ubi-aexanabiabame nubiaexanabiabijava nexata bajarapamonae pejamatabēcueneta ayaijava palata pecatopitsapaenexa. Bajara pijinia pacuenia xanē ata nevecuapitsipame xua nacanabijitsipajē nijapalatata itsa canacuenebijitsipajē. ²⁵ Bajaraxuata junavajē. Ponajē irata tamatayatsiamēhētetsinexa nijapalata. Bajara manijapalata catocanaviatsisje,” jai bajaraponē pijatuxanenējavabelia. ²⁶ Nexata petuxanenē jumaitsi: “Tajajivitonē atamē, itsiata ajamatabēcuenebejemē. Afaetabimēnua. Xamē baja cajena yapētaneme tajajivi taubi-aexanabiabijava, taubiaexanabiabijava nexata bajarapamonae pejamatabēcueneta ayaijava palata tanetopitsapaenexa. ²⁷ Bajaraxuata xanepanaejevcuapitsianatsi. ³⁰ Maponē tajajivitonēje, itsacuenejavayonexa ata, apo netoxanepanae. Paxuabaremelia pitaquirijavabelia. Bajarajota natsinuena. Navonosiniananua bitso penavixaetaexae,” jai petuxanenē, jai Jesús comparacióncuenia pijajivijavabelia.

²⁸ Nexata petuxanenē jumaitsi bajarajota penubenaevijavabelia: “Pavecuapire bajarapamil ponēbeje. Nexata juya parajure ponējavabelia xaina diez mil ponēbeje. Tsiapai bajaraponē caējēpatsi tanetoevetsinexa pematatsēnēa. ²⁹ Tsiapai pajivi ayaijava baja xaina, pematatsēnēa icatsia itsajava rajutsianatsi. Nexata xainaena ayaijava. Itsiata pajivi tsiquirijavayo xaina, bajarapajivi pijatsiquirijavayomi vecuapitsianatsi. ³⁰ Maponē tajajivitonēje, itsacuenejavayonexa ata, apo netoxanepanae. Paxuabaremelia pitaquirijavabelia. Bajarajota natsinuena. Navonosiniananua bitso penavixaetaexae,” jai petuxanenē, jai Jesús comparacióncuenia pijajivijavabelia.

Bajarapacuenia Jesús jumaitsi pamonae pijaneconi pexainaevi Jesús penaneconitsiaexanaenexa pamatacabi icatsia patsianica.

Pacuenia Dioso naneconitsiaexanaena pijaneconi pexainaevi yabara pelivaisi

³¹ Jesús tajēvelia navajunupaeba pacuenia itsamatacabi exanaeijtsia mapanacuataje. Jesús jumaitsi pijajivijavabelia mapacueniaje:

–Xanē, Daxitajivi Pematapijinēnē, icatsia itsa najetarucaenajē daxitanacua taevetsinexa, āngelevi nematatororonaeya yajavanajetarucaenajē. Nexata ecaenajē tajapenivenivenaetronovēnējavata. ³²⁻³³ Nexata daxitanacuapēpijivi caetuatsianatsi taitabarata. Tsaataponanajē bajarapamonae. Oveja pevetsinē ovejavecua chivo saicaya tsatapona. Nexata oveja pevetsinē petsavenonenia chivo nubenaeyaexana. Pecujuanenia pijinia oveja nubenaeyaexana. Bajara pijinia pacuenia xanē tsataponanajē Dioso apo pejumecovēnētsivi, Dioso pejumecovēnētsivivecua. Dioso apo pejumecovēnētsivi tatsavenonenia nubenaeyaexanaenajē. Dioso pijinia pejumecovēnētsivi tacujuanenia nubenaeyaexanaenajē. ³⁴ Nexata jumaitsinē tsane tacujuanenia penubenaevijavabelia, Dioso pejumecovēnētsivi: “Naxanitsia. Paxamē taxa papecaitaxutotsionitsiaevi. Payajavajinavanapenaeme taxa pijanacuatsia, itsajotatsia pacatoxaniavaeta tajēvelia. Dioso pacatoxaniavaeta nacua pexanaejavaveliacujinae. ³⁵ Itsa tajani, paxamē taxaejava panerajutame. Itsa mera jitsipajē, panerajutame mera. Itsanacuaverena itsa patajē, panecopiapitame xaniavaetsia. ³⁶ Itsa ajibi bitso tanaxatatsijava, panerajutame tanaxatatsijavanexa. Itsa avitanenē, papatame patanevetsinexamē. Itsa neeta penaneconitsivi pejebabiabibota, papatame patanetaenexamē,” janē tsane tacujuanenia penubenaevijavabelia. ³⁷ Nexata bajarapamonae nejumai tsane: “Tajatuxanenē, ¿detsa pacujinae nijanijavata patajacarajutsi nexaejava?” nejai tsane. ¿Detsa pacujinae mera neijitsipaejavata patajacarajutsi mera? nejai tsane. ³⁸ Itsa jume, nejumai tsane: “¿Detsa pacujinae itsanacuaverena nepatsinē patajacacopiapitsi xaniavaetsia?” nejai tsane. Itsa jume, nejumai tsane: “¿Detsa pacujinae piajibijavata bitso nenaxatatsijava patajacarajutsi nenaxatatsijavanexa?” nejai tsane. ³⁹ Itsa jume, nejumai tsane: “¿Detsa pacujinae niavitanejavata patajaponae patacaevetsinexa?” nejai tsane. Itsa jume, nejumai tsane: “¿Detsa pacujinae pecaetsijavata penaneconitsivi pejebabiabibota patajaponae patacataenexa?” nejai tsane. ⁴⁰ Nexata xanē jumaitsinē tsane bajarapamonaejavabelia: “Xaniajanē pacuenia pacatsipaebijitsiatsi. Daxita xua patoexaname paneyavenonaenexa tajajiviyajuvēnjivi, beveliajamatabēcuenevi piteavetsijavabelia, bajaraxua xanē taniji xanējavaberena bepatanetoexanaejavamē,” janē tsane.

⁴¹ Nexata tatsavenonenia penubenaevi, Dioso apo pejumecovēnētsivijavabelia, jumaitsinē tsane: “Panevecuanatsare panijaneconi paneyajavajinavanapaevi. Paponaremelia apo pevereverecaeisotojavabelia. Bajarapaisoto Dioso tajēvelia

toxaniavaeta dovathinexa, dovathi pijajivinexa ata. ⁴² Xanë ita tajani, paxamë apo panerajutsimë taxaejava. Itsa mera jitsipajë, apo panerajutsimë mera. ⁴³ Itsanacuaverena itsa patajë, apo panecopiapitsimë xaniavaetsia. Itsa ajibi bitso tanaxatatsijava, apo panerajutsimë tanaxatatsijavanexa. Itsa avitanenë, apo papatsimë patanevetsinexamë. Itsa neeta penaneconitsivi pejebabiabibota, apo papatsimë patanetaenexamë, janë tsane tatsavenonena penubenaevijavabelia. ⁴⁴ Nexata bajarapamonae pijaneconi peyajavajinavanapaevi nejumai tsane: “Tajatuxanenë, ¿detsa pacujinae niajanijavata apo pacarajutsitsi nexaejava?” nejai tsane. Itsa jume, nejumai tsane: “¿Detsa pacujinae mera nejitsipaejavata mera apo pacarajutsitsi?” nejai tsane. Itsa jume, nejumai tsane: “¿Detsa pacujinae itsanacuaverena nepatsinë, apo pacacopiapitsitsi xaniavaetsia?” nejai tsane. Itsa jume, nejumai tsane: “¿Detsa pacujinae bitso pecatoajibijavata nenaxatatsijava, apo pacarajutsitsi nenaxatatsijavanexa?” nejai tsane. Itsa jume, nejumai tsane: “¿Detsa pacujinae niavitanejavata, apo paponanë patacaevetsinexa?” nejai tsane. Itsa jume, nejumai tsane: “¿Detsa pacujinae penaneconitsivi pejebabiabibota pecaetsijavata, apo paponanë patacataenexa?” nejai tsane bajarapamonae. ⁴⁵ Nexata xanë jumaitsinë tsane bajarapamonaejavabelia: “Xaniajanë pacuenia pacatsipaebijitsiatsi. Bajarapacuenia itsa apo patoexanaemë paneyavenonaenexa tajajiviyajuvënëjivijavabelia, nexata bajaraxua xanë taniji xanëjavaberena apo patanetoexanaejavamë,” janë tsane pijaneconi peyajavajinavanapaevijavabelia. ⁴⁶ Bajaraxuacujinae bajarapamonae ponaena penaneconitsiajinavanapaenexa daxitamatacabijavabelianexa. Pamona Dioso pejumecovënëtsivi, bajarapamonae Dioso rajutsianatsi matacabi apo pevereveraejava, jai Jesús pijajivijavabelia tajëvelia penavajunupaebijavata itsamatacabi penaneconitsiaexanaejavanexa pijaneconi pexinaevi, pamatacabi icatsia patsianica.

26

Pacuenia picani Jesús pijavajabitsaë jamatabëvaetabatsi yabara pelivaisi
(Mr 14.1-2; Lc 22.1-2; Jn 11.45-53)

¹ Itsa baja Jesús najumevereta pijajivijavabelia livaisi petsipaebijava, Jesús icatsia tajëvelia navajunupaeba itsamonae cruzajavabelia pecobematabiabarutsijavanexatsi. Jesús jumaitsi pijajivijavabelia mapacueniaje:

² –Payapëtaneme rabaja nijamatacabibeje pesajinaejava pejonenexa baja pascuavënëfiesta. Nexata xanë, Daxitajivi Pematapijinë, necanajetsiana itsamonae pecobeyabelia tanecobematabiabarutsinexa cruzajavabelia, jai Jesús pijajivijavabelia tajëvelia penavajunupaebijavata cruzajavabelia pecobematabiabarutsijavanexatsi.

³ Nexata bajarapaepatota nacaetuata sacerdotevi penamatacaitorobivi. Nacaetuata judíovi pecujarubivinu. Nacaetuata judíovi pijaancianovinu. Daxita bajarapamonae nacaetuata Caifásvënë pijaboxanetota. Bajaraponë Caifás, sacerdotevi pepo penamatacaitorobinë. ⁴ Bajarajota daxita bajarapamonae najumejaita. Penumajtsënëtsilivaisita picani Jesús jamatabëvaetabatsi pebeyaxuabinexatsi. ⁵ Itsiata bajarapamonae najumaitsi:

–Fiestajavata meta abaxë apo vaetabi tsanetsi jivi vajanacaitsacueniabianiva, najai daxita bajarapamonae.

Pacuenia Jesús petiriva tsimataepanatsi petuxujuviaceitera yabara pelivaisi
(Mr 14.3-9; Jn 12.1-8)

⁶ Jesús ponapona Betania tomarata, Simón pijabota. Simón bajayajebi bitso peperabëtsabanaenëmi. ⁷ Nexata Jesús petiriva cobenaimoxoyorenatsi petuxujuviaceitera, alabastrobotellabëta pejeaceitera. Bajarapora bitso penamatamotsira. Nexata Jesús penabanecaejavata mesata, bajarapova tsimataepanaicatsi bajarapaaceitera. ⁸ Nexata Jesús pijajivi itsa taeyena Jesús pëtsimataepanaejavatsitsica bajarapaaceitera, Jesús pijajivi jamatabëcueneanaepanareca. Nexata epamonae najumai tsenae:

–¿Detsa xuajitsia saya xuaba bajarapacuenia maporaje? ⁹ Canajetsipa rajane. Nexata matamopitsipa ayaimatamo. Bajarapapalata rajutsipa bepejiobivi bajarapacuenia peyavenonaenexa, najai tsenae Jesús pijajivi.

¹⁰ Nexata Jesús jumetane bajarapacuenia pijajivi pejumaitsijava. Nexata Jesús jumaitsi pijajivijavabelia:

–¿Detsa xuajitsia bajarapacuenia pajumaitsimë bajarapova pexanaejava yabara? Mara povaje pexaniacueni nexanaje. ¹¹ Daxitamatacabi raja bepejiobivi jinavanapa itsaxuayo pajinavanapame. Itsiata baitsi jane xanë daxitamatacabi apo ponaponaenë tsane paxamëjavata. ¹² Itsamonae petëpaejivi batsiperabëpana petuxujuviaceitera peperabëxaniavaetsinexa pemëthëtsivajënae. Bajara pijinia pacuenia mapovaje netsimataepana petuxujuviaceitera, abaxë apo tēpae atanë. Nexata baja bajarapova neperabëxaniavaeta

itsamonae tanemëthëtsivajënae. ¹³ Xaniajanë pacuenia pacatsipaebijtsiatsi. Daxitanacuanëjava tajajivi itsa paebanajetarubenaena pexanialivaisi jivi tacapanepaelivaisinexa, vajunupaebabiabianana pacuenia exana xanëjavaberena mapapetirivaje, jai Jesús pijajivijavabelia tajëvelia penavajunupaebijavata pebeyaxuabijavanexatsi.

Pacuenia Judas Jesús yajumejailia pijavajabitsaë pecobeyabelia pecanajetsinexa yabara pelivaisi

(Mr 14.10-11; Lc 22.3-6)

¹⁴ Jesús pijajivi, doce ponëbejeyajuvënënenë, pevënë Judas Iscariote. Nexata Judas pona sacerdotevi penamatacaitorobivijavabelia. Jesús jane baja yajumejailiatsi pecanajetsinexatsi. ¹⁵ Nexata Judas jumaiatsi sacerdotevi penamatacaitorobivijavabelia:

—¿Detsa pacuenia panerajutsipame panecobeyabelia itsa canajetsipajë Jesús? jai Judas.

Nexata bajarapamonae Judas matamotatsi treinta ponëbeje pepo palatanëanë, bitso penamatamotsinëanë. ¹⁶ Nexata bajaraxuacujinae Judas Jesús naitaxutocaevetsia ponapona. Nexata paepatota Judas toyapëxanepanatsi, perajutsinexa jane baja Jesús bajarapamonae pecobeyabelia.

Pacuenia Jesús barënabane pijajivi pecopiarutsinabani baja pebeyaxuabivajënaetsi yabara pelivaisi

(Mr 14.12-25; Lc 22.7-23; Jn 13.21-30; 1 Co 11.23-26)

¹⁷ Junua jane baja fiesta, pafiestajava judíovi baxane levadurata matajërëbinejeva pexanaepan. Nexata Jesús pijajivi imoxoyorenatsi. Yanijobatsi pijajivi.

—¿Detsa belia paponanajë patacamitsaexanaenexa, xua jivi baxane pascua fiestamatacabi, nexaenexa? jai Jesús pijajivi.

¹⁸ Nexata Jesús jumaiatsi pijajivijavabelia:

—Paponare tomarabelia. Pacatsipaebianatsi ponë pijabota papatsijitsiamë. Pajumaitsimë tsane bo pexainanëjavabelia mapacueniaje: “Vajanacacujarubinë raja jumaiatsi: ‘Imoxoyo rabaja tavajënae tanebeyaxuabinexa. Nexata bajaraponë pijabo netsicopatsiana patacabarëxanexa xua jivi baxane pascua fiestamatacabi,’ jai raja vajanacacujarubinë,” pajamë tsane bo pexainanëjavabelia, jai Jesús pijajivijavabelia.

¹⁹ Nexata baja Jesús pijajivi pona pacuenia Jesús jumaiatsi. Nexata xua jivi baxane pascua fiestamatacabi daxita Jesús pijajivi pebarëxanexa. Jesús pijajivi exana jane baja.

²⁰ Nexata baja ajena meravyotsia, Jesús pijajivi, doce ponëbeje, barëeca mesa muxuneneta. ²¹ Nexata pexaeyenaejavata Jesús jumaiatsi pijajivijavabelia:

—Xaniajanë pacuenia pacatsipaebijtsiatsi. Caenë paxamëyajuvënënenë necanajetsiana tajavajabitsaë pecobeyabelia, jai Jesús pijajivijavabelia Judas yabara.

²² Nexata Jesús pijajivi bejamatabëjireca. Nexata Jesús pijajivi, caenë canacujitsia, Jesúsjavabelia yanijobapona.

—Tajatuxanenë, ¿xanë tsaja tsane? jai tsaponae Jesús pijajivi.

²³ Nexata Jesús jumaiatsi pijajivijavabelia:

—Ponëbeje peneta caecuenia panajuacajabutsianajëbeje panbë platojavabelia, bajaraponë necanajetsiana tajavajabitsaë pecobeyabelia. ²⁴ Xanë, Daxitajivi Pematapijinënë, tēpaenajë pacuenia baja cajena xanë yabara Dioso pejumelivaisibaxutota tajëvelia jumaiatsi. Itsiata ponë tajavajabitsaë pecobeyabelia necanajetsiana, bajaraponë bitso bejiobi tsane pinijicuenia. Itsa meta bajaraponë apo naexanae tsipae, bajarapacuenia apo necanajetsi tsipae. Nexata xanepanaejitsipa bajaraponë itsa apo naexanae tsipae. Tsipaji apo naneconitsi tsipae Diosojavabelia, jai Jesús pijajivijavabelia Judas yabara.

²⁵ Nexata Judas, ponë jane baja canajetsijtsiatsi Jesús pijavajabitsaë pecobeyabelia, jumaiatsi:

—Petuxanenë, ¿xanë tsaja tsane? jai.

Nexata Jesús jumaiatsi:

—Jājā, xamë rabaja tsane, jai.

²⁶ Pexaeyenaejavata Jesús pita panbë. Jesús jumaiatsi Diosojavabelia:

—Pexaniacuenie panetoexaname. Panerajutame pan, jai.

Bajaraxuacujinae Jesús epatsënëquejeba bajarapapanbë. Rajuta pijajivi. Jesús jumaiatsi pijajivijavabelia:

—Paxaema. Mara tavitoje, jai.

²⁷ Bajaraxuacujinae icatsia Jesús copavënëjavata yapita piapaeranexa. Diosojavabelia jumaiatsi:

—Pexaniacuenie panetoexaname. Panerajutame maporaje, jai.

Bajaraxuacujinae pijajivi bajarapora rajuta. Jumaiatsi pijajivijavabelia:

—Papaema padaxitamè maporaje. ²⁸ Tsipaji tajana othopaena jivi ayailbitsaètoxaneto pibisiacuene pexanaeconi pevecuaajibiaexanaenexatsi. Nexata tatèpaejava pejamatabècueneta, jivi yapètaena pepacuene xaniajai Dioso jivi pecapanepaejavanexa, pacuenia baja cajena tajèvelia Dioso najumecapanepaeya jumaitsi. ²⁹ Xaniajanè pacuenia pacatsipaebijitsiatsi. Xanè rabaja mapanacuataje matavèjèa apo apaenè tsane uvacuaira, matapania icatsia pejanauvacuaira pacayajavaapaenatsi taxa pijanacuataatsia, jai Jesús pijajivijavabelia penavajunupaebijavata pebeyaxuabijavanexatsi.

Pacuenia Jesús tajèvelia jumaitsi Pedrojavabelia: “Pedro, xamè raja nayavajunuaxainaename tajajivitonècuenemè,” jai yabara pelivaisi
(Mr 14.26-31; Lc 22.31-34; Jn 13.36-38)

³⁰ Jesús pijajivi barènaaxèana Diosojumevajianè. Bajaraxuacujinae Jesús pijajivi barèpona petsutojumabelia. Patsutojumata olivonaenè apaaxayo, bajarapatsutojumabelia barèpona. ³¹ Nexata bajarapatsutojumata Jesús jumaitsi pijajivijavabelia:

—Daxita raja paxamè ajena, pameravi, panexuabarècèpecaename. Tsipaji rabaja patanexuabarècèpecaejavanexamè yabara, Dioso pejumelivaisibaxutota tajèvelia jumaitsi mapacueniaje: “Beyaxuabianatsi raja oveja pevetsinè. Nexata pijaovejabitsaèto nacayajatsia rēcèpecaena,” jai Dioso pejumelivaisibaxutota paxamè patanexuabarècèpecaejavanexamè yabara. Nexata ajena, pameravi, tajavajabitsaè itsa nevaetabiana tanebeyaxuabinexa, daxita paxamè panexuabarècèpecaename. ³² Itsiata baitsi jane tatèpaecujinae, icatsia asaenè tsane. Nexata paxamè panevajènaeyabelia, copiata ponaenajè Galilea nacuyabelia, jai Jesús pijajivijavabelia.

³³ Nexata Pedro jumaitsi Jesúsjavabelia:

—Daxita mapamonaaje caxuabarècèpecae ata tsane, xanè cajena apo caxuabatabajiravi tsanetsi, jai Pedro.

³⁴ Nexata Jesús jumaitsi Pedrojavabelia:

—Xaniajanè pacuenia catsipaebijitsiatsi. Ajena rabaja, pameravi, naniaanaevèpata, vacara pefiabivajènaeya, nayavajunuaxainaename tajajivitonècuenemè. “Apo yapètaenè cajena bajaraponè,” jamè tsane xanè yabara acueyabi xuabeje, jai Jesús Pedrojavabelia.

³⁵ Itsiata Pedro jumaitsi Jesúsjavabelia:

—Nebeyaxuabijitsia ata tsane xamè yajava, itsiata cajena apo nayavajunuaxainaenè tsane nijajivitonècuenenè, jai Pedro Jesúsjavabelia.

Daxita Jesús pijajivi bajarapacuenia jumaitsi.

Pacuenia Jesús vajèta Diosojavabelia Getsemanivènèjavata yabara pelivaisi
(Mr 14.32-42; Lc 22.39-46)

³⁶ Jesús pijajivi pecunameravita yajavapata Getsemanivènèjavata. Bajarajota Jesús jumaitsi pijajivijavabelia:

—Paneevetenare abaxè majotaje. Abaxè raja imoxoyo majotaliaje vajètsijitsianè Diosojavabelia, jai Jesús pijajivijavabelia.

³⁷ Nexata Jesús barèpona acueyabi ponèbeje pijajivi. Jesús pijajivi barèpona pesaicaeyojavabelia mapamatabèxèyoje. Pedro, Santiago, Juan, bajarapamatabèxèyo. Santiagobeje Juanbeje Zebedeo pexènatobeje. Bajaraxuacujinae Jesús bitso najamatabèxaina. Nexata bejamatabèjiobireca.

³⁸ Nexata Jesús jumaitsi pijajivi acueyabi ponèbejejavabelia:

—Xanè bitso pinijicuenia najamatabèxainajè. Nexata bitso tanajamatabèxainaejava, jamatabèyatèpajè. Paxamè abaxè majotaje panacopabare. Paitavamè tsane. Pètsa abaxè pamajitame, jai Jesús pijajivi acueyabi ponèbejejavabelia.

³⁹ Nexata Jesús caenè pevajènaeyabelia icatsia tsiquirirjavayo ponataba. Nexata Jesús irataeya bocajunua pevajètsinexa Diosojavabelia. Jumaitsi Diosojavabelia:

—Taxa Diosomè, netocopatame picani tanebeyaxuabinexa betajiobicuena. Daxitacuene raja cacaèjèpa nexanaenexa. Nexata necapanepare bajarapabejiobicuenevecua. Itsiata xanè apo tajitsipaecuene ata, pacuenia xamè jitsipame, netocopatsianame, jai Jesús Diosojavabelia pevajètsijavata pebeyaxuabijavanexatsi.

⁴⁰ Bajaraxuacujinae Jesús naviarena acueyabi ponèbeje pijajivijavaberena. Caxitajaraba Jesús pijajivi pemajitanubenaevi. Nexata Jesús jumaitsi Pedrojavabelia:

—¿Apo pacacaèjèpae tsabaja rovia caepatoyo ata paneaitavatsenaenexa? ⁴¹ Pètsa pamajitame. Paitavamè. Pavajère Diosojavabelia papecayavenonaenexa pibisiacuene paneexanaeyaniva. Tsipaji raja dovathi pacajamatabècuenèèjèbiana. Paxamè picani panejamatabècueneta pexaniacuene jamatabèpaexanabiabame. Itsiata baitsi jane apo pajamatabècuenesaèmè pexaniacuene paneexanaenexa, jai Jesús Pedrojavabelia.

⁴² Nexata icatsia Jesús pona pecovèyabelia pevajètsinexa icatsia Diosojavabelia. Vajèta Diosojavabelia mapacueniaje.

—Axa, itsa apo jitsipaemë tanevecuatsatsinexamë betajjobicueneta tatëpaejavanexa, nexata pacuenia jitsipame, netocopatsianame, jai Jesús Diosojavabelia.

⁴³ Bajaraxuacujinae Jesús icatsia naviarena pijajivijavaberena. Caxitajaraba icatsia Jesús pijajivi pemajitanubenaevi. Tsipaji baja Jesús pijajivi bitso itamajitsipana. ⁴⁴ Nexata abaxë bajarapamonae pemajitanubenaevavata, Jesús icatsia pona pecovëyabelia pevajëtsinexa icatsia Diosojavabelia. Nexata icatsia vajëta Diosojavabelia pacuenia vajëta copiaya xuabeje vajëta. ⁴⁵ Bajaraxuacujinae icatsia Jesús naviarena pijajivijavaberena. Jumaitsi Jesús pijajivijavabelia:

—¿Abaxë tsarovia tsiteca pamajitanubename? Copiapata rabaja paepatota xanë, Daxitajivi Pematapijinënë, necanajetsijitsia pibisiacuene pexanaevi pecobeyabelia. ⁴⁶ Panonobapunare baja. Ponaenatsi baja. Imoxoyo rabaja najetaruca tajavajabitsaë pecobeyabelia tanecanajetsinënexa, jai Jesús pijajivijavabelia Judas yabara.

Pacuenia Jesús vaetabatsi pijavajabitsaë yabara pelivaisi

(Mr 14.43-50; Lc 22.47-53; Jn 18.2-11)

⁴⁷ Jesús pijavajabitsaë pevaetabijavatanevatsi, cuacuajiai tsanucæ pijajivijavabelia. Nexata bajarapaepatota patanajetaruca Judas, Jesús pijajivi doce ponëbejeyajuvënëniemi. Judas pënanajetarubenatsi jivi ayailbitsaëtoxaneto. Bajarapamonaeyajuvënëni itsamonæ canajetarubena espadanë. Itsamonæ canajetarubena naebonë yajava. Bajarapamonæ itorobatsi sacerdotevi penamatacaitorobivi, judïovi pijaancianovinua. ⁴⁸ Judas pebarënavajënae bajarapamonæ, copiaya baja cajena Judas tsipaeba pacuenia bajarapamonæ yapëtaejitsia Jesúsucue. Judas jumaitsi mapacueniaje:

—Ponë raja peneta bajacobiyaja itabaratsutsunexuabianajë, bajaraponë Jesús tsane. Bajaraponë pavaetabianame. Pacobecëtsiana xaniavaetsia, jai baja cajena Judas pematacanajetarucaevijavabelia pebarënavajënae.

⁴⁹ Nexata jane baja Judas itsa patanajetaruca, exana pacuenia jumaitsi pematacanajetarucaevijavabelia. Judas Jesús itabaratsutsuniya bajacobatsi Judas jane baja pematacanajetarucaevi peyapëtaenexa Jesúsucue. ⁵⁰ Jesús nexata jumaitsi Judasjavabelia:

—Judas, ¿detsa xua yabara patame? jai.

Nexata jane baja Jesús petsimaxëponaevitsi, cujibarëcëpaliatsi. Vaetabatsi. Cobecëtatsi xaniavaetsia pecaponaenexatsi.

⁵¹ Bajarajota Jesús pijajiviyajuvënëni pijaespada navemarajonotaxuabina. Muxuyoropaebiaxuaba sacerdotevi pepo penamatacaitorobinë pijajivitonë. ⁵² Nexata Jesús jumaitsi pijajivitonëjavabelia:

—Nijaespada baja xataremeca pevënojojavareca. Tsipaji pamonaë namaxëvanita espada, daxita bajarapamonæ juya espadata babiatsi, jai Jesús.

⁵³ Icatsia Jesús jumaitsi:

—Itsa vajëtsipajë taxa Diosojavabelia taneyavenonaevinexa tanetoorobinexatsica, nexata tavajëtsiepatota netoorobijitsipaica bitso ayailbitsaëtoxanetonë ångelevi. ⁵⁴ Itsa vajëtsipajë taxa Diosojavabelia tanetoorobinexatsica taneyavenonaevinexa, nexata baja apo netocopiapatsi tsipae pacuenia Dioso pejumelivaisibaxutota tajëvelia nevajunupaeba pacuenia nevaetabijitsia tanebeyaxuabinexa, jai Jesús pijajivitonëjavabelia.

⁵⁵ Nexata Jesús bajarajota jumaitsi petsimaxëponaevitsijavabelia:

—Paxamë meta panetaneme betanacobetoxotsinë. Bajaraxuata pacaponame espadanë, naebonë yajava, patanevaetabinevamë pacuenia pavaetabijabame penacobetoxotsinë. Xanë caematacabi canacujitsia Dioso pejumelivaisi paxamëjavabelia pacatsipaebababatsi templobota. Itsiata bajarapamatacabi apo panevaetabimë. ⁵⁶ Mara pacuenia panevaetabameje tanetocopiapatsixæ baja pacuenia Dioso pejumelivaisibaxutota bajayata tajëvelia nevajunupaeba, jai Jesús pevaetabivitsijavabelia.

Nexata jane baja Jesús pijavajabitsaë pevaetabijavatatsi, daxita Jesús pijajivi xubarëcëpecatsi pacuenia baja cajena Jesús tajëvelia jumaitsi pijajivijavabelia.

Pacuenia Jesús nutatsi judïovi penamatacaitorobivi pitabarata yabara pelivaisi

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Jesús pevaetabivitsi caponaliatsi Caifás pijaboyabelia. Bajaraponë Caifás sacerdotevi pepo penamatacaitorobinë. Nexata Caifás pijabota nacaetuana judïovi pecujarubivi, judïovi pijaancianovi yajava. ⁵⁸ Itsa baja Jesús caponaliatsi, nexata Pedro bajarapamonæ pecovëya tajiyo najetaruca. Sacerdotevi pepo penamatacaitorobinë pijabo matatoyorotsia yacaranata ibopanaxanetonë mataropotsia pefaratsijavaxanetota. Nexata bajarapayacaranatsijavaxaneto baupa, Pedro najoneya bopanabojavabelia, itsabelia Jesús cajunuatsi. Nexata sacerdotevi pepo penamatacaitorobinë pijabopanabota, Pedro naeca templobopijipolicíavita. Bajarajota Pedro naeca petanexa pacuenia Jesús pijavajabitsaë exanatsi.

⁵⁹ Nexata bajarapabo ënëtuatuajëta sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, nabarëcuaicuajiai. Bajarapamonae nayanijoba.

—¿Jipatsa yapëtane Jesús pibisiacuene pexanaejava, paneconi yabara beyaxuabijitsiatsi? najai tsaponae.

Itsiata bajarapamonae apo caxitajarabi itsaneconi ata, Jesús pijaneconi. Najumetsënëtsiaya picani peneconitsilivaisinexa, jaita penajumetsënëtsilivaisita picani Jesús pebeyaxuabinexatsi. ⁶⁰ Ayaibitsaëto pata penajumetsënëtsilivaisi pepaebinexa Jesús yabara. Itsiata caelivaisi ata najumejëpaeya apo paebi bajarapamonae. Nexata bajarapamonae apo caxitajarabi paneconi yabara Jesús naneconitsiaexanaejitsiatsi pebeyaxuabiaexanaenexatsi. Bajaraxuacujinae belia anijanëbeje caelivaisi najumejëpaeya neconitatsibeje.

⁶¹ Jumaitsibeje bajaraponëbeje Jesús yabara:

—Maponë jumaitsije: “Xanë necaëjëpa taxuabinexatsica Dioso pijatemplobo. Necaëjëpanua acueyabi matabacaba icatsia taveretetsinexa itsabo,” jai maponëje, jaiibeje bajaraponëbeje Jesús yabara.

⁶² Nexata jane baja sacerdotevi pepo penamatacaitorobinë nonotapuna bajarapamonae pitabarata. Nexata jumaitsi Jesúsjavabelia:

—¿Apo yapëtaemë tsaja itsalivaisiyo ata nejumecanaviatsinexa? ¿Xaniajai tsabaja pacuena maponëbeje caneconitsiajumaitsibeje? jai sacerdotevi pepo penamatacaitorobinë.

⁶³ Jesús itsiata moyá. Nexata bajaraponë icatsia jumaitsi Jesúsjavabelia:

—Caitorobatsi caecuenia tanenavajunupaebinxamë nexaniajaijumeta. Itsajume, Diosojavabelia naneconitsianame. Panenavajunupaebare xaniavetsia itsa xamë Cristomë, athëbëvetsica Dioso pecaitorobinëtsica jivi necapanepaenexa. ¿Xamë tsaja Dioso pexënatomë? jai.

⁶⁴ Nexata Jesús jumaitsi:

—Jãã, xanë rabaja pacuena nejumaitsimë. Nexata icatsia pacajumaitsitsi. Paxamë raja panetaename xanë, Daxitajivi Pematapijinënë, taecaejava Dioso pecujuanenia, daxitajamatabëcuene pecaëjëpaenëtsi. Panetaenamenua tanajetarucajava athëbëvetsica itarëbëbota, jai Jesús.

⁶⁵ Bajarapacuenia Jesús pejumaitsijava itsa jumetane, sacerdotevi pepo penamatacaitorobinë penaxatatsijava anaeya titinaxuaba. Bajarapacuenia titinaxuaba pianaepanaexae Jesús pejumaitsijava yabara. Nexata sacerdotevi pepo penamatacaitorobinë jumaitsi daxita penacaetuatsivijavabelia:

—Mara ponë Dioso apo pejitsipaecuenia cuaicuaijaije. Dioso bepexë nato nataeya cuaicuaijai. Pijacuata rabaja naneconita bajarapacuenia pecuacuajiaixae. Pematatsënëa baja apo namatavenonaetsi itsamonae vajanacatsipaebinexa paneconi yabara maponëje naneconitsiaexanaejitsiatsi. Paxamë rabaja pajumetaneme maponëje Dioso apo pejitsipaecuenia pecuacuajiaijava. ⁶⁶ ¿Detsa nexata paxamë pajamatabëitsimë? jai sacerdotevi pepo penamatacaitorobinë daxita penacaetuatsivijavabelia.

Nexata daxita penacaetuatsivi jumaitsi:

—Naneconita rabaja Diosojavabelia. Nexata baja beyaxuabianatsi, jai bajarapamonae Jesús yabara.

⁶⁷ Nexata bajarapamonae Jesús itabarasuabatsi. Bajaraxuacujinae papaëbërëpanata itaxutocëtatsi. Pitaxutocëtscijunaetsi itabaratsaquibabeponatsi pecobethaitonëta. Itsamonae itabarapacabixuababiabatsi. ⁶⁸ Nexata bajarapamonae jumai tsaponae Jesúsjavabelia:

—¿Xamë raja itsa Cristomë, athëbëvetsica Dioso itsa pecaitorobinëtsica jivi necapanepaenexa, nexata vënëjonare ponë caitabarapacabixuaba! jai tsaponae bajarapamonae.

Pacuenia Pedro nayavajunuaxaina Jesús pijajivitonëcuene yabara pelivaisi

(Mr 14.66-72; Lc 22.56-62; Jn 18.15-18, 25-27)

⁶⁹ Itsa abaxë Jesús sacerdotevi pepo penamatacaitorobinë pijabo ënëtuatuajëalia yanijobaponatsi xua yabara naneconitsiaexanaejitsiatsi, Pedro naitaxutocaevetsiaya naeca bopanabota. Nexata bajarapabota penacuenebiva Pedro kujirenatsi. Bajarapova jumaitsi Pedrojavabelia:

—Xamë ata rabaja naponapona Jesúsata, Galilea nacuapijinëta, jai.

⁷⁰ Nexata Pedro itsiata nayavajunuaxaina Jesús pijajivitonëcuene. Daxita bajarajota penubenaevi pitabarata Pedro jumaitsi:

—Xanë cajena apo yapëtaenë pacuene yabara nejumaitsimë, jai.

⁷¹ Sacerdotevi pepo penamatacaitorobinë pijabo matatoyorotsia yacaranata ibopanaxanetonë mataropotsia pefaratsijavaxanetota. Nexata bajarapayacaranatsijavaxaneto

baupajavabelia Pedro natixilia. Nuca bajarapabaupa muxuneneta. Bajarajota icatsia itsava, bajarapabota penacuenebiva, Pedro taenutatsi. Nexata bajarapova ata Pedro yabara icatsia jumaitsi bajarajota penubenaevijavabelia:

—Mara ponë ata naponapona Jesústaje, Nazaret tomarapijinëta, jai bajarapova.

⁷² Nexata icatsia Pedro nayavajunuaxaina Jesús pijajivitonëcuene. Pedro jumaitsi:

—Xaniajanë. Dioso pitabarata cajumaitsitsi. Apo yapëtaenë cajena bajaraponë, jai.

⁷³ Bajaraxuacujinae icatsia, caeapatoyocujinae, bajarajota penubenaevi cujibarëcëpaliatsi Pedro. Jumaitsi bajarapamona:

—Xaniajai raeta baja cajena. Xamë Jesús pijajiviyajuvënënenëmë. Tsipaji rabaja Galilea nacuapijivi penatsipaebicuenia natsipaebame, jai bajarapamona Pedrojavabelia.

⁷⁴ Nexata Pedro jumaitsi:

—Itsa apo xaniajanë tsipae paxamëjavabelia, nexata Diosojavabelia naneconitsipajë. Apo yapëtaenë cajena bajaraponë, jai Pedro.

Itsa baja Pedro najumevereta bajarapacuenia pejumaisijava, vacara fiaba. ⁷⁵ Nexata bajarajota Pedro najamatabënapitajaraba Pedrojavabelia Jesús pejumaisijava mapacueni-aje: “Ajena rabaja, pameravi, vacara pefiabivajënaeya, nayavajunuaxainaname tajajivitonëcuenemë. ‘Xanë cajena apo yapëtaenë bajaraponë,’ jamë tsane xanë yabara acueyabi xuabeje,” pejaijiva Jesús Pedrojavabelia, Pedro najamatabënapitajaraba. Nexata baja Pedro pitsapalia bo matatoyorotsia peyacaranatsijava pënëyabelia. Pinijicuenia Pedro nua.

27

Pacuenia Jesús caponaliatsi Pilatojavabelia yabara pelivaisi

(Mr 15.1; Lc 23.1-2; Jn 18.28-32)

¹ Ajena baja matacabi tsarucapona, sacerdotevi penamatacaitorobivi, judíovi pijaancianovi yajava, najamatabëjëpa pacuenia exanaeijtsia Jesús pebeyaxuabiaexanaenexatsi.

² Nexata Jesús cobecëtsiaya caponaliatsi nacuaejetsinë Poncio Pilatojavabelia.

Pacuenia Judas nabeyaxuaba yabara pelivaisi

³ Judas canajetaxuabatsi Jesús pijavajabitsaë pecobeyabelia. Bajaraponë itsa tane Jesús penaneconitsijava pebeyaxuabinexatsi, nexata bitso najamatabëxaina. Nexata pona petocanaviatsinexa perajutsipalatamitsi, treinta ponëbeje pepo palatanëanë, bitso penamatamotsinëanë. Tocanaviatsijitsia sacerdotevi penamatacaitorobivijavabelia, judíovi pijaanciaotxivavabelia ata. ⁴ Judas jumaitsi bajarapamonaevijavabelia:

—Pibisiacuene baja rovia exanajë. Bajaraponë itsacuenejavayo ata apo exanaenejeva, panecobeyabelia baja canajetaxuabajë, jai Judas.

Nexata bajarapamona jumaitsi Judasjavabelia:

—¡Paxanë raja patajamatabëcueneta apo naneconitsimë tsane! ¡Xamë raja nijacuata naneconitame! jai bajarapamona Judasjavabelia.

⁵ Nexata Judas templobota othotajarabeta perajutsipalatanëanëmitsi. Bajaraxuacujinae pitsapalia. Pona baja. Nexata pijacuata nabeyaxuaba. Pepuanavësicëtsi athëbëvetsica perucaemaëtoxanetota, athëbëvetsica jirevica irabetsica penacuibosi catarëretajarabaxuabinexa. Bajarapacuenia pijacuata Judas nabeyaxuaba.

⁶ Nexata sacerdotevi penamatacaitorobivi caetuata Judas piothotajarabetsipalatanëanë. Najumaitsi bajarapamona:

—Acuenebi mapapalataje vajabuatsinexa ofrenda vajajebabiabicajónita. Tsipaji bajarapapalata pejamatabëcueneta jivitonë beyaxuabijitsiatsi, najai bajarapamona.

⁷ Nexata bajarapamona najamatabëjëpa bajarapapalatanëanëta pecomuatsinexa ira. Nexata bajarapamona bajarapalatanëanëta comuata canalitönë pefaratabiabinë pijairami. Bajarapamona comuata bajarapaira, itsanacuaverena pepatsivi itsa tëpa Jerusalén tomarata, bajarapairata pemëthëtabiabinexa. ⁸ Bajaraxuata mapamatacabijavaberena ataje vënërubaba bajarapaira mapejumaisivënëje: “Papalata pejamatabëcueneta jivitonë beyaxuabatsi, bajarapapalata pecomuatsiira,” pejaiivënë vënërubaba. ⁹ Bajarapacuenia itsa comuata bajarapaira, copiapata jane baja pacuenia Diosojumepaebinëmi profeta Jeremiaspijinë bajayata tajëvelia vajunupaeba bajarapapalata. Profeta Jeremiaspijinë baja cajena bajarapapalata yabara tajëvelia jumaitsi mapacueni-aje: “Israelnacia pevetsivi rajutsiana jivitonë pecanajetsinëjavabelia treinta ponëbeje, pepo platanitota pexanaenëanë. Bajarapalatanëanë icatsia bajarapamona pitsiana. ¹⁰ Nexata bajarapalatanëanëta bajarapamona comuatsiana canalitönë pefaratabiabinë pijairami, pacuenia Dioso tajëvelia nejumaisi,” jai bajayata profeta Jeremiaspijinë tajëvelia pevajunupaebijavata Jesús pematamopitsipalatanexatsi.

Pacuenia Jesús nutatsi Pilato pitabarata yabara pelivaisi

(Mr 15.2-5; Lc 23.3-5; Jn 18.33-38)

¹¹ Jesús nutatsi nacuaevevtsinē Pilato pitabarata. Nexata Pilato jumaitsi Jesúsjavabelia:

—¿Xamē tsaja judíovi pepo nevetsinē? jai Pilato.

Nexata Jesús jumaitsi Pilatojavabelia:

—Jājā, xanē rabaja pacuenia nejumaitsimē, jai Jesús Pilatojavabelia.

¹² Sacerdotevi penamatacaitorobivi, judíovi pijaancianovi yajava, Jesús neconitaponae atatsi, apo jumepitsi. ¹³ Nexata Pilato jumaitsi Jesúsjavabelia:

—¿Apo jumetaemē tsaja pacuenia mapamonaē caneconitaponaje? jai.

¹⁴ Jesús neconitsi atatsi, itsiata apo jumepitsi. Bajaraxuata Pilato jamatabēcuenenabenajaca. Apo yapētae pacuenia Pilato exanaejitsia Jesúsjavabelia.

*Pacuenia baja Pilato tocopata Jesús pebeyaxuabinexatsi yabara pelivaisi
(Mr 15.6-20; Lc 23.13-25; Jn 18.38-19.16)*

¹⁵ Nacuaevevtsinē Pilato xaina pijacujirucuenē. Caevai canacujitsia, pascua fiestamatacabi, Pilato copatabiaba caenē penaneconitsinē pepitsapaenexa penaneconitsivi pejebabiabibovecua. Pajivi yabara jivi vajētabiaba Pilatojavabelia, bajarapajivi Pilato copatabiaba pascua fiestamatacabi. Bajarapacuenia Pilato caenē copatabiaba jivi pesivajamatabēcuenē xanepanaenexatsi. ¹⁶ Pamatacabi Jesús naneconitsiaexanatsi, bajarapamatacabi penaneconitsivi pejebabiabibota naneconitsiaponapona jivibenē, Barrabásvēnēnē. Bajaraponē bitso piacujirubejenēcuenē yapētanetsi daxitajivi. ¹⁷ Nexata daxita Jerusalén tomarapijivi penacaetuatsijavata Pilato jumaitsi:

—¿Detsa ponē pajitsipame patacatocapitsapaenexa penaneconitsivi pejebabiabibovecua pepitsapaenexa? ¿Barrabás tsaja? Itsa jume, ¿Jesús tsaja, ponē yabara jivi jumaitsi: “Cristo raja athēbēvetsica Dioso pitorobinētsisica jivi pecapanepaenexa,” jaitsi? jai Pilato bajarapamonaējavabelia.

¹⁸ Pilato jamatabējumaitsi:

—Xua Jesús exanapona, sacerdotevi penamatacaitorobivi cueneitoyatsi. Bajaraxuata netocaparena, jamatabējai.

¹⁹ Pilato abaxē eca itsajota ecabiaba penaneconitsivi penaneconitsiaexanaenexa. Nexata Pilato pijava tonajumeitorobarenatsi. Pilato pijava Jesús yabara jumaitisirena mapacueniaje: “Copare bajaraponē, ponē itsacueneneconiyo ata apo penaneconitsinē. Ajena raja, meravi, amajitsinaebejenē bajaraponē yabara,” jaitsirena Pilato pijava. Nexata picani Pilato jamatabēcopata Jesús.

²⁰ Itsiata baitsi jane bajarapaepatota sacerdotevi penamatacaitorobivi, judíovi pijaancianovi yajava, jivijavabelia muxubijiapenetsia jumai tsaponae:

—Pavajētsianame Barrabás pecapitsapaenexatsi. Pavajētsianame Jesús pebeyaxuabinexatsi, jai tsaponae bajarapamonaē.

²¹ Nexata nacuaevevtsinē Pilato icatsia yanijoba jivijavabelia:

—¿Detsa ponē nexata pajitsipame patacatocapitsapaenexa? jai Pilato.

Nexata bajarapamonaē jumaitsi:

—Panetocapitsapare Barrabás, jai.

²² Pilato nexata jumaitsi bajarapamonaējavabelia:

—¿Detsa nexata xua exanaenajē Jesúsjavabelia, ponē yabara: “Cristo, ponē Dioso athēbēvetsica itorobatsi jivi pecapanepaenexa,” jaitsi? jai Pilato bajarapamonaējavabelia.

Nexata daxita bajarapamonaē jumaitsi Pilatojavabelia:

—¡Cruzajavabelia cobematabiabarutsiaexanare! jai bajarapamonaē.

²³ Nexata Pilato jumaitsi bajarapamonaējavabelia:

—¿Detsa pitsineconi yabara cobematabiabarutsiaexanaejitsipajē cruzajavabelia? jai Pilato Jesús yabara.

Itsiata bajarapamonaē icatsia pinijjumeta vavajai.

—¡Cruzajavabelia cobematabiabarutsiaexanare! jai tsaponae.

²⁴ Pilato tane piauemesaējava bajarapamonaē. Muxujiobi ata, apo jumecovēnētsitsi. Bitsoyo biji caranata bajarapamonaē jamatabēnanaeacjematapona bajarapatomarata. Nexata Pilato penacobequiatsinexa, pijajivi itoroba petocarenanexatsi mera. Pilato nacobequiata daxitajivi pitabarata bajarapamonaē peyapētaenexa Jesús apo penaneconitsiaexanaecuenē. Pilato jumaitsi bajarapamonaējavabelia:

—Xanē raja tajamatabēcueneta apo beyaxuabiaexanaenē tsane maponēje, pianeconijibinē. Paxamē panejamatabēcueneta pabeyaxuabiaexanaename, jai Pilato.

²⁵ Nexata daxita bajarapamonaē jumaitsi:

—¡Itsa bajaraponē pianeconijibinē Diosojavabelia, nexata bajaraponē patabeyaxuabineconi jema panetsijumajopaena, pataxi yajava! jai bajarapamonaē Pilatojavabelia.

²⁶ Nexata baja Pilato tocopata Barrabás pepitsapaenexa penaneconitsivi pejebabiabibovecua. Itorobanua vajabitsaēvi ayaiucuenia Jesús pejumatiitibabenexatsi penaneconitsivi pejumaconitabiabimacata. Bajaraxuacujinae Pilato tocopata baja Jesús vajabitsaēvi pecobematabiabarutsinexatsi cruzajavabelia.

²⁷ Nexata baja Pilato pijajivi, vajabitsaēvi, Jesús caponaliatsi nacuaevetsinē Pilato pijaboxanetojavabelia. Nexata bajarajota Jesús matatorotsia nacuaetatsi daxita vajabitsaēvi. ²⁸ Jesús penaxatatsijava vajabitsaēvi vejumajonotatsi saicayajava pexatatsinexatsi. Nexata jane baja vajabitsaēvi Jesús quenetsiataeya xatatatsi petsobiajava benacuaevetsinēcuenia petaenexatsi. ²⁹ Becoronacuenia pemataxatatsinexatsi, pejuvitoyoroto tsimataexanatsi. Bajarapatoyoroto Jesús mataxatatsi. Tsciberutatsinua naebo pecujanenia benacuaevetsinēcuenia petaenexatsi. Nexata bepeyaiyatacueniatsi bajarapamonae pematabacabēta tonubenatsi Jesús pitabarata. Quenetsiataeya jumai tsaponaeitsi:

—¡Bajaco, judíovi pepo pevetsinē! jai tsaponaeitsi bajarapamonae.

³⁰ Suabaponatsi. Vecuapitatsi naebo. Bajarapanaebota mataconitarababiabatsi. ³¹ Bajarapacuenia quenetsiataeya pecapocaponaecujinaetsi, vejumajonotatsi baja pexatatsijavatsi. Jesús baja icatsia xatatatsi penaxatatsijava. Caponaliatsi jane baja pecobematabiabarutsinexatsi cruzajavabelia.

*Pacuenia jane baja Jesús cruzajavabelia cobematabiabarutatsi yabara pelivaisi
(Mr 15.21-32; Lc 23.26-43; Jn 19.17-27)*

³² Vajabitsaēvi Jesús itsa caponaliatsi tomaravecua, namutota caxitajaraba Simónvënēnē, Cirene tomarapijinē. Nexata vajabitsaēvi Simón itorobatsi, pacruzajavabelia Jesús cobematabiabarutsijitsiatsi, peyavenonaeyacaponaeenexa.

³³ Jesús caponaliatsi Gólgotavënē tsutojavabelia, bajarapatsutojumata pecobematabiabarutsinexatsi cruzajavabelia. “Gólgota,” itsa jai hebreojumeta, mapajumetaje pejumaitsume: “Jivimatasiptsuto,” pejaijume. ³⁴ Bajarajota picani Jesús rajutatsi vinora, pematajērēabira piatsaxarata. Jesús picani rajutatsi bitso penavixaeatayaniva pecobematabiabarutsijavatatsi cruzajavabelia. Jesús pajane bajarapora. Itsiata apo apae.

³⁵ Nexata jane baja Jesús vajabitsaēvi cobematabiabarutatsi cruzajavabelia. Bajaraxuacujinae vajabitsaēvi bajarajota canamuxusita beibotoxi. Bajarapacuenia canamuxusita peypātaenexa ponē pitaponaejitsia caejava canacujitsia Jesús penaxatatsijavami, xua jumaponapona. Bajarapacuenia vajabitsaēvi natsicobetsana Jesús penaxatatsijavami. Bajarapacuenia vajabitsaē itsa natsicobetsana Jesús penaxatatsijavami, tocopiapatsi jane baja pacuenia Diosojumepaebinēmi profetanē bajayata tajēvelia vajunupaeba Jesús penaxatatsijava. Jesús penaxatatsijava yabara, profetanēmi bajayata tajēvelia jumaitsi mapacueniaje: “Natsicobetsanaena penaxatatsijava. Canamuxusitsiana beibotoxi peypātaenexa ponē pitaponaejitsia,” jai profetanēmi. ³⁶ Bajaraxuacujinae vajabitsaēvi bajarajota evetena penaitaxutocaevetsinexatsi Jesús. ³⁷ Bajarajota Jesús pematabocoto matsēnēyo cruzajavata, yaquinaruta tablapayota itsamonae ata peypātaenexa pajamatabēcuene yabara naneconitsiaexanatsi Jesús. Jumai tsarutsi peyaquinaeitane cruzajavata mapacueniaje: “Mara ponē Jesúsje, judíovi pepo pevetsinē,” jai tsarutsi Jesús yabara.

³⁸ Anijanēbeje penacobetoxotsinēbeje Jesús yajavacobematabiabarutatsi. Caenē canacujitsia pijacruzata rubatsi. Bajarapanebeje Jesús pemuxuneneta rutatsibeje. Itsanē Jesús pecujanenia rutatsi. Itsanē Jesús petsavenonenia rutatsi. ³⁹ Jesús pecobematabiabarutsijavatatsi cruzajavabelia, bajaraxuayo penajetarubenaevi Jesús itaropitsiayi bijataeyabiabatsi. ⁴⁰ Jumai tsabiabi bajarapamonae:

—Xamē raja imata jumaitsume: “Xuabianicajē templobo. Acueyabi matabacaba icatsia veretetsianajē itsabo,” jamē. Nacapanepare jane baja nijacuata. Itsa xaniajai Dioso pexēnatomē, nexata cruzajavavetsica runaimica, jai tsabiabi Jesúsjavabelia bajaraxuayo penajetarubenaevi.

⁴¹ Bajara pijinia pacuenia sacerdotevi penamatacaitorobivi capocaponatsi Jesús. Judíovi pecujarubivi ata capocaponatsi. Fariseovi ata capocaponatsi. Judíovi pijaancianovi ata capocaponatsi Jesús. Ēpamonae najumaitsi:

⁴² —Maponēje itsamonae yabara jumai tsabiabi: “Capanepaenajē jivi,” jai tsabiabi. Caranata pijacuata penacapanepaenexa apo caējēpaetsi. Itsa xaniajai Israel nacuapijivi pepo pevetsinē, nexata aeconoxae cruzajavavetsica runaenica vajataenexa. Nexata jane baja jumecovēnētsianatsi Cristonēcuene. ⁴³ Bajarapone pina najamatabēcuene copata Diosojavabelia peyavenonaenexatsi. “Xanē raja Dioso pexēnatonē,” jai tsabiabinua. Nexata taenatsi aeconoxae Dioso pecapanepaejavatsi, najai bajarapamonae capocaponaeya Jesús yabara.

⁴⁴ Ponêbeje penacobetoxotsinêbeje Jesús yajavacobematabiabarutatsi, bajaraponêbeje ata Jesús bijataerucatsibeje bajarapacuenia.

Pacuenia baja Jesús tēpa yabara pelivaisi
(Mr 15.33-41; Lc 23.44-49; Jn 19.28-30)

⁴⁵ Jesús baja itsa tēpaejitsia, ajena matonejejitsia, daxita nacuanêjava aitaquiri tsajuni. Matapania caniviyojavabelia, bejamatabêcuene a las tres, nacua napebeta icatsia.
⁴⁶ Nexata paepatota icatsia nacua napebeta, bajarapaepatota pinijicuenia Jesús aėjai. Jumaitsi:

—Eli, Eli, ¿lama sabactani? jai Jesús.

Bajarapacuenia Jesús itsa jumaitsi pijajumeta, mapajumetaje pejumaitsijume: “Taja-Dioso, tajaDioso, ¿detsa xuajitsia baja tajaepato necopatame?” peajijume.

⁴⁷ Nexata itsamonaë bajarajota penubenaevi bijiaya jumetane bajarapacuenia Jesús pejumaitsijava. Nexata saya jamatabêcuenenavêxaniabiaya jumaitsi bajarapamonaë:

—Mara ponê junata profeta Elíaspijinêmi, Diosojumepaebinêmi, jai bajarapamonaë.

⁴⁸ Nexata bajarapamonaeyajuvênênê bepimia kujinaelia pecarenanexa esponjavênêjava. Nexata esponjavênêjava jabutaba piajatuvinorayalia. Bajaraxucujinae esponjavênêjava naeboupita cêtaruta. Toyotsiatsi Jesús petsutsuninexa picani bajaraxua. ⁴⁹ Itsiata itsamonaë jumaitsi:

—Copare abaxê. Taenatsi Elíaspijinê itsa najetaruca pecapanepaenexatsi, jai bajarapamonaë capocaponaeya.

⁵⁰ Icatsia Jesús pinijicuenia aėjai. Bajaraxucujinae jane baja Jesús tēpanajereca.
⁵¹ Paepatota Jesús tēpanajereca, bajarapaepatota templo bo ênêtuatuajêalia peyatuucutarut-sipana, ayai papaêbêrêpanaxaneto, titititica tuatuajêareca, athêbêvetsicacujinae irabereca. Ira najêaba. Ibotoxanetonê ata sarapajununia. ⁵²⁻⁵³ Ayaibitsaêto Dioso pepua pejumecovênêtsivi petêpaevimi pemêthêanê ata napananubena. Nexata Jesús acueyabi matakabita icatsia itsa asaê petêpaecujinae, pamonaë pemêthêanê napananubena, bajarapamonaë ata cotocaevi asaê. Nexata pitsapa mêthêvetsina. Nexata bajarapamonaë pona Jerusalên tomarabelia. Bajarajotalia naitajêbapona jivi ayai bitsaêtojavabelia.

⁵⁴ Jesús cruzata petêpaejavata vajabitsaêvi pijacapitán, pijajivi yajava, nuca. Taenubena Jesús petêpaejava. Jesús petêpaejavata ira najêaba. Nexata bajarapamonaë itsa tane ira penajêabijava, itsajavanê ata itsa taepona, bajarapamonaë bitso junava. Jumaitsi:

—Matsaena ponê tēpaje, pepacueni baja rovia Dioso pexênato, jai bajarapamonaë.

⁵⁵ Bajarajota petiriavibitsaêtoxaneto tajiyoverena taenubena Jesús petêpaejava. Bajarapa-petiriavi Jesús pepêta napona Galilea nacuverena, Jesús peyavenonaevimitsi. ⁵⁶ Bajara papetiriavibitsaêtoxaneto tuatuajêta nanubena mapamatabêxêyoje. Itsava Mariavênêva, Magdala tomarapijiva. Itsava icatsia Mariavênêva. Bajarapova Santiagobeje Josêbeje pena. Itsava pijinia Salomêvênêva. Bajarapova pijinia Santiagobeje Juanbeje pena. Bajarapova Salomêvênêva, Zebedeo pijava.

Pacuenia Jesús petêpaenê mêthêtatsi yabara pelivaisi
(Mr 15.42-47; Lc 23.50-56; Jn 19.38-42)

⁵⁷ Itsa baja caniviyotsia, José, Arimatea tomarapijinê, pona nacuae vetsinê Pilotojavabelia. Bajaraponê José bitso pexainaenê pexainaëjava. José jumecovênêtaponapona Jesús Cristocuene. ⁵⁸ Nexata José itsa pata nacuae vetsinê Pilotojavabelia, vajêta petocopatsinexatsi pemêthêtsinexa Jesús petêpaenê. Nexata Pilato itoroba pijajivi petocopatsinexatsi. ⁵⁹ Nexata José cruzajavavetsica pitsica Jesús petêpaenê. Mataquionaë daxitanêreca matakacêba pexaniaviria piapiasábanapanata, piaxuirajibipanata. ⁶⁰ Bajarapona José, pamatakabi tēpa pemêthêtsinexatsi picani, iboitapajanitojavata pinijiiibovaju toexanabauatatsi cajena. Nexata bajarapaibovajulia José buata Jesús petêpaenê. Nexata bajaraxucujinae pinijiiibopanaxaneto José tixirena. Yavajuvêpaacatabuata. Nexata baja José naviata pijaboyabelia. ⁶¹ Bajarajota ibovaju itapjavata eecabeje najjavabeje êMariavênêvabeje. Itsava María, Magdala tomarapijiva.

Pacuenia vajabitsaêvi Jesús pemêthê evetavanapa yabara pelivaisi

⁶² Pascuafiesta pejonematakabinexa pevajênaeya pamatakabi, judíovi baja banacuenevereta penacuenebijava. Nexata baja pamatakabi judíovi banacuenevereta penacuenebi-
java, bitso baja itsa caniviyotsia, sacerdotevi penamatacaitorobivi, fariseovi ata, ponalia Pilotojavabelia. ⁶³ Nexata bajarapamonaë jumaitsi Pilotojavabelia Jesús yabara:

—Pamatakabi abaxê bajaraponê asaê tsaponaponaë bitso najumetsênêtabiaba. Jumai tsabiabi: “Tatêpaecujinae, acueyabi matakabita, icatsia asaênê tsane,” jai tsabiabi. Bajarape-
jumaitsijava paxanê apo panacofênêtsinê. ⁶⁴ Nexata nijajivi itorobare bajaraponê pemêthê xaniavaetsia pevetsinexa. Nexata nijajivi bajaraponê pemêthê xaniavaetsia evetsiana

acueyabi matababijavabelia, bajaraponë pecapabimatababijavabelia. Nexata acuenebi tsane pijajivi meravi pejutsinexatsi mëthëvecua. “Namatacota rabaja Jesús,” pejajijava ata jivijavabelia, acuenebi tsane. Itsa bajarapacuenia pijajivi jumai tsipae, nexata najumetsënëtsipa copiaya Jesús penajumetsënëtsijava matatoxenetsia. Nexata bajarapacuenia yamaxëitorobijitsipa jivi ayaibitsaëtoxaneto, jai bajarapamonae Pilatojavabelia.

⁶⁵ Pilato nexata jumaitis bajarapamonaejavabelia:

–Mapamonae tajajivi, vajabitsaëvije, payajavaponare. Nexata paitorobare bajarapamonae Jesús pemëthë pevetsinexa xaniavaetsia, jai.

⁶⁶ Nexata bajarapamonae vajabitsaevi barëponalia Jesús pemëthëjavabelia. Bajarapamonae pemaëtoupi catsataruta Jesús pebuatsiibovajutsi pevëpaacatsiibopanajumata. Itsaupi pijinia catsata ihoitapajanitovabelia. Bajarapacuenia exana peyapëtaenexa petixitsijava muetsia Jesús peyavajuvëpa acatabuatsiibopanatsi. Bajaraxuacujinae itoroba vajabitsaëvi Jesús pemëthëvëpa pevëtanapaenexa.

28

Pacuenia Jesús petëpaacujinae icatsia asaë yabara pelivaisi
(Mr 16.1-8; Lc 24.1-12; Jn 20.1-10)

¹ Judïovi baja penacueraevetsimatababi ita verevereca, meravia pitsijavata, bajayacunua, ajena matababi tsarucaponae, Maria, Magdala tomarapijiva, itsaMaria yajava, taeyojopaliabeje Jesús pebuatsiibovajutsijavabelia. ² Jemata ira najëaba. Tsipaji Dioso pijaangel runaica athëbëvetsica. Angel ita pata Jesús pebuatsiibovajutsijavata, tixita Jesús peyavajuvëpa acatsiibopanaxanetomi. Bajaraxuacujinae ángel eca bajarapaibopanajumata. ³ Bajaraponë ángel naitayota. Pacuenia yamaxëcotia itsi, bajara cotiaitsi ángel. Penaxatatsijava niojai daxita peniojajava matatoxenetsia. ⁴ Vajabitsaë, pamonae eventanubena Jesús pebuatsiibovajutsivëpa, ita tane ángel, neconecojai pecajunavi. Bobenajunua bepetëpaevi. ⁵ Nexata ángel jumaitis petirivabejejavabelia:

–Pëtsa pajunavamebeje. Yapëtaniji xua yabara paponamebeje. Jesús pecobematabiabarutsinëmitsi cruzajavabelia, pajaitamebeje. ⁶ Ajibi raja tsarucea majotaje. Asaë rabaja icatsia pacuenia baja cajena tajëvelia jumaitis. Parenamërebeje panetaenexabeje itsajota picani buatatsi. ⁷ Bajaraxuacujinae paliamëbeje tsane bepíjia. Pijajivijavabelia patsipaebianamebeje mapacueniaje: “Petëpaenëmi rabaja icatsia asaë. Panevajënaeyabelia pina pona Galilea nacuayabelia. Baja pina jotalia pacaxitajarabianame,” pajamëbeje tsane pijajivijavabelia. Bajarapalivaisiyo xainajë patacatsipaebinxabeje, jai ángel bajarapovabejejavabelia.

⁸ Nexata bajarapovabeje naviatabajiravabeje Jesús pebuatsiibovajutsivëcua. Junavabeje picani. Itsiata barëyabeje bitso. Cujinaetabajiravabeje petsipaebinxabeje Jesús pijajivijavabelia. ⁹ Bajarapovabeje namutualia pecujinaejinaenajetaruceajavatabeje, Jesús jemata tsitanaitajëtatsibeje. Nexata bajarapovabeje kujitabaliabeje Jesúsjavabelia. Bajacobatsibeje. Nexata pematabacabëta nucajunuabeje. Sitaicaliabeje yayiataeya Jesús pecopiapitsinexabeje bajarapacuenia. ¹⁰ Jesús nexata jumaitis bajarapovabejejavabelia:

–Pëtsa pajunavamebeje. Paliamërebeje tajajivijavabelia. Pajumaitsimëbeje tsane tajajivijavabelia: “Jesús raja jumaitis. Paponaeremelia pina Galilea nacuayabelia. Baja pina jotalia pacacaxitajarabiana Jesús,” pajamëbeje tsane tajajivijavabelia, jai Jesús.

Pacuenia vajabitsaëvi navajunupaeba yabara pelivaisi

¹¹ Paepatota ëMariavënëvabeje naviatabeje Jesús pebuatsiibovajutsijavavelia, vajabitsaëvi, Jesús pemëthë pevetsivijavujënëvi, pona tomarabelia. Bajarapamonae tsipaeba sacerdotevi penamatacitorobivijavabelia pacuenia tane bajarapamonae. ¹² Nexata sacerdotevi penamatacitorobivi pona judïovi píjaancianovijavabelia penabarëcuaicuaiajinexa penajamatabëjëpaenexa pacuenia exanaejitsia. Nexata jane baja bajarapamonae najamatabëcuenjëpa. Nexata bajarapamonae rajuta ayajava palata vajabitsaëvijavabelia. ¹³ Bajarapamonae jumaitis vajabitsaëvijavabelia:

–Jivijavabelia pajumaitsimë tsane: “Meravi pataitamajitsita, Jesús pijajivi pata. Nexata bajarapamonae juta Jesús petëpaenë,” pajamë tsane. ¹⁴ Nexata nacuaeavetsinë Pilato ita jumetaena mapajumeje, paxanë itsiata pacayavenonaenatsi itsacuenë papecaexanaeyaniva, jai bajarapamonae vajabitsaëvijavabelia.

¹⁵ Nexata vajabitsaëvi jejai. Nota bajarapapalata. Nexata jane baja vajabitsaëvi pona najumetsënëtsiaya jivijavabelia pejumaitsinexa pacuenia itorobatsi. Nexata vajabitsaëvi najumetsënëtsiaya jumai tsaponae jivijavabelia:

–Meravi pataitamajitsita, Jesús pijajivi pata. Nexata Jesús pijajivi petëpaenë jutatsi, jai tsaponae jivijavabelia.

Bajarapacuenia vajabitsaevi pepaebixae, judíovi juya bajarapacuenia natsipaebaona. Nexata mapamatacabijavaberena ataje judíovi jumai tsabiabi:

—Jesús pijajivi petëpaenë jutatsi, jai tsabiabi.

Pacuenia Jesús petëpaecujinae icatsia itsa asaë, pijajivi itoroba pejumelivaisi jivi petotsipaebanajetarubenaenexatsi daxitanacuanëjava yabara pelivaisi

(Mr 16.14-18; Lc 24.36-49; Jn 20.19-23)

¹⁶ Jesús pijajivi once ponëbeje pona Galilea nacuyabelia. Jesús pijajivi pona petsutojumabelia, patsutojumatalia Jesús caxitarabiapaebatsi. ¹⁷ Nexata bajarapatsutojumata Jesús pijajivi itsa taenuta Jesús, yaiyataeya pitabarata pematocababëta tonubena. Itsiata itsamonae Jesús pijajiviyajuvënëvi jamatabëcuenenavëxaniabiaya jamatabëjumaitsi:

—Apo Jesús meta, jamatabëjai.

¹⁸ Nexata Jesús pijajivi kujirena. Jumaitsi pijajivijavabelia:

—Dioso baja cajena nevetsiaexana daxitacuene athëbëtatsia, daxita mapanacuajava ataje, taevetsinexa. ¹⁹ Nexata pacaitorobatsi. Paponare daxitanacuanëjava daxitanacuanëpijivi tajumelivaisi patanetotsipaebinexamë tanejumecovënëtsinexa. Bajaramonae pabautisabaponaename taxa pevënëta, xanë ata pexënatonë tavënëta, Espiritu Santo ata pevënëta. ²⁰ Bajarapamonae patsipaebaponaename pejumecovënëtavanapaenexa daxita pacuenia pacaitorobatsi. Pëtsa panacofënëtame daxitamatacabi patacayajavaponaponaajava. Nacua pevereverecejavabelianexa ata pacayajavaponaponaenatsi, jai Jesús pijajivijavabelia.

Pexanialivaisi Jesucristo pelivaisi, San Marcos peyaquinaelivaisi

Pacuenia Juan jivibautisabinë jivi livaisi tsipaeba petusato nacuata yabara pelivaisi (Mt 3.1-12; Lc 3.1-9, 15-17; Jn 1.19-25)

¹ Mara pacuenia taxuxuaba pexanialivaisi, Jesucristo Dioso pexënatō pelivaisije. ² Bajayata Diosojumepaebinëmi, profeta Isaiaspijinë, tajëvelia yaquina Dioso pejumait-sijava pexënatōjavabelia. Dioso jumaitsi pexënatōjavabelia mapacueniaje: Itorobianajë nevajënaeyabelia tanejumelivaisipaebinënexa. Catsivajënaexanebijitsia nijanamuto. ³ Nexata tanejumelivaisipaebinë vavajai tsane petusato nacuata. Jumaitsi tsane jivijavabelia: “Jivi baxaneba panamutoverena najetaruceijitsia petuxanenë. Batoroviaexananua namuto. Bajara pijinia pacuenia paxamë ata panajamatabëcuenexaniavaere pepo petuxanenë pepatsivajënaeya paxamëjavaberena,” jai tsane tanejumelivaisipaebinë xamë yabara,

jai bajayata tajëvelia Dioso pexënatōjavabelia pejumait-sijava Juan jivibautisabinë jivijavabelia Dioso pejumelivaisi petsipaebanajetarucejavanexa yabara.

⁴ Bajaraxuata nexata Juan jivibautisabinë Dioso pejumelivaisipaebinë najetaruca petusato nacujava Jesús pevajënaeya. Juan jivijavabelia jumai tsaponae mapacueniaje:

–Pacopabare pibisiacuene paneexanabiabijava. Panajamatabëcuenenëyore Diosojavabelia. Bajaraxuacujinae pacabautisabianatsi. Nexata Dioso pacavecuajibiaexanaena panijaneconimi, jai tsaponae Juan jivijavabelia.

⁵ Nexata ayabitsaëtōxaneto Judea nacuapijivi, Jerusalén tomarapijivina, muxunaponabiabatsi Juan petsipaebilivaisi penamuxunaevetabiabinexatsi. Nexata bajarapamonae pibisiacuene pexanaejavami, rovia Diosojavabelia navecuapaebapona. Bajaraxuacujinae Juan bautisabapona bajarapamonae Jordán meneta.

⁶ Juan naxatata camellonata pexanaejava. Naepacëta cuerobocoto. Pexaejava ëbosese, jabëra yajava. ⁷ Juan Jesús pelivaisi jivi tsipaebapona. Jumai tsaponae tajëvelia Jesús yabara:

–Tacovëverena patsiana itsanë. Bajaraponë daxitacuene pexanaenexa pecaëjëpaenëtsi tsane. Xanë raja saya beveliajamatabëcuenenëñë bajaraponëvecua. Nexata vecuaauranë bajaraponë bepajajivitonëñë tanataenexa. Nexata aurandë pijazapato ata tataxujonotsinexa. ⁸ Xanë raja saya pacabautisabatsi merata. Ponë rajane xanëcujinae patsiana, bajaraponë pacatsijamatabëjoneyaexanaponaena Espiritu Santo, jai tsaponae Juan jivijavabelia Jesús yabara tajëvelia pevajunupaebijavata Jesús penajetarucejavanexa.

Pacuenia Juan bautisaba Jesús yabara pelivaisi (Mt 3.13-17; Lc 3.21-22)

⁹ Jesús najetaruca Nazaret tomaraverena, Galilea nacuata peeaetomaraverena. Nexata Juan bautisaba Jesús Jordán meneta. ¹⁰ Jesús pebautisabicujinaetsi menevetsina penonotajunaejavata, tane itaboxo penapatsijava. Bajarajota Jesús tane Espiritu Santo ata perunaejavatsica pematatsënëatsica beucucuto. ¹¹ Jesús jumetanenua athëbëvetsica Dioso pejumait-sijavatsi: “Xamë raja taxënatomë, bitso tacaasivanë. Bitso casivajamatabëcuenobarëyatsi,” pejaijavatsi.

Pacuenia Jesús jamatabëcuenëjëbatsi dovathi yabara pelivaisi (Mt 4.1-11; Lc 4.1-13)

¹² Jesús Juan pebautisabicujinaetsi, bepijiayo Espiritu Santo ponaeyaexanatsi petusato nacuyabelia. ¹³ Bajarajotalia daxitacueneviria unupijivi jinavanapa. Nexata bajarajota Jesús ponapona, caenë, cuarenta pamatacabibeje. Bajarapamatabianëta dovathi picani Jesús jamatabëcuenëjëbatsi pibisiacuene pexanaenexa. Bajaraxuacujinae ángelevi runaica Jesús peyavenonaenexatsi.

Pacuenia Jesús Galilea nacuata taxuxuaba Dioso pitorobilivaisi jivi petsipaebijava yabara pelivaisi (Mt 12.12-17; Lc 4.14-15)

¹⁴ Juan penaneconitsiaexanaenexatsi vajabitsaë vaetabatsi. Nexata penaneconitsivi pejebabiabibota Juan naneconitsiaponapona. Nexata abaxë Juan penaneconitsivi pejebabiabibota itsa ponapona, Jesús najetaruca Galilea nacujavaberena. Jesús jivi tsipaebaponarena pexanialivaisi. Tsipaebaponarena daxita Dioso pijajivi pevetsijavanexa. ¹⁵ Jesús jumai tsaponae jivijavabelia mapacueniaje:

—Imoxoyo rabaja pevajënae pecopiapatsinexa Dioso papecaevetsimatocabinexa. Nexata pacopabare pibisiacuene paneexanabiabijava. Panajamatabëcuenepeñeyorore Diosojavabelia. Pajumecovënëre mapapexanialivaisije papecacapanepaelivaisinexa, jai tsaponae Jesús jivijavabelia.

Pacuenia Jesús junata cuatro ponëbeje dujuai peyamatajucabiabivi yabara pelivaisi (Mt 4.18-22; Lc 5.1-11)

¹⁶Jesús najetaruca Galilea pucaxaneto itapaya. Nexata Galileapuca itapata Jesús taenuta anijanëbeje nacaebananëbeje, Simónbeje Andrésbeje. Bajaraponëbeje daxitamatacabi canacujitsia dujuai yamatajucabiababeje. ¹⁷Nexata Jesús jumaitsi bajaraponëbejejavabelia: —Naxanitsia. Panepënaponarebeje. Nexata pacacujarubianatsibeje jivi panejucaenexabeje. Pacuenia dujuai payamatajucabiabamebeje, bajarapacuenia jivi pajucaenamebeje Dioso pijajivinexa, jai Jesús bajaraponëbejejavabelia.

¹⁸Nexata bajaraponëbeje dujuai peyamatajucabiabijavamibeje bajarajota puenetabutaabeje. Nexata baja naponabeje Jesús pepëta.

¹⁹Nexata icatsia belibaiyo pevajënaeyabelia Jesús barëpona. Icatsia Jesús taenuta anijanëbeje Santiagobeje Juanbeje, Zebedeo pexënatobeje. Bajaraponëbeje pijajeraënëta xanebanucabeje dujuai peyamatajucaejavabeje. ²⁰Nexata icatsia Jesús junata bajaraponëbeje ata. Nexata bajaraponëbeje bajarajota jerata puenetanutabeje paxa Zebedeo jane baja. Nexata Zebedeo, pijajivi yajava, nacopatanuca bajarajota. Nexata baja Santiagobeje Juanbeje naponabeje Jesús pepëta.

Pacuenia pebi dovathi peyajavaponaponanë Jesús jamatejemayaexana yabara pelivaisi (Lc 4.31-37)

²¹Nexata Jesús, pijajivi yajava, pata Capernaum tomarabelia. Judíovi penacueraevetsimatocabita Jesús joneya judíovi penacaeuatabiabiboyalia. Nexata bajarajota Jesús jivi livaisi tsipaeba. ²²Nexata Jesús pejumtaevitsi jamatabëcuenenabenajaca Jesús petsipaebilivaisi yabara. Bajarapamonae jamatabëcuenenabenajaca tsipaji xaniavaetsia Jesús tsipaeba Dioso pitorobinëtsicuenia. Apo tsipaebi pacuenia judíovi pecujarubivi tsipaebabiaba. ²³Bajarajota pebi dovathi peyajavaponaponanë naeca. Nexata bajaraponë Jesúsjavabelia vavajai tsaxuabi. Jumaitsi:

²⁴—¡Jesús, Nazaret tomarapijinëmë, panevecuaponare baja! ¿Detsa xua paneexanaejitsiamë? ¿Najetarucame tsaja pataneveretsinexamë? Xanë cajena cayapëtanetsi. Xamë raja Dioso pexënatomë, pepo pexaniajamatabëcuenenëmë, jai dovathi peyajavaponaponanë Jesúsjavabelia.

²⁵Jesús nexata jumeitaveta dovathi. Jumaitsi:

—¡Moyamërel! ¡Vecuapitsapare baja maponëjel! jai Jesús.

²⁶Nexata dovathi pebi pinijicuenia devacaibiaexanatsi. Dovathi vavajai pinijicuenia. Nexata baja dovathi pitsatabijirava jivitonëvecua. ²⁷Nexata daxitajivi bajarapacuenie itsa tane, bitso jamatabëcuenenabenajaca. Najumaitsi bajarapamonae:

—¿Detsa mapitsicuenije? ¿Detsa mapitsipejanacujarubicuenije? ¡Maponëje Jesús, beDioso pitorobinëtsitsica! ¡Dovathi ata jumecovënëtsatsi! ¡Nexata Jesús pitavetsixae dovathi, pebi baja vecuapitsapatsi! najai bajarapamonae.

²⁸Nexata daxita Galilea nacuapijivi bepíjia Jesús vënëlivaisitanetsi Dioso pesaëta pinijicuenie pexanaponaejava.

Pacuenia Simón Pedro pijava pena Jesús tojamatejemayaexana yabara pelivaisi (Mt 8.14-15; Lc 4.38-39)

²⁹Jesús baja pitsapa judíovi penacaeuatabiabibovecua. Nexata Santiagobeje Juanbeje Jesús yajavapona. Jesúsbana napona Simónbeje Andrésbeje pijaboyabelia. ³⁰Nexata Simón pijabota Simón pijava pena Jesúsbana pevajënae romaebanucatsi camata. Nexata itsamonae bepíjia Jesús tsipaebarecëpatsi bajarapova peromaebanucacajavatsi. ³¹Nexata Jesús imoxoyotabilia peromaebanucacajavatsi. Cobeyotsiaya matacota. Nexata bajarajota peromaebanucacajavatsi vecuajibi tsanajetsisireca baja doma. Nexata bajarapova Jesúsbana pexaejava toexanatsi.

Pacuenia ayaibitsaëto jivi piavitanevi Jesús jamatejemayaexana yabara pelivaisi (Mt 8.16-17; Lc 4.40-41)

³²Itsa baja ajena meravitsia, Jesúsjavaberena tocapatatsi daxita piavitanevi. Tocapatatsinua dovathi peyajavajinavanapaevinua. ³³Daxita tomarapijivi Jesús pepatsibota baupajavaberena nacaetuata. ³⁴Nexata Jesús jamatejemayaexana ayaibitsaëto daxitacuenevitane pexainaevimí. Vecuacapsapanua dovathi peyajavajinavanapaevi. Jesús apo tocapatsi dovathi pecuacuaijainexa jivijavabelia pevajunupaebiyavatsi. Tsipaji dovathi xaniavaetsia Jesús yapëtanetsi Dioso pexënatocuene.

Pacuenia Dioso pitorobilivaisi Jesús jivi tsipaeba Galilea nacuata yabara pelivaisi (Lc 4.42-44)

³⁵ Pepo bajayacunua, abaxê itsa apo napebetsi matakabi, Jesús naêcota. Nexata pitsapalia bovecua. Pesaicaeyojavabelia pona pevajêtsinexa Diosojavabelia. Jesús nexata pecovêta matakabi baja. ³⁶ Itsa baja matakabi, Simónbana Jesús pêjaitaponalia. ³⁷ Itsa baja bajarapamonae Jesús caxitajaraba, jumaitsi bajarapamonae:

–Daxita raja cajaitaruta pecataenexa, jai bajarapamonae Jesúsjavabelia.

³⁸ Nexata Jesús jumaitsi:

–Ponatsi baja imoxoyo penaetomaraxijavabelia bajarajotalia tatsipaebinexa Dioso pitorobilivaisi. Bajaraxuanexa bovecua pitsaparenajê, jai Jesús.

³⁹ Nexata daxita Galilea nacujava Jesús jivi tsipaebapona Dioso pitorobilivaisi judíovi penacaetuatabibonêjava. Jesús jivi dovathi vecuacapsapaponanua.

Pacuenia Jesús jamatejemayaexana bajayajebi bitso peperabêtsabanaenê yabara pelivaisi (Mt 8.1-4; Lc 5.12-16)

⁴⁰ Jesús imoxoyorenatsi bajayajebi bitso peperabêtsabanaenê. Nexata bajaraponê pe-matabacabêta nucajunua Jesús pitabarata. Bajaraponê pinijicuenia vajêta Jesúsjavabelia. Jumaitsi:

–Cacaêjêpa tanejamatejemayaexanaenamê. Itsa jitsipame, nejamatejemayaexanare mapavitanevecuaje, jai peperabêtsabanaenê Jesúsjavabelia.

⁴¹ Nexata Jesús bajaraponê itaxutobejobiatane. Pecobeta perabêjayalia. Jumaitsi:

–Jājā, jitsipajê cajena. Jamatejemamê rabaja, jai Jesús peperabêtsabanaenêjavabelia.

⁴² Bajarapacuenia Jesús pejumaitsijavata peperabêtsabanaenêmi baja per-abêxanepananajereca. Jamatejema baja. Peperabêtsabanaejavami baja ajibi. ⁴³ Nexata baja Jesús naviatisiaexana bajaraponê. Pinijicuenia Jesús muxujioba bajaraponê penaviatsivajênaeya. Jesús jumaitsi:

⁴⁴ –Nejumetaema. Pêtsa itsajivijavabelia tsipaebame tacajamatejemayaexanaejava. Naitajêremelia jane sacerdotenêjavabelia templobota penacuenenbinêjavabelia. Nexata sacerdotenê cataena pecavecuajibijava baja niavitanejavami. Diosonexa rajuremelia ofrenda sacerdotenêjavabelia pecavecuajibiaexanaexae niavitanejavami. Bajara tsipaji pacuenia bajayata vajasalinainêmi Moiséspijinê nacaitoroba. Nexata jivi yapêtaena pepacune baja pecavecuajibijava niavitanejavami, jai picani Jesús bajayajebi bitso peperabêtsabanaenêmijavabelia.

⁴⁵ Nexata bajaraponê lia. Itsiata tsipaebanajetaruca daxitajivijavabelia Jesús pejamatejemayaexanaejavatsi. Bajaraxuata Jesús apo jitsipae naitajêtsiaya pejonejava it-satomarabelia ata, jivi ayaiBITSaêtoXaneto pematatoyoronaeyanivatsi. Jesús saya ponapona tomaranê piajibijava. Itsiata cajena daxita nacanêjavaverena jivi muxunapatabiabatsi Jesús.

2

Pacuenia Jesús jamatejemayaexana petabusipacuenabinêtsi yabara pelivaisi (Mt 9.1-8; Lc 5.17-26)

¹ Itsamatakabi icatsia Jesús naviarena Capernaum tomaraberena. Nexata jivi yapêtane pabota Jesús patajopa. ² Nexata jivibitsaêtoXaneto nacaetuata Jesús pepatsibota. Bo baupa ata cajena bitso jivi vênêca. Nexata bajarapamonaejavabelia Jesús tsipaeba Dioso pitorobilivaisi. ³ Nexata cuatro ponêbeje parena, camayota peyavêtaccaranajetarubenaevi petabusipacuenebinêtsi. ⁴ Nexata petabusipacuenabinêtsi acuenebi bajarapamonae pecapatsijava Jesús pitabarayabelia. Tsipaji bo ênêtuatujê bitso jivi yavênêca. Nexata petabusipacuenabinêtsi pecapatsivi, bomatatu javavetsica vojoexana Jesús pecanacujitsiatsica. Nexata bajarapavojotuatsica camayota yacopatsica petabusipacuenebinêtsi. ⁵ Jesús jamatabêcueneyapêtane pacuenia bajarapamonae sivanajamatabêxainatsi. “Nacato-jamatejemayaexanaenatsi cajena,” pesivajamatabêjaijavatsi Jesús jamatabêcueneyapêtane. Bajaraxuata petabusipacuenebinêtsijavabelia Jesús jumaitsi mapacueniaje:

–Tajabananê, pibisiacuene rabaja nexanaeconimi cavecuajibiaexanatatsi, jai Jesús.

⁶ Bajarajota judíovi pecujarubiviyajuvênêvi naena. Bajarapamonae itsa jumetaeyena bajarapacuenia Jesús pejumaitsijava, nexata jamatabêcuenenavêxaniabiaya bêpênêa jamatabêjumai tsenae mapacueniaje:

⁷ –Maponêje Jesús Dioso apo pejitsipacuenia cuaicuajiai. Itsanê ata cajena apo caêjêpaetsi itsajivi pibisiacuene pexanaecononi pevecuajibiaexanaenexa. Caenê Dioso caêjêpatsi pevecuajibiaexanaenexa bajarapacueni, jamatabêjai tsenae bajarapamonae.

⁸ Jesús jamatabêcueneyapêtane bajarapamonae jamatabêcuenenavêxaniabiaya bajara-pacuenia pesivanajamatabêxainaejavatsi. Nexata Jesús jumaitsi bajarapamonaejavabelia:

—Pëtsa bajarapacuenia panesivanajamatabëxainame. Tshipaji cajena xanë necaëjêpa jivi pibisiacuene pexanaeconimi tavecuajibiaexanaenexa. ⁹ Paxamë apo pacacaëjêpae ata itsajivi pibisiacuene pexanaecononi panevecuajibiaexanaenexa, pacacaëjêpa picani saya jema panejumaitsinexa petabusipacuenebinëtsijavabelia mapacueniaje: “Cavecuajibiaexanatsi rabaja pibisiacuene nexanaeconimi,” panejainexa. Tshipaji itsajivi ata apo yapëtae tsipae saya jema panejumaitsijava. Itsiata baiitsi jane itsa apo pacacaëjêpae panejamatejemayaexanaenexa petabusipacuenebinëtsi, acuenebi panejumaitsinexa bajaraponëjavabelia mapacueniaje: “Nonotapunare. Nijacamayo pire. Ponare baja,” panejainexa. Tshipaji bajarapacuenia pajumaitsimë ata, itsa apo jamatejema tsipae bajaraponë, nexata daxitajivi pacayapëtaejitsipa apo papecacaëjêpaeacuene panejamatejemayaexanaenexa, jai nexata Jesús judíovi pecujarubivijavabelia.

¹⁰ Icatsia Jesús jumaitsi bajarapamonaejavabelia:

—Xanë, Daxitajivi Pematapijinënë, mapanacuata necaëjêpa tavecuajibiaexanaenexa itsajivi pibisiacuene pexanaeconimi ata pacuenia baja exanajê maponëjavabeliaje. Nexata patanecueneyapëtaenexamë tanecaëjêpaeacuene tavecuajibiaexanaenexa itsajivi pibisiacuene pexanaeconimi ata, pataema pacuenia jamatejemayaexanaejitsianë maponëjê, jai Jesús judíovi pecujarubivijavabelia.

Nexata icatsia Jesús jumaitsi petabusipacuenebinëtsijavabelia:

¹¹ —Xamë cajumaitsitsi. Nonotapunare. Nijacamayo pire. Nijaboyabelia baja ponare, jai Jesús.

¹² Nexata bajarapacuenia Jesús pejumaitsijavata petabusipacuenebinëmitsi nonotapuna. Pebocaecamayo baja pita. Pitsapalia baja daxitajivi pitabarata. Nexata daxitajivi itsa tane bajarapacuenia, jamatabëcuenenabenajaquena. Bajarapamonae jumai tsenae mapacueniaje:

—Dioso cajena bitso ayajamatabëcuenenë. Caeto ata abaxë mapitsicuene pexanaejava apo taetsije, jai tsenae bajarapamonae.

Pacuenia Jesús pijajivitonënexa junata Levívënëñë yabara pelivaisi
(Mt 9.9-13; Lc 5.27-32)

¹³ Jesús pona pucaxaneto itapajavabelia. Nexata jivi ayabitsaëttoxaneto pënapatatsi bajarabelia. Nexata Dioso pejumelivaisi Jesús tsipaeba bajarapamonaejavabelia. ¹⁴ Bajaraxuacujinae penajetarucaejavata Jesús taeyeta Levívënëñë, Alfeo pexënëto. Leví eca pabota gobierno pejamatabëcuenia jivijavabelia matamoyanijobabiaba impuestomatamo. Nexata Jesús jumaitsi Levíjavabelia:

—Leví, naxanitsia. Népënaponare, jai Jesús.

Jejai Leví. Nexata nonotapuna. Leví baja napona Jesús pepëta.

¹⁵ Nexata Leví junata Jesús pebarënanabinexa pijabota. Nexata Leví pijabota Jesús pexaejava naxane. Leví pijabota ayabitsaëto naena gobierno pejamatabëcuenia jivijavabelia impuestomatamo pematamoyanijobabiabivi. Itsamonae ata nanabane pijamatabëcueniebejevi. Nexata Jesús pijajivi nabarëca bajarapamonaejavata. ¹⁶ Nexata fariseovi, judíovi pecujarubivinu, Jesús taeyetatsi daxita bajarapamonaejavata pijajivi penabarënanabaceajava. Nexata bajarapamonae jamatabëcuenenavëxaniabiaya jumaitsi Jesús pijajivijavabelia:

—Papecacujarubinë Jesús naneconita Diosojavabelia. Tshipaji gobierno pejamatabëcueneta impuestomatamo pematamoyanijobabiabivijavata, pijamatabëcueniebejevijavatanua, naxaeyeca pexaejava, jai bajarapamonae Jesús pijajivijavabelia.

¹⁷ Itsa Jesús jumatane mapajumeje, nexata jumaitsi bajarapamonaejavabelia:

—Pevaëbinë raja apo vaëbi pejamatejemavi. Pevaëbinë raja piavitanevi vaëba. Bajara pijinia xanë ata itsinë. Apo sivapatajopaenë tajunatsinexa pamonae baja aneconijibi tsavanapae. Sivapatajopajê raja tajunatsinexa pijaneconi pexainaevi. Bajarapamonae junataponajê pecopabinexa pibisiacuene pexanaejava penajamatabëcuenepëñëyorotsinexa Diosojavabelia, jai Jesús bajarapamonaejavabelia.

Pacuenia Jesús yanijobatsi pamatacabibeje jivi vajëta pona Diosojavabelia pexaejava apo pexaeyabiabixae yabara pelivaisi

(Mt 9.14-17; Lc 5.33-39)

¹⁸ Itsamatacabi Juan pijajivi, fariseovi pijajivinu, pexaejava apo xaevanapae pamatacabibeje Diosojavabelia vajëcapona. Nexata itsamonae Jesúsjavaberena pata. Yanijobatsi pexaejava piatsobicuene yabara. Jumaitsi mapacueniaje:

—Juan pijajivi, fariseovi pijajivinu, pexaejava apo xaeyabiabi pamatacabibeje Diosojavabelia vajëta pona. ¿Detsa xuajitsia itsiata xamë nijajivi pexaejava xaeyabiaba pamatacabibeje Diosojavabelia vajëta pona? jai Jesús peyanijobivitsi.

¹⁹ Nexata Jesús jumaitsi bajarapamonaejavabelia:

—Pamonaē junatatsi penacasabifiestajavabelia penabaninexa, apo atsohi pexaejava ita abaxē yajavaecatsi pejananacasabinē. Itsa abaxē pejananacasabinē yajavaponaponatsi, acuenebi pexaejava piatsobinexa bajarapamonaē. ²⁰ Itsiata baitsi jane ita pejananacasabinē tsimaxēpatsipatsi pevecuacaponae nexatsi itsajavabelia, nexata bajarapamonaē pexaejava apo xae tsipae. Tsipaji bitso najamatabēxainaejitsipa pevecuacaponae aetsi. Bajara pijinia itsi tajajivi ata. Tayajavaponaponaeeepato abaxē apo atsobabiabi pexaejava pamatacabibeje Diosojavabelia vajēta. Itsiata pamatacabi xanē necaponae aen bajarapamonaeevecu, nexata jane baja bajarapamatacabi pexaejava apo xae tsane bitso tanesivanajamatabēxainae, jai Jesús peyanijobivitsijavabelia.

²¹ Nexata bajarapamonaē perujamatabēcuene baja pecopabinexa, Jesús livaisi tsipaeba comparaciōncuenia bajarapamonaē pejumecovēnēsinexa ēpejanalivaisi, Jesús petsipaebilivaisi. Bajarapamonaē anijamatabēcuenebeje pexainae yaniva perujamatabēcuene baja pecopabinexa, Jesús livaisi tsipaeba comparaciōncuenia. Perujamatabēcuene yabara Jesús jumaitsi bajarapamonaejavabelia mapacueniaje:

—Itsajivi ata raja apo catsatarutsi pejanapana perujanaxatatsiesetojavabelia. Itsa catsatarutsipa pejanapanata perujanaxatatsiesetojavabelia, nexata pejanapana yanarobotsipa perujuesetojavaverena. Nexata biji bitso pinijivojoto titinaejitsipa. ²² Itsajivi ata pijinia apo epacae pejanavinoranē perujubocodoruanējavabelia bajayajebi peyajebinexa. Pejanavinoranē itsa epacaejitsipa perujubocodoruanējavabelia, nexata pejanavinoranē yatititibia tsipae. Tsipaji perujubocodoruanē apo yanayeretsi tsipae. Tsipaji pejanavinoranē pejumalitsēxē abaxē xaina. Nexata ita yatititibia tsipae, mene naxuabijitsipa, vinoranēmi. Bajaxuata bepaca pejanavinoranē pejanabocodoruanējavabelia, jai Jesús peyanijobivitsijavabelia bajarapamonaē pejumecovēnēsinexa ēpejanalivaisi, Jesús petsipaebilivaisi, perujamatabēcuene baja penacopabinexa.

Pacuenia Jesús pijajivi namutua siricanajetarubena trigoxu penacueraevetstimatacabita yabara pelivaisi

(Mt 12.1-8; Lc 6.1-5)

²³ Judiovi penacueraevetstimatacabita Jesús, pijajivi yajava, najetaruca namutua trigo pabianējava. Nexata Jesús pijajivi piajanixae, trigoxu siricanajetarubena. Xuxaeyabuata-pona. ²⁴ Nexata fariseovi jumaitsi Jesúsjavabelia:

—¡Taema mapacuneje! Dioso Moiséspijinēta penajumecopatsilivaisita vajanacaitavetsicue, nijajivi exana. Apo nacaitavetsi ata trigoxu vajaxaejava, itsiata ajena penacueraevetstimatacabixae, nijajivi apo bexanae mapacuneje, jai fariseovi Jesúsjavabelia.

²⁵ Nexata Jesús jumaitsi fariseovijavabelia:

—Ajena, penacueraevetstimatacabita, tajajivi bajarapacuenia exanae ata, itsiata apo pibisiacuene. Tsipaji bitso piajani. ¿Apo palebimē tsipaji Dioso pejumelivaisibaxuto panepapētaenexa pacuenia vajasalinainēmi Davidpijinē, pebareponaponaevi yajava, exana pamatacabi bitso piajani? ²⁶ Davidpijinē joneya Dioso pijatemploboyalia pamatacabi Abiatarpijinē daxita sacerdotevi penamatacaitorobinē tsaponaponaē. Nexata Dioso pijatemplobenēta, mesajumata, bobena Diononexa ofrendacuenia petojebipanbēanē. Bajarapapanbēanē itsajivi ata apo tocopatsitsi pexaenexa penaconitsianiva Diosojavabelia. Ēsacerdotevi picani tocopatatsi pexaenexa. Davidpijinē apo sacerdotenē ata, xae ata bajarapapanbēanē pijajivi barē, itsiata apo vēnananeconitsi Diosojavabelia, jai Jesús fariseovijavabelia.

²⁷ Icatsia Jesús jumaitsi fariseovijavabelia:

—Dioso raja tocopata caematacabi jivi penacueraevetstinexa. Tsipaji Dioso yapētane pacuenia jivi namatavenona penacueraevetstinexa. Dioso apo exanae jivi saya jema peyaiyataenexa penacueraevetstimatacabianē. ²⁸ Nexata xanē, Daxitajivi Pematapijinēnē, netoxanepana cajena tatsipaebinexa pacuene xanepana jivi pexanaenexa penacueraevetstimatacabita ata, jai Jesús fariseovijavabelia.

3

Pacuenia Jesús jamatejemayaexana pebi pecobetsaquenaenē yabara pelivaisi

(Mt 12.9-14; Lc 6.6-11)

¹ Penacueraevetstimatacabita Jesús joneya judiovi penacaetuatabiabi boyalia. Nexata bajarajota pebi naeca pecobetsaquenaenē. ² Nexata Jesús naitaxutocaevetatsi

fariseovi petaenexatsi pecobetsaquenaenē pejamatejemayaexanaejava penacueraevetsimatacabita. Nexata Jesús pecobetsaquenaenē ita jamatejemayaexana penacueraevetsimatacabita, “Jesús raja naneconita Diosojavabelia. Tsipaji penacueraevetsimatacabita nacueneba,” pejainexa bajarapamonaē. ³ Nexata Jesús jumaiti pecobetsaquenaenējavabelia:

—Nonotapunare. Nucare mapamonaē pitabarataje, jai.

⁴ Nexata Jesús jumaiti fariseovijavabelia:

—Penacueraevetsimatacabita ata xanepana vajaexanaenexa pexaniacuene. Xanepana vajajamatejemayaexanaenexa piavitanevi, jai Jesús fariseovijavabelia.

Nexata fariseovi Jesús apo jume pitsitsi. ⁵ Nexata Jesús anaeya naēcota bajarapamonaē. Bajaraxuacujinaē Jesús bejamatabējiobireca. Tsipaji yapētane piajamatabēcuenetajajava fariseovi. Nexata Jesús jumaiti pecobetsaquenaenējavabelia:

—Namaxērovire, jai.

Nexata pecobetsaquenaenē namaxērovita. Bajarajota cobexanepananajereca baja. Pecobetsaquenaejavami ajibi. ⁶ Nexata fariseovi ita tane Jesús pecobexanepanaeayaexanaejava pecobetsaquenaenē, fariseovi anaepana. Nexata bajarapabovecua pitsapa. Pona penabarēcuaijainexa nacuaevetsinē Herodes pijajivijavabelia. Bajarapamonaē najumejaita Jesús pebeyaxubinexatsi.

Pacuenia jivi nacaetuata Galilea pucaxaneto itapata yabara pelivaisi

⁷ Jesús, pijajivi yajava, pona Galilea pucaxaneto itapayabelia. Nexata Jesús pēnaponaliatsi ayaibitsaētoخانeto Galilea nacupijivi. ⁸ Nexata Jesús pēnaponaliatsi Judea nacupijivinua, Jerusalén tomarapijivinua, Idumea nacupijivinua, Jordánmene itsapanavere-napijivinua, imoxoyo Tiro tomaravecua pejinavanapaevinua, imoxoyo Sidón tomaravecua pejinavanapaevinua. Daxita bajarapamonaē Jesús pēnaponaliatsi tsipaji Jesús vēnēlivaitsanetsi Dioso pesaēta pinijicuene pexanaponaejava. ⁹ Nexata Jesús pijajivi itoroba jera petoxaniavaetarutsinexatsi menetareca. Itsa bajarapajivibitsaētoخانeto Jesús bitso matacēnēnapanonatsi, nexata bajarapamo ēnēabereca Jesús perunaenexareca. ¹⁰ Jesús baja ayaibitsaēto piavitanevi jamatejemayaexana. Bajaraxuata itsamonaē, piavitanevi, Jesúsjavabelia natorotaponabiaba pejayatsinexatsi.

¹¹ Dovathi peyajavajinavanapaēvi Jesús ita taeyabiabatsi, bajarapamonaē irata othopabiaba Jesús pitabarata. Bajarapamonaē aējai tsabiabi.

—Xamē tsaena Dioso pexēnatomē, jai tsabiabi dovathi peyajavajinavanapaēvi.

¹² Nexata Jesús jumeitaveta bajarapamonaē. Jumaitsi:

—“Dioso raja pexēnato,” pajamē pētsa xanē yabara itsajivijavabelia, jai Jesús bajarapamonaējavabelia.

Pacuenia Jesús pijajivi ayaibitsaētoخانetoyajuvēnēvi itapeta saya doce ponēbeje apóstolevinexa yabara pelivaisi

(Mt 10.1-4; Lc 6.12-16)

¹³ Jesús pijajivi ayaibitsaētoخانetoyajuvēnēvi, doce saya ponēbeje, itapeta apóstolevinexa. Jesús pitapetsivajēnaē apóstolevinexa, junaya petsutojumabetsia. Bajaravetsica Jesús junatanuca ponēbeje jamatabēitapeta apóstolevinexa. Nexata pamonaē Jesús itapeta apóstolevinexa, junaya petsutojumabetsia, Jesúsjavabetsia. ¹⁴ Nexata Jesús caetuata caebitsaētoyo, doce ponēbeje pijajivi, pepēnajanavanapaevinexatsi. Jesús itorobijitsianua bajarapamonaē daxitanacuanējava jivi petsipaebanajetarubenaenexa Dioso pitorobilivaisi. ¹⁵ Jesús pijajivi jamatabēcuenecaējēpaeyaexana Dioso pesaēta pejamatejemayaexanaponaenexa piavitanevi. Jamatabēcuenecaējēpaeyaexananua Dioso pesaēta dovathi jivi pevecuacapisaponaenexa. ¹⁶ Jesús pijaapóstolevi, doce ponēbeje, mapevēnēanēje. Copiaya ponē pevēnē Simón. Bajaraponē Jesús vēnēruba itsavēnē, Pedro. ¹⁷ Itsanē Santiago. Itsanē Juan. Santiagobeje Juanbeje nacaebananēbeje, Zebedeo pexēnatobeje. Bajaraponēbeje Jesús vēnēruba Boanerges. “Boanerges,” ita jai, bajarapamonaē pijajumeta mapajumetaje pejumaitisijume: “Yamaxē pexēnatobeje,” pejaijume. ¹⁸ Itsanē pevēnē Andrés. Itsanē Felipe. Itsanē Bartolomé. Itsanē Mateo. Itsanē Tomás. Itsanē Santiago, Alfeo pexēnato. Itsanē Tadeo. Itsanē Simón, celotenē. ¹⁹ Itsanē Judas Iscariote. Bajaraponē bexējavabelia Jesús canajetsijitsiatsi pijavajabitsaē pecobeyabelia pebeyaxubinexatsi.

Pacuenia itsamonaē Jesús yabara jamatabēcuenenavēxaniabiaya jumaiti: “Beelzebú raja pesaēta, Jesús dovathi jivivecua capitsapapona,” jai yabara pelivaisi

(Mt 12.22-32; Lc 11.14-23; 12.10)

²⁰ Jesús boya joneya pijajivi yajava. Icatsia jivibitsaētoخانeto nacaetuata. Nexata acuenebi Jesús pijajivi pebarēnabanijava. ²¹ Itsamonaē Jesús yabara jumaiti: “Jesús raja matajemabatsi,” jai. Nexata bajarapacuenia itsamonaē Jesús yabara pejumaitisijava,

Jesús pijamona vënëlivaisitanetsi. Nexata Jesús pijamona ponarena Jesúsjavaberen pebarëponaenexatsilia picani.

²² Judïovi pecujarubivi, Jerusalén tomaraverena peponaevi, jamatabëcuenenavëxaniabiaya Jesús yabara jumaitsi:

–Mara ponë Jesúsje, Beelzebú yajavaponapona. Beelzebú raja daxita dovathivi pevetsinë. Bajaraxuata Jesús Beelzebú pesaëta dovathi jivivecua capitsapapona, jai judïovi pecujarubivi jamatabëcuenenavëxaniabiaya Jesús yabara.

²³ Nexata Jesús junata bajarapamona jamatabëcuenenavëxaniabiaya pejumaitsijava pecanaëjëtsinexa. Nexata bajarapamonaejavabelia Jesús jumaitsi mapacueniaje:

–Beelzebú raja dovathivi jivivecua apo capitsapapona tsipae. Tsipaji Beelzebú dovathi jivivecua itsa capitsapaponaëjitsipa, nexata Beelzebú beprijavajabitsaë taejitsipa pijajivi.

²⁴ Pacanaëjëre mapacuenaje. Nacaenacuapijivi ata itsa navecuanatsanaejitsipa penasi-
vanavajabitsaëtsinexa, namataenetsia naverëbiabijitsipa nacaenacuapijivi ata. ²⁵ Bajara pijinia nacaemonaë ata itsipae. Itsa navecuanatsanaejitsipa penasi-
vanavajabitsaëtsinexa, namataenetsia naverëbiabijitsipa nacaemonaë ata. ²⁶ Bajara pijinia itsipae dovathi ata. Dovathi jivivecua itsa capitsapaponaëjitsipa pijajivi dovathivi, nexata beprijavajabitsaëne taejitsipatsi pijajivi. Nexata apo sivaajamatabëcuenesaë tsipae pexanaponaëjavanexa. Nacopiarucaeyaexanaejitsipa dovathi, jai Jesús judïovi pecujarubivijavabelia.

²⁷ Bajarapamonaë pecanaëjëtsinexa Jesús bitso piasaënëcuen dovathi matatoxenetsia, Jesús icatsia jumaitsi bajarapamonaëjavabelia mapacueniaje:

–Itsajivi ata apo caëjëpaetsi pejonenexa bitso piasaënë pijaboyalia peyacajëjëtsinexa xua xaina pijabota. Itsiata itsa patsipa bajaraponë matatoxenetsia bitso piasaënë, nexata cobecëtabuatsipatsi. Taxucëtabuatsipatsi yajava. Matapania bajarapacuenia yacajëjëtsipatsi daxita xua xaina pijabota. Bajara pijinia pacuenia xanë ata bitso tasaënë dovathi matatoxenetsia. Bajaraxuata necaëjëpa jivivecua tacapitsapaponaë dovathivi.

²⁸ Xaniajanë pacuenia pacatsipaebatsi. Dioso cajena caëjëpatsi daxitajivi pibisiacuene pexanaeneconi pevecuaajibiaexanaenexa. Pibisiacuena jivi Dioso baracuaicuaijai ata, bajarapaneconi ata Dioso caëjëpatsi pevecuaajibiaexanaenexa. ²⁹ Itsiata baitsi jane pajivi pibisiacuena baracuaicuaijai Espiritu Santo, bajarapajivi Dioso apo vecuaajibiaexanaë tsane bajarapaneconi. Bajarapajivi naneconitsiana daxita matacabijavabelianexa, jai Jesús bajarapamonaëjavabelia.

³⁰ Bajarapacuenia Jesús jumaitsi tsipaji Jesús Espiritu Santo yajavaponaponaë atatsi, judïovi pecujarubivi jumaitsi Jesús yabara: “Jesús raja Beelzebú yajavaponapona,” jai. Nexata bajaraxuata bajarapamonaë naneconita Espiritu Santojavabelia.

*Pacuenia Jesús pejuyapijivi, pena yajava, nubena bojumavelia yabara pelivaisi
(Mt 12.46-50; Lc 8.19-21)*

³¹ Jesús pejuyapijivi, pena yajava, pata Jesúsjavaberen. Itsiata bajarapamonaë boy-
alia apo jonelia Jesús penucaeboyalia. Nexata bajarapamonaë junatsiaexana Jesús pe-
jumetaeyenaevitsijavabelia. ³² Nexata pamonaë Jesús petsipaëbilivaisi matatoyorotsia
jumetaeyenatsi, Jesúsjavabelia jumaitsi:

–Patajatuxanenë, ena raja, nejuyapijivi yajava, nuca patapënëverenena. Cajaita raja xamë, jai bajarapamonaë Jesúsjavabelia.

³³ Nexata Jesús jumaitsi bajarapamonaëjavabelia:

–¿Detsa pitsijamatabëcuenevi taena, tajuyapijivinua? jai Jesús.

³⁴ Bajaraxuacujinaë Jesús naëcota pematatoyorotsiaenaveitsi. Jumaitsi bajarapamonaë-
javabelia:

–Mara jota pamonaë xanëjavata penaevije, bajarapamonaë jane taenajivi, tajuyapijiv-
inua. ³⁵ Tsipaji raja pamonaë exana pacuenia Dioso itorobatsi, bajarapamonaë jane baja
tajuyapijivi, taenajivinua, jai Jesús bajarapamonaëjavabelia.

4

*Pacuenia Jesús jivi livaisi tsipaëba peubinë pelivaisicuenia yabara pelivaisi
(Mt 13.1-9; Lc 8.4-8)*

¹ Icatsia Jesús taxuxuaba livaisi petsipaëbijava Galilea pucaxaneto itapajavata. Nex-
ata jivi ayalbitsaëtoxaneto nacaetuata itsajota Jesús livaisi tsipaëbanuca. Nexata Jesús
runareca jera ënëabereca. Ecareca jera ënëtareca. Daxita jivibitsaëtoxaneto tajetabovelia
nubena. ² Nexata Jesús daxitacuene livaisianë tsipaëba jivijavabelia. Jesús jumai tsaponaë
bajarapamonaëjavabelia mapacueniaje:

³ —Panenamuxunaevere mapalivaisije. Peubinë pona pabiabelia peubinexa. Nexata itsa pata pabita, peubixu pexucayajabajarabicuenia ubanajetaruca. ⁴ Nexata pexucayajabajarabijavata itsaxu othopa pabi tuatujajëjava, penajetarucaenamutojumata. Nexata bajarajota pata baratsui. Xane bajarapaxumi juvinejeva. ⁵ Itsaxu pijinia othopa ibopananëjumata, itsajota bitso ira apo aitayae. ⁶ Nexata icotia bitso itsa ataju, nexata bajarapaxu juvi ata, tsaquenapona. Tsipaji irabereca bitso apo atabunepepiareca. ⁷ Itsaxu pijinia othopa xanëebacabomijavata. Nexata peubixu xanëebotonë caecuenia itsa yajavajuva, bitso xanëebotonë matacënënat si peubijavami. Nexata peubijava apo xainae pecuai. ⁸ Itsaxu pijinia othopa pexaniarata. Nexata juva. Xaniavaetsia vitsabaponanua. Xainanua pecuai. Itsabotonë capitsapa treinta paxutobeje tsaponae. Itsabotonë capitsapa sesenta paxutobeje tsaponae. Itsabotonë capitsapa cien paxutobeje tsaponae, jai Jesús bajarapalivaisi petsipaebivijavabelia.

⁹ Nexata icatsia Jesús jumait si jivibitsaët oxanetojavabelia:

—Pajivi jamatabënejumeyapëtae patacatsipaebilivaisi, nenamuxunaevetsi xaniavaetsia, jai Jesús.

Pacuene yabara Jesús jivijavabelia livaisi tsipaeba ëcomparacióncuenia yabara pelivaisi (Mt 13.10-17; Lc 8.9-10)

¹⁰ Jesús livaisi petsipaebicujinae, jivibitsaët oxaneto baja Jesús vecunaviabat si. Nexata Jesús pijaepato barënëcopata doce ponëbeje pijajivi, itsamonae itsiata yajava. Nexata bajarapamonae Jesús yanijobatsi. Bajarapamonae jumait si Jesúsjavabelia:

—Palivaisi jivijavabelia tsipaebame peubinë pelivaisicuenia, pajamatabëcuene xaina, patayapëtaenexa panetsipaebare, jai bajarapamonae Jesúsjavabelia.

¹¹ Nexata Jesús jumait si bajarapamonaejavabelia:

—Paxamë rabaja xaniavaetsia Dioso pacayapëtaeyaxana Dioso papijajivimë papecaevetsijava. Bajarapacuene abaxë daxitajivi apo yapëtae. Baitsi ra saicaya pamonae apo tajajivi, tsipaebajë livaisianë ëcomparacióncuenia. ¹² Bajaraxuata nexata bajarapamonae tae ata Dioso pesaëta pinijicue taexanaejava, itsiata apo yapëtae pajamatabëcuene yabara exanajë pinijicue taexanaejava. Nenamuxunaevetsi ata tatsipaebilivaisi, itsiata apo jumeyapëtae pajamatabëcuene xaina tatsipaebilivaisi. Bajarapacuene apo jumeyapëtae penajamatabëcuenecopatsiyani va Diosojavabelia pibisiacuene pexanaenecomimi Dioso pevecuaajibiaexanaeyanivatsi, jai Jesús.

Pacuenia Jesús yapëtaeyaxana pijajivi, itsamonae yajava, pajamatabëcuene xaina palivaisi tsipaeba peubinë pelivaisicuenia yabara pelivaisi (Mt 13.18-23; Lc 8.11-15)

¹³ Jesús icatsia jumait si pijajivijavabelia:

—Itsa apo pajumeyapëtaemë pajamatabëcuene xaina palivaisi pacatsipaebatsi peubinë pelivaisicuenia, ¿detsa nexata pacuenia pajumeyapëtaename daxita palivaisianë pacatsipaebijitsiatsi comparacióncuenia? jai Jesús pijajivijavabelia.

¹⁴ Nexata icatsia Jesús jumait si pijajivijavabelia pijajivi peyapëtaenexa pajamatabëcuene xaina palivaisi tsipaeba peubinë pelivaisicuenia:

—Pajivi raja peubixu uba, bajarapajivi bepepaebinë Dioso pitorobilivaisi. ¹⁵ Pacuenia itsi pabita peubixu, paxu othopa pabi tuatujajëjava penajetarucaenamutojumata, bajara tsijamatabëcuenetsi itsamonae Dioso pitorobilivaisi. Bajarapamonae itsa tsipaebatsi Dioso pitorobilivaisi, jumetane picani. Tsijamatabëubatsi jane baja picani Dioso pitorobilivaisi. Itsiata baitsi jane pejumetaecujinae bajarapalivaisi, bepjiia dovathi najetaruca bajarapamonaejavaberena. Nexata bajarapamonae tsijamatabëjuvinejevatsi, dovathi vecuapitatsi bajarapalivaisimi, petsijamatabëubilivaisimitsi. ¹⁶ Pacuenia pijinia itsi paxu othopa ibopananëjumata, itsajota bitso ira apo aitayae, bajara tsijamatabëcuenetsi itsamonae Dioso pitorobilivaisi. Bajarapamonae jumetane Dioso pitorobilivaisi. Nexata picani bajarapalivaisi barëyaya jumecovënëta. ¹⁷ Itsiata baitsi jane pacuenia irabereca apo atabunepepiareca paxu othopa ibopananëjumata, nexata nabijiana, bajara tsijamatabëcuenetsi bajarapamonae Dioso pitorobilivaisi. Tsi paji pepacuene pejamatabëthëtovetsina apo jumecovënëtsi bajarapalivaisi. Nexata apo ajamatabëcuenesae tsavanapae bajayajebi pejumecovënëtsinexa bajarapalivaisi. Nexata itsa tocopiapatsi daxita petoayapëbejecuenetsi, itsa yalivaisibatsinua Dioso pitorobilivaisi yabara, nexata pejumecovënëtsijavami bajarapalivaisi bepjiia copaba. Pevajënaeyabelia apo jumecovënëtaavanapae. ¹⁸ Pacuenia pijinia paxu othopa xanëebacabomijavata, itsa juva, bitso matacënënat si xanëebotonë, bajara tsijamatabëcuenetsi itsamonae Dioso pitorobilivaisi. Jumetane picani bajarapamonae Dioso pitorobilivaisi. ¹⁹ Itsiata baitsi jane bitso jamatabëcuenenatsi mapanacuapijicue yabaraje. Tsi paji najamatabëxaina ayaijava palata pexanaenexa. Nexata pijacuata najamatabëcueneyamaxëitojoroba. Daxitacuene

mapanacuapijicuene bitso jitsipa pexainaenexa. Bajaraxuata Dioso pitorobilivaisi apo tovitsabitsi pejamatabëthëtota. Nexata pacuenia itsi pabita piacuaijibibotonë, bajara itsi bajarapamonae. Tspipaji Dioso xaniavaetsia apo tojinavanapae. ²⁰ Pacuenia pijinia itsi paxu othopa pexaniairata, bajara tsijamatabëcueneitsitsi itsamonae Dioso pitorobilivaisi. Bajarapamonae itsa tsipaebatsi Dioso pitorobilivaisi, tsijamatabëjunuatsi. Nexata tsijamatabëcuenevitsabaponatsi Dioso pitorobilivaisi. Nexata pacuenia peubijava capit-sapa itsabotonë treinta paxutobeje tsaponae, itsabotonë sesenta paxutobeje tsaponae, itsabotonë cien paxutobeje tsaponae, bajara tsijamatabëcueneitsitsi bajarapamonae Dioso pitorobilivaisi, jai Jesús pijajivijavabelia.

Pacuenia Jesús pijajivi livaisi tsipaeba lámparabë pelivaisicuenia yabara pelivaisi (Lc 8.16-18)

²¹ Jesús icatsia jumaisi doce ponëbeje pijajivijavabelia, itsamonaejavabelia ata:

—Itsajivi ata lámparabë pitanojotsicujinae apo etsi cajoniënëalia. Apo etsi cama bëxëpanalia ata. Jume baja cajena. Biji rajane athëbëyo etsia daxitaboënë pitayote-caenexa. ²² Bajara pijinia itsi palivaisianë tsipaebaponajë comparacióncuenia daxitajivi picani peyapëtaenexa. Najumematayatsia apo tsipaebaponaenë. Itsamonae nejumetae ata, aeconoxae abaxë apo nejumeyapëtae pajamatabëcuene xaina tatsipaebilivaisianë. Itsiata itsamatacabi, bexëjavabelia, daxitajivi nejumeyapëtaena pajamatabëcuene xaina palivaisianë comparacióncuenia tsipaebaponajë. ²³ Pajivi jamatabënejumeyapëtae patacat-sipaebilivaisi, xaniavaetsia nenamuxunaevetsi, jai Jesús pijajivijavabelia.

²⁴ Icatsia Jesús jumaisi bajarapamonaejavabelia:

—Panejumecanaëjère patacatsipaebilivaisi. Itsamonae ata itsa pacatsipaebiana, bajarapamonae ata pajumecanaëjëtianame papecatsipaebilivaisi. Palivaisivajëto panejumecanaëjëtianame, nexata bajarapalivaisivajëto pajumeyapëtaename. Itsiata icatsia pematatsënëa bajarapitsilivaisivajëto Dioso pacayapëtaeayaexanaena. ²⁵ Pajivi xaniavaetsia nejumeyapëtae patacatsipaebilivaisi, bajarapajivi icatsia itsalivaisi pematatsënëa Dioso jumeyapëtaeayaexanaenatsi. Itsiata pajivi apo jitsipae pematatsënëa pejumeyapëtaeponaenexa, bajarapajivi palivaisiyovajëto picani jumeyapëtae, nacofënëtsiana, jai Jesús.

Pacuenia peubixu pejuvicujinae, Dioso pesaëta vitsaba yabara pelivaisi

²⁶ Jesús icatsia jivi comparacióncuenia livaisi tsipaeba Dioso pijajivi pevetsicuene yabara. Jumaisi mapacueniaje:

—Pacuenia peubixu pejuvicujinae, Dioso pesaëta vitsaba, bajara pijinia pacuenia Dioso pijajivi ata Dioso pesaëta jinavanapa. Peubinë pabita peubixu xucayajabajarabanaje-taruca. ²⁷ Peubinë peubicujinae vemaxëmajitabiaba meravi canacujitsia. Naëcotabiaba matacabita. Bajarapacuenia panepapona matocabianë. Nexata pijinia peubixu pabita juva. Vitsabapona. Itsiata baitsi jane peubinë apo yapëtae pacuenia peubixu pijacuata juva. ²⁸ Ira raja pejamatabëcueneta naxaniaba peubijava. Copiata pepaboto vitsabaya. Xuacujinae namatonota. Xuacujinae cuainavereta. ²⁹ Itsa baja yaniona peubijava, penotsivi pona penotsinexa. Tspipaji baja penotsimatacabinexa tocopiapatatsi, jai Jesús jivijavabelia.

Pacuenia mostazaxutoyo pejuvicujinae, mostazanae bepimia vitsaba yabara pelivaisi (Mt 13.31-32; Lc 13.18-19)

³⁰⁻³¹ Jesús icatsia jumaisi doce ponëbeje pijajivijavabelia, itsamonaejavabelia ata:

—¿De meta xua pelivaisi jëpa Dioso pijajivi bepimia ayaibitsaëttoxaneto penaexanae-javanexa? Jivi meta peyapëtaenexa ayaibitsaëttoxaneto bepimia Dioso pijajivi penaexanae-javanexa, mostazaxutoyo meta pelivaisicuenia tsipaebianajë. Jumaisinë meta tsane: “Pacuenia mostazaxutoyo pejuvicujinae, bepimia vitsaba mostazanae, bajara pijinia itsane Dioso pijajivi ata. Bepimia Dioso pijajivi ayaibitsaëttoxaneto naexanaena. Mostazaxu raja bitso tsiquirixutoxi daxita peubixuvecua. ³² Itsiata baitsi jane mostazanae itsa juva, bepimia vitsaba. Caevaita pinijinae naexana itsapeubinaenë matatoxenetsia. Nexata baratsui ata pematapenanë exana mostazanaemaxërananëjavata. Bajara pijinia itsane jivi ata. Bepimia ayaibitsaët Dioso pijajivi naexanaena,” janë meta tsane mapacueniaje, jai Jesús pijajivijavabelia, itsamonaejavabelia ata.

Pacuenia Jesús jivi livaisi tsipaebabiaba ëcomparacióncuenia yabara pelivaisi (Mt 13.34-35)

³³ Dioso pitorobilivaisi Jesús tsipaebabiaba jivijavabelia. Dioso pitorobilivaisi Jesús jivi tsipaebabiaba écomparacióncuenia. Pacuenia baja jivi caējēpatsi pejumeyapētaenexa, bajara-pacuenia Jesús tsipaebabiaba. ³⁴ Jesús écomparacióncuenia livaisi tsipaebabiaba bajara-pamonaejavabelia. Itsiata saicaya Jesús ēpijajivijavabelia xaniavaetsia yapētaeyaxanabiaba pajamatabēcuene xaina daxita bajarapalivaisianē.

Pacuenia Jesús itaveta joviboxaneto, malataca yajava, piyajijavami yabara pelivaisi
(Mt 8.23-27; Lc 8.22-25)

³⁵ Dioso pitorobilivaisi Jesús tsipaeba jivijavabelia. Bajarapamatacabi Jesús petsipae-bicujinae itsa baja caniviyotsia, Jesús jumaiti pijajivijavabelia:

—Nicabaliatsi mapapucaxaneto itsapanabeliaje, jai Jesús.

³⁶ Nexata baja Jesús, pijajivi yajava, vecuapona jivi. Pajerata Jesús ecareca, pijajivi ya-java pona. Itsiata itsamonaē pēnaponatsi itsajeranēta. ³⁷ Nexata pinijijoviboxaneto jemata najetaruca. Nexata malataca jera ēnēberena mera epabajarabapona. Nexata baja jera ēnēberena mera vēnēcapona. ³⁸ Jesús itsiata majitanuca jamatejema jeratabufejavavetsina. Namatabēxyaētanuca penamatabēxyaētabiabijavata. Nexata Jesús pijajivi yaitavabatsi. Jesús pijajivi jumaiti:

—jPatajatuxanenē, vaxaitsimi rabaja yaothopaenatsi! ¿Apo jamatabēcuenebējamē tsaja? jai Jesús pijajivi.

³⁹ Nexata Jesús pemajitanucaenēmi naēcotapuna. Pinijijumeta itavetaxuaba jovibo. Jesús jumaiti pucajavabelia, jovibojavabelia ata:

—jVainae ecare baja! jai.

Bajarapacuenia Jesús pejumaitisijavata jovibo baja ajibi tsaxuabi. Daxitapuca baja nexata vainae ecaxuaba. ⁴⁰ Nexata Jesús jumaiti pijajivijavabelia:

—¿Detsa xuajitsia bitso pajunavame? ¿Tsipaji apo payapētaemē Dioso papecaevetsijava? jai Jesús.

⁴¹ Nexata Jesús pijajivi najunaviaca bajarapacuenie petaexae. Ēpamonae najumaiti:

—¿De meta tsipaji maponēje? ¡Itaveta jovibo, malataca ata! ¡Jumecovēnētatsi baja rovia maponēje! ¡Nexata baja jovibo, malataca yajava, ajibi tsaxuabi! najai Jesús pijajivi.

5

Pacuenia pebi, dovathivi peyajavaponaponaenē, Jesús vecuacapitsapa Gerasa nacuata yabara pelivaisi

(Mt 8.28-34; Lc 8.26-39)

¹ Jesús pijajivi barēpata pucaxaneto itsapanabelia, Gerasa nacuayabelia. ² Nexata Jesús jerajavavetsina nonotajuna. Pebi dovathivi peyajavaponaponaenē, kujitabarenatsi jivimēthēanējavaverena. ³ Bajaraponē ponaponabiaba jivimēthēanējavata. Itsajivi ata apo caējēpaetsi pecētsinexa bajaraponē cadenamaētota ata. ⁴ Cadenamaētōnēta picani taxucētabiabatsi anijatonē. Cobecētabiabatsi picani yajava. Itsiata cajena pecobecētsicadenamaētotsi ucutajarababiaba pesaēta. Bajaraxuacujinae petaxucētsicadenamaētotsi pecobeta tsaquibiaxuababiaba. Nexata cadenamaētomi tsiquirijavaxi exanapenētabiaba. Itsajivi ata cajena apo caējēpaetsi pecētsinexa bajaraponē. Tsipaji bitso asaē. ⁵ Bajaraponē petsutonējava, jivi petēpaevi pemēthēcaejava, matacabijebi, meravijebi yajava, ponaponabiaba. Vavajai tsabiabaponaponaē. Ibotonējavabelia natsaquibajarababiabaponapona. ⁶ Bajaraponē itsa taetaba Jesús penajetarucaejava, nexata tajēverena kujinaeponarena Jesúsjavaberenā. Jesús pitabarata pematabacabēta nucajunua. ⁷ Bajaraponē aējai pinijijumeta Jesús pitabarata.

—Jesús, pepo Dioso, athēbētatsia peecaenē, pexēnatomē. ¿Detsa xua jaitame xanējavaberenā? Pexaniacuene bitso cavajētatsi Dioso pitabarata. Nejamatabēcuenebejiobitsipame, jai dovathivi peyajavaponaponaenē Jesúsjavabelia.

⁸ Bajarapacuenia jumaiti dovathivi peyajavaponaponaenē tsipaji Jesús jerajavavetsina penonotajunaejavata, dovathivi peyajavaponaponaenē pemataenenaējavatatsi, Jesús itaveta dovathivi. Jesús jumaiti dovathivijavabelia mapacueniaje:

—jDovathivi, bajaraponē baja pavecuapitsapare! jai Jesús.

⁹ Nexata Jesús jumaiti bajaraponējavabelia:

—¿Detsa pavēnēmē? jai.

Nexata dovathivi peyajavaponaponaenē navēnēpaeba.

—Tavēnē raja León. Tsipaji raja bitso paayabitsoaētōxanetonē, jai dovathivi peyajavaponaponaenē.

¹⁰ Nexata dovathivi pinijicuenia vajēta Jesúsjavabelia itsairabelia pejutsiyanivatsi bajarapairavecua. ¹¹ Nexata bajarajota, imoxoyo petsutojavata, marranobitsaētōxaneto xaevanapa. ¹² Dovathivi bitso vajēca Jesúsjavabelia.

–Paneitorobare marranobitsaëtoخانetojavabelia. Panetocopare patajonenexa bajara pamarranobitsaëtoخانetojavabelia, jai dovathivi.

¹³ Nexata Jesús tocopata pacuenia dovathivi vajęcatsi. Dovathivi baja pebi vecuapit-sapęcatsi. Nexata baja marranobitsaëtoخانetojavabelia dovathivi junua. Bajara pamarranobitsaëtoخانeto jinavanapa anijamilbeje poněbeje. Nexata daxita marranobitsaëtoخانetomi cujinaeyeca. Pucaxaneto itapajanituareca othopareca. Nexata daxita marranobitsaëtoخانetomi meneta bubuna.

¹⁴ Bajara pamarranobitsaëtoخانetomi pevetavanapaevi ręcęceca. Pona, pacuene tane, petsipaebinexa tomarapijivijavabelia, petsipaebinexa vayafotusatojava penaevijavabelia ata. Nexata jivi ponarena petaenexa bajarapacueni. ¹⁵ Nexata dovathivi peyjavaponaponaeñemi bajarapamonae taeyeta Jesús pemuxuneneta. Bajaraponě penaxatatsijava baja naxatateca. Jamatejema baja. Xaniavaetsia eca. Nexata bajarapamonae cujunavatsi Jesús. ¹⁶ Pamonae cuenetanetsi Jesús pejamatejemayaexanaejava dovathivi peyjavaponaponaeñemi, bajarapamonae paeba pepatsivijavabelia daxita pacuene tane. Paeba pacuene ata Jesús exana marranobitsaëtoخانetojavabelia. ¹⁷ Nexata Gerasa nacuapijivi jumaitsi Jesúsjavabelia:

–Pexaniacuene pacavajęcatsi. Ponare baja patajanacuavecuca, jai Gerasa nacuapijivi Jesúsjavabelia tsipaji cujunavatsi.

¹⁸ Jesús baja itsa runareca jera ěněabereca, poně dovathivi peyjavaponaponaeñemi, bitso picani navajęcca Jesús pepęta penaponaeñexa. ¹⁹ Itsiata Jesús apo jejai. Jumaitsi bajaraponějavabelia:

–Ponare nijaboyabelia. Nijamonae tsipaebare papinijicuene Dioso caexana. Tsi-paebare pacuenia ata caitaxutotsoniatane Dioso, jai Jesús dovathivi peyjavaponaponaeñemijavabelia.

²⁰ Nexata baja dovathivi peyjavaponaponaeñemi pona. Taxuxuaba penavajunupaebijava papinijicuene Jesús exanatsi. Bajaraponě navajunupaebapona Decápolisvěně nacujava. Decápolisvěně nacuatē eca diez patomarabeje. Daxitajivi jamatabęcuenenabenajaca itsa jumetanetsi bajaraponě penavajunupaebaponaejava.

Pacuenia Jesús copiaya namutoępatota jamatejemayaexana piavitaneva, pacuenia icatia cotocaevi toasęyaexana Jairo pexęnatovayo, pęcępaevayomi, yabara pelivaisi (Mt 9.18-26; Lc 8.40-56)

²¹ Jesús icatsia pecovęyaberenā jerata naviarena pucaxaneto itsapanaverena. Nexata tajetabojavatarena jivibitsaëtoخانeto Jesús matatoyoronatsi. ²² Nexata bajarajota napatajopa Jairověněně. Bajaraponě judiovi penacaetuatabiabibo pevetsiviyajuvěněně. Jairo itsa taetaba Jesús, nexata Jairo pematabacabęta yaityataeya Jesús pitabarata nucajunua. ²³ Pinijicuenia Jairo vajęta Jesúsjavabelia. Jumaitsi:

–Taxęnatoyo raja netobitso. Najumalipeneta rabaja pęcępaenexa. Pexaniacuene netoexanare. Naxanitsia. Netoperabęjayatsianame necobeta pęcępaeyaniva, jai Jairo.

²⁴ Jejai Jesús. Jesús nexata naponā Jairo pepęta. Nexata jivibitsaëtoخانeto Jesús pepęnaponaevitsi matatoyorotsia cěněnanajetarubenatsi. ²⁵ Bajarapajivibitsaëtoخانeto tuatujęta itsava, pijanacuene pecapunaevatsi, nanajetaruca. Bajarapova pijanacuene pecapunaecujinaetsi doce baja pavaibeje xaina. ²⁶ Bitso nexata bajarapova bejiobi pexainacuene yabara pevaębivitsi pejamatabęcueneta. Tsipaji belia daxita pexainaejavaximi navecuavereta pematamobaponaeta pevaębivitsi. Itsiata apo caevi piavitaneacuene. Biji caranata pevajęnaeyabelia capunaponatsi piavitaneacuene. ²⁷ Nexata bajarapova jumetane itsamonae pecuaciuajijajava Jesús piavitanevi pejamatejemayaexanaponaejava yabara. Nexata bajarapova ponataba Jesús pepęněvelia, jivibitsaëtoخانeto tuatujęalía. Nexata bajarapova tojayataba Jesús penaxatatsijava. ²⁸ Tsipaji cajena bajarapova jamatabęjumaitsi: “Itsa Jesús penaxatatsijava tojayatabianaję, tavitaniejavami nevecuajibi tsane,” jamatabęjai. ²⁹ Nexata bajarapova itsa tojayataba Jesús penaxatatsijava, bajarajota pijanacuenevecuajibitsi baja. Nexata bajarapova pijanacuenevecuajibitso, bajarajota tojayataba pijanacuenevecuajibitsi baja. Nexata bajarapova pijanacuenevecuajibitso, bajarajota tojayataba pijanacuenevecuajibitsi baja. ³⁰ Jesús ata nayapętane pesaęta pejamatejemayaexanaejava pepęněyabelia. Nexata pejayatabijavatatsi Jesús napęněyorotaxuaba. Naęcobaruta. Yanijoba jivijavabelia.

–Ĵipatsa tanaxatatsijava netojayataba? jai.

³¹ Nexata Jesús pijajivi jumaitsitsi:

–Taneme rabaja jivibitsaëtoخانeto pecacěněnanajetarubenaejava. Ĵdetsa xuajitsia: “Ĵipatsa tanaxatatsijava netojayataba?” jamę? jaitsi Jesús pijajivi.

³² Jesús naëcobaruta daxitajivijava petäenexa pajivi tojayatabatsi penaxatatsijava. ³³ Nexata bajarapova neconecojai tsanuca pecajunavi penayapëtaexae Jesús pejamatejemayaexanaejavatsi. Nexata bajarapova najetabarena Jesús pitabarayaberena. Pematabacabëta nucajunua. Nexata daxita pacuene exana, bajarapova tsipaeba Jesúsjavabelia. ³⁴ Nexata Jesús jumaitsi bajarapovajavabelia:

—Xamë nesivajamatabëjumaitsimë: “Jesús penaxatatsijava itsa tojayatabianajë, tavitanejavami nevecuaajibi tsane,” nesivajamatabëjamë. Bajaraxuata jamatejemamë baja. Ponare baja jamatejema. Niavitanejavami rabaja ajibi, jai Jesús bajarapovajavabelia.

³⁵ Bajarapacuenia Jesús pejumaitsanucaejavata namutoepatota, Jairo pijaboverena peponaevi mataenenatsi. Bajarapamonae jumaitsi Jairojavabelia:

—Jairo, nexënatoyo rabaja tëpa. Pëtsa baja matavëjëa jamatabëitonotaponame Jesús, jai bajarapamonae Jairojavabelia.

³⁶ Jesús jumetae ata bajarapajume, itsiata jumaitsi Jairojavabelia:

—Jairo, pëtsa Jesús najamatabëxainame. Najamatabëcuenecopare saya ëxanëjavaberena nexënatovayo pecatoasaënexa, jai Jesús Jairojavabelia.

³⁷ Nexata Jesús, pajivibitsaëtoxaneto pënanajetarubenatsi, pueneta bajarajota. Jesús pona Jairo pijaboyabelia. Jesús saya yajavalia mapamatabëxëyoje: Pedro, Juan, Santiago, Jairo jane baja. Juanbeje Santiagobeje nacaebananëbeje. ³⁸ Itsa baja Jesús palia Jairo pijaboyabelia, tane jivibitsaëto pinijijumeta pematänueyabijava petëpaevayo. ³⁹ Jesús itsa joneya boyalia, jumaitsi bajarapamonaejavabelia:

—Pëtsa bitso pmatänueyabame. Pejanava raja apo tëpae. Saya raja majitanuca, jai Jesús tsipaji yapëtane Jesús piasaëyaxanaejavanexa bajarapovayo.

⁴⁰ Bajarapacuenia Jesús pejumaitsijava, bajarapamonae saya jumecapocaponatsi. Nexata daxita Jesús bovecua pitsapaeyaexana. Itsaxuayolia petëpaevayo boca, Jesús barëjoneya caejiviyobeje saya. Jesús saya barëjoneya mapamatabëxëyoje: petëpaevayo paxa, pena, Jesús pijajivi, acueyabi ponëbeje. Bajarapamatabëxëyoje saya Jesús barëjoneya. ⁴¹ Nexata Jesús petëpaevayo cobepita. Jesús pijajumeta jumaitsi:

—Talita cumi, jai, mapajumetaje pejumaitsijume: “Pejanava, nonotapunare,” pejaijume.

⁴² Bajarapacuenia Jesús pejumaitsijavata, pejanavayo nonotabapuna. Ponapona baja. Bajarapovayo doce pavalbeje xaina. Nexata Jesús peyajavajonevillia pinijicuenia jamatabëcuenenabenajaca bajarapacueni itsa tane. ⁴³ Nexata Jesús pinijicuenia jumaitsi:

—Pëtsa itsajivi ata patsipaebame mapacuenije, jai Jesús.

Bajaraxuacujinae Jesús jumaitsi pejanavayo penajavabelia:

—Nexënatovayo pexaejava rajure, jai.

6

Pacuenia Jesús naviata pijanacuayabelia, Nazaret tomarabelia, yabara pelivaisi (Mt 13.53-58; Lc 4.16-30)

¹ Jesús baja, pijajivi yajava, pona Capernaum tomaravecuca. Naviata pijanacuayabelia, pevitsabitomarabelia. ² Judïovi penacueraevetsimatacabita Jesús taxuxuaba jivi livaisi petsipaebijava judïovi penacaetuatabibibota. Ayalbitsaëtoxaneto pejumetaevitsi sivajamatabëcuenenabenajacatsi. Nexata bajarapamonae Jesús jamatabëcuenaeabiatanetsi. Bajarapamonae Jesús yabara najumaitsi mapacueniaje:

—¿Detsa meta verena maponë capsapa mapajamatabëcuenelivaisije? ¿Detsa pacuenia meta yapëtane daxita mapacuenije? ¡Pitsipinijicueni maponë exanaje, vaxaitsi abaxë caeto ata apo taetsi! ¡Matapania matanetsije! ³ Maponëje vaxaitsiyajuvënënë. Carpinteronë. María pexënato. Bajaraponë peyuyapijivi Santiago, José, Judas, Simón. Papetiriavi ata vajatomarata jinavanapa, bajaraponë peyuyapijivi, najai bajarapamonae Jesús yabara.

Nacaetomarapijivixae, bajarapamonae Jesús apo jumexaniataetsi. ⁴ Nexata Jesús jumaitsi bajarapamonaejavabelia:

—Bajara maitsapibije. Diosojumepaebivi profetavi itsanacuapijivi yaiyataeyabiabatsi. Itsiata pijanacuapijivi, pijavirivi, pijamonae ata, apo yaiyataeyabiabitsi, jai Jesús.

⁵ Nexata Jesús bajarajota jivi ayalbitsaëtojavabelia pinijicueni pexanaejava apo tsitaexanae. Tsipaji apo jumecovënëtsitsi. Saya caejiviyobeje pivitanevi pecobeta jayata. Jamatejemaya exana. ⁶ Nexata Jesús bitso najamatabëxaina. Tsipaji jivi apo jumecovënëtsitsi. Bajaraxuacujinae Jesús tsiquiritomaraxijava Dioso pitorobilivaisi jivi tsipaebanajetaruca.

Pacuenia Jesús pijajivi itoroba Dioso pitorobilivaisi jivi petsipaebanajetarubenaexa yabara pelivaisi

(Mt 10.5-15; Lc 9.1-6)

⁷ Jesús junata pijajivi doce ponëbeje penacaetuatsinexa. Nexata Jesús pijajivi itoroba janëbeje tsaponae. Jesús pijajivi pecaëjëpaejamatabëcuenetsi jamatabëcuenecaëjëpaeyaexana

dovathi peyajavajinavanapaevi pevecuacapitsapaponaenexa. ⁸ Jesús jane baja pijajivi penaropobivajēnae, Jesús jumaitsi pijajivijavabelia mapacueniaje:

–Pētsa itsacuenejava ata pacaponame panijanamutonexa. Pētsa pacaponame panemarue ata, dorō ata, palata ata. Ēnaeboyō saya pacaponare. ⁹ Itsiata pataxunaponare panenataxutabijava. Caejava panenaxatatsijava pajumaponare. Pētsa anijacamisabeje pacaponame. ¹⁰ Itsajota papatabiabianame, caebota pamajitabiabianame. Pētsa panatixitaponame itsaboyabelia panemajitsinexa. Matapania icatsia itsajavabelia itsa paponae name, bajarapabovecua papitsapaenae. ¹¹ Patomarata apo pacacopiapitsi tsane, itsa apo jitsipaenua tsane papecanamuxunaevetsinexa panetsipaebilivaisi, nexata paponae name bajarapatomaravecua. Paneponaevajēnae bajarapatomarata panataxuatsapērēvarēbianame. Bajarapacuenia itsa panataxuatsapērēvarēbianame, bajarapatomarapijivi yapētaena Diosojavabelia penaneconitsicuene apo papecacopiapitsixae papecanamuxunaevetsinexa panetsipaebilivaisi. Xaniajanē pacuenia pacatsipaebijitsiatsi. Pamatacabi Dioso jivi naneconitsiaexanaena, bajarapamatacabi Dioso bitso naneconitsiaexanaenatsi patomarapijivi apo pacacopiapitsi tsane. Paneconivajētota bajayata Dioso naneconitsiaexana Sodomā tomarapijivimi, Gomorra tomarapijivimi ata, bajarapaneconivajēto matatoxenetsia Dioso naneconitsiaexanaenatsi patomarapijivi apo pacacopiapitsi tsane, jai Jesús pijajivijavabelia.

¹² Nexata jane baja Jesús pijajivi naropoba Dioso pitorobilivaisi jivi petsipaebanajetarubenaenexa. Jesús pijajivi naropoba anijanēbeje tsaponae. Nexata Jesús pijajivi jumai tsaponae jivijavabelia:

–Pacopabare baja pibisiacuene paneexanabiabijava. Panajamatabēcuene pēnēyorore Diosojavabelia, jai tsaponae.

¹³ Jesús pijajivi dovathi peyajavajinavanapaevi vecuacapitsapapona. Piavitanevi ata mataexabapona aceiteranēta. Bajarapacuenia Jesús pijajivi jamatejemayaexanapona piavitanevi.

*Pacuenia bajayata Juanpijinē jivibautisabinēmi beyaxuabatsi yabara pelivaisi
(Mt 14.1-12; Lc 9.7-9)*

¹⁴ Herodes, Galileanacua pevetsinē. Nexata Herodes jumetane itsamonae jamatabēcuenenavēxaniabiaya pejumaitsiyava Jesús yabara: “Juanpijinē raeta jivibautisabinēmi icatsia asaē petēpaecujinae. Bajaraxuata caējēpatsi Dioso pesaēta pinijicuene pexanaenexa,” pejaijava itsamonae jamatabēcuenenavēxaniabiaya Jesús yabara, Herodes jumetane.

¹⁵ Itsamonae pijinia jumai tsaponae Jesús yabara:

–Bajayata raeta ponēmi ponapona, profeta Elīspijinēmi, baja raeta ponē, jai tsaponae itsamonae.

Itsamonae pijinia jumai tsaponae Jesús yabara:

–Diosojumepaebinē profeta raja. Tsipaji rabaja pacuenia bajayata profetavi jinavanapa, bajara icatsia maponē itsije, jai tsaponae itsamonae.

¹⁶ Bajarapacuenia itsamonae jamatabēcuenenavēxaniabiaya pejumaitsaponaenexa Jesús yabara, Herodes itsa jumetane, Herodes ata jamatabēcuenenavēxaniabiaya jumaitsi Jesús yabara:

–Maraeta Juanpijinēmije, ponēmi bajayata xanē tajajivi vēsiucutaxuabiaexanajē. Icatsia raeta asaē petēpaecujinae, jai Herodes jamatabēcuenenavēxaniabiaya Jesús yabara.

¹⁷ Bajarapacuenia Herodes jumaitsi tsipaji abaxē Juanpijinē itsa asaē, Herodes pijajivi, vajabitsaēvi, itoroba Juanpijinē pevaetabinexatsi. Nexata vajabitsaēvi Juanpijinē cobecētsiaya caponatsi penaneconitsivi pejebabiabiboyalia. Bajarapacuenia Herodes pijajivi itoroba Herodes pijava, Herodiasva, pejamatabēcueneta. Herodiasva picani copiata pita Felipe, Herodes pejuyapijinē. Nexata Herodes pejuyapijinē pijava yacajērēta. ¹⁸ Nexata Herodes pejuyapijinē pijava peyacajērētsixae, Juanpijinē abaxē itsa apo vaetabitsi, muxujioba Herodes. Juanpijinē jumaitsi Herodesjavabelia:

–Acuenebi raja nejuyapijinē pijava nepitsijava,” jai Juanpijinē Herodesjavabelia.

¹⁹ Nexata bajarapacuenia Juanpijinē pejumaitsixae, itoyatsi Herodiasva. Nexata abaxē Juanpijinē itsa ponapona penaneconitsivi pejebabiabibota, bajarapova picani Juanpijinē jamatabēbeyaxuabiaexanatsi. Itsiata apo caējēpaetsi. ²⁰ Tsipaji Herodes yapētane Juanpijinē bitso pejamatabēxanepanaenēcuene. Nexata Herodes yayiatane Juanpijinē. Bajaraxuata Herodes apo tocopatsi pijava pejamatabēcueneta pebeyaxuabinexatsi Juanpijinē. Juanpijinē itsa caucauijai tsabiabi Herodesjavabelia, nexata picani Herodes jamatabēbējai tsabiabi pijaneconi yabara. Itsiata Herodes xaniavaetsia namuxunaevetabiaba. ²¹ Nexata

pamatacabi Herodes najamatabēnapita penaexanaematacabi, najamatabēxaina pexani-
 fiesta pexanaenexa. Bajarapafiestajava Herodes junata pijaboyaberena jivi ayaibit-
 saētoخانeto penabaninexa. Junata Herodes pijajivi, pamonae tovetatsi pijairanē. Ju-
 nata vajabitsaēvi pevetsivinua. Junata petuxanevinua, Galilea nacuata pejinavanapaevi.
 Nexata bajarapafiestajavata Herodiasva toyapēxanepanatsi Juanpijinē pebeyaxuabiaex-
 anaenexatsi. ²² Herodiasva toyapēxanepanatsi tsipaji pexēnatoyojoneya Herodes pejunatsivi
 pebarēnabanecaejavalia pijacujirucenia caevayo peyavajibijava. Nexata Herodes peju-
 natsivi bitso barēitajitsipa pejionēyo peyavajibijava. Nexata Herodes najumecapanepaeya
 pexaniajaijumeta jumaitsi pejionēyojavabelia:

—Nevajēre xua jitsipame. Carajutsianatsi raja. ²³ Pacuenejava nevajētsianame, carajut-
 sianatsi. Itsa nevajētsianame taneevetsiaexanaenacua ata, tuatuajējava carajutsianatsi, jai
 Herodes najumecapanepaeya pejionēyojavabelia.

²⁴ Nexata bajarapovayo pitsatabalia. Jumaitsi penajavabelia:

—¿Detsamē ra xua vajētsianajē? jai penajavabelia.

Nexata Herodiasva pexēnatoyojavabelia jumaitsi:

—Juan jivibautisabinē pematabocoto vajēre, jai.

²⁵ Nexata bepjjia bajarapovayo jopajoneya Herodes peecaejavabelia. Jumaitsi Herodes-
 javabelia:

—Jitsipajē cajena tanerajutsinexamē platota Juan jivibautisabinē pematabocoto, jai
 bajarapovayo Herodesjavabelia.

²⁶ Nexata Herodes pinijicuenia bejamatabējiobi tsanajetsireca. Herodes nexata
 acuenebi: “Jume,” pejaijava. Tsipaji baja Herodes najumecapanepaeya jumaitsi pe-
 jionēyojavabelia pexaniajaijumeta daxita pejunatsivi pitabarata. ²⁷ Nexata Herodes bepjjia
 itoroba vajabitsaēnē petocarenanexatsi Juan pematabocoto. ²⁸ Vajabitsaēnē nexata pona
 penaneconitsivi pejebabiabiboyabelia. Juanpijinēmi vēsiucutaxuabatsi. Juanpijinēmi pe-
 matabocoto vajabitsaēnē carena platota. Nexata pejanava rajutatsi. Nexata bajarapovayo
 juya pena rajuta. Nexata baja Herodiasva yapētane capanepaeya baja Juanpijinē pebeyaxu-
 abijavatsi.

²⁹ Nexata Juanpijinē pijajivi itsa vēnētanetsi pebeyaxuabijavatsi, bajarapamonae
 ponarena Juanpijinē pebocaejavaberena. Pitatsi petēpaenē. Pepitsicujinaetsi Juanpijinē
 pijajivi mēthētatsi.

Pacuenia Jesús pexaejava rajuta cinco mil ponēbeje yabara pelivaisi
 (Mt 14.13-21; Lc 9.10-17; Jn 6.1-14)

³⁰ Jesús pitorobivi, apóstolevi, naviabanajetarubena Jesúsjavaberena. Nexata bajarapa-
 monae Jesúsjavabelia navajunupaeba daxita pacuene exanavanapa, pacuenia ata jivi livaisi
 tsipaebavanapa. ³¹ Nexata Jesús jumaitsi bajarapamonaejavabelia:

—Naxanitsia. Ponatsi pesajinaejavabelia. Nacueraevetsianatsi caeepatoyo, jai Jesús.

Bajarapacuenia Jesús jumaitsi pijajivijavabelia tsipaji jivibitsaētoخانetonē topatabia-
 batsi. Itsamonae naviabaponabiaba. Itsamonae juya patabiaba. Nexata Jesús pijajivi
 pebarēnabaninexa, apo cuenecaējēpabiabitsi. ³² Nexata Jesús ēpijajivi jerata yajavapona
 itsabelia jivi ajibi. ³³ Itsiata jivi ayaibitsaētoخانeto pētānatsi Jesús peponaejava. Nexata
 itsabelia Jesús pona, matatsēnē pēnacujinaerubenatsi daxita tomaranēpijivi. Caranata Jesús
 pevajēnaeyabelia pata bajarapamonae. ³⁴ Itsa baja Jesúsvana nonobajunaya jeravecua, Jesús
 tane jivibitsaētoخانeto. Nexata Jesús bajarapamonae itaxutobejiobiatane. Nexata Jesús
 bajarapamonae sivajamatabējumaitsi mapacueniaje:

—Pacuenia baitsi ovejabitsaētoخانeto itsa toajibitsi pevetsinētsi, bajara itsi mapamonae-
 aeje, sivajamatabējai Jesús.

Nexata Jesús ayaicuenia livaisi tsipaeba bajarapamonaejavabelia. ³⁵ Itsa baja bitso
 caniviyoysia, Jesús pijajivi cujibarenatsi. Jumaitsitsi:

—Caniviyo rabaja bitso. Majota ajibi pexaejava. Tsipaji itsajivi ata pijabo apo xainae.

³⁶ Itorobare baja jivi peponaenexa imoxoyo penaetomaranējavabelia pecomuacaenexa
 pexaejava, jaitsi Jesús pijajivi.

³⁷ Jesús nexata jumaitsi pijajivijavabelia:

—Paxamē parajure pexaejava, jai.

Nexata Jesús pijajivi jumaitsi:

—¿Paponaenajē tsaja tomarabelia patacomuatsinexa pan doscientos denariota bajarapa-
 monae pexaenexa? jai Jesús pijajivi.

³⁸ Jesús icatsia jumaitsi pijajivijavabelia:

—¿Detsa papanbēbeje paxainame paxamē? Pataema copiata, jai Jesús.

Jesús pijajivi petaecujinae tsipaeba Jesúsjavabelia. Jumaitsi:

—Paxainajé saya cinco papanbêbeje, anijanëyobeje dujuainëyobeje yajava, jai Jesús pijajivi.

³⁹ Nexata Jesús itoroba daxitajivi penaenexa ponajavata. ⁴⁰ Nexata bajarapamonae pepobitsaëtônê natsanaeya ena. Caebitsaëtota enapona cien pajivibeje. Itsabitsaëtota enapona cincuenta pajivibeje. Bajarapacuenia caebitsaëto canacujitsia enapona. ⁴¹ Nexata Jesús pita cinco papanbêbeje, anijanëyobeje dujuainëyobeje yajava. Athêbêa benaëcotsia. Jumaitsi Diosojavabelia:

—Pexaniacuene panetoexaname. Panerajutame pataxaejava, jai Jesús.

Bajaraxuacujinae Jesús pan epatsicacapona. Pijajivijavabelia rajutapona pepatsicacaejava. Nexata juya Jesús pijajivi pan tsicobetsana jivijavabelia. Dujuaijavaxi ata tsicobetsana jivijavabelia. ⁴² Daxita xaniavaetsia nabane. ⁴³ Bajaraxuacujinae Jesús pijajivi caetuata pan, dujuai yajava, jivi peyajuvênëcopabejebijavanê. Nexata vênêba doce xuabeje bemapirecuenia pexanaejavanê. ⁴⁴ Pamonae pexaejava xane, ayaibitsaëttoxaneto. Itsiata êpebijivi namataêjêtatsi cinco mil ponêbeje.

Pacuenia Jesús mene itaboxoya najetaruca yabara pelivaisi

(Mt 14.22-27; Jn 6.16-21)

⁴⁵ Jesús jivi ayaibitsaëttoxaneto pexaejava perajutsicujinae, Jesús pijajivi bepija runaeyaexanareca jera ênêabereca. Jesús pijajivi copiata itoroba penicabinexa puca itsapanabelia, Betsaida tomarabelia. Jesús baja jivi naviabiaexana. Bajaraxuata abaxê caenê nacopatanuca bajarajota. ⁴⁶ Itsa baja jivi napêvereta penaviabijiva, Jesús junaya petsutojumabetsia pevajêtsinexa Diosojavabelia. ⁴⁷ Itsa baja bitso meravi, Jesús pijajivi pucaxaneto itapavecua tajê baja yanajetarubenalia. Jesús abaxê bajarapaepatota caenê nacopatanucarena pucaxanetoitapatarena. ⁴⁸ Nexata Jesús tane pijajivi petoayapêbejêjavatsi pevaetsijava. Tspaji bitso joviboxaneto ayai pevajênaeverena. Bajaraxuacujinae bajayacunua, ajena matabacijitsia, Jesús pijajivi pecovêvelia imoxoyotanajetaruca. Jesús najetaruca mene itaboxoya. Rovia picani xenetsijitsia. ⁴⁹ Jesús pijajivi itsa tanetsi mene itaboxoya penajetarucaejava, Jesús pijajivi jamatabêjumaitsi:

—jPetêpaenêmi raeta pejumape najetaruca! jamatabêjai.

Nexata Jesús pijajivi vavajai tsaxuabi ayajumeta. ⁵⁰ Tspaji daxita Jesús pijajivi tane bajarapacuenia penajetarucaejava. Nexata Jesús pijajivi jamatabêcuenenajunaviaca. Nexata Jesús bepijiayo jumaitsi pijajivijavabelia:

—Xanê raja. Pêtsa panecujinavame. Pajamatejemamêre saya, jai Jesús pijajivijavabelia.

⁵¹ Nexata baja Jesús nonolia bajarapajera ênêabelia. Ajibi baja tsaxuabi jovibo. Nexata Jesús pijajivi pinijicuenia jamatabêcuenenajunaviaca. Tspaji tane jovibo, malataca yajava, Jesús piajibiaexanaejava. ⁵² Jesús baja picani pijajivi copiyava tane, pan tsiquirijavayomi ata, jivibitsaëttoxanetovavabelia Jesús perajutsijava. Itsiata Jesús pijajivi apo jamatabêcueneyapêtae Jesús pecaêjêpaenêcuenetsi pinijicueni pexanaenexa. Abaxê bajarapamonae ajamatabêcuenetaja.

Pacuenia Jesús jamatejemayaexana piavitanevi Genesaret nacuata yabara pelivaisi

(Mt 14.34-36)

⁵³ Jesús pijajivi jerata yajavapata puca itsapanabelia. Pata Genesaret nacuayabelia. Peyapatsijera bajarajota puca itapata querataruta. ⁵⁴ Nexata Jesús, pijajivi yajava, nonotajunaya jeravecua. Bajarajota bepija jivi yapêtanetsi Jesúsucueni. ⁵⁵ Nexata Jesús pepatsijava penatsipabineja, navajunucujinaejinaruta daxita bonêjava. Nexata piavitanevi pijacamaxita yavêtacarapatatsi itsajota jivi jumetane Jesús pepatsijava. ⁵⁶ Jesús pata tsiquiritomaraxijava, pinijitomaranêjava ata, tomarapênêya penaebonêjava ata. Daxitajava, itsa patomarata Jesús patabiaba, bajarapatomaranêjava callejavata, jivi tojebabiabatsi piavitanevi. Piavitanevi pecapatsivi pinijicuenia jumai tsabiabi Jesúsjavabelia:

—Pexaniacuene bitso netoexanare. Tocopatsianame maponêje pecatojayatsinexa naxatatsijavacopia, jai tsabiabi.

Nexata daxita pamonae Jesús penaxatatsijavacopia tojayataponatsi, jamatejema baja tsaponae piavitanejavamivecua.

7

Pacuenia Jesús tsipaeba xua jivi jamatabêcuenebijianatsi yabara pelivaisi

(Mt 15.1-20)

¹⁻⁴ Daxita judíovi catsiteca pijasalinaivimi pijacuene. Judíoviyajuvênêvi, pamonae fariseovi naexana, bajarapamonae bitso catsiteca pijasalinaivimi pijacuene daxita judíovi matatxenetsia. Jamatabêcuenenavêxaniabiaya jamatabêjumai tsabiabi:

—Itsa catsitecadjë tajasalinaivimi pijacuene, nexata Dioso aneconijibia netaena, jamatabëjai tsabiabi.

Nexata bajarapamonae pijasalinaicuenia anijatonë xaniavaetsia itsa apo napënanacobequiatsi, pexaejava apo xaeyabiabi. Itsajota pexaejavacuene canajetabiaba, bajaraverena itsa naviba pecomuacaecujinae, bajarapamonae pijasalinaicuenia xaniavaetsia itsa apo napënanacobequiatsi, pexaejava apo xaeyabiabi. Bajarapamonae pematatsënëa navitsia itsacujiruxi ata, pijasalinaivimi pijacujiru, catsiteca. Bajarapamonae tazaxi, mera peyajebinëanë ata, pecasetsinëanë ata, camanë ata, pijasalinaivimi pijacuenia xaniavaetsia quiatibiaba. Nexata judíovi pecujarubivi Jerusalén tomaraverena pata. Nexata judíovi pecujarubivi, fariseovi yajava, cujibarenatsi Jesús. Nexata bajarapamonae tane Jesús pijajivi judíovi pijasalinaicuenia anijatonë napënanacobequiatsinejeva penabanijava. Bajaraxuata bajarapamonae jumaitsi Jesúsjavabelia:

—Jesús, nijajivi naneconita Diosojavabelia. ⁵ Tsipaji nijajivi apo jume-covënëtsiajinavanapae vajasalinaivi pijacuene. Nijajivi itsa xane pexaejava, anijatonë napëna apo nacobequiatabiabi, jai bajarapamonae Jesúsjavabelia.

⁶ Jesús nexata jumaitsi bajarapamonaejavabelia:

—¡Paxamë saya jivi paneyamaxëitojorobivil Diosojumelivaisipaebinëmi profeta Isaíaspijinë baja cajena bajayata tajëvelia xaniavaetsia pacavajunupaeba. Bajayata Dioso tajëvelia pejumaitisijava paxamë yabara profeta Isaíaspijinë peyaquinaelivaisita jumaitsi mapacueniaje: Bajarapamonae nejitsipaena saya pijumeta. Itsiata pepo tanejitsipaejamatabëcuene nevecuatajë tsane. ⁷ Saya baitsi bajarapamonae pijajumaitisita tsane: “Pacajitsipatsi,” nejai itajara tsane. Itsiata apo xaniajai tsane. Bajarapamonae saya jivi tsipaebapon-aena pejamatabëcuene pijilivaisi. Pepo taitorobilivaisi apo tsipaebi tsane, jai tajëvelia Dioso pejumaitisijava paxamë yabara Isaíaspijinë peyaquinaelivaisita, jai Jesús bajarapamonaejavabelia.

⁸ Jesús icatsia jumaitsi fariseovijavabelia, judíovi pecujarubivijavabelia ata:

—Paxamë Dioso papecaitorobicuenia apo paexanaemë. Caranata ëvajasalinaivi pijacuene pacatsitecame. Nexata vajasalinaivi pijacuenia xaniavaetsia paquiatabiabame mera peyajebinëanë. Xaniavaetsia paquiatabiabame tazaxi ata. Pematatsënëa navitsia itsacujiru ata pacatsitecame. ⁹ Apo pajumecovënëtsimë Dioso pitorobilivaisi vajasalinaivi pijacuene panecatsitecaenexa. Apo pajumecovënëtsi atamë Dioso pitorobilivaisi, jamatabëcuenenavëxaniabiaya pajamatabëjumaitisimë tsabiabi: “Pexaniacuene raja exanajë,” pajamatabëjamë tsabiabi. ¹⁰ Bajayata Dioso najumecopata Moiséspijinëta. Bajarapalivaisi jumaitsi: “Axa yayiataema. Ena ata yayiataema. Pajivi pibisiacuenia bijatane paxa, pena ata, bajarapajivi pabeyaxuare,” jai Dioso Moiséspijinëta penajumecopatsilivaisi. ¹¹⁻¹² Itsiata baitsi jane paxamë jivi pamuxubijipenetabiabame peyayataeyaniva paxajivi, penajivi ata. Paxamë pajumaitisimë tsabiabi mapacueniaje: “Axa, ena ata, itsa cavajëta neyavenonaenexa, nexata itsa apo jitsipaemë neyavenonaejava, jumaitisimë tsane mapacueniaje: ‘Daxita xua pacarajutsipatsibeje picani patacayavenonaenexabeje, daxita bajaraxua tsipaebajë baja tarajutsinexa Diosojavabelia. Nexata baja acuenebi patacarajutsinexabeje,’ jamë tsane neyavenonaeyaniva,” pajamë tsabiabi jivijavabelia. ¹³ Nexata caranata Dioso pejumaitisijume: “Axa yayiataema. Ena ata yayiataema,” pejaijume, paxamë jivi pacopabiaexanaponame. Tsipaji paxamë patsipaebaponame saicaya vajasalinaivimi pijalivaisi. Itsalivaisianë ata pematatsënëa saicayacuenia patsipaebaponame Dioso pitorobilivaisivecua, jai Jesús judíovi pecujarubivijavabelia, fariseovijavabelia ata.

¹⁴ Nexata icatsia Jesús junata jivi. Jumaitsi jivijavabelia:

—Daxita paxamë panenamuxunaevera xaniavaetsia patanejumeyapëtaenexamë. ¹⁵ Xua jivi pecubota xane, pexaejavënae napëna anijatonë apo nacobequiatsi ata, apo jamatabëcuenebijianaetsi. Apo vënananeconitsi Diosojavabelia. Baitsi rajane xua jivi najamatabëxaina pejamatabëëthëtoetsina, xua ata pibisiacuenia cuacuajai, bajara baitsi jane xua jivi bajamatabëcuenebijianaetsi. ¹⁶ Pajivi jamatabënejumeyapëtanepatacatsipaebilivaisi, nenamuxunaevetsi xaniavaetsia, jai Jesús.

¹⁷ Itsa baja Jesús jivivecua natixita, boya joneya. Nexata boyalia pijajivi yanijobatsi bajarapalivaisi. ¹⁸ Nexata Jesús jumaitsi pijajivijavabelia:

—¿Paxamë ata tsarovia abaxë apo panejumeyapëtaemë? Daxitacuene raja pexaejava jivi xae ata, apo jamatabëcuenebijianaetsi. Diosojavabelia apo vënananeconitsi. ¹⁹ Tsipaji raja jivi pexaejava apo tsijamatabëëthëjonetsi. Saya pënëareca joneca. Bajaraxuacujinae icatsia vecuapitsapatsi, jai Jesús.

Bajarapacuenia Jesús jumaitsi Jesús pijajivi peyapëtaeyaxanaenexa pacuenia daxitacuene jivi pexaejava xae ata, apo pibisiacuene.

²⁰ Icatsia Jesús jumaitsi:

—Baitsi rajane jivi pejamatabëëthëtojavavetsina, papibisiajamatabëcuene pitsapa, bajara baitsi jane xua jivi jamatabëcuenebijianatsi. ²¹ Tsipaji rabaja jivi pejamatabëëthëtojavavetsina pitsapa pibisiacuene penajamatabëxainaxana. Pitsapa pebi pijava pevēcuanamatayajitsi jamatabëcuenenexa. Pitsapa petiriavijavabelia pebi penaperabëquenetsiatæ jamatabëcuenenexa. Pitsapa pavitonë pebeyaxuabijamatabëcuenenexa. ²² Pitsapa penacobetoxotsijamatabëcuenenexa. Pitsapa itsamonæ pecobecovë penaxinaeyabijamatabëcuenenexa. Pitsapa piacujirubejejamatabëcuenenexa. Pitsapa itsamonæ peyamaxëitorobjamatabëcuenenexa. Pitsapa itsamonæ pexainaecuene pecobecaëbijamatabëcuenenexa. Pitsapa itsajivi pibisiacuena pebaracuaicuaijai jamatabëcuenenexa. Pitsapa ayajiamatabëcuenejivi penataejamatabëcuenenexa. Pitsapa saya jema peponaponæjamatabëcuenenexa. ²³ Daxita bajarapajamatabëcuene jivi pejamatabëëthëtojavavetsina pitsapa. Nexata bajarapacuene jivi jamatabëcuenebijianatsi, jai Jesús pijajivijavabelia.

Pacuenia Jesús itsanacuapijiva pexënatoyo tojamatejemayaexana yabara pelivaisi (Mt 15.21-28)

²⁴ Jesús baja Genesaret nacuavecua pona. Naropota itsanacuayabelia, itsabelia eca anijatomarabeje, Tiro tomarabeje Sidón tomarabeje. Nexata Jesús bajarapanacuatalia bota patajopa. Muetsia picani Jesús patsijitsia. Itsiata acunebi muetsia pepatsijava. ²⁵ Nexata bepíjia petiriva vënëlivaisitaetabatsi Jesús pepatsijava. Nexata petiriva pata Jesúsjavaberenata. Nexata bajarapova yayiataeya Jesús pitabarata pematabacabëta nucajunua. Bajarapova pexënatoyo dovathi yajavaponapona. ²⁶ Bajarapova sirofeniciaviriava, apo judíoiva. Nexata Jesúsjavabelia jumaitsi:

—Pexaniacuene bitso netoexanare. Taxënatovayo netovecuacapsapare dovathi, jai bajarapova.

²⁷ Nexata Jesús jumaitsi bajarapovajavabelia:

—Copiaya abaxë veyavenonajë tajanacuapijivi, judíoivi. Tsipaji apo xanepanae xamë itsanacuapijivamë copiaya tacayavenonaenexa. Xamë copiaya itsa cayavenonæjitsipatsi, nexata pacuenia pejevaxi pexaejavaminexa yacajërëtsipajë tarajutsinexa avirixijavabelia, bajara itsinë tsipae, jai Jesús bajarapovajavabelia.

²⁸ Itsiata baitsi jane bajarapova ajumesaë tsaponæ. Icatsia jumaitsi Jesúsjavabelia:

—Xaniajamë rabaja picani. Itsiata neyavenonare. Tsipaji avirixi ata mesa bëxëpanata itsa nubena, nexata pejevaxi pexaepanpërë itsa othopareca mesa bëxëpanareca, banaxane avirixi ata. Bajara pijinia pacuenia itsiata itsanacuapijiva atanë, neyavenonare, jai bajarapova Jesúsjavabelia.

²⁹ Nexata icatsia Jesús jumaitsi bajarapovajavabelia:

—Xaniavaetsia nejumecanaviatame. Nviare baja nijaboyabelia. Dovathi rabaja catovecuapitsapatsi nexënatovayo, jai Jesús.

³⁰ Itsa baja bajarapova pijaboyabelia pata, pexënatovayo taeyabuata jamatejema baja pebocæjava camata. Nexata yapëtane pexënatovayo baja petovecuapitsapæjavatsi dovathi.

Pacuenia Jesús jamatejemayaexana bitso siyanë, apo pejumetaenë, piajumecëcënë, yabara pelivaisi

³¹ Jesús baja naropota Tiro nacuavecua. Najetaruca Sidón nacuajava. Bajaraxuacujinae najetaruca Decápolis nacuajava. Bajaraxuacujinae patajopa Galilea pucaxanetojavabelia. ³² Bajarajota jivi tocapatatsi siyanë, bitso apo pejumetaenë, piajumecëcënë. Nexata bajarapamonæ jumaitsitsi Jesúsjavabelia:

—Jesús, pexaniacuene panetoexanare. Panetojayare maponëje pejumetaenexa, pecuaicuaijainexanua, jai bajarapamonæ.

³³ Nexata Jesús jivivecua bajaraponë barëpona pesaicaeyojavabelia. Nexata Jesús pecobesitota namataenetsia muxuvojobëta. Bajaraxuacujinae nacobesioniata. Ebarëtojayata. ³⁴ Nexata Jesús athëbëa benaëcotsia. Jesús athëbë venajumalixuabica. Nexata Jesús pijajumeta jumaitsi bajaraponëjavabelia:

—¡Efata! jai.

“Efata,” pejaijume Jesús pijajumeta, mapajumetaje pejumatsijume: “¡Muxuvojorucaremial!” pejaijume.

³⁵ Bajarapacuenia Jesús pejumatsijavata, bajaraponë muxuvojorucalia baja. Jumetane jane baja. Peebarëto ata jane baja xanepana. Natsipaeba baja xaniavaetsia. ³⁶ Nexata Jesús jumaitsi bajaraponë petocapatsivitsijavabelia:

—Pëtsa papaebame itsamonæjavabelia pacuene exanajë maponëjavabellaje, jai picani Jesús asaëyata.

Itsiata bajarapamonae jumeitavetsi atatsi, bitso tsipaebapona jivijavabelia. ³⁷ Nexata pamonae jumetane bajarapalivaisi, pinijicuenia jamatabëcuenenabenajaca. Bajarapamonae jumaitsi:

—Bajaraponë, Jesús, daxitacuenevitane pexainaevi ata xaniavaetapona. Siyavi ata, bitso apo pejumetaevimi ata, jumetaeyaexanapona. Apo pecaëjêpaevitsi ata pecuaicuaijajava, cuaicuaijiaeyaexanapona xaniavaetsia, jai bajarapamonae Jesús yabara.

8

Pacuenia Jesús rajuta pexaejava bejamatabëcuene cuatro mil pajivibeje yabara pelivaisi (Mt 15.32-39)

¹ Itsamatacabi Jesús jivibitsaëttoxaneto muxunanacaetuatsi. Nexata bajarapamonae penabaninexa, bajarajota pexaejava apo xinae. Nexata Jesús junata pijajivi. Jesús jumaitsi pijajivijavabelia mapacueniaje:

² —Netsitabejiobi baja rovia mapamonaeje. Tsipaji baja ajena acueyabi pamatacabibeje xaina xanëjavata pejinavanapaecujinae. Pemarue baja tovereverecatsi. ³ Itsa meta itorobijitsipajê pijabonëjavabelia peponaenexa pexaejava xaenejeva, apo asaë meta tsipae namutua peponaejava. Tsipaji raja itsamonae pata tajëverena, jai Jesús pijajivijavabelia.

⁴ Nexata Jesús pijajivi jumaitsi:

—¿Detsa jane pacuenia pexaejava berajutatsi? Majotaje ajibi pexaejava. Tsipaji itsajivi ata pijabo apo xinae, jai Jesús pijajivi.

⁵ Nexata Jesús yanijoba pijajivijavabelia.

—¿Detsa papanbêbeje paxainame? jai.

Nexata Jesús pijajivi jumaitsi:

—Siete papanbêbeje paxainajê, jai.

⁶ Nexata Jesús itoroba daxitajivi penaenexa irata. Nexata Jesús pita siete papanbêbeje. Nexata Diosojavabelia Jesús jumaitsi:

—Pexaniacuene panetoexaname. Panerajutame pataxaejava, jai.

Bjaraxuacujinae Jesús epatsicacapona pan. Nexata Jesús pepatsicacapan rajutapona pijajivijavabelia. Nexata juya Jesús pijajivi bajarapapan tsicobetsana daxitajivi pexaenexa. ⁷ Dujuainëxinua xaina. Icatsia Jesús jumaitsi Diosojavabelia dujuainëxi yabara:

—Pexaniacuene panetoexaname. Panerajutame dujuainëxi, jai.

Nexata icatsia pijajivi itoroba petsicobetsanaenexa daxitajivi bajarapadujuainëxi. ⁸ Daxitajivibitsaëttoxaneto nabane xaniavaetsia. Nexata peyajuvënëcopabijavanë Jesús pijajivi caetuata. Vënëba siete xuabeje bemapirecuenia pexanaejavanë. ⁹ Pexaejava nabane bejamatabëcuene cuatro mil pajivibeje. Nexata jane baja pexaejava pexaecujinae, Jesús jivi naviabiaexana pijabonëjavabelia. ¹⁰ Bjaraxuacujinae Jesús, pijajivi yajava, runareca jera ënëabereca. Jesús pijajivi barëpona Dalmanuta nacuaayabelia.

Pacuenia fariseovi Jesús itorobatsi Dioso pesaëta pinijicuene pexanaejava petsitaexanaenexa picani yabara pelivaisi

(Mt 16.1-4; Lc 12.54-56)

¹¹ Fariseovi Jesúsjavaberena pata. Bajarapamonae jamatabëcuenejëbiaya jumeno-taponatsi. Nexata bajarapamonae jumaitsi Jesúsjavabelia:

—Jesús, Dioso pesaëta pinijicuene exanare. Nexata pacacueneyapëtaenatsi Dioso pepacuene athëbëvetsica pecaitorobinëcuenetsica, jai.

¹² Nexata bajarapamonae yabara Jesús bitso jamatabëcuenebëjai. Nexata Jesús athëbë venajumalixuabica. Jumaitsi:

—¿Detsa xuajitsia panevajëcame pinijicuene patacatsitaexanaenexa pataneyapëtaenexamë pepacuene Dioso athëbëvetsica taneitorobinëcuenetsica. Xaniajanë pacuenia pacatsipaebijitsiatsi. Itsiata apo pacatsitaexanaetsi tsane pinijicuene taexanaejava, jai Jesús.

¹³ Nexata baja Jesús bajarapamonae vecuapona. Icatsia runareca jera ënëabereca. Pucaxaneto itsapanabelia baja Jesús pona.

Pacuenia Jesús pijajivi muxujioba fariseovi petsipaebilivaisi pejumecovënëtsiyanima yabara pelivaisi

(Mt 16.5-12)

¹⁴ Jesús pijajivi nacofënëta pemarue. Nexata saya caepanbëyo capona jerata. ¹⁵ Nexata Jesús pijajivi muxujioba pejumecovënëtsiyanima fariseovi itsa tsipaebatsi saicayacuenia Dioso pejumelivaisivecua. Jesús jumaitsi pijajivijavabelia mapacueniaje:

—Panëjumetaema. Xania panayajivitaema fariseovi pijalevadura, jai Jesús pijajivijavabelia.

Bajarapacuenia Jesús jumaitsi fariseovi petsipaebilivaisi, nacuaevevtsinē ata, Herodes, petsipaebilivaisi, Jesús pijajivi pejumecovēnētsiyaniva.

¹⁶ Itsiata Jesús pijajivi apo jumeyapētaetsi. Bajaraxuata Jesús pijajivi nabarēcuaiquaijai bajarapacuenia Jesús pejumaitsijume yabara. Jesús pijajivi najumaitsi:

—Jesús nacajumaitsi: “Xania panayajivitaema fariseovi pijalevadura,” nacajai. Baja raeta pacuenia Jesús nacajumaitsi pan apo vajacaponaxae, najai Jesús pijajivi.

¹⁷ Jesús pijajivi jamatabēcueneyapētane bajarapacuenia jamatabēcuenenavēxaniabiaya penajumaitsijava levadura yabara. Nexata Jesús jumaitsi pijajivijavabelia:

—¿Detsa xuajitsia panajumaitsimē: “Baja raeta pacuenia Jesús nacajumaitsi pan apo vajacaponaxae,” panajamē? Paxamē abaxē apo panejumeyapētaemē xua yabara pacajumaitsitsi. Pajamatabēcuenetajamē bitso. ¹⁸ Pan yabara raja apo pacajumaitsitsi. Pan itsa namatavenonaejitsipatsi, necaējēpa taexanaenexa. ¿Apo panajamatabēnapitsimē tsipaji pacuenia exanaxē pamatacabi pan namatavenonatsi? ¹⁹ Pacujinae epatsicacajē cinco papanēmibeje panetsicobetsanaenexa cinco mil ponēbejevavelia, bajarapacujinae peyajuvēnēcopabijavanē, ¿detsa xuabeje pavēnētame bemapirecuenia pexanaejavanē? jai Jesús pijajivijavabelia.

Nexata Jesús pijajivi jumaitsi:

—Doce xuabeje pavēnētajē, jai.

²⁰ Jesús icatsia jumaitsi:

—Pacujinae epatsicacajē siete papanēmibeje panetsicobetsanaenexa cuatro mil pajivebejevavelia, bajarapacujinae peyajuvēnēcopabijavanē, ¿detsa xuabeje pavēnētame bemapirecuenia pexanaejavanē? jai Jesús.

Nexata Jesús pijajivi jumaitsi:

—Siete xuabeje pavēnētajē, jai.

²¹ Nexata Jesús jumaitsi pijajivijavabelia:

—¿Panejumeyapētaneme tsabaja pan yabara apo patacajumaitsijava? Xanē pacajumaitsi: “Xania panayajivitaema fariseovi pijalevadura,” pacajaitsi. Bajarapacuenia pacajumaitsitsi panejumecovēnētsiyaniva fariseovi petsipaebilivaisi, panejumecovēnētsiyaniva nacuaevevtsinē ata Herodes. Tsipaji bajarapamonae pacatsipaebiana saicayacuenia Dioso pejumelivaisivecua, jai Jesús pijajivijavabelia.

Pacuenia Jesús itaxutoxaniavaeta bitso pitaxutotsēcēnaenē, apo petaenē tsiquirijavayo ata, yabara pelivaisi

²² Jesús, pijajivi yajava, patajopa Betsaida tomarata. Nexata Jesús tocanajetarubenatsi bitso pitaxutotsēcēnaenē, apo petaenē. Piniicuenia vajēcatsi Jesús pitaxutojayatsinexa bajaraponē pitaxutoxanepanaxenaxa. ²³ Nexata Jesús cobepita. Barēpona pesaicaeyojavabelia, tomarapēnēyavelia. Nexata bajarajotalia Jesús peionitota itaxutoxaba. Itaxutojayata. Bajaraxuacujinae Jesús yanijoba.

—¿Cacaējēpa tsabaja netaejava? jai Jesús.

²⁴ Nexata bajaraponē naēcota. Jumaitsi:

—Taniji pebijivi pejinavanapaejaya. Itsiata saya benetsita naejavanē, jai bajaraponē.

²⁵ Nexata icatsia Jesús itaxutojayata. Bajara jane xaniavaetsia naitaxutobabatsiaya naēcota. Itaxutoxanepana jane baja. Xaniavaetsia baja tane. ²⁶ Nexata Jesús jumaitsi bajaraponējavabelia:

—Naviare nijaboyavelia. Pētsa abaxē poname tomaravelia. Pētsa paebame itsajivijavabelia ata pacuene caexanatsi, jai Jesús.

Pacuenia Pedro jumaitsi Jesúsjavavelia: “¡Xamē raja Cristomē! jai yabara pelivaisi (Mt 16.13-20; Lc 9.18-21)

²⁷ Jesús, pijajivi yajava, najetaruca. Pona pepatsinexa Cesarea de Filipovēnē tomara-jumaverena penaetomaraxijavavelia. Namutua abaxē penajetarubenaejavata Jesús jumaitsi pijajivijavabelia:

—¿Detsa jivi jumai tsabiabi xanē yabara? ¿De tsaeta xanē ponēnē? jai Jesús pijajivijavabelia.

²⁸ Nexata Jesús pijajivi jumaitsi:

—Itsamonae xamē yabara jumai tsabiabi: “Juanpijinēmi raeta jivibautisabinēmi icatsia asaē,” jai tsabiabi. Itsamonae pijinia jumai tsabiabi: “Diosojumepaebinēmi raeta, profeta Elíaspijinē, ponēmi bajayata ponapona, icatsia asaē,” jai tsabiabi. Itsamonae pijinia jumai tsabiabi: “Bajayata raeta Diosojumepaebivimi profetavimiyajuvēnēnē icatsia asaē,” jai tsabiabi xamē yabara, jai Jesús pijajivi.

²⁹ Nexata icatsia Jesús jumaitsi pijajivijavabelia.

—¿Detsa nexata paxamē pajamatabēitsimē xanē yabara? ¿Detsa xanē ponēnē? jai Jesús pijajivijavabelia.

Nexata Pedro jumaitsi Jesúsjavabelia:

—Xamë cajena Cristomë, athëbëvetsica Dioso pecaitorobinëtsica jivi necapanepaenexa, jai Pedro Jesúsjavabelia.

³⁰ Nexata Jesús pijajivijavabelia jumaitsi:

—Pëtsa bajarapacuenia itsajivijavabelia papaebame. “Cristo raja,” pajamë pëtsa xanë yabara, jai Jesús.

Pacuenia Jesús tajëvelia navajunupaeba pebeyaxuabijavanexatsi yabara pelivaisi
(Mt 16.21-28; Lc 9.22-27)

³¹ Jesús pebeyaxuabijavanexatsi, tajëvelia navajunupaeba pijajivijavabelia. Jumaitsi mapacueniaje:

—Xanë, Daxitajivi Pematapijinënë, pinijicuenia bejiobinë tsane. Judíovi pijaancianovi, sacerdotevi penamatacaitorobivina, judíovi pecujarubivina, apo nejumecovënëtsi tsane Cristonëcuenenë. Nexata bitso nebejiobiaexanaena. Bajaraxuacujinae nebeyaxuabiana. Itsiata baitsi jane tatëpacujinae, acueyabi maticabita, icatsia asaënë tsane, jai Jesús pijajivijavabelia tajëvelia penavajunupaebijavata pebeyaxuabijavanexatsi.

³² Jesús jumenapebetsiaya pijajivi xaniavaetsia tsipaeba mapajumeje. Nexata Pedro junata Jesús pebarëponatabinexa pesaicaeyojavabelia. Nexata Pedro pesaicaeyojavatalia jumaitsi Jesúsjavabelia:

—Pëtsa bajarapacuenia cuaicuaijamë netëpaejavanexa yabara, jai Pedro Jesúsjavabelia.

³³ Nexata Jesús Pedrovecua napënëyorotaxuaba. Taenuca pijajivi penaejavabelia. Nexata Jesús napënëyorotsia jumaitsi tsanucacae Pedrojavabelia:

—¡Dovathi, nevecuanatixire! Tsipaji xamë apo jitsipaemë pacuenia Dioso jitsipa taexanaenexa. Saya ëjivi pacuenia jitsipa taexanaenexa, jitsipame, jai Jesús.

³⁴ Nexata Jesús junata pijajivi, daxita jivibitsaëto yajava. Jumaitsi bajarapamonaejavabelia:

—Pajivi jitsipa tanepënaponaejava, bajarapajivi copatsi pejitsipaecuenia pexanaenexa penajamatabëxainabibijavami. Exanaponaponae taitorobicuenia. Najamatabëcueneveretsinua bejiobiaexanaejitsia atatsi, beyaxuabijitsia atatsinua, Dioso pejumelivaisi yabara piijamatabëcuenesä tsaponaponaeenexa. Nexata jane baja xuacujinae nepënaponaena. ³⁵ Pajivi exanaponaponae penatojitsipaecuenia, apo xainae tsane maticabi apo pevereverecejava. Pajivi xanë tajamatabëcueneta copata penatojitsipaecuenia pexanabibijavami, jivi tacapanepaelivaisitanexa pejamatabëcuenetanua, bajarapajivi xainaena maticabi apo pevereverecejava. ³⁶ Pajivi exanaponaponae penatojitsipaecuenia, bajarapajivi Diosovecua naxuabiana. Nexata bajarapajivi daxitacuenenë xainae ata mapanacuapijicuenije, itsiata nacuerata. Tsipaji pexainaecuenenë apo capanepae tsanetsi Diosojavabelia. ³⁷ Tsipaji acuenebi tsane itsajivi ata pematamotsinexa penaxuabiyaniava Diosovecua. ³⁸ Pajivi tajajivitonë ata, Dioso apo pejumecovënëtsi tuatujëta, pibisicuenia pexanaevi tuatujëta ata, navënëlivaisicaura tsane xanë tajajivitonëcuenenë, tanejumecovënëtsijava ata yabara, nexata juya xanë bajarapajivi, tajajivitonë ata, tajajivitonëcuenenë vënëlivaisicauranë tsane taxa Diosojavabelia. Bajarapajivi vënëlivaisicauranë tsane pamatacabi icatsia patsianicajë. Baitsi pamatacabi xanë, Daxitajivi Pematapijinënë, angelevi yajava, patsianicajë, pamatacabi yajavapatsianicajëna taxa Dioso pijapenivenivenaecotia, jai Jesús pijajivijavabelia.

9

¹ Icatsia Jesús jumaitsi jivijavabelia:

—Xaniajanë pacuenia pacatsipaebijitsiatsi. Daxita paxamë patëpaenejevamë, Dioso taxuabiana pijajivi pevetsijava mapanacuataje. Nexata paxamëyajuvënëvi pepuatae tsane Dioso petaxuxuabijava pijajivi pevetsijava mapanacuataje, tēpaena. Dioso raja pijajivi evetsiana pinijijamatabëcuenesaëta, jai Jesús jivijavabelia.

Pacuenia Jesús caepatoyo perabënivenivenataba yabara pelivaisi
(Mt 17.1-13; Lc 9.28-36)

² Jesús petëpaejavanexa tajëvelia penavajunupaebicujinae, seis pamatacabibecujinae, Jesús pijajivi, acueyabi ponëbeje, barëpona pinijitsutoxanetojumabetsia. Jesús barëjunaya mapamatabëxëyoje: Pedro, Santiago, Juan. Bajarapamatabëxëyo Jesús barëjunaya pinijitsutoxanetojumabetsia. Nexata petsutojumatsia Jesús perabënivenivena bajarapamonae pitabarata. ³ Jesús penaxatatsijava bitso nivenivena. Bitso niojai. Mapanacuataje pexaniaquiatsiva ata apo cajëpaetsi bajarapacuenia peniojaiyaxanaenexa. ⁴ Jesús pijajivi bajarajota tane jemata penaitajëtsijava bajayata petëpaenëmibeje, Eliaspijinëbeje Moiséspijinëbeje. Jesús barëcuaicuaijaisi bajaraponëbeje. ⁵ Nexata Pedro jumaitsi Jesúsjavabelia mapacueniaje:

—¡Patajatuxanenë, pijacuaxae panebarëponame! Pacatoexanaenatsi acueyabi pabobërëtoheje. Itsabobërëto xamënexa tsane. Itsabobërëto Moisésnexa tsane. Itsabobërëto Elíasnexa tsane, jai Pedro Jesúsjavabelia.

⁶ Bajarapacuenia Pedro jumaitsi Jesúsjavabelia canaëjëtsinejeva. Tsipaji bitso bajarapamonae najunaviaca. Nexata apo yapëtae pacuenia jumaitsijitsia. ⁷ Nexata daxita bajarapamonae pematatsënëvetsica itarërëbo mataacataxuatatsi. Nexata bajarapamonae jumetane bajarapaitarërëbojavavetsica Dioso pejumajitsijava.

—Mara ponë taxënatato, tasivanëje. Panamuxunaevere bajaraponë, jaitsica Dioso Jesús pijajivijavabelia.

⁸ Bajarajota bajarapamonae itsa naëcobarëcëpalia Jesúsjavabelia, ajibi baja bajaraponëbeje. Caenë baja Jesús nuca.

⁹ Nexata Jesús pijajivi itsa barërunanucaponaica petsutojumavetsica, jumeitaveta pijajivi. Jumaitsi pijajivijavabelia:

—Pëtsa patsipaebame itsajivi ata pacuene pataneme. Matapania xanë, Daxitajivi Pematapijinë, icatsia asaënë tsane tatëpaecujinae, nexata jane baja matapania patsipaebianame, jai Jesús pijajivijavabelia.

¹⁰ Bajarapamonae, acueyabi ponëbeje, jumecovënëta pejumajitsicueniatsi. Itsiata ëpamonae nayanijobabiaba.

—Jesús jumai tsabiabi: “Tatëpaecujinae icatsia asaënë tsane,” jai tsabiabi. ¿De tsamëra pajamatabëcuene xaina bajarapalivaisi? najai tsabiabi bajarapamonae.

¹¹ Nexata Jesús pijajivi yanijoba Jesúsjavabelia. Jesús pijajivi jumaitsi:

—Patajatuxanenë, ¿detsa xuajitsia judiövi pecujarubivi jumai tsabiabi: “Bajayata ponëmi ponapona, Elíaspijinë, petëpaecujinae icatsia asaë tsane. Bajaraponë copiata patsiana. Bajaraxuacujinae patsiana Cristo, ponë Dioso athëbëvetsica itorobijitsiatsica pepo vajanacacapanepaenëxata jane baja,” jai tsabiabi? jai Jesús pijajivi Jesúsjavabelia.

¹² Nexata Jesús jumaitsi pijajivijavabelia:

—“Copiata Elíaspijinë patsiana. Nexata bajaraponë jamatabëcuenexanetsiana daxitajivi,” itsa jai, Juanpijinëmi jivibautisabinëmi yabara jumaitsi. Nexata baja xaniajai pacuenia judiövi pecujarubivi jumaitsi. Tsipaji baja Juanpijinë tavajënaeya jivi jamatabëcuenexanetanajetaruca. Xanë, Daxitajivi Pematapijinë, athëbëvetsica Dioso nitoroba jivi tacapanepaenexa. Nexata xanë yabara tajëvelia Dioso pejumelivaisibaxutota jumaitsi mapacueniaje: “Bejiobi tsane pinijicuenia. Apo jitsipaetsi tsane. Naitaxutojematsianatsi,” jai xanë yabara tajëvelia Dioso pejumelivaisibaxutota, jai Jesús pijajivijavabelia.

¹³ Jesús icatsia jumaitsi pijajivijavabelia Juanpijinëmi yabara:

—Xaniajanë pacuenia pacatsipaebijitsiatsi. Elíaspijinë rabaja patajopa. Pepatsicujinae baja exanatsi daxita pacuenia jamatabëexanatsi. Nexata exanatsi pacuenia baja cajena Dioso pejumelivaisibaxutota tajëvelia jumaitsi bajaraponëmi yabara, jai Jesús pijajivijavabelia Juanpijinëmi yabara.

Pacuenia Jesús jamatejemayaexana pejevaxinë, dovathi peyajavaponaponaenë, yabara pelivaisi

(Mt 17.14-21; Lc 9.37-43)

¹⁴ Jesús pijajivi, acueyabi ponëbeje, petsutojumabetsia pebarëponaecujinae, icatsia barënaviatsica. Itsamonae Jesús pijajivi pepuenetsivijavabetsica, barënaviatsica. Nexata Jesús tane pijajivi jivibitsaëtöxaneto pevajënae pematatoyoronaejavatsi. Jesús tanenua judiövi pecujarubivi anaeya pejumenotsijavatsi Jesús pijajivi. ¹⁵ Nexata bajarapamonae itsa taerëcëpa Jesús, daxita jamatabëcuenebarëyaya cujinaeyeca Jesúsjavabelia pebacabobinexatsi Jesús. ¹⁶ Nexata Jesús jumaitsi bajarapamonaejavabelia:

—¿Detsa xua yabara panajumeanaenotame pinijicuenia? jai Jesús.

¹⁷ Caenë bajarapajivi bitsaëtöxanetojajuvënë jumaitsi Jesúsjavabelia:

—Jesús, mara picani taxënatonëyo, dovathi peyajavaponaponaenëyo, catocanajetarucatsije. Maponëyoje dovathi apo netonatsipaebiaexanaetsi. ¹⁸ Itsa raja dovathi vaetababiabatsi, irata xuababiabatsi. Nexata bajarajota pecuiothamu tsabiabi. Vonoquiraquira-jainua tsabiabi. Daxitanëyo aperabëbaba tsatababiabireca. Picani raja nijajivijavabelia jumajitsinë: “Panetovecuacapsapare dovathi,” janë. Itsiata bajarapamonae apo caëjëpaetsi tanetovecuacapsapaenexa, jai bajaraponë Jesúsjavabelia.

¹⁹ Jesús nexata jumaitsi pijajivijavabelia:

—¡Paxamë baja rovia apo pajumecovënëtsimë Dioso papecayavenonaejavanexa! Bajaraxuata apo pacajamatabëcuenecaëjëpae pejevaxinë panevecuacapsapaenexa dovathi. ¿Detsa paepatojebi abaxë paxamëjavata ponaponaenajë? ¿Detsa paepatojebi abaxë paxamëjavabelia ajamatabëcuenesaënë tsaponapona tsane patanejumecovënëtsinexamë? Panetocarenamëre pejevaxinë, jai Jesús pijajivijavabelia.

²⁰ Nexata tocarenatsi Jesús pejevaxinē. Dovathi itsa tanetsi Jesús, nexata icatsia bajara-jota dovathi pejevaxinē tēpajoneyaexanatsi. Irata xuabatsi pejevaxinē. Nexata pejevaxinē natorenaba irata. Pethamu pitsapa pecuibuatsina. ²¹ Nexata Jesús yanijoba pejevaxinē paxajavabelia.

—¿Detsa pamatacabibeje xaina petaxuxuabicujinaetsi mapacueneye? jai Jesús.

Nexata pejevaxinē paxa jumaitsi:

—Penacuetojavaveliacujinae cajena taxuxuabatsi. ²² Bajayajebi picani isotojavaliala dovathi netoxuababiabaliatsi. Menialia ata netoxuababiabaliatsi. Beyaxuabijitsiatsi bajarapacuenia. Xamē itsa cacaējēpa itsacuenia ata taneyavenonaenexamē, initaxutotso-niataema! ¡Neyavenonare! jai pejevaxinē paxa Jesúsjavabelia.

²³ Nexata Jesús jumaitsi pejevaxinē paxajavabelia:

—Pajivi jumecovēnēta Dioso peyavenonaejavanexatsi, bajarapajivi Dioso yavenonatsi daxita xua namatavenona, jai Jesús.

²⁴ Nexata pejevaxinē paxa aējai. Jumaitsi:

—¡jumecovēnētajē baja cajena! ¡neyavenonare bitso orijibia tajumecovēnētsinexa! jai bajaraponē Jesúsjavabelia.

²⁵ Nexata Jesús itsa tane jivibitsaētoxfaneto penacaetuataponaejava Jesúsjavabereña, nexata Jesús itaveta dovathi. Jumaitsi:

—Dovathi, xamē pejevaxinē apo nenatsipaebiaexanaenē. Apo nejumetaeyaex-anaenēnuā. Xanē caitavetatsi. Pitsapare mapapejevaxinēvecuaje. Pētsa baja icatsia junuame matavējēa maponēyojavaberenaje, jai Jesús dovathijavabelia.

²⁶ Nexata dovathi pejevaxinē icatsia aējaiyaexanatsi. Vecuapitsapatsi jane baja. Puenetabuatatsi bepetēpaenēyo. Nexata itsamonae bajarajota jumaitsi:

—Pejevaxinē rabaja tēpa, jai bajarapamonae.

²⁷ Nexata Jesús cobepita pejevaxinē. Cobevaetabiaya yotsina. Nexata pejevaxinē nonotabapuna.

²⁸ Nexata xuacujinae Jesús boya itsa joneya, Jesús pijajivi jumaitsi:

—¿Detsa xuajitsia meta paxanē apo panecaējēpae patavecuacapitsapaenexa dovathi? jai Jesús pijajivi.

²⁹ Nexata Jesús jumaitsi pijajivijavabelia:

—Mara paviria dovathije apo jitsipae pepitsapaejavaje. Matapania panexaejava apo paxaemē tsipae panevajētsinexa asaēyata Diosojavabelia panecapitsapaenexa dovathi, pitsapaejitsipa, jai Jesús pijajivijavabelia.

Pacuenia icatsia Jesús tajēvelia navajunupaeba pebeyaxuabijavanexatsi yabara pelivaisi (Mt 17.22-23; Lc 9.43-45)

³⁰ Jesús pejevaxinē dovathi pevecuacapitsapaecujinae, Jesús baja, pijajivi yajava, pona. Nexata Jesús, pijajivi yajava, najetaruca Galilea nacujajava. Jesús jitsipa pijajivi pe-barēnajarucaenexa bajaraxuayo itsajivi ata yapētaenejevatsi. ³¹ Tsipaji Jesús pebeyaxuabi-javanexatsi, tajēvelia navajunupaebapona pijajivijavabelia. Jumaitsi taponae Jesús pijajivi-javabelia mapacueniaje:

—Xanē, Daxitajivi Pematapijinēnē, necanajetsiana itsamonae pecobeyabelia. Bajarapamonae nebeyaxuabiana. Itsiata baitsi jane tanebeyaxuabicujinae, acueyabi matacabita, icatsia asaēnē tsane, jai taponae Jesús pijajivijavabelia.

³² Itsiata pijajivi apo jumeyapētaetsi. Bajarapamonae ajumeura Jesúsjavabelia peyani-jobinexa bajarapalivaisi yabara.

Pacuenia Jesús pijajivi: “¿Detsa ponē vaxaitsiyajuvēnēnē nacavecuayajamatabēcuenenē bitso?” najai tsanajetarubenaē yabara pelivaisi

(Mt 18.1-5; Lc 9.46-48)

³³ Jesús pijajivi barēpata Capernaum tomarata. Jesús pijajivi pebarēpatsicujinae, boyalia itsa barējoneya Jesús, yanijoba pijajivijavabelia.

—¿Detsa pitsicuene yabara namutua bitso panajumenotanajetarubename? jai Jesús.

³⁴ Nexata Jesús pijajivi moya. Tsipaji Jesús pijajivi namutua najumaitsi tsanajetarubenaē:

—¿Detsa ponē vaxaitsiyajuvēnēnē nacavecuayajamatabēcuenenē bitso? najai tsanaje-tarubenaē Jesús pijajivi.

³⁵ Nexata Jesús eca. Junata pijajivi, doce ponēbeje. Jumaitsi pijajivijavabelia:

—Pajivi jitsipa ayajamatabēcuenējivi penaexanaenexa daxitajivi matatoxenetsia, bajarapajivi bevelijamatabēcuenējivi natae peyavenonaenexa daxitajivi, jai Jesús pijajivijavabelia.

³⁶ Bajaraxuacujinae Jesús cobepita pejevaxinēyo. Pijajivi pitabarata nuteta. Bajaraxuacujinae Jesús isapita. Jumaitsi pijajivijavabelia:

³⁷ –Pajivi copiapita tanejumečovēnētsijiviyo, mapitsipejevaxinēyo ataje, xanē taniji tanecopiapitsijava. Pajivi necopiapita, ēxanē apo necopiapitsi. Ponē nitoroba, neyajavacopiapita, jai Jesús pijajivijavabelia.

Pacuenia Jesús jumaitsi pijajivijavabelia itsa vēnēlivaisitane itsanē dovathi jivivecua pecapitsapaejava Jesús pevēnēta yabara pelivaisi
(Mt 10.42; Lc 9.49-50)

³⁸ Jesús pijajivitonē, Juan, jumaitsi Jesúsjavabelia:

–Tajatuxanenē, pataniji itsanē nevēnēta dovathi jivivecua pecapitsapaejava. Itsiata bajaraponē apo paxanēyajuvēnēnē. Nexata paitavetajē bajaraponē dovathi jivivecua pecapitsapaponaejava, jai Juan.

³⁹ Nexata Jesús jumaitsi Juanjavabelia:

–Pētsa paitavetame bajaraponē. Tspiji raja pajivi pinijicuene pexanaejava exana tavēnēta, bajaraxuacujinae acuenebi bajarapajivi tanebaranatsipaebinexa pibisiacuenia. ⁴⁰ Tspiji raja pajivi pibisiacueni apo najamatabēxainae vaxaitsijavaberena, bajarapajivi nacajamatabēcueneyavenona. Bajarapajivi bevaxaitsijamatabēcuenējivi. ⁴¹ Xaniajanē pacuenia pacatsipaebijitsiatsi. Pajivi tsiquirijavayo ata mera pacarajutsiana paneapaenexa patajajivixaemē, bajarapajivi pepacuene Dioso matamotsianatsi mera papecarajutsimatamo, jai Jesús Juanjavabelia.

Pacuenia Jesús pijajivi muxujioba itsajivi ata pibisiacueni pexanaeyaexanaeyaniva yabara pelivaisi
(Mt 18.6-9; Lc 17.1-2)

⁴² Icatsia Jesús jumaitsi pijajivijavabelia:

–Pajivi pibisiacueni exanaeyaexanaejitsipa mapitsipejevaxijivixi ataje, tanejumečovēnētsiyajuvēnējiviyo, bajarapajivi Diosojavabelia bitso naneconitsipa. Nexata Dioso ayaiacuenia naneconitsiaexanaejitsipatsi. Nexata pajivi najamatabēxaina pibisiacueni pexanaeyaexanaenexa tanejumečovēnētsivijavabelia, abaxē pibisiacueni exanaeyaexanaenejeva, bajarapajivi bevēsicētatsi ibotoxanetojavabelia. Nexata bajarapajivi yamaēya, ibotoxaneto yajava, bexuarecatsi pucaxaneto tuatuajēareca. Bajarapajivi bexuarecatsi bitso penaneconitsiyaniya Diosojavabelia pibisiacueni itsa exanaeyaexana tanejumečovēnētsivijavuvēnēvi. ⁴³ Bajaraxuata panecobeta pibisiacueni itsa paexaname, panacobe-caucure. Itsiata xanepana panejonenexa cobemataxuacaeya apo pevereverecaenacuajavabelia. Biji rajane apo xanepanae tsipae panejonenexa infernojavabelia anijacobebeje yajava, itsajota isotocotia apo itaxupae caeto ata. ⁴⁴ Bajarajota apo tēpae oro, jivivixaevi. Isotocotia ata apo itaxupae caeto ata. ⁴⁵ Itsa panetaxuta ata pibisiacueni paexaname, panataxuacure. Itsiata xanepana panejonenexa taxumataxuacaeya apo pevereverecaenacuajavabelia. Biji rajane apo xanepanae tsipae panejonenexa infernojavabelia anijataxubeje yajava. ⁴⁶ Bajarajota apo tēpae oro, jivivixaevi. Isotocotia ata apo itaxupae caeto ata. ⁴⁷ Paneitaxutota ata panetaejava yabara pibisiacueni itsa paexaname, panaitaxutocajure. Itsiata xanepana panejonenexa pacaeitaxutojivimē apo pevereverecaenacuajavabelia, Dioso pijanacuayabelia. Biji rabiji apo xanepanae tsipae panejonenexa anijaitaxutobeje yajava infernojavabelia. ⁴⁸ Bajarajota apo tēpae oro, jivivixaevi. Isotocotia ata apo itaxupae caeto ata.

⁴⁹ Dajubinē jivi itsa beyaxuaba Diosojavabelia ofrendacuenia pevi perajutsinexa, viexaba yajota pevixanepanaenexa. Bajara pijinia pacuenia pejamatabēcuenexanepanaenexa, daxita Dioso pijajivi ata jamatabēcuenējēbianatsi mapanacuataje. ⁵⁰ Yajo raja xanepana. Itsiata yajo pexaicaejavami itsa ajibi tsipae, apo xanepanae tsipae itsacuenējavayonexa ata. Bajara pijinia pacuenia paxamē ata pajamatabēcuenētsimē tsipae Diosojavabelia, itsa apo pavecua-paneapemē tsipae papecajamatabēcueni ējēta-ponaejava. Nexata pajamatabēcuenesaēmēre panejamatabēcuenexanepanaenexa Diosojavabelia. Pajinavanapare xaniavaetsia itsamonaejavabelia ata, jai Jesús pijajivijavabelia itsajivi ata Jesús pijajivi pibisiacueni pexanaeyaexanaeyaniva.

10

Pacuenia Jesús jivi livaisi tsipaeba penacojiobinē pijava pexuabiyaniya yabara pelivaisi
(Mt 19.1-12; Lc 16.18)

¹ Jesús baja pona Capernaum tomaravecua. Pona Judea nacuayabelia. Bajaraxuacujinae Jordánmene itsapanabelia, paia, Jesús pona. Bajarajotalia icatsia jivibitsaētoxaneto pata Jesúsjavaberena. Nexata icatsia Jesús livaisi tsipaeba bajarapamonae. Tspiji baja cajena Jesús livaisi petsipaebanajetarucaenē. ² Nexata fariseovi Jesús cujibarenatsi petsipaebilivaisi yabara jamatabēcuenējēbiaya peyanijobinexatsi. Nexata Jesús bijiaya itsa jumecanaviata, neconitsijitsiatsi. Nexata fariseovi jumaitsi Jesúsjavabelia:

—¿Xanepana tsaja penacojiobinē pijava pexuabinexa? jai.

³Jesús nexata jumaitisi fariseovijavabelia:

—¿Detsa pacuenia bajayata Moiséspijinē pacaitoroba panijavajivi panexuabiyaniya? jai Jesús.

⁴Nexata fariseovi jumaitisi Jesúsjavabelia:

—Moiséspijinē tocopata, ponē pijava jamatabēxuaba, pexuabinexa. Itsiata baitsi jane Moiséspijinē tocopata, ponē pijava xuabijitsia, copiaya petoyaquinaenexa cuyalatobaxuto pijavajavabelia. Nexata ponē pijava xuabijitsia, copiaya pijava toyaquinabiaba pitavetsilivaisi pexuabinexa jane baja pijava. Bajarapacuenia pexanaenexa, ponē pijava jamatabēxuaba, Moiséspijinē tocopata, jai fariseovi Jesúsjavabelia.

⁵Nexata Jesús jumaitisi fariseovijavabelia:

—Moiséspijinē raja bajarapacuenia pacatocopata paneajamatabēcuenelivaisitajaxae.

⁶Pamatacabi Dioso taxuxuaba nacua pexanaejava, bajarapamatacabit Dioso exana pebi, pijava yajava. ⁷Bajaraxuata pebi itsa nacojioba pijavajavabelia, banatsata paxavecua, pena atavecua. ⁸Nexata Dioso tane anijajivimibeje becaejivi. Nexata Dioso apo tae beanijajivibeje. Becaejivi saya tane Dioso. ⁹Bajaraxuata itsanē ata apo bexuabi pijava. Tspaji Dioso pejamatabēcueneta napitsiaexanatsibeje, jai Jesús fariseovijavabelia.

¹⁰Bajaraxuacujinae Jesús pijajivi pijaepato itsa barēnacopata bota, nexata Jesús pijajivi yanijobatsi bajarapacue yabara. ¹¹Nexata Jesús jumaitisi pijajivijavabelia:

—Ponē pijava pexuabicujinae, itsava icatsia itsa pita, bajaraponē pibisiacue exana pevitota. Nexata naneconita Diosojavabelia. Tspaji itsava jaita pepo pijavavecua. Dioso cajena abaxē bajaraponē pexuabiva pepo pijavacuenia totanetsi. ¹²Bajara pijinia itsi petiriva ata pamona pevecuanaviatsicujinae, itsanē icatsia itsa pitatsi. Bajarapova pibisiacue exana pevitota. Nexata naneconita Diosojavabelia. Tspaji itsanē jaita pepo pamonavecua, ponē abaxē Dioso totanetsi pamonacuenia, jai Jesús pijajivijavabelia.

Pacuenia Jesús jumaitisi pejevaxijivixijavabelia yabara pelivaisi

(Mt 19.13-15; Lc 18.15-17)

¹³Jesúsjavaberena itsamonae pejevaxijivixi tocataponatsi Jesús pejayataponaenexa pecobeta. Nexata Jesús pijajivi itaveta pexi pecapatsivi. Jesús pijajivi jumaitisi pexi pecapatsivijavabelia:

—Pētsa patocataponame panexi Jesúsjavaberena, jai.

¹⁴Nexata Jesús itsa tane bajarapacuenia pijajivi pejumaitisjiva, Jesús jamatabēcueneanapanaxuareca. Jumaitisi pijajivijavabelia:

—Pētsa paitavetame. Pacopare pejevaxijivixi pepatsinexa xanējavaberena. Mapitsipejevaxijivixije jumeabinejeva, xaniavaetsia bajumecovēnēta palivaisi tsipaebatsi. Nexata pamonaē jitsipa pejonejava Dioso pijanacuayabetsia, bajara pijinia pacuenia jumeabinejeva xaniavaetsia bejumecovēnēta Dioso pejumelivaisi. ¹⁵Xaniajanē pacuenia pacatsipaebijitsiatsi. Mapitsipejevaxijivixije itsa jumecovēnēta palivaisi tsipaebatsi, bajumecovēnēta xaniavaetsia jumeabinejeva. Bajara pijinia pacuenia jumeabinejeva, xaniavaetsia bejumecovēnēta Dioso pejumelivaisi pamonaē jitsipa pejonejava Dioso pijanacuayabetsia, jai Jesús pijajivijavabelia.

¹⁶Nexata Jesús isapitapona pejevaxijivixi, caejiviyo canacujitsia. Pecobeta jayatapona. Jesús pejevaxijivixijavabelia jumai tsaponae:

—Dioso xaniavaetsia caevetsiana, jai tsaponae.

Pacuenia pevėjēato, bitso pexainaenē, cuaicuaijai Jesúsjavabelia yabara pelivaisi

(Mt 19.16-30; Lc 18.18-30)

¹⁷Pabota Jesús pejevaxijivixi isapitapona, bajarapabovecua itsajavabelia baja icatsia Jesús ponaējitsia. Nexata baja Jesús itsa naropotsijitsia, pevėjēato cujinaerucarena Jesúsjavaberena. Jesús pitabarata pematatabacabēta nucajunua. Jumaitisi pevėjēato Jesúsjavabelia:

—Petuxanenē, pexaniajamatabēcuenenēmē. ¿Detsa pitsicue bexanajē taxainaenexa maticabi apo pevereverecejaveja? jai pevėjēato.

¹⁸Nexata Jesús jumaitisi pevėjēatojavabelia:

—¿Detsa xuajitsia: “Pexaniajamatabēcuenenēmē,” nejamē? Ajibi raja itsapebi ata pexaniajamatabēcuenenē. Caenē rabaja Dioso pexaniajamatabēcuenenē. ¹⁹Xamē baja yapētaneme pacuenia Dioso pejumelivaisita itoroba jivi pejumecovēnētsinexa. Jumaitisi mapacueniaje: “Pētsa jaitame itsava nijavavecua. Pētsa beyaxuabame jivitonē. Pētsa nacobetoxotame. Pētsa itsamonae pexanaejava yabara najumetsēnētsiaya paebame. Pētsa yamaxēitorobiaya vecuapitame itsajivi pexanaejava. Axa yayataema. Ena ata yayataema,” jai Dioso pejumelivaisita. Xamē baja yapētaneme bajarapalivaisi, jai Jesús pevėjēatojavabelia.

²⁰Nexata pevėjēato jumaitisi Jesúsjavabelia:

–Petuxanenē, daxita rabaja bajarapalivaisianē jumecovēnētājē pejevax-inējavaveliacujinaenē, jai pevėjēato.

²¹ Nexata Jesús asivaya tane pevėjēato. Jumaitsi:

–Caejava raja catošaica nexanaenexa. Ponare necanajetsinexa daxita nexainaecuenemi. Bajarapamatamomi tsiobetsanaename bepejioivi. Nexata bajarapacuenia xainaename bitso nexainaecue Dioso pijanacuatsia. Nexata najamatabēcueneverere, cabejiobiaexanae ata, cabeyacuabijitsia atanua tajumelivaisi yabara, niajamatabēcuenesaē taponaponaenexa. Nexata jane baja xuacujinae nepēnaponaename, jai Jesús pevėjēatojavabelia.

²² Nexata pevėjēato itša jumetane bajarapacuenia Jesús pejumaitsijava, najamatabēxainaeja baja vecuapona Jesús. Tsipaji pevėjēato daxitacuene bitso pexainaenē. Nexata pevėjēato apo jamatabējumecovēnētsi palivaisi Jesús tsipaeba.

²³ Nexata pevėjēato pecovēta Jesús pijajivi matatoyorotsia naēcota. Jumaitsi:

–jPamona bitso daxitacuene pexainaevi, tsiayapēbejtsi penajamatabēcuenecopatsinexa Diosojavabelia pecapanepaenexatsi Dioso pijanacuayabetsia! jai Jesús pijajivijavabelia.

²⁴ Nexata Jesús pijajivi jamatabēcuenenabenajaca itša jumetane bajarapacuenia Jesús pejumaitsijava. Nexata icatsia Jesús jumaitsi pijajivijavabelia:

–Tajamonae, pamona bitso ēpexainaejavaneja najamatabēxaina, bajarapamona bitso tsiayapēbejtsi tsane pejonexa taxa Dioso pijanacuayabetsia. ²⁵ Pacuenia camello ayainēxae, acuenebi pejonejava palutaetoitaxutovojotualia, bajara pijinia pacuenia bitso pexainaenē acuenebi tsane pejonejava Dioso pijatomarabetsia. Tsipaji najamatabēxaina bitso ayajava pexainaenexa, jai Jesús pijajivijavabelia.

²⁶ Jesús pijajivi itša jumetane bajarapacuenia Jesús pejumaitsijava, bitso jamatabēcuenenabenajaca. Nexata bajarapamona jumaitsi Jesúsjavabelia:

–¿Detsa nexata pitsivi panepaena Diosojavabelia bitso pexainaevi ata itša apo panepae tsane Diosojavabelia? jai.

²⁷ Nexata Jesús asaēya naēcota pijajivijavabelia. Jumaitsi pijajivijavabelia:

–Jivi raja apo caējēpaetsi pijacuata penacapanepaenexa Diosojavabelia. Caenē Dioso caējēpatsi jivi pecapanepaenexa. Dioso raja caējēpatsi daxitacuene pexanaenexa, jai Jesús pijajivijavabelia.

²⁸ Nexata Pedro jumaitsi Jesúsjavabelia:

–Patajatuxanenē, paxanē rabaja pacopatajē daxitacuene pataxainaejavami. Nexata baja pacapēnainavanapatsi, jai Pedro.

²⁹ Nexata Jesús jumaitsi:

–Xaniajanē pacuenia pacatsipaebijitsiatsi. Pajivi xanē tajamatabēcueneta, jivi tacapanepaelivaisitanexa pejamatabēcuenetanua, pueneta pijabomi, pematapijivi ata, pejuyapijivi ata, paxa ata, pena ata, pijava ata, pexi ata, pijapabianē ata, nexata bajarapajivi bitso ayajava Dioso rajutsianatsi pepuenetsijavanēmi matatoxensia.

³⁰ Caejavayomijamatabēcueneta taponae, rajutsianatsi mapanacuataje cien xuabeje taponae pevājēnaeyabelia. Bajarapajivi icatsia xainaena bonē, pematapijivi ata, pejuyapijivi ata, pena ata, pexi ata, pabianē ata. Itsiata bajarapajivi itoya tsanetsi mapanacuapijivije. Bejiobiaexanabianatsinua. Itsiata baitsi jane bexējavabelia xainaena matababi apo peverevecaejava. ³¹ Pamonaeeconoxae mapamatacabitaje ayaijamatabēcuenevi tanetsi, bajarapamona Dioso beveliajamatabēcuenevi exanaenatsi. Pamona pijinia mapamatacabitaje beveliajamatabēcuenevi tanetsi, bajarapamona Dioso ayaijamatabēcuenevi exanaenatsi, jai Jesús pijajivijavabelia.

Pacuenia icatsia Jesús tajēvelia navajunupaeba pebeyaxuabijavanexatsi yabara pelivaisi (Mt 20.17-19; Lc 18.31-34)

³² Jesús, pijajivi yajava, najetaruca namutua. Pona Jerusalén tomarabelia. Jesús pijajivi, pepēnaponaevitsi, jamatabēcuenenabenajaca. Tsipaji Jesús apo junavi bajarabelia peponaejava, yapētae ata, pacuenia exanaejitsiatsi Jerusalén tomarata. Nexata Jesús icatsia junata pijajivi, doce ponēbeje, pesaicaeyojavabelia. Navajunupaeba tajēvelia pacuenia exanaejitsiatsi Jerusalén tomarata. ³³ Jumaitsi Jesús tajēvelia pijajivijavabelia:

–Panėjumetaema. Mara Jerusalén tomarabelia ponatsije. Bajarajotalia xanē, Daxitajivi Pematapijinēnē, sacerdotevi penamatacaitorobivi, judiōvi pecujarubivinua, pecobeyabelia necanajetsiana tanevaetabinexa. Nexata xanē neneconitsiana tanebeyaxuabinexa. Bajaraxuacujinae icatsia necanajetsiana itsanacuaverena pepatsivi pecobeyabelia. ³⁴ Bajarapamona necanepaenexa. Nesuabiana. Nejumatitibabena penaneconitsivi pejumaconitabiabimacata. Bajaraxuacujinae nebeyaxuabiana jane baja. Itsiata baitsi jane tanebeyaxuabicujinae, acueyabi matababita, icatsia asaēnē tsane, jai tajēvelia pijajivijavabelia Jesús penavajunupaebijavata pebeyaxuabijavanexatsi.

Pacuenia Santiagobeje Juanbeje vajëtabeje Jesúsjavabelia pexaniacuene petoexanaenexasibeje yabara pelivaisi

(Mt 20.20-28)

³⁵ Zebedeo pexënatobeje, Santiagobeje Juanbeje, imoxoyoliabeje Jesús. Jumaitsibeje Jesúsjavabelia:

—Patajatuxanenë, pacuenia pacavajëtsijtsatsibeje, bajarapacuenia pajitsipajëbeje patanetoexanaenexamëbeje, jaibeje Santiagobeje Juanbeje Jesúsjavabelia.

³⁶ Nexata Jesús jumaitsi:

—¿Detsa pitsicuene pajitsipamebeje patacattoxanaenexabeje? jai.

³⁷ Nexata Santiagobeje Juanbeje jumaitsibeje:

—Pamatacabi daxitacuene evetsianame, panetocopatsianamebeje patanaecaenexabeje nemuxuneneta vajanajuaevetsinexa. Itsanë naecaena necujanenia. Itsanë naecaena netsavenonenia, jaibeje.

³⁸ Nexata Jesús jumaitsi:

—Paxamëbeje apo payapëtaemëbeje xua panevajëtabeje. ¿Pacacajëpabeje tsaja panenacaevetsinexabeje papecabejiobiaexanaenexabeje pacuenia xanë nacaevetsianajë tanebejiobiaexanaenexa? ¿Pacacajëpabeje tsaja panenacaevetsinexabeje papecabeyaxuabinexabeje pacuenia xanë nacaevetsianajë tanebeyaxuabinexa? jai Jesús pijajivitonëbejevavelia.

³⁹ Nexata Santiagobeje Juanbeje jumaitsibeje:

—Jãjã, panecajëpabeje cajena, jaibeje.

Nexata icatsia Jesús jumaitsi Santiagobeje Juanbejevavelia:

—Paxamëbeje pacabejiobiaexanaenabeje pacuenia xanë nebejiobiaexanaena. Pacabeyaxuabianabejenua pacuenia xanë nebeyaxuabiana. ⁴⁰ Itsiata bailsi jane xua panevajëtabeje panenacaenexabeje, itsanë tacujanenia, itsanë tatsavenonenia, bajaraxua Dioso apo netocopatsi patacatocopatsinexabeje. Tspijaji raja taxa Dioso ëpitapetsivinxaxa abaxë bajaraxua toxaniavaeta, jai Jesús Santiagobeje Juanbejevavelia.

⁴¹ Diez ponëbeje, Jesús pijajivi, itsa vënëtane pepëya bajaraxua Santiagobeje Juanbeje Jesúsjavabelia pevajëcaevabeje, nexata bajarapamonae jamatabëcuenebaraanaepana Santiagobeje Juanbejevavelia. ⁴² Nexata Jesús daxita pijajivi junata. Jesús jumaitsi pijajivivavelia:

—Payapëtaneme rabaja pacuenia nacuaeetsivi exana. Eveta caenacua canacujitsia. Nexata nacuaeetsivi pijajivicuenia eveta pamonae jinavanapa pevetsinacuanëjava. Nexata bajarapanacuanë pevetsivi ayaijamatabëcuenevi nataeyabiaba. Xua jamatabëtoroba pevetsinacuanëjava pejinavanapaevi petoexanaenexatsi, ajumesaëya itorobabiaba petoexanaenexatsi.

⁴³ Pëtsa paxamë bajarapamonae cuenejëpaeya bajarapacuenia paexaname itsamonaejavavelia. Biji rajane ponë paxamëyajuvënënë jitsipa ayaijamatabëcueneënë penaexanaenexa daxita paxamëvecua, bajaraponë daxita paxamë bepanijajivitonëcuenia bepacayavenonabiaba. ⁴⁴ Ponë paxamëyajuvënënë jitsipa penaexanaenexa papecanamatacaitorobinënexa, bajaraponë daxita paxamë bepanijajivitonëcuenia bepacayavenonabiaba. ⁴⁵ Tspijaji rabaja xanë ata, Daxitajivi Pematapijinë atanë, apo patajopaenë jivi tanejavavenonaenexa. Biji rajane xanë patajopajë tayavenonaenexa daxitajivi. Patajopajë tasivatëpaenexa jivi ayaiBITSaëttoxaneto pibisiacuene pexanaeneconimi taneconimatamotsinexa, jai Jesús pijajivivavelia.

Pacuenia Jesús itaxutoxanepanaeyaexana Bartimeo, bitso pitaxutotsëcënaenë, apo petanë yabara pelivaisi

(Mt 20.29-34; Lc 18.35-43)

⁴⁶ Jesús, pijajivi yajava, pata Jericó tomarabelia. Jesús icatsia, pijajivi yajava, itsamonae ayaiBITSaëttoxaneto yajava, pitsapa Jericó tomaravecuca. Nexata Bartimeovënënë, Timeo pexënatato, eca namuto muxuneneta. Bartimeo, bitso pitaxutotsëcënaenë, apo petanë. Jivijavabelia amoneya palata pevajëcabiabiinë. ⁴⁷ Nexata Bartimeo itsa jumetane Nazaret tomarapijinë Jesús imoxoyo penajetarucuaeja, vavajai tsecae.

—Jesús, Davidpijinë pemomomë, nitaxutotsoniataema! jai tsecae Bartimeo.

⁴⁸ Nexata picani itsamonae jumeitavetatsi Bartimeo pemoyanexa. Itsiata bitsoyo orijibia vavajai tsecae.

—jDavidpijinë pemomomë, nitaxutotsoniataema! jai tsecae Jesúsjavabelia.

⁴⁹ Nexata Jesús muxunanucujopa. Jumaitsi jivijavabelia:

—Pajunaremena bajaraponë, jai.

Nexata bajarapamonae junarena Bartimeo. Pejunatsivirena jumaitsi Bartimeojavabelia:

—Najamatabësaëtaxuare. Nonotapunare. Jesús raja cajunarena, jai bajarapamonae.

⁵⁰ Nexata Bartimeo penajumaxuabipana xuabapuna. Bepijia najetabarena Jesúsjavabarena. ⁵¹Nexata Jesús yanijoba Bartimeojavabelia.

—¿Detsa xua jitsipame tacaexanaenexa? jai Jesús.

Nexata Bartimeo bitso pitaxutotsēcēnaenē, jumaitsi Jesúsjavabelia:

—Jesús, jitsipajē taitaxutoxanepanaejava, jai.

⁵² Nexata Jesús jumaitsi:

—Ponare baja. Nesivajamatabējumaitsimē: “Jesús nitaxutoxanepanaeayaexanaena,” nesi-vajamatabējamē. Bajaraxuata itaxutoxanepaname baja, jai Jesús Bartimeojavabelia.

Bajarapacuenia Jesús pejumaitsijavata, Bartimeo baja xaniavaetsia tane. Nexata baja bajaraponē Jesús pepēta napona.

11

Pacuenia Jesús pata Jerusalén tomarata yabara pelivaisi

(Mt 21.1-11; Lc 19.28-40; Jn 12.12-19)

¹ Jesús baja pijajivi barēimoxoyotanajetaruca Jerusaléntomara. Barēpata baja Betfagé tomarayobeje Betania tomarayobeje muxuneneta. Itsajota petsutojumata nubena olivonaenē, bajarajota Jesús barēpata. Bajarajota pebarēpatsicujinae Jesús itoroba anijanēbeje pijajivitonēbeje. ²Jesús jumaitsi pijajivitonēbejejavabelia mapacueniaje:

—Paponarebeje mapatomarayo ecaliajejavabelia. Ajena papatsiaremeliabeje, pataenut-sianamebeje burro, pecētanutšinēsi. Bajarapaburro itsajivi ata abaxē apo jumaponae. Paisinaenamebeje. Payamaēcarenamēbeje tsane. ³“¿Detsa xuajitsia paisinamebeje burro?” itsa pacajaibeje tsane itsajivi, nexata pajumaitsimēbeje tsane: “Vajatuxanenē raja namatavenona. Aeonoxae raja icatsia canaviatsiarena,” pajamēbeje tsane, jai Jesús pijajivitonēbejejavabelia.

⁴ Nexata Jesús pijajivitonēbeje liabeje. Caxitajarabanutabeje burro baupa muxuneneta. Cētanutatsi burro namuto muxuneneta. Nexata bajaraponēbeje burro isinabeje.

⁵ Nexata bajarajota pejinavanapaevi yanijobatsibeje.

—¿Detsa xuajitsia paisinamebeje burro? jaitsibeje.

⁶ Nexata bajaraponēbeje jumaitsiabeje pacuenia baja Jesús itorobatsibeje. Nexata tocopatatsibeje pecaponaenexabeje. ⁷ Nexata jane baja burro capatabeje Jesúsjavabarena. Nexata Jesús pijajivi pijacamisajumavelia penaxatabijavanē burro tsijumajeba. Bajarapajumata Jesús ecaya. ⁸ Jesús penajetarucaenamutojavarena jivi ayaibitsaētoxoneto pijacamisajumavelia penaxatabijavanē namutua tsivajēnaeyerequejebaponatsi. Itsamonaenaemaxērananē, pebaxu yajava, ucubaba. Nexata namutua Jesús tsivajēnaeitabētsiaya jebaponatsi yayiataeya Jesús pecopiapitsinexatsi. ⁹ Jesús penajetarucaejavata jivi ayaibit-saētoxoneto Jesús pevajēnaeya namataxainaeya najetarubena. Itsabitsaētoxoneto Jesús pecovēya cotocaevanajetarubena. Daxita bajarapamonae vavajai tsanajetarubena. Jumai tsanajetarubena:

—¡Dioso yavenonaenatsi maponē najetarucaje! ¡Vajatuxanenē pejamatabēcueneta najetaruca! ¹⁰ ¡Dioso yavenonaenatsi maponē najetarucaje nacua pevetsinexa! ¡Pacuenia bajayata vajasalinainēmi Davidpijinēmi nacua eveta, bajarapacuenia evetsijitsia! ¡Nexata vaxaitsi pexaniajamatabēcuenē rajutatsi Diosojavabelia! jai tsanajetarubena bajarapamonae.

¹¹ Nexata jane baja Jesús patajopa Jerusalén tomarata. Templobojavalía joneya. Nexata Jesús templobota naitaxutocaeveta, pacuene jivi exana templobota, petanexa. Nexata baja Jesús pepuatae pacuene jivi exana templobota, Jesús baja icatsia pona. Naviata abaxē Betania tomarabelia pijajivi, doce ponēbeje, yajava. Tsipaji baja caniviyotsia.

Pacuenia Jesús bijataenuta higeranae piacuaijibixae yabara pelivaisi

(Mt 21.18-19)

¹² Jesús pijajivi barēmajita Betania tomarata. Nexata bajayacunua Jesús icatsia pijajivi barēlia Jerusalén tomarabelia. Nexata Jesús namutua penajetarucaejavata, piajani. ¹³ Jesús namutovecua tajiyotalia higeranae yabaxua taenuta. Nexata Jesús taeyojopalia bajarapona pecuai perubenajava. Itsa Jesús pata bajaraponaejavabelia, ēpebaxu saya tsanucuae. Tsipaji cajena abaxē apo penacuaitsimatacabi. ¹⁴ Nexata Jesús jumaitsi higeranaejavabelia:

—Itsajivi ata apo cacuaixae tsane matavējēa, jai Jesús.

Nexata pijajivi jumetanetsi bajarapacuenia Jesús pejumaitsijava higeranaejavabelia.

Pacuenia Jesús Jerusalén tomarata templobovecua pitsapaeyaexana pecanajetabiabivi, pecomuacabiabivina, yabara pelivaisi

(Mt 21.12-17; Lc 19.45-48; Jn 2.13-22)

¹⁵ Jesús, pijajivi yajava, pata Jerusalén tomarata. Nexata Jesús joneya temploboyalia. Nexata templobota Jesús tane pecanajetabiabivi, pecomuacaevinua. Nexata daxita bajarapamonae Jesús pitsapaeyaexana templobovecua. Palata pecambiabibiabivi ata pijamesanēmi Jesús topēñeyorobajaraba. Uucucu pecanajetabiabivi ata penabiabijavanēminua topēñeyorobajaraba. ¹⁶ Jesús apo tocopatsi itsajivi ata itsacunejawa pecaponaenexa templobojawa. ¹⁷ Jesús livaisi tsipaeba. Jumaitsi bajarajota pepatsivijavabelia:

—Dioso baja cajena pejumelivaisibaxutota mapatemplobo yabara tajēvelia jumaitsi mapacueniaje: “Tajabo raja daxitanacuanēpijivi xanējavaberena penavajēcaebo tsane,” jai Dioso pejumaitsijava Dioso pejumelivaisibaxutota. Itsiata baitsi jane paxamē yamaxēitojorobiaya panenacobetoxotsinexa panacaetuatabiabame mapabotaje, jai Jesús templobota pecanajetabiabivijavabelia.

¹⁸ Sacerdotevi penamatacaitorobivi, judíovi pecujarubivinuua, jumetane daxita pacuenia Jesús exana jivijavabelia templobota. Nexata bajarapamonae najumejaita pacuenia Jesús beyaxuabijitsiatsi. Bajarapamonae cujunavatsi Jesús. Tsipaji daxitajivi jamatabēcuenenabenajaca Jesús petsipaebilivaisi yabara. ¹⁹ Ajena baja meravitsia, Jesús yajavapona pijajivi Jerusalén tomaravecua.

Pacuenia higuerae tēpanuca yabara pelivaisi
(Mt 21.20-22)

²⁰ Jesús pijajivi barēmajita Betania tomarata. Nexata bajayacunua Jesús icatsia, pijajivi yajava, najetaruca pecovēnamutua. Bajarapamonae taenuta higuerae baja petēpanucaejawa daxita yatabutopaya. ²¹ Nexata Pedro najamatabēnapita higuerae Jesús pebijataenutsijava. Nexata Pedro jumaitsi Jesúsjavabelia:

—Tajatuxanenē, jica, taema. Pona higuerae bijataenutame, tēpanuca baja. ¿Detsa meta pacuenia tēpa baja? jai Pedro.

²² Nexata Jesús jumaitsi pijajivijavabelia:

—Paxamē bitso pajumecovēñere Dioso papecatoexanaenexa pacuenia pavajētame. ²³ Xaniajanē pacuenia pacatsipaebijitsiatsi. Itsa pajamatabējumaitsimē tsipae Dioso yabara: “Dioso nejumecovēñetsiana xua vajētsianajē Diosojavabelia,” itsa pajamatabējamē tsipae, pacajumecovēñetsipa mapatsuto ataje. Nexata itsa pajumaitsimē tsipae mapatsutojavabeliaje: “Natixire majotavecuaaje. Pucaxanetojavabelia jopare,” itsa pajamē tsipae, pacajumecovēñetsipa. Nexata mapatsuto ataje paneitorobicuenia, pacajumecovēñetsipa. Itsa pajumecovēñetsianame Dioso papecatoexanaejavanexa, itsa panajamatabēxainanenamenua Dioso epapecajumecovēñetsijavanexa, xua pavajētsianame Diosojavabelia, Dioso pacajumecovēñetsiana. ²⁴ Bajaraxuata pacajumaitsitsi. Daxita xua pavajētsianame Diosojavabelia, pasivajamatabējumaitsimē tsane: “Xua vajētājē Diosojavabelia, pepacune Dioso nejumecovēñetsiana,” pasivajamatabējamē. Nexata xua pavajētsianame Diosojavabelia, Dioso pacajumecovēñetsiana. ²⁵ Itsajivi pibisiacuene papecaexanaejawa, pajamatabēcuenecaevare panevajētsijavata Diosojavabelia. Nexata pabarajamatabēcuenexanepanare bajarapajivi. Nexata pijinia paneaxa, athēbētatsia peecaenē, jamatabēcuenecaeviana paxamē ata pitabarata pibisiacuene paneaxanaejawa. ²⁶ Paxamē itsa apo pajamatabēcuenecaevimē tsane itsanē pibisiacuene papecaexanaejawa, itsa apo pabarajamatabēcuenexanepanaemēnuua tsane, nexata pijinia paneaxa, athēbētatsia peecaenē, apo jamatabēcuenecaevi tsane paxamē pitabarata pibisiacuene paneaxanaejawa. Apo pacabarajamatabēcuenexanepanaenuua tsane, jai Jesús pijajivijavabelia.

Pacuenia Jesús caējēpatsi daxitacuene pexanaenexa yabara pelivaisi
(Mt 21.23-27; Lc 20.1-8)

²⁷ Jesús, pijajivi yajava, pata Jerusalén tomarata. Jesús itsa ponapona templobota, nexata sacerdotevi penamatacaitorobivi, judíovi pecujarubivinuua, judíovi piijaancanovinua, parena Jesúsjavaberena. ²⁸ Nexata bajarapamonae jumaitsi Jesúsjavabelia:

—¿Jipatsa pejamatabēcueneta pecanajetabiabivi, pecomuacaevinua, capitsapame mapatemplobovecuaaje? jai bajarapamonae Jesúsjavabelia.

²⁹ Nexata Jesús jumaitsi bajarapamonaejavabelia:

—Xanē copiyaya caejumeyo pacayanijobianatsi. Itsa paxamē panejumecaviatsianame, nexata xanē juya pacatsipaebianatsi ponē nitoroba taexanaenexa bajarapacuenē. ³⁰ ¿Jipatsa jane pejamatabēcueneta Juanpijinē jivi bautisabaponapona? ¿Dioso tsaja pejamatabēcueneta? Itsa jume, ¿jivi tsaja pejamatabēcueneta? Panejumecanaviare baitsi jane, jai Jesús bajarapamonaejavabelia.

³¹ Nexata epamonae nabarēcuaicuaijai. Najumaitsi:

—¿De meta pacuenia jumecanaviatsianatsi? Vaxaitsi itsa jumai tsipaetsi: “Dioso raja pejamatabēcueneta,” itsa jai tsipaetsi, nexata Jesús nacajumai tsipae: “¿Detsa nexata xujitsia apo pajumecovēñetsimē Juanpijinē pepaebilivaisi?” nacajai tsipae. ³² “Jivi raja saya

pejamatabëcueneta Juanpijinë jivi bautisabaponapona,” acuenebi vajajijava. Tsipaji mapatomarapijivije ayailbitsaëttoxaneto Juanpijinë yabara sivajamatabëjumai: “Juanpijinë raja pepacuene Diosojumepaebinëmi,” sivajamatabëjai. Nexata bajarapamonae nacabeyejebijitsipa, najai Jesús peyanijobivitsi.

³³ Nexata saya bajarapamonae jumai: Jesúsjavabelia:

–Apo payapëtaenë ponë Juanpijinë itorobatsi jivi pebautisabaponaenexa, jai.

Nexata Jesús jumai: bajarapamonaejavabelia:

–Nexata xanë ata apo pacatsipaebi tsanetsi ponë nitoroba taexanaenexa bajarapacuene, jai Jesús.

12

Pacuenia exana pijamatabëcuenebejevi, itsanë pijauvabacabo petoevetsivi, yabara pelivaisi

(Mt 21.33-46; Lc 20.9-19)

¹ Jesús livaisi tsipaeba sacerdotevi penamatacaitorobivijavabelia, judíovi pecujarubivijavabelia ata, judíovi pijaancianovijavabelia ata. Jumai: mapacueniaje:

–Pijaira pexainanë pijairta uba ayaiabacoboxaneto uvavënëjava. Bajaraxuacujinae pijaira matatorotsia ibopanaxanetonë mataropotsia pefaratsijavata yacaranata. Bajarapayacaranatsijava athëbëabetsia apia jivitonë matatoxenetsia. Bajaraxuacujinae irata mëthë cueyeta. Nexata pecueyetsimëthëjavata exana uvacuaibarëmene pecayujucabiabijavanexa. Bajaraxuacujinae pijauvabacabo tuatujëta exananuta piapiabotsia, penacuaitsimatacabi ita tonaveretatsi, athëbëyo pevetaibiaenexa pijauvabacabo. Nexata bajaraponë itsamonae evetsiaexana pijauvabacabo. Uvabacabo pexainanë jumai: petoevetsivisjavabelia: “Pamatacabi cuainaveretsiana, natsicobetsatsianatsi. Pamatacabi raja cuainaveretsiana, tajajivitonë itorobiarenajë xua panetotsatsianame tanetopitsinexa,” jai uvabacabo pexainanë petoevetsivisjavabelia. Nexata uvabacabo pexainanë tajë nacuyabelia pona. ² Itsa baja uvabacabo pexainanë yapëtaene pecopiapatsijava uvacuai penaveretsimatacabi penotsinexa, nexata uvabacabo pexainanë itoroba pijajivitonë. Itoroba petoevetsivisjavabelia petsicobetsatsinexatsi. ³ Nexata uvabacabo pexainanë pijajivitonë tovaetabatsi. Toconibabiatsi. Petoconibabecujinaetsi cobesa navitsiaexanalitsi. ⁴ Itsiata uvabacabo pexainanë icatsia itoroba itsanë pijajivitonë petsicobetsatsinexatsi. Bajaraponë ata icatsia tomatajorobiaxuabatsi. Pibisiacuenia tobijatanetsi. ⁵ Itsiata icatsia uvabacabo pexainanë itoroba itsanë pijajivitonë. Bajaraponë jane baja tobeyaxuabatsi. Bajaraxuacujinae abaxë icatsia uvabacabo pexainanë itoroba itsamonae. Bajarapamonaejajuvënëvi itsamonae totsaquibabiatsi. Itsamonae tobeyejebatsi.

⁶ Abaxë uvabacabo pexainanë icatsia pitorobinexa, caenë tonacopatatsi. Pexë nato bitso piavianë. Nexata jane baja uvabacabo pexainanë pexë nato icatsia itoroba. Uvabacabo pexainanë jamatabëjumai: “Tajauvabacabo tanetoevetsivi tajajivi apo netoyaiyatae ata, itsiata meta taxë nato netoyaiyataena,” jamatabëjai uvabacabo pexainanë. ⁷ Itsiata uvabacabo petoevetsivitsi uvabacabo pexainanë pexë nato ata, apo toyaiyataetsi. Itsa tane uvabacabo pexainanë pexë nato, bajarapamonae najumai: “Mara ponëje paxa pevënamuto paxa pijauvabacabo pitsipaje. Naxanitsia. Beyaxuabatsi. Nexata raja vaxiitsi vajauvabacabo tsane,” najai uvabacabo petoevetsivitsi. ⁸ Nexata icatsia uvabacabo pexainanë pexë nato ata tovaetabatsi. Icatsia pexë nato ata tobeyaxuabatsi. Petëpaenë xubatsi bajarapauvabacabo pënyabelia, jai Jesús sacerdotevi penamatacaitorobivijavabelia, judíovi pecujarubivijavabelia ata, judíovi pijaancianovijavabelia ata.

⁹ Icatsia Jesús jumai: bajarapamonaejavabelia:

–¿De meta nexata xua exanaena uvabacabo pexainanë pijauvabacabo petoevetsivisjavabelia? Uvabacabo raja pexainanë patsiarena. Verebiabiana daxita bajarapamonae. Nexata icatsia itsamonae evetsiaexanaena bajarapauvabacabo, jai Jesús bajarapamonaejavabelia.

¹⁰ Icatsia Jesús jumai:

–Payapëtaneme rabaja pacuenia Dioso pejumelivaisibaxutota tajëvelia jumai: xanë yabara. Ihoto pelivaisicuenia Dioso pejumelivaisibaxutota jumai: xanë yabara mapacueniaje:

Paiboto itsamonae boexanaevi naitaxutojematabuatsiana petsitaabejexaetsi itajara, bajarapaiboto itsanë pitsiana. Nexata bajarapaibotota xaniavaetsia nayaëtsiana botabu daxita itsaibo matatoxenetsia. ¹¹ Vajatuxanenë Dioso raja exanaena bajarapacuene. Nexata nacatsita pexaniacuene bitso tsane bajarapacuene, jai tajëvelia Dioso pejumelivaisibaxutota xanë yabara.

Bajarapacuenia tajëvelia Dioso pejumelivaisibaxutota itsa jumaitsi, paxamë apo patanejumecovënëtsijavanexamë yabara jumaitsi. Dioso taneitapetsijava daxitajivi tacapanepaenexa yabara ata jumaitsi, jai Jesús bajarapamonaejavabelia.

¹² Bajarapamonae picani Jesús jamatabëvaetabatsi. Tsipaji bajarapamonae jumeyapëtanetsi Jesús pejumaitsijava bajarapamonae yabara. Itsiata abaxë apo vaetabitsi. Tsipaji cujunava jivi. Nexata baja Jesús bajarapamonae vecuapona.

Pacuenia Jesús jamatabëcueneëjëbiaya yanijobatsi impuestomatamo pematamotsijava yabara pelivaisi

(Mt 22.15-22; Lc 20.20-26)

¹³ Fariseoviyajuvënëvi, Herodes pijajiviyajuvënëvinua, najetarubena Jesúsjavaberena. Bajarapamonae pevetsivitsi itorobatsi livaisi peyanijobinexatsi Jesús. Nexata Jesús bajarapamonae bijiaya itsa jumecanaviata, peneconitsinexatsi picani nacuaevevtsinëjavabelia.

¹⁴ Nexata bajarapamonae pata Jesúsjavaberena. Bajarapamonae jamatabëcueneëjëbiaya jumaitsi Jesúsjavabelia:

—Jesús, payapëtaniji cajena nexaniajaicue, xua yabara tsipaebabiabame livaisianë. Petuxanevi ata xamë apo cujunavimë. Apo auramë livaisi netsipaebabiabijava. Nexata daxitajivi najëpaeya livaisi tsipaebabiabame. Pexaniajailivaisi tsipaebabiabame pacuenia Dioso jitsipa jivi pejinavanapaenexa. ¿Xanepana tsaja vajamatamotsinexa impuestomatamo Romanonacua pepo pevetsinëjavabelia? Itsa jume, ¿apo xanepanae tsaja vajamatamotsinexa? jai bajarapamonae jamatabëcueneëjëbiaya Jesúsjavabelia.

¹⁵ Itsiata baitsi jane Jesús jamatabëcueneyapëthane bajarapamonae jamatabëcueneëjëbiaya peyanijobijavatsi peneconitsinexatsi picani. Nexata Jesús jumaitsi bajarapamonaejavabelia:

—¿Detsa xuajitsia jamatabëcueneëjëbiaya paneyanijobame? Panetocarenamëre palatanëyo. Taejitsianë, jai Jesús.

¹⁶ Nexata bajarapamonae Jesús tocaponarenatsi palatanëyo. Nexata Jesús jumaitsi bajarapamonaejavabelia:

—¿Jipatsa mapitabaraje, pevënënuua, ruca mapapalatanëyotaje? jai Jesús.

Nexata bajarapamonae jumaitsi Jesúsjavabelia:

—Romanonacua raja pepo pevetsinë pitabara, pevënënuua, jai.

¹⁷ Nexata Jesús jumaitsi bajarapamonaejavabelia:

—Nexata parajutabiabianame Romanonacua pepo pevetsinë pijajava. Parajutabiabianame pijinia saicaya Diosojavabelia Dioso pijajava, jai Jesús.

Nexata Jesús itsa jumecanaviata bajarapacuenia, bajarapamonae jamatabëcuenenabenajaca bajarapacuenia Jesús pejumaisijavata. Nexata bajarapamonae jamatabëjumaisi:

—¡Xaniavaetsia baja rovia Jesús panejumecanaviata! jamatabëjai.

Pacuenia Jesús tsipaeba jivi petëpaecujinae icatsia piasaëjavanexa yabara pelivaisi

(Mt 22.23-33; Lc 20.27-40)

¹⁸ Saduceovi saicaya itsalivaisi xaina. Bajarapamonae jamatabëcuenenavëxaniabiaya jumai tsabiabi: “Petëpaevi rabaja petëpaecujinae, icatsia apo asaë tsane,” jai tsabiabi. Nexata saduceovi imoxoyorenatsi Jesús. Saduceovi jumaitsi Jesúsjavabelia mapacueniaje:

¹⁹ —Jesús, Moiséspijinë bajayata vajanacatoyaquinaelivaisi, jumaitsi mapacueniaje: “Ponë pematapijinë pepua penacojiobinë baja, totëpatsi pexi xainaenejeva, nexata juyapijinë bepita pematapijinëmi pijavami. Bajarapacuenia juyapijinë bepita pematapijinëmi pijavami pexi pexainaenexa bajarapovajavabelia. Nexata pexi itsa xainabeje, bematapijinëmi pexi petaenexa daxitajivi,” jai Moiséspijinë bajayata vajanacatoyaquinaelivaisi.

²⁰ Nexata jinavanapa ënacaemonae siete ponëbeje. Pepo matapijinë copliaya nacojoba. Nexata bajaraponë pijava vecuatëpa pexi xainaenejeva. ²¹ Nexata pematapijinëmi pepënarucaenë pita pematapijinëmi pijavami. Nexata icatsia bajaraponë ata tëpa pexi xainaenejeva bajarapovajavabelia. Nexata icatsia itsanë tuatujëmatapijinë pita bajarapova. Bajaraponë ata icatsia tëpa pexi xainaenejeva bajarapovajavabelia.

²² Bajarapacuenia tëpa daxita siete ponëmibeje nacaemonae, bajarapova pepitaponaevi. Itsiata itsanë ata pexi apo xinae bajarapovajavabelia. Bajaraxuacujinae belia bajarapova ata tëpa baja. ²³ “Jivi raja petëpaecujinae, Dioso icatsia asaëyaexanaenatsi,” jamë. ¿Detsa nexata ponë, bajarapomonaeyajuvënëne, pijava tsane bajarapova bajarapamatacabi? Daxita pamonae siete ponëmibeje, nacaemonae, pitapona picani bajarapovami, jai saduceovi Jesúsjavabelia.

²⁴ Nexata Jesús jumaitsi saduceovijavabelia:

—Paxamë saya pajamatabëcuenenavëxaniabame. Paxamë raja apo payapëtaemë pacuenia Dioso pejumelivaisibaxutota jumaitsi. Apo payapëtaemënuua pacuenia Dioso caëjëpatsi

daxitacuene pexanaenexa. Bajaraxuata jamatabëcuenenavëxaniabiaya paneyanijobame: “¿Detsa ponë pitsiana bajarapova?” panejamë. ²⁵ Pamatacabi raja petëpaevimi Dioso icatsia asaëyaexanaenatsi, apo nacojiobi baja tsane. Bajarapamatacabita itsajivi ata pexënatoyo apo canajetsi tsane pebijavabelia petonacojiobinexatsi. Bajarapamonae nacojiobinejeva, jinavanapaena athëbëtatsia pacuenia angelevi jinavanapa. ²⁶ Itsa pepacuene paxamë paneyanijobame Dioso icatsia piasaëyaexanaejavanexatsi petëpaevimi, nexata pacatsipae-bianatsi. Paxamë rabaja payapëtaneme pacuenia bajayata Moiséspijinë peyaquinaebax-utota jumaitsi. Bajarapabaxutota jumaitsi pacuenia Moiséspijinë Dioso barëcuaijaijatsi tsiquirinaemëyo petajueyecaecotiajavaverena. Abraham baja pepuatëpae, Isaac ata baja pepuatëpae, Jacob ata baja pepuatëpae, bajarapamonae yabara bajayata Dioso jumaitsi Moiséspijinëjavabelia mapacueniaje: “Xanë rabaja abaxë Abraham pijaDiosonë, Isaac ata pijaDiosonë, Jacob ata pijaDiosonë,” jai Dioso Moiséspijinëjavabelia bajayata petëpaevimi yabara. ²⁷ Bajarapacuenia Dioso pejumaitsixae, nayapëtane bajarapamonae bajayata tēpae ata, Diosovecua apo penaxuabijava. Aeconoxae ata bajarapamonae Dioso yajavajinanapa athëbëtatsia. Nexata paxamë itsa pajumaitsimë: “Petëpaevi rabaja petëpaecujinae, icatsia apo asaë tsane,” itsa pajamë, pinijicuenia pajamatabëcuenenavëxaniabame, jai Jesús saduceovijavabelia.

Palivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia yabara pelivaisi

(Mt 22.34-40)

²⁸ Judíovi pecujarubinë pata Jesúsjavaberena. Nexata bajaraponë Jesús jumetanetsi xaniavaetsia pejumecanaviataponaejava saduceovijavabelia. Nexata judíovi pecujarubinë jumaitsi Jesúsjavabelia:

–¿Detsa palivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia? jai.

²⁹ Jesús nexata jumaitsi judíovi pecujarubinëjavabelia:

–Palivaisi bitso jivi bejumecovënëta, daxita Dioso pitorobilivaisianë pejumecovënëtsijava matatoxenetsia jumaitsi mapacueniaje: “Paxamë, Israelpijinë papemomoximë, pajumetaema. Vajatuxanenë rabaja caenë Dioso. ³⁰ Bajaraponë panijatuxanenë, panijaDioso, daxita panejamatabëthëtojavavetsina pasivamëre. Pasivamëre daxita panejamatabëcueneta ata, daxita panenajamatabëxainaesaëta ata, daxita panesaëta ata,” pejalivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia. ³¹ Bajaraxuacujinae pecotocaevilivaisi, palivaisi bitso jivi bejumecovënëta, jumaitsi icatsia mapacueniaje: “Pasivamëre itsajivi ata pacuenia paxamë panijacuata panaasivamë,” jai. Bajarapalivaisi ata jivi bitso bejumecovënëta. Ajibi rabaja itsalivaisi pematatsënëa, Dioso pitorobilivaisi, palivaisi bitso jivi bejumecovënëta,” jai Jesús judíovi pecujarubinëjavabelia.

³² Nexata icatsia judíovi pecujarubinë jumaitsi Jesúsjavabelia:

–Jesús, xaniajamë rabaja pacuenia jumaitsimë. Caenë tsaena Dioso ponapona. Ajibi tsaena pematatsënëa itsanë Dioso. ³³ Bejumecovënëtsi Dioso daxita vajajamatabëthëtojavavetsina, daxita vajanajamatabëxainaesaëta ata, daxita vajasaëta ata. Bisivatsi itsajivi ata pacuenia vaxaitsi yajacuata nasivatsi. Daxita bajaraxua itsa jumecovënëtsi, bitso nacatonamatota Diosojavabelia. Bajaraxua bitso nacatonamatota ofrenda Diosojavabelia vajarajutabiabijava matatoxenetsia. Baitsi xua Diosonexa ofrendacuenia totajuitabiabatsi, dajubicuene itsa tobeyabiabatsi, bajaraxua matatoxenetsia bitso nacatonamatota, jai judíovi pecujarubinë Jesúsjavabelia.

³⁴ Jesús itsa jumetane judíovi pecujarubinë xaniavaetsia pejumecanaviatsijavatsi, nexata Jesús jumaitsi judíovi pecujarubinëjavabelia:

–Tsiquirijavayo catosaiça Diosojavabelia nenajamatabëcuenecopatsinexa nijatuxanenë Dioso nexanaenexa, jai Jesús judíovi pecujarubinëjavabelia.

Bajaraxuacujinae daxitajivi baja Jesús cujunavatsi. Nexata baja Jesús jivi jamatabëcuenëjēbiaya livaisi apo yanijobitsi.

Pacuenia Jesucristo yabara Davidpijinë bajayata tajëvelia: “Tajatuxanenë,” jai, yabara pelivaisi

(Mt 22.41-46; Lc 20.41-44)

³⁵ Jesús livaisi tsipaeba templobota. Jesús pijacuata nayabarajumaitsi:

–¿Detsa xuajitsia judíovi pecujarubivi apo jumecovënëtsi Cristo Dioso pexënatocuene, ponë athëbëvetsica Dioso itorobijitsiatsica jivi pecapanepaenexa? Bajarapamonae saya jamatabëcuenenavëxaniabiaya jumai tsabiabi Cristo yabara: “Cristo raja itsa patsiana, Davidpijinë pemomo tsane,” jai tsabiabi. ³⁶ Davidpijinë bajayata Espiritu Santo pejamatabëcueneta tajëvelia jumaitsi Cristo yabara mapacueniaje:

Dioso jumaiti tajatuxanenëjavabelia: “Ecare abaxë tacujuanenia. Vecatsivajënae jume-covënëtsiaexanaenatsi abaxë copiaya nijavajabitsaë nitorobicuenianexa,” jai Dioso tajatuxanenëjavabelia,

jai bajayata tajëvelia Davidpijinë mapacueniaje Cristo yabara.

³⁷ “Nexata Davidpijinë bajayata Cristo yabara: “Tajatuxanenë,” itsa jai, nexata Cristo Davidpijinë apo pemomo. Tspiji baja cajena Cristo saicaya Dioso pexë nato, nayabarajai Jesús judíovi pecujarubivi pecanaëjëtsinexa Cristo Dioso pexë natocuene.

Nexata jivibitsaëtoxaneto Jesús pejumetaevitsi jumebarëyatannetsi.

Pacuenia Jesús jumaiti jivijavabelia: “Judíovi pecujarubivi bitso pinijicuenia Dioso naneconitsiaexanaenatsi,” jai yabara pelivaisi

(Mt 23.1-36; Lc 11.37-54; 20.45-47)

³⁸ Jesús jivi ayaibitsaëtoxanetojavabelia, pijajivijavabelia ata, livaisi tsipaeba. Nexata Jesús livaisi petsipaebijavata jumaiti mapacueniaje:

–Xania, panayajivitaema, palivaisi judíovi pecujarubivi tsipaeba, panejume-covënëtsianiva. Bajarapamonae jitsipabiaba tomara tuatujëjava piapijavanë penaxatababiabavanapaxexa jivi peyaiyatenexatsi. Jitsipabiabanua bitso yayiyataeya peba-jacobinexatsi callejava. ³⁹ Bajarapamonae itsa najoneyabiaba judíovi penacaetuatabi-abibonëjava, jitsipabiaba penaenexa pexaniavirijavanëta. Nexata natsiitapetabiaba penaenexa peyaiyatevitsi penaenexa petsinubijavanëta. Bajarapamonae itsa napatabi-aba fiestajava ata, jitsipabiaba penaenexa peyaiyatevitsi penaenexa petsinubijavanëta.

⁴⁰ Bajarapamonae yamaxëitojorobiaya vecuanotabiabanua pamonajivi pevecutëpaevanëtsi pecobecovëjavaxi. Bajarapamonae itajara pinijicuenia vajëcabiaba Diosojavabelia. Itsiata pepo pexaniajajamatabëcueneta apo vajëcabiabi. Bajarapacuenia vajëcabiaba saya jivi petaenexatsi Dioso itajara bitso bepejumecovënëtsivi. Nexata bajarapamonae bitso pinijicuenia Dioso naneconitsiaexanaenatsi pamatacabi Dioso naneconitsiaexanaena daxita pamona Dioso apo pejumecovënëtsivi, jai Jesús judíovi pecujarubivi yabara.

Pacuenia ofrenda rajuta Diosojavabelia pamona pevecutëpaevatsi yabara pelivaisi

(Lc 21.1-4)

⁴¹ Itsamatacabi Jesús eca templobota. Pacajonita jivi palata jeyabiaba ofrendacuenia perajutsijava Diosojavabelia, bajarapacajoni pecanacujitsita Jesús eca. Nexata Jesús cobetaeyeca jivi palata pejeponaejava bajarapacajonita. Ayaijava palata pexainaeivi, caejivi canacujitsita, ayaijava palata jepona. ⁴² Bajarajota napata pamona pevecutëpaevatsi, bepejiobiva. Nexata bajarapova najia anijapalatanëyobeje piamatamobinëyobeje. ⁴³ Nexata Jesús junata pijajivi. Jumaiti pijajivijavabelia:

–Xaniajanë pacuenia pacatsipaebijitsiatsi. Mapovaje pamona pevecutëpaevatsi bejiobi bitso. Xuayo jia cajonita ofrendacuenia perajutsinexa Diosojavabelia, bajaraxuayo bitso Dioso sivajamatabëcuenabarëya daxita xua itsamonae jia bajarapacajonita matatoxenetsia. ⁴⁴ Tspiji rabaja xua bajarapamonae apo namatavenonae, jia bajarapacajonita ofrendacuenia perajutsinexa Diosojavabelia. Itsiata mapovaje bepejiobiva daxitajavayomi penaevetsijavayotaminexa, jia bajarapacajonita ofrendacuenia perajutsinexa Diosojavabelia, jai Jesús pijajivijavabelia.

13

Pacuenia Jesús pijajivitonëjavabelia tajëvelia tsipaeba itsamatacabi itsanacupijivi templo pexuabijavanexatsica yabara pelivaisi

(Mt 24.1-2; Lc 21.5-6)

¹ Itsa baja Jesús, pijajivi yajava, pitsaparena templobovecua, Jesús pijajivitonë jumaiti Jesúsjavabelia:

–¡Tajatuxanenë, jica, nataema mapabotoxanetonëje, mapaboxanetonë ataje! jai Jesús pijajivitonë.

² Nexata Jesús tajëvelia jumaiti pijajivitonëjavabelia:

–Daxita raja mapaboxanetonë tanemeje, bajarapaboxanetonëmi itsamatacabi itsanacupijivi penetsianica irabetsica. Nexata mapabotoxanetonëmije itsaiboto ata pejumavereca apo bocae tsane, jai Jesús tajëvelia pijajivitonëjavabelia.

Pacuenia itsijitsia Jerusalén tomarata, daxitanacuanëjava ata, mapanacua pecopiarucavajënaeje yabara pelivaisi

(Mt 24.3-28; Lc 21.7-24; 17.22-24)

³ Jesús eca petsutojumata. Patsutojumata olivonaenë apaaxayo templo canacujitsi-javalia, bajarapatsutojumata Jesús eca. Nexata Pedro, Santiago, Juan, Andrés, bajarapamatabëxëyo pijaepatojavata Jesúsjavabelia jumaiti:

⁴—Patajatuxanenē, pajitsipajē patanetsipaebinexamē patayapētaenexa paepatota copiapatšijitsia xua vajunupaebame. ¿Detsa peneta pitsicuene pataenajē itša copiapatsijitsia xua jumaitšimē temploba yabara? jai bajarapamonae Jesúsjavabelia.

⁵ Jesús nexata tajēvelia vajunupaeba pacuenia itsamatacabi itsijitsia mapanacuataje. Jesús jumaitšij pijajivjavabelia mapacueniaje:

—Xania panayajivitaeneme. Pētsa panacopatame itsajivi ata papecayamaxēitojorobinexa.

⁶ Tsipaji raja peymaxēitojorobinexa ayaibitsaēto patsiana bexanē itajara tsane. Bajarapamonae najumetsēnētsiaya jumai tsane: “Xanē raja Cristonē, Dioso athēbēvetsica taneitorobinētsica jivi tacapanepaenexa,” jai tsane. Bajarapamonae jivi, ayaibitsaēto yamaxēitojorobiana.

⁷ Vajabitsaē pexanaejava imoxoyonacuanējava, tajēnacuanējava ata, pavēnēlivaisitaeneme. Itsiata pētsa pajunavame. Bajara peneta itsane mapanacua pevereverecaevajāneje. Itsiata baitsi jane bepijia bajarapamatacabi mapanacuaje abaxē apo vereverecajuni tsane.

⁸ Mapanacuaje pevereverecaevajāne peneta copiaya itsaviriavi nabena itsaviriavijavabelia. Itsanacuanēpijivi pijinia nabena itsanacuanēpijivjavabelia. Ira najēbiana ayaicuenia nacuanējava. Ayaijaniboxaneto najetarucaena nacuanējava. Ayaicuenia bitso jivi bejiobi tsane nacuanējava. Daxita bajarapacuene itša pataeneme, saya abaxē taxuxabaponaena piayaicue, jai Jesús pijajivjavabelia tajēvelia pevajunupaebijavata pacuenia itsamatacabi itsijitsia mapanacuata.

⁹ Icatsia Jesús tajēvelia vajunupaeba pacuenia itsamatacabi itsijitsia mapanacuataje. Jesús jumaitšij pijajivjavabelia mapacueniaje:

—Nexata paxamē xania panayajivitaeneme. Tsipaji raja xanē patajajivixaemē, tomara pevetsivijavabelia pacacaponabiabiana. Bajarapamonae pacajumaconibabeyabiabiana judiōvi penacaeuatabibonēta. Paxamē patajajivixaemē pacanubiana nacuaevevtsivi pitabarata, presidentevi ata pitabarata. Nexata bajarajota bajarapamonaejavabelia patsipaebianame xanē talivaisi. ¹⁰ Nexata daxitanacuanēpijivijava patsipaebianajetarubenaeneme pecapanepaelivaisinexatsi. ¹¹ Itša pacataicaena papecaneconitsinexa nacuaevevtsivijavabelia, pētsa pajamatabēcuenebējamē panenayajivicuauaijainexa bajarapamonaejavabelia. Palivaisi panejamatabēcuenevetsina pacatonaitajētsiana, patsipaebianame bajarapamonaejavabelia. Tsipaji raja bajarapaepatota Espiritu Santo pacacuaicuauaijaexanaena. Paxamē baitsi panejamatabēcueneta apo pacuaicuauijamē tsane. ¹² Bajarapamatacabi patajajivixaemē, panacaemonae atamē, itsajivi panijamonaejivi ata pacacanajetsiana nacuaevevtsivijavabelia papecabeyaxuabinexa. Panexa ata, paneena ata, pacacanajetsiana nacuaevevtsivijavabelia papecabeyaxuabinexa. Panexi ata pacacanajetsiana nacuaevevtsivijavabelia papecabeyaxuabinexa. ¹³ Daxitajivi pacaitoya tsane patajajivixaemē. Itsiata pajivi ajamatabēcuenesaē tsane Dioso pejumecovēnētsijava nacua pecopiarucaejavabelianexa, bajarapajivi Dioso capanepaenatsi, jai Jesús pijajivjavabelia tajēvelia pevajunupaebijavata pacuenia itsamatacabi itsijitsia mapanacuataje.

¹⁴ Icatsia Jesús tajēvelia vajunupaeba papiayaicue itsamatacabi copiapatsijitsia Jerusalén tomarata. Jesús jumaitšij pijajivjavabelia mapacueniaje:

—Diosojumepaebinēmi, profeta Danielpijinē, tajēvelia Dioso pitorobicueniatsi piayaicue pevajunupaebilivaisi bajayata yaquina. Xua panijatamaranēmi vereverecaexanaejitsiatsi, bajaraxua pelivaisi yaquina. (Pajivi lebiana mapalivaisije, yapētaena papiayaicue vajunupaeba mapalivaisitaje.) Nexata paxamē pataeneme bajarapapiayaicue penucaejava templobota, itsajota picani apo benueae. Nexata Judea nacua pejinavanapevi itša vēnēlivaisitaena bajarapapiayaicue penucaejava templobota, pētsa nubena. Naxanitsiayo bajarapamonae rēcēpecaena ibotsutonējavabelia.

¹⁵ Pajivi pijabojumata athēbēyo ecaya, itša vēnēlivaisitaena bajarapapiayaicue penucaejava templobota, bajarapajivi perunaecujinaetsica bepijia najetabajiraviana. Pētsa joneya pijaboyalia pejutsinexa pecobecovē. ¹⁶ Pajivi pijinia nacuenaponaona pijapabita, itša vēnēlivaisitaena bajarapapiayaicue penucaejava templobota, bepijia najetabajiraviana. Pētsa naviatā pijaboyabelia pejutsinexa penaxatabijava.

¹⁷ ¡Papetiriavi penacueto yacotajinavanapa, bitso bejiobi tsane bajarapamatacabi! ¡Bitso nabejiobitsiaya jinavanapaena! ¡Papetiriavi ata mitopaenacuetoxi isajinavanapa, bitso bejiobi tsane bajarapamatacabi!

¹⁸ Bajaraxuata tajēvelia Diosojavabelia pavajēcare piayapēbejematacabita papecatocopiapatsiyaniva bajarapapiayaicue. Nexata pamatacabi parēcēpecaeneme, pexaniamatacabi Dioso pacatocopsiana bitso nabejiobitsiaya paneponaeyaniva. ¹⁹ Tsipaji raja bajarapamatacabi bitso jivi bejiobi tsane. Pabejiobicuene abaxē jivi caeto ata apo tae Dioso nacua pexanaecujinae, bajarapabejiobicuene taena. Bajaraxuacujinae icatsia itsamonae bejiobiaexanae atatsi tsane, itsiata bajarapacuenia bitso apo bejiobiaexanaetsi tsane. Tsipaji Dioso epatua yatuucutsiana jivi bitso nabejiobitsiaya pejinavanapaematacabianēminexa, bitso jivi

nabejiobitsia pejinavanapaeyaniva. ²⁰ Dioso epatua itsa apo yatuucutsi tsipae bitso jivi nabejiobitsiaya pejinavanapaematacabianëminexa, caejivi ata apo asaë tsipae. Itsiata bailsi jane Dioso piasivaxae pijajivi, pitapetsivi, Dioso epatua yatuucutsiana bitso jivi nabejiobitsiaya pejinavanapaematacabianëminexa, jai Jesús pijajivijavabelia tajëvelia pevajunupaebijavata papiayaicuene itsamatacabi copiapatsijitsia Jerusalén tomarata.

²¹ Icatsia Jesús tajëvelia vajunupaeba pacuenia itsamatacabi mapanacuataje patsijitsia peyamaxëitojorobivi Dioso pejumecovënëtsivi peyamaxëitojorobinexatsi. Jesús jumaitsi pijajivijavabelia mapacueniaje:

—Nexata itsajivi yamaxëitojorobiaya itsa pacajumaitsi tsane: “Pataema. Mara Cristo nucaje,” itsa pacajai tsane, pëtsa pajumecovënëtame. Itsa pacajumaitsi tsane: “Bajarajota nuca Cristo,” itsa pacajai tsane, pëtsa pajumecovënëtame. ²² Itsamonae jumai tsane: “Xanë raja Cristonë,” jai tsane. Itsiata jemajai tsane. Itsamonae jumai tsane: “Diosojumepaebinënë raja, profetanënë,” jai tsane. Itsiata jemajai tsane. Bajarapamonae itajara exanaena pinijicuene pexanaejavanë peyamaxëitojorobinexa saya jivi. Nexata bajarapacuenia itsamonae yamaxëitojorobaponaenatsi. Itsiata pamonaepacuenia Dioso pijajivi, Dioso pitapetsivitsi, bajarapamonae apo yamaxëitojorobi tsanetsi. ²³ Xania baja tsane! Xanë rabaja pacatsipaebatsi tajëvelia daxitacuene panenayajivitaenexa, jai Jesús pijajivijavabelia tajëvelia pevajunupaebijavata pacuenia itsamatacabi mapanacuataje patsijitsia peyamaxëitojorobivi Dioso pejumecovënëtsivi peyamaxëitojorobinexatsi.

Pacuenia Jesús tajëvelia navajunupaeba icatsia pepatsijavanexatsica petëpacujinae yabara pelivaisi

(Mt 24.29-35, 42, 44; Lc 21.25-36)

²⁴ Jesús tajëvelia navajunupaeba itsamatacabi icatsia pepatsijavanexatsica. Jesús jumaitsi pijajivijavabelia mapacueniaje:

—Xanë tapatsivijënaetsica, jivi taena pecujunavicuene. Jivi nabejiobitsiaya jinavana-paena. Nexata jivi nabejiobitsiaya pejinavanapaematacabicujinae matacabipijijuumeto aitaquiri tsane. Meravipijijuumeto ata aitaquiri tsane. ²⁵ Tulupe ata othopaenica irabetsica. Daxitacuene, xua rubena athëbëtatsia, najëabiana. Xaniavaetsia apo rubenae tsane. ²⁶ Nexata bajarapaepatota xanë, Daxitajivi Pematapijinënë, jivi netaena athëbëvetsica itarërëbota tanajetaruaejava. Patsianicajë daxitacuene taevetsinexa. Tanivenivenaectotia yajavapatsianicajë. ²⁷ Bajaraxuacujinae ángelevi itorobianajë, pamonaetajajivi, Dioso pitapetsivitsi, daxitanacuanëjavaverena tanetocaetuatsinexa xanëjavaverena, jai Jesús pijajivijavabelia tajëvelia penavajunupaebijavata itsamatacabi icatsia pepatsijavanexatsica.

²⁸ Icatsia Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Pacanaejëre pacuenia itsi higueranae. Itsa maxëranajuva, nexata pejanabaxu pitsapa. Nexata bajarapacuenia payapëtaneme vai baja imoxoyo pevajënae pejonejavanexa. ²⁹ Bajara pijinia pacuenia peneta itsa pataenae pecopiapatsijava, xua yabara pacatsipaebatsi, nexata payapëtaenae imoxoyo baja tavajënae tsane tapatsijavanexatsica. ³⁰ Xaniajanë pacuenia pacatsipaebijitsiatsi. Pitsijamatabëcuenevi aeconoxae mapamatacabitaje jinavanapa, bajarapitsijamatabëcuenevi abaxë, hexëjavabelia ata, apo vererecaetane. Matapania xua yabara pacatsipaebatsi, itsa baja copiapatsiana, bajarapamonae jane baja vererecaena. ³¹ “Itaboxo, ira yajava, tsitecaena daxitamatacabijavabelianexa,” jamatabëjai ata tsane itsamonae, itsiata jamatabëcuenenavëxaniabiana. Tsi-paji jemata itaboxo, ira yajava, vererecaena. Nexata palivaisi pacatsipaebatsi, apo najumetsënëtsinë tsane. Nexata xua yabara pacatsipaebatsi, pacuenia baja najumecapenapeya jumaitsinë, daxita bajaraxua copiapatsiana, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

³² Jesús icatsia jumaitsi pijajivijavabelia:

—Itsajivi ata apo yapëtae pamatacabita, paepatota ata, copiapatsijitsia daxita xua yabara tajëvelia pacatsipaebatsi. Athëbëpijivi ata, ángelevi, apo yapëtae. Xanë, Dioso pexënato atanë, apo yapëtaenë. Caenë taxa Dioso yapëtae, jai Jesús pijajivijavabelia.

³³ Icatsia Jesús jumaitsi pijajivijavabelia:

—Xania baja tsane. Daxitamatacabi saya panecopiaevetavanapaenae. Tsi-paji raja apo payapëtaemë tsane paepatota patsijitsianëtsica. ³⁴ Nexata pacuenia bo pexainanë, pijabo evetsiaexana pijajivi, bajara xanë itsinë tsane. Bo pexainanë itsa ponaëjitsia tajënacuyabelia, pijajivi evetsiaexana pijabo. Nexata pijajivi, caejivi canacujitsia, rajutapona petonacuenebavanapaevanexatsi pecovëta. Nexata pijajivijavajuvënë itoroba

baupa pevetsinēnēxa petoevetabiabinexatsi pijabobaupa. Bo pexainaenē jumaitsi bajaraponējavabelia: “Xaniavaetsia netoevetabianame baupa matapania tapatsimatacabijavabelianēxa,” jai bo pexainaenē. ³⁵ Nexata paxamē ata bajarapacuenia panecopiaevetavanapaename matapania tapatsimatacabitsicajavabelianēxa. Tspijaji raja apo payapētaemē tsane pamatacabita patsijitsianētsica. Ajena meravi, caecanivia, patsipajē. Meravi tuatujēta ata patsipajē. Matabibivēpata ata patsipajē. Bajayacunua ata patsipajē. ³⁶ Bajaraxuata xania baja tsane. Daxitamatacabi saya panecopiaevetavanapaename. Jemata itsa patsipajē, paepatota apo panecopiaevetsimē, pacacaxitajarabijitsipatsi panemajitsijavata. ³⁷ Palivaisi pacatsipaebatsi paxamējavabelia, daxitajivinēxa jumaitsinē. jDaxitamatacabi saya panecopiaevetavanapaename! jai Jesús pijajivijavabelia.

14

Pacuenia picani Jesús pijavajabitsaē jamatabēvaetabatsi yabara pelivaisi
(Mt 26.1-5; Lc 22.1-2; Jn 11.45-53)

¹ Anijamatacabibeje abaxē ajibi pejonenēxa pascuafiesta, itsafiestanua, pafiestajava judiovi baxane levadurata matajērēbinejeva pexanaepan. Nexata bajarapafiestabejevajēnaeya, sacerdotevi penamatacaitorobivi, judiovi pecujarubivinuua, najumejaita picani bajarapafiestajava pevaetabinexatsi Jesús. Penajumetsēnētsilivaisita picani jamatabēvaetabatsi Jesús pebeyaxuabinexatsi. ² Itsiata bajarapamonae najumaitsi:

—Fiestajava meta abaxē apo vaetabi tsanetsi jivi vajanacaitsacueniabianiva, najai bajarapamonae.

Pacuenia Jesús petiriva tsimataepanatsi petuxujuviaceitera yabara pelivaisi
(Mt 26.6-13; Jn 12.1-8)

³ Jesús ponapona Betania tomarata, Simón pijabota. Simón bajayajebi bitso peperabētsabanaenēmi. Nexata Jesús pexaeyecaevajavata mesata, petiriva cobenaimoxoyorenatsi petuxujuviaceitera, nardovēnēra, alabastrobotellabēta pejeaceitera. Bajarapora bitso penamatamotsira. Nexata bajarapova yavētōxobiaxuaba bajarapora, petuxujuviaceitera. Bajaraxuacujinae Jesús tsimataepanaicatsi bajarapaaceitera. ⁴ Bajarajota itsamonae penaenaevi itsa taeyena Jesús petsimataepanaevajavatsitsica, bajarapamonae jamatabēanaepanareca. Nexata epamonae najumai tsenae:

—¿Detsa xuajitsia saya xuaba bajarapacuenia maporaje? ⁵ Canajetsipa rajane. Nexata matamopitsipa trescientos padenariobeje matatoxenetsia. Bajarapapalata rajutsipa bepejiovivi bajarapacuenia peyavenonaenēxa, najai tsenae epamonae.

Bajarapamonae anaepana bajarapovajavabelia.

⁶ Nexata Jesús jumaitsi bajarapamonaejavabelia:

—¿Detsa xuajitsia bajarapacuenia pajumaitsimē bajarapova pexanaejava yabara? Mara povaje pexaniacuenē nexanaje. ⁷ Daxitamatacabi raja bepejiovivi jinavanapa itsaxuayo pajinavanapame. Pamatacabi pajitsipame pexaniacuenē panetoexanaenēxa bepejiovivijavabelia, nexata patoexanaenē. Itsiata baitsi jane xanē daxitamatacabi apo ponaponaenē tsane paxamējavata. ⁸ Mara papetirivaje pexaniacuenē netoexana pacuenia baja cuenecaējēpatsi. Itsamonae petēpaejivi batsiperabēepana petuxujuviaceitera peperabēxaniavaetsinēxa pemēthētsivajēnae. Bajara pijinia pacuenia mapovaje netsimataepana petuxujuviaceitera, abaxē apo tēpae atanē. Nexata baja bajarapova neperabēxaniavaeta itsamonae tanemēthētsivajēnae. ⁹ Xaniajanē pacuenia pacatsipaebijitsiatsi. Daxitanacuanējava tajajivi itsa paebanajetarubenaena pexanialivaisi jivi tacapanepelivaisinēxa, vajuupaeabiabiananua pacuenia exana xanējavaberena mapapetirivaje, jai Jesús pijajivijavabelia.

Pacuenia Judas pona Jesús pijavajabitsaē pecobeyabelia pecanajetsinexatsi yabara pelivaisi

(Mt 26.14-16; Lc 22.3-6)

¹⁰ Jesús pijajivi doce ponēbejeyajuvēnēnē pevēnē Judas. Itsavēnē Iscariote. Nexata Judas pona sacerdotevi penamatacaitorobivijavabelia. Jesús jane baja yajumejailiatsi pecanajetsinexatsi. Nexata jane baja Judas Jesús canajetsi sacerdotevi penamatacaitorobivi pecobeyabelia. ¹¹ Nexata sacerdotevi penamatacaitorobivi itsa tane bajarapacuenē, barēya. Jumaitsi bajarapamonae Judasjavabelia:

—Palata pacarajutsianatsi, jai.

Nexata jane baja xuacujinae Judas Jesús naitaxutocaevetaponaponatsi. Nexata paepatota Judas toypāxanepanatsi, perajutsinēxa jane baja bajarapamonae pecobeyabelia.

Pacuenia Jesús barë nabane pijajivi pecopiarutsinabani baja pebeyaxuabivajënaetsi yabara pelivaisi

(Mt 26.17-29; Lc 22.7-23; Jn 13.21-30; 1 Co 11.23-26)

¹²Junua jane baja fiesta, pafiestajava judïovi baxane levadurata matajërëabinejeva pexanaepan. Bajarapamatacabi ovejaxi babia pexaenexa pascua fiestamatacabi. Nexata Jesús yanijobatsi pijajivi.

—¿Detsa belia paponañajë patacamitsaexanaenexa pascua fiestamatacabi pexaejava nexaenexa? jai Jesús pijajivi.

¹³Nexata Jesús itoroba anijanëbeje pijajivitonëbeje. Jumaitsi:

—Tomarabelia paponarebeje. Bajarajotalia pacaxitajarabianamebeje mera canalito pecanajetarucaenë. Bajaraponë papënanajetarucaenamebeje. ¹⁴Pabota bajaraponë joneyojopaena, bajarapabo pexainañjavabelia pajumaitsimëbeje tsane: “Vajanacacujarubinë raja jumaitsi: “¿Detsa jota pënëyatuucutsibo eca, pabota tajajivi barëxajëtsianë xua jivi baxane pascua fiestamatacabi?” jai raja vajanacacujarubinë,” pajamëbeje tsane bajarapabo pexainañjavabelia. ¹⁵Nexata athëbëabetsia anijairabeje pënëyatuucutsibojavata, pacatsitajëtsianabeje. Bajarapaboënëta athëbëyotsia paira ayaiënëtuatujë tsane. Daxitacuene bajarajota xainaena. Nexata vajaxaejavanexa bajarajotsia paexanaenamebeje, jai Jesús pijajivitonëbejejavabelia.

¹⁶Nexata jane baja ponabeje Jesús pijajivitonëbeje. Patabeje baja tomarabelia. Caxitajarababeje daxita pacuenia Jesús jumaitsitsibeje. Nexata xua jivi baxane pascua fiestamatacabi daxita Jesús pijajivi pebarëxaenexa, bajaraponëbeje exanabeje jane baja.

¹⁷Itsa baja meravitsia, Jesús patajopa bajarajota pijajivi, doce ponëbeje, yajava. ¹⁸Daxita mesata pexaeyenaejavata, Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Caenë paxamëyajuvënënë, xanëjavata pexaeyecaenë, necanajetsiana tajavajabitsaë pecobeyabelia, jai Jesús.

¹⁹Nexata Jesús pijajivi bejamatabëjibireca. Nexata Jesús pijajivi, caenë canacujitsia, Jesúsjavabelia yanijobapona.

—¿Xanë tsaja tsane? jai tsaponae Jesús pijajivi.

²⁰Nexata Jesús jumaitsi pijajivijavabelia:

—Doce paponëmëbejeyajuvënënë raja. Ponëbeje peneta caecuenia panajuacajabutsianajëbeje panbë platojavabelia, bajaraponë tsane. ²¹Nexata xanë, Daxitajivi Pematapijinënë, tæpaenajë pacuenia baja cajena xanë yabara Dioso pejumelivaisibaxutota tajëvelia jumaitsi. Itsiata ponë tajavajabitsaë pecobeyabelia necanajetsiana, bajaraponë bitso bejiobi tsane pinijucuenia. Itsa meta bajaraponë apo naexanae tsipae, bajarapacuenia apo necanajetsi tsipae. Nexata xanepanaejitsipatsi bajaraponë itsa apo naexanae tsipae. Tsipaji apo naneconitsi tsipae Diosojavabelia, jai Jesús pijajivijavabelia.

²²Nexata pexaeyenaejavata Jesús pita panbë. Jesús jumaitsi Diosojavabelia:

—Pexaniacuene panetoexaname. Panerajutame pan, jai.

Bajaraxuacujinae epatsënëquejeba bajarapapanbë. Rajuta pijajivi. Jesús jumaitsi pijajivijavabelia:

—Paxaema. Mara tavitoje, jai.

²³Bajaraxuacujinae icatsia Jesús copavënëjavata yapita pijajivi pebarëpaeranexa. Diosojavabelia jumaitsi:

—Pexaniacuene panetoexaname. Panerajutame maporaje, jai.

Bajaraxuacujinae pijajivi bajarapora rajuta. Daxita Jesús pijajivi bajarapora apa.

²⁴Jesús pijajivijavabelia jumaitsi:

—Tajana raja othopaena jivi ayabitsaëttoxaneto pecapanepaenexatsi. Nexata tatëpaejava pejamatabëcueneta, jivi yapëtaena pepacuene xaniajai Dioso jivi pecapanepaejavanexa, pacuenia baja cajena tajëvelia Dioso najumecapanepaeya jumaitsi. ²⁵Xaniajanë pacuenia pacatsipaebijitsiatsi. Xanë rabaja matavëjëa apo apaenë tsane uvacuaira mapanacuataje, matapania icatsia apaenajë Dioso pijanacuatsia pejanauvacuaira, jai Jesús pijajivijavabelia.

Pacuenia Jesús tajëvelia jumaitsi Pedrojavabelia: “Pedro, xamë raja nayavajunuaxainaname tajajivitonëcuenemë,” jai, yabara pelivaisi

(Mt 26.30-35; Lc 22.31-34; Jn 13.36-38)

²⁶Jesús pijajivi barënaexëana Diosojumevajianë. Bajaraxuacujinae Jesús pijajivi barëpona petsutojumabelia. Patsutojumata olivonaenë apaaxayo, bajarapatsutojumabelia barëpona. ²⁷Nexata bajarapatsutojumata Jesús jumaitsi pijajivijavabelia:

—Daxita raja paxamë ajena, pameravi, panexuabarëcëpecaename. Tsipaji rabaja patanexuabarëcëpecaejavanexamë yabara, Dioso pejumelivaisibaxutota tajëvelia jumaitsi mapacueniaje: “Beyaxuabianatsi raja oveja pevetsinë. Nexata

pijaovejabitsaëto nacayajatsia rëcëpecaena,” jai Dioso pejumelivaisibaxutota paxamë patanexuabarëcëpecaejavanexamë yabara. Nexata ajena, pameravi, tjavajabitsaë itsa nevaetabiana tanebeyaxuabinexa, daxita paxamë panexuabarëcëpecaename. ²⁸ Itsiata baitsi jane tatëpaecujinae icatsia asaënë tsane. Nexata paxamë panevajënaeyabelia copiata ponaenajë Galilea nacuyabelia, jai Jesús pijajivijavabelia.

²⁹ Nexata Pedro jumaitsi Jesúsjavabelia:

–Daxita mapamonaeye caxuabarëcëpecae ata tsane, xanë cajena apo caxuabatabajiravi tsanetsi, jai Pedro.

³⁰ Nexata Jesús jumaitsi Pedrojavabelia:

–Xaniajanë pacuenia catsipaebijitsiatsi. Ajena rabaja, pameravi, nanianaevëpata, nijajumebeje vacara pefiabivajënaeya, nayavajunuaxainaename tajajivitonëcuenemë. “Apo yapëtaenë cajena bajaraponë,” jamë tsane xanë yabara acueyabi xuabeje, jai Jesús Pedrojavabelia.

³¹ Itsiata Pedro ajumesaëya jumaitsi Jesúsjavabelia:

–Nebeyaxuabijitsia ata tsane xamë yajava, itsiata cajena apo nayavajunuaxainaenë tsane nijajivitonëcuenenë, jai Pedro Jesúsjavabelia.

Daxita Jesús pijajivi bajarapacuenia jumaitsi.

Pacuenia Jesús vajëta Diosojavabelia Getsemanivënëjavata yabara pelivaisi

(Mt 26.36-46; Lc 22.39-46)

³² Jesús, pijajivi yajava, pata Getsemanivënëjavata. Bajarajota Jesús jumaitsi pijajivijavabelia:

–Paneevetenare abaxë majotaje tavajëtsiepatoyo Diosojavabelia, jai.

³³ Nexata Pedro, Santiago, Juan, bajara saya pamatabëxëyo, Jesús barëpona pesaicaeyojavabelia. Bajaraxuacujinae Jesús bitso najamatabëxaina. Nexata bejamatabëjibireca.

³⁴ Nexata Jesús jumaitsi pijajivi acueyabi ponëbejejavabelia:

–Xanë bitso pinijicuenia najamatabëxainajë. Nexata tanajamatabëxainaejava yatëpaejitsianë. Paxamë abaxë majotaje panacopabare. Paitavamë tsane. Pëtsa pamajitame, jai Jesús pijajivi acueyabi ponëbejejavabelia.

³⁵ Nexata Jesús, caenë, pevajënaeyabelia icatsia tsiquirijavayo ponataba. Tsipaji Jesús tajëvelia yapëtane pacuenia Dioso tocopatatsi bitso ayaicuenia pebejibioiaexanaenexatsi paepatota pijavajabitsaë beyaxuabijitsiatsi. Nexata Jesús irataeya bocajunua pevajëtsinexa Diosojavabelia. Vajëta picani Diosojavabelia bitso bejibioitsiaya pebeyaxuabiyaniavatsi.

³⁶ Nexata Jesús pevajëtsijavata Diosojavabelia, jumaitsi:

–Taxa Diosomë, netocopatame picani tanebeyaxuabinexa betajibobicueneta. Daxitacuenë raja cacaëjëpa nexanaenexa. Nexata necapanepare bajarapabejibobicuenevecua. Itsiata xanë apo tajëtsipaecuenë ata, pacuenia xamë jitsipame, netocopatsianame, jai Jesús pevajëtsijavata Diosojavabelia.

³⁷ Bajaraxuacujinae Jesús naviarena acueyabi ponëbeje pijajivijavaberena. Caxitajaraba Jesús pijajivi pemajitanubenaevi. Nexata Jesús jumaitsi Pedrojavabelia:

–Simón, ¿pamajitanubename tsaja? ¿Apo pacacaëjëpae tsabaja caeepatoyo ata paneaitavatsenaenexa? ³⁸ Pëtsa pamajitame. Paitavamëre. Pavajëre Diosojavabelia pibisiacuenë paneexanaeyaniva. Tsipaji raja dovathi pacajamatabëcueneëjëbiana. Paxamë picani panejamatabëcueneta pexaniacuene jamatabëpaexanabiabame. Itsiata baitsi jane apo pajamatabëcuenesaëmë pexaniacuene paneexanaenexa, jai Jesús Pedrojavabelia.

³⁹ Nexata icatsia Jesús pona pecovëyabelia pevajëtsinexa icatsia Diosojavabelia. Bajara icatsia pacuenia Jesús vajëta Diosojavabelia pacuenia vajëta copiata. ⁴⁰ Icatsia Jesús naviarena pijajivijavaberena. Caxitajaraba icatsia Jesús pijajivi pemajitanubenaevi. Tsipaji baja Jesús pijajivi bitso itamajitsipana. Nexata Jesús pijajivi apo yapëtae pacuenia jumeceanavitsijitsia Jesúsjavabelia. ⁴¹ Icatsia abaxë Jesús naviata pecovëyabelia pevajëtsinexa icatsia Diosojavabelia. Bajaraxuacujinae, acueyabi baja xuabeje pevajëtsicujinae, Jesús icatsia rena pijajivijavaberena. Jumaitsi Jesús pijajivijavabelia:

–¿Abaxë tsarovia tsiteca pamajitanubename? Ajibi rabaja. Copiapata rabaja paepatota xanë, Daxitajivi Pematapijinënë, necanajetsijitsia pibisiacuene pexanaevi pecobeyabelia. ⁴² Panonobapunare baja. Ponaenatsi baja. Imoxoyo rabaja najetaruca tajavajabitsaë pecobeyabelia tanecanajetsinënëxaxa, jai Jesús pijajivijavabelia Judas yabara.

Pacuenia Jesús vaetabatsi pijavajabitsaë yabara pelivaisi

(Mt 26.47-56; Lc 22.47-53; Jn 18.2-11)

⁴³ Jesús pijavajabitsaë pevaetabijavatanexatsi, cuaicuaijai tsanucuae pijajivijavabelia. Nexata bajarapaepatota patanajetaruca Judas, Jesús pijajivi doce ponëbejejavuvënëni. Judas pënanajetarubenatsi jivi ayabitsaëtoxaneto. Bajarapamonaeyajuvënëni itsamonae canajetarubena espadanë. Itsamonae canajetarubena naebonë yajava. Bajarapamonae

itorobatsi sacerdotevi penamatacaitorobivi, judíovi pecujarubivi ata, judíovi pijaancianovi ata. ⁴⁴ Judas pebarërenavajënae bajarapamonae, copiaya baja cajena Judas tsipaeba pacuenia bajarapamonae yapëtaejitsia Jesúscuene. Judas jumaitsi mapacueniaje:

—Ponë raja peneta bajacobiaya itabaratsutsunexuabianajë, bajaraponë Jesús tsane. Bajaraponë pavaetabianame. Pacobecëtsianame xaniavaetsia. Nexata panecobecëtsinë pacaponeremena, jai baja cajena Judas pematacanajetarucaevijavabelia pebarërenavajënae.

⁴⁵ Nexata jane baja Judas ita patanajetaruca, exana pacuenia baja cajena jumaitsi pematacanajetarucaevijavabelia. Judas Jesús itabaratsutsuniaya bajacobatsi, Judas jane baja pematacanajetarucaevi peyapëtaenexa Jesúscuene. ⁴⁶ Nexata jane baja Jesús pijavajabitsaë vaetabatsi. Cobecëtsia xaniavaetsia.

⁴⁷ Bajarajota Jesús pijajiviyajuvënënë pijaespada navemarajonotaxuabina. Muxuyoropaehixuaba sacerdotevi pepo penamatacaitorobinë pijajivitonë. ⁴⁸ Nexata Jesús jumaitsi pevaetabivitsijavabelia:

—Paxamë meta panetaneme betanacobetoxotsinë. Bajaraxuata pacaponame espadanë, naebonë yajava, patanevaetabinexamë pacuenia pavaetababiabame penacobetoxotsinë. ⁴⁹ Xanë caematacabi canacujitsia Dioso pejumelivaisi paxamëjavabelia pacatsipaebabiabatsi templobota. Itsiata bajarapamatacabi apo pancevaetabimë. Mara pacuenia pancevaetabameje tanetocopiapatsixae baja pacuenia Dioso pejumelivaisibaxutota bajayata tajëvelia jumaitsi xanë yabara, jai Jesús pevaetabivitsijavabelia.

⁵⁰ Nexata jane baja Jesús pijavajabitsaë pevaetabijavatatsi, daxita Jesús pijajivi xubarëcëpecatsi pacuenia baja cajena Jesús jumaitsi tajëvelia pijajivijavabelia.

Pacuenia pevëjëato najetabajirava yabara pelivaisi

⁵¹ Pevëjëato pënanajetaruca Jesús pecaponaevitsi. Sábanata namataquinanajetaruca. Nexata pevëjëato bajarapamonae yasábanavaetabatsi. ⁵² Nexata pevëjëato sábananaixinaxuaba. Najetabajirava jumasane.

Pacuenia Jesús nutatsi judíovi penamatacaitorobivi pitabarata yabara pelivaisi
(Mt 26.57-68; Lc 22.54-55, 63-71; Jn 18.12-14, 19-24)

⁵³ Jesús caponalitsi sacerdotevi pepo penamatacaitorobinë pijaboyabelia. Nacaetuta bajarajota daxita sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava. ⁵⁴ Itsa baja Jesús caponalitsi, nexata Pedro bajarapamonae pecovëya tajiyo najetaruca. Sacerdotevi pepo penamatacaitorobinë pijabo matatoyorotsia yacaranata ibopanaxanetonë, mataropotsia pefaratsijavaxanetota. Nexata bajarapayacaranatsijavaxaneto baupa, Pedro najoneya bopanobojavabelia, itsabelia Jesús cajunuatsi. Nexata sacerdotevi pepo penamatacaitorobinë pijabopanabota, Pedro nanonopeca isoto muxuneneta templobopijipolicíavita.

⁵⁵ Nexata bajarapabo ënëtuatujëta sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, nabarëcëuacuijai. Bajarapamonae nayanijoba.

—¿Jipatsa yapëtane Jesús pibisiacuene pexanaejava, paneconi yabara beyaxuabijitsiatsi? najai tsaponae.

Itsiata bajarapamonae apo caxitajarabi itsaneconi ata Jesús pijaneconi. ⁵⁶ Itsamonae saya penajumetsënëtsilivaisi paeba Jesús yabara. Itsiata caelivaisi najuapaebi ata, najumëjëpaeya apo paebi bajarapamonae. ⁵⁷ Itsamonae nonobapuna. Penajumetsënëtsilivaisi paeba Jesús yabara. Penonobapunaeviyajuvënënë jumaitsi mapacueniaje:

⁵⁸—Paxanë raja, pamatabëxëyo panubenajë majotaje, pajumetaniji Jesús pejumaitsijava. Bjaraponë jumaitsi: “Xanë raja xuabianicajë mapatemploboje, jivi pexanaebo. Acueyabi matababita icatsia itsabo veretetsianajë. Jivi apo pexanaebo tsane,” jai maponë Jesúsje, jai penonobapunaeviyajuvënënë.

⁵⁹ Itsiata daxita bajarapamonae najumëjëpaeya apo paebi.

⁶⁰ Nexata jane baja sacerdotevi pepo penamatacaitorobinë nonotapuna bajarapamonae pitabarata. Nexata jumaitsi Jesúsjavabelia:

—¿Apo yapëtaemë tsaja itsalivaisiyo ata nejumecanaviatsinexa? ¿Xaniajai tsabaja pacuenia mapamonae caneconitsiajumaitsi? jai Jesúsjavabelia sacerdotevi pepo penamatacaitorobinë.

⁶¹ Jesús itsiata moya. Apo jumepitsi cajena. Nexata icatsia sacerdotevi pepo penamatacaitorobinë jumaitsi Jesúsjavabelia:

—¿Xamë tsabaja pepacuene Cristomë, athëbëvetsica Dioso pecaitorobinëtsica jivi necapaneapenexa? ¿Xamë tsaja, Dioso pexënatomë? jai.

⁶² Nexata Jesús jumaitsi bajaraponëjavabelia:

—Jājā, xanē rabaja. Paxamē raja panetaename, Daxitajivi Pematapijinēnē, taecaejava Dioso pecujanenia, daxitajamatabēcuene pecaējēpaenēsi. Panetaenamenua tanajetarucaejawa athēbēvetsica itarērēbota, jai Jesús.

⁶³ Bajarapacuenia Jesús pejumaitsijava itsa jumetane, sacerdotevi pepo penamatacaitorobinē penaxatatsijava anaeya titinaxuaba. Bajarapacuenia titinaxuaba pi-anaepanaexae Jesús pejumaitsijava yabara. Nexata sacerdotevi pepo penamatacaitorobinē jumaiti saxita penacaetuatsivijavabelia:

—Pijacuata rabaja pejumaitsijumeta naneconita. Pematatsēnēa apo namatavenonaetsi itsamonaē vajanacatsipaebinexa paneconi yabara maponēje naneconitsiaexanaejitsiatsi. ⁶⁴ Paxamē rabaja pajumetaneme maponēje Dioso apo pejitsipaecuenia pecuaicuaijajava. Tsipaji Dioso bepexēnato nataeya cuaicuaijai. ¿Detsa nexata paxamē pajamatabēitsimē? jai sacerdotevi pepo penamatacaitorobinē daxita penacaetuatsivijavabelia.

Nexata daxita penacaetuatsivi jumaiti:

—Naneconita rabaja Diosojavabelia. Nexata baja beyaxuabianatsi, jai bajarapamonae Jesús yabara.

⁶⁵ Nexata bajarapamonae yajuvēnēvi Jesús itabarasuabatsi. Bajaraxuacujinae papaēbērēpanata itaxutocētatsi. Pitaxutocētsicujinaetsi itabaratsaquibabeponatsi pecobethaitonēta. Nexata bajarapamonae jumai tsaponae Jesúsjavabelia:

—ǀVēnējonare ponē caitabaratsaquibabepona! jai tsaponae bajarapamonae.

Bajaraxuacujinae templobopijipoliciaivi itabarapacabixuabatsi Jesús.

Pacuenia jane baja Pedro nayavajunuaxaina Jesús pijajivitonēcuene yabara pelivaisi

(Mt 26.69-75; Lc 22.56-62; Jn 18.15-18, 25-29)

⁶⁶ Itsa abaxē Jesús sacerdotevi pepo penamatacaitorobinē pijabo ēnētuaatjēalia yanijobapanatsi xua yabara naneconitsiaexanaejitsiatsi, Pedro naitaxutocaevevtsiaya naeca bopanabota. Nexata bajarajota taeyetatsi petiriva, sacerdotevi pepo penamatacaitorobinē pijabota penacuenebiva. ⁶⁷ Bajarapova Pedro taeyetatsi penanonopecaejavata. Nexata bajarapova naitaxutobabatsia asaēya taenucatsi Pedro. Jumaiti:

—Xamē ata rabaja naponaponame Jesúsata, Nazaret tomarapijinēta, jaitsi.

⁶⁸ Nexata Pedro itsiata nayavajunuaxaina Jesús pijajivitonēcuene. Nexata Pedro jumaiti bajarapovajavabelia:

—Jume raja. Apo yapētaenē cajena bajaraponē. Apo yapētaenē pacuene yabara nejumait-simē, jai Pedro.

Bajaraxuacujinae Pedro pejonebaupajavaverenajavabelia natixilia. Nexata vacara fiaba. ⁶⁹ Icatsia bajarapova Pedro tanetsi. Nexata pamonaē bajarajota nubena, bajarapamonaejavabelia bajarapova jumaiti:

—Mara ponēje Jesús pijajiviyajuvēnēnēje, jai bajarapova Pedro yabara.

⁷⁰ Icatsia nexata Pedro jumaiti:

—Jume raja. Apo yapētaenē cajena bajaraponē, jai.

Bajaraxuacujinae, icatsia caepatoyocujinae, bajarajota penubenaevi Pedro jumaiti:
—Xaniajai raeta baja cajena. Xamē Jesús pijajiviyajuvēnēnēmē. Tsipaji rabaja Galilea nacupijinjēmē. Galilea nacupijivi pecuaicuaijaicuenia cuaicuaijamē, jaitsi.

⁷¹ Nexata Pedro pejumexanianaenexatsi, ajumesaēya jumaiti:

—Itsa apo xaniajanē tsipae paxamējavabelia, nexata Diosojavabelia naneconitsipajē. Apo yapētaenē cajena ponē yabara panejumaitsimē, jai Pedro.

⁷² Itsa baja Pedro najumevereta bajarapacuenia pejumaitsijava, vacara icatsia fiaba. Nexata bajarajota Pedro najamatabēnapitajaraba pacuenia Jesús jumaiti: “Anijamebeje vacara pefiabivajēnaeya, nayavajunuaxainaename tajajivitonēcuenēmē. ‘Xanē cajena apo yapētaenē bajaraponē,’ jamē tsane xanē yabara acueyabi xuabeje,” pejaajavatsi Jesús, Pedro najaaraba. Nexata bajarajota Pedro bitso najamatabēxaina Jesús pejumaitisijumetsi yabara. Pedro nexata nua.

15

Pacuenia Jesús nutatsi Pilato pitabarata yabara pelivaisi

(Mt 27.1-2, 11-14; Lc 23.1-5; Jn 18.28-38)

¹ Ajena baja mataba tsarucaponae, sacerdotevi penamatacaitorobivi, judiovi pijaancianovi ata yajava, judiovi pecujarubivi ata yajava, nacaetuata. Icatsia pematatsēnēa itsamonaē bajarapitsijamatabēcuenevi yajavanacaetuata penabarēcuaicuaijainexa. Bajaraxuacujinae bajarapamonae Jesús cobecētsiaya caponaliatsi nacuaevetsinē Pilatojavabelia.

² Nexata Pilato yanijobatsi Jesús.

—¿Xamē tsaja judiovi pepo nevetsinē? jaitsi.

Nexata Jesús jumaiti Pilatojavabelia:

—Jājā, xanē rabaja pacuenia nejumlahitsimē, jai Jesús Pilatojavabelia.

³ Sacerdotevi penama itsamonae bajarapitsijamatabēcuenevi yajtacaitorobivi jumaitsi Pilatojavabelia:

—Jesús raja bitso pibisiacuene exanabiaba, jai.

⁴ Nexata icatsia Pilato yanijobatsi Jesús.

—¿Itsalivaisiyo ata tsaja apo yapētaemē nejumecanaviatsinexa? ¿Apo jumetaemē macuena pecaneconitsijavaje? jaitsi.

⁵ Itsiata Jesús matavējēa apo jumepitsi Pilatojavabelia. Bajaraxuata Pilato apo yapētae pacuenia exanaejitsia Jesúsjavabelia.

*Pacuenia baja Pilato tocopata Jesús pebeyaxuabinexatsi yabara pelivaisi
(Mt 27.15-31; Lc 23.13-25; Jn 18.38-19.16)*

⁶ Nacuaevevtsinē Pilato xaina pijacujirucue. Caevai canacujitsia, pascua fiestamatacabi, Pilato copatabiaba caenē penaneconitsinē pepitsapaenexa penaneconitsivi pejebabiabibovecua. Pajivi yabara jivi Pilatojavabelia vajēcabiaba, Pilato nexata copatabiaba bajarapajivi pascua fiestamatacabi. Bajarapacuenia Pilato caenē copatabiaba jivi pesivajamatabēcuene xanepanaenexatsi. ⁷ Pamatacabi Jesús naneconitsiaenexatsi, bajarapamatacabi Barrabásvēnēnē jivi pebarēbevi barēnaneconitsiauponapona penaneconitsivi pejebabiabibota. Barrabás, itsamonae yajava, barēnabia picani gobierno pijajivijavabelia. Nexata taicatsi. Naneconitsiaexanejebatsi penaneconitsivi pejebabiabibota. ⁸ Nexata jivi pona Pilatojavabelia. Jumaitsi bajarapamonae Pilatojavabelia:

—Pacuenia pascua fiestamatacabi copatabiabame caenē pepitsapaenexa penaneconitsivi pejebabiabibovecua, bajarapacuenia panetocopare caenē pepitsapaenexa penaneconitsivi pejebabiabibovecua, jai bajarapamonae Pilatojavabelia.

⁹ Nexata Pilato jumaitsi bajarapamonaejavabelia:

—¿Pajitsipame tsaja patacatocopatsijava pepitsapaenexa Jesús, pajudiovimē pepo pacaevetsinē? jai Pilato.

¹⁰ Bajarapacuenia Pilato jumaitsi tsipaji yapētane pajamatabēcuene yabara sacerdotevi penamatacaitorobivi tocaponarenatsi Jesús. Pilato jamatabēcuene yapētane sacerdotevi penamatacaitorobivi Jesús pecueneitoyaxaetsi petocaponaevjavatsirena. ¹¹ Nexata bajarapamonae asaēya vajēca Barrabás pecapitsapaenexatsi. Tsipaji baja cajena sacerdotevi penamatacaitorobivi muxubijijapenetsia jumaitsi jivijavabelia:

—Asaēya pavajēcaename Barrabás pecopatsinexatsi. Nexata Barrabás copatsianatsi pepitsapaenexa penaneconitsivi pejebabiabibovecua. Pētsa pavajēcame Jesús pecopatsinexatsi, jai baja cajena sacerdotevi penamatacaitorobivi jivijavabelia.

¹² Nexata icatsia Pilato yanijoba jivijavabelia:

—¿Detsa nexata xua pajitsipame taexanaenexa maponējavabeliaje: “Judiovitsi pepo vanacaevevtsinē,” paneyabarajainējavabelia? jai Pilato judiovijavabelia Jesús yabara.

¹³ Nexata bajarapamonae vavajai pinijijumeta.

—¡Cruzajavabelia cobematabiabarutsiaexanare! jai Pilatojavabelia.

¹⁴ Nexata Pilato jumaitsi bajarapamonaejavabelia:

—¿Detsa pitsineconi yabara cobematabiabarutsiaexanaejitsipajē? jai Pilato Jesús yabara.

Itsiata bajarapamonae icatsia pinijijumeta vavajai.

—¡Cruzajavabelia cobematabiabarutsiaexanare! jai tsaponae.

¹⁵ Nexata baja Pilato tocopata Barrabás pepitsapaenexa penaneconitsivi pejebabiabibovecua jivi barajamatabēcuenexanepanaeya petaenexatsi. Nexata Pilato pijajivi, vajabitsaēvi, itoroba copiaya Jesús ayaicuenia pejumatiitibabenexatsi penaneconitsivi pejumacnitabiabimacata. Bajaraxuacujinae Pilato tocopata baja Jesús vajabitsaēvi pecobematabiabarutsinexatsi cruzajavabelia.

¹⁶ Nexata baja vajabitsaēvi Jesús caponaliatsi nacuaevevtsinē Pilato pijaboxanetojavabelia. Nexata bajarajota nacaetuata daxita vajabitsaēvi. ¹⁷ Bajaraxuacujinae Jesús quenetsiataeya xatatatsi peraēnaetsausaucaejava. Xua nacuaevevtsinē banaxatata, bajaraxua xatatatsi benacuaevevtsinēcuenia petaenexatsi. Coronacuenia pemataxatatsinexatsi, peejuvitoyoroto tsimataexanatsi. Bajarapatoyoroto Jesús mataxatatatsi. ¹⁸ Bajaraxuacujinae quenetsiataeya bajacobaponatsi.

—¡Bajaco, judiovi pepo pevetsinē! jai tsaponae bajarapamonae Jesúsjavabelia.

¹⁹ Bajarapamonae caenē canacujitsia mataconibixuabaponatsi naebota. Suabaponatsinua. Beyaiyataeya itajara pematabacabēta tonubenajoneyabiabatsi Jesús pitabarata. ²⁰ Jesús quenetsiataeya pecapocaponaecujinaetsi, vejumajonotatsi baja xua xatatatsi, peraēnaetsausaucaejava. Jesús baja icatsia xatatatsi penaxatatsijava. Caponaliatsi jane baja pecobematabiabarutsinexatsi cruzajavabelia.

Pacuenia jane baja Jesús cruzajavabelia cobematabiabarutatsi yabara pelivaisi
(Mt 27.32-44; Lc 23.26-43; Jn 19.17-27)

²¹ Alejandrobeje Rufobeje paxa, Simónvënëñë, Cirene tomarapijinë. Nexata Simón najetaruca vayafotusatojavaverena. Nexata vajabitsaëvi Simón junatatsi, pacruzajavabelia Jesús cobematabiabarutatsijitsiatsi, peyavenonaeyacaponanexa.

²² Caponaliatsi Jesús Gólgotavënë tsojavabelia. “Gólgota,” itša jai hebreojumeta, mapajumetaje pejumaitsijume: “Jivimatasipatsuto,” pejaijume. ²³ Bajarajota picani Jesús rajutatsi vinora piapaenexa, pematajerëabira mirravënëjavata, bitso penavixetaeyaniva pecobematabiabiavatatsi cruzajavabelia. Itsiata Jesús apo apae. ²⁴ Nexata jane baja Jesús vajabitsaëvi cobematabiabarutatsi cruzajavabelia. Bajarapacuenia canamuxusita peyapëtaenexa ponë pitaponaejitsia caejava canacujitsia Jesús penaxatatsijavami, xua jumaponapona. Bajarapacuenia vajabitsaëvi natsicobetsana Jesús penaxatatsijavami.

²⁵ Bajayacunuaepatota, a las nueve, Jesús cobematabiabarutatsi cruzajavabelia. ²⁶ Bajarajota Jesús pematabocoto matatsënëyo yaquinaruta tablapayota itsamonae ata peyapëtaenexa pajamatabëcuene yabara Jesús cobematabiabarutatsi cruzajavabelia. Jumai tsarutsi peyaquinaruttsiitane cruzajavata mapacueniaje: “Mara ponëje judiövi pepo pevetsinëje,” jai tsarutsi Jesús yabara. ²⁷ Anijanëbeje penacobetoxotsinëbeje, Jesús yajavacobematabiabarutatsi. Caenë canacujitsia pijacruzata rubatsi. Bajaraponëbeje Jesús pemuxuneneta rutatsibeje. Itsanë Jesús pecujanenia rutatsi. Itsanë Jesús petsavenonia rutatsi. ²⁸ Bajarapacuenia Jesús itša yajavacobematabiabarutatsi penacobetoxotsinëbeje, nexata Jesús tocopiapatatsi pacuenia baja cajena Dioso pejumelivaisibaxutota tajëvelia jumaitši Jesús yabara. Dioso pejumelivaisibaxutota tajëvelia jumaitši Jesús yabara mapacueniaje: “Naneconitsiaexanaenatsi bepibisiacuene pexanaenëcuena,” jai baja cajena tajëvelia Dioso pejumelivaisibaxutota Jesús yabara.

²⁹ Jesús cobematabiabarutatsijavatsi cruzajavabelia, bajaraxuayo penajetarubenaevi Jesús itaropitsiaya bijataeyabiabatsi. Jumai tsabiabi bajarapamonae:

–Yiara jane maitsimëje. Xamë raja imata jumaitšimë: “Xuabianicajë templobo. Acueyabi matocabita icatsia veretetsianajë itsabo,” jamë. ³⁰ Nacapanepare jane baja nijacuata. Cruzajavavetsica runaimica, jai tsabiabi Jesúsjavabelia bajaraxuayo penajetarubenaevi.

³¹ Bajara pijinia pacuenia sacerdotevi penamatacaitorobivi, judiövi pecujarubivi ata, capocaponatsi Jesús. Èpamonae najumaitši:

–Maponëje itsamonae yabara jumai tsabiabi: “Capanepaenajë jivi,” jai tsabiabi. Caranata pijacuata penacapanepaenexa, apo caëjëpaetsi. ³² Itša xaniajai pepacuene Cristo, athëbëvetsica Dioso pitorobinëtsica jivi pecapanepaenexa, Israel nacuapijivi pepo pevetsinëxanua, aeconoxae runaenica cruzajavavetsica vajataenexa. Nexata jane baja jumecovënëtsianatsi Cristonëcuene, najai bajarapamonae capocaponaeya Jesús yabara.

Ponëbeje ata Jesús yajavacobematabiabarutatsi, bajaraponëbeje ata, Jesús bijataerucat-sibeje.

Pacuenia baja Jesús tēpa yabara pelivaisi
(Mt 27.45-56; Lc 23.44-49; Jn 19.28-30)

³³ Jesús baja itša tēpaejitsia, ajena matonejejitsia, daxita nacuajava aitaquiri tsajuni. Matapania caniviyojavabelia, bejamatabëcuene a las tres, nacua napebeta icatsia. ³⁴ Nexata icatsia paepatota nacua napebeta, bajarapaepatota pinijicuenia Jesús aëjai. Jumaitši:

–Eloi, Eloi, ¿lama sabactani? jai Jesús.

Bajarapacuenia Jesús itša jumaitši pijajumeta, mapajumetaje pejumaitsijume: “Taja-Dioso, tajaDioso, ¿detsa xuajitsia baja tajaepato necopatame?” pejaijume.

³⁵ Nexata itsamonae bajarajota penubenaevi bijiaya jumetane bajarapacuenia Jesús pejumaitšijava. Nexata saya jamatabëcuenenavëxaniabiaya jumaitši bajarapamonae:

–Jica, pajumetaema. Mara ponë junata profeta Elíaspijinëmije, Diosojumepaebinëmi, jai bajarapamonae.

³⁶ Nexata bajarapamonaeajuvënëñë piajatuvonorayalia bepijia jabutaxuaba esponjavënëñëjava. Bajaraxuacujinae esponjavënëñëjava naeboupita cëtaruta. Toyotsiatsi picani Jesús petsutsuninexa bajaraxua. Ponë picani Jesús toyotsiatsi bajaraxua petsutsuninexa, bajaraponë jumaitši penajuanubenaevijavabelia:

–Bajarapacuenia abaxë copatarutatsi Jesús. Taenatsi Elíaspijinë itša najetaruca cruzave-cua penutsinexatsitsica Jesús, jai bajaraponë capocaponaeya.

³⁷ Jesús icatsia pinijicuenia aëjai. Bajaraxuacujinae jane baja Jesús tēpanajereca. ³⁸ Paepatota Jesús tēpanajereca, bajarapaepatota templobo ëñëtuatuajëalia peyatuucutarut-sipana, ayaipapaëbërëpanaxaneto, titititica tuatuajëareca, athëbëvetsicacujinae irabereca.

³⁹ Nexata paepatota Jesús tēpanajereca, vajabitsaēvi pijacapitán Jesús pitabara canacujitsialia nuca. Nexata bajaraponē taenuca Jesús pinijucuenia peaejajava. Taenucanua Jesús petēpanajetsijavareca. Nexata vajabitsaēvi pijacapitán jumaitsi:

—Matsaena ponē tēpaje, pepacueña baja rovia Dioso pexēnato, jai.

⁴⁰ Bajarajota petiriavibitsaētoxfaneto tajiyoverena taenubena Jesús petēpaejave. Bajarapapetriavi tuatuajēta nanubena mapamatabēxēyoje. Itsava Mariavēñeva, Magdala tomarapijiva. Itsava Saloméñevēña. Itsava icatsia Mariavēñeva. Bajarapova Santiagojebe Joséjebe pena. Bajaraponē Santiago, pevējēato abaxē itsanē Santiagovēñevēncua.

⁴¹ Pamatacabi abaxē Jesús ponapona Galilea nacua, bajarapapetriavi Jesús pēnainavanapatsi peyavenonaenexatsi. Papetriavibitsaētojavata Mariabana nanubena, bajarapapetriavi ata Mariabana Jesús najuapēnaponarena Galilea nacuaavereña Jerusalén tomaraberena.

Pacuenia Jesús petēpaenē mēthētatsi yabara pelivaisi
(Mt 27.57-61; Lc 23.50-56; Jn 19.38-42)

⁴²⁻⁴³ José Arimatea tomarapijinē, judíovi pevetsinē, peyaiyataenētsi. Bajaraponē José copiaevetaponapona pecopiapatsijava pamatacabi caenē Dioso evetsijitsia daxita pijajivi mapanacuataje. Judíovi baja penacueraevetsimatacinexa pevājēnaeya pamatacabi, caniviyotsia baja. Bajarapamatacabi judíovi banacuenevereta baja penacuenebijava. Nexata bajarapaepatota José acueñura ata, najamatabēsāeta. Nexata lia nacuaevetsinē Pilatojavabelia. Nexata José vājēta Pilatojavabelia petocopatsinexatsi Jesús petēpaenē pemēthētsinexa. ⁴⁴ Nexata Pilato jamatabējumaitsi:

—Xaniajai tsamē rabaja Jesús tēpa, jamatabējai tsipaji abaxē bajayajebi Jesús apo rucae cruzajavabelia pecobematabiabarutsicujinaetsi.

Nexata Pilato junata vajabitsaēvi pijacapitán. Nexata Pilato yanijoba vajabitsaēvi pijacapitánjavabelia, Jesús petēpaecueña Pilato pepapētaenexa. ⁴⁵ Nexata vajabitsaēvi pijacapitán tsipaeba Pilatojavabelia.

—Jesús rabaja capanepaeya tēpa, jai.

Nexata jane baja Pilato José tocopatatsi cruzajavavetsica pepitsinexa Jesús petēpaenē. ⁴⁶ Nexata José comuata pexaniaviriasábana. Bajaraxuacujinae José jane baja cruzajavavetsica pitsica Jesús petēpaenē. Daxitanēreca mataquionaeya matacacēba pexaniaviria piapiasábanapanata. Bajaraxuacujinae itsajota cajena José iboitapanijotjavata pinijiihovaju exanaeyaexanabuata petēpaevi pebuataponaenexa, bajarapaibovajualia José buata Jesús petēpaenē. Bajaraxuacujinae pinijiihovapanaxaneto José tixirena. Yavajuvēpaacatabuata.

⁴⁷ María Magdala tomarapijiva, itsava pijinia María, José pena, bajarapovabeje tanebeje itsajota Jesús buataetsi petēpaenē.

16

Pacuenia Jesús petēpaecujinae icatsia asaē yabara pelivaisi
(Mt 28.1-10; Lc 24.1-12; Jn 20.1-10)

¹ Judíovi baja penacueraevetsimatacabi itsa verevereca, acueyabi povamaxēto comuata petuxujuvira. Itsava Mariavēñeva, Magdala tomarapijiva. Itsava Saloméñevēña. Itsava icatsia Mariavēñeva. Bajarapova Santiago pena. Bajarapamonae petuxujuvira comuata peperabēexabinexa picani Jesús petēpaenē. ² Nexata baja judíovi penacueraevetsimatacabi itsa verevereca, meravia pitsijavata, ajena baja matacabi tsarucapone, bajarapamonae ponalia Jesús pebuatsiibovajutsijavabelia. ³ Nexata bajarapamonae namutualia najumaitsi tsanajetarubena:

—¿Jipatsa meta nacatotixitsiana Jesús peyavajuvēpa acatabuatsiibopanaxanetotsi? najai tsanajetarubena bajarapamonae.

⁴ Nexata bajarapamonae itsa imoxoyotabuatapona, naēcobarēcēpalia ibovajuvavelia. Nexata taeyabuata ibopanaxanetomi petixitabuatsijavalia ibovajuvēpavecua. Bajarapai-bopana bitso pinijiihovapanaxaneto. ⁵ Nexata petiriavi itsa joneya Jesús pebuatsiibovajutsijavalia, taeyeta pecujanenia pevējēato. Bajaraponē naxatateca piapiajava peniiponaejava. Nexata petiriavi najunaviaca. ⁶ Nexata pevējēato jumaitsi petiriavijavabelia:

—Pētsa panajunaviacame. Paxamē picani pajaitame Jesús, Nazaret tomarapijinē, ponē cobematabiabarutatsi cruzajavabelia. Asaē rabaja icatsia bajaraponē petēpaecujinae. Ajibi rabaja tsarucacae majotaje. Pataema jane itsajota picani buataetsi. ⁷ Paponare baja. Patsipaebianame pijajivijavabelia, Pedrojavabelia ata. Pajumaitsimē tsane bajarapamonaejavabelia: “Jesús pina panevajēnaeyabelia pona Galilea nacuaayabelia. Baja pina jotalia pacaxitajarabianame Jesús pacuenia baja pacajumaitsi,” pajamē tsane pijajivijavabelia, jai pevējēato petiriavijavabelia.

⁸ Nexata saya bajarapapetiriavi rēcēpeca Jesús pebuatsiibovajutsivecua. Neconecojai saya pecajunavi. Nexata namutoepatua apo tsipaebi itsajivijavabelia ata. Tsipaji bitso junava.

Pacuenia Jesús petēpaecujinae, icatsia itsa asaē, tsitanaitajēta María Magdala tomarapiji-vajavabelia yabara pelivaisi

(Jn 20.11-18)

⁹ Judíovi baja penacueraevetsimatacabi itsa verevereca, meravia pitsijavata, ajena baja matakabi tsarucaponae, Jesús icatsia asaē petēpaecujinae. Bajarapamatakabi copiata Jesús tsitanaitajēta María, Magdala tomarapijivajavabelia. Bajarapova cajena copiaya Jesús vecuacapitsapa siete padovathibeje itsa abaxē Jesús apo beyaxuabitsi. ¹⁰ Nexata María, Magdala tomarapijiva, Jesús petsitanaitajētsicujinaetsi, pona Jesús pijajivijavabelia. Nexata María pevājēnae Jesús pijajivi abaxē vēnueyena Jesús. Nexata María itsa pata Jesús pijajivijavabelia, tsipaeba pacuenia María tane Jesús. ¹¹ María jumaitsi Jesús pijajivijavabelia:

–Jesús rabaja icatsia asaē petēpaecujinae. Taniji rabaja tajacuata, jai.

Itsiata Jesús pijajivi apo jumexaniataetsi María.

Pacuenia Jesús petēpaecujinae icatsia itsa asaē, tsitanaitajēta pijajivitonēbejejavabelia yabara pelivaisi

(Lc 24.13-35)

¹² Jesús pijajivitonēbeje najetarucabeje namutua. Nexata Jesús pijajivitonēbeje namutua penajetarucaejavatabeje, Jesús tsitanaitajēta beitsanēcuenia pijajivitonēbejejavabelia. ¹³ Nexata Jesús pijajivitonēbeje itsa tanebeje Jesús, naviatecabeje. Nexata pacuenia tanebeje Jesús, tsipaebabeje itsamonae Jesús pijajivijavabelia. Itsiata bajarapamonae apo jumexaniataetsibeje.

Pacuenia Jesús petēpaecujinae, icatsia itsa asaē, pijajivi itoroba pexanialivaisi jivi petsipae-banajetarubenaenexa daxitanacuanējava yabara pelivaisi

(Mt 28.16-20; Lc 24.36-49; Jn 20.19-23)

¹⁴ Bexējavabelia icatsia Jesús tsitanaitajēta pijajivi once ponēbejejavabelia penabanenaejavata mesata. Nexata Jesús pinijicuenia muxujioba pijajivi plajamatabēcuenetajaxae. Muxujiobanua apo pejumecovēnētsixae petsipaebijavatsi pamonae tane Jesús icatsia piasaējava petēpaecujinae. ¹⁵ Nexata Jesús jumaitsi pijajivijavabelia:

–Paponare daxitanacuanējava daxitajivi panetsipaebanajetarubenaenexa pexanialivaisi pecapanepaelivaisinexatsi. ¹⁶ Pajivi jumecovēnētsiana bajarapalivaisi, nexata pabautisabianame. Bajarapajivi Diosojavabelia capanepaenatsi. Pajivi apo jumecovēnētsi tsane bajarapalivaisi, daxitamatacabijavabelianexa naneconitsiana Diosojavabelia. ¹⁷ Pamonae peneta jumecovēnētsiana bajarapalivaisi, mapacuenia exanavanapaenaje. Tavēnēta jivivecua capitsapaponaena dovathi. Itsaviriajumetanua, apo penatsipae-bijumemi ata, jemata natsipaebiana. ¹⁸ Bajarapamonae jomo pecobeta pitsi ata tsane, apae atanua tsane jivi petēpaeyaexanaera, itsiata apo tēpae tsane. Bajarapamonae itsa nacobebuatsiana piavitanejivi pematatsēnēvereca, pejayatsijivi jamatejema tsane piavitanejavavecua, jai Jesús pijajivijavabelia.

Pacuenia Jesús petēpaecujinae, icatsia itsa asaē, naviata baja athēbēabetsia yabara pelivaisi

(Lc 24.50-53)

¹⁹ Vajatuxanenē Jesús livaisi petsipaebicujinae pijajivijavabelia, Dioso baja pesaēta catsiatsi athēbēabetsia. Nexata athēbētatsia Jesús eca Dioso pecujanenia penajuaevevtsinexabeje daxitacuenē. ²⁰ Nexata jane baja Jesús pijajivi daxitanacuanējava jivi tsi-paebanajetarubena bajarapapexanialivaisi. Nexata daxita pamonae jumetaeyabibatsi, jumecovēnētabiabatsi pexaniajalivaisi petsipaebicuenē. Tsipaji Jesús pijajivi jamatabēcueneyavenonabiaba Jesús pijajivi pinijicuenē pexanaenexa jivijavabelia livaisi petsipaebabiabijavata.

Pexanialivaisi Jesucristo pelivaisi, San Lucas peyaquinaelivaisi

Pacuenia Lucas taxuxuaba mapabaxutotaje Jesucristo pelivaisi, petoyaquinaejava Teófilovēnējavabelia, yabara pelivaisi

¹⁻² Pamatacabi abaxē Jesús ponapona mapanacuataje, jivi ayaiBITSaētoXaneto tanetsi peponaponaejava. Bajarapamonae tanetsi Jesús petaxuxuabijavaveliacujinae jivi livaisi petsipaebaponaejava. Nexata bajarapamonae paebanajetarubena tomaranējava Jesús pelivaisi, pexanialivaisi. Nexata tomaranējava Jesús pelivaisi pejumetaevi, ayaiBITSaēto, baja cajena yaquina juya mataropotsia petsipaebinexa itsamonaejavabelia. Pacuenia Jesús petaevitsi vajunupaebatsi, bajarapamonae yaquina baja cajena Jesucristo pelivaisi. ³ Nexata xanē ata mapamatacabitaje yanijobaponajē bajarapalivaisi daxita peyapētaevijavabelia. Yanijobaponajē xaniavaetsia tayapētaenexa pacuenia Jesús exanaponapona petaxuxuabijavaveliacujinae mapanacuataje. Teófilo, catoyaquinatsi. Catoyaquinatsi mapabaxutotaje xamē ata xaniavaetsia neyapētaenexa daxita bajarapalivaisi, Jesucristo pelivaisi. Netsitaxanepana tacatoyaquinaenexa daxita bajarapalivaisi neyapētaenexa pacuenia jumai tsaponae caelivaisi canacujitsia Jesús pexanaponaevajanē yabara, caejava canacujitsia. ⁴ Copiaya baja picani itsamonae catsipaeba bajarapalivaisi. Itsiata icatsia xanē catoyaquinatsi neyapētaenexa jane baja xaniavaetsia bajarapalivaisi pexaniajailivaisicuene.

Pacuenia ángel tajēvelia jumaitsi Zacaríasjavabelia: “Nexēnatonēyo raja xainaename,” jai yabara pelivaisi

⁵ Pamatacabi abaxē Herodes eveta Judeanacua, bajarapamatacabi ponapona sacerdotenē Zacarías. Bajaraponē sacerdotevi Abíasvēnēvijavujēnēnē. Zacarías pijava pevēnē Elisabet. Bajarapova sacerdotenēmi Aarónpijinē pemomoxiyajuvēnēva. ⁶ Bajarapajivibeje xaniavaetsia aneconijibia Dioso pitabarata toponaponabeje. Dioso jumecovēnētsiaya ponaponabeje pacuenia Dioso itorobatsi judiovi xaniavaetsia pejinavanapaenexa. ⁷ Itsiata bajarapajivibeje pexi apo xainaabeje. Tsiapaji Elisabet mavecova. Nexata bajarapajivibeje bitso baja perujujiviyobeje.

⁸ Nexata itsamatacabi Zacarías templobota nanacuenebijitsia sacerdotevi penacuenebicuene Dioso pitabarata. Pasemanata daxita sacerdotevi, Abíasvēnēvi, nacobenaevetsijitsia templobo, bajarapasemana Zacarías daxitasemana nanacuenebijitsia templobota. ⁹ Nexata abaxē sacerdotevi petaxuxuabijavajēnaeya penacuenebijava, pijacujirucuenia exana penayapētaeponaenexa xua caenē canacujitsia nacuenebijitsia templobota. Nexata sacerdotevi pijacujirucuenia pexanaecujinae, itsa baja yapētane xua caenē canacujitsia nacuenebijitsia templobota, nexata Zacarías tocopatatsi templobōēnēalia petajuitsinexa inciensovēnējava, petuxujuvijava. Bajaraxuata Zacarías joneya temploboyalia petajuitsinexa jane baja inciensovēnējava templobōēnēalia. ¹⁰ Paepatota Zacarías tajuitanuca inciensovēnējava templobōēnēalia, jivi ayaiBITSaētoXaneto templobojumavelia vajēcanubena Diosojavabelia. ¹¹ Nexata Zacarías templobōēnēalia, altarpvēnējava muxuneneta, tsitanaitajētatsi ángel. Paaltarpvēnējavajumata incienso tajuitabiaba Dionexa, bajarapaaltarpvēnējava pecujanenia pamuxunenējavata, Zacarías taenuta ángel. ¹² Nexata Zacarías itsa taenuta ángel, apo yapētae pacuenia exanaejitsia Zacarías. Bitso jamatabēcuenenajunaviaca. ¹³ Nexata ángel jumaitsi Zacaríasjavabelia:

–Zacarías, pētsa junavame. Dioso baja cajena cajumetane nevajētsijava. Nexata nijava Elisabet catonacoxitsiana. Nexēnatonēyo baja xainaename. Vēnērubianame bajaraponēyo Juan. ¹⁴ Piniicuenia, jivi ayaiBITSaēto yajava, barēyamē tsane bajaraponēyo itsa catonaejanaena. ¹⁵ Tsiapaji bajaraponēyo ayaijamatabēcuenenē tsane Dioso pitabarata. Apo apae tsane pīataneranē. Vinora ata apo apae tsane. Penaexanaejavaveliacujinae tsijamatabēnēcaenatsi Espíritu Santo. Nexata Espíritu Santo pitorobicueniatsi, exanabiabi-ana. ¹⁶ Bajaraponē, Juan, Israel nacuapijivi najamatabēcuenecopatsiaexanaena Diosojavabelia. ¹⁷ Bajayata Diosojumepaebinēmi, profeta Elíaspijinē, ayaijamatabēcuenenēmi, Dioso pesaē yajavaponapona. Espíritu Santo ata pitorobicueniatsi, exanaponapona. Bajara icatsia itsane Juan ata. Bajaraponē pejamatabēcueneta, penacoxiitoyavimi ata, icatsia nacoxiasiva tsane. Bajaraponē pejamatabēcueneta, itsamonae pijinia pibisijamatabēcuenepexinaevi ata, jamatabēcuene xanepanaeayaexanaena pexaniajamatabēcuene pexinaenexa. Bajarapacuenia bajaraponē jivi jamatabēcuene xanepanaeayaexanaena pepo petuxanenē penajetarucaevajēnaeya. Nexata bajarapamonae xaniavaetsia copiapitsiana pepo petuxanenē pamatacabi najetarucaena, jai ángel Zacaríasjavabelia.

¹⁸ Zacarías nexata yanijoba ángeljavabelia. Jumaitsi:

—Itsa taxénato xainaejitsiané, ¿detsa peneta pitsicuene taenajé tayapëtaenexa? Tsipaji rabaja xanë perujunënë. Tajava ata baja perujuva, jai Zacarías.

¹⁹ Nexata ángel jumaitsi Zacaríasjavabelia:

—Xanë raja Gabrielné, Dioso baja joroba tacatsipaebinexa mapapexanialivaisije. ²⁰ Xamé saya nejumeabeme, xaniavaetsia catsipaebi atatsi xua pepacuene catocopiajopaejitsia. Nexata baja aeconoxae apo cacaejépaee tsane necuaicuajijajava. Matapania jane baja pamatacabi catocopiajopaena xua yabara namucapanepaeya catsipaebatsi, natsipaebianame icatsia, jai ángel Zacaríasjavabelia.

²¹ Bajarapaepatota jivi templobo jumavelia evetanubenatsi Zacarías pepitsapaejavarena. Najumaitsi bajarapamonae:

—¿De meta xuajitsia Zacarías bepíjia apo pitsapaerena temploboveca? najai bajarapamonae.

²² Itsa jane baja Zacarías pitsaparena temploboveca, apo caejépaetsi pecuaicuajijajava. Nexata pamonae evetanubenatsi templobo jumavelia, najumaitsi:

—Zacarías raeta bemajitsinaebota temploboenëlia itsacuene tane, najai.

Nexata Zacarías apo pecaejépaexaetsi pecuaicuajijajava, pecobeta tsipaeba besiyañeucenia jivi peyapëtaeayaxanaenexa.

²³ Itsa baja Zacarías vereta penacuenebijava templobota pamatacabibeje itorobatsi penacuenebinexa, naviata baja pijaboyabelia. ²⁴ Bajaraxuacujinae Zacarías pijava, Elisabet, nacoxita jane baja. Nexata bajarapova penacoxitsijava itsa yapëtane, cinco pajuametobejucenia itsajavabelia pijaboveca apo ponaponae. ²⁵ Elisabet jamatabëjumaitsi:

—Dioso raja taneitaxutotsoniataexae, neyavenona tanacoxitsinexa mapacueniaje. Nexata baja apo aurané tsane tacoxibijava yabara, jamatabëjai Elisabet.

Pacuenia ángel tajëvelia jumaitsi Marijavabelia yabara pelivaisi

²⁶ Elisabet baja seis pajuametobeje pepuaxainae penacoxitsicujinae, Dioso icatsia itoroba pijaángel Gabriel. Pijaángel itoroba Nazaret tomarabelia, Galilea nacuada peecae-tomarabelia. ²⁷ Dioso itoroba ángel petsipaebinxeta Marijavabelia. María abaxë pebi apo pequenetsiataevatsi. Ángel pepatsivajënaeya Marijavabelia, Mariabeje baja cajena Josébeje nabarëcuacuajiaibeje penapitsinexabeje. Nacuaevetsinëmi Davidpijiné pemo-moxiyajuvënë José. ²⁸ Ángel nexata joneya María peponaponae. Ángel jumaitsi Marijavabelia:

—María, cabajacobatsi. Pexaniajamatabëcuenia Dioso pecataeva. Dioso cayjavaponaponaena. Bitso cayavenonaena xamé daxita nevëna petiriavi matatoxenetsia, jai ángel.

²⁹ Nexata María ita jumetane bajarapacuenia ángel pejumaitsijavatsi, María jamatabëjumaitsi:

—¿Detsa meta pitsijamatabëcuene yabara nejumaitsi ángel mapacueniaje? jamatabëjai María.

³⁰ Icatsia ángel tajëvelia jumaitsi Marijavabelia:

—María, pëtsa junavame. Tsipaji raja Dioso pexaniajamatabëcuenia catane. ³¹ Xamé raja nacoxitsianame. Cavacuanaexanaena raja pebinëyo. Bajaraponëyo vënërubianame Jesús. ³² Bajaraponëyo ayaijamatabëcuenenë tsane. “PinijidiDioso, athëbëtsia peecaenë, mapexënatöje,” jaitsi tsane jivi. Nexata vajatuxanenë Dioso nacuaevetsinë exanaenatsi. Pacuenia pijasalinainëmi Davidpijiné bajayata nacuaevetsinëmi, bajara icatsia itsane. ³³ Bajaraponë evetsiana Israel nacupijivi daxita matabijavabelianexa, jai ángel tajëvelia Marijavabelia.

³⁴ Nexata María jumaitsi ángeljavabelia:

—¿Detsa pacuenia nacoxitsipajë? Xanë raja tamona apo xainaenë, jai María ángeljavabelia.

³⁵ Ángel nexata tajëvelia jumaitsi Marijavabelia:

—Espiritu Santo raja patsianica xamëjavabetsica. Nexata Espiritu Santo Dioso pesaëta caevetsiana. Bajaraxuata panacuetonëyo cavacuanaexanaena, tsatsianatsi Diosonexa. “Dioso ra mapexënatöje,” jaitsi tsane jivi. ³⁶ Nijamonaeva ata Elisabet, perujuva ata, exanaena penacuetonëyo. “Mavecova raja,” jai atatsi jivi, itsiata baja penacoxitsicujinae xaina baja seis pajuametobeje. ³⁷ Dioso raja caejépaetsi daxitacuene pexanaenexa, jai ángel tajëvelia Marijavabelia.

³⁸ Nexata María jumaitsi ángeljavabelia:

—Xanë raja Dioso pijajivitonänë. Pacuenia nejumaitsimë, bajarapacuenia Dioso xanëjavaberena exanaena, jai María.

Nexata baja María vecuaponatsi ángel.

Pacuenia María sivaxaina Elisabetjavabelia yabara pelivaisi

³⁹ María penacoxitsijavanexa petsipaebicujinaetsi ángel, caematacabibejecujinae, María pona petsutonēnacua peacaetomarabelia. Bajarapatomara eca Judea nacua. ⁴⁰ Nexata María joneya Zacarías pijaboyalía. Bajacobanuta pijamonaeva Elisabet. ⁴¹ María itsa bajacobanuta Elisabet, nexata Elisabet peyacotajinaenacuetoyo tsicotonayucutajarabatsi. Nexata jane baja Elisabet tsijamatabēvēnēcatsi Espírítu Santo. ⁴² Nexata Elisabet Espírítu Santo itorobatsi pinijijumeta Maríajavabelia pejumaitisnexa mapacuenajaje:

—Dioso cajena bitso cayavenona daxita petiriavi matatoxenetsia. Panacuetonēyo ata exanaename, bajarapanacuetonēyo Dioso bitso peyavenonabiabinētsi tsane. ⁴³ Xamē tajatuxanenē penamē tsane. ¿Detsa xuajitsia beveliajamatabēcueneva atanē, nesivaxainamerē? ⁴⁴ Itsa nebjacobanutame, tayacotajinaenacuetoyo nayucutajaraba pebarēyaxae. ⁴⁵ Barēyamē Dioso pecajumaitisicuenia nejumecovēnēsiva. Tsipaji pepacueene catocopiapatsiana daxita pacuenia vajatuxanenē Dioso pitorobinēsica ángel tajēvelia catsipaeba, jai Elisabet Maríajavabelia.

⁴⁶ Nexata María jumaitis Elisabetjavabelia:

Tajamatabēēthētojavavetsina jumaitsinē Diosojavabelia: “Ayaijamatabēcuenenēmē bitso,” janē. ⁴⁷ Sivajamatabēcuenebarēyanē Dioso tanecapanepaenēnexa. ⁴⁸ Sivajamatabēcuenebarēyanē. Tsipaji pijajivitovanē, beveliajamatabēcueneva atanē, Dioso nitapeta. Tatēpaecujinae ata tsane, tavēnamuto, pevājēnaeyabelia daxitajivi xanē yabara jumai tsabiabi tsane: “Dioso bitso peyavenonaevamitsi,” jai tsabiabi tsane. ⁴⁹ Bajarapacuenia daxitajivi jumai tsabiabi tsane xanē yabara. Tsipaji ayaijamatabēcuenenē Dioso netoexanabiabiana ayaicueene pexanaejavanē. Dioso raja apo pejitsipaenē jivi pibisiacuenia pexanaejava. ⁵⁰ Daxita pamonae Dioso yayiyatana, bajarapamonae juya Dioso itaxutotsoniataeyabiabiana. ⁵¹ Dioso raja pecaējēpaenētsi pinijicueene ata pexanaenexa pecobeta. Pamonae jamatabējumaitis tsavanapae: “Vaxaitsi cajena ayaijamatabēcuenevitsi,” jamatabējai tsavanapae, bajarapamonae Dioso nacayajatsiaexana baja. ⁵² Pinijinacuanē pevetsivimi ata, bajarapanacuanē pevetsijavami Dioso vecuapitsapaeyaexana. Nexata bajaraxuacujinae Dioso juya evetsiaexana bajarapanacuanē beveliajamatabēcuenevimi ata. ⁵³ Pamonae pijinia bitso piajani, bajarapamonae Dioso rajuta pexanianabanijava. Pamonae pijinia bitso pexainaevi mapanacuapijicueene, bajarapamonae Dioso apo pejumecovēnēsixaexae, bajarapamonae Dioso apo rajutsi. ⁵⁴ Dioso yavenona pijajivi, Israel nacuapijivi. Apo nacofēnētsi cajena. Dioso itaxutotsoniataeyabiaba Israel nacuapijivi. ⁵⁵ Bajarapacuenia Dioso pijajivi itaxutotsoniataeyabiaba daxitamatacabijavabelianexa. Tsipaji baja cajena bajarapacuenia Dioso najumecapanepaeya jumaitis vajasalinainēmi Abrahampijinējavabelia, daxita pemomoxijavabelianexa ata pitaxutotsoniataeyabiabijavanexa yabara, jai María Elisabetjavabelia.

⁵⁶ Nexata María acueyabi pajuametobeje naponapona Elisabet pijabota. Bajaraxuacujinae María baja naviatu pijaboyabelia.

Pacuenia Juan naexana jivibautisabinēnexa yabara pelivaisi

⁵⁷ Juameto baja ecaica, pajuametota Elisabet penacuetu vecuanaexanaejitsiatsi. Penacuetonēyo jane baja vecuanaexanatsi. ⁵⁸ Itsa Elisabet yapētane Dioso pitaxutotsoniatae-cuenetsi, bitso Elisabet jamatabēcuenebarēya. Daxita pamonae ata ena imoxoyo, pijabo muxuneneta, bajarapova pijamonaeyajuvēnēvi ata, sivajamatabēcuenebarēyatsi. ⁵⁹ Itsa baja penacuetonēyo caesemana xaineca penaexanaecujinae, Elisabetbeje Zacaríasbeje pexēnatonēyo perabēcaucutsiaexanabeje judíovicuenia. Baitis boupiparabēcaucutsiaexanabeje. Nexata daxita bajarapamonae pata Elisabetbeje Zacaríasbejevaberenena. Bajarajota picani penacuetonēyo tovēnērubijsiatsibeje paxa pevēnēcuenia paxa picani pevēnēxainanexa. ⁶⁰ Tsiata Elisabet jumaitis pamonaejavabelia picani tovēnērubijsiatsibeje:

—Jume. Pevēnē raja tsane Juan, jai Elisabet bajarapamonaejavabelia.

⁶¹ Nexata bajarapamonae jumaitis:

—¿Detsa xuajitsia jitsipame bajarapavēnē? Itsanē ata cajena nijamonaeyajuvēnēnē apo xainae bajarapavēnē, jai bajarapamonae Elisabetjavabelia.

⁶² Nexata bajarapamonae penacuetonēyo jane baja paxa junata. Pecobeta yanijoba pavēnē Zacarías jitsipa petovēnērubinexatsi. ⁶³ Nexata Zacarías vajēta tablapayo peyaquinaenexa. Nexata yaquinaruta: “Juan rabaja pevēnē,” pejaiitane. Nexata daxita bajarapamonae jamatabēcuenenabenajaca. ⁶⁴ Bajarajota jemata icatsia Zacarías cuaicuaijai baja. Nexata jivi pitabarata Zacarías jumai tsaponae Diosojavabelia:

—Diosomē, ayaijamatabēcuenenēmē bitso, jai tsaponae.

⁶⁵ Daxita pamonaē bajarapatomarata imoxoyo penaēvi, ita jumetane pacuenia Zacarías Dioso yavenonaponatsi, pinijicuenia jamatabēcuenenabenajaca. Itsamonaē bajarapanacuata petsutonējava penaēvi ata, daxita bajarapamonaē ata, vēnēlivaisitane bajarapacuenē yabara. ⁶⁶ Daxita pamonaē jumetane bajarapacuenē yabara, apo nacofēnētsi. Jamatabēnajinavanapabiaba bajarapacuenē. Nexata bajarapamonaē nayanijobabiaba.

—¿De meta jamatabēcuenēitsi tsane bajarapanacuetonēyo ita vitsabiana? najai tsabiabi bajarapamonaē.

Bajarapacuenia nayanijobabiaba tsipaji bitso Dioso yavenonaponatsi bajarapanacuetonēyo.

Pacuenia Zacarías tajēvelia jumaitsi yabara pelivaisi

⁶⁷ Zacarías, Juan jivibautisabinēnexa paxa, tsijamatabēvēnēcatsi Espiritu Santo. Nexata Zacarías Espiritu Santo itorobatsi jivijavabelia pejumaitsinexa mapacueniaje:

⁶⁸ Pexaniajamatabēcuene rajutatsi vaxaitsi pepo vajatuxanenējavabelia, Israel nacupijivitsi vajaDiosojavabelia. Tsipaji pijajivitsi nacatoitorobianica vajanacacapanepaenēnexa vajaneconivecua. ⁶⁹ Dioso cajena nacatoitorobianica pinijicuenē pexanaejava pecaējēpaenētsi vajanacacapanepaenexa. Bajaraponē Dioso pijajivitonēmi Davidpijinē pemomoxiyajuvēnē tsane. ⁷⁰ Bajayata Dioso jumepaebivimi profetavi, Dioso pitorobicueniatsi pejinavanapaēvi, tajēvelia najumecapanepaeya jumaitsi bajaraponē vajanacacapanepaejavanexa yabara. ⁷¹ Tajēvelia profetavimi najumecapanepaeya jumaitsi bajaraponē vajanacacapanepaejavanexa vajavajabitsaēvivecua, daxita vajanacaitoyavi atavecua. ⁷² Dioso nacaitaxutotsoniataena pacuenia tajēvelia najumecapanepaeya jumaitsi vajasalinavimijavabelia. Dioso cajena apo nacofēnētsi pacuenia najumecapanepaeya jumaitsi vajasalinavimijavabelia. ⁷³ Bajayata copiaya bajarapacuenē yabara Dioso najumecapanepaeya jumaitsi vajasalinainēmi Abrahampijinējavabelia. ⁷⁴ Dioso baja najumecapanepaeya jumaitsi vajanacacapanepaenexa vajavajabitsaēvecua. Bajarapacuenia Dioso nacapanepaena ajunavijibia vajatonacuenebavanapaenexa. ⁷⁵ Nexata bajarapacuenia Dioso ita tonacuenebavanapaenatsi, jinavanapaenatsi pibisiacuene exanaejevatsi Dioso pitabarata vajaasaētsavanapaepato abaxē mapanacuataje,

jai Zacarías jivijavabelia tajēvelia pevajunupaebijavata Jesús Dioso pitorobijavanexatsisica vajanacacapanepaenexa.

⁷⁶ Icatsia Zacarías jumaitsi pexēnatonēyojavabelia mapacueniaje:

Taxēnatonēyo, xamē yabara itsamonaē jumai tsabiabi tsane: “Mara ponēje pinijiDioso, athēbētatsia peecaenē, pijaprofetanēje,” jai tsabiabi tsane. Xamē raja itsaxuayo pepo petuxanenē najetaruaejitsia, pevajēnaeya jivi tsipaebanajetaruaename pesivanajamatabēcuenecopatsinexa bajaraponējavabelia pamatacabi bajaraponē najetaruaena. ⁷⁷ Tsipaebanajetaruaename jivijavabelia pacuenia Dioso bajarapamonaē capanepaejitsiatsi. Tsipaji bajarapamonaē pibisiacuene pexanaeconimi Dioso vecuaajibiaexanaenatsi. ⁷⁸ Dioso vajanacaitaxutotsoniataexae, nexata nacayapētaeyaexanaena vajanacacapanepaenēnexa athēbēvetsica pepatsijavanexatsica. ⁷⁹ Nexata bajaraponē jivijavabelia ita tsipaebanajetaruaena pexaniajailivaisi, jamatabēcueneitayotsiana daxita pīajamatabēcueneitaquirivimi. Baitsi pamonaē picani cjunava petēpaejava, bajaraponē petsipaebilivaisi pejamatabēcueneta, bajarapamonaē yapētaena jamatabēcuenebanepaeya pejinavanapaenexa,

jai Zacarías pexēnatonēyojavabelia tajēvelia pevajunupaebijavata Jesús jivijavabelia Dioso pejumelivaisi petsipaebanajetaruaejavanexa.

⁸⁰ Nexata jane baja xuacujinae Juan jivibautisabinēnexa vitsabanajetarua. Yajavaajamatabēcuenesaē baja cajena tsanajetaruaē Dioso pejumelivaisi yabara. Nexata baja Juan ita penaveretsinē, ponapona petusato nacua. Matapania ita taxuxuabijitsia jivi petsipaebinxexa Jesús pelivaisi, naitajēta jivijavabelia pevēnēlivaisitaenexatsi daxita Israel nacupijivi.

2

Pacuenia Jesús naexana yabara pelivaisi

(Mt 1.18-25)

¹ Imoxoyo baja pevajēnae Jesús penaexanaejavanexa. Nexata bajarapamatacabijava Romanonacua pepo pevetsinē, Augusto, taxuxuaba pijajivi pitorobijava jivi petonamataējētsinexatsi. Jumaitsi pijajivijavabelia:

—Daxitajivi, pamonaē taevetsinacuanējava jinavanapa, panetonamataējētsianame, jai.

² Bajarapamatacabi pijinia nacuaevevtsinē Cireniovēnēnē saicaya itsanacua eveta, Siri-avēnēnācua. ³ Nexata nacuaevevtsinē Augusto pevetsinacuanējava penaetomaranēta pejinavanapaevi, apo jinavanapae ēpijatomaranējava. Itsamonae najinavanapa itsatomaranējava. Bajaraxuata pamonaē najinavanapa itsatomaranējava, caejivi canacujitsia, pijasali-naivimi pijatomaranējavabelia pona. Bajarapamonae pona penamataējētsinexatsi pijasali-naivimi pijatomaranējava.

⁴ Bajaraxuata José ata barēpona Belén tomarabelia. José barēnaropota Nazaret tomarata, Galilea nacuata peecaetomarata. José barēpona Belén tomarabelia, Judea nacuata peecaetomarabelia. Tsipaji baja cajena José pijasalinainēmi, Davidpijinē, bajayata Belén tomarata ponapona. ⁵ José barēpona María, pova pita pijavanexa. Bajarapova yacotapona itsa baja imoxoyo pevajēnaē penacueto pevecuanaexanaenexatsi. ⁶⁻⁷ Nexata baja itsa patabeje Belén tomarata, ponaponabeje dajubi pevetabiabibota. Tsipaji baja pabota jivi patabiaba, pevajēnaebeje baja jivi yavēnēca. Nexata apo nayacaējēpaetsibeje bajarapabota penaecaenexabeje. Bajaraxuata patabeje dajubi pevetabiabibota. Nexata dajubi pevetabiabibota María jane baja vecuanaexanatsi penacuetonēyo, copiaya penacoxitsinacueto. Barēca dajubi pevetabiabibota. Jumaquioneta papaēbērēpanaxita. Buateta dajubi pexaejavanexa pemitsothocabiabimoēnēta.

Pacuenia āngelevi patsica Jesús penaexanaelivaisi petsipaebinxeta oveja pevetsivijavabelia yabara pelivaisi

⁸ Belén tomarajumaverena imoxoyovayafota, oveja pevetsivi evetavanapa. Bajarapamonae meravi nacobenaevetabiaba pijaovejabitsaētōnē. ⁹ Jemata oveja pevetsivi tsitanaitjētatsi Dioso pijaāngel. Nexata Dioso pijapenivenivenaecotia oveja pevetsivi mata-toyorotsia itayotatsi. Najunaviaca bajarapamonae pinijicuenia. ¹⁰ Nexata āngel jumaitsi oveja pevetsivijavabelia:

—Pētsa panajunaviacame. Pexanialivaisi raja pacatocanajetarucatsi pesivabarēyanexa daxitajivi. ¹¹ Ajena rabaja, mapameravitaje, naexana baja daxitajivi pecapanepaenēnēna. Naexana Belén tomarata, patomarata bajayata nacuaevevtsinēmi Davidpijinēmi ponapona. Ponē naexana, bajaraponē pepo petuxanē Cristo, Dioso athēbēvetsica pitorobinētsitsica jivi pecapanepaenēna. ¹² Paneyapētaenēna pacuenia pacatsipaebatsi, penacuetonēyo pataeyabuatsianame mapacueniaje. Penacuetonēyo pataeyabuatsianame papaēbērēpanaxita pejumaquionaenacuetoenēyotsi. Boquecaena dajubi pexaejava pemitsothocabiabimoēnēta, jai āngel oveja pevetsivijavabelia.

¹³ Bajara saya jota jemata oveja pevetsivi tsitanaitjētatsi ayaiabitsaētoanaxeto āngelevi, copiaya petsipaebiāngelnētsijavata. Bajarapamonae āngelevi pexaniajamatabēcuene rajuta Diosojavabelia. Penaxēanaejavata āngelevi jumaitsi mapacueniaje:

¹⁴ JīDioso, athēbētatsia peecaenē, pinijicuenē rabaja exana! Pamonaē Dioso jumecovēnēta, Dioso sivajamatabēcuenebarēyatsi. Daxita bajarapamonae jamatabēcuenexanepanaeya jinavanapaeyaexanaena Dioso, jai āngelevi penaxēanaejavata.

¹⁵ Itsa baja āngelevi naviaba athēbēabetsia, oveja pevetsivi āngelevi pecovēta najumaitsi:

—Ponaliatsi Belén tomarabelia. Taenatsi pecopiapatsijava pacuene yabara vajatuxanenē Dioso pitorobiāngelnētsica nacatsipaeba, najai oveja pevetsivi āngelevi pecovēta.

¹⁶ Nexata bajarapamonae bepijiayo ponalia Belén tomarabelia. Pata itsajota Mariabeje Josébeje barēcabeje penacuetoenēyo. Penacuetoenēyo boqueca dajubi pexaejava pemitsothocabiabimoēnēta. ¹⁷ Oveja pevetsivi itsa taeyabuata penacuetoenēyo pacuenia baja cajena āngelnē tsipaebatsi, nexata pona petsipaebaponaenēna daxitajivijava pacuenia bajarapanacuetoenēyo taeyabuata. ¹⁸ Nexata daxita pamonaē jumetane oveja pevetsivi pepaebilivaisi, jamatabēcuenenabenajaca. ¹⁹ María baja cajena pejamatabēthētota yapētaeponapona daxita bajarapacuenē yabara. ²⁰ Oveja baja pevetsivi naviabaponalia. Oveja pevetsivi namutualia jumai tsanajetarubenaē Diosojavabelia:

—Diosomē, bitso ayaijamatabēcuenenēmē. Pexaniajamatabēcuene pacarajutatsi patane-toexanaexaemē pexaniacuene, jai tsaponaelia oveja pevetsivi.

Bajarapacuenia jumaitsi tsipaji baja tane daxita pacuenia āngelnē tsipaebatsi.

Pacuenia Jesúsnēyo caponaliatsi temploboyabelia yabara pelivaisi

²¹ Jesúsnēna penaexanaecujinaē, ocho matcabita, perabēcaucutatsi judiovicuenia. Baitsi boupiperabēcaucutatsi. Vēnērubatšinua jane baja pevēnē pexainaenēna. Vēnērubatšiti “Jesús,” pejaivēnēta. Tsipaji baja cajena abaxē María nacoxitsinejeva Jesúsnēna, tajēvelia āngel jumaitsi Marijavabelia: “Bajaraponēyo vēnērubianame Jesús,” jai.

²² Nexata jane baja tocopiajopatsibeje Josébeje Mariabeje pexanaenexabeje pacuenia bajayata Dioso Moiséspijinēta penajumecopatsilivaisi itorobatsi daxita judiōvi pexanaenēna

penacuetonēyo itsa tonaexanatsi. Nexata Jerusalén tomarabelia barēponabeje penacuetonēyo. Nexata Jerusalén tomarata, templobota, María ofrenda rajuta Diosojavabelia penajamatabēcuene xaniavaetsinexa Diosojavabelia. Rajutabejenua penacuetonēyo Diosojavabelia pijajivitonēnexa petonacuenēbinexa itsa penaveretsinē. ²³ Bajarapacuenia Josēbeje Mariabeje exanabeje tsipaji Dioso Moiséspijinēta penajumecopatsilivaisi jumaitsi: “Penacasabijivibeje pexi itsa xainabeje, nexata copiaya panacuetonēyo xainabeje, totsatsibeje Dioso pijajivitonēnexa,” jai. ²⁴ Josēbeje Mariabeje rajutabeje ofrenda Diosojavabelia pacuenia Dioso Moiséspijinēta penajumecopatsilivaisi itorobatsibeje. Rajutabeje tsiquiriviria ucucutoyobeje. Itsa jume, rajutabeje meta pinijiyoviria ucucutobeje.

²⁵ Bajarapamatacabi ponapona Jerusalén tomarata Simeónvnēnē. Bajaraponē jumečovnētsiaponapona pacuenia Dioso pejumelivaisibaxutota jumaitsi. Nexata bajarapamatacabi Israelnacua eveta Romano nacuaverena ēpepatsivi. Nexata Romano nacuaverena pepatsivi pevetsixae Israelnacua, bejiobiaexanabiabatsi Israel nacupijivi. Bajaraxuata Simeón copiaevetaponapona Dioso pejamatabēcueneta petovecuajutsinexatsi Israelnacua pevetsivi. Nexata baja Romano nacuaverena pepatsivi, pevecuapitsapaenexa Israelnacua pevetsicuene. Espiritu Santo yajavaponaponatsi Simeón. ²⁶ Nexata Espiritu Santo pejamatabēcueneta Simeón tajēvelia yapētaeyaexanatsi pacuenia Simeón petēpaevajēnae taejitsia Cristo, ponē Dioso athēbēvetsica itorobiapaebica jivi pecapanepaenexa. ²⁷ Nexata Espiritu Santo pejamatabēcueneta Simeón joneyaexanatsi temploboyabelia. Bajaraxuata Simeón tane Mariabeje Josēbeje pebarējonejavatabeje Jesúsnēyo temploboyarena pexanaenexabeje pacuenia Dioso Moiséspijinēta penajumecopatsilivaisi itorobatsibeje. ²⁸ Nexata Simeón isapita Jesúsnēyo. Pexaniajamatabēcuene rajuta Diosojavabelia. Pexaniajamatabēcuene Simeón perajutsijavata Diosojavabelia, Simeón jumaitsi mapacueniaje:

²⁹ Tajatuxanenē, baja rajane netocopatsianame nijajivitonēnē jamatabēcuenexanepanaeya tatēpaenexa. Tsipaji baja netaeyaexaname pacuenia baja cajena tajēvelia najumecapanepaeya nejumaitsimē. ³⁰ Taitaxutota rabaja taniji maponēje, ponē itorobimica jivi pecapanepaenēnexa xamējavabelia. ³¹ Ponē itorobimica jivi pecapanepaenēnexa, daxitajivi taenatsi. ³² Maponēje petsipaebilivaisita, pamonaē apo judiovi ata, jamatabēcueneitayotsiana. Yapētaeyaexanaena pacuenia jamatabēcueneitsimē. Nexata maponēje pejamatabēcueneta apo judiovi yayataena nijajivi judiovi, jai Simeón templobota Diosojavabelia pexaniajamatabēcuene perajutsijavata Jesúsnēyo yabara.

³³ Nexata Josēbeje Mariabeje itsa jumetanebeje bajarapacuenia Simeón pejumaitsiyava Jesúsnēyo yabara, jamatabēcuenenabenajacabeje. ³⁴⁻³⁵ Bajaraxuacujinae Simeón tovajēta Diosojavabelia peyavenonaenexatsibeje Josēbeje Mariabeje, Jesúsnēyo yajava. Bajaraxuacujinae Simeón jumaitsi Marijavabelia:

–Mapanacuetonēyoje, Dioso itapetatsi. Maponēje petsipaebilivaisi jivi ayaibitsaētoخانeto apo jumecovēnētsi tsanetsi. Nexata jivi ayaibitsaētoخانeto naxuabiana, Israel nacupijivi. Ayaibitsaētoخانeto pijinia jumecovēnētsianatsi. Nexata pijinia ayaibitsaētoخانeto capanepaena. Maponēje Dioso pesaēta pinijicuene pexanaejava, tsitaexanaena jivi peyapētaenexa Dioso pitorobinētsitsica. Maponēje itajētsiana pacuenia jivi ayaibitsaētoخانeto, caejivi canacujitsia, bēpēnēa pibisiajamatabēcuene najamatabēxainabiaba. Jivi ayaibitsaētoخانeto apo jumecovēnētsi tsanetsi. Pibisiacuenia saya baranatsipaebianatsi. María, xamē nexata pepo nejamatabēēthētojavavetsina bitso sivajamatabēcuenebējamē tsane itsa yapētaename pacuenia exanaejitsiatsi, jai Simeón Marijavabelia Jesús yabara tajēvelia pevajunupaebijavata pacuenia Jesús exanaejitsiatsi.

³⁶⁻³⁷ Bajara pijinia pamatacabi templobota ponapona Diosojumepaebiva profetava, Anavēnēva. Bajarapova Fanuelpijinē pexēnatoyo, Aserpijinē pemomoxiyajuvēnēva. Bajarapova bitso baja perujuva. Ochenta y cuatro baja pavaibeje xaina. Nacasaba picani abaxē itsa pejanava. Penacasabicujinae siete pavaibeje pepuaxainae pamonajavabelia, vecuatēpatsi pamonava. Itsajavabelia apo vecuaponabiabi templobo. Matacabijebi, meravijebi yajava, Dioso tonacuenebabiaba templobota. Itsajavata pexaejava apo xaeyabiabi pamatacabibeje vajēcabiaba Diosojavabelia. ³⁸ Nexata bajarapova ata pata itsajota Josēbeje Mariabeje nucabeje templobota. Simeón pisanucaejavata Jesúsnēyo, isataenuta bajarapova. Nexata bajarapova pexaniajamatabēcuene rajuta Diosojavabelia Jesúsnēyo yabara. Romano nacuaverena pepatsivi Israelnacua pevetsixae, Israel nacupijivi copiaevetavanapa Dioso pejamatabēcueneta petovecuajutsinexatsi, nexata baja Romano nacuaverena pepatsivi pevecuapitsapaenexa Israelnacua pevetsicuene. Nexata daxita pamonaē copiaevetavanapa Dioso pejamatabēcueneta petovecuajutsinexatsi Israelnacua pevetsivi, daxita bajarapomonaejavabelia, bajarapova tsipaebabiaba Jesúsnēyo pelivaisi.

Pacuenia Jesús ponapona Nazaret tomarata pebarēnaviatsicujinaetsi templobojavaverena yabara pelivaisi

³⁹ Josébeje Mariabeje Jerusalén tomarata templobota exanaeveretabeje baja daxita pacuenia Dioso Moiséspijinēta penajumecopatsilivaisi itorobatsibeje. Nexata baja pijatomarabelia Jesúsñeyo barēnaviatabeje, Nazaret tomarabelia, Galilea nacuata peecaetomarabelia. ⁴⁰ Nexata jane baja Jesúsñeyo vitsaba Nazaret tomarata. Ajamatabēcuenaesā tsaponae Dioso pijacuene yabara. Jamatabēcuenevitsabaponanua. Dioso yavenonaponatsi ayaicuenia.

Pacuenia Jesúsñeyo templobota barēcuaiacuaijai judíovi pecujarubivijavabelia yabara pelivaisi

⁴¹ Caevai canacujitsia Josébeje Mariabeje ponabiababeje Jerusalén tomarabelia. Ponabiababeje pascuavēñēfiesta penataeyabiabinexabeje. ⁴² Nexata baja Jesúsñeyo doce pavaibeje itsa xaina, barēponabeje icatsia Jerusalén tomarabelia pascuafiesta penataenexa. ⁴³ Itsa baja copiaruca pascuafiesta, daxita baja penataevi bajarapafiesta, naviaba baja pijabonējavabelia. Nexata Jesúsñeyo nacopatanucalia Jerusalén tomaratalia. Mariabeje Josébeje abaxē apo yapētaebeje Jesúsñeyo pevecuanacopatsijavatsilivabeje. ⁴⁴ Jamatabējumaitisibeje saya:

–Jesúsñeyo raeta nanajetaruca vajanajuaponaevita, jamatabējaiibeje.

Bjaraxuata caematacabi baja pepuaponaebeje namutua, itaxanabeje Jesúsñeyo. Nexata yanijobabeje pijamonaevjavabelia, peyapētaevitsibejevjavabelia ata. ⁴⁵ Itsiata apo caxitajaribiibeje. Nexata naviatecabeje Jerusalén tomarabelia pejaitsinexabeje Jesúsñeyo.

⁴⁶ Acueyabi matacabita caxitajarababeje templobota. Jesúsñeyo naeca judíovi pecujarubivi tuatujēta. Jumetaeyeca bajarapamonae penabarēcuaiacuaijailivaisi. Nexata Jesúsñeyo yanijobapona bajarapamonae penabarēcuaiacuaijailivaisi yabara. ⁴⁷ Nexata daxita Jesúsñeyo pejumetaeyenaevitsi, taeyena Jesúsñeyo xaniavaetsia pejumeyapētaejava judíovi pecujarubivi penabarēcuaiacuaijailivaisi. Taeyenanua xaniavaetsia pejumecanaviataponaejava, abaxē tsiquirinēyovajēto ata. Bjaraxuata jamatabēcuenenabenajaquena bajarapamonae. ⁴⁸ Josébeje Mariabeje itsa tanebeje bajarajota Jesúsñeyo penaecaejava, nexata jamatabēcuenenabenajacabeje. María nexata jumaitis:

–Taxēnato, ¿detsa xuajitsia panevepēnacoparemenabeje? Paxanēbeje patacajaitarutsijavatabeje, bitso pacaitaxanatsibeje, jai María.

⁴⁹ Nexata Jesúsñeyo jumaitis penajavabelia:

–¿Detsa xuajitsia bajarapacuenia panejaitarutamebeje? Panejaitsipamebeje raja mapabotaje. Tsipaji raja xanē taxa Dioso pijacuene taexanaenexa mapabotaje, nejamatabēcueneenabiaba, jai Jesúsñeyo.

⁵⁰ Itsiata bajarapajivibeje apo jumeyapētaebeje pajamatabēcuene yabara jumaitis Jesúsñeyo.

⁵¹ María baja cajena pejamatabēēthētota yapētaeponapona daxita bajarapacuenia yabara. Nexata baja bajarapajivibeje pepēta Jesúsñeyo napona baja Nazaret tomarabelia. Nazaret tomarata Jesúsñeyo xaniavaetsia jumecovēnētsiaponapona pacuenia Josébeje Mariabeje itorobabiababeje. ⁵² Jesús abaxē vitsabanajetaruca. Jamatabēcuene vitsabanajetarucanua. Nexata Dioso pexaniajamatabēcuenia tanetsi. Daxita pamona Jesúsñeyo yapētanetsi, pexaniajamatabēcuenia tanetsi.

3

Pacuenia Juan jivibautisabinē jivi livaisi tsipaeba petusato nacuata yabara pelivaisi (Mt 3.1-12; Mr 1.1-8; Jn 1.19-28)

¹ Pamatacabi pepo nacuaevevtsinē Tiberiovēñē xaina quince pavaibeje pevetsicujinae Romanonacua, bajara pijinia pamatacabi itsanacuanē eveta itsamonae. Bajara-pamatacabi nacuaevevtsinē Poncio Pilato eveta Judeanacua. Bajara pijinia pamatacabi nacuaevevtsinē Herodes eveta Galileanacua. Bajara pijinia pamatacabi Herodes pejuypijinē, nacuaevevtsinē Felipe, eveta Itureanacua, Traconitenacua yajava. Bajara pijinia pamatacabi nacuaevevtsinē Lisanias eveta Abilininacua. ² Bajara pijinia pamatacabi Anásbeje Caifásbeje Israel nacuata sacerdotevi pepo penamatacaitorobinēbeje tsaponapona. Bajara pijinia pamatacabi Juan, Zacarías pexēnato, petusato nacuata ponapona. Nexata Dioso itorobatsi jivi petsipaebanajetarucaenexa Dioso pitorobilivaisi. ³ Nexata Juan jivi tsipaebanajetaruca Dioso pitorobilivaisi daxita Jordánmene imoxoyo penaenacuanēta pejinavanapaevijava. Juan jumai tsanajetarucaevijavabelia:

–Panajamatabēcuenepeñeyorore Diosojavabelia. Pacopabare pibisiacuene paneexanabiabijava. Nexata pacabautisabianatsi Dioso papecavecuajibiaexanaenexa pibisiacuene paneexanaeconimi, jai tsanajetarucaevijavabelia.

⁴ Bajarapacuenia Juan jivi itsa tsipaebanajetaruca, copiajopa jane baja pacuenia Diosojumepaebinēmi profeta Isaiaspijinē bajayata tajēvelia yaquina Juan yabara. Juan jivibautisabinē Dioso pitorobilivaisi jivijavabelia petsipaebanajetarucaejavanexa yabara, yaquina. Profeta Isaiaspijinē peyaquinaelivaisita tajēvelia jumaitsi mapacueniaje:

Tanejumelivaisipaebinē vavajai tsane petusato nacuata. Jumai tsane jivijavabelia: “Jivi baxaneba panamutoverena najetarucajitsia petuxanenē. Batoroviaexananua namuto. ⁵ Daxita namutua pafotonē rubena, atsa baothoca penamatajēpaeyaexanaenexa namuto. Daxita petsutonēmi, pinijiibotsutoxanetonēmi ata, banamatajēpaeyaexana. Baroviayaexananua penatoxorotsinamutomi ata. Banamatajēpaeyaexananua namutua pebobenaemēthēanēmi ata. Bajara pijinia pacuenia paxamē ata panajamatabēcuenexaniavaere pepo petuxanenē pepatsivajēnaeya paxamējavaberena. ⁶ Nexata daxitanacuanēpijivi yapētaena Dioso pecapanepaejavanexatsi pijaneconivecua.”

jai baja cajena profeta Isaiaspijinē bajayata peyaquinaelivaisita, Dioso pitorobilivaisi, Juan jivi petsipaebanajetarucaejavanexa yabara.

⁷ Jivi ayabitsaētoxaneto pata Juanjavaberena Juan picani pebautisabinexa bajarapamonae. Bajarapamonae apo jumecovēnētsi ata Dioso pitorobilivaisi, jamatabēcuenenavēxaniabiaya jamatabējumaitsi:

—Juan itsa nacabautisabiana, Dioso nacacapanepaena, jamatabējai.

Nexata Juan jumaitsi bajarapamonaejavabelia:

—¡Panajamatabēcuenenavēxaniabivi! Pacuenia jomo rēcēpeca itsa tane isoto petajuenajetarucaejava, bajara saya paitsimē. Dioso rabaja papecananeconitsia exanaematacabinexa pacaimoxoyotapona. Itsiata acuenebi tsane panevecuapanepaenexa Dioso papecananeconitsia exanaematacabinexavecua. ⁸ Itsa pajiitsipame Dioso papecacapanepaejava, pacopabare pibisiacuene paneexanabiabijava. Dioso pajumecovēnētsiajinavanapare. Nexata daxitajivi pacayapētaena pepacuene baja panecopabijava pibisiacuene paneexanabiabijavami. Pacayapētaenanua panenajamatabēcuene pēnēyorotsijava Diosojavabelia. Jamatabēcuenenavēxaniabiaya pētsa panajumaitsimē: “Vaxaitsi cajena Abrahampijinē pemomoxitsi. Nexata Dioso nacacapanepaena,” panajamē pētsa. Abrahampijinē picani papemomoxi atamē, itsiata pibisiacuene itsa paexanavanapame, nexata bajarapacueni apo pacatonamatamotsi tsipae papecacapanepaenexa Diosojavabelia. Dioso baja cajena caējēpatsi jivi pexanaenexa mapaibotonēmi ataje, Abrahampijinē bepemomoxi Dioso petaenexa. Nexata bajarapamonae ata Dioso itsa apo jumecovēnētsi, Dioso apo capanepae tsipae. Nexata pacopabare pibisiacuene paneexanabiabijavami papecacapanepaenexa Dioso. ⁹ Peubinaenē pexainaenē itsa apo tonacuaitsitsi pexaniacuai, nicata sipalita daxita ponaenē apo tonacuaitsitsi pexaniacuai. Nexata baja penicatsicujinae, itsa niona bajaraponaenē, caetuata. Xuaba isotojavabelia. Nexata bajaraponaenēmi tajuatsi. Bajara pijinia pacuenia paxamē ata Dioso pacaxuabiana infernojavabelia papecatajuenexa, Dioso apo panejumecovēnētsivi, jai Juan bajarapamonaejavabelia.

¹⁰ Nexata bajarapamonae jumaitsi Juanjavabelia:

—¿Detsa nexata pacuene paexanaenajē daxitajivi pataneyapētaenexa pepacuene patacopabijava pibisiacuene pataexanabiabijavami? jai bajarapamonae.

¹¹ Nexata Juan jumaitsi bajarapamonaejavabelia:

—Pajivi anijacamisabeje xaina, rajutsi pajiviyo apo xinae camisa. Pajivi pexaejava xaina, tsicobetsatsi pajiviyojavabelia apo xinae pexaejava, jai Juan.

¹² Gobierno pejamatabēcuene impuestomatamo pematamoyanijobabiabivi ata, pata Juanjavaberena Juan picani pebautisabinexa bajarapamonae. Nexata bajarapamonae ata jumaitsi Juanjavabelia:

—Juan, ¿detsa pacuene paexanaenajē daxitajivi pataneyapētaenexa pepacuene patacopabijava pibisiacuene pataexanabiabijavami? jai bajarapamonae.

¹³ Nexata Juan jumaitsi bajarapamonaejavabelia:

—Itsa pamatamoyanijobabiabame impuestomatamo, pamatamoyanijobabiabare pamatamota papecaitorobivi pacatocopata paneyanijobabiabinexa. Pētsa matatoxenetsia bajarapamatamovecua yamaxēitojorobiaya payanijobabiabame paxamē saya panepitsinexa bajarapapalata, jai Juan bajarapamonaejavabelia.

¹⁴ Nexata icatsia vajabitsaē ata jumaitsi Juanjavabelia:

—Juan, ¿jica paxanē tsane? ¿Detsa pacuene paexanaenajē daxitajivi pataneyapētaenexa pepacuene patacopabijava pibisiacuene pataexanabiabijavami? jai vajabitsaē.

Nexata Juan jumaitsi vajabitsaējavabelia:

—Pētsa panejumesaēta itsajivi ata palata payacajērētame. Pētsa najumetsēnētsiaya itsajivi ata pananeconitsiaexaname saya palata papecarajutsinexa pecajunavi. Saya pasivarēyamēre pacueneata pacamatamatapona papecaitorobivi, jai Juan vajabitsaējavabelia.

¹⁵ Jivi itatsacajinaeya copiaevetavanapa Cristo, ponë Dioso athëbëvetsica itorobijitsia pepatsijavatsica jivi pecapanepaenexa. Nexata bajarapamonae Juan itsa tanetsi, bajarapamonae jamatabëcuenenavëxaniabiaya jamatabëjumaitsi Juan yabara:

–Baja raeta jane maCristoje, daxitajivi pecapanepaenënexa, jamatabëjai bajarapamonae Juan yabara.

¹⁶ Nexata Juan jumaitsi daxita bajarapamonaejavabelia:

–Xanë raja saya pacabautisabatsi merata. Itsiata baitsi jane itsanë tacovëverena najetarucaena. Bajara jane ponë pacatsijamatabëjoneyaexanaena Espiritu Santo, pitarunutsicotia yajava. Xanë raja saya beveliajamatabëcuenenëñë bajaraponëvecua. Nexata bajaraponë vecuaauranë pijazapato ata tataxujonotsinexa bepijajivitonëcuenianë. ¹⁷ Arrozxainanë baja itsa vereta arroz penotsijava, jëaba arroz pejëabijavata ëpexu pepitsinexa. Nexata pijaarroz pejëabijavata, tsatapon saicaya ëpexu pesivecua. Nexata ëpexu xaniavaeteta peetsibojavabelia. Pesi pijinia penetapona vayafuabelia petajuitsinexa. Bajara pijinia pacuenia paxamë ata, Dioso jumecovënëtsivivecua Dioso pacatsatsiana papecaxuabinexa infiernojavabelia pananaxuabinexa baja daxitamatacabijavabelianexa. Pamonaë pijinia Dioso jumecovënëtsivi, Dioso capanepaenatsi pijanacuayabetsia. Pamonaë pijinia Dioso apo jumecovënëtsi, Dioso naneconitsiaexanaenatsi daxitamatacabijavabelianexa apo pevëreveraëisotojavabelia, jai Juan daxita bajarapamonaejavabelia.

¹⁸ Bajarapacuenia ayailivaisianëta Juan muxujobapona jivi. Tsipaebanajetaruca pexanialivaisi pecapanepaelivaisinexatsi Diosojavabelia. ¹⁹ Bajaraxuacujinaë icatsia Juan itaveta nacuaevetsinë Herodes. Tsipaji Herodes pejuyapijinë pijava yacajërëta, Herodiasvënëva. Daxita Herodes pibisiacuene pexanaejavanë ata, itaveta Juan. ²⁰ Itsiata baitsi jane Juan Herodes apo jumecovënëtsitsi. Caranata biji orijibia icatsia Herodes pibisiacuene exana. Herodes itoroba pijajivi Juan pevaetabinexatsi, penaneconitsivi pejebabiabibota peetsinexatsi.

Pacuenia Juan bautisaba Jesús yabara pelivaisi
(Mt 3.13-17; Mr 1.9-11)

²¹ Juan pevaetabivajënaetsi penaneconitsivi pejebabiabibota peetsinexatsi, jivi bautisabapona. Bajarapamatacabi Juan bautisaba Jesús ata. Jesús pebautisabicujinaetsi itsa vajëta Diosojavabelia, athëbëtatsia itaboxo napatsia. ²² Athëbëvetsica Espiritu Santo naitajëtsiaya Jesús tsmatarunaicatsi beucucuto. Nexata Jesús jumetane athëbëvetsica Dioso pejumatsijavatsi: “Xamë raja taxënatomë, bitso tacaasivanë. Bitso casivajamatabëcuenëbarëyatsi,” pejaijavatsi.

Jesucristo pijasalinaivimi pevënëanë yabara pelivaisi
(Mt 1.1-17)

²³ Itsa baja Jesús xaina bejamatabëcuene treinta pavaileje, taxuxuaba jane baja jivi Dioso pitorobilivaisi petsipaëbijava. Jivi tanetsi Jesús beJosé pexënatato. José paxapijinë pevënë Elí. ²⁴ Elí paxapijinë pevënë Matat. Matat paxapijinë pevënë Leví. Leví paxapijinë pevënë Melqui. Melqui paxapijinë pevënë Jana. Jana paxapijinë pevënë José. ²⁵ José paxapijinë pevënë Matatías. Matatías paxapijinë pevënë Amós. Amós paxapijinë pevënë Nahum. Nahum paxapijinë pevënë Esli. Esli paxapijinë pevënë Nagai. ²⁶ Nagai paxapijinë pevënë Maat. Maat paxapijinë pevënë Matatías. Matatías paxapijinë pevënë Semei. Semei paxapijinë pevënë Josec. Josec paxapijinë pevënë Judá. ²⁷ Judá paxapijinë pevënë Joanán. Joanán paxapijinë pevënë Resa. Resa paxapijinë pevënë Zorobabel. Zorobabel paxapijinë pevënë Salatiel. Salatiel paxapijinë pevënë Neri. ²⁸ Neri paxapijinë pevënë Melqui. Melqui paxapijinë pevënë Adi. Adi paxapijinë pevënë Cosam. Cosam paxapijinë pevënë Elmadam. Elmadam paxapijinë pevënë Er. ²⁹ Er paxapijinë pevënë Josué. Josué paxapijinë pevënë Eliezer. Eliezer paxapijinë pevënë Jorim. Jorim paxapijinë pevënë Matat. ³⁰ Matat paxapijinë pevënë Leví. Leví paxapijinë pevënë Simeón. Simeón paxapijinë pevënë Judá. Judá paxapijinë pevënë José. José paxapijinë pevënë Jonam. Jonam paxapijinë pevënë Eliaquim. ³¹ Eliaquim paxapijinë pevënë Melea. Melea paxapijinë pevënë Mena. Mena paxapijinë pevënë Matata. Matata paxapijinë pevënë Natán. ³² Natán paxapijinë pevënë David. David paxapijinë pevënë Isai. Isai paxapijinë pevënë Obed. Obed paxapijinë pevënë Booz. Booz paxapijinë pevënë Sala. Sala paxapijinë pevënë Naasón. ³³ Naasón paxapijinë pevënë Aminadab. Aminadab paxapijinë pevënë Admin. Admin paxapijinë pevënë Arni. Arni paxapijinë pevënë Esrom. Esrom paxapijinë pevënë Fares. Fares paxapijinë pevënë Judá. ³⁴ Judá paxapijinë pevënë Jacob. Jacob paxapijinë pevënë Isaac. Isaac paxapijinë pevënë Abraham. Abraham paxapijinë pevënë Taré. Taré paxapijinë pevënë Nacor. ³⁵ Nacor paxapijinë pevënë Serug. Serug paxapijinë pevënë Ragau. Ragau paxapijinë pevënë Peleg. Peleg paxapijinë pevënë Heber. Heber paxapijinë pevënë Sala. ³⁶ Sala paxapijinë pevënë Cainán. Cainán paxapijinë pevënë Arfaxad. Arfaxad paxapijinë

pevënë Sem. Sem paxapijinë pevënë Noé. Noé paxapijinë pevënë Lamec. ³⁷ Lamec paxapijinë pevënë Matusalén. Matusalén paxapijinë pevënë Enoc. Enoc paxapijinë pevënë Jared. Jared paxapijinë pevënë Mahalaleel. Mahalaleel paxapijinë pevënë Cainán. ³⁸ Cainán paxapijinë pevënë Enós. Enós paxapijinë pevënë Set. Set paxapijinë pevënë Adán. Adánpijinë Dioso pexanaenëtsi.

4

Pacuenia picani Jesús jamatabëcuenejëbatsi dovathi yabara pelivaisi
(Mt 4.1-11; Mr 1.12-13)

¹ Jesús baja naviarena Jordán meneverena Juan pebautisabicujinaetsi. Tsijamatabëvënëcatsi bitso Espíritu Santo. Nexata Espíritu Santo ponaeayaexanatsi petusato nacuaayabelia. ² Bajarajotalia Jesús ponapona cuarenta pamatacabibeje. Bajara pijinia pamatacabibeje Jesús pexaejava apo xae. Jesús nexata bitso piäjani. Dovathi nexata jamatabëcuenejëbatsi pibisiacuene picani pexanaenexa. ³ Dovathi jumaitsi Jesúsjavabelia:

–Itsa pepacuene Dioso pexënatomë, itorobare mapaibotoyoje penaexanaenexa panbë, jai dovathi Jesúsjavabelia.

⁴ Jesús nexata jumaitsi dovathijavabelia:

–Jume raja. Dioso raja pejumelivaisibaxutota jumaitsi mapacueniaje: “Jivi raja apo namatavenonae ëpexaejava pexaenexa. Jivi raja namatavenona daxita Dioso pejumelivaisi ata pejumecovënëtsinexa pexainaenexa matacabi apo peverevereaejava,” jai raja Dioso pejumelivaisibaxutota, jai Jesús dovathijavabelia.

⁵ Bajaraxuacujinae icatsia Jesús barëliatsi dovathi pinijitsutoxanetojavabelia. Barëjunayatsi bajarapatsutojumabetsia. Nexata bajarapatsutojumavetsica dovathi Jesús tsitajëtatsi bepijia daxitanacuanë. ⁶ Nexata icatsia dovathi jumaitsi Jesúsjavabelia:

–Xanë raja carajutsianatsi daxita mapanacuanëje nevetsinexa. Daxita bajarapanacuanëta paitabëcuene taneme, cayajavarajutsianatsi. Nexata bitso nexainaenë tsane nexainaenë. Daxita tanerajutsijavanëmi, necaëjëpa juya tarajutsinexa pajivijavabelia jamatabërajutajë. ⁷ Ayaijamatabëcuenenënë netaeya taitabarata nematabacabëta ita netonucajunuame, nexata daxita mapanacuanëje nijanacuanë tsane, jai dovathi Jesúsjavabelia.

⁸ Nexata Jesús jumaitsi dovathijavabelia:

–Dovathi, nevecuanatixire. Dioso raja pejumelivaisibaxutota jumaitsi mapacueniaje: “Daxitajivi vajëcae pematabacabëta caenë, pepo petuxanenë Diosojavabelia. Tonacuenebinua bajarapëponënexa,” jai raja Dioso pejumelivaisibaxutota, jai Jesús dovathijavabelia.

⁹ Bajaraxuacujinae abaxë icatsia Jesús barëliatsi dovathi Jerusalén tomarabelia. Jerusalén tomarata barëjunayatsi temploboxaneto matatuyabetsia. Nexata templobo matatutatsia dovathi icatsia jumaitsi Jesúsjavabelia:

–Itsa pepacuene Dioso pexënatomë, jirevaremeca irabereca. ¹⁰ Bajarapacuenia jirevaremeca irabereca. Tsipaji xamë peitsacueneyaniva pecaevetsinexa, Dioso pejumelivaisibaxutota jumaitsi mapacueniaje:

Dioso itorobianica pijaängelevi pecaevetsinexa. ¹¹ Nexata Ángelevi pecobeta cayotsiana pecataxutsaquitсийaniva ibotonëjavabelia, jai Dioso pejumelivaisibaxutota xamë pecaevetsinexa Ángelevi, jai dovathi Jesúsjavabelia.

¹² Jesús nexata icatsia jumaitsi dovathijavabelia:

–Jume raja. Dioso raja pijinia pejumelivaisibaxutota jumaitsi mapacueniaje: “It-sajivi ata jamatabëcuenenavëxaniabiaya pijacuata apo bejamatabëjumaitsi: ‘Xanë Dioso jamatabëcuenejëtsianajë. Nexata natoexanaenajë pacuene bitso netsiayai tatëpaenexa. Itsiata Dioso neyavenonaena tavecuapanepaenexa bajaraxua. Nexata bajarapacuenia yapëtaenajë Dioso taneyavenonaenajë,’ apo bejamatabëjai,” jai Dioso pejumelivaisibaxutota, jai Jesús dovathijavabelia.

¹³ Bajaraxuacujinae ita baja dovathi daxitacuene Jesús jamatabëcuenejëbiveretatsi pibisiacuene picani Jesús pexanaenexa, nexata abaxë yatucopatatsi itsamatacabijavabelia icatsia pejamatabëcuenejëtsinexatsi.

Pacuenia Jesús Galilea nacuata taxuxuaba Dioso pitorobilivaisi jivi petsipaebijava yabara pelivaisi

(Mt 4.12-17; Mr 1.14-15)

¹⁴ Jesús baja ita naviata petusato nacuaverena, Galilea nacuaayaberena, Espíritu Santo pesaë yajavaponapona. Nexata daxita Galilea nacuapijivi vënëlivaisitanetsi Jesús. ¹⁵ Judiovi penacaetuatabibonëjava Jesús jivi livaisi tsipaebanajetaruca. Daxitajivi nexata Jesús yabara jumai tsabiabi: “Maponëje bitso ayaijamatabëcuenenë,” jai tsabiabi.

Pacuenia Jesús naviata pijatomarabelia, Nazaret tomarabelia, yabara pelivaisi
(Mt 13.53-58; Mr 6.1-6)

¹⁶ Nexata Jesús naviata pevitsabitomarabelia, Nazaret tomarabelia. Nexata pepat-sicujinae Nazaret tomarata, judíovi penacueravetsimatacabita Jesús najoneya judíovi penacaetuatabiabiobyalia. Tspaji baja cajena Jesús bajarapacuenia exanabiaba. Nexata judíovi penacaetuatabiabiabibota Jesús nonotapuna Dioso pejumelivaisibaxuto petsimuxulebinexa daxita bajarajota penaevi pejumetaenexa. ¹⁷ Nexata Jesús tsicoberutatsi profeta Isaiáspijinē bajayata peyaquinaebaxuto. Nexata Jesús bajarapabaxuto baxupata. Nexata jane baja daxita bajarajota penaevi pejumetaenexa, Jesús tsimuxuleba itsajota bajara-pabaxutota tajēvelia Jesús yabara jumaitsi mapacueniaje:

¹⁸ Dioso pijaEspíritu Santo netsijamatabēeca. Tspaji Dioso nitapeta tatsipaebinexa pexanialivaisi pibisiacuene pexanabiabijava bepeyajamatabēcuenejioviavavelia. Nitorobanua tajamatabēcuenexaniavaetsinexa bajarapamonae pibisiacuene pexanabiabineconi yabara bepeyajamatabēcuenejioviavaveca. Nitorobanua tajamatabēcuenexaniavaetsinexa pamonae piamatabēcueneitaquirivi, pamonae abaxē apo yapētae pexaniajailivaisi. Nitorobanua tacapanepaenexa pamonae jamatabēcuenejiovitabiabitsi pijavajabitsaē. ¹⁹ Nitorobanua tatsipaebinexa pacuenia baja Dioso najamatabēcuenevereta pecapanepaenexa pijajivi,

pejaiitanjavata tajēvelia Jesús yabara Isaiáspijinē peyaquinaebaxutota Jesús tsimuxulebanuca daxita bajarajota penaevi pejumetaenexa.

²⁰ Bajaxuacujinae Jesús baja bajarapabaxuto baxuacata. Tocanaviata baja judíovi penacaetuatabiabiabibota penacuenebinējavavelia. Bajaxuacujinae Jesús baja icatsia ecareca. Daxita pamonae judíovi penacaetuatabiabiabibota ena, Jesús asaēyata taeyenatsi. ²¹ Nexata icatsia Jesús jumaitsi bajarapamonaejavavelia:

—Aeconoxae Dioso pejumelivaisibaxuto pacatsimuxulebiveretatsi. Xua yabara bajara-pabaxutota jumaitsi, bajaraxua baja aeconoxae mapamatacabitaje copiapata baja, jai Jesús bajarapamonaejavavelia.

²² Nexata daxitajivi pexaniajamatabēcuenia Jesús yabara cuaicuaijai. Jamatabēcueneabenaajaca pexanialivaisi Jesús petsipaebixae. Nexata bajarapamonae Jesús jamatabēcueneaebiatanetsi. Nexata bajarapamonae nayanijobena. Najumaitsi:

—¿Matsa baja ponē Josépijinē apo pexēnatoje? najai tsenae bajarapamonae Jesús yabara.

Tspaji saya bajarapamonae jamatabējumai tsenae:

—Josépijinē raja pexēnato, jamatabējai tsenae.

²³ Nexata Jesús jamatabēcuenyapētane pacuenia sivanajamatabēxainatsi bajarapamonae. Nexata Jesús jumaitsi bajarapamonaejavavelia:

—Xaniajanē cajena pacuenia pacatsipaebijitsiatsi. Pacuenia pajumaitsimē tsabiabi pajivijovjavavelia pajamatabēcueneaebiataneme, bajara pijinia pacuenia xanējavaberena ata panejumaitsimē tsane patanejamatatabēcueneaebiataexaemē. Panejumaitsimē tsane mapacueniaje: “Pacuenia pacavēnēlivaitsanetsi Dioso pesaēta pinijicuene nexanaejava Capernaum tomarata, bajara icatsia pitsicuene exanare majotaje nevitsabitomarata,” panejamē tsane, jai Jesús judíovi penacaetuatabiabiabibota penaevijavavelia.

²⁴ Icatsia Jesús jumaitsi bajarapamonaejavavelia:

—Xaniajanē cajena pacuenia pacatsipaebijitsiatsi. Itsanē ata Diosojumepaebinēmi profetanē pijanacuapijivi apo jumecovēnētsitsi petsipaebilivaisi. Jamatabēcuene aebiataeyabi-abatsi pijanacuapijivi. ²⁵ Bajayata profetanēmibeje pinijicuene exanae atabeje, pinijicuene apo exanaebeje pijanacuata. Bajara pijinia pacuenia xanē ata pinijicuene apo exanaenē tsane tavitsabitomarata. Bajayata, abaxē pamatacabí profeta Elíaspijinē ponapona Israel nacuata, bajarapamatacabí, emarapae ata, ema apo jopae. Nexata acueyabi pavaibeje epatua ajibi ema. Nexata daxita nacuanējava bitso janibo. Bajarapamatacabí janibovajēnaeya pamonajivi pevecutēpaevanētsi ayaiBITSaēto jinavanapa Israel nacuata. Bitso bejiobi tsavanapae. ²⁶ Itsiata Elíaspijinē Dioso apo itorobitsi peyavenonaenexa bajarapamonaeayjuvēnēva. Elíaspijinē Dioso itorobatsi peponaenexa Sarepta tomarapijivijavavelia, Sarepta tomarata pamonae pevecutēpaevatsi Elíaspijinē peyavenonaenexa. Sareptatomara eca Sidón nacuata. ²⁷ Bajayata, Elíaspijinē pevēnamuto, profeta Eliseopijinē ponapona Israel nacuata. Bajayajebi bitso peperabētsabanaevi, ayaiBITSaēto picani jinavanapa Israel nacuata. Itsiata bajarapamatacabí profeta Eliseopijinē caenē ata pijanacuapijinē, bajaya-jebi bitso peperabētsabanaevijuvēnēnē, apo jamatejemayaexanae. Caenē bajayajebi bitso peperabētsabanaenē Naamán, Siria nacuverena pepatsinē, jamatejemayaexana, jai Jesús judíovi penacaetuatabiabiabibota penaevijavavelia.

²⁸ Nexata bajarapamonae itsa jumetane bajarapacuenia Jesús pejumaitsijava, bitso Jesús baraanaepanatsi bajarapamonae. ²⁹ Bajarapamonae nonobapuna. Vaetabatsi

Jesús. Caponaliatsi tomarajumabelia. Patsutoyenepanata eca Nazarettomara, bajara-patsutojumabetsia Jesús caponayatsi pexuabinexatsireca picani bajarapatsuto itapa-janitojavareca. ³⁰ Itsiata baitsi jane Jesús bajarapamonae tuatuajëta najetarucae ata, pëtaenejevatsi vecuapona baja Capernaum tomarabelia. Nexata baja Jesús vecuapanepa bajarapamonae.

Pacuenia pebi, dovathi peyajavaponaponae, Jesús jamatejemayaexana yabara pelivaisi

(Mr 1.21-28)

³¹ Jesús pata Capernaum tomarata. Capernaum tomara eca Galilea nacuata. Nexata Capernaum tomarata Jesús jivi livaisi tsipaeba judíovi penacueraevetsimatatabita. ³² Itsa bajarapamonae jumetane palivaisi Jesús tsipaeba, jamatabëcuenenabenajaca. Tsipaji xani-avaetsia tsipaeba Dioso pitorobinëtsicuenia.

³³ Bajarajota judíovi penacaeuatabiabibota pebi, dovathi peyajavaponaponae, naeca. Nexata bajaraponë Jesúsjavabelia vavajai tsaxuabi. Jumaitsi:

³⁴ —¡Jesús, Nazaret tomarapijnëmë, panevecuaponare baja! ¿Detsa xua paneexanaejit-siamë? ¿Najetarucame tsaja pataneveretsinexamë? Xanë cajena cayapëtanetsi. Xamë raja Dioso pexënatomë, pepo pexaniajamatabëcuenenëmë, jai dovathi peyajavaponaponae Jesúsjavabelia.

³⁵ Jesús nexata jumeitaveta dovathi. Jumaitsi:

—¡Moyamëre! ¡Vecuapitsapare baja maponëje! jai Jesús.

Nexata dovathi pebi xuabatsi irata daxita bajarapamonae pitabarata. Dovathi baja pebi vecuapitsapatsi itsiata itsacuene exanaenejevatsi. ³⁶ Nexata daxitajivi bajarapacuenie itsa tane, bitso jamatabëcuenenabenajaca. Najumaitsi bajarapamonae:

—¿De meta pacuenia maponë caëjëpatsi pijumeta pexanaenexa mapacueniaje? ¡Maponëje Jesús, beDioso pitorobinëtsisca! ¡Itaveta dovathi pepitsapaenexa jivivecua! ¡Nexata baja dovathi pitsapa jivivecua! najai bajarapamonae.

³⁷ Nexata Jesús vënëlivaisitanetsi daxita bajarapanacuapijivi.

Pacuenia Simón Pedro pijava pena Jesús tojamatejemayaexana yabara pelivaisi

(Mt 8.14-15; Mr 1.29-31)

³⁸ Judíovi penacaeuatabiabibo pevecuapitsapaecujinae, Jesús joneya Simón Pedro pijaboyalia. Nexata bajarajota Jesús pevajënae, Simón pijava pena bitso romaebanucatsi. Nexata bajarajota itsamonae Jesús tsipaebarecëpatsi bajarapova peromaebanucaejavatsi.

³⁹ Jesús nexata cujilia peromaebanucaevatsi. Vecuaitaveta peromaebijavatsi. Nexata bajarajota peromaebanucaevatsi domae baja vecuajibi tsanajetsitsireca. Bajarapova baja jamatejema. Nexata bajarapova Jesúsbana pexaejavanexa toexanatsi.

Pacuenia ayaibitsaëto jivi, piavitanevi, Jesús jamatejemayaexana yabara pelivaisi

(Mt 8.16-17; Mr 1.32-34)

⁴⁰ Itsa baja ajena meravitsia, jivi piavitanevi, daxitaviriavitane pexainaevi, tocapatatsi Jesúsjavaberena. Jesús nexata perabëjayatapona caejivi canacujitsia, piavitanevi. Bajara-pacuenia Jesús jamatejemayaexana daxita piavitanevi. ⁴¹ Itsamonae ayaibitsaëto, dovathi peyajavajinavanapaevi, Jesús vecuacapsapapona. Nexata dovathi itsa pitsapa, vavajai tsabiabi Jesúsjavabelia.

—Xamë raja Dioso pexënatomë, jai tsabiabi.

Nexata Jesús jumeitavetabiaba dovathi. Apo tocopatabiabi pecuaicuaijainexa petsipaebiyaniava itsamonaejavabelia. Tsipaji dovathi xaniavaetsia yapëtanetsi Cristo athëbëvetsica Dioso pitorobijavatsi jivi pëcapanepaenexa.

Pacuenia Dioso pitorobilivaisi Jesús jivi tsipaeba Galilea nacuata yabara pelivaisi

(Mr 1.35-39)

⁴² Bajayacunua, ajena baja matabi tsarucaponae, Jesús pitsapa tomaravecua. Pona pesaicaeyojavabelia. Nexata jivi pëjaitatsi. Yapënapatatsi itsajota Jesús eca. Asivatsi bajarapamonae Jesús pevecuaponaeyaniava itsajavabelia. ⁴³ Nexata Jesús jumaitsi bajarapamonaejavabelia:

—Itsatomaranëjava ata raja tsipaebijitsianë pexanialivaisi pacuenia Dioso evetsijitsia pijajivi mapanacuataje. Bajarapalivaisi tatsipaebinexa jivi, Dioso baja cajena nitoroba, jai Jesús bajarapamonaejavabelia.

⁴⁴ Bajarapacuenia Jesús Judea nacujava livaisi jivi tsipaebanajetaruca judíovi penacaeuatabiabibonëjava.

5

Pacuenia dujuai bitso ayaijavanaxeto juta peyamatajucaejavata yabara pelivaisi (Mt 4.18-22; Mr 1.16-20)

¹ Itsamatacabi Jesús nua Genesaret pucaxaneto itapata. Nexata jivi ayaibitsaëtoxaneto cënënaponatsi imoxoyo pejumetaenexatsi Jesús petsipaebilivaisi, Dioso pitorobilivaisi. ² Nexata Jesús anijajerabeje taeruta bajarajota pucaitapata. Bajarapamobeje dujuai peyamatajucaevi Simónbana vecuanonobajunarëcëpa. Nexata bajarajota imoxoyo Simónbana quiatanubena dujuai peyamatajucaejava. ³ Nexata Jesús runareca jera ënëabereca, Simón pijajera ënëabereca. Jesús itoroba Simón jera peyatorotsinexatsilia tsiquirijavayo puca tuatuajëyojavabelia. Jesús eca jeraënëta. Nexata Jesús jera ënëjavaverena livaisi tsipaebeca bajarapajivi bitsaëtoxanetojavabelia. ⁴ Itsa baja Jesús copata jivi livaisi petsipaebijava, nexata jumaiti Simónjavabelia:

—Pavaeremelia jera piavajubuajavabelia. Pacoparemecca dujuai paneyamatajucaejava. Payamatajutsianame dujuai, jai Jesús Simónjavabelia.

⁵ Nexata Simón jumaiti Jesúsjavabelia:

—Jesús, payamatajucajë rabaja picani meravijebi. Itsiata apo payamatajutsinë caenëyo ata. Itsiata pacuenia paneitorobame, pacopatsiarecajë dujuai patayamatajucaejava, jai Simón Jesúsjavabelia.

⁶ Nexata copareca pitorobicueniatsi. Itsa jutsina dujuai peyamatajucaejava, ayaijavanaxaneto bitso dujuai yajutsina. Nexata dujuai peyamatajucaejava imoxo peyamaëucucucuae. ⁷ Nexata itacovaebarena penajuayamatajucaevi peponaenexarena itsamota peyavenonaenexatsi. Bajarapamonae nubenalia puca itapatalia. Nexata bajarapamonae ponarena. Vënëta bajarapamobeje dujuai. Imoxo dujuai peyabubunae bajarapamobeje. ⁸ Nexata Simón Pedro itsa tane bajarapacueni, pematabacabëta tonuca Jesús pitabarata. Jumaiti Jesúsjavabelia:

—Tajatuxanenë, nevecuanatixire. Tsipaji xanë pibisiacueni taexanaenë, jai Simón Jesúsjavabelia.

⁹ Bajarapasamota peyavenonaenexatsi. Bajarapamonae nubenalia puca itapatalia. Nexata bajarapamonae ponarena. Vëncuenia Simón jumaiti tsipaji penajuayamatajucaevi yajava bitso jamatabëcuenenabenajaca, bitso ayaijavanaxaneto dujuai peyamatajutsixae. ¹⁰ Ponëbeje Simón yanatatsi, Santiagobeje Juanbeje. Bajaraponëbeje Zebedeo pexënatobeje. Bajaraponëbeje ata jamatabëcuenenabenajacabeje. Nexata Jesús jumaiti Simónjavabelia:

—Pëtsa najunaviacame. Cacuajrubianatsi jivi nejucanexa. Nexata pacuenia dujuai jucabiabame, bajarapacuenia jivi jucaename Dioso pijajivinexa, jai Jesús Simónjavabelia.

¹¹ Nexata bajarapamonae robobocalia jerabeje tajetabojavabelia. Bajaraxuacujinae bajarapamonae pecajinavanapaejavaximi rajata itsamonaejavabelia. Bajaraxuacujinae pënapona baja Jesús.

Pacuenia Jesús jamatejemayaexana bajayajebi bitso peperabëtsabanaenë yabara pelivaisi (Mt 8.1-4; Mr 1.40-45)

¹² Jesús itsa ponapona tomarata, nexata bajarajota patajopa pebi, bajayajebi bitso peperabëtsabanaenë. Itsa bajaraponë tane Jesús, pematabacabëta irataeya bocajunua Jesús pitabarata. Vajëta pinijicuenia Jesúsjavabelia. Jumaiti:

—Tajatuxanenë, cacajëjëpa raja tanejamatejemayaexanaenexamë mapavitanevecuajë. Itsa jitsipame, nejamatejemayaexanare mapavitanevecuajë, jai bitso peperabëtsabanaenë Jesúsjavabelia.

¹³ Nexata Jesús pecobeta perabëjayalia bitso peperabëtsabanaenë. Jumaiti bajaraponëjavabelia:

—Jajã, jitsipajë cajena. Jamatejemamë rabaja, jai Jesús peperabëtsabanaenëjavabelia.

Bajarapacuenia Jesús pejumaitisjavata peperabëtsabanaenëmi baja perabëxanepananajereca. ¹⁴ Nexata Jesús jumeitaveta bajayajebi bitso peperabëtsabanaenëmi petsipaebiyaniwa itsajiviyojavabelia ata pacuenia Jesús jamatejemayaexana bajaraponë. Jesús jumaiti:

—Naitajëremelia jane sacerdotenëjavabelia, templobota penacuenëbinëjavabelia. Nexata sacerdotenë cataena pecavecuajibijava baja niavitanejavami. Diosonexa rajuremelia ofrenda sacerdotenëjavabelia pecavecuajibixae niavitanejavami. Bajara tsipaji pacuenia bajayata vajasalinainëmi Moiséspininë nacaitoroba. Nexata jivi yapëtaena pepacueni baja pecavecuajibijava niavitanejavami, jai picani Jesús bajayajebi bitso peperabëtsabanaenëmijavabelia jivi ayaibitsaëto pevënëlivaisitaeyanivatsi.

¹⁵ Itsiata Jesús vënëlivaisitanetsi daxita bajarapanacuapijivi. Nexata Jesús jivi itsa vënëlivaiastanetsi, ayaibitsaëtoxaneto patapona Jesúsjavaverena penamuxunaevetsinexatsi

petsipaebilivaisi. Bajarapamonae pata Jesús pejamatejemayaexanaenexanua piavitanejavavecua. ¹⁶ Itsiata Jesús itsajavata jivivecua natixitabiaba pesaicaeyojavabelia. Bajarajota vajëtabiaba Diosojavabelia.

Pacuenia Jesús jamatejemayaexana petabusipacuenabinëtsi yabara pelivaisi
(Mt 9.1-8; Mr 2.1-12)

¹⁷ Itsamatacabi Jesús jivi livaisi tsipaeba. Bajarajota naena fariseovi. Naenanua judíovi pecujarubivi ata. Bajarapamonae pata Galilea nacuata penaetomaranëjavaverena, Judea nacuata penaetomaranëjavaverena ata, Jerusalén tomaraverena ata. Nexata bajarapamatacabi Jesús Dioso pesaëta caëjëpaeyaexanatsi jivi pejamatejemayaexanaenexa piavitanejavavecua. ¹⁸ Nexata bajarajota Jesúsjavaberena pebijivi camayota yavëtarapararena petabusipacuenabinëtsi. Bajarapamonae picani bajaraponë boyalia yavëtarajonejitsialia peyabuatsinexa Jesús pitabarata. ¹⁹ Itsiata acuenebi boyalia pecajonejava. Tsipaji bitso jivi bajarapabo yavënëca. Nexata bajarapamonae petabusipacuenabinëtsi bojumabetsia cajunaya. Bomatatu javavetsica vojoexana. Nexata bajarapavojotuatrica petabusipacuenabinëtsi camayota yacopatsicatsi jivi tuatujëatsica Jesús pitabaravatsica. ²⁰ Jesús jamatabëcueneyapëtane pacuenia bajarapamonae sivanajamatabëxainatsi. “Nacatojamatejemayaexanaenatsi cajena,” pesivajamatabëjajavatsi Jesús jamatabëcueneyapëtane. Bajaraxuata petabusipacuenabinëtsijavabelia Jesús jumaitsi mapacueniaje:

–Pibisiacueni rabaja nexanaeneconimi cavecuaajibiaexanatsi, jai Jesús bajaraponëjavabelia.

²¹ Nexata judíovi pecujarubivi, fariseovinu, itsa jumetaeyena Jesús pejumaitisijava bajarapacuenia, najamatabëxainena bëpënëa mapacueniaje:

–¿De meta maponëje? Maponëje Dioso apo pejitsipaecuenia cuaicuaijai. Itsanë ata cajena apo caëjëpaetsi itsajivi pibisiacueni pexanaeneconimi pevecuaajibiaexanaenexa. Caenë Dioso caëjëpatsi itsajivi pibisiacueni pexanaeneconimi pevecuaajibiaexanaenexa, jamatabëjai tsenae bajarapamonae bëpënëa Jesús yabara.

²² Nexata Jesús jamatabëcueneyapëtane bajarapamonae bëpënëa pesivanajamatabëxainenaajava bajarapacuenia. Nexata Jesús jumaitsi bajarapamonaejavabelia:

–Pëtsa bajarapacuenia panesivanajamatabëxainame. Tsipaji cajena xanë necaëjëpa jivi pibisiacueni pexanaeneconimi tavecuaajibiaexanaenexa. ²³ Paxamë apo pacacaëjëpae ata itsajivi pibisiacueni pexanaeneconimi panevecuaajibiaexanaenexa, pacacaëjëpa picani saya jema panejumaitsinexa pejamatejemavijavabelia mapacueniaje: “Cavecuaajibiaexanatsi rabaja pibisiacueni nexanaeneconimi,” panejainexa. Tsipaji itsajivi ata apo yapëtae tsipae saya jema panejumaitisijava. Itsiata baitsi jane itsa pepacueni apo pacacaëjëpae panejamatejemayaexanaenexa petabusipacuenabinëtsi, nexata acuenebi panejumaitsinexa bajaraponëjavabelia mapacueniaje: “Nonotapunare. Ponare baja,” panejainexa. Tsipaji bajarapacuenia pajumaitsimë ata, itsa apo jamatejema tsipae bajaraponë, nexata daxitajivi pacayapëtaejitsipa apo papecacaaëjëpaeacueni panejamatejemayaexanaenexa bajaraponë, jai nexata Jesús bajarapamonaejavabelia.

²⁴ Icatsia Jesús jumaitsi bajarapamonaejavabelia:

–Xanë, Daxitajivi Pematapijinënë, mapanacuata necaëjëpa tavecuaajibiaexanaenexa itsajivi pibisiacueni pexanaeneconimi ata pacuenia baja exanajë maponëjavabeliaje. Nexata patanecueneyapëtaenexamë tanecaëjëpaejava tavecuaajibiaexanaenexa itsajivi pibisiacueni pexanaeneconimi ata, pataema pacuenia jamatejemayaexanaenexajitsianë maponëje, jai Jesús bajarapamonaejavabelia.

Nexata icatsia Jesús jumaitsi petabusipacueninëtsijavabelia:

–Xamë cajumaitisiti. Nonotapunare. Nijacamayo pire. Nijaboyabelia baja ponare, jai Jesús.

²⁵ Nexata bajarapacuenia Jesús pejumaitisijavata, petabusipacueninëtsi nonotapuna baja daxitajivi pitabarata. Pebocacemayo pita. Pona baja pijaboyabelia. Penajetarucacajavata namutua, Diosojavabelia jumai tsanajetarucacae: “Diosomë, pexaniacueni netoexaname,” jai tsanajetarucacae bajaraponë. ²⁶ Nexata daxita pamonae tane petabusipacueninëtsi baja pejamatejemajava, pinijicuenia jamatabëcuenenabenajaca. Nexata bajarapamonae jumaitsi Diosojavabelia:

–Diosomë, pexaniacueni bitso nexanaenë, jai Diosojavabelia.

Daxitajivi itsa tane bajaraponë pejamatejemajava, pejamatabëcueneta bëpënëa bitso junava. Nexata bajarapamonae najumaitsi:

–Ajena, mapamatacabitaje, tanetsi Dioso pinijicueni pexanaejava, najai bajarapamonae.

Pacuenia Jesús pijajivitonënexa junata Levivënë yabara pelivaisi
(Mt 9.9-13; Mr 2.13-17)

²⁷ Jesús baja vecuapona pabota jamatejemayaexana petabusipacuenabinëtsi. Nexata Jesús penajetarucaejavata taeyeta Levivënenë. Bajaraponë pematamoyanijobinë impuestomatamo gobierno pejamatabëcuene. Pabota jivijavabelia matamoyanijobabiaba impuestomatamo, bajarapabota eca Leví. Nexata Jesús jumaiti Levíjavabelia:

—Leví, nepënaponare, jai Jesús.

²⁸ Jejai Leví. Nexata nonotapuna. Copata baja daxita pacuene bajarajota nacuenebabiaba. Pënapona Jesús.

²⁹ Bajaraxuacujinae Leví pijabota napata Jesús. Nexata Leví pinijifiesta toexana Jesúsnexa. Tspiji Leví jamatabëcuenebarëya Jesús pejunatsixaetsi pijajivitonënexa. Nexata Leví pijabota naena ayaibitsaëto jivijavabelia impuestomatamo pematamoyanijobivi gobierno pejamatabëcuene. Itsamonaë ata Leví pijabota naena mesa muxuneneta.

³⁰ Nexata fariseovi, judíovi pecujarubavinua, Leví pijabo jumapënenëvelia penubenaëvi, jamatabëcuenenavëxaniabiaya baracuaicuaijaiti Jesús pijajivijavabelia. Bajarapamonae Jesús yabara jumaiti:

—Jesús rabaja naneconita Diosojavabelia. Tspiji gobierno pejamatabëcuene impuestomatamo pematamoyanijobabiabivijavata, piagamatabëcuenebejevijavatanua, naxaeyeca pexaejava, jai bajarapamonae jamatabëcuenenavëxaniabiaya Jesús pijajivijavabelia.

³¹ Jesús ita jumetane fariseovi, judíovi pecujarubavinua, pebaracuaicuaijajivatsi, nexata Jesús jumaiti bajarapamonaejavabelia mapacueniaje:

—Pevaëbinë raja apo vaëbi pejamatejemavi. Pevaëbinë raja piavitanëvi vaëba. ³² Bajara pijinia xanë ata itsinë. Apo sivapatajopaenë tajunatsinexa pamonaë baja aneconijibi tsavanapae. Sivapatajopajë raja tajunatsinexa pijaneconi pexainaevi. Bajarapamonae junataponajë pecopabinexa pibisiacuene pexanaejava, penajamatabëcuenepënëyorotsinexa Diosojavabelia, jai Jesús bajarapamonaejavabelia.

Pacuenia Jesús yanijobatsi pamatacabibeje jivi vajëtaona Diosojavabelia pexaejava apo pexaeyabiabixae yabara pelivaisi

(Mt 9.14-17; Mr 2.18-22)

³³ Fariseovi, judíovi pecujarubavinua, jumaiti Jesúsjavabelia:

—Juan pijajivi, fariseovi pijajivinua, pexaejava apo xaeyabiabi pamatacabibeje Diosojavabelia vajëcapona. ¿Detsa xuajitsia xamë nijajivi pexaejava xaeyabiaba Diosojavabelia pevajëcaematacabianë ata? jai bajarapamonae.

³⁴ Jesús nexata comparacióncuenia jumaiti bajarapamonaejavabelia:

—Pamonae junatatsi penacabasifiestajavabelia penanabaninexa, apo atsobi pexaejava ita abaxë yajavaecatitsi pejananacasabinë. ³⁵ Itsiata baiti jane ita pejananacasabinë tsimaxëpatsipatsi pijavajabitsaë pevecuacaponanexatsi itsajavabelia, nexata pecovëta bajarapamonae apo xae tspiae pexaejava. Tspiji bitso najamatabëxainaejitsipa. Bajara pijinia itsi tajajivi ata. Tayajavaponaponaeepato abaxë apo atsobabiabi pexaejava pamatacabibeje Diosojavabelia vajëtaona. Itsiata pamatacabixanë necaponaëna bajarapamonaevecua, nexata jane baja bajarapamatacabixanë pexaejava apo xae tsane bitso tanesivanajamatabëxainaeaxae, jai Jesús peyanijobivitsijavabelia.

³⁶ Nexata bajarapamonae perujujamatabëcuene baja penavecuacopatsinexa, Jesús livaisi tspiaëba comparacióncuenia, bajarapamonae pejumecovënëtsinexa ëpejanalivaisi, Jesús petsipaëbilivaisi. Bajarapamonae anijajamatabëcuenebeje pexainayaniva, perujujamatabëcuene baja penavecuacopabinexa, Jesús livaisi tspiaëba comparacióncuenia. Perujujamatabëcuene yabara Jesús jumaiti bajarapamonaejavabelia mapacueniaje:

—Itsajivi ata apo caucutsi pejananaxatatsijava pejanapana pecatsatarutsinexa perujunaxatatsiesetojavabelia. Itsa caucutsipa pecatsatarutsinexa pejanapana perujunaxatatsiesetojavabelia, nexata bijianaejitsipa pejananaxatatsijava. Apo itajitsipaëna tspiae pejanapana perucajava perujunaxatatsiesetojavabelia. ³⁷ Itsajivi ata pijinia apo epacae pejanavinoranë perujubocodoruanëjavabelia bajayajebi peyajebinexa. Pejanavinoranë ita epacaejitsipa perujubocodoruanëjavabelia, nexata pejanavinoranë yatititibia tspiae. Tspiji perujubocodoruanë apo yanayeretsi tspiae xaniavaetsia. Tspiji pejanavinoranë pejumalitsëxë abaxë xaina. Nexata ita yatititibia tspiae, naxuabijitsipa vinoranëmi.

³⁸ Bajaraxuata bepaca pejanavinoranë pejanabocodoruanëjavabelia. ³⁹ Itsajivi perujuvinora piapaecujinae, apo jitsipae piapaenexa pejanavinora. Tspiji jamatabëjumaiti: “Perujuvinora bitso xanëpana pejanavinora matatoxenetsia,” jamatabëjai, jai Jesús bajarapamonaejavabelia comparacióncuenia. Bajarapacuenia Jesús jumaiti comparacióncuenia tspiji bajarapamonae catsiteca perujujamatabëcuene. Nexata Jesús jitsipa bajarapamonae pejumecovënëtsinexa ëpejanalivaisi, palivaisi Jesús tspiaëba.

6

Pacuenia Jesús pijajivi namutua siricanajetarubena trigoxu judíovi penacueraevetsimat-acabita yabara pelivaisi

(Mt 12.1-8; Mr 2.23-28)

¹ Judíovi penacueraevetsimatocabita Jesús, pijajivi yajava, najetaruca namutua trigo pabianēja. Nexata Jesús pijajivi pijaanaxae, trigoruané siricanajetarubena. Xunacobe-nacaquiatanajetarubena. Xuxaeyabuatapona. ² Nexata fariseoviyajuvěni jumaitsi Jesús pijajivijavabelia:

—Paxamě raja paexaname Dioso Moiséspijiněta penajumecopatsilivaisi vajanacaitavetsicue. Apo nacaitavetsi ata trigoxu vajaxaeyaniva, itsiata ajena penacueraevetsimatocabixae, apo bepaexanaemě mapacueniaje, jai fariseovi Jesús pijajivijavabelia.

³ Jesús nexata jumaitsi fariseovijavabelia:

—Ajena, penacueraevetsimatocabita, tajajivi bajarapacuenia exanae ata, itsiata apo pibisiacue. Tsipaji bitso pijaani. ¿Apo palebimě tsipaji Dioso pejumelivaisibaxuto paneyapětaenexa pacuenia vajasalinainěmi Davidpijině, pebarěponaponaevi yajava, exana pamatacabi bitso pijaani? ⁴ Bajaraponě Davidpijině joneya Dioso pijatemployalia. Nexata Dioso pijatemploeněta, mesajumata bobena Diosonexa ofrendacuenia petojebipañeně. Bajarapapanbēaně itsajivi ata apo tocopatsitsi pexaenexa penaneconitsiyaniva Diosojavabelia. Ěsacerdotevi picani pexaenexa tocopatatsi. Davidpijině apo sacerdoteně ata, pijajivi barěxae ata bajarapapanbēaně, itsiata apo vėnananeconitsi Diosojavabelia, jai Jesús fariseovijavabelia.

⁵ Icatsia pematatsěnėa Jesús jumaitsi fariseovijavabelia:

—Xaně, Daxitajivi Pematapijiněně, netoxanepana cajena tatsipaebinxaxanepana jivi pexanaenexa penacueraevetsimatocabita ata, jai Jesús.

Pacuenia Jesús jamatejemayaexana pebi pecobetsaquenaeně yabara pelivaisi

(Mt 12.9-14; Mr 3.1-6)

⁶ Itsamatocabita Jesús joneya judíovi penacaetuatabiaboyalia judíovi penacueraevetsimatocabita. Nexata bajarajota Jesús jivi livaisi tsipaeba. Bajarajota pebi pecujanenia pecobetsaquenaeně, naeca. ⁷ Nexata Jesús naitaxutocaevetenatsi judíovi pecujarubivi, fariseovinu, petanexatsi Jesús pejamatejemayaexanaejava pecobetsaquenaeně judíovi penacueraevetsimatocabita. Nexata Jesús pecobetsaquenaeně itsa jamatejemayaexana penacueraevetsimatocabita, “Jesús raja pibisiacue exana,” pejainexa bajarapamonae. ⁸ Nexata Jesús yapětane pacuenia bajarapamonae sivanajamataběxainatsi. Nexata Jesús jumaitsi pecobetsaquenaenějavabelia:

—Notopunare. Nucare majotaje mapamonae pitabarataje, jai Jesús.

Nexata pecobetsaquenaeně notopuna. Nuca bajarapamonae pitabarata. ⁹ Nexata Jesús jumaitsi penaitaxutocaevetenaevitsijavabelia:

—Penacueraevetsimatocabita ata xanepana vaxaexanaenexa pexaniacue. Xanepana vajajamatejemayaexanaenexa piavitanevi, jai Jesús penaitaxutocaevetenaevitsijavabelia.

¹⁰ Jesús matatoyorotsia naěcoba daxita pamonaenaxa bajarajota. Jesús jumaitsi pecobetsaquenaenějavabelia bajarapamonae pitaběnejeva:

—Namaxěrovire, jai Jesús.

Nexata baja pecobetsaquenaeně namaxěrovita. Bajarajota cobexanepananajereca baja. Pecobetsaquenaevajami ajibi. ¹¹ Nexata judíovi pecujarubivi, fariseovinu, itsa tane Jesús pecobexanepanaejaxanaejava pecobetsaquenaeně, bitso anaepana. Nexata jane baja najumejaita pacuenia Jesús beyaxubijitsiatsi.

Pacuenia Jesús pijajivi ayaibitsaětoxanetoyajuvěni itapeta saya doce poněbeje apóstolevinexa yabara pelivaisi

(Mt 10.1-4; Mr 3.13-19)

¹² Jesús pijajivi ayaibitsaětoxanetoyajuvěni, doce saya poněbeje, itapeta apóstolevinexa. Jesús pitapetsivajěnaeya apóstolevinexa, junaya petsutojumabetsia pevajěsinexa Diosojavabelia. Nexata Jesús meravijebi bajarapatsutojumatatsia vajětapona Diosojavabelia.

¹³ Bajayacunua, ajena baja matacabi tsarucaponae, Jesús junata daxita pijajivibitsaětoxanetoyajuvěni. Nexata bajarajota itapeta pijajivibitsaětoxanetoyajuvěni, doce saya poněbeje. Bajarapamonae Jesús vėnėruba apóstolevi. ¹⁴ Pamonae Jesús itapeta apóstolevinexa mapevėnėaněje. Copiaya poně, pevėně Simón. Bajaraponě Jesús vėnėruba itsavėně, Pedro. Itsaně Andrés, Simón Pedro jane baja pejuyapijině. Itsaně Santiago. Itsaně Juan. Itsaně Felipe. Itsaně Bartolomé. ¹⁵ Itsaně Mateo. Itsaně Tomás. Itsaně Santiago, Alfeo pexėnato. Itsaně Simón, celoteně. ¹⁶ Itsaně Judas, Santiago pejuyapijině. Itsaně Judas

Iscariote. Bajaraponë hexëjavabelia Jesús canajetsijtsiatsi pijavajabitsaë pecobeyabelia pebeyaxuabinexatsi.

Pacuenia Jesús jivi ayaibitsaëtoxaneto livaisi tsipaeba yabara pelivaisi
(Mt 4.23-25)

¹⁷ Jesús baja, pijajivi ayaibitsaëtoxaneto yajava, runaica petsutojumavetsica. Nexata epatua petsutoyenepanajavata, itsajota ira namatajëpa, Jesús yajavanuca pijajivi ayaibitsaëtoxaneto. Bajarajota nexata jivi nacaetuata ayaibitsaëtoxaneto. Bajarapamonae Judea nacuapijivi, itsamonae Jerusalén tomarapijivi, itsamonae Tiro tomarapijivi, itsamonae Sidón tomarapijivi. Tiro tomarabeje Sidón tomarabeje, manuameneitapata ecabeje. Daxita bajarapatomaranëpijivi nacaetuata pejumetaenexa Jesús petsipaebilivaisi. Bajarapamonae patanua Jesús pejamatejemayaexanaenexa piavitannejavavecu. ¹⁸ Bajarapamonaeyajuvënëvi itsajamatabëcuene tsabiabi dovathi pejamatabëcueneta. Bajarapamonaenua Jesús jamatejemayaexana. ¹⁹ Daxita pamonae bajarajota nacaetuata, Jesús picani jamatabëjayabatsi. Tsipaji Jesús daxitajivi piavitannejavavecu jamatejemayaexanapona pecaëjëpaejamatabëcuenetatsi.

Pacuenia Jesús pijajivi tsipaeba Jesús pijajivi pejamatabëcuenebarëyajanexa, apo pejamatabëcuenebarëyajanexanua, yabara pelivaisi
(Mt 5.1-12)

²⁰ Jesús pijajivi naëcota asaëya. Jumaitsi bajarapamonaejavabelia:

—Panajamatabëcuene copabame baja Diosojavabelia paneponaenexa Dioso pijatomarabetsia. Bajaraxuata paxamë bepanejamatabëcuenejiovivimi panijaneconi yabara, aeconoxae baja pajamatabëcuenebarëyamë Diosojavabelia.

²¹ 'Pajitsipame Dioso pijacuene. Pajamatabëcuenebarëyamë baja. Tsipaji Dioso athëbëtatsia pacarajutsiana daxitacuene xua panamatavenoname.

'Paneyanuevimi pibisiacuene paneexanaeconi yabara, pacavecuajibiaexana baja bajarapaneconi. Bajaraxuata itsamatacabi pajamatabëcuenebarëyamë tsane.

²² 'Xanë, Daxitajivi Pematapijinënë, patajajivixamë, itsa pacaitoya tsane jivi, itsiata pasivajamatabëcuenebarëyamë tsane. Bajarapamonae pacanavecuaitavetsi ata tsane, itsiata pasivajamatabëcuenebarëyamë tsane. Pibisiacuenia pacabijatae ata tsane, pibisiacuenia pacabaracuauicuaijai ata tsane, itsiata pasivajamatabëcuenebarëyamë tsane. ²³ Bajarapacuenia pacaexanae ata tsane, itsiata pasivajamatabëcuenebarëyamë tsane. Tsipaji raja Dioso athëbëtatsia pacarajutsiana bitso pexaniacuene jivi papecaitoyajamatabëcuene. Pamonae pacaitoya tsane, bajarapamonae pijasalinaivimi bajayata itoya Diosojumepaebivimi profetavi. Nexata bajarapamonae pijasalinaivimi bajayata bejio-biaexanapona Diosojumepaebivimi profetavi. Bajarapamonae aeconoxae ata pijasalinaivimi cuenejëpavanapa. Bajaraxuata paxamë ata icatsia bajarapamonae pacaitoya tsane pijasalinaivimi pecuenejëpavanapaexae.

²⁴ 'Daxitacuene mapanacuata panexainaevi, Dioso bitso ayaicuenia pacabejiobiaexanaena. Tsipaji pacabarëyamë tsavanapae ëpanexainaevajava mapanacuataje.

²⁵ 'Bitso bepajamatabëcuenejiovimë tsane daxitacuene mapanacuata panenatojitsipacuene panexainaevi. Pasivajamatabëcuenebarëyamë picani tsavanapae panexainaevajava. Itsiata baitsi jane itsamatacabi itsa patëpaename, panetëpaeucijinae panajamatabëxainaename ayaicuenia.

'Bepajamatabëcuenejiovimë tsane panejëajëajitsabiabivi sivabarëyaya mapanacuapijicueneje. Paneasaëtsavanapaepato abaxë mapanacuataje panesivajamatabëcuenebarëya tsabiabixae bajarapacuene, panetëpaeucijinae bitso payanuename pibisiacuene paneexanaeconi.

²⁶ 'Mapanacuapijivi pexaniacuena pacabaracuauicuaijai tsabiabi saicayacuenia Dioso pejumelivaisivecu panetsipaebabiabixae. Itsiata baitsi jane pamatacabi Dioso pacananeconitsiaexanaena, bitso bepajamatabëcuenejiovimë tsane. Tsipaji pacuenejëpame bajayata pamoname jinavanapa. Bajarapamonaemi bajayata jivi tsipaebabiaba saicayacuenia Dioso pejumelivaisivecu. Nexata bajarapamonaemi pexaniacuena baracuauicuaijaiti tsabiabi mapanacuapijivije, jai Jesús pijajivi ayaibitsaëtoxanetojavabelia.

Pacuenia Jesús pijajivi muxujioba piasivanexa pitoyavi atatsi yabara pelivaisi
(Mt 5.38-48; 7.12)

²⁷ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Pacatsipaebijitsiatsi icatsia patanenamuxunaevetsivimë. Pasivamëre papecaitojavavi ata. Pexaniacuene patoexanare pamonaë pacaitoya. ²⁸ Payavenonare pamonaë pacabijatane pibisiacuena. Pamonaë pacabaracuaicuaijai pibisiacuena, patovajëre Diosojavabelia peyavenonaenexatsi. ²⁹ Itsajivi itsa pacaitabarapacabiaxuaba anaeya, nexata icatsia itsanenia ata patonaitabaracaevere papecaitarapacabiaxuabinexa. Itsajivi itsa pacayacajërëta panijacamisajumavelia panenaxatatsijava, nexata patocopare panijacamisata papeyacajajërëtsinexa. ³⁰ Pajivi itsacuenejavayo amoneya pacavajëta, parajure. Itsajivi itsa pacayacajërëta itsacuenejavayo, pëtsa payanijobame papecatocanaviatsinexa. ³¹ Xua pexaniacuene, paxamë pajitsipame itsamonae papecatoexanaenexa, copiaya paxamë bajarapapexaniacuene patoexanare bajarapamonaëjavabelia, jai Jesús pijajivi ayabitsaëtoxanetojavabelia.

³² Icatsia Jesús jumaitsi pijajivijavabelia:

—Itsa pasivamë tsipae ëpapecaasivavi, nexata pexaniacuene apo paxainaemë tsipae Diosojavabelia. Tsipaji pijamatabëcuenebejevi ata, pamonaë asivatsi, banamataenetsianasiva. ³³ Pexaniacuene itsa patoexanejitsipame pexaniacuene ëpapecatoexanaevijavabelia, nexata apo paxainaemë tsipae pexaniacuene Diosojavabelia. Tsipaji pijamatabëcuenebejevi ata, pexaniacuene batoexana penajamatabëcuenejëpaevijavabelia. ³⁴ Itsa patsicopatsipame ëpanejamatabëcuene yapëtaevijavabelia baja, papecatocanaviatsinexa pacuena patsicopatame, nexata apo paxainaemë tsipae pexaniacuene Diosojavabelia. Tsipaji pijamatabëcuenebejevi ata, batsicopata penajamatabëcuenejëpaevijavabelia, pamonaë jamatabëcueneypëtane baja petocanaviatsinexatsi. ³⁵ Nexata pasivamëre panijavajabitsaë ata. Bajarapamonaëjavabelia pexaniacuene patoexanare. Bajarapamonaë patsicopare panajamatabëxainaenejavamë papecatocanaviatsinexa panetsicopatsicuena. Bajarapacuena bitso paxainaename pexaniacuene Diosojavabelia papecarajutsinexa athëbëtatsia. Bajarapacuena itsa paexanavanapaename, Dioso, athëbëtatsia peecaenë, pexicuena pacaexanaena. Tsipaji Dioso pitaxutotsoniataenë pijamatabëcuenebejevi ata. Itsamonae Dioso yavenonaë atatsi, itsiata apo canaëjëtsi Dioso peyavenonaëjavatsi. Bajarapamonaë apo canaëjëtsi ata Dioso peyavenonaëjavatsi, itsiata tsiteca Dioso itaxutotsoniataeyabiaba. ³⁶ Pacuena Dioso daxitajivi itaxutotsoniataeyabiaba, bajarapacuena paxamë ata itsamonae ata paitaxutotsoniataename, jai Jesús pijajivi ayabitsaëtoxanetojavabelia.

Pacuena Jesús pijajivi muxujioba pitaxutotsoniataenexa itsamonae ata, pacuena bajarapamonaë ata Dioso itaxutotsoniatanetsi, yabara pelivaisi (Mt 7.1-5)

³⁷ Icatsia Jesús jumaitsi pijajivi ayabitsaëtoxanetojavabelia petsutoyeneapanajavata:

—Pëtsa panataname pepacuene bepeneaneconijibivi. Nexata itsamonae pibisiacuene pexanaëjava xaniavaetsia payapëtaenejavamë, pëtsa pabaracuaicuaijamë mapacuenaiaje: “Bajarapitsipibisiacuene pexanaëvi, Dioso bitso ayacuena naneconitsiaexanaenatsi,” pajamë pëtsa. Nexata paxamë ata juya bajarapacuena itsamonae apo pacabaracuaicuaijai tsane pibisiacuene paneexanaëjava yabara. Itsamonae pibisiacuene pacaexanaë ata, pajamatabëcueneceavare. Pabarajamatabëcueneexanepanarena. Nexata pijinia Dioso pitabarata pibisiacuene paneexanaëjava Dioso jamatabëcueneceaviana. Pacabarajamatabëcueneexanepananaëna. ³⁸ Parajutaponare itsamonaejavabelia penamatavenonaëjavaxi. Nexata juya paxamë Dioso pacarajutaponaëna pacuena jitsipa papecarajutsinexa. Pacarajutsiana xuvajëto itsamonae parajutame matatoxenetsia, jai Jesús daxitajivijavabelia petsutoyeneapanajavata.

³⁹ Jesús icatsia comparacióncuena tsipaëba bajarapamonaëjavabelia mapalivaisije:

—Ponë bitso itaxutotsëcëna. Itsa apocajëpaetsi pematacaponaenaxa itsanë, ponë pijinia bitso itaxutotsëcëna. Itsa matacaponaëjitsipa, nexata najuajopaejitsiparecabeje bajaraponëbeje caemëthëxanetojavareca. ⁴⁰ Itsajivi pijinia itsa nacujaruba, yapëtaë ata baja penacujarubijava, apo jamatabëcuene matatoxenetsi pecujarubinëtsi. Itsa baja penacujarubijivi vereta xaniavaetsia penacujarubijava, nexata saya najamatabëcuenejëpabeje pecujarubinëtsibeje, jai Jesús pijajivijavabelia.

⁴¹ Jesús pijajiviyajuvënëvi pepacuene bepeneaneconijibivi natane. Nexata itsa cujirutane itsamonae itsacuenejavayo pexanaëjava, jumai tsabiabi: “Mapitsicuene pexanaëvi Dioso bitso ayacuena naneconitsiaexanaenatsi,” jai tsabiabi. Nexata bajarapacuena pejumaitsabibixae, Jesús pijajivi piurabinexa jumaitsi mapacuenaiaje:

—Pëtsa paxamë pepacuene bepeneaneconijibivi nataëya pamuxujiobame itsajivi pijaneconi yabara. Tsipaji raja apo payapëtaemë paxamë ata pijinia paneconivajëto paxainame. ⁴² Nexata paxamë ata ayaineconixaneto itsa paxainame, nexata itsanëjavabelia apo bepajumaitsimë: “Tajabananë, papibisiacuene exaname, copare,” apo bepajamë.

Yamaxëitojorobiaya saya bepexaniajamatabëcuenevi nataeya pacuaicuajiamë tsabiabi. Itsiata pijinia paxamë ata paneconivajëto paxainame, apo payapëtaemë. Paxamë copiaya pacopabare pibisiacuene paneexanabiabijava. Bajara jane xuacujinae paitavetsianame itsamonae ata pibisiacuene pexanaejava penavecuacopsinexa, jai Jesús pijajivijavabelia.

Pacuenia peubinaenë itsa nacuaita, nayapëthane pavirianaecuene yabara pelivaisi
(Mt 7.17-20; 12.34-35)

⁴³ Icatsia Jesús jumaitsi pijajivi ayaibitsaëtoxanetojavabelia petsutoyenepanajavata: –Pexaniavirianaenë itsa ubatsi, nacuaita pijinia pexaniacuai. Apo nacuaitsi pibisiacuai. Ponaë pijinia pibisianaë, apo nacuaitsi pexaniacuai. ⁴⁴ Caevirianaë canacujitsia yapëtanetsi itsa nacuaita. Higovëneucuito apo paucutsimë cucunanaeta. Uvaru pijinia apo paucutsimë saya pejuviënëbotota. ⁴⁵ Bajara pijinia itsi jivi ata. Pexaniajamatabëcuenenë pexaniacuene yabara cuacuajiai. Tspiji pexaniajamatabëcuene xaina pejamatabëëthëtota. Pibisiamatabëcuenenë pijinia pibisiacuene yabara cuacuajiai. Tspiji pibisiamatabëcuene najamatabëxaina pejamatabëëthëtota. Nexata pacuene yabara pebi pecuaibovojotota cuacuajiai, bajarapacuene pitsapa pejamatabëëthëttojavavetsina, jai Jesús pijajivijavabelia.

Pacuenia Jesús livaisi tsipaeba anijanëbeje bo pexanaenëbeje pelivaisicuenia yabara pelivaisi

(Mt 7.24-27)

⁴⁶ Icatsia Jesús jumaitsi pijajivi ayaibitsaëtoxanetojavabelia petsutoyenepanajavata: –¿Detsa xuajitsia: “Tajatuxanenë,” panejamë tsabiabi ata, itsiata apo panejumecovënëtsimë patacaitorobicuenia? ⁴⁷⁻⁴⁸ Pajivi xanëjavaberena pata tanenamuxunaevetsinexa, tanjumecovënëtsinexana, bajarapajivi apo nacueratsi tsane. Bajarapajivi piatajairata bo bepexanaenë tsane. Bajarapajivi yabara pacatsipaebianatsi. Bo pexanaenëxexa, peyapëtaexae itsajota pijabo exanaejitsia pebubutsijavanexa, nexata naesituru atajaya xaniavaetsia mëthëca piatajairata. Nexata pijabo toyabubutsi ata, petojopaeyanivatsi. Bajaraxuacujinae bo baja vereteta. Itsa baja mene avajubuatsica, pijabo toyabubutatsi. Mera asaëtsica bojavabetsica. Itsiata pijabo apo tonanequetsitsi. Tspiji naesituru xaniavaetsia mëthëca piatajairata. Nexata bajaraponë apo nacueratsi bo pexanaejava. ⁴⁹ Pajivi nejumetae ata tsane tatsipaebillivaisi, itsiata itsa apo nejumecovënëtsi tsane tatsipaebillivaisi, nacueratsiana. Bajarapajivi tajetabota bo bepexanaenë tsane. Ponë tajetabota pijabo exaneta, yapëtae ata emarapae pecopiapatsijavanexa, bajaraponë nacuerata bo pexanaejava. Tspiji bo peveretetsicujinae, mene avajubuatsica. Nexata pijabo toyabubutatsi. Bo nexata jopaiça. Pepacuene baja nexata abeje, jai Jesús pijajivijavabelia.

7

Pacuenia vajabitsaë pijacapitán pijabota petonacuenebaponaponaenëtsi, Jesús tojamatejemayaexana yabara pelivaisi

(Mt 8.5-13)

¹ Jesús baja itsa najumevereta pijajivi ayaibitsaëtoxaneto livaisi petsipaebijava petsutoyenepanajavata, pona baja Jesús Capernaum tomarabelia. ² Capernaum tomarata ponapona Romano nacuapijinë, vajabitsaë pijacapitán. Bajaraponë pijajivitonë, bitso piasive, toavitanetsi. Totëpaejitsiatsi baja. ³ Bajaraponë capitán vënëlivaisitanetsi Jesús pejamatejemayaexanaponaejava piavitanevi. Nexata capitán jumaitsi judíovi piajaanovijavabelia:

–Panetoyunaremelia Jesús. Pabarëpatsiaremena tajaboyaberena tanetojamatejemayaexanaenexa tajajivitonë, jai capitán judíovi piajaanovijavabelia.

⁴ Nexata bajarapamonae pona Jesúsjavabelia. Itsa pata Jesúsjavabelia, pinijicuenia junata. Jumaitsi Jesúsjavabelia:

–Bajaraponë capitán bitso pexaniajamatabëcuenenë. Nexata tojamatejemayaexanaename pijajivitonë. ⁵ Tspiji raja bajaraponë nacaasiva vaxaitsi judíovitsi. Matamota cajena pijapalatata vajanacatoexanetsinexa vajanacaetuatabibonexa, jai judíovi piajaanovi Jesúsjavabelia.

⁶ Nexata Jesús nalia bajarapamonae pepëta. Itsa baja imoxoyotanajetarubena capitán pijabo, nexata capitán icatsia peyapëtaevitsi itoroba Jesús pemataenenaenexatsi. Capitán peyapëtaevitsi itoroba Jesúsjavabelia pejumaitsinexa mapacueniaje:

–Petuxanenë, pëtsa paremena tajaboyaberena. Apo caquenetsiataejitsipaetsi. Bevelijamatabëcuenenë raja saya xanë xamëvecua. Nexata apo xanepanaë tsipae nena-jonejava tajaboyaberena. ⁷ Apo nejamatatabëcuenecaëjëpaenua taponaejava xamëjavabelia

ata. Saya bajaraverena itorobare ënijume. Nexata tajajivitonë netojamatejema tsane. ⁸ Xanë ata xainajë taneitorobabiabivi taneitorobicuenia tajumecovënëtabiabinea. Xanë ata juya xainajë vajabitsaë, tajajivi, taitorobicuenia tanetoexanabiabinexa. Nexata ita itorobajë caenë vajabitsaënë peponaenexa, bajaraponë ponabiaba. Itsa junarenajë it-sanë vajabitsaënë pepatsinexa maberenaje, bajaraponë patabiabarena. Itsa itorobajë tajajivitonë tanetoexanaenexa itsacuenejavayo, nexata netoexanabiaba. Bajara pijinia pacuenia xamë ata nexanaenexa, cacaëjëpa. Nexata saya bajaraverena ënijume itorobare saya ënijumeta tajajivitonë netojamatejemayaexanaenexamë, jai capitán mapacueniaje petonajumeitorobijume Jesúsjavabelia.

⁹ Jesús ita jumetane bajarapacuenia capitán petonajumeitorobijumetsi, jamatabëcuenenabenajaca capitán petonajumeitorobijumetsi yabara. Nexata napënëyorotaxuaba Jesús. Jumaitsi pepënanajetarubenaevitsijavabelia:

—Xaniajanë pacuenia pacatsipaëbijitsiatsi. Caeto ata cajena Israel nacuapijinë apo caxitajarabaxuabinë xanëjavabarena bitso tanesivanajamatejemaatabëcuenecopatsinë pacuenia mapacapitán nesivajamatebëcuenecopatsiaya jumaitsije, jai Jesús capitán yabara. ¹⁰ Nexata baja pamona capitán itorobalia Jesús petsipaëbinexatsi capitán penajumeitorobilivaisi, naviabarena baja capitán pijaboyaberena. Itsa baja pata boyaberena, caxitajaraba baja capitán pijajivitonë pejamatejemanë.

Pacuenia pamona pevecuatëpaevatsi pexënato Jesús toasaëyaxana, petëpaenëmi, yabara pelivaisi

¹¹ Jesús pona Naín tomarabelia. Nexata yanatatsi pijajivi, itsamonae yajava, ayait-saëtoxaneto. ¹² Itsa baja Jesús patanajetaruca Naín tomara imoxoyojavata, nexata camataen-natsi petëpaenë pecanajetarubenaevi. Bajarapamona petëpaenë tomaravelia capitsapa pemëthëtsinexa tomarapënëyabelia. Ponë tëpa, bajaraponëmi pamona pevecuatëpaevatsi pexënato, pepo cainë. Nexata pamona pevecuatëpaevatsi pexënato, petëpaenë, itsa capon-aliatsi pemëthëtsinexatsi, tomaraverena jivi ayait-saëtoxaneto pënaponatsi. ¹³ Nexata Jesús ita tane bajarapova, tsitabejiobitsi bitso. Nexata Jesús jumaitsi bajarapovajavabelia:

—Matanueyabijitsipame, jai Jesús.

¹⁴ Nexata Jesús cujitalalia petëpaenë peyacajoniacanajetarubenaevi. Pecobeta jayata cajoni. Nexata petëpaenë peyacajoniacanajetarubenaevi, nubenaothopa. Nexata Jesús jumaitsi petëpaenëjavabelia:

—Pevëjëato, xanë raja cajumaitsitsi. Namatacore, jai Jesús.

¹⁵ Nexata baja petëpaenëmi namatacota. Cuaicuaijai. Jesús baja tocanaviata piasaënë penajavabelia. ¹⁶ Nexata daxita petaevitsi jamatabëcuenenabenajaca. Najumaitsi bajarapamonae:

—Dioso bitso ayaijamatebëcuenenë. Pinijijamatebëcuene pexainaenë, profeta, nacatsi-tanajamatebëcueneitajëta. Dioso pinijicuene pexanaejava ata nacatsitajëta vajataenexa, najai bajarapamonae Jesús yabara.

¹⁷ Daxita Judea nacuapijivi, imoxoyo nacuanëjava ata pejinavanapaevi, Jesús vënëlivaisitanetsi xua exana.

Pacuenia Juan jivibautisabinë itoroba pijajivitonëbeje Jesúsjavabelia yabara pelivaisi (Mt 11.2-19)

¹⁸ Juan jivibautisabinë naneconitsia ponapona penaneconitsivi pejebabiabibota. Nexata pijajivi tsipaebatsi daxita Jesús pexanaponajava yabara. Nexata Juan junata anijanebeje pijajivitonëbeje pitorobinexa Jesúsjavabelia. ¹⁹ Juan pitorobivajënae pijajivitonëbeje, jumaitsi bajaraponëbejejavabelia:

—Pajumaitsimëbeje tsane Jesúsjavabelia: “¿Xamë tsabaja Cristomë? ¿Xamë tsabaja tajëvelia cavajunupaebapona nepatsijavanexatsica daxitajivi necapanepaenexa? Itsa apo Cristomë, ¿abaxë tsaja pacopiaevetavanapaenajë itsanë athëbëvetsica Dioso pitorobinex-atsicatsi jivi pecapanepaenexa?” jai raja Juan,” pajamëbeje tsane Jesúsjavabelia, jai Juan pijajivitonëbejejavabelia.

²⁰ Nexata Juan pijajivitonëbeje ita patabeje Jesúsjavabelia, Juan pijajivitonëbeje jumait-sibeje Jesúsjavabelia:

—Juan raja jivibautisabinë paneitorobabeje patacayanijobinexabeje. “¿Xamë tsabaja Cristomë? ¿Xamë tsabaja tajëvelia cavajunupaebapona nepatsijavanexatsica daxitajivi necapanepaenexa? Itsa apo Cristomë, ¿abaxë tsaja pacopiaevetavanapaenajë itsanë pepat-sijavanexatsica?” jai raja Juan, jai beje jane baja Jesúsjavabelia.

²¹ Nexata bajaraponëbeje pitabëta Jesús jamatejemayaexanapona ayait-saëtoxaneto piavitanevi. Dovathi peyajavajinavanapaevi ata vecuacapsapa dovathi. Itaxutox-anepanaeyaexananua pamona bitso itaxutotsëcëna. ²² Nexata Jesús jumaitsi Juan pija-jivitonëbejejavabelia:

—Paponarebeje baja. Patsipaebianamebeje Juanjavabelia pacuenia baja patanemebeje taexanaponaejava. Patsipaebianamebejenua pacuenia baja pajumetanemebeje tatsipaebilivaisi jivijavabelia. Apo petaevimu ata itaxutoxaniavaetaponajë xaniavaetsia petaenexa. Petabusipacuenabivitsinua daxita jinavanapaeyaexanaponajë. Bajayajebi bitso peperabëtsabanaevinua vecuaajibiaexanaponajë baja. Bitso pemuxusipanaevinua jumetaeyaexanaponajë baja xaniavaetsia pejumetaenexa. Petëpaevimu ata icatsia asaëyaexanaponajë. Pexanialivaisinua pecapanepaelivaisinexatsi pibisiacuene pexanaeconimivecua, tsipaebaponajë bepejiobivijavabelia. Daxita bajaraxua taexanaponaejava patanetaejavamëbeje, patsipaebianamebeje Juanjavabelia. ²³ Pajumaitsimëbejenua tsane Juanjavabelia: “Jesús raja jumaitsi: ‘Jamatabëcuenebarëya pajivi tsiteca nejumecovënëta xanë Dioso pexënatocuenenë, jai raja Jesús,’ pajamëbeje tsane Juanjavabelia, jai Jesús Juan pijajivitonëbejejavabelia.

²⁴ Itsa baja Juan pijajivitonëbeje naviatabeje, nexata bajaraponëbeje pecovëta Jesús taxuxuaba jivijavabelia patsipaebijava Juan pelivaisi. Jesús jumaitsi jivijavabelia:

—Itsa paponame petusato nacuyabelia pamatacabi Juan ponapona petusato nacuata, ¿detsa pitsicuene pajamatabënaponaremelia panetaenexa bajarajotalia? ¿Paponaremelia tsaja saya panetaenexa musuli penajëabijava jovibota? ²⁵ Itsa apo paponamëlia panetaenexa musuli penajëabijava jovibota, ¿detsa nexata pitsicuene panetaenexa paponaremelia? ¿Paponaremelia tsaja saya panetaenexa naitabëtsiaya pexaniajava penaxatatsinë? Paxamë rabaja payapëtaneme mapacueje. Pamona naitabëtsiaya pexaniajava naxatababiaba, pamona naitabëtsiaya pexaniajava naxatababiaba, bajarapamonae jinavanapa nacuanë pevetsivi pijabonëjava. ²⁶ ¿Detsa nexata xua pajamatabënaponaremelia panetaenexa petusato nacuyabelia? Paponaremelia raja panetaenexa Diosojumepaebinë profetanë. Xaniajanë pacuenia pacatsipaebijitsiatsi. Juan itsa pataneme, pepacuene jane baja pepo profetanë, Diosojumepaebinë, pataneme. Nexata saya bevelia profetanë apo pataemë. ²⁷ Juan pexanaejavanexa, bajayata tajëvelia Dioso pejumelivaisibaxutota vajunupaeba. Dioso tanejumaitsijava ata xanëjavaberena, Dioso pejumelivaisibaxutota jumaitsi mapacueniaje: Itorobianajë nevajënaeyabelia tanejumelivaisipaebinënexa jivi pecatsivajënae najamatabëcuenexaniavaetsinexa,

jai bajayata Dioso pejumelivaisibaxutota athëbëvetsica tapatsivajënaeyatsica Juan tanelivaisi paebanajetarucujavanexa yabara.

²⁸ Juan ayaijamatabëcuenenë mapanacuataje. Nexata bajayata Juan pevajënaeya pprofetavimi jinavanapa, itsanë ata Juan apo jamatabëcuenematatoxensitsi. Itsiata baitsi jane pajivi bevelijamatabëcuenejivi ata, itsa najamatabëcopata baja Diosojavabelia pijatuxanenë pexanaenexa, bajarapajivi juya Dioso ayaijamatabëcuenejivi exanaenatsi Juan matatoxensitsi, jai Jesús Juan jivibautisabinë yabara.

²⁹ Juan vënëlivaisitanetsi daxitajivi. Impuestomatamo pematamoyanijobivi ata gobierno pejamatabëcuene, vënëlivaisitanetsi. Bajarapamonae jumecovënëta palivaisi Dioso najumecopata Juanjavabelia. Nexata Juan bautisaba bajarapamonae. ³⁰ Itsiata fariseovi, judíovi pecujarubivinua, namuxujemata bajarapalivaisi. Nexata picani pacuenia Dioso tojitsipatsi bajarapamonae pexanaenexa, apo exanae. Nexata Juan apo bautisabi bajarapamonae.

³¹ Jesús icatsia jumaitsi jivijavabelia:

—¿Detsa meta pacuenia yapëtaeyaexanaenajë itsamonaejavabelia bajarapamonae xaniavaetsia papecayapëtaenexa pacuenia paxamë pajamatabëcueneitsimë tsavanapae? Jumaitsinë meta tsane paxamë yabara mapacueniaje: ³² “Bajarapamonae abaxë saya bepejevaxijivixi, pajivixi tomara tuatujëjava banamuxusitenavanapa. Pejevaxijivixi itsa namuxusitenavanapa, bavavajai tsenae penajua namuxusitenaevijavabelia. Pevava-jaijavata bajumaitsi: ‘Pacatoobecatsi picani flauta. Itsiata apo payavajibimë. Pacatonaxënecatsi picani panemuxunanuevajinexa ata. Itsiata apo panuemë,’ bajai tsenae pejevaxi penajua namuxusitenaevijavabelia. Bajara saya jamatabëcueneitsi pamonae aeconoxae jinavanapa mapanacuataje,” janë meta tsane paxamë yabara. ³³ Juan jivibautisabinë Dioso pitorobilivaisi jivi tsipaebanajetaruca. Pexaejava itsajavata apo xaeyabiabi pamatacabibeje Diosojavabelia vajëtacona. Vinora ata apo apaeyabiabi. Nexata bajaraponë yabara jamatabëcuenenavëxaniabiaya pajumaitsimë tsabiabi: “¡Juan raja dovathi yajavaponapona!” pajamë tsabiabi jamatabëcuenenavëxaniabiaya. ³⁴ Bajaraxuacujinae icatsia xanë, Daxitajivi Pematapijinë. Itaxutojema xaniji. Matavëjëa apaeyabiabajëna. Nexata xanë yabara icatsia jamatabëcuenenavëxaniabiaya pajumaitsimë tsabiabi: “¡Pataema maponëje! Ayaijava xaeyabiaba. Ayaira matavëjëa apaeyabiabanua paitajibinexa. Barënajamatabëcuenejëpanua gobierno pejamatabëcuene impuestomatamo pematamoyanijobabiabivi. Pamonae ata pajamatabëcuenebejevi, barënajamatabëcuenejëpa,” pajamë tsabiabi xanë yabara. ³⁵ Itsiata baitsi jane itsamonae xaniavaetsia yapëtaena

paxanēbeje Juanbeje Dioso pejamatabēcueneta bitso pataneyapētaeyaxanaejavabeje. Nexata daxita bajarapamonae yapētaena pacuenia Dioso paneyapētaeyaxanaebeje pepacuene pepo pexaniajajamatabēcuene, jai Jesús mapacueniaje jivijavabelia.

Pacuenia Jesús exanatsi Simón pijabota yabara pelivaisi

³⁶ Fariseonē, Simónvñēnē, pijabota Jesús penanabaninexa, junatatsi. Nexata Jesús napona Simón pijaboyabelia. Jesús naeca mesa muxuneneta penanabaninexa. ³⁷ Bajarapatomarata ponapona petiriva, pibisiacuene pexanabiabiva pevitota palata pepitsinexa. Bajarapova itsa jumetane penanabanijavanexa Jesús Simón pijabota, nexata bajarapova capata alabastrovñē ibotota pexanaebotellabē. Pevñēcaebē pexaniapetuxujuviaceitera. Bajarapova capata bajarapaaceitera Jesús petsitaxuepacaenexa. ³⁸ Nexata bajarapova Jesús petaxusalibēnenia, pematabacabēta nucajunua petsitaxuepacaenexa jane baja bajarapaaceitera. Nexata saya bajarajota itacarajeta bajarapova nua. Tsipaji pibisiacuene pexanabiabineconi bitso yanajamatabēxaina. Nexata bajarapova pitaxutobarēmene othopa Jesús petaxujavabereca. Nexata bajarapova pematana taxuiquica. Bajaraxuacujinae yayiataeya taxutsutsune. Tsitaxuepaca jane baja petuxujuviaceitera. ³⁹ Nexata Simón, ponē Jesús junatatsi, itsa tane pacuenia petiriva exana Jesúsjavabelia, nexata Simón jamatabējumaitsi mapacueniaje:

—Itsa peneta pepacuene maponē Jesús, pepo profetanē tsipaeje, nexata yapētaejitsipa pitsijamatabēcueneva taxujayabatsi. Yapētaejitsipa bajarapova pibisiacuene pexanabiabivacuene. Nexata apo tocopatsi tsipae petaxujayabinexatsi, jamatabējai Simón Jesús yabara.

⁴⁰ Nexata Jesús jumaitsi Simónjavabelia:

—Simón, xainajē livaisiyo tacatsipaebinexa, jai Jesús.

Simón nexata jumaitsi:

—Jesús, netsipaebare, jai.

⁴¹ Nexata Jesús jumaitsi Simónjavabelia comparacióncuenia:

—Palata petsicopababiabinē amoneyabatsi anijanēbeje. Caenē amoneyabatsi quinientos padenariobeje. Itsanē amoneyabatsi saya cincuenta padenariobeje. ⁴² Nexata bajaraponēbeje apo xainaebeye juya petocanaviatsinexabeje petsicopatsimatamotsibeje. Nexata palata petsicopatsinē jumaitsi bajaraponēbejevavelia: “Iquinajē baja bajaraxuami pataniamoneyabijavamēbeje. Naxuabi baja jema,” jai. ¿Detsa nexata ponē bitso sivajamatabēcuenebarēya palata petsicopatsinētsibejevavelia? jai Jesús Simónjavabelia.

⁴³ Simón nexata jumaitsi Jesúsjavabelia:

—Ponē meta picani ayaijava amoneyaba, sivajamatabēcuenebarēya palata petsicopatsinētsijavavelia, jai Simón.

Nexata Jesús jumaitsi:

—Xaniajamē rabaja, jai Jesús Simónjavavelia.

⁴⁴ Jesús napñēyorota petirivajavavelia. Nexata jumaitsi Simónjavavelia:

—Simón, ¿taneme tsabaja pacuenia exana xanējavaberena mapovaje? Xanē junuajē nijaboyaberena. Itsiata yayiataeya xaniavaetsia apo necopiapitsimē. Apo nerajutsimē mera ata tanataxuiatsinexa. Mapovaje netaxuquiata baja pitaxutobarēmeneta. Netaxuiquicanua pematana. ⁴⁵ Xamē nijabota patsi atanē, apo nitabaratsutsunimē tanecopiapitsinexamē xaniavaetsia. Mapovaje tapatsicujinae apo copatsi cajena yayiataeya tanetaxutsutsuneponaejava. ⁴⁶ Xamē xaniavaetsia tanecopiapitsinexamē, apo netsimataepanaemē aceitera. Mapovaje netsitaxuepaca pexaniapetuxujuviaceitera. ⁴⁷ Nexata catsipaebatsi neyapētaenexa mapacuenieje. Mapovaje pinijicuenia nesivajamatabēcuenebarēya. Tsipaji ayaineconi ata pibisiacuene pexanaeoneconimi, vecuaajibiexanajē. Pajivi saya tsiquirineconiyo vecuaajibiaexanajē, pibisiacuene pexanaeoneconi, nayapētane. Tsipaji saya bajarapajivi tsiquirijavayo nesivajamatabēcuenebarēya, jai Jesús Simónjavavelia.

⁴⁸ Nexata Jesús jumaitsi petirivajavavelia:

—Pibisiacuene rabaja nexanaeoneconimi cavecuaajibiaexanatsi, jai Jesús.

⁴⁹ Itsamonae ata, pamona Simón junata penanabaninexa Simón pijabota, naena mesa muxuneneta. Nexata bajarapamonae najumai tsenae Jesús yabara:

—¿Detsa meta maponēje? Jamatabēcuenenavēxaniabiaya natane bepejamatabēcuenecaejēpaenētsi jivi pibisiacuene pexanaeoneconi pevēcuaajibiaexanaenexa, najai tsenae bajarapamonae.

⁵⁰ Nexata Jesús jumaitsi petirivajavavelia:

—Dioso pecacapanepaeva tsane pibisiacuene nexanaeoneconimivecua. Tsipaji nesivajamatabēcueneocopatame xanējavaberena. Jamatejema baja ponare. Cavecuaajibiaexanatsi rabaja pibisiacuene nexanaeoneconimi, jai Jesús petirivajavavelia.

8

Pacuenia Jesús, pijajivi, pebijivi, petiriavinua, yajavanajetaruca yabara pelivaisi

¹ Simón pijabota Jesús penanabanicujinae, najetaruca pinijitomaranëjåva, tsiquirito-maraxijåva ata. Tsipaebanajetaruca pacuenia Dioso pijajivi evetsijitsia. Jesús, pijajivi doce ponëbeje, apóstolevi, yajavanajetaruca. ² Jesús yajavanajetaruca petiriavinua, papetiriavi dovathi vecuacapitsapa yajuvënëvi. Papatiriavi ata piavitanejavavecua Jesús jamatejemaya exana yajuvënëvi, Jesús yajavanajetaruca. Bajarapapetiriaviyajuvënëva, caeva pevënë María, Magdala tomarapijiva. Bajarapova Jesús vecuacapitsapa siete ponëbeje dovathivi. Bajarapadovathivi Jesús pevecuacapitsapaecujinae, María pënaponatsi. ³ Itsava pevënë Juana, Cuzavënënë pijava. Bajaraponë Cuzavënënë, nacuaevetsinë Herodes pijajivitonë. Itsava pevënë Susana. Bajarapapetiriavi pematatsënë, itsapetiriavi, ayaibitsaëto, yajavanajetaruca Jesús. Bajarapapetiriavi pexainaepalatayajuvënëjåva, rajuta Jesúsjavabelia. Nexata xuaxi Jesús pijajivi barënamatavenona pebarëcomuatsinexa bajarapalatata.

Pacuenia Jesús jivi livaisi tsipaeba peubinë pelivaisicuenia yabara pelivaisi
(Mt 13.1-9; Mr 4.1-9)

⁴ Jivi naropoba tomaranëjavaverena. Pata Jesúsjavaberena petaenexatsi. Itsa baja ayaibitsaëtoxaneto nacaetuata Jesúsjavaberena, nexata Jesús livaisi tsipaeba peubinë pelivaisicuenia. Jesús jumaitsi mapacueniaje:

⁵—Peubinë pona pabiabelia peubinexa. Nexata itsa pata pabita, peubixu pexucayajabarabicuenia ubanajetaruca. Nexata itsaxu othopa pabi tuatuajëjåva penajetarucaenamutojumata. Bajarapaxu jivi taxunanonoba. Nexata bajarapaxumi juvinejeva baratsui xane. ⁶ Itsaxu pijinia othopa ibopananëjumata, itsajota bitso ira apo aitayaë. Nexata bajarapaxu juvi ata, tsaquenapona. Tspijaji ira tseva. ⁷ Itsaxu pijinia othopa xanëebacabomijavata. Nexata peubixu xanëebotonë caecuenia itsa yajavajuva, bitso xanëebotonë matacënënatsi peubijavami. ⁸ Itsaxu pijinia othopa pexaniairata. Bajarapaxu itsa juva, vitsaba. Nexata xaniavaetsia nacuaita. Itsabotonë capsapa cien paxutoyobeje ata, jai Jesús jivi ayaibitsaëtoxanetojavabelia.

Itsa Jesús tsipaeba bajarapalivaisi, pinijijumeta jumaitsi:

—Pajivi jamatabëjumeyapëtane patacatsipaebilivaisi, nenamuxunaevetsi xaniavaetsia, jai Jesús bajarapalivaisi petsipaebivijavabelia.

Pacuenia Jesús jivijavabelia livaisi tsipaeba ëcomparacióncuenia yabara pelivaisi
(Mt 13.10-17; Mr 4.10-12)

⁹ Nexata Jesús pijajivi yanijobatsi. Jesús pijajivi jumaitsi Jesúsjavabelia:

—Palivaisi jivijavabelia tsipaebame peubinë pelivaisicuenia, pajamatabëcuene xaina, patayapëtaenexa panetsipaebare, jai Jesús pijajivi Jesúsjavabelia.

¹⁰ Jesús nexata jumaitsi pijajivijavabelia:

—Paxamë rabaja xaniavaetsia Dioso pacayapëtaeyaxana Dioso papijajivimë papecaevetsijåva. Bajarapacuenie abaxë daxitajivi apo yapëtae. Bajaraxuata bajarapamonae itsa tsipaebajë livaisi, ëcomparacióncuenia tsipaebaponajë. Nexata bajarapamonae tae ata Dioso pesaëta pinijicue ne taexanaejåva, itsiata apo yapëtae pajamatabëcuene yabara exanajë pinijicue ne taexanaejåva. Namuxunaevetsi ata tatsipaebilivaisi, itsiata apo jumeyapëtae pajamatabëcuene xaina tatsipaebilivaisi, jai Jesús pijajivijavabelia.

Pacuenia Jesús yapëtaeyaxana pijajivi pajamatabëcuene xaina palivaisi tsipaeba peubinë pelivaisicuenia yabara pelivaisi

(Mt 13.18-23; Mr 4.13-20)

¹¹ Icatsia Jesús jumaitsi pijajivijavabelia:

—Mara pajamatabëcuenelivaisi xainaje, palivaisi pacatsipaebatsi pabita peubinë pelivaisicuenia. Pacuenia itsi pabita peubixu, bajara pijinia itsi Dioso pitorobilivaisi jivi pejamatabëëthëtota. Dioso pitorobilivaisi jivi itsa tsipaebatsi, tsijamatabëubatsi Dioso pitorobilivaisi. ¹² Nexata pacuenia itsi pabita peubixu, paxu othopa pabi tuatuajëjåva penajetarucaenamutojumata, bajara tsijamatabëcueneitsitsi itsamonaë Dioso pitorobilivaisi. Bajarapamonae itsa tsipaebatsi Dioso pitorobilivaisi, jumetane picani. Tsijamatabëubatsi jane baja picani Dioso pitorobilivaisi. Itsiata baitsi jane pejumetaecujinae bajarapalivaisi, bepijia dovathi najetaruca bajarapamonaejavaberena. Nexata bajarapamonae tsijamatabëjuvinejevatsi, petsijamatabëubilivaisitsi dovathi baja vecuapitatsi bajarapalivaisimi. Vecuapitatsi pevajënaeyabelia Dioso pejumecovënëtsiyåniva, Dioso pecapanepaeyånivatsi pibisiacuenie pexanaeconivecua. ¹³ Pacuenia pijinia itsi paxu othopa ibopananëjumata, itsajota bitso ira apo aitayaë, bajara tsijamatabëcueneitsitsi itsamonaë Dioso pitorobilivaisi. Bajarapamonae Dioso pitorobilivaisi jumetane. Nexata

picani bajarapalivaisi barëyaya jumecovënëta. Itsiata baitsi jane pacuenia irabereca apo atabunepiarioca paxu othopa ibopananëjumata, nexata nabijiana, bajara tsijamatabëcueneitsitsi bajarapamonae Dioso pitorobilivaisi. Tshipaji saya caeapatoyo jumecovënëta bajarapalivaisi. Nexata paepatota dovathi jamatabëcuenejëtatsi, copaba baja bajarapalivaisi pejumecovënëtsijavami. ¹⁴ Pacuenia pijinia paxu othopa xanëebacabomlijavata, itsa juva, bitso matacënënatsi xanëebotonë, bajara tsijamatabëcueneitsitsi itsamonae Dioso pitorobilivaisi. Jumetane picani bajarapamonae Dioso pitorobilivaisi. Itsiata baitsi jane bitso jamatabëcueneenatsi mapanacuapijicuene yabaraje. Tshipaji najamatabëxainana ayaijava palata pexainaenexa. Najamatabëxainanua pexanaenexa pacuene mapanacuapijivi exana saya jema pebarëyanexa. Bajaraxuata Dioso pitorobilivaisi apo tovtisabitsi pejamatabëëthëtota. Nexata pacuenia itsi pabita piacuaijibibotonë, bajara itsi bajarapamonae. Tshipaji Dioso xaniavaetsia apo tojinavanapae. ¹⁵ Pacuenia pijinia itsi paxu othopa pexaniairata, bajara tsijamatabëcueneitsitsi itsamonae Dioso pitorobilivaisi. Bajarapamonae ajamatabëcueneixuirajibi. Èpexaniajamatabëcuene najamatabëxainana. Casaë tsavanapae pevajënaeyabelia Dioso pejumelivaisi pejumecovënëtsijava. Nexata Dioso pejumelivaisi tsijamatabëcueneitsabaponatsi pevajënaeyabelia. Tshipaji exanavanapa Dioso pitorobicueniatsi, jai Jesús pijajivijavabelia itsa tsipaeba peyapëtaeyaxanaenexa palivaisi jivijavabelia tsipaeba pabita peubinë pelivaisicuenia.

Pacuenia Jesús pijajivijavabelia livaisi tsipaeba lámparabë pelivaisicuenia yabara pelivaisi (Mr 4.21-25)

¹⁶ Icatsia Jesús jumaitsi pijajivijavabelia:

–Itsjavi ata lámparabë pitanojotsicujinae, apo mataacatetsi itsacueniejavata. Cama bëxëpanalia ata apo etsi. Biji rajane athëbëyo etsia jivi boyaberena pejonevi petsivajënaeitayotecanenexa. ¹⁷ Bajara pijinia itsi palivaisianë tsipaebaponajë comparacióncuenia daxitajivi picani peyapëtaenexa. Najumematayatsia apo tsipaebaponanë. Itsamonae nejumetae ata, aeconoxae abaxë apo nejumeyapëtae pajamatabëcuene xaina tatsipaebillivaisianë. Itsiata itsamatacabi, bexëjavabelia, daxitajivi nejumeyapëtaena pajamatabëcuene xaina palivaisianë comparacióncuenia tsipaebaponajë, jai Jesús pijajivijavabelia.

¹⁸ Icatsia Jesús jumaitsi pijajivijavabelia:

–Panejumecanaëjère patacatsipaebilivaisi. Itsamonae ata itsa pacatsipaebiana, bajarapamonae ata pajumecanaëjëtsianame papecatsipaebilivaisi. Palivaisivajëto panejumecanaëjëtsianame, nexata bajarapalivaisivajëto panejumeyapëtaename. Itsiata icatsia pematatsënëa bajarapitsilivaisivajëto Dioso pacayapëtaeyaxanaena. Pajivi xaniavaetsia nejumeyapëtae patacatsipaebilivaisi, bajarapajivi icatsia itsilivaisi pematatsënëa Dioso jumeyapëtaeyaxanaenatsi. Itsiata pajivi apo jitsipae pematatsënëa pejumeyapëtaeponaenexa, bajarapajivi palivaisiyovajëto picani jumeyapëtae, nacofënétsiana, jai Jesús pijajivijavabelia.

Pacuenia Jesús pejuyapijivi, pena yajava, nubena bojumavelia yabara pelivaisi (Mt 12.46-50; Mr 3.31-35)

¹⁹ Jesús pejuyapijivi, pena yajava, pata Jesúsjavaberena. Itsiata acuenebi bajarapamonae pimoxoyotsijava Jesús. Tshipaji bitso jivi ayaibitsaëto Jesús matatoyorotsia vënëcatsi. ²⁰ Nexata pamonae Jesús petsipaebilivaisi matatoyorotsia jumetaeyenatsi, jumaitsi Jesúsjavabelia:

–Patajatuxanenë, ena raja, nejuyapijivi yajava, nuca patapënëverenena. Bajarapamonae pina jitsipa pecataejava, jai Jesúsjavabelia.

²¹ Nexata Jesús jumaitsi daxita bajarapamonaejavabelia:

–Pamonae jumetane Dioso pejumelivaisi, jumecovënëtanua pacuenia Dioso itorobatsi, bajarapamonae jane baja tajuyapijivi, taenajivinua, jai Jesús bajarapamonaejavabelia.

Pacuenia Jesús itaveta joviboxaneto, malataca yajava, piayaijavami yabara pelivaisi (Mt 8.23-27; Mr 4.35-41)

²² Itsamatacabi Galilea nacuata Jesús, pijajivi yajava, runareca jera ënëabereca. Jumaitsi pijajivijavabelia:

–Nicabaliatsi mapapucaxaneto itsapanabeliaje, jai Jesús.

²³ Itsa baja naropobalia, Jesús majitanuca. Nexata pinijijoviboxaneto jemata najetaruca. Malataca nexata bitso ayai. Nexata malataca jera ënëaberena mera epabajarabapona. Mera nexata vënëcapona jera ënëaberena. Bubunaejitsia baja bajarapamo. ²⁴ Nexata Jesús pemajitanucaenë pijajivi yaitavabatsi. Jesús pijajivi jumaitsi:

–¡Patajatuxanenë, vaxaitsimi rabaja yaothopaenatsi! jai Jesús pijajivi.

Nexata Jesús pemajitanucaeñemi naëcotapuna. Pinijijumeta itavetaxuaba jovibo, malataca yajava. Jovibo baja nexata ajibi tsaxuabi. Mene ata baja nexata vainae ecaxuaba.

²⁵ Nexata Jesús jumaitsi pijajivijavabelia:

—¿Detsa xuajitsia bitso pajunavame? ¿Tsipaji apo payapëtaemë Dioso papecaevetsijava? jai Jesús pijajivijavabelia.

Nexata Jesús pijajivi ita tane Jesús pitavetsijava jovibo, malataca yajava, Jesús pijajivi jamatabëcuenenajunaviaca bëpënëa. Nexata Jesús pijajivi najumaitsi:

—¿De meta tsipaji maponëje? ¡Itaveta jovibo, malataca yajava! ¡Nexata jumecovënëtsi! ¡Nexata baja jovibo, malataca yajava, ajibi tsaxuabi! najai Jesús pijajivi.

Pacuenia pebi, dovathivi peyajavaponaponaenë, Jesús vecuacapsapa Gerasa nacuata yabara pelivaisi

(Mt 8.28-34; Mr 5.1-20)

²⁶ Jesús pijajivi barëyaëta pucaxaneto itsapanabelia, Gerasa nacuyavelia. Gerasanacua boca puca itsapanaverena, Galileanacua pecanacujitsialia. ²⁷ Itsa Jesús jeravecua nonotajunaya, mataenenarenatsi bajarapanacuapijinë, dovathivi peyajavaponaponaenë. Bajaraponë bajayajebi baja jumasa ponaponabiaba. Pijabota apo ponaponaë. Jivimëthëanëjavata saya ponaponabiaba. ²⁸ Nexata bajaraponë ita pata Jesúsjavaberena, pematabacabëta nucajunua Jesús pitabarata. Pinijijumeta aëjai.

—Jesús, Dioso athëbëtatsia peecaenë pexënatomë. ¿Detsa xua jaitame xanëjavaberena? Pexaniacuene bitso cavajëtatsi. Nejamatabëcuenebejiobitsipame, jai dovathivi peyajavaponaponaenë Jesúsjavabelia.

²⁹ Bajarapacuenia jumaitsi dovathivi peyajavaponaponaenë tsipaji Jesús jerajavavetsina penonotajunaejavata, dovathivi peyajavaponaponaenë pemataenënaejavatatsi, Jesús itaveta dovathivi. Jesús jumaitsi dovathivijavabelia mapacueniaje: “¡Dovathivi, bajaraponë baja pavecuaapsapare!” jai. Bajaraponë anijatonë dovathivi vaetababiabatsi. Jivi picani bajaraponë cadenamaëtonëta cobecëtabiabatsi. Yajavataxucëtabiabatsi cadenamaëtonëta xaniavaetsia picani peecaenëxa. Itsiata baitsi dovathivi peyajavaponaponaenë ucubabiaba cadenamaëtonëmi. Dovathivi pejamatabëcueneta najetabajiravabiaba petusatuabelia. ³⁰ Nexata Jesús jumaitsi bajaraponëjavabelia:

—¿Detsa pavënëmë? jai Jesús.

Nexata bajaraponë navënëpaeba.

—Tavënë raja Legión, jai.

Bajarapacuenia navënëpaeba tsipaji dovathivi ayaibitsaëtoxaneto tsijamatabëjimavanapatsi. ³¹ Bajarapadovathivi vajëta Jesúsjavabelia infiernojavabelia Jesús pitorobianiva. ³² Nexata bajarajota, imoxoyo petsutojavata, marranobitsaëtoxaneto xaeavanapa. Dovathivi bitso vajëta Jesúsjavabelia.

—Panetocopare patajonëxa marranobitsaëtoxanetojavabelia, jai dovathivi.

Jesús nexata pevajëtsicueniatsi tocopata. ³³ Nexata dovathivi pebi vecuapitsapecatsi. Nexata marranobitsaëtoxanetojavabelia baja junua dovathivi. Nexata daxita bajarapamaranobitsaëtoxanetomi cujinaeyeca. Pucaxaneto itapajanituareca othopareca. Bajarajota daxita marranobitsaëtoxanetomi meneta bubuna.

³⁴ Marrano pevetsivi ita tane bajarapacuenë, rëcëpeca. Pona, pacuene tane, petsipaebinëxa tomarapivijavabelia, petsipaebinëxa vayafotusatojava penaevijavabelia ata.

³⁵ Nexata jivi ponarena petaenëxa bajarapacuenë. Jivi ita parena Jesúsjavaberena, taeyeta dovathivi peyajavaponaponaenëmi peecaëjava Jesús pemuxuneneta. Penaxatatsijava baja bajaraponë natataeca. Jamatejema baja. Xaniavaetsia eca. Nexata bajarapamonae cujunavatsi Jesús. ³⁶ Pamonae cuenetanetsi Jesús pejamatejemayaexanaëjava dovathivi peyajavaponaponaenëmi, bajarapamonae paeba pepatsivijavabelia daxita pacuenia tane.

³⁷ Bajarapamonae bitso cujunavatsi Jesús. Nexata daxita Gerasa nacuapijivi jumaitsi Jesúsjavabelia:

—Pexaniacuene pacavajëtatsi. Ponare baja patajanacuavecua, jai Gerasa nacuapijivi Jesúsjavabelia tsipaji cujunavatsi.

Nexata baja Jesús runareca jera ënëabereca. Ponaëjitsia baja. ³⁸ Nexata dovathivi peyajavaponaponaenëmi bitso picani navajëca Jesúsjavabelia penaponaenëxa picani Jesús pepëta.

—Petuxanenë, netocopare tanaponaenëxa nepëta, jai picani Jesúsjavabelia.

Itsiata Jesús apo jejai. Jumaitsi bajaraponëjavabelia:

³⁹ —Ponare nijamonaejavabelia. Tsipaebianame pacuenia ayaicuene nijatuxanenë Dioso catóexana, jai Jesús.

Nexata baja bajaraponë pona. Tsipaebapona daxita pijatomarapijivijavabelia pacuenia Jesús jamatejemayaexanatsi.

Pacuenia Jesús copiaya namutoepatota jamatejemayaexana piavitaneva, pacuenia icatsia cotocaevi toasaëyaxana Jairo pexënatovayo, petëpaevayomi, yabara pelivaisi (Mt 9.18-26; Mr 5.21-43)

⁴⁰ Jesús icatsia pecovëyaberena naviarena jerata pucaxaneto itsapanaverena. Nexata jivi ayaibitsaëtoxaneto copiapitatsi barëyaya. Tsipaji baja cajena copiaevetavanapatsi pepat-sijavarena. ⁴¹ Nexata bajarajota napatajopa Jairovënënë. Bajaraponë judiövi penacae-tuatabiabibo pevetsinë. Jairo pematatabacabëta yayiataeya Jesús pitabarata nucajunua. Pinijicuenia junata. Jumaitsi Jesúsjavabelia:

—Tapëta ponare tajaboyabelia, jai.

⁴² Bajarapacuenia Jairo jumaitsi Jesúsjavabelia tsipaji caevayo pexënatovayo totëpaejitsiatsi. Bajarapovayo xaina doce pavaibeje. Itsa Jesús napona Jairo pepëta, jivibitsaëtoxaneto Jesús pepënaponaevitsi matatoyorotsia cënënanajetarubensati.

⁴³ Bajarapajivibitsaëtoxaneto tuatujëta, itsava pijanacuene pecapunaevatsi nanajeta-ruca. Bajarapova pijanacuene pecapunaecujinaetsi, doce baja pavaibeje xaina. Beya-jiöbi tsabiabi bajarapajana. Daxita pexainaejavaximi navecuavereta pematamobita pe-vaëbivitsi. Itsiata baitsi jane itsanë ata pevaëbivitsi apo jamatejemayaexanaetsi bajara-pavitanevecua. ⁴⁴ Nexata bajarapova ponataba Jesús pepëñevëlia, jivibitsaëtoxaneto tuatu-ajëalia. Nexata bajarapova tojayataba Jesús penaxatatsijavacopia. Nexata bajarapaepatota pijanacuenemi vecuaajibitsi baja.

⁴⁵ Jesús nexata jumaitsi:

—¿Jipatsa tanaxatatsijava netojayataba? jai Jesús.

Daxitajivi jumaitsi Jesúsjavabelia:

—Xanë cajena apo cajayatabitsi, jai.

Nexata Pedrobana jumaitsi:

—Patajatuxanenë, jivibitsaëtoxaneto raja camatatorotsia cënënanajetarubena. Apo be-caajayatsijibi. ¿Detsa xuajitsi: “¿Jipatsa tanaxatatsijava netojayataba?” jamë? Itsajiviyo raeta baja cajayataba, jai Pedrobana.

⁴⁶ Nexata Jesús jumaitsi:

—Itsajiviyo baja cajena tanaxatatsijava netojayataba. Yapëtaniji bajarapajiviyo tajamate-jemayaexanaejava tasaëta, jai Jesús.

⁴⁷ Nexata petiriva jamatabëjumaitsi:

—Jesús baja yapëthane tanejamatejemayaexanaejava, jamatabëjai.

Nexata bajarapova najetabarena Jesús pitabarayaberena. Neconecojai pecajunavi. Pe-matabacabëta tonucajunua Jesús pitabarata. Bajarapova nexata navajunupaeba daxitajivi tuatujëta pacuene yabara tojayataba Jesús penaxatatsijava. Navajunupaebanua pacue-nia jamatejemayaexanatsi pejayatabijavata. ⁴⁸ Nexata Jesús jumaitsi bajarapovajavabelia: —Xamë nesivajamatabëjumasimë: “Jesús penaxatatsijava itsa tojayatabianajë, tavi-tanejavami nevecuaajibi tsane,” nesivajamatabëjamë. Bajaraxuata jamatejemamë baja. Ponare baja jamatejema, jai Jesús bajarapovajavabelia.

⁴⁹ Bajarapacuenia Jesús pejumaitsanucaejavata namutoepatota, pataba jivitonë Jairo pijaboverena. Bajaraponë jumaitsi Jairojavabelia:

—Jairo, nexënatoyo rabaja tëpa. Pëtsa baja matavëjëa jamatabëitonotaponame Jesús, jai bajaraponë Jairojavabelia.

⁵⁰ Jesús jumetae ata bajarapajume, itsiata jumaitsi Jairojavabelia:

—Jairo, pëtsa najamatabëxainame. Najamatabëcuenecopare saya ëxanëjavaberena. Nexënatovayo raja jamatejema tsane, jai Jesús Jairojavabelia.

⁵¹ Itsa Jesús pata Jairo pijabota, apo tocopatsi ayaibitsaëto penajonenexa Jesús pepëta petëpaevayo pebocaejavabelia. Tocopata saya penajonenexa mapamatabëxëyoje. Pedro, Santiago, Juan, petëpaevayo paxa, pena, bajara saya pamatabëxëyo tocopata penajonenexa Jesús pepëta. Pamonaë Jesús pevajënae ena Jairo pijabota, bajarapamonae Jesús pit-sapaeyaexana. ⁵² Daxitajivi pinijicuenia matanueyaba petëpanucaevayo. Nexata Jesús jumaitsi:

—Pëtsa pamanueyabame. Pejanava raja apo tëpae. Saya raja majitanuca, jai Jesús bajarapamonaejavabelia tsipaji yapëthane Jesús piasaëyaxanaejavanexa bajarapovayo.

⁵³ Bajarapacuenia Jesús pejumaitssijava, bajarapamonae saya Jesús jumecapocaponatsi. Tsipaji bajarapamonae yapëthane bajarapovayo baja picani pepacuene petëpaejava.

⁵⁴ Nexata Jesús petëpaevayo cobepita. Jumaitsi pinijijumeta:

—Pejanavayo, nonotabapunare, jai Jesús.

⁵⁵ Nexata bajarapacuenia Jesús pejumlahitsijavata, petēpanucaevayomi nonotabapuna. Asaē baja icatsia petēpaevayomi. Nexata Jesús jumlahitsi pejanavayo penajavabelia:

—Nexēnatovayo pexaejava rajure, jai Jesús.

⁵⁶ Nexata pejanavayo paxa, pena ata, bitso jamatabēcuenenabenajacabeje. Nexata Jesús jumlahitsi bajarapajivibejejavabelia:

—Pētsa papaebamebeje itsajivijavabelia ata pacuene pacatoexanatsibeje, jai Jesús.

9

Pacuenia Jesús pijajivi itoroba Dioso pitorobilivaisi jivi petsipaebanajetarubenaenexa yabara pelivaisi

(Mt 10.5-15; Mr 6.7-13)

¹ Jesús junata pijajivi, doce ponēbeje, penacaetuatsinexa. Nexata Jesús jumlahitsi bajarapamonaejavabelia mapacueniaje:

—Pacajamatabēcuene caējēpaeyaexanatsi rabaja papecacajējēpaejamatabēcuene dovathi pejavajinavanapaevi ata panevecuacapsapaponaenexa. Pacajamatabēcuene caējēpaeyaexanatsinua piavitanevi ata panejamatejemayaexanaponaenexa.

² Patsipaebanajetarubenaename daxitajivijava pacuenia Dioso pijajivi evetsijitsia. Piavitanevi ata pajamatejemayaexanaponaename, jai Jesús pijajivijavabelia.

³ Jesús jane baja pijajivi penaropobivajēnae, Jesús jumlahitsi pijajivijavabelia mapacueniaje:

—Pētsa itsacuenējava ata pacaponame panijanamutonexa. Pētsa pacaponame naebo, dorō ata, panamarue ata, palata ata. Caejava saya panenaxatatsijava pajumaponare. Pētsa anijacamisabeje pacaponame. ⁴ Itsa papatabiabianame tomarata, caebota pama-jitabiabianame. Pētsa panatixitaponame itsaboyabelia panemajitsinexa. Matapania icatsia itsajavabelia itsa paponaname, bajarapabovecua papitsapaname. ⁵ Patomarata apo pacacopiapitsi tsane pexanialivaisi panetsipaebinexa, nexata pavecuaponaename bajarapatomara. Panevecuaponaevajēnae bajarapatomara, bajarapatomarata panataxuatapērēvarēbianame. Bajarapacuenia itsa panataxuatapērēvarēbianame, yapētaena bajarapatomarapijivi Diosojavabelia penaneconitsicue ne apo papecacopiapitsixae papecanamuxanaevetsinexa panetsipaebilivaisi, jai Jesús pijajivijavabelia.

⁶ Bajaraxuacujinae Jesús pijajivi naropoba jane baja. Najetarubena daxitatomaraxijava. Tsipaebanajetarubena jane baja pexanialivaisi jivi pecapanepelivaisinexatsi pibisiacue ne pexanaeconimivecua. Jamatejemayaexanaponaenua piavitanevi daxitajava.

Pacuenia Juanpijinē jivibautisabinēmi beyaxuabatsi yabara pelivaisi

(Mt 14.1-12; Mr 6.14-29)

⁷ Herodes, Galileanacia pevetsinē, vēnēlivaisitanetsi daxita Jesús pinijicue ne pexanaponaevajava. Nexata Herodes najamatabēcueneepatajērērēcaeya najamatabēxaina Jesús yabara. Tsipaji itsamonae jamatabēcuenenavēxaniabiaya Jesús yabara jumai tsaponae: “Juanpijinē raeta jivibautisabinēmi petēpacujinae icatsia asaē,” jai tsaponae Jesús yabara. Nexata bajarapacuenia itsamonae pejumlahitsaponaejava Herodes pejumetaexae, najamatabēcueneepatajērērēcaeya najamatabēxaina Jesús yabara.

⁸ Itsamonae pijinia jumai tsaponae Jesús yabara:

—Bajayata raeta ponēmi ponapona, profeta Elīspijinēmi, icatsia asaē, jai tsaponae itsamonae.

Itsamonae pijinia jumai tsaponae Jesús yabara:

—Bajayata raeta pamonaemi jinavanapa, profetavimiyajuvēnēnē, icatsia asaē, jai tsaponae itsamonae Jesús yabara.

Bajarapacuenia itsamonae jamatabēcuenenavēxaniabiaya pejumlahitsaponaejava Jesús yabara, Herodes jumetane.

⁹ Nexata Herodes jamatabējumlahitsi:

—Xanē bajayata tajajivi itorobajē Juanpijinē jivibautisabinēmi pebeyaxuabinexa. Nexata baja tajajivi Juanpijinēmi vēsiucutaxuaba. Beyaxuaba baja. ¿De tsaeta nexata ponē pinijicue ne pexanaponaevajava, vēnēlivaisitaeyabiabajē? jamatabējai Herodes Jesús yabara.

Bajaraxuata Herodes bitso jamatabētane Jesús.

Pacuenia Jesús pexaejava rajuta cinco mil ponēbeje yabara pelivaisi

(Mt 14.13-21; Mr 6.30-44; Jn 6.1-14)

¹⁰ Jesús pitorobivi, apōstolevi, jivi pexanialivaisi petsipaebanajetarubenaecujinae, naviabanajetarubena baja Jesúsjavaberena. Nexata bajarapamonae pepatsicujinae Jesúsjavaberena, navajunupaeba Jesúsjavabelia daxita pacuenia exanavanapa. Nexata Jesús barēpona pijajivi pesajinaevajavabelia, Betsaidatomara imoxoyojavabelia. ¹¹ Itsiata baitsi jane jivi ayailbitsaētoxaneto pētanetsi. Nexata bajarapamonae Jesús pecovēvelia pējaitatsi.

Nexata bajarapamonae itsa pata Jesúsjavata, Jesús copiapita xaniavaetsia. Nexata Jesús tsipaeba bajarapamonaejavabelia pacuenia Dioso eveta pijajivi mapanacuataje. Jesús jamatejemayaexananua piavitanevi.

¹² Itsa baja caniviyo tsaponae, Jesús pijajivi doce ponëbeje kujibarenatsi. Jumaitsitsi:

–Itorobaremelia baja jivi peponaenexa imoxoyo penaetomaraxijavabelia, imoxoyo penaebonëjavabelia ata. Bajarabelia bajarapamonae namajitsiana. Pexaejavanua namit-savajëtsiana. Majotaje ajibi pexaejava. Tsipaji itsajivi ata pijabo apo xinae majotaje, jai Jesús pijajivi.

¹³ Nexata Jesús jumaitsi pijajivijavabelia:

–Paxamë parajure pexaejava, jai Jesús.

Nexata Jesús pijajivi jumaitsi:

–Paxainajë saya cinco papanbëbeje, anijanëyobeje dujuainëyobeje yajava. ¿Jitsipame tsaja patacomuacaenexa pexaejava daxita mapamonae penaxaenexaje? jai Jesús pijajivi.

¹⁴ Bajarapajivibitsaëttoxaneto bejamatabëcuene cinco mil ponëbeje. Nexata Jesús jumaitsi pijajivijavabelia:

–Paenaeyaexanare pepobitsaëttonë, bejamatabëcuene cincuenta ponëbeje tsaponae caebitsaëtota, jai Jesús pijajivijavabelia.

¹⁵ Nexata Jesús pijajivi bajarapacuenia exana. Enaeyaexana jane baja daxita jivibit-saëttoxaneto. ¹⁶ Nexata Jesús pita cinco papanbëbeje, anijanëyobeje dujuainëyobeje yajava. Athëbëa benaëcotsia. Jumaitsi Diosojavabelia:

–Pexaniacuene panetoxaname. Panerajutame pataxaejava, jai Jesús.

Bajaraxuacujinae Jesús pan epsaticapona, dujuainëyobeje yajava. Pepsaticaejava pijajivijavabelia rajutapona petsicobetsanaenexa daxitajivi. ¹⁷ Daxita xaniavaetsia naba-ne. Bajaraxuacujinae jivi peyajuvënëcopabejebijavanë, Jesús pijajivi vënëba doce xuabeje bemapirecuenia pexanaejavanë.

Pacuenia Pedro jumaitsi Jesúsjavabelia: “¿Xamë raja Cristomë!” jai yabara pelivaisi (Mt 16.13-19; Mr 8.27-29)

¹⁸ Itsamatacabi Jesús caenë vajëta Diosojavabelia pijajivi pitabëta. Nexata xuacujinae Jesús jumaitsi pijajivijavabelia:

–¿Detsa jivi jumai tsabiabi xanë yabara? ¿De tsaeta xanë ponënë? jai Jesús pijajivijavabelia.

¹⁹ Nexata Jesús pijajivi jumaitsi:

–Itsamonae xamë yabara jumai tsabiabi: “Juanpijinë raeta jivibautisabinëmi icatsia asaë,” jai tsabiabi. Itsamonae pijinia jumai tsabiabi: “Diosojumepaebinëmi raeta. Profeta Elíaspijinë, ponëmi bajayata ponapona, icatsia asaë,” jai tsabiabi. Itsamonae pijinia jumai tsabiabi: “Bajayata raeta Diosojumepaebivimi profetavimiyajuvënënë icatsia asaë,” jai tsabiabi xamë yabara, jai Jesús pijajivi.

²⁰ Nexata icatsia Jesús jumaitsi pijajivijavabelia:

–¿Detsa nexata paxamë pajamatabëitsimë xanë yabara? ¿Detsa xanë ponënë? jai Jesús pijajivijavabelia.

Nexata Pedro jumaitsi Jesúsjavabelia:

–Xamë raja cajena Cristomë, athëbëvetsica Dioso pecaitorobinëtsica jivi necapanapae-nexa. Xamë cajena Dioso pexënatomë, jai Pedro Jesúsjavabelia.

Pacuenia Jesús tajëvelia navajunupaeba pebeyaxuabijavanexatsi yabara pelivaisi (Mt 16.20-28; Mr 8.30-9.1)

²¹ Jesús jumeitaveta pijajivi. Jumaitsi mapacueniaje:

–Pëtsa pajumaitsimë jivijavabelia: “Jesús raja Dioso pexënat,” pajamë pëtsa, jai Jesús.

²² Nexata Jesús pebeyaxuabijavanexatsi, tajëvelia navajunupaeba. Jumaitsi pijajivijavabelia mapacueniaje:

–Xanë, Daxitajivi Pematapijinënë, pinijicuenia bejiobinë tsane. Judíovi pijaancianovi, sacerdotevi penamatacaitorobivina, judíovi pecujarubivina, apo nejumecovënëtsi tsane xanë Cristonëcuenenë. Nexata bitso nebejiobiaexanaena. Bajaraxuacujinae nebeyaxuabi-ana. Itsiata baitsi jane tatëpaecujinae, acueyabi matababita, icatsia asaënë tsane, jai Jesús pijajivijavabelia tajëvelia penavajunupaebijavata pebeyaxuabijavanexatsi.

²³ Bajaraxuacujinae Jesús jumaitsi daxitajivijavabelia:

–Pajivi jitsipa tanepënaponaejava, bajarapajivi copatsi penatojitsipaecuenia pexanaenexa penajamatabëxainabiabijavami. Exanaponaponaetaitorobucuenia. Bajarapajivi caematacabi canacujitsia najamatabëcueneveretsinua, bejiobiaexanaejitsia atatsi, beyaxuabijitsia atatsinua, Dioso pejumelivaisi yabara pijamatabëcuenesaë tsaponaponaenexa. Nexata jane baja xuacujinae nepënaponaena. ²⁴ Pajivi exanaponapona penatojitsipaecuenia, apo xinae tsane matababi apo pevereverecejava. Pajivi xanë

tajamatabēcueneta copata penatojitsipaecuenia pexanaejavami, bajarapajivi xainaena matababi apo peverevereaejava. ²⁵ Pajivi exanaponapona penatojitsipaecuenia, bajarapajivi Diosovecua naxuabiana. Nexata bajarapajivi daxitacueni xainaena mapanacuapijicuenije, itsiata nacuerata. Tspaji pexainaecueni apo capanepae tsanetsi Diosojavabelia. ²⁶ Pajivi tajajivitonē ata, navēnēlvaisicaura tsane jivijavabelia xanē tajajivitonēcueni, tanejumecovēnētsijava ata yabara, nexata juya xanē. Daxitajivi Pematapijinēnē, bajarapajivi tajajivitonē ata, tajajivitonēcueni vēnēlvaisicauranē tsane taxa Diosojavabelia. Bajarapajivi vēnēlvaisicauranē tsane pamatababi icatsia patsianicajē taxa Dioso pijapenivenivenaecotia yajava, tananeconitsiaexanaenexa daxita pijaneconi pexainaevi. Yajavapatsianicajēnua Dioso pijaángelevi. ²⁷ Xaniajanē pacuenia pacatsipaebijitsiatsi. Daxita paxamē patēpaenejevamē, Dioso taxuxuabiana daxita pijajivi pevetsicueni mapanacuataje. Nexata paxamēyajuvēnēvi pepuatae tsane Dioso petaxuxuabijava daxita pijajivi pevetsicueni mapanacuataje, tēpaena, jai Jesús bajarapamonaejavabelia.

Pacuenia Jesús caeepatoyo perabēnivenivenataba yabara pelivaisi
(Mt 17.1-8; Mr 9.2-8)

²⁸ Jesús petēpaejavanexa tajēvelia penayajunupaebicujinae, bejamatabēcueni ocho pamatababihecujinae, Jesús pijajivi, acueyabi ponēbeje, barējunaya petsutojumabetsia. Barējunaya mapanatabēxēyoje: Pedro, Santiago, Juan. Bajarapamatabēxēyo Jesús barējunaya petsutojumabetsia pevājētsinexa Diosojavabelia. ²⁹ Diosojavabelia pevājētsijavata, Jesús itabaranivenivena. Penaxatatsijava ata bitso nivenivenaeya niojai. ³⁰ Bajarajota jemata naitajēta anijanēbeje, ponēmibeje bajayata tēpa. Bajaraponēbeje Jesús barēcuaicuajaiti. Bajaraponēbeje tsaena Moiséspijinēbeje Elíaspijinēbeje. ³¹ Bajaraponēbeje matatoyorotsia nivenivenabeje. Jesús bana nabarēcuaicuajai Jesús petēpaejavanexa yabara. Pacuenia Jesús bejibioaexanaejitsiatsi Jerusalén tomarata, bajarapacueni yabara nabarēcuaicuajai. ³² Pedro bana penajuajinavanapaevi bitso itamajitsipanae ata, itsiata naēcotavanapa. Nexata bajarapamonae tane Jesús matatoyorotsia penivenivenaeva. Tanenua Moisésbeje Elíasbeje pebarēcuaicuajavatsi Jesús. ³³ Itsa baja Moisésbeje Elíasbeje Jesúsvecua ponaejitsiatsibeje, nexata bajarapaepatota Pedro jumai tsaxuabi Jesúsjavabelia:
—¡Patajatuxanenē, pijacuaxae panebarēponame! Pacatoexanaenatsi acueyabi pabobērētobeje. Itsabobērēto xamēnexa tsane. Itsabobērēto Moisésnexa tsane. Itsabobērēto Elíasnexa tsane, jai Pedro.

Pedro xaniavaetsia najamatabēxainaenejeva, bajarapacuenia jumaiti. ³⁴ Pedro abaxē itsa cuacuajai tsanucuae, itarērēbo mataacataxuabatsi daxita bajarapamonae. Jesús pijajivi najunaviaca itsa mataacataxuabatsi itarērēbo. ³⁵ Nexata bajarapaitarērēbojavavetsica Dioso jumaititsica:

—Mara ponē taxēnato, tasivanēje. Bajaraponē panamuxunaevere, jaitsica Dioso itarērēbojavavetsica Jesús pijajivijavabelia.

³⁶ Itsa baja Dioso najumevereta bajarapacuenia pejumaitisjavatsica, Jesús pijajivi tane caenē baja Jesús penucaejava bajarajota. Jesús pijajivi tae ata bajarapacueni, moya saya jinavanapa. Bajarapamonae abaxē apo tsipaebi itsamonaejavabelia, tae ata bajarapacueni.

Pacuenia Jesús jamatejemayaexana pejevaxinē, dovathi peyajavaponaponaenē, yabara pelivaisi

(Mt 17.14-21; Mr 9.14-29)

³⁷ Jesús pebarēcuaicuajaicujinae Moisésbeje Elíasbeje, pijajivi acueyabi ponēbeje yajava, navitsica petsutojumavetsica. Nexata mataenenatsi jivi ayaibitsaētōxaneto. ³⁸ Nexata caenē bajarapajivi bitsaētōxaneto yajuvēnēnē pinijijumeta jumaiti Jesúsjavabelia:

—Jesús, nitaxutotsoniataema. Netotaema taxēnatonēyo. Caenēyo rabaja tspaji xainajē. ³⁹ Dovathi vaetababiabatsi. Nexata jemata aējai tsabiabi. Tēpajoneyaexanabiabatsi. Daxitanē neconecojaia aperabēbaba tsatababiabireca. Nexata bajarajota pecuibothamu tsabiabi. Bitso bejibioaexanabiabatsi. Dovathi abaxē apo jamatabēcopsitsi. ⁴⁰ Picani raja nija-jivijavabelia jumaitinē: “Panetovecuapitsapare dovathi,” janē. Itsiata apo caejēpaetsi tanetovecuapitsapaenexa, jai bajaraponē Jesúsjavabelia.

⁴¹ Nexata Jesús jumaiti daxita pijajivijavabelia:

—¡Paxamē baja rovia apo pajumecovēnētsimē Dioso papecayavenonaejavanexa! Bajaraxuata apo pacajamatabēcuenecaējēpae pejevaxinē panevecuapitsapaenexa dovathi. ¡Panejamatabēcuenetajavi baja rovia! ¿Detsa paepatojebi abaxē paxamējavabelia ajamatabēcuenesaenē tsaponaponae tsane patanejumecovēnētsinexamē? jai Jesús daxita pijajivijavabelia.

Nexata Jesús jumaiti pejevaxinē paxajavabelia:

—Barërenamëre nexënatonëyo, jai Jesús.

⁴² Ajena pejevaxinë imoxoyotabarena Jesúsjavaberena, dovathi icatsia irata xuabatsi pejevaxinë. Daxitanë aperabëbaba tsatabireca. Nexata Jesús itaveta dovathi pejevaxinë pevecuapitsapaenexatsi. Nexata baja Jesús jamatejemayaexana pejevaxinë. Tocanaviata baja pejamatejemanë paxajavabelia. ⁴³ Daxitajivi bitso jamatabëcuenenabenajaca Dioso pesaëta Jesús pevecuapitsapaexae dovathi bajaraponëyo.

Pacuenia icatsia Jesús tajëvelia navajunupaeba pebeyaxuabijavanexatsi yabara pelivaisi (Mt 17.22-23; Mr 9.30-32)

Jivibitsaëtoxaneto Jesús jamatabëcuenëbarëyaya tanetsi daxita Jesús pexanaejava yabara. Nexata Jesús pebeyaxuabijavanexatsi, tajëvelia navajunupaeba pijajivijavabelia. Jesús jumaitsi mapacueniaje:

⁴⁴ —Xaniavaetsia panenamuxunaevere. Pëtsa panacofënëtame. Xanë, Daxitajivi Pematapijinënë, necanjetsiana itsamonaë pecobeyabelia, jai Jesús pijajivijavabelia tajëvelia penavajunupaebijavata pebeyaxuabijavanexatsi.

⁴⁵ Itsiata baitsi jane Jesús pijajivi apo jumeyapëtae xua yabara Jesús jumaitsi. Baitsi bajarapomonaë Dioso apo tocopatsitsi pejumeyapëtaeyaniva xua yabara Jesús jumaitsi. Bajarapomonaë ajumeauro Jesúsjavabelia peyanijobijava xua yabara Jesús jumaitsi.

Pacuenia Jesús pijajivi: “¿Detsa ponë vaxaitsiyajuvënënë nacavecuayajamatabëcuenënë bitso?” najai tsanajetarubenaë namutua yabara pelivaisi (Mt 18.1-5; Mr 9.33-37)

⁴⁶ Jesús pijajivi anaeya namutua najumenotsiaya nalivaisitanajetarubena. Najumaitsi tsanajetarubenaë bajarapomonaë:

—¿Detsa ponë vaxaitsiyajuvënënë nacavecuayajamatabëcuenënë bitso? najai tsanajetarubenaë Jesús pijajivi.

⁴⁷ Nexata Jesús pijajivi jamatabëcueneyapëtane pacuenia najamatabëxaina. Nexata Jesús cobepita pejevaxinëyo. Pemuxuneneta nuteta. ⁴⁸ Jumaitsi pijajivijavabelia:

—Pajivi copiapita tanejumecovënëtsijiviyo, mapitsipejevaxinëyo ataje, xanë taniji tanecopiapitsijava. Pajivi necopiapita, ëxanë apo necopiapitsi. Ponë nitoroba, neyjavacopiapita. Nexata pëtsa bepaayajamatabëcuenëvimë panataneme. Tsipaji ponë paxamëyajuvënënë beveliajamatabëcuenënë natane paxamëvecua, bajaraponë bitso ayajamatabëcuenënë taenatsi Dioso daxita paxamë matatoxenetsia, jai Jesús pijajivijavabelia.

Pacuenia Jesús jumaitsi pijajivijavabelia itsa vënëlivaisitane itsanë dovathi jivivecua pecapitsapaëjava Jesús pevënëta yabara pelivaisi (Mr 9.38-40)

⁴⁹ Jesús pijajivitonë, Juan, jumaitsi Jesúsjavabelia:

—Tajatuxanenë, pataniji itsanë nevënëta dovathi jivivecua pecapitsapaëjava. Itsiata bajaraponë apo paxanëyajuvënënë. Nexata paitavetajë bajaraponë dovathi jivivecua pecapitsapaponaëjava, jai Juan.

⁵⁰ Nexata Jesús jumaitsi Juanjavabelia:

—Pajivi pibisijamatabëcuene apo najamatabëxainae vaxaitsijavaberena, bajarapajivi nacajamatabëcueneyavenona. Bajarapajivi bevaxaitsijamatabëcueneyivi. Bajaraxuata pëtsa baja paitavetame bajaraponë xanë tavënëta jivivecua dovathi itsa capitsapapona, jai Jesús Juanjavabelia.

Pacuenia Jesús jumeitaveta Santiagobeje Juanbeje yabara pelivaisi

⁵¹ Itsa baja imoxoyo pevajënaë pamatacabi Jesús athëbëabetsia Dioso caponaëjitsiatsi, ajamatabëcuenesaë baja peponaenexa Jerusalén tomarabelia. ⁵² Jesús nexata pevajënaeyabelia pijajivitonëbeje natsivajënaëitoroba, Santiagobeje Juanbeje. Bajaraponëbeje ponabeje Samaria nacuata peacaetomarajavabelia petocovaetsinexabeje pabota picani Jesús patsijitsia. ⁵³ Itsiata baitsi jane Samaria nacuapijivi apo jamatabëcueneyapitsiatsi Jesús. Tsipaji baja bajarapomonaë yapëtane Jesús peponaëjavexa Jerusalén tomarabelia. ⁵⁴ Nexata Jesús pijajivitonëbeje itsa yapëtanebeje Samaria nacuapijivi Jesús apo pecopiapitsijavanexatsi, nexata jumatsibeje Jesúsjavabelia:

—Patajatuxanenë, bajayata profeta Elíaspijinë vajëta Diosojavabelia Dioso pitorobinexatsica isotocotia peverebiabinexa piamatabëcuenëbejevi. ¿Baja tsaja pitsicuene jitsipame patavajëtsinexa Diosojavabelia peveripaenexatsi pamonaë apo jitsipae pecacopiapitsijava? jai beje Jesús pijajivitonëbeje.

⁵⁵ Nexata Jesús naëcota pijajivitonëbejejavabelia. Jumeitaveta pijajivitonëbeje. Jesús jumaitsi:

—Paxamēbeje apo pajamatabēcuenepētaemēbeje Espiritu Santo, ponē pacayajavapon-aponabeje. ⁵⁶ Xanē, Daxitajivi Pematapijinēnē, apo patsinētsica taverēbiabinexa jivi. Biji rajane patsicajē tacapanepaenexa jivi pibisiacuene pexanaeneconivecua, jai Jesús pijajivitonēbejejavabelia.

Nexata baja Jesús, pijajivi yajava, pona itsatomarabelia.

Pacuenia picani itsamonae Jesús jamatabēpēnaponatsi yabara pelivaisi
(Mt 8.19-22)

⁵⁷ Jesús pijajivi namutua peyajavanajetaruaejavata, judíovi pecujarubinē jumaitsi Jesúsjavabelia:

—Jesús, itsabelia poname, capēnaponaeatsi cajena, jai judíovi pecujarubinē.

⁵⁸ Nexata Jesús jumaitsi bajaraponējavabelia:

—Itsa nepēnaponaejitsipame, apo napatabiabimē tsipae tajabota nenacueraevetabi-abinexa. Tsipaji tajabo apo xainaenē. Namo pijamēthēanē xaina pepatabiabinexa pema-jitabiabinexana. Baratsui ata pematapenānē xaina. Itsiata baitsi jane xanē, Daxitajivi Pematapijinēnē, itsajavabelia ata apo xainaenē, itsajota nacueraevetabiabijitsianē, jai Jesús.

⁵⁹ Bajaraxuacujinae Jesús jumaitsi icatsia itsanējavabelia:

—Nepēnaponare, jai Jesús.

Nexata bajaraponē jumaitsi:

—Tajatuxanenē, caepatoyo abaxē necopare tamēthētsinexa taxa petēpaenē, jai bajaraponē Jesúsjavabelia.

⁶⁰ Jesús nexata jumaitsi bajaraponējavabelia:

—Copare matacabi apo peveverecaajava apo pexainaevinexa pemēthēcaenexatsi nijamonaemi itsa tēpa. Xamē saicaya nepēnaponare jivi netsipaebinexa pacuenia Dioso evetsijitsia daxita pijajivi mapanacuataje, jai Jesús bajaraponējavabelia.

⁶¹ Bajaraxuacujinae icatsia itsanē jumaitsi Jesúsjavabelia:

—Tajatuxanenē, jitsipajē tacapēnaponaejiva. Itsiata abaxē caepatoyo necopare tanapējiobinexa tajabota pejinavanapaevijavabelia, jai bajaraponē.

⁶² Nexata Jesús jumaitsi bajaraponējavabelia:

—Pajivi Dioso tonacuenēbi ata, itsiata jamatabēnainabiaba pijaperujamatabēcuene, xua exanabiaba, bajarapajivi apo caējēpaetsi xaniavaetsia Dioso petonacuenēbinexa pitorobicueniatsi. Tsipaji najamatabēcueneepatajērērēcaeya nacuenēba, jai Jesús bajaraponējavabelia.

10

Pacuenia Jesús pijajivi itoroba, setenta ponēbeje, Dioso pejumelivaisi jivi petsipaebanaje-tarubenaenexa yabara pelivaisi

¹ Jesús icatsia itsamonae itapeta pijajivinexa, setenta ponēbeje. Bajarapamonae Jesús itoroba anijanēbeje tsaponae Jesús pevājēnaeya Dioso pejumelivaisi jivi petsipaebanaje-tarubenaenexa. Itoroba petsipaebanajetarubenaenexa daxita tomananējava, tsiquiritomaraxijava ata, itsaxuayo Jesús najetaruaejitsia. ² Jesús pijajivi penaropobivajēnae, Jesús jumaitsi pijajivijavabelia mapacueniaje:

—Xaniajanē pacuenia pacatsipaebijitsiatsi. Ayaipabi pexainaenē caecuenia uba ayaijava peubijava. Nexata baja itsa tonaveretatsi peubijava, caejiviyobeje tonotatsi. Nexata notsi ata, abaxē bitso ayaijava tosajinatsi penotsinexa. Bajara pijinia itsi jivi ata Diosojavabelia penajamatabēcueneopabivinexa. Abaxē sajina ayaibitsaētōxaneto. Itsiata baitsi jane paxamē Dioso panetonacuenēbivi pacaevijiyomēbeje saya. Bajaraxuata Diosojavabelia pavajēre icatsia Dioso pijajivi pematatsēnēa itsamonae pitorobinexa papacayavenonaenexa. ³ Paponare baja Dioso pejumelivaisi jivi panetsipaebanajetarubenaenexa. Panayajivitaeyajinavanapaename. Pacaitorobianatsi raja bitso pibisiacuene pexanabiabivijavabelia. Pacuenia ovejaji tsaiayana jai jinavanapa pianaepanaevi nevēthē tuatuaējēata, bajarapaitsimē tsane. ⁴ Pētsa pacaponame itsacuenējava ata, dorota, palata ata, zapato ata. Itsa pabajacobianame itsajivi namutoepatota, pētsa bajayajebi pabarēcuaicaujāmē tsanunubenaenē panenajematsiyaniva. ⁵ Itsa pajonejitsiamē itsamonae pijaboyalia, panejonevajēnaelia copiyaya pajumaitsimē tsane Diosojavabelia: “Dioso, yavenonare mapabopijivije jamatabēcuenexanepanaeya pejinavanapaenexa,” pajamē tsane copiyaya Diosojavabelia. ⁶ Bajarapabo pexainaenē itsa jitsipaena pejamatabēcuene xanepanaeyaexanaenexatsi Dioso, nexata bajaraponē jamatabēcuene xanepanaeyaexanaenatsi Dioso. Itsa apo muxujitsipae tsane bajarapacuenia panejumaitsiyava, nexata

Dioso apo jamatabëcuene xanepanaeayaexanae tsanetsi bajaraponë. ⁷Itsajota papatabiabi-aname, caebota pamajitabiabianame. Pëtsa panatixitaponame itsaboxijavabelia. Aura-jibia paxaeyabiabianamenua xua pacaabata bajarapabota. Pëtsa pauramë panexaejava papecarajutsijava yabara. Tspiji panetsipaëbixae patacaitorobilivaisi, pacarajutsiana panexaejava. Tspiji itsajivi itsa tonacueneba itsanëjavabelia, barajutatsi pexaejava. ⁸Itsa papatabiabiianame tomarata, itsa pabota bajarapatomarapijivi xaniavaetsia pacacopi-apita, nexata panaxaenenua xua pacaabata. ⁹Bajarapatomarata pajamatejemayaexanae-name piavitanevi. Pajumaitsimë tsane bajarapatomarapijivijavabelia: “Dioso daxita pijajivi pevetsimatacabinexa, imoxoyo baja pevajënae pecopiapatsinexa,” pajamë tsane. ¹⁰Itsiata baitsi jane patomarata panepatsicujinae apo pacacopiapitsi tsane, bajarapatomarapijicallejavata panubenaenenua. Pajumaitsimë tsane bajarapatomarapijivijavabelia mapacueniaje: ¹¹“Panijatomarapijitsapërë patataxuta rubena. Nexata panave-taxuvarëbajë. Bajarapacuenia panavetaxuvarëbajë panenayapëtaenexa Diosojavabelia panenaneconitsijava. Pananeconitame Diosojavabelia. Tspiji apo panecopiapitsimë patanenamuxunaevetsinexamë palivaisi picani pacatsipaëbijitsiatsi. Itsiata panenamux-unaevere paneyapëtaenexa mapalivaisije. Dioso daxita pijajivi pevetsimatacabinexa, imoxoyo baja pevajënae pecopiapatsinexa,” pajamë tsane. ¹²Xaniajëne pacuenia pacatsipaëbijitsiatsi. Pamatacabi Dioso naneconitsiaexanaena daxita pijaneconi pexainaevi, bajarapamatacabi bitso ayaicuenia Dioso naneconitsiaexanaena patomarapijivi apo pacacopiapitsi tsane. Paneconivajëtota bajayata Dioso naneconitsiaexana Sodoma tomarapijivimi, bajarapaneconivajëto matatoxenetsia Dioso naneconitsiaexanaena patomarapijivi apo pacacopiapitsi tsane, jai Jesús pijajivijavabelia, setenta ponëbejevavabelia.

Pacuenia Jesús jumaitsi patomarabejepijivi Dioso xuabijitsia infernojavabelia apo pe-jumecovënëtsixaetsi yabara pelivaisi
(Mt 11.20-24)

¹³Icatsia Jesús jumaitsi pijajivijavabelia, setenta ponëbejevavabelia:
—jBitso bejiobi tsane Corazín tomarapijivi! jBitso bejiobi tsane Betsaida tomarapijivi ata! Piniacuenie Dioso pesaëta taexanaejavanë, xua itsajivi ata apo caëjëpaetsi pex-anaenexa, bajarapatomarabejepijivi tae ata, itsiata apo nejumecovënëtsi. Apo copabi pibisiacuene pexanabiabijava. Apo najamatabëcuenepeñëyorotsi Diosojavabelia. Bajayata Tiro tomarapijivimi, Sidón tomarapijivimi ata, petuatuajëta bajarapitsipiniacuenie itsa tsi-taexanaejitsipajë, nexata bajarapamonaemi copabijitsipa pibisiacuene pexanaejava. Najamatabëcuenepeñëyorotsipa Diosojavabelia. Bajarapamonaemi nexata pibisiacuene pex-anaebiabineconi bitso yajamatabëcuenebëjajai tspiae. Nexata Diosojavabelia petsitanajamatabëcueneitajëtsinexa peyajamatabëcuenebëjajava pibisiacuene pexanabiabineconi, nax-atabijitsipa piayopapaëbërëjavane. Enaejitsipa irata. Ipumana ata natsumataothocaejit-sipa bitso peyajamatabëcuenebëjajaxae pibisiacuene pexanabiabineconi. ¹⁴Itsiata baitsi jane Corazín tomarapijivi, Betsaida tomarapijivi ata, tae ata piniacuenie Dioso pesaëta taexanaejavanë, apo nejumecovënëtsi. Nexata pamatacabi Dioso naneconitsiaexanaena daxita pijaneconi pexainaevi, bajarapamatacabi bitso ayaicuenia Dioso naneconitsi-aexanaenatsi. Paneconivajëtota bajayata Dioso naneconitsiaexana Tiro tomarapijivimi, Sidón tomarapijivimi ata, bajarapaneconivajëto matatoxenetsia Dioso bitso ayaicuenia naneconitsiaexanaena Corazín tomarapijivi, Betsaida tomarapijivi ata. ¹⁵Capernaum tomarapijivi picani najamatabëxaina Dioso pecaponaejavatsi athëbëabetsia. Itsiata baitsi jane bajarapamonae apo tanejumecovënëtsixae, Dioso xuabianatsi infernojavabelia, jai Jesús Corazín tomarabeje Betsaida tomarabejepijivi yabara.

¹⁶Icatsia Jesús jumaitsi pijajivijavabelia, setenta ponëbejevavabelia:
—Pajivi pacanamuxunaevetsiana, bajarapajivi taenajë xanë tanenamuxunaevetsijava. Pajivi pacanayajiviitavetsiana, bajarapajivi taenajë xanë tanenayajiviitavetsijava. Bajarapajivi Dioso ata taenatsi Dioso penayajiviitavetsijava. Bajarapacuenia Dioso ata taenatsi penayajiviitavetsijava tspiji xanë Dioso nitoroba, jai Jesús pijajivijavabelia Jesús pijajivi setenta ponëbeje pitorobivajënaeja.

Nexata jane baja Jesús pijajivi naropoba. Dioso pejumelivaisi jivi tsipaebanajetarubena daxita tomanëjéva. Saicaya navecuanajetarubena anijanëbeje tsaponae.

Pacuenia Jesús pijajivi, setenta ponëbeje, naviabanajetarubena, Dioso pejumelivaisi jivi daxitanacuanëjéva patsipaebanajetarubenaecujinae, yabara pelivaisi

¹⁷Jesús pijajivi, setenta ponëbeje, Dioso pejumelivaisi jivi daxitanacuanëjéva petsipae-banajetarubenaecujinae, barëyaya naviabanajetarubena Jesúsjavaberena. Nexata pepat-sicujinae bajarapamonae jumaitsi Jesúsjavabelia:

—Tajatuxanenë, dovathivi baja cajena itsa paitavetaponajë nevënëta, panejume-covënëtabiaba, jai bajarapamonae Jesúsjavabelia.

¹⁸ Jesús nexata jumaitsi pijajivijavabelia:

—Xanë baja cajena taniji dovathi athëbëvetsica pejpoejavatsica pacuenia yamaxë bajopaica. ¹⁹ Xanë baja cajena pacajamatabëcuene caëjëpaeyaexanatsi papeca-caëjëpaejamatabëcuene panejamatabëcuene matatoxenetsinexa vajavajabitsaenë dovathi. Nexata jomo pacuetsacuetsanae atamë tsane, aqueto ata pacuetsacuetsanae atamë tsane, apo pacaitsacueniabi tsane. ²⁰ Itsiata pëtsa bitso pasivajamatabëcuenebarëyamë dovathi itsa paitavetame papecajumecovënëtsijava. Bitso jane pasivajamatabëcuenebarëyamë tsavanapae Dioso papijajivixamë Dioso papecavënëyaquinarubijava athëbëtatsia, jai Jesús pijajivijavabelia, setenta ponëbejejavabelia.

Pacuenia Jesús jamatabëcuenebarëya yabara pelivaisi

(Mt 11.25-27; 13.16-17)

²¹ Jesús bitso jamatabëcuenebarëyayaexanatsi Espíritu Santo. Nexata Jesús jumaitsi paxa Diosojavabelia:

—Axa, nevetsinë athëbëtatsia. Nevetsinë mapanacuajava ataje. “Ayaijamatabëcuenenëmë bitso,” cajaitsi. Tspaji pamonae bitso apo penacujarubivi ata, yapëtaeyaexaname pacuenia itsamatacabi daxita nijajivi evetsijitsiamë mapanacuataje. Bajarapamonae yapëtaeyaexaname pexanialivaisi, xanë talivaisi, palivaisi vecumatayatame bitso peyapëtaevi mapanacuapijilivaisije. Bajarapalivaisi vecumatayatame bitso penacujarubivi ata mapanacuapijicuene yabaraje. Bajarapacuenia exaname tspaji baja exaname nejitsipacuenia, jai Jesús paxa Diosojavabelia pevajëtsijavata.

²² Icatsia Jesús jumaitsi pijajivijavabelia, jivijavabelia ata:

—Taxa Dioso baja cajena netocopata tayapëtaenexa daxitacuene. Itsajivi ata apo nejamatabëcuenyapëtae pacuenia xanë jamatabëcueneitsinë, Dioso pexënatonë. Caenë, taxa Dioso, nejamatabëcuenyapëtae. Itsajivi ata apo jamatabëcuenyapëtae pacuenia taxa Dioso jamatabëcueneitsi. Caenë, xanë pexënatonë, jamatabëcuenyapëtaniji pacuenia taxa Dioso jamatabëcueneitsi. Pamonae tojitsipajë tayapëtaeyaexanaenexa pacuenia taxa Dioso jamatabëcueneitsi, bajarapamonae ata yapëtaeyaexanaenajë, jai Jesús pijajivijavabelia, jivijavabelia ata.

²³ Nexata Jesús napënëyorota. Ëpijajivijavabelia jumaitsi:

—Paxamë baja pajamatabëcuenebarëyamë panetaexae pacuene baja pataepo name. ²⁴ Xaniajanë pacuenia pacatsipaebijitsiatsi. Bajayata ayaibitsaëto profetavimi necopiaeve-tavanapa picani tanetaenexa tapatsijavatsica. Nacuaevetsivimi ata necopiaevetavanapa picani tanetaenexa tapatsijavatsica. Itsiata netaenejeva tapatsijavatsica, bajarapamonae aemi tēpa baja. Jamatabëjumetaeyabiabanua picani palivaisianë baja aeconoxae paxamë pacatsipaebaponatsi. Itsiata apo jumetaenejeva bajarapalivaisinë, bajarapamonae aemi tēpa baja, jai Jesús pijajivijavabelia.

Pacuenia pexaniajamatabëcuenenë, Samaria nacuapijinë, yavenona itsanë yabara pelivaisi

²⁵ Itsamatacabi Jesús livaisi tsipaebanuca pijajivijavabelia. Nexata bajarajota judíovi pecujarubinë notopuna. Bajaraponë Jesúsjavabelia jamatabëcuenejëbiaya jumaitsi:

—Jesús, ¿detsa xua exanaenajë Dioso tanerajutsinexa matacabi apo peverevere caejava? jai judíovi pecujarubinë.

²⁶ Nexata Jesús jumaitsi judíovi pecujarubinëjavabelia:

—¿Detsa jane jumaitsi bajarapacuenie yabara bajayata Dioso Moiséspijinëta penajumecopatsilivaisi jivi pejumecovënëtsinexa? jai Jesús.

²⁷ Nexata judíovi pecujarubinë jumaitsi Jesúsjavabelia:

—Bajayata Dioso Moiséspijinëta penajumecopatsilivaisi jumaitsi mapacueniaje: “Daxita panejamatabëthëtojavavetsina, daxita panejamatabëcueneta ata, daxita pansaëta ata, daxita panenajamatabëxainaesaëta ata, pasivamëre panijatuxanenë panijaDioso. Pasivamëre itsajivi ata pacuenia paxamë panijacuata panasivamë,” jai bajayata Dioso Moiséspijinëta penajumecopatsilivaisi, jai judíovi pecujarubinë Jesúsjavabelia.

²⁸ Nexata icatsia Jesús jumaitsi judíovi pecujarubinëjavabelia:

—Xaniavaetsia nejumecanaviatame. Bajarapacuenia exanapononare. Nexata pepacuene xainaename matacabi apo peverevere caejava, jai Jesús.

²⁹ Itsiata baitsi jane judíovi pecujarubinë bijiaya jumecovënëta bajarapalivaisi. Asivaya apo tae itsamonae ata. Bajaraxuata judíovi pecujarubinë matavëjëa jumaitsi Jesúsjavabelia:

—¿Detsa nexata pitsijivi asivanë tsane? jai judíovi pecujarubinë.

³⁰ Nexata icatsia Jesús jumaitsi judíovi pecujarubinëjavabelia mapacueniaje:

—Pebi namutua najetaruca Jerusalén tomaraverena. Naropota pepatsinexa Jericó tomaraberena. Nexata jivi pecaponaejava peyacajërbabiabivi, bajaraponë epatua vaetabatsi. Daxita pecobcovë yacajërëtsi. Penaxatabijavanëmi ata yacajërëtsi.

Nexata pinijicuenia conibabiatsi. Puenetabuatatsi picani petēpanucaenexa bajarajota.
³¹ Nexata bajarapanamutua sacerdotenē najetaruca, templobota penacuenebabiabinē.
 Nexata sacerdotenē bajaraponē ita taeyabuata, matavaquetanucapona. Pona baja rovia.
³² Bajaraxuacujinae icatsia bajarapanamutua itsanē, templobota penacuenebabiabinē,
 najetaruca. Bajaraponē taenucajopa. Bajaraxuacujinae matavaquetanucapona. Pona
 baja icatsia rovia bajaraponē ata. ³³ Bajaraxuacujinae icatsia bajarapanamutua Samaria
 nacuapijinē najetaruca. Nexata bajaraponē ita taeyabuata, tsitabejiobitsi bitso. ³⁴ Nexata
 bajaraponē cujilia. Vajēnēvaēba aceiterata, vinorata yajava. Vajēnēcēba papaēbērēpanaxita.
 Bajaraxuacujinae Samaria nacuapijinē pijaburrojumata buatsia. Nexata bajaraponē
 capona jivi pepatabiabiobiyabelia. Bajarajota Samaria nacuapijinē eveta xaniavaetsia.
³⁵ Meravia pitsijavata Samaria nacuapijinē ita baja ponaejitsia itsabelia najetaruca,
 juta anijapalatanēbeje, bitso penamatamotsinēbeje. Matamota bajarapabo pexainaenē.
 Jumaitsi bajaraponējavabelia: “Netoevetsianame maponēje. Itsa matamovereverecaena,
 pematatsēna nevetsimatamo, bajarapapalata icatsia caevēarena camatamotsianatsi.” jai
 Samaria nacuapijinē bo pexainaenējavabelia, jai Jesús mapacueniaje judíovi pecujaru-
 binējavabelia.

³⁶ Bajaraxuacujinae judíovi pecujarubinējavabelia Jesús yanijoba bajarapalivaisi yabara.
 Jumaitsi mapacueniaje:

–Pamonaē, acueyabi ponēmaxēto, taeyabuata pecobecovē peyacajērētsinētsi. ¿Detsa
 ponē bajarapamonaeyajuvēnēnē asivaya tane bajaraponē? jai Jesús.

³⁷ Nexata judíovi pecujarubinē jumaitsi Jesúsjavabelia:

–Ponē pitaxutotsoniataexae yavenona, bajaraponē asivaya tane, jai judíovi pecujaru-
 binē Jesúsjavabelia.

Nexata Jesús jumaitsi judíovi pecujarubinējavabelia:

–Ponare baja. Xamē ata bajarapacuenia asivaya itaxutotsoniataeyabiabianame itsa-
 monae ata, jai Jesús judíovi pecujarubinējavabelia.

Pacuenia Jesús jumaitsi Martabeje Mariabeje pijabota yabara pelivaisi

³⁸ Jesús, pijajivi yajava, najetaruca pevajēnaeyabelia. Nexata tomarayota pata. Ba-
 jarapatomarayota Jesús xaniavaetsia copiapitatsi petiriva, Martavēnēva. Nexata Marta
 pijabota Jesús napata. ³⁹ Marta pejuyapijiva xaina, Mariavēnēva. Nexata María eca
 Jesús pitabarata penamuxunaevetecaenexa Jesús petsipaebilivaisi. ⁴⁰ Nexata Marta bitso
 jamatabēcueneenatsi penacuenabijava, Jesús pexaejavanexa ata pemitseaenexa. Nex-
 ata Marta cujilia Jesús. Jumaitsi:

–Tajatuxanenē, tajuyapijiva netocopata caevanē taexanaenexa daxita xua exanaejit-
 sianē. Itorobare taneyavenonaenexa, jai Marta Jesúsjavabelia.

⁴¹ Nexata Jesús jumaitsi Martajavabelia:

–Marta, xamē bitso cajamatabēcueneena nexanaenexa daxita xuanē jamatabēexaname.

⁴² Caejava bitso xanepana nexanaenexa, tanenamuxunaevetsinexamē. María baja ca-
 jena tanenamuxunaevetecaexae tatsipaebilivaisi, catsuitapeta pexaniacuene daxitacuene
 matatoxensia. Nexata acuenebi itsajivi ata peyacajērētsijavatsi tatsipaebilivaisi pe-
 jumetaejava, jai Jesús Martajavabelia.

11

Pacuenia Jesús pijajivi tsipaeba pacuenia Diosojavabelia vajēcaejitsia yabara pelivaisi
 (Mt 6.9-15; 7.7-11)

¹ Jesús vajētabiaba Diosojavabelia. Nexata itsamatacabi, ita baja Jesús najumevereta
 pevajētsijava Diosojavabelia, Jesús pijajiviyajuvēnēnē jumaitsi Jesúsjavabelia:

–Patajatuxanenē, panejumecjarubare pacuenia pavajētabiabijsianē Diosojavabelia.
 Pacuenia Juanpijinē jivibautisabinēmi jumecjarubabiaba pijajivi pacuenia
 vajētabiabijsia Diosojavabelia, bajara pijinia pacuenia xamē ata panejumecjarubare
 pavajētabiabijsianē Diosojavabelia, jai Jesús pijajiviyajuvēnēnē.

² Jesús nexata jumaitsi pijajivijavabelia mapacueniaje:

–Itsa pavajētabiabianame Diosojavabelia, pajumaitsimē tsabiabi tsane:

Taxamē, athēbētatsia neecaenē, jitsipajē pecayaiyataejava daxitajivi. Jitsipajē
 naxanitsiayo pecopiapatsijava daxita nijajivi nevetsijava mapanacuataje.
 Jitsipajē daxitajivi mapanacuata nejitsipaecuenia pecatoexanabiabijava,
 pacuenia baja athēbētatsia nijajivi nejitsipaecuenia catoexanabiaba,
 bajarapacuenia pecatoexanavanapaenexa mapanacuapijivi ataje. ³ Caematacabi
 canacujitsia panerajure pataxaejavanexa pacuenia panamatavenonajē.
⁴ Panebarajamatabēcuene xanepanarena nitabarata pibisiacuene pataexanaejava.
 Nexata panevecuaajibiaexanare pibisiacuene pataexanaeconi. Tsipaji

paxanē ata itsamonae paxanējavaberena pibisiacuene patanexanaejava pajamatabēcuenecaevajē. Nexata pabarajamatabēcuenexanepanajē. Panevecuatsare dovathi patanejamatabēcuenējēbīyaniva. Panecapanepare jane pibisiacuenevecua, pajamē tsane mapacueniaje itsa pavajētābiabianame Diosojavabelia, jai Jesús pijajivijavabelia.

⁵ Icatsia Jesús pijajivijavabelia jumaitsi comparacióncuenia Jesús pijajivi peyapētaenexa pacuenia vajēcabiabijitsi Diosojavabelia:

—Paxamējajuvēnēnē meravi tuatujēta ponaejitsipa bitso peyapētaenētsi pijaboyabelia. Nexata jumai tsipae: “Cacovaetatsi acueyabi papanbēyobeje. ⁶ Itsanē raja, taneyapētaenē, tajēverena peponaenē, aeconoxae tajabota netopata. Nexata bitso piyani. Itsiata xanē apo xainaenē itsacuenejavayo ata pexaejava tarajutsinexa,” jai tsipae paxamējajuvēnēnē meravi tuatujēta peyapētaenētsijavabelia. ⁷ Nexata bo ēnēverena bajaraponē jumepitsipatsi. Jumaitsi tsipae: “Nejamatabēitonotsipame. Baupa rabaja xaniavaetsia xatatanutajē. Taxi raja barēmajitanucajē caecamata. Nexata acuenebi tanonotapunaevana tacarajutsinexa xua nevajēame. Itsa nonotapunaejitsipajē, yaitavabijitsipajē taxi,” jai tsipae peyapētaenētsi. Itsiata baitsi jane bajaraponē perajutsinexatsi ajumesaēya vajēcaponaejitsipa. ⁸ Xaniajanē pacuenia pacatsipaebijitsiatsi. Bajaraponē apo jamatabēnonotapunaevana ata, itsiata nonotapunaejitsipa perajutsinexa pecovaebijavatsi. Itsiata peyapētaenētsiatsi, bajarapacuenia apo rajutsi tsipae. Biji rajane rajutsipa daxita pacuenia namatavenona ajumesaēya pevajēcaponaejitsipa. ⁹ Xaniajanē pacuenia pacatsipaebijitsiatsi. Itsacuenejavayo itsa pacatonaxuabijitsipa, nexata bajayajebi ata pajaitsipame matapania panecaxitajarabijavabelianexa. Bajara pijinia pacuenia bajayajebi ata pavajētābiabianame Diosojavabelia papecajumecovēnētsinexa. Bo ata itsa baupa xatatanuta, nexata asaēyata pabaupadocodocot-sipame matapania papecatobaupatsijavabelianexa. Bajara pijinia pacuenia asaēyata pavajētābiabianame Diosojavabelia papecajumecovēnētsinexa. ¹⁰ Bajarapacuenia asaēyata pavajētābiabianame Diosojavabelia. Tsipaji pajivi vajētābiaba, rajutabiabatsi. Pajivi ata jaitabiaba, caxitajarababiaba. Pajivi ata baupa docodocotabiaba, tobaupatabiabatsti, jai Jesús pijajivijavabelia comparacióncuenia.

¹¹⁻¹² Icatsia Jesús jumaitsi pijajivijavabelia:

—Paxamē papebijivimē, panexi panexinaevi. Panexēnatonēyo itsa pacavajēta panbē, apo panacoxirajutsimē tsipae iboto. Itsa pacavajēta dujuainēyo, apo panacoxirajutsimē tsipae jomo. Itsa pacavajēta vacaratobēto, apo panacoxirajutsimē tsipae aqueto. ¹³ Paxamē paneajamatabēcuenēbejevi ata, payapētaneme panenacoxirajutsinexa pexaniajava. Paneaxa, athēbētatsia peecaenē, bitso biji cajena pexaniajamatabēcuenēnē paxamē matatoxenetsia. Bajaraponē pacarajutsiana pexaniacuene itsa pavajēame. Bajaraponē rajutsiana Espiritu Santo daxita pamonaevajētatsi, jai Jesús pijajivijavabelia.

Pacuenia itsamonae Jesús yabara jamatabēcuenenavēxaniabiaya jumaitsi: “Beelzebú raja pesaēta Jesús dovathi jivivecua capitsapapona,” jai yabara pelivaisi (Mt 12.22-30; Mr 3.20-27)

¹⁴ Pebi ponapona, dovathi pejamatabēcueneta apo penatsipaebinē. Nexata bajaraponē Jesús dovathi vecuacapsipa. Pebi baja dovathi Jesús itsa vecuacapsipa, natsipaeba baja. Jivibitsaētoxaneto petaevi bajarapacuenē, bitso jamatabēcuenenabenajaca. ¹⁵ Itsiata baitsi jane itsamonae fariseovi Jesús baracuaicuajiaitsi pibisiacuena.

—Maponē Jesúsje, dovathi jivivecua capitsapabiaba Beelzebú pesaēta. Beelzebú raja daxita dovathivi pepo penamatacaitorobinē, jai fariseovi jamatabēcuenenavēxaniabiaya Jesús yabara.

¹⁶ Itsamonae icatsia fariseovi Jesús picani jamatabēcuenējēbiaya itorobatsi pinijicuene Dioso pesaēta pexanaejava Jesús petsitaexanaenexa. Bajarapacuenia picani itorobatsi fariseovi peyapētaenexa pepacuene Jesús Dioso pitorobinēcuenetsitsica. ¹⁷ Itsiata Jesús jamatabēcueneyapētane pacuenia fariseovi sivanajamatabēxainatsi. Nexata fariseovijavabelia Jesús jumaitsi mapacueniaje:

—Nacaenacuapijivi ata itsa navecuanatsanaejitsipa penasivanavajabitsaētsinexa, nexata namataenetsia naverebiabijitsipa daxita bajarapamonae. Bajara pijinia pacuenia nacaemonae ata itsipae. Itsa navecuanatsanaejitsipa penasivanavajabitsaētsinexa, nexata namataenetsia naverebiabijitsipa nacaemonae ata. ¹⁸ Bajara pijinia itsipae dovathi ata. Dovathi jivivecua itsa capitsaponaejitsipa pijajivi, dovathivi, nexata bepjavajabitsaē taejitsipa pijajivi. Itsajamatabēcuenē vecuaxinaejitsipa pijajivi. Pesaē ata apo xainaponae tsipae. Mapacuenia pacatsipaebatsije tsipaji paxamē xanē yabara apo pacanaējētsinejevamē jamatabēcuenenavēxaniabiaya pajumaitsimē: “Jesús raja dovathi jivivecua capitsapabiaba Beelzebú pesaēta,” pajamē xanē yabara. ¹⁹ Paxamē ata panijajivi dovathi jivivecua capitsapabiaba. Nexata xanē Beelzebú pesaēta dovathi jivivecua itsa

capitsapabiabajë, ¿detsa nexata ponë pesaëta panijajivi ata dovathi jivivecua capitsapabi-aba? Caenë rabaja Dioso pesaëta. Nexata panijajivi ata pacayapëtane bajarapacuenia jamatabëcuenenavëxaniabiaya panejumaitisijava xanë yabara. ²⁰ Espiritu Santo pesaëta xanë dovathi jivivecua capitsapabiabajë. Nexata baja picani jivi beyapëtane Dioso baja petaxuxuabijava pijajivi pevetsijava paxamë tuatujëta, jai Jesús fariseovijavabelia.

²¹ Fariseovi pecanaëjëtsinexa Jesús bitso piasaënëcuene dovathi matatoxenetsia, Jesús icatsia comparacióncuenea jumaitsi fariseovijavabelia mapacueniaje:

–Ponë bitso piasaënë, aitatsacaya pijanae cobenaevetabiabijitsipa pijabo, itsamonae peyacarëjëtsiyainivatsi pecobecovë. Nexata daxita pecobecovë xaniavaetsia tobobenaejitsipatsi, jai Jesús dovathi pijajivi pevetsijava yabara.

²² Icatsia Jesús pijacuata nayabarajumaitsi mapacueniaje:

–Itsiata baitsi jane itsa najetarucæjitsipa itsanë bitso piasaënë boxainenë matatoxenetsia, nexata cueneamoneyabijitsipatsi. Aitatsacaya pijanae cobenaevetabiabi ata tsipae, itsiata vecuapitsipatsi pijanae, daxita pecobecovëjavaxi yajava, nayabarajai Jesús pijacuata comparacióncuenea dovathi pejamatabëcueneamoneyabijava yabara.

²³ Icatsia Jesús jumaitsi fariseovijavabelia:

–Pajivi apo neyavenonae yacaetuatsi jivi Dioso pijajivinexa, bajarapajivi betajavajabitsaëjivi. Tsiapaji apo taneyavenonae yacaetuatsixae, jivi nevecunacayajata Dioso picani pejumecovënëtsiviminexa, jai Jesús fariseovijavabelia.

Pacuenia dovathi jivitonë pevejamatabëpitsapæcujinaetsi, icatsia naviarena pecovëyaberena petsijamatabëcaenexatsi icatsia yabara pelivaisi
(Mt 12.43-45)

²⁴ Icatsia Jesús jumaitsi fariseovijavabelia:

–Dovathi itsa vejamatabëpitsapa jivitonë, nexata dovathi jinaruta petseviiranëjava. Jaitapona itsanëjavabelia petsijamatabëjonenexa dovathi penacueraevetsinexa bajaraponëjavata. Itsa apo caxitajarabi, ponëjavabelia tsijamatabëjonejitsia, nexata dovathi jamatabëjumaitsi: “Naviatsianajë meta icatsia tajabomijavabelia, paboverena pitsapajë,” jamatabëjai dovathi, ponëjavaverena pitsapa icatsia petsijamatabëjonenexatsi. ²⁵ Dovathi baja caevëa itsa naviarena, caxitajaraba peyajavaponaponenëmitsi. Nexata peyajavaponaponenëmitsi pejamatabëëthëto, dovathi tane bepënëšajinecaebo, bepënëxaniavaetetsibo, bepircacajuetetsibo. ²⁶ Nexata dovathi icatsia sivapona peyajavapatsinexarena it-sadovathivi, siete ponëbeje. Bajarapadovathivi bitso piacujirubejevi copiaya padovathi matatoxenetsia. Daxita bajarapadovathivi pebi tsijamatabëjunuatsi peyajavaponaponenexa. Belia jane baja pebi dovathivi bitso bejiobiaexanatsi. Copiaya abaxë caenë itsa tsijamatabëccatsi pacuenia bejiobiaexanabiabatsi, matatoxenetsia bejiobiaexanatsi, jai Jesús fariseovijavabelia.

Pacuenia Jesús tsipaeba xua yabara jivi jamatabëcuenebarëya yabara pelivaisi

²⁷ Itsa abaxë Jesús livaisi tsipaeba fariseovijavabelia, petiriva bajarapajivi bitsaëttoxanetoyajuvënëva pinijijumeta vavajai tsaxuabi. Jumaitsi Jesúsjavabelia:

–Jamatabëcuenebarëya baja cajena ena, pecanavitaniabiva, pecavitsatsiva! jai petiriva Jesúsjavabelia.

²⁸ Nexata Jesús jumaitsi bajarapovajavabelia:

–Xaniajamë rabaja. Itsiata baitsi jane pamonaë jumetane Dioso pejumelivaisi, nexata itsa jumecovënëta bajarapalivaisi, bajarapamonae jane bitso jamatabëcuenebarëya tsavanapae taena matatoxenetsia, jai Jesús petirivajavabelia.

Pacuenia pibisijamatabëcuenevi Jesús picani itorobatsi Dioso pesaëta pinijicue ne pexanaejava petsitaexanaexa yabara pelivaisi
(Mt 12.38-42; Mr 8.12)

²⁹ Jivi ayai bitsaëttoxaneto Jesús itsa matatoyorotsia nacaetuatsi, nexata Jesús jumaitsi:

–Pamonae aeconoxae jinavanapa, bitso pibisijamatabëcuenevi. Bajarapamonae picani nitoroba Dioso pesaëta pinijicue ne taexanaejava tatsitaexanaenexa, taneyapëtaenexa Dioso pepacue ne athëbëvetsica taneitorobinëcueneetsica. Itsiata baitsi jane Dioso pesaëta pinijicue ne taexanaejava, apo tsitaexanaenë tsane. Bajayata pacuenia Diosojumepaebinëmi profeta Jonáspijinë exanatsi, bajara èpitsicue ne taneexanaejava, tsitajëtsianajë. ³⁰ Bajayata daxita Nínive tomarapijivi yapëtane profeta Jonáspijinë Dioso pitorobinëcueneetsi. Tsiapaji ayaicue ne exanatsi Dioso. Bajara pijinia pacuenia xanë ata, Daxitajivi Pematapijinëne, pinijicue ne Dioso nexanaena. Nexata daxita pamonaë aeconoxae jinavanapa, neyapëtaena pepacue ne Dioso athëbëvetsica taneitorobinëcueneetsica. ³¹ Itsamatacabi copi-apatsiana Dioso penaneconitsiaexanaematacabinexa daxita pijaneconi pexainaevi. Bajarapamonae nubianatsi Dioso pitabarata. Nexata bajarapamatacabi bajayata povami

ponapona, Saba nacuapijivimi pevetsivami, nonotapunaena. Nexata bajarapova Diosojavabelia neconitsiana pamonaeeconoxae jinavanapa, Dioso apo pejumecovënëtsivi. Bajarapova neconitsiana tsipaji bajarayata bajarapovami tajë nacuatabuverena ata muxunanajetaruca pejumetaenexa Salomónpijinë, bitso daxitalivaisi peyapëtaenëmi, petsipae-bilivaisi. Xanë raja majotaje ponaponajë, bitso ayaijamatabëcuenenë Salómónpijinëmi matatoxenetsia. Itsiata baitsi jane pamonaeeconoxae jinavanapa mapanacuataje, apo nenamuxunaevetsi. Bajaraxuata ayaineconi xaina Diosojavabelia, jai Jesús.

³² Icatsia Jesús jumaitsi jivi ayaibitsaëtoxanetojavabelia:

—Bajayata Nínive tomarapijivi ita jumetane Dioso pitorobilivaisi, Jonáspjiinë petsipae-bilivaisi, copaba pibisiacuene pexanaejava. Najamatabëcuenepeñëyorota Diosojavabelia. Pamatacabi copiapatsiana Dioso penaneconitsiaexanaematacabinexa daxita pijaneconi pexainaevi, bajarapamatacabi Nínive tomarapijivimi ata nonobapunaena Diosojavabelia peneconitsinexa pamonaeeconoxae jinavanapa, Dioso apo pejumecovënëtsivi. Tsipaji xanë majota ponaponajë bitso ayaijamatabëcuenenë Jonáspjiinëmi matatoxenetsia. Itsi-ata baitsi jane pamonaeeconoxae jinavanapa mapanacuataje, tsipaebi atanë Dioso pejumelivaisi, apo najamatabëcuenepeñëyorotsi pibisiacuene pexanaejavavecuca. Bajaraxu-ata Dioso naneconitsiaexanaenatsi bajarapamonaee, jai Jesús jivi ayaibitsaëtoxanetojavabelia tajëvelia pevajunupaebijavata itsamatacabi Dioso jivi penaneconitsiaexanaejavanexa.

Pacuenia vajaitaxuto belámparabë yabara pelivaisi
(Mt 5.15; 6.22-23)

³³ Icatsia Jesús jumaitsi jivibitsaëtoxanetojavabelia:

—Itsjivi ata lámparabë pitanojotsicujinae, apo mataacettsi itsacuenejavata. Canjoniënëalia ata apo etsi lámparabë. Biji rajane athëbëyo etsia. Jivi boyaberena pejonevi tsivajënaeitayotecaiejtsia. ³⁴ Lámparabë boënëta itayoteca xaniavaetsia vajataenexa. Bajara pijinia itsi paneitaxuto ata. Paneitaxutoxanepanaexae, xaniavaetsia panatsivajënaetaneme. Itsa paitaxutobejemë tsipae, nexata xaniavaetsia apo panatsivajënaetaemë tsipae. Pacatsitaaitaquiri saya tsipae. Bajara pijinia itsi panejamatabëcuene ata. Dioso itsa pacajamatabëcueneitayota, pajitsipaname paneexanabiabinexa pacuenia Dioso pacaitoroba. Nexata xaniavaetsia pajinavanapaename. Itsa panajamatabëxainaejitsipame bitso panexainaejava ëpaxamënexa, nexata bitso pajamatabëcueneitaquirimë tsipae. ³⁵ Panayajivitaema xua panajamatabëxainabiabame, papecajamatabëcuene aitaquiriyaexanaeyaniva. ³⁶ Itsa paexanavanapaename pacuenia Dioso pacaitoroba, nexata pacajamatabëcueneitayotsiana Dioso. Tsiquirijavayo ata apo aitaquiri tsane panejamatabëcuene. Nexata pacuenia lámparabë daxita boënë xaniavaetsia itayoteca pecotiata, bajara pijinia pacuenia paxamë ata pacajamatabëcueneitayotsiana Dioso, jai Jesús jivi ayaibitsaëtoxanetojavabelia.

Pacuenia Jesús tsipaeba fariseovijavabelia, judiovi pecujarubivijavabelia ata, pacuenia bajarapamonaee naneconita Diosojavabelia yabara pelivaisi
(Mt 23.1-36; Mr 12.38-40; Lc 20.45-47)

³⁷ Itsa baja Jesús najumevereta livaisi petsipaebijava, nexata fariseonë junatatsi Jesús penanabaninexa fariseonë pijabota. Jesús nexata najoneya fariseonë pijaboyalía. Naeca mesa muxuneneta penanabaninexa. ³⁸ Fariseonë itsa tane Jesús penabaninjava anijatonë nacobequiatsinejeva, fariseonë jamatabëcuenenabenajaca. Pacuenia daxita judiovi pijacuenia anijatonë nacobequiatabiaba penabanivajënae, apo itsi Jesús. ³⁹ Nexata Jesús jumaitsi fariseovijavabelia:

—Paxamë pafariseovimë panecaxaejavënae plato, taza ata, naniavelia bapaquiatame xaniavaetsia panijacuenia. Tsipaji jamatabëcuenenavëxainabiaya pajamatabëjumaitsimë tsabiabi: “Itsa caxaejitsipajë xaniavaetsia quiatsinejevanë, Diosojavabelia naneconitsipajë,” pajamatabëjamë tsabiabi. Bajarapacuenia paquiatabiabi atamë xaniavaetsia panecaxaejavänëxapa papecajamatabëcuene bijianaeyaniva picani, itsiata pananeconitaponaee Diosojavabelia. Tsipaji bajarapacuenia paquiatabiabi atamë, caranata panejamatabëëthëtota panajamatabëxainabiabame pibisiacuene. Panajamatabëxainabiabame it-sanë pecobecovë paneyacajërëtsinexa. Panajamatabëxainabiabamenua paneexanaenexa pibisiacuene ata. ⁴⁰ ¡Apo paneyapëtaevi baja rovia! Dioso cajena pexanaenë daxitacuene. Dioso baja cajena pacaperabëexana. Pacajamatabëëthëexananua. ⁴¹ Pejanajamatabëcuene itsa paxainaejitsipame, nexata pexainacuene patoexanabiabijitsipame itsamonaejavabelia. Daxita xua ata papecajamatabëcuene bijianaeyaniva, pajanijunavame panexaeayaniva, xua ata pacobejunavame panejayatsiyaniva, apo pacatsitapibisiacuene tsipae, jai Jesús fariseovijavabelia.

⁴² Icatsia Jesús jumaitsi fariseovijavabelia:

—¡Paxamë pafariseovimë ayaineconi panatsixainame Diosojavabelia! Panenacanabi-
java diez xuabejeyajuvënëjava, caejavayo, parajutabiabame ofrendacuenia Diosojav-
abelia. Daxitaviria paneubijavaxi ata diez xuabejeyajuvënëjava, caejavayo, parajutabi-
abame ofrendacuenia Diosojavabelia. Xanepana baja picani bajarapacuenia panera-
jutabiabijava Diosojavabelia. Itsiata bajarapacuenia parajutabiabi atamë, pepacune
apo pajitsipaemë Dioso. Bajaraxuata pananeconitame Diosojavabelia. Pananeconita-
menua Diosojavabelia tsipaji pacuene ata picani xanepana panetoexanabiabinexa itsa-
monaexavabelia, apo pasivanajamatabëxainamë. Bajaraxua picani paxamë bepanaja-
matabëxainame panetoexanabiabinexa itsamonaejavabelia, jai Jesús fariseovijavabelia.

⁴³ Icatsia Jesús jumaitsi fariseovijavabelia:

—¡Paxamë pafariseovimë ayaineconi panatsixainame Diosojavabelia! ¡Tsipaji bepaayai-
jamatabëcuenevimë panataeyabiabame! Judíovi penacatuatabibonëjava itsa pana-
joneyabiabame, pajitsipabiabame paneenaenexa peyayataevitsi penaenexa petsinubija-
vanëta. Pajitsipabiabamenua jivi papecabajacobinexa callejava bitso yayataeya, jai Jesús
fariseovijavabelia.

⁴⁴ Icatsia Jesús jumaitsi judíovi pecujarubivijavabelia, fariseovijavabelia ata:

—¡Paxamë judíovi panecujarubivi, paxamë ata pijinia pafariseovimë, ayaineconi panat-
sixainame Diosojavabelia! Paxamë itajara jivi bepatsita pexaniajamatabëcuenevimë tsabi-
abi pibisijamatabëcuene panexainaevi ata. Pacuenia itsamonae pona jivi pemëthëanë
matatsënëa apo peyapëtaexae xua xaina bëpënëareca, bajara pijinia itsi pamona pacayaiy-
atane apo peyapëtaexae pacuenia pajamatabëcuenebejemë bëpënëa. Bajarapamonae
pacayaiyatane tsipaji apo yapëtae bajarapamonae bëpënëa paneajamatabëcuenebejejava, jai
Jesús judíovi pecujarubivijavabelia, fariseovijavabelia ata.

⁴⁵ Nexata bajarapacuenia Jesús pejumaitisjavata, judíovi pecujarubiviyajuvënëne ju-
maitsi Jesúsjavabelia:

—Jesús, itsa mapacuenia jumaitsimëje, paxanë yabara ata pibisiacuenia jumaitsimë, jai
Jesúsjavabelia judíovi pecujarubiviyajuvënëne.

⁴⁶ Jesús nexata jumaitsi judíovi pecujarubinëjavabelia:

—¡Paxamë ata, judíovi panecujarubivi, ayaineconi panatsixainame Diosojavabelia! Pali-
vaisianë ayapëbeje itsajivi ata pejumecovënëtsinexa, bajarapalivaisianë jivi patsipaebabi-
abame pejumecovënëtsinexa. Bajarapalivaisianë patsipaebabiabi atamë itsamonae pe-
jumecovënëtsinexa, paxamë itsiata apo panajamatabëxainamë paneexanaenexa bajara-
pacuenia, jai Jesús judíovi pecujarubinëjavabelia.

⁴⁷ Icatsia Jesús jumaitsi judíovi pecujarubivijavabelia:

—¡Paxamë judíovi panecujarubivi, ayaineconi panatsixainame Diosojavabelia! Bajayata
pamatacabi jinavanapa panijasalinaivimi, beyaxuababiaba Diosojumepaebivimi profe-
tavi. Nexata juyava paxamë bajarapaprofetavimi pemëthëanëjumavereca bonë paexana-
jebame, jivi itsa tane bajarapabonë, penajamatabënapitabiabinexa bajarapaprofetavimi.
⁴⁸ Bajarapacuenia paneexanaexae, pacuenejëpame bajayata panijasalinaivimi penaxae-
cuene. Panijasalinaivimi bajayata beyaxuababiaba profetavimi. Nexata juyava paxamë bonë
paexanajebame bajarapaprofetavimi pemëthëanëjumavereca, jai Jesús judíovi pecujarubi-
javabelia.

⁴⁹ Icatsia Jesús jumaitsi judíovi pecujarubivijavabelia:

—Bajarapacuenia paneexanaejavanexa yabara, daxitacuene Dioso peyapëtaenëxae, ba-
jayata tajëvelia jumaitsi paxamë yabara mapacueniaje: “Bajarapamonaejavabelia toitoro-
bianajë profetavi. Toitorobianajënuu apóstolevi ata. Bajarapamonae itsiata beyaxuababi-
abiana tatoitorobiviyajuvënëvi. Bejlobiaexanabiabiananua tatoitorobiviyajuvënëvi,” jai
baja cajena bajayata tajëvelia Dioso bajarapacuenia paxamë paneexanaejavanexa yabara.
⁵⁰ Dioso baja cajena nacua pexanaejavaveliacujinae, panijasalinaivimi beyaxuabapona
profetavimi. Nexata bajarapaneconi yajava Dioso pacananeconitsiaexanaena, paxamë aeconoxae ma-
pamatacabitaje panejinavanapaevi. ⁵¹ Panijasalinaivimi profetavimi pebeyaxuabapona-
java, taxuxuaba Abelpijnëta. Bajaraxuacujinae icatsia pevajënaeyabela beyaxuabapona
itsaprofetavimi ata. Nexata bexëjavaberenata icatsia panijasalinaivimi beyaxuaba
Zacariaspijinëmi. Zacariaspijinëmi panijasalinaivimi beyaxuaba templobopanabota, baitsi
templobobeje altarvënëjavabeje petuatuajëta. Xaniajanë pacuenia pacatsipaebijitsiatsi.
Nexata bajarapaneconi yajava Dioso pacananeconitsiaexanaena paxamë, aeconoxae ma-
pamatacabitaje panejinavanapaevi, jai Jesús judíovi pecujarubivijavabelia.

⁵² Icatsia Jesús jumaitsi judíovi pecujarubivijavabelia:

—¡Paxamë judíovi panecujarubivi, ayaineconi panatsixainame Diosojavabelia! “Vaxaitsi
xaniavaetsia Dioso pejumelivaisi yapëtanetsi,” pajamatabëjamë tsabiabi picani. Itsiata

baitsi jane apo payapëtaemë. Saicayalivaisi Dioso pejumelivaisivecua jivi patsipaebabi-abame. Pacuenia ho baupaxatata jivi pejoneyaniva, bajara saya pacuenia paxamë paex-aname jivijavabelia. Nexata itsamonae jitsipae ata pejonejava picani Dioso pijanacuaya-betsia, paxamë saicayalivaisi panetsipaebabiabixae, apo pacopatsimë pejonenexa Dioso pijanacuayabetsia. Paxamë ata apo pajitsipaemë panejonenexa Dioso pijanacuayabetsia, jai Jesús judíovi pecujarubivijavabelia.

⁵³⁻⁵⁴ Bajarapacuenia Jesús pejumaitsicujinae, pitsapa baja bovecua. Bajaraxuacujinae judíovi pecujarubivi, fariseovi yajava, Jesús itoyatsi. Nexata jamatabëitonotabiabatsi. Jamatabëcuenejëbiaya livaisi yanijobabiabatsi. Nexata Jesús bijiaya itsa jumecanaviata, bajarapalivaisi yabara peneconitsinexatsi picani nacuaeavetsinëjavabelia.

12

Pacuenia Jesús tsipaeba jivi pejumecovënëtsiyaniva fariseovi petsipaebilivaisitsi yabara pelivaisi

¹ Penacaetuataponaejavata jivi pepo ayaibitsaëttoxaneto cajena tsaponae, baitsi miles pajivibeje. Nexata jivi nataxucuetasabataxuabapona. Nexata Jesús pijajivijavabelia copi-aya tsipaeba livaisi, pejumecovënëtsiyaniva fariseovi itsa tsipaebatsi saicayalivaisi Dioso pejumelivaisivecua. Jesús pijajivijavabelia jumaitsi mapacueniaje:

—Xania panayajivitaema fariseovi pijalevadurayaniva. “Levadura,” itsa janë, peyamaxëitorobilivaisi yabara pacajumaitsi. Fariseovi raja bepacatsita pexaniajamatabëcuenevi itajara tsane, pibisijamatabëcuene pexainaevi ata. ² Daxita abaxë palivaisianë jivi aeconoxae apo yapëtae, bajarapalivaisianë itsamatacabi daxitajivi yapëtaeponaena xaniavaetsia. Pibisiacue muetsia itsajivi pexanaejava ata, itsamatacabi xaniavaetsia yapëtaena daxitajivi. ³ Xua ata muetsia pavajunupaebame meravi, bajaraxua ata, itsamatacabi itsajivi vajunupaebiana matacabita daxitajivijavata. Xua ata pënëyatuucutsiboënëta baupa xatatsiaya muetsia vëpaxapaxajaiya pavajunupaebame, bajaraxua ata itsamatacabi itsajivi pinijijumeta vajunupaebiana jivi penacaetuatsijavata, jai Jesús pijajivijavabelia.

Pacuenia Jesús tsipaeba pijajivi pecujunaviyaniva jivivevi yabara pelivaisi
(Mt 10.26-31)

⁴ Icatsia Jesús jumaitsi pijajivijavabelia:

—Tajamonae, pacatsipaebijitsiatsi. Pëtsa pacujunavame jivivevi ata. Bajarapamonae pacabeyaxuabi ata tsipae, acuenebi matavëjëa papecaitsacueniabinexa. ⁵ Biji rajane pacatsipaebijitsiatsi panecujunavinexa Dioso. Tsipaji Dioso cajëpatsi papecaxuabinexa infiernojavabelia papecabeyaxuabicujinae, jai Jesús pijajivijavabelia.

⁶ Icatsia Jesús jumaitsi pijajivijavabelia:

—Cinco ponëbeje baratsui saya namatamota anijapalatanëyobeje. Tsipaji amatamobi. Bajarapacuenia amatamobi ata, itsiata caenëyo ata Dioso apo nacofënëtsi bajarapabaratsuiyajuvënë. ⁷ Paxamë rabiji bitso Dioso pacaasiva baratsui matatoxenetsia. Tsipaji panamatomate baratsui matatoxenetsia. Dioso bitso papecaasivaxae, panematanatoxi ata, caematanatoyo canacujitsia, Dioso baja cajena namatajëta. Bajaraxuata pëtsa pacujunavame itsacuenëjava ata, jai Jesús pijajivijavabelia.

Pacuenia Jesús pijajivi apo benayavajunuaaxinae Jesús pijajivicuene yabara pelivaisi
(Mt 10.32-33; 12.32; 10.19-20)

⁸ Icatsia Jesús jumaitsi pijajivijavabelia:

—Pacatsipaebijitsiatsi raja. Daxita pamonaë tajajivi, jivi pitabarata navajunupaebiana tajajivicuene. Bajarapamonae juya xanë, Daxitajivi Pematapijnë, vajunupaebianajë tajajivicuene Dioso pijaängelevi pitabarata. ⁹ Pamonaë jumai tsane itsamonaejavabelia: “Xanë cajena Jesús apo pijajivitonë,” jai tsane, bajarapamonae yabara juya xanë, jumaitsinë tsane: “Mara pamonaë cajena apo tajajivije,” janë tsane Dioso pijaängelevi pitabarata, jai Jesús pijajivijavabelia.

¹⁰ Icatsia Jesús jumaitsi pijajivijavabelia:

—Pajivi pibisiacuenia nebaracuaicuaijai ata, xanë, Daxitajivi Pematapijnë, bajarapaneconi yabara itsa navajëta Diosojavabelia, itsiata vecuaajibiaexanaetsi Dioso. Itsiata baitsi jane pajivi pibisiacuenia baracuaicuaijai Espíritu Santo, bajarapajivi bajarapaneconi Dioso apo vecuaajibiaexanaetsi tsane, jai Jesús pijajivijavabelia.

¹¹ Icatsia Jesús jumaitsi pijajivijavabelia:

—Itsa pacacaponaelia tomaraevetsivijavabelia, judíovi penacaetuatabibijavabelia ata, papecayanijobinexa, pëtsa pajamatabëcuenebëjamë panenayajivicuaicuaijijavanexa yabara. ¹² Tsipaji raja bajarapaepatota, Espíritu Santo pacacuaicuaijaiyaxanaena pacuenia panayajivicuaicuaijamëjitsia, jai Jesús pijajivijavabelia.

Pacuenia Jesús jivi livaisi tsipaeba bitso pesivanajamatabëxainaeayaniva ayaijava pexainaejava pexainaejava yabara pelivaisi

¹³ Jivi ayaiBITSaëtoxanetoyajuvënënë jumaitsi Jesúsjavabelia:

–Jesús, taxapijinë picani petëpaevajënae netocopata pevënamuto tapitsinexa pecobecovëyajuvënëjavanë. Nexata tamatapijinë pita bajaraxuanë. Nexata itorobare tamatapijinë tanerajutsinexa taxapijinë tanerajutsiapaebijavanë, jai bajaraponë Jesúsjavabelia.

¹⁴ Jesús nexata jumaitsi bajaraponëjavabelia:

–Itsajivi ata cajena apo nitorobi jueznënexanë, tananeconitsiaexanaenexa ponë naneconita. Itsajivi ata cajena apo nitorobi axapijinë pecobecovë patacatsicobetsatsinexabeje, jai Jesús.

¹⁵ Nexata icatsia Jesús jumaitsi daxitajivijavabelia:

–Xania pataema. Pëtsa bitso panajamatabëxainame ëpaxamënexa ayaijava panexainaejava. Tsipaji jivi pexainaejava ayaijava xainae ata tsipae, bajarapamonae pexainaejava yabara jamatabëcuenexanëpanaeya apo jinavanapae tsipae, jai Jesús.

¹⁶ Nexata Jesús tsipaeba livaisi bajarapamonaejavabelia mapacueniaje:

–Ponapona bitso riconë. Pijapabianë tocapitsapabiabatsi ayaijava pexinaecuenë.

¹⁷ Riconë nexata jamatabëjumaitsi: “¿De meta pacuenia exanaenajë? Netoajibi baja rovia taetaponaejavabelianexa taubijava,” jamatabëjai riconë. ¹⁸ Riconë nexata icatsia jamatabëjumaitsi: “Yapëtaniji rajane baja pacuenia exanaejiatsianë. Paboxita jebabiabajë taubijava, penetsianicajë taexanaenexa icatsia ayaiBOXANETONë bajarapacovëta. Bajara-paboxanetonëta jane baja jebianajë daxita taubijava, daxita tacobecovë yajava. ¹⁹ Nexata baja xainaeajë bajayajebinxaxa daxitacuene xua namatavenonajë. Nexata jane baja xuacujinae nacueraevetsianajë. Pexaniacuene nabanebiabianajë. Pexaniaviriranënuu matavëjëa apaeyabiabianajë taitajibinexa. Nexata barëyanë tsabiabi tsane,” jamatabëjai riconë. ²⁰ Nexata bajarapaepatota Dioso jumaitsi riconëjavabelia: “Apo neyapëtaenë baja rovia xamë. Ajena baja, mapameravitaje, tëpaename. ¿Jipatsa nexata nevënamuto pitsiana daxita nexaniavaetejebijavanëmi?” jai Dioso riconëjavabelia, jai Jesús mapalivaisije daxitajivijavabelia.

²¹ Icatsia Jesús jumaitsi bajarapamonaejavabelia:

–Bajara pijinia pacuenia paxamëyajuvënëvi ata tocopiapatsianatsi pamonae ayaijava natocaetuatapona ëpamonae pexainaejava. Bajarapamonae itsiata pepacuenë bepejiobivi tsane Diosojavabelia, jai Jesús bajarapamonaejavabelia.

Pacuenia Dioso pijajivi eveta mapanacuataje yabara pelivaisi
(Mt 6.25-34)

²² Jesús nexata jumaitsi pijajivijavabelia:

–Xaniajanë pacuenia pacatsipaebijitsiatsi. Pëtsa pasivanajamatabëxainame ëpanexaejava pavenëjaninavanapanejava. Pëtsa pasivanajamatabëxainamenuea ëpanenaxatabijavanexa ata. ²³ Apo jinavanapaetsi cajena ëvajaxaejavanexa. Apo jinavanapaetsinua ëvajapanerabëxatabinexa. ²⁴ Pacanaëjere pacuenia baratsui apo ubi pexaejavanexa. Apo notsinua penaveretaponaejava. Apo xainaeenua penaveretaponaejava peetsibonexa. Itsiata Dioso rajutabiabatsi pexaejavanexa. ¡Paxamë rabiji bitsoyo Dioso pacaasiva baratsuimonae matatoxenetsia papecarajutsinexa daxita xua panamatavenoname! Bajaraxuata pëtsa pasivanajamatabëxainame ëpanexaejavanexa, ëpanenaxatabijavanexa ata. ²⁵ ¿Detsa jane ponë paxamëyajuvënënë caëjëpatsi pijacujiruta medio metrocuenia matavëjëa penavitsabiaexanaejaxana? Ajibi. Bitso jamatabëjëjai ata tsipae pevitsabinexa, itsiata apo navitsabiaexanae tsipae pijacujiruta. Nexata saya najamatabëcuenequeratsipa pejamatabëcuenebëjajava penavitsabiaexanaejavanexa. Tsipaji apo tonamatamotsitsi bajaraxua. ²⁶ Bajara pijinia pacatoitsi paxamë ata daxita xua pasivajamatabëcuenebëjamë. Apo pacatonamatamotsi. Bajaraxuata apo bepajamatabëcuenebëjamë itsacuenejavayo ata yabara, jai Jesús pijajivijavabelia.

²⁷ Icatsia Jesús jumaitsi pijajivijavabelia:

–Pacanaëjere pacuenia bitso pexaniamatono pitsapa, mapamatonoje. Bajarapamatononatsijumanacuenebi. Penaxatatsijavanexa ata apo natoexanae. Bajayata nacuaevetsinë Salomónpijinë bitso pexainaejenëmi. Naitabëtsiaya naxatababiaba bitso pexaniavirirajanë. Itsiata baitsi jane Salomónpijinë penaitabëtsijava matatoxenetsia bitso aitaë mapamatonotoxije. ²⁸ Paxamë, bevelia Dioso panejumecovënëtsivi, asaëya bepa-jumecovënëtaeme Dioso papecaevetsijava. Ajena pitsijavata vayafota tanetsi pexaniaponamatanoxi. Bajaraxuacujinae, caematacabibejecujinae, tajuatsi baja bajarapamonamatanoxi. Pacuenia Dioso aitaëyaexana ponamatanoxi, bajara pijinia pacuenia paxamë ata itsamatacabi Dioso pacaxatabiana piitaëbëja. ²⁹ Bajaraxuata pëtsa pasivanajamatabëxainavanapame ëpanexaejavanexa, ëpanematavëjëapaajavanexa ata. Biji rajane

pajumecovënëtavanapare Dioso. ³⁰ Pamonae Dioso apo pejumecovënëtsivi, bitso sivanajamatabëxainabiaba ëpexaejavanexa, ëpenaxatabijavanexa ata. Itsiata baitsi jane paneaxa Dioso paxainame. Bajaraponë yapëtane daxita xua panamatavenoname. ³¹ Bajaraxuata, daxita xua panamatavenoname, matatoxenetsia Dioso pijacuene bitso pasivanajamatabëxainabiabianame Dioso pijacuene panetoexanavanapaenexa. Nexata Dioso pacarajutsiana daxita xua panamatavenoname, jai Jesús pijajivijavabelia.

Pacuenia Jesús tsipaeba pijajivi xaniavaetsia Dioso petonacuenebavanapaenexa it-samatacabi ayajjaya pexainaenexa athëbëtsia yabara pelivaisi
(Mt 6.19-21)

³² Icatsia Jesús jumaitsi pijajivijavabelia:

–Tajamonae, paxamë patajajivimë pacaejiviyomëbeje ata, pëtsa pajunavame. Tsi-paji paneaxa pacaitapeta panecobenaevetsinexa pamatacabi bajaraponë evetsiana dax-itacuene. ³³ Pacanajere panexainaejajuvënëjava, bitso paneasivajava ata. Nexata bajarapalata parajutsianame bitso bepejiobivijavabelia. Nexata juya Dioso athëbëtsia pacarajutsiana bitso penamatamotsijava, apo pevereverecaejava. Bajarajotsia acunebi pejonejava penacobetoxotsivi papecayacajërëtsinexa. Itsanë ata ajibi papecatoucubax-aenënexa. ³⁴ Panacuatatsia pacatoxaniavaeta panexainaejavanexa, bajarapanacua panajamatabëëthëtovetsina pajamatabënajinavanapaename, jai Jesús pijajivijavabelia.

Pacuenia Jesús pijajivi tsipaeba pacujinae icatsia patsijitsiatsica najamatabëcuenexaniavaetsiaya pevajënae pijajivi pecopiaevetavanapaenexatsi yabara pelivaisi

³⁵ Jesús icatsia pepatsijavanexatsica tajëvelia navajunupaeba. Jesús jumaitsi pijajivijavabelia mapacueniaje:

–Icatsia raja jemata patsianicajë. Nexata najamatabëcuenexaniavaetsiaya panecopi-aevetavanapaename. ³⁶ Payapëtaneme rabaja mapacuenije. Petuxanenë itsa pona penacasabififestajavabelia, pijajivi tonajumecopata meravijebi ata pecopiaevetavanapaenexatsi pepatsijavarena. Nexata petuxanenë pijajivi meravi ata copiaevetavanapatsi. Nexata petuxanenë jemata meravi najetarucæ ata, baupa itsa docodocota, nexata bajarapamonae bepjija tobaupata pijatuxanenë. ³⁷ Bajarapamonae barëya pijatuxanenë naëcotsiaya pecopiaevetavanapaejavata pepatsixæ. Xaniajanë pacuenia pacatsipæbi-jitsiatsi. Nexata petuxanenë pijajivi caecuenia petobaupatsixætsi, petuxanenë pijajivi sivajamatabëcuenëbarëya. Nexata petuxanenë pepatsicujinae xaniavaeta mesa. Eneaex-anaena pijajivi. Nexata caranata petuxanenë bajarapamonae bepjjajivitonë nataeya rajuta pexæjava pijajivi. ³⁸ Meravi tuatujëta petuxanenë patsi ata, itsa jume, matacabi vëpata patsi ata, nexata petuxanenë pijajivi naëcotsiaya pecopiaevetavanapaejavata pijatuxanenë pecaxitarabixætsi, petuxanenë pijajivi barëya. ³⁹ Pacanaëjere mapacuenije. Bo pexainaenë itsa yapëtaejitsipa paepatota meravi pijabojavaberena patsijitsia pecobecovë petonacobetoxotsinënexatsi, nexata apo majitsi tsipæ. Vajënaevetecæjitsipa meravijebi. Apo copatsi tsipæ pijaboyaberena petojoneyanivatsi penacobetoxotsinënexa. ⁴⁰ Bajara pijinia pacuenia paxamë ata najamatabëcuenexaniavaetsiaya panecopiaevetavanapaename tapatsijavatsica. Tsipajj xanë, Daxitajivi Pematapijinënë, paepatota apo panejamatabënajinaemë tapatsijavanexatsica, jemata icatsia patsianicajë, jai Jesús pijajivijavabelia tajëvelia penavajunupaebijavata icatsia pepatsijavanexatsica.

Pacuenia Jesús pijajivijavabelia livaisi tsipaeba, petuxanenë pijajivitonëbeje pelivaisicue-nia, yabara pelivaisi

(Mt 24.45-51)

⁴¹ Pedro jumaitsi Jesúsjavabelia:

–Tajatuxanenë, ¿palivaisi aeconoxæ panetsipæbame, baja tsaja palivaisi ëpaxanë panijajivinexanë? Itsa jume, ¿itsamonaenexa ata tsaja yajava? jai Pedro.

⁴² Jesús nexata jumaitsi Pedrojavabelia:

–Mara pejamatabëcuenëitsivinexa yabara pacatsipæbatsije. Petuxanenë pijajivitonë, ponë xaniavaetsia pijatuxanenë pecovëta tonacuenëbaponapona pijacuene, maitsije. Petuxanenë pijajivitonë itsajamatabëcuene xainaenejeva, copiaevetaponapona pijatuxanenë pepatsimatacabijavabelianexa. Bajaraponë pijatuxanenë pijajivi pecovëta toevetaponapona xaniavaetsia. Toabataponapona pexæjava caematacabi canacujitsia pacuenia itorobatsi pijatuxanenë. ⁴³ Bajaraponë bitso barëya pamatacabi pijatuxanenë pata xaniavaetsia pijajivi pecovëta petoetaponaponaexæ. ⁴⁴ Xaniajanë pacuenia pacatsipæbijitsiatsi. Ponë bajarapacuenia xaniavaetsia tonacuenëba pijatuxanenë pecovëta, bajaraponë icatsia evetsiaexanatsi daxita xua xaina pijatuxanenë. ⁴⁵ Petuxanenë pijajivitonë itsa pijamatabëcuenëbejenë tsipæ, nexata bajaraponë pijatuxanenë pecovëta jamatabëjumai

tsipae: “Tajatuxanenē ajibi tsarucae tsane bajayajebi,” jamatabējai tsipae. Nexata pijatuxanenē pijajivi, pamonaē evetsiaexanatsi xaniavaetsia picani petoēvetsinexa, toconibabeyabiabijitsipa. Conibabeyabiabijitsipa pebijivi, petiriavi ata. Bajaraponē ayajava pexaejava xaeyabiabijitsipa. Aitajibinua tsabiabi tsipae. ⁴⁶ Nexata itsajota apo jamatabēnajinaē tsipae pijatuxanenē pepatsijavanexa, bajarapaepatota jemata patsipa pijatuxanenē. Nexata bajaraponē pijatuxanenē pinijicuenia naneconitsiaexanaejitsipatsi. Bajara pijinia pacuenia Dioso ata itsamatacabi pinijicuenia naneconitsiaexanaena pamonaē Dioso apo pejumecovēnētsivi, jai Jesús Pedrojavavelia.

⁴⁷ Icatsia Jesús jumaitsi pijajivijavavelia:

–Ponē itsanē pijajivitonē, yapētaē ata picani pacuenia itorobatsi pijatuxanenē petoexanaenexa, itsiata itsa apo toexanaē pijatuxanenē pitorobicueniatsi, bajaraponē pinijicuenia jumaconibabejitsipatsi ayacuērobocotota. ⁴⁸ Ponē ata pijinia itsanē pijajivitonē, itsa apo jumeyapētaē xaniavaetsia petoexanaenexa pacuenia pijatuxanenē itorobatsi, nexata pijatuxanenē pitorobicueniatsi saicayacuenia itsa toexana, bajaraponē ata jumaconibabejitsipatsi. Itsiata pinijicuenia apo jumaconibabe tsipaetsi. Pajivi pijinia ayajava rajutatsi, bajarapajivi yabara vaxaitsi basivajamatabējumaitssi: “Juya meta mapajivije ayajava rajutabiabiana itsamonaējavavelia,” basivajamatabējajitsi. Pajivi pijinia evetsiaexanatsi ayajava, bajarapajivi pevetsiaexanaenētsi sivajamatabējumaitssi: “Itsa netocanacuenebiana taevetsiaexanaejava, ayajava netopitsapaena,” sivajamatabējajitsi pevetsiaexanaenētsi, jai Jesús pijajivijavavelia.

Pacuenia Jesús apo penajuajumecovēnētsixae, nacaemonae ata apo najamatabēcueniejēpae tsane yabara pelivaisi

(Mt 10.34-36)

⁴⁹ Icatsia Jesús jumaitsi pijajivijavavelia:

–Xanē raja patajopajē daxitanacuapijivi pibisiacuene pexanaeoneconī natēpaenexa. Nexata bajarapamonaeyajuvēnēvi itsamonaē nejumecovēnētsiana. Nexata nacaemonae ata apo najamatabēcueniejēpae tsane. Itsa baja capanepaeya cruzata daxitajivi sivatēpaejitsipajē, jamatabēcuenēbarēyanē baja tsipae. ⁵⁰ Itsiata baitsi jane abaxē netosajina bajaraxua yabara tanejamatābēcuenējētsinexa tanebeyaxuabijavata. ¡Bitso baja rovia najamatabēxainajē! ¡Matapania nebeyaxuabiana, jamatabēcuenēcaevianajē! ⁵¹ Pētsa panesivajamatabējumaitsimē mapacueniajē: “Jesús rabaja patsica mapanacuayabetsicaje daxitajivi mapanacuataje najamatabēcueniejēpae pejinavanapaeyaexanaenexa,” panesivajamatabējame pētsa. Bajaraxuanexa apo patsinētsica. Biji rajane xanē tapatsixaetsica mapanacuayabetsicaje, jivi itsa nejumecovēnētsiana, apo najamatabēcueniejēpae tsane pamonaējavavelia apo nejumecovēnētsi, nacaemonae ata. Itsamonaē napijavajabitsaē tsane. Nexata apo najamatabēcueniejēpae tsane. ⁵² Ajena mapamatacabijavaveliacujinaeje jivi apo najamatabēcueniejēpae tsane. Cinco pajivibeje, nacaemonae ata, caebota pejinavanapaevi ata, apo najamatabēcueniejēpae tsane xanē apo tanenajuajumecovēnētsixaebeje. Pamonaē cinco pajivibeje nacaemonae, bajarapamonaeyajuvēnēvi, acueyabi pajivibeje, nejumecovēnētsiana. Anijajivibeje apo nejumecovēnētsi tsane. Itsa jume, anijajivibeje nejumecovēnētsiana. Acueyabi pajivibeje apo nejumecovēnētsi tsane. ⁵³ Bajarapabopijivi, paxabeje pexēnatobeje, apo najamatabēcueniejēpaebeje tsane xanē apo tanenajuajumecovēnētsixaebeje. Petirivabeje pijinia, penabeje pexēnatoyobeje ata, apo najamatabēcueniejēpaebeje tsane xanē apo tanenajuajumecovēnētsixaebeje. Pamebeje pecopenabeje ata apo najamatabēcueniejēpaebeje tsane xanē apo tanenajuajumecovēnētsixaebeje, jai Jesús pijajivijavavelia.

Pacuenia Jesús asaēya jivi muxujioba apo pecanaējētsixae Jesús Dioso pexēnatocuene yabara pelivaisi

(Mt 16.1-4; Mr 8.11-13)

⁵⁴ Jesús icatsia jumaitsi jivi ayaibitsaētōxanetojavavelia:

–Itsa pataneme vaēvetsica itarērēbo pepitsapaejava, nexata pajumaitsimē tsabiabi: “Ajena raja emajitsia,” pajamē tsabiabi. Nexata bajarapamatacabi ema jopabiaba. ⁵⁵ Itsa pataneme jovibo pepitsapaejava epatajērētsiarena la surverena, pajumaitsimē tsabiabi: “Ajena raja icotia ataju tsane,” pajamē tsabiabi. Nexata bajarapamatacabi icotia ataju tsabiabi. ⁵⁶ Nexata itsamonaē pacatane bepatsita pexaniajamatabēcuenēvimē itajara, papibisiajamatabēcuenēvi atamē. Payapētaeyabiabame pacuenia matacabi itsijitsia itarērēbo pepitsapaejava panetaeyabiabixae. Bajarapacuenia picani payapētaeyabiabame. Itsiata baitsi jane patae atamē daxita xua Juanpijinēmi jivibautisabinēmi exanapona, patae atamēnua daxita xua xanē ata exanapojē, caranata xanē apo paneyapētaemē Dioso athēbēvetsica taneitorobinēcuenetsica, jai Jesús jivi ayaibitsaētōxanetojavavelia.

Pacuenia penaneconitsijivi xaniavaetsia bebarëcuaicuajai pajivijavabelia naneconita penasivajamatabëxanepanaenexabeje, peneconitsiyaniavatsi jueznëjavabelia, yabara pelivaisi (Mt 5.25-26)

⁵⁷ Jesús icatsia jumaitsi jivi ayaibitsaëtoxanetojavabelia:

—Pacanaëjère panijacuata paneexanaenexa pacuene xanepana. ⁵⁸ Itsa pananeconitime itsajivijavabelia, nexata itsa pacacapona bajarapajivi jueznëjavabelia papecanonitsinexa, namutua xaniavaetsia panabarëcuaicuajamërebeje panenasi-vajamatabë xanepanaenexabeje xua yabara pacaneconitsijitsia. Bajarapacuenia xaniavaetsia panabarëcuaicuajamërebeje papecanutsiyaniava jueznë pitabarata. Tsipaji raja jueznë itorobijitsipa policiavi panijaneconi yabara papecacaponaenexa penaneconitsivi pejebabiabiboyabelia. Nexata policiavi pacananeconitsiaexanetsipa penaneconitsivi pejebabiabibota. ⁵⁹ Xaniajanë pacuenia pacatsipaebijitsiatsi. Nexata penaneconitsivi pejebabiabibota itsa pacananeconitsiaexanetsipa, bajaraverena bepijia apo papitsapaemë tsipae. Matapania pamatamotsipame daxita xua yabara pacananeconitsiaexaneta, papitsapaejitsipame, jai Jesús jivi ayaibitsaëtoxanetojavabelia.

13

Pacuenia jivi benajamatabëcuenepeñëyorota pibisiacuene pexanabiabijavavecuia yabara pelivaisi

¹ Itsamonaë jumaitsi Jesúsjavabelia:

—Galilea nacuaverena pepatsivi, baca beyaxuaba Jerusalén tomarata templobota. Bajarapamonaë baca beyaxuaba ofrendacuenea pevi perajutsinexa Diosojavabelia. Nexata bajarapaepatota nacuaeveitsinë Pilato pibisiacuene exana. Itoroba vajabitsaë Galilea nacuapijivimi pebeyejebinxatsi templobota. Itsajota Galilea nacuapijivimi baca beyaxu-ababuata, bajarapacovëta icatsia beyejebatsi bajarapamonaemi. Nexata bajarapamonaemi pijana namatajërëata bacajana yajava, jai itsamonaë Jesúsjavabelia.

² Jesús nexata jumaitsi bajarapamonaëjavabelia:

—“Pamonaemi bajarapacuenia beyejebatsi, bitso meta pibisiacuene pexanaevimi daxita pijanacuapijivi matatoxenetsia. Bajaraxuata beyejebatsi penaxuabinexa Diosovecuia,” ¿pajamatabëjamë tsaja? ³ Jume baja cajena. Bajarapamonaemi ata picani bitso pibisiacuene apo exanaë pijanacuapijivi matatoxenetsia. Itsiata Dioso tocopatatsi bajarapamonaemi pebeyejebinxatsi, penacopabivi pecanaëjëtisnexa Diosojavabelia penaneconitsijava. Paxamë ata itsa apo pacopabimë tsane pibisiacuene peneexanabiabijava, itsa apo panajamatabëcuenepeñëyorotsimë tsane Diosojavabelia, nexata bajarapacuenia paxamë ata panaxuabianame Diosovecuia itsa patëpaename. ⁴ Pamatacabí ata jemata Jerusalén tomarata jopanucaya athëbëabetsia piapiabotsia, Torre de Siloëvënëbo, dieciocho pajivibeje matacënëbatsi. Nexata baja tëpa bajarapamonaemi. “Pamonaemi matacënëbatsi, pibisiacuene meta bitso pexanaevimi daxita Jerusalén tomarapijivi matatoxenetsia. Bajaraxuata matacënëbatsi penaxuabinexa Diosovecuia,” ¿pajamatabëjamë tsaja? ⁵ Jume baja cajena. Bajarapamonaemi ata picani bitso pibisiacuene apo exanaë pijatomarapijivi matatoxenetsia. Paxamë ata itsa apo pacopabinë tsane pibisiacuene paneexanaevija, itsa apo panajamatabëcuenepeñëyorotsimë tsane Diosojavabelia, nexata daxita paxamë ata bajarapacuenia panaxuabianame Diosovecuia itsa patëpaename, jai Jesús bajarapamonaëjavabelia.

Pacuenia Jesús jivi livaisi tsipaeba piacuaijibihigueranaë pelivaisicuenia yabara pelivaisi

⁶ Jesús jivi livaisi tsipaeba piacuaijibihigueranaë pelivaisicuenia. Jesús jivi piacuaijibihigueranaë pelivaisicuenia petsipaëbijavata, pijaperujujamatatabëcuene apo penavecuacatsivi yabara Jesús jumaitsi mapuceniajaje:

—Pebi pijapabi tuatuajëta caenaë peubinaë xainanuta, higueravënënaë. Nexata picani taeyojopalia bajaraponaë penacuaitisijava. Itsiata baitsi jane apo nacuaiti. ⁷ Nexata jumaitsi pijapabi petoëvetsinëtsijavabelia: “Taema maponaëje. Acueyabi picani pavaibeje taeyopajë tacuainotabiabinexa maponaëcuaije. Itsiata acuaijibi tsabiabi. Nexata baja netonicataxuare. Apo becopatantsitsi bajaraponaë. Ira caranatanuca saya,” jai pijapabi pexainaenë. ⁸ Itsiata baitsi jane pijapabi petoëvetsinëtsi jumaitsi: “Copatanutsianatsibeje abaxë mapavaije. Nexata bacatuirabianajë bacatasitoxita. ⁹ Baja raeta xuacujinaë xanepanaena. Nexata aeconoxae pavai nacuaitisiana. Nexata aeconoxae pavai ata itsa apo nacuaiti tsane, nexata jane baja caticataxuabianatsi,” jai pijapabi petoëvetsinëtsi, jai Jesús.

Bajarapacuenia Jesús jumaitsi tsipaji Dioso xuabijitsia pamonaë pijaperujujamatatabëcuene apo pecopatsivi.

Pacuenia Jesús jamatejemayaexana judíovi penacueraevetsimatacabita penajumafurutsivami yabara pelivaisi

¹⁰ Itsamatacabita judíovi penacueraevetsimatacabita, Jesús jivi livaisi tsipaeba judíovi penacuetaatabiabibota. ¹¹ Bajarajota naeca petiriva. Dovathi pejamatabêcueneta bajarapova dieciocho pavaibeje xaina penajumafurutsicujinae. Nexata apo caêjêpaetsi tsiquiririjavayo ata penaepasirovitsijava. ¹² Itsa Jesús taeyeta bajarapova, nexata junarena. Jesús jumaitsi bajarapovajavabelia:

–Niatanejavami rabaja cavecuajibi, jai Jesús bajarapovajavabelia.

¹³ Jesús tsimatanacobeuata bajarapova. Nexata bajarajota petiriva naepasirovitsixanepana baja. Nexata bajarapova jumai tsaponae Diosojavabelia:

–¡Diosomê, bitso pexaniacuenene netoexaname ayaijamatabêcuenenêxaemê! jai tsaponae bajarapova Diosojavabelia.

¹⁴ Itsiata baitsi jane judíovi penacuetaatabiabiboto pevetsinê Jesús baranaaepanatsi judíovi penacueraevetsimatacabita Jesús pejamatejemayaexanaexae penajumafurutsiva. Tsipaji judíovi apo jitsipae itsajivi ata itsacuenejavayo pexanaenexa penacueraevetsimatacabita. Nexata judíovi penacuetaatabiabiboto pevetsinê jamatabêjumaitsi:

–Jesús nacueneba penacueraevetsimatacabita. Jesús apo jumecovênêtsi patajasalinaivi patanitavetsicuenene, jamatabêjai.

Nexata judíovi penacuetaatabiabiboto pevetsinê najumejematsiaya jumaitsi jivijavabelia:

–Caesemana canacujitsia xainaponatsi seis pamatacabibeje vajanacuenebinexa. Bajarapamatacabijava bepatatsi vajanacajamatejemayaexanaenexa. Nexata abaxê penacueraevetsimatacabita apo bepatatsi vajanacajamatejemayaexanaenexa, jai judíovi penacuetaatabiabiboto pevetsinê najumejematsiaya jivijavabelia.

¹⁵ Nexata Jesús jumaitsi judíovi penacuetaatabiabiboto pevetsinêjavabelia:

–Paxamê saya jivi paneyamaxêitojorobivi. Bepatsita pexaniajamatabêcuenenimê itajara itsamonae, papibisiamatabêcuenenimê atamê. Paxamê ata panacuenebabiabame penacueraevetsimatacabita ata. Paxamê penacueraevetsimatacabita ata panijabaca, burro ata, paisinabiabame panecaponaeenexa merajavabelia mera piapaenexa. ¹⁶ Mapovaje Abrahampijinê pemomoxiyajuvênêva jamatejemayaexanajê. Tsipaji bajarapova namatamota Dioso pitabarata dajubinê matatoxenetsia. Dovathi pejamatabêcueneta penajumafurutsicujinae, xaina baja dieciocho pavaibeje. Bajaraxuata penacueraevetsimatacabita ata jamatejemayaexanajê piatanecuenenevecua, jai Jesús judíovi penacuetaatabiabiboto pevetsinêjavabelia.

¹⁷ Bajarapacuenia Jesús itsa jumaitsi, nexata daxita pecueneitoyavitsi moya ena. Aura tsenae bajarapamonae. Itsamonae pijinia Jesús sivajamatabêcuenenarêyatsi pinijicuenene Dioso pesaêta pexanaponaejavanê yabara.

Pacuenia mostazaxutoyo pejuvicujinae, mostazanae bepimia vitsaba yabara pelivaisi
(Mt 13.31-32; Mr 4.30-32)

¹⁸ Jesús jumaitsi jivijavabelia:

–¿De meta xua pelivaisi jêpa Dioso pijajivi bepimia ayaibitsaêtoxoneto penaexanaejavanexa? Jivi meta peyapêtaenexa ayaibitsaêtoxoneto bepimia Dioso pijajivi penaexanaejavanexa, mostazaxutoyo meta pelivaisicuenia tsipaebianajê. ¹⁹ Pebi capona mostazaxutoyo peubinexa pijapabita. Nexata baja mostazaxutoyo pebi itsa uba pijapabita, bajarajota mostazanae bepimia vitsaba. Bepimia baja mostazanae pinijinae naexana. Baratsui ata exana pematapenanê bajaraponaemaxêranaxijava. Bajara pijinia pacuenia Dioso pijajivi ata itsane. Bepimia ayaibitsaêtoxoneto naexanaena Dioso pijajivi, jai Jesús jivijavabelia.

Pacuenia pan pexanaematabênexa, levaduravênêjava fufunaeyaexana yabara pelivaisi
(Mt 13.33)

²⁰ Icatsia Jesús jumaitsi jivijavabelia:

–¿De meta pelivaisi jêpa pecacajêpaejava Dioso pijajivi pevetsicuenene daxitanacuanêjava? ¿De meta pacuenia jivi livaisi tsipaebianajê peyapêtaenexa Dioso pijajivi pevetsicuenene peyacaêjêpaejava daxitanacuanêjava? ²¹ Levaduravênêjava meta pelivaisicuenia tsipaebianajê. Petiriva pan pexanaenexa, acueyabi patarrobeje trigobenonê matajêrêaba levaduravênêjavata. Nexata pan pexanaematabênexa, ayaimatabê.

Tsiquiribaupayo epatajêrêtsialia yabara pelivaisi
(Mt 7.13-14, 21-23)

²² Jesús jivi livaisi tsipaebanajetaruca pinijitotomaranêjava, tsiquiritomaraxijava ata, pepatsinexa Jerusalên tomarabelia. ²³ Nexata Jesús jivi livaisi petsipaebijavata, itsanê yanijobatsi Jesús. Bajaraponê jumaitsi Jesúsjavabelia:

–Jesús, ¿Dioso tsaja capanepaena caebitsaêtoyo saya? jai.

Nexata Jesús jumaitsi daxita jivijavabelia:

²⁴ –Xaniajanē pacuenia pacatsipaebijitsiatsi. Pajamatabēcuenesaēmēre bitso panevajēnaeyabelia itsamatacabi athēbētatsia panejonenexa tsiquiribaupayojavalia. Jivi picani itsamatacabi athēbētatsia ayaiBITSaētoXaneto jamatabējonena tsiquiribaupayojavalia. Itsiata apo caējēpaetsi tsane pejonenexa. ²⁵ Bo pexainanē itsa nonotapunaena baupa pexatatsinexa, paxamē bo jumapēnēvelia panubenaename. Nexata picani panejonenexa pabaupadocodocotsianame. Pajumaitsimē tsane: “Tajatuxanenē, panetobaupare,” pajamē tsane. Itsiata bajaraponē pacajumaitsi tsane: “Apo pacayapētaetsi cajena paxamē. Itsaverena ata papatame, apo yapētaenē,” pacajai tsane. ²⁶ Nexata paxamē pajumaitsimē tsane: “Xamē baja cajena panebarēnabaneme. Panebarēmatavējēaapamenua. Patajatamaranējava ata baja cajena jivi livaisi tsipaebabiabame,” pajamē tsane. ²⁷ Itsiata bajaraponē pacajumaitsi tsane: “Apo pacayapētaetsi cajena paxamē. Itsaverena ata papatame, apo yapētaenē. Pibisiacuene paneexanabiavi, panevecuaponare baja,” pacajai tsane. ²⁸ Dioso pijanacuataatsia pataename Abrahampijinē, Isaacpijinē ata, Jacobpijinē ata, daxita Diosojumepaebivimi profetavi ata. Daxita bajarapamonae penajuajinavanapaejiva Dioso pijanacuataatsia pataename. Nexata paxamē bajarajota pinijicuenia panatsinuename. Panavoninianamenua bitso paneanaepanaexae. Tsipaji paxamē Dioso beveliajamatabēcuenivi exanaenatsi. Pamonae pijinia mapamatacabitaje beveliajamatabēcuenivi tanetsi, bajarapamonaejajuvēnēvi, ayaiBITSaētoXaneto, itsamatacabi Dioso ayaijamatabēcuenivi exanaenatsi, jai Jesús daxitajivijavabelia. ²⁹ Itsaviriajumevi patsiana daxitanacuanejivaverena. Nexata daxita bajarapamonae naenaena penabaninexa Dioso pijanacuataatsia. ³⁰ Pamonae aeconoxae mapamatacabitaje ayaijamatabēcuenivi tanetsi, bajarapamonaejajuvēnēvi, ayaiBITSaētoXaneto, itsamatacabi Dioso ayaijamatabēcuenivi exanaenatsi, jai Jesús daxitajivijavabelia.

Pacuenia Jesús najamatabēxainaeaya sivanua Jerusalén tomarapijivi yabara pelivaisi (Mt 23.37-39)

³¹ Itsa baja Jesús najumevereta jivi livaisi petsipaebijava, fariseovi pata Jesúsjavaberenā. Nexata fariseovi jumaitsi Jesúsjavabelia:

–Jesús, mapatomara baja vecuaponareje. Nacuaeetsinē raja Herodes cabeyaxuabiapaba, jai fariseovi.

³² Jesús nexata jumaitsi fariseovijavabelia:

–Paponaremelia. Bajaraponē Herodes, jivi peyamaxēitojorobabiabinējavabelia, pajumaitsimē tsane mapacueniaje: “Jesús raja jumaitsi: ‘Ajena raja abaxē, meravia ata icatsia, vecuacapitsaponaenajē dovathi peyajavajinavanapaevi. Piavitanevi ata jamatejemayaexanaponaenajē. Nexata abaxē pameravia bajarapacuenia taexanaejava copatsianajē,’ jai raja Jesús,” pajamē tsane Herodesjavabelia. ³³ Diosojumepaebivimi profetavimi beyejebabiabatsi Jerusalén tomarata. Tsipaji profetavi acuenebi saicayatomarata petēpaejiva Jerusalén tomaravecuā. Bajaraxuata xanē ata ponaenajē tavajēnaeyabelia Jerusalén tomarabelia. Nexata ponaenajē ajena. Itsa jume, meravia, pameravia ata, tanebeyaxuabinexa Jerusalén tomarata, jai Jesús fariseovijavabelia.

³⁴ Nexata Jesús najamatabēxainaeaya sivanua Jerusalén tomarapijivi. Jerusalén tomarapijivi Jesús najamatabēxainaeaya pesivanuejavata, jumaitsi mapacueniaje:

–¡PajJerusalén tomarapijivimē, pabeyajebabiabame Diosojumepaebivimi profetavi! ¡Ibotonēta ata patseconabiabame bajarapacuenia panebeyaxuababiabinexa Diosojumelivaisi pecaponaevi paxamējavaberenā! ¡Pacuenia vacara banacoxicaetuata pecorofetobēxēpanaberena, bajara pijinia pacuenia xanē ata picani bitso jitsipabiabajē patacacaetuatsinexa, patacapanepaenexa picani panijaneconivecuā! ¡Itsiata baitsi jane paxamē apo pajejamē cajena! ³⁵ Panejumetaema. Dioso rabaja pacacopata papecaevetabiabijavami. Nexata baja panijatemplobota Dioso apo ponaponae. Xaniajanē pacuenia pacatsipaebijitsiatsi. Paxamē baja apo panetaemē tsane matavējēa. Matapania itsa panejumecovēnētame Cristonēcuenenē, Dioso taneitorobinētsica, icatsia panetaename. Itsa panesivajamatabējumaitsimēnua tsane: “Dioso, bitso yavenonare maponē najetarucaje. Bajaraponē nejamatabēcueneta najetaruca,” itsa panesivajamatabējamē tsane, nexata jane baja icatsia panetaename itsa patsianicajē, jai Jesús mapacueniaje najamatabēxainaeaya pesivanuejavata Jerusalén tomarapijivi.

14

Pacuenia Jesús jamatejemayaexana pebi, bitso daxitanē peyajinaenē, yabara pelivaisi

¹ Itsamatacabi, judiōvi penacueraevetsimatacabita, Jesús pona fariseovi penamatacaitorobinē pijaboyabelia penabaninexa. Nexata bajarapabota itsamonae fariseovi

Jesús naitaxutoacævetatsi. ²Nexata Jesús pitabarata eca pebi, daxitanë peyajinaenë. ³Jesús nexata jumaiti judíovi pecujarubivijavabelia, fariseovijavabelia ata:

—¿Pencuæraevetsimatacabita ata tsaja piavitanevi vajajamatejemayaexanaenexa, Dioso nacatocopata? Jume. ¿Apo nacatocopatsi tsaja? jai Jesús judíovi pecujarubivijavabelia, fariseovijavabelia ata.

⁴Itsiata bajarapamonæ moya ena. Nexata Jesús cobepita peyajinaenë. Jamatejemayaexana baja. Itoroba baja peponaenexa bajarapabovecua. ⁵Jesús nexata jumaiti judíovi pecujarubivijavabelia, fariseovijavabelia ata:

—Itsa panijaburro, panijabaca ata, pacatojopæjitsipareca meramëthëareca, nexata penacuæraevetsimatacabita ata, bepíjia pajutarëcëpæjitsipame. ¿Baja tsabaiti jane? jai Jesús judíovi pecujarubivijavabelia, fariseovijavabelia ata.

⁶Nexata bajarapamonæ acuenebi pejumecanaviatsijava Jesúsjavabelia.

Pacuenia Jesús jivi muxujíoba peyaiyataevitsi penaenexa petsinubijavanëta penaenexa penatsiitapetsiyániva yabara pelivaisi

⁷Fariseonë pijabota Jesús tane fariseonë pejunatsivi. Bajarapamonæ natsiitapeta peyaiyataevitsi penaenexa petsinubijavanëta penaenexa mesa muxuneneta. Nexata Jesús muxujíoba bajarapamonæ beveliajamatabëcuenevi penataenexa. Jesús jumaiti daxitajivijavabelia mapacueniaje:

⁸—Itsa pacajunata panenanabaninexa penacasabifíestajavabelia, pëtsa panatsiitapetame paneenaenexa peyaiyataevitsi penaenexa petsinubijavanëta. Tsipaji itsanë ayaijamatabëcuenenë paxamë matatoxenetsia itsa najunatsi, napatsipa. ⁹Nexata papecajunatsinë pacacujitsiparena. Nexata pacajumai tsipae: “Tocopare bajaraxua maponë peecaenexaje,” pacajai tsipae. Nexata paxamë pauramë tsipae itsa pacanatixitsiaexana paneecaenexa beveliajamatabëcuenevi penaenexa petsinubijavanëta. ¹⁰Itsa pacajunata, paenaenæ beveliajamatabëcuenevi penaenexa petsinubijavanëta. Matapania papecajunatsinë itsa pacajumai tsane: “Natixiremena. Peyaiyataevitsi penaenexa tatsinubijavanëta ecare,” itsa pacajai tsane, paenaenæ bajaraxuanëta. Nexata bajarapacuenia daxita mesa muxuneneta panenajuaenævi pacataena papecaiyataejava papecajunatsinë. ¹¹Pajivi ayaijamatabëcuenejivi natane, bajarapajivi beveliajamatabëcuenejivi taenatsi Dioso. Pajivi pijinia beveliajamatabëcuenejivi natane, bajarapajivi ayaijamatabëcuenejivi taenatsi Dioso, jai Jesús judíovi pecujarubivijavabelia, fariseovijavabelia ata.

¹²Nexata Jesús icatsia jumaiti pejunatsifariseonëtsijavabelia:

—Itsa junatame itsamonæ nebarënanabaninexa nijabota matonejepijijava, itsa jume, caniviyopijijava ata, pëtsa junatame ëneyapëtaevi. Pëtsa junatame nebarënanabaninexa ënijamonæ. Pëtsa junatame ënijamonævirivi ata. Pëtsa junatame ëricovi, pamonaë nijabo muxuneneta jinavanapa. Tsipaji bajarapamonæ juya canamatamojunatsipa pijabota pecabarënanabaninexa. Nexata bajarapacuenia canamatamotsipa bajarapamonæ. ¹³Itsa junatame itsamonæ fiesta nebarëxanaenexa, junatsianæ bepejiovivi, penabejenaevi ata, pejayuyayunaevi ata, bitso pitaxutotsëcënaevi ata. ¹⁴Nexata bajarapacuenia pepacune jamatabëcuenebarëyamë tsane. Tsipaji bajarapitsivi acuenebi juya pecanamatamojunatsijava tsane. Nexata nijamatamo xainaenæ pamatacabi icatsia Dioso asäyæxanaena pamonaë tæpa, pexaniajamatabëcuenevimi, jai Jesús pejunatsifariseonëtsijavabelia.

Pacuenia Jesús jivi livaisi tsipaeba pinijífiesta pexanaenë pelivaisicuenia yabara pelivaisi (Mt 22.1-10)

¹⁵Daxita mesa muxuneneta penaevi jumetane Jesús petsipaebilivaisi. Nexata fariseoviyajuvënëne jumaiti Jesúsjavabelia:

—Jamatabëcuenebarëya tsane pajivi nanabaniana Dioso pijanacuatatsia, jai fariseoviyajuvënëne.

¹⁶Nexata fariseovi peyapëtaenexa itsamonæ Dioso apo pejumecovënëtsijava, junatsi atatsi, Jesús jumaiti comparaciõncuenia mapacueniaje:

—Fiesta pexanaenë pijajivi itoroba ayaijiva pexaejava pexanaenexa. Nexata tajëvelia junatsiaexana jivi ayaiBITSaëtõxaneto petopatsinexatsi. ¹⁷Bajaraxuacujinae pexaejava baja itsa vereta, fiesta pexanaenë itoroba pijajivitonë peponaenexa pejunatsivijavabelia: “Naxanitsia baja. Pexaejava rabaja vereta,” pejinexa. ¹⁸Itsiata baitsi jane daxita pejunatsivi apo topatsisirena. Itsanë saya peponaeyaniva, pijajivitonëta tonajumeitorobarenatsi pejumaitsilivaisi mapacueniaje: “Xanë aeconoxaeta comuatabajë ira. Nexata ponæjitsianë bajarabelia tatanexa bajarapaira. Pexaniacune netoexanaenæ. Pëtsa jamatabëcueneanaepaname xanëjavaberena,” pejailivaisi tonajumeitorobarenatsi pijajivitonëta. ¹⁹Itsanë pijinia saya peponaeyaniva, pijajivitonëta tonajumeitorobarenatsi

pejumaitsilivaisi mapacueniaje: “Xanë comuatajê diez ponêbeje bueyu tanetoroborobo-
caevinexa. Nexata ponaejitsianê taêjêtsinexa bajarapabueyu. Pexaniacuene netoexanae-
name. Pêtsa jamatabêcueneanaepaname xanêjavaberena,” pejailivaisi tonajumeitorobare-
natsi pijajivitonêta. ²⁰ Itsanê pijinia saya peponaeyaniva, pijajivitonêta tonajumeitoro-
barenatsi pejumaitsilivaisi mapacueniaje: “Xanê raja aeconoxaeta nacasabajê. Bajarax-
uata acuenebi taponaejava,” pejailivaisi tonajumeitorobarenatsi pijajivitonêta. Bajara-
pacuenia daxita pamonae picani fiesta pexanaenê junata, peponaeyaniva saya tona-
jumeitorobarenatsi pijajivitonêta. ²¹ Nexata fiesta pexanaenê pijajivitonê naviarena
pijatuxanenêjavaberena. Tsiapaeba pijatuxanenêjavabelia daxita pacuenia najumerubatsi.
Nexata fiesta pexanaenê anaepana. Jumaitsi pijajivitonêjavabelia: “Naxanitsiayo liamêre
tomarabelia. Junatanajetarucaename jivi pinijicallexanetonêjava, tsiquiricallexijava
ata. Junatsianame bepejiobivi, penabejenaevi ata, pejayujayunaevi ata, bitso pitax-
utotsêcênaevi ata, penanabaninexa tajabota,” jai fiesta pexanaenê pijajivitonêjavabelia.
Nexata baja pijajivitonê pona pejunatsinexa jivi. ²² Jivi pebarêpatsicujinaarena, jumaitsi
pijatuxanenêjavabelia: “Tajatuxanenê, exanajê rabaja taneitorobicueniamê. Itsiata abaxê
sajinanubena itsamesanê itsamonaenexa,” jai bajaraponê pijatuxanenêjavabelia. ²³ Nexata
petuxanenê icatsia jumaitsi pijajivitonêjavabelia: “Liamêre icatsia carreteranêjavabelia,
namutonêjavabelia ata. Junatanajetarucaename asaêyata carreterajava peponaevi, na-
mutojava ata peponaevi, penanabaninexa tajabota pevênêcaenexa tajabo. ²⁴ Pamonae
picani copiata junatajê penanabaninexa, caenê ata bajarapamonaejavuvênê, apo
naxae tsane bajarapapexaejava,” jai petuxanenê pijajivitonêjavabelia, jai Jesús fariseoviya-
juvênêjavabelia jivi peyapêtaenexa itsamona Dioso apo pejumecovênêtsijava, junatsi
atatsi.

*Pacuenia Jesús tsiapaeba jivijavabelia, pajivi Jesús jamatabêpênaponatsi, copiaya penaja-
matabêcueneveretsinexa Jesús pepênaponaejavênaevatsi yabara pelivaisi
(Mt 10.37-38)*

²⁵ Jivibitsaêtoxaneto Jesús pênajinavanapatsi. Nexata Jesús napênëyorota bajarapamonae-
javabelia. Jesús jumaitsi mapacueniaje:

²⁶ –Ponê xanêjavaberena patsi ata, itsiata itsa apo niasiva tsane daxita pijamonae
matatoxenetsia, nexata bajaraponê apo tajajivitonê tsane. Bajaraponê itsa apo niasiva
tsane paxa, pena ata, pematapijivi ata, peyuyapijivi ata, piyasivajava matatoxenetsia,
nexata apo tajajivitonê tsane. Bajaraponê itsa apo niasiva tsane pijava, pexi ata, pijacuata
penasivajava ata, matatoxenetsia, nexata bajaraponê apo tajajivitonê tsane. ²⁷ Ponê
xanê yabara itsamona jamatabêpebeyaxuabixaetsi, jamatabêpebejiobiaexanaexaetsinua,
nexata pecajunavi itsa apo nepênaponae tsane, bajaraponê apo tajajivitonê tsane.
²⁸ Paxamêjavuvênê itsa jamatabêxana bo, athêbêabetsia piapiaboxanetotsia, nexata
copiaya najamatabêcueneveretsipa pacuenia exanaejitsia. “¿Netocaêjêpa tsamêra
baja tajapalata taveretsinexa tajabo?” jamatabêjai tsiapae copiaya. ²⁹ Itsa apo
najamatabêcueneveretsi tsiapae copiaya, nexata bo pexanaejava taxuxuabi ata,
apo veretsi tsiapae itsa apo tocaêjêpaetsi pijapalata. Nexata pijabo petotaevitsi,
capocaponaejitsipatsi. ³⁰ Baracuaicuaijatsi tsiapae: “Bajaraponê picani taxuxuaba
pijabo pexanaejava. Itsiata apo tocaêjêpaetsi pijapalata peveretsinexa pijabo,” jaitsi
tsiapae capocaponaejava petotaevitsi. ³¹ Nacuaevetsinê pijinia, itsanacuaeverena itsa
sivanavajabitsaêtsijitsiatsi, nexata copiaya najamatabêxainaejitsipa. Jamatabêjumaitsi
tsiapae mapacueniaje: “Tajajivi saya diez mil ponêbeje. Tanebarêtsimaxêponaevinexa,
veinte mil ponêbeje. ¿Baja tsamêra tajajivi nebarêcuenecaêjêpaena tabarêbenexa
tajavajabitsaenê pijajivi, veinte mil ponêbejejavabelia?” jamatabêjai tsiapae copiaya.
³² Nexata bajarapacuenia penajamatabêxainaejitsipa, bajaraponê yapêtaejitsipa apo
pebarêcuenecaêjêpaevatsi pebarêbenexa pijavajabitsaenê pijajivijavabelia. Itsa abaxê tajê
pevajênae pepatsijavarena pijavajabitsaenê, nexata najumexuabijitsipalia pijajivita
penabarajamatabêcuene xanepanaenexabeje vajabitsaêcuene pexanaeyanivabeje.
³³ Bajara pijinia pacuenia paxamêjavuvênêvi ata itsa apo najamatabêcueneveretsi copiaya
penajamatabêcueneponêyorotsinexa daxita pexainaejavavecua, nexata acuenebi tajajivi
taexanaenexa, jai Jesús jivi ayaibitsaêtoxanetojavabelia.

*Pacuenia Jesús jivi livaisi tsiapaeba comparacióncuenia pacuenia jamatabêcueneitsi tsiapae
Jesús pijajivitonê itsa copatsipa Jesús pejumecovênêtsijavami yabara pelivaisi
(Mt 5.13; Mr 9.50)*

³⁴ Jesús icatsia comparacióncuenia jumaitsi jivi ayaibitsaêtoxanetojavabelia mapacueniaje:
–Yajo abaxê itsa xaica, xanepana. Itsiata yajo pexaicaejavami itsa ajibi tsiapae, ¿detsa
pacuenia icatsia naxaicaejaxanaejitsipa? Acuenebi. ³⁵ Itsacueniejavayonexa ata baja
apo xanepanae tsiapae. Nexata peubijava petsibacathocaenexa ata, apo xanepanae

tsipae. Tspijaji pacuenia peubijava petsibacathocaebeno, itsa tsibacathoca, peubijava naxaniabiaexana, bajara apo itsi tsipae bajarapayajomi. Pacuenia bacatasi ata itsa tsibacathoca, peubijava naxaniabiaexana, bajara apo itsi tsipae bajarapayajomi. Nexata saya jema xuabijitsipa bajarapayajomi. Pajivi jamatabënejumeyapëtane patacatsipaebilivaisi, nenamuxunaevetsi xaniavaetsia, jai Jesús comparacióncuenia bajarapamonaejavabelia.

Bajarapacuenia Jesús jumaiti comparacióncuenia jivi peyapëtaenexa pacuenia jamatabëcuenetsipae Jesús pijajivitonë itsa copatsipa Jesús pejumecovënëtsijavami. Nexata Diosovecua naxuabijitsipa.

15

Pacuenia Jesús jivi livaisi tsipaeba oveja penaxuabinë pelivaisicuenia yabara pelivaisi (Mt 18.10-14)

¹ Gobierno pejamatabëcuene impuestomatamo pematamoyanijobabiabivi, pata Jesúsjavaberena. Yajavaparenanua piamatabëcuenebejevi. Bajarapamonae pata penamuxunaevetsinexa Jesús petsipaebilivaisi. ² Nexata fariseovibeje judíovi pecujarubivibeje itsa tane gobierno pejamatabëcuene impuestomatamo pematamoyanijobabiabivi pepatsijava Jesúsjavaberena, itsa tanenua piamatabëcuenebejevi ata pepatsijava Jesúsjavaberena, nexata fariseovibeje judíovi pecujarubivibeje Jesús baracuaicuaijaiti. Bajarapamonae najumaiti mapacueniaje:

–Mara ponëje naneconita Diosojavabelia. Tspijaji copiapitabiaba piamatabëcuenebejevi ata. Naxaeyabiabanua pexaejava bajarapamonae, najai fariseovibeje judíovi pecujarubivibeje Jesús yabara jamatabëcuenenavëxaniabiaya.

³ Nexata Jesús pebaracuaicuaijaixaetsi, Jesús bajarapamonaejavabelia livaisi tsipaeba mapacueniaje:

⁴ –Paxamëyajuvënëne xinaejitsipa cien ponëbeje oveja. Nexata itsa toyajuvënënaxuabinëtsipatsi caenë, oveja pexainaenë petusatota puenetsipa noventa y nueve ponëbeje. Nexata jaitisipa petonaxuabinëtsi matapania pecaxitarabijavabelianexa.

⁵ Nexata oveja pexainaenë itsa baja caxitarabijitsipa petonaxuabinëtsi, barëyataejitsipa. Boyaberena vëtarapatsipa petonaxuabinëtsi. ⁶ Nexata oveja pexainaenë petonaxuabinëtsi itsa capatsipa boyaberena, junatsipa peyapëtaevitsi. Junatsipa pijabo muxuneneta imoxoyo penaevi ata. Nexata oveja pexainaenë jumai tsipae bajarapamonaejavabelia: “Panecobenabarëyamëre. Tspijaji tajaovejayo, tanetonaxuabinëyomi picani, caxitarabajë baja,” jai tsipae oveja pexainaenë bajarapamonaejavabelia. ⁷ Xaniajanë pacuenia pacatsipaebijitsiatsi. Mapanacuataje Dioso pitabarata pijaneconi pexinaejivi ata, itsa copatsiana pibisiacuene pexanabiabijava, itsa najamatabëcuenepënëyorota Diosojavabelia, bajara pijinia pacuenia sivabarëyatsi tsane athëbëtsia pejinavanapaevi. Bajarapajivi, athëbëtsia pejinavanapaevi, sivabarëyatsi tsane noventa y nueve pajivibeje Dioso pitabarata planeconijibitsavanapaevi pesivabarëyatsiabiabijava matatoxenetsia, jai Jesús fariseovijavabelia, judíovi pecujarubivijavabelia ata.

Pacuenia Jesús livaisi tsipaeba penaxuabipalatanëyo pelivaisicuenia yabara pelivaisi

⁸ Icatsia Jesús jumaiti fariseovijavabelia, judíovi pecujarubivijavabelia ata:

–Petiriva xinaejitsipa diez ponëbeje palatanëanë, bitso penamatamotsinëanë. Nexta itsa toyajuvënënaxuabijitsipatsi caenë, itanojotsipa lámpara. Bo ira cajuetsipa xaniavaetsia pejaitsinexa. Matapania itsa pitabuatsipa petonaxuabipalatanëtsi, copatsipa pejaitsijava. ⁹ Itsa baja caxitarabijitsipa petonaxuabipalatanëtsi, nexata junatsipa peyapëtaevitsi. Junatsipa pijabo muxuneneta imoxoyo penaevi ata. Bajarapova nexata jumai tsipae bajarapamonaejavabelia: “Panecobenabarëyamëre. Tspijaji tajapalatanëyo, tanetonaxuabinëyomi picani, caxitarabajë baja,” jai tsipae petiriva bajarapamonaejavabelia. ¹⁰ Xaniajanë pacuenia pacatsipaebijitsiatsi. Pajivi copatsiana pibisiacuene pexanabiabijavami, itsa najamatabëcuenepënëyorotsiananua Diosojavabelia, bajara pijinia pacuenia athëbëtsia angelevi sivabarëyatsi tsane, jai Jesús fariseovijavabelia, judíovi pecujarubivijavabelia ata.

Pacuenia picani juyapijinë paxavecua naxuabaponapona yabara pelivaisi

¹¹ Icatsia Jesús livaisi tsipaeba fariseovijavabelia, judíovi pecujarubivijavabelia ata. Jesús jumaiti mapacueniaje:

–Pebi xaina anijanëbeje pexënatobeje. ¹² Nexata juyapijinë jumaiti paxajavabelia: “Axa, xuanë picani netocopatame tapitsinexa nevënamuto, bajaraxuanë abaxë apo tēpae atamë, nerajure baja tajajavanexa,” jai juyapijinë. Nexata pexënatobeje pexainaenë

pexēnato bejejavabelia rajuta daxita pexainaejavanēmi. ¹³ Nexata paxa perajutsicujinaetsibeje, caematacabibejecujinae, juyapijinē canajeta daxita pexainaejavanēmi pecaetuatsinexa palata. Bajaraxuacujinae jane baja pona tajēnacuaayabelia. Bajarajotalia pibisiacune exanaponapona. Nexata vereta daxita paxa perajutsijavanēmitsi. ¹⁴ Nexata daxita bajarapanacuapijivi janibocuene tsipatsi. Bajaraponē peveretsicujinae daxita pijapalatami, bitso namatavenona pexaejava. ¹⁵ Nexata jaita penacuenebinexa bajarapanacuata peecaenējavabelia. Bajaraponē itorobatsi pijairanējava petoetaponaponaejava pijamarrano. ¹⁶ Nexata bajaraponē bitso piajanixae, pepenenexa picani ayaijava jamatabēxaeyabiaba bopocuai, marrano pexaeyabiabijava. Bajarajota itsajivi ata apo rajutsitsi pexaejavanexa. ¹⁷ Nexata belia bajaraponē xaniavaetsia najamatabēxaina. Jamatabējumaitsi mapacueniaje: “Taxa pijabota pexaejava ayaijava xaina pijajivi ayaibit-saēto piabatsinexa. Tonacopatabiabatsi ayaijava pexaejava. Itsiata xanē majotaje tēpaejitsianē baja tajani. ¹⁸ Nexata taxajavabelia naviatiansianjē. Jumaitsinē meta tsane taxajavabelia: ‘Axa, pibisiacune exanajē Diosojavabelia, xamējavabelia ata. ¹⁹ Abejenē raja. Auranē baja rovia xamējavabelia: ‘Taxēnato,’ tanejamējava. Nexata saya nijajivitonēnē nexanare,’ janē meta tsane taxajavabelia,’ jamatabējai juyapijinē. ²⁰ Nexata baja naviatia paxajavabelia.

Itsa abaxē tajēverena najetaruca, pexēnato pexainanē copiatane. Nexata bajaraponē pexēnato itaxutobejibiatane. Mataenetsia cujinaejinalia pexēnato. Nacoxivaetabarucapona. Copiapitsiaya itabaratsutsunexuaba pexēnato. ²¹ Nexata bajaraponē jumaitsi paxajavabelia: ‘Axa, pibisiacune raja exanajē Diosojavabelia, xamējavabelia ata. Abejenē raja. Nexata baja rovia auranē xamējavabelia: ‘Taxēnato,’ tanejamējava,’ jai paxajavabelia. ²² Itsiata baitsi jane pexēnato pexainanē bajarajota jumaitsi pijajivijavabelia: ‘Naxanitsia. Bepijiayo taxēnato patocaponaremena daxita matatoxenetsia pexaniapana, penajumaxuabipana. Pajumaacare bajarapanata. Anillonua pacobesixatatare. Zapatonua pataxuxatatare. ²³ Penasitsinē becerro papiremelia. Pabeyaxuabianame vajaxaenexa. ¡Fiesta exanaenatsi vajabarēyanexa! ²⁴ Tsipaji raja maponē taxēnatoje: ‘Tēpa meta baja,’ sivajamatabējanē picani. Itsiata tsaena ponapona. ‘Naxuaba meta baja,’ sivajamatabējanē picani. Itsiata baja icatsia patajopa,’ jai pexēnato pexainanē pijajivijavabelia. Nexata taxuxuaba fiesta pexanaejava.

²⁵ Bajarapamatacabi matapijinē pabiabelia nacuenebaponapona. Nexata penaviatsinē bo itsa imoxoyotanajetaruca, jumetane música. Jumetanenua peyavajibijava. ²⁶ Nexata bajaraponē junata paxa pijajivijavuvēnēnē. Jumaitsi: “¿Detsa pitsicune yabara fiesta paexaname?” jai matapijinē. ²⁷ Nexata paxa pijajivitonē jumaitsi: “Nejuyapijinē baitsi patajopa. Axa nexata paneitoroba patabeyaxuabinexa becerro, penasitsinē. Jamatejema tsaena ponapona nejuyapijinē,” jai bajaraponē matapijinējavabelia. ²⁸ Nexata matapijinē bitso anaepana. Apo jitsipae boyabelia pejonejava. Nexata paxa sivapitsaparenatsi. Jumaitsi pexēnatojavabelia: “Naxanitsia. Najonemeya,” jai pexēnatojavabelia. ²⁹ Nexata matapijinē jumaitsi paxajavabelia: “Jume. Bajayajebi baja rovia catonacuenebaponaponatsi xanē. Caeto ata cajena apo cajumeapajeaitsi. Itsiata baitsi jane caeto ata apo nerajutsimē chivoyo ata fiesta tabarēexanaenexa tayapētaevi. ³⁰ Itsiata aeconoxae patajopa baja nexēnato, ponē vereta nijapalatami petirivijavabelia. Nexata tobeyaxuabame becerro, penasitsinē,” jai matapijinē paxajavabelia. ³¹ Nexata bajaraponē jumaitsi pexēnatojavabelia: “Taxēnato, xamē cajena xanējavata ponaponame daxitamatacabi. Nexata daxita xua taxainaejava nijajava baja cajena. ³² Itsiata aeconoxae namatavenonatsi vajabarēyanexa. Tsipaji nejuyapijinē: ‘Tēpa meta baja,’ tasivajamatabējainēmi, itsiata tsaena asaē. Penaxuabaponaponanēmi icatsia baja patajopa,’ jai bajaraponē pexēnatojavabelia, jai Jesús mapalivaisije fariseovijavabelia, judíoivi pecujarubivijavabelia ata.

16

Pacuenia pijatuxanenē pecobecovē petoevetsinē toveretapona pevetsiaexanaejavanēsi yabara pelivaisi

¹ Jesús pijajivijavabelia livaisi tsipaeba. Jumaitsi mapacueniaje:

–Petuxanenē, bitso pexainanē, ponapona. Bajaraponē xaina pijajivitonē peto-evetsinexatsi pecobecovē. Itsiata pepēya pijajivitonē pecobecovē toveretaponatsi. Nexata itsamonae tsipaebatsi pepēya pijajivitonē pecobecovē petoveretaponaejavatsi. ² Nexata petuxanenē pijajivitonē junata. Jumaitsi pijajivitonējavabelia: “Xamē pina tapēya netoveretaponame tacaevetsiaexanaejava. Pabaxutojavabelia matamoyaquinarubame xuanē canajetaponame tacobecovē, xuanēnua netocomuataponame, bajarapabaxuto netocanaviatsianame. Nexata baja itsa netocanaviatsianame bajarapabaxuto, matavējēa

apo netoevetsimē tsane tacobecovē,” jai petuxanenē pijajivitonējavabelia. ³ Nexata pijajivitonē sivapona bajarapabaxuto petocanaviatsinexa pijatuxanenē. Nexata bajarapabaxuto petocanaviatsivajēnae jamatabējumaiṡi: “¿De tsaeta xua exanaenajē? Tajatuxanenē baja necapitsapaejitsia pecobecovē tatoevetaponaponaejavavecua. Apo necaējēpae tsane tanacuenebinexa pabi tajacuta tanaevetsinexa. Bitso auranēna tsipae itsamonaejavabelia amoneya tavajētaponaenexa palata tanamitsacomuatabiabinexa taxaajava. ⁴ Taneamoneyabivi meta abaxē, xua niamoneyaba, bevelia tovēnējonaponaenajē. Nexata tajatuxanenē tanecapitsapaeucujinae, bajarapamonaē pijaboyabelia itsa ponae-najē, xaniavaetsia necopiapitsiana. Nexata bajarapamonaējavata naponaponaenajē,” jamatabējai bajaraponē. ⁵ Nexata bajaraponē junata daxita pamonaē abaxē amoneyabatsi. Nexata pamonaē amoneyabatsi, bajarapamonaē, caenē canacujitsia, patapona bajaraponējavabereṡa. Nexata bajaraponē coplaya petopatsinēṡisjavabelia jumaiṡi: “¿Detsa pacuenia niamoneyabame abaxē, xua tajatuxanenē pijajava catsicopatatsi? jai bajaraponē. ⁶ Nexata ponē amoneyabatsi, jumaiṡi: “Camoneyabatsi abaxē tacarajutsinexa aceiteranē ochocientos pagalónbeje,” jai. Nexata bajaraponē jumaiṡi piamoneyabinēṡisjavabelia: “Bevelia saya catocopatsianatsi. Mara picani pacuenia niamoneyabameje, tanetoitanerubibaxutotamēje. Pire cajena. Icatsia itsabaxutojavabelia saya cuatrocientos pagalónbejenexa bepījia yaquinarure. Nexata bajarapacuenia tajatuxanenē rajutsianame,” jai bajaraponē piamoneyabinēṡisjavabelia. ⁷ Bajaraxuacujinae icatsia itsanē topatatsi. Nexata icatsia jumaiṡi bajaraponējavabelia: “¿Jica xamē? ¿Detsa pacuenia niamoneyabame?” jai. Nexata bajaraponē jumaiṡi: “Camoneyabatsi abaxē tacarajutsinexa cien pabultobeje trigoxubultonē,” jai. Nexata bajaraponē jumaiṡi piamoneyabinēṡisjavabelia: “Mara picani pacuenia niamoneyabameje, tanetoitanerubibaxutotamēje. Pire cajena. Icatsia itsabaxutojavabelia saya ochenta pabultobejenexa yaquinarure. Nexata saya bajarapacuenia tajatuxanenē rajutsianame,” jai bajaraponē piamoneyabinēṡisjavabelia. Bajarapacuenia exanapona daxita piamoneyabivitsi-javabelia pesivajamatabēcuene xanepanaenexatsi, xaniavaetsia pecopiapitsinexatsi pijabota penaponaponaenexa, pijatuxanenē itsa navecuacapitsapatsi. Nexata jane baja daxita piamoneyabivitsi tocanaviabatsi. Bevelia matamota petoyaitanetuarutaponae baxutonēṡi. ⁸ Bajaraxuacujinae pijatuxanenējavabelia pona perajutsinexa jane baja bajarapabaxutonē. Nexata pijatuxanenē jumaiṡitsi: “Xamē baja rovia pibisiacuene exaname. Itsiata baitsi jane niatitsacaxae, exaname pacuenia catoxanepanaejitsia nevajēnaeyabelia,” jaitsi pijatuxanenē. Nexata pacuenia pijatuxanenē pepēya pecobecovē petocanajetabiabinē ajamatabēcueneitatsaca, bajara pijinia pacuenia Dioso apo pejumecovēnēṡivi ajamatabēcueneitatsaca Dioso pejumecovēnēṡivi matatoxenetsia mapanacuapijicueṡe yabaraje, jai Jesús pijajivijavabelia.

⁹ Icatsia Jesús jumaiṡi pijajivijavabelia:

–Pacamuxujiobatsi xaniavaetsia. Mapanacuapijipalatata payavenonare itsamonae. Nexata pacuenia pijatuxanenē pecobecovē patoevetsinē, pesivajamatabēcuene xanepanaevitsi xaina, xaniavaetsia pecopiapitsinexatsi pijabota penaponaponaenexa pijatuxanenē pecapitsapaeucujinaetsi, bajara pijinia pacuenia paxamē ata athēbētatsia paxainaename papecasivajamatabēcuene xanepanaevi. Nexata pamatacabi patēpame, itsajota apo panamatavenonaemē palata, Dioso pacacopiapitsiana apo pevereverecaebonējavatatsia, jai Jesús pijajivijavabelia.

¹⁰ Icatsia Jesús jumaiṡi pijajivijavabelia:

–Pajivi xaniavaetsia toeveta tsiquirijavayo ata itsanē pecobecovē, bajarapajivi xaniavaetsia toevetsipa ayajiva ata. Pajivi bijiyaya toeveta tsiquirijavayo ata itsanē pecobecovē, bajarapajivi bijiyaya toevetsipa ayajiva ata. ¹¹ Itsanē pecobecovē, mapanacuapijicueṡe, palata ata, xaniavaetsia itsa apo patoevetsimē tsipae, nexata itsajivi ata apo pacaevetsiaexanae tsipae Dioso pijacuene, xua bitso namatamota mapanacuapijicueṡe matatoxenetsiaje. ¹² Itsa xaniavaetsia apo patoevetsimē tsipae itsanē pecobecovē, nexata pitsijava picani pacaevetsiaexana, bajarapitsijava itsajivi ata apo pacarajutsi tsipae pepo panijajavanexa, jai Jesús pijajivijavabelia.

¹³ Icatsia Jesús jumaiṡi pijajivijavabelia:

–Itsajivi ata acuenebi caecuenia petonacuenebijava anianēbeje pijatuxanenēbeje. Caenējavabelia jitsipaejitsipa petonacuenebijava. Itsanējavabelia apo jitsipae tsipae petonacuenebijava. Bajara pijinia itsi pajivi bitso jitsipa Dioso. Pajivi bitso jitsipa Dioso, nexata itsa tonacueneba Dioso, acuenebi bitso pejitsipaejava palata, jai Jesús pijajivijavabelia.

¹⁴ Fariseovi, bitso palata pejitsipaevi, jumetaeyena Jesús petsipaebilivaisi pijajivijavabelia. Nexata fariseovi jumecapocaponatsi Jesús. ¹⁵ Jesús nexata jumaiṡi fariseovijavabelia:

—Paxamē pajitsipabiabame jivi pejumaitsinexa paxamē yabara: “Fariseovi raja pexaniajatabēcuenevi,” pejainexa. Itsiata baitsi jane Dioso pacajamatabēcuenyepētane pexaniajamatabēcuene apo panexainaevicuene. Pacuene bitso jivi tsitapexaniacuenetsi, bajarapacuene Dioso apo tsitapexaniacuenetsi, jai Jesús fariseovijavabelia.

Pacuenia Jesús tsipaeba fariseovijavabelia bajayata Dioso Moiséspijinēta penajumecopat-silivaisi, pacuenia ata Dioso pijajivi evetsijitsia, yabara pelivaisi

¹⁶ Icatsia Jesús jumaitsi fariseovijavabelia:

—Juanpijinē jivibautisabinēmi pepatsvijānaeya, jivi xaina Dioso Moiséspijinēta penajumecopatsilivaisi pejumecovēnētsinexa. Bajayata Diosojumepaebivi profetavi ata petsipaebilivaisianē ata, xaina jivi pejumecovēnētsinexa. Itsiata Juanpijinē pepatsicujinae, pexanialivaisi tsipaebaponajē. Tsipaebaponajē Dioso pijajivi pevetsijavanexa. Nexata daxitajivi bitso jitsipa penajonexa Dioso pijanacuayabetsia, jai Jesús fariseovijavabelia.

¹⁷ Icatsia Jesús jumaitsi fariseovijavabelia:

—Mapanacuaeje, itaboxo yajava, jemata vereverecaena. Itsiata baitsi jane palivaisi Dioso Moiséspijinēta najumecopata, bajarapacuenia apo verevereca tsane. Nexata daxita pacuene yabara tajēvelia vajunupaeba bajarapalivaisita, pepacuene xaniajai tsane, jai Jesús fariseovijavabelia.

Pacuenia Jesús livaisi tsipaeba penacojobinē pijava pexuabianiva yabara pelivaisi (Mt 19.1-12; Mr 10.1-12)

¹⁸ Icatsia Jesús jumaitsi fariseovijavabelia:

—Ponē pijava xuaba, nexata icatsia itsava itsa pita, bajaraponē pibisiacuene exana pevitota. Nexata naneconita Diosojavabelia. Tsipaji pepo pijavavecua jaita itsava. Dioso cajena abaxē bajaraponē pexuabiva pepo pijavacuenia totanetsi. Ponē ata itsanē pexuabiva pita, bajaraponē ata pibisiacuene exana pevitota. Nexata naneconita Diosojavabelia. Tsipaji itsanē pijava yacajērēta, pova abaxē Dioso tanetsi itsanē pepo pijavacuenia, jai Jesús fariseovijavabelia.

Bitso riconē Lázaro beje yabara pelivaisi

¹⁹ Icatsia Jesús livaisi tsipaeba fariseovijavabelia. Jesús jumaitsi mapacueniaje:

—Bitso pexainanē, riconē, ponapona. Daxitamatacabi naxatababiaba bitso pexaniaviriajavanē. Pexaejava, pexaniaviriajava, xaeyabiaba. ²⁰ Riconē pijabo matatoyorotsia yacaranata ibopanaxanetonē mataropotsia pefaratsijavaxanetota. Nexata bajarapacaranatsijavaxaneto jumavelia baupa muxuneneta, bepejobinē, Lázarovēnēnē, boquecabiaba. Lázaro daxitanē perabētsabana. ²¹ Lázaro picani jamatabēxaeyabiaba riconē pexaeyabiabijavata piothopaepērē mesa bēxēpanareca. Avirixi ata patabiaba itsajota Lázaro bocabiaba. Petsabanaejava raebabiabatsi. ²² Nexata baja belia Lázaro tēpa. Petēpaecujinae Lázaro āngelevi caponayatsi Dioso pijanacuayabetsia, itsabetsia Abrahampijinē petēpaecujinae ponapona. Bajaraxuacujinae riconē ata tēpa. Mēthētatsi. ²³ Riconēmi petēpaecujinae pata petēpaevi pepatabiabinacuayabelia. Nexata bajarapanacuata riconēmi bitso navixaetaeya bejiobi tsaponapona. Nexata riconēmi athēbēa benāecotsia. Tajētatsia taenuta Abraham penuaejava. Lázaro nucaya Abraham pemuxunenetsia. ²⁴ Nexata riconēmi vavajai. Jumaitsi Abrahamjavabelia: “Amo Abraham, nitaxutotsoniataema. Netoitorobimica Lázaro. Nacobeupijabutsi merata neebarētocainejebiaexanaejitsia. Bitso jamatabēfaenajē mapatajutaje,” jai riconēmi. ²⁵ Nexata Abraham jumaitsi riconēmijavabelia: “Tamomo, najamatabēnapire. Pamatacabi pinaena abaxē asaē taponapona nenaexanaeirata, ēpexaniacuene picani xainame. Lázaro pijinia pamatacabi abaxē asaē taponapona, bitso picani bejiobi. Itsiata juya mapamatacabije pexaniacuenia majotaje catsuponapona. Xamē biji navixaetaeya ponapona. ²⁶ Itsajivi jamatabēponae ata bajarabereca, acuenēbi itsiata pepanepaenexa bajarabereca. Tsipaji bitso ayaiitapajanitoxanetoreca. Bajaraxuata paxamē ata apo pacacajēpae panepanepaenexa mabetsinaje,” jai Abraham. ²⁷ Nexata icatsia riconēmi jumaitsi Abrahamjavabelia: “Amo Abraham, pexaniacuene cavajētatsi. Tonajumeitorobianame Lázarota taxa pijaboyabelia. ²⁸ Bajarajotalia xainajē cinco ponēbeje tajuyapijivi. Xaniavaetsia Lázaro tsipaebiana. Mux-ujibiana bajarapamonae ata peponaeyaniva mapanavixaetaeyabiabinacuaya berenaje,” jai riconēmi Abrahamjavabelia. ²⁹ Nexata icatsia Abraham jumaitsi riconēmijavabelia: “Bajarapamonae baja xaina Moiséspijinē peyaquinaelivaisianē. Diosojumepaebivimi profetavi ata peyaquinaelivaisianē ata, xaina baja. Nexata nejuyapijivi itsa apo jitsipae tsane peponaenexa bajarapanacuayabelia, nexata nejuyapijivi jumecovēnētsiana bajarapamonae mi peyaquinaelivaisianē,” jai Abraham riconēmijavabelia. ³⁰ Riconēmi icatsia jumaitsi Abrahamjavabelia: “Jume raja. Apo jumecovēnētsi tsane cajena bajarapalivaisianē. Itsiata itsajivi itsa asaē tsanē petēpaecujinae penaviatsinexa pecovēyabelia, tsipaebiana

tajuyapijivijavabelia. Nexata tajuyapijivi copabiana pibisiacuene pexanabiabijava. Najamatabêcuenepênêyoroetsiana Diosojavabelia,” jai riconêmi Abrahamjavabelia. ³¹Nexata icatsia Abraham jumaitsi riconêmijavabelia: “Nejuyapijivi itsa apo jumecovênêtsi Moiséspijinê peyaquinaelivaisianê, Diosojumepaebivimi profetavi peyaquinaelivaisi ata, nexata pajivi asaê petêpaecujinae, mavelia ponae ata tsipaeje petsipaebinexa nejuyapijivijavabelia, itsi-ata nejuyapijivi apo jumecovênêtsi tsipae bajarapajivi ata,” jai Abraham riconêmijavabelia, jai Jesús fariseovijavabelia.

17

Pacuenia Dioso pijajivixae, itsamonae jamatabêcuenejëbijiatsi pibisiacuene pexanaenexa yabara pelivaisi

(Mt 18.6-7, 21-22; Mr 9.42)

¹Jesús jumaitsi pijajivijavabelia:

—Xanê tajajivixae, itsamonae jamatabêcuenejëbabiabianatsi pibisiacuene pexanaenexa. Nexata itsamonae pejamatabêcueneta tajajivi pibisiacuene exanaena. Nexata pajivi pejamatabêcueneta tajajivi pibisiacuene exanaena, bajarapajivi Diosojavabelia bitso naneconitsiana. Nexata bajarapajivi pinijicuenia Dioso naneconitsiaexanaenatsi. ²Itsamonae Dioso pejumecovênêtsivi, abaxê bepejevaxijamatabêcuene xaina Dioso pejumecovênêtsijava yabara. Nexata apo ajamatabêcuenesaê. Nexata pajivi tajajivijavabelia pibisiacuene jamatabêexanaeyaexana, abaxê tajajivijavabelia pibisiacuene exanaeyaexanaejeva, bajarapajivi bevêsicêtsati ibotoxanetojavabelia. Nexata bajarapajivi yamaëya, ibotoxaneto yajava, bexuarecatsi pucaxaneto tuatujâreca. Bajarapacuenia bexuarecatsi, tajajivijavabelia pibisiacuene itsa exanaeyaexana bitso penaneconitsianiva Diosojavabelia. ³Nexata xania. Panayajivitaema pibisiacuene, jai Jesús pijajivijavabelia.

Icatsia Jesús jumaitsi pijajivijavabelia:

—Itsanê Dioso panenajuajumecovênêtsivi pibisiacuene itsa pacaexanaena paxamêjavaberena, bajaraponê xaniavaetsia paitavetsianame. Nexata baja itsa aura tsane pibisiacuene papecaexanaejava yabara, nexata pexaniajajumeta itsa pacanavajunupaebiana pecopatsijavanexa bajarapacueni, pajamatabêcuenecaevianame pibisiacuene papecaexanaejava. Pabarajamatabêcuenexanepanaename bajaraponê. ⁴Caematacabita siete xuabeje pibisiacuene pacaexanae ata tsane, itsiata siete xuabeje itsa aura tsane pibisiacuene papecaexanaejava yabara, nexata pexaniajajumeta itsa pacanavajunupaebiana pecopatsijavanexa bajarapacueni, itsiata pajamatabêcuenecaevianame. Pabarajamatabêcuenexanepanaename bajaraponê, jai Jesús pijajivijavabelia.

Pacuenia Jesús jumaitsi pijaapôstolevijavabelia yabara pelivaisi

⁵Jesús pijaapôstolevi jumaitsi Jesúsjavabelia:

—Patajatuxanenê, paneyavenonare: “Xanê cajena necaëjêpa daxitacuene taexanaenexa,” nejaitsabijava orijibia patacajumecovênêtsinexa, jai Jesús pijaapôstolevi.

⁶Nexata Jesús jumaitsi pijaapôstolevijavabelia:

—Tsqirijavayo ata xanê yabara itsa pajamatabêjumaitsimê tsipae: “Xaniajai cajena. Jesús caëjêpatsi daxitacuene pexanaenexa,” itsa pajamatabêjamê tsipae, nexata paxamê ata pacacaëjêpaejitsipa ayaicueni paneexanaenexa. Nexata itsa pajumaitsimê tsipae mapanaejaxanetojavabeliaje: “Yatabutopaya natixire. Nucaename pucaxaneto tuat-ujâetalia,” itsa pajamê tsipae, nexata naejava ata pacajumecovênêtsipa cajena, jai Jesús pijaapôstolevijavabelia.

Pacuenia itsajivi pijatuxanenê pitorobicueniatsi toexanabiaba yabara pelivaisi

⁷Jesús icatsia jumaitsi pijaapôstolevijavabelia:

—Paxamêyajuvênênê xinaejitsipa pijajivitonê. Nexata itorobjiitsipa petonacuenebaponaponaeenexatsi. Nexata bajaraponê pijatuxanenê ira petocueponaponaeucujinae, patsipa pijatuxanenê pijaboyaberena. Itsa jume, baca petoevetaponaponaeucujinae patsipa. Nexata paxamêyajuvênênê petuxanenêxae, pijajivitonêjavabelia apo jumai tsipae: “Jonemena baja. Ecare nexaejava tacarajutsinexa,” apo jai tsipae pijajivitonêjavabelia. ⁸Jume baja cajena. Biji rajane jumai tsipae pijajivitonêjavabelia: “Netoexanare taxaevanexa. Nexata abaxê nevetanucaename tanabanijavata. Bajaraxuacujinae xamê nabanianame,” jai tsipae pijajivitonêjavabelia. ⁹“Xanepana rabaja. Pexaniacuene bitso netoexaname,” apo jai tsabiabinua pijajivitonêjavabelia petonacuenebabiabijavatsi yabara. Bajarapacuenia apo jumai tsabiabi tsipae tsipaji saya pijajivitonê tsaapononae. Nexata pacuenia pijatuxanenê itorobatsi, bajaraponê exanabiabijitsipa. ¹⁰Bajarapacuenia paxamê ata patoexanare

Dioso papecaitorobicuenia. Itsa patoveretsianame Dioso papecaitorobicuenia panetoexanavanapaejava, nexata saya namataenetsia panajumaitsimē tsane: “Vaxaitsi saya vajatuxanenē pijajivitsi. Nexata vajanacaitorobicuenia toexanavanapatsi,” panajamē tsane. Pētsa panajumaitsimē: “Itsajivi meta nacajumai tsane: ‘Xanepana rabaja. Xaniavaetsia Dioso patonacuenebame,’ nacajai meta tsane,” panajamē pētsa, jai Jesús pijaapóstolevijavabelia.

Pacuenia Jesús jamatejemaya exana diez ponēbeje, bajayajebi bitso peperabētsabanaevi, yabara pelivaisi

¹¹ Jesús pona Jerusalén tomarabelia. Itsajota Samaria nacuabeje Galilea nacuabeje namuxunenecaxitarababeje, bajaraxuayo Jesús najetaruca. ¹² Itsa baja Jesús pat-sijitsia tsiquiritomaroyavabelia, mataenenatsi diez ponēbeje bajayajebi bitso peperabētsabanaevi. Itsiata tajjyo bajarapamonae vecuanubenaothopatsi. ¹³ Bajarapamonae ayajumeta jumaitsi Jesúsjavabelia:

—Jesús, paneitaxutotsoniataema! jai.

¹⁴ Nexata Jesús itsa tane bajarapamonae, Jesús jumaitsi bajarapamonaejavabelia:

—Panaitajētsianame sacerdotevijavabelia papecaperabētaenexa, jai Jesús bajarapamonaejavabelia.

Nexata bajarapamonae pona sacerdotevijavabelia. Nexata bajarapamonae namutua penajetarubenaejavata pepatsinexa sacerdotevijavabelia, namutua baja perabēxanepananajetarubena. ¹⁵ Daxita bajarapamonae peperabēxanepanaejava itsa tane, nexata caenē saya bajarapamonaeayajuvēnēnē naviateca Jesúsjavabelia. Bajaraponē namutua ayajumeta Diosojavabelia jumai tsanajetaruca: “¡Diosomē, bitso ayajamatabēcuenenēmē! ¡Tavitanejavami baja vecua, nejamatejemayaexaname!” jai tsanajetarucae bajaraponē Diosojavabelia.

¹⁶ Bajaraponē itsa pata Jesúsjavabelia, pematabacabēta irataeya bocajunua Jesús pitabarata.

—Pexaniacuene netoexaname. Nejamatejemayaexaname baja tavitanejavamivecua, jai Jesúsjavabelia.

Bajaraponē Samaria nacuapijinē. ¹⁷ Nexata Jesús jumaitsi bajarajota penubenaevijavabelia:

—Diez ponēbeje bitso peperabētsabanaevi jamatejemayaexanajē. ¿Detsa meta xuajitsia daxita apo najuapatsi? ¹⁸ Maponēje caenē saicaya nacuapijinē, apo judionē ata, naviateca Diosojavabelia pejumaitsinexa: “¡Diosomē, bitso ayajamatabēcuenenēmē! ¡Tavitanejavami baja vecua, nejamatejemayaexaname!” pejainexa Diosojavabelia, jai Jesús bajarajota penubenaevijavabelia Samaria nacuapijinē yabara.

¹⁹ Nexata Samaria nacuapijinējavabelia Jesús jumaitsi:

—Nonotapunare. Ponare baja. Jamatejemamē rabaja tanejumecovēnētsixaemē tacajamatejemayaexanaejavanexa, jai Jesús.

Pacuenia Jesús tsipaeba pijajivijavabelia, fariseovijavabelia ata, pecopiapatsijava baja Dioso pijajivi pevetsijava mapanacuataje yabara pelivaisi

(Mt 24.23-28, 36-41)

²⁰ Fariseovi jumaitsi Jesúsjavabelia:

—¿Detsa paepatota copiapatsiana Dioso pijajivi pevetsijava pijajivi mapanacuataje? jai fariseovi.

Nexata Jesús jumaitsi fariseovijavabelia:

—Dioso taxuxuabi ata pijajivi pevetsijava mapanacuataje, apo taetsi vajaitaxutota.

²¹ Nexata jivi apo jumai tsane: “Copiapata rabaja majotaje Dioso pijajivi pevetsijava mapanacuataje,” apo jai tsane. “Copiapata rabaja majotaliaje Dioso pijajivi pevetsijava mapanacuataje,” apo jainua tsane. Dioso rabaja capanepaeya aeconoxae evetapona pijajivi paxamē tuatuajēta, jai Jesús fariseovijavabelia.

²² Nexata Jesús itsamatacabi mapanacuataje pevetsijavanexa, tajēvelia navajunupaeba pijajivijavabelia. Jesús jumaitsi mapacueniaje:

—Itsamatacabi xanē, Daxitajivi Pematapijinēnē, mapanacuataje taevetsinē tsane. Nexata paxamē picani bitso pajitsipaename patanetaenexamē mapanacuataje taevetsicuene. Itsiata baitsi jane apo pataemē tsane mapanacuataje taevetsicuene. ²³ Nexata itsamonae pacajumai tsane: “Bajarajotalia eca mapanacua pepo pevetsinēje,” pacajai tsane xanē yabara. Itsa jume, pacajumai tsane: “Majota ecaje, mapanacua pepo pevetsinēje,” pacajai tsane xanē yabara. Itsiata pētsa paponame. Pētsa pamuxunaponamenua bajarapamonae pepēta. ²⁴ Pacuenia yamaxē itsa nivejai tsajuni athēbēvetsica, caecuenia jivi cotiatane daxitajava, bajara pijinia pacuenia daxitanacuanēpijivi caecuenia netaena pamatacabi patsianicajē xanē, Daxitajivi Pematapijinēnē. ²⁵ Itsiata copiya ayacuena navixaetaeya bejiobinē

tsane. Mapanacuataje pejinavanapaevi apo nejumecovënëtsinua tsane Dioso athëbëvetsica taneitorobinëcuenetsica. ²⁶ Pacuenia bajayata jemata itsi pamatacabi Noépjiinē ponapona, bajara icatsia jemata itsane pamatacabi xanē, Daxitajivi Pematapijinēnē, jemata icatsia patsianicajē. ²⁷ Bajayata pamatacabi Noépjiinē ponapona, jivi picani xaniavaetsia jamatejema pexaejava xaevanapa. Apaevanapanua. Nacojobapona itsamonae. Itsamonae pexēnatoyonē pebijavabelia canajetapona petonacojobinexatsi. Bajarapomnae jamatejema saya jinavanapa. Nexata bajarapamatacabi Noépjiinē ēpijamonaē pinijibarcojavabelia barējunua. Nexata daxitajivi merata bubuna jemata ira itsa bubuta. ²⁸ Bajara pijinia itsi bajayata pamatacabi Lotpijinē ponapona. Jivi saya jamatejema jinavanapa. Pexaejava xaevanapa. Apaevanapanua. Comuacapona. Canajetapona. Ubapona pijapabianē. Pijabonē ata exanapona. ²⁹ Itsiata baitsi jane pamatacabi Lotpijinē Sodomatomara vecuapitsapa, jemata athëbëvetsica pinijicuenia isotonē othopaica. Othopaica pitarutsiibotonēnua. Nexata daxita Sodoma tomarapijivimi tajuatsi. Nexata baja verebiabatsi. ³⁰ Bajara pijinia pacuenia icatsia jemata itsane pamatacabi xanē, Daxitajivi Pematapijinēnē, jemata icatsia patsianicajē, jai Jesús pijajivijavabelia tajëvelia penavajunupaebijavata icatsia pepatsijavanexatsica.

³¹ Icatsia Jesús jumaiitsi pijajivijavabelia:

–Pamatacabi xanē jemata patsianicajē, itsajivi ata pëtsa sivanajamatabëxaina mapanacuapijicueje. Nexata pajivi athëbëyo bojumatatsia ecaya, perunaecujinaetsica, pëtsa sivanajamatabëxaina pijaboëñëalia pebobenaevanē pejutsinexa. Pajivi pijinia pijapabita nacuenebaponapona, pëtsa najamatabëxaina penaviatsinexa pijaboyabelia. ³² Panajamatabënapire pacuenia bajayata Lotpijinē pijavami exanatsi. Lotpijinē pijavami pesivanajamatabëxainasine tsane. Mapanacuapijicue, napijivitaeyojopa. Nexata baja tēpa. ³³ Pajivi exanaponapona penatojitsipaecuenia, apo xainae tsane matacabi apo peverevereaejava. Itsiata baitsi jane pajivi xanē tajamatabëcueneta copatsiana penatojitsipaecuenia pexanabiabijavami, bajarapajivi xainaena matacabi apo peverevereaejava, jai Jesús pijajivijavabelia.

³⁴ Icatsia Jesús jumaiitsi tajëvelia pijajivijavabelia:

–Xaniajanē pacuenia pacatsipaebijitsiatsi. Pamatacabi patsianicajē, bajarapameravi anijanēbeje majitanucaenabeje caecamata. Itsanē tanejumecovënëtsinē tsane. Itsanē apo tanejumecovënëtsinē tsane. Nexata tanejumecovënëtsinē pitsianatsi āngelnē. Apo tanejumecovënëtsinē copatabuatsianatsi. ³⁵ Anijavabeje pijinia najuacuabanucaenabeje caejavata. Nexata tanejumecovënëtsiva pitsianatsi. Apo tanejumecovënëtsiva copatanutsianatsi. ³⁶ Anijanēbeje pijinia najuanacuenebanucaenabeje pabita. Nexata tanejumecovënëtsinē pitsianatsi. Apo tanejumecovënëtsinē copatanutsianatsi, jai Jesús tajëvelia pijajivijavabelia.

³⁷ Jesús nexata pijajivi itsa jumetane bajarapacuenia Jesús pejumaiitsijava, bajarapomnae jumaiitsi Jesúsjavabelia:

–Patajatuxanenē, ¿detsa jota bajarapacuenia yajuvënëpitsianatsi? jai Jesús pijajivi.

Nexata Jesús jumaiitsi tajëvelia pijajivijavabelia:

–Pacuenia quequeremonaē bepjiia yapëtane itsajota petuxutsaebinē boca bajarajota penacaetuatsinexa, bajara pijinia pacuenia daxita tajajivi bepjiia yapëtaena tapatsijavatsica penacaetuatsinexa xanējavaberena, jai Jesús pijajivijavabelia.

18

Pacuenia Jesús pijajivijavabelia livaisi tsipaeba jueznē pelivaisicuenia yabara pelivaisi

¹ Jesús pijajivi livaisi tsipaeba mapacueniaje Jesús pijajivi jamatabëcuenecueranaejejeva pevajëtabiabinxa Diosojavabelia. ² Nexata Jesús jumaiitsi pijajivijavabelia:

–Tomarata ponapona jueznē. Bajaraponē pevetsinē jivi penaneconitsiaexanaecue. Bajaraponē Dioso apo cjunavi. Jivi ata apo cjunavi. ³ Bajarapatomarata ponapona pamona pevecutëpaevatsi. Bajarapova ponabiaba jueznējavabelia pejumaiitsiabinexa: “Naneconitsiaexanare ponē xanējavaberena naneconita. Naneconitsiaexanare pacuenia caitoroba nijatuxanenē bajarapitsivi nenaneconitsiaexanaenexa,” pejaitsiabinexa, bajarapova ponabiaba jueznējavabelia. ⁴ Itsiata abaxē bajayajebi jueznē apo jamatabëcueneyavenonaē bajarapova. Belia baja bexëa jueznē jejai. Nexata jueznē jamatabëjumaiitsi: “Dioso picani apo cjunavinē. Jivi ata picani apo cjunavinē. ⁵ Itsiata mapovaje tanejamatabëitonotabiabixae, yavenonaenajē pacuenia nitorobabiaba. Nexata baja bajarapova matavëjēa apo patabiabirena tsane xanējavaberena tanecueranaeayaexanaenexa,” jamatabëjai jueznē, jai Jesús pijajivijavabelia.

⁶ Jesús icatsia jumaiitsi pijajivijavabelia:

—Bajara jamatabëcueneitsi jueznë, pibisiajamatabëcuenenë ata. Yavenona bajarapova asaëya pevajëcabiabixaetsi. ⁷ Bajara pijinia pacuenia Dioso ata pijajivi yavenonaena itsamonaë pibisiacuene itsa exanatsi. Bajarapacuenia Dioso pijajivi yavenonaena bajarapamonae itsa vajëtabiabiana Diosojavabelia matacabijebi, meravi yajava. Dioso cajena apo cuenenajematsi tsane itsa yavenonaena pijajivi. ⁸ Xaniajanë pacuenia pacatsipaebijitsiatsi. Dioso apo cuenenajematsi tsane itsa yavenonaena pijajivi itsamonaë pibisiacuene pexanaeyanivatsi. Pamatacabi xanë, Daxitajivi Pematapijijnë, icatsia patsianicajë, çcax-itajarabianajë tsaja abaxë tanecopiaevetavanapaevi? jai Jesús pijajivijavabelia.

Pacuenia itsanë fariseonë, itsanë impuestomatamo gobierno pejamatabëcuene pematamoyanijobinë, vajëtabeje Diosojavabelia yabara pelivaisi

⁹ Itsajota Jesús pijajivijavabelia livaisi tsipaeba, bajarajota nubena itsamonaë. Bajarapamonae jamatabëjumi tsabiabi: “Vaxaitsi cajena pexaniajamatabëcuenevitsi itsamonaëvecua. Itsamonaë bitso nacavecuapibisiajamatabëcuenevi,” jamatabëjai tsabiabi. Nexata bajarapamonaejavabelia Jesús livaisi tsipaeba. Jumaiti mapacueniaje:

¹⁰ —Anijanëbeje tsiabeje templobojavabetsia pevajëtsinexabeje Diosojavabelia. Caenë fariseonë. Itsanë gobierno pejamatabëcuene impuestomatamo pematamoyanijobabinë. ¹¹ Nexata fariseonë nuca. Fariseonë pevajëtsijavata Diosojavabelia, bitso bepexaniajamatabëcuenenë nataeya jumaiti mapacueniaje: “Diosomë, pexaniajamatabëcuene carajutatsi. Tsipaji pacuenia itsamonaë jamatabëcueneitsi tsenae, bajara xanë apo jamatabëcueneitsinë. Yamaxëitojorobiaya jivi apo tavecuacobetoxotsinë. Apo tacujirubejenë cajena. Apo tajaitsinë itsava tajavavecu. Pacuenia maponëje gobierno pejamatabëcuene impuestomatamo pematamoyanijobabinë jamatabëcueneitsije, bajara xanë apo tajamatabëcueneitsinë. ¹² Caesemana canacujitsia, anijamatacabibeje, najamatabëcuenexaniavaetsiaya ponaponabiabajë xaenejevanë taxaejava tacavajëtsinexa xamëjavabelia. Daxita pacuene nacanabajë, diez xuabejeyajuvënëjava, caejava, xamëjavabelia carajutabiabatsi ofrendacuena,” jai mapacueniaje fariseonë templobota pevajëtsijavata Diosojavabelia. ¹³ Nexata ponë gobierno pejamatabëcuene impuestomatamo pematamoyanijobabinë, pevajëtsijavata Diosojavabelia tajaji nucalia piauraxae. Athëëabetsia ata penavëyotsijava cujunava. Namëpabëbenuca pecobeta pejamatabëbëjaixae pibisiacuene pexanaeoneci yabara. Nexata bajaraponë Diosojavabelia pevajëtsijavata jumaiti mapacueniaje: “¡Diosomë, nitaxutotsoniaema! ¡Pibisiacuene cajena bitso xanë exanabiabajë!” jai bajaraponë templobota pevajëtsijavata Diosojavabelia, jai Jesús mapacueniaje bepexaniajamatabëcuenevi penataevijavabelia.

¹⁴ Icatsia Jesús jumaiti bajarapamonaejavabelia:

—Xaniajanë pacuenia pacatsipaebijitsiatsi. Ponë gobierno pejamatabëcuene impuestomatamo pematamoyanijobabinë, bajarapacuenia pevajëtsixae Diosojavabelia, Dioso baja vecuaajibiaexanatsi pibisiacuene pexanaeonecimi. Nexata baja bajaraponë naviaata pijaboyabelia pianeconijibinë. Ponë fariseonë, navajëtsi ata Diosojavabelia, itsiata pijaneconi yajava naviaata pijaboyabelia. Tsipaji beayaijamatabëcuenenë natane pevajëtsijavata Diosojavabelia. Bajaraxuata pajivi beayaijamatabëcuenejivi natane itsamonaëvecua, bajarapajivi beveliajamatabëcuenejivi exanaenatsi Dioso. Pajivi saya beveliajamatabëcuenejivi natane itsamonaëvecua, bajarapajivi ayaijamatabëcuenejivi exanaenatsi Dioso, jai Jesús bepexaniajamatabëcuenevi penataevijavabelia.

Pacuenia Jesús jumaiti pejevaxijivixijavabelia yabara pelivaisi
(Mt 19.13-15; Mr 10.13-16)

¹⁵ Itsamonaë pejevaxijivixi tocapataponatsi Jesús pecobeta pejayataponae. Nexata Jesús pijajivi itsa tane bajarapacuenia, Jesús pijajivi itaveta pexi pecapatsivi. Jesús pijajivi jumaiti pexi pecapatsivijavabelia:

—Pëtsa patocapataponame panexi Jesúsjavabelia, jai.

¹⁶ Nexata Jesús jumaiti pijajivijavabelia:

—Pëtsa paitavetame. Pacopare pejevaxijivixi pepatsinexa xanëjavaberena. Mapitsipejevaxijivixije jumeabinejeva xaniavaetsia bajumecovënëta palivaisi tsipaebatsi. Nexata pamonae jitsipa pejonejava Dioso pijanacuayabetsia, bajara pijinia pacuenia jumeabinejeva xaniavaetsia bejumecovënëta Dioso pejumelivaisi. ¹⁷ Xaniajanë pacuenia pacatsipaebijitsiatsi. Mapitsipejevaxijivixije itsa jumecovënëta palivaisi tsipaebatsi, bajumecovënëta xaniavaetsia jumeabinejeva. Nexata pamonae jitsipa pejonejava Dioso pijanacuayabetsia, bajara pijinia pacuenia jumeabinejeva xaniavaetsia bejumecovënëta Dioso pejumelivaisi. Nexata pamonae jumeabinejeva xaniavaetsia jumecovënëtsiana Dioso pejumelivaisi, bajarapamonae jonena Dioso pijanacuayabetsia. Itsiata baitsi jane

pamonae Dioso pejumelivaisi jumeaebinejeva xaniavaetsia apo jumecovënëtsi tsane, apo jone tsane Dioso pijanacuayabetsia, jai Jesús pijajivijavabelia.

Pacuenia pevëjëato, bitso pexainaenë, cuaicuaijai Jesúsjavabelia yabara pelivaisi (Mt 19.16-30; Mr 10.17-31)

¹⁸ Pevëjëato, judíovi pevetsinë, yanijoba Jesúsjavabelia. Pevëjëato jumaiti mapacueniaje: –Petuxanenë, pexaniajamatabëcuenenëmë, ¿detsa pitsicuene exanaenajë taxainaenexa matacabi apo peverevereaejava? jai pevëjëato.

¹⁹ Nexata Jesús jumaiti pevëjëatojavabelia: –¿Detsa xuajitsia: “Pexaniajamatabëcuenenëmë,” nejamë? Ajibi raja itsapebi ata pexaniajamatabëcuenenë. Caenë rabaja Dioso pexaniajamatabëcuenenë. ²⁰ Xamë baja yapëtaneme pacuenia Dioso pejumelivaisita itoroba jivi pejumecovënëtsinexa. Jumaiti mapacueniaje: “Pëtsa jaitame itsapetiriva nijavavecua. Pëtsa beyaxuabame jivitonë. Pëtsa nacobetoxotame. Pëtsa itsamonaë pexanaejava yabara najumetsënëtsiaya paebame. Axa yayiataema. Ena ata yayiataema,” jai Dioso pejumelivaisita. Xamë baja yapëtaneme bajarapalivaisi, jai Jesús pevëjëatojavabelia.

²¹ Nexata pevëjëato jumaiti Jesúsjavabelia: –Daxita rabaja bajarapalivaisianë jumecovënëtajë pejevaxinënëjavaveliacujinae, jai pevëjëato.

²² Itsa Jesús jumetane bajarapacuenia pejumecanaviatsijavatsi, nexata icatsia jumaiti pevëjëatojavabelia:

–Abaxë raja catosaica caejava nexanaenexa. Canajere daxita nexainaejavami. Bajarapamatamomi tscobetsanaeneme bepejiobivi. Bajaraxuacujinae nepënaponaeneme. Nexata bajarapacuenia xainaname bitso nexainaeuene Dioso pijanacuatatsia, jai Jesús pevëjëatojavabelia.

²³ Bajarapacuenia Jesús itsa jumaiti pevëjëatojavabelia, nexata pevëjëato bitso bejamatabëjiobi tsanajetsireca. Tspipaji pevëjëato daxitacuene bitso pexainaenë. Nexata pevëjëato apo jamatabëjumecovënëtsi palivaisi Jesús tsipaeba. ²⁴ Itsa Jesús tane pevëjëato bepejamatabëjiobi tsanajetsijavareca, nexata pevëjëato pecovëta jumaiti pijajivijavabelia: –¡Pamonae bitso daxitacuene pexinaeavi, tsiyapëbejetsi bitso penajamatabëcuenecopatsinexa Diosojavabelia pecapanepaenexatsi Dioso pijanacuayabetsia! ²⁵ Pacuenia camello acuenebi pejonejava palutaetoitaxutovojuotalia, bajara pijinia pacuenia bitso pexainaenë acuenebi tsane pejonejava Dioso pijatomarabetsia, jai Jesús pijajivijavabelia.

²⁶ Nexata Jesús pijajivi jumaiti Jesúsjavabelia: –¿Detsa nexata pitsivi panepaena Diosojavabelia, bitso pexinaeavi ata, itsa apo panepae tsane Diosojavabelia? jai Jesús pijajivi.

²⁷ Jesús nexata jumaiti pijajivijavabelia: –Pacuenia jivi apo caëjëpaetsi pexanaenexa, bajarapacuenia Dioso caëjëpatsi pexanaenexa, jai Jesús pijajivijavabelia.

²⁸ Nexata Pedro jumaiti Jesúsjavabelia: –Patajatuxanenë, paxanë rabaja pacopatajë daxitacuene pataxainaejavami. Nexata baja pacapënajinavanapatsi, jai Pedro.

²⁹⁻³⁰ Jesús nexata jumaiti: –Xaniajanë pacuenia pacatsipaebijitsiatsi. Pajivi Dioso pijacuene petonacuenebinexa pueneta pijabomi, paxa ata, pena ata, pematapijivi ata, pejuyapijivi ata, pijava ata, pexi ata, nexata bajarapajivi mapanacuataje pepuenetsijavami matatoxenetsia Dioso rajutsianatsi. Nexata bajarapajivi hexëajavabelia petëpaecujinae ata Dioso rajutsianatsi matacabi apo peverevereaejava, jai Jesús pijajivijavabelia.

Pacuenia icatsia Jesús tajëvelia navajunupaeba pebeyaxuabijavanexatsi yabara pelivaisi (Mt 20.17-19; Mr 10.32-34)

³¹ Jesús itsamonaevēcuaa ëpijajivi, doce ponëbeje, junata pimoxoyotsinexatsi. Nexata Jesús pebeyaxuabijavanexatsi, tajëvelia navajunupaeba pijajivijavabelia. Jesús jumaiti mapacueniaje:

–Panejumetaema. Mara Jerusalén tomarabelia ponatsije. Bajayata Diosojumepaebivimi profetavi, xanë, Daxitajivi Pematapijinënë, talivaisi tajëvelia yaquina. Pacuenia nexanaejitsia, daxita bajarapalivaisi bajayata profetavimi tajëvelia yaquina. Nexata daxita pacuenia xanë talivaisi bajayata tajëvelia profetavimi yaquina, daxita jane baja bajarapacuenia Jerusalén tomaratalia netocopiapatsiana. ³² Itsanacuaverena pepatsivi pecobeyabelia necanajetsiana tanebeyaxuabinexa. Bajarapamonae necanecaponaena.

Nebijataena pibisiacuena. Nesuabiana. ³³ Nejumatitibabena penaneconitsivi pejunaconitabiabimacata. Bajaraxuacujinae nebeyaxuabiana. Itsiata baitsi jane tanebeyaxuabicujinae, acueyabi matababita, icatsia asaenē tsane, jai Jesús pijajivijavabelia tajēvelia penavajunupaebijavata pebeyaxuabijavanexatsi.

³⁴ Itsiata Jesús pijajivi apo jumeypātae pajamatabēcuene yabara Jesús jumaitsi.

Pacuenia Jesús itaxutoxanepanaeyaexana bitso pitaxutotsēcēnaenē, Jericó tomarapijinē, yabara pelivaisi

(Mt 20.29-34; Mr 10.46-52)

³⁵ Jesús imoxoyotanajetaruca Jericótomara. Nexata namuto muxuneneta eca bitso pitaxutotsēcēnaenē, apo petaenē. Bajaraponē amoneya palata vajēcabiabeca jivijavabelia. ³⁶ Nexata bitso pitaxutotsēcēnaenē itsa jumetane jivibitsaētoxaneto pecuaicuajiai tsanajetarubenaajava namutua, bajaraponē epajunateca.

—¿Detsa xua pajaitame? jai tsecae bajaraponē.

³⁷ Nexata jivi jumaitsi bajaraponējavabelia:

—Jesús raja, Nazaret tomarapijinē, maxuayo najetarucaje, jai jivi.

³⁸ Nexata pitaxutotsēcēnaenē vavajai tsecae.

—¡Jesús, Davidpijinē pemomomē, nitaxutotsoniataema! jai tsecae bajaraponē.

³⁹ Nexata picani itsamonae, Jesús pevajēnaeya penajetarubenaevi, jumeitaveta bajaraponē pemoyanexa. Itsiata biji bitsoyo orijibia vavajai tsecae.

—¡Davidpijinē pemomomē, nitaxutotsoniataema! jai tsecae pitaxutotsēcēnaenē.

⁴⁰ Nexata Jesús muxunanucojopa. Jumaitsi pijajivijavabelia:

—Panetocomacaponaremena pitaxutotsēcēnaenē, jai Jesús.

Itsa baja imoxoyo tocanajetarubenatsi, Jesús jumaitsi pitaxutotsēcēnaenējavabelia:

⁴¹ —¿Detsa xua jitsipame tacaexanaenexa? jai Jesús.

Nexata bitso pitaxutotsēcēnaenē jumaitsi Jesúsjavabelia:

—Jesús, jitsipajē taitaxutoxanepanaejava, jai pitaxutotsēcēnaenē.

⁴² Jesús nexata jumaitsi pitaxutotsēcēnaenējavabelia:

—Itaxutoxanepaname rajaba. Tsipaji nesivajamatabējumaitsimē mapacueniaje: “Jesús nitaxutoxanepanaeyaexanaena,” nesivajamatabējamē, jai Jesús pitaxutotsēcēnaenējavabelia.

⁴³ Bajarapacuenia Jesús pejumaitsijavata, bitso pitaxutotsēcēnaenēmi xaniavaetsia baja tane. Nexata bajaraponē napona baja Jesús pepēta. Bajaraponē namutua jumai tsanajetarucade Diosojavabelia:

—¡Diosomē, bitso pexaniacuene netoexaname! jai tsanajetarucade bajaraponē.

Pamonae ata tane bajaraponē pitaxutoxanepanaejava baja, daxita bajarapamonae ata Diosojavabelia jumai tsanajetarubena:

—¡Diosomē, bitso ayajamatabēcuenenēmē! jai tsanajetarubena Diosojavabelia.

19

Pacuenia nabarēcuacuajaiabeje Jesúsbeje Zaqueobeje yabara pelivaisi

¹ Jesús najetaruca Jericó tomarajava. ² Jericó tomarata ponapona Zaqueovēnēnē. Bajaraponē gobierno pejamatabēcuene impuestomatamo pematamoyanijobabiabivi penamatacaitorobinē. Zaqueo bitso pexainaenē pexinaejava. ³ Nexata Zaqueo jamatabētane Jesús. Itsiata apo caējēpaetsi petaejaya. Tsipaji Zaqueo petoyaeacaeñeyo. Jivibitsaētoxaneto matatoyorotsi nubenatsi Jesús Zaqueo pevajēnae. ⁴ Nexata Zaqueo cujinaeponalla jivibitsaētoxaneto pevajēnaeyabelia Jesús peponaenamutuabelianexa. Junaya naejavatsia athēbēvetsica petaenucaenexa Jesús penajetarucaejaya. ⁵ Nexata Jesús namutua itsa imoxoyotanajetaruca, itsa ponaeta Zaqueo athēbēyo nucaya, bajaraponaejavatsia Jesús naēcotsia. Nexata Jesús taenutsia Zaqueo. Jesús nexata jumaitsi Zaqueojavabelia:

—Zaqueo, naxanitsiayo runaimica. Nijaboyabelia raja patsijitsianē, jai Jesús.

⁶ Nexata Zaqueo naxanitsiayo runajopaica. Barēyaya copiapita pijaboyabelia pebarēponaenexa Jesús. ⁷ Daxita pamonae Jesús matatoyorotsia najetarubenatsi, itsa tane bajarapacuenie, Jesús baracuacuajiaitsi tsanajetarubena. Epamonae najumaitsi tsanajetarubena Jesús yabara:

—Jesús raja naponaponaejitsia Zaqueo pijabota, caranata pibisiacuene pexanaenē pijabota, najai tsanajetarubena bajarapamonae Jesús yabara.

⁸ Nexata Zaqueo pijabota Jesús eca mesa muxuneneta. Bajarajota Jesús pitabarata Zaqueo nonotapuna. Jumaitsi Jesúsjavabelia:

—Tajatuxanenē nejumetaema. Tsatsianejē namatajēpaeya taxainajava tarajutsinexa bepejiovijavabelia. Pamonae yamaxēitojorobiaya vecuanotajē tamatamoyanijobijavata impuestomatamo, bajarapamonae tocanaviabianajē. Nexata

tayamaxëitojorobijamatabëcuene bajarapamonae rajutsianajë juya cuatro xuabeje tsaponai caijavayomijamatabëcuene, jai Zaqueo Jesúsjavabelia.; ⁹ Nexata Jesús jumaiti Zaqueojavabelia:

–Zaqueo, ajena rabaja pamatacabi, caxitajarabame, nijamonae yajava, nijaneconivecua pecacapanepaejavanaxa Diosojavabelia. Tsipaji baja nijamonae barëjumecovënëtamè Dioso. Zaqueo, xamë Abrahampijinë pemomo atamë, abaxë picani Dioso apo catae Abrahampijinë pemomomëcuenia. Itsiata baitsi jane ajena baja Diosojavabelia ne-najamatabëcuene copatsixae, Dioso jane baja catane pepacuene Abrahampijinë pemomomëcuenia. ¹⁰ Xanë, Daxitajivi Pematapijinë, sivapatajopajë tajaitsinexa Diosovecua penaxuabivi tacapanepaenexa pijaneconivecua, jai Jesús Zaqueojavabelia.

*Oro palatanëanë, diez ponëbeje, yabara pelivaisi
(Mt 25.14-30)*

¹¹ Zaqueo pijabota itsamonae namuxunaevetena Jesús petsipaebilivaisi Zaqueojavabelia. Pamonae namuxunaevetena, jamatabëcuenenavëxaniabiaya jamatabëjumai tsenae: “Imoxoyo rabaja ecalia Jerusaléntomara. Nexata Jesús itsa patsialia Jerusalén tomarabelia, copiajopaena jane baja daxita Dioso pijajivi pevetsijava,” jamatabëjai tsenae bajarapamonae. Bajarapacuenia jamatabëjumai tsenae tsipaji baja Jerusaléntomara imoxoyo ecalia Jesús pepatsinexa. ¹² Bajaraxuata Jesús livaisi tsipaeba bajarapamonaejavabelia. Jesús jumaimatabëcuenenavëxaniabiaya jamatabëjumai tsenae: “Imoxoyo rabaja ecaliatsi mapacueniaje:

–Petuxanenë ponapona pijanacuata. Nexata pepo nacuaevetsinë tonajumeitorobarenatsi tajënacuaeverena. Petonajumeitorobijumetsirena jumaitisirena mapacueniaje: “Ponae name maberenaje nacua nevetsinënexa tacaexanaenexa nijanacua nevetsinexa. Bajaraxuacujinae navitsiaremelia nijanacua jane baja nevetsinexa,” jaitsirena petonajumeitorobijumetsirena. ¹³ Nexata petuxanenë peponaejavënae, junata pijajivi, diez ponëbeje. Nexata petuxanenë pijajivi evetsiaexana pijapalatanëanë, oronëanë, bitso penamatamotsinëanë. Caenë canacujitsia caepalatanë evetsiaexanapona. Nexata petuxanenë pijajivi jumaiti pijajivijavabelia: “Bajarapapalata pacomuataponaenae name. Xua pacomuataponaenae name, icatsia pacanajetaponaenae name. Nexata bajarapacuenia netoayaijaya tsaponae tsane tajapalata,” jai petuxanenë pijajivijavabelia. Bajaraxuacujinae pona jane baja. ¹⁴ Itsiata baitsi jane pevetsinacuatanexa pejinavanapaevi, bitso itoyatsi petuxanenë. Nexata bajarapamonae petuxanenë pecovëvelia itsamonae itorobalia, itsajotalia petuxanenë nacua pevetsinënexa exanaejitsiatsi, bajarajotalia pejumaitisinexa: “Apo pajitsipañë bajaraponë patanevetsinënexa patajanacuata,” pejainexa petuxanenë yabara. ¹⁵ Itsiata baitsi jane petuxanenë pijanacua baja pevetsinënexa exanatsi. Nexata baja naviarena pijanacuayaberena pevetsinexa jane baja pijanacua. Nexata baja parena. Nexata petuxanenë pepatsicujinaerena, junata icatsia pijajivi peyapëtaenexa jane baja pacuenia caenë canacujitsia pijapalatanëanë pijajivi tocanacuenebatsi pecovëta. ¹⁶ Copiaya pepatsinë jumaiti pijatuxanenëjavabelia: “Tajatuxanenë, nijapalatanë, taneevetsiaexanaenëmë, catopitsapa baja diez ponëbeje. Nexata baja daxitata once ponëbeje,” jai. ¹⁷ Nacuaevetsinë nexata jumaiti pijajivitonëjavabelia: “Xanepana rabaja. Xaniavaetsia netoetevaponaenae name. Tsiquirijavayo ata xaniavaetsia netoetevame. Nexata icatsia diez patomarabeje netoetevaponaenae name,” jai nacuaevetsinë pijajivitonëjavabelia. ¹⁸ Icatsia itsanë pijatuxanenë pijapalatanë petoevetsinë pata. Nexata bajaraponë jumaiti: “Tajatuxanenë, nijapalatanë, taneevetsiaexanaenëmë, catopitsapa baja cinco ponëbeje pematatsënëa,” jai. ¹⁹ Nacuaevetsinë nexata jumaiti pijajivitonëjavabelia: “Xamë icatsia cinco patomarabeje netoetevaponaenae name,” jai nacuaevetsinë pijajivitonëjavabelia. ²⁰ Nexata icatsia itsanë pijatuxanenë pijapalatanë petoevetsinë pata. Jumaiti pijatuxanenëjavabelia: “Tajatuxanenë, mara nijapalatanë, taneevetsiaexanaenëmë. Pañuelopanayota yamatacëtsiaya catoevetatsi. ²¹ Bajarapacuenia catoevetatsi tsipaji cacujunavatsi. Niajamatabëcuensaenë. Xamë apo itaxutobejobiataeyabiabimë nijajivi, pamonae catoeveta nijajava. Itorobabiabame nijajivi pecatopitsinexa apo nijajava ata. Itorobabiabamenua pecatonotsinexa apo neubiaexanaejava ata,” jai pijatuxanenë pijapalatanë petoevetsinë. ²² Nexata nacuaevetsinë jumaiti pijajivitonëjavabelia: “¡Acujirubejemë xamë! Bijiaya netoetevame. Naneconitame bajarapacuenia tanejumaitisijavamë yabara. Xamë baja cajena yapëtaneme tajamatabëcuensaenëjava tajajava yabara. Pacuenia itorobabiabajë tajajivi tanetopitsinexa apo tajajava ata, yapëtaneme baja. Pacuenia ata itorobabiabajë tanetonotsinexa apo taubiaexanaejava ata, yapëtaneme baja. ²³ Xanepanaejitsipa xamë banco pevetsivi itsa netocanacuenebiaexanaejitsipame tajapalatanë. Nexata banco pevetsivi aeconoxae tajapalatanë netocanaviatsipa. Nexata pecacovaetsijamatabëcuene itsajava palata netoyajavacanaviatsipa,” jai nacuaevetsinë pijajivitonëjavabelia. ²⁴ Nexata

nacuaevevsinē jumaitsi pijajivijavabelia: “Tajapalatanē panetovecuapire maponēje. Nexata juya parjure ponē xaniavaetsia netoeveta tajapalatanē. Bajaraponē xaniavaetsia netocanacueneba. Nexata baja pematatsēnēa diez papalatanēbeje netopitsapaeyaexana. Nexata taevetsiaexanaenēta once ponēbeje,” jai nacuaevevsinē. ²⁵ Nexata nacuaevevsinē pijajivi jumaitsi pijatuxanenējavabelia: “Patajatuxanenē, bajaraponē xaina baja ayaijava. ¿Detsa xuajitsia rajutsijitsiamē pematatsēnēa?” jai pijajivi. ²⁶ Nexata nacuaevevsinē jumaitsi pijajivijavabelia: “Pacatsipaebatsi rabaja. Pajivi baja ayaijava xaina, pematatsēnēa icatsia itsajava rajutsianatsi. Itsiata pajivi tsiquirijavayo xaina, bajarapajivi pijatsiquirijavayomi vecuapitsianatsi. ²⁷ Tajavajabitsaē, pamonaē picani apo jitsipae mapanacua taevetsijavaje, bajarapamonaē pacaponaremena maberenaje patanevecuaverebiabinexamē taitabēta,” jai nacuaevevsinē pijajivijavabelia, jai Jesús livaisi petsipaebijavata Zaqueo pijabota.

Pacuenia Jesús pata Jerusalén tomarata yabara pelivaisi
(Mt 21.1-11; Mr 11.1-11; Jn 12.12-19)

²⁸ Jesús baja itsa najumevereta livaisi petsipaebijava Zaqueo pijabota, pona baja Jerusalén tomarabelia. ²⁹ Jerusalén tomaravecu imoxoyo eca petsuto. Bajarapatsutojumata nubena olivonaenē. Bajarapatsuto canacujitsita anijatomarayobeje ecabeje, Betfagé tomarayobeje Betania tomarayobeje. Jesús itsa imoxoyotanajetaruca bajarapatomarayobeje, nexata itoroba pijajivitonēbeje bajarapatomarayobejevabelia. ³⁰ Jesús jumaitsi pijajivitonēbejevabelia:

—Paponarebeje mapatomarayo ecaliajevabelia. Itsa rabaja papatsiaremeliabeje, pataenutsianamebeje burro pecētanutsinētsi. Bajarapaburro itsajivi ata abaxē apo jumaponaē. Paisinaenamebeje. Payamaēcarenamebeje tsane. ³¹ “¿Detsa xuajitsia paisinamebeje burro?” itsa pacajaibeje tsane itsajivi, nexata pajumaitsimēbeje tsane: “Vajatuxanenē raja namatavenona,” pajamēbeje tsane, jai Jesús pijajivitonēbejevabelia.

³² Nexata Jesús pijajivitonēbeje liabeje. Pacuenia Jesús jumaitsi, bajarapacuenia caxitarabanacuabeje burro. ³³ Nexata itsa isinabeje, burro pexinaeivi jumaitsibeje:

—¿Detsa xuajitsia paisinamebeje burro? jaitsibeje.

³⁴ Nexata Jesús pijajivitonēbeje jumaitsibeje burro pexinaevijavabelia:

—Vajatuxanenē raja namatavenona. Bajaraxuata paisinajēbeje, jaiibeje.

³⁵ Nexata jane baja burro capatabeje Jesúsjavabereña. Nexata Jesús pijajivi burro tsijumajeba pijacamisajumavelia penaxatabijavanē. Jesús baja bajarapaburrojumat ecaya. ³⁶ Jesús itsa yanajetaruca burrota, panamutovelial Jesús patsijitsia Jerusalén tomarabelia, bajarapanamutua jivi pijacamisajumavelia penaxatabijavanē namutua tsivajēnaeyerequejebaponatsi yaityataeya pecopiapitsinexatsi. ³⁷ Patsutojumata olivonaenē nubena, bajarapatsutojavatsica namuto namatononocarucaica. Nexata bajarapanamutuatitsica Jesús imoxoyotanajetaruca pepatsinexa Jerusalén tomarata. Nexata jivi ayaibitsaētoxaneto, Jesús pijajivi yajava, vavajai tsanajetarubenaē. Sivabarēyaya vavajai Diosojavabelia:

—¡Diosomē, bitso ayaijamatabēcuenenēmē! jai tsanajetarubenaē bajarapamonaē.

Bajarapacuenia vavajai tsanajetarubenaē tsipaji bajarapamonaē kujirutaeyabiaba Jesús Dioso pesaēta ayaicuene pexanaponaējavanē. ³⁸ Bajarapamonaē jumai tsanajetarubenaē Jesús yabara:

—¡Maponē najetarucabeje, bitso ayaijamatabēcuenenē Dioso pejamatabēcueneta najetaruca jivi pevetsinēnexas! ¡Jamatabēcuenexanepanaeya jinavanapa daxita pamonaē athēbētatsia jinavanapa! ¡Piniijicueña rabaja exana Dioso! jai tsanajetarubenaē namutua daxita Jesús pijajivi.

³⁹ Nexata fariseovi najetarubena bajarapajivibitsaētoxaneto tuatuaēta. Nexata fariseovi jumaitsi Jesúsjavabelia:

—Jesús, jumeitavere baja nijajivi bajarapacuenia pejumaitsiyaniva xamē yabara, jai fariseovi.

⁴⁰ Nexata Jesús jumaitsi fariseovijavabelia:

—Xaniajanē pacuenia pacatsipaebijitsiatsi. Mapamonaēje moya itsa najetarubenaējitsipa, nexata juya ibotonē vavajai tsenaē tsipae, jai Jesús fariseovijavabelia.

⁴¹ Itsa baja Jesús imoxoyo taeyeta Jerusaléntomara, nexata Jesús sivanua Jerusalén tomarapijivi. ⁴² Jesús pesivanuejavata Jerusalén tomarapijivi, Jesús jumaitsi Jerusalén tomarapijivi yabara mapacueniaēje:

—¡Bitso picani jitsipajē Jerusalén tomarapijivi mapamatacabitaje peyapētaenexa pacuenia Dioso pepacuene jamatabēcuene xanepanaeyaexanaējitsipatsi, itsa nejumecovēnētsipa! Abaxē raja aeconoxae Dioso apo tocopatsitsi peyapētaeyaniva bajarapacuene. ⁴³ Nexata tocopiapatsianatsi pibisiamatacabi. Pijavajabitsaē

tsimaxëpatsianatsi. Nexata pijatomara matatoyorotsia foto yacaranatsia cuerutsianatsi petsimaxëñubenaenexatsi bajarapafotota. Pijatomara matatoyorotsia peyacaranatsiibopanaxanetopënëya, pijavajabitsaë foto matatoyorotsia cuenatsi. Bajarapacuenia yacaranatsianatsi pijavajabitsaë. ⁴⁴ Nexata irabetsica topenetsianatsi pijabonëmi. Nexata daxita Jerusalén tomarapijivi benatsi. Pijatomara matatoyorotsia peyacaranatsiibopanaxanetomi ata tosarababenatsi. Nexata itsaibopana ata apo bocae tsane itsaibopana jumavereca. Bajarapacuenia itsane tsipaji xanë apo neyapëtae Dioso athëbëvetsica taneitorobinëtsica, Daxitajivi Pematapijinënë, jai Jesús pesivanuejavata Jerusalén tomarapijivi.

Pacuenia Jesús Jerusalén tomarata templobovecua pitsapaeyaexana pecanajetabiabivi, pecomuacabiabivina, yabara pelivaisi

(Mt 21.12-17; Mr 11.15-19; Jn 2.13-22)

⁴⁵ Jesús pepatsicujinae Jerusalén tomarata, joneya temploboyalia. Nexata templobota Jesús tane pecanajetabiabivi, pecomuacabiabivina. Nexata daxita bajarapamonae Jesús pitsapaeyaexana templobovecua. ⁴⁶ Jesús jumaitsi bajarapamonaejavabelia:

–Dioso baja cajena pejumelivaisibaxutota mapatemplobo yabara tajëvelia jumaitsi mapacueniaje: “Tajabo raja jivi xanëjavaberena penavajëcaebo tsane,” jai Dioso pejumelivaisibaxutota. Itsiata baitsi jane paxamë yamaxëitorobiaya panenacobetoxotsinexa, panacaetuatabiabame mapabotaje, jai Jesús templobota pecanajetabiabivijavabelia.

⁴⁷ Bajaraxuacujinae caematacabi canacujitsia Jesús jivi livaisi tsipaebabiaba bajaraptemplobota. Nexata sacerdotevi penamatacaitorobivi, judíovi pecujarubivina, tomaraevetsivina, najumejaita picani Jesús pebeyaxuabinexatsi. ⁴⁸ Itsiata acuenebi Jesús pebeyaxuabijavatsi. Tsipaji Jesús itsacueneneconi ata apo xainae. Daxitajivi yayatanetsi. Jesús jivi petsipaebillivaisianë xaniavaetsia namuxunaevetabiabatsi.

20

Pacuenia Jesús caëjëpatsi daxitacuenë pexanaenexa yabara pelivaisi

(Mt 21.23-27; Mr 11.27-33)

¹ Itsamatacabi Jesús templobota jivi livaisi tsipaeba. Tsipaeba pexanalivaisi jivi pecanepaelivaisinexatsi pibisiacuenë pexanaenëconivecua. Nexata bajarajota pata sacerdotevi penamatacaitorobivi, judíovi pecujarubivina, judíovi pijaancianovina. ² Nexata bajarapamonae jumaitsi Jesúsjavabelia:

–Panetsipaebare cajena. ¿Jipatsa pejamatabëcueneta pecanajetabiabivi, pecomuacabiabivina, capitsapame mapatemplobovecuaje? jai.

³ Jesús nexata jumaitsi bajarapamonaejavabelia:

–Xanë copiaya caejumeyo pacayanijobianatsi patanejumecanaviatsinexamë.

⁴ ¿Jipatsa jane pejamatabëcueneta Juanpijinë jivi bautisabaponapona? ¿Dioso tsaja pejamatabëcueneta? Itsa jume, ¿jivi tsaja pejamatabëcueneta? jai Jesús bajarapamonaejavabelia.

⁵ Nexata epamonae nabarëcuaicuaijai. Najumaitsi:

–¿De meta pacuenia jumecanaviatsianatsi? Vaxaitsi itsa jumai tsipaetsi: “Dioso raja pejamatabëcueneta,” itsa jai tsipaetsi, nexata Jesús nacajumai tsipae: “¿Detsa nexata xuajitsia apo pajumecovënëtsimë Juanpijinë pepaebilivaisianë?” nacajai tsipae. ⁶ “Jivi raja saya pejamatabëcueneta Juanpijinë jivi bautisabaponapona,” itsa jai tsipaetsi, nexata daxitajivi anaeya ibotonëta nacatseconaejitsipa vajanacabeyejebinxë. Bajarapacuenia nacabeyejebijitsipa tsipaji daxitajivi Juanpijinë yabara sivaamatabëjumaitsi: “Juanpijinë raja pepacuenë Diosojumepaebinëmi,” sivaamatabëjai, najai sacerdotevi penamatacaitorobivi, judíovi pecujarubivina, judíovi pijaancianovina.

⁷ Nexata saya bajarapamonae jumaitsi Jesúsjavabelia:

–Apo payapëtaenë ponë Juanpijinë itorobatsi jivi pebautisabaponaenexa, jai.

⁸ Nexata Jesús jumaitsi bajarapamonaejavabelia:

–Nexata xanë ata apo pacatsipaebi tsanetsi ponë nitoroba tacapitsapaenexa bajarapamonae templobovecua, jai Jesús.

Pacuenia exana pijamatabëcuenëbejevi, itsanë pijauvabacabo petoevetsivi yabara pelivaisi

(Mt 21.33-44; Mr 12.1-11)

⁹ Jesús taxuxuaba livaisi petsipaebijava jivijavabelia. Jumaitsi mapacueniaje:

–Pijaira pexainaenë pijairata uba ayaiabacoboxaneto uvavënëjava. Bajaraxuacujinae itsamonae evetsiaexana pijauvabacabo. Jumaitsi bajarapamonaejavabelia: “Pamatacabi cuainaveretsiana, natsicobetsanaenatsi. Pamatacabi raja cuainaveretsiana, tajajivitonë

itorobianajë xua panetotsatsianame tanetopitsinexa,” jai uvabacabo pexainanë petoevetsivitsijavabelia. Nexata uvabacabo pexainanë tajënacuaayabelia pona bajayajebi pijaibitsarucaenexa. ¹⁰ Itsa baja uvabacabo pexainanë yapëtane pecopiapatsijava uvacuai penaveretsimatacabi penotsinexa, nexata uvabacabo pexainanë itoroba pijajivitonë. Itoroba petoevetsivitsijavabelia petsicobetsatsinexatsi. Nexata uvabacabo pexainanë pijajivitonë tovaetabatsi. Toconibabiatsi. Petoconibabecujinaetsi cobesa naviatxiaexanaliatsi. ¹¹ Itsiata uvabacabo pexainanë icatsia itoroba itsanë pijajivitonë petsicobetsatsinexatsi. Bajaraponë ata icatsia pibisiacuenia tobijatanetsi. Toconibabiatsi. Piconibabecujinaetsi cobesa naviatxiaexanaliatsi. ¹² Itsiata uvabacabo pexainanë icatsia itoroba itsanë pijajivitonë. Icatsia bajaraponë ata tomatajorobabiatsi. Uvabacabopënyabelia xuabatsi.

¹³ Nexata uvabacabo pexainanë jamatabëjumaitsi: “¿Detsa nexata xua exanaenajë? Itorobianajë cajena taxë nato, tasivanë. Itsa raeta itorobianajë taxë nato, bajarapamonae netoyaiyataena,” jamatabëjai uvabacabo pexainanë. ¹⁴ Itsiata baitsi jane uvabacabo petoevetsivitsi, uvabacabo pexainanë pexënato ata apo toyaiyataetsi. Itsa tane uvabacabo pexainanë pexënato, bajarapamonae najumaitsi: “Mara ponëje itsamatacabi paxa pevënamuto paxa pijauvabacabo pitsipaje. Naxanitsia. Beyaxuabatsi. Nexata raja vaxaitsi vajauvabacabo tsane,” najai uvabacabo petoevetsivitsi. ¹⁵ Nexata uvabacabo pexainanë pexënato ata tovaetabatsi. Caponaliatsi bajarapauvabacabo pepënyabelia. Bajarapacuenia icatsia tobeyaxuabatsi, jai Jesús.

Nexata Jesús yanijoba bajarapalivaisi petsipaebivijavabelia. Jumaitsi:

—¿De meta nexata xua exanaena uvabacabo pexainanë pijauvabacabo petoevetsivitsijavabelia? ¹⁶ Uvabacabo raja pexainanë, patsiarena. Verebiabiana daxita bajarapamonae. Nexata icatsia itsamonae evetsiaexanaena bajarapauvabacabo, jai Jesús bajarapamonaejavabelia.

Jesús penamuxunae vetsivitsi itsa jumetane bajarapacuenia Jesús pejumaitisijava, bajarapamonae jumaitsi:

—¡Dioso pëtsa copata bajarapacuenia pexanaenexa paxanëjavaberen! jai bajarapamonae.

¹⁷ Nexata Jesús asaëyata naëcota bajarapamonaejavabelia. Jumaitsi bajarapamonaejavabelia:

—Payapëtaneme rabaja pacuenia Dioso pejumelivaisibaxutota tajëvelia jumaitsi xanë yabara. Iboto pelivaisicuenia Dioso pejumelivaisibaxutota jumaitsi xanë yabara mapacueniaje:

Paiboto itsamonae boexanaevi naitaxutojematabuatsiana petsitaabejexaetsi itajara, bajarapaiboto itsanë pitsiana. Nexata bajarapaibotota xaniavaetsia nayaëtsiana botabu daxita itsaibo matatoxenetsia, jai tajëvelia Dioso pejumelivaisibaxutota xanë yabara.

¹⁸ Bajarapacuenia tajëvelia Dioso pejumelivaisibaxutota itsa jumaitsi, judíovi penamatacaitorobivi apo tanejumecovënëtsijavanexa yabara jumaitsi. Dioso taneitapetsijava daxitajivi tacapanepaenënexa yabara ata jumaitsi, jai Jesús.

¹⁸ Icatsia Jesús jumaitsi mapacueniaje:

—Pamonae apo nejumecovënëtsi Dioso pexënatocuenë, bajarapamonae bitso bejamatabëjiobi tsane apo tanejumecovënëtsixae. Pacuenia ibotojumata pefirapecaejivi, itsa tsapatcatsi, pevixae bitso yanabejiobita, bajara itsane. Pamonae naneconitsiaexanaenajë, bajarapamonae pepacuenie naxuabiana daxitamatacabijavabelianexa. Pacuenia iboto pematacënëbinëtsi apo asaë, bajara itsane, jai Jesús bajarapamonaejavabelia.

Pacuenia Jesús jamatabëcuenejëbiaya yanijobatsi impuestomatamo pematamotsijava yabara pelivaisi

(Mt 22.15-22; Mr 12.13-17)

¹⁹ Palivaisi Jesús tsipaeba templobota, bajarapalivaisi sacerdotevi penamatacaitorobivi, judíovi pecujarubivi ata, jumeyapëtane. Nexata bajarapamonae najumaitsi:

—Vaxaitsi raja Jesús nacajai, najai.

Nexata picani bajarajota bajarapamonae Jesús jamatabëvaetabatsi. Itsiata bajarapamonae abaxë apo vaetabitsi. Tsipaji cujanava jivi. ²⁰ Nexata itsamatacabi bajarapamonae itorobarena pijajivi yaenebiaya petonamuxunae vetsinexatsi Jesús. Nexata bajarapamonae pijajivi bepexaniajamatabëcuenevi itajara jinavanapa Jesúsjavata. Bajarapamonae namuxunae vetena Jesús jivi livaisi petsipaebijavata. Bijiaya Jesús jivi livaisi itsa tsipaeba, bajarapalivaisi yabara picani Jesús pecaponaenexatsi nacuae vetsinëjavabelia peneconitsinexatsi. ²¹ Nexata bajarapamonae jamatabëcuenejëbiaya jumaitsi Jesúsjavabelia mapacueniaje:

—Jesús, pacayapëtanetsi jivi pepacueni pexaniajailivaisi netsipaebijava. Daxitajivi, ricovi ata, bepejiobivi ata, najëpaeya yaiyataeya pexaniajailivaisi tsipaebabiabame bajarapamonae pejinavanapaenexa pacuenia Dioso jitsipa. ²² Panetsipaebare. ¿Xanepana tsaja vajamatamotsinexa impuestomatamo Romanonacua pepo pevetsinëjavabelia? Itsa jume, ¿apo xanepana tsaja vajamatamotsinexa? jai bajarapamonae jamatabëcuenejëbiaya Jesúsjavabelia.

²³ Itsiata baitsi jane Jesús jamatabëcueneyapëtane bajarapamonae jamatabëcuenejëbiaya peyanijobijavatsi peneconitsinexatsi picani. Nexata Jesús jumaitsi bajarapamonaejavabelia:

—¿Detsa xuajitsia panejamatabëcuenejëbame? ²⁴ Panetsitajëre palatanëyo, jai Jesús.

Nexata bajarapamonae tsitajëtatsi palatanëyo. Nexata Jesús jumaitsi bajarapamonaejavabelia:

—¿Jipatsa mapitabaraje, pevënënu, ruca mapapalatanëyoyumataje? jai Jesús.

Nexata bajarapamonae jumaitsi Jesúsjavabelia:

—Romanonacua raja pepo pevetsinë pitabara, pevënënu, jai.

²⁵ Nexata Jesús jumaitsi bajarapamonaejavabelia:

—Nexata parajutabiabianame Romanonacua pepo pevetsinë pijajava. Parajutabiabianame pijinia saicaya Diosojavabelia Dioso pijajava, jai Jesús.

²⁶ Nexata bajarapamonae ajibi Jesús peyabaravaetabijavatsi jivijavabelia livaisi petsipaebijava yabara. Tsipaji xaniavaetsia Jesús jumecanaviata bajarapamonae jamatabëcuenejëbiaya peyanijobijavatsi. Caranata bajarapamonae jamatabëcuenenabenajaca xaniavaetsia Jesús pejumecanaviatsixae bajarapamonaejavabelia. Moya baja nexata ena bajarapamonae.

Pacuenia Jesús tsipaeba jivi petëpaecujinae icatsia piasaëjavanexa yabara pelivaisi (Mt 22.23-33; Mr 12.18-27)

²⁷ Saduceovi saicaya itsalivaisi xaina. Bajarapamonae jamatabëcuenenavëxaniabiaya jumai tsabiabi: “Petëpaevi rabaja petëpaecujinae, apo asaë icatsia tsane,” jai tsabiabi. Nexata saduceovi imoxoyobatsi Jesús. Saduceovi jumaitsi Jesúsjavabelia mapacueniaje:

²⁸ —Jesús, Moiséspijinë bajayata vajanacatoyaquinaelivaisi, jumaitsi mapacueniaje: “Ponë pematapijinë pepua penacojiobinë baja, itsa tëpa pexi xainaenejeva, nexata juyapijinë bepita pematapijinëmi pijavami. Bajarapacuenia juyapijinë bepita pematapijinëmi pijavami pexi pexainanexa bajarapovajavabelia. Nexata pexi itsa xainabeje, bematapijinëmi pexi petanexa daxitajivi,” jai Moiséspijinë bajayata vajanacatoyaquinaelivaisi. ²⁹ Nexata jinavanapa ënacaemonae, siete ponëbeje. Pepo matapijinë copiata nacojioba. Nexata bajaraponë pijava vecuatëpa pexi xainaenejeva. ³⁰ Nexata pematapijinëmi pepënarucaenë pita pematapijinëmi pijavami. Nexata icatsia bajaraponë ata tëpa pexi xainaenejeva bajarapovajavabelia. ³¹ Nexata icatsia itsanë tuatujëmatapijinë pita bajarapova. Bajara icatsia ponë ata tëpa pexi xainaenejeva bajarapovajavabelia. Bajarapacuenia daxita baja siete ponëbeje, nacaemonae, pitaponae ata bajarapova, itsiata itsanë ata pexi apo xainae bajarapovajavabelia. Bajarapacuenia daxita siete ponëmibeje tëpa. Verevereca baja. ³² Belia baja bajarapova ata tëpa. ³³ “Jivi raja petëpaecujinae, Dioso icatsia asaëyaexanaenatsi,” jamë. ¿Detsa nexata ponë, bajarapomonaeyajuvënë, pijava tsane bajarapova bajarapamatacabi? Daxita pamonae siete ponëmibeje, nacaemonae, pitapona picani bajarapovami, jai saduceovi Jesúsjavabelia.

³⁴ Nexata Jesús jumaitsi saduceovijavabelia:

—Aeconoxae mapanacuataje pebijivi, petiriavi ata, nacojiobapona. Itsamonae pexënatoyonë pexainaeivi pebijavabelia canajetapona petonacojiobinexatsi. ³⁵ Itsiata baitsi jane pamonae Dioso itapetatsi, apo pevereverecaenacuatsia jinavanapaena. Bajarapamonae petëpaecujinae, Dioso icatsia asaëyaexanaenatsi. Bajarapamonae bajarapanacuatsia apo nacojiobi baja tsane. Bajarajotatsia itsajivi ata pexënatoyo apo canajetsi tsane pebijavabelia petonacojiobinexatsi. ³⁶ Bajarapamonae acuenebi tsane petëpaevaja. Tsipaji bajarapamonae jinavanapaena athëbëtatsia pacuenia angelevi jinavanapa. Bajarapamonae baja Dioso pexi tsane. Tsipaji baja petëpaecujinae Dioso icatsia asaëyaexanaenatsi. ³⁷ Moiséspijinë bajayata yaquina pacuenia Dioso tsipaebatsi tsiquirinaemëyo petajueyecaecotiajavaverena. Nexata Moiséspijinë peyaquinaelivaisita, jumaitsi pacuenia Dioso icatsia asaëyaexanaejitsia petëpaevimi. Nexata Moiséspijinë nacayapëtaeyaexana Dioso icatsia piasaëyaexanaejavanexa petëpaevimi. Tsipaji baja Abraham peputëpae, Isaac ata baja peputëpae, Jacob ata baja peputëpae, bajarapamonae yabara bajayata Moiséspijinë peyaquinaelivaisita jumaitsi mapacueniaje: “Xanë rabaja Abraham pijaDiosonë, Isaac ata pijaDiosonë, Jacob ata pijaDiosonë,” jai baja cajena Dioso bajayata Moiséspijinëjavabelia. ³⁸ Bajarapacuenia Dioso pejumaitsixae, nayapëtane bajarapomonae

bajayata tēpae ata, Diosovecua apo penaxuabijava. Aconoxae ata bajarapamonae Dioso yajavajinavanapa athēbētatsia. Daxita petēpaevi Dioso cajena apo tsitatēpaetsi, jai Jesús saduceovijavabelia.

³⁹ Nexata judíovi pecujarubivi jumaitsi Jesúsjavabelia:

—Jesús, saduceovi xaniavaetsia jumecanaviatame, jai judíovi pecujarubivi.

⁴⁰ Bajaraxuacujinae saduceovi cjunava baja icatsia peyanijobijava Jesúsjavabelia.

Pacuenia Jesucristo yabara Davidpijinē bajayata tajēvelia: “Tajatuxanenē,” jai yabara pelivaisi

(Mt 22.41-46; Mr 12.35-37)

⁴¹ Jesús pijacuata nayabarajumaitsi judíovi pecujarubivijavabelia mapacueniaje:

—¿Detsa xuajitsia jivi apo canaējētsi Cristo Dioso pexēnatocuene? Jivi saya jamatabēcuenenavēxaniabiaya jumai tsabiabi Cristo yabara: “Cristo raja itsa patsiana, saya Davidpijinē pemomo tsane,” jai tsabiabi. ⁴² Davidpijinē bajayata tajēvelia pejumaitsiyava Cristo yabara Salmosvēnēbaxutota, jumaitsi mapacueniaje:

Dioso jumaitsi tajatuxanenējavabelia: “Ecare abaxē tacujanenia. ⁴³ Vecatsivajēnae jume-covēnētsiaexanatsi abaxē copiaya nijavajabitsaē nitorobicuenaexa,” jai Dioso tajatuxanenējavabelia,

jai Salmosvēnēbaxutota Davidpijinē bajayata pejumaitsiyava Cristo yabara.

⁴⁴ ‘Nexata Davidpijinē bajayata Cristo yabara: “Tajatuxanenē,” itsa jai, nexata Cristo Davidpijinē apo pemomo. Tsipaji baja cajena Cristo saicaya Dioso pexēnato, nayabarajai Jesús judíovi pecujarubivijavabelia, judíovi pecujarubivi pecanaējētsinexa Cristo Dioso pexēnatocuene.

Pacuenia Jesús tsipaeba pijajivijavabelia judíovi pecujarubivi penaconitsijava Diosojavabelia yabara pelivaisi

(Mt 23.1-36; Mr 12.38-40; Lc 11.37-54)

⁴⁵ Itsa abaxē daxitajivi namuxunaevetatsi Jesús petsipaebilivaisi, Jesús jumaitsi pijajivijavabelia:

⁴⁶ —Xania, panayajivitaema palivaisi judíovi pecujarubivi tsipaebapona panejume-covēnētsianiva. Bajarapamonae jitsipabiaba tomara tuatuaējjava piapiajavanē penaxatababiabavanapaenexa jivi peyaiyataenexatsi. Jitsipabiabanua bitso yayiyataeya peba-jacobinexatsi callejava. Bajarapamonae itsa najoneyabiaba judíovi penacaeuatabiabi-bonējava, jitsipabiaba penaenexa pexaniavirijavanēta. Nexata natsiitapetiabiaba penaenexa peyaiyataevitsi penaenexa petsinubijavanēta. Bajarapamonae itsa napatabi-aba fiestajava ata, jitsipabiaba penaenexa peyaiyataevitsi penaenexa petsinubijavanēta.

⁴⁷ Bajarapamonae yamaxēitorobiaya vecuanotabiabanua pamonajivi pevecuatēpaevanētsi pecobecovējavaxi. Bajarapamonae itajara pinijicuenia vajēcabiaba Diosojavabelia. Itsiata pepo pexaniajajamatabēcueneta apo vajēcabiabi. Bajarapacuenia vajēcabiaba saya jivi petaenexatsi Dioso itajara bitso bepejume-covēnētsivi. Nexata bajarapamonae bitso pini-jicuenia Dioso naneconitsiaexanaenatsi pamatacabi Dioso naneconitsiaexanaena daxita pamona Dioso apo pejume-covēnētsivi, jai Jesús pijajivijavabelia judíovi pecujarubivi yabara.

21

Pacuenia ofrenda rajuta Diosojavabelia pamona pevecuatēpaevatsi yabara pelivaisi

(Mt 12.41-44)

¹ Templobota Jesús cobetane bitso pexainaevi ayajira palata pejeponaejava cajonijavabelia. Bajarajota jivi palata jeyabiaba ofrendacuenia perajutsijava Diosojavabelia.

² Bajarajota Jesús cobetanenua pamona pevecuatēpaevatsi, bepejiobiva, penajejava anijapalatanēyobeje. Bajarapova najia anijapalatanēyobeje piamatamobinēyobeje. ³ Jesús nexata jumaitsi pijajivijavabelia:

—Xaniajanē pacuenia pacatsipaebijitsiatsi. Mapovaje pamona pevecuatēpaevatsi bejiobi bitso. Xuayo jia cajonita ofrendacuenia perajutsinexa Diosojavabelia, bajaraxuayo bitso Dioso sivajamatabēcuenabarēya daxita xua itsamonae jia bajarapacajonita matatoxenetsia. ⁴ Tsipaji rabaja xua bajarapamonae apo namatavenonae, jia bajarapacajonita ofrendacuenia perajutsinexa Diosojavabelia. Itsiata mapovaje, bepejiobiva, daxitajavayo penaevetsijavayotaminexa jia bajarapacajonita ofrendacuenia perajutsinexa Diosojavabelia, jai Jesús pijajivijavabelia.

Pacuenia Jesús tajēvelia tsipaeba pijajivi itsamatacabi itsanacuapijivi pexuabijavanexasica templobo yabara pelivaisi

(Mt 24.1-2; Mr 13.1-2)

⁵ Jerusalén tomarata templobo itabëtsiaya exaneta pexaniaviriaibotonëta. Jivi Diosojavabelia ofrendacuenia perajutsijavanë ata, templobota itabëtsiaya ruba templobo pitaitabëtscaenexa. Nexata Jesús pijajiviyajuvënëvi nabarëcuaiquaijai tsaponae templobo pitabëtetsijava yabara. Nexata Jesús tajëvelia vajunupaeba pacuenia itsamatacabi itsanacuapijivi xuabijitsiatsica templobo, daxita bajarapaaitabëcuene yajava. Jesús jumaitsi pijajiviyavabelia mapacueniaje:

⁶ –Itsamatacabi itsanacuapijivi xuabianica mapatemplobomije. Nexata daxita xua pataneme, pitabëcuene yajava, penetsianica. Nexata templobopijiibotonë caeiboto ata pejumavereca apo boca tsane, jai Jesús pijajiviyavabelia.

Pacuenia itsijitsia Jerusalén tomarata, daxitanacuanëjjava ata, mapanacua pecopiarucaevajënaeje yabara pelivaisi

(Mt 24.3-28; Mr 13.3-23)

⁷ Jesús pijajivi jumaitsi:

–Patajatuxanenë, pajitsipajë patanetsipaebijavamë patayapëtaenexa paepatota copiapatsijitsia xua vajunupaebame. ¿Detsa pitsicuene peneta pataenajë itsa copiapatsijitsia xua jumaitsimë templobo yabara? jai Jesús pijajivi.

⁸ Jesús nexata tajëvelia vajunupaeba pacuenia itsamatacabi itsijitsia mapanacuataje. Jesús pijajiviyavabelia jumaitsi mapacueniaje:

–Xania panayajivitaename. Pëtsa panacopatame itsajivi ata papecayamaxëitojorobinexa. Tspajì raja peyamaxëitojorobinexa, ayaibitsaëto patsiana hexanë itajara tsane. Bajarapamonae najumetsënëtsiaya jumai tsane: “Xanë raja Cristonë, athëbëvetsica Dioso taneitorobinëtsica jivi tacapanepaenexa,” jai tsane. “Imoxoyo rabaja pevajënae nacua pevereverecaenexa,” jai tsane itsamonae. Itsiata pëtsa pajumecovënëtame bajarapamonae. Pëtsa papënaponamenua. ⁹ Vajabitsaë pexanaejava imoxoyonacuanëjjava, tajënacuanëjjava ata, pavënëlivaisitaename. Itsiata pëtsa pajunavame. Peneta bajara itsane mapanacua pevereverecaevajënaeje. Itsiata baitsi jane bepìjia bajarapamatacabi mapanacuajaje abaxë apo vereverecajuni tsane, jai Jesús pijajiviyavabelia tajëvelia pevajunupaebijavata pacuenia itsamatacabi itsijitsia mapanacuata.

¹⁰ Jesús icatsia tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajiviyavabelia mapacueniaje:

–Mapanacuajaje pevereverecaevajënae, peneta copiaya itsaviriavi nabena itsaviriavijavabelia. Itsanacuanëpijivi pinijina nabena itsanacuanëpijiviyavabelia. ¹¹ Ira najëabiana ayaicuenia nacuanëjjava. Nacuanëjjava ayajaniboxaneto najetarucaena, piavitaneucue yajava. Itaboxotatsia pitsapaena piayaijunavicuene, pinijicuene pexanaejavanë yajava, jai Jesús pijajiviyavabelia.

¹² Icatsia Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajiviyavabelia mapacueniaje:

–Bajarapacue pecopijapoevajënaeya patajajivixaemë, pacataicaena. Pacabejiobiaexanaena. Pacapanaena judiövi penacatuatabiibonëjavabelia papecanconitsinexa. Penaneconitsivi pejebabiabibota pacajebiana. Patajajivixaemë, pacanubiana presidentevi pitabarata, nacuaevetsivi pitabarata ata. ¹³ Nexata bajarajota xanë talivaisi, pexanialivaisi, patsipaebianame xaniavaetsia. ¹⁴ Nexata pëtsa tajëvelia panatsinajamatabëxainame pacuenia panayajivicuajamëjitsia bajarapamonaejavabelia. ¹⁵ Tspajì paepatota panayajivicuajamëjitsia, bitso peyapëtaevicuena pacacuaicuaijiaexanaenatsi. Nexata caenë ata panijavajabitsaënë apo cajëpaetsi tsane papecajumecanaviatsinexa. ¹⁶ Bajarapamatacabi patajajivixaemë, panacaemonae atamë, itsajivi panijamonaejivi ata pacananajetsiana nacuaevetsivijavabelia papecabeyaxuabinexa. Paneaxa ata, paneena ata, panijabanajivi ata, bitso papecayapëtaejivi ata, bajarapamonae caranata pacananajetsiana. Nexata pacayajuvënëbeyaxuabiana. ¹⁷ Daxitajivi pacaitoya tsabiabi tsane patajajivixaemë. ¹⁸ Itsiata baitsi jane pepo panejamatabëcuenelivaisi bajarapamonae apo itsacueniabi tsane. ¹⁹ Itsa pajamatabëcuenesaemë tsavanapae tsane, nexata matacabi apo pevereverecaejava paxainaename, jai Jesús pijajiviyavabelia tajëvelia pevajunupaebijavata pacuenia itsamatacabi itsijitsia mapanacuataje.

²⁰ Icatsia Jesús tajëvelia vajunupaeba papiyauicuene itsamatacabi copiapatsijitsia Jerusalén tomarata, Jesús jumaitsi pijajiviyavabelia mapacueniaje:

–Itsa pataename vajabitsaë, itsanacuaverena pepatsivi, Jerusaléntomara matatoyorot-sia peyacaranatsijavatsi, nexata pajamatabëtsimë tsane: “Imoxoyo rabaja pevajënae

Jerusaléntomara pevereverecaenexa,” pajamatabëjamë tsane. ²¹ Nexata bajarapamatacabi Judea nacuata pejinavanapaevi, itsa tane bajarapacuene, berëcëpeca cajena ibot-sutonëjavabelia. Jerusalén tomarapijivi ata berëcëpeca pijatomaravecuca. Itsamonae pijinia, Jerusalén tomarapijivi, bajarapamatacabi Jerusalén tomarapënyabelia itsa jinavanapa, apo benaviabirena pijaboyaberena. ²² Bajarapacuenia Jerusalén tomarapijivi itsa tocopiajopaenatsi, tocopiajopaenatsi jane baja Dioso penaeconitsiaexanaematacabitisi. Nexata jane baja tocopiajopaenatsi daxita pacuenia baja cajena pepo bajay-atami tajëvelia vajunupaeba Diosojumelivaisibaxutota. ²³ Bajarapavajabitsaëmatacabi bitso ayaicuenia bejiobi tsane mapanacuapijivije. ¡Papetiriavi penacueto yacotajinavanapa, bitso bejiobi tsane bajarapamatacabi bitso nabejiobitsiaya peponaexae tsane! ¡Papetiriavi ata mitoapaenacuetoxi isajinavanapa, bitso bejiobi tsane bajarapamatacabi! Bajarapacuenia daxita mapanacuapijivije pinijicuenia Dioso naneconitsiaexanaenatsi. ²⁴ Bajarapavajabitsaëmatacabi itsanacuaverena Jerusalén tomarapijivi vajabitsaë tsmaxëpatsianatsi. Nexata itsabitsoëtomu, Jerusalén tomarapijivimi, beyejebianatsi. Itsabitsoëtomu pijinia, Jerusalén tomarapijivimi, caponaenatsi itsanacuanëjavabelia. Nexata bajaraxuacujinae itsanacuanëpijivi patsiana Jerusalén tomarata. Nexata juya bajarapamonae jinavanapaena Jerusalén tomarata. Nexata itsanacuaverena pepatsivi evt-siana Jerusaléntomara. Matapania daxita itsanacuaverena pepatsivi vecuapitsapaena Jerusaléntomara, copatsiana baja bajarapamonae pevetsijava Jerusaléntomara, jai Jesús pijajivijavabelia tajëvelia pevajunupaebijavata papiayaicueene itsamatacabi copiapatsijitsia Jerusalén tomarata.

Pacuenia Jesús tajëvelia navajunupaeba icatsia pepatsijavanexatsica petëpacujinae yabara pelivaisi

(Mt 24.29-35, 42-44; Mr 13.24-37)

²⁵ Jesús tajëvelia navajunupaeba itsamatacabi icatsia pepatsijavanexatsica. Jesús jumaitsi pijajivijavabelia mapacueniaje:

—Xanë tapatsivajënaetsica, jivi taena pecujunavicuene. Matababipijijumetotatsia, xua naitajëtsiana, meravipijijumetotatsia ata, xua naitajëtsiana, tulupujavatatsia ata, xua naitajëtsiana, bajaraxuanë jivi bitso cjunaviana. Daxita nacuanëpijivi bitso najunavicaena itsa jumetaena manuameneta pinijimalatata bitso penajumetsijava. ²⁶ Daxitanacuanëjava bitso jivi najamatabëxainae itsa taena piayaicueene petocopiajopajavatsi. Nexata daxita nacuanëjava jivi tēpajoneyabiabiana pecajunavi. Daxita xua athëbëtatsia rubena, najëabiana. Xaniavaetsia apo rubenae tsane. ²⁷ Nexata bajarapaepatota jivi netaena, Daxitajivi Pematapijinënë, athëbëvetsica itarërëbota tanajetaruaejava. Patsianicajë daxitacueene taevetsinexa. Tanivenivenaecotia yajavapatsianicajë. ²⁸ Itsa pataename pecopiajopaejava bajarapacuene, nexata panajamatabëcuenesätsianame. Tsipaji rabaja imoxoyo pevajënae tsane papecacapanepaenexa jivi papecabebiobia exanaebi-abijavamivecuca, jai Jesús pijajivijavabelia tajëvelia penavajunupaebijavata itsamatacabi icatsia pepatsijavanexatsica.

²⁹ Icatsia Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Pacanaëjere pacuenia itsi higeranae, itsavirianaenë ata. ³⁰ Itsa baja imoxoyo pevajënae tsaponae vai pejonejavanexa, bajaraponaenë pejanabaxu juva. Nexata bajarapacuenia payapëtaname vai baja imoxoyo pevajënae pejonejavanexa. ³¹ Bajara pijinia pacuenia peneta itsa pataename pecopiapatsijava xua yabara pacatsipaebatsi, nexata payapëtaname imoxoyo baja pevajënae pecopiapatsijavanexa tsane pamatacabi daxita Dioso pijajivi evt-sijitsia mapanacuataje, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

³² Icatsia Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Pitsijamatabëcuenivi aeconoxae mapamatacabitaje jinavanapa, bajarapitsijamatabëcuenivi abaxë, bexëjavabelia ata, apo vereverecae tsane. Matapania xua yabara pacatsipaebatsi itsa baja copiapatsiana, bajarapamonae jane baja vereverecaena. ³³ “Itaboxo, ira yajava, tsitecaena daxitamatabëcujavabelianexa,” jamatabëjai ata tsane itsamonae, itsiata jamatabëcuenenavëxaniabiana. Tsipaji jemata itaboxo, ira yajava, vereverecaena. Nexata palivaisi pacatsipaebatsi, apo najumetsënëtsinë tsane. Nexata xua yabara pacatsipaebatsi, pacuenia baja najumecapanepaeya jumaitsinë, daxita bajaraxua copiapatsiana, jai Jesús pijajivijavabelia.

³⁴ Icatsia Jesús jumaitsi pijajivijavabelia:

—Nayajivitaeya pajinavanapaename. Pëtsa panajamatabëxainame pibisiacueni paneexanaenexa, paneaitajbinexa ata. Pëtsa pasivanajamatabëxainame maëpanacuapijijamatabëcuenije. Belia bajarapacuenia paneexanavanapaejavata, jemata

copiapatsipa tapatsimatacabinexatsica. ³⁵ Pacuenia dujuai peyamatajucaejava, meniareca jemata jivi xuareca dujuai peyamatajutsinexa, bajara pijinia pacuenia xanë tapatsimatacabinexatsica, jemata daxitanacuanëjava copiapatsiana. ³⁶ Bajaraxuata nayajivitaeya pajinavanapaename. Daxitamatacabi canacujitsia panayajivivajëcabiabianame Diosojavabelia paneajamatabëcuenesaë tsaonaenexa, panevecuapanepaonaenexa daxita papibisiacuene pacatocopiapataponaena. Daxita bajarapapibisiacuene panevecuapanepaecujinae ata, pavajëcabiabianame Diosojavabelia. Nexata pamatacabi xanë, Daxitajivi Pematapijinënë, patsianicajë, papecacaëjëpaenexa panenubenaejava taitabarata, jai Jesús pijajivijavabelia.

³⁷ Caematacabi canacujitsia Jesús livaisi tsipaebabiaba templobota. Nexata icatsia caemeravi canacujitsia Jesús tomaravecuca pitsapabiaba pemajitabiabinexa petsutojumabelia. Nexata patsutojumata olivonaenë nubena, bajarapatsutojumata Jesús majitabiaba. ³⁸ Daxita bajayacunua canacujitsia jivi patabiaba templobota penamuxunaevetabiabinexatsi Jesús petsipaebilivaisi.

22

Pacuenia Judas pona Jesús pijavajabitsaë pecobeyabelia pecanajetsinexatsi yabara pelivaisi

(Mt 26.1-5, 14-16; Mr 14.1-2, 10-11; Jn 11.45-53)

¹ Imoxoyo baja pevajënae pejonenexa pascuavënëfiesta. Bajarapafiestamatacabi jivi baxane levadurata matajërëabinejeva pexanaepan. ² Sacerdotevi penamatacaitorobivi, judíovi pecujarubivinuua, najumejaita pacuenia picani bajarapamonae Jesús beyaxuabijitsiatsi. Itsiata abaxë bajarapamonae Jesús apo beyaxuabitsi. Tsipaji bajarapamonae jivi cujunava.

³ Nexata dovathi tsijamatabëjunuatsi Judas. Judas, ponë vënërubatsi itsavënë, Iscariote. Bajaraponë Jesús pijajivi, doce ponëbejeyajuvënë. ⁴ Judas yapëtane itsajota nacaetutata sacerdotevi penamatacaitorobivi, templobopijipolicíavi penamatacaitorobivi yajava. Nexata bajarabelia Judas pona pebarëcuacuajainexa bajarapamonae. Nexata Judas tsipaeba pacuenia rajutsijitsia Jesús bajarapamonae pecobeyabelia. ⁵ Nexata bajarapamonae barëya. Rajutsiapaebatsi palata. ⁶ Jejai Judas. Nexata Judas Jesús naitaxuto-caevetsia ponapona. Paepatota Judas toyapëxanepanatsi, perajutsinexa jane baja Jesús bajarapamonae pecobeyabelia. Bajarapacuenia Judas najamatabëxaina pexanaenexa itsajota bitso jivi apo navitsi.

Pacuenia Jesús barë nabane pijajivi pecopiarutsinabani baja pebeyaxuabivajënaetsi yabara pelivaisi

(Mt 26.17-29; Mr 14.12-25; Jn 13.21-30; 1 Co 11.23-26)

⁷ Junua jane baja pascuavënëfiesta, pafiestamatacabi jivi baxane levadurata matajërëabinejeva pexanaepan. Bajarapamatacabi ovejaji babia pexaenexa pascua fiestamatacabi. ⁸ Nexata Jesús itoroba pijajivitonëbeje, Pedrobeje Juanbeje. Jesús jumaiti pijajivitonëbejejavabelia:

–Paponarebeje paneexanaenexabeje vajaxaejavanexa. Xua jivi baxane pascua fiestamatacabi, bajaraxua vajaxaenexa paexanaenamebeje, jai Jesús pijajivitonëbejejavabelia.

⁹ Nexata Pedrobeje jumaitisibeje Jesúsjavabelia:

–¿Detsa jota jitsipame bajaraxua pataexanaenexabeje? ¿Detsajota bajaraxua xaenatsi? jai beje.

¹⁰ Jesús nexata jumaiti pijajivitonëbejejavabelia:

–Tomarabelia itsa papatsianamebeje, pacaxitajarabianamebeje mera canalito pecanajetarucaenë. Bajaraponë papënanajetarucaenamebeje. Pabota bajaraponë joneyojopaena, bajarapabota panapatsianamebeje. ¹¹ Nexata pajumaitsimëbeje tsane bajarapabo pexainanëjavabelia: “Vajanacacujarubinë raja Jesús jumaiti: “¿Detsa jota pënëyatuucutsibo eca, pabota tajajivi barëxajëtsianë xua jivi baxane pascua fiestamatacabi?” jai raja Jesús,” pajamëbeje tsane bajarapabo pexainanëjavabelia. ¹² Nexata athëbëabetsia anijairabeje pexainaebojavata, pacatsitajëtsianabeje. Bajarapaboënëta, athëbëyotsia paira, ayaiënëtuatujë tsane. Daxitacuene bajarajota xainaena. Nexata xua jivi baxane pascua fiestamatacabi, bajarajota paexanaenamebeje vajaxaenexa, jai Jesús pijajivitonëbejejavabelia.

¹³ Nexata jane baja bajaraponëbeje ponabeje. Caxitajarababeje daxita pacuenia Jesús jumaiti. Nexata xua jivibaxane pascua fiestamatacabi, daxita Jesús pijajivi pebarëxaenexa, bajaraponëbeje exanabeje jane baja.

¹⁴ Itsa baja copiapona pexaepatotanexa, Jesús, pijajivi doce ponëbeje, apóstolevi, yajava, eca mesa muxuneneta. ¹⁵ Nexata Jesús jumaiti pijajivijavabelia:

—Tatêpaevajênae bitso jitsipajê patacayajavaxaejava mapapascua fiestamatacabi pexaejavaje. ¹⁶ Xaniajanê pacuenia pacatsipaebijitsiatsi. Matavêjêa rabaja mapanacuataje apo xaeñê tsane pascua fiestamatacabi pexaejava. Matapania daxita patajajivimê Dioso itsa pacacapanepaena panijaneconivecua, bajara jane icatsia matapania taxa Dioso pijanacuatatsia xaeñajê pascua fiestamatacabi pexaejava, jai Jesús pijajivijavabelia.

¹⁷ Nexata Jesús copavênêjavata yapita pijajivi pebarêapaeranexa. Jesús jumaitsi Diosojavabelia:

—Pexaniacuene panetoexaname. Panerajutame maporaje, jai Jesús.

Bajaraxuacujinae pijajivijavabelia jumaitsi:

—Maporaje payapire. Papaema padaxitamê mapacopataje. ¹⁸ Xaniajanê pacuenia pacatsipaebijitsiatsi. Matavêjêa rabaja mapanacuataje apo apaenê tsane uvacuaira. Matapania itsa copiajopaena daxita Dioso pijajivi pevetsimatacabi, apaenajê icatsia, jai Jesús pijajivijavabelia.

¹⁹ Bajaraxuacujinae Jesús pita panbê. Jesús jumaitsi Diosojavabelia:

—Pexaniacuene panetoexaname. Panerajutame pan, jai Jesús.

Bajaraxuacujinae epatsênêquejeba bajarapapanbê. Rajuta pijajivi. Jesús jumaitsi pijajivijavabelia:

—Paxaema. Mara tavitoje, patacasivatêpaejava paxamênexa. Tatêpaecujinae mapacuenia paexanabiabianameje patanenajamatabênapitabiabinexamê, jai Jesús pijajivijavabelia.

²⁰ Nexata jane baja daxita Jesús pijajivi barênabane. Penabanicujinae Jesús icatsia yapita pijajivi pebarêapaeranexa. Jesús jumaitsi pijajivijavabelia:

—Dioso baja cajena najumecapanepaeya jumaitsi pejanalivaisi papecacapanepaenexa bajaraponêjavabelia. Bajarapacuenia pacacapanepaena tajana pejamatabêcueneta. Tajana raja runaena papecacomuatsinexa pibisiacuene paneexanaeneconimivecua. Mapacapaevajataje padaxitamê papaema panenajamatabênapitabiabinexa pacuenia Dioso bajarapapejanalivaisita najumecapanepaeya jumaitsi papecacapanepaenexa bajaraponêjavabelia, jai Jesús pijajivijavabelia.

²¹ Icatsia Jesús jumaitsi pijajivijavabelia:

Panejumetaema. Ponê necanajetsijitsia tajavajabitsaê pecobeyabelia, bajaraponê naeca mapamesa muxunenetaje. ²² Xañê, Daxitajivi Pematapijinênê, têpaenajê pacuenia tajêvelia Dioso netocopata. Itsiata baitsi jane ponê necanajetsiana tajavajabitsaê pecobeyabelia, bitso bejiobi tsane, jai Jesús.

²³ Nexata Jesús pijajivi najumai tsenae:

—¿De meta ponê vaxaitsiyajuvênênê, canajetsiana Jesús pijavajabitsaê pecobeyabelia? najai tsenae Jesús pijajivi.

Pacuenia Jesús pijajivi: “¿Detsa ponê vaxaitsiyajuvênênê nacavecuaayajamatabêcuenênê bitso?” najai yabara pelivaisi

²⁴ Jesús pijajivi anaeya najumenotsiaya nalivaisita. Najumaitsi:

—¿Detsa ponê vaxaitsiyajuvênênê nacavecuaayajamatabêcuenênê? najai Jesús pijajivi.

²⁵ Nexata Jesús jumaitsi pijajivijavabelia:

—Nacuaejetsivi pacuenia jamatabêpacaitoroba panetoexanaenexa, ajumesaêya pacaitorobabiaba papijajivimê, bajarapamonae pevetsinacuanêjava panejinavanapaevi. Itsiata baitsi jane bajarapacuenia pacabejiobiaexanabiabi ata, bajarapamonae jitsipabiaba paxamê bajarapamonae yabara panejumaitsinexa: “Bajaraponê vajanacayanacuaejetsivínê, bitso pexaniacuene nacatoexanabiaba,” panejainexa. ²⁶ Pêtsa paxamê bajarapamonae cuenêjêpaeya bepaayajamatabêcuenevimê panataneme. Ponê raja peneta paxamêyajuvênênê daxita paxamê pacavecuaayajamatabêcuenênê, bajaraponê peneta daxitajivi bepíjajivitonêcuenia yavenonaena. ²⁷ Mapanacuata petuxanenê itsa xaeyeca mesata, petuxanenê jamatabêcueneevetatsi pijajivitonê. Tspají petuxanenê ayajamatabêcuenênê pijajivitonê matatoxenetsia. Itsiata xañê bajarapitsijamatabêcuenê apo xainaenê. Ponaponajê paxamêjavata daxita paxamê bepanijajivitonênêcuenia patacayavenonaenexa, jai Jesús.

²⁸ Icatsia Jesús jumaitsi pijajivijavabelia:

—Pacuenia jivi nitoya, nebejiobiaexananua, bajarapacuenia paxamê ata patajajivixaeñê, pacaexana. Bajarapacuenia pacaexanae ata tsane, itsiata apo panenavecuacopabimê tsane. Tsitecaeya paneyajavajinavanapame. ²⁹ Bajaraxuata nexata pacuenia taxa Dioso nitoroba jivi taevetsinexa, bajara pijinia pacuenia juya xañê ata paxamê pacaitorobatsi jivi paneevetsivinexa. ³⁰ Nexata paxamê pacajamatabêcuenecaêjêpaena taevetsinacuatatsia tajamesata panenanabaninexa, panenamatavejêaapaenexanua. Paenaename

jueznēcuenia panenaneconitsiaexanaenexa pijaneconi pexainaevi. Nexata pananeconitsiaexanaename Israelpijinēmi pexi, doce ponēmibeje, pemomoxiyajuvēnēvi, jai Jesús pijajivijavabelia.

Pacuenia Jesús tajēvelia jumaitsi Pedrojavabelia: “Pedro, xamē raja nayavajunuaxainae-name tajajivitonēcuenemē;” jai yabara pelivaisi (Mt 26.31-35; Mr 14.27-31; Jn 13.36-38)

³¹ Jesús jumaitsi Pedrojavabelia:

–Simón, dovathi baja cajena jamatabēcapiata xanēvecua. Bitso cajamatabēcuenējēbiana tanenavecuacopatsinexamē. Pacuenia arroxainanē arroxzu jēaba pesi pevecuaxu-abinexa, bajara pijinia pacuenia pecaxuabinexa xanēvecua cajamatabēcuenējēbiana dovathi. ³² Itsiata baitsi jane catovajētatsi Diosojavabelia necopatsiyaniva tanejume-covēnētsijavamē. Itsa navecuapaebianame nenaneconitsijava Diosojavabelia, nexata jane baja bajaraxuacujinae jamatabēcuenē babataponaponaename Dioso pejumecovēnētsivi, jai Jesús Pedrojavabelia.

³³ Pedro nexata jumaitsi Jesúsjavabelia:

–Tajatuxanenē, najamatabēcueneveretajē baja. Penaneconitsivi pejebabiabibota caetsi ata, tanaponaponaenexa xamēta. Najamatabēcueneveretajē baja tacayajavatēpaenexanua, jai Pedro Jesúsjavabelia.

³⁴ Nexata icatsia Jesús jumaitsi:

–Pedro, xaniajanē pacuenia catsipaebijitsiatsi. Ajena, mapameravitaje, vacara pefi-abivajēnaeya nayavajunuaxainaname tajajivitonēcuenemē. “Xanē cajena apo yapētaenē bajaraponē,” jamē tsane acueyabi xuabeje xanē yabara, jai Jesús Pedrojavabelia.

Pacuenia baja itsa imoxoyo pevajēnae Jesús pebeyaxuabinexatsi, tsipaeba pijajivijavabelia yabara pelivaisi

³⁵ Jesús yanijoba pijajivijavabelia. Jesús jumaitsi mapacueniaje:

–Imata panamuto itsa pacaitorobatsi Dioso pejumelivaisi jivi daxitanacuanējava panet-sipaebanajetarubenaenexa, pacaitavetatsi panecaponaeyaniva doro, palata ata, zapato ata. ¿Bajarapamatacabi panamatavenoname tsaja itsacuenējava? jai Jesús pijajivijavabelia.

Nexata Jesús pijajivi jumaitsi:

–Jume. Apo panamatavenonaenē cajena itsacuenējava ata bajarapamatacabi, jai.

³⁶ Jesús nexata jumaitsi:

–Baja rajane aeconoxae panamuto, pajivi doro xaina, bajarapajivi caponae pijadoro. Palata ata caponae. Pajivi espada apo xainae, bajarapajivi penajumaxuabipana canajetsi. Comuatsi espada. ³⁷ Xaniajanē pacuenia pacatsipaebijitsiatsi. Pacuenia xanē yabara Diosojumelivaisibaxutota tajēvelia jumaitsi, bajarapacuenia netocopiapatsiana. Dioso pejumelivaisibaxutota tajēvelia xanē yabara jumaitsi mapacueniaje: “Naneconitsiaex-anaenatsi bepibisiacuene pexanaenēcuenia,” jai tajēvelia xanē yabara Diosojumelivaisi-baxutota. Nexata bajarapacuenē imoxoyo baja pevajēnae tanetocopiapatsinexa, jai Jesús pijajivijavabelia.

³⁸ Nexata Jesús pijajivi jumaitsi:

–Tajatuxanenē, mara anijaespadabejeje, jai Jesús pijajivi.

Nexata Jesús jumaitsi pijajivijavabelia:

–Xanepana rabaja, jai Jesús.

Pacuenia Jesús vajēta Diosojavabelia Getsemanivēnējavata yabara pelivaisi (Mt 26.36-46; Mr 14.32-42)

³⁹ Jesús pitsapa bovecua. Pacuenia ponabiaba, bajarapacuenia icatsia pona petsutojumabelia. Patsutojumata olivonaenē apaaxayo, bajarapatsutojumabelia pona. Nexata Jesús pijajivi pēnaponatsi. ⁴⁰ Jesús pijajivi itsa barēpata bajarapatsutojumabelia, Jesús jumaitsi pijajivijavabelia:

–Pacajamatabēcuenējēbiana raja dovathi pejamatabēcueneta. Pavajētaponare aeconoxae Diosojavabelia paneajamatabēcuenesaēnexa panecopabiyaniva patanejumecovēnētsijavamē, jai Jesús.

⁴¹ Nexata Jesús pijajivi vecuanatixilia bejamatabēcuenē treinta metro. Jesús nucajunua pematabacabēta pevajētaponanexa Diosojavabelia. ⁴² Jesús pevajētsijavata jumai tsaponae Diosojavabelia:

–Taxa Diosomē, netocopatame picani tanebeyaxuabinexa betajiocuicuneta. Itsa jitsipame, necapanepare bajarapabejiocicunēvecua. Itsiata xanē apo tajitsipaeuene ata, pacuenia xamē jitsipame, netocopatsianame, jai Jesús pevajētsijavata Diosojavabelia.

⁴³ Nexata Jesús athēbēpijiāngel tsitanaitajētatsi pejamatabēcuenē asaēyaxanaenexatsi. ⁴⁴ Jesús pebeyaxuabijavanexatsi yabara, bitso natsinajamatabēxaina. Nexata Jesús bitso

orijibia asaëyata vajëtaƨona Diosojavabelia. Jesùs bitso janetatsi. Pacuenia itsi pijana, bajara itsi Jesùs pejanetsibarëmenetsi. Topitopijai irabereca.

⁴⁵ Jesùs pevajëtsicujinae itsa nonotapuna, lia pijajivijavabelia. Nexata Jesùs pijajivi caxi-tajaraba pemajitanubenaevi. Tsipaji Jesùs pijajivi bitso penajamatabëxainaejava, cuerana.

⁴⁶ Nexata Jesùs jumaitsi pijajivijavabelia:

—¿Detsa xuajitsia pamajitanubename? Panonobapunare. Pavajëtaƨonare Diosojavabelia, dovathi pejamatabëcueneta pacajamatabëcuenejëbi ata paneajamatabëcuenesaënexa, jai Jesùs pijajivijavabelia.

Pacuenia Jesùs vaetabatsi pijavajabitsaë yabara pelivaisi

(Mt 26.47-56; Mr 14.43-50; Jn 18.2-11)

⁴⁷ Jesùs pijavajabitsaë pevaetabijavatanexatsi, cuacuajai tsanucæ pijajivijavabelia. Nexata bajarapaepatota jivi ayabitsaëtoxaneto, Jesùs petsimaxëponaevitsi, najetarubena. Ponë vënërubatsi Judas, Jesùs pijajivi doce ponëbejeyajuvënënëmi, matacanajetaruca bajarapamonaë. Nexata Judas najetabilia Jesùsjavabelia. Itabaratsutsuniaya bajacobatsi.

⁴⁸ Nexata Jesùs bajarajota jumaitsi Judasjavabelia.

—Judas, ¿matsa pacuenia nitabaratsutsuniaya nebajacobame xanë, Daxitajivi Pematapijinënë, tanecanajetsinexamë tajavajabitsaë pecobeyabeliaje? jai Jesùs.

⁴⁹ Jesùs pijajivi itsa tane pacuenia Jesùs exanaejitsiatsi, nexata bajarapamonaë jumaitsi Jesùsjavabelia:

—Tajatuxanenë, ¿namaxëvanitsianatsi tsaja espadata? jai Jesùs pijajivi.

⁵⁰ Nexata caenë Jesùs pijajiviyajuvënënë namaxëvanita. Sacerdotevi pepo penamatacaitorobinë pijajivitonë muxuyoropaëbiaxuaba pecujanenia pamuxuyoroto. ⁵¹ Nexata Jesùs jumaitsi pijajivitonëjavabelia:

—Copabare baja, jai Jesùs.

Nexata Jesùs bajaraponë muxuyoroyataba. Jesùs baja muxuyororuta icatsia bajaraponë. ⁵² Pamonæ Jesùs tsimaxëpatatsi, itsamonæ sacerdotevi penamatacaitorobivi, itsamonæ templobopijipolicivi penamatacaitorobivi, itsamonæ judïovi pijaancianovi. Bajarapamonaë caponaejitsiatsilia Jesùs. Nexata Jesùs jumaitsi bajarapamonaëjavabelia:

—Paxamë meta panetaneme betanacobetoxotsinë. Bajaraxuata pacaponame espadanë, naëbonë yajava, patanevaetabinexamë pacuenia pavaetabablabame penacobetoxotsinë.

⁵³ Xanë caematacabi canacujitsia Dioso pejumelivaisi paxamëjavabelia pacatsipaëbababatsi templobota. Itsiata bajarapamatacabi apo pamevaetabimë. Nexata mapaepatotaje panetsimaxëpatame dovathi, jivi piamatabëcuene itaquiriyaexanaenë, papecaitorobixæ, jai Jesùs petsimaxëpatsivitsijavabelia.

Pacuenia jane baja Pedro nayavajunuaxaina Jesùs pijajivitonëcuene yabara pelivaisi

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Jesùs pevaetabijavajinaetsi, caponaliatsi sacerdotevi pepo penamatacaitorobinë pijaboyabelia. Nexata Pedro bajarapamonaë pecovëvelia tajiyo pënanajetaruca. ⁵⁵ Nexata pabota Jesùs capatatsi, bajarajota, panabo tuatujëta, vajabitsaë isoto itajuruteta. Bajarapamonaë isoto matatoyorotsia ena. Pedro nexata naitaxutocaevetsiaya naëca bajarapamonæjavata. ⁵⁶ Nexata bajarapabota penacuenebiva, Pedro itsa taeyetatsi penanonopecajavata isoto muxuneneta, naitaxutobabatsia asaëya taenucatsi. Nexata itsamonæjavabelia bajarapova jumaitsi Pedro yabara:

—Mara ponë ata Jesùs pijajivitonëje, jai bajarapova.

⁵⁷ Nexata Pedro jumaitsi bajarapovajavabelia:

—Jume raja. Xanë cajena apo yapëtaenë bajaraponë, jai Pedro bajarapovajavabelia Jesùs yabara.

⁵⁸ Bajaraxuacujinae icatsia itsajivi Pedro taeyetatsi. Bajarapajivi ata icatsia jumaitsi Pedrojavabelia:

—Xamë ata rabaja cajena Jesùs pijajiviyajuvënënëmë, jai.

Nexata Pedro jumaitsi bajarapajivijavabelia:

—Jume raja. Xanë raja cajena apo Jesùs pijajiviyajuvënënënë, jai Pedro.

⁵⁹ Bejamatabëcuene caehoracujinae, icatsia itsanë jumaitsi:

—Xaniajai rabaja cajena. Maponëje Jesùsta naponaponaje. Tsipaji rabaja bajaraponë ata Galilea nacuapijinë, jai bajaraponë Pedro yabara.

⁶⁰ Nexata Pedro nayajumetane. Pedro nexata jumaitsi bajaraponëjavabelia:

—Apo yapëtaenë cajena pacuene yabara jumaitsimë, jai Pedro.

Bajarapacuenia Pedro pejumaisijavata, vacara baja fiaba. ⁶¹ Nexata Jesùs boverena namuxufeta Pedrojavaberena. Taeyerentsi Pedro. Nexata bajarapaepatota Pedro najamatabënapitajaraba Jesùs pejumaisijavatsi: “Pedro, ajena, mapameravitaje, vacara pefiavijajënaëya nayavajunuaxainaename tajajivitonëcuenëmë. Xanë cajena apo

yapëtaenë bajaraponë, jamë tsane xanë yabara acueyabi xuabeje,” pejaijavatsi Jesús, namamatabënapitajaraba Pedro. ⁶² Nexata baja Pedro pitsapalia bopanaxovecua. Pinijicuenia nua.

Pacuenia Jesús pijavajabitsaë capocaponatsi yabara pelivaisi
(Mt 26.67-68; Mr 14.65)

⁶³ Pamonae Jesús vaetabatsi, capocaponatsi. Itabaratsaquibabeponatsi pecobethaitonëta. ⁶⁴ Papaëbërëpanata itaxutocëtatsi. Pitaxutocëtsicujinaetsi icatsia itabaratsaquibabeponatsi pecobethaitonëta. Nexata bajarapamonae jumai tsaponae Jesúsjavabelia:

—jVënëjonare ponë caitabaratsaquibaba! jai tsaponae.

⁶⁵ Pibisiacuenianua bajarapamonae jumai tsaponae Jesúsjavabelia.

Pacuenia Jesús nutatsi judíovi penamatacaitorobivi pitabarata yabara pelivaisi
(Mt 26.59-66; Mr 14.55-64; Jn 18.19-24)

⁶⁶ Ajena baja matababi tsarucaponae, nacaetuata judíovi pijaancianovi, sacerdotevi penamatacaitorobivi yajava, judíovi pecujarubivi yajava. Nexata Jesús caponarenatsi bajarapamonae penacaetuatsijavaberena. Bajarajota bajarapamonae jumaiti Jesúsjavabelia:

⁶⁷ —Panetsipaebare. ¿Xamë tsabaja rovia Cristomë, athëbëvetsica Dioso pecaitorobinëtsica jivi necapanepaenënexa? jai bajarapamonae.

Nexata Jesús jumaiti bajarapamonaejavabelia:

—“Xanë rabaja Cristonë, athëbëvetsica Dioso taneitorobinëtsica jivi tacapanepaenëxa,” pacajai atatsi tsipae, itsiata apo panejumecovënëtsimë tsipae. ⁶⁸ Itsalivaisiyo pacayanijobi atatsi tsipae, itsiata apo panejumecanaviatsimë tsipae. Apo panecopatsimënu tsipae. ⁶⁹ Itsiata baitsi jane tavajënaeyabelia xanë, Daxitajivi Pematapijinëne, ecaenajë taxa Dioso pecujanenia patanajuavevetsinexabeje daxitacuene. Bajaraponë pecajëpænëtsi daxitajamatabëcuene, jai Jesús bajarapamonaejavabelia.

⁷⁰ Nexata daxita bajarapamonae jumaiti Jesúsjavabelia:

—¿Xamë tsabaja Dioso pexënatomë? jai bajarapamonae.

Nexata Jesús jumaiti bajarapamonaejavabelia:

—Jājā, xanë rabaja pacuenia panejumaitsimë. Bajaraponëne, jai Jesús.

⁷¹ Nexata bajarapamonae najumaiti:

—Ajibi rabaja abaxë vajeavetaponaeyava jivi neconitsiaya vajanacatsipaebaponaenëxa pacuene yabara naneconitsiaexanaejitsiatsi maponëje. Vaxaitsi rabaja vajacuata jumetanetsi pacuenia maponëje cuaicuajjai Dioso apo pejitsipaecuenia. Tsipaji beDioso pexënato natane, najai bajarapamonae.

23

Pacuenia Jesús nutatsi Pilato pitabarata yabara pelivaisi
(Mt 27.1-2, 11-14; Mr 15.1-5; Jn 18.28-38)

¹ Daxita judíovi pijaancianovi nonobapuna. Sacerdotevi penamatacaitorobivi ata nonobapuna. Judíovi pecujarubivi ata nonobapuna. Nexata bajarapamonae Jesús caponaliatsi itsaboyabelia, Judeanacua pevetsinë Pilato pijaboyabelia. ² Bajarajota Pilato pitabarata bajarapamonae neconitsiaya jumaiti Jesús yabara:

—Mara ponëje naneconita. Tsipaji muxubijiapenetapona jivi pianaepanaenëxa nacuaevevetsivijavabelia. Paneitavetaponanua patamatamotsiyaniya Romanonacua pepo pevetsinë pejamatabëcueneta impuestomatamo pataneyanijobijava. Jumai tsaponaenua: “Xanë raja Cristonë, nacua taevetsinë,” jai tsaponae maponëje, jai bajarapamonae Jesús yabara neconitsiaya Pilatojavabelia.

³ Nexata Pilato jumaiti Jesúsjavabelia:

—¿Xamë tsaja judíovi pepo nevetsinë? jai.

Nexata Jesús jumaiti Pilatojavabelia:

—Jājā, xanë rabaja pacuenia nejumaitsimë, jai Jesús Pilatojavabelia.

⁴ Pilato nexata jumaiti sacerdotevi penamatacaitorobivijavabelia, jivi ayaibitsaëttoxanetojavabelia ata:

—Apo caxitajarabinë cajena itsacujiruneconi ata pexainaejava maponëje, paneconi yabara naneconitsijitsia, jai Pilato.

⁵ Itsiata bajarapamonae ajumesaë. Orijibia neconitsia jumaiti Jesús yabara:

—Bajaraponë daxita Judea nacuapijivi muxubijiapenetapona bajarapamonae pianaepanaenëxa Judeanacua pevetsivijavabelia. Taxuxuaba cajena bajaraponë bajarapacuene pexanaeyava Galilea nacuata. Nexata maberena ataje bajarapacuenia icatsia exanapona, jai bajarapamonae Jesús yabara Pilatojavabelia.

Pacuenia Jesús nutatsi Herodes pitabarata yabara pelivaisi

⁶ Pilato itsa jumetane bajarapamonae peneconitsijavatsi Jesús, nexata Pilato jumaitsi bajarapamonaejavabelia:

—¿Matsa ponėje Jesús, Galilea nacuapijinėje? jai Pilato.

⁷ Nexata bajarapamonae tsipaeba Pilatojavabelia Jesús Galilea nacuapijinēcuene. Nextata Pilato itoroba pijajivi Jesús pecaponaenexatsilia Herodesjavabelia. Tsipaji Herodes Galileanacua pevetsinē. Bajarapamatacabi Herodes ponapona Jerusalén tomarata. ⁸ Nexata Herodes itsa tane Jesús, barēya. Tsipaji Herodes vėnėlivaisitaeyabiaba Dioso pesaėta Jesús pinijicuene pexanaponaejavanė. Nexata Jesús pinijicuene pexanaejava Dioso pesaėta jamatabėtane Herodes. ⁹ Nexata Herodes ayaiacuenia yanijobapona Jesúsjavabelia. Itsiata Jesús apo jumepitsi caejumeyo ata. ¹⁰ Bajarajota nubena sacerdotevi penamatacaitorobivi, judıovi pecujarubivi yajava. Bajarapamonae ayaijumeta neconitaponatsi Jesús Herodesjavabelia. ¹¹ Nexata Herodes, pijajivi yajava, Jesús capocaponatsi. Bitso pexaniajava, xua nacuaevetsinē banaxatata, bajaraxua Jesús quenetsiataeya xatatatsi. Bajarapacuenia Jesús quetsiataeya xatatatsi pepo nacuaevetsinēcuena petanexatsi. Bajaraxuacujinae icatsia canaviabarenatsi Pilatojavaberena. ¹² Pilatobeje Herodesbeje naitoyabeje picani. Itsiata bajarapamatacabi nabarajamatabėcuenexanepanabeje. Naxani-ababeje baja.

Pacuenia baja Pilato tocopata Jesús pebexuabinoxatsi yabara pelivaisi

(Mt 27.15-26; Mr 15.6-15; Jn 18.39-19.16)

¹³ Pilato junata penacatuatsinexa sacerdotevi penamatacaitorobivi. Junata penacatuatsinexa judıovi pevetsivi ata. Junata penacatuatsinexa bajarapatomarata pejinavana-paevi ata. ¹⁴ Nexata Pilato jumaitsi bajarapamonaejavabelia Jesús yabara:

—Paxamė panetocapatame maponėje. “Mara ponėje naneconita. Tsipaji muxubijiapeneta-pona jivi pianaepananea nacuaevetsivijavabelia,” panejamė. Itsiata baitsi jane xanė picani tajacuata yanijobajė xaniavaetsia paneitabėta. Nexata xua yabara paneconitame, ajibi picani. Maponėje itsacujiruneconi ata apo xainae, paneconi yabara naneconitsijitsia. ¹⁵ Herodes ata apo naneconitsiaexanaetsi. Saya icatsia nacatocanaviarena. Pataneme rabaja. Itsacujiruneconi ata apo xainae maponėje, paneconi yabara beyaxuabijitsiatsi. ¹⁶ Nexata tajajivi itorobianajė bajaraponė saya tajajivi pejumaconibabenexa penaneconitsivi pejumaconibabeyabiabimacata. Bajaraxuacujinae copatsianajė, jai Pilato bajarapamonaejavabelia.

¹⁷ Caevai canacujitsia, pascuavėnė fiestamatacabi, Pilato copatabiaba caenė penaneconitsinė pepitsapaenexa penaneconitsivi pejebabiabibovecua. Pilato copatabiaba ponė jivi vajėtatsi pecopatsinexa. Nexata bajarapacuenia copatabiaba jivi pesivajamatabėcuene xanepanaenexatsi. ¹⁸ Nexata bajarapamonae itsa jumetane Pilato picani Jesús pecopatsiapaebijava, nexata daxita bajarapamonae caecuenia vavajai Jesús yabara. Bajarapamonae pevavajajavata, Jesús yabara jumaitsi Pilatojavabelia mapacueniaje:

—¡Majane ponė beyaxuareje! ¡Barrabás jane panetocapitsapare! jai bajarapamonae.

¹⁹ Bajaraponė Barrabás Jesús pevajėnaeya bajarapatomarata barėnabia gobierno pijajivijavabelia. Nexata Barrabás jıvitonė beyaxuaba. Bajaraxuata naneconitsiaponapona penaneconitsivi pejebabiabibota. ²⁰ Pilato picani jamatabėcopata Jesús. Bajaraxuata picani icatsia Pilato tsipaebijitsia jivijavabelia Jesús baja pecopatsinexa. ²¹ Itsiata baitsi jane bajarapamonae orijibia vavajai.

—¡Cruzajavabelia cobematabiabarutsiaexanare! ¡Cruzajavabelia cobematabiabarutsiaexanare! jai tsaponae bajarapamonae Pilatojavabelia.

²² Icatsia Pilato jumaitsi bajarapamonaejavabelia:

—¿Detsa xuajitsia? ¿Detsa papibisiacuene exana maponėje? Apo caxitajarabinė cajena itsacujiruneconi ata, paneconi yabara beyaxuabijitsiatsi. Nexata tajajivi itorobianajė bajaraponė saya tajajivi pejumaconibabenexa penaneconitsivi pejumaconibabeyabiabimacata. Bajaraxuacujinae copatsianajė peponaenexa baja, jai Pilato.

²³ Itsiata bajarapamonae ajumesaė. Vavajai tsaponae.

—¡Cruzajavabelia cobematabiabarutsiaexanare! jai tsaponae bajarapamonae Pilatojavabelia.

Nexata bajarapamonae, sacerdotevi penamatacaitorobivi yajava, bitso pevavajait-saponaexae, belia baja Pilato jejai. ²⁴ Nexata baja Pilato tocopata pacuenia bajarapamonae vajėtatsi. ²⁵ Nexata Pilato itoroba pijajivi Barrabás, ponė jıvitonė beyaxuaba, pecapitsapaenexatsi pepitsapaenexa baja penaneconitsivi pejebabiabibovecua. Caranata Jesús, pianeconijibinė, pebexuabinoxatsi Pilato itoroba pijajivi.

*Pacuenia jane baja Jesús cruzajavelia cobematabiabarutatsi yabara pelivaisi
(Mt 27.32-44; Mr 15.21-32; Jn 19.17-27)*

²⁶ Vajabitsaë itsa caponaliatsi Jesús cruzajavelia pecobematabiabarutsinexatsi, Simón pijinia najetaruca vayafoverena. Nexata vajabitsaë vaetabatsi Simón. Simón Cirene tomarapijinë. Nexata Simón vajabitsaë itorobatsi, pacruzajavelia Jesús cobematabiabarutsiatsi, petocaponaenexa. Nexata bajarapacruza Simón tovëtaranajetaruca Jesús pecovëya.

²⁷ Jesús pënanajetarubenatsi, jivi ayaiBITSaëtoXaneto. Bajarapamonaeyajuvënëvi, petiriavi ayaiBITSaëto, Jesús bitso pënuayabatuaponaatsi ayaijumeta. ²⁸ Nexata Jesús napënyorota. Jumaitsi bajarapapetiriavijavelia:

—Paxamë petiriavi, paJerusalén tomarapijivimë, pëtsa panepënuayabame xanë. Paxamë jane panatsinuema. Panexi ata patsinuema. ²⁹ Itsa copiajopaena piayaimatacabi, jivi bitso bejiobi tsane. Nexata jivi jumai tsane: “Mavecovi itsiata bevelia nacatsunabejiobitanane pexi apo pexainaexae,” jai tsane jivi bajarapamatacabi mavecovi yabara. ³⁰ Nexata bajarapamatacabi jivi bitso itsa nabejiobitaena, belia jitsipaena petëpaejava. Nexata jivi najumai tsane: “Vajatëpaenexa, nacatoxanepanaejitsipa pinijibotsutonë itsa nacamatacënëbajarabijitsipa,” najai tsane jivi. ³¹ Xanë itsacujiruneconi apo xainae atanë, nebejiobiaexanaena itsa necobematabiabarutatsiana cruzajavelia. Nexata pamonae pibisiacuene pexanaevi bitso xanë matatoxenetsia, bejiobiaexanaenaenatsi itsa tocopiapatsianatsi piayaimatacabi, jai Jesús bajarapapetiriavijavelia.

³² Itsabelia vajabitsaë Jesús caponatsi, bajarabelia anijanëbeje penaneconitsinëbeje, Jesús yajava, caponatsi. Bajaraponëbeje piamatabëcuenebejenëbeje vajabitsaë caponatsibeje Jesús peyajavabeyaxabinexatsibeje. ³³ Itsa baja capaliatsi Jivimatasipavënë tsutojavavelia, nexata cruzajavelia Jesús yajavacobematabiabarutatsi bajaraponëbeje. Itsanë rutatsi itsacruzata Jesús pecujuanenia. Itsanë rutatsi itsacruzata Jesús petsavenonenia. ³⁴ Jesús baja cruzajavelia pepuacobematabiabarutatsi, jumaitsi paxa Diosojavelia:

—Axa, mapamonaeje itaxutotsoniataema. Vecuaxuare paneconi xaina pibisiacuene ta-neexanaexae mapacueniaje. Tsipaji raja apo yapëtae. Bajaraxuata mapacuenia nexanaje, jai Jesús paxa Diosojavelia.

Nexata vajabitsaë, pamonae Jesús cobematabiabarutatsi cruzajavelia, bajarajota namuxusita. Penamuxusitsijavaxi irata natsipenepena. Bajarapacuenia vajabitsaë penamuxusitsijavaxi canamuxusita peyapëtaenexa ponë pitaponaejitsia caejava canacujitsia Jesús penaxatatsijavami, xua jumaponapona. ³⁵ Bajarajota daxitajivi taenubena. Judiovi pevetsivi Jesús capocaponatsi. Bajarapamonae capocaponaeya jumaitsi Jesús yabara:

—Ëitsamonae yabara jumai tsabiabi: “Capanepañajë jivi,” jai tsabiabi. Baja rajane piacuata nacapanepae itsa xaniajai pepacuene Cristo, Dioso athëbëvetsica pitorobinëtsitsica jivi pecapanepaenexa, jai judiovi pevetsivi Jesús yabara.

³⁶ Vajabitsaë ata Jesús capocaponatsi. Nexata capocaponaeya cujibarenatsi. Rajutsijitsiatsi piajatuvinora piapaenexa Jesús. ³⁷ Nexata vajabitsaë jumaitsi Jesúsjavavelia:

—Itsa xamë judiovi pepo nevetsinë, nexata nacapanepare nijacuata, jai vajabitsaë Jesúsjavavelia.

³⁸ Bajarajota Jesús pematabocoto matatsënëyo tablapajumata, Pilato pijajivi yaquinaruta acueyabi paviriavibeje pijajumeta. Itsaitane yaquinaruta griegojumeta. Itsaitane yaquinaruta latinjumeta. Itsaitane yaquinaruta hebreojumeta. Peyaquinarubiitane jumai tsarubi mapacueniaje: “Mara ponëje judiovi pepo pevetsinëje,” jai tsarubi Jesús yabara. ³⁹ Itsanë piamatabëcuenebejenë cruzajavelia pecobematabiabarutsinëtsi, Jesús anaeya bijataerucatsi.

—Itsa xamë Cristomë, athëbëvetsica Dioso pecaitorobinëtsica jivi necapanepaenexa, nijacuata nacapanepare. Paxanëbeje ata panecapaneparebeje, jai tsarucae Jesúsjavavelia.

⁴⁰ Itsanë pijinia itsacruzajavelia pecobematabiabarutsinëtsi, jumeitavetaruca. Jumai tsarucae penajuananeconitsinëbejejavavelia:

—¿Dioso tsaja apo cujunavimë netëpaenexa, cacobematabiabi ata nijaneconi yabara mapacueniaje? ⁴¹ Vaxaibeje rabiji vajaneconi xainatsibeje vajatëpaenexabeje. Nacarutabeje mapacueniaje pibisiacuene vajaexanaexabeje. Mabiji ponëje caeto ata pibisiacuene apo exanae, jai tsarucae bajaraponë jumeitavetsiaya penajuananeconitsinëbejejavavelia.

⁴² Icatsia xuacujinae bajaraponë jumaitsi Jesúsjavavelia:

—Jesús, xanë nenajamatabënapitsianame pamatacabi xamë evetsianame mapanacuaje, jai bajaraponë Jesúsjavavelia.

⁴³ Nexata Jesús jumaitsi bajaraponëjavavelia:

—Xaniajanë pacuenia catsipaebijitsiatsi. Ajena, pamatacabi, neyajavaponaponaename paraisojavatatsia, jai Jesús bajaraponëjavavelia.

*Pacuenia baja Jesús tēpa yabara pelivaisi**(Mt 27.45-56; Mr 15.33-41; Jn 19.28-30)*

⁴⁴ Jesús baja itsa tēpaejitsia, matonejeepeatota, daxita nacuanējava aitaquiri tsajuni. Matapania acueyabi pahorabejecujinae, caniviyojavabelia, nacua napebeta icatsia. ⁴⁵ Paepatota Jesús tēpanajereca, bajarapaepatota templo bo enētuaatujāalia pēnēyatuucutarutsipana, ayaipapaēbērēpana, tuatuaejāetsica titititicaica. ⁴⁶ Nexata Jesús ayaijumeta jumaitsi Diosojavabelia:

—Axa, xamējavabelia daxita tajamatabēcuene carajutatsi, jai Jesús.

Itsa baja Jesús najumevereta bajarapajume, tēpanajereca jane baja.

⁴⁷ Nexata Romano nacuaipijinē, vajabitsaē pijacapitán, itsa tane daxita bajarapacuenē, bajaraponē Diosojavabelia jumaitsi:

—Diosomē, bitso ayaijamatabēcuenenēmē. Xaniajai tsaena baja. Maponē tēpaje, pi-aneconijibinē, jai vajabitsaē pijacapitán.

⁴⁸ Daxita pajivibitsaētōxaneto taenubena pacuenia Jesús jumaliverevereca, bajarapamonaē bitso najamatabēxainaeya naviaba pijabonējavabelia. ⁴⁹ Daxita pamonaē Jesús peyapētaevitsi, pebijivi, petiriavi ata, pamonaē Galilea nacuaeverena pēnaponatsi, tajiyojavaverena taenubena, petanexa Jesús pebeyaxuabijavatsi.

*Pacuenia Jesús petēpaenē buatatsi ibovajualia yabara pelivaisi**(Mt 27.57-61; Mr 15.42-47; Jn 19.38-42)*

⁵⁰ Jerusalén tomarata ponapona José, Arimatea tomarapijinē. Bajaraponē pexani-ajamatabēcuenenē, xaniavaetsia peponaponaenē Dioso pitabarata. Bajaraponē judíovi pevetsinē. ⁵¹ José copiaevetaponapona pecopiajopaejava pamatacabi caenē Dioso evetsi-jitsia daxita pijajivi mapanacuataje. Nexata José apo jamatabēcuenejēpae pacuenia judíovi exana Jesúsjavabelia. ⁵² José nexata lia nacuaevetsinē Pilatojavabelia. Vajēta petocopsinexatsi pemēthētšinexa petēpaenē Jesús. ⁵³ Bajaraxuacujinae José cruzajavetsica pitsica Jesús petēpaenē. Daxitanēreca mataquionaeya matacācēba pexaniaviria piapi-asābanapanata. Nexata cajena itsajota José iboitapajanitojavata pinijūibovaju toexanabuatatsi petēpaevi pebuataponaenexa, bajarapaibovajualia buata Jesús petēpaenē. Bajarapavajualia abaxē itsajiviyo ata petēpaejiviyo José apo buatsi. ⁵⁴ Pamatacabi José bajarapacuenia vajēta Pilatojavabelia Jesús petēpaenē pemēthētšinexa, bajarapamatacabi judíovi penacuenebijava banacuenevereta baja pecopiajonevajēnaeya penacueraevetsimatacabinexa. Nexata paepatota José ibovajualia buata Jesús petēpaenē, bajarapaepatota José baja tocopiapataponatsi penacueraevetsimatacabinexa.

⁵⁵ Papetiriavi Jesús pēnaponatsi Galilea nacuaeverena, bajarapapetiriavi tajiyo José pecovēya najetarubena. Nexata bajarapapetiriavi tane Jesús petēpaenē José pebuatsijava bajarapaibovajualia. ⁵⁶ Bajaraxuacujinae bajarapapetiriavi naviaba baja pijaboyabelia. Nexata pepatsicujinae pijaboyabelia, bajarapapetiriavi xaniavaeta pexaniapetuxujuvira, pexaniapetuxujuvitsapato yajava, Jesús petēpaenē peperabēxabinexa. Nexata abaxē bajarapapetiriavi nacuaeveta judíovi penacueraevetsimatacabitata pacuenia itorobatsi Dioso Moisésjijnēta bajayata penajumecopatsilivaisi.

24*Pacuenia Jesús petēpaecujinae icatsia asaē yabara pelivaisi**(Mt 28.1-10; Mr 16.1-8; Jn 20.1-10)*

¹ Judíovi baja penacueraevetsimatacabi verevereca. Nexata meravia pitsijavata, ajena juameto pitsapaina, papetiriavi xaniavaeta pexaniapetuxujuvijava, icatsia ponalia Jesús petēpaenē pebuatsiibovajutsijavabelia. Patuxujuvijava xaniavaeta Jesús petēpaenē peperabēxabinexa, caponalia Jesús petēpaenē peperabēxabinexa jane baja picani. Itsapetiriavi yajava ponalia peyanabinexatsi. ² Itsa baja palia, nexata bajarapapetiriavi tane Jesús petēpaenē pebuatsiibovajutsi peyavēpaacatsiibopanaxanetomi petixitanutsijavalia. ³ Bajarapamonaē joneya picani Jesús pebuatsiibovajutsijavalia. Itsiata baitsi jane apo caxitajarababuatsi petēpaenē, pepo petuxanenē Jesús. ⁴ Nexata bajarapapetiriavi bitso jamatabēcuenenajunaviaca. Apo yapētae pacuenia exanaejitsia. Bajarajota nexata bajarapapetiriavi taenuta anijanēbeje āngelnēbeje. Bajaraponēbeje penaxatatsijavabeje nivenivena bitso. ⁵ Bajarapapetiriavi bitso cunjuna bajarapaāngelnēbeje. Nexata pecajunavi pematabacabēta irataeya bobena. Nexata bajarapaāngelnēbeje jumaitsi petiriavijavabelia:

—¿Detsa xuajitsia petēpaenē pebuatsijavatatsi, pajaitame? Bajaraponē asaē baja icatsia.

⁶ Bajaraponē majotaje ajibi baja tsarucāe. Dioso rabaja icatsia asaēyaexanatsi. Panajamatabēnapire pacuenia pacatsipaeba Galilea nacuaata pamatacabi abaxē asaē tsaponaponaē. ⁷ Bajaraponē baja cajena tajēvelia pacajumaitsi: “Xanē, Daxitajivi Pematapijinēnē,

necanajetsiana pibisiajamatabêcuenevi pecobeyabelia. Nexata bajarapamonaе cruzajavabelia necobematabiabarutsiana tanebeyaxuabinexa. Itsiata baitsi jane tanebeyaxuabicujinae, acueyabi matabacaba, icatsia asaenê tsane,” pacajai baja cajena tajêvelia Jesús itsa abaxê pamatacabi pacayajavaponapona, jai ângelnêbeje petiriavijavabelia.

⁸ Nexata bajarapapetiriavi najamatabênâpita pacuenia Jesús tajêvelia jumaitsi. ⁹ Nexata baja bajarapapetiriavi naviabarena Jesús petêpaenê pebuatsiibovajutsijavaverena. Nexata bajarapapetiriavi tsipaeba daxita bajarapacuenе yabara once ponêbeje, Jesús pijaapóstolevijavabelia. Tsipaebanua daxita itsamonae Jesús pijajivijavabelia ata. ¹⁰ Bajarapapetiriaviyâjuvênêvi itsava Mariavênêva. Bajarapova Magdala tomarapijiva. Itsava pijinia Juanavênêva. Itsava pijinia icatsia Mariavênêva. Bajarapova Santiago pena. Itsapetiriavi yajava tsipaeba bajarapacuenе yabara apóstolevijavabelia. ¹¹ Bajarapapetiriavi apóstolevijavabelia tsipaebi ata bajarapacuenе yabara, itsiata apóstolevi apo jumexaniataetsi. Apóstolevi saya bajarapalivaisi yabara jamatabêjumaitsi: “Saya meta bajarapapetiriavi pijacuata exana bajarapalivaisi,” jamatabêjai apóstolevi.

¹² Itsiata baitsi jane Pedro pitsapalia bovecua. Nexata cujinaejalia Jesús petêpaenê pebuatsiibovajutsijavabelia. Nexata Pedro bajarapaibovajualia itsa naêcolia, taeyejeba pebobenaеjava bajarajota daxitanêreca Jesús mataquionaeяa pematacacêbipanamitsireca. Nexata baja Pedro naviata boyaberena. Najamatabêxaina bajarapacuenе yabara.

Pacuenia Jesús petêpacujinae icatsia itsa asaê, pijajivitonêbeje pêcaxitajarabaxuaba, Emaús tomarabelia peponaenêbeje, yabara pelivaisi (Mr 16.12-13)

¹³ Pamatacabi bajarapapetiriavi tane ângelnêbeje, bajarapamatacabi Jesús pijajivitonêbeje Jerusalén tomaravelia naropotabeje. Ponabeje Emaús tomarabelia. Bajarapatomara eca once pakilômetrobeje Jerusalén tomaravecuа. ¹⁴ Bajaraponêbeje baracaicuaijabeje tsanajetarucaе daxita pacuenе copiapata. ¹⁵ Itsa abaxê bajarapalivaisi cuaicuaijai tsanucaponaеbeje, Jesús pêcaxitajarabalia. Nexata Jesús muxunenianajetaruca bajaraponêbeje. ¹⁶ Bajaraponêbeje tae atabeje Jesús, itsiata apo yapêtaеbeje Jesúscuene. ¹⁷ Nexata Jesús yanijoba bajaraponêbejejavabelia. Jesús jumaitsi:

—¿Detsa pitsicuene pabaracaicuaijamêbeje tsanucaponaе namutua? ¿Detsa xuajitsia bepajamatabêcuenejiobimêbeje? jai Jesús bajaraponêbejejavabelia.

¹⁸ Bajaraponêbeje itsanê pevênê Cleofas. Nexata Cleofas jumaitsi Jesúsjavabelia:

—Daxitajivi baja cajena yapêtane pacuenе copiapata Jerusalén tomarata mapamatacabitaje. ¿Xamê tsaja caenême apo nijanayapêtaе bajarapacuenе, naponaponaе atamê bajarapatomarata? jai Cleofas caranata Jesúsjavabelia.

¹⁹ Nexata Jesús jumaitsi bajaraponêbejejavabelia:

—¿Detsa pitsicuene copiapata? jai.

Nexata icatsia bajaraponêbeje jumaitsi Jesúsjavabelia:

—Jesúspijinê raja, Nazaret tomarapijinêmi, profetanêmi. Pinijicuene exanapona Dioso pesaêta. Bitso xaniaveitsia jivi pexanialivaisi tsipaebapona. Nexata daxitajivi sivajamatabêcuenebarêya bajaraponêmi. Dioso ata sivajamatabêcuenebarêyatsi. ²⁰ Nexata sacerdotevi penamatacaitorobivi, vajanacaevetsivi yajava, canajetatsi Jesúspijinêmi. Canajetaxuabatsi Jesúspijinê cruzajavabelia pecobematabiabarutsinexatsi pebeyaxuabinexatsi. ²¹ Paxanê picani bajaraponêmi yabara pajamatabêjumaitsinê: “Bajaraponê nacavecuacapitsapaena itsanacuaverena pepatsivi, pamonaе apo judiovi, vajanacayanacuaevetsijavavecuа pepitsapaenexa,” pajamatabêjanê tsavanapae picani Jesúspijinê yabara. Nexata Jesúspijinê pebeyaxuabicujinaetsi, ajena baja xaina acueyabi pamatacabibeje. ²² Paxanêyâjuvênêvi, petiriavi, ajena, bajayacunua, panenabenajacaеyaexana. Bajarapamonaе bajayacunua, ajena juameto pitsapaina, ponalia Jesús petêpaenê pebuatsiibovajutsijavabelia. ²³ Itsiata apo caxitajarababuatsi bajarajota Jesús petêpaenê. Nexata bajarapapetiriavi naviabarena. Bajarapamonaе panetsipaeba pacuenia bemajitsinaebota tane ângelnêbeje. Angelnêbeje pina nexata jumaitsibeje petiriavijavabelia: “Jesús rabaja asaê tsaponaponaе icatsia,” jai pina. ²⁴ Nexata itsamonae paxanêyâjuvênêvi pona Jesús petêpaenê pebuatsiibovajutsijavabelia. Nexata tane pacuenia baja petiriavi panetsipaeba. Jesús itsiata petêpaenê apo taeyabuatsi, jaiibeje Jesúsjavabelia Emaús tomarabelia peponaenêbeje.

²⁵ Nexata Jesús jumaitsi bajaraponêbejejavabelia:

—¡Paxamêbeje saya paneajamatabêcuenetajanêbeje! Apo pajumecovênêtsimêbeje daxita profetavi peyaquinaelivaisianê. ²⁶ Nexata apo payapêtaemêbeje pacuenia Cristo, Dioso athêbêvetsica pitorobinêtsitsica jivi pecapanepaenexa, copiaya bitso bejiobiaexanaejitsiatsi peponaevajênaeяa paxa Diosojavabetsia athêbêtatsia paxa pemuxuneneta peecaenexa, nayabarajai Jesús bajaraponêbejejavabelia.

²⁷ Nexata Jesús xaniavaetsia navajunupaeba bajaraponëbejejavabelia daxita pacuenia Dioso pejumelivaisibaxutota tajëvelia jumaiti Jesús yabara. Taxuxuaba jane baja penavajunupaebijava pacuenia Moiséspijinë peyaquinaebaxutota tajëvelia jumaiti Jesús yabara. Bajaraxuacujinae icatsia navajunupaeba pacuenia daxita itsaprotetavi peyaquinaebaxutontëta ata jumaiti Jesús yabara.

²⁸ Itsa baja imoxoyotanajetarubena patomarata bajaraponëbeje patsijitsiabeje, Jesús itajara rovia bepeponaëjitsia bajaraponëbejevecua. ²⁹ Nexata bajaraponëbeje bitso asivabeje Jesús penajumajitsinexa bajarapatomarata. Jumaitsiabeje bajaraponëbeje Jesúsjavabelia:

—Namajire abaxë mapatomarataje. Caniviyo rabaja bitso. Meravijitsia rabaja, jaiabeje bajaraponëbeje Jesúsjavabelia.

Nexata baja Jesús najoneya pabota bajaraponëbeje patabeje. ³⁰ Itsa bajaraponëbeje yajavaecabeje mesa muxuneneta, Jesús pita panbë. Jumaiti paxa Diosojavabelia:

—Pexaniacuene panetoexaname. Panerajutame pan, jai Jesús.

Bajaraxuacujinae epatsënëquejeba panbë. Rajutatsi bajaraponëbeje. ³¹ Bajarajota matapania bajaraponëbeje yapëtanebeje Jesúsucueni. Itsiata baitsi jane bajarajota vecuacaevatsibeje Jesús. Apo taebeje baja matavëjëa.

³² Nexata bajaraponëbeje najumaitsiabeje:

—Namutua vajanacanavajunu paebanucaponaëjavatabeje pacuenia jumaiti Diosojumelivaisibaxutota, bitso muxunajamatabëcuenearëyatsibeje, najaiabeje bajaraponëbeje.

³³ Nexata bajarajota bepigia naropotabeje Emaús tomaravecuca. Naviatabeje baja Jerusalén tomarabelia. Nexata Jerusalén tomarabelia itsa patabeje, caxitajarababeje penacaetuatsijavata once ponëbeje apóstolevi, itsamonae yajava Jesús pijajivi. ³⁴ Nexata penacaetuatsivi jumaiti bajaraponëbejejavabelia:

—Xaniajai baja cajena. Vajatuxanenë icatsia asaë tsaponaponae. Simón baja tsitanaitajëtatsi, jai bajarapamonae.

³⁵ Nexata ponëbeje Emaús tomaraverena patabeje, tsipaebabeje bajarapamonaejavabelia pacuenia namutoepatualia pëcaxinatsibeje Jesús. Tsipaebabejenua pacuenia matapania yapëtanebeje Jesúsucueni, pitabëta itsa epatsënëquejeba panbë.

Pacuenia Jesús petëpaecujinae tsitanaitajëta pijajivijavabelia yabara pelivaisi (Mt 28.16-20; Mr 16.14-18; Jn 20.19-23)

³⁶ Ponëbeje Emaús tomaraverena patabeje, tsipaebabeje Jesús pijajivijavabelia pacuenia tanebeje Jesús Emaús tomaratalia. Nexata bajarapaepatota Jesús tsitanaitajëta pijajivijavabelia. Jesús jemata nuca pijajivi tuatujëta. Jesús bajacoba pijajivi.

³⁷ Nexata Jesús pijajivi bitso nabenajaca.

—Petëpaenëmi raeta pejumape maje, jamatabëjai bajarapamonae Jesús yabara.

³⁸ Nexata Jesús jumaiti pijajivijavabelia:

—¿Detsa xuajitsia pajunavame? ¿Detsa xuajitsia panejamatabëëthëtota pajumeaebame icatsia tasaëjava? ³⁹ Panecobetaema. Tataxubeje ata pataema. Xanë rabaja maje. Paneyajabare. Paneyorobarena xaniavaetsia. Petëpaenëmi raja peneta pejumape avijibi. Asijibinua. Apo perabëitsi cajena pacuenia xanë perabëitsinë, jai Jesús pijajivijavabelia.

⁴⁰ Jesús itsa jumaiti mapacueniaje, nacobeitajëta pijajivijavabelia. Nataxuitajëta yajava.

⁴¹ Jesús pijajivi bitso tsitapexaniacuenetsi. Itsiata baitsi jane Jesús pijajivi abaxë apo jumexaniatae xaniavaetsia Jesúsucueni. Jesús nexata jumaiti pijajivijavabelia:

—¿Paxainame tsabaja itsacuenajavayo patanerajutsinexamë taxaenaxa? jai Jesús.

⁴² Nexata Jesús pijajivi rajutatsi pesebidujuaijavayo, jabëperiyoyajava. ⁴³ Pita baja Jesús. Nexata Jesús pijajivi pitabarata xane. ⁴⁴ Nexata Jesús jumaiti pijajivijavabelia:

—Mapacueni taneexanaejavanexa yabaraje, pacatsipaebabiabatsi baja cajena tajëvelia pamatacabi abaxë pacayajavaponaponatsi. “Pacuenia bajayata tajëvelia xanë yabara jumaiti Moiséspijinë peyaquinaebaxutota, Diosojumepaebivimi profetavi peyaquinaebaxutota ata, Salmosvënëbaxutota ata, bajarapacuenia netocopiapatsiana,” pacajaitsi tsabiabi baja cajena pamatacabi abaxë pacayajavaponaponatsi. Daxita rabaja bajarapacueni netocopiapata jane baja, jai Jesús pijajivijavabelia.

⁴⁵ Nexata Jesús pijajivi jamatabëcuenecaëjëpaeyaexana Jesús pijajivi xaniavaetsia pejumepapëtaenexa pacuenia Dioso pejumelivaisibaxutota tajëvelia jumaiti Jesús yabara.

⁴⁶ Jesús jumaiti pijajivijavabelia mapacueniaje:

—Dioso pejumelivaisibaxutota tajëvelia jumaiti pacuenia xanë, Cristonë, athëbëvetsica Dioso taneitorobinëtsica jivi tacapanepaenexa, nebejiobitsiaya nebeyaxuabijitsia. Jumaitsinua pacuenia tatëpaecujinae, acueyabi matababita, icatsia Dioso niasaëyaexanaejitsia

tatēpaejavavecua. ⁴⁷ Jumaitsinua pacuenia patajajivimē tajumelivaisi patsipaebaponaejit-siamē daxitajivijavabelia. Nexata tajumelivaisi patsipaebaponaename daxitajivi pena-jamatabēcuenepēnēyorotsinexa Diosojavabelia, pibisiacuene pexanaeconimi pevecuaa-jibiaexanaenexatsi Dioso. Copiaya Jerusalén tomarata pataxuxuabianame panetsipae-bijava. Bajaraxuacujinae patsipaebanajetarubenaename daxitanacuanējjava. ⁴⁸ Paxamē rabaja pataneme daxita pacuene netocopiapata. Nexata jivi patsipaebaponaename daxita bajarapacue yabara. ⁴⁹ Espiritu Santo, ponē taxa Dioso najumecapanepaeya pacarajutsipaeba, pacatoitorobianicatsi papecatsijamatabējonexa. Abaxē pajinavana-paename majotaje Jerusalén tomarata. Matapania Dioso athēbēvetsica pacajamatabēcue-ne caējēpaeyaexanaena pinijicuene paneexanaponaenexa, paponaname jane baja tajumeliv-aisi jivi panetsipaebanajetarubenaenexa daxitanacuanējjava, jai Jesús pijajivijavabelia.

Pacuenia Jesús petēpaecujinae icatsia itsa asaē, tsia baja athēbēabetsia yabara pelivaisi (Mr 16.19-20)

⁵⁰ Jesús pijajivi matalalia Betania tomarabelia. Jesús nacobeyotsiaya pijajivi to-vajēcānuca Diosojavabelia Jesús pijajivi peyavenonaenexatsi Dioso. ⁵¹ Nexata saya bajara-jota Jesús pijajivi athēbēabetsia baja vecuapona. Jesús baja Dioso caponatsi athēbēabetsia.

⁵² Jesús pijajivi jamatabējumaitsi:

—Ķvajatuxanenē bitso ayaijamatabēcuenenē! jamatabējai.

Bajaraxuacujinae Jesús pijajivi barēyaya naviaba Jerusalén tomarabelia. ⁵³ Templobojavabelia Jesús pijajivi joneyabiaba pevājēcabiabinexa Diosojavabelia. Jesús pijajivi pexaniajamatabēcue rajutabiaba Diosojavabelia.

Pexanialivaisi Jesucristo pelivaisi, San Juan peyaquinaelivaisi

Pacuenia vaxaitsi banaexanatsi mapanacuataje, bajarapacuenia Cristo penaexanaejava mapanacuataje paxa Dioso pejamatabëcuenelivaisi itajëtsinexa yabara pelivaisi

¹ Itsa abaxë ajibi itsacuenejavayo ata mapanacuataje, Cristo baja cajena ponapona athëbëatsia. Cristo raja paxa Dioso pejamatabëcuenelivaisi itajëtsinë jivijavabelia. Cristobeje paxa Diosobeje najuaponaponabeje. Cristo ata rabaja Dioso baja cajena. ² Daxitacuenë baja cajena pexanaejava petaxuxuabivajënaeya ata, Cristobeje paxa Diosobeje najuaponaponabeje. ³ Cristo baja cajena daxitacuenë mapanacuapijicuenëje exana. Exana athëbëpijicuenë ata. Bajarapacuenë exanaeyaexanatsi paxa Dioso. Bajaraxuata itsacuenëjavayo ata apo vecuaexanaetsi itsanë ata. ⁴ Cristo baja cajena rajuta piasaëjumali daxitacuenëviria mapanacuataje. Cristo baja cajena bepecotia picani. Nexata jivi jamatabëcuenëitayota pexaniajailivaisita. ⁵ Pacuenia pecotia itayota piaitaquirijavata, bajarapacuenia Cristo petsipaëbilivaisita jivi jamatabëcuenëitayota. Nexata dovathi, jivi piajamatabëcuenë itaquiriyaexanaenë, apo caëjëpaetsi peverevereceaeyaexanaenëxa bajarapalivaisi.

⁶ Nexata Dioso itoroba caenë pebi. Bajaraponë pevënë Juan. ⁷ Nexata Juan pona petsipaëbinexa jivijavabelia Cristo pelivaisi. Nexata Juan tsipaëba daxitajivi pejumetaenëxa Cristo pelivaisi, pejumecovënëtsinexanua. ⁸ Juan raja jivi apo pejamatabëcuenëitayotsinë. Juan raja pona saya jivi petsipaëbanajetaruaenëxa xaniavaetsia Cristo pelivaisi. ⁹ Bajaraponë Cristo jamatabëcuenëitayotsiana daxitajivi. Bajaraponë xani-ajai jivi pejamatabëcuenëitayotsinë. Bajaraponë Cristo patsica baja mapanacuayabetsicaje.

¹⁰ Cristo, ponë paxa Dioso jamatabëcuenelivaisi itajëta jivijavabelia, ponapona baja mapanacuataje. Itsiata baitsi jane mapanacuapijivi apo yapëtaë bajaraponë mapanacua pexanaenëcuenëje. ¹¹ Cristo patsica pexanaenacuayabetsica. Itsiata baitsi jane mapanacuapijivi apo jumecovënëtsi Dioso pexënatocuenë. ¹² Itsiata itsamonae jumecovënëtsi. Nexata Cristo tocopata bajarapamonae paxa Dioso pexi pexanaenexatsi. ¹³ Bajarapamonae penaexanaematacabi, abaxë Dioso pexicuenia apo taetsi. Pebi petiriva pepitsicujinae, pexi itsa jamatabëxainabeje, pexi xainabeje. Itsiata bajarapamonae itsa naexana, abaxë Dioso apo pexi. Matapania pacuenia Dioso tojitsipatsi, bajarapamonae itsa jumecovënëta Cristo Dioso pexënatocuenë, Dioso pexi exanatsi.

¹⁴ Cristo, paxa Dioso pejamatabëcuenelivaisi itajëtsinëxa jivijavabelia, itsa patsica mapanacuayabetsicaje, naexana pacuenia vaxaitsi baexanatsi mapanacuataje. Nexata bajarapacuenia Cristo ponapona vaxaitsi tuatujëta. Bajaraponë vënërubatsi Jesús. Paxanë payapëtaniji Cristo ayaijamatabëcuenenëcuenë. Tsipaji pataniji pinijicuenë pexanaejavanë. Bajaraponë Cristo, pepo caenë Dioso pexënato. Pinijicuenia asiva mapanacuapijivije. Cuaicuajai ëpexaniajailivaisi. ¹⁵ Bajaraxuata Juan, Jesús itsa vajunupaëbanajetaruca jivijavabelia, jumai tsanajetarucæ mapacuanijaje:

–Baja rajane maponë yabara pacajumaitsisije: “Ponë tacovëverena patsiana, bajaraponë bitso xanë nevecuaayaijamatabëcuenenë. Tsipaji baja cajena tanaexanaevajënaeya ata bajaraponë ponapona,” jai tsanajetarucæ Juan jivijavabelia Jesús yabara.

¹⁶ Bajaraponë Jesús cajena pepo pexaniajamatabëcuenenë. Pexaniacuenë nacatoexanabiaba. Nacayavenonabiaba. ¹⁷ Bajayatami baja cajena picani Dioso Moiséspijinëta najumecopata jivi pejumecovënëtsinexa. Itsiata baitsi jane mapamatacabita Jesucristo patajopaica mapanacuayabetsicaje vajanacatsipaëbinexa paxa Dioso vajanacaasivajava, vajanacatsipaëbinexanua pexaniajailivaisi. ¹⁸ Itsajivi ata vaxaitsiyajuvënëjivi Dioso apo tae. Bajaraxuata apo yapëtaetsi pacuenia Dioso jamatabëcuenelivaisiitsi. Itsiata caenë Dioso pexënato, ponëbeje najuaponaponabeje, bajaraponë nacayapëtaëyaexanaica pacuenia jamatabëcuenelivaisiitsi paxa Dioso.

Pacuenia Juan jivibautisabinë Jesucristo pelivaisi xaniavaetsia tsipaëbanajetaruca jivijavabelia yabara pelivaisi

(Mt 3.11-12; Mr 1.7-8; Lc 3.15-17)

¹⁹ Judiovi, Jerusalën tomarapijivi, Juanjavabelia itoroba sacerdotevi, itsamonae tem-plobo pevetsivi yajava, bajarapamonae peyanijobinexa Juanjavabelia. Nexata bajarapamonae itsa pata Juanjavabelia, yanijoba Juanjavabelia. Jumaitsi:

–¿Jipatsamë xamë? ¿Xamë tsaja Dioso pecaitapetsinë? jai bajarapamonae Juanjavabelia.

²⁰ Juan nexata bajarapamonaejavabelia xaniavaetsia roviaalia navajunupaëba. Jumaitsi:

—Xanë ra apo Cristonë, ponë Dioso athëbëvetsica itorobijitsiatsica jivi pecapanepaenexa, jai Juan.

²¹ Nexata icatsia matavëjëa yanijobatsi.

—¿Detsa nexata ponëmë? ¿Xamë tsaja profeta Elíaspijinëmë, ponëmi bajayata ponapona? jai bajarapamonae Juanjavabelia.

Nexata Juan jumaitsi:

—Jume raja. Xanë raja bajara apo ponënë, jai Juan.

Nexata icatsia yanijobatsi matavëjëa.

—¿Xamë tsabaja nexata profetanëmë? ¿Xamë tsabaja pacacopiaevetavanapatsi nepatsi-javanexatsica? jai bajarapamonae Juanjavabelia.

Nexata icatsia Juan jumaitsi:

—Jume raja. Xanë raja apo bajaraponënë, jai.

²² Nexata bajarapamonae jumaitsi:

—¿Detsa nexata ponëmë? Pajitsipajë patanenavajunupaebinexamë xaniavaetsia patayapëtaenexa ponëcuenemë patatsipaebinexa patanitorobivijavabelia. ¿Detsa nexata pacuenia navajunupaebianame? jai bajarapamonae Juanjavabelia.

²³ Juan nexata jumaitsi bajarapamonaejavabelia:

—Xanë raja saya petusato nacuata itsa jumelivaisipaebajë, tavavajainë: “Panajamatabëcuenexaniavaere pepo petuxanenë pepatsivajënaeyarena,” tajainë. Bajarapacuenia tajumaitsijavanexa, bajayatami tajëvelia yaquina profeta Isaíaspijinë, jai Juan.

²⁴ Nexata fariseovi pitorobivitsi icatsia yanijobatsi Juan.

²⁵ —Itsa xamë apo Cristomë, apo Elíaspijinëmënuu, apo profetanëmënuu, ponë pacopi-aevetavanapajë pepatsijavanexatsica, ¿detsa nexata xuajitsia xamë jivi bautisabaponame? jaitsi bajarapamonae.

²⁶ Juan nexata jumaitsi:

—Xanë saya bautisabaponajë ëmerata. Itsiata paxamë tuatujëta ponapona ponë apo payapëtaemë. ²⁷ Bajaraponë tacovëverena jane baja pata. Itsiata xanë bajaraponëvecua beveliajumatatabëcuenenënë. Nexata acobeuranë tatoisinaenexa ata pijazapatomaëto tatakuxonotsinexa pijazapato, jai Juan bajarapamonaejavabelia Jesús yabara.

²⁸ Bajarapacuenia Juan yanijobatsi Jordánmene itsapanatalia, Betianiavënë tomarajavata, Juan jivi itsa bautisabaponapona.

Pacuenia Jesús beovejayo tanetsi yabara pelivaisi

²⁹ Fariseovi pijajivi Juan peyanijobicujinaetsi peyapëtaenexatsi ponëcuenë, meravia pitsijavata, Juan taetaba Jesús penajetarucaejava Juanjavaberena. Nexata Juan jumaitsi jivijavabelia:

—Pataema, mara ponëje, Dioso athëbëvetsica pitorobinëtsitsicaje. Bajaraponë Dioso bepajaovejajo tsane. Pacuenia jivi ovejajo babeyaxuaba pevi ofrendacuenia perajutsinexa Diosojavabelia, bajara itsanetsi maponëje. Nacaevetsiana pebeyaxuabinxatsi. Nexata bajarapacuenia matamotsiana daxita nacuanëpijivi pibisiacuene pexanaecononimi. ³⁰ Baja rajane maponë yabara itsa pacatsipaebatsi, pacajumaitsitsi tsabiabi mapacueniaje: “Tacovëverena patsiana itsanë. Bajaraponë nevecuaayajamatatabëcuenenë bitso. Tsiipaji baja cajena tanaexanaevajënaeya ata, bajaraponë ponapona,” pacajaitsi tsabiabi. ³¹ Apo yapëtaenë picani bajaraponë. Itsiata apo yapëtae atanë, pacabautisabanajetarucatsi merata paIsrael nacuapijivimë. Ponë yabara pacatsipaebatsi, bajara jane maponë najetarucaje, jai Juan jivijavabelia Jesús penajetarucaejavata.

³² Icatsia Juan jumaitsi jivijavabelia Jesús yabara:

—Xanë taniji Espiritu Santo perunaejavatsica athëbëvetsica beucucuto. Nexata tsimatanacopatsicatsi bajaraponë. ³³ Xanë abaxë itsiata apo yapëtaenë bajaraponë Cristocuene. Itsiata Dioso, taneitorobinë merata jivi tabautisabaponaenexa, nejumaitsi baja cajena copiatu: “Papebi pematatsënëatsica taename Espiritu Santo perunaejavatsitsica petsijamatabëcaenexatsi, bajaraponë jane baja jivi tsijamatabëjoneyaexanaena Espiritu Santo,” nejai baja cajena copiatu Dioso. ³⁴ Pacuenia baja cajena taniji, pacatsipaebatsi. Bajaraponë baja cajena Dioso pexënatu, jai Juan jivijavabelia Jesús yabara.

Pamonae copiyaya Jesús yajavaponapona yabara pelivaisi

³⁵ Juan jivijavabelia petsipaebicujinae Jesús Dioso pexënatocuene, meravia pitsijavata, Juan yajavaponapona anijanëbeje pijajivitonëbeje. ³⁶ Itsa Juan tane Jesús pexenetanajetarucaejavatsi, nexata Juan jumaitsi pijajivitonëbejejavabelia:

—Pataemabeje. Mara ponë najetarucaje, Dioso bepijaovejajo tsane, jai Juan pijajivitonëbejejavabelia Jesús pebeyaxuabijavanexatsi yabara, tsiipaji Jesús tocopiapatsijitsiatsi pacuenia Dioso tocopatatsi.

³⁷ Nexata Juan pijajivitonëbeje itsa jumetanebeje bajarapacuenia Juan pejumaitisijava, Juan pijajivitonëmibeje pënaponabeje Jesús. ³⁸ Jesús napënëyorotojopa. Taenucajopa. Yanijoba bajaraponëbejejavabelia.

—¿Detsa xua pajaitamebeje? jai Jesús.

Nexata bajaraponëbeje jumaitisibeje:

—Petuxanenë, ¿detsa jota ecame? jaibeje Jesúsjavabelia.

³⁹ Jesús nexata jumaitsi bajaraponëbejejavabelia:

—Naxanitsia. Panataenamebeje itsajota ponaponajë, jai Jesús.

Nexata bajaraponëbeje naponabeje baja Jesús pepëta caniviyoopatota. Nexata baja tanebeje itsajota ponapona Jesús. Nexata bajarapamatacabi nayacaniviyoobeje tsaponaponae Jesúsjavata.

⁴⁰ Bajaraponëbejejayüvënënenë itsanë pevënë Andrés. Andrés raja Simón Pedro pejuyapijinë. ⁴¹ Andrés nexata bepíjia pona pematapijinë Simón pejaitsinexa. Itsa baja Andrés pematapijinë caxitajaraba, jumaitsi pematapijinëjavabelia:

—Pacaxitajarabajë rabaja Mesías, jai Andrés pematapijinëjavabelia.

Bajarapamonae pijajumeta: “Mesías,” itsa jai, mapajumetaje pejumaitisijume: “Cristo, ponë athëbëvetsica Dioso itorobijitsiatsica jivi pecapanepaenexa,” pejaijume.

⁴² Nexata Andrés barëlia pematapijinë Simón Jesúsjavabelia. Itsa Jesús tane Simón, nexata Jesús jumaitsi Simónjavabelia:

—Simón, xamë raja Jonás pexënatomë. Cavënërubianatsi Cefas, jai Jesús Simónjavabelia.

“Cefas,” itsa jai, bajarapamonae pijajumeta mapajumetaje pejumaitisijume: “Pedro,” pejaijume.

Pacuenia Jesús junata Felipebeje Natanaelbeje Jesús pijajivitonëbejenexa yabara pelivaisi

⁴³ Jesús baja ponaejitsia Galilea nacuyabelia. Jesús nexata peponaevajënae, caxitajarabaxuaba Felipe. Nexata Jesús jumaitsi Felipejavabelia:

—Nepënaponae name, jai Jesús.

⁴⁴ Bajaraponë Felipe Betsaida tomarapijinë. Andrésbeje Pedrobeje ata Betsaida tomara-píjinëbeje. ⁴⁵ Felipe nexata pona pejaitsinexa Natanael. Itsa baja Felipe caxitajaraba, jumaitsi Natanaeljavabelia:

—Pacaxitajarabajë rabaja ponë pelivaisi bajayatami tajëvelia Moiséspijinë yaquina. Dioso penajumecopatsilivaisi jivi pejumecovënëtsinexa bajayata Moiséspijinë itsa yaquina, yaquinanua bajaraponë ata pelivaisi. Bajaraponë pelivaisi bajayata profetavi ata tajëvelia yaquina. Bajaraponë Jesús Nazaret tomarapijinë, Josépijinë pexënato, jai Felipe Natanaeljavabelia.

⁴⁶ Nexata Natanael jumaitsi:

—Itsanë ata cajena pexaniajamatabëcuenenë Nazaret tomarata apo ponaponae, jai Natanael.

Felipe nexata jumaitsi Natanaeljavabelia:

—Naxanitsia. Nataename jane, jai Felipe.

⁴⁷ Jesús itsa tane Natanael pecujitanajetarucæjavatsi, nexata Jesús Natanael yabara jumaitsi pijajivijavabelia:

—Mara ponë najetarucæje, Israelpíjinë pemomo, Dioso pitabarata xaniavaetsia peponaponae. Apo peyamaxëitojorobinë itsajivi ata, jai Jesús pijajivijavabelia Natanael yabara.

⁴⁸ Nexata Natanael jumaitsi Jesúsjavabelia:

—¿Detsa pacuenia nejamatabëcueneyapëtaneme? jai Natanael.

Nexata Jesús jumaitsi Natanaeljavabelia:

—Felipe cajena pecajunatsivajënaeya, catanetsi neecæjava higeranae bëxëpanata. Nexata cajamatabëcueneyapëtanetsi, jai Jesús.

⁴⁹ Natanael nexata jumaitsi Jesúsjavabelia:

—Petuxanenë, xamë rabaja Dioso pexënatomë. Israelnucua pepo nevetsinë, jai Natanael Jesúsjavabelia.

⁵⁰ Jesús nexata jumaitsi:

—“Catanetsi cajena neecæjava higeranae bëxëpanata,” tacajaixae, jamatabëjumaitsimë xanë yabara: “Maponëje Dioso cajena pexënato,” jamatabëjamë. Xamë taename bajarapacuenë matatoxenetsia Dioso pesaëta pinijicuenë taexanaejavanë, jivi apo pexanaecapanepaejavanë. Nexata bajaraxuanë taexanaejava itsa taename, pepacuenë jane baja neyapëtaename Dioso pexënatocuenenë, jai Jesús Natanaeljavabelia.

⁵¹ Icatsia Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Pataename itaboxo penapatsijava. Pataenamenua Dioso pijaängelevi pejunaejavatsia athëbëabetsia. Pataenamenua perunaejavatsica ata xanëjavabetsica, Daxitajivi Pematapijinëjavabetsica, jai Jesús pijajivijavabelia.

2

Pacuenia Jesús exana Caná tomarata pamatacabi Caná tomarapijinē nacasaba yabara pelivaisi

¹ Jesús pebarēcuaiacuajicujinae Natanael, acueyabi pamatacabibejecujinae, Caná tomara-pijinē exana penacasabifiestanexa. Galilea nacuata eca Canátomara. Jesús pena napon-aponna fiesta pexanaejavata. ² Nexata Jesús pijajivi nabarējunatatsi penacasabifiestajavabelia. Jesús nexata pijajivi nabarēpata penacasabifiestajavabelia. ³ Fiesta pexanaenē itsa baja tovereverecatsi vinora, Jesús pena jumaitsi:

–Vinora rabaja tovereverecatsi, jai pexēnatojavabelia.

⁴ Jesús nexata jumaitsi penajavabelia:

–Ena, ¿detsa xuajitsia netsipaebame bajarapacueñe? Abaxē raja apo netocopiapatsi paepatota exanaejitsianē bajaraxua, jai Jesús penajavabelia.

⁵ Nexata Jesús pena jumaitsi mesa pevetsivijavabelia:

–Daxita pacuenia taxēnato aeconoxae pacaitorobiana, paexanaename, jai.

⁶ Nexata bajarajota nubena seis pacanalitobeje, ibocanalitonē. Caecanalitota mera caējēpaponna bejamatabēcuene quince pagalónbeje. Nexata bajarapacanalitonēta peyaenaemeranēta, judíovi pijacuenia anijatōnē xaniavaetsia nacobequiatabiaba penabanivajēnae.

⁷ Jesús nexata jumaitsi mesa pevetsivijavabelia:

–Pavēñēbare mera mapacanalitonē nubenaje, jai Jesús.

Nexata mesa pevetsivi xaniavaetsia mera vēñēba bajarapacanalitonē. Piupiyorotoxijava copabapona.

⁸ Nexata Jesús jumaitsi bajarapamonaejavabelia:

–Papuare tsiquirirayo. Patocaponaremilia fiesta pevetsinē pepajaninexa, jai Jesús.

Nexata baja mesa pevetsivi tocaponalia. ⁹ Nexata jane baja fiesta pevetsinē pajane bajarapora, merami pexanaevinora. Bajaraponē abaxē apo yapētae itsaverena capitsapa bajarapavinora. Itsiata mesa pevetsivi yapētane mera pevēñēbixae bajarapacanalitonēta. Pepajanicujinae vinora, fiesta pevetsinē junata fiesta pexanaenē, ponē pejananacasabinē.

¹⁰ Nexata fiesta pevetsinē jumaitsi pejananacasabinējavabelia:

–Mapavinoraje bitso xanepana. Daxita pamonae fiesta pexanaevi, copiaya batsanaeyaexana pexaniavinora. Nexata baja fiesta pexanaenē pejunatsivi itsa apa ayaijava, cotocaevi batsanaeyaexana bevelia penamatamotsivinoranē. Tsipaji baja ayaijava piapaexae, cotocaevi apae ata beveliara, apo yapētae beveliaracueñe. Itsiata baitsi jane xamē bajarapacuenia apo exanaemē. Evetame abaxē cotocaevi patanerajutsinexamē pexaniavinora, jai fiesta pevetsinē pejananacasabinējavabelia.

¹¹ Bajarapapiniijicueñe Dioso pesaēta Jesús exana Caná tomarata. Canátomara eca Galilea nacuata. Caná tomarata Jesús jane baja taxuxuaba Dioso pesaēta pinijicueñe pexanaponaejava. Bajarajota jane baja Jesús najamatabēcueneitajēta Dioso pesaēta ayaicueñe pexanaejava pecaējēpaenēcuenetsi. Nexata pijajivi orijibia sivanajamatatabēcuene copabaponatatsi. Jesús pijajivi jamatabējumaitsi:

–Xaniajai rabaja. Pepacueñe Cristo, ponē copiaevetavanapatsi pepatsijavatsica vanacacapanepaenexa, jamatabējai.

¹² Bajaraxuacujinae Jesús baja pona Capernaum tomarabelia. Yajavapona pena, pejuyapijivinu, pijajivinu. Capernaum tomarata caematacabibeje jinavanapa.

Pacuenia Jesús Jerusalén tomarata templobovecua pitsapaeyaexana pecanajetsivi, pecomuacaevinu, yabara pelivaisi

(Mt 21.12-13; Mr 11.15-18; Lc 19.45-46)

¹³ Judíovi baja pijafiesta pexanaenexa, toimoxoyotsi pascuavēñēfiesta. Bajaraxuata Jesús pona Jerusalén tomarabelia. ¹⁴ Nexata Jerusalén tomarata, templobota, Jesús caxitajarabaxuaba pecanajetanubenaevi baca, oveja ata, ucucu ata. Tane palata pecambiabenaevinua. ¹⁵ Jesús itsa tane bajarapacueñe, nexata quiobatata peyorotsimacanexa. Nexata Jesús daxitajivibitsaēto capitsaparena temploboñēverena. Bajarapamonae pi-jaoveja yajava, pijabaca yajava, Jesús capitsaparena. Nexata palata pecambiabenaevi pijapalata irabelia tocayajabajaraba. Pijamesaxi ata topēñeyorobajaraba. ¹⁶ Nexata ucucu pecanajetanubenaevijavabelia Jesús jumaitsi:

–Mapaucujuje pacapitsaparemilia. ¡Pētsa pacanajetame mapaboñēñetaje, taxajavabelia jivi penavajēcaebota! jai Jesús.

¹⁷ Nexata Jesús pijajivi itsa jumetane bajarapacuenia Jesús pejumajetsijava, jumenajamatabēnapita pacuenia Dioso pejumelivaisibaxutota jumaitsi. Bajarapacuenia Jesús pexanaponaejavanaxa yabara, tajēvelia Dioso pejumelivaisibaxutota jumaitsi mapacueniaje: “Neyabarabeyaxuabijitsia ata tsane, jitsipajē Dioso pijabo petoyaiyataejavatsi,” jai Dioso pejumelivaisibaxutota.

¹⁸ Nexata judíovi itsa tane Jesús jivi pecapitsapaejava temploboëñeverena, judíovi jumaitisi Jesúsjavabelia:

—¿Dioso tsaja caitoroba nejutsinexa bajarapamonae temploboëñevecua? Itsa caitoroba Dioso bajarapacuenia nexanaenexa, nexata pinijicuene ata exanare Dioso pesaëta pata-cayapëtaenexa Dioso pecaitorobinëcuene, jai judíovi Jesúsjavabelia.

¹⁹ Nexata Jesús jumaitisi judíovijavabelia:

—Itsa paxuabimica mapatemploboje, nexata icatsia veretetsianajë acueyabi matababita, nayabarajai Jesús judíovijavabelia petëpaecujinae icatsia Jesús piasaëjavanexa yabara.

²⁰ Nexata judíovi apo jumeypapëtae xua yabara Jesús jumaitisi. Bajaraxuata judíovi jumaitisi mapacueniaje:

—Xamë acueyabi matababita apo matabocsimë tsipae. Itsamonae baja cajena mapatem-ploboxanetoje peveretsinexa, nacueneba cuarenta y seis pavaibeje, jai judíovi.

²¹ Itsiata baitisi jane Jesús peperabëto yabara: “Mapatemploboje,” jai saya. ²² Bajaraxuata icatsia Jesús itsa asaë petëpaecujinae, Jesús pijajivi jumenajamatabënapitatsi. Jesús pija-jivi jumenajamatabënapitatsi tajëvelia Jesús penavajunupaebijava mapacueniaje: “Itsiata baitisi jane tatëpaecujinae, acueyabi matababita, icatsia asaëñë tsane,” pejaijava, Jesús pijajivi jumenajamatabënapitatsi. Nexata Jesús pijajivi jumecovënëta pacuenia Dioso pejumelivaisibaxutota jumaitisi. Jesús ata pacuenia jumaitisi, jumecovënëta.

Pacuenia Jesús jamatabëcueneyapëtanë daxitajivi yabara pelivaisi

²³ Pamatababi pascuafiesta exana, Jesús ponapona Jerusalén tomarata. Nexata Jerusalén tomarata jivi ayaibitsaëtoxaneto jumecovënëta Cristocuene. Tsipaji bajarapamonae Jesús cuenetanetsi Dioso pesaëta pinijicuene pexanaejavanë, jivi apo pexanaecapanepaejavanë. Itsiata baitisi jane bajarapamonae pepacuenie xaniavaetsia apo jumecovënëtsi. ²⁴ Bajaraxuata Jesús apo yavavaponapona bajarapamonae. Tsipaji Jesús jamatabëcueneyapëtanë bajarapamonae xaniavaetsia apo pejumecovënëtsijavatsi. ²⁵ Jesús apo namatavenonae itsajivi petsipaebinxatsi peypapëtaenexa pacuenia jamatabëcuenieitsi jivi. Tsipaji Jesús pejamatabëcueneyapëtanë pacuenia daxitajivi jamatabëcuenieitsi.

3

Pacuenia Jesús barëcuaicuaijai Nicodemo yabara pelivaisi

¹ Nicodemo fariseonë. Nexata catsitecaponapona fariseovi pijacuene. Nicodemo judíovi pevetsiviyajuvënëñë. ² Nexata Nicodemo meravi pona Jesúsjavabelia. Nexata itsa pata, Jesúsjavabelia Nicodemo jumaitisi:

—Petuxanë, pacayapëtanetsi baja cajena athëbëvetsica Dioso pecaitorobinëcuenetsica patanetsipaebaponaenexamë Dioso pejumelivaisi. Itsa Dioso apo cayajavaponapona tsipae, nexata apo exanaemë tsipae pinijicuene nexanaejavanë, xuanë baja exanapona, jai Nicodemo Jesúsjavabelia.

³ Nexata Jesús jumaitisi Nicodemojavabelia:

—Xaniajanë pacuenia catsipaebijitsiatsi. Pajivi Dioso pejamatabëcueneta apo naexanae tsane icatsia bepejananaexanaejiviyo, bajarapajivi Dioso apo pijajivitonë tsane, jai.

⁴ Nexata Nicodemo jumaitisi Jesúsjavabelia:

—¿Detsa jane pacuenia penaveretsijivi baja icatsia naexanaejitsipa bepejananaexanaejiviyo? ¡Apo caëjépaetsi rabaja icatsia pejonexa pena pecototualia penaexanaenexa icatsia bepejananaexanaejiviyo! jai Nicodemo Jesúsjavabelia.

⁵⁻⁶ Jesús nexata jumaitisi Nicodemojavabelia:

—Xaniajanë pacuenia catsipaebijitsiatsi. Pajivi pena pecototoverena naexana, yaperabëanaexana baja cajena. Pajivi pijinia Espiritu Santo pejamatabëcueneta naexana bepejananaexanaejiviyo, bajarapajivi Diosojavabelia ajamatabëcuenesaëyaexanatsi, Espiritu Santo petsijamatabëcaexaetsi. Pajivi Dioso pejamatabëcueneta jamatabënaexana icatsia bepejananaexanaejiviyo, bajarapajivi xanepana pebautisabinexatsi merata. Nexata bajarapajivi Espiritu Santo rajutsianatsi pejanajamatabëcuenë. Nexata bajarapajivi Dioso pijajivitonëcuenia evetsianatsi. ⁷ “Xamë ata baja cajena icatsia benaexaname bepejananaexanaejiviycuenia,” tacajajava yabara, pëtsa jamatabëcuenenabenajacame. ⁸ Jovibo bana-jetaruca itsabelia jamatabënajetaruca. Jumetaneme saya ëpijume. Itsiata apo yapëtaemë itsaverena pona, itsabelia ata pona. Bajara pijinia pacuenia apo yapëtaemë pacuenia jivi Espiritu Santo pejamatabëcueneta naexanaeyaxanatsi bepejananaexanaejivicuenia, jai Jesús Nicodemojavabelia.

⁹ Nexata icatsia Nicodemo jumaitisi Jesúsjavabelia:

—¿Detsa pacuenia itsipae bajaraxua? jai Nicodemo.

¹⁰ Jesús nexata jumaitisi:

–Xamē picani Israel nacuapijivi necujarubinē. ¿Itsiata tsaja apo jumeyapētaemē palivaisi catsipaebatsi? ¹¹ Xaniajanē pacuenia catsipaebijitsiatsi. Juan jivibautisabinē. Bajaraponēbeje patayapētaelivaisibeje, jivi patsipaebaponajēbeje. Xua pepacuene patanijibeje, bajaraxua ata jivijavabelia patsipaebaponajēbeje. Itsiata baitsi jane patatsipaebilivaisianēbeje, apo panejumecovēnētšimē. ¹² Catsipaebi atatsi xua Dioso exanapona mapanacuataje, itsiata apo nejumecovēnētšimē. ¿Detsa nexata pacuenia nejumecovēnētšianame itša catsipaebianatsi xua Dioso exanapona athēbētatsia? jai Jesús.

¹³ Icatsia Jesús pijacuata nayabarajumaitsi Nicodemojavabelia:

–Itsajivi ata cajena apo ponaē Dioso pijanacuayabetsia icatsia pepatsinexatsica mapanacuayabetsicaje patsipaebinexa jivijavabelia pacuenia itsi athēbētatsia. Caenē, Daxitajivi Pematapijinē, caējēpatsi jivi patsipaebinexa pacuenia itsi athēbētatsia. Tsipaji baja cajena bajaraponē athēbēvetsica pepatsinē. Tsipaji baja cajena athēbētatsia peponaponaeenē. ¹⁴ Bajayata petusato nacuata jivi ayaibitsaēto yatēpaponajomo pesinijavatsi. Nexata bajarapaematota Moiséspijinē jomo jumapecataeya pexanaenē, naejavata athēbēyo ruta. Nexata jomo pesinivitsi peyatēpaeviminexa, itša taepona bajaraponē, asaē tsaponae. Bajara pijinia pacuenia, Daxitajivi Pematapijinē ata, athēbēyo rutsianatsi cruzajavabelia. Bajara pacuenia rutsianatsi cruzata petēpaenexa. ¹⁵ Nexata pajivi bajaraponējavabelia sivanajamatabēcopata, apo naxuabi tsane. Bajarapajivi xainaena maticabi apo pevereverecejava, nayabarajai Jesús pijacuata Nicodemojavabelia.

Pacuenia Dioso exana piāsivaxae mapanacuapijivije yabara pelivaisi

¹⁶ Icatsia Jesús pijacuata nayabarajumaitsi Nicodemojavabelia:

–Pinijicuenia Dioso asiva mapanacuapijivije. Bajaraxuata itorobica pepo caenē pexēnato mapanacuayabetsicaje mapanacuapijivije Diosovecua penaxuabiyani. Pamonae sivanajamatabēcopata Dioso pexēnatojavabelia, apo naxuabi tsane. Bajarapamonae maticabi apo pevereverecejava, Dioso rajutsianatsi. ¹⁷ Dioso apo itorobitsica pexēnato mapanacuayabetsicaje mapanacuapijivije pijaneconi yabara penaneconitsiaexanaenexa. Biji rajane Dioso itorobica pexēnato, pejamatabēcueneta Dioso pecapanepaenexa mapanacuapijivije pibisiacue pexanaeconimivecua, nayabarajai Jesús pijacuata Nicodemojavabelia.

¹⁸ Icatsia Jesús pijacuata nayabarajumaitsi Nicodemojavabelia:

–Pajivi sivanajamatabēcopata Daxitajivi Pematapijinējavabelia, bajarapajivi Dioso apo naneconitsiaexanaetsi tsane pibisiacue pexanaeconimi yabara. Pajivi apo sivanajamatabēcopatsi Daxitajivi Pematapijinējavabelia, bajarapajivi baja naneconita Diosojavabelia. Nexata Dioso naneconitsiaexanaenatsi. Tsipaji apo sivanajamatabēcopatsi pepo caenē Dioso pexēnatojavabelia. ¹⁹ Ponē Daxitajivi Pematapijinē, bepecotia picani. Tsipaji jivi tsipaebapona pexaniajailivaisi jivi pejamatabēcuenitayotsinexa. Itsiata mapanacuapijivi apo jitsipae pejamatabēcuenitayotsinexatsi. Jitsipa saya piaitaquirijamatabēcueneta. Tsipaji bajarapamonae pibisiacue exanavanapa. Bajaraxuata bajarapamonae naneconitsiaexanaenatsi Dioso. ²⁰ Daxita pamonae pibisiacue pexanavanapaevi, apo jitsipae Daxitajivi Pematapijinē pejamatabēcuenitayotsinexatsi. Bajaraxuata Daxitajivi Pematapijinējavabelia apo patsi. Tsipaji cjunava peyapētaeyaexanaeyanivatsi penaneconitsijava Diosojavabelia pibisiacue pexanaeconi yabara. ²¹ Pamonae jumecovēnēta Dioso pexaniajailivaisi, bajarapamonae apo cjunavi. Bajarapamonae pata Daxitajivi Pematapijinējavabelia pejamatabēcuenitayotsinexatsi. Bajarapamonae jitsipa daxitajivi peyapētaenexatsi Dioso peyavenaponaejavatsi xua exanavanapa, nayabarajai Jesús pijacuata Nicodemojavabelia.

Pacuenia Juan jivibautisabinē vajunupaeba Jesús yabara pelivaisi

²² Jesúsbeje Nicodemobeje pecuaicuaijucujinaebeje, Jesús baja, pijajivi yajava, pona Judea nacuyabelia. Nexata Judea nacuata bajayajebi Jesús pijajivi barēponapona. Bajarapamonae bautisabapona jivi. ²³ Juan pijinia itsamonae bautisabapona Enón tomarata. Enótomara eca Salimtomara imoxoyjavata. Bajarajota Juan jivi bautisabapona tsipaji ayaimera. Juan jivi topataponatsi pebautisabinexa. Nexata pepataponae, Juan bautisabapona. ²⁴ Bajarapacuenia Juan jivi bautisabapona abaxē itša apo etsitsi penaneconitsivi pejebabiabibota.

²⁵ Nexata Juan pijajiviyajuvēnēvi anaeya najumenotsiaya cuaicuaijai judiōnējavabelia. Juan pijajivi jumaitsi:

–¿De meta ponē itša nacabautisaba, nacajamatabēcuenexaniavaetsiana Dioso vajanacabarajamatabēcuenexanepaenexa? jai Juan pijajivi judiōnējavabelia.

²⁶ Nexata Juan pijajivi pona Juanjavabelia. Nexata bajarapamonae Juanjavabelia jumaitsi Jesús yabara:

—Ponē caxitajarabame Jordánmene itsapanatalia, ponē vajunupaebame paxanējavaberena, bajaraponē ata aeconoxae jivi bautisabapona. Nexata daxitajivi bajaraponējavabelia pona, jai Juan pijajivi.

²⁷ Nexata Juan jumaitsi pijajivijavabelia:

—Xuavajēto xaina caejivi canacujitsia, Dioso perajutsixaetsi xaina. ²⁸ Pamatacabi jumaitsinē tsabiabi jivijavabelia: “Xanē raja apo Cristonē, ponē Dioso athēbēvetsica itorobijitsiatsica jivi pecapanepaenexa. Saya raja taneitorobinē Cristo pevājēnaeya, talvaisipaebanajetarucaenēnexa,” itsa janē, paxamē ata panejumetaeyabiabame. ²⁹ Ponē pita petiriva pijavanexa, nacasaba. Nexata pejananacasabinē peyapētaenētsi, namuxunaevetanuca imoxoyo. Bajaraponē ata nabarēya itsa jumetane pejananacasabinē pebarēyajava. Bajara pijinia pacuenia xanē ata aeconoxae bitso jamatabēcuenebarēyanē, itsa vēnēlivaisitaniji jivi peponaejava Jesúsjavabelia. ³⁰ Pevājēnaeyabelia jivi ayaibitsaētoxoneto Jesús pēnaponaenatsi. Xanē nexata tanepēnaponaevi bevelia tsaponae tsane, jai Juan pijajivijavabelia.

Pacuenia Juan tsipaeba pijajivijavabelia Jesús athēbēvetsica pepatsijava yabara pelivaisi

³¹ Icatsia Juan jumaitsi pijajivijavabelia:

—Athēbēvetsica pepatsinē, bitso cajena ayaijamatabēcuenenē daxitajivi matatoxenetsia. Pamonaē naexana mapanacuataje, bajarapamonaē saya mapanacuapijivije. Nexata saya cuaicuajiai ēmapanacuapijicuene yabaraje. Itsiata baitsi jane ponē athēbēvetsica pepatsinē, bajaraponē daxitajivi matatoxenetsia bitso ayaijamatabēcuenenē. ³² Bajaraponē picani tsi-paeba jivijavabelia pacuene tane athēbētatsia. Tsipaebanua picani palivaisi ata jumetane athēbētatsia. Itsiata baitsi jane daxitajivi jumeaebatsi petsipaebilivaisianē. ³³ Pajivi jumecovēnēta athēbēvetsica pepatsinē pepaebilivaisi, bajarapajivi Dioso ata yabara jamatabējumaitsi: “Dioso cajena pexaniajailivaisi pepaebinē,” jamatabējai. ³⁴ Ponē Dioso itorobatsi, bajaraponē tsipaeba jivijavabelia Dioso pitorobilivaisi. Tsi-paji Dioso rajutatsi Espiritu Santo. Yajavaponaponaeyaexanatsinua Espiritu Santo ayacuena. ³⁵ Dioso bitso asiva pexēnato. Tocopata daxitacuene pevetsinexa, pitorobinexanua. ³⁶ Pajivi najamatabēcopata Dioso pexēnatojavabelia, xainaena matacabi apo pevereverecejava. Pajivi apo najamatabēcopatsi Dioso pexēnatojavabelia, matacabi apo pevereverecejava apo xainae tsane. Bajarapajivi Dioso naneconitsiaexanaenatsi daxita matacabijavabelianexa, jai Juan pijajivijavabelia.

4

Pacuenia Jesús barēcuaicuajiai Samaria nacuapijiva yabara pelivaisi

¹ Fariseovi jumetane jivi pejumaitsjava: “Jesús baja pijajivi ayaibitsaētoxoneto xainaponapona. Bautisabaponanua jivi ayaibitsaēto Juan matatoxenetsia,” peyajava. ² Itsiata Jesús pecobeta apo bautisabi caejivi ata. Jesús rajane pijajivi bautisabapona jivi. ³ Nexata Jesús itsa yapētane fariseovi pevēnēlivaisitaevajatsi pacuenia jivi baracuaicuajiaitsi, nexata naviatu Judea nacuaverena. Pona Galilea nacuayabelia.

⁴ Nexata Galilea nacuayabelia peponaenē, Jesús, pijajivi yajava, patanajetaruca Samaria nacujava. Tsi-paji bajaraxuayo namuto najetaruca. ⁵ Nexata Jesús ecojopa Samaria nacuata peecaetomarata, Sicarvēnē tomarata. Sicar tomaravecua imoxoyo boca pairayo Jacobpijinē bajayata rajuta pexēnato Josépijinē. ⁶ Bajarapairayota eca meramēthē, pamēthē Jacobpijinē bajayata cueyeta. Jesús sicuerana peponaejava namuto. Nexata Jesús ecojopa meramēthē muxuneneta. Matonejeepatota Jesús ecojopa. ⁷⁻⁸ Jesús caenē eca meramēthējavata. Tsi-paji Jesús pijajivi tomarabelia pona pecomuacaenexa pexaejava. Nexata bajaraberena Samaria nacuapijiva rena pepuatsinexa mera bajarapamēthēta. Nexata Jesús jumaitsi Samaria nacuapijivajavabelia:

—Mera nerajure, jai Jesús.

⁹ Nexata Samaria nacuapijiva jumaitsi:

—¿Detsa xuajitsia mera nevajētame niapaenexa? Xamē judiōnemē. Xanē saicaya Samaria nacuapijivanē, jai bajarapova Samaria nacuapijiva Jesúsjavabelia.

Bajarapacuenia Samaria nacuapijiva jumaitsi Jesúsjavabelia tsi-paji judiōvibeje Samaria nacuapijivibeje naitajitsibiaya nanaēcotabiaba. ¹⁰ Nexata Jesús jumaitsi Samaria nacuapijivajavabelia:

—Pajamatabēcuene Dioso jitsipa pecarajutsinexa, apo yapētaemē. Xanē ata mera tacavajētsinē apo nejamatabēcuene yapētaemē. Itsa nejamatabēcuene yapētaejitsipame, nexata xanējavaberena copiaya mera nevajētsipame tacarajutsinexa. Nexata carajutsipatsi pi-aitavamera, jivi pejamatabēcuene asāyaxanaemera daxitamatacabijavabelianexa, jai Jesús Samaria nacuapijivajavabelia.

¹¹ Nexata Samaria nacuapijiva jumaitsi Jesúsjavabelia:

—Xamë apo caponaemë nijavaxiyo mera nepuatsinexa. Meramëthë raja tajëreca bitso. ¿Detsa jota pitsipame nexata piatavamera tanerajutsinexamë? ¹² Vajasalinainëmi Jacobpijinë ayaijamatabëcuenenëmi. Bajayata nacatocopata mapameramëthëje. Bajaraponëmi, pexi ata, pijadajubi ata, mera apa mapamëthëtaje. ¿Xamë tsaja nexata Jacobpijinëmi matatoxenetsia bitso ayaijamatabëcuenenëmi? jai Samaria nacuapijiva Jesúsjavabelia.

¹³ Jesús nexata jumaitsi:

—Jivi apaeyabiabi ata mapamëthëpijimeraje, itsiata mera pejitsipaejava apo tovereverecabiabitsi. ¹⁴ Pajivi apaena xanë tarajutsimera, bajarapajivi xainaena matacabi apo peverevereaejava. Nexata pacuenia meramëthë eca daxitamatacabijavabelianexa, bajara itsi tsane bajarapajivi, jai Jesús.

¹⁵ Nexata Samaria nacuapijiva jumaitsi Jesúsjavabelia:

—Bajarapamera nerajure icatsia mera tanamatavenonaponaeyaniva. Nexata baja mera apo puanabiabinë tsane mapamëthëaberenaje, jai Samaria nacuapijiva.

¹⁶ Jesús nexata jumaitsi Samaria nacuapijivajavabelia:

—Amona junaremelia. Yajavarenamë tsane, jai Jesús.

¹⁷ Nexata Samaria nacuapijiva jumaitsi:

—Apo xainaenë raja tamona, jai.

Nexata Jesús jumaitsi:

—“Apo xainaenë raja tamona,” itsa jamë, apo najumetsënëtsimë cajena. ¹⁸ Xainame picaní amonajivi cinco ponëbeje. Ponë aeconoxae xainame, apo amona cajena. Tsipaji saya nijajara. Bajaraxuata xaniavaetsia netsipaebame, jai Jesús Samaria nacuapijivajavabelia.

¹⁹ Nexata Samaria nacuapijiva itsa jumetane bajarapacuenia Jesús pejumaitsijava, nexata Samaria nacuapijiva jumaitsi Jesúsjavabelia:

—¿Xamë tsabaja Diosojumepaebinëmi profetanëmi? ²⁰ Patajasalinaivimi baja cajena navajëcabiaba Diosojavabelia mapatsutojumataliaje. Itsiata baitsi jane pajudíovimë pajumaitsimë tsabiabi: “Jivi itsa navajëca Diosojavabelia, benavajëcabiaba Jerusalén tomarata Dioso pejumecovënëtsinexatsi,” pajamë tsabiabi, jai Samaria nacuapijiva.

²¹ Jesús nexata jumaitsi:

—Nelumecovënëtsianame pacuenia catsipaebijitsiatsi. Imoxoyo rabaja pevajënae papecatocopiapatsinexa Diosojavabelia panevajëcabiabinexa, paponaejevamë mapatsutojavabeliaje, paponaejevamë Jerusalén tomarabelia ata. ²² PaSamaria nacuapijivimë, pavajëcabiabi atamë Diosojavabelia, xaniavaetsia apo payapëtaemë Dioso. Paxanë rajane pajudíovimë xaniavaetsia payapëtaniji Dioso, ponëjavabelia pavajëcabiabajë. Tsipaji xanë daxitajivi tacapanepaenë tsane, judíoviyajuvënë. ²³ Ajena mapamatacabijavaveliacujinaeje, pevajënaeyabelia ata tsaponae, daxita pamonaë jamatabëvajëta Diosojavabelia, bajarapamonae xaniavaetsia vajëtsiana daxita pejamatabëthëtajavavetsina. Pepo pexanijajimatabëcueneta vajëtsiana Diosojavabelia. Bajarapitsivi Dioso jitsipa pevajëtsijavatsi. ²⁴ Dioso cajena apo vajataenë. Pamonaë vajëta Diosojavabelia, xaniavaetsia pexanijajimatabëcueneta bevajëta, pepo pejamatabëthëtajavavetsina, jai Jesús Samaria nacuapijivajavabelia.

²⁵ Nexata Samaria nacuapijiva jumaitsi:

—Yapëtaniji rabaja pepatsijavanexatsica Mesías, ponë Cristo, baitsi ponë athëbëvetsica Dioso itorobijitsiatsica jivi pecapanepaenexa. Itsa bajaraponë patsianica, nacatsipaebiana daxitacuenelivaisianë, jai Samaria nacuapijiva Jesúsjavabelia.

²⁶ Jesús nexata jumaitsi Samaria nacuapijivajavabelia:

—Xanë rabaja Cristonë, jai.

²⁷ Nexata bajarapaepatota tomaraverena parena Jesús pijajivi. Bajarapamonae jamatabëcuenenabenajaca Jesús pecuaicuaijaitsanucaeaxae Samaria nacuapijivajavabelia. Itsiata itsanë ata: “¿Detsa xua jitsipame?” apo jai Samaria nacuapijivajavabelia. Jesúsjavabelia ata apo yanijobi: “¿Detsa xuajitsia bajarapova barëcuaiicuijamë?” apo jai itsanë ata. ²⁸ Nexata bajarajota Samaria nacuapijiva pueneteta pijacanalito. Navialia pijatomarabelia. Tsipaebalia jivi. Nexata jumaitsi Jesús yabara:

²⁹ —Panataemelia ponë netsipaeba daxita pacuenia exanajë. ¿Baja tsamëra jane apo Cristo, ponë athëbëvetsica Dioso itorobijitsiatsica jivi pecapanepaenexa? jai Samaria nacuapijiva.

³⁰ Nexata bajarapamonae pijatomaravelia ponalia. Taeothopalia Jesús. ³¹ Itsa abaxë bajarapamonae apo patsilia Jesúsjavabelia, Jesús pijajivi jumaitsi:

—Patajatuxanenë, naxaema itsajavayo, jai.

³² Nexata Jesús jumaitsi pijajivajavabelia:

—Xainajë raja saicaya taxaejavanexa paxamë apo paneyapëtaejava, jai Jesús.

³³ Nexata Jesús pijajivi, épamonae, nayanijoba.

—¿Itsanë tsamëra tsipaji vajacovëta Jesús pexaejava tocapatatsi penabaninexa? najai Jesús pijajivi.

³⁴ Nexata Jesús jumaitsi:

—Pacuenia taneitorobinëtsica nitoroba, jitsipajë taexanaenexa. Jitsipajë baja tanacuen-everetsinexa xua nitoroba. Bajara jane xua betaxaejava tani. ³⁵ Paxamë pajumait-simë tsabiabi peubijava yabara: “Saica raja abaxë cuatro pajuametobeje peubijava penaveretsinexa,” pajamë tsabiabi. Itsiata xanë pacatsipaebianatsi jivi yabara. Pataema mapamonae najetarubenaje. Pacuenia baja peubijava navereta penotsinexatsi, bajara itsi mapamonaeje. Mapamonaeje jumecovënëtsiana itsa tsipaebianatsi Dioso pejumelivaisi. ³⁶ Pajivi tsipaebiana tajumelivaisi jivi pejumecovënëtsiaexanaenexa, matacabi apo pevereverecaejava jivi pexainaenexa, bajarapajivi sivajamatabëcuenenarëya tsane ayaibitsaëto itsa jumecovënëtsianatsi. Itsamonae baja picani namataxainaeya tsipaeba bajarapamonaejavabelia Dioso pejumelivaisi. Itsiata baitsi jane apo jumecovënëtsitsi. Nexata bajarapamonae ata itsa vënëlivaisitaena pejumecovënëtsijava tajumelivaisi, bajarapamonae ata sivajamatabëcuenenarëya tsane. ³⁷ Jivi bajumaitsi peubijava yabara mapacueniaje: “Copiaya itsanë uba. Itsa baja navereta peubijava, saicaya icatsia itsanë nota,” bajai. ³⁸ Nexata baja itsaxuayo itsamonae copiaya Dioso pejumelivaisi asaëyata tsipaebapona, bajara icatsia xuayo paxamë ata talivaisi panetsipaebinexa, pacaitorobatsi. Nexata pamonae copiaya Dioso pejumelivaisi tsijamatabëubatsi, ayaibitsaëto bajarapamonae najamatabëcuenecopaba baja Diosojavabelia panetsipaebixae talivaisi, jai Jesús pijajivijavabelia.

³⁹ Samaria nacuapijiva, pova Jesús barëcuaicuaijai mera mëthëjavata, pijatomarapijivijavabelia tsipaeba ayaibitsaëto xanetojavabelia Jesús yabara. Nexata Samaria nacuata pejinavanapaevi, Sicar tomarapijivi, ayaibitsaëto xaneto jumecovënëta Cristocuene. Jumecovënëta Cristocuene penavajunupaebixae bajarapova bajarapatomarapijivijavabelia: “Daxita pacuene exanjë, Jesús netsipaeba,” pejaixae. ⁴⁰ Nexata Samaria nacuapijivi itsa parena Jesúsjavaberena, bajarapamonae Jesús asivatsi penaponaponaenexa bajarapamonaejavata. Nexata Jesús bajarapamonaejavata naponapona anijamatacabibeje. ⁴¹ Itsa bajarapamonae pijacuata jumetane Jesús petsipaebilivaisi, nexata icatsia ayaibitsaëto xaneto jumecovënëta Cristocuene. ⁴² Nexata bajarapamonae jumaitsi penavajunupaebivajavabelia:

—Pajumecovënëtajë apo ëpatanetsipaebijumemë yabara. Biji rajane pajumecovënëtajë tsipaji baja patajacuata ata pajumetaniji Jesús vajanacatsipaebilivaisi. Payapëtaniji baja cajena bajaraponë pexaniajajava Cristocuene. Payapëtaniji bajaraponë mapanacuapijivije pecapanepaejavanexa, pibisiacuene pexanaenconimivecua, jai bajarapamonae penavajunupaebivajavabelia.

Pacuenia Jesús tojamatejemayaexana gobierno pijajivitonë pexënatonëyo yabara pelivaisi

⁴³ Samaria nacuata anijamatacabibeje Jesús peponaponaecujinae, vecuapona baja Samarianacua. Nexata jane baja pona Galilea nacuayabelia. ⁴⁴ Jesús jumai tsabiabi pijajivijavabelia:

—Pajivi Dioso jumepaebabiaba, bajarapajivi apo yaiyataetsi pijanacuapijivi, jai tsabiabi Jesús.

⁴⁵ Itsa baja Jesús palia Galilea nacuayabelia, bajarapanacuapijivi xaniavaetsia copiapitatsi. Tsipaji baja cajena bajarapamonae ata Jerusalén tomarata pascua fiestamatacabi Jesús tanetsi. Nexata Jesús ayaicuene Dioso pesaëta pexanaejava bajarapamonae kujirutanetsi fiestamatacabi.

⁴⁶ Nexata icatsia Jesús naviaata Caná tomaraberena. Canátomara eca Galilea nacuata. Bajarapatomarata Jesús copiaya merami exana vinora. Caná tomarata ponapona gobierno pijajivitonë, ayaijamatabëcuenenë. Bajaraponë pexënatonëyo toavitane tsanucaetsi Capernaum tomaratalia. ⁴⁷ Nexata gobierno pijajivitonë vënëlivaisitanetsi Jesús Judea nacua-javaverena pepatsijava, Galilea nacuaaberena. Nexata bajaraponë lia Jesúsjavabelia. Pinijicuenia junata pijaboyabelia pebarëponaenexa Jesús petojamatejemayaexanaenexatsi pexënatonëyo. Tsipaji baja gobierno pijajivitonë pexënatonëyo totëpaejitsiatsi. ⁴⁸ Nexata Jesús jumaitsi bajaraponëjavabelia:

—Paxamë cajena apo panejumecovënëtsimë. Matapania itsa pataneme ayaicuene Dioso pesaëta taexanaejava, jivi apo pexanaecapanepaejava, panejumecovënëtsianame, jai Jesús.

⁴⁹ Nexata gobierno pijajivitonë jumaitsi:

—Jesús, naxanitsiayo tapëta ponare taxënatonëyo abaxë petëpaejavajënaeya, jai.

⁵⁰ Jesús nexata jumaitsi bajaraponëjavabelia:

—Naviaremelia nexënatonëyojavabelia. Nexënatonëyo rabaja icatsia catojamatejema, jai Jesús.

Bajaraponë jumecovënëta pacuenia Jesús jumaitsi. Nexata baja lia pijaboyabelia. ⁵¹ Itsa bajaraponë patanajetarucalia, nexata pijajivi mataenenarenatsi. Nexata pijajivi jumait-sitsi:

–Nexënatonëyo rabaja icatsia jamatejema tsecae, jaitsi.

⁵² Nexata bajaraponë yanijoba pijajivijavabelia.

–¿Detsa xuayota juameto itsa ruca, jamatejema baja? jai tsapatsi bajaraponë.

Nexata pijajivi jumait-si:

–Canivi, matonejeepeatota, vecuaajibitsi baja peromaebijavatsi, jai pijajivi.

⁵³ Nexata bajaraponë jamatabëjumaitsi:

–Bajarapaepatota canivi Jesús nejumaitsi: “Nexënatonëyo rabaja icatsia catojamatejema,” nejai, jamatabëjai.

Bajaraxuata bajaraponë, pijamonae yajava, jumecovënëta Jesús Cristonëcuene.

⁵⁴ Jesús penaviatsicujinae Judea nacujavaverena, Galilea nacujavaverena, cotocaevi bajarapapinjicue Dioso pesaëta exana Galilea nacuaeta.

5

Pacuenia Betzatavënë pucayojavata Jesús jamatejemayaexana petabusipacuenabinëtsi yabara pelivaisi

¹ Judíovi fiesta exana Jerusalén tomarata. Nexata Jesús nalia. ² Jerusalén tomarata, ovejaxi pecajoneyabiabibaupa imoxoyojavata, pecueyetsipucayo eca. Bajarapapucayo hebreojumeta pevënë Betzata. Bajarapapucayo matatoyorotsia cinco pabobërëtoheje eca. ³ Bajarapabobërëtonëjavata piavitanevi ayaibitsaëtoxaneto bobena. Itsamonae bitso pitaxutotsëcënaevi. Itsamonae pejayujayunaevi. Itsamonae peperabëcuenabivitsi. Daxita bajarapamonae evetanubena pucayo pemenenacujirubijava. ⁴ Athëbëvetsica ángel jemata runabiabica pucayojavabetsica. Nexata pucayo menenacujirubabiaba. Pemenenacujirubijavata, pajivi copiaya runareca pucayojavabereca, bajarapajivi pavitanecuene capunatsi, vecuaajibiaexanabiabatsi. ⁵ Bajarajota naboca treinta y ocho pavaibeje piavitanetsanucaenë, petabusipacuenabinëtsi. ⁶ Itsa Jesús taeyabuata bajaraponë, nexata yapëtaeyabuata bajayajebi piavitanenëcuene. Nexata Jesús jumaitsi bajaraponëjavabelia:

–¿Jitsipame tsaja nejamatejemajava? jai Jesús.

⁷ Nexata bajaraponë jumait-si:

–Itsajivi ata apo xainenë tanecopatsinexareca pucayojavabereca itsa mene nacujiruba. Ajena narunabiabijitsianëreca, bajarapaepatota itsajivi netsurunabiabareca copiaya, jai piavitanetsanucaenë.

⁸ Jesús nexata jumait-si piavitanetsanucaenëjavabelia:

–Namatacore. Pire nijapanayo. Ponare baja, jai Jesús.

⁹ Bajarapacuenia Jesús pejumait-sijavata, jamatejema baja piavitanetsanucaenëmi. Pita baja pijapanayo. Ponaexanepana baja. Bajarapacuenia petabusipacuenabinëtsi Jesús jamatejemayaexana judíovi penacueraevetsimatacabita. ¹⁰ Nexata judíovi jamatabëcuenenavëxaniabiava judíovi petabusipacuenabinëtsimait-sijavabelia:

–Ajena raja vajanacueraevetsimatacabi. Nexata apo xanepanae necaponaponaenexa nijapanayo, jai judíovi, tsipaji bajarapamonae apo jitsipae itsajivi ata pexanaenexa itsacuenejavayo ata penacueraevetsimatacabita.

¹¹ Nexata petabusipacuenenbinëtsi jumait-si judíovijavabelia:

–Tanejamatejemayaexanaenë raja nejumaitsi: “Nijapanayo pire. Ponare baja,” nejai, jai petabusipacuenenbinëtsi judíovijavabelia.

¹² Nexata icatsia judíovi jumait-si:

–¿Jipatsa nexata cajumaitsi: “Nijapanayo pire. Ponare baja,” cajai? jai.

¹³ Itsiata baitsi jane bajaraponë apo vënëyapëtae pavënëné jamatejemayaexanatsi. Apo vënëyapëtae Jesús. Tsipaji bitso jivi ayaibitsaëtoxaneto bajarajota jinavanapa. Jesús baja cajena pauptaponae itsajavabelia, yanijobatsi. ¹⁴ Bajaraxuacujinae icatsia Jesús caxitarabaxuaba bajaraponë templobota. Nexata Jesús jumait-si bajaraponëjavabelia:

–Taema. Aeonoxae baja jamatejemamë. Icatsia pëtsa baja matavëjëa exaname pibisiacuene. Icatsia raja itsa exaname, bitsomë tsipae, jai Jesús bajaraponëjavabelia.

¹⁵ Nexata bajaraponë pona baja. Tsipaeba judíovijavabelia.

–Jesús tsaena raja nejamatejemayaexana, jai judíovijavabelia.

¹⁶ Bajaraxuata nexata judíovi Jesús jamatabëitonotatsi. Jamatabëbeyaxuabatsinua. Tsipaji jamatejemayaexana piavitanevi judíovi penacueraevetsimatacabita. ¹⁷ Nexata Jesús jumait-si judíovijavabelia:

–Taxa Dioso raja piavitanevi jamatejemayaexanabiaba daxitamatacabi. Bajaraxuata xanë ata piavitanevi jamatejemayaexanajë daxitamatacabi, jai Jesús judíovijavabelia.

¹⁸ Bajarapacuenia Jesús penalivaisipaebixae judíovijavabelia, itoyatsi bitso. Bajarapamonae jamatabëbeyaxuabatsi. Tsipaji Jesús jamatejemayaexana pivitanevi judíovi penacueraevetsimatacabita. Orijibia Jesús jumaitsi: “Taxa raja Dioso,” jai. Bajarapacuenia Jesús pejumaitsixae, nexata judíovi bitso jamatabëbeyaxuabatsi.

Pacuenia Dioso pexénato jamatabëcuenecaējēpatsi daxitacuene pexanaenexa yabara pelivaisi

¹⁹ Jesús jumaitsi judíovijavabelia:

—Xaniajanë pacuenia pacatsipaebijitsiatsi. Xanë, Dioso pexénatonë, itsacueneyavayo ata apo exanaenë ëxanë tajamatabëcueneta. Pacuenia taniji taxa pexanaejava, bajarapacuenia xanë ata exanajë. ²⁰ Taxa niasiva. Nexata neyapëtaeyaxana daxita pacuene taxa yapëtane. Tavajënaeyabelia neyapëtaeyaxanaponaena bajarapacuenia matatoxenetsia ayaicuene taexanaponaenexa. Nexata exanaenajë ayaicuene taexanaejavanë. Paxamë itsa pataename ayaicuene taexanaejavanë, pajamatabëcuenenabenajacaname. ²¹ Taxa petëpaevimi ata icatsia asaëyaexana. Xanë ata necaējēpa tasaëyaexanaenexa petëpaeviji ata, pajivi jamatabëasaëyaexanajë. ²² Taxa raja apo naneconitsiaexanae tsane itsajivi ata. Xanë raja, pexénatonë, nitoroba tananeconitsiaexanaenexa pibisiacuene pexanaevi. ²³ Bajarapacuenia nitoroba tananeconitsiaexanaenexa taneyaiyataenexa daxitajivi pacuenia bajarapamonae yayiatane taxa. Pajivi apo neyaiyatae, Dioso pexénatonë, bajarapajivi taxa ata apo yayiatae, jai Jesús judíovijavabelia.

²⁴ Icatsia Jesús jumaitsi judíovijavabelia:

—Xaniajanë pacuenia pacatsipaebijitsiatsi. Pajivi nenamuxunaeveta tapaebilivaisi, itsa jumecovënëtanua Dioso athëbëvetsica taneitorobinëcuenetsica, nexata bajarapajivi xainaena matacabi apo pevereverecejava. Nexata bajarapajivi apo naneconitsiaexanaenë tsane pibisiacuene pexanaeneci yabara. Bajarapajivi tēpae ata tsane, capanepaenatsi Diosojavabelia. ²⁵ Xaniajanë pacuenia pacatsipaebijitsiatsi. Pamonae apo xinae matacabi apo pevereverecejava, pijamatacabi baja tocopiapatatsi tanejumetaenexa, xanë Dioso pexénatonë, tatsipaebilivaisi. Nexata pajivi nesivanajamatabëcopata, xainaena matacabi apo pevereverecejava. ²⁶ Taxa raja caējēpatsi jivijavabelia perajutsinexa matacabi apo pevereverecejava. Nexata xanë ata taxa necaējēpaeyaxana jivi tarajutsinexa matacabi apo pevereverecejava. ²⁷ Nitorobanua tananeconitsiaexanaenexa pibisiacuene pexanaevi. Tsipaji xanë, Daxitajivi Pematapijinë. ²⁸ Pëtsa pajamatabëcuenenabenajacame patacatsipaebilivaisi yabara. Itsamatacabi nejumetaena daxita petëpaevimi ata tatsipaebilivaisi. ²⁹ Nexata bajarapamonae pemëthëanëmi vecuapitsapaena. Pamonae pexaniacuene pexanaevimi, Dioso icatsia asaëyaexanaenatsi. Nexata bajarapamonae xainaena matacabi apo pevereverecejava. Pamonae pibisiacuene pexanaevimi, icatsia Dioso asaëyaexanae atatsi tsane, bajarapamonae naneconitsiaya jinavanapaena daxitamatacabi-javabelianexa, jai Jesús judíovijavabelia.

Pacuenia Jesús jivi tsitanajamatabëcueneitajëta pecaējēpaenëcuenetsi daxitacuene pexanaenexa yabara pelivaisi

³⁰ Icatsia Jesús jumaitsi judíovijavabelia:

—Xanë tajamatabëcueneta apo exanaenë tsane itsacuenejavayo ata. Taneitorobinëtsica taneitorobicuenia, pijaneconi pexinaevi naneconitsiaya jinavanapaeyaxanaenajë. Nexata saya itaxutojema apo naneconitsiaexanaenë tsane. Itsa naneconitsiaexanaenajë jivi, paneconivajëto xaina caeviji canacujitsia, bajarapaneconivajëtota caeviji canacujitsia naneconitsiaexanaenajë. Apo exanaenë tsane pacuenia jamatabëcuenajë tajacuata. Pacuenia jitsipa taxa taneitorobinëtsica, bajarapacuenia exanaenajë. ³¹ Itsa navënëlivaisipaebijitsipajë, “Xanë rabaja ayajamatabëcuenenë,” itsa janë tsipae, itsiata itsamonae saya nejumeebijitsipa. ³² Itsiata baja Juanpijinë jivibautisabinëmi nevajunupaeba xaniavaetsia. Yapëtaniji bajaraponë tanevajunupaebijava pexaniajajamatabëcueneta. ³³ Paxamë itsamonae paitorobame tanevënëlivaisiyanijobinexa Juan jivibautisabinëmijavabelia. Nexata Juanpijinë xanë talivaisi, pexaniajailivaisi, tsipaeba paneitorobivijavabelia. ³⁴⁻³⁶ Pacanajamatabënapitsiaexanatsi pacuenia Juanpijinë nevënëlivaisipaeba panejumecovënëtsinexa patacacapanepaejavanaxa taxa Diosojavabelia. Juanpijinë abaxë itsa ponapona mapanacuataje, belámparabë picani. Pacajamatabëcueneitayota. Caepatoyo picani pasivajamatabëcuenenarëyamë papecatsipaebilivaisi. Juanpijinë itsa nevënëlivaisipaeba, pacayapëtaeyaxana baja cajena pexaniajailivaisi tapaebinëcuene. Itsiata baitsi jane Juanpijinë bajarapacuenia apo pacatsipaebi ata tsipae, xanë xainajë itsanë tanevënëlivaisipaebinëxaxa. Bajaraponë bitso ayajamatabëcuenenë Juanpijinëmi matatoxenetsia. Bajaraponë taxa. Taxa netocopata pinijicuene taexanaenexa. Nexata pinijicuene exanajë daxitajivi tanevijamatabëjumaitsinexa: “Xaniajai tsana. Maponëje pepacuene Dioso athëbëvetsica

pitorobinētsitsicaje.” tanesivajamatabējainexa. ³⁷ Taxa, ponē nitorobica, tajēvelia baja cajena nevēnēlvaisi yaquinaeyaexana pejumelivaisibaxutota. Caeto ata taxa livaisi papecatsipaebijava, apo pajumetaemē. Apo pataemēnu. ³⁸ Nexata pejumelivaisi apo pacatsijamatabējone. Tspaji apo panejumecovēnētšimē taxa athēbēvetsica taneitorobinētsica. ³⁹ Paxamē picani xaniavaetsia palebabiabame Dioso pejumelivaisibaxuto. Bajarapacuenia palebabiabame tspaji jamatabēcuenenavēxaniabiaya pajamatabējumaitšimē tsabiabi: “Xaniavaetsia itsa lebjē Dioso pejumelivaisi, nexata Dioso nerajutsiana maticabi apo pevereverecejava,” pajamatabējamē tsabiabi. Itsa palebabiabame Dioso pejumelivaisibaxuto, ponē yabara palebabiabame, xanē rabaja cajena. ⁴⁰ Paxamē itsiata apo panejumecovēnētšimē panexainaenexa maticabi apo pevereverecejava, jai Jesūs judiōvijavabelia.

⁴¹ Icatsia Jesūs jumaitšimē judiōvijavabelia:

—Apo exanaenē ayaicue ne taexanaejava saya jivi tanesivajamatabējumaitšimē: “Jesūs raja ayajamatabēcuenenē,” tanesivajamatabējainexa. ⁴² Pacajamatabēcueneyapētanetsi. Yapētaniji cajena apo panejitsipaevaja Dioso. ⁴³ Xanē athēbēvetsica patsicajē mapanacuaya-betsicaje taxa Dioso taneitorobixaetsica. Itsiata apo panejumecovēnētšimē. Itsanē itsa pacatopatsiana saya bajaraponē pejamatabēcuenepijilivaisi papecatsipaebinexa, nexata pajumecovēnētšianame. ⁴⁴ Paxamē pajitsipame mapanacuata ējivi papecasivabarēyanexa, papecayiyataenexanua. Apo panajamatabēxainaemē cajena Dioso papecasivabarēyanexa. Bajaraxuata apo pacacājēpae panejumecovēnētšimē Dioso pejumelivaisi. ⁴⁵ “Mara ponēje nacaneconitsijitsia Diosojavabelia,” panesivajamatabējamē pētsa. Xanē raja apo pacaneconitsi tsanetsi. Paxamē jamatabēcuenenavēxaniabiaya pajamatabējumaitšimē tsabiabi: “Bajayata Dioso Moiséspijinetā najumecopata jivi pejumecovēnētšimē. Bajarapalivaisi baja jumecovēnētšijinavanapatsi. Bajaraxuata nacacapanepaena Dioso,” pajamatabējamē tsabiabi jamatabēcuenenavēxaniabiaya. Itsiata bajarapalivaisivēcu saya pajinavanapame. Nexata bajarapalivaisi pacaneconitsiana Diosojavabelia. ⁴⁶ Itsa pepacue ne pajumecovēnētšipame Dioso Moiséspijinetā penajumecopatsilivaisi, nexata xanē ata panejumecovēnētšipame. Tspaji cajena bajayatami tajēvelia nevajunupaeba Moiséspijinē peyaquinaebaxutota. ⁴⁷ Apo pajumecovēnētšimē Moiséspijinē peyaquinaelivaisi. Bajaraxuata nexata apo panejumecovēnētšimē xanē patacatsipaebilivaisi, jai Jesūs judiōvijavabelia.

6

*Pacuenia Jesūs pexaejava rajuta cinco mil ponēbeje yabara pelivaisi
(Mt 14.13-21; Mr 6.30-44; Lc 9.10-17)*

¹⁻⁴ Bitso baja imoxoyo pevājēnae pejonenexa judiōvi pijafiesta, pascuavēnēfiesta. Bajarapamaticabi Jesūs pona Galilea pucaxaneto itsapanabelia. Bajarapapuca itsavēnē Tiberiaspuca. Nexata jivi ayaibitsaētoخانeto Jesūs pēnapanotsi. Tspaji Dioso pesaēta Jesūs ayaicue ne exanapona. Piavitanevi jamatejemayaexana pona. Nexata Jesūs junaya petsutojumabetsia. Jesūs, pijajivi yajava, ecaya petsutojumatatsia. ⁵ Itsa Jesūs tane jivibitsaētoخانeto pecujibijavatsirena, Jesūs jumaitšimē Felipejavabelia:

—¿Detsa belia comuatsianatsi pexaejava pexaenexa mapabitsaētoخانetoje? jai Jesūs.

⁶ Bajarapacuenia Jesūs jumaitšimē tspaji jamatabēyapētane pacuenia Felipe jumecanavitsijitsiatsi. Jesūs baja cajena picani yapētane pacuenia pexaejava mitsaexanaejitsia bajarapajivibitsaētoخانeto. ⁷ Nexata Felipe jumaitšimē Jesūsjavabelia:

—Doscientos denariocuenia comuatsi atatsi tspiae pan, apo yacajēpaetsi tspiae pexaenexa daxita mapajivibitsaētoخانetoje, jai Felipe.

⁸ Itsanē Jesūs pijajivitonē Andrés, Simón Pedro pejuyapijinē, jumaitšimē Jesūsjavabelia:

⁹ —Majotaje napatajopa pejevaxinēyo. Xaina bajaraponēyo cinco papanbēbeje, cebavēnēbenota pexanaepanbēanē. Xaina anijanēyobeje dujuainēyobeje yajava. Bajaraxuaxi apo caejēpae tspiae cajena vajarajutsinexa mapajivibitsaētoخانetoje, jai Andrés.

¹⁰ Nexata Jesūs jumaitšimē pijajivijavabelia:

—Daxita bajarapamonae paenaeyaexanare, jai Jesūs.

Nexata Jesūs pijajivi itoroba jivi penaenexa ponajumavereca. Bajarapajivibitsaētoخانeto bejamatabēcuenē cinco mil meta ponēbeje. ¹¹ Nexata Jesūs pita panbēxi. Bajaraxuacujinae pexaenexa vajēta Diosojavabelia.

—Pexaniacue ne panetoexanare. Panerajutame pataxaejavanexa, jai Jesūs Diosojavabelia.

Bajaraxuacujinae Jesūs pan rajuta pijajivijavabelia. Nexata juya Jesūs pijajivi tšicobetšana daxita penaevibitsaētoخانetojavabelia. Bajara icatsia pacuenia Jesūs vajēta Diosojavabelia dujuainēyobeje pexaenexa.

—Pexaniacuene panetoexaname. Panerajutame pataxaejavanexa, jai Jesús Diosojavabelia.

Bajaraxuacujinae icatsia dujuaijavaxi tscobetsana daxita penaevivibitsaëtoxanetojavabelia. Daxita bajarapamonae xaniavaetsia nabane. ¹² Itsa baja bajarapamonae penia, Jesús jumaitsi pijajivijavabelia:

—Pacaeture baja peyajuvënënacopabenaevanë penaxuabenaeyaniva, jai Jesús pijajivijavabelia.

¹³ Nexata Jesús pijajivi caetuata peyajuvënënacopabenaevanë. Vënëba doce xuabeje bemapirecuena pexanaevanë. Cinco papanbëmibeje picani cebadavënëbenota pexanaepanbëanë. ¹⁴ Nexata bajarapajivibitsaëtoxaneto ita tane Jesús ayaicuene Dioso pesaëta pexanaejava, najumaitsi Jesús yabara:

—Diosojumepaebinë profeta, ponë vaxaitsi copiaevetavanapatsi pepatsijavanexatsica, bajara jane maçonëje. ¹⁵ Vaetabianatsi maçonëje. Vajanacayanacuaevetsinë exanaenatsi bajaraponë, najai picani bajarapamonae.

Nexata Jesús jamatabëcuenyapëtane bajarapacuenia pesivanajamatabëxainaejavatsi. Bajaraxuata Jesús baja vecuapona. Najetaruca pinijitsutonëjava caenë.

Pacuenia Jesús mene itaboxoya najetaruca yabara pelivaisi
(Mt 14.22-27; Mr 6.45-52)

¹⁶ Itsa baja meravi, Jesús pijajivi puca itapayabereca pona. ¹⁷ Jesús abaxë patsinejeva pijajivijavata, aitaquiri baja. Nexata pijajivi runareca jera ënëabereca. Nicabijitsia Capernaum tomarabelia. ¹⁸ Jesús baja pijajivi pepuaponae jerata, taxuxuaba jovibo pebubujajava. Nexata malataca bitso ayai. ¹⁹ Pavëpata Jesús pijajivi naropoba, bajarapavëpa baja bejamatabëcuene cinco pakilómetrobeje, seis pakilómetrobeje ata, pepuavecuanajetarubenaelia, Jesús pijajivi cujitanajetaruca. Jesús najetaruca mene itaboxoya. Nexata Jesús pijajivi tanetsi. Jesús pijajivi cujunavatsi. ²⁰ Nexata Jesús jumaitsi pijajivijavabelia:

—¡Xanë raja najetarucajël! ¡Pëtsa panecujunavame! jai Jesús pijajivijavabelia.

²¹ Nexata Jesús pijajivi jamatabëcuenebarëya. Jesús baja nexata nonorena jera ënëaberena. Nexata bajarapaepatota Jesús baja, pijajivi yajava, pata Capernaum tomarabelia.

Pacuenia Jesús pëjaitatsi jivi yabara pelivaisi

²² Pamonae Jesús pexaejava rajuta, abaxë nacopabalia puca itsapanatalia. Nexata meravia pitsijavata bajarapamonae najumaitsi:

—Canivi caejera perucaejava, tanetsi majotaje. ÈJesús pijajivi runareca penicabinexalia. Nexata Jesús nacopatanuca majotaje, najai bajarapamonae.

²³ Bajara saya paepatota itsamonae jeranë yaparena Tiberias tomaraverena. Itsajota Jesús pevajëtsicujinae Diosojavabelia pexaejava rajuta jivi ayaibitsaëtoxaneto, bajarajota vecuaimoxoyo yaëba. ²⁴ Nexata pamonae Jesús pexaejava rajuta, bajarapamonae tane Jesús pijajivi pebarëajibitsarucaejava bajarajota. Nexata bajarapamonae runareca jera ënëabereca penicabinexalia Capernaum tomarabelia. Bajarapatomarabelia pona pepëjaitsinexatsi Jesús.

Pacuenia Jesús bepitavapan yabara pelivaisi

²⁵ Jesús pepëjaitshivitsi ita pata Capernaum tomarabelia, caxitajarabatsi Jesús. Nexata bajarapamonae jumaitsi Jesúsjavabelia:

—Jesús, ¿detsa pacujinae patame baja maberenaje? jai.

²⁶ Jesús nexata jumaitsi bajarapamonaejavabelia:

—Xaniajanë pacuenia pacatsipaebijitsiatsi. Paxamë panejaitame tsipaji xaniavaetsia panabaneme xanëjavata. Apo panejaitsimë panejumecovënëtsinexamë Cristocuenenë, Dioso taneitorobinëtsica. Patae atamë ayaicuene Dioso pesaëta taexanaejava, apo panejumecovënëtsimë. ²⁷ Pëtsa pacajamatabëcueneena ëpeverevereaejava yabara. Pacuenia panexaejava baverevereca, bajarapitsijava. Biji rajane pacajamatabëcueneena apo peverevereaejava yabara. Nexata xanë, Daxitajivi Pematapijinënë, pacarajutsianatsi matacabi apo peverevereaejava. Taxa Dioso baja cajana nitoroba patacarajutsinexa matacabi apo peverevereaejava, jai Jesús bajarapamonaejavabelia.

²⁸ Nexata bajarapamonae jumaitsi Jesúsjavabelia:

—¿Detsa nexata xua bepaexanajë Dioso pejitsipaecuene? jai bajarapamonae.

²⁹ Nexata Jesús jumaitsi bajarapamonaejavabelia:

—Mara pacuene Dioso jitsipa paneexanaenexaje. Panejumecovënëre xanë Dioso taneitorobicuenetsica, jai Jesús.

³⁰ Nexata icatsia bajarapamonae jumaitsi Jesúsjavabelia:

—¿Detsa nexata xua pinijicuene Dioso pecaitorobicuenetsica? ³¹ Vajasalinaivimi pina bajayata baxaevanapa manávënëjava petusato nacuata pacuenia baja Dioso pejumelivaisibaxutota jumaiti. Dioso baja cajena pejumelivaisibaxutota jumaiti mapacueniaje: “Bajarapamonae rajutabiabatsi pexaejava athëbëpijijava,” jai Dioso pejumelivaisibaxutota vajasalinaivimi yabara, jai bajarapamonae Jesúsjavabelia.

³² Jesús nexata bajarapamonaejavabelia jumaiti:

—Xaniajanë pacuenia pacatsipaebijitsiatsi. Moiséspijinë petusato nacuata vajasalinaivimi pexaejava apo rajutsi athëbëpijijava. Taxa Dioso raja rajutabiaba bajarapamonae pexaejanexa. Nexata pijinia aeconoxae paxamë ata Dioso pacarajutsiana athëbëpijipan, pepacuenie pexaniajapan. ³³ Ponë athëbëvetsica pepatsinë, Dioso rabaja pijapan. Bajaraponë mapanacuapijivijavabeliaje rajutsiana matakabi apo peveverecaejava, nayabarajai Jesús pijacuata bajarapamonaejavabelia.

³⁴ Nexata bajarapamonae jumaiti:

—Jesús, bajarapapan panerajutaponaename daxitamatakabi canacujitsi, jai.

³⁵ Nexata Jesús jumaiti bajarapamonaejavabelia:

—Papan jivi rajutsianatsi matakabi apo peveverecaejava, xanë rabaja bajarapannë. Pajivi xanëjavaberenata pata, apo piajani cajena tsane pejamatabëthëtota. Pajivi nesivanajamatabëcopata xanëjavaberenata, apo jitsipae tsane icatsia mera. ³⁶ Paxamë apo panejumecovënëtsimë, patae atamë Dioso pesaëta pinijicuene taexanaejava. ³⁷ Daxita pamonae taxa tanerajutsivi, patsiana xanëjavaberenata. Pajivi patsiana xanëjavaberenata, apo navecuaitavetsinë tsane. ³⁸ Xanë apo patsinëtsica athëbëvetsica taexanaenexa ëtajamatabëcujirupijijava. Biji rajane patsicajë taexanaenexa pacuenia nitoroba taneitorobinëtsica. ³⁹ Mara pacuene taxa Dioso jitsipa tatoexanaenexaje. Apo jitsipae cajena taxoxuabijava caejivi ata tanerajutsiviyajuvënëvi. Pamatakabi icatsia patsianicajë, daxita bajarapamonae toasaëyaexanaenajë icatsia petëpaejavamivecua. ⁴⁰ Mara pacuene taxa Dioso jitsipaje. Daxita pamonae tanetaevi Dioso pexënatonë, nexata itsa nesivanajamatabëcopata, bajarapamonae xainaena matakabi apo peveverecaejava. Bajarapamonae icatsia asaëyaexanaenajë petëpaejavamivecua pamatakabi icatsia patsianicajë, jai Jesús bajarapamonaejavabelia.

⁴¹ “Xanë rabaja athëbëvetsica tapatsipan,” penayabarajajava Jesús jivijavabelia, judíovi baracuaicuaijaiti pepënëvelia. ⁴² Nexata judíovi najumaiti:

—Mara ponë Jesús, Josépijinë pexënatote. Vaxaiti baja cajena yapëtanetsi paxapijinë, pena ata. Nexata bajaraponë acuenebi pejumaitisijava: “Athëbëvetsica tapatsinë,” pejaijava, najai judíovi Jesús yabara.

⁴³ Nexata Jesús jumaiti bajarapamonaejavabelia:

—Jamatabëcuenenavëxaniabiaya pëtsa panebaracuaicuaijamë tapënëverena. ⁴⁴ Itsajivi ata raja apo caëjëpaetsi pijacuata xanëjavaberenata tanesivanajamatabëcopatsinexa. Matapania taxa Dioso, taneitorobinëtsica, itsa caëjëpaeyaexanaenatsi, nesivanajamatabëcopatsiana. Pajivi nesivanajamatabëcopatsiana, asaëyaexanaenajë petëpaejavamivecua pamatakabi icatsia patsianicajë. ⁴⁵ Bajayata Diosojumepaebivimi peyaquinaelivaisi jumaiti mapacueniaje: “Dioso cajena yapëtaeyaexanaena daxitajivi pexaniajailivaisi,” jai. Nexata pajivi jumecovënëta taxa peyapëtaeyaexanaelivaisi, bajarapajivi xanë ata nesivanajamatabëcuenecopatsiana, jai Jesús judíovijavabelia.

⁴⁶ Icatsia Jesús jumaiti judíovijavabelia:

—Itsajivi ata cajena taxa apo tae. Xanë raja caenënë taxa Dioso taniji. Tspajivi bajaravetsica tapatsinë. ⁴⁷ Xaniajanë pacuenia pacatsipaebijitsiatsi. Pajivi nesivanajamatabëcopatsiana, xainaena matakabi apo peveverecaejava. ⁴⁸ Xanë rabaja pitavapannë. Nexata jivi rajutsianajë matakabi apo peveverecaejava. ⁴⁹ Bajayata panijasalinaivimi xaevanapa picani manávënëjava petusato nacuata. Itsiata baitsi jane bajarapamonae bajayajebi bajaraxua xaevanapae ata, tēpa itsiata. ⁵⁰ Xanë raja pacanavajunupaebatsi athëbëvetsica tapatsinë. Pajivi nesivanajamatabëcuenecopatsiana, pepacuenie apo tēpae tsane. ⁵¹ Xanë rabaja cajena pitavapannë, athëbëvetsica tapatsinë. Pajivi jumecovënëtsiana tasivatëpaejava pijaneconi yabara, jamatabëcuenaeitava tsaponaponae tsane daxitamatakabijavabelianexa. Papan rajutsianajë tanejumecovënëtsivi, tavito rabaja tsane. Navirajutsianajë daxitanacuapijivi pexainaenexa matakabi apo peveverecaejava, nayabarajai Jesús judíovijavabelia.

⁵² Nexata judíovi najumeanenata ëpamonae bajarapacuenia Jesús pejumaitisijava yabara. Najumaiti bajarapamonae:

—¿Detsa pacuenia maponë nacanavirajutsipa vajavixanexaje? Acuenebi raja vanajanacavirajutsijava vajavixanexa, najai judíovi.

⁵³ Jesús nexata jumaiti judíovijavabelia:

—Xaniajanë pacuenia pacatsipaebijtsiatsi. Xanë, Daxitajivi Pematapijinënë. Itsa paxamë apo panevixaemë tsane, apo panejanaapaemënuu tsane, nexata maticabi apo peverevereceaeva, apo paxainaemë tsane.⁵⁴ Pajivi nevixaena, nejanaapaenanua, xainaena maticabi peverevereceaeva. Pamaticabi icatsia patsianicajë, bajarapajivi icatsia asaëyaexanaenajë petëpaejavamivecua.⁵⁵ Tavito rabaja cajena pepo pexaniajajiva jivi pexaenexa. Tajana rabaja pijinia pepo pexaniajajiva jivi piapaenexa.⁵⁶ Pajivi nevixaena, nejanaapaenanua, bajarapajivi yajavaponaponaeenajë. Bajarapajivi ata pijinia neyjavaponaponae.⁵⁷ Taxa, ponë nitorobica, bajaraponë daxitamaticabijavabelianexa piasaëtsaponaponaeenë. Bajaraponë pejamatabëcueneta xanë ata daxitamaticabijavabelianexa asaë tsaponaponae tsane daxitamaticabijavabelianexa.⁵⁸ Athëbëvetsica pepatsipan, xua yabara baja pacatsipaebatsi, bajarapapan apo jëpae papan bajayata panijasalinaivimi xaevanapa. Bajarapapanmi bajayajebi xaevanapae ata, bajarapamonami itsiata tēja baja cajena. Biji rajane pajivi xanë nevixaena, ponaponae daxitamaticabijavabelianexa, jai Jesús judíovijavabelia.

⁵⁹ Bajarapacuenia Jesús jumaiti judíovijavabelia livaisi petsipaebijavata Capernaum tomarata, judíovi penacatuatabibota.

Maticabi apo peverevereceaeva yabara pelivaisi

⁶⁰ Ayaibitsaëto, pamonae Jesús pepëta najinavanapa, itsa jumetane Jesús petsipaebilivaisi, apo jumexaniatae. Najumaiti ëpamonae:

—Penajumetsënësilivaisi saya nacatsipaeba. ¿Jipatsa jumecovënëtsiana? Ajibi cajena, najai ëpamonae.

⁶¹ Nexata Jesús jamatabëcueneyapëtane pacuenia pepënëvelia baracuaicuaijaiti. Nexata Jesús yanijoba pepënaponaevitsijavabelia. Jumaiti:

—¿Apo bepexaniajailivaisi tsaja pajumetaneme patacatsipaebilivaisi? ⁶² Xanë Daxitajivi Pematapijinënë. ¿Detsa paitsimë tsipae itsa pataejitsipame tatsiajava athëbëabetsia taponaponaeacuamijavabetsia? ⁶³ Espiritu Santo baja cajena pejamatabëcueneta jivi xaina maticabi apo peverevereceaeva. Ejjivi raja pejamatabëcueneta apo caëjëpaetsi pexainaenexa maticabi apo peverevereceaeva. Patacatsipaebilivaisi baja cajena papecat-sijamatabëjonexa picani, panexainaenexa maticabi apo peverevereceaeva. ⁶⁴ Itsiata baitsi jane paxamëyajuvënëvi abaxë apo nejumecovënëtsi, jai Jesús.

Jesús bajarapalivaisi petsipaebivajënae ata, jamatabëcueneyapëtane pamonae apo jumecovënëtsijtsiatsi. Jamatabëcueneyapëtanenua tajëvelia ponë canajetsijtsiatsi pijavajabitsaë pecobeyabelia. ⁶⁵ Nexata Jesús icatsia jumaiti pepënaponaevitsijavabelia:

—Bajaraxuata cajena pacajumaitsi: “Itsajivi ata raja apo caëjëpaetsi pijacuata xanëjavabereana tanesivanajamatabëcopatsinexa. Matapania taxa Dioso, taneitorobinëtsica, itsa caëjëpaeyaexanaenatsi, nesivanajamatabëcopatsiana,” pacajaiti, jai Jesús pepënaponaevitsijavabelia.

⁶⁶ Bajara nexata jota ayaibitsaëto Jesús pepënaponaevitsi vepënaviabatsi baja. Nexata bajarapamonae pematatsënëa baja apo pënaponaeitsi Jesús. ⁶⁷ Nexata Jesús yanijoba doce ponëbeje pijajivijavabelia. Jumaiti:

—¿Paxamë ata tsabaja pajamatabënaviabame? jai Jesús.

⁶⁸ Nexata Simón Pedro jumaiti Jesúsjavabelia:

—Tajatuxanenë, itsa panaviabajë, ¿jipatsa nexata papënaponaejitsipajë xamëvecua? Xamë rabaja caenëmë panetsipaebame maticabi apo peverevereceaeva pataxainaenexa. ⁶⁹ Paxanë rabaja pacajumecovënëtsi patanetsipaebilivaisimë. Pacayapëtanetsinua baja cajena Cristocuenemë, Dioso piasaëtsaponaponaeenë daxitamaticabijavabelianexa pexënatomë, jai Simón Pedro Jesúsjavabelia.

⁷⁰ Jesús nexata jumaiti pijajivijavabelia:

—Xanë rabaja pacaitapetatsi doce paponëmëbeje. Itsiata baitsi jane paxamëyajuvënënë, itsanë, dovathi pijajivitonë tsaponaponae, jai Jesús.

⁷¹ Bajarapacuenia Jesús itsa jumaiti, Judas Iscariote, Simón pexënato, yabara jumaiti. Judas Jesús canajetsijtsiatsi pijavajabitsaë pecobeyabelia. Judas rabaja picani Jesús pijajivitonë, doce ponëbejeyajuvënënë.

¹ Jesús ponapona Galilea nacujava. Apo jitsipae peponaponaejava Judea nacujava. Tsipaji bajarajota judíovi jamatabëbeyaxuabatsi. ² Imoxoyo baja pevajënae pejonenexa fiesta, pafiestamatacabi judíovi bobërëtonë exanabiaba. Nexata judíovi bajarapobërëtonëta jinavanapabiaba bajarapafiestamatacabi. ³ Nexata Jesús pejuypajivi junatatsi penaponaenexa bajarapafiestajavabelia. Jesús pejuypajivi jumatsi:

—Pëtsa nacopatame majotaje. Judea nacujavabelia liamëre. Bajarajotalia pijinia Dioso pesaëta pinijicuene nexanaponaejava nijajivi tsitaexanaename. ⁴ Pajivi pexanaejava yabara jitsipa pevënëlivaisitaenexatsi daxitanacuapijivi, bajarapajivi pexanaejava muetsia apo exanae. Nexata pepacune Dioso pesaëta pinijicuene ita exanaponaename, nexata icatsia pinijicuene tsitaexanaename fiestajavata daxitanacuapijivi pitabarata. Nexata daxitajivi cayapëtaena, jaitsi Jesús pejuypajivi.

⁵ Jesús pejuypajivi ata apo jamatabëjumecovënëtsi Cristocuene. Bajaraxuata bajarapacuenia pejuypajivi ata jumatsitsi. ⁶ Nexata Jesús jumatsi pejuypajivijavabelia:

—Abaxë raja tajamatacabi apo netocopiapatsi tanaitajëtsinexa daxitajivijavabelia. Itsiata paxamë apo paitsimë. Paepatota jamatabëpaponame, pacatoxanepana paneponaenexa. ⁷ Mapanacuapijivi cajena acuenebi paxamë papecaitoyajava. Itsiata baitsi jane xanë nitoya. Tsipaji itavetaponajë pibisiacuene pexanavanapaejaya. ⁸ Paxamë baja paponare fiestajavabelia. Xanë ra abaxë apo ponaenë. Tsipaji abaxë apo netocopiapatsi paepatota ponaejitsianë, jai Jesús pejuypajivijavabelia.

⁹ Bajarapacuenia Jesús pejumatsicujinae, abaxë Jesús nacopatanuca Galilea nacuat pecotocaevinexa.

Pacuenia Jesús napona fiestajavabelia yabara pelivaisi

¹⁰ Jesús pejuypajivi fiestajavabelia pepuaponae, Jesús ata cotocaevi napona fiestajavabelia. Jesús nexata jivibitsaëto tuatujëta apo naponae muetsia pepatsinexa. ¹¹ Jesús picani jaitatsi judíovi pevetsivi fiestajava. Najumatsi judíovi pevetsivi:

—¿Detsa xania jota ponapona bajaraponë? najai judíovi pevetsivi Jesús yabara.

¹² Ayaiabitsaëto jivi vëpaxapaxajaiya baracuaicuajitsi Jesús. Itsamonae jumatsi Jesús yabara:

—Pexaniajamatabëcuenenë raja, jai itsamonae.

Itsamonae pijinia jumatsi:

—Apo pexaniajamatabëcuenenë raja Jesús. Peyamaxëitojorobinë ra saya jivi, jai Jesús yabara.

¹³ Itsajivi ata apo cuaicuaijai ayaijumeta Jesús yabara. Tsipaji jumejunava judíovi pevetsivi pejumetaeyanivatsi.

¹⁴ Ita baja fiesta epatua tsaponae pevereverecaenexa, nexata Jesús joneya temploboyalia. Taxuxuaba jane baja livaisi petsipaebijaya. ¹⁵ Judíovi pevetsivi jamatabëcuenenabenajaca ita jumetane Jesús pepaebilivaisi. Nexata judíovi pevetsivi najumatsi:

—Maponëje bitso livaisi yapëtane. Picani livaisi apo nacujarubi pacuenia vaxaitsi nacujarubatsi, najai tsanubena judíovi pevetsivi Jesús yabara.

¹⁶ Jesús nexata jumatsi judíovi pevetsivijavabelia:

—Tatsipaebilivaisi raja apo tajamatabëcuenepijilivaisi. Dioso raja, ponë nitorobica, bajaraponë pejumelivaisi tsipaebaponajë. ¹⁷ Pajivi jamatabëxana Dioso pejitsipacuenia, bajarapajivi yapëtaena pepacune Dioso pejumelivaisi tatsipaebijaya. Nexata yapëtaenana tajamatabëcuenepijilivaisi ita tsipaebajë. ¹⁸ Pajivi tsipaeba ëpejamatabëcuenepijilivaisi, tsipaeba saya jivi peyaiyataenexatsi. Itsiata baitsi jane pajivi tsipaeba jivi peyaiyataenexa Dioso, bajarapajivi cajena tsipaeba pexaniajailivaisi. Bajarapajivi apo yamaxëitojorobi jivi. Tsipaji pacuenia Dioso itorobatsi, tsipaeba, jai Jesús judíovi pevetsivijavabelia.

¹⁹ Jesús icatsia jumatsi judíovijavabelia:

—Moiséspijinë baja cajena bajayata yaquina Dioso penajumecopatsilivaisi jivi pejumecovënëtsinexa. Itsiata baitsi jane paxamëyajuvënëjivi, caejivi ata, apo jumecovënëtsi bajarapalivaisi. Bajarapalivaisi pacaitavetsi ata jivi panebeyaxuabiyaniya, ¿detsa xuajitsia itsiata xanë jamatabëpanebeyaxuabame? jai Jesús judíovijavabelia.

²⁰ Nexata judíovi jumatsi Jesúsjavabelia:

—Dovathi baja cajena yajavaponaponaename. Itsajivi ata raja apo jamatabëcabeyaxuabi, jai judíovi.

²¹ Jesús nexata jumatsi bajarapamonaejavabelia:

—Caejavayo Dioso pesaëta pinijicuene taexanaejava exanajë penacuer-aevetsimatacabita. Nexata ita pataneme bajarapacune, daxita paxamë pajamatabëcuenenabenajacame penacuer-aevetsimatacabita taexanaexae bajarapacune.

²² Paxamë ata penacuer-aevetsimatacabita ata panacuenebabiabame. Tsipaji

penacuetonēyo paperabēcaucutabiabame penacueraevetsimatacabita ata ocho pamatacabibeje itsa xaina penaexanaecujinae. Baitsi paboupiperabēcaucutabiabame, Moiséspijinē baja cajena papecaitorobicuene. (Itsiata Moiséspijinē apo taxuxuabi bajarapacuene.) Bajaraponēmi cajena pevājēnaeya ata, panijasalinaivimi taxuxuaba bajarapacuene.)²³ Bajarapacuenia penacuetonēyo paperabēcaucutabiabame penacueraevetsimatacabita ata, panejumecovēnētisnexa Moiséspijinē pitorobicuena. ¿Detsa nexata xuajitsia xanē panebaraanaepaname penacueraevetsimatacabita pebi tajamatejemayaexanaejava yabara?²⁴ Xaniavaetsia abaxē payapētaenejevamē itsajivi pibisiacuene pexanaejava, pētsa abaxē pananeconitsiaexaname. Matapania xaniavaetsia payapētaename, payanijobianamenua, itsa baja xaniajai naneconita, baja rajane pananeconitsiaexanaename, jai Jesús judíovijavabelia.

Pacuenia Jesús navajunupaeba itsaverena pata yabara pelivaisi

²⁵ Itsamonae Jerusalmē tomarata pejinavanapaevi najumaitsi Jesús yabara:

—¿Matsa ponē apo jaitarutsitsi pebeyaxuabinoxatsije?²⁶ ¡Pataamal Bajaraponē cuacuaijai tsanucacae daxitajivi pitabarata. Itsiata itsajivi ata apo jumeitavetsi. Vajanacaevetsivi ata meta jumecovēnēta bajaraponē pepacuene Dioso athēbēvetsica pitorobijavatsitsica jivi pecapanepaenexa. Bajaraxuata bajarapamonae apo jumeitavetsi.²⁷ Vaxaitsi cajena yapētanetsi itsaverena pata maponēje. Nexata acuenebi pijacuata: “Cristonē raja,” pejaijava. Tspijai Cristo yabara tajēvelia jumaitsi mapacueniaje: “Itsajivi ata apo yapētae tsane itsaverena patsijitsia Cristo,” jai, najai Jerusalmē tomarapijivi Jesús yabara.

²⁸ Nexata Jesús livaisi petsipaebijavata templobota, jumetane bajarapamonae pebaracuacuajijavatsi. Nexata Jesús ayaijumeta jumaitsi bajarapamonaejavabelia:

—Xanē yabara pajumaitsimē: “Yapētanetsi bajaraponē. Yapētanetsinua itsaverena pata bajaraponē,” pajamē. Itsiata baitsi jane apo patsinē tajamatabēcueneta. Biji rajane taneitorobinētisica ponapona athēbētatsia. Paxamē cajena apo payapētaemē bajaraponē.²⁹ Xanē yapētaniji bajaraponē. Tspijai athēbēvetsica tapatsinē. Bajaraponē baja cajena nitorobica mapanacuayabetsicaje, jai Jesús bajarapamonaejavabelia.

³⁰ Nexata picani Jesús bajarapamonae jamatabēvaetabatsi pananeconitsiaexanaenexatsi. Itsiata abaxē itsajivi ata apo vaetabitsi. Tspijai abaxē Jesús apo tocopiapatsitsi pijamatabi pevaetabinoxatsi.³¹ Itsiata baitsi jane bajarapamonaejavajuvēnēvi ayaibitsaēto jumecovēnēta Cristocuene. Nexata bajarapamonae najumaitsi:

—Itsa pina Cristo patsianica, Dioso pesaēta pinijicuene pexanaejava exanaena. Bajara maponē pepacuene Cristoje, ponē Dioso athēbēvetsica itorobijitsiatsica jivi pecapanepaenexa. Tspijai nacatsitajēta pesaē. Pinijicuene pexanaejava exana Dioso pesaēta. Tspijai cajena itsanē ata mapanacuata apo caējēpaetsi bajarapitsipinijicuene pexanaenexa, najai bajarapamonae Jesús yabara.

Pacuenia fariseovi itoroba policíavi Jesús pevaetabinoxatsi yabara pelivaisi

³² Fariseovi jumetane jivi pejumaitsiyava: “Pepacuene rabaja maponē Cristoje,” pejaijava Jesús yabara. Nexata fariseovibeje judíovi penamatacaitorobivibeje najamatabēcuenējepabeje pitorobinexa policíavi. Nexata policíavi pona templobojavabelia pevaetabinoxatsi picani Jesús. Itsiata abaxē Jesús apo vaetabitsi.³³ Jesús nexata templobota jumaitsi judíovijavabelia:

—Abaxē raja bajayayo itsiata pacayajavaponaponaenatsi. Bajaraxuacujinae jane baja naviansianijē taneitorobinētisicajavabetsia.³⁴ Paxamē picani panejaitsianame. Itsiata apo panecaxitajarabimē tsane. Tspijai apo pacacājēpae tsane paneponaenexa itsabetsia ponaējitsianē, jai Jesús judíovijavabelia.

³⁵ Nexata judíovi nayanijoba epamonae.

—¿De tsauta belia maponē pijaponaējitsiaje peponaenexa, itsajota vaxaitsi apo caxitajarabijitsiatsi? Ponaējitsia raeta griegovi pijatomaranējavabelia, itsabelia judíovi jinavanapa. Griegovi raeta livaisi tsipaebijitsia Jesús.³⁶ Jesús nacajumaitsi: “Paxamē picani panejaitsianame. Itsiata apo panecaxitajarabimē tsane. Tspijai apo pacacājēpae tsane paneponaenexa itsabetsia ponaējitsianē,” nacajai. ¿De tsauta pitsijamatabēcuenē yabara bajarapacuenia Jesús nacajumaitsi? najai judíovi.

Apo pevereverecaamera yabara pelivaisi

³⁷ Pafiestamatacabí judíovi bobērētonē exanabiaba, pecopiarucaematacabí, jivi bitso najamatabēcuenereviabiaya bajinavanapa. Nexata bajarapamatacabí jivi ayaibitsaēto pitabarata Jesús nonotabapuna. Ayaijumeta Jesús jumai tsanucacae:

—Pajivi mera jitsipa, xanëjavaberena ponae piapaenexa. ³⁸ Dioso pejumelivaisibaxutotota jumaiti mapacueniaje: “Pajivi nesivanajamatabëcuenecopatsiana, bajarapajivi pejamatabëëthëtota xainaena daxitamatacabi pepitsaparuaemera. Baitsi bajarapajivi asivaya taeyabiabiana itsamonae ata. Nexata jamatabëcueneyavenonabiabiana itsamonae ata tanesivanajamatabëcuene copatsinexa, bajarapamonae ata pexainaenexa matacabi apo peverevereaejava,” jai Jesús judíovijavabelia.

³⁹ “Pajivi nesivanajamatabëcuenecopatsiana, bajarapajivi pejamatabëëthëtota xainaena daxitamatacabi pepitsaparuaemera,” itsa jai Jesús, jumaiti Espíritu Santo yabara. Baitsi pajivi jumecovënëta Jesús petsipaebilivaisi, tsijamatabëcaenatsi Espíritu Santo. Itsiata baitsi jane abaxë Espíritu Santo apo patsitsica. Tsipaji abaxë Jesús apo ponae athëbëabetsia.

Pacuenia daxitajivi Jesús yabara apo najamatabëcuenejêpae yabara pelivaisi

⁴⁰ “Pajivi nesivanajamatabëcopatsiana, bajarapajivi pejamatabëëthëtota xainaena daxitamatacabi pepitsaparuaemera,” pejaijava Jesús, jivi itsa jumetane, itsamonae jumaiti:

—Xaniajai rabaja. Maponë Diosojumepaebinë profetanêje, ponë copiaevetavanapatsi pepatsijavanexatsica, jai bajarapamonae.

⁴¹ Itsamonae pijinia jumaiti:

—Jume raja. Bajara maponë Cristoje, ponë Dioso athëbëvetsica itorobijitsiatsica jivi pecapanepaenexa, jai itsamonae.

Itsiata itsamonae jumaiti:

—¡Apo Cristo raja! Tsipaji Cristo Galilea nacuaverena apo patsi tsipae. ⁴² Dioso baja cajena pejumelivaisibaxutota jumaiti pacuenia Davidpijinë pemomoxiyajuvënënë naexanaejitsia Cristo. Bajaraponë peneta naexanaena Belén tomarata, patomarata Davidpijinë bajayata ponapona, jai bajarapamonae.

⁴³ Bajarapacuenia nexata jivi ayaibitsaëto apo najamatabëcuenejêpae Jesús yabara.

⁴⁴ Itsamonae picani Jesús jamatabëvaetabatsi penaneconitsiaexanaenexatsi. Itsiata itsajivi ata apo vaetabitsi.

Pacuenia Jesús yabara judíovi pevetsivi apo jumecovënëtsi Cristonëcuene yabara pelivaisi

⁴⁵ Papoliciavi picani fariseovibeje judíovi penamatacaitorobivibeje itorobalia Jesús pevaetabinexatsi, itsiata apo vaetabitsi. Naviabalia baja cobesa. Nexata fariseovibeje judíovi penamatacaitorobivibeje jumaiti policiavijavabelia Jesús yabara:

—¿Detsa xuajitsia apo pacaponaemërena bajaraponë? jai fariseovibeje judíovi penamatacaitorobivibeje.

⁴⁶ Nexata policiavi jumaiti:

—Bajaraponë Dioso pitorobicueniatsi, xaniavaetsia jivi livaisi tsipaeba, itsajivi ata apo pepaebicuenia. Bajaraxuata apo pavaetabinë patacaponaenexarena, jai policiavi.

⁴⁷ Nexata fariseovi jumaiti:

—¿Paxamë ata tsabaja pacayamaxëitoroba bajaraponë? ⁴⁸ Caenë ata vajanacaevetsiviyajuvënënë, fariseoviyajuvënënë ata, apo jumecovënëtsi baja cajena bajaraponë Cristonëcuene. ⁴⁹ Pamona jumecovënëta bajaraponë Cristonëcuene, apo yapëtae pacuenia bajayata Dioso Moiséspijinëta penajumecopatsilivaisi jumaiti jivi pejumecovënëtsinexa. Nexata bajarapamonae apo peyapëtaexae bajarapalivaisi, naneconita Diosojavabelia. Nexata Dioso naneconitsiaexanaenatsi, jai fariseovi policiavijavabelia Jesús Cristonëcuene pejumecovënëtsivi yabara.

⁵⁰ Nicodemo, ponë copiaya Jesús taeyojopalia meravi, bajaraponë naeca bajarajota. Bajaraponë Nicodemo fariseoviyajuvënënë. Nicodemo nexata jumaiti pevëna fariseovijavabelia:

⁵¹ —Vajalivaisi cajena nacaitaveta itsajivi ata vajananeconitsiaexanaeyaniva, abaxë copiaya xaniavaetsia navajunupaebinejeva paneconi xaina bajarapajivi, jai Nicodemo.

⁵² Nexata bajarapamonae jumaiti Nicodemojavabelia:

—¿Xamë ata tsabaja Galilea nacuapijinëmë necajumecovënëtsi bajaraponë Cristonëcuene? Lebare Dioso pejumelivaisibaxuto. Yapëtaename pacuenia jumaiti. Caenë ata cajena Diosojumepaebinë profeta apo patsi Galilea nacuajavaverena, jai bajarapamonae.

Petiriva pibisiacuene pexanaeva pamona pepëya yabara pelivaisi

⁵³ Fariseovibeje judíovi penamatacaitorobivibeje pebijataecujinae policiavi, fariseovi baja caenë canacujitsia naviaba pijabonëjavabelia.

8

¹ Jesús pona Olivovënë tsojavabelia. ² Nexata meravia pitsijavata, bajayacunua, Jesús icatsia naviarena templooyaberena. Nexata daxitajivi itaxutuanacaetuanatsi. Nexata

Jesús ecojopa templobota. Livaisi tsipaeba bajarapamonaejavabela. ³ Nexata temploboyaberena judíovi pecujarubivi, fariseovi yajava, caparena petiriva Jesúsjavaberena. Bajarapamonae petiriva vaetaba pamona pepëya itsanëjavabela pevitota pibisiacuene pexanaponaponaejavata. Nexata petiriva nutatsi daxitajivi pitabarata. ⁴ Nexata judíovi pecujarubivi, fariseovi yajava, jumaiti Jesúsjavabela:

—Jesús, mara povaje pavaetabajë fariseovi pepëya itsanëjavabela pibisiacuene pexanaponaponaejavata. ⁵ Dioso Moiséspijinëta penajumecopatsilivaisivecua, saicayacuena, Jesús itsa jume-canaviata, bajarapamonae neconitsijitsiatsi picani. Itsiata Jesús jamatabëcueneypëtane pacuena bajarapamonae sivanajamatabëxainatsi. Nexata Jesús ira taeyecaxuaba. Pecobesitota ira yaquinea. ⁷ Bajarapamonae bitso yanijobapona Jesúsjavabela. Nexata jane baja Jesús nonotapuna. Jumaiti bajarapamonaejavabela:

—Ponë paxamëyajuvënëne pibisiacuene apo pexanaenë, bajaraponë copiata iboto bixanae bajarapovajavabela, jai Jesús.

⁸ Nexata icatsia Jesús ecareca. Ira taeyeca icatsia. ⁹ Nexata bajarapamonae itsa jumetane bajarapacuena Jesús pejumaitisijava, bajarapamonae najamatabënapita, caenë canacujitsia, pibisiacuene pexanavanapaejava. Nexata bajarapamonae, caenë canacujitsia, templobovecua pitsapapona. Copiaya perujuvi pitsapa. Bajaraxuacujinae pevëjëavi pitsapa. Itsa baja daxita pitsapa, caenë Jesús templobota nacopateca petiriva yajava. Bajarapova abaxë nuca bajarajota. ¹⁰ Nexata Jesús itsa nonotapuna, caeva taenuta. Nexata Jesús jumaiti petirivajavabela:

—¿Detsa belia pona pamonaecaneconita picani? ¿Itsanë ata tsaja apo cabixanae ibotota nijaneconi yabara pecananeconitsiaexanaenexa? jai Jesús petirivajavabela.

¹¹ Nexata bajarapova jumaiti:

—Jume raja. Caenë ata apo nebixanae ibotota, jai bajarapova.

Nexata Jesús jumaiti:

—Xanë ata apo cananeconitsiaexanaetsi. Ponare baja. Pëtsa baja icatsia pibisiacuene exaname, jai Jesús bajarapovajavabela.

Jesús mapanacuapijivije pexaniajailivaisita pejamatabëcueneitayotsinë yabara pelivaisi

¹² Jesús icatsia templobota jumaiti jivijavabela:

—Xanë raja pexaniajailivaisita daxitanacuapijivi jamatabëcueneitayotsianajë. Pajivi nepënaponaena, bajarapajivi jamatabëcueneitayotsianajë. Nexata xainaena matababi apo peverevereaejava. Bajarapajivi itsamatabajibavabela ata apo ajamatabëcueneitaquiri tsane, jai Jesús jivijavabela.

¹³ Nexata fariseovi jumaiti Jesúsjavabela:

—Xamë saya nijacuata najamatabëcuenelivaisipaebame. Nexata apo payapëtaenë nexaniajaicuene. Bajaraxuata apo pacajumecovënëtsitsi, jai fariseovi.

¹⁴ Jesús nexata jumaiti fariseovijavabela:

—Najamatabëcuenelivaisipaebi atanë tajacuata, itsiata cajena xaniajanë. Tsipaji xanë yapëtaniji itsaverena patajë. Itsabela ata ponaejitsianë, yapëtaniji. Itsiata paxamë apo payapëtaemë itsaverena patajë. Itsabela ata ponaejitsianë, apo payapëtaemë. ¹⁵ Paxamë paexanabiabame pacuena baexana mapanacuapijivije. Itaxutojema jivi pananeconitsiaexanabiabame payapëtaejevamë pepacuene paneconivajëto xaina. Xanë abaxë apo naneconitsiaexanaenë itsajivi ata. ¹⁶ Itsiata itsamatababi, itsa naneconitsiaexanaenajë Diosojavabela pijaneconi pexinaevi, naneconitsiaexanaenajë paneconivajëtota xaina. Tsipaji caenënë apo naneconitsiaexanaenë tsane. Taxa Dioso, ponë nitorobica, bajaraponë neyajava tsane jivi tananeconitsiaexanematababi. ¹⁷ Dioso Moiséspijinëta penajumecopatsilivaisi peyaquinaebaxutota jumaiti mapacuenaiaje: “Palivaisi anijajivibeje najumejëpaeya paebabeje, bajarapalivaisi bepajumecovënëtame,” jai. ¹⁸ Xanë baja cajena najamatabëcuenelivaisipaebajë. Taxa ata, ponë nitorobica, nevajunupaeba. Nexata baja panijanënëbeje najumejëpaeya pacatsipaebatsibeje xanë talivaisi, jai Jesús fariseovijavabela.

¹⁹ Nexata fariseovi jumaiti:

—¿Detsa jota nexata ponapona axa? jai.

Nexata Jesús jumaiti fariseovijavabela:

—Paxamë ra cajena apo paneyapëtaemë. Taxa ata apo payapëtaemë. Itsa paneyapëtaejitsipame, nexata taxa ata payapëtaejitsipame, jai Jesús fariseovijavabela.

²⁰ Bajarapacuenia Jesús jumaitsi livaisi petsipaebijavata templobota. Itsajota ofrendacuenia palata pejëbabiabicajonianë hobena, bajarajota Jesús livaisi tsipaebanuca. Itsiata abaxë itsajivi ata Jesús apo vaetabitsi penaneconitsiaexanaenexatsi. Tspaji abaxë pijamatacabi apo tocopiapatsitsi pevaetabinexatsi.

Pacuenia Jesús tajëvelia jumaitsi: “Paxamë apo pacacaëjëpae tsane paneponaenexa itsabelia ponaëjitsianë,” jai yabara pelivaisi

²¹ Jesús icatsi templobota tajëvelia jumaitsi fariseovijavabelia:

–Xanë pacavecuaponaenatsi. Nexata paxamë panejaittsianame. Paxamë pibisiacuene paneexanaeneconi, Dioso apo pacavecuajibiaexanae tsane. Nexata panijaneconi payajavatëpaename. Bajaraxuata paxamë apo pacacaëjëpae tsane paneponaenexa itsabelia ponaëjitsianë, jai Jesús fariseovijavabelia.

²² Nexata judiovi jamatabëcuenenavëxaniabiaya najumaitsi Jesús yabara:

–Covë nabeyaxuabijitsia. Bajaraxuata nacajumaitsi: “Apo pacacaëjëpae tsane paxamë paneponaenexa itsabelia ponaëjitsianë,” nacajai, najai judiovi.

²³ Nexata Jesús jumaitsi judiovijavabelia:

–Paxamë baja cajena mapanacuapijivimëje. Xanë saicaya athëbëvetsica tapatsinë. Paxamë mapanacuata panejinavanapaevije. Xanë raja maapo panacuapijinënëje.

²⁴ Bajaraxuata pacajumaitsitsi: “Paxamë pibisiacuene paneexanaeneconi, Dioso apo pacavecuajibiaexanae tsane. Nexata panijaneconi payajavatëpaename,” pacajaitsi. Nexta paxamë panijaneconi payajavatëpaename itsa apo panejumecovënëtsimë patacavecuajibiaexanaejevanexa pibisiacuene paneexanaeneconi, jai Jesús fariseovijavabelia.

²⁵ Nexata fariseovi jumaitsi Jesúsjavabelia:

–¿Detsa xamë ponëmë? jai.

Jesús nexata jumaitsi:

–Pacanavajunupaebatsi rabaja. Tataxuxuabijavaveliacujinae livaisi patacatsipaebijava, pacanavajunupaebaponatsi baja cajena. ²⁶ Paxamë bitso pibisiacuene paexanabiabame. Nexata ayailivaisi xainajë itsmonaejavabelia patacavajunupaebinxaxa pibisiacuene paneexanaejava. Nexata pibisiacuene paneexanaeneconi yabara, necaëjëpa picani patacananeconitsiaexanaenexa. Itsiata baitsi jane ponë nitorobica, petsipaebinë pexaniajailivaisi. Pacuenia bajaraponë netsipaeba xanëjavaberena, bajarapacuenia juya xanë tsipaebajë mapanacuapijivijavabeliaje, jai Jesús fariseovijavabelia.

²⁷ Itsiata baitsi jane fariseovi apo jumeyapëtae bajarapacuenia Jesús petsipaebijava paxa Dioso yabara. ²⁸ Bajaraxuata Jesús jumaitsi bajarapamonaejavabelia:

–Itsa xanë, Daxitajivi Pematapijinënë, paneyotarutsiaexanaename cruzjavabelia patanebeyaxuabiexanaenexamë, nexata matapania bajarapamatacabi paneyapëtaename ponëcuenenë. Nexata bajarapamatacabi payapëtaenamenua patacatsipaebijava apo tajamatabëcuenepijilivaisi. Biji rajane pacuenia taxa copiat netsipaeba, bajarapacuenia juya pacatsipaebatsi paxamëjavabelia. ²⁹ Taxa, ponë nitorobica, neyjavaponapona baja cajena. Tajaepato apo neponaponaeyaexanae. Tspaji exanabiabajë pacuene yabara taxa nesivajamatabëcuenebarëyajitsia, jai Jesús bajarapamonaejavabelia.

³⁰ Itsa Jesús jumaitsi bajarapacuenia, ayaibitsaëtoخانeto judiovi jumecovënëtatsi Cristonëcuene: “Xaniajai cajena. Maponëje Dioso itorobicatsi,” jamatabëjai judiovi Jesús yabara.

Dioso pexi yabara pelivaisi, dovathi ata pexi yabara pelivaisi

³¹ Pajudiovi jumecovënëta Cristonëcuene, bajarapajudiovijavabelia Jesús jumaitsi:

–Itsa paxamë tsiteca pajumecovënëtavanapaename patacatsipaebilivaisi, nexata baja pepacune patajajivimë tsane. ³² Nexata palivaisi pacatsipaebatsi, payapëtaename baja pexaniajailivaisicune. Nexata baja itsa payapëtaename bajarapapexaniajailivaisi, pacopabianame baja itsanë papecaitorobicuenia panetoexanabiabijavami, jai Jesús bajarapajudiovijavabelia.

³³ Nexata pajudiovi apo jumecovënëtsi Cristonëcuene, jumaitsi Jesúsjavabelia:

–Paxanë rabaja cajena Abrahampijinë papemomoxinë. Paxanë dajubicuenia apo panecanajetsi itsanëjavabelia amoneya patatonacuenebabiabinexa. “Pacopabianame baja itsanë papecaitorobicuenia panetoexanabiabijavami,” itsa panejamë, ¿detsa pitsilivaisi yabara panejumaitsimë? jai Jesúsjavabelia pajudiovi apo jumecovënëtsi Cristonëcuene.

³⁴ Jesús nexata jumaitsi bajarapajudiovijavabelia:

–Xaniajanë pacuenia pacatsipaebijitsiatsi. Daxita pamona pibisiacuene pexanaevi, jamatabëcuenenitorobiabatsi dovathi pejamatabëcueneta. ³⁵ Ponë itsanë pijajivitonë naexana, bajaraponë itsiata pijatuxanenë apo pexiyajuvënë. Ponë petuxanenë pexiyajuvënë, daxitamatacabi javabelianexa petuxanenë pexënato tsaponapona. ³⁶ Nexata pijinia xanë,

Dioso pexēnatonē, itsa copiarucaeyaexanaenajē dovathi papecaitorobabiabijavami, copiarucaeyaexanaenajē daxitamatacabijavabelianexa. Nexata baja dovathi apo pacaitorobabiabi tsane matavējēa pibisiacuene paneexanaenexa. ³⁷ Yapētāniji cajena Abrahampijinē papemomoxicuenemē. Itsiata baitsi jane jamatabēpanebeyaxuabame. Tsipaji apo panejumecovēnētšimē patacatsipaebilivaisi. ³⁸ Xanē rabaja pacuenia taxa netsitajēta, jivi tšipaebabiabajē. Paxamē ata paexanabiabame pacuenia paneaxajivi pacaitoroba, jai Jesūs judiōvijavabelia.

³⁹ Nexata judiōvi jumaitsi:

—Pataxajivi baja cajena pexaniajamatabēcuenevi. Abrahampijinē rabaja cajena pata-mopijinēmi, patajasalinainēmi, jai judiōvi.

Jesūs nexata jumaitsi bajarapamonaejavabelia:

—Itsa pepacuene paxamē Abrahampijinē papemomoximē tšipae, paexanaejitsipame peneta pacuenia exanabiaba Abrahampijinēmi. ⁴⁰ Pacatsipaebi atatsi pexaniajailivaisi, pacuenia taxa Dioso netsipaeba, itsiata paxamē jamatabēpanebeyaxuabame. ¡Abrahampijinē cajena caeto ata apo exanae bajarapitsicuene! ⁴¹ Paxamē paexanabiabame pacuenia itsanē paneaxa pacaitorobiaba, jai Jesūs judiōvijavabelia dovathi yabara.

Nexata judiōvi jumaitsi:

—Paxanē cajena mapanacuataje pataenajivi apo panenacoxitsi itsanējavabelia pataxajivivecua pibisiacuene pexanaecujinae. Paxainajē caenē pataxa, athēbēpijinē. Pataxa rabaja Dioso, jai bajarapamona.

⁴² Nexata Jesūs jumaitsi bajarapamonaejavabelia:

—Itsa pepacuene Dioso paneaxa tšipae, nexata paxamē asivaya panetaejitsipame. Tsi-paji Diosojavetsica tapatsinē. Majotaje ponaponajē. Xanē raja saya tajamatabēcueneta apo patsinētšica. Dioso raja nitorobica. ⁴³ ¿Detsa xuajitsia paxamē apo panejumeyapētaemē patacatsipaebilivaisi? Apo pajitsipaemē patanenamuxunaevetsinexamē bajarapali-vaisi. ⁴⁴ Paxamē rabaja cajena paneaxa dovathi. Papijajivimē. Pejitsipacuena jamatabēpatoexanabiabame. Dovathi rabaja cajena jivibenē Dioso nacua pexanaejava petax-uxuabijavaveliacujinae. Pexaniajailivaisi apo najamatabēxainae. Caeto ata cajena pex-aniajailivaisi apo paebi. Itsa najumetsēnēta, bajaraponē pijacujiru baja cajena. Tšipaji penajumetsēnētšimē. Jivi ata najumetsēnētšiaexanabiaba. ⁴⁵ Xanē baja cajena pexaniajaili-vaisi pacatsipaebatsi. Itsiata apo panejumecovēnētšimē. ⁴⁶ ¿Jipatsa paxamēyajuvēnēnē netane pibisiacuene taexanaejava? Ajibi cajena. Itsacuenejavayo ata, xua pibisiacuene, apo exanaenē. Pexaniajailivaisi pacatsipaebabiabi atatsi, ¿detsa xuajitsia itsiata apo panejumecovēnētšimē? ⁴⁷ Pajivi Dioso pijajivitonē, bajarapajivi namuxunaeveta Dioso pejumelivaisi. Itsiata baitsi jane paxamē Dioso apo papijajivimē. Bajaraxuata apo pajitsipaemē patanenamuxunaevetsinexamē Dioso pejumelivaisi, jai Jesūs judiōvijavabelia.

Pacuenia Cristo, ponē Dioso itorobica, ponapona baja cajena Abrahampijinē pevājēnaeya ata yabara pelivaisi

⁴⁸ Judiōvi jumaitsi Jesūsjavabelia:

—Paxanē itsa pacajumaitsi: “Xamē raja Samaria nacuapijinēmē, dovathi neya-javaponaponaenē,” itsa pacajaitsi, paxaniajanē cajena, jai judiōvi Jesūsjavabelia.

⁴⁹ Jesūs nexata jumaitsi judiōvijavabelia:

—Xanē cajena dovathi apo yajavaponaponaenē. Xanē taxa Dioso yayiataeya ponapon-ajē. Itsiata paxamē apo paneyaiyataemē. ⁵⁰ Xanē raja xua exanaponajē, apo exanaenē jivi saya taneyaiyataenexa. Itsiata baitsi jane taxa netojitsipa jivi taneyaiyataenexa. Bajaraponē naneconitsiaexanaena pamona apo neyaiyatae. ⁵¹ Xaniajanē pacuenia pacatsipaebijitsiatsi. Pajivi jumecovēnētšiana tatsipaebilivaisi, bajarapajivi tēpae ata tsane, pepacujiru apo tēpae tsane daxitamatacabijavabelianexa. Nexata xainaena matababi apo peveverecaajava, jai Jesūs judiōvijavabelia.

⁵² Nexata judiōvi jumaitsi:

—Aeconoxae pepacuene dovathi pecayajavaponaponaejava, payapētāniji. Tšipaji Abrahampijinēmi tēpa. Daxita Diosojumepabivimi profetavi ata, tēpa. Itsiata xamē jumaitsimē tsaponae: “Pajivi jumecovēnētšiana tatsipaebilivaisi, bajarapajivi tēpae ata tsane, pepacu-jiru apo tēpae tsane daxitamatacabijavabelianexa,” jamē tsaponae. ⁵³ Vamopijinēmi Abrahampijinē, ayaijamatabēcuenenēmi ata, bajayata tēpa. Daxita Diosojumepabivimi profetavi ata tēpa. ¿Xamē tsaja Abrahampijinēmi matatoxenetsia beayaijamatabēcuenenēmē nataneme? ¿Detsa beponēmē nataneme? jai judiōvi.

⁵⁴ Jesūs nexata jumaitsi judiōvijavabelia:

—Itsa xanē tajacuata najumaitsinē tšipae: “Xanē bitso ayaijamatabēcuenenēnē,” itsa janē tšipae, nexata ajumematamobinē tšipae. Itsiata baitsi jane taxa Dioso, ponē yabara paxamē ata: “PatajaDioso raja,” pajamē, bajaraponē neyaiyatane. ⁵⁵ Itsiata

paxamë apo payapëtaemë bajaraponë. Xanë cajena yapëtaniji. Nexata xanë Dioso yapëtae atanë, itsa yavajunuaxainaejitsipajë, “Apo yapëtaenë cajena bajaraponë,” itsa janë tsipae Dioso yabara, najumetsënëtsipajë pacuenia paxamë panajumetsënëtabiabame. Itsiata xanë pepacuenë Dioso yapëtaniji. Jumecovënëtajënuu pacuenia Dioso nitorobabi-aba. ⁵⁶ Bajayata Abrahampijinë panijasalinainëmi jamatabëcuenebarëya. Tsipaji tajëvelia yapëtanë mapanacuayabetsicaje tapatsijavanexatsica. Nexata Abrahampijinëmi nesivajamatabëcuenebarëya baja cajena, jai Jesús judíovijavabelia.

⁵⁷ Nexata judíovi jumaitsi Jesúsjavabelia:

—Abaxë raja xamë apo xainaeemë cincuenta pavaibeje ata. ¿Detsa pacuenia nexata taejitsipame Abrahampijinë? Abrahampijinë baja cajena pepo bajayatami tëpa, jai judíovi Jesúsjavabelia jumeaebiaya.

⁵⁸ Jesús nexata jumaitsi judíovijavabelia:

—Xaniajanë pacuenia pacatsipaebijitsiatsi. Xanë raja cajena ponaponajë Abrahampijinë pevajënaeya ata, jai Jesús judíovijavabelia.

⁵⁹ Nexata bajarapacuenia Jesús itsa jumaitsi judíovijavabelia, judíovi nota ibotonë. Tsec-onaiejitsiatsi picani Jesús ibotonëta. Itsiata baitsi jane Jesús namatayatsia pitsapa tem-plobovecua bajarapamonae petuatuajëalia. Jesús baja nexata judíovi itsajavabelia vecuapona.

9

Pacuenia Jesús itaxutoxanepanaeyaexana ecënaenë yabara pelivaisi

¹ Jesús najetaruca namutua. Nexata tane penaexanaejavaveliacujinae bitso pitaxutotsëcënaenë. ² Nexata Jesús pijajivi jumaitsi Jesúsjavabelia:

—Patajatuxanenë, ¿detsa meta xuajitsia maponë naexana bitso pitaxutotsëcënaenëje? ¿Paxa tsaeta pibisiacuene pexanaejamatabëcuene? Itsa jume, ¿pena tsaeta pibisiacuene pexanaejamatabëcuene maponë itaxutotsëcënaenë? Itsa jume, ¿baja tsaeta ponë pijacuata pibisiacuene natoexana? jai Jesús pijajivi.

³ Jesús nexata jumaitsi pijajivijavabelia:

—Jume raja. Mara ponëje paxa, pena ata, pibisiacuene pexanaejamatabëcuene, apo itaxutotsëcënaeje. Naexana bitso pitaxutotsëcënaenë saya daxitajivi petanexatsi Dioso icatsia pitaxutoxanepanaeyaexanaejavatsi. ⁴ Payapëtaneme rabaja mapacuneje. Mat-acabita xanëpana vajanacuenebinexa. Itsa baja meravi, acuenebi vajanacuenebinexa. Bajara pijinia itsinë xanë ata. Taponaponaematacabi xanëpana tatonacuenebinexa ponë nitorobica. Itsa pamatacabi nebeyaxuabiana, acuenebi tsane tatonacuenebinexa. ⁵ Abaxë paepatojebi ponaponaenajë mapanacuataje, daxitajivi jamatabëcueneitayotsianajë pexani-ajailivaisita, jai Jesús pijajivijavabelia.

⁶ Bajarapacuenia Jesús pejumaitsicujinae irabelia suabaxuaba. Peionitota tsorobojavayo exana. Nexata itaxutoexaba bitso pitaxutotsëcënaenë. ⁷ Nexata Jesús jumaitsi bitso pitaxutotsëcënaenëjavabelia:

—Ponare baja. Naitaxutoquiaremelia pecueyetsipucayojavabelia, Siloévenë pucayojavabelia, jai Jesús.

“Siloé,” itsa jai bajarapamonae pijajumeta, mapajumeta pejumaitsjume: “Pitorobinëtsitsica,” pejaijume.

Nexata bitso pitaxutotsëcënaenë lia baja. Naitaxutoquiatojopalia. Naviarena baja pitaxutoxanepanaenë. ⁸ Nexata itsajota ponapona bitso pitaxutotsëcënaenëmi, imoxoyo penaevi, pamonaeta taeyabiabatsi, daxita bajarapamonae nayanijoba.

—¿Matsa ponë palata amoneya pevajëcabiabecaenëmije? najai bajarapamonae.

⁹ Nexata itsamonae jumaitsi:

—Jãjã, bajara covë ponë, jai.

Itsiata itsamonae jumaitsi:

—Apo ponë raja. Bajara saya itsiata beponë, jai.

Nexata pitaxutotsëcënaenëmi pijacuata jumaitsi:

—Jãjã, xanë rabaja, jai bajaraponë.

¹⁰ Nexata bajarapamonae jumaitsi pitaxutotsëcënaenëmijavabelia:

—¿Detsa nexata pacuenia taneme baja? jai.

¹¹ Nexata pitaxutotsëcënaenëmi jumaitsi:

—Ponë raja Jesúsvenë, exana tsorobojavayo. Nitaxutoexaba. Nexata nejumaitsi: “Liamëre pecueyetsipucayojavabelia, Siloévenë pucayojavabelia. Naitaxutoquiaremelia,” nejai Jesús. Nexata baja lianë. Itsa naitaxutoquiatajë bajarapapucayota, taniji baja, jai pitaxutotsëcënaenëmi.

¹² Nexata bajarapamonae jumaitsi:

—¿Detsa jota bajaraponë ponapona? jai.
Nexata icatsia pitaxutotsëcënaenëmi jumaitsi:
—Apo yapëtaenë itsajota ponapona, jai.

Pacuenia bitso pitaxutotsëcënaenëmi caponaliatsi fariseovijavabelia peyanijobinexatsi yabara pelivaisi

¹³ Pitaxutotsëcënaenëmi pitaxutoxanepanaejava jivi itsa tane, yanijobatsi peyapëtaenexa pacuenia itaxutoxanepana. Pamonaë yanijobaponatsi, bajarapamonae pitaxutotsëcënaenëmi caponaliatsi fariseovijavabelia. ¹⁴ Pamatacabi Jesús exana tsorobojavayo pitaxutoxanepanaeyaexanaenexa bitso pitaxutotsëcënaenëmi, bajarapamatacabi judiövi penacueraevetsimatacabi. ¹⁵ Nexata jane baja fariseovi yanijoba pitaxutotsëcënaenëmijavabelia.

—¿Detsa pacuenia nexata itaxutoxanepaname? jai fariseovi.

Nexata pitaxutotsëcënaenëmi jumaitsi:

—Nitaxutoexaba raja tsorobojavayota. Bajaraxuacujinae naitaxutoquiatajë. Nexata aeconoxae taniji baja, jai pitaxutotsëcënaenëmi fariseovijavabelia.

¹⁶ Nexata fariseovi najumaitsi:

—Ponë bajarapacuenë exana, Dioso apo pitorobinëtsi cajena. Tsipaji apo yaiyatae penacueraevetsimatacabi, najai fariseovi.

Itsiata bajarapamonaeyajuvënëvi itsamonae najumaitsi:

—Itsa pibisiacuenë pexanaenë tsipae, apo cajëpae tsipaetsi bajarapitsipinijicuenë pexanaenexa, najai itsamonae.

Nexata daxita fariseovi apo najamatabëcuenejëpae. ¹⁷ Nexata icatsia fariseovi yanijoba pitaxutotsëcënaenëmijavabelia.

—¿Detsa jane xamë bejamatabëtsimë ponë caitaxutoxanepanaeyaexana yabara? jai fariseovi.

Nexata pitaxutotsëcënaenëmi jumaitsi:

—Bajaraponë cajena Diosojumepaebinë profeta, jai.

¹⁸ Judiövi apo jumexaniatae pitaxutoxanepanaeyaexanaejavatsi yabara. Nexata bajarapamonae junata pitaxutotsëcënaenëmi paxa, pena yajava. ¹⁹ Judiövi jane baja yanijoba pitaxutotsëcënaenëmi paxabeje penabejevavabelia. Jumaitsi:

—¿Baja tsa maponë panexënatobejeje, ponë penaexanaejavaveliacujinae pitaxutotsëcënaenëmije? ¿Detsa pacuenia aeconoxae baja tane? jai judiövi.

²⁰ Nexata pitaxutotsëcënaenëmi paxabeje penabeje jumaitsibeje:

—Maponëje pataxënatobeje payapëtanijibeje cajena. Payapëtanijibejenua penaexanaejavaveliacujinae pitaxutotsëcënaejava. ²¹ Itsiata baitsi jane aeconoxae apo payapëtaenëbeje pacuenia baja itaxutoxanepana. Apo payapëtaenëbejenua ponë itaxutoxanepanaeyaexanatsi. Bajaraponë taxënato payanijobare. Penaveretsinë rabaja. Pijacuata pacatsipae-biana, jai pitaxutotsëcënaenëmi paxabeje penabeje judiövijavabelia.

²² Judiövi baja cajena najamatabëcuenejëpa pevajënaeitavetsinexa penajoneyaniva judiövi penacaetuatabibojavaberena pajivi jumaitsi: “Jesús rabaja cajena Cristo, ponë Dioso athëbëvetsica itorobijitsiatsica jivi pecapanepaenexa,” pejaivivi. Bajaraxuata pitaxutotsëcënaenëmi paxabeje penabeje bajarapacuenia jumecanaviatabeje pecujonavixaebeje judiövi. ²³ Bajaraxuata bajarapajivibeje jumaitsibeje: “Taxënatovavabelia payanijobare. Penaveretsinë rabaja,” jaibeje.

²⁴ Nexata judiövi icatsia junata pitaxutotsëcënaenëmi. Jumaitsi bajaraponëjavabelia:

—Panetsipaebare xaniavaetsia Dioso pitabarata. Paxanë baja cajena payapëtaniji bajaraponë pibisiacuenë pexanaenëcuene, jai judiövi Jesús yabara.

²⁵ Nexata pitaxutotsëcënaenëmi jumaitsi:

—Pibisiacuenë meta pexanaenë. Xanë apo yapëtaenë. Itsiata baitsi jane nitaxutoxanepanaeyaexana taitaxutotsëcënaenëmi, jai pitaxutotsëcënaenëmi.

²⁶ Nexata icatsia judiövi jumaitsi:

—¿Detsa pacuenia catoxana netaenexa? jai judiövi.

²⁷ Nexata pitaxutotsëcënaenëmi jumaitsi judiövijavabelia:

—Pacatsipaebatsi rabaja picani xaniavaetsia. Itsiata apo panejumecovënëtsimë. ¿Detsa xuajitsia pajitsipame patacatsipaebaponaenexa icatsia? ¿Paxamë ata tsaja pajitsipame panejumecovënëtsinexa bajaraponë papijajivinexamë? jai pitaxutotsëcënaenëmi judiövijavabelia.

²⁸ Nexata judiövi bijatanetsi pitaxutotsëcënaenëmi. Jumaitsitsi:

—Xamë raeta baja cajena bajaraponë pijajivitonëmë. Paxanë raja saicaya Moiséspijinë petsipaebilivaisi pajumecovënëttavanapajë. ²⁹ Paxanë baja cajena payapëtaniji pepacuenë

Dioso pebarêcuaicuajijavatsi Moiséspjinê. Itsiata baitsi jane ponê cabarêcuaicuajijai, apo payapêtaenê itsaverena pata, jai judiôvi.

³⁰ Nexata pitaxutotsêcênaenêmi jumaitsi judiôvijavabelia:

—¿Detsa xuajitsia nitaxutoxanepanaeyaexanae ata, apo payapêtaemê itsaverena pata bajaraponê? ³¹ Yapêtanetsi baja cajena mapacueneye. Diosojavabelia vajêtsi ata pamonaebibisiacuene pexanaevi, Dioso baja cajena apo namuxanaevetsi. Dioso baja cajena banamuxanaeveta itsa vajêtsi pejitsipaecuena yayataeya petojinavanapaevitsi. ³² Caeto ata mapanacuapijivi apo vênêlivaisitaetsi ponê caêjêpatsi pitaxutoxanepanaeyaexanaenexa penaexanaejavaveliacujinae bitso pitaxutotsêcênaenê. ³³ Peneta bajaraponê itsa apo patsi tsipae Diosojavavetsica, nexata apo caêjêpaetsi tsipae pexanaenexa Dioso pesaêta pinijicuene pexanaejava, jai pitaxutotsêcênaenêmi judiôvijavabelia.

³⁴ Nexata judiôvi jumaitsi:

—Xamê cajena pibisiacuene exaname nenaexanaejavaveliacujinae. ¿Itsiata tsaja caranata pibisiacuene nexanaenê jamatabêpanemuxujibame? jai judiôvi pitaxutotsêcênaenêmijavabelia.

Nexata torotajarabaxuabatsi judiôvi penacaetuatabiabibo pevecuapitsapaenexa.

Pacuenia Dioso apo pejumecovênêtsivi jamatabêcueneitaquiri tsavanapae yabara pelivaisi

³⁵ Jesús vênêlivaisitane pitaxutoxanepanaeyaexanaenê judiôvi petorobajarabijavatsi judiôvi penacaetuatabiabibo pevecuapitsapaenexa. Nexata Jesús itsa caxitajaraba pitaxutoxanepanaeyaexanaenê, Jesús jumaitsi pitaxutoxanepanaeya exanaenêjavabelia:

—¿Najamatabêcopatame tsabaja Dioso pexênatojavabelia? nayabarajai Jesús.

³⁶ Nexata ponê Jesús itaxutoxanepanaeyaexana, jumaitsi:

—¿Detsa ponê Dioso pexênato tanajamatabêcopatsinexa bajaraponêjavabelia? jai.

³⁷ Jesús nexata pijacuata nayabarajumaitsi:

—Ponê rabaja cabarêcuaicuajijai, Dioso rabaja pexênato, nayabarajai Jesús.

³⁸ Nexata ponê Jesús itaxutoxanepanaeyaexana, pematabacabêta nuca Jesús pitabarata. Jumaitsi Jesúsjavabelia:

—Tajatuxanenê, casivanajamatabêcopatatsi baja cajena, jai.

³⁹ Nexata Jesús jumaitsi pitaxutoxanepanaeya exanaenêjavabelia:

—Xanê patajê mapanacuayabetsicaje jivi penayapêtaenexa pijaneconi pexainaejava. Nexata pamonaebixaniajailivaisi tatsipaebijavata najamatabêcueneypêtaena pijaamatabêcueneitaquirijava, bajarapamonaebixaniajailivaisi jamatabêcueneitayotsianajê pexaniajailivaisita. Pamonaebixaniajailivaisi. Apo yapêtae ata pexaniajailivaisi, jamatabêjumaitsi: “Vaxaitsi rabaja yapêtanetsi pexaniajailivaisi,” jamatabêjai, bajarapamonaebixaniajailivaisi, jai Jesús.

⁴⁰ Nexata fariseovi, bajarajota penubenaevi, jumetane bajarapacuenia Jesús pejumaitsijava. Nexata fariseovi jumaitsi Jesúsjavabelia.

—¿Paxanê ata tsabaja pajamatabêcueneitaquirinê tsavanapae? jai.

⁴¹ Jesús nexata jumaitsi fariseovijavabelia:

—Jājā, bitso pajamatabêcueneitaquirimê tsavanapae. Tsipaji jamatabêcuenenavêxaniabiaya pajamatabêjumaitsimê tsabiabi: “Vaxaitsi rabaja jumecovênêtatsi Dioso,” pajamatabêjamê tsabiabi. Nexata Dioso pejumelivaisi payapêtae atamê, itsiata pibisiacuene paexanabiabame. Nexata bitso pananeconitame Diosojavabelia. Paxamê Dioso pejumelivaisi apo paneyapêtaexae, itsa pajamatabêcueneitaquirimê tsipae, nexata bitso apo pananeconitsimê tsipae Diosojavabelia, jai Jesús fariseovijavabelia.

10

Oveja pecajoneyabiabicorral yabara pelivaisi

¹ Jesús jumaitsi fariseovijavabelia:

—Xaniajanê pacuenia pacatsipaebijitsiatsi. Oveja pecajoneyabiabicorral ênêabelia saicayanê pejonexaxa, apo jone corral baupajava. Junaya saya peyenepanatsia pejonexaxa. Bajaraponê penacobetoxotsinênexa oveja. ² Ponê peneta joneya corral baupayalia, bajaraponê cajena oveja pevetsinê. ³ Nexata corral baupa pevetsinê tobaupatatsi pijaoveja pecapitsapaenexa. Itsa baja pijaoveja capitsapa corralvecua, pijaoveja jumeyapêtanetsi. Tsipaji junatapona pijaoveja caenê canacujitsia pevênêta. ⁴ Pecapitsapaecujinae daxita pijaoveja, bajaraponê oveja pevajênaeya namataxainana-jetaruca. Nexata pijaoveja pênaponatsi. Tsipaji jumeyapêtanetsi pijaoveja. ⁵ Oveja apo pênaponae tsipae saicayanê. Tsipaji apo jumeyapêtae. Vecuarêcêpecaejitsipa saya, nayabarajai Jesús fariseovijavabelia.

⁶ Bajarapacuenia Jesús oveja pevetsinëcuenia nataeya comparacióncuenia nalivaisipaeba fariseovijavabelia. Itsiata fariseovi apo jumeypêtaetsi Jesús comparacióncuenia penali-vaisipaebijava.

Pacuenia Jesús xaniavaetsia eveta pijajivi yabara pelivaisi

⁷ Jesús jumaitsi fariseovijavabelia:

—Xaniajanë pacuenia pacatsipaebijitsiatsi. Pacuenia oveja junua corral baupajava, pepanepaenexa corral ênëaberena, bajara xanë itsinë jivi pejonenexa xanëjava, pepanepaenexa Dioso pijatomarabetsia. ⁸ Itsamonae xanë tavajënaeya penajumetsënëtsilivaisi jivi tsipaebapona. Bajarapamonae oveja bepenacobetoxotsivi. Jamatabëneyacajërëta tajajivi. Itsiata baiitsi jane tajajivi apo jumecovënëtsi bajarapamonae. ⁹ Xanë rabaja cajena baupanë. Pajivi nesivanajamatabëcopatsiana, jonena xanëjava pepatsinexa Dioso pijatomarabetsia. Bajarapajivi capanepaenatsi Diosojavabelia. Pijaoveja xaniavaetsia pevetsinë, caebajayacunua canacujitsia capitsapa corralvecua oveja pexaejava pejaitsinexa. Icatsia caecaniviyo canacujitsia cajunua corraljavaberena. Bajara pijinia pacuenia xanë ata xaniavaetsia evetsianajë pajivi nesivanajamatabëcopatsiana, jai Jesús fariseovijavabelia.

¹⁰ Icatsia Jesús jumaitsi fariseovijavabelia:

—Penacobetoxotsinë bapata oveja penacobetoxotsinexa, pebeyaxuababiabinexanua. Bajarapacuenia oveja peveretaponaenexa bapata. Bajara pijinia jamatabëcuenieitsi pamonae pata penajumetsënëtsilivaisi jivi petsipaebaponaenexa. Itsiata baiitsi jane xanë patajopaicajë mapanacuayabetsicaje xanë tajamatabëcueneta jivi pexainaenexa maticabi apo peverevereaejava, bitso jamatabëcuenearëyaya pejinavanapaenexanua. ¹¹ Pacuenia itsi xaniavaetsia pevetsinë pijaoveja, bajara pijinia xanë itsinë taevetsinexa tajajivi. Xaniavaetsia pevetsinë pijaoveja jamatabëjumaitsi: “Itsanë netobeyaxuabijitsia ata tsane tajaoveja, apo copatsinë tsane tanetoyajuvënëbeyaxuabianiva tajaoveja. Nexata xanë tajaoveja yapijivinacaevetsianajë tanebeyaxuabinexa,” jamatabëjai. Bajara pijinia xanë ata jamatabëitsinë tajajivi yabara. ¹² Itsiata ponë saya toevtsipa itsanë pijaoveja, bajaraponë apo xainae tsipae bajarapaovejabitsaëto. Saya toevetaponaponaejitsipa pematamotsinexatsi. Nexata nevëthë oveja itsa tsimaxënajetarucaejitsipa, bajaraponë xuabatabajiravijitsipa ovejabitsaëtom. Nexata oveja nevëthë itsa yajuvënëvaetabijitsipatsi, nacayajatecaejitsipa ovejabitsaëtom. ¹³ Oveja pevetsinë najetabajiravijitsipa. Tsipaji saya pematamotsinexatsi nacuenabaponaponaejitsipa. Nexata apo jamatabëjëjai tsipae oveja yabara, jai Jesús fariseovijavabelia.

¹⁴⁻¹⁵ Icatsia Jesús jumaitsi:

—Pacuenia itsi xaniavaetsia pevetsinë pijaoveja, bajara pijinia itsinë xanë ata taevetsinexa tajajivi, pamonae taniji beovejacuenia. Pacuenia taxa neyapëtane, bajara pijinia pacuenia xanë ata yapëtaniji taxa. Pacuenia pijinia xaniavaetsia yapëtaniji tajajivi, bajara pijinia pacuenia tajajivi ata neyapëtane. Xanë sivatëpaenajë tajajivi. ¹⁶ Xainajë baja itsabitsaëto tajajivi. Itsiata abaxë bajarapamonae apo yavajinavanapae mapabitsaëtojavataje. Itsiata itsamatacabi capatsianajë bajarapamonae mapabitsaëtojavaberena. Nexata daxita bajarapamonae nejumecovënëtsiana taitorobicuenia. Caebitsaëtoxaneto jane baja tajajivi netonaexanaena. Bajarapamonae xanë caenë evetsianajë, jai Jesús.

¹⁷ Icatsia Jesús jumaitsi:

—Taxa niasiva. Tsipaji tajajivi yabara nacaevetsianajë tanebeyaxuabinexa. Itsiata icatsia tatëpaecujinae asaënë tsane. ¹⁸ Itsa apo nacaevetsinë tsipae tanebeyaxuabinexa, itsajivi ata apo caëjëpaetsi tsipae tanebeyaxuabinexa. Itsiata tajacuta nacaevetsianajë tanebeyaxuabinexa. Necaëjëpa tatëpaenexa. Necaëjëpanua icatsia tasaënëxa tatëpaecujinae. Bajarapacuenia taxa netocopata, jai Jesús.

¹⁹ Judíovi itsa jumetane bajarapacuenia Jesús pejumaitsiyava, judíovi apo najamatabëcueniejëpae. ²⁰ Judíovi ayaibitsaëto najumaitsi Jesús yabara:

—Dovathi raja bajaraponë yajavaponaponatsi. Matajemabatsi ra saya. ¿Detsa xuajitsia bajaraponë panamuxunaevetame? najai bajarapamonae.

²¹ Itsiata bajarapamonae yajuvënëvi itsamonae najumaitsi:

—Ponë dovathi yajavaponaponatsi, apo caëjëpaetsi tsipae cajena pecuaicuijainexa mapacueniaje. Apo caëjëpaetsinua tsipae pitaxutoxanepanaeyaexanaenexa bitso pitaxutotsëcënaenëmi, najai bajarapamonae yajuvënëvi Jesús yabara.

Pacuenia Jesús judíovi navecuaitavetsi yabara pelivaisi

²² Emarapaeta Jerusalén tomarata fiesta exana. Bajarapafiesta exana judíovi penajamatabënapitsinexa bajayata judíovi pijasalinaivi templobo pexanebetsijava.

²³ Nexata pamatacabi fiesta exana, Jesús ponapona bajarapatemplobojavata, Portal de

Salomónvënëjavata. ²⁴ Nexata Jesús judíovi matatoyorotsia nacaetuatsi. Judíovi jumaitsi Jesúsjavabelia:

—Apo payapëtaenë pacuenia panajamatabëxainaejitsianë xamë yabara. ¿Detsa pacujinae paneyapëtaeyaxanaename patacayapëtaenexa pepacuene ponëmë? Itsa pepacuene Cristomë, Dioso athëbëvetsica pecaitorobinëtsica jivi necapanepaenexa, panetsipaebare cajena rovalia, jai judíovi.

²⁵ Jesús nexata jumaitsi judíovijavabelia:

—Pacatsipaebatsi rabaja picani rovalia. Itsiata apo panejumecovënëtsimë. Taxa Dioso pesaëta pinijicuene exanajë. Bajara papinijicuene exanajë taxa taneitorobicuena. Nexata itsa exanajë bajarapapinijicuene, pacatsitaexanatsi picani taxa taneitorobicuene. ²⁶ Itsiata baitsi jane apo panejumecovënëtsimë Cristonëcuenenë. Tsipaji paxamë apo patajajivimë. ²⁷ Tajajivi, pamona taniji beovejacuena, bajarapamona nejumeyapëtane. Bajarapamona pijinia yapëtaniji. Nexata nepënapona. ²⁸ Bajarapamona rajutsianajë matakabi apo peveverecaejava. Bajarapamona taxa Diosovecua apo naxuabi tsane. Itsajivi ata apo neyacajërëtsi tsane tajajivi. ²⁹ Taxa baja cajena ayajamatabëcuenenë daxitajivi matatoxenetsia. Bajaraponë nerajuta bajarapamona. Nexata itsajivi ata apo caëjëpaetsi tsane taxa pecobevecua pepitsinexa bajarapamona. ³⁰ Taxa, xanë, caenë rabaja panaexanajëbeje, jai Jesús judíovijavabelia.

³¹ Nexata picani bajarajota judíovi jamatabëbeyaxuabatsi Jesús. Judíovi nota ibotonë Jesús picani petseconaenexatsi ibotonëta. ³² Jesús nexata jumaitsi judíovijavabelia:

—Ayajjava pexaniacuene taxa Dioso pesaëta exanaponajë paxamë paneitabarata. ¿Detsa nexata pitsineconi yabara panetseconaejitsiamë ibotonëta? jai Jesús judíovijavabelia.

³³ Judíovi nexata jumaitsi:

—Pexaniacuene raja nexanaejava yabara apo pacatseconaejitsiatsi. Pacatseconaejitsiatsi raja nenaneconitsixae Diosojavabelia. Tsipaji pibisiacuena, Dioso apo pejitsipacuena, cuaicuaijamë. Xamë saya jivitonë atamë, beDiosonëmë nataneme, jai judíovi Jesúsjavabelia.

³⁴ Jesús nexata jumaitsi judíovijavabelia:

—Dioso pejumaitsijava, Dioso pejumelivaisibaxutota jumaitsi mapacuenaiaje: “Paxamë ata rabaja padiosovimë,” jai Dioso pejumelivaisibaxutota Dioso pejumecovënëtsivi yabara. ³⁵ Nexata Dioso pejumelivaisibaxutota bajarapacuena itsa jumaitsi Dioso pejumecovënëtsivi yabara, acuenebi bajarapamona yabara vajajumaitsinexa: “Bajarapamona apo diosovi,” vajajainexa. ³⁶ Dioso cajena nitapeta. Nexata nitorobica mapanacuayabetsicaje. ¿Detsa nexata xuajitsi panejumaitsimë: “Xamë raja naneconitame Diosojavabelia. Pibisiacuena cuaicuaijamë Dioso apo pejitsipacuena. Tsipaji jumaitsimë: “Xanë raja Dioso pexënatonë, jamë,” panejamë. ³⁷ Itsa apo exanaenë tsipae pacuenia taxa nitoroba, nexata acuenebi tsipae patanesivanajamatabëcopatsinexamë. ³⁸ Itsiata baitsi jane exanaponajë pacuenia taxa nitoroba. Nexata apo panesivanajamatabëcopatsi atamë, itsiata bepajumecovënëtamë Dioso pesaëta taexanaejava, pacuene baja exanaponajë. Itsa pajumecovënëtsianame bajarapacuene Dioso pesaëta taexanaponaejava, nexata payapëtaenename taxa Dioso taneyajavaponaponaejava. Payapëtaenamenua xanë ata pijinia taxa Dioso tayajavaponaponaejava, jai Jesús judíovijavabelia.

³⁹ Bajarapacuena Jesús jumaitsi ata, itsiata judíovi jamatabëvaetabatsi penaneconitsiaexanaenexatsi. Itsiata Jesús vecuapanepa.

⁴⁰ Nexata Jesús navialia Jordánmene itsapanabelia, panacuatalia copiaya Juanpijinë jivi bautisababiaba. Bajarajotalia Jesús ponapona. ⁴¹ Jivi ayaibitsaëtoxaneto ponalia petaenexatsi Jesús. Nexata bajarapamona jumaitsi:

—Juanpijinë Dioso pesaëta pinijicuene apo exanapona ata, itsiata daxita pacuenia tajëvelia vajunupaeba maponë yabaraje, xaniajai cajena, jai bajarapamona Jesús yabara.

⁴² Nexata jane baja bajarajota jivi ayaibitsaëtoxaneto jumecovënëta Jesús Dioso athëbëvetsica pitorobinëcuenetsi.

11

Pacuenia baja Lázaro tēpa yabara pelivaisi

¹ Lázaro, Betania tomarapijinë, avitane tsanuca Betania tomarata. Bajarapatomarata ponaponabeje pematapijivabeje, Mariabeje Martabeje. ² Bajarapova María itsamatakabi Jesús tsitaxuepanaena petuxujuvira. Daxitarayomi tsitaxuepanaena. Bajaraxuacujinae bajarapova pematatanata taxuiquicaenanua. ³ Nexata pamatakabi Lázaro avitane tsanuca, Mariabeje Martabeje tonajumeitorobaliabeje Jesús. Jumaitsiabeje:

—Tajatuxanenë, niasivanë raja Lázaro catovitane, jaiabeje.

⁴ Jesús itsa jumentane bajarapovabeje petonajumeitorobijumetsi, nexata Jesús jumaitsi pijajivijavabelia:

—Mapavitane taje Lázaro apo tēpae tsane daxitamatacabijavabelianexa. Biji rajane bajarapavitane pejamatabēcueneta jivi yapētaena Dioso pinijicuene pexanaenexa pecaējēpaenēcuenetsi. Yapētaenana xanē ata, Dioso pexēnatonē, pinijicuene taexanaenexa tanecaējēpaenēcuene, jai Jesús pijajivijavabelia.

⁵ Jesús bitso asivaya taeyabiaba Martabana, Maríabana, Lázarobana. ⁶ Jesús vënëlvaisitae ata Lázaro bitso piavitanejava, itsiata abaxē apo ponae Betania tomarabelia. Anijamat-acabibeje abaxē ponapona Jordánmene itsapanatalia. ⁷ Bajaraxuacujinae Jesús jumaitsi pijajivijavabelia:

—Ponaliatsi icatsia Judea nacuayabelia, jai Jesús.

⁸ Jesús nexata pijajivi jumaitsi:

—Patajatuxanenē, canivita saya judíovi bajarajotalia jamatabēcatsecona picani ibotonēta. ¿Itsiata tsabaja icatsia ponaeliatsi bajarabelia? jai pijajivi.

⁹ Jesús nexata jumaitsi pijajivijavabelia:

—Matacabi raja xaina doce pahorabeje. Nexata pajivi matacabita ponapona, apo firapecae. Tspijaji icotiata napebeta xaniavaetsia. ¹⁰ Itsiata pajivi meravi ponapona, firapeca. Tspijaji meravi apo napebetsi xaniavaetsia. Bajara pijinia xanē ata itsinē. Ponae ata tsanetsi Betania tomarabelia, itsiata apo nitsacueniabi tsane. Tspijaji abaxē tajamatacabi apo netocopiapatsi, jai Jesús pijajivijavabelia petēpaejavanexa yabara.

¹¹ Bajaraxuacujinae Jesús peponaevajēnae jumaitsi pijajivijavabelia:

—Vajayapētaenē rabaja Lázaro majitanuca. Nexata baja ponajē. Itavabijitsianē Lázaro, jai Jesús.

¹² Nexata pijajivi jumaitsi:

—Patajatuxanenē, itsa raeta saya Lázaro majitanuca, itsiata jamatejema tsane, jai Jesús pijajivi.

¹³ “Vajayapētaenē rabaja Lázaro majitanuca,” itsa jai Jesús, Jesús picani pejumaitsijume, “Lázaro rabaja tēpa,” pejaijume. Itsiata Jesús pijajivi apo jumeyapētaetsi. Bajarapamonae Jesús pijajivi jamatabēcuenenavēxaniabiaya jamatabējumai: “Lázaro meta saya majitanuca pacuenia majitanucabiaba meravi,” jamatabējai. ¹⁴ Bajaraxuata nexata Jesús roviaia jumaitsi pijajivijavabelia:

—Lázaro rabaja tēpa. ¹⁵ Paepatota Lázaro tēpa, bajarajotalia apo ponaponaenē. Bajaraxuata barēyanē paxamē yabara. Barēyanē tspijaji Lázaro petēpaexae, xaniavaetsia panejumecovēnētsianame. Baja nexata ponatsi, jai Jesús pijajivijavabelia.

¹⁶ Jesús pijajiviyajuvēnē, Tomás, ponē icatsia itsavēnē vënërubatsi Sapalanē. Bajaraponē jumaitsi penajuaponaevijavabelia:

—Naponatsi Jesús pepēta. Ibotonēta itsa tseconatsi, vajayajatēpaenexa bajaraponē, jai Tomás.

Pacuenia Jesús caējēpatsi petēpaevi ata icatsia piasaēyaexanaenexa yabara pelivaisi

¹⁷ Pepuaxainae baja cuatro pamatacabibeje Lázaropijinē pemēthētsicujinaetsi, Jesús matapania patajopa Betania tomarata. ¹⁸ Betaniamarata eca imoxoyo Jerusalén tomarave-cua. Bejamatabēcuene anijakilómetrobeje epatua navecuacabeje bajarapatomarabeje. ¹⁹ Jesús pepatsivajēnaeya Betania tomarata, ayaibitsaētoxoneto judíovi pata Martabeje Maríabejevaberena Lázaro petēpaexae. Bajarapamonae jumaitsi bajarapovabejevavabelia:

—Paxanē itsiata pacayanabatsi. Panajamatabēxainajē paxanē ata papecavecu-atēpaexabeje panejuyapijinēbeje, Lázaro, jai bajarapamonae.

²⁰ Itsa Marta vënëlvaisitane Jesús penajetaruaejava, pitsapa pijabovecua pemataene-naenexa Jesús. María itsiata bota nacopateca. ²¹ Nexata Marta itsa mataenenatsi Jesús, Marta jumaitsi Jesúsjavabelia:

—Tajatatuxanenē, itsa majota ponaponaejitsipameje, apo tēpae tsipae tajuyapijinē.

²² Itsiata yapētanjiji aeconoxae ata Dioso carajutsiana daxita pacuene vajētame Diosojavabelia, jai Marta.

²³ Nexata Jesús jumaitsi Martajavabelia:

—Nejuyapijinē raja itsiata icatsia asaē tsaponapona tsane, jai Jesús.

²⁴ Nexata Marta apo jumeyapētae Jesús piasaēyaexanaejavanexa Lázaro. Bajaraxuata Marta jumaitsi Jesúsjavabelia mapacueniaje:

—Yapētanjiji rabaja pacuenia icatsia Lázaro Dioso asaēyaexanaejitsiatsi pamatacabita icatsia asaēyaexanaenatsi daxita petēpaevimi, jai Marta.

²⁵ Nexata Jesús jumaitsi Martajavabelia:

—Xanē rabaja petēpaevi ata icatsia tasaēyaexanaenē, tarajutsinē matacabi apo peverevere-caejava. Pajivi nejumecovēnētsiana Cristonēcuenenē, bajarapajivi tēpae ata, itsiata icatsia

asaë tsane. ²⁶ Pajivi abaxë pamatacabi asaë tsaponaponaë mapanacuataje, itsa nejumecovënëtsiana Cristonëcuenenë, bajarapajivi tēpae ata, xainaena matacabi apo peverevere-caejava. ¿Xamë tsabaja bajarapalivaisi jumecovënëtame? jai Jesús Martajavabelia.

²⁷ Marta nexata jumaitsi:

–Tajatuxanenë, jumecovënëtajë rabaja. Xamë rabaja cajena Cristomë, Dioso pexënatomë, ponë pacopiaevetavanapajë athëbëvetsica pepatsijavanexatsica mapanacuayabetsicaje jivi pecapanepaenexa, jai Marta.

Pacuenia Jesús vënua Lázaro pemëthëjavata yabara pelivaisi

²⁸ Itsa baja Marta najumelivaisivereta bajarapalivaisi, naviata pijaboyabelia pejunatsinexa pejuypajiva María. Nexata Marta muetsia jumaitsi Marijavabelia:

–Vajanacacujarubinë rabaja pata. Cajunalia raja bajaraponë, jai Marta.

²⁹ Caejumetae María Jesús pejunatsijavatsilia, nonotabapuna. Pona Jesúsjavabelia petaenexa. ³⁰ Jesús abaxë apo patsi Betania tomaraberena. Ecojopa abaxë itsajotalia Marta mataenenatsi. ³¹ Pajudíovi bajarapovabeje pijabota pata peyanabinexatsibeje Lázaro petëpaexae, bajarapamonae tane María penonotabapunaejava bepíjia pepitsatabi-javalia bovecua. Nexata bajarapamonae María pēnaponatsi. Tsipaji bajarapamonae jamatabëjumaitsi:

–María raeta pejuypajijnëmi pemëthëjavabelia pona pematantueyabinexa, jamatabëjai:

³² Itsa María palia, itsajotalia Jesús ecojopa, nexata María pematatabacabëta nucajunua Jesús pitabarata. Jumaitsi:

–Tajatuxanenë, itsa majota ponaponaejitsipameje, apo tēpae tsipae tajuyapijnë Lázaro, jai María Jesúsjavabelia.

³³ Jesús itsa tane María penueyaxuabijava, judíovi ata María peyjavapatsivi penuejava itsa tane, Jesús nexata bitso najamatabëxainaxuaba. ³⁴ Nexata Jesús jumaitsi bajarapamonaejavabelia:

–¿Detsa jota pamëthëtame Lázaro? jai Jesús.

Nexata bajarapamonae jumaitsi Jesúsjavabelia:

–Naxanitsia. Taename itsajota pamëthëtajë Lázaro, jai.

³⁵ Jesús nexata vënua Lázaro. ³⁶ Nexata judíovi najumaitsi:

–Pataema Jesús penuejava. Jesús picani bitso asiva petëpaenëmi, najai judíovi.

³⁷ Itsamonae judíovi najumaitsi Jesús yabara:

–Mara ponëje itaxutoxaniavaeta bitso pitaxutotsëcēnaenëmi ataje xaniavaetsia petaenexa. ¿Apo caëjēpaetsi tsamëra tsipae Lázaropijnë pejamatejemayaexanaenexa petëpaeyaniva? najai bajarapamonae.

Pacuenia Lázaro petëpaecujinae Jesús icatsia asaëyaexana yabara pelivaisi

³⁸ Jesús bitso sivanajamatabëxaina Lázaropijnë. Nexata Jesús cujilia Lázaropijnë pemëthëtsiibovajutsijavabelia. Iboanaxanetota Lázaro yamëthëvëpa acatabuatatsi. ³⁹ Jesús nexata jumaitsi bajarajota penapatsivijavabelia:

–Pavecuatixiremelia mapaibopanaxanetoje, jai Jesús.

Nexata Marta, petëpaenë pematapíjiva, jumaitsi:

–Tajatuxanenë, tuxutsaeba raeta baja bitso Lázaro. Tsipaji rabaja petëpaecujinae, ajena baja cuatro pamatacabibeje xaina, jai Marta Jesúsjavabelia.

⁴⁰ Jesús nexata jumaitsi Martajavabelia:

–Catsipaebatsi rabaja pacuenia taejitsiamë Dioso ayaicuene pexanaejava itsa jumecovënëtame Dioso, jai Jesús.

⁴¹ Nexata bajarapamonae Lázaropijnë pemëthëvëpavecua tixilia ibopanaxaneto. Jesús itaboxo naëcotsiaya jumaitsi:

–Taxa, pexaniajamatabëcuene carajutatsi tanejumetaexaemë. ⁴² Yapëtaniji cajena tane-namuxunaevetabiabijavamë. Itsiata icatsia cavajëtatsi mapamonaeje ayaibitsaëtoxaneto jumecovënëtsinexa taneitorobinëcuenemëtsica, jai Jesús Diosojavabelia.

⁴³ Bajarapacuenia Jesús pejumaitsicujinae, ayajumeta jumaitsi Lázaro pebuatsiibovajutsijavabelia:

–¡Lázaro, bajara jane mëthëvecua pitsaparemena! jai Jesús.

⁴⁴ Nexata baja Lázaro petëpaenëmi pitsaparena mëthëvecua. Piapiasábanata daxitanëreca mataquionaeya pematacacëbicujinaetsireca abaxë, pitsaparena. Pitabaraacatsi-papaëbërëpanatsi abaxë tsiteca itabaraacatsi. Jesús nexata jumaitsi bajarapamonaejavabelia:

–Pavecuaisinare bajarapapana. Pacopare peponaenexa pijaboyabelia, jai Jesús.

Pacuenia picani Jesús pijavajabitsaë jamatabëvaetabatsi yabara pelivaisi
(Mt 26.1-5; Mr 14.1-2; Lc 22.1-2)

⁴⁵ Judíovi, pamonae María yanabatsi, tane Lázaro petépaenēmi Jesús piasaēyaexanaejava. Nexata bajarapamonaeyajuvēnēvi ayaibitsaēto jumecovēnēta Jesús Dioso pexēnatocuene. ⁴⁶ Itsiata itsamonae bajarapamonaeyajuvēnēvi pona fariseovijavabelia. Nexata tsipaeba pacuenia Jesús Lázaro petépaenēmi asaēyaexana. ⁴⁷ Nexata fariseovi, sacerdotevi penamatacaitorobivi yajava, nacaetuata. Nexata bajarapamonaē junata penacaetuatsinexa judíovi pijaancianovi, judíovi pecujarubivi ata yajava. Nexata bajarapamonaē najumaitsi:

—¿Detsa meta vaxaitsi itsanetsi? Bajaraponē Dioso pesaēta pinijicuene pexanaejava exanapona. ⁴⁸ Itsa vaxaitsi cuenecopatsipatsi bajarapacuene pexanaponaejava, daxitajivi jumecovēnētaponaejitsipa bajaraponē. Apo jumecovēnētsi tsipae Romanonacua pevetsivi. Nexata Romanonacua pevetsivi anaepanaejitsipa. Itorobijitsiparena pijajivi, vajabitsaē. Nexata vajabitsaē itsa patsiparena, vajatemplobo nacatoxuabijitsipaica. Nacaverebiabi-jitsipanua, najai bajarapamonaē.

⁴⁹ Bajarapamonaeyajuvēnēnē pevēnē Caifás. Bajarapamatacabi bajaraponē Caifás, sacerdotevi pepo penamatacaitorobinē tsaponaponaē. Nexata Caifás jumaitsi penajuanacae-tuatsivijavabelia:

—Paxamē raja apo payapētaemē. ⁵⁰ Nexata Romanonacua pevetsivi vajabitsaē itsa itorobarena, vajanacaverebiabiyani, bepanajamatabēxainame mapacueniaje. Bajaraponē caenē itsa beyaxuabiaexanaenatsi, bajaraponē pejamatabēcueneta daxita judíovitsi vajavajabitsaē apo nacaverebiabi tsane, jai Caifás Jesús yabara.

⁵¹ Itsiata baitsi jane Caifás apo jumaitsi bajarapacuenia pijacuata penajamatabēxainacuena. Biji rajane bajarapamatacabi Caifás daxita sacerdotevi pepo penamatacaitorobinēxae, Dioso bajarapacuenia jumaitsiyaexanatsi. Bajarapacuenia Caifás tajēvelia jumaitsi tsipaji Jesús sivatēpaejitsia daxita judíovi. ⁵² Itsiata Jesús apo sivatēpae tsane ējudíovi. Daxitanacuanējava, pamonae nacayajataruta Dioso pexi, bajarapamonaē ata pecaetuatsinexa, sivatēpaena Jesús. ⁵³ Bajarapacuenia bajara pamatacabijavaveliacujinae cajena judíovi pevetsivi najamatabēveretapona pacuenia bajarapamonaē Jesús beyaxuabijitsiatsi.

⁵⁴ Bajaraxuata Jesús apo ponabiabi baja itsabelia judíovi nacaetuatabiabi. Nexata Judea nacuavecua pitsapa. Jesús baja nexata pona petusatonacua imoxoyojavabelia, Efraínvēnē tomarajavabelia. Nexata bajarapatomarata Jesús ponapona pijajivi yajava.

⁵⁵ Imoxoyo baja pevajēnae judíovi pijajiesta pejonematacabinexa, pascuavēnēfiesta. Nexata jivi ayaibitsaētoxaneto pona Jerusalén tomarabelia. Pona pexanaenexa pacuenia exanabiabi fiestavajēnae penajamatabēcuene xaniavaetsinexa Diosojavabelia. Bajarapamonaē naropoba tsiquiritomaraxijavaverena. ⁵⁶ Nexata bajarapamonaē jaitarutatsi Jesús. Itsa bajarapamonaē nacaetuata templobota, nayanijoba. Najumaitsi:

—¿Detsa xamē jamatabēitsimē? ¿Jesús tsamēra patsiana mapafiestajavaje? Jume. Apo patsi tsamēra tsane, najai ēpamonaē.

⁵⁷ Nexata fariseovibeje sacerdotevi penamatacaitorobivibeje najumecopata jivijavabelia petonaitaxutocaevetsinexatsi Jesús. Nexata pajivi yapētane itsajota Jesús ponapona, petsipaebinexa bajarapamonaējavabelia. Nexata fariseovibeje sacerdotevi penamatacaitorobivibeje itsa yapētane itsajota Jesús ponapona, pevaetabinexatsi Jesús penaneconitsiaexanaenexatsi.

12

Pacuenia Jesús petiriva tsitaxuepanatsi petuxujuviaceitera yabara pelivaisi
(Mt 26.6-13; Mr 14.3-9)

¹ Pejonenexa baja pascuavēnēfiesta, saica seis pamatacabibeje. Nexata bajarapamatacabi Jesús baja pona Betania tomarabelia. Bajarapatomarata ponapona Lázaro, ponē Jesús asaēyaexana petépaenēmi. ² Bajarajota Jesús pexaejava toexanatsi canivijopijijava. Bajarajota Marta pexaejava tsanapona. Lázaro nanabaneca pamesata Jesús nanabeca. ³ Nexata María carena epatuabotellabēyota petuxujuviaceitera, nardovēnēra. Bajarapora bitso penamatamotsira. Nexata bajarapaaceitera María tsitaxuepana Jesús. Bajaraxuacujinae icatsia pematatanata taxuiquica. Daxita bo tuatuajē tuxudereecaruta. ⁴ Nexata Jesús pijajiviyajuvēnēnē, Judas Iscariote, Simón pexēnato, ponē itsamatacabi Jesús canajetsijitsiatsi pijavajabitsaē pecobeyabelia, jumaitsi:

⁵ —¿Detsa xuajitsia apo canajetsi bajarapatuxujuvira. Matamopitsipa trescientos denario. Bajarapapalata rajutsipa bepejiobivi bajarapacuenia peyavenonaenexa, jai Judas Iscariote.

⁶ Itsiata bajarapacuenia Judas apo jumaitsi pesivanajamatabēxainaxae bepejiobivi. Judas raja penacobetoxotsinē. Jesús bna pijapalatadoro pevetsiaexanaenēxatsi, Judas nacobetoxotabiabi bajarapapalatayajuvēnējava. ⁷ Nexata Jesús jumaitsi Judasjavabelia petiriva yabara:

–Copare bajarapova xanëjavabereña pexanaenexa bajarapacuenia. Itsamonae petëpaejivi batsiperabëepana petuxujuviaceitera peperabëxaniavaetsinexa pemëthëtsivajënae. Bajara pijinia pacuenia mapovaje xaniavaeta bajarapora tanetsiperabëepanaenexa, apo tëpae atanë, taneperabëxaniavaetsinexa itsamonae tanemëthëtsivajënae. Tspaji baja imoxoyo tavajënae tanemëthëtsinexa. ⁸ Daxitamatacabi raja bepejiobivi jinavanapa itsaxuayo pajinavanapame paneyvanonaenexa. Itsiata baitsi jane xanë daxitamatacabi apo ponaponanë tsane paxamëjavata, jai Jesús Judasjavabelia.

Pacuenia judíovi najamatabëxaina pebeyaxuabinexatsi Lázaro yabara pelivaisi

⁹ Ayaibitsaëtöxaneto judíovi vënëlivaisitanetsi Jesús pepatsijava Betania tomarata. Judíovi nexata ponalia Betania tomarabelia petaenexatsi Jesús. Itsiata bajarapamonae apo ponaelia petaenexa ëjesús. Ponalia petaenexanua Lázaro, ponë Jesús asaëyaexana, petëpaenëmi. ¹⁰ Nexata sacerdotevi penamatacaitorobivi daxita baja sivanajamatabëjëpa pebeyaxuabinexatsi Lázaro, Jesús yajava. ¹¹ Bajarapamonae najamatabëjëpa pebeyaxuabinexatsi Lázaro. Tspaji judíovi ayaibitsaëto natsanapona sacerdotevivecua petaxae Lázaro pi-asaëtsaponaponeajava petëpaeucujinae. Nexata bajarapajudíovi jumecovënëtaþona Jesús Dioso pexënatocuene.

Pacuenia Jesús pata Jerusalén tomarata yabara pelivaisi
(Mt 21.1-11; Mr 11.1-11; Lc 19.28-40)

¹² Jivi ayaibitsaëtöxaneto pata Jerusalén tomarata pascuafiesta petaenexa. Nexata bajarapamonae Jesús vënëlivaisitanetsi pepatsijavanexa Jerusalén tomarata. Jesús naropota Betania tomaraverena. ¹³ Nexata bajarapamonae Jesús pevajënae baxuucubaba benaxarebobaxutonë. Bajarapamonae pona baja pecopiapitsinexa Jesús. Itsa panamutoverena Jesús najetaruca, bajarapanamutuabelia bajarapamonae pona. Itsa baja bajarapamonae Jesús copiapita, bajarapamonae vavajai tsabuataponae.

–Dioso yavenonaenatsi! ¡Maponë najetarucaje, vajatuxanenë pejamatabëcueneta najetaruca Israel nacuapijivi pepo pevetsinënexa! jai tsanajetarubena bajarapamonae Jesús yabara.

¹⁴ Nexata Jesús caxitajarabaxuaba burro. Bajarapaburro Jesús jumaponatsi pepatsinexa Jerusalén tomarata. Jesús burrojumata pepatanajetarucæjavanexa Jerusalén tomarata, Dioso pejumelivaisibaxutota tajëvelia jumaiti mapacueniaje:

¹⁵ Pajerusalén tomarapijivimë, pëtsa pajunavame. Pataename pepo papecaevetsinënexa penajetarucæjava. Pejanaburroyota yapatanajetarucaena, jai tajëvelia Dioso pejumelivaisibaxutota Jesús burrojumata pepatanajetarucæjavanexa Jerusalén tomarata.

¹⁶ Itsa bajarapacuenia Jesús pata Jerusalén tomarata, copiapata jane baja pacuenia Dioso pejumelivaisibaxutota tajëvelia jumaiti Jesús yabara. Bajarapamatacabi Jesús pijajivi tae ata bajarapacueni, itsiata abaxë apo yapëtae pecopiapatsijava bajarapacueni. Matapania baja Jesús pepuaponae athëbëabetsia, Jesús pijajivi yapëtane pecopiapatsijava baja pacuenia Dioso pejumelivaisibaxutota tajëvelia jumaiti Jesús yabara.

¹⁷⁻¹⁸ Pamonae tane pamatacabi Jesús Lázaro asaëyaexana petëpaenëmi, bajarapamonae tsipaeba Jerusalén tomarapijivijavabelia. Tsipaeba pacuenia bajarapamonae tane Jesús Lázaro piasaëyaexanaejavata petëpaenëmi. Bajaraxuata jivi ayaibitsaëto pitsapa tomaravelia pecopiapitsinexatsi Jesús. ¹⁹ Nexata fariseovi itsa tane bajarapacueni, najumaiti:

–Pataema. Daxitajivi pënaponatsi Jesús. Vaxaitsi baja nexata acuenebi vajaexanaejava Jesús jivi pepënaponeajavatsi yabara, najai fariseovi.

Pacuenia Grecia nacuapijivi Jesús jamatabëtanetsi yabara pelivaisi

²⁰ Ayaibitsaëto jivi pata Jerusalén tomarata Diosojavabelia pevajëtsinexa pascuavënë fiestamatacabita. Bajarapamonaeyajuvënëvi itsamonae Grecia nacuapijivi. ²¹ Nexata Grecia nacuapijivi cujibaliatsi Felipe. Felipe Betsaida tomarapijinë. Betsaidatomara eca Galilea nacuata. Nexata Grecia nacuapijivi jumaiti Felipejavabelia:

–Felipe, pajamatabëtaniji raja Jesús, jai.

²² Felipe nexata pona Andrésjavabelia petsipaebinexa pacuenia Grecia nacuapijivi jumaiti. Nexata Felipebeje Andrésbeje ponabeje petsipaebinexabeje Jesúsjavabelia. ²³ Nexata Jesús jumaiti bajaraponëbejevavelia:

–Xanë, Daxitajivi Pematapijinë, tajamatacabi baja netocopiapata tanaviatsinexa baja athëbëabetsia ayajamatabëcuenenënë Dioso taneexanaenexa. ²⁴ Xaniajanë pacuenia pacatsipaebijitsiatsi. Trigoxuto itsa apo ubitsi irabelia, saya tsitecanuca caexutoyo. Itsiata itsa ubatsi, pejuvicujinae xutsabana vajaubixutoyomi penacopatsinexa pejanaboto. Nexata itsa nacuaita bajarapaboto, ayajava pexu capitsapa. ²⁵ Bajara pijinia itsi jivi ata. Pajivi

jamatabëjumaitsi ata tsane petëpaeyaniva: “Xanë nayajivitaeyaponaponaenajë tanebejiobi-aexanaeyaniva, tanebeyaxuabiyaniya ata,” jamatabëjai ata tsane, itsiata tēpaena. Nexata Diosovecua naxuabiana. Biji rajane pajivi nesivanajamatabëcopatsiaya jamatabëjumaitsi tsane: “Jema nebejiobiaexanaena. Jema nebeyaxuabiananua Jesús pijajivitonēxaenë,” jamatabëjai tsane, bajarapajivi xainaena matababi apo peverevereaejava. ²⁶ Pajivi jamatabënetonacueneba, bajarapajivi nepēnaponaena. Nexata pajivi netonacuenebiana, neyjavaponaponaena itsajota ponaponaenajë. Pajivi netonacuenebiana, bajarapajivi yabara taxa Dioso jumaitsi tsane: “Bajarapajivi sivajamatabëcuenebarēyanë,” jai tsane, jai Jesús Felipebeje Andrésbejejavabelia.

Pacuenia Jesús tajëvelia navajunupaeba pacuenia beyaxuabijitsiatsi yabara pelivaisi

²⁷ Jesús bēpēnēa jamatabëjumaitsi:

—Aeconoxae bitso najamatabëxainajë. ¿Detsa meta jumaitsinē tsane taxajavabelia? Jumaitsinē meta tsane: “Taxa, betajibicuenia tanebeyaxuabijavaminexa, vecuanepanepaenae,” janë meta tsane taxajavabelia. Jume raja. Bajarapacuenia meta apo vajëtsinē tsane. Tsipaji betajibicuenia tanebeyaxuabinexa, patajë mapanacuayabetsicaje, jamatabëjai Jesús.

²⁸ Nexata Jesús Diosojavabelia jumaitsi:

—Taxa, pacuenia jitsipame nexanaenexa jivi pecayiyataenexa, exanare, jai Jesús.

Nexata bajarajota Jesús jumetane athëbëvetsica ayajjume. Jumaitsitsica mapacueniaje:

—Jivi rabaja cajena neyaiyatane. Itsiata matavëjēa neyaiyataena, jaitsica.

²⁹ Jivibitsaëto bajarajota penubenaevi jumetane bajarapajume. Nexata bajarapamonae jumaitsi:

—Yamaxë raeta najumeta, jai.

Itsamonae pijinia jumaitsi:

—Angel raeta barëcuaicuajiaitsi Jesús, jai.

³⁰ Nexata Jesús jumaitsi bajarapamonaejavabelia:

—Xanë raja tajumetaenexa bajarapajume apo jumaitsitsica. Paxamë raja panejumetaenexa jumaitsitsica. ³¹ Aeconoxae rabaja copiapatsiana Dioso penaneconitsiaexanaematacabinexa daxita pijaneconi pexainaevi. Vecuaxuabiananua dovathi, ponë mapanacuata jivi itorobabiaba pibisiacuene pexanaenexa. ³² Itsa neyotarutsiana cruzajavabelia tanebeyaxuabinexa, nexata daxitajivi jitsipaeyaexanaenajë xanë tanesivanajamatabëcuene copatsinexa, jai Jesús.

³³ Bajarapacuenia Jesús tajëvelia jumaitsi jivijavabelia jivi peyapëtaenexa pacuenia Jesús tēpaejitsia. ³⁴ Nexata bajarapamonae jumaitsi Jesúsjavabelia:

—Dioso Moiséspijinëta penajumecopatsilivaisi tajëvelia jumaitsi mapacueniaje: “Cristo, ponë athëbëvetsica Dioso itorobijitsiatsica jivi pecapanepaenexa, asaë tsaponapona tsane daxitamatabijavabelianexa pevetsinexa mapanacuaje,” jai. Itsiata xamë Cristo atamë, jumaitsimë: “Xanë, Daxitajivi Pematapijinë, neyotarutsiana cruzajavabelia tanebeyaxuabinexa,” jamë. ¿Detsa nexata ponë Cristo daxita matabacijavabelianexa asaë tsaponapona tsane? jai bajarapamonae Jesúsjavabelia.

³⁵ Nexata Jesús jumaitsi bajarapamonaejavabelia:

—Imoxoyo rabaja pevajēnae taponamatacabinexa. Abaxë raja itsiata taponaponaematacabibeje, pacatsipaebianatsi pexaniajailivaisi patacjamatabëcueneitayotsinexa. Nexata itsa pacatsipaebianatsi pexaniajailivaisi, panejumecovënëtsianame paneajamatabëcueneitaquirianiva. Pajivi ajamatabëcueneitaquiri, apo xaina tsane matababi apo peverevereaejava. ³⁶ Xanë rabaja pexaniajailivaisita pacajamatabëcueneitayotsianatsi. Taponaponaematacabibeje abaxë mapanacuataje, panesivanajamatabëcopatsianame. Bajarapacuenia nexata jamatabëcueneitayotsiaya pajinavanapaenae, jai Jesús bajarapamonaejavabelia.

Bajarapacuenia pejumaitsicujinae, Jesús baja pona pevewanamatayabinexa bajarapamonae.

Pacuenia judiövi jamatabëjumaitsi Jesús yabara: “Maponëje apo Cristo, ponë copiaeveta-vanapatsi vajanacapanepaenexa,” jamatabëjai yabara pelivaisi

³⁷ Jesús ayaicuene pexanaejava Dioso pesaëta judiövi pitabarata exanapona. Judiövi tae ata bajarapacuenia, itsiata apo jumecovënëtsi Cristocuene. ³⁸ Nexata judiövi itsa apo jumecovënëtsi Cristocuene, copiapata jane baja pacuenia bajayata tajëvelia yaquina Diosojumepaebinëmi, profeta Isaiaspjinë. Judiövi Cristocuene apo pejumecovënëtsijavanexa yabara, bajayata Isaiaspjinë peyaquinaelivaisita tajëvelia jumaitsi mapacueniaje:

Dioso, patatsipaebilivaisi cajena jivi apo panejumecovënëtsi tsane. Bajarapamonae apo panejumecovënëtsi tsane,

tae ata nesaëta pinijicuene pataexanaejava, jai bajayata tajëvelia Isaíaspijinë peyaquinaelivaisita judíovi Cristocuene apo pejumecovënëtsijavanexa yabara.

³⁹ Bajaraxuata Cristo patsi ata, judíovi apn jumecovënëtsi Cristocuene. Isaíaspijinë peyaquinaelivaisita, judíovi yabara icatsia tajëvelia jumaitsi mapacueniaje:

⁴⁰ Bajarapamonae Dioso itaxutotsëcënaeyaexanaena. Ajamatabëcuenetajaya exanaenanua. Bajarapacuenia Dioso exanaena bajarapamonaejavabelia. Nexata bajarapamonae tae ata tsane pinijicuene Dioso pesaëta pexanaejava, itsiata bajarapamonae apo yapëtae tsane pajamatabëcuenelivaisi xaina petaejava. Nexata bajarapamonae Diosojavabelia apo najamatabëcuenepëñëyorotsi tsane perujumatabëcuenecua. Nexata apo jamatabëcuenexaniavaetsinë tsane,

jai bajayata tajëvelia Isaíaspijinë peyaquinaelivaisita judíovi Cristocuene apo pejumecovënëtsijavanexa yabara.

⁴¹ Bajarapacuenia Isaíaspijinë yaquina tsipaji bajayata Isaíaspijinë bemajitsinaebota tane Jesús ayaijamatabëcuenepexainenëcuenecua. Bajaraxuata bajayata Isaíaspijinë bajarapacuenia Jesús vajunupaeba baja cajena.

⁴² Itsiata judíoviyajuvënëvi ayaibitsaëto jumecovënëta Cristocuene. Judíovi pevetsivi ata jumecovënëta Cristocuene. Bajarapamonae judíovi pevetsivixae, apo navajunupaebi pejumecovënëtsijava Cristocuene. Tsipaji cjunava fariseovi. Bajarapamonae bëpënëa jamatabëjumaitsi:

—Apo navajunupaebinë tsane tajumecovënëtsijava Cristocuene tanecapitsapaeyaniva fariseovi judíovi penacaetuatabiabibovecua, jamatabëjai bëpënëa bajarapamonae.

⁴³ Tsipaji bajarapamonae jitsipa penajuaevevetsivi pesivabarëyajavatsi Dioso pesivabarëyajavatsi matatonexetsia.

Pacuenia jivi naneconitsijitsia Diosojavabelia itsa apo jumecovënëtsi Jesús petsipaebilivaisi yabara pelivaisi

⁴⁴ Jesús jumaitsi ayaijumeta jivijavabelia:

—Pajivi jumecovënëtsiana Cristocuenenë, bajarapajivi ëxanë yabara apo jumecovënëtsi tsane. Taxa, ponë nitorobica, bajaraponë yabara ata jumecovënëtsiana. ⁴⁵ Pajivi necuenyapëtaena, bajarapajivi taneitorobinëtsica ata cuenyapëtaena. ⁴⁶ Xanë rabaja pexaniajailivaisita jamatabëcuenetayotsianajë mapanacuapijivije. Nexata pajivi jumecovënëtsiana Cristocuenenë, apo ajamatabëcuenetaquiri tsane. ⁴⁷ Pajivi jumeyapëtae ata tsane tatsipaebilivaisi, itsiata itsa apo jumecovënëtsi tsane bajarapalivaisi, bajarapajivi naneconitsiana Diosojavabelia. Itsiata xanë bajarapajivi apo naneconitsiaexanaenë tsane. Tsipaji xanë apo patsinëtsica tananeconitsiaexanaenexa mapanacuapijivije. Biji rajane xanë patsicajë tacapanepaenexa mapanacuapijivije. ⁴⁸ Pajivi nenayajiviitavetsiana, apo nejumecovënëtsinua tsane tatsipaebilivaisi ata, bajarapajivi taxa Dioso naneconitsiaexanaenatsi. Bajarapajivi taxa Dioso naneconitsiaexanaena pamatacabi naneconitsiaexanaena daxita pijaneconi pexinaeavi tatsipaebilivaisi apo pejumecovënëtsixae. ⁴⁹ Tsipaji xanë tajamatabëcueneta apo paebinë bajarapalivaisi. Taxa raja, ponë nitorobica, nitoroba bajarapalivaisi jivi tatsipaebinxexa. ⁵⁰ Yapëtaniji baja cajena jivi pexinaejavanexa matacabi apo pevereverecejava itsa jumecovënëta taxa pitorobilivaisi. Nexata bajarapalivaisi itsa tsipaebaponajë jivijavabelia, tsipaebaponajë pacuenia taxa Dioso nitoroba tatsipaebinxexa, jai Jesús jivijavabelia.

13

Pacuenia Jesús beveliajamatabëcuenenë nataeya taxuquiatapona pijajivi, caenë canacujitsia, yabara pelivaisi

¹ Caematacabi baja saica pejonenexa pascuavënëfiesta. Jesús nexata yapëtane pamatacabi pijavajabitsaë beyaxuabijitsiatsi. Yapëtanenua peponaejavanexa paxa Diosojavabetsia. Jesús bitso asiva pijajivi, mapanacuapijivije. Jesús nexata bajarapamatacabi pijajivi tsitanajamatabëcuenetajëta piasivacuene.

² Jesús pijajivi barënbane caniviyopijijava. Nexata Judas Iscariote, Simón pexënato, dovathi pejamatabëcueneta najamatabëxainaeaxanatsi. Nexata Judas najamatabëxaina Jesús pecanajetsinexa pijavajabitsaë pecobeyabelia. ³ Jesús yapëtane paxa Dioso perajutsijavatsi daxitacuene pevetsinexa. Yapëtanenua paxa Diosojavavetsica pepatsijava. Icatsia pacuenia ata navitsijitsia paxa Diosojavabetsia, yapëtane. ⁴ Nexata Jesús pijajivi pebarënbanijavata, Jesús nonotapuna mesajavata. Najumajonota penaxatatsijava. Nexata toalla naepacëta. ⁵ Jesús mera epata penacobequiatsinëjavabelia petaxuquiatsinexa pijajivi. Jesús nexata beveliajamatabëcuenenë nataeya taxuquiatapona pijajivi, caenë canacujitsia. Taxuquicapona icatsia pijatoallata penaepacëtsipanata.

⁶ Itsa Jesús taxuquiatsijitsia Simón Pedro, nexata Simón Pedro jumaitsi:

—Tajatuxanenë, apo jitsipaenë tanetaxuquiatsijavamë. Tspiji ayaijamatabëcuenenëmë, jai Simón Pedro Jesúsjavabelia.

⁷Jesús nexata jumaitsi:

—Aeconoxae abaxë apo yapëtaemë pajamatabëcuene yabara cataxuquiatsijitsiatsi. Itsi-ata baitsi jane hexëajavabelia yapëtaename, jai Jesús.

⁸Nexata Pedro jumaitsi:

—Apo catonataxucopatsi tsanetsi tanetaxuquiatsinexamë, jai Pedro.

Jesús nexata jumaitsi:

—Itsa apo cataxuquiatsi tsanetsi, nexata apo tajajivitonëmë tsane, jai Jesús Pedrojavabelia.

⁹Simón Pedro nexata jumaitsi:

—Tajatuxanenë, ètaxu nexata apo netoquiatsimë tsane. Tacobe ata, tamatabocoto ata, netoquiatsianame, jai Pedro.

¹⁰Jesús nexata jumaitsi Pedrojavabelia:

—Pajivi baja navane, apo namatavenonae baja pequiatsinexatsi daxitanë. Saya namatavenona èpetaxuquiatsinexatsi. Tspiji baja daxitanë axuirajibi. Paxamë rabaja pajamatabëcuenuirajibimë. Itsiata baitsi jane apo padaxitamë, jai Jesús Pedrojavabelia.

¹¹“Pajamatabëcuenuirajibimë. Itsiata baitsi jane apo padaxitamë,” jai Jesús. Tspiji yapëthane tajëvelia ponë canajetsijitsiatsi pijavajabitsaë pecobeyabelia.

¹²Petaxuquiatsicujinae pijajivi, Jesús baja icatsia penaxatatsijava naxatata. Eca icatsia mesa muxuneneta. Jumaitsi pijajivijavabelia:

—¿Payapëtaneme tsabaja paxamë pajamatabëcuene yabara pacataxuquiatsi?

¹³“Vajanacacujarubinë,” pajamë tsabiabi itsa panabarëcuaicuajamë xanë yabara. Itsajavata: “Vajatuxanenë,” pajamë tsabiabi. Paxaniajamë rabaja cajena.

Bajara tspiji taitsinë. ¹⁴Xanë, patacacujarubinë ata, panijatuxanenë atanënuu, beveliajamatabëcuenenënë nataeya pacataxuquiatsi bepanijajivitonënëcuenia. Nexata bajarapacuenia paxamë ata beveliajamatabëcuenevi nataeya panataxuquiatabiabianame namataenetsia. ¹⁵Pacatsitaexanatsi bajarapacuenia paxamë ata bajarapacuenia namataenetsia panenatoexanaenexa. ¹⁶Xaniajanë pacuenia pacatsipaebijitsiatsi.

Paxamë cajena apo panejamatabëcuene matatoxenetsimë. Tspiji itsanë ata apo jamatabëcuenematatoxenetsi pitorobinëtsi. ¹⁷Payapëtaneme rabaja pajamatabëcuene yabara panijatuxanenë atanë, beveliajamatabëcuenenënë nataeya pacataxuquiatsi. Nexata pijinia paxamë ata bajarapacuenia beveliajamatabëcuenevi nataeya namataenetsia nasivaya itsa panayavenonabianame, pajamatabëcuenebarëyamë tsavanapae tsane, jai Jesús pijajivijavabelia.

¹⁸Icatsia Jesús jumaitsi pijajivijavabelia:

—Daxita raja itsiata apo pajamatabëcuenebarëyamë tsavanapae tsane. Tspiji caenë paxamëyajuvënënë, ponë naxaena xanëta, bajaraponë necanajetsiana tajavajabitsaë pecobeyabelia pacuenia tajëvelia jumaitsi Dioso pejumelivaisibaxutota.

Yapëtaniji ponë necanajetsijitsia. Tspiji xanë patacaitapetsivi patajajivinexamë, pacajamatabëcueneyapëtanetsi pacaenëmë canacujitsia. Nexata pacuenia tajëvelia Dioso pejumelivaisibaxutota jumaitsi xanë yabara, bajarapacuenia netocopiapatsiana.

¹⁹Pacatsipaebatsi bajarapacuenia taneexanaevajënaeya. Nexata itsa nebeyaxuabiana, panejumecovënëtsianame xanë Cristocuenenë pacuenia baja cajena pacatsipaebatsi.

²⁰Xaniajanë pacuenia pacatsipaebijitsiatsi. Pajivi copiapiatsiana taitorobinë, xanë neyjavacopiapiatsiana. Pajivi necopiapiatsiana, bajarapajivi neyjavacopiapiatsiana taxa Dioso, ponë nitorobica, jai Jesús pijajivijavabelia.

Pacuenia Jesús navajunupaeba Judas pecanajetsijavanexatsi pijavajabitsaë pecobeyabelia yabara pelivatsi

(Mt 26.20-25; Mr 14.17-21; Lc 22.21-23)

²¹Jesús pejamatabëthëtota bëpënëa bitso natsinajamatabëxaina. Nexata rovalia Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Caenë paxamëyajuvënënë necanajetsiana tajavajabitsaë pecobeyabelia, jai Jesús pijajivijavabelia.

²²Nexata Jesús pijajivi nataeyena. Tspiji apo yapëtae ponë yabara Jesús jumaitsi.

²³Jesús pijajiviyajuvënënë, caenë bitso asivaya tane. Bajaraponëbeje Jesúsbeje namuxuneni axaeyecabeje. ²⁴Nexata bajaraponë Jesúsjavabelia petoyanijobinexatsi, Simón Pedro pecobeta itorobeca.

—Yanijobare ponë yabara Jesús jumaitsi, jai tsecae Simón Pedro pecobeta.

²⁵Nexata bajaraponë natixireca. Eca bitso Jesús pemuxuneneta peyanijobinexa Jesúsjavabelia.

—Tajatuxanenē, ¿jipatsa yabara jumaitsimē? jai bajaraponē Jesúsjavabelia.

²⁶ Nexata Jesús jumaitsi pijajivitonējavabelia, bitso piasivanējavabelia:

—Ponē ra peneta panjavayo tocajabutsianajē, bajaraponē tsane, jai Jesús pijajivitonējavabelia, bitso piasivanējavabelia.

Nexata Jesús panjavayo pita. Cajabuta. Nexata jane baja rajuteta Judas Iscariote, Simón pexēnatojavabelia. ²⁷ Judas itsa pita pan, nexata bajarajota Judas dovathi tsijamatabējumuatsi. Nexata Jesús jumaitsi Judasjavabelia:

—Xua baja exanaejiitsiamē, naxanitsiayo baja exanare, jai Jesús.

²⁸ Itsiata baitsi jane pamonaē najuaxaeyena bajarapamesata, apo jumeypētae xua yabara Jesús jumaitsi Judasjavabelia. ²⁹ Judas toevetabiaba bajarapamonaē pijapalatoro. Bajaraxuata Judas yabara Jesús pijajivi jamatabējumaitsi:

—Jesús raeta itoroba Judas pecomuatsinexa vajaxaejavanexa fiestajavata. Itsa jume, itoroba meta perajutsinexa itsacuenejavaxi bepejibovijavabelia, jamatabējai Jesús pijajivi.

³⁰ Itsa baja Judas pan pita, bovecua pitsapalia vayafuabelia, meravi baja.

Pacuenia Jesús pijajivi itoroba namataenetsia penaasivatsavanapaenexa yabara pelivaisi

³¹ Pabota Jesús pijajivi barēnacaetuata, bajarapabovecua Judas pitsapalia. Nexata Judas peptsapaecujinaelia Jesús jumaitsi pijajivijavabelia:

—Aeconoxae rabaja xanē, Daxitajivi Pematapijinēnē, najamatabēcueneitajētsianajē ayaijamatabēcuene taxainaejava. Taxa Dioso ata bajarajota yajavajamatabēcueneitajētsianajē ayaijamatabēcuene pexainaejava. ³² Nexata taxa Dioso juya nejamatabēcueneitajētsiana ayaijamatabēcuene taxainaejava. Bajarapacuenē baja naxanitsiayo taxa Dioso exanaena.

³³ Bepataximē patacataevi. Bajara maapo pacayajavaponaponaetsi tsane bajayajebije. Paxamē panejaittsianame. Pacuenia jumaitsinē itsamonae judiovijavabelia, bajarapacuenia paxamējavabelia ata pacajumaitsijitsiatsi. Apo pacacājēpae tsane paneponaenexa itsabelia ponaejitsianē. ³⁴ Pacatsipaebijitsiatsi icatsia pejanalivaisi. Paexanavanapaeneme mapacueniaje. Pasivamē tsavanapae tsane itsamonae ata. Pacuenia xanē pacaasivatsi, bajarapacuenia namataenetsia panaasivamē tsavanapae tsane. ³⁵ Namataenetsia itsa panaasivamē tsavanapae tsane, nexata daxitanacuanēpijivi pacayapētaena patajajivicuenemē, jai Jesús pijajivijavabelia.

Pacuenia Jesús tajēvelia jumaitsi Pedrojavabelia: “Pedro, xamē nayavajunuaxainaname tajajivitonēcuenemē,” jai yabara pelivaisi

(Mt 26.31-35; Mr 14.27-31; Lc 22.31-34)

³⁶ Simón Pedro yanijoba Jesúsjavabelia.

—Tajatuxanenē, ¿detsa belia ponaejitsiamē? jai Pedro.

Nexata Jesús jumaitsi Pedrojavabelia:

—Itsa belia ponaejitsianē, aeconoxae apo cacajēpae tanepēnaponaeexamē. Itsiata baitsi jane itsamatacabi nepēnaponaeeneme, jai Jesús Pedrojavabelia.

³⁷ Nexata Pedro jumaitsi Jesúsjavabelia:

—Tajatuxanenē, ¿detsa xuajitsia apo necajēpae aeconoxae tacapēnaponaeenexa? Daxita pacuenia nitorobame, catonexanejitsipatsi. Nebeyaxuabijitsia ata tsipae xamē yabara, apo cacopatsi tsipaetsi, jai Pedro Jesúsjavabelia.

³⁸ Jesús nexata jumaitsi Pedrojavabelia:

—¿Xaniajamē tsaja? ¿Nacaevetsipame pecabeyaxuabinexa taneasivaxaemē? Xaniajanē pacuenia catsipaebijitsiatsi. Vacara raja pefiavivajēnaeya, nayavajunuaxainaname tajajivitonēcuenemē. “Apo yapētaenē cajena bajaraponē,” jamē tsane xanē yabara acueyabi xuabeje, jai Jesús Pedrojavabelia.

14

Pacuenia Jesús benamuto paxa Diosojavabetsia yabara pelivaisi

¹ Jesús jumaitsi pijajivijavabelia:

—Pētsa bitso panajamatabēxainame patacavecuaponaejavanexa yabara. Panajamatabēcuenecompare Diosojavabelia, xanējavaberena ata. ² Taxajavatatsia pexaniabobitsaētonē xaina panejinavanapaenexa. Itsa bajara apo itsipae, apo pacatsipaebi tsipaetsi. Nexata bajarabetsia ponaejitsianē patacatsivajēnaexaniavaetsinexa itsajota papatsijitsiamē. ³ Xanē taponaeucujinae mavetsiaje, itsa baja veretsianajē patacatsivajēnaexaniavaetsijava itsajota papatsijitsiamē, icatsia patsianicajē patacacaponaenexatsia jane baja. Nexata bajarajotatsia pacayajavaecaenatsi, itsajota ecaenajē. ⁴ Paxamē baja payapētaneme itsabelia ponaejitsianē. Payapētanemenua baja panepatsinexa itsajotatsia ecaejitsianē, jai Jesús pijajivijavabelia.

⁵ Nexata Tomás, Jesús pijajivitonë, jumaitsi:

—Tajatuxanenë, apo payapëtaenë cajena itsabelia ponaejitsiamë. ¿Detsa nexata pacuenia payapëtaenajë namuto pataponaenexa itsabelia ponaejitsiamë? jai Tomás Jesúsjavabelia.

⁶ Jesús nexata jumaitsi:

—Xanë rabaja benamutonë. Tspaji xanë tjamatabëcueneta jivi panepaena athëbëbetsia. Xanë rabaja pepe pexaniajailivaisi jivi tatsipaebaponaenë. Xanë rabaja xainajë matacabi apo peverevereceaajava tarajutsinexa pamonaë nesivanajamatabëcopata. Itsajivi ata apo patsicapanepe tsane taxajavabetsia xanë itsa apo nejumecovënëtsi. ⁷ Paxamë picani bajayata apo paneyapëtaemë. Nexata picani taxa ata apo payapëtaemë. Aeconoxae rabaja paneyapëtaneme. Nexata baja taxa ata payapëtaneme. Patanemenua baja, jai Jesús.

⁸ Nexata Felipe jumaitsi Jesúsjavabelia:

—Tajatuxanenë, panetsitajëre axa. Pajitsipajë baja cajena bitso axa patataenexa, jai Felipe Jesúsjavabelia.

⁹ Jesús nexata jumaitsi:

—Felipe, bajayajebi rabaja pacayajavaponaponatsi. ¿Itsia tsaja abaxë xaniavaetsia apo paneyapëtaemë? Pajivi netane, bajarapajivi taxa ata tane. ¿Detsa xuajitsia nexata nevajëcama taxa netaenexa? ¹⁰ Taxa baja cajena neyjavaponapona. Xanë ata taxa yajavaponaponajë. ¿Abaxë tsaja apo jumecovënëtsimë? Palivaisi pacatsipaebatsi, tjamatabëcueneta baja cajena bajarapalivaisi apo pacatsipaebitsi. Taxa raja, ponë neyjavaponapona, bajaraponë pejamatabëcueneta bajarapalivaisi neyapëtaeyaxana. Nexata bajarapalivaisi pacatsipaebatsi. ¹¹ Panejumecovënëre taxa tayjavaponaponaejava. Panejumecovënërenua taxa ata tanejavaponaponaejava. Patacatsipaebilivaisianë apo panejumecovënëtsi atamë, itsiata ayaiucuen Dioso pesaëta taexanaexae, panejumecovënëre taxa tayjavaponaponaejava. ¹² Xaniajanë pacuenia pacatsipaebijitsiatsi. Pajivi nejumecovënëtsiana, bajarapajivi exanaena pacuenia xanë exanjë. Ayaiucuen taexanaejava matatoxenetsia bajarapajivi exanaena. Tspaji xanë navitsianiajë taxajavabetsia. ¹³⁻¹⁴ Daxita xua xanë tavënëta pavajëtsianame taxajavabelia, pacatoexanaenatsi cajena. Xanë, Dioso pexënatonë, bajarapacuenia pacatoexanaenatsi taxajavabelia panejamatabëcuenëbarëyanexa, jai Jesús pijajivijavabelia.

Pacuenia Jesús najumecapanepaeya jumaitsi pitorobinexatsica Espiritu Santo jivijavabetsia yabara pelivaisi

¹⁵ Icatsia Jesús jumaitsi pijajivijavabelia:

—Itsa paneasivamë, paexanabiabianame pacuenia pacaitorobatsi. ¹⁶ Vajëtsianajë taxajavabelia itsanë juya papecatoitorobinexatsica papecayavenonaenënexa daxitamatacabijavabelianexa. Bajaraponë Espiritu Santo. ¹⁷ Espiritu Santo cajena pepe pexaniajailivaisi jivi peyapëtaeyaxanaenë. Bajaraponë mapanacuapijivi abaxë apo tsijamatibëceaetsi. Tspaji bajarapamonaë apo nejumecovënëtsi. Nexata apo yapëtae ponë Espiritu Santo. Apo yapëtaenua cajena Espiritu peponaponaejava ata. Itsiata baitsi jane paxamë Espiritu Santo payapëtaneme baja. Tspaji baja bajaraponë pacayajavaponapona. Espiritu Santo cajena pacatsijamatabëceaena daxitamatacabijavabelianexa. ¹⁸ Ponaë atanë tsane taxajavabetsia, itsiata apo pacaxuabi tsanetsi. Icatsia raja patsianicajë patacayajavaponaponaejava. ¹⁹ Caematacabibejecujinae baja jivi apo netae tsane. Itsiata icatsia paxamë panetaeneme. Paxamë paxainaname matacabi apo peverevereceaajava. Tspaji tatëpaecujinae icatsia asaënë tsaponaponae tsane. ²⁰ Pamatacabi Espiritu Santo patsianica paxamëjavabetsica, bajarapamatacabi payapëtaeneme taxa tayjavaponaponaejavaxana. Payapëtaenamenua pataneyajavajinavanapaejavaxamë. Payapëtaenamenua xanë ata patacayajavaponaponaejavaxana. ²¹ Pajivi yapëtane, taitorobucuenia nejumecovënëtanua, bajarapajivi niasiva. Pajivi niasiva, bajarapajivi taxa juya asivatsi. Xanë ata bajarapajivi asivanë. Tsitanaitajëtsianajë bajarapajivijavabelia, jai Jesús pijajivijavabelia.

²² Itsanë Judasvënënë, itsiata apo Judas Iscariote, jumaitsi Jesúsjavabelia:

—Tajatuxanenë, ¿detsa xuajitsia ëpaxanë panetsitanaitajëtsianame? ¿Detsa xuajitsia apo tsitanaitajëtsimë tsane itsamonaejavabelia? jai Judas Jesúsjavabelia.

²³ Jesús nexata jumaitsi Judasjavabelia:

—Pajivi niasiva tsane, nejumecovënëtsiananua tatsipaebilivaisi, bajarapajivi juya taxa asiva tsanetsi. Nexata paxanëbeje, taxabeje, bajarapajivi payajavaponaejavabeje. ²⁴ Pajivi apo niasiva tsane, bajarapajivi apo nejumecovënëtsinua tsane tatsipaebilivaisi. Xanë palivaisi pacatsipaebaponaenatsi, xanë raja apo tajumelivaisi. Taxa raja, ponë nitorobica, pejumelivaisi, jai Jesús Judasjavabelia.

²⁵ Icatsia Jesús jumaitsi pijajivijavabelia:

—Abaxë patacayajavaponaponaeepato pacatsipaebijitsiatsi mapacueniaje. ²⁶ Taxa tjamatabëcueneta, Espiritu Santo pacatoitorobianica papecayavenonabiabinexa. Nexata

Espíritu Santo pacayapëtaeayaexanaena daxitacuene. Pacanamatabënapitsiaexanaenanua daxita palivaisi pacatsipaebaponatsi, jai Jesús.

²⁷ Icatsia Jesús jumaitsi pijajivijavabelia:

–Pacanapëjibatsi jamatabëcuene xanepanaeya. Pacajamatabëcuene barëyayaexanaenatsi. Bajarapajamatabëcuene barëyajava, apo jëpae mapanacuata pebarëyajava. Nexata bepïjia apo verevercae tsane paxamë panejamatabëcuene barëyajava. Pëtsa pajamatabëcuene bëjamë. Pëtsa pacujunavamenua itsacuene ata. ²⁸ Panejumetaneme rabaja patacajumaitsijava mapacueniaje: “Xanë baja ponaenajë taxajavabetsia. Itsiata baitsi jane icatsia pacasivapatsianicatsi,” patacajajava. Itsa bitso panejitsipaejitsipame, nexata pasivajamatabëcuene barëyamë tsipae taponaejavanexa taxajavabetsia. Tsipaji taxa nevecuaayajamatabëcuenenë. ²⁹ Bajarapacuenia pacajumaitsitsi taponaevajënaeya. Nexata itsa copiapatsiana patacajumaitsicovëya, panejumecovënëtsianame Dioso pexënatocuenenë, jai Jesús pijajivijavabelia.

³⁰ Icatsia Jesús jumaitsi pijajivijavabelia:

–Apo necuene caëjëpae rabaja pematatsënëa livaisi patacatsipaebaponaenexa. Tsipaji rabaja imoxoyo dovathi najetaruca, ponë mapanacuapijivi pijatuxanenë. Itsiata baitsi jane bajaraponë apo caëjëpaetsi xanë taneitorobinexa tatoexanaenexa pacuenia picani bajaraponë jitsipa. Apo caëjëpaetsinua taneitsacueniabinexa. ³¹ Biji rajane pacuenia taxa nitoroba tatoexanaenexa, bajarapacuenia exanaenajë. Nexata daxita mapanacuapijivije yapëtaena taxa tasivajava. Panonobapunare. Ponatsi baja mapacovëvecuaje, jai Jesús pijajivijavabelia.

15

Pacuenia Jesús bepeubinae yabara pelivaisi

¹⁻² Jesús jumaitsi comparacióncuenia pijajivijavabelia:

–Xanë rabaja bepexaniaviriauvanaenë. Nexata paxamë patajajivimë, bepatamaxëranamë. Pacuenia peubijava pevetsinë xaniavaetsia eveta, bajara pijinia pacuenia taxa nacaeveta. Nexata pacuenia peubijava pevetsinë vecuacuaba pibisiamaxëranaxi, penacopatsinexa ëpexaniamaxëranë, bajara itsi taxa. Nexata pacuene taxa apo pacatojitsipae, pacavecuajibiaexanaponaena. Nexata pacuenia taxa Dioso pacatojitsipae, panevajënaeyabelia paexanavanapaename. ³ Paxamë rabaja panejumecovënëtame patacatsipaebillivaisi. Bajaraxuata taxa baja pacavecuaxuaba pibisijamatabëcuenemi. ⁴ Paxamë paneyajavajinavanapaename. Nexata xanë ata pacayajavaponaponaenatsi. Pamaxërana apo tabunucae tsipae pepo naejavabelia, apo nacuaitsi tsipae. Bajara pijinia pacuenia paxamë ata paitsimë tsipae itsa apo paneyajavajinavanapaemë tsipae. Xaniavaetsia apo pajinavanapaemë tsipae, jai Jesús pijajivijavabelia.

⁵ Icatsia Jesús jumaitsi pijajivijavabelia:

–Xanë rabaja beuvanaenë. Paxamë nexata bepatamaxërananëmë. Nexata pajivi neyjavaponaponaena, xanë ata pijinia bajarapajivi yajavaponaponaenajë. Bajarapajivi exanabiiana bitso Dioso pejitsipaecuenia. Itsa apo paneyajavajinavanapaemë tsipae, nexata apo pacacaëjëpae tsipae panijacuata pexaniacuene paneexanaenexa. ⁶ Peubijava pevetsinë, piabejemaxëranaxi caucuba penacopatsinexa ëpexaniamaxërananë. Bajaraxuacujinae bajarapamaxëranaxi xuaba. Nexata baja itsa niona bajarapamaxëranaxi, caetuata pexuabinexa isotojavabelia. Bajara pijinia pacuenia taxa Dioso exanaenatsi pamonae apo neyjavajinavanapae tsane, jai Jesús pijajivijavabelia.

⁷ Icatsia Jesús jumaitsi:

–Itsa paxamë tsitecaeya panejumecovënëtavapanapae name, nexata apo panacofënëtsimë tsane patacatsipaebillivaisi. Nexata panevajëtabiabianame xua pajitsipame. Nexata pacarajutsianatsi xua panevajëtamë. ⁸ Itsa paxamë jivi patsitaexanavanapaename taxa Dioso pejitsipaecuenia, jivi yayataenatsi taxa. Nexata daxitajivi paxamë yabara jumai tsane: “Xaniajai rabaja. Bajarapamonae pepacuenie Jesús pijajivi,” jai tsane. ⁹ Pacuenia taxa niasiva, bajara pijinia pacuenia xanë ata pacaasivatsi. Tsiteca paexanavanapaename xua pacaitorobatsi. Tsipaji bitso pacaasivatsi. ¹⁰ Taxa niasiva. Tsipaji baja jumecovënëtajë taneitorobicuenia. Nexata yapëtaniji taxa taneasivajava. Bajara pijinia pacuenia paxamë ata itsa panejumecovënëtavapanapae name pacuenia pacaitorobatsi, nexata payapëtaename patacasivajava, jai Jesús pijajivijavabelia.

¹¹ Icatsia Jesús jumaitsi pijajivijavabelia:

–Xanë bitso jamatabëcuene barëyanë. Nexata pacatsipaebatsi paxamë ata panejamatabëcuene barëyanexa pacuenia xanë jamatabëcuene barëyanë. Pacatojitsipatsi bitso panejamatabëcuene barëya tsavanapaneexa. ¹² Mapacuenia paexanavanapaenameje. Pacuenia

xanē pacaasivatsi, bajara pijinia pacuenia paxamē ata namataenetsia panaasivamē tsa-
vanapae tsane pacanenēm canacujitsia. ¹³ Pajivi peyapētaejivitsi bitso asiva, jamatabēcuene
yavenonabiabijitsipa daxitacuene yabara. Peyapētaejivitsi pijaneconi yabara ata, yapī-
jivinabeyaxuabiaexanaejitsipa. Nexata bajarapacuenia daxitajivi yapētaejitsipa pepacu-
jiru bajarapajivi bitso piasivajava peyapētaejivitsi. Bajarapacuenia yapijivinabeyaxuabia
exanaejitsipa bitso piasivaxae peyapētaejivitsi. Nexata baja pematatsēnēa itsajivi ata
apo caējēpaetsi bajarapacuenia pexanaejivi matatoxenetsia piasivanexa peyapētaejivitsi.
¹⁴ Itsa paexanavanapaename patacaitorobicuenia, nexata baja patajamaenamē tsane.
¹⁵ Aeconoxae baja cajena saya bepatajajivicueniamē apo pacataetsi. Bepatajamaenamē
baja bitso pacatanetsi. Tspaji baja pacayapētaeyaxanatsi daxita pacuenia taxa nitoroba
taexanaenexa. Tspaji mapanacuata petuxanenē pijajivi apo yapētaeyaxanae daxita
pacuenia petuxanenē exanaejitsia. ¹⁶ Paxamē raja apo panejunatsimē. Biji rajane
xanē pacajunatatsi patanepēnāponaenamē. Nexata xanē pacaitorobatsi paneexanavana-
pānēxa Dioso pejitsipaecuenia. Nexata xua paexanavanapaename, apo pevereceaje-
vanexa tsane. Daxita pacuene tavēnēta pavajētsianame taxa Diosojavabelia, pacarajutsiana
cajena. ¹⁷ Mara pacuene paneexanaenexa pacaitorobatsije. Namataenetsia panaasivamē
tsavanapae tsane pacanenēm canacujitsia, jai Jesús pijajivijavabelia.

Pacuenia Jesús pijajivi mapanacuapijivi itoyajitsiatsi yabara pelivaisi

¹⁸ Jesús icatsia tajēvelia jumaitsi pijajivijavabelia:

—Mapanacuapijivi, Dioso apo pejumecovēnētsivi, itsa pacaitoya tsane, panaja-
matabēnapitsianame xanē copiaya taneitoyajava bajarapamonae. ¹⁹ Mapanacuapijivi,
pamonae Dioso apo pejumecovēnētsivi, namataenetsia nasiva tsavanapae. Paxamē
ata bajarapamonae itsa pajamatabēcuenejēpa vanapaejitsipame, nexata paxamē
ata bajarapamonae pacaasiva tsipae. Itsiata baitsi jane xanē baja pacajunatatsi
bajarapamonaevecua. Nexata baja paxamē apo pajamatabēcuenejēpaemē bajarapamonae.
Bajaraxuata pacaitoya tsane bajarapamonae. ²⁰ Panajamatabēnapitabiabianame
najumecapanepaeya patacajumaitsiyava: “Itsanē ata apo jamatabēcuenematatoxenetsi
pijatuxanenē,” patacajajava. Nebejiobiaexana itsamonae. Nexata paxamē ata itsamonae
pacabejiobiaexanaena. Itsamonae nejumecovēnēta tatsipaebilivaisi. Nexata pijinia
paxamē ata itsamonae pacajumecovēnētsiana panetsipaebilivaisi. ²¹ Bajarapacuenia
pacaexanaena mapanacuapijivije xanē patajajivixaemē. Tspaji bajarapamonae apo
yapētae Dioso, ponē nitorobica, jai Jesús tajēvelia pijajivijavabelia.

²² Icatsia Jesús jumaitsi pijajivijavabelia:

—Xanē ita apo patsinētsica tsipae mapanacuayabetsicaje, mapanacuapijivi apo
naneconitsi tsipae Diosojavabelia. Tspaji bajarapamonae Dioso apo peyapētaexae,
pibisiacuene exanaejitsipa. Nexata xanē tapatsixaetsica mapanacuayabetsicaje,
bajarapamonae yapētae baja Dioso. Nexata bajarapamonae yapētae ata Dioso,
pibisiacuene pexanaexae, nexata naneconita Diosojavabelia. Nexata acunēbi
bajarapamonae pejumaitsiyava pibisiacuene pexanaejava yabara: “Apo tayapētaexae
Dioso, pibisiacuene exanaej,” pejaiyava. ²³ Nexata pamonae nitoya, bajarapamonae taxa
ata itoya. ²⁴ Bajarapamonaejavata Dioso pesaēta pinijicuene taexanaejava exanabiabajē.
Bajaraxua itsajivi ata apo exanae mapanacuata. Bajarapamonaejavata pinijicuene
taexanaejava ita apo exanaenē tsipae, apo naneconitsi tsipae Diosojavabelia. Tspaji
bajarapamonae apo yapētae tsipae Dioso. Bajarapamonae taē ata Dioso pesaēta
pinijicuene taexanaejava, itsiata apo nejumecovēnētsi. Bajarapamonae nitoya. Taxa
ata itoya. Nexata naneconita Diosojavabelia. ²⁵ Bajarapacuenia nitoya tspaji baja cajena
bajayata tajēvelia bajarapamonae taneitoyajavanexa yabara, Dioso pejumelivaisibaxutota
jumaitsi mapacueniajē: “Nitoya tsane bajarapamonae, ajibi taneyabaraitoyajava ata,” jai
tajēvelia Dioso pejumelivaisibaxutota xanē yabara, jai Jesús pijajivijavabelia.

²⁶ Icatsia Jesús jumaitsi pijajivijavabelia:

—Vajētsianajē taxajavabelia pitorobinexatsica Espiritu Santo, pexaniajailivaisi pepae-
binēnēxa. Itsa patsianica Espiritu Santo taxajavavetsica, nexata pacayavenonaena. Paca-
jamatabēcuene asaēyaexanaenanua. Espiritu Santo xanē nevajunupaebiana xaniavaetsia.
²⁷ Paxamē baja cajena tataxuxubijavaveliacujinae jivi livaisi tatsipaebijava, paneyajava-
jinavanapame. Bajaraxuata paxamē ata xaniavaetsia panevajunupaebianame, jai Jesús
pijajivijavabelia.

16

¹ Icatsia Jesús jumaitsi pijajivijavabelia:

—Bajarapacuenia pacatsipaebatsi panecopabianiva patanejumecovēnētsilivaisimē.
² Paxamē papacaitoyavi, pacacapitsapabianiana judiōvi penacaetuatabihibovecua. Belia

jane baja itsamatacabijavabelia pacabeyejebiana. Nexata pamonaē pacabeyejebiana, jamatabēcuenenavēxaniabiaya jumaiti tsane: “Dioso pejitsipacuenia tobeyejebajē mapamonaē,” jai tsane. ³ Bajarapamonaē xanē apo neyapētaē. Apo yapētaē cajena taxa ata. Bajaraxuata bajarapacuenia pacaexanaena. ⁴ Bajarapacuenia tajēvelia pacatsipaebatsi baja cajena. Nexata jane baja pamatacabi pacatsipsiana bajarapacuenē, panajamatabēnapitsianame pacuenia baja cajena tajēvelia pacatsipaebatsi, jai Jesūs pijajivijavabelia.

Pacuenia Espiritu Santo exanaejitsia jivijavabelia yabara pelivaisi

Icatsia Jesūs jumaiti pijajivijavabelia:

–Tataxuxuabijavaveliacujinaē jivi livaisi tatsipaebijava, abaxē apo pacatsipaebitsi macpacuene yabaraje. Bajarapacuenia apo pacatsipaebitsi tsipaji abaxē pacayajavaponaponatsi. ⁵ Itsiata baitsi jane aeconoxae baja payapētaē atamē tanaviatsijavanexa taneitorobinējavabetsia, itsanē ata paxamēyajuvenēnē apo neyanijobi. “¿Detsa belia ponaējitsiamē?” apo nejai. ⁶ Pacanavajunupaebatsi baja cajena tanaviatsijavanexa. Bajaraxuata bitso panajamatabēxainame. ⁷ Palivaisi aeconoxae pacatsipaebijitsiatsi, pexaniajailivaisi cajena. Pacatoxanepanaena itsa baja pacavecuaponaenatsi. Itsa apo pacavecuaponaē tsipaetsi, apo pacatopatsitsica tsipae Espiritu Santo papecayajavaponaponanexa. Espiritu Santo pacayavenonabiabiana. Pacajamatabēcuene asaēyaexanaenanua. Itsa ponaenajē taxajavabetsia, nexata Espiritu Santo pacatoitorobianicatsi. ⁸ Nexata Espiritu Santo patsianica. Nexata Espiritu Santo pejamatabēcuenetjailivaisi cajena. Pacatoxanepanaena itsa baja pacavecuaponaenatsi. Itsa apo pacavecuaponaē tsipaetsi, apo pa, pamonaē Dioso apo pejumecovēnētsivi, nacueneyapētaena pibisiacuene pexanaejava. Yapētaenanua pacuene xanepana pexanavanapaxena Dioso pitabarata. Yapētaenanua pacuenia Dioso naneconitsiaexanaejitsiatsi bajarapamonaē pibisiacuene pexanaecononi yabara. ⁹ Espiritu Santo pejamatabēcueneta, bajarapamonaē nacueneyapētaena pibisiacuene pexanaevicuene. Tsi-paji xanē bajarapamonaē apo nejumecovēnētsi pibisiacuene pexanaecononi tavecuajibiaexanaejavanexa. ¹⁰ Nexata Espiritu Santo pejamatabēcueneta, bajarapamonaē yapētaena pacuene xanepana pexanavanapaxena Dioso pitabarata. Tsi-paji baja xanē naviat-sianajē taxajavabetsia. Nexata baja bajarapamonaē pematatsēnēa apo netae tsane. ¹¹ Bajarapamonaē Espiritu Santo pejamatabēcueneta, yapētaena pacuenia Dioso naneconitsiaexanaejitsia daxita pamonaē pibisiacuene pexanaevi dovathi pejamatabēcueneta. Tsi-paji Dioso naneconitsiaexanaena dovathi, ponē mapanacuapijivi itorobabiaba pibisiacuene pexanaenexa, jai Jesūs pijajivijavabelia.

¹² Icatsia Jesūs jumaiti pijajivijavabelia:

–Ayailivaisi picani abaxē xainajē patacatsipaebinexa. Itsiata baitsi jane abaxē apo pacajamatabēcuenecaējēpae bajarapalivaisi panejumeyapētaenexa. ¹³ Matapania pamatacabi patsianica Espiritu Santo, ponē pexaniajailivaisi pepaebinē, bajaraponē pacayapētaēyaexanaena daxita pexaniajailivaisi. Espiritu Santo raja apo pacayapētaēyaexanaē tsane saicaya pejamatabēcuenejilivaisi. Daxita raja pacuenia taxa Dioso jumaiti, juya Espiritu Santo pacayapētaēyaexanaena. Nexata tajēvelia Espiritu Santo pacayapētaēyaexanaena pacuene pevajēnaeyabelia copiapataponaejitsia. ¹⁴ Espiritu Santo pejamatabēcueneta jivi neyayataena. Tsi-paji xanē talivaisi, pexaniajailivaisi, Espiritu Santo pacayapētaēyaexanaena. ¹⁵ Daxita taxa pexanaejava, xanē ata rabaja tajajava. Bajaraxuata pacajumaititsi: “Xanē talivaisi, pexaniajailivaisi, Espiritu Santo pacayapētaēyaexanaena,” pacajaitsi, jai Jesūs pijajivijavabelia.

Pacuenia bepejamatabēcuenejivimi jamatabēcuenebarēyajitsia yabara pelivaisi

¹⁶ Icatsia Jesūs jumaiti pijajivijavabelia:

–Caematacabibejucujinaē rabaja apo panetaemē tsane. Itsiata icatsia itsamatacabibejucujinaē panetaename. Bajara jane xuacujinaē ponaenajē baja taxajavabetsia, jai Jesūs.

¹⁷ Nexata pijajiviyajuvenēvi nayanijoba epamonaē.

–¿Detsa majumaiti pajumeje? Jesūs nacajumaiti: “Caematacabibejucujinaē rabaja apo panetaemē tsane. Itsiata icatsia itsamatacabibejucujinaē panetaename. Bajara jane xuacujinaē ponaenajē baja taxajavabetsia,” nacajai. ¹⁸ ¿De tsaeta pejumaitisijume? “Caematacabibejucujinaē rabaja apo panetaemē tsane. Itsiata icatsia itsamatacabibejucujinaē panetaename,” nacajai? Apo jumeyapētaetsi cajena xua yabara nacajumaiti, najai Jesūs pijajivi.

¹⁹ Jesūs jamatabēcueneypētane pacuenia picani pijajivi jamatabēyanijobatsi. Nexata Jesūs tajēvelia jumaiti pijajivijavabelia:

–Pacajumaititsi mapacueniaje: “Caematacabibejucujinaē rabaja apo panetaemē tsane. Itsiata icatsia itsamatacabibejucujinaē panetaename,” pacajaitsi. ¿Baja tsa pajume yabara panayanijobame? ²⁰ Xaniajanē pacuenia pacatsipaebijitsiatsi. Xanē itsa tēpaenajē, paxamē

panuename. Bitso xanëjitsia panajamatabëxainae. Itsiata baitsi jane pamonaē apo ne-jumecovënëtsi, barëya tsane tatëpaejava yabara. Itsiata baitsi jane xuacujinae paxamë icatsia bitso panesivajamatabëcuenebarëyamë tsane itsa panetaename icatsia. ²¹ Pamatacabi petiriva vixae notatsi penacueto pevecuanaexanaenexatsi, bitso bayanajamatabëxaina. Itsiata penacueto pevecuanaexanaecujinaetsi, pevixae apo najamatabënapitsi. Panacueto baja vecuanaexanatsi, sivajamatabëcuenebarëya. ²² Bajara pijinja pacuenia paxamë ata bitso panajamatabëxainae itsa tēpaenajë. Itsiata icatsia itsa panetaename, bitso panesivajamatabëcuenebarëyamë tsane. Nexata itsajivi ata apo caëjēpaetsi tsane papecavecuajibiaexanaenexa panejamatabëcuenebarëyajava, jai Jesús pijajivijavabelia.

²³ Icatsia Jesús jumaitsi pijajivijavabelia:

—Pamamatacabi icatsia panetaename, apo paneyanijobimë baja tsane itsacuenejavayo ata. Tsipaji baja Espiritu Santo pacayapëtaeayaexanaena daxitacuene. Xaniajanë pacuenia patsipaebijitsiatsi. Taxa pacarajutsiana daxita xua tavënëta pavajëtabiabianame taxajavabelia. ²⁴ Abaxë tavënëta taxajavabelia apo pavajëtsimë itsacuenejavayo ata. Aeconoxae rajane baja tavënëta taxajavabelia pavajëtabiabianame. Nexata taxa itsa pacarajutsiana xua pavajëtsianame, bitso pajamatabëcuenebarëyamë tsane taxajavabelia, jai Jesús pijajivijavabelia.

Pacuenia Jesús jamatabëcueneamoneyaba dovathi, ponë itorobabiaba mapanacuapijivije pibisiacuene pexanaenexa, yabara pelivaisi

²⁵ Icatsia Jesús jumaitsi pijajivijavabelia:

—Palivaisi baja pacatsipaebabiabatsi, najumematayatsiaya pacatsipaebabiabatsi. Itsiata itsamatacabi livaisi apo pacatsipaebi tsanetsi najumematayatsiaya. Biji rajane pacatsipaebianatsi jumenapebetsiaya taxa pelivaisi. ²⁶ Bajarapamatacabi paxamë baja taxajavabelia pavajëtabiabianame tavënëta. Nexata baja xanë apo patacatovajëtabiabi tsanetsi taxajavabelia. ²⁷ Paxamë paneasivamë. Panejumecovënëtamenu taxa taneitorobinëcuenetsica. Bajaraxuata paxamë taxa pacaasiva. Nexata panijacuata taxajavabelia itsa pavajëtabiabianame, taxa pacajumetaena. ²⁸ Xanë baja cajena ponaponajë taxajavatatsi. Nexata taxajavavetsica ponajë tapatsinexa mapanacuayabetsicaje. Nexata icatsia ponaenajë mapanacuavecuaje. Naviatnianijë baja taxajavabetsi, jai Jesús pijajivijavabelia.

²⁹ Nexata Jesús pijajivi jumaitsi:

—Baja rajane jumenapebetsiaya panetsipaebame. Najumematayatsia baja apo panetsipaebimë. ³⁰ Nexata baja pacajamatabëcueneypëtanetsi daxitacuene neypëtaenëcuene. Xamë panejamatabëcueneypëtaneme palivaisi picani jamatabëpacayanijobatsi. Bajaraxuata pacajumecovënëtsi baja Dioso athëbëvetsica pecaitorobinëcuenetsica, jai Jesús pijajivi.

³¹ Jesús nexata jumaitsi pijajivijavabelia:

—¿Nexata tsabaja aeconoxae panejumecovënëtamē taxa Dioso athëbëvetsica taneitorobinëcuenetsica? ³² Imoxoyo rabaja pevajënae panenacayatsinexa panenaviabinexa panijabonëjavabelia. Paxamë panexuabanutsianame caenëñë. Itsiata baitsi jane apo caenëñë tsane. Tsipaji taxa yjavaponaponajë. ³³ Bajarapacuene tajëvelia paneyapëtaenexa, pacatsipaebabiabatsi baja cajena. Nexata xanëjavaberena panenajamatabëcueneocopatsixae, ajunavijibia pajinavanapaename. Mapanacuata panejinavanapaepato mapanacuapijivije pacabejiobiaexanabiabiana. Itsiata pajamatabëcuensaemë tsavanapae tsane. Xanë rabaja jamatabëcueneamoneyabajë dovathi, ponë itorobabiaba mapanacuapijivije pibisiacuene pexanaenexa, jai Jesús pijajivijavabelia.

17

Pacuenia Jesús pijajivi tovajëta paxa Diosojavabelia yabara pelivaisi

¹ Jesús dovathi pejamatabëcueneamoneyabijava pijajivijavabelia petsipaebicujinae, Jesús athëbëa bnaëcotsia. Nexata jumaitsi paxa Diosojavabelia:

—Taxa, netocopiapata rajane baja daxita pacuenia netocopatame. Tsitajëre jivi pacuenia xanë nexënatoxaenë, bitso ayajamatabëcuenenëñë. Bajarapacuenia itsa tsitajëtsianame, nexata jivi yapëtaena pacuenia xamë Diosomë bitso ayajamatabëcuenenëmë. ² Xamë rabaja netocopatame daxitajivi taevetsinexa. Nexata necaëjēpa tarajutsinexa matabacabi apo peverevereaejava daxita pamonaē nerajutame. ³ Matabacabi apo peverevereaejava pexainaevinexa, cayapëtae baja caenëmë pepo Diosonëcuenemë. Bajarapamonae neypëtanenua baja Jesucristonë athëbëvetsica taneitorobinëmëtsica, jai Jesús paxa Diosojavabelia.

⁴ Icatsia Jesús jumaitsi paxa Diosojavabelia:

—Xanë rabaja mapanacuapijivjavabeliaje, apo pecajumecovënëtsivijavabelia, cajamatabëcueneitajëtatsi bitso ayaijamatabëcuene nexainaejava. Veretajënuu baja daxita xua nitorobame tacatoexanaenexa. ⁵ Taxa, pamatacabi abaxë ajibi mapanacuaje, itsa cayajavaponaponatsi, necotia yajavaponaponajë ayaijamatabëcueneixæenë. Bajarapacuenia icatsia aeconoxae ata netocopatsianame vajanajuavevaponaponæenexabeje daxitacuene, jai Jesús paxa Diosojavabelia.

⁶ Icatsia Jesús jumaitsi paxa Diosojavabelia:

—Xamë itapetame itsamonæ mapanacuataje tanesivanajamatabëcopatsinexa. Xanë nexata yapëtaeyæxanajë bajarapamonæ pacuenia jamatabëcueneitsimë. Bajarapamonæ nijajivi nerajutame. Xaniavaetsia cajumecovënëta nijumelivaisi. ⁷ Aeconoxæ baja bajarapamonæ nijajivi yapëtane xamë nejamatabëcueneta taexanaponæjava daxita xuanë exanaponajë. ⁸ Daxita palivaisi netsipaebame, xanë juya bajarapalivaisi tsipaebajë bajarapamonæ. Nexata nejumecovënëta. Nexata yapëtane bajarapamonæ pepacuene tapatsijava xamëjavavetsica. Nejumecovënëta xamë athëbëvetsica taneitorobinëcuenemëtsica, jai Jesús paxa Diosojavabelia.

⁹ Icatsia Jesús jumaitsi paxa Diosojavabelia:

—Cavajëtatsi bajarapamonæenexa. Apo cavajëtsitsi raja apo pecajumecovënëtsivinexa. Cavajëtatsi raja tanerajutsivimëenexa. ¹⁰ Daxita pamonæ nijajivi, bajarapamonæ xanë ata tajajivi. Daxita pamonæ tajajivi, bajarapamonæ xamë ata nijajivi. Daxitajivi neyapëtane ayaijamatabëcuene taxainæjava. Tsipaji tajajivi xaniavaetsia netojinavanapa, jai Jesús paxa Diosojavabelia.

¹¹ Icatsia Jesús jumaitsi paxa Diosojavabelia:

—Xanë baja apo ponaponæenë tsane mapanacuataje. Tsipaji baja ponaæjitsianë xamëjavabetsia. Itsiata baitsi jane tajajivi jinavanapaena abaxë mapanacuataje. Taxamë, bitso nianeconijibinë. Tanerajutsivimë nesaëta evetsianame pibisiacuenevecua. Vaxaitsibeje caejamatabëcuene xainatsibeje. Nexata bajarapamonæ ata tojitsipajë caejamatabëcuene pexainæenexa. Pacuenia vaxaitsibeje jamatabëcueneitsibeje, bajara pejamatabëcueneitsinexa. ¹² Itsa abaxë yajavaponaponajë bajarapamonæ mapanacuataje, nesaëta evetaponaponajë. Nexata apo nevecuanaxuabi daxita. Caenë saya nevecuanaxuabiana. Bajaraponë nevecuanaxuabiana tsipaji tocopiapatsianatsi pacuenia baja cajena tajëvelia jumaitsi nijumelivaisibaxutota bajaraponë yabara, jai Jesús paxa Diosojavabelia Judas yabara.

¹³ Icatsia Jesús jumaitsi paxa Diosojavabelia mapacueniaje:

—Aeconoxæ baja ponaenajë xamëjavabetsia. Itsiata abaxë taponaponatabiepatoyo mapanacuataje, cavajëtatsi. Bajarapacuenia cavajëtatsi tajajivi bitso pejamatabëcuenebarëyanexa pacuenia xanë bitso jamatabëcuenebarëyanë. ¹⁴ Xanë baja tajajivi tsipaebajë nijumelivaisi. Pacuenia mapanacuapijivije, apo pecajumecovënëtsivi, jamatabëcueneitsi, xanë apo jamatabëcueneitsinë. Bajaraxuata tajajivi ata itoyatsi mapanacuapijivije. Tsipaji apo jamatabëcuenejëpæe. ¹⁵ Apo cavajëtsitsi raja nejutsinexa tajajivi mapanacuapijivivecuaje. Cavajëtatsi raja nevetabiabinexa tajajivi dovathivecua. ¹⁶ Pacuenia xanë apo jamatabëcuenejëpaenë mapanacuapijivije, bajara pijinia pacuenia tajajivi ata apo jamatabëcuenejëpæe mapanacuapijivije. ¹⁷ Nijumelivaisi cajena pexaniajailivaisi. Bajaraxuata tanejumecovënëtsivi baja yavenonaenæne penatsatsinexa dovathi pejamatabëcuenevecua. Nexata bajarapamonæ exanavanapaena xamë netojitsipacuenia nijumelivaisi baja petsijamatabëcaæxaetsi. ¹⁸ Pacuenia xamë nitorobame pexaniajailivaisi tatsipaebinxæ mapanacuapijivijavabeliaje, bajara pijinia pacuenia juya xanë ata itorobajë tajajivi pexaniajailivaisi petsipaebinxæ mapanacuapijivijavabeliaje. ¹⁹ Pacuenia xamë netojitsipame, tajajivi yapijivinacæevetsianajë xanë tanebeyaxuabinexa. Nexata bajarapamonæ pacuenia xamë tojitsipame, catoexanavanapaena. Tsipaji baja bajarapamonæ yapëtane nijumelivaisi pexaniajailivaisicuene, jai Jesús paxa Diosojavabelia.

²⁰ Icatsia Jesús jumaitsi paxa Diosojavabelia mapacueniaje:

—Itsiata apo cavajëtsitsi ëtajajivinexa. Cavajëtatsi raja bexëjavabelia tanejumecovënëtsivinexa ata. Tajajivi itsamatacabi bajarapamonæjavabelia itsa tsipaebaponaena tajumelivaisi, nexata bexëjavabelia bajarapamonæ nejumecovënëtsiana. ²¹ Nexata cavajëtatsi daxita bajarapamonæ penajamatabëcuenejëpaenexa. Xamë neyajavaponaponame. Xanë ata pijinia cayajavaponaponatsi. Bajara pijinia pacuenia tojitsipajë daxita bajarapamonæ ata vajanacayajavajinavanapaenæxabeje. Tojitsipajë bajarapamonæ penajamatabëcuenejëpaenexa. Nexata bajarapamonæ najamatabëcuenejëpaeya pejinavanapæjava, itsa tane daxita mapanacuapijivije, pejumecovënëtsinexa xamë athëbëvetsica taneitorobinëcuenemëtsica. ²² Pacuenia xamë yapëtaeyæxanæne tajajivijavabelia xanë bitso ayaijamatabëcuene taxainæjava,

bajara pijinia pacuenia xanë ata bajarapamonaejavabelia yapëtaeyaexanajë baja bajarapamonae ata ayaijamatabëcuenevi baja penaexanaejava tanejumecovënëtsixae. Nexata bajarapamonae tanejumecovënëtsixae, najamatabëcuenejëpa baja pacuenia vaxaitsibeje najamatabëcuenejëpatsibeje. ²³ Tajajivi yajavaponaponajë. Xamë pijinia neyjavaponaponame. Nexata tajajivi caejamatabëcuene xainaena. Nexata daxita mapanacuapijivije itsa taena tajajivi najamatabëcuenejëpaeya pejinavanapaejava, yapëtaena xamë athëbëvetsica taneitorobinëcuenemëtsica. Yapëtaenana bajarapamonae niasivajava pacuenia xanë ata niasivamë, jai Jesús paxa Diosojavabelia.

²⁴ Icatsia Jesús jumaitsi paxa Diosojavabelia:

—Taxa, bajarapamonae xamë nerajutame. Nexata jitsipajë bajarapamonae ata pena-jinavanapaejava itsabelia ponaejitsianë. Jitsipajë bajarapamonae tanejavajinavapanaejava, tanejavajinavapanae bitso ayaijamatabëcuene taxinaejava. Tsipaji nacua nexanaevajënaeya ata, xamë niasivamë. Bajaraxuata ayaijamatabëcuenenënë nexaname. ²⁵ Taxa, itsaneconi ata apo nexainenë. Mapanacuapijivi, pamonae apo cajumecovënëtsi, apo cayapëtae. Itsiata xanë cayapëtanetsi. Mapamonaeje, tajajivi, yapëtae baja xamë athëbëvetsica taneitorobijavamëtsica. ²⁶ Xanë tajajivi yapëtaeyaexanajë pecayapëtaenaxa. Abaxë itsiata pevajënaeyabelia pecayapëtaeponaenaxa, yapëtaeyaexanaponaenajë. Pacuenia xanë niasivamë, bajara pijinia pacuenia bajarapamonae ata namataenetsia penaasivanaxa, yapëtaeyaexanaponaenajë. Xanë bajarapamonae yajavaponaponaejava, jai Jesús paxa Diosojavabelia.

18

Pacuenia Jesús pijavajabitsaë vaetabatsi pebeyaxuabinexatsi jane baja yabara pelivaisi (Mt 26.47-56; Mr 14.43-50; Lc 22.47-53)

¹ Jesús pevajëtsicujinae paxa Diosojavabelia, pijajivi barëpona Cedrónvënënjato it-sapanabelia. Nexata bajarajotalia peubinaenë bacabobëxëpanata, Jesús pijajivi barëpata. ² Bajarajota cajena Jesús pijajivi barënacaetuatiabiaba. Bajaraxuata Judas, Jesús pijajivitonë ata, ponë canajetsijitsiatsi pijavajabitsaë pecobeyabelia, yapëtae itsajota Jesús pijajivi barënacaetuatiabiaba. ³ Nexata Judas peyapëtaexae, bajarajota barëpata vajabitsaë. Barëpatanua templobopijipoliciaivi. Bajarapamonae itorobatsi sacerdotevi penamatacaitorobivibeje fariseovibeje. Judas pematacaponaevi capona espadanë, naebonë yajava. Lämparabëanënuua capona. Beisotabuqueranënuua capona penatsivajënaeitayotsinexa. ⁴ Nexata baja Jesús yapëtae daxita pacuenia exanaejiatsiatsi bajarapamonae. Nexata Jesús najetabalia. Jumaitsi bajarapamonaejavabelia:

—¿Jipatsa pajaitame? jai Jesús.

⁵ Nexata bajarapamonae jumaitsi:

—Jesús raja, Nazaret tomarapijinë, pajaitajë, jai bajarapamonae.

Jesús nexata jumaitsi:

—Xanë rabaja maje, jai.

Judas, ponë Jesús pijavajabitsaë pecobeyabelia canajetatsi, nanuca bajarapamonaejavata. ⁶ “Xanë rabaja maje,” pejaijavata Jesús, bajarapamonae pematabëxëpa toqueque- naponalia. Othopa irata. ⁷ Nexata icatsia Jesús jumaitsi:

—¿Jipatsa nexata pajaitame? jai.

Nexata icatsia bajarapamonae jumaitsi:

—Jesús raja, Nazaret tomarapijinë, pajaitajë, jai bajarapamonae.

⁸ Nexata Jesús jumaitsi bajarapamonaejavabelia:

—“Xanë rabaja maje,” pacajaitsi rabaja. Xanë itsa panejaitame, pacopatsianame mapamonaeje peponaenaxa, jai Jesús pijajivi yabara.

⁹ Bajarapacuenia Jesús itsa jumaitsi, copiajopa jane baja pacuenia tajëvelia jumaitsi Jesús. Jesús baja cajena pijajivi yabara tajëvelia jumaitsi mapacueniaje: “Pamonae taxa nerajuta, itsanë ata apo nevecuanaxuabi tsane,” jai cajena Jesús tajëvelia pijajivi yabara. Bajarapacuenia jane baja copiajopa. ¹⁰ Nexata Jesús pijajivitonë, Simón Pedro, nama-racëtaaponapona espada. Nexata Simón Pedro espada navemarajonotaxuabina. Pecujuanenia pamuxuyorotomi, muxuyoropaebiaxuaba sacerdotevi pepo penamatacaitorobinë pijajivitonë. Ponë Simón Pedro muxuyoropaebiaxuaba, pevënë Malco. ¹¹ Nexata Jesús jumaitsi Pedrojavabelia:

—Nijaespada baja pevënojojavareca xataremeca. Taxa baja cajena netocopata tanebejio-biaexanaenaxa. Bajaraxuata nacaevetsianajë tanebejio-biaexanaenaxa, jai Jesús Pedrojavabelia.

Pacuenia Jesús nutatsi sacerdot. Pecujanenia pamuxuyorotomi, muxuyoropaebiaxuba sacerdotevi pepo penamataevi pepo penamatacaitorobinē pitabarata yabara pelivaisi (Mt 26.57-58; Mr 14.53-54; Lc 22.54)

¹² Vajabitsaēvi pijacapitán, pijajivi yajava, judíovi pijapolicíavina, nacobenavaetabatsi Jesús. Nexata cobecētatsi. ¹³ Caponatsi baja Anásvēnēnē pijaboyabelia. Anás paxuyo Caifás. Bajarapamatacabi Caifás sacerdotevi pepo penamatacaitorobinē tsaponaponae. ¹⁴ Bajaraponē Caifás jumaitsi baja cajena copiaya judíovijavabelia Jesús yabara: “Bajaraponē caenē itsa beyaxuabiaexanaenatsi, bajaraponē pejamatabēcueneta daxita judíovitsi vajavajabitsaē apo nacaverebiabi tsane,” jai.

Pacuenia jane baja Pedro nayavajunuaxaina Jesús pijajivitonēcuene yabara pelivaisi (Mt 26.69-70; Mr 14.66-68; Lc 22.55-57)

¹⁵ Itsa baja Jesús caponaliatsi sacerdotevi pepo penamatacaitorobinē pijaboyabelia, Simón Pedrobeje, itsanēbeje, Jesús pijajivitonēbeje, tajiyo pēnanajetarucabeje. Ponē Simón Pedro yanatatsi, bajaraponē yapētanetsi sacerdotevi pepo penamatacaitorobinē. Sacerdotevi pepo penamatacaitorobinē pijabo matatoyorotsia yacaranata ibopanaxanetonē, mataropotsia pefaratsijavaxanetota. Nexata ponē Pedro yanatatsi, bajarapayaracaranatsijavaxaneto baupa najoneya. Nexata panepa bopanabojavabelia, itsabelia Jesús cajunuatsi. ¹⁶ Nexata Pedro nucojopa sacerdotevi pepo penamatacaitorobinē pijabo matatoyorotsia peyacaranatsijavaxaneto baupa jumavelia. Nexata ponē Pedro yanatatsi, caevēa pitsaparena. Nexata bajaraponē cuaicuajai baupa pevetsivajavabelia Pedro ata penajonenexalia. Nexata baja Pedro ata tocopatatsi bopanabojavabelia penajonenexalia. Nexata baja Pedro ata najoneya bopanabojavabelia. ¹⁷ Nexata baupa pevetsiva jumaitsi Pedrojavabelia:

—¿Xamē ata tsabaja Jesús apo pijajivitonēmē? jai.

Pedro nexata jumaitsi:

—Jume raja. Xanē raja Jesús apo pijajivitonēnē, jai Pedro.

¹⁸ Bajarapaepatota bitso bajarapameravi cainejeba. Nexata bajarapabota penacuenebivi, policíavi yajava, isoto itajuruteta bopanabota. Bajarapamonae nonopanubena. Nexata Pedro nanuca bajarapamonaejavata. Nanonopanuca.

Pacuenia sacerdotevi pepo penamatacaitorobinē Jesús yanijobatsi yabara pelivaisi (Mt 26.59-66; Mr 14.55-64; Lc 22.66-71)

¹⁹ Anás jane baja sacerdotevi pepo penamatacaitorobinē jumaitsi Jesúsjavabelia:

—¿Detsa pamatabēxëyo nijajivi? ¿Detsa palivaisi tsipaebabiabame nijajivi? jai.

²⁰ Jesús nexata jumaitsi Anásjavabelia:

—Xanē daxitajivi pexanialivaisi tsipaebabiabajē itsajota nacaetuatabiaba. Tsipaebabiabajē penacaetuatsibonējava, templobota ata. Muetsia cajena itsamatacabi ata apo tsipaebinē. ²¹ ¿Detsa xuajitsia nexata neyanijobame? Yanijobare pamonaevjavabelia tsipaebabiabajē. Nexata bajarapamonae catsipaebiana cajeneta nejumetaeyabiaba. Bajarapamonae yapētane xua yabara pexanialivaisi tsipaebabiabajē, jai Jesús sacerdotevi pepo penamatacaitorobinējavabelia.

²² Itsa bajarapacuenia Jesús jumaitsi, nexata bajarajota penucaenē templobopijipolicianē itabarapacataxuabatsi. Policianē jumaitsi Jesúsjavabelia:

—Pētsa bajarapacuenia cuaicuajiamē sacerdotevi pepo penamatacaitorobinējavabelia, jai.

²³ Jesús nexata jumaitsi policianējavabelia:

—Itsa pibisiacuena cuaicuajianē, netsipaebare papibisiacuene yabara cuaicuajianē. ¿Detsa xuajitsia saya xaniavaetsia tajumatsijava yabara, nebiame? jai Jesús.

²⁴ Nexata Anás itoroba Jesús cobecētsiaya tsiteca pecaponaexatsi Caifásjavabelia, ponē sacerdotevi pepo penamatacaitorobinējavabelia.

Pacuenia icatsia Pedro nayavajunuaxaina Jesús pijajivitonēcuene yabara pelivaisi (Mt 26.71-75; Mr 14.69-72; Lc 22.58-62)

²⁵ Pedro abaxē nanonopanuca isotojavata. Nexata bajarajota penubenaevi jumaitsi:

—¿Xamē ata tsabaja Jesús apo pijajivitonēmē? jaitsi.

Pedro nexata nayavajunuaxainaeya jumaitsi:

—Jume raja. Xanē raja Jesús apo pijajivitonēnē, jai Pedro.

²⁶ Nexata icatsia bajarajota sacerdotevi pepo penamatacaitorobinē pijajivitonē, ponē Pedro muxuyoropaebiaxuba pijamonaenē, jumaitsi:

—Xamē cajena covē catanetsi Jesúsjavata, peubinaenē bacabojavata, jai.

²⁷ Pedro icatsia nayavajunuaxainaeya jumaitsi:

—Jume raja. Xanē cajena apo yapētaenē Jesús, jai Pedro.

Itsa baja Pedro najumeveretaba bajarapacuenia pejumaitssijava, vacara baja fiaba.

Pacuenia Jesús nutatsi Pilato pitabarata yabara pelivaisi
(Mt 27.1-2, 11-14; Mr 15.1-5; Lc 23.1-5)

²⁸ Itsa baja ajena matakabi tsina, Jesús capitsapatsi Caifás pijabovecua. Nexata Jesús caponaliatsi nacuaevevtsinē Pilato pijaboyabelia. Judíovi, pamonaē najetarubena Jesús peneconitsinexatsi, apo najonelia nacuaevevtsinē Pilato pijaboyalia. Tsipaji Pilato apo judíonē. Judíovi apo joneyabiabi apo judíonē pijaboyalia. Bajarapamonaē itsa jonejitsipa Pilato pijaboyalia, bajarapamonaē judíovixae, jamatabējumai tsipae: “Najamatabēcuenebijianajē Dioso pitabarata apo judíonē pijaboyalia tanajonexae. Nexata tavēna judíovi apo netocopatsi tsane tanaxaenexa pascua fiestamatakabi pexaejava,” jamatabējai tsipae bajarapamonaē. ²⁹ Nexata Pilato pitsaparena. Jumaitsi judíovijavabelia:

—¿Detsa pitsineconi yabara pacapatame maPONĕje? jai Pilato judíovijavabelia.

³⁰ Nexata judíovi jumaitsi:

—Itsa raja pibisiacuene apo pexanaenē tsipae, apo pacatocapatsi tsipaetsi maberenaē, jai judíovi.

³¹ Nexata icatsia Pilato jumaitsi:

—Paca ponaremelia caevēalia. Pananeconitsiaexanaename panijacuata pacuenia panilivivaisi pacaitoroba paneexanaenexa, jai Pilato judíovijavabelia.

Nexata judíovi icatsia jumaitsi:

—Paxamē baitsi jane apo panetocopatsimē patabeyaxuabinexa itsanē ata pijaneconi yabara, jai judíovi.

³² Bajarapacuenia Jesús tocopiapatatsi pacuenia baja cajena tajēvelia pijajivijavabelia navajunupaebapona pebeyaxuabijavanexatsi. ³³ Nexata Pilato icatsia joneya pijaboyalia. Jumaitsi Jesúsjavabelia:

—¿Xamē tsaja judíovi pepo nevetsinē? jai.

³⁴ Jesús nexata jumaitsi Pilatojavabelia:

—¿Xamē tsaja nejamatabēcueneta neyanijobame? Jume. ¿Catsipaeba tsaja itsamonaē xanē judíovi pepo taevetsinēcuene? jai Jesús.

³⁵ Pilato nexata jumaitsi:

—Xanē raja apo judíonēnē. Bajarapacuenia apo tacasivanajamatabēxainaeta. Judíovi raja, caranata nijanacuapijivi, sacerdotevi penamatacaitorobivi yajava, cacapata maberenaē pecaneconitsinexa xanējavabarena. ¿Detsa jane xua exaname? jai Pilato Jesúsjavabelia.

³⁶ Nexata Jesús jumaitsi Pilatojavabelia:

—Mara panacua xanē apo taevetsinēje. Itsa ra peneta mapanacua taevetsinē tsi-paeje, nexata paepatota judíovi nevaetaba, daxita tajajivi neyapijivinamaxēvanitsipa tapanepaenexa. Xanē raja mapanacua apo taevetsinēje, jai Jesús Pilatojavabelia.

³⁷ Nexata Pilato jumaitsi:

—¿Xamē tsaja nexata jivi nevetsinē? jai.

Jesús nexata jumaitsi:

—Jājā, xanē raja jivi taevetsinē pacuenia nejumaitsimē. Bajaraxuata patajē mapanacuayabetsicaje tatsipaebinexa jivi pexaniajailivaisi. Daxita pamonaē jitsipa pexaniajailivaisi, nenamuxunaevetabiaba bajarapalivaisi, jai Jesús Pilatojavabelia.

³⁸ Nexata Pilato jumaitsi Jesúsjavabelia:

—¿Detsa pacuenia nayapētane pexaniajailivaisicuene? jai.

Pacuenia baja Pilato tocopata Jesús pebeyaxuabinexatsi yabara pelivaisi
(Mt 27.15-31; Mr 15.6-20; Lc 23.13-25)

Pilato peyanijobicujinae Jesúsjavabelia, Pilato icatsia pitsapalia. Nexata Pilato jumaitsi judíovijavabelia:

—Apo caxitajarabinē cajena itsacujiruneconi ata pexanaejava, paneconi yabara bajaraponē naneconitsijitsia. ³⁹ Penaneconitsivi pejebabiabibota naneconitsia peponaponaeñē pepitsapaenexa itsa panevajētame, nexata pascua fiestamatakabi caenē pacatocapitsapabiabatsi. ¿Pajitsipame tsaja patacatocapitsapaenexa penaneconitsivi pejebabiabibovecua pepitsapaenexa pajudíovimē papecaevetsinē? jai Pilato judíovijavabelia Jesús yabara.

⁴⁰ Nexata bajarajota daxitajudíovi vavajai.

—¡Pētsa abaxē copatame bajaraponē! ¡Panetocapitsapaename jane Barrabás! jai judíovi.

Bajaraponē Barrabás bitso penacobetoxotsinē. Bajaraxuata penaneconitsivi pejebabiabibota, naneconitsiaponapona.

19

¹ Pilato pijajivi itoroba Jesús pejumatitibabenexatsi penaneconitsivi pejumaconitabiabimacata. ² Nexata pejumatitibabecujinaetsi vajabitsäe Jesús becoronacuenia tsimataexanatsi peejuvitoyoroto. Mataxatatatsi bajarapaejuvitoyoroto. Bajaraxuacujinae quenet-siataeya benacuaevevtsinëcuenia xatatatsi peraënaeyatsautsaucaejava. ³ Nexata vajabitsäe imoxoyoliatsi Jesús. Vajabitsäe capocaponaeja jumaiatsi tsuabataponae Jesúsjavabelia:

—¡Bajaco, judíovi pepo pevetsinë! jai tsuabataponae.

Vajabitsäe pecobeta Jesús itabarapacababeyabuataponatsi.

⁴ Pilato nexata icatsia pitsapalia. Jumaiatsi judíovijavabelia:

—Pacatocanaviarenatsi icatsia maberenaje paneyapëtaenexa. Apo caxitajarabinë itsacujiruneconi ata pexanaejava, paneconi yabara naneconitsijitsia maponëje, jai Pilato Jesús yabara.

⁵ Nexata peejuvitoyoroto Jesús namataxatatatsiaya pitsaparena. Naxatata peraënaeyatsautsaucaejava. Nexata Pilato jumaiatsi judíovijavabelia:

—¡Baja rajane nuca maponëje! jai Pilato.

⁶ Nexata sacerdotevi penamatacaitorobivi, policíavi yajava, itsa tanetsi Jesús, nexata bajarapamonae vavajai.

—¡Cruzajavabelia cobematabiabarutsiaexanare! ¡Cruzajavabelia cobematabiabarutsiaexanare! jai bajarapamonae Jesús yabara.

Pilato nexata jumaiatsi bajarapamonaejavabelia:

—Paxamë pacaponaremelia. Cruzajavabelia pacobematabiabarutsianame. Tsipaji rajaxanë apo caxitajarabinë itsacujiruneconi ata pexanaejava, jai Pilato.

⁷ Nexata judíovi jumaiatsi Pilatojavabelia:

—Mara ponë Dioso apo pejitsipacuenia jumaiatsije: “Xanë raja Dioso pexënatonë,” jai. Paxanë pajudíovinë patajalivaisita itaveta bajarapacuenia pejumaiatsiyaniva itsajivi ata. Bajaraxuata bajaraponë baja bebeyaxuabatsi, jai judíovi Jesús yabara.

⁸ Pilato itsa jumetane bajarapamonae pejumaiatsijava: “Mara ponë Dioso apo pejitsipacuenia jumaiatsije: ‘Xanë raja Dioso pexënatonë,’ jai,” pejaijiva Jesús yabara, nexata bitso Pilato junava. ⁹ Nexata icatsia Pilato pijaboyalía barëjoneya Jesús. Yanijoba icatsia Jesúsjavabelia.

—¿Detsa nexata verena neponaenë? jai Pilato.

Itsiata Jesús apo jume pitsi.

¹⁰ Nexata Pilato jumaiatsi:

—¿Detsa xuajitsia apo nejumepitsimë? ¿Apo yapëtaemë tsipaji mapanacua taevetsinëcuenene? Nejamatabëcuenecaëjëpa raja taitorobinexa tajajivi cruzajavabelia pecacobematabiabarutsinexa. Nejamatabëcaëjëpanua taitorobinexa pecacopatsinexa ata, jai Pilato.

¹¹ Jesús nexata jumaiatsi:

—Itsa Dioso apo catocopatsi tsipae mapanacua nevetsinexaje, nexata xanëjavaberena ata apo cacajëpae tsipae taneitsacueniabinxamë. Itsiata baitsi jane ponë necanajeta xamë necobeyabelia, bitso naneconita Diosojavabelia xamë matatoxetsia, jai Jesús Pilatojavabelia.

¹² Itsa bajarapacuenia Jesús jumaiatsi, nexata picani Pilato jamatabëcopatsi Jesús.

Itsiata baitsi jane judíovi vavajai Jesús pecopatsiyanivatsi. Jumaiatsi:

—¡Itsamonaë raja paxanëyajuvënëvi jitsipa maponëje pevetsinënexatsi! ¡Nexata itsa copatsianame maponëje, naneconitsianame nijatuxanenëjavabelia, Romanonacua pepo pevetsinëjavabelia, pepo vajanacayanacuaevevtsinëjavabelia jane baja! ¡Nexata maponëbejeje nijatuxanenëbeje naitoyabeje tsane! jai judíovi Pilatojavabelia.

¹³ Nexata Pilato itsa jumetane bajarapacuenia judíovi pejumaiatsijava, Pilato eca tribunavënëjavata, xuata Pilato ecabiaba jivi itsa naneconitsiaexanaejitsia. Xuata Pilato ecabiaba jivi itsa naneconitsiaexanaejitsia, hebreojumeta pevënë Gabata. Bajarajota pirafaratsiira. Nexata Pilato itorobeca pijajivi pecapitsapaenexatsi Jesús Pilato pijabovecua. ¹⁴ Pascuavënëfiesta pejonematacabineja pevajënaeya pamatacabi, matoneje, bajarapacuenia Jesús exanatsi. Nexata Pilato jumaiatsi tsecae judíovijavabelia:

—¡Mara jota nucaje papecaevetsinëje! jai Pilato Jesús yabara.

¹⁵ Itsiata saya bajarapamonae vavajai.

—¡Beyaxuabiaexanare! ¡Jema tëpae! ¡Cruzajavabelia cobematabiabarutsiaexanare! jai judíovi. Pilato nexata jumaiatsi:

—¿Pajitsipame tsaja cruzajavabelia tacobematabiabarutsiaexanaejava papecaevetsinëmi? jai Pilato.

Nexata sacerdotevi penamatacaitorobivi jumaiatsi Pilatojavabelia:

—Caenë raja Romanonacua pevetsinë paxainajë pepo patanevetsinë. Paxanë raja apo paxainanë itsanë pematatsënëa pepo patanevetsinë, jai sacerdotevi penamatacaitorobivi.

¹⁶ Nexata baja Pilato rajuta judiövi pecobeyabelia Jesús pecobematabiabarutsinexatsi cruzajavabelia. Itsiata Pilato pijajivi itoroba Jesús pecaponaenexatsilia petsutojumabelia.

Pacuenia jane baja Jesús cruzajavabelia cobematabiabarutatsi yabara pelivaisi
(Mt 27.32-44; Mr 15.21-32; Lc 23.26-43)

¹⁷ Jesús nexata vajabitsaë itsa caponaliatsi, caponaeyaexanatsi cruza, pacruzajavabelia Jesús cobematabiabarutsijsiatsi. Caponaliatsi Jivimatasipavënë tsutojavabelia. Hebreojumeta bajarapatsuto pevënë Gólgota. ¹⁸ Bajarapatsutojumata Jesús cruzajavabelia cobematabiabarutatsi. Anijanëbeje yajavacobematabiabarutatsi. Caenë canacujitsia pijacruzata rubatsi. Itsanë Jesús pecujanenia ruca. Itsanë Jesús petsavenonenia ruca. ¹⁹ Pilato pijajivi itoroba petoyaquinaenexatsi tablapoyojumata. Nexata Pilato pijajivi itoroba bajarapatablapayo petomatabiabarutsinexatsi Jesús perucaecruzaupita. Jumai tsarucae bajarapaitane mapacueniaje: “Mara ponëje Jesús, Nazaret tomarapijinëje, judiövi pepo pevetsinë,” jai tsarucae bajarapaitane. ²⁰ Pajumatsutota Jesús cobematabiabarutatsi cruzajavabelia, bajarapajumatsuto eca tomaravecuia imoxoyo. Bajaraxuata judiövi ayaibitsaëtocaxaneto tomarapijivi leba bajarapaitane. Bajarapaitane yaquinaruta acueyabi paviriavibeje pijajumeta. Yaquinaruta hebreojumeta, griegojumetana, latinjumetana. ²¹ Nexata sacerdotevi penamatacaitorobivi jumaiti Pilatojavabelia:

—Apo xanepanae raja neyaquinarutsiaexanaenexa mapejumaitsiitaneje, “Mara ponëje, judiövi pepo pevetsinëje,” pejaitane. Biji rajane icatsia yaquinarutsiaexanare pejumaitsiitane mapacueniaje: “Mara ponë jumaitsi: ‘Xanë raja judiövi pepo taevetsinë,’ jai,” pejaitane icatsia yaquinarutsiaexanare, jai sacerdotevi penamatacaitorobivi Pilatojavabelia.

²² Nexata Pilato jumaiti sacerdotevi penamatacaitorobivijavabelia:

—Pacuenia baja yaquinarutsiaexanajë, bajarapacuenia jema rucae, jai Pilato sacerdotevi penamatacaitorobivijavabelia.

²³ Vajabitsaë Jesús pecobematabiabarutsicujinaetsi cruzajavabelia, Jesús penaxatatsijavami, xua jumaponapona, vajabitsaë nota. Cuatro xuabeje tsanaeya jeba. Caenë canacujitsia natsicobetsanaejitsia. Saicaya tsatabuata itsajava, xua Jesús naxatatabiaba piapiajavareca. Bajaraxua apo xainae pecaucutsiajoronaejava. Pecuejava saya caepanacujinae.

²⁴ Nexata vajabitsaë najumaiti:

—Apo titicae tsanetsi bajaraxua. Canamuxusitsianatsi beibotoxi vajayapëtaenexa ponë pitsijsitsia bajaraxua, najai vajabitsaë.

Bajarapacuenia vajabitsaë itsa exana, Jesús jane baja tocopiapatatsi pacuenia baja cajena Dioso pejumelivaisibaxutota, tajëvelia jumaiti Jesús penaxatatsijava yabara. Dioso baja cajena pejumelivaisibaxutota, tajëvelia jumaiti Jesús penaxatatsijava yabara mapacueniaje: “Natsicobetsanaena tanaxatatsijava. Canamuxusitsiana beibotoxi peyapëtaenexa ponë pitsijsitsia,” jai baja cajena tajëvelia Dioso pejumelivaisibaxutota Jesús penaxatatsijava yabara. Nexata vajabitsaë canamuxusita beibotoxi peyapëtaenexa ponë pitsijsitsia piapiajavareca, Jesús penaxatatsijavami.

²⁵ Pacujinae abaxë Jesús athëbëyo ruca cruzata, cruza bëxëpanata nubena acueyabi povamaxëto ëMariavënëvanë. Itsava Jesús pena. Itsava Jesús penava. Cleofas pijava. Itsava María, Magdala tomarapijiva. ²⁶ Nexata Jesús itsa taerucaica, taenutsica pena, pijajivitonë bitso piasivanë yajava. Jesús pena pemuxuneneta nuca bajaraponë. Jesús nexata jumaiti penajavabelia:

—Ena, maponë nuca nemuxunenetaje, benexënatocuenia taename, jai Jesús penajavabelia.

²⁷ Bajaraxuacujinae icatsia Jesús jumaiti pijajivitonëjavabelia:

—Mapovaje beenacuenia taename, jai Jesús.

Bajaraxuacujinae Jesús pijajivitonë pijaboyabelia barëpona Jesús pena, Jesús pena penaenexa bajaraponë pijabota.

Pacuenia baja Jesús tēpa yabara pelivaisi
(Mt 27.45-56; Mr 15.33-41; Lc 23.44-49)

²⁸ Jesús baja yapëthane petocopiarucaejavatsi daxita pacuenia tajëvelia vajunupaebatsi Dioso pejumelivaisibaxutota. Nexata jane baja Jesús pecopiarutsinexa daxita abaxë xua tosaicatsi, Jesús jumaiti:

—Mera bitso jitsipajë, jai Jesús.

²⁹ Nexata bajarajota vaxi eca. Vênëqueca pïajatuvinora. Nexata vajabitsaënë esponjavênëjava jabuta bajaraporayalia. Bajaraxuacujinae naeboupita ruta bajarapaesponjavênëjava. Toyotsiatsi Jesús. Tsiuciborutatsi Jesús petsutsuninexa. ³⁰ Jesús nexata tsutsune bajaraxua. Bajaraxuacujinae Jesús jumaitsi:

–Daxita rajane baja taexanaejava, veretajë, jai Jesús.

Nexata irataeya tëpanajereca.

Pacunia Jesús becuerebota yenecacuatatsi yabara pelivaisi

³¹ Pascuavênë fiesta junua. Nexata abaxë caematacabi sajina pejonenexa judíovi penacueraevetsimatacabinexa. Bajaraxuata judíovi apo jitsipae Jesús bana baja matavëjëa perubenaevata cruzata. Tsiapaji pascuavênë fiestamatacabi itsa junua judíovi penacueraevetsimatacabinexa, judíovi bitso banajamatabëcuenereviaba daxita penacueraevetsimatacabinë matatoxenetsia. Bajaraxuata judíovi vajëta Pilatojavabelia Pilato vajabitsaë pitorobinexa pethaëepatsicababenexatsi Jesús bana, cruzata perubenaevi, bepïjia bajarapamonae petëpaenexa. Itsa baja bajarapamonae tëparubena, penotsinexatsitsica cruzaveca pecaponaenexatsi itsajavabelia. ³² Nexata vajabitsaë itsa ponalia, Jesús peyajava cobematabiabarutatsinëtsibeje asaëbeje abaxë tsarucae. Bajaraxuata copiaya itsanë thaëepatsicabiabatsi. Bajaraxuacujinae icatsia itsanë thaëepatsicabiabatsi. ³³ Nexata Jesús vajabitsaë itsa kujbaliatsi, taerutatsi baja Jesús petëpaenë. Bajaraxuata Jesús apo thaëepatsicabiabitsi.

³⁴ Itsiata baitsi jane vajabitsaëviyajuvênë becuerebota Jesús yenecacuatatsi. Bajarapavajënëyarena pitsapa pijana, mera yajava. ³⁵ Xanë raja, Juannë, pacatoyaquinatsi mapalivaisije. Tataenë bajarapacuenë. Nexata xanë yapëtaniji bajarapacuenë pexaniajaicuenë. Nexata bajarapalivaisi pacatoyaquinatsi panejumecovënëtsinexa paxamë ata. ³⁶ Bajarapacunia Jesús apo thaëepatsicabiabitsi petocopiapatsixaetsi pacunia baja cajena Dioso pejumelivaisibaxutota tajëvelia jumaitsi Jesús yabara. Dioso baja cajena pejumelivaisibaxutota Jesús yabara tajëvelia jumaitsi mapacueniaje: “Apo siepatsicabiabi tsanetsi itsiata caesitoyo ata,” jai baja cajena tajëvelia Dioso pejumelivaisibaxutota Jesús yabara. ³⁷ Itsabaxutota pijinia tajëvelia jumaitsi Jesús yabara mapacueniaje: “Bajarapamonae taena pecacuatsivajënëtsi,” jai baja cajena itsabaxutota Jesús peyenecacuatsijavanexatsi yabara.

Pacunia Jesús petëpaenë mëthëtsi yabara pelivaisi

(Mt 27.57-61; Mr 15.42-47; Lc 23.50-56)

³⁸ José, Arimatea tomarapijinë. Bajaraponë judíovi pevetsiviyajuvênë. Nexata José jumecovënëtaponapona Jesús Cristocuene. Itsiata apo najamatabëcueneitajëtsi pejumecovënëtsijava Jesús Cristocuene. Tsiapaji cujunava penajuaevevetsivi judíovi. Nexata baja Jesús itsa tëpa, José itsiata najamatabëcueneitajëta. José vajëta Pilatojavabelia Jesús petëpaenë pepitsinexatsica cruzajavavetsica pemëthëtsinexa. Nexata baja tocopatatsi. Nexata José lia Jesús perucaejavabelia pecaponaenexa Jesús petëpaenë. ³⁹ Nicodemo, ponë meravi pona pebarëcuaicuajainexa Jesús, bajaraponë ata judíovi pevetsiviyajuvênë. Nexata Nicodemo Josëta nalia. Caponabeje treinta pakilobeje petuxujuvibenonë, pematajërëabibenonë petuxujuvijavata. ⁴⁰ Nexata Josébeje Nicodemobeje cruzajavavetsica pitsicabeje Jesús petëpaenë. Petsiothoacucujinaebeje petuxujuvibenonë, pexaniaviria piapiasábanapanata mataquionaeaxa daxitanëreca matacacëbabeje. Bajarapacunia exanabeje tsiapaji judíovi baxaniavaeta petëpaëjiviyo pemëthëtsinexa bajarapacunia. ⁴¹ Itsajota Jesús cruzajavabelia cobematabiabarutatsi, bajarajota imoxoyo peubinaenë ayaibacoboxaneto eca. Bajarapabacabovajata Jesús petëpaevajënaeya, José cajena exanaeyaexanabuata iboitapajanitovajata pinijiiobovaju. José pijamonaejivi itsa totëpatsi, pebuatsinexa bajarapaibovajulia. José ata itsa tëpa, pebuatsinexatsi bajarapaibovajulia. Nexata bajarapaibovajulia abaxë itsajiviyo ata petëpaëjiviyo apo buatsitsi. ⁴² Nexata bajarapaibovajulia Josébeje Nicodemobeje Jesús petëpaenë buatabeje. Tsiapaji bajarapaibovaju boca imoxoyo. Judíovi ata baja penacueraevetsimatacabinexa, bitso baja imoxoyo pejonenexa. Bajaraxuata bajarapaibovajulia Jesús petëpaenë buataatsi.

20

Pacunia Jesús petëpacujinae icatsia asaë yabara pelivaisi

(Mt 28.1-10; Mr 16.1-8; Lc 24.1-12)

¹ Judíovi baja penacueraevetsimatacabi verevereca. Nexata meravia pitsijavata, bajayacunua, ajena matacabi tsarucaponae, itsiata abaxë itsa aitaquiri, María Magdala tomarapijiva pona Jesús petëpaenë pebuatsiibovajutsijavabelia. Nexata María tane ibopanaxanetomi petixitanutsijavalia ibovajuvëpavecua. ² Nexata María cujinaejinarena itsaberena

Simón Pedro ponapona. Bajarajota Simón Pedro yajavaponapona itsanë Jesús pijajivitonë, ponë bitso asiva Jesús. Nexata María jumaitsi bajaraponëbejevavelia:

—Vajatuxanenëmi ra covë jutatsi pebuatsiibovajutsivecua. Apo payapëtaenë raja itsabelia icatsia buatatsi, jai María.

³ Nexata Pedrobeje Jesús pijajivitonëbeje ponabeje Jesús pebuatsiibovajutsijavavelia. ⁴ Najuacujinaejinaliabeje. Itsiata itsanë Jesús pijajivitonë bitsojinaeya cujinaejina Pedro matatoxenetsia. Bajaraponë copiaya palia Jesús pebuatsiibovajutsijavavelia. ⁵ Itsa bajaraponë nabëxëtsutsiaya naëcolia ibovaju bëxëpanalia, nexata taeyabualia Jesús daxitanë pematacacëbipanamitsireca pebocaejava bajarapaibovajualia. Bajaraponë itsiata abaxë apo jonelia. ⁶ Bajaraxuacujinae Simón Pedro cotocaevi pata. Nexata ibovajualia Pedro joneya. Pedro ata tane Jesús pematacacëbipanamitsireca pebocaejava bajarajota. ⁷ Papanata Jesús saicaya matacëtatsi, apo yajavabocae bajarajota. Saicayajavata xaniavaetsia quionabuata. ⁸ Nexata ponë copiaya pata Jesús pebuatsiibovajutsijavata, najoneya jane baja. Tane pacuenia Jesús vecuapitsapa bajarapaibovaju. Nexata jane baja bajaraponë jumecovënëta xaniavaetsia Jesús icatsia piasaëjava petëpaecujinae. ⁹ Abaxë picani bajaraponë apo jumeyapëtae pacuenia Dioso pejumelivaisibaxutota jumaitsi Jesús petëpaecujinae icatsia piasaëjavanexa yabara. ¹⁰ Bajaraxuacujinae Jesús pijajivitonëbeje naviatabeje baja pijaboyavelia.

Pacuenia Jesús petëpaecujinae tsitanaitajëta María Magdala tomarapijivajavavelia yabara pelivaisi

(Mr 16.9-11)

¹¹ María nuenuca Jesús petëpaenë pebuatsiibovajutsijumavelia. Nexata María yaitaxu-tonueya nabëxëtsutsiaya naëcolia ibovaju bëxëpanalia. ¹² Nexata María taeyelia anjanëbeje ángelnëbeje, penioponaejava penaxatatsinëbeje. Ecabeje itsajota picani Jesús petëpaenë buatatsi. Itsanë eca Jesús pematabocotomijavaverca. Itsanë eca Jesús petaxumijavatsina.

¹³ Nexata ángelnëbeje jumaitsibeje Marijajavavelia:

—¿Detsa xuajitsia nuame? jai beje.

María nexata jumaitsi:

—Tsipaji covë itsamonae jutatsi tajatuxanenëmi. Nexata apo yapëtaenë itsabelia icatsia buatatsi, jai María ángelnëbejevavelia.

¹⁴ María ajena najumeveretanajelia bajarapacuenia pejumajitsijava, napënëyorotsiaya naëcolia. Taenuta Jesús penucaejava bajarajota. Itsiata abaxë María apo yapëtae Jesús cuene.

¹⁵ Nexata Jesús jumaitsi Marijajavavelia:

—¿Detsa xuajitsia nuame? ¿Jipatsa jaitame? jai Jesús.

María nexata Jesús yabara saya jamatabëjumaitsi:

—Matsamëra ponë mapaunubacabo pevetsinëje, jamatabëjai María.

Bajaraxuata María caranata Jesúsjavavelia jumaitsi mapacueniaje:

—Xamë itsa jutame Jesús petëpaenë, netsipaebare itsajota buatame. Pitsiitsianë tacaponenexa, jai María.

¹⁶ Jesús nexata junataxuaba María pevënëta.

—¡María! jai Jesús.

María nexata napënëyorolia Jesúsjavavelia. Judíovi pijajumeta María jumaitsi Jesúsjavavelia: —¡Rabuni! jai. “Rabuni,” itsa jai hebreojumeta, mapajumetaje pejumajitsijume: “Xamë tanecujarubinëmë,” pejaijume.

¹⁷ Jesús nexata icatsia jumaitsi Marijajavavelia:

—Pëtsa nejayaremena. Tsipaji raja abaxë apo ponaenë taxa peecaejavabetsia. Ponare jane tajajivijavavelia. Tsipaebianame tajajivijavavelia taponaejavanexa taxajavabetsia. Taxa rabaja, paxamë ata paneaxa. Ponë tajaDioso, bajaraponë paxamë ata panijaDioso, jai Jesús Marijajavavelia.

¹⁸ Nexata María Magdala tomarapijiva pona baja petsipaebineca Jesús pijajivijavavelia. Pona baja petsipaebineca pacuenia tane pepo petuxanenë Jesús. Nexata María Jesús pijajivijavavelia tsipaebanua daxita pacuenia Jesús jumaitsi.

Pacuenia Jesús petëpaecujinae tsitanaitajëta pijajivijavavelia yabara pelivaisi

(Mt 28.16-20; Mr 16.14-18; Lc 24.36-49)

¹⁹ Pamatacabi María tane Jesús, icatsia itsa asaë petëpaecujinae, bajarapameravi nacaetuata daxita Jesús pijajivi. Daxita baupanë xaniavaetsia nayabaupaxataba. Tsipaji Jesús pijajivi judíovi cujunava. Jesús itsiata joneya. Jemata nuca pijajivi tuatujëta. Jesús jumaitsi pijajivijavavelia:

—¡Paxamë saya pajamatabëjemamëre! ¡Pëtsa pajunavame! jai Jesús.

²⁰ Bajarapacuenia Jesús pejumaitsicujinae, pijajivijavabelia tsitajëta pecobevajënëbeje. Nayenevajënëitajëtanaa pijajivijavabelia. Bajarajota Jesús pijajivi bitso barëya icatsia petaexae pijatuxanenë. ²¹ Nexata Jesús icatsia jumaitsi:

—¡Paxamë saya pajamatabëjemamëre! ¡Pëtsa pajunavame! Pacuenia taxa nitoroba, bajarapacuenia juya pacaitorobatsi jivijavabelia pexanialivaisi panetsipaebaponaenexa, jai Jesús pijajivijavabelia.

²² Nexata Jesús uxunelia asaëyata pijajivi pematatsënëalia. Jumaitsi pijajivijavabelia:

—Espiritu Santo pacopiapire panejamatabëëthëtota papecatsijamatabëëcaenexa.

²³ Nexata itsamonae pibisiacueni pexanaeneconi ita pavecuajibiaexanaename, nexata baja pibisiacueni pexanaeneconimi pepacueni vecuajibitsi tsane. Itsa apo pavecuajibiaexanaemë tsane itsamonae pibisiacueni pexanaeneconi, nexata pibisiacueni pexanaeneconi apo vecuajibitsi tsane, jai Jesús pijajivijavabelia.

Pacuenia Tomás Jesús tane Dioso piasaëyaexanaecujinaetsi petëpaecujinae yabara pelivaisi

²⁴ Jesús pijajiviyajuvënë, pevënë Tomás, ponë vënërubatsi itsavënë, Sapalanë. Bajaraponë piajibitsarucaejavata, Jesús pijajivijavabelia tsitanaitajëta. ²⁵ Nexata Tomás ita pata, Jesús pijajivi jumaitsi Tomásjavabelia:

—Pacatsutanetsi rabaja necovëta vajatuxanenë, jai Jesús pijajivi.

Nexata Tomás jumeaebiaya jumaitsi:

—Itsa pepacueni taenajë cruzajavabelia clavota pecobematabiabarutsvajënëtsibeje, nacobesibëtsianajë pecobevajënëyalia. Nacobesibëtsianajë peyenevajënëyalia ata. Nexata jane baja matapania jumecovënëtsianajë Jesús icatsia piasaëjava petëpaecujinae, jai Tomás Jesús yabara.

²⁶ Bajaraxuacujinae, ocho pamatacabibecujinae, Jesús pijajivi icatsia bota nacaet-uata. Tomás ata jane baja naponapona. Nexata daxita baupanë icatsia xaniavaetsia nayabaupaxataba. Jesús itsiata joneya. Jemata nuca pijajivi tuatujëta. Jesús jumaitsi pijajivijavabelia:

—¡Paxamë saya pajamatabëjemamëre! ¡Pëtsa pajunavame! jai Jesús.

²⁷ Bajaraxuacujinae Jesús jumaitsi Tomásjavabelia:

—Tomás, taema rajane baja tacobevajënëbeje. Nacobesibëtsiaremelia jane baja tacobevajënëyalia. Nacobesirovire jane baja tayenevajënëyalia nebëtsinexa. Pëtsa baja xuacujinae jumeaebame. Jumecovënëre jane baja icatsia tasaëjava tatëpaecujinae, jai Jesús Tomásjavabelia.

²⁸ Nexata Tomás jumaitsi Jesúsjavabelia:

—¡Tajatuxanenë, tajaDioso! jai Tomás.

²⁹ Jesús nexata icatsia jumaitsi:

—Tomás, aeconoxae rajane baja jumecovënëtame icatsia tasaëjava tatëpaecujinae. Tsipaji baja nijacuata netaname. Xamë matatoxenetsia bitso nesivajamatabëcuenëbarëya tsane pamona apo netae ata, itsiata jumecovënëta icatsia tasaëjava tatëpaecujinae, jai Jesús Tomásjavabelia.

Pajamatabëcueni yabara yaquina mapacuyalatoje yabara pelivaisi

³⁰ Jesús pijajivi pitabëta exanapona orijibia itsajavanë pinijicueni Dioso pesaëta pexanaejavanë. Itsiata bajaraxuanë pelivaisi apo yajavayaquinaenë mapacuyalato-taje. ³¹ Itsiata mapalivaisi pacatoyaquinatsije panejumecovënëtsinexa Jesús athëbëvetsica Dioso pitorobijavatsica vajanacacapanepaenexa, panejumecovënëtsinexanaa Jesús Dioso pexënatocuene. Nexata ita pajumecovënëtsianame mapalivaisije, paxainaname matacabi apo pevevererecajava Jesús pejamatabëcueneta.

21

Pacuenia Jesús petëpaecujinae icatsia ita asaë, tsitanaitajëta pijajivijavabelia, siete ponëbejejavabelia, yabara pelivaisi

¹ Jesús petëpaecujinae icatsia ita asaë, tsitanaitajëta pijajivijavabelia Tiberiasvënë pucaxanetoitapata. Jesús icatsia pijajivi ita tsitanaitajëta, maitsije. ² Caejavata Jesús pijajivi najuajinavanapa mapamatabëxëyoje. Najuaponapobeje Simón Pedrobeje Tomásbeje, ponë vënërubatsi itsavënë, Sapalanë. Najuaponapobeje pijinia anijanëbeje, Zebedeo ëpexënatobeje. Najuaponapobeje pijinia itsanëbeje icatsia pematatsënë. Natanael ata naponapona bajarajota. Canávënë tomarapjinë Natanael. Canátomara eca Galilea nacuata. ³ Nexata Simón Pedro jumaitsi penajuajinavanapaevijavabelia:

—Djuuai raja yamatajucaejitsianë, jai Pedro.

Nexata penajuajinavanapaevi jumaitsi:

—Paxanë ata panaponaenajë xamëta, jai.

Nexata pucaxanetojavabelia pona. Bajarajotalia jerata naropoba. Itsiata bajarapamer-avi caenë ata dujuainë bajarapamonae apo yamatajutsi. ⁴ Ajena baja matacabi tsina, Jesús pijajivi tsitanaitajëta Tiberiaspuca itapata. Itsiata Jesús pijajivi apo yapëtaetsi Jesús cuene.

⁵ Nexata Jesús jumaitsi pijajivijavabelia:

—¿Jica? ¿Djuainë apo payamatajutsimë caenë ata? jai Jesús.

Nexata Jesús pijajivi jumaitsi:

—Ajibi cajena, jai.

⁶ Nexata icatsia Jesús jumaitsi pijajivijavabelia:

—Djuai paneyamatajucaejava, panecujuanenia pamuxunene, pacoparemecca jerayenepanareca. Bajarapacuenia payamatajutsianame dujuai, jai Jesús pijajivijavabelia.

Nexata Jesús pijajivi dujuai peyamatajucaejava bajarapacuenia copareca. Bajaraxuacujinae pejutsinexatsina menevecua apo caëjëpaetsi. Tsipaji bitso ayaijava dujuai tojunuatsi.

⁷ Nexata Jesús pijajivitonë, ponë Jesús bitso asiva, bajaraponë jumaitsi Pedrojavabelia:

—¡Vajatuxanenë tsaena rabaja maje! jai Pedrojavabelia.

Nexata Simón Pedro caejumetaetabi bajarapacuenia pejumatsijava Jesús yabara, jumaasa penucaenë, naxatataxuaba penaxatatsijava. Jopanucalia menialia naxanitsiayo pepatabinexa Jesúsjavabelia. ⁸ Jesús pijajivi meneitapavecua tajë apo yarubena. Cien metrocuenia saya yarubenalía. Nexata itsamonae Pedrobana penajuajinavanapaevi jerata pata tajetabuabelia. Robobocuatapona dujuai peyamatajucaejava. Tovënëcatsi cajena dujuai. ⁹ Bajarapamonae itsa nonobajunalia tajetabuabelia, taeyeta isotoitaire. Bajara paisotoitairejumavereca taeyabuata dujuainë, panbëanë yajava. ¹⁰ Nexata Jesús jumaitsi pijajivijavabelia:

—Aeconoxae dujuai itsa payajutsiaremena, pacaponaenimina panexaniavaetsinexa, jai Jesús pijajivijavabelia.

¹¹ Pedro nexata jeraënëa berunareca tajetabuaberena peyarobobocaenexarena dujuai peyamatajucaejava. Nexata bajaraxua dujuai vënëca pinijidujuainëanë. Ciento cincuenta y tres ponëbeje. Itsiata dujuai peyamatajucaejava, dujuai ayaijava ata, apo yaucuucuae.

¹² Nexata Jesús jumaitsi pijajivijavabelia:

—Naxanitsia. Vepanabanianame, jai Jesús pijajivijavabelia.

Itsanë ata Jesús pijajivitonë apo yanijobi Jesúsjavabelia. “¿Jipatsamë?” apo jai. Tsipaji baja bajarapamonae yapëthane pijatuxanenë Jesús cuene. ¹³ Jesús nexata cujilia bajarapaisoto. Pita baja panbëanë. Tsicobetsana pijajivi. Bajarapacuenia icatsia Jesús dujuaijavanë ata tsicobetsana pijajivi.

¹⁴ Bajarapacuenia Jesús pijajivijavabelia acueyabijava tsitanaitajëta, petëpaecujinae icatsia itsa asaë.

Pacuenia Jesús petëpaecujinae itsa naitajëta cuaicuajiai Simón Pedrojavabelia yabara pelivaisi

¹⁵ Penabaniveretsicujinae Jesús jumaitsi Simón Pedrojavabelia:

—Simón, Jonás pexënatomë, ¿xamë tsaja bitso niasivamë mapamonae taneasivajava matatoxetsiaje? jai Jesús.

Pedro nexata jumaitsi:

—Jājā. Xamë rabaja nejamatabëcuenyapëtaneme tacaasivajava, jai Pedro Jesúsjavabelia.

Jesús nexata jumaitsi Pedrojavabelia:

—Nexata pacuenia pijaoveja pevetsinë xaniavaetsia baeveta pijaoveja, bajara pijinia pacuenia xamë xaniavaetsia netoovetabiabianame tajajivi, pamona tanepejanajume-covënëtsivi. Bajarapamonae taniji betajaovejxicuenia, jai Jesús.

¹⁶ Nexata icatsia Jesús jumaitsi Pedrojavabelia:

—Simón, Jonás pexënatomë, ¿xamë tsaja niasivamë? jai.

Pedro nexata icatsia jumaitsi:

—Jājā. Xamë rabaja nejamatabëcuenyapëtaneme tacaasivajava, jai Pedro Jesúsjavabelia.

Jesús nexata icatsia jumaitsi:

—Nexata xamë netoovetsianame tajajivi, pamona nesivanajamatabëcopata xanëjavaberena. Bajarapamonae taniji betajaovejacuenia, jai Jesús.

¹⁷ Icatsia matavëjëa Jesús jumaitsi Pedrojavabelia:

—Simón, Jonás pexënatomë, ¿xamë tsaja niasivamë? jai icatsia.

Pedro nexata bejamatabëjibireca matavëjëa peyanijobaponaexaetsi Jesús piasivajava yabara. Nexata Pedro jumaitsi Jesúsjavabelia:

—Xamë baja cajena yapëtaneme daxitacuene. Nexata baja nejamatabëcuenyapëtaneme bitso tacaasivajava, jai Pedro.

Jesús nexata tajëvelia jumaitsi Pedrojavabelia:

—Nexata xamë netoevetsianame tajajivi, pamonaē taniji betajaovejacuēnia.
 18 Xaniajanē pacuenia catsipaebijitsiatsi. Itsa abaxē pamatacabi pevėjēatomē, naxatatabiabame nenaxatatsijava nijacuata. Nexata nejitsipaejavabelia ponabiabame. Itsa pamatacabi perujunēmē tsane, pacuenia bitso perujunēyo banamaxēcaeveta itsajivi pijacamisa pexatatsinexatsi, bajarapacuenia namaxēcaevetsianame itsamonae pecacobecēsinexa pecacaponanexa itsabelia picani apo jitsipaeimē tsane neponaejava, j Xaniajanē pacuenia catsipaebijitsiatsi. Itsa abaxē pamatacabi pevėjēatomē, naxatai Jesús tajēvelia Pedrojavabelia.

¹⁹ Bajarapacuenia Jesús jumaitsi Pedrojavabelia Pedro tajēvelia peyapētaenexa pacuenia beyaxuabijitsiatsi Dioso pejumelivaisi pejumecovēnētsixae. Itsa baja Jesús najumevereta bajarapacuenia pejumaitsijava, Jesús jumaitsi Pedrojavabelia:

—Pedro, naxanitsia. Nepēnaponare, jai Jesús.

Nexata baja Pedrobeje Jesúsbeje ponatababeje pesaicaeyojavabelia.

Jesús pijajivitonē, ponē bitso Jesús asiva, penavajunupaebijava yabara pelivaisi

²⁰ Xanē Juannē, Jesús pijajivitonēnē, bitso taneasivanē. Pamatacabi caniviyopijijava panabaniji Jesús pebeyaxuabivajēnaetsi, xanē Jesús pemuxuneneta ecajē. Nexata bajarajota yanijobecajē. “Tajatuxanenē, ĵipatsa cacanajetsiana nijavajabitsaē pecobeyabellia?” janē Jesúsjavabelia. Nexata Jesús pebeyaxuabicujinaetsi, icatsia itsa asaē, panetsitanaitajēta. Nexata bajarapamatacabi Jesúsbeje Pedrobeje pesaicaeyojavabelia ponatababeje. Nexata xanē pecovēvelia cotocaevajē. Nexata Pedro Jesús pecovēya najetaruca. Pedro itsa napēnēyorotaba caevēarena, netaetaba bajaraponēbeje pecovēya tanajetarucaejava. ²¹ Nexata Pedro itsa netane, xanē tatēpaejavanexa yabara, yanijoba Jesúsjavabelia.

—Tajatuxanenē, ĵdetsa pacuenia tēpaena maponēje? jai Pedro Jesúsjavabelia.

²² Jesús nexata jumaitsi Pedrojavabelia xanē yabara:

—Itsa xanē tojitsipaejitsipajē bajaraponē piasaētsaponaponaenexa, asaē tsaponaponaē tsipae matapania icatsia tapatsimatacabitsicajavabelianexa. Pētsa bajaraponē tatocopatsijava yabara, najamatabēxainame. Tsipaji xua bajaraponē tocopatsipajē, apo xamēnēxa tsipae. Nexata xamē saicaya caasaēmē tsaponaponaē tsane nexanaejava, pacuene caitorobatsi, jai Jesús Pedrojavabelia.

²³ Bajaraxuata patanajuajinavanapaevi, Jesús pijajivi, xanē yabara jamatabēcuēnenavēxaniabiaya najumai tsabiabi: “Juan raeta apo tēpae tsane,” najai tsabiabi. Itsiata baitsi jane Jesús apo jumaitsi: “Juan raja apo tēpae tsane.” apo jai. Jumaitsi rajane mapacueniaje: “Itsa xanē tojitsipaejitsipajē bajaraponē piasaētsaponaponaenexa, asaē tsaponaponaē tsipae matapania icatsia tapatsimatacabitsicajavabelianexa. Pētsa bajaraponē tatocopatsijava yabara, najamatabēxainame. Tsipaji xua bajaraponē tocopatsipajē, apo xamēnēxa tsipae,” jai Jesús xanē yabara Pedrojavabelia.

²⁴ Xanē Jesús pijajivitonēnē. Patanajuajinavanapaevi xanē yabara jamatabēcuēnenavēxaniabiaya najumai tsabiabi: “Juan raeta apo tēpae tsane,” najai tsabiabi. Bajarapacuenia tanesivajamatabējumaitsinē, Juannē, yaquinajē daxita mapalivaisije. Yapētanetsi baja cajena palivaisianē Jesús nacatsipaeba, pexaniajailivaisianē.

²⁵ Jesús pinijicuēne pexanaejavanē Dioso pesaēta, ayaijava exana mapanacuataje. Itsajavanē ata exana pematatēnēa. Nexata bajaraxuanē, caejavayo canacujitsia pelivaisi, itsamonae itsa yaquinaejitsipa, bajaraxuanē pelivaisibaxutonē bitso ayaijava tsipae. Nexata meta bajarapalivaisibaxutonē vēnēcaejitsipa mapanacuajē.

Pacuenia exanavanapa Jesús pitorobivi, apóstolevi

Pacuenia Jesús tajévelia vajunupaeba Espíritu Santo pepatsijavanexatsica mapanacuaya-betsicaje yabara pelivaisi

¹ Teófilo, xanē Lucasnē, catoyaquinatsi mapabaxutoje. Copiaya baja cajena catoy-aquinatsi itsabaxutota daxita Jesús pexanaejavanē pelivaisi. Nexata copiayapijibaxu-tota catoyaquinatsi xuamaxēto Jesús exana petaxuxuabijavaveliacujinae pexanaejava. Daxita bajaraxuanē pelivaisi, catoyaquinatsi. Pacuenia ata Jesús pexanialivaisi jivi tsipaebaponapona, abaxē itsa ponapona mapanacuataje, bajarapalivaisi ata catoy-aquinatsi. ² Matapania pamatacabi Jesús athēbēabetsia Dioso caponatsi, bajarajota Jesús baja copiaruta pexanaejava. Nexata baja itsajota Jesús copiaruta pexanaejava, ba-jarajota pijinia copiarutajē copiayapijibaxutota tacatoyaquinajava, Jesús pexanaeja-vanē pelivaisi. Athēbēabetsia Jesús Dioso pecaponaevajēnaetsi, Jesús itapeta pijajiviya-juvēnēvi apóstolevinexa. Nexata Jesús itoroba pijajivi, apóstolevi, jivi pexanialivaisi pet-sipaebanajetarubenaenexa daxitanacuanējava. Espíritu Santo pejamatabēcueneta Jesús yapētaeaxanatsi pacuenia itorobijitsia pijajivi, apóstolevi. ³ Bajaraxuacujinae Jesús pijava-jabitsaē beyaxuabatsi. Jesús petēpaecujinae icatsia itsa asaē, anijatonē tsitanaitajētabiaba pijajivijavabelia. Cuarenta baja pamatacabibeje itsa panepa Jesús icatsia piasaēcujinae, pona jane baja athēbēabetsia. Bajarapacuenia anijatonē Jesús pijajivi petsitanaitajētsixae petēpaecujinae, nexata pijajivi yapētanetsi Jesús icatsia piasaējava petēpaecujinae. Jesús pijajivi itsa tsitanaitajētabiaba, Jesús pijajivi tsipaebabiaba Dioso pijajivi pevetsijavanexa.

⁴ Nexata Jesús pijajivi itsa tsitanaitajēta Jerusalén tomarata, Jesús jumaitsi pijajivijav-abelia mapacueniaje:

—Pētsa abaxē paponame mapatomaravecuaje. Pacopiaevetavanapaename abaxē Espíritu Santo. Bajaraponē yabara taxa Dioso najumecapanepaeya jumaitsi papeca-toitorobinexatsica. Xanē ata bajaraponē yabara pacatsipaebatsi baja cajena panecopi-aevetavanapaenexa. ⁵ Juanpijinē raja jivi bautisabanajetaruca ēmerata. Itsiata baitsi jane caematocabibejucujinae paxamē Dioso pacatsijamatabējoneyaexanaena Espíritu Santo, jai Jesús pijajivijavabelia.

Pacuenia Jesús petēpaecujinae icatsia itsa asaē, athēbēabetsia baja pona yabara pelivaisi

⁶ Jesús petēpaecujinae icatsia itsa asaē, tsitanaitajēta pijajivijavabelia. Nexata Jesús pijajivi penacaetuatsijavata, Jesús pijajivi yanijobatsi. Jesús pijajivi jumaitsi mapacueniaje:

—Patajatuxanenē, ¿xaniajai tsabaja? ¿Itsanacuapijivi pevetsijava mapanacuaje peco-patsinexa, xanē vecuapitsapaeyaexanaename mapamatacabitaje? ¿Nexata tsaja vajaviri-avi judíoivi juya evetsiaexanaename vajanacayanacuaevetsinexa? jai Jesús pijajivi.

⁷ Nexata Jesús jumaitsi pijajivijavabelia:

—Xua yabara paneyanijobame, paneyapētaenexa, taxa Dioso apo pacatocopatsi. Apo pacatocopatsi paneyapētaenexa pamatacabita, paepatota ata, taxa Dioso pexanaejava, copiapatsijitsia. Caenē taxa Dioso yapētane pamatacabi bajaraxua copiapatsijitsia.

⁸ Itsiata baitsi jane paxamē ajumejunavijibia papaebianame xanē talivaisi Espíritu Santo itsa pacatsijamatabēpatsianica paxamējavabetsica. Nexata panelivaisipaebanajetarubena-e-name Jerusalén tomarajava, Judea nacujava ata, Samaria nacujava ata, tajēnacuatubujava ata, jai Jesús pijajivijavabelia.

⁹ Bajarapacuenia Jesús pejumaitsicujinae pijajivijavabelia, Jesús baja pijajivi pitabēnejeva, athēbēabetsia Dioso caponatsi. Itarērēbo baja Jesús pēcaevaya. Nexata baja Jesús pijajivi acuenebi matavējēa petaejava. ¹⁰ Nexata Jesús pijajivi pētaenubena athēbēabetsia Jesús pepēcaevijavatsia. Nexata ángelnēbeje, penioponaejava penaxatatsinēbeje, Jesús pijajivi jemata bajarajota tsitanaitajētatsi. ¹¹ Nexata ángelnēbeje jumaitsi beje Jesús pijajivijavabelia:

—PaGalilea nacuapijivimē, ¿detsa xuajitsia athēbēabetsia pataenubename? Bajaraponē Jesús paxamējavavetsia Dioso pacavecuacaponatsi athēbēabetsia. Bajaraponē icatsia it-samatacabi patsianica. Pacuenia pataneme petsiajava, bajara icatsia pacuenia patsianica, jai ángelnēbeje Jesús pijajivijavabelia.

Pacuenia Jesús pijajivi natsicueyaitapeta Matíasvēnēnē apóstolenēnexa yabara pelivaisi

¹² Jesús baja peponaecujinae athēbēabetsia, Jesús pijajivi, apóstolevi, naviaba Jerusalén tomaraberena. Naviaba olivonaenē penubenaetsutojavaverena. Bajarapatsuto eca caek-ilómetrocuena Jerusalén tomaravecuca. ¹³ Nexata Jesús pijajivi pata Jerusalén tomarata. Nexata pabota Jesús pijajivi najinavanapa, athēbēyo pexanaeiravabetsia junaya. Tsipaji baja cajena tsicopatatsi bajarapairatatsia pejinavanapaenexa. Pamonaē Jesús pijajivi

apóstolevi, mapevënëanėje. Itsanė pevěnė Pedro. Itsanė Santiago. Itsanė Juan. Itsanė Andrés. Itsanė Felipe. Itsanė Bartolomé. Itsanė Mateo. Itsanė Santiago, Alfeo pexėnato. Itsanė Simón. Bajaraponė celotenė. Itsanė pevěnė Judas, Santiago pejujapijinė. ¹⁴⁻¹⁵ Pabota Jesús pijajivi apóstolevi najinavanapa, athėbėyo pexanaeirajavatatsia, nacaetuatabiaba caejavata pevajėtabinexa Diosojavavelia. Jesús pena María, Jesús pejujapijivi ata, itsapeitirivi ata yajava, nacaetuatabiaba pevajėtabinexa Diosojavavelia. Bajarapajivibitsaėto ciento veinte pajivibeje. Nexata penacaetuatsijavata bajarapamonae tuatuajėta Pedro nonotapuna. Pedro nexata jumaitis penacaetuatsivijavavelia:

¹⁶ –Tajamonae, copiapata rajane baja pacuenia baja cajena tajėvelia jumaitis Dioso pejumelivaisibaxutota. Pacuenia bajayata Davidpijinė Espiritu Santo pejamatabėcueneta tajėvelia vajunupaebiaexanatsi Judaspijinė pexanaejavanexa, copiapata jane baja. Tsipaji Judaspijinė itsa matabapona pamonae Jesús vaetabijitsiatsi, Judaspijinė tocopiapatatsi baja pacuenia Davidpijinė tajėvelia jumaitis. ¹⁷ Judaspijinė picani paxanėyajuvėnėnėmi. Jesús picani bajaraponėmi itapeta penanacuenebinexa paxanėta. ¹⁸ Judaspijinė ira comuata pibisiacuenepexanaematamopalatata. Bajaraponėmi pijacuata nabeyaxuaba. Nexata penabeyaxuabicujinae, pematonono ira bejopaica. Nexata cototititicajunua. Daxita pėnėmi pitsatarabarena. ¹⁹ Daxita Jerusalėn tomarapijivi vėnėlivaisitanetsi daxita xua tocopiapatatsi Judaspijinėmi. Nexata Judaspijinėmi pecomuatsiira, Jerusalėn tomarapijivi vėnėruba Acėldama. “Acėldama,” itsa jai bajarapamonae pijajumeta, mapajumetaje pejumaitisjume: “Papatata pejamatabėcueneta jivitonė beyaxuabatsi, bajarapalatata pecomuatsiira,” pejaijume, jai Pedro penacaetuatsivijavavelia.

²⁰ Icatsia Pedro jumaitis penacaetuatsivijavavelia:

–Salmosvėnėbaxutota tajėvelia Judaspijinė yabara comparacińcuenia jumaitis mapacueniaje:

Pijabo jivinebo xuabetsiana. Itsajivi ata apo ponaponae tsane bajarapabota, jai tajėvelia Salmosvėnėbaxutota Judaspijinė apóstolenė penaexanaejavavecua pepitsapaejavanaxa yabara.

Itsajavata Salmosvėnėbaxutota icatsia tajėvelia jumaitis Judaspijinė yabara mapacueniaje:

Bajaraponėmi penacuenebijavami, itsanė pitsiana, jai itsajavata Salmosvėnėbaxutota itsanė icatsia apóstolenė penaexanaejavanexa yabara Judaspijinė pepitsapaejamatabėcuenė, jai Pedro penacaetuatsivijavavelia.

²¹ Icatsia Pedro jumaitis:

–Caenė panetsicueyaajibi doce paponėbejenexanė Jesús petėpaecujinae Dioso icatsia piasaėyaexanaejavatsi patataejava patanajuapaebinexa. Bajaraxuata bitapetatsi itsanė pataneyanabinexa. Paxamė tuatuajėta ena patanajuapėnainavanapaevi vajatuxanenė Jesús pamatacabi abaxė ponapona mapanacuataje. ²² Juanpijinė raja bautisaba Jesús. Bajara pamatacabijavaveliacujinae, panajuapėnainavanapajė Jesús, matapania athėbėabetsia Dioso patanevecua caponaematacabitsijavavelia. Nexata bajarapitsinė bitapetatsi Jesús petėpaecujinae Dioso icatsia piasaėyaexanaejavatsi patataejava patanajuapaebinexa, jai Pedro penacaetuatsivijavavelia.

²³ Nexata pamonae nacaetuata, Dioso pejumecovėnėtsivi, anijanėbeje itapeta, Pedrohana jane baja Jesús penajuapėnainavanapaevi. Bajaraponėbejeyajuvėnėnė caenė acueyabi pavėnėbeje xaina. Itsavėnė José. Itsavėnė Barsabás. Itsavėnė Justo. Itsanė caevėnė xaina. Bajaraponė pevěnė Matías. ²⁴ Bajaraxuacujinae bajarapamonae najumaitis:

–Vajėtsianatsi Diosojavavelia vajanacayapėtaeayaexanaenexa, najai.

Nexata jane baja bajarapamonae peyapėtaenexa, ponė Dioso itapetsijitsiatsi apóstolenėnėxa, vajėta Diosojavavelia. Bajarapamonae pevajėtsijavata Diosojavavelia, jumaitis mapacueniaje:

–Patajatuxanenė, daxitajivi nejamatabėcueneyapėtaenė. Maponėbejeyajuvėnėnėje, ponė itapetame apóstolenėnėxa, panetsitajėre. ²⁵ Nexata ponė itapetame, pitsiana xua Judaspijinė vecuapitsapa. Bajaraxua Judaspijinė vecuapitsapa peponaexae infiernojavavelia, jai bajarapamonae pevajėtsijavata Diosojavavelia.

²⁶ Bajaraxuacujinae bajarapamonae pijacuenecujirua exana peyapėtaenexa jane baja ponė apóstolenėnėxa. Nexata bajarapamonae yapėtane Matías apóstolenėnėxa. Nexata baja Matías najunua once ponėbeje Jesús pijajivi apóstolevijavavelia. Nexata baja apóstolevi doce ponėbeje.

2

Pacuenia jane baja athėbėvetsica Espiritu Santo patsica Jesús pijajivi petsijamatabėjonexatsi yabara pelivaisi

¹ Itsa baja panepa cincuenta pamatacabibeje pascuavënëfiesta pevereverecaecujinae, icatsia junua Pentecostésvënëfiesta. Nexata bajarapamatacabi daxita Jesús pijajivi nacaetua caejavata. ² Nexata bajarapamatacabi athëbëvetsica jemata najumeta bepinijijoviboxaneto. Nexata pabota Pedrobana nacaetuatena, daxitabo najumeteca. ³ Bajarapamonae tane athëbëvetsica perunaejavatsica bepitarrunutsicotia. Nexata bajarapamonae caejivi canacujitsia bajarapacotia tsimatatanatsanaeyarunaicatsi. ⁴ Nexata daxita bajarapamonae tsijamatabëvënëcatsi Espiritu Santo. Nexata bajarapamonae jemata taxuxuaba penatsipaebijava itsavirijumenëta, apo penatsipaebijumemi picani. Espiritu Santo saya pejamatabëcueneta bajarapacuenia itsavirijumenëta natsipaebiaexanatsi.

⁵ Bajarapamatacabita Jerusalén tomarata jinavanapa ayaibitsaëtoxoneto judíovi. Bajarapamonae saicaya daxitanacuanëjava penaexanaevi. Bajarapamonae saya napata Jerusalén tomarata penataenexa Pentecostésvënëfiesta. Bajarapamonae bitso pejumecovënëtsivi Dioso. ⁶ Nexata bajarapamonae itsa jumetane bepinijijoviboxaneto athëbëvetsica penajumetsijava, nexata pabota Jesús pijajivi nacaetuatena, bajarapabota muxunanacaetua ayaibitsaëtoxoneto bajarapamonae. Pavirijumenëta Jesús pijajivi Espiritu Santo pejamatabëcueneta natsipaebiaexanatsi, bajarapamonae pijajumenë. Nexata bajarapamonae xaniavaetsia jumetane xua yabara Jesús pijajivi tsipaebapona. Bajaraxuata bajarapamonae bitso jamatabëcuenenabenajaca. Tsipaji bajarapamonae caenacuapijivi canacujitsia xaniavaetsia jumetaepona pepo pijajumeta Jesús pijajivi petsipaebilvaisianë. ⁷ Athëbëvetsica bepinijijoviboxaneto penajumetsijava pemuxunanacaetua naevi, pinijicuenia najamatabëxainaeaya jamatabëcuenenabenajaca. Nexata bajarapamonae najumaitsi:

—Daxita mapamonae nacatsipaebanubenaje, Galilea nacuapijivi. Apo penatsipaebivi picani vajajumenë. ⁸ Vaxaitsi itsaverena patatsi, caenacuapijivitsi canacujitsia saicaya xainatsi vajajumenë, apo penatsipaebijumenë mapamonaeje. ¿Detsa pacuenia itsiata vaxaitsi, caenacuapijivitsi canacujitsia, vajanaxanaejavaveliacujinae vajanatsipaebijumenëta cajëpatsi penatsipaebinexa mapamonaeje? ⁹ Vaxaitsiyajuvënëvi raja itsamonae Partia nacuapijivi. Itsamonae Media nacuapijivi. Itsamonae Elam nacuapijivi. Itsamonae Mesopotamia nacuapijivi. Itsamonae Judea nacuapijivi. Itsamonae Capadocia nacuapijivi. Itsamonae Ponto nacuapijivi. Itsamonae Asiavënë nacuapijivi. ¹⁰ Itsamonae Frigia nacuapijivi. Itsamonae Panfilia nacuapijivi. Itsamonae Egipto nacuapijivi. Itsamonae Africa nacuapijivi, Cirene tomarapënëverenapijivi. Itsamonae vaxaitsiyajuvënëvi judíovi, Roma tomarapijivi. Itsamonae apo judíovi, Roma tomarapijivi. Bajarapamonae apo judíovi ata, Dioso jumecovënëtavapana pacuenia vaxaitsi judíovitsi jumecovënëtavapanatsi Dioso. ¹¹ Itsamonae vaxaitsiyajuvënëvi Creta nacuapijivi. Itsamonae Arabia nacuapijivi. Itsiata daxitatsi jumetanetsi xaniavaetsia Jesús pijajivi vajanacatsipaebilvaisianë vajajumenëta. Caejivi canacujitsia bajarapamonae Dioso pinijicuenia pexanaejava yabara nacatsipaebapona, najai athëbëvetsica bepinijijoviboxaneto penajumetsijava pemuxunanacaetua naevi.

¹² Nexata daxita bajarapamonae jamatabëcuenenajunaviacanubena. Nexata bajarapamonae najumaitsi:

—¿Detsa meta mapitsijamatabëcuene yabara itsije? najai.

¹³ Itsamonae saya jumecaponaeya jumaitsi Jesús pijajivi yabara:

—Aitajibi ra saya mapamonaeje, jai.

Pacuenia Pedro tsipaeba athëbëvetsica bepinijijoviboxaneto penajumetsijava pemuxunanacaetuaevijavabelia yabara pelivaisi

¹⁴ Apóstolenë Pedro nonotapuna once ponëbeje apóstolevi yajava. Nexata Pedro pinijumeta jumaitsi athëbëvetsica bepinijijoviboxaneto penajumetsijava pemuxunanacaetuaevijavabelia:

—Tajamonae judíovi, Jerusalén tomarata panenapatsivi, panenamuxunaevere. Paxamë ata Jerusalén tomarata paneenaevi, xaniavaetsia panenamuxunaevere paneyapëtaenexa xua yabara pacatsipaebijitsiatsi. ¹⁵ Paxamë mapamonae yabaraje pajumaitsimë: “Aitajibi ra saya mapamonaeje,” pajamë. Mara pamonaevi apo aitajibi. Bajayacunuaepato raja abaxë maje. Bajarapaepatota jivi apo aitajibi tsabiabi. ¹⁶ Mara pamonaevi paxamë panijajumenëta Espiritu Santo pejamatabëcueneta natsipaebiaexanatsije pecopiapatsixae baja xua bajayata tajëvelia Joelpijnë Diosojumepaebinëmi vajunupaeba. Bajaraxua yabara Dioso pejumaitsiyava Joelpijnë bajayata tajëvelia jumaitsi mapacueniaje:

Dioso jumaitsi: ¹⁷ “Itsa baja imoxoyo pevajënaevi tsane mapanacua pevereverecaenexaje, itorobianicajë Espiritu Santo daxitanacuapijivi, pamonaevi tajajivi petsijamatabëjonexatsi. Daxita panexi, pebijivi, petiriavi, paebiana palivaisi Espiritu Santo paebiaexanaenatsi, xanë talivaisi. Pevjëavi pebijivi taena xua

tsitajëtsianajë bemajitsinaebocuenia. Perujivi pebijivi piamajitsinaejavata tsipaebianajë.¹⁸ Nexata daxita pamonaë tanetonacuenebivi, pebijivi, petiriavi ata, bajarapamatacabi Espiritu Santo toitorobianicajë petsijamatabëjonexatsi. Nexata bajarapamonaë paebiana xanë talivaisi.¹⁹ Tsitajëtsianajë itaboxotatsia pinijicuene taexanaejava. Daxita mapanacuajava ata pinijicuene taexanaejava tsitajëtsianajë. Ayai tsane pijana. Ayai tsane isotocotia. Ayai tsane petsëxë mapanacuataje.²⁰ Nexata matabicipijijuumeto aitaquiri tsane. Meravipijijuumeto bepijana itatsobia tsane. Bajara itsane mapanacuataje itsa baja peneta imoxoyo pevajënaë tsane icatsia pepatsimatacabinexatsica pepo petuxanenë. Bajarapamatacabi bajaraponë pinijicuene pexanaejava pecaëjëpaenëcuenetsi, tsitajëtsiana daxitajivijavabelia.²¹ Nexata pajivi navajëtsiana pepo petuxanenëjavabelia, bajarapajivi capanepaenatsi,” jai Dioso,

jai bajayata tajëvelia Joelpijinë Diosojumepaebinëmi Dioso pejumaitisijava bajaraxua yabara, jai Pedro athëbëvetsica bepinijijoviboxaneto penajumetsijava pemuxunanacaetuaevijavabelia.

²² Icatsia Pedro jumaitsi bajarapamonaëjavabelia:

–Tajamonaë judiövi, panenamuxunaevere paneyapëtaenexa xua yabara pacatsipaebijitsiatsi. Jesús, Nazaret tomarapijinë, Dioso pesaëta pinijicuene pexanaejava exanapona paxamë tuatujëta. Nexata Jesús pacayapëtaeayaxana Dioso ayaicuene pexanaejava pecaëjëpaenëcuenetsi. Bajarapacuenia paxamë baja payapëtaneme Jesús Dioso pitorobinëcuenetsi. Xaniavaetsia rabaja payapëtaneme paxamëjavata Jesús pexanaejava bajarapapinjicuene.²³ Bajaraponë Jesús paxamë panecobeyabelia canajëtsati. Nexata paxamë pabeyaxuabame. Tspajivi patocopatame piamatabëcuenebejevi Jesús cruzajavabelia pecobematabiabarutsinexatsi. Bajarapacuenia Jesús pabeyaxuabame tspajivi baja cajena Dioso tajëvelia najamatabëxaina bajarapacuenia Jesús panebexyaxabinexa.²⁴ Itsiata baitsi jane Jesús petëpacujinaë Dioso icatsia asaëyaexanatsi. Dioso capanepatsi petëpaejavaveua. Tspajivi Jesús Dioso pexënatoxae, acuenebi pematatoxetsijavatsi petëpaejavava.²⁵ Bajayata Davidpijinë tajëvelia yaquina Dioso pejumelivaisibaxutota Jesús icatsia piasaëjavanexa petëpacujinaë. Davidpijinë itsa yaquina Jesús pejumaitisijava Diosojavabelia icatsia piasaëjavanexa petëpacujinaë, yaquina mapejumaitsiitaneje:

Yapëtaniji Dioso taneyajavaponaponaëjavava. Tamuxuneneta ponapona, tacujuanenia. Bajaraxuata apo junavinë tsane.²⁶ Bajaraxuata jamatabëcuenebarëyanë tsane. Nexata jivijavabelia tsipaebianajë tajamatabëcuenebarëyajava. Bajaraxuata yapëtaniji tatëpacujinaë icatsia tasaëjavanexa.²⁷ Xamë, Diosomë, apo necopatsimë tsane petëpaevi peponaenacuayabelia. Apo necopatsimënu tsane taperabëtsabanaenexa nexënatonë.²⁸ Netsitajëtame baja cajena taponaenamutonexa taxainaenexa matacabi apo pevereverecejava. Nejamatabëcuenebarëyaexaname itsa neyajavaponaponaë,

pejaiitane bajayata Davidpijinë yaquina Dioso pejumelivaisibaxutota Jesús pejumaitisijava Diosojavabelia, jai Pedro athëbëvetsica bepinijijoviboxaneto penajumetsijava pemuxunanacaetuaevijavabelia.

²⁹ Icatsia Pedro jumaitsi bajarapamonaëjavabelia:

–Tajamonaë, jumenapebetsiaya pacatsipaebianatsi vajasalinainëmi Davidpijinë yabara. Bajayata baja tëpa Davidpijinëmi. Nexata mëthëtsati. Yapëtanetsi itsajota mëthëtsati.³⁰ Davidpijinëmi raja Diosojumepaebinëmi profetanëmi. Davidpijinëmi baja cajena yapëtanë pacuenia Dioso pexaniajajumeta najumecapanepaëya jumaitsi. Davidpijinëmijavabelia Dioso najumecapanepaëya jumaitsi mapacueniaje: “Pacuenia xamë evetame Israelnacua, bajara icatsia pacuenia bexëjavabelia caenë nemomoxiyajuvënënenë evetsiana nevetsinacuami, Israelnacua,” jai Dioso najumecapanepaëya mapacueniaje Davidpijinëmijavabelia Jesús yabara.³¹ Davidpijinë baja cajena tajëvelia yapëtanë Jesús athëbëvetsica Dioso pitorobijavanexatsi jivi pecapanepaenexa. Tajëvelia yapëtanenua Jesús petëpacujinaë Dioso icatsia piasaëyaexanaëjavaneaxatsi. Bajaraxuata bajayata Davidpijinë tajëvelia cajena vajunupaëba Jesús petëpacujinaë Dioso icatsia piasaëyaexanaëjavaneaxatsi. Davidpijinëmi peyaquinaebaxutota tajëvelia Jesús yabara jumaitsi mapacueniaje: “Nexata apo copatsi tsanetsi petëpaevi peponaenacuayabelia. Apo copatsi tsanetsinua peperabëtsabanaenexa,” jai baja cajena Davidpijinë peyaquinaebaxutota Jesús yabara.³² Bajaraxuata Jesús baja icatsia Dioso asaëyaexanatsi petëpacujinaë. Jesús Dioso piasaëyaexanaëjavatsi, daxita baja paxanë pataniji. Bajaraxuata pacatsipaebatsi.³³ Jesús caponatsi athëbëabetsia Dioso pecujuanenia peecaenexa. Nexata baja paxa Dioso rajutatsi Espiritu Santo pacuenia baja cajena najumecapanepaëya Dioso jumaitsi. Nexata bajaraxuacujinaë Jesús juya itorbica Espiritu Santo paxanëjavabetsica. Nexata xua pinijicuene pexanaejava, aeconoxae

pataenubename, pajumetanemenua, palivaisianē mapamonae panijajumenēta pacatsipaebaje, bajaraxua Espiritu Santo pejamatabēcueneta exana. ³⁴ Itsiata baitsi jane ponē athēbēabetsia Dioso caponatsi, apo Davidpijinē. Davidpijinē bajayata tajēvelia Jesús yabara jumaitsi mapacueniaje:

Dioso jumaitsi tajatuxanenējavabelia: “Evetecare abaxē tacujuanenia. ³⁵ Vecatsivajēnae jumecovēnētsiaexanaenatsi abaxē copiaya nijavajabitsaē nitorobicuenianexa,” jai Dioso tajatuxanenējavabelia,

jai bajayata tajēvelia Davidpijinē Jesús yabara.

³⁶ Bajaraxuata daxita Israēl nacuapijivi xaniavaetsia beyapētane Jesús pelivaisi, ponē paxamē pacobematabiabarutame cruzajavabelia. Bajaraponē Jesús, Dioso exanatsi pepo petuxanenē. Bajaraponē Jesús, Cristo cajena, ponē Dioso itorobica vajanacacapanepaenexa, jai Pedro athēbēvetsica bepinijijoviboxaneto penajumetsijava pemuxunanacaeuanaevijavabelia.

³⁷ Itsa bajarapamonae jumetane Pedro bajarapacuenia pejumaitsiijava, nexata bajarapamonae bejamatabējio bireca pinijicuenia. Nexata bajarapamonae yanijoba Pedrojavabelia, itsamonae Jesús pijajivi apóstolevijavabelia ata.

—Tajamonae, ¿detsa nexata pitsicue ne paexanaenajē patajaneconi yabara? jai nexata bajarapamonae Pedrobanajavabelia.

³⁸ Pedro nexata jumaitsi bajarapamonaejavabelia:

—Daxita paxamē pibisiacuene paneexanaejava pacopabare. Panajamatabēcuenepēnēyorore Diosojavabelia. Nexata pacabautisabiana Jesucristo pejamatabēcueneta papecavecuajibiaexanaenexa daxita pibisiacuene paneexanaeconi. Bajara jane xuacujinae Dioso pacarajutsiana Espiritu Santo papecatsijamatabējonexa.

³⁹ Dioso raja cajena jitsipa papecarajutsinexa Espiritu Santo. Dioso raja jitsipa panexijavabelia ata perajutsinexa Espiritu Santo. Dioso raja jitsipa itsanacuanēpijivi, tajēnacuanējava pejinavanapevi ata, perajutsinexa Espiritu Santo. Daxita pamonae Dioso junatsiana pijajivinexa, tsijamatabējonenatsi Espiritu Santo, jai Pedro bajarapamonaejavabelia.

⁴⁰ Bajarapacuenia Pedro itsa tsipaeba, itsalivaisi pematatsēnēa tsipaeba bajarapamonaejavabelia. Pedro pinijicuenia muxujioba bajarapamonae. Pedro jumaitsi mapacueniaje:

—Pamonae Jesús beyaxuaba, pibisiacuene pexanaevi, bajarapamonae naxuabiana. Nexata paxamē ata bajarapamonae paneyajavanaxuabiyaniva, pavecunajamatabēcuenepēnēyorore Diosojavabelia, jai Pedro.

⁴¹ Nexata Pedro petsipaebilivaisi bajarapamatacabi jumecovēnētatsi tres mil pajivimaxēto. Nexata daxita bajarapamonae Jesús pijajivi bautisaba. Nexata bajarapamonae najunua baja Jesús pijajivijavabelia. ⁴² Nexata bajarapamonae jumecovēnēta palivaisi Jesús pijajivi apóstolevi tsipaebapona. Daxita bajarapamonae Jesús pijajivi yajava, apóstolevinua yajava, najamatabēcuenējēpaeya jinavanapa. Daxita nacaetuatabiaba pevajēcabiabinexa Diosojavabelia. Nacaetuatabiabanua caejavata pexaenexa, penajamatabēnapitabiabinexa xua yabara Jesús sivatēpatsi.

Pacuenia jinavanapa pamonae copiaya Jesús pelivaisi jumecovēnēta yabara pelivaisi

⁴³ Daxitajivi cununava Dioso. Tsipaji Dioso yavenonabiaba apóstolevi. Nexata apóstolevi Dioso pesaēta pinijicue ne pexanaejava, exanabiaba. ⁴⁴ Daxita pamonae jumecovēnēta Jesús pelivaisi, nacaetuatabiaba najamatabecuenējēpaeya. Bajarapamonae daxita pexainaejava nacobenaxainaeya evetabiaba. ⁴⁵ Paepatota itsajivi bitso namatavenona, peyavenonaenexa bajarapamonaeayajuvēnēvi pexainaejava canajetapona. Pijairanē ata canajetapona. Pijabonē ata canajetapona. Pacuenejavaxi xaina, canajetapona. Nexata bajaraxumatamopalata, daxita bajarapamatamo, natsicobetsanabiaba pacuenia caejivi canacujitsia namatavenona. ⁴⁶ Bajarapamonae caematacabi canacujitsia nacaetuatabiaba templobota. Daxita bajarapamonae pijabonējava jamatabēcuenēbarēyaya xaeyabiaba pexaejava najamatabēcuenējēpaeya. ⁴⁷ Nexata bajarapamonae jumai tsabiabi Diosojavabelia: “Diosomē, bitso ayaijamatabēcuenenēmē. Paneyavenonabiabame,” jai tsabiabi. Nexata daxita Jerusalēn tomarapijivi, bajarapamonae pexaniacuena yayiyataeyabiabatsi. Nexata itsamonae ata, caematacabi canacujitsia Jesús pelivaisi jumecovēnētapona peca-panepaenexatsi pibisiacuene pexanaeconivecu. Bajarapamonae najonepona Jesús pelivaisi pejumecovēnētsivijavabelia.

3

Pacuenia apóstolenēbeje Jesús pejamatabēcueneta xanepanaeyaexanabeje apo pecaējēpaenētsi peponaponaejava yabara pelivaisi

¹ Judíovi caniviyoeapatota, bejamatabëcuene a las tres, templobota vajëcabiaba Diosojavabelia. Nexata itsamatacabi, bajarapaepatota, Pedrobeje Juanbeje naponabeje templobojavabelia. ² Ponë apo pecaëjëpaenëtsi peponaponaejava penaexanaejavabeliacujinae, capatabiabatsi pijamonae peetabiabinexatsi templobobaupa muxuneneta. Bajarapabaupa pevënë Pexaniabaupa. Caematacabi canacujitsia bajarapabaupa muxuneneta bajaraponë etabiabatsi pijamonae. Nexata bajaraponë amoneya palata vajëcabiabeca bajarapabaupajava pejoneponaevita templobojavaberena. ³ Nexata itsa bajaraponë taeyeca Pedrobeje Juanbeje pejonenajetarucaejavabeje templobojavaberena, vajëqueca palata. ⁴ Nexata Pedrobeje Juanbeje naëcotabeje bajaraponëjavabelia. Nexata Pedro jumaitsi bajaraponëjavabelia:

—Panetaemabeje, jai Pedro.

⁵ Nexata bajaraponë naitaxutocaevetsiaya jamatabëjumai tsecae:

—Nerajutsianabeje tsamë raja itsacuenejavayo, jamatabëjai tsecae bajaraponë.

⁶ Pedro nexata jumaitsi bajaraponëjavabelia:

—Palata raja apo xainaeñ. Itsiata baitsi jane xua xainajë, carajutsianatsi. Jesucristo, Nazaret tomarapijinë, pecaxanepanaeyaexanaexae baja, nonotapunare. Ponaponare baja, jai Pedro.

⁷ Nexata bajaraponë pecujanenia pacobe, Pedro cobevaetabiayotsia. Bajarajota bajaraponë daxitaneniabeje asisaëreca baja. ⁸ Nexata bajaraponë jirevajunua. Petaxuta nuca. Ponapona baja. Nexata bajaraponë templobo ënëabelia najoneya Pedrobeje Juanbeje pepëta. Bajaraponë jirevanajetaruca. Jumai tsanajetarucae Diosojavabelia:

—Diosomë, ¡bitso ayaijamatabëcuenenëmë! ¡Tsipaji baja nexanepanaeyaexaname! jai tsanajetarucae Diosojavabelia.

⁹ Nexata daxitajivi tanetsi peponaponaejava. Jumetanetsinua pexaniajamatabëcuene perajutsijava Diosojavabelia. ¹⁰ Bajarapamonae itsa tanetsi, yapëtanetsi palata pevajëcabiabecaenëmi templobobaupa muxuneneta, Pexaniabaupavënë muxuneneta. Nexata daxita bajarapamonae itsa tane bajaraponë baja pexanepanaejava, bitso jamatabëcuenenajunaviaca.

Pacuenia Jesús pelivaisi Pedro jivi tsipaeba templobo ënëtuatuajëta, Portal de Salomónvënëjavata, yabara pelivaisi

¹¹ Ponë penaexanaejavaveliacujinae apo peponaponaeñemi, Pedro pexanepanaeyaexanaecujinae, Pedrobeje Juanbeje apo copatsitsibeje. Nexata templobo ënëtuatuajëta, Portal de Salomónvënëjavata, ponë Pedro xanepanaeyaexana, Pedrobeje Juanbeje najuamaxëvaetabanucatsibeje. Nexata jivi ayaiabitsaëto itaxutuaothopatsi. Jamatabëcuenenabenajaca bajarapamonae. ¹² Nexata Pedro itsa tane bajarapamonae pejamatabëcuenenabenajacaejava, nexata Pedro jumaitsi bajarapamonaejavabelia:

—Tajamonae judíovi, ¿detsa xujitsia pajamatabëcuenenabenajacame maponë yabaraje? ¿Detsa xujitsia bitso panenaëcobamebeje mapacueniaje? Paxonëbeje yabara meta pajamatabëjumaitsimë mapacueniaje: “Maponëbeje xanepanaeyaexanabeje apo pecaëjëpaenëmitsi peponaponaejava. Tsipaji baja caëjëpatsibeje bajarapacuenene pexanaenexabeje. Bajarapacuenene caëjëpatsibeje tsipaji meta Dioso pitabarata aneconijibia ponaponabeje,” pajamatabëjamë meta paxanëbeje yabara. Paxonëbeje raja patajamatabëcuenetabeje apo paexanaenëbeje bajarapacuenene. Jesús raja exana bajarapacuenene. ¹³ Vajasalinaivi baja cajena Abrahampijinë, Isaacpijinë, Jacobpijinë. Bajarapamonae pijadioso pexënatato Jesús. Nexata Dioso jivi yapëtaeyaexana Jesús bitso ayaijamatabëcuene pexanaenëcuene. Bajaraponë Jesús paxamë parajutame vajanacayanacuaeveetsivi pecobeyabelia. Vajanacayanacuaeveetsinë Pilato copatsijitsia ata Jesús, itsiata paxamë pajumesaëmë. Apo pajitsipaemë Pilato pecopatsijava Jesús. ¹⁴ Apo pavajëcaemë Pilatojavabelia pecopatsinexatsi Jesús, itsacueneneconiyi apo pexainaeñ, pepo pianeconijibinë. Caranata biji pibisiacuenene pexanaenë, jivibenë, pecopatsinexatsi, pajumesaëmë. Pavajëcame Pilatojavabelia jivibenë pepitsapaenexa penaneconitsivi pejebabiabibovecua. ¹⁵ Ponë Dioso itorobica vajanacarajutsinexa matacabi apo peverevereaejava, bajaraponë caranata pabeyaxuabame. Itsiata baitsi jane Jesús petëpaeacujinae, Dioso icatsia asaëyaexanatsi. Bajarapacuenene patataexae, pacatsipaebatsi. ¹⁶ Bajaraponë Jesús pejamatabëcueneta xanepanaeyaexanatsi baja maponëje, apo pecaëjëpaenëmitsi peponaponaejava. Maponëje najamatabëcuenecopata Jesúsjavabelia. Bajaraxuata maponëje Jesús baja xanepanaeyaexanatsi paneitabarata, panetaeyabiabinë, paneyapëtaenë, jai Pedro bajarapamonaejavabelia Portal de Salomónvënëjavata.

¹⁷ Icatsia Pedro jumaitsi bajarapamonaejavabelia:

—Tajamonaē, yapētāniji pacuene pacabarēexana itsamonaē, papecaevetsivi yajava. Tsi-paji apo payapētaemē xaniavaetsia. Bajaraxuata pabeyaxuabame Jesús. ¹⁸ Bajayata Diosojumepaebivimi profetavi tajēvelia vajunupaeba Jesús athēbēvetsica Dioso pitorobijavanexatsi jivi pecapanepaenexa. Profetavimi tajēvelia vajunupaebanua Jesús bitso pebejiobiaexanaejavanexatsi daxitajivi pijaneconi yabara. Bajarapacuene Jesús baja tocopiapatatsi ita pabeyaxuabame. Tsi-paji baja Dioso bajarapacuenia tocopatatsi. ¹⁹ Nexata baja aeconoxae paneyapētaexae Jesús petēpaejava daxitajivi pijaneconi yabara, pacopabare baja panijaperujumatabēcuenemi. Panajamatabēcuenepēñeyorore baja Diosojavabelia. Nexata pibisiacuene paneexanaeconimi, Dioso pacavecuajibiaexanaena. Nexata pacajamatabēcuene asaēyaexanaena Dioso. ²⁰ Tsi-paji raja icatsia itsamatacabi Dioso athēbēvetsica itorobianica Jesús, ponē bajayata Dioso itapeta papecayavenonaenexa. ²¹ Jesús raja abaxē ecaya athēbētatsia. Matapania pamatacabi Dioso xanebijitsia daxitacuene, icatsia patsianica Jesús. Bajarapacuenia Jesús pepatsijavanexatsica, Diosojumepaebivimi profetavi bajayata tajēvelia vajunupaeba. ²² Vajasalinavimijavabelia baja cajena bajayata tajēvelia profeta Moiséspijinē Jesús yabara jumaitsi mapacueniaje: “Pacuenia nitoroba xanē profetanēnaxanē, bajarapacuenia icatsia vajatuxanenē Dioso itorobiana itsanē profetanē, paxamē panemomoxiyajuvēnēnē tsane. Nexata pacuene yabara bajaraponē profeta pacatsipaebiana, pajumecovēnētsianame xaniavaetsia. ²³ Tsi-paji daxita pamonaē apo jumecovēnētsi tsane bajaraponē profeta petsipaebilivaisi, pepacuene Dioso pijajivivecua tsatsiana. Nexata bajarapamonae Dioso verebabena,” jai baja cajena bajayata tajēvelia Moiséspijinē vajasalinavimijavabelia Jesús pepatsijavanexatsica yabara, jai Pedro bajarapamonaejavabelia Portal de Salomónvēnējavata.

²⁴ Icatsia Pedro jumaitsi bajarapamonaejavabelia:

—Xua baja aeconoxae mapamatacabitaje copiapataponā, bajayata tajēvelia profeta Samuelpijinē copiaya vajunupaeba. Bajara icatsia xuacujinae cotocaevi paprofetavimi ata bajarapacuenia tajēvelia vajunupaebapona bajaraxua. ²⁵ Paxamē rabaja profetavimi papemomoximē. Nexata xua Dioso najumecapanepaeya jumaitsi perajutsinexa panijasalinavimijavabelia, bajaraxua paxamē Dioso pacarajutsiana. Bajayata tajēvelia Dioso jumaitsi vajasalinainēmi Abrahampijinējavabelia Jesús yabara: “Caenē nemomoxiyajuvēnēnē itorobianajē jivi peyavenonaenexa. Nexata nemomoxiyajuvēnēnē yavenonaena caenacuapijivi canacujitsia, mapanacuata pejinavanapaevi,” jai Dioso tajēvelia Abrahampijinēmijavabelia Jesús yabara. ²⁶ Nexata baja copiaya paxamējavabetsica Dioso pexēnato pacatoitorobica. Bajarapacuenia Dioso pexēnato pacatoitorobica paxamē pacaējivimē canacujitsia papecayavenonaenexa panenajamatabēcuene pēñeyorotsinexa pibisiacuene paneexanaejavavecua, jai Pedro bajarapamonaejavabelia Portal de Salomónvēnējavata.

4

Pacuenia Pedrobeje Juanbeje Jesús pelivaisi tsipaebabeje tomaraevetsivijavabelia yabara pelivaisi

¹ Pedrobeje Juanbeje abaxē Jesús pelivaisi tsipaebabeje bajarapamonaejavabelia Portal de Salomónvēnējavata. Nexata bajaraberena jemata patanajetarubena sacerdotevi. Patanajetarubena saduceovinua. Pematatsēnēa patanajetaruca itsanē capitán. Bajaraponē capitán templobopijipolicíavi pevetsinē. ² Daxita bajarapamonae baranaepanatsibeje Pedrobeje Juanbeje. Tsi-paji Pedrobeje Juanbeje Jesús pelivaisi petsipaebijavatabeje, jumai tsaponaebeje:

—Jivi tēpae ata tsane, icatsia asaē tsane petēpaeucujinae. Bajarapalivaisi cajena pexaniajalivivaisi. Tsi-paji baja icatsia Jesús asaēyaexanatsi petēpaeucujinae, jai-beje tsaponaē.

³ Nexata bajarapamonae vaetabatsibeje. Caponaliatsibeje peetsinexatsibeje penaneconitsivi pejebabiabibota. Meravia pitsijavata jutsjiitsatsibeje. Tsi-paji baja bitso caniviyo. ⁴ Itsiata baitsi jane baja jivibitsaētoxonetonē capanepaeya jumecovēnētatsibeje pevaetabivajēnaeyatsibeje. Nexata daxita pamonaē jumecovēnēta Jesús pelivaisi, ēpebijivi namataējētatsi cinco mil ponēbeje.

⁵ Nexata meravā pitsijavata nacaetuata judíovi pevetsivi. Nacaetuata judíovi pijaancianovinua. Nacaetuata judíovi pecujarubivinua. Daxita bajarapamonae nacaetuata Jerusalēn tomarata. ⁶ Nexata bajarajota napata sacerdotenē Anás. Bajaraponē Anás sacerdotevi pepo penamatacatorobinēmi. Napata Caifás ata. Napata Juan ata. Napata Alejandro ata. Napata itsamonaē ata, Anás pijamonaē. ⁷ Nexata Pedrobeje Juanbeje nutatsibeje daxita bajarapamonae pitabarata. Nexata bajarapamonae jumaitsi Pedrobeje Juanbejejavabelia:

—¿Jipatsa pejamatabēcueneta paxanepanaeyaexanamebeje apo pecaējēpaenēmitsi peponaponaējava? jai bajarapamonae Pedrobeje Juanbejejavabelia.

8-9 Nexata Pedro Espíritu Santo bitso jamatabëcueneyavenonatsi. Nexata Pedro jumaitsi bajarapamonaejavabelia:

—Paxamë judíovi paneevetsivi, paxamë ata pijinia paancianovimë, paneyanijobamebeje paneyapëtaenexa ponë pejamatabëcueneta paxanepanaeyaexanaejëbeje apo pecaëjëpaenëmitsi peponaponaejava. Paneyanijobamebejena paneyapëtaenexa pacuenia paxanepanaeyaexanaejëbeje bajaraponë. ¹⁰ Nexata pacatsipaebianatsi daxita paxamë paneyapëtaenexa daxita Israel nacuapijivi ata peyapëtaenexa. Jesús, Nazaret tomarapijinë, ponë paxamë pacobematabiabarutame cruzajavabelia, bajaraponë icatsia Dioso asaëyaexanatsi petëpaecujinae. Bajaraponë Jesús pejamatabëcueneta maponë paneitabarata nucaje, xanepanaeyaexanatsi, jai Pedro.

¹¹ Icatsia Pedro jumaitsi bajarapamonaejavabelia:

—Bajaraponë Jesús yabara Dioso pejumelivaisibaxutota bajayata tajëvelia jumaitsi comparacióncuenia mapacueniaje:

Paiboto itsamonaë boexanaevi naitaxutojematabuatsiana petsitaabejexaetsi itajara, bajarapaiboto itsanë pitsiana. Nexata bajarapaibotota xaniavaetsia yaëtsiana botabu daxita itsaibo matatoxenetsia, jai tajëvelia Dioso pejumelivaisibaxutota.

Bajarapacuenia Dioso pejumelivaisibaxutota comparacióncuenia itsa jumaitsi Jesús yabara, judíovi penamatacaitorobivi Jesús apo pejumecovënëtsijavanexa yabara, jumaitsi. Dioso pitapetsijavatsi Jesús daxitajivi pecapanepaenexa yabara ata jumaitsi. ¹² Caenë Jesús caëjëpatsi vajanacacapanepaenexa pibisiacuene vajaexanaeeneconivecua. Bajaraxuata Dioso itorobica Jesús. Tsipaji baja ajibi pematatsënëa mapanacuataje itsanë ata pejamatabëcueneta vajanacacapanepaenexa Diosojavabelia, jai Pedro bajarapamonaejavabelia.

¹³ Bajarapamonaë yapëtane Pedrobeje Juanbeje ajumejunavijibia Jesús pelivaisi petsipaebijavabeje bajarapamonaejavabelia. Bajarapamonaë yapëtanenua bajaraponëbeje bajayajebi apo penacujarubinëbeje peyaquinaejava. Itsiata bitso yapëtanebeje pexanialivaisi. Saya bajaraponëbeje penacuenebinëbeje. Nexata judíovi pevetsivi jamatabëcuenenabenajaca. Bajarapamonaë nexata jamatabëjumaitsi Pedrobeje Juanbeje yabara:

—Bajaraponëbeje cajena penaponaponaenëbeje Jesúsata. Bajaraxuata bitso baja yapëtanebeje bajarapalivaisi, jamatabëjai.

¹⁴ Bajarapamonaë tane apo pecaëjëpaenëmitsi peponaponaejava penanucaejava Pedrobeje Juanbejejavata. Nexata bajarapamonaë acuenebi pejumaisijava: “Jume raja. Jesús raja pejamatabëcueneta apo xanepanaë maponëje,” acuenebi pejaijava. Tsipaji apo pecaëjëpaenëmitsi peponaponaejava Jesús pejamatabëcueneta ponapona baja. ¹⁵ Nexata bajarapamonaë Pedrobeje Juanbeje caepatoyo navecuacapitsapatsibeje pecovëta ëpamonae penabarëcuaicuaijainexa.

¹⁶ Nexata Pedrobeje Juanbeje pecovëta caepatoyo penavecuacapitsapaejavatatsibeje, bajarapamonaë najumaitsi:

—¿Detsamë raja pacuene exanaenatsi bajaraponëbejejavabelia? Daxita Jerusalén tomarapijivi xaniavaetsia yapëtane bajaraponëbeje pexanepanaeyaexanaejavabeje apo pecaëjëpaenëmitsi peponaponaejava. Nexata acuenebi jivijavabelia vajajumaitsijava: “Apo xanepanaeyaexanaejeje raja bajaraponëbeje,” vajajaijava. ¹⁷ Pinijicuenia vaxaitsi bajaraponëbeje itavetsianatsi petsipaebiyavabeje matavëjëa Jesús pelivaisi itsajiviojavabelia ata. Nexata bajarapacuenia apo tsipaebibeje baja tsane itsamonaëjavabelia Jesús pelivaisi, najai bajarapamonaë Pedrobeje Juanbeje pecovëta caepatoyo penavecuacapitsapaejavatatsibeje.

¹⁸ Nexata icatsia Pedrobeje Juanbeje caevëalia pejonenexaliabeje, junaliatsibeje. Nexata jane baja bajarapamonaë jumaitsi Pedrobeje Juanbejejavabelia:

—Pëtsa baja icatsia matavëjëa jivi patsipaebaponaëbeje Jesús pelivaisi. Pacoparebeje baja jivi panetsipaebaponaëjavabeje Jesús pelivaisi, jai bajarapamonaë.

¹⁹ Nexata Pedrobeje Juanbeje jumaitsibeje bajarapamonaëjavabelia:

—Paxamë panijacuata panajamatabëxainare pacuene xanepana pataexanaponaenexabeje Dioso pitabarata. Itsa pacajumecovënëtsipatsibeje paxamë patanitavetsijavamëbeje, nexata apo pajumecovënëtsinëbeje tsipae Dioso patanitorobijavabeje. ²⁰ Acuenebi cakena patacopatsijavabeje jivi patatsipaebaponaëjavabeje xua patanijibeje, palivaisi ata pajumetanijibeje, jaibeje Pedrobeje Juanbeje bajarapamonaëjavabelia.

²¹ Icatsia judíovi pevetsivi orijibia itavetatsibeje jivi petsipaebaponaëyanivabeje Jesús pelivaisi. Bajaraxuacujinae copatatsibeje baja peponaenexabeje. Ajibi peyabarananeconitsia exanaëjavaneaxatsibeje. Tsipaji daxitajivi jumai tsaponae Diosojavabelia:

—Diosomë, bitso ayaijamatabëcuenenëmë, jai tsaponae.

Bajarapacuenia daxitajivi pexaniajamatabëcuene rajuta Diosojavabelia Pedrobeje Juanbeje pexanepanaeyaexanaexaabeje apo pecaëjëpaenëmitsi peponaponaejava. ²² Ponë xanepanaeyaexanatsi Dioso pesaëta pinijicuene pexanaejavata, bajaraponë penaexanaecujinae xaina baja caurenta pavaibeje pematatsënëa.

Pacuenia Dioso pejumecovënëtsivi vajëca Diosojavabelia pecaëjëpaeyaexanaenexatsi Jesús pelivaisi ajumejunavijibia jivi pepaebaponaenexa yabara pelivaisi

²³ Itsa baja Pedrobeje Juanbeje judiövi pevetsivi copatatsibeje peponaenexabeje, navialiabeje baja itsabelia jinavanapa Dioso pejumecovënëtsivi. Nexata Pedrobeje Juanbeje Jesús pelivaisi jivi petsipaebaponaeyanivabeje sacerdotevi penamatacaitorobivi pitavetsijavatsibeje, navajunupaebabeje Dioso pejumecovënëtsivijavabelia. Navajunupaebabejenua judiövi pijaancianovi ata pitavetsijavatsibeje. ²⁴ Nexata Dioso pejumecovënëtsivi itsa jumetane Pedrobeje Juanbeje penavajunupaebijavabeje, nexata daxita Dioso pejumecovënëtsivi Pedrobana najamatabëcuenejëpaeya vajëca Diosojavabelia. Daxita bajarapamonae pevajëcaejavata Diosojavabelia, jumaitsi mapacueniaje:

—Xamë pinijiDiosomë, nexanaenë cajena itaboxo. Nexanaenë daxita itaboxopijicuene ata. Nexanaenë ira ata. Nexanaenë daxita irapijicuene ata. Nexanaenë manuamene ata. Nexanaenë daxita manuamenepijicuene ata. ²⁵ Xamë Diosomë, bajayata Espiritu Santo pejamatabëcueneta tajëvelia yapëtaeyaexaname patajasalinainëmi Davidpijinë. Nexata nijajivitonë Davidpijinë tajëvelia nexënato Jesús yabara jumaitsi mapacueniaje:

Itsanacuanëpijivi, pamonaë apo judiövi, bitso anaepanabiabiana. Saya jema najamatabëxainabiabiana pexanaenexa picani xua apo caëjëpaetsi pexanaenexa. ²⁶ Pinijinacuanë pevetsivi nacaetuatsiana. Tomaranë pevetsivi ata nacaetuatsiana. Bajarapamonae najamatabëxainaena, xamë Diosomë, nijacuene peccatobijianaenexa. Najamatabëxainaenanua pebejiobiaexanaenexa Cristo, ponë itorobianimica jivi pecapanepaenexa,

jai bajayata tajëvelia Davidpijinë Espiritu Santo pejamatabëcueneta, Jesús pebejiobiaexanaejavanexatsi yabara, jai Pedrobana pevajëcaejavata Diosojavabelia.

²⁷ Icatsia Pedrobana jumaitsi pevajëcaejavata Diosojavabelia:

—Mapatomarataje Herodesbeje, Poncio Pilatobeje, barënacaeuatabeje itsanacuanëpijivi. Barënacaeuatabeje apo judiövi. Barënacaeuatabeje judiövi ata yajava. Bajarapamonae nacaetuata penajumejaitsinexa pacuenia beyaxuabijitsiatsi nexënato Jesús, ponë athëbëvetsica itorobimica. Bajarapacuenia itsa barënacaeuatabeje, copiapata jane baja xua bajayata tajëvelia Davidpijinë vajunupaeba. ²⁸ Bajarapamonae nacaetuata pexanaenexatsi daxita pacuenia baja cajena bajayata nexënato tocopatame pexanaenexatsi. ²⁹ Patajatuxanenë, yapëtaneme judiövi pevetsivi patanitavetsijava jivi patatsipaebaponaeyaniva nexënato pelivaisi. Poxanë panijajivinë. Nexata panerajutsianame patanecaëjëpaejamatabëcuene ajumejunavijibia jivi patatsipaebaponaenexa nexënato pelivaisi. ³⁰ Itsa patomarata patsipaebianajë nexënato pelivaisi, jamatejemayaexanaename piavitanevi. Pinijicuene nexanaejava exanaename jivi peyapëtaenexa bitso ayaijamatabëcuene nexainaenëcuene. Bajarapapinijicuene exanaename nexënato Jesús pejamatabëcueneta, jai Pedrobana pevajëcaejavata Diosojavabelia.

³¹ Itsa baja bajarapamonae vereta pevajëcaejava Diosojavabelia, bajarajota ira nanequetajaraba. Daxita bajarapamonae Espiritu Santo tsijamatabëvënëcatsi. Nexata bajarapamonae Espiritu Santo petsijamatabëvënëcaexaetsi, ajumejunavijibia jane baja jivi tsipaebapona Jesús pelivaisi.

Pacuenia Dioso pejumecovënëtsivi, xua xaina, daxita nacobenaxainaeyaeveta yabara pelivaisi

³² Ayaibitsaëtoxaneto Dioso pejumecovënëtsivi najamatabëjëpaeya jinavanapa. Bajarapamonae xua xaina, apo najamatabëxainae caejivi pexainaenexa. Nexata daxita bajarapamonae xua xaina, nacobenaxaina daxita. ³³ Nexata apóstolevi asaëya tsipaebabiaba jivijavabelia Jesús pelivaisi. Tsipaebabiaba pacuenia icatsia Dioso asaëyaexanatsi vajatuxanenë Jesús petëpaecujinae. Dioso bitso yavenonabiabatsi daxita bajarapamonae. ³⁴ Nexata bajarapamonae Dioso pejumecovënëtsivi caenë ata apo yajuvënëbejioibi pexainaejava yabara. Tsipaji pamonaë bitso xaina iranë, bonë ata, canajetabiaba. Nexata bajarapamonae xua canajeta, bajarapamatamolalata capatabiaba. ³⁵ Nexata bajarapapalata rajutabiaba apóstolevijavabelia. Nexata juya apóstolevi tsicobetsanabiaba penajuajinavanapaevijavabelia pacuenia baja caejivi canacujitsia namatavenonapona. ³⁶ Bajarapamonaeyajuvënënë itsanë pevënë José, Chiprevënë tunaetota penaexanaenë. Bajaraponë Levipijinë pemomoxiyajuvënënë. Bajaraponë apóstolevi

vënërubatsi itsavënë, Bernabé. Bajarapavënë hebreojumeta pejumaitsijume: “Jivi pejamatabëcuenebarëyayaexanaenë,” pejaijume.³⁷ Nexata José ata pijaira canajeta. Bajaraxuacujinae José capata pijairamatamopalata. Nexata bajarapapalata rajuta apóstolevijavabelia.

5

Pacuenia tēpabeje Ananiasbeje pijava Safirabeje, penajumetsēnētsixaebje apóstolenē Pedro pitabarata yabara pelivaisi

¹ José pijaira pecanajetsicujinae, Ananias ata pijava Safirabeje yajuvēnēcanajetabeje pijaira. ² Nexata Ananiasbeje pijavabeje pijairamatamoyajuvēnēpalata muetsia copatabeje. Bajaraxuacujinae Ananias peyajuvēnēcopatsipalata calia apóstolevijavabelia. Nexata Ananias jumaitsi apóstolevijavabelia:

—Tajaira yajuvēnēcanajetajē. Nexata pacarajutatsi daxita bajarapairamatamopalata panetsicobetsanaenexa vajanajuajinavanapaevijavabelia, jai.

³ Nexata Pedro jumaitsi Ananiasjavabelia:

—Ananias, ¿detsa xuajitsia jumecovēnētame dovathi pecayamaxēitorobijava nenajumetsēnētsinexa Espiritu Santojavabelia? Xamē baja rovia nijairamatamopalata yajuvēnēcopatame. ⁴ Nijairami necanajetsivajēnaeya, nijaira baja cajena picani saicaya. Nijaira necanajetsicujinae ata, xua nijairamatamo pitame, nijajava baja cajena picani saicaya. ¿Detsa xuajitsia nexata mapacuenia neyamaxēitorobijava najamatabēxainameje? Ēpaxanējyaverena baja cajena apo najumetsēnētismē. Najumetsēnētame baja cajena Diosojavabelia ata, jai Pedro.

⁵ Ananias itsa jumetane bajarapacuenia Pedro pejumaitsijava, Ananias petēpaenē irata jopa. Nexata daxita pamonaē vēnēlivaisitane bajarapacuenia Ananias petēpaejava, pinijicuenia jamatabēcuenenajunaviaca. ⁶ Nexata pabota Ananias petēpaenē boca, bajarapaboyarena pevējēavi jonena. Mataquiona petēpaenē. Bajaraxuacujinae capitsapalia pemēthētsinexa.

⁷ Bajaraxuacujinae bexēa, acueyabi pahorabejecujinae, Ananiaspijinē pijava jonena. Bajarapova abaxē apo yapētae pamona pevecuatēpaejavatsi. ⁸ Pedro icatsia yanijoba bajarapovajavabelia. Jumaitsi:

—Netsipabare. ¿Xaniajai tsabaja? ¿Mapamatamotaje pacanajetamebeje panijairamibeje? jai Pedro.

Nexata bajarapova jumaitsi:

—Xaniajai rabaja. Bajarapacuenia pacanajetajēbeje, jai bajarapova.

⁹ Nexata Pedro jumaitsi bajarapovajavabelia:

—¿Detsa xuajitsia amonabeje panajamatabēcuenejēpamebeje panenajumetsēnētsinexabeje Espiritu Santojavabelia? Namuxunaevere. Jumia naviabanajetarubena rabaja amonami pemēthēcaevilia. Bajarapamonae icatsia xamē ata cacaponaelia pecamēthētsinexa, jai Pedro.

¹⁰ Nexata bajarajota Pedro pitabarata bajarapova ata icatsia petēpaeava irata jopa. Itsa jonena pevējēavi penaviabanajetarubenaevi, Ananiaspijinē pemēthēcaevilia, caxitajarababuata petēpanucaeava. Nexata icatsia bajarapamonae capitsapalia bajarapova pemēthētsinexa pamonami pemēthē muxuneneta. ¹¹ Nexata daxita Dioso pejumecovēnētsivi, itsamonae ata, pamonaē bajarapajivibeje petēpaejava vēnēlivaisitanetsi, bitso junava.

Pacuenia apóstolevi pinijicuenē pexanaejavanē exanapona Dioso pesaēta yabara pelivaisi

¹² Apóstolevi Dioso pesaēta exanapona pinijicuenē pexanaejavanē Jerusalén tomarapijivi pitabarata. Daxita Dioso pejumecovēnētsivi nacaeuatabiaba templobo ēnētuaajēta, Portal de Salomónvēnējavata. ¹³ Itsamonae, pamonaē Dioso apo pejumecovēnētsivi, junava penanacaeuatsijava bajarapamonaeta. Itsiata daxita Jerusalén tomarapijivi pexaniacuenia yayataeyabiaba Dioso pejumecovēnētsivijavabelia. ¹⁴ Pevajēnaeyabelia jivibitsaēttoxanetonē jumecovēnēta pona Jesús pelivaisi, pebijivi, petriavi ata. Nexata daxita bajarapamonae nanacaeuatabiaba Dioso pejumecovēnētsivijavabelia. ¹⁵ Apóstolevi Dioso pesaēta pinijicuenē pexanaponaexae, itsamonae tocapatabiabatsi piavitanevi callejavaberena. Nexata piavitanevi tojebabiabatsi callejavata camata. Itsamonae tulimanēta tojebabiabatsi. Nexata Pedro itsa najetaruca callejava, piavitanevi jitsipabiaba Pedro pitacaēnae ata petsijopaejavatsi pejamatejemanexa bajarapamonae piavitanejavaveca. ¹⁶ Nexata jivibitsaēttoxanetonē patabiaba Jerusalén tomaraberena imoxoyo penaetomaraxijavaverena penaropobivi. Bajarapamonae Pedro tocapatabiabatsi piavitanevi. Tocapatabiabatsinua bitso dovathi peyajavajinavanapevi. Nexata Pedro daxita bajarapamonae jamatejemayaexanabiaba.

Pacuenia apóstolevi taicatsi paneconitsiaexanaenexatsi yabara pelivaisi

¹⁷ Sacerdotevi pepo penamatacaitorobinē yajavaponapona saduceovi. Nexata daxita bajarapamonae pinijcuenia anaepana apóstolevijavabelia. Tsipaji cuenecaēbatsi. ¹⁸ Bajaraxuata taicatsi apóstolevi. Jebatsi penaneconitsivi pejebabiabibota. ¹⁹ Itsiata bailsi jane bajarapameravi Dioso pijaángel apóstolevi tobaupanatsi penaneconitsivi pejebabiabibo baupanē. Nexata ángel apóstolevi matacapitsapaliatsi. Angel jumaitsi apóstolevijavabelia:

²⁰ —Paponare templobojavabelia. Patsipaebianame jivijavabelia mapapejanalivaisi, Dioso vajanacayajavaponaponaejava, jai ángel apóstolevijavabelia.

²¹ Apóstolevi itsa jumetane bajarapacuenia ángel pejumaitsijava, nexata ajena matacabi tsina, apóstolevi ponalia templobojavabelia. Nexata apóstolevi templobota Jesús pelivaisi jivi tsipaebanubena.

Nexata pijinia bajarapaepatota sacerdotevi pepo penamatacaitorobinē peyajavaponaponaevi barēnacaetuata itsabota. Nexata junata penacaetuatsinexa judíovi pijaancianovi. Junatanua penacaetuatsinexa judíovi pecujarubívi. Nexata bajarapamonae jumaitsi templobopijipolicíavijavabelia:

—Panetosivaponaremelia apóstolevi penaneconitsivi pejebabiabibojavabelia. Nexata panetobarēpatsiaremena maberenaje, jai.

²² Nexata templobopijipolicíavi itsa ponalia, apo caxitajarabi apóstolevi penaneconitsivi pejebabiabibota. Nexata apo pecaxitajarabixae, naviabarena cobesa petsipaebinexa penacaetuatsivijavabelia. ²³ Nexata templobopijipolicíavi jumaitsi bajarapamonaejavabelia:

—Itsa papaliajē penaneconitsivi pejebabiabibojavabelia, daxitabaupanē xaniavaetsia nabaupaxatabanubena. Bajarajota nubena picani pevetanubenevi baupanē. Itsiata bailsi jane itsa pabaupatajē, caenē ata apo ecae bajarapabo ēnētuatujēalia, jai policíavi.

²⁴ Nexata templobopijipolicíavi pijacapítan, sacerdotevi penamatacaitorobivinu, itsa jumetane bajarapacuenia policíavi pejumaitsijava, bajarapamonae jamatabējumaitsi:

—¿Detsamēra nexata itsi apóstolevi? jamatabējai bajarapamonae.

²⁵ Nexata bajarapaepatota itsanē pebi parena, templobojavaverena peponaenē. Jumaitsi bajaraponē bajarapamonaejavabelia:

—¡Panejumetaema! Pamonae pacajunume penaneconitsivi pejebabiabibota, bajarapamonae cajena nubena templobotalia. Jivijavabelia tsipaebanubena Jesús pelivaisi, jai bajaraponē.

²⁶ Nexata templobopijipolicíavi pijacapítan barēlia pijajivi. Nexata policíavi apóstolevi xaniavaetsia saya caponarenatsi. Tsipaji jamatabējumaitsi:

—Anaeya itsa taicaejitsipatsi apóstolevi, nexata jivi nacabaraanaepanaejitsipa. Nexata nacatseconaejitsipa ibotonēta, jamatabējai policíavi.

²⁷ Itsa baja apóstolevi caparenatsi, nexata nubatsi sacerdotevi penamatacaitorobivi pitabarata, judíovi pijaancianovinua pitabarata, judíovi pecujarubivinu pitabarata. Nexata bajarajota sacerdotevi pepo penamatacaitorobinē jumaitsi apóstolevijavabelia:

²⁸ —Paxanē baja cajena pacajumaitsitsi: “Pētsa baja matavējēa jivi patsipaebame Jesús pelivaisi,” pacajaitsi. ¿Itsiata tsabaja rovia apo panejumecovēnētsimē? Pataema jane pacuenia Jerusalén tomarata yacaējēpaponā panetsipaebilivaisi. Paxamē jamatabēpaneconeconitame Jesús pebeyaxuabijavatsi yabara, jai sacerdotevi pepo penamatacaitorobinē apóstolevijavabelia.

²⁹ Nexata sacerdotevi pepo penamatacaitorobinē bajarapacuenia pejumaitsixae, Pedro, itsaapóstolevi yajava, jumaitsi bajarapamonaejavabelia:

—Namatavenonatsi vajajumecovēnētsinexa xua vajaDioso nacaitoroba. Nexata Dioso vajanacaitorobicuenia, saicayacuenia jivi itsa nacaitoroba, apo bejumecovēnētsitsi.

³⁰ Paxamē Jesús pabeyaxuabame pamatacabita pacobematabiabarutame cruzajavabelia. Vajasalinaivimi pijaDioso Jesús icatsia asaēyaexanatsi petēpacujinae. ³¹ Nexata Dioso jumaitsi Jesúsjavabelia: “Ecare tacujanenia. Xamē rabaja ayajamatabēcuenenēmē. Jivi nevetsinē tsane. Necapanepaenēnu tsane,” jai Dioso Jesúsjavabelia. Bajarapacuenia Dioso jumaitsi Jesúsjavabelia vaxaitsi judíovitsi pibisiacuene vajaexanabiabijava vajacopabijavanexa yabara jumaitsi. Vajanajamatabēcuene pēnēyortsijavanexa ata Diosojavabelia yabara jumaitsi. Tsipaji Dioso jitsipa Jesús pejamatabēcuenetā daxitajivi aneonijibbia petaenexa. ³² Nexata bajarapacuenē yabara jivijavabelia itsa patsipaebaponajē, Espíritu Santo paneyajava tsabiabi. Dioso cajena rajutapona Espíritu Santo pamonaē jumecovēnēta Dioso, jai Pedro, itsaapóstolevi yajava, daxita bajarapamonaejavabelia.

³³ Nexata daxita bajarapamonae itsa jumetane bajarapacuenia Pedrobana pejumait-sijava, nexata bitso anaepana. Jamatabēbeyejebatsi picani apóstolevi. ³⁴ Itsiata apo beyejebitsi. Tsipaji bajarapamonae yajuvēnēnē judíovi pecujarubinē, Gamalielvēnēnē, nonotapuna daxita penajuavi pitabarata. Bajaraponē fariseonē, Dioso Moiséspijinēta penajumecopatsilivaisi pecujarubinē. Daxitajivi peyaiyatanētsi. Nexata Gamaliel itoroba

apóstolevi caeepatoyo pepitsapaenexalia. ³⁵ Nexata apóstolevi caeepatoyo pepitsapaevajavatalia, pecovëta, Gamaliel jumaiti penajuavijavabelia:

–Tajamonae judíovi, panajamatabëxainare xaniavaetsia. Pëtsa paexaname pacuenia panajamatabëxainame mapamonaejavabeliaje. ³⁶ Panajamatabënapire pacuenia Teudasvënëni bajayata exanatsi. Bajaraponëmi picani nacua pevetsinënexa, ayaijamatabëcueneñ bitso jamatabënaexana. Nexata picani pijajivinexa pëñajinavanapatsi cuatrocientos ponëbeje. Itsiata Teudaspijinëmi beyaxuabatsi. Bajaraponëmi pepëñajinavanapaevitsi, pamonae pijajivinexa picani, daxita nacayajateca. Nexata copiaruca baja bajarapacuenemi. ³⁷ Bajaraxuacujinae icatsia pamatacabi gobierno pejamatabëcueneta daxitajivi namataëjëtsi, Judasvënëni, Galilea nacuapijinëmi, bajarapacuenia pijinia jivi ayaiBITSaëtoXaneto pëñajinavanapatsi. Bajaraponëmi ata beyaxuabatsi. Nexata daxita pepëñajinavanapaevitsi nacayajateca. Nexata baja copiaruca bajarapacuenemi. ³⁸ Bajaraxuata nexata mapamonaeje apóstolevi yabara pacatsipaebijitsiatsi. Pëtsa paitacsianabame bajarapamonae. Itsa bajarapamonae saya mapanacuapijivi pejamatabëcueneta tsipaebavanapaje, bepíjia peneta bajarapamonae petsipaebilivaisi vereverecaena. ³⁹ Itsa jume, Dioso pejamatabëcueneta bajarapamonae bajarapalivaisi jivi itsa tsipaebavanapa, nexata acuenebi tsipae paxamë bajarapacuenepaneverevereayaexanaejava. Belia ayaineconi panatsiexanaejitsipame Diosojavabelia, jai Gamaliel daxita penajuavijavabelia.

⁴⁰ Nexata daxita bajarapamonae jumecovënëtsi Gamaliel. Apóstolevi icatsia caevëlia pejonexalia junaliatsi. Bajaraxuacujinae apóstolevi, caenë canacujitsia, ayaiCuenia jumatiTibaponatsi penaconitsivi pejumaconitabiimacata. Itavetsi icatsia matavëjëa jivi petsipaebiyaniiva Jesús pelivaisi. Bajaraxuacujinae copabatsi jane baja peponaenexa. ⁴¹ Apóstolevi nexata pitsaparena bajarapabovecua. Barëyaya ponalia apóstolevi. Tsipaji Dioso tocopatatsi bajarapacuenia bepejioBiaexanaponaenexatsi Jesús pijajivixae. ⁴² Nexata caematacabi canacujitsia templobota, bonëjaya ata, apóstolevi asaëya Jesús pelivaisi tsipaebapona jivijavabelia. Apóstolevi jivijavabelia tsipaebapona pexanialivaisi, Jesucristo, ponë Dioso itorobica jivi pecapanepaenexa, pelivaisi.

6

Pacuenia itapetatsi siete ponëbeje diaconovinexa yabara pelivaisi

¹ Jesús pelivaisi pejumecovënëtaPonaevi, pevajënaeyabelia ayaiBITSaëtoXanetonë tsaponae. Bajarapamatacabi Jesús pelivaisi jumecovënëtaPona griegovi, judíovi ata. Nexata pamonajivi pevecuatëpaevanëtsi, pamonae bitso bejiobi, bajarapamonaejavabelia apóstolevi rajutabiaba penamatavenonaejavanë. Nexata Jesús pelivaisi penajuajumecovënëtsivi, pamonae griegovi, jumaiti judíovijavabelia:

–Caematacabi canacujitsia apóstolevi pamonajivi pevecuatëpaevanëtsijavabelia, tsicobetsanabiaba pexaejavanexa. Nexata xuavajëtonë panijaviriavijavabelia rajutabiaba, bajaraxuavajëtonë patajaviriavijavabelia apo rajutabiabi, jai griegovi judíovijavabelia.

² Doce ponëbeje, apóstolevi, najamatabëcuenejëpa pacuenia exanaejitsia judíovibeje griegovibeje penacobaëbabiabixae. Nexata apóstolevi junata penacaetuatsinexa daxita pamonae Jesús pelivaisi pejumecovënëtsivi. Nexata baja itsa nacaetuata daxita bajarapamonae, apóstolevi jumaiti bajarapamonaejavabelia:

–Tajamonae, paxanë itsa patsicobetsanabiabijitsipajë pexaejava bitso penamatavenonaevijavabelia, nexata apo panecuenecaëjëpabiabi tsipae jivi patatsipaebinexa Dioso pitorobilivaisi. ³ Nexata paitapetsianame siete ponëbeje, paxamëyajuvënëvi. Paitapetsianame papëbijivi caejamatabëcuene pexinaevi, bitso pëtsijamatabëvënëcaevitsi Espiritu Santo, bitso peyapëtaeyaxanaevitsi Espiritu Santo pejamatabëcuene. Bajarapamonae paitorobianame bepejiobivijavabelia pëtsicobetsanabiabinexa penamatavenonaeCuene. ⁴ Nexata paxanë saicaya patsitecavanapaenajë patavajëcabiabijava Diosojavabelia. Patsipaebabiabianajënu Dioso pitorobilivaisi jivijavabelia, jai apóstolevi penacaetuatsijavata daxita Jesús pelivaisi pejumecovënëtsivijavabelia.

⁵ Nexata daxita pamonae nacaetuata, itsa jumetane bajarapacuenia apóstolevi pejumaitisijava, tsitaxanepanatsi. Nexata bajarapamonae itapeta mapamatabëxëyoje. Itapeta Estebanvënëni, ponë bitso Dioso pejumecovënëtsinë, Espiritu Santo pëtsijamatabëvënëcaenëtsi. Itapeta Felipevënëni. Itapeta Prócorovënëni. Itapeta Nicanorvënëni. Itapeta Timónvënëni. Itapeta Parmenasvënëni. Itapeta Nicolásvënëni. Nicolás it-sanacuapijinë, Antioquía tomarapijinë. Bajaraponë apo judíonë. Itsiata judíovicuenia Dioso najumecovënëtaPonaPona. ⁶ Daxita bajarapamatabëxëyo pitapetsicujinaetsi, nubatsi apóstolevi pitabarata. Nexata pamonae itapetatsi, caenë canacujitsia pematabocotojumavereca apóstolevi nacobeatuanubena Diosojavabelia petovajëtsijavata.

⁷ Nexata jane baja apóstolevi, itsamonae yajava, Dioso pitorobilivaisi jivi tsipaebapona Jerusalén tomarata. Nexata Jerusalén tomarata ayaibitsaëtoxaneto tsaponae Jesús pelivaisi pejumecovënëtsivi. Sacerdotevi ata ayaibitsaëto jumecovënëta pona Jesús pelivaisi.

Pacuenia Esteban vaetabatsi penaneconitsiaexanaenexatsi yabara pelivaisi

⁸ Dioso bitso yavenonabiabatsi Esteban. Nexata Esteban Dioso pesaëta pinijicuene pexanaejava, exanabiaba. Daxitajivi pitabarata Dioso pesaëta pinijicuene pexanaejava, Esteban exanapona. ⁹ Nexata itsamonae Esteban anaeya jumenotatsi. Bajarapamonae nacaetuatabiaba judíovi penacaetuatabiabibota. Bajarapabo pevënë Esclavos Libertados. Bajarapamonae caenacuaverena apo pepatsivi. Itsamonae Cirene nacuaverena pepatsivi. Itsamonae Alejandria tomaraverena pepatsivi. Itsamonae Cilicia nacuaverena pepatsivi. Itsamonae Asiavënë nacuaverena pepatsivi. Bajarapamonae yajunëni Esteban anaeya jumenotatsi. ¹⁰ Nexata bajarapamonae yajunëni Esteban anaeya itsa jumenotatsi, Espíritu Santo yavenonatsi pejumecanaviatsijavata bajarapamonae javabelia. Bajaraxuata nexata daxita bajarapamonae Esteban apo jumecanaviatsicapanepeatsi juya. ¹¹ Nexata pamonae Esteban anaeya jumenotatsi, matamota itsamonae Esteban peneconitsinexatsi jivijavabelia. Nexata pamonae matamotatsi penajumetsënëtsinexa Esteban yabara, najumetsënëtsia jane baja jumaiti jivijavabelia:

—Pajumetaniji pibisiacuenia Esteban pebaracuaicuajitsabiabijava Moisés pjinë. Pajumetanijina pibisiacuenia pebaracuaicuajitsabiabijava Dioso ata, jai bajarapamonae Esteban yabara.

¹² Bajarapacuenia bajarapamonae pejumaitisixae, nexata daxitajivi anaepana. Judíovi pijaancianovi ata anaepana. Judíovi pecujarubivi ata anaepana Esteban javabelia. Nexata daxita bajarapamonae Esteban cujibarenatsi. Vaetabatsi. Caponaliatsi penutsinexatsi sacerdotevi penamatacaitorobivi pitabarata, judíovi pijaancianovi ata pitabarata, judíovi pecujarubivi ata pitabarata. ¹³ Nexata icatsia bajarapamonae junata pamonae jane baja matamota najumetsënëtsiaya peneconitsinexatsi Esteban. Nexata bajarapamonae itsa pata, jumaiti Esteban yabara:

—Mara ponëje Esteban apo cueranae Dioso apo pejitsipaecuenia pebaracuaicuajitsabiabijava templo. Apo cueranaenua Dioso Moisés pjinëta penajumecopatsilivaisi ata pebaracuaicuajitsabiabijava. ¹⁴ Pajumetaniji maponëje pejumaitisijava: “Jesús, Nazaret tomarapijinë, xuabianica mapatemploboje. Dioso Moisés pjinëta penajumecopatsilivaisi ata vajajumecovënëtsijava, nacacopabiaexanaena Jesús,” jai maponëje, jai najumetsënëtsiaya Esteban yabara pamonae matamotatsi.

¹⁵ Nexata sacerdotevi penamatacaitorobivi, judíovi pijaancianovi ata, judíovi pecujarubivi ata, naëcobarëcëpatsi Esteban. Nexata bajarapamonae Esteban pitabaranaëcobarëcëpajavatatsi, betsita ángelnëitabara tsarucea Esteban.

7

Pacuenia Esteban jumecanaviata sacerdotevi pepo penamatacaitorobinë yabara pelivaisi

¹ Sacerdotevi pepo penamatacaitorobinë jumaiti Esteban javabelia:

—¿Xaniajai tsabaja? ¿Jumaitisimë tsabiabi pacuenia mapamonae caneconitsiajumaitisije? jai sacerdotevi pepo penamatacaitorobinë.

² Nexata sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata, Esteban jumaiti mapacueniaje:

—Tajamonae, patanevetsivimë, panenamuxunaevere. Vaja Dioso bitso ayaijamatabëcuenenë. Tsitanaitajëta baja cajena bajayata vajasalinainë Abrahampijinë javabelia. Vaja Dioso tsitanaitajëta Abrahampijinë javabelia abaxë Abrahampijinë itsa ponapona Mesopotamia nacuata. Bajarapanacuata Abrahampijinë ponapona pevarapaevajënaeya Harán nacuyavelia. ³ Dioso jumaiti Abrahampijinë javabelia: “Nijairavecu ponare. Daxita nijamonae ata vecuaponare. Ponare pairajavabelia catsitajëtsianatsi,” jai Dioso Abrahampijinë javabelia. ⁴ Bajaraxuata Abrahampijinë Caldea nacujavaverena pona. Nexata pata Harán nacuyaverena. Bajarapanacuata Abrahampijinë itsa ponapona, nexata paxapijinëmi Harán nacuata vecuatëpatsi. Paxapijinëmi pevecuatëpacujinaetsi, Dioso icatsia Abrahampijinë varapaeyaexanatsi mapairajavaberenaje, itsajota vaxaitsi aeconoxae jinavanapatsi. ⁵ Itsiata Abrahampijinë Dioso apo rajutsitsi itsairayo ata pepo pijairanexa. Jume cajena. Tsiquiriirayo ata apo rajutsitsi. Itsiata tajëvelia Dioso najumecapanepaeya jumaiti Abrahampijinë javabelia: “Carajutsianatsi nijairanexa daxita mapaira tanemeje. Nevënamuto nexi bajarapaira xainaena,” jai Dioso. Abaxë Abrahampijinë pexi itsa apo xinae, bajarapacuenia Dioso najumecapanepaeya jumaiti Abrahampijinë javabelia. ⁶ Icatsia Dioso tajëvelia jumaiti Abrahampijinë javabelia:

“Itsamatacabi nemomoxi mapairaje vecuaponaena. Nexata najinavanapaena itsanacuapijivi pijanacuata. Bajarapanacuata nemomoxi itsanacuaverena pepatsivixae tsane, bajarapanacuapijivi pijajivi exanaenatsi. Bepejiobicuenia nacuenbiaexanabiabianatsi. Cuatrocientos pavaibeje nemomoxi bepejiobicuenia jinavanapaena bajarapanacuatalia. ⁷ Xanë nexata naneconitsiaexanaenajë panacuapijivi nemomoxi pijajivi exanaenatsi. Bajaraxuacujinae nemomoxi bajarapanacuavecu pitsapaena. Nexata icatsia mapanacuayaberenaje patsiana. Nexata mapanacuataje xanëjavaberena najamatabëcuene copatsiaya navajëcabiabiana,” jai baja cajena tajëvelia Dioso Abrahampijinëjavabelia. ⁸ Nexata Abrahampijinë Dioso itorobatsi peperabëcaucutaponaenexa daxita papebinacuetoxi naexana Abrahampijinë pijabota, baitsi peboupiperabëcaucutaponaenexa. Bajarapacuenia Abrahampijinë pexanaenexa Dioso itorobatsi Abrahampijinë penajamatabënapitabiabinexa Dioso peyavenonaeypaebijavatsi. Nexata Abrahampijinë pijava vecuanaexanatsi pebinëyo. Bajaraponëyo pevenë Isaac. Nexata baja penacuetonëyo penaexanaecujinae, ocho pamatacabibeje itsa xaina, Abrahampijinë boupiperabëcaucuta pexënatonëyo pacuenia Dioso itorobatsi. Bajaraxuacujinae icatsia juya Isaacpijinë pexënato xaina. Isaacpijinë pexënato pevenë Jacob. Bajara icatsia pacuenia Isaacpijinë ata boupiperabëcaucuta pexënatonëyo. Bajaraxuacujinae icatsia Jacobpijinë pexi xaina doce ponëbeje. Bajara icatsia pacuenia Jacobpijinë ata boupiperabëcaucuba pexi. Bajarapadoce ponëbejejavaverena penaexanaponaeivi doce pabitsaëtobeje naexana, jai Esteban sacerdotevi penamatacaitorobivijavabelia, judiövi pijaancianovijavabelia ata, judiövi pecujarubivijavabelia ata.

⁹ Icatsia Esteban jumaitsi bajarapamonaejavabelia:

–Nexata Jacobpijinë pexi, ponëbeje nacaemonaemi, vaxaitsi vajasalinaivi. Bajarapamonaeivi peyuyapijinë Josépijinë. Nexata Josépijinë cuencaëbatsi pematapijivi. Bajaraxuata Josépijinë pecaponaenexatsi Egipto nacuyabelia, canajetaxubatsi pematapijivi. Itsiata Josépijinë Dioso yajavaponaponatsi. ¹⁰ Nexata Josépijinë bepejiobiaexanaejavaminexatsi Egipto nacuata, vecuapanepaponapona. Dioso daxitacuene Josépijinë Egipto nacuata yapëtaeayaxanaponatsi. Bajaraxuata Egiptonacua pevetsinëmi, Josépijinë pexaniajamatatabëcuenia tanetsi. Nexata Egiptonacua pevetsinëmi tocopatatsi Josépijinë pecobenaevetsinexa Egiptonacua. Egiptonacua pevetsinëmi pijabo ata petoevetsinexa, Josépijinë tocopatatsi, jai Esteban bajarapamonaejavabelia.

¹¹ Icatsia Esteban jumaitsi bajarapamonaejavabelia:

–Nexata pinijianixaneto pata daxita Egipto nacujava, Canaán nacujava ata. Nexata bitso bejiobi jivi. Canaán nacuata vajasalinaivi jane baja apo xinae pexaejava. ¹² Itsiata Egipto nacuata janibovajënaeya, Josépijinë pecomuaquejebijava ayajiva xaniavaetejeba trigoxu. Nexata Jacobpijinë vënëtane Egipto nacuata pexaejava pexainaejava trigoxu. Nexata Jacobpijinë pexi itoroba Egipto nacujavabelia pesivaponaenexalia pexaejava. Bajarapanamuto ponalia, copiaya jane baja pexaejava pesivaponaenamutolia Jacobpijinë pexi, pamonaevi jane baja vajasalinaivi. Itsiata Jacobpijinë pexi peyuyapijinëjavata comucae ata, apo yapëtae peyuyapijinëcuene. ¹³ Bajaraxuacujinae vajasalinaivi icatsia cotocaeivi panamuto itsa sivaponalia pexaejava, nexata Josépijinë jumaitsi pematapijivijavabelia: “Xanë raja Josépijinë panejuyapijinë,” jai Josépijinë. Bajaraxuata nexata Egipto nacuaevetsinëmi yapëtae bajarapamonae Josépijinë pijamonae cuene. ¹⁴⁻¹⁵ Nexata Josépijinë tonajumexuaba paxa Jacobpijinë penavaraenexa Egipto nacuyabelia. Nexata Jacobpijinë daxita pexi, pemomoxi yajava, varapa Egipto nacuyabelia. Nexata Jacobpijinë, daxita pexi, pemomoxi yajava, itsa pata Egipto nacuata pejinavanapaenexa, nanamatajëta setenta y cinco pajivibeje. Bajaraxuacujinae Egipto nacuata Jacobpijinë tēpa. Pexi ata vajasalinaivimi jane baja bajarapanacuata icatsia tēpa. ¹⁶ Bexëjavabelia vajasalinaivimi jane baja petëpaevimi pesijebinxatsi ibovajuta, Siquem tomarata, sicaponatsi Siquem tomarabelia. Bajarapaihovajuta cajena jivi petëpaevi, jebabiaba. Abrahampijinë abaxë itsa asaë vajasalinaivimi pevajënaeya, comuata bajarapaihovaju. Hamorpijinë pexita comuata bajarapaihovaju, jai Esteban sacerdotevi penamatacaitorobivijavabelia, judiövi pijaancianovijavabelia ata, judiövi pecujarubivijavabelia ata.

¹⁷ Icatsia Esteban jumaitsi bajarapamonaejavabelia:

–Nexata baja itsa panepapona bejamatatabëcuene trescientos veinte pavaibeje vajasalinaivimi pejinavanapaecujinae Egipto nacuata, nexata Abrahampijinë pemomoxi, vajasalinaivimi jane baja, ayabitsaëtoxaneto tsaponae Egipto nacuata. Nexata jane baja pijinia imoxoyo pevajënae tsaponae pecopiapatsinexa pacuenia Dioso pexaniajajumeta najumecapanepaeya jumaitsi Abrahampijinëjavabelia, baitsi jane baja Dioso pejamatatabëcueneta vajasalinaivimi pejutsinexatsi Egipto nacuaverena pejinavanapaenexa Canaán nacuata. ¹⁸ Nexata bajarapamatatabi itsanë junua

pevetsinexa Egiptonacua. Ponë Egiptonacua pejanaevetsinë, bajaraponë apo yapëtae Josépjinë Egiptonacua pevetsinëmicuene. Tsipaji baja bajayata, bajaraponë pevajënaeya, tēpa baja Josépjinë. ¹⁹ Nexata Egiptonacua pejanaevetsinë, vajasalinaivimi apo itaxutotsoniataetsi. Ayaicuenia nacuenëbiaexanabiabatsi. Bejiobiaexanabiabatsinua. Vajasalinaivi pexi pebinëyo ita tonaexanatsi, nacuaevetsinë pejamatabëcueneta penetsiaexanabiabatsi bajarapacuenia petëpaenexa pebinacuetoxi. ²⁰ Bajarapamatacabi naexana Moisésppjinë. Moisésppjinë bitso pexanianacuetonëyo. Dioso barëya tanetsi. Nexata Moisésppjinë penaexanaecujinae, paxabeje penabeje muetsia evetatsi bota acueyabi pajuametobeje. ²¹ Bajaraxuacujinae Moisésppjinë paxabeje penabeje xuabatsi baja. Nexata nacuaevetsinë pexënatoyo Moisésppjinë pitsatsi nacoxyabijitsiatsi. Nexata nacuaevetsinë pexënatoyo Moisésppjinë vitsatatsi pexënatonëyocuenia. ²² Nexata Moisésppjinë cujarubatsi daxitacuenë, xua Egipto nacuapijivi yapëtane. Nexata Moisésppjinë bitso yapëtane livaisi petsipaebinexa jivijavabelia. Pexanaejava ata pecobeta bitso yapëtane, jai Esteban sacerdotevi penamatacaitorobivijavabelia, judiövi pijaancianovijavabelia ata, judiövi pecujarubivijavabelia ata.

²³ Icatsia Esteban jumaitsi bajarapamonaejavabelia:

—Itsa baja Moisésppjinë cuarenta pavaibeje xaina penaexanaecujinae, sivanajamatabëxaina petaenexa pijamonae itsajota jinavanapa. ²⁴ Nexata baja Moisésppjinë pona petaenexa pijamonae. Nexata baja Moisésppjinë ita ponapona panacuata pijamonae jinavanapa, Moisésppjinë pitabëta Egipto nacuapijinë tobejiobiaexanatsi pijamonae. Nexata Moisésppjinë bajarajota pijamonae yamatamobeyaxuaba Egipto nacuapijinë. ²⁵ Moisésppjinë nexata jamatabëjumaitsi: “Daxita tajamonae, Israelpjinë pemomoxi, nesivajamatabëjumaitsi tsane: ‘Moisés cajena nacayavenonaena vajavecuapitsapaenexa Egiptonacua,’ nesivajamatabëjai tsane,” jamatabëjai picani Moisésppjinë. Itsiata baitsi jane Moisésppjinë pijamonae bajarapacuenia apo sivajamatabëjumaitsi. ²⁶ Moisésppjinë pebeyaxuabicujinae Egipto nacuapijinë, icatsia meravia pitsijavata, Moisésppjinë caxitajaraba anijanëbeje penabejavatabeje. Bajaraponëbeje Moisésppjinë ëpijamonaeñebeje, Israelpjinë pemomobeje. Nexata Moisésppjinë xaniavaetsia itaveta penabeyanivabeje matavëjëa. Jumaitsi: “¡Panabejitsipamebeje! Panapijamonaeñemëbeje raja. ¿Detsa xuajitsia panabiamebeje?” jai Moisésppjinë. ²⁷ Nexata ponë matapita penabejavabeje, torotajarabatsi Moisésppjinë. Bajaraponë jumaitsi Moisésppjinëjavabelia: “¿Jipatsa catocopata patanevetsinëñexamë? ¿Jipatsa catocopata, pibisiacuenë ita paexanjë, pataneconitsiaexanabiabinexamënu? ²⁸ ¿Nebeyaxuabijitsiamë tsaja icatsia xanë ata pacuenia canivi beyaxuabame Egipto nacuapijinë?” jaitsi Moisésppjinë pijamonae. ²⁹ Nexata Moisésppjinë ita jumetane bajarapacuenia pejumaitsijavatsi pijamonaeñe, nexata Moisésppjinë najetabajirava Madián nacuayabelia. Bajarapanacuatalia ponapona. Nexata bajarapanacuatalia Moisésppjinë nacojioba. Xaina anijanëbeje pexënatobeje, jai Esteban sacerdotevi penamatacaitorobivijavabelia, judiövi pijaancianovijavabelia ata, judiövi pecujarubivijavabelia ata.

³⁰ Icatsia Esteban jumaitsi bajarapamonaejavabelia:

—Bajaraxuacujinae icatsia cuarenta baja pavaibeje ita panepa Moisésppjinë peponaponaeacujinae Madián nacuata, Dioso tsitanaitajëtatsi beangelnëcuenia. Bajarapacuenia tsitanaitajëtatsi petusato nacuata, Sinaivënëtsuto canacujitsita. Tsiquirinaemëyo petajueyecaecotia tuatujëta, tsitanaitajëtatsi Dioso Moisésppjinë. Itsiata tsiquirinaemëyo apo veriajavatsi. ³¹ Moisésppjinë ita tane, jamatabëcuenenabenajaca. Nexata cujitabilia xaniavaetsia imoxoyo petaenexa tsiquirinaemëyo petajueyecaecotia. Nexata bajarapacotiajavaverena Dioso jumaitsi Moisésppjinëjavabelia: ³² “Xanë raja nijasalinaivimi pijaDiosonë. Abrahampjinë, Isaacpjinë ata, Jacobpjinë ata, pijaDiosonë,” jai Dioso. Nexata bajarajota Moisésppjinë neconecojai pecajunavi. Apo naëcotsilia baja icatsia matavëjëa. ³³ Nexata icatsia bajarapacotiajavaverena Dioso jumaitsi Moisésppjinëjavabelia: “Nataxujonore nijazapato. Tsiipaji raja taitabarata nucame. ³⁴ Taniji rabaja tajajivi nijamonae Egipto nacuata bitso bepejiobicuenia pejinavanapaejava. Jumetaniji bajarapamonae penatsinueyabiabijava. Nexata runaicajë bajarapamonae tajutsinexa Egipto nacuaverena. Naxanitsia. Caitorobijitsiatsi Egipto nacuayabelia,” jai Dioso Moisésppjinëjavabelia tsiquirinaemëyo petajueyecaecotiajavaverena, jai Esteban sacerdotevi penamatacaitorobivijavabelia, judiövi pijaancianovijavabelia ata, judiövi pecujarubivijavabelia ata.

³⁵ Icatsia Esteban jumaitsi bajarapamonaejavabelia:

—Nexata Moisésppjinë Dioso itorobatsi peponaenexa Egipto nacuayabelia, vajasalinaivimi Egipto nacuata pebejiobiaexanabiabijavatsivecua pejutsinexa Egipto nacuaverena. Moisésppjinë peponaevajënaeya Egipto nacuayabelia, pamatacabi abaxë Moisésppjinë ponapona panacuata vajasalinaivimi jinavanapa, bajarapamatacabi vajasalinaivimi Moisésppjinë navecuaitavetatsi. Vajasalinaivimi jumaitsi Moisésppjinëjavabelia: “¿Jipatsa

catocopata patanevetsinēnexamē? ¿Jipatsa catocopata, pibisiacuene itsa paexanajē, pataneconitsiaexanabiabinexamēnua?” jai vajasalinaivimi. Bajarapacuenia vajasalinaivimi navecuaitavetsi ata, itsiata Dioso itorobatsi Moisésipijinē peponaenexa vajasalinaivimijavabelia. ³⁶ Moisésipijinē nexata pona Egipto nacuayabelia. Nexata Egipto nacuata Moisésipijinē Dioso pesaēta pinijicuene pexanaejava, exanapona. Bajaraxuacujinae Moisésipijinē Egipto nacuverena vajasalinaivimi jane baja matacanajetarua. Nexata Moisésipijinē epatuarena Rojovēnē manuamene maxēranajavata, Dioso pesaēta pinijicuene pexanaejava exana. Bajaraxuacujinae cuarenta pavaibeje itsa jinavanapa petusato nacuata, itsajavanē icatsia Dioso pesaēta pinijicuene pexanaejavanē, Moisésipijinē exanapona. ³⁷ Bajarapamatacabi cajena Moisésipijinē jumaitsi vajasalinaivimijavabelia: “Pacuenia xanē Dioso nitoroba Diosojumelivaisi jivi tatsipaebinēnēxa profetanēnēxanē, bajarapacuenia Dioso pacatoitorobianca itsanē profetanē Diosojumelivaisi papecatsipaebinēnēxa. Bajaraponē paxamēyajuvēnēnē tsane. Bajaraponē pajumecovēnētsianame,” jai cajena Moisésipijinē bajayata tajēvelia vajasalinaivimijavabelia Jesús yabara. ³⁸ Moisésipijinē barēnacaetuata vajasalinaivimi petusato nacuata, Sinaivēnē tsutomuxuneneta. Nexata Sinaivēnē tsutojumabetsia caenē Moisésipijinē junaya. Nexata Sinaivēnē tsutojumatatsia Moisésipijinē ángeljavabelia toucaicuaijai vajasalinaivimi. Nexata Moisésipijinēta Dioso penajumecopatsilivaisi jivi pejumecovēnētsinēxa, Sinaivēnē tsutojumatatsia tonajumecopatatsi. Bajarapalivaisi Dioso najumecopata Moisésipijinēta vaxaitsi ata bajarapalivaisi vajaxainaenexa mapamatacabiavaberanaje, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

³⁹ Icatsia Esteban jumaitsi bajarapamonaejavabelia:
 –Vajasalinaivimi apo jamatabējumecovēnētsi Moisésipijinē. Apo jitsipae cajena matavējēa penamatacaitorobinēnēxatsi. Vajasalinaivimi picani najamatabēxaina epatua Moisésipijinē pevepēnaviabinxatsi Egipto nacuayabelia. ⁴⁰ Moisésipijinē bajayajebi ponaponaya Sinaivēnē tsutojumatatsi. Nexata Moisésipijinē pecovēta vajasalinaivimi jumaitsi Aarónpijinējavabelia: “Exanare diosovi vajanacamatacaponaenexa. Apo yapētaetsi rabaja pacuenia exanatsi Moisés vajanacamatacaponaenē Egipto nacuverena,” jai. ⁴¹ Nexata vajasalinaivimi becerro jumapecataeya exana oronē. Nexata bajarapajumapenējavabelia pevi perajutsinēxa, ofrendacuenia tobia dajubi. Bajaraxuacujinae vajasalinaivimi jamatabēcuenebarēyaya fiesta exana pecobeta pexanaexae oronē. Tsipaji bajarapajumapenē vajasalinaivimi beprijadisonē tane. ⁴² Bajaraxuata Dioso baja copata peyavenonaejava vajasalinaivimi. Nexata baja Dioso tocopata vajasalinaivimi najamatabēcuenecepatatsiaya penavajēcabiabinēxa itaboxopijitlupujavabelia. Diosojumepaebinē profeta peyaquinaebaxutota, Dioso pejumaitisjaya vajasalinaivimi yabara jumaitsi mapacueniaje:

Israelpijinē papemomoximē, pamatacabi abaxē pajinavanapame cuarenta pavaibeje petusato nacuatalla, pabeyabiabi atamē baca, oveja yajava, bajarapavi xanē apo panerajutabiabimē ofrendacuenia. ⁴³ Bajarapavi parajutabiabame ofrendacuenia panenatoexanaediosovijavabelia. Tsipaji bajarapamatacabi pacajinavanapame carpabo bepanijadisonē panetaenē Molocvēnēdisonē pijabonexa. Pacajinavanapamenua tuluputo, jumapecataeya panenatoexanaetluputo, Renfánvēntuluputo. Nexata bajarapatuluputo pataneme bepanijadioso. Panecobeta saya paneexanaediosovi, pacajinavanapame najamatabēcuenecepatatsiaya bajarapadiosovijavabelia panenavajēcabiabinēxa. Bajaraxuata panijanacuaveuca pacacaponaeaxanaenatsi Babilonianacua pēnētaubia pairajavabelia,

jai Dioso pejumaitisjaya mapacueniaje profetanē peyaquinaebaxutota vajasalinaivimi yabara, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

⁴⁴ Icatsia Esteban jumaitsi bajarapamonaejavabelia:

–Bajayata vajasalinaivimi itsa jinavanapa petusato nacuata, cajinavanapa Dioso pijacarpoboxaneto, bajarapabota Diosojavabelia pevajētabiabinēxa. Nexata Dioso Moisésipijinēta penajumecopatsilivaisi, Dioso peyaquinaeibopanyobeje, vajasalinaivimi xaniavaetabuatabiaba bajarapacarpabo ēnētuaatujēta. Copiaya Moisésipijinē jumapecataeya Dioso tsitajētatsi pacuenia bajarapacarpabo exanetsijitsia. Nexata juya Moisésipijinē itoroba vajasalinaivijavabelia. Nexata vajasalinaivimi exaneta bajarapacarpabo pacuenia Dioso cuenecataeya tsitajētatsi Moisésipijinē. ⁴⁵ Bajaraxuacujinae bajarapacarpabo rajutatsi vajasalinaivimi pecajinavanapaeenexa. Nexata vajasalinaivimi itsabelia varapa, caponabiaba bajarapacarpabo. Moisésipijinē baja ita tēpa, Josuépijinē juya matacapona vajasalinaivimi. Josuépijinē nexata pamatacabi vajasalinaivimi matacanajetarua, caparena bajarapacarpabo mapanacuayaberanaje. Nexata vajasalinaivimi vajabitsaē exana mapanacuataje pejinavanapaevimijavabelia.

Nexata vajasalinaivimi mapairaje yacajërëta. Pamatacabi Josuëpijinë vajasalinaivimi matacanajetaruca mapanacuayaberena, Dioso rëcëpecaeyaexanatsi mapanacuapijivimije Josuébana pevajënaetarena. Nexata bexëjavaberena ata, pamatacabi Davidpijinë mapanacua evetaje, vajasalinaivimi abaxë cajanavanapa bajarapacarpabo. ⁴⁶ Nexata Dioso pexaniajamatabëcuenia tanetsi Davidpijinë, mapanacuaje pevetsinëmi. Nexata picani Davidpijinë bitso jitsipa Dioso pijabonexa templo pexanaeyaexanaenexa. Baitsi paDioso bajayata Jacobpijinë jumecovënëta, Davidpijinë jane baja pamopijjinëmi. ⁴⁷ Itsiata baitsi jane Davidpijinë Dioso apo tocopatsitsi templo pexanaeyaexanaenexa. Davidpijinë pexënato, Salomónpijinë, Dioso pijabonexa templo exanaeyaexana, Davidpijinë baja peuatëpae. ⁴⁸ Pepo Dioso athëbëtatsia peecaenë, bajaraponë apo ponaponae bota, jivi pexanaebota. Diosojumepaebinë profetanë bajayata jumaitsi mapacueniaje Dioso pejumaitsijava:

⁴⁹ Athëbëtatsia daxitacuen taevetsinë. Mapanacuajava ata taevetsinë. ¿Detsa nexata xuajitsia bo panetoexanetsipame? Apo namatavenonaenë cajena bo tanacuer-aevetsinexa. ⁵⁰ Xanë daxitacuen taexanaenë, jai profeta bajayata Dioso pejumaitsijava, jai Esteban sacerdotevi penamatacaitorobivijavabelia, judiövi pijaancianovijavabelia ata, judiövi pecujarubivijavabelia ata.

⁵¹ Icatsia Esteban jumaitsi bajarapamonaejavabelia:

—Panaejamatabëcuenetajavi. Paneamatabocotajavinua. Apo pajumecovënëtsimë Dioso pejumelivaisi. Apo pacopatsimë Espiritu Santo papecatsijamatabëjonexa. Pacuenia panijasalinaivimi bajayata itsi, bajara saya icatsia paxamë paitsimë. ⁵² Diosojumepaebivi profetavi tajëvelia vajunupaebapona Cristo, pepo planeconijibinë pepatsijavanexatsica. Nexata panijasalinaivimi daxita bajarapaprofetavimi bejiobiaexanabiaba. Beyejebabi-abanua. Nexata jane baja Cristo itsa patsica, paxamë pijavajabitsaë pecobeyabelia pacanajetaxuabame. Bajarapacuenia Cristo pabeyaxuabame. ⁵³ Angelevi pacarajutsi ata Dioso Moiséspijjinëta penajumecopatsilivaisi jivi pejumecovënëtsinexa, itsiata paxamë apo pajumecovënëtsimë bajarapalivaisi, jai Esteban sacerdotevi penamatacaitorobivijavabelia, judiövi pijaancianovijavabelia ata, judiövi pecujarubivijavabelia ata.

Pacuenia Esteban beyaxuabatsi yabara pelivaisi

⁵⁴ Sacerdotevi penamatacaitorobivi, judiövi pijaancianovi ata, judiövi pecujarubivi ata, itsa jumetane Esteban petsipaebilivaisi, anaepana bitso Estebanjavabelia. Nexata bajarapamonae pecaanae, navonoquiarabaxane. ⁵⁵ Itsiata Esteban bitso jamatabëcuenevënëca Espiritu Santo. Esteban athëbëa benaëcotsia. Nexata tane Dioso pijapenivenivenaecotia. Taenutsianua Jesús penucaejava paxa Dioso pemuxuneneta, pecujanenia. ⁵⁶ Nexata Esteban jumaitsi daxita bajarapamonaejavabelia:

—¡Panataema! Taniji itaboxo penapatsijavatsia. Daxitajivi Pematapijinë, ponë naexana mapanacuataje, pacuenia vaxaitsi banaexanatsi, nucaya paxa Dioso pemuxuneneta, pecujanenia, jai Esteban.

⁵⁷ Nexata sacerdotevi penamatacaitorobivi, judiövi pijaancianovi ata, judiövi pecujarubivi ata, pecobenëta namuxuvojoacaba. Bajarapamonae vavajai pinijicuenia. Daxita cae-cuenia cujibarenatsi Esteban pevaetabinexatsi. ⁵⁸ Bajarapamonae Esteban caponaliatsi tomarapënëyabelia. Nexata tomarapënëta Esteban tseconatsi ibotonëta. Nexata daxita pamonaë jumetane Esteban petsipaebilivaisi, najumajonejeba pijacamisajumavelia penaxatabijavanë. Nexata Esteban petseconaevajënaetsi ibotonëta, bajarapamonae penajumajonejebijavanë pevëjëato Saulovënënë evetsiaexanatsi. ⁵⁹ Petseconanubenaëjavatatsi ibotonëta, Esteban vajëta Diosojavabelia. Jumaitsi:

—Tajatuxanenë Jesús, daxita pepo tajamatabëcuene pire, jai Esteban.

⁶⁰ Bajaraxuacujinae Esteban pematabacabëta nuca. Aëjai pinijijumeta.

—Tajatuxanenë, itaxutobejiobiataema mapamonaeje. Vecuaajibiaexanare paneconi natsiexana xamëjavabelia tanebejiobiaexanaexae mapacueniaje, jai Esteban.

Bajaraxuacujinae Esteban tēpanajereca baja.

8

Pacuenia Saulo jaita Jesús pelivaisi pejumecovënëtsivi penaneconitsiaexanaenexa yabara pelivaisi

¹⁻³ Sacerdotevi penamatacaitorobivi, judiövi pijaancianovi ata, judiövi pecujarubivi ata, Estebanpijinë baja itsa beyaxuabatsi, Saulo tsitaxanapanatsi. Nexata pebijivi, pamonaë Dioso bitso jumecovënëta, bajarapamonae Estebanpijinë mëthëtatsi. Matanueyabatsi bitso.

Bajarapamatacabi jane baja sacerdotevi penamatacaitorobivi, judíovi pijaancianovi ata, judíovi pecujarubivi ata, taxuxuaba pebejiobiaexanaponaejava Jesús pelivaisi pejumecovënétsivi Jerusalén tomarata. Saulo jane baja jaitaruta Jesús pelivaisi pejumecovënétsivi Jerusalén tomarata. Cao bo canacujitsia jonepona. Nexata taicapona pebejivi, petiriavi ata, pamona Jesús pelivaisi pejumecovënétsivi. Penaneconitsivi pejebabiabiboyabelia Saulo cajonepona bajarapamona. Nexata ayaibitsaëtoxaneto Jesús pelivaisi pejumecovënétsivi, Jerusalén tomarapijivi, rëcëpeca itsatamaranëjavabelia. Itsamona rëcëpeca Samaria nacua yabelia. Itsiata apóstolevi nacopaba Jerusalén tomarata.

Pacuenia pexanialivaisi, Jesús pelivaisi, pejumecovënétsivi, tsipaeba pona Samaria nacua-java yabara pelivaisi

⁴ Pamona Jesús pelivaisi pejumecovënétsivi, rëcëpeca Jerusalén tomaravecu. Nexata itsaxuayo bajarapamona njetarubena, jivi tsipaebanjetarubena pexanialivaisi, Jesucristo pelivaisi. ⁵ Pamona rëcëpeca yajuvënënë, pevënë Felipe. Bajaraponë lia Samaria nacua pecaetomarajavabelia. Bajarapatomarapijivijavabelia Felipe tsipaeba Jesús pelivaisi. Jumaitsi:

—Jesús raja Cristo, ponë Dioso itorobica jivi pecapanepaenexa, jai tsapona Felipe Samaria nacua pecaetomarapijivijavabelia.

⁶ Itsa patomarata Felipe Jesús pelivaisi tsipaebabiaba, jivi ayaibitsaëtoxaneto nacaetutabiaba. Daxita bajarapamona xaniavaetsia namuxunaevetabiaba Felipe itsa tsipaebabiaba Jesús pelivaisi. Bajarapamona tane Felipe Dioso pesaëta pinijicuene pexanaejavanë. ⁷ Pamona dovathi peyajavajinavanapaevi, Felipe vecuacapitsapabiaba. Dovathi pinijijumeta aëjai tsabiabi itsa vecuacapitsapabiaba Felipe. Nexata dovathi peyajavajinavanapaevimi, jamatejema baja tsabiabi. Pamona ata petabusipacuenabivitsi, pejayujayunaevi ata, jamatejemayaexanapona Felipe. ⁸ Bajaraxuata daxita bajarapatomarapijivi jamatabëcuenebarëya.

⁹ Bajarapatomarata Simónvënënë ponapona. Bajaraponë jivi pejorobabiabinë. Bajayajebi daxita Samaria nacupijivi yamaxëitojorobapona. Simón jumai tsabiabi bajarapatomarapijivijavabelia:

—Xanë bitso jivi taxaniavaetsinë, jai tsabiabi.

¹⁰ Daxitajivi, petuxanevi ata, Simón pejumaitsijava namuxunaevetabiabatsi. Bajarapamona nexata Simón yabara jumai tsabiabi:

—Maponëje Simón pinijicuene pexanaejava caëjëpatsi. Dioso raeta yavenonatsi, jai tsabiabi bajarapamona Simón yabara.

¹¹ Bajarapacuenia Samaria nacupijivi xaniavaetsia jumecovënëtabiaba tsipaji Simón pejorobicuena bajayajebi jivi yamaxëitojorobabiaba. ¹² Nexata Felipe Samaria nacupijivijavabelia tsipaeba Dioso pijajivi pevetsijavanexa. Jesucristo pelivaisi ata tsipaeba. Nexata Samaria nacupijivi jumecovënëta Felipe petsipaebilivaisi. Bajarapamona pebijivi, petiriavi ata, Felipe bautisaba.

¹³ Nexata jane baja Simón jivi pejorobabiabinë ata jumecovënëta Felipe petsipaebilivaisi. Nexata baja Simón ata Felipe bautisaba. Bajaraxucujinae Felipe pepëta naponapona Simón. Nexata Simón jamatabëcuenenabenajacabiaba itsa teyabiaba Dioso pesaëta Felipe pinijicuene pexanaponaejavanë.

¹⁴ Nexata apóstolevi Jerusalén tomarata pejinavanapaevi, vënëlvaisitane Samaria nacupijivi Dioso pitorobilivaisi pejumecovënétsijava. Nexata apóstolevi jumaitsi peyajuvënënëbejevabelia:

—Pedro, paxamëbeje Juanbeje, pataemeliabeje Samaria nacupijivi, pejumecovënétsivi Dioso pitorobilivaisi, jai apóstolevi.

Nexata Pedrobeje Juanbeje ponabeje. ¹⁵ Itsa bajaraponëbeje patabeje Samaria nacua yabelia, tovajëtabeje Diosojavabelia Espiritu Santo petsijamatabëpatsinexatsitsica Samaria nacupijivi, Dioso pitorobilivaisi pejumecovënétsivi. ¹⁶ Bajarapacuenia tovajëtabeje tsipaji abaxë Samaria nacupijivi Espiritu Santo apo tsijamatabëpatsitsitsica. Abaxë saya bautisabatsi bajarapamona Jesús pevënëta. ¹⁷ Nexata Pedrobeje Juanbeje petovajëtsijavatabeje Diosojavabelia, tsimatanacobeuatabeje Samaria nacupijivi. Nexata jane baja Samaria nacupijivi Espiritu Santo tsijamatabëpatsitsi.

¹⁸ Nexata Simón itsa tane Samaria nacupijivi Espiritu Santo petsimatarunaejavatsitsica apóstolenëbeje Samaria nacupijivi tsimatanacobeuatsiaya petovajëtsijavatabeje Diosojavabelia, nexata Simón palata tsipaeba apóstolenëbejevabelia. ¹⁹ Simón jumai:

—Panerajurebeje mapacaëjëpajamatabëcueneje. Pajivi tsimatanacobeuatajë tatovajëtsijavata Diosojavabelia, bajarapajivi petsimatarunaexatsitsica Espiritu Santo, jai Simón apóstolenëbejevabelia.

²⁰ Nexata Pedro jumai Simónjavabelia:

—Xamē cajena Dioso caxuabiana infiernojavabelia. Nexata vereverecaename ni-japalata yajava. Tsipaji najamatabēxainame necomuatsinexa ēpalatata Dioso amoneya jivi perajutsijavatsica. ²¹ Tsipaji pepacuene apo najamatabēcuenecopatsimē xaniavaetsia Diosojavabelia. Nexata Dioso patajumecovēnētsivita, apo nanacuenebimē tsane. ²² Copare baja papibisiacuene najamatabēxainame. Najamatabēcuenepēnyorore Diosojavabelia. Vajēre Diosojavabelia pecavecuajibiaexanaenexa papibisiacuene najamatabēxainame. ²³ Xanē cajena yapētaniji necueneēbijava Jesús pelivaisi pejumecovēnētsivi. Yapētanijinua pecajamatabēcuenecēnēnaejava pibisiacuene nexanaeneconi, jai Pedro.

²⁴ Nexata Simón jumaitsi:

—Panetovajērebeje Diosojavabelia tanevecuajibiaexanaenexa paneconi xainajē Dioso tanexuabiyaniava infiernojavabelia pacuenia panejumaitsimēbeje, jai Simón.

²⁵ Bajaraxuacujinae Pedrobeje Juanbeje bajarapatomarapijivijavabelia tsipaebabeje pacuenia tanebeje Dioso pexanaejava. Tsipaebabejenua Dioso pitorobilivaisi. Bajaraxuacujinae Pedrobeje Juanbeje itsa navialibeje Jerusalén tomarabelia, Samaria nacuata penaetomaranejava tsipaebanajetarucabeje pexanialivaisi, Jesús pelivaisi.

Pacuenia Felipe bautisaba Etiopía nacuapijinē yabara pelivaisi

²⁶ Dioso pijaängel jumaitsi Felipejavabelia:

—Nonotapunare. Maxuayolia roviaia liamēreje. Panamuto Jerusalén tomaraverena naropota pepatsinexa Gaza tomarabelia, bajarapanamutualia liamēre, jai āngel Felipejavabelia.

Bajarapanamuto petusato nacujava rucalia pepatsinexa Gaza tomarabelia. ²⁷ Nexata Felipe xaniavaeta pijavaxi peponaenexa baja. Bajaraxuacujinae naropolia jane baja. Nexata bajarapanamutualia Felipe caxitajaraba Etiopía nacuapijinē. Bajaraponē palata pevetsinē. Etiopianacua pevetsiva pijapalata toevetabiaba. Bajaraponē, Etiopía nacuapijinē, Jerusalén tomarajavabelia pona najamatabēcuenecopatsiaya pevajētsinexa Diosojavabelia templobota. ²⁸ Nexata baja Etiopía nacuapijinē Jerusalén tomaraverena naviatanajetaruca. Navialia baja pijanacuayabelia. Pijamoyota, carrozavēnēmoyota, yanajetaruca. Nexata lebanajetaruca Diosojumelivaisipaebinē profeta Isaíaspijinē bajayata peyaquinaebaxuto. ²⁹ Nexata Espiritu Santo jumaitsi Felipejavabelia:

—Bitsojinaremelia. Pēcaxinaeremelia mapamoje. Imoxoyo pemuxunenia nucaponae-name, jai Espiritu Santo.

³⁰ Felipe nexata cujinaejinalia. Nexata baja Felipe pēcaxinalia Etiopía nacuapijinē. Nexata Felipe jumetane Etiopía nacuapijinē pelebanajetarucajava profeta Isaíaspijinē peyaquinaebaxuto. Nexata Felipe jumaitsi Etiopía nacuapijinējavabelia:

—¿Xamē tsaja pepacuene jumeyapētaneme palivaisi lebanajetarucame? jai Felipe.

³¹ Nexata Etiopía nacuapijinē jumaitsi:

—¿Detsa pacuenia jumeyapētaejitsipajē itsa apo netsipaebi xaniavaetsia itsanē ata? jai.

Nexata Etiopía nacuapijinē junatatsi Felipe carrozavēnēmoyo ēnēabetsia Felipe penaju-naenexatsia penamuxuneniaecaenexabeje.

³² Profeta Isaíaspijinē peyaquinaebaxutota, palivaisi Etiopía nacuapijinē lebanajetaruca, tajēvelia Jesús yabara jumaitsi mapacueniaje:

Pacuenia oveja moya, caponae atatsilia pebeyaxuabinexatsi, bajara pijinia pacuenia bajaraponē ata moya tsane, caponae atatsilia pebeyaxuabinexatsi. Pacuenia ovejajo naxunae atatsi, moya, bajara pijinia pacuenia bajaraponē ata moya tsane, yapētae ata pebejobiaexanaejavanexatsi. ³³ Bejioibiaexanaenatsi. Pibisiacuene apo exanae ata, naneconitsiaexanatsi. Itsajivi ata bajaraponē yabara apo jumaitsi tsane: “Mara pamonaaje bajaraponēmi pemomoxije,” apo jai tsane. Tsipaji beyaxuabianatsi, jai tajēvelia mapacueniaje Isaíaspijinē peyaquinaebaxutota Jesús yabara, palivaisi Etiopía nacuapijinē lebanajetaruca.

³⁴ Nexata Etiopía nacuapijinē jumaitsi Felipejavabelia:

—Pexaniacuene netoexanare. Netsipaebare ponē yabara yaquina profeta Isaíaspijinē mapacueniaje. ¿Baja tsa ponē pijacuata nayabarajumaitsi? Itsa jume, ¿itsanē yabara tsaja jumaitsi? jai Etiopía nacuapijinē Felipejavabelia.

³⁵ Nexata palivaisi Etiopía nacuapijinē lebanajetaruca, bajarapalivaisi Jesús yabara pejumaitsijava copiaya Felipe yapētaeyaexana. Bajaraxuacujinae icatsia tsipaeba pexanialivaisi, Jesús pelivaisi. ³⁶ Penajetarucaejavatabeje bajarapanamutua, patabeje itsajota merayo eca. Nexata Etiopía nacuapijinē jumaitsi Felipejavabelia:

—Mara jota meraje. Jitsipajē picani xanē tanebautisabinexamē. Itsiata baitsi jane yapētaneme xua yabara apo xanepanae tanebautisabinexamē, jai Etiopía nacuapijinē Felipejavabelia.

³⁷ Nexata Felipe jumaitsi:

—Itsa jumecovënētame xaniavaetsia daxita nejamatabëëthëtojavaverena, nexata necaëjêpa tacabautisabinexa, jai Felipe.

Nexata bajaraponë jumaitsi:

—Jumecovënëtajê rabaja. Jesucristo raja xaniajai Dioso pexênato, jai Etiopía nacuapijinê Felipejavabelia.

³⁸ Nexata bajaraponë pijamo nucojopaeyaexana. Bajaraponëbeje Felipebeje runarecabeje merajavabereca. Felipe bautisaba Etiopía nacuapijinê. ³⁹ Nexata penonotajunaecuajinaetsinabeje, Espíritu Santo pitatsi Felipe Etiopía nacuapijinê pitabarata. Itsiata Etiopía nacuapijinê apo tae pacuenia Felipe pitatsi Espíritu Santo. Bajaraxuacujinae Etiopía nacuapijinê apo taetsi baja Felipe matavêjêa. Itsiata Etiopía nacuapijinê pona baja barêyaya pijanacuayabelia. ⁴⁰ Felipe Espíritu Santo caliatsi Azoto tomarabelia. Felipe nexata daxita tomanêjava tsipaebanajetaruca pexanialivaisi, Jesús pelivaisi. Matapania Felipe itsa patajopa Cesarea tomarata, caejavata ponapona.

9

Pacuenia Saulo jumecovënêta Jesús yabara pelivaisi
(Hch 22.6-16; 26.12-18)

¹ Saulo cajena Jerusalén tomarata apo copatsi petaicaponaejava daxita pamonaê Jesús pelivaisi jumecovënêta pebejejebiaexanaenexa. Bajaraxuata Saulo pona daxita sacerdotevi pepo penamatacaitorobinêjavabelia. ² Nexata Saulo sacerdotevi pepo penamatacaitorobinêjavabelia jumaitsi:

—Netsicobeyaquinare cuyalatobaxutonê tacaponaenexa Damasco tomarabelia. Damasco tomaratalia judíovi penacaeutuabiabibonê pevetsivi tarajutsinexa. Nexata bajaramonaê itsa tane neyaquinaebaxutonê, tanetocopatsinexa daxita Jesús pelivaisi pejumecovënêtsivi tataicaenexa. Nexata itsa taicajê pebijivi, petiriavi ata, tacapatsinexa mapatamaraberena je penaneconitsivi pejebabiabibota tajebinexa, jai Saulo.

Nexata sacerdotevi pepo penamatacaitorobinê jejai. Nexata cuyalatobaxutonê tsi-cobeyaquinatsi Saulo pecaponaenexa Damasco tomarabelia. ³ Bajaraxuacujinae Saulo jane baja pona Damasco tomarabelia. Nexata ajena Saulo imoxoyotanajetaruca Damascotomara, jemata Saulo penajetarucaejavata namutua matatoyorotsia naitayotatsi athêbêvetsica. ⁴ Nexata Saulo irataeya bocajunua irata. Jumetaenuca athêbêvetsica pejumaitisjava Jesús. Jumaitsi mapacueniaje:

—Saulo, Saulo, ¿detsa xuajitsia tajajivi netobejiobiaexanaponame? jai Jesús.

⁵ Nexata Saulo jumaitsi:

—Tajatuxanenê, ¿detsa ponêmê? jai.

Nexata icatsia athêbêvetsica Jesús jumaitsi Saulojavabelia:

—Xanê raja Jesúsniê. Tajajivi netobejiobiaexanaponame. ¿Detsa xuajitsia apo tajitsipaecuenia exanaponame? Xamê nijacuata najamatabêcuenebijianaponame, jai Jesús athêbêvetsica.

⁶ Saulo nexata neconecojai pecajunavi. Nexata jumaitsi:

—Tajatuxanenê, ¿detsa xua nexata jitsipame taexanaenexa? jai.

Nexata Jesús jumaitsi:

—Nonotapunare baja. Ponaename baja Damasco tomarabelia. Bajarajotalia catsipaebiana pacuenia exanaejitsiamê, jai Jesús.

⁷ Nexata papebijivi Saulo yajavanajetaruca, najunaviacanubena. Nexata moya nubena. Tsipaji jumetane pajume athêbêvetsica jumaitsi Saulojavabelia. Bajarapajume jumetae ata, itsiata bajarapamonae apo tae jivitonê. ⁸ Nexata Saulo, irata peboacaenêmi, nonotapuna. Naêcobaruta picani. Itsiata apo naêcotsixanepanae. Tsipaji itaxutomeravibatsi. Nexata papebijivi Saulo yajavanajetaruca, bajarapapebijivi saya Saulo comacaponaliatsi Damasco tomarabelia. ⁹ Nexata Saulo natsivajênaetaenejeva, Damasco tomarata ponapona acueyabi pamatacabibeje. Apo xae pexaejava. Apo apaenua mera.

¹⁰ Damasco tomarata ponapona Ananías, Dioso pejumecovënêtsinê. Nexata Jesús bema-jitsinaebocuenia tsitanaitajêta Ananíasjavabelia. Nexata Jesús junataxuaba.

—¡Ananías! jai.

Nexata Ananías jumaitsi Jesúsjavabelia:

—Tajatuxanenê, canamuxunaevetatsi rabaja, jai Ananías.

¹¹ Nexata Jesús bajarajota jumaitsi Ananíasjavabelia:

—Nonotapunare. Ponaename pacallejavabelia jivi vênêruba Peroviacalle. Bajarajotalia Judas pijabota vênêyanijobianame Saulovênênê, Tarso tomarapijinê. Bajaraponê Saulo maparucaje xanêjavaberena navajêqueca. ¹² Bajaraponê Saulo bemajitsinaebocuenia tsitajêtajê pacuenia exanaejitsiamê bajaraponêjavabelia. Nexata Saulo bemajitsinaebota

catane pacuenia nejonecujinaelia bajaraponē tsmatanacobeuatsijitsiamē petaenexa icatsia xaniavaetsia, jai Jesús Ananíasjavabelia.

¹³ Nexata Ananías ita jumetane bajarapacuenia Jesús pejumaitsijava, nexata Ananías jumaiti Jesúsjavabelia:

—Tajatuxanenē, anijatōnē vēnēlivaisitaniji pacuenia bajaraponē Saulo exanaponapona. Vēnēlivaisitaniji bajaraponē pebejobiaexanaponaejava Jerusalén tomarata daxita pecajumecovēnētsivi. ¹⁴ Maberena ataje icatsia itorobatsi sacerdotevi penamatacaitorobinē petotaicaenexa daxita pamonaē pecajumecovēnētsivi jinavanapa mapatomarataje, jai Ananías Jesúsjavabelia.

¹⁵ Nexata Jesús jumaiti Ananíasjavabelia:

—Ponare baja. Tsipaji bajaraponē Saulo itapetajē baja tanelivaisipaebinexa itsanacuanēpivijavabelia, tanelivaisipaebinexanua bajarapanacuanē pevetsivijavabelia ata, tanelivaisipaebinexanua Israel nacuapivijavabelia. ¹⁶ Xanē Saulo tsitajētsianajē pacuenia itsamatacabi Saulo itsamonae bejobiaexanaejitsiatsi. Bajaraponē bitso bejobiaexanaenatsi talivaisi yabara, jai Jesús Ananíasjavabelia bemajitsinaebocuenia petsitanitajētsijavata.

¹⁷ Bajaraxuacujinae Ananías jane baja lia. Joneya pabota Saulo ponapona. Ananías nexata nacobeuata Saulo pematobocotjumavereca. Ananías jumaiti Saulojavabelia:

—Tajabananē baja, pepo petuxanenē raja Jesús, ponē catsitanitajēta namutua nenajetarucaejavata, bajaraponē nitoroba. Bajaraponē nitoroba tacatsimatanacobeuatsinexa pecavecuajibinexa baja pecaitaxutomeravibijava icatsia baja netaenexa xaniavaetsia. Nitorobanua tacatsimatanacobeuatsinexa pecatsijamatabēvēnēcaenexa Espiritu Santo, jai Ananías Saulojavabelia.

¹⁸ Bajarapacuenia Ananías pejumaitsijavata Saulojavabelia, Saulo veitaxutoothopatsi xua itaxutocaranatatsi, bedujuaitseboco. Nexata jane baja icatsia Saulo xaniavaetsia tane. Saulo nexata nonotapuna. Bajaraxuacujinae bautisabatsi baja. ¹⁹ Bajaraxuacujinae pexaejava baja xane. Nexata baja icatsia Saulo aperabēsaēreca. Saulo nexata Damasco tomarata caematacabibeje naponapona Dioso pejumecovēnētsivita.

Pacuenia Saulo paeba Jesús pelivaisi Damasco tomarata yabara pelivaisi

²⁰ Saulo pejumecovēnētsicujinae Jesús Dioso pexēnatocuene, bepijiayo Saulo taxuxuaba jivi petsipaebijava Jesús pelivaisi judiōvi penacatuatabiibonējava. Saulo jivi ita tsipaebapona Jesús pelivaisi, jumai tsaponae.

—Pepacuene raja Dioso pexēnato Jesús, jai tsaponae Saulo.

²¹ Nexata daxita pamonaē jumetane Saulo petsipaebilivaisi, jamatabēcuenenabenajaca. Najumaiti bajarapamonae Saulo yabara:

—Mara ponēje bejobiaexanapona Jerusalén tomaratalia daxita pamonaē jumecovēnēta Jesús pelivaisi. Icatsia picani pata mapatomaraberenaje petaicaenexa daxita pamonaē jumecovēnēta Jesús pelivaisi. Nexata ita taica, pecaponaenexa picani Jerusalén tomara-belia, sacerdotevi penamatacaitorobivijavabelia, najai bajarapamonae Saulo yabara.

²² Itsiata Saulo ajumejunavijibia bitso asaēyata tsipaebapona Jesús pelivaisi. Nexata Saulo xaniavaetsia jivi yapētaeyaxana xaniajai Jesús Dioso pitorobinētsitsica jivi pecapanepaenexa. Nexata judiōvi Damasco tomarata penaevi moya. Apo yapētae pacuenia jumecanaviatsijitsiatsi Saulo.

Pacuenia Saulo vecuapanepa judiōvi yabara pelivaisi

²³ Saulo Damasco tomarata petaxuxuabicujinae Jesús pelivaisi jivi petsipaebapona-aejava, hexēajavabelia judiōvi sivanajamatabēcueneyanabatsi pebeyaxuabinexatsi Saulo. ²⁴ Nexata caematacabi canacujitsia, caemeravi canacujitsia ata, Saulo judiōvi vajēnaeevetabiabatsi pebeyaxuabinexatsi picani. Pabaupaxanetojavalia jivi pitsapabiaba Damasco tomaravelia penaropobivi, bajarapabaupaxaneto muxuneneta Saulo judiōvi vajēnaeevetabiabatsi pebeyaxuabinexatsi picani. Itsiata Saulo nayalivaisiajumetane judiōvi pebeyaxuabiapaebijavatsi. Bajaraxuata Saulo bajarapabaupaxanetojavalia apo pitsapaelia. ²⁵ Damascotomara matatoyorotsia yacaranata piatayaēibopanaxanetota. Bajarapayacaranatsijavaxaneto athēēabetsia apia, pacuenia pinijinaejavaxaneto apia. Bajarapayacaranatsijavaxaneto ibopananē mataropotsia catsanaeya farata. Nexata Dioso pejumecovēnētsivi, Saulo pepēnaponaevitsi, ita baja meravi, Saulo ecaeyaxanatsi bemapirecuenia pexanaejavaxanetoēnēta. Nexata Damasco tomara matatoyorotsia peyacaranatsiibopanaxaneto yenepanata athēēyo perucaeventanavojojotualia, Saulo yacoparecatsi irabereca Damasco tomarapēnēyabelia. Bajarapacuenia Saulo Damasco tomarata judiōvivecua panepa pebeyaxuabiyaniavatsi.

Pacuenia Saulo Jerusalén tomarata copiapitatsi yabara pelivaisi

²⁶ Saulo itsa patajopa Jerusalén tomarata, Saulo picani jitsipa penaponaponaajava Jesús pelivaisi pejumecovënëtsivijavata. Itsiata daxita bajarapamonae Saulo cujunavatsi. Tsiipaji apo jumexaniataetsi Saulo pejumecovënëtsijava Jesús pelivaisi. ²⁷ Itsiata Bernabé barëlia apóstolevijavabelia apóstolevi peyapëtaenexatsi Saulo. Nexata Bernabé tsiipaeba apóstolevijavabelia pacuenia Saulo namutua penajetaruaejavata tane Jesús bemajitsinaebota. Pacuenia ata Saulo Jesús barëcuaicuaiajaisi, Bernabé tsiipaeba apóstolevijavabelia. Pacuenia ata Saulo ajumejunavijibia tsiipaebapona Damasco tomarata Jesús pelivaisi, Bernabé tsiipaeba apóstolevijavabelia. ²⁸ Nexata baja Saulo ponapona Jerusalén tomarata. Naponapona apóstolevijavata. ²⁹ Saulo tsiipaebapona ajumejunavijibia Jesús pelivaisi. Saulo barëcuaicuaiajaisi tsabiabi juđiovi, griegojume penatsipaebivi. Barënajumenotabiaba bajarapamonae. Itsiata baitsi jane bajarapamonae najamatabëxaina pacuenia beyaxuabijitsiatsi Saulo. ³⁰ Jesús pelivaisi pejumecovënëtsivi, jumetane Saulo pebeyaxuabiapaebijavatsi. Nexata Jesús pelivaisi pejumecovënëtsivi, Saulo pënauxabatsi Cesarea tomarabelia. Bajarajotacujinae Saulo itorobatsi pevajënaeyabelia penajetaruaenexa pepatsinexa Tarso tomarabelia.

³¹ Bajaraxuacujinae nexata daxitajava, itsaxuayo Jesús pelivaisi pejumecovënëtsivi jivananapa, xaniavaetsia baja jivananapa. Copabatsi baja pebejiobiaexanabiabijavatsi. Nexata Judea nacuata, Galilea nacuata ata, Samaria nacuata ata, Jesús pelivaisi pejumecovënëtsivi caebitsaëto canacujitsia xaniavaetsia jivananapa. Nexata daxita jamatabëcuenevitsabapona Jesús pelivaisi pejumecovënëtsijava. Bajarapamonae xaniavaetsia jumecovënëtavanapa Jesús pelivaisi pibisiacuene pexanaeyaniva. Espiritu Santo yavenonaponatsi. Nexata itsamonae ata Jesús pelivaisi apo pejumecovënëtsivimi, ayaiBITSaëtoXaneto jumecovënëtapona Jesús pelivaisi.

Pacuenia Jesucristo pejamatabëcueneta Pedro jamatejemayaexana Eneasvënënë yabara pelivaisi

³² Pedro najetaruca daxitatomaranëjava pesivaxainaenexa Dioso pejumecovënëtsivi. Nexata najetaruca Lida tomarajava ata pesivaxainaenexa Lida tomarata pejinavanapaevi, Dioso pejumecovënëtsivi. ³³ Nexata Pedro Lida tomarata taeyabuata Eneasvënënë. Bajaraponë ocho pavaibeje xaina camata pebocaecujinae. Tsiipaji tabusipacuenabatsi. ³⁴ Pedro nexata jumaitsi bajaraponëjavabelia:

–Eneas, cajamatejemayaexana rabaja Jesucristo. Nonotapunare. Xanebare nijacama, jai Pedro.

Nexata Eneas bajarajota nonotapuna. ³⁵ Nexata daxita Lida tomarapijivi, Sarón nacuapijivi ata, tanetsi Eneas pejamatejemajava. Bajarapamonae nexata pijaperujujamatatabëcuene pecatsitecaejavami, copaba baja. Najamatabëcuenecopaba baja Jesucristojavabelia.

Pacuenia Pedro Dorcasvënëva petëpaecujinae icatsia asaëyaexana yabara pelivaisi

³⁶ Jope tomarata ponapona Dioso pejumecovënëtsiva, Tabitavënëva. Bajarapova pevënë griegojumeta Dorcas. Dorcas daxita matacabi canacujitsia pexaniacuene toexanabiaba itsamonaejavabelia. Bepejiobivijavabelia rajutabiaba penamatavenonaejavaxi bajarapacuenia peyavenonaenexa. ³⁷ Pamatacabi Pedro ponapona Lida tomarata, Dorcas avitane Jope tomarata. Nexata baja Dorcas tëpa Jope tomarata. Peperabëquatsicujinaetsi petëpaeva buatatsi anijairabeje pexainaëbo ënëtuatuajëta. Athëbëyo pairatsia, bajarapaënëtuatuajëtatsia buatatsi. ³⁸ Jopetomara eca imoxoyo Lida tomaravecua. Dioso pejumecovënëtsivi vënëlvivaisitanetsi Pedro peponaponaajava Lida tomarata. Nexata Dioso pejumecovënëtsivi itoroba anijanëbeje pejumaitsinexabeje Pedrojavabelia: “Pedro, naxanitsia. Liamëre Jope tomarabelia,” pejainexabeje Pedrojavabelia. Nexata bajaraponëbeje Lida tomarabelia sivaliabeje Pedro.

³⁹ Nexata Pedro narena bajaraponëbeje pepëta. Pedro itsa napata pabota petëpaeva boca, tsitajëtatsi itsajota petëpaeva boca. Nexata pamonajivi pevecuatëpaevanëtsi, Dorcaspijiva pevënuvitsi, Pedro matatorotsia itaxutuanuëbenatsi. Bajarapamonae Pedro tsitajëbatsi Dorcaspijiva pejorocaevajanë, penaxatabijavanë, penajumaacabipananë ata, xuanë Dorcaspijiva rajuta bajarapamonaejavabelia pamatacabi abaxë asaë tsaponapona. ⁴⁰ Nexata paënëtuatuajëta petëpaeva boca, bajarapaënëtuatuajëvecua Pedro daxita bajarapamonae pitsapaeyaexana. Bajarapamonae itsa pitsapalia, Pedro pematabacabëta nuca pevajëtsinexa Diosojavabelia. Nexata Pedro pevajëtsicujinae Diosojavabelia, napënëyorota petëpaevajavabelia. Pedro jumaitsi petëpaevajavabelia:

–Tabita, nonotapunare, jai Pedro.

Nexata petëpaevami naëcota. Itsa tanetsi Pedro, bajarapova namatacota. ⁴¹ Pedro nexata bajarapova cobevaetabiaya nonotapunaeyaexana. Nexata Pedro junarena daxita Dioso

pejumecovënëtsivi, pamonajivi pevecuatëpaevanëtsi ata. Nexata tsitajëta bajarapamonaejavabelia petëpaevami icatsia piasaëjava. ⁴² Nexata Dioso pesaëta bajarapapiniijicuene Pedro pexanaejava, daxita Jope tomarapijivi yapëtane. Nexata jivibitsaëttoxaneto jumecovënëta Jesús Dioso pexënatocuene. ⁴³ Nexata Pedro bajayajebi ponapona Jope tomarata. Simón bacabocotonë peyacueyacuëcaeyaexanaenë, pijabota Pedro naponapona.

10

Pacuenia Pedro barëcuaicuatjai Corneliovënënë yabara pelivaisi

¹ Cesarea tomarata ponapona Corneliovënënë. Apo judiönë. Bajaraponë Italia nacuaverena pepatsivi vajabitsaëvi pijacapitän. ² Cornelio pijabopijivi barëjumecovënëtaponapona Dioso. Dioso bitso yayiataeya Cornelio ponapona. Cornelio palata ayaijava rajutabiaba judiövijavabelia peyavenonaenexa judiövi bepejiöbivi. Cornelio vajëtabiaba Diosojavabelia. ³ Itsamatacabi caniviyoeapatota, bejamatabëcuene a las tres, Cornelio bemajitsinaebota tane Dioso pijaängel pejonejavarena pijaboyarena. Nexata junataxuabatsi.

—¡Cornelio! jaitsi.

⁴ Cornelio nexata naëcota ángeljavabelia. Bitso cujanava. Nexata Cornelio jumaitsi ángeljavabelia:

—¿Detsa xua jitsipame? jai.

Nexata ángel jumaitsi:

—Nevajëtabiäbija Diosojavabelia, nerajutabiäbija ata penamatavenonaecuene bepejiövijavabelia, daxita bajaraxua Dioso tsitaxanepanatsi. Dioso nexata apo nacofënëtsi bajaraxua. ⁵ Itorobare nijajivi Jope tomarabelia peccatöjunatsinexa Simón, ponë itsavënë vënërubatsi, Pedro. ⁶ Bajaraponë Simón naponapona Jope tomarata, itsanë Simón, bacabocotonë peyacueyacuëcaeyaexanaenë, pijabota. Bajaraponë Simón pijabo eca manuaemene itapata. Nexata Simón, ponë itsavënë vënërubatsi, Pedro, itsa patsiarena, catsipaebiana pacuenia exanaejitsiamë, jai ángel Corneliojavabelia bemajitsinaebota.

⁷ Bajarapacuenia ángel bemajitsinaebota pejumaitsicujinae Corneliojavabelia, ángel baja pona. Nexata Cornelio junata anijanëbeje pijabota petonacuenebaponapon-aenëtsibeje. Pematatsënëa junata caenë vajabitsaënë. Bajaraponë vajabitsaënë Dioso peyaiyataenë. Bajaraponë Cornelio yavenonabiabatsi. ⁸ Nexata Cornelio copiata tsipaeba bajarapamonaejavabelia daxita pacuenia tsipaebatsi ángel. Bajaraxuacujinae Cornelio itoroba bajarapamonae peponaenexa jane baja Jope tomarabelia, Simón pesivapon-aenexa. Nexata baja bajarapamonae naropoba.

⁹ Meravia pitsijavata, matonejeeapatota, bajarapamonae Jope tomara imoxoyotanajetarubena. Bajara pijinia paepatota Pedro pabota naponapona, bajarapabo jumabetsia junaya. Bajarapabo pejumanamatajëpaëbo. Pedro junaya bajarapabojumabetsia pevajëtsinexa Diosojavabelia. ¹⁰ Pedro bitso piajani. Jamatabënabane picani. Itsiata pexaejava pexanaevi abaxë apo veretsi pexaejava. Nexata Pedro bemajitsinaebota tane. ¹¹ Pedro tane itaboxo penapatsijava. Nexata athëbëvetsica runaica irabetsica ayaipanaxaneto, besábanapanaxaneto. Bajarapapanaxaneto cuatro pamaëtotabeje namataenetsia upicëta. Bajarapacuenia yamaëya copatsica. ¹² Bajarapapanaxaneto tuatujëta nubena daxitacueneviria. Nubena daxitaviria cuatro pataxutabeje pejinavanapaevi. Bobena daxitaviria pecotobëxëta pejinavanapaevi. Nubena daxitaviria pepunaevi. ¹³ Nexata Pedro jumetane athëbëvetsica pejumaitsjava: “Pedro, nonotapunare. Beyaxuare daxita mapamonaeje nexaenexa,” pejaijava athëbëvetsica, Pedro jumetane.

¹⁴ Nexata Pedro jumaitsi:

—Jume raja. Caeto ata raja xanë apo xanë bajarapavirianëxi tanejamatabëcuenebijianaeyaniva. Tsipaji Dioso Moiséspijinëta patanetonajumecopsilivaisi, paneitaveta bajarapavirianëxi pataxaeyaniva, jai Pedro.

¹⁵ Icatsia athëbëvetsica jumaitsi Pedrojavabelia:

—Pavirianëxi caitorobatsi nexaenexa, xaema. Pëtsa jumaitsimë: “Apo xanë raja bajarapavirianëxi tanejamatabëcuenebijianaeyaniva,” jamë pëtsa, jai athëbëvetsica.

¹⁶ Acueyabi xuabeje bajarapacuenia athëbëvetsica napëna jumaitsi Pedrojavabelia. Bajaraxuacujinae bajarapapanaxaneto athëbëbetsia baja icatsia yapëcaevaya. ¹⁷ Pedro nexata najamatabëxainaeya jamatabëjumaitsi tsecae:

—¿Detsa meta pitsijamatabëcuene yabara netsitajëta bajaraxua? jamatabëjai tsecae Pedro.

Pedro abaxë itsa najamatabëxaineca bajarapacuenia, Cornelio pijajivi pata. Pabota Pedro naponapona, bajarapabo matatoyorotsia yacaranata ibopanaxanetonë mataropotsia pefaratsijavaxanetota. Nexata bajarapayacaranatsijavaxaneto baupa muxuneneta

nubena bajarapamonae. Bajarapamonae namutuarena yanijobanajetarubena jivijavabelia peyapétaenexa itsajota eca Simón, bacabocotoné peyacueyacucaeyaexanaenē, pi-jabo. ¹⁸ Nexata bajarapamonae pepatarēcēpaecujinae, baupa pēnēvelia ayaijumeta yani-joba. Jumaitsi:

—¿Baja tsa mapabota Simón naponaponaje, ponē vēnērubatsi itsavēnē, Pedro? jai bajara-pamonae.

¹⁹ Pedro abaxē bojumatatsia athēbēyo najamatabēxainecaya bemajitsinaebota petaejaya yabara. Nexata Espiritu Santo jumaitsi Pedrojavabelia:

—Taema. Acueyabi ponēbeje casivaparena. ²⁰ Nexata nonotapunare. Runaremecca baja nenaponaeenexa bajarapamonae pepēta. Jamatejema saya ajamatabēcueneecovēbia naponae-name. Tsi-paji raja xanē itorobarenajē bajarapamonae, jai Espiritu Santo Pedrojavabelia.

²¹ Nexata baja Pedro runareca Cornelio pijajivijavabereca. Pedro jumaitsi bajarapa-monaejavabelia:

—Ponē pajaitame, xanē rabaja maje. ¿Detsa xuajitsia panesivaparemena? jai Pedro.

²² Nexata Cornelio pijajivi jumaitsi Pedrojavabelia:

—Vajabitsaēvi raja pijacapitán Cornelio pejamatabēcuene panajetarubenajē. Bajaraponē pexaniajamatabēcuene. Dioso bitso pejumecovēnētsinē. Nexata bajaraponē Diosojavabelia yajēcabiaba. Daxita judíovi yayiatanetsi. Nexata judíovi jumai tsabiabi bajara-ponē yabara: “Pexaniajamatabēcuene raja Cornelio,” jai tsabiabi. Dioso raja pijaángel itorobatsi Cornelio pecajunatsinexa. Bajaraxuata paxanē pacasivaponarenatsi Cornelio pijaboyabelia nenaponaeenexa. Cornelio cajumetaejitsia palivaisi tsi-pabijitsiamē bajaraponējavabelia, jai Cornelio pijajivi Pedrojavabelia.

²³ Nexata Pedro copiapita boyaberenaja pejonenexa bajarapamonae. Bajarapamonae abaxē namajita bajarapabota. Bajayacunua jane baja Pedro napona bajarapamonae pepēta. Pedro pēyanatatsi itsamonae Jope tomarapijivi, Dioso pejumecovēnētsivi. Itsiata abaxē bajarapamatacabi apo patsilia. Epatua abaxē majithopa.

²⁴ Nexata meravia pitsijavata Pedrobana jane baja palia Cesarea tomarabelia. Cornelio nexata pijabota yajavanuca pejunatsivi, pijamonaeviriavi. Yajavanucanua itsamonae, pamonae bitso Cornelio peyapétaevitsi. Pedro jane baja barēvajēnae vetanucatsi. ²⁵ Pedro itsa patanajetaruca Cornelio pijabopanabota, Cornelio copiapitatsi. Nexata Cornelio pe-matabacabēta nucajunua Pedro pitabarata. Tsi-paji bitso yayiataeya copiapitsijitsia picani. ²⁶ Nexata Pedro apo jitsipae bajarapacuenia bitso yayiataeya pecopiapitsijavatsi. Nexata Pedro maxēvaetaba. Nonotapunare. Nexata Pedro jumaitsi Corneliojavabelia:

—Nonotapunare. Tsi-paji saya pacuenia xamē jamatabēcueneitsimē, bajara saya xanē ata jamatabēcueneitsinē, jai Pedro.

²⁷ Nexata Pedro Cornelio barēcuacuajjai tsanucaponae panabojavarena. Pedro itsa najoneya Cornelio pijaboyalia, tane jivibitsaēto-xaneto Cornelio pijabota penacaetuatsivi. ²⁸ Nexata Pedro jumaitsi Cornelio pijabota penacaetuatsivijavabelia:

—Paxamē baja cajena xaniavaetsia payapétaneme mapacueneye. Paxanē pajudíovinē patajasalinaivimi apo panetocopatsi patayajavajinavanapaenexa apo judíovi. Bijiaya pataeyabiabajē apo judíovi. Apo panetocopatsinua patajonenexa apo judíovi pijaboy-alia. Itsiata baitsi jane aeconoxaeta baja Dioso nitaveta tacopatsinexa baja bajarapajamatabēcuene. Nexata Dioso netocopata tayajavaponaponaeenexa apo judíovi ata. Netocopatanua tanajonenexa apo judíovi ata pijaboyalia. ²⁹ Bajaraxuata itsa nejunata taponae-nexa maberenaje, narenanē bepíjia ajamatabēcueneecovēbia. Nexata jamatabēyapétaniji xua yabara panejunatame, jai Pedro Cornelio pijabota penacaetuatsivijavabelia.

³⁰ Nexata bajarajota Cornelio jumaitsi Pedrojavabelia:

—Xanē imata, caniviyoe-patota, bejamatabēcuene a las tres, vajētajē Diosojavabelia. Nexata bajarapaepatota jemata taitabarata netsitanaitajēta ángel. Ajena baja cuatro pamatacabibeje xaina bajarapacuenie tataecujinae. Angel penaxatsijava nivenivena.

³¹ Nexata ángel nejumaitsi: “Cornelio, Dioso rabaja cajumetane nevajētsijava. Yapétane baja nerajutabiabijava bepejio-bivijavabelia penamatavenonaecuenie. ³² Nexata nijajivi itorobare Jope tomarajavabelia pecatojunatsinexa Simón, ponē vēnērubatsi itsavēnē, Pe-dro. Bajaraponē naponapona itsanē Simón, bacabocotoné peyacueyacucaeyaexanaenē, pijabota. Bajaraponē Simón pijabo eca manuamene itapata. Nexata Simón, ponē it-savēnē vēnērubatsi, Pedro, itsa patsiarena, catsipaebiana pacuenia exanaejitsiamē,” nejai ángel. ³³ Bajaraxuata bepíjia-yo casivaponaeyaexanatsi. Xamē baja nexata pexaniaja-matabēcuenia netopatame. Bajaraxuata nevajēnae daxita paxanē panacaetuatajē Dioso pitabarata. Pacaevetatsi patacajumetaenexa daxita palivaisi Dioso caitoroba patanetsi-paebinexamē, jai Cornelio Pedrojavabelia.

Pacuenia Pedro livaisi tsi-paeba Cornelio pijabota yabara pelivaisi

³⁴ Pedro jane baja taxuxuaba livaisi petsipaebijava. Jumaitisi:

—Matapania rajane baja yapētaniji. Najēpaeya tsaena Dioso nacajitsipa daxitavirivavitsi. ³⁵ Caenacuapijivi canacujitsia, pamonaē Dioso yayiataeyajinavanapa, jume-covēnētsiajinavanapanua pacuenia Dioso itorobatsi, bajarapamonae Dioso jitsipa. ³⁶ Dioso cajena pexanialivaisi, Jesucristo pelivaisi, tonajumecopata Israel nacuapijivijavabelia. Nexata bajarapalivaisi tsipaebatsi Israel nacuapijivi pibisiacue ne paxanaeconivecua Jesucristo pejamatabēcueneta pecapanepaenexatsi Dioso. Jesucristo raja daxitajivi pijatuxanenē. ³⁷ Payapētaneme rabaja mapacueje. Juanpijinē jivibautisabinēmi jivi livaisi petsipaebanajetarucaecujinae, pebautisabaponaecujinaenua, Jesús cotocaevi tsipaebanajetaruca Galilea nacujava, Judea nacujava ata. ³⁸ Payapētaneme rabaja mapacueje. Jesús, Nazaret tomarapijinē, Dioso rajuta Espiritu Santo. Nexata Espiritu Santo pejamatabēcueneta Jesús caējēpatsi daxitacue ne pexanaenexa. Nexata Jesús jamatejemaexanapona daxita pamonaē dovathi pejamatabēcueneta avitane. Bajarapacuenia Jesús exanapona tsipaji Dioso yajavaponaponatsi. ³⁹ Paxonē baja cajena pataniji daxita xua Jesús exanapona Judea nacua, Jerusalén tomarata ata. Itsamonaē beyaxuabatsi Jesús. Cobematabiabarutatsi cruzajavabelia. ⁴⁰ Itsiata baitsi jane Jesús pemēthētsicujinaetsi, acueyabi matakabita, Dioso icatsia asaēyaxanatsi. Dioso Jesús caējēpaeyaxanatsi patanetsitanaitajētabinena paxanējavaberena. ⁴¹ Itsiata Jesús apo tsitanaitajētsi daxitajivijavabelia. Ēpaxanējavaberena saya panetsitanaitajētabiaba. Tajēvelia baja cajena Dioso paneitapeta patataevinexa Jesús petēpaecujinae icatsia itsa asaē. Bajaraxuata Jesús petēpaecujinae icatsia itsa asaē, panetsitanaitajētabiaba. Nexata panebarēnabane. Panebarēmatavējēaapanua. ⁴² Nexata Jesús paneitoroba patatsipaebaponaenexa daxitajivijavabelia pexanialivaisi, Jesús pelivaisi. Paneitorobanua patatsipaebaponaenexa Dioso pejamatabēcueneta itsamat-acabi Jesús penaneconitsiaexanaejavanexa daxita pijaneconi pexainaevi. Itsamatacabi Jesús naneconitsiaexanaena plasaēvi, petēpaevimi ata. ⁴³ Athēbēvetsica Jesús pepatsi-vajēnaetsica, bajayata jinavanapa Diosojumepaebivimi profetavi. Nexata profetavimi tajēvelia vajunupaebapona Jesús pejamatabēcueneta Dioso pevecuaajibiaexanaejavanexa pibisiacue ne pexanaeconimi, pajiviyo jumecovēnēta Jesús pelivaisi, jai Pedro Cornelio pijabota penacaetuatsivijavabelia.

Pacuenia Espiritu Santo tsijamatabējunuatsi apo judiōvi ata yabara pelivaisi

⁴⁴ Pedro abaxē livaisi petsipaebanucaejavata Cornelio banajavabelia, Espiritu Santo tsijamatabējunuatsi daxita pamonaē jumetaeyena Pedro petsipaebilivaisi. ⁴⁵ Nexata judiōvi Dioso pejumecovēnētsivi, Pedro peyajavapatsivi, itsa tane bajarapacue ne, jamatabēcuenenabenajacanubena. Jamatabēcuenenabenajaca tsipaji apo judiōvi ata Espiritu Santo tsijamatabējunuatsi. ⁴⁶ Nexata Pedro peyajavapatsivi yapētane Espiritu Santo petsijamatabējonejavatsi Cornelio bana. Tsipaji Cornelio bana cuai cuaijai itsaviriajumenēta, apo penatsipaebijumenēmi. Cornelio bana jumai tsaponae Diosojavabelia:

—Diosomē, bitso ayaijamatabēcuenenēmē, jai tsaponae.

⁴⁷ Bajaraxuata Pedro jumaitisi peyajavapatsivijavabelia:

—Pacuenia vaxaitisi Dioso nacarajuta Espiritu Santo, bajara pijinia pacuenia mapamonae ataje Dioso rajutatsi Espiritu Santo. Bajaraxuata itsajivi ata acuenebi pejumaitisjava bajarapamonae yabara: “Pētsa mapamonaeje pabautisabame merata,” peajava, jai Pedro.

⁴⁸ Nexata Jesucristo pevēnēta Pedro bautisaba Cornelio bana. Pedro pebautisabicujinae Cornelio bana, asivatsi abaxē Pedro penaponaponaenexa bajarajota caematacabibeje.

11

Pacuenia Pedro navajunupaeba Dioso pejumecovēnētsivijavabelia Jerusalén tomarata yabara pelivaisi

¹ Apóstolei vēnēlivaisitane apo judiōvi ata Cornelio bana pejumecovēnētsijava Jesús pelivaisi. Judea nacua pejinavanapaevi ata, pamonaē jumecovēnēta Jesús pelivaisi, vēnēlivaisitane apo judiōvi ata Cornelio bana pejumecovēnētsijava Jesús pelivaisi. ² Nexata pamatacabi Pedro pata Jerusalén tomarata, judiōvi, pamonaē jumecovēnēta Jesús pelivaisi, jumaitisi Pedrojavabelia:

³ —¿Detsa xuajitsia Cesarea tomarata naponaponame apo judiōvi pijabota? ¿Detsa xuajitsia nanabaneme apo judiōvita? jai judiōvi Pedrojavabelia.

⁴ Nexata Pedro tsipaeba judiōvijavabelia pacuenia taxuxuaba bajarapacue ne yabara. Pedro jumaitisi judiōvijavabelia:

⁵ —Pamatacabi naponaponajē Jope tomarata Simón, bacabocotonē peyacueyacuecaeyaxanaenē, pijabota, vajētajē Diosojavabelia. Nexata Diosojavabelia tavajētsijavata bemajitsinaebota taniji athēbēvetsica perunaejavatsica ayaiapanaxaneto, besābanapanaxaneto.

Bajarapapanaxaneto cuatro pamaëtotabeje namataenetsia upicëta. Nexata bajarapapanaxaneto xanëjavabetsica yamaëya copatsica. ⁶ Itsa naitaxutobabatsi naëcotajë xaniavaetsia tataenexa xua yajavanajetarua bajarapapanaxaneto tuatuajëta, nexata taniji cuatro pataxutabeje pejinavanapaevi. Taniji unupijivinua, pianapanaevi. Taniji pecotobëxëta pejinavanapaevinua. Taniji pepunaevinua. ⁷ Nexata jumetaniji athëbëvetsica tanejumaitsijava: “Pedro, nonotapunare. Beyaxuare dixata mapamonaeje nexaenexa,” nejai. ⁸ Nexata jumaitsinë: “Jume raja. Caeto ata raja xanë apo xaenë bajarapavirianëxi tanejamatabëcuenebijaeyaniva. Tsipaji Dioso Moiséspijinëta patanetonajumecopatsilivaisi, paneitaveta bajarapavirianëxi pataxaeyaniva,” janë. ⁹ Nexata athëbëvetsica icatsia nejumaitsi: “Pavirianëxi caitorobatsi nexaenexa, xaema. Pëtsa jumaitsimë: ‘Apo xaenë raja bajarapavirianëxi tanejamatabëcuenebijaeyaniva,’ jamë pëtsa,” nejai athëbëvetsica. ¹⁰ Acueyabi xuabeje bajarapacuenia athëbëvetsica napëna nejumaitsi. Bajaraxuacujinae bajarapapanaxaneto dixata bajarapamonae athëbëabetsia baja icatsia yapëcaevaya. ¹¹ Bajarapapatota jane baja acueyabi ponëbeje nesivapata pabota naponaponajë. Bajarapamonae itorobatsi Cesarea tomaraverena. ¹² Nexata Espiritu Santo nitoroba bajarapamonae pepëta ajamatabëcueneconvëbia tanaponaenexa Cesarea tomarabelia. Mapamonaeje vajamonae, seis ponëbeje Dioso pejumecovënëtsivi, nepëyanata Cesarea tomarabelia. Nexata panajoneyajë Cornelio, vajabitsaëvi pijacapitán, pijaboyalia. ¹³ Nexata Cornelio panetsipaeba pijabota petsitanitajëtsijavatsi ángel. Ángel pina jumaitsi Corneliojavabelia: “Itorobare nijajivi Jope tomarabelia pecatojunatsinexa Simón, ponë vënërubatsi itsavënë, Pedro. ¹⁴ Bajaraponë ita patsiarena, catsipaebiana pacuenia exanaejetsiamë Dioso pecavecuajibiaexanaenexa dixata pibisiacuene nexanaenecomini, dixata nijabopijivi yajava,” jai pina ángel Corneliojavabelia. ¹⁵ Nexata jane baja ita taxuxuabajë livaisi tatsipaebijava Corneliojanajavabelia, Espiritu Santo tsijamatabëpatsicatsi Corneliojana. Pacuenia vaxaitsi copiaya nacatsijamatabëpatsica Espiritu Santo, bajara pijinia pacuenia bajarapamonae ata tsijamatabëpatsicatsi Espiritu Santo. ¹⁶ Nexata najamatabënapitajë Jesús patanejumaitsiyava mapacueniaje: “Juanpijinë raja jivi bautisabanajetarua ëmerata. Itsiata baitsi jane caematacabibejecujinae paxamë Dioso pacatsijamatabëjoneyaexanaena Espiritu Santo,” patanejajava Jesús, najamatabënapitajë. ¹⁷ Xaniajai baja cajena. Dioso rajutapona Espiritu Santo apo judíovi ata pacuenia vaxaitsi nacarajuta Espiritu Santo vajajumecovënëtsixae vajatuxanenë Jesucristo. Nexata acuenebi tacaranatsijava Dioso perajutsijava Espiritu Santo apo judíovi ata, jai Pedro judíovijavabelia, Jesús pelivaisi pejumecovënëtsivijavabelia.

¹⁸ Nexata judíovi ita jumetane bajarapacuenia Pedro pejumaitsiyava, moya baja. Nexata judíovi jamatabëcuenebarëya Diosojavabelia. Nexata Dioso yabara jumaitsi:

–Xaniajai rabaja. Dioso bajarapacuenia exana apo judíovi ata matakabi apo pevereverecejava pexainaenexa, ita copaba pibisiacuene pexanabiabijava penajamatabëcuenepeñëyorotsinexa Diosojavabelia, jai judíovi.

Pacuenia Dioso pejumecovënëtsivi Antioquía tomarata jinavanapa yabara pelivaisi

¹⁹ Pamatacabi Estebanpijinë beyaxuabatsi, Dioso pejumecovënëtanapapaevi Jerusalén tomarata rëcëpeca daxitanacuanëjava. Bajarapacuenia rëcëpeca tsipaji bitso bejibiaexanaponatsi. Jesús pelivaisi pejumecovënëtsixae, itoyatsi. Itsamonae tajëbelia rëcëpeca Fenicia tomarabelia. Itsamonae rëcëpeca Chipre tunaetota peecaetomarabelia. Itsamonae rëcëpeca Antioquía tomarajavabelia. Nexata bajarapamonae Jesús pelivaisi tsipaebapona bajarapatomaranëjava ëjudíovijavabelia. Itsavirivijavabelia apo tsipaebapona. ²⁰ Itsamonae Jesús pelivaisi pejumecovënëtsivi, Chipre tunaetota peecaetomarapijivi, Cirene tomarapijivi ata, pona Antioquía tomarabelia. Bajarapamonae pijinia Antioquía tomarata apo judíovijavabelia tsipaebapona pexanialivaisi, Jesús pelivaisi. ²¹ Pamonae apo judíovijavabelia tsipaeba Jesús pelivaisi, Dioso yavenonatsi. Nexata apo judíovi ayabit-saëtoxaneto jumecovënëta Jesús pelivaisi. Najamatabëcuenepeñëyorota Diosojavabelia pibisiacuene pexanabiabijavavecuca.

²² Jerusalén tomarata pejinavanapaevi, Jesús pelivaisi pejumecovënëtsivi, vënëlivaisitanë apo judíovi ata Antioquía tomarapijivi Jesús pelivaisi pejumecovënëtsijava. Nexata bajarapamonae Bernabé itorobaliatsi Antioquía tomarabelia petaenexa apo judíovi ata Jesús pelivaisi pejumecovënëtsijava. ²³ Nexata Bernabé ita pata Antioquía tomarabelia, tane apo judíovi ata Dioso peyavenonaejavatsi. Nexata Bernabé sivajamatabëcuenebarëya apo judíovi ata. Nexata Bernabé muxujioba apo judíovi ata dixata bajarapamonae pejamatabëëthëtovetsina ajamatabëcuenesaëya peyajavajinavanapaenexa Dioso. ²⁴ Bernabé bitso pexaniajamatabëcuenenë. Jamatabëcuenevënëca Espiritu Santo. Nexata exanabiaba Espiritu Santo pitorobicueniatsi. Dioso bitso pejumecovënëtsinë Bernabé. Bajaraxuata nexata jivibitsaëtoxaneto jumecovënëta Dioso.

²⁵ Bajaraxuacujinae Bernabé baja pona Tarso tomarabelia pejaitsinexa Saulo. Nexata baja Bernabé ita caxitajaraba Saulo, barërena Saulo Antioquia tomaraberena. ²⁶ Nexata Antioquia tomarata caevai naponaponabeje Dioso pejumecovënëtsivijavata. Jivi ayaibit-saëtoxaneto livaisi tsipaebabiababeje. Antioquia tomarata daxita pamonaes Jesús pelivaisi jumecovënëttavanapa, bajarapamonae pijatomarapijivi pepo copiaya jane baja vënërübatsi Cristianovi.

²⁷ Pamatacabi abaxë Bernabébeje Saulobeje ponaponabeje Antioquia tomarata, Dioso-jumepaebivi profetavi, Jerusalén tomaraverena penaropobivi, pata Antioquia tomarata. ²⁸ Bajarapaprofetavijavuvënëñ pevënë Agabo. Nexata Agabo nonotapuna Dioso pejumecovënëtsivi penacaetuatsijavata. Nexata Agabo tajëvelia vajunupaeba ayaijaniboxaneto pecopiapatsijavanexa tajëvelia Espiritu Santo peyapëtaeyaxanaexaetsi. Agabo jumaiti mapacueniaje:

—Ayaijaniboxaneto raja copiapatsiana daxitanacuanëjjava, jai tajëvelia Agabo.

Bajarapajaniboxaneto hexëa copiapata Agabo pejumaitisicuenia pamatacabi nacuaeveitsinë Claudio evetaponapona Romanonacua. ²⁹ Bajaraxuata cajena janibovajënaeya, Antioquia tomarapijivi daxita Dioso pejumecovënëtsivi najamatabëcueniejëpa peyavenonaenexa Judea nacuapijivi Dioso pejumecovënëtsivi. Nexata Antioquia tomarapijivi, caenë canacujitsia, najamatabëcuenevereta Judea nacuapijivijavabelia perajutsinexa palata pacuenia cuenecaëjëpatsi. ³⁰ Nexata baja Antioquia tomarapijivi ita tocaetuatsivereta, bajarapamonae itorobatsibeje Bernabébeje Saulobeje petocaponaenexabeje bajarapapalata Judea nacuapijivijavabelia, Dioso pejumecovënëtsivi pijaancianovijavabelia. Nexata ancianovi petsicobetsanaenexa bepejiovijavabelia.

12

Pacuenia Pedro etatsi penaneconitsivi pejebabiabibota yabara pelivaisi

¹ Nacuaeveitsinë Herodes bejiobiaexanapona Jesús pelivaisi pejumecovënëtsivi. Herodes pijajivi itoroba espadata pebeyaxuabinexatsi Santiago, Juan pematapijinëmi. ³ Herodes ita tane judiövi pëtsitaxanepanaejavatsi Santiago pebeyaxuabijavatsi, nexata icatsia Herodes itoroba pijajivi Pedro pevaetabinexatsi. Bajarapacuenia Herodes exana fiestamatacabi, pafiestamatacabi judiövi baxane levadurata matajërëabinejeva pexanaepan. ⁴ Pedro pevaetabicujinaetsi, penaneconitsivi pejebabiabibota etatsi. Bajarapabota cuatro pabitsaëtobeje vajabitsaëvi Pedro nacobenaveatabiabatsi. Itsabitsaëto ita pitsapa, juya itsabitsaëto evetabiabatsi. Caebitsaëtota jinavanapa vajabitsaëvi cuatro ponëbeje tsaponae. Nexata picani Herodes najamatabëxaina Pedro penutsinexatsi daxita judiövi pitabarata pascuavënëfiesta pevereverecaecujinae. ⁵ Nexata Pedro eca penaneconitsivi pejebabiabibota. Vajabitsaë xaniavaetsia Pedro yabaupaevetabiabatsi bajarapabovecua Pedro pepitsapaeyaniva. Itsiata baiti jane daxita Dioso pejumecovënëtsivi, asaëyata Diosojavabelia tovajëtaponatsi Pedro.

Pacuenia Dioso pejamatabëcueneta Pedro capanepatsi penaneconitsivi pejebabiabibovecua yabara pelivaisi

⁶ Pamatacabi picani Herodes Pedro nutsijitsiatsi daxita judiövi pitabarata, bajarapamatacabivajënaeya pameravi, penaneconitsivi pejebabiabibota ënëtuatujëta Pedro majitanuca anijanëbeje vajabitsaënëbeje, pevetsinëtsibeje, petuatujëta. Vajabitsaënëbeje Pedro yamaëcabocatsibeje anijacadenamaëtotabeje. Itsanëbeje pijinia yabaupaevetatsi. ⁷ Jemata Dioso pijaängel naitajëta Pedrojavata. Nexata penaneconitsivi pejebabiabibota ënëtuatujëta naitayota. Pedro pemaajanucaenë ängel yenejayatabatsi Pedro penaëcotsinexa. Ängel jumaiti Pedrojavabelia:

—Naxanitsiayo nonotapunare, jai ängel.

Nexata Pedro pecobecëtsicadenamaëtotsibeje vecobejoparecatsi baja. ⁸ Nexata icatsia ängel jumaiti Pedrojavabelia:

—Nijacorrea xaniavaetsia naepacatarërëre. Nataxuxatare baja nijazapato, jai ängel.

Pedro nexata xaniavaetsia naepacatarërëtaxuaba pijacorrea. Nataxuxatataxuaba pijazapato. Nexata icatsia ängel jumaiti:

—Naxatare nijacamisajumavelia nenaxatatabiabiava. Nepënaponare, jai ängel Pedrojavabelia.

⁹ Pedro nexata naponaa ängel pepëta. Itsiata Pedro xaniavaetsia apo najamatabëcueneyapëtae. Nexata Pedro xaniavaetsia apo yapëtae pepacuene ängel pebarëponaejavatsi. Nexata saya Pedro jamatabëjumaiti:

—Amajitsinaenë meta, jamatabëjai.

¹⁰ Itsiata baitsi jane xenetsiabeje penamataxainae ênêtuatuajêtareca peyabaupaevetecae-
caevajabitsaênêtsi. Icatsia xenetabeje pecotocaevi ênêtuatuajêtatsina peyabaupaevetecae-
vajabitsaênêtsi. Bajaraxuacujinae pepitsapaenexabeje callejavabelia, nucojopabeje pepo
baupaxanetojavata jane baja. Bajarapabaupaxaneto hierrobaupaxaneto. Nexata bajarapabaupaxaneto tonabaupatatsibeje pijacuata. Pitsatabaliabeje jane baja callejavabelia. Nexata callejavareca penjetarucejavatabeje, ângel jemata ajibi tsojopae. ¹¹ Pedro jane baja xaniavaetsia najamatabêcueneyapêtane. Nexata Pedro jamatabêjumaitis:

—Baja rajane matapania aeconoxae xaniavaetsia najamatabêcueneyapêtaniji. Dioso tsaena itorobica pijaângel tanecapanepaenexa Herodes pecobevecua. Nexata baja judiôvi apo netae tsane Herodes pijajivi tanebaxuabijava, jamatabêjai Pedro.

¹² Pedro najamatabêxaina pacuenia exanaejitsia. Nexata lia María pijaboyabelia. Bajarapova María, Juan pena, ponê vênêrubatsi itsavênê, Marcos. María pijabota ayabit-saêtoxaneto Dioso pejumecovênêtsivi nacaetuata Diosojavabelia petovajêcaenexatsi Pedro. ¹³ María pijabo matatorotsia yacaranata ibopanaxanetonê mataropatsia pefaratsi-javaxanetota. Nexata bajarapayacaranatsijavaxaneto baupa, Pedro docodocota petobau-patsinexatsi. Nexata bajarapabota penacuenebivayo, Rode, pitsaparena petaenexa ponê baupa docodocotanuna. ¹⁴ Nexata Rode itsa jumeyapêtane Pedrocuene, nexata abaxê apo tobaupatsi. Rode cujinaelia boyabelia pejamatabêcuenebarêyatsajonexae. Nexata Rode tsipaeba María pijabota penacuetsivijavabelia. Jumaitsi:

—¡Pedro rajane baja nucalia baupa pênêverena! jai Rode.

¹⁵ Nexata bajarapamonae jumaitsi:

—¡Camatajemaba raja saya! jai.

Itsiata icatsia Rode jumaitsi:

—¡Xaniajanê raja pepacuene! Pedro raja nucalia baupa pênêverena, jai Rode.

Bajarapamonae nexata jumaitsi:

—Apo Pedro raeta. Pevetsiângeltsi raeta, jai bajarapamonae.

¹⁶ Nexata bajarapamonae pecuaicuajijavata, Pedro tsiteca baupa docodocotanunua. Nexata jane baja bajarapamonae tobaupata Pedro pejonenexarena. Bajarapamonae itsa tanetsi Pedro, bajarapamonae jamatabêcuenenajunaviaca. ¹⁷ Nexata Pedro nacobe-yota bajarapamonae pemoyanexa. Pedro tsipaeba pacuenia Dioso pejamatabêcueneta capanepatsi penaneconitsivi pejebabiabibovecua. Pedro jumaitsi:

—Patsipaebianame mapalivaisije Santiagojavabelia. Patsipaebianame itsamonaejavabelia ata, Dioso pejumecovênêtsivijavabelia, jai Pedro.

Bajaraxuacujinae Pedro pitsapalia. Itsajavabelia icatsia pona.

¹⁸ Itsa baja matacabi tsina, vajabitsaevi, pamonaev Pedro evetabiabatsi pananeconitsivi pejebabiabibota, bitso jamatabêcuenebêjai. Tsipaji bajarapamonae apo yapêtae itsabelia Pedro pona. ¹⁹ Nexata Herodes itoroba bajarapamonae pejaitsinexatsi Pedro. Itsiata bajarapamonae Pedro apo caxitajarabitsi. Nexata picani Herodes xaniavaetsia yanijoba pamonaev Pedro evetabiabatsi pananeconitsivi pejebabiabibota. Nexata baja bajarapamonae Pedro pevecuapanepaexae, Herodes anaepana. Nexata Herodes itsamonae vajabitsaevi itoroba bajarapamonae pebeyejebinexatsi Pedro bajarapamonae pevecuapanepaexae. Nexata baja beyejebatsi. Bajaraxuacujinae nacuaevevtsinê Herodes Judea nacuaevecua pona. Pona Cesarea tomarabelia peponaponanexa Cesarea tomarata.

Pacuenia têpa nacuaevevtsinê Herodes yabara pelivaisi

²⁰ Nacuaevevtsinê Herodes itsa ponapona Cesarea tomarata, baranaepana bitso Tiro tomarapijivijavabelia, Sidôn tomarapijivijavabelia ata. Nexata Herodes pebaraanaepanaexae, bajara patomarabejepijivijavabelia copatsiaexana pexaejava petocaponabiabijava bajara patomarabejepijivijavabelia. Nexata bajarapatomarabejepijivi sivanajamatabêcueneyanaba xaniavaetsia pebarêcuacuajainexa nacuaevevtsinê Herodesjavabelia. Tsipaji bajarapatomarabejepijivi jitsipa icatsia pexaejava petocapatabinexatsi pijatomarabejevaverena Herodes pevetsinacuajavaverena. Nacuaevevtsinê Herodes pijabo petoevtsinêtsi pevênê Blasto. Nexata Tiro tomarapijivibeje Sidôn tomarapijivibeje copiaya cuacuajai Blastojavabelia Blasto pexaniajamatabêcuene petoxainaenexa petocuaicuajainexa Herodesjavabelia. Nexata Blasto jejai. Tocuaicuajai Herodesjavabelia Herodes icatsia pebarajamatabêxanepanaenexa bajara patomarabejepijivijavabelia. ²¹ Nexata Herodes tocajêta pamatacabi patsijitsia bajarapatomarabejepijivi Herodes pijaboyabelia. Nexata pamatacabi Herodes tocajêta bajarapamonae pepatsinexa, Herodes naitabêtsia naxatata nacuaevevtsinê penaxatatsicuenia. Nexata jane baja bajarapatomarabejepijivi pata pebarêcuacuajainexa Herodes. Nexata daxita bajarapamonae pitabarata nacuaevevtsinê pecaejavata, Herodes eca. Nexata Herodes xaniavaetsia barêcuacuajai bajara

patomarabejepijivijavabelia. ²² Nexata bajarapatomarabejepijivi Herodes yabara pinijijumeta yamaxëitotorobiaya jumai tsaponae pebarajamatabëxanepanaenexatsi:

—¡Maponëje nacabarëcaucaiuaijaije, apo jivitonë! ¡Diosonë tsaena! jai tsaponae bajarapatomarabejepijivi Herodes yabara.

²³ Bajarapacuenia pejumaitsijava bajarapatomarabejepijivi Herodes apo pejumeitavetsixae, Dioso pijaängel naneconitsiaexanatsi Herodes. Avitaniayaexanatsi. Herodes nexata oro ënëverenetsi. Herodes nexata oro pënëverenijavatsi yatëpa.

²⁴ Nexata Dioso pejumecovënëtsivi, daxitanacuanëjava tsipaebapona Dioso pitorobilivaisi. Nexata Dioso pitorobilivaisi pejumecovënëtsivi ayaibitsaëttoxaneto tsaponae.

²⁵ Itsa baja Bernabébeje Saulobeje palata petocaponaevijavabelia livaisi petsipaebijavabeje najumeveretabeje, naviatabeje baja Jerusalén tomaraverena. Navialiabeje baja Antioquia tomarabelia. Barëliabeje Juan, ponë vënërubatsi itsavënë, Marcos.

13

Pacuenia Bernabébeje Saulobeje junatatsibeje Dioso pitorobilivaisi jivi petsipaebaponaenexabeje daxitanacuanëjava yabara pelivaisi

¹ Antioquia tomarata Dioso pejumecovënëtsivijavata, jinavanapa mapamatabëxëyoje. Itsanë Bernabé. Itsanë Simón, ponë vënërubatsi itsavënë, Negro. Itsanë Lucio. Bajaraponë Cirene tomarapijinë. Itsanë Saulo. Itsanë Manaén. Bajarapamonae cajena profetavi, Dioso pejumecovënëtsivijavabelia livaisi petsipaebabiabivinu. Herodes Galileanacua pevetsinë. Herodesbeje Manaénbeje penajuavitsabinëbeje. ² Itsamatacabi daxita bajarapaprofetavi, Dioso pejumecovënëtsivi yajava, culto pexanaevajënaeya, pexaejava apo xae japasa Diosojavabelia pevajëcaenexa. Nexata bajarajota Espiritu Santo jumaiti daxita bajarapamonaejavabelia:

—Panetotsare saicaya Bernabébeje Saulobeje. Xua yabara junatajëbeje, bajaraxua jane baja tanetonacuenëbinexabeje, jai Espiritu Santo.

³ Nexata jane baja daxita bajarapamonae japasa vajëca Diosojavabelia. Bajaraxuacujinae Bernabébeje Saulobeje bajarapamonae tsimatanacobebuatatsibeje. Tovajëtatsibeje Diosojavabelia. Nexata jane baja copatatsibeje peponaenexabeje jivi daxitanacuanëjava petsipaebaponaenexabeje Dioso pitorobilivaisi.

Pacuenia apóstolenëbeje Dioso pitorobilivaisi jivi tsipaebabeje Chipre tunaetoxanetota pnaetomaranëjava yabara pelivaisi

⁴ Bernabébeje Saulobeje Espiritu Santo pejamatabëcueneta itorobatsibeje. Nexata baja ponabeje Seleucia tomarabelia. Naxata Seleucia tomarata naropotabeje. Naponabeje velapanata peponaebarcota. Nanicababeje Chipre tunaetoxanetojavabelia. ⁵ Nexata napaliabeje Salamina tomarata. Bajarapatomarata tsipaebaponaabeje Dioso pitorobilivaisi judiovi penacaetuatabiabibonëjava. Juan napona Bernabébeje Saulobeje pepëta peyavenonabiinexa. ⁶ Nexata bajarapamonae Chipre tunaetoxaneto matatuvëria. Nexata pata Pafos tomarata. Bajarapatomarata bajarapamonae caxitajaraba judionë, Barjesúsvënë. Bajaraponë jivi pejorobinë. Bajaraponë jivi yamaxëitotorobiaya jumai tsabiabi: “Xanë raja tsipaebabiabajë Dioso taneitorobicuenia,” jai tsabiabi. ⁷ Nexata Barjesúbeje najuaponaponabiababeje Sergio Pauloabeje. Sergio Paulo Chipre tunaetoxaneto pevetsinë. Sergio Paulo cajena bitso bepíjia peyapëtaenë palivaisi tsipaebatsi. Nexata Sergio Paulo pijajivi itoroba petojunatsinexatsi Bernabébeje Saulobeje. Tsipaji Sergio Paulo bitso jamatabëjumetane Dioso pitorobilivaisi. ⁸ Itsiata baitsi jane Barjesús, jivi pejorobinë, ponë vënërubatsi itsavënë, Elimas, najamatabëcuene epatajërëcaeyaexana Sergio Paulo Bernabébeje Saulobeje petsipaebaponaelivaisibeje yabara. Bajarapacuenia Barjesús najamatabëcuene epatajërëcaeyaexana Sergio Paulo pejumecovënëtsiyaniva Dioso pitorobilivaisi. ⁹ Nexata Saulo, ponë vënërubatsi itsavënë, Pablo, tsijamatabëvënëcatsi Espiritu Santo. Nexata Pablo naëcota asaëyata Barjesúsjavabelia. ¹⁰ Pablo jumaiti Barjesúsjavabelia:

—¡Xamë jivi neyamaxëitotorobinë, pibisiacuene nexanaenë, dovathi pijajivitonëmë, pexanijamatabëcuene pexanaejava nitoyanë! Apo jamatabëcopatsimë nenajumetsënëtsijava pejumecovënëtsiyaniva pamonae picani jamatabëjumecovënëta Dioso pijapexaniajailivaisi. ¹¹ Dioso raja aeconoxae canaenonitsiaexanaena. Nexata apo natsivajënaetaemë tsane. Matapania anijajuametonë panepaena, icatsia natsivajënaetaename, jai Pablo Barjesúsjavabelia.

Nexata bajarajota Barjesús itaxutomeravibajunuatsi. Bitso itaxutoaitaquiri. Nexata saya Barjesús nacobenajayabaruta itsanë pecobevaetabinexatsi pecomacaponaenexatsi

pijaboyabelia. ¹² Sergio Paulo itsa tane bajarapacuene, nexata jumecovënëta Jesús pelivaisi. Sergio Paulo bitso jamatabëcuenenajunaviaca itsa jumetane Jesús pelivaisi Bernabébeje Pablobeje petsipaebijavatabeje.

Pacuenia Pablobeje Bernabébeje ponaponabeje Antioquia tomarata, Pisidia nacuata peecaetomarata, yabara pelivaisi

¹³ Pablobana Chipre tunaetota Jesús pelivaisi petsipaebavanapaecujinae, Pafos tomarata nanaropoba velapanata peponaebarcoxanetota. Nicaba Panfilia nacuayabelia. Nexata Panfilia nacuatatia pata Perge tomarata. Juan baja Perge tomarata itsajamatabëcuene najamatabëxaina. Nexata baja naviateca Jerusalén tomarabelia. ¹⁴ Nexata Pablobeje Bernabébeje icatsia nanaropotabeje Perge tomarata. Nexata icatsia patabeje Antioquia tomarabelia, Pisidia nacuata peecaetomarabelia. Judíovi penacueraevetsimatacabita Pablobeje Bernabébeje najunuabeje judíovi penacuetautabiabibota. Bajarajota naecabeje. ¹⁵ Nexata daxita bajarapabota pejonevi, namuxunaeveta Dioso Moisésipjinëta penajumecopatsilivaisi. Namuxunaevetanua Diosojumepaebivimi profetavi bajayata peyaquinaelivaisi ata. Bajaraxuacujinae judíovi penacuetautabiabibo pevetsivi, pijajivitonë itoroba. Nexata bajaraponë jumaitsi Pablobeje Bernabébejejavabelia:

–Tajabananëbeje, itsa payapëtanemebeje itsalivaisiyo panetsipaebinxabeje, aeconoxae patsipaebianamebeje jivi piagamatabëcuenesaënexa Diosojavabelia, jai bajaraponë Pablobeje Bernabébejejavabelia.

¹⁶ Nexata jane baja Pablo nonotapuna. Nacobeyota jivi pemoyanexa. Pablo nexata jumaitsi:

–Tajamonae judíovi, panenamuxunaevere. Tajamonae, paxamë ata apo pajudíovimë, Dioso panejitsipaevi, abaxë panenamuxunaevere pacuenia jumaitsinëjitsia. ¹⁷ PaDioso aeconoxae judíovitsi vajaDioso, bajarapaDioso bajayata baja cajena itapetatsi vajasalinaivimi pijajivinexa. Nexata Dioso pejamatabëcueneta vajasalinaivimi pexi ayaibitsaëtöxaneto xainapona. Nexata vajasalinaivimi ayaibitsaëtöxaneto tsaponae pamatacabi jinavanapa Egipto nacuata. Nexata Dioso pesaëta vajasalinaivimi matacaponatsi Egipto nacuaverena. ¹⁸ Vajasalinaivimi Dioso pejitsipaecuenia apo exanabiabi ata, itsiata Dioso cuarenta pavaibeje xaniavaetsia evetatsi petusato nacuata. ¹⁹ Dioso cajena verebiaba siete panacuabejepijivi, Canaánvënë nacuata pejinavanapaevimi. Nexata baja Dioso vajasalinaivimi totsatsi bajarapanacuënëjava juya pejinavanapaenexa. ²⁰ Bajaraxuacujinae Dioso itoroba vajasalinaiviyajuvënëvi juezmanae penaexanaponaeenexa, vajasalinaivimi pevetsivinexatsi. Juezmanae nexata penaexanaponaeivi, vajasalinaivimi evetavanapatsi cuatrocientos cincuenta pavaibeje. Matapania profeta Samuelpijinë evetatsi vajasalinaivimi, copata baja juezmanae pevetsijavatsi. Tsipaji baja profeta Samuelpijinë pecotocaevijueznë. ²¹ Nexata vajasalinaivimi jumaitsi profeta Samuelpijinëjavabelia: “Pajitsipajë nitorobijava vajayajuvënëni penaexanaenexa vajanacayanacuavevetsinëna,” jai. Nexata profeta Samuelpijinë Dioso pejamatabëcueneta itoroba Saúlpijinë vajasalinaivimi cuarenta pavaibeje peyanacuavevetsinënaenexatsi. Bajaraponëmi Saúlpijinë, Cispijinë pexënato, vajasalinainëmi Benjamínpijinë pemomoxiyajuvënëni. ²² Bajaraxuacujinae Saúlpijinë Dioso copatsiaexanatsi pecopatsinexa baja vajasalinaivimi peyanacuavevetsijavatsi. Nexata juya Dioso itoroba Davidpijinë vajasalinaivimi peyanacuavevetsinexatsi. Dioso jumaitsi Davidpijinë yabara mapacueniaje: “Isaí pexënato, David, jamatabëcueneyapëtaniji. Bajarapatsinë jitsipajë. Bajaraponë David daxita pacuenia jitsipajë, netoexanaena,” jai Dioso Davidpijinë yabara. ²³ Davidpijinë raja pemomoyota naexana Jesús. Dioso cajena itorobica Jesús Israel nacuapijivitsi vajanacapanepaenexa pacuenia Dioso tajëvelia najumecapanepaeya jumaitsi vajasalinaivimijavabelia. ²⁴ Jesús petaxuxuabivajënaeya jivi livaisi petsipaebaponaejava, copiaya Juanpijinë jivibautisabinëmi tsipaebanajetaruca daxita Israel nacuapijivijava. Jumai tsanajetarucae Juanpijinë: “Pacopabare baja daxita pibisiacuene paneexanabiabijava. Panajamatabëcuenepënyorore Diosojavabelia. Bajaraxuacujinae pacabautisabianatsi,” jai tsanajetarucae Juanpijinë. ²⁵ Juanpijinë abaxë itsa apo beyaxuabitsi, jumai tsaponae jivijavabelia: “Ponë pacopiaevetavanapame, xanë raja apo bajaraponënë. Xanëcujinae rajane bajaraponë najetarucaena. Xanë raja saya beveliajamatabëcuenenënë bajaraponëvecua. Nexata bajaraponë bepajajivitonënëcuenia ata tataxujonotsinexa pijazopato, vecuaauranë,” jai tsaponae Juanpijinë Jesús yabara, jai Pablo judíovijavabelia judíovi penacuetautabiabibota.

²⁶ Icatsia Pablo jumaitsi judíovijavabelia judíovi penacuetautabiabibota:

–Tajamonae Abrahampijinë papemomoximë, Dioso paneyaiyataevi. Dioso raja naca-toitoroba mapalivaisije vajanacapanepaenexa Diosojavabelia. ²⁷ Itsiata Jerusalén

tomarapijivi apo yapêtae Jesús pecapanepaejavanexatsi. Jerusaléntomara pevetsivi ata apo yapêtae Jesús pecapanepaejavanexatsi. Bajarapamonae apo jumeyapêtaenua pacuenia jumaitsi Jesús yabara bajayata profetavi peyaquinaebaxutota. Penacueraevetsimatacabianê canacujitsia lebabibi ata bajarapabaxuto judíovi penacaetuatabiabi-bota, itsiata bajarapamonae apo jumeyapêtae. Bajarapamonae itsa neconita Jesús pebeyaxuabinexatsi, nexata judíovi exana pacuenia baja cajena Diosojumepaebivi profetavi tajêvelia vajunupaeba Jesús pexanaejavanexatsi. ²⁸ Judíovi apo caxitajarabi ata Jesús itsacueneneconi pexainaejava, itsiata bajarapamonae vajêta nacuaeveitsinê Pilatojavabelia Jesús pebeyaxuabinexatsi. ²⁹ Nexata jane baja Jesús itsa beyaxuabatsi, copiapata jane baja daxita pacuenia Jesús yabara tajêvelia jumaitsi Dioso pejumelivaisibaxutota. Bajaraxuacujinae Jesús petêpaenê pitsicatsi cruzajavavetsica. Bajaraxuacujinae mêtêtatsi. ³⁰ Itsiata baitsi jane Dioso icatsia asaêyaexanatsi Jesús petêpaecujinae. ³¹ Jesús petêpaecujinae Dioso icatsia itsa asaêyaexanatsi, bajayajebi anijatonê tsitanaitajêtabiabi pijajivijavabelia, pamona yanatatsi pamatacabi Jesús pona Galilea nacujavaverena Jerusalén tomaraberenae. Bajarapamonae nexata maparucaje tsipaebaona jivijavabelia Jesús pelivaisi, jai Pablo bajarapamonaejavabelia judíovi penacaetuatabiabi-bota.

³² Icatsia Pablo jumaitsi bajarapamonaejavabelia judíovi penacaetuatabiabi-bota:

—Nexata pacatsipaebianatsi pexanialivaisi. Dioso cajena vajasalinaivimijavabelia tajêvelia najumecapanepaeya jumaitsi pacuenia Dioso toexanaejitsia vajasalinaivijavabelia. ³³ Vaxaitsi rabaja cajena bajarapamonaemi pemomoxitsi. Nexata pacuenia Dioso tajêvelia najumecapanepaeya jumaitsi vajasalinaivimijavabelia, nacatocopiapata jane baja. Tsipaji baja Jesús Dioso icatsia asaêyaexanatsi petêpaecujinae pacuenia baja cajena jumaitsi Salmosbaxutota. Dioso pejumaitsijava Jesúsjavabelia, Salmosbaxutota jumaitsi mapacueniaje: “Ajena raja, pamatacabi, canutatsi daxitajivi pitabarata pecayapêtaenexaxanê taxênatocuenemê,” jai cajena Salmosbaxutota Dioso pejumaitsijava Jesúsjavabelia. ³⁴ Dioso baja asaêyaexanatsi Jesús petêpaecujinae. Jesús baja nexata icatsia apo têpa tsane itsamatacabijavabelia ata. Bajarapacuenae yabara baja cajena vaxaitsi yapêtanetsi. Tsipaji Dioso pejumelivaisibaxutota tajêvelia jumaitsi mapacueniaje: “Caexanaenatsi pacuenia baja cajena najumecapanepaeya jumaitsinê Davidpijinêjavabelia,” jai Dioso pejumelivaisibaxutota bajayata Dioso pejumaitsijava Jesúsjavabelia. ³⁵ Bajaraxua yabara Jesús pejumaitsijava Diosojavabelia Salmosbaxutota icatsia jumaitsi mapacueniaje: “Nexênatonê apo necopatsimê tsane taperabêtsabanaejavabelia,” jai Salmosbaxutota. ³⁶ Davidpijinê abaxê itsa asaê tsaponaponae, jumecovênêtsiaponapona pacuenia Dioso itorobatsi. Bajaraxuacujinae Davidpijinê têpa baja. Nexata Davidpijinê mêtêtatsi pamojivimi pemêthêanê muxuneneta. Nexata Davidpijinê mêtêhabelia perabêtsabana baja. ³⁷ Itsiata baitsi jane Jesús, ponê Dioso icatsia asaêyaexanatsi, petêpaecujinae bajaraponê apo perabêtsabanae cajena mêtêhabelia. ³⁸ Tajamonae, bepapyapêtaneme ponê yabara pacatsipaebatsi. Jesús raja pejamatabêcueneta Dioso raja pacavecuajibiaexana pibisiacuenae paxeanaeconimi. ³⁹ Pajivi Jesús jumecovênêtsiana, bajarapajivi daxita pibisiacuenae pexanaeconi Dioso vecuajibiaexanaenatsi Jesús pejamatabêcueneta. Pajivi apo jumecovênêtsicapanepea ata Dioso Moiséspijinêta penajumecopatsilivaisi, jamatabêjumaitsi: “Xanê baja jumecovênêtajê Dioso Moiséspijinêta penajumecopatsilivaisi. Nexata pibisiacuenae taexanaeconi Dioso nevecuajibiaexanaena,” jamatabêjai, itsiata bajarapajivi pibisiacuenae pexanaeconi Dioso apo vecuajibiaexanaetsi tsane. Tsipaji Dioso Moiséspijinêta penajumecopatsilivaisi itsajivi ata apo jumecovênêtsicapanepea. ⁴⁰ Xania baja tsane. Xaniavaetsia pajinavanapename papecatocopiapatsiyanova pacuenia Diosojumepaebivi profetavi peyaquinaebaxutota tajêvelia jumaitsi. Tsipaji raja profetavi peyaquinaebaxutota, tajêvelia jumaitsi mapacueniaje:

⁴¹ Panecapocaponaevi, ¡xania baja pataename! Panajunaviacaeneme raja. Tsipaji raja panevecuanaxuabianame. Panejivanapaeapatota xanê, Diosonê, exanaenajê ayaicuenae taexanaejavanê. Nexata taexanaejavanê pelivaisi, itsamonae xaniavaetsia pacatsipaebi ata tsane, itsiata apo pajumecovênêtsimê tsane, jai Diosojumepaebivi profetavi peyaquinaebaxutota Dioso penaneconitsiaexanaejavanexa yabara pamonae Dioso apo pejumecovênêtsivi, jai Pablo bajarapamonaejavabelia judíovi penacaetuatabiabi-bota.

⁴² Pablobeje baja Bernabêbeje pitsapaejitsiabeje judíovi penacaetuatabiabi-bovecua. Nexata bajarajota pamonae apo judíovi, junatatsibeje icatsia itsamatacabi judíovi penacueraevetsimatacabita petsipaebinxabeje bajarapalivaisi. ⁴³ Penacaetuatsivi baja naviaba judíovi penacaetuatabiabi-bovecua. Nexata Pablobeje Bernabêbeje judíovi penacaetuatabiabi-bovecua itsa pitsapabeje, jivi ayalbitsaêto pênaponatsibeje. Bajarapamonaeayjuvênêvi itsamonae judíovi, itsamonae apo judíovi. Pamonae apo judíovi, bajarapamonae catsiteca judíovicuenia Dioso pejumecovênêtsiava. Nexata Pablobeje Bern-

abébeje muxujobabeje bajarapamonae pevajënaeyabelia ajamatabëcuenesaëya pejume-covënëtavapaenexa Dioso pitaxutotsoniataejavatsi.

⁴⁴ Bajara jane xuacujinae icatsia judíovi penacueraevetsimatacabita, bajarapatomara-pijivi muxunanacaetuatsibeje ayaibitsaëttoxanetonë Dioso pitorobilivaisi penamuxu-naevetsinexatsibeje. ⁴⁵ Nexata judíovi itsa tane bajarapajivibitsaëttoxanetonë Pablobeje Bernabébeje pemuxunanacaetuatsijavatsibeje, judíovi bitso cuenecaëbatsi. Nexata judíovi jumaitsi jivijavabelia pejumecovënëtsiyanima bajarapalivaisi:

–Pacuenia Pablo pacatsipaeba, apo xaniajai cajena, jai judíovi Pablo petsipaebilivaisi yabara.

Judíovi bitso pibisiacuenia baracuaicuaijaisi Pablo. ⁴⁶ Itsiata Pablobeje Bernabébeje ajumejunavijibia tsipaebaponabeje Dioso pitorobilivaisi. Jumaitsibeje tsaponae mapacueniaje:

–Copiaya baja picani pacatsipaebatsibeje Dioso pitorobilivaisi paxamë pajudíovimëjavabelia. Itsiata apo pajitsipaemë bajarapalivaisi panejumecovënëtsinexa. Tsipaji apo pajitsipaemë panexainaenexa matababi apo pevereverecejava. Paxanëbeje baja nexata pacavecuaponatsibeje patatsipaebinxabeje bajarapalivaisi apo judíovijavabelia. ⁴⁷ Bajarapacuenia pacavecuaponatsibeje tsipaji baja pepo petuxanenë bajarapacuenia paneitorobabeje. Dioso cajena pejumelivaisibaxutota tajëvelia jumaitsi mapacueniaje:

Caitorobianatsi nejamatabëcuenitayotsinexa pamonaе apo judíovi. Baitsi jane tsipaebana-jetaruaenae tajumelivaisi daxitanacuanëjjava, nacuatubujava ata pejinavana-paevi, pecapanepaenexatsi pibisiacuenie pexanaeiconivecua, jai Dioso pejumelivaisibaxutota, jai Pablo judíovijavabelia.

⁴⁸ Apo judíovi itsa jumetane bajarapacuenia Pablo pejumaitsijava, nexata apo judíovi jamatabëcuenearëya. Nexata apo judíovi jumaitsi:

–Dioso cajena pitorobilivaisi pexanialivaisi bitso, jai.

Nexata jane baja apo judíovi ata jumecovënëta Dioso, pamonaе baja cajena tajëvelia Dioso itapeta matababi apo pevereverecejava pexainaenexa. ⁴⁹ Nexata jane baja daxita bajarapanacuata pejinavanapaevi jumetane Dioso pitorobilivaisi. ⁵⁰ Itsiata baitsi jane pajudíovi Pablobeje Bernabébeje cueneitoyatsibeje, muxubijiapenetsiaya barëcuacuajai tomaraevetsivijavabelia, petuxanevi pijavajivijavabelia ata. Nexata bajarapamonae anaepana Pablobeje Bernabébejeyavabelia. Nexata baja Pablobeje Bernabébeje capit-sapatsibeje bajarapanacuavecua. ⁵¹ Nexata Pablobeje Bernabébeje bajarapatomarata nataxuatsapërëvarëbabeje. Bajarapacuenia nataxuatsapërëvarëbabeje bajarapatomara-pijivi peyapëtaenexa penaneconitsijava Diosojavabelia, apo pejumecovënëtsixae Dioso pitorobilivaisi. Bajaraxuacujinae Pablobeje Bernabébeje Iconio tomarabelia baja ponabeje. ⁵² Itsiata daxita pamonaе Dioso pejumecovënëtsivi, Antioquia tomarata pejinavanapaevi, jamatabëcuenearëya. Espiritu Santonua jamatabëcuenevënëcavanapa. Nexata exanabiaba pacuenia Espiritu Santo itorobatsi.

14

Pacuenia Pablobeje Bernabébeje ponaponabeje Iconio tomarata yabara pelivaisi

¹ Iconio tomarata Pablobeje Bernabébeje judíovi penacaetuatabibibota najoneyabeje. Bajarajota xaniavaetsia tsipaebabeje Jesús pelivaisi. Nexata jivibitsaëttoxaneto judíovi, apo judíovi ata, jumecovënëta Jesús pelivaisi. ² Itsiata baitsi jane itsamonae judíovi, Dioso apo pejumecovënëtsivi, itoroba apo judíovi pianaepanaenexa Jesús pelivaisi pejumecovënëtsivijavabelia. ³ Bajarapacuenie peyapëtaexabeje, Pablobeje Bernabébeje bajayajebi ponaponabeje bajarajota. Tsipaebabiababeje ajumejunavijibia Jesús pelivaisi. Tsipaji yapëtanebeje Dioso peyajavaponaponaejavatsibeje. Nexata daxitajivi yapëtaeyaxanaponabeje Dioso pitaxutotsoniataejavatsi bajarapamonae. Nexata daxita bajarapamonae yapëtane Jesús pelivaisi pexaniajallivaisicuenie. Tsipaji bajaraponëbeje ayaicuenie pexanaejava Dioso pesaëta exanaponabeje. ⁴ Itsiata bajarapatomarapijivi apo najamatabëcueniejëpae. Itsamonae jitsipa pejumecovënëtsinexa judíovi petsipaebilivaisi. Itsamonae jitsipa pejumecovënëtsinexa apóstolenëbeje petsipaebillivaisi. ⁵ Nexata judíovi, apo judíovinuа, tomara pevetsivinuа, jamatabëbjijatanetsibeje Pablobeje Bernabébeje. Jamatabëtsiconatsibejenua ibotonëta. ⁶ Nexata Pablobeje Bernabébeje nayajumetanebeje pacuenia exanaejitsiatsibeje. Nexata vecuanajetabajiravabeje Lистра tomarabelia, Derbe tomarabelia ata. Bajarapatomarabeje ecabeje Licaonia nacuata. Bajarapatomarabeje pepënëya penaetomaraxijava ata najetarucabeje. ⁷ Daxita bajaraxuayo tsipaebanajetarucabeje pexanialivaisi, Jesús pelivaisi.

Pacuenia Pablo ibotonëta tseconatsi Lистра tomarata yabara pelivaisi

⁸ Lистра tomarata naeca petaxucuenabinētsi. Penaexanaejavaveliacujinae apo ponaponaē caeto ata. ⁹ Bajaraponē najumetaeyeca Pablo petsipaebilivaisi. Nexata Pablo naitaxutobabatsiaya nāēcota bajaraponējavabelia. Nexata Pablo jamatabēcueneyapētane petaxucuenabinētsi pejamatabējumaitsijava: “Dioso pepacuene caējēpatsi tanetaxuxanepanaeyaexanaenexa,” pejamatabējajjava. ¹⁰ Nexata Pablo pinijijumeta jumaitsi petaxucuenabinētsijavabelia:

—Nonotapunare. Ponaponare baja, jai Pablo.

Nexata bajaraponē jirevapuna. Ponapona baja. ¹¹ Jivibitsaētoxonetonē itsa tane Pablo petaxuxanepanaeyaexanaejava petaxucuenabinētsi, nexata bajarapamonae pijajumeta, Licaoniajumeta, pinijijumeta jumaitsi mapacueniaje:

—jDiosonēbeje cajena! jBevaxaitsi jivitonēbejecuena patsica vaxaitsijavabetsica! jai bajarapamonae.

¹² Bajarapanacuapijivi xaina pijadiosovi. Itsiata apo pepo diosovi. Nexata Bernabē tanetsi beZeusvënēdiosonē. Pablo pijinia tanetsi beHermesvënēdiosonē. Tsipaji Pablo penamatacanajetarucaenē. Nexata jivi barēcuaiacuijai tsiabiabi. ¹³ Zeusvënēdiosonē pijatemplobo eca Listratomara jumaverena, Lистра tomarabelia pejonebaupa imoxoyovecua. Nexata sacerdotenē, Zeusvënēdiosonē pijatemplobota penacuenebabiabinē, capata torobitsaēto Lистра tomarabelia pejonebaupajavaberena. Bajarapatorobitsaēto matabocoitabētsiaya tsmataruba pematono. Nexata sacerdotenē, Lистра tomarapijivi yajava, tobejitsiatsibeje picani bajarapatorobitsaēto Pablobeje Bernabēbeje ofrendacuenia bajarapavi petotajuitsinexatsibeje. Bajarapacuenia picani totajuitsijitsiatsibeje tsipaji bediosonēbeje tanetsibeje. ¹⁴ Nexata Bernabēbeje Pablobeje itsa jumetanebeje bajarapacuenē petoexanaejavanexatsibeje, apo jitsipaēbeje. Nexata penaxatsijavabeje mēpabētītinaxuabarecabeje. Tsipaji Dioso apo pejitsipacuenia bajarapamonae toexanejitsiatsibeje. Nexata cujinaejinaliabeje jivibitsaētoxonetonē penacatuanaejavabelia. Nexata bajarapajivibitsaētoxonetonē tuatuajēta nucabeje. Pinijijumeta Pablo jumaitsi:

¹⁵ —¿Detsa xuajitsia bajarapacuenē panetoexanaejitsiamē? Paxanēbeje ata raja saya pajivitonēbeje. Pacuenia paxamē pajamatabēcuenētsimē, bajara saya paxanēbeje ata patajamatabēcuenētsinēbeje. Papatajopajēbeje patacatsipaebinxabeje pexanialivaisi. Panajamatabēcuenepēnyorore bajarapacuenia paneexanabiabijavavecua panejumecovënētsinexa pepo Dioso apo peyamatacabavererecaenē. Dioso raja daxitacuenē pexanaenē. Exana mapanacuaje, mapanacuapijiucene yajava. Exana itaboxo ata, itaboxopijiucene yajava. Exana manuamene ata, manuamenepijjiucene yajava. ¹⁶ Dioso copata vajavajēnaeya daxitanacuapijivi pejinavanapaxena pijacuatā penatojitsipacuenia. ¹⁷ Nexata Dioso daxitacuenē pexanaejava, nacobecovētaeyaexanabiaba daxitajivijavabelia. Nexata picani bajarapamonae becanaējēta Dioso peponapanajava. Tsipaji Dioso pexaniacuenē toexanabiaba bajarapamonamijavabelia. Bajara icatsia pacuenia vaxaitsijavaberena ata pexaniacuenē Dioso nacatoexana. Ema nacatorunaeyaexanabiabica. Nexata vajaubijava nacatonaxaniabiāexanabiaba. Nexata bajarapacuenia vajaxaejava nacarajutabiaba. Nacajamatabēcuenēbarēyayaexananua, jai Pablo pamonaejavabelia picani torobitsaēto tobejitsiatsibeje.

¹⁸ Bajarapacuenia Pablo jumaitsi ata, itsiata picani bajarapamonae jamatabētobiatsibeje torobitsaēto petotajuitsinexatsibeje bajarapavi ofrendacuenia Pablobeje Bernabēbejenexa. Itsiata baja belia copatsiaexanabeje.

¹⁹ Nexata judiōvi, Dioso apo pejumecovënētsivi, parena Antioquía tomaraverena, Iconio tomaraverena ata. Bajarapajudiōvi Lистра tomarapijivijavabelia najumetsënētsiaya neconitatsibeje Pablobeje Bernabēbeje pebaraanaepanaenexatsibeje. Nexata Lистра tomarapijivi ibotonēta tseconatsi Pablo. Bajaraxucujinae tomarapēnēyabelia robobocaliatsi. Tsipaji baja bepetēpaenē taeyabuatsi. ²⁰ Itsiata baitsi jane Dioso pejumecovënētsivi Pablo matatoyorotsia itsa taenubenatsi pexuababuatsijavatatsi, nexata Pablo nonotapuna icatsia. Icatsia Pablo caevēa jonena Lистра tomaraberena. Meravia pitsijavata Pablobeje Bernabēbeje ponabeje baja Derbe tomarabelia.

²¹ Nexata Derbe tomarata tsipaebaponaponaēbeje pexanialivaisi, Jesús pelivaisi. Nexata jumecovënētatsibeje jivibitsaētoxoneto. Bajaraxucujinae icatsia naviatanajetarucabeje Lистра tomarajava, Iconio tomarajava ata, Antioquía tomarajava ata. ²² Bajarapatomaranējava Jesús pelivaisi tsipaebanajetarucabeje pejamatabēcuenē asaēyaexanaponaenexabeje Dioso pejumecovënētsivi. Muxujiojaponaēbeje bajarapamonae pevājēnaeyabelia ajamatabēcuenesaēya pecatsitecaenexa Dioso pejumecovënētsijava. Pablobeje Bernabēbeje jumai tsaponaebeje Dioso pejumecovënētsivijavabelia:

—Dovathi pejamatabēcueneta, pinijicuenia nacajamatabēcuenējētaponae na daxita vajajovinexa Dioso pijanacuayabetsia, jaiibeje tsaponae Dioso pejumecovënētsivijavabelia.

²³ Caebitsaëto canacujitsia, Dioso pejumecovënëtsivijava, toitapetaponabejenua ancianovinexa, Dioso pejumecovënëtsivi pevetsivinexa. Nexata itsa pabitsaëtojavata toitapetsijitsiabeje, penacaetuatsivajënaeya apo xaeyabiabibeje pexaejava. Nexata penacaetuatsijavata itsa toitapetabeje, japasa tovajëtabiababeje Diosojavabelia bajarapamonae peyavenonaenexatsi Dioso. Jumai tsabiabibeje Diosojavabelia:

—Diosomë, xaniavaetsia yavenonaename mapaancianovije xaniavaetsia pecatoevetsinexa nijajivi, jaibeje tsabiabi Diosojavabelia.

Pacuenia Pablobeje Bernabébeje naviatabeje Antioquia tomarabelia, Siria nacuata peecaetomarabelia, yabara pelivaisi

²⁴ Pablobeje Bernabébeje Pisidianacua pexenetsicujinaeabeje, patabeje Panfilia nacuayabelia. ²⁵ Nexata Panfilia nacuata, Perge tomarata, Dioso pitorobilivaisi jivi tsipaebabeje. Bajaraxuacujinae icatsia patabeje Atalia tomarata. ²⁶ Nexata Atalia tomarata naropotabeje barcota. Menia jane baja ponabeje. Naviatabeje jane baja Antioquia tomarabelia. Tsipaji baja cajena pamatacabi taxuxuabijitsiabeje Dioso pitorobilivaisi jivi petsipaebanajetaruaenexabeje, naropotabeje Antioquia tomarata. Nexata pamatacabi naropotabeje Antioquia tomarata, penaropotsivajënaeyabeje, Dioso pejumecovënëtsivi tsmatanacobeuatatsibeje Dioso peyavenonaponaeenexatsibeje jivi petsipaebanajetaruaejavatabeje Dioso pitorobilivaisi. Pablobeje Bernabébeje Antioquia tomarata patabeje. Tsipaji baja toveretabeje daxita pacuenia Dioso itorobatsibeje. ²⁷ Itsa baja Antioquia tomarata patabeje, junatabeje penacaetuatsinexa daxita Dioso pejumecovënëtsivi. Nexata bajarapamonaejavabelia tsipaebabeje daxita Dioso peyavenonaponaejavatsibeje. Tsipaebabejenua apo judíovi ata pejumecovënëtsijava Dioso pitorobilivaisi. Tsipaji baja cajena Dioso tocopata apo judíovi ata pejumecovënëtsinexa bajarapalivaisi. ²⁸ Pablobeje Bernabébeje Antioquia tomarata bajayajebi naponaponabeje Dioso pejumecovënëtsivijavata.

15

Pacuenia apóstolevi, ancianovi yajava, nacaetuata Jerusalén tomarata yabara pelivaisi

¹ Pamatacabi Pablobeje Bernabébeje ponaponabeje Antioquia tomarata, judíovi, Judea nacuaverena peponaevi, pata Antioquia tomarata. Nexata bajarapamonae Dioso pejumecovënëtsivijavabelia livaisi tsipaeba. Petsipaebijavata bajarapamonae jamatabëcuenenavëxaniabiaya jumaitsi mapacueniaje:

—Panamatavenoname paxamë ata papecaperabëcaucubinexa pacuenia Dioso Moiséspijinëta najumecopata. Itsa jume, nexata acunebi tsane papecacapanepaejava Diosojavabelia, jai tsaponae judíovi, pepatsivi Judea nacuaverena.

² Bajarapacuenia pejumaitsaponaexae, nexata Pablobeje Bernabébeje pinijicuenia namataenetsia barënajumenotabeje pajudíovi pata Judea nacuaverena. Nexata Antioquia tomarapijivi Dioso pejumecovënëtsivi, Pablobeje Bernabébeje itapetatsibeje pitorobinexatsibeje Jerusalén tomarabelia. Nexata Pablobeje Bernabébeje yavavaponabeje Dioso pejumecovënëtsivijavëñevi. Itorobatsibeje peyanijobinexabeje peperabëcaucubicuene yabara apóstolevijavabelia, ancianovijavabelia ata, Jerusalén tomarata pejinavanapaevijavabelia.

³ Itorobatsibeje Dioso pejumecovënëtsivi. Nexata Pablobana itsa pona, najetarubena Fenicia nacujava, Samaria nacujava ata. Bajaraxuayo Dioso pejumecovënëtsivijavabelia tsipaeba pona apo judíovi ata pijaperujumatabëcuene pecopabijava, pejumecovënëtsinexa Dioso. Nexata daxita Dioso pejumecovënëtsivi jamatabëcuenebarëya itsa jumetane bajarapalivaisi.

⁴ Pablobana itsa pata Jerusalén tomarabelia, Dioso pejumecovënëtsivi, apóstolevinua, ancianovinua, xaniavaetsia copiapitatsi. Nexata Pablobeje Bernabébeje bajarapamonaejavabelia tsipaebabeje daxita Dioso peyavenonaponaejavatsibeje pamatacabi Dioso pitorobilivaisi jivi tsipaebanajetarucabeje. ⁵ Nexata fariseovi, Dioso pejumecovënëtsivi, nonobapuna. Fariseovi jumaitsi mapacueniaje:

—Dioso pejumecovënëtsivi apo judíovi ata, namatavenona peperabëcaucubinexatsi. Namatavenonana bajarapamonae pejumecovënëtsinexa Dioso Moiséspijinëta penajumecopatsilivaisi, jai fariseovi Dioso pejumecovënëtsivi.

⁶ Nexata nacaetuata apóstolevi, ancianovi yajava, apo judíovi ata peperabëcaucubijavatsi yabara penabarëcuaiquaijainexa. ⁷ Bajayajebi baja namataenetsia penabarëcuaiquaijainexa, nexata Pedro nonotapuna. Jumaitsi:

—Tajamonae, payapëtaneme rabaja mapacuenije. Xanë baja cajena bajaya Dioso nitapeta, paxamëyajuvëñënë, apo judíovijavabelia tatsipaebinexa pexanialivaisi, Jesús pelivaisi. Nexata apo judíovi ata Dioso pecapanepaenexatsi Jesús pelivaisi itsa jumecovënëta.

⁸ Dioso cajena daxitajivi pejamatabēcuenepätaenē. Yapētanetsi Dioso aneconijibia petaejava apo judiövi ata. Yapētanetsi bajarapacuene tsipaji apo judiövi ata Dioso rajuta Espiritu Santo. Pacuenia vaxaitsi judiövitsi Dioso nacarajuta Espiritu Santo, bajara pijinia pacuenia Dioso rajuta Espiritu Santo apo judiövi ata. ⁹ Pacuenia vaxaitsi judiövitsi Dioso nacajitsipa, bajara pijinia pacuenia Dioso jitsipa apo judiövi ata. Bajaraxuata apo judiövi ata pibisiacuene pexanaeconimi Dioso vecuaajibiaexanatsi Jesús pelivaisi pejumecovēñetsixae. ¹⁰ Pētsa pajumeaebame Dioso aneconijibia petaejava apo judiövi ata. Pētsa bajarapamonae paitorobame pejumecovēñetsinexa piayapēbejelivaisi, Dioso Moiséspijinēta penajumecopat-silivaisi. Tsipaji bajarapalivaisi vaxaitsi ata apo nacacaejēpae vajajumecovēñetsinexa. Vajasalinalivimi ata apo caejēpaetsi pejumecovēñetsinexa bajarapalivaisi. ¹¹ Vaxaitsi baja jumecovēñētatsi Jesús pelivaisi. Nexata vajatuxanenē Jesucristo pejamatabēcueneta Dioso vajanacaitaxutotsoniataexae, nacacapanepaena pibisiacuene vajaexanaeconivecua. Bajara pijinia pacuenia apo judiövi ata Jesucristo pejamatabēcueneta Dioso capanepaenatsi pibisiacuene pexanaeconivecua, jai Pedro apóstolevijavabelia, ancianovijavabelia ata.

¹² Dioso pitorobilivaisi Bernabébeje Pablobeje apo judiövijava itsa tsipaebanajetarucabeje, Dioso pesaēta pinijicuene pexanaejavanē exanaponabeje. Nexata bajaraxua Bernabébeje Pablobeje itsa navajunupaebabeje, daxita apóstolevi, ancianovi ata, moya ena. Xaniavaetsia namuxunaevetena. ¹³ Itsa baja Pablobeje Bernabébeje najumevetabeje petsipaebijavabeje, nexata Santiago jumaiti apóstolevijavabelia, ancianovijavabelia ata:

–Tajamonae, panenamuxunaevere. ¹⁴ Simón Pedro raja nacatsipaeba Dioso aneconijibia petaejava apo judiövi ata pecapanepaenexa pibisiacuene pexanaeconivecua Jesús pelivaisi itsa jumecovēñeta. ¹⁵ Bajarapacuena apo judiövi ata aneconijibia Dioso petaejavanexa yabara, bajayata tajēvelia Diosojumepaebivi profetavi peyaquinaelivaisita vajunupaeba baja cajena. Dioso pejumaitisijava apo judiövi yabara Dioso pejumelivaisibaxutota jumaiti mapacueniaje:

¹⁶ “Bajayata abaxē pamatacabi Davidpijinē evetaponapona Israelnacua, xaniavaetsia jivi nejumecovēñētavanapa. Bajara icatsia pacuenia jivi xaniavaetsia tanejumecovēñētavanapaenexa, yavenonaenajē. ¹⁷ Nexata apo judiövi ata, daxita pamonaenatsianajē tajajivinexa, bajarapamonae ata jitsipaena tanejumecovēñetsinexa,” jai bajayata Dioso mapacueniaje. ¹⁸ Dioso baja cajena tajēvelia yapētaeyaxana daxita mapacuene yabaraje,

jai profetavi peyaquinaelivaisita, jai Santiago apóstolevijavabelia, ancianovijavabelia ata.

¹⁹ Icatsia Santiago jumaiti apóstolevijavabelia, ancianovijavabelia ata:

–Nexata xanē jamatabēitsinē mapacueniaje. Apo jamatabēitonotsi tsanetsi baja matavējēa apo judiövi, pamonaenatsi baja najamatabēcuenepēñeyorota Diosojavabelia. ²⁰ Itsiata bailsi jane caelivaisiyobeje toyaquinaenatsi cuyalatobaxutota vajayapētaeyaxanaenexa bajarapamonae. Itsamonae xaina pecobeta saya jumapecataeya pexanaenēñē bepíjadosovi petaenexa. Nexata bajaraxuanējavabelia ofrendacuena pevi perajutsinexa, tobeyabiaba baca, oveja ata. Toyaquinaenatsi bajarapayajuvēñēvi pexaeyaniva. Toyaquinaenatsinua daxita pebijivi peyapētaenexa, daxita petiriavi ata peyapētaenexa. Papebijivi baja nacojioba, pematayajibiyaniavatsi itsavajavabelia pijavavecua. Papebijivi pijinia abaxē apo nacojiobi, pematayajibiyaniavatsi petirivajavabelia. Bajara pijinia pacuenia petiriavi ata. Papatiriavi baja nacojioba, pematayajibiyaniavatsi itsanējavabelia pamonavecua. Papatiriavi pijinia abaxē apo nacojiobi pematayajibiyaniavatsi pebijavabelia. Toyaquinaenatsinua bajarapamonae pexaeyaniva cuibocuetacaeya pebeyaxuabinē pevi, pexaeyaniva peja ata. Bajarapacuenia toyaquinaenatsi apo judiövi ata Dioso pejumecovēñetsivi peyapētaenexa xua vaxaitsi judiövitsi cujanavatsi. Nexata itsamatacabijavabelia ata apo judiövi pejamatabēcuenepijianaeyaniva judiövijavabelia. ²¹ Tsipaji bajarapalivaisi Dioso Moiséspijinēta penajumecopat-silivaisiavajucujinae, vajasalinalivimi caetomara canacujitsia itavetabiabatsi bajarapacuene. Itavetabiabatsi bajarapacuene penacueraevetsimatacabianē canacujitsia penacuetaabiabibonējava, jai Santiago apóstolevijavabelia, ancianovijavabelia ata.

²² Nexata daxita apóstolevi, ancianovinua, daxita Dioso pejumecovēñetsivinua, najamatabējēpa penaitapetsinexa bajarapamonaeajuvēñēvi pitorobinexa Antioquia tomarebelia Pablobeje Bernabébeje pepēta. Nexata itapetsibeje Silasbeje Judasbeje. Judas vñērübatsi itsavēñē, Barsabás. Bajaraponēbeje Dioso pejumecovēñetsivi penamatacaitorobivi yajuvēñēñēbeje. ²³ Pacuyalatobaxuto bajaraponēbeje tacaponaejitsiabeje Antioquia tomarapijivijavabelia, Siria nacuapijivijavabelia ata, Cilicia nacuapijivijavabelia ata, jumaiti mapacueniaje:

–Tajamonae, paxanē paapóstolevinē, pacajamatabēñajinaliatsi. Vajamonae ancianovi ata pacajamatabēñajinalia. Pacajamatabēñajinaliatsi daxita apo pajudiövimē, Antioquia tomarata panejinavanapaevi. Paxamē ata Siria nacua panejinavanapaevi,

pacajamatabēnajinaliatsi. Paxamē ata Cilicia nacuata panejinavanapaevi, pacajamatabēnajinaliatsi. ²⁴ Pavēnēlivaitsiniji pacuenia pacajumaitsi paxanēyajuvēnēvi papecasivaxainaevilia. Bajaramonae pina nexata pacanajamatabēcuene epatajērērecaeyaxanapona. Tspaji pina bajararamonae pacajumaitsi: “Panamatavenoname paxamē ata papecaperabēcaucubinexa. Panamatavenonamenua panejumecovēnētsinexa Dioso Moiséspijinēta penajumecopatsilivaisi,” pacajai pina. Pamonae pacajumaitsi bajarapacuenia, paxanē cajena apo paitorobinē paxamējavabelia. ²⁵ Nexata paxanē patanacaetuatsijavata, panajamatabēcuenejēpajē pataitapetsinexa ponēbeje paitorobijitsianē paxamējavabelia pecaponaenexabeje patacatoyaquinaelivaisi. Bajaramonēbeje naliabeje Bernabēbeje Pablobeje pepēta. ²⁶ Vajabananēbeje, Bernabēbeje Pablobeje, bitso vaxaitsi asivatsi. Bajaramonēbeje vajatuxanenē Jesucristo pejumelivaisi yabara itsamonae jamatabēbeyaxuababiabi atatsibeje, itsiata ajamatabēcuenesaēbeje tsaponapona. ²⁷ Nexata bajararonēbeje pepēta pacaitorobatsi Judasbeje Silasbeje. Nexata Judasbeje Silasbeje xaniavaetsia pacatsipaebiana pacuene yabara pacatoyaquinatsi cuyalatobaxutota. ²⁸ Itsa panacaetuatajē Espiritu Santo paneyavenona patayapētaenexa peyapēxanepanaelivaisi patacatoitorobinexa panejumecovēnētsinexa. Nexata baja apo panamatavenoname panejumecovēnētsinexa piayapēbejelivaisi, palivaisi daxita pajudiovinē panejumecovēnētajē. Pacaitorobatsi palivaisi bitso panamatavenoname panejumecovēnētsinexa. ²⁹ Pecobeta saya jumapecataeya pexanaenēnējavabelia ofrendacuena pevi perajutsinexa itsamonae itsa tobias baca, oveja ata, pētsa paxaneme bajarapayajuvēnēvi. Pētsa paxaneme peja. Pētsa paxaneme cuibocutsacaeya pebeyaxuabinē pevi. Papebijivi baja nacojioba, pētsa matayajibatsi itsavajavabelia pijavavecu. Papebijivi pijinia abaxē apo nacojiobi, pētsa matayajibatsi petirivajavabelia. Bajara pijinia pacuenia petiriavi ata. Papetiriavi baja nacojioba, pētsa matayajibatsi itsanējavabelia pamonavecu. Papetiriavi pijinia abaxē apo nacojiobi, pētsa matayajibatsi pebijavabelia. Itsa pajumecovēnētame bajarapalivaisi, nexata xaniavaetsia pajinavanapaename. Bajara saya palivaisiyo pacatoyaquinatsi, jai apóstolevi, ancianovi yajava, apo judiōvijavabelia petoyaquinaebaxutota Jerusalén tomaravelia.

³⁰ Nexata jane baja bajarapacuyalatobaxuto petocaponaenexabeje apo judiōvijavabelia, Judasbeje Silasbeje itorobatsibeje penaponaenexabeje Pablobeje Bernabēbeje pepēta. Nexata baja naponabeje. Bajaramonae pata Antioquia tomaravelia. Nexata Antioquia tomarapijivi junata daxita Dioso pejumecovēnētsivi penacaetuatsinexa. Nexata penacaetuatsijavata rajutabeje bajarapacuyalatobaxuto. ³¹ Antioquia tomarapijivi itsa leba bajarapacuyalatobaxuto, bajararamonae bitso jamatabēcuenebarēya. ³² Judasbeje Silasbeje Diosojumepaebinēbeje profetanēbeje. Nexata ayailivaisi tsipaebabeje Antioquia tomarapijivijavabelia. Nexata baja bajararamonae ajamatabēcuenesaē Diosojavabelia pejumetaexae palivaisi tsipaebabeje Judasbeje Silasbeje bajararamonaejavabelia. ³³ Bajayajebi baja Antioquia tomarata Judasbeje Silasbeje naponaponabeje. Bajaraxucujinae Dioso pejumecovēnētsivijavabelia xaniavaetsia napējiobabeje penaviatsinexabeje baja pitorobivitsijavabelia. ³⁴ Pepuanapējiobibeje baja, Silasbeje abaxē itsiata icatsia nacopatabeje bajarajota. ³⁵ Pablobeje Bernabēbeje ata abaxē ponaponabeje Antioquia tomarata. Dioso pitorobilivaisi tsipaebaponaponabeje. Itsamonae Dioso pejumecovēnētsivi yajavaponaponabeje Dioso pitorobilivaisi penajutsipaebabinexa.

Pacuenia icatsia Pablo cotocaevi panamuto pona jivi icatsia petsipaebinxadioso pitorobilivaisi yabara pelivaisi

³⁶ Antioquia tomarata Pablobeje Bernabēbeje bajayajebi ponaponabeje. Pablo jumaitsi Bernabējavabelia:

–Ponatsibeje icatsia vajataenexabeje vajamonae Dioso pejumecovēnētsivi. Daxita tomanējava, itsaxuayo baja imata tsipaebanajetarucatsibeje Dioso pitorobilivaisi, bajaraxuayo icatsia najetarucaenatsibeje. Taenajetarucaenatsibeje pacuenia jinavanapa bajararamonae, jai Pablo Bernabējavabelia.

³⁷ Bernabē nexata bitso jitsipa pebarēponaenexabeje icatsia Juan, ponē vērērubatsi itsavēnē, Marcos. ³⁸ Itsiata baitsi jane Pablo apo jitsipae baja icatsia Marcos pebarēponaenexabeje. Tspaji imata copiaya panamuto barēponabeje picani, Marcos epatua naviateca Panfilia nacuata. Nexata Marcos xaniavaetsia apo yavenonaeyaveretsi Dioso pitorobilivaisi jivi petsipaebaponaejava. ³⁹ Nexata Pablobeje Bernabēbeje apo najamatabēcuenejēpaebabeje Marcos pebarēponaejavabejenexa yabara. Nexata baja Pablobeje Bernabēbeje navecuanatsatabeje. Bernabē jane baja nexata Marcos barēpona. Velapanata peponaebarcota Bernabēbeje Marcosbeje naponabeje. Nexata nicababeje Chipretunaeto

nacuayabelia. ⁴⁰ Nexata pijinia Pablo itapeta Silas peyanatsinexatsi. Dioso pejumecovënëtsivi tovajëtatsibeje Diosojavabelia peyavenonaponenexatsibeje penajetarucaejavabeje. ⁴¹ Nexata Pablobeje Silasbeje Siria nacuajava, Cilicia nacuajava ata, Dioso pitorobilivaisi jivi tsipaebanajetarucabeje. Nexata bajarapanacuanëpivivi Dioso pejumecovënëtsivi, caebitsaëto canacujitsia, Diosojavabelia ajamatabëcuenesaë tsaponae.

16

Pacuenia Timoteo Listra tomarata nanaropota Pablobeje Silasbeje pepëta yabara pelivaisi

¹ Pablobeje Silasbeje patabeje Derbe tomarata. Patabeje Listra tomarata ata. Listra tomarata caxitajarababeje Dioso pejumecovënëtsinë, Timoteo. Timoteo pena judíova, Dioso pejumecovënëtsiva. Itsiata baitsi jane Timoteo paxapijinë griegonë. ² Daxita Dioso pejumecovënëtsivi, Listra tomarapivivi, Iconio tomarapivivi ata, Timoteo yabara jumai tsabiabi:

—Timoteo raja xaniavaetsia Dioso jumecovënëtaponapona, jai tsabiabi.

³ Pablo jitsipa Timoteo pebarëponaejava. Nexata Pablo Timoteo pebarëponaevajënae, judíovi pijacuenia perabëcaucutsiaexana. Baitsi bou Piperabëcaucutsiaexana. Bajarapacuenia Pablo perabëcaucutsiaexana pebaraanaepanaeyanivatsi pevëna judíovi. Tsipaji itsaxuayo barënajetarucaejitsia, judíovi penaperabëcaucubivi jinavanapa. Nexata judíovi apo jitsipae peyajavajinavanapaejava apo peperabëcaucutsinëtsi. Nexata Pablo Timoteo perabëcaucutsiaexanaejeva itsa barënajetarucaejitsipa bajarapamonaejava, yapëtaejitsipatsi Timoteo, apo peperabëcaucutsijavatsi. Tsipaji Timoteo paxapijinë griegonë, apo peperabëcaucutsinëtsi. ⁴ Pablobana tomaranëjava itsa najetarubena, caetomarapivivi canacujitsia, tsipaebapona Dioso pejumecovënëtsivijavabelia palivaisi toyaquinatsi Jerusalén tomaraverena. Tsipaebanajetarubena caetomarapivivi canacujitsia pejumecovënëtsinexa pacuenia apóstolevi, ancianovi ata, itorobatsi Jerusalén tomaraverena. ⁵ Bajaraxuata Dioso pejumecovënëtsivi, caebitsaëto canacujitsia, bitso ajamatabëcuenesaë tsaponae Diosojavabelia. Caematacabi canacujitsia Dioso pitorobilivaisi ayabitsaëto jumecovënëtapona.

Pacuenia Pablo bemajitsinaebota tane Macedonia nacuapijinë yabara pelivaisi

⁶ Espiritu Santo apo tocopatsitsi Pablobana petsipaebinexa Dioso pitorobilivaisi Asiavënë nacuata. Bajaraxuata Pablobana najetarubena Frigia nacuajava, Galacia nacuajava ata. ⁷ Pablobana itsa najetarubena Misianacua muxubërëa, jamatabëpata picani Bitinia nacuajava. Itsiata baitsi jane Espiritu Santo apo tocopatsitsi pepatsinexa Bitinia nacuajava. ⁸ Nexata Misianacua canacujitsialia roviaalia ponalia. Pata Troas tomarabelia. ⁹ Nexata Troas tomarata meravi Pablo bemajitsinaebota taenuta Macedonia nacuapijinë. Macedonia nacuapijinë asaëyata jumaitsi Pablojavabelia:

—Naxanitsia. Macedonia nacuayabelia ponare. Paneyavenonaename, jai Macedonia nacuapijinë.

¹⁰ Pablo bemajitsinaebota petaenutsicujinae Macedonia nacuapijinë, bepijia paxaniavaetajë patajavaxi patancabinexalia Macedonia nacuayabelia. Nexata panajumaitsinë:

—Xaniajai cajena. Dioso nacaitoroba Macedonia nacuapivijavabelia vajatsipaebinexa pexanialivaisi, Jesús pelivaisi, panajanë.

Pacuenia Pablobeje Silasbeje ponaponabeje Filipos tomarata yabara pelivaisi

¹¹ Troas tomarata panaropojë. Panaponajë barcota. Roviaalia pananyancabaliajë patapatsinexa Samotraciatunaeto nacuayabelia. Troas tomarata patanaropobicujinae, meravia pitsijavata, panapatajë Neápolis tomarabelia. ¹² Bajaraxuacujinae matatsënëa paponajë Filipos tomarabelia. Filipostomara Macedonia nacuata eca. Filipostomara daxita tomaranëvecua ayaitomaraxaneto. Filipos tomarata najinavanapa ayabitsaëtoxaneto Roma tomaraverena pepatsivi. Bajarapatomarata panajinavanapajë caematacachimaxëto. ¹³ Nexata abaxë itsa panajinavanapajë Filipos tomarata, judíovi penacueraevetsimatacabita papitsapajë tomarapënëyabelia. Paponajë mene itapayavelia patajaitsinexa itsajota nacaetuatabiaba judíovi pevajëcabiabinexa Diosojavabelia. Nexata mene itapaya itsa pajaitanajetarubenajë, petiriavi penacaetuatenavei mene itapata, patayejebajë. Nexata pajamatabëjumaitsinë:

—Bajara macovë jotaje judíovi nacaetuatabiaba pevajëcabiabinexa Diosojavabelia, pajamatabëjanë.

Nexata bajarajota panaenajë. Nexata bajarajota Dioso pitorobilivaisi patsipaebajë petriaviyavabelia. ¹⁴ Bajarapapetriaviyajuvenëva pevënë Lidia. Bajarapova Tiatira tomarapivivi, penamatamotsipapaëbërë, perajejapapaëbërë, pecanajetabiabi. Dioso bitso pejumecovënëtsiva. Bajarapova panenamuxunaeveta xaniavaetsia. Dioso

jamatabēcueneyavenonatsi. Nexata bajarapova jumecovēnēta Pablo petsipaebilivaisi.¹⁵ Bajaraxuacujinae bajarapova, pijabopijivi yajava, itsa bautisabatsi baja, bajarapova panejumaitsi:

—Itsa paxamē panetaneme pepacuene Dioso tajumecovēnētsivacuene, nexata tajabota abaxē panajinavanapaename, panejai bajarapova.

Bitso bajarapova asaēyata panejunata patanajinavanapaenexa pijabota. Nexata panaponajē bajarapova pijaboyabelia bajarapova pijabota patanajinavanapaenexa.

¹⁶ Paponabiabajā mene itapayabelia Dioso pitorobilivaisi patatsipaebabiabinexa itsajota judiōvi nacaetuanabiaba. Belia itsanamutota panemataenena petiriva, dovathi peyajavaponaponaeva. Bajarapadovathi pejamatabēcueneta tajēvelia petiriva yapētaeyabiaba itsacunejavaxi yabara. Bajarapova pijamonae pecanajetsivatsi pijatuxanevi amoneya petonacuenebabiabinexa. Nexata bajarapova pijumata pijatuxanevi ayajjava palata pitabiaba. Tsipaji itsajivi itsa yanijoba bajarapovajavabelia itsacunejavayo yabara, bajarapova tajēvelia xaniavaetsia tsipaebabiaba. Nexata pacuenia bajarapova tajēvelia jumai tsabiabi itsajivijavabelia, xaniajai tsabiabi. Nexata papalata matamotabiabatsi petsipaebabiabijamatabēcuenē, pijatuxanevi pitabiaba.¹⁷ Bajarapova nexata panepēnanajetarucabiaba. Bajarapova pinijijumeta jumai tsanajetarucabiabi paxanē yabara:

—Mapapebijivije, athēbētatsia peecaenē Dioso pijajivi. Pacatsipaebaona papēcaca-panepealivaisinexa pibisiacuene paneexanaeconivecua, jai tsanajetarucabiabi petiriva paxanē yabara.

¹⁸ Bajarapacuenia najuamatacabianē jumai tsanajetarucabiabi itsa panepēnanajetarucabiaba. Nexata bitso Pablo pejamatabēitonotabiabixaetsi, belia napēnēyorotaxuaba bajarapovajavabelia. Jumaitsi:

—Dovathi, caitavetatsi Jesucristo pevēnēta. Vecuapitsapare baja mapovaje, jai Pablo.

Bajarapacuenia Pablo pejumaitsijavata dovathi baja petiriva vecuapitsapatsi.

¹⁹ Nexata bajarapova pijatuxanevi yapētane baja pecopiarucaejava bajarapova pijumata palata penotabiabijava. Nexata bajarapova pijatuxanevi vaetabatsibeje Pablobeje Silasbeje. Robocaponaliatsibeje tomara tuatuaējabelia. Caponatsibeje tomara pevetsivijavabelia.²⁰ Jivi penaneconitsiaexanabiabivi, juezmonae, pitabarata nutatsibeje. Pamonaē Pablobeje Silasbeje vaetabatsibeje, najumetsēnētsiaya jumaitsi juezmonaejavabelia Pablobeje Silasbeje yabara:

—Mara papebibeje judiōnēbeje. Anaepanaeyaexanaponabeje vajatomarapijivi.

²¹ Tsipaebaponabeje vajanacuapijivi pejumecovēnētsinexa palivaisi vaxaitsi Romano nacuapijivitsi apo nacatocopatsi vajajumecovēnētsinexa, jai najumetsēnētsiaya bajarapamonae Pablobeje Silasbeje yabara.

²² Nexata jivi ayaiBITSaētōxaneto baraanaepanatsibeje Pablobeje Silasbeje. Nexata juezmonae itoroba vajabitsaē Pablobeje Silasbeje penaxatatsijavabeje pevejuma-jonotsinexatsibeje. Bajaraxuacujinae itoroba ayaiacuēnia pejumaconibabenexatsibeje naebota.²³ Ayaiacuēnia pejumaconibabecujinaetsibeje, juezmonae icatsia itoroba vajabitsaē Pablobeje Silasbeje penaneconitsivi pejebabiabibota peetsinexatsibeje. Bajaraxuacujinae icatsia juezmonae itoroba penaneconitsivi pejebabiabibo pevetsinē Pablobeje Silasbeje xaniavaetsia pevetsinexatsibeje penaneconitsivi pejebabiabibo ēnētuaējēta.²⁴ Penaneconitsivi pejebabiabibo pevetsinē juezmonae pitorobixaetsi xaniavaetsia pevetsinexa, nexata penaneconitsivi pejebabiabibo pēnēyatuucubijavanē, pecopiarucaejavatareca, Pablobeje Silasbeje etatsibeje. Peponaponaeyanivabeje penaitabarataeyaexanaetablapabeje tusatualia sixataliatsibeje. Bajaraxuacujinae xaniavaetsia yasicatarērētatsibeje cepovēnējavata.

²⁵ Nexata meravituatūjēta Pablobeje Silasbeje vajētabeje Diosojavabelia. Diosojumevajianē naxēanecabeje Diosojavabelia. Itsamonae pijinia penaneconitenaēvi bajarapabota, jumetanetsibeje penaxēanecaejavabeje.²⁶ Nexata jemata bajarapaepatota ira najēabapeneta pinijicuenia. Penaneconitsivi pejebabiabibo, daxitabo, nanequebeca. Caecuenia daxita baupanē nabaupana pijacuata. Daxita penaneconitsivi pacadenamaētonēta cobecēbejebatsi, vecobeothopatsi.²⁷ Penaneconitsivi pejebabiabibo pevetsinē naēcotapuna pemajitecaenēmi. Nexata itsa tane daxita baupanē penabaupanaejava, navemarajonotaxuabina pijaespada penabeyaxuabinexa picani. Tsipaji jamatabējumaitsi:

—Daxita meta baja penaneconitsivi rēcēpeca. Nexata bajarapajamatabēcuenē yabara penaneconitsiaexanaena tomara pevetsivi, jamatabējai.

²⁸ Nexata bajarajota itacarajeta Pablo pinijijumeta jumai tsaxuabi:

—Pētsa nabeyaxuabame. Daxita raja patananeconitsivi panubenajē, jai Pablo.

²⁹ Nexata penaneconitsivi pejebabiabibo pevetsinē itoroba pijajivitonē petocarenanexatsi pitayotabiabijava. Nexata bepījia tocarenatsi. Penaneconitsivi pejebabiabibo

pevetsinē bitso neconecojai pecajunavi. Nexata bajaraponē pematabacabēta nucajunua Pablobeje Silasbeje pitabarata. ³⁰ Bajaraxuacujinae penaneconitsivi pehebabiabibo pevetsinē barēpitsapaliatsibeje Pablobeje Silasbeje. Penaneconitsivi pehebabiabibo pevetsinē jumaitsi:

—¿Detsa xua exanaenajē tanecapanepaenexa Diosojavabelia? jai Pablobeje Silasbejejavabelia.

³¹ Nexata Pablobeje Silasbeje jumaitsiibeje:

—Najamatabēcuenecopare pepo petuxanenē Jesucristojavabelia pecapanepaenexa Diosojavabelia. Xamē nijabota pejinavanapaevi ata Jesucristojavabelia najamatabēcuenecopatsi pecapanepaenexatsi Diosojavabelia, jaiibeje.

³² Nexata Pablobeje Silasbeje tsipaebabeje Dioso pitorobilivaisi bajaraponējavabelia, daxita pijabota pejinavanapaevijavabelia ata. ³³ Penaneconitsivi pehebabiabibo pevetsinē bajarapaepatota, meravi, Pablobeje Silasbeje jumavajēñequiatatsibeje. Nexata bajaraponē, pijabopijivi yajava, bautisababeje Pablobeje Silasbeje. ³⁴ Bajaraxuacujinae penaneconitsivi pehebabiabibo pevetsinē pijaboyabelia Pablobeje Silasbeje barēliatsibeje. Nexata pexaejava rajutatsibeje. Bajaraponē, pijabopijivi yajava, pinijicuenia jamatabēcuenearēya Dioso pejumecovēñētsixae.

³⁵ Nexata pepo bajayacunua juezmonae itorobalia vajabitsaē penaneconitsivi pehebabiabibo pevetsinējavabelia pejumaitsinexa: “Capitsapaename pina baja Pablobeje Silasbeje,” pejinexa. ³⁶ Nexata penaneconitsivi pehebabiabibo pevetsinē jumaitsi Pablojavabelia:

—Juezmonae rabaja netonajumeitorobarena patacacapitsapaenexabeje. Paponarebeje baja xaniavaetsia, jai penaneconitsivi pehebabiabibo pevetsinē.

³⁷ Itsiata baitsi jane Pablo jumaitsi juezmonae pitorobivajabitsaēvijavabelia:

—Juezmonae naneconita pijatuxanevijavabelia, paxanēbejejavabarena ata. Tsipaji abaxē copiata xaniavaetsia yajētaenejeva paneconi paxainajēbeje, paxanēbeje paRomano nacuapijinē atanēbeje, juezmonae itoroba paxamēyajuvēñēvi patanejumaconibabenexabeje daxita tomarapijivi pitabarata. Bajaraxuacujinae paneetabeje mapabotaje. Nexata aeconoxae juezmonae saya paxamē pacaitorobarena pepēya patanecapitsanaenexamēbeje. Juezmonae ponaerena pijacuata patanecapitsapaenexabeje, jai Pablo juezmonae pitorobivajabitsaēvijavabelia.

³⁸ Nexata vajabitsaē tsipaeba juezmonaejavabelia pacuenia Pablo jumaitsi. Nexata juezmonae itsa jumetane Pablobeje Silasbeje Romano nacuapijinēbejecuene, bitso jamatabēcuenenajunaviaca. ³⁹ Nexata juezmonae parena. Jumaitsi Pablobeje Silasbejejavabelia:

—Pauranē paxamēbejejavabelia vajabitsaē pataitorobixae pibisiacuene papecaexanaenexabeje, jai juezmonae.

Nexata juezmonae pijacuata Pablobeje Silasbeje penaneconitsivi pehebabiabibovecua capitsapatsibeje. Juezmonae barajamatabēcuenexanepanaeya Pablobeje Silasbeje itorobatsibeje peponaenexabeje baja tomaravecua. ⁴⁰ Pablobeje Silasbeje pecapitsapaecujinaetsibeje, ponabeje baja Lidia pijaboyabelia. Nexata Lidia pijabota itsa tanebeje Dioso pejumecovēñētsivi, muxujiobabeje bajarapamonae pijamatabēcuenesaenexa Diosojavabelia. Bajaraxuacujinae ponabeje baja bajarapatomaravecua.

17

Pacuenia Pablobeje Silasbeje Tesalónica tomarata jaitatsibeje pevaetabinexatsibeje abara pelivaisi

¹ Pablobeje Silasbeje najetarucabeje Anfipolis tomarajava, Apolonia tomarajava ata. Bajaraxuacujinae patabeje Tesalónica tomarabelia. Nexata Pablobeje Silasbeje Tesalónica tomarata naponaponabeje acueyabi pasemanabeje. Tesalónica tomarata eca judíovi penacaetuatabiabibo. ² Nexata Pablo pijacujirucuenia judíovi penacueraevetsimatacabianē canacujitsa najoneyabiaba bajarapabota. Dioso pitorobilivaisi Pablo tsipaebabiaba bajarapabota penacaetuatabiavijavabelia. Tsipaebabiaba pacuenia Dioso pejumelivaisibaxutota jumaitsi. ³ Pablo jumai tsabiabi judíovi penacaetuatabiavibota:

—Dioso baja cajena pejumelivaisibaxutota tajēvelia vajunupaebatsi Cristo, ponē baja Dioso itorobica jivi pecapanepaenexa. Tajēvelia baja cajena Dioso pejumelivaisibaxutota Cristo vajunupaebatsi pijavajabitsaē ayaicuenia pebejiobiaexanaejavanexatsi. Vajunupaebatsinua baja cajena Cristo petēpaecujinae icatsia piasaējavanexa. Bajaraponē raja Jesús, ponē pelivaisi pacatsipaebatsi. Bajaraponē raja Cristo, ponē Dioso itorobica jivi pecapanepaenexa, jai tsabiabi Pablo itsa tsipaebabiaba Dioso pitorobilivaisi judíovi penacaetuatabiavibota.

⁴ Nexata judíoviyajuvēnēvi jumecovēnēta Pablo petsipaebabiabilivaisi. Ayaibitsaēto griegovi ata, Dioso pejitsipavevi, jumecovēnēta Pablo petsipaebabiabilivaisi. Ayaibitsaēto petiriavi ata, petuxanevi pijavajivi, jumecovēnēta Pablo petsipaebibilivaisi. Nexata daxita bajarapamonae nacaetuatabiaba Pablobeje Silasbejejavata. ⁵ Nexata judíovi, pamonae apo jumecovēnētsi Pablo petsipaebabiabilivaisi, Pablo cuenecaēbatsi. Tsipaji Pablojavabelia jivi ayaibitsaēto jonepona. Nexata bajarapajudíovi junata jivi ayaibitsaēto xaneto pibisiajamatabēcuenevi, saya jema pejinavanapevi tomarapijicallejava. Nexata pejunatsicujinae bajarapajudíovi pejunatsivi jane baja barēnacaetuata. Nexata daxita bajarapajudíovi, pejunatsivi jane baja yajava, barēnajamatabēcueneyanaba. Nexata itoroba bajarapatomarapijivi pianapepanaenexa Dioso pejumecovēnētsivijavabelia. Pablobeje Silasbeje naponaponabeje Jasónvēnēnē pijabota. Nexata daxita pamonae anaepana bajarapatomarata, Pablobeje Silasbeje jemata tsimaxēpatatsibeje Jasón pijabota. Vaetabijitsiatsibeje picani penutsinexatsibeje tomara pevetsivi pitabarata. ⁶ Jasón pijabota Pablobeje Silasbeje apo pecaxitajarabixaetsibeje, nexata pamonae anaepana, vaetabatsi Jasón, itsamonae yajava, pamonae Dioso pejumecovēnētsivi. Robobocaponaliatsi Jasónbana tomara pevetsivijavabelia. Nexata pamonae anaepana, tomara pevetsivi pitabarata najumetsēnētsiaya pinijijumeta jumaitsi Pablobeje Silasbeje yabara:

–Pablobeje raja Silasbeje daxitanacuanējava pejinavanapevi itorobaponabeje pianapepanaenexa. Nexata jane baja aeconoxae vajatomarajavaberena ata patabeje. ⁷ Nexata Jasón, maponē nucaje, tocopata pijabota penaponaponae xabeje Pablobeje Silasbeje. Daxita pamonae Jasón mayajavanucaje, Pablobana ata, daxita bajarapamonae, apo jumecovēnētsi cajena Romanonacua pepo pevetsinē pitorobilivaisi. Daxita bajarapamonae jumai tsabiabi: “Romanonacua pepo pevetsinē rabaja apo nacayanacuae vetsi. Itsanē rabaja nacayanacuae veta. Bajaraponē pevēnē Jesús,” jai tsabiabi daxita bajarapamonae, jai najumetsēnētsiaya tomara pevetsivijavabelia pamonae anaepana.

⁸ Nexata bajarapacuenia pejumaitsijava itsa jumetane, daxita tomarapijivi tomara pevetsivinnua bitso anaepana. ⁹ Nexata Jasón, Dioso pejumecovēnētsivi yajava, palata matamotsiaexanatsi tomara pevetsivijavabelia, Pablobeje Silasbeje pevēcua pitsapaenexabeje bajarapatomara. Tomara pevetsivi jumaitsi:

–Itsa rabaja ponaenabeje bajaraponēbeje mapatomaravecuaje, pacatocanaviabianatsi panijapalata, jai tomara pevetsivi Jasónbanajavabelia.

Bajaraxuacujinae copabatsi baja Jasónbana penaviabinexa pijabonējavabelia.

Pacuenia Pablobeje Silasbeje ponaponabeje Berea tomarata yabara pelivaisi

¹⁰ Jasónbana tomara pevetsivi pecopabicujinaetsi, bajarapameravi, Dioso pejumecovēnētsivi bepíjia itorobatsi Pablobeje Silasbeje peponaenexabeje, Berea tomarabelia. Pablobeje Silasbeje pepatsicujinaeliabeje Berea tomarata najunuabeje judíovi penacaetuatabiabiobjavabelia. ¹¹ Ajamatabēcuenetaja pajudíovi jinavanapa Tesalónica tomarata. Nexata apo jumecovēnētsi Dioso pitorobilivaisi. Pajudíovi jinavanapa Berea tomarata, bajarapacuenia apo ajamatabēcuenetaja. Bajarapajudíovi bitso jitsipa pejumetaenexa Dioso pitorobilivaisi. Nexata Pablo caematacabi canacujitsia judíovi penacaetuatabiabiobta Dioso pitorobilivaisi tsipaebabiaba bajarapajudíovijavabelia. Nexata Pablo itsa copata petsipaebabiabijava, bajarapajudíovi pijacuata Dioso pejumelivaisibaxutota xaniavaetsia nacujarubabiaba peyapētaenexa xaniajai bajarapacuenia itsa jumaitsi Pablo petsipaebabiabilivaisi. ¹² Berea tomarapijivi judíovi ayaibitsaēto jumecovēnēta Pablo petsipaebabiabilivaisi. Ayaibitsaēto pijinia griegovi ata jumecovēnēta. Jumecovēnēta bepíjivi. Jumecovēnēta petiriavi ata. Bajarapapetiriavi petuxanenēnē pijavajivi. ¹³ Pajudíovi jinavanapa Tesalónica tomarata, Pablo vēnēlvaisitanetsi Dioso pitorobilivaisi petsipaebabiabijava Berea tomarata. Nexata bajarapajudíovi ponalia Berea tomarabelia. Nexata bajarapajudíovi itoroba Berea tomarapijivi ayaibitsaēto pianapepanaenexa Pablojavabelia. ¹⁴ Nexata Berea tomarapijivi, pamonae jumecovēnēta Pablo petsipaebabiabilivaisi, bajarapamonae Pablo bepíjia itorobatsi peponaenexa manuamene itapata peecaetomarabelia. Silasbeje abaxē Timoteobeje nacopatabeje Berea tomarata. ¹⁵ Pamonae Pablo yanataponaliatsi, pēnaxuabatsi Atenas tomarabelia. Nexata Atenas tomaraverena bajarapamonaeta Pablo tonajumexuaba Silasbeje Timoteobeje. Jumaitsi:

–Itsa cuenecaējēpaenatsibeje, bepíjia renabeje tsane tanecaxitajarabinexabeje Atenas tomarata, jai Pablo bajarapamonaejavabelia.

Bajaraxuacujinae pamonae Pablo pēnaxuabatsi, naviaba baja Berea tomarabelia.

Pacuenia Pablo ponapona Atenas tomarata yabara pelivaisi

¹⁶ Pablo abaxē Atenas tomarata evetaponapona Silasbeje Timoteobeje pepatsijavabeje Atenas tomarabere. Nexata Pablo itsa ponapona Atenas tomarata, tane

pecobeta jumapecataeaya pexanaenänē piapaxayojava daxita Atenas tomara tuatua-jējava. Nexata Atenas tomarapijivi pematabacabēta nubenabiaba pevajēcabiabinexa bajarapajumapecataevijavabelia. Nexata Pablo itsa tane bajarapacuenē, bejamatabējiobi bitso. ¹⁷ Nexata judiōvi penacaetuatabibibota Pablo Dioso pitorobilivaisi yabara barēnajumenotabiaba pevēna judiōvi. Barēnajumenotabiabanua apo judiōvi ata, pamonaē Dioso pejuitsipaevi. Caematacabi canacujitsia barēnajumenotabiabanua pamonaē Pablo caxitajarabatsi tomara tuatua-jēta. ¹⁸ Nexata Pablo caxitajaraba pebijivi, epicūreomonaē pecujarubilivaisi pejumecovēnētavanapaevi. Caxitajarabanua itsapebijivi, estoicosmonaē pecujarubilivaisi pejumecovēnētavanapaevi. Bajarapamonaē ata Pablo barēnajumenota. Nexata Pablo pebarēnajumenotsijavata, bajarapamonaēyajuvenēvi Pablo yabara muetsia najumaitsi:

—¿Detsa meta pitsilivaisi maponēje namatatsapatsia nacabarēcuaiacuajiaije? najai bajarapamonaē Pablo yabara.

Itsamonaē pijinia Pablo yabara najumaitsi:

—Itsanacuapijivi racovē pijadiosoivi pelivaisipaebinē, najai bajarapamonaē.

Bajarapacuenia najumaitsi tsipaji Pablo tsipaebapona pexanalivaisi, Jesús pelivaisi. Tsipaebaponanua petēpaevimi icatsia itsamatacabi piasaējavanexa petēpaecujinae. ¹⁹ Nexata bajarapamonaē Pablo barēponaliatsi Areópagovēnē tsutojavabelia, patsutojavabelia tomara pevetsivi nacaetuatabiaba penabarēcuaiacuajainexa. Itsa baja palia bajarabelia, bajarapamonaē jumaitsi Pablojavabelia:

—Panetsipaebare patayapētaenexa papejanalivaisi tsipaebaponaē.

²⁰ Panetsimuxuaitothia abaxē palivaisi tsipaebaponaē. Nexata pajitsipajē patayapētaenexa pajamatabēcuenelivaisi xaina palivaisi tsipaebaponaē, jai Atenas tomarapijivi Pablojavabelia.

²¹ Atenas tomarapijivi, itsanacuaverena pepatsivina, pamonaē bajarapatomarata najinavanapa, daxita bajarapamonaē jamatabēcuenenabiabatsi pejanalivaisi pejumetaeyabiabinexa. Jamatabēcuenenabiabatsinua petsipaebabiabinexa itsamonaējavabelia ata.

²² Nexata Pablo nonotapuna bajarapamonaē tuatua-jēta Areópagovēnē tsutojavata. Jumaitsi:

—PaAtenas tomarapijivimē, pacatanetsi rabaja panijadiosoivi bitso papecajamatabēcuenenabiabijava. ²³ Tanajetarucabiabijavata panijatomaracallejava, taeyabiabajē itsaxuayo pavajēcabiabame panijadiosoivijavabelia. Nexata caxitajarabajē altarpvēnējava, itsajota jivi vajēcabiaba abaxē apo yapētae ata padiosojavabelia vajēcabiaba. Bajara-paaltarpvēnējavata peyaquinarutsiitane jumai tsarucae mapacueniaje: “Padioso abaxē apo yapētaetsi, bajarapadiosojavabelia vajēcabiabianatsi mapaaltarpvātataje,” jai tsarucae peyaquinarutsiitane. PaDioso yabara yaquinaruta bajarapaaltarpvēnējavata, nexata bajarapaDiosojavabelia paxamē baja najamatabēcuenecopatsiaya panavajēcabiabame, abaxē apo payapētae atamē bajarapaDioso, bajarapaDioso yabara jane baja aeconoxae pacatsipaebijitsiatsi, jai Pablo Atenas tomarapijivijavabelia.

²⁴ Icatsia Pablo jumaitsi Atenas tomarapijivijavabelia:

—PaDioso yabara pacatsipaebijitsiatsi, mapanacua exanaje. Exana daxita mapanacuapijicuenē yajava. BajarapaDioso pepo pevetsinē jane baja daxita mapanacuaje. Pevetsinē itaboxo ata. BajarapaDioso cajena apo ponaponaē jivi pexanaetemplota. ²⁵ BajarapaDioso apo namatavenonaē jivi peyavenonaenexatsi. Tsipaji apo namatavenonaē itsacuenējavayo ata. Biji rajane bajaraponē nacarajuta caeepatoyo vajaasaētsavanapaejumaliyonexa. Nacarajutanua daxita xua namatavenonatsi, jai Pablo pepo Dioso, athēbētatsia peecaenē, yabara.

²⁶ Icatsia Pablo jumaitsi Atenas tomarapijivijavabelia:

—BajarapaDioso abaxē copiaya caenē pebi exana. Bajaraxuacujinae bajarapapebijavaverena naexanapona daxitavirijamevi pijasalinaivimi. Nexata bajarapapebijavaverena penaexanaponaēvi yacājēpa pejinavanapaejava daxitanacuanējava. Nexata Dioso caevirijamevi canacujitsia tocopatopona pamatacabibeje asaē tsavanapaejitsia. Tocopatoponanua panacuanējava jinavanapaejitsia. ²⁷ Bajarapacuenia Dioso tocopata mapanacuataje daxita bajarapamonaē Dioso pejuitsipaenexa penajamatabēcuenecopatsinexa Diosojavabelia. Dioso cajena tajē apo nacavecuaponaponaē. ²⁸ Dioso raja pejamatabēcueneta asaē tsavanapaetsi. Bajarapacuenia Dioso pejamatabēcueneta asaē tsavanapaetsi tsipaji baja cajena paxamēyajuvenēvi bajayata peyaquinaelivaisita jumaitsi: “Vaxaitsi ata rabaja Dioso pexitsi,” jai. ²⁹ Nexata Dioso itsa pexitsi, Dioso yabara jamatabēcuenenavēxaniabiaya apo bejamatabēcuenenavēxaniabiaya jumaitsi: “Dioso raja oronanitota, platananitota ata, ibotota ata pexanaenētsi. Nexata pacuenia bitso pecujanivitsi pecobeta pexanaenänē pexaniacuenia exana, bajara pitsinē Dioso,” apo bejamatabējaitsi jamatabēcuenenavēxaniabiaya Dioso yabara. ³⁰ Jivi abaxē bajayata apo yapētae Dioso peponaponaējava. Nexata bajayata jivi

pihisiaacuene exanabiabi ata, Dioso abaxë najamatabëcuenecataita. Nexata abaxë Dioso apo naneconitsiaexanae bajarapamonae pibisiacuene pexanabiabijava yabara. Itsiata baitsi jane maparucaje Dioso itoroba daxitajivi daxitanacuanëjava pejinavanapaevi pibisiacuene pexanabiabijava pecopabinexa baja, penajamatabëcuenepënëyorotsinexa Dioso javabelia. ³¹ Bajarapacuenia Dioso itoroba tsipaji baja Dioso jivi penaneconitsiaexanaemat-acabinexa tocaëjêtaruta. Pamatacabi Dioso tocaëjêtaruta, itsa copiapatsiana, naneconitsiaexanaena daxitanacuanëpivivi. Nexata Dioso jivi itsa naneconitsiaexanaena, caejivi canacujitsia paneconivajêto xainapona, bajarapaneconivajêtota naneconitsiaexanaponaena. Ponë jivi naneconitsiaexanaejitsia, Dioso baja cajena itapeta. Daxitajivi beyapêtane ponë Dioso itapeta. Tsipaji baja bajaraponë Dioso icatsia asaëyaexana petêpaecujinae, jai Pablo Atenas tomarapijivijavabelia Jesús yabara.

³² Nexata Atenas tomarapijivi itsa jumetane bajarapacuenia Pablo pejumaitsijava Jesús petêpaecujinae Dioso icatsia piasaëyaexanaejavatsi yabara, Atenas tomarapijivi Pablo jumecaponatsi. Itsamonae pijinia itsiata jumaitsi Pablojavabelia:

—Icatsia itsamatacabijavabelia pacanamuxunaevetsianatsi bajarapalivaisi, jai itsamonae.

³³ Nexata baja Pablo bajarapamonae vecuapona. ³⁴ Itsamonae itsiata pënaponatsi. Bajarapamonae jumecovënêta Pablo petsipaebilivaisi. Pamonaejumecovënêta Pablo petsipaebilivaisi yajuvënêne, pevënê Dionisio. Bajaraponë Dionisio, Areópogovënê tsutojavata penacaetuatabiabiivi pevetsiviyajuvënêne. Petiriva ata, Dámarisvënêna, jumecovënêta Pablo petsipaebilivaisi. Itsamonae yajava jumecovënêta.

18

Pacuenia Pablo ponapona Corinto tomarata yabara pelivaisi

¹ Atenas tomarata Pablo jivi petsipaebaponaponaecujinae Dioso pitorobilivaisi, pona baja. Nexata pata Corinto tomarabelia. ² Nexata Corinto tomarata Pablo caxitaraba judiönë, Aquilavënêne, Ponto nacupijinë. Bajaraponë Aquila caematacabibeje abaxë xaina Corinto tomarata pepatsicujinae Italia nacuaverena. Yajavapata pijava Priscilavënêna. Bajarapajivibeje Italia nacuaverena patabeje. Bajaraverena patabeje tsipaji Romanonacua pepo pevetsinë, Claudiovënêne, capitsapapona daxita judiövi pepit-sapaenexa Roma tomaravecu. Romatomara eca Italia nacuata. Nexata Pablo pona Aquila pijaboyabelia. ³ Nexata Aquila pijabota Pablo naponapona. Nexata carpabonë Pablo nayavenonaeya jorocabiaba Aquila. Pablo nanacueneba tsipaji Pablo ata yapêtane pejorocaejava carpabonë. ⁴ Judiövi penacaetuatabiabiibota, penacueraevetsimatacabianë canacujitsia, Pablo judiövi tsipaebabiaba Dioso pitorobilivaisi. Pablo tsipaebabiaba judiövijavabelia, apo judiövijavabelia ata, bajarapamonae pejumecovënêtsinexa palivaisi Pablo tsipaebabiaba.

⁵ Silasbeje Timoteobeje Corinto tomarata itsa patabeje Macedonia nacuaverena, Pablo baja copata Aquila peyavenonaeyajorocabiabijava carpabonë. Nexata Pablo caematacabi canacujitsia Jesús yabara jumai tsaponae judiövijavabelia:

—Jesús raja pepacuene Cristo, ponë copiaevetavanapatsi pepatsijavatsica vajanacapanepaenexa, jai tsaponae Pablo Jesús yabara.

⁶ Nexata bajarapacuenia Pablo pejumaitsaponaejava Jesús yabara, judiövi baraanaepanatsi. Pablo pibisiacuenia hijatanetsi. Nexata Pablo penaxatatsijava najumajonotaxuaba. Nënêbabia bajarapamonae peyapêtaenexa penaneconitsijava Dioso javabelia. Tsipaji apo jumecovënêtsisi, Pablo tsipaebi ata Jesús yabara. Pablo nexata jumaitsi judiövijavabelia:

—Paxamë saya panejamatabëcueneta panaxuabianame Diosovecu. Xanë tajamatabëcueneta apo panaxuabimë tsane. Panijacuata panaxuabianame. Tsipaji cajena pacatsipaebi atasi Jesús yabara, apo panejumecovënêtsimë. Aeconoxae rabaja copatajê patacatsipaebabiabijava paxamëjavabelia bajarapalivaisi. Tavajënaeyabelia baja ponaenajê tatsipaebaponaenexa bajarapalivaisi apo judiövijava, jai Pablo judiövijavabelia.

⁷ Nexata Pablo judiövi penacaetuatabiabiibovecu pitsapa. Nexata pona Justovënêne pijaboyabelia. Nexata Justo pijabota Pablo naponapona. Bajaraponë Justo penavajêcabiabinë Dioso javabelia. Pijabo eca judiövi penacaetuatabiabiibo muxuneneta.

⁸ Nexata Crispovënêne, judiövi penacaetuatabiabiibo pevetsinë, daxita pijabopijivi barëjumecovënêta Jesús pelivaisi. Ayalbitsaêto Corinto tomarapijivi, pamonaejumetane Pablo petsipaebabiabilivaisi, jumecovënêta. Nexata bajarapamonae nabautisaba.

⁹ Nexata meravi bemajitsinaebota Dioso jumaitsi Pablojavabelia:

—Pëtsa junavame. Pëtsa copatame netsipaebaponaajava tajumelivaisi. ¹⁰ Xanë raja caya-javatsi. Nexata itsajivi ata apo caitsacueniabi tsane. Tspiaebaponaename tajumelivaisi. Tspijai rabaja tajajivi ayaiBITSaëto tsaponae mapatomarataje, jai Dioso.

¹¹ Nexata Pablo ponapona Corinto tomarata dieciocho pajuametobeje. Tspiaebapona-pona Dioso pitorobilivaisi Corinto tomarapijivjavavelia.

¹² Pamatacabi Galionvënënë Acayanacua evetapona, judiovi najamatabëcuenejëpaeya tsmaxënacuetuatsi Pablo pevaetabinexatsi. Nexata itsa vaetabatsi, Pablo caponaliatsi penutsinexatsi nacuaevevtsinë Galion pitabarata. ¹³ Nexata judiovi jumaitsi nacuaevevtsinë Galionjavavelia:

—Mara ponëje jivi livaisi tspiaebapona pejumecovënëtsinexa Dioso. Itsiata baitsi jane saicayacuenia Dioso pejumelivaisivecua tspiaebapona. Paxanë cajena bajarapacuenia apo panetonajumecopatsi Dioso Moiséspijinëta penajumecopatsilivaisi, jai judiovi nacuaevevtsinë Galionjavavelia Pablo yabara.

¹⁴ Ajena picani Pablo jumepitsijitsia judiovi, itacarajeta nacuaevevtsinë Galion jumaitsi judiovi javavelia:

—Paxamë pajudiovimë, bepayaepëtaneme mapacueneje. Itsa maponëje nacobetoxotsipa, jivitonë ata itsa beyaxuabijitsipa, pacajumexaniataejitsipatsi. Nexata naneconitsiaexanaejitsipajë. ¹⁵ Paxamë saya pabarënajumenotame maponëje papecatsipaebaponaelivaisi yabara. Pabarënajumenotamenua panijasalinaivi pijalivaisi yabara ata. Nexata saya paxamë panijacuata bajaraxua yabara pabarëcuaicuaijamëre pacuenia pajitsipame. Xanë raja apo evetsinë bajarapalivaisi, jai nacuaevevtsinë Galion judiovi javavelia.

¹⁶ Nexata baja nacuaevevtsinë Galion navecuapitsapaeyaexana judiovi. ¹⁷ Nacuaevevtsinë Galion judiovi navecuapitsapaeyaexanae ata, caecuenia abaxë judiovi apo ponae pijabonëjavavelia. Nexata griegovi, bajarajota penubenaevi, nacobenavaetaba judioviyajuvënënë, Sóstenesvënënë. Bajaraponë Sóstenes judiovi penacuetuatabiabibo pevtsinë. Nexata griegovi Sóstenes conibabia nacuaevevtsinë Galion pitabarata, ajibi ata peyabaraconibabejava. Nexata nacuaevevtsinë Galion tae ata bajarapacuenia, apo itavtsi.

Pacuenia Pablo pepatsicujinae Antioquia tomarata, icatsia naropota acueyabinamutonexa jivi petsipaebaponaenexa Dioso pitorobilivaisi yabara pelivaisi

¹⁸ Pablo abaxë bajayajebi ponapona Corinto tomarata. Bajaraxuacujinae Dioso pejumecovënëtsivita napëjioba. Napona barcota Siria nacuyavelia. Pablo yajavapona Priscilabeje Aquilabeje. Nexata epatua Cencrea tomarata, Pablo mataxunatsi. Daxitamatanami matacasibatsi jivi peyapëtaenexatsi petoveretsijava Dioso petonacuenebijava pacuenia baja cajena Dioso javavelia Pablo najumecapanepaeya jumaitsi. ¹⁹ Pablobana Aquilabana Priscilabana itsa pata Efeso tomarata, Pablo baja vecuanatsa Priscilabeje Aquilabeje. Nexata Pablo Efeso tomarata joneya judiovi penacuetuatabiabiboyalia. Nexata bajarajota barënalivaisita judiovi. ²⁰ Nexata picani Efeso tomarata Pablo judiovi asivatsi abaxë penaponaponaenexa anijamatacabianë. Itsiata Pablo apo jejai. ²¹ Nexata Pablo itsa napëjioba, bajarapamonaejavavelia jumaitsi:

—Naxanetajë tapatsinexa Jerusalén tomarabelia tataenexa pafieta baja imoxoyo pevajënae pejonenexa. Itsiata icatsia najetarucaenajë paxamëjavaberena itsa Dioso jitsipa, jai Pablo judiovi javavelia.

Nexata Pablo Efeso tomarata barcota nanaropota. ²² Itsa baja Pablo pata Cesarea tomarabelia, pona icatsia Jerusalén tomarabelia pebajacobinexa daxita Dioso pejumecovënëtsivi. Bajaraxuacujinae icatsia naviata Antioquia tomarabelia. ²³ Antioquia tomarata bajayajebi ponapona. Bajaraxuacujinae icatsia naropota. Najetaruca daxita tomananëjava. Najetaruca Galacia nacuaeta penaetomaranëjava, Frigia nacuaeta penaetomaranëjava ata. Bajarapatomananëjava pejinavanapaevi Dioso pijalivaisita Pablo jamatabëcuene asaëyaexananajetaruca daxita Dioso pejumecovënëtsivi.

Pacuenia Apolos Dioso pitorobilivaisi tspiaeba Efeso tomarapijivjavavelia yabara pelivaisi

²⁴ Judionë Apolosvënënë pata Efeso tomarata, Alejandria tomarapijinë. Bajaraponë xaniavaetsia Dioso pitorobilivaisi jivi tspiaebabiaba. Jumeyapëthane bitso pacuenia Dioso pejumelivaisibaxutota jumaitsi. ²⁵ Apolos itsamonae epatua tspiaebatsi Jesús pelivaisi. Itsiata baitsi jane xaniavaetsia daxitalivaisi apo tspiaebitsi. Palivaisi Juanpijinë jivjavavelia tspiaebapona, bajarapalivaisi Apolos xaniavaetsia tspiaebatsi. Juanpijinë jivi pebautisabaponaajava ata Apolos xaniavaetsia tspiaebatsi. Apolos xaniavaetsia Jesús pelivaisi apo tspiaebi atatsi, itsiata ajamatabëcuenesaëya xaniavaetsia tspiaebanajetaruca Jesús pelivaisi. ²⁶ Apolos ajumejunavijibia Dioso pitorobilivaisi jivi tspiaeba judiovi penacuetuatabiabibota. Nexata Priscilabeje Aquilabeje itsa jumetanebeje Apolos petsipaebilivaisi, nexata bajarapajivibeje junatabeje Apolos. Nexata Apolos napona Priscilabeje Aquilabeje

pijaboyabelia. Nexata bajarapajivibeje daxitalivaisi jane baja, Jesús pelivaisi, xaniavaetsia tsipaebabeje Apolosjavabelia xaniavaetsia Apolos peyapætaenexa Jesús pelivaisi. ²⁷ Itsa baja Apolos naropotsijitsia Efeso tomaravecua peponaenexa Acaya nacuaiyabelia, Dioso pejumecovënëtsivi, Efeso tomarapijivi, yavenonatsi peponaenexa. Tscobeyaquinatsi cuyalatobaxuto pecaponaenexa, Dioso pejumecovënëtsivijavabelia perajutsinexa Acaya nacuata. Bajarapacuenia tscobeyaquinatsi Acaya nacuaijivi, Dioso pejumecovënëtsivi, xaniavaetsia Apolos pecopiapitsinexatsi. Apolos baja itsa pata Acaya nacuaiyabelia, Apolos bitso yavenona Acaya nacuaijivi Dioso pejumecovënëtsivi. ²⁸ Daxitajivijavabelia Apolos tsipaebapona Jesús pelivaisi. Nexata pacuenia Dioso pejumelivaisibaxutota jumaitsi Jesús yabara, Apolos tsipaebapona daxitajivijavabelia. Nexata Apolos daxitajivi yapætaeyaxanapona Jesús pepacuenia Dioso athëbëvetsica pitorobijavatsitsica jivi pecapanepaenexa. Nexata baja judíovi moya ena. Tsipaji acuenebi judíovi: “Jume raja,” pejaijava Apolos petsipaebilivaisi yabara.

19

Pacuenia Pablo ponapona Efeso tomarata yabara pelivaisi

¹ Pamatacabi abaxë Apolos ponapona Corinto tomarata, bajarapamatacabi pijinia Pablo ibotsutonë nacujavaverena najetaruca pepatsinexa Efeso tomaraberena. Efeso tomarata Pablo itsa pata, caxitajaraba caejivibeje Jesús pelivaisi pejumecovënëtsivi. ² Nexata Pablo yanijoba bajarapamonaejavabelia.

—¿Espíritu Santo tsabaja pacatsijamatabëjunua pamatacabi ajena pajumecovënëtaame Jesús pelivaisi? jai Pablo.

Nexata bajarapamonaejumaitsi:

—Jume. Apo payapætaenë patanetsijamatabëjonejava Espíritu Santo. Apo pavënëtaenë cajena Espíritu Santo ata, jai bajarapamonaej Pablojavabelia.

³ Nexata Pablo jumaitsi:

—¿Detsa pitsijamatabëcuene yabara pacabautisaba? jai Pablo bajarapamonaejavabelia.

Nexata bajarapamonaejumaitsi:

—Pajamatabëcuene yabara raja Juanpijinë panetsipaeba, bajarapajamatabëcuene yabara panebautisaba, jai bajarapamonaej.

⁴ Pablo nexata jumaitsi bajarapamonaejavabelia:

—Juanpijinë raja bautisabapona pamonaej baja copaba pibisiacuene pexanaejava, pamonaej baja najamatabëcuenepënëyorota Diosojavabelia. Itsiata baitsi jane Juanpijinë jumai tsaponae jivijavabelia: “Panamatavenoname panejumecovënëtsinexa ponë xanë tacovëverena patsiana, baitsi Jesús. Bajaraponë Cristo, ponë Dioso itorobica,” jai tsaponae Juanpijinë jivijavabelia, jai Pablo bajarapamonaejavabelia.

⁵ Bajarapamonaej itsa jumecovënëta Jesús pelivaisi, nexata Pablo bautisaba bajarapamonaej petuxanenë Jesús pevënëta. ⁶ Nexata Pablo pevajëtsijavata Diosojavabelia, tsimatanacobeuata bajarapamonaej. Nexata bajarapamonaej Espiritu Santo tsijamatabëjunuatsi. Nexata bajarapamonaej itsa cuaiacuaijai, ajumeitothia pecuacuaijaijava. Tsipaji itsavirijumenëta, apo penatsipaebijumenëmi, cuaiacuaijai. Bajaraxuacujinaej jane baja bajarapamonaej Dioso pitorobilivaisi tsipaebapona jivijavabelia. ⁷ Daxita meta bajarapamonaej bejamatabëcuene doce ponëbeje.

⁸ Efeso tomarata Pablo acueyabi pajumetobeje ponapona. Nexata Pablo Efeso tomarata, judíovi penacætuatabiabibota, judíovijavabelia ajumejunavijibia tsipaebabiaba Dioso pitorobilivaisi. Pablo judíovi barënajumenotabiaba Dioso pijajivi pevetsijavanexa yabara. Bajarapacuenia Pablo barënajumenotabiaba judíovi pejumecovënëtsinexa Dioso pijajivi pevetsijavanexa. ⁹ Itsamonae itsiata amatabocotaja. Apo jitsipae pejumecovënëtsijava bajarapalivaisi. Bajarapamonaej daxitajivi pitabarata pibisiacuenia baracuaiacuaijai pexanialivaisi, Jesús pelivaisi. Nexata baja Pablo vecuanatsata bajarapamonaej apo pejumecovënëtsixae Jesús pelivaisi. Pablo nexata, Jesús pelivaisi pejumecovënëtsivi yajava, pona Tirannovënëni pijaescuelabojavabelia, bajarapabota penacætuatabiabinexa. Bajarapabota nexata Pablo caematacabi canacujitsia pexanialivaisi, Jesús pelivaisi, jivi tsipaebabiaba. ¹⁰ Bajarapacuenia Pablo tsipaebaponaaponanijavaibeje. Nexata daxita Aslavënë nacuaijivi, judíovi, apo judíovi ata, jumetane petuxanenë Jesús pelivaisi. ¹¹ Dioso yavenonatsi Pablo Dioso pesaëta pinijicuene pexanaejavanë pexanaponaenexa. ¹² Nexata pamonaej toavitanetsi, pijamonaej Pablo penaxatabijavanë, pijapañueloxi ata, daxita xuaxi Pablo naperabëcajayaba, tocaponabiaba piavitanevi peperabëcajayabinexa. Nexata piavitanevi bajaraxua itsa tsiperabëbuatatsi, jamatejema baja tsabiabi. Dovathivi peyajavajinavanapaevi ata vecuapitsapabiabatsi.

¹³⁻¹⁴ Itsamonaē judíovi tomaranējava najetarubena. Bajarapamonaē Jesús pelivaisi apo jumecovēñetsi ata, itsiata dovathi jivivecua capitsapapona. Pajudíovi bajarapacuenia dovathi jivivecua capitsapapona, siete ponēbeje tsavanapae. Bajarapamonaē Esce-vavēñenē, sacerdotevi penamatacaitorobinē, ēpexi tsavanapae. Nexata bajarapamonaē vēñētane Jesús. Nexata bajarapamonaē najumaitsi:

—Dovathi jivivecua capitsapaenatsi petuxanenē Jesús pevēñeta, najai.

Nexata jane baja itsa tane dovathi peyajavaponaponaenē, bajarapamonaē jumaitsi:

—Dovathi, pacaitavetatsi, ponē Pablo vajunupaebapona, petuxanenē Jesús pevēñeta. Vecuapitsapare baja maponēje, jai Esce-vavēñenē pexi dovathi peyajavaponaponaenējavabelia.

¹⁵ Nexata Esceva pexi itsa itaveta dovathi, dovathi jumaitsi mapacueniaje:

—Yapētaniji raja Jesús. Yapētaniji Pablo ata. Itsiata paxamē apo pacayapētaetsi. ¿Detsa jane paxamē papamonaemē? jai dovathi.

¹⁶ Nexata bajarajota dovathi peyajavaponaponaenē, tsimaxējirevarenatsi bajarapamonaē. Pinijisaēta dovathi peyajavaponaponaenē biatsi. Nexata amoneyabatsi. Pinijicuenia tsaquibabiatsi. Vejumatitcatsi penaxatabijavanēmi. Nexata bajaraponē pijabovecua bajarapamonaē yarēcēpeca pebejavatsi. Jumasa nexata rēcēpeca. ¹⁷ Nexata daxita Efeso tomarapijivi, judíovi, apo judíovi ata, vēñēlivaisitane pacuenia dovathi peyajavaponaponaenē exanatsi Esceva pexi. Nexata Efeso tomarapijivi bitso jamatabēcuenenajunaviaca. Nexata daxita bajarapamonaē yayiatane Jesús pevēñe.

¹⁸ Nexata ayaibitsaētoanaxeto Dioso pejumecovēñetsivi, patapona Pablobanajavaberena. Nexata bajarapamonaē daxitajivi pitabarata navecuapaebapona pibisicuenie pexanabi-abijava. ¹⁹ Nexata ayaibitsaēto penajorobicuene peyapētaevi, capata pijacuyalatobaxutonē, penajorobicuene yabara pecajinavanapaebaxutonē. Pamatacabi bajarapamonaē comuaca bajarapabaxutonē, ayaimatamota comuaca. Nexata daxita bajarapamonaē bajarapacuyalatobaxutonēmi tajuita isotota daxitajivi pitabarata. Petajuitsicujinae itsa namatajēta petajuitsibaxutonēmi pematamo, xuaba pina cincuenta mil ponēbeje palatanēanē. Bajarapapalatanēanē bitso penamatamotsinēanē. ²⁰ Nexata bajarapacuenia Dioso pitorobilivaisi yacaējēpapona baja daxitanacuanējava. Nexata ayaibitsaēto tsaponaē Dioso pejumecovēñetsivi.

²¹ Bajaraxuacujinae Pablo najamatabēxaina peponaenexa Macedonia nacuajava, Acaya nacuajava ata, petaenajetarucaenexa Dioso pejumecovēñetsivi. Bajaraxuacujinae ponaejitsia Jerusalén tomarabelia. Pablo nexata jumaitsi:

—Tapatsicujinae Jerusalén tomarabelia, ponaenajē icatsia Roma tomarabelia ata, jai Pablo.

²² Nexata Pablo itoroba Macedonia nacuaylabelia anijanēbeje pijajivitonēbeje, Timoteobeje Erastobeje. Pablo abaxē bajayajebi ponapona Asiavēñē nacuaata.

Pacuenia picani Pablo Efeso tomarata jamatabēbeyaxuabatsi yabara pelivaisi

²³ Pablo itsa ponapona Asiavēñē nacuaata, Efeso tomarapijivi bitso anaepana Jesús pelivaisi pejumecovēñetsivijavabelia. ²⁴ Efeso tomarapijivi anaepana Pablobanajavabelia Demetrio pejamatabēcueneta. Demetrio platananita templobo jumapecataeya exanabi-aba, tsiquiriboxi. Saya pecobeta jumapecataeya pexanaediosova, Artemisavēñē diosova, pijatemplobo jumapecataeya Demetrio exanabiaba bajarapaboxi. Demetrio templobo jumapecataeya itsa exanabiaba, bajarapaboxi pebarēnacuenebivi bitso ayaicuenia palata barēpitabiaba bajarapaboximatamo. ²⁵ Nexata Demetrio junata pebarēnacaetuatsinexa daxita pebarēnacuenebabiabivi bajarapaboxi. Junatanua itsamonaē ata, pamonaē pijinia jumapecataeya pexanaejavanē nacuenebabiaba. Nexata Demetrio jumaitsi bajarapamonaējavabelia:

—Paxamē rabaja payapētaneme mapacuenije. Jumapecataeya vajaexanabiabijavanē vajacanajetabiabixae, ayaijava palata xainaponatsi. ²⁶ Pataneme rabaja. Pajumetanemenua baja Pablo pejumaitsaponaējava mapacueniaje: “Jivi raja pecobeta jumapecataeya pexanaenēanē, apo diosovi cajena,” pejaitsaponaējava. Nexata jivi ayaibitsaētoanaxeto mapatomarapijivije jumecovēñētapona Pablo bajarapacuenia petsipaebaponaējava. Itsiata apo ēmapatomarapijivije. Daxita Asiavēñē nacuapijivi ata jumecovēñētapona. ²⁷ Bajarapacuenia jivi ayaibitsaēto pejumecovēñētaponaējava apo nacatoxanepanae. Tsipaji jivi apo nacacomuatsi tsipae Artemisavēñē diosova pijacuene vajanacuenebijava. Pinijijamatabēcuenie pexainaediosova Artemisa pijatemplobo ata, apo yayiatae tsipae. Baitsi padiosova daxita Asiavēñē nacuapijivi, daxitanacuanēpijivi ata, pematatabacabēta tonubenabiaba pevājēcabiabinexa bajarapovajavabelia, verevercaejitsipa. Nexata baja bajarapovajavabelia jivi apo vājēcabiabi tsipae, jai Demetrio templobo jumapecataeya tsiquiriboxi pexanabi-abivijavabelia.

²⁸ Nexata bajarapamonae itsa jumetane bajarapacuenia Demetrio pejumaitisjiva, nexata bitso bajarapamonae anaepana. Pinijijumeta vavajai tsaponae. Jumaitis:

—iPinijijamatabëcuene raja pexainaediosova Artemisa, Efeso tomarapijivitsi vajadiosova! jai tsaponae bajarapamonae.

²⁹ Nexata daxita Efeso tomarapijivi itsa jumetane, bitso anaepana Pablobanajavabelia. Nexata ponëbeje Pablo yanatatsi, Gayobeje Aristarcobeje, Efeso tomarapijivi vaetabatsibeje. Bajaraponëbeje Macedonia nacuapijinëbeje. Daxitajivi vaetabiaya nacobenacaponatsibeje pinijiboxanetojavabelia, itsabelia baja cajena daxita tomarapijivi nacaetuatabiaba.

³⁰ Pablo picani jumaitis Dioso pejumecovënëtsivijavabelia:

—Xanë najonejitsianë mapaboyaliaje taneyanatsinëbeje tayajivicuaicuaijainexa penacaetuatsivijavabelia, jai.

Itsiata Dioso pejumecovënëtsivi apo tocopatsitsi Pablo penajonenexalia. ³¹ Asiavënë nacuapijivi pevetsivi, Pablo yapëtanetsi. Nexata bajarapamonae asaëya Pablo tonajumeitorobarenatsi penajoneyaniva bajarapaboyabelia pebexaxuabiyaniavatsi. ³² Efeso tomarapijivi penacaetuatsijavata, nalivaisijëpaeya apo cuaicuaijai. Nexata pevavajajavata itsamonae itsalivaisicuenia vavajaiya jumai tsaponae. Itsamonae pijinia itsalivaisicuenia vavajai tsaponae. Tsipaji jivi ayaibitsaëtöxaneto apo yapëtae palivaisi yabara nacaetuata. ³³ Nexata Efeso tomarapijivi penacaetuatsijavata, caejiviyobeje judiövi nanacaetuata. Bajarapajudiövi yapëtae palivaisi yabara jivi ayaibitsaëtö nacaetuata. Nexata bajarapajudiövi tsipaeba Alejandrovënënjëjavabelia Alejandro peyapëtaenexa xua yabara jivi ayaibitsaëtö nacaetuata. Tsipaji Alejandro ata judiönë. Nexata Alejandro pevëna judiövi pënatöröbajarabiaya itöröbatsi daxitajivi pitabarata penucaenexa. Nexata Alejandro nacöbeyota jivi pemoyanexa petsipaebinexa Efeso tomarapijivi pianaeplanayeniva daxita judiövijavabelia. ³⁴ Itsiata baitsi jane Efeso tomarajivi apo tocopatsi Alejandro pecuaicuaijainexa. Itsa daxitajivi yapëtae Alejandro judiönëcuene, nexata daxita vavajaiya jumai tsaponae anijahorabejecuenia mapacueniaje:

—iPinijijamatabëcuene raja pexainaediosova Artemisa, Efeso nacuapijivitsi vajadiosova! jai tsaponae bajarapamonae.

³⁵ Bajaraxuacujinae nexata tomara jane baja pevetsinë daxitajivi moyaxana. Nexata jumeitavetsiaya jumaitis:

—PaEfeso tomarapijivimë, daxitanacuanëpijivi baja cajena yapëtae vajanacatocopsatsijava vajaevetsinexa mapatomarataje peecaëbo, pinijijamatabëcuene pexainaediosova Artemisa pijatemplobo. Daxitanacuanëpijivi baja cajena yapëtae diosojumapeibotova, Artemisa, athëbëvetsica pejopaejava mapatomarataje. ³⁶ Nexata bajarapadiosojumapeibotova athëbëvetsica pejopaejava yabara, acuenëbi itsajivi ata: “Jume,” pejaijava. Nexata pajamatejemamëre. Pëtsa abaxë itsacuene paexaname copiaya panajamatabëxainaejevamë xaniavaetsia. ³⁷ Mapapebibeje paxamë pacapatameje, apo penacöbetoxotsinëbeje templobopijijava. Pibisiacuenia apo baracuaicuaijaibejenua vajadiosova Artemisa, jai Efeso tomara pevetsinë Efeso tomarata penacaetuatsivijavabelia.

³⁸ Icatsia tomara pevetsinë jumaitis bajarapamonaejavabelia:

—Demetriobana itsa jamatabëneconita itsajivi, nexata neconitsi juezmanoe pitabarata, jivi peneconitabiabibota. Bajara saya xua juezmanoe evetavanapa. ³⁹ Itsa apo paneconitsijitsiamë jivi, saya itsa panacaetuatae itsacuenelivaisiyo yabara, nexata saya roviaalia papaebare xaniavaetsia daxitajivi penacaetuatsijavata, pacuenia gobierno nacaitoroba. ⁴⁰ Xaniajanë pacuenia pacatsipaebijitsiatsi. Ajena, mapamatacabitaje, mapacuenia itsa exanaponaejitsipatsije, nacananeconitsiaexanaejitsipa gobierno. Bajarapacuenia nacananeconitsiaexanaejitsipa tsipaji itsacueneneconi itsajivi xainaejejeva, mapacuenia anaeya nacaetuatsijai, jai Efeso tomara pevetsinë penacaetuatsivijavabelia.

⁴¹ Itsa baja Efeso tomara pevetsinë najumevereta bajarapacuenia petsipaebijava, itoroba baja daxitajivi penaviabinexa pijabonëjavabelia.

20

Pacuenia Pablo najetaruca Macedonia nacujava, Grecia nacujava ata, yabara pelivaisi

¹ Itsa baja Efeso tomarapijivi jamatabëcaeva pianaeplanajava, nexata Pablo junata penacaetuatsinexa daxita Dioso pejumecovënëtsivi. Nexata Pablo muxujioba Dioso pejumecovënëtsivi pevajënaeyabelia pijamatabëcuenesaë tsavanapaenexa Dioso pejumecovënëtsijava. Pablo nexata pexaniacuenia napëjioba bajarapamonae. Bajaraxuacujinae Pablo baja pona Macedonia nacuyabelia. ² Nexata Pablo itsa pata Macedonia nacuyabelia, pexanialivaisi tsipaebanajetaruca Macedonia nacuapijivi Dioso pejumecovënëtsivi

pevajënaeyabelia pïajamatabëcuenesaë tsavanapaenexa Dioso pejumecovënëtsijava. Bajaraxuacujinae icatsia Pablo pata Grecia nacuayabelia. ³ Nexata Grecia nacuata Pablo ponapona acueyabi pajuametobeje. Bajaraxuacujinae picani Pablo barcota naponaejitsia Siria nacuayabelia. Nexata Pablo nayajumetane Siria nacuata judïovi pevajënaeevetsijavatsi pebeyaxuabinexatsi. Bajaraxuata Pablo najamatabëxaina icatsia pecovëya penaviatsinexa matatsënëa Macedonia nacuajava. ⁴ Pamonaë Pablo yanatatsi, mapevënëanëje. Sópater, Berea tomarapijinë. Aristarcobeje pijinia Segundobeje, Tesalónica tomarapijinëbeje. Gayo pijinia Derbe tomarapijinë. Timoteo pijinia Listra tomarapijinë. Tiqicobeje pijinia Trófimobeje, Asiavënë nacuapijinëbeje. Bajarapamonaë Pablo yanatatsi. Nexata Pablo itsa barëpata Filipos tomarata, xanë Lucasnë, necaxitajaraba. ⁵ Nexata daxita pamonaë Pablo yanatatsi, namataxainaeya baja ponalia Troas tomarabelia. Nexata paxanëbeje Pablobeje abaxë panacopatajëbeje Filipos tomarata, Macedonia nacuata peecaetomarata. Nexata pamonaë namataxainaeya baja ponalia, paneevetavanapabeje Troas tomaratalia. ⁶ Nexata paxanëbeje Filipos tomarata barcota pananaropatajëbeje pepuavererecae baja pafiestamatacabi judïovi baxane levadurata matajërëabinejeva pexanaëpan. Panaponajëbeje jane baja Troas tomarabelia. Cinco matababita panapaliajëbeje Troas tomarabelia. Nexata pamonaë paneevetavanapabeje Troas tomaratalia, papëcaxinajëbeje baja. Nexata abaxë Troas tomarata pajinavanapajë siete pamatacabibeje.

Pacuenia Pablo ponapona Troas tomarata yabara pelivaisi

⁷ Troas tomarata domingomatacabi panacaetuatajë daxita Dioso pejumecovënëtsivi yajava, patanamatabënapitsinexa xua yabara Cristo sivatëpa. Pablo nexata livaisi tsipaëba. Meravia baja pitsijavata Pablo Mileto tomarabelia naropotsijitsia. Bajaraxuata Pablo livaisi tsipaëba meravijebi. ⁸ Panacaetuatajë athëbëabetsia pënëyatuucubibota. Nexata athëbëyo paira paenayajë, itsajotatsia pitayotsijavanë ayajivava rubena xaniavaetsia pitayotsinexa. ⁹ Nexata pevëjëato ventanajavata eca, Euticovënënë. Pablo nexata bajayajebi livaisi tsipaëba. Nexata belia pevëjëato bitso itamajitsipaneca. Nexata baja majiteca. Pemajitecaenë nexata pevëjëato jopareca acueyabi pairabejéjavavereca. Nexata pevëjëato itsa sivarunarecatsi, petëpaenë baja pitatsi. ¹⁰ Nexata Pablo sivarunareca. Pematabacabëta ecaeya isapita petëpaenë. Nexata Pablo jumaitsi Dioso pejumecovënëtsivijavabelia:

–Pëtsa panajamatabëxainame. Asaë rabaja icatsia pevëjëato, jai Pablo.

Nexata pevëjëato icatsia asaë. ¹¹ Nexata Pablo icatsia caevëa junaya. Pejunaecujinaetsia epatsënëca jane baja pan. Tsicobetsana jane baja daxita Dioso pejumecovënëtsivi pexaenexa. Pexaecujinae abaxë icatsia Pablo bajayajebi cuaicuajjai. Pecuaicuajjainë belia yamatacabibecatsi. Bajaraxuacujinae Pablo jane baja pona Mileto tomarabelia. ¹² Nexata baja pevëjëato piasaënë barënaviabatsi pijaboyabelia. Barëya bitso bajarapamonaë piasaëxae pevëjëato petëpaecujinae.

Pacuenia Pablobana naropoba Troas tomarata pepatsinexa Mileto tomarabelia yabara pelivaisi

¹³ Paxanë Pablo paneitoroba barcota menia namataxainaeya patanaponaenexa Asón tomarabelia. Bajarapacuenia Pablo paneitoroba tsipaji Pablo matatsënëa najetarucacajitsia pepatsinexa Asón tomarabelia. Nexata Pablo itsa pata Asón tomarata, bajarapatomarata patayapitsinexa. ¹⁴ Nexata jane baja Pablo itsa pata Asón tomarata, Pablo baja nanonorena barco ënëberena. Nexata baja panaponajë Mitilene tomarabelia. ¹⁵ Bajaraxuacujinae icatsia Mitilene tomarata pananaropobajë. Nexata meravia pitsijavata panapatajë Quiotomara canacujitsialia peecaetomarabelia. Bajarapatomarata icatsia patananaropobicujinae, meravia icatsia pitsijavata, panapatajë Samos tunaetota peecaetomarabelia. Bajarapatomarata icatsia patananaropobicujinae, panapatajë icatsia Trogilio tomarabelia. Nexata abaxë Trogilio tomarata panacuraevetajë. Nexata icatsia Trogilio tomarata patananaropobicujinae, caematacabicujinae, icatsia panapatajë jane baja Mileto tomarabelia. ¹⁶ Pablo rovia jamatabëxena Efesotomara, Asiavënë nacuata peecaetomara. Tsipaji apo jamatabëponaponaë bajayajebi Asiavënë nacuata. Pablo bepïjia jamatabëpata Jerusalén tomarabelia Pentecostésvenë fiestavajënaeya.

Pacuenia Pablo Mileto tomarata livaisi tsipaëba Efeso tomaraverena pepatsivi, ancianovijavabelia, yabara pelivaisi

¹⁷ Mileto tomaravelia Pablo tonajumeitoroba Efeso tomarapijivi ancianovi pepatsinexarena Mileto tomaraberena. ¹⁸ Nexata baja ancianovi itsa parena Pabloyavaberena, Pablo jumaitsi bajarapaancianovijavabelia:

–Paxamë baja cajena payapëtaneme mapacueneje. Asiavënë nacuata tapatsimatatabijavaveliacujinae, Dioso pitorobilivaisi tsipaëbaponaponajë Asiavënë nacuata. Daxitamatacabi tonacuenëbajë Dioso pijacuene. ¹⁹ Dioso pijacuene itsa tonacuenëbaponaponajë,

apo jamatabējumaitsinē: “Xanē bitso ayajamatabēcuenenēnē,” apo jamatabējanē. Itsa taeyabiabajā ītsamonae pecopabijava Dioso pejumecovēnētsijavami, bitso sivanueyabiabajā. Bitso bejiobinēnuu tsabiabi tsipaji judiōvi jamatabēnebeyaxuababiaba. ²⁰ Daxita Dioso pitorobilivaisi pacatsipaebabiabatsi papecajamatabēcueneyavenonaenexa. Caelivaisi ata apo pacavecuacopatsitsi. Pacatsipaebabiabatsi baja cajena daxitajivi pitabarata. Pacatsipaebabiabatsinua baja cajena panijabonējava ata. ²¹ Asaēya tsipaebabiabajā judiōvi, apo judiōvi ata, daxita bajarapamonae pecopabinexa pibisiacuene pexanabiabijava penajamatabēcuenepēnyorotsinexa Diosojavabelia. Bajaraxuacujinae jane baja pejumecovēnētsinexa vajatuxanenē Jesucristo pelivaisi. ²² Mara jotacujinaeje ponaenajē Jerusalēn tomarabelia Espīritu Santo taneitorobixae bajarabelia taponaeenexa. Itsiata xaniavaetsia apo yapētaenē pacuenia nexanaejitsia Jerusalēn tomarapijivi. ²³ Itsiata caejavayo yapētanjiji. Caetomara canacujitsia Dioso pitorobilivaisi tatsipaebanajetarucajavata Espīritu Santo nejumai tsabiabi: “Caetsiana raja penaneconitsivi pejebabiabibota. Xanē bitso benejibicuene taename,” nejai tsabiabi Espīritu Santo. ²⁴ Itsiata bailsi jane cajena apo junavinē bajarapacuene yabara. “Belia nebeyaxuabijitsipa,” apo jamatabējanē cajena. Jamatabēveretajē pacuene vajatuxanenē Jesús nitoroba tatonacuenebinexa daxitajivi tatsipaebanajetarucaenexa pexanialivaisi, Dioso vajanacaitaxutotsoniatatejava, jai Pablo ancianovijavabelia.

²⁵ Icatsia Pablo jumaiitsi ancianovijavabelia:

–Paxamējava naponaponajē patacatsipaebinexa Dioso pevetsijavanexa daxita pijajivi. Tajēvelia baja cajena yapētanjiji. Apo panetaemē rabaja tsane matavējēa. ²⁶ Bajaraxuata ajena baja pacatsipaebatsi. Itsajivi paxamējajuvēnējivi itsa naxuabiana Diosovecua, apo naxuabi tsane xanē tajamatabēcueneta. ²⁷ Apo naxuabi tsane xanē tajamatabēcueneta tsipaji baja daxita Dioso pitorobilivaisi xaniavaetsia baja cajena pacatsipaebatsi. Caelivaisiyo ata apo pacavecuacopatsitsi, jai Pablo ancianovijavabelia.

²⁸ Icatsia Pablo jumaiitsi ancianovijavabelia:

–Xaniavaetsia nayajivitaeya pajinavanapare pibisiacuene paneexanaeyaniva. Pacuenia oveja pexainaevi xaniavaetsia evetavanapa pijaoveja, bajara pijinja pacuenia xaniavaetsia paevetavanapaename daxita pamonaē Dioso pejumecovēnētsivi. Espīritu Santo raja pacaitoroba panetoevetsinexa vajatuxanenē Jesús pijajivi, pamonaē comuata pijanata. ²⁹ Tajēvelia baja cajena yapētanjiji tacovēya penajetarubenaējavaneja saicayacuena Dioso pejumelivaisivecua petsipaebivi. Bajarapamonae najetarubenaena jivi Dioso pejumecovēnētsijava pevereverecaeyaexanaenexa. Pacuenia nevethē pianaepanaevi verene oveja, bajara jamatabēcueneitsane bajarapamonae pevereverecaeyaexanaenexa jivi Dioso pejumecovēnētsijavami. ³⁰ Paxamējajuvēnēvi ata saicayacuena Dioso pejumelivaisivecua tsipaebaponaena peyamaxēitojorobinexa Dioso pejumecovēnētsivi. Nexata Dioso pejumecovēnētsivi navecuanatsanaena pepēnaponaeenexa bajarapamonae. ³¹ Bajaraxuata xaniavaetsia paevetavanapare Dioso pejumecovēnētsivi. Panajamatabēnapire mapacueneje. Xanē baja cajena acueyabi pavaije, caematacabi canacujitsia, meravi yajava, caeto ata apo copatsinē patacamuxujijava bitso patacaasivaxae. Itsajavata tanuejavata ata pacamuxujijababiabatsi, jai Pablo Efeso tomarapijancianovijavabelia.

³² Icatsia Pablo jumaiitsi bajarapamonaejavabelia:

–Tajamonae, nexata baja pacacopatatsi Dioso pecobeyabelia Dioso papecaevetsinexa. Dioso pejumelivaisi nacatsipaeba Dioso vajanacaasivajava. Nexata bajarapalivaisi pacajamatabēcueneyavenonaena. Bajarapalivaisi caējēpatsi papecajamatabēcuene asaēyaexanaenexa Diosojavabelia. Dioso pacacapanepaena pacuenia Dioso capanepaena daxita pamonaē Dioso aneconijibia tane. ³³ Xanē itsa naponaponajē paxamējavata, apo najamatabēxainanē tanaxainaeyabinexa itsanē pijapalata, penaxatabijava ata. ³⁴ Payapētaneme baja cajena mapacueneje. Tacobeta nacuenebajē tanamatavenonaējavaxi tacomuataponaenexa, tayajavaponaponaevi ata tatocomuatsinexa. ³⁵ Pacatsitanacueneitajētatsi baja cajena pacuenia paxamē ata bepanacuenebame. Bepayavenonamenua itsamonae bitso bepejibivi. Tsipaji baja cajena vajatuxanenē Jesús jumaiitsi mapacuenaie: “Xanepana bitso itsamonaejavabelia vajarajutabiabijava vaxaitsi itsamonae vajanacarajutabiabijava matatoxenetsia. Tsipaji bitso jamatabēcuenebarēyatsi itsa rajutatsi itsamonaejavabelia vajanacarajutsijava matatoxenetsia,” jai raja Jesús, jai Pablo ancianovijavabelia.

³⁶ Itsa baja Pablo najumevereta bajarapacuena petsipaebijava, Pablo daxita ancianovi pematabacabēta barēnuca pebarēnavajētsinexa Diosojavabelia. ³⁷ Bajaraxuacujinae Pablo baja pona. Nexata ancianovi pēnueyabatsi. Nexata Pablo itsa napējioba ancianovi, yaitaxutonueya vaetabiaya itabaratsutsuneponatsi. ³⁸ Bitso ancianovi najamatabēxaina. Tsipaji Pablo jumaiitsi:

–Apo panetaemē rabaja tsane matavējēa, jai.

Bajaraxuacujinae Pablo barcojavabelia peponaejavata, bajarapamonae pēnaxuabaliatsi barcojavabelia.

21

Pacuenia Pablo pona Jerusalén tomarabelia yabara pelivaisi

¹ Itsa baja panapējiobiveretajē ancianovi, panarunarecajē baja barco ēnēabereca. Pananicabaliājē roviaia patapatsinexalia Cos tomarabelia. Bajaraxuacujinae, meravia pitsijavata, panapatajē abaxē epatua Rodas tomarata. Bajaraxuacujinae abaxē icatsia panapatajē Pátara tomarabelia. ² Nexata Pátara tomarata icatsia pacaxitajarabajē itsabarco. Bajarapabarco ponaejitsia Fenicia nacuayabelia. Nexata icatsia bajarapabarcota patanaponaeixa, panarunarecajē bajarapamo ēnēabereca. Panaponajē jane baja. ³ Nexata barcota patanajetarubenejavata, pataeyetajē patatsavenonia Chipretunaeto. Paxenetanajetarubenejavata rovia. Paponajē Siria nacuayabelia. Nexata baja papatajē Siria nacuayabelia Tiro tomarata. Nexata Tiro tomarata juteta barcoēnēta pecaponaejava. ⁴ Nexata Tiro tomarata pacaxitajarabajē Dioso pejumecovēnētsivi. Bajarapamonaejavata pajinavanapajē siete pamatacabibeje. Bajarapamonae tajēvelia Espiritu Santo pejamatabēcueneta yapētaeayaexanatsi Pablo pebejiobiaexanae javanexatsi Jerusalén tomarata. Nexata bajarapamonae jumaitsi Pablojavabelia:

—Pētsa poname Jerusalén tomarabelia, jai picani bajarapamonae.

⁵ Itsiata baja icatsia siete pamatacabibejecujinae panaropobajē. Nexata Tiro tomarapijivi, daxita Dioso pejumecovēnētsivi, pijavajivi yajava, pexi yajava, patapēta naponalia mene itapayabelia patanepētaenexa pataponaejava. Nexata mene itapatalia, tajetabota, daxita bajarapamonae yajava, panubenejavata patamatabacabēta patavajētsinexa Diosojavabelia. ⁶ Bajaraxuacujinae panapējiobajē baja daxita Dioso pejumecovēnētsivi. Icatsia baja panarunarecajē barco ēnēabereca. Bajarapamonae baja naviabalia pijabonējavabelia.

⁷ Tiro tomarata patananaropobicujinae, panapatajē Tolemaida tomarabelia. Bajarapatomarata pabajacobajē Dioso pejumecovēnētsivi. Bajarapamonaejavata panajinavanapajē caematacabi. ⁸ Meravia icatsia pitsijavata pananaropobajē. Panapatajē icatsia Cesarea tomarabelia. Cesarea tomarata patapatsicujinae, panaponajē Felipe pijaboyabelia. Felipe, Dioso pitorobilivaisi jivi petsipaebinē, siete ponēbeje diáconoviyajuvēnēnē. Bajaraponē pijabota panajinavanapajē. ⁹ Felipe xaina cuatro povabeje pexi. Bajarapetiriavi abaxē apo nacojiobi. Bajarapamonae tsipaebabiaba jivijavabelia Dioso pitorobilivaisi, palivaisi Espiritu Santo pejamatabēcueneta yapētaeayaexanatsi. ¹⁰ Itsa baja paxainajē anijamatacabanē Felipe pijabota patanapatsicujinae, Judea nacuaverena pata Diosojumepaebinē profeta, Agabovēnēnē. ¹¹ Bajaraponē pata paxanējavabereca Felipe pijabota. Nexata Agabo Pablo pijacorreaocoto veepajonotatsi. Bajarapabocotota Agabo nacobecētabeje. Nataxucētabeje yajava. Nexata Agabo jumaitsi:

—Espiritu Santo raja nejumaitsi tajēvelia mapacueniaje: “Jerusalén tomarata pejinavanapaeivi, judiōvi, mapacuenia cētsianatsi mapacorreaocoto pexainaeñeje. Bajaraxuacujinae canajetsianatsi itsanacuapijivi pecobeyabelia, apo judiōvijavabelia,” jai raja tajēvelia Espiritu Santo, jai Agabo Pablo yabara.

¹² Nexata itsa pajumetaniji bajarapacuenia Agabo patanetsipaebijava, nexata paxanē, Cesarea tomarapijivi yajava, panacobenaaivanē picani Pablo peponaeayaniva Jerusalén tomarabelia. ¹³ Nexata Pablo panejumaitsi:

—¿Detsa xuajitsia panuame? ¿Panenajamatabēxainaeya exanaejitsiamē tsaja? Xanē raja evetajē tanecētsinexa. Evetajē tanebeyaxuabijava ata Jerusalén tomarata vajatuxanenē Jesús pelivaisi yabara, panejai Pablo.

¹⁴ Pasiva atanē tsabiabi, Pablo itsiata apo najamatabēcōpatsi peponaejava Jerusalén tomarabelia. Nexata baja belia pacopatajē pataasivatsabiabijava. Pajumaitsinē nexata:

—Pacuenia Dioso tojitsipatsi pexanaenexatsi, beexanaenatsi baja, pajanē.

¹⁵ Caematacabibejecujinae paxaniavetajē patacobecovējavaxi. Nexata jane baja panaropobajē Jerusalén tomarabelia. ¹⁶ Itsamonae Dioso pejumecovēnētsivi, Cesarea tomarapijivi, paneyanalia. Bajarapamonae panebarēpona Mnasónvēnēnē, Chipretunaeto nacuapijinē, pijaboyabelia. Nexata bajaraponē pijabota panajinavanapajē. Bajaraponē cōpiaya Dioso pejumecovēnētsiviyajuvēnēnē.

Pacuenia Pablo Jerusalén tomarata Santiago barēcuaicuajai yabara pelivaisi

¹⁷ Itsa papatajē Jerusalén tomarabelia, Dioso pejumecovēnētsivi panecopiapita jamatabēcuenēbarēyaya. ¹⁸ Nexata meravia pitsijavata Pablo panebarēsivaxaina Santiagojavabelia. Nexata Santiago pijabota naena ancianovi. ¹⁹ Nexata Pablo bajarapamonae bajacoba. Pebajacobicujinae Pablo bajarapamonaejavabelia navajunupaeba daxita pacuene Pablo exanapona apo judiōvijava ata Dioso peyavenonaexatsi. ²⁰ Itsa

jumetane bajarapacuenia Pablo penavajunupaebijava, nexata Santiago, ancianovi yajava, jamatabëcuenebarëya. Nexata daxita bajarapamonae pejumetaexae bajarapacuenene, pexaniajamatabëcuene rajuta Diosojavabelia. Nexata Santiagobana jumaiti Pablojavabelia:

—Patajabanänë, yapëtaneme baja cajena mapacueneye. Judïovi bitso ayaibitsaëtöxaneto, miles pajivibeje Dioso pejumecovënëtsivi. Yapëtanemenua baja mapacueneye. Daxita bajarapajudïovi jumecovënëtsi ata Jesús pelivaisi, itsiata abaxë tsiteca jumecovënëttavanapa Dioso Moiséspijinëta penajumecopatsilivaisi. ²¹ Pajudïovi apo jumecovënëtsi Jesús pelivaisi, xamë netsipaebaponaelivaisi cayabaranajumetsënëtiabiaba. Nexata bajarapajudïovi najumetsënëtsiaya jumai tsabiabi Jesús pelivaisi pejumecovënëtsijudïovijavabelia: “Itsa raja Pablo livaisi tsipaebapona judïovijava, itsanacuanëjáva pejinavanapaevi, Pablo itavetabiaba judïovi pecopatsinexa Dioso Moiséspijinëta penajumecopatsilivaisi pejumecovënëtsijavami. Itavetabiabanua bajarapamonae pecopabinexa peperabëcaucubijava pexi. Pablo itavetabiabanua bajarapamonae pecatsitecaeyaniva vajasalinaivi pijacuene,” jai tsabiabi bajarapamonae najumetsënëtsiaya xamë yabara Jesús pelivaisi pejumecovënëtsijudïovijavabelia, jai Santiagobana Pablojavabelia.

²² Icatsia Santiagobana jumaiti Pablojavabelia:

—¿Detsa nexata vaxaitsi itsanetsi? Itsa raeta judïovi Jesús pelivaisi pejumecovënëtsivi, cavënëlivaisitane nepatsijava, nacaetuatsiana penabarëcuaicuajainexa xamë yabara. ²³ Nexata daxitajivi pecayapëtaenexa nejumecovënëtsijava Dioso Moiséspijinëta penajumecopatsilivaisi, exanaename pacuenia pacaitorobijitsiatsi. Majotaje cuatro ponëbeje paxanëyajuvënëvi vereta baja pexanaejava pacuenia baja najumecapanepaeya jumaiti Diosojavabelia. Nexata bajarapamonae ponaejitsia temploboyabelia ofrenda perajutsinexa Diosojavabelia. ²⁴ Nexata naponaname bajarapamonae temploboyabelia. Nexata templobota nanajamatabëcuenexaniavaetsianame niamatabëcuenesaënexa Diosojavabelia. Pacuenia bajarapamonae najamatabëcuenexaniavaetsijitsia pijamatabëcuenesaënexa Diosojavabelia, bajarapacuenia nanajamatabëcuenexaniavaetsianame. Nexata daxita xua bajarapamonae notsiana templobota ofrenda perajutsinexa Diosojavabelia, ponëjavabelia notsiana, bajaraxua xamë daxita cobecovëmatamotsianame. Bajaraxuacujinae bajarapamonae daxitamatanami matacasibianatsi. Bajarapacuenia itsa exanaename, daxita judïovi cayapëtaena nejumecovënëtsijava Dioso Moiséspijinëta penajumecopatsilivaisi. Nexata daxita judïovi yapëtaena najumetsënëtsiaya pecabaracuajai tsabiabijava pajudïovi apo jumecovënëtsi Jesús pelivaisi. ²⁵ Pamonae apo judïovi, pijasalinaivi apo itavetsitsi daxita pacuene vaxaitsi judïovitsi vajasalinaivi nacaitaveta. Nexata pamonae apo judïovi ata, Dioso pejumecovënëtsivi, pataitavetsinexa, caelivaisiyojebe patoyaquinajë cuyalatota. Itsa patoyaquinajë, pajumaitsinë mapacueniaje: “Pecobeta saya pexanaenënejavabelia pevi perajutsinexa ofrendacuenia itsa tobia baca oveja ata, pëtsa paxaneme bajarapayajuvënëvi. Pëtsa paxaneme peja. Pëtsa paxaneme cuibocuetacaeya pebeyaxuabinë pevi. Papebijivi baja nacojioba, pëtsa matayajibatsi itsavajavabelia pijavavecua. Papebijivi pijinia abaxë apo nacojiobi, pëtsa matayajibatsi petrivajavabelia. Bajara pijinia pacuenia petiriavi ata. Papetiriavi baja nacojioba, pëtsa matayajibatsi itsanëjavabelia pamonavecua. Papetiriavi pijinia abaxë apo nacojiobi, pëtsa matayajibatsi pebijavabelia,” pajanë itsa patoyaquinajë apo judïovijavabelia, jai Santiagobana Pablojavabelia.

Pacuenia Pablo templobota vaetabatsi penaneconitsivi pejebabiabibota peetsinexatsi yabara pelivaisi

²⁶ Santiagobana Pablo pitorobicujinaetsi, meravia pitsijavata, Pablo napona pebijivi cuatro ponëbeje pepëta pacuenia Santiagobana itorobatsi. Pablo nexata najamatabëcuenexaniavaetapona pijamatabëcuenesaënexa Diosojavabelia cuatro ponëbeje yajava. Bajaraxuacujinae Pablo temploboyalia joneya sacerdotevijavabelia, pitsipaebinxaxa pamatacabi copiarucaeijitsia Pablobana penajamatabëcuene xaniavaetsijava Diosojavabelia. Bajarapamatacabi cuatro ponëbeje Diosojavabelia ofrenda perajutsijavanëxena templobota notsijitsia. Nexata picani daxita bajaraxua Pablo cobecovëmatamotsijitsia bajaraxua pecanajetsivijavabelia.

²⁷ Nexata siete pamatacabibejecujinae, pamatacabi jane baja Pablo, cuatro ponëbeje yajava, Diosojavabelia ofrenda rajutsijitsia, Pablo templobota tanetsi judïovi, Asiavënë nacuverena pepatsivi. Nexata bajarapajudïovi itoroba daxita Jerusalén tomarapijivi pianepanexa Pablojavabelia. Nexata Jerusalén tomarapijivi, Asiavënë nacuverena pepatsivi yajava, nacobenavaetabatsi Pablo. ²⁸ Nexata bajarapamonae vavajai pinijumeta. Najumetsënëtsiaya jumaiti:

—¡Tajamonae judíovi, naxanitsia! ¡Paneyavenonare! Maçonėje daxitanacuanējava livaisi tsipaebanajetaruca daxitanacuanēpijivi vajanacaitoyanexa vaxaitsi manacuapijivitsije. Itavetaponanua Dioso Moiséspijinēta penajumecopatsilivaisi jivi pejumecovēnētsiyaniva. Itavetaponanua mapatemplobo ataje jivi peyaiyataeyaniva. Apo judíovi ata Pablo barējoneyabiaba matemploboyarenaje. Nexata baja Dioso tsitaabejetsi mapatemploboje, Dioso pijatemplobo. Nexata baja Pablo naneconita Diosojavabelia, jai najumetsēnētsiaya judíovi Pablo yabara Asiavēnē nacuaverena pepatsivi.

²⁹ Bajarapacuenia vavajaiya jumaitis tsipaji baja copiaya bajarapajudíovi Pablo tanetsi pebarēponaponaejava Jerusalén tomarata apo judíonē, Trófimovēnēnē, Efeso tomarapijinē. Nexata jamatabēcuenenavēxaniabiaya bajarapamonae jamatabējumaitis:

—Pablo raeta apo judíonē barējunua mapatemploboyarenaje, jamatabējai Trófimo yabara. Pablo cajena Trófimo apo barējone temploboyalia.

³⁰ Nexata Asiavēnē nacuaverena pepatsivi, Pablo yabara penajumetsēnētsilivaisi, daxita Jerusalén tomarapijivi jumentane. Nexata bitso anaepana. Nexata daxita bajarapamonae kujinaejinarena templobojavaberena. Bajarapamonae vaetabatsi Pablo. Robobocatsi vayafuabelia temploboēnēvecua. Nexata templobobaupaxanetonē bepíjia vecuabaupaxatabatsi. ³¹ Bajarapamonae picani Pablo jamatabēbeyaxuabatsi. Nexata bajarapaepatota itsamone tsipaeba vajabitsaē pepo pevetsinē, comandantejavabelia. Tsipaeba pacuenia daxita Jerusalén tomarapijivi bitso anaepanavanapa. ³² Nexata comandante bepíjia barēlia pijajivi vajabitsaēvi, vajabitsaēvi pijacapitānvi yajava. Cujinaejina jivi penacaetuatsijavabelia. Nexata judíovi itsa tane comandante vajabitsaēvi pebarēpatsijava, nexata judíovi copaba pebevantsi Pablo. ³³ Nexata comandante Pablo kujirenantsi. Vaetabiaexanatsi pijajivi. Comandante itoroba pijajivi Pablo pecētsinexatsi anijacadenamaētotabeje. Bajaraxuacujinae yanijoba judíovijavabelia.

—¿Detsa maçonėje? ¿Detsa xua exana maçonėje? jai comandante.

³⁴ Nexata bajarapajivi bitsaētoxanetonēyajuvēnēvi comandantejavabelia najuatsipaebanubena pinijijumeta. Nexata comandante apo jumetae xaniavaetsia bitso jivi pevavajaixae. Nexata comandante itoroba vajabitsaē Pablo pecaponaenexatsi vajabitsaē pijaboyabelia. ³⁵ Pablo capatatsi vajabitsaē pijaboitapatata. Vajabitsaē pijabo pepēnēvelia xaina beescaleracuenia pexanaejava. Nexata bajarajota Pablo vajabitsaē nacobenayotsiaya cajunayatsi vajabitsaē pijaboyalia pecajonenexatsi. Tsipaji icatsia bajarajota Pablo jivi bejitsiatsi bitso pianaepanaexae. ³⁶ Jivibitsaētoxanetonē Pablo barabocabuataponatsi. Vavajai tsabuataponae bajarapamonae.

—¡Pabeyaxuare! jai tsabuataponae Pablo yabara.

Pacuenia Pablo navajunupaeba jivibitsaētoxanetonējavabelia yabara pelivaisi

³⁷ Itsa baja Pablo vajabitsaēvi pijaboyalia cajonejitsiatsi, nexata Pablo griegojumeta jumaitis comandantejavabelia:

—Netocopare tacatsipaebinexa caejumeyo, jai Pablo.

Nexata comandante jumaitis:

—¿Xamē tsaja natsipaebame griegojume? ³⁸ ¿Xamē tsaja apo Egipto nacuapijinēmē? ¿Xamē tsaja imata jivi apo itorobimē pianaepanaenexa gobiernojavabelia? ¿Xamē tsaja imata penamaxēvanitsivi cuatro mil ponēmaxēto apo barēnajatabajiravimē petusato nacuyabelia? jai comandante Pablojavabelia.

³⁹ Nexata Pablo jumaitis:

—Jume raja. Xanē raja saicaya judíonēnē, Tarso tomarapijinēnē. Tarsotomara cajena pinijitomara daxita Cilicia nacuada penaetomaranēvecua. Pexaniacueni netoexanare. Netocopare livaisi tatsipaebinexa mapamonaejavabeliaje, jai Pablo.

⁴⁰ Nexata comandante tocopatatsi livaisi petsipaebinexa. Pablo nuca vajabitsaē pijabo pepēnēvelia beescaleracuenia pexanaejavajumeta. Pablo nacobeyota jivi pemoyanexa. Nexata baja jivi itsa moya, Pablo navajunupaeba bajarapamonaejavabelia hebreojumeta.

Pablo jumaitis:

22

¹ —Tajamonae, panenamuxunaevere. Paxamē ata vajanacua paneevetsivi, panenamuxunaevere. Vepacanavajunupaebatsi daxita xua exanjē, jai Pablo hebreojumeta judíovijavabelia.

² Bajarapajudíovi itsa jumetae palivaisi Pablo tsipaeba hebreojumeta, nexata bitso ajumejibia namuxunaevetena. Nexata Pablo icatsia jumaitis:

³ —Xanē raja judíonēnē. Naexanjē Tarso tomarata, Cilicia nacuada peecaetomarata. Itsiata vitsabajē mapatomarataje, Jerusalén tomarata. Pecujarubinē Gamaliel necujaruba. Nexata xaniavaetsia necujaruba daxita vajasalinaivi pijacuene. Nexata

picani jamatabējumaitsinē tsabiabi: “Daxita tajamatabēcueneta Dioso pejjitsipaecuenia tonacuenebianajē,” jamatabējanē tsabiabi. Bajarapacuenia aeconoxae daxita paxamē ata pajamatabēitsimē tsavanapae, jai Pablo.

⁴ Pablo icatsia jumaitsi:

—Xanē abaxē picani bajayata barajinabiabajā pamonaē jumecovēnēta pexanialivaisi, Jesucristo pelivaisi. Pamonaē jumecovēnēta Jesús pelivaisi, taicaponajē pebijivi. Taicaponajē petiriavi ata. Jebaponajē bajarapamonaē penaneconitsivi pejebabiabibota. Jitsipajē picani pebeyejebinexatsi daxita bajarapamonaē. ⁵ Sacerdotevi pepo penamatacaitorobinē, daxita judiōivtsi vajaancianovi ata, pacatsipaebijitsipa bajarapacuenia, pacuenia baja xaniavaetsia pacanavajunupaebatsi. Tspajaji bajarapamonaējavabelia vajētajē tanetsicobeyaquinaenexa cuyalato tatocaponaenexa pamonaē judiōivi jinavanapa Damasco tomaratalia. Nexata bajarapajudiōivi itsa yoroba bajarapabaxuto, tanetocopsinexa picani Jesús pelivaisi pejumecovēnētsivi tataicaenexa. Nexata jane baja picani lianē tataicaenexa daxita pexanialivaisi, Jesús pelivaisi, pejumecovēnētsivi, tacapatsinexa picani maberenaje Jerusalēn tomaraberena penaneconitsiaexanaenexatsi, jai tsanucae Pablo judiōivjavabelia.

Pacuenia Pablo navajunupaeba pacuenia taxuxuaba Jesús pelivaisi pejumecovēnētsijava yabara pelivaisi

(Hch 9.1-19; 26.12-18)

⁶ Pablo icatsia jumaitsi hebreojumeta judiōivjavabelia:

—Nexata jane baja ponajē Damasco tomarabelia. Itsa baja imoxoyotanajetarucajā Damasco tomara, jemata matonejeepatota pinijicotia nematatoyorotsia naitayota athēbēvetsica. ⁷ Nexata bajarajota irataeya bocajunuajē irata. Jumetaenucajē athēbēvetsica tanejumaitsijava: “Saulo, Saulo, ģdetsa xuajitsia xanē tajajivi netobejiobiaexanaponame?” tanejajjava. ⁸ Nexata xanē jumaitsinē: “Tajatuxanenē, ģdetsa ponēmē?” janē. Nexata icatsia jumaitsi: “Xanē raja Jesūsne, Nazaret tomarapijinēnē. Xanē raja tajajivi netobejiobiaexanaponame,” nejai. ⁹ Papebijivi yajavanajetarucajā, tane baja cajena athēbēvetsica penaitayotsicotia. Itsiata baitsi jane apo jumetae xua yabara nebarēcuaićuajai athēbēvetsica. ¹⁰ Nexata xanē jumaitsinē: “Tajatuxanenē, ģdetsa xua nexata exanaenajē?” janē. Nexata pepo petuxanenē nejumaitsi: “Nonotapunare baja. Ponaename baja Damasco tomarabelia. Bajarajotalia catsipaebiana pacuenia exanaejitsiamē,” nejai. ¹¹ Nexata bajarapacotia tataecujinae bitso nitaxutomeraviba. Apo necaģēpae tataejava. Nexata saya tayajavaponaevi necomacaponalia Damasco tomarabelia, jai Pablo judiōivjavabelia:

¹² Icatsia Pablo jumaitsi judiōivjavabelia:

—Bajarajota Damasco tomarata ponapona Ananiasvēnēnē, bitso pejumecovēnētsinē Dioso Moiséspijinēta penajumecopsilivaisi. Bajaraponē Ananias yabara daxita judiōivi, Damasco tomarapijivi, jumai tsabiabi: “Bitso raja Dioso pejumecovēnētsinē Ananias,” jai tsabiabi. ¹³ Nexata bajaraponē Ananias xanējavaberena patajopa tanetaenexa. Nexata nejumai tsanucae: “Tajabananē Saulo, icatsia rabaja itaxutoxanepaname,” nejai. Bajarapacuenia tanejumaitsijavata icatsia baja itaxutoxanepanajē. Nexata baja taniģi Ananias. ¹⁴ Nexata icatsia Ananias nejumaitsi: “Vamojivimi rabaja pijaDioso caitapeta. Caitapeta baja neyapētaenexa pacuenia catoģitsipa netoexanaenexa. Caitapetana netaenexa Dioso pitabarata Jesús pepo planeconijibinē. Caitapetana nejumetaenexa Jesús pecatsipaebilivaisi. ¹⁵ Nexata ponaename daxitanacuneģijivjavabelia netsipaebanajetarucaenexa pacuenia taneme, pacuenia ata jumetaneme Jesús pelivaisi. ¹⁶ ģDetsa nexata xuajitsia abaxē najamatabējematsia ponaponame? Nonotapunare. Cabautisabiana. Jesūsjavabelia nenajamatabēcuenecopsixae, daxita pibisiacuene nexanaeconimi cavecuajibiaexanaena,” nejai Ananias, jai Pablo judiōivjavabelia.

Pacuenia Pablo itorobatsi Dioso pitorobilivaisi petsipaebaponaenexa apo judiōivjava yabara pelivaisi

¹⁷ Pablo icatsia jumaitsi hebreojumeta judiōivjavabelia:

—Bajaraxuacujinae Damasco tomaraverena naviarenajē baja Jerusalēn tomaraberena. Nexata itsa patajē Jerusalēn tomarata, ponajē templobojavabelia tavajētsinexa Diosojavabelia templobota. Nexata tavajētsijavata Diosojavabelia, taniģi bemajitsinaebota pepo petuxanenē Jesús. ¹⁸ Nexata Jesús nejumaitsi: “Naxanitsiayo bepiģia vecuaponare Jerusalēntomara. Tspajaji raja mapatomarapijivije apo cajumecovēnētsi tsane netsipaebijava xanē talivaisi,” nejai Jesús bemajitsinaebota. ¹⁹ Nexata xanē jumaitsinē: “Tajatuxanenē, bajarapamonaē judiōivi xaniavaetsia baja cajena neyapētane. Bajarapamonaē neyapētane judiōivi penacaetuatabiabinējava tataicaponaējava daxita pamonaē cajumecovēnēta taconibabeyabiabinexa naebota. ²⁰ Bajarapamonaē neyapētane xanē ata

bajaramonae jamatabëcuenejēpaeya tataenucaejava pamatacabi Estebanpijinē, pecalivaisipaebinēmi, beyaxuabatsi. Bajaramatacabi, pamonae Estebanpijinē beyaxuabatsi, penajumajonejebijavanē tovetanucajē,” janē pepo petuxanenē Jesúsjavabelia. ²¹ Nexata pepo petuxanenē nejumaitsi: “Ponare baja Jerusalén tomaravecua. Caitorobijitsiatsi raja itsanacuanēpijivijavabelia, apo judiōvijavabelia,” nejai pepo petuxanenē, jai Pablo judiōvijavabelia.

Pacuenia Pablo exanatsi vajabitsaē pepo pevetsinē comandante yabara pelivaisi

²² Judiōvi namuxunaevetatsi Pablo penavajunupaebijava. Nexata itsa jumentane judiōvi pacuenia Pablo navajunupaeba, nexata icatsia judiōvi vavajai tsaponae pinijijumeta. Jumai tsaponae:

—jMaponēje pabeyaxuare! jMara pitsinē apo becopsatsi peponaponaenexa matavējēajel jai tsaponae judiōvi Pablo yabara.

²³ Bajaramonae pinijijumeta vavajai tsaponae. Pijacamisajumavelia penaxatabijavanē, vebabia bitso pianaepanaexae. Atsabenonē cayajabajarabarena Pablojavaberenena pebaraanaepanaexaetsi. ²⁴ Nexata vajabitsaē pepo pevetsinē, comandante, pijajivi itoroba Pablo pecajonexatsi vajabitsaē pijaboyalia. Comandante itoroba pijajivi Pablo picani pejumatitibabenexatsi penaconitsivi pejumaconitabiabimacata. Bajaramonae picani Pablo exanaejitsiatsi Pablo petsipaebinexa vajabitsaējavabelia xua yabara judiōvi neconitsiaya pinijicuenia vavajai tsaponae Pablo yabara. ²⁵ Nexata jane baja Pablo itsa cētetatsi vajabitsaē picani pejumatitibabenexatsi, nexata Pablo jumaitsi bajarajota penucaenē vajabitsaē pijacapitánjavabelia:

—Xanē raja Romano nacuapijinēnē. Nexata itsa panejumaconibabejitsipame abaxē copiaya neneconitsinejeva juezumonae pitabarata, nexata panevemaxēnaneconitsipame. Tsipaji nijatuxanenē, Romanonacua pepo pevetsinē, pacaitaveta bajarapacuenia paneexanaeyaniva, jai Pablo vajabitsaē pijacapitánjavabelia.

²⁶ Capitán itsa jumentane bajarapacuenia Pablo pejumaitsijava, nexata capitán lia vajabitsaē pepo pevetsinē comandantejavabelia. Capitán jumaitsi comandantejavabelia:

—Xania baja tsane pacuene exanaejitsiamē Pablojavabelia. jMaponēje Pablo Romano nacuapijinē baja cajena! jai capitán comandantejavabelia.

²⁷ Nexata comandante rena Pablojavaberenena. Jumaitsi Pablojavabelia:

—¿Xaniajai tsabaja? ¿Xamē Romano nacuapijinēmē? jai comandante.

—Jājā, jai Pablo.

²⁸ Nexata comandante jumaitsi Pablojavabelia:

—Xanē ata baja maparucajeje Romano nacuapijinēnē naexanjē. Tsipaji baja matamotajē ayaimatamota bepepo Romano nacuapijinēnē tanaexanaenexa, jai comandante.

Bajarapacuenia jumaitsi tsipaji comandante saicayanacua penaexanaenē.

Pablo nexata jumaitsi comandantejavabelia:

—Xanē apo matamotsinē. Tsipaji baja cajena pepo Romano nacuapijinēnē. Naexanjē cajena Romano nacua, jai Pablo comandantejavabelia.

²⁹ Nexata picani pavajabitsaē Pablo jumaconibabejitsiatsi, vecuaponatsi baja. Vajabitsaēvi pepo pevetsinē ata, comandante, Pablo cujunavatsi itsa yapētanetsi Pablo Romano nacuapijinēcuene. Cujunavatsi pecētsiaexanaexaetsi cadenamaētonēta.

Pacuenia Pablo navajunupaeba daxita judiōvi pevetsivi pitabarata yabara pelivaisi

³⁰ Pablo penavajunupaebicujinae Romano nacuapijinēcuene, meravia pitsijavata, vajabitsaē pepo pevetsinē, comandante, jamatabēyapētane xaniavaetsia paneconi yabara judiōvi neconitsijitsiatsi Pablo. Nexata comandante pijajivi itoroba Pablo pevecuaisinaenexatsi cadenamaēto. Nexata comandante junata sacerdotevi penamatacaitorobivi, judiōvi pijaancianovi ata yajava, judiōvi pecujarubivi ata yajava, penacaetuatsinexa. Nexata caponarenatsi Pablo, penutsinexatsi daxita penacaetuatsivi pitabarata.

23

¹ Pablo naēcota daxita penacaetuatsivi. Nexata Pablo jumaitsi bajarapamonaejavabelia: —Tajamonae, xaniavaetsia cajena ponaponabiabajē najamatabëcuenebijianaenejevanē Dioso pitabarata mapamatacabijavaberenena ataje, jai Pablo bajarapamonaejavabelia.

² Nexata Ananías, sacerdotevi pepo penamatacaitorobinē, jumaitsi Pablo pimoxoyotanubenaevitsijavabelia:

—Pacuibotsaquibiaxuabare Pablo, jai Ananías, sacerdotevi pepo penamatacaitorobinē.

³ Nexata Pablo jumaitsi Ananíasjavabelia:

—jDioso rajane juya pepacuene xamē catsaquibiaxuabiana! Xamē majotaje ecame taneneconitsinexamē. Tsipaji xamē xanē yabara jamatabëcuenenavēxaniabiaya jamatabējumaitsimē: “Maponēje Pablo naneconita Diosojavabelia,” jamatabējamē. Nexata

xamē nijacuata naneconitame nijagobiernojavabelia. Tspijaji itorobame mapamonaeje tanetsaquibiaxabina taaneconijibinē, jai Pablo Ananíasjavabelia.

⁴ Bajarajota penubenaevi jumaitsi Pablojavabelia:

– Xamē raja jumeitavetame Dioso pijajivitonē, sacerdotevi pepo penamatacaitorobinē, jai bajarapamonae Pablojavabelia Ananías yabara.

⁵ Nexata Pablo jumaitsi:

– Tajamonae, xanē apo yapētaenē Ananías sacerdotevi pepo penamatacaitorobinēcuene. Itsa yapētaejitsipajē, apo jumaitsinē tsipae bajarapacuenia. Tspijaji Dioso pejumelivaisibaxutota jumaitsi mapacueniaje: “Pētsa jumeitavetame pecaevetsinē,” jai Dioso pejumelivaisibaxutota, jai Pablo Ananías yabara.

⁶ Nexata Pablo jamatabēcuenyapētane penacaetuatsivi. Tspijaji penacaetuatsivi caelivaisi apo xainae. Jamatabēcuenyapētaneme itsamonae pecatsitecaejava saduceovi pecujarubicuene. Jamatabēcuenyapētane itsamonae pijinia pecatsitecaejava fariseovi pecujarubicuene. Nexata Pablo pinijijumeta jumaitsi:

– Tajamonae, xanē raja fariseonē. Fariseovi pecujarubicuene jumecovēnētajē. Taxapijinē baja cajena fariseonē. Tamojivimi ata cajena fariseovi. Majotaje neneconitsijitsia. Tspijaji jivi petēpaecujinae Dioso icatsia piasaēyaexanaejavanexa, jumecovēnētajē, jai Pablo.

⁷ Bajarapamonae ita jumetane bajarapacuenia Pablo pejumaitsijava, nexata najumeanaenota fariseovibeje saduceovibeje. Bajarapamonae nexata apo najamatabēcuenejēpaebaja. Nexata anaeya bajarajota navecuanatsana baja. ⁸ Saduceovi jumeaebabiaba fariseovi pejumecovēnētsilivaisi. Nexata saduceovi jumai tsabiabi:

– Jivi petēpaecujinae, acuenebi icatsia Dioso piasaēyaexanaejava. Ajibi raja cajena Ángelevi. Ajibi raja cajena petēpaevi ata pejumape, jai tsabiabi saduceovi.

Fariseovi jumecovēnēta jivi petēpaecujinae Dioso icatsia piasaēyaexanaejavanexa. Jumecovēnētanua Ángelevi ata pejinavanapaejava. Jumecovēnētanua petēpaevi ata pejumape pejinavanapaejava. ⁹ Apo penajamatabēcuenejēpaexae, daxita bajarapamonae bajarajota pinijijumeta vavajai tsaponae. Nexata pamonaē judiōvi pecujarubivi, fariseoviyajuvēnēvi, nonobapuna. Anaeya jumaitsi saduceovijavabelia:

– Itsacuene ata cajena pibisiacuene apo exanae maponē Pabloje. Xaniajai meta cajena. Petēpaevivi pejumape tsipaebatsi. Itsa jume, ángel meta tsipaebatsi. Paxanē nexata itsacuene ata apo paexanaenē tsane Pablojavabelia Diosojavabelia patananecotsiyaniva, jai fariseovi saduceovijavabelia.

¹⁰ Nexata bajarapamonae pinijicuenia nabijataeya najumeanaenotapona. Nexata vajibitsaē pepo pevetsinē, comandante, belia jamatabējumaitsi: “Pablo meta baja bajarapamonae beyaxuabianatsi,” jamatabējai. Nexata comandante junata pijajivi peponaenexa. Pablo baja jutatsi bajarapamonavecua. Comandante itoroba pijajivi Pablo pecaponaenexatsi vajibitsaē pijaboyabelia.

¹¹ Nexata bajarapameravi Jesús tsitanaitajētatsi Pablo. Jesús nuca Pablo pemuxuneneta. Jumaitsi:

– Ajamatabēcuenesaēmēre nevajēnaeyabelia. Pacuenia tsipaebame xanē talivaisi majotaje Jerusalén tomarata, bajara icatsia pacuenia tsipaebianame xanē talivaisi Roma tomarata ata, jai Jesús Pablojavabelia.

Pacuenia picani Pablo judiōvi jamatabēbeyaxuabatsi yabara pelivaisi

¹² Pablo petsitanaitajētsicujinaetsi Jesús, meravia pitsijavata, judiōvi nacaetuata. Najamatabēcuenyana jana baja picani Pablo pebeyaxuabianatsi. Nexata picani pebeyaxuabivajēnaetsi, bajarapamonae najumecapanepaeya najumaitsi:

– Vaxaitsi apo xae tsanetsi itsacuenejavayo ata. Mera ata apo apae tsanetsi. Matapania baja Pablo beyaxuabianatsi, nabanianatsi. Mera ata apaenatsi, najai bajarapamonae.

¹³ Pamonaē picani Pablo jamatabēbeyaxuabatsi, cuarenta ponēbeje pematatsēnē. ¹⁴ Bajaraxuacujinae bajarapamonae pona sacerdotevi penamatacaitorobivijavabelia. Pona judiōvi pijaancianovijavabelia ata. Tspijaji bajarapamonae caejavata nacaetuata. Nexata pamonaē cuarenta ponēbeje, pamonaē picani Pablo jamatabēbeyaxuabatsi, jumaitsi sacerdotevi penamatacaitorobivijavabelia, judiōvi pijaancianovijavabelia ata:

– Paxanē rajane baja najumecapanepaeya panajumaitsinē: “Vaxaitsi apo xae tsanetsi itsacuenejavayo ata. Matapania baja Pablo beyaxuabianatsi, nabanianatsi,” panajanē.

¹⁵ Nexata paxamē sacerdotevi panenamatacaitorobivi, paxamē ata judiōvi papijaancianovimē, panacaetuatsianame judiōvi pecujarubivi yajava panenabarēcuaicuijainexa. Nexata daxita paxamē patonajumeitorobianame cuyalatota vajibitsaē pepo pevetsinē, comandantejavabelia. Pavajētsianame comandantejavabelia papecatocarenanexa Pablo. Pa-jumaitsimē tsane yamaxēitororobiya comandantejavabelia: “Pajitsipajē icatsia matavējēja

patayanijobijava Pablo, pijaneconi patayapëtaenexa xaniavaetsia, paneconi xaina,” pamamë tsane. Nexata paxanë epatotalia pavajënaevetsianajë Pablo. Itsa rena, patabeyaxuabineza patsinejeva maberenaje, jai pamonae cuarenta ponëbeje, pamonae picani Pablo jamatabëbeyaxuabatsi.

Nexata sacerdotevi penamatacaitorobivi, judiövi pijaancianovi ata, jejai comandantejavabelia petonajumeitorobinexa Pablo pecarenanexatsi.

¹⁶ Itsiata baitsi jane Pablo pematapijiva pexenato jumetane Pablo pevajënaevetsiapaebijavatsi pebeyaxuabinezatsi picani. Nexata bajaraponë pona vajabitsaë pijaboyabelia. Itsa baja bajaraponë joneya vajabitsaë pijaboyalia, bajarapalivaisi tsipaeba Pablojavabelia. ¹⁷ Nexata bajaraxuacujinae Pablo junata caenë vajabitsaë pijacapitan. Pablo jumaitssi:

–Barëponare mapapevëjëatoje papecanamatacaitorobinë, comandantejavabelia. Itsalivaisiyo xaina petsipaebineza, jai Pablo.

¹⁸ Nexata Pablo piopaxa capitán barëponatsi vajabitsaë pepo pevetsinë, comandantejavabelia. Nexata capitán jumaitssi comandantejavabelia:

–Naneconitsia raja peponaponaenë Pablo nejunata. Nexata nitoroba tabarëponaenexa mapapevëjëatoje xamëjavabereana. Tspaji pina catsipaebijitsia itsalivaisiyo, jai capitán comandantejavabelia.

¹⁹ Nexata comandante cobepitatsi pevëjëato. Barëliatsi pesaicaeyojavabelia. Comandante nexata jumaitssi pevëjëatojavabelia:

–¿Detsa pitsilivaisi xainame tanetsipaebinezamë? jai.

²⁰ Nexata pevëjëato jumaitssi:

–Sacerdotevi penamatacaitorobivibeje, judiövi pijaancianovibeje, najamatabëcueneyanaba pecavajëtsinexa meravia netocalianexa Pablo bajarapamonaejavabelia. Bajarapamonae cayamaxëitojorobiaya cajumaitsiapaebi: “Pajitsipajë icatsia matavëjëa patayanijobijava Pablo, pijaneconi patayapëtaenexa xaniavaetsia, paneconi xaina,” cajaiyapaebi bajarapamonae. ²¹ Itsiata pëtsa jumecovënëtame bajarapamonae. Tspaji cuarenta ponëbeje pematatsënëa namatayabiaya epatota Pablo vajënaevetsiapaebatsi pebeyaxuabinezatsi. Bajarapamonae daxita najumecapanepaeya najumaitssi baja: “Apo xae tsanetsi itsacuenejavayo ata. Mera ata apo apae tsanetsi. Matapania baja Pablo beyaxuabianatsi, nabanianatsi. Mera ata apaanatsi,” najai baja capanepaeya bajarapamonae. Aeconoxae saya bajarapamonae eveta Pablo necalijava, jai pevëjëato comandantejavabelia.

²² Nexata comandante jumaitssi pevëjëatojavabelia:

–Pëtsa tsipaebame itsajivi ata tanetsipaebilivaisimë, jai comandante. Bajaraxuacujinae pevëjëato baja itorobatsi caevëalia.

Pacuenia Pablo itorobatsi nacuaevetsinë Félixjavabelia yabara pelivaisi

²³ Vajabitsaë pepo pevetsinë, comandante, junata anijanëbeje, vajabitsaë pijacapitanbeje. Jumaitssi:

–Panaxaniavaetsiaexanarebeje vajabitsaë petaxuta peponaevinexa doscientos piontos ponëmamaxëto, setenta pijinia ponëbeje caballogumata peponaevinexa, doscientos pijinia ponëmamaxëto becuerereboxanetonë, lanzavënëjavanë, pecaponaevinexa. Panaxaniavaere paneponaenexa Cesarea tomarabelia ajena, mapameravitaje, bejamatabëcuene a las nuevejava. ²⁴ Itsacaballobeje pijinia Pablo peyaponaenexa, patoxaniavaere. Xaniavaetsia evetsiaya pacaponaename Pablo nacuaevetsinë Félixjavabelia, jai comandante capitánbejejavabelia.

²⁵ Bajaraxuacujinae comandante tscobeyaquina cuyalatobaxuto pitorobinexa nacuaevetsinë Félixjavabelia. Comandante peyaquinaecuyalatobaxutota jumaitssi mapacueniaje:

²⁶ “Félix, pecayiyataenë, nacua nevetsinë. Xanë raja Claudio Lisiasvënënenë catoyaquinatsi. Cabajacobatsi. ²⁷ Judiövi raja vaetabatsi ponë catoitobaliatsi, Pablovënënenë. Beyaxuabijitsiatsi picani. Nexata itsa vënëlivaisitaniji Pablo Romano nacuapijinëcuene, sivalianë. Tajajivi vajabitsaë taneyavenonaecueneta yacajëretajë judiövi pecobevecu, ajena baja picani beyaxuabijitsiatsi. Nexata caponaeyaexanajë tajajivi vajabitsaë pijaboyabelia. ²⁸ Bajaraxuacujinae sacerdotevi penamatacaitorobivi pitabarata, judiövi pijaancianovi ata pitabarata, judiövi pecujarubivi ata pitabarata, nutsiaexanajë. Bajarapacuenia nutsiaexanajë bajarapamonae pitabarata tayapëtaenexa jane baja picani paneconi yabara Pablo judiövi neconitsijitsiatsi. ²⁹ Itsiata baitsi jane Pablo itsacuenecononi ata apo xainae, paneconi yabara beyaxuabijitsiatsi, paneconi yabara ata etsijitsiatsi penaneconitsivi pejebabiabibota. Judiövi saya Pablo neconitsijitsiatsi judiövi pijasalinaivi pijacuene yabara. ³⁰ Nexata itsajivi netsipaeba judiövi namutoepatota Pablo

pevajēnaevetsiapaebijavatsi pebeyaxuabinexatsi. Bajaraxuata nexata najamatabēxainajē Pablo tacatoitorobinexa xamējavabelia. Nexata pajudīovi Pablo neconitsijatsiatsi, itorobajē peneconitsinexatsi xamē nitabarata. Bajara masaya daxitajumeyoje,” jai mapacueniaje comandante petoyaquinaebaxutota nacuaevetsinē Félixjavabelia.

³¹ Nexata vajabitsaē exana baja pacuenia itorobatsi comandante. Bajarapameravi vajabitsaē baja Pablo caponaliatsi Antīpatris tomarabelia. ³² Nexata meravia pitsijavata bajarapavajabitsaēyajuvēnēvi, petaxuta peponaevi, Antīpatris tomarata naviabarena baja pijaboyaberena. Pamonaē caballojumata peponaevi, pevājēnaeyabelia abaxē caponaliatsi Pablo. ³³ Caponaliatsi Cesarea tomarabelia. Nexata Cesarea tomaratalia vajabitsaē rajuta petocaponaecuyalotobaxuto nacuaevetsinē Félixjavabelia. Yajavarajutanua Pablo bajaraponē pecobeyabelia. ³⁴ Nexata nacuaevetsinē Félix leba baja petocapatsicuyalotobaxutotsi. Bajaraxuacujinae nacuaevetsinē Félix jumaitsi Pablojavabelia:

—¿Detsa panacuapijinēmē? jai.

Nexata Pablo jumaitsi:

—Xanē raja Cilicia nacuapijinēnē, jai.

Nexata yapētanetsi Pablo Cilicia nacuapijinēcuene. ³⁵ Nexata icatsia nacuaevetsinē Félix jumaitsi Pablojavabelia:

—Cajumetaenatsi abaxē itsa parena judīovi pecaneconitsivinexa, jai nacuaevetsinē Félix.

Bajaraxuacujinae nacuaevetsinē Félix itoroba pijajivi xaniavaetsia pevetsinexatsi Pablo. Nexata Pablo evetatsi Herodespijinē pexanaeyaexanaebota.

24

Pacuenia Pablo navajunupaeba nacuaevetsinē Félix pitabarata yabara pelivaisi

¹ Pablo Cesarea tomarata penaneconitsiaexanaecujinaetsi, cinco pamatacabibejecujinae, Ananias, sacerdotevi pepo penamatacaitorobinē, parena Cesarea tomaraberena. Parena judīovi pijaancianovi yajava, Tértulovēnēnē yajava. Tértulo abogadonē, jivi peneconitsicuene peyapētaenē. Bajaraxuata judīovi junata bajaraponē petocuaicuaijainexatsi nacuaevetsinē Félixjavabelia. Nexata judīovi, Tértulo yajava, nubena nacuaevetsinē Félix pitabarata peneconitsinexatsi jane baja Pablo. ² Itsa caparenatsi Pablo, nexata Tértulo taxuxuaba peneconitsijavatsi Pablo. Tértulo jumaitsi nacuaevetsinē Félixjavabelia mapacueniaje:

—Pecayaiyataenē nacua nevetsinē. Xaniavaetsia nevetsixae mapanacuaje, bajayajebi xaniavaetsia pajinavanapajē. Xamē nejamatabēcueneta daxita mapanacuapijicuene, xua abeje picani, xanibiaexanaponame pevājēnaeyabelia. ³ Nexata pabarēyanē patanetoexanaejavamē yabara daxita mapanacuajavaje. Bajaraxuata pexaniajamatabēcuene pacarajutatsi. ⁴ Caepatoyo saya pacajamatabēitonotatsi. Pexaniacuene panetoexanare. Panenamuxunaevere caejumeyobeje. ⁵ Payapētaniji baja cajena maponēje Pablo bitso piacujirubejenēcuene. Daxitanacuanējava, itsaxuayo judīovi jinavanapa, itorobapona pianaepanaenexa judīovi penavecuansanaenexa. Mara ponēje Nazaret tomarapijinēmi petsipaebilivaisi pejumecovēnētsivi, penamatacaitorobinēje. ⁶ Mara ponēje Dioso pijatemplobo Jerusalén tomaratalia jamatabēbijiana picani. Tspiji apo judīovi barējonēya temploboēnēalia. Bajaraxuata pavaetabajē. Nexata pacuenia paneitoroba pajudīovinē patajalivaisi, jamatabēpabeyaxuabajē picani penaneconitsixae. ⁷ Itsiata baitsi jane itacarajeta vajabitsaē pepo pevetsinē, comandante Lisias, barēpata pijajivi. Pinijsaēta paneyacajērēta Pablo. Nexata comandante Lisias panejumaitsi: “Pajivi jamatabēneconita Pablo, ponae nacuaevetsinē Félixjavabelia bajaraponē pitabarata peneconitsinexa,” panejai. ⁸ Nexata itsa yanijobianame maponēje Pablo, yapētaename baja daxita pacuenia xaniavaetsia pacatsipaebatsi Pablo pexanaejava yabara, jai Tértulo mapacueniaje nacuaevetsinē Félixjavabelia.

⁹ Judīovi bajarajota Tértulo pemuxuneneta penubenaevi ata neconitsi Pablo. Bajarapajudīovi jumaitsi nacuaevetsinē Félixjavabelia:

—Xaniajai rabaja Tértulo. Daxita pacuenia Tértulo cajumaitsi, bajarapacuenia exana Pablo, jai judīovi nacuaevetsinējavabelia.

¹⁰ Nacuaevetsinē Félix nacobeyota juya Pablo pitorobinexatsi Pablo jane baja penavajunupaebinxaxa nacuaevetsinē Félix pitabarata. Nexata Pablo jumaitsi nacuaevetsinē Félixjavabelia:

—Yapētaniji baja cajena xamē bajayajebi mapanacuapijivi nenaneconitsiaexanabiabijava. Bajaraxuata barēyanē tacatsipaebinxaxa xua exanajē. ¹¹ Nexata taxaniajajumeta catsipaebianatsi. Itsa yanijobijitsipame itsamonaejavabelia ata, nexata catsipaebijitsipa pacuenia aeconoxae catsipaebianatsi. Ajena raja abaxē saya xainajē doce pamatacabibeje tapatsicujinae Jerusalén tomarata. Patajē najamatabēcuene copatsiaya tanavajētsinexa Diosojavabelia templobota. ¹² Bajarapatemplobota judīovi apo netae tabarēcuaijuajava

itsajivi ata. Apo netaenua judiõvi penacaetuatabibonëjåva jivi taitorobijåva pi-
anaepanaenexa. Apo netaenua tomaranëjåva ata taitorobijåva jivi pianaepanaenexa.
13 Nexata acuenebi itsajivi ata pejumaitisijåva xanë yabara: “Xanë raja pepacuene taniji
xua Pablo exana,” pejåjava. Tspaji itsajivi ata apo netae pibisiacuene taexanaejåva.
14 Nexata pacuene yabara catsipaebijitsiatsi, xaniajanë cajena. Patajasalinaivi pijaDioso
jumecovënëtsiaponaponajë. Tonacuenebaponaponajë. Pejanajamatabëcueneta Dioso jumecovënëtsiaponaponajë. Baitsi pexanialivaisi, Jesucristo pelivaisi, jumecovënëtsiaponaponajë. Bajara palivaisi yabara judiõvi jumaitis tsabiabi: “Apo pexaniajailivaisi cajena bajarapalivaisi. Dioso baja cajena apo nacatocopatsi vajajumecovënëtsinexa bajarapalivaisi. Dioso baja cajena apo nacatocopatsi vajajumecovënëtsinexa bajarapalivaisi. Dioso baja cajena apo nacatocopatsi vajajumecovënëtsinexa bajarapalivaisi. Dioso baja cajena apo nacatocopatsi vajajumecovënëtsinexa bajarapalivaisi. Dioso baja cajena apo nacatocopatsi vajajumecovënëtsinexa bajarapalivaisi.”
15 Mapajudiõvi nubenaje, jumecovënëta mapacuena pejumaitsilivaisije: “Dioso icatsia asaëyaexanaena petëpaevimi,” pejailivaisi. Xanë ata bajarapalivaisi jumecovënëtajë. Baitsi daxita pamonaetëpa, pexaniajamatabëcuenevimi, pibisijamatabëcuenevimi ata, itsamatacabi icatsia Dioso asaëyaexanaena. 16 Bajaraxuata bitso jitsipajë xaniavaetsia taponaponaejåva tanajamatabëcuenebijaaneyaniva Dioso pitabarata, tanajamatabëcuenebijaaneyaniva daxitajivi ata pitabarata, jai Pablo nacuaevetsinë Félixjavabelia.

17 Icatsia Pablo jumaitis nacuaevetsinë Félixjavabelia:

—Caevaimaxëtë baja cajena ajibinë tsarucae Jerusalén tomaravecuia Dioso pitorobilivaisi jivi tatsipaebinexa daxitanacuanëjåva. Bajaraxucujinae icatsia naviatajë Jerusalén tomarabelia. Tocopaliajë ofrenda tarajutsinexa bepejiõbivi. Patajë picani templobota ofrenda tarajutsinexa Diosojavabelia. 18 Itsa baja veretajë templobota tanajamatabëcuenexaniaavaetsijåva Diosojavabelia tajamatabëcuenesaënexa, tarajutsinexa picani bajarapaofrenda Diosojavabelia, nexata bajarapaopatota judiõvi, Asiavënë nacupijivi, necaxitajaraba templobota. Nexata nevaetaba taneneconitsiaexanaenexa. Itsa necaxitajaraba templobota, apo yajavanucaenë ayaibitsaëtõ. Daxita templobopijivi yãijai. Templobopijivi ajumejibia jinavanapa. 19 Bajara baitsi jane pamonaetëpa, Asiavënë nacupijivi, tanetaevi templobota, bepatsirena maberanaje taneneconitsinexa jane baja itsa necuenetane pibisiacuene taexanaejåva. 20 Itsa jume, nexata mapamonaetje, nitabarata penubenaevi, vecae taitabëtã catsipaebi, itsa netane pibisiacuene taexanaejåva pamatacabi nucajë sacerdotevi penamatacaitorobivi pitabarata, judiõvi pijaancianovi ata pitabarata, judiõvi pecujarubivi ata pitabarata. 21 Saya meta caelivaisiõ bajarapamonae catsipaebiana xanë talivaisi. Tspaji pamatacabi nucajë judiõvi pijaancianovi pitabarata, ayajumeta jumaitisinë: “Mapamatacabitaje neneconitsiana. Tspaji jivi petëpaecujinae Dioso icatsia piasaëyaexanaejavanexa, jumecovënëtajë,” janë. Nexata meta bajarapacuenia tajumaitisijåva yabara bajarapamonaetë jamatabënenconita xamëjavabelia, jai Pablo nacuaevetsinë Félixjavabelia.

22 Nacuaevetsinë Félix xaniavaetsia yapëtane daxitanacuanëjåva jivi pejumecovënëtaaponaejåva Jesucristo pelivaisi. Nexata nacuaevetsinë Félix pejumetaecujinae Pablo petsipaebilivaisi, nacuaevetsinë Félix naviabiaexana baja pamonaetëpa picani Pablo neconitsijitsiatsi. Nexata nacuaevetsinë Félix jumaitis Tértulobanajjavabelia, Jerusalén tomaraverena pepatsivijjavabelia:

—Itsa patsiarena vajabitsaëtë pepo pevetsinë, comandante Lisias, yapëtaenajë pacuenia exanaejitsianë Pablojavabelia, jai.

23 Nexata nacuaevetsinë Félix jumaitis vajabitsaëtë pijacapitånjavabelia:

—Pablo barëevetsianame xaniavaetsia penajetabajiraviyaniva. Itsiata tocopatsianame peponaponaenexa bajarajota pacëtinsinejavamë. Tocopatsianamenua peyapëtaevitsi pesivaxainanexatsi perajutsinexatsinua penamatavenonaejavaxi, jai nacuaevetsinë Félix vajabitsaëtë pijacapitånjavabelia.

24 Bajaraxucujinae, caematacabibejecujinae, nacuaevetsinë Félix icatsia pata pijåva yajåva, Drusilavënëva. Drusila judiõva. Nexata nacuaevetsinë Félix itoroba pijajivitonë petojunatsinexatsi Pablo. Nexata Pablo itsa pata, Pablo livaisi tsipaeba nacuaevetsinë Félixjavabelia. Pablo tsipaeba jivi penajamatabëcuenebapabaponaejåva Jesucristojjavabelia. 25 Pablo tsipaebanua Dioso pitorobijåva jivi pejinavanapaenexa pibisiacuene exanaenejeva Dioso pitabarata. Pablo tsipaebanua jivi xaniavaetsia penaevetsijavanexa pevitota pibisiacuene pexanaeyaniva. Pablo tsipaebanua itsamatacabi Dioso peneneconitsiaexanaejavanexa pibisiacuene pexanaevi. Nexata nacuaevetsinë Félix itsa jumetane bajarapacuenia Pablo petsipaebilivaisi, najunaviaca. Nexata bajarajota nacuaevetsinë Félix jumaitis Pablojavabelia:

—Pitsapare baja abaxë. Icatsia cajunatsianatsi itsajota cuenesajinajë, jai nacuaevetsinë Félix.

²⁶ Nacuaevevtsinē Félix jamatabējumaitsi Pablo yabara:

–Pablo meta nerajutsiana palata tacopatsinexa penaneconitsijavavecu, jamatabējai. Bajaraxuata Félix anijatonē pijajivi itorobabiaba Pablo petojunatsinexatsi pebarēcuaiacuajainexatsi. ²⁷ Anijavaibeje bajarapacuenia Félix pijajivi itorobabiaba Pablo petojunatabinexatsi. Belia baja Félix vecuapitsapa nacua pevetsicue. Nexata juya itsanē, Porcio Festovēnē, tocopatatsi bajarapanacua pevetsinexa. Félix baja pitsapae ata, itsiata Félix pejamatabēcueneta Pablo apo tocopatsitsi pepitsapaenexa penaneconitsijavavecu. Bajarapacuenia Félix exana judiōvi pesivajamatabēcueneta barēyanexatsi.

25

Pacuenia Pablo navajunupaeba pejananacuaevevtsinē Festo pitabarata yabara pelivaisi

¹ Festo patajopa Cesarea tomarata pexanaenexatsi nacuaevevtsinēnexa. Pepatsicujinae, acueyabi pamatacabibejucujinae, Festo baja pona Cesarea tomaravecu. Pona Jerusalēn tomarabelia. ² Nexata Jerusalēn tomaratalia sacerdotevi penamatacitorobivi Pablo neconitatsi pepēya nacuaevevtsinē Festojavabelia. Neconitatsinua judiōvi ata, pamona petuxanevi. ³ Bajarapamonae pinijucuenia vajēta nacuaevevtsinē Festojavabelia petocapatsinexatsirena Pablo Jerusalēn tomaraberena. Bajarapacuenia vajēta tsipaji baja cajena bajarapamonae najamatabēcuenevereta picani Pablo pebeyaxuabiaexanaenexatsi namutoepatota. ⁴ Nexata nacuaevevtsinē Festo jumaitsi bajarapamonaejavabelia:

–Pablo raja naneconitsia ponapona Cesarea tomarata. Xanē raja caematacabibejucujinae ponaejitsinē Cesarea tomarabelia. ⁵ Pablo pibisiacue ne itsa exana, nexata papecanamatacitorobivi tapēta naponaeena Cesarea tomarabelia peneconitsinexa Pablo, jai nacuaevevtsinē Festo bajarapamonaejavabelia.

⁶ Bajarapacuenia nacuaevevtsinē Festo pejumaitsicujinae, nacuaevevtsinē Festo abaxē ponapona Jerusalēn tomarata ocho pamatacabibeje. Itsa jume, diez meta pamatacabibeje. Bajaraxuacujinae pona jane baja Cesarea tomarabelia. Nexata meravia pitsajivai nacuaevevtsinē Festo eca itsajota nacuaevevtsinē ecabiaba jivi penaneconitsiaexanaenexa. Nexata pijajivi itoroba petocapatsinexatsi Pablo. ⁷ Pablo itsa joneya, nexata judiōvi, Jerusalēn tomaraverena pepatsivi, matatoyorotsia imoxoyotatsi Pablo. Najumetsēnētsiaya neconitatsi beayaineoni pexainaenēcuenia. Itsiata baitsi jane xua yabara picani Pablo neconitatsi picani, bajarapamonae apo jumenamatamotsi peneconitsijavatsi. ⁸ Nexata Pablo nayajivijumaitsi peneconitsiyanivatsi:

–Itsacue ne ata pibisiacue ne apo exanaenē. Nexata xanē judiōvi pitorobilivaisijavabelia, templobojavabelia ata, Romanonacua pepo pevetsinējavabelia ata, apo naneconitsinē, jai Pablo nacuaevevtsinē Festojavabelia.

⁹ Nexata nacuaevevtsinē Festo yanijoba Pablojavabelia judiōvi pejamatabēcuenetarēyanexa nacuaevevtsinē Festojavabelia. Nacuaevevtsinē Festo Pablojavabelia jumaitsi mapacueniaje:

–¿Tsitipame tsaja neponaejava Jerusalēn tomarabelia bajarajotalia pecaneconitsinexa taitabarata mapacue ne yabaraje? jai nacuaevevtsinē Festo Pablojavabelia.

¹⁰ Pablo nexata jumaitsi:

–Nucajē rabaja majotaje xamē nitabarata. Tsipaji nijatuxanenē, Romanonacua pepo pevetsinē, itoroba majotaje peneconitsinexatsi pibisiacue ne pexanaevi. Bajaraxuata apo beneitorobimē itsajavabelia taneneconitsinexamē. Itsacue ne ata pibisiacue ne apo exanaenē judiōvijavabelia. Bajarapacue ne xamē xaniavaetsia yapētaneme baja cajena. ¹¹ Itsa pepacue ne naneconitsipajē, nexata itsa nebeyaxuabijitsia tajaneoni yabara, nexata apo najamatabēxainaenē tsipae tavecuapanepaenexa tatēpaejava. Itsiata baitsi jane pacuenia mapamonae neneconitsiajumaitsije, apo xaniajai cajena. Nexata acue nebi itsajivi ata tanecanajetsijava mapamonae pecobeyabeliaje saya aneconijibia tanebeyaxuabinexa. Nexata jane baja xanē cavajētatsi taneitorobinexamē nijatuxanenējavabelia, Romanonacua pepo pevetsinējavabelia, bajaraponē pitabarata taneneconitsinexa, jai Pablo nacuaevevtsinē Festojavabelia.

¹² Nexata nacuaevevtsinē Festo barēcuaicuajai pijajivi, pejamatabēcueneyavenonaevitsi. Bajaraxuacujinae nacuaevevtsinē Festo jumaitsi Pablojavabelia:

–Xamē nevajētame tacaitorobinexa tajatuxanenējavabelia, Romanonacua pepo pevetsinējavabelia, bajaraponē pitabarata pecaneconitsinexa pibisiacue ne itsa exaname. Nexata bajaraponējavabelia ponaename, jai nacuaevevtsinē Festo Pablojavabelia.

Pacuenia Pablo navajunupaeba nacuaevevtsinē Agripajavabelia yabara pelivaisi

¹³ Pablo pevajētsicujinae nacuaevevtsinē Festojavabelia pitorobinexatsi Romanonacua pepo pevetsinējavabelia, caematacabibejucujinae, nacuaevevtsinē Agripa, pijava

Berenicevënëva yajava, parena Cesarea tomaraberena. Parenabeje pebajacobinexabeje nacuaevevtsinē Festo pejanapatsinēxae nacua pevetsinēnexa. ¹⁴ Agripabeje Berenicebeje caematacabibeje ponaponabeje Cesarea tomarata. Nexata nacuaevevtsinē Festo tsipaeba nacuaevevtsinē Agripajavabelia Pablo yabara. Nacuaevevtsinē Festo jumaitsi:

—Majotaje xainajē pebi naneconitsia peponaponaenē. Félix abaxē mapanacua itsa eve-taje, bajaraponē naneconitsiaexanatsi. ¹⁵ Nexata ita ponajē Jerusalén tomarabelia, sacerdotevi penamatacaitorobivi, judiōvi pijaancianovinua, neconitatsi Pablo xanējavaberena. Bajarapamonaē nevajēta tananeconitsiaexanaenexa Pablo pebeyaxuabinexatsi. ¹⁶ Nexata xanē jumaitsinē bajarapamonaējavabelia: “Romanonacua raja pepo pevetsinē pejamatabēcueneta apo pacopatsinē itsajivi ata pebeyaxuabinexatsi abaxē xaniavaetsia payapētaenejevanē paneconi xaina. Itsajivi pibisiacuene itsa exana, nexata namatavenona pecuenetaevitsi pitabarata copiaya peneconitsinexatsi. Nexata pajivi naneconita, bajara-jota xanepana penayajivicuaicuajainexa paneconi yabara neconitatsi,” janē bajarapamonaējavabelia, jai nacuaevevtsinē Festo nacuaevevtsinē Agripajavabelia.

¹⁷ Itatsia nacuaevevtsinē Festo jumaitsi nacuaevevtsinē Agripajavabelia:

—Nexata bajarapajudiōvi maberena pepatsicujinaeje, meravia pitsijavata, copiaya joneyajē taecaenexa itsajota ecabiabajē jivi itsa naneconitsiaexanaejitsianē. Nexata itorobajē tajajivi tanetocapatsinexa Pablo xanējavaberena. Tsipaji jamatabējumaitsinē: “Pablo meta pibisiacuene pexanaexae, neconitatsi,” jamatabējanē. ¹⁸ Itsiata baitsi jane Pablo itsa pata, peneconitsivitsi apo neconitsitsi pibisiacuene pexanaejava yabara pacue-nia picani najamatabēxainajē. ¹⁹ Saya judiōvi jumeanaenotatsi Pablo Dioso pejumecovēnēsijava yabara. Jumeanaenotatsinua Pablo petsipaebijava Jesús petēpaejava yabara ata. Jesús yabara Pablo jumaitsi: “Jesús raja apo tēpae. Petēpaeccujinae baja icatsia Dioso asaēyaxanatsi,” jai Pablo bajarapajudiōvijavabelia. ²⁰ Nexata xaniavaetsia apo yapētaenē pacuenia exanaejitsianē bajarapacuenē yabara. Nexata jumaitsinē Pablojavabelia: “Jitsipame tsaja neponaejava Jerusalén tomarabelia, bajarajotalia icatsia pecaneconitsinexa pamonaē caneonita,” janē picani. ²¹ Itsiata baitsi jane Pablo nevajēta taitorobinexa picani vajatuxanenēbejejavabelia, Romanonacua pepo pevetsinējavabelia, bajaraponē pitabarata peneconitsinexatsi, pibisiacuene itsa exana Pablo. Itsiata abaxē xanē mapatomarataje Pablo naneconitsiaya ponaponaeyaxanaxajē. Nexata pamatacabi necuenecaējēpaena, itorobianajē vajatuxanenēbejejavabelia, jai nacuaevevtsinē Festo nacuaevevtsinē Agripajavabelia.

²² Nexata nacuaevevtsinē Agripa jumaitsi nacuaevevtsinē Festojavabelia:

—Xanē ata jitsipajē tajumetaejava Pablo penavajunupaebijava, jai nacuaevevtsinē Agripa.

Nexata nacuaevevtsinē Festo jumaitsi nacuaevevtsinē Agripajavabelia:

—Meravia rabaja jumetaename Pablo penavajunupaebijava, jai nacuaevevtsinē Festo.

²³ Nexata meravia pitsijavata nacuaevevtsinē Agripa pijava Berenicebeje bitso naitabētabeje. Nexata naponabeje jivi penacaetuatabibiboxanetojavabelia. Pēyanatatsibeje vajabitsaē pepo pevetsivi. Pēyanatatsibeje Cesarea tomarapijipetuxanevi ata. Penacaetuatsiboxanetojavalia barējoneyabeje. Nexata nacuaevevtsinē Festo pijajivi itoroba petocaponaenexatsirena Pablo. ²⁴ Nexata nacuaevevtsinē Festo jumaitsi nacuaevevtsinē Agripajavabelia, itsamonaējavabelia ata:

—Agripa, nacua nevetsinē, daxita paxamē ata majotaje vajanajuanaeatsi. Pataneme rabaja mapapebi nuca paneitabarataje. Ayaibitsaēto judiōvi, Jerusalén tomarapijivi, bajaraponē neconitatsi xanējavaberena Jerusalén tomaratalia. Bajara icatsia pamonaē tapēta naponarena Cesarea tomaraberena. Bajara icatsia pacuenia neconitatsi xanējavaberena. Bajarapamonaē vavajaiya nejumai tsabiabi: “Pajitsipajē Pablo pebeyaxuabinexatsi,” nejai tsabiabi. ²⁵ Itsiata baitsi jane xanē apo yapētaenē paneconi yabara beyaxuabijitsiatsi. Maponē nevajēta picani taitorobinexa tajatuxanenējavabelia, Romanonacua pepo pevetsinējavabelia, bajaraponē pitabarata peneconitsinexatsi itsa pibisiacuene exana. Bajaraxuata itorobijitsianē Romanonacua pepo pevetsinējavabelia.

²⁶ Itsiata baitsi jane apo yapētaenē pacuenē yabara toyaquinaejitsianē cuyalatabaxutota tajatuxanenējavabelia. Bajaraxuata xamē Agripa, nacua nevetsinē, mapamonaē ataje, daxita paxamē paneitabarata Pablo penucaenexa pacatocapatatsi maberena. Pacatocapatatsi paneyanijobinexa paneconi yabara naneconita. Nexata meta paneyanijobicujinae xanē yapētaenajē paneconi yabara naneconita. Nexata bajarajota yapētaenajē tajatuxanenējavabelia tatoyaquinaenexa cuyalatabaxutota paneconi yabara judiōvi Pablo neconitsijitsiatsi tajatuxanenējavabelia. ²⁷ Tsipaji acuenēbi taitorobijava maponēje Pablo tajatuxanenējavabelia toyaquinaenejevanē cuyalato xaniavaetsia peyapētaenexa paneconi yabara judiōvi neconitsijitsiatsi, jai nacuaevevtsinē Festo nacuaevevtsinē Agripajavabelia.

26

Pacuenia Pablo navajunupaeba nacuaevevtsinē Agripa pitabarata yabara pelivaisi

¹ Nacuaevevtsinē Agripa jumaitsi Pablojavabelia:

– Catocopatatsi rabaja nenavajunupaebinxaxa paneconi yabara judíovi caneconita, jai nacuaevevtsinē Agripa Pablojavabelia.

Nexata Pablo yayiataeya bajacoba nacuaevevtsinē Agripa. Nexata Pablo jumaitsi nacuaevevtsinē Agripajavabelia mapacueniaje:

² – Barēyanē. Tspaji ajena pamatacabi netocopatame nitabarata tanavajunupaebinxaxa daxita paneconi yabara judíovi neneconitsijitsia. ³ Aeconoxaeta bitso barēyanē. Tspaji yapētaneme xaniavaetsia daxita palivaisi paxainajē pajudíovinē. Yapētanemenua pajamatabēcuenelivaisi yabara panajumeanaenotabiabajē. Nexata cavajētatsi ajamatabēcuenesaēya bajayaepato xaniavaetsia tanenamuxunaevetecaenexamē, jai Pablo nacuaevevtsinē Agripajavabelia.

Pacuenia Pablo navajunupaeba pacuenia ponapona pamatacabi abaxē apo jumecovēnētsi Jesucristo yabara pelivaisi

⁴ Pablo icatsia jumaitsi nacuaevevtsinē Agripajavabelia:

– Daxita judíovi baja cajena neyapētane pacuenia copiaya ponaponažē bajarapamonaevjavata. Bajarapamonaev neyapētane pacuenia ponaponažē patajanacuata tsiquirinēyojavaveliacujinaenē. Neyapētanenua pacuenia ponaponažē Jerusalēn tomarata ata. ⁵ Judíoviyajuvēnēvi itsamonaev naexana fariseovi. Nexata bajarapamonaev Dioso Moisésipjinēta penajumecopatsilivaisi, bitso jumecovēnētsiajinavanapa itsajudíovivecua. Nexata itsa yanijobijitsipame, daxita judíovi catsipaebijitsipa pacuenia picani pejevaxinējavaveliacujinaenē catsitecaponažē fariseovi pecujarubicuene.

⁶ Bajarapamonaev neneconitsijitsia tspaji baja xanē jumecovēnētajē petēpaevimi itsamatacabi Dioso icatsia piasaēyaexanaevjavanaxa. Tspaji baja cajena bajarapacuenia Dioso najumecapanepaeya jumaitsi patajasalinaivimijavabelia. Nexata bajarapalivaisi jumecovēnētajē. ⁷ Daxita raja paxanē, Israelpijinēmi pexi doce ponēmibeje papemomoxinē. Pacopiaevetavanapajē Dioso icatsia piasaēyaexanaevjavanaxa petēpaevimi pacuenia baja cajena tajēvelia Dioso najumecapanepaeya jumaitsi patajasalinaivimijavabelia. Bajaraxuata najamatabēcuenecopatsiaya pavajētabiabajē Diosojavabelia. Patonacuenebavanapajēnua caematacabi canacujitsia, meravi yajava. Agripa, nacua nevetsinē, abaxē nenamuxunaevvere. Dioso icatsia petēpaevimi piasaēyaexanaevjavanaxa, copiaevetaponaponažē. Bajaraxuata judíovi neneconitsijitsia.

⁸ Pētsa pajamatabējumaitsimē Dioso yabara: “Dioso raja apo caējēpaetsi petēpaevi icatsia piasaēyaexanaevjavanaxa,” pajamatabējamē pētsa, jai Pablo bajarapamonaevjavabelia.

Pacuenia Pablo navajunupaeba petaicaponaevjavata Jesús pejumecovēnētsivi pejebinxaxa penaneconitsivi pejebabiabibota yabara pelivaisi

⁹ Pablo icatsia jumaitsi nacuaevevtsinē Agripajavabelia:

– Xanē abaxē Jesús itsa apo jumecovēnētsinē, jamatabējumaitsinē tsabiabi: “Xanē bejiobiaexanaevnajē daxita pamonaev jumecovēnēta Jesús, Nazaret tomarapijinē, pelivaisi,” jamatabējanē tsabiabi. ¹⁰ Nexata bajarapacuenia exanajē Jerusalēn tomarata. Sacerdotevi penamatacaitorobivi taneitorobixae, ayaibitsaēto Jesús pelivaisi pejumecovēnētsivi jebaponažē penaneconitsivi pejebabiabibota. Itsa bajarapamonaev naneconitsiaexanatsi, itsa bejeyejatsinua, netsitaxanepana bajarapacuenia pebejebijavatsi. ¹¹ Pamonaev Jesús pelivaisi jumecovēnēta, anijatonē jumaconibabeyaexanaevjavanaxa judíovi penacaetuatabi-abibonējava. Bajarapacuenia picani exanaponažē bajarapamonaev pecopabinexa Jesús pelivaisi pejumecovēnētsijava. Xanē picani cueneitoyanē bajarapamonaev. Nexata itsanacuajava penaetomaranējava ata, jaitarutajē Jesús pelivaisi pejumecovēnētsivi taitacaenexa tajebinxaxa penaneconitsivi pejebabiabibota, jai Pablo nacuaevevtsinē Agripajavabelia.

Pacuenia icatsia Pablo navajunupaeba pacuenia Jesús pelivaisi jumecovēnēta yabara pelivaisi

(Hch 9.1-19; 22.6-16)

¹² Pablo icatsia jumaitsi nacuaevevtsinē Agripajavabelia:

– Bajara picani icatsia pacuenia taitacaenexa Damasco tomarata Jesús pelivaisi pejumecovēnētsivi, ponažē picani Damasco tomarabelia. Nitoroba sacerdotevi penamatacaitorobivi. Bajarapamonaev pejamatabēcueneta nitoroba taitacaenexa picani Jesús pelivaisi pejumecovēnētsivi tajebinxaxa penaneconitsivi pejebabiabibota. ¹³ Agripa, nacua nevetsinē, abaxē nenamuxunaevvere. Nexata jane baja ponažē Damasco tomarabelia. Nexata tanajetarucaevjavata namutua, taniji matonejeepatota athēbēvetsica pinijicotia

tanematoyorotsianaitayotsijava. Naitayota matabacipijijuametocotia matatoxenetsia. Daxita tayajavaponaevi tayajavanajetarucajavata, panematoyorotsia naitayota. ¹⁴ Nexata daxita paxanë irata pabobenajunuajë. Bajarajota irata jumetaenucajë hebreojumeta athëbëvetsica tanejumaitsijava: “Saulo, Saulo, çdetsa xuajitsia tajajivi netobejibiaexanapona? Xamë nijacuata najamatabëcuenebijianapona,” tanejajava, jumetaenucajë irata. ¹⁵ Nexata xanë jumaitsinë: “Tajatuxanenë, çdetsa ponëmë?” janë. Nexata icatsia nejumaiti: “Xanë raja Jesúsnë. Xanë raja tajajivi netobejibiaexanapona. ¹⁶ Nonotabapunare. Catsitanaitajëtatsi raja tacaitapetsinexa tajajivitonënxamë. Xamë nexata tsipaebianame itsajivijavabelia pacuenia aeconoxae netaneme. Tsipaebianamenua pacuenia icatsia catsitanaitajëtatsianatsi bexëa itsamatacabijavabelia. ¹⁷ Cacapanepaenatsi raja judiövi pecobevecua pecaitsacueniabiyaniava. Caitorobianatsi apo judiövi pijanacuanëjavabelia. Apo judiövi ata pecobevecua cacapanepaenatsi pecaitsacueniabiyaniava. ¹⁸ Caitorobatsi rabaja netsipaebinxaxa apo judiövijavabelia pexanialivaisi, xanë talivaisi. Nexata apo judiövi ata najamatabëcuene pënëyorotsiaexanaename Diosojavabelia. Nexata Dioso pexaniajailivaisita apo judiövi ata jamatabëcueneitayotsianatsi piaitaquirijamatabëcuenevecua, dovathi pejamatabëcuene itorobabiabijavatsivecua. Nexata apo judiövi ata talivaisi jumecovënëtsiana. Nexata bajarapamonae pibisiacuene pexanaeconimi, Dioso vecuaajibiaexanaenatsi itsa jumecovënëtsiana talivaisi. Nexata apo judiövi ata pibisiacuene pexanaeconimi, Dioso vecuaajibiaexanaenatsi, pacuenia baja daxita tanejumecovënëtsivi Dioso vecuaajibiaexanatsi pibisiacuene pexanaeconimi,” nejai Jesús mapacueniaje athëbëvetsica, jai Pablo nacuaevevtsinë Agripajavabelia.

Pacuenia Pablo navajunupaeba pacuenia jumecovënëta Jesús pitorobicueniatsi yabara pelivaisi

¹⁹ Icatsia Pablo jumaiti nacuaevevtsinë Agripajavabelia:

—Agripa, nacua nevetsinë, abaxë nenamuxunaevere. Nexata pacuenia Jesús athëbëvetsica nejumaiti, jumecovënëtajë baja cajena. ²⁰ Copiata Jesús pelivaisi tsipaebaponajë Damasco tomarapijivijavabelia, Jerusalén tomarapijivijavabelia ata, Judea nacuarapijivijavabelia ata. Bajaraxuacujinae icatsia tsipaebaponajë apo judiövijavabelia ata. Nexata itorobajë daxita bajarapamonae pecopabinexa pibisiacuene pexanabiabijava penajamatabëcuene pënëyorotsinexa Diosojavabelia. Nexata itorobajë xaniavaetsia pejinavanapaenexa pibisiacuene pexanaeyaniava. Nexata baja bajarapacuenia itsa jinavanapa, daxitajivi yapëtanetsi pepacuene penajamatabëcuene pënëyorotsijava Diosojavabelia. ²¹ Bajarapalivaisi tatsipaebaponaexae, nevaetaba judiövi pamatacabi ponaponajë templobota. Nevaetaba tanebeyaxuabinexa picani. ²² Itsiata baitsi jane neyjavapona Dioso tanejavonaenaxa mapamatacabijavaberena ataje. Bajaraxuata nucajë majotaje tatsipaebinxaxa Jesús pelivaisi daxitajivijavabelia. Jesús pelivaisi jivi itsa tsipaebabiabajë, tsipaebabiabajë bepejibivijavabelia, pepo petuxanevijavabelia ata. Nexata daxita bajarapamonae najëpaeya tsipaebabiabajë peyapëtaenexa xua bajayata tajëvelia Diosojumepaebivi profetavi vajunupaeba. Profeta Moiséspijinë ata bajayata tajëvelia vajunupaeba bajaraxua. Pacuenia ata bajayata tajëvelia Diosojumepaebivimi profetavi copiaya jumaiti, tsipaebabiabajë. Bajayata baja cajena profetavimi Cristo yabara jumaiti mapacueniaje: ²³ “Pamatacabi Cristo Dioso itorobianicatsi jivi pecapanepaenexa, beyaxuabianatsi. Itsiata baitsi jane pebeyaxuabicujinaetsi Dioso icatsia asaëyaexanaenatsi. Nexata Cristo Dioso itsa asaëyaexanaenatsi petëpaecujinae, namataxainaeya asaëyaexanaenatsi daxita petëpaevivecua,” jai bajayata tajëvelia profetavi. Nexata jane baja Cristo Dioso itsa asaëyaexanaenatsi petëpaecujinae, namataxainaeya jane baja asaëyaexanaenatsi daxita petëpaevivecua. Nexata pamona Dioso pepuajumecovënëtsi tēpa, Dioso icatsia cotocaevi asaëyaexanaenatsi petëpaecujinae. Nexata bajarapalivaisi tsipaebaponajë judiövijava, apo judiövijava ata. Daxita bajarapamonae itsa jumecovënëta bajarapalivaisi, pecapanepaenexatsi Diosojavabelia, jai Pablo nacuaevevtsinë Agripajavabelia.

Pacuenia Pablo petsipaebilivaisi pejumetaevitsi, sivanajamatabëxainatsi yabara pelivaisi

²⁴ Pacuenia penavajunupaebijavata, nacuaevevtsinë Festo jumevabaxuabatsi.

—jPablo, xamë raja saya camatajemaba! Camatajemaba bitso nenacujarubixae, jai nacuaevevtsinë Festo.

²⁵ Pablo nexata jumaiti:

—Festo, pecayaiyaenë, nacua nevetsinë. Apo nematajemabi raja xanë. Palivaisi raja pacatsipaebatsi, pepo pexaniajailivaisi. ²⁶ Bajarapalivaisi ajumejunavijibia pacatsipaebatsi tsipaji maponë ecaje, nacua pevetsinë Agripa, xaniavaetsia yapëthane bajarapalivaisi. Agripa xaniavaetsia yapëthane daxita xua Jesús exana. Tsipaji abaxë pamatacabi Jesús ponapona mapanacuataje, daxita xua exana, muetsia apo exanae. ²⁷ Agripa, nacua nevetsinë,

xamē baja cajena jumečovēnētame profetavi bajayata peyaquinaelivaisi. ¿Baja tsabaitsi jane? Cayapētanetsi baja cajena nejumečovēnētsijava bajarapamonae peyaquinaelivaisi, jai Pablo nacuaevetsinē Agripajavabelia.

²⁸ Nexata nacuaevetsinē Agripa jumaitsi Pablojavabelia:

—¿Bepijia tsabaja Jesús pelivaisi jamatabēnejumečovēnētsiaexaname? jai nacuaevetsinē Agripa.

²⁹ Nexata Pablo jumaitsi:

—Vajētājē Diosojavabelia Jesús pelivaisi bepijia panejumečovēnētsinexa. Itsa jume, beaxayocuenia ata panejumečovēnētsinexa. Daxita paxamē patanejumetaeyenavimē, jitsipajē panejumečovēnētsijava Jesús pelivaisi. Pacuenia baja xanē jamatabēcueneitsinē, Jesús pelivaisi tajumečovēnētsinē, bajara paxamē ata panejamatabēcueneitsinexa. Itsiata apo pacatojitsipaetsi papecacēbinexa mapitsicadenamaētonētaje pacuenia xanē necētanuta, jai Pablo.

³⁰ Itsa baja Pablo najumevereta bajarapacuenia petsipaebijava, nacuaevetsinē Festo nonotapuna. Nacuaevetsinē Agripa ata, pijava Berenice yajava, nonotapuna. Daxita baja penajuanacaetuatsivi ata nonobapuna peponaenexa. ³¹ Pepitsapaecujinaelia bajarapamonae najumaitsi:

—Maponēje Pablo itsacuene baja cajena apo exanae. Nexata picani ajibi paneconi yabara beyaxuabijitsiatsi. Ajibinua paneconi yabara etsijitsiatsi penaneconitsivi pejebabiabib-ota, najai bajarapamonae Pablo yabara.

³² Nacuaevetsinē Agripa jumaitsi nacuaevetsinē Festojavabelia:

—Itsa apo cavajētsi tsipae nitorobinexa vajatuxanenēbejejavabelia, Romanonacua pepo pevetsinējavabelia, bajaraponē pitabarata peneconitsinexatsi, nexata baja picani copat-sipatsi pepitsapaenexa penaneconitsivi pejebabiabibovecua, jai nacuaevetsinē Agripa Pablo yabara.

27

Pacuenia Pablo caponaliatsi Roma tomarabelia yabara pelivaisi

¹ Nacuaevetsinē Festobana najamatabēcuenevereta baja pitorobinexatsi Pablo Italia nacuyabelia, Romanonacua pepo pevetsinējavabelia. Nexata Pablo caponaejitsiatsi vajabitsaē pijacapitán, Juliovēnēnē. Itsamonae naneconitsia pejinavanapaevi, Pablo yajava, caponaejitsiatsi. Ponē Romanonacua pepo pevetsinē, bajaraponē pevēnē Augusto. Nexata Augusto pijajivi vajabitsaē pijacapitánmonaeyajuvēnēnē Julio. ² Xanē Lucasnē, naponajē Pablota. Adramitio tomaraverena pepatsibarco ēnēabereca parunarecajē. Bajarapamo yaētanajetarucaejitsia manuamene muxubērēa penaetomaranējava, pepatsinexa Asiavēnē nacuyabelia. Payajavaponajēbeje Aristarco, Tesalónica tomarapijinē. Tesalónicatomara eca Macedonia nacuata. ³ Meravía pitsijavata epatua panapatajē Sidón tomarata. Capitán Julio yaiyatanetsi Pablo. Bajaraxuata Sidón tomarata Pablo tocopatatsi penonotajunaenexa barcoēnēvecua, penasivaxainaenexa peyapētaevitsijavabelia, perajutsinexatsinua xua namatavenona Pablo. ⁴ Bajaraxuacujinae icatsia panaropobajē Sidón tomaravecua. Nexata patavajēnaeverena jovibo najetaruca. Nexata Chipretunaeto papatalsijajē bajarapatunaeto muxubērēa patanajetarubenaenexa. Nexata Chipretunaeto patatsavenonēnia paxen-tanajetarubenajē. Tsipaji bajarapamuxubērēvelia jovibo beyajetayo. ⁵ Cilicia nacubeje Panfilia nacubeje canacujitsialia papaliajē. Nexata payaētājē Mira tomarata. Miratomara eca Licia nacuata.

⁶ Nexata Mira tomarata capitán Julio caxitajaraba barco, Alejandría tomaraverena pepatsimo. Bajarapamo ponaejitsia Italia nacuyabelia. Nexata baja pabarcota pananajetarubenajē, pavecuanonobajunajē. Nexata icatsia capitán Julio panerunaeyaexana Alejandría tomaraverena pepatsibarco ēnēavelia. ⁷ Anijamatacabianē bajarapabarcota pananajetarubenajē. Tsipaji beaxayo najetaruca. Pinijicuenecujinae itsiata panajetarubenajē Gnidotomara canacujitsita. Jovibo abaxē tsiteca najetaruca patavajēnaeverena. Nexata pamatavaquetajē Cretavēnētunaeto. Panajetarubenajē itsapaitapavelia eca Salmóntomara. Tsipaji bajarapaitapavelia jovibo beyajetayo. ⁸ Piayapēbejecuenia panajetarubenajē manuamene muxubērēa. Nexata papatajē Buenos Puertosvēnējavata, Laseatomara imoxoyjavata.

⁹ Pamatacabianē xanepana menia patanajetarubenaenexa, panevecuapanepapona baja. Nexata baja bitso panetsiayai menia pataponaenexa. Tsipaji bajarapajuametota bitso jovibo ayai tsabiabi. Emarapae ata baja copiajunua. Nexata picani Pablo tsipaeba barcota patanajuaponaevijavabelia. ¹⁰ Pablo picani jumaitsi mapacueniajē:

—Xanē raja yapētaniji nacatsiayai baja bitso menia vajaponaenexa vajavajēnaeyabelia. Naxuabijitsipa raeta mapamoje. Naxuabijitsipa raeta mapamoēnētaje pecaponaejava

yajava. Vaxaitsi ata meta naxuabijitsipatsi. Nexata abaxë majotaje evetavanapaenatsi emarapae pepanepaejava, jai picani Pablo.

¹¹ Itsiata capitán Julio apo jumecovënëtsi Pablo petsipaebijava. Caranata pacuenia jumaitsi beje barco pexainaenë, barco pecaponaenë ata, capitán Julio jumecovënëta. ¹² Buenos Puertosvënëjavata ayapëbeje barco perucaejava bajayajebi. Nexata acuenebi bajarajota pataevetavanapaenexa emarapae pepanepaejava. Nexata picani daxita bajarapamonae bitso jitsipa patavajënaeyabelia pataponaenexa. Jitsipa picani Cretatunaeto muxubërëa patanajetarubenaenexa, itsa cuenecaëjëpatsi, pepatsinexa picani Fenice tomarata. Bajarapatomarata picani jamatabëyaëta pataevetavanapaenexa emarapae pepanepaejava. Fenicetomara eca Creta tunaetotsotota. Nexata bajarapatotsotota xanepana barco perubenaenexa. Tsipaji bajarapatotsototajava apo joneyabiabi jovibo.

Pacuenia pinijjoviboxaneto barco caponatsi Creta tunaetovecua yabara pelivaisi

¹³ Itsa pajinavanapajë Buenos Puertosvënëjavata, barco pexainaenë bitso jitsipa peponaenexa pevajënaeyabelia. Nexata bajarapaepatota patacovëverena beaxayo jovibo najetaruca. Nexata bajarapamonae itsa tane bajarapajovibo, jitsipa pevajënaeyabelia peyacaponaenexatsi bajarapamonae pejitsipaecuenia. Nexata jane baja panaropobajë. Cretatunaeto muxubërëa panajetarubenajë. ¹⁴ Nexata jemata caeepatoyocujinae pinijjoviboxaneto najetaruca Cretatunaeto epatajërëtsiarena barcojavaberena. Bajarapajovibo Nordestevënëjovibo. ¹⁵ Bajarapajovibo barco torotaponatsi Cretatunaetovecua. Apo panecaëjëpae barco patamuxufetsinexa jovibo pevajënaevelia. Nexata baja pacopatajë pataneyacaponaenexa jovibo. ¹⁶ Paponajë tsiquiritunaetoyo, Claudavënë tunaetoyo, pepënënenia. Bajaraxuayo bitso jovibo apo ayai. Barco petabufevetsina robotanajetaruca jera. Nexata itsajota jovibo beyajetayo, pinijicuenia payamaërobobocainajë jera patajaturabatsinexa barco ënëabetsina. ¹⁷ Bajaraxuacujinae bajarapamonae barco epacëbapona pinijibumacaxanetonëta barco pesarasaraëcaeyaniva malatacata. Bajarapamonae junava barco patayayaëyaëcaeyaniva Sirtevenë iratsaubonëjumata. Nexata bajarapamonae isica barcopijivelapananë. Bajaraxuacujinae bajarapamonae copata baja itsabelia jovibo pona, barco pataneyacaponaenexa jovibota. ¹⁸ Meravia abaxë pitsijavata tsiteca pinijijovibo piyaijava. Nexata bajarapamonae barcoënëta pecaponaejavanë, menia yajuvënëpenereca barco pefafanaenexa. ¹⁹ Bajaraxuacujinae icatsia meravia pitsijavata bajarapamonae menia penereca barcoënëta pecanacuenibijavanë. ²⁰ Bajayajebi baja cajena apo pataenë matacabipijjuameto, tulupu ata. Tsipaji bajayajebi pinijijovibo, ema yajava, tsitecanuca. Belia pajamatabëjumaitsinë: “Apo yapanepatsi meta baja tsane,” pajamatabëjanë.

²¹ Pamatacabibeje bajarapacuenie pataniji, bajara pijinia pamatacabibeje apo paxaenë pataxaejava. Nexata Pablo nototapuna bajarapamonae petuatujäta. Pablo jumaitsi:

—Itsa paxamë panejumecovënëtsipame pacuenia pacatsipaebatsi, xanepanaejitsipa. Nexata maberenaje apo yaponae tsipaetsi Cretatunaetovecua. Apo bejibitsinua tsipae.

²² Itsiata baitsi jane aeconoxae pëtsa panatsinajamatabëxainame. Itsajivi ata raja paxamëyajuvënëjivi itsiata apo tēpae tsane. Ebarco rajane baja naxuabiana. ²³ Ajena baja cajena, pameravi, netsinaitajëta ängel, Dioso pitorobinëtsica. BajarapaDioso xanë pijajivitonë. BajarapaDioso tonacuenebaponaenajë. ²⁴ Nexata ängel nejumaitsi: “Pablo, pëtsa junavame. Itsiata raja apo tēpaemë tsane. Tsipaji raja naitajëtsijitsiamë Romanonacua pepo pevetsinë pitabarata. Xamë raja nejamatabëcueneta Dioso capanepaenatsi petëpaeyaniva daxita pamonae yajavanajetarucame mapabarcotaje,” nejai ängel. ²⁵ Nexata daxita paxamë panajamatabëcuenesaëre panejamatabëcuenebëjjajavavecua. Najamatabërutajë Diosojavabelia vajanacapanepaenexa Dioso. Yapëtaniji Dioso vajanacapanepaejavanexa pacuenia baja ängel netsipaeba. ²⁶ Itsiata baitsi jane cajena jovibo nacayacaponaena itsatunaetojavabelia, jai Pablo.

²⁷ Catorce baja pamatacabibeje itsa paxainajë patanaropobicujinae, meravi jovibo toquebiaya paneyacapona Adriavënë manuamenejava. Nexata meravi tuatujëta barcota penacuenebivi jamatabëjumaitsi:

—Pitapayabelia covë payapataponajë, jamatabëjai.

²⁸ Nexata bajarapamonae pemaëtota caëjëtaponaxuavajëto mene avajubua irabereca peypätaenexa. Nexata treinta y seis pametrobeje xaina mene piavajubuajava irabereca. Bajaraxuacujinae, caeepatoyocujinae, icatsia caëjëta. Veintisiete icatsia pametrobeje xaina mene piavajubuajava irabereca. ²⁹ Nexata barcota penacuenebivi jamatabëjumaitsi:

—Barco meta payanayaëtotojapanaenajë ibotojumata, jamatabëjai.

Nexata bajarapamonae barco petabufevetsina, cuatro xuabeje anclavënëjavanë, yamaëya copabareca. Nexata anclavënëjavanë menebëxëpana irabelia itsa vaetaba, barco perucojopaenexa. Bajarapamonae picani bitso jitsipa bepijia peyamatacabibijavatsi, penatsivajënae taenajetarubenaenexa. ³⁰ Nexata bajarapaepatota bajarapamonae picani

bitso jitsipa epämonae penonobajunaenexa barcovecua pepanepaenexa. Nexata bajarapamonae penajuaponaevijavabelia yamaxëitojorobiaya jumaitsi:

–Icatsia raja pacopabijitsianëreca itsaanclajavanë barcoupitatsia, jai.

Nexata saya ëjera, pamo pajutabuatsinajë, bajarapamonae xuareca peyaponaenexa picani pitapayabelia. ³¹ Nexata Pablo itsa tane bajarapamonae jera pexuabijavareca, jumaitsi vajabitsaë pijacapitanëjavabelia, capitan pijajivijavabelia ata:

–Mapomonaëje barcota penacuenebivi itsa ponaena mapajerataje, paxamë pavajabitsaëmë panapenetsianame meneta, jai Pablo.

³² Nexata barcota penacuenebivi peponaeyaniva jerata, vajabitsaë caucutaxuaba jera pecëtarutsimaëto. Jera baja nexata pona barcovecua.

³³ Ajena baja matakabi tsina, Pablo itoroba daxita barcota peponaevi pexaëjava pexaenexa. Pablo jumaitsi bajarapamonaejavabelia:

–Catorce baja cajena pamatacabibeje xaniavaetsia apo pamajitsimë. Panexaëjava ata apo paxaëmë. ³⁴ Bajaraxuata pacaitorobatsi panexaëjava panexaenexa, panesaë panexainaenexa panepanepaenexa. Itsiata raja daxita apo paitsacuenemë tsane, jai Pablo bajarapamonaejavabelia.

³⁵ Bajarapacuenia Pablo pejumaitsijavata, panbë pita. Panbë yabara Pablo pexaniajamatabëcuene rajuta Diosojavabelia daxita bajarapamonae pitabarata. Bajaraxuacujinae Pablo epatsënëca panbë. Pablo nexata xane pexaëjava. ³⁶ Daxita nexata bajarajota ajamatabëcuenesaëreca baja. Nexata bajarapamonae ata xane pexaëjava. ³⁷ Doscientos setenta y seis papajivinëbeje daxitata paponajë bajarapabarcota. ³⁸ Nexata daxita xaniavaetsia penabanicujinae, menia penereca trigoxu sacuanë pefafanaenexa barco.

Pacuenia barco bubuna manuameneta yabara pelivaisi

³⁹ Itsa baja matakabi tsarucaponaë, barcota penacuenebivi taeyelia petunaeto. Itsiata apo yapëtae bajarapatunaeto. Nexata menetotsoto taerulia. Bajarajotalia tajetabo boca. Nexata picani bajarapamonae najamatabëxaina peyaëtsinexa barco bajarapatajetabojavabelia. ⁴⁰ Xuanë anclavënëjavanë, yamaëya copabareca, bajaraxuanë irabelia itsa vaetaba, barco patayarucopopaenexa. Bajaraxuanëmi yamaëcaucubapenereca. Sarasaranaeyaexananua barco petabufecajëbanajetarubenaepabeje. Nexata barcoupitatsia penucaenaeta velapana upicëtarutsia. Velapana nexata jovibota nayerebajaraba. Barco jane baja imoxoyotanajetaruca tajetabo. ⁴¹ Nexata itacarajeta barco pata itsajota anijamenebeje pesaë namataenetsia patabeje. Barco baja payajumanayaëtarabajë iratsaubojumata. Nexata bajarajota barcoupi mëthëmëthëcajunua iratsaubojavabelia. Ataja tsanuaë. Barco petabufejavavetsina malataca pesaëta tabufesarabajarabatsi. ⁴² Nexata picani vajabitsaë bajarajota beyejebijitsiatsi daxita penaneconitsivi, pevecuapanepaeyanivatsi pejuejavata. ⁴³ Itsiata vajabitsaë pijacapitanë apo tocopatsi. Tspijaji apo jitsipae Pablo yajava pebeyaxuabijavatsi. Nexata capitanë itoroba daxita pamonaë yapëtane pejuejava, copiaya pejuenexa pitapayabelia copiaya pepatsinexa matatsënëabelia. ⁴⁴ Bajaraxuacujinae pamonaë apo yapëtae pejuejava, cotocaevi itoroba tablapanëjumata, barcopanëmijumatanua, pejuenexa. Bajarapacuenia daxita panepa matatsënëabelia.

28

Pacuenia Pablo ponapona Maltavënë tunaetjavata yabara pelivaisi

¹ Itsa baja daxita paxanë xaniavaetsia papanepajë matatsënëabelia, nexata pavënëtaniji bajarapatunaeto. Bajarapatunaeto Malta vënëtunaeto. ² Maltatunaetopijivi bitso paneyavenona. Bajarapamonae pinijiisotoxaneto itajuruteta. Tspijaji bitso ema tsanuaë. Nexata bitso cainejeba. Panëjunata daxita patanonopaenexa. ³ Nexata Pablo nota petseviiso. Itamataeta bajarapaisoto. Nexata jomo bitso piatanenë, bebula, pitsatabijirava isotojavaverena piatajujavavecua. Nexata Pablo cobesinetsi. Pecobesinijavatatsi tsiteca yajumaruca. ⁴ Maltatunaetopijivi itsa tane Pablo jomo pecobesinerucaëjavatsi, nexata najumaitsi bajarapamonae:

–Maraeta ponë jivibenëje. Bajaraxuata manuamene vecuapanepae ata, icatsia Dioso tocopatatsi jomo pesininexatsi. Nexata jivi pebejamatabëcuene, jomo pesinijavatsi peyatëpaenexa, najai Maltatunaetopijivi Pablo yabara.

⁵ Nexata Pablo nacobenënëbiaxuaba jomo pejopaenexa isotojavabelia. Pablo itsiata apo itsacuenë. ⁶ Nexata daxita Maltatunaetopijivi jamatabëjumatsi Pablo yabara:

–Aeconoxae meta Pablo cobeyajinaena. Itsa jume, irata meta petëpaenë jopaena, jamatabëjai.

Nexata bajarapamonae bajayaepato evetanubenaë ata Pablo petaenexatsi jomo pecobesinijavatsi peyaitsacuenëjava, itsiata Pablo apo itsacuenë. Nexata icatsia

bajarapamonaē itsacuenia najamatabēxaina Pablo yabara. Nexata najumaitsi bajarapamonaē:

—¡Maraeta papebi diosonēje! najai.

⁷ Maltatunaeto pevetsinē pevēnē Publio. Nexata itsajota panubenaē, imoxoyo bobena Publio pijairanē. Nexata bajaraponē panecopiapita pexaniaacuenia. Bajaraponē pijabota panajinavanapajē acueyabi pamatacabibeje. ⁸ Publio paxa avitane tsanuca camata. Romaebanucatsi. Bitso suliabatsi. Nexata Pablo taeyojopalia. Vajētē Diosojavabelia. Bajaraxuacujinae piavitanenē pematabocotojumavereca Pablo nacobebuata. Nexata baja Pablo jamatejemayaexana piavitanenēmi. ⁹ Bajarapacuenē Pablo itsa exana, nexata daxita piavitanevi Maltatunaetopijivi pata Pabloyavaberena. Daxita bajarapamonaē ata jamatejemayaexana Pablo. ¹⁰ Maltatunaetopijivi pinijicuenia paneyaiyataeya paneyavenona. Itsa baja icatsia bexējavabelia itsabarcota panaponajē, nexata Maltatunaetopijivi panerajuta daxita patanamatavenonaējavaxi pataponaejavata.

Pacuenia Pablo pata Roma tomarata yabara pelivaisi

¹¹ Malta vēnētunaetota panajinavanapajē acueyabi pajuametobeje. Bajaraxuacujinae baja icatsia panaponajē barcota. Bajarapabarco patavajēnae pata Alejandría tomaraverena. Bajarapamo Maltatunaetototsotota daxita emarapae ruca. Evetaruca emarapaejuametonē pepanepaejava. Bajarapabarcoupita rucabeje jivi saya pecobeta jumapecataeya pexanaenēbeje. Cástorbeje Póluxbeje jumapecataeya jivi pecobeta pexanaenēbeje bediosonēbeje petaenexa. ¹² Bajarapabarcota panaponajē. Nexata jane baja panapatajē Italia nacuyabelia. Panapatajē Siracusa tomarata. Siracusa tomarata abaxē panajinavanapajē acueyabi pamatacabibeje. ¹³ Bajaraxuacujinae icatsia panaropobajē. Paponajē manuamene muxubērēa. Nexata icatsia papatajē Regio tomarata. Nexata meravia pitsijavata patacovēverena pexaniajovibo najetaruca. Nexata bajarapajovibo paneyacapona patavajēnaeyabelia. Nexata icatsia anijamatacabibejecujinae papatajē Puteoli tomarata. ¹⁴ Puteoli tomarata pacaxitajarabajē Dioso pejumecovēnētsivi. Bajarapamonaē paneasiva caesemana patanajinavanapaenexa bajarapamonaējavata. Bajaraxuacujinae jane baja matatsēnēa paponajē Roma tomarabelia. ¹⁵ Roma tomarapijivi, Dioso pejumecovēnētsivi, patavajēnaelia panevēnēlivaisitane patanajetarubenaējava. Nexata bajarapamonaē panecopiajairena. Nexata penamataxainaebitsaēto panemataenena Foro de Apiovēnējavata. Bajaraxuacujinae icatsia itsabitsaēto panemataenena Tres Tabernasvēnējavatalia. Nexata Pablo itsa tane bajarapamonaē, pexaniajamatabēcuenē rajuta Diosojavabelia. Nexata ajamatabēcuenesaēreca Pablo bajarapamonaē pataejavata. ¹⁶ Nexata jane baja papatajē Roma tomarabelia. Nexata Roma tomarata capitán Julio rajuta baja pamonaē naneconitsia capona Cesarea tomaraverena. Rajuta baja penaneconitsivi pejebabiabibo pevetsivi penamatacaitorobinē pecobeyabelia. Itsiata Pablo tocopatatsi saicayabota peponaponaenexa. Caenē vajabitsaēnē evetaponaponatsi Pablo penajetabajarivianiva.

Pacuenia Pablo tsipaeba Jesús pelivaisi Roma tomarata yabara pelivaisi

¹⁷ Pablo baja itsa xaina acueyabi pamatacabibeje pepatsicujinae Roma tomarata, tonajumexuaba judíovi penamatacaitorobivi pepatsinexa Pabloyavaberena. Itsa baja nacaetua ta judíovi penamatacaitorobivi, Pablo nexata jumaitsi judíovi penamatacaitorobivijavabelia:

—Tajamonaē, itsacuenē apo exanaē atanē vajavēna judíovijavabelia, vajasalinaivi pecujarubicuene jumecovēnētsiaponaponaē atanē, itsiata vajavēna judíovi nevaetaba Jerusalén tomaratalia. Nexata necanajeta tananeconitsinexa Romano nacuapijivi pecobeyabelia. ¹⁸ Nexata Romano nacuapijivi, jivi penaneconitsicuenē pevetsivi, neyanijoba xua yabara vajavēna judíovi neneconita. Nexata baja picani Romano nacuapijivi necopatsijitsi. Tsipaji apo caxitajarabi itsacueneneconi ata taxainaējava, paneconi yabara nebeyaxuabiaexanaējitsia. ¹⁹ Itsiata baitsi jane vajavēna judíovi, pamonaē neneconita, apo jitsipae Romano nacuapijivi tanecopatsinexa. Jitsipa picani tanebeyaxuabinexa. Nexata xanē vajētājē taneitorobinexa maberenaja Romanonacua pepo pevetsinē pitabarata taneeconitsinexa pibisiacuenē itsa exanajē. Itsiata xanē apo jitsipañē juya bajarapamonaē taneconitsijava tajanacuapijivijavabelia. ²⁰ Bajaraxuata nexata pacajunatatsi patacacaenexa patacabarēcuaiacuajainexanua. Ponē daxita Israel nacuapijivi copiaevetavanapa athēbēvetsica pepatsijavanexatsica, xanē baja yapētanjiji bajaraponē athēbēvetsica pepatsijavatsica. Nexata xanē vajunupaebaponajē bajaraponē athēbēvetsica pepatsijavatsica. Bajaraxuata necobecētsiaya yamaēya ponaponajē mapacadenamaētoje, jai Pablo Roma tomarata judíovi penamatacaitorobivijavabelia.

²¹ Nexata judíovi penamatacaitorobivi jumaitsi Pabloyavabelia:

—Itsalivaisi ata baja cajena xamë yabara apo panetonajumeitorobi Judea nacuaverena. Vajavëna judíovi patsi ata bajaraverena, itsiata apo panetsipaebi pibisiacuene xamë nexanaejava. ²² Itsiata baitsi jane pajitsipajë patanetsipaebinxamë pacuenia Jesús pelivaisi jumecovënëtame. Daxitanacuanëpijivi baja cajena baracuaicuajijai tsabiabi bajara papejanapitsapaelivaisi: “Apo pexaniajailivaisi cajena bajarapalivaisi. Dioso cajena apo nacatocopatsi bajarapalivaisi vajajumecovënëtsinexa,” jai tsabiabi daxitanacuanëpijivi, jai judíovi penamatacaitorobivi Pablojavabelia.

²³ Nexata judíovi penamatacaitorobivi cajëta matacabi icatsia nacaetuatsijitsia pabota Pablo ponapona. Nexata jane baja icatsia itsa nacaetuata, bajarapamonae ayaitbitsaëtöxaneto parena pabota Pablo ponapona. Nexata Pablo bajayacunua petaxuxuabicujinae livaisi petsipaebijava, matapania caniviyojavabelia copata. Nexata Pablo tsipaeba bajarapamonaejavabelia Dioso pijajivi pevetsijava mapanacuataje. Pablo tsipaebanua bajarapamonaejavabelia pacuenia jumaiti Dioso Moiséspijinëta penajumecopatsilivaisi Jesús yabara. Pablo tsipaebanua pacuenia jumaiti Diosojumepaebivi profetavi bajayata peyaquinaelivaisita Jesús yabara. Bajarapacuenia Pablo tsipaeba bajarapamonae pejumecovënëtsinexa Jesús pelivaisi. ²⁴ Itsamonae bajarapamonaeayajuvënëvi jumecovënëta baja bajarapacuenia Pablo petsipaebilivaisi. Itsiata itsamonae apo jumecovënëtsi. ²⁵⁻²⁶ Nexata daxita bajarapamonae apo najamatabëcuenejëpae. Nexata bajarapamonae penaviabivajënae Pablo icatsia jumaiti bajarapamonaejavabelia mapacueniaje:

—Bajayata baja cajena profeta Isaiaspjinë Espíritu Santo pejamatabëcueneta tajëvelia yapëtaeyaxanatsi paxamë apo panejumecovënëtsijavanexa Jesús pelivaisi. Nexata profeta Isaiaspjinë Espíritu Santo itorobatsi petsipaebinxaxajasalinaivimijavabelia mapacueniaje:

Paxamë raja picani pajumetaeyabiabianame palivaisi pacatsipaebabiabiana. Itsiata apo pajumeyapëtaemë tsane xua yabara bajarapalivaisi pacatsipaebabiabiana. Paxamë raja picani pataeyabiabianame xua pacatsitaexanabiabiana. Itsiata apo payapëtaemë tsane pajamatabëcuene yabara bajaraxua pacatsitaexanabiabiana, jai profeta Isaiaspjinë vajasalinaivimijavabelia.

²⁷ Bajarapacuenia jumaiti profeta Isaiaspjinë tsipaji baja cajena Dioso tajëvelia jumaiti paxamë apo panejumecovënëtsijavanexa yabara mapacueniaje:

Bajarapamonae ajamatabëcuenetaja tsane. Nexata benamuxuacabiaya pejinavanapaevi tsane. Benaitaxutotsaquebiaya pejinavanapaevi tsane. Itsa bajarapacuenia apo itsipae, nexata yapëtaejitsipa pajamatabëcuene yabara tsitaexanatsi xua tane. Jumeyapëtaejitsipana palivaisi tsipaebatsi. Pejamatabëëthëtöjavavetsina jumeyapëtaejitsipa. Nexata najamatabëcuenepeñëyorotsipa perujujamatabëcuenevecua. Nexata xanë jamatabëcuene xanepanaeyaxanaejitsipajë pibisiacuenevecua,

jai baja cajena Dioso bajayata tajëvelia paxamë apo panejumecovënëtsijavanexa yabara, jai Pablo judíovijavabelia Roma tomarata.

²⁸ Pablo icatsia jumaiti judíovijavabelia:

—Pajudíovimë, pajumeyapëtaema mapalivaisije. Ajena baja mapamatacabijavaveliacujinaeje, pevajënaeyabelia, Dioso jivi pecapanepaelivaisinexa apo judíovijavabelia ata tsipaebianatsi. Nexata apo judíovi ata xaniavaetsia namuxunaevetsiana bajarapalivaisi, jai Pablo judíovijavabelia.

²⁹ Itsa baja Pablo najumevereta bajarapacuenia petsipaebijava, nexata jane baja daxita judíovi naviaba. Nexata bajarapalivaisi yabara bajarapamonae namutua nabarëcuacuajijai tsanajetarubena.

³⁰ Pablo penacovaetsibota anijavaibeje ponapona Roma tomarata. Pablo matamotoapona bo pecovaetsijamatabëcuene. Pablo xaniavaetsia copiapitabiaba daxita pamonae sivaxainabiabatsi. ³¹ Pamonae Pablo sivaxainabiabatsi, tsipaebabiaba Dioso pijajivi pevetsijava mapanacuataje. Tsipaebabiabanua pepo petuxanenë Jesucristo pelivaisi. Tsipaebabiaba ajumejunavijibia. Itsajivi ata Pablo apo jumeitavetsitsi petsipaebabiabilivaisi.

Mapabaxutoje San Pablo toyaquina Roma tomarapijivijavabelia

Pacuenia Pablo toyaquina mapabaxutoje Dioso pejumecovënëtsivi, Roma tomarapijivi-javabelia, yabara pelivaisi

¹ Xanë Pablonë, Jesucristo pijajivitonënë. Dioso nejunata. Nexata nitoroba apóstolenëxanë tatsipaebaponaenexa jivi pexanialivaisi, Jesucristo pelivaisi, Diosojavabelia pecapanepaelivaisinexatsi.

² Bajayata vajavajënaeya, Dioso bajarapalivaisi tajëvelia yapëtaeyaexana profetavijavabelia. Nexata bajayata Diosojumepaebivi profetavi itsa yaquina Dioso pejumelivaisi-baxutonexa, bajarapamonae yaquina pacuenia Dioso tajëvelia yapëtaeyaexanatsi bajara-papexanialivaisi. ³ Bajarapalivaisi vajatuxanenë Jesucristo, Dioso pexënato pelivaisi. Jesucristo itsa naexana mapanacuataje, Davidpijinë pemomoxiyajuvënëvata naexana. Bajaraponë, Davidpijinë, bajayata Israelnacia pepo pevetsinëmi. ⁴ Vajatuxanenë Jesucristo petëpaecujinae, Espiritu Santo icatsia asaëyaexanatsi. Bajarapacuenia piasaëyaexanaeatsi petëpaecujinae, jivi yapëtanetsi Dioso pexënatoeuene. Yapëtanetsinua piasaënëcuene ata. ⁵ Jesucristo pejamatabëcueneta Dioso paneitoroba saicaya paapóstolevinexanë, Dioso pata-tonacuenebinexa. Bajarapacuenia Dioso paneitoroba Dioso pejumelivaisi patatsipaebaponaenexa pamonaë apo judiövijava, apo judiövi ata pejumecovënëtsinexa Dioso. ⁶ Nexata paxamë ata Roma tomarata panejinavanapaevi pajumecovënëtamë Baja Dioso. Tsi-paji paxamë ata Dioso pacajunata Jesucristo papijajivinxamë.

⁷ Daxita paxamë, Roma tomarata panejinavanapaevi, pacatoyaquinatsi mapabaxutoje. Dioso pacajitsipa. Nexata pacajunata papijajivinxamë. Pacatovajëtatsi vaxa Diosojavabelia, vajatuxanenë Jesucristojavabelia ata, papecatixutotsoniaenexa jamatabëcuenexanepanaeya panejinavanapaenexana.

Pacuenia picani Pablo bitso jamatabëtane Roma tomarapijivi yabara pelivaisi

⁸ Namataxainaea pacatoyaquinarnutatsi pacuenia jumaitsinë tsabiabi paxamë yabara Diosojavabelia. Diosojavabelia jumaitsinë tsabiabi mapacueniaje: "Sivajamatabëcuenebarëyanë bitso bajarapamonae Jesucristo pejumecovënëtsixae," janë tsabiabi Diosojavabelia paxamë yabara. Bajarapacuenia Diosojavabelia jumaitsinë tsabiabi tsi-paji daxitanacuanëpijivi pacavajunupaeba xaniavaetsia panejumecovënëtavapanapejava Dioso. ⁹ Xanë daxita tajamatabëcuenesaëta Dioso pijacue-tonacuenebaponaponajë jivi itsa tsi-paebabiabajë pexanialivaisi, Dioso pexënato pelivaisi. Dioso yapëtane patacatovajëtabiabijava itsa pacanajamatabënapitabiabatsi tavajëtisijavata Diosojavabelia. ¹⁰ Vajëtabiabajë Diosojavabelia taponanexa paxamëjavabelia. Nexata Dioso itsa netocopatsiana taponanexa, ponaenajë paxamëjavabelia. Bajayajebi picani bitso jamatabëponabiabajë patacataenexa. ¹¹ Nexata jitsipajë patacataenexa, patacatsipaebinxanua palivaisi Espiritu Santo neyapëtaeyaexana. Bajarapacuenia itsa pacayapëtaeyaexanaenatsi, pajamatabëcuenesaëmë taponae tsane orijibia Diosojavabelia. ¹² Namataenetsia najamatabëcueneyavenonaenatsi Dioso pejumelivaisi vajajumecovënëtsijava. Pacayavenonaenatsi panejamatabëcuenesaënexa Diosojavabelia. Paxamë ata juya paneyavenonaenae bajarapacuenia.

¹³ Tajamonae, pacatojitsipatsi paneyapëtaenexa mapacuenije. Bajayajebi picani bajayajebi jamatabëponabiabajë patacataenexa. Itsiata apo necuenecaëjëpabiabi taponanexa. Jitsipajë patacatsipaebinxa Jesucristo pelivaisi paxamëyajuvënëvi, pamonaë abaxë apo jumecovënëtsi, pejumecovënëtsinexa Jesucristo. Pamonaë ata baja jumecovënëta, Jesucristo pijamatabëcuenesaënexa pevajënaeyavelia. Pacuenia apo judiövi ata jumecovënëta pona pevajënaeyavelia itsaxuayo tsi-paebanajetarucajë, bajara paneitsinexa paxamë ata. ¹⁴ Dioso nitoroba tatsipaebaponaenexa Dioso pejumelivaisi daxitajivijava. Nexata Dioso pejumelivaisi jivi tsi-paebaponajë pinijitomaranëjiva, sasavia penaevijava ata. Tsi-paebaponajë mapanacuapijilivaisi bitso peyapëtaevijava ata, apo peyapëtaevijava ata. ¹⁵ Bajaraxuata bitso jitsipajë paxamë, Roma tomarata panejinavanapaevi ata, patacatsipaebinxa pexanialivaisi.

Pacuenia pexanialivaisi, Jesucristo pelivaisi, pinijisaë xaina ayaicue pexanaenexa yabara pelivaisi

¹⁶ Apo ajumeuranë tsabiabi jivi tatsipaebabiabijava pexanialivaisi, Jesucristo pelivaisi, jivi pecapanepaelivaisinexatsi Diosojavabelia. Tsi-paji bajarapalivaisi pejamatabëcueneta

pijaneconi vecuaajibiaexanaenatsi pajivi jumecovënëta bajarapalivaisi. Copiaya patsipae-baponajë bajarapalivaisi judïovi. Bajaraxuacujinae icatsia cotocaevi patsipae-baponajë apo judïovi. ¹⁷ Bajarapalivaisi nacayapëtaeayaexana pacuenia Dioso nacatoexana aneconijibia Dioso vajanacataenexa. Aneconijibia baja Dioso nacatane Jesucristojavabelia vavajajënaeyabelia vajanajamatabëcuene copataponaeaxae. Dioso ra pejumelivaisibaxutota jumaiti mapacueniaje: "Pajivi jamatabëjumaiti: 'Xanë pepacune Dioso neyavenon-aena pacuenia najumecapanepaeya jumaiti,' jamatabëjai, bajarapajivi Dioso aneconijibia tanetsi. Bajarapajivi xainaena matabaci pevreverecaejava," jai Dioso pejumelivaisibaxutota.

Pacuenia daxitatsi mapanacuajivitsi naneconitatsi Diosojavabelia yabara pelivaisi

¹⁸ Dioso, athëbëtsia peecaenë, vaxaitsi jamatabëcueneypëtanetsi. Yapëtanetsi mapacueniaje. Dioso baraanaepanapona daxita pibisiacuene pexanaevijavabelia. Bajarapamonae pevajënaeyabelia pibisiacuene pejamatabëexanaexae, apo jitsipae pejumecovënëtsinexa pexaniajailivaisi, Dioso pejumelivaisi. ¹⁹ Bajarapamonae xaniavaetsia beyapëtae picani pacuenia Dioso jamatabëcueneitsi. Tspajivi baja picani Dioso tsitanajamatabëcueneitajëta bajarapamonaejavabelia. ²⁰ Jivi apo caëjëpaetsi pitaxutota petaenexa Dioso. Nexata jivi apo yapëtae pacuenia itsi Dioso. Itsiata baitsi jane picani caëjëpatsi peyapëtaenexa pacuenia Dioso jamatabëcueneitsi. Caëjëpatsi picani peyapëtaenexana daxitamatacabijavabelianexa Dioso bitso piasaëtsaponaponaejava. Bajaraxua picani jivi caëjëpatsi pijacuata peyapëtaenexa, itsa canaëjëtsipa Dioso pexanaejavanë mapanacuataje. Nexata bajarapamonae acuenebi pejumaitinexa: "Apo payapëtaenë cajena pacuenia Dioso jamatabëcueneitsi," pejainexa. ²¹ Bajarapamonae yapëtae ata Dioso peponaponaejava, itsiata apo yayyatae. Caeto ata cajena Diosojavabelia pexaniajamatabëcuene apo rajutsi. "Pexaniacuene rabaja panetoexaname," apo jai. Biji saya caranata ënatsiquejemajava yabara najamatabëxainabiaba. Nexata pevajënaeyabelia apo peyapëtaexae pexanialivaisi, ajamatabëcueneitaquiri tsaponae. ²² Jamatabëcuenenavëxaniabiaya bajarapamonae jamatabëjumai tsabiabi: "Vaxaitsi cajena bitso vawayapëtaevi daxitacuene," jamatabëjai tsabiabi bajarapamonae. Itsiata baitsi jane cajena apo yapëtae. ²³ Bajarapamonae apo najamatabëcuenecopabi ayajamatabëcuenenë Diosojavabelia, ponë apo petëpaenënexa daxitamatacabijavabelianexa. Caranata saya jivi pecobeta jumapecataeya pexanaenëanëjavabelia najamatabëcuenecopaba. Bajarapamonae navajëcabiaba itsamonae pecobeta jivi jumapecataeya pexanaenëanëjavabelia. Navajëcabiabanua itsamonae pecobeta pepunaevi jumapecataeya pexanaenëanëjavabelia ata. Navajëcabiabanua itsamonae pecobeta jomo jumapecataeya pexanaenëanëjavabelia ata. Navajëcabiabanua itsamonae pecobeta cuatro pataxutabeje pejinavanapaevi jumapecataeya pexanaenëanëjavabelia ata.

²⁴ Bajaraxuata Dioso tocopata bajarapamonae pibisiacuene pexanavanapaenexa. Nexata pacuenia jamatabëexana, exanavanapa. Nexata bajarapamonae pevitota pibisiacuene namataenetsia natoexanabiaba. ²⁵ Bajarapacuenia Dioso tocopata pacuenia bajarapamonae jitsipa pexanavanapaenexa tspajivi bajarapamonae Dioso pejumelivaisi, pexaniajailivaisi, apo jamatabëjumecovënëtsi. Jumecovënëta saya caranata penajumetsënëtsilivaisi, jivi pecobeta jumapecataeya pexanaenëanë pelivaisi. Bajarapamonae apo yayyatae pepo Dioso, ponë daxitacuene exana mapanacuataje. Caranata yayyataeya navajëcabiaba Dioso pecobecovëjavënëjavabelia. Najamatabëcuenecopabanua ëbajaraxuanëjavabelia. Bajarapamonae nexata saya namuxujemata caranata pepo Dioso, ponëjavabelia jivi daxitamatacabijavabelianexa jumaitisijitsia: "Diosomë, bitso ayajamatabëcuenenëmë," jajitsia. Bajara itsi tsane.

²⁶ Bajaraxuata Dioso tocopata bajarapamonae pibisiacuene pexanabiabinexa. Pacuenia jamatabëexana, exanavanapa. Mapanacuata picani Dioso tocopata petiriavi pebi pejitsipaenexa. Itsiata baitsi jane bajarapamonae ëpetiriavi najitsipa. Nexata ëpetiriavi namataenetsia naperabëquenetsiataeyabiaba. ²⁷ Bajara pijinia pacuenia Dioso tocopata pebjivi petiriva pejitsipaenexa. Itsiata baitsi jane bajarapamonae ëpebjivi najitsipa. Nexata ëpebjivi namataenetsia naperabëquenetsiataeyabiaba. Bajarapacuenia pibisiacuene penatsixanaexae, Dioso ayaicuenia naneconitsiaexanaponatsi bajarapamonae.

²⁸ Bajarapamonae apo jamatabënajinae Dioso. Pacuenia picani Dioso tojitsipatsi bajarapamonae pexanaenexa, apo exanae. Bajaraxuata Dioso tocopata bajarapamonae penajamatabëxainanaexa ëpibisiacuene pexanaejava. ²⁹ Bajarapamonae exanavanapa bitso daxita pibisiacuene. Èpibisiacuene yabara najamatabëxainabiaba penaperabëquenetsiataenexa. Daxita pibisiacuene sivanajamatabëxainabiabanua. Jamatabëxainanaeyababiabanua itsamonae pecobecovë. Pibisiacuene jamatabëxanabiabanua itsamonaejavabelia. Cuenecaëbabiabanua

itsamonae pexainaejava. Jamatabëbeyaxuababiabanua jivi. Namataenetsia nabijataeya najumeanaenotabiabanua. Bitso cajena jivi yamaxëitojorobabiabanua. Èpamonae ata bitso naitoya tsabiabinua. ³⁰ Bajarapamonae itsamonae pepëya pibisiacuenia najumetsënëtsia baracuaicuajiai tsabiabinua. Bajarapamonae apo jitsipaenua Dioso. Nexata itoya Dioso pijacuene. Apo yayiataeyabiabinua itsamonae ata. Naitaxutojematsia naëcotabiabanua itsamonae. Bajarapamonae jumaiti tsabiabi: “Xanë bitso ayajamatabëcuenenënë itsamonae matatoxenetsia,” jai tsabiabi itsamonaejavabelia. Bajarapamonae najamatabëxainabiabanua itsamonae ata pibisiacuenie pexanaeyaexanaenexa. Bajarapamonae apo jumecovënëtabiabinua paxajivi, penajivi ata. ³¹ Bajarapamonae apo jamatabëjumeyapëtaeyabiabinua caelivaisiyo ata, Dioso pejumelivaisi. Bajarapamonae itsajivijavabelia najumecapanepaeya pejumaitisicuenia, apo exanabiabinua. Bajarapamonae asivaya apo taeyabiabinua itsajivi ata. Bajarapamonae itsajivi itsa itsacueniabatsi, apo jitsipabiabi pexaniabinexa icatsia. Bajarapamonae apo itaxutotsoniataeyabiabinua itsajivi ata. ³² Bajarapamonae bitso xaniavaetsia yapëtanë picani pacuenia Dioso itorobatsi pexanaenexa. Yapëtanenua picani Dioso penavecuaxuabijavanexa bajarapitsipibisiacuenie pexanaevi. Itsiata baitsi jane bajarapamonae tsiteca pibisiacuenie exanapona. Orijibia sivabarëya tsabiabi itsamonae ata pibisiacuenie itsa exana.

2

Pacuenia itsamatacabi Dioso naneconitsiaexanaejitsia pijaneconi pexainaevi yabara pelivaisi

¹ Paxamë pajudïovimë, pacatsipaebianatsi mapacueniaje. Pajudïovimë pajumaitsimë tsabiabi itsajivi yabara: “Mara pajivi pibisiacuenie exanaje. Nexata Dioso naneconitsiaexanaenatsi,” pajamë tsabiabi. Bajarapacuenia paxamë itsa pajumaitsimë tsabiabi itsajivi yabara, nexata paxamë ata Dioso pacananeconitsiaexanaena. Tspipaji paxamë ata pibisiacuenie paexaname bajarapacuenia itsa pajumaitsimë tsabiabi itsajivi yabara. ² Yapëtanetsi baja cajena mapacuenieje. Itsamatacabi Dioso naneconitsiaexanaena pibisiacuenie pexanaevi, caejivi canacujitsia, paneconivajëto xaina, bajarapaneconivajëtota Dioso naneconitsiaexanaponaena. ³ Bajara pijinia pacuenia paxamë ata pibisiacuenie paexanabiabi atamë, pajumaitsimë tsabiabi itsajivi yabara: “Mara pajivi pibisiacuenie exanaje. Nexata Dioso naneconitsiaexanaenatsi,” pajamë tsabiabi. Bajara pijinia pacuenia paxamë ata bajarapitsipibisiacuenie paneexanabiabixae, pëtsa pajamatabëjumaitsimë tsabiabi: “Vaxaitsi judïovitsi Dioso pijajivixaeitsi, apo nacananeconitsiaexanae tsane Dioso,” pajamatabëjamë pëtsa. Tspipaji Dioso naneconitsiaexanaena daxita pibisiacuenie pexanaevi. ⁴ Bepacanaëjëtame xaniavaetsia pacuenia Dioso jamatabëcuenieitsi. Dioso cajena abaxë bepijia apo naneconitsiaexanae pibisiacuenie pexanaevi ata. Dioso raja abaxë jamatabëcuenievetaponapona pibisiacuenie pexanaevi ata pevajëtsinexatsi pevecuaajibiaexanaenexa pijaneconi. Paxamë ata Dioso pacatojitsipa panecopabinexa pibisiacuenie paneexanabiabijava, panenajamatabëcuenie pënëyorotsinexa Diosojavabelia. Bajaraxuata abaxë Dioso pacaitaxutotsoniatane. ⁵ Itsiata paxamë pajamatabëcuenietajamë bitso. Apo pajamatabëcopatsimë pibisiacuenie paneexanaejava. Nexata ayaneconi panatoexanaponame panevajënaeyabelia. Nexata ayacuenia Dioso pacananeconitsiaexanaena pamatacabi Dioso naneconitsiaexanaena daxita pijaneconi pexainaevi. ⁶ Bajarapamatacabi Dioso naneconitsiaexanaponaena caejivi canacujitsia. Paneconivajëto natoexanaponapona itsa abaxë asaë tsaponaponae mapanacuataje, bajarapaneconivajëtota Dioso caejivi canacujitsia naneconitsiaexanaponaena. ⁷ Itsamonae jamatabëcuenienabiabatsi ëpexaniacuenie pexanabiabinexa. Bajarapamonae jitsipabiabanua pejinavanapaenexa Dioso pijapenivenivenaenacuataatsia. Jitsipabiabanua Dioso pesivajamatabëcueniebarëyanexatsi. Jitsipabiabanua pexainaevenexa matacabi apo pevereveceajava. Bajarapamonae Dioso rajutsianatsi matacabi apo pevereveceajava. ⁸ Itsamonae natojitsipa daxitacuenie pexainaejava ëbajarapamonaeenexa. Apo jumecovënëtsinua pexaniajilivaisi. Saya exanavanapa ëpibisiacuenie. Bajarapamonae Dioso anaeya ayacuenia naneconitsiaexanaenatsi. ⁹ Daxitajivi pibisiacuenie exana, judïovi, apo judïovi ata. Daxita bajarapamonae pibisiacuenie pexanaexae, Dioso bejibiaexanaenatsi. Bitso yanajamatabëxainaevenanua pijaneconi. ¹⁰ Itsiata baitsi jane daxita pamonae pexaniacuenie pexanaevi, judïovi, apo judïovi ata, Dioso pijapenivenivenaenacuataatsia jinavanapaena. Dioso sivajamatabëcueniebarëya tsanetsi. Jinavanapaenanua jamatabëcuenexanepanaeya.

¹¹ Dioso itsa naneconitsiaexanaena daxita pijaneconi pexainaevi, najëpaeya naneconitsiaexanaena. Paneconivajëta xaina caejivi canacujitsia, bajarapaneconivajëtota Dioso

naneconitsiaexanaponaena caejjivi canacujitsia. ¹² Pamonae apo judíovi, yapêtae ata xua pibisiacuene, itsiata bajarapapibisiacuene exanavanapa. Nexata bajarapapibisiacuene pexanavanapaexae, Dioso naneconitsiaexanaenatsi apo judíovi. Pamonae judíovi, yapêtae ata pacuenia Dioso Moisésppijnêta penajumecopatsilivaisi jumaitsi pibisiacuene pexanaeyaniva, itsiata bajarapapibisiacuene exanavanapa. Nexata bajarapapibisiacuene pexanavanapaexae, Dioso naneconitsiaexanaenatsi judíovi. ¹³ Dioso raja judíovi aneconijibia apo tae saya jema judíovi peyapêtaejava yabara, palivaisi Dioso tonajumecopata Moisésppijnêta. Dioso raja judíovi aneconijibia tane matapania judíovi itsa exanavanapa pacuenia Dioso itoroba Moisésppijnêta petonajumecopatsilivaisita. ¹⁴ Pamonae apo judíovi, apo tsipaebitsi Dioso Moisésppijnêta penajumecopatsilivaisi. Itsiata apo judíovi ata itsajavata exana pacuenia itoroba Dioso Moisésppijnêta penajumecopatsilivaisita. Apo judíovi apo muxujíobi atatsi, yapêtane pejamatabêêthêtota xua pexaniacuene pexanaenexa. Yapêtanenua xua ata pibisiacuene pexanaeyaniva. ¹⁵ Pamonae pexaniacuene exanavanapa tsipaebinejevatsi Dioso Moisésppijnêta penajumecopatsilivaisi, bajarapamonae exanavanapa pejamatabêêthêtota peyapêtaecuena, pacuenia itorobatsi Dioso Moisésppijnêta penajumecopatsilivaisita. Daxita apo judíovi yapêtane pejamatabêêthêtota pexaniacuene pexanaenexa. Yapêtanenua xua pibisiacuene pexanaeyaniva. ¹⁶ Jemata raja copiapatsiana pamatacabi Dioso itorobijitsia Jesucristo penaneconitsiaexanaenexa daxitajivi. Nexata Jesucristo daxitajivi naneconitsiaexanaena muetsia daxitajivi pibisiacuene pexanavanapaeneconi yabara. Naneconitsiaexanaenana papibisiacuene ata muetsia daxitajivi najamatabêxainavanapa yabara. Nexata bajarapamatacabi daxitajivi nayapêtaena Dioso penaneconitsiaexanaejavanexatsi muetsia pexanavanapaeneconi yabara. Bajarapacuenia jivi tsipaebaponajê Dioso pitorobilivaisi itsa tsipaebaponajê.

Judíovi yabara, Dioso Moisésppijnêta penajumecopatsilivaisi ata, yabara pelivaisi

¹⁷ Pajudíovimê, pajumaitsimê tsabiabi: “Vaxaitsi raja judíovitsi. Vaxaitsi yapêtanetsi Dioso Moisésppijnêta penajumecopatsilivaisi. Bajaraxuata Dioso nacacapanepaena. Dioso raja êjudíovitsi vajaDioso,” pajamê tsabiabi. ¹⁸ Payapêtaneme baja cajena xua Dioso pacatojitsipa paneexanaenexa. Payapêtanemenua Dioso Moisésppijnêta penajumecopatsilivaisi. Bajaraxuata payapêtaneme xua pexaniacuene paneitapetsinexa paxanavanapanenexa. ¹⁹ Pajamatabêjumaitsimênu tsabiabi: “Vaxaitsi cajena bitso yapêtanetsi Dioso pejumelivaisi, vajatsipaebinexa pamonae jumetae ata Dioso pejumelivaisi, abaxê apo pejumeyapêtaevi pexaniajailivaisicuene. Vaxaitsi jamatabêcueneitayotsianatsi pamonae pajamatabêcueneitacquirivi, Dioso pejumelivaisivecua saya pejinavanapaevi,” pajamatabêjamênu tsabiabi. ²⁰ Pajamatabêjumaitsimênu tsabiabi: “Vaxaitsi cajena nacacajêpa vajayapêtaeyaxanaenexa pamonae abaxê apo yapêtae pacuenia Dioso jamatabêcueneitsi. Nacacajêpanua vajayapêtaeyaxanaenexa pamonae ata pejanajumecovênêtsivi Dioso. Nacacajêpa bajarapacuenia vajayapêtaeyaxanaenexa tsipaji yapêtanetsi pacuenia Dioso jumaitsi Moisésppijnêta penajumecopatsilivaisita. Bajarapalivaisi pexaniajailivaisi baja cajena. Yapêtaeyaxana pacuenia jivi exanaejitsia,” pajamatabêjamê tsabiabi. ²¹ Bajarapacuenia paxamê patsipaebabiabi atamê itsamonaejavabelia, itsiata paxamê ata apo paexanaemê bajarapacuenia. “jPêtsa panacobotoxotame,” pajamê tsabiabi itsamonaejavabelia. Itsiata paxamê panacobotoxotabiabame. ²² “Pêtsa panaperabêquenetsiataneme itsavajavabelia panijavajivecua,” pajamê tsabiabi ata itsamonaejavabelia, itsiata paxamê panaperabêquenetsiatayabiabame itsavajavabelia panijavajivecua. Paxamê pajumaitsimê tsabiabi: “Jumapecataeya pexanaenêanêjavabelia penavajêcaecuene bitso abeje. Itsa pajonejitsipame jumapecataeya pexanaenêanê penubenaebota, pacajamatabêcuene bijianaejitsipa,” pajamê tsabiabi. Itsiata paxamê pajoneyabiabame jumapecataeya pexanaenêanê penubenaebota penamatamotsijavanê, ofrendacuena pebjijavanê, panacobotoxotabiabinexa. ²³ Paxamê pajudíovimê jivi picani patsipaebabiabame Dioso Moisésppijnêta penajumecopatsilivaisi, bitso pexanepanaelivaisi. Itsiata paxamê ata apo pajumecovênêtsimê bajarapalivaisi. Bajaraxuata jivi apo yaiyatae Dioso. ²⁴ Bajara paneitsixae, copiapata jane baja pacuenia baja cajena Dioso pejumelivaisibaxutota tajêvelia pacavajunupaeba. Dioso pejumelivaisibaxutota tajêvelia itsa pacavajunupaeba, jumaitsi paxamê yabara mapacueniajê: “Pamonae apo judíovi, pibisiacuena Dioso baracuaicuajai tsane judíovi xaniavaetsia apo petsitajinavanapaexae,” jai tajêvelia Dioso pejumelivaisibaxutota paxamê Dioso apo panejumecovênêtsijavanexa yabara.

²⁵ Paxamê pajudíovimê papebijivimê, pacaperabêcaucuba itsa abaxê patsiquirinacuetoximê. Baitsi pacaboupipeabêcaucuba. Bajarapacuenia pacaperabêcaucuba panenayapêtaenexa Dioso papijajivicuenemê. Bajarapacuenia pacatonamatamota matapania itsa pajumecovênêtavanapame Dioso Moisésppijnêta penajumecopatsilivaisi. Itsa

apo pajumecovënëtsimë tsipae Dioso Moiséspijinëta penajumecopatsilivaisi, papecaperabëcaucubivi ata, itsiata Dioso apo papijajivimë tsipae. ²⁶ Pamonaë apo judíovi ata, apo peperabëcaucubivi atatsi, pejumecovënëtavánaepaxae pacuenia Dioso Moiséspijinëta penajumecopatsilivaisi itorobatsi, nexata bajarapamonaë ata Dioso pijajivicuena tanetsi. ²⁷ Pamonaë apo judíovi, apo peperabëcaucubivi atatsi, itsiata pejumecovënëtavánaepaxae Dioso Moiséspijinëta penajumecopatsilivaisi, bajarapamonaë itsamatacabi pacuarabiana Diosojavabelia. Bajarapacuenia pacuarabiana Diosojavabelia tsipaji Dioso Moiséspijinëta penajumecopatsilivaisi payapëtae atamë, papecaperabëcaucubivi atanua, itsiata apo pajumecovënëtsimë Dioso Moiséspijinëta penajumecopatsilivaisi. ²⁸ Pajivi perabëcaucutsi atatsi penayapëtaenexa Dioso pijajivitonëcuene, saya peperabëcaucutsijjavatsi yabara Dioso pijajivitonëcuena apo taetsi. ²⁹ Pajivi pepacuene Dioso pijajivitonë, bajarapajivi peneta pejamatabëëthëtovetsina Dioso jumecovënëta. Pajivi pepacuene Dioso pijajivitonë, bajarapajivi saya naniavelia apo perabëcaucutsitsi. Biji rajane pejamatabëëjëtota pejanajamatabëcuene Rajutatsi Espíritu Santo. Bajarapajivi xua exanaponona, exanaponona Dioso pesivabarëyanexatsi. Bajaraxua apo exanaponona saya mapanacuapíjivi pesivabarëyanexatsi.

3

¹ ¿Detsa xua judíovi xaina Diosojavabelia, pamonaë apo judíovivecua? ¿Detsa xua yabara toxanepanatsi Diosojavabelia ponë peperabëcaucutsinëtsi apo peperabëcaucutsinëtsivecua? ² Palivaisianë judíovi toxanepanatsi Diosojavabelia, navita. Penamataxainaelivaisi, palivaisi judíovi toxanepanatsi Diosojavabelia, maitsije. Dioso tonatjumelivaisicopatatsi bajarapamonaëjavabelia. ³ Itsamonaë judíovi apo jumecovënëtsi pacuenia Dioso najumecapanepaeya jumaitsi petoexanaenexatsi. Pëtsa bajarapacuenia yabara pajamatabëjumaitsimë mapacueniaje: “Dioso meta itsiata apo exanaë tsane pacuenia picani najumecapanepaeya jumaitsi pexanaenexa. Tsipaji judíovi apo jumecovënëtsi,” pajamatabëjamë pëtsa Dioso yabara. ⁴ Dioso cajena apo penajumetsënëtsinë. Jivi rajane banajumetsënëta. Dioso pexaniajailivaisi jivijavabelia petsipaebabiabijava yabara, tajëvelia Dioso pejumelivaisibaxutota jumaitsi mapacueniaje:

Xamë Diosomë, pexaniajailivaisi jivijavabelia tsipaebabiabame. Jivi cajumeaebi ata, itsiata daxitajivi peyapëtaenexa, xamë apo nenajumetsënëtsinë, jai Dioso pejumelivaisibaxutota.

⁵ Pibisiacuene vaxaxanaejava yabara Dioso nacananeconitsiaexanaena. Nexata Dioso vajanacananeconitsiaexanaejavata, najamatabëcueneitajëtsiana daxitajivi peyapëtaenexa Dioso apo pejitsipaenëcuene pibisiacuene pexanaejava. Bajaraxuata pamonaë naneconita Diosojavabelia, Dioso naneconitsiaexanabiaba. Nexata Dioso jivi penaneconitsiaexanaejava yabara, itsa jumaitsinë tsipae: “Dioso pibisiacuene exana itsa naneconitsiaexana pijaneconi pexainaevi,” itsa janë tsipae, nexata jamatabëcuenenavëxaniabiaya jumaitsinë tsipae. Tsipaji Dioso itsa apo naneconitsiaexanaë tsipae pijaneconi pexainaevi, Dioso apo najamatabëcueneitajëtsi tsipae pibisiacuene pexanaejava apo pejitsipaenëcuene. Nexta pacuenia Dioso apo pejumecovënëtsivi banajamatabëxaina, bajarapacuenia najamatabëxainaejitsipajë. ⁶ Tsipaji Dioso saya jema jivi apo penaneconitsiaexanaenë. Itsa saya jema Dioso jivi naneconitsiaexanaejitsipa, apo naneconitsiaexanaë tsipae épijaneconi pexainaevi. Nexata caejivi canacujitsia pibisiacuene pexanaenaeconi yabara, paneconivajëto xainapona, bajarapaneconivajëto Dioso apo naneconitsiaexanaponaë tsipae.

⁷ Itsamonaë meta jamatabëcuenenavëxaniabiaya jumaitsi tsane mapacueniaje: “Daxitajivi pecanaëjëtsinexa Dioso apo penajumetsënëtsinëcuene, vaxaitsi yamaxëitjorobiaya jivi livaisi tsipaebabiabianatsi. Bajarapacuenia yamaxëitjorobiaya jivi livaisi tsipaebabiabi atatsi tsane, itsiata Dioso apo nacananeconitsiaexanaë tsane. Tsipaji vaxaitsi yamaxëitjorobiaya jivi livaisi vajatsipaebabiabijava pejamatabëcuenet, daxitajivi canaëjëtsiana Dioso bitso pexaniajainëcuene, apo penajumetsënëtsinëcuene. Bajaraxuata Dioso apo nacananeconitsiaexanaë tsane vajanajumetsënëtabijava yabara,” jai meta tsane itsamonaë jamatabëcuenenavëxaniabiaya. ⁸ Bajarapacuenia itsa najamatabëxainaena bajarapamonaë, nexata meta jamatabëcuenenavëxaniabiaya mataropotsia jumaitsi tsane: “Pibisiacuene meta vaxaxanaejava ata xanepana. Nexata pibisiacuene exanabiabianatsi. Tsipaji vaxaitsi pibisiacuene vaxaxanabiabijava pejamatabëcuenet, daxitajivi canaëjëtsiana Dioso pibisiacuene apo pexanaenëcuene,” jai meta tsane bajarapamonaë jamatabëcuenenavëxaniabiaya. Bajarapacuenia itsa jumai tsane, nexata pexaniajailivaisi jivijavabelia apo tsipaebabiabi tsane. Itsiata baitsi jane itsamonaë najumetsënëtsiaya xanë yabara jumai tsabiabi: “Pablo raja itorobapona jivi bajarapacuenia pibisiacuene pexanaenexa,” jai tsabiabi xanë yabara. Bajarapacuenia pejumaitsvi xanë yabara, Dioso naneconitsiaexanaenatsi.

Pacuenia daxitajivi naneconita Diosojavabelia yabara pelivaisi

⁹ ¿Nexata tsaja ėjudĳovi saicaya aneconijibia Dioso tane daxita mapanacuapijivi ve-
cuaje? Jume raja. Jumaitsinĳe baja cajena mapacueniaje. Daxitatsi mapanacuapijivitsije
pibisiacuene ėvajaexanaevi. Judĳovi, apo judĳovi ata, bajara itsi. ¹⁰ Daxitatsi pibisiacuene
vajaexanaejava yabara, Dioso pejumelivaisibaxutota jumaitsi mapacueniaje:

Caejivi ata aneconijibia apo ponapone Dioso pitabarata. ¹¹ Ajibi pepapĳetaejivi pacue-
nia Dioso jamatabĳecueniitsi. Ajibi pepacuene pejamatabĳeĳethĳetovetsina pejume-
covĳenĳsijivi Dioso. ¹² Daxita Diosovecua naxuabiaya jinavanapa. Daxita aja-
matabĳecunebeje. Ajibi pexaniacuene pexanabiabijivi. ¹³ Pacuenia petĳepaenĳ
pemĳethĳ tuxutsaeba, bajara itsi bajarapamonae pecubovojojota pecuaicuajijava
pibisilivaisi. Pijumeta jivi yamaxĳitojorobabiaba. Pacuenia jomo pecubovojo-
tota xaina piatanejava, bajara pijinia itsi bajarapamonae pecuaicuajijava pena-
jumetsĳenĳsilivaisi. ¹⁴ Pecubovojojota cuaicuajai ĳipibisilivaisi pianapanaenexa.
¹⁵ Itsacuene apo exanae atatsi, bepĳija jitsipa jivi pebeyaxuabinexa. ¹⁶ Itsabela jina-
vanapa, bejĳobiaexanabiaba itsamonae. ¹⁷ Bajarapamonae apo yapĳetae xaniavaet-
sia peyajavajinavanapaenexa jivi. ¹⁸ Bajarapamonae apo canaĳĳetsi pejunavinexa
Diosojavabelia,

jai mapacueniaje Dioso pejumelivaisibaxutota daxitatsi mapanacuapijivitsi yabara.

¹⁹⁻²⁰ Vaxaitsi baja cajena yapĳetanetsi mapacueneje. Bajayata Dioso pejumelivaisi
tonajumecopata ĳjudĳovi picani pejumecovĳenĳĳavanapaenexa. Itsiata judĳovi apo jume-
covĳenĳscapanepae bajarapalivaisi. Bajaraxuata judĳoviyajuvĳenĳnĳ, caenĳ ata, acuenebi
pejumaitsinexa: “Xanĳ cajena apo tonaneconitsinĳ Dioso,” pejainexa. Daxita ma-
panacuapijivi, judĳovi, apo judĳovi ata, beyapĳetane penaneconitsijava Diosojavabelia. Tsi-
paji itsajivi ata apo caĳĳepaetsi pejumecovĳenĳsinexa pacuenia itoroba Dioso penajumeco-
patsilivaisita. Bajarapalivaisi Dioso najumecopata pibisiacuene vajaexanavanapaejava
vajasivajamatabĳejumaitsinexa mapacueniaje: “Xaniajai rabaja. Xanĳ ata pibisiacuene
taexanaenĳ,” vajajamatabĳejainexa bajarapalivaisi pejamatabĳecueneta.

*Pacuenia Dioso aneconijibia tane pajivi najamatabĳecuenecopata Jesucristojavabelia
yabara pelivaisi*

²¹ Aeconoxae baja mapamatacabitaje Dioso nacayapĳetaeayaexana pacuenia nacatoex-
ana aneconijibia vajanacataenexa. Dioso apo jamatabĳejumaitsi: “Pamonae jume-
covĳenĳscapanepa Moissĳipĳinĳeta tanajumecopatsilivaisi, bajara ĳpamonae aneconijibia ta-
enajĳ,” apo jamatabĳejai. Pacuenia Dioso capanepaejitsia Dioso pejumecovĳenĳtsivi, bajay-
ata Diosojumepaebivi profetavi tajĳvelia yaquina Dioso pejumelivaisibaxutota. ²² Mara
pacuenia Dioso jivi aneconijibia taneje. Pajivi jamatabĳejumaitsi: “Xaniajai. Jesucristo itsa
tĳpa cruzata, pibisiacuene taexanaeconĳ yabara tĳpa,” jamatabĳejai, bajarapajivi Dioso
aneconijibia tanetsi. Dioso aneconijibia taenatsi daxita pamonae jumecovĳenĳta Jesu-
cristo cruzata pesivatĳepaejavatsi pijaneconĳ yabara. Tsipaji Dioso daxitajivi najĳepaeyatane.
²³ Daxitajivi baja cajena pibisiacuene exana. Bajaraxuata caejivi ata aneconijibia
Dioso pejitsipaecuenia apo toponapone. Daxitajivi Diosovecua naxuabiaya jinavanapa.
²⁴ Itsiata baitsi jane Dioso pinijicuenia piasivaxae daxitajivi, aneconijibia tane daxita pa-
monae jumecovĳenĳta Jesucristo cruzata pesivatĳepaejavatsi pijaneconĳ yabara. Jivi apo na-
matavenonae pijacuata penaneconimatamotsinexa Diosojavabelia. Tsipaji baja anecon-
ijibia tanetsi Jesucristo pecomuatsixaetsi pibisiacuene pexanaeneconivecua. ²⁵ Dioso
copata Jesucristo petĳepaenexa cruzata vajanacaneconimatamotsinexa, pibisiacuene va-
jaexanaeneconimi. Nexata itsa jumecovĳenĳtatsi Jesucristo cruzata vajanacasivatĳepaejava,
nacavecuaajibiaexana pibisiacuene vajaexanaeneconimi. Bajarapacuenia Dioso copata
Jesucristo cruzata vajanacasivatĳepaenexa mapanacuapijivitsi. Tsipaji Dioso apo jitsipae
pibisiacuene vajaexanaejava. Bajaraxuata Dioso aneconijibia nacatane Jesucristo itsa
nacanecanimatamota, pibisiacuene vajaexanaeneconimi. Pepo bajayata pejinavana-
paevimiyajuvĳenĳvi ata, najamatabĳecuenecopaba Diosojavabelia. Nexata bajarapamonae
aemi pibisiacuene exanae ata, itsiata Dioso apo naneconitsiaexanaetsi. Tsipaji Dioso
tajĳvelia yapĳetane Jesucristo pesivatĳepaejavaneja bajarapamonae aemi ata pibisiacuene pex-
anaeneconĳ yabara. ²⁶ Ajena, mapamatacabitaje, Dioso jivi tsitanajamatabĳecuneitajĳeta jivi
pibisiacuene pexanaejava Dioso apo pejitsipaenĳcuenene. Tsitanajamatabĳecuneitajĳetanua
aneconijibia petaejavaneja pamonae jumecovĳenĳta Jesucristo pesivatĳepaejavatsi cruzata
pijaneconĳ pevecuaajibiaexanaenexatsi.

²⁷ Bajarapacuenia Dioso nacatoexana aneconijibia vajanacataenexa. Dioso aneconijibia
apo nacatae vajacuata vajaexanaejava yabara. Biji rajane Dioso aneconijibia nacatane
vajajumecovĳenĳsixae Jesucristo vajanacasivatĳepaejava cruzata vajaneconĳ yabara. Nexata
ayaajamatabĳecunejivitsi vajanacataenexa, acuenebi vajajumaitsinexa itsajivijavabelia:

“Xanē taexanaejava pejamatabēcueneta, Dioso aneonijibia netane,” vajainexa acuenebi.²⁸ Vaxaitsi baja cajena yapētanetsi mapacueneje. Dioso aneonijibia tane pajivi jumečovēnēta Jesucristo pesivatēpaejavatsi cruzata pijaneconi yabara. Bajarapajivi apo jumečovēnētsi ata Dioso Moiséspijinēta penajumecopatsilivaisi, Dioso itsiata aneonijibia tanetsi pejumecovēnētsixae Jesucristo pesivatēpaejavatsi cruzata pijaneconi yabara.

²⁹ Dioso raja ējudiōvi apo pijaDioso. Dioso raja apo judiōvi ata pijaDioso.³⁰ Caenē rabaja Dioso. Pematatsēnēa baja itsanē Dioso ajibi. Bajaraponē Dioso judiōvi aneonijibia tane, pamonaē jumečovēnēta Jesucristo pesivatēpaejavatsi cruzata pijaneconi yabara. Bajara pijinia pacuenia Dioso aneonijibia tane pamonaē apo judiōvi ata.³¹ Vaxaitsi baja xaniavaetsia Jesucristo jumečovēnētatsi vajanacasivatēpaejava cruzata vajaneconi yabara. Nexata Dioso Moiséspijinēta penajumecopatsilivaisi yabara, apo bejamatabējumaitsitsi: “Dioso Moiséspijinēta penajumecopatsilivaisi tajumecovēnētsijavami, copatajē baja. Tspijaji baja jumečovēnētajē Jesucristo tanesivatēpaejava cruzata tajaneconi yabara,” apo bejamatabējajitsi. Biji rajane Jesucristo vajanacasivatēpaejava cruzata, itsa jumečovēnētatsi, Dioso Moiséspijinēta penajumecopatsilivaisi ata bajarajota yajavajumečovēnētatsi.

4

Pacuenia Abrahampijinē bajayata Dioso aneonijibia tanetsi pejumecovēnētsixae pacuenia Dioso najumecapanepaeya jumaiitsitsi yabara pelivaisi

¹ Pacatsipaebijitsiatsi pajamatabēcuenelivaisi yabara Abrahampijinē Dioso aneonijibia tanetsi. ² Abrahampijinē pijacuata ēpexaniacuene itsa exanabiabijitsipa, nexata jumaiitsi tsipae Diosojavabelia: “Ēpexaniacuene taexanabiabixae, nexata aneonijibia netaneme,” jai tsipae. Itsiata baitsi jame Abrahampijinē Diosojavabelia apo jumaiitsi bajarapacuenia. Tspijaji Abrahampijinē ēpexaniacuene pijacuata exanabiabi ata tsipae, bajaraxua yabara Dioso aneonijibia apo taetsi tsipae. ³ Biji rajane Dioso pejumelivaisibaxutota Abrahampijinē yabara jumaiitsi mapacueniaje: “Abrahampijinē najamatabēcopatsiya Diosojavabelia pejamatabējumaitsiabixae: ‘Xaniajai. Pepacuene Dioso netoexanaena pacuenia najumecapanepaeya nejumaiitsi,’ pejamatabējajitsiabixae, nexata Dioso aneonijibia tanetsi,” jai Dioso pejumelivaisibaxutota Abrahampijinē yabara. ⁴ Pajivi itsanē pijajava tonacuenebaponapona, bajarapajivi xua rajutatsi, amoneya apo rajutsitsi. Petonacuenebixae matamotatsi. ⁵ Pajivi apo exanae ata pexaniacuene, itsiata jamatabējumaitsi: “Dioso, ponē penaneconitsivi pijaneconivecua ajibiaexanabiaba, bajaraponē pepacuene necapanepaena pacuenia najumecapanepaeya jumaiitsi tanecapanepaenexa,” jamatabējai, bajarapajivi Dioso aneonijibia taenatsi pecapanepaenexatsi pijaneconivecua. ⁶ Pepo bajajata Davidpijinē vajunupaeba pejamatabēcuenebarēyajava pamonaē baja Dioso aneonijibia tanetsi. Bajarapacuenia Dioso aneonijibia tanetsi bajarapamonaē pejumecovēnētsixae Dioso najumecapanepaeya pejumaiitsicueniatsi. Bajarapamonaē Dioso aneonijibia apo taetsi, pijacuata ēpexaniacuene exanabiabi ata. ⁷ Davidpijinē pepo bajayata tajēvelia bajarapamonaē yabara jumaiitsi mapacueniaje:

Jamatabēcuenebarēya baja tsavanapae pamonaē picani naneconita Diosojavabelia. Barajamatabēcuenexanapanatsi baja Dioso. Tspijaji baja pibisiacuene pexanaeconomy, vecuaajibiaexanatsi. ⁸ Jamatabēcuenebarēya baja tsaponaponaē pajivi pibisiacuene pexanaejivi ata, itsiata Dioso aneonijibia itsa tanetsi, jai mapacueniaje Davidpijinē bajayata.

⁹ Bajarapacuenia Davidpijinē itsa jumaiitsi, pejamatabēcuenebarēyatsavanapaevi baja, ējudiōvi, peperabēcucubivitsi yabara, apo jumaiitsi. Pamonaē apo judiōvi, apo peperabēcucubivi atatsi, yabara jumaiitsi. Xaniajanē pacuenia pacatsipaebijitsiatsi. Abrahampijinē bajayata Dioso jumečovēnēta najumecapanepaeya pejumaiitsicueniatsi. Nexata baja Abrahampijinē Dioso aneonijibia tanetsi pibisiacuene pexanaeconomy. ¹⁰ ¿Abrahampijinē tsajane baja pepuaperabēcucutsitsi, Dioso aneonijibia tanetsi? Jume raja. Abaxē apo perabēcucutsinejeva atatsi, aneonijibia tanetsi pejumecovēnētsixae Dioso najumecapanepaeya pejumaiitsicueniatsi. ¹¹ Dioso baja aneonijibia pepuataetsi, Abrahampijinē perabēcucutatsi. Bajarapacuenia Abrahampijinē perabēcucutatsi daxitajivi peyapētaenexatsi Dioso aneonijibia petaejavatsi. Bajaraxuata daxita pamonaē apo peperabēcucubivi atatsi, itsa jamatabējumaitsi: “Xaniajai. Pepacuene Dioso netoexanaena pacuenia najumecapanepaeya jumaiitsi,” itsa jamatabējai, bajarapamonaē Abrahampijinē bepexi Dioso tanetsi, apo peperabēcucubivi atatsi. Abrahampijinē abaxē apo perabēcucutsi atatsi, Dioso pejumecovēnētsixae, aneonijibia tanetsi. ¹² Xaniajai rabaja. Abrahampijinē bepexi Dioso tanetsi daxita pamonaē peperabēcucubivitsi. Bajarapamonaē Abrahampijinē bepexi Dioso tanetsi apo ēpeperabēcucubijavatsi yabara. Biji rajane

Abrahampijinē bepexi Dioso tanetsi tsipaji bajarapamonae ata abaxē apo perabēcaucubi atatsi, jumecovēnēta pacuenia Dioso najumecapanepaeya jumaitsi.

Pacuenia tocopiapatatsi pajivi jumecovēnēta pacuenia Dioso najumecapanepaeya jumaitsi petoexanaenexatsi yabara pelivaisi

¹³ Bajayata Dioso najumecapanepaeya jumaitsi Abrahampijinējavabelia: “Carajutsianatsi daxita mapairaje nijairanexa. Nevēnamuto ata, nexi, nemomoxi ata, pijairanexa,” jai Dioso Abrahampijinējavabelia. Bajarapacuenia Dioso jumaitsi Abrahampijinējavabelia tsipaji Dioso aneconijibia tanetsi Abrahampijinē pejumecovēnētsixae pacuenia Dioso najumecapanepaeya jumaitsi. Nexata acuenēbi vajajumaitsinexa: “Abrahampijinē Dioso aneconijibia tanetsi tsipaji jumecovēnēta Dioso Moiséspijinēta penajumecovēnētsilivaisi,” vajajainexa. Tsipaji baja Abrahampijinē pepuatēpae, bexēa Moiséspijinē ponapona. ¹⁴ Dioso najumecapanepaeya itsa jumai tsipae perajutsinexa bajarapaira ēpamonae jumecovēnēta pona Dioso Moiséspijinēta penajumecopatsilivaisi, nexata bajarapamonae, Abrahampijinē pemomoxi ata, apo rajutsi tsipae bajarapaira. Tsipaji itsajivi ata, bajarapamonaeajuvēnējivi, apo jumecovēnētsicapanepe Dioso Moiséspijinēta penajumecopatsilivaisi. Bajarapamonae Dioso pejumecovēnētsijava ata, nacueratsipa. Dioso najumecapanepaeya bajarapaira perajutsiapaebijavamitsi ata, toajumematamobi tsipaetsi. ¹⁵ Tsipaji daxita pamonaē apo jumecovēnētsi pacuenia Dioso itoroba Moiséspijinēta penajumecopatsilivaisita, bajarapamonae Dioso naneconitsiaexanaena. Itsiata baitsi jane itsa ajibi tsipae pitavetsilivaisitsi, nexata pijinia ajibi tsipae peyabarananeconitsia exanaējavanexatsi.

¹⁶ Dioso cajena najumecapanepaeya jumaitsi Abrahampijinējavabelia amoneya perajutsinexa bajarapaira. Perajutsinexa Abrahampijinē pexijavabelianexa ata, pemomoxijavabelianexa ata. Bajarapaira Abrahampijinē Dioso rajutsiapaebatsi Dioso najumecapanepaeya pejumaitsijavatsi Abrahampijinē pejumecovēnētsixae. Bajarapaira Dioso najumecapanepaeya itsa rajutsiapaeba pamonaē jumecovēnēta Dioso Moiséspijinēta penajumecopatsilivaisi, bajara ēpamonae itsiata apo rajutsiapaebi. Biji rajane rajutsiapaeba pamonaē ata jumecovēnēta pacuenia Dioso najumecapanepaeya jumaitsi, pacuenia bajayata Abrahampijinē jumecovēnēta Dioso najumecapanepaeya pejumaitsicueniatsi. Bajaraxuata daxitatsi, Dioso vajajumecovēnētsivi, Dioso nacatane Abrahampijinē bepexitsi. ¹⁷ Bajarapacuenia Abrahampijinē bepexitsi Dioso vajanacataejavanexa yabara, Dioso pejumaitsijava Abrahampijinējavabelia Dioso pejumelivaisibaxutota tajēvelia jumaitsi mapacueniaje: “Ayaibitsaētoanaxeto jivi bepijasalinainēmē cataeayaexanaenatsi,” jai Dioso pejumelivaisibaxutota tajēvelia Dioso pejumaitsijava Abrahampijinējavabelia vaxaitsi yabara. Dioso baja cajena icatsia piasaēyaexanaenē petēpaevimi ata. Xua picani abaxē ajibi manacuataje, Dioso baja exana pijumeta.

¹⁸ “Abraham raeta baja pexi apo xainae tsane,” sivajamatabējai atatsi daxitajivi bajayata, itsiata Abrahampijinē Dioso apo jumeaebi. Jumecovēnēta Dioso pejumaitsicueniatsi. Evetaponapona jivi ayaibitsaētoanaxeto pamo pexanaenexatsi pacuenia Dioso najumecapanepaeya jumaitsi. ¹⁹ Bajarapamatacabi Abrahampijinē imoxo pexinae cien pavaijeje. Bajaraponē pijava Sara, mavecova. Perujuvayo baja pijinia. Pexi picani pexinaenexabeje, apo caējēpaetsibeje. Tsipaji baja bitso perujujivibeje. Bajaraxua Abrahampijinē nacuenepātaē ata, itsiata jumecovēnēta Dioso pacuenia najumecapanepaeya jumaitsi. Bitso biji pevājēnaeyabelia jamatabēcuenēvetaponapona pacuenia Dioso najumecapanepaeya jumaitsi petocopiapatsinexatsi. Nexata Dioso yabara Abrahampijinē jumai tsabiabi: “Dioso cajena bitso ayajamatabēcuenē,” jai tsabiabi. ²¹ Abrahampijinē xaniavaetsia yapētane Dioso pecaējēpaenēcuenetsi petoexanaenexatsi daxita pacuenia najumecapanepaeya jumaitsi. ²² Abrahampijinē Dioso jumecovēnēta petoexanaenexatsi pacuenia najumecapanepaeya jumaitsi. Bajaraxuata Dioso aneconijibia tanetsi.

²³ Dioso pejumelivaisibaxutota jumaitsi pacuenia Dioso aneconijibia tanetsi Abrahampijinē pejumecovēnētsixae Dioso najumecapanepaeya pejumaitsicueniatsi. Bajarapacuenia Dioso pejumelivaisibaxutota apo jumaitsi saya vajajapētaenexa Abrahampijinē pelivaisi. ²⁴ Biji rajane nacatoyaquina vaxaitsi ata vajanacamuxujobinexa. Nexata vaxaitsi ata itsa jumecovēnētatsi pacuenia Dioso najumecapanepaeya jumaitsi, aneconijibia Dioso nacatane. Bajaraponē Dioso vajatuxanenē Jesucristo icatsia asaēyaexanatsi petēpaecujinae. ²⁵ Dioso athēbēvetsica itorobica Jesús vajanacasivatēpaenexa mapanacuataje. Nexata Jesús itsa nacasivatēpa, nacaneconimatamota pibisiacuene vajaexanaeneconi. Bajaraxuacujinae Dioso icatsia asaēyaexanatsi petēpaejavavecua vajanacavecuaajibiaexanaenexa vaneconimi. Nexata baja Dioso aneconijibia nacatane Jesús pejamatabēcueneta.

5

Pacuenia jamatabêcuenebarêya pajivi Dioso aneconijibiatanetsi yabara pelivaisi

¹ Dioso aneconijibia nacatane vajajumecovênêtsixae pacuenia Dioso najumecapanepaeya jumaitsi. Nexata sivajamatabêcuenebarêyatsi tsavanapae Dioso. Vajatuxanenê Jesucristo vajanacasivatêpaexae vajaneconi yabara, bajaraponê pejamatabêcueneta nacajamatabêcuenebarêyayaexana. ² Vajajumecovênêtsixae Jesucristo vajanacasivatêpaejava, Dioso nacaitaxutotsoniatayabiaba. Nexata Dioso sivajamatabêcuenebarêyatsi. Tsipaji yapêtanetsi itsamatacabi Dioso vajayajavajinavanapaejavanexa penivenivenaenacuatatsia. ³ Mapanacuapijivi nacabejiobiaexanabiabi ata, itsiata sivajamatabêcuenebarêyatsi tsabiabi. Tsipaji yapêtanetsi vajanacabejiobiaexanabiabicueneta, nacajamatabêcueneasaêyaexanapona Diosojavabelia. Nexata nacajamatabêcueneceajêpa vajanajamatabêcuenesaêtsinexa, daxita pibisiacuene nacatocopiapatsi ata. ⁴ Itsa najamatabêcuenesaêtatsi, nacatocopiapatsi ata pibisiacuene, Dioso pijinia nacasivabarêya. Nexata itsa yapêtanetsi Dioso vajanacasivabarêyajava, nexata jamatabêcueneevetatsi Dioso vajanacatoexanaenexa pacuenia najumecapanepaeya jumaitsi. ⁵ Nexata itsa jamatabêcueneevetatsi Dioso vajanacatoexanaenexa pacuenia najumecapanepaeya jumaitsi, apo nacueratsitsi tsane. Bajarapacuenia apo nacueratsitsi tsane tsipaji baja Dioso nacarajata Espiritu Santo vajanacatsijamatabêcaenexa. Nexata Espiritu Santo xaniavaetsia nacayapêtaeyaexana Dioso vajanacaasivajava.

⁶ Vaxaitsi bitso ajamatabêcuenesaêjibitsi pibisijamatabêcuenevixaetsi. Acuenebi vajacuata vajanacapanepanexa Diosojavabelia vajaneconi yajava. Itsiata baitsi jane Dioso pecaêjêtsimatocabita, Cristo nacasivatêpa pibisiacuene vajaexanaecononi yabara. ⁷ Mapanacuataje itsajivi itsa jamatabêcuenevavenona itsanê, nexata itsa beyaxuabiapiebatsi pejamatabêcuenevavenonaexae, pecajunavi baja apo jamatabêcuenevavenonae tsi-pae. Itsajivi meta itsiata jamatabêcuenevavenonaajitsipa, beyaxuabijitsia atatsi. Bajara-pacuenia jamatabêcuenevavenonaajitsipa itsa bitso pexanijamatabêcuenenê, ponêjavabelia jamatabêcuenevavenonaajitsi. ⁸ Itsiata baitsi jane vaxaitsi Dioso nacayavenona, pibisiacuene vajaexanaevi ata. Nexata Dioso nacatsitanajamatabêcueneitajêta bitso vajanacaasivajava. Dioso pexênato athêbêvetsica itorobica vajanacasivatêpaenexa mapanacuataje. ⁹ Jesucristo vajanacasivatêpaexae, nexata baja mararucaje Dioso aneconijibia nacatane. Bajaraxuata yapêtanetsi Jesucristo pejamatabêcueneta Dioso vajanacapanepaejavanexa vajanacananeconitsia exanaejavanexamivecua. ¹⁰ Vaxaitsi picani Dioso pijavajabitsaêvitsi. Nexata pexênato vajanacasivatêpaexae, Dioso baja nacabarajamatabêcuenevanepana. Bajaraxuata mararucaje yapêtanetsi Dioso pepacue vajanacapanepaejavanexa vajanacananeconitsia exanaejavaminexavecua. Tsipaji pexênato asaê tsaponapona vajanacatocuaicuajainênexa paxajavabelia. ¹¹ Orijibia vaxaitsi bitso sivajamatabêcuenebarêyatsi Dioso vajanacaasivajava. Tsipaji vajatuxanenê Jesucristo pejamatabêcueneta Dioso baja nacabarajamatabêcuenevanepana.

Adânpjinê Cristo ata yabara pelivaisi

¹² Copiaya caenê, Adânpjinê, pibisiacuene exana. Nexata mapanacuataje daxitajivi pibisiacuene pexanaejavanexa, taxuxuaba. Taxuxuabanua jivi petêpaejavanexa. Nexata jivi petêpaejava, yacaêjêpa daxitanacuapijivijava. Tsipaji daxitanacuapijivi pibisiacuene exana. ¹³ Dioso Moisésipjinêta penajumecopatsilivaisi ata pevajênayaya, mapanacuapijivi pibisiacuene exanavanapa. Itsiata abaxê apo petonajumecopatsixaetsi Dioso pejumelivaisi, itsajivi ata acuenebi pejumaitisijavatsi: “Pananeconitame raja Diosojavabelia,” pejaijavatsi pibisiacuene pexanaejava yabara. ¹⁴ Adânpjinê peponaponaevaveliacujinae, jivi jinavanapa. Bajarapamonaemi jinavanapa Moisésipjinê pevajênayaya. Daxita bajarapamonaemi ata pibisiacuene exana. Nexata têpapona. Bajarapamonaepibisiacuene itsa exana, itsiata Adânpjinê papibisiacuene exana, cuenejêpaeya apo exanae. Cristo, ponê tajêvelia vajunupaebatsi pepatsijavanexatsica, Adânpjinêbeje, apo najamatabêcuenejêpaebeje. Adânpjinê pejamatabêcueneta, daxitajivi pibisiacuene exanavanapa. Nexata daxitajivi naneconita Diosojavabelia. Cristo pijinia pejamatabêcueneta, jivi ayaibitsaêtoxaneto Dioso aneconijibia tanetsi.

¹⁵ Nexata Adânpjinê papibisiacuene exana, apo najêpaebeje papexaniacuene Dioso nacatoexana Jesucristo pejamatabêcueneta. Caenê, Adânpjinê, pibisiacuene pexanaejava pejamatabêcueneta, daxitajivi têpapona. Biji rajane Dioso vajanacaitaxutotsoniatayajava, bitso pexaniacuene. Tsipaji Dioso athêbêvetsica itorobica vajatuxanenê Jesucristo vajanacasivatêpaenexa mapanacuataje, vajanacavecuajibiaexanaenexa daxita vajaneconimi. Nexata bajarapacuenia caenê, Jesucristo, pexaniacuene exana pecapanepanexa jivi ayaibitsaêtoxaneto. ¹⁶ Caenê saya picani Adânpjinê. Itsiata pibisiacuene itsa exana,

yacaējēpa daxitajivijava. Nexata daxitajivi pibisiacuene pexanaexae, naneconita Diosojavabelia. Itsiata baitsi jane Jesucristo xaniavaeta daxita xua Adánpijinē pejamatabēcueneta bijiana picani. Jesucristo pejamatabēcueneta Dioso aneconijibia tane daxita pamonae jumecovēnēta Jesucristo pesivatēpaejavatsi pibisiacuene pexanaeconi yabara. ¹⁷ Caenē Adánpijinē pibisiacuene pexanaexae, daxitajivi tēpaona bajarapamonae ata pibisiacuene pexanaexae. Itsiata caenē Jesucristo vajanacasivatēpaexae, maparuceje Dioso baja nacaitaxutotsoniatane. Bajaraxuata itsacuenejavayo ata Dioso apo toexanae atatsi, Dioso aneconijibia nacatane. Daxita pamonae jumecovēnēta Jesucristo pejamatabēcueneta Dioso aneconijibia petaejavatsi, bajarapamonae ajamatabēcuenesaē tsavanapae tsane Dioso pejumecovēnētsijava Jesucristo peyavenonabiabixaetsi.

¹⁸ Daxitajivi naneconita Diosojavabelia caenē, Adánpijinē, copiaya pibisiacuene pexanaexae. Caenē pijinia, Jesucristo, pexaniacuene pexanaexae, daxita pamonae jumecovēnēta Jesucristo pesivatēpaejavatsi pibisiacuene pexanaeconi yabara, Dioso aneconijibia tanetsi. Nexata bajarapamonae Dioso rajutsianatsi matacabi apo pevererecaejava. ¹⁹ Caenē, Adánpijinē, copiaya apo jumecovēnētsi Dioso pitorobicueniatsi. Nexata bajaraponē pejamatabēcueneta, jivi ayaibitsaētōxaneto pibisiacuene exana. Nexata icatsia hexēa caenē, Jesucristo, xaniavaetsia jumecovēnēta Dioso pitorobicueniatsi. Nexata Jesucristo pejamatabēcueneta, jivi ayaibitsaētōxaneto Dioso aneconijibia tanetsi.

²⁰ Bajayata Dioso Moiséspijinēta najumecopata jivi pejumecovēnētsinexa. Nexata bajarapalivaisi itavetatsi pibisiacuene picani pexanaeyaniva. Itsiata baitsi jane jivi apo caējēpaetsi penajamatabēcuenesaētsinexa. Nexata pibisiacuene exanabiaba. Nexata bajarapalivaisi pitavetsixaetsi pibisiacuene picani pexanaeyaniva, itsiata jivi pibisiacuene itsa exana, nacueneyapētane pibisiacuene pexanaejava. Nexata jivi pevājēnaeyabelia pibisiacuene itsa exana, Dioso pijinia pevājēnaeyabelia bitso itaxutotsoniataeponatsi. ²¹ Daxitatsi tēpaenatsi. Tspaji daxitatsi pibisiacuene exanatsi. Bajara pijinia pacuenia daxitatsi Dioso vajanacaitaxutotsoniataexae, Dioso aneconijibia nacatane. Dioso nacarajutsiana matacabi apo pevererecaejava vajatuxanenē Jesucristo vajanacasivatēpaexae.

6

Pacuenia Dioso pejumecovēnētsivi pejanajamatabēcuene yajavajinavanapa yabara pelivaisi

¹ Itsajivi meta jamatabēcuenenavēxaniabiaya jamatabējumaisi tsane: “Dioso vajanacaitaxutotsoniataexae, aneconijibia nacatane. Nexata icatsia ayaiucuenia Dioso vajanacaitaxutotsoniataenexa, vajavājēnaeyabelia pibisiacuene exanavanapaenatsi,” jamatabējai meta tsane jamatabēcuenenavēxaniabiaya. ² [Jume raja! Pētsa baja vaxaitsi pibisiacuene exanatsi pematatsēnē. Petēpaenē baja apo najamatabēxainae pibisiacuene pexanaenexa. Bajara pijinia pacuenia vaxaitsi ata bejamatabēcuenetsitsi pibisiacuene vajaexanaeyaniva. ³ Paxamē bepapyapētaneme pajamatabēcuene yabara nabautisabatsi. Itsa nabautisabatsi, becaeperabēto nacaexana Jesucristojavabelia. Nexata vaxaitsi bejamatabējumaisitsi mapacueniaje: “Jesucristo cruzata itsa tēpa, xanē ata betaneyajavatēpae cruzata,” bejamatabējaisi. Bajarapajamatabēcuene yabara nabautisabatsi. ⁴ Itsa Jesucristo bevajanacayajavatēpae, nexata bevajanacayajavamēthētsitsi. Nexata Jesucristo petēpaecujinae, Dioso pesaēta icatsia itsa asaēyaexanatsi, bevajanacayajavaasaēyaexanaetsi icatsia. Vaxaitsi pejanajamatabēcuene vajavajinavanapenexa, copatatsi baja vajaperujumatabēcuenemi. Bajarapajamatabēcuene yabara nabautisabatsi.

⁵ Becaeperabēto vajanacaexanaexae Jesucristojavabelia, nexata daxitatsi Jesucristo cruzata bevajanacayajavatēpae. Nexata Jesucristo petēpaecujinae, Dioso icatsia itsa asaēyaexanatsi, bevajanacayajavaasaēyaexanaetsi. ⁶ Jesucristo itsa rutatsi cruzata pebeyaxuabinexatsi, vajaperujumatabēcuenemi yajavarutatsi vajanacavecuajibiaexanaenexa pibisiacuene vajanacaexanaeya exanaejamatabēcuenemi. Bajarapacuenia vjanacatoexanaexae, pematatsēnē baja apo hexanaetsi pibisiacuene. ⁷ Pacuenia baja petēpaenē pibisiacuene apo exanae, bajara pijinia vaxaitsi ata bejamatabēcuenetsitsi pibisiacuene vajaexanaeyaniva. ⁸ Jesucristo cruzata bevajanacayajavatēpaexae, nexata bejamatabējumaisitsi mapacueniaje: “Yajavajinavanapaenatsi Jesucristo daxitamatacabijavabelianexa,” bejamatabējaisi. ⁹ Yapētanetsi vajatuxanenē Jesucristo Dioso icatsia piasaēyaexanaejavatsi petēpaecujinae. Nexata baja icatsia Cristo pematatsēnē apo tēpae tsane. ¹⁰ Itsa baja Cristo tēpa daxitajivi pibisiacuene pexanaeconi yabara, caecuenia copiarutsiaya sivatēpa daxitamatacabijavabelianexa. Nexata baja Cristo icatsia pematatsēnē apo tēpae tsane. Biji rajane Dioso yajava daxitamatacabijavabelianexa asaē tsaponaponae tsane athēbētatsia, itsajotatsia ajibi petēpaecuene. ¹¹ Nexata paxamē panejamatabēthētota pajamatabējumaisimēre tsavanapae: “Tajaperujumatabēcuenemi baja navecuatēpaeyabajē.

Nexata baja pibisiacuene apo exanaenē tsane. Biji rajane asaenē baja tsaponaponae Dioso taneitorobicuenia tatoexanabiabinexa. Tshipaji baja tajatuxanenē Jesucristo neyajavaponapona,” pajamatabējamēre tsavanapae.

¹² Bajaraxuata pētsa baja panajamatabēxainabiabame pibisiacuene paneexanaenexa panijacuata panenatojitsipacuenua. ¹³ Pētsa panacopatame daxita xua pibisiacuene paneexanaenexa. Tshipaji paxamē bepanetēpaecujinae, Dioso icatsia bepucaasaēyaxanaeavi. Nexata pajumaitsimēre tsabiabi Diosojavabelia: “Tajatuxanenē, catonucatsi majotaje. Cajamatabēcuenevetaponaponaenatsi daxitamatacabijavabelianexa pacuenia xamē jitsipame tacatoexanabiabinexa,” pajamēre tsabiabi Diosojavabelia. ¹⁴ Nexata pacacaejēpaena panenajamatabēcuensaētsinexa caevēalia paneexanaeyaniva papibisiacuene panijacuata panatojitsipame. Tshipaji Dioso papecaitaxutotsoniaetaxae, Dioso pacayavenonabiabi-ana. Nexata baja apo paexanavanapaemē tsane pacuenia pacaitoroba Dioso Moisésppijnēta penajumecopatsilivaisi.

Pacuenia itsane pajivi nacopata ēpibisiacuene pexanaejavabelia yabara pelivaisi

¹⁵ Itsajivi meta jamatabēcuenenavēxaniabiaya jamatabējumai tsane: “Dioso vajanacaitaxutotsoniaetaxae, aneconijibia nacatane. Nexata baja tsiteca apo exanavanapae tsanetsi pacuenia nacaitoroba Dioso Moisésppijnēta penajumecopatsilivaisi. Nexata baja itaxutojema pibisiacuene exanavanapaenatsi,” jamatabējai meta tsane itsajivi jamatabēcuenenavēxaniabiaya. Jume raja! Pibisiacuene apo hexanavanapaetsi. ¹⁶ Paxamē rabaja xaniavaetsia payapētaneme mapacueneje. Itsa panacopatsipame itsanē papijajivinegamē, nexata pacuenia bajaraponē pacaitorobabiaba, pajumecovēnētabiabijitsipame. Bajara pijinia paitsimē tshipae itsa panacopatsipame pibisiacuene paneexanabiabinexa. Nexata bajarapapibisiacuene bepapijajivimēcuenua, pacuenia pacajamatabēcueneitorobabiaba, paexanavanapaejitsipame. Nexata bajarapaneconi pejamatabēcueneta papitsipame panetēpaejavanexa, Diosovecua panenaxuabinexa daxitamatacabijavabelianexa. Itsiata itsa pajumecovēnētavanapaename Dioso, nexata pacuenia Dioso pacatojitsipa, patoexanavanapaename. ¹⁷ Bajajajebi picani panacopatame pibisiacuene paneexanavanapaenexa. Nexata pibisiacuene bepapijajivimēcuenua, pacuenia pacajamatabēcueneitorobabiaba, ēpibisiacuene paexanavanapame. Nexata itsiata maparuceaje daxita panejamatabēcueneta pajumecovēnētavanapame baja papexaniajailivaisi itsamonae pacatsipaeba. Bajaraxuata paxamē yabara Diosojavabelia jumaitsinē tsabiabi: “Xanepana rabaja. Ayaicuenia yavenoname bajarapamonae,” janē tsabiabi. ¹⁸ Aeconoxae baja Dioso pacacopatsiaexana pibisiacuene paneexanavanapaejavami. Nexata jane baja panajamatabēxainame ēpexaniacuene paneexanavanapaenexa. ¹⁹ Peyapēxanepanaeuenia pacatoyaquinatsi mapalivaisije xaniavaetsia panejumeyapētaenexa xua yabara pacatoyaquinatsi. Bajajajebi picani panacopatame pibisiacuene paneexanavanapaenexa. Nexata bajarapapibisiacuene bepapijajivimēcuenua pacuenia pacajamatabēcueneitorobabiaba, ēpibisiacuene picani paexanavanapame panevajēnaeyabelia. Itsiata baja aeconoxae panajamatabēcuenerajure Diosojavabelia ēpexaniacuene paneexanavanapaenexa panevajēnaeyabelia. Bajarapacuenia Dioso pacatojitsipa paneexanavanapaenexa.

²⁰ Pamatacabi picani abaxē ēpibisiacuene paexanavanapame, Dioso papecatojitsipacuenua apo paexanavanapaemē. Saya jamatejema pajinavanapame. ²¹ Itsiata apo pacatoxanepanae itsacuenejavayonexa ata daxita papibisiacuene picani paexanavanapame. Payaauramē tsabiabi pibisiacuene paneexanaejava. Pamonae tsiteca pibisiacuene exanavanapa, bajarapamonae Diosovecua naxuabiana daxitamatacabijavabelianexa. ²² Paxamē rabaja Dioso pacacapanepa pibisiacuene paneexanaeconomyve-cua. Bajaraxuata Diosojavabelia panajamatabēcuenerajutame baja Dioso papijajivinegamē. Nexata apo panacueratsimē tsane. Dioso papecatojitsipacuenua pajinavanapaename. Panetēpaecujinae paxainaename matacabi apo pevereverecejava. ²³ Pamonae pibisiacuene pexanaeavi, Dioso rajutsianatsi petēpaejavanexa, Diosovecua penaxuabinexa daxitamatacabijavabelianexa. Pamonae jumecovēnēta vajatuxanenē Jesucristo pesivatēpaejavatsi pijaneconi yabara, bajarapamonae itsamatacabi Dioso amoneya rajutsianatsi matacabi apo pevereverecejava.

7

Pacuenia Dioso pejumecovēnētsivi Dioso Moisésppijnēta penajumecopatsilivaisi apo bejumecovēnētsi pecapanepaenexatsi yabara pelivaisi

¹ Tajamonae, payapētaneme rabaja Dioso Moisésppijnēta penajumecopatsilivaisi. Nexata baja pijinia payapētaneme pacuenia jivi bajarapalivaisi bejumecovēnētavanapa itsa abaxē

asaë tsavanapae mapanacuataje. Itsiata baitsi jane itsa baja tsëpa, acuenebi baja pematatsënëa bajarapalivaisi pejumecovënëtavapanapænæxa. ² Pova baja pamona pexainæva, acuenebi pevecuanaviatsinæxa pamona, penacojiobinæxa icatsia itsanëjavabelia. Tsipaji Dioso Moisésþijinëta penajumecopatsilivaisi itaveta bajarapacuenæ. Itsiata baitsi jane pova baja pamona vecuatëpatsi, nexata matapania tocopatatsi penacojiobinæxa icatsia itsanëjavabelia itsa jitsipa penacojiobijava. ³ Pova pamona pexainæva, itsa nacojiobijitsipa itsanëjavabelia, pamona abaxë itsa asaë tsaponaponaæ, nexata bajarapova ayaineconi natsiexanaeþitsipa Diosojavabelia. Tsipaji pamonavecuia itsanëjavabelia naperabëquenetsiatae ponaponaæþitsipa. Itsiata baitsi jane baja pova baja pamona vecuatëpatsi, Dioso Moisésþijinëta penajumecopatsilivaisi apo itavetsitsi penacojiobijava itsanëjavabelia. Nexata pova baja pamona vecuatëpatsi, nacojiobi ata icatsia itsanëjavabelia, ayaineconi apo natsiexanae tsipae Diosojavabelia.

⁴ Tajamonæ, bajara pijinia paitsimë paxamë ata. Pacuenia petiriva pamona pitorobabiabicueniatsi, jumecovënëtabiaba, bajara pijinia pacuenia pajumecovënëtabiabame picani Dioso Moisésþijinëta penajumecopatsilivaisi papecaitorobicuenia. Jesucristo bepaneyajavatëpaexæ, nexata Dioso Moisésþijinëta penajumecopatsilivaisi bepanevecuatëpæ. Nexata baja icatsia apo pajumecovënëtavapanapæmë bajarapalivaisi papecaitorobicuenia. Maparucaæe Cristo baja papijajivimë, ponë icatsia Dioso asaëyaexanatsi petëpaecujinae. Cristo icatsia Dioso bepapecayajavaasaëyaexanae pacuenia Dioso pacatojitsipa paneexanavanapænæxa. ⁵ Pamatacabi abaxë Cristo pelivaisi apo jumecovënëtsitsi, pibisiacuenæ exanavanapatsi vajacuata vajanatojitsipaecuenia. Nexata bajarapamatacabi itsa nacaitaveta Dioso Moisésþijinëta penajumecopatsilivaisi pibisiacuenæ vajeaxanaeyaniva, caranata saya bevajanacaitorobi pibisiacuenæ vajeaxanaenæxa. Nexata bitso pibisiacuenæ exanavanapatsi. Bajaraxua yabara picani Diosovecuia naxuabijainavanapatsi. ⁶ Itsiata baja maparucaæe palivaisi Dioso Moisésþijinëta najumecopata, bajarapalivaisi vajajumecovënëtsijavami, Dioso baja nacacopiaexana Cristo bevajanacayajavatëpaexæ. Nexata papexaniacuenæ aeconoxæ exanavanapatsi, apo exanavanapaetsi saya vajanacaitorobixæ bajayata peyaquinaelivaisimi, Dioso Moisésþijinëta penajumecopatsilivaisi. Jume baja cajena. Espiritu Santo raja pejanajamatabëcueneta vajanacaitorobixæ, exanavanapatsi bajarapexaniacuenæ.

Dioso Moisésþijinëta penajumecopatsilivaisi, pacuenia ata Pablo pibisiacuenæ pexanaenæxa najamatabëxaina, penavajunupaebijava, yabara pelivaisi

⁷ Itsajivi meta jamatabëcuenenavëxaniabiaya jamatabëjumaitsi tsane: “Dioso Moisésþijinëta penajumecopatsilivaisi, itsacuenëjavayonæxa ata apo xanepanae,” jamatabëjai meta tsane. ¡Jume raja! Itsa ajibi tsipæe bajarapalivaisi, nexata apo nacueneyapëtaenë tsipæe pibisiacuenæ taexanaejava. Tsipaji Dioso Moisésþijinëta penajumecopatsilivaisita, itsalivaisianë yajava, jumaitsi mapacueniaje: “Pëtsa cobecaëbame itsajivi pexainæjava,” jai. Nexata itsa apo yapëtaenë tsipæe bajarapalivaisi, xanë apo nacueneyapëtaenë tsipæe pibisiacuenæ taexanaejava, itsajivi pexainæjava cobecaëbi atanë. ⁸ Dioso Moisésþijinëta penajumecopatsilivaisi, itsa nitaveta itsamonæ pexainæjava tacobecaëbivaniva, nexata caranata bitso betanitorobi tabocæaëbinæxa itsamonæ pexainæjava. Pamatacabi abaxë apo yapëtaenë Dioso Moisésþijinëta penajumecopatsilivaisi, apo jitsipaenë picani taexanaenæxa bajarapacuenæ. ⁹ Bajayata abaxë itsa apo yapëtaenë bajarapalivaisi, jamatejemanë saya. Itsiata pamatacabi xaniavaetsia yapëtaniji xua yabara Dioso nitaveta, nexata jitsipajë bitso pibisiacuenæ taexanaenæxa. Bitso najamatabëxainajë. Bajarapalivaisi pejamatabëcueneta yapëtaniji pibisiacuenæ taexanaexæ, Diosovecuia naxuabiaya tatëpaejavanæxa picani. ¹⁰ Bajarapalivaisi Dioso najumecopata Moisésþijinëta jivi picani jamatabëcuenëbarëyaya xaniavaetsia pejinavanapænæxa. Itsiata xanë bajarapalivaisi pejamatabëcueneta apo jamatabëcuenëbarëyanë. Tsipaji pibisiacuenæ taexanaexæ, bajarapalivaisi pejamatabëcueneta yapëtaniji Diosovecuia tanaxuabijavanæxa picani. Nexata bitso najamatabëxainajë. ¹¹ Papibisiajamatabëcuenæ xainajë tajamatabëëthëtota, pibisiacuenæ neexanaeyaexanabiaba. Nexata pacuenia jumaitsi bajarapalivaisi, naneconitajë picani Diosovecuia tanaxuabinæxa.

¹² Palivaisi Dioso Moisésþijinëta najumecopata, pexanialivaisi cajena. ¹³ Nexata bajarapexanialivaisi pejamatabëcueneta yapëtaniji Diosovecuia tanaxuabijavanæxa picani. Tsipaji xanë tajamatabëëthëtota papibisiajamatabëcuenæ xainajë pejamatabëcueneta, exanabiabajë pibisiacuenæ. Bajaraxuata Diosovecuia naxuabijitsianë picani. Bajarapacuenia daxitajivi bajarapalivaisi pejamatabëcueneta, nacueneyapëtaena pibisiacuenæ pexanaejava. Taexanaexæ xua bajarapalivaisita itaveta, naneconitajë Diosojavabelia. Bajarapalivaisi itsa yapëtaniji, nexata tajamatabëëthëtota papibisiajamatabëcuenæ xainajë, nitorobapona bitsoyo pibisiacuenæ taexanapænæxa.

¹⁴ Palivaisi Dioso Moiséspijinëta najumecopata jivi pejumecovënëtsinexa, yapëtanetsi bajarapalivaisi Dioso penajumecopatsijava. Bajarapalivaisi jivi pejumecovënëtsinexa, bexaina pejanajamatabëcuene. Itsiata baitsi jane xanë bajara apo jamatabëcueneitsinë. Tajacuata saya ëtanatojitsipaecuenia exanaponaponajë. Caranata saya najamatabëxainabiabajë ëpibisiacuene taexanabiabinexa, papibisijamatabëcuene tajamatabëëthëtota xainajë taneitorababiabucuenia. ¹⁵ Xua pexaniacuene, jamatabëxanabiabajë picani. Itsiata bajaraxua apo exanabiabinë. Biji papibisiacuene apo jitsipaenë picani taexanabiabinexa, bajaraxua caranata exanabiabajë. “¿De tsaeta xuajitsia bajarapacuenia exanabiabajë?” jamatabëjanë belia. ¹⁶ Itsa exanabiabajë papibisiacuene picani apo jitsipaenë taexanabiabinexa, nexata sivajamatabëbëjanë tsabiabi. Bajaraxuata yapëtaniji jane baja Dioso penajumecopatsilivaisi pexanialivaisicuene. Tsipaji Dioso penajumecopatsilivaisi itaveta pibisiacuene pexanaejava. ¹⁷ Bajarapapibisiacuene exanae atanë, itsiata apo betanatsitaexanae itajara. Papibisijamatabëcuene abaxë xainajë tajamatabëëthëtota, nexanaeyaexanapona bajarapapibisiacuene. ¹⁸ Tajamatabëcuene cajena bitso abeje. Yapëtaniji itsacuenejavayonexa ata apo netoxanepanae daxita tajamatabëcuene. Natojitsipajë picani pexaniacuene taexanabiabinexa. Itsiata apo nejamatabëcuenecajëpabiabi pexaniacuene taexanabiabinexa. ¹⁹ Papexaniacuene jitsipajë taexanabiabinexa picani, itsiata apo exanabiabinë. Caranata saya exanabiabajë pibisiacuene, xua picani apo jitsipaenë taexanaenexa. ²⁰ Nexata itsa exanabiabajë xua picani apo jitsipaenë taexanabiabinexa, nexata bajaraxua apo betanatsitaexanae itajara. Tsipaji papibisijamatabëcuene abaxë xainajë tajamatabëëthëtota, nexanaeyaexanapona bajarapapibisiacuene.

²¹ Nexata jane baja yapëtaniji pacuenia jamatabëcueneitsinë tsabiabi. Paepatota picani jitsipajë pexaniacuene taexanabiabinexa, itsiata apo exanabiabinë. Tsipaji papibisijamatabëcuene xainajë, abaxë yajavaponaponajë. ²² Tajamatabëcueneta jamatabëjumaitsinë tsabiabi: “Jitsipajë tajumecovënëtsinexa Dioso pejumelivaisi,” jamatabëjanë tsabiabi picani. ²³ Itsiata baitsi jane belia najamatabëcuene yapëtaniji. Papibisiacuene exanabiabajë, bajarapapibisiacuene picani tajamatabëcueneta apo jitsipaenë taexanaenexa. Tajamatabëcueneta picani jitsipajë pexaniacuene taexanaenexa, Dioso tanetojitsipaecuenia. Caranata exanabiabajë ëpibisiacuene. Tajaperujumatabëcuene saya beprijajivitonënëcuenia toponaponajë.

²⁴ ¡Xanë bitso bejiobinë! Bajarapapibisijamatabëcuene yabara Dioso picani nenaneconitsiaexanaejitsia tanaxuabinexa Diosovecuia daxitamatacabijavabelianexa. “¿Jipatsa meta nevecuaajibiaexanae bajarapapibisijamatabëcuene?” jamatabëjanë belia. ²⁵ Nexata Diosojavabelia jumaitsinë: “Pexaniacuene rabaja netoexaname,” janë. Tsipaji vajatuxanenë Jesucristo jamatabëcuenecajëpatsi taneyavenonaenexa. Bajaraxuata ëpibisiacuene jamatabëexanae atanë, jitsipajë daxita tajamatabëcuenevetsina tajumecovënëtsinexa pacuenia Dioso itoroba.

8

Pacuenia Espiritu Santo nacajamatabëcuene yavenona yabara pelivaisi

¹ Pamona baja Jesucristo yajavajinavanapa, bajarapamonae Dioso baja apo naneconitsiaexanaetsi tsane. Bajarapamonae penatojitsipaecuenia, pibisiacuene apo exanavanapae. Biji rajane exanavanapa pacuenia Espiritu Santo tojitsipatsi. ² Nexata bajarapacuenia xanë ata Jesucristo itsa yajavaponaponajë, nexata Espiritu Santo pesaëta neyavenonabiaba xaniavaetsia taponaponaenexa. Nexata baja apo exanaponaenë pibisiacuene. Papibisijamatabëcuene picani nenaneconitsiaexanabiaba daxitamatacabijavabelianexa picani tananeconitsiaponaponaenexa, bajarapajamatabëcuenemi Espiritu Santo baja nevecuaajibiaexana. ³ Vaxaitsi vajacuata apo nacajamatabëcuenecajëpae vajajumecovënëtsinexa Dioso Moiséspijinëta penajumecopatsilivaisi. Bajaraxuata apo nacacajëpae vajacuata vajanacapanepaenexa Diosojavabelia. Itsiata Dioso cajëpatsi vajanacapanepaenexa. Athëbëvetsica Dioso itorobica pepo caenë pexënato. Nexata mapanacuata Dioso pexënato itsa naexana, nacaperabëjëpa picani pibisiacuene vajaexanaevi. Bajaraponë vaxaitsi pibisiacuene vajaexanae neconi yabara, nacasivatëpa. Nexata baja nacavecuajibiaexana papibisijamatabëcuene picani xainatsi, pajamatabëcuene picani nacaxanaeyaexanabiaba pibisiacuene. ⁴ Bajarapacuenia Dioso nacatoexana vajanacajamatabëcuenecajëpaenexa pexaniacuene vajaexanaejava pacuenia Dioso Moiséspijinëta penajumecopatsilivaisi jumaitsi. Nexata nacacajëpa vajaexanaenexa pexaniacuene. Tsipaji apo exanavanapatsi pacuenia vajacuata natojitsipatsi. Biji rajane exanavanapatsi pacuenia Espiritu Santo nacatojitsipa.

⁵ Pamonaē exanavanapa pijacuata penatojitsipaecuenia, bajarapamonaē jamatabēcuenēnabiabatsi ēpibisiacuene pexanaenexa. Pamonaē pijinia exanavanapa Espiritu Santo pejitsipaecuenia, bajarapamonaē jamatabēcuenēnabiabatsi Espiritu Santo pejitsipaecuenia pexanavanapaenexa. ⁶ Pamonaē saya exanavanapa pijacuata penatojitsipaecuenia, bajarapamonaē bepejamatabēcuenētēpaevi Dioso pitabarata. Nexata Diosovecua naxuabiaya jinavanapa. Pamonaē pijinia exanavanapa Espiritu Santo pejitsipaecuenia, bajarapamonaē jamatabēcuenēbarēyaya jinavanapa Dioso pitabarata. Bajarapamonaē itsamatacabi xainaenaua matacabi apo peverevereaejava. ⁷ Pamonaē saya exanavanapa pijacuata penatojitsipaecuenia, bajarapamonaē itoya Dioso. Tsipaji apo exanaē pacuenia Dioso penajumecopatsilivaisi itorobatsi. Apo jamatabēcuenēcaējēpaetsi pejumecovēnētsinexa bajarapalivaisi. ⁸ Pamonaē saya exanavanapa pijacuata penatojitsipaecuenia, bajarapamonaē apo jamatabēcuenēcaējēpaetsi pexanaenexa Dioso pejitsipaecuenia.

⁹ Maparuaeje paxamē apo paexanavanapaemē pacuenia panijacuata panatojitsipame. Espiritu Santo, ponē Cristo itorobica, pepacuenē pacatsijamatabēeca. Nexata Espiritu Santo pejitsipaecuenia, paexanavanapame. Pajivi Espiritu Santo apo tsijamatabēecaetsi, bajarapajivi Cristo apo pijajivitonē. ¹⁰ Paneperabēto tēpaena pibisiacuene paneexanaējamatabēcuene. Itsiata Cristo pajijavixiaemē, nexata pepo panejamatabēcuene athēbētatsia jinavanapaena daxitamatacabijavabelianexa. Tsipaji Dioso aneconijibia pacatane. ¹¹ Dioso asaēyaexanatsi Jesús petēpaecujinae. Nexata paxamē Espiritu Santo itsa pacatsijamatabēeca, pacuenia Jesús Dioso asaēyaexanatsi petēpaecujinae, bajara pijinia pacuenia paxamē ata Dioso pacaasaēyaexanaena panetēpaecujinae. Nexata panetēpaecujinae Dioso pacaperabēasaēyaexanaena Espiritu Santo papecatsijamatabēecaexae.

¹² Tajamonaē, bajarapacuenia Dioso nacaexanaena. Bajaraxuata xanepana vajaexanavanapaenexa pacuenia Dioso nacatojitsipa. Copatatsi baja yajacuata vajanatojitsipaecuenia vajaexanabiabijavami. ¹³ Tsipaji pibisiacuene itsa paexanavanapaejitsipame panijacuata panenatojitsipaecuenia, nexata itsa patēpame, Diosovecua panaxuabijitsipame daxitamatacabijavabelianexa. Itsiata baitsi jane Espiritu Santo papecayavenonaē jamatabēcueneta itsa pacopatame panijacuata panenatojitsipaecuenia pibisiacuene paneexanabiabijavami, nexata itsamatacabi paxainaename matacabi apo peverevereaejava.

¹⁴ Pamonaē exanavanapa Espiritu Santo pitorobicueniatsi, bajarapamonaē Dioso pexi. ¹⁵ Itsa nacatsijamatabējunua Espiritu Santo, Dioso pexitsi nacaexana. Saya bepjjajivicueniatsi apo nacaexanae cujanaviaya vajatonacuenēbinexa. ¡Jume baja cajena! Biji rajane pepacuenē Dioso pexitsi nacaexana. Nexata Espiritu Santo pejamatabēcueneta: “¡Axal!” nacajaiyaexana vajavajētsijavata Diosojavabelia. ¹⁶ Vajajamatabēthētota Dioso pijaEspiritu Santo nacayapētaeayaexana Dioso pexicuenetsi. ¹⁷ Nexata Dioso pexixaetsi, itsamatacabi Jesucristo yajava Dioso nacatsicobetsanaena daxita xua Dioso toxaina pexi petsicobetsanaenexa. Nexata Dioso pexixaetsi, pacuenia Jesucristo bejiobiaexanatsi, bajara pijinia pacuenia vaxaitsi ata itsamonaē nacabejiobiaexanaena. Nexata jane baja xuacujinae Dioso yajavajinavanapaenatsi Dioso pijapenivenivenaenacuataatsia.

¹⁸ Xaniajai. Maparuaeje itsamonaē nacabejiobiaexanapona mapanacuataje. Itsiata bajaraxua yabara apo najamatabēxainaetsi. Tsipaji baja yapētanetsi itsamatacabi bitso vajajamatabēcuenēbarēyajavanexa Dioso pijanacuataatsia. ¹⁹ Daxita mapanacuapijivi itatsacajinaeaya vajēnaēvetavanapa petocopiapatsinexatsi pamatacabi Dioso nacaitajētsijitsia bajarapamonaējavabelia Dioso pexitsi vajanacaexanaecuenē. Bajarapamonaē vajanacayapētaenexa Dioso pexicuenetsi, Dioso nacaitajētsijitsia bajarapamonaējavabelia. Vaxaitsi baja Dioso vajajumecovēnētsivi, Dioso baja nacajamatabēcuenēxaniavaeta. ²⁰ Daxitacuene Dioso pexanaejava mapanacuataje pevererecaponaena. Tsipaji bajarapacuenia Dioso copata pevererecaponaenexa.

Bajaraxua apo naneconitsi ata Diosojavabelia, itsiata pevererecaena. Tsipaji baja Dioso copata bajarapacuenia daxitacuene pevererecaponaenexa Adánpjinē pibisiacuene pexanaejava pejamatabēcueneta. Itsiata baitsi jane itsamatacabi Dioso copiarucaeyaexanaena daxitacuene pevererecaponaejava. ²¹ Dioso pexitsi nacaasaēyaexanaena vajatēpaecujinae, pacuenia copiya Cristo ata Dioso asaēyaexanatsi. Bajarapamatacabi, daxitacuene Dioso pexanaejava mapanacuataje pevererecaponaejava, Dioso copiarucaeyaexanaena. ²² Yapētanetsi baja cajena pacuenia itsi daxitacuene mapanacuataje. Pacuenia itsi unupijivi, pejuvijavanē ata, bejiobi abaxē. Tsipaji xaina piavitaneuene, petēpaecuenē ata. Nexata abaxē tsitecapona bajarapabejibicuene mapamatacabijavaberena ataje. ²³ Daxita xua tanetsi mapanacuataje, bajaraxua bajarapacuenia apo bejiobi piavitaneuene yabara. Vaxaitsi ata cajena bejiobitsi tsavanapae. Espiritu Santo vajanacatsijamatabēecaexae, yapētanetsi mapacuenēje. Dioso pexixaetsi itsamatacabi nacaperabēithianaena

pacuenia Cristo perabëitothianatsi. Nexata bitso jitsipatsi vajajamatabëëthëtovetsina Dioso vajanacaperabëitothianaenexa vajaperabëevereverecaejavavecua. ²⁴ Jumecovënëtsi Jesucristo vajanacasivatëpaejava pibisiacuene vajaexanaeneconi yabara. Nexata yapëtanetsi Dioso vajanacaperabëitothianaevanexa. Bajarapacueni nexata abaxë copiaevetavanapatsi. Itsa baja Dioso nacarajutsipa xua nacarajutsipaeba, nexata baja apo copiaevetavanapaetsi tsipae vajanacarajutsinexa. Tsipaji baja ajibi tsipae vajayabaracopiaevetavanapaevajava itsa baja nacarajutsipa. ²⁵ Nexata abaxë evetavanapatsi xua Dioso nacarajutsipaeba vajanacarajutsinexa. Nexata abaxë copiaevetavanapatsi bajayajebi ata itsajamatabëcuene vecuaxainaenejevatsi.

²⁶ Vajajamatabëcuenesaëjibixae, Espiritu Santo nacayavenonabiaba mapamatacabi ataje abaxë bajaraxua vajacopiaevetavanapaenexa. Vaxaitsi apo yapëtaetsi xaniavaetsia vajavajëtsinexa Diosojavabelia. Nexata Espiritu Santo bëpënëa bitso nacasivanajamatabëxainae nacamatacabi asaëyata Diosojavabelia. Xua apo vënëjonecapanepaetsi, Espiritu Santo nacatovajëtabiaba. ²⁷ Dioso cajena vajanacajamatabëcuene yapëtaenë pacuenia najamatabëxainatsi. Nexata Dioso yapëtae xua Espiritu Santo nacatovajëtsijatsi. Tsipaji Dioso vajanacatojitsipaenue, Espiritu Santo nacatovajëtabiaba Diosojavabelia Dioso pijajivixatsi.

Pacuenia Dioso pejumecovënëtsijivi daxita pibisiacuene tocopiapatsi atatsi, bejamatabëcuenematatoxeneta daxita bajarapapibisiacuene Jesucristo peyavenonabiabixatsi yabara pelivaisi

²⁸ Yapëtanetsi mapacuenije. Daxita xua apo vajajitsipaenue, Dioso nacatocopata vajanacatocopiapatabiabinexa. Nexata bajaraxua nacatocopiapatabiaba saya vajanacajamatabëcueneëjëtsinexa. Nexata bajaraxua itsa nacajamatabëcueneëjëta, apo nacatsitapexaniacuene itajara. Itsiata Dioso vajajumecovënëtsijivi yapëtanetsi bajaraxua vajanacajamatabëcueneëjëtsijava pejamatabëcueneta vajanacajamatabëcuene asaëyaexanaevanexa Diosojavabelia. Vaxaitsi Dioso nacajunata pexitsi vajanacaxanaenexa pacuenia nacasivanajamatabëxaina. ²⁹ Vajanaexanaevajënaeya ata, Dioso yapëtae pexitsi vajanacaxanaevanexa. Nexata vajanacaxanaevajënaeya ata, Dioso nacasivanajamatabëcuenevereta vajanacaxanaenexa pacuenia pexënato jamatabëcueneitsi. Nexata vajanacaxanaevajënaeya ata, Dioso nacasivanajamatabëcuenevereta Dioso pexënato pejuvayajivitsi ayaibitsaëtotsi vajanacaxanaenexa. ³⁰ Bajarapacuenia vajanacaxanaevajënaeya ata, Dioso vajanacasivanajamatabëcuene veretsixae, najamatabëxaina pexitsi vajanacaxanaenexa. Nexata jane baja mapamatacabitaje nacajunata pexitsi vajanacaxanaenexa. Dioso vajanacajunatsixae, nexata nacavecuajibixae pibisiacuene vajaexanaeneconimi. Nexata baja aneconijibia Dioso nacatane. Nexata itsamatacabi Dioso vajavajinavanapaenatsi Dioso pijapenivenivenaenacuataatsi.

³¹ Nexata Dioso yabara bejumaitsitsi mapacueniaje: “Dioso cajena vajanacayavenonaeñë. Nexata itsajivi ata apo caëjëpaetsi vajanacajamatabëcuene matatoxenetsinexa,” bejaitsi. ³² Dioso baja cajena apo nacavecuasiva pexënato. Biji rajane copata pexënato vajanacasivatëpaenexa daxita vaxaitsi vajaneconi yabara. Nexata bajarapacuenia vajanacatoexanaexae, yapëtanetsi Dioso vajanacarajutsijavanexa daxita vajanamatavenonaeuene ata. ³³ Dioso baja cajena nacaitapeta. Nexata vaxaitsi yabara Dioso jumaitsi: “Bajarapamonae baja aneconijibia taniji,” jai Dioso najumecapanepaeya. Nexata cajena itsajivi ata apo caëjëpaetsi vajanacaneconitsinexa Diosojavabelia pibisiacuene vajaexanaevajava yabara. ³⁴ Itsajivi ata cajena apo caëjëpaetsi vajanacaneconitsiaexanaenexa pibisiacuene vajaexanaevajava yabara. Tsipaji baja capanepaeya Jesucristo nacasivatëpa vajanacaneconimatamotsinexa. Nexata Cristo petëpacujinae Dioso icatsi asaëyaexanatsi. Maparucaje Jesucristo eca athëbëtatsi, Dioso pemuxuneneta, pecujanenia. Cristo pijajivitsi Diosojavabelia nacayajivicaicuaijai. ³⁵ Cristo baja cajena vajanacaasivanë. Nexata itsajivi ata apo caëjëpaetsi Cristo vajanacaasivacuene vajanavecuacopiarucaeyaexanaenexa. Nacabejiobiaexanae ata tsipae, piayapëbejucuene nacatocopiapatsi ata tsipae, itsiata vajanacaasivanë Cristo tsiteca nacaasiva tsipae. Vajanacaitoyaxae, nacabarajinae ata tsipae, vajani tsabiabi ata tsipae, itsiata vajanacaasivanë Cristo tsiteca nacaasiva tsipae. Bitso bejiobi atatsi tsipae, bitso nacatsiyai ata tsipae, nacabeyaxuabiapaebi ata tsipae, daxita bajarapitsicuene nacatocopiapatsi ata tsipae, itsiata vajanacaasivanë Cristo tsiteca nacaasiva tsipae. ³⁶ Vaxaitsi yabara mapajamatabëcuenelivaisi jëpaje. Bajayata Dioso pijajivi navajunapaeba Diosojavabelia pacuenia itsamonae bejiobiaexanaponatsi. Dioso pejumelivaisibaxutota bajarapamonae penavajunupaebijume itanerubena. Jumaitsi mapacueniaje:

Xamē Diosomē, panijajivixaeñē, daxitamatacabi itsamonae jamatabēpanebejejababiaba picani. Pacuenia oveja pebeyaxuabinexa capona, bajarapacuenia jamatabēpaneexanabiaba, jai Dioso pejumelivaisibaxutota.

Bajara pijinia pacuenia vaxaitsi ata aeconoxae nacaexanapona. ³⁷ Nexata daxita xua pibisiacuene, nacatocopiatabiabiana. Nacabejiobiaexanabiabiana. Nexata itsiata vaxaitsi bajaraxua jamatabēcuene matatoxenetabianatsi. Tsiapaji Cristo vajanacaasi-vanē, nacayavenonabiabiana. ³⁸ Nexata yapētaniji mapacuneje. Itsacuenejavayo ata apo caējēpaetsi Cristo vajanacaasivacuene vajanacavecuacopiarucaeya exanaenexa. Vajātēpaecuene ata, vajaasaētsavanapaecuene ata, Ángelevi ata, dovathivi penamatacaitorobivi ata, apo caējēpaetsi Cristo vajanacaasivacuene vajanacavecuacopiarucaeya exanaenexa. Playapēbejeacuene, xua baja nacatocopiapata, xua ata abaxē nacatocopiapatsijitsia, daxita bajaraxua ata, apo caējēpaetsi Cristo vajanacaasivacuene vajanacavecuacopiarucaeya exanaenexa. ³⁹ Athēbēbetsia vajaponaejava ata, ira bēxēpanabereca vajaponaejava ata, apo caējēpaetsi Cristo vajanacaasivacuene vajanacavecuacopiarucaeya exanaenexa. Dioso pexanaejava, itsacuenejavayo ata, apo caējēpaetsi Cristo vajanacaasivacuene vajanacavecuacopiarucaeya exanaenexa. Yapētanetsi Dioso vajanacaasivajava. Tsiapaji Dioso vajanacaasivaxae, vajatuxanenē Jesucristo athēbēvetsica itorobicatsi vajanacasivatēpaenexa mapanacuataje.

9

Pacuenia Dioso pijajivinexa itapeta judíovi yabara pelivaisi

¹ Najamatabēcuene copatajē Cristojavabelia. Nexata apo najumetsēñētsinē. Pexani-ajailivaisi cajena pacatoyaquinatsi. Palivaisi pacatoyaquinatsi pexaniajailivaisicuene tayapētaenexa, Espiritu Santo tajamatabēēthētota neyapētae yaxana. ² Bitso sivanajamatabēxainajē tavēna judíovi, Israel nacupijivi. Belia betaajamatabētane tasivana-jamatabēxainaejava bajarapamonae. ³ Bajarapamonae apo pejumecovēñētsixae Cristo, bitso sivanajamatabēxainajē. Bajaraxuata bajarapamonae yabara jamatabējumaitsinē: “Itsa xanē Dioso netocopatsipa tanaxuabinexa Cristovecua, bajarapamonae juya pecapanepaenexatsi, nexata bajarapacuenia exanae jitsipajē bajarapamonae Dioso pecapanepaenexatsi,” jamatabējanē belia tavēna judíovi yabara. ⁴ Bajarapamonae judíovi, Israelpijinē pemomoxi. Bajarapamonae pijasalinaivimijavabelia bajayata picani Dioso ayaicuenia yavenonabiaba. Itsiata bajarapamonaemi Dioso apo jumecovēñētsi. Dioso picani itapeta bajarapamonaemi Dioso pexi pexanaenexa. Bajarapamonaemi tanenua baja picani Dioso pijapenivenivena ecotia. Dioso baja picani najumecapanepaeya jumaitsinua bajarapamonaemijavabelia peyavenonabiabinexa. Dioso Moisés pijinēta penajumecopatsilivaisi ata, rajuta picani bajarapamonaemi pejumecovēñētavapanepaenexa. Dioso picani itorobanua bajarapamonaemi pexanaenexa templobo, bajarapabota pevajēcabiabinexa Diosojavabelia. Dioso picani najumecapanepaeya jumaitsinua petoitorobinexatsica Cristo bajarapamonaemi picani pecapanepaenēnexatsi pibisiacuene pexanaeneconomivecua. ⁵ Bajarapamonaemi pijasalinaivimi, pevēñējonevimi Dioso pejumecovēñētsijava. Cristo itsa naexana mapanacuataje, judíonēcuenia naexana. Cristo nexata pijamonae judíovi. Bajarapōñē Cristo, Disonē baja cajena, daxitacuene pevetsinē. Nexata bajarapōñējavabelia jivi jumai tsabiabi tsane: “Xamē Cristomē, bitso baja cajena ayaijamatabēcuenenēmē,” jai tsabiabi tsane daxitamatacabijavabelianexa. Bajara itsi tsane.

⁶ Itsiata daxita judíovi apo jumecovēñētsi pacuenia Dioso najumecapanepaeya jumaitsi. Nexata Dioso apo toexanae daxita judíovijavabelia pacuenia Dioso najumecapanepaeya jumaitsi. Nexata Dioso yabara vaxaitsi jamatabēcuenenavēxaniabiaya apo bejumaitsi mapacueniaje: “Pacuenia Dioso najumecapanepaeya jumaitsi judíovijavabelia petoexanaenexa, bajarapacuenia itsiata Dioso apo toexanae daxita judíovijavabelia,” apo bejaitsi vaxaitsi jamatabēcuenenavēxaniabiaya Dioso yabara. Bajarapacuenia Dioso yabara vaxaitsi jamatabēcuenenavēxaniabiaya apo bejumaitsi. Tsiapaji Dioso tajēvelia apo itapetsi daxita judíovi pijajivinexa. Bajaraxuata pacuenia Dioso tajēvelia najumecapanepaeya jumaitsi, apo toexanae daxita judíovijavabelia. ⁷ Tsiapaji bajayata Abrahampijinē pemomoxi ayaiBITSaēto xainae ata, daxita itsiata Dioso apo totaetsi Abrahampijinē pepo pemomoxicuenia. Dioso tajēvelia jumaitsi Abrahampijinējavabelia mapacueniaje: “Ani-janēbeje nexēnatobeje xainae atamē tsane, taitapetsinēxae, caenē nexēnato, Isaac, pexi catotaenatsi pepo nemomoxicuenia,” jai Dioso. ⁸ Bajaraxuata yapētanetsi mapacuneje. Pajivi naexanae ata Abrahampijinē pemomoxiyajuvēñējivi, itsiata bajarapajivi Dioso apo taetsi Abrahampijinē pepo pemomojivicuenia. Matapania pajivi jumecovēñēta pacuenia Dioso najumecapanepaeya jumaitsi, bajarapajivi jane baja Abrahampijinē pepo

pemomojivicuenia tanetsi Dioso. ⁹ Dioso tajĕvelia najumecapanepaeya jumaitsi Abrahampijinĕjavabelia mapacueniaje: "Icatsia caevaicujinae patsianajĕ. Nexata nijava, Sara, xainaena pexĕnatonacueto," jai Dioso Abrahampijinĕjavabelia Isaacpijinĕnaxa yabara.

¹⁰ Nexata jane baja xuacujinae Isaacpijinĕ naexana. Bajaraxuacujinae icatsia bexĕa Isaacpijinĕ baja pepuanacojiobi, Dioso icatsia tajĕvelia jumaitsi vajasalinainĕ Isaacpijinĕ pijava Rebecapijivajavabelia, Rebecapijiva baja pepuayacotaponaponea sapalanĕbejenaxa. ¹¹⁻¹³ Itsa abaxĕ bajaraponĕbeje apo naexanaebeje, pexaniacuea ata abaxĕ itsa apo exanaebeje, pibisiacuea ata abaxĕ itsa apo exanaebeje, bajarapamatacabi Dioso tajĕvelia jumaitsi Rebecapijivajavabelia mapacueniaje: "Panacuetonĕyo copiaya cavacuanaexanaena, bajaraponĕyo jamatabĕcueneevetsiana pejuyapijinĕ pitorobabiabinexatsi pijajivitonĕcuenia," jai Dioso tajĕvelia Rebecapijivajavabelia. Bajarapacuenia Dioso pejumaitsijava Rebecapijivajavabelia najumejĕpabeje pacuenia jumaitsi Dioso pejumelivaisibaxutota. Rebecapijiva pexĕnatobeje yabara Dioso pejumelivaisibaxutota jumaitsi mapacueniaje: "Asivanĕ juyapijinĕ Jacob, matapijinĕ Esaŭ matatoxenetsia," jai Dioso pejumelivaisibaxutota Dioso pejumaitsijava. Nexata bajaraponĕbeje tocopiapatatsibeje pacuenia Dioso tajĕvelia jumaitsi pacuenia Dioso itapetsijitsiatsi juyapijinĕ. Baitsi Jacob Dioso pijajivitonĕnaxa itapetatsi matapijinĕvecua. Nexata bajarapacuenia yapĕtanetsi mapacueje. Dioso cajena baitapeta pajivi jamatabĕitapeta pijajivitonĕnaxa. Dioso apo itapetsi bajarapajivi pexaniacuea pexanaejava yabara. Bajarapacuenia Dioso tajĕvelia itapeta juyapijinĕ matapijinĕvecua penaexanaevajĕnaeyabeje ata cajena.

¹⁴ Pajivi Dioso jitsipa pitapetsinexa, nexata itsa itapeta, bajaraxua yabara vaxaitsi apo bejumaitsi mapacueniaje: "Dioso baja pacuenia exana, apo xanepanae," apo bejaiti vaxaitsi. ¹⁵ Tspaji cajena Dioso bajayata jumaitsi Moisespijinĕjavabelia: "Pajivi jamatabĕitaxutotsoniataniji, itaxutotsoniataenajĕ," jai Dioso. ¹⁶ Nexata pajivi Dioso jamatabĕitaxutotsoniatane, itaxutotsoniatane. Nexata itsajivi apo jamatabĕjumaiti ata: "Jitsipajĕ xanĕ Dioso taneitaxutotsoniataejava," apo jamatabĕjai ata, itsiata Dioso itaxutotsoniatanetsi. Bajarapajivi itsacuenejavayo ata Dioso pejitsipacuenia apo exanabiabi ata, itsiata Dioso itaxutotsoniatanetsi. ¹⁷ Palivaisi bajayata Dioso jumaitsi Egiptnacua pevetsinĕjavabelia, bajarapalivaisi Dioso pejumelivaisibaxutota ruca. Jumai tsarucae mapacueniaje: "Xanĕ catocopatatsi nevetsinexa nijaira. Pinijicuea taexanaejava exanaenajĕ paxamĕ tuatujĕta. Itsiata baitsi jane apo nejumecovĕnĕtsimĕ tsane. Nexata daxita nacuapjivi neyapĕtaena tasaĕnĕcuea," jai tsarucae Dioso pejumelivaisibaxutota Egiptnacua pevetsinĕjavabelia Dioso pejumaitsijava. ¹⁸ Nexata pajivi Dioso jamatabĕitaxutotsoniatane, itaxutotsoniatane. Pajivi pijinia Dioso jamatabĕajamatabĕcuenetajayaexana pejumecovĕnĕtsiyanivatsi, ajamatabĕcuenetajayaexana.

¹⁹ Nexata meta Dioso yabara pajumaitisimĕ tsane: "Bajarapacuenia Dioso jivi itsa ajamatabĕcuenetajayaexana pejumecovĕnĕtsiyanivatsi, nexata bajarapajivi Dioso apo benaneconitsia exanae. Tspaji bajarapajivi apo jumecovĕnĕtsi Dioso pijajamatabĕcuenetajaya exanaexaetsi" pajamĕ meta tsane Dioso yabara. ²⁰ Tajamonae, pĕtsa bajarapacuenia pajumaitisimĕ. Dioso yabara cajena bajarapacuenia apo bepajumaitisimĕ. Tspaji Dioso pacaexana. Canalito itsa caĕjĕpaejitsipatsi pecuaicuaijainexa, itsacanalitovecua saicayacuenia faratsi atatsi, pefaratsivatsijavabelia apo jumaitsi tspae: "ĶDetsa xuajitsia itsacanalitovecua saicayacuenia nefaratame?" apo jai tspae pefaratsivatsijavabelia. ²¹ Tspaji atsanantota canalito pefaratsiva caĕjĕpatsi canalito pefaratsinexa pacuenia jamatabĕfarata. Nexata caĕjĕpatsi pefaratsinexa copiaya pexaniacanalito bo tuatujĕta itabĕtsiaya peetsinexa. Bajaraxuacujinae bajara paatsananitoyajuvĕnĕjavata caĕjĕpatsi pefaratsinexa itsacanalito, beveliacanalito, pecajayababiabinexa saya.

²² Bajara pijinia pacuenia Dioso baja exana jivijavabelia pacuenia tsitanexanepanatsi. Ayaicuenia Dioso jamatabĕnaneconitsiaexana daxita pamonaevetsiana bajaraponĕjavabelia. Jamatabĕsitajĕtanua pesaĕ bajarapamonaejavabelia. Itsiata baitsi jane abaxĕ bajayajebi Dioso najamatabĕcuenecatata peverebiavivajavabelianexa. ²³ Biji rajane pamonaevetsiana Dioso jamatabĕcapanepa, bajarapamonae capanepaena. Bajarapacuenia Dioso jamatabĕexana vaxaitsi vajanacaitaxutotsoniataevijavaberena, vajanacatsitanajamatabĕcuene itajĕtsinexa ayaijamatabĕcuene pexainaejava. Tspaji baja cajena vajanaxanaevajĕnaeya ata, Dioso nacaitapeta vajayajavajinavanapaenaxa athĕbĕtatsia. ²⁴ Vaxaitsi judĕoviyajuvĕnĕvitsi. Itsamonae vaxaitsiyajuvĕni apo judĕovi. Itsiata Dioso nacajunata daxitatsi pijajivinexatsi. ²⁵ Dioso pejumelivaisibaxutota, bajayata Oseapijinĕ peyaquinaebaxutota, Dioso pejumaitsijava apo judĕovi yabara, tajĕvelia jumaitsi mapacueniaje:

Pamonaevetsiana picani apo tajajivi, bajarapamonae yabara jumaitsisimĕ tsane: "Tajajivi raja mapamonaeje," janĕ tsane. Bajarapamonae picani apo jitsipae. Itsiata bajarapa-

monae yabara jumaitsinē tsane: “Tajajivi raja mapamonaeje, tsativavi,” janē tsane.
²⁶ Panacuapijivijavabelia picani jumaitsinē tsane: “Paxamē raja apo patajajivimē,”
 janē tsane picani, itsiata bajarapanacuapijivi bexēa nejumecovēnētsiana. Nexata
 bajarapanacuapijivi yabara itsamonae jumai tsane: “Mara pamonaēje Dioso pi-
 asaētsaponaponaeñ peyaxije,” jai tsane,

jai Oseaspjinē bajayata peyaquinaebaxutota, pamonaē apo judiōvi ata, Dioso pijajivi
 pexanaejavanexatsi yabara.

²⁷ Isaíaspijinē pijinia bajayata tajēvelia judiōvi yabara jumaitsi mapacueniaje: “Israelpi-
 jinē pemomoxi bitso ayaibitsaētoxaneto tsane. Pacuenia manuamene pijitajetaboatsapērē
 itsi, bajara itsane. Itsiata baitsi jane bajarapamonaeyajuvēñevi, caejiviyobeje saya, Dioso
 capanepaenatsi. ²⁸ Daxita pamonaē naneconita Diosojavabelia, bajarapamonaē naxanit-
 siayo Dioso naneconitsiaexanaena,” jai Isaíaspijinē peyaquinaebaxutota. ²⁹ Itsabaxutota
 pijinia Isaíaspijinē peyaquinaebaxutota, icatsia jumaitsi mapacueniaje:

Dioso raja ángelevi ayaibitsaētoxaneto penamatacaitorobinē. Bajaraponē Dioso itsa apo
 nacaitaxutotsoniatae tsiptae, nexata daxitatsi vaxaitsi, Israelpijinē pemomoxitsi,
 nacaverebiabijitsipa. Nacaverebiabijitsipa pacuenia bajayata verebiabatsi daxita
 Sodoma tomarapijivimi, Gomorra tomarapijivimi ata,

jai Isaíaspijinē peyaquinaebaxutota.

*Pacuenia judiōvi apo jumecovēnētsi pexanialivaisi jivi pecapanepaelivaisinexatsi yabara
 pelivaisi*

³⁰ Vaxaitsi yapētanetsi mapacuenieje. Apo judiōvi picani apo jumecovēnētsi ata Dioso
 aneconijibia petanexatsi, itsiata Dioso aneconijibia tanetsi, pejumecovēnētsixae Je-
 sucristo pesivatēpaejavatsi pibisiacuene pexanaeoneconī yabara. ³¹ Itsiata baitsi jane
 judiōvi jamatabēcuenenavēxaniabiaya jumai tsabiabi: “Itsa jumecovēnētavanapaenatsi Dioso
 Moiséspijinēta penajumecopatsilivaisi, nexata Dioso aneconijibia nacataena,” jai tsabiabi.
 Itsiata bajaraxua yabara Dioso aneconijibia apo taetsi. Tsiptaji apo caējēpaetsi pejumecovēnētsi
 capanepaenaxa bajarapalivaisi. ³² Apo caējēpaetsi Dioso aneconijibia petanex-
 atsi. Tsiptaji judiōvi apo jumecovēnētsi Jesucristo pesivatēpaejavatsi pibisiacuene pex-
 anaoneconī yabara. Biji rajane jamatabēcuenenavēxaniabiaya jumai tsabiabi. “Itsa jumecovēnētavanapaenatsi
 Dioso Moiséspijinēta penajumecopatsilivaisi, nexata Dioso aneconijibia nacataena,” jai tsabiabi.
 Bajaraxuata judiōvi Diosovecua naxuabijainavanapa,
 Cristo Dioso athēvētsica pitorobijavatsitsica, apo pejumecovēnētsixae. Caranata saya
 anaepnabiaba bajarapalivaisi yabara. ³³ Dioso tajēvelia Cristo yabara pejumaitsiyava,
 Dioso pejumelivaisibaxutota jumaitsi mapacueniaje:

Puenetanutsianajē Jerusalén tomarata ponē itorobijitsianē jivi pecapanepaenaxa. Ba-
 jaronē itsamonae apo jumecovēnētsi tsane. Nexata bajarapamonaē nevecua-
 naxuabiana. Itsiata baitsi jane pajivi jumecovēnētsiana bajaraponē, bajarapajivi apo
 nacueratsi tsane,

jai tajēvelia Dioso pejumelivaisibaxutota Cristo jivi pesivatēpaejavaxa pibisiacuene pex-
 anaoneconī yabara.

10

¹ Tajamonaē, jitsipajē bitso tajamatabēthētovetsina judiōvi Dioso pecapanepanexatsi.
 Bajaraxuata tovajētabiabajē Diosojavabelia. ² Judiōvi picani Dioso ayaicuenia
 bitso jamatabētonacuenebabiaaba Dioso pesivabarēyanexatsi. Itsiata baitsi jane
 apo yapētae pacuenia Dioso tojitsipatsi petoexanavanapaenaxa. Judiōvi saya
 jamatabēcuenenavēxaniabiabiaba. ³ Bajarapamonaē apo yapētae pacuenia exanaejitsia
 Dioso aneconijibia petanexatsi. Jamatabēcuenenavēxaniabiaya jumai tsabiabi: “Itsa
 jumecovēnētavanapaenatsi Dioso Moiséspijinēta penajumecopatsilivaisi, nexata Dioso
 aneconijibia nacataena,” jai tsabiabi bajarapamonaē. Apo jumecovēnētsi pacuenia Dioso
 itorobatsi pexanavanapaenaxa Dioso aneconijibia petanexatsi. ⁴ Pajivi jumecovēnēta
 Cristo pesivatēpaejavatsi pibisiacuene pexanaoneconī yabara, bajarapajivi Dioso
 baja aneconijibia tanetsi. Bajaraxuata pematatsēñēa baja apo benajamatabēxainae
 pejumecovēnētsinexa icatsia Dioso Moiséspijinēta penajumecopatsilivaisi Dioso
 aneconijibia petanexatsi.

⁵ Pamonaē jitsipa Dioso aneconijibia petanexatsi pejumecovēnētsixae Dioso
 Moiséspijinēta penajumecopatsilivaisi, bajarapamonaē yabara Moiséspijinē bajayata
 peyaquinaelivaisi jumaitsi mapacueniaje: “Pajivi jumecovēnētsi capanepaena daxita
 pacuenia bajarapalivaisita itorobatsi, bajarapajivi matapania Dioso aneconijibia
 taenatsi,” jai Moiséspijinē bajayata peyaquinaelivaisita. ⁶ Nexata baja pamonaē
 jumecovēnēta Cristo pesivatēpaejavatsi pibisiacuene pexanaoneconī yabara,

bajarapamonaē pejumeitavetsinexatsi, Dioso jumaitsi mapacueniaje: “Pëtsa pajamatabëjumaitsimë: ‘ǂipatsa meta athëbëabetsia ponaena mapanacuayabetsicaje pebarëpatsinexatsica vajanacayavenonaenënexa?’ pajamatabëjamë pëtsa. ⁷ Pëtsa pajamatabëjumaitsimënu: ‘ǂipatsa meta ponaena, itsabereca petëpaeivi jinavanapa, piasaëyaexanaenexa petëpaeivevica vajanacayavenonaenënexa?’ pajamatabëjamë pëtsa, jai Dioso jivi pejumeitavetsijava. Nexata itsajivi ata apo bejamatabëjumaitsi bajarapacuenia. Tshipaji baja Cristo athëbëvetsica patsica vajanacasivatëpaenexa mapanacuataje. Petëpaeucujinae ata baja icatsia Cristo asaë petëpaejavavevica vajanacapanepaenexa. ⁸ Dioso aneconijibia vajanacataejavanexa yabara, Dioso pejumelivaisibaxutota jumaitsi mapacueniaje: “Dioso rabaja pejumelivaisi panatoxainame. Bajara palivaisi yabara panabarëcuaiquajamë tsabiabi. Panejamatabëëthëtota ata baja bajarapalivaisi yabara panajamatabëxainabiabame,” jai Dioso pejumelivaisibaxutota. Bajarapalivaisibeje nalivaisijëpabeje palivaisi paxanë pacatsipaebatsi panejumecovënëtsinexa Cristo papecasivatëpaejava pibisiacuene paneexanaeneconi yabara. ⁹ Itsamatacabi Diosojavabelia papecacapanepaeivi tsane itsa paexanavanapaename mapacueniaje. Panavajunupaebabiabare itsamonaejavabelia panejumecovënëtsijava Jesús Dioso pexënatoeuene. Pajumecovënërenua panejamatabëëthëtovjavavetsina Jesús petëpaeucujinae icatsia Dioso piasaëyaexanaejavatsi. ¹⁰ Tshipaji baja jivi pejamatabëëthëtota jumecovënëta Cristo pesivatëpaejavatsi pibisiacuene pexanaeneconi yabara. Bajaraxuata Dioso baja aneconijibia tanetsi. Jivi pecuibovojotota navajunupaebabiaba pejumecovënëtsijava Cristo pesivatëpaejavatsi pibisiacuene pexanaeneconi yabara. Nexata bajarapacuenia nayapëtane bajarapajivi Dioso pepacuene pecapanepaejavanexatsi.

¹¹ Dioso pejumelivaisibaxutota jumaitsi mapacueniaje: “Pajivi jumecovënëtsiana, bajaraponë apo nacueratsi tsane,” jai Dioso pejumelivaisibaxutota Cristo jivi pesivatëpaejavanexa pibisiacuene pexanaeneconi yabara. ¹² Dioso raja jivi najëpaeya tane. Pacuenia tane judïovi, bajarapacuenia tane apo judïovi ata. Caenë, Dioso, daxita bajarapamonaē pijatuxanenë. Ayaicuena Dioso itaxutotsoniatane daxita pamonaē vajëta bajaraponëjavabelia. ¹³ Cristojavabelia jivi penavajëtsijavanexa, Dioso pejumelivaisibaxutota jumaitsi mapacueniaje: “Pajivi pepo petuxanenëjavabelia navajëta pecapanepaenexatsi, bajarapajivi capanepaenatsi,” jai Dioso pejumelivaisibaxutota. ¹⁴ Itsiata acuenebi itsajivi ata penavajëtsinexa Cristojavabelia itsa abaxë apo jumecovënëtsi Cristo pesivatëpaejavatsi pibisiacuene pexanaeneconi yabara. Itsajivi ata acuenebi pejumecovënëtsinexa Cristo pelivaisi itsa abaxë apo yapëtae Cristo pelivaisi. Itsajivi ata acuenebi peyapëtaenexa Cristo pelivaisi itsa abaxë apo tsipaebitsi. ¹⁵ Dioso pijajivi itsa apo itorobi tsipae daxitajivijava Cristo pelivaisi petsipaebaponaenexa, nexata itsajivi ata apo yapëtae tsipae Cristo pelivaisi. Dioso pejumelivaisi jivi petsipaebaponaevinexa yabara, Dioso pejumelivaisibaxutota jumaitsi mapacueniaje: “ǂPexaniacuene bitso itsa najetarubena pexanialivaisi jivi petsipaebivinexa!” jai.

¹⁶ Pexanialivaisi tsipaebi atatsi, itsiata daxitajivi apo jitsipae pejumecovënëtsinexa pexanialivaisi pecapanepaelivaisinexatsi picani Diosojavabelia. Isaíaspijinë ata, bajayata jivi apo jumecovënëtsitsi. Nexata Isaíaspijinë Diosojavabelia jumaitsi mapacueniaje: “Tajatuxanenë, daxitajivi apo nejumecovënëtsi tatsipaebilivaisi. Caejiviyobeje saya nejumecovënëta,” jai bajayata Isaíaspijinë Diosojavabelia. ¹⁷ Nexata jivi itsa tsipaebatsi Cristo pesivatëpaejavatsi pibisiacuene pexanaeneconi yabara pejumetaexae, jumecovënëta baja.

¹⁸ Judïovi ata baja picani jumetane Cristo pesivatëpaejavatsi pibisiacuene pexanaeneconi yabara. Itsiata judïovi apo jumecovënëtsi. Dioso pejumelivaisibaxutota jumaitsi mapacueniaje:

Dioso pijajivi Dioso pejumelivaisi tsipaebanajetarubena daxitanacuanëjjava. Nexata baja Dioso pejumelivaisi yacajëpa daxitanacuanëjjava, jai Dioso pejumelivaisibaxutota.

¹⁹ Judïovi baja picani jumetane Cristo pesivatëpaejavatsi pibisiacuene pexanaeneconi yabara. Itsiata judïovi apo jumecovënëtsi. Moiséspijinë bajayata tajëvelia yaquina judïovi Dioso apo pejumecovënëtsijavanexa. Yaquinanua apo judïovi juya Dioso pejumecovënëtsijavanexa. Judïovijavabelia Dioso tajëvelia pejumatsijava, bajayata Moiséspijinë yaquina mapacueniaje:

Itsanacuanëpijivi paxamë hijiaya panaëcotabiabame. Bajarapamonaē tajajivi exanaenajë. Nexata bajarapamonaē pacuenecaëbianame. Bajarapamonaē tajumelivaisi apo jamatabëjumeyapëtae picani. Itsiata tajajivi exanaenajë. Nexata bajarapamonaē pacuenecaëbiaanaepanaename, jai Moiséspijinë bajayata peyaquinaebaxutota Dioso tajëvelia pejumatsijava judïovijavabelia.

²⁰ Isaíaspijinē ata bajayata ajumejunavijibia jumaiṣi Dioso tajēvelia pejumaiṣijava. Apo judiōvi yabara Dioso pejumaiṣijava, Isaíaspijinē jumaiṣi mapacueniaje: “Pamonae picani apo nejitsipae, apo nejumecovēnēṣina, bajarapamonae itsiata it-samatacabi nejumecovēnēṣiana. Nexata baja neyapētaena. Bajarapamonae apo nevēnēlivaisiyamijobi ata, najamatabēcuenetajēṣianajē bajarapamonaejavabelia,” jai Dioso tajēvelia, jai bajayata Isaíaspijinē.

Bajaraxuata nayapētane tajēvelia Dioso penajamatabēcueneverēṣijava pecapanepaenexa apo judiōvi ata. ²¹ Biji rajane judiōvi yabara Dioso pejumaiṣijava, Isaíaspijinē bajayata jumaiṣi mapacueniaje: “Daxitamatacabi junatabiabajē pamonae apo nejumecovēnēṣi. Bajarapamonae apo exanae taitorobicuenia,” jai bajayata Isaíaspijinē Dioso pejumaiṣijava judiōvi yabara. Nexata nayapētane mapacuenije. Judiōvi junatsi atatsi Dioso, itsiata apo jumecovēnēṣi Dioso pecapanepaenexatsi.

11

Pacuenia judiōvi, Israel nacuapijiviyajuvēnēvi, Dioso capanepaejitsiatsi yabara pelivaisi

¹ ¿Dioso tsabaja pijajivi judiōvi, Israel nacuapijivi, daxita Dioso navecuaxuaba? Jume raja. Apo navecuaxuabi. Xanē ata raja judiōnēnē, Israel nacuapijinēnē. Tajasalinaīnē cajena Abrahampijinē. Benjamínpijinē ata pemomoxiyajuvēnēnē. ² Bajayata baja cajena vajavajēnaeyami, Dioso pijajivinexa itapeta judiōvi, Israel nacuapijivi. Nexata Dioso apo navecuaxuabi tsane bajarapamonae. Payapētaneme rabaja pacuenia Dioso pejumelivaisibaxutota jumaiṣi profeta Eliaspjinē yabara. Profeta Eliaspjinē pina pevajēṣijavata Diosojavabelia, neconitsiaya jumaiṣi Israel nacuapijivi yabara mapacueniaje: ³ “Tajatuxanenē, mapamonaeje, Israel nacuapijivi, catobepona daxita pecajumelivaisipaebivimi profetavi. Toxobabianua altarvēnējavanē, itsajota tajuitabiaba dajubivi pecarajutsinexa ofrendacuena. Nexata baja xanē caenēnē, nijajivitonēnē, nacopatajē. Xanē ata baja jamatabēnebeyaxuaba,” jai pina profeta Eliaspjinē Diosojavabelia Israel nacuapijivi yabara. ⁴ Itsiata baiṣi jane Dioso pina jumaiṣi profeta Eliaspjinējavabelia mapacueniaje: “Apo caenēmē raja. Xainajē baja tajajivi, siete mil ponēbeje, Israel nacuapijiviyajuvēnēvi. Bajarapamonae xaniavaetia nejumecovēnētavanapa. Pematabacabēta apo tonubenaenē penavajēcaenexa Baalvēnēnē, jumapecaetaeya pexanaenēṣi, pitabarata,” jai pina Dioso bajayata profeta Eliaspjinējavabelia. ⁵ Bajara pijinia itsi maparuae ataje. Caejiviyobeje pijinia Dioso itapetatsi pijajivinexa pitaxutotsoniataexaetsi. ⁶ Bajarapamonae Dioso pexaniacuene petoexanavanapaejaya yabara, apo itapetsitsi. Bajarapamonae Dioso itsa itapetsipatsi ēpexaniacuene Dioso petoexanavanapaejaya yabara, nexata saya bajarapamonae Dioso itapetsipatsi ēpexaniacuene petoexanavanapaejaya yabara. Nexata bajarapamonae saya Dioso pitaxutotsoniataexaetsi, apo itapetsitsi tsipae.

⁷ Mara pacuenia itsi Israel nacuapijivije, Dioso apo pejumecovēnēṣivi. Bajarapamonae apo jumecovēnēṣi Dioso pecapanepaejavanexatsi. Itsiata baiṣi jane bajarapamonaejavuvēnēvi, caejiviyobeje, Dioso itapetatsi pijajivinexa. Bajarapamonae jumecovēnēta pexaniajailivaisi, Dioso pejumelivaisi, pecapanepaelivaisinexatsi Diosojavabelia. Itsamonae apo jumecovēnēṣi bajarapalivaisi. Tspajaji amatabēcuenetaja. Apo jumecovēnēṣi Dioso pejumelivaisi, pexaniajailivaisi, pecapanepaelivaisinexatsi picani Diosojavabelia. ⁸ Israel nacuapijivi, Dioso apo pejumecovēnēṣivi, yabara Dioso pejumelivaisibaxutota jumaiṣi mapacueniaje: “Dioso ajamatabēcuenetajayaexanatsi. Bajaraxuata bajarapamonae lebabibi ata Dioso pejumelivaisibaxuto, apo jumecovēnēṣi. Bajara itsi bajarapamonae mapamatacabijavaberena ataje,” jai Dioso pejumelivaisibaxutota Israel nacuapijivi, Dioso apo pejumecovēnēṣivi, yabara. ⁹ Israel nacuapijivi, Dioso apo pejumecovēnēṣivi, yabara bajayata Davidpijinē ata jumaiṣi mapacueniaje:

Israel nacuapijivi fiesta itsa exanabiaba, jamatabēcuenenavēxaniabiaya jamatabējumai tsabiabi: “Dioso cajena nacasivabarēya. Bajaraxuata ayajava vajaxinaejava xainatsi,” jamatabējai tsabiabi. Itsiata baiṣi jane pebarēyajakavata, itsamatacabi jemata tocopi-apsiansatsi pijaneconi yabara Dioso jane baja penaneconitsiaexanaejavanexatsi. ¹⁰ Bajarapamonae apo yarepeva pijaneconi peyajavajinavanapaejaya daxitamatacabi. Pacuenia bitso piarejevava pecaponaevi, nabēxēṣutsiaya bacapona, bajara itsi bajarapamonae pejamatabēthētota pijaneconi yabara. Bitso yanajamatabēxaina pijaneconi,

jai bajayata Davidpijinē Israel nacuapijivi, Dioso apo pejumecovēnēṣivi, yabara.

Pacuenia apo judiōvi ata Dioso capanepaejitsiatsi yabara pelivaisi

¹¹ Judiōvi apo jumecovēnēṣi ata Cristo pesivatēpaejavatsi pecapanepaenexatsi Diosojavabelia, itsiata abaxē Dioso apo navecuaxuabi judiōvi daxitamatacabijavabelianexa.

Judíovi apo pejumecovênêtsixae Cristo pelivaisi, juya apo judíovi Dioso tocopatatsi pejumecovênêtsinexa Cristo pelivaisi pecapanepaenexatsi Diosojavabelia. Nexata apo judíovi ata pejumecovênêtsijava Cristo pelivaisi, judíovi itsa taena, nexata judíovi ata jumecovênêtsiana Cristo pelivaisi pecapanepaenexatsi Diosojavabelia. ¹² Judíovi apo jumecovênêtsi Cristo pelivaisi pecapanepaenexatsi Diosojavabelia. Bajaraxuata juya Dioso tocopata apo judíovi ata pejumecovênêtsinexa Cristo pelivaisi pecapanepaenexatsi Diosojavabelia. Nexata apo judíovi ata bajarapacuenia caxitajaraba baja pexaniacuene, judíovi apo pejumecovênêtsixae Cristo pelivaisi. Bajarapacuenia apo judíovi ata aeconoxae baja toxanepanatsi Dioso petocopatsixaetsi pejumecovênêtsinexa Cristo pelivaisi. Itsiata baitsi jane pacuenia apo judíovi ata aeconoxae toxanepanatsi, bajaraxua matatoxenetsia bitso pexaniacuene caxitajarabiana pamatacabi judíovi ayailbitsaêto jane baja jumecovênêtsiana Cristo pelivaisi.

¹³ Aeconoxae baja palivaisi pacatsipaebatsi, bajarapalivaisi paxamê apo pajudíovínexamê. Jitsipajê paneyapêtaenexa Dioso taneitorobicuene. Dioso nitoroba paxamê apo pajudíovímêjavabelia patacatsipaebínexa Dioso pejumelivaisi. Nexata jamatabêjumaitsinê: “Dioso cajena netocopata ayaijamatabêcuene pexainaelivaisi jivi tatsipaebaponaenexa,” jamatabêjanê. ¹⁴ Bajarapacuenia Dioso pejumelivaisi pacatsipaebaponatsi tsipaji jitsipajê tajaviriavi ata, judíovi, Dioso petoexanaenexatsi pacuenia paxamê ata Dioso pacatoexana papecacapanepaenexa. Nexata meta bajarapacuenia judíoviyajuvênêvi ata jumecovênêtsiana Cristo pelivaisi pecapanepaenexatsi Diosojavabelia. ¹⁵ Judíoviyajuvênêvi Cristo navecuaitaveta. Nexata juya pamonaê apo judíovi, Dioso barajamatabêcuenexanepanaeyatane. Pamatacabi judíovi jumecovênêtsiana Cristo pelivaisi, Dioso pitsianatsi pijajivínexa. Bajaraxua bitso pinijicuene tsane. Judíovi aeconoxae bepetêpaevi Dioso tanetsi apo pejumecovênêtsixae Cristo pelivaisi. Nexata pamatacabi judíovi jumecovênêtsiana Cristo pelivaisi, Dioso taenatsi petêpaeujinae bepiasaêyaxanaevitsi. ¹⁶ Panbê jivi ofrendacuenia itsa rajuta Diosojavabelia, copiya pexanaepanbê barajuta. Nexata bajarapanmatabela cotocaevi pexanaepan ata, apo rajutsi ata Diosojavabelia, Dioso pijapanacuenia tane. Naejava ata petabunepe jivi ofrendacuenia itsa rajuta Diosojavabelia, nexata daxita pemaxêrananê ata Dioso pijamaxêrananêcuena tane. Bajara pijinia itsi judíovi ata. Judíovi pijasalinaivimi Dioso itsa itapeta pijajivínexa, nexata Dioso pemomoxi ata Dioso pijajivícuenia tane.

¹⁷ Dioso tane judíovi, beolivonaemaxêrananê. Olivonaenê pexainanê, pepo olivonaemaxêrananê caucuba juya saicayaviria olivonaemaxêranaxi perubinexa bajarapacovêta. Nexata pepo olivonaê ênêtuatujêpijímêra junua bajarapamaxêranaxi ênêtuatujêjava pejuvarubenaenexa pepo olivonaemaxêranajavaberena. Bajara pijinia pacuenia Dioso pacatoexana paxamê apo pajudíovímê. Judíovi apo pejumecovênêtsixae Cristo pelivaisi, paxamê juya, apo pajudíovímê, Dioso papijajivímê pacaexana. ¹⁸ “Judíovivecua Dioso papijajivínê paneexana. Nexata paayaijamatabêcuenevinê judíovivecua,” pajamê pêtša. Tsipaji payapêtaneme mapacueneje. Naejava, petabunepe pejamatabêcuena, xaniavaetsia nuca. Pemaxêrana pejamatabêcuena, xaniavaetsia apo nuca. Bajara pijinia paxamê ata paitsimê. Apo pacacajêpae paneyavenonaenexa judíovijavabelia. Biji rajane judíovi bepapecayavenonae. Tsipaji judíovi apo jumecovênêtsi Cristo pelivaisi. Nexata judíovi apo pejumecovênêtsixae, Cristo pelivaisi juya paxamê Dioso pacaitaxutotsoniatane. Nexata pacatocopata Cristo pelivaisi panejumecovênêtsinexa Dioso papecacapanepaenexa panijaneconivecua.

¹⁹ Nexata meta pajumaitsimê: “Pacuenia olivonaenê pexainanê, olivonaemaxêrananê caucuba, bajarapacovêta juya perubinexa itsaviriaolivonaemaxêranaxi, bajara pijinia itsi Dioso. Dioso navecuatsata judíovi juya apo judíovitsi vajanacaitapetsinexa pijajivínexatsi,” pajamê meta. ²⁰ Pacuenia olivonaenê pexainanê, pibisiamaxêrana caucuta, bajara pijinia itsi Dioso. Dioso navecuatsata judíovi apo pejumecovênêtsixae Cristo pelivaisi. Pacuenia olivonaenê pexainanê, pecaucutimaxêrana pecovêta juya itsaviriaolivonaemaxêrana ruta, bajara pijinia pacuenia paxamê ata judíovi pejamatabêcuenemi, pacapita Dioso papijajivínexamê panejumecovênêtsixae Cristo pelivaisi. Bajaraxuata pêtša panataneme paayaijamatabêcuenevimê. Biji rajane xania. Cujunaviaya Dioso pajinavanapare panevecuajopaeyaniva Dioso panejumecovênêtsijava. ²¹ Pacuenia olivonaenê pexainanê, pibisiamaxêrana bacacuta, bajara pijinia pacuenia Dioso judíovi navecuatsata apo pejumecovênêtsixae Cristo pelivaisi. Judíovi picani Dioso itapeta pijajivínexa. Nexata judíovi Cristo pelivaisi apo pejumecovênêtsixae, Dioso navecuatsata pitapetsivimi ata. Nexata bajarapacuenia paxamê ata Dioso pacanavecuatsatsipa panevajênaeyabelia itsa apo pejumecovênêtavanapaemê tsipae Cristo pelivaisi. ²² Bajaraxuata pacanaêjêre mapacueneje. Dioso bitso papecaitaxutotsoniataexae, pacatocopata Cristo pelivaisi panejumecovênêtsinexa.

Pacanaējērenua mapacueneye. Apo pejumecovēnētsixae Cristo pelivaisi, Dioso navecutasata pitapetsivimi ata. Xanijai cajena. Dioso naneconitsiaexanapona daxita pamonaē apo jumecovēnētsi Cristo pelivaisi. Itsiata paxamējavabelia Dioso pacaitaxutotsoniatane. Nexata panevajēnaeyabelia tsiteca Dioso pajumecovēnētavanapare. Itsa pacopabijitsipame Dioso panejumecovēnētsijava, nexata pacuenia olivonaenē pexainaenē, pibisiamaxērana bacaucuta pexuabinexa, bajara pijinia pacuenia paxamē ata Dioso pacanavecuaxuabi-jitsipa. ²³ Judīovi Dioso pejumeaebijava itsa copatsiana, nexata jumecovēnētsiana Cristo pesivatēpaejavatsi pecapanepaenexatsi Diosojavabelia. Nexata bajarapamonae ata Dioso pijajivi tsane. Nexata pacuenia olivonaenē pexainaenē, pecaucutsimaxēranami icatsia caevēarena pecovēta ruta, bajara pijinia pacuenia Dioso icatsia pitsianatsi judīovi Dioso pijajivinexa. ²⁴ Pacuenia saicayaviria olivonaemaxērana ruta pepo olivonaemaxēranacovēta, bajarapacovēta pejuvarucaenexa, bajara pijinia pacuenia Dioso pacapita paxamē apo pajudīovi atamē Dioso papijajivinxamē. Paxamē apo pajudīoviriavi atamē, itsiata Dioso pacapita papijajivinxamē. Judīovi biji toyapēxanapanatsi icatsia pepitsinexatsi Dioso pijajivinexa. Tspaji bajarapamonae pijasalinaivimi ata Dioso itapeta pijajivinexa.

Pacuenia Dioso capanepaejitsia judīovi, Israel nacuapijivi, yabara pelivaisi

²⁵ Tajamonae, panejamatabējumaitsiyaniava mapacueniaje: “Vaxaitsi bitso vajayapētaevi,” panejamatabējaiyaniva, jitsipajē paneyapētaenexa mapalivaisije, Dioso muetsia pexainabutsilivaisimi. Judīoviyajuvēnēvi baja cajena ajamatabēcuenetaja. Nexata bajarapamonae apo jumecovēnētsi Cristo pelivaisi. Nexata ayaibitsaētoxaneto apo judīovi, itsa jumecovēnētsiana Cristo pelivaisi, matapania jane baja judīovi ata jumecovēnētsiana Cristo pelivaisi. ²⁶ Nexata daxita pamonaē judīovi, itsamatacabi Dioso capanepaenatsi pacuenia baja Dioso pejumelivaisibaxutota tajēvelia jumaitsi. Dioso pejumelivaisibaxutota tajēvelia jumaitsi mapacueniaje:

Jerusalén tomaraverena najetarucaena daxitajivi pecapanepaenēnexa. Bajaraponē daxita judīovi, pamonaē Israelpijinē pemomoxi, vecuaajibiaexanaena pibisiacuene pexanaeneconimi. ²⁷ Itsa bajaraponē vecuaajibiaexanaena pibisiacuene pexanaeneconimi, nexata jane baja toexanaenajē pacuenia bajayata tajēvelia najumecapanepaeya jumaitsinē bajarapamonae pijasalinaivimijavabelia, jai tajēvelia Dioso pejumelivaisibaxutota Dioso pejumaitsijava judīovi pecapanepaejavanaxa Cristo pejamatabēcueneta.

²⁸ Judīoviyajuvēnēvi Dioso pijavajabitsaē naexana. Tspaji apo jumecovēnētsi Cristo pelivaisi pecapanepaenexatsi Diosojavabelia. Itsiata abaxē tsiteca Dioso asiva judīovi. Tspaji bajayata copiatā Dioso itapeta bajarapamonae pijasalinaivimi pijajivinexa. ²⁹ Xua Dioso rajuta judīovijavabelia, apo vecuacnaviatsi. Pamonaē pijinia Dioso junata pijajivinexa, apo navecuaxuabi tsane. Nexata itsamatacabi bajarapamonae Dioso athēbētatsia yajavaecaena daxitamatacabijavabelianexa. ³⁰ Paxamē apo pajudīovimē, pamatacabi abaxē Cristo pelivaisi apo pajumecovēnētsimē, Dioso picani apo papijajivimē. Judīovi apo pejumecovēnētsixae Cristo pelivaisi, nexata apo pajudīovi atamē, Dioso pacaitaxutotsoniatane. Papijajivimē baja pacaexana. ³¹ Bajara pijinia pacuenia itsane judīovi ata. Maparuaeje abaxē judīovi apo jumecovēnētsi Cristo pelivaisi. Itsiata itsamatacabijavabelia judīovi ata Dioso itaxutotsoniatanatsi pacuenia paxamē ata Dioso pacaitaxutotsoniatane. ³² Dioso tocopata daxitajivi pijacuata penatojitsipacuenia pexanavanapaenexa Dioso pitorobicueniatsi apo pejumecovēnētsixae. Nexata daxitajivi naneconita Diosojavabelia. Bajarapacuenia Dioso tocopata itsamatacabijavabelia icatsia pitaxutotsoniatanexa bajarapamonae.

³³ ¡Dioso baja cajena pitaxutotsoniatanē daxitajivi pecapanepaenexa! ¡Dioso cajena bitso peyapētaenē! ¡Daxitalivaisi bitso pejumeyapētaenēnua! Pacuenia Dioso najamatabēcuenevereta pexanaenexa, pacuenia ata baja exanapona, vaxaitsi bajaraxua Dioso apo jamatabēcueneyapētaetsi. ³⁴ Dioso pejumelivaisibaxutota jumaitsi mapacueniaje. “Vaxaitsi apo jamatabēcueneyapētaetsi xua najamatabēxaina Dioso. Apo nacacāējēpaenua vajamuxujobinexa ata. ³⁵ Dioso cajena itsajivijavabelia ata apo amoneyabi. Nexata xua Dioso rajuta itsajivijavabelia, apo rajutsi piamoneyabimatamo,” jai Dioso pejumelivaisibaxutota Dioso yabara. ³⁶ Tspaji cajena Dioso pijacuata exana daxitacuene. Evetanua daxitacuene. Daxitacuene baja cajena Dioso pijajava. Nexata Diosojavabelia vaxaitsi bejumaitsitsi tsabiabi mapacueniaje: “¡Diosomē, bitso ayaijamatabēcuenenēmē!” bejaitsi tsabiabi daxitamatacabijavabelianexa. Bajara itsi tsane.

12

Pacuenia Dioso pejumecovēnētsinē benajamatabēcuenerrajuta Diosojavabelia pijajivitonēnaxa daxitamatacabijavabelianexa yabara pelivaisi

¹ Tajamonae, payapëtaneme rabaja Dioso ayaicuena vajanacaitaxutotsoniataejava. Bajaraxuata pacaitorobatsi mapacueniaje. Pacuenia ofrenda barajutatsi Diosojavabelia Dioso pijajavanexa, bajara pijinia pacuenia panajamatabëcuenerajure Diosojavabelia, pacuenia Dioso pacaitorobapona paneexanabiabinexa daxitamatacabijavabelianexa. Nexata ëDioso pijacuene panetonacuenebijava, pacaasaëmëre tsavanapae papecasivabarëyanexa Dioso. Bajarapacuenia Diosojavabelia panajamatabëcuenerajure panajamatabëëthëtojavavetsina panetsitanajamatabëcueneitajëtsinexa pepacuene panejitsipaejava Dioso. ²Pëtsa paexanavanapame pacuenia exanavanapa Dioso apo pejumecovënëtsivi. Biji rajane panajamatabëcueneopare Diosojavabelia papecarajutsinexa pejanajamatabëcuene. Nexata bajarapacuenia payapëtaneme xua Dioso pacatojitsipa paneexanabiabinexa. Xua Dioso pacatojitsipa paneexanabiabinexa, bajaraxua bitso pexaniacuene. Bajaraxua itsa paexanabiabianame, Dioso pacasivabarëya tsane.

³ Dioso raja taneitaxutotsoniataexae, nitoroba tatonacuenebinexa. Bajaraxuata mapacuenia pacajumaititsije. Pacuenia baja aeconoxae pajamatabëcueneitsimë tsavanapae, bajarapajamatabëcuene matatoxenetsia pëtsa panataneme paayajamatabëcuenevimë bitso. Biji rajane pacaëjivimë canacujitsia, xuavajëto Dioso pacajamatabëcuene caëjëpaeyaexanapona paneexanabiabinexa panenajamatabëcueneopatsixae Diosojavabelia, bajarapacuenia saya baja panataema. ⁴Jivi itsa naexana, yajavanaexana peperabëto, caeperabëtoerca. Itsiata bajarapaperabëtopijivi saicaya xainapona pevënëanë. Caevito canacujitsia saicaya xaina pexanabiabijavanexa. ⁵Bajara pijinia pacuenia vaxaitsi ata itsisti, Jesucristojavabelia vajanajamatabëcueneopatsivi. Ayailbitsaëto atatsi, itsiata caenë Cristo beperabëtotsi. Nexata namataenetsia nayavenonabiabianatsi.

⁶ Caejivitsi canacujitsia, pacuenia Dioso nacatojitsipa, saicaya nacajamatabëcuene caëjëpaeyaexanapona vajaexanabiabinexa. Nexata Dioso betonacuenebavanapatsi pacuenia nacajamatabëcuene caëjëpaeyaexanapona. Dioso itsa nacajamatabëcuene caëjëpaeyaexana jivi vajatsipaebabiabinexa Dioso pejumelivaisi, nexata betsipaeabiabatsi xaniavaetsia pacuenia nacajamatabëcuene caëjëpaeyaexana. ⁷ Itsa pijinia Dioso nacajamatabëcuene caëjëpaeyaexana vajayavenonabiabinexa itsamonae Dioso pejumecovënëtsivi, nexata xaniavaetsia beyavenonabiabatsi Dioso pejumecovënëtsivi. Pajivi pijinia Dioso jamatabëcuene caëjëpaeyaexanatsi Dioso pejumelivaisi jivi petsipaebabiabinexa, xaniavaetsia betsipaeabiabata daxita pejamatabëcuenesaëta. ⁸ Pajivi pijinia Dioso jamatabëcuene caëjëpaeyaexanatsi itsamonae pemuxujobiabinexa pejamatabëcuenesaëtaeyaexanaexana Dioso pejumecovënëtsijava, bajarapajivi bemuxujobiababiaba xaniavaetsia bajarapamonaejavabelia. Pajivi pijinia rajutabiaba pexainaeyajuvënëjava bepejiobivijavabelia, berajutabiaba itsajamatabëcuene xainaenejeva. Pajivi pijinia itsacuenejava evetsiaexanatsi, bevetaponapona xaniavaetsia. Pajivi pijinia yavenonabiaba piavitanevi, pamonaë ata bitso najamatabëxaina pijamonaejiviyo itsa totëpatsi, beyavenonabiaba barëyaya.

Pacuenia Jesucristo pijajivi bexanavanapa yabara pelivaisi

⁹ Xaniavaetsia namataenetsia panaasivamëre tsavanapae. Paitoyamëre pibisiacuene pexanaejava. Pacaasaëmëre tsavanapae ëpexaniacuene paneexanaejava. ¹⁰ Pacuenia nacaënapijivi bitso nasiva, bajarapacuenia panaasivamëre tsavanapae Cristo papijajivixamë. Itsamonae Dioso pejumecovënëtsivi, patojitsipare itsamonae petanexatsi ayajamatabëcuenevi paxamë matatoxenetsia. Namataenetsia panayaiyataeyabiabare.

¹¹ Pacaasaëmëre tsavanapae Dioso pijacuene panetonacuenebijava. Pëtsa pafaetabimë. Daxita panejamatabëcuenesaëta patonacuenebabiabare Dioso pijacuene.

¹² Pasivabarëyamëre tsavanapae. Tsipaji rabaja payapëtaneme itsamatacabi panexainae-javanexa matacabi apo peverevereaejava. Itsamonae itsa pacabejiobiaexana Cristo papijajivixamë, bajayajebi ata, pëtsa pacopatame. Daxitamatacabi pavajëtabiabare Diosojavabelia pacopatsinejavamë.

¹³ Itsajota Dioso pejumecovënëtsivi namatavenona, payavenonabiabare. Pamonaë pacasivaxaina panijaboyaberena, xaniavaetsia pacopiapitabiabare.

¹⁴ Pamonaë pibisiacuene pacaexana, patovajëtabiabare Diosojavabelia Dioso peyavenonae-nexatsi. Patovajëtabiabare pexaniacuene. Pëtsa patovajëtabiabame pibisiacuene juya pibisiacuene pexanaenexatsi.

¹⁵ Pamonaë barëya petocopiapatsixaetsi pexaniacuene, bajarapamonae paxamë ata pajamatabëcuene yavenonaeya barëyamëre. Pamonaë pijinia nua petocopiapatsixaetsi apo pejitsipaacuene, bajarapamonae paxamë ata pajamatabëcuene yavenonaeyanuema.

¹⁶ Najamatabëcuenejëpaeya pajinavanapare. Pëtsa panataneme paayajamatabëcuenevimë. Pamonaë bevelijamatabëcuenevi ata, xaniavaetsia pataema.

Xaniavaetsia payajavajinavanaparenu. “Xanë bitso tayapëtaenë itsamonae matatoxenetsia,” pajamatabëjamë pëtsa.

¹⁷ Itsajivi pibisiacuene itsa pacaexana, pëtsa juya pibisiacuene panamatamoexaname. Paexanabiabare ëpexaniacuene, xua jivi tsitaxanepanatsi. ¹⁸ Xua Dioso pacajamatabëcuenecaëjëpaeyaexana paneexanaenexa, bajaraxua paexanabiabare xaniavaetsia panejinavanapaxenexa, daxitajivijavabelia itsacuene paexanaejevamë. ¹⁹ Tajamonae bitso patacaasivavi, itsamonae pibisiacuene itsa pacaexana, pëtsa panamatamotame. Pacopare saya bajarapamonae Dioso penaneconitsiaexanaenexatsi. Tsipaji Dioso pejumaitisijava, Dioso pejumelivaisibaxutota jumaiti mapacueniaje: “Pamonae pibisiacuene exana itsamonaejavabelia, xanë naneconitsiaexanaenajë,” jai Dioso pejumelivaisibaxutota. ²⁰ Dioso pejumelivaisibaxutota itsabaxutota pijinia jumaiti mapacueniaje: “Nijavajabitsaënë itsa piajani, rajure pexaejava. Mera itsa jitsipa, rajure mera piapaenexa. Bajarapacuenia itsa exaname, nexata caurataena nijavajabitsaënë ata,” jai Dioso pejumelivaisibaxutota. ²¹ Itsajivi pibisiacuene itsa pacaexana, pëtsa pibisiacuene panamatamoexaname. Tsipaji bajarapacuenia panajamatabëcuene bijianaiejitsipame. Biji rajane pajivi pibisiacuene pacaexana, pexaniacuene patoexanare. Nexata bajarapacuenia pibisiacuene papecaexanaejivi ata, pajamatabëcuenecaeviaexanaename.

13

¹ Daxita pamonae gobierno pijajivi, papecayanacuaeveitsivi, pacuenia bajarapamonae pacaitoroba, xaniavaetsia pajumecovënëtabiabare. Tsipaji bajarapamonae, caenë canacujitsia, Dioso pejamatabëcueneta pacayanacuaeaveta. Daxita pamonae nacua pevetsivi, pacaaveta Dioso petocopatsixaetsi. ² Nexata pajivi apo jumecovënëtsi pacuenia nacuaeveitsinë itorobatsi, bajarapajivi Dioso ata apo jumecovënëtsi. Pamonae apo jumecovënëtsi, nexata bajarapamonae Dioso naneconitsiaexanaenatsi. ³ Pamonae pexaniacuene exanavanapa, nacuaeveitsivi apo cjunavi. Pamonae pijinia pibisiacuene exanavanapa, nacuaeveitsivi cjunava. Paxamë nexata pexaniacuene paexanavanapare ajunavijibdia panejinavanapaenexa. Nexata pacasivabarëya tsane papecayanacuaeveitsivi. ⁴ Bajarapamonae Dioso pejamatabëcueneta nacuenebavanapa. Nexata pacaevetavanapa pibisiacuenevecu. Itsiata pibisiacuene itsa paexaname, papecayanacuaeveitsivi bepacujunavame. Tsipaji bajarapamonae Dioso tocopatatsi papecananeconitsiaexanaenexa. Dioso tocopatatsi bajarapamonae penaneconitsiaexanaenexa daxita pamonae pibisiacuene pexanaevi. ⁵ Bajaraxuata bejumecovënëtsi pamonae vajanacayanacuaeveitsivi. Apo jumecovënëtsi saya vajanacananeconitsiaexanaeyaniva. Jume baja cajena. Biji rajane jumecovënëtsi tsipaji Dioso pijajivixaetsi, vajajamatabëcueneta yapëtanetsi pacuenia bexanavanapatsi. ⁶ Bajaraxuata nacuaeveitsivijavabelia impuestomatamo pamatamotabiabame panematamotsipalatata penaevetsinexa. Nacuaeveitsivi, Dioso pejamatabëcueneta, tocopatatsi nacua pevetsinexa. Nexata nacua ëpevetsicuenenacueneba.

⁷ Pacuenia pacaiejivimë canacujitsia bepatoexaname gobierno pejamatabëcueneta penacuenebivijavabelia, bajarapacuenia patoexanabiabare. Bajarapamonaeajuvënëvi itsa caetuata impuestomatamo, xuavajëto pamoneyabame, pamatamotabiabare. Pamonae pijinia peyaiyataevitsi, payaiyataevitsi. Pamonae peyaiyataevitsi, bajarapamonae pexaniacuena pabaracuaicuajiamëre tsabiabi. ⁸ Pëtsa pamoneyabame itsajivi ata. Biji rajane pacuenia Cristo pacaasiva, bajarapacuenia paxamë ata panaasivamëre tsavanapae. Pajivi asiva itsajivi ata pacuenia nasiva pijacuata, bajarapajivi jumecovënëtsicapanepe Dioso Moiséspijinëta penajumecopatsilivaisi. ⁹ Dioso Moiséspijinëta penajumecopatsilivaisi, itaveta mapacueniaje: “Pëtsa jaitame itsava nijavavecu. Pëtsa beyaxuabame jivitonë. Pëtsa nacobetoxotame. Pëtsa najumetsënëtsiaya baracuaicuajiamë itsajivi. Pëtsa cobecaëbame itsajivi pexinaejava,” jai Dioso Moiséspijinëta penajumecopatsilivaisi. Nexata paxamë itsa pajumecovënëtsicapanepeajitsipame daxita mapalivaisije, itsalivaisiyo ata yajava, pajumecovënëtsicapanepeajitsipame mapejumaitsilivaisiyoje: “Asivamëre itsajivi ata pacuenia xamë nijacuata nasivamë,” peajilivaisiyo. ¹⁰ Tsipaji pajivi asiva itsajivi ata, pibisiacuene apo exanae bajarapajivijavabelia. Bajaraxuata itsa asivatsi itsamonae ata, nexata jumecovënëtsicapanepeatsi daxita pacuenia Dioso nacaitoroba.

¹¹ Bajarapacuenia itsamonae ata biasivatsi. Tsipaji baja yapëtanetsi bitso baja imoxoyo pevajënae icatsia Jesucristo pepatsijavanexatsica. Vajanacacapanepaenënexa, najetarucaena vajanacacapanepaenexa mapanacuaevecuaje. Pamatacabi taxuxuabatsi Jesucristo vajajumecovënëtsijava, nacatsita tajëvjavënae abaxë itajara Jesucristo icatsia pepatsijavanexatsica. Aconoxae baja bitso imoxoyo pevajënae icatsia Jesucristo pepatsijavanexatsica. ¹² Meravi abaxë aitaquiri. Itsa baja icatsia matakabijitsia, pitaquirijavami baja ajibi tsaponae. Bajara pijinia pacuenia imoxoyo baja pevajënae pecopiarucaenexa mapanacuapijivi pibisiacuene pexanaejava yabara pijamatabëcueneitaquirijavami. Tsipaji

baja imoxoyo pevājēnae icatsia Jesucristo pepatsijavanexatsica. Bajaraxuata bexanavanapatsi ēpexaniacuene Dioso pejitsipaecuena. ¹³ Aeconoxae baja vajavājēnaeyabelia, jinavanapaenatsi xaniavaetsia vajayapētaexae pexaniajailivaisi. Apo ponae tsanetsi pi-aitajibivijava. Apo ponae tsanetsi fiestajava ata, itsajota pibisiacuene exanavanapa. Apo exanae tsanetsi pibisiacuene vajavitota. Apo exanae tsanetsi itsacunejava ata, xua pibisiacuene. Nabijataeya apo najumeanaenotsi tsanetsi. Itsamonae ata apo cuenecaēbi tsanetsinua. ¹⁴ Biji rajane vajētabibianatsi vajatuxanenē Jesucristojavabelia vajanacayavenonabibinexa. Vajatuxanenē Jesucristo nacajamatabēcueneasaēyaxanaena vajatojinavanapaenexa vajanacatojitsipaecuena. Apo sivanajamatabēxainae tsanetsi pacuenia vajacuata natojitsipatsi pibisiacuene vajaexanaenexa.

14

Pacuenia Pablo itaveta Roma tomarapijivi Dioso penajuajumecovēnētsivi itsa janitane pexaejava jumapecataeya pexanaenēanējavabelia peyajuvēnērajutsivi, "Pibisiacuene exana mapajivije," pejaiyaniva, yabara pelivaisi

¹ Pajivi jumecovēnētsi ata Jesucristo pesivatēpaejavatsi pijaneconi yabara, itsiata abaxē itsa apo ajamatabēcuenesaē pejumecovēnētsijava, bajarapajivi ata xaniavaetsia pacopi-āpire panenacatuatsibojavaberena itsa najunua. Bajarapajivi pijaneconi yabara Jesucristo pesivatēpaejavatsi pejumecovēnētsicujinae, copata baja pexaeyabiabijavami jumapecataeya pexanaenēanējavabelia perajutsiyajuvēnēvi. Nexata baja cjunava pexaejava, bepibisiacuene pexanaejava petaxae. Pētsa pajumeanaenotame bajarapit-sijivijavabelia panexaeyaexanaenexa icatsia bajarapayajuvēnēvi. ² Itsamonae Cristojavabelia penajamatabēcuene copatsivi, jamatabējumaitsi: "Daxitacuene xanepana vajaxaenexa," jamatabējai. Itsamonae pijinia abaxē jamatabējumaitsi: "Dioso nacananeconitsiaexanaejitsipa jumapecataeya pexanaenēanējavabelia perajutsiyajuvēnēvi itsa xanetsi," jamatabējai. Nexata ēpeubijava xane jumapecataeya pexanaenēanējavabelia perajutsiya-juvēnēvi pexaeyaniva. ³ Nexata pajivi xane jumapecataeya pexanaenēanējavabelia perajutsiyajuvēnēvi, pētsa bijiaya tane pajivi apo xae jumapecataeya pexanaenēanējavabelia perajutsiyajuvēnēvi. Pajivi pijinia apo xae jumapecataeya pexanaenēanējavabelia perajutsiyajuvēnēvi, pētsa neconitsiaya jumaitis jivijavabelia: "Pibisiacuene exana pajivi xane jumapecataeya pexanaenēanējavabelia perajutsiyajuvēnēvi," jai pētsa. Tsipaji Cristojavabelia penajamatabēcuene copatsijivi daxitacuene itaxutojema xae ata, itsiata Dioso tanetsi aneonijibia. Nexata bajarapajivi Dioso capanepenatsi. ⁴ Dioso apo pacatocopatsi Dioso pijajivitonē neconitsiaya jivijavabelia panejumaitsinexa mapacueniaje: "Xua exana bajaraponē, pibisiacuene. Nexata Dioso naneconitsiaexanaenatsi," panejainexa. Dioso pijajivitonē xaniavaetsia Dioso itsa tonacueneba, xaniavaetsia apo tonacunenēi atanua, caenē, Dioso, toxanepanatsi, pacuenia jamatabējumaitsi, pejumaitsinexa pijajivitonējavabelia. Dioso cajena caējēpatsi peyavenonaenexa pijajivi pejitsipaecuena xaniavaetsia petojinavanapaenexatsi pesivabarēyanexa.

⁵ Itsamonae Dioso pejumecovēnētsivi yaiyataeyabiaba matacabi. Nexata itsamatacabianēvecua caematacabi yaiyataeyabiaba. Itsamonae pijinia najēpaeya tane daxitamatabianē. Pamonae yaiyataeyabiaba caematacabi itsamatacabianēvecua, bajarapamonae xaniavaetsia beyapētane pajamatabēcuenelivaisi yabara yaiyataeyabiaba caematacabi. Pamonae ata pijinia najēpaeya tane daxitamatabianē, xaniavaetsia beyapētane pajamatabēcuenelivaisi yabara najēpaeya tane daxitamatabianē. ⁶ Pajivi nacueraeveta itsamatacabi, bajarapajivi nacueraeveta peyaiyataenexa Dioso. Pajivi pijinia apo nacueraevetsi bajarapamatacabi, apo nacueraevetsi tsipaji jamatabēxana pacuenia Dioso itorobatsi. Pajivi pijinia xane jumapecataeya pexanaenēanējavabelia perajutsiyajuvēnēvi, bajarapajivi xane peyaiyataenexa Dioso. Tsipaji jamatabējumaitsi: "Dioso cajena netocopata daxitacuene taxaenexa," jamatabējai. Nexata pexaniajamatabēcuene rajutabiaba Diosojavabelia. Pajivi pijinia apo xae jumapecataeya pexanaenēanējavabelia perajutsiyajuvēnēvi, bajarapajivi apo xae peyaiyataenexa Dioso. Tsipaji jamatabējumaitsi: "Mapavije apo xae nē tananeconitsiyaniva Diosojavabelia," jamatabējai. Nexata pexaniajamatabēcuene rajutabiaba Diosojavabelia ēpeubijava pexaeyabiabixae.

⁷ Itsajivi ata vaxaitsiyajuvēnēvi, Dioso pejumecovēnētsijivi, apo ponaponae ēpijacuata penatojitsipaecuena pexanaponaponaenexa. Biji rajane exanaponapona pacuenia Cristo tojitsipatsi. Petēpaematacabinexa ata yabara, apo jamatabējumaitsi: "Tēpaenajē pamatacabi natojitsipajē tatēpaejava," apo jamatabējai. ⁸ Vaxaitsi abaxē vajaasaētsavanapaepato, tojinavanapatsi pacuenia vajatuxanenē nacatojitsipa. Itsiata baitsi jane itsamatacabi, tēpaenatsi.

Tsipaji Dioso nacatojitsipaena vajatēpaenexa. Aeconoxae abaxē vajaasaētsavanapaevi, vajatuxanenē pijajivitsi tsavanapae. Vajatēpaecujinae ata tsane, tsiteca vajatuxanenē pijajivitsi tsavanapae tsane. ⁹ Cristo baja cajena nacasivatēpa vajatuxanenē vajaexanaenexa. Nexata icatsia Cristo asaē tsaponaponae petēpaecujinae. Bajaraxuata Cristo daxitajivi pijatuxanenē. Piasaētsavanapaevi, petēpaevi ata, daxita pamonaē najamatabēcuenecopata bajaraponējavabelia, Cristo cajena pijatuxanenē.

¹⁰ Bajaraxuata nexata jumapecataeya pexanaenēanējavabelia perajutsiyajuvēnēvi paxamē panijabananē pexaejava yabara, baracuaicuaijaya apo bepajumaitsimē mapacueniaje: “Maponēje pibisiacuene exana. Nexata Dioso naneconitsiaexanaenatsi,” apo bepajamē. Bijiaya ata apo bepataemē bajaraponē. Tsipaji cajena itsamatacabi daxitatsi vaxaitsi Cristo pitabarata nubenaenatsi, caejivitsi canacujitsia, vajanavajunupaebaponaenexa daxita pacuenia exanavanapatsi mapanacuataje. ¹¹ Bajaraxua yabara Dioso pejumelivaisibaxutota tajēvelia jumaitsi mapacueniaje:

Dioso tajēvelia jumaitsi: “Xanē daxitamatacabijavabelianexa tasaētsaponaponae. Nexata tajumaitsijume xanijanjē. Itsamatacabi daxitajivi taitabarata pematatabcabēta netonubenaena taneyaiyataexae. Daxitajivi nevajunupaebiana Diosonēcuenenē,” jai Dioso pejumelivaisibaxutota mapacueniaje Dioso tajēvelia pejumaitsijava daxitajivi yabara.

¹² Nexata vaxaitsi itsamatacabi, caejivitsi canacujitsia, navajunupaebaponaenatsi Diosojavabelia daxita pacuenia exanavanapatsi mapanacuataje.

Pacuenia Pablo itaveta Roma tomarapijivi Dioso penajuajumecovēnētsivi Diosovecua pejopaeyaexanaeyaniva petsitaexanaejava pejamatabēcueneta yabara pelivaisi

¹³ Itsamatacabi caejivitsi canacujitsia nubenaenatsi Cristo pitabarata vajanavajunupaebaponaenexa pacuenia exanavanapatsi mapanacuataje. Bajaraxuata itsanē vajanabanā pexanaejava yabara, apo bebaracuaicuaijaiti pibisiacuena. Biji rajane bejamatabējumaitsi mapacueniaje: “Apo tsitaexanaenē tsane itsacuenejavayo ata, xua yabara itsajivi, Dioso pejumecovēnētsijivi, jamatabēcuenebijanaejitsipatsi,” bejamatabējaiti.

¹⁴ Najamatabēcuenecopatājē xaniavaetsia vajatuxanenē Jesucristojavabelia. Nexata yapētanjivi Dioso tanetocopatsijava taxaenexa xua picani cujanavajē taxaejava Jesucristojavabelia tanajamatabēcuenecopatsivajēnaeya. Itsiata meta itsanē Dioso pejumecovēnētsinē bajaraxua itsa xane, jamatabējumaitsi tsipae: “Dioso apo netocopatsi taxaenexa bajaraxua. Itsa xaejitsipajē, naneconitsipajē Diosojavabelia,” jamatabējai tsipae. Nexata apo xae tsipae bajaraxua. ¹⁵ Panijabananē itsa apo pexaenē jumapecataeya pexanaenēanējavabelia perajutsiyajuvēnēvi, pētsa patsitaxaneme. Tsipaji paxamē itsa patsitaxaejitsipame jumapecataeya pexanaenēanējavabelia perajutsiyajuvēnēvi, panijabananē bepacasivajamatabējiobi tsipae. Tsipaji panijabananē bepibisiacuene patsitaexanaejitsipame itsa patsitaxaejitsipame jumapecataeya pexanaenēanējavabelia perajutsiyajuvēnēvi. Nexata jumapecataeya pexanaenēanējavabelia perajutsiyajuvēnēvi, panijabananē itsa patsitaxaejitsipame, nexata panijabananē asivaya apo pataemē tsipae. Tsipaji itsa pacajanitaiejitsipa panexaejava jumapecataeya pexanaenēanējavabelia perajutsiyajuvēnēvi, nexata bajaraponē ata naxaejitsipa. Nexata Diosojavabelia bepenaneconitsinē nataejitsipa penaxaexae jumapecataeya pexanaenēanējavabelia perajutsiyajuvēnēvi. Panetsitaxaejava pejamatabēcueneta Diosovecua pananaxubiaexanaeyaniva panijabananē, pētsa patsitaxaneme jumapecataeya pexanaenēanējavabelia perajutsiyajuvēnēvi. Tsipaji rabaja vajatuxanenē Cristo sivatēpa bajaraponē ata penaxuabiyaniva. ¹⁶ Payapētae atamē, xua picani xanepana paneexanaenexa, itsiata panijabananē itsa cujanava bajaraxua pexanaenexa, pētsa patsitaexaneme. Tsipaji panijabananē pacataejitsipa pibisiacuene bepaneeexanaevi. ¹⁷ Vaxaitsi baja najamatabēcuenecopabatsi Cristojavabelia. Nexata jumecovēnētavanapatsi Dioso. Apo nacaitorobi vajanayanijobabiabinexa ēvajaxaejava yabara, vajaapaejava ata yabara. Biji rajane nacaitoroba xaniavaetsia aneonijibia najamatabēcuenējēpaeya vajanavanapaenexa. Nacaitorobanua jamatabēcuenebarēyaya vajajinavanapaenexa Espiritu Santo vajanacatsijamatabēcaexae. ¹⁸ Pajivi Dioso pijacune tonacuenebaponapona, siva-jamatabēcuenebarēyatsi Dioso. Jivi ata xaniavaetsia yaiyataneatsi.

¹⁹ Xua Dioso nacayavenona vajajinavanapaenexa najamatabēcuenējēpaeya, bajaraxua exanavanapaenatsi. Xua ata nacayavenona namataenetsia vajanajamatabēcuenē asaēyaexanaenexa Diosojavabelia, bajaraxua ata exanavanapaenatsi. ²⁰ Pētsa patsitaxaneme xua panijabananē tane bepitaevetsijavatsi pexaeyaniva. Nexata itsa pacajanitaiejitsipa panexaejava, bajarapajivi ata naxaejitsipa. Nexata bepenaneconitsinē Diosojavabelia nataejitsipa. Panexaejava pejamatabēcueneta, bajarapajivi Diosovecua pajopaeyaexanaejitsipame. Bajaraxuyaniva pētsa patsitaxaneme xua cujanava panijabananē. Xanijai rabaja. Daxitacuene rabaja picani xanepana vajaxaenexa. Itsiata

pibisiacuene paexanaejitsipame itsa patsitaxaejitsipame xua panijabananē taejitsipa pepibisiacuene panexanaejava itsa paxaejitsipame. ²¹ Bajaraxuata pētsa paxaneme jumapecataeya pexanaenēanējavabelia perajutsiyajuvēnēvi. Pētsa papamenua piatanera paneaitajibiyaniva. Pētsa paexanamenua itsacuenejava ata, xua pejamatabēcueneta panijabananē pajopaeyaexanaejitsipame Diosovecua. Pētsa patsitaexaname xua panijabananē jamatabēcueneta faefaenaeyaexanaejitsipatsi. ²² Itsa baja xaniavaetsia payapētaneme pexanepanaecuene panexaenexa, xua picani pacujunavame panexaejava Jesucristojavabelia panenajamatabēcueneta copatsivajēnaeya, saya pamoyamē tsane. Tsipaji Dioso yapētane pacuenia panajamatabēxainame bajaraxua yabara. iBitso jamatabēcuenetarēya pajivi pexanabiabijava yabara jamatabējumaitsi: “Dioso pitabarata aneconijibia toponaponajē,” jamatabējai! ²³ Pajivi pijinia jamatabējumaitsi ata: “Apo xanepanae tsipae taxaenexa bajaraxua,” jamatabējai ata, itsiata itsa xaejitsipa, bajarapajivi pibisiacuene natoexanaejitsipa Diosojavabelia. Tsipaji pijacuata najamatabēcuenebijianaejitsipa. Daxita pijinia xua yabara vaxaitsi jamatabējumaitsi: “Dioso apo jitsipae vajaexanaenexa bajaraxua,” jamatabējai atatsi, itsiata itsa exanaejitsipatsi bajaraxua, nexata pibisiacuene natoexanaejitsipatsi Diosojavabelia.

15

Pacuenia becanaejētatsi vajabananē vajajamatabēcueneyavenonaenexa yabara pelivaisi

¹ Vaxaitsi ajamatabēcuenesaētsi Dioso vajajumecovēnētsijava. Nexata beyavenonatsi pamonaē abaxē jamatabēcuenefaefaena Dioso pejumecovēnētsijava. Pētsa exanatsi vaxaitsi vajacuata vajanatojitsipaecuena. ² Biji rajane caejivitsi canacujitsia becanaejētatsi vajabananē vajajamatabēcueneyavenonaenexa. Xua yabara vajabananē ajamatabēcuenesaējitsia, bajaraxua betoexanavanapatsi vajabananē pejamatabēcuenevitsabinexa Diosojavabelia. ³ Tsipaji Cristo ata, ponē Dioso athēbēvetsica itorobica jivi pecapanepaenexa, abaxē itsa ponapona mapanacuataje, apo exanae pijacuata penatojitsipaecuena. Biji rajane nacopata pebejiobiaexanaenexatsi pacuenia Dioso tojitsipatsi. Paxa Diosojavabelia Cristo pejumaitisijava, Dioso pejumelivaisibaxutota tajēvelia jumaitsi mapacueniaje: “Pacuenia picani jivi xamē pibisiacuena jamatabēcabaracuaicuaijai, xanē nebaracuaicuaijai tsane,” jai tajēvelia Dioso pejumelivaisibaxutota paxa Diosojavabelia Cristo pejumaitisijava. ⁴ Palivaisi bajayata yaquina Dioso pejumelivaisibaxutota, bajarapalivaisi vaxaitsi ata nacatocopata vajajumecovēnētsinexa, vajanacajamatabēcueneta yavenonaenexanua. Bajaraxuata bajayajebi nacabejiobiaexanaebi ata Dioso pijajivixatsi, itsiata ajamatabēcuenesaētsi tsavanapae. Tsipaji yapētanetsi pacuenia Dioso najumecapanepaeya jumaitsi bajarapalivaisita vajanacacapanepaenexa. ⁵ Itsacuenejavaxi yabara bajayajebi itsa nacajamatabēcuenējētaponā, nexata Dioso nacajamatabēcueneyavenonapona. Nacajamatabēcuenesaēyaexanapona bajayajebinxata. Pacatovajētatsi Diosojavabelia Dioso papecayavenonaenexa, najamatabēcuenējēpaeya daxita panejinavanapaenexa Jesucristo papecatojitsipaecuena. ⁶ Nexata daxita paxamē najamatabēcuenējēpaeya vajatuxanenē Jesucristo paxa Diosojavabelia pajumaitsimē tsabiabi tsane: “Diosomē, bitso ayaijamatabēcuenenēmē,” pajamē tsabiabi tsane.

Pacuenia apo judiōvi ata pexanialivaisi tsipaebatsi pecapanepelivaisinexatsi yabara pelivaisi

⁷ Pajudiōvinē, apo pajudiōvi atamē, najēpaeya Cristo nacapita pijajivinexatsi. Bajara pijinia pacuenia paxamē ata najēpaeya xaniavaetsia namataenetsia panacopiapitabiabianame. Nexata bajarapacuenia itsa paexanabiabianame, daxitajivi Dioso yaiaatana. Nexata daxitajivi jumai tsabiabi tsane Dioso yabara: “Dioso cajena bitso ayaijamatabēcuenenē. Tsipaji pijajivi yavenona xaniavaetsia petojinavanapaenexatsi,” jai tsabiabi tsane. ⁸ Mara pacajumaitsijsije. Jesucristo athēbēvetsica patsica mapanacuaya-betsicaje peyavenonaenexa judiōvi. Bajarapacuenia Jesucristo athēbēvetsica patsica petocopiapatsixaetsi pacuenia bajayata Dioso najumecapanepaeya jumaitsi judiōvi pijasalinaijivjavabelia. Nexata bajarapacuenia Dioso pexaniajainēcuene najamatabēcuenēitajēta judiōvijavabelia. ⁹ Jesucristo athēbēvetsica patsica pecapanepaenexa apo judiōvi ata. Nexata apo judiōvi ata Jesucristo pejamatabēcueneta: “Diosomē, bitso ayaijamatabēcuenenēmē,” jai tsabiabi tsane Diosojavabelia. Bajarapacuenia apo judiōvi ata jumai tsabiabi tsane Diosojavabelia pitaxutotsoniataexatsi Dioso. Nexata bajaraxua yabara Cristo paxa Diosojavabelia pejumaitisijava, Dioso pejumelivaisibaxutota jumaitsi mapacueniaje: Xanē tajamatabēcueneta, daxitanacuanēpijivi: “Diosomē, bitso ayaijamatabēcuenenēmē,” cajai tsabiabi tsane. Catonaxēanabiabiananua vajianē ata, jai Dioso pejumelivaisibaxutota paxa Diosojavabelia Cristo pejumaitisijava.

¹⁰ Apo judíovi ata Dioso pijajivi pexanaejavanexatsi yabara, itsabaxutota Dioso pejumelivaisibaxutota jumaitis mapacueniaje:

Apo pajudíovimë, pajamatabëcuenebarëyamëre Dioso pijajivi, judíovi yajava, jai Dioso pejumelivaisibaxutota apo judíovi ata Dioso pijajivi pexanaejavanexatsi yabara.

¹¹ Itsabaxutota pijinia Dioso pejumelivaisibaxutota jumaitis icatsia mapacueniaje:

Paxamë apo pajudíovimë, Diosojavabelia pajumaitsimëre: “Diosomë, bitso ayaijamatabëcuenenëmë,” pajamëre. Paxamë, padaxitamë, itsamonaejavabelia pajumaitsimëre: “Caenë Dioso bitso ayaijamatabëcuenenë,” pajamëre,

jai Dioso pejumelivaisibaxutota.

¹² Isafaspijnë pijinia itsabaxutota tajëvelia yaquina Jesucristo pelivaisi. Jumaitis mapacueniaje:

Penacuetonëyo naexanaena. Nexata Isafipijnë bepemomonëyocuenia naexanaena. Itsa vitsabiana, Dioso evetsiaexanaenatsi jivi, daxitanacuanëpíjivi. Pamonaë apo judíovi, jumecovënëtsiana bajaraponë pesivatëpaejavatsi pecapanepaenexatsi pijaneconivecua,

jai tajëvelia Isafaspijnë peyaquinaebaxutota Jesucristo yabara.

¹³ Yapëtanetsi Dioso vajanacapanepaejavanea Jesucristo pejamatabëcueneta. Nexata pacatovajëtatsi Dioso papecajamatabëcuene barëyayaexanaenexa. Pacatovajëtatsinua jamatabëcuenexanepanaeya panejinavanapaenexa. Bajarapacuenia Dioso pacajamatabëcueneyavenonaena tsipaji Dioso pajumecovënëtame. Espíritu Santo ata, ponë pacatsiyamatabëca, pesaëta panevajënaeyabelia pacajamatabëcuene asaëyaexanaponaena Dioso papecaapanepaejavabelianexa.

¹⁴ Tajamonae, pacayapëtanetsi paxamë papexaniajamatabëcueneyijavamë. Pacayapëtanetsinua paxamë bitso paneyapëtaejava Cristo papecasivatëpaejava pibisiacuene paneexanaeconi yabara. Pacayapëtanetsinua paneyapëtaejava xaniavaetsia namataenetsia panenamuxujibinexa.

¹⁵ Tajamonae, palivaisi baja payapëtaneme, bajarapayajuvënëlivaisi panenajamatabënapitsinexa, icatsia ajumeurajibia pacatoyaquinatsi mapabaxutotaje. Bajarapacuenia ajumeurajibia pacatoyaquinatsi tsipaji Dioso nitoroba. ¹⁶ Dioso taneitaxutotsoniataexae, bajarapacuenia nitoroba Jesucristo pijajivitonëxanë Jesucristo pelivaisi tatsipaebabinexa apo judíovijava. Nexata apo judíovi tsipaebabiabajë pexanialivaisi, Jesucristo pelivaisi, pecapanepaelivaisinexatsi Diosojavabelia. Espíritu Santo pejamatabëcueneta apo judíovi ata Cristo pijajivi exanatsi. Bajaraxuata Dioso sivabarëyatsi Dioso pepitsinexatsi bajarapamonae, apo judíovi ata.

¹⁷ Jesucristo pijajivitonëxanë, Jesucristo neyavenonabiaba itsa tonacuenebabiabajë. Bajaraxuata barëyanë tatsipaebaponaenexa itsamonaejavabelia Jesucristo taneyavenonabiabijava tatonacuenebinexa Dioso. ¹⁸ Rovialia tsipaebabiabajë ajumeurajibia. Tsipaebabiabajë vajatuxanenë Jesucristo taneyavenonabiabijava tatonacuenebinexa Dioso. Vajatuxanenë Jesucristo neyavenonabiaba tatsipaebabinexa apo judíovijavabelia apo judíovi ata pejumecovënëtsinexa Dioso. Nexata apo judíovi itsa jumetane tatsipaebabiabilivaisi, itsa tanenua Dioso pesaëta pinijicuene taexanaponaejavanë, bajarapamonae jumecovënëta baja Jesucristo pesivatëpaejavatsi pibisiacuene pexanaeconi yabara.

¹⁹ Vajatuxanenë Dioso pesaëta nejamatabëcuenecaëjëpaeyaexana pinijicuene taexanaenexa. Espíritu Santo ata pesaëta nejamatabëcueneyavenona. Bajaraxuata apo judíovi tsipaebaponajë pexanialivaisi, Jesucristo pelivaisi, Diosojavabelia pecapanepaelivaisinexatsi. Tsipaebaponajë baja bajarapalivaisi Jerusalén tomarajava. Bajaraxuacujinae tsipaebaponajë daxitanacuanëjava. Tajënacujavabelia ata, Ilírico nacujavabelia, tsipaebaponajë.

²⁰ Itsa tsipaebaponajë pexanialivaisi, Jesucristo pelivaisi, jitsipajë tatsipaebaponaenexa itsaxuayo abaxë jivi apo vënëlivaisitae Cristo. Apo jitsipaenë tatsipaebaponaejava itsaxuayo baja tavajënaeya itsamonaë tsipaebapona. ²¹ Bajarapacuenia apo judíovi itsa tsipaebaponajë Jesucristo pelivaisi, copiapata jane baja pacuenia baja cajena Dioso pejumelivaisibaxutota tajëvelia jumaitis tatsipaebaponaejavanexa yabara. Mapamatacabitaje apo judíovijava Jesucristo pelivaisi tatsipaebaponaejavanexa yabara, Dioso pejumelivaisibaxutota tajëvelia jumaitis mapacueniaje:

Pamonaë abaxë apo vënëlivaisitae, ponë athëbëvetsica Dioso itorobijitsiatsica jivi pecapanepaenexa, bajarapamonae bajaraponë pelivaisi tsipaebianatsi. Nexata bajarapamonae jumecovënëtsiana ponë pelivaisi tsipaebianatsi,

jai tajëvelia Dioso pejumelivaisibaxutota Dioso pitorobinëtsitsica pelivaisi apo judíovijava mapamatacabitaje tatsipaebaponaejavanexa yabara.

Pacuenia picani Pablo jamatabëponabiaba Roma tomarabelia yabara pelivaisi

²² Bajayajebi picani bitso jamatabëpacataeyabiabatsi. Itsiata apo necuenecaëjēpae taponae-nexa paxamëjavabelia daxitanacuanëjava Dioso pejumelivaisi tatsipaebanajetarucaexae. ²³ Aeconoxae baja veretajë tanacuenebijava mapanacuajavaje. Nexata jane baja ponae-najë paxamëjavabelia. Tsipaji picani bajayajebi jamatabëpacataeyabiabatsi. ²⁴ Pamatacabi ponaenajë España nacuyabelia, patsianajë copiaya paxamëjavata patacataenexa. Itsa baja nataenatsi, bitso jamatabëcuenebarëya tsavanapae tsanetsi. Bajaraxuacujinae jitsipajë pataneyavenonaenexamë tajanamutonexa taponae-nexa jane baja España nacuyabelia. ²⁵ Bajara masaya pamatacabitaje ponaenajë Jerusalén tomarabelia ofrenda tatocaponae-nexa Dioso pejumecovënëtsivi. ²⁶ Dioso pejumecovënëtsivi, Macedonia nacuapijivi, Acaya nacuapijivi ata, ofrenda baja toexana. Bajarapaofrenda toexana petoitorobinexa Dioso pejumecovënëtsivi, pamonaë bepejibivi, Jerusalén tomarata pejinavanapaeivi. ²⁷ Macedonia nacuapijivi, Acaya nacuapijivi ata, apo judiövi. Itsiata tsitaxanepanatsi bajarapacuenia ofrenda petoexanaenexa peyavenonaenexa juya judiövijavabelia, Jerusalén tomarapijivi. Tsipaji judiövi copiaya yapëtane pexanialivaisi pecapanepaelivaisinexatsi Diosojavabelia. Nexata judiövi pejamatabëcueneta, pamonaë apo judiövi ata, yapëtane baja pecapanepaelivaisinexatsi Diosojavabelia. Bajaraxuata pamonaë apo judiövi beyavenonaë juya judiövijavabelia. Judiövijavuvënëvi aeconoxae bitso namatavenona peyavenonaenexatsi mapanacuata penamatavenonaëjavaxi yabara. ²⁸ Copiaya tocalianë tsane mapaofrendaje Jerusalén tomarapijivijavabelia. Nexata bajaraxuacujinae itsa ponaenajë España nacuyabelia, copiaya patsianajë paxamëjavata. ²⁹ Itsa patsianajë paxamëjavabelia, orijibia pacatsipaebianatsi pexanialivaisi, Cristo pelivaisi, bitso pejamatabëcuenebarëyanexa. ³⁰ Tajamonaë, pajumecovënëtsime vajatuxanenë Jesucristo. Paneasivamënu Espiritu Santo pejamatabëcueneta papecajamatabëcueneitorobixae pataniasivanexamë. Bajaraxuata pexaniacuene pacavajëtatsi. Itsa pavajëtsime Diosojavabelia, xanë ata asaëyata panetovajëtsianame, pacuenia tajacuata natovajëtabiabajë. ³¹ Panetovajëtsianame Diosojavabelia tanevavenonaenexa taneitsacueniabianuya Judea nacuapijivi, Dioso apo pejumecovënëtsivi. Panetovajëtsianamenua Dioso pejumecovënëtsivi, Jerusalén tomarapijivi, tanevecuapitsinexa xaniavaetsia paofrenda tocaponaëjitsianë. Pamonaë apo judiövi pejebipalataxae, belia bajarapaofrenda apo nevecuapitsi tsipae bajarapamonaë judiövi. ³² Panetovajëtsianamenua, itsa Dioso jitsipa, barëyaya tapatsinexa paxamëjavabelia. Panetovajëtsianamenua tanejamatabëcuene asaëyaexanaenexa Diosojavabelia itsa ponaponajë paxamëjavata. ³³ Xanë pacatovajëtabiabatsi Diosojavabelia papecayajavaponaponae-nexa Dioso. Dioso cajena nacayavenonabiaba jamatabëcuenebarëyaya vajajinavanapaenexa. Bajara itsi tsane.

16

Pacuenia Pablo jamatabënajinalia peyapëtaevitsi, Roma tomarapijivi, yabara pelivaisi

¹ Payavenonaename vajabanava Febe, pova ponaejitsia paxamëjavabelia. Bajarapova yavenonabiaba Dioso pejumecovënëtsivi, Cencrea tomarapijivi. ² Pacopiapitsianame xaniavaetsia bajarapova vajatuxanenë Jesucristo pejamatabëcueneta, pacuenia vaxaitsi copiapitabiabatsi Dioso vajatanajuamecovënëtsivi. Xua namatavenona bajarapova, payavenonaename. Tsipaji bajarapova yavenonabiaba ayaibitsaëto Dioso pejumecovënëtsivi. Xanë ata neyavenonabiaba.

³ Nebajacobiana Prisca. Prisca pamonaë ata, Aquila, nebajacobiana. Bajarapajivibeje tayajavanacuenebijivibeje vajatuxanenë Jesucristo pijacuene. ⁴ Bajarapajivibeje toayai atatsibeje petëpaejavanexabeje picani, necapanepabeje tatëpaejavaminexavecu. Nexata jumaitsinë: "Pexaniacuene baja cajena bitso panetoexanamebeje," janë bajarapajivibejejavabelia. Itsiata ëxanë bajarapacuenia apo jumaitsinë. Daxita pamonaë apo judiövi, Dioso pejumecovënëtsivi, bajarapamonaë ata, bajarapacuenia jumaittsibeje tanecapanepaeaebeje. ⁵ Pamonaë Dioso pejumecovënëtsivi, pamonaë nacaetuatabiaba Priscabeje Aquilabeje pijabota, bajarapamonaë ata nebajacobiana. Nebajacobiananua tasivanë Epeneto. Bajaraponë daxita Asiavënë nacuapijivivecu copiaya najamatabëcuenecopata Jesucristojavabelia. ⁶ Nebajacobiananua María, pova bitso tonacuenebabiaba Dioso pijacuene paxamë tuatujëta. ⁷ Nebajacobiananua tajanacuapijinëbeje, Andrónicobeje Juniasvënënebeje. Bajayata bajaraponëbeje panenajuajeba penaneconitsivi pejebabiabibota. Bajaraponëbeje yayiataeya baracuaicuaijaittsibeje pevëna apóstolevi ata. Xanë ata najamatabëcuenecopatsivajënaeya, bajaraponëbeje najamatabëcuenecopatabeje Cristojavabelia.

⁸ Nebajacobiananua Ampliato. Bitso tasivanë. Tsipaji bajaraponë ata Cristojavabelia najamatabëcuenecopata. ⁹ Nebajacobiananua Urbano. Bajaraponë ata tonacuenebaponapona vajatuxanenë Jesucristo pijacuene pacuenia vaxaitsi tonacuenebavanapatsi. Nebajacobiananua Estaquis, bitso tasivanë. ¹⁰ Nebajacobiananua Apeles, ponë picani dovathi

pejamatabēcueneta jamatabēcuenējētatsi Cristo pelivaisi pejumecovēnētsijava yabara. Itsiata apo copatsi pejumecovēnētsijava Cristo pelivaisi. Nebajacobiananua Aristóbulo pijamonae. ¹¹ Nebajacobiananua tajanacuapijinē Herodión. Nebajacobiananua Narciso pijamonae, pamonaē penajamatabēcopatsivi Cristojavabelia. ¹² Nebajacobiananua Trifenabeje Trifosabeje, povabeje tonacuenebabiaba Dioso pijacuene. Nebajacobiananua vajaa-sivava Pérsida, pova bitso tonacuenebabiaba Dioso pijacuene. ¹³ Nebajacobiananua Rufo, ponē bitso xaniavaetsia jumecovēnēta vajatuxanenē. Bajaraponē pena ata nebajacobiana. Bajarapova bepexēnatonē netaeyabiaba. ¹⁴ Nebajacobiananua Asíncrito, Flegonte ata, Hermas ata, Patrobas ata, Hermes ata, itsamonae ata, pamonaē najinavanapa bajarapamonaējavata. ¹⁵ Nebajacobiananua Filólogo, Julia ata, Nereo ata, Nereo pejuyapijiva ata, Olimpás ata, daxita itsamonae ata, Dioso pejumecovēnētsivi, pamonaē najinavanapa bajarapamonaējavata.

¹⁶ Paxamē ata Dioso panejumecovēnētsixaē, xaniavaetsia namataenetsia bitso nasivaya panabajacobabiabare. Daxita pina Dioso pejumecovēnētsivi majotaje pejinavanapaēvi pacabajacobalia.

¹⁷ Tajamonae, pacatsipaebatsi itsalivaisi. Penajumetsēnētsilivaisi petsipaebaponaēvi, panayajivitaenae papecayamaxēitojorobianiva. Bajarapamonaē namataenetsia pacanajumeanaenotsiaexanaena najamatabēcuenējēpaeya panejinavanapaēyaniva panenavecuanatsanaenexa. Palivaisi baja paxamē pajumecovēnētame, bajarapalivaisivecua saicayalivaisi bajarapamonaē tsipaebapona. Panavecuatsare bajarapamonaē. ¹⁸ Bajarapamonaē apo jamatabēcexanaē pacuenia jitsipa vajatuxanenē Jesucristo. Biji rajane saya jamatabēcexana bajarapamonaē pijacuata penatojitsipacuenia. Bajarapamonaē jivi tsipaebapona bepexaniajailivaisi itajara. Itsiata baitsi jane bajarapamonaē saya jamatabēcayamaxēitojoroba pamonaē abaxē xaniavaetsia apo jumeyapētaē pexaniajailivaisi. ¹⁹ Daxitajivi paxamē pacavēnēlivaisitane xaniavaetsia panejumecovēnētsijava Dioso. Bajaraxuata pacasivabarēyatsi. Pacatojitsipatsi paneyapētaenexa bitso ēpexaniacuene paneexanaenexa. Pētsa panacopatame itsajivi ata papecayamaxēitojorobinexa pibisiacuene paneexanaenexa. ²⁰ Dioso baja cajena vajanacayavenonaenē najamatabēcuenējēpaeya vajinavanapaenexa, itsajivi ata vajanacayamaxēitojorobianiva penajumetsēnētsilivaisita. Nexata Dioso bepija pacayavenonaena panejamatabēcueneamoneyabinexa dovathi. Pacatovajētabiabatsi Diosojavabelia vajatuxanenē Jesucristo papecayavenonabiabinexa.

²¹ Pabajacobianame pina Timoteo, Dioso patatonajuanacuenebinēbeje. Pabajacobiana-menua pina tajanacuapijivi Lucio, Jasón ata, Sosipater ata.

²² Xanē, Tercionē, mapabaxutotaje Pablo pijume tajumeyaquinaponaenē. Xanē ata pacajamatabēnajinatsi. Tspajivi Jesucristojavabelia vajanajamatabēcuenecopatsivi.

²³ Pabajacobianame pina Gayo. Naponaponajē Gayo pijabota. Gayo tocopatabiaba daxita Dioso pejumecovēnētsivi penacatuatabiabinexa Gayo pijabota. Pabajacobiana-menua pina Erasto, ponē evetabiaba palata, Corinto tomarapijipalata. Pabajacobiana-menua pina vajabananē Cuarto.

²⁴ Pacatovajētabiabatsi Diosojavabelia daxita paxamē vajatuxanenē Jesucristo papecayavenonabiabinexa. Bajara itsi tsane.

Pacuenia cotocaevipijilivaisita Pablo jumaitsi yabara pelivaisi

²⁵ Vaxaitsi Dioso yabara jumaitsitsi tsabiabi: “Dioso cajena bitso ayaijamatabēcuenenē,” jaitsi tsabiabi. Dioso, daxitamatacabijavabelianexa peponaponaenē, caējēpatsi papecajamatabēcuenē asaēyaexanaenexa pejumelivaisita. Bajarapalivaisi pexanialivaisi, Jesucristo pelivaisi, jivi pecapanepaelivaisinexatsi Diosojavabelia. Bajarapalivaisi jivi tsipaebapona-jē. Bajarapalivaisi bajayajebi picani Dioso muetsia xainabuata. Dioso nacua pexanaejavaveliacujinae, muetsia Dioso xainabuata Jesucristo pelivaisi. ²⁶ Bajarapalivaisi bajayata Diosojumelivaisipaebivi profetavi tajēvelia yapētane baja cajena. Nexata bajarapalivaisi mapamatacabitaje Dioso jane baja nacayapētaēyaexana. Nexata Dioso pijajivi itorobapona daxitanacuanēpijivijava petsipaebinaē Jesucristo pelivaisi. Bajarapacuenia Dioso pijajivi itorobapona daxitanacuanēpijivi ata pejumecovēnētsinexa Jesucristo pelivaisi.

²⁷ ¡Caenē rabaja Dioso daxitacuene peyapētaenē! Bajaraxuata daxitamatacabijavabelianexa vaxaitsi vajatuxanenē Jesucristo pejamatabēcueneta Diosojavabelia jumaitsitsi tsabiabi: “¡Diosomē, bitso ayaijamatabēcuenenēmē!” jaitsi tsabiabi. Bajara itsi tsane.

Mapabaxutoje San Pablo copiaya toyaquina Corinto tomarapijivijavabelia

Pacuenia Pablo toyaquina mapabaxutoje Dioso pejumecovënëtsivi, Corinto tomarapijivijavabelia, yabara pelivaisi

¹ Xanë Pablonë, Dioso tanetojitsipaexae, nitapeta Jesucristo pijaapóstolenëxanë. Nexata Jesucristo nitoroba jivi pexanialivaisi tatsipaebaponaenexa daxitanacuanëjava. Vajabananë Sòstenes neyavenona mapalivaisije patacatoyaquinaejava paxamëjavabelia. ² Mapabaxutoje pacatoyaquinatsibeje Dioso panejumecovënëtsivi, paCorinto tomarapijivimë. Dioso baja papijajivimë Jesucristo pejamatabëcueneta aneconijibia Dioso papecataexae. Dioso pacajunata papijajivinexamë xaniavaetsia panetojinavanapaenexa. Pacayajavajunata baja cajena daxita Dioso pejumecovënëtsivi, itsanacuanëjava pejinavanapaevi, pamonaev navajëcabiaba Jesucristojavabelia. Vajatuxanenë Jesucristo rabaja bajarapamonae ata pijatuxanenë. ³ Pacatovajëtatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa.

Pacuenia Corinto tomarapijivi Cristo pijajivixae, Dioso yavenonabiabatsi yabara pelivaisi

⁴ “Xanepana rabaja pacuenia yavenonabiabame bajarapamonae Jesucristo pijajivixae,” janë tsabiabi Diosojavabelia tavajëtabiabijavata paxamë yabara. ⁵ Jesucristo papijajivixaemë, daxitacuenë yabara Dioso pacajamatabëcueneyavenonabiaba. Pacayavenonabiabanua xaniavaetsia jivi panetsipaebinexa Dioso pejumelivaisi. Pacajumeyapëtaeyaexananua pepo pexaniajailivaisi. ⁶ Xua yabara pacatsijavanexatsi Cristo papecajamatabëcuene yavenonabiabinexa, baja rajane pacatocopiapata. Bajarapacuenia papecatocopiapatsixae, nexata baja pajamatabëcuenesaemë tsavanapae panejumecovënëtsijava bajarapalivaisi. ⁷ Nexata abaxë paepatojebi pacopiaevetavanapame vajatuxanenë Jesucristo icatsia pepatsijavanexatsica, Dioso pacacajëjëpaeyaexanabiaba panetoexanavanapaenexa daxita pacuene Dioso pacatojitsipa. ⁸ Dioso cajena pacayavenonaponaena panejamatabëcuenesaenëxaxa Dioso panejumecovënëtsijava daxitamatabijavabelianexa. Nexata pamatacabijavatuxanenë Jesucristo icatsia patsianica, toacuenëbi tsanetsi itsajivi ata papecanconitsinexa. ⁹ Dioso cajena bajarapacuenia pacatoexanaena. Tspiji pacuenia Dioso najumecapanepaeya jumai tsabiabi pexanaenexa, exanabiaba. Dioso pacajunata pexënato, vajatuxanenë Jesucristo, papijajivinexamë.

Pacuenia Dioso pejumecovënëtsivi navecuanatsanapona apo penajamatabëcuenejëpaexae yabara pelivaisi

¹⁰ Tajamonae, pacaitorobatsi vajatuxanenë papijajivixaemë, najamatabëcuenejëpaeya panejinavanapaenexa. Pëtsa panavecuanatsanaeyajoneponame itsajavabelia. Biji rajane najamatabëcuenejëpaeya pajinavanapare. Najamatabëcuenejëpaeya xaniavaetsia panajamatabëxainare caelivaisi. ¹¹ Mapacuenia pacatoyaquinatsije tspiji Cloëvënëva pijajivi netsipaeba. Apo panajamatabëcuenejëpaemë pina. Daxitatsi baja cajena caenë vajatuxanenë Jesucristo pijajivitsi. Paxamë tuatujëta pina itsamonae nabijataeya namataenetsia najumeanaenotabiaba. ¹² Itsamonae pina xanë yabara jumai tsabiabi: “Xanë raja saicaya Pablo pijajivitonënë,” jai pina tsabiabi. Itsamonae pina jumai tsabiabi: “Xanë raja saicaya Apolos pijajivitonënë,” jai pina tsabiabi. Itsamonae pina jumai tsabiabi: “Xanë raja saicaya Pedro pijajivitonënë,” jai pina tsabiabi. Itsamonae pina jumai tsabiabi: “Xanë raja saicaya Cristo pijajivitonënë,” jai pina tsabiabi. ¹³ Bajarapacuenia paxamëyajuvenëvi apo bejumaitsi tsabiabi. Tspiji bajarapalivaisi yabara nabijataeya namataenetsia penajumeanaenotabiabixae, navecuanatsanapona. Bajarapacuenia apo benavecuanatsanaponaev tspiji baja cajena Cristo caenë tsaponaponaev. Apo navitsanaev baja cajena. Nexata pamonaev ata Cristo pijajivi, caebitsaëto rabaja tsavanapae. Nexata apo benavecuanatsanaponaev. Nexata itsajivi ata xanë yabara apo bejumaitsi: “Xanë raja saicaya Pablo pijajivitonënë,” apo bejai. Tspiji xanë itsajivi ata apo sivanabeyaxuabiaexanaenë cruzata. Itsajivi ata baja cajena apo bautisabitsi tavënëta tajajivitonë penaexanaenexa. ¹⁴ Xanë baja cajena apo bautisabinë jivi ayaibitsaëto. Saya bautisabajë anijanëbeje, Cristobeje Gayobeje. Bajaraponëbeje itsa bautisabajë, bautisabajë Cristo pevënëta. Nexata jivi ayaibitsaëto apo tabautisabixae, sivabarëyanë Diosojavabelia. ¹⁵ Nexata acuenëbi

itsajivi ata pejumaitisjiva: “Xanë raja nebautisaba Pablo pevënëta. Nexata Pablo pija-jivtonëne,” pejaijava. ¹⁶ Jemajanë tsaena. Bautisabajënuu tsaena Estéfanas pijamona. Pematatsënëa baja apo najamatabënapitsinë pajiviyo bautisabajë. ¹⁷ Cristo apo nitorobi bitso jivi tabautisabaponaenexa. Biji rajane Cristo nitoroba tatsipaebaponaenexa jivi pexanialivaisi pecapanepaelivaisinexatsi Diosojavabelia. Nexata pacuenia Dioso nejamatabëcuenecajëpaeya exanapona, bajarapacuenia pacatsipaebaponaetsi. Apo nitorobi baja cajena tatsipaebaponaenexa pematatsënëa itsalivaisicuenia. Pacuenia tsipaebabiaba pamona yapëtane saya maëpanacuapijilivaisije, bajarapacuenia tatsipaebinexa, Cristo apo nitorobi. Nexata itsa tsipaebaponaejitsipajë pacuenia tsipaebabiaba pamona yapëtane saya maëpanacuapijilivaisije, nexata Jesucristo vajanacasivatëpaejava cruzata tsipaebi atanë tsipae jivjavabelia, ajumematamobinë tsipae.

Pacuenia Cristo jivjavabelia tsitajëta Dioso piasaënëcuene, Dioso bitso daxitacuene peyapëtaenëcuene ata, yabara pelivaisi

¹⁸ Itsamonaë pijaneconi yajavatëpaena. Bajarapamonaë jumetae ata Jesucristo cruzata vajanacasivatëpaejava, bajarapalivaisi apo jumecovënëtsi. Benatsiquejemalivaisi saya tane. Itsiata baitsi jane vaxaitsi Dioso vajanacapanepavevinexa, bajarapalivaisi nacayapëtaeyaexana Dioso piasaënëcuene. ¹⁹ Dioso baja cajena pejumelivaisibaxutota tajëvelia jumaitsi mapacueniajæ:

Itsamonaë bitso yapëtane mapanacuapijilivaisije. Bajarapamonaë peyapëtaelivaisimi, itsamatacabi vecuaajibiaexanaenajë. Pamonaë ata bitso peyapëtaevi itajara tanetsi mapanacuapijivije, xanë itsamatacabi jamatabëcueneitajëtsianajë pacuenia jamatabëcueneitsi. Nexata bajarajota daxitajivi jamatabëcueneyapëtaenatsi bajarapamonaë saya bevelia peyapëtaevicuene,

jai baja cajena tajëvelia Dioso pejumelivaisibaxutota.

²⁰ Ponë yapëtane saya maëpanacuapijilivaisije, ajumematamobi cajena. Ponë ata bajayajebi nacujaruba maëpanacuapijilivaisije, nexata yapëtae ata, ajumematamobi cajena. Ponë ata bitso ajumelivaisisaëya cuaicuaijai, bajaraponë ata ajumematamobi cajena. Daxita bajarapitsivi ajumematamobi, itsa apo natovajëtsi Diosojavabelia peyavenonaenexatsi peyapëtaenexa jane baja xaniavaetsia. Dioso baja cajena nacayapëtaeyaexana mapanacuapijilivaisije natsiquejemalivaisicueni. Tsipaji Dioso apo penajamatabëxainaelivaisi. ²¹ Dioso baja cajena daxitacuene bitso peyapëtaenë mapanacuapijilivaisi peyapëtaevi matatoxenetsia. Nexata Dioso apo tocopatsi pejamatabëcueneyapëtaenexatsi pamonaë bitso yapëtane saya mapanacuapijilivaisije. Biji rajane Dioso jamatabëcapanepa pijaneconivecua pamonaë jumecovënëta pexanialivaisi, palivaisi patsipaebaponaë, Jesucristo cruzata vajanacasivatëpaelivaisi. Bajarapalivaisi itsamonaë betsitanatsiquejemalivaisi atatsi, itsiata bajarapalivaisi pejamatabëcueneta capanepaenatsi pamonaë jumecovënëtavapanapa bajarapalivaisi.

²² Judíovi itsa jumetaeyabiaba patatsipaebijava Diosojavabelia picani pecapanepaelivaisinexatsi, najumai tsabiabi epamonaë: “Itsa taejitsipatsi Dioso pesaëta pinijicueni pexanaejava pamonaë nacatsipaeba mapalivaisije, nexata matapania jumecovënëtsipatsi bajarapalivaisi pexaniajailivaisicueni,” najai tsabiabi judíovi. Griegovi ata itsa patsipaebabiabajë bajarapalivaisi, najumai tsabiabi epamonaë: “Mapalivaisije itsa jumejëpaejitsipa palivaisi nacatsipaebabiaba vajayajuvënëvi, daxitalivaisi bitso peyapëtaevi, nexata matapania jumecovënëtsipatsi pexaniajailivaisicueni mapalivaisije,” najai tsabiabi griegovi. ²³ Itsiata baitsi jane paxanë itsa patsipaebaponaë bajarapalivaisi. “Cristo raja nacasivatëpa cruzata vajanacapanepaenexa vajaneconivecua,” pajanë tsabiabi. Bajarapacuenia patatsipaebijava judíovi jumetaeyabiabi ata, itsiata apo jumecovënëtsi. Anaepanabiaba saya. Apo judíovi ata itsa jumetaeyabiaba Cristo vajanacasivatëpaejava cruzata, benatsiquejemalivaisi saya jumetaeyabiabi. ²⁴ Itsiata pamonaë Dioso junatatsi pecapanepaenexatsi, judíovi, apo judíovi ata, bajarapamonaë jumeyapëtaepona bajarapalivaisi. Nexata bajarapamonaë yapëtaepona Dioso piasaënëcuene. Tsipaji bajarapamonaë Dioso capanepaejitsiatsi pijaneconivecua Cristo pesivatëpaexaetsi cruzata. Bajarapamonaë yapëtaeponanua Dioso bitso daxitacuene peyapëtaenëcuene. Tsipaji Dioso tajëvelia najamatabëxaina bajarapamonaë pibisiacuene pexanaeconivecua pecapanepaenexa Cristo pejamatabëcueneta.

²⁵ Pacueni Dioso exana jivi pecapanepaenexa pijaneconivecua, bajarapacueni mapanacuapijivije, Dioso apo jumecovënëtsivi, betsitanatsiquejemacuenetsi. Pacuenia baja cajena Dioso tajëvelia najamatabëxaina jivi pecapanepaenexa, exana baja. Bajaraxua bitso pexaniacuene. Bitso peyapëtaevi ata mapanacuapijilivaisije, apo cajëpaetsi bajarapacuenia penajamatabëxainanexa. Dioso itsa copata Cristo pebeyaxuabinexatsi cruzata, bajarapaepatota Dioso saya bepiasaëjibinë tanetsi mapanacuapijivije. Itsiata baitsi jane bajarapaepatota Dioso najamatabëcueneitajëta bitso piasaënëcuene daxita

mapanacuapijivije matatoxenetsia. Tspaji bajarapaepatota Dioso pinijicue ne exana vajanacapanepaenexa vaneconivecua. ²⁶ Tajamonae, pacanaëjere mapacue neje. Paxamëyajuvënëvi caejivibeje saya bitso peyapëtaevi mapanacuapijilivaisije. Caejiviyobeje pijinia saya ayajamatabëcuenevi. Caejiviyobeje saya petuxanevi pexi. Paxamë paayaibitsaëtoxonetomë beveliajamatabëcueneya saya panexinaevi. Bajarapacuenia beveliajamatabëcueneya panexinaevi ata, itsiata Dioso pacajunata papijajivinxamë. ²⁷ Pamona bitso peyapëtaevi mapanacuapijilivaisije, jumai tsabiabi paxamë bajarapalivaisi apo paneyapëtaevi yabara: “Mara pamona bitso apo peyapëtaevije,” jai tsabiabi. Itsiata Dioso pacaitapeta papijajivinxamë, apo paneyapëtaevi ata. Bajarapacuenia Dioso pacaitapeta, pamona bitso peyapëtaevi natane, piauranexa Dioso pitabarata, pamatacabi daxita Dioso papijajivimë bitso paneyapëtaevi pacaexanaena. Dioso cajena pacaitapetanua papijajivinxamë, mapanacuapijivije bepaveliajamatabëcuenevimë pacatae ata. Bajarapacuenia Dioso pacaitapeta, pamona bitso ayajamatabëcuenevi natane, piauranexa Dioso pitabarata, pamatacabi daxita Dioso papijajivimë paayajamatabëcuenevimë pacaexanaena. Bajarapamonae aura tsane itsa nayapëtaena jamatabëcuenenavëxaniabiaya beveliajamatabëcuenevi papecataejava Dioso papijajivimë. ²⁸ Dioso baja cajena pacaitapeta papijajivinxamë, daxitajivi papecaitoxaxae, bijiya papecanaëcotsivi ata. Bajarapacuenia Dioso pacaitapeta, pamona bitso ayajamatabëcuenevi itajara daxitajivi tanetsi mapanacuataje, Dioso piaurabinexa. Bajarapamonae Dioso urabiana, pamatacabi daxita Dioso papijajivimë paayajamatabëcuenevimë pacaexanaena. Bajarapamatacabi daxitajivi Dioso yapëtaeyaxanaena piamumematamobijava, pamona ayajamatabëcuenevi itajara tanetsi mapanacuataje. ²⁹ Bajaraxuata Dioso pitabarata jamatabëcuenenavëxaniabiaya itsajivi ata apo bejumaitsi itsajivijavabelia: “Xanë bitso ayajamatabëcueneya taxainaenë,” apo bejai. ³⁰ Dioso papecaitaxutotsoniataexae, pacaitapeta papijajivinxamë. Nexata Jesucristo payajavajinavanapame. Vaxaitsi Dioso jamatabëcueneyapëtanetsi. Tspaji Jesucristo nacajamatabëcueneyavenona Dioso vajajamatabëcueneyapëtaenexa. Jesucristo pejamatabëcueneta Dioso aneonijibia nacatane. Pijajivitsinua Dioso nacaexana. Nacavecuajibiaexananua pibisiacueneya vaxaxanaeconimi. ³¹ Bajaraxuata jivijavabelia be navajunupaebatsi Dioso vajanacayavenonaejava. Tspaji Dioso pejumelivaisibaxutota jumaiti mapacueniaje: “Pëtsa navajunupaebame saya nijacuata nexanaejava yabara jivi pecayiyataenexa. Biji rajane navajunupaebare Dioso pecayavenonaponaejava. Nexata jivi Dioso yayiataena,” jai Dioso pejumelivaisibaxutota.

2

Pacuenia Jesucristo sivatëpa mapanacuapijivije yabara pelivaisi

¹ Tajamonae, pamatacabi ponajë paxamëjavabelia, pacatsipaebatsi baja cajena pexaniajilivaisi, Dioso pejumelivaisi. Nexata bajarapamatacabi apo pacatsipaebitsi pacuenia tsipaebabiaba pamona bitso peyapëtaevi mapanacuapijilivaisije. Biji rajane pacatsipaebatsi xaniavaetsia jumenapebetsiaya panejumeyapëtaenexa patacatsipaebilivaisi. ² Itsa ponaponajë paxamëjavata, najamatabëxainajë patacatsipaebinexa ëJesucristo pelivaisi. Nexata bitso pacatsipaebabiabatsi Jesucristo vajanacasivatëpaejava cruzata. ³ Paxamëjavata itsa ponaponajë patacatsipaebinexa pexaniajilivaisi, Jesucristo pelivaisi, najamatabëcueneyapëtaniji apo tanecaëjëpaejava tajacuata patacatsipaebinexa. Nexata natsijamatabëcuenëbëjanë. Jamatabëcueneneconeconajë Dioso pitabarata bajarapalivaisi patacatsipaebijavanexa yabara. ⁴ Bajarapamatacabi pexaniajilivaisi itsa pacatsipaebabiabatsi, Dioso neyavenonabiaba. Xanë ëtajamatabëcuenesaëta bajarapalivaisi apo pacajumecovënëtsiaexanaetsi. Biji rajane Espiritu Santo pacatsijamatabëcuaijai. Dioso pesaëta pinijicue taexanaejava ata, pataneme. Bajaraxuata patacatsipaebilivaisi pexaniajilivaisi, payapëtaneme. Nexata bajarapalivaisi pajumecovënëtame. ⁵ Bajarapacuenia pacatsipaebatsi panenajamatabëcuenecopatsinexa Dioso javabelia, Dioso pesaëta papecayavenonaponaejava. Tspaji apo pacatojitsipaetsi paneyajavajumecovënëtsinexa pamona mapanacuataje tanetsi bitso peyapëtaevi mapanacuapijilivaisije.

Pacuenia Dioso najamatabëcueneitajëtaona pejumecovënëtsivitsijavabelia Espiritu Santo pejamatabëcueneta yabara pelivaisi

⁶ Dioso bitso pejumecovënëtsivi tuatuajëta itsa pajinavanapajë, patsipaebavanapajë Dioso pejumelivaisi, pexaniajilivaisi. Bajarapalivaisi apo yapëtae mapanacuapijivije. Mapanacuanë pevetsivi ata apo yapëtae. Bajarapamonae saicaya itsalivaisi xaina. Bajarapamonae bajarapalivaisi yajavatëpaena. ⁷ Dioso pejumelivaisi, pexaniajilivaisi,

itsa patsipaebavanapajë, patsipaebavanapajë Cristo vajanacasivatëpaejava vajanacacapanepaenexa vajeconivecua. Bajarapalivaisi baja cajena Dioso bajayata tajëvelia muetsia xainabuata. Matapania aeconoxae mapamatacabitaje Dioso nacayapëtaeyaexana bajarapalivaisi. Dioso baja cajena nacua pexanaevajënaeya ata, najamatabëxaina pacuenia exanaejitsia vajanacarajutsinexa matacabi apo peverevereaejava. ⁸ Nexata abaxë pamatacabi Cristo ponapona mapanacuataje, itsanë ata mapanacuanë pevetsiviyajuvënëne apo jumeyapëtae bajarapalivaisi, Cristo pelivaisi. Bajarapamonae itsa jumeyapëtaejitsipa bajarapalivaisi, nexata Cristo apo beyaxuabi tsipaetsi cruzata, ponë pepo petuxanenë, Dioso pexë nato. ⁹ Nexata bajarapamonae apo pejumeyapëtaexae Cristo pelivaisi, copiapata jane baja pacuenia Dioso pejumelivaisibaxutota tajëvelia jumaitis mapacueniaje:

Xua abaxë itsajivi ata apo tae, apo jumetaenua, apo sivanajamatabëxainanua, bajaraxua

Dioso baja cajena toxaniavaeta pamonae Dioso pejitsipaevinexa, jai tajëvelia Dioso pejumelivaisibaxutota Cristo vajanacasivatëpaejavanaxa cruzata.

¹⁰ Nexata vaxaitsi Cristo vajanacasivatëpaejava, Dioso nacayapëtaeyaexana Espiritu Santo pejamatabëcueneta. Espiritu Santo baja cajena daxitacuenenacayapëtaeyaexana. Pacuenia Dioso najamatabëxaina vajanacacapanepaenexa, bajaraxua ata Dioso nacayapëtaeyaexana Espiritu Santo pejamatabëcueneta.

¹¹ Vaxaitsi apo nacacajëpae vajajamatabëcueneyapëtaenexa pacuenia bëpënë najamatabëxaina itsajivi. Itsiata bajarapajivi pijacuata najamatabëcueneyapëtaenexa. Bajara pijinia pacuenia vaxaitsi ata Dioso apo jamatabëcueneyapëtae tsipaetsi pacuenia Dioso najamatabëxaina Espiritu Santo itsa apo nacayapëtaeyaexanae tsipae. ¹² Tsipaji Dioso apo natocotopsi vajacuata vajajamatabëcueneyapëtaenexa pacuenia Dioso najamatabëxaina. Bajaraxuata Dioso nacarajuta Espiritu Santo vajanacatsijamatabëcueneta. Nexata Espiritu Santo pejamatabëcueneta nacayapëtaeyaexana pacuenia Dioso nacayavenonaejitsia Jesucristo pejamatabëcueneta. ¹³ Nexata livaisi itsa tsipaebaponatsi Dioso pejumecovënënsivijavabelia, tsipaebaponatsi pacuenia Espiritu Santo nacayapëtaeyaexanapona. Apo tsipaebaponatsi mapanacuapijicuenenayabaraje, xua vajacuata banajamatabëxainatsi.

¹⁴ Pajivi Dioso apo jumecovënënsi, bajarapajivi apo jumecovënënsi palivaisi picani Espiritu Santo ata yapëtaeyaexanaejitsiatsi. Tsipaji saya bajarapalivaisi betsitantsiquejemalivaisitsi. Bajarapajivi apo cajëpae tsipatsinua pejumeyapëtaenexa palivaisi Espiritu Santo yapëtaeyaexanatsi. Tsipaji Espiritu Santo pejsijamatabënaevitsi, cajëpatsi pejumeyapëtaenexa palivaisi Espiritu Santo yapëtaeyaexanatsi. ¹⁵ Pajivi tsijamatabëcucatsi Espiritu Santo, bajarapajivi pejamatabëcueneta yapëtaeyaexanaponatsi xua Dioso tsitapexaniacuenetsi. Yapëtaeyaexanaponatsinua xua ata Dioso tsitapibisiacuenetsi. Nexata Dioso apo pejumecovënënsivi apo cajëpae tsipatsinua peconitsinexatsi bajarapajivi Diosojavabelia. ¹⁶ Dioso pejumelivaisibaxutota bajaraxua yabara jumaitis mapacueniaje: "Itsajivi ata apo yapëtae pacuenia najamatabëxaina pepotuxanenë Dioso. Nexata itsajivi ata apo cajëpae tsipatsi pemuxujobinexa Dioso," jai Dioso pejumelivaisibaxutota. Nexata pacuenia Cristo jamatabëcuenetsi, baja vaxaitsi ata jamatabëcuenetsitsi. Nexata itsajivi ata apo cajëpae tsipatsi vajanacajamatabëcueneyapëtaenexa. Apo cajëpae tsipatsinua vajanacamuxujobinexa.

3

Pacuenia Dioso pejumecovënënsivi najamatabëcuenepaejava Dioso betonacuenebavanapa yabara pelivaisi

¹ Tajamonae, palivaisi abaxë ayapëbeje jivi pejumeyapëtaenexa, bajarapalivaisi tsipaebabiabajë Espiritu Santo pitorobicueniatsi pejinavanapaevijavabelia. Nexata bajarapamonae nejumeyapëtaeyabiaba. Itsiata baitsi jane paxamë bajayajebi baja Cristo pelivaisi panejumecovënënsivi ata, piyapëbejelivaisi apo pacatsipaebabiabitsi. Tsipaji apo panejumeyapëtaemë tsipae. Bajaraxuata abaxë pacatsipaebabiabatsi pacuenia tsipaebabiabajë pamonae pejanajumecovënënsivi Cristo pelivaisi. Tsitecaeya abaxë bepapejevaxijamatabëcuenemë Cristo panejumecovënënsijava yabara. Tsipaji apo panejumeyapëtaeponaemë panevajënaeyabelia Cristo pelivaisi. ² Penacuetojiviyo abaxë emitto barajutatsi. Apo rajutsitsi abaxë pexaenexa pevi. Bajara pijinia pacuenia paxamë ata pamatacabi ajena pajumecovënëntame Cristo pelivaisi, pacatsipaebatsi peyapëxanepanalivaisi panejumeyapëtaenexa. Tsipaji abaxë bajarapamatacabi apo pacacajëpae panejumeyapëtaenexa palivaisi abaxë ayapëbeje. Itsiata baitsi jane abaxë aeconoxae ata saya patsitecavanapame. Apo pacacajëpae panejumeyapëtaenexa pematatsënë. Bajaraxuata paxamë abaxë bemito paneapaejivixi Cristo pelivaisi panejumecovënënsijava yabara. ³ Bajarapacuenia pajamatabëcuenetsimë tsipaji abaxë mapanacuapijivije, Dioso apo pejumecovënënsivi, jamatabëcuenepaejava pajinavanapame. Paxamë abaxë panacuenecaëbabiabame. Nabijataeyanua namataenetsia

panajumeanaenotabiabame. Natsanaeyanua jamatabëpanavecuajinavanapame. Nexata abaxë pacatsitecavanapame mapanacupijivi pijacuene. ⁴ Pacuenia Dioso apo pejumecovënëtsivi najamatabëcuenejëpaeya apo jinavanapae, bajarapacuenia paxamë ata najamatabëcuenejëpaeya apo pajinavanapaemë. Tsipaji paxamëyajuvënëvi, itsamonae, xanë yabara jumai tsabiabi: “Pablo raja Apolosvecua ayaijamatabëcuenenë. Bajaraxuata xanë saicaya Pablo pijajivitonënë,” jai tsabiabi. Itsamonae pijinia jumai tsabiabi: “Apolos raja Pablovecu ayaijamatabëcuenenë. Bajaraxuata xanë Apolos pijajivitonënë,” jai tsabiabi.

⁵ Xanë Pablonë, apo ayaijamatabëcuenenënë. Apolos ata raja apo ayaijamatabëcuenenë. Paxonëbeje ata raja Apolosbeje saya Dioso papijajivitonënëbeje. Bajaraxuata pacatsipaebatsibeje vajutuxanenë Cristo pelivaisi. Nexata baja pajumecovënëtime vajutuxanenë Cristo pelivaisi. Paxonëbeje patonacuenebajëbeje vajutuxanenë Cristo pacuenia paneitorobabeje. ⁶ Pabixinaevi bauba pabita xua jamatabëuba. Bajaraxuacujinae pabita peubijava eveta petoayabacabejeyanivatsi. Itsiata baitsi jane xua uba pabita, Dioso pejamatabëcueneta tovitsabiaexanatsi. Bajara pijinia pacuenia xanë ubajë Dioso pejumelivaisi paxamë panejamatabëëthëtota. Bajaraxuacujinae Apolos pacaevetaponapona Dioso pejumelivaisita. Itsiata baitsi jane Dioso pejamatabëcueneta pacajamatabëcuene vitsabiaexanapona. ⁷ Nexata ponë uba, ponë ata evetaponapona, apo ayaijamatabëcuenenëbeje. Caenë baja cajena Dioso ayaijamatabëcuenenë. Tsipaji pacuenia pabita peubijava Dioso pejamatabëcueneta vitsabiaexana, bajara pijinia pacuenia Dioso pejamatabëcueneta pacatsijamatabëvitsabiaexanapona Dioso pejumelivaisi. ⁸ Pamonaevi jivi tsijamatabëuba Dioso pejumelivaisi, pamonaevi ata evetavanapa Dioso pijajivi, najamatabëcuenejëpa daxita. Itsanë ata apo ayaijamatabëcuenenë itsamonaevecua. Itsiata Dioso matamotsianatsi caenë canacujitsia saicaya petonacuenebimatamo. ⁹ Paxonë raja Dioso pijacuene panebarënacueneba. Paxamë ra pijinia bepapabimë, papabita Dioso panebarëubapona pejumelivaisi. Pacuenia pabita peubijava Dioso pejamatabëcueneta vitsabiaexana, bajara pijinia pacuenia panejamatabëëthëtota Dioso pejumelivaisi vitsabiaexanapona.

Paxamë raja Dioso bepapjabomënu, paboxaneto Dioso panebarëexanapona. ¹⁰ Bo pexanaevi, pexaniabo pexanaexa, itsaxuayo bo ënëtuatuajënexa, copiaya feratonë bamatatorotsia cueruba ibotoxanetonë pemëthëcaenexa bajarapaferatonëjava. Bajaraxuacujinae bajara paibotoxanetonëjumavereca itsaibotonë banajumacatsanejebapona. Nexata xanë, pacuenia Dioso netocopata, copiaya pacatsipaebatsi pexanialivaisi Jesucristo pelivaisi. Nexata baja pajumecovënëtime bajarapalivaisi. Bajaraxuata xanë bo ënëtuatuajënexa matatorotsia taferacuejava, bitso betanecujaninë. Bajarapaferatonëjava ibotoxanetonë tamëthëcaejava ata, bitso betanecujaninë. Tsipaji xanë copiaya pacatsipaebatsi Cristo pelivaisi. Nexata juya pamonaevi cotocaevi pacatsipaebavanapa, pacatsipaeba panevajënaeyabelia paneajamatabëcuenesaë tsaponaeuxa Cristo pelivaisi panejumecovënëtsijava. Bajarapamonae boyenepananexa ibotonë bepecatsanaponaevi bo ënëtuatuajënexa matatorotsia tamëthëcaebotoxanetonëjumavereca. Boyenepananexa pecatsanaponaevi baitapetapona ëpexaniavirijava, pavirijava tsixanepana boyenepananexa. Bajara pijinia itsi pamonaevi pacaevetavanapa. Èpexanialivaisi pacatsipaebabiaba paneajamatabëcuenesaënxaxa Diosojavabelia. ¹¹ Payapëtaneme rabaja mapacuneje. Itsajivi baja capanepaeya boyenepananexa, itsa tsivajënaemëthëca ibotoxanetonë, nexata baja itsajivi ata bajarapajumabereca icatsia itsaibotoxanetonë apo bemëthëca. Bajara pijinia paitsimë paxamë ata. Capanepaeya baja pajumecovënëtime Jesucristo papecasivatëpaejava Dioso papecavecuajibiaexanaenexa pibisiacuene paneexanaeconimi. Nexata baja apo bepajumecovënëtsimë saicayalivaisi. Tsipaji baja ajibi pematatsënëa itsalivaisi papecacapanepaelivaisinexa panijaneconivecu. ¹² Pamonaevi bo exana, maitsije. Itsamonae exana bitso penamatamotsijavanëta. Itsamonae exana bevelia penamatamotsijavanëta. Pamonaevi pacatsipaebapona pexanijailivaisi pacuenia Dioso yapëtaeyaxanapontsi, bajarapamonae bo bepexanaevi bitso penamatamotsijavanëta bajayajebi bo pijamatabësaëtsëcaenexa. Bajarapamonae bo bepexanaevi oronanitonëta, platananitonëta, penamatamotsiibotonëta ata. Pamonaevi pijinia saya pejamatabëcueneta peyapëtaelivaisi pacatsipaebapona, bajarapamonae bo bepexanaevi bevelia penamatamotsijavanëta, bajayajebi apo pijamatabësaëjavanëta. Bajarapamonae bo bepexanaevi saya naejavanëta, patebaxutoxita ata, bearrozbotoxita ata. ¹³ Nexata pamatacabi Cristo patsianica, bajarapamatacabi nayapëtaena caejivi canacujitsia Cristo pijajivi, pamonaevi xaniavaetsia tonacuenebavanapa. Bajarapamatacabi Cristo isoto yajavapatsianica. Nexata bajarapaisotota Cristo ëjëtaponaena xua pijajivi, caejivi canacujitsia, tonacuenebatsi. Nexata bajarapacuenia Cristo yapëtaena xaniavaetsia pijajivi petonacuenebijavatsi.

¹⁴ Itsanē bo tonacuenebijitsipa itsanē pijabonexa. Nexata bo petoveretetsicujinae, isoto najetaruae ata, itsiata bo apo tajue tsipae isoto apo petajuejavanēta bo pexanetsixae. Nexata bo penacuenebinē matamotsipatsi. ¹⁵ Itsiata baitsi jane peveretetsibo itsa totajuejitsipatsi isoto petajuejavanēta, bo pexanetsixae, nexata naxuabijitsipa penacuenebijava. Bo ata naxuabijitsipa. Penacuenebimatamo ata naxuabijitsipa. Itsiata bo pexanaenē apo naxuabi tsipae. Panepaejitsipa itsiata tsiquirijavayota. Bajara pijinia itsi Cristo pelivaisi papecatsipaebivi ata. Baitsi pamonaē xaniavaetsia pacatsipaeba, capanepaenatsi Dioso. Matamotsianatsinua Dioso. Tsipaji pacuenia Dioso yapētaeayaxanatsi, pexanialivaisi pacatsipaebapona. Pamonaē pijinia apo pacatsipaebi xaniavaetsia, apo matamotsi tsanetsi. Tsipaji saya pejamatabēcueneta peyapētaelivaisi, pacatsipaebapona. Itsiata bajarapamonaē ata tsiquirijavayota capanepaenatsi Dioso.

¹⁶ Payapētaneme rabaja mapacuneje. Paxamē rabaja Dioso bepapijatemplobomē. Tsipaji Espiritu Santo pacayajavaponapona. ¹⁷ Pajivi bijianaena bajarapatemplobo, Dioso pijabo, nexata juya bajarapajivi Dioso navecuaxuabianatsi. Dioso baja cajena pijatemplobo saicaya Diosonexa. Paxamē rabaja Dioso bepapijatemplobomē.

¹⁸ Pētsa pajamatabēcuenenavēxaniabame. Itsajivi paxamēyajuvēnjivi itsa jamatabējumaitsi: “Xanē cajena daxitajivi matatoxenetsia bitso tayapētaenē mapanacuapijilivaisije,” itsa jamatabējai, nexata bajarapajivi becopata bajarapajamatabēcuene. Beveliajamatabēcuenejivi saya benatae. Nexata Dioso jamatabēcuenecaējēpaeya exanaenatsi peyapētaenexa jane baja Dioso pejumelivaisi. ¹⁹ Daxita palivaisi bitso bepexaniajailivaisitane mapanacuapijivije, itsiata daxita bajarapalivaisi Dioso tsitanatsiquejemalivaisitsi saya. Dioso pejumelivaisibaxutota jumaitsi mapacueniaje: “Dioso cajena naneconitsiaexanaena bitso peyapētaevi mapanacuapijilivaisije peyamaxēitojorobavanapaejavata itsamonae,” jai Dioso pejumelivaisibaxutota. ²⁰ Icatsia itsalivaisita Dioso pejumelivaisibaxutota jumaitsi mapacueniaje: “Pepo petuxanenē baja cajena yapētane piamatamobicuene mapanacuapijilivaisije, bitso peyapētaevi penajamatabēxainacuene,” jai Dioso pejumelivaisibaxutota. ²¹ Bajaraxuata itsajivi ata paxamēyajuvēnjivi, Dioso pejumelivaisi patacatsipaebivi, paxanē bepatajavitonē apo benatae. Bepaayajamatabēcuenevinēnua, apo bepanteae. “Xanē raja saicaya bajaraponē pijajivitonēnē,” apo bejai paxanēyajuvēnjivi yabara. Biji rajane paxanē bepanijajivinē panataniji Dioso pejumelivaisi patacatsipaebaponaeaxae. Tsipaji baja cajena Dioso pacatocopata daxita xua panamatavenoname. ²² Xanē Pablonē, Apolos ata, Pedro ata, bajarapamatabēxēyo Dioso panecopata paxamē patacajamatabēcuene yavenonaenexa. Daxita mapanacuata panejinavanapaenexa ata, Dioso pacatocopata. Paneasaētsavanapaenexa, panetēpaenexa ata, Dioso pacatocopata. Panejinavanapaenexa ajena, panevajēnaeyabelia ata panejinavanapaenexa, Dioso pacatocopata. Daxita rabaja bajaraxua Dioso pacatocopata paxamēnexa. ²³ Pematatsēnēa rabaja Dioso pacatocopatanua paxamē Cristo papijajivinxamē. Cristo rabaja pijinia Dioso bepajajivitonē, Dioso pejitsipaecuenia petoexanaeaxe.

4

Pacuenia Cristo pijajivi, apóstolevi, nacuenebavanapa yabara pelivaisi

¹ Paxamē saya panetaema Cristo papijajivinēcuenia. Cristo raja panetocopata jivi patatsipaebavanapaenexa pexanialivaisi. Bajarapalivaisi Dioso pepo bajayata muetsia xainabuata. ² Pajivi itsanē pijajivitonē naexana, bajarapajivi pijatuxanenē pitorobicueniatsi, xaniavaetsia betonacuenebaponapona. ³ Bajaraxuata xanē ata exanaponajē pacuenia vajatuxanenē nitoroba. Nexata paxamē panebaracuaicuijamē tsabiabi ata, itsamonae ata nebaracuaicuijai tsabiabi ata jivi tatsipaebaponaelivaisi yabara, taexanaponaejava ata yabara, itsiata apo nasivajamatabēcuenebējanē patanebaracuaicuijaittsabiabijava yabara. Apo nacueneanaējētsinēnua pacuenia tonacuenebajē vajatuxanenē. Nexata tajamatabēcueneta apo jamatabējumaitsinē: “Xaniavaetsia meta tajatuxanenē tonacuenebaponaponajē. Itsa jume, bijiata meta tonacuenebaponaponajē,” apo jamatabējanē. ⁴ “Jumecovēnētajē daxita pacuenia Dioso nitoroba. Nexata taneitorobicuenia xaniavaetsia tonacuenebajē. Bajaraxuata ajibi Dioso tanyabara naneconitsiaexanaejavanexa,” jamatabējanē ata tsipae, itsiata ajumematamobinē tsipae. Bajaraxuata evetajē vajatuxanenē pijacuata tanejumaitsinexa itsa apo jumecovēnētšinē taneitorobicuenia. ⁵ Bajaraxuata pētsa pabaracuaicuijamē itsamonae ata Dioso petonacuenebavanapaevi. Pacopiaevetavanapare abaxē vajatuxanenē pepatsijavatsica. Bajaraponē itajētsiana bajarapamonaē muetsia pexanaejavanēmi ata. Pacuenia caejivi canacujitsia vajatuxanenē pijajivi bēpēnēa najamatabēxaina petonacuenebavanapaejavata, vajatuxanenē itajētsiananua. Bajaraxuacujinae nexata xaniavaetsia petonacuenebavanapaevi, caejivi canacujitsia, Dioso barēyataenatsi petonacuenebavanapaejava yabara.

⁶ Tajamonae, bajarapacuenia pacatoyaquinatsi Apolos yabara, xanë ata yabara, pat-acayapëtaeyaxanaenexa. Bajarapacuenia pacatoyaquinatsi, Dioso pejumelivaisibaxutota pejumaitsicueniavecua, bitso bepaayaijamatabëcuenenënëbeje patanetaeyanivamë. Bajarapacuenia pacatoyaquinatsi itsamonae ata, pamonaë Dioso petonacuenebavanapaevi, najëpaeya paneyaiyataenexa. Pëtsa itsamonaevécua beayaijamatabëcuenenë pataneme caenë ata. Bajara pijinia pacuenia beveliajamatabëcuenenë pëtsa pataneme caenë ata. ⁷ Paxamë ata pëtsa itsamonaevécua bepaayaijamatabëcuenenimë panataneme. Itsa panavajunupaebabiabame, apo panavajunupaebabiabimë Dioso papecayavenonabiabi-
java. Xua daxita paxainame, Dioso baja cajena pacarajuta panexainaenexa. Pamonaë ata pata paxamëjavata papecatsipaebinxaxa Dioso pejumelivaisi, bajarapamonae ata Dioso pacatocopata. Nexata daxita bajaraxua Dioso papecatocopatsixaxa, bepaayaijamatabëcuenenimë pëtsa panataneme itsamonaevécua.

⁸ Paxamë jamatabëcuenenavëxaniabiaya panajamatabëxainame mapacueniaje: “Pacuenia ricovi ayaijava pecobecovë xaina, bajara voxaitsi itsitsi Dioso pejumelivaisi vajajumecovënëtsijava. Tspipaji ayailivaisi xainatsi. Tspipaji baja itsamonaë bitso nacatsipaebabi-
aba Dioso pejumelivaisi. Nexata baja pematatsënëa apo namatavenonaetsi itsajivi ata vajanacatsipaebaponaeenexa,” pajamatabëjamë tsabiabi jamatabëcuenenavëxaniabiaya. Jamatabëcuenenavëxaniabiaya Dioso pijacuene bepaneevetsivi panataneme. Nexata meta paxanë matatoxenetsia bitso bepaayaijamatabëcuenenimë panataneme. Dioso pijacuene itsa paneevetsivi tspipae, nexata pacasivajamatabëcuenenarëyatsi tspipae. Nexata vajana-
juaeetsivi tspipae Dioso pijacuene. ⁹ Paxanë, paapóstolevinë, Dioso covë panetocopata daxitajivi patanetaenexa bijiyaya. Panetocopata bepatananeconitsivicuenia patanebejeje-
binexa. Bajarapacuenia Dioso panetocopata bijiyaya panetaenexa ángelevi ata, daxitajivi ata. ¹⁰ Paxanë, Cristo xaniavaetsia patajumecovënëtsivi, itsamonaë panetane bepatane-
matajemabivi. Paxamë, Cristo xaniavaetsia apo panejumecovënëtsivi ata, Cristo pi-
jacuene bitso bepaneyapëtaevi itajara panataneme. Caranata paxanë itsamonaë bepatana-
jamatabëcuenesaëjivivi panetane. Caranata juya paxamë bepaneajamatabëcuenesaëvi
panataneme. Paxanë itsamonaë apo paneyaiyatae. Paxamë panayaiyataneme. ¹¹ Cristo
pelivaisi jivi itsa patsipaebaponajë mapamatacabijavaberena ataje, bitso baja cajena
panabejibitabiabajë. Patajani tsabiabi. Mera pajitsipabiabajë. Bitso pajumaesebejenë
tsabiabi. Jivi panebeyabiaba pecobeta. Apo paxinabiabinë pabota panapatsijitsianë.
¹² Pacueranabiabajë bitso patanacuenebabiabijava patacobeta. Jivi panebijataeyabiaba
pibisiacuenia. Itsiata apo pajumeanaecanaviatabiabinë. Biji caranata paxanë bajarapa-
monae patovajëtabiabajë Diosojavabelia Dioso peyavenonaenexatsi. Jivi panebejibiaex-
anabiaba. Itsiata pajamatabëcuenemoyanë tsabiabi. ¹³ Pibisiacuenia panebaracuacuijai
tsabiabi itsamonaëjavabelia. Itsiata bajarapamonae pexaniajamatabëcuenia xaniavaetsia
pamuxujibabiabajë bajayajebi. Ajena, mapamatacabijavaberena ataje, panetaeyabiaba
daxitajivivecua bepaveliajamatabëcuenenimë. Bepaavirinënuva panetaeyabiaba.

¹⁴ Apo pacatoyaquinaetsi raja mapacueniaje patacaurabinexa. Biji rajane pacatoy-
aquinatsi saya patacamuxujibinxaxa xaniavaetsia. Pacuenia muxujibijitsipajë taxi,
bajarapacuenia pacamuxujibatsi. ¹⁵ Xanë copiaya pacatsipaebatsi pexanialivaisi, Cristo
pelivaisi. Nexata baja panajamatabëcuenecopatame Jesucristojavabelia. Bajaraxuata
xanë bepatacavitsatsivixaxa, panetaneme bepaneaxanë. Paxainae atamë tspipae diez mil
ponëbeje papecatsipaebivinxaxa Cristo pelivaisi, itsiata xanë caenë panetaejitsipame
bepaneaxanë. ¹⁶ Bajaraxuata asaëyata pacamuxujibatsi. Pacuenia baja pacatsitaex-
anaponaponatsi, bajarapacuenia necuenejëpaeya pajinavanapare.

¹⁷ Bajaraxuata Timoteo baja pacatoitorobatsi paxamëjavabelia. Bajaraponë bitso tasi-
vanë. Betaxënatocuenia tataanë. Xaniavaetsia pejumecovënëntaponaponaeenë Dioso. Ba-
jaraponë Timoteo pacatoitorobatsi baja papecatsipaebinxaxa pacuenia ponaponajë. Nex-
ata Timoteo pacatsipaebiananua pacuenia xanë Jesucristo pijajivitonëxanë, tsitaexan-
abiabajë daxita Dioso pejumecovënëtsijava, itsaxuayo tspipaeaponajë Cristo pelivaisi.
¹⁸ Itsamonaë paxamëyajuvënëvi, taitorobicuenia apo exanaë. Bajarapamonae beayaija-
matabëcuenenimë natane. Nexata itsa pacatoitorobatsi Timoteo, bajarapamonae xanë yabara
jamatabëcuenenavëxaniabiaya jamatabëjumaitsi: “Pablo rabaja apo patsi tsane. Nacacuju-
nava rabaja vajanacataenexa,” jamatabëjai bajarapamonae xanë yabara. ¹⁹ Itsiata baitsi
jane Dioso itsa netocopatsiana patacataenexa, ponaenajë naxanitsiayo paxamëjavabelia.
Nexata tajacuata taenajë pacuenia jamatabëcuenenitsi tsavanapae pamonaë beayaija-
matabëcuenenimë natane. Tspipaji raeta bajarapamonae pepacuene ajamatabëcuenesaë Dioso-
javabelia. Itsa jume, nexata meta saya pecuibovojotota jumaitsi. ²⁰ Pamonaë Dioso pijajivi,
bajarapamonae nayapëtane. Tspipaji peneta Dioso pesaëta ajamatabëcuenesaë tsavanapae.
Ëpecuibovojotota apo jumaitsi. Biji rajane bajarapamonae pejamatabëthëtojavavetsina

Dioso jumecovënëta. ²¹ ¿Detsa xua pajitsipame paxamë itsa ponaenajë paxamëjavabelia? ¿Patacabijataejava tsaja pajitsipame? Itsa jume, ¿pajitsipame tsaja pexaniajamatabëcuenia asivaya patacataejava?

5

Pacuenia Dioso pejumecovënëtsivi tuatuajëta ponapona bitso pibisiacue ne pexanaponaponaenë yabara pelivaisi

¹ Paxamë tuatuajëta bitso pibisiacue ne pexanaponaponaenë pevitota, daxitajivi pina baracuaicuaijai tsabiabi. Dioso apo pejumecovënëtsivi ata, papibisiacue ne apo exanae, bajaraponë pina exanaponapona. Bajaraponë paxamëyajuvenënë pita pina pijavanexa paxa pijavami. ² ¡Bajaraponë pibisiacue ne pexanaejava, apo pacueneitavetsi atamë, itsiata bepaayaijamatabëcuenimë panataneme! ¡Biji rajane bajaraponë pibisiacue ne pexanaejava, bitso bepasivanajamatabëxainame! ¡Bepayapijiviuauramënuu bajaraponë! Bajaraponë pibisiacue ne pexanaponaponaenë, bepanavecuacapsipame. ³ Paxamëjavata apo naponaponaenë atanë, itsiata paxamëjavata betanaponaponaenë, nataniji. Nexata tajëvelia bitso sivanajamatabëxainabiabjë bajaraponë Dioso penaneconitsiaexanae javanexatsi yabara pibisiacue ne pexanaponaponaexae. ⁴ Paxamë panacaetuare vajatuxanenë Jesucristo papijajivixaemë. Apo pacayajava atatsi tsane, itsiata panenacaetuatsijavata, pacajamatabënjainaeatsi. Diosojavabelia pacatovajëtsianatsinua bajarapaeapatota. Vajatuxanenë Jesucristo ata pesaë, pacayajava tsane bajarajota. ⁵ Pibisiacue ne pexanaponaponaenë paxamë tuatuajëta, panavecuacapsipare baja dovathijavabelia. Nexata daxita pibisiacue ne penatojitsipacuenia pexanaejava yabara, dovathi pebejibiaexanaenexatsi. Nexata belia icatsi Dioso jumecovënëtsiana. Bajarapajamatabëcue ne jane baja capanepaenatsi pamatacabi vajatuxanenë Jesús patsianica.

⁶ Papibisiacue ne bajaraponë exanaponapona, panaitaxutojematsi atamë, itsiata bepaayaijamatabëcuenimë panataneme. Abeje raja pibisiacue ne pexanaponaponaenë panecuenenaitaxutojematsijava. Payapëtaneme rabaja mapacueneje. Pan pexanaematabënexa, ayaimatabë ata, levadurajava pijinia tsiquirijavayo ata, itsiata pematajërëabijavata, bacaëjëpa daxitamatabëjava. Nexata levadura, tsiquirijavayo ata, bafufunaeyaexana daxitamatabë. Bajara pijinia itsi tsipae caenë itsa pacuenecopatsipame pibisiacue ne pexanaponaponaejava paxamë tuatuajëta. Daxitajivi belia pexanaponaponaenë exanaponaponaenë bajaraponë pejamatabëcueneta. ⁷ Bajaraxuata panavecuacapsipare baja, ponë pibisiacue ne exanaponapona paxamë tuatuajëta, daxitajivi pejamatabëcuenebijianaeyaniva bajaraponë pejamatabëcueneta. Pacuenia itsi perujupanmatabë, levadurata pematajërëabimatabë, bajara jamatabëcuenetsi bajaraponë, pibisiacue ne pexanaponaponaexae. Bajaraxuata bajaraponë panavecuacapsipare baja. Paxamë rabaja Jesucristo pejamatabëcueneta pejanajamatabëcue ne paxainame. Nexata pacuenia itsi levadurata apo pematajërëabipanmatabë, bajarapajamatabëcuenetsimë. Tsipaji baja Dioso aneonijibia pacatane. Paxamë baja aneonijibia Dioso pacatane. Tsipaji Cristo pacasivatëpa. Cristo baja cajena beovejajo tanetsi Dioso. Tsipaji nacasivatëpa cruzata pibisiacue ne vajaexanae neconimi vajanacavecuajibiaexanaexa. ⁸ Nexata baja aeconoxae pibisiacue ne apo beexanavanapaetsi. Jesucristo pijajivixaetsi, itsajamatabëcue ne xainaejevatsi, pexaniajailivaisi jumecovënëtavapanapenatsi. Bajarapacuenia itsa jumecovënëtavapanapenatsi, nexata pacuenia itsi levadurata apo pematajërëabipanmatabë, bajarajamatabëcue ne itsanetsi aneonijibia vajajinavanapaeaxae.

⁹ Itsabaxutota baja cajena pacatoyaquinatsi pevitota pibisiacue ne pexanaponaevi paneyajavajinavanapaeyaniva. ¹⁰ Dioso apo pejumecovënëtsivi, itsamonae, pibisiacue ne exana pevitota. Itsamonae najamatabëxaina ëpamonaenexa ayajiva pexinaecue ne pexainaexa. Itsamonae nacobetoxota. Itsamonae, jumapecataeya pexanaenëjavabelia, navajëca. Bajarapitsicue ne pexanaevi, Dioso apo pejumecovënëtsivi, panavecuatsatsinexa, patacatoyaquinaebaxutota apo pacaitorobitsi. Bajarapitsicue ne pexanaevi, Dioso apo pejumecovënëtsivi, itsa panavecuatsatsipame, nexata pepacuene mapanacuavecuaje athëbëbetsia ëpaneponaenexa tsipae. Tsipaji daxita mapanacuajavaje bajarapitsicue ne pexanaevi yacajëpa. ¹¹ Patacatoyaquinaebaxutota raja pacaitorobatsi mapacueniaje. Pajivi jumaitsi ata: “Xanë cajena Jesucristo pelivaisi jumecovënëtajë,” jai ata, itsiata pibisiacue ne itsa exana pevitota, ëpamonaenexa ata pexainaecue ne itsa natojitsipa, jumapecataeya pexanaenëjavabelia ata itsa navajëca, itsamonae ata pibisiacuenia itsa baracuaicuaijai, itsa aitajibi tsabiabinua, itsa nacobetoxotannua, bajarapajivi pëtsa payajavajinavanapame. Pëtsa payajavaxanemenua caejavata, pacajunatsi ata. ¹²⁻¹³ Pamonaenë abaxë Dioso apo pejumecovënëtsivi, bajarapamonae yabara tajumatsinexa Dioso apo netocopatsi: “Bajarapamonae cajena pijaneconi xaina Diosojavabelia,” tajainexa. Dioso

cajena abaxê saicaya pepacue neaneconitsiaexanaena bajarapamona. Itsiata baitsi jane pamona Dioso panenajuajumecovênêtsivi, panenacaetuatabiabibota panenajuajoneyabiabivi, pibisiacuene itsa exana, paxamê bepacueneitavetame. Bajaraxuata nexata panavecuacapsapare baja ponê paxamê tuatuajêta pevitota pibisiacuene exanaponapona.

6

Pacuenia Dioso pejumecovênêtsivi itavetatsi Dioso penajuajumecovênêtavanapaevi peneconitsiyaniava juezmonaejavabelia yabara pelivaisi

¹ Itsanê paxamêyajuvênênê, Dioso pejumecovênêtsinê, itsa pacaitsacueniaba paxamêjavaberena, nexata jueznêjavabelia paneconitabiabame. Pêtsa bajarapacuenia paexaname. Tsipaji raja juezmonae Dioso apo pejumecovênêtsivi. Bajaraxuata Dioso panenajuajumecovênêtsivi apo bepaneconitsimê juezmonaejavabelia. Biji rajane bepayanijobame Dioso pejumecovênêtsivijavabelia papecatoxanetsinexa bajarapalivaisi.

² Payapêtaneme rabaja mapacueje. Pamatacabi Cristo evetsiana mapanacuaje, daxita Dioso vajajumecovênêtsivi Dioso nacatocopatsiana vajananeconitsiaexanaexa pamona pijaneconi pexainae. Daxita mapanacuapijivije, pamona Dioso apo pejumecovênêtsivi, vaxaitsi neaneconitsiaexanaenatsi. Nexata aeconoxae ata pacacajêpa panelivaisixanetsinexa paneconi exana panetuatuajêta. Tsipaji mapanacuata jivi pevetsijamatabêcuene bevelijamatabêcuene saya. Apo ayapêbeje bitso. ³ Payapêtaneme rabaja mapacueje. Pamatacabi Cristo patsianica, vaxaitsi neaneconitsiaexanaenatsi daxitajivi. Neaneconitsiaexanaenatsi ângelevi ata. Nexata abaxê aeconoxae panejinavanapaepato mapanacuataje, pacacajêpa panelivaisixanetsinexa paneconi exana panetuatuajêta, mapanacuapijilivaisije. ⁴ Itsiata baitsi jane paxamêyajuvênêtsivi itsa pacaitsacueniaba mapanacuataje, itsiata panijacuata apo palivaisixanetabiabimê pacuenia picani bepaexaname. Nexata pajivi pacaitsacueniaba, pacaponabiabame juezmonaejavabelia penaneconitsiaexanaenatsi. ⁵ Mapacuenia pacajumaitsitsije patacaurabinexa. Paxamêyajuvênêtsivi itsa pacaitsacueniaba, çajibi tsabaja caenê ata paxamêyajuvênênê pexanialivaisi peyapêtaenê pelivaisixanetsinexa bajarapalivaisi?

⁶ Dioso panejumecovênêtsivixae, juezmonaejavabelia apo bepaneconitsimê Dioso panenajuajumecovênêtsivi.

⁷ Bajarapacuenia panacaevenavi atamê paneneconitabiabixae juezmonaejavabelia, daxitajivi pacacueneyapêtane xaniavaetsia apo panejinavanapaepava Dioso pitabarata. Nexata panacaevenavimê itsa pacaitsacueniaba, itsa pacatonacobetoxotanua, Dioso panejumecovênêtsivixae, xanepanaejitsipa itsa pajamatabêcuenemoyamê tsipae. ⁸ Itsiata baitsi jane paxamê Dioso panenajuajumecovênêtsivijavabelia ata, paitsacueniababiabame. Yamaxêitojorobiaya pavecuanacobetoxotabiabamenua.

⁹⁻¹⁰ Payapêtaneme rabaja mapacueje. Pibisiacuene pexanaevi apo yajavajinavana paetsi tsanê Dioso pijanacuatsia. Bajaraxuata pêtsa paexaname panijacuata panenatojitsipacuenia. Dioso pijanacuatsia apo yajavajinavanapaetsi tsane pevitota pibisiacuene pexanaevi. Apo yajavajinavanapaetsi tsane jumapecataeya pexanaenêanêjavabelia penavajêcaevi. Apo yajavajinavanapaetsi tsane pejaitsivi itsava pijavavecu. Apo yajavajinavanapaetsi tsane pejaitsivi itsanê pamonavecu. Apo yajavajinavanapaetsi tsane penaquenetslataevi nacaevênapebibeje. Apo yajavajinavanapaetsi tsane penacobetoxotsivi. Apo yajavajinavanapaetsi tsane epamonaexa pexanaecuene penatojitsipaevi. Apo yajavajinavanapaetsi tsane piaitajibitsabiabivi. Apo yajavajinavanapaetsi tsane itsamonae pibisiacuena pebaracuacuajiaivi. Daxita bajarapitsivi apo yajavajinavanapaetsi tsane Dioso pijanacuatsia. ¹¹ Bajara picani bajayata paxamêyajuvênêtsivi pacuenia exanavanapa. Itsiata baitsi jane aeconoxae baja pibisiacuene paneexanaeconimi, Dioso baja pacavecuajibiaexana. Pacatsata baja Dioso papijajivinexamê. Dioso baja aneconijibia pacatane vajatxanenê Jesucristo pejamatabêcueneta. Espiritu Santo ata pesaêta pacayavenona panejumecovênêtsinexa vejatxanenê papecaitorobicuena.

Pacuenia Dioso pejumecovênêtsivi xaniavaetsia bejinavanapa Dioso pitabarata yabara pelivaisi

¹² Itsamonae jumaisi: "Mapanacuata navita vajaexanaejavanexa. Itsajivi ata apo nacaitavetsi bajarapacuenia vajaexanaenexa," jai itsamonae. Xaniajai rabaja picani. Itsiata baitsi jane daxita bajarapacuenia vajaexanaenexa, apo nacatoxanepanae. Mapanacuata navitsi ata vajaexanaejavanexa, xua itsajivi ata apo nacaitavetsi, itsiata bejamatabêjumaisitsi mapacueniaje: "Papibisiacuene taexanaenexa tajamatabêcuene nitorobiaba, apo exanaenê tsane Cristo pijajivitonêxaenê. Tsipaji itsa exanaejitsipajê bajarapapibisiacuene, nexata tajamatabêcuene beprijajivitonêncuenia jumecovênêtabiabijitsipajê,"

bejamatabėjaiṣi pibisiacuene vajaexanaeyaniva. ¹³ “Vajaxaejava raja vajacotsorotopijijavanexa. Vajacotsoroto raja pijinia vajaxaejava peacaenexa,” pejaillivaisi, xaniajai baja cajena. Itsiata baitsi jane itsamatacabi Dioso bajarapacuenebeje vereverecaeyaexanaena. Daxita raja vajaperabētuareca pibisiacuene apo vajanexanapanapenexa. Vajaperabēto raja Dioso nacatocopata vajatuxanenē vajatonacuenebavanapanexa. Vajatuxanenē rabaja pijinia vajaperabētota vajanacayavaponaponaenexa. ¹⁴ Dioso baja cajena icatsia asaēyaexanatsi vajatuxanenē petēpaecujinae. Bajara pijinia pacuenia vaxaiti ata itsamatacabi Dioso pesaēta nacaasaēyaexanaena vajatēpaecujinae.

¹⁵ Payapētaneme rabaja mapacueneje. Pacaenēmē canacujitsia, caenē Cristo peperabētōjavabelia becaeperabēto panaexaname papijajivixaemē. Xanē ata rabaja Cristo bepeperabētōyajuvenēnēnē. Bajaraxuata pibisiacuene apo hexanaenē tavitota pibisiacuene pexanabiabivajavabelia, bajarapova bepeperabētōyajuvenējavanē tanaexanaeyaniva. ¹⁶ Payapētaneme rabaja mapacueneje. Pebi pibisiacuene itsa exana pevitota pibisiacuene pexanabiabivajavabelia, bajarapajivibeje becaeperabēto naexanabeje. Dioso pejumelivaisibaxutota jumaiti penapitsijivibeje yabara mapacueniaje: “Anijajivimibeje becaejivi naexanabeje,” jai. ¹⁷ Nexata pijinia pajivi najamatabēcuenecopata vajatuxanenē Jesucristojavabelia, bajarapajivi becaejivi naexana vajatuxanenē Jesucristojavabelia.

¹⁸ Pevitota pibisiacuene pexanaeyaxanaejamatabēcuene, pavecuanajetabajiravabiabare. Itsajava raja pibisiacuene pexanaejava, bitso jivi apo jamatabēcuenebijianaetsi. Pacuenia pevitota pibisiacuene pexanaejava, jamatabēcuenebijianaetsi, apo itsi. Ponē jaita itsava pijavavecua pibisiacuene pexanaenexa pevitota, bitso pibisiacuene exana. Petiriva ata, pova jaita itsanē pamonavecua pibisiacuene pexanaenexa pevitota, bitso pibisiacuene exana. Pajivi bajarapapibisiacuene exana, bitso najamatabēcuenebijiana. ¹⁹ Payapētaneme rabaja mapacueneje. Paneperabēto baja cajena Espiritu Santo pijabo papecatsijamatabēcaexae. Dioso cajena pacarajuta pijaEspiritu Santo papecatsijamatabēcaenexa. Dioso baja cajena papijajivimē. Nexata paneperabēto ata paxamēnexa. Apo panaperabēxainaemē panijacuata panenatojitsipacuenua paneexanapanapenexa. ²⁰ Tsipaji Dioso ayaimatamota pacacomuata. Nexata Dioso papijajivixaemē, xaniavaetsia panejamatabēthētovetsina Dioso jumecovēnētsiaya pajinavanapare. Nexata daxitajivi Dioso yayiataeponaena paxamē xaniavaetsia itsa pitsitajinavanapame.

7

Pemuxujobilivaisi penapitsijivibeje yabara pelivaisi

¹ Xua yabara panetoyaquinaremena pataneyanijobinexamē, nexata aeconoxae pacajumecanaviatsijitsiatsi. Xaniajai rabaja picani. Xanepana itsa apo nacojiobi pebi. ² Itsiata baitsi jane jivi navita pevitota pibisiacuene pexanaevi. Bajaraxuayaniva caepebi canacujitsia pijava hexaina. Bajara pijinia itsi petirivi ata. ³ Nexata pebi pijava xaniavaetsia bevetaaponapona pijavaxae. Bajara pijinia itsi petiriva ata. Xaniavaetsia bevetaaponapona pamonaxae. ⁴ Petiriva, penacojiobiva, pijacuata apo naperabēxainae ēbajarapovanexa. Biji rajane petiriva baja itsa nacojioba, pamona pijaperabētocuenua xainatsi. Bajara pijinia itsi pebi ata. Peperabēto apo naperabēxainae ēbajaraponēnexa. Itsa baja nacojioba, pijava pijaperabētocuenua xainatsi. Nexata namataenetsia naperabēxainabeje. ⁵ Papetirivimē panenacojiobivi baja, pētsa panaperabēasivamē paneamonajivivecua. Bajara pijinia pacuenia paxamē ata papebijivimē. Pētsa panaperabēasivamē panijavajivivecua. Matapania pamatacabimaxēto Diosojavabelia panavajēcaejitsiamēbeje, pacatocopatabeje panavecuanaperabēasivanexabeje. Bajara pacuenia paexanaenamebeje itsa panajamatabēcuenejēpamebeje panavajēcaenexabeje Diosojavabelia. Pamatacabimaxēto panavajēcaejitsiamēbeje Diosojavabelia, bajarapamatacabimaxēto pētsa panaimoxoyotamebeje. Itsa baja paveretsianamebeje Diosojavabelia panaxavajēcaejavabeje, pētsa baja panavecuanaperabēasivamēbeje. Tsipaji panevajēnaeyabeliabeje itsa panavecuanaperabēasivamēbeje tsaponae tsipae, nexata dovathi pacajamatabēcuene yamaxētojobijitsipabeje. Nexata pibisiacuene paexanaejitsipamebeje, pacuene picani apo bepaexanaemēbeje.

⁶ Itsa pacamuxujobatsi panenacojiobinexa pibisiacuene paneexanaeyaniva panevitota, apo pacaitorobitsi daxita panenacojiobinexa. Pamonaē jitsipa penacojiobijava, nacojiobi. ⁷ Pacuenia xanē imasia ponaponajē, bajarapacuenia picani paxamē ata imasia panejinavanapaejava, pacatojitsipatsi. Itsiata baitsi jane Dioso pacaenēmē canacujitsia papecayavenonaponaexae, pacacaējēpa baja pacuenia paexanavanapaejitsiamē. Itsa monae paxamēyajuvenēvi itsacuenia Dioso jamatabēcuene caējēpaeyaxanaponatsi Dioso

pejitsipaecuenia petoexanavanapaenexa. Itsamonae pijinia saicaya itsacuenia Dioso jamatabëcuene caëjêpaeyaexanaponatsi.

⁸ Mapacuenia saicaya jumaitsinëje pimasiarubenaevijavabelia, pamonajivi pevecuatêpaevitsijavabelia ata. Bajarapamonae picani toxanepanatsi imasia pejinavanapaejava pacuenia xanê imasia ponaponajê. ⁹ Itsiata baitsi jane itsa apo caëjêpaetsi penajamatabëcuenaetsijava, nexata pibisiacuene pevitota pexanaeyaniva, roviaalia benacojioba. Bajarapamonae toxanepanatsi roviaalia penacojiobijava. Tspajivi itsa apo nacojiobi tsipae, êpibisiacuene pexanaenexa najamatabëxainaejitsipa. Nexata najamatabëcuene bijianaponaejitsipa.

¹⁰ Paxamê baja panenacojiobivi mapacuenia pacajumaitsitsije. Itsiata xanê apo tamatabëcuene. Pacuenia vajatuxanenê jumaitsi, pacaitorobatsi. Papetiriavimê, pêtša pavecuanaviabame paneamonajivi. ¹¹ Pacamuxujiobi atatsi, itsiata pova vecuanaviata pamona, bajarapova beponapona imasia. Apo benacojiobi baja. Itsa jume, benapitabeje icatsia pamonacovênêbeje. Bajara pijinia itsi pebi ata. Pebi apo bexuabi pijava.

¹² Paxamê tuatuajêta Dioso apo pejumecovênêtavanapaevi yabara, jumaitsinë mapacueniaje. Itsiata vajatuxanenê apo pejumaitsijume. Dioso pejumecovênêtsinë pijava, itsa apo pejumecovênêtsiva Dioso, itsiata bajarapova itsa jitsipa peponaponaenexa bajaraponêjavabelia, nexata bajaraponê pijava apo benavecuaitavetsi pevecuanaviatsinexatsi. ¹³ Dioso pijinia pejumecovênêtsiva pamona, itsa apo pejumecovênêtsinë Dioso, itsiata bajaraponê itsa jitsipa peponaponaenexa bajarapovajavabelia, nexata bajarapova pamona apo benavecuaitavetsi pevecuanaviatsinexatsi. ¹⁴ Dioso pejumecovênêtsiva pamona, apo jumecovênêtsi ata Dioso, itsiata bajaraponê Dioso copatsiaexanaenatsi mapanacuapijipibisiacuene pexanabiabijavami. Bajarapacuenia Dioso copatsiaexanaenatsi tsipajivi bajaraponê pijava Dioso pejumecovênêtsiva. Bajara pijinia itsane Dioso pejumecovênêtsinë pijava. Apo jumecovênêtsi ata Dioso, bajarapova Dioso copatsiaexanaenatsi mapanacuapijipibisiacuene pexanabiabijavami. Bajarapacuenia Dioso copatsiaexanaenatsi tsipajivi bajarapova pamona Dioso pejumecovênêtsinë. Bajarapacuenia Dioso itsa apo copatsiaexanae tsipae pibisiacuene pexanabiabijavami, nexata pacuenia Dioso coxitanê pamona Dioso apo pejumecovênêtsivi, bajarapacuenia coxitaetjitsipatsibeje Dioso. Nexata bajarapjivibeje caejivi pejumecovênêtsixae, Dioso coxitaenatsibeje bepenajuumecovênêtsijivibeje Dioso. ¹⁵ Itsiata Dioso pejumecovênêtsiva pamona, itsa apo pejumecovênêtsinë Dioso, itsa jamatabêvecuanaviatatsi, nexata becopata roviaalia pevecuanaviatsinexatsi. Dioso pijinia pejumecovênêtsinë pijava, itsa apo pejumecovênêtsiva Dioso, itsa jamatabêvecuanaviatatsi, nexata becopata roviaalia pevecuanaviatsinexatsi. Nexata Dioso pejumecovênêtsinë, pijava pevecuanaviatsinêtsi, bepimasiarucaenê penaexanaenexa. Pova pijinia Dioso pejumecovênêtsiva, pamona pevecuanaviatsivatsi, bepimasiarucaeva penaexanaenexa. Bajarapacuenia bexana imasia peponaponaenexa. Tspajivi Dioso nacajunata jamatabêcueneexanepanaeya vajajinavanapaenexa. ¹⁶ Papetiriavimê, paneamonajivi Dioso itsa apo pejumecovênêtsivi, paxamê xaniavaetsia panetsitajinavanapaexae tsane paneamonajivi, paneamonajivi ata meta najamatabêcuene copatsiana Cristojavabelia. Papebijivimê pijinia, panijavajivi Dioso itsa apo pejumecovênêtsivi, paxamê xaniavaetsia panetsitajinavanapaexae tsane panijavajivi, panijavajivi ata meta najamatabêcuene copatsiana Cristojavabelia. Bajaraxuata jamatabêcueneexanepanaeya panacajinavanapare. Pêtša panavecuaniabame.

¹⁷ Caenê canacujitsia tsiteca hexanapona pacuenia Dioso tocopatatsi pexanaponaenexa. Xua nacuenebapona Dioso pejunatsivajênaeyatsi Jesucristojavabelia penajamatabêcuene copatsinexa, bajaraxua mapamatacabi ataje tsiteca benacuenebapona. Bajarapacuenia itorobaponajê daxita Dioso pejumecovênêtsivijava pexanialivaisi itsa tsipaebanajetarucajê. ¹⁸ Ponê Dioso junatatsi pepua peperabêcaucutsinêtsi baja judiövi pijacuenia, bajaraponê baja bajarapacuenia Dioso bejumecovênêtaponapona. Ponê pijinia Dioso junatatsi abaxê apo peperabêcaucutsinë atatsi judiövi pijacuenia, bajaraponê baja bajarapacuenia Dioso bejumecovênêtaponapona. Apo benaperabêcaucutsiaexanae. ¹⁹ Vajanacaperabêcaucutsijava, amatamobi Diosojavabelia. Apo vajanacaperabêcaucutsijava ata, amatamobi Diosojavabelia. Dioso rajane vajanacaitorobicuenia vajajumecovênêtavanapaejava, bajara jane xua, namatamota Diosojavabelia. ²⁰ Caejivi canacujitsia benacuenebapona xua nacuenebapona Dioso pejunatsivajênaeyatsi. ²¹ Itsamonae baja paxamêyajuvênêvi Jesucristojavabelia penajamatabêcuene copatsivajênaeya, dajubicuenia canajetatsi itsamonaejavabelia amoneya petonacuenebavanapaenexa. Nexata bajarapamonae pijatuxanevi amoneya tonacuenebabiaba. Itsiata baitsi jane bajarapamonae Dioso baja pejunatsixaetsi Jesucristojavabelia penajamatabêcuene copatsinexa, pêtša natsinajamatabêxaina pijatuxanevi amoneya penacuenebiaexanabiabijavatsi yabara. Jamatejema saya

tonacuenebavanapae pijatuxanevi. Itsiata baitsi jane itsamatacabi itsa tocopiapatsianatsi pevecuapitsapaenexa baja bajarapamonae, nexata vecuapitsapaena amoneya petonacuenebabiabivi. ²² Ponë itsamonaejavabelia canajetatsi, nexata amoneya itsa tonacuenebaponapona, bajaraponë bitso pibisiacuene pexanabiabineconimi Cristo baja vecuajibiaexanatsi. Bajarapacuenia vecuajibiaexanatsi pamatacabi najamatabëcuene copata Cristojavabelia. Copata baja pibisiacuene pexanabiabijavami. Nexata Dioso pitorobicueniatsi exanapona. Bajara pijinia itsi ponë ata apo canajetsitsi itsamonaejavabelia. Itsa najamatabëcuene copata Cristojavabelia, bajaraponë Cristo pijajivitonë baja naexana. Nexata bajaraponë ata exanapona Dioso pitorobicueniatsi. ²³ Dioso baja cajena pacacomuata ayaimatamota. Bajaraxuata pëtsa baja panacopatame itsajivi ata papecajamatabëcuenebijianaenexa Dioso panejumecovënë tavanapaejavavecu. Itsa bajarapacuenia panacopatsipame papecajamatabëcuenebijianaenexa, nexata bajarapajivi bepapijajivimë tsipae paneexanavanapomenaxa papecaitorobicuenia. ²⁴ Bajaraxuata, xua baja panacuenebavanapame, tsiteca panevajënaeyabelia xaniavaetsia panacuenebavanapare Dioso pitabarata. Pacaenëmë canacujitsia panacuenebavanapare xua panacuenebavanapame pamatacabi abaxë Dioso apo pacajunatsi panejumecovënëtsinexa. Itsa apo pacaperabëcaucutsi judiövi pijacuenia, nexata bajarapacuenia pajinavanapare. Itsamonaejavabelia papeccanajetsixae, nexata amoneya itsa patonacuenebavanapame, bajarapacuenia tsiteca patonacuenebavanapare.

²⁵ Itsa panetoyaquinaremena, paneyanijobame abaxë apo penacojiobavanapae vi yabara. Apo yapëtaenë pacuenia vajatuxanenë jumatsi bajarapitsivi yabara. Itsi-ata baitsi jane pacatsipaebianatsi pacuenia sivanajamatabëxainajë bajarapitsivi. Dioso tajamatabëcueneta neyapëtaeyaxana taneitaxutotsoniataexae. Bajaraxuata pacatox-anezana pacuenia pacatsipaebijitsiatsi patanejumecovënëtsinexamë. ²⁶ Dioso vajajume-covënë tavanapae vi, nacatsiyaai bitso aeconoxae vajajinavanapaeepato abaxë mapanacu-ataje. Tsipaji itsamonaee vajanacaitoyaxae, nacabejiobiaexanaponaena. Bajaraxuata netsitaxanepana bajarapamonae itsa apo nacojiobavanapae. ²⁷ Itsa baja capanepaeya penacojiobivi, pëtsa xuaba pijava. Itsiata baitsi jane itsa abaxë apo nacojiobi, pëtsa jaita pijavanexa. ²⁸ Ponë baja capanepaeya nacojioba, apo pibisiacuene. Petiriva ata baja itsa nacojioba, apo exanae pibisiacuene. Aeconoxae daxita Dioso vajajumecovënëtsivi bitso vajanacatsiyaixae, pamonaee baja nacojioba, bajarapamonae toayapëbeje tsanetsi pevecuapanepaenexa bajarapapiayaicuene. Bajarapacuenia petoayapëbejeyanivatsi, bajarapamonae picani tojitsipajë imasia pejinavanapaeenexa.

²⁹ Tajamonae, mara pacuenia jamatabëpacajumatsitsije. Imoxoyo rabaja pevajënae vajatuxanenë icatsia pepatsijavanexatsica. Ajena, mapamatacabicujinaelia tsaneje, penacojiobivi ata bepimasiarubenaevicuenia asaëyata betonacuenebavanapa vajatuxanenë. ³⁰ Daxitajivi bejamatabëcueneenatsi ëDioso pijacuene petonacuenebavanapaeenexa. Pamonaee bitso najamatabëxaina peyajuvënë tãpaexae, bajarapamonae ata najamatabëxainaenejeva asaëyata betonacuenebavanapa vajatuxanenë. Apo bepena-jamatabëxainaevicuenia, bejinavanapa. Pamonaee ata jamatabëcuenebarëya tsavanapae, asaëyata betonacuenebavanapa vajatuxanenë. Apo bepejamatabëcuenebarëyaevicuenia betonacuenebavanapa. Pamonaee ata comuaca pexinaejavanexa, asaëyata betonacuenebavanapa vajatuxanenë. Asivaya apo betae xua natocomuaca. ³¹ Pamonaee ata, mapanacuata pexinaejava, canacuenebavanapa, bajarapamonae becanacuenebavanapa jamatabëcueneenënaenejevatsi bajarapajamatabëcuene. Tsipaji mapanacuapijicuene vajataejavami vereverecapona.

³² Apo pacatojitsipaetsi papecajamatabëcueneenaenexa mapanacuapijicueneje. Ponë abaxë imasia ponapona, jamatabëcueneenatsi ëvajatuxanenë pijacuene. Tsipaji jitsipa pesivajamatabëcuenebarëyanexatsi vajatuxanenë. ³³ Itsiata baitsi jane penacojiobinë yajavajamatabëcueneenatsi pevetsinexa pijava pesivajamatabëcuenebarëyanexatsi. ³⁴ Apo najamatabëcuenejãpaebeje pijinia penacojiobivabeje pimasiarucaevabeje. Pova apo nacojiobi, jamatabëcueneenatsi ëvajatuxanenë pijacuene. Jitsipa pexaniacuene pexanaponaenexa. Jitsipana pexaniacuene penajamatabëxainaponaenexa Dioso pesiva-jamatabëcuenebarëyanexatsi. Itsiata baitsi jane penacojiobiva yajavajamatabëcueneenatsi pevetsinexa pamona pesivajamatabëcuenebarëyanexatsi.

³⁵ Bajarapacuenia itsa pacajumatsitsi, apo penacojiobivi apo itavetsinë penacojiobi-ava. Patacjamatabëcuene yavenonaenexa raja, pacajumatsitsi bajarapacuenia. Tsipaji pacatojitsipatsi xaniavaetsia panejinavanapaeenexa. Vajatuxanenë bepatonacuenebavanapame daxita panejamatabëcueneta, panajamatabëcuene epatajërërëcaenejevamë.

³⁶ Ponë pexënatoyo xaina, itsa tsitaxanepanatsi pexënatoyo petonacojiobinexatsi, nexata betocopata penacojiobinexa. Tsipaji baja penaveretsiva tsaponaponaee. Bajarapova ata

baja itsa jitsipa penacojiobinexa, betocopata penacojiobinexa. Itsa tocopata pexénatoyo penacojiobinexa, apo pibisiacuene. ³⁷ Poné pijinia pexénatoyo itsa apo jitsipae abaxé penacojiobinexa, bajaraponé ata itsa najamatabécuenevereta apo petocopatsinexa pexénatoyo penacojiobijava, nexata bajaraponé ata pexaniacuene exana. ³⁸ Nexata poné apo tocopatsi pexénatoyo penacojiobinexa, bajaraponé itsanēvecua bitso pexaniacuene exana.

³⁹ Penacojiobiva baja acuenebi pevecuanaviatsinexa pamona. Tsipaji pamona piasaetsaponaponaeeepato, bajaraponé abaxé tsiteca pijava tsaponapona. Tsipaji bajara-pacuenia Dioso najumecopata. Itsiata baitsi jane pamona itsa vecuatēpatsi, bajara-pova tocopatatsi icatsia penacojiobinexa. Tocopatatsi penacojiobinexa ponējavabelia jamatabēnacojioba, itsa bajaraponé ata Dioso pejumecovēñetsinē. ⁴⁰ Itsiata bajarapova pamona pevecuatēpaecujinaetsi, imasia abaxé itsa ponapona, jamatabécuenearēya tsaponapona tsane ēDioso pijacuene pejamatabécueneenaponaexaetsi. Nexata baja itsa nacojiobiana, bevelia baja jamatabécuenearēya tsane. Pacuenia copiaya jamatabécuenearēya tsaponapona, apo itsi tsane baja. Bajarapacuenia najamatabēxainaj bajarapacuenie yabara. Bajarapacuenia itsa pacajumaittsi, Espiritu Santo neyjavacuaicuaijai.

8

Jumapecataeya pexanaenēanējavabelia perajutsiviyajuvēñējava yabara pelivaisi

¹ Jumapecataeya pexanaenēanē itsamonae tane bepjjadiosovi. Nexata bajarapamonae dajubi beyabiaba perajutsinexa bajarapavi jumapecataeya pexanaenēanējavabelia. Bajarapaviyajuvēñējava panexaejava ata yabara, paneyanijobame itsa panetoyaquinaremena. Nexata bajaraxua yabara juya mapacatoyaquinatsije. Xaniajai rabaja cajena. Daxitatsi baja cajena bajarapacuenie yapētanetsi. Pavi rajuta jumapecataeya pexanaenēanējavabelia, bajarapaviyajuvēñējava xae atatsi tsipae, apo nacaitacueniabi tsipae. Itsiata vajaxae-cujinae bajarapaviyajuvēñējava, itsa jamatabējumaittsi: “Xanē bitso yapētaniji pamona mapavije atsobabiaba matatoxenetsia,” itsa jamatabējaittsi, abeje rajane bajarapajamatabécuene. Tsipaji beayajamatabécuenejivitsi nataejitsipatsi bajarapamonaevecua. Biji rajane xanepana vajajamatabējumaittsinexa mapacueniaje: “Asivaya taniji Dioso patana-jujumecovēñetsivi, pamona atsobabiaba jumapecataeya pexanaenēanējavabelia perajutsiviyajuvēñējava. Nexata xanē ata apo xanē tsane bajarapaviyajuvēñējava. Nexata xaniavaetsia tsitaponaponaenajē bajarapamonae taneitaxutua ajamatabécuenesaēnexa Dioso-javabelia,” vajajamatabējajava xanepana. Bajarapacuenia itsa tsitaponaponsi Dioso pejumecovēñetsivi, nexata nacaitaxutuaajamatabécuenesaē tsaponae Diosojavabelia. ² Pajivi jamatabējumaittsi: “Xanē cajena bitso yapētaniji daxitacuene,” jamatabējai, bajarapajivi pejamatabécuene navēxaniabijivi. Abaxé ayajava tosaicatsi xaniavaetsia peyapētaenexa. ³ Itsiata baitsi jane pajivi Dioso jitsipa, bajarapajivi Dioso ata jamatabécuene yapētanetsi Dioso pejitsipaejava.

⁴ Nexata jitsipajē patacyapētaeyaexanaenexa itsamonae jumapecataeya pexanaenēanējavabelia perajutsiviyajuvēñējava pexaejava yabara. Vaxaitsi baja cajena yapētanetsi jumapecataeya pexanaenēanē apo pexaniajaicuene. Tsipaji saya jivi pecobeta pexanaejavanē. Yapētanetsi baja cajena caenē Dioso peponaponaejava. Pematatsēnēa baja cajena itsadioso ajibi. ⁵ Jivi raja apo yapētae. Bajaraxuata saya jamatabécuene navēxaniabiaya jumai tsabiabi: “Diosovi raja navitsiajinavanapa athēbētatsia. Jinavanapa mapanacuajava ataje,” jai tsabiabi jivi jamatabécuene navēxaniabiaya. ⁶ Itsiata vaxaitsi yapētanetsi caenē vaxa Dioso peponaponaejava. Bajaraponé daxitacuene pexanaenē. Bajaraponēnexa tojinavanapatsi. Caenē rabaja pijinia pepo vajatuxanenē Jesucristo. Bajaraponé pejamatabécuene ta exana daxitacuene. Bajaraponé pejamatabécuene tana nacacapanepaena vajaneconivecua.

⁷ Itsiata baitsi jane itsamonae Dioso pejumecovēñetsivi ata, abaxé apo yapētae pacuenia picani apo caējēpaetsi jumapecataeya pexanaenēanē pejamatabécuenebijianaenexatsi. Bajarapamonae pejevaxijavaveliacujinae jumapecataeya pexanaenēanē taeyabiaba bepiasaetsavanapaevi. “Papexaejava itsamonae rajutabiaba jumapecataeya pexanaenēanējavabelia, diosovijavabelia rajutabiaba bajaraxua,” sivajamatabējai tsabiabi bajarapamonae jamatabécuene navēxaniabiaya. Bajaraxuata bajarapamonae aeconoxae Dioso jumecovēñetsi ata, itsa xane jumapecataeya pexanaenēanējavabelia perajutsiviyajuvēñējava, bajarapamonae jamatabécuene navēxaniabiaya jamatabējumai tsabiabi: “Pibisiacuene meta exanajē Dioso pitabarata mapavi taxaexaeje,” jamatabējai tsabiabi. Tsipaji Dioso jumecovēñetsi ata, abaxé apo yapētae pacuenia picani apo caējēpaetsi jumapecataeya pexanaenēanē pejamatabécuenebijianaenexatsi. ⁸ Yapētanetsi rabaja vaxaitsi. Vajaxaejava yabara Dioso pexitsi apo nacaexanae. Xae atatsi, apo xae atatsinua, najēpabeje. Vajaxaejava apo nacavēnananeconitsiaexanae Dioso. ⁹ Paxae

atamēnua, apo paxae atamēnua, itsiata picani apo pacaitsacueniabi tsipae. Itsiata baitsi jane xania baja tsane. Dioso panenajujumecovēnētsivi asivaya panetaexae, pētsa patsitaexaname itsacuenejavayo ata, xua bepibisiacue taejitsipa bajarapamonae. Tsipaji itsa pacacuenetaejitsipa, exanaejitsipa bajarapajivi ata. Nexata Dioso pejumecovēnētsijavavecua pajopaeayaxanaejitsipame bajarapajivi. Tsipaji abaxē jamatabēcuenefaena Dioso pejumecovēnētsijava. ¹⁰ Paxamē pētsa panabaneme pabojavata jumapecataeya pexanaenēanējavabelia perajutsiviyajuvēnējava abatabiaba. Paxamē baja payapētaneme pacuenia apo pacaitsacueniabi picani tsipae, bajarapaviyajuvēnējava paxae atamē. Nexata itsa paxaejitsipame bajarajota, panexaejavata pacataejitsipa itsanē Dioso pejumecovēnētsinē, ponē abaxē bepibisiacue pexanaejava tane bajarapavi itsa naxaejitsipa. Nexata itsa pacajanitane, bajaraponē ata naxaejitsipa. Nexata penaxaexae, bepenaneconitsinē Diosojavabelia nataejitsipa. ¹¹ Paxamē picani bajarapitsinē matatoxenetsia paneyapētaexae, paxaejitsipame bajarapaviyajuvēnējava. Itsiata nexata bajarapacuenia pajamatabēcuenebijanaejitsipame, ponē Dioso pejumecovēnētsinē ata, abaxē jamatabēcuenefaena Dioso pejumecovēnētsijava. Bajaraponēnexa ata cajena Cristo sivatēpatsi. ¹² Bajarapacuenia itsa pajamatabēcuenebijanaejitsipame Dioso pejumecovēnētsijivi, nexata pananeconitsipame Cristojavabelia. ¹³ Bajaraxuata xanē itsa yapētaniji pacuenia itsajivi, Dioso pejumecovēnētsijivi, belia jopaejitsipa Dioso pejumecovēnētsijavavecua xanē tatsitaxaejava pejamatabēcueneta, nexata caeto ata apo tsitaxaenē tsipae bajarapaviyajuvēnējava asivaya tataexae bajarapajivi.

9

Pacuenia apóstolevi tocopatatsi, xua namatavenona, pevajētsinexa Dioso pejumecovēnētsivijavabelia yabara pelivaisi

¹ Payapētaneme rabaja mapacueneye. Xanē apo xae atanē jumapecataeya pexanaenēanējavabelia perajutsiviyajuvēnējava, itsiata Dioso netocopata daxitacue taexanaenexa Jesucristojavabelia tanajamatabēcuenecopatsixae. Payapētanemenua vajatuxanenē Jesucristo taneitapetsijava apóstolenēnaxanē. Taitaxutota baja cajena taniji vajatuxanenē Jesús. Paxamē ata patacatsipaebixae Jesucristo pelivaisi, nexata baja panajamatabēcuenecopatame Jesucristojavabelia. Tsipaji asaēyata tonacuenebaponaponajē vajatuxanenē. ² Itsamonae apo beapóstolenēnē netae ata, itsiata paxamē apóstolenēcuenenē paneyapētaneme. Patacatsipaebixae pexanialivaisi, paxamē baja vajatuxanenē pajumecovēnētame. Bajaraxuata picani daxitajivi xaniavaetsia beneyapētane apóstolenēcuenenē.

³ Itsajota pexanialivaisi jivi tsipaebaponaponajē, Dioso picani netocopata tanerajutsinexa tanamatavenonaejavaxi. Itsamonae paxamēyajuvēnēvi nejumeeababiaba livaisi tatsipaebabiabijava mapacueniaje. ⁴ Paapóstolevinē itsa pananeconibajē Dioso pijacue, panetocopata itsajota pexanialivaisi patsipaebavanapajē patanerajutsinexa pataxaejava, pataapaejava ata. ⁵ Itsa tanacojiobinē tsipae, xanē ata pijinia Dioso netocopatsipa tabarēponaenexa tajava, Dioso pejumecovēnētsiva. Bajarapacuenia netocopatsipa tsipaji bajarapacuenia exanavanapa itsamonae apóstolevi. Vajatuxanenē peyujapijivi ata, apóstolenē Pedro ata, pijava barēponabiaba. ⁶ Itsamonae itsa pacatsipaeba Cristo pelivaisi, pajamatabēcueneyavenonabiabame penamatavenonaejava yabara. Itsiata baitsi jane paxanēbeje Bernabēbeje panacuenebabiabajēbeje patajacuatabeje patanaevetsinexabeje. Bajarapacuenia picani apo benacuenebinēbeje patajacuatabeje patanaevetsinexabeje. Nexata picani paxamē, paxanēbeje ata, bepanerajutame patanamatenonaejavaxibeje. Tsipaji paxanēbeje Cristo pelivaisi patacatsipaebabiabixaebeje, Dioso picani panetocopatabeje patanerajutsinexamē patanamatenonaejavaxibeje. ⁷ Payapētaneme baja cajena mapacueneye. Itsanē itsa tonacueneba pijatuxanenē, barajutatsi pexaejava. Pamonae ata pijinia vajabitsaē naexanavanapa, itsa rajutaponatsi pexaejava, apo matamotaponae pexaejavamatamo pijapalatata. Jume cajena. Tocomuatabiabatsi ponē itorobatsi. Pamonae pijinia xaina uvabacabo, itsajivi ata apo janitavetsi pexaeyaniva penotsicuaiyajuvēnējava. Pamonae pijinia itsanē pijaoveja toeveta, itsajivi ata apo janitavetsi pemiujucabarēmeyajuvēnējava piapaeyaniva. Jume cajena. ⁸ “Maraeta pacuenia Pablo nacajumaitsi je saya jivi petsitaxanepanaecueniatsi vaxaxanavanapaenexa,” pajamatabējamē pētsa. Tsipaji rabaja Dioso pejumelivaisibaxutota ata bajarapacuenia jumaitsi. ⁹ Dioso pejumelivaisibaxutota jumaitsi pacuenia bueyu copatatsi pexaejava pexaenexa penacuenebijavata ata. Jumaitsi mapacueniaje: “Pabueyu canacuenebame trigoxu pecatotanabataxubinexa, pētsa pumuxatatame nepumuxatatabiabijavata. Pētsa pumuxatatame trigoxu pexaenexa pecatotanabataxubinjavata,” jai Dioso pejumelivaisibaxutota. Bajarapacuenia Dioso pejumelivaisibaxutota itsa jumaitsi, ēbueyu yabara apo jumaitsi. ¹⁰ Biji rajane bajarapacuenia Dioso

pejumelivaisibaxutota jumaitsi vajanacayapëtaeyaexanaenexa vajamatamotsijavanexa vajacatonacuenebinë. Ponë canacueneba iracuemo itsanë pijatrigoxu petoubinexa, penacuenebijavata jamatabëjumaitsi: “Pamatacabi naveretsiana trigoxu, bajarapaxuyajuvënëjava nerajutsiana tatonacuenebimatamo,” jamatabëjai. Nexata penaveretsimat-acabi trigoxu rajutatsi. Ponë ata icatsia juya trigoxu penaveretsimat-acabi totan-abataxuaba, bajaraponë ata jamatabëjumaitsi: “Mapatrigoxuyajuvënëjavaje nerajutsiana tatonacuenebimatamo,” jamatabëjai. Nexata rajutatsi. Bajara pijinia pacuenia Dioso pijacuene patatonacuenebivi patanamatavenonaejavaxi, paxamë bepanerajutame Cristo pelivaisi patacatsipaebijamatabëcuene. ¹¹ Paubajë baja cajena panejamatabëëthëtota Dioso pejumelivaisi. Jica, nexata juya itsa pacajamatabëcueneevetsipatsi patanerajutsinexamë patanamatavenonaejavaxi, ¿pacatsitaayajava tsaja tsipae bajarapacuene? ¹² Paxamë rabaja Dioso pejumelivaisibaxutota papecaitorobicuenia, parajutabiabame itsamonae penamatavenonaejavaxi papecatsipaebijamatabëcuene Cristo pelivaisi. Paxonë biji picani panetoxanepana copiyaja patanerajutsinexamë itsamonaevecua.

Dioso picani panetocopata patanerajutsinexamë patanamatavenonaejavaxi Cristo pelivaisi patacatsipaebaponaejamatabëcuene. Itsiata apo pacavajëtsitsi patanerajutsinexamë. Biji rajane piyapëbejecuenia panatonacuenebaponajë patajacuata patanaevetsinexa bajarapacuenia. Apo pacavajëtsitsi caeto ata patanerajutsinexamë patanamatavenonaejavaxi. Itsa pacavajëtsipatsi, itsajamatabëcuene meta paxainaejitsipame paxanëjavaberena. Nexata meta apo pajumecovënëtsimë tsipae patacatsipaebilivaisi, pexanialivaisi, Cristo pelivaisi. ¹³ Payapëtaneme rabaja mapacueneje. Templobota Dioso petonacuenebivi, tocopatsi bajara patemplobopijipexaejava pexaenexa. Baitsi pamonaevetsinexa altarnënëjavata, itsajota dajubi tobeyabiaba ofrendacuenia perajutsinexa bajarapavi Diosojavabelia, bajarapamonae ata Dioso tocopatsi pexaenexa bajarapaviyajuvënëjava. ¹⁴ Bajara pijinia pacuenia vajatuxanenë Jesucristo itoroba Dioso pejumelivaisi petsipaebaponaeivi penamatavenonaejavaxi perajutsinexatsi. Pamonaevetsinexa pet-sipaebilivaisitsi, bajarapamonae juya berajutapona xua namatavenona petsipaebivitsi. ¹⁵ Itsiata baitsi jane xanë bajarapacuenia netocopatsi ata, apo pacavajëtsitsi itsacuenejavayo ata. Mapabaxutoje pacatoyaquinae atatsi, apo pacatoyaquinaetsi patanerajutaponaenexamë itsacuenejavaxi. Bitso cajena jamatabëcuenebarëyanë. Tsipaji Cristo pelivaisi pacatsipaebabiabatsi, apo panerajutsi atamë itsacuenejavayo ata. Bajaraxuata baja cajena apo jitsipaenë patanematamotsijavamë. Itsa panematamotsijitsiamë tsipae, nexata jitsipaajitsipajë tatëpaejava patanematamotsijivanamë. Tsipaji itsa panematamotsipame, copiarucaejitsipa baja pacasivajamatabëcuenebarëya tsabiabijavami. Tsipaji amoneya patacatsipaebabiabixae Cristo pelivaisi, pacasivajamatabëcuenebarëyatsi tsabiabi.

¹⁶ Apo jamatabëjumaitsinë: “Ayaijamatabëcuenenënë tatsipaebinëxae jivi pexanialivaisi pecapanepaelivaisinexatsi Diosojavabelia,” apo jamatabëjanë. Jume baja cajena. Pexanialivaisi jivi tsipaebabiabajë. Tsipaji baja vajatuxanenë nitoroba. ¿Bitso meta naneconitsipajë Diosojavabelia jivi itsa apo tsipaebinë tsipae bajarapalivaisi! ¹⁷ Dioso nitorobinejeva, saya xanë tajamatabëcueneta jivi itsa tsipaebaponaejitsipajë pexanialivaisi, Jesucristo pelivaisi, nexata jamatabëcuene evetabiabijitsipajë jivi tanematamotabiabinexa pexanialivaisi tatsipaebabiabijamatabëcuene. Itsiata baitsi jane pexanialivaisi jivi tsipaebaponajë vajatuxanenë taneitorobixae. Jumecovënëtaponaponajë pacuenia Dioso nitorobapona. ¹⁸ Bajaraxuata apo nematamotsi ata, tsipaebaponajë pexanialivaisi jivi pecapanepaelivaisinexatsi Diosojavabelia. Dioso netocopatsi ata jivi tanematamotsinexa pexanialivaisi tatsipaebaponaejamatabëcuene, itsiata apo vajëtsinë tanerajutsinexa itsacuenejavayo ata. Jivi itsa tsipaebaponajë bajarapalivaisi, bitso jamatabëcuenebarëyanë tsaponae. Bajaraxuata apo jitsipaenë tanematamotsijava.

¹⁹ Apo tanecanajëtsinë raja dajubinëcuenia itsamonaejavabelia amoneya tatonacuenebinexa. Itsiata baitsi jane daxitajivi beprijavitonënëcuenia ponaponajë. Bajarapacuenia exanaponaponajë itsamonae ayaiBITSaëtöxaneto ata tayavenonaenexa, penajamatabëcueneecopatsinexa Cristojavabelia, pecapanepaenexatsi Diosojavabelia. ²⁰ Judíovi jumecovënëtsijijnavanapa bajayata Dioso Moiséspijinëta penajumecopatsilivaisi. Xanë picani apo jitsipaenë taexanaponaponae pacuenia itoroba Dioso Moiséspijinëta penajumecopatsilivaisi. Tsipaji baja najamatabëcueneecopatajë Cristojavabelia tajaneconi tanevecuaajibiaexanaenexa. Itsiata judíovijava itsa naponaponabiabajë, pacuenia Dioso Moiséspijinëta penajumecopatsilivaisi itorobatsi, judíovi itsa exana, xanë ata bajarapacuenia naexanabiabajë. Bajarapacuenia naexanabiabajë bajarapamonae judíovi xaniavaetsia tanenamuxunaevetsinexa Cristo pelivaisi itsa tsipaebajë. Nexata judíovi itsa najamatabëcueneecopata Cristojavabelia, pecapanepaenexatsi Diosojavabelia. ²¹ Bajara pijinia pacuenia apo judíovijava ata itsa naponaponabiabajë, judíonë atanë, pacuenia apo judíovi jinavanapa, cuenejëpaeja naponaponabiabajë.

Bajarapacuenia apo judíovi cuenejëpaeya naponaponabiabajë bajarapamonae xaniavaetsia tanenamuxunaevetsinexa Cristo pelivaisi itsa tsipaebajë. Nexata apo judíovi ata itsa najamatabëcueneocopata Cristojavabelia, pecapanepaenexatsi Diosojavabelia. Bajarapamonae apo judíovi apo jumecovënëtsijajinavanapae bajayata Dioso Moiséspijinëta penajumecopatsilivaisi. Bajarapamonaejava naponaponabiabi atanë, itsiata apo copatsinë tajumecovënëtsijava Dioso pejumelivaisi saicaya tajitsipaecuenia taponaponaenexa. Jume baja cajena. Tsipaji jumecovënëtajë Cristo taneitorobicuenia. ²² Itsamonae abaxë ajena najamatabëcueneocopaba Cristojavabelia. Nexata abaxë apo ajamatabëcuenesaë tsavanapae Dioso pejumecovënëtsijava. Bajarapamonaejava cuenejëpaeya naponaponabiabajë. Bajarapacuenia cuenejëpaeya naponaponabiabajë tajamatabëcueneyavenonaenexa bajarapamonae pevajënaeyabelia piamatabëcuenesaë tsavanapaeenexa vajatuxanenëjavabelia. Baitsi pacuenia caeviria canacujitsia jivi pijasalinaicuenia jinavanapa, bajarapacuenia xanë ata cuenejëpaeya naponaponabiabajë. Bajarapacuenia cuenejëpaeya naponaponabiabajë bajarapamonae tajamatabëcueneyavenonaenexa. Jamatabëcueneyavenonaejitsianë bajarapamonaejavuvënëvi ayaiabitsaëtöxaneto ata penajamatabëcueneocopatsinexa Cristojavabelia pecapanepaenexatsi Diosojavabelia. ²³ Bajarapacuenia exanaponaponajë baja jivi pejumecovënëtsinexa pexanialivaisi pecapanepalivaisinexatsi Diosojavabelia, bajarapamonae ata taneyajavacapanepaenexatsi Diosojavabelia.

²⁴ Payapëtaneme rabaja mapacueje. Penayacobivi pecujinaejinaejava, bacujinaejina daxita. Itsiata baitsi jane ponë bitsojina pecujinaejinaejava daxita penayacobivi matatoxenetsia, bajaraponë caenë bapita xua tsipaebatsi pecujinaejinaematamo, premiovënëjava. Pacuenia penayacobivi pecujinaejinaejava, daxitasaëta bacujinaejina, bajara pijinia pacuenia paxamë ata daxita panesaëta panevajënaeyabelia patonacuenebavanapare Dioso. ²⁵ Daxita pamonaë penayacobivinexa pecujinaejinaejava, tajëvelia banajamatabëveretavanapa pebitsojinaenexa itsamonae matatoxenetsia. Naxaniavaetavanapanua. Daxitamatacabi canacujitsia nasisaëjëbavanapa caenë canacujitsia. Bajarapamonae najamatabëcuenesaëtavanapa, daxita xua abeje, pexanaeyaniva piamajalisänexa. Bajarapacuenia naxaniavaetavanapa, penayacobijavata itsamonae matatoxenetsia pebitsojinaenexa, perajutsinexatsi corona, naebaxucorona. Itsiata baitsi jane bepijia saya piabejcoronanexa. Biji rajane vaxaitsi Dioso vajajumecovënëtsivi, Dioso tonacuenebavanapatsi athëbëtsia vajanacarajutsinexa xua nacatsipaeba, apo peverevereacajavanexa. ²⁶ Pacuenia pebitsojinaenë asaëyata cujinaejina rovia pepatsinexalia petocaejëtsijavabeliatsi, bajara pijinia pacuenia xanë ata asaëyata tavajënaeyabelia exanaponaponajë vajatuxanenë taneitorobicuenia. Tonacuenebaponaponajë asaëyata. Apo tonacuenebinë saya jema penaxuabinexa tatonacuenebijava. ²⁷ Bajaraxuata naperabëevetsia naevetaponaponajë pibisiacuene taexanaeyaniva. Bajarapacuenia naperabëevetsia naevetaponaponajë tsipajë jitsipajë vajatuxanenë tanesivajamatabëcuenebayera tsaponaejava itsamonae itsa tsipaebaponajë pexanialivaisi. Apo jitsipaanë tanecopatsiaexanaejava Dioso tatonacuenebijava. Itsamonae pexanialivaisi tatsipaebicujinae, bijiata itsa ponaponaejitsipajë, Dioso necopatsiaexanaejitsipa tatonacuenebijava.

10

Pemuxujobilivaisi penavajëcaayaniva jumapecataeya pexanaenëanëjavabelia yabara pelivaisi

¹ Tajamonae, pacatojitsipatsi icatsia panenajamatabënapitsinexa pacuenia bajayatami vajasalinaivimi Moiséspijinë barëpitsaparena Egipto nacuaverena. Moiséspijinë Dioso tsitajëtaponatsi itsaxuayo vajasalinaivimi barënajetarucaejitsia. Vajasalinaivimi pematsenënetsia itarërebo namataxainaeja najetaruca. Nexata bajarapaitarërebo vajasalinaivimi pënanajetarubena. Daxitabitsaëto vajasalinaivimi Moiséspijinë barënicabarena Rojovënë manuamenemaxërana epatuarena. ² Pacuenia pebi ita bautisabatsi merata, naexana Dioso pijajivitonë, bajara pijinia pacuenia vajasalinaivimi Moiséspijinë pijajivi naexana itsa pënaponarena Egipto nacuaverena. Moiséspijinë pijajivi naexana vajasalinaivimi itarërebo pebëxëpana itsa pënanajetarubena Moiséspijinë. Rojovënë manuamenemaxërana epatuarena ata itsa barënicabarenatsi, Moiséspijinë pijajivi naexana vajasalinaivimi. ³ Daxita vajasalinaivimi caevirijava pexaejava najuanabanepona ita najetarubena bajarapatusato nacuayarena. Papexaejava Dioso rajutaponatsi, bajarapamonaemi xaepona. ⁴ Itsa najetarubena, caeviriamera najuapaepona, Dioso perajutsiratsi. Bajarapamera Dioso tocapitsapatsi ibotoxanetojavaverena. Bajarapamatacabi vajasalinaivimi Cristo yajavaponatsi. Cristo rabaja cajena bajarapabotoxaneto. ⁵ Itsiata baitsi jane vajasalinaivimiyajuvënëvi, caejiviyobeje, saya

jumecovëneta pacuenia Dioso najumecapanepaeya jumaitsitsi. Nexata bajarapajiviyobeje Dioso sivajamatabëcuenebarëyatsi. Daxita itsamonae apo jumecovënëtsi Dioso. Bajaraxuata vajasalinaivimi Dioso verebiabatsi petusato nacuata.

⁶ Nexata vaxaitsi becanaëjëtatsi pacuenia vajasalinaivimi bajayata Dioso verebiabatsi pibisiacuene pexanaexae. Nexata vaxaitsi ata vajajamatabëëthëtovetsina becanaëjëtatsi pibisiacuene vajaexanaeyaniva. ⁷ Bajaraxuata apo benavajëcaetsi jumapecataeya pexanaenëanëjavabelia pacuenia bajayata vajasalinaivimiyajuvënëvi navajëca jumapecataeya pexanaenëanëjavabelia. Dioso pejumelivaisibaxutota jumaitsi pacuenia vajasalinaivimi pibisiacuene exanavanapa, fiesta itsa toexana jumapecataeya pexanaenëanëxaxa. Dioso pejumelivaisibaxutota vajasalinaivimi yabara jumaitsi mapacueniaje: “Bajarapamonae enabiaba penabaninexa, piapaenexanua. Bajaraxuacujinae nonobapunabiaba peyavajibinexa,” jai Dioso pejumelivaisibaxutota vajasalinaivimi yabara. ⁸ Apo hexanaetsinua vajavitota pibisiacuene pacuenia bajayata vajasalinaivimiyajuvënëvi exana. Bajarapitsivi tēpa caematacabita veintitrés mül pajivibeje. ⁹ Apo bejamatabëcueneëjëtitsinua vajatuxanenë pacuenia bajayata vajasalinaivimiyajuvënëvi Dioso jamatabëcueneëjëta. Papibisiacuene vajasalinaivimi pejamatabëëthëtota natojitsipa pexanaenexa, Dioso jamatabëcueneëjëtisiaya exanavanapa, peyapëtaenexa pacuenia Dioso exanaejitsia bajarapamonaejavaberena. Bajaraxuata vajasalinaivimi jomo pesinicujiruatsi vereverecapona. ¹⁰ Pëtsa panaepaname Dioso pejumelivaisi papecatsipaebavanapaevijavabelia pacuenia bajayata vajasalinaivimiyajuvënëvi anaepanabiaba Moisésipijnëbeje Aarónpijnëbejejavabelia. Bajaraxuata Dioso itoroba pijaängel peverebiabinexatsi vajasalinaivimiyajuvënëvimi.

¹¹ Bajarapacuenia exanatsi bajayata vajasalinaivimi. Dioso baja cajena nacayapëtaeyaexana pacuenia bajayata vajasalinaivimi Dioso naneconitsiaexanatsi pibisiacuene pexanaexae. Bajarapalivaisi itanerubena Dioso pejumelivaisibaxutota vajanacamuxujibinexa, vaxaitsi ata bajarapacuenia pibisiacuene vajaexanaeyaniva. Vaxaitsi rabaja nacua pevereverecaetabarayota jinavanapatsi. ¹² Itsa pajamatabëjumaitsimë: “Xanë cajena ajamatabëcuenesaënë Dioso tajumecovënëtsijava. Nexata apo exanaenë tsane pibisiacuene pacuenia bajayata tajasalinaivimi exana,” itsa pajamatabëjamë, jxania baja tsane! Tsipaji paxamë ata bajarapacuenia pibisiacuene paexanaejitsipame. ¹³ Xua baja aeconoxae pataepoename, dovathi pejamatabëcueneta papecajamatabëcueneëjëtitsijava, bajaraxua daxita Dioso pejumecovënëtsivi tocopiapataponatsi mapanacuataje. Itsiata baitsi jane Dioso pacayavenonaponaena pacuenia najumecapanepaeya jumaitsi. Dioso cajena apo pacacopatsi tsane dovathi papecajamatabëcueneëjëtaponae exana paneajamatabëcuenesaëjava matatoxenetsia. Nexata dovathi itsa pacajamatabëcueneëjëta, itsiata Dioso pacayavenonaponaena paneajamatabëcuenesaë tsaponae exana. Nexata papecajamatabëcueneëjëtitsijava, pavecuaepaponaename pibisiacuene paexanaejevamë.

¹⁴ Tajamonae bitso patacaasivavi, jumapecataeya pexanaenëanëjavabelia itsamonae penavajëcaecuene, nayajivitaeya pajinavanapare. ¹⁵ Pacajamatabëcuenecaëjëpa baja cajena panejumeyapëtaenexa patacatsipaebilivaisi. Nexata panejumecanaëjère patacatsipaebilivaisi paneypapëtaenexa itsa pexaniajailivaisi. ¹⁶ Itsa nacaetuanatsi vajanajamatabënapitsinexa xua yabara Cristo nacasivatëpa, najuaxanetsi pan. Najumatavejëaapatsinua vajamatavëjëaapaera. Nexata pan yabara, vajamatavëjëaapaera ata yabara, Diosojavabelia jumaitsitsi: “Pexaniacuene bitso panetoexanave. Panerajutame pan. Panerajutame patamatavëjëaapaera ata,” jaitsi. Itsa nacaetuatatsi vajanajamatabënapitsinexa xua yabara Cristo nacasivatëpa, caebitsaëto naexanatsi Cristo yajava, ponë nacasivatëpa cruzata. ¹⁷ Ayaibitsaëtoexaneto atatsi, caepan itsiata najuaxanetsi. Nexata vaxaitsi Cristo vajayajavajinavanapaexae, caebitsaëtotsi Cristo pijajivitsi naexanatsi.

¹⁸ Pacanaëjère pacuenia judiovi baexana. Itsamonae dajubi beyabiaba bajarapavi ofrendacuenia perajutsinexa Diosojavabelia. Nexata pamonaenaxane bajarapavi, caebitsaëto Dioso pijajivi naexana. ¹⁹ Mara pajamatabëcuene yabara jumaitsinëje. Jumapecataya pexanaenëanë, itsacuenejavayo ata pexanaenexa, apo caëjëpaetsi. Bajara pijinia itsi pavi ata jumapecataeya pexanaenëanëjavabelia rajuta. Apo caëjëpaetsi jivi xae ata pejamatabëcuenebijianaenexatsi. Tsipaji jumapecataeya pexanaenëanë, bajarapavi apo ithoianae bajarapavivecua. ²⁰ Nexata abaxë pamonaen Dioso apo yapëtae, dajubinë itsa tobeyaxuaba ofrendacuenia pevi perajutsinexa jumapecataeya pexanaenëanëjavabelia, bajarapavi dovathinexa saya. Apo Diosonexa cajena. Bajaraxuata apo pacatojitsi-paetsi panenaxaenexa bajarapamonaejavata. Itsa panaxaejitsipame bajarapamonaejavata, nexata caebitsaëto panaexanaejitsipame dovathi yajava. ²¹ Paxamë baja panenabanivi, paneapaevinua, vajatuxanenë pijamesata. Nexata baja acuenebi panenabaninexa, paneapaenexanua, itsajota Dioso apo pejumecovënëtsivi dovathi pijacuene

exanavanapa. ²² Vaxaitsi Dioso vajajumecovënëtsivi, apo jitsipaetsi vajatuxanenë vajanacabaraanaepanaejava. Dioso pijacuene, dovathi pijacuene ata, anijacuenebeje itsa exanaponaejitsipatsi, nexata vajatuxanenë nacabaraanaepanaejitsipa. Vaxaitsi cajena apo vecuaasaëtsi vajatuxanenë. Nexata apo vecuapanepaetsi tsipae vajatuxanenë itsa nacananeconitsiaexana.

Pacuenia Dioso pejumecovënëtsivi bejinavanapa itsamonae pejamatabëcuenebijianaeyaniva yabara pelivaisi

²³ Xaniajai rabaja pacuenia itsamonae jumaitsi. Mapanacuata navita vajaexanaejavanexa. Itsajivi ata apo nacaitavetsi bajarapacuene vajaexanaenexa. Itsiata baitsi jane apo nacatoxanepanae daxita bajarapacuene vajaexanaenexa. Daxitacuene, xua itsajivi ata apo nacaitavetsi vajaexanaenexa, exanae atatsi tsipae, itsiata apo nacajamatabëcueneasaëyaexanae tsipae Dioso vajajumecovënëtsijava. ²⁴ Pëtsa pajamatabëjumaitsimë: “¿De tsaeta xua natoexanaenajë, xua èxanënexa netoxanepanaejitsia?” pajamatabëjamë pëtsa. Biji rajane pajamatabëjumaitsimëre. “¿De tsaeta xua toexanaenajë, xua itsamonaenexa toxanepanaejitsiatsi?” pajamatabëjamëre.

²⁵ Dioso baja cajena pacatocopata panexaenexa itaxutojema. Nexata pacatocopata panexaenexa pavi canajeta pecanajetsibota. Nexata pëtsa payanijobame. “¿Matsa pavi jumapecataeya pexanaenëanëjavabelia peyajuvënërajutsivije?” pajamë pëtsa. Itsa payanijobijitsipame bajarapacuenia: “Jājā, bajarapayajuvënëvi,” pacajai tsipae. Nexata paxamë pajamatabëjumaitsimë tsipae bajarapavi yabara: “Mapavije itsa xaejitsipajë, nexata pibisiacuene exanaejitsipajë Dioso pitabarata,” pajamatabëjamë tsipae. Saya pacomuare payanijobinejevamë. ²⁶ Dioso baja cajena pacatocopata itaxutojema panexaenexa. Tsipaji mapanacuaje, daxita mapanacuapijicuene ataje, Dioso baja cajena pijajava.

²⁷ Dioso apo pejumecovënëtsijivi ata itsa pacajunata panenanabaninexa pijaboyabelia, panaponare panenanabaninexa itsa pajitsipame. Xua pacaabata, paxaema payanijobinejevamë. “¿Matsa pavi jumapecataeya pexanaenëanëjavabelia peyajuvënërajutsivije?” pajamë pëtsa. ²⁸ Itsamonae Dioso pejumecovënëtsivi bepibisiacuene pexanaejava taejitsipa itsa xaejitsipa bajarapayajuvënëvi. Nexata panexaevajënaeya, bajarapamonaeyajuvënënië itsa pacajumaitsi: “Mara pavije jumapecataeya pexanaenëanëjavabelia ofrendacuenia peyajuvënërajutsivije,” itsa pacajai, pëtsa patsitaxaneme. Itsa apo patsitaxaemë tsane, nexata apo pajamatabëcuenebijianaemë tsane bajaraponë. ²⁹ Itsa patsitaxaejitsipame, bajaraponë ata naxaejitsipa. Nexata bajaraponë jamatabëjumai tsipae: “Pibisiacuene baja cajena exanajë Dioso pitabarata mapavije tanaxaexae,” jamatabëjai tsipae.

Bajarapacuenia patacatsipaebijava, itsanë Dioso pejumecovënëtsinë itsa jumetaena, jamatabëcuenenavëxaniabiaya meta jumaitsi tsane mapacueniaje: “Jumapecataeya pexanaenëanëjavabelia perajutsivijajuvënëjava taxaeyabiabinexa, Dioso netocopata. Nexata baja xaeyabiabajë. Itsiata icatsia aeconoxae nitaveta itsanë Dioso pejumecovënëtsinë itsa tsitaxaniji bajarapayajuvënëvi, bepibisiacuene petaeyaniva. ¿De meta xuajitsia xanë epatua copatsipajë bajarapayajuvënëvi taxaeyabiabijavami? ³⁰ Taxaevajënae bajarapavi, ‘Xanepana rabaja,’ janë tsabiabi Diosojavabelia tanerajutsixae taxaenexa. ¿Detsa nexata xuajitsia jivi nebaracuaicujai tsipae bepibisiacuene taexanaenë taxaejamatabëcuene bajarapayajuvënëvi?” jai meta tsane jamatabëcuenenavëxaniabiaya itsanë Dioso pejumecovënëtsinë. ³¹ Mara pacuenia pacatsipaebatsije panecopatsinexa paneexanabiabijavami ata, itsajivi ata panejamatabëcuenebijianaeyaniva panetsitaexanaejava pejamatabëcuenet. Itsa paxaneme, itsa papamenua, daxitacuene itsa paexanamenuea, xaniavaetsia itsamonae patsitaexanavanapaname paxamë panetsitaexanaejava yabara jivi papecasivajamatabëjumaitsinexa: “Dioso cajena ayajamatabëcuenenë. Tsipaji pijajivi yavenona xaniavaetsia petojinavanapaneaxatsi,” papecasivajamatabëjainexa. ³² Bajaraxuata pëtsa patsitaexaname itsacuenejavayo ata itsajivi ata Diosoecuata itsajamatabëcuene pexainaeayaniva. ³³ Pacuenia xanë tsitaexanaponaponajë itsamonae tanesivajamatabëcuenebarëyanexa, bajarapacuenia paxamë ata patsitaexanavanapare itsamonae. Apo najamatabëxainabiabinë taexanaenexa xua èxanënexa netoxanepana. Biji rajane najamatabëxainabiabijë tatoexanaenexa xua toxanepanatsi itsamonae ata. Bajarapacuenia toexanaponajë bajarapamonae ata Dioso pejumecovënëtsinexa pecapanepaenexatsi pijaneconivecua.

11

¹ Itsamonae patsitaexanavanapare pacuenia xanë pacatsitaexanaponatsi. Xanë raja pijinia cuenejèpaeya ponaponajë Cristo.

Pacuenia petirivi namataacatsiaya bejunua Dioso pejumecovënëtsivi penacaetuatabi-abibota yabara pelivaisi

² Tajamonae, panejamatabë najinabiabame. Pacuena pacaitorobatsi, bajarapacuenia paexanavanapamenua. Bajaraxuata pacasivajamatabë cuenebarëyatsi. ³ Pacatojitsipatsi paneyapëtaenexa mapacueneye. Athëbëvetsica Dioso itorobicatsi Cristo. Nexata juya mapanacuataje Cristo caepebi canacujitsia itorobapona. Bajara pijinia itsi pebi ata. Pebi juya itorobapona pijava. Pebi peyaiyataenexa Cristo, apo benamataacatsi papaëbërëpanayota jivi penacaetuatsibota. ⁴ Bajaraxuata pebi Diosojavabelia penavajëtsijavata, itsamonaejavabelia ata Dioso pejumelivaisi petsipaebijavata, itsa namataacatsipa papaëbërëpanayota, nexata Cristo athëbëvetsica yapijiviaura tsipaetsi. ⁵ Petiriva rajane pamona pejumecovënëtabiavacuene itsamona peyapëtaenexatsi, benamataacata papaëbërëpanayota jivi penacaetuatsibota. Bajarapacuenia benamataacata penavajëtsijavata Diosojavabelia, itsamonaejavabelia petsipaebijavata ata Dioso pejumelivaisi. Itsa apo namataacatsi tsipae, nexata pamona yapijiviaura tsipaetsi. Pacuena petiriva amatura tsipae itsa mataxunaejitsipatsi, bajara pijinia pacuenia petiriva pamona yapijiviaura tsipaetsi, papaëbërëpanayota itsa apo namataacatsi tsipae jivi penacaetuatsibota. ⁶ Petiriva itsa apo namataacatsi tsipae papaëbërëpanayota, pacuenia pebi apo namataacatsi, nexata itsa bemataxunatsi pacuenia pebi bamataxunatsi, bajarapova namatacaura tsipae. Bajaraxuata petiriva jivi penacaetuatsibota, benamataacata papaëbërëpanayota pamona peyapijiviaurayanivatsi. ⁷ Dioso itsa exana pebi, nacujirujëpaeyaexana. Nexata pacuenia itsi Dioso, bajara itsi pebi. Nexata pebi xaniavaetsia itsa ponapona, jivi pecanaëjëtsinexa Dioso bitso ayajamatabëcuene pexainaeñecuene. Bajaraxuata pebi apo benamataacatsi papaëbërëpanayota penavajëtsijavata Diosojavabelia, itsamonaejavabelia Dioso pejumelivaisi petsipaebijavata ata. Itsiata baitsi jane petiriva benamataacata papaëbërëpanayota penayapëtaenexa pamonavecu beveliajamatabëcuene pexainaevacuene. ⁸ Copiata Dioso pebi itsa exana, petiriva peyenyajuvënësitomita apo exanae. Biji rajane pebi peyenyajuvënësitomita cotocaevi Dioso exana petiriva. ⁹ Petiriva baja cajena Dioso exana pebinexa. ¹⁰ Bajarapajamatabëcuene yabara petiriva benamataacata papaëbërëpanayota. Petiriva namataacatsia itsa ponapona, ángelevi tanetsi pamona pejumecovënëtabiavacuene. ¹¹ Vaxaitsi Dioso vajajumecovënëta vanapaevi, xanepana namataenetsia vajanajamatabëcuene asaëyaexanaenexa. Pebi namatavenona petiriva. Petiriva pijinia namatavenona pebi. ¹² Xaniajai rabaja. Pebi peyenyajuvënësitota Dioso exana petiriva. Itsiata baitsi jane bajaraxuacujinae petiriavita naexanapona pebijivi. Tsipaji Dioso pejamatabëcueneta bajarapacuenia copata.

¹³ Panijacuata pacanaëjere. ¿Xanepana tsaja petiriavi penavajëtsinexa Diosojavabelia papaëbërëpanayota namataacatsinejeva? Jume raja. Namataacatsiaya raja papaëbërëpanayota petiriavi benavajëta Diosojavabelia. ¹⁴ Vaxaitsi baja cajena vajajamatabëthëtota yapëtanetsi mapacueneye. Pebi itsa amatanapiareca, amatura tsipae. ¹⁵ Vajajamatabëthëtota yapëtanetsina mapacueneye. Petiriva pijinia itsa amatanapiareca, toxanepanatsi. Yabarëya pematana. Dioso cajena petiriva tocopatatsi piamatanapianaxareca. Nexata bepemataacatsi pematana. ¹⁶ Itsajivi itsa jamatabëpanejumeanaenota petiriavi papaëbërëpanayota penamataacatsijava yabara, nexata bajarapajivijavabelia pajumaitsinë tsane mapacueniaje: “Paxanë bajarapacuenia panajamatabëxainajë petiriavi papaëbërëpanayota penamataacatsijava yabara. Bajarapacuenia itsamonae ata, pamona Dioso pejumecovënëtsivi, najamatabëxaina. Tsipaji baja cajena patajacuene,” pajanë tsane pajivijavabelia jamatabëpanejumeanaenota petiriavi papaëbërëpanayota penamataacatsijava yabara.

Pacuenia itsamonae ayajava xaeyabiaba itsa nacaetuatabiaba penajamatabënapitsinexa xua yabara Cristo sivatëpatsi yabara pelivaisi

¹⁷ Pacatoyaquinatsi mapalivaisije patacamuxujobinexa. Aeconoxae xua paexanabiabame, apo pacatoxanepanae. Panacaetuatabiabi atamë, itsiata apo pajamatabëcuenesaëmë tsaponae panevajënaeyabelia Dioso panejumecovënëtsijava. Caranata saya panevajënaeyabelia pajamatabëcuenecueranapona. ¹⁸ Najamatabëxainajë copiaya patacajumaitsinexa mapacueniaje. Pacavënëlivaisitanetsi. Apo panajamatabëcuenejëpabiabimë pina itsa panacaetuatabiabame paneracaetuatabiabi. Caebota pina panacaetuatabiabi atamë, navecuanatsanaeya pina panavecuenaabiabame pacaebitsaëttoximë canacujitsia. “Xaniajai raeta baja. Baja raeta pacuenia exanabiaba,” jamatabëjanë belia paxamë yabara. ¹⁹ Baja raeta pacuenia navecuanatsanaeya panavecuenaabiabame. Tsipaji meta pajamatabëjumaitsimë tsabiabi: “Vaxaitsi cajena Dioso pepacuene jumecovënëtsi. Nexata vajanacaetuatsijavata, Dioso apo pejumecovënëtsivi navecuatsatsianatsi Dioso apo ëpejumecovënëtsivi saicaya penaenexa,” pajamatabëjamë meta tsabiabi. ²⁰ Xua yabara Cristo pacasivatëpa, panenajamatabënapitsinexa panacaetuatabiabi atamë, najamatabëcuenejëpaeya apo

panacaetuatabiabiimë. Nexata Dioso pacatane saya jema bepanenacaetuatsivi.²¹ Tshipaji copiaya panepatsivi panenabaniepatota, ayaijavanë paxaeyabiabame. Apo paevetabiabiimë abaxë itsamonae pepatsijava caecuenia panenajuabaninexa. Itsamonae paxamëyajuvënëvi ayaijava xaeyabiaba. Ayaira vinora matavëjëa apaeyabiabanua. Nexata vënaaitajibi tsabiabi. Nexata pamonaë cotocaevi pepatsivi, yavereverecabiaba. Nexata pijani tsabiabi.²² Èpanexaejavanexa itsa pasivnacaetuatabiabame, panijabonë paxainame panijabonëjaya panenabaninexa, paneapaenexanua. Bijiaya pataeyabiabame pamonaë nacaetuatabiaba penavajëcaenexa Diosojavabelia. Paurababiabamenua pamonaë bepejiobivi, pexaejava apo penacapatsivi. Pexaniacuene cajena apo paexanabiabiimë bajarapacuenia itsa paexanabiabame. Bajarapacuenia saya paneexanabiabixae, pananeconitame Diosojavabelia.

Pajamatabëcuene yabara nacaetuatabiaba Dioso pejumecovënëtsivi caejumeto canacujitsia yabara pelivaisi

(Mt 26.26-29; Mr 14.22-25; Lc 22.14-20)

²³ Imata baja cajena pacatsipaebatsi pacuenia vajatuxanenë Jesús pijajivi barëexana. Pameravi vajatuxanenë pijavajabitsaë pecobeyabelia canajetsijitsiatsi, bajarapameravi vajatuxanenë cobenanua panbë.²⁴ “Pexaniacuene panetoexaname. Pan panerajutame,” pejaicujinaë Diosojavabelia, panbë epatsënëca. Jumaitsi pijajivijavabelia: “Mara tavije patacasivatëpaejava paxamënexa. Mapacueniaje tacovëta paexanabiabianame patanenajamatabënapitsinexamë,” jai vajatuxanenë Jesús pijajivijavabelia.²⁵ Penabanicujinaë bajara icatsia pacuenia Jesús cobenanua pecaapaejava. Nexata icatsia jumaitsi pijajivijavabelia: “Dioso baja cajena najumecapanepaeya jumaitsi papecacapanepaenexa. Nexata pacuenia Dioso najumecapanepaeya jumaitsi, pacacapanepaena tajana pejamatabëcueneta. Tajana raja nevecuarunaena tatëpaejavata papecacomuatsinexa panijaneconivecua. Mapacapaevajavataje, itsa papaeyabiabianame, panenajamatabënapiabiabianame,” jai vajatuxanenë Jesús pijajivijavabelia.²⁶ Nexata paxamë bajarapacuenia itsa paexanabiabame, patsitanaitajëtabiabame itsamonaejavabelia xua yabara vajatuxanenë pacasivatëpa cruzata. Bajarapacuenia paexanabiabare vajatuxanenë icatsia pepatsimatacabitsicajavabelianexa.

Pacuenia Dioso pejumecovënëtsivi benaxaniavaeta, itsa nacaetuata penajamatabënapitsinexa xua yabara Cristo sivatëpatsi, yabara pelivaisi

²⁷ Jivi itsa nacaetuata penajamatabënapitsinexa xua yabara Cristo sivatëpatsi, becanaëjëtena. Tshipaji canaëjëtsinejeva itsa naxane pan, itsa apanua vajatuxanenë pecaapaejavata, bajarapajivi naneconitsipa vajatuxanenëjavabelia, vajatuxanenë pivito, pijana ata, apo peyaiyataexae.²⁸ Bajaraxuata caejivi canacujitsia xaniavaetsia benajamatabëcuenejaita pecaxitajarabinexa paneconi xainaponapona Dioso pitabarata. Bajarapacuenia benajamatabëcuenejaita pan penaxaevajënaeya, pematavëjëaapaera ata penaapaevajënaeya.²⁹ Itsa naxane pan, itsa naapanua pematavëjëaapaera, becanaëjëta pajamatabëcuene yabara vajatuxanenë sivatëpatsi cruzata. Pajivi canaëjëtsinejeva naxane pan, naapanua pematavëjëaapaera, bajarapajivi pijacuata naneconitapona Diosojavabelia.³⁰ Bajaraxuata paxamë ayaiBITSaëto payajuvënëavitanemë. Nexata itsamonae payajuvënëcueraname. Itsamonae payajuvënëtëpame baja.³¹ Bajaraxuata vaxaitsi vajanaxaevajënae pan, vajanaapaevajënae ata pematavëjëaapaera, benajamatabënapitsi Jesucristo vajanacasivatëpaejava vajaneconi yabara. Benajamatabëcuenejaitatsinua paneconi xainatsi Dioso pitabarata vajanavajunupaebinexa Diosojavabelia. Bajarapacuenia itsa exanaenatsi, vajatuxanenë apo nacananeconitsiaexanae tsane.³² Itsa naneconitsianatsi, nexata vajatuxanenë nacabejiobiaexanaponaena Dioso apo pejitsipaacuene vajaexanaejava vajacopsinexa. Bajarapacuenia vajatuxanenë nacaexanaena Dioso apo pejumecovënëtsivi yajava Diosovecua vajanaxuabiyaniava.

³³ Bajaraxuata itsa panacaetuatae panenajamatabënapitsinexa xua yabara Cristo pacasivatëpa, paevetabiabianame abaxë daxita pepatsijava caecuenia panenajuaxaenexa.³⁴ Pajivi pijajivi, bajarapajivi copiaya benabane pijabota pejonevajënaeya panenacaetuatsibojavaberena. Nexata panenacaetuatsijavata, bajarapajivi apo naneconitsi tsane Diosojavabelia. Itsajamatabëcuenejavaxi pematatsënëa, xua yabara paneyanijobame, abaxë apo pacatoyaquinatsi mapabaxutotaje. Itsa pacataenatsi, pacatsipaebianatsi bajarajotalia.

12

Pacuenia Dioso pejumecovënëtsivi Espiritu Santo pejamatabëcueneta jamatabëcuenecaëjëpaeyaxanatsi pexanaenexa pacuenia Dioso itorobaponatsi yabara pelivaisi

¹ Tajamonae, jitsipajë patacatoyaquinaejava paneyapëtaenexa mapacueneye. Caejivi canacujitsia Dioso pejumecovënëtsivi Espiritu Santo pejamatabëcueneta jamatabëcuene caējëpaeyaexanaponatsi pexanaenexa pacuenia Dioso itorobaponatsi.

² Paxamë rabaja payapëtaneme mapacueneye. Pamatacabi abaxë Dioso apo pajumecovënëtsimë, dovathi pacayamaxëitojorobabiaba. Nexata panevajëtsinexa jumapecataeya pexanaenëanëjavabelia, panematabacabëta patonubenabiabame. Jumapecataeya raja pexanaenëanë, apo caējëpaetsi itsacuenejavayo ata pexanaenexa. ³ Bajaraxuata pacatoy-aquinatsi paneyapëtaenexa mapacueneye. Pajivi jumaitsi: “Jesús raja Dioso apo pexënat,” jai, bajarapajivi Espiritu Santo apo yajavaponaponatsi. Pajivi rajane jumaitsi: “Jesucristo raja pepo petuxanenë,” jai, bajara jane pajivi Espiritu Santo yajavaponaponatsi.

⁴ Daxita xua Dioso pejumecovënëtsivi Espiritu Santo pejamatabëcueneta jamatabëcuene caējëpaeyaexanaponatsi, apo najëpae. Caenë canacujitsia saicayacuenia jamatabëcuene caējëpaeyaexanaponatsi. Itsiata baitsi jane caenë Espiritu Santo pejamatabëcueneta jamatabëcuene caējëpaeyaexanaponatsi daxita bajarapamonae. ⁵ Xua jivi Dioso tonacuenebavanapa, apo caevirianacuenebijava. Navita cajena xua jivi Dioso tonacuenebavanapa. Itsiata caenë Dioso pijacune tonacuenebavanapa. ⁶ Dioso pijacune petonacuenebivi, apo nacuenjëpae. Itsiata rabaja caenë Dioso daxita yavenonatsi petonacuenebavanapaenexa. ⁷ Caejivi canacujitsia, Dioso pejumecovënëtsivi, Espiritu Santo pejamatabëcueneta jamatabëcuene caējëpaeyaexanatsi xua Dioso tonacuenebavanapaajtisi. Nexata bajarapamonae, caejivi canacujitsia, caējëpatsi peyavenonaenexa bajarapajamatabëcueneta daxita Dioso pejumecovënëtsivijavabelia. ⁸ Itsamonae Dioso pejumecovënëtsivi, Espiritu Santo pejamatabëcueneta jamatabëcuene caējëpaeyaexanaponatsi pemuxujobinexa xaniavaetsia itsamonaejavabelia, xaniavaetsia pejinavanapaenexa Dioso pitabarata. Itsamonae pijinia jamatabëcuene caējëpaeyaexanaponatsi jivi xaniavaetsia peyapëtaeyaexanaenexa pexaniajailivaisi, Jesús pelivaisi. Itsiata baitsi jane caeEspiritu Santo pejamatabëcueneta bajarapacuenia jamatabëcuene caējëpaeyaexanaponatsi bajarapamonae. ⁹ Itsamonae pijinia jamatabëcuene caējëpaeyaexanaponatsi penajamatabëcuenerutsinexa Diosojavabelia Dioso peyavenonababinexatsi daxitacueneye yabara. Itsamonae pijinia jamatabëcuene caējëpaeyaexanaponatsi pejamatejemayaexanaenexa piavitanevi. CaeEspiritu Santo rabaja pejamatabëcueneta bajarapacuenia jamatabëcuene caējëpaeyaexanaponatsi. ¹⁰ Itsamonae pijinia jamatabëcuene caējëpaeyaexanaponatsi Dioso pesaëta pinijicune pexanaejavanë pexanaenexa. Itsamonae pijinia jamatabëcuene caējëpaeyaexanaponatsi petsipaebinexa itsamonaejavabelia pacuenia Dioso yapëtaeyaexanatsi. Itsamonae pijinia jamatabëcuene caējëpaeyaexanaponatsi pejumeyapëtaenexa itsajivi itsa tsipaebatsi penajumetsënëtsilivaisi dovathi pejamatabëcueneta. Jamatabëcuene caējëpaeyaexanatsinua pejumeyapëtaenexa itsajivi itsa tsipaebatsi pexaniajailivaisi Espiritu Santo pejamatabëcueneta. Itsamonae pijinia jamatabëcuene caējëpaeyaexanaponatsi pecuaicuajainexa itsajivi ata mapanacuata apo pejumetaejumeta. Itsamonae pijinia jamatabëcuene caējëpaeyaexanaponatsi pejumetaenexa bajarapajume juya pejumevajunupaebaponanexa itsamonaejavabelia. Nexata bajarapamonae tsipaebapona pajamatabëcuenelivaisi xainapona caelivaisi canacujitsia, palivaisianë tsipaebapona pamonae cuaicuajai itsajivi ata mapanacuata apo pejumetaejumeta. ¹¹ Itsiata baitsi jane caeEspiritu Santo pejamatabëcueneta jamatabëcuene caējëpaeyaexanaponatsi daxita bajarapamonae. Pacuenia Espiritu Santo jitsipa pejamatabëcuenecaējëpaeya exanaponaenexa Dioso pejumecovënëtsivijavabelia, bajarapacuenia Espiritu Santo caejivi canacujitsia jamatabëcuene caējëpaeyaexanaponatsi Dioso pejumecovënëtsivi.

Pacuenia daxita Dioso pejumecovënëtsivi caenë Cristo bepeperabëto yabara pelivaisi

¹² Pavi xainatsi vajaperabëtota, caevito canacujitsia pevënë xainapona. Vajavi xainatsi navitsiaya. Caevito canacujitsia saicaya pexanaejavanexa, xainapona. Itsiata baitsi jane caeperabëtotsireca. Bajara pijinia itsitsi daxita Dioso vajajumecovënëtsivi. Caejivitsi canacujitsia saicaya vajanacuenebijanexa, Espiritu Santo pejamatabëcueneta nacajamatabëcuene caējëpaeyaexanaponaeta, itsiata caenë Cristo bepeperabëtotsi. ¹³ Daxitatsi rabaja Dioso vajajumecovënëtsivi, itsa nacabautisaba, caeEspiritu Santo nacatsijamatabëca caebitsaëtonexatsi, caenë Cristo bepeperabëtonexatsi. Judiovi atatsi, apo judiovi atatsi, dajubicuenia vajanacacanajetsivi ata itsamonaejavabelia amoneya vajatonacuenebinexa, apo vajanacacanajetsivi ata itsamonaejavabelia, daxitatsi, caeEspiritu Santo nacatsijamatabëca.

¹⁴ Pavi jivi peperabëtuaerca xaina, caevito canacujitsia pevënë xainapona. Nexata caevënëvito jivi apo xinae peperabëtuaerca. ¹⁵ Nexata jivi petaxu itsa caējëpaejitsipatsi pecuaicuajainexa, petaxu meta jumaitsi tsipae: “Apo pecobenë raja. Bajaraxuata maapo

paperabētōyajuvenējavānēje,” jai meta tsipae. Itsiata baitsi jane cajena jemajai tsipae. Tsitecaeya bajarapaperabētōyajuvenējava tsipae. Pijumeta saya apo naexanae tsipae saicayajava. ¹⁶ Jivi pemuxuyoroto ata itsa caējēpaejitsipatsi pecuaicuaijainexa, pemuxuyoroto meta jumai tsipae: “Apo pitaxutonē raja. Bajaraxuata maapo paperabētōyajuvenējavānēje,” jai meta tsipae. Itsiata baitsi jane cajena jemajai tsipae. Tsitecaeya bajarapaperabētōyajuvenējava tsipae. Pijumeta saya apo naexanae tsipae saicayajava. ¹⁷ Jivi daxitanē peperabētūareca itsa xainaejitsipa ēpitaxutonē, ζdetsa nexata pacuenia jumetaejitsipa? Acuenebi tsipae. Daxitanē peperabētūareca itsa xainaejitsipa ēpemuxuyorotonē, ζdetsa nexata pacuenia tuxunijitsipa? Acuenebi tsipae. ¹⁸ Bajaraxuata jivi peperabētūareca caevēnēvito Dioso apo torutsi. Saicaya pevēnē pexainaevitonē, caevito canacujitsia, jivi peperabētūareca Dioso torutapona itsajota jitsipa petorutsinexa. ¹⁹ Itsa meta jivi peperabētūareca xainaejitsipa caevitoreca, aithothia meta tsipae. Nexata apo bejivitonē perabētō tsipae. ²⁰ Itsiata baitsi jane maitsije. Jivi peperabētūareca navitsiaxainae ata saicaya caevito canacujitsia pevēnē pexainaevi, itsiata rabaja caeperabētoreca.

²¹ Nexata jivi pitaxutobeje caējēpae atatsibeje tsipae pecuaicuaijainexabeje, itsiata acuenebi tsipae pejumaitsinexabeje pecobebejevavelia: “Apo pacanamatavenonaetsibeje cajena,” pejainexabeje. Jivi pematabocotota ata caējēpae atatsi tsipae pecuaicuaijainexa, itsiata acuenebi tsipae pejumaitsinexa petaxubejevavelia: “Apo pacanamatavenonaetsibeje cajena,” pejainexa. Tspaji daxita pavi xainatsi vajaperabētota, namatavenonatsi. ²² Bajaraxuata vajaperabētota pavi xainatsi, pavi itajara apo bevajanacatsitanamatavenonae, bajarapavi bitso pepacune namatavenonatsi. ²³ Pavi xainatsi vajaperabētota, pavi vaxaitsi natanetsi beveliavi, bajarapavi banaperabēxatatatsi naitabētsiya. Pavi naperabēcauratsi, naperabēcaranatsiya banaperabēxatatatsi xaniavaetsia. ²⁴ Pavi apo naperabēcauratsi, apo naperabēxatatatsi xaniavaetsia. Bajarapacuenia vajaperabētota Dioso nacavimataropbiaruba. Nexata picani pavi bevelia vajanamatavenonaevi, bajarapavi itsiata naitabētsia banaperabēxatatatsi. Nexata bajarapacuenia bajarapavi ata bevajanamatavenonaevi tanetsi. ²⁵ Nexata pavi vajaperabētota xainatsi, apo navecuanatsanae. Nexata daxita pavi xainatsi vajaperabētota, namataenetsia naeveta. ²⁶ Vajaperabētota pavi xainatsi, caevito itsa atane, nexata daxita itsavijavavelia ata baatane. Caevito ata pijinia itsa naitabētsianaxatatatsi, nexata daxitaperabētotsireca bayajavabarēyatsi.

²⁷ Daxita rabaja paxamē Dioso papijajivimē. Nexata caenē Cristo beperabētō panaexaname. Pavi Cristo peperabētota xaina, bajara bepajajuvenēvi Dioso pacatane pacaenēmē canacujitsia. ²⁸ Vajaperabētota pavi xainatsi, caevito canacujitsia saicaya xainapona pexanaponaevajanexa. Bajara pijinia itsi Dioso pejumecovēnētsivi. Caējivi canacujitsia Dioso itapetonatsi saicaya caējivi canacujitsia pexanaponaenexa xua Dioso tocopatatsi. Copiata Dioso itapeta apóstolevinexa. Xuacujinae icatsia cotocaevi itapeta petsipaebivinexa itsamonaevjavavelia pacuenia Dioso yapētaeyaexanatsi. Xuacujinae icatsia Dioso itapeta, pacuenia Dioso pejumelivaisibaxutota jumaitsi, peyapētaeyaexanaevinexa itsamonaevjavavelia. Xuacujinae icatsia Dioso itapeta Dioso pesaēta pinijicuene pexanaejava pexanaponaevinexa. Xuacujinae Dioso itapeta piavitanevi pejamatejemayaexanaevinexa. Xuacujinae icatsia Dioso itapeta bepejiobivi peyavenonaevinexa. Xuacujinae icatsia Dioso itapeta Dioso pejumecovēnētsivi penamatacaitorobivinexa. Xuacujinae icatsia Dioso itapeta pecuaicuaijivivinexa itsajivi ata mapanacuata apo pejumetaejumeta. ²⁹ Nexata daxita apo ēapóstolevi. Nexata pijinia daxita apo ēpetsipaebivinexa itsamonaevjavavelia pacuenia Dioso yapētaeyaexanatsi. Nexata pijinia daxita apo ēpeyapētaeyaexanaponaevinexa itsamonaevjavavelia pacuenia Dioso pejumelivaisibaxutota jumaitsi. Nexata pijinia daxita Dioso pesaēta pinijicuene pexanaejava, apo ēpexanaponaevinexa. ³⁰ Nexata pijinia daxita apo ēpejamatejemayaexanaevinexa piavitanevi. Nexata pijinia daxita apo ēpecuaicuaijivivinexa itsajivi ata mapanacuata apo pejumetaejumeta. Nexata pijinia daxita apo ēpejumetaevinexa bajarapajume, juya itsamonaevjavavelia pejumevajunupaebaponaenexa pajamatabēcuenelivaisi xainapona caelivaisi canacujitsia, palivaisianē tsipaebapona pamonaē cuaicuaijai itsajivi ata mapanacuata apo pejumetaejumeta. ³¹ Bajarapacuenia itsamonaē pejamatabēcuenecaējēpaeya exanaevjavatsi matatoxenetsia panevajēnaeyavelia bitso pajitsipare Dioso papecajamatabēcuenecaējēpaeya exanaenexa, panevavenonaenexa daxita Dioso pejumecovēnētsivijavavelia. Daxita baja xua yabara pacatsipaebatsi, daxita bajaraxua matatoxenetsia panevajēnaeyavelia bitso pajitsipare Dioso papecajamatabēcuenecaējēpaeya exanaenexa itsamonaē ata paneasivanexa.

13

Pacuenia jivi namataenetsia benaasiva yabara pelivaisi

¹ Dioso nejamatabëcuenecaëjêpaeya exanaejitsipa tacuaicuaijainexa itsajivi ata mapanacuata apo pejumetaejumeta. Angelevi ata pijajumeta cuaicuaijanë tsipae. Nexata jivi netaejitsipa ayaijamatabëcuenenênë. Bajarapacuenia Dioso nejamatabëcuenecaëjêpaeyaexanae ata tsipae, itsiata itsamonae ata itsa apo asivanë tsipae, nexata saya bajaraxua netoamatamobi tsipae Dioso pitabarata. Nexata palivaisi ata tsipaebaponaejitsipajê jivi pejumetaejumeta, apo nejumecovênëtsi tsipae. Nexata pacuenia tambor, itsa jume, plato itsajivi penajumetsiaexanaejava namuxujematatsi, bajarapacuenia nenamuxujematsipa tatsipaebilivaisi. ² Dioso nejamatabëcuenecaëjêpaeya exanaejitsipa xaniavaetsia tayapêtaenexa Dioso pejumelivaisi, asaëyata tatsipaebinxexa itsamonaejavabelia. Yapêtaejitsipajênuu daxita Dioso muetsia penajamatabêxainaelivaisianë ata. Yapêtaejitsipajênuu daxita Dioso pijacuene ata. Bajarapacuenia xaniavaetsia yapêtae atanë tsipae, itsiata itsamonae ata itsa apo asivanë tsipae, nexata saya bajaraxua netoamatamobi tsipae Dioso pitabarata. Dioso bitso tajumecovênëtsinë tsipae. Nexata itsa jumaitsinë tsipae: “Dioso baja cajena mapatsutoxanetoje nevecutixitsiana,” itsa janë tsipae, nexata Dioso nevecutixitsipa. Bajarapacuenia exanae atanë tsipae, itsiata itsa apo asivanë tsipae itsamonae ata, nexata saya bajaraxua netoamatamobi tsipae Dioso pitabarata. ³ Rajutaponaejitsipajê bepejiobivijavabelia daxita taxainaejavaximi. Nacaevetsipajênuu tanetajuitsinexa, tanebeyaxuabinexa ata, Dioso pejumelivaisi yabara. Bajarapacuenia nacaevetsi atanë tsipae, itsiata itsa apo asivanë tsipae itsamonae ata, nexata saya bajaraxua netoamatamobi tsipae Dioso pitabarata.

⁴ Majamatabëcuenetsije pajivi asiva itsamonae ata. Bajarapajivi bajayajebi itsacueniabi atatsi, ajamatabëcuenesaë bajarapamonaejavabelia. Pajivi asiva itsamonae ata, itaxutotsoniatane bajarapamonae. Pajivi asiva itsamonae ata, apo cuenecaëbi bajarapamonae. Pajivi asiva itsamonae ata, “Xanë ayaijamatabëcuenenênë bajarapamonae matatoxenetsia,” apo jai itsajivijavabelia. ⁵ Pajivi asiva itsamonae ata, bajarapajivi apo ataejitsibi itsajivi ata. Apo exanae itsacuenie ata piurabinexa bajarapamonaejavabelia. Pajivi asiva itsamonae ata, daxita xua xanepana, êponênexa apo natonajamatabêxainae. Pajivi asiva itsamonae ata, bepjiia apo anaepanae bajarapamonaejavabelia. Pajivi asiva itsamonae ata, itsacueniabi atatsi, apo jamatabêtsitecae juya pecuenececanaviatsinexa bajarapamonaejavabelia. ⁶ Pajivi asiva itsamonae ata, bajarapamonae itsa tocopiapatatsi pibisiacuene, bajarapajivi apo sivajamatabêcuenekarêya bajarapamonae pibisiacuene petocopiapatatsijavatsi yabara. Biji rajane pajivi asiva itsamonae ata, itsa bajarapamonae Dioso pejitsipaecuenia exanavanapa, bajarapajivi sivajamatabêcuenekarêya bajarapamonae Dioso pejitsipaecuenia pexanavanapaejava yabara. ⁷ Pajivi asiva itsamonae ata, bajarapajivi piavivaviyajuvênëvi itsacueniabi atatsi, najamatabêcuenesaëta pevajênaeyabelia piavivajava bajarapamonae. Pajivi asiva itsamonae ata, bajarapajivi apo peyapêtaevi ata, sivajamatabêjumaitsi mapacueniajê: “Maraeta pamonaë ata pexaniajamatabêcuenevije,” sivajamatabêjai. Pajivi asiva itsamonae ata, bajarapajivi pibisiacuene pexanaevi ata, sivajamatabêjumaitsi mapacueniajê: “Maraeta pamonaë itsamatacabi pexaniaacuene pexanaevi tsaneje,” sivajamatabêjai. Pajivi asiva itsamonae ata, bajarapajivi tsiyapêbeje atatsi daxitacuene yabara, apo copatsi piavivajava itsamonae ata.

⁸ Itsamonae Espîritu Santo pejamatabêcueneta jamatabêcuenie caëjêpaeyaexanaponatsi petsipaebinxexa itsamonaejavabelia pacuenia Dioso yapêtaeyaexanatsi. Itsamonae pijinia jamatabêcuenie caëjêpaeyaexanaponatsi pecuaicuaijainexa itsajivi ata mapanacuata apo pejumetaejumeta. Itsamonae pijinia jamatabêcuenie caëjêpaeyaexanaponatsi pacuenia Dioso pejumelivaisibaxutota jumaitsi peyapêtaeyaexanaenexa itsamonaejavabelia. Daxita bajarapacuenie, xua Dioso Espîritu Santo pejamatabêcueneta Dioso pejumecovênëtsivi jamatabêcuenecaëjêpaeyaexanatsi, itsamatacabi tocopiarucaenatsi. Itsiata baitsi jane jivi namataenetsia penasivacuene, apo copiarucae tsane. ⁹ Dioso nacajamatabêcuenie caëjêpaeyaexanae ata vajayapêtaenexa, abaxë tsiquirijavayo yapêtaeponatsi. Palivaisi ata tsipaebatsi itsamonaejavabelia Dioso pejumelivaisi, apo ayaijava. ¹⁰ Pamatacabi icatsia Cristo patsianica, Espîritu Santo pejamatabêcueneta vajanacajamatabêcuenie caëjêpaeyaexanaejamatabêcuenemi, nacatocopiarucaena. Nexata jane baja bajarapamatacabi vajatuxanenë xaniavaetsia nacayapêtaeyaexanaena daxitacuene Dioso pijacuene.

¹¹ Pamatacabi abaxë pejevaxinëyonë, cuaicuaijanë pejevaxinëyonëcuenia. Najamatabêxainajênuu pejevaxinëyonëcuenia. Jumetanijinua abaxë pejevaxinëyonëcuenia. Itsa baja tanaveretsinë, pejevaxijamatabêcuenemi baja copatajê. ¹² Bajara pijinia itsinë Dioso tajamatabêcueneyapêtaejava. Tsiquirijavayo abaxë Dioso

jamatabêcueneyapêtaniji. Pacuenia pitatsêcênaetsaxuta itsa naitatanetsi, apo nacatonapebetsi, bajarajamatabêcueneitsinê Dioso tajamatabêcueneyapêtaejava. Abaxê saya tsiquirijavayo Dioso jamatabêcueneyapêtaniji. Itsiata baitsi jane itsamatacabi Dioso xaniavaetsia jamatabêcueneyapêtaenajê. Pacuenia aeconoxae Dioso xaniavaetsia nejamatabêcueneyapêtane, bajara pijinia pacuenia xanê ata itsamatacabi xaniavaetsia Dioso jamatabêcueneyapêtaenajê. ¹³ Apo vereverecae daxitamatacabi vaxaitsi vajanajamatabêcuenecopatsijava Diosojavabelia. Vaxaitsi evetavanapatsinua Dioso vajanacapanepaenexa. Nexata vajanajamatabêcuenecopatsijava Diosojavabelia, vajevetavanapaejava ata Dioso vajanacapanepaenexa, bajaraxuabeje matatoxenetsia bitso xanepana vajaasivajava itsamonae ata.

14

Pacuenia Espiritu Santo pejamatabêcueneta itsamonae cuaiquaijiaexanatsi itsajivi ata mapanacuata apo pejumetaejumeta yabara pelivaisi

¹ Panajamatabêcueneverere panevajênaeyabelia panecasaêtsavanapaenexa itsamonae ata paneasivajava pacuenia panijacuata panaasivamê. Panatojitsiparenu xua Dioso pacatojitsipa papecajamatabêcuenecaejêpaeyaexanaenexa Espiritu Santo pejamatabêcueneta. Bitso jane panatojitsipare palivaisi Dioso payapêtaeyaexana panetsipaebinxexa itsamonaejavabelia. Nexata patsipaebianame palivaisi Dioso pacayapêtaeyaexana. ² Itsamonae Espiritu Santo pejamatabêcueneta jamatabêcuenecaejêpaeyaexanaponatsi pecuaicuaijainexa itsajivi ata mapanacuata apo pejumetaejumeta. Nexata bajarapajivi itsajivi ata mapanacuata apo pejumetaejumeta livaisi itsa paeba, tsipaeba Diosojavabelia. Nexata Dioso jumetanetsi palivaisi paeba. Bajarapajivi apo tsipaebi jivijavabelia. Nexata bajarapajivi livaisi itsa paeba itsajivi ata mapanacuata apo pejumetaejumeta, jivi jumetae atatsi, itsiata itsajivi ata apo jumetaetsi palivaisi paeba. Tspajivi itsajivi ata mapanacuata apo pejumetaejumeta paeba. Bajarapajivi Espiritu Santo pejamatabêcueneta livaisi paebiaexanatsi. Palivaisi Espiritu Santo hêpênêa xainaponapona, paebiaexanatsi. ³ Itsamonae pijinia Espiritu Santo pejamatabêcueneta jamatabêcuenecaejêpaeyaexanatsi jivi pejumetaejumeta petsipaebinxexa palivaisi Dioso yapêtaeyaexanatsi. Nexata bajarapajivi tsipaeba jivi pejumetaejumeta pejumetaenexatsi paivaisi tsipaeba. Nexata jivi pejumetaejumeta bajarapalivaisi bajarapajivi itsa tsipaeba, itsamonae pevajênaeuabelia sivaajamatabêcuenesae tsaponae Dioso pejumecovênêtavanapaejava. Bajara-pajivi jamatabêcuenecaejêpaeyaexanatsi livaisi pepaebinxexa itsajivi ata mapanacuata apo pejumetaejumeta, bajarapajivi pijacuata jamatabêcuenecaejêpaeyaexanatsi bajarapalivaisita. Itsiata baitsi jane pajivi jamatabêcuenecaejêpaeyaexanatsi jivi pejumetaejumeta petsipaebinxexa palivaisi Dioso yapêtaeyaexanatsi, bajarapajivi petsipaebilivaisita Diosojavabelia jamatabêcuenecaejêpaeyaexanapona daxita Dioso pejumecovênêtsivi.

⁵ Pacatojitsipatsi picani daxita paxamê Espiritu Santo pejamatabêcueneta papecajamatabêcuenecaejêpaeyaexanaenexa panecuaicuaijainexa itsajivi ata mapanacuata apo pejumetaejumeta. Itsiata rajane bajaraxua matatoxenetsia bitso pacatojitsipatsi papecajamatabêcuenecaejêpaeyaexanaenexa jivi pejumetaejumeta panetsipaebinxexa palivaisi Dioso pacayapêtaeyaexana. Pajivi tsipaebapona jivi pejumetaejumeta palivaisi Dioso yapêtaeyaexanatsi, bajarapajivi bitso jamatabêcueneyavenona itsamonae Dioso pejumecovênêtsivi. Pajivi livaisi tsipaeba itsajivi ata mapanacuata apo pejumetaejumeta, bajarapajivi apo jumetaetsi palivaisi tsipaeba. Nexata bajarapajivi Dioso pejumecovênêtsivi apo jamatabêcuenecaejêpaeyaexana Diosojavabelia. Itsiata bajarapajivi itsa caejêpatsinua jivi pejumetaejumeta penajumevajunupaebinxexa pejumetaenexatsi palivaisi tsipaeba, nexata bajarapajivi Dioso pejumecovênêtsivi jamatabêcuenecaejêpaeyaexana Diosojavabelia. ⁶ Bajaraxuata xanê ata pijinia paxamêjavata itsa patsipajê livaisi patacatsipaebinxexa apo panejumetaejumeta, nexata apo panejumetaemê tsipae palivaisi pacatsipaebijitsipatsi. Nexata apo pacajamatabêcuenecaejêpaeyaexanae tsipaetsi Diosojavabelia. Itsiata baitsi jane itsa patsipajê panejumetaejumeta patacatsipaebinxexa pacuenia Dioso bemajitsinaebota netsitajêta, nexata pacajamatabêcuenecaejêpaeyaexanae jitsipatsi Diosojavabelia. Itsa pacatsipaebijitsipatsinua pexaniajailivaisi, nexata pacajamatabêcuenecaejêpaeyaexanae jitsipatsi Diosojavabelia. Palivaisi Dioso neyapêtaeyaexana, palivaisi ata Dioso jumaitsi, pexaniajailivaisi, itsa pacatsipaebijitsipatsi, nexata pacajamatabêcuenecaejêpaeyaexanae jitsipatsi Diosojavabelia.

⁷ Pamonae Espiritu Santo pejamatabêcueneta jamatabêcuenecaejêpaeyaexanatsi pecuaicuaijainexa itsajivi ata mapanacuata apo pejumetaejumeta, bajarapamonae livaisi tsipaebi ata, itsajivi ata apo jumetaetsi palivaisi tsipaeba. Bajara pijinia itsi

tsipae penaxëanaejavanë peracatsivi ata xaniavaetsia itsa apo racatsi tsipae. Flauta piobinë, bijiata itsa obijitsipa, arpa pijinia peracatsinë ata, bijiata itsa racatsipa, nexata itsajivi ata apo vajiyapëtaetsibeje tsipae, pavaji picani naxëanaeyaexanabeje. Flauta piobijava, arpa ata peracatsijava, amatamobi tsipae. ⁸ Bajara pijinia itsi tsipae vajabitsaë trompeta piobijava ata. Vajabitsaë itsa ponaejitsia penavajabitsaëtsinexa, trompeta baoba penajunatsinexa. Nexata trompeta piobijava vajabitsaë itsa jumetane, bamuxunaothopa penacaetuatsinexa. Nexata trompeta piobinë xaniavaetsia itsa apo obi tsipae, nexata trompeta piobijava vajabitsaë jumetae ata tsipae, apo muxunaothopae tsipae penacaetuatsinexa penavajabitsaëtsinexa. ⁹ Bajara pijinia paitsimë tsipae paxamë ata. Itsajivi ata mapanacuata apo pejumetaejumeta itsa patsipaebijitsipame itsamonaejavabelia palivaisi Dioso pacayapëtaeyaexana, nexata apo pacajumetae tsipae palivaisi patsipaebame. ¡Nexata saya pajumenaxuabijitsipame bajarapalivaisi panetsipaebijava! ¹⁰ Daxitavirijumevi bitso navita mapanacuajavaje. Caevirijumevi canacujitsia yapëtaepona xaniavaetsia pijajume. ¹¹ Itsiata baitsi jane tajanacuapijinë ata itsa nebarëcuaiacuajai tsipae itsaviriavi pijajumeta, apo tajumetaejumeta, nexata besaicaya nacuapijinë taejitsipajë bajaraponë. Bajaraponë ata pijinia itsaviriavi pijumeta, apo pejumetaejumeta, itsa barëcuaiacuajianë tsipae, besaicaya nacuapijinënë netaejitsipa. ¹² Itsa pajitsipame Dioso papecajamatabëcuene caëjëpaeyaexanaenexa daxitacuene, nexata panatovajëre Diosojavabelia papecajamatabëcuene caëjëpaeyaexanaenexa. Itsiata baitsi jane bitso panatojitsipare Dioso papecajamatabëcuene caëjëpaeyaexanaenexa itsamonaejavabelia panetsipaebinexa palivaisi Dioso pacayapëtaeyaexana. Nexata Dioso pejumecovënëtsivi itsa pacajumetae palivaisi patsipaebame, ajamatabëcuenesaë tsane Dioso pejumecovënëtsijava.

¹³ Nexata pajivi Espiritu Santo pejamatabëcueneta jamatabëcuenecaëjëpaeyaexanatsi jivijavabelia livaisi patsipaebinexa itsajivi ata mapanacuata apo pejumetaejumeta, bajarapajivi bevajëta Diosojavabelia pejamatabëcuenecaëjëpaeya exanaenaxatinsua jivi pejumetaejumeta penajumevajunupaebinexa bajarapalivaisi. Nexata bajarapajivi Dioso itsa jamatabëcuenecaëjëpaeyaexanatsi jivi pejumetaejumeta penajumevajunupaebinexa daxitajivijavabelia, itsa najumevajunupaebiana, yapëtaeyaexanaena palivaisi tsipaeba. ¹⁴ Xanë ata apo tajumetaejumeta vajëtsi atanë tajamatabëthëthëtojavavetsina, itsiata apo yapëtaenë xua vajëtajë Diosojavabelia. ¹⁵ Mara pacuenia tavajënaeyabelia xanë exanaenajëje. Vajëtsianajë Diosojavabelia anijavirijumetaeje. Vajëtsianajë apo tajumetaejumeta. Vajëtsianajëna tajumeta ata daxitajivi tanejumetaenexa. Tanaxëanaejavata ata pijinia bajarapacuenia exanaenajë. Naxëanaenajë apo tajumetaejumeta. Naxëanaenajëna tajumeta ata daxitajivi tanejumetaenexa. ¹⁶ Pexaniacuene Dioso papecatoexanaejava yabara itsa pavajëtsipame Diosojavabelia itsajivi ata mapanacuata apo pejumetaejumeta, nexata pajivi pacajumetaeyeca, apo pacajumetae tsipae xua yabara pavajëtsipame Diosojavabelia. Nexata bajarapajivi toacuenebitsi tsipae papecayavenonaeyavajëtsinexa Diosojavabelia. ¹⁷ Paxamë picani Dioso pexaniacuene papecatoexanaexae, Diosojavabelia pavajëtsipame xaniavaetsia. Itsiata baitsi jane itsajivi ata mapanacuata apo pejumetaejumeta panevajëtsixae Diosojavabelia, pajivi pacajumetaeyeca, ajamatabëcuenecovëbi tsipae. Tsipaji apo pacajumetae tsipae xua yabara pavajëtsipame. Nexata apo pacamuxunajamatabëcuenecovëtsabi tsipae Diosojavabelia. ¹⁸ Dioso baja cajena xanë nejamatabëcuenecaëjëpaeyaexana tacuacuajainexa itsajivi ata mapanacuata apo pejumetaejumeta. Bajarapacuenia cuacuajianë itsajivi ata mapanacuata apo pejumetaejumeta daxita paxamë matatoxenetsia. Bajarapacuenia Dioso tanejamatabëcuenecaëjëpaeyaexanaexae, jumaitsinë tsabiabi Diosojavabelia: “Xanepana rabaja. Pexaniacuene bitso netoexaname,” janë tsabiabi Diosojavabelia. ¹⁹ Itsiata baitsi jane Dioso pejumecovënëtsivi penacaetuatsijavata, ayailivaisi tsipaebi atanë tsipae itsajivi ata mapanacuata apo pejumetaejumeta, bajarapamonae apo nejumetae tsipae palivaisi tsipaebajë. Bajaraxuata Dioso pejumecovënëtsivi penacaetuatsijavata, apo jitsipañë tatsipaebinexa itsajivi ata mapanacuata apo pejumetaejumeta. Biji rajane jitsipajë bajarapamonae pejumetaejumeta tatsipaebinexa saya tsiquirilivaisiyo ata tanejumetaenexa, palivaisi tsipaebajë.

²⁰ Tajamonae, pacuenia pejevaxi bajamatabëcuenecitsi, pëtsa bajara pajamatabëcuenecitsimë. Xaniavaetsia panajamatabëxainaname. Pacuenia penaveretsivi bajamatabëcuenecitsi, bajara pajamatabëcuenecitsimë tsane. Itsiata baitsi jane pibisiacuene paneexanaeyaniva, bepapejevaxijiviximë panatename. Tsipaji pejevaxijivixi abaxë bitso apo najamatabëxainae pibisiacuene pexanaenexa. ²¹ Dioso pejumelivaisibaxutota tajëvelia jumaitsi mapacueniaje: “Itsamonae cuacuajiyaxanaenajë itsajivi ata mapanacuata apo pejumetaejumeta. Nexata bajarapamonae tajumelivaisi netotsipaebiana tajajivijavabelia. Itsiata baitsi jane tajajivi apo jumecovënëtsi tsane tajumelivaisi,” jai tajëvelia Dioso pejumelivaisibaxutota judiovi Dioso apo

pejumecovënëtsijavanexa yabara. ²² Nexata Dioso pejumecovënëtsivi Espiritu Santo pejamatabëcueneta jamatabëcuene caëjêpaeyaexanaponaenatsi pecuaicuajainexa itsajivi ata mapanacuata apo pejumetaejumeta. Nexata Dioso apo pejumecovënëtsivi itsa taena bajarapacuenene, canaëjêtsiana Diosojavabelia. Canaëjêtsiananua bajarapamonae penaneconitavanapaejava Diosojavabelia. Dioso pejumecovënëtsivi jamatabëcuene caëjêpaeyaexanaenatsi petsipaebinexa itsamonaejavabelia palivaisi Dioso yapêtaeyaexanatsi. Nexata itsamonae Dioso pejumecovënëtsivi xaniavaetsia pejumetaexae palivaisi tsipaebatsi, canaëjêtsiana pepacuenene Dioso pitaxutotsoniataejavatsi pecapanepaenexatsi pijaneconivecua. ²³ Nexata pijinia itsamonae Dioso apo pejumecovënëtsivi napatsipa panenacaetuatsijavata. Nexata bajarajota paxamê livaisi patsipaebijitsipame itsajivi ata mapanacuata apo pejumetaejumeta. Nexata pamonaenapatsivi apo papecajumetaexae palivaisi patsipaebame itsajivi ata mapanacuata apo pejumetaejumeta, nexata pacabarajamatabêjumai tsipae: “Mara pamonaee saya pematajemabivitsije,” pacabarajamatabêjai tsipae. Tsipaji apo pacajumetae tsipae palivaisi patsipaebame. ²⁴ Jivi pejumetaejumeta panetsipaebijavata palivaisi Dioso pacayapêtaeyaexana, Dioso apo pejumecovënëtsijivi napatsipa. Nexata bajarapajivi papecajumetaexae palivaisi patsipaebame, najamatabêxainaejitsipa. Nayapêtaejitsipanaa bajarapajivi penaneconitsijava Diosojavabelia. Nexata pijaneconi bitso yanajamatabêxainaejitsipa Diosojavabelia. ²⁵ Papecanamuxunaevetsijavata, bajarapajivi muetsia penajamatabêxainabiabijava najamatabêcueneyapêtaejitsipa. Nexata nayapêtaejitsipa penaneconitsijava Diosojavabelia. Nexata pematabacabêta nucaejitsipa. Vajêtsipa Diosojavabelia. Pevajêtsijavata jumai tsipae Diosojavabelia: “Diosomê, bitso baja cajena ayaijamatabêcuenenêmê,” jai tsipae Diosojavabelia. Nexata paxamêjavaberena ata bajarapajivi pacajumaitsi tsipae: “Pepacuenene majotaje paxamê Dioso pacayajavaponapona,” pacajai tsipae.

Pacuenia Dioso pejumecovënëtsivi muxujiobatsi peyapêtaenexa pacuenia exanaejitsia culto pexanaejavata yabara pelivaisi

²⁶ Tajamonae, itsa panacaetuataame Dioso pejumelivaisi yabara, mapacuenia paexanaenameje. Itsamonae naxêanaena vaji. Itsamonae najamatabêcueneveretsiana jivi pejumetaejumeta livaisi petsipaebinexa daxitajivijavabelia. Itsamonae najamatabêcueneveretsiana palivaisi Dioso yapêtaeyaexanatsi juya petsipaebinexa itsamonaejavabelia. Itsamonae najamatabêcueneveretsiana livaisi petsipaebinexa itsajivi ata mapanacuata apo pejumetaejumeta. Itsamonae pijinia najamatabêcueneveretsiana jivi pejumetaejumeta juya pejumevajunupaebaponaenexa daxitajivijavabelia, palivaisi tsipaeba itsajivi ata mapanacuata apo pejumetaejumeta pecuaicuajiaivi. Bajarapacuenia paexanaename panenacaetuatsijavata daxita Dioso pejumecovënëtsivi pevajênaeyabelia pejamatabêcuenevitsabaponaenexa Dioso pejumecovënëtsijava. ²⁷ Panenacaetuatsijavata, jivijavabelia itsamonae livaisi itsa tsipaebijitsia itsajivi ata mapanacuata apo pejumetaejumeta, nexata Dioso tocopatatsi petsipaebinexa anijajivibeje, acueyabi pajivibeje ata. Baitsi pejumevajunupaebinexatsi palivaisi tsipaeba itsajivi ata mapanacuata apo pejumetaejumeta. Itsiata baitsi jane caeuenia acueyabi pajivibeje apo benajuatsipaebi. Nexata pajivi jivijavabelia livaisi tsipaebijitsia itsajivi ata mapanacuata apo pejumetaejumeta, bajarapajivi copiata betsipaeaba. Nexata pijinia pajivi jumevajunupaebaponaejitsia jivi pejumetaejumeta, bajarapajivi cotocaevi bejumevajunupaebapona jivijavabelia. Bajarapacuenia itsamonae jivijavabelia livaisi itsa tsipaeba itsajivi ata mapanacuata apo pejumetaejumeta, nexata juya itsajivi jivi pejumetaejumeta bejumevajunupaebapona daxitajivijavabelia peyapêtaenexa palivaisi tsipaeba itsajivi ata mapanacuata apo pejumetaejumeta. ²⁸ Nexata itsa ajibi jivi pejumetaejumeta pejumevajunupaebijivinxatsi daxitajivi peyapêtaenexa palivaisi tsipaeba itsajivi ata mapanacuata apo pejumetaejumeta, nexata panenacaetuatsijavata livaisi apo betsipaeibi itsajivi ata mapanacuata apo pejumetaejumeta. Bajarapamonae moya beena. Bêpênêa saya pejamatabêêthêtotu becuaiacuajiai tsenae itsajivi ata mapanacuata apo pejumetaejumeta. Diosojavabelia ata pijinia bajarapacuenia bêpênêa pejamatabêêthêtotu bevajêtena. ²⁹ Bajara pijinia pacuenia Dioso tocopata itsamonae ata jivijavabelia petsipaebinexa palivaisi Dioso yapêtaeyaexanatsi. Bajarapamonae ata Dioso tocopata jivijavabelia petsipaebinexa anijajivibeje, acueyabi pajivibeje ata. Nexata petsipaebijavata, itsamonae xaniavaetsia benamuxunaevetena pejumeyapêtaenexa itsa xaniajai Dioso pejamatabêcueneta bajarapamonae tsipaebatsi bajarapalivaisi. ³⁰ Nexata bajarapamonae livaisi petsipaebaponaejavata, bajarajota penamuxunaevetecaenê Dioso pejamatabêcueneta livaisi itsa yapêtaeyaexanatsi, nexata ponê jivijavabelia livaisi tsipaebapona, benajumecopata baja. Nexata ponê penamuxunaevetecaejavata, Dioso

livaisi yapētaeyaexanatsi, bajaraponē juya daxitajivijavabelia betsipaeba palivaisi Dioso yapētaeyaexanatsi penamuxunaevetecaejavata. ³¹ Bajarapacuenia daxita paxamē Dioso pejumelivaisi papecayapētaeyaexanaevi Dioso pacatocopata jivijavabelia livaisi panetsipaebinexa pacaejivimē tsaponae. Bajarapacuenia Dioso pacatocopata daxitajivi peyapētaenexa Dioso papecayapētaeyaexanaelivaisi, pesivaajamatabēcuenesāē tsaponaenexanua Dioso pejumecovēnētsijava panetsipaebilivaisita. ³² Pamonae tsipaeba daxitajivijavabelia palivaisi Dioso yapētaeyaexanatsi, bajarapamonae yapētane paepatota najumecopatsijitsia. Tsipaji Espiritu Santo pejamatabēēthētota itorobatsi paepatota najumecopatsijitsia. Nexata itsa najumecopata bajaraponē, juya itsanē petsipaebinexa daxitajivijavabelia. ³³ Dioso apo tocopatsi caecuenia anijajivibeje jivijavabelia livaisi penajuatsipaebinexa. Tsipaji caecuenia anijajivibeje livaisi itsa najuatsipaebijitsipabeje, xaniavaetsia apo jumetaetsi tsipae penajuanaetaetsivi. Bajaraxuata Dioso tocopata jivijavabelia livaisi petsipaebinexa caejivi tsaponae.

Pacatsipaebijitsiatsi pacuenia exanabiaba daxita Dioso pejumecovēnētsivi penacaetuatsijavata. ³⁴ Petiriavi mocya beena Dioso pejumecovēnētsivi penacaetuatsijavata. Tsipaji petiriavi Dioso apo tocopatsi Dioso pejumecovēnētsivi penacaetuatsijavata pecuaicuajaitseanaenexa. Petiriavi pamonajivi bejumecovēnētsiainavanapa pacuenia Dioso pejumelivaisibaxutota itorobatsi. ³⁵ Petiriva itsa jamatabēyanijoba itsalivaisiyo, nexata bota beyanijoba pamonajavabelia. Piauracuene exanaejitsipa Dioso pejumecovēnētsivi penacaetuatsijavata petiriva itsa cuaicuajai tsecae tsipae.

³⁶ Pētsa pacopatame Dioso pejumecovēnētsivi penacaetuatsijavata petiriva pecuaicuajaitseanaenexa. Tsipaji itsatamaranējava Dioso pejumecovēnētsivi bajarapacuenia apo exanae. Pētsa bepaayaijamatabēcuenevimē panatane bajarapacuenia paneexananapaenexa. ³⁷ Itsamonae paxamēyajuvēnēvi natane bepetsipaebiarutsvinexa daxitajivijavabelia palivaisi Dioso yapētaeyaexanatsi. Itsamonae natane Espiritu Santo pejamatabēcueneta bepejamatabēcuenē caējēpaeyaexanaevitsi pacuenia Dioso jitsipa. Nexata bajarapamonae itsa xaniajai Espiritu Santo yajavajinavanapa, beyapētane picani patacatoyaquinaelivaisi, mapalivaisije vajatuxanenē pitorobilivaisi jivi pejumecovēnētsinexa. ³⁸ Itsiata baitsi jane pajivi apo namuxunaevetsi pejumecovēnētsinexa mapalivaisije, pētsa pajumecovēnētame bajarapajivi penavajunupaebijava Dioso pejamatabēcuenecaējēpaeya exanaejavatsi.

³⁹ Bajaraxuata asaēyata panatojitsipare Dioso papecajamatabēcuenē caējēpaeyaexanaenexa panetsipaebinexa daxitajivijavabelia palivaisi Dioso pacayapētaeyaexana. Itsiata baitsi jane pētsa pajumeitavetame itsamonae itsa cuaicuajai itsajivi ata mapanacuata apo pejumetaejumeta. ⁴⁰ Nexata panenacaetuatsijavata, itsa patsipaebame daxitajivijavabelia palivaisi Dioso pacayapētaeyaexana, xaniavaetsia pacanenē tsaponae patsipaebabiabianame.

15

Jesucristo petēpaecujinae Dioso icatsia piasaēyaexanaejavatsi yabara pelivaisi

¹ Tajamonae, pacatojitsipatsi panenajamatabēnapitsinexa palivaisi baja imata pacatsipaebatsi. Bajarapalivaisi, pexanialivaisi, papecacapanepaelivaisinexa panijaneconivecua. Pajumecovēnētame baja bajarapalivaisi. Nexata panevajinaeyabelia asaēya pajumecovēnētavanapaenane bajarapalivaisi. ² Panevajinaeyabelia itsa pajumecovēnētavanapaenane bajarapalivaisi, nexata pibisiacuene paneexanaeconivecua Dioso pacacapanepaena. Matacabi apo pevereverecaejava paxainaname. Itsiata baitsi jane copiaya panejamatabēēthētojavavetsina itsa apo pajumecovēnētsimē tsane bajarapalivaisi, nexata Dioso apo pacacapanepae tsane.

³ Copiaya baja cajena pacatsipaebatsi palivaisi vajatuxanenē copiaya netsipaeba. Pacatsipaebatsi baja cajena Cristo vajanacasivatēpaejava pibisiacuene vajaexanaeconioni yabara. Cristo baja cajena nacasivatēpa pacuenia Dioso pejumelivaisibaxutota tajēvelia jumaitsi. ⁴ Nexata Cristo petēpaenē pemēthētsicujinaetsi, acueyabi matacabita, icatsia Dioso asaēyaexanatsi. Bajarapacuenia Cristo Dioso icatsia asaēyaexanatsi pacuenia baja cajena tajēvelia Dioso pejumelivaisibaxutota jumaitsi Cristo yabara. ⁵ Nexata Cristo Dioso piasaēyaexanaecujinaetsi, copiaya Pedrojavabelia tsitanaitajēta. Bajaraxuacujinae Jesús pijajivi, doce ponēbeje apóstolevijavabelia, tsitanaitajēta. ⁶ Bajaraxuacujinae Jesús pijajivi quinientos pematatsēnēa pajivibejejavabelia penacaetuatsijavata, tsitanaitajēta. Bajarapamonae yajuvēnēvimi Jesús petaevitsi itsamonae baja tēpae ata, itsiata ayaibitsaētoxaneto abaxē asaē tsavanapae. ⁷ Bajaraxuacujinae icatsia Santiagojavabelia Jesús tsitanaitajēta. Bajaraxuacujinae icatsia daxita apóstolevijavabelia Jesús tsitanaitajēta.

⁸ Xanë daxita apóstolevivecua bexëjavaberena apóstolenënë nexana. Nexata pacuenia pexi pexainaejivi cotocaevi pexainacueto itsi, bajarapacuenia nataniji bajarapamonaevivecua. Itsiata baitsi jane daxita Jesús pijajivijavabelia petsitanaitajëtsicujinae, xanëjavaberena ata Jesús netsitanaitajëta tataenexa. ⁹ Daxita apóstolevivecua xanë bevelli-ajamatabëcuenenënë nataniji. Tsipaji abaxë xanë Jesús itsa apo jumecovënëtsinë, Jesús pijajivi bejioxiaexanabiabajë. Bajaraxuata: “Apóstolenë,” tanejainexa ata, auranë tsabiabi. ¹⁰ Itsiata baitsi jane Dioso taneitaxutotsoniataexae, nitapeta baja apóstolenënexanë. Xanëjavaberena Dioso taneitaxutotsoniataejava, apo nacueratsi. Biji rajane xanë daxita itsaapóstolevi matatoxenetsia bitso Dioso tonacuenebaponaponajë. Itsiata xanë tajamatabëcuenesaëta apo tonacuenebaponaponanënë. Dioso raja pesaëta tonacuenebaponaponajë. Nexata Dioso pesaëta nejamatabëcueneyavenonapona asaëya tatonacuenebaponaponanexa. ¹¹ Xanë meta bitso Dioso tonacuenebaponaponajë itsamonae apóstolevi matatoxenetsia. Itsa jume, nexata meta bajarapamona bitso Dioso tonacuenebavanapa xanë matatoxenetsia. Itsiata baitsi jane bajarapacuenie yabara apo canaëjëtšinë. Bitso rajane pacatojitsipatsi paneyapëtaenexa palivaisi baja pacatsipaebatsi, pexanialivaisi, Jesucristo pelivaisi. Nexata baja bajarapalivaisi pajumecovënëtavanapame.

Pacuenia itsamatacabi Dioso icatsia asaëyaexanaejitsia petëpaevimi yabara pelivaisi

¹² Pacatsipaebatsi baja cajena Cristo petëpaecujinae Dioso icatsia piasaëyaexanaejavatsi. Itsiata baitsi jane itsamonae paxamëyajuvënëvi jamatabëcuenenavëxaniabiaya jumai tsabiabi: “Jivi rabaja petëpaecujinae ajibi icatsia piasaëjavanexa,” jai tsabiabi. Nexata bajarapacuenia apo bejumaitsi bajarapamona. ¹³ Tsipaji peneta itsa pepacuenie ajibi tsipae petëpaevi icatsia piasaëjavanexa, nexata baja Cristo ata icatsia Dioso apo asaëyaexanaetsi tsipae petëpaecujinae. ¹⁴ Itsa baja Cristo petëpaecujinae icatsia Dioso apo asaëyaexanaetsi tsipae, nexata palivaisianë pacatsipaebavanapatsi, amatamobi tsipae. Paxamë ata panenajamatabëcuenecopatsijava Cristojavabelia Dioso papecacapanepanexa panijaneconivecua, amatamobi tsipae. ¹⁵ Pematatsënëa xua Dioso exana patavajunupaebijava, panajumetsënëtsipajë. Tsipaji pajumaitsinë tsabiabi mapacueniaje: “Cristo raja petëpaecujinae Dioso baja icatsia asaëyaexanatsi,” pajanë tsabiabi. Itsa pepacuenie ajibi tsipae petëpaevi icatsia piasaëjavanexa, nexata baja Cristo Dioso icatsia apo asaëyaexanaetsi tsipae. ¹⁶ Itsa peneta pepacuenie ajibi tsipae petëpaevi icatsia piasaëjavanexa, nexata Cristo ata petëpaecujinae icatsia Dioso baja apo asaëyaexanaetsi tsipae. ¹⁷ Nexata Cristo petëpaecujinae Dioso baja icatsia itsa apo asaëyaexanaetsi tsipae, nexata paxamë ata panenajamatabëcuenecopatsijava Cristojavabelia Dioso papecacapanepanexa panijaneconivecua, panacueratsipame baja. Tsiteca abaxë panijaneconi paxainaejitsipame. ¹⁸ Bajarapacuenia itsa itsipae, nexata baja pamonaemi tēpa Cristo pepua pejumecovënëtsivi, bajarapamonaemi ata naxuabi-jitsipa baja. ¹⁹ Vaxaitsi ata pijinia Cristojavabelia vajanajamatabëcuenie copatsicujinae, xua Dioso nacayavenonabiaba, saya nacayavenonaejitsipa vajajinavanapeepatojebi mapanacuataje. Vajatëpaecujinae, Cristo pejamatabëcueneta Dioso itsa apo nacacapanepaejitsia tsipae vajaneconivecua, vajajamatabëcuenenavëxaniabivi baja tsipae. Tsipaji vaxaitsi jamatabëjumaitsi tsabiabi mapacueniaje: “Cristo pejamatabëcueneta Dioso nacacapanepaena,” jamatabëjaitsi tsabiabi. Nexata ayaicuenia Dioso vajatonacuenebabiabijava ata, nacueratsipatsi. Matacabi apo peverevereaejava Dioso vajanacarajutsinexa vajavevetavanapaejava ata, nacueratsipatsi. Caranata meta jitsipaejitsipatsi Dioso apo pejumecovënëtsivi vajanacaitaxutobejioabiataenexa.

²⁰ Itsiata baitsi jane mapalivaisije xaniajai cajena. Tsipaji baja Cristo petëpaecujinae, capanepaeya baja icatsia Dioso asaëyaexanatsi. Nexata pacuenia Cristo petëpaecujinae mëthëvecua pitsapa, bajara pijinia pacuenia itsamatacabi mëthëvecua pitsapaena daxita pamonaemi tēpa Dioso pepua pejumecovënëtsivi. Nexata baja Cristo petëpaecujinae, mëthëvecua itsa pitsapa, daxita petëpaevivecua Cristo baja namataxainaeja pitsapa mëthëvecua. ²¹ Caenë Adánpijinë pejamatabëcueneta taxuxuaba jivi petëpaejava mapanacuataje pibisiacuenie pexanaexae. Bajara pijinia pacuenia caenë Cristo pejamatabëcueneta vajanacasivatëpaexae cruzata, taxuxuaba petëpaevimi itsamatacabi mëthëvecua pepitsapaejavanexa. ²² Daxitajivi tēpapona Adánpijinë petaxuxuabicuenia. Bajara pijinia pacuenia daxita pamonaie Cristo pijajivi, petëpaecujinae icatsia Dioso asaëyaexanaenatsi pacuenia Cristo Dioso asaëyaexanatsi. ²³ Paepatota Dioso jitsipa petëpaevi piasaëyaexanaenexa, caejivi canacujitsia asaëyaexanaponaena. Cristo baja petëpaecujinae, Dioso itsa asaëyaexanatsi, daxita petëpaevivecua namataxainaeja baja asaëyaexanatsi. Bajaraxuacujinae icatsia pamatacabi Cristo patsianica, daxita pamonaie Cristo pijajivi, Dioso icatsia asaëyaexanaenatsi. ²⁴ Bajaraxuacujinae jane baja daxitacuenie pecopiarucaeyaexanaejavanexa, copiapat-siana. Bajarapamatacabi Cristo copiarucaeyaexanaena daxita xua Cristo pijavajabitsaë evetavanapa. Nexata bajaraxua Cristo pecopiarucaeyaexanaecujinae, xua paxa

Dioso tocopatatsi Cristo pevetsinexa, bajaraxua tocanaviatsiana baja paxa Diosojavabelia. ²⁵ Cristo evetaponaponaena daxitacuene. Matapania Dioso cuenamoneyabiana daxita Cristo pijavajabitsaë, Cristo copatsiana daxitacuene pevetsijava. ²⁶ Daxita Cristo pijavajabitsaë verebiabiana. Bajaraxuacujinae cotocaevi copiarucaeyaxanaena jivi petëpaecuenemi. ²⁷ Dioso pejumelivaisibaxutota tajëvelia jumaitis mapacueniaje: “Dioso itsamatacabi pexënato Cristo tocopatsiana daxitacueneviria petoetsinexatsi,” jai Dioso pejumelivaisibaxutota. Itsiata baitsi jane Dioso pexënatojavabelia apo jumaitis: “Xanë ata nitorobianame,” apo jai Dioso. Dioso raja itorobiana pexënato petoetsinexatsi daxitacueneviria. ²⁸ Nexata itsamatacabi Cristo daxitacueneviria itsa evetsiana, daxitacueneviria Cristo pitorobicia jumecovënëtabiabianatsi. Nexata jane baja bajarapamatacabi Cristo jumecovënëtsiana paxa Dioso pitorobicueniatsi. Bajarapacuenia Cristo paxa Dioso jumecovënëtsixae tsane, nexata bajarapamatacabi Dioso daxitanacuanëjava daxitacueneviria pitorobinë tsane.

²⁹ Itsamonae pepua penabautisabivi baja, pijamonaemi totëpatsi. Pijamonaemi ata baja pepuanajamatabëcueneocopabi Cristojavabelia, totëpatsi. Itsiata baitsi jane bajarapamonaemi tēpa nabautisabinejeva. Nexata pajivi pijamonaemi totëpatsi, bajarapajivi penabautisabijivi ata baja, pijamonaev pēvënamuto icatsia nabautisaba. Bajarapacuenia anijatobeje nabautisaba pevecuatëpaejivitsi bepenabautisabijivi petotaenexatsi Dioso. Petëpaevimi peneta icatsia Dioso itsa apo asaëyaexanaetsijitsia tsipae, penabautisabijivi baja pijamonaev pēvënamuto icatsia apo nabautisabi tsipae, nabautisabinejeva pevecuatëpaejivitsi bepenabautisabijivi petotaenexatsi Dioso.

³⁰ Petëpaevimi peneta icatsia Dioso itsa apo asaëyaexanaejitsiatsi tsipae, nexata Dioso pejumelivaisi apo patsipaebavanapaenë tsipae, daxitamatacabi panetsiyai tsabiabi ata. ³¹ Tajamonaev, daxitamatacabi baja cajena netsiyai tsabiabi. Itsamonae picani jamatabënebeyaxuababiaba. Bajaraxua paneyapëtaenexa, pacatsipaebatsi. Tsi-paji pacasivajamatabëcuenebarëyatsi vajatuxanenë Jesucristo xaniavaetsia panejumecovënëtavapaxae. ³² Majotaje Efeso tomarajivi ata jamatabënebeyaxuaba picani. Bajarapamonaev benevëthëjamatabëcuenevi. Tsiquirijavayota vecuapanepajë. Jivi petëpaecujinaev icatsia Dioso itsa apo asaëyaexanaejitsiatsi tsipae, nexata xanë ata nacueratsipajë. Nacueratsipajë, netsiyai ata, jivi tatsipaebaponaevjava Dioso pejumelivaisi. Vajatëpaecujinaev icatsia Dioso itsa apo nacaasaëyaexanaejitsia tsipae, nexata xaniavaetsia jumecovënëtsipatsi pamonae jamatabëcuenenavëxaniabiaya nacatsipaeba mapacuenia pejumaitsilivaisije: “Ayai-javanë vajaxaejava xaeyabiabianatsi. Aitajibitsinua tsabiabi tsane vajabarëyatsabiabinexa. Tsi-paji raja bepjiia tēpaenatsi,” pejailivaisi vajanacatsipaebivi jumecovënëtsipatsi.

³³ Itsiata baitsi jane pëtsa panacopatame papecayamaxëitojorobinexa bajarapacuenia pejumaitisivi. Tsi-paji raja itsamonae bajumaitis: “Itsa yajavaponaponaevjitsipame pibisiajamatabëcuenevi, cajamatabëcuenebijianajitsipa. Nexata pexaniajamatabëcuenenë atamë, bajarapamonaev cuenejëpaeya ponaponaevjitsipame,” bajai itsamonae. ³⁴ Panajamatabëxainare xaniavaetsia. Pëtsa baja pematatsënëa pibisiacuene paexaname. Itsamonae paxamëyajuvënëvi Dioso apo yapëtaev. Mapacuenia pacajumaitisitsije paneauranexa.

Pacuenia petëpaevimi Dioso icatsia itsa asaëyaexanatsi, perabëithianaejitsiatsi yabara pelivaisi

³⁵ Itsamonae raeta yanijobiana petëpaevimi icatsia Dioso piasaëyaexanaevjanexatsi yabara. Jumaitis meta tsane bajarapamonaev: “¿Detsa meta pacuenia petëpaevimi icatsia asaëyaexanaenatsi? ¿Detsa meta nexata pitsiperabëto icatsia xainaena bajarapamonaev?” jai meta tsane bajarapamonaev. ³⁶ Bajarapacuenia itsa yanijobiana, apo canaëjëtsinejeva jamatabëcuenenavëxaniabiaya bajarapacuenia yanijobiana. Vajaubijava, pexuto itsa ubatsi, pejavicujinaev bajarapaxutomi batsabana pepitsapaenexa pejananaev. ³⁷ Arrozxuto, itsaviriaxutoti ata, pexu saya ubatsi. Apo mëthëcaetsi pepabotonë. ³⁸ Peubixu, caeviriaxu canacujitsia, peubicujinaev capitsapapona pijaviriabotonë, pijaviriabaxu yajava. Dioso baja cajena pecopatsicuenia caeviriaboto canacujitsia naexanapona. ³⁹ Mapanacuata Dioso copatsi ata daxitacueneviria pejinavanapanaev, itsiata apo naperabëjëpae. Jivi saicaya itsaviriaperabëto xaina. Unupijidujuai pijinia saicaya itsaviriaperabëto xaina. Pepunaevi pijinia saicaya itsaviriaperabëto xaina. Menepijidujuai pijinia saicaya itsaviriaperabëto xaina. ⁴⁰ Bajara pijinia itsi athëbëtatsia pejinavanapaevi ata. Bajarapamonaev saicaya itsaviriaperabëto xaina mapanacuapijivivecuaje. Athëbëtatsia pejinavanapaevi nacavecuapexaniaperabëtovi. Mapanacuata pejinavanapaevi ata, itsamonae nacatsitapexaniaperabëtovi picani. Itsiata pijinia saicayacuenia. ⁴¹ Matacabipijijumeto itayota. Meravipijijumeto ata itayota. Itsiata saicayacuenia navecuaitayotabeje. Tulupu ata pijinia itayota. Itsiata caetulupu canacujitsia saicayacuenia navecuaitayotapona.

⁴² Bajara pijina nacavecuaitane petēpaevimi. Saicayaperabēto nacavecuaxainaena Dioso icatsia ita asaēyaexanaenatsi. Petēpaeviji irabelia mēthētatsi. Nexata baja tsabana. Bajaraxuacujinae Dioso icatsia ita asaēyaexanaenatsi, apo petsabanaeperabētonexa jane baja xainaena. ⁴³ Petēpaeviji mēthētatsi vajaataejitsibiperabēto yajava. Bajaraxuacujinae Dioso icatsia ita asaēyaexanaenatsi, pexaniapenivenivenaeperabēto jane baja xainaena. Petēpaeviji mēthētatsi pecueranaeperabēto mi yajava. Bajaraxuacujinae Dioso icatsia ita asaēyaexanaenatsi, daxita matababijavabelianexa jane baja pesaē pexainaeperabēto xainaena. ⁴⁴ Petēpaeviji mēthētatsi mapanacuapijiperabēto yajava. Bajaraxuacujinae Dioso icatsia ita asaēyaexanaenatsi, athēbēnacuapijiperabēto xainaena. Itsaviriaperabēto abaxē aeconoxae xainatsi mapanacuata vajajinavanapaenexa. Bajara icatsia pacuenia itsamatababi itsaviriaperabēto xainaenatsi athēbēnacuata tsia vajajinavanapaenexa.

⁴⁵ Dioso pejumelivaisibaxutota jumaiti mapacueniaje: “Adánpijinē copiaya Dioso exanatsi mapanacuataje. Bajaraponē Dioso exanatsi pecueranaeperabēto yajava peponaponae nexa mapanacuataje,” jai Dioso pejumelivaisibaxutota. Itsiata baiti jane Adánpijinē matatoxenetsia Cristo bitso ayaijamatabēcuenenē. Nexata Cristo petēpaecujinae icatsia Dioso ita asaēyaexanatsi, caējēpatsi vajanacajamatabē cueneasaēyaexanaenexa Diosojavabelia. Caējēpatsinua vajanacarajutsinexa matababi apo pevereverecejava. ⁴⁶ Pacuenia athēbēnacuapijivi perabētsi, abaxē copiaya apo perabētsi. Biji rajane pacuenia mapanacuapijivi perabētsije, bajaraperabētsi. Itsiata baiti jane vajatēpaecujinae Dioso icatsia ita nacaasaēyaexanaena, pacuenia athēbēnacuapijivi perabētsi, bajara vaxaitsi ata perabētsi tsanetsi. ⁴⁷ Adánpijinē copiaya Dioso exanatsi mapanacuataje. Atsabenota exanatsi. Bajaraxuacujinae hexējavabelia athēbēvetsica Cristo patsica, ponē vajatuxanenē. Bajaraponē saicaya athēbēvetsica pepatsinē. ⁴⁸ Daxitatsi vaxaitsi, mapanacuapijivitsije, perabējēpatsi Adánpijinē, atsabenota pexanaenētsi. Itsiata baiti jane itsamatababi daxitatsi, Cristo vajajumecovēnētsivi, perabējēpaenatsi Cristo. Nexata pacuenia athēbēnacuapijivi perabētsi, bajaraperabētsi tsanetsi Cristo vajajumecovēnētsivi. ⁴⁹ Aeconoxae abaxē perabējēpatsi Adánpijinē, ponē atsabenota pexanaenētsi. Bajara icatsia pacuenia itsamatababi Cristo perabējēpaenatsi, ponē athēbēvetsica pepatsinē.

⁵⁰ Tajamonae, jitsipajē patacatsipaebinxaxa mapacueniaje. Acuenebi caejivi ata mapanacuapijivije mapanacuapijiperabēto yajava pejonexa Dioso pijanacuayabetsia. Tsipaji vajaperabēto saya pevereverecejavanexa. Bajaraxuata cuenebi vajayajavajinavanapaenexa bajarapaperabēto daxita matababijavabelianexa. ⁵¹ Nexata panamuxunae vere mapalivaisije, Dioso bajayata muetsia pexainabuatsilivaisimi, palivaisi aeconoxae Dioso nacayapētaeyaexanapona. Daxitatsi raja vaxaitsi Cristo icatsia patsimatabacinxaxatsica pevājēnaeya, apo tēpaetsi tsane. Itsiata baiti jane apo tēpae atatsi tsane, pamatababi Cristo patsianica, daxitatsi nacaperabēitothianaena Dioso. ⁵² Itsa najumetsiana cotocaevi piobijava trompeta, bepijiayo tsatabi tsane, paepatoyovajēto banaitatsaquetajarabatsi, bajarapaepatoyovajēto Dioso nacaperabēitothianajonena. ⁵³ Vajaperabēto raja pevereverecejavanexa. Bajaraxuata xanepana vajanacaperabēitothianaenexa, apo pevereverecejaperabēto vajaxainaenexa. ⁵⁴ Nexata paepatota bajarapacuenia nacaperabēitothianajonena, copijapona jane baja pacuenia Dioso pejumelivaisibaxutota tajēvelia jumaiti. Dioso baja cajana pejumelivaisibaxutota tajēvelia jumaiti mapacueniaje: “Jivi petēpaecuenemi itsamatababi copiarucaena. Pinijicuenia Dioso copiarucaeyaexanaena jivi petēpaecuenemi. ⁵⁵ Jivi petēpaeyaexanaecuenemi ajibi tsane pesaē vajanacaavitaniaexanaeyaniva. Ajibi tsane vajanacatēpaeyaexanaecuenemi,” jai tajēvelia Dioso pejumelivaisibaxutota jivi petēpaeyaexanaecuenemi Dioso pecopiarucaeyaexanaejavanexa yabara. ⁵⁶ Pibisiacuene vajaexanaecononi yabara tēpaenatsi. Palivaisi bajayata Dioso Moiséspijinēta najumecopata, bajarapalivaisi pejamatabēcueneta yapētanetsi vajatēpaecujinae Diosovecua picani vajanaxuabijavanexa pibisiacuene ita exanatsi. ⁵⁷ Itsiata baiti jane baja vajatēpaecujinae Diosovecua apo naxuabitsi tsane. Tsipaji baja vajatuxanenē Jesucristo nacasivatēpa cruzata vajanacapanepaenexa vajaneconivecua. Bajaraxuata vaxaitsi Diosojavabelia jumaititsi tsabiabi mapacueniaje: “Pexaniacuene rabaja panetoexaname,” jaiti tsabiabi.

⁵⁸ Tajamonae, bitso patacaasivavi. Payapētaneme rabaja mapacueniaje. Dioso panetonacuenibijava, apo panacueratsimē tsane. Bajaraxuata panevajēnaeyabelia asaēya patonacuenebavanapare Dioso. Pētsa pacopabame Dioso panejumecovēnētsijava. Panevajēnaeyabelia asaēya Dioso patonacuenebaponare.

16

Pacuenia Pablo itoroba Corinto tomarapijivi ofrenda pexanaenexa Jerusalén tomarata Dioso pejumecovēnētavanapaevi petoitobinexa yabara pelivaisi

¹ Pacatsipaebijitsiatsi pacuenia pacaetuatsijitsiamë ofrenda panetoitorobinexa Jerusalén tomarata Dioso pejumecovënëtanapaevijavabelia bajarapacuenia paneyavenonaenexa. Pacuenia Galacia nacuata Dioso pejumecovënëtsivi, caebitsaëto canacujitsia, itorobajë ofrenda pecaetuataponaenexa, bajara pijinia pacuenia paxamë ata pacaetuataponaename ofrenda. ² Pacaejivimë canacujitsia, caesemana canacujitsia panacanabipalatayajuvënëjava, ofrendanexa saicaya patsataponanename caedomingo canacujitsia. Pajivi tsiquirijavayo nacanaba, tsiquirijavayo pijinia saicaya tsatsiana. Pajivi ayaijava nacanaba, ayaijavayo pijinia saicaya tsatsiana. Bajarapacuenia paxaniavaetaponaenename palata. Nexata pamatacabi paxamëjavabelia patsianajë, palata ofrendanexa apo pacaetuataponaemë tsane. ³ Nexata pamatacabi paxamëjavabelia patsianajë, paitapetsianame bajarapalata pecaponaevinexa Jerusalén tomarapijivijavabelia. Pamona palata pecaponaevinexa, tscibeyaquinaenajë cuyalato. Bajarapacuyalato bajarapamona peyajavacaponexa, panecaetuatsiofrenda ita tocaponena Jerusalén tomarata Dioso pejumecovënëtsivijavabelia. Nexata bajarapalata pecaponaevi, Jerusalén tomarapijivi yapëtaenatsi xaniavaetsia Dioso pejumecovënëtsivicuene, peyajavacaponaxae tsane tatsicobeyaquinaebaxuto. ⁴ Xanë ata ita jitsipaenajë taponanexa, ponaenajë Jerusalén tomarabelia. Nexata meta bajarapamona naponaneta pata.

Pacuenia Pablo tajëvelia navajunupaeba pacuenia exanaejitsia yabara pelivaisi

⁵ Itsa ponaenajë paxamëjavabelia, tapatsivajënaeya paxamëjavabelia, copiaya pataponanajë Macedonia nacujava. Bajaraxucujinae jane baja patsianajë paxamëjavabelia, Corinto tomarata. ⁶ Ponaponanajë meta paxamëjavata bajayajebi. Daxita emarapaejebi ata meta naponanajë paxamëjavata. Nexata bajaraxucujinae paneyavenonaenename tajanamutonexa, itsabelia jitsipajë taponanexa icatsia. ⁷ Caepatoyo saya tanapononatabinexa paxamëjavata, apo jitsipaenë. Biji rajane jitsipajë bajayajebi taponanexa paxamëjavata pacuenia vajatuxanenë netojitsipa. ⁸ Itsiata baitsi jane abaxë aeconoxae ponaponanajë majotaje Efeso tomarata. Pentecostësvënë fiestacujinae meta, matapania vecuaponanajë Efesotomara. ⁹ Majotaje aeconoxae baja bitso xanepana tatsipaebinexa Dioso pejumelivaisi. Tsipaji mapatomarapijivije bitso baja jitsipapona pejumetaenaxa Dioso pejumelivaisi. Itsiata baitsi jane itsamonae ayabitsaëto apo jitsipae. Nexata tatsipaebilivaisi pejumecovënëtsivi, jamatabëcopabianexanaponatsi.

¹⁰ Timoteo ita patsiana paxamëjavabelia, pacopiapitsianame xaniavaetsia jamatabëcuenebarëyaya peponaponanexa paxamëjavata. Bajarapacuenia xaniavaetsia pacopiapitsianame. Tsipaji pacuenia xanë vajatuxanenë pejamatabëcueneta tonacuenebaponanajë, bajara pijinia pacuenia bajaraponë ata vajatuxanenë pejamatabëcueneta tonacuenebaponana. ¹¹ Bajaraxuata pëtsa itsajivi ata pacopatame pequenetsiataenexatsi. Biji rajane payavenonaenename pijanamutonexa jamatabëcuenexanepanaeya pepatsinexa xanëjavaberenana. Xanë, itsamonae yajava, vajënaeveetaponanajë Timoteo pepatsinexarena xanëjavaberenana.

¹² Vajabananë Apolos pelivaisi pacatsipaebijitsiatsi. Bajaraponë picani itorobajë itsamonae Dioso pejumecovënëtsivi pepëta penaponanexa paxamëjavabelia papecataenexa. Itsiata baitsi jane aeconoxae abaxë apo jamatabëponae. Ponaena meta itsiata itsajota cuencaëjëpatsi.

Pacuenia Pablo jamatabënjajina Corinto tomarapijivi yabara pelivaisi

¹³ Dovathi pejamatabëcueneyaniva, jamatabëcueneenacotsiaya pajinavanapare. Pajamatabëcuenesaëmëre tsavanapae Jesucristojavabelia panenajamatabëcueneecopsijava. Pëtsa jamatabëcueneaitjepaebiaya pajinavanapame. Pajamatabëcueneaittsacamëre tsavanapae pebicuenia. Itsamonae patsiatajamatabëcuenesaëmëre tsavanapae. ¹⁴ Daxita xua paexanavanapame, itsamonae ata asivaya paexanavanapare.

¹⁵ Tajamonae, payapëtaneme rabaja mapacujeje. Estéfanos pijabopijivi barëjumecovënëta Jesús pelivaisi. Bajarapamonae daxita pijanacuapijivivecua copiaya jumecovënëta Jesús pelivaisi Acaya nacuata. Nexata bajarapamonae jamatabëcueneenabiabatsi ëDioso pijacuene. Bajaraxuata bajarapamonae asaëyata bitso yavenonabiaba itsamonae Dioso pejumecovënëtsivi. ¹⁶ Pacatojitsipatsi xaniavaetsia panejumecovënëtsinexa xua pacaitoroba bajarapitsivi. Bajarapitsivi peyajavanacuenebivi ata, xua pacaitoroba, pajumecovënëtsianame. ¹⁷ Paxamëyajuvënëvi parena xanëjavaberenana mapamatabëxëyoje. Estéfanos, Fortunato, Acaico, bajarapamatabëxëyo parena. Bajaraxuata sivajamatabëcuenebarëyanë. Bitso picani pacaitaxanabiabatsi. Itsiata baitsi jane bajarapamonae tanetopatsixaerena, neyavenonabiaba pacuenia paxamë ita papatsiparemena, paneyavenonaejitsipame. ¹⁸ Nexata bajarapamonae itaxutuanajamatabëcuenesaëtajë. Paxamë ata bajarapamonae

pacajamatabëcueneasaëyaexanaena icatsia itsa naviabiana paxamëjavabelia. Bajarapitsivi bepayaivaneme.

¹⁹ Caebitsaëto canacujitsia Dioso pejumecovënëtsivi, Asiavënë nacuapijivi, pacabajacobalia. Aquila pijava, Prisca, pacabajacobalia. Aquila ata pacabajacobalia. Daxita Dioso pejumecovënëtsivi, pamonaë nacaetuatabiaba bajarapajivibeje pijabota, bajarapamonae ata, daxita pacabajacobalia vajatuxanenë pevënëta. ²⁰ Daxita Dioso pejumecovënëtsivi, majotaje pejinavanapaevi, pacabajacobalia. Paxamë ata Dioso panejumecovënëtsixae, xaniavaetsia namataenetsia bitso nasivaya panabajacobabiabare.

²¹ Xanë Pablonë, tajacuata tacobeta pacatoyaquinatsi mapacotocaevilivaisiyoje. Apo itorobinë taneyavenonabiabinë tanetoyaquinaenexa. Bitso pacabajacobatsi.

²² Pajivi apo jitsipae vajatuxanenë Jesucristo, bajarapajivi Dioso navecuaxuabianatsi. ¡Vajatuxanenë raja naxanitsiayo patsianica!

²³ Pacatovajëtabiabatsi Diosojavabelia vajatuxanenë Jesucristo papecayavenonabiabinexa. ²⁴ Daxita paxamë asivaya pacajamatabënajinatsi caenë Jesucristo pijajivixaetsi.

Mapabaxutoje San Pablo cotocaevi toyaquina Corinto tomarapijivijavabelia

Pacuenia Pablo toyaquina mapabaxutoje Dioso pejumecovënëtsivi, Corinto tomarapijivi-javabelia, yabara pelivaisi

¹ Xanë Pablonë, Dioso tanetojitsipaexae, nitapeta Jesucristo pijaapöstolenënexanë. Nexata Jesucristo nitoroba jivi tatsipaebinxexa pexanialivaisi. Vajabananë Timoteo xanëjavata ponapona. Nexata pacatoyaquinatsibeje mapalivaisije Dioso panejumecovënëtsivi, paCorinto tomarapijivimë. Patoyaquinajëbejenua mapalivaisije Acaya nacujava pejinavana-paevi ata. ² Pacatovajëtatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanaenexa.

Pacuenia Pablo navajunupaeba itsamonae pebejiobiaexanaejavatsi yabara pelivaisi

³ “Ayaicuenia panejamatabëcueneyavenoname,” pajanë vaxa Diosojavabelia. Bajaronë Dioso, vajatuxanenë Jesucristo paxa. Dioso, vajanacaitaxutotsoniataenë, vajanacajamatabëcuenebabatsinë bitso vajanajamatabëxainaeyaniva. ⁴ Pamatacabi panetocopiapatabiaba daxita xua bitso panenajamatabëxainaeya exanaejitsia, itsiata Dioso panejamatabëcuenebabatabiaba bajaraxuavecu. Bajara pijinia pacuenia paxanë ata panejamatabëcuenecaejëpa itsamonae juya patajamatabëcuenebabatsinexa pamatacabi bajaraponaenata tocopiapatatsi xua bitso najamatabëxainaeya exanaejitsiatsi. ⁵ Itsamonae bitso panebejiobiaexanabiaba Jesucristo patajumecovënëtsixae. Nexata pijinia Jesucristo pejamatabëcueneta Espiritu Santo panejamatabëcuenebabatabiaba bitso patanajamatabëxainaeyaniva. ⁶ Nexata paxanë itsamonae itsa panebejiobiaexanabiaba, Dioso panejamatabëcueneyavenonabiaba patanejamatabëcuenebabatsinexa. Nexata paxanë ata panejamatabëcuenecaejëpaena juya itsamatacabi paxamë patacjamatabëcuenebabatsinexa itsa pacatocopiapata xua bitso pacanajamatabëxainaeya exanaejitsia. Nexata itsa pacajamatabëcuenebabatsianatsi, bajayajebi pajamatabëcuenesaëmë tsane Dioso panejumecovënëtsijava matapania Dioso papecacapanepaejavabelianexa. Paxamë ata raja itsamonae pacabejiobiaexanabiabiana. ⁷ Payapëtaniji baja cajena paxamë ata Dioso papecacapanepaejavanexa. Pacuenia paxanë itsamonae panebejiobiaexanabiaba, bajarapacuenia paxamë ata itsamonae pacabejiobiaexanabiabiana. Nexata paxamë ata itsamonae itsa pacabejiobiaexanabiabiana, Dioso pacajamatabëcuenebabatabiabiana panevajënaeyabelia panejamatabëcuenesaënexa Dioso panejumecovënëtsijava. Bajarapacuenia Dioso pacajamatabëcuenebabatabiabiana matapania Dioso papecacapanepaejavabelianexa.

⁸ Tajamonae, pajitsipajë paxamë ata paneypätaenexa itsamonae Asiavënë nacuata patanebejiobiaexanabiabijava. Ayaicuenia bitso panebejiobiaexanabiaba. Nexata baja picani pasaëjibinë tsaponae. Apo panaecaejëpae baja picani patavajënaeyabelia pataponenexa. Nexata pajamatabëjumaitsinë tsabiabi: “Patëpaenajë meta baja rovia,” pajamatabëjanë tsabiabi. ⁹ “Pepacuenen ræta baja panebeyejebiana,” pajamatabëjanë tsabiabi. Dioso baja cajena panetocopata bajarapacuenia itsamonae patanebejiobiaexanabiabinxexa. Nexata paepatota panebejiobiaexana patajamatabëjumaitsinexa mapacueniaje: “Xanë tajacuata apo necaejëpae tavecuapanepaenexa mapacuenije. Matapania Dioso neyavenonaena, necaejëpaena tavecuapanepaenexa mapacuenije,” patajamatabëjainexa. Dioso caëjëpatsi pataneyavenonaenexa. Tsiapai baja cajena Dioso pematocotsinë petëpaevi ata. ¹⁰ Dioso baja panecapanepa itsamonae patanebejiobiaexanaejavata patanebeyaxuabianiva. Icatsia bajarapacuenia itsamonae itsa panebejiobiaexanaena, Dioso icatsia panecapanepaena. Bajaraponëjavabelia panajamatabëcuenecopatajë bajarapacuenia pataneyavenonabiabinxexa. ¹¹ Paneyavenonaeyavajëtaponenama Diosojavabelia bajarapacuenia Dioso pataneyavenonabiabinxexa. Paayaibitsaëtotoxanetomë itsa panetovajëtaponenama Diosojavabelia, nexata Dioso paneyavenonabiabiana. Nexata pijinia jivi ayailbitsaëtotoxanetomë paxanë yabara jumai tsabiabi tsane Diosojavabelia: “Pexaniacuene bitso toexaname Pablobana. Ayaicuenia yavenoname pebeyejebianivatsi,” jai tsabiabi tsane.

Pajamatabëcueneyabara Pablo apo ponae Corinto tomarabelia yabara pelivaisi

¹² Itsa pajinavanapajë daxitajivijava, paxamëjava ata, xaniavaetsia pajinavanapajë Dioso pitabarata. Itsa pajinavanapajë paxamëjava, pibisiacuene apo pacasivanajamatabëxainaetsi. Bajaraxuata panasivajamatabëcuenecarëyanë. Paxanë raja saya mapanacuapijilivaisita apo panejamatabëcueneyavenonae xaniavaetsia patajinavanapaenexa. Dioso raja patanejamatabëcueneyavenonaexae, bajarapacuenia

xaniavaetsia pajinavanapajė. ¹³ Palivaisianė baja pacatoyaquinabiabatsi, caelivaisita anijamatabėcuenelivaisibeje apo xainaponae. Palivaisianė pajumetaneme itsa palebame patacatoyaquinaelivaisianė, bajarapalivaisianė saya caejamatabėcuenelivaisi xainapona. Pematatsėnėa itsajamatabėcuenelivaisi apo xainaponae. Pacatojitsipatsi xaniavaetsia panejumeyapėtaenexa palivaisianė pacatoyaquinatsi. ¹⁴ Pacatojitsipatsi xaniavaetsia patanejamatabėcueneyapėtaenexamė. Tspaji abaxė xaniavaetsia apo panejamatabėcueneyapėtaemė pacuenia pajamatabėcueneitsinė tsavanapae. Nexata pamatacabi vajatuxanenė Jesús icatsia patsianica, paxamė panesivajamatabėcuenebarėyamė tsane. Bajara pijinia pacuenia paxanė ata pacasivajamatabėcuenebarėyatsi tsane.

¹⁵ Nexata xanė pacasivajamatabėcuenejumaitsitsi mapacueniaje: “Corinto tomarapijivi baja cajena xaniavaetsia nejamatabėcueneyapėtane. Yapėtane pacuenia apo sivanajamatabėxainaanė itsajamatabėcuene bajarapamonaejavabelia,” pacasivajamatabėjaiti. Bajaraxuata picani jamatabėpatajė paxamėjavata patanesivajamatabėcuene barėyexamė itsa patajė paxamėjavata. ¹⁶ Pamatacabi ponajė Macedonia nacuyabelia, talianė picani jamatabėpacataeponatsi bajaraxuayo. Bajaraxuacujinae icatsia tanaviatsinėrena jamatabėpacataeponatsi picani icatsia bajaraxuayo. “Bajarajota bajarapamonae neyavenonae aenatajanamutonexa, Judea nacuyabelia taponaeenexa,” pacasivajamatabėjaiti picani. ¹⁷ Pacuenia najamatabėxainabiabajė taponaeenexa itsajavabelia, ponabiabajė baja cajena. Itsiata aeconoxae bajarapacuenia apo exanaanė taponaeenexa paxamėjavabelia. Mapanacuata itsamonae najamatabėxainae ata itsacuenėjavayo pexanaenexa, itsiata apo exanabiabi. Bajarapacuenia itsiata xanė apo jamatabėcueneitsinė. Paxamė baja cajena panecueneyapėtaneme. ¹⁸ Dioso ata panecueneyapėtane apo patacayamaxėitojorobicuene. Dioso baja cajena pejumelivaisi pacatsipaebabiabatsi. Nexata icatsia xuacujinae bajarapalivaisi itsa pacatsipaebabiabatsi, saicayalivaisicuenia icatsia apo pacatsipaebabiabatsi. ¹⁹ Xanė Pablonė, Silvano, Timoteo, bajarapamatabėxėyo, pacatsipaebabiabatsi Jesucristo, Dioso pexėnato, pelivaisi. Bajaraponė Jesucristo caejamatabėcuene xainabiaba. Nexata pacuenia jumaiti, xaniajai tsabiabi. ²⁰ Jesús pejamatabėcueneta Dioso baja daxita nacatoexana pacuenia tajėvelia najumecapanepaeya jumaiti vajanacatoexanaenexa. Bajaraxuata Diosojavabelia vajavajėtsijavata itsa jumaitisitsi: “Diosomė, bitso ayaijamatabėcuenenėmė,” itsa jaiti, nexata Jesucristo pejamatabėcueneta jumaitisitsi. ²¹ Dioso pacajamatabėcueneyavenonapona panevajėnaeyabelia paneajamatabėcuenesaėnexa Cristojavabelia panenajamatabėcuenecopatsijava. Bajarapacuenia paxanė ata Dioso panejamatabėcueneyavenonapona. Dioso nacaitapeta Jesucristo pijajivinxatsi, Dioso pijacuenė vajatonacuenėbavanapoenexa. ²² Dioso raja Espiritu Santo nejamaitamatabėcueneayaxana. Nexata nayapėtanetsi Dioso pexicuenetsi. Bajaraxuata yapėtanetsi pepacuenė xaniajai Dioso vajanacacapanepaejavanaxa.

²³ Mapacuenia pacajumaitisije Dioso pitabarata. Dioso baja cajena nejamatabėcueneyapėtane. Pamatacabi picani jamatabėponabiabajė paxamėjavabelia, caecuenia itsa ponaejitsipajė, nexata pacabijataejitsipatsi. Tspaji abaxė apo paexanavanapaemė patacaitorobicuenia. Bajaraxuata abaxė apo navecuaponanė paxamėjavabelia, itsa pacabijatanetsi, bitso panenajamatabėxainaeayaniva. ²⁴ Nexata apo jitsipaanė icatsia patacatsipaebaponaenexa paneyapėtaenexa pacuenia bepaexanavanapame. Tspaji baja xaniavaetsia Dioso pajumecovėnėtavanapame. Jamatabėpacayavenonatsi. Pacuenia baja pajamatabėcuenebarėyamė tsavanapae, matatoxenetsia icatsia panejamatabėcuenebarėyanexa Dioso pitabarata.

2

¹ Najamatabėcopatajė baja taponaejava paxamėjavabelia. Tspaji jamatabėjumaitisinė paxamė yabara mapacueniaje: “Apo ponaenė abaxė tsane Corinto tomarapijivijavabelia tanajamatabėxainaeayaxanaeyaniva bajarapamonae,” jamatabėjanė. ² Paxamė itsa pajamatabėcuenebarėyamė, nexata xanė ata pacasivajamatabėcuenebarėyatsi tsabiabi. Itsiata itsa pacanajamatabėxainaeaya exanaejitsipatsi, nexata apo pajamatabėcuenebarėyamė tsipae. Nexata xanė ata apo pacasivajamatabėcuenebarėyatsi tsipae. Tspaji ajibi tsipae patacasivajamatabėcuenebarėyavanaxa. ³ Bajaraxuata taponaevajėnaeya paxamėjavabelia copiata baja cajena pacatoitorobaliatsi itsabaxuto, patacatoyaquinaebaxuto. Bajarapacuenia pacatoyaquinatsi tspaji abaxė apo jamatabėponaanė paxamėjavabelia patacasivanajamatabėxainaeayaniva, itsa pacatanetsi panejinavanapaejava apo patacaitorobicuenia. Jitsipajė picani paxamė patacasivajamatabėcuenebarėyanexa. Paxamė yabara jamatabėjumaitisinė mapacueniaje: “Corinto tomarapijivi baja cajena nejamatabėcueneyapėtane. Bajarapamonae itsa jamatabėcuenebarėya, xanė ata bajarapamonae sivajamatabėcuenebarėyanė tsabiabi,” jamatabėjanė. ⁴ Apo jitsipaanė picani patacatoyaquinaenexa bajarapabaxuto. Itsiata itsa pacatoyaquinatsi,

nuajë paxamëjitsia. Najamatabëxainajë cajena bitso tajamatabëëthëtovetsina. Apo pacatoyaquinatsi raja saya patacanajamatabëxainaeya exanaenexa. Ayaicuenia raja patacaasivajava patanejamatabëcueneyapëtaenexamë, pacatoyaquinatsi.

Pacuenia Pablo itoroba Corinto tomarapijivi barajamatabëcuenexanepanaeya baja pëtaenexa pibisiacuene pexanaponaponaenëmi yabara pelivaisi

⁵ Ponë pibisiacuene exana, caenënë xanë apo nenajamatabëxainaeyaexanae. Daxita paxamë ata bajarapacuenia pacanajamatabëxainaeyaexana. ⁶ Ponë yabara itsabaxutota pacatoyaquinatsi, paxamë baja cajena najamatabëcuenëjëpaeya panavecuaitavetame bajaraponë, pibisiacuene pexanaenë, penapatsiyaniva panenacaetuatsijavata. Nexata baja bajaraponë belia copata pibisiacuene pexanaejava. Xanepana rabaja. Pëtsa baja pematatsënëa icatsia panavecuaitavetame bajarapacuenia. ⁷ Aeconoxae baja pajamatabëcuenecaevare bajaraponë pibisiacuene pexanaejava. Pabarajamatabëcuenexanepanare baja. Bajaraponë juya pajamatabëcueneyavenonaename piaurayaniva. Bajarapacuenia pajamatabëcueneyavenonaename pejamatabëcuenematoxenetsiyanivatsi bitso pejamatabëcuenëbjajivajava pijaneconi yabara. ⁸ Bitso pacatojitsipatsi panetsitanajamatabëcuenëitajëtsinexa pëneasivajava bajaraponë. ⁹ Nexata pabaxuto copiaya pacatoyaquinatsi, bajarapabaxuto pacatoyaquinatsi saya patacajamatabëcuenëjëtsinexa. Jitsipajë xaniavaetsia tayapëtaenexa itsa panejumecovënëtsijitsiamë daxita pacuenia pacaitorobatsi. ¹⁰ Nexata baja aeconoxae itsa pajamatabëcuenecaevame papibisiacuene bajaraponë exana paxamë tuatujëta, xanë ata baja jamatabëcuenecaevajë bajaraponë pibisiacuene pexanaejava. Xanë baja jamatabëcuenecaevajë paneconi bajaraponë exana xanëjavaberena. Jamatabëcuenecaevajë baja bajaraponë pibisiacuene pexanaejava, daxita paxamë aneconijibia jamatabëcuenëbarëyaya panejinavanapænexa Cristo pitabarata. ¹¹ Jamatabëcuenecaevatsi baja papibisiacuene bajaraponë exana vaxaitsijavaberena. Tspipaji vaxaitsi itsa apo jamatabëcuenecaevatsi tspipae bajarapapibisiacuene pexanaejava, vaxaitsi ata dovathi nacayamaxëitotorobijitsipa. Vaxaitsi baja dovathi cueneyapëtanetsi, xua exanabiaba vajanacacopabiaexanaenexa Dioso pejumelivaisi vajajumecovënëtsijava.

Pacuenia bitso Pablo Tito sivanajamatabëxaina yabara pelivaisi

¹² Patajopajë Troas tomarata tatsipaebinxexa Cristo pelivaisi. Troas tomarata tapatsi-vajënajëa, taniji Dioso tanetoxanepanaeyaexanaejava tatsipaebinxexa pejumelivaisi bajarapatomarata. Nexata Troas tomarata itsa tsipaebabiabajë Dioso pejumelivaisi, Troas tomarapijivi nenamuxunaevetabiaba xaniavaetsia. ¹³ Itsiata baitsi jane bajarajota abaxë apo jamatabëcuenëbarëyanë. Najamatabëxainajë vajanabanë Tito yabara. Tspipaji abaxë Tito apo caxitajarabaxuabinë Troas tomarata. Nexata baja napëjibibajë Troas tomarapijivi taponænexa baja Macedonia nacuyabelia.

Pacuenia Cristo nacajamatabëcueneyavenona yabara pelivaisi

¹⁴ “Pexaniacuene rabaja panetoexaname,” pajanë Diosojavabelia, Cristo pejamatabëcueneta Dioso patanejamatabëcueneyavenonabiabixae. Itsajavabelia itsa paponajë, Dioso paneyajavaponabiaba. Panejamatabëcueneyavenonabiaba pacuenia Dioso jitsipa pataxanaenexa. Panejamatabëcueneyavenonabiabanua itsamonaejavabelia xaniavaetsia patatsipaebinxexa Dioso pejumelivaisi. Pamonae jumecovënëta bajarapalivaisi, tsitapexanialivaisitsi bitso. ¹⁵ Dioso sivanajamatabëcuenëbarëyatsi pajivi itsamonaejavabelia tsipaeba Cristo pelivaisi. Poxanë ata Dioso panesivanajamatabëcuenëbarëyaya. Tspipaji patsipaebabiabajë Cristo pelivaisi daxitajivijavabelia. Itsamonae baja jumecovënëtapona Cristo pelivaisi Dioso pecapanepaevinexatsi. Itsamonae pijinia apo jumecovënëtsi Cristo pelivaisi Diosovecua penaxuabivinxexa. ¹⁶ Pamonae Diosovecua naxuabiana apo pejumecovënëtsixae Cristo pelivaisi, naxuabiana. Pamonae pijinia Dioso capanepaenatsi pejumecovënëtsixae Cristo pelivaisi, capanepaenatsi. Poxanë, paapóstolevinë, Dioso paneyavenonabiaba. Nexata panejamatabëcuenecaëjëpa patatsipaebabiabinexa pexanialivaisi, Cristo pelivaisi, jivi pecapanepaelivaisinexatsi. ¹⁷ Pacuenia itsamonae tsipaebabiaba Cristo pelivaisi épematamotsinexatsi, poxanë apo paitsinë. Bijj rajane itsajamatabëcueneyavenonabiaba apo pasivanajamatabëxainaenë jivijavabelia itsa patsipaebabiabajë Cristo pelivaisi. Dioso baja cajena panejamatabëcueneyapëtanë. Dioso paneitoroba Cristo patatonacuenëbinexa.

3

Pacuenia Dioso pejanalivaisi najumecapanepaeya jumatsi jivi pecapanepaenexa yabara pelivaisi

¹ Itsa pacanavajunupaebatsi paneyapëtaenexa Dioso patanitorobijava Cristo pelivaisi patacatsipaebinexa, paayajamatabëcuenevinë apo panataenë. Itsamonae pata paxamëjavata penajumetsënëtsilivaisi papecatsipaebinexa beDioso pejumelivaisicuenia. Bajarapamonae patatocapata cuyalato itsamonae petsicobeyaquinaebaxutotsi. Bajarapabaxutota patatoyaquina: “Dioso raja pejumelivaisi papeabivi,” pejailivaisi. Bajaraxuata xaniavaetsia pacopiapitame bajarapamonae. Itsiata baitsi jane paxanë itsa papatajë paxamëjavata, apo pacarajutsitsi itsamonae patanetsicobeyaquinaecuyalato. “Pablo raja apóstolenë,” pejailivaisi itsamonae patanetsicobeyaquinaebaxuto, apo pacarajutsitsi xaniavaetsia patanecopiapitsinexamë. Apo panamatavenonaenë paxamë ata cuyalato patanetsicobeyaquinaexamë patacaponanexa itsamonaejavabelia bajarapamonae pataneyapëtaenexa xaniavaetsia patanecopiapitsinexa. ² Bajarapacuenia cuyalato apo panamatavenonaenë patacaponanexa jivi pataneyapëtaenexa xaniavaetsia patanecopiapitsinexa. Tsipaji baja jivi yapëtane xaniavaetsia Jesucristo pelivaisi patacatsipaebixae panenajamatabëcuene pënyorotsijava Diosojavabelia pibisiacueni panexanabiabijavamivecua. Nexata jivi bajarapamonae yapëtanenua Dioso patanitorobijava. ³ Paxamë xaniavaetsia panejumecovënëtime patacatsipaebilivaisi, Jesucristo pelivaisi. Nexata itsamonae, apo pataneyapëtaevi ata, itsa pacavënëlvaisitane patanejumecovënëtsijavamë, panesivajamatabëjumaitsi: “Pabloana Corinto tomarapjivi cuyalato apo tsicobeyaquinae atatsi, itsa jume, ibopanata ata apo tsicobeyaquinae atatsi vajayapëtaenexa, itsiata yapëtanetsi Dioso pitorobijavatsi pexaniajailivaisi, Jesucristo pelivaisi, jivi petsipaebavanapaenexa,” panesivajamatabëjai. Piasaëtsaponaponanë raja cajena Espiritu Santo pacatsijamatabëca. Nexata baja pacajamatabëcuenepënyorota pejanajamatabëcuene panexainanexa. Nexata itsamonae xaniavaetsia itsa patsitajinavanapame, bajarapamonae ata baja pacayapëtane Cristo pelivaisi papecatsijamatabëceaejava.

⁴ Paxanë payapëtaniji Dioso patanitorobijava pepacueni Cristo pelivaisi jivi patatsipaebavanapaenexa. Tsipaji baja Dioso paneyavenonabiaba Jesucristo pejamatabëcueneta. ⁵ Paxanë patasaëta Dioso patatonacuenebinexa, apo panejamatabëcuenecajëjèpae. Nexata xua Dioso patoexanavanapajë, Dioso baja cajena paneyavenonabiaba. ⁶ Dioso panejamatabëcueneavenonabiaba patatsipaebabiabinexa itsamonaejavabelia Dioso najumecapanepaeya pejanalivaisi pejumaitsijava jivi pecapanepaenexa. Bajarapamonaejavabelia apo pajumaitsinë tsabiabi: “Pajumecovënëttavanapare Dioso Moisésipjinëta penajumecopatsilivaisi. Itsa apo pajumecovënëtsimë tsane, nexata panaxuabianame,” apo pajanë tsabiabi. Biji rajane jivi patsipaebabiabajë pacuenia Espiritu Santo jamatabëcueneasaëyaexanaejitsiatsi. Palivaisi bajayata Dioso Moisésipjinëta najumecopata, itoroba pebeyaxuabinexatsi pajivi apo jumecovënëtsi bajarapalivaisi. Itsiata baitsi jane pajivi jumecovënëta papejanalivaisi jivi patsipaebabiabajë, Espiritu Santo pesaëta jamatabëcueneasaëyaexanaponatsi.

⁷ Bajayatami Dioso Moisésipjinëta najumecopata. Bajarapalivaisi Dioso yaquina ibopanabejumatata. Bajarapalivaisita Dioso itoroba pajivi apo jumecovënëtsi bajarapalivaisi pebeyaxuabaponanexatsi. Bajarapacuenia Dioso Moisésipjinëta ita najumecopata bajarapalivaisi, Moisésipjinë itabaranivenivena bitso. Nexata Israelpjinë pemomoxi apo itabaranaeçotsicapanepaetsi. Itsiata baitsi jane bajaraxuacujinae itsamatacabianëjavabelia, itabaracotiacaevapona baja. ⁸ Palivaisi bajayata Dioso Moisésipjinëta najumecopata, xanepana baja picani caeepatoyonexa saya. Bajarapalivaisimi matatoxenetsia bitso xanepana papejanalivaisi mapamatacabitaje jumecovënëttavanapatsi Dioso vajanacapanepaenexa. Bajarapacuenia Dioso nacacapanepaena Espiritu Santo vajanacatsijamatabëceaxae daxitamatacabijavabelianexa. ⁹ Bajayata Dioso Moisésipjinëta najumecopata. Nexata bajarapalivaisi xanepana. Tsipaji bajarapalivaisi pejamatabëcueneta, jivi yapëtane Dioso penaneconitsiaexanaejavanexatsi pibisiacueni pexananeconi yabara. Itsiata baitsi jane bajarapalivaisimi matatoxenetsia bitso xanepana papejanalivaisi pejamatabëcueneta Dioso nacacapanepaetsiatsi. Bajarapapejanalivaisi pejamatabëcueneta, Dioso baja aneconijibia nacatane. ¹⁰ Palivaisi bajayata Dioso Moisésipjinëta najumecopata, xanepana baja picani. Itsiata baitsi jane palivaisi Dioso cotocaevi najumecopata, bajarapalivaisi bitso xanepana. Bajaraxuata palivaisimi copiaya Dioso najumecopata Moisésipjinëta, aeconoxae baja nacatsitaajumematamobi. ¹¹ Palivaisi copiaya Dioso Moisésipjinëta najumecopata, xanepana picani caeepatoyonexa saya. Biji rajane palivaisi cotocaevi Dioso najumecopata, bitso xanepana. Tsipaji daxitamatacabijavabelianexa bajarapalivaisi tsitecaena.

¹² Payapëtaniji papejanalivaisi Dioso cotocaevi najumecopata bitso pexanepanaejava. Tsipaji daxitamatacabijavabelianexa apo vereverecae tsane bajarapalivaisi. Bajaraxuata apo pajumeejunavabiabinë bajarapalivaisi patatsipaebinexa jivijavabelia. Palivaisivajëto payapëtaniji, patsipaebabiabajë jivijavabelia. ¹³ Bajayata Moisésipjinë

yapëtae ata livaisi. Itsiata xaniavaetsia apo tsipaebi pijajivijavabelia. Itsiata paxanë bajarapacuenia apo paitsinë. Bajayata Moiséspijinë itsa itabaranivenivena, naitabaraacata papaëbërëpanata. Bajarapacuenia naitabaraacata pijajivi, Israelpijinë pemomoxi, pitabarataeyanivatsi bajarapacotia pecaevaponaejava. ¹⁴ Itsiata baitsi jane bajarapamonaejavabelia Moiséspijinë tsipaebi ata, apo jumeypëtaetsi pajamatabëcuenelivaisi yabara tsipaeba. Bitso ajamatabëcuenetaja bajarapamonae. Nexata apo jumeypëtae palivaisi tsipaebatsi. Bajara pijinia pacuenia ajena mapamatacabijavaberena ataje, tsiteca abaxë ajamatabëcuenetaja bajarapamonae pemomoxi ata. Bajarapamonae penacaeuatabiabibota, itsa lebabiaaba Dioso Moiséspijinëta penajumecopatsilivaisimi, apo jumeypëtaeyabiabi pajamatabëcuenelivaisi xaina. Bajarapamonae itsa jumecovënëtsipa Cristo pesivatëpaejavatsi, nexata matapania jumeypëtaejitsipa pajamatabëcuenelivaisi xaina palivaisi bajayata Moiséspijinë tsipaebabiaba. ¹⁵ Ajena mapamatacabijavaberena ataje, judíovi penacaeuatabiabibota itsa lebabiaaba Dioso Moiséspijinëta penajumecopatsilivaisimi, apo jumeypëtaeyabiabi pajamatabëcuenelivaisi xaina. Bitso ajamatabëcuenetaja bajarapamonae. ¹⁶ Itsiata baitsi jane pajivi najamatabëcuenecopata vajatuxanenë Jesucristojavabelia, bajarapajivi Dioso vecuaajibiaexanatsi pibisiacue pexanaeconimi. Nexata bajarapajivi xaniavaetsia jumeypëtanë pajamatabëcuenelivaisi xaina palivaisi bajayata Moiséspijinë tsipaebabiaba. ¹⁷ Vajatuxanenë Jesucristobeje, Espiritu Santobeje, najamatabëcuenëjépabeje. Jesucristo pejamatabëcueneta Espiritu Santo ponapona vajajamatabëëtëtota. Nexata Espiritu Santo nacajamatabëcueneyavenonapona pibisiacue vajaexanaeyaniva. ¹⁸ Nexata Jesucristo pejamatabëcueneta, Espiritu Santo nacayavenona. Nexata pacuenia Moiséspijinë jivi vecuanaitabaraacata pitabaracotiataeyanivatsi pitabaranivenivenaejave, bajara vaxaitsi apo itsitsi. Biji rajane tsitanacuenëitajëtsiaya jinavanapatsi xaniavaetsia jivi peypëtaenexa Dioso ayajamatabëcuenë pexinaejava. Espiritu Santo nacajamatabëcueneyavenonapona vajavajënaeyabelia pejanajamatabëcuenë vajaxainaponaexa. Nexata pacuenia Jesucristo jamatabëcuenëitsi, bajara vaxaitsi ata vajajamatabëcuenëitsinexa.

4

¹ Dioso baja cajena patanitaxutotsoniataexae, panetocopata patatsipaebabiabinexa jivijavabelia pexanialivaisi, Jesucristo pelivaisi. Bajaraxuata itsajavata panetsiyai tsabiabi ata, itsiata apo pajamatabëcopatsinë patatsipaebabiabijava Jesucristo pelivaisi. Tsipaji baja Dioso panetocopata bajarapacuenia. ² Muetsia apo paexanaenë itsacuenëjava ata. Apo paexanaenë daxita xua piauracuenë ata. Jivi patayamaxëitörorobinexa, itsacuenëjava ata apo paexanaenë. Apo patsipaebabiabinënu saicayalivaisi Dioso pejumelivaisivecua. Dioso baja cajena yapëtanë jivijavabelia ëpexaniajailivaisi patatsipaebabiabijava. Patanejumetaeyenaevi ata bajarapacuenia jumai tsipae. ³ Itsa patsipaebabiabajë jivi pecapanepaelivaisinexatsi, jumenapebetsiaya patsipaebabiabajë xaniavaetsia patanejumeypëtaenexa. Nexata patsipaebi atanë, pajivi apo jumecovënëtsi bajarapalivaisi, bajarapajivi pijacuata nanaxuabiaexanaena Diosovecua. Nexata bajarapajivi daxitamatacabijavabelianexa, Diosovecua naxuabiana. ⁴ Bajarapacuenia apo jumecovënëtsi tsipaji dovathi pejamatabëcueneta ajamatabëcuenëitajiriyaxanatsi pejumecovënëtsiyeniva bajarapalivaisi. Bajarapapexanialivaisi, Cristo pelivaisi, bepinijicotia jivi pejamatabëcuenëitayotsinexa itsa jumecovënëta bajarapalivaisi. Nexata dovathi, mapanacuapijivi pijatuxanenë, apo jitsipae bajarapalivaisi jivi pejumecovënëtsinexa pejamatabëcuenëitayotsiyanivatsi. Cristo paxa Dioso jamatabëcuenëjépa. Nexata pacuenia Dioso jamatabëcuenëitsi, bajara Cristo ata jamatabëcuenëitsi. ⁵ Livaisi itsa pacatsipaebabiabatsi, paxanë apo panalivaisipaebabiabinë pataneyaiyataenexamë. Biji rajane vajatuxanenë Jesucristo pelivaisi pacatsipaebabiabatsi. Paxanë saya panataniji bepanijajivinë. Jesucristo bitso pajitsipajë. Bajaraxuata paxamë ata jamatabëcuenëitajiriyavenonatsi. ⁶ Bajayata Dioso mapanacuaje itsa exana, pitaquirijavata pitayotsinexa, itoroba juamentö penaexanaexa. Bajara pijinia pacuenia paxanë ata patajamatabëcuenëitajirijavami, Jesucristo pelivaisi itsa pajumecovënëtajëta, Dioso panejamatabëcuenëitayota. Bajarapacuenia itsa panejamatabëcuenëitayota, payapëtaniji Dioso bitso ayajamatabëcuenë pexinaejava. Jesucristo itsa itabaranivenivena Dioso pexënatöxae, paxa Dioso jamatabëcuenëitajëta Dioso bitso ayajamatabëcuenë pexinaejava.

Pacuenia Dioso jamatabëcueneyavenona pijajivi, itsa tonacuenëbavanapatsi, yabara pelivaisi

⁷ Paxanë Dioso patanejamatabëcuenëitayotsivi ata, pataperabëto apo ajamatabësaë. Pacuenia atsavaxi bajayajebi apo ajamatabësaë, bajara saya itsi. Pataperabëto apo paperebësaë atanë, Dioso pataneyavenonaexae, pajamatabëcuenësaënë tsavanapae. Nexata

bajarapacuenia pataajamatabêcuenesaê tsavanapaejava patanetaevi, jamatabêjumai tsane paxanê yabara: "Mapamonaeye ajamatabêcuenesaê tsavanapae Dioso pesaêta," jamatabêjai tsane. ⁸ Nexata panetocopiapatabiabi ata itsacuenne patanetoayapêbejecuene, itsiata Dioso paneyavenonabiaba patavecuapanepaenexa bajarapacuenne. Apo payapêtaeyabiabi atanê pajamatabêcuenne yabara panetocopiapata patanetoayapêbejecuene, itsiata paxanê apo pacopatsinê Dioso patajumecovênêtsijava. ⁹ Itsamonae panebejiobiaexanabiabi ata Dioso patajumecovênêtsijava yabara, itsiata Dioso apo panecopatsi patajaepato. Itsamonae irata panepenatabiabi ata patanebeyejebinexa picani, itsiata pepacuenne apo panebeyaxu-ababiabi Dioso pataneyavenonabiabixae. ¹⁰ Pacuenia Jesús pijavajabitsaê bajayajebi picani jamatabêbeyaxuababiabatsi, bajarapacuenia paxanê ata Jesús papijajivixae, itsamonae jamatabêpanebejebabiaba picani. Itsiata apo panebejebicapaneapae. Bajaraxuata daxita jivi yapêtane Jesús pataneyavenonabiabijava. ¹¹ Daxitamatacabi patajinavanapamatacabianê, panetsiayai tsabiabi itsamonae patanebeyejebinexa Jesús papijajivixae. Bajarapacuenia panetocopiapatabiabi jivi pataneyapêtaenexa Jesús pataneyajavaponaponaejava. ¹² Panetsiayai tsabiabi itsamonae patanebeyejebinexa patacatsipababiabixae papecacapanepaelivaisinexa Diosojavabelia. Nexata paxanê patacatsipaebillivaisi panejumecovênêtsixae, itsamatacabi athêbêtatsia Dioso pacarajutsiana matacabi apo peverevercaejava.

¹³ Dioso pejumelivaisibaxutota jumaitsi mapacueniaje: "Jumecovênêtajê Dioso taneyavenonaejavanexa. Bajaraxuata tsipaebajê jivijavabelia Dioso taneyavenonaejavanexa," jai. Bajara pijinia pacuenia paxanê ata pajamatabêcuenêitsinê. Pajumecovênêtajê Dioso pataneyavenonaejavanexa. Bajaraxuata patsipaebabiabajê jivijavabelia Dioso pataneyavenonaejavanexa. ¹⁴ Vajatuxanê Jesús petêpaecujinae Dioso icatsia asaêyaexanatsi. Bajaraxuata payapêtaniji baja pexaniajaicuene Dioso icatsia paxanê ata pataniasaêyaexanaejavanexa patatêpaecujinae, Dioso patayajavajinavanapaenexa pijanacuatasta. ¹⁵ Paxanê itsamonae panebejiobiaexanabiabi ata, itsiata apo pacopatsinê patacatsipaebabiabijava pexaniajaillivaisi. Nexata panevajênayabelia pajumecovênêtaponame patacatsipaebillivaisi. Nexata baja itsa paayaibitsaêtomê tsaponae Dioso panejumecovênêtsivi, paayaibitsaêtomê baja pijinia tsaponae Diosojavabelia panejumaitsvinexa: "Xanepana rabaja. Tsipaji bitso pexaniacuene panetoexaname," panejaivinexa Diosojavabelia. Nexata papecajumetaevi ayaibitsaêto yapêtaena Dioso bitso ayaijamatabêcuenne pexainaejava.

¹⁶ Bajaraxuata itsamonae panebejiobiaexanabiabi ata, itsiata apo pajamatabêcopatsinê jivi patatsipaebabiabijava pexaniajaillivaisi. Pataperabêto cueranaponae ata, itsiata patavajênayabelia, caematacabi canacujitsia, pajamatabêcuenesaênê tsaponae Dioso patajumecovênêtsijava. ¹⁷ Xua nacatocopiapatabiaba itsamonae vajanacabejiobiaexanabiabinexa, saya caepatoyo bajarapacuenia nacabejiobiaexanabiaba mapanacuataje vajajinavanapaeepatoyo. Bajaraxuacujinae athêbêtatsia xainaenatsi daxitacuennevecua pexaniajava, baitsi matacabi apo peverevercaejava. ¹⁸ Nexata apo vajênavevetavanapaetsi vajanacatocopiapatsinexa, xua nacacajêpa vajataenexa. Biji rajane jamatabênajinavanapatsi vajanacatocopiapatsinexa xua apo nacacajêpae vajataenexa. Tsipaji xua nacacajêpae vajataenexa, daxita bajaraxua, verevercaena. Itsiata baitsi jane xua apo nacacajêpae vajataenexa, daxitamatacabijavabelianexa apo peverevercae tsane.

5

¹ Mapanacuata jivi pexanaebobêrêto bepijia baabeje. Bajara pijinia itsi vajaperabêto ata. Bepijia verevercaena. Itsiata baitsi jane yapêtanetsi mapacuenne. Vajatêpaecujinae itsamatacabi Dioso athêbêtatsia nacarajutsiana apo peverevercaeperabêtonexa. ² Xaniajai cajena. Itsa abaxê jinavanapatsi mapanacuataje, bitso picani jitsipabiabatsi vajanacaperabêtothianaenexa athêbêpijiperabêtonexa. Jitsipabiabatsi picani vajaponaenexa athêbêabetsia pejanaperabêto vajayajavajinavanapaneaxa athêbêtatsia. ³ Athêbêtatsia raja aperabêjibia apo jinavanapae tsanetsi. Biji rajane pejanaperabêto vajavajinavanapaenatsi. ⁴ Itsa abaxê jinavanapatsi mapanacuataje, bitso picani jitsipabiabatsi vajanacaperabêtothianaenexa. Apo jitsipaetsi picani vajatêpaejava. Itsiata baitsi jane yapêtanetsi mapacuenne. Vajatêpaecujinae itsamatacabi athêbêtatsia vajavajinavanapaenatsi pejanaperabêto, apo peverevercaeperabêtonexa jane baja. Nexata mapanacuata vajayajavajinavanapaeperabêtomî ajibi baja tsane. Xainaenatsi juya apo peverevercaeperabêtonexa. ⁵ Bajarapacuenia vajanacaperabêtothianaenexa Dioso nacatocopata Espíritu Santo vajanacayavaponaponaenexa. Nexata Dioso yabara bejamatabêjumaitssi mapacueniaje: "Mapacueniaje Espíritu Santo Dioso

pataneyajavaponaponaeyaexanaexae, nexata payapētāniji xaniajai pepacuenē itsamat-acabi Dioso pataneperabēithianaejavanexa. Xaniajai baja cajena. Pepacuenē itsamat-acabi Dioso paneperabēithianaena pacuenia baja najumecapanepaeya jumaitsi,” bejamatabējaitsi Dioso yabara.

⁶ Bajaraxuata apo jamatabēcopatsitsi vajajumecovēnētsijava Dioso. Vajavajāneayabelia jamatabēcuenēbarēyatsi. Yapētānētsi mapacuenēje. Itsa abaxē vajaperabēto yajavajinavanapatsi mapanacuataje, panacuata itsamatacabi vajatuxanenē daxitamatacabijavabelianexa yajavajinavanapaejitsiatsi, bajarapanacua abaxē tajē vecuajinavanapatsi. ⁷ Apo taetsi abaxē athēbētatsia vajatuxanenē vajayajavajinavanapaejavanexa. Itsiata yapētānētsi itsamatacabi xaniajai vajatuxanenē athēbētatsia vajayajavajinavanapaejavanexa. ⁸ Bajaraxuata jitsipatsi vajatēpaejava. Tspaji mapanacuata vajajinavanapaejava, matatoxenetsia bitso jitsipatsi vajatuxanenē pijanacuatacia vajayajavajinavanapaejavanexa. ⁹ Bajaraxuata mapanacuata vajajinavanapaeamatacabibeje, asaēyata vajatuxanenē tonacuenēbavanapatsi. Tspaji jitsipatsi vajanacasivajamatabēcuenē barēyajava. Vajatēpaejinae ata, pijanacuatacia jamatabētojinavanapatsi pejitsipacuenia. ¹⁰ Vajatuxanenē pejitsipacuenia jamatabētojinavanapatsi mapanacuata ata vajajinavanapaeepato. Tspaji caejivitsi canacujitsia Cristo pitabarata tonaitajētaponaeatsi. Nexata bajarapamatacabi nacarajutsiana daxita pijajivitsi xua nacatoxaina vajanacarajutsinexa. Xaniavaetsia vajatuxanenē itsa tonacuenēbavanapatsi, nacarajutsiana xua nacatoxaina vajanacarajutsinexa. Pamonae xaniavaetsia apo tonacuenēbavanapae, nacueratsiana.

Pacuenia Dioso nacabarajamatabēcuenēxanepana vajaneconi yabara Cristo vajanacasi-vatēpaexae yabara pelivaisi

¹¹ Payapētāniji baja cajena itsamatacabi vajatuxanenē pitabarata cujunaviaya patananubenaejavanexa. Bajaraxuata asaēyata jivijavabelia patsipaebabiabajā Jesucristo pesivatēpaejavatsi pejumecovēnētsinexa. Itsajamatabēcuenē apo panajamatabēxainabiabinē bajarapalivaisivecua. Dioso baja cajena panejamatabēcuenēyapētāne pacuenia pajamatabēcuenētsinē. Pajitsipajē paxamē ata patanejamatabēcuenēyapētānexamē. ¹² Bajarapacuenia paxanē apo pacanavajunupaebitsi saya pataneyaiyataenexamē. Pacanavajunupaebatsi rajane pataneyapētānexamē vajatuxanenē papijajivicuenenē. Nexata bajarapacuenia paxamē papecajamatabēcuenēcaejēpānēxaxa panejume-canaviatsijava pamonae pibisiacuenia panebaracuaicuaijai. Bajarapamonae paneyalivaisiaexanabiaba. Beayajamatabēcuenēvi nataeyabiaba. Pexaniacuenē exanabiabi ata, bajaraxua exanabiaba saya jivi petānexamē. Itsiata baitsi jane bitso naneconita Diosojavabelia pibisiacuenē pexanaeconi yabara. Apo canaējētsi pexaniajamatabēcuenē pexainaenexa. ¹³ Paxanē picani xaniavaetsia Dioso jumecovēnētsiaya jivi patsipaebabiabajā Jesús pelivaisi. Itsiata Dioso apo pejumecovēnētsivi, panejumai tsabiabi: “Pematājemabivitsi raja saya,” panejai tsabiabi. Itsiata itsa pacatsipaebabiabatsi bajarapalivaisi, Jesucristo pelivaisi, pacatsipaebabiabatsi paxamē ata Dioso papeccapanepānēxaxa. Paxamē apo panetaemē bepatanematajemabivi. ¹⁴ Cristo raja paneasiva tsabiabi. Bajaraxuata patonacuenēbavanapajē. Pajamatabējumaitsinē tsabiabi: “Caenē Cristo nacasivatēpa daxitanexatsi. Bajaraxuata Dioso baja nacatane Cristo bevajayavatēpaevi. Nexata baja bevajananeconimatotsicapānēpaevi Dioso nacatane,” pajamatabējanē tsabiabi. ¹⁵ Cristo jivi sivatēpa. Petēpaejinae Dioso icatsia asaēyaexanatsi. Nexata daxita pamonae jumecovēnēta Cristo pesivatēpaejavatsi, matacabi apo peverevereaejava xainaena. Nexata bajarapamonae apo hexanavanapae pijacuata penatojitsipacuenia. Biji rajane hexanavanapa pacuenia Cristo tojitsipatsi pesivajamatabēcuenēbarēyanexatsi. ¹⁶ Bajaraxuata ajena mapamatacabijavaveliacujinaeje, patavajinaeyabelia tsaponae, Dioso pejumecovēnētsivi yabara apo bepanajamatabēxainaenē pibisiacuenia, pacuenia Dioso apo pejumecovēnētsivi banajamatabēxaina. Tspaji pamonae Dioso pejumecovēnētsivi pacuenia bēpēnēaverena jamatabēcuenētsi, apo pajamatabēcuenēyapētānē. Xanē ata rabaja picani Jesucristojavabelia tanajamatabēcuenēcopatsivajinaeja, Jesucristo yabara najamatabēxainajē pibisiacuenia, pacuenia banajamatabēxaina Dioso apo pejumecovēnētsivi. Bepēnajumetsēnētsinē taniji Cristo. Itsiata baitsi jane aeconoxae baja bajarapacuenia apo najamatabēxainaenē Cristo yabara. Tspaji baja yapētāniji Cristo pexaniajinēcuenē. ¹⁷ Pajivi najamatabēcuenēcopata Jesucristojavabelia, bajarapajivi xaina pejanajamatabēcuenē. Pijaperujumatabēcuenēmi baja vecuaajibiaexanatsi. Nexata bajarapajivi daxitacuenē sivanajamatabēxaina pexaniajamatabēcuenēta.

¹⁸ Daxitatsi Dioso pejanajamatabēcuenē nacarajuta. Dioso nacabarajamatabēcuenēxanepana Cristo vajanacasivatēpaexae vajaneconi yabara. Nexata

Dioso panetocopata pejumelivaisi patatsipaebanajetarubenaenexa daxitajivijava, bajarapamonae ata itsa jumecovënëta, Dioso pebarajamatabëcuenexanepanaenexatsi. ¹⁹ Nexata Cristo cruzata itsa sivatëpa mapanacuapijivije, Cristo pesivatëpaexaetsi, Dioso barajamatabëcuenexanepanaeya tanetsi daxita pamonaë jumecovënëta Cristo pesivatëpaejavatsi. Paneconi picani bajarapamonae xaina, Dioso baja vecuaajibiaexanatsi Cristo pesivatëpaejamatabëcuenetatsi. Bajarapalivaisi Dioso panetocopata patatsipaebanajetarubenaenexa jivijavabelia. ²⁰ Nexata paxanë Cristo papijajivinë tsanajetarubenaë. Cristo baja cajena pejamatabëcueneta, papatajë paxamëjavata patacatsipaebinexa pexanialivaisi. Pacuenia Dioso itsa patsipa, pacamuxujiohijitsipa, bajarapacuenia xanë ata pacamuxujiohatsi Cristo papecasivatëpaexae panijaneconi yabara Dioso papecabarajamatabëcuenexanepanaenexa. ²¹ Cristo pibisiacuene apo exanaë, tsiquirijavayo ata. Itsiata baitsi jane Cristo Dioso tsijumaxuabatsi daxita vaxaitsi vaneconimi. Nexata vaneconi yabara Cristo bepibisiacuene pexanaenëcuenia cruzata beyaxuabatsi. Bajarapacuenia Cristo cruzata vajanacasivatëpaexae, nexata Dioso aneconijibia nacatane itsa jumecovënëtatsi Cristo vajanacasivatëpaejava vaneconi yabara.

6

¹ Dioso pataneyajavanacuenebixae, asaëyata pacamuxujiohatsi. Dioso pinijicuenia papecaitaxutotsoniataejava, pacatsipaebatsi panejumeebiyaniva. Itsa pajumeebijiitsipame, nexata Dioso nacueratsipa papecaitaxutotsoniataejava. ² Tsipaji Dioso jivi pitaxutotsoniataejavanexa, tajëvelia Dioso pejumelivaisibaxutota jumaitsi mapacueniaje: Pamatacabi jivi itaxutotsoniataenajë, cajumetaenatsi. Nexata pamatacabi jivi capanepae-najë, xamë ata cayavenonaenatsi, jai tajëvelia Dioso pejumelivaisibaxutota.

Aeconoxae rabaja nacatocopiapata Dioso vajanacaitaxutotsoniataejava vajanacacapanepaenexa jane baja.

³ Itsa patonacuenebavanapajë Dioso, pajitsipajë daxitajivi xaniavaetsia patatsitajinavanapaejava, daxitajivi Dioso pejumecovënëtsinexa. Apo paexanaenë pibisiacuene, tsiquirijavayo ata, pataexanaejava yabara jivi patanejumeebiyaniva Dioso pejumelivaisi itsa patsipaebajë. ⁴ Biji rajane daxita xua paexanavanapajë, xaniavaetsia patsitaexanavanapajë jivi pataneyapëtaenexa Dioso papijajivicuenenë. Itsamonae panebejiobiaexanabiaba. Itsajavata bitso panamatavenonabiabajë itsacuenejavaxi. Itsajavata bitso panetsiyai tsabiabi itsamonae patanebeyejebinexa. Bajarapacuenia panetsiyai tsabiabi ata, itsiata bajayajebi pajamatabëcuenesaenë tsavanapae Dioso pejumelivaisi jivi patatsipaebavanapaejava. ⁵ Itsajavata panejumetitibabeyabiaba. Itsajavata penaneconit-sivi pejebabiabibota panejebabiaba. Itsajavata Cristo pelivaisi jivi itsa patsipaebajë, itsamonae anaeya panebarajinabiaba patanebeyejebinexa picani. Itsajavata bitso panacuenebabiabajë. Itsajavata meravi ata apo pamajitabiabinë Dioso pejitsipaecuenia pataexanaenexa. Itsajavata bitso patajani tsabiabi. Bajarapacuenia panetoayapëbeje tsabiabi ata, itsiata bajayajebi pajamatabëcuenesaenë tsavanapae Dioso pejumelivaisi jivi patatsipaebavanapaejava. Nexata jivi paneyapëtane Dioso papijajivicuenenë. ⁶ Dioso papijajivicuenenë jivi pataneyapëtaenexa, jivi patsitajinavanapajëna mapacueniaje. Pamatacabibeje pajinavanapajë, pibisiacuene apo paexanavanapaenë. Biji rajane jivi patsitajinavanapajë pexaniajailivaisi patayapëtaevicuenia. Bajayajebi itsamonae pibisiacuene paneexanabiabi ata, apo pacuene canaviatabiabinëna. Pexaniacuene patoexanabiabajëna itsamonaejavabelia. Patsitajinavanapajëna pacuenia Espiritu Santo paneyapëtaeayaexanapona Espiritu Santo patanetsijamatabëcaexae. Patsitanajamatabëcuenie itajëtanapajëna itsamonae ata pataasivajava patajamatabëthëtojavavetsina. Bajarapacuenia patatsitajinavanapaexae, jivi xaniavaetsia paneyapëtane Dioso papijajivicuenenë. ⁷ Dioso papijajivicuenenë jivi pataneyapëtaenexa, patsitajinavanapajëna mapacueniaje. Ëpexaniajailivaisi jivi patsipaebabiabajë. Patsitanacuenieitajëtanapajëna daxita xua paexanavanapajë, Dioso pataneyavenonabiabijava. Dioso baja aneconijibia panetaexae, Espiritu Santo paneyavenonabiaba patanayajivitaeyabiabinexa dovathi pijacuene. Paneyavenonabiabanua Espiritu Santo patacuene amoneyabinexa dovathi. Bajarapacuenia patatsitajinavanapaexae, jivi paneyapëtane Dioso papijajivicuenenë. ⁸ Itsamonae paneyaiyataeyabiaba. Itsamonae pijinia apo paneyaiyataeyabiabi. Itsamonae pexaniacuene panebaracuaicuajai tsabiabi. Itsamonae pijinia pibisiacuene panebaracuaicuajai tsabiabi. Itsamonae panetaeyabiaba pexaniajailivaisi patatsipaebivicuene. Itsamonae pijinia panetaeyabiaba bepatanajumetsënëtsivi. ⁹ Itsamonae pataneyapëtaevi ata, itsiata apo bepataneyapëtaevi panetaeyabiaba. Itsajavata itsamonae jamatabëpanebeyejebabiaba

piciani. Itsiata tsiteca asaëya bajarapalivaisi patsipaebavanapajë. Dioso baja cajena pane-
tocopata itsamonaë ayaicuenia patanebejiobiaexanabiabinexa, itsiata apo patanebeye-
jebinexa. ¹⁰ Panajamatabëxainabiabi atanë bitso itsamonaë pibisiacuene pexanaejava
yabara, itsiata bëpënëa pepacuene pajamatabëcuenebarëyanë tsavanapae daxitamatacabi-
javabelianexa. Patabejiobivi piciani. Itsiata jivi ayaibitsaëttoxanetonë ricovi paexanaponajë
Dioso pejumelivaisi patatsipaebijamatabëcuenetä pejumecovënëtsixae. Apo paxainanë
piciani mapanacuapijicuene. Itsiata baitsi jane Diosojavabelia daxitacuene paxainajë, apo
peverevereaejavanexa jane baja.

¹¹ Tajamonae, paxamë paCorinto tomarapijivimë, pacanajamatabëcuene vajunupa-
batsi baja cajena roviaalia. Apo pacavecuanajamatabëcuene matayatsitsi. ¹² Asivaya
pacatae atatsi, paxamë itsiata bajarapacuenia asivaya apo panetaemë. ¹³ Pacuenia pexi
pexainanë asaëya banacoximuxujioba, bajara pijinia pacuenia paxanë ata pacamuxu-
jiobatsi. Paxamë ata panejamatabëcuenevetsina asivaya panetaema pacuenia baja paxanë
asivaya pacatanetsi.

*Pacuenia piasaëtsaponaponaenë Dioso nacatane bepijatemplobotsi tsavanapae yabara pe-
livaisi*

¹⁴ Dioso apo pacatojitsipae mapacueneje. Paxamëyajuvënëva, Dioso pejumecovënëtsiva,
pëtsa pitatsi Dioso apo pejumecovënëtsinë. Paxamë ata papebijivimë, pëtsa papitame Dioso
apo pejumecovënëtsiva. Bajayajebinexa ata pëtme Dioso apo pejumecovënëtsivi. Tsipaji
apo pacajamatabëcuenejëpae tsipae. Dioso pejumecovënëtsivi apo jamatabëcuenejëpae
Dioso apo pejumecovënëtsivi. Tsipaji Dioso jivi pejamatabëcuene itayotsijamatabëcuenetsi,
mapanacuata pitaquirijamatabëcuenebeje, apo najamatabëcuenejëpaebeje. ¹⁵ Cristobeje
dovathibeje apo najamatabëcuenejëpaebeje. Nexata pijinia pajivi Dioso pejumecovënëtsijivi,
Dioso apo pejumecovënëtsijivibeje, acuenebi bajayajebi penajuanacuenebaponaponaenex-
abeje. Tsipaji apo najamatabëcuenejëpaebeje. ¹⁶ Bajara pijinia navecuaitisibeje Dioso
pijatemplobobeje, jumapecataeya pexanaenëanë penubenaetemplobobeje. Apo najamatabë-
cuenejëpaebeje. Vaxaitsi baja cajena piasaëtsaponaponaenë Dioso, nacatane bep-
ijatemplobotsi tsavanapae. Bajarapacuenia nacatane tsipaji pacuenia bajayata Dioso
templobota ponaponabiaba, bajara pijinia pacuenia aeconoxae Dioso nacayajavapon-
apona. Bajarapajamatabëcuene yabara bajayata Dioso vaxaitsi yabara tajëvelia jumaitis
mapacueniaje:

Tsijamatabëcaenajë bajarapamonae tayajavaponaponaenexa. Bajarapamonae pija-
Diosonë tsane. Bajara pijinia pamonaë tajajivi tsane,
jai Dioso bajayata tajëvelia vaxaitsi yabara.

¹⁷ Bajaraxuata Dioso apo pejumecovënëtsivi vajavecuapitsapaejavanexa, vajatuxanenë
Dioso tajëvelia nacavajunupaeba. Vajanacavajunupaebijavata jumaitis mapacueniaje:
Pamonaë tuatuajëta pajinavanapaename, pavecuapitsapaename. Bajarapamonae nave-
cuatsatsia pajinavanapaename. Paxamë pëtsa pibisiacuene panaexanaename ba-
jarapamonaeta papecajamatabëcuene bijianaeyaniva. Nexata xanë pacasivabarëya
tsanetsi. ¹⁸ Paneaxanë tsane. Nexata daxita paxamë pataximë tsane,
jai bajayata vajatuxanenë Dioso tajëvelia vaxaitsi yabara, daxitacuene pevetsinë.

7

¹ Tajamonae bitso patacaasivavi, daxita baja pacuenia Dioso pejumelivaisibaxutota
tajëvelia najumecapanepaeya jumaitis pexicueniatsi vajanacataenexa, yapëtanetsi baja.
Bajaraxuata Dioso pitabarata aneonijibia jinavanapaenatsi. Vajavitota pibisiacuene
vajaexanabiabijavami, copatsianatsi baja. Vajajamatabëëthëtota pibisijamatabëcuene
vajanajamatabëxainabiabijavami ata, copatsianatsi baja. Dioso yayiataeya jinavanapaenatsi
Dioso vajanacatojitsipacuena.

Pacuenia Pablo sivajamatabëcuenebarëya Corinto tomarapijivi yabara pelivaisi

² Panetsitanajamatabëcueneitajëre pataniasivajavamë. Caejivi ata paxamëyajuvënëjivi
apo pacayajuvënëitsacueniabititsi. Apo pacayajuvënë jamatabëcuenebijianaetsinua. Apo
pacayajuvënë yamaxëitojorobitsinua bajarapacuenia panijapalata patacavecuapitsinexa.
³ Itsa pacajumaititsi mapacueniaje, apo pacabijataetsi. Jume baja cajena.
Pacuenia baja cajena copiaya pacajumaititsi, daxita matacabijavabelianexa asivaya
pacajamatabënajinabiabatsi. ⁴ Payapëtanijinua caejamatabëcuene panenajamatabëxainaejava.
Bajaraxuata bitso pacasivajamatabëcuenebarëyatsi. Paepatota ata itsamonaë
panebejiobiaexanabiaba, apo panasivabëjanë tsabiabi. Tsipaji bajarapaepatota itsa
pacavënëlivaisitaeyabiabatsi xaniavaetsia panejinavanapaejava, pacasivanajamatabëcuene
saëtabiabatsi. Nexata panebejiobiaexanabiabi ata, bitso pabarëyanë tsabiabi paxamë
yabara.

⁵ Macedonia nacuata patapatsicujinae, caeto ata cajena xaniavaetsia apo panacuer-
aevetsinē. Daxitajava, itsaxuayo panajetarubenajē, paneyalivaisiaexanabiaba. Nexata
itsa panayajumetaeyabiabajē itsacuenelivaisi, patajamatabēēthētota bēpēnēa payajunavi-
ajinavanapabiabajē. ⁶ Itsiata baitsi jane Dioso, jivi pejamatabēcueneasaēyaexanaenēxae,
panejamatabēcueneasaēyaexana. Bajarapacuenia Dioso panejamatabēcueneasaēyaexana
paxamējavaverena peponaenē, Tito, itsa patajopa paxanējavata. ⁷ Tito pepatsixae
paxamējavaverena, panejamatabēcueneasaēyaexana. Itsiata Tito ēpepatsijava, apo
panejamatabēcueneasaēyaexanae. Biji rajane Tito paxamējavabelia itsa patajopa,
paxamē pina Tito pajamatabēcueneasaēyaexaname. Bajarapacuenia paneexanaejava,
Tito itsa pacavajunupaeba paxanējavaverena, pamuxunanajamatabēcueneasaēyājē.
Bitso pina picani jamatabēpanetaneme. Bajarapalivaisinua Tito panetsipaeba.
Panetsipaebanua bitso paneyanajamatabēxainaejava pibisiacuene paneexanaeconi.
Panetsipaebanua bitso patanesivanajamatabēxainaejavamē itsa panevēnēlivaisitaneme
bitso patacasivanajamatabēxainaejava. Bajarapacuenia paneexanaejava, Tito itsa
pacavajunupaeba paxanējavaverena, bitso pamuxunanajamatabēcuenebarēyanē.

⁸ Pabaxutomi copiaya pacatoyaquinatsi, itsa palebame, bitso pacanaja-
matabēxainaeaxana. Itsiata saya caeepatoyonexa. Bajarapacuenia papecanaja-
matabēxainaeaxanaexae, bajarapabaxutomi yabara jamatabējumaitsinē mapacueniaje:
“Apo betoyaquinaenē picani bajarapabaxutomi,” jamatabējanē. Itsiata baitsi jane
aeconoxae baja bajarapabaxutomi yabara bajarapacuenia apo sivanajamatabēxainanē.
⁹ Aeconoxae baja sivabarēyanē patacatoitobixae bajarapabaxutomi. Itsiata apo
sivabarēyanē xua pacanajamatabēxainaeaxanatsi panijaneconi yabara. Biji rajane
sivabarēyanē tsipaji patacanajamatabēxainaeaxanaejavata bajarapabaxutomita,
pacopabame baja pibisiacuene paneexanabiabijava. Panajamatabēcuenepepēnyorotame
baja Diosojavabelia. Nexata pacuenia Dioso pacatojitsipa, paexananapaname. Itsiata
apo pacaitsaveniabi patacatoyaquinaebaxutomi. Biji rajane bajarapabaxutomi
pejamatabēcueneta, pacajamatabēcueneyavenonatsi. ¹⁰ Nexata pacuenia Dioso pacatojitsipa,
bitso payanajamatabēxainame panijaneconi. Nexata baja pacopabame pibisiacuene
paneexanaejavami. Panajamatabēcuenepepēnyorotame baja Diosojavabelia. Nexata
paxamē Dioso pacacapanepaena. Pamonae Dioso capanepaenatsi, apo jumaitsi
tsane: “Apo jitsipāenē picani Dioso tanecapanepaejava,” apo jai tsane. Itsiata baitsi
jane pamonae yanajamatabēxainavanapae ata pibisiacuene pexanaeconi, itsiata itsa
apo copabi tsane pibisiacuene pexanabiabijava, itsa apo najamatabēcuenepepēnyorotsi
Diosojavabelia, bajarapamonae Diosovecua naxuabiana daxitamacabijavabelianexa.
¹¹ Panajamatabēcueneacanaējēre mapacuenije. Pacuenia Dioso pacatojitsipa, bitso paxamē
payanajamatabēxainame panijaneconi. Nexata baja aeconoxae paneconijibimē Dioso
pitabarata. Najamatabēcuenerēviabiaya baja pacanaējētame panijaneconi. Pepacue
panavajunupaebamenua Diosojavabelia pacuenia paexananapaname. Paxamē picani
bitso pabaraanaepanabiabame paxamējajuvēnēnē, ponē pibisiacuene exanaponapona
paxamē tuatujēta. Panecujunavabiabamenua picani bajaraponē pijaneconi
yabara. Itsiata bitso pajitsipame paneexanaenexa Dioso papecatoyitsipacuenia.
Pasivanajamatabēcuenevetamenua panenaneconitsiaexanaenexa paxamējajuvēnēnē,
ponē pibisiacuene exanaponapona paxamē tuatujēta. Bajarapacuenia itsa
pasivanajamatabēxainame pibisiacuene pexanaponaponaenē, Dioso patsitanaja-
matabēcueneitajētame Diosojavabelia apo panenaneconitsijava. ¹² Itsa pacatoyaquinatsi
copiaya pabaxutomi, pacatoyaquinatsi padaxitamē patacamuxujiobinexa. Apo
toyaquinaenē caenē paxamējajuvēnēnē tamuxujiobinexa, ponē pibisiacuene
exanaponapona paxamē tuatujēta. Apo toyaquinaenēnua tamuxujiobinexa ēponē
ata pibisiacuene toexanatsi itsanē. Pacatoyaquinatsi bajarapabaxutomi padaxitamē
patacamuxujiobinexa. Pacatoyaquinatsi bajarapabaxutomi tsipaji pajitsipajē panijacuta
panenajamatabēcueneypātaenexa juya pataniasivajavamē. Baitsi pacuenia pajitsipame,
Dioso pitabarata patanejumecovēnētsinexamē patacasivajamatabēcuenebarēyanexa.
¹³ Nexata baja panejumecovēnētame. Bajarapacuenia patanejumecovēnētsixamē, bitso
pacasivajamatabēcuenebarēyatsi.

Pibisiacuene itsa paexaname, Tito bitso pacasivanajamatabēxaina. Itsiata baja
aeconoxae daxita paxamē Dioso pitabarata xaniavaetsia panejinavanapaeaxae,
apo pacasivanajamatabēxainae baja. Bajaraxuata pacasivajamatabēcuenebarēya
Tito. Nexata Tito papecasivajamatabēcuenebarēyajava yabara, paxanē ata bitso
pacasivajamatabēcuenebarēyatsi. ¹⁴ Tito peponaevajēnaeya paxamējavabelia, jumaitsinē
bajaraponējavabelia: “Corinto tomarapijivi, Dioso pejumecovēnētsivi, tatoyaquinaebaxuto
pejamatabēcueneta, itsiata najamatabēcueneaxanabiana Diosojavabelia,” janē paxamē
yabara Titojavabelia. Nexata bajarapacuenia paexaname baja. Bitso nexata Tito

pacasivajamatabëcuenebarëya. Pacuenia xanë pacatsipaebabiabatsi pexaniajailivaisi, bajarapacuenia paxamë yabara tsipaebajë Titojavabelia. Bajarapacuenia itsa tsipaebajë, xaniajanë cajena. Tsipaji pacuenia pacatoyaquinatsi, paexanavanapame. Bajaraxuata pacasivajamatabëcuenebarëyatsi. ¹⁵ Tito najamatabënapitabiaba panejumecovënëtabiabajava pacuenia pacaitoroba. Najamatabënapitabiabanua yayiyataeya panecopiapitsijava ata. Bajaraxuata Tito bitso pacaitaxanapona pevajënaeyabelia. ¹⁶ Pacasivajamatabëcuenebarëyatsi. Tsipaji xaniavaetsia yapëtaniji paneexanavanapaejava pacuenia Dioso pacatojitsipa.

8

Pacuenia Dioso pejumecovënëtsivi penajamatabëcuenerajutsixae Diosojavabelia, ofrenda tojeba Diosonexa yabara pelivaisi

¹ Tajamonae, pacatoyaquinatsi mapalivaisije paneyapëtaenexa pacuenia Dioso jamatabëcueneavenonatsi Dioso pejumecovënëtsivi, Macedonia nacuapijivi. ² Macedonia nacuapijivi petoayapëbejecuenetsi tocopiapataponae atatsi ayaicuenia pejamatabëcuenejëtsinexatsi, itsiata jamatabëcuenebarëya tsavanapae. Bajarapamonae bitso bepejiobivi picani. Itsiata ofrenda itsa exana petoitorobinexa bepejiobivi Jerusalén tomarapijivijavabelia, ayaijava jebabiaba. ³ Xanë yapëtaniji bajarapamonae bepejiobivicuene. Itsiata bepejiobivi ata, ayaijava jebabiaba ofrenda itsa exanabiaba. Bajarapamonae jebabiaba bajarapacuenia, itsajivi ata apo itorobi atatsi ayaijava pejebinexa. ⁴ Bajarapamonae pinijicuenia paneitoroba patatocaponaeaxa pejebiofrenda. Panejumaitsi mapacueniaje: “Pexaniacuene panetoxanaenae. Panetocaponae name mapoafrendaje Jerusalén tomarjavabelia Dioso pejumecovënëtsivi panerajutsinexa. Paxanë ata bitso jamatabëpayavenonajë bajarapamonae,” panejai. ⁵ Nexata bajarapamonae bepejiobivixae, pasivajamatabëjumaitsinë picani: “Tsiquirijavaxi meta bajarapamonae jebiana,” pasivajamatabëjanë picani. Itsiata bajarapamonae ayaijava jeba. Bajarapamonae ëofrenda apo rajutsi Diosojavabelia. Biji rajane copiaya najamatabëcuenerajuta Diosojavabelia pacuenia Dioso itorobaponatsi pexanabiabinexa daxitamatacabijavabelianexa. Bajaraxuacujinae pejebiofrenda paxanëjavaberena panerajuta patatocaponaeaxa bepejiobivijavabelia. Bajarapacuenia itsa exana, exana Dioso petojitsipaecueniatsi. ⁶ Paxamë, paCorinto tomarapijivimë, paofrenda paxamë ata pacaetuatame panerajutsinexa Dioso pejumecovënëtsivi, Jerusalén tomarapijivi, Tito pacajamatabëcueneavenona panecaetuatsijava. Itsiata abaxë apo paveretsimë panecaetuatsijava. Bajaraxuata aeconoxae baja icatsia Tito paitorobajë paxamëjavabelia paneveretsinexa jane baja bajarapaofrenda panecaetuatsijava. ⁷ Paxamë itsamonaevexa xaniavaetsia Dioso patojinavanapame. Xaniavaetsia panajamatabëcueneocopatame Diosojavabelia. Payapëtanemenua xaniavaetsia Dioso pejumelivaisi. Pacacaëjëpanua xaniavaetsia Dioso pejumelivaisi panetsipaebinexa itsamona. Bitso pacajamatabëcueneenabiabanua Dioso pijacuene panetonacuenebavanapaenexa. Bitso paneasivamënu. Nexata paneyavenonaenexa bepejiobivi, Jerusalén tomarapijivi, ayaijava bepajebame ofrenda itsa paexaname.

⁸ “Macedonia nacuapijivi, bepejiobivi ata, ayaijava ofrenda jeba,” itsa janë, apo pacaitorobitsi paxamë ata ayaijava ofrenda panerajutsinexa. Biji rajane saya pacatsipaebatsi paneyapëtaenexa pacuenia Macedonia nacuapijivi bitso jamatabëcuenebarëyaya toexana ofrenda bepejiobivi peyavenonaenexa. Bajarapacuenia paxamë ata itsa paexanaename, itsamonaepatsitanajamatabëcuene itajëtsianame panexaniajaicue Dioso paneasivajava. ⁹ Bajarapacuenia paxamë ata ofrenda parajutsianame. Tsipaji payapëtaneme pacuenia vajatuxanenë Jesucristo nacayavenona vajanacaasivaxae. Bajaraponë picani ayaijamatabëcuenenë. Daxitacuene pevetsinë. Itsiata papecaasivaxae, nabejiobiaexana papecayavenonaenexa. Bajarapacuenia papecasivanabejiobiaexanaexae, nexata paxamë ata itsamatacabi paayaijamatabëcuenevimë tsane Dioso pijanacuatatsia.

¹⁰ Pacatsipaebatsi paneyapëtaenexa pacuenia panetsitaxanepana paxamë paneexanaenexa bajarapaofrenda. Paxamë picani imata pavaimi bitso jamatabëpayavenoname Dioso pejumecovënëtsivi, Jerusalén tomarapijivi. Nexata paxamë daxitajivivajënaeya jamatabëpatoexaname ofrenda. ¹¹ Paxamë picani imata pavaimi Jerusalén tomarapijivi bitso jamatabëpayavenoname ofrendanexa. Bajarapacuenia aeconoxae ata tsiteca paexanare paneveretsinexa jane baja palata panecaetuatsijava bajarapaofrendanexa. Parajutsianame pacuenia pacacaëjëpa. ¹² Nexata itsa pepacuene parajutsianame pacuenia pacacaëjëpa, Dioso pacasivajamatabëcuenebarëya tsane. Tsipaji apo pacaitorobi xua apo paxainaemë panerajutsinexa.

¹³ Apo pacaitorobitsi raja mapacueniaje: “Itsamonae paneyavenonaenexa, ofrenda itsa paexaname, pabuare daxita panexainaepalatayomi,” apo pacajaitsi. Tsipaji juya paxamē panamatavenonaejitsipame. ¹⁴ Jitsipatsi namataenetsia vajanayavenonaenexa vajanamatavenonaejavaxi yabara. Aeconoxae baja pacacaejēpa paneyavenonaenexa bepejiobivi, Jerusalén tomarapijivi. Itsamatacabijavabelia, pamatacabi paxamē panamatavenonaename, caejēpaenatsi juya bajarapamonae papecayavenonaenexa. Bajarapacuenia nexata daxita paxamē panenamataavenonaejavaxi, apo panamatavenonaemē tsane. ¹⁵ Bajarapajamatabēcuenelivaisi yabara Dioso pejumelivaisibaxutota jumaitsi mapacueniaje: “Itsajivi bitso ayaijava xinae ata, itsiata apo toyajuvēnēnacopatsitsi. Itsajivi pijinia tsiquirijavayo xinae ata, itsiata apo namatavenonae,” jai Dioso pejumelivaisibaxutota. Bajaraxuata paxamē ata panexainaeyajuvēnējava, beparajutame penamatavenonaevijavabelia.

Pacuenia Tito, anijanēbeje yajava, pona Corinto tomarabelia yabara pelivaisi

¹⁶ Xanē bitso jitsipajē paxamē patacayavenonaenexa. Tito ata bajarapacuenia jitsipa papecayavenonaenexa. Bajaraxuata pexaniajamatabēcuene rajutajē Diosojavabelia. Tsipaji Espiritu Santo pejamatabēcueneta Titobeje panajamatabēcuenejēpajēbeje paxamē yabara. ¹⁷ Nexata Tito itorobajē papecataenexalia, papecayavenonaenexanua bajarapaofrenda panecaetuatsijava paneveretsinexa baja tavajēnaelia. Barēyaya Tito jejai peponaenexa paxamējavabelia. Bajaraponē ata pijacuata pejitsipaexae peponaejava paxamējavabelia, ponaena papecayavenonaenexa.

¹⁸ Tito pepēta paitorobajē itsanē Dioso pejumecovēnētsinē. Bajaraponē Macedonia nacuata daxita Dioso pejumecovēnētsivi bitso peyapētaenētsi. Peyaiyataenētsinua. Tsipaji xaniavaetsia tsipaebabiaba Dioso pejumelivaisi jivi pecapanepaelivaisinexatsi. ¹⁹ Ponē, Tito yajava, ponaejitsia paxamējavabelia, bajaraponē Macedonia nacuata itapetatsi daxita Dioso pejumecovēnētsivi. Nexata pamatacabi paponaeñajē Jerusalén tomarajavabelia, bajaraponē payajavaponaenajē. Nexata paofrenda pacaponaejitsianē, bajaraponē paneyavenonaeyacaponaena. Bajarapaofrenda pacaponaenajē Jerusalén tomarapijivi pesivajamatabēcuenebarēyanexa Dioso. Patsitanajamatabēcuene itajētsianajēnua patajitsipaejava patayavenonaenexa pamonae bepejiobivi. Nexata bajarapamonae jamatabējumai tsane: “Matsaena pamonae jitsipa peyavenonaenexa bepejiobivije,” jamatabējai tsane. ²⁰ Bajarapacuenia Macedonia nacupijinē payajavaponaenajē itsajivi ata patanebaracuacuaijaiyaniva bajarapapalataxaneto yabara. “Pablohana raeta bajarapapalata yajuvēnēcopata,” patanejaiyaniva. ²¹ Dioso baja cajena paneyapētane apo patanacobetoxotsivicuene. Itsiata pajitsipajē daxitajivi ata patanepapētaenexa apo patanacobetoxotsivicuene.

²² Titobeje icatsia itsanē patsicueyaitorobajē Dioso pejumecovēnētsinē peyajavaponaenexabeje paxamējavabelia. Bajaraponē anijatōnē pajamatabēcuenejētabiabajē. Xaniavaetsia bitso paneyavenonabiaba. Nexata aeconoxae paxamē bitso jamatabēpapecayavenona. Tsipaji pacavēnēlivaisitane paneyavenonaejavanexa Jerusalén tomarapijivi. ²³ Nexata Tito yabara itsajivi itsa pacayanijobiana: “¿Detsa pacuenia maponē peponaponaenēje?” itsa pacajai tsane, pajumaitsimē tsane: “Pablobeje raja penajuaponaponaenēbeje. Bajaraponē Tito Pablo yavenonabiaba vaxaitsi juya Pablo vajanacayavenonaenexa,” pajamē tsane. Itsajivi itsa pacayanijobiana Tito peyajavaponaenēbeje yabara, pajumaitsimē tsane: “Bajaraponēbeje Dioso pejumecovēnētsivi pitorobinētsibeje. Bajaraponēbeje xaniavaetsia Cristo petoponaponaejavabeje jivi petaexae, nexata jivi yayiatane Cristo pelivaisi,” pajamē tsane. ²⁴ Nexata bajaraponēbeje itsa patsianabeje paxamējavata, patsitanajamatabēcuene itajētsianame paneasivajava bajaraponēbeje. Nexata Dioso pejumecovēnētsivi, pamonae itorobatsibeje bajaraponēbeje, pacavēnēlivaisitaena paneasivajava bajaraponēbeje. Nexata asivaya itsa pacopiapitsianame Dioso pejumecovēnētsivi pitorobinētsibeje, nexata Dioso pejumecovēnētsivi jamatabējumai tsane paxamē yabara: “Pacuenia baja Pablohana nacatsipaeba, xaniajai baja cajena. Corinto tomarapijivi asivaya tane daxitajivi,” jamatabējai tsane.

9

Ofrenda pecaetuatsijava Dioso pejumecovēnētsivijavabelia peyavenonaenexa yabara pelivaisi

¹ Ofrenda pacaetuataponame paneyavenonaenexa bepejiobivi, Dioso pejumecovēnētsivi, Jerusalén tomarapijivi. Apo jitsipañē picani icatsia patacatoyaquinaenexa bajaraxua yabara. ² Tsipaji baja yapētaniji pacuenia bitso jamatabēpayavenoname bajarapamonae. Bajaraxuata pacasivajamatabēcuenebarēyatsi. Nexata paxamē

yabara jumaitšinē Macedonia nacuapijivijavabelia: “Acaya nacuapijivi, Corinto tomarata penacaetuatabiabi, imata baja cajena pavaimi najamatabēcuenereta perajutsinexa ofrenda Jerusalén tomarapijivijavabelia,” janē paxamē yabara. Nexata Macedonia nacuapijivi ita pacavēnlivaisitane paneyavenonaejavanexa Jerusalén tomarapijivi, Macedonia nacuapijivi ata ayaiBITSaētōxaneto tocaetuatapona ofrenda peyavenonaenexa Jerusalén tomarapijivi.³ Nexata pacatoitorobatsi Titobana papecayavenonaenexa paneveretsinexa baja bajarapaofrenda panecaetuatsijava panerajutsinexa Jerusalén tomarapijivi. Tavajēnaelia ita apo paveretsimē tsipae ofrenda panecaetuatsijava, paxamē yabara pexaniacuenia tajumaitisijava, najumecovēauranē tsipae Macedonia nacuapijivijavabelia.⁴ Tsipaji itsamonae Macedonia nacuapijivi belia naponaejitsipa tapēta paxamējavabelia. Ita bajarapamonae taejitsipa bajarapaofrenda apo paneveretsijava, nexata bitso paxamē yabara auranē tsipae. Tsipaji paxamē yabara bajaya baja jumaitšinē: “Corinto tomarapijivi jamatabēveretapona baja ofrenda pecaetuatsijava,” janē paxamē yabara. Nexata paxamē ata bitso pauramē tsipae.⁵ Bajaraxuata jamatabējumaitšinē: “Titobana Corinto tomarabelia tavajēnaeyabelia itorobianajē,” jamatabējanē. Nexata Titobana pacajamatabēcueneyavenonaena ofrenda panecaetuatsijava, paneveretsinexa baja pacuenia najumecapanepaeya panetocaējētame. Nexata baja tavajēnaelia bajarapaofrenda ita paxaniavaetabuatsianame, panajamatabēcueneitajētsianame Jerusalén tomarapijivi paneasivaxae paneyavenonaejava, apo ēpatacaitorobixae.

⁶ Pacanaējēre mapalivaisije. Tsiquirijavayo peubinē, tsiquirijavayo pijinia batopitsapatsi. Ayaijava pijinia peubinē, ayaijava batopitsapatsi. Nexata ayaijava ita parajutsianame itsamonaejavabelia, Dioso juya pacarajutsiana ayaijava.⁷ Nexata caejivi canacujitsia berajuta pacuenia najamatabēcuenereta perajutsinexa. Pētsa pajamatabējumaitšinē: “Apo jamatabērajutsi atanē picani, tsiata taneitorobixae, rajutsianajē,” pajamatabējamē pētsa. Tsipaji pajivi rajuta itsajivijavabelia jamatabēcuenebarēyaya, Dioso asivatsi.⁸ Dioso baja cajena caējēpatsi papecarajutaponaenexa pacuenia panamatavenoname matatoxenetsia. Nexata xua panamatavenoname, paxainaponaename. Pacatonacopatsiananua panerajutsinexa bepejiobivijavabelia.⁹ Dioso pejumelivaisibaxutota jumaitsi mapacueniaje:

Ponē rajutabiaba bepejiobivi penamatavenonaecuene, bajaraponē pexaniacuenie exanabiaba Dioso pitabarata. Nexata bajarapacuenie Dioso apo nacofēnētsi daxitamatabijavabelianexa, jai Dioso pejumelivaisibaxutota.

¹⁰ Dioso rajuta jivi pebuxunexa. Bajaraxuacujinae icatsia Dioso pejamatabēcueneta penaveretsixu capitsapa penotsinexa jivi pexaejavanexa. Bajara pijinia pacuenia Dioso pacarajutsiana panexainaejavanexa, panerajutsinexanua bajaraxuayajuvēnjējava bepejiobivijavabelia. Pacacaējēpaeyaexanaenanua ēpexaniacuenie ayaijava paneexanaenexa.¹¹ Bajarapacuenia Dioso pacarajutsiana panexainaejavanexa ayaijava. Nexata pacacaējēpaena bajaraxuayajuvēnjējava juya panerajutsinexa bepejiobivijavabelia. Nexata paofrenda panerajutame patatocaponaenexa Dioso pejumecovēnētsivi, Jerusalén tomarapijivi, ita parajutsianajē bajarapamonae, pexaniajamatabēcuene rajutsiana Diosojavabelia bajarapacuenia paneyavenonaexae.¹² Bajarapacuenia Dioso pejumecovēnētsivi, bepejiobivi, ita parajutame, payavenoname bitso penamatavenonaejavata. Bajarapamonae paneyavenonaejava ita taena, pexaniajamatabēcuene Diosojavabelia perajutabiabijava pematatsēnēa bitso pexaniajamatabēcuene rajutsiana Diosojavabelia.¹³ Bajarapacuenia Jerusalén tomarapijivi ofrenda ita parajutsianame paneyavenonaenexa, bajarapamonae patsitanajamatabēcuene itajētsianame pepacuenie xaniajai panejumecovēnētsijava pexanialivaisi, Cristo pelivaisi. Nexata bajarapamonae pexaniajamatabēcuene rajutsiana Diosojavabelia Cristo pelivaisi panejumecovēnētavanapaejava yabara. Ofrenda ata panerajutsijava Jerusalén tomarapijivi, paofrenda ata parajutame itsamonaejavabelia, bajaraxua ata yabara Jerusalén tomarapijivi pexaniajamatabēcuene rajutsiana Diosojavabelia.¹⁴ Nexata bajarapamonae bitso asivaya pacajamatabēnainajayaya pacatovajētabiabiana Diosojavabelia. Tsipaji paxamē bajarapamonae payavenoname Dioso pejamatabēcueneta papecaitorobixae.¹⁵ Vaxaitsi pexaniajamatabēcuene rajutabiabatsi Diosojavabelia. Tsipaji Dioso pexēnato athēbēvetsica nacatoitorobica vajanacasivatēpaenexa mapanacuataje. ¡Cristo vajanacasivatēpaejava pexaniacuenie bitso!

10

Pacuenia Pablo navajunupaeba Cristo pitorobijavatsi Dioso pejumelivaisi daxitanacuanējava jivi petsipaebanajetarucaenexa yabara pelivaisi

¹ Pacuenia Cristo pexaniacuenia pacaitorobijitsipa, bajarapacuenia xanë ata pexaniacuenia ajumesaëya pacaitorobatsi. Itsiata baitsi jane itsamonaë paxamëyajuvënëvi xanë yabara jamatabëcuenenavëxaniabiaya jumai tsabiabi: "Itsa abaxë Pablo tajë nacavecuaponapona, ajumelivaisisaëya nacatoyaquinabiabarena. Itsiata baitsi jane majotaje, vaxaitsijavata, itsa patajopaena, piaitejepaëbinëcuenia patajopaena. Ajumejibia ponaponaena pijameuraxae," jai tsabiabi paxamëyajuvënëvi xanë yabara jamatabëcuenenavëxaniabiaya. Itsiata bajarapacuenia apo itsinë tsane. ² Nexata pexaniacuenia pacavajëtatsi. Pëtsa itsajamatabëcuene panetoexaname, itsa patsialiajë paxamëjavabelia, ayajumeta pacabijataeya patacamuxujobiyaniva. Itsamonaë paxamëyajuvënëvi xanë yabara jamatabëcuenenavëxaniabiaya jumai tsabiabinua: "Pablo apo ponaponaë Dioso pejumecovënëtsinëcuenia. Saya ponapona Dioso apo pejumecovënëtsinëcuenia. Yajavaponapona pijaperujumatabëcuene," jai tsabiabi paxamëyajuvënëvi xanë yabara. Bajarapacuenia xanë yabara pecuacuajajitsabiabivijavelia ayajumeta bijataeya cuacuajianë tsane. ³⁻⁴ Mapanacuajijivi, Dioso apo pejumecovënëtsivi, saicayacuenia nayajiviyapëtane pijavajabitsaëvecua penaevetsinexa pitsacueniabiyanivatsi. Vaxaitsi ata mapanacuata vajajinavanapaevi, Dioso vajajumecovënëtsivi, saicayacuenia pijinia nayajiviyapëtanetsi vajanaevetsinexa dovathivecua. Dovathivecua apo naevetsitsi mapanacuajijicueneta. Pajamatabëcuenesaë Dioso nacarajuta, bajarapajamatabëcuenesaëta jamatabëcueneamoneyabaponatsi dovathi. ⁵ Nexata Dioso pejamatabëcuenesaëta, paajibiaexanaponajë jivi Dioso yabara penajumetsënëtsilivaisimi. Bajarapamonae dovathi pejamatabëcueneta itorobatsi penajumetsënëtsilivaisi petsipaebabiabinexa itsamonaëjavabelia. Nexata pamonaë Dioso yabara penajumetsënëtsivi, pajumecovënëtsiaexanaponajë Cristo pelivaisi Dioso pejamatabëcuenesaëta. Itsamonaë pijinia dovathi pejamatabëcueneta beayajamatabëcueni natane. Pamonaë bajarapacuenia najamatabëxaina, apo yapëtaë Dioso. Bajaraxuata bajarapajamatabëcuenemi paajibiaexanaponajë baja. Nexata pamonaë ata bajarapacuenia beayajamatabëcueni natane, pajumecovënëtsiaexanaponajë Cristo pelivaisi Dioso pejamatabëcuenesaëta. ⁶ Bajarapacuenia paxamëjaya ata paexanaponaenajë. Paxanë panajamatabëcueneveretajë pataexanaenexa mapacueniajæ. Paxamë baja xaniavaetsia Dioso itsa pajumecovënëtavapaponaë, paxanë pacavecuacapitsapaenatsi pamonaë apo jitsipae patanejumecovënëtsinexa Cristo pelivaisi.

⁷ Paxamë raja saya jema pataneme daxitajivi. Nexata daxitajivi pataneme pacuenia Dioso apo pejumecovënëtsivi tane daxitajivi. Nexata apo payapëtaemë pacuenia paxanë pajamatabëcueneitsinë. Pajivi nayapëtane Cristo pijajivitonëcuene, bajarapajivi bepaneyapëtane paxanë ata Cristo papijajivicuenenë. ⁸ Paxamë meta xanë yabara pajamatabëjumaitsimë tsabiabi: "Pablo saya bitso navajunupaebabiaba Dioso pitapetsijavatsi apóstolenëxaxa," pajamatabëjamë meta tsabiabi xanë yabara. Dioso baja cajena paneitoroba patacajamatabëcuene asaëyaexanaenexa. Apo paneitorobi patacajamatabëcuene faefaenaëyaexanaenexa. Bajaraxuata apo ajumeuranë tsabiabi tanavajunupaebabiabijava apóstolenëjavanë. ⁹ "Pablo saya nacajamatabëcuenenabenajacaeaya exanabiaba vajanacatoyaquinaelivaisianëta," panejajiva xanë yabara apo jitsipañë. Tsipaji bajaraxua yabara apo pacatoyaquinaetsi. ¹⁰ Itsamonaë xanë yabara jumai tsabiabi: "Pablo ajumelivaisisaëya nacatoyaquinabiabarena. Itsiata bajaraponë itsa patajopa majotaje, vaxaitsijavata, apo ajumesaë tsabiabi. Saya ajumelivaisixaebi tsabiabi," jai tsabiabi itsamonaë xanë yabara. ¹¹ Itsiata baitsi jane pamonaë bajarapacuenia jumai tsabiabi xanë yabara, beyapëtane pacuenia bajarapamonaejavabelia exanaejitsianë itsa patsialiajë paxamëjavabelia. Pacuenia baja pacatoyaquinialitsi taexanaenexa paxamëjavabelia, bajarapacuenia exanaenajë paxamëjavabelia.

¹² Palivaisi paxanë pacatsipaebabiabatsi, bajarapalivaisivecua saicayalivaisi itsamonaë pacatsipaebabiaba. Bajarapamonae apo canaëjëttsi pacuenia Dioso pejumelivaisibaxutota jumaitsi. Nexata bajarapamonae namataenetsia natane bepexaniajamatabëcueni. Nexata pamonaë apo bajarapamonaeyajuvënëvi, bepibisijamatabëcueni tane. Saya xua bajarapamonae tsitaxanepanatsi, bajaraxua yabara jumai tsabiabi: "Maxuajæ pexaniacueni," jai tsabiabi. Xua pijinia apo tsitaxanepanaetsi, bajaraxua yabara jumai tsabiabi: "Maxuajæ pibisiacueni," jai tsabiabi. Bajarapamonae cajena bitso apo yapëtaë. Paxanë raja bajarapacuenia apo pajamatabëcueneitsinë. ¹³ Paxanë Dioso paneitoroba Dioso pijacueni patatonacuenibinexa. Nexata panacuanëjaya Dioso paneitoroba, bajarapanacuanëjaya Dioso pejumelivaisi patsipaebanajetarubenajë. Dioso paneitoroba tajë ata paxamë paCorinto tomarapijivimëjavabelia ata pataponaenexa patacatsipaëbinexa pejumelivaisi. Nexata itsa panavajunupaebabiabajë Dioso patanitorobijava, xuyavajëtto Dioso panetocopata patatonacuenibinexa, panavajunupaebabiabajë. Ayailivaisi apo panavajunupaebabiabinë saya itsamonaë pataneyaiyataenexa patanavajunupaebijava

yabara. ¹⁴ Bajaraxuata itsa papatajê paxamêjavata, pacatsipaebatsi pexanialivaisi, Cristo pelivaisi. Tsipaji bajarapanacuanêjava Dioso paneitoroba pejumelivaisi patacatsipaebinxexa. Bajarapalivaisi copiaya baja paxanê pacatsipaebatsi. ¹⁵ Itsamonaebaja Cristo pelivaisi jumecovênêta itsamonaepetsipaebixaetsi. Nexata Cristo pelivaisi pejumecovênêtsivi yabara najumetsênêtsiaya apopajumaitsinê tsipae mapacueniaje: “Paxanê raja patatsipaebixae, bajarapamonae jumecovênêta Cristo pelivaisi,” apopajanê tsipae. Pacatojitsipatsi panevajênæyabelia panejumecovênêtavanapaenexa Dioso. Nexata pajitsipajê orijibia patacatsipaebavanapaenexa pexanialivaisi, Cristo pelivaisi. Itsiata baitsi jane êpanacuanêjava Dioso paneitoroba patatsipaebavanapaenexa pejumelivaisi, bajaraêpanacuanêjava patsipaebavanapaenajê. ¹⁶ Nexata paxamê majotaje patacatsipaebicujinae, panepênêyabelia penaetomaranêjava atajamatabêpatsipaebajê pexanialivaisi, Cristo pelivaisi. Apopajitsipænê patatsipaebinxexa bajarapalivaisi itsaxuayo baja patavajênæya itsamonaepetsipaebapona bajarapalivaisi.

¹⁷ Pajivi itsamonaejavabelia navajunupaeba pexanaejava, benavajunupaeba Dioso peyavenonaejavatsi. Bajarapacuenia benavajunupaeba pejumetaevitsi peyaiyataenexa Dioso. Bajarapajivi apobenavajunupaebi pijacuata pexanaejava jivi saya peyaiyataenexatsi. ¹⁸ Pajivi pijacuata navajunupaebabiaba: “Xanê ra bitso pexaniacuene exanabiabajê,” jai tsabiabi, bajarapajivi ajumematamobi. Tsipaji saya pijacuata navajunupaebabiaba. Itsiata baitsi jane pajivi yabara vajatuxanenê jumaitsi: “Mara pajivije xaniavaetsia netopapona,” jai, nexata tojumenamatamotatsi.

11

Pablo pelivaisi, penajumetsênêtsilivaisi petsipaebaponaevi ata, yabara pelivaisi

¹ Natsiquejemalivaisi pecuaicuajainê, xua exana, pijacuata banavajunupaeba itsamonaejavabelia. Bajara pijinja pacuenia xanê ata, xua exanajê, tajacuata pacanavajunupaebijitsiatsi. Bajarapacuenia tajacuata pacanavajunupaebi ata tsanetsi, itsiata jitsipajê xaniavaetsia ajamatabêcuenesaêya patanenamuxunaevetsinexamê. ² Bajarapacuenia pacanavajunupaebijitsiatsi tsipaji bitso pacaasivatsi pacuenia Dioso pacaasiva. Pacatojitsipatsi êCristo panejitsipaenexa. Pacuenia petiriva caenê jitsipa êpamonanexa, bajarapacuenia caenê Cristo pajitsipare. ³ Bajayata Evapijiva yamaxêitorobatsi dovathi penajumetsênêtsicueneta. Pacacacujunavatsi paxamê ata bajarapacuenia dovathi papecaya-maxêitorobiyana. Nexata paxamê yabara jamatabêjumaitsinê mapacueniaje: “Dovathi meta jamatabêcuenebijianaenatsi Corinto tomarapijivi. Cristo meta pejitsipaejavami copabiana,” jamatabêjanê paxamê yabara. ⁴ Pacacacujunavatsi penajumetsênêtsilivaisi petsipaebaponaevi papecatsipaebiyaniya. Tsipaji bajarapamonae pata baja paxamêjavata. Xanê Jesús pelivaisi pacatsipaebabiabatsi. Nexata Jesús pelivaisivecua bajarapamonae saicayacuenia pacatsipaebabiabi ata, itsiata bajarapalivaisi panamuxunaevetabiabame xaniavaetsia. Espiritu Santo, ponê pacatsijamatabêeca, pelivaisi, xanê pacatsipaebabiabatsi. Nexata Espiritu Santo pelivaisivecua saicayacuenia bajarapamonae pacatsipaebabiabi ata, itsiata bajarapalivaisi ata panamuxunaevetabiabame xaniavaetsia. Xanê pacatsipaebabiabatsi pexanialivaisi papecacapanepelivaisinexa Diosojavabelia. Nexata bajarapalivaisivecua bajarapamonae saicayalivaisi pacatsipaebabiabi ata, itsiata panamuxunaevetabiabame xaniavaetsia. ⁵ Pamonae penajumetsênêtsilivaisi pacatsipaebabiaba, ayajamatabêcuenevi nataeyabiaba. Paxanê paapostolevinê bajarapamonae bitso panevecuayajamatabêcuenevi natane. Itsiata baitsi jane xanê bajarapamonaevecua beveliajamatabêcuenenênê aponataenê. ⁶ Jivijavabelia xaniavaetsia livaisi tatsipaebinxexa, aponecujani ata, itsiata xaniavaetsia yapêtaniji xua yabara tsipaebajê. Xaniavaetsia Jesús pelivaisi patayapêtaejava paneyapêtaenexa, pacatsitanajamatabêcuenetajêtabiabatsi paxamêjavata itsa pacatsipaebavanapatsi Jesús pelivaisi.

⁷ Paxamêjavata itsa pacatsipaebaponaenapatsi pexanialivaisi papecacapanepelivaisinexa Diosojavabelia, itsacueniejavayo ata paxamêjavabelia apopacavajêtsitsi. Xanê tacobeta asaêyata nacuenebabiabajê tanaevetsinexa. Bajarapacuenia betajibicuenia nacuenebabiabajê tanaevetsinexa pamatacabi pacatsipaebaponaenapatsi Jesús pelivaisi. Nexata baja pajumecovênêtame Jesús pelivaisi itsamatacabi panexainaenexa matacabi apopevererecaejava. ⁸ Itsamonaebajo pejumecovênêtsivi itsa netoitoroba palata, itsiata pitajê paxamêjavata tanaevetaponaenexa bajarapapalata. Nexata pacayavenonaenaponaenapatsi. Bajarapacuenia paxamêjavata naevetaponaenapajê. Paxamê apopanerajutsimê palata. ⁹ Nexata pamatacabi paxamêjavata ponaponaenapajê, namatavenonaenapajê, apopacavajêtsitsi panexainaeyajuvênêjava patanerajutsinexamê. Itsiata Dioso pejumecovênêtsivi, Macedonia nacuverena pepatsivi, netocapata daxita tanamatavenonaejava. Bajarapacuenia paxamêjavata ponaponaenapajê itsacueniejavayo

ata pacavajëtsinejevatsi patacavamatabëitonotsiyaniya. Apo najamatabëxainaenë bexëajavabelia ata patacavajëtsinexa. ¹⁰ Yapëtaniji Cristo pelivaisi pepacuna pexaniaajailivaisicue. Bajaraxuata daxita Acaya nacujava Cristo pelivaisi amoneya asaëya tatsipaebaponaejava, sivajamatabëcuenebarëyanë. ¹¹ Itsamonae xanë yabara jamatabëcuenenavëxaniabiaya pacajumaisi: “Pablo raja apo pacaasiva. Bajaraxuata apo pacavecuapitsi palata,” pacajai. Jemajai raja bajarapamonae. Dioso raja yapëtanë bitso patacaasivajava.

¹² Itsiata tavajënaeyabelia Dioso pejumelivaisi pacatsipaebaponaenatsi pacavajëtsinejevatsi itsacujenjavayo ata. Pamonaen penajumetsënëtsilivaisi pacatsipaebabiaba, bajarapamonae pacamatamoyanijobabiaba papecatsipaeibatamato. Bajarapacuenia papecamatamoyanijobabiabixae, nexata toacuenebitsi pevajënaeyabelia papecajumaisaponaenexa: “Paxanë ata patonacuenebavanapajë Dioso pacuenia Pablo tonacuenebaponapona Dioso,” papecajinexa. ¹³ Bajarapamonae apo pepo apóstolevi. “Paxanë raja paapóstolevinë,” itsa pacajai, saya raja pacayamaxëitojoroba. Paxanë Cristo papijajivinë, paapóstolevinë, bajarapamonae saya panacuenecataeya apóstolevi naexana. ¹⁴ Paxamë apo bepasivajamatabëcuenenabenajacaemë bajarapamonae. Bajarapacuenia saya bajarapamonae exanavanapa papecayamaxëitojorobinexa. Dovathi raja caëjëpatsi Dioso bepijaangelhë penaexanaenexa, bepexaniaajailivaisi itajara petsipaebinë jivi petaenexatsi. ¹⁵ Nexata dovathi pijajivi ata pexaniacuene itajara exanavanapae ata, itsiata apo besivajamatabëcuenenabenajacaetsi. Paneconivajëto bajarapamonae xaina, bajarapaneconivajëto itsamatacabi Dioso naneconitsiaexanaena bajarapamonae.

Pacuenia Pablo apóstolenëxae nabejiobitsiaponapona yabara pelivaisi

¹⁶ Icatsia pacajumaisitsi. Xua aeconoxae pacajumai tsanetsi, bajaraxua yabara pëtsa panetaneme betanematajemabinë. Bajarapacuenia panetae atamë, itsiata panenamuxunaevere palivaisi pacatsipaebijitsiatsi. Pacuenia peyamaxëitojorobiapóstolevi ajumeurajibia pacanavajunupaebabiaba paneyaiyataenexa, bajara pijinia pacuenia xanë ata ajumeurajibia pacanavajunupaebijitsiatsi pataneyaiyataenexamë. ¹⁷ Vajutaxanenë picani apo nitorobi patacanavajunupaebinexa. Itsiata pacuenia pematajemabinëtsi ajumeurajibia banavajunupaeba xua exana, bajarapacuenia xanë ata aeconoxae ajumeurajibia pacanavajunupaebijitsiatsi pataneyaiyataenexamë. ¹⁸ Pamonaen peyamaxëitojorobiapóstolevi, ayaijamatabëcuenevi nataeyabiaba. Nexata ajumeurajibia pacanajamatabëcuene vajunupaebabiaba bajarapamonae. Nexata xanë ata bajarapacuenia ajumeurajibia pacanajamatabëcuene vajunupaebijitsiatsi. ¹⁹ Paxamë bitso ayailivaisi bepaneyapëtaevi panataneme. Itsiata apo payapëtaemë. Tspaji saya jamatabëcuenebarëyaya panamuxunaevetabiabame palivaisi pacatsipaebabiaba peyamaxëitojorobiapóstolevi. Pacuenia pematajemabinëtsi ajumeurajibia banavajunupaeba xua exana, bajarapacuenia ajumeurajibia pacanavajunupaebabiaba peyamaxëitojorobiapóstolevi. ²⁰ Bajarapamonae bepapijajivitonëmëcuenia pacaitorobabiabi ata, itsiata xaniavaetsia panamuxunaevetabiabame. Panexinaejavaxi pacavecuereveta-ponae ata, itsiata xaniavaetsia panamuxunaevetabiabame. Bijiaya pacanaëcotabiabi ata, itsiata xaniavaetsia panamuxunaevetabiabame. Pacaitabarapacababeyabiabi ata, itsiata xaniavaetsia panamuxunaevetabiabame. ²¹ Paxanë bajarapacuenia apo pacaexanaetsi pamatacabi pajinavanapajë paxamëjavata.

Xua yabara bajarapamonae ajumeurajibia pacanavajunupaebabiaba, xanë ata necaëjëpa bajarapitsicue yabara ajumeurajibia patacanavajunupaebinexa pataneyaiyataenexamë. ²² Bajarapamonae ayaijamatabëcuenevi nataeya itsa pacanavajunupaebabiaba, pacajumai tsabiabi paneyaiyataenexa: “Paxanë raja pajudjovinë,” pacajai tsabiabi. Xanë ata raja judjonë. Itsiata bajarapacuenia apo pacajumaisitsi pataneyaiyataenexamë. Bajarapamonae pacajumai tsabiabinua: “Paxanë raja Israelpijinë papemomoxinë,” pacajai tsabiabi. Xanë ata raja Israelpijinë pemomonë. Itsiata bajarapacuenia apo pacajumaisitsi. Bajarapamonae pacajumai tsabiabinua: “Paxanë raja Abrahampijinë papemomoxinë,” pacajai tsabiabi. Xanë ata raja Abrahampijinë pemomonë. Itsiata bajarapacuenia apo pacajumaisitsi. ²³ Bajarapamonae Cristo bepijajivi nataeya ajumeurajibia pacanavajunupaebabiaba. Xanë xaniavaetsia Cristo tonacuenebaponapajë. Xanë picani apo jitsipae- në patacanavajunupaebinexa. Itsiata Cristo tatonacuenebaponaponaevajava, xanë ajumeurajibia pacanavajunupaebijitsiatsi. Pacuenia pematajemabinëtsi ajumeurajibia banavajunupaeba xua exana, bajarapacuenia ajumeurajibia pacanavajunupaebijitsiatsi. Itsiata mapacuenia pacanavajunupaebijitsiatsije. Xanë bitso Cristo tonacuenebaponapajë bajarapamonae matatoxenetsia. Bajarapamonae

matatoxenetsia xanë bitso nejumaconibabeyabiaba penaneconitsivi pejumaconibabeyabiabimacata. Bajarapamonaē matatoxenetsia nenaneconitsiaexanabiaba penaneconitsivi pejebabiabibota taneetsinexa. Bajarapamonaē matatoxenetsia anijatonë imoxo tanebeyaxuababiabi. ²⁴ Cinco xuabeje judiövi nevaetaba tanenaneconitsiaexanaenexa. Caenevaetabi canacujitsia nejumaconibabeyabiaba penaneconitsivi pejumaconibabeyabiabimacata. Itsa nejumaconibabeyabiaba, treinta y nueve xuabeje nejumaconibabeyabiaba caenevaetabita. ²⁵ Acueyabi icatsia xuabeje apo judiövi nevaetaba tanenaneconitsiaexanaenexa. Bajaraxuanë saicaya naebota nejumaconibabia. Icatsia itsamatacabijavabelia caeto judiövi ibotonëta netsecona. Acueyabi pijinia panamutobeje menia barcota tanaponaejava, acueyabi xuabeje nayabubunajë manuameneta. Caepayajopaetanë, caemeravi, caematacabi yajava, manuameneta juenajetarucajë. ²⁶ Xanë ayaicuenia jinarutabiabajë Cristo pelivaisi jivi tatsipaebaponaenexa. Nexata itsajavata netsiyai tsabiabi menia taponabiabijava. Itsajavata namutua itsa ponajë, netsiyai tsabiabi tanevecuanacobetoxotsinexa tacobecovëjavaxi. Itsajavata netsiyai tsabiabi tajanacuapijivi taneitsacueniabinxexa. Itsajavata netsiyai tsabiabi saicayanacuapijivi taneitsacueniabinxexa. Itsajavata netsiyai tsabiabi tomaranëjava, petusato nacuanëjava ata, manuamenejava ata. Itsajavata netsiyai tsabiabi pamonaejava Dioso bepejumecovënëtsivi penataevijava. ²⁷ Itsajavata bitso nacuenebabiabajë. Cueranabiabajënuua. Itsajavata apo majitabiabinë. Itsajavata bitso tajani tsabiabi. Meranua jitsipabiabajë. Itsajavata taxaejava xaenejevanë ponaponabiabajë. Itsajavata bitso aquenë tsabiabi apo taxainaexae tanaxatatsijava.

²⁸ Bajaraxua icatsia pematatsënëa mapacueneye. Caematacabi canacujitsia bitso sivanajamatabëxainabiabajë caetomarapijivi canacujitsia, Dioso pejumecovënëtsivi. ²⁹ Pajivi jamatabëcuenecuerana Dioso pejumecovënëtsijava, xanë ata sivajamatabëcuenecueranabiabajë. Pajivi itsajivi pejamatabëcueneta pibisiacuenexanaeyaexanatsi pejopaenexa Dioso pejumelivaisivexa, bajarapajivi yapijivauranë tsabiabi Diosojavabelia. Baraanaepanabiabajënuua pajivi pejamatabëcueneta jopaeayaexanatsi. ³⁰ Itsajivi itsa nitoroba tanajamatabëcuenevajunupaebinxexa, nexata najamatabëcuenevajunupaebianajë tanajamatabëcuenetajëtësinexa tajamatabëcuenefaenaejava. ³¹ Vajatuxanenë Jesucristo paxa Diosojavabelia pexaniajamatabëcueneta berajutabiabatsi daxitamatacabijavabelianexa. Dioso baja cajena yapëtane jivi tatsipaëbllivaisi pexaniajaicueneta. ³² Imata ponaponajë Damasco tomarata. Nexata pepo iraevetšinë, Aretasvënëne, eveta bajarapaira. Nexata pijajivitonë eveta Damascotomara. Damascotomara matatorotsia yacaranata pialitayaëibopanaxenetota. Bajara payacaranatsijavaxaneto ibopananë mataropotsia catsanaeya pefaratsijava. Bajaraxua apia athëbëabetsia pacuenia pinijinaejavaxaneto apia. Nexata Damascotomara pevetsinë pijajivi itoroba tanevajënaevetsinexa pabaupajava pitsapaejitsianë picani bajarapatomaravecua. Bajaraponë itoroba pijajivi tanevatabinxexa tanecaponaejava picani penaneconitsivi pejebabiabiboyabelia. ³³ Itsiata baitsi jane itsamonae Dioso pejumecovënëtsivi bemapirecuenia pexanaejavaxanetoënëta neecaeyaexana. Nexata Damascotomara matatorotsia peyacaranatsi ibopanaxanetojumabelia neyamaëyacopareca athëbëyo perucaeventanavojoatualia. Bajarapacuenia Damasco tomarata vecuapanepajë Damascotomara pevetsinë pijajivi.

12

Pacuenia Pablo navajunupaeba bemajitsinaebota vajatuxanenë petsitanaitajëtabiabijavatsi yabara pelivaisi

¹ Apo netsitaxanepanae picani ajumeurajibia patacanavajunupaebinxexa. Itsiata baitsi jane pamonae peyamaxëitojorobiapóstolevi, ajumeurajibia pacanavajunupaebabiaba saya paneyaiyataenexa. Nexata xanë ata ajumeurajibia pacanavajunupaebatsi bemajitsinaebota vajatuxanenë Jesucristo tanetsitanaitajëtabiabijava. Neyapëtaeyaexanua pajamatabëcuenelivaisi xaina xuanë ata netsitajëtabiaba. ²⁻³ Catorce pavaibeje xainajë tanecapanepaecujinae athëbëabetsia Dioso pijanacuayabetsia. Apo nayapëtaenë athëbëabetsia tanecaponaejava taperabëto yajava. Itsa jume, ëtajamatabëcueneta meta saya capona. Caenë Dioso yapëtane pacuenia necapona athëbëabetsia. ⁴ Itsiata necapona paräisojavabetsia. Bajarajotatsia jumetaniji Dioso muetsia pexainabuatsilivaisi. Bajarapalivaisi Dioso apo netocopatsi tatsipaebinxexa itsajivi ata. ⁵ Bajarapacuenia athëbëabetsia tanecaponaejava tanavajunupaebinxexa, necaëjëpa picani jivi taneyaiyataenexa. Itsiata apo navajunupaebabiabinë tsane bajaraxua. Ètasaëjibijava saya navajunupaebabiabianajë. ⁶ Ayallivaisi picani xainajë ajumeurajibia tanavajunupaebaponaenexa pacuenia taniji athëbëtatsia.

Ajumeurajibia itsa navajunupaebaponaejitsipajë, apo navajunupaebaponaenë tsipae betanematajemabinëcuenia. Tshipaji êpexaniajilivaisi navajunupaebaponaejitsipajë. Itsiata baitsi jane apo navajunupaebaponaenë tsane daxita xua yapëtaniji. Tshipaji apo jitsipaeenë bajarapalivaisita jivi taneyaiyataenexa. Biji rajane jitsipajë jivi taneyaiyataenexa taexanaponaejava yabara, livaisi tatsipaeaponaejava ata yabara.

⁷ Dioso netocopata tanavixaetaeyabinexa. Bajarapacuenia Dioso netocopata tanavixaetaeyabinexa tajacuata tanabarajamatabëjumaitsiyaniva mapacueniaje: “Xanë baja cajena pinijicue Dioso netsitajëtabiaba xua itsajivi ata apo tae. Bajaraxuata bitso xanë ayaijamatabëcuenenëenë daxitajivi matatoxenetsia,” tanabarajamatabëjaiyaniva, Dioso netocopata tanavixaetaeyabinexa. Dioso netocopata dovathi pejamatabëcuenecaejëpae atatsi tanevixaeitonotabinexa daxitamatacabi. ⁸ Diosojavabelia picani vajëtajë acueyabi xuabeje tanevecuaajibiaexanaenexa bajarapavixae. ⁹ Itsiata baitsi jane vajatuxanenë nejumaitsi mapacueniaje: “Jume. Apo cavecuajibiaexanaetsi tsane. Bitso casivatsi. Nexata cayavenonaetsi daxita xua namatavenoname. Pajivi apo jamatabëcuenecaejëpae atatsi pesaëta tanetonacuenebinexa tajacuene, itsiata baja itsa cajëjëpatsi tanetonacuenebinexa, nayapëthane tayavenonaecueene,” nejai vajatuxanenë. Bajaraxuata vajatuxanenë pijacuene tatonacuenebinexa, xanë tasaëta apo tanejamatabëcuenecaejëpaejava, nasivajamatabëcuenebarëyanë. Tshipaji Cristo pesaëta neyavenonabiaba daxitacuene yabara. ¹⁰ Apo tanejamatabëcuenecaejëpaeaxae tasaëta tatonacuenebinexa vajatuxanenë pijacuene, nasivajamatabëcuenebarëyanë tsabiabi. Itsamonae pibisiacuenia itsa nebijataeyabiaba Cristo pijajivitonëxaenë, nasivajamatabëcuenebarëyanë tsabiabi. Itsacuenjavaxi itsa namatavenonabiabajë, itsiata nasivajamatabëcuenebarëyanë tsabiabi. Itsamonae itsa nebejiobiaexanabiaba Cristo pijajivitonëxaenë, itsiata nasivajamatabëcuenebarëyanë tsabiabi. Itsa netsiyapëbeje tsabiabi tatonacuenebinexa Cristo pijacuene, itsiata nasivajamatabëcuenebarëyanë tsabiabi. Tshipaji paepatota apo nejamatabëcuenecaejëpae, bajarapaepatota vajatuxanenë bitso nejamatabëcueneyavenonabiaba.

Pacuenia bitso Pablo sivanajamatabëxaina Dioso pejumecovënëtsivi, Corinto tomarapijivi, yabara pelivaisi

¹¹ Pamonaë peyamaxëitojorobiapóstolevi, saya jivi peyaiyataenexatsi ajumeurajibia navajunupaebabiaba pacuenia pematajemabinëtsi banavajunupaeba ajumeurajibia. Bajarapacuenia xanë ata navajunupaebajë. Apo jitsipaeenë picani tanavajunupaebinxexa. Paxamë xaniavaetsia itsa panevajunupaebijitsipame pacuenia exanaponaonajë paxamëjavata, nexata xanë tajacuata apo navajunupaebinë tsipae. Beveliajamatabëcuenenë atanë, itsiata pamonaë peyamaxëitojorobiapóstolevivecua, xanë apo beveliajamatabëcuenenëenë. ¹² Paxamëjavata itsa ponaponajë, netsiyapëbeje ata, bajayajebi pacatsitaexanaponaonatsi pacuenia Dioso nitoroba. Pacatsipaeaponaonatsi Jesús pelivaisi. Nexata pacatsitaexanabiabatsi pinijicue ne taexanaejava Dioso pesaëta. Nexata paneyapëtaneme Dioso taneyavenonabiabijava. ¹³ Pacuenia taniji daxita Dioso pejumecovënëtsivi, bajarapacuenia paxamë ata pacatanetsi. Nexata itsamonae Dioso pejumecovënëtsivivecua bepaveliajamatabëcuenevimë, apo pacataetsi. Itsamonae Dioso pejumecovënëtsivi, neyavenonabiaba itsajota namatavenonajë. Itsiata bajarapacuenia paxamë ata pataneyavenonaenexamë, apo pacavajëtsitsi. Pamatacabi ponaponajë paxamëjavata, apo pacavajëtsitsi itsacuenejavayo ata. Pëtsa itsiata bajaraxua pasivanajamatabëxainame. Biji rajane pasivajamatabëcuenebarëyamëre itsacuenejavayo ata apo patacavajëtsijava.

¹⁴ Mabaja panamutotaje, acueyabi namuto taponaeenexa paxamëjavabelia naxaniavaetaponaponajë baja. Itsiata apo pacamatamoyanijobi tsanetsi Dioso pejumelivaisi patacatsipaebimatamo. Tshipaji palata apo jitsipaeenë. Jitsipajë rajane xaniavaetsia panejumecovënëtsinexa Dioso. Bepataximë pacatanetsi. Pacuenia pejevaxi paxajavabelia apo rajutsi palata paxa penaevetsinexa, bajara pijinia pacuenia paxamë ata apo panerajutsimë palata tanaevetsinexa. ¹⁵ Xanë patacayavenonaenexa, mapacuenia exanaejitsipajë. Daxita taxinaejavami, veretsipajë jamatabëcuenebarëyaya. Tasaëtsaponaponaepatojebi abaxë mapanacuataje, pacyavenonabiabijitsipatsi. Bajarapacuenia pacyavenonabiabijitsipa patacjamatabëcueneyavenonaenexa, xaniavaetsia Dioso panejumecovënëtsinexa. Tavajënaeyabelia bitso pacaasiva tsaponae atatsi, itsiata covë paxamë juya bevelia saya paneasivamë tsaponae.

¹⁶ Itsamonae paxamëyajuvënëvi xanë yabara jamatabëcuenenavëxaniabiaya jumai tsabiabi: “Xaniajai. Vaxaitsi Pablo apo rajutsitsi palata, Dioso pejumelivaisi vajanacatsipae-bimatamo. Itsiata Pablo piaiatsacanë. Nexata meta itsacuenia nacayamaxëitojorobiaya nacavecuapitabiaba palata,” jai tsabiabi itsamonae xanë yabara. ¹⁷ Itsanë ata cajena, paxamëjavabelia xanë taitorobiviyajuvënëenë, yamaxëitojorobiaya palata apo pacavecuapitsi.

18 Itorobajě baja Tito peponaenexa paxamějavabelia papecataenexa. Itorobajěnuu itsaně Dioso pejumecovėnėtsině Tito peyajavaponaenexa. Nexata pamatacabi Tito ponapona paxamějavata, ¿pacavajėta tsaja palata? Jume. Apo pacavajėtsi cajena. Paxanėbeje Titobeje panajamatabėcuenejėpajėbeje. Nexata panacuenėjėpajėbeje.

19 Panesivajamatabėjumaitsimė raeta: “Bajarapacuenia Pablobana nacanajamatabėcuenelivaisipaeba saya penayajivicuaicujainexa vaxaitsi vajananeconitsiaexanaeyaniva,” panesivajamatabėjamė raeta. Bajarapacuenia itsa pacanavajunupaebatsi, apo pacanavajunupaebitsi patacujunavixae patanenaneconitsiaexanaejavamė. Pacatsipaebatsi raja Dioso pitabarata pacuenia Cristo panetojitsipa. Tajamonae bitso patacaasivavi, daxita palivaisi baja pacatsipaebabiabatsi, pacatsipaebabiabatsi patacujamatabėcuene yavenonaponaenexa. Nexata bajarapalivaisi panevajėnaeyabelia pacatsijamatabėvitsabaponaena Dioso papijajivixae. 20 Pamatacabi ponaenajė paxamějavabelia, bitso meta najamatabėxainaeya patsianajė paxamějavata. Aeconoxae pajitsipame tapatsinexa paxamějavata. Itsiata meta itsa patsianajė paxamějavata, apo pajitsipaemė tsane patacananeconitsiaexanaenexa. Tspaji meta apo pacacaxitarabi tsanetsi pexaniacuenia panejinavanapaejavata pacuenia pacatojitsipatsi. Itsa patsianajė paxamějavata, pacataenatsi meta panenajumeanaenotabiabijava. Pacataenatsi meta panenacaėbabiabijava ata. Pacataenatsi meta panenabaraanaepanabiabijava ata. Pacataenatsi meta apo paneyavenonaejava itsajiviyi ata. Pacataenatsi meta itsamonae pepėya pibisiacuenia najumetsėnėtsia panebaracuaicujajitsabiabijava ata. Pacataenatsi meta itsamonaevecua paayajiamatabėcuenevimė panenataeyabiabijava ata. Pacataenatsi meta apo panenajamatabėcuenejėpaexae navecuanatsanaeya panejinavanapaejavata ata. 21 Paxamějavata icatsia itsa patsianajė, Dioso meta pitabarata pacayapijiviaura tsanetsi pibisiacueni paneexanavanapaejavata yabara. Bajaraxuata bitso pacasivanajamatabėxainatsi icatsia patacataenexalia. Tspaji itsa apo pajinavanapaeemė tsane pacuenia pacatorobatsi, patacasivajamatabėcuenebarėyajavami, nevecuaajibi meta tsane. Paxamėyajuvėnėvi bajayatajavaverenacujinae pibisiacueni pexanavanapaeaxae, sivajamatabėnuenajė. Bajarapamonae pibisiacueni pexanavanapaejavata pevitota, apo sivajamatabėcuenebėjai. Apo jamatabėcopatsinua pibisiacueni pexanavanapaejavata pevitota.

13

Pacuenia icatsia Pablo itaveta Corinto tomarapijivi Diosojavabelia penaneconitsiyaniva yabara pelivaisi

1 Aeconoxae baja icatsia poneajitsianė paxamějavabelia acueyabi namutonexa. Pibisiacueni pexanaejivi yabara, Dioso pejumelivaisibaxutota jumaiti mapacueniaje: “Pajivi pibisiacueni exana, xanepana pevajunupaebinxatsi anijajivibeje, acueyabi pajivibeje ata, petaevitsi. Nexata xuacujinae xanepana jane baja penaneconitsiaexanaenexatsi,” jai Dioso pejumelivaisibaxutota. Nexata paxamějavabelia itsa patsianajė, bajarapacuenia xanė pacananeconitsiaexanaenatsi. 2 Imata panamutomi pacaitavetsi daxita paxamė pibisiacueni paneexanavanapaejavata panecopatsinexa, Diosojavabelia pananeconitsiyaniva. Bajarapacuenia itavetajė itsamonae ata pibisiacueni pexanavanapaeayaniva. Aeconoxae tajė pacavecuaponaponae atatsi, pacatoyaquinatsi icatsia patacaitavetsinexa pibisiacueni paneexanaeyaniva. Icatsia paxamějavabelia itsa patsianajė, pacananeconitsiaexanaenatsi padaxitamė. Caejivi ata apo bejiobiataenė tsane pibisiacueni pexanaeneconi yabara. 3 Itsa pacananeconitsiaexanaenatsi, ajumesaenė tsane patacananeconitsiaexanaenexa. Nexata bajarajota xaniavaetsia paneyapėtaename tayjavacuicujajitsabiabijava Cristo. Cristo baja cajena pajamatabėcuenesaėjjava, pacatsitanajamatabėcueneitajėta itsa pacayavenonapona paxamějavata. 4 Xaniajai rabaja. Pacuenia vaxaitsi mapanacuapijivitsi ajamatabėcuenesaėjibitsi, bajara pijinia itsi Cristo ata mapanacuata itsa naexana pacuenia vaxaitsi banaexanatsi. Nexata Cristo cruzata itsa beyaxuabatsi, Dioso pesaėta icatsia asaėyaxanatsi petėpaecujinae. Paxanė pajamatabėcuenesaėjibi atanė, itsiata aeconoxae Dioso pesaėta Cristo payajavajinapajė patacujamatabėcuene yavenonaenexa.

5 Jica jane. Panajamatabėcuenelivaisiėjėre itsa xaniajai pepacueni Cristo papijajivimė. Itsa pepacueni Cristo papijajivimė, nexata payapėtaename Cristo papecayjavaponaponaejava. Itsa Cristo apo papijajivimė, nexata Cristo apo pacayjavaponaponae. 6 Paxanė pajamatabėjumaitsinė paxamė yabara mapacueniaje: “Corinto tomarapijivi vaxaitsi itsa nacacuenecanaėjėtsiana, xaniavaetsia yapėtaena pepacueni Cristo pijajivicuenetsi,” pajamatabėjanė. 7 Pacatovajėtaaponatsi Diosojavabelia pibisiacueni paneexanaponaeyaniva. Bajarapacuenia itsa pacatovajėtaaponatsi

Diošovavabelia, itsajamatabëcuene apo pacasivanajamatabëxainaetsi. Nexata apo pajamatabëjumaitsinë paxamë yabara: "Itsa bajarapamonae xaniavaetsia jinavanapaena, nexata pijinia daxitajivi nacayapëtaena pepacuene apóstolevicuenetsi," apo pajamatabëjanë paxamë yabara. Bajarapacuenia Diošovavabelia pacatovajëtatsi tsipaji pacatojitsipatsi ëpexaniacuene paneexanavanapaejava. Xaniavaetsia itsa pajinavanapaename, nexata ita papatsianajë paxamëjavabelia, ajibi tsane patacyabarananeconitsiaexanaejava. Pacuenia Cristo panetocopata patananeconitsiaexanaenexa pijaneconi pexainaevi, bajarapacuenia apo pacaexanaetsi tsane. ⁸ Tsipaji acuenebi patananeconitsiaexanaejava pajivi baja jumecovënëta pexaniajailivaisi, Jesucristo pelivaisi. Pananeconitsiaexanaenajë ëpijaneconi pexainaevi. ⁹ Aneconijibia ita pajinavanapaename, acuenebi patacananeconitsiaexanaenexa. Itsiata pacasivajamatabëcuenebarëyatsi. Tsipaji apo paxainaemë paneconi yabara pacananeconitsiaexanaejitsiatsi. Pacatovajëtaponatsinua Diošovavabelia panevajënaeyabelia panejamatabëcuenevitsabaponaenexa Dioso panejumecovënëtsijava. ¹⁰ Pacatoyaquinaliatsi mapabaxutoje taponaevajënaeya paxamëjavabelia tavajënaelia panenajamatabëcuenexanebinexa pibisiacuene paneexanaejavavecu. Nexata ita patajopaeliajë paxamëjavabelia, apo pacabijatae tsanetsi. Apo pacananeconitsiaexanaetsinua tsane. Dioso nitoroba patacaevetsinënexa. Nexata ita patsialiajë paxamëjavabelia, apo jitsipañë tsane patacananeconitsiaexanaenexa. Biji rajane jitsipajë patacajamatabëcuene saëyaexanaejava panevajënaeyabelia panejamatabëcuenesaënexa Dioso panejumecovënëtsijava.

¹¹ Tajamonae, pajamatabëcuenebarëyamëre tsavanapae. Panevajënaeyabelia panajamatabëcuene vitsabiaexanaponare Dioso panejumecovënëtsijava. Panamux-unaevere palivaisi pacatoyaquinaliatsi. Najamatabëcuenejëpaeya pajinavanapare jamatabëcuenexanepanaeya. Dioso vajanacaasivanë. Bajaraponë jamatabëcuenexanepanaeya nacajinavanapaeyaexana. Nexata Diošovavabelia pacatovajëtabiatsi Dioso papecayajavaponaponaenexa. ¹² Paxamë ata Dioso panejumecovënëtsixae, xaniavaetsia nasivaya namataenetsia panabajacobabiabare. ¹³ Daxita pamonae Dioso pejumecovënëtsivi, majota pejinavanapaevije, pacabajacobalia.

¹⁴ Pacatovajëtabiatsi Diošovavabelia vajatuxanenë Jesucristo papecayavenonabi-abinexa. Pacatovajëtabiatsinua itsamonae ata asivaya panetaenexa pacuenia paxamë ata Dioso pacaasiva. Pacatovajëtabiatsinua Espiritu Santo ata papecayajavaponaponaenexa.

Mapabaxutoje San Pablo toyaquina Galacia nacuapijivjavabelia

Pacuenia Pablo toyaquina mapabaxutoje Dioso pejumecovênêtsivi, Galacia nacuapijivjavabelia, yabara pelivaisi

¹ Xanê Pablonê, apóstolenênê. Jivi pejamatabêcueneta apo nitorobi tatsipaebapon-aenexa Jesucristo pelivaisi. Nitorobabeje raja Jesucristobeje, paxa Diosobeje, ponê icatsia Jesucristo asaëyaexanatsi petêpaecujinae. ² Pacatoyaquinatsi mapabaxutoje paGalacia nacuapijivimê, Dioso panejumecovênêtsivi. Daxita majota Dioso pejumecovênêtsivi pacajamatabênajinalia. ³ Pacatovajêtabiabatsi vaxa Diosojavabelia, vajatuxanenê Jesucristojavabelia ata, papecaitaxutotsoniataenexa jamatabêcuenexanepanaeya panejinavana-paenexa. ⁴ Pacuenia vaxa Dioso itorobatsi, vajatuxanenê Jesucristo pijacuata tonacaeveta pebeyaxuabinexatsi pibisiacune vajaexanaeconi yabara. Nexata Jesucristo pejamatabêcueneta vaxa Dioso aneconi jibia nacatane. ⁵ Bajaraxuata vaxaitsi Diosojavabelia jumaitsitsi tsabiabi: “¡Xamê Diosomê, bitso ayajamatabêcuenenê!” jaitsi tsabiabi daxitamatabijavabelianexa. Bajara itsi tsane.

Pacuenia baja Jesús pelivaisivecua pematatsênêa ajibi itsalivaisi jivi pecapanepaelivaisinexatsi yabara pelivaisi

⁶ Paxamê saya caematacabibecujinae, pacopabame Dioso panejumecovênêtsijava. Bajaraxuata xanê bitso pacasivajamatabêcuenenabenajacatsi. Jesucristo picani pejamatabêcueneta, Dioso pacaitaxutotsoniatane itsa pacajunata papecacapanepaenexa. Itsiata baja aeconoxae jamatabêcuenenavêxaniabiaya pavecuanajamatabêcuenepênêyorotame saicayalivaisijavabelia, bepepacapanepaelivaisinexa itajara panejumetaexae. ⁷ Itsiata baitsi jane baja pematatsênêa ajibi itsalivaisi papecacapanepaelivaisinexa. Itsamonae pata paxamêjavata livaisi papecatsipaebinexa. Bajarapamonae pata papecajamatabêcuenenapatajêrêcaeyaexanaenexa. Bajarapamonae saicayalivaisi jamatabêpacatsipaebapona panecopabinexa panejumecovênêtsijava pexanialivaisi, Jesucristo pelivaisi. ⁸ Copiaya baja cajena paxanê pacatsipaebatsi pexanialivaisi, Jesucristo pelivaisi, papecacapanepaelivaisinexa Diosojavabelia. Nexata acunebi paxanê pataithianaenexa bajarapalivaisi. Athêbêvetsica pepatsinê ata tsipae, ángelnê, acunebi piaithianaenexa bajarapalivaisi. Jesucristo pelivaisivecua, saicayalivaisi, itsa pacatsipaebijitsipatsi, nexata Diosojavabelia pananeconitsipajê. Nexata Dioso panenaneconitsiaexanaejitsipa daxitamatabijavabelianexa. ⁹ Copiaya baja cajena pacuenia pacatsipaebatsi, bajara icatsia pacuenia aeconoxae ata pacatsipaebatsi. Pajivi Jesucristo pelivaisivecua, saicayalivaisi pacatsipaeba bepepacapanepaelivaisinexa itajara, nexata bajarapajivi Dioso naneconitsiaexanaenatsi daxitamatabijavabelianexa. Tsiapaji pacacopsiaexana panejumecovênêtsijava pexanialivaisi, Jesucristo pelivaisi.

¹⁰ Payapêtaneme rabaja xua yabara bajarapacuenia pacajumaitsitsi. Bajarapacuenia itsa pacajumaitsitsi, apo pacajumaitsitsi saya jivi tanesivabarëyanexa. Jume cajena. Jivi apo nesivabarëya ata Jesucristo pelivaisi jivi tatsipaebaponaejava yabara, itsiata jitsipajê jivi tatsipaebinexa Jesucristo pelivaisi, Dioso tanesivajamatabêcuenenabarëyanexa. Saya jema jivi livaisi itsa tsipaebijitsipajê saya tanesivabarëyanexa, nexata pacuenia Jesucristo nitoroba, apo tsipaebaponaenê tsipae. Nexata Jesucristo apo pijajivitonênê tsipae.

Pacuenia Pablo Dioso junatsi apóstolenênêxaxuata yabara pelivaisi

¹¹ Tajamonae, jitsipajê patacatsipaebinexa mapalivaisije. Palivaisi tsipaebapona jivi pecapanepaelivaisinexatsi Diosojavabelia, bajarapalivaisi itsajivi ata pejamatabêcueneta apo pexanaelivaisi. ¹² Itsajivi ata cajena bajarapalivaisi apo netsipaebi. Jesucristo raja neyapêtaeyaexana bajarapalivaisi. Nexata Jesucristo nitoroba jivi tatsipaebaponaenexa bajarapalivaisi.

¹³ Panevênêlivaisitaneme rabaja pacuenia exanaponapona jê pamatacabi abaxê jumecovênêtajê Dioso Moiséspijinêta penajumecopatsilivaisi. Bajarapalivaisi Dioso Moiséspijinêta najumecopata pajudovinê patajumecovênêtsinexa. Panevênêlivaisitanemenua pacuenia barajinabiabajê Jesucristo pijajivi. Apo itaxutobejiobiataeyabiabinê cajena tsiquirjavayo ata. Jamatabêverebiaxuababiabajê Jesucristo pijajivi. ¹⁴ Xanê abaxê itsa pevêjêatonê, jumecovênêtajê bitso Dioso Moiséspijinêta penajumecopatsilivaisi. Xanê bitso asaëyata jumecovênêtsiaponapona jê bajarapalivaisi pitorobicuenia. Daxita pamonaevêjêavi judiôvi, Israel nacuapijivi, matatoxenetsia xanê bitso casaênê tajumecovênêtsijava bajarapalivaisi. ¹⁵ Itsiata baitsi jane tanaexanaevajênêaeya ata, Dioso nitapeta Jesucristo

tajumecovēñetsinexa. Dioso taneitaxutotsoniataexae, nejunata apóstolenēnexanē. ¹⁶ Nexata pamatacabi ponajē Damasco tomarabelia, namutoepatota Dioso netsitajēta pexēnato. Nexata Dioso neyapētaeyaxana pexēnato pelivaisi. Bajarapacuenia Dioso pexēnato pelivaisi neyapētaeyaxana tatsipaebaponaenexa apo judíovijava. Nexata Dioso taneyapētaeyaxanaecujinae pexēnato pelivaisi, apo ponaenē itsajivijavabelia ata tayanijobinexa Dioso pexēnato pelivaisi. Apo ponaenē tanemuxujobinexana Dioso pexēnato pelivaisita. ¹⁷⁻¹⁸ Pamatacabi namutoepatota Dioso netsitajēta pexēnato, apo naviatecaenē Jerusalén tomarabelia tayanijobinexa pamonaejavabelia xanēvecua copiaya exanatsi apóstolevi. Biji rajane rovia paliajē Damasco tomarabelia. Nexata Damasco tomarata tapatsicujinae, caenēnē ponajē Arabia nacuyabelia, petusato nacuyabelia. Nexata petusato nacuata Dioso xaniavaetsia neyapētaeyaxanapona pexēnato pelivaisi. Bajaraxuacujinae icatsia bexēa Arabia nacuverena naviarenañē Damasco tomaraberena. Bajaraxuacujinae tapuaxainae baja acueyabi pavaibeje tajumecovēñetsicujinae Dioso pexēnato pelivaisi, ponajē jane baja Jerusalén tomarabelia apóstolenē Pedro tacaxitajarabinexa. Nexata Jerusalén tomarata, Pedrojavata, naponaponajē quince pamatacabibeje. ¹⁹ Itsiata Jerusalén tomarata pematatsēnēa itsaapóstolenē apo taenē. Ēsantiago saya, vajatuxanenē pejuyapijinē, tani. ²⁰ Xaniavaetsia pacajumaitsi Dioso pitabarata. Palivaisi pacatoyaquinatsi, pexaniajailivaisi cajena.

²¹ Jerusalén tomarata taponaponacujinae, ponajē icatsia Siria nacuyabelia Jesucristo pelivaisi jivi tatsipaebaponaenexa. Ponajē Cilicia nacuyabelia ata. ²² Jesucristo pelivaisi jivi itsa tsipaebanajetarucajē, Jesucristo pelivaisi pejumecovēñetsivi, Judea nacuapijivi, abaxē apo neyapētae. Tsipaji abaxē Judea nacuata apo tsipaebaponaenē Jesucristo pelivaisi. ²³ Bajarapamonae saya nevēñelivaisitane itsamonae xanē yabara pejumaitsiyava: “Ponē pina nacabarajinabiaba Jesucristo pelivaisi vajajumecovēñetsivi, aeconoxae pina baja bajaraponē ata jumecovēñeta. Nexata pina itsamonae ata pejumecovēñetsinexa Jesucristo pelivaisi, bajaraponē tsipaebapona. Bajarapalivaisi yabara bajaraponē jamatabēnacaverebiaxuaba picani,” peyajjiva, itsamonae xanē yabara nevēñelivaisitane Judea nacuapijivi, Jesucristo pelivaisi pejumecovēñetsivi. ²⁴ Bajaraxuata Judea nacuapijivi, Jesucristo pelivaisi pejumecovēñetsivi, jumai tsabiabi Diosojavabelia: “Diosomē, bitso ayaijamatabēcuenenēmē. Tsipaji Pablo ata najamatabēcuenecopatsiaexaname nexēnato Jesucristojavabelia,” jai tsabiabi xanē yabara.

2

Pacuenia Pablo pevēna apóstolevi Jerusalén tomarata xaniavaetsia copiapitatsi yabara pelivaisi

¹ Jerusalén tomarata naropotajē Jesucristo pelivaisi jivi tatsipaebanajetarucaenexa Siria nacujava, Cilicia nacujava ata. Nexata Jesucristo pelivaisi jivi tatsipaebanajetarucaecujinae bajarapanacuabejjava, catorce pavaibejecujinae matapania icatsia patajē tacovēyaberena, Jerusalén tomarata. Bernabēbeje Titobeje barēpatajē. ² Patajē Jerusalén tomarata tsipaji Dioso nitoroba tapatsinexa Jerusalén tomarata. Nexata Jerusalén tomarata Dioso pejumecovēñetsivi ēpenamatacatorobivi penacatuatsijavata, navajunupaebajē bajarapamonaejavabelia. Bajarapacuenia navajunupaebajē Dioso pejumecovēñetsivi penamatacatorobivijavabelia, taneypētaenexa Jesucristo pelivaisi tatsipaebaponaejava apo judíovijava pecapanepaelivaisinexatsi Diosojavabelia. Bajarapacuenia navajunupaebajē Dioso pejumecovēñetsivi penamatacatorobivijavabelia tsipaji jamatabējumaitsinē: “Maraeta pamonae apo pejitsipaecuenia, tsipaebaponajē apo judíovijavaje,” jamatabējanē. Itsiata baitsi jane Dioso pejumecovēñetsivi penamatacatorobivi, tsitaxanepanatsi pacuenia tsipaebaponajē apo judíovijava. ³ Bajarapacuenia tanavajunupaebixae, tanyanabinē Tito, apo judionē ata, Dioso pejumecovēñetsivi penamatacatorobivi pajudíovinē patajacuenia apo perabēcaucutsiaexanaetsi. Baitsi apo boupiiperabēcaucutsiaexanaetsi. ⁴ Itsamonae, judíovi, Jesucristo pelivaisi apo jumecovēñetsi. Nexata bajarapamonae Jesucristo pelivaisi bepejumecovēñetsivicuenia, saya jema najunua paxanē Jesucristo pelivaisi patajumecovēñetsivijavaberena. Bajarapamonae picani jitsipa Tito peperabēcaucutsiaexanaenexatsi. Itsiata apo perabēcaucutsiaexanaetsi. Bajarapamonae saya jema najunua patanenaitaxutocaevetsinexa patanetaenexa jamatejema patavecuajinavanapajava Dioso Moiséspijinēta penajumecopatsilivaisi, palivaisimi patajasalinaivi jumecovēñeta. Bajarapalivaisi patajumecovēñetsijavami, pacopatajē baja Jesucristo pejamatabēcueneta. Nexata pamonae panenaitaxutocaeveta, jamatabēpanejumecovēñetsiaexana picani icatsia Dioso Moiséspijinēta penajumecopatsilivaisi. ⁵ Itsiata baitsi jane tsiquirijavayo ata apo paexanaenē pacuenia bajarapamonae paneitoroba. Nexata Jesucristo

pelivaisi jivi itsa patsipaebaponajë, apo payajavatsipaebaponaenë Dioso Moiséspijinëta penajumecopatsilivaisi. Dioso Moiséspijinëta penajumecopatsilivaisi, itsa pacatsipaebijitsipatsi, jamatabëcuenenavëxaniabiaya pajamatabëjumaitsimë tsipae: “Naperabëcaucutsiaexanaenajë pacuenia judíovi naperabëcaucuba. Jumecovënëtsianajënu Dioso Moiséspijinëta penajumecopatsilivaisi. Nexata Dioso pepacue neapanepaena,” pajamatabëjamë tsipae jamatabëcuenenavëxaniabiaya.

⁶ Jerusalén tomarata Dioso pejumecovënëtsivi penamatacaitorobivijavabelia, nava-junupaebajë Jesucristo pelivaisi tatsipaebaponaejava apo judíovijava pecapanepaelivaisinexatsi Diosojavabelia. Itsiata bajarapamatacabi Dioso pejumecovënëtsivi penamatacaitorobivi, apo netsipaebi itsalivaisiyo ata Jesucristo pelivaisi tayajavatsipaebaponaenexa apo judíovijava. Bajarapamonae yabara itsamonae jamatabëjumai tsabiabi: “Mapamonaeje Dioso pejumecovënëtsivi bitso pepo penamatacaitorobivi. Nexata bitso ayaijamatabëcuenevi,” jamatabëjai tsabiabi. Itsiata xanë apo sivanajamatabëxainenë bajarapamonae ayaijamatabëcuenevi tataanexa. Tsipaji cajena daxita vaxaitsi, Jesucristojavabelia vajanajamatabëcuenecopatsivi, Dioso najëpaeya nacatane. ⁷ Dioso pejumecovënëtsivi penamatacaitorobivi, apo nitorobi itsalivaisiyo ata tayajavatsipaebaponaenexa apo judíovijava itsa tsipaebajë Jesucristo pelivaisi pecapanepaelivaisinexatsi Diosojavabelia. Biji rajane Dioso pejumecovënëtsivi penamatacaitorobivi, neyapëtane Dioso taneitorobinëcuenë. Nextata Dioso pejumecovënëtsivi penamatacaitorobivi, jumaitsi xanë yabara: “Xaniajai. Pablo Dioso itorobatsi Jesucristo pelivaisi petsipaebaponaenexa apo judíovijava. Pacuenia copi-aya Pedro Dioso itorobatsi Jesucristo pelivaisi petsipaebaponaenexa judíovijava, bajara pijinia pacuenia Pablo ata Dioso itorobatsi Jesucristo pelivaisi petsipaebaponaenexa apo judíovijava,” jai Dioso pejumecovënëtsivi penamatacaitorobivi xanë yabara. ⁸ Apóstolenë Pedro Dioso pesaëta Jesucristo pelivaisi petsipaebaponaexae judíovijava, judíovi baja najamatabëcuenecopabapona Jesucristojavabelia. Bajara pijinia pacuenia xanë ata Dioso pesaëta Jesucristo pelivaisi tatsipaebaponaexae apo judíovijava, apo judíovi ata baja najamatabëcuenecopabapona Jesucristojavabelia.

⁹ Mara pamatabëxëyo Jerusalén tomarata Dioso pejumecovënëtsivi penamatacaitorobivije. Santiago, Pedro, Juan, bajarapamatabëxëyo. Dioso pejumecovënëtsivi penamatacaitorobivi, itsa neyapëtane Dioso taneitorobinëcuenë tatsipaebaponaenexa Jesucristo pelivaisi apo judíovijava, nexata Dioso pejumecovënëtsivi penamatacaitorobivi, panebajacobabeje pexaniacuenia Bernabébeje. Bajarapacuenia Dioso pejumecovënëtsivi penamatacaitorobivi, pexaniacuenia panebajacobabeje tsipaji paneyapëtanebeje patatonajuanacuenibivicuene Dioso pijacuene. Bajaraxuata paxanëbeje Bernabébeje, Jesucristo pelivaisi patavajënaeyabeliabeje patsipaebaponajëbeje apo judíovijava. Santiagobana pijinia, Pedrobana, Juanbana, tsipaebapona judíovijava. ¹⁰ Bajarapamonae caelivaisiyo panejumaitsiibeje Jerusalén tomarata. Paneitorobabeje patayavenonaenexabeje Dioso pejumecovënëtsivi, bitso bepejiobivi, Jerusalén tomarata pejinavanapaevi. Bajaraxuata xanë jamatabëcuenenarëyaya bajarapamonae ofrenda toexanaeyaexanaponajë itsaxuayo tatsipaebilivaisi, Jesucristo pelivaisi, jumecovënëta. *Pacuenia Pablo muxujioba Pedro Antioquia tomarata yabara pelivaisi*

¹¹ Perujulivaisimi, judíovi pijalivaisi, itavetatsi judíovi caejavata peyajavanabaniyaniva apo judíovi. Pedro itsa ponapona Antioquia tomarata, muxujiobajë daxitajivi pitabarata. Tsipaji Pedro apo pexanepanaecuenë exana. Pedro apo judíovijavata itsa naponapona, jemata apo judíovi vecuanasaicayaba. ¹² Pedro, judionë ata, pecopatsixae baja pejumecovënëtsijava perujulivaisimi, judíovi pijalivaisi, abaxë picani Pedro jamatejema nabananebiababa apo judíovijavata. Nexata itsa pata Santiago pijajivi Antioquia tomarata, Pedro baja vecuanasaicayaba apo judíovi. Tsipaji Pedro cununava Santiago pijajivi petaeyani-vatsi apo judíovijavata penanabanijava. Pedro baja nexata copata apo judíovijavata penanabanebiabijava. Santiago pijajivi perujulivaisi tsiteca jumecovënëtaavanapa. Nexata Santiago pijajivi jumai tsabiabi: “Pamonae apo judíovi ata, Jesús pelivaisi itsa jumecovënëta, bajarapamonae ata benaperabëcaucubiaexana,” jai tsabiabi. Nexata Pedro cununava bajarapamonae. Nexata Pedro jamatabëjumaitsi: “Itsa netaejitsipa Santiago pijajivi tananabanijava apo judíovijavata, neneconitsipa judíovijavabelia Jerusalén tomarata. Nexata judíovi ayaicuenia nebijataejitsipa,” jamatabëjai Pedro. Bajaraxuata Pedro vecuanasaicayaba baja apo judíovi. ¹³ Pedro yapëtae ata pacuenia picani apo bevecuanasaicayabi apo judíovi, itsiata vecuanasaicayaba. Nexata daxita judíovi, pamonae najamatabëcuenecopaba Jesucristojavabelia, itsa tane Pedro pevecuanasaicayabijava apo judíovi, bajarapamonae ata vecuanasaicayaba apo judíovi. Bernabé ata yapëtae ata pacuenia picani apo bevecuanasaicayabi apo judíovi, itsiata vecuanasaicayaba apo judíovi. ¹⁴ Nexata pacuenia jumaitsi pexanalivaisi jivi pecapanepaelivaisinexatsi Diosojavabelia, bajarapamonae

apo exanae. Nexata saya bajarapamonae vecuanasaicayaba apo judíovi. Bajaraxuata itsa taniji bajarapamonae pevecuanasaicayabijava apo judíovi, nexata muxujobajê. Daxita Dioso pejumecovênêtsivi pitabarata, jumaitsinê Pedrojavabelia: “Xamê judíonê atamê, itsiata apo judíovijavata naponaponame. Nexata pacuenia apo judíovi jinavanapa, naponaponabiabame picani. Apo ponaponabiabimê judíonêcuenia. Pacuenia baja picani naponaponabiabame apo judíovijavata, xanepana baja picani. Xamê judíonê atamê, itsa apo ponaponaejudíonêcuenia, ¿detsa nexata xuajitsia caranata apo judíovi aeconoxae jamatabêjinavanapaeyaexaname judíovicuenia?” janê Pedrojavabelia pevecuanasaicayabixae apo judíovi.

Pacuenia judíovi ata xanepana penajamatabêcuenecopatsinexa Cristojavabelia pecapanepaenexatsi Diosojavabelia yabara pelivaisi

¹⁵ Paxanê baja cajena pajudíovinê. Patanaexanaejavaveliacujinae itsa pavitsabaponajê, payapêtaniji patajumecovênêtsinexa pexaniajailivaisi, Dioso pejumelivaisi. Nexata pacuenia apo judíovi pejevaxijavaveliacujinae apo yapêtae pejumecovênêtsinexa pexaniajailivaisi, Dioso pejumelivaisi, apo paitsinê. ¹⁶ Pexaniajailivaisi patajumecovênêtsinexa, patajamonae baja cajena paneyajavavitsata. Nexata payapêtaniji mapacuenije. Itsajivi jumecovênêtsi ata tsipae Dioso Moiséspijinêta penajumecopatsilivaisi, itsiata Dioso aneconijibia apo taetsi tsipae. Bajarapacuenepaxanê pajudíovinê payapêtaniji. Bajaraxuata paxanê pajudíovi atanê, panajamatabêcuenecopatajê Jesucristojavabelia. Nexata Dioso aneconijibia panetane patanajamatabêcuenecopatsixae Jesucristojavabelia. Dioso aneconijibia apo panetae patajumecovênêtsixae Dioso Moiséspijinêta penajumecopatsilivaisi. Tsipaji itsajivi ata apo jumecovênêtsicapaneape bajarapalivaisi. Nexata itsamonae jumecovênêtsi ata bajarapalivaisi, itsiata Dioso aneconijibia apo taetsi.

¹⁷ Pexaniajailivaisi patacatsipaebijavata, itsajivi jamatabêcuenenavêxaniabiaya nejumaitsi tsipae: “Xamê jumaitsimê tsabiabi: ‘Dioso aneconijibia netane tajumecovênêtsixae Cristo tanesivatêpaejava tajaneconi yabara. Nexata baja apo jumecovênêtsinê Dioso Moiséspijinêta penajumecopatsilivaisi,’ jamê tsabiabi. Dioso Moiséspijinêta penajumecopatsilivaisi apo nejumecovênêtsixae, nexata Dioso catane pibisiacuene nexanaenê,” nejai tsipae itsajivi jamatabêcuenenavêxaniabiaya. Itsiata baitsi jane bajarapacuenia itsajivi nejumaitsi ata tsipae, itsiata Dioso apo netae tsipae pibisiacuene taexanaenê. ¹⁸ Diosojavabelia rajane naneconitsipajê mapacuenia itsa exanaejitsipajê. Dioso Moiséspijinêta penajumecopatsilivaisi, tajumecovênêtsijavami tacopatsicujinae, icatsia caevêalia itsa jumecovênêtsipajê, nexata Diosojavabelia naneconitsipajê. ¹⁹ Pamatacabi abaxê ajamatabêcuenesaênê tsabiabi tajumecovênêtsijava Dioso Moiséspijinêta penajumecopatsilivaisi, naneconitajê picani Diosojavabelia. Tsipaji ajamatabêcuenesaênê tsabiabi ata tajumecovênêtsijava bajarapalivaisi, itsiata apo necaêjêpae tajumecovênêtsicapaneapenaxa daxita pacuenia jumaitsi bajarapalivaisi. Itsa meta abaxê tsiteca bajarapalivaisi jumecovênêtaponaponaejitsipajê, yajavatêpaejitsipajê meta tajaneconi. Bajaraxuata aeconoxae baja icatsia bajarapalivaisi tajumecovênêtsinexa, apo sivanajamatabêxainaenê. Pacuenia baja petêpaejivi itsacuenepavayo apo sivanajamatabêxainae, bajara itsinê taexanaeyaniva icatsia pacuenia bajarapalivaisi nitoroba. Biji rajane aeconoxae baja Dioso nerajuta pejanajamatabêcuene taexanaponaponaeapenaxa pacuene Dioso jitsipa. ²⁰ Cristo cruzajavabelia itsa cobematabiabarutatsi, xanê ata tajaneconi yabara nesivatêpa. Nexata xanê ata Cristo betaneyajatêpae. Bajaraxuata perujumatabêcuenemi, pibisiacuene taexanaenexa taneitorobabiabijamatabêcuenemi, nevecuatêpa baja cruzata. Nexata baja piasajamatabêcuene, pejanajamatabêcuene, xainajê. Cristo baja neyjavaponapona. Pajamatabêcuene yaasaênê tsaponapone, Dioso pexênatojavabelia najamatabêcuenecopatsiaya ponaponajê. Dioso pexênato nejitsipa. Nesivatêpanua baja cajena. ²¹ Apo namuxujematsinê Dioso vajanacaitaxutotsoniataejava. Dioso Moiséspijinêta penajumecopatsilivaisi, jivi pejumecovênêtsixae, Dioso aneconijibia jivi itsa taejitsipa, nexata Cristo jivi apo sivatêpae tsipae pijaneconi yabara. Nexata Cristo saya jema têpaejitsipa.

3

Pacuenia Cristo pejumecovênêtsivi, Dioso aneconijibia tanetsi pecapanepaenexatsi pijaneconivecua, itsa jumecovênêta pacuenia Abrahampijinê jumecovênêta, yabara pelivaisi

¹ Paxamê paGalacianacuapijivimê, bitso cajena paneajamatabêcuenetajavi! Itsamonae raeta saicayalivaisi yamaxêtojorobiaya pacatsipaeba, pexaniajailivaisi, palivaisi baja picani pajumecovênêtame, panecopabinexa. Xanê Jesucristo pelivaisi patacatsipaebijavata, xaniavaetsia baja cajena pacatsipaebatsi, pacuenia Jesucristo cruzajavabelia

cobematabiabarutatsi. Nexata baja picani panijacuata bepanetae Jesucristo papeca-sivatépaejava cruzata. ² Caejumejo pacayanijobatsi. ¿Detsa xua yabara pacatsija-matabējūnua Espiritu Santo? Apo pacatsijamatabējone raja panejumecovēnētsixae Dioso Moiséspijinēta penajumecopatsilivaisi. Espiritu Santo raja pacatsijamatabējūnua panejumecovēnētsixae Jesucristo papecacapanepaejavanexa panijaneconivecua. ³ Paxamē bitso pajamatabēcuenetajamē. Pamatacabi pataxuxuabame panejumecovēnētsijava Jesucristo papecacapanepaejavanexa panijaneconivecua, panajamatabēxainabiabame Espiritu Santo papecayavenonabiabinexa. Aeconoxae baja icatsia caevēalia panajamatabēxainame panejumecovēnētsinexa Dioso Moiséspijinēta penajumecopatsilivaisi. Itsiata apo caējēpaetsi bajarapalivaisi papecacapanepaenexa. ⁴ Itsamonae bitso pacabejiobiaexanabiaba pex-anialivaisi, Jesucristo pelivaisi, panejumecovēnētsixae. Bajaraxuata apo bepacopatsimē panejumecovēnētsijava Jesucristo pelivaisi, palivaisi yabara itsamonae pacabejiobiaexanabiaba. Tspaji itsa pacopabijitsipame panejumecovēnētsijava Jesucristo pelivaisi, saya panacueratsipame. ⁵ Payapētaneme rabaja Dioso papecarajutsijava Espiritu Santo. Pini-jicuene pexanaejavanē ata Dioso pacatsitaexana paxamē tuatuajēta. Baitsi piavitanevi jamatejemaya exanapona. Petēpaevimi ata asaēyaexanapona. ¿Detsa xua yabara bajarapacue Dioso pacatsitaexana? ⁶ Dioso raja apo pacatsitaexanae bajarapacue panejumecovēnētsixae Dioso Moiséspijinēta penajumecopatsilivaisi. Dioso raja pacatsitaexanae bajarapacue panejumecovēnētsixae patacatsipaebilivaisi, Jesucristo pelivaisi.

⁶ Bajayata Abrahampijinē Diosojavabelia najamatabēcuenecopatsiava jamatabējumaitsi: “Xaniajai. Dioso netoexanaena pacuenia najumecapanepaeya nejumaitsi,” jamatabējai. Bajaraxuata Dioso Abrahampijinē aneonijibia tanetsi Dioso pijanacuayabetsia pecapanepaenexatsi. ⁷ Bajaraxuata paxamē bepayaepētaneme mapacueneye. Pamonaē jumecovēnēta pacuenia Dioso najumecapanepaeya jumaitsitsi, bajarapamonae Abrahampijinē apo pemomoxi ata, itsiata Dioso tanetsi Abrahampijinē bepepo pemomoxi. Bajarapamonae Dioso capanepaenatsi. ⁸ Dioso pejumelivaisibaxutota tajēvelia jumaitsi pacuenia apo judíovi ata Dioso capanepaejitsiatsi pijaneconivecua. Nexata apo judíovi ata Dioso itsa jumecovēnētsiana, capanepaenatsi pacuenia Dioso najumecapanepaeya jumaitsi. Dioso jivi pecapanepaejavanexa yabara, tajēvelia Abrahampijinējavabelia Dioso jumaitsi mapacueniaje: “Tacatsipaebilivaisi tanejumecovēnētsixae, daxitanacuapijivi ata aneonijibia taenajē, bajarapamonae ata itsa nejumecovēnētsiana pacuenia xamē nejumecovēnētame,” jai Dioso Abrahampijinējavabelia. Bajarapacuenia Dioso pejumelivaisibaxutota tajēvelia jumaitsi. ⁹ Nexata baja vaxaitsi xaniavaetsia yapētanetsi mapacueneye. Pamonaē jumecovēnēta Jesucristo pelivaisi, bajarapamonae Dioso aneonijibia tanetsi pecapanepaenexatsi pijaneconivecua. Tspaji bajarapamonae ata jumecovēnēta pacuenia bajayata Abrahampijinē jumecovēnēta pacuenia Dioso najumecapanepaeya jumaitsi.

¹⁰ Pajivi Dioso Moiséspijinēta penajumecopatsilivaisi apo jumecovēnētsicapanepea ata, jamatabējumaitsi: “Bajayata Dioso Moiséspijinēta najumecopata jivi pejumecovēnētsinexa. Nexata baja xanē bajarapalivaisi jumecovēnētaaponaponajē Dioso tanecapanepaenexa,” jamatabējai, itsiata bajarapajivi Dioso naneconitsiaexanaenatsi. Tspaji Dioso pejumelivaisibaxutota jumaitsi mapacueniaje: “Pamonae apo jumecovēnētsicapanepea tsane daxita pacuenia itorobatsi Dioso Moiséspijinēta penajumecopatsilivaisi, bajarapamonae cajena Dioso naneconitsiaexanaenatsi,” jai Dioso pejumelivaisibaxutota. ¹¹ Nexata baja vaxaitsi xaniavaetsia yapētanetsi bajarapacue. Dioso Moiséspijinēta penajumecopatsilivaisi, jivi jumecovēnētsi ata, itsiata itsajivi ata Dioso aneonijibia jivi pecapanepaenexatsi Diosojavabelia. Tspaji itsajivi ata apo jumecovēnētsicapanepea daxita pacuenia itorobatsi Dioso Moiséspijinēta penajumecopatsilivaisi. Bajarapacue vaxaitsi yapētanetsi. Tspaji Dioso pejumelivaisibaxutota icatsia jumaitsi mapacueniaje: “Pajivi pepacue Dioso pejumecovēnētsixae, jamatabējumaitsi: ‘Xanē pepacue Dioso neyavenonaena pacuenia najumecapanepaeya jumaitsi,’ jamatabējai, Dioso aneonijibia tanetsi. Bajarapajivi xainaena matacabi apo peverevereaejava,” jai Dioso pejumelivaisibaxutota. ¹² Dioso Moiséspijinēta penajumecopatsilivaisi jivi jumecovēnētsi ata, itsiata apo jumecovēnētsicapanepea daxita pacuenia itorobatsi bajarapalivaisita. Bajaraxuata Dioso Moiséspijinēta penajumecopatsilivaisi yabara, Dioso pejumelivaisibaxutota jumaitsi mapacueniaje: “Pajivi apo jumecovēnētsicapanepea ata Dioso Moiséspijinēta penajumecopatsilivaisi, itsiata itsa jamatabējumaitsi tsane: ‘Xanē pepacue Dioso neyavenonaena pacuenia najumecapanepaeya jumaitsi,’ itsa jamatabējai tsane, apo jumecovēnētsicapanepea ata, bajarapajivi Diosojavabelia capanepaenatsi,” apo jai. Biji rajane Dioso Moiséspijinēta penajumecopatsilivaisi yabara, Dioso pejumelivaisibaxutota jumaitsi mapacueniaje: “Pajivi matapania jumecovēnētsicapanepea daxita pacuenia itorobatsi Dioso Moiséspijinēta penajumecopatsilivaisi, bajarapajivi capanepaenatsi Diosojavabelia. Itsa apo jumecovēnētsicapanepea tsane daxita pacuenia itorobatsi Dioso Moiséspijinēta penajumecopat-

silivaisi, nexata tēpaena. Naxuabiana Diosovecua,” jai Dioso pejumelivaisibaxutota Dioso Moiséspijinēta penajumecopatsilivaisi yabara.

¹³ Vaxaitsi baja cajena naneconitatsi Diosojavabelia. Tsiapai apo jume-covēnētsicapanepaetsi Dioso Moiséspijinēta penajumecopatsilivaisi. Itsiata baitsi jane Cristo itsa tēpa cruzata, nacaneconimatamota pijanata. Dioso Moiséspijinēta penajumecopatsilivaisi apo vajajumecovēnētsicapanepaexae, naneconitatsi picani Diosojavabelia. Itsiata Cristo cruzata itsa tēpa, nacavecuajibiaexana baja bajarapaneconimi. Nexata baja Dioso apo nacananeconitsiaexanae tsane. Cristo saya tsijumaxuabatsi vajaneconimi. Nexata Dioso tanetsi Cristo bepenaneconitsinē vajaneconi pejamatabēcueneta. Nexata vajaneconi yabara Cristo nacopata pebeyaxuabinexatsi pacuenia Dioso pejumelivaisibaxutota jumaiti. Dioso pejumelivaisibaxutota jumaiti mapacueniaje: “Pajivi bitso naneconita Diosojavabelia pibisiacuene pexanaeconi yabara, bajarapajivi naejavajavabelia rutatsi,” jai. ¹⁴ Nexata Cristo pibisiacuene bepexanaenē vajaneconi yabara, nacopata cruzajavabelia pecobematabiabarutsinexatsi. Bajarapacuenia Cristo itsa nacopata cruzajavabelia pecobematabiabarutsinexatsi vajaneconi yabara, copiajopa jane baja pacuenia tajēvelia Dioso najumecapanepaeya jumaiti Abrahampijinējavabelia. Nexata apo judiovi ata Dioso capanepaenatsi Jesucristo pejamatabēcueneta. Vaxaitsi vajanajamatabēcuenecopatsixae Jesucristojavabelia vajanacapanepaenexa Diosojavabelia, nexata pacuenia Dioso tajēvelia najumecapanepaeya jumaiti, bajarapacuenia Dioso nacatsijamatabēceayaexana Espiritu Santo.

Pacuenia Abrahampijinējavabelia Dioso najumecapanepaeya jumaiti, pacuenia ata icatsia cotocaevi Moiséspijinējavabelia najumecapanepaeya jumaiti, yabara pelivaisi

¹⁵ Tajamonae, livaisi pacatsipaebijitsiatsi paneyapētaenexa mapacueneje. Pepacuene raja Dioso exanaena pacuenia bajayata tajēvelia Abrahampijinējavabelia Dioso najumecapanepaeya jumaiti. Mapanacuapijinē ata, pecobecovē pexainaenē, petēpaevajēnae bayaquina pecobecovē yabara. Nexata pecobecovē pexainaenē itsa tēpa, pevēnamuto pexi penatsicobetsanaenexa. Nexata jumenamatamota pecobecovē pexainaenē peyaquinaelivaisi. Nexata acuenebi itsajivi ata pejumaitisnexa: “Ajumematamobi mapalivaisije,” pejainexa. Mataropotsia ata itsanē peyaquinaponaenexa, acuenebi. Tsiapai pecobecovē pexainaenē peyaquinaelivaisi, jumenamatamota. ¹⁶ Bajara pijinia pacuenia Dioso jumenamatamota bajayata tajēvelia Dioso najumecapanepaeya pejumaitisjava Abrahampijinējavabelia. Baitsi Abrahampijinē pemomo pejamatabēcueneta, jivi ayaibitsaēto Dioso aneconijibia petaejavanexa, Dioso jumenamatamota. Bajayata tajēvelia Dioso najumecapanepaeya jumaiti Abrahampijinējavabelia ayaibitsaēto mapanacuapijivi Abrahampijinē pemomo pejamatabēcueneta Dioso aneconijibia petaenexa. Ayaibitsaēto Abrahampijinē pemomoxi pejamatabēcueneta Dioso jivi aneconijibia petaenexa, bajarapacuenia tajēvelia Dioso najumecapanepaeya apo jumaiti. Biji rajane caenē, Jesús, pejamatabēcueneta Dioso jivi aneconijibia petaenexa, tajēvelia najumecapanepaeya jumaiti. “Abrahampijinē pemomo,” itsa jai, tajēvelia jumaiti Cristo yabara. ¹⁷ Palivaisi pacatsipaebatsi, maitsije. Bajayatami copiaya Dioso tajēvelia najumecapanepaeya jumaiti Abrahampijinējavabelia pacuenia Dioso toxanaejitsia Abrahampijinējavabelia. Bajaraxuacujinae icatsia cotocaevi, cuatrocientos treinta pavaibejecujinae, Dioso icatsia Moiséspijinēta najumecopata jivi pejumecovēnētsinexa. Itsiata palivaisi copiaya Dioso tajēvelia najumecapanepaeya jumaiti Abrahampijinējavabelia, bajarapalivaisi acuenebi Dioso penajumeamatamobi-aexanaenexa. ¹⁸ Nexata palivaisi cotocaevi Dioso Moiséspijinēta najumecopata, bajarapalivaisi jivi pejumecovēnētsixae, Dioso aneconijibia jivi itsa teajitsipa pecapanepaenexa pijaneconivecua, nexata palivaisi copiaya Dioso tajēvelia najumecapanepaeya jumaiti Abrahampijinējavabelia, ajumematamobi tsipae. Itsiata baitsi jane palivaisi cotocaevi Dioso Moiséspijinēta najumecopata, jivi jumecovēnētsi ata tsipae, itsiata Dioso apo capanepae tsipaetsi. Nexata yapētanetsi pejumenamatamotsijava palivaisi copiaya Dioso tajēvelia najumecapanepaeya jumaiti Abrahampijinējavabelia. Tsiapai pajivi jumecovēnēta pecapanepaejavanexatsi pacuenia Dioso tajēvelia najumecapanepaeya jumaiti Abrahampijinējavabelia, bajarapajivi Dioso aneconijibia tanetsi.

¹⁹ Itsa baja jumenamatamota palivaisi copiaya Dioso tajēvelia najumecapanepaeya jumaiti Abrahampijinējavabelia, ¿detsa nexata xuajitsia icatsia Dioso Moiséspijinēta nacatonajumecopata bajarapalivaisi? Dioso raja nacatonajumecopata bajarapalivaisi saya vajanacueneypētaenexa pibisiacuene vajaexanavanapaejava Dioso pitabarata. Bajrapalivaisi Dioso nacatonajumecopata vajajumecovēnētavanapaenexa matapania Abrahampijinē pemomo, Cristo, pepatsimatacabitsicajavabelianexa. Tajēvelia Dioso najumecapanepaeya

jumaitsi Cristo pejamatabëcueneta ayaibitsaëtoxaneto mapanacuapijivije Dioso aneconijibia petaenexa. Palivaisi Dioso Moiséspijinëta najumecopata, pijacuata Dioso apo jumaitsi Moiséspijinëjavabelia. Dioso saya itoroba ángelevi Moiséspijinë petsipaebinexatsi. Nexata juya Moiséspijinë tsipaeba jivijavabelia. Moiséspijinë jivi petocuaicuajainë Diosojavabelia. Dioso juya Moiséspijinë itorobatsi petocuaicuajainexa jivijavaberena. ²⁰ Pamatacabi Dioso najumecapanepaeya jumaitsi Abrahampijinëjavabelia pacuenia Dioso toexanaejitsia Abrahampijinëjavabelia, Dioso pijacuata jumaitsi Abrahampijinëjavabelia. Dioso apo itorobi ángelevi petotsipaebinexatsi Abrahampijinëjavabelia. Dioso pijacuata najumecapanepaeya jumaitsi Abrahampijinëjavabelia pacuenia pepacueno toexanaejitsia.

Pajamatabëcuenelivaisi yabara bajayata Dioso Moiséspijinëta najumecopata yabara pelivaisi

²¹ Dioso icatsia cotocaevi Moiséspijinëta itsalivaisi najumecopatsi ata, palivaisi copiaya Dioso najumecapanepaeya jumaitsi Abrahampijinëjavabelia, itsiata apo ajumematamobi-aexanae. Tspaji Dioso Moiséspijinëta penajumecopatsilivaisi pejamatabëcueneta, jivi Dioso apo capanepaejitsiatsi. Jivi itsa caëjëpaejitsipatsi pejumecovënëtsicapaneapenexa daxita palivaisi Dioso Moiséspijinëta najumecopata, nexata Dioso jivi capanepaejitsipa pijaneconivecua Dioso Moiséspijinëta penajumecopatsilivaisi pejumecovënëtsicapaneapexae. ²² Itsiata baitsi jane itsajivi ata apo caëjëpaetsi pejumecovënëtsicapaneapenexa Dioso Moiséspijinëta penajumecopatsilivaisi. Dioso pejumelivaisibaxutota jumaitsi pacuenia daxitajivi pibisi-acuene pexanaexae, Dioso naneconitsiaexanaejitsiatsi Diosovecua penaxuabinexa. Bajarapacuenia Dioso pejumelivaisibaxutota jumaitsi vajayapëtaenexa. Nexata yapëtanetsi vajanajamatabëcuenecopatsinexa Jesucristojavabelia, vajanacapanepaenexa pacuenia Dioso copiaya tajëvelia najumecapanepaeya jumaitsi Abrahampijinëjavabelia.

²³ Cristo abaxë athëbëvetsica pepatsivajënaeaysica, Dioso Moiséspijinëta penajumecopatsilivaisi nacayapëtaeayaexana pamatacabi Cristo patsica vajanajamatabëcuenecopatsinexa Cristojavabelia. Nacayapëtaeayaexananua pacuenia vajacuata vajaxanaejaya pejamatabëcueneta, acuenebi Dioso vajanacapanepaenexa. Nexata Dioso Moiséspijinëta penajumecopatsilivaisi, nacajamatabëcueneevetapona matapania Cristo athëbëvetsica pepatsimatacabitsicajavabelianexa. Nexata bajarapalivaisi vajanajamatabëcueneevetsijavata, Cristo baja nacacaxitajaraba. ²⁴ Pacuenia pejevaxi pevetsijivi, pejevaxi baeveta, bajarapacuenia Dioso Moiséspijinëta penajumecopatsilivaisi, nacajamatabëcueneeveta daxita vajajumecovënëtsivi bajarapalivaisi. Bajarapacuenia nacajamatabëcueneeveta matapania Cristo athëbëvetsica pepatsimatacabitsicajavabelianexa. Nexata jane baja athëbëvetsica Cristo pepatsicujinaetsica, vajanajamatabëcuenecopatsixae bajaraponëjavabelia, Dioso aneconijibia nacatane. ²⁵ Aeconoxae baja najamatabëcuenecopatatsi Cristojavabelia. Nexata pacuenia pejevaxi pevetsijivi, pejevaxi baeveta, bajarapacuenia baja Dioso Moiséspijinëta penajumecopatsilivaisi, apo nacajamatabëcueneevetsi.

²⁶ Paxamë rabaja Dioso papeximë panenajamatabëcuenecopatsixae Jesucristojavabelia. ²⁷ Nexata baja daxita paxamë panabautisabame panetsitanaitajëtsinexa jivijavabelia Cristo papijajivicuenemë. Nexata Cristo, Dioso pexënatojavabelia, panenajamatabëcuenecopatsixae, paxamë ata baja Dioso papeximë. ²⁸ Daxitatsi vaxaitsi vajanajamatabëcuenecopatsivi Jesucristojavabelia, pajudíovínë, apo pajudíovi atamë, aeconoxae baja Dioso najëpaeya nacatane. Paxamë ata pijinia dajubicuenia papecanajetsivi itsamonaejavabelia amoneya panetonacuenebavanapaenexa, apo patanecacanajetsivi ata itsamonaejavabelia amoneya panetonacuenebavanapaenexa, daxitatsi Dioso najëpaeya nacatane. Paxonë papebijivínë, paxamë pijinia papetiriavi atamë, bajarapacuenia daxitatsi Dioso najëpaeya nacatane. ²⁹ Cristo pijajivixaetsi, nexata Abrahampijinë bepepo pemomoxitsi Dioso nacatane. Nexata pacuenia Dioso bajayata tajëvelia najumecapanepaeya jumaitsi Abrahampijinëjavabelia, bajarapacuenia Dioso nacacapanepaena.

4

¹ Mara pacuenia jitsipajë patacajumaitsinexaje. Pejevaxinëyo paxa itsa vecuatëpatsi, paxami riconë ata, abaxë apo rajutsitsi paxami pecobecovë pepitsinexa pijajavanexa. Tspaji abaxë pejevaxinëyo. Pacuenia itorobabiabatsi pevetsijivitsi, bajarapacuenia exanabiaba. Daxitacuene pexainaenënexa ata, bajaraponëyo jumecovënëtabiaba pevetsijivitsi pitorobicueniatsi. ² Itsa abaxë pejevaxinëyo, pevetsijivitsi evetatsi. Xua ata pijajavanexa, toevetatsi. Matapania baja itsa tocopiapatatsi paxapijinë petocaëjëtsimatacabitsi, tocopatatsi jane baja petoevetsijavatsi pevetsinexa baja pijacuata. Pevetsijavatsi ata baja copatatsi. ³ Bajara pijinia paitsinë pajudíovínë Jesucristo abaxë athëbëvetsica

pepatsivajənaeyatsica. Itsa abaxə apo payapətaenə pexaniajailivaisi, Jesucristo pelivaisi, pajumecovənətəbiabəjə pacuenia paneitoroba Dioso Moiséspijinəta penajumecopatsilivaisi. Nexata pacuenia pejevaxinəyo jumecovənətəbiaba pevetsijivitsi pitorobicueniatsi, bajarapacuenia pajumecovənətəbiabəjə Dioso Moiséspijinəta penajumecopatsilivaisi. Jamatabəcuenenavəxaniabiaya pajamatabəjumaitšinə tsabiabi: “Pacuenia Dioso Moiséspijinəta najumecopata vajaexanaexae, nacacapanepaena Dioso,” pajamatabəjanə tsabiabi. ⁴ Itsiata Dioso pecaəjətsimatacabi itsa copiapata, Dioso pexənato itorobica judiəvata penaexanaenexa mapanacuataje. Nexata Dioso pexənato mapanacuataje judionəcuenia ponapona. Nexata pacuenia itoroba Dioso Moiséspijinəta penajumecopatsilivaisi, bajarapacuenia Dioso pexənato exanapona. ⁵ Bajarapacuenia Dioso pexənato naexana mapanacuataje vajanacavecuajibiaexanaenexa pibisiacuene vajaneconimi. Nexata baja nacacopatsiaexana vajaexanabiabijavami pacuenia nacaitoroba Dioso Moiséspijinəta penajumecopatsilivaisi. Bajarapacuenia Dioso nacatoexana pexicueniatsi Dioso vajanacataenexa.

⁶ Bajaraxuata paxamə Dioso papexicuenemə panenayapətaenexa, Dioso pacatoitorobica Espiritu Santo papecatsijamatabəjonenexa. Nexata Espiritu Santo pejamatabəcueneta: “¡Taxa!” pacajaiyaexana Diosojavabelia. ⁷ Nexata Dioso papexixaemə, aeconoxae baja apo pajumecovənətsimə pacuenia pacaitoroba Dioso Moiséspijinəta penajumecopatsilivaisi. Dioso papexixaemə, itsamatacabi pacarajutsiana xua Dioso toxaina pexi perajutsinexa.

Pacuenia Pablo sivanajamatabəxaina Galacia nacuapijivi, Dioso pejumecovənətəvanapaevi, yabara pelivaisi

⁸ Pamatacabi abaxə Dioso apo payapətaemə, panematabacabəta panubenabiabame panevajəcabiabinexa bediosovi panetaevijavabelia. Bajarapamonae baja cajena apo diosovi. Nexata saya panacueratabiabame. ⁹ Itsiata baiitsi jane aeconoxae baja payapətaneme pepo Dioso. Bajaraponə jane xaniavaetsia pacayapətane. ¿Detsa xuajitsia nexata pajitsipame panejumecovənətsinexa Dioso Moiséspijinəta penajumecopatsilivaisi? Pamatacabi abaxə apo payapətaemə pepo Dioso, panematabacabəta pavajəcabiabame bediosovi panetaevijavabelia. Itsiata baiitsi jane bajarapamonae apo caəjəpaetsi papecacapanepaenexa. Bajara pijinia itsi Dioso Moiséspijinəta penajumecopatsilivaisi. Pajumecovənətsi atamə tsipae Dioso Moiséspijinəta penajumecopatsilivaisi, itsiata Dioso aneconijibia apo pacatae tsipae papecacapanepaenexa. ¹⁰ Judiəvi nacueraevetabiaba penacueraevetsimatcabita. Exanabiabanua fiesta Dioso Moiséspijinəta penajumecopatsilivaisi pitorobicueniatsi. Bajara pijinia pacuenia paxamə ata paexanabiabame. Pajuametota, pavaita ata, judiəvi nacueraevetabiaba, fiesta ata exanabiaba, bajara pijinia pacuenia paxamə ata paexanabiabame. Jamatabəcuenenavəxaniabiaya pajamatabəjumaitšinə tsabiabi: “Bajarapacuenia vxaxitsi ata itsa exanaenatsi, Dioso aneconijibia nacataena,” pajamatabəjamə tsabiabi. ¹¹ Bajarapacuenia paneexanabiabixae, bitso pacasivanajamatabəxainatsi. Tsipaji paxamə yabara jamatabəjumaitšinə mapacueniaje: “Ayaicuenia Jesucristo pelivaisi tatsipaebabiabijava bajarapamonaejavabelia, saya meta nacueratajə,” jamatabəjanə paxamə yabara.

¹² Tajamonae, pacaitorobatsi paxamə ata panenajamatabəcuenecopatsinexa Jesucristojavabelia pacuenia xanə najamatabəcuenecopatajə. Tanajamatabəcuenecopatsixae baja Jesucristojavabelia, judionə atanə, copatajə baja tajumecovənətsijavami Dioso Moiséspijinəta penajumecopatsilivaisi. Nexata pacuenia paxamə, apo pajudiəvimə, apo pajumecovənətsimə picani Dioso Moiséspijinəta penajumecopatsilivaisi, bajarapacuenia xanə ata baja apo jumecovənətsinə Dioso Moiséspijinəta penajumecopatsilivaisi. Nexata pətsa baja pajumecovənətəme Dioso Moiséspijinəta penajumecopatsilivaisi. Pamatacabi copiaya pacatsipaebatsi Jesucristo pelivaisi, paxamə apo paneitsacueniabimə. ¹³ Paxamə baja cajena payapətaneme mapacuenije. Tavitanexae, copiaya patajopajə paxaməjavata. Nexata bajarapacuenia paxaməjavata pacatsipaebatsi pexanialivaisi, Jesucristo pelivaisi, papecacapanepaelivaisinexa Diosojavabelia, palivaisi picani abaxə apo payapətaemə. ¹⁴ Dioso baja cajena netocopata tanevaetabinexa bajarapavitane patanəvaaitajitsibinexamə picani. Itsiata baiitsi jane bajarapavitane yabara hijiata apo panetaemə. Apo panenavecuaitorobimə patacavecuaponaenexa itsajavabelia. Biji rajane xaniavaetsia panecopiapitame. Pacuenia ángel xaniavaetsia pacopiapitsipame, itsa jume, pacuenia Jesucristo xaniavaetsia pacopiapitsipame, bajarapacuenia xaniavaetsia panecopiapitame. ¹⁵ Bajarapamatacabi bitso pajamatabəcuenəbarəyamə patacatsipaebixae pexanialivaisi, Jesucristo pelivaisi. ¿Detsa baja aeconoxae paitsimə panejamatabəcuenəbarəyavami? Bajarapamatacabi meta itsa pacavajətsipatsi, paneitaxuto ata panerajutsipame tanaitaxutorutsinexa. ¹⁶ Aeconoxae meta bepanijavabitsaənənə panetaejitsipame patacatsipaebixae pexaniajailivaisi, Jesucristo pelivaisi.

¹⁷ Pamonae saicayalivaisi Jesucristo pelivaisivecua petsipaebaponaevi, pata paxamējavata bajarapalivaisi papecatsipaebinexa. Bajarapamonae najamatabēxainabiaba pexanaenexa xua yabara pasivabarēyamējitsia bajarapamonae. Itsiata baitsi jane bajarapamonae apo najamatabēxainae papecatsipaebinexa pexaniajailivaisi papecacapanepaelivaisinexa Diosojavabelia. Bajarapamonae jitsipa paxanē patanevecuanasaicayabinexamē. Jitsipa panejamatabēcuenejēpaenexa bajarapamonae. ¹⁸ Xanepana picani itsamonae ata panesivabarēyanexa itsa pacayavenona, itsa baitsi jane pepacuene xaniavaetsia pacasivanajamatabēxaina papecayavenonaenexa. Bepacayavenona bajarapamonae daxitamatabijavabelianexa. Nexata paxanē ētapatsimatacabi paxamējavata, apo bepacayavenona. ¹⁹ Paxamē bepataximē pacatanetsi. Petiriva itsa vixaenotatsi penacueto pevecuaenaxaenexatsi, bitso banajamatabēxaina ēpexanaejavabelianexa. Bajara pijinia pacuenia xanē ata bitso pacasivanajamatabēxainatsi. Tspipaji bitso patoijitsipatsi, pacuenia Cristo jamatabēcueneitsi, bajara paxamē ata panejamatabēcueneitsinexa. ²⁰ Bitso picani jitsipajē aeconoxae taponaponaejava paxamējavata bitso patacasivanajamatabēxainaexae. Nexata itsa ponaponaejitsipajē paxamējavata, apo patacatoyaquinae tsipaetsi. Pacabarēcuaiquaijatsi tsipae pexaniacuenia. Apo patacataexae, nexata abaxē xaniavaetsia apo yapētaenē pacuenia exanaejitsianē paxamējavabelia.

Agarpijivabeje Sarapijivabeje yabara pelivaisi

²¹ Paxamē pajumaitsimē tsabiabi: “Jumecovēnētsianatsi Dioso Moiséspijinēta penajumecopatsilivaisi Diosojavabelia vajanacacapanepaenexa,” pajamē tsabiabi. ¡Nexata panamuxunaevere xaniavaetsia paneyapētaenexa pacuenia Dioso jumaitsi bajarapalivaisi yabara! ²² Dioso pejumelivaisibaxutota jumaitsi pacuenia bajayata Abrahampijinē xaina pexēnatobeje. Abrahampijinē pexēnato itsanē xaina Agarpijivata. Agarpijiva, Abrahampijinē bedajubicuenia pecomuatsiva amoneya petonacuenebaponaponaenexatsi pijabota. Nexata Agarpijiva jumecovēnētabiaba pijatuxanejivibeje pitorobicueniatsi. Bajaraxuacujinae icatsia Abrahampijinē itsanē xaina Sarapijivata, pepo pijavata jane baja. Bajarapova apo pecomuatsiva. ²³ Panacuetonēyo Abrahampijinē xaina Agarpijivata, pecomuatsivata jane baja, xaina pacuenia baxaina pexi pexinaevi. Panacuetonēyo pijinia xaina Sarapijivata, pepo pijavata jane baja, mavecova ata bitso pepua perujavata, xaina. Bajarapanacuetonēyo xaina petocopiapatsixaetsi pacuenia Dioso tajēvelia najumecapanepaeya jumaitsi Abrahampijinē pexēnato pexainaenexa. ²⁴ Bajarapovabeje pelivaisita Dioso nacayapētaeyaexana pacuenia Dioso jivi tane anijacueniabeje. Dioso Moiséspijinēta najumecopata Moiséspijinē pijajivi pebarējumecovēnētsinexa bajarapalivaisi. Bajarapalivaisi Dioso najumecopata Moiséspijinēta Sinaivēnē tsutojumata, Arabia nacuata. ²⁵ Itsamonae abaxē mapamatacabi ataje tsiteca jumecovēnētavanapa Dioso Moiséspijinēta penajumecopatsilivaisi. Bajarapamonae abaxē tsiteca pejumecovēnētavanapaexae Dioso Moiséspijinēta penajumecopatsilivaisi, Abrahampijinē pecomuatsivami, Agarpijivami, cuenejēpavanapa. Tspipaji pacuenia Agarpijiva daxitamatacabi jumecovēnētabiaba pijatuxaneva pitorobabiabicueniatsi, bajara pijinia pacuenia bajarapamonae jumecovēnētabiaba Dioso Moiséspijinēta penajumecopatsilivaisi pitorobicueniatsi. ²⁶ Vaxaitsi pijinia Jesucristojavabelia vajanajamatabēcueneocopatsivi, Abrahampijinē pepo pijavami, Sarapijivami, cuenejēpavanapatsi. Nexata itsamatacabi Dioso pijatomarata, pejanaJerusalén tomarata, jinavanapaenatsi. Tspipaji pacuenia Abrahampijinē pepo pijavami, Sarapijivami, itsajivi ata apo pijajivitova pitorobabiabicueniatsi pexanaenexa, bajara pijinia vaxaitsi ata itsitsi. Tspipaji Dioso Moiséspijinēta penajumecopatsilivaisi pitorobicuenia apo jumecovēnētavanapaetsi. ²⁷ Nexata ayaibitsaētotsi taponae Jesucristojavabelia vajanajamatabēcueneocopatsivi. Abrahampijinē pepo pijavami, Sarapijivami, yabara, Dioso pejumelivaisibaxutota tajēvelia jumaitsi mapacueniabe:

Mavecovamē, nexi apo nexainaeva. Jamatabēcuenebarēyamē tsane. Caeto ata apo nenavixaetaeva ata, itsiata jamatabēcuenebarēyaya vavajamē tsaxuabi tsane, navixaetae atamē. Tspipaji nemomoxi ayaibitsaēto xainaename. Xainaename ayaibitsaēto nemomoxi, nijajivitova pemomoxi matatoxenetsia, jai tajēvelia Dioso pejumelivaisibaxutota ayaibitsaētotsi Jesucristojavabelia vajanajamatabēcuene copatsijavanexa yabara.

²⁸ Tajamonae, pacuenia Abrahampijinē pepo pijavata, Sarapijivata, naexana Isaacpijinē pacuenia Dioso tajēvelia najumecapanepaeya jumaitsi, bajara pijinia pacuenia vaxaitsi ata Dioso nacatane. Jesucristojavabelia vajanajamatabēcueneocopatsixae, Dioso nacatane Sarapijiva bepepo pemomoxitsi. Nexata pacuenia Dioso tajēvelia najumecapanepaeya jumaitsi vajanacacapanepaenexa, bajarapacuenia Dioso nacacapanepaena. ²⁹ Bajayata Abrahampijinē pexēnato, matapijinē, ponē naexana Agarpijivata, bajaraponē jamatabēitonotabiaba pejuyapijinē, ponē naexana Sarapijivata

Dioso pejamatabëcueneta Espirítu Santo peyavenonaexaetsi. Bajara pijinia pacuenia aeconoxae ata, pamonaes casaë tsavanapae pejumecovënëtsijava Dioso Moiséspijinëta penajumecopatsilivaisi, nacajamatabëitonotabiaba Dioso pejamatabëcueneta Espirítu Santo vajanacatsijamatabëcaevi. ³⁰ Pijuyapijinë, pejamatabëitonotabiabinë yabara, Dioso pejumaitisjiva Abrahampijjinëjavabelia Dioso pejumelivaisibaxutota jumaitis mapacueniaje: “Ponë nexënato xainame necomuatsivata, apo rajutsimë tsane nexainaeyajuvënëjjava nevënamuto pepitsinexa. Daxita rajutsianame ponë xainame pepo nijavata. Bajaraxuata nijabovecua pitsapaeyaexanaename necomuatsiva, nexënato yajava,” jai Dioso pejumelivaisibaxutota Abrahampijjinëjavabelia Dioso pejumaitisjiva. ³¹ Tajamonae, Dioso apo nacatae Abrahampijjinë pecomuatsiva bepemomoxitsi. Biji rajane Dioso nacatane Abrahampijjinë pepo pijava bepemomoxitsi. Bajaraxuata vaxaitsi baja apo jumecovënëtsitsi Dioso Moiséspijinëta penajumecopatsilivaisi.

5

Pacuenia icatsia apo bejumecovënëtsi Dioso Moiséspijinëta penajumecopatsilivaisi, pamonaes baja najamatabëcuenecopaba Cristojavabelia, yabara pelivaisi

¹ Cristo pejamatabëcueneta nacacopatsiaexana Dioso Moiséspijinëta penajumecopatsilivaisi vajajumecovënëtsijavami. Nexata Dioso Moiséspijinëta penajumecopatsilivaisi panejumecovënëtsijavami panecopatsijava, tsiteca baja pacopatanavapare. Pëtsa icatsia caevëalia pajumecovënëtime Dioso Moiséspijinëta penajumecopatsilivaisi, bajarapalivaisi bepapijajivimë papecaitorababiabucuenia paneexanavanapaeyaniva.

² Xanë Pablonë, panenamuxunaevere palivaisi pacatsipaebijitsiatsi. Jamatabëcuenenavëxaniabiaya pëtsa pajamatabëjumaitisimë: “Xanë rabaja taneperabëcaucutsinë. Bajaraxuata tajaneconivecua Dioso necapanepaena,” pajamatabëjamë pëtsa. Bajarapacuenia itsa panajamatabëxainaejitsipame, nexata Cristo papecasivatëpaejava papecacapanepaenexa panijaneconivecua, saya pacasivanacueratsipa. Nexata pajumecovënëre Cristo papecasivatëpaejava papecacapanepaenexa panijaneconivecua.

³ Icatsia pacamuxujibatsi asaëyata. Pajivi jamatabëcuenenavëxaniabiaya jamatabëjumaitis: “Xanë naperabëcaucutsiaexanaenajë tajaneconivecua Dioso tanecapanepaenexa,” jamatabëjai, bajarapajivi bejumecovënëtsicapanepa daxita pacuenia Dioso Moiséspijinëta penajumecopatsilivaisi itorobatsi. ⁴ Jamatabëcuenenavëxaniabiaya itsa pajamatabëjumaitisimë tsipae: “Xanë jumecovënëtsianajë Dioso Moiséspijinëta penajumecopatsilivaisi. Nexata Dioso aneconijibia netaena tanecapanepaenexa,” itsa pajamatabëjamë tsipae, nexata pacopabijitsipame panejumecovënëtsijavami Cristo papecasivatëpaejava panijaneconi yabara. Dioso papecaitaxutotsoniataexae aneconijibia papectaejavami ata, pacopabijitsipame. ⁵ Vaxaitsi baja cajena yapëtanëtsi Dioso vajanacapanepaejavanexa. Tsipaji jumecovënëtsi Jesucristo vajanacasivatëpaejava vajaneconi yabara. Bajaraxuata Espirítu Santo pejamatabëcueneta vajanacayavenonaexae, evetavanapatsi Dioso vajanacajumaitisnixa: “Paxamë rabaja paneconijibimë,” vajanacajainexa, pamatacabi Dioso pitabarata nubenaenatsi. ⁶ Vaxaitsi baja Jesucristo pijajivitsi. Nexata nacaperabëcaucutsi ata, apo nacaperabëcaucutsi ata, itsiata bajarapacuenie amatamobi Dioso pitabarata. Namatamota rajane asivaya vajayavenonaponaejava itsamonae ata vajanajamatabëcuenecopatsixae Jesucristojavabelia.

⁷ Pajumecovënëtanavanapame baja picani pexaniajailivaisi. ¿Iipatsa nexata pacacopatsiaexana bajarapalivaisi panejumecovënëtsijavami? ⁸ Dioso raja apo pacacopatsiaexanae. Biji rajane Dioso pacajunata Jesucristojavabelia panenajamatabëcuenecopatsinexa. ⁹ Pëtsa panacofënëtime mapalivaisije. Pan pexanaematabënexa ayaimatabë ata, levadurajava pijinia tsiquirijavayo ata, itsiata pematajërëabijavata, bacaejëpa daxitamatabë. Nexata bafufunaeyaexana daxitamatabë. Bajara pijinia itsi penajumetsënëtsilivaisi jivi petsipaebaponaevi. Penajumetsënëtsilivaisi jivi petsipaebaponaevi, caenëbeje ata, itsiata ayailbitsaëto Jesucristojavabelia penajamatabëcuenecopatsivi, jamatabëcuenebijianapona.

¹⁰ Yapëtaniji baja cajena mapacuenije. Paxamë baja Jesucristo papijajivimë. Nexata Dioso pacayavenonaena. Xanë yapëtaniji pacuenia paexanaejitsiamë. Tsiteca pajumecovënëtanavanapaename patacatsipaebilivaisi. Dioso cajena itsamatacabi naneconitsiaexanaenatsi ponë Jesucristo pelivaisivecua pacajamatabëcuenebijiana penajumetsënëtsilivaisita.

¹¹ Tajamonae, Jesucristo pelivaisi apo judíovi tatsipaebabiabijavata, itsa jumaitsinë tsabiabi tsipae: “Paxamë apo pajudíovimë, Jesucristojavabelia panenajamatabëcuenecopatsivi, bepanaperabëcaucubiaexaname Diosojavabelia papecacapanepaenexa,” itsa janë tsabiabi tsipae, nexata judíovi apo nebejibiaexanabiabi

tsipae. Apo judíovi ata, Jesucristojavabelia penajamatacuenecopatsivi, itsa itorobaponaejitsipajē peperabēcaucubinexatsi, nexata Jesucristo cruzata petēpaelivaisi tsipaebi atanē, itsiata judíovi apo nitoya tsipae. ¹² Pamonae pacajamatabēitonotabiaba panenaperabēcaucutsiaexanaenexa, bajarapamonae tojitsipajē mapacueniaje. Tojitsipajē bajarapamonae papecavecuapitsapaenexa, papecacopatsinexa baja papecajamatabēitonotabiabijava.

¹³ Tajamonae, Dioso pacajunata panecopabinexa Dioso Moisésipjinēta penajumecopat-silivaisi panejumecovēnētsijavami. Itsiata baitsi jane pētsa pajamatabējumaitsimē: “Dioso Moisésipjinēta penajumecopabilivaisi tajumecovēnētsijavami, tacopatsixae baja, nexata ex-anaenajē daxita pibisiacuene pacuenia jitsipajē,” pajamatabējamē pētsa. Biji rajane Dioso Moisésipjinēta penajumecopatsilivaisi panejumecovēnētsijavami, panecopabixae baja, Je-sucristojavabelia penajamatabēcuenecopatsivi bepapijajivimē panataema namataenetsia panenayavenonabiabinexa. Bajarapacuenia namataenetsia panayavenonabiabianame panenasivaxae. ¹⁴ “Asivamēre itsamonae ata pacuenia nijacuata nasivamē,” pejailli-vaisi itsa pajumecovēnētsianame, nexata daxita palivaisi Dioso Moisésipjinēta najumecopata, pajumecovēnētsicapaneaname. ¹⁵ Itsa panaitoyamē, itsa panabaracuaicuai-jamēnua pibisiacuena, nexata xaniavaetsia panaitavere. Tsipaji itsa panaitoyamē tsipae, itsa panabaracuaicuajamēnua tsipae pibisiacuena, nexata Jesucristojavabelia panenajamatabēcuenecopatsijava, namataenetsia panajamatabēcuene faefaenaeyaxanaejitsipame. Pacopatsipamena baja Dioso pejumelivaisi yabara panenacaetuatabiabiijava ata.

Pacuenia Espiritu Santo nacajamatabēcueneyavenona yabara pelivaisi

¹⁶ Mapacuenia pacajumaitsitsije. Pacuenia Espiritu Santo pacaitorobabiaba, paexan-abiabare daxitamatacabi canacujitsia. Pētsa pibisiacuene paexanabiabame panijacuata panenajamatabēxainaejava. ¹⁷ Xua vajacuata vajajamatabēēthētota najamatabēxainabiabatsi pibisiacuene vajaexanabiabinexa, bajaraxua vajaexanaenexa, Espiritu Santo apo jitsi-pae. Xua pijinia Espiritu Santo nacaitorobabiaba pexaniacuene vajaexanabiabinexa, bajaraxua juya vajajamatabēcuene vajaexanabiabinexa apo jitsipae. Nexata vajaja-matabēcuenebeje, Espiritu Santobeje apo najamatabēcuenejēpaebeje. Bajaraxuata pexani-acuene pajamatabēexanabiabi atanē, itsiata apo paexanabiabimē pexaniacuene. ¹⁸ Itsa baja paexanavanapaename pacuenia Espiritu Santo pacaitorobabiaba, nexata baja tsiteca apo paexanavanapaemē tsane pacuenia pacaitoroba Dioso Moisésipjinēta penajumecopat-silivaisi. Tsipaji baja pacuenia Espiritu Santo pacaitoroba, paexanavanapaename.

¹⁹ Xua jivi pijacuata najamatabēxaina, itsa exana, yapēxanepana vajayapētaenexa. Tsipaji xua jivi pijacuata najamatabēxaina itsa exana, pebi itsava jaita pijavacuena. Petiriva pijinia jaita itsanē pamonavecuca. Pamonae pevitota pibisiacuene exana pacuenia pijacuata najamatabēxaina, bajarapamonae jitsipanauxa daxita xua pibisiacuene pexanaenexa. ²⁰ Pamonae pibisiacuene exana pacuenia pijacuata najamatabēxaina, pematatabacabēta nubenabiaba pevajētabiabinexa jumapecataeya pexanaenēanējavabelia. Junatabiabanua penajorobivi. Bajarapomonaeyajuvēnēvi naexananua penajorobivi. Itoyanua tsabi-abi itsamonae. Jumeanaenotabiabanua itsamonae. Cuenecaēbabiabanua itsamonae. Anaepanabiabanua apo vajayabaraanaepanaejavayo ata. Natoexanabiabanua daxi-tacuene ēpamonaenexa. Vecuanaicayababiabanua itsamonae Dioso pejumecovēnētsivi. Caebitsaēto caejavata apo najuanacaetuanabiabi. ²¹ Pamonae pibisiacuene exana pacue-nia pijacuata najamatabēxaina, jamatabēyacajērētabiabanua itsamonae pexinaejava. Ja-matabēbeyaxuababiabanua jivi. Aitajibinua tsabiabi pijabonējava. Aitajibinua tsabiabi fies-tajava ata. Itsacuenua pematatsēnēa, bajara bepitsipibisiacuene, exanabiaba. Pacuenia copiata pacamuxujibatsi, bajara icatsia pacuenia pacamuxujibatsi. Pamonae bajara-pacuenia pibisiacuene exana, bajarapamonae apo jinavanapae tsane Dioso pijanacuatat-sia.

²² Pacuenia peubinae, pexaniana, pexaniacuai capitsapa, bajara pijinia pacuenia Espiritu Santo vajajamatabēēthētovetsina capitsapa mapacuneje. Capitsapa itsamonae ata vajaasivajamatabēcuene. Capitsapa vajabarēyajamatabēcuene. Capitsapa Dioso-javabelia, itsamonaejavabelia ata, barajamatabēcuenexanepanaeya vajataenexa. Capit-sapa, itsamonae nacaitacueniabi ata, vajavajēnaeyabelia vajaajamatabēsaējamatabēcuene. Capitsapa itsamonae vajaitaxutotsoniatē jamatabēcuene. Capitsapa itsamonae pexa-niacuene vajatoexanaejamatabēcuene. Capitsapa Dioso vajajumecovēnētsijava vajaaja-matabēsaējamatabēcuene. ²³ Espiritu Santo vajajamatabēēthētovetsina capitsapa vajaate-jepaebijamatabēcuene. Capitsapa vajanajamatabēcatisi jamatabēcuene pibisiacuene va-jaxanaeyaniva. Daxita bajarapajamatabēcuene, Espiritu Santo vajajamatabēēthētovetsina

pecapitsapaejamatabêcuene, xanepana. Itsalivaisi ata cajena apo itavetsi daxita bajarapacuene. ²⁴ Pamonae Jesucristo pijajivi, bajarapamonae jamatabêjumaisi: “Jesucristo cruzajavabelia itsa cobematabiabarutatsi, tajaperujujamatabêcuenemi yajavatêpa,” jamatabêjai. Nexata vecuaajibiaexanatsi pajamatabêcuene itorobabiabatsi pibisiacuene pexanaenexa. ²⁵ Vaxaitsi Espiritu Santo nacayajavaponapona. Nexata betonacopatabiabatsi vajanacaitorobinexa pacuenia Espiritu Santo nacatojitsipa vajaexanabiabinexa.

²⁶ Ayaijamatabêcuenenivitsi apo benataetsi. Namataenetsia itsacuenejavayo ata pibisiacuene apo benatoexanaetsi vajanabaraanaepanaeyaniva, vajanacuenecaêbivaniva ata.

6

Pacuenia Dioso pejumecovênêtsivi itorobatsi namataenetsia penajamatabêcueneyavenonaenexa yabara pelivaisi

¹ Tajamonae, itsa pacaxitajarabame Dioso pejumecovênêtsijavavecu pejopaejivi, paxamê pacuenia Espiritu Santo pacaitoroba panejinavanapaevi, payavenonare bajarapajivi. Payavenonare bajarapajivi piamatabêcuenesaênexa icatsia Dioso pejumecovênêtsijava. Itsiata baitsi jane pexaniajamatabêcuenia xaniavaetsia payavenonare. Paxamê ata pibisiacuene nayajivitaeya pajinavanapare. Belia paxamê ata Dioso panejumecovênêtsijavavecu, pajopaejitsipame dovathi itsa pacajamatabêcueneêjêta pibisiacuene paneexanaenexa. ² Namataenetsia panayavenonabiabare dovathi itsa pacajamatabêcueneêjêta, pibisiacuene paneexanaeyaniva. Namataenetsia itsa panayavenonabiabianame panenasivaxae, nexata pajumecovênêtsianame pacuenia Cristo pacaitoroba.

³ Pajivi jumaisi itsa vênêlivaitsitane itsajivi Dioso pejumecovênêtsijavavecu pejopaejava: “Xanê cajena ayaijamatabêcuenenênê bajarapajivi matatoxenetsia. Nexata Dioso tajumecovênêtsijavavecu apo jopañê tsane,” jai, bajarapajivi najamatabêcuenecapaeba. Tspajivi bajarapajivi ata dovathi itsa jamatabêcueneêjêtatsi pibisiacuene pexanaenexa, apo ajamatabêcuenesaê tspae Dioso pejumecovênêtsijava. ⁴ Caejivi canacujitsia benacuenecanaêjêta peyapêtaenexa xua exanaponapona Dioso pitabarata. Nexata pajivi pexaniacuene exanaponapona, bajarapajivi jamatabêcuenebarêya Dioso pitabarata. Itsiata baitsi jane bajarapajivi pexaniacuene exanaponapona ata, apo bejamatabêjumaisi mapacueniaje: “Xanê itsamonavecu pexaniacuene Dioso toexanaponaponajê,” apo bejamatabêjai. ⁵ Caejivi canacujitsia baja cajena saicaya xaina pexanaponaejavanexa Dioso pitorobicueniatsi.

⁶ Pamonae tsipaebatsi Dioso pejumelivaisi, bajarapamonae pexainaeyajuvênêjaya juya berajuta Dioso pejumelivaisi petsipaebinêtsijavabelia.

⁷ Pêta pajamatabêcuenenavêxaniabame saicayacuenia paneexanaeyaniva Dioso peacaitorobicuenevecua. Tspajivi itsajivi ata apo caêjêpaetsi peyamaxêitojorobinexa Dioso. Xua jivi bauba pabita, pamatacabi baja navereta bajaraxua, icatsia banota. Bajara pijinia itsane Dioso ata. Pajivi pibisiacuene exana, bajarapajivi juya pibisiacuene tocopiapatsianatsi pamatacabi Dioso naneconitsiaexanaenatsi. ⁸ Pajivi pibisiacuene exanaponapona pijacuata penatojitsipaenetsia, nexata bajarapajivi itsa têpaena, pepacuene Diosovecu naxuabiana. Pajivi pijinia pexaniacuene exanaponapona Espiritu Santo pesivabarêyanexatsi, nexata bajarapajivi têpae ata, xainaena matacabi apo pevereverecejava. ⁹ Vaxaitsi itsa apo yabaracueranaetsi tsane pexaniacuene vajaexanavanapaejava, nexata Dioso pecaêjêtsimatacabita nacarajutsiana pexaniacuene. Bajaraxuata pexaniacuene vajaexanavanapaejava, apo beyabaracueranaetsi. ¹⁰ Nexata itsajota nacacuenecaêjêpa, pexaniacuene betoexanabiabatsi itsamonaejavabelia. Pamonae Jesucristo vajanajuumecovênêtsivi, bajarapamonae bitsoyo beyavenonaponatsi.

Pacuenia Pablo pemuxujobilivaisi Galacia tomarapijivi toyaquina peveretsinexa baja petoyaquinaelivaisi mapabaxutotaje yabara pelivaisi

¹¹ Pataema mapaayaiitanetonêje. Xanê raja Pablonê tajacuata pacatoyaquinatsi mapalivaisije. ¹² Itsamonae judiôvi ajumesaêya pacajumai tsabiabi: “Paxamê apo pajudiôvi atamê, Jesucristo pelivaisi itsa pajumecovênêtame, bepanaperabêcaucubiaexaname papeca-capanepanexa Diosojavabelia,” pacajai tsabiabi. Pajudiôvi bajarapacuenia pacajumai tsabiabi, jamatabêcuenenavêxaniabiaya jamatabêjumai tsabiabi: “Jesucristo pelivaisi apo judiôvi itsa tsipaebianatsi, yajavaitorobianatsi penaperabêcaucubiaexanaenexa. Nexata bajarapacuenia itsa exanaenatsi, vajamonae judiôvi nacasivajamatabêcuenebarêya tsane. Nexata vajamonae judiôvi apo nacaitsacueniabi tsane, apo judiôvi tsipaebi atatsi Cristo vajanacasivatêpaejava cruzata,” jamatabêjai tsabiabi bajarapajudiôvi jamatabêcuenenavêxaniabiaya. ¹³ Pajudiôvi bajarapacuenia pacajumai tsabiabi, pijacuata naperabêcaucubiaexanae ata, itsiata apo exanavanapae daxita pacuenia itorobatsi Dioso Moiséspijinêta penajumecopatsilivaisi. Bajarapamonae jitsipa

panenaperabêcaucubiaexanaenexa, saya papecavajunupaebinxexa pevêna judíovijavabelia: "Paxanê patajamatabêcueneta Galacia nacuapijivi naperabêcaucubiaexana," pejinexa paxamê yabara. Tsipaji bajarapajudíovi jitsipa pesivajamatabêcuenenarêyayavatsi pevêna judíovi. ¹⁴ Xanê cajena bajarapacuenia apo exanaenê. Apo najamatabêxainenê, xua exanajê, tanavajunupaebinxexa jivi saya tanesivabarêyanexa. Itsiata jitsipajê caelivaisiyo jamatabêcuenenarêyaya jivi tatsipaebinxexa. Jitsipajê jivi tatsipaebinxexa Jesucristo vajanacasivatêpaejava cruzata. Jesucristo cruzata tanesivatêpaexae, nevejamatabêcaeva baja tajitsipaejavami mapanacuapijicueneye. Mapanacuapijivi pijinia tanejitsipaejamatabêcuenemi ata ajibi baja. ¹⁵ Espíritu Santo vajanacaitorobicuenia itsa exanavanapatsi, nacaperabêcaucutsi ata, apo nacaperabêcaucutsi ata, najêpabeje. Tsipaji cajena amatamobi bajarapacuenene Dioso pitabarata. Vajanajamatabêcuenene pênêyorotsijava rajane pejanajamatabêcuenenjavabelia, namatamota vajanacacapanepaenexa Diosojavabelia. ¹⁶ Nexata pamonaexanavanapa pacuenia pejanajamatabêcuenene itorobatsi, bajarapamonae jamatabêcuenexanepanaeya jinavanapaena Dioso pitabarata. Dioso itaxutotsoniataenatsinua. Bajarapamonae daxita Dioso baja pepo pijajivi tsane.

¹⁷ Tavajênaeyabelia baja apo jitsipenê tanejamatabêitonotaponaenexa pamonaexa ne-jumeaeba Jesucristo taneitorobinêcuenene. Jesucristo pelivaisi yabara tanejumaconi-babeyabiabijavata, nejumatatibabeyabiaba. Bajarapavajênêcovêanê tanetsijumarubenaexae, daxitajivi neyapêtane Jesucristo pijajivitonêcuenenê.

¹⁸ Tajamonae, pacatovajêtabiabatsi Diosojavabelia vajatuxanenê Jesucristo papecayavenonabiabinxexa. Bajara itsi tsane.

Mapabaxutoje San Pablo toyaquina Efeso tomarapijivijavabelia

Pacuenia Pablo toyaquina mapabaxutoje Dioso pejumecovënëtsivi, Efeso tomarapijivijavabelia, yabara pelivaisi

¹ Xanë Pablonë, Dioso tanetojitsipaexae, nitapeta Jesucristo pijaapóstolenënexanë. Nexata Jesucristo nitoroba jivi pexanialivaisi tatsipaebaponaenexa. Pacatoyaquinatsi mapabaxutoje Dioso papijajivimë, Jesucristojavabelia panenajamatabëcuenecopatsivi, panejinavanapaevi Efeso tomarata. ² Pacatovajëtatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa.

Pacuenia Dioso jivi capanepaejitsia pijaneconivecua Jesucristo pesivatëpaexaetsi yabara pelivaisi

³ “Pexaniacuene rabaja panetoexaname,” jaitsi vaxaitsi, vajatuxanenë Jesucristo paxa, Diosojavabelia. Jesucristo baja pijajivixaetsi, daxitacuenejavabelia Dioso nacayavenonapona vajanacajamatabëcuene asaëyaexanaenexa. Nexata Dioso nacajamatabëcuenexaniavaetapona vajanaponaenexa Dioso pijanacuayabetsia. ⁴ Dioso mapanacuaje pexanaevajënaeya ata, tajëvelia nacaitapeta pijajivinexatsi. Tsipaji baja Dioso tajëvelia yapëtane Jesucristojavabelia vajanajamatabëcuene copatsijavanexa Jesucristo vajanacasivatëpaexae. Bajarapacuenia Dioso tajëvelia nacaitapeta pijajivinexatsi vajajinavanapaenexa aneconijibia Dioso pitabarata. ⁵ Dioso bitso vajanacajitsipaexae, tajëvelia najamatabëcuenevereta pexicueniatsi vajanacataenexa. Jesucristo nacasivatëpa Dioso petojitsipaecueniatsi. Bajaraxuata nexata Dioso nacatane pexicueniatsi. ⁶ Nexata Dioso pexaniacuena vajanacaitaxutotsoniataexae, daxitamatacabi canacujitsia Diosojavabelia jumaitsitsi tsabiabi. “Xanepana rabaja. Tsipaji pexaniacuene panetoexaname,” jaitsi tsabiabi Diosojavabelia. Dioso pexënato piasivanë pijajivixaetsi, Dioso nacaitaxutotsoniatane. ⁷ Pinijicuenia Dioso vajanacaitaxutotsoniataexae, nexata pexënato itorobica mapanacuayabetsicaje vajanacasivatëpaenexa. Bajarapacuenia Dioso nacavecuaajibiaexana pibisiacuene vajaexanaeneconimi. ⁸ Dioso pinijicuenia vajanacaitaxutotsoniataexae, nacayapëtaeyaexana pexaniajailivaisi. Nacayapëtaeyaexananua pacuene nacatoxanepana Dioso pejitsipaecuenia vajaexanavanapaenexa. ⁹ Xua Dioso tajëvelia najamatabëcuenevereta pexanaenexa, bajaraxua baja aeconoxae Dioso nacayapëtaeyaexana. Bajaraxua picani abaxë itsajivi ata apo yapëta. Xua Dioso tajëvelia najamatabëcuenevereta pexanaenexa, maitsije. Dioso itorobjitsiatsica pexënato mapanacuayabetsicaje petoexanaeveretsinexatsi daxita pacuenia itoroba. ¹⁰ Pacuenia Dioso tajëvelia najamatabëcuenevereta, bajarapacuenia daxita Cristo pijajivitsi nacacaetuatsiana Dioso pecaëjëtimsimatacabi itsa copiapatsiana. Dioso pecaëjëtimsimatacabi itsa copiapatsiana daxitacuene mapanacuapijicueje, athëbëpijicueene ata, Dioso baja tocopatsiana pexënato juya pevetsinexa.

¹¹ Jesucristo pijajivinexatsi tajëvelia Dioso nacaitapeta. Bajarapacuenia Dioso tajëvelia nacaitapeta tsipaji baja cajena Dioso tajëvelia najamatabëcuenevereta bajarapacuenia pexanaenexa. Dioso daxitacuene exana pacuenia tsitaxanepanatsi. ¹² Bajarapacuenia Dioso tajëvelia nacaitapeta vajanajamatabëcuenecopatsinexa Jesucristojavabelia. Nexata vaxaitsi Dioso tojinavanapatsi Diosojavabelia vajumaititsabiabinexa: “Diosomë, ayajamatabëcuenenëmë bitso,” vajajaitsabiabinexa Diosojavabelia. ¹³ Pexaniajailivaisi papeccapanepaelivaisinexa, paxamë ata itsa pajumetaneme, nexata baja panajamatabëcuenecopatame Jesucristojavabelia papijajivinexamë. Nexata pacuenia Dioso tajëvelia najumecapanepaeya jumaitsi, pacarajuta baja Espiritu Santo papecatsijamatabëcaenexa. Nexata bajarapacuenia panayapëtaneme Dioso papijajivicuenemë. ¹⁴ Espiritu Santo vajanacatsijamatabëcaexae, yapëtanetsi pexaniajicuene Dioso vajanacarajutsinexa matacabi apo pevereverecejava. Yapëtanetsina Dioso vajanacapanepaejavanexa pexënato vajanacasivatëpaexae. Bajaraxuata vaxaitsi bejumaitsitsi Diosojavabelia: “Diosomë, ayajamatabëcuenenëmë bitso,” bejaitsi.

Pacuenia Pablo tovajëta Diosojavabelia Dioso pejumecovënëtsivi, Efeso tomarapijivi, yabara pelivaisi

¹⁵ Pacavënëlivaisitanetsi panenajamatabëcuenecopatsijava vajatuxanenë Jesucristojavabelia. Pacavënëlivaisitanetsinua paneasivajava daxita pamonaë Dioso

pejumecovênêtsivi. ¹⁶ Bajaraxuata itsa vajêtajê Diosojavabelia, pacatovajêtabiatsi. Nexata pexaniajamatabêcuene rajutabiabajê Diosojavabelia paxamê yabara. ¹⁷ Ayaijamatabêcuenenê Dioso, vajatuxanenê Jesucristo paxa. Bajaraponêjavabelia pacatovajêtabiatsi. Pacatovajêtabiatsi Espiritu Santo pejamatabêcueneta xaniavaetsia panevajênayabelia papecayapêtaeyaexanaponaenexa pacuenia Dioso jamatabêcueneitsi. Nexata Espiritu Santo pejamatabêcueneta panevajênayabelia pacayapêtaeyaexanaponaena pacuenia Dioso jamatabêcueneitsi. Pacayapêtaeyaexanaponaenana pacuenia Dioso nacatsitanajamatabêcueneitajêta. ¹⁸ Pacatovajêtabiatsinua Diosojavabelia Dioso papecajamatabêcueneitayotsinexa panevajênayabelia paneyapêtaeponaenexa pajamatabêcuene yabara Dioso pacajunata pijajivinexamê. Pacatovajêtabiatsinua Diosojavabelia paneyapêtaenexa xua Dioso pacarajutsijitsia, bitso ayaijamatabêcuenejava, matakabi apo peverevereaejava. Tajêvelia Dioso najumecapanepaeya jumaiti Dioso pijajivitsi vajanacarajutsinexa matakabi apo peverevereaejava. ¹⁹⁻²⁰ Pacatovajêtabiatsinua paneyapêtaenexa Dioso bitso piasaênêcuene. Vajanacayavenon-aenê vajanajamatabêcuene copatsivi bajaraponêjavabelia. Dioso bitso piasaênêcuene jivi tsitanajamatabêcueneitajêta pamatakabi Cristo asaêyaexanatsi petêpaecujinae. Nexata baja Cristo paxa Dioso athêbêtatsia pemuxuneneta ecaeyaexanatsi pecujuanenia penajuaevetsinexabeje daxitacuene. Nexata bajarapasaêta voxaiti ata Dioso nacayavenonapona. ²¹ Bajarapacuenia Cristo athêbêtatsia, paxa Dioso pemuxuneneta, ecaeyaexanatsi pecujuanenia Cristo pevetsinexa daxitacuene. Nexata daxitanacuanêjava pevetsivi matatoxenetsia aeconoxae jane baja daxitacuene Cristo pepo pevetsinê. Cristo baja daxitacuene eveta mapamatacabitaje. Pejanamatacabijavabelianexa ata evetsiana. ²² Dioso tocopatatsi Cristo daxitacuene pevetsinexa. Nexata Cristo pepo pitorobinê daxita pamonaenajamatabêcuene copata bajaraponêjavabelia. ²³ Daxita baja pamonaenajamatabêcuene copata Jesucristojavabelia, Dioso tanetsi Cristo pijajivi. Cristo nexata itoroba bajarapamonae. Nexata Cristo bajarapamonae yajavaponapona daxita mapanacuajavaje.

2

Pacuenia Dioso pijajivi, piasivaxae, capanepaejitsia yabara pelivaisi

¹ Dioso baja cajena pacajamatabêcueneaitavayaexana Jesucristo pejamatabêcueneta. Paxamê abaxê bajayata Dioso itsa apo pajumecovênêtsimê, naxuabiaya picani Diosovecua pajinavanapame pibisiacuene paneexanavanapanecononi yabara. Nexata pacuenia itsi petêpaevi, bajara picani pajamatabêcueneitsimê Diosojavabelia itsa abaxê Dioso apo pajumecovênêtsimê. ² Pacuenia Dioso apo pejumecovênêtsivi, pibisiacuene exanavanapa, bajara picani pacuenia paxamê ata bajayata pibisiacuene paexanavanapame. Pajumecovênêtavananapame picani êdovathi, ponê eveta pitaquirijamatabêcuene mapanacuataje. Aeconoxae dovathi jamatabêcueneasaêyaexanapona pamonaenajamatabêcuene itajêtsinexa daxitamatacabijavabelianexa vajanacaitaxutotsoniataenê, voxaiti bitso nacajitsipa. ⁵ Diosovecua naxuabiaya picani vajinavavotsoniata ena pibisiacuene vajeaxanecononi yabara, itsiata Dioso nacajamatabêcueneaitavayaexana, Jesucristo Dioso itsa asaêyaexanatsi petêpaecujinae. Bajarapacuenia Dioso nacatoexana vajanacaitaxutotsoniataexae. Nexata Dioso nacacapanepaena pibisiacuene vajeaxaneconimivecua. ⁶ Jesucristo petêpaecujinae, Dioso icatsia asaêyaexanatsi petêpaejavavecua. Nexata voxaiti Jesucristojavabelia vajanajamatabêcuene copatsixae, Dioso nacatane bevajanacayajavaasaêyaexanaevi. Dioso nacatanenua Jesús athêbêtatsia bevajanacayajavae-caevi daxitacuene vajanacabarêevetsinexa. ⁷ Bajarapacuenia Dioso nacatoexana vajanacatsitanajamatabêcuene itajêtsinexa daxitamatacabijavabelianexa vajanacajitsipae-cuene. Nacatsitanajamatabêcueneitajêtanua vajanacaitaxutotsoniataecuene Jesucristo vajanacasivatêpaexae. ⁸ Dioso cajena bitso pacajitsipa. Bajaraxuata Jesucristojavabelia itsa panajamatabêcuene copatame, Dioso pacacapanepaena panijaneconivecua. Bajarapacuenia Dioso papecacapanepaejavanexa, panijacuata apo panatoexanaemê. Biji rajane Dioso pejamatabêcueneta pacacapanepaena. ⁹ Itsajivi ata Dioso petonacuenebaponaponaejamatabêcuene, Dioso apo capanepaetsi tsane. Biji rajane Jesucristojavabelia penajamatabêcuene copatsixae, Dioso capanepaenatsi. Bajaraxuata itsajivi ata beayaijamatabêcuenejivi apo benatae Dioso pecapanepaejavanexatsi yapêtae ata. Apo bejumaitsinua: “Xanê Dioso tatonacuenebixae, nexata necapanepaena,” apo bejai. ¹⁰ Voxaiti

raja Dioso nacaexana. Nacaexanana Jesucristo pijajivitsi Dioso vajatoexanavana-paenexa pexaniacuene. Bajarapacuenia Dioso tajëvelia najamatabëxaina vajatoexanavanapaenexa.

Pacuenia Dioso pejumecovënëtsivi jamatabëcuenexanepanaeya jinavanapa Jesucristo pejamatabëcueneta yabara pelivaisi

¹¹ Panajamatabënapire pacuenia picani paxamë bajayata pajamatabëcuenetsimë tsavanapae itsa abaxë Dioso apo pajumecovënëtsimë. Paxamë apo pajudiovimë. Judiovi saicaya peperabëcaucubivitsi Dioso pijajivi penayapëtaenexa. Nexata judiovi jumai tsabiabi: “Vaxaitsi vajanacaperabëcaucubivi, Dioso pijajivitsi nayapëtanetsi,” jai tsabiabi. Paxamë pijinia apo pajudiovixae, judiovi paxamë yabara jumai tsabiabi: “Bajarapamonae apo peperabëcaucubivitsi. Nexata Dioso apo pijajivi,” jai tsabiabi judiovi paxamë yabara. ¹² Bajarapamatacabi abaxë apo pajumecovënëtsimë Cristo. Pasaicayavimë abaxë tsavanapae judiovi ataveca. Bajarapamatacabi abaxë apo payapëtaemë pacuenia Dioso pacayavenonaejitsia papecacapanepaenexa. Mapanacuata picani abaxë naxuabiaya Diosovecua pajinavanapame. “Pamatacabi tēpaenajë, pepacue naxuabianajë,” pajamatabëjamë tsabiabi. ¹³ Paxamë picani Diosovecua bitso naxuabiaya pajinavanapame. Itsiata baitsi jane aeconoxae baja Cristo papijajivimë. Cristo papecasivatëpaexae, aeconoxae baja payajavajinavanapame Dioso. ¹⁴ Paxanë pajudiovinë, paxamë apo pajudiovi atamë, Jesucristo pejamatabëcueneta daxitatsi Dioso nacamatabëcuenexanepanaeyaaxana namataenetsia vajanasivatsavanapaenexa. Jesucristo pejamatabëcueneta benacaemonetsi Dioso nacaexana. Jesucristo daxitatsi vajanacasiivatëpaexae, ajibi vajanayabaraitoyacuene vajanavecuanatsanaenexa. ¹⁵ Jesucristo cruzata itsa tēpa, copiarucaeyaexana baja namataenetsia vajanaitoyacuenemi. Tspijaji baja Jesucristo itsa tēpa, copiarucaeyaexana palivaisimi bajayata Dioso Moiséspijinëta najumecopata. Bajarapalivaisimi paxanë pajudiovinë bitso picani asaëyata pajumecovënëtanapajë. Nexata bajarapalivaisimi Jesucristo baja copiarucaeyaexana. Dioso Moiséspijinëta penajumecopatsilivaisi itsa pajumecovënëtanapajë, paxamë apo pajudiovimë apo pacabarajamatabëcuenexanepanaetsi. Aeconoxae baja Jesucristo vajajumecovënëtsixae, Jesucristo pijajivitsi nacaexana. Nexata baja Jesucristo pejamatabëcueneta nacanabarajamatabëcuenexanepanaeyaexana. ¹⁶ Jesucristo cruzata vajanacasivatëpaexae, copiarucaeyaexana baja namataenetsia vajanaitoyacuenemi. Nexata paxanë pajudiovinë, paxamë pijinia apo pajudiovi atamë, Cristo baja caebitsaëtotsi nacaexana pijajivinxatsi. Nexata baja Dioso jamatabëcuenexanepanaeya nacaetane.

¹⁷ Jesucristo patajopa mapanacuayabetsicaje. Nexata capatsica pexanialivaisi vajayapëtaenexa daxitatsi Dioso jamatabëcuenexanepanaeya vajanacataejava. Paxamë apo pajudiovimë bitso picani Diosovecua naxuabiaya pajinavanapame. Bajaraxuata Dioso pacatocopata Jesucristo pelivaisi panejumecovënëtsinexa. Paxanë pajudiovinë pajumecovënëtajë picani palivaisi bajayata Dioso Moiséspijinëta najumecopata. Nexata paxanë ata Dioso panetocopata Jesucristo pelivaisi patajumecovënëtsinexa. ¹⁸ Nexata Jesucristo daxitatsi vajanacasivatëpaexae, paxanë pajudiovinë, paxamë pijinia apo pajudiovi atamë, vaxa Dioso nacatocopata vajajonenexa Dioso pijatomarabetsia. Bajarapacuenia vaxa Dioso nacatocopata vajajonenexa pijatomarabetsia Espiritu Santo vajanacayavenonaexae. ¹⁹ Bajaraxuata apo pajudiovi atamë, aeconoxae baja Dioso panejumecovënëtsixae, bepasaicayavimë baja Dioso apo pacatae. Biji rajane itsamonae, Dioso pejumecovënëtsivi yajava, paxamë baja Dioso papeximë pacaexana Dioso pijanacuatsia panenajuajinavanapaenexa. ²⁰ Palivaisi bajayata Diosojumepaebivi profetavi tajëvelia yaquina, Jesucristo baja cajena pelivaisi, bajarapalivaisi pajumecovënëtamë baja. Paxanë ata Jesucristo papijajivinë, paapóstolevinë, paneitoroba patacatsipaebaponaenexa bajarapalivaisi, Jesucristo pelivaisi. Nexata bajarapalivaisi panejumecovënëtsixae, panajamatabëcuenecopabame baja Jesucristojavabelia papecacapanepaenexa. Bajaraxuata Dioso baja papeximë pacaexana. ²¹ Nexata baja itsamonae ata ayabitsaëtotoxaneto najamatabëcuenecopabapona Jesucristojavabelia. Nexata Cristo pejamatabëcueneta itorobaponatsi bajarapamonae. Daxita bajarapamonae Dioso baja pexi exanatsi. Nexata pacuenia Dioso tojitsipatsi, jinavanapa. ²² Bajara pijinia pacuenia paxamë ata, itsamonae yajava, pamonae Jesucristojavabelia penajamatabëcuenecopabivi, caebitsaëto Dioso papeximë pacaexana. Nexata Dioso pacayajavaponapona Espiritu Santo papecatsijamatabëcaexae.

3

Pacuenia Pablo itorobatsi pexanialivaisi, Jesucristo pelivaisi, petsipaebaponaenexa apo judiovijava yabara pelivaisi

¹ Paxamē apo pajudíovi atamē, Dioso papijajivixaemē, pacatovajētabiatsi Diosojavabelia. Xanē Pablonē, Jesucristo pijajivitonēnē. Nexata Jesucristo pelivaisi jivi tsi-paebabiabajā. Nexata Jesucristo pelivaisi jivi tatsipaebabiabixae, nenaneconitsiaexaneta penaneconitsivi pejebabiabibota. Jesucristo pelivaisi jivi tatsipaebabiabijavata, jumaitsinē tsabiabi: “Pamonae apo judíovi ata, itsa jumecovēnēta Jesucristo pelivaisi, bajarapamonae ata Dioso pijajivi,” janē tsabiabi paxamē yabara. Bajarapacuenia Jesucristo pelivaisi jivi tatsipaebabiabixae, penaneconitsivi pejebabiabibota tavēna judíovi neeta. ² Bepayapētaneme xanē Dioso taneitorobicuene patacatsipaebinxea apo pajudíovi atamē Dioso papecaitaxutotsoniataejava. ³ Apo pajudíovi atamē, Dioso papecaitaxutotsoniataejava tayapētaexana, Dioso baja cajena neyapētaexana. Dioso papecaitaxutotsoniataexae papecacapanepaejavanexa ata tayapētaexana, Dioso baja cajena neyapētaexana. Nexata Dioso papecaitaxutotsoniataejava paneyapētaexana, pacatoyaquinarutetatsi caelivaisiyobeje saya. ⁴ Itsa palebianame, payapētaname pacuenia Dioso neyapētaexana ėpajudíovinē Dioso apo patanitaxutotsoniataejava. Payapētanemenua pacuenia Dioso neyapētaexana, apo pajudíovi atamē, Dioso papecaitaxutotsoniataejava. ⁵ Bajayata abaxē itsajivijavabelia ata Dioso apo yapētaexanae, apo pajudíovi atamē, Dioso papecaitaxutotsoniataejavanexa. Aeconoxae baja paxanē Dioso papijajivinē, paapóstolevinē, Dioso paneyapētaexana, apo pajudíovi atamē, Dioso papecaitaxutotsoniataejava. Profetavijavabelia ata Dioso yapētaexana, apo pajudíovi atamē, Dioso papecaitaxutotsoniataejava. Aeconoxae baja bajarapacuenia Dioso paneyapētaexana Espiritu Santo pejamatabēcuena. ⁶ Xua picani itsajivijavabelia ata Dioso apo yapētaexanae, bajaraxua maitsije. Paxanē pajudíovinē, itsa pajumecovēnētājē pexanialivaisi, Jesucristo pelivaisi, panecapanepaena Dioso. Bajara pijinia pacuenia paxamē ata, apo pajudíovi atamē, itsa pajumecovēnētame pexanialivaisi, Jesucristo pelivaisi, pacacapanepaena Dioso. Pajudíovinē, apo pajudíovi atamē, daxitatsi benacaemonaetsi nataenatsi. Jesucristo pelivaisi vajajumecovēnētsixae, daxitatsi Dioso nacarajutsiana xua Dioso najumecapanepaeya nacarajutsiapaeba.

⁷ Piasaēnē Dioso taneitaxutotsoniataexae, netocopata Jesucristo pelivaisi tatsipaebaponaeaxa daxitajivijava. Dioso necaēėpaeyaexananua xaniavaetsia jivi tatsipaebaponaeaxa bajarapalivaisi. ⁸ Xanē itsiata bevelijamatabēcuenenēnē nataniji daxita Dioso pejumecovēnētsivivecu. Itsiata baitsi jene mapapexaniacueneje Dioso netocopata. Dioso netocopata apo pajudíovimējava patacatsipaebaponaeaxa pexanialivaisi, Jesucristo pelivaisi. Nexata pacatsipaebaponatsi ayaicuenia Jesucristo vajanacayavenonaponaejavanexa. ⁹ Dioso nitoroba patacatsipaebaponaeaxa, apo pajudíovi atamē, Dioso papecacapanepaejavanexa. Dioso daxitacuene pexanaenē mapanacuataje. Dioso cajena tajēvelia najamatabēxaina paxamē ata, apo pajudíovi atamē, papecacapanepaenexa. Itsiata itsajivijavabelia ata Dioso apo yapētaexanae, apo pajudíovi atamē, Dioso papecacapanepaejavanexa. ¹⁰ Bajarapacuenia Dioso pacacapanepaena, apo pajudíovi atamē, petsitanajamatabēcuene itajētsinexa athēbētatsia pevetsivijavabelia. Nexata athēbētatsia pevetsivi itsa nacataena daxitatsi Dioso vajajumecovēnētsivi, pajudíovinē, apo pajudíovi atamē, benacaemonaetsi vajanajuajinavanapaejava, athēbētatsia pevetsivi yapētaena bitso Dioso peyapētaenēcuene daxitacuene pexanaenexa. ¹¹ Pacuenia Dioso tajēvelia copiaya najamatabēxaina, mapanacua pexanaevajānaeya ataje, bajarapacuenia baja Dioso exanaevereta. Tspaji baja Dioso itorobica vajatuxanenē Jesucristo vajanacasivatēpaenexa cruzata. ¹² Vaxaitsi baja najamatabēcuene copatatsi Jesucristojavabelia vajanacapanepaenexa. Bajaraxuata Diosojavabelia vājētabiatsi ajumejunavijibia. ¹³ Bajaraxuata Diosojavabelia asaēyata pacatovajētabiatsi patanesivajamatabēcuene cueranaeyanivamē abaxē naneconitsia taponaponaejava penaneconitsivi pejebabiabibota. Jesucristo pelivaisi jivi tatsipaebijavata, jumaitsinē tsabiabi: “Pamonae apo judíovi ata itsa jumecovēnēta Jesucristo pelivaisi, bajarapamonae ata Dioso pijajivi,” janē tsabiabi paxamē yabara. Bajarapacuenia Jesucristo pelivaisi jivi tatsipaebabiabixae, penaneconitsivi pejebabiabibota tavēna judíovi nenaneconitsiaexaneta. Bajaraxuata panesivajamatabēcuenebarēyamēre naneconitsia taponaponaejava penaneconitsivi pejebabiabibota.

Pacuenia Pablo Diosojavabelia tovajēta Dioso pejumecovēnētsivi yabara pelivaisi

¹⁴ Itsa najamatabēnapitabiabajā, apo pajudíovi atamē, Dioso papecacapanepaejavanexa, nexata tamatabacabēta nucabiabajā asaēyata patacatovajētsinexa vajatuxanenē Jesucristo paxa Diosojavabelia. ¹⁵ Daxita Dioso pijajivi, pamonae athēbētatsia jinavanapa, pamonae ata mapanacuataje jinavanapa, daxita bajarapamonae Dioso tanetsi benacaemonae. Caenē paxa exana Dioso. ¹⁶ Dioso baja cajena bitso piasaēnē. Ayajamatabēcuene pexainaenē. Bajaraxuata pacatovajētabiatsi Diosojavabelia Dioso pesaēta papecajamatabēcuene asaēyaexanaenexa Espiritu Santo

pejamatabëcueneta. ¹⁷ Pacatovajëtabiatsinua Jesucristo papecatsijamatabëcaenexa panesivanajamatabëcopatsixae bajaraponëjavabelia. Pacatovajëtabiatsinua bitso paneasivanexa itsamonae ata, pamonaie Dioso pejumecovënëtsivi. ¹⁸ Pacatovajëtabiatsinua daxita Dioso panejumecovënëtsivi panejamatabëcuenepätaenexa Jesucristo bitso papecaasivajava. ¹⁹ Pacatovajëtabiatsinua panijacuata xaniavaetsia paneypätaenexa Jesucristo vajanacaasivajava. Jesucristo vajanacaasivajava, bitso pexaniacuenae, apo vajayapëtaecapanepaejava xaniavaetsia vajayapëtaenexa. Nexata itsa payapëtaename Jesucristo vajanacaasivajava, paxainaename pajamatabëcuene Dioso pacatojitsipa.

²⁰ “Diosomë, bitso ayaijamatabëcuenenëmë,” jaitsi vaxaitsi Diosojavabelia. Bajarapacuenia jumaitsitsi tsipaji bitso Dioso pecaëjëpaenëtsi vajanacayavenonaenexa. Dioso caëjëpatsi vajanacatoexanaenexa vajavajëtsicuenia. Vajanajamatabëxainaejava ata matatoxenetsia, Dioso caëjëpatsi vajanacatoexanaenexa. Dioso pesaëta nacayavenonabiaba. ²¹ Dioso pejumecovënëtsivi Dioso peyavenonaponaexaetsi, itsamonaejavabelia tsipaebavanapa Dioso bitso ayaijamatabëcuene pexainaenëcuene. Jesucristo ata itsa ponapona mapanacuataje, nexata Dioso tsitanajamatabëcueneitajëta jivijavabelia Dioso bitso ayaijamatabëcuene pexainaenëcuene. Bajaraxuata daxitajivi bejumai tsabiabi Diosojavabelia: “¡Diosomë, bitso ayaijamatabëcuenenëmë!” bejai tsabiabi Diosojavabelia daxitamatacabijavabelianexa. Bajara itsi tsane.

4

Pacuenia Espiritu Santo pejamatabëcueneta daxita Dioso pejumecovënëtsivi najamatabëcuenejëpaeya jinavanapaena yabara pelivaisi

¹ Naneconitsiaponaponajë majotaje, penaneconitsivi pejebabiabibota, tajumecovënëtsixae vajatuxanenë Jesucristo taneitorobicuenia. Asaëyata pacamuxujibotsi panejinavanapaenexa pacuenia Dioso pacatojitsipa Dioso papecajunatsivi papijajivinxamë. ² Itsamonaevetua bevelijamatabëcuenevi nataeya pajinavanapare. Panajamatabëxainarenua pexaniajamatabëcuene daxitajivijavabelia. Pajamatabëcuenesaëmërenua tsavanapae bajayajebi, itsamonae pacaitsacueniababiabi ata. Namataenetsianua panayavenonabiabare namataenetsia panenasivaxae. ³ Pajamatabëcuenesaëmëre tsavanapae najamatabëcuenejëpaeya panejinavanapaenexa. Bajaraxua yabara Diosojavabelia panatovajëtabiabare papecacayavenonaenexa Espiritu Santo. Nexata nabarajamatabëcuenexanepanaeya pajinavanapaename. ⁴ Jesucristojavabelia vajanajamatabëcuenecopatsixae, vaxaitsi baja nexata caenë Jesucristo pijajivitsi. Xainatsi baja caeEspiritu Santo Dioso vajanacajunatsivi. Bajaraxuata caejamatabëcuene xainavanapatsi. Evetavanapatsi pacuenia Dioso najumecapanepaeya jumaitsi vajanacacapanepaenexa. ⁵ Caenë rabaja vajatuxanenë Jesucristo. Daxitatsi najamatabëcuenecopatatsi caenëjavabelia. Nacabautisabanua caenë Jesucristo pevënëta. ⁶ Xainatsi caenë vaxa Dioso. Caenë Dioso daxitatsi vajanacanamatatorobinë. Dioso pijajivitsi, daxitatsi, nacayavenona. Nacayajavaponaponua.

⁷ Caejivitsi canacujitsia, Cristo pejitsipaecuenia nacajamatabëcuene caëjëpaeyaexanapona pecovëta vajatonacuenebavanapaenexa vajanacatorobicuenia. ⁸ Tsipaji baja cajena Dioso pejumelivaisibaxutota tajëvelia jumaitsi Jesucristo yabara mapacueniaje:

Ayaibitsaëttoxaneto pitoyavitsi pepuajamatabëcueneamoneyabi, athëbëabetsia naviatsiania. Pijajivi pijinia pepuajamatabëcuenecaëjëpaeyaexanae pecaëjëpajamatabëcuenetsi pecovëta petonacuenebavanapaenexatsi, naviatsiania, jai tajëvelia Dioso pejumelivaisibaxutota Jesucristo yabara.

⁹ Bajarapacuenia Dioso pejumelivaisibaxutota Jesús yabara tajëvelia jumaitsi. Tsipaji Jesús patsijitsiatsica mapanacuayabetsicaje. Bajaraxuacujinae icatsia Jesús naviatsijitsia athëbëabetsia. Mapanacuaje bevelianacua saya Dioso pijanacuavevua. ¹⁰ Ponë yabara Dioso pejumelivaisibaxutota bajarapacuenia tajëvelia jumaitsi, patsica baja mapanacuayabetsicaje. Bajaraxuacujinae icatsia bajaraponë naviatsia baja tajënacuyabetsia. Bajaraxuacujinae Jesucristo itorobica Espiritu Santo. Nexata daxitanacuanëjava Espiritu Santo yajavaponapona daxita Dioso pejumecovënëtsivi. ¹¹ Nexata Dioso pejumecovënëtsivi, caejivi canacujitsia, Espiritu Santo jamatabëcuene caëjëpaeyaexanapontsi saicayacuenia. Itsamonaie Espiritu Santo jamatabëcuenecaëjëpaeyaexanatsi apóstolevinexa Jesucristo pexanaejavanë pevajunupaebaponaenexa. Itsamonaie pijinia Espiritu Santo jamatabëcuenecaëjëpaeyaexanatsi peypätaenexa pajamatabëcuenelivaisi xaina Dioso pejumelivaisi. Nexata tsipaeba itsamonaiejavabelia. Itsamonaie pijinia Espiritu Santo jamatabëcuenecaëjëpaeyaexanatsi petsipaebaponaenexa apo peypätaevi abaxë pexanialivaisi, Jesucristo pelivaisi. Itsamonaie pijinia Espiritu Santo jamatabëcuenecaëjëpaeyaexanatsi

pevetsinexa Dioso pejumecovênêtsivi. Jamatabêcuene caējēpaeyaexanatsinua xaniavaetsia peyapêtaeyaexanaenexa Dioso pijacuene. ¹² Bajarapacuenia Espiritu Santo, daxita Dioso pejumecovênêtsivi, jamatabêcuene caējēpaeyaexanatsi petonacuenebavanapaenexa Dioso pijacuene. Nexata daxita Dioso pejumecovênêtsivi, caejivi canacujitsia, ajamatabêcuenesaē tsaonaē pevājēnaeyabelia. ¹³ Nexata belia daxitatsi bajarapacuenia najamatabêcuenejēpaeya jumecovênêtsianatsi Dioso. Jamatabêcuenejapêtaenatsinua xaniavaetsia vajatuxanenē Jesucristo, Dioso pexênato. Nexata daxitatsi Espiritu Santo nacajamatabêcuene caējēpaeyaexanaena Dioso vajajumecovênêtsinexa. Nacajamatabêcuene caējēpaeyaexanaenana xaniavaetsia Dioso vajatojinavanapaenexa. Nexata pacuenia Jesucristo jamatabêcueneitsi, bajara vaxaitsi ata jamatabêcueneitsi tsane. Nexata jinavanapaenatsi pacuenia Dioso nacatojitsipa. ¹⁴ Nexata pacuenia pejevaxi caejamatabêcuene apo najamatabêxainae, bajara vaxaitsi apo jamatabêcueneitsi tsane. Itsajamatabêcuene apo vecuanajamatabêxainatsi tsane, palivaisi baja jumecovênêtavanapatsi. Nexata itsamonaē najumetsênêtsilivaisi bepxaniajailivaisicuenia nacatsipaebi ata tsane vajanacayamaxêitojorobinexa picani, itsiata apo nacayamaxêitojorobi tsane. ¹⁵ Nexata itsamonaējavabelia itsa tsipaebaponatsi pexaniajailivaisi, bajarapamonae asivaya betanetsi. Pacuenia Cristo vajanacaitorobinē jamatabêcueneitsi, bajara vaxaitsi ata vajajamatabêcueneitsinexa, benatojitsipatsi Cristo vajajamatabêcuenejēpaenexa. ¹⁶ Daxitatsi Cristo pelivaisi vajajumecovênêtsivi, caenē Cristo pijajivitsi. Vajaperabêtota caevitoyo canacujitsia exanapona pacuenia Dioso tocopatatsi. Bajara pijinia pacuenia vaxaitsi ata, caejivitsi canacujitsia, Cristo nacatocopatapona vajatonacuenebavanapaenexa pacuenia nacatojitsipa. Nexata namataenetsia nayavenonaeya natonacuenebianatsi. Namataenetsianua nasivatsi tsavanapae tsane. Bajarapacuenia nexata jamatabêcuenevitsabaponaenatsi Dioso vajajumecovênêtsijava.

Pacuenia Cristo pijajivi pejanajamatabêcuene xaina yabara pelivaisi

¹⁷ Jesucristo taneitorobixae, mapacuenia pacajumaitstijitsiatsije. Pêtsa baja pajinavanapame pacuenia jinavanapa Dioso apo peyapêtaevi. Dioso apo pejumecovênêtsivi najamatabêxainavanapa pexanaenexa piamatamobicuene Diosojavabelia. ¹⁸ Dioso apo pejumecovênêtsivi ajamatabêcueneitaquiri tsavanapae. Tsiipaji apo yapêtae Dioso. Bitso saya ajamatabêcuenetaja. Bajaraxuata Dioso pejitsipaecuenia apo tojinavanapae. Diosovecua naxuabiaya jinavanapa. ¹⁹ Nexata apo yapêtae piauracuene. Casaē bitso pexanaenexa daxita xua pibisiacuene. ²⁰ Itsiata baitsi jane paxamē itsa pajumecovênêtame Jesucristo pelivaisi, apo pacaitorobi pibisiacuene paneexanaenexa. ²¹ Pajumetaneme baja cajena Jesucristo pelivaisi. Jesucristo pelivaisi panejumecovênêtsixae, nexata Jesucristo pijajivi pacatsipaeba pexaniajailivaisi pacuenia copiaya Jesucristo tsipaebatsi. ²² Nexata pacopabare panijaperujujamatabêcuene. Bajarapajamatabêcuene bajayata abaxē Dioso itsa apo pajumecovênêtsimē, pacaitorobabiaba pibisiacuene paneexanaenexa. Panijaperujujamatabêcuene cajena bitso abeje. Bajarapajamatabêcuene picani pacayamaxêitojorobabiaba panejitsipaecuenia pibisiacuene paneexanaenexa. ²³ Paxamē Diosojavabelia panajamatabêcuenejēpaenepênēyorore. Papejanajamatabêcuenevimē panaxanare. ²⁴ Pacuenia Dioso jamatabêcueneitsi, bajara paxamē ata pajamatabêcueneitsimēre. Nexata jivi xaniavaetsia patsitajinavanapaeneme pacuenia Dioso pacatojitsipa.

²⁵ Bajaraxuata pêtsa baja panajumetsênêtame. Pacaenēmē canacujitsia namataenetsia panatsipaebare pexaniajailivaisi. Tsiipaji daxitatsi caenē Jesucristo pijajivitsi.

²⁶ Itsa panabaraanaepaname, pêtsa pibisiacuene panaexaname panenabaraanaepanaejavata. Pêtsa panasivajamatabêcueneitsitecame itsamatacabijavabelia ata. ²⁷ Tsiipaji itsa panasivajamatabêcuene tsitecaejitsipame, nexata dovathi pacayamaxêitojorobijitsipa. Nexata pibisiacuene paexanaejitsipame.

²⁸ Pajivi penacobetoxotsijivi, copatsi baja penacobetoxotabiabijava. Nacuenebi pepitsinexa xua namatavenona, peyavenonaenexanua bepejiobivijavabelia.

²⁹ Pêtsa pacuaicuaijamē pibisialivaisi. Biji rajane pacuaicuaijamē pexanialivaisi. Pexanialivaisi itsa pacuaicuaijamē tsane, nexata papecajumetaevi pajamatabêcuenejēpaenonaeneme. Tsiipaji paepatota jamatabêcuenefaeana, itsa pacajumetaena, pacamuxunajamatabêcuenesaē tsane. ³⁰ Pêtsa itsacuene paexaname Espiritu Santo papecatojitsipaecuenivecua panejamatabêcuenebejiobitsiyanima Espiritu Santo. Dioso pijaEspiritu Santo papecatsijamatabêcaexae, panayapêtaneme pepacuene Dioso papijajivicuenemē. Nexata Dioso pacacapanepaena pamatacabi Dioso pijajivi capanepaena mapanacuavecuaje.

³¹ Daxita pibisijamatabêcuene pacopabare. Pacopabarenua baja, itsajivi itsa pacaitsacueniaba, bajayajebi panejamatabêtsitecabiabijava. Pêtsa bajayajebi pajamatabêtsitecame paneanaepanaejava. Bepijia pajamatabêcaevare. Pacopabarenua baja

paneajamatabêcuenebejejava ata. Pacopabarenaua baja panenabaraanaepanabiabijava ata. Pacopabarenaua baja itsamonae pibisiacuenia panebijataeyabiabijava ata. Pacopabarenaua baja itsamonae pibisiacuenia panebaracuaicuajaitsabiabijava ata. ³² Biji rajane pexaniajamatabêcuene paxainare. Namataenetsia panaitaxutobejioabiataema. Pacuenia Jesucristo pejamatabêcueneta Dioso pacabarajamatabêcuenexanepana pibisiacuenepexanaevi ata, bajara pijinia pacuenia paxamê ata panabarajamatabêcuenexanepanare, paxamêyajuvênêvi pacaitsacueniabi ata.

5

Pacuenia Dioso pexi bejinavanapa yabara pelivaisi

¹ Paxamê Dioso papeximê. Pacuenia Dioso jamatabêcueneitsi, bajara paxamê ata pajamatabêcueneitsimêre tsavanapae. ² Pacuenia bitso Cristo nacaasiva, bajara pijinia pacuenia paxamê ata bitso pasivamêrê tsavanapae itsamonae ata. Bajayata judiôvi Diosojavabelia pijaneconi itsa xaina, oveja pebito beyaxuababiaba. Nexata judiôvi ofrendacuenia ovejavi rajutabiaba Diosojavabelia pijaneconi Dioso pevecuaajibiaexanaenexatsi. Bajara pijinia pacuenia Cristo bitso vajanacaasivaxae, nacopata pebeyaxubinxatsi vaxaitsi vajaneconi vajanacavecuajibiaexanaenexa. Bajarapacuenia Cristo bitso vajanacaasivaxae, itsa nacopata vajanacasivatêpaenexa, nexata paxa Dioso bitso sivajamatabêcuenebarêyatsi.

³ Paxamê rabaja Dioso papijajivimê. Bajaraxuata pêtsa baja paexaname daxita xua pibisiacuenê. Pêtsa panajamatabêxainamenua pibisiacuenê paneexanaenexa panavitota. Pêtsa panajamatabêxainamenua bitso panenaxainaeyabinexa daxitacuenê mapanacuapijicuenêje.

⁴ Pêtsa panabarêcuaicuajiamênuu piauracuenê yabara ata. Pêtsa panabarêcuaicuajiamênuu saya jema natsiquejemalivaisixi ata. Tspijaji apo pexanepanaecuenê. Biji rajane Diosojavabelia pexaniajamatabêcuene parajutabiabianame.

⁵ Payapêtaname rabaja pexaniajamata mapalivaisije. Pajivi daxita pibisiacuenê exana, apo jone tsane Dioso pijanacuayabetsia. Ponê jaita itsava pijavavecuu, pova pijinia jaita itsanê pamonavecuu, apo jone tsane Dioso pijanacuayabetsia. Pamonae ata bitso jitsipa pexainaenexa daxitacuenê mapanacuapijicuenêje, apo jone tsane Dioso pijanacuayabetsia. Pamonae bitso jitsipa pexainaenexa daxitacuenê mapanacuapijicuenêje, jamatabêcuenejêpa pamonaevajêcabiaba jumapecataeya pexanaenêanêjavabelia. Bajarapamonae jamatabêcuenejêpa tspijaji bitso jitsipa saicayacuenê Dioso vecua. ⁶ Pêtsa pacayamaxêitojoroba itsajivi ata paxamê ata paneexanaenexa bajarapitsipibisiacuenê. Tspijaji Dioso ayaicuenia naneconitsiaexanaena pamonaev Dioso apo pejumecovênêtsivi, bajarapitsipibisiacuenê pexanaevi. ⁷ Bajaraxuata pêtsa payajavajinavanapame pibisiacuenê pexanaevi.

⁸ Paxamê picani bajayata pajamatabêcueneaitaquirimê tsavanapae itsa abaxê apo payapêtaemê pexanialivaisi, Jesucristo pelivaisi. Itsiata baitsi jane aeconoxae baja Jesucristojavabelia panenajamatabêcopatsixae, Dioso baja pacajamatabêcueneitayota. Bajaraxuata pajinavanapare Dioso pejitsipaecuenia, pacuenia Dioso pijajivi jinavanapa.

⁹ Dioso baja papecajamatabêcueneitayotsixae pexanialivaisita, paexanavanapare êpexaniacuenê. Pacanaêjêtaaponarenuu êpexaniajaicuenê paneyapêtaenexa, xaniaveysia panejinavanapaenexa Dioso pejitsipaecuenia. ¹⁰ Panevajênaeyabelia pacanaêjêtaaponare paneyapêtaenexa xua yabara Dioso pacasivajamatabêcuene barêyajitsia. Nexata itsa payapêtaname xua yabara Dioso pacasivajamatabêcuene barêyajitsia, bajaraxua tsiteca asaêyata panevajênaeyabelia paexanavanapaname. ¹¹ Dioso apo pejumecovênêtsivi pibisiacuenê itsa exanavanapa, pêtsa panaexaname bajarapapibisiacuenê. Biji rajane paitavetsianame bajarapamonae pibisiacuenê pexanaeyaniva Dioso pitabarata. ¹² Xua bajarapamonae exana muetsia, bajaraxua bitso pibisiacuenê. Nexata itsajivi itsa cuenetaejitsipatsi bajaraxua pexanaejava, bajarapajivi bitso ajumeura tspipae juya petsipaebinxeta itsamonaejavabelia. Tspijaji bitso pibisiacuenê xua muetsia exana bajarapamonae. ¹³ Itsiata baitsi jane bajarapamonae itsa paitavetsianame Dioso pejumelivaisita, nacueneyapêtaena bajarapamonae bitso pibisiacuenê pexanaejava. ¹⁴ Bajaraxuata pina bajarapamonae yabara, itsamonae Dioso pijajivi jumaitsi mapacueniaje:

Jamatejema saya pajinavanapame, pibisiacuenê paexanavanapae atamê. Bajaraxuata Dioso vecua naxuabiaya pajinavanapame. Pacopabare baja pitaquirijamatabêcuene. Nexata Cristo pejamatabêcueneta panijaneconivecuu Dioso pacacapanepaena. Pacajamatabêcueneitayotsiana,

jai pina itsamonae Dioso pijajivi. ¹⁵ Nexata baja xania tsane. Panayajivitaema pibisiacuenê xaniavaetsia panejinavanapaenexa. Pêtsa pajinavanapame pacuenia bajinavanapa Dioso apo peyapêtaevi. Biji rajane

pajinavanapare pacuenia bajinavanapa bitso peypapētaevi Dioso pijacuene. ¹⁶ Dioso papecaitorobicuenia xaniavaetsia patojinavanapare daxitamatacabijavabelianexa. Pamux-ujjobabiabare itsamonae ata Cristo pelivaisi pejumecovēnētsinexa. Tsipaji mapanacuapijivije, Dioso apo pejumecovēnētsivi, ėpibisiacuene exanavanapa. ¹⁷ Pētsa pajinavanapame pacuenia Dioso apo peypapētaevi jinavanapa. Pacaasaēmēre tsavanapae Dioso panejumecovēnētsijava, pacuenia Dioso pacatojitsipa paneexanavanapaenexa. ¹⁸ Pētsa paitajibimē tsabiabi. Tsipaji bajarapacuenē Diosovecua pacanaxuabiaexanaejitsipa infernojavabelia. Biji rajane panacopatabiabare Espiritu Santo papecatsijamatabēvēnēcaenexa, Espiritu Santo papecaitorobicuenia paneexanabiabinexa. ¹⁹ Namataenetsia panatsipae-babiabare vajatuxanenē ayaijamatabēcuene pexainacuene. Bajarapacuenia namataenetsia itsa panatsipae-babiabianame, daxita panejamatabēĕthētovetsina panaxēanabiabianame pavajianē rubena Salmosbaxutota. Panaxēanabiabianamenua himnobaxutota ata pavajianē rubena. Panaxēanabiabianamenua pavaji ata Espiritu Santo jemata pacanaxēanaeyaexanaena. ²⁰ Pajumaitsimē tsabiabi tsane Diosojavabelia: “Xanepana rabaja. Tsipaji bitso pexaniacuene panetoexaname,” pajamē tsabiabi tsane daxitacuene yabara vaxa Diosojavabelia vajatuxanenē Jesucristo pevēnēta. Bajarapacuenia Diosojavabelia pajumaitsimē tsabiabi tsane pexanepanaecuene yabara, apo pexanepanaecuene ata yabara.

Pacuenia muxujjobatsi penapitsijivibeje yabara pelivaisi

²¹ Padaxitamē namataenetsia panajamatabēcueneevere, xua jamatabēpanaitorobame, namataenetsia panenaitorobiabinexa Cristo panejumecovēnētsivixae.

²² Paxamē papetirivimē, pacuenia yayiataeya pajumecovēnētabiabame vajatuxanenē Jesucristo papecaitorobicuenia, bajara pijinia pacuenia yayiataeya pajumecovēnētabiabare paneamonajivi ata. ²³ Pacuenia Cristo Dioso tocopatatsi daxita vaxaitsi Dioso vajajumecovēnētsivi vajanacaitorobinexa, bajara pijinia pacuenia pebi Dioso tocopatatsi pijava pitorobinexa. Cristo nacopata pebeyaxuabinexatsi vajanacapanepaenexa daxita vaxaitsi vajanajamatabēcuene copatsivi Cristojavabelia. Daxitatsi caenē Cristo pijajivitsi. ²⁴ Nexata bejumecovēnētavanapatsi pacuenia nacaitorobapona Cristo. Bajara pijinia pacuenia paxamē ata, papetirivimē, bepajumecovēnētavanapame daxita pacuenia pacaitoroba paneamonajivi.

²⁵ Paxamē pijinia papebijivimē, pasivamēre panijavajivi. Bepaasivamē panivajivi pacuenia daxitatsi Cristo nacaasiva daxita Dioso vajajumecovēnētsivi. Vajanacaasivaxae, Cristo nacopata pebeyaxuabinexatsi vajanacapanepaenexa vajaneconivexa. ²⁶ Bajarapacuenia Cristo exana caenē Cristo pijajivitsi vajanacaexanaenexa. Nexata baja Cristo vajanacajamatabēcuene xuirajibiaexanaejava, najamatabēcueneitajētatsi vajanacabautisabijavata. Vajajumecovēnētavanapaexae Dioso pejumelivaisi, nacaajamatabēcuene xuirajibiaexanapona. ²⁷ Bajarapacuenia Cristo exana daxita Dioso vajajumecovēnētsivi itsamatacabi vajanubenaenexa Cristo pitabarata. Nexata itsamatacabi nubenaenatsi Cristo pitabarata vajaaneconijibivi, Dioso vajanacajamatabēcuenexaniavaetsivi. ²⁸ Nexata pebijivi bitso biasiva pijavajivi. Pacuenia pijacuata naperabēasiva, bajarapacuenia biasiva pijavajivi. Nexata ponē asiva pijava, bajaraponē asiva pijava pacuenia pijacuata naperabēasiva. ²⁹ Itsajivi ata apo naperabēitoya. Biji rajane xaniavaetsia naperabēeveta. Bajara pijinia pacuenia Cristo ata nacaeveta daxita Dioso vajajumecovēnētsivi. ³⁰ Tsipaji vaxaitsi Cristo pijajivitsi, ayabitsaēto atatsi, becaejivitsi Dioso nacatane. ³¹ Nexata nayapētane pexaniajaicuene mapacueneje. Pebi petiriva itsa pita pijavanexa, naexanabeje becaejivi peperabētocuenia. Tsipaji Dioso pejumelivaisibaxutota jumaisi mapacueni-aje: “Pebi itsa nacojioba, paxavecua, pena atavecua, havecuanatsata pijavajavabelia. Nexata anijajivimibeje becaejivicuenia naexanabeje,” jai Dioso pejumelivaisibaxutota. ³² Mapalivaisije bitso ayapēbeje vajajumeyapētaenexa. Itsiata baitsi jane comparacióncuenia nacayapētaeyaexana. Cristo vajanacaasivaxae, vaxaitsi Cristo pijajivitsi Dioso nacatane becaenē Cristo peperabētotsi. ³³ Bajarapalivaisi comparacióncuenia pacayapētaeyaexana nexata paxamē, pacanenēmē canacujitsia, paneasivanexa panijavajivi. Nexata panijavajivi pasivamēre. Pacuenia panijacuata panaperabēasivamē, bajara pijinia pacuenia panijavajivi pasivamēre. Panijavajivi ata pijinia bepacayaiyatane.

6

¹ Paxamē papeximē, Dioso panejumecovēnētsivixae, pajumecovēnētabiabare paneaxajivi, paneenajivi ata. Bajarapacuenia panijamonae pajumecovēnētabiabare. Tsipaji bajarapacuenia Dioso pacatocopata panejumecovēnētabiabinexa panijamonae. ²⁻³ Dioso pejumelivaisibaxutota jumaisi mapacueni-aje: “Yaiyataema axa. Yaiyataema ena ata nejamatabēcuenebarēyanexa, neponaponaenexanua bajayajebi mapanacuataje,” jai Dioso pejumelivaisibaxutota. Bajarapalivaisi Dioso itsa najumecovēnētsivixae,

yajavanajumecopata pacuenia Dioso yavenonaejitsia pajivi jumecovēnēta bajarapalivaisi. Itsalivaisianē copiaya Dioso najumecopatsi ata, apo yajavanajumecopatsi pacuenia yavenonaejitsia pajivi jumecovēnēta bajarapalivaisianē. Nexata matapania mapalivaisitaje Dioso yajavanajumecopata pacuenia yavenonaejitsia pajivi jumecovēnēta bajarapalivaisi.

⁴ Paxamē panexi panexinaevi, anaeyacuenia pētsa panexi paitorobabiabame papecabaraanaepanaeyaniva. Biji rajane xaniavaetsia panacoxivitsare papecajumecovēnētabiabinexa paneitorobijava. Pacujarubarenuia Dioso pejumelivaisi pejumecovēnētsinexa.

⁵ Paxamē pijinia itsamonaē papijajivimē, dajubicuenia papecacanajetsivi, itsamonaē amoneya panetonacuenebavanapaenexa. Patoexanabiabare pacuenia panijatuxanevi pacaitoroba. Payaiyataema panijatuxanevi. Cujunaviaya panijatuxanevi patonacuenebabiabare asaēyata. Pacuenia Cristo panejitsipaexae, xaniavaetsia patonacuenebabiabame Cristo pijacuene, bajara pijinia pacuenia xaniavaetsia panijatuxanevi patonacuenebabiabare.

⁶ Xaniavaetsia panijatuxanevi patonacuenebabiabare daxitamatacabi canacujitsia pacuenia patonacuenebijitsipame Cristo. Pētsa matapania itsajota pacanaitaxutocaeveta panijatuxanevi, asaēyata patonacuenebame papecasivabarēyanexa panetonacuenebijava yabara. Patoexanabiabare panijatuxanevi pacuenia Dioso pacatojitsipa panetoexanaenexa daxita panejamatabēēthētovetsina. ⁷ Jamatabēcuenebarēyaya patonacuenebavanapare panijatuxanevi. Xua panijatuxanevi patonacuenebavanapame, bajaraxua yabara pasivajamatabējumaitsimēre: “Maxuaje nacuenebajē apo ētajatuxanenēnexa. Taniji pepo tajatuxanenē, Cristo, betatonacuenebijava,” pasivajamatabējamēre panijatuxanevi panetonacuenebijava yabara. ⁸ Payapētaneme rabaja mapacueneje. Pajivi pexaniacuene toexana itsamonaē ata, bajarapajivi matamotsianatsi Dioso. Pamonaē ata dajubicuenia canajetatsi itsamonaē amoneya petonacuenebabiabinexa, bajarapamonaē ata Dioso matamotsianatsi pexaniacuene itsa toexana itsamonaē ata. Pamonaē ata apo pecanajetsivitsi, bajara pijinia pacuenia bajarapamonaē ata Dioso matamotsianatsi pexaniacuene itsa toexana itsamonaē ata.

⁹ Paxamē pijinia papijatuxanevimē, pacamuxujibatsi mapacueniaje. Xaniavaetsia pataema panijajivi, papecatonacuenebivi. Pētsa anaeya patiobabiabame panijajivi asaēya papecatonacuenebabiabinexa. Pacanaējēre pacuenia paxamē ata panijatuxanenē Dioso eca athēbētatsta. Pamonaē ata apo pecanaia. Bajaraponējavabelia pananeconitsipame. Bajaraponē panijajivi ata pijatuxanenē baja cajena. Bajaraponē saya najēpaeya nacatene daxitatsi. Nexata paneconivajēto xainatsi caejivitsi canacujitsia, bajarapaneconivajēto nacananeconitsiaexanaponaena. Bajaraxuata panijajivi ata itorobajē xaniavaetsia papecatonacuenebabiabinexa.

Pacuenia Dioso pejumecovēnētsivi itorobatsi penayajivitaenexa dovathi yabara pelivaisi

¹⁰ Tajamonaē, icatsia cotocaevi patacatoyaquinaelivaisita, pacajumaitsiitsi mapacueniaje. Pajamatabēcuenesaēmēre tsavanapae vajatuxanenē pesaē paneyajavajinavana-paexae. ¹¹ Vajabitsaēnē banayajivinaxatata piatajajava pijavajabitsaēnē pejororon-aejanivatsi. Bajara pijinia pacuenia paxamē ata panayajivinajamatabēcuenexatare Dioso pejumelivaisita. Nexata bajarapacuenia pajamatabēcuenesaēmē tsane dovathi papecajamatabēcuene yamaxēitojorobyaniva.

¹² Tsipaji Dioso vajanacatojitsipaecuenia itsa exanavanapatsi, nexata dovathi jamatabēnacaitsacueniaba. Nexata bēpēnēa vajajamatabēcuenesaēta asaēyata vajabitsaē hexanatsi, dovathi pijajivijavabelia, apo vajataevijavabelia. Dovathi cajena pijajivi ayaibitsaētoxaneto. Dovathi pijajivi xaina penamatacaitorobivitsi, bitso pijamatabēcuenesaēvi. Nexata dovathi pijajivi jinavanapa athēbētatsi. Jinavanapa mapanacuata ataje. Nexata dovathi pijajivi itoroba daxitajivi pibisiacuene pexanaeyaexanaenexatsi mapanacuataje. Bajaraxuata bēpēnēa vajajamatabēcuenesaēta, asaēyata vajabitsaē hexanatsi dovathi pijajivijavabelia. ¹³ Nexata paxamē dovathi papecajamatabēcuene yamaxēitojorobyaniva, panayajivinajamatabēcuenexatare Dioso pejumelivaisita. Nexata pamatacabi pibisiacuene pacatocopiapatsiana dovathi pejamatabēcueneta papecajamatabēcueneējētsinexa, itsiata pajamatabēcuenesaēmē tsane bajarapalivaisita. Nexata pibisiacuene apo paexanaemē tsane. ¹⁴ Vajabitsaēnē itsa nayajivinaxatata piatajajava, caecovēta banuca. Nexata pijavajabitsaē apo tixitsitsi pecovēvecua. Bajara pijinia pacuenia paxamē ata pajamatabēcuenesaēmēre Dioso pejumelivaisita dovathi papecajopaeyaexanaeyaniva Dioso pejumelivaisi panejumecovēnētsijavavecuia. Vajabitsaēnē piatajajava itsa nayajivinaxatata, bayanaepacēta penaepacētsijavata pesarabijanivatsi penayajivinaxatatsijava.

Bajara pijinia pacuenia paxamë ata Dioso pejumelivaisita, pexaniajailivaisita, panayajivinajamatabëcuenexatare. Vajabitsaënë piatajajava banamëpabëxatata pijavajabitsaënë pejorojoronaeyanivatsi. Bajara pijinia pacuenia paxamë ata Dioso pejumelivaisita panayajivinajamatabëcuenexatare. Pajamatabënjavanapare Dioso baja aneconijibia papecataejava. Nexata dovathi nayajivitaeya pajinavanapare papecajamatabëcuene yamaxëitojorobiyanima. ¹⁵ Vajabitsaënë najamatabëcueneveretsiaya pexaniazapato banataxuxatata pijavajabitsaëjavabelia jamatejema peponaenexa. Bajara pijinia pacuenia paxamë ata panajamatabëcueneverere, jamatejema pexanialivaisi jivi panetsipaebavanapaenexa. Daxita baja pamonaе jumecovënëta bajarapalivaisi, Dioso baja barajamatabëcuenexanepanaeya tanetsi. ¹⁶ Panajamatabëcuenecopare Diosojavabelia papecayavenonabiabinexa. Vajabitsaënë banayajivicaпona escudovënëjаva, pijavajabitsaënë itsa bixabajarabatsi piupiitarunutsipuyaeneta, penacaranatsinexa bajarapaescudota, panayajiviitacaëbinexanua. Bajara pijinia pacuenia paxamë ata dovathivecua Dioso pacajamatabëcuenecaranatsiana, itsa panajamatabëcuenecopatsianame Diosojavabelia papecayavenonabiabinexa. ¹⁷ Vajabitsaënë banamataxatata piatajajava, cascovënëjаva, pematathinaxuabiyanimivatsi pijavajabitsaënë. Bajara pijinia pacuenia paxamë ata panayajivinajamatabëcuenexatare Dioso pejumelivaisita. Pajumecovënëre papecacapanepaelivaisinexa panijaneconivecua. Vajabitsaënë itsa pona pijavajabitsaëjavabelia, banayajivicaпona espada. Bajara pijinia pacuenia paxamë ata panayajivicaпonare Dioso pejumelivaisi, palivaisi baja pacayapëtaeyaexana Espiritu Santo. ¹⁸ Dioso pejumelivaisita najamatabëcuenexatatsiaya itsa pajinavanapaename, nexata pacuenia Espiritu Santo pacaitoroba, daxitamatacabi canacujitsia Diosojavabelia pavajëtabiabianame Dioso papecajamatabëcuene yavenonabiabinexa. Pajamatabëcueneitatsacamëre tsavanapae dovathi papecajamatabëcuene yamaxëitojorobiyanima. Nexata pacopatsinejevamë Diosojavabelia panevajëtabiabijava, ajamatabëcueneitatsacaya Diosojavabelia panayajivivajëtabiabare. Asaëyata patovajëtabiabarenuа daxita Dioso pejumecovënëtsivi. ¹⁹ Xanë ata panetovajëtabiabarenuа Dioso taneyapëtaeyaexanaenexa paepatota bajarapalivaisi tsipaebajë itsamonaejavabelia. Panetovajëtabiabarenuа ajumeurajibia tatsipaebabiabinexa apo judíovi ata Dioso pecapanepaejavanexatsi. ²⁰ Naneconitsiaponaponajë majotaje, penaneconitsivi pejebabiabibota, itsamonaejavabelia tatsipaebabiabixae bajarapapexanialivaisi, Dioso tanetocopatsilivaisi. Bajaraxuata Diosojavabelia panetovajëtabiabare, naneconitsiaponaponae atanë, ajumeurajibia jivijavabelia tatsipaebabiabinexa bajarapalivaisi pacuenia jamatabëtsipaebajë.

Pacuenia Pablo toyaquina Efeso tomarapijivi peveretsinexa baja petoyaquinaelivaisi mapabaxutotaje yabara pelivaisi

²¹ Vajabananë Tíquico itsa patsiana paxamëjavabelia, pacatsipaebiana daxita pacuenia netane. Bajaraponë bitso vajaasivanë. Xaniavaetsia paneyavenonabiaba itsa patonacuenebabiabajë pacuene vajatuxanenë paneitoroba. ²² Bajaraxuata Tíquico pacatoitorobatsi baja paxamëjavabelia papecatsipaebinexa pacuenia pajinavanapajë. Nexata Tíquico itsa pacatsipaebiana pacuenia pajinavanapajë, pamuxunaajamatabëcuenesaëmë tsane. ²³ Pacatovajëtabiabatsi vaxa Diosojavabelia, vajatuxanenë Jesucristojavabelia ata, jamatabëcuenexanepanaeya panejinavanapaenexa. Pacatovajëtabiabatsinua namataenetsia panenasivanexa Diosojavabelia panenajamatabëcuenecopatsivixae. ²⁴ Pacatovajëtabiabatsinua Diosojavabelia daxita paxamë Dioso papecayavenonabiabinexa. Paxamë abaxë tsiteca bitso pasivamë tsavanapae vajatuxanenë Jesucristo. Bajara itsi tsane.

Mapabaxutoje San Pablo toyaquina Filipos tomarapijivijavabelia

Pacuenia Pablo toyaquina mapabaxutoje Dioso pejumecovënëtsivi, Filipos tomarapijivijavabelia, pamatacabi naneconitsia ponapona penaneconitsivi pejebabiabibota yabara pelivaisi

¹ Xanë Pablonë, Timoteobeje, Jesucristo papijajivitonënëbeje. Pacatoyaquinatsibeje mapabaxutoje padaxitamë paFilipos tomarapijivimë, Jesucristo pelivaisi panejumecovënëtavanaepaevi. Paancianovimë, paxamë ata padiaconovimë, pacatoyaquinatsibeje. ² Pacatovajëtatsibeje vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa.

Pacuenia Pablo Diosojavabelia tovajëta Jesucristo pelivaisi pejumecovënëtsivi yabara pelivaisi

³ Itsa pacanajamatabënapitatsi Diosojavabelia tavajëtsijavata, jumaitsinë tsabiabi Diosojavabelia: “Xaniavaetsia yavenonabiabame nijajivi, Filipos tomarapijivi,” janë tsabiabi Diosojavabelia paxamë yabara. ⁴ Itsa vajëtajë Diosojavabelia, nexata pacatovajëtabiabatsi jamatabëcuenebarëyaya. ⁵ Bajarapacuenia pacatovajëtabiabatsi tsipaji Dioso pejumelivaisi, pexanialivaisi, panejumecovënëtsijavaliacujinae, paneyavenonabiabame tanamatenonaejavaxi yabara. Patsipaebabiabamenua Jesucristo pelivaisi itsamonaejavabelia. ⁶ Yapëtaniji baja cajena pacuenia Dioso pacayavenonaejitsia bitso pexaniajamatabëcuene panexainavanapaenexa. Tsipaji baja Dioso taxuxuaba papecajamatabëcuene xanepanaeyaexanaenexa. Bajaraxuata panevajënaeyabelia Dioso pacajamatabëcuene xanepanaeyaexanaponaena copatsinejeva matapania Jesucristo icatsia pepatsimatacabitsicajavabelianexa. ⁷ Bajarapacuenia paxamë patacasivanajamatabëxainaejava, netsitaxanepana. Tsipaji bitso pacaasivatsi. Pamatacabi naneconitsiaponaponajë penaneconitsivi pejebabiabibota, panejamatabëcueneyavenoname. Panejamatabëcueneyavenonamenua pamatacabi nacuaeveitsivi pitabarata nenuta Jesucristo pelivaisi jivi tatsipaebaponaejava yabara. Nexata bajarapamatacabi jumaitsinë bajarapamonaejavabelia: “Mara palivaisije, Jesucristo pelivaisi, pexaniajailivaisi cajena jivi pecapanepaelivaisinexatsi Diosojavabelia,” janë nacuaeveitsivijavabelia. ⁸ Dioso cajena nejamatabëcueneyapëtane pacuenia bitso paxamë pacaasivatsi. Jesucristo neyavenona bitso patacasivanexa. ⁹ Pacatovajëtatsi Diosojavabelia itsamonae ata bitso paneasivatsavanapaenexa panevajënaeyabelia. Pacatovajëtatsinua paneyapëtaenexa Dioso. Pacatovajëtatsinua paneyapëtaenexa xua Dioso pacatojitsipa paneexanavanapaenexa. ¹⁰ Nexata payapëtaename paneitapetsinexa palivaisi bitso xanepana daxitalivaisivecua, panejumecovënëtsinexa bajarapalivaisi. Nexata bajarapacuenia pacacajëpapaena xaniavaetsia panejinavanapaenexa aneonijibia. Matapania Jesucristo icatsia pepatsimatacabitsicajavabelianexa, bajarapacuenia panaevetavanapaename. ¹¹ Nexata ëpexaniajamatabëcuene paxainaename panejamatabëëthëtajavavetsina Jesucristo papijajivixamë. Nexata itsamonae paxamë yabara jamatabëjumaitsi tsane Diosojavabelia: “Diosomë, ayaijamatabëcuenenëmë bitso. Pexaniaeune bitso toexaname Filipos tomarapijivi ëpexaniajamatabëcuene pexainaenexa pejamatabëëthëtota,” jamatabëjai tsane itsamonae Diosojavabelia paxamë xaniavaetsia panetsitajinavanapaexae.

Pacuenia Pablo jumecovënëtaaponapona Cristo yabara pelivaisi

¹² Tajamonae, payapëtaneme rabaja pajamatabëcuene yabara naneconitsia ponaponajë penaneconitsivi pejebabiabibota. Jitsipajë paneyapëtaenexa mapacuneje. Majotaje penaneconitsivi pejebabiabibota neeta pexanialivaisi, Jesucristo pelivaisi, jivi tatsipaebaponaexae. Xanë neetsi ata penaneconitsivi pejebabiabibota, itsiata apo yacaranatsicapanepae pexanialivaisi, Jesucristo pelivaisi, peyacaëjëpapaenexa daxitanacuanëjava. Nexata baja aeconoxae bajarapalivaisi pevajënaeyabelia yacaëjëpapaena daxitanacuanëjava daxitajivi Diosojavabelia pecapanepaenexatsi. ¹³ Nacuaeveitsinë pijabopijivi, vajabitsaë, daxita itsamonae ata, neyapëtane majota naneconitsia taponaponaejava Jesucristo pijajivitonëxaenë. ¹⁴ Mapatomarataje ayaibitsaëtöxaneto Dioso pejumecovënëtsivi, itsa nevënëtanë tananeconitsiaponaponaejava, najamatabëcuenesaëtavanapa. Diosojavabelia asaëyata najamatabëcueneopaba peyavenonaenexatsi. Nexata ajumejunavijibia Dioso pejumelivaisi tsipaebapona itsamonaejavabelia.

¹⁵ Pamonae ajumejunavijibia Dioso pejumelivaisi tsipaebapona itsamonaejavabelia, bajarapamonaeyajuvēnēvi, panecuenecaēba. Nexata itsamonaejavabelia asaēya tsipaebapona Cristo pelivaisi. Bajarapamonaē xanē yabara jamatabējumaitsi: “Pablo bitso ayaicuenia Dioso pejumelivaisi jivi nacatsutsipaebapona. Pacuenia bajaraponē tsipaebapona, matatoxenetsia vaxaitsi tsipaebaponaenatsi jivi vajanacayaiyatanexa,” jamatabējai bajarapamonaē. Itsiata itsamonaē, bajarapamonaeyajuvēnēvi, taneyavenonaenexa, itsamonaejavabelia tsipaebapona Cristo pelivaisi bajarapamonaē ata xaniavaetsia pejumecovēnētsinexa. ¹⁶⁻¹⁷ Itsamonaē tsipaebapona Cristo pelivaisi pejumetaevitsi saya peyaiyataenexatsi, pepēnaponaenexatsinua. Bajarapamonaē pejamatabēēthētovetsina apo jumecovēnētsi ata Cristo, saya jema Cristo pelivaisi tsipaebapona. Jamatabējumaitsi: “Vecae Pablo naneconitsiaponaponaē penaneconitsivi pejebabiabibota, pecovēta itsajamatabēcuene xainaeayaxanaenatsi Cristo pelivaisi pejumecovēnētsivi. Bajarapacuenia Pablo jamatabēcuenebējaiyaxanaenatsi,” jamatabējai bajarapamonaē xanē yabara. Itsiata itsamonaē xaniavaetsia tsipaebapona Cristo pelivaisi pejumecovēnētsixae Cristo. Bajarapamonaē yapētane Dioso tanetocopatsijava penaneconitsivi pejebabiabibota naneconitsia taponaponaējavata, tajumaitsi javanexa nacuaevevitsivijavabelia mapacueniajē: “Jesu Cristo pelivaisi jivi pecapanepaelivaisinexatsi, pexaniajailivaisi cajena,” tajaijavanexa nacuaevevitsivijavabelia, bajarapamonaē yapētane. ¹⁸ Majotaje nenaneconitsi axanaē ata, apo natsinajamatabēxainanē. Itsamonaē pejamatabēēthētovetsina Cristo pelivaisi pejumecovēnētsixae, tsipaebapona jivi pejumecovēnētsinexa bajarapalivaisi. Itsamonaē pijinia pejamatabēēthētovetsina apo jumecovēnētsi ata, itsiata Cristo pelivaisi tsipaebapona jivi pejumecovēnētsinexa bajarapalivaisi. Bajaraxuata bajarapamonaē ata jivi petsipaebaponaējava yabara, itsiata sivajamatabēcuenebarēyanē.

Bitso orijibia tavajēnaeyabelia jamatabēcuenebarēyanē tsaponaē tsane. ¹⁹ Tsipaji yapētaniji pacuenia panetovajētaponame Dioso javabelia. Espiritu Santo, ponē Jesucristo itorobica, bajaraponē neyavenonapona. Bajaraxuata yapētaniji daxita pacuenia netoxanepanaejitsia. Nexata baja pitsapaenajē tananeconitsia ponaponaējavavecuā. ²⁰ Bitso jitsipajē ēpexaniacuene taexanaenexa. Apo jitsipaenē taexanaenexa itsacujenejavayo ata, xua yabara auranē tsipae. Cristo tajumecovēnētsijavaveliacujinaē, aeconoxae ata, ajunavijibia jitsipajē taexanaenexa Cristo pejitsipacuenia daxitamatacabijavabelianexa. Bajarapacuenia jitsipajē taexanaponaenexa ēbajaraponēnexa. Bajaraponē tanetojitsipacuenia abaxē taesaētsaponaponaēepato mapanacuatajē, tatēpaeepatotanexa ata, jitsipajē taexanaenexa xua pejamatabēcueneta daxitajivi yayataejitsia Cristo. ²¹ Tasaētsaponaponaēepato abaxē mapanacuatajē, Cristo pejitsipacuenia toexanaponaenajē. Itsa pamatacabi tēpaenajē, netoxanepanaejitsia mapanacuata tasaētsaponaponaējava matatoxenetsia. Tsipaji Cristo yajavaponaponaenajē athēbētatsia. ²² Tasaētsaponaponaēepato abaxē mapanacuatajē, necaējēpa tatoexanaponaenajē axanaenexa Cristo tanetojitsipacuenia. Itsiata apo yapētaenē xua pepacueni jitsipajē. ²³ Itsajavata bitso jitsipabiabajē tatēpaejava taponanexa Cristo pijanacuayabetsia. Bajaraxua bitso netoxanepanaejitsipa. ²⁴ Itsiata paxamē panenamatavenoname abaxē taponaponaenexa mapanacuata, patacayavenonaponaenexa. ²⁵ Yapētaniji baja cajena abaxē taponaponaējava paxamēnexa. Ponaponaenajē abaxē patacayavenonaenexa, paneajamatabēcueneasaēnexa panevajēnaeyabelia, panejamatabēcuenebarēyanexanua panejumecovēnētsixae Cristo pelivaisi papecacapanepaenexa panijaneconivecuā. ²⁶ Nexata pamatacabi Jesucristo neyavenonaena penaneconitsivi pejebabiabibovecuā tapitsapaenexa, ponaponaenajē icatsia paxamējavata. Nexata jamatabēcuenebarēyaya panevajunupaebianame itsamonaejavabelia pacuenia Jesucristo neyavenona tapitsapaenexa penaneconitsivi pejebabiabibovecuā.

²⁷ Pajinavanapare xaniavaetsia, pacuenia pexanialivaisi, Cristo pelivaisi, pacaitoroba. Nexata itsa pacataenatsi, apo pacataē atatsinua tsane, itsiata jitsipajē patacavēnēlivaisitaeponaējava najamatabēcuenejēpaeya panecasaētsavanapaejava Cristo pelivaisi panejumecovēnētavanapaejava. Jitsipajē patacavēnēlivaisitaējava asaēyata najamatabējēpaeya jivi panetsipaebavanapaejava Jesucristo pelivaisi jivi pecapanepaelivaisinexatsi. ²⁸ Pētsa pacujunavame pamonaē pacaitoya. Dioso papecayavenonaenexae, itsa apo pacujunavimē tsane itsamonaē pacabejiobiaexanaē ata, nexata bajarapamonaē jamatabējumaitsi tsane: “Pexaniajailivaisi cajena bajarapamonaē tsipaebapona. Tsipaji Dioso yavenonatsi. Nexata vaxaitsi bajarapamonaē vajabejiobiaexanaexae, Dioso nacaverebiabiana,” jamatabējai tsane. Yapētaenua paxamē papecacapanepaejavaneaxa Dioso. ²⁹ Cristo pejamatabēcueneta pacatocopata bajaraponē panejumecovēnētsinexa. Itsiata baitsi jane apo pacatocopatsi ēbajaraponē panejumecovēnētsinexa. Pacatoyajavacopatanua baja cajena itsamonaē papecabejiobiaexanaenexa bajaraponē papijajivixamē. ³⁰ Pacuenia Cristo pijajivitonēxanē itsamonaē nebejiobiaexanapona, bajara pijinia pacuenia paxamē

ata itsamonaē pacabejiobiaexanaena. Pacuenia baja imata panetaneme itsamonaē tanebejiobiaexanaējava, bajarapacuenia abaxē tsiteca nebejiobiaexanapona pacuenia baja panevënēlivaitsaneme.

2

Pacuenia Dioso pejumecovënētsivi itavetatsi beayaijamatabēcuenevi penataeyaniva yabara pelivaisi

¹ Payapētaneme rabaja mapacujeje. Jesucristo paneyajavajinavanapaexae, panajamatabēcuenesaētame panejumecovënētsijava. Payapētaneme rabaja. Jesucristo papecaasivaxae, pacajamatabēcuenebabata. Payapētaneme rabaja Espiritu Santo papecat-sijamatubēcaejava papecaajavaponaponaenexa. Payapētaneme rabaja Jesucristo papecaitaxutotsonia taeyabiabijava. ² Bajaraxuata nexata pacaitorobatsi mapacuenia panejinavanapaenexaje patacasivarēyanexa. Najamatabēcuenejēpaeya pajinavanapare. Najamatabēcuenejēpaeya namataenetsia panaasivamēre tsavanapae. Xua paexanaējitsi-amē Dioso pejamatabēcueneta, najamatabēcuenejēpaeya paexanavanapare. ³ Pētsa panatoexaname itsacujenejavayo ata, xua ēpaxamēnēna pacatoxanepana. Biji rajane paexanare xua itsamonaenexa ata toxanepanatsi. Pētsa paexanamenua itsacujenejavayo ata saya bepaayaijamatabēcuenevimē papecataenexa itsamonaē. Biji rajane beveliajamatabēcuenevi panataeyabiabianame. Itsamonaē paxamēvecua ayaijamatabēcuenevi pataeyabiabianame. ⁴ Pētsa panajamatabēxainabiabiamē ēpaxamē panenatojitsipaecuene. Biji rajane payajavanajamatabēxainabiabianame itsamonaē ata penatojitsipaecuene.

⁵ Pacuenia Jesucristo jamatabēcueneitsi, bajara pijinia paxamē ata pajamatabēcueneitsimēre. ⁶ Pacuenia Dioso jamatabēcueneitsi, bajara pijinia Jesucristo ata jamatabēcueneitsi. Itsiata baitsi jane Jesucristo apo jamatabējumaitsi: "Jitsipajē daxitajivi taneyaiyataenexa pacuenia taxa Dioso yayiatanetsi," apo jamatabējai. ⁷ Bajaraponē picani ayaijamatabēcuenenē. Paxa Dioso yajavaponapona athēbētatsia. Itsiata itsa patsica mapanacuayabetsicaje, naexana pacuenia vaxaitsi banaexanatsi mapanacuataje. Nexata paxa Dioso bepijajivitonē naexana, pacuenia Dioso itorobatsi pexanaenexa. ⁸ Bejivitonēcuenia itsa naexana, beveliajamatabēcuenenēcuenia ponapona. Paxa Dioso pitorobicueniatsi jumecovënēta. Pacuenia bitso pibisiacuene pexanaēvi pijaneconi yabara cruzajavelia bacobematabiabarutatsi pebeyaxubinexatsi, bajara pijinia pacuenia Jesucristo ata nacopata cruzajavelia pecobematabiabarutsinexatsi. ⁹ Bajaraxuata Dioso mēthēvetsina maticotatsi. Caponatsi athēbēabetsia peecaenexa paxa Diosojavatatsia, pebarēvevtsinexatsi daxitacuene. ¹⁰ Nexata bajaraponē itsa vënēlivaitsaenatsi, pematabacabēta yayiataeya tonubenaenatsi daxitajivi. Athēbētatsia pejinavanapaeivi, mapanacuapijivi ata, peṭēpaevimi ata, pematabacabēta yayiataeya tonubenaenatsi. ¹¹ Nexata daxitajivi jumai tsane Jesucristo yabara: "Jesucristo rabaja cajena pepo petuxanenē," jai tsane. Nexata daxitajivi yapētaena pacuenia paxa Dioso bitso ayaijamatabēcuenenē.

Pacuenia Dioso pejumecovënētsivi pexaniajailivaisi pejumecovënētavanapaexae, bepecotia mapanacuataje yabara pelivaisi

¹² Tajamonaē bitso patacaasivavi, pacuenia panejumecovënētame pamatacabi pacatsipaebaponaponatsi Dioso pejumelivaisi, bajarapacuenia matatoxenetsia Dioso pajumecovënētavanapare, aeconoxae xanē tajē pacavecuaponaponaē atatsi. Pacaejivimē canacujitsia cjunaviaya Dioso pajumecovënēre. Nexata ēpexaniacuene paexanavanapaename. Tsipaji Dioso papecacapanepaevinexa. ¹³ Dioso rabaja pacajamatabēcuenyavenona panejamatabēthētovetsina jitsipaeya paneexanaenexa, pacuenia Dioso pacatojitsipa. Dioso pacajamatabēcuene caējēpaeyaexananua paneexanaenexa bajarapacuenia.

¹⁴ Daxitacuene paexanavanapare pajamatabēcueneenatsipaebinejevamē. Pētsa anaeya namataenetsia najumenotsia panabijatanemenua. ¹⁵ Bajarapacuenia itsa pajinavanapaename, nexata daxita paxamē aneonijibia jivi patsitajinavanapaename Dioso papeixaemē. Nexata mapanacuapijivi pibisiacuene pexanaēvi tuatuajēta pajinavanapae atamē tsane, itsajivi ata acuenebi tsane pibisiacuena papecabaracuaiacujainexa. Pacuenia pecotia itayota pitaquirijavata, bajara pijinia pacuenia paxamē ata paitsimē tsane. Bepapecotiamē tsane pexaniajailivaisi panejumecovënētavanapaexae bajarapamonaejavata. ¹⁶ Bepapecotiamē tsane xaniavaetsia itsa patsitajumecovënētavanapaename bajarapamonaejavata pexaniajailivaisi, Jesucristo pelivaisi. Bajarapacuenia itsa patsitajumecovënētavanapaename, pacasivabarēyatsi tsane pamatacabi icatsia Cristo patsianica. Bajarapacuenia pacasivabarēyatsi tsane tsipaji baja yapētaenajē apo tanacueratsijava asaēya tanacuenebijava paxamējavata. ¹⁷ Dioso pacasivabarēya panenajamatabēcuenerajutsixae Diosojavavelia panetojinavanapaenexa bajaraponē papecatojitsipaecuena. Itsamonaē

nebeyaxuabijitsia ata tsipae Cristo pelivaisi patacatsipaebixae, xanë itsiata nasivajamatabëcuenebarëyanë tsipae. Tspijaji Cristo pelivaisi bajarapacuenia patacatsipaebinexa, Dioso netocopata. Nexata daxita paxamë pacayajavajamatabëcuenebarëyatsi tsane. ¹⁸ Bajarapacuenia paxamë ata pajamatabëcuenebarëyamëre tsavanapae. Paneyajavabarëyamërenua tsavanapae.

Timoteobeje Epafroditobeje yabara pelivaisi

¹⁹ Itsa vajatuxanenë Jesüs jitsipa, naxanitsiayo jamatabëitorobajë Timoteo papecataenexalia. Pepatsicujinaerena, itsa pacavënëlivaisitaenatsi pacuenia pajinavanapame, nejamatabëcuenebarëyaya exanaejitsia. ²⁰ Bajaraponë caenë nejamatabëcuenejëpa. Bajaraponë bitso pacasivanajamatabëxaina xaniavaetsia panejinavanapaenexa. ²¹ Daxita itsamonae bitso najamatabëxaina ëpenatojitsipacuenia pexanaenexa. Apo sivanajamatabëxainae Jesucristo petonacuenebinxa. ²² Paxamë baja payapëtaneme pacuenia Timoteo pacatsiponapona pexaniajamatabëcuena. Pacuenia itsamonae paxa penacuenebijava bayavenona, bajara pijinja pacuenia Timoteo neyavenona jivi tatsipaebaponaejava pexanialivaisi, Jesucristo pelivaisi. ²³ Bajaraxuata jamatabëitorobajë Timoteo paxamëjavabelia papecataenexalia. Itsa yapëtaenajë pacuenia nexanaejitsia penaneconitsivi pejebabiabibota tananeconitsiponaponaejava yabara, nexata bajaraxuacujinae pacatoitorobialitsi Timoteo papecataenexalia. ²⁴ Xanë jamatabëjumaitsinë paxamë yabara: "Itsa Dioso netojitsipaena xanë ata taponanexa bajarabelia, nexata neyavenonaena bepijia taponanexa tataenexalia Filipos tomarapijivi," jamatabëjanë paxamë yabara.

²⁵ Panetoitorobaremena rabaja vajabanenë Epafrodito pataneyavenonaenexamë bajarapacuenia tanamatavenonaepatota. Nexata Jesucristo patonajuanacuenebajëbeje. Asaëyata panajuanacuenXanë jamatabëjumaitsinë paxamë yabara: "Itsa Diosobajëbeje, Dioso apo pejumecovënëtsivi paneitsacueniababiabi atabeje. Nexata icatsia netsitaxanepana bajaraponë patacatoitorobinexalia. ²⁶ Majotaje Epafrodito piavitanecujinae, jamatejema baja. Nexata aeconoxae bitso jamatabëpona paxamëjavabelia papecataenexa. Bitso jamatabëpona tsipaji yapëtane panevënëlivaisitaejava pemitsojava pivavitaneuene. ²⁷ Xaniajai rabaja picani. Avitane petëpaejavabelianexa. Itsiata baitsi jane Dioso itaxutotsoniatanetsi. Xanë ata Dioso nitaxutotsoniatane. Tspijaji itsa nevecuatëpaejitsipa, xanë bitso najamatabëxainaejitsipajë. Tspijaji penaneconitsivi pejebabiabibota taneetsixae tanajamatabëxainaejavata, nevecuatëpaejitsipa. ²⁸ Bajaraxuata bitso jitsipajë bajaraponë patacatoitorobinexalia panetaenexa, nexata paxamë panejamatabëcuenebarëyanexa itsa pataneme icatsia bajaraponë. Nexata xanë ata paxamë yabara bevelia najamatabëxainaejanë. ²⁹ Pacopiapitsianeme bajaraponë bitso jamatabëcuenebarëyaya Dioso pejamatabëcueneta vajabananexae. Pamona jamatabëcueneitsi pacuenia bajaraponë jamatabëcueneitsi, payaiyataname. ³⁰ Paxamë apo papatsi atamërena maberena je pataneyavenonaenexamë, itsiata panejamatabëcueneta bajaraponë panetoitorobaremena taneyavenonaenexa. Nexata bajaraponë neyavenonabiaba Cristo pijacuene tatonacuenebijava. Bajaraxuacujinae itsa avitane, imoxo picani petëpae.

3

Pacuenia jivi Dioso pejitsipacuenia betojinavanapa yabara pelivaisi

¹ Tajamonae, palivaisi capanepaeya patatoyaquinatsi baja, bajarapalivaisi pasivajamatabëcuenebarëyamëre Cristo papijajivixamë. Xanë apo pacasivacueranaetsi patacatoyaquinaenexa icatsia bajarapalivaisi. Tspijaji xanepana icatsia panejumetaenexa bajarapalivaisi. ² Panayajivitaema piagamatabëcuenebejevi, pamona beaviri pianepanaevi. Tspijaji raja bajarapamonae apo aura pexanaejava yabara. Bajarapamonae jamatabëcuenenavëxaniabiaya jumaitsi tsabiabi Jesucristo pijajivijavabelia: "Xanepana paxamë ata papecaperabëcaucubinexa judiövicuenia Dioso pepacune papecacapanepaenexa panijaneconivecua," jai tsabiabi. ³ Nacaperabëcaucutsi ata tsipae, vajanacaperabëcaucutsijava yabara, Dioso pexitsi apo nacaexanae tsipae. Vaxaitsi pepacuene vajanacacapanepaevinexa Diosojavabelia. Tspijaji vajamatabëthëtojavavetsina najamatabëcuenecopatatsi Diosojavabelia vajanacacapanepaenexa. Jamatabëcuenebarëyatsi Jesucristo pijajivixatsi. Yapëtanetsinua pacuenia Dioso apo nacapanepae tsipae vajacuata vaxaxanaejava pejamatabëcueneta. ⁴ Itsajivi itsa caëjëpaejitsipatsi pijacuata penacapanepaenexa Diosojavabelia judiönexae, Dioso petonacuenebijava yabara ata, nexata xanë ata nacaëjëpaejitsipa tajuacuata tanacapanepaenexa. ⁵ Xanë picani mataitsinëje. Itsa baja xainajë ocho pamatacabibeje tanaexanaecujinae, tajasalinavivicuenia neperabëcaucuta. Baitsi neboupiiperabëcaucuta. Xanë raja tajasalinainëmi Israelpijinë. Benjamínpijinë pemomoxiyajuvënënenë. Taxa judiönë. Taena ata judiöva. Xanë picani fariseonenë. Pacuenia fariseovi bitso

jumecovënëta Dioso Moiséspijinëta penajumecopatsilivaisi, bajara pijinia pacuenia xanë ata itsinë. ⁶ Daxita tajamatabëcuenesaëta caasaënë tajumecovënëtsijava Dioso Moiséspijinëta penajumecopatsilivaisi. Jamatabëcuenenavëxaniabajë tsaena bitso. Jesús pelivaisi pejumecovënëtsivi yabara, jumaitsinë tsabiabi: “Dioso Moiséspijinëta penajumecopatsilivaisivecua saicayalivaisi jumecovënëta. Nexata bajarapamonae bebeyejebatsi,” janë tsabiabi. Nexata Jesús pijajivi bejiobiaexanabiabajë. Dioso Moiséspijinëta penajumecopatsilivaisi, bitso xaniavaetsia jumecovënëtaponaponajë. Nexata itsajivi ata acuenebi pejumait्सijava xanë yabara: “Pablo xaniavaetsia apo jumecovënëtsi Dioso Moiséspijinëta penajumecopatsilivaisi,” pejajivava. ⁷ Daxita bajarapalivaisi yabara xanë picani sivabarëyanë. “Itsa jumecovënëtsianajë bitso, netonamatamotsiana Diosojavabelia,” jamatabëjanë picani. Itsiata aeconoxae yapëtaniji daxita bajarapalivaisi piamatamobilivaisiucene. Tsipaji baja najamatabëcuenecopatajë Cristojavabelia tanevecuaajibiaexanaenexa tajaneconì. ⁸ Aeconoxae baja yapëtaniji daxita bajarapalivaisi piamatamobilivaisiucene. Daxita bajarapalivaisivecua netonamatamota tayapëtaenexa xaniavaetsia tajatuxanenë Jesucristo. Jesucristo taneyajavaponaponaeaxae, nexata piamatamobilivaisi tajumecovënëtsijavami, copatajë baja. ⁹ Dioso aneconijibia apo netae tajumecovënëtsixae Dioso Moiséspijinëta penajumecopatsilivaisi. Aeconoxae baja Dioso aneconijibia netane tsipaji najamatabëcuenecopatajë Jesucristojavabelia tanevecuaajibiaexanaenexa tajaneconì. ¹⁰ Tavajënaeyabelia bitso jitsipajë daxitacuenecua tayapëtaenexa pacuenia Cristo jamatabëcuenetsi. Pasaëta Dioso matacotatsi Cristo petëpaejavavecua, bajarapaasaë jitsipajë tayajavaponaponaeaxae. Cristo pijajivitonëxanë, jitsipajë xanë ata tanebejiobiaexanaenexa, tatëpaeaxae ata. ¹¹ Tsipaji xanë ata copiaevetaponaponajë Dioso tanematacotsinexa tatëpaejavavecua.

Pacuenia Pablo najamatabëcuenesaëta xaniavaetsia Cristo peyajavaponaponaeaxa, pepatsinexa Dioso pijanacuayabetsia, yabara pelivaisi

¹² Xanë apo jamatabëjumait्सinë: “Daxita baja Dioso pejitsipaecuenia toexanjë. Nejamatabëcuenecaëjëpa baja tajumecovënëtsinexa pacuenia Dioso netojitsipa taexanaenexa,” apo jamatabëjanë. Itsiata tavajënaeyabelia tanejamatabëcuenecaëjëpaponaenexa, caasaënë tsaponaponae taexanaejava pacuenia Dioso netojitsipa. Jitsipajë bitso tajamatabëcuenexanepanaejava tavajënaeyabelia pacuenia Dioso netojitsipa. Tsipaji bajarapacuenia yabara Jesucristo nesivatëpa. ¹³ Tajamonae, apo jamatabëjumait्सinë: “Xanë rabaja nejamatabëcuenecaëjëpa Dioso tajumecovënëtsinexa pacuenia Dioso netojitsipa taexanaenexa,” apo jamatabëjanë. Jume baja cajena. Mapacuenia najamatabëxainajëje. “Daxita xua exanjë Jesús pelivaisi tajumecovënëtsivajënaeya, nacofënëtajë baja,” jamatabëjanë. Najamatabëcuenesaëtajë xaniavaetsia tatoponaponaeaxa Dioso. Pacuenia pebitsojinaenë pecujinaejinaejava penayacobijavata, nasaëta pepatsinexa petocaëjëtsijabeliatsi, bajara pijinia pacuenia xanë ata najamatabëcuenesaëtajë xaniavaetsia tatoponaponaeaxa Dioso. Tavajënaeyabelia najamatabëcuenesaëtajë taexanaenexa pacuenia Dioso netojitsipa. Bajarapamonae najamatabëxainaponaponajë. ¹⁴ Pacuenia pecujinaejinaenë nasisaëta penacanabinexa perajutsinexatsi premiovënëjava, bajara pijinia pacuenia najamatabëcuenesaëtajë. Najamatabëcuenesaëtajë xaniavaetsia tatoponaponaeaxa Dioso tanerajutsinexa athëbëtsatsia taxainaejavanaxa tayajavaponaponaeaxae Jesucristo.

¹⁵ Daxita pamonae xaniavaetsia jumecovënëtavapanapa Dioso, bajarapamonae ata benajamatabëcuenesaëtavapanapa xaniavaetsia petojinavanapanaeaxa Dioso. Itsa abaxë paxamë saicaya itsajamatabëcuenepaxainame, nexata Dioso pacayapëtaeyaexanaena saicaya abaxë itsajamatabëcuenepanaxainaejava. ¹⁶ Nexata palivaisivajëto jumeyapëtanetsi pexaniajailivaisi, bajarapalivaisi bejumecovënëtavapanapatsi. Beccaasaë tsavanapaetsinua vajavajënaeyabelia orijibia vajajumeyapëtaeponaenexa.

¹⁷ Tajamonae, pacuenia baja pacatsitaponaponatsi, bajara pijinia pacuenia paxamë ata pajinavanapare. Itsamonae paxamëyajuvënëvi xaniavaetsia jinavanapa pacuenia pacatsitaponaponatsi. Bajarapamonae ata panaitaxutocaevetsianame paxamë ata xaniavaetsia panejinavanapaenexa pacuenia bajarapamonae jinavanapa. ¹⁸ Ayaibitsaëtoxaneto paxamëyajuvënëvi apo jumecovënëtsi Jesucristo cruzata pesivatëpaejavatsi pecapanepaenexatsi. Bajarapamonae yabara pacatsipaebatsi baja anijatonë. Itsiata icatsia aeconoxae yaitaxutonueya pacatsipaebianatsi. ¹⁹ Mapanacuaje pecopiarucaematacabita, bajarapamonae Dioso verebiabianatsi. Tsipaji bitso jitsipa pijacua penatojitsipaecuenia pexanavanapaenexa. Piauracuene exanabiabi ata, jamatabëcuenenavëxaniabiaya jamatabëjumait्सinë tsabiabi: “Pexaniacuene bitso vaxaitsi exanavanapatsi,” jamatabëjai tsabiabi bajarapamonae. Ëmapanacuapijicuene saya sivanajamatabëxainabiaba. ²⁰ Vaxaitsi baja cajena jinavanapaenatsi Dioso pijanacuatsia. Bajaraxuata copiaevetavanapatsi vajatuxanenë Jesu-

cristo pepatsijavatsica vajanacacapanepaenexa Dioso pijanacuayabetsia. ²¹ Vajaperabëto vereverecaena. Itsiata vajatuxanenë Jesús nacaperabëitothianaena. Nexata pacuenia bajaraponë perabëitsi athëbëatsia, bajara vaxaitsi ata perabëitsi tsane. Nexata pasaëta Jesús caëjëpatsi pitorobinexa daxitacuene, bajarapasaëta nacaperabëitothianaena.

4

Pacuenia vaxaitsi besivabarëyatsi tsabiabi vajatuxanenë Jesucristo yabara pelivaisi

¹ Tajamonae bitso patacaasivavi, pacaitaxanatsi. Bitso jamatabëpacatanetsi. Bitso paca-sivajamatabëcuenebarëyatsi. Tspiji xaniavaetsia pajumecovënëtavanapame Jesús pelivaisi pacuenia baja pacatsipaebatsi. Pajamatabëcuenesaëmëre tsavanapae pacopatsinejevamë panejumecovënëtsijava Jesús pelivaisi.

² Papetirivamëbeje, Evodia Síntique, paxamëbeje pacatoyaquinatsibeje patacaitavetsinexabeje mapacueniaje. Pëtsa baja icatsia pematatsënëa namataenetsia panajumeanaenotamebeje. Panajamatabëcuenejëparebeje Jesús pelivaisi panejumecovënëtsivaxaabeje. ³ Xamë ata xaniavaetsia taneyavenonaenëmë Dioso pijacuene tanacuenebijava, catoyaquinatsi. Jitsipajë neyavenonaenexa bajarapapetirivabeje, penabaramatabëcuenexanepanaenexabeje namataenetsia icatsia penajumeanaenotsiyanivabeje. Bajarapovabeje bitso neyavenonabeje tatsipaebijava itsamonaejavabelia pexaniajailivaisi pecapanepaelivaisinexatsi Diosojavabelia. Bajarapacuenia Clemente ata neyavenona. Itsamonae ata patanajuanacuenebivi, bajarapacuenia neyavenona. Daxita baja bajarapamonae vënërubena Dioso pijabaxutota, itsa pabaxutota vënëyaquinarubatsi pamonaë pexainaevinexa matababi apo pevereverecaëja.

⁴ Jesús pelivaisi panejumecovënëtsivixae, pajamatabëcuenebarëyamëre daxitamatacabi-javabelianexa. Icatsia pematatsënëa pacajumaitsi. ¡Pajamatabëcuenebarëyamëre tsavana-pae! ⁵ Jamatabëcuenexanepanaëya xaniavaetsia pajinavanapaename daxitajivi papecaja-matabëcueneypëtaenexa. Tspiji rabaja vajatuxanenë imoxoyo pevajënaë pepatsinexat-sica.

⁶ Pëtsa pajamatabëcuenebëjamë itsacuenejavayo ata yabara. Biji rajane pavajëre Dioso-javabelia daxitacuenejavané yabara. Pexaniajamatabëcuenenua parajutabiabare Dioso papecayavenonaëjavanë yabara. ⁷ Nexata Dioso pacajamatabëjemayaexanaëna paneja-matabëcuenebëjaiyaniva. Pexaniacuene bitso bajarapajamatabëcuene. Dioso itsa nacaja-matejemayaexana vajajamatabëcuenebëjaiyaniva, itsiata apo yapëtaetsi pacuenia nacaja-matejemayaexana vajajamatabëcuenebëjaiyaniva. Dioso itsa pacajamatejemayaexanaëna panejamatabëcuenebëjaiyaniva, nexata apo pajamatabëcuenebëjamë tsane. Jesucristo itsa pajumecovënëtavanapame, daxitacuene yabara panenajamatabëxainaejava atavecua Dioso pacaevetsiana.

Pacuenia benajamatabëxainabiabatsi ëpexaniacuene yabara pelivaisi

⁸ Tajamonae, pecotocaevilivaisi pacatoyaquinatsi mapacueniaje. Pana-jamatabëxainabiabare ëpexaniajailivaisi yabara. Panajamatabëxainabiabarena panenayaiyatae cuene ata yabara. Panajamatabëxainabiabarena xua xanepana paneexanavanapaenexa. Panajamatabëxainabiabarena Dioso papecajamatabëcuene barëyayaexanaenexa. Panajamatabëxainabiabarena xua jivi baracuaicuaijajitsia pexaniacuena. Panajamatabëxainabiabarena daxita xua pexaniacuene. Panajamatabëxainabiabarena xua yabara Dioso pacabarëyataëjitsia.

⁹ Daxita pacuenia pacatsipaebatsi, pacuenia pacatsitaponaponatsinua, bajarapacue-nia paexanavanapare. Nexata Dioso, ponë pacajamatejemayaexanaëjitsia paneja-matabëcuenebëjaiyaniva, pacayajavaponaponaëna.

Pacuenia Filipos tomarqijivi ofrenda tojebabiabatsi Pablonexa yabara pelivaisi

¹⁰ Vajatuxanenë bitso nejamatabëcuenebarëyayaexana. Tspiji baja paxamë icatsia pane-sivanajamatabëxainame pataneyavenonaenexamë. Nexata baja icatsia ofrenda pane-toitorobarena. Bajayajebi apo panetoitorobi atamë ofrenda, itsiata paxamë yabara apo jamatabëjumaitsinë: “Apo jitsipae raeta icatsia taneyavenonaenexa bajarapamonae,” apo jamatabëjanë. Jume cajena. Yapëtaniji pacuenia picani jamatabëpanetoitorobi atamë ofrenda pataneyavenonaenexamë, itsiata apo pacacuenecaëjëpae patanetoitorobinex-amë. ¹¹ Apo pacatoyaquinaetsi mapacueniaje ofrenda patanetoitorobivajënaeyamë bitso tanamatavenonaëxae itsacuenejavayo. Dioso tanejamatejemayaexanaëxae taja-matabëcuenebëjaiyaniva daxitacuene yabara, sivajamatabëcuenebarëyanë saya xuayovajëto xainajë. ¹² Yapëtaniji pacuenia ponaponajë, pamatacabi tsiquirijavayo xainae atanë. Yapëtanijinua pacuenia ponaponajë pamatacabi ayaijava xainajë. Yapëtanijinua pacue-nia jamatabëcuenebarëyanëjitsia daxitamatacabi javabelianexa. Nexata itsa xainajë daxita

tanamatavenonaejavaxi, barëyanë. Apo xainae atanë itsacuenejavayo ata, itsiata barëyanë tsabiabi. ¹³ Nejamatabëcuenecaëjëpa tanajamatabëcuenesaëtsinexa daxitacuene yabara. Tsipaji Cristo pesaëta nejamatabëcuenecaëjëpaeyaexana. ¹⁴ Itsiata baitsi jane paxamë pexaniacuene bitso panetoexaname itsa panetoitorobaremena bajarapaofrenda bitso tanamatavenonaejavata.

¹⁵ Payapëtaneme rabaja mapacuneje. Pamatacabi copiaya tsipaebanajetarucajë jivi pecapanepaelivaisinexatsi Macedonia nacuajava, paxamë paFilipos tomarapijivimë panijanacuavecuia itsa ponajë, paxamë panerajutame ofrenda pataneyavenonaenamë. Itsatomarapijivi, Dioso pejumecovënëtsivi ata, apo nerajutsi ofrenda bajarapacuenia taneyavenonaenexa. Ëpaxamë itsiata paneyavenoname. ¹⁶ Nexata bajaraxuacujinae, itsa abaxë ponaponajë Tesalónica tomarata, panetoitorobabiabame icatsia ofrenda anijatonë tanamatavenonabiabijavata. ¹⁷ Sivabarëyanë tsabiabi itsa panetoitorobabiabame bajarapacuenia. Itsiata apo sivabarëyanë tsabiabi tanetoxanepanaexae bajarapacuenia pataneyavenonaejavamë. Jume baja cajena. Biji rajane sivabarëyanë tsabiabi bajarapacuenia pataneyavenonaejavamë. Tsipaji juya paxainaejitsiamë Diosojavabelia papecarajutsijavanexa athëbëtsia. ¹⁸ Nexata pitajë daxita patanetoitorobijavamë Epafroditota. Xainajë baja nexata bitso ayaijava, tanamatavenonaejava matatoxenetsia. Xua panetoitorobame ofrendacuenia, tsitapexaniacuenetsi Dioso. Bajaraxua Dioso sivajamatabëcuenekarëya. ¹⁹ TajaDioso bitso pexainaenë. Nexata pacarajutsiana daxita pacuenia panamatavenoname. Bajara pijinia pacuenia ayaijava Dioso pacarajutsiana Jesucristojavabelia xaniavaetsia panenajamatabëcuenecopatsixae. ²⁰ Vaxa Dioso ayaijamatabëcuenenë daxitamatacabijavabelianexa! Bajara itsi tsane.

Pacuenia Pablo tonajumeitoroba Dioso pejumecovënëtsivi pebajacobinexatsi yabara pelivaisi

²¹ Nebajacobiana paxamëjavata daxita Jesús pelivaisi pejumecovënëtsivi, pamonaë Dioso pijajivi. Dioso pijajivi, pamonaë xanëjavata jinavanapa, pacabajacobalia. ²² Daxita Dioso pijajivi, mapatomarataje pejinavanapaevi, pacabajacobalia. Romanonacua pepo pevetsinë pijabota penacuenebivi ata bitso pacabajacobalia.

²³ Pacatovajëtabiatsi Diosojavabelia, vajatuxanenë Jesucristo papecayavenonabinexa. Bajara itsi tsane.

Mapabaxutoje San Pablo toyaquina Colosas tomarapijivijavabelia

Pacuenia Pablo toyaquina mapabaxutoje Dioso pejumecovënëtsivi, Colosas tomarapijivi-javabelia, yabara pelivaisi

¹⁻² Xanë Pablonë, Dioso tanetojitsipaexae, nitapeta Jesucristo pijaapóstolenëxanë. Nexata Jesucristo nitoroba jivi pexanialivaisi tatsipaebaponaenexa. Pacatoyaquinatsi mapabaxutoje xaniavaetsia Jesucristo pelivaisi panejumecovënëtsivi, Colosas tomarata panejinavanapaevi. Vajabananë Timoteo ata pacajamatabënajina. Aeconoxae baja nacaemonaetsi, paxamë ata Jesús pelivaisi panejumecovënëtsixae. Pacatovajëtatsi vaxa Diosojavabelia papecaitaxutotsoniataenexa jamatabëcuenexanepanaeya panejinavanapaenexa.

Pacuenia Pablo Diosojavabelia tovajëtabiaba Colosas tomarapijivi, Jesús pelivaisi pejumecovënëtsivi, yabara pelivaisi

³ Paxanëbeje Timoteobeje pacatovajëtabiatsibeje vajatuxanenë Jesucristo paxa Diosojavabelia. Nexata Diosojavabelia patacatovajëtsijavatabeje, paxamë yabara Diosojavabelia pajumaitsinëbeje tsabiabi mapacueniaje: “Pexaniajamatabëcuenepacarajutatsibeje. Tspaji pexaniacuenia yavenonabiabame Colosas tomarapijivi,” pajanëbeje tsabiabi Diosojavabelia paxamë yabara. ⁴ Bajarapacuenia pajumaitsinëbeje tsabiabi tspaji pacavënëlivaisitanetsibeje xaniavaetsia panejumecovënëtavanapaeyava Jesús pelivaisi. Pacavënëlivaisitanetsibejenua paneasivatsavanapaeyava daxita Jesús pelivaisi pejumecovënëtsivi. ⁵ Bajara pajamatabëcuenetsimë tspaji baja xaniavaetsia payapëtaneme xua Dioso pacatoxaniavaeta athëbëtatsia papecarajutsinexa. Pamatacabi ajena pajumetaneme pexanialivaisi papecacapanepaelivaisinexa, bajarapamatacabi payapëtaneme baja xua Dioso pacatoxaniavaeta athëbëtatsia papecarajutsinexa. ⁶ Bajarapapexanialivaisi pajumetaneme baja pamatacabi copiaya Epafra pacatsipaeba Dioso papecaasivajava. Bajarapalivaisi baja aeconoxae daxitanacuanëjaya yacaëjëpapona. Nexata daxitanacuanëjaya, pamonaë jumecovënëtapona bajarapalivaisi, copatapona baja perujujamatabëcuenemi. Nexata baja pejanajamatabëcuenepaxinapona. Bajarapamonae pejanajamatabëcuenepaxinapona, pacuenia paxamë ata pejanajamatabëcuenepaxinaeme pamatacabi ajena pejumecovënëtame bajarapalivaisi. Bajara pamatacabiavaverenacujinae paxamë baja payapëtaepoename pepacuenia Dioso papecaitaxutotsoniataejaya. ⁷ Dioso papecaitaxutotsoniataejaya, copiaya baja cajena vajaasivanë Epafra pacatsipaeba. Bajaraponë Jesucristo xaniavaetsia petonacuenebinë. Nexata bajaraponë panetoitorobaremena paneyavenonaenexabeje Dioso patatonajuanaenacuenibinexa majotaje. ⁸ Nexata pamatacabi Epafra pata paxanëbejeyavaberena, panetsipaebabeje xaniavaetsia panejinavanapaeyava. Panetsipaebabejenua Espiritu Santo papecayavenonaeyava paneasivanexa itsamonaë ata.

⁹ Nexata patacavënëlivaisitaecujinaebeje, pacatovajëtabiatsi Diosojavabelia. Pacatovajëtabiatsi xua Dioso pacatojitsipa papecayapëtaeyaxanaenexa. Nexata Dioso itsa pacayapëtaeyaxana xua Dioso pacatojitsipa, bajaraxua paneexanavanapaenexa. Bajarapacuenia pacatovajëtabiatsi daxitacuenia, Dioso pijacuenia ata, Dioso papecayapëtaeyaxanaenexa. ¹⁰ Pacatovajëtabiatsinua xaniavaetsia jivi panetsitajinavanapaenexa, Dioso papecasivabarëyanexa pexaniacuenepaneexanabiabixae. Pacatovajëtabiatsinua Diosojavabelia panevajënaeyabelia Dioso panejamatabëcueneyapëtaeponaenexa. ¹¹ Pacatovajëtabiatsinua Dioso papecajamatabëcuenepaxinapona pesaëta. Nexata bajayajebi itsamonaepacaitsacueniababiabi ata, pacajamatabëcuenecaëjëpaena panejamatabëcuenesaëtsavanapaeyava. ¹² Pacatovajëtabiatsinua paxamë panejumaitsabibinexa Diosojavabelia: “Xanepana rabaja. Tspaji bitso pexaniacuenepanetoexaname,” panejaitsabibinexa Diosojavabelia. Bajarapacuenia pajumaitsimë tsabiabi tsane tspaji bajaraponë pacavecuajibiaexana baja panijaneconimi. Nexata baja Dioso aneconijibia picatane. Nexata paxamë ata Dioso pacarajutsiana xua xaina pijajivi perajutsinexa pijapenivenenaenacuatatsia. ¹³ Vaxaitsi bajayata apo yapëtaetsi pexaniajailivaisi. Nexata picani hepitaquirinacuata vajajinavanapaevi. Tspaji picani dovathi pijajivitsi tsavanapae. Pibisiacuenepaneexanabiatsi pacuenia dovathi nacaitoroba. Itsiata baja aeconoxae Dioso nacapita dovathivecua. Nexata baja Dioso pexënato, piavianë, pijajivitsi nacaexana. ¹⁴ Nacasivatëpa Cristo. Nexata baja Cristo pejamatabëcueneta Dioso nacavecuajibiaexana vajaneconimi. Nexata baja aneconijibia jinavanapatsi.

Pacuenia Dioso nacavecuajibiaexana pibisiacuene vajaexanaeiconimi Cristo janacasivatēpaexae yabara pelivaisi

¹⁵ Dioso cajena caeto ata apo vajataenē. Itsiata Dioso pexēnato, Cristo, naexana mapanacuataje. Cristo paxa jēpa. Dioso daxitacuene mapanacuata pexanaevajēnaeya ata, Cristo baja cajena ponapona athēbētatsia. ¹⁶ Cristo baja cajena exana daxitacuene Dioso pejamatabēcueneta. Athēbētatsia xua apo taetsi, Cristo exana. Daxitacuene xua tanetsi mapanacuata ataje, Cristo exana. Cristo daxitacuene itsa exana, ángelevi ata exana. Angelevi penamatacaitorobivnexa ata, Cristo exana. Bajarapacuenia Cristo ángelevi ata exana pacuenia Cristo jitsipa petonacuenebavanapaenexatsi. ¹⁷ Daxitacuene Cristo pexanaevajēnaeya ata, Cristo baja cajena athēbētatsia ponapona. Daxitacuene xua Cristo exana, bajaraxua pexanaecujinae abaxē Cristo pesaēta mapamatacabita ataje tsitecanajetaruca. ¹⁸ Cristo baja cajena pevetsinē daxita Dioso pejumecovēnētsivi. Nexata daxita Dioso pejumecovēnētsivi Cristo penamatacaitorobinē. Cristo pejamatabēcueneta daxita Dioso pejumecovēnētsivi Dioso pijajivi exanatsi. Cristo taxuxuaba jivi petēpaecujinae icatsia jivi piasaējavanexa. Bajaraxuata itsamonae ata icatsia asaē tsane petēpaecujinae. Nexata Cristo daxitajivi matatoxenetsia bitso ayaijamatabēcuenenē. ¹⁹ Bajarapacuenia Cristo bitso ayaijamatabēcuenenē tsipaji Dioso pexēnato tojitsipa pejamatabēcuenējēpaenexatsi. ²⁰ Daxitajivi, pamonaē jinavanapa mapanacuataje, naneconita Diosojavabelia. Pamonaē ata jinavanapa athēbētatsia, naneconita Diosojavabelia. Nexata Dioso jitsipa daxita bajarapamonaē pebarajamatabēcuenexanepanaenexa. Nexata Dioso itorobica Cristo mapanacuayabetsicaje cruzata pesivatēpaenexa daxita bajarapamonaē. Nexata daxita bajarapamonaē Dioso aneconijibia tane Cristo pesivatēpaejamatabēcueneta. Bajaraxuata Dioso baja barajamatabēcuenexanepana bajarapamonaē.

²¹ Paxamē picani abaxē bajayata Diosovecua naxuabiaya pajinavanapame. Dioso bepapijavajabitsaēmē tsavanapae pibisiacuene paneexanavanapaexae. Itsiata baitsi jane aeconoxae baja Dioso pacabarajamatabēcuenexanepana. ²² Dioso baja aeconoxae pacabarajamatabēcuenexanepana. Tsipaji Jesucristo bepejiobucenia cruzata pacasivatēpa. Nexata baja Dioso pacavecuajibiaexana pibisiacuene paneexanaeiconimi. Bajaraxuata aeconoxae baja Dioso papijajivimē. Dioso baja pitabarata aneconijibia pajinavanapame. ²³ Nexata panevajēnaeyabelia aneconijibia Dioso pitabarata panejinavanapaenexa, asaēyata pajumecovēnētavanapare Cristo papecasivatēpaejava panijaneconi yabara. Palivaisi baja pajumecovēnētame papecacapanepaelivaisinexa, pētsa pacopatame panejumecovēnētsijava. Bajarapalivaisi baja yacaējēpa daxitanacuanējava petsipaebaponaējava. Xanē ata, Pablonē, tsipaebaponajē bajarapalivaisi.

Pacuenia Pablo itorobatsi peyavenonaenexa Dioso pejumecovēnētsivi yabara pelivaisi

²⁴ Xanē Pablonē, majotaje penaneconitsivi pejebabihibota, naneconitsiaponaponajē paxamē apo pajudiovimējava Cristo pelivaisi patacatsipaebaponaexae. Itsiata jamatabēcuenebarēyanē tsaponaponaē, nebejiobiaexanabiabi ata. Pacuenia Cristo bejiobiaexanatsi pijajivi pecapanepaenexa, bajara pijinia pacuenia xanē ata itsamonae nebejiobiaexanabiaba. Bajarapacuenia Dioso netocopata tanebejiobiaexanabiabinexa tavajēnaeyabelia tajamatabēcuenesaētsaponaenexa Dioso tajumecovēnētsijava. Nexata tane-sivaajamatabēcuenesaēnēxa daxita pamonaē jumecovēnēta Cristo pelivaisi. ²⁵ Dioso netocopata tayavenonaenexa Dioso pijajivi, pamonaē Cristo pelivaisi jumecovēnēta. Bajaraxuata paxamē ata pacayavenonatsi. Tsipaji Dioso nitoroba daxitajivi xaniavaetsia tatsipaebaponaenexa pexanialivaisi, Dioso pejumelivaisi. ²⁶ Dioso nitoroba jivi tatsipaebaponaenexa pacuenia Dioso tajēvelia najamatabēxaina pijajivi pecapanepaenexa. Dioso baja cajena nacua pexanaevajēnaeya ata, najamatabēxaina pacuenia exanaejitsia pijajivi pecapanepaenexa. Abaxē picani itsajivi ata Dioso apo yapētaeyaexanae bajarapacuenē. Itsiata baitsi jane aeconoxae baja Dioso tocopata daxita Dioso pejumecovēnētsivi peyapētaenexa pacuenia Dioso exana pijajivi pecapanepaenexa. ²⁷ Dioso tojitsipa apo judiōvi ata peyapētaenexa pexanialivaisi, palivaisi picani itsajivijavabelia ata Dioso apo yapētaeyaexanae. Bajarapalivaisi mapacuenia itsije. Cristo cajena pacatsijamatabēca papecayavajaponaponaenexa. Bajaraxuata nexata payapētaneme itsamatacabi Cristo panejayavajinavanapaējavanexa Dioso pijapenivenivenaenacuatatsia.

²⁸ Paxanē patanecaējēpacuenia, daxitajivi xaniavaetsia patsipaebaponajē Cristo pelivaisi. Pamuxujiobaponajēnua xaniavaetsia daxita bajarapamonaē pejumecovēnētsinexa Cristo pelivaisi. Bajarapacuenia pamuxujiobaponajē pevajēnaeyabelia pijamatabēcuenesaētsaponaenexa Cristo pelivaisi pejumecovēnētsijava. ²⁹ Bajaraxuata asaēyata Dioso tonacuenebaponajē daxita pasaēta Cristo nerajutapona.

2

¹ Jitsipajë paneyapëtaenexa pacuenia bitso pacasivanajamatabëxainatsi. Nexata asaëyata Diosojavabelia pacatovajëtabiabatsi. Laodicea tomarapijivi ata tovajëtabiabajë. Itsamonae ata, pamonaë abaxë apo netae, bajarapamonae ata tovajëtabiabajë. ² Asaëyata Diosojavabelia pacatovajëtabiabatsi papecajamatabëcuene asaëyaexanaenexa Cristo pelivaisi panejumecovënëtsijava. Pacatovajëtabiabatsinua najamatabëcuenejëpaeya panejinavanapaenexa namataenetsia panenasivaxae. Pacatovajëtabiabatsinua panejamatabëëthëtota ayailivaisi paneyapëtaeponaenexa xaniavaetsia itsa payapëtaneme Cristo. Bajarapacuenia pacatovajëtabiabatsi xaniavaetsia paneyapëtaenexa pexaniajailivaisi, palivaisi picani Dioso apo yapëtaeyaexanae itsajivijavabelia ata, baitsi jane baja Cristo pelivaisi. ³ Cristo pelivaisi xaniavaetsia itsa yapëtanetsi, nexata yapëtanetsi pacuenia Cristo nacatojitsipa vajatonacuenebavanapaenexa. ⁴ Bajarapacuenia pacatsipaebatsi itsajivi ata papecayamaxëitojorobiyaniya, penajumetsënëtsilivaisi itsa pacatsipaeba, bepexaniajailivaisi itajara panejumetaeyaniva. ⁵ Apo pacayajavaponaponaë atatsi, itsiata pacajamatabënajinabiabatsi. Jamatabëcuenebarëyanë itsa pacavënëlvivaisitanetsi najamatabëcuenejëpaeya panejinavanapaejava. Jamatabëcuenebarëyanënuu itsa pacavënëlvivaisitanetsi panevajënaeyabelia panejamatabëcuenesaë tsavanapaejava panejumecovënëtsijava Cristo pelivaisi.

⁶ Bajaraxuata pacuenia baja copiaya panajamatabëcueneocopatame vajatuxanenë Jesucristojavabelia papecacapanepaenexa Diosojavabelia, bajarapacuenia tsiteca panajamatabëcueneocopatavanapare. Panajamatabëcueneocoparenua panevajënaeyabelia Cristo papecayavenonaponaenexa daxitacuene yabara. Nexata pajinavanapaneame Cristo papecatoyitsipaecuenia. ⁷ Paxamë xaniavaetsia panajamatabëcueneocopare Jesucristojavabelia papecayavenonaenexa. Nexata Jesucristo pacajamatabëcueneasaëyaexanaena. Nexata papexaniajailivaisi itsamonae pacatsipaeba, tsiteca pajumecovënëtvavanapaneame. Pajumaitsimënuu tsabiabi tsane Diosojavabelia: "Xanepana rabaja. Tsiapaji bitso pexaniacuene panetoxaneame," pajamë tsabiabi tsane Diosojavabelia.

Pacuenia Cristo pijajivi pejanajamatabëcuene xainavanapa yabara pelivaisi

⁸ Xania. Nayajivitaeya pajinavanapare. Pëtsa panacopatame papecayamaxëitojorobinexa pamonaë tsipaebavanapa saicayalivaisi Dioso pejumelivaisivecua. Bajarapamonae apo tsipaebaponaë Cristo pelivaisi. Saya tsipaebapona mapanacuapijivi penajamatabëxainaelivaisi, penajumetsënëtsilivaisi, saya natsiquejemalivaisi.

⁹ Pacuenia Dioso jamatabëcueneitsi, Cristo itajëta mapanacuata itsa ponapona. ¹⁰ Pacuenia Dioso jamatabëcueneitsi, bajara paxamë ata itsamatacabi pajamatabëcueneitsimë tsane. Tsiapaji Cristo payajavajinavanapame. Bajaraponë bitso ayajamatabëcueneënë. Caëjëpatsi pitorobinexa daxitacuene. Caëjëpatsinua pitorobinexa daxitanacuënë pevetsivi ata. ¹¹ Itsa panajamatabëcueneocopare Cristojavabelia, nexata baja Dioso pacavecuajibiaexana pibisiacuene paneexanaeconomie papecacapanepaenexa. Pibisijamatabëcuene ata baja pacavecuajibiaexana. Nexata pacuenia judiövi pijacuenia perabëcaucubatsi, bajarapacuenia paxamë apo pacaperabëcaucubi pibisiacuene paneexanaeconomie Dioso papecavecuajibiaexanaenexa. Jume baja cajena. Biji rajane Cristo papecasivatëpaejava panejumecovënëtsixae, Dioso pacavecuajibiaexana pibisiacuene paneexanaeconomie. ¹² Itsa pacabautisaba, merata pacabubutaxuareca. Nexata papecabautisabijavata itsa pacabubutaxuareca, Dioso pacatane Cristo bepepacyajavamëthëtsivi itsa mëthëtsi petëpaeucujinae. Nexata papecabautisabijavata, papecabubutaxuabicujinaereca icatsia itsa pacamatacotsina menevetsina, Dioso pacatane Cristo icatsia bepepacyajavaasaëvi petëpaeucujinae icatsia itsa asaë. Bajarapacuenia Dioso pacatane tsiapaji Cristo yabara pajamatabëjumaitsimë mapacueniaje: "Xaniajai rabaja. Dioso pesaëta Cristo asaëyaexanatsi petëpaeucujinae," pajamatabëjamë. ¹³ Paxamë picani abaxë bajayata bepanetëpaevi. Diosovecua naxuabiaya pajinavanapame pibisiacuene paneexanaeconomie yabara. Bajarapacuenia picani Diosovecua naxuabiaya pajinavanapame apo pajudiövixae. Itsiata baitsi jane aeconoxae baja Cristo payajavajinavanapame papecacapanepaenexa. Tsiapaji baja Cristo pejamatabëcueneta Dioso pacavecuajibiaexana pibisiacuene paneexanaeconomie. ¹⁴ Bitso picani pibisiacuene exanavanapatsi. Tsiapaji apo exanaetsi pacuenia Dioso pejumelivaisita nacaitoroba. Itsiata baitsi jane Dioso baja nacavecuajibiaexana daxita bajarapaneconomie Cristo cruzata vajanacasivatëpaexae. ¹⁵ Bajarapacuenia Cristo cruzata vajanacasivatëpaexae, Cristo baja cueneamoneyaba dovathi. Tsiapaji bajarapacuenia Cristo itsa nacasivatëpa cruzata, asaëjibiaexana dovathi, pijajivi yajava. Pacuene dovathi pijajivi barëvetaponapona pitorobinexa, bajarapacuenia Cristo cueneamoneyaba. Nexata Cristo daxitajivijavabelia tsitanacueneitajëta pecueneamoneyabijava dovathi, pijajivi yajava.

Pacuenia Pablo muxujioba Jesús pelivaisi pejumecovënëtsivi pejamatabënjavinavanapaenexa Cristo pecaejava athëbëtatsia yabara pelivaisi

¹⁶ Cristo baja pecueneamoneyabixae dovathi, pëtsa panacopatame itsajivi ata papecajaniitavetsinexa panexaejava, panematavëjëaapaejava ata. Itsamonae abaxë tsiteca jume-covënëtavana perujulivaisi, Dioso Moiséspijinëta penajumecopatsilivaisi. Nexata pacue-nia itorobatsi bajarapalivaisi, fiestanë exanabiaba caeavi canacujitsia. Itsafiestanë ex-anabiaba caejuaameto canacujitsia, pejanajuameto itsa ecaica. Itsafiestanë exanabiaba pe-nacueraevetsimatacabianë canacujitsia. Pëtsa pajumecovënëtamë, itsajivi pacajunatsi ata panenaponaenexa bajarapafiestanëjavabelia. ¹⁷ Bajayata picani jivi ponabiaba bajarapafi-estanëjavabelia. Tspiji palivaisi bajayata Dioso Moiséspijinëta naponabiabinexa bajarapafiestanëjavabelia. Itsiata baja Cristo itsa patsica mapanacuaya-betsicaje, Cristo baja copiarucaeyaexana bajarapacuenemi. Nexata pacuenia Cristo nacaitoroba, bajarapacuenia exanavanapaenatsi. ¹⁸ Pëtsa pajumecovënëtamë itsamonae pacajumaitsi ata mapacueniaje: “Beveliajamatabëcuenevi panataema. Pavajëtabiabarenau ângelevijjavabelia Diosovecua panenaxuabiyaniava. Bemajitsinaebota baja cajena pataniji bajarapacuenia vaxaexanabiabinexa,” pacajai ata, pëtsa pajumecovënëtamë. Bajara-pamonae beayaijamatabëcuenevi nataeyabiaba pejamatabëcuenevijilivaisi saya petsipaebaponaejava yabara. ¹⁹ Bajarapamonae Cristo apo pejumecovënëtsivi. Daxita vaxaitsi Cristo vajajumecovënëtsivi, Cristo pijajivitsi. Nexata Dioso nacatane caenë Cristo bepeper-abëtotsi. Caejivi canacujitsia peperabëtota vinamataropotsiarubenaponareca. Bajara pijinia pacuenia vaxaitsi ata caenë Cristo bepeperabëtotsi Dioso nacatane. Bajarapacuenia Dioso nacatane Cristo pejamatabëcueneta. Nexata Dioso nacajamatabëcuenevayenonapona. Nacajamatabëcuene vitsabiaexanaponanua pacuenia Dioso nacatojitsipa.

²⁰ Itsamonae jamatabëcuenenavëxaniabiaya jumai tsabiabi: “Vajanacapanepaenexa Diosojavabelia, pexaniacuene toexanavanapaenatsi itsamonaejavabelia. Jumecovënëtavanaenatsinua daxita pacuenia nacaitoroba mapanacuapijivije,” jai tsabiabi itsamonae jamatabëcuenenavëxaniabiaya. Itsiata baitsi jane paxamë baja payapëtaneme bajarapalivaisi apo pexaniajailivaisicuene. Cristo itsa tēpa, paxamë ata, Cristo bepapecayajavatēpaevi, Dioso pacatane. Nexata baja picani paxamë mapanacuapijicuene yabaraje apo bepasivanajamatabëxainaemë. ¿Detsa nexata xujajitsia itsiata pajumecovënëtavana pame mapanacuapijivi jamatabëcuenenavëxaniabiaya papecatsipaebillivaisije? ²¹ Bajarapamonae jumai tsabiabi: “Dioso pitabarata panenajamatabëcuene bijianaeyaniava, pëtsa pajayatame maxuaje. Pëtsa paxanome maxuaje. Pëtsa papitame panecobeta maxuaje,” jai tsabiabi bajarapamonae. ²² Bajarapamonae xua itaveta itsamonae pejayatsiyaniava, pexaeyaniava ata, pepitsiyaniava ata, bajarapacueni daxita vereverecaena. Bajarapacuenia pitavetsicuene saya jivi pejamatabëcuenevijilivaisita itaveta. ²³ Pamonae bajarapacuenia pacaitavetapona, bepacatsita pepapëtaevi itajara. Tspiji bajarapamonae jamatabëpacaitoroba panevajëtabiabinexa ângelevijjavabelia. Bajarapamonae pacaitorobanua beveliaja-matabëcuenevi panenataenexa. Pacaitavetanua panijacuata panenatojitsipacuene paneexanaeyaniava. Bajarapamonae papecaitavetsicuene pajumecovënëtaponaë atamë tspipae, itsiata apo pacajamatabëcuenevayenonae tspipae papecavecuajibiaexanaenexa papibisijamatabëcuene paxainame pejamatabëthëtota.

3

¹ Cristo petēpaecujinae Dioso icatsia itsa asaëyaexanatsi, paxamë ata Cristo bepapecaya-javaasaëyaexanaevi, Dioso pacatane. Bajaraxuata athëbëpijicuene pajamatabënjavinavanapare, Dioso pijanacuapijicuene. Athëbëtatsia Cristo eca Dioso pemuxuneneta, pecujanenia, pe-najuavevetsinexabeje daxitacuene. ² Pasivanajamatabëxainabiabare êathëbëpijicuene. Pëtsa pasivanajamatabëxainabiabame mapanacuapijicueneje. ³ Cristo itsa tēpa, paxamë ata Cristo bepapaneyajavatēpaevi, Dioso pacatane. Aeconoxae baja paxamë Cristo papecayajavapon-aponaejava, itsamonae apo tae. Apo yapëtaenua. Pacuenia Cristo Dioso yajavaponapona, bajara pijinia pacuenia paxamë ata Dioso payajavajinavanapame. ⁴ Cristo baja cajena nacayajavaponapona. Vaxaitsi ata pijinia Cristo yajavajinavanapatsi. Pamatacabi Cristo icatsia athëbëvetsica patsianica, paxamë ata paxainaename penivenivenaectia Cristo papijajivixaemë.

Pacuenia Dioso pejumecovënëtsivi perujujamatabëcuenemi baja copata pejanaja-matabëcuene pexainaenexa yabara pelivaisi

⁵ Mapacuenia pajamatabëjumaitsimërs tsavanapaeje: “Tajaperujujamatabëcuenemi baja copatajê. Nexata baja apo jitsipaenë icatsia taxainaejava perujujamatabëcuene, ma-panacuapijijamatabëcueneje. Apo jitsipaenë baja itsapetiriva tajaitsijava tajavavecua. Apo

pijinia papebijivimē, pasivamēre panijavajivi. Pētsa anaeyacuenia paitorobabiabame panijavajivi. ²⁰ Paxamē pijinia papeximē, daxita xua paneaxajivi, paneenjivi ata, pacaitoroba paneexanaenexa, pajumecovēnētabiabare. Tspiji bajarapacueene vajatuxanenē sivabarēya. ²¹ Paxamē pijinia panexi panexainaevi, pētsa panexi anaeya paitorobabiabame papecajumecovēnētabiabinexa xua paitorobame. Tspiji saya belia panexi jamatabēcuenefaenaenjitsipa Dioso pejumecovēnētsijava. ²² Paxamē pijinia itsamonae papijajivimē, dajubicuenia papecanajetsivi itsamonae amoneya panetonacuenebavanapaenexa. Pacuenia panijatuxanevi pacaitoroba, bajarapacuenia patonacuenebabiabare panijatuxanevi. Pētsa matapania itsajota pacanaitaxutocaeveta panijatuxanevi, asaēyata patonacuenebame papecasivabarēyanexa panijatuxanevi panetonacuenebijava yabara. Biji rajane daxitamatacabi asaēyata xaniavaetsia patonacuenebabiabare. Panejamatabēcuenevetsina cuenejitsipaeya panijatuxanevi patonacuenebabiabare papecasivabarēyanexa vajatuxanenē. ²³ Daxita xua panijatuxanevi patonacuenebabiabame, jamatabēcuenearēyaya patonacuenebabiabare panijatuxanevi. Xua panijatuxanevi patonacuenebabiabame, bajaraxua yabara pajamatabējumaitsimēre tsabiabi mapacueniaje: “Xua tajatuxanenē tonacuenebajē, bajaraxua taniji Cristonexa betatonacuenebijava. Apo ētajatuxanenēnēxa,” pajamatabējamēre tsabiabi. ²⁴ Payapētaneme rabaja mapacuenieje. Vajatuxanenē pacarajutsiana pacuene pijajivi toxaina perajutsinexa, baitsi matacabi apo peverevereaejaya. Patonacuenebavanapame baja cajena Cristonexa. Bajara jane ponē pepacueene panijatuxanenē. ²⁵ Panejumecovēnēre pacuenia pacaitorobatsi. Tspiji pajivi pibisiacuene exana, bajarapajivi itsamatacabi Dioso naneconitsiaexanaenatsi pibisiacuene pexanaeneconi yabara. Pamatacabi Dioso daxitajivi naneconitsiaexanaena, paneconivajēto caejivi canacujitsia xainapona, bajarapaneconivajētota Dioso naneconitsiaexanaponaena caejivi canacujitsia. Nexata itsajivi ata apo vecuapanepae tsane Dioso jivi penaneconitsiaexanaecuene.

4

¹ Paxamē papetuxanevimē, xaniavaetsia paevere panijajivi, papecatonacuenebabiabivi. Panajamatabēnapitabiabare paxamē ata panijatuxanenē athēbētatsia peecaejaya.

² Daxita Dioso panejumecovēnētsivi icatsia pacatoyaquinatsi mapacueniaje. Diosojavabelia pavajētabiabare ajamatabēcueneitatsacaya pajamatabēcuenemajitsinejevamē. Itsa pavajētabiabianame Diosojavabelia, Dioso papecayavenonabiabijava yabara, pajumaitsimē tsabiabi tsane mapacueniaje: “Xanepana rabaja. Tspiji bitso pexaniacuene pane-toexaname,” pajamē tsabiabi tsane Diosojavabelia. ³ Itsa pavajētabiabianame Diosojavabelia, paxanē ata panetovajētabiabianame. Panetovajētabiabianame Diosojavabelia Dioso pataneyavenonaenexa nacuanē pevetsivi patanitavetsiyaniva jivi patatsipaebaponaeva Cristo pelivaisi. Pajitsipajē jivi patatsipaebinexa pacuenia Jesucristo patsica mapanacuyabetsicaje vajanacasivatēpaenexa pibisiacuene vajaexanaeneconi yabara. Bajarapalivaisi jivi tatsipaebaponaexae, neneconitsiaexana. Nexata abaxē naneconitsiaya ponaponajē penaneconitsivi pejebabiabibota. ⁴ Cristo pelivaisi jivi itsa tsipaebabiabajē, jitsipajē jumenapebetsiaya tatsipaebabiabinexa. Nexata panetovajētabiabianamēna Cristo pelivaisi jivi jumenapebetsiaya tatsipaebabiabinexa tanejumeyapētaenexa xaniavaetsia.

⁵ Paepatota pacatoxanepana pexanialivaisi, Cristo pelivaisi, panetsipaebinexa itsamonejavabelia, patsipaebabiabare. Xaniavaetsianua patsitajinavanapare pamonae Dioso apo pejumecovēnētsivi. Tspiji rabaja imoxoyo pevajēnae Cristo icatsia pepatsijavanexatsia. ⁶ Daxita palivaisianē pacuicuanetsipaebilivaisi. Panajamatabēcuenevererenua xaniavaetsia panejumecanaviatsinexa caejivi canacujitsia bajarapamonae itsa pacayanijobapona Dioso pejumelivaisi yabara.

Pacuenia Pablo toyaquina pecopatsinexa baja petoyaquinaelivaisi mapabaxutotaje yabara pelivaisi

⁷ Vajabanānē Tíquico, bitso vajaasivanē. Bajaraponē xaniavaetsia tonacuenebabiaba vajatuxanenē. Vajatuxanenē pijacuene patonajuanacuenebajēbeje. Bajaraponē pacatsipaebiana daxita pacuenia xanē ponaponajē. ⁸ Bajaraxuata bajaraponē pacaitorobaliatsi papecatsipaebinexa pacuenia pajinavanapajē. Bajaraponē nexata itsa pacatsipaebiana, nexata panesivaajamatabēcuenesaēmē tsane. ⁹ Bajaraponē paxamējavabelia yajavaponaenjitsia vajabanānē Onésimo. Bajaraponē Onésimo panijatomarapijinē. Tonacuenebabiaba xaniavaetsia vajatuxanenē. Bajaraponēbeje pacatsipaebiana daxita pacuenia Dioso pejumecovēnētsivi jinavanapa majotaje Roma tomarata.

¹⁰ Aristarcobeje naneconitsia paponaponajēbeje penaneconitsivi pejebabiabibota. Aristarco ata pacabajacobalia. Marcos ata, Bernabé pejuypijjinē, pacabajacobalia.

Paxamë rabaja payapëtaneme pacuenia paexanaejitsiamë. Nexata Marcos ita patsialia paxamëjavabelia, pacopiapitsianame xaniavaetsia. ¹¹ Pacabajacobalia Jesús ata, ponë itsavënë, Justo. Judíovi picani ayabitsaëto Jesucristo pelivaisi jumecovënëta. Itsiata bajarapamonaeyajuvënëvi, caenëbeje saya, neyavenona vajatuxanenë pijacuene tatonacuenebijava. Neyavenona saya mapamatabëxëyoje. Aristarco, Marcos, Jesús. Bajara saya pamatabëxëyo neyavenona. Bajarapamona bitso neyavenona. ¹² Epafra ata, Cristo pijajivitonë, panijatomarapijinë. Bajaraponë ata pacabajacobalia. Bajaraponë bitso pacatovajëtabiaba Diosojavabelia. Pacatovajëtabiaba ajamatabëcuenesaëya panejumecovënëtavanapaenexa Dioso pejumelivaisi. Pacatovajëtabiabanua xaniavaetsia paneexanabiabinexa pacuene Dioso pacatojitsipa. ¹³ Pacatsipaebatsi baja cajena pacuenia Epafra pacatovajëtabiaba Diosojavabelia bitso papecajamatabënajinaexae. Bajara pijinia pacuenia bitso tovajëtabiaba Dioso pejumecovënëtsivi, pejinavanapaevi Laodicea tomarata. Bitso tovajëtabiabanua Hierápolis tomarata pejinavanapaevi ata. ¹⁴ Vajaasivanë Lucas, ponë jivi vaëbabiaba, bajaraponë ata pacabajacobalia. Demasvënëne ata pacabajacobalia.

¹⁵ Nebajacobi vajamonae, daxita Dioso pejumecovënëtsivi, Laodicea tomarata pejinavanapaevi. Nebajacobi Ninfas ata. Pamona ata nacaetuatabiaba bajaraponë pijabota, nebajacobi. ¹⁶ Itsa baja paveretame panelebijava mapabaxutoje, patoitorobianame Laodicea tomarapijivijavabelia penalebinexa bajarapamona ata. Bajarapamona ata tatoyaquinaebaxuto juya pacatoitorobiana panenalebinexa paxamë ata. ¹⁷ Arquipojavabelia pajumaitsimë tsane mapacueniaje: “Dioso pecatocopatsijava netonacuenebinexa, verere xaniavaetsia,” pajamë tsane.

¹⁸ Xanë Pablonë, pacatoyaquinatsi baja cajena tacobeta mapalivaisiyoje patanebajacobinexamë. Pajamatabënajinavanapare penaneconitsivi pejebabiabibota taponaponaejava. Pacatovajëtabiabatsi Diosojavabelia papecayavenonabiabinexa Dioso. Bajara itsi tsane.

Mapabaxutoje San Pablo copiaya toyaquina Tesalónica tomarapijivijavabelia

Pacuenia Pabloana, Silvanobana, Timoteobana toyaquina mapabaxutoje Dioso pejumecovēñetsivijavabelia yabara pelivaisi

¹ Xañē, Pablonē, Silvano, Timoteo, mapamatabēxēyoje pacatoyaquinatsi mapabaxutoje. Pacatoyaquinatsi Dioso panejumecovēñetsivi, paTesalónica tomarapijivimē. Panenajamatabēcuenecopatsivi baja vaxa Diosojavabelia, vajatuxanenē Jesucristojavabelia ata. Pacatovajētatsi vaxa Diosojavabelia papecaixutotsoniataenexa jamatabēcuenexanepanaeya panejinavanapaenexa.

Pacuenia Tesalónica tomarapijivi Dioso pejumecovēñetsivi xaniavaetsia Dioso jumecovēñetsia jinavanapa yabara pelivaisi

² Itsa pavajētabiabajā Diosojavabelia, pexaniajamatabēcuene parajutabiabajā Diosojavabelia paxamē yabara. Pacatovajētabiabatsi Diosojavabelia daxitamatacabi canacujitsia Dioso papecayavenonabiabinexa. ³ Itsa pacatovajētabiabatsi vaxa Diosojavabelia, panajamatabēnapitabiabajā Dioso pinijicuenia panetonacuenebavanapaejava panenajamatabēcuenecopatsixae Diosojavabelia. Panajamatabēnapitabiabājēnua bitso pinijicuenia panejitsipaejava Dioso. Paxamē rabaja pajamatabēcuenesaēmē tsavanapae panecopi-aevetavanapaejava vajatuxanenē Jesucristo icatsia pepatsijavanexatsica. ⁴ Tajamonae, Dioso baja cajena pacaasiva. Payapētaniji baja cajena Dioso papecaixutotsoniataenexa. ⁵ Bajayata itsa pacatsipaeabatsi mapapexanialivaisije Diosojavabelia papeca-capanepaelivaisinexa, saya patacuibovojotota apo pacatsipaebitsi. Jume baja cajena. Biji ra Espiritu Santo pesaē yajava pacatsipaeabiabatsi. Nexata baja payapētaneme palivaisi pacatsipaeabatsi, pexaniajailivaisicuene. Payapētanemenua pacuenia paxanē xaniavaetsia panajinavanapajē paxamējavata patanitaxutua ajamatabēcuenesaēñexamē.

⁶ Pacuenia paxanē pajinavanapajē, pacuenia Jesús ata ponapona, bajarapacuenia paxamē ata pajinavanapame. Barēyaya baja pajumecovēñetavanapame patacat-sipaebillivaisi Espiritu Santo papecatsijamatabēcaexae. Bajarapacuenia barēyaya pajumecovēñetavanapame patacat-sipaebillivaisi, itsamonae bitso pacabejiobiaexanabiabi ata. ⁷ Bajarapacuenia panejinavanapaejava daxita Dioso pejumecovēñetsivi, Macedonia nacuapijivi, Acaya nacuapijivi ata, itsa pacavēñelivaisitane, bajarapamonae ata yapētane bajarapacuenia xaniavaetsia Dioso petojinavanapaenexa. Nexata bajarapamonae ata xaniavaetsia jinavanapa pacuenia paxamē pajinavanapame. ⁸ Itsiata ēMacedonia nacuapijivi, ēAcaya nacuapijivi ata, bajarapacuenia xaniavaetsia panejinavanapaejava, apo pacavēñelivaisitae. Tajē nacuapijivi ata pacavēñelivaisitane panenajamatabēcuenecopatsijava Diosojavabelia. Bajarapacuenia itsa pacavēñelivaisitane, bajarapamonae ata yapētane baja Jesús pelivaisi pexaniajailivaisicuene. Bajaraxuata paxanē apo pacavajunupaebitsi daxita bajarapamonaejavabelia. Tsipaji baja yapētane. ⁹ Biji rajane bajarapamonae pijacuata panetsipaeba paxamē xaniavaetsia patanecopiapitsijavamē pamatacabi pacanasivaxainatsi. Paxamē picani jumapecataeya pexanaenēanējavabelia panavajēcabiabame. Itsiata baja aeconoxae pacopatame jumapecataeya pexanaenēanējavabelia panenavajēcabiabijavami. Nexata baja pepo Diosojavabelia panajamatabēcuenecopatame. Patonacuenebavanapame pepo Dioso, ponē piasaētaponaponaenē daxitamatacabijavabelianexa. Bajarapacuenia paxamē yabara panetsipaeba baja cajena daxita bajarapamonae. ¹⁰ Bajarapamonae panetsipaebanua panecopi-aevetavanapaejava Jesús, Dioso pexēnato, athēbēvetsica icatsia pepatsijavanexatsica. Bajaraponē, Jesús, Dioso baja cajena asaēyaxanatsi petēpaecujinae. Jesús nacacapanepaena pibisiacuene vajaexanaeconi yabara Dioso vajanacananeconitsia exanaejavamīnēxavecu.

2

Pacuenia Pablo nacueneba Tesalónica tomarata yabara pelivaisi

¹ Tajamonae, apo panacueratsinē itsa pacasivaxainatsi. Bajarapacuenie paxamē panijacuata payapētaneme. ² Paxamē baja cajena payapētaneme mapacueneje. Paxanēbeje Silas-beje patapatsivajēnaebeje paxamējavabelia, Filipos tomarata panenaneconitsiaexanabeje itsaneconi apo paxinae atanēbeje. Panebejiobiaexanabejenua bajarapamonae. Itsiata baitsi jane Dioso pataneyavenonaexaebeje, ajumeurajibia pacatsipaeabatsi pexanialivaisi

Diosojavabelia papecacapanepaelivaisinexa. Pacatsipaebatsi bajarapalivaisi, patanito-
 avi picani apo panecocopatsi ata patacatsipaebinexa. ³ Palivaisi pacatsipaebatsi, pexa-
 niajailivaisi cajena. Apo penajumetsënëtsilivaisi. Apo pacatsipaebitsi bajarapalivaisita
 patacayamaxëitojorobinexa. ⁴ Biji ra Dioso paneitoroba. Panecocopatana jivi patatsi-
 paebinexa pexanialivaisi pecapanepaelivaisinexatsi Diosojavabelia. Bajaraxuata bajara-
 palivaisi jivi itsa patsipaebaponajë, apo patsipaebaponaenë saya jivi patanebarëyataenexa
 bajarapalivaisi patatsipaebijava yabara. Biji ra bajarapalivaisi jivi patsipaebaponajë
 Dioso patanebarëyataenexa. Tspaji Dioso vajanacajamatabëcuenyapëtaenë. ⁵ Paxamë baja
 cajena payapëtaneme mapacueneye. Caeto ata paxanë itsalivaisi apo pacabarëcuaiucuijaiti
 saya jema bajarapalivaisi yabara patanebarëyataenexamë. Yamaxëitojorobiaya livaisi apo
 pacatsipaebitsi palata patacavecuapitsinexa. Dioso baja cajena daxita bajarapacueneye
 panejamatabëcuenyapëtanë. ⁶ Cristo patanitorobixae, panejamatabëcuenecaëjëpa picani
 patacaitorobinexa pataneyaiyataenexamë. Itsiata baitsi jane caeto ata apo pacaitorobitsi
 pataneyaiyataenexamë. Apo paitorobinë itsamonae ata pataneyaiyataenexa. ⁷ Biji rajane
 pacuenia petiriva asivaya xaniavaetsia baevetaponapona pexi, bajara pijinia pacuenia
 paxanë ata asivaya xaniavaetsia pacaevetavanapatsi. ⁸ Bitso pacaasivatsi. Nexata pacatsi-
 paebatsi Dioso pejumelivaisi. Bitso patacaasivaxae, itsamonae jamatabëpanebyejebabiabi
 ata, itsiata apo pacopatsinë patacayavenonaponaejava. ⁹ Tajamonae, panecuenecaëjëre
 mapacueneye. Pamatacabi paxamëjavata pajinavanapajë, pinijicuenia panacuenebabi-
 abajë. Pinijicuenia panacuenebabiabajë patajacuata patanaevetsinexa. Pacatsipa-
 ebaonatsinua pexanialivaisi, palivaisi Dioso nacayapëtaeyaxana. Paepatota pacue-
 nesajinajë, panatonacuenebabiabajë matacabita, meravi ata. Bajarapacuenia pana-
 tonacuenebabiabajë itsanë ata paxamëyajuvënënë petoayapëbejeyanivatsi patanevetapon-
 aejava.

¹⁰ Paxamë baja cajena paneyapëtaneme pacuenia pajinavanapajë. Dioso
 ata paneyapëtanë. Paxamë baja cajena paneyapëtaneme paxanë bibisiacueneye
 apo pataexanaevi. Paxamë baja cajena paneyapëtaneme paxanë bitso Dioso
 patajumecovënëtsivi. Paxamë baja cajena paneyapëtaneme paxanë itsacueneneconiyo
 ata apo paxainaenë, paneconi yabara pananeconitsijitsianë paxamëjavata itsa
 pacatsipaebavanapatsi Dioso pejumelivaisi. ¹¹ Paxamë baja cajena paneyapëtaneme
 paxamë pacanenë canacujitsia patacamuxujiobaponaejava panejamatabëcuenesaënexa
 Diosojavabelia. Pacuenia pexi pexainaenë nacoximuxujioba, bajara pijinia
 pacuenia paxanë ata pacamuxujiobatsi. ¹² Pacaitorobatsi baja cajena xaniavaetsia
 panetojinavanapanaexa Dioso papecabarëyataenexa. Dioso baja cajena pacajunata
 daxitacueneye papecabarëvevetsinexa pijapenivenivenenaacuatsia.

¹³ Itsa pacatsipaebatsi Dioso pitorobilivaisi, panenamuxunaevetame. Nexata pane-
 jumecovënëtamë patacatsipaebilivaisi. “Xaniajai baja cajena. Dioso pejumelivaisi nacat-
 sipaeba,” panejamatabëjaixae, panejumecovënëtamë. Apo pajumetaemë saya bejivi-
 tonë pejamatabëcueneta pepaebilivaisi. Xaniajai cajena. Dioso pejumelivaisi pacatsi-
 paebaponatsi. Bajarapalivaisi panejumecovënëtsixae, panevajënaeyabelia paexanavana-
 pame pacuenia Dioso pacaitoroba. Bajaraxuata paxamë yabara pexaniajamatabëcuene
 parajutabiabajë Diosojavabelia. ¹⁴ Tajamonae, pacuenia Judea nacuata Dioso pejumec-
 ovënëtsivi bejiobiaexanatsi pijanacuapijivi, judiovi, bajara pijinia pacuenia pacabejiobi-
 aexana panijanacuapijivi. ¹⁵ Pacuenia bajarapajudiovi pijasalinaivimi bajayata beyaxu-
 abapona Diosojumepaebivimi profetavi, bajara icatsia pacuenia bajarapamonaemi pe-
 momoxi beyaxuaba pepo petuxanenë Jesús. Nexata Jesús papijajivixanenë, paxanë ata
 bajarapamonaemi panecapitsapa judiovi penacaetuatabiabibovecua. Dioso apo pejitsipa-
 cuene bajarapajudiovi exanapona. Bajarapajudiovi daxitajivi bitso itoya. ¹⁶ Paxanë pexa-
 nialivaisi itsa patsipaebabiabajë apo judiovijavabelia, apo judiovi ata pecapanepaenexatsi
 Diosojavabelia, nexata bajarapajudiovi panejumeitavetabiaba. Bajarapacuenia patane-
 jumeitavetabiabixae, bibisiacueneye pexanaeneconi pematatsënëa ayaineconi natsixaina
 Diosojavabelia. Nexata baja aeconoxae bajarapamonaecopiapatatsi ayaicuenia Dioso
 penaneconitsiaexanaematacabinexatsi.

Pacuenia picani icatsia Pablo jamatabëtanë Tesalónica tomarapijivi yabara pelivaisi

¹⁷ Tajamonae, patacavecuaponaecujinae, caematacabibeje apo pacatae atatsi, itsiata
 pacajamatabënajinavanapatsi. Bitso picani icatsia jamatabëpaponajë paxamëjavabelia
 patacataenexa. ¹⁸ Jamatabëpaponajë picani paxamëjavabelia. Xanë Pablonë,
 jamatabëponabiabajë picani. Itsiata dovathi apo panecopatsi. ¹⁹ Vajatuxanenë
 Jesucristo icatsia itsa patsianica, pacavajunupaebianatsi bajaraponëjavabelia
 xaniavaetsia Dioso panejumecovënëtsijava. Bitso pacasivajamatabëcuenebarëya tsanetsi.

²⁰ Paxamë yabara baja cajena pexaniajamatabëcuene parajutabiabajë Diosojavabelia. Pacasivajamatabëcuene barëyatsinua tsabiabi.

3

¹ Bajayajebi baja cajena apo pacataetsi. Nexata baja belia apo panajamatabëcuene saëtaaponaejitsipaenë matavëjëa pataevetaponaejava patacataenexa. Nexata baja panajamatabëxainajëbeje ëTimoteo pataitorobinexabeje, peponaenexa paxamëjavabelia papecataenexa. Paxanëbeje Silvanobeje, Atenas tomarata panacopatsianajëbeje. ² Nexata baja pacatoitorobatsibeje vajabananë Timoteo. Timoteobeje baja cajena Dioso patatonajuanacuenebinëbeje, jivi patatsipaebaponaenexabeje pexanalivaisi, Cristo pelivaisi. Pacatoitorobatsibeje Timoteo papecayavenonaenexa, papecajamatabëcuene asaëyaexanaenexa Dioso panejumecovënëtsijava yabara. ³ Pacatoitorobatsibeje Timoteo papecayavenonaeya tsipaebabiabinexa pexanalivaisi, caenë ata paxamëyajuvënë Dioso pejumelivaisi pejumecovënëtsijava pecopabianiva, itsamonae itsa bejibiaexanaponatsi. Paxamë baja cajena payapëtaneme Dioso vajanacatocopsijava itsamonae vajanacabejioibiaexanaponaenexa. ⁴ Pamatacabi abaxë pacayajavajinavanapatsi, tajëvelia baja cajena pacatsipaebabiabatsi itsamonae papecabejioibiaexanaponaejavanexa Dioso papijajivixamë. Nexata jane baja bajarapacuene aeconoxae pacatocopiapata. ⁵ Bajaraxuata baja apo najamatabëcuene saëtaaponaejitsipaenë matavëjëa taevetaponaejava patacataenexa. Nexata baja itorobajë Timoteo peponaenexa paxamëjavabelia papecataenexa pacuenia pajumecovënëtavapaname Dioso pitorobilivaisi. Xanë picani paxamë yabara jamatabëjumaitsinë: "Dovathi meta bajarapamonae jamatabëcueneëjëtatsi. Othopaica meta baja. Nacueratajë meta baja bajarapamonaejavata pexanalivaisi tatsipaebabiabijava," jamatabëjanë picani paxamë yabara.

⁶ Timoteo nexata itsa parena paxamëjavaverena, Tesalónica tomaraverena, panetsipaebabeje pexanalivaisi. Xaniavaetsia pina Dioso pajumecovënëtavapaname. Paxamë pina pasivamë tsavanapae itsamonae ata. Panejamatabënajinavanapaname pina pexaniajamatabëcuena. Bitso pina jamatabëpanetaneme picani pacuenia paxanë ata jamatabëpacatanetsi picani. ⁷ Tajamonae, panetocopiapata rajane baja pibisiacuenia itsamonae patanebejioibiaexanaponaenexa. Itsiata baitsi jane panajamatabëcuenesaëtavapanajë paxamë yabara. Panajamatabëcuenesaëtajë itsa pacavënëlivaisitanetsi asaëya Dioso panejumecovënëtsijava. ⁸ Itsa pacavënëlivaisitanetsi asaëya Dioso panejumecovënëtsijava, nexata pacasivanajamatabëcuenesaëttatsi. ⁹ Nexata pexaniajamatabëcuene parajutajë Diosojavabelia paxamë yabara. Pexaniajamatabëcuene parajutajë Diosojavabelia bitso patacasivajamatabëcuenebarëyaxae Dioso pitabarata. ¹⁰ Matabacaba, meravira, daxita patajamatabëëthëtovetsina pavajëtabiabajë Diosojavabelia patanetocopsinexa icatsia pataponaenexa paxamëjavabelia patacataenexa. Pacatovajëtatsi Dioso papecayapëtaeyaexanaenexa palivaisi abaxë pacatosaica xaniavaetsia panejumecovënëtsinexa Dioso pejumelivaisi.

¹¹ Pavajëtajë vaxa Diosojavabelia, vajatuxanenë Jesucristojavabelia ata, pataneyavenonaenexa pataponaenexa paxamëjavabelia. ¹² Pacuenia paxanë pacaasivatsi tsavanapae, bajarapacuenia paxamë ata caejivi canacujitsia panevajënaeyabelia namataenetsia panenasivanexa, pacatovajëtatsi Diosojavabelia papecayavenonaenexa. Pacatovajëtatsi Dioso papecayavenonaenexa itsamonae ata paneasivanexa. ¹³ Pacatovajëtatsi Dioso papecajamatabëcuene asaëyaexanaenexa, jamatabëcuenexanepanaeya panejinavanapanaenexa. Nexata paneconijibimë tsane. Paneconijibimë tsane Dioso pitabarata panenubenaenjavata, pamatacabi vajatuxanenë Jesús, daxita pijajivi yajava, patsianica.

4

Pacuenia Dioso pitabarata xaniavaetsia bejinavanapatsi Dioso vajanacasivajamatabëcuenebarëyanexa yabara pelivaisi

¹ Tajamonae, nexata pinijicuenia pacamuxujibatsi. Vajatuxanenë Jesús pejamatabëcueneta pacaitorobatsi xaniavaetsia panejinavanapanaenexa. Pacatsipaebatsi rabaja cajena pacuenia pajinavanapaejitsiamë Dioso papecasivajamatabëcuenebarëyanexa. Bajarapacuenia panevajënaeyabelia xaniavaetsia pajinavanapare daxitamatabacijavabelianexa.

² Payapëtanemenua baja cajena palivaisi vajatuxanenë Jesús pejamatabëcueneta pacaitorobatsi panejumecovënëtsinexa. ³ Dioso raja jitsipa xaniavaetsia panetoinavanapanaenexa ëponëxexa. Dioso raja pacatojitsipa panecopabinexa pibisiacuene panevitota paneexanaejava. ⁴ Dioso raja pacatojitsipa pacanenëmë

canacujitsia paneyapëtaenexa mapacueneje. Petiriva itsa papitame panijavanexa, xaniavaetsia paevere. Payaiyataemanua. ⁵ Pëtsa petiriva papitame pibisiacuene saya panevitota paneexanaenexa bajarapovajavabelia pacuenia Dioso apo pejumecovënëtsivi baexana. ⁶ Dioso cajena apo jitsipae itsanë ata pevitota pibisiacuene pexanaenexa itsanë pijavajavabelia. Vajatuxanenë cajena pinijucuenia naneconitsiaexanaena daxita pamonaē exana bajarapacuene. Bajarapacuene yabara imata baja cajena pacatsipaebatsi pamatacabi abaxë pajinavanapajë paxamëjavata. ⁷ Dioso baja cajena nacajunata ëpexaniacuene vajaexanavanapaenexa. Dioso apo nacajunatsi pibisiacuene vajaexanavanapaenexa. ⁸ Itsamonae apo panejumecovënëtsi patatsipaebilivaisi. Bajarapamonae itsa apo panejumecovënëtsi paxanë, apo jumecovënëtsi Dioso, ponë nacarajuta Espiritu Santo.

⁹ Paxamë rabaja namataenetsia panaasivamë tsavanapae itsamonae Dioso pejumecovënëtsivijavabelia. Dioso baja cajena pacayapëtaeyaxana bajarapacuena panenasivanexa. Bajaraxuata apo namatavenonaenë baja patacatoyaguinaenexa patacayapëtaeyaxanaenexa bajarapacuene. Tsipaji baja payapëtaneme. ¹⁰ Xaniajai rabaja. Pasivamë tsavanapae daxita vajamonae, Macedonia nacujava pejinavanapaeivi. Itsiata icatsia pacaitorobatsi namataenetsia bitsoyo orijibia panenasivanexa. ¹¹ Pacuenia baja cajena copiaya pacaitorobatsi, bajarapacuena jamatabëcueneanaxanaepaeya pajinavanapare. Èpanijacuene saya paexanare panejamatabëitonotsiyaniiva itsamonaējavabelia. Panijacuata panatonacuenebare bajarapacuena panenaevetavanapaenexa. ¹² Bajarapacuena nexata Dioso apo pejumecovënëtsivi pacayaiyataena. Nexata apo pacatosaiacae tsane itsacuenejavayo ata panenamatavenonaējava.

Pacuenia pepo petuxanenë Jesús icatsia patsijitsiatsica yabara pelivaisi

¹³ Tajamonae, pacatojitsipatsi xaniavaetsia paneyapëtaenexa pacuenia itsamatacabi itsijitsia Dioso pepua pejumecovënëtsivi petëpaeivi. Pacatsipaebatsi baja cajena bitso panenajamatabëxainaeayaniva itsa pacavecuatëpa itsajiviyo. Pacatsipaebatsi baja cajena bitso panenajamatabëxainaeayaniva, pacuenia bitso banajamatabëxaina Dioso apo pejumecovënëtsivi itsa vecuatëpatsi itsajiviyo. Bajarapamonae jamatabëcuenenavëxaniabiaya bajumaitsi: “Petëpaeivi rabaja peponaxuabi,” bajai Dioso apo pejumecovënëtsivi. ¹⁴ Vaxaitsi baja cajena jumecovënëtatsi Jesús vajanacasivatëpaejava. Jesús vajanacasivatëpaeucujinae, Dioso icatsia asaëyaexanatsi petëpaejavavecu. Dioso icatsia itsamatacabi asaëyaexanaena daxita pamonaē Dioso pepua pejumecovënëtsivi petëpaeivimi. Bajarapalivaisi vaxaitsi baja jumecovënëtatsi.

¹⁵ Palivaisi pepo petuxanenë Jesús netsipaeba, bajarapalivaisi pacatsipaebijitsiatsi. Vaxaitsi abaxë mapanacuata vajaasaëtsavanapaeivi pamatacabi pepo petuxanenë Jesús icatsia patsianica. Vaxaitsi athëbëbetsia apo namataxainaeitsiatsi tsane. Petëpaeivimi rajane copiaya namataxainae. ¹⁶ Angelevi penamatacatorobinë vavajai tsaxuabi tsane. Dioso pijatrompeta najumetsiana. Pepo petuxanenë jane baja pijacuata patsianica athëbëvetsica. Nexata pamonaē Cristo pepua pejumecovënëtsivi tëpa, bajarapamonae asaëyaexanaenatsi petëpaejavamivecu. ¹⁷ Bajaraxucujinae vaxaitsi, abaxë mapanacuata vajaasaëtsavanapaeivi bajarapamatacabi, itarërëbotatsi nacacatuatsianiva petëpaeivimi yajava. Caxitajarabianatsi jane baja athëbëtatsia pepo petuxanenë Jesús. Nexata jane baja daxitamatacabijavabelianexa yajavajinavanapaenatsi bajaraponë. ¹⁸ Bajaraxuata panajamatabëcueneasëtavapanare mapalivaisitaje.

5

¹ Tajamonae, itsiata apo panamatavenonaenë patacatoyaguinaenexa patacayapëtaeyaxanaenexa pamatacabi, paepatota ata, copiapatsijitsia daxita bajarapacuene. ² Payapëtaneme baja cajena pepo petuxanenë Jesús icatsia pepatsijavanexatsica. Paepatota apo vajënaeevetsitsi, jemata patsianica. Pacuenia penacobetoxotsinënexa meravi bapata itsajota apo jamatabënajinaetsi, bajarapacuena jemata patsianica pepo petuxanenë Jesús. ³ Pamatacabi jivi jumai tsaponae tsane: “Daxitanacuanëjava baja cajena xanepana. Daxitajivi xaniavaetsia jinavanapa,” jai tsane, bajarapaepatota jemata tocopiapatsianatsi Dioso apo pejumecovënëtsivi peverebiabinexatsi. Nexata acuenebi tsanë Dioso apo pejumecovënëtsivi pevecuarëcëpecaenexa bajarapacuene. Pacuenia petiriva, penacoxitsiva, itsa vixanotatsi penacueto pevecuanaexanaenexatsi, acuenebi pevecuanajetabajiravijava bajarapavixae, bajara pijinja itsane pamonaē Dioso apo pejumecovënëtsivi. ⁴ Tajamonae, paxamë baja apo pajamatabëcueneitaquirimë. Pacuenia Dioso apo pejumecovënëtsivi ajamatabëcueneitaquiri, bajarapacuena apo pajamatabëcueneitaquirimë. Pepo petuxanenë Jesús pepatsimatocabinexatsica pacopiaevetavanapame. Nexata pamatacabi pepo petuxanenë patsianica, apo

pajamatabêcuenenabenajacaemê tsane. Pacuenia penacobetoxotsinê itsa pata, basivajamatabêcuenenabenajacatsi, apo paitsimê tsane. ⁵ Tspaji baja daxita paxamê pexanialivaisita pacajamatabêcueneitayota. Nexata baja daxita vaxaitsi pitaquirijamatabêcuene apo xainaetsi. ⁶ Bajaraxuata nexata vaxaitsi apo bejamatabêcuenemajitsi. Pacuenia Dioso apo pejumecovênêtsivi jamatabêcueneitsi, bajara apo bejamatabêcueneitsi. Biji rajane jamatabêcueneaitavaya bejinavanapatsi. Nayajivitaeya bejinavanapatsinua pibisiacuene vajaexanaeyaniva. ⁷ Pamonaie jamatabêcueneaitaquiri, jamatabêcuenemajitabiaba. Aitajibi tsabiabinua meravi. ⁸ Itsiata baitsi jane vaxaitsi baja pexanialivaisita nacajamatabêcueneitayota. Nexata nayajivitaeya jinavanapatsi pibisiacuene vajaexanaeyaniva. Najamatabêcuenecopatatsi baja êDiosojavabelia. Asivatsi tsavanapae Dioso. Itsamonae ata asivatsi tsavanapae. Copiaevetavanapatsi Cristo vajanacacapanepaenexa Diosojavabelia. Bajarapacuenia itsa copiaevetavanapatsi Cristo vajanacacapanepaenexa Diosojavabelia, nexata dovathi pejamatabêcuenevecua nayajivinajamatabêcuenexatatsi Dioso pejumelivaisita. Nexata pacuenia vajabitsaênê nayajivinaxatata piatajajava, namataxatatanua piatajajava pejorojoronaeyanivatsi pijavajabitsaênê, bajara vaxaitsi ata itsi dovathi vajanacayamaxêtojorobiyaniva. ⁹ Dioso apo nacaitapetsi vajanacananeconitsiaexanaenexa pibisiacuene vajaexanaeconi yabara. Biji rajane Dioso nacaitapeta vajanacacapanepaenexa pibisiacuene vajaexanaeconivecua pepo petuxanenê Jesucristo pejamatabêcueneta. ¹⁰ Jesucristo baja cajena nacasivatêpa vajanacayajavaponaponaenexa vajasasêtsavanapaevi mapanacuataje. Vajatêpaecujinae ata, Dioso pijanucatsia Cristo nacayajavaponaponaena. ¹¹ Bajaraxuata pacuenia baja namataenetsia panajamatabêcueneasaêya exanaponaenexa, bajarapacuenia panevajênayabelia tsiteca paexanavanapare.

Pacuenia Pablo Dioso pejumecovênêtsivi muxujioba yabara pelivaisi

¹² Tajamonae, pinijicuenia pacamuxujiobatsi paneyaiyataenexa pamonaie paxamê tuatuajêta Dioso tonacuenebavanapa. Bajarapamonae Dioso pitorobicueniatsi pacaevetavanapa. Pacamuxujiobabiabanua. ¹³ Payaiyataema bajarapamonae. Asivaya pataema. Tspaji bajarapamonae xaniavaetsia Dioso tonacuenebavanapa. Jamatabêcuenexanepanaeya panajuajinavanapare.

¹⁴ Pacaitorobatsinua panemuxujiobinexa pamonaie piafaetabivi. Pamonaie pijinia jamatabêcuenequerana itsamonae bepejiobiaexanaponaexatsi Dioso pejumecovênêtsijaya yabara, pajamatabêcueneasaêyaexanare. Payavenonare pamonaie jamatabêcuenefaefaena Dioso pejumelivaisivecua. Itsa pamuxujiobianame bajarapamonae, itsa pamuxujiobianamenua itsamonaejavabelia ata, ajamatabêcueneasaêya pamuxujiobianame bajayajebi pacopatsinejevamê.

¹⁵ Pêtsa bajarapamonaejavabelia pibisiacuene panamatamoexaname, copiaya pibisiacuene pacaexanae ata. Biji pajamatabênajinavanapare pexaniacuene namataenetsia panatoexanaponaenexa. Pajamatabênajinavanapare daxitajivijavabelia ata pexaniacuene panetoexanaenexa.

¹⁶ Daxitamatacabi pajamatabêcuenebarêyamêre tsavanapae. ¹⁷ Daxitamatacabi Diosojavabelia pavajêtabiare pacopatsinejevamê. ¹⁸ Daxita pacuene apo panejitsipacuene ata, Dioso itsa pacatocopata papecatocopiapatsinexa, nexata itsa pacatocopiapata bajarapacuene, itsiata pexaniajamatabêcuene parajutabiabianame Diosojavabelia bajarapacuene yabara. Bajarapacuenia paneexanavanapae, Dioso pacatojitsipa Jesucristo papijajivixaemê.

¹⁹ Espiritu Santo itsa pacajamatabêcueneitoroba itsacuenejavayo paneexanaenexa, pêtsa pajamatabêjumaitimê: "Apo exanaenê tsane bajarapacuenia," pajamatabêjamê pêtsa. ²⁰ Pêtsa panamuxujomatame Espiritu Santo peyajavacuaicuaijivi, Dioso pejumelivaisianê pepaebivi. ²¹ Nexata pacuenia bajarapamonae pacaitoroba panejumecovênêtsinexa, copiaya pajaire Dioso pejumelivaisibaxutota paneyapêtaenexa. Nexata xaniajai bajarapacuenia Dioso pejumelivaisibaxutota itsa jumaiti, bajarapacuenia paexanare. ²² Daxita xua pibisiacuene, panayajivitaema.

²³ Dioso baja cajena vajanacajamatabêcuenexaniavaetsinê. Bajaraponê pibisiacuene paneexanaeconimi pacavecuaajibiaexanaena. Dioso evetsiana panejamatabêcuene, paneperebêto ata, pibisiacuene paneexanaeyaniva. Bajarapacuenia Dioso pacaevetsiana matapania vajatuxanenê Jesucristo icatsia pepatsimatatabitsicajavabelianexa. ²⁴ Bajarapacuenia Dioso pacaevetsiana, ponê pacajunata papexinexamê. Dioso cajena pacatoexanaena daxita pacuenia najumecapanepaeya pacajumaiti.

Pacuenia Pablo jamatabênajina Tesalónica tomarajivi, pacuenia ata tovajêta Dioso peyavenonaenexatsi, yabara pelivaisi

²⁵ Tajamonae, Diosojavabelia panetovajêtabiare.

²⁶ Asivaya nebajacobiana daxita bajarajotalia Dioso pejumecovënëtsivi.

²⁷ Pacaitorobatsi Dioso pejamatabëcueneta. Patsimuxulebianame mapabaxutoje daxita Dioso pejumecovënëtsivi pejumetaenexa.

²⁸ Pacatovajëtabiabatsi Diosojavabelia vajatuxanenë Jesucristo papecayavenonabinexa.

Mapabaxutoje San Pablo cotocaevi toyaquina Tesalónica tomarapijivijavabelia

Pacuenia icatsia Pablobana, Silvanobana, Timoteobana, toyaquina mapabaxutoje Dioso pejumecovēñetsivijavabelia yabara pelivaisi

¹ Xanē Pablonē, Silvano, Timoteo, mapamatabēxēyoje pacatoyaquinatsi mapabaxutoje. Pacatoyaquinatsi Dioso panejumecovēñetsivi, paTesalónica tomarapijivimē. Pane-najamatabēcuenecopatsivi baja vaxa Diosojavabelia, vajatuxanenē Jesucristojavabelia ata. ² Pacatovajētatsi vaxa Diosojavabelia, vajatuxanenē Jesucristojavabelia ata, papecaitaxutotsoniataenexa jamatabēcuenexanepanaeya panejinavanapaenexa.

Pacuenia Dioso naneconitsiaexanaena pibisiacuene pexanaevi pamatacabi Cristo icatsia patsianica yabara pelivaisi

³ Tajamonae, panevajēnaeyabelia bitso orijibia panajamatabēcuenecopataponame Diosojavabelia. Pacaenēmē canacujitsia namataenetsia panaasivamēnuu tsavanapae. Bajaraxuata daxitamatacabi paxamē yabara pajumaitsinē tsane Diosojavabelia: “Xanepana rabaja. Pexaniacuena yavenonaponame Tesalónica tomarapijivi,” pajanē tsane. ⁴ Diosojavabelia pajamatabēcuenesaēmē tsaponae itsamonae pinijicuenia pacabijataeyabiabi ata, pacabejiobiaexanabiabi atanua. Bajaraxuata paxanē barēyaya pacavēñēlivaisipaebaponatsi itsatomaranējava, Dioso pejumecovēñetsivijava. ⁵ Bajarapacuenia pacabejiobiaexanabiabi ata, Diosojavabelia paneajamatabēcuenesaē tsaponaexae, nayapētane Dioso papecajamatabēcueneyavenonaējavanaxa pamatacabi naneconitsiaexanaena pijaneconi pexainaevi. Bajarapamatacabi Dioso papecasivajamatabēcuenēbarēyaxae, pacatocopatsiana panejonenexa Dioso pijanacuayabetsia Dioso papecaevetsinexa.

⁶ Dioso baja cajena najamatabēcuenevereta pacuenia exanaejitsia. Nexata juya Dioso bejiobiaexanaena pamonaē pacabejiobiaexanapona maparucaeje. ⁷ Paxamē abaxē pacabejiobiaexanaponaena pacuenia paxanē ata panebejiobiaexanapona. Itsiata Dioso nacayavenonaena bajarapacuenievecua. Bajarapacuenia Dioso nacayavenonaena pamatacabi pepo petuxanenē Jesús icatsia patsianica piasaēāngelevi yajava, pitarunutsicotia ata yajava. ⁸ Jesús jane baja patsianica penaneconitsiaexanaenexa pamonaē apo yapētaē Dioso. Pamonaē ata apo jumecovēñetsi pepo petuxanenē Jesucristo pelivaisi, Jesús naneconitsiaexanaena. ⁹ Bajarapamonae pijaneconi yabara Jesús naneconitsiaexanaenatsi daxitamatacabijavabelianexa. Dioso pitabaravecua tajē xuabianatsi. Bajarapamonae Dioso pijapenivenivenaecotia apo tae tsane caeto ata. ¹⁰ Pamatacabi vajatuxanenē icatsia patsianica, pinijicuenia pijajivi yaiyataenatsi. Pinijicuenia sivajamatabēcuene nabenajacaenatsi daxita Jesús pejumecovēñetsiviitsi. Bajarapacuenia tocopiapatsianatsi pamatacabi patsianica vajatuxanenē. Paxamē ata Jesús pijajivi payajavamē tsane patanejumecovēñetsixaēmē patacatsipaebilivaisi.

¹¹ Bajaraxuata pacatovajētabiabatsi Diosojavabelia. Pacatovajētabiabatsi vajaDiosojavabelia papecajamatabēcuene xaniavaetsinexa. Pacuenia bejamatabēcueneitsi Dioso pijajivi, bajara panejamatabēcueneitsinexa. Pacatovajētabiabatsinua Diosojavabelia pecajēpeajamatabēcuenetatsi papecajamatabēcueneyavenonaenexa, paneexanaenexa daxita pacuenia pajamatabēexanaponame. Pacatovajētabiabatsinua Diosojavabelia papecayavenonaenexa daxita pacuene paexanamē Jesucristo papijajivixaēmē. ¹² Nexata paxamē xaniavaetsia panejinavanapaejamatabēcueneta, vajatuxanenē Jesucristo daxitajivi yaiyataenatsi. Paxamē ata juya Dioso pacayaiyataeyaexanaena daxitajivi. Bajarapacuenia pacayaiyataeyaexanaena papecaitaxutotsoniataexae vajaDioso, vajatuxanenē Jesucristo ata.

2

Pibisiacuene bitso pexanabiabinē yabara pelivaisi

¹ Tajamonae, pacatsipaebatsi baja cajena paneypētaenexa pacuenia vajatuxanenē Jesucristo patsijitsiatsica. Pacatsipaebatsinua baja cajena pacuenia ata nacacaetuatsijitsia bajaraponējavabelia pamatacabi patsianica. ² Nexata pajivi najumetsēñetsiya pacajumai tsane: “Espíritu Santo raja neyapētaeyaexana. Jesucristo rabaja patsica,” pacajai tsane, pētsa pajumecovēñetame. Pajivi pijinia najumetsēñetsiya pacajumai tsane: “Pepacuene rabaja Jesucristo patsica,” pacajai tsane, pētsa pajumecovēñetame. Pajivi pijinia najumetsēñetsiya pacajumai tsane: “Pablobana raja nacatoyaquina: ‘Jesucristo

rabaja patsica, jai raja vajanacatoyaquinaebaxutota,” pacajai tsane, pëtsa pajumecovënètame. Itsamonae najumetsënëtsia itsa pacatsipaeba Jesús pepatsijavatsica yabara, pëtsa panajamatabëcueneepatajërërëcame panejumecovënëtavanapae livaisivecua. Pëtsa pamatabëcuenenabenajacamenua. ³ Pëtsa pajumecovënètame pematatsënëa itsalivaisicuenia itsa pacatsipaeba Jesucristo pepatsijavatsica yabara. Jesucristo raja abaxë apo patsitsica tsane. Peneta raja itsa baja imoxoyo pevajëne tsane Jesucristo pepatsinexatsica, jivi ayaibitsaëtonë Dioso pejumelivaisi pejumecovënëtsijava copabiana. Bajara pijinia pamatacabi patsiana ponë bitso pibisiacuene pexanabiabinënexa. Bajaraponë itsamatacabi Dioso xuabiana isotuabelia, bitso bejiobiaya peponaponanexa daxitamatacabijavabelianexa. ⁴ Bajaraponë cueneitoya tsane Dioso pijacuene. Pamonaë ata vajëcabiaba bedioso petae-vijavabelia, itavetsiana pevajëcabiyaniva. Dioso pijatemplobota ata belia ecaena bediosonë jivi petaenexatsi. Bajaraponë jumai tsane: “Xanë rajane baja diosonënë,” jai tsane. Bajarapacuenia jivi ayaibitsaëto bajaraponë yamaxëitojorobiana.

⁵ Pamatacabi abaxë paxamëjavata naponaponajë, tajëvelia baja cajena pacatsipaebabi-abatsi bajarapalivaisi. ¿Panacofënètame tsabaja bajarapalivaisi? ⁶ Payapëtaneme baja cajena pacuenia abaxë Dioso yacaranata pibisiacuene bitso pexanabiabinënexa pepatsiyaniava. Dioso petocaëjëtisimatocabita bajaraponë patsiana. ⁷ Mapamatacabita ataje jivi pibisiacuene pexanaejava navitapona pevajënaeyabelia. Itsiata abaxë apo patsi ponë bitso pibisiacuene pexanabiabinënexa. Matapania pamatacabi Dioso copatsiana pecaranatsijava bajaraponë pepatsiyaniava, patsiana jane baja pibisiacuene bitso pexanabiabinexa. ⁸ Bajarapamatacabi bajaraponë patsiana bitso pibisiacuene pexanabiabinexa. Nexata pepo petuxanenë Jesús pijumalisaëta bajaraponëmi beyaxuabiana. Pamatacabi Jesús patsianica, bajaraponëmi Jesús vereverecaeyaxanaena pijapenivenivena-naecotiata. ⁹ Bajaraponë patsiana dovathi pejamatabëcueneta pibisiacuene bitso pexanabiabinexa. Nexata bajaraponë dovathi pesaëta pinijicueni pexanaejava exanapon-aena jivi peyamaxëitojorobinexa, beayajamatabëcuenenë petaenexatsi. ¹⁰ Bajaraponë exanaena daxita xua pibisiacuene, jivi peyamaxëitojorobinexa. Nexata bajaraponë pejamatabëcueneta Diosovecua jivi naxuabiana. Jivi Diosovecua naxuabiana tsipaji apo jitsipae pejumecovënëtsinexa pexaniajailivaisi pecapanepaelivaisinexatsi Diosojavabelia. ¹¹ Bajaraxuata Dioso tocopatsiana bajaraponë penajumetsënëtsilivaisi petsipaebinxatsi peyamaxëitojorobinexatsi. Nexata bajarapamonae jumecovënëtsiana ëpenajumetsënëtsilivaisi. ¹² Bajaraxuata nexata daxita bajarapamonae Dioso naneconitsiaexanaenatsi. Tsipaji apo jumecovënëtsi tsane pexaniajailivaisi. Caranata saya sivabarëya tsabiabi tsane ëpibisiacuene pexanaejava.

Pacuenia Dioso pijajivi itapeta pecapanepaenexa yabara pelivaisi

¹³ Tajamonae Dioso papecaasivivi, pepo bajayata abaxë itsa apo panaexanaemë, vajatuxanenë baja cajena tajëvelia pacaitapeta papecacapanepanexa. Dioso baja cajena pacacapanepaena. Espiritu Santo pesaëta pacajamatabëcuene xaniavaetsiana panejumecovënëtsixae pexaniajailivaisi, Jesús pelivaisi. Bajaraxuata paxamë yabara pajumaitsinë tsabiabi Diosojavabelia: “Xanepana rabaja. Pexaniacuene exaname. Tsipaji tajëvelia itapetame Tesalónica tomarapijivi pecajumecovënëtsinexa. Nexata baja cajumecovënëta,” pajanë tsabiabi. ¹⁴ Dioso paneitoroba patacatsipaebinxexa pexanialivaisi papecacapanepaelivaisinexa Diosojavabelia. Nexata baja pajumecovënètame bajarapalivaisi. Bajarapacuenia Dioso pacajunata panepatsinexa vajatuxanenë Jesucristo javabetsia, papacayajavaponaponanexa.

¹⁵ Tajamonae, bajaraxuata panevajënaeyabelia pacaasaëmëre tsavanapae panejumecovënëtsijava Dioso. Pajumecovënëtavanapare patacatsipaebillivaisi. Palivaisi ata pat-acatoyaquinatsi panejumecovënëtsinexa, pëtsa panacofënètame. ¹⁶ Vajatuxanenë Jesucristo, vaxa Dioso ata, nacaasiva. Bajaraponëbeje nacaitaxutotsioniatane. Bajaraxuata nacajamatabëcuene asaëyaexanapona daxitamatacabijavabelianexa. Nacatocopatanua vajacopiaevetavanapaenexa pepo petuxanenë Jesucristo icatsia pepatsijavanexatsica. ¹⁷ Nexata pacatovajëtatsi vajatuxanenë Jesucristo javabelia, vaxa Diosojavabelia ata, papecajamatabëcuene asaëyaexanaenexa. Pacatovajëtatsinua jivi panetsipaebinxexa pexanialivaisi. Pacatovajëtatsinua paneexanaenexa daxita xua pexaniacuene.

3

Pacuenia Pablo toyaquina Dioso pejumecovënëtsivi: “Panetovajëre Diosojavabelia,” pe-jailivaisi yabara pelivaisi

¹ Tajamonae, pecopiarucaelivaisi rabaja maje pacatoyaquinatsije. Panetovajëre Diosojavabelia Dioso pejumelivaisi bepijia peyacaëjëpaenexa daxitanacuajava. Patovajërenua

daxitajivi pejumecovënëtsinexa Dioso pejumelivaisi pacuenia baja paxamë pajumecovënëtae bajarapalivaisi. Patovajërenua daxitajivi peyaiyataenexa Dioso pejumelivaisi. ² Panetovajërenua Dioso patanevetsinexa pibisiajamatabëcuenevivecua. Bajarapacuenia panetovajëre tsipaji raja daxitajivi Dioso apo jumecovënëtsi. ³ Itsiata baitsi jane vajatuxanenë nacayavenonabiaba. Bajaraponë pacajamatabëcueneasaëyaexanaena. Pacaevetsiananua dovathivecua. ⁴ Paxamë yabara baja cajena pajamatabëjumaitsinë: “Bajarapamonae vajatuxanenë yavenonaenatsi. Nexata xaniavaetsia exanavanapaena daxita pacuenia itorobatsi. Pevajënaeyabelia xaniavaetsia exanavanapaena pacuenia itorobatsi,” pajamatabëjanë baja cajena paxamë yabara. ⁵ Diosojavabelia pacatovajëtatsi xaniavaetsia paneyapëtaenexa Dioso papecaasivajava. Pacatovajëtatsinua panevajënaeyabelia paneajamatabëcuenesaë tsavanapaenexa Cristo papecajamatabëcuene yavenonabiabinexa.

Pacuenia daxitajivi benacueneba penaevetsinexa yabara pelivaisi

⁶ Tajamonae, vajatuxanenë Jesucristo pejamatabëcueneta pacaitorobatsi. Dioso pejumecovënëtsivi ata itsa piafaetabivi, bajarapamonae panavecuatsare. Bajarapamonae apo nacuenebabiabi penaevetsinexa pacuenia picani paitorobajë. ⁷ Payapëtaneme rabaja pacuenia paxanë paexanavanapajë pamatacabi panajinavanapajë paxamëjavata. Nexata pacuenia pacatsitajinavanapatsi, bajarapacuenia bepajinavanapame. Pamatacabi abaxë panajinavanapajë paxamëjavata, apo pafaetabinë tsavanapae. ⁸ Amoneya baja cajena itsajivi ata apo pavecuaxaenë itsacuenejavayo ata. Biji rajane panatonacuenebabiabajë pinijicuenia. Matacabita, meravi ata, panatonacuenebabiabajë patanaevetsinexa. Bajarapacuenia panatonacuenebabiabajë itsajivi ata paxamëyajuvënëvi petoayapëbejeyanivatsi patanevetsijava patanajinavanapaejavata. ⁹ Paxamëjavata pexanialivaisi patacatsipaebavanapaexae, vajatuxanenë picani panetocopata patacavajëtsinexa xua panamatavenonajë patanerajutsinexamë. Itsiata baitsi jane apo pacavajëtsitsi. Pacatsitanacuenebabiabatsi baja cajena. Bajarapacuenia paxamë ata panatonacuenebabiabare panenaevetsinexa. ¹⁰ Pamatacabi abaxë panajinavanapajë paxamëjavata, pacajumaittsitsi baja cajena: “Pajivi afaetabi, pëtsa naxane,” pacajaitsi baja cajena. ¹¹ Pavënëlivaisitaniji pacuenia itsamonae paxamëyajuvënëvi saya jinavanapa nacuenebinejeva. Bajarapamonae pina bitso jamatabëitonotabiaba itsamonae. ¹² Bajarapamonaejavabelia pajumaitsimë tsane: “Pablo raja vajatuxanenë Jesucristo pejamatabëcueneta jumaitsi: ‘Panacuenebianame pina pane-naevetsinexa,’ jai raja Pablo,” pajamë tsane.

¹³ Tajamonae, pëtsa pajamatabëcuenecueraname pexaniacuene paneexanavanapaejava. ¹⁴ Pajivi apo nacuenebi tsane penaevetsinexa, apo jumecovënëtsinua tsane palivaisi pacatoyaquinatsi mapabaxutotaje, bajarapajivi panavecuatsare. Pëtsa payajavajinavanapame. Nexata aura tsane apo penacuenebijava yabara. ¹⁵ Itsiata baitsi jane bajarapajivi bepanijavajabitsaëjivi pëtsa pataneme. Dioso panenajuajumecovënëtsivixae, pexaniajamatabëcuenia pamuxujiobianame.

Pacuenia Pablo toyaquina peveretsinexa baja petoyaquinaelivaisi mapabaxutotaje yabara pelivaisi

¹⁶ Vajatuxanenë vajanacajamatabëcuene xanepanaeyaexanaenë. Pacatovajëtatsi bajaraponëjavabelia daxitamatacabi papecajamatabëcuene xanepanaeyaexanaenexa, itsamonae pacaitsacuenebabiabi ata. Pacatovajëtatsi vajatuxanenë papecajavavaponaponabiabinexa.

¹⁷ Xanë Pablonë, tacobeta pacatoyaquinatsi mapalivaisiyoje patacajamatabënajinaexae. Paitanecuenia yaquinabiabajë daxita tayaquinaebaxutonëta, bajarapaitanecuenia pacatoyaquinatsi mapalivaisiyoje paneyapëtaenexa xanë patacatoitorobicuene mapabaxutoje. ¹⁸ Pacatovajëtabiatsi Diosojavabelia daxita paxamë vajatuxanenë Jesucristo papecayavenonabiabinexa.

Mapabaxutoje San Pablo copiaya toyaquina Timoteojavabelia

Pacuenia Pablo mapabaxutoje toyaquina Timoteojavabelia yabara pelivaisi

¹ Xanë Pablonë, Jesucristo pijaapóstolenë. Dioso, ponë nacacapanepaejitsia, bajaraponë nitoroba pijacuene tatonacuenebinexa. Vajatuxanenë Jesucristo, ponë pejamatabëcueneta Dioso nacacapanepaejitsia, bajaraponë ata nitoroba pijacuene tatonacuenebinexa. ² Timoteo, bepepo taxënatomë tacataenë, Jesucristo pelivaisi xamë ata nejumecovënësixae. Catoyaquinatsi mapabaxutoje. Catovajëtatsi vaxa Diosojavabelia, vajatuxanenë Jesucristojavabelia ata, pecayavenonaenexabeje pecaasivaxaabeje. Catovajëtatsinua bajaraponëbeje pecaitaxutotsoniataenexabeje pecajamatabëcuenexanepanaeyaexanaenexabejena.

Pacuenia Pablo itoroba Timoteo pejumeitavetsinexa penajumetsënësilivaisi petsipae-baponaevi yabara pelivaisi

³ Pamatacabi baja ponajë Macedonia nacuayabelia, capuenetatsi neponaponaenexa Efeso tomarata. Nexata icatsia matavëjëa caitorobatsi tsifeca abaxë neponaponaenexa bajarajota. Tsipaji itsamonaë bajarajota tsipaebavanapa saicayacuenia Dioso pejumelivaisivecua. Palivaisi tsipaebavanapa bajarapomonaë, apo pexaniajilivaisi cajena. Jumeitavetsianame bajarapomonaë matavëjëa baja petsipaebaponaeyaniva bajarapalivaisi. ⁴ Itavetsianamenua bajarapomonaë penajamatabëxainabiabiyanima saya jemalivaisixi, perujulivaisiximi. Itavetsianamenua pijasalinaivimi pevënëxi yabara ata penajamatabëxainabiabiyanima. Bajarapitsilivaisixi najumematamobi baja cajena itsa nabarëcuaicuaijai tsaponae jivi. Bajarapalivaisixi apo nacajamatabëcueneyavenonaë tsipae pacuenia Dioso nacaitoroba jumecovënësiaya vajatoexanaenexa.

⁵ Bajarapacuenia caitorobatsi nejumeitavetsinexa bajarapomonaë pecopatsinexa bajarapalivaisi pecuaicuaijaitabiabijava. Nexata juya pexanaenexa pacuenia Dioso jitsipa. Dioso cajena jitsipa jivi pejamatabëëthëtovetsina jamatabëcuenexanepanaeya namataenetsia penaasivatsavanapaejava. Dioso jitsippanua jivi pejinavanapaenexa aneconijibia Dioso pitabarata. Dioso jitsippanua jivi pejamatabëëthëtovetsina xaniavaetsia pejumecovënëtanapaenexa Dioso pejumelivaisi. ⁶ Bajarapomonaë pacuenia Dioso jitsipa apo pexanavanapaexae, Dioso pejitsipaejavami vecuanajamatabëcuenemuxufeta. Nexata jamatabëcuenenaxuaba natsiquejemalivaisixi pecuaicuaijaitabiabinexa. ⁷ Bajarapomonaë picani jamatabënaexana jivi livaisi petsipaebabibivinexa. Palivaisi Dioso Moiséspijinëta najumecopata, bajarapalivaisi picani jivi asaëya jamatabëtsipaebapona. Itsiata baitsi jane bajarapomonaë apo jumeyapëtae pajamatabëcuenelivaisi xaina bajarapalivaisi.

⁸ Vaxaitsi baja cajena yapëtanetsi pexanepanaecue ne palivaisi Dioso Moiséspijinëta najumecopata. Bajarapalivaisi Dioso nacatocopata vajatsipaebinexa jivijavabelia, jivi peyapëtaenexa penaneconitsicue ne Diosojavabelia. ⁹ Pamonaë pexaniacue ne exanavanapa, apo toyaquinabiabitsi pitavetsilivaisinexatsi. Biji rajane pamonaë pibisiacue ne exanavanapa, toyaquinabiabatsi pitavetsilivaisinexatsi. Pamonaë ata apo yayatae itsacue ne javayo ata Dioso pijacuene, toyaquinabiabatsi pitavetsilivaisinexatsi. Pamonaë ata najamatabëcuenebijiana Dioso pijacuenevecua, toyaquinabiabatsi pitavetsilivaisinexatsi. Pamonaë ata jivivevi, paxa ata, pebeyaxuabivi, toyaquinabiabatsi pitavetsilivaisinexatsi. ¹⁰ Pamonaë ata pijavajivi vecuanamatayajita itsavajavabelia, toyaquinabiabatsi pitavetsilivaisinexatsi. Pamonaë ata pevëna pebijavabelia pevitota pibisiacue ne exana, toyaquinabiabatsi pitavetsilivaisinexatsi. Bajara pijinia pacuenia petiriavi ata. Pamonaë pamonaë jivi vecuanamatayajita itsanëjavabelia, toyaquinabiabatsi pitavetsilivaisinexatsi. Pamonaë ata pevëna petirivijavabelia pevitota pibisiacue ne exana, toyaquinabiabatsi pitavetsilivaisinexatsi. Pamonaë ata jivi nacobetoxotsiaya pita, toyaquinabiabatsi pitavetsilivaisinexatsi. Pamonaë ata najumetsënëta, toyaquinabiabatsi pitavetsilivaisinexatsi. Pamonaë ata itsamonaë yabara najumetsënëtsiaya baracuaicuaijai tsabiabi, toyaquinabiabatsi pitavetsilivaisinexatsi. Pamonaë ata apo jitsipae pexaniajilivaisi jivi petsipaebaponaenexa, toyaquinabiabatsi pitavetsilivaisinexatsi. ¹¹ Bajarapalivaisicuenia xanë ata itavetaponajë itsa tsipaebaponajë palivaisi Dioso netocopata jivi tatsipaebaponaenexa. Bajarapalivaisi itsa tsipaebaponajë, tsipaebaponajë daxitajivi peyapëtaenexa pacuenia Dioso itaxutotsoniatanetsi pecapanepanexatsi.

Pacuenia Pablo pexaniajamatabëcue ne rajuta Jesucristojavabelia yabara pelivaisi

¹² Pexaniajamatabëcuene rajutajë vajutuxanenë Jesucristojavabelia tanerajutsixae pesaë tatonacuenebinexa. Jesucristo nesivanajamatabëxaina xaniavaetsia tatonacuenebinexa. Bajaraxuata pexaniajamatabëcuene rajutajë. ¹³ Copiata abaxë itsa apo jumecovënëtsinë Jesucristo, pibisiacuena picani baracuaicuajianë tsabiabi Jesucristo. Pijajivi ata tobarajinabiabajë tabejiobiaexanaenexa. Pibisiacuena bijataeyabiabajë Jesucristo pijajivi. Bajarapacuenia taexanabiabinë ata, Dioso itsiata nebejiobiatane. Tspiji jamatabëcuenenavëxaniabiaya bajarapacuenia exanabiabajë. Apo yapëtaenë picani xua exanaponajë Jesucristojavabelia. Tspiji abaxë apo jumecovënëtsinë Jesucristo Dioso pexënatocuene. ¹⁴ Nexata baja itsiata belia vajutuxanenë Jesucristo pinijicuenia neyavenona tanajamatabëcuene copatsinexa bajaraponëjavabelia. Bajaraxuacujinae pijajivitonëxaenë, neyavenona tasivanexa itsamonae ata.

¹⁵ Mapalivaisije pacatsipaebijitsiatsi. Bajarapalivaisi pexaniajailivaisi cajena. Nexata daxitajivi xaniavaetsia bejumecovënëta mapalivaisije. Jesucristo baja cajena patsica mapanacuayabetsicaje pibisiacuene pexanaevimi pecapanepenexa Diosojavabelia. Xanë ata picani bitso pibisiacuene taexanaenëmi daxitajivi matatoxenetsia. ¹⁶ Xanë itsiata bajara taitsinëmi ata, Dioso itsiata nebejiobiatane. Bajarapacuenia Dioso nebejiobiatane daxitajivi peyapëtaenexa Jesucristo bajayajebi tanesivaajamatabëcuenesaëjava tajumecovënëtsinexa, pibisiacuene taexanaenëmi ata. Nexata pamonae hexëjavabelia ata Jesucristojavabelia najamatabëcuene copataponae, xainaena matacabi apo peverevere caejava. Bajarapamonae nesivaajamatabëcuenesaë tsane itsa nevënëlivaisitaena Jesús taneitapetsijava pijajivitonëxanë, pibisiacuene bitso taexanabiabinëmi ata. ¹⁷ Bajaraxuata vaxaitsi pepo Dioso, daxitacuene peyapëtaenëjavabelia, jumaitsitsi tsabiabi: “Xamë Diosomë bitso ayajamatabëcuenenëmë. Bitso ayaicuene nexanaenë,” jaitsi tsabiabi. Bajaraponë Dioso daxitacuene peyapëtaenë. Pepo pevetsinënuu daxitacuene. Apo petëpaenëxanua daxitamatacabijavabelianexa. Apo petaenëtsinua itsajivi ata.

¹⁸ Timoteo, betaxënatomë tacataenë. Pacuenia caitorobatsi, exanaename. Bajayata baja cajena itsamonae Dioso pejumecovënëtsivi Dioso pejamatabëcueneta tajëvelia cavajunupaeba pacuenia exanaejitsiamë. Bajarapacuenia Dioso asaëyata tocanacuene baponare mapalivaisije. Nexata bajarapacuenia Dioso pitorobilivaisi daxitajivi yapëtaena. Catoayapëbeje ata dovathi pecajamatabëcuenejëtsixae, ajamatabëcuenesaëmëre Diosojavabelia nenajamatabëcuene copatsijava. Exanabiabare xua yapëtaneme pexaniajaicuene nenajamatabëcuene bijianaeyaniva Diosovecua. ¹⁹ Itsamonae baja yapëtae ata pacuenia Dioso itorobatsi, itsiata pibisiacuene exana. Nexata bajarapamonae Diosovecua naxuabiana pecopabixae Cristo pejumecovënëtsijavami. ²⁰ Bajarapamonae ayajuvënënebeje Himeneobeje Alejandrobeje. Pibisiacuena Dioso baracuaicuajiaibeje tsabiabi. Nexata pecopatsinexabeje Dioso pebaracuaicuajiajavabeje, bajaraponëbeje copatajë dovathijavabelia. Nexata hexëa itsa najamatabëxainabeje pexanialivaisi, xaniavaetsia jane baja Dioso pejumecovënëtsinexabeje.

2

Pacuenia Dioso pejumecovënëtsivi daxitajivi betovajëta Diosojavabelia yabara pelivaisi

¹ Timoteo, copiava caitorobatsi mapacueniaje. Caitorobatsi panetovajëtabiabinexa daxitajivi Diosojavabelia. Daxitajivi Diosojavabelia patovajëtabiabiname pitaxutotsoniataenexatsi Dioso. Itsa baja Dioso itaxutotsoniataenatsi bajarapamonae, nexata pexaniajamatabëcuene parajutsianame Diosojavabelia bajarapamonae yabara. ² Patovajëtsianamenua Diosojavabelia presidentevi ata. Patovajëtsianamenua daxita gobiernu pijalivaisi pevetsivi ata. Bajarapacuenia patovajëtsianame bajarapamonae Dioso peyavenonaenexatsi. Nexata xaniavaetsia jinavanapaenatsi avajabitsaëjibia. Nexata xaniavaetsia Dioso jumecovënëtavanaenatsi. Nexata exanavanapaenatsi ëpexaniacuene. ³ Bajarapacuenia Diosojavabelia daxita bajarapamonae vajatovajëtsijava, xanepana Dioso, ponë nacapanepaejitsia, vajanacasivabarëyanexa. ⁴ Bajarapacuenia daxitajivi vajatovajëtsijava Dioso jitsipa. Tspiji Dioso jitsipa daxitajivi pecapanepenexa bajaraponëjavabelia. Dioso tojitsipanua daxitajivi peyapëtaenexa pexaniajailivaisi, Jesucristo pelivaisi. ⁵ Nexata daxitajivi itsa yapëtaena pexaniajailivaisi, Jesucristo pelivaisi, yapëtaenanua pacuenia caenë Dioso daxitajivi capanepaejitsia. Yapëtaenanua pacuenia pijinia caenë Jesucristo daxitajivi petocuaicuajianëxexa Diosojavabelia. ⁶ Jesucristo rabaja nacopata pebeyaxuabinexatsi. Nexata Jesucristo petëpaejavata, daxitajivi pijaneconimi matamota. Bajarapacuenia daxitajivi peyapëtaenexa, Dioso pecajëtsimatacabita pijajivi itoroba daxitanacuenejava pexaniajailivaisi jivi petsipaebinexa. Tspiji baja cajena Dioso jitsipa daxitajivi pecapanepenexa. ⁷ Bajarapalivaisi jivi tatsipaebinexa Dioso nitoroba. Dioso nitoroba bajarapalivaisi

tatsipaebinexa pamonaē apo judiōvi ata penajamatabēcuēnecopatsinexa Diosojavabelia. Nexata pexaniajailivaisi jivi tatsipaebijava, itsa canavajunupaebatsi, xaniajanē cajena. Cristo tajumecovēnētšinēxae, pexaniajailivaisi jivi tsipaebaponajē. Apo najumetsēnētšinē cajena.

⁸ Bajaraxuata daxitanacuanējava pebijivi, pamonaē baja Dioso pitabarata aneonijibi, itsa vajēta Diosojavabelia, jitsipajē nacobeyotsiaya pevajētšijava Diosojavabelia. Bajara-pamonaē bevajēta Diosojavabelia anaepanaenejeva itsajivijojavabelia, jumeanaenotsine-jevanua itsajivijojavabelia. ⁹ Jitsipajē pijinia petiriavi penaxatabinexa xanepanaeya. Pētsa bitso naitabētšiaya naxataba. Itsa naxaniavaeta, bitso pētsa namataitabēta pexa-niacuenia. Pētsa bitso naitabēta oronanitota pexanaejavanēta. Pētsa naitabēta penamatotsiviriabitoxita ata. Pētsa naitabētšiaya naxataba bitso penamatotsinavanē ata. ¹⁰ Petiriavi, pamonaē baja xaniavaetsia najamatabēcuēnecopata Diosojavabelia, pētsa naitabēta bitso. Bajarapamonaē Dioso pitabarata pexaniacuene betoexanabiaba itsamonaejavabelia penajamatabēcuēneitabētšinexa bēpēnējavaverena. ¹¹ Dioso pejumecovēnētšivi itsa nacaetuata Dioso pejumelivaisi penamuxunaevetsinexa, petiriavi bevelia-ajamatabēcuēnevi nataeya ajumejibia benamuxunaevetena pejumecovēnētšinexa palivaisi tsipaebatsi. ¹² Petiriavi apo tocopatsinē pemuxujobinexa pebijivi. Apo tocopatsinēna petiriavi beayajamatabēcuēnevi nataeya pitorobabiabinexa pebijivi. Biji rajane petiri-avi beveliajamatabēcuēnevi nataeya ajumejibia benamuxunaevetena. ¹³ Bajarapacuenia itorobajē tsipaji copiaya Dioso exana pebi. Bajaraponē pevēnē Adán. Bajaraxuacujinae cotocaevi Dioso exana petiriva. Bajarapova pevēnē Eva. ¹⁴ Adán cajena picani dovathi apo yamaxēitojorobitsi. Biji rajane copiaya petiriva dovathi yamaxēitojorobatsi. Nexata petiriva copiaya pibisiacuene exana. ¹⁵ Bajaraxuata daxita petiriavi Dioso tocopatatsi pevixaeitonotsinexatsi penacuetō itsa vecuanaexanatsi. Itsiata baitsi jane bajarapamonaē capanepaenatsi Diosojavabelia itsa casaē tsane penajamatabēcuēnecopatsijava Diosojavabelia. Capanepaenatsi Diosojavabelia daxitajivi ata asivaya itsa taena, Dioso ata asivaya itsa taena. Capanepaenatsi Diosojavabelia xaniavaetsia itsa jinavanapanua pacuenia Dioso tojitsipatsi.

3

Pacuenia ancianovinexa bejamatabēcuēneitsi yabara pelivaisi

¹ Pexaniajailivaisi cajena maje. Ponē jitsipa pitapetsinexatsi ancianonēnexa, Dioso pejumecovēnētšivi pevetsinēnexa, bajaraponē pexaniacuene, Dioso pijacuene, jamatabētonacueneba. ² Ancianonēnexa, xanepana ponē apo xainae itsacueneneconi ata, paneconi yabara itsamonae neconitsijitsiatsi. Caevayo pepitsinē. Penajamatabēcuēnereviabinē. Xaniavaetsia penajamatabēxainae. Peyaiyataenētši. Xaniavaetsia pecopiapitabibinē pijaboyaberena pesivaxainaeivitsi. Pecaējēpaenētši xaniavaetsia jivi Dioso pejumelivaisi petsipaebinexa. ³ Ancianonēnexa, xanepana ponē apo piapaenē piatajibinexa. Pevēna pebi apo pebenē. Apo pejitsipaenē itsajivi ata yamaxēitojorobiaya palata pevēcuanacobetoxotsinexa. Biji rajane ancianonēnexa xanepana ponē pexaniajamatabēcuēnenē. Anaeya itsajivi ata apo pejumepitsinē pebarēnajumeanaenotsinexa. Bitso pexainaeata itsa pexainaejava, apo penajamatabēxainae. ⁴ Ancianonēnexa, xanepana ponē xaniavaetsia eveta pexi, pijava yajava. Pexi pejumecovēnētšinētši. Pejumeyaiyataenētšina. ⁵ Ponē apo caējēpaetsi xaniavaetsia pexi pevetsinexa, pijava yajava, nexata bajaraponē apo caējēpae tsipaetsi pevetsinexa Dioso pejumecovēnētšivi. ⁶ Apo xanepanaē tsipae ancianonēnexa ponē abaxē ajena jumecovēnēta Dioso. Beayajamatabēcuēnenē itajara nataejitsipa bajaraponē. Nexata epatua Diosovecua jopaejitsipa. Bajarapacuenia bajayata dovathi penajamatabēxainae, Dioso vecuajopaica. Nexata dovathi daxitamatabijavabelianexa naneconita Diosojavabelia. ⁷ Ancianonēnexa, xanepana ponē peyaiyataenētši pamonaē Dioso apo pejumecovēnētšivi ata. Bajarapitsinē xanepana ancianonēnexa ancianonē pexanaecujinaetsi jivi pequenetsiataeyanivatsi, dovathi ata peyamaxēitojorobiyanivatsi.

Pacuenia diáconovinexa bejamatabēcuēneitsi yabara pelivaisi

⁸ Diáconovinexa pijinia, xanepana pamonaē penajamatabēcuēnereviabivi. Itaxutojema apo pecuaicuajaiivi. Apo piapaevi piatajibinexa. Apo pejitsipaevi itsajivi ata yamaxēitojorobiaya palata pevēcuanacobetoxotsinexa. ⁹ Diáconovinexa, xanepana pamonaē xaniavaetsia najamatabēcuēnecopata Cristojavabelia. Pejamatabēthētota peyapētaevi pexaniajaicuene palivaisi jumecovēnēta. ¹⁰ Pamonaē diáconovinexa, copiaya bitorobatsi itsacueniejavayo pevetsinexa bajarapacuenia pejamatabēcuēneētšisinxatsi. Nexata xaniavaetsia itsa eveta xua evetsiaexanatsi, diáconovi jane baja hexanatsi. Nexata jane

baja bitorobatsi penacuenebinexa xua diáconovi banacueneba. ¹¹ Diáconovi pijinia pijavajivi xanepana penajamatabêcueneruviabinexa, apo bebaracuaicuajai itsamonae. Xaniavaetsia benajamatabêxaina. Nexata xaniavaetsia bexanabiaba pacuenia itorobatsi. ¹² Diácononênexa, xanepana ponê caeva pepitsinê. Pecaêjêpaenêtsinua xaniavaetsia pevetsinexa pexi, pijava yajava. ¹³ Diáconovi xaniavaetsia itsa eveta penacuenebijava, nexata diáconovi xaniavaetsia yayataenatsi daxitajivi. Ajumeurajibianua jivijavabelia navajunupaebiana Jesucristojavabelia penajamatabêcuenecopatsijava.

Pacuenia Timoteo toyaquinatsi peyapêtaenexa pacuenia exanaponaponaejitsia Dioso pejumecovênêtsivi tuatuajêta yabara pelivaisi

¹⁴ Timoteo, bepíjia picani jamatabêponajê xamêjavabelia tacataenexa. Itsiata tavajênaeyabelia catoyaquinatsi mapacue yabaraje. ¹⁵ Nexata abaxê itsa cuenenajematsianajê tapatsijava xamêjavabelia, neyapêtaenexa pacuenia exanaponaponaejitsiamê Dioso pejumecovênêtsivi tuatuajêta. Pamona baja Dioso pejumecovênêtsivi, Dioso rabaja piasaênê pijajivi. Bajarapamonae Dioso pejumelivaisi, pexaniajailivaisi, xaniavaetsia baja jumecovênêtavanapa. Daxita nacuanêpijivi ata pejumecovênêtsinexa bajarapalivaisi. Bajarapamonae pexaniajailivaisi itsamonaejavabelia tsipaebapona. Bajarapamonae apo tocopatsinua itsajivi ata pexaniajailivaisivecua saicayalivaisi pejumecovênêtsianiva. ¹⁶ Pepo pexaniajailivaisi cajena Cristo pelivaisi. Bajaraponê baja vaxaitsi jumecovênêtavanapatsi. Itsiata baitsi jane itsamonae apo jamatabêcueneyapêtae bajaraponê. Bajaraponê Cristo ayajamatabêcuenenê bitso:

Bajaraponê Cristo mapanacuata naexana bevaxaitsi jivitonêcuenia. Espíritu Santo pejamatabêcueneta daxitajivi yapêtaeyaxanatsi Cristo planeconijibinêcuene. Angelevi ata Cristo tanetsi. Cristo pijajivi vênêlivaisipaebaponatsi daxitanacuanêpijivijava. Nexata daxitanacuanêpijivi najamatabêcuenecopabapona Cristojavabelia. Dioso pijanacuatatsia ata Cristo copiapitatsi.

4

Dioso pejumelivaisi pejumecovênêtsijava pecopabivi yabara pelivaisi

¹ Espíritu Santo baja cajena tajêvelia nacayapêtaeyaxana pacuenia bexêjavabelia itsamonae copabijitsia Dioso pejumelivaisi pejumecovênêtsijavami. Bajarapamonae nexata pejumecovênêtsiana penajumetsênêtsilivaisi petsipaebaponaevitsi. Nexata bajarapamonae asaêya jumecovênêtaponanae itsamonae dovathi pejamatabêcueneta petsipaebilivaisitsi. ² Bajarapamonae namuxunaevetsiana penajumetsênêtsilivaisi petsipaebaponaevitsi, betsitapexaniajamatabêcuenevitsi itajara tsane, pibisijamatabêcuenevi ata. Bajarapamonae tsipaebaponaena penajumetsênêtsilivaisi. Apo acueneura cajena tsane. ³ Bajarapamonae itavetsiana penacasibicuene. Bajarapamonae itavetsianana itsacuenejavanê jivi pexaeyaniva. Dioso cajena daxitacuene pexaejava exanae ata, jivi pexaeyaniva apo itavetsi. Bajaraxuata Dioso pejumecovênêtsivi, pexaniajailivaisi peyapêtaevi, jumai tsabiabi pexaejava yabara: “Xanepana rabaja,” jai tsabiabi Diosojavabelia pexaejava pexaevajênae. ⁴ Daxitacuene, xua Dioso exana vajaxaejavanexa, pexaniacuene bitso. Nexata apo biatsobitsi itsacuenejavayo ata Dioso pexanaejava. Biji rajane itsa pitatsi Dioso pexanaejava, “Xanepana rabaja,” bejai tsabiabitsi Diosojavabelia vajanacarajutsixae vajaxaejavanexa. ⁵ Bajarapacuenia Dioso pejumelivaisibaxutota pejumaitsixae, xanepana daxitacuene vajaxaenexa. Pexaniajamatabêcuene rajutatsi Diosojavabelia vajaxaejavanexa vajanacarajutsixae. Bajaraxuata Dioso nacatoxanepanaeyaxana vajaxaejavanexa.

Pacuenia Timoteo itorobatsi xaniavaetsia peponaponanexa, xaniavaetsia petsipaebinxanua Dioso pejumelivaisi, yabara pelivaisi

⁶ Itsa tsipaebianame pexaniajailivaisi Dioso pejumecovênêtsivijavabelia, penajumetsênêtsilivaisi petsipaebaponaevi pejumecovênêtsianiva, nexata xaniavaetsia Jesucristo netonacuenebinê tsane. Niajamatabêcuenesaênexa nevajênaeyabelia, asaêya jumecovênêtaponaponare palivaisi baja jumecovênêtavanapatsi. Pexaniajailivaisi, Dioso pejumelivaisi, palivaisi itsamonae catsipaeba, tsiteca asaêya jumecovênêtaponaponare. ⁷ Itsiata baitsi jane pêsáa jumecovênêtame mapanacupijilivaisianêje, saya natsiquejemalivaisianê. Daxita nesaêta nacujaubare xaniavaetsia neponaponanexa Dioso pejetsipaecuenia. ⁸ Vajajumalixanepanaenexa, xanepana picani vajaperabêsáeta vajacujinaejinaejava. Itsiata baitsi jane daxitacuenevecua xanepana bitso vajajinavanapaenexa pacuenia Dioso nacatojitsipa. Bajarapacuenê nacatoxanepana tsipaji vajatêpaecujinae ata Dioso nacajamatabêcueneyavenonaena xaniavaetsia vajajinavanapaenexa. ⁹ Bajarapalivaisi pexaniajailivaisi cajena. Nexata daxitajivi xaniavaetsia bejumecovênêta bajarapalivaisi. ¹⁰ Bajaraxuata Dioso tonacuenebaponaponatsibeje. Casaêtsibeje tsaponaponae Dioso vajatonacuenebaponaponaejavabeje,

itsamonae pibisiacuenia nacabijataeyabiabi atabeje. Bajarapacuenia exanatsibeje tsipaji najamatabëcuenecopatatsibeje Diasojavabelia. Bajaraponë Dioso daxitajivi pecapanepaenë pijaneconivecua. Dioso capanepaena daxita pamonae najamatabëcuenecopata bajaraponëjavabelia.

¹¹ Bajarapalivaisi tsipaebaponare. Itorobaponarenuu bajarapacuenia pexanaenexa. ¹² Pëtsa nacopatame pevêjëatoxaemë itsajivi ata pecaquenetsiataenexa. Biji rajane Dioso pejumecovënëtsivijava, xaniavaetsia tsitaponaponare. Cuaicuaijamëre xaniavaetsia. Livaisi ata itsa tsipaebame, tsipaebare xaniavaetsia. Ponaponare xaniavaetsia. Asivamëre daxitajivi. Najamatabëcöpare xaniavaetsia Diasojavabelia pecayavenonaenexa daxitacuenie yabara. Èpexaniacuenie yabara najamatabëxainare. Bajarapacuenia itsa tsitaexanaponaponaename, nexata Dioso pejumecovënëtsivi cacuenjëpaeajinavanapaena. ¹³ Tavajënaelia bajarapacuenia exanaponaponare. Jivi penacaetuatsijavata, Dioso pejumelivaisibaxuto tsimumulebabiabare. Tsipaebaponarenuu pacuenia jumaitis Dioso pejumelivaisibaxutota bajarapamonae pijamatabëcuenesaënexa Diasojavabelia. ¹⁴ Dioso baja cajena carajuta pecacajëpaejamatabëcuenie xaniavaetsia jivi livaisi netsipaebinexa, pecacajëpaeenexanua xaniavaetsia nevetsinexa Dioso pejumecovënëtsivi. Bajaraxua xaniavaetsia najamatabëcuenievetaponaponare. Pamatacabi ancianovi nacaetuata, catsimatanacobeuatsiaya catovajëta Diasojavabelia. Nexata bajarajota Dioso carajuta pecacajëpaejamatabëcuenie.

¹⁵ Daxita nesaëta evetaponaponare daxita pacuenia caitorobatsi nexanaenexa. Nexata daxitajivi cayapëtaena xaniavaetsia tanejumecovënëtaponaponaejavamë pacuenia caitorobatsi. ¹⁶ Pibisiacuenie nayajiviteaya ponaponare. Palivaisi ata tsipaebaponame, xaniavaetsia tsipaebaponare. Saicayacuenia pëtsa bajarapalivaisivecua tsipaebaponame. Bajarapacuenia nexanaejava casaëmëre tsaponapona. Nexata Dioso cacapanepaena. Pamonae ata cajumecovënëta netsipaebilivaisi, Dioso capanepaenatsi.

5

Pacuenia Timoteo itorobatsi penaponaponaenexa Dioso pejumecovënëtsivijava yabara pelivaisi

¹ Pëtsa asaëya muxujibame pamonae nevajënaeyapijivi. Biji xaniavaetsia yayiataeya beaxacuenia muxujibare. Necovëpijivi pijinia benejuyapijivicuenia muxujibare. ² Petirivi ata nevajënaeyapijivi beenacuenia muxujibare. Necovëpijivaxi pijinia benejuyapijivaxicuenia muxujibare. Èpexaniajamatabëcuenia taema bajarapovaxi itsajamatabëcuenie bëpënëa nejamatabëthëtota sivanajamatabëxainaejevamë.

³ Pamonae pevecatëpaevatsi, Dioso pejumecovënëtsiva, yayiataeya yavenonare itsa bitso bejiobi. ⁴ Itsiata baitsi jane pamonae pevecatëpaevatsi, itsa xaina pexi, pemomoxi ata, bajarapamonae xanepana pevetsinexatsi. Bajarapamonae xanepana peyavenonaenexa pijamonae. Bajarapamonae juya beveta paxa, pena ata, pamo ata, pacue ata, pamonae vitsatatsi. Bajarapacuenia itsa exana, exana pexaniacuenie. Nexata Dioso barëyataenatsi. ⁵ Pamonae pevecatëpaevatsi, Dioso pejumecovënëtsiva, itsa apo xainae itsajivi ata pevetsinexatsi, bajarapova najamatabëcuenecopataponapona Diasojavabelia peyavenonaenexatsi. Navajëtabiabi Diasojavabelia matakabita, meravi ata. ⁶ Itsiata baitsi jane pamonae pevecatëpaevatsi pejitsipaecuenia pibisiacuenie itsa exanaponapona, Dioso tanetsi bepetëpaeva, abaxë asaë tsaponapona. ⁷ Bajarapacuenia itorobare Dioso pejumecovënëtsivi pijamonae peyavenonaenexa itsa bitso bejiobi. Nexata pamonae Dioso apo pejumecovënëtsivi, toacueniebi tsanetsi pebaracuaicuaijajavatsi bajaraxua yabara. ⁸ Dioso pejumecovënëtsivi, pijamonae beveta. Pajivi apo itaxutotsoniatæ pevetsinexa pepo pijamonae ata, bajarapajivi apo exanae pacuenia Dioso itorobatsi. Nexata pijamonae itsa apo evetsi, bajarapajivi bitso pibisiacuenie exana Dioso apo pejumecovënëtsiviji mata-toxenetsia.

⁹ Petiriva sesenta pavaibeje pexainaeva, caeto penacojiobicujinae pamonae pevecatëpaevatsi, xanepana pevënëyaquinarutsinexatsi pamonae pevecatëpaevitsi pevënëyaquinarubibaxutota. Nexata daxita Dioso pejumecovënëtsivi peyavenonabiabinexatsi.

¹⁰ Pova pamonae pevecatëpaevatsi itsa cueneyapëtanetsi pexaniacuenie pexanaejava, bajarapova xanepana pevënëyaquinarutsinexatsi pamonae pevecatëpaevatsi pevënëyaquinarubibaxutota. Mabaitsi pacuene pexanaeva xanepana pevënëyaquinarutsinexatsije. Pexi xaniavaetsia pevitsatsiva. Jivi ata itsa sivaxainatsi, xaniavaetsia pijabota pecopiapitsiva. Ajamatabëcuenecovëbia Dioso pejumecovënëtsivi peyavenonaeva. Peyavenonaevanua itsamonae itsa bejiobiaexanatsi Dioso pejumecovënëtsijava yabara. Daxita xua pexaniacuenie, pexanaeva, xanepana pevënëyaquinarutsinexatsi pamonae pevecatëpaevitsi pevënëyaquinarubibaxutota.

¹¹ Itsiata baitsi jane pova abaxë sesenta pavaibeje apo pexainaeva, pëtsa vënëyaquinarutame nevënëyaquinarubixutota peyavenonaenexatsi daxita Dioso pejumecovënëtsivi. Tspiji bajarapova itsa jitsipa pexanaenexa pacuenia natojitsipa, copatsipa Cristo pejumecovënëtsijavami. Nexata icatsia nacojibijitsipa. ¹² Nexata pijaneconi xainaejitsipa Diosojavabelia. Tspiji copatsipa Cristojavabelia penajamatabëcuenecopatsijavami: “Capanepaeya baja jumecovënëtajë Cristo,” jai ata. ¹³ Pematatsënëa bajarapova sivaxainarutsipa itsa bonëjava. Afaetabinua tspiae. Pematatsënëa baracuaicuajjai tsabiabi tspiae itsamonae. Jamatabëitonotabiabijitsipa itsamonae. Xuaxi yabara ata apo becuaiacuajjai, cuaiacuajjai tsabiabi tspiae. ¹⁴ Bajaraxuata pamona pevecuatëpaevatsi, pova abaxë bitso apo perujuva, jitsipajë icatsia penacojibijava pexi pexainaenexa, pijabo ata xaniavaetsia pevetsinexa. Nexata bajarapacuenia vajanacacueneyotavi ata toacuenebi tsanetsi pebaracuaicuajjijavatsi bajarapitsiva. ¹⁵ Bajarapacuenia jumaitsinë tspiji baja itsamonae pamonajivi pevecuatëpaevatsi copaba baja Cristo pejumecovënëtsijavami. Nexata pacuenia dovathi itorobatsi, exanavanapa.

¹⁶ Dioso pejumecovënëtsivi, pebijivi, petirivi ata, itsa pijamonaeyajuvënëva pamona vecuatëpatsi, nexata bajarapamonae bitaxutotsoniatane bajarapova. Bajarapacuenia nexata apo namatavenonae tsane peyavenonaenexatsi daxita Dioso pejumecovënëtsivi. Tspiji baja pijamonae evetatsi. Nexata Dioso pejumecovënëtsivi caejëpaejitsiatsi peyavenonaenexa pamona bitso bepejibivi, pamona pevecuatëpaevatsi pijamona petojibivitsi.

¹⁷ Ancianovi, pamona xaniavaetsia evetabiaba Dioso pejumecovënëtsivi, bajarapamonae xaniavaetsia bematamotatsi. Beyaiyanetsinua. Ancianovi, pamona Dioso pitorobilivaisi bitso tspiaeba, bitso cujarubana, bajarapamonae xaniavaetsia bematamotatsi. ¹⁸ Dioso pejumelivaisibaxutota jumaitsi pacuenia bueyu copatatsi pexaejava pexaenexa penacuenebijavata. Jumaitsi mapacueniaje: “Pabueyu canacuenebame trigoxu pecatotanabataxuabinexa, pëtsa pumuxatatame nepumuxatatabijavata. Pëtsa pumuxatatame trigoxu pexaenexa pecatotanabataxuabijavata,” jai Dioso pejumelivaisibaxutota. Itsalivaisita pijinia Dioso pejumelivaisibaxutota xaniavaetsia pematamotsijavanexa yabara jumaitsi mapacueniaje: “Penacuenebinë bematamotatsi,” jai Dioso pejumelivaisibaxutota. Bajaraxuata bematamotatsi ancianovi Dioso pejamatabëcueneta bitso penacuenebivi.

¹⁹ Pëtsa jumexaniantaneme caejivi pepaebijava ancianonë pibisiacueni pexanaejava yabara. Matapania anijajivibeje, acueyabi pajivibeje ata, petaevitsi catsipaebiana, jumecovënëtsianame. ²⁰ Nexata xaniajai ancianovi pibisiacueni itsa exanapona, itavere daxita Dioso pejumecovënëtsivi pitabarata. Nexata pijinia itsamonae ancianovi itsa cacuenetane nitavetsijava pibisiacueni pexanaevi, cujunaviana pibisiacueni pexanaejava. ²¹ Dioso pitabarata, vajatuxanenë Jesucristo ata pitabarata, Dioso pijaängelevi ata pitabarata, xanë jamatabëcuenereviaya caitorobatsi pacuenia caitorobatsi nexanaponaponanexa. Daxita ancianovi, pibisiacueni pexanaevi, najëpaeya itavetsianame. Ponë ancianonë, bitso pecayapëtaenë, pibisiacueni itsa exana, pëtsa sivaajumeuramë nitavetsinexa pibisiacueni pexanaejava. ²² Pëtsa itsanë ata bepjiia exaname ancianonënexa. Tspiji ponë bepjiia ancianonënexa exanaejitsipame, bepjiia pibisiacueni itsa exana, nexata itsamonae cataejitsipa pibisiacueni pexanaevi benejamatabëcueneyavenonaenë. Daxita pibisiacuenivecuva, xaniavaetsia naevetsiaya ponaponare.

²³ Xamë raja ajamatabëpatanemë tsabiabi. Nexata pëtsa apaeyabiabame ëpitaranae. Tsiquirijavayo vinorayo, pitaranae yajava, apaeyabiabianame.

²⁴ Itsamonae pibisiacueni itsa exana, bananeconitsiaexanatsi daxitajivi pepuacueneyapëtaetsi. Itsamonae pijinia pibisiacueni exanae ata, bepjiia apo cueneyapëtaetsi. Bexëa matapania xaniavaetsia vënëlivaisinaitajëta pibisiacueni pexanaejava. ²⁵ Bajara pijinia itsi itsamonae pexaniacueni itsa exana. Pexaniacueni itsa exana, daxitajivi cuenetanetsi pexaniacueni pexanaejava. Itsajavata pexaniacueni exanae ata, jivi apo cuenetaetsi. Itsiata baitsi jane bajarapajivi pexaniacueni itsa exana, acuenebi navënëmatayatsia peponaponaejava. Nexata bexëjavabelia daxitajivi vënëlivaisitanetsi pexaniacueni pexanaejava.

6

¹ Pamona dajubicuenia canajetatsi itsamonaejavabelia amoneya petonacuenebabinexa, bajarapamonae Jesús pelivaisi itsa pejumecovënëtsivi, yaiyataeya tonacuenebi pijatuxanenë. Bajarapacuenia tonacuenebi pijatuxanenë pesivajamatabëcuenebareyanexatsi. Nexata pijatuxanenë Dioso pibisiacuenia apo baracuaicuajjai tsane. Jesús pelivaisi ata, palivaisi vaxaitsi jivi tsipaebaponatsi, pijatuxanenë pibisiacuenia apo baracuaicuajjai

tsane. ²Dajubicuenia pecanajetsivitsi pijatuxanenē, Dioso itsa pejumecovēnētsinē, pecana-jetsivitsi pētsa jamatabējumaiṣi pijatuxanenē yabara mapacueniaje: “Tajatuxanenē rabaja abaxē Dioso pejumecovēnētsinē. Nexata asaēyata apo tonacuenebi atanē tsane, itsiata apo nebijatae tsane,” jamatabējai pētsa. Biji rajane asaēya xaniavaetsia tonacuenebi pi-jatuxanenē. Tspaji raja Dioso pejumecovēnētsinē yavenonaeya tonacueneba Dioso pena-juasivavitsiyajuvēnē. Bajarapalivaisi tsipaebaponare. Itorobarena bajarapacuenia pexanavanapaenexa.

Pacuenia Dioso pejumecovēnētsijivi jamatabēcuenebarēya yabara pelivaisi

³ Itsamonaē saicaya itsalivaisi tsipaebapona. Bajarapalivaisibeje apo najamatabēcuenejēpaebeje palivaisi vajatuxanenē Jesucristo tsipaebapona. Palivaisi vaxaiṣi jumecovēnētavanapatsi, apo nalivaisijēpaebeje. ⁴ Cuenyapētanetsi pamonaē penajumetsēnētsilivaisi tsipaebapona. Bajarapamonaē beayaijamatabēcuenevi itajara natane. Itsiata bajarapamonaē pexaniajilivaisi apo yapētae. Bitso bepematajemabivitsi jinavanapa. Nexata bajarapamonaē jitsipabiaba itsamonaējavabelia pejumenaeyanotabiabinexa saya jema itsacuenelivaisixi peyanijobijavata. Apo barēnajamatabēcuenejēpae itsajivi ata. Bajarapamonaeyajuvēnēvi itsa xaina itsacuenejavayo, bajarapamonaē nacobecaēbabiaba. Anaepanabiaba. Nabijataeyabiaba. “Itsamonaē covē nitsacueniabijitsia,” jamatabējai tsabiabi, itsamonaē apo itsacueniabijitsia atatsi. ⁵ Bajarapamonaē anaeya namataenetsia najumenotabiaba. Tspaji piamatabēcuenebejevi. Bajarapamonaē pexaniajilivaisi, Cristo pelivaisi, apo yapētae xaniavaetsia jivi petsipaebinexa. Saya bajarapamonaē jamatabējumai tsabiabi: “Xanē raja Dioso pejumelivaisi tatsipaebaponaexae, palata nacanabianajē,” jamatabējai tsabiabi bajarapamonaē. Bajarapitsivi nayajivitsare. ⁶ Vaxaiṣi Dioso vajajumecovēnētsivi, bitso cajena vajaxainaevi Diosojavabelia, itsa sivajamatabēcuenebarēyatsi xuayovajēto Dioso nacatocpata vajaxainaexa mapanacuataje. ⁷ Pamatacabi vaxaiṣi naexanatsi mapanacuataje, itsacuenejavayo ata apo capatsitsi. Pamatacabi pijinia tēpaenatsi, apo caponaē tsanetsi itsacuenejavayo ata mapanacuapijicueneje. ⁸ Bajaraxuata nexata itsa xainatsi vajaxaejava, vajanaxatabijava ata, besivajamatabēcuenebarēyatsi. ⁹ Itsiata baiṣi jane pamonaē najamatabēxaina ēpexainaecuenē pexainaexa. Nexata baja copaba Dioso pejumecovēnētsijavami. Nexata bajarapajamatabēcuene bēpēnēa bitso yajamatabēcuenebējai.

Pacuenia Timoteo muxujibatsi piamatabēcuenesaēnēxa Diosojavabelia penajamatabēcueneocopatsijava yabara pelivaisi

¹¹ Timoteo, xamē Dioso pijajivitonēmē. Navecuatsare mapanacuata jivi palata pejitsi-paejamatabēcuene. Biji jane ajamatabēcuenesaēmēre Dioso nejumecovēnētaponaponaējava. Dioso asivamēre. Diosojavabelia najamatabēcueneocopatsiava ponaponare. Itsamonaē ata asivamēre tsaponaponaē. Itsamonaē caitsacueniababiabi ata, bajayajebi casaēmēre tsaponaponaē Dioso nejumecovēnētaponaponaējava. “Xanē ayaijamatabēcuenenēnē,” ne-aijaniva, beveliajamatabēcuenenē nataeya ponaponare. ¹² Catoayapēbeje ata Dioso-javabelia nenajamatabēcueneocopatsijava, ajamatabēcuenesaēmēre nepitsinexa xua Dioso carajutsijitsia, matacabi apo peverevereaejava. Pamatacabi navajunupaebame ne-jumecovēnētsijava Jesús Dioso pexēnatocuene, Dioso cajunata peclarajutsinexa matacabi apo peverevereaejava. Ayaiṣitsaētoxaneto Dioso pejumecovēnētsivi pitabarata, Dioso cajunata peclarajutsinexa matacabi apo peverevereaejava. ¹³ Dioso baja cajena pesaēta daxita vaxaiṣi asaē tsavanapaetsi. Pamatacabi Jesucristo nutatsi Poncio Pilato pitabarata, ajumejunavijibia navajunupaeba pexaniajilivaisita. Nexata Diosobeje Jesucristobeje pitabarata caitorobatsi aeconoxae mapacueniaje. ¹⁴ Caitorobatsi xaniavaetsia nejumecovēnētaponaponaēnēxa daxita pacuenia jumaiṣi pexanialivaisi, Cristo pelivaisi. Nex-ata acuenebi tsane itsajivi ata pecaitavetsinexa. Bajarapacuenia vajēnaeetaponaponaē vajatuxanenē Jesucristo matapania pepatsimatacabitsicajavabelianexa. ¹⁵ Pamatacabi Dioso caējēta, itsa copiapatsiana, Cristo icatsia patsianica. Caenē Dioso bitso ayaija-matabēcuenenē daxitanacuanē pevetsivivecua. ¹⁶ Caenē Dioso apo tēpae tsane daxita mat-acabijavabelianexa. Dioso peyacotiyaponaponaēnē. Bajaraxuata itsajivi ata acuenebi pimoxoyotsijava Dioso. Itsajivi ata cajena caeto ata apo tae Dioso. Tspaji apo caējēpaetsi petaejava. ¡Daxitamatacabi Dioso pijajivi yayiatanetsi! ¡Diosojavabelianexa!

¹⁷ Pamonae bitso pexainaevi mapanacuapijicueneje, bajarapamonae muxujiobare beayaijamatabëcuenevi penataeyaniva. Muxujiobarena pejamatabëjumaitsiyaniva: “Palata baja taxainaexae, apo namatavenonaenë itsacuenejava ata,” pejamatabëjaiyaniva. Tshipaji saya palata peverevereaejava. Biji rajane itorobare bitso pexainaevi penajamatabëcuene copatsinexa piasaëtsaponaponaenë Diosojavabelia. Dioso nacarajuta daxita vajaxinaejava harëyaya vajacajinavanapaenexa. ¹⁸ Itorobarena bajarapamonae pijapalata pecanacuenebinexa, itsamonaejavabelia pexaniacuene petoexanabiabinexa bajarapapalata. Itorobarena penajamatabëcuene veretsinexa palata perajutsinexa bepejiobivijavabelia, bajarapacuenia peyavenonaenexa. Itorobarena petsicobetsanaponaenexa pexinaejava bepejiobivijavabelia. ¹⁹ Bajarapacuenia itsa exanaena, nexata athëbëtatsia Dioso tobuataponaenatsi pepacuene penamatamotsijava pexainaenexa daxitamatacabijavabelianexa. Xainaenana matacabi apo peverevereaejava.

Pacuenia Pablo Timoteo pemuxujobilivaisi toyaquina, pecopatsivajënae petoyaquinaelivaisi mapabaxutotaje, yabara pelivaisi

²⁰ Timoteo, exanaponaenare daxita xua Dioso catocopata nexanaenexa. Pëtsa namuxunaevetame pamonae bitso pecuaicuaijaivi saya mapanacuapijicuene yabaraje. Pëtsa namuxunaevetame pecuaicuaijaivi natsiquejemalivaisixi. Pëtsa namuxunaevetame pamonae jivi tsipaebapona penajumetsënëtsilivaisi. Bajarapamonae tsipaebapona itajara pepacuene bepexaniajailivaisi. Itsiata cajena apo pexaniajailivaisi. ²¹ Itsamonae bajarapalivaisi jumecovënëta. Nexata baja copaba Dioso pejumecovënëtsijavami.

Catovajëtatsi Dioso pecayavenonaenexa.

Mapabaxutoje San Pablo cotocaevi toyaquina Timoteojavabelia

Pacuenia icatsia Pablo cotocaevibaxuto toyaquina Timoteojavabelia yabara pelivaisi

¹ Xanë Pablonë, Jesucristo nitoroba Dioso pejamatabëcueneta. Jesucristo nitoroba daxitanacuanëjava jivi tatsipaebinexa pacuenia Dioso najumecapanepaeya jumaiti vajanacarajutsinexa matakabi apo pevereverecejava. Dioso nacarajutsiana matakabi apo pevereverecejava, Jesucristo vajajumecovënëtsivi. ² Timoteo, bitso tacaasi-vanë, betaxënatomëcuenia tacataenë. Catoyaquinatsi mapabaxutoje. Catovajëtatsi vaxa Dioso, vajatuxanenë Jesucristo ata, pecayavenonaenexa pecaasivaxaabeje. Catovajëtatsi pecaitaxutotsoniatenexabeje, pecajamatabëcuene xanepanaeyaexanaenexanua bajara-ponëbejevabelia.

Pacuenia Pablo Cristo vajunupaeba yabara pelivaisi

³ Pexaniajamatabëcuene rajutabiabajë Diosojavabelia. Dioso tonacuenebabiabajë pacuenia bajayata tajasalinaivimi ata Dioso tonacuenebavanapa. Pacuenia Dioso nitoroba, bajarapacuenia xaniavaetsia toponaponajë. Itsa canajamatabënapitatsi tavajëtsijavata Diosojavabelia, meravi, matakabita ata, Diosojavabelia pexaniajamatabëcuene rajutabiabajë xamë yabara. ⁴ Najamatabënapitabiabajë tanepënuayabaxuabijavamë pamatacabi navecuanatsatsibeje. Bitso icatsia jamatabëcatanetsi tacasivajamatabëcuenebarëyanexa itsa catanetsi. ⁵ Najamatabënapitabiabajë pacuenia daxita nejamatabëëthëtovetsina najamatabëcuenecopatame Diosojavabelia. Copi-aya acue Loidabeje, ena Eunicebeje, pejamatabëëthëtovetsina najamatabëcuenecopatabeje Diosojavabelia. Nexata yapëtaniji bajarapacuenia xamë ata nenajamatabëcuenecopatsijava Diosojavabelia.

⁶ Bajaraxuata canajamatabënapitsiaexanatsi mapacueniaje. Exanaponaename pacuenia Dioso caitoroba pecavejamatabëcaeviyaniava Dioso pecacajëpaeyaexanaejamatabëcuene. Nex-ata xaniavaetsia evetaponaponaename Dioso pejumecovënëtsivi. Pajamatabëcuene Dioso cacajëpaeyaexana, Dioso carajuta pamatacabi catsimatancobebuatatsi tacatovajëtsijavata Diosojavabelia. ⁷ Dioso cajena nacarajuta Espiritu Santo. Espiritu Santo nexata vajanacaya-javaponaponaexae, apo cjunavitsi itsacuenejava ata. Espiritu Santo pesaëta nacacajëpaeyaexana pacuenia Dioso nacatojitsipa vajaexanabiabinexa. Nacayavenonanua vajaasivanexa itsamonae ata. Nacanajamatabëcuene cataitsiaexananua pibisiacuene ata vajaexanaeyaniva. ⁸ Pëtsa ajumeuramë nevajunupaebaponaejava vajatuxanenë Jesús. Pëtsa ajumeuramë xanë ata tanevajunupaebijavamë, Jesucristo pijajivitonëxaenë penaneconitsivi pejebabiabibota taneetsijava. Biji rajane xamë ata tonacopare itsamonae pecabejiobiaexanaenexa, jivi Diosojavabelia pecapanepaelivaisinexatsi yabara. Itsamonae pecabejiobiaexanaejavata, Dioso cajena cajamatabëcuenebabatsiana. ⁹ Dioso cajena nacapanepaena pibisiacuene vajaexanaeneconimivecua. Nacajunata vajatojivanaponaenexa xaniavaetsia. Itsacuenejavayo pexaniacuene apo exanae atatsi, Dioso itsiata nacajunata. Nacajunata tsipaji Dioso jitsipa vajanacajunatsinexa. Dioso nacaitaxutotsoniatanenua Jesucristo pejamatabëcueneta. Pepo bajayatamicujinae, pamatacabi abaxë Dioso nacua ata apo exanae, Dioso baja cajena nacajitsipa. ¹⁰ Dioso cajena nacatsitanajamatabëcueneitajëta vajanacaasivajava. Dioso vajanacaasivaxae, pexënato itorobica vajanacapanepaenexa. Nexata tēpae ata tsanetsi, apo nacatoitsacuene. Tsipaji ita najamatabëcuenecopatatsi Jesucristojavabelia, nacacapanepaena Diosojavabelia. Nexata xainaenatsi matakabi apo pevereverecejava.

¹¹ Dioso cajena nitapeta jivi tatsipaebaponaenexa bajarapapexanialivaisi. Nitoroba apóstolenëxanë tatsipaebaponaenexa bajarapalivaisi apo judiovijavabelia. ¹² Bajarapalivaisi jivi tatsipaebaponaexae, itsamonae nebejiobiaexanapona mapacueniaje. Itsiata baitsi jane apo aurane tanebejiobiaexanaejava yabara. Tsipaji ponëjavabelia najamatabëcuenecopatajë, jamatabëcueneyapëtaniji. Jamatabëcueneyapëtaniji pacuenia bajaraponë jamatabëcuenecaajëpatsi taneyavenonaenexa. Nexata bajaraponë neyavenonabiabiana pacuene netocopata taexanaponaenexa matapania icatsia Cristo pepatsimatacabitsicajavabelianexa.

¹³ Timoteo, casaëmëre tsaponapona nejumecovënëtsijava pexaniajailivaisi, palivaisi baja catsipaebatsi. Pacuenia baja catsipaebatsi, bajarapacuenia juya itsamonaejavabelia tsipaebabiabianame. Bajarapalivaisi jamatabënaponapona. Xaniavaetsia jumecovënëtsia ponapona. Asivaya taeyabiabare itsamonae ata Jesucristo pijajivitonëxaemë. ¹⁴ Espiritu

Santo cajena nacayavaponaponabeje. Nexata nacayavenonaponaponabeje. Bajaraxuata pexaniajailivaisi xaniavaetsia tsipaebaponaponare. Pacuenia Dioso caitoroba, exanabiabare. Saicayalivaisicuenia pëtsa tsipaebaponame. Espiritu Santo cayavenonaena.

¹⁵ Xamë baja cajena yapëtaneme pacuenia Aslavënë nacuapijivi, daxita Dioso pejumecovënëtsivi, nexuabarëcëpeca. Tanexuabarëcëpecaevi yajuvënëñëbeje Figelobeje Hermógenesbeje. ¹⁶ Onesiforo, pijamonae yajava, Dioso pitaxutotsoniataenexatsi, tovajëtajë Diosojavabelia. Onesiforo nejamatabëcuenebabatabiaba. Penaneconitsivi pejebabiabibota ecae atanë, nesivaxaina anijatonë. Onesiforo cajena apo neyabaraaura, penaneconitsivi pejebabiabibota ecae atanë. ¹⁷ Biji rajane Onesiforo itsa patajopa Roma tomarata, nejaitaruta. Apo copatsi cajena tanejaitarutsijava. Matapania itsa necaxitajaraba penaneconitsivi pejebabiabibota, copata baja tanejaitarsijava. ¹⁸ Diosojavabelia Onesiforo tovajëtajë Dioso pitaxutotsoniataenexatsi pamatacabi icatsia Cristo patsianica. Xamë baja cajena yapëtaneme pacuenia Onesiforo nacayavenonabeje pamatacabi ponaponatsibeje Efeso tomarata.

2

Pacuenia Jesucristo pijajivitonë jamatabëcuenetsi, ponë xaniavaetsia jumecovënëta, yabara pelivaisi

¹ Timoteo, xamë betaxënatomëcuenia tacataenë. Catovajëtatsi Diosojavabelia pecajamatabëcuene asaëyaexanaenaxa. Nacayavenonaena Jesucristo pijajivixaetsi. ² Xamë rabaja cajena nejumetaeyabiabame palivaisi tsipaebabiabajë jivi ayaibitsaëttoxanetonëjavabelia. Bajarapalivaisi juya tsipaebare itsamonaejavabelia. Pamonae apo piacuenejitsibivi pexanaenexa pacuenia itorobatsi, pecajëjëpaevitsinua xaniavaetsia jivi livaisi petsipaebinxaxa, bajarapamonae itorobare juya mataropotsia bajarapalivaisi petsipaebinxaxa itsamonaejavabelia.

³ Dioso pejumelivaisi jivi netsipaebaponaejavata, itsa catoayapëbeje, itsamonae itsa cabejiobiaexanaejitsianua, pëtsa najetabajiravame. Jesucristo pijajivitonëxaemë, jamatabëcueneevetaponaponare pacuenia caitoroba nexanaenaxa. Pacuenia pexaniavajabit-saenë itsi, bajaraitsimëre. ⁴ Vajabitsaenë pitorobabiabinëtsi jamatabëcueneevetaponapona pacuenia itorobatsi pexanaenaxa. Nexata apo vecuanajamatabëcueneepatajërëtsi saicayacuene pevetaaponaeenaxa. ⁵ Bajara pijinia pacuenia pebitsojinavei pecujinaejinaejava, penayacobijavata, cujinaejina pacuenia itorobatsi pijatuxanevi. Penacanabinë jamatejema perajutsinexatsi itsacuenejavayo. Pajivi xaniavaetsia apo cujinaejinae pacuenia itorobatsi, bitsojinae ata pecujinaejinaejava, itsiata apo nacanabi. Nexata apo rajutsitsi pecujinaejinaematamo. ⁶ Ponë pijinia pabi nacueneba peubinxaxa peubijava, bajaraponë copiaya nacueneba asaëyata. Nexata peubijava itsa tonaveretatsi, pita baja nacuenebimatamo. Bajara pijinia pacuenia xamë ata asaëya tonacuenebare vajatuxanenë. Nexata vajatuxanenë carajutsiana netonacuenebimatamo. ⁷ Najamatabëxainare tacatsipaebilivaisi. Nexata vajatuxanenë cayapëtaeyaxanaena bajarapalivaisi.

⁸ Canaëjere Jesucristo. Bajaraponë cajena Dioso asaëyaexanatsi petëpaeucujinae. Bajaraponë cajena Davidpijinë pemomoxiyajuvënëñë. Bajaraponë pelivaisi jivi tsipaebabiabajë. Itsa jumecovënëta bajarapalivaisi, pecapanepaelivaisinexatsi Diosojavabelia. ⁹ Bajarapalivaisi tatsipaebaponaexaxa, penaneconitsivi pejebabiabibota neeta tavajënaeyabelia daxitanacuanëjajava tatsipaebaponaeyaniva. Cadenamaëttonëta xanë necëta, pacuenia bitso pibisacuene pexanaenë bacëtatsi. Itsiata Jesucristo pelivaisi apo cëtsicapanepae. Nexata xanë majotaje naneconitsia ponaponae atanë, aeconoxae baja Jesucristo pelivaisi yacajëjëpapona daxitanacuanëjajava. ¹⁰ Bajaraxua tayapëtaexaxa, tonacavevetajë itsamonae ayaicuenia tanebejiobiaexanaenaxa, Dioso pitapetsivitsi pecapanepaenexatsi Jesucristo pelivaisi pejumecovënëtsixaxa. Nexata bajarapamonae ata Dioso capanepaenatsi pexainaenaxa matacabi apo pevereverecaejajava daxita matacabijavabelianexa. Nexata bajarapamonae Jesucristo yajavajinavanapaena pinijicotia yajava. ¹¹ Palivaisi aeconoxae jumaitsinëjitsia, pexaniajailivaisi cajena:

Itsa xaniajai Cristo yajavatëpatsibeje, nexata icatsia Cristo yajavaasaëtsibeje tsaponaponae tsane. ¹² Itsa casaë tsaponaponaetsibeje tsane Cristo pelivaisi vajajumecovënëtsijavabeje, itsamonae nacabejiobiaexanae atabeje, nexata daxitacuene Cristo cobenaevetsianatsibeje pamatacabi daxitacuene evetsiana pijanacuatsia. Itsa vaxaitsibeje bajaraponë pelivaisi vajajumecovënëtsijavabeje nayavajunuaxainae-natsibeje jivijavabelia, nexata juya bajaraponë pijajivitonëcuenetsibeje nacayavajunuaxainaenabeje paxa Diosojavabelia. ¹³ Vaxaitsi itsajamatabëcuene Dioso vecuanajamatabëxainae atatsi, itsiata Dioso nacatoexanaena pacuenia baja cajena najumecapanepaeya jumaitsi.

Pacuenia jamatabëcueneitsi xaniavaetsia Dioso petonacuenebinë yabara pelivaisi

¹⁴ Daxita Dioso pejumecovënëtsivi najamatabënapitsiaexanaename palivaisi catsipaebatsi. Vajatuxanenë pitabarata tsipaebare bajarapamonae. Pëtsa bajarapamonae anaeya jumenota saya itsamonae pecuaicuaijajava. Pejumeanaenotsijava itsamonae, apo jamatabëcueneavenonae tsipaetsi itsajivi ata. Saya jamatabëcuenebijinaejitsipatsi daxita pejumetaevitsi. ¹⁵ Pacuenia cacajëpa, Dioso pecaitorobicuenia exanaponaponare. Nextata pamatacabi naitajëtsianame Dioso pitabarata, cabarëyataena xaniavaetsia nejumecovënëtsixae pacuenia caitoroba. Ajibi tsane neyabaraaurajava Diosojavabelia. Tsipaji xaniavaetsia jivi tsipaebaponaponame Dioso pejumelivaisi, pepo pexaniajailivaisi. ¹⁶ Pëtsa namuxunaevetame pamonae tsipaebapona natsiquejemalivaisi, mapanacuapijilivaisi. Tsipaji raja bajarapamonae petsipaebaponaelivaisi, jivi Dioso pejumecovënëtsijavami copabiaexanapona pevajënaeyabelia. ¹⁷ Bitso cajena abeje bajarapalivaisi. Pacuenia ayaivajënë banaexanapona pevajëntsabanajetarucaejava, bajara pijinia jamatabëcueneitsi bajarapamonae petsipaebaponaelivaisi. Tsipaji pevajënaeyabelia jivi ayaibitsaëto jamatabëcuenebijinanaponatsi bajarapalivaisi petsipaebaponaexaetsi. Bajarapalivaisi petsipaebaponaevi yajuvënënebeje Himeneobeje Filetoebeje. ¹⁸ Bajaraponëbeje copatabeje baja pexaniajailivaisi pejumecovënëtsijavamibeje. Jamatabëcueneavëxaniababeje saya. Tsipaji jumaitisibeje tsabiabi: “Panepa rabaja jivi petëpaecujinae icatsia Dioso piasaëyaexanaponaejavaminexa,” jaibeje tsabiabi. Nextata bajarapacuenia Dioso pejumelivaisivecua najamatabëcuene epatajërërëcaponabeje. Nextata bajaraponëbeje itsamonae ata Dioso pejumecovënëtsijavamivecua najamatabëcueneepatajërërëcaeya exanaponabeje. ¹⁹ Pacuenia ibotoxaneto apo tixitsicanepaetsi, bajara pijinia itsi Dioso pejumelivaisi, pexaniajailivaisi. Caelivaisi rabaja tsiteca. Nextata itsalivaisijavabelia apo tixitsicanepaetsi. Bajarapalivaisijavata mapacuenia pejumaitsilivaisiyo rucaje: “Pepo petuxanenë cajena yapëtane pijajivi,” pejailivaisiyo ruca. Itsalivaisijavata pijinia mapacuenia pejumaitsilivaisiyo rucaje: “Pajivi jumaitsi: ‘Xanë raja Cristo pijajivitonënë,’ jai, bajarapajivi becopata pibisiacuene pexanaejava,” pejailivaisiyo ruca.

²⁰ Riconë pijaboxanetota jivi pecanabaninëanënexa, xaina daxitacuenevirianënë. Itsanënë penioponaeplataninitota pexanaenënë. Itsanënë oronanitota pexanaenënë. Pamatacabi riconë topatatsi petuxanevi, ayajamatabëcuenevi, pexaejava abatabiaba bajaraponënëta. Itsanënë bevelianënë, naejavanënë. Itsanënë atsanandinënë. Bajaraponënë xaina daxitamatacabi jivi pecanabaninexa. ²¹ Bajara pijinia jamatabëcueneitsi Dioso pejumecovënëtsivi ata. Pajivi xaniavaetsia najamatabëcuenevetaponapona pibisiacuene pexanaeyaniva, bajarapajivi jamatabëcueneitsi pacuenia oronanitota pexanaenënë itsi. Baitsi baja ajamatabëcuenexuirajibi. Nextata pijatuxanenë tsitaxanepana pitorobinexatsi xua pexaniacuene pijatuxanenë petonacuenebinexa. Timoteo, bajaraxuata xaniavaetsia benaevetaponaponame pibisiacuene nexanaeyaniva.

²² Pacuene pevëjëavi najamatabëxaina pibisiacuene pexanaenexa, bajarapacuene vecuanajetabajiravaponare. Casaëmëre tsaponaponae ëpexaniacuene nexanaponaponaejava. Diosojavabelia najamatabëcuene copatsiyaponaponare. Asivamëre tsaponaponae itsamonae ata. Jamatabëcueneexanepanaeya ponaponara Dioso pitabarata. Bajarapacuenia barëajamatabëcuenesaëmëre tsaponaponae, pamonae xaniavaetsia penaevetavanapaevi pibisiacuene pexanaeyaniva, penavajëcabiabivinuua Diosojavabelia peyavenonaenexatsi. ²³ Namuxujemare natsiquejemalivaisixi pecuaicuaijajivi. Yapëtaneme rabaja. Bajarapitsilivaisixi jivi itsa cuaicuaijai, belia najumeanaenotabiabapona. ²⁴ Jesús cajena pijajivitonënë, itsamonae apo bejumeanaenotsi. Biji rajane pexaniajamatabëcuene bexaina daxitajivijavabelia. Livaisi jivi betsipaeaba xaniavaetsia. Bajayajebi ata apo becopatsi livaisi petsipaebaponaejava. ²⁵ Xaniavaetsia muxujiobiaya livaisi betsipaeapona pamonae Dioso apo pejitsipaevi ata. Nextata beevetaponapona bajarapamonae ata pecopabindexa pibisiacuene pexanabiabijava penajamatabëcuene pënëyorotsinexa Diosojavabelia. Nextata bajarapamonae ata Dioso yapëtaeyaexanaenatsi Jesús pelivaisi pexaniajailivaisi. ²⁶ Nextata icatsia najamatabëxainaena xaniavaetsia Dioso pejumecovënëtsinexa. ²⁵ Xaniavaetsia muxujiobiaya livaisi betsipaeapona pamonae Dioso apo pejitsipaevi ata. Nextata beevetaponapona bajarapamonae ata Nextata dovathi pejamatabëcuene itorobabiabijavatsivecua najamatabëcuene pënëyorotsiana Diosojavabelia.

3

Pacuenia jivi itsane itsa baja imoxoyo pevajënae nacua peverevececaenexa yabara pelivaisi

¹ Timoteo, xaniavaetsia beyapētaneme mapacueneje. Itsa baja imoxoyo pevājēnae tsane nacua pevereverecaenexa, bajarapamatacabi bitso ayapēbeje tsane daxitacuenejavabelia. ² Bajarapamatacabi cajena caejivi canacujitsia pexainaejava, natoasiva tsane ēbajarapamonae ayaijava pexainaenexa. Navajunupaebiana saya peyaiyataenexatsi pejumetaevitsi. Beayaijamatabēcuenevi nataena. Navajunupaebiana pexanaejava yabara peyaiyataenexatsi. Bajarapamonae pibisiacuenia baracuaicuijai tsane Dioso. Apo jumecovēnētsi tsane paxajivi, penajivi ata, pitorobicueniatsi. Vitsatsi atatsi, yavenonabiabi atatsi, apo jamatabēnajinae tsane pijamonae. Bajarapamonae apo yayiatae tsane itsamonae Diosojavabelia pevājēcabiabijava. ³ Bajarapamatacabi bajarapamonae apo asiva tsane pijamonae ata. Apo itaxutotsoniatae tsane itsamonaejavabelia ata. Namumetsēnētsiaya baracuaicuijai tsabiabi tsane itsamonae. Apo caējēpaetsi tsane penajamatabēcueneataitsinexa pibisiacueni pexanaejava. Anaepanabiabiana bitso pebejiobiaexanaenexa itsamonae. Itoya tsane daxita pexaniacuene pexanaevi. ⁴ Bajarapamonae canajetsiana penajajinavanapaevi ata pijavajabitsa pecobeyabelia. Xaniavaetsia najamatabēxainaenejeva, exanaena daxitacuene. Bijijaya naēcotsiana itsamonae. Dioso apo jamatabēnajinae tsane. Jaitsiana biji pebarēyajamatabēcuene saya pebarēyanexa. ⁵ Bajarapamonae itajara najonena Dioso pejumecovēnētsivijavabelia. Itsiata baitsi jane apo jumecovēnētsi tsane Dioso pejumelivaisi, jumetae ata.

Bajarapamonae navecuatsatsianame. ⁶ Bajarapamonae navecuatsatsianame tsipaji bajarapamonaeyajuvēnēvi itsamonae pijabonējavabelia joneyabiabiana. Nexata bajarapabonēpijivi, petiriavi, bajarapamonae yamaxēitojorobabiabiana. Bajarapapetiriavi jamatabēcuenefaefaena. Daxitacuene pibisiacueni jamatabēxanabiabiana. Nexata pamatacabi bajarapapetiriavi pibisiacueni jamatabēxana, patabiabiana penajumetsēnētsilivaisi petsipaebinxatsi. Nexata bajarapapetiriavi itsa tsipaebianatsi penajumetsēnētsilivaisi, beDioso itajara pejumelivaisi petsipaebivi taeyabiabiana. ⁷ Bajarapapetiriavi picani jitsipaena petsipababiabinxatsi Dioso pejumelivaisi. Itsiata baitsi jane apo tsjamatabējonetsi tsane pepo pexaniajailivaisi pecapanepaelivaisinexatsi Diosojavabelia. ⁸ Bajayata penajorobinēmibeje, Janespijinēmibeje Jambrespijinēmibeje, nayajiviitavetabeje Moiséspijinē pexaniajailivaisi petsipaebiyativatsibeje. Bajara pijinia pacuenia pamonaē petiriavijavabelia penajumetsēnētsilivaisi tsipaebaponaena. Bajarapamonae nayajiviitavetaponaena pepo pexaniajailivaisi petsipaebiyativatsi. Bajarapapetiriavi apo caējēpaetsi tsane penajamatabēxainaenexa xaniavaetsia. Bajarapamonae saya yamaxēitojorobiaya jumai tsabiabi tsane itsamonaejavabelia: “Paxanē raja Dioso patajumecovēnētsivi,” jai tsabiabi tsane. ⁹ Itsiata bajarapamonae ayaibitsaeto jivi apo pēnaponaetsi tsane. Daxitajivi cueneyapētaenatsi bajarapamonae saya jema livaisi petsipaebaponaejava. Nexata pacuenia bajayata Janespijinēmibeje Jambrespijinēmibeje daxitajivi cueneyapētanetsibeje pibisiacueni pexanaponaejavabeje, bajara pijinia pacuenia bajarapamonae ata daxitajivi cueneyapētaenatsi penajumetsēnētsilivaisi petsipaebaponaejava.

Pacuenia baja Pablo copatsijitsia Timoteo pemuxujobijava yabara pelivaisi

¹⁰ Timoteo, xamē baja cajena yapētaneme palivaisi tsipaebabiabajā jivibit-saētoxinetojavabelia. Yapētanemenua baja cajena pacuenia xaniavaetsia nonaponajē. Yapētanemenua pacuene yabara Dioso tonacuenebaponaponajē. Yapētanemenua pacuenia Dioso jumecovēnētaponaponajē. Yapētanemenua pacuenia itsamonaejavabelia livaisi tsipaebaponajē bajayajebi copatsinejevanē. Yapētanemenua pacuenia itsamonae ata asivanē. Yapētanemenua pacuenia casaēnē tsaponaponae jivi livaisi tatsipaebaponaejava netoayapēbeje ata. ¹¹ Yapētanemenua pacuenia itsamonae pibisiacuenia nebaracuaicuijai tsabiabi Jesucristo tajumecovēnētsinēxae. Yapētanemenua pacuenia nebejiobiaexanapona. Yapētanemenua pacuenia nebejiobiaexana Antioquia tomarata, Iconia tomarata ata, Litra tomarata ata. Bajarapatomaranēpijivi bitso nebejiobiaexana. Itsiata baitsi jane Dioso necapanepa daxita bajarapacuenivecua. ¹² Xaniajai cajena. Daxita pamonaē najamatabēcuene copata xaniavaetsia petojinavanaponaexa Jesucristo, bajarapamonae bejiobiaexanaponaenatsi. ¹³ Nexata pibisijamatabēcuenevi, pamonaē dovathi pejamatabēcueneta jivi yamaxēitojorobapona, orijibia bitso pevājēnaeyabelia pibisiacueni exanaponaena. Bajarapamonae dovathi pejamatabēcueneta jivi yamaxēitojorobaponaena. Nexata pijinia bajarapamonae ata bitsoyo dovathi yamaxēitojorobaponaenatsi.

¹⁴ Timoteo, itsiata baitsi jane xamē casaēmēre tsaponaponae palivaisi baja capanepaeya jumecovēnētame. Tsipaji baja cajena xamē jamatabēcueneyapētaneme pacuenia jamatabēcueneitsi pamonaē catsipaeba bajarapalivaisi. ¹⁵ Tsiquirinēyomējavaveliacujinae baja cajena yapētaneme Dioso pejumelivaisi. Bajarapalivaisi cayapētaeyaxana pecapanepaejavaneja Diosojavabelia nenajamatabēcuene copatsixae Jesucristojavabelia. ¹⁶ Dioso pijajivi Espiritu Santo itorobatsi peyaquinaenexa Dioso pejumelivaisi. Nexata pacuenia

Espíritu Santo itorobatsi, bajarapacuenia Dioso pijajivi yaquina daxita Dioso pejumelivaisibaxutonēnexa. Nexata nacatoxanepana Dioso pejumelivaisi itsamonae vajanacatsipaebinexa vajayapētaenexa pexaniajailivaisicuene. Nacatoxanepanana Dioso pejumelivaisi vajanacaitavetsinexa apo pexanepanaecuene itsa exanatsi. Nacatoxanepanana Dioso pejumelivaisi vajanacajamatabēcueneitorobinexa ēDioso pejitsipaecuene vajatoexanabiabinexa. Nacatoxanepanana Dioso pejumelivaisi vajanacayapētaeyaxanaenexa xaniavaetsia vajatojinavanapaenexa Dioso. ¹⁷ Nexata Dioso pejumecovēnētsinē itsa yapētane Dioso pejumelivaisi, jamatabēcuenecaējēpaenatsi daxita xua pexaniacuene pexanaenexa.

4

¹ Pepo petuxanenē Jesucristo patsianica penaneconitsiaexanaenexa daxita pibisiacuene pexanaevi. Naneconitsiaexanaena piasaētsavanapaevi, petēpaevi ata. Bajaronē itsa patsianica, daxitacuene pevetsinexa, patsianica. Jesucristo pitabarata, Dioso ata pitabarata, xanē jamatabēcuenerēviaya caitorobatsi mapacueniaje. ² Daxitamatacabi jivi tsipaebare Dioso pitorobilivaisi. Ajamatabēcuensaēya Dioso pitorobilivaisi tsipaebaponare. Paepatota jivi jitsipa pecanamuxunaevetsinexa, tsipaebare. Paepatota ata apo jitsipae pecanamuxunaevetsinexa, itsiata tsipaebare. Dioso pitorobilivaisi jivi jumecovēnētsiaexanare. Itavere pibisiacuene pexanaejava. Muxujobare pijamatabēcuensaēnexa Diosojavabelia. Tsipaebaponare xaniavaetsia Dioso pejumelivaisi bajayajebi jamatabēcuenequeranaenejevamē. ³ Bajarapacuenia tsipaebaponare tsipaji raja itsamatacabi jivi apo namuxunaevetsi tsane pexaniajailivaisi petsipaebijavatsi. Biji rajane itsamatacabi jivi pijacuata natojaitisiana saicayalivaisi Dioso pejumelivaisivecua ayaibitsaēto petsipaebinxatsi. Bajarapamonae pijacuata junatsiana petsipaebinxatsi palivaisi muxujitsipa. ⁴ Nexata pexaniajailivaisi petsipaebiyativatsi, navecuaitavetsiana. Jumecovēnētsiana saya ēnatsiquejermalivaisixi. ⁵ Itsiata baitsi jane xamē saicaya nayajivitaeyaponaponare. Daxita pacuenia Dioso catocopata nexanaenexa, veretsianame. Catoayapēbeje ata, itsamonae cabejibioiaexanae ata, casaēmēre tsaponaponae nevajēnaeyabelia. Casaēmēre tsaponaponae jivi netsipaebijava pexanialivaisi pecanepaelivaisinexatsi Diosojavabelia.

⁶ Xanē baja netoimoxoyo tsaponae tatonacaevetsinexa tanebeyaxuabinexa. ⁷ Pacuenia pebitsojinaenē pecujinaejinaejava daxitasaēta cujinaejinaeya pata, bajarapacuenia xanē ata xaniavaetsia daxita tasaēta tonacuenebajē tajatuxanenē. Toveretaponajē baja tatonacuenebijava taneitorobicuenia. Apo copatsinē cajena tanajamatabēcueneocopatsijava Diosojavabelia. ⁸ Pacuenia penayacobijavata, pebitsojinaenē pecujinaejinaejava, barajutatsi corona pecujinaejinaematamo, bajara pijinia pacuenia xanē ata vajatuxanenē athēbētatsia nerajutsiana pexaniacuene taneitorobicuenia tatoponaponaeaxae. Bajarapacuenia nerajutsiana pamatacabi vajatuxanenē patsianica. Itsiata baitsi jane exanē apo nerajutsi tsane bajarapacuenia. Daxita pamonae ata ajamatabēcuensaēya vajēnaeevetavanapa pepatsijavatsica Jesucristo, bajarapamonae ata rajutsianatsi bajarapacuenia. Vajatuxanenē itsa patsianica, naneconitsiaexanaena daxita pamonae naneconita bajaraponējavabelia. Vajatuxanenē itsa naneconitsiaexanaena daxita pamonae naneconita bajaraponējavabelia, itaxotjema apo naneconitsiaexanae tsane. Paneconivajēto caejivi canacujitsia xainapona, bajarapaneconivajētota naneconitsiaexanaponaena.

Pacuenia Pablo jumaitsi Timoteojavabelia yabara pelivaisi

⁹ Itsa cacuenecaējēpa neponaejava, bepijiayo netaeyojopaeremena. ¹⁰ Demasvēnēnē rabaja nexuabatabajirava. Tsipaji Dioso pejumelivaisi matatoxenetsia jitsipa bitso mapanacuapijicueje. Pona baja nexata Tesalónica tomarbelia. Crescentevēnēnē baja itorobajē Galacia nacuyabelia. Tito pijinia itorobajē Dalmacia nacuyabelia. ¹¹ Caenē Lucas xanējavata ponapona. Jaire Marcos. Bajaraponē caējēpatsi taneyavenonaenexa Dioso tatonacuenebijava. Nexata barērenamē tsane. ¹² Tiquico baja itorobajē Efeso tomarbelia. ¹³ Itsa renamē tsane xanējavaberena, Troas tomarata tajacamajumavelia tanaxatatsijava netopitaponaeeremena. Carpovēnēnē raja pijabota puenetarutajē. Tajalibronēna, tajacuyalatobaxutoxinua, netopitaponaeeremena. Bitso tajacuyalatobaxutoxi namatavenonajē.

¹⁴ Alejandro, cobrenanita daxitacuene pexanaenē, bitso baja cajena pibisiacuene nexana. Itsiata baitsi jane Dioso neyamamatotsiana tanebejibioiaexanaematamo. ¹⁵ Nayajivitaema bajaraponē. Tsipaji raja bitso itoya patatsipaebaponaelivaisi.

¹⁶ Pamatacabi nayajivicuaicuijanē majotaje Roma tomarata, nacua pevetsivi pitabarata, itsajivi ata apo neyavenonaeyacuicuijai. Daxita nexuabanuta. Nexata bajarapamonae tovajētajē Diosojavabelia penaneconitsiaexanaeyanivatsi

tanexuabanutsijamatabëcuene. ¹⁷ Itsiata baitsi jane bajarapaepatota vajatuxanenë neyavenona. Vajatuxanenë pesaë nerajuta daxitalivaisi tatsipaebinexa. Apo judíovi ata pejumecovënëtsinexa, bajarapalivaisi tsipaebaponajë Diosojavabelia pecapanepaelivaisinexatsi. Tanexuabanutsijavata picani netsiayai tanebeyaxuabinexa. Itsiata vajatuxanenë necapanepa tanebeyaxuabijavaminexavecua. ¹⁸ Vajatuxanenë cajena necapanepaponaena daxita pibisiacuene taneexanaeyaniva. Necaponaena athëbëabetsia bajaraponë pevetsinacuayabetsia. Vaxaitsi jumai tsabiabi tsanetsi Diosojavabelia daxitamatacabijavabelianexa: “Diosomë, pinijicuene baja cajena nexanaenë,” jai tsabiabi tsanetsi.

Pacuenia Pablo Timoteo tonajumeitoroba Efeso tomarabelia pebajacobinexatsi peyapëtaevitsi yabara pelivaisi

¹⁹ Nebajacobiana Prisca. Prisca pamona ata, Aquila, nebajacobiana. Nebajacobiana Onesíforo pijamonae ata. ²⁰ Erasto nacopatajopa Corinto tomaratalia. Trófimo pijinia puenetajë Mileto tomaratalia. Tsipaji avitane. ²¹ Itsa cacuenecaëjëpa, naxanitsiayo renamë tsane emarapae pecopiajopaevajënaeya. Cajamatabënajina pina Eubulo, Pudente ata, Lino ata, Claudia ata, daxita itsamonae Dioso pejumecovënëtsivi yajava.

²² Catovajëtatsi vajatuxanenë Jesucristo pecayajavaponaponaenexa. Daxita paxamë pacatovajëtatsi Dioso papecayavenonaenexa.

Mapabaxutoje San Pablo toyaquina Titojavabelia

Pacuenia Pablo mapabaxutoje toyaquina Titojavabelia yabara pelivaisi

¹ Xanë Pablonë, Dioso pijajivitonënë. Jesucristo ata pijaapöstolenënë. Jesucristo baja cajena nitoroba jivi tayavenonaenexa Diosojavabelia penajamatabëcuenecopatsinexa. Dioso baja cajena tajëvelia itapeta bajarapamonae penajamatabëcuenecopatsinexa Diosojavabelia. Jesucristo nexata nitoroba bajarapamonae tatsipaebinexa pexaniajailivaisi Dioso pitabarata bajarapamonae xaniavaetsia pejinavanapaenexa. ² Jesucristo nitoroba tatsipaebinexa pexaniajailivaisi bajarapamonae ata pexinaenexa matacabi apo peverevereaejava. Pepo bajayatami, Dioso abaxë nacua ata itsa apo exanae, Dioso najumecapanepaeya jumaiti vajanacarajutsinexa matacabi apo peverevereaejava. Dioso baja cajena apo penajumetsënëtsinë. ³ Nexata baja Dioso pecaëjëtsimatacabita, bajarapalivaisi nacayapëtaeyaexana. Nexata Dioso, vajanacapanepaenëxexa, xanë nitoroba jivi tatsipaebinexa bajarapalivaisi. Nexata xanë daxitajivi tsipaebaponajë bajarapalivaisi. ⁴ Tito, betaxënatomëcuenia tacataenë. Tsipaji cayavenonatsi xamë ata nejumecovënëtsinexa Jesucristo pelivaisi. Catoyaqinatsi mapabaxutoje. Catojitsipatsi vaxa Dioso pecayavenonaenexa, Jesucristo ata, vajanacapanepaenëxexa, pecayavenonaenexa. Catojitsipatsi pecaitaxutotsoniataenexa, pecajamatabëcuenë xanepanaeyaexanaenexana.

Pacuenia Pablo Tito puenetanuta Cretatunaeto nacuata petonacuenebinexa Dioso pijacuenë yabara pelivaisi

⁵ Capuënetatsi baja cajena Cretatunaeto nacujavata. Capuënetatsi nexanaponaponaeenexa, xua abaxë cotosajina nejamatabëcuenesaëyaexanaenexa Dioso pejumecovënëtsivi. Caitorobatsinua baja cajena caetomarapijivi canacujitsia nitapetsinexa ancianovinexa, Dioso pejumecovënëtsivi pevetsivinexa. ⁶ Nejumenajamatabënapire pacuenia caitorobatsi. Itsa itapetsijitsiamë ponë ancianonëxexa, itapetsianame ponë toajibitsi jivi peyabaraneconitsijavanexatsi. Caeva pepitsinë. Pexi Dioso petojumecovënëtsinëtsi. Pexi apo petoacujirubejenëtsi. Pacuenia ata pexi itoroba, pejumecovënëtsinëtsi. ⁷ Tsipaji ponë itapetsianame ancianonëxexa, Dioso pijacuenë tonacuenebiana. Bajaraxuata ancianonëxexa, itapetsianame ponë xaniavaetsia peponaponae, planeconijibinë. Beayaijamatabëcuenenë apo penataenë. Bepijia apo pianaeponaenë. Apo piapaenë piaitajibinexa. Pevëna pebi apo pebenë. Apo pejitsipaenë itsajivi ata yamaxëitojorobiaya pevecuanacobetoxotsinexa palata. ⁸ Ancianonëxexa, xanepana ponë xaniavaetsia copiapitabiaba pijabota pepatsivi. Pexaniacuenë pexanaenë. Xaniavaetsia copiaya penajamatabëxainaenë pacuenë exanaejitsia. Xaniavaetsia peponaponae jivi pitabarata, Dioso ata pitabarata. Pexanaponaponae daxita pacuenia Dioso pejumelivaisita itoroba jivi pexanaenexa. Pecaëjëpaenëtsi penajamatabëcuenecataitsinexa pibisiacuenë pexanaeyaniva. ⁹ Ancianonëxexa, xanepana ponë casaë tsaponaponae pejumecovënëtsijava palivaisi tsipaebatsi, pexaniajailivaisi. Bajarapacuenia nexata bajaraponë caëjëpaenatsi itsamonae ata pejamatabëcuenebabatsinexa pexaniajailivaisita. Caëjëpaenatsinua xaniavaetsia pejumecanaviatsinexa pamonae jamatabëcuenenavëxaniabiaya pibisiacuenia baracuaicuaijai Dioso pejumelivaisi. Nexata ancianonë xaniavaetsia itsa jumecanaviatsiana pamonae pibisiacuenia baracuaicuaijai Dioso pejumelivaisi, bajarapamonae ata jumecovënëtsiana Dioso.

¹⁰ Bajarapitsijamatabëcuenëvi itapetaponaename ancianovinexa. Tsipaji raja Cretatunaeto nacuata, Dioso pejumecovënëtsivi tuatuajëta, ayalbitsaëto jinavanapa apo pejumecovënëtsivi pacuenia itorobatsi pevetsivitsi. Bajarapamonaeayajuvënëvi ayalbitsaëto judiövi. Bajarapajudiövi jumai tsabiabi: "Pamonae apo judiövi ata Jesüs pelivaisi itsa jumecovënëta, bajarapamonae ata benaperabëcaucubiaexana," jai tsabiabi. Bajarapajudiövi natsiquejemalivaisi saya cuaiicuaijai tsabiabi. Nexata yamaxëitojorobapona Dioso pejumecovënëtsivi. ¹¹ Bajarapajudiövi bejumeitavetame. Tsipaji saya penajumetsënëtsilivaisi jivi tsipaebapona Dioso apo pejitsipaecuenia. Bajarapajudiövi, caebopijivi canacujitsia, Dioso pejumecovënëtsivi, najamatabëcuenë epatajërërecaeyaexanapona Dioso pejumecovënëtsijavavecua. Bajarapajudiövi penajumetsënëtsilivaisi jivi tsipaebapona saya pematomtsinexatsi palata.

¹² Bajayata pina livaisi bitso peyapëtaenëmi ponapona Cretatunaeto nacuata. Nexata pina bajaraponëmi jumaiti Cretatunaeto nacuapijivi yabara mapacueniaje: "Cretatunaeto nacuapijivi cajena bitso penajumetsënëtsivi. Bitso piacujirubejevi. Ayaijavanua jamatabëxaeyabiaba. Bitso afaetabinua," jai pina cajena bajayata Cretatunaeto nacuapijinëmi. ¹³ Xaniajai baja cajena pacuenia jumaiti bajaraponëmi. Bajara jamatabëcuenëtsi

Cretatunaeto nacuapijivi. Tito, nexata xamě asaëyata itorobare bajarapamonae xaniavaetsia penajamatabëcuenecopatsinexa Diosojavabelia. ¹⁴ Itavere bajarapamonae penamuxunaevetsiyaniva judiövi pijasalinaivimi pijalivaisixi. Itaverenua bajarapamonae pejumecovënëtsiyaniva pacuenia itorobaponatsi pamonae copaba pexaniajailivaisi pejumecovënëtsijavami.

¹⁵ Pajivi jumecovënëta Jesucristo pesivatëpaejavatsi, bajarapajivi ajamatabëcuenexuirajibi. Bajarapajivi daxita xua tane, ëpexaniacuenia sivanajamatabëxaina. Nexata itsacuenjavayo ata apo jamatabëcuenebijianaetsi. Pajivi pijinia apo jumecovënëtsi Jesucristo pesivatëpaejavatsi, bajarapajivi ajamatabëcuenexuira. Nexata bajarapajivi daxita xua tane, pibisiacuenia sivanajamatabëxaina. Nexata daxitacuenie jamatabëcuenebijianatsi. Pibisiacuenie exanabiabi ata, jamatejema saya ponapona. ¹⁶ “Xaně rabaja bitso Dioso yapëtaniji,” jai tsabiabi. Itsiata baitsi jane bajarapamonae pibisiacuenie exanavanapa. Nexata nayapëtaene Dioso apo peyapëtaejava. Bajarapamonae itoya Dioso. Bajarapamonae apo jumecovënëtsi pacuenia Dioso itorobatsi. Nexata apo caëjëpaetsi itsacuenjavayo ata pexaniacuenie pexanaenexa.

2

Pacuenia Pablo Tito itoroba pexanialivaisi jivi petsipaebaponaenexa yabara pelivaisi

¹ Tito, xamě jivi livaisi itsa tsipaebabiabianame, tsipaebabiabianame ëpexaniajailivaisi. ² Perujupebijivi muxujobabiabianame penajamatabëcuenereviabinexa. Muxujobabiabianame xaniavaetsia pejinavanapaenexa jivi peyaiyataenexatsi. Muxujobabiabianame penajamatabëcuenecataitsinexa pibisiacuenie pexanaeyaniva. Muxujobabiabianame daxitajivi asivaya petanexa. Muxujobabiabianame, itsamonae bejiobiaexanae atatsi Dioso pejumelivaisi yabara, pevajënaeyabelia pecaasaënexa Dioso pejumecovënëtsijava. ³ Bajara pijinia pacuenia muxujobabiabianame perujupetiriavi ata jamatabëcuenereviaya pejinavanapaenexa Dioso pitabarata. Bajarapamonae pibisiacuenia itsamonae apo bebaracuaicuajiai. Apo biaitajibi tsabiabinua. Bajarapapetiriavi itsamonae pexaniacuenie betsiexanavanapa. ⁴ Nexata perujupetiriavi itsamonae pexaniacuenie itsa tsi-taexanavanapa, jamatabëcuenecujarubiana pecovëpijipetiriavi ata xaniavaetsia pamonajivi plasivanexa, penacoxiasivanexanua. ⁵ Perujupetiriavi itorobianame pemuxujobabiabixina pecovëpijipetiriavi ata penajamatabëcuenereviabinexa, pexaniajamatabëcuenie ata penajamatabëxainaenexa. Perujupetiriavi muxujobabiabianame pijabo ata xaniavaetsia pevetsinexa, pexaniacuenie ata pexanabiabinexa, pamonajivi ata xaniavaetsia pejumecovënëtabiabinexa. Nexata juya perujupetiriavi muxujobabiabiana pecovëpijipetiriavi xaniavaetsia pejinavanapaenexa. Nexata bajarapamonae xaniavaetsia itsa jinavanapaena, itsajivi ata pibisiacuenia Dioso pejumelivaisi apo baracuaicuajiai tsane.

⁶ Bajara pijinia pacuenia muxujobabiabianame pevëjëavi penajamatabëcuenecataitsinexa pibisiacuenie pexanaeyaniva. ⁷ Xamě xaniavaetsia bajarapamonae ëpexaniacuenie tsitaexanaponaponaename. Nexata bajarapacuenia daxitajivi cacuenetaena xaniavaetsia neponaponaejava. Pexanialivaisi itsa tsipaebabiabianame, tsipaebabiabianame nejamatabëëthëtovetsina nexaniajajumeta jamatabëcuenereviaya. ⁸ Xaniavaetsia tsipaebabiabianame pexaniajailivaisi. Bajarapacuenia itsa exanabiabianame, pecaitoiyavi ata aura tsane. Tspajai ajibi tsane pecayabarananeconitsiaexanaejava.

⁹ Pajivi bedajubicuenia canajetatsi petonacuenebabiabinexa amoneya pijatuxanenë, bajarapajivi muxujobabiabianame pijatuxanenë pejumecovënëtsinexa daxita pacuenia itorobatsi. Muxujobabiabianame xaniavaetsia pijatuxanenë petonacuenebabiabinexa pesivajamatabëcuenebarëyanexatsi. Pëtsa bajarapajivi apo jejai pijatuxanenë pitorobjavatsi. Pëtsa jumaitsi pijatuxanenëjavabelia: “Jume raja. Bajarapacuenia apo xanepanae tacatoexanaenexa. Mara jane pacuenia xanepanae tacatoexanaenexaje,” jai pëtsa. ¹⁰ Pëtsa bajarapajivi muetsia pita pijatuxanenë pijajava. Biji rajane pijatuxanenëjavabelia tsi-tanajamatabëcuenieitajëtsi daxitacuenie xaniavaetsia petonacuenebabiabijava nacobetoxotsinejeva. Bajarapacuenia itsa exanaena bajarapajivi, nexata daxitajivi yapëtaena Dioso vajanacapanepaenëxexa pejumelivaisi pexaniajailivaisicuenie.

¹¹ Dioso baja cajena nacayapëtaeyaxana vajanacaitaxutotsoniatæjæva. Nexata Dioso nacacapanepaena daxitanacuapijivitsi. ¹² Dioso vajanacayapëtaeyaxanaexæ vajanacaitaxutotsoniatæjæva vajanacacapanepaenexa, nexata becopatatsi pibisiacuenie vaxaxanaejavami. Bitso vajajitsipæjæva ata mapanacuapijicuenie vajaxanaenexa, becopatatsi. Dioso rajane jitsipa mapanacuata nayajivitaeyæ vajajinavanapaenexa pibisiacuenie vaxaxanaeyaniva. Nexata Dioso nejitsipæcuenia betoexanavanapatsi.

Dioso cujanaviaya xaniavaetsia bejinavanapatsi. ¹³ Bajarapacuenia Dioso cujanaviaya xaniavaetsia bejinavanapatsi paepatojebi Jesucristo copiaevetavanapatsi icatsia pepatsijavanexatsica. Nexata icatsia pamatacabi Jesucristo patsianica, sivajamatabêcuenebarêyatsi tsane. Pacuenia Dioso tajêvelia najumecapanepaeya nacajumaiti Jesucristo pepatsijavanexatsica, bajarapacuenia xaniajai Jesucristo patsianica. Jesucristo rabaja cajena, pinijiDiosonê, vajanacacapanepaenexa. Bajarapone penivenivenaecotia yajavapatsianica. ¹⁴ Bajarapone pijacuata tonacaeveta pijavajabitsaê pebeyaxuabinexatsi. Nexata Jesucristo itsa beyaxuabatsi, pijanata nacacomuata pibisiacuene vajaexanaeneconivecua. Nacavecuaajibiaexana baja bajarapaneconimi Jesucristo pijajivitsi vajanacaexanaenexa. Nacajitsipaeyaexananua êpexaniacuene Jesucristo vajatoexanaenexa.

¹⁵ Daxita bajarapacuenia muxujiobaponaename. Jamatabêcuenebabataponaename asaëya bajarapamona. Asaëya muxujiobabiabianame pibisiacuene itsa exanapona. Bajarapacuenia muxujiobabiabianame Dioso pecatocopatsixae bajarapacuenia nexanaponenexa. Pêtsa copatame itsajivi ata bijiaya pecataenexa.

3

Pacuenia Dioso pejumecovênêtsivi pexaniacuene bexanavanapa yabara pelivaisi

¹ Dioso pejumecovênêtsivi, Cretatunaeto nacuapijivi, najamatabênapitsiaexanaename yayiataeya pejumecovênêtsinexa gobierno pitorobilivaisi, pejumecovênêtsinexanua gobierno pijajivi ata. Itorobianamenua bajarapamona pexanaenexa daxitaxua pexaniacuene. ² Muxujiobabiabianame bajarapamona itsajivi ata pibisiacuene pebaracuaicuaijayaniva. Muxujiobabiabianame bajarapamona, itsamonae itsacueniabi atatsi, pecuenececanaviatsiyaniva. Muxujiobabiabianame bajarapamona pexaniajamatabêcuenia pebarêcuaicuaijainexa daxitajivijavabelia. Itorobianamenua daxitajivivecua beveliajamatabêcuenevi nataeya pejinavanapaenexa.

³ Itsa abaxê vaxaitsi ata Dioso apo jumecovênêtsitsi, saya picani jema jinavanapatsi. Apo exanavanapaetsi pacuenia Dioso nacaitoroba. Apo exanavanapaetsinua pacuenia nacuaevetsivi ata nacaitoroba. Naxuabiaya saya jinavanapatsi Dioso pejumelivaisivecua. Pibisiacuene, pacuene vajavitota jamatabêexanatsi, exanavanapatsi. Pacuene ata nacajamatabêcuenebarêyayaexana, exanavanapatsi. Pibisiacuene bitso exanavanapatsi itsamonaejavabelia. Itsamonae cueneceababiabatsi. Daxitajivi nacitoya tsabiabi. Vaxaitsi ata namataenetsia naitoyatsi tsabiabi. ⁴ Bajara vajaitsivimi ata, itsiata Dioso, vajanacacapanepaenênexa, nacayapêtaeyaexana vajanacaitaxutotsoniatacuene. Nacayapêtaeyaexananua pacuenia ata Dioso nacaasiva daxitatsi mapanacuapijivitsije. ⁵ Dioso nacacapanepaena vaneconivecua. Itsiata baitsi jane pexaniacuene vajaexanaejava yabara, Dioso apo nacacapanepae tsane. Jume baja cajena. Dioso raja nacacapanepaena tsipaji nacaitaxutotsoniatane. Nexata nacajamatabêcuenequiata. Dioso vajanacaitaxutotsoniataxeae, nacacapanepaena. Espiritu Santo pejamatabêcueneta pejanajamatabêcuenevitsi baja nacaexana. ⁶ Dioso baja cajena ayaicuenia vajanacayavenonenexa, Espiritu Santo nacatoitorobica vaxaitsijavabetsica. Bajarapacuenia Dioso Espiritu Santo nacatoitorobica Jesucristo vajanacacapanepaenênexa pejamatabêctsoniatane. Nexata nacajamatabêcuenequiata. Dioso vajanacaitaxutotsoneta. ⁷ Bajaraxuata Dioso vaxaitsi yabara jumaiti: "Bajarapamona baja aneconijibia taniji," jai Dioso. Tsipaji nacaitaxutotsoniatane. Nexata vaxaitsi xainaenatsi matacabi apo pevereverecejava, xua copiaevetavanapatsi.

⁸ Daxita baja palivaisi pacatoyaquinatsi, pexaniajailivaisi cajena. Nexata jitsipajê ajumesaëya jivi netsipaebaponaenexa bajarapalivaisi. Nexata Dioso pejumecovênêtsivi êpexaniacuene pexanaenexa pejamatabêcueneenaenexatsi. Bajarapalivaisi bitso xanepana daxitajivi pejumecovênêtsinexa. ⁹ Nexata navecuaitavetsianame saya jema natsiquejemalivaisixi itsamonae pecabarêcuaicuaijayaniva. Navecuaitavetsianamenua judiovi pijasalinaivimi pevênêxi yabara pecabarêcuaicuaijayaniva. Navecuaitavetsianamenua Dioso Moiséspijinêta penajumecopatsilivaisi yabara anaeya pecajumenotsiyaniva. Bajarapacuenia pecabarêcuaicuaijajava apo xanepanae tsipae itsacueniejavayonexa ata.

¹⁰ Itsamonae penajumetsênêtsilivaisi jivi tsipaebapona. Nexata bajarapamona penajumetsênêtsilivaisita Dioso pejumecovênêtsivi navecuatanatsanaeyaexanapona. Bajarapamona jumeitavetsianame. Anijatobeje ata jumeitavetsianame. Nexata bajarapamona copatsiana penajumetsênêtsilivaisi jivi petsipaebaponaejava. Jumeitavetsi atamê, itsiata

itsa apo cajumecovënëtsi tsane, nexata bajarapamonae itorobianame itsajavabelia peponaenexa. ¹¹ Yapëtaneme rabaja mapacueneje. Ponë peneta copata pexaniajailivaisi pejumecovënëtsijavami, pibisiacuene exana. Nexata bajaraponë naneconita Diosojavabelia pibisiacuene pexanaexae.

Pacuenia icatsia Pablo itsalivaisi toitoroba Tito asaëya Dioso petonacuenebinexa yabara pelivaisi

¹² Catoitorobialiatsi Artemas. Itsa jume, catoitorobialiatsi Tiquico. Bajaraponë itsa patsialia xamëjavabelia, nexata xamë bepjiia renamë tsane xanëjavaberena. Nacaxitajarianatsibeje Nicápolis tomarata. Daxita emarapae raja ponaponaenajë Nicápolis tomarata. ¹³ Itsa baja pacavecuaponaena Zenasbeje Apolosbeje, nexata yavenonaename pacuenia namatavenonaenabeje pijanamutobejenexa. Zenas raja abogadonë, penaneconitsivi peyavenonaeyacuaicuaijainë. Rajutsianame pacuenia namatavenonabeje, itsacuenejavayo ata petosajinaeyanivatsibeje itsa najetarucabeje namuto. ¹⁴ Pamonae vaxaitsi pexanialivaisi tsipaebatsi, bajarapamonae tojitsipajë peyapëtaenexa xua pexaniacuene. Nexata ëpexaniacuene pexanaenexa. Nexata bajarapamonae tojitsipajë asaëya penacuenebinexa, peyavenonaenexa pamonae bitso bepejiobivi. Pëtsa saya bajarapamonae jinavanapa nacuenebinejeva.

Pacuenia Pablo itsamonae jamatabënajina yabara pelivaisi

¹⁵ Daxita pamonae yajavaponaponajë, cajamatabënajinalia. Pajamatabënajinaliajë daxita pamonae pataniasivavi, Dioso pejumecovënëtsivi. Pacatovajëtatsi Diosojavabelia daxita paxamë Dioso papecayavenonaenexa.

itsa catonaneconita, itsa camoneyabanua, nexata xanë bajaraxuamatamo neyanijobianame. ¹⁹ Peneta raja paitaneberëtoyo jumaiti: “Xanë Pablonë. Camatamotsianatsi cajena,” jai, xanë tajacuata tacobeta yaquinajë. Itsiata pijinia pacuenia niamoneyabame, apo catoitajëtsitsi. Tsipaji itsa catoitajëtsipatsi pacuenia niamoneyabame, nexata jitsipaejitsipame daxitanëmë, nejamatabëcuene yajava, tanerajutsinexamë. ²⁰ Tajabananë, pacuenia cavajëtatsi, xaniavaetsia copiapitsianame Onésimo Jesucristo pijajivitonëxaemë. Xaniavaetsia Onésimo itsa copiapitsianame, bitso nejamatabëcuenebarëyaya exanaename.

²¹ Catoyaquinatsi mapabaxutoje tsipaji yapëtaniji tanejumecovënëtsijavanexa tacaitorobicuenia. Casivajamatabëjumaititsi mapacueniaje: “Filemón cajena taitorobicuenia matatoxenetsia xaniavaetsia copiapitsiana Onésimo,” casivajamatabëjaiti. ²² Caecuenia tavajënaeyabelia cavajëtatsi tavajënaelia nijabota tanetoxaniavaetsinexamë, itsajota patsijitsianë itsa ponajë paxamëjavabelia. Tsipaji bajayajebi panetovajëcabiabame Diosojavabelia tapatsinexa paxamëjavabelia. Nexata jamatabëjumaitinë: “Pacuenia bajarapamonae netovajëcabiaba Diosojavabelia, bajarapacuenia Dioso netocopatsiana,” jamatabëjanë tapon-aenexa paxamëjavabelia.

Pacuenia itsamonae jamatabënajinatsi Filemón yabara pelivaisi

²³ Epafra, ponëbeje panajuaponaponajëbeje penaneconitsivi pejebabiabibota Jesucristo pijinia pijajivitonëxae, bajaraponë cajamatabënajinalia. ²⁴ Cajamatabënajinalia Marcos ata, Aristarco ata, Demas ata, Lucas ata. Cajamatabënajinalia daxita bajarapamonae patanajuacuenebivi Dioso pijacuene. ²⁵ Pacatovajëtabiabatitsi Diosojavabelia vajatuxanenë Jesucristo papecayavenonabiabinexa.

Mapabaxutoje Dioso pijajivitonē toyaquina judíovijavabelia

Pacuenia Dioso pexēnato itoroba jivijavabelia petocuaicuajainexatsi yabara pelivaisi

¹ Bajayatami Dioso anijatonē najamatabēcueneitajētabiaba Dioso jumepaebivi profetavijavabelia. Nexata juya profetavi tsipaebabiaba vajasalinaivimijavabelia pacuenia Dioso itorobatsi. Bajarapacuenia Dioso najamatabēcueneitajētabiaba profetavijavabelia mat-acabita bemajitsinaebocuenia. Itsajavata Dioso najamatabēcueneitajētabiaba profetavijavabelia meravi majitsinaebota. Itsajavata pepacuenia Dioso roviaalia barēcuacuajai tsabiabi profetavijavabelia. Nexata juya profetavi tsipaebabiaba vajasalinaivijavabelia pacuenia Dioso itorobatsi. ² Nexata jane baja aeconoxae, mapamatacabitaje, Dioso itorobica pexēnato vajanacatsitanajamatabēcuene itajētsinexa, vajayapētaenexa Dioso vajanacatojitsipaejava. Bajayata Dioso itoroba pexēnato pexanaenexa mapanacuaje, daxitacuene yajava. Nexata daxitacuene mapanacuateje Dioso pexēnato tocopata pevetsinexa. ³ Nexata pacuenia Dioso bitso ayaijamatabēcuenenē, pexaniajamatabēcuenenēna, bajara pijinia Dioso pexēnato ata jamatabēcueneitsi. Dioso pexēnato caējēpatsi daxitacuene pexanaenexa pijumesaēta. Nexata pijumeta itsa itoroba mapanacuaje penaexanaenexa, daxitacuene yajava naexana. Bajaraponē pexanaecujinae mapanacuaje, bajaraponē pejamatabēcueneta abaxē tsiteca xanepana mapamatacabijavaberena ataje. Bajaraponē nacasivatēpa cruzata vajanacavecuaxuabinexa pibisiacuene vajaexanaeconimi. Bajaraxuacujinae pona jane baja athēbēabetsia peecaenexa paxa Dioso pemuxuneneta, pecu-juanenia, penajuaevetsinexabeje daxitacuene.

Pacuenia Dioso pexēnato bitso ayaijamatabēcuenenē ángelevi matatoxenetsia yabara pelivaisi

⁴ Dioso pexēnato bitso ayaijamatabēcuenenē ángelevi matatoxenetsia. Bajarapajamatabēcuene yapētanetsi. Tsipaji Dioso pexēnato tocopata daxitacuene pevetsinexa. Dioso saya ángelevi tocopata bevelijamatabēcuenejava pevetsinexa. ⁵ Dioso baja cajena jumaitsi pexēnatojavabelia mapacueniaje: Xamē raja taxēnatomē. Xanē raja axanē, jai Dioso.

Dioso icatsia jumaitsi pexēnato yabara mapacueniaje: Xanē raja bajaraponē paxanē. Xanē raja bajaraponē taxēnato, jai Dioso pexēnato yabara.

Bajarapacuenia Dioso apo jumaitsi ángelevi yabara. Biji rajane Dioso pexēnato yabara jumaitsi. Bajaraxuata nayapētane Dioso pexēnato bitso ayaijamatabēcuenenēcuene ángelevi matatoxenetsia. ⁶ Pacujinae Dioso itorobijitsiatsica pepo caenē pexēnato mapanacuata penaexanaenexa, Dioso jumaitsi pexēnato yabara mapacueniaje: Daxita tajajivi, ángelevi, pematabacabēta tonubenaena ayaijamatabēcuene perajutsinexa bajaraponējavabelia, jai Dioso pexēnato yabara.

⁷ Dioso icatsia jumaitsi ángelevi yabara mapacueniaje: Tajajivi, ángelevi, tanelivaisipaebinexa, bepija pona pacuenia jovibo. Bajarapamonae beisotocotiata verebiabiana daxita pamonae naneconita xanējavaberena, jai Dioso ángelevi yabara.

⁸ Itsiata baitsi jane icatsia Dioso pexēnatojavabelia jumaitsi mapacueniaje: Diosomē, daxita xua evetame, daxitamatacabijavabelianexa evetsianame. Xua xamē evetame, xaniavaetsia evetabianame. ⁹ Xamē jitsipame jivi pexaniaacuene pexanaejava. Apo jitsipaemē pibisiacuene pexanaejava. Bajaraxuata xanē, nija-Diosonē, cajamatabēcuenebarēyayaexanatsi. Cajamatabēcuenebarēyayaexanatsi daxita itsamonae matatoxenetsia, jai Dioso pexēnatojavabelia.

¹⁰ Icatsia Dioso pexēnatojavabelia jumaitsi mapacueniaje: Xamē petuxanenēmē. Itsa abaxē daxitacuene ajibi, xamē exaname mapanacuaje. Nesaēta exaname daxita itaboxopijicuene yajava. Xua jivi apo tae, bajaraxua ata exaname. ¹¹ Daxita bajaraxua, nexanaejava, verevereaena. Itsiata baitsi jane xamē apo verevereaemē tsane daxitamatacabijavabelianexa. Daxita xamē nexanaejava, perujujava naexanaena. Pacuenia jivi penaxatatsijava, perujujava banaexana, bajara pijinia itsi tsane nexanaejava. ¹² Pacuenia jivi baquiona penaxatatsijava, bajarapacuenia itsamatacabi xamē quionaenane itaboxo, ira yajava, pejananacua

icatsia nexanaenexa. Itsiata baitsi jane xamë tsitecaename. Apo vereverecaemë tsane,
jai Dioso pexënatotjavavelia.

¹³ Dioso baja cajena caeto ata ángeleviyajuvënëñjavavelia apo jumaiti mapacueniaje: Ecare abaxë tacujanenia daxitacuene vajanajuaevetsinexabeje. Nijavajabitsaë abaxë copiaya vecatsivajënae jumecovënëtsiaexanaenatsi nitorobicuenianexa, apo jai Dioso ángeleviyajuvënëñjavavelia.

Biji rajane Dioso pexënatotjavavelia bajarapacuenia jumaiti. ¹⁴ Daxita ángelevi apo taetsi vajaitaxutota. Bajarapamonae saya Dioso tonacuenebabiaba pacuenia Dioso itorobatsi. Nexata ángelevi yavenona pamonaе jumecovënëta Dioso pecapanepaejavanexatsi.

2

Pacuenia apo benamuxujematsitsi pexaniajailivaisi Dioso vajanacapanepaenexa yabara pelivaisi

¹ Dioso pexënato bitso ayaijamatabëcuenenë ángelevi matatoxenetsia. Bajaraxuata vajanacatsipaebilivaisi xaniavaetsia benamuxunaevetatsi. Bitso baja cajena pexaniajailivaisi nacatsipaeba. Nexata vajavajënaeyavelia asaëyata bejumecovënëtsi bajarapapexaniajailivaisi vajajumecovënëtsijava, itsamatacabijavavelia ata vajacopatsiyaniva. ² Bajayata palivaisi Dioso najumecopata Moiséspijinëta, Dioso najumeitoroba ángelevita. Nexata juya ángelevi bajarapalivaisi tsipaeba Moiséspijinëjavavelia. Xaniajai baja cajena bajarapalivaisi. Pamonaе apo jumecovënëtsi bajarapalivaisi, paneconivajëto xaina, bajarapaneconivajëtota Dioso naneconitsiaexanatsi. ³ Itsa namuxujematatsi papinijicueneta Dioso nacapanepaejitsia, çdetsa pacuenia nacacajëpaejitsipa vajacuata vajanacapanepaenexa? Ajibi. Vajatuxanenë Jesucristo baja cajena copiaya tsipaeba itsamonaejavavelia pacuenia capanepaejitsia daxitajivi. Nexata bajarapamonae yapëtane bajarapalivaisi pexaniajailivaisicuene. Nexata juya bajarapamonae vaxaitsijavaberena nacatsipaeba bajarapalivaisi. ⁴ Nexata nayapëtane bajarapamonae vajanacatsipaebilivaisi pexaniajailivaisicuene. Tsipaji Jesucristo petsipaebilivaisitsi, jivi itsa tsipaebavanapa, Dioso pesaëta pinijicuenia pexanaejavanë tsitaexanapona. Bajarapamonae piavitanevi ata jamatejemayaxanapona. Petëpaevi ata icatsia asaëyaexanapona. Espiritu Santo ata jamatabëcuene caëjëpaeyaexanapontsi, caejivi canacujitsia, bajarapamonae pexanaenexa pacuenia Dioso tojitsipatsi.

Pacuenia baja Jesucristo naexana bejivitonëcuenia yabara pelivaisi

⁵ Papejananacua yabara pacatsipaebatsi, Dioso baja itsa exanaena bajarapanacua, Dioso apo tocopatsi tsane ángelevi pevetsinexa. Biji rajane jivi tocopatsianatsi pevetsinexa bajarapanacua. ⁶ Tsipaji Dioso pejumelivaisibaxutota, tajëvelia jumaiti pacuenia jivi ayaijamatabëcuenevi Dioso exanaejitsiatsi ángelevi matatoxenetsia. Bajaraxua yabara Dioso pejumelivaisibaxutota jumaiti mapacueniaje:

Diosomë, jivi matatoxenetsia bitso ayaijamatabëcuenenë atamë, çdetsa xuajitsia itsiata jivi sivanajamatabëxainame nevetsinexa? ⁷ Jivi itsa exaname, ángelevivecua jivi beveliajamatabëcuenevi exaname. Bajarapacuenia picani exaname. Itsiata baitsi jane aeconoxae jivi pecajumecovënëtsixae, ayaijamatabëcuenevi baja exaname ángelevi matatoxenetsia. ⁸ Nexata itsamatacabi tocopatsianame jivi pevetsinexa daxitacuene nexanaejava,

jai Dioso pejumelivaisibaxutota Dioso pejumecovënëtsivi yabara.

Bajarapacuenia Dioso itsa tocopatsiana daxitacuene Dioso pexanaejava jivi pevetsinexa, itsacueniejavayo ata Dioso apo vecuacopatsi tsane jivi pevetsiaexanaejava. Itsiata baitsi jane abaxë apo taetsi vajaitaxutota jivi pevetsijava daxita bajaraxua. ⁹ Pamatacabi Jesús bejivitonëcuenia naexana mapanacuataje, bajaraponë ata ángelevivecua beveliajamatabëcuenenë picani naexana. Dioso pitaxutotsoniataexae daxita mapanacuapijivije, Dioso pexënato itorobica penaexanaenexa mapanacuata, pesivatëpaenexa daxitajivi pijaneconi yabara. Jesús baja daxitajivi pesivatëpaexae, aeconoxae baja Dioso tocopatatsi Jesús athëbëtatsia pecaenexa paxa Dioso pemuxuneneta.

¹⁰ Dioso baja cajena daxitacuene natoexana bajaraponënexa. Dioso daxitacuene pexanaecujinae, Dioso abaxë pejamatabëcueneta daxitacuene tsiteca xanepana mapamatacabijavaberena ataje. Daxita pamonaе jumecovënëtsi, pexicuenia petaevi, Dioso jitsipa pebarëevetsinexa daxitacuene Dioso pexanaejava. Bajaraxuata Dioso tocopata Jesucristo cruzata ayaicuenia bepejiobiaexanaenexatsi. Nexata Jesucristo capanepaena daxita pamonaе najamatabëcuenecopata Jesucristojavavelia, peyajavaponaponaenexa Dioso pijapenivenaenacuataatsia. ¹¹ Jesucristo baja cajena jivi tsata Dioso pijajivinexa. Nexata

pamonaē Jesucristo tsata Dioso pijajivinexa, bajarapamonaē, Jesús yajava, benacaeaxapijivi baja tanetsi Dioso. Bajaraxuata Jesús, Dioso pexénato, pijajivi yabara itsa cuaicuajiai, apo ajumeura: “Tajuyapijivi,” peajajava. ¹² Jesús pijajivi yabara pejumaisijavanexa, Dioso pejumelivaisibaxutota tajêvelia jumaitsi mapacueniaje:

Taxa Diosomē, tajuyapijivijavabelia cavajunupaebianatsi. Nexata daxita bajarapamonaē tabarēnacaetuatsijavata, xamēnexa catonaxēanaenatsi, tanaxēanaejavata ayaijamatabêcuene tacarajutsinexa,

jai Dioso pejumelivaisibaxutota Jesús paxa Diosojavabelia pejumaisijavanexa.

¹³ Jesús icatsia pijajivi yabara pejumaisijavanexa, Dioso pejumelivaisibaxutota tajêvelia jumaitsi mapacueniaje:

Xanē ata najamatabêcuene copatsianajê taxa Diosojavabelia taneyavenonaenexa pacuenia najamatabêcuene copaba tajuyapijivi, jai Dioso pejumelivaisibaxutota.

Jesús icatsia pijajivi yabara pejumaisijavanexa, Dioso pejumelivaisibaxutota tajêvelia jumaitsi mapacueniaje:

Yajavaponaponajê baja mapamonaēje, Dioso pexi tanetocopatsivi tatoevetsinexa,

jai Dioso pejumelivaisibaxutota.

¹⁴ Vaxaitsi, Dioso pexitsi, mapanacuata jinavanapatsi. Bajaraxuata Jesús ata naexana mapanacuataje, pacuenia vaxaitsi banaexanatsi, peponaponanexa mapanacuataje. Nexata Jesús penaexanaexae mapanacuataje pacuenia vaxaitsi banaexanatsi, caêjêpatsi pebeyaxuabinexatsi vajanacasivatêpaenexa. Jesús baja itsa nacasivatêpa, jamatabêcuenematatoxeneta dovathi. Nexata baja copiaruca dovathi vajanacaitorobabiabijava. Nexata jivi tēpae ata tsane, itsiata icatsia asaē tsane petêpaecujinae. ¹⁵ Bajarapacuenia Jesús vajanacasivatêpaexae, nacavecuajibiaexana baja vajacujunavabiabijavami, vajatêpaejava. Vajatêpaejava picani cujunavabiabatsi daxita vajajinavanapaematacabanê.

¹⁶ Jesús baja cajena patsica mapanacuayabetsicaje, jivi peyavenonaenexa, pamonaē Abrahampijinê pepo pemomoxi, baitsi Dioso pejumecovênêtsivi. Jesús apo patsi peyavenonaenexa angelevi. ¹⁷ Bajaraxuata Jesús naexana mapanacuataje pacuenia vaxaitsi banaexanatsi, jivi petocuaicuajianexa Diosojavabelia. Jesús nacaitaxutotsoniatane. Nacatoexana pexaniacuene. Jesús nacatoexana pacuenia Dioso itorobatsi vajanacatoexanaenexa. Jesús pijacuata nacopata pebeyaxuabinexatsi, bajaraponê pejamatabêcueneta Dioso vajanacavecuajibiaexanaenexa pibisiacuene vajaexanaeconimi. ¹⁸ Nexata Jesús jamatabêcuene caêjêpatsi peyavenonaenexa pijajivi, dovathi pejamatabêcuene êjêtsivitsi. Tsi-paji baja copiaya Jesús ata jamatabêcuene êjêtsi dovathi. Bejjobiaexanatsinua.

3

Pacuenia bitso Jesús ayaijamatabêcuenenê Moiséspijinê matatoxenetsia yabara pelivaisi

¹ Tajamonaē, Dioso papijajivimē, Dioso pacajunata papijajivinexamē. Nexata xaniavaetsia pacanaējêre Jesucristo yabara. Bajaraponê Dioso nacaitorobica vajanacatsipaebinexa Dioso pejumelivaisi, vajanacatocuaicuajianexanua vajatuxanenê Diosojavabelia. ² Bajayatami Moiséspijinê daxita Dioso pijajivi toevetabiaba Dioso pitorobicueniatsi. Bajara pijinia pacuenia Jesús ata mapanacuataje jumecovênêta Dioso pitorobicueniatsi.

³ Nexata Jesús jivi pecapanepaenêxae, ayaijamatabêcuenenê Moiséspijinê matatoxenetsia. Pacuenia bo pexainaenê, ayaijamatabêcuene xaina pijajivitonê matatoxenetsia, bajara pijinia pacuenia Jesús ayaijamatabêcuenenê Moiséspijinê matatoxenetsia. ⁴ Caebō canacujitsia tanetsi jivi pexanajebixae bajarapabonê. Itsiata baitsi jane mapanacuata Dioso pexanaejavanêta, jivi exanejeba bonê. ⁵ Bajayata Moiséspijinê Dioso itorobatsi daxita Dioso pijajivi petoevetsinexa xaniavaetia. Nexata Moiséspijinê Dioso pijajivi itsa tovetaponapona, tajêvelia itorobatsi petsipaebinexa jivijavabelia pacuenia itsamatacabijavabelia Dioso jumaitsiatsia pijajivijavabelia. ⁶ Cristo Dioso pexénatōxae, xaniavaetsia toeveta paxa Dioso pijajivi. Vaxaitsi baja Dioso vajajumecovênêtsivi, Dioso nacatane pijajivitsi. Tsi-paji baja nacayajavaponapona Jesucristo. Bajarapacuenia vajavajēnaeyabelia Dioso nacataeponaena xaniavaetsia Jesucristo itsa jumecovênêtavanapaenatsi vajatêpaejavabelianexa. Jamatabêcuene barêyaya jinavanapatsi. Tsi-paji yapêtanetsi Dioso pexaniajaicuene vajanacapanepaenexa.

Pacuenia Dioso pejumecovênêtsivi tocopatatsi pejonenexa Dioso pijanacuayabetsia yabara pelivaisi

⁷⁻⁸ Jesucristo baja cajena ayaijamatabêcuenenê Moiséspijinê matatoxenetsia. Angelevi ata matatoxenetsia ayaijamatabêcuenenê. Bajaraxuata Espiritu Santo Dioso pejumelivaisibaxutota jumaitsi mapacueniaje:

Ajena, mapamatacabitaje, itsa pajumetaneme pacuenia Dioso jumaitsi, pëtsa pajamatabëcuenetajamë panejumecovënëtsinexa. Pacuenia bajayata panijasalinaivimi ajamatabëcuenetaja baja, pëtsa paitsimë. Bajarapamonaemi pamatacabi petusato nacuata jinavanapa, apo jitsipae pexanaenexa pacuenia Dioso itorobatsi. Bajarapacuenia bajayajebi Dioso apo jumecovënëtsi ata, bajarapamonaemi itsiata abaxë Dioso apo verebiabitsi. ⁹ Bajarajota petusato nacuata panijasalinaivimi jamatabëitonotabiaba Dioso. Apo jumecovënëtsi pacuenia Dioso itorobatsi pejinavanapaenexa. Cuarenta picani pavaibeje Dioso ayaicuene pexanaejavanë, tsitaexanapona bajarapamonaë peyavenonaenexa. Bajaraxua panijasalinaivimi taeyabiabi ata, itsiata Dioso apo jumecovënëtsi. ¹⁰ Bajaraxuata Dioso baraanaepana panijasalinaivimijavabelia. Nexata panijasalinaivimi yabara Dioso najumecapanepaeya jumaitsi: “Najamatabëxainabiaba saya ëpibisiacuene yabara. Apo jitsipae pejinavanapaenexa pacuenia picani tojitsipajë,” jai Dioso. ¹¹ Bajaraxuata Dioso bitso baraanaepana panijasalinaivimijavabelia. Nexata Dioso najumecapanepaeya jumaitsi: “Bajarapamonaë apo jone tsane xanëjavaberena. Nexata apo jinavanapae tsane itsajota picani toxaniavaetajë pejinavanapaenexa,” jai Dioso, jai Espiritu Santo panijasalinaivimi yabara Dioso pejumelivaisibaxutota.

¹² Tajamonaë, dovathivecua panajamatabëcueneevetavanapare, paxamëyajuvënëjivi ata, pacuenia panijasalinaivi najamatabëxaina pibisiacuene pexanaenexa, penajamatabëxainayaniava. Tspijai Dioso itsa apo pajumecovënëtsimë tspipae, nexata pacopabijitsipame panejumecovënëtsijavami Dioso, daxitamatacabijavabelianexa piasaëtsaponaponaenë. ¹³ Nexata namataenetsia panajamatabëcueneyavenonare daxitamatacabi canacujitsia panecasaëtsavanapaenexa Dioso panejumecovënëtsijava. Bajarapacuenia panajamatabëcueneyavenonare itsajivi ata paxamëyajuvënëjivi dovathi peyamaxëitororobiyaniavatsi pibisiacuene pexanaeyaniava. Panajamatabëcueneyavenonare itsajivi ata paxamëyajuvënëjivi pecopabiyaniava Dioso pejumecovënëtsijava. ¹⁴ Vajataxuxuabijavaveliacujinae Dioso vajajumecovënëtsijava, tsiteca abaxë Dioso jumecovënëtavanapatsi vajatëpaëjavabelianexa. Nexata daxita xua Cristo Dioso rajutsianatsi, bajaraxua vaxaitsi ata Dioso nacarajutsiana.

¹⁵ Bajaraxuata papecamuxujobinexa, Dioso pejumelivaisibaxutota jumaitsi mapacueniaje:

Ajena, mapamatacabije, itsa pajumetaneme Dioso papecajumaitsijava, pëtsa pajamatabëcuenetajamë. Pacuenia panijasalinaivimi petusato nacuata ajamatabëcuenetaja, pëtsa paxamë bajarapacuenia paitsimë, jai Dioso pejumelivaisibaxutota.

¹⁶ ¿Detsa pamonaë bajayata bajarapacuenia jumetaë ata Dioso pejumaitsijavatsi, itsiata apo jumecovënëtsi? Baitsi pamonaemi bajayata Moiséspijinë matacapona Egipto nacuaverena. ¹⁷ ¿Detsa jane pamonaemijavabelia Dioso baraanaepana cuarenta pavaibeje? Dioso baraanaepana pamonaemijavabelia pibisiacuene exana petusato nacuata. Nexata daxita bajarapamonaemi pijaneconi yatëpa petusato nacuata. ¹⁸ ¿Detsa jane pamonaemijavabelia Dioso najumecapanepaeya jumaitsi: “Apo pajonemë tsane xanëjavaberena,” jai? Bajarapacuenia Dioso najumecapanepaeya jumaitsi apo pejumecovënëtsivitsijavabelia. ¹⁹ Nexata yapëtanetsi panijasalinaivimi apo pejonejava Diosojavabelia. Tspijai apo jumecovënëtsi Dioso pitorobicueniatsi.

4

¹ Dioso baja cajena najumecapanepaeya jumaitsi vajajonenexa bajaraponë pijanacuayabetsia vajanacueraevetavanapaenexa, itsajotatsia nacatoxaniavaeta vajajinavanapaenexa. Bajaraxuata nexata benajamatabëcuenexaniavaetavanapatsi. Tspijai itsamonaë paxamëyajuvënëjivi apo jonecapanepae tspipae Dioso pijanacuayabetsia itsa apo jumecovënëtsi Dioso. ² Vaxaitsi ata rabaja jumetanetsi pexanialivaisi vajanacapanepaelivaisinexa pacuenia bajayata vajasalinaivimi ata jumetane picani. Itsiata baitsi jane vajasalinaivimi apo toxanepanaetsi bajarapalivaisi pecapanepaenexatsi. Tspijai jumetaë ata, apo jumecovënëtsi. ³ Nexata vaxaitsi Dioso vajajumecovënëtsivi, nacacajëpaena vajajonenexa Dioso pijanacuayabetsia, itsajotatsia nacatoxaniavaeta vajajinavanapaenexa. Dioso apo pejumecovënëtsivi apo jone tsane. Tspijai bajarapitsivi yabara Dioso bajayata jumaitsi mapacueniaje:

Anaepanaenajë apo tanejumecovënëtsivijavabelia. Nexata najumecapanepaeya jumaitsinë baja: “Bajarapamonaë apo jone tsane xanëjavaberena,” janë, jai Dioso.

Dioso nacua pexanaejavaveliacujinae, toxaniavaetsi atatsi picani panijasalinaivimi pejinavanapaenexa bajaraponëjavatatsia, itsiata apo jone. ⁴ Yapëtanetsi pacuenia Dioso

petoxaniavaetsicujinaetsi, copiaevetatsi picani panijasalinaivimi pejonenexa pejinavana-paenexa bajaraponëjavatatsia. Tsipaji Dioso pejumelivaisibaxutota jumaiti mapacueniaje: Dioso baja daxita mapanacujaje, daxitacuene yajava, itsa vereta pexanaejava, vemaxënacueraeveta siete matacabita, jai Dioso pejumelivaisibaxutota.

⁵ Icatsia Dioso pejumelivaisibaxutota jumaiti Dioso apo pejumecovënëtsivi yabara mapacueniaje:

Bajarapamonaë apo jone tsane xanëjavaberena, pejinavanapaenexa xanëjavata," jai Dioso pejumelivaisibaxutota.

⁶ Pamonaë baja picani copiaja jumetane pexanialivaisi pecapanepaelivaisinexatsi, itsiata apo pejumecovënëtsixae, nexata apo jone tsane Dioso pijanacuayabetsia. Itsiata baiti jane Dioso najumecapanepaeya jumaiti mapacueniaje: "Pamonaë tajajivi, jonena xanëjavaberena," jai. Nexata pamonaë jumecovënëtaþona Dioso, jonena Dioso pijanacuayabetsia. ⁷ Bajarapacuenia bajayata itsamonaë Dioso apo pejumecovënëtsixae, nexata icatsia Dioso caëjëta itsamatacabi itsamonaë pejonenexa. Bajarapacuenia Dioso itsa caëjëta itsamonaë pejonenexa, mapamatacabitaje cajena caëjëta itsamonaë pejonenexa. Bajayata Davidpijinë Dioso itorobatsi tajëvelia pevajunupaebinexa itsamonaë mapamat-acabitaje pejoneponaëjavanaxa Diosojavabelia. Nexata bajayata Davidpijinë tajëvelia itsa vajunupaeba itsamonaë mapamatacabije pejonejavanexa Diosojavabelia, jumaiti mapacueniaje:

Mapamatacabitaje itsa pajumetaneme Dioso papecajumaitisijava, pëtsa pajamatabëcuenetajamë panejumecovënëtsinexa Dioso, jai Davidpijinë tajëvelia.

⁸ Bajayata Josuépijinë vajasalinaivimi petusato nacujavaverena matacapona Israel nacujavaverena. Panacua bajarapamonaenexa Dioso toxaniavaetatsi pejonenexa, bajarapanacua daxitamatacabijavabelianexa. Bajarapanacua cajena xaina Dioso pijanacuatatsia. Nexata panacua yabara jumaiti: "Dioso pijajivi pejinavanapaenacuanexa, toxaniavaeta," itsa jai, Israelnacua yabara apo jumaiti. Itsa meta peneta Israelnacua yabara jumai tsipae, nexata mapamatacabitaje Dioso apo caëjëtsi tsipae itsamonaë pejonenexa Diosojavabelia. Tsipaji baja vajasalinaivimi bajayata baja pata Israel nacuata. ⁹ Bajaraxuata yapëtanetsi pacuenia abaxë Dioso tocopata mapamatacabitaje itsamonaë ata Dioso pejumecovënëtsinexa pejonenexa Dioso pijanacuayabetsia. ¹⁰ Pajivi jonena Dioso pijanacuayabetsia peponaponaenexa Diosojavatatsia, bajarapajivi penacuenebabi-abijava vemaxënacueraevetsiana. Pacuenia bajayatami Dioso ata nacua baja pexanaejava itsa vereta, vemaxënacueraeveta, bajarapacuenia vemaxënacueraevetsiana. ¹¹ Daxita voxaiti vajajitsipaejamatabëcueneta, bejitsipatsi Dioso pijanacuayabetsia vajajonenexa, bajaraponëjavatatsia vajajinavanapaenexa. Bajayata pamonaëmi Dioso apo jumecovënëtsi, nexata apo jone Dioso pijanacuayabetsia. Nexata voxaiti bajarapamonaëmi apo becuenëjëpaetsi.

¹² Dioso cajena pejumelivaisi bitso asaë. Nexata Dioso pejumelivaisi caëjëpatsi ayaiacuene pexanaenexa pijumesaëta. Dioso pejumelivaisi bitso pexiujaillivaisi anijabarëneniabeje espada matatoxenetsia. Nexata bajarapalivaisi itsa yapëtanetsi, nacayapëtaeyaxana pacuenia pepacuene jamatabëcuenetsitsi. ¹³ Voxaiti Dioso vajanacaexanaevi, apo nacacaëjëpae Dioso vajavecuanamatayabinexa. Bajaraponë tane daxita xua exanatsi. Nexata itsamatacabi bajaraponëjavabelia navajunupaebianatsi daxita xua exanatsi.

Pacuenia Jesús ayaijamatabëcuenenë, jivi petocuaicuaijinë Diosojavabelia, yabara pelivaisi

¹⁴ Jesús cajena Dioso pexënato, ayaijamatabëcuenenë. Pepo sacerdotenë vajanacatocuaicuaijinë Diosojavabelia. Jesús baja pona Diosojavabetsia vajanacayavenonaenexa. Bajaraxuata nexata voxaiti becaasaë tsavanapaetsi Dioso vajajumecovënëtsijava mapanacuataje. ¹⁵ Jesús, Diosojavabelia vajanacatocuaicuaijinë, nacajamatabëcueneyapëtanë pacuenia voxaiti jamatabëcuenetsitsi. Nexata dovathi itsa nacajamatabëcuenëjëta pibisiacuene vajaexanaenexa, Jesús nacajamatabëcueneyapëtanë. Bajarapacuenia nacajamatabëcueneyapëtanë tsipaji Jesús ata abaxë itsa ponapona mapanacuataje, jamatabëcuenëjëtatsi dovathi. Itsiata baiti jane Jesús caeto ata pibisiacuene apo exanaë. ¹⁶ Bajaraxuata ajumejunavijibia vajacuata benavajëtatsi Diosojavabelia. Dioso nacaitaxutotsoniatane vajanacaasivaxae. Nexata nacayavenonaëna paepatota voxaiti namatavenonatsi vajanacayavenonaenexa.

5

¹ Sacerdoteviyajuvënë, caenë, itapetatsi sacerdotevi penamatacaitorobinënexa, daxitajivi petocuaicuajitsabiabinexa Diosojavabelia. Nexata jivi Diosojavabelia ofrendacuenia perajutsijavanexa, capatabiaba sacerdotenëjavaberena. Nexata juya sacerdotenë rajutabiaba Diosojavabelia bajarapaofrenda. Dajubinë, pijana ata yajava, bajarapacuenia rajutabiaba Diosojavabelia, daxitajivi pibisiacue pexanaeconi Dioso pevecuaajibiaexanaenexatsi. ² Sacerdotenë caëjêpatsi dovathi pejamatabêcuenejëtsinexatsi pibisiacue pexanaenexa. Tspaji bajaraponë ata saya jivitonë. Nexata sacerdotenë jamatabêjumaiti jivi yabara: “Jamatabêcueneypêtaniji pamonae abaxë apo yapêtae Dioso pejumelivaisi. Nexata pibisiacue exana. Jamatabêcueneypêtanijinua pamonae dovathi jamatabêcuenejëtatsi pibisiacue pexanaenexa,” jamatabêjai sacerdotenë. Bajaruata jivi pibisiacue ita exana, sacerdotenë itaxutotsoniatane jivi. ³ Sacerdotenë ata apo ajamatabêcuenesaë. Sacerdotenë dajubinë, pijana yajava, Diosojavabelia ofrendacuenia rajutabiaba jivi pibisiacue pexanaeconi Dioso pevecuaajibiaexanaenexatsi. Bajarapacuenia ita rajutabiaba, bajaraponë ata pibisiacue pexanaeconi Dioso pevecuaajibiaexanaenexatsi, yajavarajutabiaba.

⁴ Itsanë ata pijacuata pepo sacerdotenë apo naexanae daxitajivi petocuaicuajainexa Diosojavabelia daxitajivi peyaiyataenexatsi. Biji rajane sacerdoteviyajuvënë, caenë, Dioso itapetatsi pepo sacerdotevi penamatacaitorobinë pexanaenexatsi, pacuenia bajayata Aarónpijinë ata Dioso itapetatsi pepo sacerdotenë pexanaenexatsi. Nexata bajayata Aarónpijinë ata daxitajivi yaïyatanetsi. ⁵ Bajara icatsia itsi Cristo ata. Pijacuata apo naexanae pepo sacerdotenë, vajanacatocuaicuajainexa Diosojavabelia. Biji rajane Dioso itapetatsi Cristo pepo sacerdotenënexa daxitajivi peyaiyataenexatsi. Cristojavabelia copiya Dioso jumaiti mapacueniaje:

Xamë raja taxënatomë. Xanë raja axanë, jai Dioso.

⁶ Icatsia itsabaxutota, Dioso pejumelivaisibaxutota, jumaiti pacuenia Dioso itapeta pexë nato pepo sacerdotenënexa. Jumaiti mapacueniaje:

Xamë raja pepo sacerdotenëmë tsane daxitamatacabijavabelianexa. Jivi netocuaicujainë tsane xanëjavaberena. Pacuenia bajayatami itsi Melquisedec, bajara xamë ata itsimë tsane,

jai Dioso pexë natojavabelia.

⁷ Jesucristo abaxë ita ponapona mapanacuataje, pinijijumeta yaitaxutonueya vajëta Diosojavabelia. Bajarapacuenia vajëta Diosojavabelia pecapanepaenexatsi petêpaejavavecu. Nexata Jesucristo xaniavaetsia Dioso jumetanetsi. Tspaji Jesucristo jamatabêjumaiti Dioso yabara: “Jitsipajë taneexanaenexa pacuenia taxa netojitsipa,” jamatabêjai. ⁸ Jesucristo, Dioso pexë nato, ayajamatabêcuenenë ata, itsiata paxa jumecovënëta. Nexata pijacuata nacopata pebejjobiaexanaenexatsi pacuenia Dioso tojitsipatsi. ⁹ Nexata Jesucristo paxa ita jumecovënëta, nacopata pebeyaxuabinexatsi jivi pesivatêpaenexa. Nexata daxita pamonae jumecovënëtavanapa pacuenia Jesucristo itorobatsi, Dioso rajutsianatsi matababi apo peverevercaejava. ¹⁰ Dioso baja cajena itapetatsi Jesús pepo sacerdotenënexa, jivi petocuaicuajainexa Diosojavabelia, pacuenia bajayata itsi Melquisedecpijinë.

Pacuenia Dioso jumecovënëtsivi muxujibatsi pecopabiyanima Dioso jumecovënëtsijava yabara pelivaisi

¹¹ Xainajë picani ayailivaisi patacatsipaebinxaxa paneyapêtaenexa pacuenia Cristo pepo sacerdotenë vajanacatocuaicuajainexa Diosojavabelia. Itsiata baitsi jane ayapêbeje patacajumeyapêtaeyaxanaenexa bajarapalivaisi. Pacuenia pejevaxi beaxayo bayapêtaepona vajacujarubijava, bajara pajamatabêcueneitsimë. ¹² Bajayajebi baja picani Jesucristo pajumecovënëtame. Juya baja picani bepatsipaebapona itsamonaejavabelia. Itsiata baitsi jane abaxë panamatavenoname icatsia papecatsipaebinxaxa bajarapalivaisi. Palivaisi picani yapêxanepana, Dioso pejumelivaisi, itsiata apo pajumeyapêtaemë. Nexata abaxë panamatavenoname icatsia pejamatapibinxaxa bajarapalivaisi. Pacuenia pejavaxinacuetoxi emitobarëmene apa, apo xae abaxë pexaejava, bajara pajamatabêcueneitsimë. Tspaji palivaisi ayapêbejavajëto, apo pacacajêpae orijibia panejumeyapêtaenexa. ¹³ Pamonae abaxë namatavenona petsipaebinxaxa peyapêxanepanaelivaisixi, Dioso pejumelivaisi, bajarapamonae pejamatabêcuene abaxë mito bepiapaenacuetoxi. Bajarapamonae abaxë apo yapêtae pexanaenexa pacuenia Dioso tojitsipatsi. ¹⁴ Pacuenia penaveretsivi pijacuata xane pexaejava, bajara jamatabêcueneitsi pamonae pejamatabêcuenevitsabivi Diosojavabelia. Nexata pacuenia Dioso itorobatsi, jumecovënëta. Najamatabêxainabiaba pexanaenexa êpexaniacue. Apo jitsipae pibisiacue pexanaejava.

6

¹ Vaxaitsi Dioso vajajumecovënëtsijavaveliacujinae, vajavajënaeyabelia jumecovënëtaponatsi vajajamatabëcuenevitsabaponaenexa Diosojavabelia, pacuenia jamatabëcuenevitsabapona bitso Dioso pejumecovënëtsivi. Bajaraxua baja vaxaitsi yapëtanetsi. Nexata baja apo namatavenonaetsi icatsia vajanacatsipaebinxea Cristo pelivaisi, pacuenia copiaya nacatsipaeba pamatacabi ajena najamatabëcueneocopatatsi Diosojavabelia. Vaxaitsi baja copabatsi pibisiacuene vajeaxanabiabijava. Najamatabëcuenepeñeyorotatsi baja Diosojavabelia. Bajaraxuata apo namatavenonaetsi baja icatsia itsajivi ata vajanacatsipaebaponaenexa bajaraxua vajayapëtaenexa. ² Apo namatavenonaetsinua baja icatsia vajanacatsipaebaponaenexa vajayapëtaenexa pajamatabëcuenelivaisi xaina vajanacabautisabijava. Apo namatavenonaetsi baja icatsia vajanacatsipaebaponaenexa vajayapëtaenexa pajamatabëcuene yabara pijinia tsimatanacobeuata ancianovi Dioso pejumecovënëtsivijavabelia. Pacuenia ata icatsia Dioso asaëyaexanaejitsia petëpaevimi, vajayapëtaexae baja, apo namatavenonaetsi icatsia vajanacatsipaebaponaenexa. Pacuenia ata daxita pamonaenaneconita Diosojavabelia, naneconitsiajinavanapaejitsia daxitamatacabijavabelianexa, vajayapëtaexae baja, apo namatavenonaetsi vajanacatsipaebaponaenexa. ³ Dioso itsa nacatocopataponaena, vajavajënaeyabelia jamatabëcuenevitsabaponaenatsi pacuenia Dioso nacatojitsipa.

⁴ Itsamonae baja picani yapëthane pexaniajailivaisi. Jumecovënëtanua baja picani Jesucristo pelivaisi Dioso pecapanepaenexatsi. Espiritu Santo ata baja picani tsijamatabëecatsi. ⁵ Yapëtanenua baja picani pacuenia Dioso pejumelivaisi bitso xanepana. Yapëtanenua baja picani pacuenia taejitsia Dioso pinijicuene pexanaejava pamatacabi pejananacua Dioso exanaena. ⁶ Itsiata baitsi jane bajarapamonaenexa itsa copaba baja Jesucristo pelivaisi pejumecovënëtsijavami, nexata baja acuenebi icatsia penajamatabëcuenepeñeyorotsijava pibisiacuene Diosojavabelia. Pecopabixae Jesucristo pelivaisi pejumecovënëtsijava, naexana quenetsiataeya bepecapocaponaevi Jesucristo pelivaisi. Bajaraxuata bajarapamonaenexa jamatabëcuenejêpa pamonaemi bajayata Jesucristo beyaxuabatsi cruzata. Tsipaji pamonaemi Jesucristo beyaxuabatsi, quenetsiataeya capocaponatsi daxitajivi pitabarata. ⁷ Ema itsa runa mapairataje, Dioso pejamatabëcueneta pecopatsixae, runa bajarapaema. Nexata Dioso pejamatabëcueneta perunaexae, bajarapaema banacale naxaniabiaexana mapairataje. Nexata capitsapa pexaniabanacale. ⁸ Itsiata baitsi jane mapanacuataje saya itsa juva piabejejava, apo xanepanaenexa itsacuenejavayonexa ata. Nexata bajaraxua tajuatsi. Bajara pijinia itsi tsane jivi ata. Pamonaenexa Jesucristo pelivaisi pejumecovënëtsicujinae, copabiana bajarapalivaisi pejumecovënëtsijavami, nexata tajunenatsi infernojavabelia.

Pajamatabëcuene yabara Dioso pejumecovënëtsivi casaë tsavanapae Dioso pejumecovënëtsijava yabara pelivaisi

⁹ Tajamonae bitso patacaasivavi, pacuenia itsamonae jumecovënëtsi ata Dioso pecapanepaejavanexatsi, itsiata copaba, bajara paxamë apo paitsimë tsane. Dioso panejumecovënëtsijava apo pacopabimë tsane. Yapëtaniji baja cajena paxamë xaniavaetsia panejinavanapaejavanexa. Dioso baja nexata panejumecovënëtsixae, Dioso pacapanepaena. ¹⁰ Dioso êpexaniacuene exana. Apo nacofënëtsinua xua baja paexanapaneayavenonaenexa itsamonae Dioso pejumecovënëtsivi. Tsiteca abaxë payavenonaponame bajarapamonaenexa. Bajarapacuenia itsa payavenonaponame itsamonae, patsitanacueneitajëtaponame Cristo bitso panejitsipaevaja. ¹¹ Pacatojitsipatsi, pacaiejivimë canacujitsia, itsamonae panetsitanacueneitajëtaponaenexa namataenetsia bitso panenasi-vajava panetëpaejavabelianexa. Nexata bajarapacuenia itsa paexaname, pacapanepaena Diosojavabetsia. ¹² Apo pacatojitsipaetsi paneayabarafaetabijava Dioso panejumecovënëtsijava. Biji rajane pacatojitsipatsi paneajamatabëcuenesaënexa, pacuenia itsamonae ajamatabëcuenesaë bajayajebi penajamatabëcueneocopatsijava Diosojavabelia. Bajarapamonaenexa rajutsianatsi xua Dioso najumecapanepaeya jumaitsitsi perajutsinexatsi.

¹³ Bajayata Dioso pexaniajajiumeta tajëvelia najumecapanepaeya jumaitsi pacuenia Dioso toexanaejitsia Abrahampijinëjavabelia. Dioso navënëcacuaicuaijajia jumaitsi mapacueniaje: "Xanë Disonëxanë, najumecapanepaeya cajumaitsitsi pepacune tacaoexanaenexa pacuenia najumecapanepaeya cajumaitsitsi," jai Dioso Abrahampijinëjavabelia. Bajarapacuenia Dioso najumecapanepaeya jumaitsi Abrahampijinëjavabelia pepacune petoexanaenexa pacuenia najumecapanepaeya jumaitsi. Jivi namataenetsia penajumexaniataenexa Dioso pevënë bacuaicuaijai. "Xaniajanë. Pepacune Dioso pitabarata cajumaitsitsi," banajai. Itsiata baitsi jane ponë pevënë Dioso cacuaicuaijajitsia, ajibi. Tsipaji baja pematatsënë Dioso matatoxenetsia ayajamatabëcuenenë ajibi. Bajaraxuata Dioso pexaniajajiumeta navënëcacuaicuaijajia jumaitsi pacuenia toexanaejitsia Abrahampijinëjavabelia. ¹⁴ Nexata Dioso jumaitsi Abrahampijinëjavabelia mapacueniaje:

“Pepacuenē xanē cayavenonabiabianatsi. Xainaenamenua ayaibitsaēto nemomoxi,” jai Dioso pexaniajajumeta. ¹⁵ Nexata Abrahampijinē Dioso jamatabēcueneevetsiaponapona bajayajebi. Nexata jane baja belia Abrahampijinē Dioso rajutatsi pacuenia najumecapanepaeya jumaitsitsi. ¹⁶ Itsamonae Dioso pevēnē bacacuaicuajiai pejumexaniataenexatsi xua toexanaejitsia itsajivijavabelia. “Paxaniajanē. Pepacuenē Dioso pitabarata pacajumaitsitsi,” bajai. Nexata bajarapacuenia itsa jumaitsi, acuenēbi itsajivi ata pejumaitsijava bajarapamonaejavabelia: “Apo pacajumexaniataetsi,” pejaijava. Tspijai Dioso pevēnē cacuaicuajiai pexaniajajumeta. ¹⁷ Dioso baja cajena pexaniajajumeta najumecapanepaeya jumaitsi jivi peyavenonaenexa. Dioso najamatabēcueneitajēta jivijavabelia xaniajai peyavenonaejava jivi pejumeaebiyaniatsi, “Jemajai raja. Dioso epatua itsajamatabēcuene xainaena,” pejaiyanivatsi. Bajaraxuata nexata Dioso tajēvelia navēnēcacuaicuajiai jumaitsi Abrahampijinējavabelia mapacueniaje: “Xanē Diosonēxanē, najumecapanepaeya cajumaitsitsi pepacuenē tacatoexanaenexa pacuenia najumecapanepaeya cajumaitsitsi,” jai Dioso Abrahampijinējavabelia. ¹⁸ Bajarapacuenia Dioso najumecapanepaeya pejumaitsicujinae, acuenēbi epatua itsajamatabēcuene pexinaejava. Tspijai baja Dioso acuenēbi penajumetsēnētsijava. Nexata vaxaitsi Dioso vajanacapanepaejavanexa vajajumecovēnētsivi, bejamatabējematsi. Apo bejamatabēcuenebējajitsi. Tspijai baja yapētanetsi Dioso pexaniajajava vajanacapanepaenexa, pacuenia baja bajayata tajēvelia najumecapanepaeya jumaitsi. ¹⁹ Cristo vajanacasivatēpaenē, athēbētatsia peccaexae Dioso pemuxuneneta, nexata baja yapētanetsi vajanacapanepaejavanexa Diosojavabelia. Nexata ajamatabēcuenesaētsi tsavanapae Dioso vajajumecovēnētsijava. ²⁰ Jesús athēbēbetsia vajavajēnaeyabetsia pona vajanacatoexanarutsinexatsia namuto. Nexata jane baja Jesús athēbētatsia pepo sacerdotenē Dioso exanatsi, jivi petocuaicuajainexa Diosojavabelia daxitamatacabijavabelianexa. Nexata Jesús pepo sacerdotenē pacuenia bajayatami itsi Melquisedecpijinē.

7

Pacuenia Jesús pepo sacerdotenē pacuenia bajayatami itsi Melquisedecpijinē yabara pelivaisi

¹ Bajayatami Melquisedecpijinē ponapona. Salemtomara pevetsinēmi. Bajaraponēmi sacerdotenē, jivi petocuaicuajainexa, athēbētatsia peccaenē, Diosojavabelia. Nexata bajarapamatacabī Abrahampijinē vajabitsaē exana itsanacuanē pevetsivijavabelia. Itsa baja Abrahampijinē verebiaba pijavajabitsaē, naviarena. Nexata penaviatsinērena caxitarabatsi Melquisedecpijinē. Nexata Melquisedecpijinē jumaitsi Abrahampijinējavabelia: “Catovajētsianatsi Diosojavabelia pecayavenonabiabinexa,” jai. ² Abrahampijinē pijavajabitsaē peverebiabivimi pecobecovē penotsijavanē, caponapona. Nexata bajaraxua diez xuabejeyajuvēnējavanē tsaponae, Abrahampijinē caejavayo ofrendacuenia rajutapona Melquisedecpijinējavabelia. “Melquisedec,” itsa jai hebreojumeta, mapajumetaje pejumaitsijume: “Dioso pitabarata aneonijibia xaniavaetsia jivi pevetsinē,” pejaijume. “Salemtomara pevetsinē,” itsa jai hebreojumeta, mapajumetaje pejumaitsijume: “Jamatabēcuene xanepanaeya tomara pevetsinē,” pejaijume. Nexata Melquisedecpijinē Salemtomara pevetsinēmi. ³ Melquisedecpijinē paxa yabara, pena ata yabara, pamojivimi ata yabara, Dioso pejumelivaisibaxutota apo jumaitsi. Penaexanaejava ata yabara, petēpaejava ata yabara, apo jumaitsi. Nexata pacuenia Dioso pexēnato, Jesucristo, jivi petocuaicuajainē Diosojavabelia daxitamatacabijavabelianexa, bajara pijinja itsi Melquisedecpijinē. Melquisedecpijinē jivi petocuaicuajainē Diosojavabelia daxitamatacabijavabelianexa.

⁴ Nexata aeconoxae pacanaējere mapacuenije. Melquisedecpijinē bitso ayajamatabēcueneē vajasalinainēmi Abrahampijinē matatoxenetsia. Bajaraxuata Abrahampijinē ayajamatabēcueneēmi ata, ofrenda rajuta Melquisedecpijinējavabelia. Pamatacabī Abrahampijinē pijavajabitsaē verebiaba, pecobecovē nota. Nexata Abrahampijinē itsa caxitajaraba Melquisedecpijinē, diez xuabejeyajuvēnējavanē tsaponae, caejavayo rajutapona Melquisedecpijinējavabelia. ⁵ Bajayatami Dioso najumecopata Moiséspijinēta. Bajarapalivaisi juya itorobatsi Levīpijinēmi pexi, pemomoxi ata, sacerdotēvi penaexanaponaevinexa, jivi petocuaicuajiaevinexa Diosojavabelia. Nexata Levīpijinē pemomoxi, sacerdotēvi naexanapona. Nexata bajarapamonae Dioso tocopatatsi perajutsinexatsi daxita judiovi pexainaeyajuvēnējava. Baitsi tocopatatsi pematamoyanijobinexa diez xuabejeyajuvēnējavanē tsaponae, caejavayo pevecupitaponaenexa. Nacaevirivi ata, daxita bajarapamonae Abrahampijinē ēpemomoxi ata, itsiata Dioso tocopatatsi nacaevirivi ata pexainaeyajuvēnējavanē perajutsinexatsi. ⁶ Melquisedecpijinē picani Levīpijinē apo pemomo. Itsiata

Melquisedecpijinē ayaijamatabēcuenenēxae, Abrahampijinē ofrenda rajuta Melquisedecpijinējavabelia. Diez xuabejeyajuvēnējavanē tsaponae, caejavyo rajutapona. Nexata Melquisedecpijinē jumaitsi Abrahampijinējavabelia: “Catovajētsianatsi Diosojavabelia pecayavenonabiabinexa,” jai Abrahampijinējavabelia, ponējavabelia Dioso najumecapanepaeya jumaitsi peyavenonaenexa. ⁷ Pajivi jumaitsi: “Catovajētsianatsi Diosojavabelia pecayavenonaenexa,” jai, bajarapajivi ayaijamatabēcuenenejivi Dioso pitabarata pajiviyo tovajētsijitsia matatoxenetsia. Daxita baja cajena yapētanetsi bajarapacuenē. ⁸ Majotaje, vaxaitsijavata, itsamonae sacerdotevijavabelia ofrenda rajutabiaba. Diez xuabeje pexainaeyajuvēnējavanē, caejavyo rajutabiaba sacerdotevijavabelia. Pasacerdotevijavabelia rajutabiaba bajaraxuanē, petēpaevinexa. Tsipaji saya jivi. Itsiata baitsi jane Dioso pejumelivaisibaxutota Melquisedecpijinē yabara jumaitsi pacueniaje: “Melquisedec abaxē mapamatacabita ataje asaē tsaponaponae. Nexata tsiteca jivi toucaicuajaij tsabiabi Diosojavabelia,” jai. ⁹⁻¹⁰ Bajayatami Abrahampijinē ofrenda rajuta Melquisedecpijinējavabelia. Bajarapamatacabi abaxē Levípijinē apo naexanae. Pexi ata abaxē ajibi. Pemomoxi ata abaxē ajibi, pamonaē jane baja mapamatacabitaje sacerdotevi naexana jivi petocuaicuajainexa Diosojavabelia. Itsiata paofrenda Abrahampijinē rajuta Melquisedecpijinējavabelia, bajaraxua Dioso tane Levínexa, daxita Leví pemomoxinexa ata. Bajarapacuenia Abrahampijinē daxitanexa yayiataeya ofrenda rajuta Melquisedecpijinējavabelia.

¹¹ Pamatacabi Aarónpijinē, pexi ata, sacerdotevi baja tsavanapae, bajarapamatacabi judíovi pejumecovēnētsinexa Dioso Moiséspijinēta najumecopata. Pamonaē Aarónpijinē pexi, Levípijinē baja cajena pemomoxi. Judíovi itsa jumecovēnētsipa Dioso Moiséspijinēta penajumecopatsilivaisi Dioso aneonijibia petanexatsi, nexata Dioso apo itorobitsica tsipae Cristo, ponē beMelquisedecjamatabēcuenenē, jivi petocuaicuajainexa Diosojavabelia daxitamatacabijavabelianexa. Dioso Moiséspijinēta penajumecopatsilivaisi pejamatabēcueneta Dioso aneonijibia judíovi itsa taejitsipa, nexata icatsia Dioso saya mataropotsia pepo sacerdotenē exanaponaejitsipa Aarónpijinē pemomoxi. ¹² Nexata Cristo sacerdotenē itsa exanatsi, jivi petocuaicuajainexa Diosojavabelia daxitamatacabijavabelianexa, yajavacopatsi pijinia itsalivaisi Dioso Moiséspijinēta penajumecopatsilivaisivecua. ¹³ Vajatuxanenē, ponē Dioso pejumelivaisibaxutota tajēvelia vajunupaebatsi, bajaraponē Levípijinē apo pemomo. Biji rajane saicayavirianē. Bajaraponē pijaviriavi bajayata caenē ata sacerdotenē apo naexanae. ¹⁴ Vajatuxanenē itsa naexana mapanacuataje, daxitajivi baja cajena yapētane penaexanaejava mapanacuataje. Vajatuxanenē naexana Judápijinē pemomoyota. Daxitajivi yapētanenua pacuenia bajayata Moiséspijinē tajēvelia vajunupaeba pamonaē sacerdotevi naexanaponaejitsia. “Judápijinē pemomoxi ata sacerdotevi naexanaena,” apo jai picani.

¹⁵ Bajaraxuata vaxaitsi xaniavaetsia jane baja yapētanetsi pepatsijava itsaviriasacerdotenē. Tsipaji Cristo, ponē jane baja pepo sacerdotenē jivi petocuaicuajainexa Diosojavabelia daxitamatacabijavabelianexa, bajaraponē beMelquisedecjamatabēcuenenē. ¹⁶ Levípijinē pemomoxi sacerdotevi exanaponatsi. Tsipaji bajayata Moiséspijinē tocopata bajarapamonaeyajuvēnēvi sacerdotevi pexanaenexatsi. Itsiata baitsi jane Cristo, pepo sacerdotenē itsa exanatsi jivi petocuaicuajainexa Diosojavabelia daxitamatacabijavabelianexa, Levípijinē pemomoxae, pepo sacerdotenē apo exanaetsi. Jume baja cajena. Biji rajane Cristo pepo sacerdotenē exanatsi icatsia piasaēxae petēpaecujinae. ¹⁷ Dioso baja cajena tajēvelia pexēnatovjabelia pejumaitisijava, Dioso pejumelivaisibaxutota jumaitsi mapacueniaje: Xamē raja pepo sacerdotenēmē tsane daxitamatacabijavabelianexa. Pacuenia

Melquisedec jamatabēcuenetsi, bajarajamatabēcuenetsimē tsane, jai baja cajena tajēvelia Dioso pejumelivaisibaxutota Dioso pejumaitisijava pexēnatovjabelia.

¹⁸⁻¹⁹ Nexata baja palivaisimi copiaya Dioso Moiséspijinēta najumecopata jivi pejumecovēnētsinexa, Dioso baja copiarucaeyaexana. Tsipaji bajarapalivaisimi apo caejēpaetsi jivi pevecuaajibiaexanaenexatsi pibisiacuenē pexanaeoneoni. Nexata palivaisi aeconoxae Dioso nacatocopata, xanepana bitso bajarapalivaisimi matatoxenetsia. Tsipaji baja Cristo vajanacasivatēpaexae, bajaraponē pejamatabēcueneta Dioso baja aneonijibia nacatane. Nexata nacatocopata vajajamatabēcuenē saya vajaimoxoyotsinexa Dioso.

²⁰ Dioso baja cajena tajēvelia najumecapanepaeya jumaitsi Cristo pepo sacerdotenē pexanaenexatsi, jivi petocuaicuajainexa Diosojavabelia daxitamatacabijavabelianexa. ²¹ Pamonaemi bajayata copiaya Cristo pevajēnaeya sacerdotevi exanaponatsi, bajarapamonaemi yabara Dioso bajarapacuenia apo jumaitsi. Itsiata baitsi jane tajēvelia Dioso najumecapanepaeya jumaitsi Cristo pepo sacerdotenē pexanaenexatsi. Bajaraxuata tajēvelia Dioso pejumelivaisibaxutota jumaitsi mapacueniaje:

Dioso baja cajena najumecapanepaeya itša jumaitsi, itsajamatabëcuene icatsia epatua apo xainae. Bajaraxuata tajëvelia Dioso pexënatovavabelia pejumaitšijava, Dioso pejumelivaisibaxutota jumaitsi mapacueniaje: “Xamë baja cajena pepo sacerdotenëmë tsane daxitamatacabijavabelianexa. Pacuenia Melquisedec jamatabëcueneitsi, bajarajamatabëcueneitsimë tsane,”

jai Dioso pejumelivaisibaxutota tajëvelia Dioso pejumaitšijava pexënatovavabelia.

²² Bajarapacuenia tajëvelia Dioso najumecapanepaeya pejumaitšixae Cristo yabara, nexata yapëtanetsi xua Cristo nacatoexana, bitso pexaniacuene. Bajaraxua bitso pexaniacuene, palivaisimi copiaya Dioso Moiséspijinëta najumecopata matatoxenetsia. ²³ Copiaya pamonaeimi sacerdotevi exanaponatsi, ayaibitsaëto jonepona sacerdotevinexa. Tsipaji tēpapona. Nexata apo caëjēpaetsi pevetsinexa daxitamatacabijavabelianexa. ²⁴ Itsiata baitsi jane Jesús baja icatsia apo tēpae tsane. Nexata pepo sacerdotenë tsane daxitamatacabijavabelianexa. Nexata baja icatsia itsanë pepo sacerdotenë apo exanaetsi tsane. ²⁵ Nexata pajivi najamatabëcuenecopata Diosojavabelia pibisiacuene pexanaecononi Dioso pevecuaajibiaexanaenexatsi, daxitamatacabijavabelianexa Dioso vecuaajibiaexanaenatsi. Bajarapacuenia daxitamatacabijavabelianexa pibisiacuene pexanaecononi vecuaajibiaexanaenatsi Jesús pejamatabëcueneta. Tsipaji Jesús daxitamatacabijavabelianexa asaë tsaponaponae tsane jivi petocuaicuajinexa Diosojavabelia.

²⁶ Pacuenia baja Jesús pepo sacerdotenë, bajarapitsinë vaxaitsi vajanamatavenonaexae, Jesús baja patsica. Jesús cajena Dioso pejamatabëcuenejēpaenë, planeconijibinë Diosojavabelia. Pibisiacuene pexanaevi ata, apo jamatabëcuenebijianaetsi. Tocopatatsi peecaenexa athëbëtatsia, paxa Dioso pemuxuneneta, penajuaevetsinexabeje daxitacuene. ²⁷ Pacuenia itsamonae pepo sacerdotevi jamatabëcueneitsi, bajara Jesús apo jamatabëcueneitsi. Itsamonae pepo sacerdotevi, daxitamatacabijavabelianexa ofrendacuena bajarapavi perajutsinexa Diosojavabelia, perajutsinexa pijana ata. Bajarapacuenia sacerdotevi exanabiaba, pibisiacuene pexanaecononi Dioso pevecuaajibiaexanaenexatsi, itsamonae ata pibisiacuene pexanaecononi Dioso pevecuaajibiaexanaenexatsi. Bajarapacuenia Jesús apo exanae. Jesús saya nacopata pebeyaxuabinexatsi ofrendacuena penarajutsinexa Diosojavabelia. Bajarapacuenia Jesús itša nacopata pebeyaxuabinexatsi, caecuenia matamota daxitajivi pibisiacuene pexanaecononimi daxitamatacabijavabelianexa. ²⁸ Bajayata palivaisi Dioso Moiséspijinëta najumecopata, bajarapalivaisi Dioso tocopata pepo sacerdotevi penaexanaenexa mapanacuapijivi. Bajarapamonae apo caëjēpae atatsi pejinavanapaenexa pibisiacuene exanaenejeva, itsiata Dioso tocopata pepo sacerdotevi penaexanaenexa. Itsiata baitsi jane bajaraxuacujinae Dioso najumecapanepaeya jumaitsi Dioso pexënatovavabelianexa. Jesús pexënatovavabelianexa daxitamatacabijavabelianexa. Jesús caeto ata pibisiacuene apo exanae.

8

Pacuenia Jesús daxitajivi petocuaicuajinë Diosojavabelia yabara pelivaisi

¹ Xua yabara baja pacatsipaebatsi, maitsije. Aeconoxae baja xainatsi Jesús, pepo sacerdotenë vajanacatocuaicuajinexa Diosojavabelia. Bajaraponë ecaeyaexanatsi athëbëtatsia, Dioso ayajamatabëcuenenë pemuxuneneta, pecujanenia, penajuaevetsinexabeje daxitacuene. ² Nexata jane baja aeconoxae Jesús Dioso pijatemplobota athëbëtatsia nacueneba pepo sacerdotenë penacuenebijava. Bajarapatemplobo Dioso pexanaetemplobo. Jivi apo pexanaetemplobo. ³ Daxita pamonae pepo sacerdotevi, tocopatatsi perajutabiabinexa ofrenda Diosojavabelia. Dajubi ata beyabiaba ofrendacuena bajarapavi perajutsinexa Diosojavabelia. Bajaraxuata Jesucristo ata, vajanacatocuaicuajinë Diosojavabelia, ofrenda rajuta Diosojavabelia. Nexata Jesucristo ofrenda itša rajuta Diosojavabelia, pijacuata nacopata pebeyaxuabinexatsi ofrendacuena penarajutsinexa Diosojavabelia. ⁴ Itša abaxë Jesucristo mapamatacabijavabelianexa ponaponaejitsipa mapanacuataje, apo sacerdotenë tsipae. Jesucristo apo exanae tsipae pacuenia itsamonae sacerdotevi exanabiaba. Bajarapamonae saya dajubi beyabiaba ofrendacuena bajarapavi perajutsinexa Diosojavabelia Moiséspijinë pitorobicueniatsi. ⁵ Xua Jesucristo athëbëtatsia exanaponaponae, bajaraxua saya sacerdotevi cuenecataeya exanavanapa templobota mapanacuataje. Bajaraxua sacerdotevi cuenecataeya pexanavanapaenexa, Dioso tocopatatsi. Yapëtanetsi baja cajena xua Jesucristo athëbëtatsia exana, bajaraxua mapanacuapijisacerdotevi saya cuenecataeya exanavanapa. Tsipaji pamatacabi Dioso Moiséspijinë itorobatsi mapanacuata pexanaenexa Dioso pijacarpaboxaneto, Moiséspijinëjavabelia Dioso jumaitsi mapacueniaje: “Exanaename daxita pacuenia baja catsitajëtatsi petsutojumata,” jai Dioso. Bajaraxuata mapamatacabijavaberena ataje sacerdotevi templobota exanaponacuenia Moiséspijinë Dioso tsitajëtatsi petsutojumata. ⁶ Itsiata baitsi jane Cristo, ponë

pepo sacerdotenē, xua Dioso athēbētatsia tocopatatsi petonacuenebinexa, bajaraxua bitso ayajamatabēcuene. Xua bajayata sacerdotēvi Dioso tonacuenebavanapa mapanacuataje, beveliajamatabēcuenejava saya. Tspiji Cristo jivi tocuaiuaijai tsane Diosojavabelia daxitamatabacijavabelianexa. Cristo nacayavenonabiabiana. Pepacuene baja Cristo pejamatabēcueneta Dioso nacavecuajibiaexana vajaneconimi. Cristo nacayavenonaenanua Dioso vajanacarajutsinexa xua yabara Dioso najumecapanepaeya jumaitsi vajanacaratjutsinexa, baitsi matababi apo peverevereaejava. Bajaraxua bitso pexaniacuene. Palivaisimi copiaya Dioso Moiséspijinēta najumecopata, bevelialivaisimi saya.

⁷Itsa baja xanepanaejitsipa copiaya palivaisi Dioso Moiséspijinēta najumecopata, nexata baja icatsia cotocaevi itsalivaisi Dioso najumecapanepaeya apo nacatonajumecopatsi tsipae. ⁸Israelpijinē pemomoxi xaniavaetsia apo jumecovēnētsi palivaisi bajayata Dioso najumecopata Moiséspijinēta. Bajaraxuata Dioso tajēvelia najumecapanepaeya pejumaitsi-
java, Dioso pejumelivaisibaxutota jumaitsi mapacueniaje:

Itsamatabacijavabelia icatsia najumecapanepaeya jumaitsinē tsane pejanalivaisi jivi pejumecovēnētsinexa. Pajivi jumecovēnētsiana bajarapalivaisi, rajutsianajē matababi apo peverevereaejava. Bajarapacuenia najumecapanepaeya jumaitsinē tsane Israel nacuaijivijavabelia, Judea nacuaijivijavabelia ata. ⁹Bajarapamonae pijalinalivimi bajayata matabacananē Egipto nacuverena. Bajarapamatabi baja najumecapanepaeya jumaitsinē pacuenia bajarapamonaemi yavenonaejitsianē picani. Itsiata baitsi jane bajarapamonaemi apo nejumecovēnētsi. Bajaraxuata copatajē baja bajarapamonaemi tayavenonaejava,

jai Dioso pejumelivaisibaxutota tajēvelia Dioso pejumaitsijava Israelpijinē pemomoxi yabara.

¹⁰Dioso icatsia tajēvelia pejumaitsijava, Dioso pejumelivaisibaxutota jumaitsi mapacueniaje:

Nexata icatsia itsamatabacijavabelia najumecapanepaeya jumaitsinē tsane Israel nacuaijivi yabara mapacueniaje: “Caejivi canacujitsia pejamatabēthētota yapētaeaxonaponaenajē pacuenia netojinavanapaejitsia. Nexata bajarapamonae pejamatabēthēttojavavetsina jitsipaena tanejumecovēnētsinexa. Nexata bajarapamonae pijaDiosonē tsane. Bajarapamonae pijinia tajajivi tsane. ¹¹Nexata bajarapamatababi itsajivi ata apo jumai tsane itsanējavabelia, pijamonaenējavabelia ata: “Xamē ata beyapētaneme Dioso,” apo jai tsane. Tspiji baja daxitajivi neyapētaena. Neyapētaena beveliajamatabēcuenevi. Neyapētaena ayajamatabēcuenevi ata. Daxita bajarapamonae neyapētaena. ¹²Xanē baja daxita tajajivi pibisiacuene pexanaeconimi, vecuajibiaexanaenajē. Apo najamatabēnapitsinē tsane bajarapapibisiacuene,

jai Dioso pejumelivaisibaxutota bajayata tajēvelia Dioso pejumaitsijava.

¹³Bajarapacuenia Dioso itsamatabacijavabelia icatsia najumecapanepaeya pejumaitsi-
javanaxa yabara jumaitsi. Tspiji baja ajumematamobi palivaisimi copiaya Dioso najumecapanepaeya jumaitsi judíovi pijasalinalivimijavabelia. Pacuenia mapanacuapijicuene ajibi tsaponae, bajara itsi bajarapalivaisimi. Vereverecapona baja.

9

Pacuenia mapanacuata eca Diosojavabelia jivi penavajēcabiabibo, bajara pijinia pacuenia athēbētatsia ata peecaebo, yabara pelivaisi

¹Dioso copiaya najumecopata Moiséspijinēta. Bajarapalivaisita itoroba Israel pemomoxi pexanaenexa Dioso pijacarpoboxaneto, bajarapabota Diosojavabelia penavajēcabiabinexa. Itorobanua sacerdotēvi Dioso pijacuene petonacuenebavanapaenexa bajarapacarpabota. ²Itsa baja vereteta carpoboxaneto Diosojavabelia penavajēcabiabibonexa, bajarapabo enētuaatjē yatuucutsiaya epatajērētsiarena rurena ayaiapaēbērēpana. Bajarapaēnyatuucutsijava jumaveruca, paēnētuaatjē pevenē Lugar Santo. Bajarajota nuta candelerovēnjējava pitayotanacuena. Mesa ata nuta bajarajota. Bajarapamesajumata pejebinexa pan, papan ofrendacuenia rajutabiaba Diosojavabelia. ³Bajara papaēbērēpanacujinaereca, paēnētuaatjē, pevenē pijinia Lugar Santísimo, itsajota baitsi Dioso peponaponaenexa yatuucuta. ⁴Bajarapaēnyatuucutsijava tuatuajēta, nuca orota pexanaejava, altarvēnjējava. Bajara paaltarjumata jeba petuxujuvijavanē, inciensovēnjēvanē, petajuitsinexa. Bajarapaēnyatuucutsijava tuatuajēta boca baula, orota pexanaebaula. Bajarapabaula enētuaatjēta nuca orota pexanaebotellabē. Bajarapabotellabēta yanuca pexaejava, manávēnjējava. Bajarapabaula enētuaatjēta bocanua Aarónpijinēmi pijanae-
boyo. Bajarapanaeboyoy bajayata Aarónpijinē: “Baxujuvare,” itsa jai, baxujuvatabiaba. Bajarapabaula enētuaatjēta bocabejenua ibopanabeje. Bajarapaihopanatabeje Dioso jivi

pitavetsilivaisi najumeyaquinabuata. ⁵ Bajarapabaula matatsēnēta anijanēbeje pecorofeto pexaināenēbeje nucabeje. Bajaraponēbeje beāngelnēbeje, jumapecataa pexanaenētsibeje. Bajaraponēbeje nutatsibeje Dioso pijapeniveninaecotia pitajētsinexabeje. Bajaraponēbeje pecorofetota baula matatsēnēcaranatanucabeje. Nexata pepo sacerdotenē caevai canacujitsia bajarapabaula jumatsicababiaba dajubinē pijanata. Pepo sacerdotenē bajarabaula ita jumatsicababiaba, jamatabējumai tsabiabitsi: “Dioso nacaitaxutotsoniataena. Nacavecuajibiaexanaena pibisiacuene vajaexanaeconimi,” jamatabējai tsabiabi pepo sacerdotenē dajubinē pijanata baulajuma petsicababiabijavata. Itsiata aeconoxae apo necuenecaējēpae patacatoyaquinaponaenexa pajamatabēcuenelivaisi xainapona daxita bajaraxua.

⁶ Bajarapacuenia bajayata Diosojavabelia penavajēcabiabibonexa, vereteta Dioso pijacarpaboxaneto. Nexata sacerdotevi joneyabiaba daxitamatacabi canacujitsia bajarapabojavabelia. Bajarapabo pēnēyatuucutsijava penamataxinaeēnētuaatujētatsina, sacerdotevi jinavanapabiaba. Sacerdotevi joneyabiaba penacubeninexa Dioso pijacuene petonajumecopsicueniatsi. ⁷ Nexata bajarapabo pēnēyatuucutsijava penamataxinaeēnētuaatujētatsina cujinaereca, paēnētuaatujējavabereca, sacerdotevi pepo penamatacaitorobinē caenē joneyabiaba. Bajarapacuenia joneyabiaba caeto caevai canacujitsia. Itsa joneyabiaba, cajoneyabiaba dajubi pijana. Bajarapajanata sacerdotevi pepo penamatacaitorobinē jumatsicababiaba bajarapabaula. Bajarapacuenia exanabiaba bajarapajana ofrendacuenia perajutsinexa Diosojavabelia. Bajarapacuenia exanabiaba pibisiacuene pexanaecononi Dioso pevecuaajibiaexanaenexatsi. Bajarapacuenia exanabiaba daxita itsamonae xua pibisiacuene exanae ata, itsiata apo nacueneyapētae, Dioso pevecuaajibiaexanaenexatsi. ⁸ Espiritu Santo pejamatabēcueneta nacayapētaeayaxana mapacueneye. Pamatacabi abaxē Dioso pijacarpaboxaneto piapiapapaēbērēpanaxanetota ēnētuaatujē yatuucutarurena, sacerdotevi Dioso pijacuee tonacuenēbavanapa bajarapacarpaboxanetota. Bajarapamatacabi Dioso apo tocopatsi jivi pejonenexa Lugar Santísimojavabelia pijacuata pevajētsinexa Diosojavabelia. Bajaraxua vajayapētaenexa Espiritu Santo pejamatabēcueneta nacayapētaeayaxana. ⁹ Bajaraxua bajayata sacerdotevi exana comparaciñcuenia ajena mapamatacabiavaberrenaje vajanacayapētaeayaxanaenexa bajaraxua yabara. Jivi dajubi beyabiaba ofrendacuenia bajarapavi perajutsinexa Diosojavabelia. Vaxaitsi baja yapētanetsi mapacueneye. Bajarapacuenia jivi exanae ata, nacueratabiaba. Tspaji jivi dajubinēvi ofrendacuenia rajutabiabi ata Diosojavabelia, tsiteca pijaperujumatabēcuenē xainavanapa. ¹⁰ Paperujulivaisimi bajayata Dioso Moiséspijinēta najumecopata, jivi apo itorobitsi penajamatabēcuenexaniavaetsinexa. Biji rajane saya itorobatsi pexaejavanexa xaniavaetsia pevetsinexa, piapaeranexa ata xaniavaetsia pevetsinexa, xaniavaetsia penaperabēquatsinexanua. Bajarapacuenia itorobatsi bajarapalivaisimi pejumecovēnētavanapaenexa abaxē Cristo pepatsivajēnaeyatsica. Nexata Cristo pepatsicujinaetsica, Dioso jane baja bajarapalivaisimi pevereverecaeyaxanaenexa pejanalivaisita.

¹¹ Capanepaeya baja pata Cristo, pepo sacerdotenē. Bajaraponē vajanacatocuaicuaijainēnexa Diosojavabelia daxitamatacabiavabelianexa. Aeconoxae baja Cristo pexanicacuene nacatoexana. Cristo baja pona athēbēabetsia, Dioso pepo pijaboyabetsia. Bajarapabo bitso pexaniabo mapanacuata jivi pexanaebo matatoxenetsia. Dioso saicaya pexanaebo. ¹² Bajarabetsia Cristo ita junua bajarapabotatsia, caeueneta junua bajarapaboēnēalia, Lugar Santísimojavabelia, itsajota baitsi Dioso peponaponaenexa yatuucuta. Cristo ita junua, apo cajone chivojana, becerrojana ata. Biji rajane Cristo najanacajunua daxitajivineja. Nexata baja caeuenia nacaneconimatamota daxitamatacabiavabelianexa Dioso vajanacapanepaenexa. ¹³ Xaniajai. Bajayata Israelpijinē pemomoxi ita naneconita Diosojavabelia, abaxē apo tocopatabiabitsi penajonenexa Diosojavabelia penavajēcabiabibojavabelia. Nexata Israelpijinē pemomoxi copiaya matatsicababiabatsi chivojanata, torojanata ata. Becerrami altarvēnējavajumata petajuitsipumana ata tsimataothoothabiabatsi. Nexata jane baja xuacujinae tocopatabiabatsi icatsia penajonenexa Diosojavabelia penavajēcabiabibojavabelia. ¹⁴ Bajarapacuenia bajayata Dioso tocopatatsi dajubinē pijana pejamatabēcueneta Israelpijinē pemomoxi pejonenexa Diosojavabelia penavajēcabiabibojavabelia. Dajubinē pijana matatoxenetsia Cristo bitso caējēpatsi vajanacayavenonaenexa Dioso pexēnatoxae. Espiritu Santo, apo pevereverecaenē daxitamatacabiavabelianexa, Cristo yavenonatsi. Nexata Cristo nacopata pebeyaxuabinexatsi vajanacasivatēpaenexa. Cristo cajena caeto ata pibisiacuene apo exanae. Nexata Cristo pijanata nacavecuajibiaexana baja pibisiacuene vajaexanaeconimi. Bajarapanecononi yabara picani Diosovecu vajanaxuabiviminexa. Bajarapacuenia Cristo vajanacatoexanaejae, tonacuenēbavanapatsi piasaētsaponaponaenē Dioso.

¹⁵ Nexata Jesucristo pejamatabëcueneta nacavecuajibiaexana baja vajaneconimi. Nexata baja aneconijibia Dioso nacatane. Bajaraxuata daxita pamona Dioso junatatsi, rajutsianatsi matabi apo peverevereaejava, pacuenia baja Dioso najumecapanepaeya jumaiti perajutsinexatsi. Cristo ita nacasivatëpa, nacaneconimatamota baja. Nexata nacavecuajibiaexana daxita paneconimi xainatsi ita abaxë jumecovënëtanapatsi copiaya palivaisimi Dioso Moisésppijnëta najumecopata. ¹⁶⁻¹⁷ Itsajivi petëpaevajëna, yaquina pecobecovë yabara. Bajarapajivi ita tëpa, pijamona pevënamuto penatsicobetsanaenexa. Nexata yaquina pacuenia caejivi canacujitsia pitaponaejitsia. Itsiata baitsi jane abaxë ita asaë taponapona pecobecovë pexainaejivi, ajumematamobi abaxë bajarapalivaisi. Matapania baja ita tëpa pecobecovë pexainaejivi, jumenamatamota jane baja bajarapalivaisi. Nexata jane baja xanepana pijamona penatsicobetsanaenexa pacuenia petëpaevajivi yaquina petëpaevajënaeya pecobecovë yabara. ¹⁸ Bajara pijinia itsi paperujulivaisimi bajayata Dioso Moisésppijnëta najumecopata Israelppijnë pemomoxi pejumecovënëtsinexa. Jumenamatamotapona Israelppijnë pemomoxi dajubi pebeyabibixae ofrendacuenia bajarapavi perajutsinexa Diosojavabelia. ¹⁹ Bajayata Moisésppijnë copiaya tsipaeba daxitajivijavabelia daxitajivi bajarapalivaisi pejumecovënëtanapaenexa. Nexata Moisésppijnë pita hisopovënë naeboxi pepacëtetsicunuyo petsobialanamaëtota. Bajaraxuacujinae bajarapacunuyo Moisésppijnë jabuta merata, bercojronata, chivojanatana, peyajavamatajërëbijanarata. Nexata Moisésppijnë tsmatatsicaba pabaxutota itanerubena palivaisi Dioso najumecopata Moisésppijnëta. Bajaraxuacujinae Moisésppijnë daxitajivi tsmatatsicabapona. ²⁰ Nexata Moisésppijnë jumaiti jivijavabelia: “Mara pacuenia pacamatatsicabatsije. Nexata patacamatatsicabixae, xaniavaetsia jane baja Dioso najumecovënëtanapaename. Nexata pacuenia Dioso najumecapanepaeya pacajumaiti, pacatocopiapatsiana,” jai Moisésppijnë jivijavabelia. ²¹⁻²² Bajaraxuacujinae icatsia Moisésppijnë tsicabanajajenajaeba Diosojavabelia penavajëcabiabibo ënëtuatujë. Xuanë bajarapabo ënëtuatujëta xaina pecanacuenebinexa Dioso pijacuene, daxita bajaraxuane yajavatsicabanajajenajaeba. Bajarapacuenia pexanaenexa itoroba baja cajena Dioso Moisésppijnëta penajumecopatsilivaisimita. Itoroba dajubinë pijanata daxitacuene petsicabinexa, petsicabicujinae Dioso axuirajibia petaenexa daxita bajaraxuanë, jivi ata Dioso aneconijibia petaenexa. Tsipaji jivi pibisiacuen pexanaeneconiyabara, acujanebi Dioso aneconijibia petaenexatsi. Matapania dajubinë ita beyaxuaba, pijanata ita matatsicabatsi, Dioso jane baja aneconijibia tanetsi.

Pacuenia Cristo nacopata pebeyaxuabinexatsi mapanacuapijivi pijaneconi pevécuajibiaexanaenexa yabara pelivaisi

²³ Diosojavabelia penavajëcabiabibota, xuabeje xaina pecanacuenebinexa Dioso pijacuene, dajubinë pijanata bajayata Moisésppijnë tsicabanajajenajaeba. Bajarapacuenia Moisésppijnë ita exana, tajëvelia comparacióncuenia itajëtapona jivi peyapëtaenexa itsamat-acabijavabelia Cristo pesivatëpaevajanexa mapanacuapijivi. Cristo dajubinë pijanata apo tsicabanajajenajaebi Diosojavabelia penavajëcabiabibo ënëtuatujë. Biji rajane Cristo nacopata pebeyaxuabinexatsi. Nexata Cristo pijana pejamatabëcueneta, mapanacuapijivi pibisiacuen pexanaeneconiyabara, Dioso baja vecuajibiaexanatsi. Cristo cajena bitso janamatamota Dioso pitabarata, dajubinë pejana matatoxenetsia. ²⁴ Cristo baja cajena vajanacasivatëpaecujinae, athëbëabetsia pona. Aeconoxae baja Cristo athëbëatsia eca, paxa Dioso pemuxuneneta, vajanacatocuaicuaijaitsecaenexa Diosojavabelia. Nexata Dioso pepo pijabotatsia Cristo nacatocuaicuaijaitsecaenexa. Bajarapabo apo pexanaebo itsajivi ata. Apo bemapanacuapijibo. Tsipaji pacarpaboxaneto mapanacuata jivi exana Diosojavabelia penavajëcabiabibonexa, bajarapabo saya cuenecataeya exana pacuenia athëbëatsia Dioso pepo pijabo itsi. ²⁵ Sacerdotevi pepo penamatacatorobinë, bajarapone judionë. Caevai canacujitsia cajoneyabiaba dajubinë pijana Lugar Santísimovënëjavabelia, itsajota baitsi Dioso peponaponaenexa yatuucuta. Itsiata baitsi jane Cristo bajarapacuenia apo exanabiabi caevai canacujitsia. Caeto penacopatsicujinae pebeyaxuabinexatsi vajanacasivatëpaenexa, icatsia baja pematatsënëa apo nacopatsi petëpaenexa. ²⁶ Dioso mapanacuajepexanaevaveliacujinae, Dioso ita tocopatsipa Cristo jivi pesivatëpaponaejitsipa caevai canacujitsia, nexata Cristo bitso anijatonë jivi pijaneconi yabara sivatëpaponaejitsipa. Itsiata baitsi jane Cristo caeto petëpaecujinae, icatsia baja apo tëpae. Itsa baja copiarucaejitsia perujulivaisimi, Cristo naexana mapanacuataje. Nexata caeto nacopata pebeyaxuabinexatsi vajanacasivatëpaenexa, pibisiacuen vajaexanaeneconimi vajanacavecuajibiaexanaenexa. ²⁷ Bajara pijinia pacuenia vaxaitsi ata caeto tëpaponaejitsi. Bajaraxuacujinae jane baja Dioso naneconitsiaexanaponaena daxita pamona pijaneconi pexainaevi. ²⁸ Bajara pijinia pacuenia Cristo caeto nacopata pebeyaxuabinexatsi vajanacasivatëpaenexa, ayabitsaëttoxanetotsi pibisiacuen vajaexanaeneconiyabara vajanacavecuajibi-

aexanaenexa. Bajaraxuacujinae Cristo baja athëbëabetsia pona. Icatsia patsianica coto-caevijava. Itsiata baitsi jane baja icatsia apo nacasivatëpae tsane pibisiacuene vajaexanaeconi yabara. Saya baja nacasivapatsianica vajavajënaeevetavanapaevi vajanacaponaeenexa athëbëabetsia.

10

¹ Palivaisi bajayata Dioso Moiséspijinëta najumecopata, bajarapalivaisi saya Dioso najumecopata tajëvelia vajayapëtaenexa papexaniacuene aeconoxae Cristo nacatoexana. Pacuenia jumaitsi Dioso Moiséspijinëta penajumecopatsilivaisi, sacerdotevi exanabiaba Cristo pepatsivajënaeyatsica. Caevai canacujitsia dajubinë beyaxuababiaba ofrendacuenia pevi perajutsinexa Diosojavabelia, pibisiacuene pexanaeconi Dioso pevecuaajibiaexanaenexatsi. Itsiata baitsi jane bajarapacuenia exanabiabi ata, pepacune apo jamatabëcuenexaniavaetsitsi. ² Pacuenia bajayata itorobatsi Dioso Moiséspijinëta najumecopatsilivaisi, sacerdotevi exanabiaba. Dajubinë beyaxuababiaba ofrendacuenia pevi perajutsinexa Diosojavabelia. Bajarapacuenia pexanabiabixae, pepacune Dioso itsa vecuaajibiaexanaejitsipatsi pibisiacuene pexanaeconi, nexata bajarapamonae apo yanajamatabëxainae tsipae pijaneconi. Nexata baja itsa aneonijibi tsipae, pematatsënëa dajubinë apo beyaxuababiabi tsipae ofrendacuenia pevi perajutsinexa Diosojavabelia. ³ Bajarapacuenia dajubinë caevai canacujitsia beyaxuababiabi ata ofrendacuenia pevi perajutsinexa Diosojavabelia, itsiata jivi jamatabëcuenëbarëyaya apo jinavanapae. Biji rajane bajarapacuenia exanabiabi ata, pevajënaeyabelia tsitcae yanajamatabëxainapona pijaneconi. ⁴ Bajarapacuenia beyaxuababiabi ata toro, chivo ata, bajarapajana apo caëjëpaetsi jivi pijaneconi pepacune pevecuaajibiaexanaenexatsi.

⁵ Bajaraxuata Cristo pepatsicujinaetsica mapanacuayabetsicaje, paxa Diosojavabelia jumaitsi mapacueniaje:

Apo jitsipaemë xamë xua jivi carajutabiaba ofrendacuenia. Apo jitsipaemënuu dajubinë ata pebeyaxuababiabijava pevi pecarajutsinexa ofrendacuenia. Bajaraxuata xanë nitorobimica pacuenia banaexana mapanacuapijivi, tanaexanaenexa mapanacuata, mapanacuapijivi tsivatëpaenexa pijaneconi yabara. ⁶ Jivi picani dajubinë beyaxuababiaba ofrendacuenia pevi pecarajutabiabinexa, altarvënëjajavajumata pecatotajuitsinexa. Jamatabëjumai tsabiabi bajarapamonae: “Tajaneconi Dioso nevecuaajibiaexanaena mapacuenia itsa exanaenajëje,” jamatabëjai tsabiabi. Itsiata baitsi jane apo sivajamatabëcuenëbarëyamë bajaraxua yabara. ⁷ Bajara jane manucajëje pacuenia jitsipame tacatoexanaenexa, pacuenia nijumelivaisibaxutota tajëvelia jumaitsi xanë yabara, tasivatëpaenexa nijajivi,

jai Cristo paxa Diosojavabelia.

⁸ Nexata bajarapacuenia Cristo pejumaitsixae, aeconoxae baja vaxaitsi yapëtanetsi mapacuenieje. Dioso aeconoxae apo sivajamatabëcuenëbarëya jivi dajubinë pebeyaxuababiabijava ofrendacuenia pevi perajutabiabinexa Diosojavabelia. ⁹ Icatsia Cristo jumaitsi paxa Diosojavabelia mapacueniaje: “Bajara jane manucajëje pacuenia jitsipame tacatoexanaenexa,” jai Cristo. Cristo baja mapanacuapijivi pibisiacuene pexanaeconi yabara sivatëpa cruzata pacuenia paxa Dioso itorobatsi. Nexata sacerdotevi dajubinë pebeyaxuababiabijava ofrendacuenia pevi perajutabiabinexa Diosojavabelia, Cristo baja copiarucayaexana. ¹⁰ Pacuenia Dioso tojitsipatsi, Jesucristo nacopata pebeyaxuabinexatsi vajanacasivatëpaenexa cruzata. Bajarapacuenia Jesucristo nacasivatëpa vajanacavecuajibiaexanaenexa pibisiacuene vajaexanaeconimi. Caeto baja Jesucristo nacasivatëpa daxita mapanacuapijivitsije.

¹¹ Caematacabì canacujitsia picani sacerdotevi nubenabiaba altarvënëjava muxuneneta, dajubinë itsa beyaxuaba, ofrendacuenia pevi perajutabiabinexa Diosojavabelia. Itsiata baitsi jane bajarapacuenia exanabiabi ata, Dioso pepacune apo vecuaajibiaexanaetsi pibisiacuene pexanaeconi. ¹² Jesucristo baja cajena nacopata pebeyaxuabinexatsi, vajanacaneconimatotsinexa pibisiacuene vajaexanaeconimi. Caeto baja Jesucristo tēpa pibisiacuene vajaexanaeconi vajanacaneconimatotsinexa daxitamatacabijavabelianexa. Bajaraxuacujinae Jesucristo athëbëtatsia eca, paxa Dioso pemuxuneneta, penajuaevevetsinexabeje daxitacuene. ¹³ Cristo abaxë aeconoxae athëbëtatsia ecaya. Jamatabëcuenëeevetecaya abaxë pijavajabitsaë paxa Dioso petojamatabëcuenëamoneyabinexatsi. Nexata Jesús pijavajabitsaëmi ata pacuenia itoroba, pejumecovënëtsinexatsi. ¹⁴ Caeto baja Cristo nacopata vajanacasivatëpaenexa. Nexata vaxaitsi, Cristo pelivaisi vajajumecovënëtavanapaevi, Cristo pejamatabëcueneta Dioso nacavecuajibiaexana pibisiacuene vajaexanaeconimi daxitamatacabijavabelianexa. ¹⁵ Cristo baja cajena caeto vajanacasivatëpaejavanaxa daxitamatacabijavabelianexa, Espiritu Santo tajëvelia nacayapëtaeyaxana.

Espíritu Santo tajëvelia nacayapëtaeayexana pexaniajaicuene, xua baja aeconoxae Cristo nacatoexana. Tsipaji baja cajena Dioso pejumelivaisibaxutota tajëvelia jumaiti mapacueniaje:

¹⁶ Najumecapanepaeya tajajivi yabara pejanalivaisi itsamatacabi jumaitisnë tsane mapacueniaje: “Caejivi canacujitsia pejamatabëthëtota yapëtaeayexanaponaponaeñajë pacuenia netojinavanapaejitsia. Nexata bajarapamonaë pejamatabëthëtöjavavetsina jitsipaena tanejumecovënëtsinexa,” jai Dioso.

¹⁷ Bajaraxuacujinae icsatsia Dioso jumaiti mapacueniaje:

Apo najamatabënapitsinë tsane itsamatacabijavabelia ata daxita papibisiacuene bajarapamonaë exana,

jai Dioso tajëvelia pija-jivi yabara.

¹⁸ Nexata jane baja Cristo nacasivatëpa pibisiacuene vajaexanaeconimi Cristo pejamatabëcueneta Dioso vajanacavecuajibiaexanaenexa. Nexata baja pematatsënëa dajubinë apo beyaxuababiabi tsanetsi ofrendacuenia pevi vajarajutabiabinexa Diosojavabelia, pibisiacuene vajaexanaeconi Dioso vajanacavecuajibiaexanaenexa.

Pacuenia saya vajajamatabëcuene imoxoyotsijtsiatsi Dioso yabara pelivaisi

¹⁹ Tajamonae, Jesucristo baja vajanacasivatëpaexae, aeconoxae baja Dioso nacatocopata ajunavijibia vajajonenexa Dioso pijanacuayabetsia. Nacatocopatanua bajarajotatsia vajajonenexa Lugar Santísimovënëjavabelia, itsajota baitsi Dioso ponapona. ²⁰ Jesucristo nacatoexana pejananamuto vajaponaenexa athëbëabetsia, Dioso vajanacarusinexa matacabi apo peverevereaejava. Jesucristo baja itsa nacasivatëpa cruzata, nacasivatëpa vajapatsinexa Diosojavabetsia. ²¹ Bajayata sacerdotevi tovetavanapa Dioso pijacarpaboxaneto. Bajara pijinia pacuenia aeconoxae Jesucristo, pepo sacerdotenë jane baja, nacaevetavanapona vaxaitsi vajanacatocuaicuajibiaexa Diosojavabelia. ²² Bajaraxuata vajajamatabëthëtöjavavetsina vajajamatabëcuene saya bimoxoyotatsi Dioso. Bëpënëa vajajamatabëcueneta Dioso yamaxëitorobiaya apo bejumecovënëtsitsi. Tsi-paji yapëtanetsi Dioso vajanacacapanepaejavanexa. Bajarapacuenia Dioso nacapanepaena tsipaji baja pibisiacuene vajaexanaeconimi Dioso nacavecuajibiaexana. Nexata baja nacaajamatabëcuene xuirajibiaexana Jesucristo vajanacasivatëpaexae. Vajanacabautisabijavata, nacaperabëquiatanua piaxuirajibimerata. ²³ Vajavajënäyabelia asaëyata copiaevetavanapenatsi Dioso vajanacacapanepaejavanexa. Bajarapacuenia asaëyata copiaevetavanapenatsi Dioso jumeaebinejevatsi. Nexata itsamonaejavabelia navajunupaebabibianatsi Dioso vajanacacapanepaejavanexa. Tsi-paji baja pacuenia Dioso najumecapanepaeya nacajumaiti, xaniajai baja cajena. Dioso nacacapanepaena. ²⁴ Nexata vaxaitsi namataenetsia benayavenonatsi vajanajamatabëcueneitajëtsinexa vajanasivacuene. Namataenetsianua pexaniacuene benatoexanabiabatsi. ²⁵ Itsamonae baja vaxaitsiyajuvënëvi copabapona penajoneyabiabijava vajanacaetuatabibibojavabelia. Vaxaitsi nexata bajarapamonaë apo becuenejëpaetsi. Namataenetsia benajamatabëcueneasaëyaexanaponatsi. Aeconoxae baja bitsoyo biamamatabëcueneasaëtsi tsavana-pae. Tsi-paji baja imoxoyo pevajënaë vajatuxanenë pepatsinexatsia.

²⁶ Vaxaitsi tsitcae vajavajënäyabelia pibisiacuene itsa exanaponaejitsipatsi, yapëtae atatsi Cristo vajanacasivatëpaexae, nexata nacatoacuenebi tsipae Dioso vajanacavecuajibiaexanaenexa pibisiacuene vajaexanaeconi. ²⁷ Bajarapacuenia vajavajënäyabelia tsitcae pibisiacuene itsa exanaponaejitsipatsi, nexata saya copiaevetavanapaejitsipatsi pinijicuenia Dioso ëvajananconitsia exanaejavanexa. Pamatacabi Dioso pijavajabitsaë naneconitsiaexanaena pinijiisotojavabelia peverebiabinexa, bajarapamatacabi vaxaitsi ata, bajarapamonaë yajava, pinijicuenia Dioso nacayajavanaconitsia exanaejitsipa. ²⁸ Bajayata Dioso Moiséspijnëta najumecopata jivi pejumecovënëtsinexa. Nexata pajivi apo jumecovënëtsi Dioso Moiséspijnëta penajumecopatsilivaisi, beyaxuabaponatsi. Anijajivibeje, acueyabi pajivibeje ata, itsa jumaiti pibisiacuene pexanaejivi yabara: “Pataniji pepacuenie pibisiacuene pexanaejava mapajivije,” itsa jai, nexata bajarapajivi apo itaxutotsoniataetsi. Beyaxuabatsi pibisiacuene pexanaeconi yabara. ²⁹ Pacanaëjère mapacuenije. Pajivi apo jumecovënëtsi Dioso Moiséspijnëta penajumecopatsilivaisi, naneconitsiaexanatsi. Nexata bajaraxua matatoxenetsia Dioso bitso naneconitsiaexanaenatsi pajivi copata pejumecovënëtsijava Dioso pexënato pesivatëpaejavatsi pijaneconi yabara. Pajivi copata pejumecovënëtsijava Dioso pexënato pesivatëpaejavatsi pijaneconi yabara, bajarapajivi tane Dioso pexënato pesivatëpaejavatsi bepiamatamobicujiru. Apo

canaëjtsinua Espiritu Santo piasivajavatsi. ³⁰ Yapëtanetsi baja cajena Dioso pejumait-sijava mapacueniaje: “Pamonae pibisiacue ne xanapona itsamonaejavabelia, bajarapamonae xanë naneconitsiayaxanaenajë,” pejajjava. Jumaitsinua Dioso mapacueniaje: “Xanë Diosonënë, naneconitsiaexanaenajë tajajivi,” jai. ³¹ Pajivi Dioso apo jume-covënëtsi, nexata Dioso itsa naneconitsiaexanaenatsi, jibitso piayaiacue ne taeyaexanaenatsi piasaëtsaponaponaenë Dioso!

³² Panajamatabënapire pacuenia pajamatabëcuenëtsimë tsavanapae pamatacabi ajena Cristo pajumecovënëtamë. Bajarapamatacabi pajamatabëcuenesaëmë tsavanapae panejumecovënëtsijava vajatuxanenë pelivaisi, itsamonaë pacabejiobiaexanae ata bajarapalivaisi yabara. ³³ Paxamëyajuvënëvi baja cajena jivi ayaibitsaëto pitabarata itsamonaë capocaponatsi. Ayaicuenia baja cajena bejiobiaexanatsinua bajarapamonae pitabarata. Nexata pijinia itsamonaë paxamëyajuvënëvi bitso sivanajamatabëxaina bajarapacuenia papecayajuvënëbejiobia exanaexaetsi. ³⁴ Paxamë paitaxutotsoniataneme pamonae jebatsi penaneconitsivi pejebabiabibota Dioso pejumelivaisi yabara. Paxamë itsamonaë pacavecuanotsi ata panijairanëmi, panecobecovëjavaximi yajava, itsiata paxamë pajamatabëcuenëbarëyamë. Bajarapacuenia pajamatabëcuenëbarëyamë tsipaji baja payapëtaneme xua athëbëtsia paxainaejitsiamë. Bajaraxua mapanacuapijicue ne matatoxenetsia bitso pexaniacuenëjave. Tsipaji daxitamatacabi javabelianexa apo pevereverecejavanexa. ³⁵ Bajaraxuata pëtsa pacopabame panesivanajamatabëcuenecopatsijava Dioso javabelia papecayavenonaenexa. Dioso cajena athëbëtsia pacarajutsiana ayaicuenëjave panenajamatabëcuenecopatsixae bajaraponëjavabelia. ³⁶ Bajayajebi ata panevajënaeyabelia paexanaponare pacuenia Dioso pacatojitsipa. Nexata xua yabara tajëvelia Dioso najumecapanepaeya jumaitsi papecarajutsinexa, bajaraxua Dioso pacarajutsiana. ³⁷ Cristo icatsia pepatsijavanexatsica yabara, Dioso pejumelivaisibaxutota tajëvelia jumaitsi mapacueniaje:

Bepijia patsianica ponë patsijitsiatsica. Apo cuenenajematsi tsane pepatsinexatsica. ³⁸ Nexata pajivi Dioso aneconijibiatanetsi Dioso javabelia penajamatabëcuenecopataponaponaexae, bajarapajivi xainaena matacabi apo pevereverecejave. Itsiata baitsi jane pajivi nevecuanaviata pecovëyabelia, apo sivajamatabëcuenëbarëyanë tsane,

jai Dioso pejumelivaisibaxutota. ³⁹ Itsiata baitsi jane vaxaitsi vajacovëyabelia Diosovecua apo naviabi tsanetsi Diosovecua vajanaxuabiyaniava. Biji rajane vaxaitsi najamatabëcuenecopabatsi Dioso javabelia ëvajanacapanepaejavabelianexa.

11

Pacuenia Dioso pejumecovënëtsivi apo jumeaebi xua Dioso najumecapanepaeya jumaitsi yabara pelivaisi

¹ Itsa pepacue ne vaxaitsi xaniavaetsia najamatabëcuenecopatatsi Dioso javabelia, nexata najamatabëxainatsi mapacueniaje: “Abaxë daxitacue ne apo copiapatsi ata, xua yabara Dioso najumecapanepaeya jumaitsi, itsiata yapëtaniji pexaniaicue ne. Pacuenia Dioso najumecapanepaeya jumaitsi, xaniajai baja cajena. Pepacue ne Dioso exanaena,” jamatabëjaitsi. ² Bajayata vajasalinavimi jumecovënëta Dioso. Nexata bajarapamonae mi jamatabëjumaitsi tsabiabi: “Pacuenia Dioso najumecapanepaeya jumaitsi, pepacue ne yavenonaena,” jamatabëjai tsabiabi. Bajaraxuata bajarapamonae mi yabara Dioso jumaitsi: “Sivajamatabëcuenëbarëyanë,” jai.

³ Vaxaitsi ata jumecovënëtsi Dioso. Nexata yapëtanetsi pexaniajaicue ne mapacuenia pejumaitsilivaisije: “Dioso baja cajena nacua exana daxitacue ne yajava. Dioso saya pijumeta daxitacue ne exana. Daxita xua aeconoxae vajaitaxutota tanetsi, Dioso baja cajena exana. Abaxë pamatacabi ajibi itsacuenëjavayo ata mapanacuataje, Dioso baja cajena exana daxitacue ne,” pejailivaisi yapëtanetsi pexaniajaicue ne.

⁴ Bajayatami Abelpijinë najamatabëcuenecopata Dioso javabelia. Abelpijinë jumecovënëta pacuenia Dioso itorobatsi. Nexata Abelpijinë dajubinë beyaxuaba. Nexata ofrendacuenia pevi rajuta Dioso javabelia. Dioso nexata sivajamatabëcuenëbarëyatsi. Abelpijinë pijinia pematapijinëmi, Caïnpijinë, apo jumecovënëtsi pacuenia Dioso itorobatsi. Saicaya pijinia itsaviriajava ofrendacuenia rajuta Dioso javabelia. Dioso nexata apo sivajamatabëcuenëbarëyatsi Caïnpijinë. Nexata Abelpijinë bajayatami baja tēpae ata, itsiata mapamatacabi javaberena ataje vënëlivaisitaeponatsi Dioso pejumecovënëtsijava. Nexata baja vaxaitsi yapëtanetsi, vaxaitsi ata Dioso itsa jumecovënëtsi, Dioso vajanacasivabarëjavavanexa.

⁵ Bajayata Enocpijinë ata najamatabëcuenecopata Dioso javabelia. Bajaraxuata apo tēpae nejeva Dioso caponatsi athëbëabetsia. Jemata pitajarabatsi. Nexata itsamonaë

jaitsi atatsi, itsiata apo caxitajarabitsi. Dioso pejumelivaisibaxutota jumaitis pacuenia Enocpijinē Dioso pepitsivajēnaeyatsi, Dioso sivajamatabēcuenebarēyatsi. ⁶ Pajivi apo najamatabēcueneocopatsi Diosojavabelia, bajarapajivi yabara Dioso apo jamatabēcuenebarēya. Pajivi najamatabēcueneocopatsijitsia Diosojavabelia, bajarapajivi copiaya bejamatabējumaitis mapacueniaje: “Xaniajai tsaina baja. Dioso ponapona. Bajaraponē jivi pitaxutotsoniatāenē. Nexata pamonaē asaēyata vajēta Diosojavabelia pibisiacuene pexanaeconi pevecuaajibiaexanaenexatsi, bajarapamonaē pijaneconi Dioso vecuaajibiaexanatsi,” bejamatabējai copiaya.

⁷ Bajayata Noēpijinēmi ata najamatabēcueneocopata Diosojavabelia. Nexata Noēpijinēmijavabelia tajēvelia Dioso jumaitis pacuenia mapairaje Dioso bubutsiaexanaejitsia. Nexata Noēpijinēmi abaxē apo tae ata mapairaje pebubutsijava, itsiata jumecovēnēta pacuenia Dioso jumaitis. Nexata baja pinijibarcoxaneto exana pebarēpanepaenexa pijamonaē mapaira pebubutsijavavecuaje. Bajarapacuenia Noēpijinēmi pijamonaē pebarējumecovēnētisixae Dioso, nexata Dioso aneonijibia tanetsi. Bajarapamatacabi daxita mapanacuapijivimi apo jumecovēnētis Dioso. Caenē Noēpijinē pijamonaē barējumecovēnēta Dioso. Nexata daxita pamonaemi apo jumecovēnētis Dioso, nayapētane bitso penaneconitsijava Diosojavabelia.

⁸ Bajayata Abrahampijinēmi ata najamatabēcueneocopata Diosojavabelia. Nexata Dioso itsa itorobatsi Abrahampijinē pevecuapitsapaenexa pijanacuami, jumecovēnēta. Nexata baja Abrahampijinē pona itsanacuayabelia. Panacua Dioso rajutsiapaebatsi, bajarapanacuayabelia pona. Abrahampijinē abaxē apo natsivajēnaeyapētae ata panacuayabelia patsijitsia, itsiata vecuapitsapa pijanacuami Dioso pitorobixaetsi. ⁹ Panacuata Abrahampijinē Dioso patsiaexanatsi, bajarapanacuata itsiata Abrahampijinē pepo pijabo apo exanaē. Carpabota saya ponapona. Becaematacabibejenexa saya pepatsinēcuenia carpabota Abrahampijinē ponapona. Itsiata bajayajebi bajarapanacuata carpabota ponapona. Abrahampijinē pexēnato ata, Isaacpijinē, bajarapaira Dioso rajutsiapaebi atatsi, itsiata Isaacpijinē ata carpabota ponapona. Bajara icatsia itsi Isaacpijinē pexēnato ata, Jacobpijinē, Abrahampijinē jane baja pemomo. Jacobpijinē bajarapaira Dioso rajutsiapaebi atatsi, itsiata Jacobpijinē ata carpabota ponapona. ¹⁰ Bajarapacuenia Abrahampijinē bajayajebi carpabota saya ponapona. Tsipaji abaxē vajēnae vetaponapona pecaponaenexatsi athēbēabetsia, Dioso pexanaetomarabetsia, apo pevevere caromatomabetsia, daxitamatacabijavabelianexa jane baja peponaponaenexa bajarapatomaratsia.

¹¹ Bajayata Abrahampijinē pijava pevēnē Sara. Bajarapovami ata najamatabēcueneocopata Diosojavabelia. Bajarapova mavecova picani. Nexata bitso pepua perujuva ata, itsiata Dioso caējēpaeyaexanatsi pexēnato pexainaenexa. Jumecovēnēta pacuenia Dioso najumecapanepaeya jumaitisitsi pexēnato pexainaenexa. Bajaraxuata xaina pexēnatonēyo. ¹² Bajarapacuenia Abrahampijinē bitso pepua perujunē ata, pexēnato xaina. Nexata Abrahampijinē pevēnamuto pemomoxibitsaēto baja tsaponae. Athēbētatsia, itaboxota, bitso navita tulupu. Mapanacuata pijinia tajetabota bitso navita tajetaboatsapērē. Nexata acuenebi itsajivi ata penamataējētisicapanepaenexa tulupu, tajetaboatsapērē ata. Bajara pijinia itsaponae Abrahampijinē pemomoxi. Bitso cajena Abrahampijinē pemomoxi navita.

¹³ Daxita pamonaemi bajayata Dioso jumecovēnēta, tēpa baja. Bajarapamonaemi xua yabara Dioso najumecapanepaeya jumaitisitsi perajutsinexatsi, pitsinejeva tēpa baja. Abaxē apo tocopiapatsi atatsi xua yabara Dioso najumecapanepaeya jumaitisitsi perajutsinexatsi, itsiata sivajamatabēcuenebarēya bajarapamonaemi. Jamatabējumai tsabiabi mapacueniaje: “Daxita pacuenia Dioso najumecapanepaeya jumaitis, bajarapacuenia pepacuene Dioso exanaena,” jamatabējai tsabiabi bajarapamonaemi. Bajarapamonaemi namataenetsia najumai tsabiabi: “Mara panacuataje pepacuene apo jinavanapaetsi tsane daxitamatacabijavabelianexa. Vaxaitsi saya caematacabibeje bevajanajinavanapaevinexa. Bevajanapatsivi mapanacuataje,” najai tsabiabi bajarapamonaemi. ¹⁴ Pamonaemi bajarapacuenia namataenetsia najumai tsabiabi, itsamonaē tsitanajamatabēcueneitajētavanapa. Bajarapamonaemi tsitanajamatabēcueneitajētavanapa pevetavanapaejava athēbēabetsia Dioso pecaponaē javanexatsi, bajarajotatsia jane baja pejinavanapaenexa daxitamatacabijavabelianexa. ¹⁵ Bajarapamonaemi apo najamatabēxainavanapae caevēalia icatsia penaviabinexa pijanacuamijavabelia. Itsa najamatabēxainaejitsipa caevēalia icatsia penaviabinexa pijanacuamijavabelia, nexata naviabijitsipa. ¹⁶ Biji rajane bajarapamonaemi najamatabēxainavanapa peponaenexa athēbēabetsia. Tsipaji athēbētatsia panacua, bitso pexanianacua, mapanacua matatoxenetsia. Bajaraxuata bajarapamonaemi: “TajaDiosomē,” pejaijava Diosojavabelia, Dioso sivabarēyatsi. Vaxaitsi

ata baja yapëtanetsi bajarapamonaemi Dioso pesivabarëyajavatsi. Tshipaji baja athëbëtatsia bajarapamonaemi Dioso toxaniavaetatsi pepo pijatomaranexa.

¹⁷⁻¹⁸ Copiaya Dioso tajëvelia najumecapanepaeya jumaitsi Abrahampijinjëjavabelia. Abrahampijinjë pexënato, Isaac, yabara Dioso jumaitsi mapacueniaje: “Nexënato Isaac xainaena pexi. Nexata nemomoxi xainaename,” jai Dioso. Bajaraxuacujinae icatsia Abrahampijinjë Dioso itorobatsi penacoxibeyaxuabinexa picani. Bajarapacuenia Abrahampijinjë Dioso itorobatsi penacoxibeyaxuabinexa picani saya pejamatabëcueneëjëtisnexatsi. Abrahampijinjë Dioso itorobatsi penacoxibeyaxuabinexa ofrendacuenia perajutsinexa Diosojavabelia. Nexata baja picani Abrahampijinjë jejai. Nacoxibeyaxuabijitsia picani. Bajaraxuacujinae picani Abrahampijinjë exanaejitsia Dioso pitorobicueniatsi. Tshipaji Abrahampijinjë jamatabëjumaitsi: “Dioso baja cajena caëjëpatsi piasaëyaexanaenexatsi taxënato icatsia piasaënexa,” jamatabëjai Abrahampijinjë. Ajena baja picani Abrahampijinjë nacoxicacuatsijitsia cusiupata penacoxibeyaxuabinexa, nexata Abrahampijinjë jamatabëjumaitsi: “Taxënato baja aeconoxa tëpaena,” jamatabëjai. Nexata bajarapaepatota Abrahampijinjë Dioso itavetatsi penacoxibeyaxuabianiva. Nexata baja itsiata Abrahampijinjë apo nacoxibeyaxuabi. Nexata itsiata Abrahampijinjë bepetëpaenë baja nacoxitanë. Nexata bajaraxuacujinae icatsia Dioso bepetoasaëyaexanaenëtis nacoxitanë.

²⁰ Bajayata Abrahampijinjë pexënato ata, Isaacpijinë, najamatabëcuenecopata Diosojavabelia. Bajaraxuata Isaacpijinë itsa baja perujunë, pexënatobejejavabelia tajëvelia najumecapanepaeya jumaitsi: “Dioso pacayavenonabiabianabeje,” jai Isaacpijinë pexënatobejejavabelia. Isaacpijinë pexënatobeje itsanë pevënë Jacob. Itsanë pevënë Esau. Jacobpijinë itsavënë, Israel. ²¹ Nexata Jacobpijinë ata najamatabëcuenecopata Diosojavabelia. Nexata baja pamatacabi Jacobpijinë perujunë, itsa baja nayapëtane petëpaejavanexa, bajarapamatacabi Diosojavabelia tovajëta pemomobeje Dioso peyavenonabibinexatsibeje. Ponëbeje Jacobpijinë pemomobeje tovajëta Diosojavabelia, Josépijinë pexënatobeje. Bajarapacuenia Jacobpijinë itsa tovajëta Diosojavabelia, pemomobeje, caenë canacujitsia, tovajëtapona. Pecobenaeboupita saya Jacobpijinë nayaëtanucaeya vjëtanuca Diosojavabelia. ²² Bajayata Josépijinë ata najamatabëcuenecopata Diosojavabelia. Bajarapamatacabi Egipto nacuaeta Josépijinë daxita pijamonae harëponapona, Israelpijinjë pemomoxi. Nexata baja Josépijinë itsa nayapëtane petëpaejavanexa, tajëvelia vajunupaeba daxita Israelpijinjë pemomoxi Dioso pejamatabëcueneta pecapitsapaejavanexatsi Egipto nacuaveca. Josépijinë petëpaevajënae, najumepuënetanua pijamonae pesicaponaenexatsi pamatacabi Dioso pejamatabëcueneta daxita Israelpijinjë pemomoxi capitsapatsi Egipto nacuaveca.

²³ Bajayata Moiséspijinë paxapijinë, penapijiva ata, tajëvelia yapëtanebeje Dioso peyavenonaejavanexatsibeje. Nexata bajaraxuacujinae pexënatonëyo xainabeje, Moisésnexa jane baja. Nexata matayatsia caponaponabeje acueyabi pajuametoibeje. Bajarapacuenia matayatsia caponaponabeje tshipaji bitso tsitapexanianëpymotsibeje. Egiptonacua pepo pevetsinë itoroba picani daxita Israelpijinjë pemomoxi penacoxibeyaxuabaponaenexa itsa tonaexanatsi pebinëyo. Itsiata bajarapajivibeje apo jumecovënëtsibeje penacoxibeyaxuabinexabeje. Tshipaji apo jumecujunavibeje.

²⁴ Bajaraxuacujinae Moiséspijinë jane baja vitsatsi Egiptonacua pepo pevetsinë pexënatoyo. Moiséspijinë bajarapova vitsatsi bepexënatonëyocuenia. Moiséspijinë baja itsa penaveretsinë, yapëtane Dioso peyavenonaejavanexatsi. Nexata Moiséspijinë apo jitsipae Egiptonacua pepo pevetsinë bepemomocuenia petaenexatsi. ²⁵ Nexata Moiséspijinë najamatabëcueneveretsia jamatabëjumaitsi: “Tajamonae, Israelpijinjë pemomoxi, Dioso pijajivinexa. Nexata yavenonaenajë tajamonae. Egipto nacupijivi nebejiobiaexanae ata tsane, pacuenia tajamonae bejiobiaexanaabiabatsi, itsiata yavenonaenajë,” jamatabëjai Moiséspijinë. Nexata baja Moiséspijinë Egiptonacua pevetsinë bepemomocuenia petaejavatsi itsa vecuapitsapa, copata baja pibisiajamatabëcuene, mapanacuapijijamatabëcuene. Tshipaji saya bajarapajamatabëcuene caepatoyonexa jamatabëcuenebarëya.

²⁶ Moiséspijinë Dioso jumecovënëta pacuenia tajëvelia Dioso jumaitsi pijajivi pecapanepaenexa Egipto nacuaveca. Nexata Moiséspijinë tajëvelia jamatabëjumaitsi: “Itsamatacabi Cristo itsamonae bejiobiaexanaenatsi. Bajarapacuenia xanë ata Egipto nacupijivi nebejiobiaexanaejitsia ata tsane, itsiata Dioso pejitsipacuenia toexanaenajë. Tshipaji xua Dioso athëbëtatsia nerajutsijitsia, bajaraxua bitso pexaniacuenë daxita Egipto nacupijivi pexainaecuenë matatoxenetsia,” jamatabëjai Moiséspijinëtajëvelia Dioso jumaitsi pijajivi pecapanepaenexa Egipto nacuaveca. Nexata Moiséspijinë tajëvelia jamatabëjumaitsi: “Itsamatacabi Cristo itsamonae bejiobiaexanaenatsë. ²⁷ Nexata baja Moiséspijinë Egipto nacuaveca pitsapa. Tshipaji najamatabëcuenecopata Diosojavabelia peyavenonaenexatsi. Egiptonacua pepo pevetsinë Moiséspijinë baranaepanae atatsi, apo cjunavi. Pevajënaeyabelia ajamatabëcuenesaë tsanajetaruca pacuenia Dioso itorobatsi

pexanaenexa. Moiséspijinē baja apo naviatsi pecovēyabelia. Tsipaji abaxē Moiséspijinē apo tae ata Dioso, itsiata yapētane Dioso bitso piasaēñeucene Egiptonacua pepo pevetsinē matatoxenetsia.

²⁸ Moiséspijinē Dioso peyavenonaenexatsi, tajēvelia najamatabēcuenecopata Diosojavabelia. Bajaraxuata pamatacabi Moiséspijinē pijamonae barēpitsapa Egipto nacuavecua, ayaicuenia Dioso yavenonatsi pijamonae pebarēpanepaenexa. Bajaraxuata Moiséspijinē pacuenia Dioso itorobatsi, juya daxita pijamonae itoroba. Moiséspijinē pijamonaejavabelia jumaitsi mapacueniaje: “Daxita paxamē, pacaebopijivimē canacujitsia, pabename ovejasi, pejanapebitoxi. Nexata panijabobaupanē, caebaupa canacujitsia, pamuxunenetsiabianame ovejajanata. Nexata ajena, pameravi, ángelnē najetarucae ata tsane peverebiabinexa pebinacuetoxi, matapijinacuetoxi, itsiata apo paxoxitēpaemē tsane,” jai Moiséspijinē pijamonaejavabelia. Nexata Moiséspijinē pijamonae pijabobaupanē, caebaupa canacujitsia, tsicaba ovejajanata. Nexata ángelnē najetarucae ata peverebiabinexa pebinacuetoxi, matapijinacuetoxi, itsiata Moiséspijinē pijamonae apo coxitēpae. ²⁹ Bajayata pamatacabi Moiséspijinē pijamonae barēpitsapa Egipto nacuaverenena, Egipto nacuaipijivi picani barajinatsi pebeyejebinxatsi. Nexata bajarapamatacabi Moiséspijinē pijamonae barēnajamatabēcuenecopata Diosojavabelia peyavenonaenexatsi. Nexata ayaicuenia Dioso yavenonatsi. Bajarapamonae Dioso pejamatabēcueneta nicaba Rojovēñē manuamenamaxērana tuatuajēalia. Dioso pejamatabēcueneta benamutocuenia totseviaexanaxualiatsi. Nexata jane baja Egipto nacuaipijivi, pamonae jane baja picani barajinatsi pebeyejebinxatsi, nanicabarubenapona. Ajena baja epatota najetarubena, mera baja icatsia avajubua tsaxuabi. Bubuna baja nexata Egipto nacuaipijivi.

³⁰ Bajayata Jericó tomarapijivi piaiataēibopanaxaneto exana pijatomara matatoyorotsia penayajivicananatsinexa pijavajabitsaēvecua. Bajara payacaranatsijavaxaneto mataropotsia catsanaruba ibopananē. Bajaraxua athēbēabetsia apia pacuenia pinijinaejavaxaneto apia. Nexata Israelpijinē pemomoxi vajabitsaē pexanaevajēnaeya Jericó tomarapijivijavabelia, tajēvelia najamatabēcuenecopaba Diosojavabelia peyavenonaenexatsi. Israelpijinē pemomoxi itsa pata Jericó tomarata, jinavanapa bajara payacaranatsijavaxaneto jumavelia. Nexata jane baja vajabitsaē exana Jericó tomarapijivijavabelia. Israelpijinē pemomoxi Dioso pitorobicueniatsi Jericótomara matatoyorotsia najetarubena seis xuabeje. Seis baitsi baja pijinia pamatacabibeje. Nexata jane baja siete matacabita, caematacabita, matatoyorotsia najetarubena siete xuabeje. Nexata jane baja siete matacabita bajarapayacaranatsijavaxanetomi jopaica. ³¹ Bajayata Rahabpijiva, Jericó tomarata peponaponaeva, pibisiacuene pevitota pexanabiabiva ata, marapijivimi Dioso verebiabatsi. Itsiata baitsi jane Rahabpijiva bajarapamonae apo yavavatēpae. Tsipaji pexaniacuene exana. Dioso pejamatabēcueneta Jericó tomarapijivimi peverebiavajēnaetsi, Israelpijinē pemomobeje yaenebabeje Jericó tomarapijivi. Bajarapacuenia yaenebabeje vajabitsaē jane baja pexanaenexa Jericó tomarapijivijavabelia. Bajarapamatacabi Rahabpijiva xaniavaetsia copiapita Israelpijinē pemomobeje. Bajaraxuata Jericó tomarapijivimi Dioso verebiabi atatsi, Rahabpijiva apo yavabeyaxuabitsi.

³² Apo necuenecaējēpae baja pematatsēñēa itsamonae pelivaisi patacatoyaquinaenexa patacamuxujobinexa, panenajamatabēcuenecopatsinexa Diosojavabelia papecayavenonaenexa. Apo necuenecaējēpae patacatoyaquinaenexa Gedeónpijinē pelivaisi, Baracpijinē ata pelivaisi, Sansónpijinē ata pelivaisi, Jeftēpijinē ata pelivaisi, Davidpijinē ata pelivaisi, Samuelpijinē ata pelivaisi. Apo necuenecaējēpaenua patacatoyaquinaenexa itsamonae, Diosojumepaebivimi profetavi, pelivaisi. ³³ Daxita bajarapamonaemi ata najamatabēcuenecopaba Diosojavabelia peyavenonaenexatsi. Bajaraxuata bajarapamonaemi Dioso yavenonaponatsi. Bajarapamonaemi itsa navajabitsaētauatapona itsanacuanēpijivijavabelia, bajarapanacuanēpijivimi verebia Dioso peyavenonaexaetsi. Bajarapamonae pijanacuanējava pijajivi itsa eveta, xaniavaetsia evetabiaba. Tsipaji Dioso yavenonaponatsi. Bajaraxuata xaniavaetsia pijajivi evetabiaba. Paepatota ata toayapēbejisi itsacuenajavayo yabara, Dioso yavenonabiabatsi. Yavenonabiabatsi pacuenia Dioso tajēvelia najumecapanepaeya jumaitsitsi peyavenonaenexatsi. Bajaraxuata bajarapamonaeyajuvēñēvi xuabi atatsi nevēthēbitsaēto penubenaeboyabelia, bajarapacuenia picani pebeyaxuabinxatsi, itsiata Dioso yavenonatsi. Nexata Dioso peyavenonaexaetsi Dioso pejamatabēcueneta nevēthēvecua cuihocataitatsi. Nexata baja nevēthē apo itsacueniabitsi. ³⁴ Itsamonae pijinia bajarapamonaeyajuvēñēvi xuabi atatsi pinijiisotualia, Dioso peyavenonaexaetsi, itsiata apo tajueti. Itsamonae pijinia jamatabēbeyaxuabi atatsi espadata, vecuapanepa Dioso peyavenonaexaetsi. Pamonae pijinia apo aitatsaca picani penavajabitsaētsinexa, bajarapamonae ata bitso baja piaiatsacavi naexanapona vajabitsaē penaexanabuataponaejavata Dioso peyavenonaexaetsi. Nexata bajarapamonae

pijavajabitsaë cueneamoneyaba. Vecuarëcëpecatsi. ³⁵ Bajayata pijinia petiriavi penajamatabëcuenecopatsixae Diosojavabelia peyavenonaenexatsi, itsa coxitépa, Dioso icatsia toasaëyaxanabiabatsi.

Bajayata pijinia itsamonae Dioso pejumecovënëtsiviyajuvënëvi bejiobiaexanatsi Dioso pejumecovënëtsixae. Bajarapacuenia pebejiobiaexanaejavatatsi, itsamonae tēpabiaba. Bajarapacuenia yajuvënëxanatsi pecopabinexa picani Dioso pejumecovënëtsijava. Itsiata baitsi jane apo copabi Dioso pejumecovënëtavanapaējava. Bajarapacuenia apo copabi Dioso pejumecovënëtsijava. Tsipaji bajarapamonae jamatabëjumaitsi tsavanapae: “Mapanacuataje taponaponaējava matatoxenetsia bitso jitsipajē matakabi apo peverevere-caejava Dioso tanerajutsinexa,” jamatabëjai tsavanapae bajarapamonae. ³⁶ Itsamonae pijinia Diosojavabelia penajamatabëcuenecopatsixae, itsamonae capocaponabiabatsi. Jumaititibabeyabiabatsinua penaneconitsivi pejumaconitabiabimacata. Itsamonae pijinia cadenamaētota cēbejebabiabatsi. Penaneconitsivi pejebabiabibota jebabiabatsi. ³⁷ Itsamonae pijinia ibotonēta saya tseconabiabatsi pebeyaxuabinexatsi. Itsamonae pijinia petēpaenexa, epacaucubatsi sierrata. Itsamonae pijinia jamatabëcuenejētatsi pecopabinexa Dioso pejumecovënëtsijava. Bajaraxuacujinae espadata beyaxuababiabatsi. Itsamonae pijinia pijabovecua capitsapatsi. Apo pexainaexae penaxatabijava, bajarapamonae naxataba ovejaboco, chivoboco ata. Pexainaējava ata apo xainae. Nexata bitso bejiobi bajarapamonae. Barajinabiabatsi. Bejiobiaexanatsinua. ³⁸ Bajarapamonae mi petusato nacuanējava jinaruta. Petsutonē nacuanējava ata, jinaruta. Pitajanitonējava perubenaevajuane jaita meravi pemajitabiabinexa. Bajarapamonae yabara itsamonae najumaitsi: “Mapamonaeje vajatomarata pejinavanapaenexa, apo betocopatsitsi,” najai. Itsiata bajarapamonae Dioso asivatsi. ³⁹ Daxita bajarapamonae mi nacopatsi cuenecopaba Diosojavabelia peyavenonaenexatsi. Bajaraxuata bajarapamonae mi Dioso aneconijibia tanetsi. Itsiata baitsi jane abaxē bajarapamonae mi itsa asaē tsavanapae, mapanacuataje Dioso abaxē apo rajutsitsi xua yabara Dioso najumecapanepaeya jumaitsi perajutsinexatsi. Matapania baja bajarapamonae itsa tēpa, Dioso jane baja rajutatsi matakabi apo peverevere-caejava. ⁴⁰ Dioso abaxē evetavanapaeyaexanatsi xua rajutsijitsiatsi bajarapamonae. Tsipaji Dioso apo najamatabëxainae ēbajaraponaējavabelia perajutsinexa bajaraxua. Vaxaitsi ata mapamatacabita vajajinavanapaevi, bajarapamonae yajava, Dioso jamatabëncarajuta bajarapapexanicuene, matakabi apo peverevere-caejava.

12

Pacuenia vajavajēnaeyabelia becaasaē tsavanapaetsi Dioso vajajumecovënëtsijava Jesu-cristo cruzata vajanacasivatēpaexae yabara pelivaisi

¹ Pamonaē yabara pacatoyaquinatsi, bajayata najamatabëcuenecopaba Diosojavabelia peyavenonaenexatsi. Nexata bajarapamonae mi vajavënëlvivaisitaexae, bemuxunanajamatabëcuenesaētatsi vaxaitsi ata Dioso vajanacayavenonaenexa. Itsa nayacobijitsiatsi vajacujinaejinaējava, nexata najonotatsi piarevejava bitsojinaeya vajacujinaejinaenexa, vajapatsinexa itsabelia nacatocaējēta vajanacaitorobinē. Bajara pijinia pacuenia Dioso pitabarata xaniyaetsia bejinavanapatsi asaēyata vajatonacuenebinexa pacuenia Dioso nacaitoroba. Nexata copiaya benavecuacopatsi papibisijamatabëcuene xainatsi. Tsipaji bajarapapibisijamatabëcuene nacaitorobabiaba pibisiacuene vajaexanaenexa. Bajarapapibisijamatabëcuene baja becopabatsi vajaexanavanapaenexa xua Dioso nacaitoroba. ² Itsa najamatabëcuenecopatatsi Diosojavabelia vajanacayavenonaenexa, nexata benajamatabënapitabiabatsi Jesús. Tsipaji Jesús vajanacasivatēpaexae, Dioso aneconijibia nacatane. Jesús pejamatabëcueneta Dioso nacayavenonanua vajaanamatabëcuenesaē tsavanapaenexa Dioso vajajumecovënëtsijava matapania vajanacapanepaējavabelianexa. Pajivi naneconita, cruzata rutatsi pebeyaxuabinexatsi pijaneconi yabara. Bajarapacuenia itsa naneconitsiaexanatsi, bitso piauracuene. Itsiata baitsi jane Jesús nacopata bajarapacuenia pebeyaxuabinexatsi. Bajarapacuenia Jesús nacopata pebeyaxuabinexatsi tsipaji natsivajēnaeyapētane pejamatabëcuenebarēyajavanexa icatsia itsa asaē petēpaecujinae, daxitajivi pijaneconi pematamotsixae. Aeconoxae baja nexata Jesús tronovënējavata athëbētatsia eca, Dioso pemuxuneneta, pecujanenia, penajuaevetsinexabeje daxitacuene.

³ Pacanaējere Jesús piamatabëcuenesaē taponaponaējava, pibisiacuene pexanaevi pinijicuenia bejiobiaexanae atatsi. Bajarapacuenia pacanaējētsianame itsamonae itsa pacabejiobiaexana Jesús panejumecovënëtsijava yabara. Nexata apo pacueranaemē tsane Dioso panetonacuenebijava. Apo pajamatabëcuenefaenaemēnua tsane. ⁴ Paxamē

panajamatabêcuenesaêtavanapame pibisiacuene paneexanaeyaniva. Bajarapacuenia panajamatabêcuenesaêtavanapae atamê pibisiacuene paneexanaeyaniva, itsiata abaxê pibisiacuene pexanaevi apo pacayajuvênêbeyaxuabi. Bajaraxuata panevajênaeyabelia bepanajamatabêcuenesaêtavanapame pibisiacuene paneexanaeyaniva. ⁵ Pêtsa panacofênêtame Dioso papecamuxujobijsava papecajamatabêcuenesaêya exanaenexa itsa pacamuxujioaba bepapeximêcuenia. Tspaji Dioso pejumelivaisibaxutota paxamê yabara jumaiti mapacueni-aje:

Taxi, xanêjavaberena panenaneconitsixae, itsa pacananeconitsiaexanaenatsi, pêtsa payaanaepaname. Pêtsa pasivajamatabêcuenefaeafenamenua itsa pacabijatanetsi xua yabara pananeconitame. ⁶ Pacananeconitsiaexanaenatsi. Tspaji xanê muxujioyiaya bananeconitsiaexanajê pajivi asivanê, baitsi daxita pamonae taxicuenia tataevi,

jai Dioso pejumelivaisibaxutota paxamê yabara.

⁷ Nexata patonacaevere Dioso muxujioyiaya papecananeconitsiaexanaenexa. Tspaji Dioso papeximêcuenia pacatane. Jivi ata baja cajena pexi muxujioyiaya banacoxivitsata. ⁸ Nexata Dioso muxujioyiaya itsa apo pacaevetsi tsipae, Diosojavabelia pananeconitsi atamê, nexata Dioso papeximêcuenia apo pacatae tsipae. Tspaji jivi ata, pexi pexinaevi, muxujioyiaya banacoxiconita. ⁹ Vaxaitsi abaxê pamatacabi pejevaxitsi mapanacuata, vaxajivi nacamuxujioyiaya banacaconita. Nexata vaxajivi yayiatanetsi. Nexata biji vaxaitsi bitsoyo bejumecovênêtatsi vaxa Dioso, ponê eca athêbêtatsia, vajanacarajutsinexa matacabi apo peverevereaejava. ¹⁰ Itsa abaxê vaxajivi mapanacuata nacavitsata, muxujioyiaya banacaconita. Tspaji vaxajivi nacatojitsipa xaniavaetsia vajatojinavanapaenexa. Bajaraxuata nacamuxujioyiaya banacaconita pacuenia vaxajivi nacatojitsipa vajatojinavanapaenexa. Itsiata baitsi jane vaxa Dioso muxujioyiaya nacananeconitsiaexana pepacuene vajacopsinexa pibisiacuene vajaexanaejava. Nexata bajarapacuenia Dioso nacajamatabêcueneyavenona vajaperujumatabêcuenemivecua vajanajamatabêcueneyorotsinexa Diosojavabelia. Nexata pacuenia Dioso jamatabêcuenetsi, bajara vaxaitsi ata vajajamatabêcuenetsinexa. ¹¹ Paepatota vaxa Dioso nacamuxujioyiaya nacananeconitsiaexana, bajarapaepatota abaxê apo sivajamatabêcuenegarêyatsi xua nacatocopiapata. Itsiata baitsi jane pajivi Dioso muxujioyiaya naneconitsiaexanatsi, yapêtane baja xua yabara naneconitsiaexanatsi. Nexata baja copata bajaraxua. Nexata baja jamatabêcuenegarêyaya xaniavaetsia ponapona.

Pacuenia tsiyaisi tsane pajivi namuxujemata Dioso pejumelivaisi yabara pelivaisi

¹² Pacopabare baja panejamatabêcuenecueranaejavami. Panevajênaeyabelia panajamatabêcuenesaêtaponare. Tspaji baja panajamatabêcuenecopatae Diosojavabelia papacayavenonaenexa. ¹³ Pêtsa pajumecovênêtame itsalivaisi Dioso pejumelivaisivecua. Êpexaniajailivaisi, Dioso pejumelivaisi, panevajênaeyabelia pajumecovênêtavanapare. Nexata itsamonae Dioso pejumecovênêtsivi, pamonae abaxê apo ajamatabêcuenesaê Dioso pejumecovênêtsijava, pacaitaxutua ajamatabêcuenesaê tsaponae tsane.

¹⁴ Daxitajivjavabelia pexaniajamatabêcuenepaxoainare. Nexata aneconijibia pajinavanapaename Dioso pitabarata. Pajivi aneconijibia apo ponapona tsane Dioso pitabarata, bajarapajivi Dioso apo yajavaponapona tsane. ¹⁵ Xania baja panayajivitaema. Pêtsa pacopabame Dioso panejumecovênêtsijava, Dioso papecacopsianiva papecaitaxutotsoniaetaejava panepuajumecovênêtsivi Dioso. Pacuenia piatsaxaênêboto daxitamera bijianaejitsipa, bajara pajamatabêcuenetsimê tsipae caenê ata, paxamêyajuvênê, pibisiacuene itsa exanaejitsipa. Pacajamatabêcueney bijianaejitsipa padaxitamê. ¹⁶ Panayajivitaemanua itsanê ata, paxamêyajuvênê, pejaitsiyaniya itsava pepo pijavavecua. Petiriva ata pejaitsiyaniya itsanê pepo pamonavecua. Panayajivitaemanua panejumeaebiyaniya Dioso najumecapanepaeva papecajumaitisijava. Pêtsa Dioso pajumeaebame pacuenia bajayata Esaúpijinê jumeaeba Dioso najumecapanepaeva pejumaitisjavatsi. Esaú picani matapijinêxae, Dioso yavenonabiabijitsiatsi. Nexata itsajota Esaú bitso piajani, pejuyapijinêjavabelia pexaejava caenabani namitsavajêta. Nexata pejuyapijinê jumaitisitsi: “Pacuenia nexaejava nevajêtame, carajutsianatsi. Nexata xua Dioso cayavenonabiabiapaeba, bajaraxua juya xanê netocopatsiname,” jaitsi. Nexata Esaú jejai. Pejuyapijinêjavabelia baja tocopata xua picani Dioso yavenonabiabijitsiatsi. ¹⁷ Payapêtaneme rabaja pacuenia Esaúpijinê exana pejuyapijinê petocopatsicujinae xua picani Dioso yavenonabiabiapaebatsi. Esaúpijinê picani paxa itoroba Diosojavabelia petovajêtsinexatsi Dioso peyavenonabiabinexatsi paxa pevênamuto. Itsiata baitsi jane paxa apo jumejejaitsi. Nexata Esaúpijinê bitso nua pejuyapijinê petocopsixae xua picani Dioso yavenonabiabijitsiatsi. Itsiata baja acuenebi

peñanaejava. Bajaraxuata paxamē ata pētsa pacopabame Dioso panejumecovēnētsijava Dioso najumecapanepaeya papecajumaitisjiva.

¹⁸ Paxamē panejumecovēnētsixae Dioso, pacatocopata roviaalia panevajētsinexa Diosojavabelia. Nexata apo panamatavenonaemē paneponaenexa itsanacua-javabelia panevajētsinexa Diosojavabelia. Bajayata Israelpijinē pemomoxi pata ibotsutoxanetotabuyoberena. Nexata bajarapatsutotabuta navāēca Diosojavabelia. Nexata bajarapatsutojumatatsia Israelpijinē pemomoxi tane beisotocotia itsajota aitaquiri. Bajarapaepatota bitso emaxaneto, ayaijovibo yajava. ¹⁹ Bajarapaepatota Israelpijinē pemomoxi jumetane penajumetsijava trompeta. Jumetanenua Dioso pecuaicuaiaijavatsica athēbēvetsica bajarapamonaejavabelia. Nexata judiovi pecajunavi bitso, vajēta Diosojavabelia Dioso pecuaicuaiaijaniva pematatsēnēa. ²⁰ Bajarapacuenia Israelpijinē pemomoxi vajēta Diosojavabelia tsipaji bitso jumecujunava Dioso pejumaitisjavatsicatsi mapacueniaje: “Pajivi ponaena mapatsutoyeneapanajavaje, bajarapajivi tseconaenatsi ibotonēta. Itsa jume, becuererebonēta cacuatsianatsi pebeyaxuabinexatsi bajarapacuenia. Dajubinē ata itsa ponaena mapatsutoyeneapanajavaje, bajarapacuenia exanaenatsi,” pejaijavatsica Dioso athēbēvetsica, Israelpijinē pemomoxi bitso jumecujunava. ²¹ Nexata Israelpijinē pemomoxi bajarapajume itsa jumetane, pecajunavi, bitso neconecoja. Moisésipjinē ata jumaitis: “Xanē ata rabaja tacajunavi, bitso neconecojanē,” jai.

²² Itsiata baitsi jane paxamē baja aeconoxae Dioso panejumecovēnētsixae, Dioso baja pacatocopata panepatsinexa Dioso pijatomarabetsia roviaalia panevajētsinexa Diosojavabelia. Bajarapatomaratsia eca Dioso, piasaētsaponaponae. Bajarapatomara pevēnē Jerusalén. Eca Siōnvenē tsutojumata. Bajarapatomaratsia Dioso pijajivi āngelevi, miles paāngelevibeje, javavaponapona. ²³ Bajarapatomaratsia payajavanacaetuatsianame itsamonae, pamonaē panevajēnaeya jumecovēnēta Dioso. Bajarapamonae vēnēyaquinarubatsi bajarapatomaratsia. Panacaetuatsianame Dioso pitabarata, ponē naneconitsiaexanaena daxita pamonaē naneconita bajaraponējavabelia. Payajavanacaetuatsianamenua daxita pamonaemi tēpa Dioso pepua pejumecovēnētsivi. ²⁴ Panajamatabēcuenecopatame baja Jesucristojavabelia, ponē pejamatabēcueneta Dioso nacavecuajibiaexana vajaneconimi. Nexata Dioso aneconijibia nacatane. Bajayata Abelpijinē itsa beyaxuabatsi, ponē beyaxuabatsi, juya picani xanepana peyamatomobeyaxuabinexatsi. Itsiata baitsi jane pamatacabi Jesús beyaxuabatsi cruzata, itsajivi ata apo najamatabēxainae Jesús peyamatomobeyaxuabinexatsi. Tsipaji Jesús petēpaejava pejamatabēcueneta, Dioso aneconijibia taejitsia daxita pamonaē jumecovēnēta Dioso.

²⁵ Bajaraxuata Dioso pejumelivaisi vajanacatsipaebijava, bejumecovēnētatsi. Bajayata pamonaē apo jumecovēnētsi Dioso Moisésipjinēta penajumecopatsilivaisi, naxuaba Diosovecu. Dioso apo capanepaetsi bajarapamonae. Vaxaitsi ata bitsoyo Dioso nacananeconitsiaexanaejitsipa itsa apo jumecovēnētsi ponē nacajunata athēbēvetsica. ²⁶ Paepatota pina Dioso athēbēvetsica Sinaivēnē tsutojumavetsica cuaiacuajai, baja pina paepatota ira najēaba. Nexata icatsia xuacujinae bexēa Dioso tajēvelia najumecapanepaeya jumaitis mapacueniaje: “Itsamatacabi icatsia ira najēabiaexanaenajē. Nexata jane baja caecuenia ira, itaboxo yajava, najēabiana,” jai Dioso tajēvelia najumecapanepaeya. ²⁷ Xua yabara tajēvelia Dioso najumecapanepaeya jumaitis, maitsi tsaneje. Mapairaje, itaboxo yajava, itsa najēabiana, daxitacuene xua Dioso exana mapanacuataje, vereverecaena. Itsiata Dioso pejumelivaisi, pijatomara ata, apo vereverecae tsane. ²⁸ Xua itsamatacabi Dioso nacatocopsiana athēbētsia vajatoevetsinexa, bajaraxua apo vereverecae tsane. Bajaraxuata vaxaitsi pexaniamatabēcuene rajutatsi Diosojavabelia. Yaiyataeya vajajamatabēēthētovetsina Diosojavabelia jumai tsabiabi tsanetsi: “Diosomē, bitso ayaijamatabēcuenenēmē,” jai tsabiabi tsanetsi Dioso vajanacasivajamatabēcuene barēyanexa. ²⁹ VajaDioso jivi penaneconitsiaexanaenē. Pacuenia isoto vayafo itsa tajunenataruca, verebiaba daxita piabejajava petajuejavata, bajara pijinia pacuenia Dioso verebiabiana pamonaē pibisiacuene pexanaevi.

13

Pacuenia hexanavanapatsi Dioso vajanacasivajamatabēcuene barēyanexa yabara pelivaisi

¹ Pētsa pacopabame namataenetsia panenasivajava Dioso panejumecovēnētavanapaevi. Panevajēnaeyabelia namataenetsia panaasivamēre. ² Pētsa panacofēnētame xaniavaetsia panecopiapitabiabinexa apo paneyapētaevi ata itsa pata panijaboyaberena. Bajayata pina bajarapacuenia xaniavaetsia jivi pecopiapitabiabivi, xaniavaetsia copiapita āngelevi, apo yapētae ata āngelevicuene.

³ Panajamatabënapitabiabare pamonae jebatsi penaneconitsivi pejebabiabibota Dioso pejumecovënëtsixae. Paxamë ata, bajarapamonae yajava, bepanenajuananeconitsivi panataema. Pamonae ata bejiobiaexanatsi Dioso pejumelivaisi yabara, bajarapamonae ata pajamatabëcueneyavenonare. Paxamë ata, bajarapamonae yajava, bepapecabejiobiaexanaevi panataema.

⁴ Daxitajivi beyaitane penacojobijivi. Pajivibeje baja napitabeje, apo benavecuamatayajitsibeje. Pebi apo bejaitsi itsava pijavavecua. Petiriva pijinia apo bejaitsi itsanë pamonavecua. Tshipaji Dioso naneconitsiaexanaena bajarapitsipibisiacuene pexanaevi.

⁵ Pëtsa bitso pajitsipame palata. Pasivajamatabëcuenearëyamëre saya xuayovajëto paxainame. Tshipaji Dioso jumaitsi mapacueniaje: “Apo copatsinë tsane patacayajavapononaeyava,” jai Dioso. ⁶ Bajaraxuata ajumejunavijibia namataenetsia najumaititsi mapacueniaje:

Dioso cajena vajanacayavenonaenë. Nexata apo junavitsi tsane, itsajivi nacaitsacueniabijitsia ata, najaitsi vaxaitsi namataenetsia.

⁷ Panajamatabënapitabiabare pamonae bajayata pacatsipaeba Dioso pejumelivaisi. Pacanaëjere pacuenia bajarapamonaemi Dioso pejumecovënëtsijavaveliacujinae, xaniavaetsia jinavanapa Dioso pitabarata matapania petëpaejavabelianexa. Bajarapacuenia paxamë ata Dioso pitabarata xaniavaetsia pajinavanapare matapania petëpaejavabelianexa.

⁸ Jesucristo eputua itsajamatabëcuene apo xainae tsane. Pamatacabibeje ponapona, caejamatabëcuene xainaponaponaena. Pevajënaeyabelia ata daxitamatacabijavabelianexa, caejamatabëcuene xainaponaponaena. ⁹ Pëtsa pacopabame panejumecovënëtsijava palivaisi baja pajumecovënëtame. Pëtsa pajumecovënëtame itsalivaisi bajarapalivaisivecua. Paxamë baja Dioso panejumecovënëtsijava, pajamatabëcuenesaëmë tsavanapae Dioso asivaya papecayavenonaexae. Diosojavabelia apo pajamatabëcuenesaëmë tsavanapae tsipae, panexaejava paatsobi atamë. Itsamonae jumecovënëta pexaejava piatsobinexa pitavetsilivaisi. Nexata pexaejava atsobabiaba. Itsiata baitsi jane pexaejava piatsobijava pejamatabëcueneta apo jamatabëcuenesaëyaexanaetsi Dioso pejumecovënëtsijava.

¹⁰ Jesús itsa cobematabiabarutatsi cruzajavabelia, vaxaitsi nacasivatëpa. Nexata pamonae tsiteca ëperujulivaisimi sivajamatabëjumaitsi: “Itsa jumecovënëtaponaponaenajë Dioso Moiséspijinëta penajumecopatsilivaisi, nexata xanë ata Dioso necapanepaena,” siva-jamatabëjai, bajarapamonae saya jamatabëcuenenavëxaniaba. Bajarapitsijamatabëcuene penajamatabëxainaevi, apo capanepaetsi tsane Diosojavabetsia. Tshipaji Jesús pesivatëpaejavatsi, apo jumecovënëtsi. ¹¹ Sacerdotevi pepo penamatacatorobinë dajubinë beyaxuababiaba. Nexata bajarapajana cajoneyabiaba Lugar Santísimojavabelia, itsajota baitsi Dioso peponaponaenexa yatuucuta. Bajarapayatuucutsijavaënëta sacerdotenë dajubinë pijana rajutabiaba ofrendacuenia Diosojavabelia, Dioso pevēcuaajibiaexanaenexatsi pibisiacuene pexanabiabineconi. Nexata bajarapadajubinë pevi sacerdotenë itsa tajuita, tomarapënëyabelia tajuitabiaba. ¹² Bajaraxuata Jesús ata Jerusalén tomarapënëyabelia bejiobiaexanatsi. Bajaraxuacujinae beyaxuabatsi. Nexata daxita pamonae jumecovënëta Jesús pesivatëpaejavatsi, bajarapamonae Jesús pijana pejamatabëcueneta Dioso vecuaajibiaexanatsi pibisiacuene pexanaenonimi. ¹³ Nexata vaxaitsi ata becopatatsi baja perujulivaisi vajajumecovënëtsijavami. Nexata bejumecovënëtatsi Jesús pelivaisi. Nexata pacuenia Jesús nacopata itsamonae pebejiobiaexanaenexatsi vajanacasivatëpaenexa vajaneconi yabara, bajara pijinia pacuenia vaxaitsi ata benacopatatsi itsamonae vajanacabejiobiaexanaenexa Jesús pelivaisi yabara. ¹⁴ Mapanacuataje apo xainaetsi patomarata daxitamatacabijavabelianexa jinavanapaejitsiatsi. Biji rajane abaxë vajënaevetavanapatsi athëbëpijtomara, patomarata patsijitsiatsi athëbëtatsia. ¹⁵ Jesucristo vajanacasiivatëpaxae, Dioso nacatocopata vajavajëtabiabinexa Diosojavabelia. Nexata itsa vajëtabiabinatsi Diosojavabelia, jumaitsitsi tsabiabi tsane: “Diosomë, bitso ayajamatabëcuenenëmë,” jaitsi tsabiabi tsane Diosojavabelia. Bajarapacuenia vajajumaitsiabiabijava Diosojavabelia, Dioso taena ofrendacuenia bevajarajutaponaeyava Diosojavabelia. Bajaraxuata itsa vajëtabiabinatsi Diosojavabelia, bajarapacuenia jumai tsabiabi tsane. ¹⁶ Pëtsa panacofënëtame pexaniacuene panetoxanavanapaejava itsamonaejavabelia. Itsajivi penamatavenonaeyava, parajutsianame paneyavenonaenexa bajarapacuenia. Bajarapacuenia itsa parajutsianame itsajivi penamatavenonaeyava, Dioso pacasivajamatabëcuenearëya tsane.

¹⁷ Pamonae ancianovi, xua pacaitoroba, pajumecovënëtabiabare. Itsamonae ata, pamonae pijinia Dioso tocopatatsi papecaevetsinexa Dioso panejumecovënëtsivixae, xua pacaitoroba, pajumecovënëtabiabare. Bajarapamonae yapëtanenua pacuenia Diosojavabelia naneconitsipa, xaniavaetsia itsa apo pacaevetsi. Itsa pajumecovënëtabiabiname papecaevetsivi papecaitorobicuenia, nexata papecaevetsivi jamatabëcueneyavenonaeyava

pajinavanapaename. Nexata pacasivajamatabëcuenabarëya tsane papecaevetavanapaevajava yabara. Paxamë ita apo pajumecovënëtsimë tsipae, nexata papecaevetsivi pacasivajamatabëcuenebëjai tsipae. Nexata papecaevetsivi toacuenebi tsipaetsi papecajamatatabëcueneyavenonaenexa Dioso panejumecovënëtsijava yabara.

¹⁸ Panetovajëtaponae name Dioso javabelia. Paxanë pajamatabëjumaitsinë: “Vaxaitsi baja apo naneconitsitsi Dioso javabelia, jivijavabelia ata,” pajamatabëjanë. Bajarapacuenia patavajënaeyabelia Dioso pitabarata aneconijibia patajinavanapaenexa, panetovajëtsianame Dioso javabelia. ¹⁹ Panetovajëtaponae namenua Dioso javabelia Dioso patanetocopsatsinexa pataponae nexa paxamëjavabelia. Tsipaji icatsia pajitsipajë bepijia patapatsinexa paxamëjavabelia.

Pacuenia Pablo Dioso pejumecovënëtsivi tovajëta Dioso javabelia, pacuenia ata jamatabënajina itsamonae Dioso pejumecovënëtsivi, yabara pelivaisi

²⁰⁻²¹ Jesucristo vajanacasivatëpaecujinae, vaxa Dioso icatsia asaëyaexanatsi. Bajaraxuata yapëtanetsi pexaniajaicuene Dioso athëbëabetsia vajanacacapanepaejavanexa daxitamatacabijavabelianexa. Dioso yavenona daxitajivi jamatabëcuenexanepanaeya pejinavanapaenexa. Nexata pacatovajëtatsi Dioso javabelia papecarajutsinexa xua panamatavenoname, panetoxanavanapaenexa pacuenia Dioso pacatojitsipa. Vajëtajënuu Dioso javabelia Jesucristo pejamatabëcueneta vajanacajamatabëcuenexanebinexa pacuenia jitsipa. Pacuenia oveja pexainaenë xaniavaetsia evetaponapona pijaoveja, bajara pijinia pacuenia vajatuxanenë Jesucristo xaniavaetsia nacaevetaponapona. ¡Jesucristo bitso ayaijamatabëcuenenë tsaponapona daxitamatacabijavabelianexa! Bajara ita tsane.

²² Tajamonae, pacaitorobatsi xaniavaetsia panenamuxunaevetsinexa palivaisi pacatoyaquinatsi mapabaxutotaje. Tsiquirilivaisiyo saya pacatoyaquinatsi patacamuxujjio binexa panevajënaeyabelia paneajamatabëcuenesaënexa Dioso panejumecovënëtsijava. ²³ Pexanialivaisiyo pacatoyaquinatsi patacatsipaebinexa mapacueneye. Vajabanenë Timoteo rabaja pitsapa penaneconitsivi pejebabiabibovecua. Itsa patsiarena bepijiayo xanëjavaberena, nexata barëponae najë paxamëjavabelia.

²⁴ Nebajacobiana daxita Dioso pejumelivaisita papecaevetsivi, daxita vajamonae Dioso pejumecovënëtsivi yajava. Vajamonae ata, Italia nacuapijivi, pacajamatabënajinalia.

²⁵ Daxita paxamë pacatovajëtatsi Dioso javabelia papecayavenonaenexa Dioso. Bajara ita tsane.

Mapabaxutoje Santiago toyaquina Dioso pejumecovënëtsivijavabelia

Pacuenia Santiago toyaquina mapabaxutoje Dioso pejumecovënëtsivi nacayajatsia peji-navanapaevi yabara pelivaisi

¹ Xanë Santiagonë, Dioso pijajivitonënë, vajatuxanenë Jesucristo ata pijajivitonënë. Pacatoyaquinatsi pajudiovimë patacabajacobinexa. Israelpijinëmi pexi doce ponëmi beje papemomoxiyajuvënëvimë. Pepo panijanacuata picani panejinavanapaevimi. Aeconoxae baja pepo panijanacuamivecua, nacayajatsia pajinavanapame daxita nacuanëjava.

Pacuenia Dioso pejumecovënëtsivi itsa jamatabëypätanepacuenexanepana pexanaenexa, bevajëta Diosojavabelia yabara pelivaisi

² Tajamonae, pasivajamatabëcuenebarëyamë tsane daxitacuene, apo panejitsipaecuene ata, itsa pacatocopiapatsiana. Tspaji raja bajarapacuene pacatocopiapatsiana papecajamatabëcueneëjëtsinexa Dioso panejumecovënëtsijava yabara. ³ Bajarapacuenia Dioso panejumecovënëtsivi pacajamatabëcueneëjëtaponae paneajamatabëcuenesaë tsaponaeenexa panevajënaeyabelia Dioso panejumecovënëtsijava. Payapëtaneme rabaja bajarapacuene yabara. ⁴ Apo panejitsipaecuene pacatocopiapatsi ata, pajamatabëcuenesaëmi tsavanapae tsane bajayajebi. Nexata pajamatabëcuenevitsabaponae name Diosojavabelia. Nexata apo pacatosai cae tsane itsalivaisi ata panejamatabëëthëtota.

⁵ Paxamë itsa pajamatabëypätaneme pacuene xanepana paneexanaenexa, nexata bevajëtaneme Diosojavabelia papecaypätaeyaxanaenexa Dioso. Nexata Dioso pacayapëtaeyaxanaena pacuene xanepana paneexanaenexa. Dioso cajena bayapëtaeyaxana daxita pamonaevajëta bajaraponëjavabelia. Apo jumeitavetsi cajena itsa vajëtatsi. ⁶ Itsa pavajëtaneme Diosojavabelia, pajamatabëjumaitsimë: “Dioso cajena nacayapëtaeyaxanaena xua vajëtatsi,” pajamatabëjamëre. Pëtsa pajamatabëjumaitsimë: “Dioso cajena itsiata apo nacayapëtaeyaxanae tsane xua vajëtatsi,” pajamatabëjamë pëtsa. Pajivi jumeaeba Dioso peyapëtaeyaxanaejavanexatsi, bajarapajivi xaniavaetsia apo najamatabëxainae. Bajarapajivi pejamatabëcuene bemalataca picani. Pacuenia malataca xaniavaetsia apo rucae jovibota, bajara saya jamatabëcueneitsi bajarapajivi. Apo najamatabëxainae caelivaisi, palivaisi Dioso yapëtaeyaxanaejitsiatsi. ⁷⁻⁸ Bajarapajivi anijamatabëcuenebeje xaina. Najamatabëcuene epatajërërëcabiaba itsa exana daxitacuene. Nexata pajivi jumeaeba Dioso peyapëtaeyaxanaejavanexatsi, pëtsa patocopatame pejamatabëjumaitsinexa: “Dioso cajena nerajutsiana tavajëtsijava,” pejamatabëjainexa. Dioso cajena apo rajutsitsi tsane xua vajëta bajarapajivi.

⁹ Dioso pejumecovënëtsinë apo xainae ata pecobecovëjavayo, jivi apo ya iyatae atatsinua, itsiata bejamatabëcuenebarëya Dioso pejumecovënëtsinëxae. Tspaji Dioso pejunatsix-atsi Dioso pijajivitonënë, apo bejiobi tsane daxitamatacabijavabelianexa. ¹⁰ Dioso pejumecovënëtsinë itsa bitso pexainanë pexainaejava, itsamonae itsa yacajërëtsi pexainacuene, itsiata bejamatabëcuenebarëya Dioso pejumecovënëtsinëxae. Tspaji pacuenia ponatoxi bepjiia matonoverevereca, bajara pijinia itsi tsane bitso pexainacuene ata. Bepjiia vereverecaena. ¹¹ Itsa baja juameto tajë rucaina, icotia bitso ataju. Nexata ponatoxi tsaquena. Pematono ata othopa. Nexata pexaniamatonojavami ata verevereca bepjiia. Bajara pijinia itsi tsane bitso pexainaejava pexainaevi ata. Yajavavereverecaena pexainaejava pecanajetanuaeapatota ata.

Pacuenia Dioso jivi apo jamatabëcueneëjëtsi pibisiacuene pexanaeyaxanaenexa yabara pelivaisi

¹² Pamonaevajëtaneme jamatabëcueneëjëtsi atatsi, najamatabëcueneecatata pibisiacuene pexanaeyaniva, bajarapamonae jamatabëcuenebarëya. Tspaji itsa vecuapanepa pejamatabëcueneëjëtsijavatsi, pibisiacuene exanaejejava, nexata bajarapamonae Dioso rajutsianatsi pexaniacuenejava. Rajutsianatsi matababi apo pevereverecajava. Bajarapacuene yabara Dioso najumecapanepaeya jumaitsi perajutsinexatsi pamonaevajëtsi Dioso. ¹³ Itsa pacajamatabëcueneëjëta pibisiacuene paneexanaenexa, pëtsa jamatabëcuenenavëxaniabiaya pajumaitsimë: “Dioso raja nejamatabëcueneëjëta pibisiacuene taexanaenexa,” pajamë pëtsa. Dioso cajena apo jamatabëcueneëjëtsi itsajivi ata pibisiacuene pexanaeyaxanaenexa. Itsajivi ata pijinia apo cajëpaetsi pejamatabëcueneëjëtsinexa Diosojavabelia pibisiacuene pexanaenexa Dioso. ¹⁴ Pajivi jamatabëcueneëjëtsi pibisiacuene pexanaenexa, bajarapajivi copiaya pejamatabëëthëtota jamatabënaponapona papibisiacuene jamatabëxana. Nexata jane

baja itsa jamatabëcuenejëtatsi pibisiacuene pexanaenexa, bajarapapibisiacuene exana. ¹⁵ Pajivi pibisiacuene exana, bajarapajivi exana pacuenia copiaya pejamatabëthëtota najamatabëxaina. Nexata tsiteca pibisiacuene itsa exanapona, pepacuene Diosovecua naxuabiana bajarapapibisiacuene pexanaponaexae.

¹⁶ Tajamonae bitso patacaasivavi, jamatabëcuenenavëxaniabiaya pëtsa pajamatabëjumaitsimë: “Dioso nejamatabëcuenejëta pibisiacuene taexanaenexa,” pajamatabëjamë pëtsa. ¹⁷ Tspajivi daxita pacuene pepo pexaniacuene, Dioso baja cajena vajanacatoitorobicuenetsica. Bajaraponë pexanaenë daxita xua naitayotarubena itaboxotatsia. Dioso cajena daxitamatacabijavabelianexa caejamatabëcuene penajamatabëxainanenë. Caejamatabëcuene Dioso nacasivanajamatabëxaina vaxaitsijavaberena. ¹⁸ Dioso baja cajena copiaya najamatabëxaina pexanaenexa pacuenia jitsipa. Nexata nacayapëtaeyaexana pejumelivaisi pexaniajailivaisi. Bajaraxuata nacarajuta pejanajamatabëcuene pitavajamatabëcuene. Vaxaitsi copiaya Dioso itsa jumecovënëtsati, Dioso pexitsi nacaexana. Pamonae ata cotocaevi Dioso jumecovënëta, bajarapamonae ata Dioso pexi exanatsi. Nexata vaxaitsi, copiaya Dioso vajajumecovënëtsivi, Dioso nacatane bematapijivitsi. Cotocaevi pijinia Dioso pejumecovënëtsivi, Dioso tanetsi bejuyapijivi.

Pacuenia bexanavanapa pamonae xaniavaetsia jumecovënëta Dioso yabara pelivaisi

¹⁹ Tajamonae bitso patacaasivavi, pacanaëjëtsianame mapalivaisije, palivaisi pacatsi-paebijitsiatsi. Daxita paxamë xaniavaetsia bepanamuxunaevetame Dioso pejumelivaisi. Apo bepacuacuajimë abaxë copiaya xaniavaetsia panajamatabëxainanejevamë. Apo bepaanaepanaemënuva bepijia. ²⁰ Tspajivi itsa anaepanatsi, Dioso apo toexanaetsi pexaniacuene, pacuene Dioso jitsipa. ²¹ Bajaraxuata pacopabare daxita pibisiacuene panenajamatabëxainaejava. Pacopabarena daxita pibisiacuene paneexanaejava itsamonaejavabelia. Dioso raja pejumelivaisi pacatsijamatabëuba. Bajaraxuata bevelijamatabëcuenevi nataeya pajumecovënëre Dioso pejumelivaisi. Bajarapalivaisi itsa pajumecovënëtame, nexata pacacapanepaena Diosojavabelia.

²² Pacuenia Dioso pejumelivaisita jumaitsi, jumecovënëtsiaya paexanaponare. Pëtsa pajamatabëjumaitsimë: “Pacuenia Dioso pejumelivaisita jumaitsi, apo exanae atanë, apo itsacuene,” pajamatabëjamë pëtsa. Tspajivi saya pajamatabëcuenenavëxaniabijitsipame. Nexta itsa apo paexanaemë tsipae pacuenia Dioso pejumelivaisita jumaitsi, panaeconitsipame Diosojavabelia. ²³ Pajivi jumetae ata Dioso pejumelivaisi, itsiata itsa apo exanae pitorobicueniatsi, bajarapajivi jamatabëcueneitsi pacuenia itsi ponë naitabaratanexaxuta. ²⁴ Ponë tsaxuta naitabaratanexa, penaitabarataecujinae pona baja. Nexata bajaraponë bepijia nacofënëta pacuenia itabarajumapeitsi. ²⁵ Dioso cajena pejumelivaisi bitso xanepana. Caëjëpatsinua vajanacapanepaenexa bajaraponëjavabelia. Pajivi daxita bajarapalivaisi pitorobicueniatsi exanapona copatsinejeva, bajarapajivi bitso Dioso yavenonaenatsi daxitacuenejavabelia.

²⁶ Pajivi jumaitsi ata: “Xanë bitso toexanaponaenavë Dioso pejitsipacuena,” jai ata, itsiata itaxutojema itsa cuacuajiai tsabiabi, bajarapajivi saya jamatabëcuenenavëxaniabi. Tspajivi Dioso apo pejitsipacuena cuacuajiai. Nexta bajarapajivi xua Dioso toexanapona apo tonamatamotsi tsanetsi Diosojavabelia. ²⁷ Dioso pejumecovënëtsijivi, pajivi Dioso aneconijibatatanetsi, exanapona mapacueniaje. Yavenona tsonijivixi. Yavenonana pamona pevecatëpaevitsi bitso itsa namatavenona itsacuenejavaxi. Pajivi Dioso pejumecovënëtsijivi, nayajivitaeyaponapona pibisiacuene pexanaeyaniva, pacuene exanabiaba mapanacuapijivi, Dioso apo pejumecovënëtsivi.

2

Pacuenia Dioso pejumecovënëtsivi muxujiobatsi daxitajivi najëpaeya jamatabëcueneexanepaeya petaenexa yabara pelivaisi

¹ Tajamonae, ayaijamatabëcuenenë vajatuxanenë Jesucristo panejumecovënëtsixae, daxitajivi najëpaeya pataenexa. Pëtsa itsamonae bijiaya pataneme. ² Nexta panenacaetuatsijavata, riconë, pexaniajava penaxatatsinë, napatsipa, oro anillo penacobexatatsinë. Bajarapapatota pijinia bepejiobinë, perujusetoyo penaxatatsinë, napatsipa. ¿Detsa pacuenia pacopiapitsipame bajarapitsinëbeje? ³ Caenë meta xaniavaetsia pacopiapitsipame, pexaniajava penaxatatsinë. Paecaeyaexanaejitsipame pexaniajavata. Ponë bepejiobinë, apo pacopiapitsimë tsipae xaniavaetsia. Saya panucaeyaexanaejitsipame. Itsa jume, paecaeyaexanaejitsipame irata. Nexta bajarapacuenia itsa paexanaejitsipame, pexaniacuene apo paexanaemë tsipae Dioso pitabarata. ⁴ Bajarapacuenia itsa paexanaejitsipame, najëpaeya bajaraponëbeje apo pataemë tsipae. Caenë payaiyataejitsipame. Itsanë

saya bijiaya pataejitsipame. Nexata bajarapacuenia itsa paexanaejitsipame, pibisiacuenia panajamatabëxainaejitsipame.

⁵ Tajamonae bitso patacaasivavi, panejumetaema. Dioso raja itapetatsi pamonaе apo pexainaeви mapanacuataje. Bajarapamonae Dioso itapetatsi pexi pexanaenexatsi. Nexata bajarapamonae itsa najamatabëcueneocopatsiana Cristojavabelia, bitso pexainaeви tsane athëbëtsia, Dioso pijanacuatsia, itsajotatsia Dioso eveta daxitacuene. Bajarapamonae ata tocopatsianatsi Cristo pebarëevetsinexatsi daxitacuene, pacuenia Dioso najumecapanepaeya jumaitsi Dioso pijajivi yabara. ⁶ Itsiata baitsi jane bajarapacuenia bepejiobivi yabara pejumaitsiyava payapëtae atamë, paxamë bijiaya pataeyabiabame bepejiobivi. Ricovi baja cajena xainapona bitso pexainaejiva panejumata. Bajarapamonae pacaneconitabiabanua juezmonaejavabelia juezmonae papecananeconitsiaexanaenexa. ⁷ Ricovi cuaicuaijai tsabiabi pibisiacuenia Cristo yabara, ponë vaxaitsi yayiataeya jumeovënëtanapatsi.

⁸ Dioso pejumelivaisibaxutota jumaitsi mapacueniaje: “Asivamëre itsamonae ata pacuenia xamë nijacuata nasivamë,” jai. Bajarapalivaisi pexanialivaisi bitso daxitalivaisianë matatoxenetsia. Nexata bajarapalivaisi pepacuene itsa pajumecovënëtsianame, pexaniacuene paexanaename. ⁹ Itsa payaiyataejitsipame itsamonae, itsamonae pijinia bijiaya itsa pataejitsipame, nexata paexanaejitsipame pibisiacuenia. Pananeconitsipame Diosojavabelia. Tsipaji najëpaeya apo pataemë tsipae daxitajivi Dioso papecaitorobicuenia. ¹⁰ Pajivi jumeovënëtsi ata Dioso Moiséspijinëta penajumecopatsilivaisi, itsiata bajarapalivaisita caelivaisiyo itsa apo jumecovënëtsi, nexata itsiata naneconitsiana Diosojavabelia bajarapalivaisita celivaisiyo apo pejumecovënëtsixae. Nexata bajarapajivi daxita bajarapalivaisi apo bepejumecovënëtsijivacuenia, Dioso taenatsi. ¹¹ Dioso jumaitsi: “Pëtsa jaitame itsava nijavavecu,” jai. Petiriavinexa pijinia jumaitsi: “Pëtsa jaitame itsanë amonavecu,” jai. Dioso icatsia itsajumeyo jumaitsi: “Pëtsa beyaxuabame jivitonë,” jai. Nexata ponë apo jaitsi ata itsava pijavavecu, itsiata itsa beyayuxabame jivitonë, Dioso tanetsi daxita bajarapalivaisi apo pejumecovënëtsinëcuenia. ¹² Jesucristo papecaitorobicuenia itsa paexanaename, nexata apo pananeconitsimë tsane Diosojavabelia. Itsa apo pajumecovënëtsimë tsane, nexata pananeconitsianame Diosojavabelia. Bajaraxuata itsa pacuacuaijamë, pacuacuaijamëre pexanialivaisi. Paexanavanaparena pexaniacuene pacuenia Jesucristo pacaitoroba. ¹³ Paxamë itsa apo paitaxutotsoniatamë itsamonae ata, nexata juya Dioso apo pacaitaxutotsoniatæ tsane pamatacabi Dioso naneconitsiaexanaena daxitajivi pibisiacuenia pexanaeconi yabara. Itsiata baitsi jane itsa paitaxutotsoniataneme itsamonae ata, juya Dioso pacaitaxutotsoniatæna. Nexata Dioso apo pacananeconitsiaexanae tsane.

Pacuenia Dioso pejumecovënëtsivi pexaniacuene bexanavanapa yabara pelivaisi

¹⁴ Tajamonae, pajivi jumaitsi ata: “Xanë jumecovënëtajë Jesús pelivaisi,” jai ata, itsiata itsa apo exanae pexaniacuene itsamonaejavabelia pacuenia Dioso nacaitoroba, bajarapajivi apo jumenamatamotsi Diosojavabelia. Bajarapacuenia saya itsa jumaitsi tsane pecuibota, bajarapajivi Dioso apo capanepae tsanetsi. ¹⁵⁻¹⁶ Itsamonae Dioso pejumecovënëtsivi bitso namatavenonaejitsipi penaxatatsijava, pexaejiva ata. Nexata bajarapamonaejavabelia paxamëyajuvënëjivi jumaitsi ata tsipae: “Xaniavaetsia baja paponare. Dioso pacayavenonaena panenaxatatsijavanexa paneaqueyaniva. Pacarajutsitananua panexaejavanexa ata,” jai ata tsipae, nexata itsiata bajarapajivi apo jumenamatamotsi tsipae. Tsipaji apo itaxutotsoniatæ. Saya itoroba peponaenexa. ¹⁷ Bajara pijinia itsi Jesús pelivaisi vajajumecovënëtsijava. Pajivi pexaniacuene apo toexanae itsamonaejavabelia, bajarapajivi jumaitsi ata: “Xanë jumecovënëtajë Jesús pelivaisi,” jai ata, itsiata apo jumenamatamotsi. Tsipaji pacuenia Dioso itorobatsi, apo exanae.

¹⁸ Nexata pajivi Jesús pelivaisi jumecovënëtsi ata, itsiata pexaniacuene itsa apo toexanabiabi tsane itsamonaejavabelia, nexata meta itsajivi jumai tsane bajarapajivijavabelia: “Xamë jumaitsimë tsabiabi: ‘Xanë jumecovënëtajë Jesús pelivaisi,’ jamë tsabiabi. Itsiata pexaniacuene apo toexanabiabimë itsamonaejavabelia pacuenia Dioso nacaitoroba. Nexata apo cajamatabëcueneitajëtatsi nexaniajaicuene nejumecovënëtsijava Jesús pelivaisi. Tsipaji pexaniacuene apo toexanabiabimë itsamonaejavabelia pacuenia Dioso nacaitoroba. Xanë rajane pexaniacuene toexanabiabajë itsamonaejavabelia pacuenia Dioso nacaitoroba. Bajarapacuenia pexaniacuene tatoexanabiabixae itsamonaejavabelia catsitanajamatabëcueneitajëtatsi taxaniajaicuene tajumecovënëtsijava Jesús pelivaisi,” jai meta tsane itsajivi pajivijavabelia pexaniacuene apo toexanabiabi itsamonaejavabelia, Jesús pelivaisi jumecovënëtsi ata. ¹⁹ “Caenë rabaja tsaponaponaе Dioso,” pejalivaisi paxamë pajumecovënëtamë. Xanepana rabaja picani. Itsiata pexaniacuene itsa apo patoexanaemë tsipae itsamonaejavabelia, pajemajamë tsipae. Tsipaji dovathi ata, pijajivi yajava,

jumecovënëta: “Caenë rabaja tsaponapona Dioso,” pejalivaisi. Bajaraxuata dovathi pija-jivi barëneconecojai pecajunavi. ²⁰ Paxamë pajamatabëcuenelivaisijibimë. Vaxaitsi jumaitsi atatsi: “Xanë jumecovënëtajë Jesús pelivaisi,” jai paxamë pajumecovënëtame. Xanepana rabaja picani. Itsiata pexaniacuene itsa apo patoexanaemë tsipae itsamonaejavabelia, pajemajamë tsipae. Tsipaji dovathi ata, atatsi, itsiata pexaniacuene itsa apo toexanabi-abitsi itsamonaejavabelia pacuenia Dioso nacaitoroba, ajumematamobitsi cajena Dioso-javabelia. ²¹ Bajayata vajasalinainëmi Abrahampijinë xaina pexënatonëyo. Pevënë Isaac. Nexata Abrahampijinë Dioso jamatabëcuenejëtsiaya itorobatsi penacoxibeyaxuabinexa picani. Dioso jumaitsi Abrahampijinëjavabelia: “Nexënatonëyo beyaxuare ofrendacuenia tanerajutsinexamë,” jai Dioso Abrahampijinëjavabelia. Nexata Abrahampijinë ajena nacoxibeyaxuabijitsia, Dioso itavetatsi. Abrahampijinë pejumecovënëtsixae pacuenia Dioso itorobatsi, nacoxicëtabuata picani penacoxibeyaxuabinexa. Bajaraxuata Abrahampijinë Dioso aneconijibiatanetsi. ²² Abrahampijinë cajena Dioso jumecovënëta pacuenia tajëvelia Dioso najumecapanepaeya jumaitsi. Bajaraxuata exana pacuenia Dioso itorobatsi. Bajarapacuenia itsa exana Abrahampijinë, najamatabëcueneitajëta pepacuene Dioso pejumecovënëtsijava pejamatabëthëtojavavetsina. ²³ Nexata bajarapajamatabëcuenelivaisi yabara Dioso pejumelivaisibaxutota jumaitsi Abrahampijinë yabara mapacueniaje: “Abrahampijinë jumecovënëta pacuenia Dioso najumecapanepaeya jumaitsi. Bajaraxuata Dioso aneconijibia tanetsi,” jai baja cajena Dioso pejumelivaisibaxutota Abrahampijinë yabara. Nexata Abrahampijinë yabara jivi jumai tsabiabi: “Abraham raja Dioso piasivanëtsi,” jai tsabiabi.

²⁴ Nexata baja paxamë payapëtaneme mapacueneje. Pajivi jumecovënëtsi ata pacuenia Dioso najumecapanepaeya jumaitsi, itsiata itsa apo exanabiabi pexaniacuene, bajarapajivi aneconijibia Dioso apo taetsi. Pajivi jumecovënëta pacuenia Dioso najumecapanepaeya jumaitsi, nexata itsa exanabiaba pexaniacuene, bajarapajivi Dioso aneconijibia tanetsi. ²⁵ Bajara pijinia pacuenia bajayata Dioso aneconijibia tanetsi Rahabpijivami pibisiacuene pexanabiabivami ata. Bajarapovami palata pepitsinexa, pibisiacuene exanabiaba pëvitota. Itsiata baitsi jane bajarapovami pexaniacuene exana. Tsipaji copi-apita xaniavaetsia Israelpijinë pemomobeje. Bajaraponëbeje jivi peyaenëbinëbeje vajabit-saë pexanaenexa bajara patomarapijivijavabelia. Rahabpijivami yavenonanua bajaraponëbeje peponaenexabeje saicaya namutua pijavajabitsaë pebeyaxuabiyavitsibeje. Bajarapacuenia Rahabpijivami pexaniacuene pexanaexae Dioso aneconijibia tanetsi. ²⁶ Piasaëtsaponaponaejivi ata itsa baja ajumalijibi, tēpa baja. Apo exanae baja itsacuenejavayo ata pexaniacuene pevajënaeyabelia. Bajara pijinia vaxaitsi ata jamatabëcueneitsi Jesús pelivaisi vajajumecovënëtsivi. “Xanë jumecovënëtajë Jesús pelivaisi,” jai atatsi, itsiata itsa apo exanaetsi pexaniacuene pacuenia Dioso nacaitoroba, bevajajamatabëcuenetëpaevi Dioso tsitajinavanapatsi.

3

Pacuenia itsi vajeabarëto yabara pelivaisi

¹ Tajamonae, paxamëyajuvënëvi vënëlivaisitaniji pacuenia ayaiBITSaëto jitsipa penaexanaenexa Jesús pelivaisi jivi petsipaebivinexa. Itsiata baitsi jane ayaiBITSaëto apo benaexanae jivi livaisi petsipaebaponaevinexa. Paxamë rabaja payapëtaneme mapacueneje. Paxanë Jesús pelivaisi jivi patatsipaebaponaevi, paitavetaponajë pibisiacuene pexanaejava. Nexata pibisiacuene pexanaejava pataitavetsicujinae, bajarapapibisiacuene itsa pexanaejitsipajë, Dioso bitso ayaiacuena panenaneconitsiaexanaejitsipa daxitajivi mata-toxenetsia. ² Daxitatsi vaxaitsi itsajavata banacajumejemaba pibisiacuena vajacuaicuai-jainexa, pacuenia picani apo becuaiicuaijaisi. Pajivi pibisiacuena apo cuaiicuaijai, bajarapajivi jamatabëcuenesaë baja Diosojavabelia. Nexata bajarapajivi caëjëpatsi penajamatabëcuenesaëtsinexa daxita pibisiacuene pexanaeyaniva. ³ Caballo vajavësimumufetsinexa tsicuiboxatatsi freno. Nexata freno caballovecua tsiquirijavayo ata, itsiata caëjëpa caballo vajavësimumufetsinexa itsabelia jitsipatsi vajaponaenexa. ⁴ Bajara pijinia itsi barco ata, pinijimo ata. Jovibo ayai ata, itsiata petabufetaicaenë tsiquiritenapayo ata, barcotabufe cajënapona itsabelia jamatabëpona peponaenexa. ⁵ Bajara pijinia itsi tsiquiri-isotoyo ata. Itsa tajua, naexana ayaiisoto petajuenexa pinijiunu ata. Bajara pijinia itsi vajeabarëto ata. Tsiquirijavayo picani vajeabarëto. Itsiata caëjëpatsi pecuaicuai-jainexa ayailivaisi. ⁶ Vajeabarëto cajena ayai, pacuenia isoto ayai. Vajeabarëtota raja pibisiacuene exanatsi daxita vajavi matatoxenetsia. Nexata vajacuaicuaijajava

nacajamatabëcuenebijiana. Tsiquirijiviyotsijavaveliacujinae vajatëpaejavabelianexa, bajara-pacuenia cuaicuajiaitsi. Dovathi vajanacaitorobijava vajajumecovënëtsixae, cuaicuajiaitsi pibisiacuenia. ⁷ Pacanaëjère mapacuneje. Jivi caëjëpatsi penaitajuaniaex-anaenexa daxitaviriadajubiyajuvënëvi. Caëjëpatsinua penaitajuaniaexanaenexa unupijivi ata, pepunaevi ata. Caëjëpatsinua penaitajuaniaexanaenexa pecotobëxëta pejinavanapaevi ata, manuamenepijidujuai ata. Itsamonae bajarapacuenia naitajuaniaexana baja pejume-covënëtsinexatsi. ⁸ Itsiata baitsi jane itsajivi ata apo caëjëpaetsi penaëbarëtoitavetsinexa jume-jemabiaya pibisiacuenia pecuaicuajijajava pecopatsinexa. Vajaebarëto cajena bitso abeje. Apo nacacaëjëpae vajanajumecataitsinexa. Nexata pacuenia jomo pijaveneno xaina pe-beyaxuabinexa, bajara pijinia itsi vajebarëto. ⁹ Vajaebarëtoata pexaniacuenia jumaitsitsi vaxa Diosojavabelia: “Xamë bitso ayaijamatabëcuenenëmë,” jaitsi. Vajaebarëtoata icatsia pibisiacuenia cuaicuajiaitsi itsamonaejavabelia. Bajarapamonae picani beyaiyatanetsi. Tspaji Dioso nacuenecataeya pexanaevitsi. ¹⁰ Caeëbarëtoata pexaniacuenia cuaicuajiaitsi Diosojavabelia. Pibisiacuenia ata cuaicuajiaitsi itsamonaejavabelia. Tajamonae, apo bex-anaetsi cajena bajarapacuenia. ¹¹ Pacanaëjère mapacuneje. Mera pepitsapaemëthëatsina pitsapaina caera, pexaniara. Apo pitsapae pexaniara, piatsaxara yajava. ¹² Bajara pijinia itsi peubijava ata. Higueranaejavaverena apo pitsapae saicayacuai. Uvanaejavaverena ata apo pitsapae saicayacuai. Jume cajena. Bajara pijinia itsi mera pepitsapaemëthë. Caejavatsina apo pitsapae pexaniara, piatsaxara yajava. Bajara pijinia itsi vajebarëto ata. Caeëbarëtoata apo becuacuajiaitsi pibisialivaisi, pexanialivaisi yajava. Nexata becuacuajiaitsi ëpexanialivaisi.

Pacuenia Dioso pijajivi yapëtaeyaexana pexanaenexa pexaniacuenie yabara pelivaisi

¹³ Paxamë rabaja xaniavaetsia pajumeyapëtaneme Dioso pejumelivaisi. Nexata itsamonae pexaniacuenie bepatsitaexanavanapame pacuenia pajumetaneme Dioso pejumelivaisita. Bajarapacuenia itsamonae pexaniacuenie bepatsitaexanavanapame beveliajamatabëcuenevi nataeya. Nexata daxitajivi pacacueneyapëtaena bitso panejumeyapëtaevicuene Dioso pejumelivaisi. ¹⁴ Itsiata baitsi jane bitso itsa pacuenecaëbabiabame itsamonae, itsa pajitsipabiabamenua jivi paneevetsivinexa papecaexanaenexa, pëtsa jamatabëcuenenavëxaniabiaya pajumaitsimë mapacueniaje: “Xanë bitso xaniavaetsia yapëtaniji Dioso pejumelivaisi,” pajamë pëtsa. Tspaji saya panajamatabëcuene capaëbjitsipame xaniavaetsia Dioso pejumelivaisi paneypëtaejava. ¹⁵ Dioso pejumelivaisi itsa payapëtaejitsipame xaniavaetsia, nexata apo panajamatabëxainamë tsipae bajarapacuenia. Dovathi rajane pejamatabëcueneta pacaitoroba panenajamatabëxainanexa bajarapacuenia. Itsa jume, nexata paxamë panejamatabëcueneta panajamatabëxainame bajarapacuenia. ¹⁶ Itsajota jivi cuenecaëba itsamonae, itsa jitsipabiabanua jivi pevetsivinexa pexanaenexatsi, bajarajota nexata jivi najamatabëcuenejëpaeya apo jinavanapae. Daxitacuenie pibisiacuenie ata exanavanapa. ¹⁷ Biji rajane Dioso itsa nacayapëtaeyaexana pexaniajamatabëcuene, nexata pexaniajamatabëcuene xainatsi. Apo namaxëvanitsitsi. Itsamonae yaiyatanetsi vajeaxanaeyaniva bajarapamonaejavabelia apo pejitsipacuenia. Najamatabëxainatsi itsamonae ata vajanacamuxujiobilivaisi vajajumeyapëtaenexa. Itaxutotsoniatanetsi itsamonae ata. Pexaniacuenie exanatsi. Apo najamatabëcuene epatajërëcaetsi. Apo yamaxëtojorobitsi itsamonae ata. Bajarapacuenia exanatsi Dioso pejamatabëcueneta pexaniajamatabëcuene itsa nacayapëtaeyaexana. ¹⁸ Vaxaitsi jivi itsa nabarajamatabëcuene xanepanaeyaexanaenatsi, namataenetsia penaitoyavi ata, nexata vaxaitsi ata nabarajamatabëcuenexanepanaeya jinavanapaenatsi. Pexaniacuenenua exanavanapaenatsi.

4

Pacuenia jamatabëcueneitsi pajivi jitsipa mapanacuapijicuneje yabara pelivaisi

¹ ¿Detsa xuajitsia paxamëyajuvënëvi anaeya namataenetsia pijanajumenotabiabi pecan-abejabiabi? Bajarapacuenia najumeanaenotabiaba tspaji pejamatabëthëtoata bitso jitsipa pexanaenexa daxita xua pibisiacuenie. Bajaraxuata nabeyabiaba. ²⁻³ Paxamë picani pajitsipame itsacunejava panexainanexa. Itsiata apo pacacaëjëpae panepitsinexa. Bajaraxuata nexata pexainaevi payabarabeyaxuababiabame. Pacobecaëbabiabame itsamonae pexinaejava. Nexata pexainaevi payabarabeyabiabame paneyacajërëtsinexa pecobecovë. Paxamë apo paxainamë panejitsipacuenie. Tspaji pavajëcabiabi atamë Diosojavabelia, itsiata apo pacarajutabiabi xua pavajëcame. Tspaji saya bajaraxua pavajëcabiabame paneexanaenexa daxita xua pibisiacuenie. ⁴ Caejamatabëcuene Diosojavabelia apo paxainamë. ËDiosojacuenie apo pajitsipaemë. Mapanacuata pexinae-cuenie ata bitso payajavajitsipame. Bajarapacuenia panenajamatabëxainanexae, pacuenia

petiriva jamatabêcueneitsi, pova pamonavecuja jaita itsanê, bajarapajamatabêcueneitsimê. Payapêtaneme rabaja mapanacuapijicuene bitso pejitsipaevi, bajarapamonae Dioso bepijavajabitsaê naexana. Bajara pijinia paxamê ata paitsimê. ⁵ Bajarapajamatabêcuene yabara Dioso pejumelivaisibaxutota jumaitsi mapacueniaje vajuacanaêjêtsinexa xaniavaetsia Diosojavabelia: “Espîritu Santo, ponê nacatsijamatabêca, bajaraponê bitso nacaa-siva. Bitso nacatojitsipa vajaasivanexa êDioso,” jai Dioso pejumelivaisibaxutota vajajit-sipaeyaniva mapanacuapijicueneje. ⁶ Dioso cajena nacayavenona vajanajamatabêcuene cataitsinexa pibisiacuene vajaexanaeyaniva. Dioso pejumelivaisibaxutota jumaitsi mapacueniaje: “Dioso yavenona pamonae beveliajamatabêcuenevi natane. Pamonae pijinia beayajamatabêcuenevi natane, Dioso apo yavenonae,” jai Dioso pejumelivaisibaxutota. ⁷ Nexata beveliajamatabêcuenevi nataeya paexanavanapare pacuenia Dioso pacatojitsipa. Panavecuaitavere dovathi. Nexata dovathi pacavecuanajetabajiraviana. ⁸ Pavajêre Diosojavabelia. Nexata Dioso pacayavenonaena. Paxamê pibisiacuene paneexanaevi, pacopare bajarapacuene. Paxamê anijamatabêcuenebeje panexanaevi, Dioso pijalivaisi, pibisijamatabêcuene yajava. Pacopare bajarapajamatabêcuene Dioso papecajamatabêcuene xaniavaetsinexa pibisijamatabêcuenevecua. ⁹ Pibisiacuene paneexanaecononi yabara, bitso panatsinajamatabêxainare. Bitso payaauramêrenua. Pêtsa payabarêyamê. ¹⁰ Beveliajamatabêcuenevi panataema Dioso pitabarata. Nexata pibisiacuene paneexanaecononimivecuja, Dioso pacajamatabêcuenyavenonaena. Nexata panajamatabêcuenyotsianame Diosojavabelia.

Pacuenia nacaitaveta itsamonae Dioso pejumecovênêtsivi pibisiacuena vajabaracuaicuajiyaniva yabara pelivaisi

¹¹ Tajamonae, pêtsa najumetsênêtsia namataenetsia panabaracuaicuajiamê. Pajivi najumetsênêtsia baracuaicuajiai Dioso penajuajumecovênêtsivi, bajarapajivi naneconita Diosojavabelia. Dioso penajuajumecovênêtsivi, pibisiacuene pexanaejava xaniavaetsia cuenyapêtaenejeva, itsa jamatabêjumaitsinua: “Bajarapamonae Diosoecuja naxuabiana pibisiacuene pexanaexae,” itsa jamatabêjai, nexata bajarapajivi ata naneconita Diosojavabelia. Dioso penajuajumecovênêtsivi, najumetsênêtsia itsa baracuaicuajiai, nexata apo jumecovênêtsi pacuenia Dioso itorobatsi. Pacuenia Dioso itorobatsi, itsa apo jumecovênêtsi, nexata apo bepxaniajailivaisi tane. Caranata bajarapajivi jivi bepenaneconitsiaexanaenê natane. ¹² Caenê Dioso nacatonajumecopata vajajumecovênêtsinexa. Bajara jane ponê nacananeconitsiaexanaena pibisiacuene vajaexanaecononi yabara. Bajaraponê caenê caêjêpatsinua pejumaitsinexa itsajiviyojavabelia: “Xamê pepacuene caêjêpatsiame. Nexata nevecuanaxuabianame infirnojavabelia,” pejinexa. Itsa jume, caêjêpatsi pejumaitsinexa: “Xamê baja caeconeijibiaexanatsi. Nexata aneconijibia catanetsi. Nexata cacapanepaenatsi,” pejinexa. Bajaraxuata paxamê Dioso apo pacatocopatsi itsamonae yabara panejumaitsinexa mapacueniaje: “Bajarapamonae Diosoecuja naxuabiana pibisiacuene pexanaexae,” panejinexa.

Pacuenia itsajivi ata apo natsivajênaeyapêtae pacuene meravia pitsijavata tocopiapatsijitsi yabara pelivaisi

¹³ Panenamuxunaevere mapalivaisije. Paxamê abaxê xaniavaetsia payapêtaenejevamê xua Dioso pacatocopatsijitsia paneexanaenexa, ayajamatabêcuenevi nataeya tajêvelia panavajunupaebabiabame. Tajêvelia pajumaitsimê tsabiabi: “Ajena. Itsa jume, pepacuene jane baja meravia, ponaenatsi bajarapatomarabelia. Bajarajotalia caevai nacuenebianatsi palata vajanacanabinexa,” pajamê tsabiabi. ¹⁴ Pêtsa bajarapacuenia ayajamatabêcuenevi nataeya tajêvelia panavajunupaebabiabame. Tsiipaji raja apo panatsivajênaeyapêtaemê xua pacatocopiapatsijitsia meravia pitsijavata. Vajajinavanapaeepatoyo saya tsiquirimatacabiyota jinavanapatsi vajatêpaenexa. Pacuenia itsi nojobo, bajara saya itsitsi vaxaitsi. Nojobo pitsapa bajayacunua caepatoyonexa saya. Bajaraxuacujinae icatsia ajibi baja. Bajara pijinia itsitsi vaxaitsi ata. ¹⁵ Nexata saya bepajumaitsimê: “Itsa Dioso nacatocopatsiana abaxê vajaasaêtsavanapaenexa, jinavanapaenatsi. Exanaenatsi mapacueniaje. Itsa jume, itsacuenia exanaenatsi,” bepajamê saya. ¹⁶ Paxamê saya bepaayajamatabêcuenevimê panataeyabiabame. Nexata paneexanaejavanexa, abaxê tajêvelia panavajunupaebabiabame panatsivajênaeyapêtaenejevamê xua Dioso pacatocopatsijitsia paneexanaenexa. Bajarapacuenia ayajamatabêcuenenê nataeya panavajunupaebabiabijava, pibisiacuene. Tsiipaji panajamatabêxainabiabame bepanijacuata itajara paneexanaejavanexa. Apo pacanaêjêtsimê bajaraxua Dioso papecatocopatsijava, bajarapacuenia paneexanaenexa. ¹⁷ Pajivi yapêtae ata pacuenia picani bexana, itsiata itsa apo exanae, bajarapajivi naneconita Diosojavabelia.

5

Pacuenia bitso pexainaevi muxjibatsi yabara pelivaisi

¹ Bitso panexainaevi, ipanenamuxunaevere mapalivaisije! Panatsinuema bitso ayai-jumeta. Tspijaji raja Dioso pacabejobiaexanaena. ² Bitso panexainaecuene panexani-avaetsijavami, pacatotsabanaena. Pexaniavirijavanë, panenaxatabijavanëmi ata, daxita pacatoucubaxaena. ³ Palatanëanë ata, bitso penamatamotsinëanë, pacatotasibianatsi. Nexata nayapëtaena bajarapapalata apo panecanacuenebijava. Bajarapapalata apo paneyavenonaexae itsamonaë, pacatotasibianatsi. Isoto pacaveriajaviana daxita panexainaëjava yajava. Pacaetuataponame picani papecatoayaijavanexa. Itsiata baitsi jane pamatacabi Dioso naneconitsiaexanaeijtsia daxitajivi, imoxoyo baja pevajënaë tsaponae pecopiapatsinexa. Dioso pacananeconitsiaexanaena. Tspijaji ëpaxamënexa panatoxaniavaetame panexainaecuene. ⁴ Panejumetaema. Pamonae pacatonacueneba panijacue, bajarapamonae tsipaeba itsamonaëjavabelia paneyamaxëitojorobjiva. Apo pamamatotsimë xaniavaetsia pacuenia picani pamamatotsiapaebame. Nexata vajatuxanenë Dioso, daxita athëbënatutsia pevetsinë, jumetanetsi bajarapamonae pepabijava xaniavaetsia apo panematamotsijava. ⁵ Mapanacuata picani panatsitajinavanapame xaniavaetsia. Pacabarëyamë tsavanapae panexainaecuene. Paexanavanapame panejitsipaecuena. Pacuenia baca bitso penasitsiepatota beyaxuabatsi, bajara pijinia pacuenia paxamë ata pacatoimoxoyo baja Dioso papecananeconitsia exanaematacabinexa, bitso panenaneconitsiaë Diosojavabelia. ⁶ Jivi pananeconitsiaexanabiabame. Pabeyaxuababi-abamenua pianeconijibivi ata. Bajarapacuenia paexanabiabame pamonaejavabelia apo caëjëpaetsi papecanayajiviitavetsinexa.

Pacuenia icatsia petuxanenë patsijitsiatsica yabara pelivaisi

⁷ Tajamonae, pajamatabëcuenesaëmëre tsavanapae panecopiaevetavanapaejava vajatuxanenë matapania icatsia pepatsimatacabitcsicajavabelianexa. Pabi penacuenebinë, vajënaeeveta ema peubinexa peubijava. Peubiveretsicujinaë peubijava, bajayajebi ajamatabëcuenesaëya evetaponapona petonaveretsijavabelianexatsi. ⁸ Bajara pijinia pacuenia paxamë ata bajayajebi itsamonaë pibisiacuene pacaexanaë ata, pajamatabëcuenesaëmë tsane. Pëtsa pajamatabëcuenefaenae. Tspijaji rabaja imoxoyo pevajënaë tsaponae vajatuxanenë pepatsinexatsica. ⁹ Tajamonae Dioso panenajuajumecovënëtsivi, pëtsa namataenetsia panabaracuaicuaijamë Diosojavabelia panenaneconitsianiva. Tspijaji rabaja Jesucristo, ponëjavabelia panavajunupaebijitsiamë daxita pacuene paexanavanapame mapanacuataje, imoxoyo baja pevajënaë tsaponae pepatsinexatsica. Bajaraponë pacaëjivimë canacujitsia pacarajutaponaena xuavajëto pacatoxainapona. ¹⁰ Tajamonae, pacanaëjëre profetavimi, pamonaeimi bajayata Diosojumelivaisi paeba. Bajarapamonaeimi bajayajebi bejibioiaexanaë atatsi, ajamatabëcuenesaë tsavanapae. Itsajamatabëcuenë apo xainae. ¹¹ Pamonae ajamatabëcuenesaë, bajayajebi bejibioiaexanaë atatsi, bajarapamonae aeconoxae baja topxaniacueneitsi tsane Diosojavabelia. Pavënëlivaisitaneme rabaja pacuenia bajayata Jobpijinë bejibioiaexanaë atatsi, itsiata ajamatabëcuenesaë Diosojavabelia. Pavënëlivaisitanemenua pacuenia pejamatabëcuenëjëtsicujinaëtsi, bitso Dioso yavenonatsi. Bajaraxuata nexata payapëtaneme Dioso jivi pitaxutotsoniataenëcuenë.

¹² Tajamonae, palivaisi baja pacatsipaebatsi, matatoxenetsia mapalivaisiyoje bitso pajumecovënëtsianame. Itsa pacuaicuaijamë itsamonaëjavabelia, pexaniajailivaisi pacuaicuaijamë tsabiabi tsane. Pëtsa Dioso pevënë pacuaicuaijamë itsamonaë papecajumexaniataenexa. Nexata pëtsa pajumaitsimë mapacueniaje: “Xaniajanë raja. Cajumaitsitsi mapacueniaje Dioso pitabarata,” pajamë pëtsa. Tspijaji baja pexaniajailivaisi itsa pacuaicuaijamë tsabiabi tsane, itsamonaë ata pacacueneyapëtaena apo panenajumetsënëtabiacuene. Nexata itsa pacayanijoba itsacueneyavayo yabara, roviaalia pajumaitsimëre pacuenia panajamatabëxainame. Itsa pajejamëjitsia, pajejamë roviaalia. Itsa jume, “jume!” pajamëre roviaalia. Bajarapacuenia roviaalia itsa paxaniajamë tsabiabi tsane, nexata apo pananeconitsimë tsane Diosojavabelia. Tspijaji Dioso pevënë apo pacuaicuaijamë tsabiabi tsane papecajumexaniataenexa itsamonaë.

¹³ Paxamëyajuvënëjivi itsa tocopiapatatsi pibisiacuene, bajarapajivi bevajëta Diosojavabelia. Itsa jume, barëyaya itsa ponapona, betonaxëana Diosojavabelia: “Xamë ayai-jamatabëcuenenëmë,” bejai Diosojavabelia penaxëanaëjavata. ¹⁴ Itsa jume, itsa avitane, bejunata ancianovi, Dioso pejumecovënëtsivi pevetsivi. Nexata ancianovi patsiana petovajëtsinexatsi Diosojavabelia. Nexata ancianovi piavitanejivi aceiterata perabëcalirabiana vajatuxanenë pevënëta. ¹⁵ Petovajëcaëjavata, daxita ancianovi itsa jamatabëjumaisi: “Dioso cajena pepacuene jamatejemayaexanaenatsi mapajivije,” itsa jamatabëjai ancianovi, nexata Dioso jamatejemayaexanaenatsi piavitanejivi. Piavitanejivi pibisiacuene

itsa exana piavitanevajënaeya, itsiata Dioso vecuaajibiaexanaenatsi bajarapaneconimi. ¹⁶ Bajaraxuata pibisiacuene namataenetsia itsa panatoexaname, namataenetsia panatsipaebare. Itsa pavitanemënuua, namataenetsia panatovajëre Diosojavabelia papecajamatejemayaexanaenexa Dioso. Xaniavaetsia peponaponaenë Dioso pitorobicueniatsi, daxita pejamatabëëthëtojavavetsina itsa vajëta, bajaraponë jumenamatamota Diosojavabelia. Ayaicuenia Dioso pexaniacuene toexanaenatsi. ¹⁷ Diosojumepaebinëmi, profeta Elíaspijinë, bevaxaitsijamatabëcuenenëmi. Bajayata bajaraponëmi asaëyata vajëta Diosojavabelia ema pejopaeyaniva. Nexata acueyabi pavaibeje epatua ema apo jopae bajaraponëmi pijanacuata. Nexata daxita peubijavaximi, totëpatsi. Nexata daxita bajarapanacuapijivi bitso janibo. ¹⁸ Bajaraxuacujinae icatsia asaëyata Elíaspijinë vajëta Diosojavabelia ema pejopaenexa. Nexata icatsia ema jopa. Ira icatsia capitsapa pexaejavanexa. Bajarapacuenia vaxaitsi ata asaëyata bevajëtatsi Diosojavabelia.

¹⁹ Tajamonae, paxamëyajuvënëjivi itsa copaba Dioso pejumelivaisi pejumecovënëtsijavami, nexata icatsia bepajumecovënëtsiaexaname bajarapalivaisi.

²⁰ Bepayapëtaneme mapacueneye. Pajivi icatsia copabiaexana itsamonae pibisiacuene pexanaejavami, pejumecovënëtsinexa icatsia Dioso, bajarapajivi jamatabëcueneyavenonaena bajarapamonae penaxuabiyaniva pibisianacuayabelia. Jamatabëcueneyavenonaenanua bajarapamonae Dioso pevecuaajibiaexanaenexatsi ayaineconi ata, pibisiacuene pexanaeneconimi.

Mapabaxutoje San Pedro copiaya toyaquina Dioso pejumecovënëtsivijavabelia

Pacuenia Pedro mapabaxutoje toyaquina Dioso pejumecovënëtsivi, nacayajatsia penaevijavabelia, yabara pelivaisi

¹ Xanë Pedronë, Jesucristo taneitorobinë. Nitoroba jivi tatsipaebaponaenexa Jesucristo pelivaisi. Pacatoyaquinatsi mapabaxutoje paxamë pepo panijatamaravecuca, Jerusaléntomara, nacayajatsia paneenarutsivi. Nacayajatsia pajinavanapame Ponto nacujava, Galacia nacujava ata, Capadocia nacujava ata, Asiavënë nacujava ata, Bitinia nacujava ata. ² Vaxa Dioso baja cajena bajayata tajëvelia panenaexanaevajënaeya ata, pacaitapeta papijajivinexamë. Bajarapacuenia tajëvelia Dioso papecaitapetsixae, aeconoxae baja Espiritu Santo pejamatabëcueneta pacatsata Jesucristo panejumecovënëttavanapaenexa. Dioso pacaitapeta papecavecuajibiaexanaenexa, daxita pibisiacuene paneexanaeconomi Jesucristo papecasivatëpaexae. Pacatovajëtsiti Diosojavabelia ayaicuenia Dioso papecayavenonabiabinexa. Pacatovajëtsinua jamatabëcuenexanepanaeya panejinavanapaenexa daxitacuenevecua.

Pacuenia Jesucristo pelivaisi pejumecovënëtsivi Dioso rajutsianatsi matacabi apo pevereverecejava yabara pelivaisi

³ Vaxaitsi vajatuxanenë Jesucristo paxa Diosojavabelia jumaitsiti tsabiabi: "Xanepana rabaja. Pexaniacuene panetoexaname," jaitsi tsabiabi. Ayaicuenia Dioso vajanacaitaxutotsoniataexae, pejanajamatabëcuenevitsi nacaexana Jesucristo vajajumecovënëtsixae. Jesucristo petëpaecujinae, Dioso icatsia asaëyaexanatsi. Bajaraxuata vaxaitsi ata evetavanapatsi vajanacarajutsinexa matacabi apo pevereverecejava. ⁴ Nexata Dioso nacarajutsiana xua nacatoxaina athëbëtsatia vajanacarajutsinexa. Bajaraxua apo vereverecae tsane. Apo abejenua tsane. ⁵ Bajaraxua Dioso nacatoxaniavaeta athëbëtsatia vajanajamatabëcuenecopatsixae Diosojavabelia. Nexata abaxë vajajinavanapaepato mapanacuatage, Dioso pesaëta nacaevetaponapona. Bajarapacuenia Dioso pesaëta nacaevetaponapona vajanacacapanepaenexa. Pamatacabi mapanacuaaje vereverecaena, nayapëtaena jane baja xua Dioso nacarajutsiana.

⁶ Bajaraxuata paxamë Dioso papecacapanepaejavanexa, pasivajamatabëcuenegarëyamëre tsavanapae. Aeconoxae abaxë mapamatacabitaje pacajamatabëcuenegarëyabitsi ata daxitacuene papecajamatabëcuenegëjëtsijava, itsiata pasivajamatabëcuenegarëyamëre tsavanapae. ⁷ Pacajamatabëcuenegëjëtaponapapecajamatabëcueneyapëtaenexa pepacuene panenajamatabëcuenecopatsijava Jesucristojavabelia. Oronanito ata itsa ëjëta, baseta isotota peyapëtaenexa itsa pepacuene orojava. Panenajamatabëcuenecopatsijava Jesucristojavabelia, bitso namatamota orojava matatoxenetsia. Nexata pijinia paxamë ata pacajamatabëcuenegëjëtaponapapecajamatabëcueneyapëtaenexa xaniavaetsia panenajamatabëcuenecopatsijava Jesucristojavabelia. Nexata itsa pavecuanepaenexa papecajamatabëcuenegëjëtsijava, panevajënaeyabelia pajamatabëcuenesaëmë tsaenae tsane Jesucristojavabelia panenajamatabëcuenecopatsijava. Nexata pamatacabi vajatuxanenë Jesucristo patsianica, pacasivajamatabëcuenegarëya tsane. Dioso ata pacasivabarëya tsane. Daxitajivinua pacayaitaena.

⁸ Paxamë abaxë Jesucristo apo patae atamë, itsiata pajitsipame. Aeconoxae apo patae atamë Jesucristo, itsiata panajamatabëcuenecopatame bajarapanëjavabelia. Jesucristo bitso pasivajamatabëcuenegarëyamë tsavanapae. Jesucristo panesivajamatabëcuenegarëyajava, itsa panajamatabëcuenevajunupaebame itsamonaejavabelia, epatua saya payapëtaeyaexaname. Tsipaji xaniavaetsia apo payapëtaemë xaniavaetsia panenajamatabëcuenegëvjunupaebinexa itsamonaejavabelia peyapëtaenexa pacuenia bëpënëa pajamatabëcuenegarëyamë. ⁹ Jesucristo papecasivatëpaexae, panajamatabëcuenecopatame Diosojavabelia papecacapanepaenexa. Bajaraxuata Dioso pacacapanepaena Dioso papecananeconitsia exanaejavaminexavecuca pibisiacuene paneexanaeconomi yabara.

¹⁰ Bajayatami Diosojumepaebivimi profetavi bajayajebi livaisijaitapona peyapëtaenexa. Nexata baja profetavi itsa yapëtaene pacuenia Dioso pijajivi capanepaejitsia, nexata profetavi tajëvelia vajunupaebapona jivijavabelia. Profetavi tajëvelia vajunupaebapona pacuenia Cristo pejamatabëcueneta Dioso pacaitaxutotsoniataejitsia papecacapanepaenexa. ¹¹ Espiritu Santo baja cajena pejamatabëcueneta bajayata tajëvelia profetavimi yapëtaeyaexanaponatsi. Nexata profetavimi bajayata tajëvelia yaquina pacuenia

yapëtaeyaexanaponatsi Espiritu Santo pejamatabëcueneta. Nexata profetavimi yaquina pacuenia itsamonae Cristo bejiohiaexanaejitsiatsi pebeyaxuabinexatsi. Yaquinanua pacuenia Cristo petëpaecujinae, icatsia itsa asaë, athëbëabetsia caponaejitsiatsi peecaenexa paxa Dioso pemuxunenetatsia. Nexata bajarapaprofetavimi jamatabëjumai tsabiabi: “¿De tsaeta pacujinae copiapatsiana xua tajëvelia vaxaitsi vajunupaebaponatsi?” jamatabëjai tsabiabi. ¹² Itsiata baitsi jane bajarapaprofetavimi Dioso yapëtaeyaexanatsi pacuenia bajarapamonaemi pevënamuto bexëa bajaraxua copiapatsijitsia. Nexata vaxaitsi, bajarapamonaemi pecovëpijivitsi, vajajinavanapaematacabita matapania jane baja copiapata pacuenia tajëvelia Cristo yabara vajunupaebapona profetavimi. Nexata baja paxamë bajarapalivaisi itsamonae pacatsipaeba papecacapanepaelivaisinexa. Espiritu Santo, ponë Cristo athëbëvetsica itorobica, bajaraponë pesaë pacayajavatsipaeba bajarapamonaë. Angelevi ata bitso jitsipa xaniavaetsia peyapëtaenexa bajarapalivaisi.

Pacuenia Dioso nacajunata xaniavaetsia vajatojinavanapaenexa yabara pelivaisi

¹³ Panajamatabëcuenecopare Diosojavabelia. Tsipaji rabaja payapëtaneme xua Dioso pacarajutsijitsia. Bajaraxua Dioso pacarajutsiana papecaitaxutotsoniataexae pamatacabita Jesucristo icatsia patsianica. Bajaraxuata xaniavaetsia panajamatabëcueneverere paneexanaenexa daxita xua Dioso pacatocopata. Najamatabëcueneevetsiayanua xaniavaetsia pajinavanapare. ¹⁴ Pajumecovënëtavanapare Dioso. Pëtsa panajamatabëxainame panenatojitsipaecuenia pibisiacuene paneexanaenexa, pacuenia paexanavanapame pamatacabita abaxë Dioso apo payapëtaemë. ¹⁵ Xaniavaetsia saya pajinavanapare pibisiacuene paexanaenejevamë. Tsipaji raja Dioso, ponë pacajunata papijajivinexamë, xaniavaetsia peponaponaenë. Pibisiacuene baja cajena caeto ata Dioso apo pexanaenë. ¹⁶ Dioso baja cajena pejumelivaisibaxutota jumaitsi mapacueniajaje: “Xaniavaetsia pajinavanapare. Tsipaji xanë apo jitsipaenë pibisiacuene paneexanaejava,” jai Dioso pejumelivaisibaxutota.

¹⁷ Paxamë itsa pavajëtame Diosojavabelia, pajumaitsimë tsabiabi: “Taxa Dioso,” pajamë tsabiabi. Bajaraponë Dioso najëpaeya tane daxita pamonaë jumecovënëtatsi, ayajamatabëcuenevi, beveliajamatabëcuenevi ata. Dioso cajena yapëtaneme paneconivajëto exanapona caejivi canacujitsia. Bajaraxuata Dioso cujanaviaya bepajinavanapame pamatacabibeje abaxë pasaëmë tsavanapae mapanacuataje. ¹⁸ Paxamë picani naxuabiaya Diosovecua pajinavanapame panijasalinaivimi abaxë pijacuene itsa pacasaëmë tsavanapae. Itsiata baitsi jane aeconoxae baja bajarapacuenevuca Dioso baja papecacapanepa. Payapëtaneme rabaja Dioso ayaimatamota papecanecominatamotsijava papecacapanepaenexa. Apo pacacomuatsi baja cajena peverevereaejavata, pacuenia oro itsi, palata ata. ¹⁹ Dioso baja cajena pacacomuata bitso penamatamotsijavata, Cristo pijanata. Pajivi pijaneconi xaina Diosojavabelia, bajarapajivi oveja, pejanapëbito, peperabëxanepanaenë, beyaxuaba ofrendacuena pevi perajutsinexa Diosojavabelia. Nexata bajarapajivi pijaneconi Dioso baja vecuaajibiaexanatsi bajarapaoveja pijana pejamatabëcueneta. Nexata pacuenia oveja, peperabëxanepanaenë, beyaxuabatsi, bajara pijinia itsi Cristo. Baitsi Cristo, planeconijibinë, nacopata pebeyaxuabinexatsi. Nexata Cristo petëpaejamatabëcueneta, pacavecuajibiaexana panijaneconimi. ²⁰ Bajayatami Dioso mapanacuaje pexanaevajënaeya ata, Dioso itapetatsi Cristo papecasivatëpaenexa. Belia jane baja mapamatacabitaje Cristo patsica papecasivatëpaenexa. ²¹ Itsiata baitsi jane Cristo petëpaecujinae, acueyabi matacabita, Dioso icatsia asaëyaexanatsi. Athëbëtatsia, paxa Dioso pecujanenia, Cristo ecaeyaexanatsi. Bajaraxuata panajamatabëcuenecopatame Diosojavabelia papecarajutsinexa matacabita apo peverevereaejavata.

²² Nexata baja aeconoxae paxamë pajumecovënëtame pexaniajailivaisi, Jesucristo pelivaisi, Espiritu Santo papecajamatabëcueneitayotsixae. Nexata pibisiacuene paneexanaeconimi, Dioso pacavecuajibiaexana. Nexata xaniavaetsia pasivamë tsavanapae itsamonae ata, Dioso pejumecovënëtsivi. Bajarapacuenia asaëyata namataenetsia bepanaasivamë tsavanapae daxita panejamatabëëthëtovetsina. ²³ Pacuenia pejananaexanaenacuetoyo itsi, bajara paxamë pajamatabëcuenetsimë Dioso pejumelivaisita pejanajamatabëcuenepanaxinaexae. Itsiata baitsi jane bajarapapejanajamatabëcuenepaneaxajivi apo acarajutsi. Dioso raja pejumelivaisi, apo peverevereaeelivaisinexa panejumecovënëtsixae, pejanajamatabëcuenepaxainame. ²⁴ Dioso pejumelivaisi apo peverevereaejavanaxa yabara, Dioso pejumelivaisibaxutota jumaitsi mapacueniajaje:

Pacuenia vafafopijipona bepijia tsaquena, petsaquenaecujinae tëpa, bajara pijinia saya itsi jivi ata. Bepijia tëpa. Pacuenia pematono ata bepijia tsaquena, nexata othopa, bajara pijinia saya itsi ayajamatabëcuenepexinaenë ata. Bepijia tëpa. ²⁵ Itsiata baitsi jane Dioso pejumelivaisi apo vereverecae tsane daxitamatacabijavabelianexa, jai Dioso pejumelivaisibaxutota.

Bajarapalivaisi papecacapanepaelivaisinexa, itsamonae baja pacatsipaeba.

2

¹ Bajaraxuata pacopare baja daxita pibisiacuene paneexanabiabijava itsamonaejavabelia. Pacoparenua paneyamaxëitojorobabiabijava. Pacoparenua saya yamaxëitojorobiaya panecuaicuajitsabiabijava. Tsipaji paxamë yamaxëitojorobiaya pacuaicuajimë tsabiabi itsamonaë bepapexaniajamatabëcuenevimë papecataenexa. Pacoparenua panecuenecaëbabiabijava itsamonaë. Pacoparenua panebaracuaicuajitsabiabijava pibisiacuenia itsamonaë. ² Pacuenia pejananaexanaenacueto bitso bajitsipa mitobarëmene piapaenexa, bajara pijinia pacuenia paxamë bitso pajitsipare Dioso pejumelivaisi. Bajarapalivaisi baja cajena bevaxaxejava tanetsi vajajamatabëëthëtonexa. Nexata bajarapalivaisi panelebabiabixae, pacatsijamatabëcuenevitsabaponaena pevajënaeyabelia. Nexata bajarapalivaisi pejamatabëcueneta Dioso pacajamatabëcuene naveretsiaexanaena pacuenia Dioso pacatojitsipa. ³ Nexata baja pepacuene pajamatabëcuenepëtaename vajatuxanenë pexaniajamatabëcuenenëcuene. Bajaraxuata pajitsiponare orijibia panevajënaeyabelia Dioso pejumelivaisi.

Pacuenia iboto apo vereverecae mapanacuataje, bajara pijinia pacuenia Cristo apo pevereverecaenë daxitamatacabijavabelianexa yabara pelivaisi

⁴ Vajatuxanenë Cristo raja bepiatajaiboto tsaponaponae. Apo pevereverecaenë daxitamatacabijavabelianexa. Nexata paimoxoyore bajaraponë. Vajatuxanenë Cristo itsamonaë apo pejumecovënëtsixaetsi, pacuenia ibota bo pexanaevi pibisiaiboto naitaxutojematabuata, bajaraitsitsi. Itsiata baitsi jane Dioso tanetsi bepiatajaiboto, bepexania penamatamotsiiboto tsaponaponae. ⁵ Paxamë ata rabaja Jesucristojavabelia panenajamatabëcuenecopatsixae, bepaibotonëmë Dioso pacatane. Nexata padaxitamë Cristo papijajivixamë, Dioso pacatane bepijatemplobo, ibotonëta bepexanaetemplobo. Tsiapaji pacuenia Dioso ponopana templobota, bajara pijinia pacuenia Espiritu Santo pacatsijamatabëeca. Paxamë rabaja cajena Dioso panetonacuenebavanapaevi, baitsi papijasacerdotevimë. Nexata Jesucristo pejamatabëcueneta aneconijibia papecataexae, Diosojavabelia najamatabëcuenerajutsija pavajëtabiabianame Dioso papecasivajamatabëcuenebarëyanexa. ⁶ Cristo, ponë athëbëvetsica Dioso itorobijitsiatsica jivi pecapanepaenexa, bajaraponë yabara tajëvelia Dioso jumaitsi: "Ponë itorobianajë, beiboto tsane," jai. Nexata tajëvelia Dioso pejumaitsiyava, Dioso pejumelivaisibaxutota jumaitsi mapacueniaje:

Taitapetsinë netoponaponaena Jerusalén tomarata. Bajaraponë beiboto tsane. Nexata pacuenia ibota bo pexanaevi, itsaiboto bitso tsitaxanepanatsi daxitaibotonëvecua, bajaraitsitsi tsane. Bepitapetsiibototsi tsane. Bitso bepenamatamotsiibotonua tsane. Nexata pajivi najamatabëcuenecopatsiana bajaraponëjavabelia, bajarapajivi apo nacueratsi tsane,

jai mapacueniaje Dioso pejumelivaisibaxutota tajëvelia Dioso pejumaitsiyava Cristo yabara.

⁷ Paxamë Cristo pelivaisi panejumecovënëtsivi, pataneme Cristo bepiatajaiboto tsaponaponae, bitso bepenamatamotsiibotonua. Itsiata baitsi jane pamonaë Cristo pelivaisi apo pejumecovënëtsivi, bajarapamonae bepiabejeiboto tanetsi Cristo. Tsiapaji baja copiajopa pacuenia Dioso pejumelivaisibaxutota tajëvelia najumecapanepaeya jumaitsi Cristo yabara. Tajëvelia Cristo yabara comparacióncuenia jumaitsi mapacueniaje:

Paiboto boexanaevi naitaxutojematabuata bepetsitaabejexaetsi itajara, bajarapaiboto itsamonaë pita. Nexata bajarapaibotota xaniavaetsia yaëta botabu daxita itsaibo matatoxenetsia,

jai Dioso pejumelivaisibaxutota comparacióncuenia Cristo yabara.

Bajarapacuenia jumaitsi itsamonaë Cristo apo pejumecovënëtsijavanexatsi yabara. ⁸ Copiajopanua jane baja Dioso pejumelivaisibaxutota tajëvelia Cristo yabara pejumaitsiyava mapacueniaje: "Bajarapaiboto jivi pefirapecaeyaexanaëiboto tsane," pejajjava Cristo yabara. Bajarapacuenia Dioso pejumelivaisibaxuta jumaitsi jivi itsa apo jumecovënëtsi Cristo pelivaisi, Diosovecua penaxuabijavanexa yabara jumaitsi. Tsiapaji tajëvelia Dioso yapëthane jivi apo pejumecovënëtsijavanexa pexanalivaisi, Cristo pelivaisi, pecapanepaelivaisinexatsi picani.

Dioso pijajivi yabara pelivaisi

⁹ Dioso apo pejumecovënëtsivivecua, paxamë baja Dioso pacaitapeta papijajivinxamë. Dioso baja papijasacerdotevimë tsavanapaenua, daxitacuene pepo pevetsinë panetonacuenebavanapaexae. Dioso baja papijajivimë tsavanapae panevajunupaebavanapaenexa Dioso ayaicuene pexanaejavanë. Dioso baja cajena pacajunata pibisiajamatabëcuenevecua, mapanacuataje pitaquirijamatabëcuenevecua. Nexata baja pajunuame pexaniajamatabëcuenejavabelia, Dioso pitayotsijamatabëcuenejavabelia. ¹⁰ Paxamë abaxë

Cristo panejumecovënëtsivajënaeya, Dioso picani apo papijajivimë. Itsajivi ata picani abaxë paxamëyajuvënëvi Dioso apo itaxutotsoniataetsi. Itsiata baitsi jane aeconoxae baja Dioso papijajivimë pacaexana papecaitaxutotsoniataexae.

Pacuenia Dioso pejumecovënëtsivi jinavanapa Dioso petonacuenebavanapaenexa yabara pelivaisi

¹¹ Tajamonae bitso patacaasivavi, mapanacuataje abaxë pajinavanapae atamë, athëbëtatšia baja Dioso pijanacuataetsia bepanejinavanapaevi panataema. Saya raja caeepatoyonexa mapanacuataje pajinavanapame. Bajaraxuata pacatoyaquinatsi mapacueniaje daxita picani papibisiacuene jamatabëpaexaname panecopabinexa. Bajarapitsijamatabëcuene jamatabënacanamatabëcuene bijianaeyaexana vajajamatabëcuenejavavetsina. ¹² Dioso apo peyapëtaevi petuatuajëa itsa pajinavanapame, xaniavaetsia patsitajinavanapaename. Aeconoxae pacabaracuaicuaijai ata bepibisiacuene paneexanaevi papecataexae, itsiata itsamatacabijavabelia itsa najamatabënapitsiana pexaniacuene paneexanaejava, bajarapamonae ata Dioso jumecovënëtsiana. Nexata bajarapamonae jumaisi tsane Diosojavabelia: "Diosomë, bitso ayajamatabëcuenenëmë," jai tsane. Bajarapacuenia jumaisi tsane itsa copiapatsiana pamatacabi Dioso naneconitsiaexanaejitsia daxita pamonae Dioso apo pejumecovënëtsivi.

¹³ Dioso papijajivixaemë, pajumecovënëre pacuenia pacaitoroba pamonae nacua pevetaavanapaevi. Daxita raja bajarapamonae mapanacuapijivi pejamatabëcueneta evetsiaexanatsi. Nexata pajumecovënëre presidentenë, ponë jane baja daxitajivi pevetsinë. ¹⁴ Pajumecovënërenua nacua pevetsivi. Bajarapamonae presidentenë itorobatsi penaneconitsiaexanaenexa pibisiacuene pexanaevi. Itorobatsinua pejumaisinexa pexaniacuene pexanavanapaevijavabelia: "Xanepana rabaja xua paexaname," pejainexa. ¹⁵ Bajarapamonae pajumecovënëre. Tspijaji raja Dioso pacatojitsipa xaniavaetsia panejinavanapaenexa. Nexata bajarapacuenia itsa patsitajinavanapaename, belia moya tsane itsamonae papecabaracuaicuaijajava, pamonae apo pejumecovënëtsivi pexanialivaisi, Cristo pelivaisi.

¹⁶ Paxamë picani pajumecovënëtavapaname Dioso Moiséspijinëta penajumecopatsilivaisi. Nexata picani paexanabiabame pacuenia pacaitoroba Dioso Moiséspijinëta penajumecopatsilivaisi. Aeconoxae baja Cristo pelivaisi panejumecovënëtsixae, apo pajamatabëcueneevetsimë baja pacuenia Dioso Moiséspijinëta penajumecopatsilivaisi pacaitoroba paneexanaenexa. Itsiata baitsi jane pibisiacuene paneexanaenexa apo pacatocopatsi. Biji rajane Dioso pacatocopata pacuenia Dioso jitsipa panetonacuenebavanapaenexa. ¹⁷ Daxitajivi yayiyataeya pajinavanapare. Itsamonae ata, pamonae Dioso pejumecovënëtsivi, pasivamëre. Cujunaviaya Dioso payaiyataema. Payaiyataema presidentenë ata.

Pacuenia itsamonae Cristo bejiobiaexanae atatsi, itsiata ajamatabëcuenesaë tsapanaponae, bajara pijinia pacuenia Cristo pejumecovënëtsivi ata itsamonae bejiobiaexanae atatsi, pijamatabëcuenesaë tsavanapaenexa, yabara pelivaisi

¹⁸ Paxamë itsamonae panetonacuenebavanapaevi, pacamuxujjobatsi mapacueniaje. Pajumeyaiyataeyabiabare pacuenia pacaitorobabiaba panijatuxanevi. Ëpexaniajamatabëcuenevi pëtsa panijatuxanevi pajumeyaiyataneme. Pajumeyaiyataema panijatuxanevi, piacujirubejevi ata. ¹⁹ Panijatuxanevijavabelia itsacueneneconi apo paxainae atamë, panijatuxanevi pacabejiobiaexanabijitsipa. Nexata panijatuxanevi papecabejioibiaexanabijavata: "Dioso nitaxutobejiobiataena," itsa pajamatabëjamë tsabiabi tspiae, nexata Diosojavabelia pacatonamatamotsipa. ²⁰ Itsa pananeconitsipame panijatuxanevijavabelia, nexata bajarapaneconi yabara panijatuxanevi pacaconitsipa. Nexata papecabejioibiaexanaejavata: "Dioso nitaxutobejiobiataena," pajamatabëjamë ata tspiae, itsiata Diosojavabelia pacatoamatamobi tspiae. Itsa jume, pexaniacuene paexanae atamë, panijatuxanevi pacaconitsipa. Nexata papecabejioibiaexanaejavata: "Dioso nitaxutobejiobiataena," itsa pajamatabëjamë tspiae Diosojavabelia, nexata Diosojavabelia pacatonamatamotsipa. ²¹ Bajarapacuenia itsacueneneconi apo paxainaejevamë, itsamonae pacabejiobiaexanaponaena. Tspijaji Dioso bajarapacuenia pacatocopata itsamonae papecabejioibiaexanaponaenexa. Payapëtaneme rabaja mapacuneje. Cristo itsa pacasivatëpa, bejiobiaexanatsi itsacueneneconi xainaenejeva. Nexata paxamë ata Dioso pacatocopata itsamonae papecabejioibiaexanaenexa. ²² Itsacunejeva ata pibisiacuene apo exanae Cristo. Apo yamaxëitojorobi cajena itsajiviyojavabelia ata. ²³ Pibisiacuena Cristo bijatae atatsi itsamonae, itsiata juya pibisiacuena apo jumecanaviatsi. Bejiobiaexanae atatsi jivi, "Neyamatamotsiana Dioso," apo jai Cristo bajarapamonaejavabelia. Biji rajane bajarapamonaejavabelia Cristo kujirucanaviatsinejeva, copata bajarapamonae Dioso penaneconitsiaexanaenexatsi

panatacabi Dioso naneconitsiaexanaena pijaneconi pexainaevi. ²⁴ Cristo cruzata itsa tēpa, tsijumaxuabatsi vaxaitsi pibisiacuene vajaexanaeconi. Bajarapacuenia Cristo nacatoexana vajacopatsinexa pibisiacuene vajaexanaejava. Bajarapacuenia Cristo nacatoexananava vajavajēnaeyabelia vajajinavanapaenexa Dioso pejitsipaecuena. Cristo pacasivavajēnērubatsi paxamē papecajamatabēcuene xaniavaetsinexa pibisijamatabēcuenevecua, xaniavaetsia panejinavanapaenexa Dioso pitabarata. ²⁵ Paxamē picani Diosovecua naxuabiaya pajinavanapame. Pacuenia oveja pevetsinētsivecua naxuabiaya jinavanapa, bajara picani paitsimē. Itsiata baitsi jane aeconoxae baja Cristo pejamatabēcueneta panaviabame Diosojavabelia. Pacuenia pijaoveja pevetsinē xaniavaetsia baevetaponapona pijaoveja, bajara pijinia pacuenia Cristo pacaevetaponapona. Panejamatabēcuene ata Cristo evetaponapona.

3

Pacuenia penacojobivi xaniavaetsia benabarējinavanapa yabara pelivaisi

¹ Paxamē papetirivimē, pacamuxujibatsi mapacueniaje. Pacaevamē canacujitsia paneamonajivi jumecovēnētsiaya pajinavanapare. Pova pamona abaxē apo jumecovēnētsi Jesús pelivaisi, bajarapova xaniavaetsia tsitaponaponaē pamona, pamona ata Jesús pelivaisi pejumecovēnētsinexa. Nexata bajarapova pamonajavabelia Jesús pelivaisi apo tsipaebi ata, pamona ata jumecovēnētsiana Jesús pelivaisi xaniavaetsia petsitaponaponaēxae pamona. ² Bajarapacuenia pamona ata Jesús pelivaisi jumecovēnētsiana, pijava itsa cuenetaena Dioso paneyaiyataejava, itsa cuenetaenana pijava Dioso pitabarata aneonijibia peponaponaejava. ³ Papetirivimē, pētsa pajamatabējumaitsimē mapacueniaje: “Bepexaniavanē jivi tanetaenexa, naxatatsianajē naitabētsiaya. Namatafaratsianajē naitabētsiaya. Oronanita pexanaejavanēta naitabētsianajē. Itsa jume, nexata bitso pexaniaviriana naxatatsianajē,” pajamatabējamē pētsa. Pētsa bajarapacuenia panajamatabēxainame saya naniavelia panenaitabētsinexa. ⁴ Biji rajane bēpēnēaverena panajamatabēcueneitabēre. Bēpēnēaverena panenajamatabēcueneitabētsinexa, xaniavaetsia aneonijibia pajinavanapaename Dioso pitabarata. Nexata itsamonae pacaitsacueniabi ata, pētsa pacueneceaviatame. Nexata xua bēpēnēaverena panajamatabēcueneitabētame, apo pacatovereverecae tsane. Bajarapitsijamatabēcuene pexainaeva tonamatamot-sianatsi Diosojavabelia. ⁵ Pamonaemi petirivi bajayatami Dioso pejitsipaecuena ex-avanapana, bajarapacuenia bēpēnēaverena Dioso pejumelivaisita najamatabēcueneitabēta. Bajarapamonaemi najamatabēcuenecepatata Diosojavabelia. Jumecovēnētavanapanua pamonajivi. ⁶ Bajarapamonaeyajuvēnēvami, Sarapijivami, Dioso pejumelivaisita najamatabēcueneitabēta bēpēnēaverena. Sarapijivami jumecovēnētsia ponapona pamona, Abrahampijinē. Itsa junata pamona, “Tajatuxanenē,” jai tsabiabi pamonajavabelia. Papetirivimē, panajamatabēcuenecepatavanapare Diosojavabelia. Paexanavanaparenua pexaniacuene. Pētsa pacujunavamenua pacaitsacueniabijitsia ata itsajivi papecaitoxyae. Nexta bajarapacuenia itsa paexanavanapaename, pajamatabēcuenejēpaename Sarapijivami. ⁷ Paxamē papebijivimē, pacamuxujibatsi mapacueniaje. Xaniavaetsia pabarējinavanapare panijavajivi. Pacuenia Dioso nacaitoroba, bajarapacuenia payaiyataema panijavajivi. Bajarapacuenia payaiyataema tsipaji raja bajarapamonaē vaxaitsi pebijivitsi nacavecuasaasājibi. Payaiyataema tsipaji raja bajarapamonaē ata yajava Dioso pacarajutsiana matakabi apo pevereverecaejaya. Bajarapacuenia panijavajivi yaiyataeya pabarējinavanapare paneajumeurayaniva panenavajētsijava Diosojavabelia.

Pacuenia pexaniacuene pexanaevi ata itsamonae bejlobiaexanaenatsi yabara pelivaisi

⁸ Tajamonae bitso patacaasivavi, pematatsēnē pacamuxujibatsi mapacueniaje. Najamatabēcuenejēpaeya pajinavanapare. Paxamēyajuvēnējivi itsacuene itsa cocopiapatatsi, nexata bajarapacuenia yabara bitso itsa najamatabēxaina, paxamē ata pacobenana-jamatabēxainare. Daxta Dioso panenajuajumecovēnētsivixae, namataenetsia panaasi-vamēre. Naitaxutotsoniataeyanua pajinavanapare. Beveliajamatabēcuenevinua nataeya pajinavanapare. ⁹ Itsajivi pibisiacuene itsa pacaexana, pētsa pacueneceaviatame. Pibisiacuena itsa pacabijatanenua, pētsa pajumecanaviatame. Biji rajane bajarapajivi patovajēre Diosojavabelia Dioso peyavenonaenexatsi. Tsipaji pamatacabi Dioso pacajunata papijajivinxamē, bajarapacuenia paneexanaenexa, pacaitoroba. Nexata juya paxamē Dioso pacaixutotsoniataena pacuenia najumecapanepaeya pacajumaitsi papecayavenonaenexa. ¹⁰ Bajarapacuenia yabara Dioso pejumelivaisibaxutota jumaitsi mapacueniaje:

Pajivi jitsipa peponaponaenexa jamatabēcuenebarēyaya, bajarapajivi benaebārētoeveta pibisialivaisi pecuaicuajaiyaniva. Benaebārētoevetanua penajumetsēnētsiyaniva ata.

¹¹ Bajarapajivi becopata pibisiacuene pexanabiabijavami pexanaponaponaenexa pexaniacuene. Beponapona xaniavaetsia itsajivi ata pebaraanaepanaeyanivatsi.

¹² Bajarapacuenia beponapona. Tsipaji raja Dioso naitaxutocaeveta xaniavaetsia pejinavanapaevi. Namuxonaevetanua penavajëtsijavatsi bajaraponëjavabelia. Dioso cajena baranaepana pumonaepibisiacuene pexanavanapaevi,

jai Dioso pejumelivaisibaxutota.

¹³ Itsa pajamatabëcuenesaëmë tsavanapae tsane pexaniacuene paneexanavanapaejava, nexata itsamonae pacabejiobiaexanae ata, itsiata apo pacajamatabëcuene bijianaecapanepae tsane. ¹⁴ Itsa pacabejiobiaexanaena xaniavaetsia pajinavanapae atamë, itsiata pajamatabëcuenebarëyamë tsane. Tsipaji raja Dioso pacayavenonaena. Pëtsa pacujunavame bajarapamonae. Pëtsa panasivajamatabëcuenebëjamënuua papecabejiobiaexanaejava yabara. ¹⁵ Biji rajane panejamatabëëthëtojavavetsina yaiyataeya pajumecovënëre vajatuxanenë Cristo. Panajamatabëcuene veretavanaparenua xaniavaetsia panejumecanaviatsinexa itsajivi itsa pacayanijoba vajatuxanenë Cristo panejumecovënëtsijava yabara. Nexata itsa pacayanijoba mapacueniaje: “¿Detsa xuajitsia xamë jumecovënëtamë Cristo?” itsa pacajai, nexata xaniavaetsia pajumecanaviatsianame. Itsiata baitsi jane itsa pajumecanaviatame, paxamë beveliajamatabëcuenevi panataename. Nexata bajarapajivi yaiyataeya pajumecanaviatsianame. ¹⁶ Cristo papijajivixaemë, pexaniacuenia pajinavanapae name. Nexata payapëtaename Dioso pitabarata aneonijibia panejinavanapaejava. Nexata itsamonae najumetsënëtsiaya pacabaracuaicuajiai tsabiabi ata tsane, bajarapamonae belia najumecopatsiana papecabaracuaicuajijajava. Naurabiana papecabaracuaicuajitsabiabijava yabara. ¹⁷ Pexaniacuene pexanabiabi atamë, Dioso itsa pacatocopatsiana itsamonae papecabejiobiaexanaenexa, nexata bajaraxua pacatonamatamotsiana Diosojavabelia. Itsiata baitsi jane itsamonae itsa pacabejiobiaexanae jitsipa pibisiacuene paneexanaejava yabara, nexata bajaraxua apo pacatonamatamotsi tsipae Diosojavabelia.

¹⁸ Cristo ata bejiobiaexanatsi itsa nacasivatëpa pibisiacuene vajaexanaeconi yabara. Caeto rabaja Cristo tëpa. Pematatsënëa baja apo nacasivatëpae tsane. Bajaraponë pepo pexaniacuene pexanaenë. Itsiata bejiobiaexanatsi vaxaitsi yabara, pibisiacuene vajaexanaevi, vajanacapanepaenexa Diosojavabelia. Peperabëtommi baja picani tëpa. Itsiata baitsi jane pepo pejamatabëcuene jane baja icatsia Dioso asaëyaexanatsi. ¹⁹ Nexata abaxë Cristo petëpaemë itsa boca, pepo pejamatabëcuene jane baja pona petëpaevijavabelia pexanialivaisi petsipaebinexa. Tsipaji bajarapamonae naneconitsia jinavanapa petëpaevi pijanacuata. ²⁰ Bajarapamonae mi bajayata jinavanapa, pamatacabi Noëpijinë ponapona. Bajarapamonae mi petëpaevajënae Dioso apo jumecovënëtsi. Noëpijinë abaxë itsa exanabuatapona pinijibarcoxaneto, Dioso picani bajayajebi jamatabëcueneeveta pejumecovënëtsinexatsi daxita mapanacuapijivije. Itsiata baitsi jane apo jumecovënëtsitsi. Saya ocho pajiviyobeje, Noëpijinë, pijamonae yajava, bajarapamota Dioso capanepatsi mapanacuajavepebutitsijavavecua. Yajavacapanepatsinua mapanacuataje pibisiacuene pexanaejava vecua. ²¹ Bajara pijinia itsi itsa nacabautisaba merata. Vajanacabautisabicujinae, meravecua itsa nonotajunatsi, itajëtatsi vajacopabijava pibisiacuene vajaexanaejavami. Apo nacabautisabi baja cajena saya vajanacaperabëquiatsinexa. Biji rajane nacabautisaba vajanacajamatabëcuenequiatsinexa vajavajëtsixae Diosojavabelia. Nexata Dioso vajanacajamatabëcuenequiatsijava, pexaniajaicuene. Tsipaji Jesucristo vajanacasivatëpaecuujinae, icatsia Dioso asaëyaexanatsi. Bajarapacuenia Jesucristo Dioso piasaëyaexanae xaetsi, nexata yapëtanetsi pepacuenia Dioso vajanacapanepae javanexa. ²² Jesucristo Dioso piasaëyaexanaecuujinaetsi, pona jane baja athëbëabetsia. Nexata athëbëatsia Jesucristo eca paxa Dioso pecujanenia. Daxita ángelevi Jesucristo jamatabëcueneevetatsi pitorobinexa.

4

Pacuenia Dioso asaëyata betonacuenebavanapatsi, pacuenia Dioso nacajamatabëcuene caëjëpaeyaexana, yabara pelivaisi

¹ Cristo abaxë itsa ponapona mapanacuataje, itsamonae bejiobiaexanatsi. Bajara pijinia pacuenia paxamë ata tajëvelia bepaevetavanapame itsamonae papecabejiobiaexanaenexa. Pajivi bejiobiaexanatsi Cristo pelivaisi pejumecovënëtsixae, bajarapajivi pevajënaeyabelia ajamatabëcuenesaë baja tsaponae. Copata baja pibisiacuene pexanaejava. ² Pevajënaeyabelia jamatabëexanaponapona pacuenia Dioso tojitsipatsi. Pibisiacuene baja apo exanae pacuenia Dioso apo pejumecovënëtsivi penatojitsipacuena baexana. ³ Dioso panejumecovënëtsivajënaeya, pibisiacuene paneexanavanapaneconi yabara, ayacuena picani pananeconitame Diosojavabelia. Dioso panejumecovënëtsivajënaeya, panevitota

pibisiacuene paexanabiabame. Panajamatabëxainabiabamenua ëpibisiacuene yabara. Paitajibimënu tsabiabi panijabonëjava. Paitajibimënu tsabiabi fiestajava ata. Jumapecataeya pexanaenëanëjavabelia ata panavajëcabiabame. Itsiata baitsi jane aeconoxae baja daxita bajarapacuene pacopabame. ⁴ Nexata pamonaë Dioso apo peyapëtaevi, pibisiacuene panenajuaexanabiavivimi, aeconoxae baja pacasivajamatabëcuenenabenajaca. Tspaji pibisiacuene bajarapamonaë exana, paxamë baja apo pajamatabëcueneyavenonaemë. Bajaraxuata bajarapamonaë pibisiacuenia pacabaracuaicuaijai. ⁵ Itsiata baitsi jane bajarapamonaë itsamatacabi Dioso pitabarata nubianatsi. Nexata daxita bajarapamonaë pibisiacuene pexanavanapaeneconi yabara, Dioso naneconitsiaexanaenatsi. Piasaëtsavanapaevi, petëpaevimi ata, daxita Dioso naneconitsiaexanaena. ⁶ Petëpaevimijavabelia baja picani bajayata itsamonaë tsipaebatsi pexanialivaisi, Cristo pelivaisi, itsa abaxë asaë tsavanapae bajarapamonaemi. Itsiata daxita bajarapamonaemi apo jumecovënëtsi Cristo pelivaisi. Itsiata bajarapamatacabi itsamonaë baja jumecovënëta Cristo pelivaisi. Nexata xuacujinaë daxita bajarapamonaemi tëpaponä. Itsiata baitsi jane pamonaë baja pepuajumecovënëtsi Cristo pelivaisi, tëpa, bajarapamonaë xaina baja matacabi apo pevereverecejäjava.

⁷ Imoxoyo rabaja pevajënaë peverevereceaenexa mapanacuajë. Bajaraxuata itsacuenejava ata pibisiacuene paexanaenejevamë, xaniavaetsia pajinavanapare. Namatabëcueneevetsiaya xaniavaetsia pajinavanapare panenajuaevajëtabiabinexa Diosojavabelia. ⁸ Namataenetsia panaasivamëre tsavanapae. Bajarapacuene daxitacuene matatoxenetsia bitso nacatoxanëpana vajaexanaenexa. Tspaji itsa asivatsi itsajivi ata, nexata pibisiacuene nacaexanabiabi ata, bajarapajivi apo barajamatabëtsitecatsi. ⁹ Namataenetsia xaniavaetsia panacopiapire panijaboyaberena jamatabëcuenexanëpanaeya. ¹⁰ Pacaenëmë canacujitsia Dioso saicacuena pacajamatabëcuene caëjëpaeyaexanapona Dioso pijacuene panetonacuenëbavanapaenexa. Nexata namataenetsia panajamatabëcueneyavenonare xua Dioso pacaenëmë canacujitsia pacajamatabëcuene caëjëpaeyaexanapona paneexanaenexa. Bajarapacuenia Dioso patonacuenëbavanapare xaniavaetsia. ¹¹ Itsajivi itsamonaëjavabelia itsa tsipaeba Dioso pejumelivaisi, bajarapajivi betsipäeba palivaisi Dioso yapëtaeyaexanatsi. Itsajivi pijinia itsa yavenonaëjitsia itsanë, bajarapajivi beyavenona pacuenia Dioso jamatabëcuenecaëjëpaeyaexanatsi peyavenonaenexa. Daxita xua paexanaëjitsiamë Jesucristo papijajivixäemë, paexanare jivi peyaiyataenexa Dioso. Dioso baja cajena daxitacuene pitorobinë, penivenivenaecotia pexainaenë daxitamatacabijavabelianexa. Bajara itsi tsane.

Pacuenia Jesucristo pelivaisi pejumecovënëtsivi itsamonaë bejiochiaexanaponatsi yabara pelivaisi

¹² Tajamonaë bitso patacaasivavi, pëtsa pajamatabëcuenenabenajacame, itsamonaë bitso pacabejiochiaexanaponaë ata. Bajarapacuene pacatocopiapatatsiana papecajamatabëcueneëjëtsinexa papecajamatabëcueneyapëtaenexa pepacuene panenajamatabëcuenecopatsijava Diosojavabelia. Nexata pëtsa pajamatabëjumaitsimë: “Xanë cajena Dioso tajumecovënëtsinë. Nexata bajarapacuenia caenënë netocopiapatapona,” pajamatabëjamë pëtsa. Tspaji raja daxita Dioso pejumecovënëtsivi bajarapacuenia tocopiapataponatsi pejamatabëcueneëjëtsinexatsi pejamatabëcueneyapëtaenexatsi pepacuene penajamatabëcuenecopatsijava Diosojavabelia. ¹³ Nexata saya panasivajamatabëcuenebarëyamëre tsavanapae paxamë ata itsa pacabejiochiaexanapona pacuenia Cristo bejiochiaexanatsi. Nexata pamatacabi pataename Cristo pepatsijavatsica pijapenivenivenaecotia yajava, pasivajamatabëcuenebarëyamë tsane. ¹⁴ Pibisiacuenia itsamonaë itsa pacabijatane Jesucristo pelivaisi panejumecovënëtsivixäe, pasivajamatabëcuenebarëyamëre. Tspaji raja paepatota itsamonaë pacabijatane, ayajamatabëcuenenë Espiritu Santo, ponë pacayajavaponapona, ayacuena pacayavenonaena. ¹⁵ Pëtsa jivitonë pabeyaxuabame. Pëtsa panacobetoxotame. Pëtsa paexaname itsacuenejava ata pibisiacuene. Pëtsa patoëvetame itsamonaë pijacuene pacajunatsinejava panetoëvetsinexa, bajarapacuenia itsamonaë panejamatabëitonotsiyaniiva. Pëtsa bajarapitsicuene paexaname itsajivi ata paxamë yabara pejumaitsiyaniva: “Pibisiacuene pexanaevixäe, bejiochiaexanatsi bajarapamonaë,” pejayaniiva itsa pacabejiochiaexana itsamonaë. ¹⁶ Pajivi bejiochiaexanatsi Jesucristo pelivaisi pejumecovënëtsixäe, bajarapajivi apo benacaura pebejiochiaexanaejavatsi. Pexaniajamatabëcuene berajuta Diosojavabelia Jesucristo pelivaisi pejumecovënëtsixäe.

¹⁷⁻¹⁸ Dioso yapëthane pacuenia daxita pijajivi tojinavanapatsi. Nexata aeconoxae Dioso tocopiapatatsi pijajivijavabelia pejumaitsinexa: “Paxamë xaniavaetsia panetojinavanapame. Pexaniacuenenua patoexanabiabame itsamonaëjavabelia. Nexata pacasivajamatabëcuenebarëyatsi,” pejinexa Dioso, pexaniacuene pijajivi itsa toexanavanapatsi. Itsi-

ata pamonae Dioso pijajivi ata, xaniavaetsia Dioso apo tojinavanapae, pexaniacuenenua apo toexanabiabi itsamonaejavabelia, bajarapamonaejavabelia Dioso jumaitsi tsane: "Paxamë apo pacasivajamatabëcuenobarëyatsi. Tspaji tajitsipaecuenia apo paexanavanapamë," jai tsane. Bajarapacuenia Dioso itsa jumaitsi tsane pejumecovënëtsivitsijavabelia ata, ¿detsa nexata Dioso jumaitsi tsane Dioso apo pejumecovënëtsivitsijavabelia? Nexata Dioso ayacuena naneconitsiaexanaena bajarapamonae. Pamonaejavabelia Dioso jumaitsi tsane: "Pacasivajamatabëcuenobarëyatsi," jai tsane, bajarapamonae Dioso capanepaena pijanacuayabetsia. Pamonaejavabelia ata Dioso jumaitsi tsane: "Paxamë apo pacasivajamatabëcuenobarëyatsi," jai tsane, bajarapamonae ata itsiata tsiquirijavayota Dioso capanepaena pijanacuayabetsia. Bajarapacuenia Dioso itsa exanaena pejumecovënëtsivitsijavabelia ata, nexata biji pamonae apo jumecovënëtsi Dioso pejumelivaisi, pamonae pibisiacuene pexanaevi, Dioso apo capanepae tsane pijanacuayabetsia. ¹⁹ Nexata paxamë Dioso pacatocopatsi ata itsamonae papecabejiobiaexanaponanexa, pëtsa pajamatabëcuenebëjamë. Tsiteca panevajënaeyabelia pexaniacuenae paexanavanapare. Panajamatabëcuenecopare papecaexanaenë, Diosojavabelia, papecayavenonaenexa. Dioso cajena pacuenia najumecapanepaeya jumaitsi, bajarapacuenia pacatoexanaena.

5

Pacuenia Dioso pejumecovënëtsivi muxujiobatsi yabara pelivaisi

¹ Aeconoxae ancianovi papecayajavajinavanapae, muxujiobjitsianë. Xanë ata rabaja ancianonë. Pacuenia itsi bajarapaancianovi, xanë ata rabaja itsinë. Tanijj pacuenia Cristo cruzata bejiobiaexanatsi. Pamatacabi icatsia Cristo patsianica, daxitatsi, Cristo pijajivitsi, nacabarëevetsiana xua Cristo evetsiana. ² Pacuenia oveja pevetsivi xaniavaetsia baevetavanapa, bajara pijinia pacuenia paxamë ata xaniavaetsia paevetavanapare Dioso pejumecovënëtsivi, pamonae Dioso pacatocopata panetoevetsinexa. Jamatabëcuenobarëyaya Dioso pejitsipacuenia patoevetavanapare Dioso pejumecovënëtsivi. Pëtsa pajamatabëjumaitsimë: "Apo jitsipae atanë tatoevetsinexa Dioso pejumecovënëtsivi, itsiata toevetsianajë. Tspaji Dioso netojitsipa tatoevetsinexa," pajamatabëjamë pëtsa. Pëtsa pajamatabëjumaitsimënu: "Tanematamotsinexa toevetsianajë," pajamatabëjamë pëtsa. Paxamë panejamatabëthëtojavavetsina panejitsipaexae Dioso pejumecovënëtsivi panetoevetsinexa, patoevetavanapare. ³ Pamonae Dioso pacatocopata panetoevetsinexa, bajarapamonae pëtsa bepapijatuxanevimë panatanemë saya jema paneitorobabiabinexa. Biji rajane xaniavaetsia patsitajinavanapare pacuenia patojitsipame bajarapamonae pejinavanapanaenexa. ⁴ Nexata pamatacabi icatsia Cristo patsianica, ponë jane baja pepo vajanacaevetsinënexa, nacarajutsiana pinijicuene. Xua Cristo nacarajutsiana, apo vereverecae tsane daxita matacabijavabelianexa.

⁵ Paxamë papevëjavimë, pacuenia ancianovi pacaitoroba, pajumecovënëtabiabare. Pacaejivimë canacujitsia namataenetsia panayavenonabianame beveliajamatabëcuenevi nataeya. Bajarapacuenia panataema tspaji raja Dioso pejumelivaisibaxutota jumaitsi mapacueniaje:

Dioso apo yavenonae pamonae beayajamatabëcuenevi penataevi. Itsiata baitsi jane Dioso pitaxutotsoniataexae, pexaniajamatabëcuenia yavenona pamonae beveliajamatabëcuenevi penataevi, jai Dioso pejumelivaisibaxutota.

⁶ Nexata saya paxamë beveliajamatabëcuenevi panataema ayajamatabëcuenenë Dioso pitabarata. Nexata Dioso pecaëjëtsimatacabita, paayajamatabëcuenevimë pacaexanaena. ⁷ Dioso papecaasivaxae, pacaevetaponapona. Bajaraxuata daxita panejamatabëcuenebëjajjava, pacopare. Pavajëre Diosojavabelia papecayavenonaenexa.

⁸ Nayajivitaeyanua pajinavanapare panijavajabitsaenë, dovathi, papecayamaxëitojorobianiva. Pacuenia nevëthë itsa piajani, jaitaponapona pexaeyabuatsinënexa, bajarajamatabëcuenetsi dovathi papecayamaxëitojorobinexa. ⁹ Paepatota dovathi jamatabëpacayamaxëitojoroba panecopabinexa Jesús pelivaisi panejumecovënëtsijava, bajarapaepatota pajamatabëcuenesaëmëre Jesús pelivaisi panejumecovënëtsijava. Diosojavabelia najamatabëcuenecopatsiaya dovathi panayajivitaevare. Itsamonae itsa pacabejiobiaexana dovathi pejamatabëcueneta, panajamatabënapire pacuenia itsamonae ata, Dioso pejumecovënëtsivi, daxitanacuanëjjava dovathi pejamatabëcueneta bejiobiaexanaponatsi. ¹⁰ Itsiata baitsi jane saya caepatoyo Dioso pacacopatsiana papecabejiobiaexanaenexa. Bajaraxuacujinae Dioso pacajamatabëcuenesaëyaexanaena. Bajaraponë Dioso vajanacayavenonaenë daxitacuenejavabelia. Nacajunatanua Jesucristo yajava athëbëatsia vajanacayavaecaenexa, penivenivenaenacuatsia,

daxitamatacabijavabelianexa. ¹¹ Dioso baja cajena daxitacuene pevetsinē daxitamatacabijavabelianexa. Bajara itsi tsane.

Pacuenia Pedro toyaquina peveretsinexa baja petoyaquinaelivaisi mapabaxutotaje yabara pelivaisi

¹² Silvano betajuyapijinē taniji bajaraponē ata Dioso pejumecovēnētsixae. Silvano yaquinaeyaexanajē palivaisi pacatoitorobijitsiatsilia. Bajaraponē ponaejitsia baja paxamējavabelia. Nexata pacatoyaquinatsi mapabaxutoje patacajamatabēcuene asaēyaexanaenexa. Dioso vajanacayavenonabiabixae, yapētanetsi baja xaniajai pepacuene Dioso vajanacaasivacuene. Bajaraxuata pacabejiobiaexanabiabi ata, pajamatabēcuensaēmēre tsavanapae paneyapētaexae baja bajarapacuene.

¹³ Dioso pejumecovēnētsivi, Babilonia tomarapijivi, pacajamatabēnajina. Pacuenia paxamē Dioso pacaitapeta papijajivinexamē, bajara pijinia pacuenia bajarapamonae ata Dioso itapetatsi pijajivinexa. Marcos, ponē betaxēnatocuenia tataenē, bajaraponē ata pacajamatabēnajina. ¹⁴ Namataenetsia naasivaya panabajacobare bepanacaemonaemē panenataexae.

Pacatojitsipatsi daxita paxamē jamatabēcuenexanepanaeya panejinavanapaenexa Jesucristo papijajivixaemē. Bajara itsi tsane.

Mapabaxutoje San Pedro cotocaevi toyaquina Dioso pejumecovënëtsivijavabelia

Pacuenia Pedro mapabaxutoje cotocaevi toyaquina Dioso pejumecovënëtsivijavabelia yabara pelivaisi

¹ Xanë Simón Pedronë, Jesucristo taneitorobicuenia tatonacuenebaponaponenë. Nitobanua jivi tatsipaebabiabinexa Jesucristo pelivaisi. Pacatoyaquinatsi mapabaxutoje paxamë baja Dioso panejumecovënëtsivi. Jesucristo patanesivatëpaejava patajaneconi yabara patajumecovënëtsijava, paxanë panetonamatamota Diosojavabelia. Bajara pijinia paitsimë paxamë ata. Jesucristo papecasivatëpaejava panijaneconi yabara panejumecovënëtsijava, pacatonamatamota Diosojavabelia. Bajarapacuenia daxitatsi Jesucristo vajanacasivatëpaejava vajaneconi yabara vajajumecovënëtsijava, nacatonamatamota Diosojavabelia. Tsipaji vajatuxanenë Jesucristo, vajanacacapanepaenë, nacanecomimatamota baja. ² Pacatovajëtatsi Diosojavabelia bitso papecayavenonaponenexa daxitacuene yabara. Pacatovajëtatsinua jamatabëcuenexanepanaeya panejinavanapaenexa. Bajarapacuenia Dioso pacayavenonaponena panevajënaeyabelia, Dioso ita pajamatabëcueneyapëtaeponaename, vajatuxanenë Jesucristo ata ita pajamatabëcueneyapëtaeponaename.

Pacuenia Dioso pejumecovënëtsivi jamatabëcuenetsi tsavanapae yabara pelivaisi

³ Dioso, ponë nacajunata pijajivinexatsi, yapëtanetsi baja bitso ayaijamatabëcuenepexainanëcuenene. Bajaraponë Dioso bitso pexaniacuene pexainanë. Bajaraponë Dioso pesaëta pinijicuene pexanaejava, ita exana mapanacuataje, nacatsitanajamatabëcuenetajëta bitso ayaijamatabëcuenepexainanëcuenene. Bajarapacuenia ita yapëtaeponatsi Dioso, nexata Dioso nacarajutapona pesaë vajajinavanapaenexa xaniavaetsia pacuenia Dioso nacatojitsipa. ⁴ Bajarapacuenia Dioso pinijicuene pexanaejava pexanaexae mapanacuataje, nexata yapëtanetsi Dioso xaniajai vajanacacapanepaejavanexa pacuenia najumecapanepaeya jumaitsi. Dioso vajanacacapanepaejavanexa pinijicuene bitso. Jumecovënëtsi Dioso vajanacacapanepaejavanexa. Nexata Dioso nacayajavaponapona. Bajaraxuata Dioso pesaëta nacajamatabëcuenesaëyaexanaena vajajinavanapaenexa xaniavaetsia. Nexata nacajamatabëcuenesaëjapaeaxanaena vajavecuapanepaenexa mapanacuata pibisiacuene vajanacaexanaeyaexanae jamatabëcuenene. Nexata pacuenia Dioso jamatabëcuenetsi tsaponaponae, bajara vaxaitsi ata jamatabëcuenetsitsi tsavanapae tsane. ⁵ Nexata pacuenia Dioso jamatabëcuenetsi tsaponaponae, bajara panejamatabëcuenetsinexa, asaëyata Dioso pajumecovënëtapona. Asaëyata Dioso ita pajumecovënëtaponaename, nexata icatsia itsajava payapëtaeponaename. Asaëyata paexanavanapare epexaniacuene. Asaëyata ita paexanavanapaneame epexaniacuene, nexata icatsia orijibia pajamatabëcueneyapëtaeponaename Dioso. Nexata payapëtaename pacuenia Dioso pacatojitsipa asaëyata panetoexanavanapaenexa. ⁶ Paneyapëtaecujinae pacuenia Dioso pacatojitsipa asaëyata panetoexanavanapaenexa, icatsia payapëtaename panenajamatabëcuenecataitsinexa pibisiacuene panenajamatabëxainayaniva. Paneyapëtaecujinae panenajamatabëcuenecataitsinexa pibisiacuene panenajamatabëxainayaniva, icatsia payapëtaename dovathi pejamatabëcueneta bajayajebi pacajamatabëcuenetajëtaponae ata, asaëyata panenajamatabëcuenesaëtsinexa ëDiosojavabelia. Paneyapëtaecujinae dovathi pejamatabëcueneta bajayajebi pacajamatabëcuenetajëtaponae ata, asaëyata panenajamatabëcuenesaëtsinexa ëDiosojavabelia, icatsia payapëtaename xaniavaetsia panejinavanapaenexa pacuenia Dioso pacatojitsipa. ⁷ Paneyapëtaecujinae xaniavaetsia panejinavanapaenexa pacuenia Dioso pacatojitsipa, icatsia payapëtaename asaëyata panenayavenonaenexa itsamonae ata Dioso pejumecovënëtsivi. Paneyapëtaecujinae paneyavenonaenexa itsamonae ata Dioso pejumecovënëtsivi, icatsia payapëtaename asaëyata namatonaetsia bitso panenasivanexa bajarapamonaejavabelia.

⁸ Daxita bajaraxua asaëyata panevajënaeyabelia ita paexanavanapaneame, nexata pacuenia Dioso jamatabëcuenetsi tsaponaponae, bajara pajamatabëcuenetsimë tsane. Bajarapacuenia asaëyata ita paexanavanapaneame, nexata pajamatabëcuenetsabaponaneame Dioso panejumecovënëtsijava. Nexata Dioso ata tsitaxanepaneatsi xua patonacuenebavanapame. Nexata vajatuxanenë Jesucristo panejamatabëcueneyapëtaejava, apo panacueratsimë tsane. ⁹ Itsiata baitsi jane pajivi apo exanae tsane daxita bajaraxua, nexata apo yapëtae tsane Dioso pijacuene. Tsipaji bajarapajivi nacofënëtsiana Dioso picani pevécuajibiaexanaejavatsi

pibisiacuene pexanaeneconimi. ¹⁰ Tajamonae, bajaraxuata pacaasaëmère tsavanapae Dioso panejumecovënëtsijava, jivijavabelia panetsitanaitajëtsinexa Dioso papecajunatsijava, papecaitapetsijava ata papijajivinexamë. Nexata bajarapacuenia itsa paexanavanapaename, Dioso panejumecovënëtsijavavecua, apo pajopaemë tsane. Pacacapanepaena Dioso. ¹¹ Nexata Dioso pacatocopatsiana panejonenexa vajatuxanenë Jesucristo vajanacacapanepaenënexa, pijanacuayabetsia, apo pevereverecaenacuayabetsia, paneyajavajinavanapaenexa.

¹² Daxita rabaja bajaraxua payapëtaneme. Pajamatabëcueneaëmënuja baja panejumecovënëtsijava pexaniaajilivaisi. Itsiata icatsia pematatsënëa pacanajamatabënapitsiaexanaponatsi. ¹³ Abaxë tasaëtsaponaponaepato mapanacuataje, netsitaxanepana patacamuxujobinexa, bajarapacuenia patacanajamatabënapitsia exanaponaenexa. ¹⁴ Tsipaji baja vajatuxanenë Jesucristo tajëvelia neyapëtaeyaexana bepijia tatëpaejavanaxa. ¹⁵ Itsiata baitsi jane pacuenia necaëjëpa, xaniavaetsia pacatoyaquinaenatsi panenacofënëtsiyaniva. Nexata itsa tējapj, paxamë tavënamuto panenajamatabënapitabiabinexa pacuenia pacamuxujobatsi.

Pacuenia Jesucristo pijajivijavabelia tsitanajamatabëcueneitajëta ayajamatabëcuene pexanaenëcuene yabara pelivaisi

¹⁶ Imata vajatuxanenë Jesús pelivaisi itsa pacatsipaebatsi, xaniavaetsia pacatsipaebatsi mapacueniaje: “Vajatuxanenë Jesucristo baja cajena bitso pecajëpënenëtsi Dioso pesaëta pinijicuene pexanaejava pexanaenexa. Bajaraponë icatsia patsianica,” pacajaitsi. Saya jivi pejamatabëcueneta penajumetsënëtsilivaisi, apo pacatsipaebatsi. Tsipaji baja pataitaxutota pataniji vajatuxanenë ayajamatabëcuene pexainaenëcuene. ¹⁷ Xaniavaetsia baja cajena pajumetaniji pamatacabi paxa Dioso athëbëvetsica barëcuaicuaijaisi. Bajarapaepatota daxitanë Cristo nivenivenareca. Athëbëvetsica paxa Dioso jumaititsica mapacueniaje: “Mara ponë taxënatoje, tasivanë. Bitso sivajamatabëcuenebarëyanë,” jaititsica paxa Dioso athëbëvetsica. ¹⁸ Vajatuxanenë Jesucristo payajavanubenajë petsutojumata, itsajota jane baja paxa Dioso athëbëvetsica barëcuaicuaijaisitsica. Nexata bajarapatsutojumata paxanë patajacuata pajumetaniji vajatuxanenë Jesucristo paxa Dioso athëbëvetsica pebarëcuaicuaijajavatsitsica.

¹⁹ Nexata pataniji. Payapëtanjinua. Xua bajayata Diosojumepaebivimi profetavi tajëvelia vajunupaeba pecopiapatsinexa, bajaraxua jane baja aeconoxae copiapata. Paxamë pibisiacuene panenayajivitaenexa, pajumecovënëre profetavimi pepaebilivaisi. Profetavimi pepaebilivaisi, pexaniaajilivaisixae, belámpara picani. Pacuenia lámpara itayota pitaquirijavata, bajara pijinia itsi profetavimi pepaebilivaisi pibisiacuene panenayajivitaenexa mapanacuataje. Pajumecovënëre xaniavaetsia profetavimi pepaebilivaisi. Nexata bajarapalivaisi pacajamatabëcueneyavenonaena pibisiacuene panenayajivitaevanapaenexa mapanacuataje. Bajarapacuenia pacajamatabëcueneyavenonaena matapania icatsia Jesucristo pepatsimatacabitsicajavabelianexa. Nexata bitso pabarëyamë tsane pamatacabi icatsia Jesucristo patsianica. ²⁰ Xaniavaetsia pacanaëjère daxitacuenavecua paneyapëtaenexa mapalivaisije. Daxita xua copiapatsijitsia mapanacuataje, tajëvelia Dioso pejumelivaisibaxutota vajunupaeba. Itsajivi ata cajena apo caëjëpaetsi saya pejamatabëcueneta bajaraxua xaniavaetsia pevajunupaebinexa itsamonaejavabelia, itsamonae ata peyapëtaenexa pajamatabëcuenelivaisi xaina bajaraxua. Matapania pajivi Espiritu Santo yapëtaeyaexanatsi, caëjëpatsi xaniavaetsia pevajunupaebinexa bajaraxua. ²¹ Bajayata Diosojumepaebivimi profetavi tajëvelia itsa vajunupaeba daxita xua copiapatsijitsia mapanacuataje, pejamatabëcueneta apo exanae bajarapalivaisi. Profetavimi Dioso pijajivixae, pacuenia Espiritu Santo yapëtaeyaexanatsi, paebabiaba.

2

Pacuenia Dioso pejumecovënëtsivi muxujobatsi penajumetsënëtsilivaisi petsipaebaponaeivi pejumecovënëtsiyaniva yabara pelivaisi

(Jud 4-13)

¹ Bajayata itsamonae tsipaebapona penajumetsënëtsilivaisi Israel nacuapijivijava Dioso pejumelivaisi bepaebivi petaenexatsi. Bajara icatsia aeconoxae ata itsane paxamëjava. Itsamonae pacatsipaebiana penajumetsënëtsilivaisi. Bajarapamonae yamaxëtojobiayia pacatsipaebiana penajumetsënëtsilivaisi. Nexata bajarapalivaisita pacacopabiaexanaena Dioso panejumecovënëtsijavami. Bajarapamonae apo pejumecovënëtsivi tsane vajatuxanenë Jesucristo, ponë picani sivatëpatsi pecapanepaenexatsi. Bajarapacuenia pexanaexae tsane bajarapamonae, nexata bepijia Dioso verebiabiana bajarapamonae. ² Bajarapamonae pevitota pibisiacuene exanavanapaena. Nexata bajaraxua yabara jumaititsi tsane: “Apo itsacuene itsiata, bajaraxua exanae atatsi,” jai tsane bajarapamonae.

Nexata ayaibitsaëto paxamëyajuvënëvi jumecovënëtsiana. Naexanaenanua papibisiacuene bajarapamonae exana. Nexata bajarapacuenia paxamëyajuvënëvi pibisiacuene petsitaexanaexae tsane, pamonaë Dioso apo pejumecovënëtsivi pibisiacuenia baracuaicuaijai tsane pexanialivaisi, Jesucristo pelivaisi. ³Nexata pamonaë penajumetsënëtsilivaisi tsipaebaponaena, bitso jitsipaena palata. Bajaraxuata pacatsipaebiana penajumetsënëtsilivaisi papcatsipaebijamatabëcuene papecavecuapitsinexa panijapalata. Itsiata baitsi jane Dioso tajëvelia najamatabëcuenevereta bajarapamonae penaneconitsiaexanaenexa. Nexata bajarapamonae bajarapitsixae tsane, pepacuene jemata Dioso naneconitsiaexanaena.

⁴ Angelevi ata baja cajena itsa naneconita, aneonijibia Dioso apo copatsi. Angelevi ata itsa naneconita, nexata Dioso xuaba infernojavabelia. Nexata bajarajota, pitaquirinacuata, cëbiaya Dioso jinavanapaeyaexana. Nexata bajarapaängelevi Dioso jane baja naneconitsiaexanaena pamatacabi Dioso naneconitsiaexanaena daxita pijaneconi pexainaevi. ⁵ Dioso cajena aneonijibia apo copatsi bajayatami ata pamonaë pibisiacuene exana. Dioso ira hubutsiaexana bajarapamonae penaxuabinexa.

Caenë, Noëpijinë, Dioso capanepa pijamonae yajava, siete pajiviyobeje. Noëpijinë picani itavetabiaba jivi pibisiacuene pexanaeyaniva. ⁶ Bajayata Dioso isotota verebiaba Sodoma tomarapijivimi. Bajara pijinia pacuenia Dioso verebiaba Gomorra tomarapijivimi ata. Nexata Dioso copiarucaeyaexana bajarapatomaramibeje. Tsi-paji bitso pibisiacuene exana bajarapatomaramibejepijivi. Bajarapatomaramibeje nacopata ëipumana. Bajarapacuenia Dioso verebiaba bajarapamonae, pamonaë cotocaevi jinavanapa, pepapëtaenexa, bajarapamonae ata pibisiacuene pexanaeyaniva.

⁷ Pamatacabi Dioso verebiaba bajarapatomaramibejepijivi, caenë, Lotpijinë, Dioso capanepa pexaniacuene pexanabiabixae. Lotpijinë itsa taeyabiaba bajarapamonae bitso pibisiacuene pexanaejava, nexata bitso sivanajamatabëxainabiaba. ⁸ Lotpijinë pexaniacuene pexanaenë, bajarapamonae tuatujëta naponapona. Nexata caematacabi canacujitsia Lotpijinë bitso sivanajamatabëxainabiaba, itsa tane bajarapamonae pibisiacuene pexanaejava, itsa vënëlivaisitanenua pibisiacuene pexanaejava.

⁹ Bajaraxuata vaxaitsi baja yapëtanetsi mapacueneje. Vajatuxanenë caëjëpatsi pejamatabëcueneasaëyaexanaenexa pajivi najamatabëcueneocopata vajatuxanenëjavabelia. Nexata pajivi najamatabëcueneocopata vajatuxanenëjavabelia, dovathi itsa jamatabëcueneëjëtatsi, vajatuxanenë jamatabëcueneasaëyaexana. Vajatuxanenë caëjëpatsinua pibisiacuene pexanaevi, nabejiobitsiaya pejinavanapaeyaexanaenexa, mapanacuataje abaxë itsa asaë tsavanapae. Bajarapacuenia vajatuxanenë nabejiobitsiaya jinavanapaeyaexanaena penaneconitsiaexanaenexa icatsia petëpæcujinae ata, pamatacabi naneconitsiaexanaena daxita pijaneconi pexainaevi.

¹⁰ Pamonaë bitso casaë tsavanapae pibisiacuene pexanaejava pijacuata penatojitsipaecuenia, bajarapamonae bitso ayaicuenia Dioso naneconitsiaexanaena itsamonae penaneconitsiaexanaejava matatoxenetsia. Pamonaë ata apo jumecovënëtsi vajatuxanenë pevetsicuenetsi, bajarapamonae ata Dioso bitso ayaicuenia naneconitsiaexanaena. Pamonaë penajumetsënëtsilivaisi petsipaebaponaevi, apo yayatae itsamonae ata. Ajamatabëcuenetajanua. Apo jumejunavinua bajarapamonae pibisiacuene pebaracuaicuaijainexa angelevi. ¹¹ Angelevi biji picani bitso piasaëvi penajumetsënëtsilivaisi petsipaebaponaevi matatoxenetsia. Nexata angelevi vajatuxanenë pitabarata pejinavanapaexae, bitso piasaëvi ata penajumetsënëtsilivaisi petsipaebaponaevi matatoxenetsia, itsiata pibisiacuenia apo baracuaicuaijai penajumetsënëtsilivaisi petsipaebaponaevi.

¹² Pamonaë penajumetsënëtsilivaisi petsipaebaponaevi, beveliajamatabëcuenevi saya. Pacuenia saya jinavanapa unupijidujuai, bajara saya jamatabëcueneitsi bajarapamonae. Apo najamatabëxainae pexanialivaisi. Saicaya xua jamatabëexana, exanabiaba. Unupijidujuai saya jema bajinavanapa. Nexata jivi jemata itsa tane, vaetaba. Beyaxuanua. Pamonaë penajumetsënëtsilivaisi petsipaebaponaevi, pibisiacuenia baracuaicuaijai tsabiabi xaniavaetsia apo pepapëtaejava ata. Nexata pacuenia unupijidujuai baverebiabatsi, bajara pijinia pacuenia jemata Dioso verebiabiana bajarapamonae. ¹³ Nexata Dioso bajarapamonae juya bejibia jinavanapaeyaexanaena. Tsi-paji bajarapamonae itsamonae bejibiaexanabiaba. Bajarapamonae pibisiacuene itsa exanabiaba, barëya tsabiabi. Bajarapamonae apo pacajamatabëcuenejëpae ata, nanacaetuatsiana itsa panacaetuatame. Nexata yamaxëitojorobiaya pacayajavanabanebiabiana fiesta paneexanaematacabi. Bajarapamonae pibisiacuene pexanabiabixae tsane, nexata panetuatuajëta bepiauxirajava tsane.

¹⁴ Bajarapamonae itsa tane petiriva, pibisiacuene jamatabëexanabiaba pevitota bejarapovjavabelia. Apo yabaracueranae pibisiacuene pexanaejava. Penajumetsënëtsilivaisi petsipaebaponaevi, pibisiacuene exanaeyaexanabiaba pamonaë abaxë apo ajamatabëcuenesaë Dioso pejumecovënëtsijava. Bajarapamonae bitso jitsipa

daxitacuene pexainaejava epamonaenexa. Bitso yapētanenua pepitsinexa xua jitsipa. Nexata bajarapamonae Dioso bitso ayaicuenia naneconitsiaexanaena.¹⁵ Bajarapamonae baja Diosovecua naxuabiaya jinavanapa. Tsipaji baja copaba pexaniajailivaisi pejumecovēnētsijavami. Apo jumecovēnētsi Dioso. Nexata bajarapamonae cuenejēpa Diosojumepaebinēmi, profeta Balaampijinēmi, Beorpijinēmi pexēnato. Balaampijinēmi bajayata itsamonae tsipaebatsi palata pibisiacuene picani pexanaenexa. Nexata baja picani Balaampijinēmi jejai pibisiacuene pexanaenexa.¹⁶ Itsiata baitsi jane Balaampijinē Dioso itavetatsi bajarapapibisiacuene bitso pexanaeyaniva Dioso pitabarata. Balaampijinē pijaburrota yanajetaruca. Dioso cuaicuajaiyaxana burro. Nexata pacuenia jivitonē bacuaicuajai, bajarapacuenia Balaampijinē pijaburro barēcuaicuajaiitsi pitavetsinexatsi pibisiacuene pexanaeyaniva. Nexata picani xua Balaampijinē jamatabēxana, copata baja.

¹⁷ Pamonae penajumetsēnētsilivaisi petsipaebaponaevi, apo jumenamatamotsi. Yapētanetsi pacuenia baitsi meramatathabēmi itsa tseveca. Meramatathabēmi itsa tseveca, apo jamatabēcueneyavenonae itsajiviyo ata. Tsipaji itsajivi mera jitsipae ata, piapaenexa apo puatsi bajarajota. Bajara pijinia itsi pamonae petsipaebaponaevi penajumetsēnētsilivaisi. Itsajivi ata apo jamatabēcueneyavenonae bajarapamonae petsipaebilivaisita. Pacuenia itarērēbo ata jovibota xaniavaetsia caevēta apo rucae, bajara jamatabēcuenetsi bajarapamonae. Caejamatabēcuenē apo xainae. Nexata Dioso bajarapamonae bitso ayaicuenia naneconitsiaexanaena. Bajarapamonae pitaquirinacuata naneconitsia jinavanapaena daxitamatacabijavabelianexa.¹⁸ Bajarapamonae ayaijamatabēcuenēmi nataeya cuaicuajai tsabiabi. Itsiata baitsi jane saya natsiquejemalivaisi cuaicuajai tsabiabi. Bajarapamonae yamaxēitojorobiaya jumai tsabiabi: “Apo itsacuene raja apo payaiyatae atamē petiriva. Pibisiacuene itsa jamatabēpaexaname panevitota petirivajavabelia, paexanare,” jai tsabiabi bajarapamonae. Bajarapacuenia bajarapamonae othopaeyaexanapona pamonae pejanajumecovēnētsivi Dioso. Tsipaji pibisiacuene exanaeyaexanapona.¹⁹ Bajarapamonae yamaxēitojorobiaya jumai tsabiabinua: “Itsa panejumecovēnētsianame patacatsipaebilivaisi, nexata pacatoxanepanaena paneexanabiabinexa daxitacuene,” jai tsabiabi pamonae penajumetsēnētsilivaisi petsipaebaponaevi. Itsiata baitsi jane bajarapamonae apo jamatabēcuenecaējēpaetsi daxita xua pexaniacuene pexanaenexa. Saya epibisiacuene exanabiaba. Bajaraxuata Dioso bajarapamonae verebiabiana. Tsipaji bajarapamonae pibisiacuene exanabiaba pijacuata penatojitsipaecuenia, pacuenia pejamatabēcuenē itorobatsi. Caejivitsi canacujitsia vajacuata vajanatojitsipaecuenia itsa exanaponatsi, vajajamatabēcuenē beprijavitonētsi naexanatsi. Tsipaji pacuenia vajajamatabēcuenē nacaitoroba, exanaponatsi.²⁰ Pamonae baja yapētane vajatuxanenē Jesucristo, ponē capanepaejitsiatsi pibisiacuene pexanaeoneconimivecua, bajarapamonae baja Dioso vecuaajibiaexanatsi pibisiacuene pexanaeoneconimi. Pajamatabēcuenēmi ata jitsipaeyaexanabiabatsi pibisiacuene pexanaenexa, bajarapajamatabēcuenēmi ata baja vecuaajibiaexanatsi. Itsiata baitsi jane bajarapamonaeajuvēnēvi icatsia pibisiacuene itsa exanapona, nexata icatsia bajarapajamatabēcuenē pejumecovēnētaponaxae, bitso naneconitsiana Diosojavabelia. Nexata jane baja copaiya pexanaeoneconimi matatoxenetsia, bitsoyo ayaineconi natsixainaena.²¹ Pamonae copaba pexaniajailivaisi pejumecovēnētsijavami, bitso ayaineconi natsixaina Diosojavabelia. Bajarapamonae itsa apo tsipaebi tsipaetsi bajarapapexaniajailivaisi, bevelia naneconitsipa Diosojavabelia. Tsipaji apo yapētae tsipae bajarapalivaisi. Nexata baja peyapētaexae bajarapalivaisi, pecopabixaenua pejumecovēnētsijavami bajarapalivaisi, naneconita bitso Diosojavabelia. Toxanepanaejitsipatsi meta bajarapamonae itsa apo tsipaebi tsipaetsi bajarapalivaisi bevelia penaneconitsinexa Diosojavabelia.²² Bajayatapijilivaisi jumaitis mapacueniaje: “Aviri peyacabicujinae, icatsia nayacabixane. Marrano pijinia tsorobota peboacaecujinae, itsa matavanetsi pexaniamerata, pematavaecujinaetsi, icatsia caevēalia tsorobota boca,” jai bajayatapijilivaisi. Xaniajai baja cajena bajarapalivaisi. Bajara pijinia jamatabēcuenetsi pamonae icatsia caevēalia pibisiacuene exana.

3

Pacuenia icatsia Jesucristo patsijitsiatsica yabara pelivaisi

¹ Tajamonae bitso patacaasivavi, copiaya baja cajena pacatoyaquinatsi itsabaxuto. Nexata icatsia mapabaxutoje cotocaevi pacatoyaquinatsi. Pacatoyaquinatsi bajarapabaxutobeje patacamuxujibinexa nexata xaniavaetsia panenajamatabēxainanexa.² Panajamatabēnapire pacuenia Diosojumepaebivimi profetavi bajayata tajēvelia jumaitis. Panajamatabēnapirenuu pacuenia baja cajena apōstolevi pacatsipaeba vajatuxanenē Cristo

pelivaisi. Cristo, ponē papecacapanepaenēnexa, copiaya tsipaeba apóstolevijavabelia. Nexata juya apóstolevi paxamējavabelia pacatsipaeba. ³Xaniavaetsia panamuxunaevere daxitacuenevēcua paneyapētaenēxa mapacuenēje. Nacua pecopiarucaevajēnaeyotanēxa, najetarubenaena itsamonae pecapocaponaevinēxa pexaniajailivaisi. Bajarapamonae exanavanapaena pibisiacuenē pacuenia pijacuata natojitsipa. ⁴Bajarapamonae Cristo pepatsijavanexatsica apo pejumecovēnētsixae, najumequenētsiataeya saya jumaitsi tsane: “¿Jica Cristo icatsia pepatsijavanexatsica pacuenia baja Cristo tajēvelia najumecapanepaeya jumaitsi? Bajayata vajavajēnaepijivimi, pamonaē jumecovēnēta Cristo pepatsijavanexatsica, vajēnaeēvetavanapa picani. Itsiata Cristo apo patsitsica. Nexata bajarapamonaemi belia baja tēpa Cristo patsinejevatsica. Daxitanacua abaxē itsiata tsitecanuca Dioso pexanaecujinae,” jai tsane saya bajarapamonae apo pejumecovēnētsixae Cristo pepatsijavanexatsica. ⁵Bajarapacuenia jumaitsi tsane tsipaji bajarapamonae apo canaējētsi tsane pacuenia bajayata Dioso itoroba saya pijumeta itaboxo penaexanaenēxa mapanacua yajavaje. Nexata mapairanexaje, manuamene tuatujēatsina Dioso ira jumapitsapaeyaexanaina. ⁶Bajayata pijinia mapanacua Dioso itsa bubutsiaexana, daxitajivi Dioso verebiaba merata. ⁷Itsiata baitsi jane itaboxo, ira yajava, daxita xua tanetsi, Dioso pejamatabēcueneta abaxē xaniavaetsia tsitecanuca. Dioso abaxē xaniavaeta itsamatacabi isotota peveripaenēxa. Dioso isotota veriapaena mapanacua, itaboxo yajava, pamatacabi naneconitsiaexanaena daxita pijaneconi pexinaevi. Bajarapamatacabi Dioso naneconitsiaexanaena pibisiacuenē pexanaevi. Dioso verebiabiana daxitacuenē.

⁸Tajamonae bitso patacaasivavi, pētsa panacofēnētame mapacuenēje. Vajatuxanenē saya tsitacaematacabit si mil pavaibeje ata. Mil pavaibeje ata apo tsitabajayajebitsi. Betsitacaematacabi tsanucaetsi saya vajatuxanenē. ⁹Itsamonae jamatabēcuenenavēxaniabiaya jamatabējumaitsi: “Dioso bitso cuenenajemata pexanaenēxa pacuenia najumecapanepaeya jumaitsi,” jamatabējai. Vajatuxanenē raja apo cuenenajematsi. Xua raja vajatuxanenē bajayajebi bucuenenajematsi, abaxē saya eveta jivi pejumecovēnētsinēxatsi. Tsipaji vajatuxanenē apo jitsipae itsajivi ata pevcuanaxuabijavatsi. Vajatuxanenē raja jitsipa daxitajivi pecopabinēxa pibisiacuenē pexanabiabijava, penajamatabēcuenepēnyorotsinēxa Diosojavabelia.

¹⁰Vajatuxanenē baja cajena icatsia jemata patsianica. Pamatacabi jivi jamatejema jinavanapaena, jemata vajatuxanenē patsianica. Pacuenia penacobetoxotsinēnexa jemata bapata, itsajota apo jamatabēnajinaetsi, bajara pijinia itsi tsane vajatuxanenē. Jemata patsianica. Nexata jane baja bajarapamatacabit itaboxo copiarucaena. Ayajume najumetsiana. Daxita athēbēpijicuenē veriverecaena isotota. Mapanacuamije, daxita xua tanetsi mapanacuataje, yajavatajuena isotota.

¹¹Daxitacuenē bajarapacuenia veriverecaena. ¡Bajaraxuata bitso xaniavaetsia bepajinavanapame Dioso papecatojitsipaenēcuenia! ¹²Bepacopiaeēvetavanapame vajatuxanenē pepatsijavanexatsica. Vajatuxanenē pijacuenē bepatonacuenēbavanapame bepajia pepatsinēxatsica. Pamatacabit vajatuxanenē patsianica, itaboxo veriverecaena isotota. Daxita athēbēpijicuenē veriajaviana isotocotiata. ¹³Itsiata baitsi jane xuacujinae Dioso icatsia pejanaitaboxo, pejanairanua, exanaena pacuenia tajēvelia najumecapanepaeya jumaitsi. Nexata vaxait si evetavanapatsi vajataenēxa pejanaitaboxo, pejanairanua. Itsamatacabi pejanairata daxitajivi ēpexaniacuenē exanavanapaena, xua Dioso tojitsipatsi.

¹⁴Tajamonae bitso patacaasivavi, pejanaitaboxo, pejanairanua, panetaenēxa, panecopiaeēvetavanapaepato xaniavaetsia pajinavanapaname. Nexata pamatacabi vajatuxanenē icatsia patsianica, pacasivabarēya tsane. Bajarapacuenia pacasivabarēya tsane itsa pacacaxitajarabiana jamatabēcuenēxanepanaeya aneconibia panejinavanapaejavata. ¹⁵Pacanaējēre xua yabara abaxē vajatuxanenē apo patsitsica. Abaxē raja apo patsitsica daxitajivi apo pejumecovēnētsixae Dioso. Tsipaji daxitatsi vajatuxanenē jamatabēnacacapanepa pijanacuayabetsia. Pacuenia daxitatsi vajatuxanenē jamatabēnacacapanepa pijanacuayabetsia, bajaraxua vajaasivanē, vajabanānē Pablo, peyapētaenēxa Dioso yavenonatsi. Nexata Pablo peyaquinaebaxutonēta, pacatoyaquina pacuenia vajatuxanenē daxitatsi jamatabēnacacapanepa pijanacuayabetsia. ¹⁶Pablo baja cajena peyaquinaebaxutonēta, pacatoyaquina pacuenia vajatuxanenē daxitatsi jamatabēnacacapanepa pijanacuayabetsia. Pablo peyaquinaelivaisianē, itsalivaisi ayapēbeje tsabiabi vajajumeyapētaenēxa xua yabara Pablo yaquina. Nexata palivaisi apo jumeyapētaetsi, apo yapētaetsi pajamatabēcuenelivaisi xaina. Nexata pamonaē xaniavaetsia apo jumeyapētae Pablo peyaquinaelivaisianē, juya tsipaebabiaba itsamonaejavabelia apo jumeyapētae ata. Pamonaē ata caejamatabēcuenē apo xinae Dioso pejumecovēnētsijava, juya itsamonaejavabelia tsipaebabiaba Pablo peyaquinaelivaisianē. Nexata bajarapamonae itsamonaejavabelia itsa tsipaebabiaba, Pablo peyaquinaelivaisianē mataropotsia saicayacuenia tsipaebabiaba. Bajarapacuenia itsabaxutonēta ata,

perubenaelivaisianë ata, bajarapamonae saicayacuenia mataropotsia tsipaebabiaba. Bajarapamonae itsamonaejavabelia itsa tsipaebabiaba, apo tsipaebabiabi pacuenia Dioso pejumelivaisibaxutota jumaitsi. Saicayacuenia saya tsipaebabiaba. Nexata bajarapamonae pijacuata naneconita Diosojavabelia. Nexata Dioso verebiabianatsi.

¹⁷Tajamonae bitso patacaasivavi, paxamë baja cajena tajëvelia payapëtaneme bajaraxua yabara. Bajaraxuata panayajivitaema pibisiacuene pexanaevi penajumetsënëtsilivaisi papecatsipaebiyanima. Tspaji papecatsipaebilivaisita, pacajopaeyaexanaejitsipa Dioso panejumecovënëtsijavavecua. ¹⁸Pacatojitsipatsi paneajamatabëcuenesaë tsavanapaenexa Dioso panejumecovënëtsijava Jesucristo papecaitaxutotsoniataexae. Panevajënaeyabelia payapëtaeponarenuu vajatuxanenë Jesucristo, ponë pacacapanepaejitsia pibisiacuene paneexanaeconivecua. Jesucristojavabelia daxitajivi jumai tsabiabi tsane: “¡Xamë Jesucristomë, bitso cajena ayaijamatabëcuenenëmë!” jai tsabiabi tsane daxitamatacabijavabelianexa. Bajara itsi tsane.

Mapabaxutoje San Juan copiaya toyaquina Dioso pejumecovënëtsivijavabelia

Cristo vajanacajamatabëcuene asaëyaexanaenë yabara pelivaisi

¹⁻² Pacatoyaquinatsi Dioso pexënato pelivaisi. Bajaraponë athëbëtatsia ponapona baja cajena pepo bajayatami ata, itsa abaxë Dioso apo exanae mapanacuaje. Nexata bajaraponë patsica mapanacuayabetsicaje. Bajaraponë itsa patsica mapanacuayabetsicaje, naexana pacuenia vaxaitsi baexanatsi. Nexata abaxë itsa ponapona mapanacuatataje, bajaraponë patanetsipaebilivaisianë pajumetaniji. Bajaraponë pataniji baja cajena pataitaxutota. Pajayabajënuu patacobeta. Nexata bajaraponë pelivaisi pacatsipaebatsi. Bajaraponë matababi apo pevereverecejava pexainaenë. Paxa Dioso yajavaponapona. ³ Pacatojitsipatsi paxamë ata paneyajavajinavanapaenexa Dioso. Pacatojitsipatsi Dioso pexënato, Jesucristo, ata paneyajavajinavanapaenexa. Bajaraxuata pacuenia pataniji, pacuenia ata pajumetaniji bajaraponë patanetsipaebilivaisianë, juya paxamëjavabelia pacatsipaebaponatsi. ⁴ Nexata pacuenia pataniji, pacuenia ata pajumetaniji bajaraponë patanetsipaebilivaisianë, pacatoyaquinatsi mapabaxutotaje paxamë ata paneyapëtaenexa, bitso panesivajamatabëcuenebarëyanexa Jesús.

Dioso pejumelivaisita vajanacajamatabëcueneitayotsinë yabara pelivaisi

⁵ Palivaisianë rabaja Jesucristo panetsipaeba, bajara mapalivaisianëje juya paxamëjavabelia pacatoyaquinatsije. Dioso raja pejumelivaisita vajanacajamatabëcueneitayotsinë. Dioso raja apo pijamatabëcueneitaquirinë. ⁶ Bajaraxuata vaxaitsi jumaitsi atatsi: “Dioso raja vaxaitsi yajavajinavanapatsi,” jai atatsi, itsiata pibisiacuene itsa exanavanapatsi, nexata najamatabëcueneapaebatsi. Najumetsënëtatsi saya Dioso vajayajavajinavanapaajava. Najumetsënëtatsinua pexaniacuene vajaexanaejava ata. ⁷ Itsiata vaxaitsi xaniavaetsia itsa jumecovënëtavapanapenatsi Dioso pejumelivaisi pacuenia Dioso ata pijacuata bajarapalivaisi najumecovënëtaponapona, nexata vaxaitsi ata mapanacuata xaniavaetsia najamatabëcuenejëpaeya najujajinavanapaenatsi. Bajarapacuenia vaxaitsi itsa jinavanapaenatsi, nexata Jesucristo, Dioso pexënato, vajanacasivatëpaexae, nacavecuajibiaexanaena daxita vajapibisijamatabëcuenemi.

⁸ Vaxaitsi pibisiacuene exanae atatsi, itsiata itsa jumaitsitsi: “Vaxaitsi cajena aneconijibitsi. Tspiji pibisiacuene apo exanaetsi,” itsa jaitsi, nexata saya jamatabëcuenenavëxaniabatsi. Pexaniajailivaisi, Dioso pejumelivaisi, apo nacatsijamatabëceae. ⁹ Dioso baja cajena nacayavenonabiaba pacuenia najumecapanepaeya nacajumaitsi. Dioso pexanepanaecuene exanabiabanua. Bajaraxuata pibisiacuene vajaexanaejavami, itsa navajunupaebatsi Diosojavabelia, nexata Dioso nacavecuajibiaexana pibisiacuene vajaexanaeconimi. Nacavecuajibiaexananua daxita pibisijamatabëcuene vajaxinaejavami. ¹⁰ Vaxaitsi pibisiacuene exanae atatsi, itsiata itsa jumaitsitsi: “Vaxaitsi cajena caeto ata pibisiacuene apo exanaetsi,” itsa jaitsi, nexata saya jamatabëcuenenavëxaniabatsi. Dioso pejumelivaisi ata apo nacatsijamatabëceae. Bajarapacuenia itsa jumaitsitsi, nexata Dioso tanetsi bepenajumetsënëtsinë. Tspiji Dioso pejumelivaisibaxutota jumaitsi pacuenia daxitatsi pibisiacuene ëvajaxanaevi.

2

Cristo vajanacatocuaicuaijinë Diosojavabelia yabara pelivaisi

¹ Tajamona, pacatoyaquinatsi mapalivaisije patacamuxujobinexa pibisiacuene panexanaeyaniva. Itsiata baitsi jane cajena itsajivi pibisiacuene itsa exana, xainatsi Jesucristo, vajanacayavenonaenë, vajanacatocuaicuaijinë Diosojavabelia. Bajaraponë cajena caeto ata pibisiacuene apo pexanaenë. ² Jesucristo vajanacasivatëpaexae, nacavecuajibiaexana baja daxita pibisiacuene vajaexanaeconimi. Itsiata ëvaxaitsi apo nacasivatëpae. Daxita mapanacuapijivije pibisiacuene pexanaecononi pevecuajibiaexanaenexa, Jesucristo sivatëpa.

³ ¿Detsa pacuenia nayapëtanetsi Dioso pijajivitsi? Itsa exanavanapatsi pacuenia Dioso nacaitoroba, nayapëtanetsi Dioso pijajivitsi. ⁴ Itsajivi jumaitsi ata: “Xanë raja cajena Dioso yapëtaniji,” jai ata, itsiata itsa apo jumecovënëtsi pacuenia Dioso itorobatsi, bajarapajivi saya najumetsënëta. Pexaniajailivaisi cajena, Dioso pejumelivaisi, apo tsijamatabëceatsi. ⁵ Pajivi exanaponapona Dioso pitorobicueniatsi, bajarapajivi pepacuene jumecovënëta Dioso bajarapajivi bitso pejitsipaexae Dioso. Bajarapacuenia vaxaitsi ata

itsa jumecovënëta vanapaenatsi Dioso, nexata nayapëtaevanapaenatsi vajayavajinavanapaejava Dioso. ⁶ Pajivi jumaitsi: “Xanë rabaja Dioso yavavapucapononajë,” jai, bajarapajivi xaniavaetsia beponapona pibisiacuene exanaenejeva. Pacuenia Jesús ponapona, bajarapacuenia bajarapajivi beponapona.

Palivaisi baja bajayata jivi jumecovënëta, bajarapalivaisi icatsia bepejanalivaisicuenia jivi pejumecovënëtsinexa, yabara pelivaisi

⁷ Tajamonae, pacatoyaquinatsi mapalivaisije panejumecovënëtsinexa. Apo pejanalivaisi ra picani. Itsiata baitsi jane palivaisi baja copiaya bajayata pajumetaneme, pamatacabi ajenata pajumecovënëtae Jesús pelivaisi, bajarapalivaisi jumëjëpa. ⁸ Nexata mapalivaisije pacatoyaquinatsi pejanalivaisicuenia panejumecovënëtsinexa. Mapalivaisije pexaniajailivaisi cajena. Cristo cajena pijacuata bajarapalivaisi natoexanaponapona. Paxamë ata baja pajumecovënëta vanapame bajarapalivaisi. Nexata mapanacuapijijamatabëcuenemije, pitaquirijamatabëcuenemi, pacavecuajibi baja tsaponae. Tspaji bajarapalivaisita Jesucristo nacajamatabëcuenitayotapona.

⁹ Itsajivi jumaitsi ata: “Xanë raja Dioso pitorobicuenia exanapononajë,” jai ata, itsiata itsa itoya itsajivi Dioso penajuajumecovënëtsivi, nexata bajarapajivi abaxë tsiteca ajamatabëcuenitacquiri tsaponapona. ¹⁰ Pajivi bitso asiva itsajivi ata, Dioso penajuajumecovënëtsivi, bajarapajivi Dioso jamatabëcuenitayotatsi. Nexata bajarapajivi apo caëjëpaetsi itsacuenejavayo ata pibisiacuene itsajivi pexanaeayaexanaenexatsi. ¹¹ Pajivi itoya itsamonae ata Dioso penajuajumecovënëtsivi, bajarapajivi abaxë tsiteca ajamatabëcuenitacquiri tsaponapona. Apo yapëtae pibisiacuene pexanaejava. Apo yapëtaenua itsabelia caponaejitsiatsi pibisiacuene pexanaeconi yabara. Bajara jamatabëcueni tsipaji pevajënaeyabelia dovathi yaajamatabëcuenitacquiriaya exanaponatsi piamatabëcuenitacquirixae.

¹² Tajamonae, pacatoyaquinatsi mapalivaisije. Tspaji baja Dioso pacavecuajibiaexana pibisiacuene paneexanaeconimi Jesucristo papecasivatëpaexae. ¹³ Patavajënaepijivimë, pacatoyaquinatsi mapalivaisije. Tspaji baja payapëtaneme Jesucristo, ponë baja cajena athëbëtatsia ponapona pepo bajayatami ata, Dioso daxitacuene mapanacuata pexanaevajënaeya. Paxamë ata papevëjëavimë, pacatoyaquinatsi mapalivaisije. Tspaji baja dovathi pajamatabëcueneamoneyabame.

Bepataxicueniamë patacataevi, imata baja cajena itsabaxuto pacatoyaquinatsi. Tspaji baja vaxa Dioso payapëtaneme. ¹⁴ Patavajënaeyapijivimë, imata baja cajena itsabaxuto pacatoyaquinatsi. Tspaji baja payapëtaneme Jesucristo, ponë baja cajena athëbëtatsia ponapona pepo bajayatami ata, Dioso daxitacuene mapanacuata pexanaevajënaeya. Paxamë ata papevëjëavimë, imata baja cajena itsabaxuto pacatoyaquinatsi. Tspaji baja pajamatabëcuenesaëmë Dioso panejumecovënëtsijava. Pacatsijamatabëca baja Dioso pejumelivaisi. Nexata baja dovathi pajamatabëcueneamoneyabame.

¹⁵ Pëtsa pajitsipame mapanacuapijijibisiacuene ataje. Itsa pajitsipaejitsipame mapanacuapijijibisiacueneje, nexata apo pajitsipaemë tsipae Dioso. ¹⁶ Pajamatabëcueni jivi jitsipaeyaexanabiabatsi pibisiacuene pexanaenaxa, bajarapajamatabëcueni apo pitsapae Diosojavaverena. Bajarapajamatabëcueni pitsapa mapanacuataje. Pajamatabëcueni ata jivi najamatabëxainaeayaexanabiabatsi penaxainaeayabinexa xua itajitsipa, bajarapajamatabëcueni ata pitsapa mapanacuataje. Pajamatabëcueni ata jivi najamatabëxainaeayaexanabiabatsi beayajamatabëcueni penataenaxa, bajarapajamatabëcueni ata pitsapa mapanacuataje. Daxita bajarapajamatabëcueni pitsapa mapanacuataje. Bajarapajamatabëcueni apo pitsapae vaxa Diosojavaverena. ¹⁷ Imoxoyo rabaja pevajënae tsaponae pevereverecaenexa mapanacuaje. Nexata daxita pajamatabëcueni jivi jitsipaeyaexanabiabatsi pibisiacuene pexanaenaxa, yavavavererecaena mapanacuataje. Itsiata baitsi jane pamona exanavanapa Dioso pitorobicueniatsi, jinavanapaenaxa daxitamatacabi javabelianexa.

Pexaniajailivaisi, penajumetsënëtsilivaisi ata, yabara pelivaisi

¹⁸ Tajamonae, imoxoyo rabaja pevajënae tsaponae pevereverecaenexa mapanacuaje. Pavënëlivaisitaneme rabaja pacuenia najetarucaejitsia ponë cueneitoyatsi Cristo. Pata rabaja cajena ayabitsaëto, pamona Cristo cueneitoyatsi. Bajarapamonae pepatsixae, yapëtanetsi imoxoyo baja pevajënae tsaponae pevereverecaenexa mapanacuaje. ¹⁹ Pamonae Cristo cueneitoyatsi, bajarapamonae vaxaitsiyajuvënvimi picani. Itsiata baja nacavecuapitsapa. Bajarapamonae pepacuene apo vaxaitsiyajuvënvimi cajena. Itsa peneta bajarapamonae vaxaitsiyajuvënvimi tsipae, nexata tsitecaeya najinavanapaejitsipa vaxaitsita. Bajaraxuata bajarapamonae nacavecuapona baja. Nexata daxitajivi xaniavaetsia yapëthane bajarapamonae pepacuene Dioso apo pejumecovënëtsivicuene.

²⁰ Cristo rabaja pacarajuta Espíritu Santo. Bajaraxuata daxita paxamé payapétaneme baja pexaniajailivaisi, Dioso pejumelivaisi. ²¹ Pacatoyaquinatsi mapabaxutoje tsipaji baja payapétaneme pexaniajailivaisicuene Jesús pelivaisi. Nexata apo pacatoyaquinaetsi matapania patacayapétaeyaexanaenexa pexaniajailivaisicuene Jesús pelivaisi. Tsipaji baja bajaya payapétaneme bajarapalivaisi pexaniajailivaisicuene. Payapétanemenua baja Jesús pelivaisijavaverena acuenebi pepitsapaejava penajumetsênétsilivaisi. Tsipaji pexaniajailivaisijavaverena acuenebi pepitsapaejava penajumetsênétsilivaisi.

²² ¿De jane peneta jumaisi pepo penajumetsênétsijivi? Pajivi peneta pepo penajumetsênétsijivi, jumaisi mapacueniaje: “Jesús raja apo Cristo, poné Dioso athébévetsica itorobjiitsiatsica vajanacapanepaenexa,” jai. Bajara peneta pejumaisijivi, pepo penajumetsênétsijivi jane baja. Bajarapajivi Cristo pijavajabitsaéjivi. Bajarapajivi apo jumecovênétsi Dioso. Apo jumecovênétsinua Dioso pexénato ata. ²³ Pajivi peneta jumaisi: “Jesús raja Dioso apo pexénato,” jai, bajarapajivi Dioso apo yajavaponaponae. Pajivi pijinia peneta jumaisi: “Jesús raja Dioso pexénato,” jai, bajara jane pajivi Dioso yajavaponaponatsi.

²⁴ Bajaraxuata paxamé baja palivaisi pajumetaneme panejumecovênétsijavaverenacujinae, panevajénaeyabelia tsiteca pacajinavanapare. Bajarapalivaisi tsiteca itsa pacatsijamatabécaena, nexata panevajénaeyabelia payajavajinavanapaeneme Dioso. Payajavajinavanapaenamenua Dioso pexénato ata, Cristo. ²⁵ Jesucristo rabaja najumecapanepaeya jumaisi vajanacarajutsinexa matabi apo peverevereaejava.

²⁶ Pacatoyaquinatsi mapabaxutoje patacayapétaeyaexanaenexa panenayajivitaenexa pamonaé jamatabépacayamaxéitororoba. ²⁷ Paxamé rabaja Espíritu Santo pacatsijamatabéca, poné pacarajuta Jesucristo. Bajaraxuata apo panamatavenonaemé baja itsajivi ata papecatsipaebinexa paneyapétaenexa daxitacuene. Tsipaji baja daxita xua Espíritu Santo pacayapétaeyaexanapona, pexaniajaicuene baja cajena. Penajumetsênétsicuene baja cajena Espíritu Santo apo pacayapétaeyaexanapona. Pacuenia Espíritu Santo pacayapétaeyaexanapona, bajarapacuenia pajumecovênétponare panevajénaeyabelia paneyajavajinavanapaenexa Cristo.

²⁸ Tajamonae, ajamatabécuenesaéya yajavajinavanapaenatsi Cristo. Bajarapacuenia yajavajinavanapaenatsi vajacujunaviyaniva pamatabi bajaraponé patsianica. Nexata apo aura tsanetsi bajaraponéjavabelia pamatabi patsianica. ²⁹ Paxamé rabaja payapétaneme Jesucristo, Dioso pexénatoxae, pexaniacuene pexanabiabijava. Nexata bepapapétaneme mapacuenieje. Pamonaé peneta pexaniacuene exana, bajarapamonae Dioso pexi.

3

Dioso pexi yabara pelivaisi

¹ Pacanaéjere vaxa Dioso vajanacaasivacuene. Nacaasiva bitso. Bajaraxuata Dioso pexicueniatsi nacatane. Xaniajai rabaja. Dioso pexitsi. Mapanacuapijivije Dioso apo peyapétaexae, nexata bajarapamonae vaxaitsi ata apo nacayapétae Dioso pexicuenetsi. ² Tajamonae bitso patacaasivavi, aeconoxae rabaja vaxaitsi daxitatsi Dioso pexitsi. Apo yapétaetsi abaxé pacuenia itsamatabi vaxaitsi cueneitsijitsiatsi. Itsiata Cristo itsamat-acabi itsa patsianica, vaxaitsi cuenetaenatsi Cristo pacuenia cueneitsi. Nexata vaxaitsi itsa cuenetaenatsi Cristo, cuenejépaenatsi. Tsipaji cuenetaenatsi pacuenia Cristo cueneitsi. ³ Cristo pibisiacuene apo pexanaené caeto ata. Bajaraxuata daxita pamonaé copiaevetavanapa Cristo pepatsijavanexatsica, pevajénae tonajamatabécuené xaniavaetavanapaena. Pibisiacuene apo exanavanapae tsane.

⁴ Pajivi pibisiacuene exana, apo jumecovênétsi palivaisi Dioso najumecopata jivi pejumecovênétsinexa. Pibisiacuene itsa exana, nexata Dioso pitavetsijava exana. ⁵ Payapétaneme rabaja mapacuenieje. Cristo patsica mapanacuayabetsicaje vajanacave-cuaajibiaexanaenexa pibisiacuene vajaexanaeconimí. Cristo baja cajena caeto ata pibisiacuene apo pexanaené. ⁶ Bajaraxuata pajivi baja Cristo yajavaponapona, pibisiacuene apo exanaponapona. Pajivi tsiteca pevajénaeyabelia pibisiacuene exanaponapona, bajarapajivi apo tae baja cajena Cristo. Apo yapétaenua cajena. ⁷ Tajamonae, pétsa panacopatame itsajivi ata papecayamaxéitororobinexa. Pajivi exanabiaba pexaniacuene, Dioso pejitsipacuene, bajarapajivi Dioso aneconijibia tanetsi. Pacuenia Cristo jamatabécuenetsi, bajarajamatabécuenetsi bajarapajivi. ⁸ Pajivi tsiteca pevajénaeyabelia pibisiacuene exanaponapona, bajarapajivi dovathi pijajivitoné tsaponapona. Dovathi pibisiacuene pexanaecujinae, apo copatsi. Tsiteca pevajénaeyabelia pibisiacuene exanaponapona mapanacuataje. Bajaraxuata Dioso pexénato patsica mapanacuayabetsicaje daxitajivi dovathi pejamatabécueneta pibisiacuene pexanabiabijavami pijibiaexanaenexa.

⁹ Pajivi baja Dioso pexijivi exanatsi, bajarapajivi baja pibisiacuene apo exanaponapona. Tsipaji baja Dioso najamatabëcuenerajutatsi. Bajarapajivi baja copata pibisiacuene pexanabiabijava. Tsipaji baja Dioso pexijivi exanatsi. ¹⁰ Bajarapacuenia xaniavaetsia yapëtanetsi pajivi Dioso pexijivi exanatsi. Pajivi pijinia dovathi pexijivi exanatsi, yapëtanetsi. Tsipaji pajivi Dioso pexijivi apo exanaetsi, pexaniacuene apo exanae. Apo asivanua itsamonae ata.

Pacuenia vaxaitsi namataenetsia benaasivatsi tsavanapae yabara pelivaisi

¹¹ Dioso baja cajena panejumecovënëtsijavaveliacujinae, pajumetaeyabiabame pejumait-silivaisi mapacueniaje: “Vaxaitsi namataenetsia benaasivatsi tsavanapae,” pejaillivaisi. ¹² Vaxaitsi nexata apo bitoyatsi itsamonae ata. Pacuenia bajayatami Cañpijinë itoya pejuyapijinëmi, bajara apo bitsitsi vaxaitsi. Cañpijinë dovathi pijajivitonë tsaponapona. Nexata beyaxuaba pejuyapijinëmi. Pacatsipaebijitsiatsi pacuene yabara Cañpijinë beyaxuaba pejuyapijinëmi. Cañpijinë dovathi pitorobicueniatsi, pibisiacuene exanaponapona. Pejuyapijinëmi pijinia pexaniacuene, Dioso pitorobicueniatsi, exanaponapona. Bajaraxuata Cañpijinë beyaxuaba pejuyapijinëmi.

¹³ Tajamonae, pëtsa pajamatabëcuenenabenajacame paxamë ata itsa pacaitoya mapanacuapijivije. ¹⁴ Vaxaitsi picani bajayata Dioso pitabarata jamatabëcuenetëpavanapatsi. Itsiata baja aeconoxae Dioso nacajamatabëcueneaasäyaxana vajanajamatabëcueneocopatsixae bajaraponëjavabelia. Yapëtanetsi baja cajena Dioso vajanacajamatabëcuene asaëyaxanaejava. Tsipaji itsamonae ata Dioso vajanajuajumecovënëtsivi, asivatsi tsavanapae. Pajivi apo asiva itsamonae ata, Dioso penajuajumecovënëtsivi ata, bajarapajivi Dioso pitabarata jamatabëcuenetëpaponapona. ¹⁵ Pajivi itoya itsajivi, Dioso penajuajumecovënëtsivi ata, bajarapajivi jamatabëcuenejëpaponapona jivibenë. Paxamë rabaja payapëtaneme mapacuenije. Jivibenë baja cajena apo xinae tsane matakabi apo pevereverecaejava. ¹⁶ Yapëtanetsi baja cajena mapacuenije. Jesucristo vajanacaasivaxae, nacopata pebeyaxuabinexatsi vajaneconi yabara. Nexata vaxaitsi ata vacaasivaxae Dioso vajanajuajumecovënëtsivi, bejamatabëjumaititsi mapacueniaje: “Itsamonae nebeyaxuabijitsia ata tsane, yavenonaenajë Dioso patanajuajumecovënëtsivi,” bejamatabëjaisi. ¹⁷ Ponë Dioso pejumecovënëtsinë, bitso pexainaenë pexinaejava, tae ata itsanë pijinia Dioso pejumecovënëtsinë penamatavenonaejava, itsiata itsa apo yavenonae, nexata acuenëbi pejumaititsijava: “Xanë bitso Dioso jitsipajë tajamatabëëthëtojavavetsina,” pejaijava. ¹⁸ Tajamonae, “Asivanë raja itsamonae ata,” apo bejaitsi saya vajacuibovojotota pexaniacuene toxanaenejevatsi bajarapamonaejavabelia. Biji rajane bajarapamonae vajanacayapëtaenexa pepacuene vajasivajava, pexaniacuene betoexanatsi. Beyavenonatsi bitso penamatavenonaejavata.

Pacuenia apo auratsi Dioso pitabarata yabara pelivaisi

¹⁹ Daxitatsi vaxaitsi itsa asivatsi tsavanapae tsane itsamonae ata, Dioso vajanajuajumecovënëtsivi, nexata nayapëtaenatsi Dioso pexicuenetsi. Ajunavijibianua jinavanapae-natsi Dioso pitabarata. Dioso baja cajena pexaniajailivaisi jivijavabelia petsipaebinë. ²⁰ Dioso baja cajena bitso ayaijamatabëcuenenë. Dioso peyapëtaenë daxitacuene. Bajaraxuata vaxaitsi jamatabëjumaititsi atatsi: “Xanë bitso ajamatabëcuenebejenë pibisiacuene taexanaejava yabara,” jamatabëjai atatsi, itsiata xainatsi Dioso vajanacayavenonaenë. Dioso vajanacaitaxutotsoniataenë. Tsiteca nacaasiva. Nacaevetanua. ²¹ Tajamonae bitso patacaasivavi, vajajamatabëëthëtota itsacueneneconi itsa apo xainaetsi, nexata apo auratsi Diosojavabelia vajavajëtsinexa. Jamatejematsi Dioso pitabarata. ²² Dioso nacarajutsiana daxita xua vajëtsianatsi Diosojavabelia. Bajarapacuenia Dioso nacarajutsiana tsipaji Dioso jumecovënëtavapanatsi pacuenia nacaitoroba. Pacuene yabara Dioso sivajamatabëcuenebarëya, bajarapacueni ata vaxaitsi exanavanapatsinua. ²³ Dioso raja nacaitoroba vajajamatabëjumaititsinexa mapacuenije: “Jesús baja patsica, ponë copiaeve-tavanapatsi vajanacapanepaenexa. Bajaraponë Dioso baja cajena pexënatō,” vajajamatabëjinexa. Nacaitorobanua namataenetsia vajaraasivatsavanapaneaxa. ²⁴ Pajivi jumecovënëta Dioso pitorobilivaisi, bajarapajivi Dioso yajavaponaponaena. Bajarapajivi ata pijinia Dioso yajavaponaponaenatsi. Yapëtanetsi pepacuene Dioso vajanacayajavaponaponaejava. Tsipaji Espiritu Santo, ponë Dioso nacarajuta, bajaraponë nacayapëtaeyaxana pepacuene Dioso vajanacayajavaponaponaejava.

4

Espiritu Santo yabara, Cristo pijavajabitsaë ata, yabara pelivaisi

¹ Tajamonae bitso patacaasivavi, itsamonae itsa pacajumai tsane mapacueniaje: “Espiritu Santo raja, ponë netsijamatabëeca, netsipaeba. Nexata juya bajarapalivaisi pacatsipaebatsi,” itsa pacajai tsane, pëtsa abaxë caecuenia pajumecovënëtaeme. Copiaya abaxë

pajamatabëcueneëjëbianame paneyapëtaenexa itsa xaniajai bajarapamonae Espiritu Santo petsipaebilivaisitsi pacatsipaebiana. Bajarapacuenia pajamatabëcueneëjëbianame tsipaji raja daxitajava mapanacuajavaje yacaëjëpa penajumetsënëtsilivaisi petsipaebanajetarubenaevi. Bajarapamonae penajumetsënëtsilivaisi daxitajivijava tsipaebanajetarubena. Be-Dioso itajara pejumelivaisi petsipaebivicuenia, tsipaebanajetarubena. ² Nexata bajarapacuenia copiaya itsa pajamatabëcueneëjëbianame, payapëtaeneme pamonae tsijamatabëcatsi Espiritu Santo. Pamonae raja peneta pepacuene Espiritu Santo tsijamatabëcatsi, jumaitsi mapacueniaje: “Jesucristo itsa patsica mapanacuayabetsicaje, naexana pacuenia vaxaitsi baexanatsi mapanacuataje,” jai peneta pamonae pepacuene Espiritu Santo tsijamatabëcatsi. ³ Pamonae peneta jumaitsi mapacueniaje: “Jesucristo raja Dioso apo pexënato,” jai, bajarapamonae cajena apo tsijamatabëcaetsi Espiritu Santo. Bajarapamonae tsijamatabëcatsi ponë cueneitoyatsi Cristo. Ponë baja pavënëlivaisitaneme pepatsijavanexa, ponë Cristo cueneitoyatsi, bajaraponë pata baja. Ponapona rabaja mapanacuajavaje. ⁴ Tajamonae, paxamë rabaja Dioso pijajivimë. Nexata baja penajumetsënëtsilivaisi papecatsipaebivi, apo pacayamaxëitojorobicapanepae. Apo caëjëpaetsi papecayamaxëitojorobijava. Tsipaji ponë pacatsijamatabëca, bajaraponë bitso piasaënë, ponë ponapona mapanacuajavaje, matatoxenetsia. ⁵ Pamonae tsipaebapona penajumetsënëtsilivaisi, bajarapamonae saya Dioso apo peyapëtaevi. Bajaraxuata mapanacuapijicueene cacuaicuajai. Nexata pamonae bitso jitsipa maëpanacuapijicueeneje, namuxunaevetabiabatsi. ⁶ Vaxaitsi raja Dioso pijajivitsi. Pajivi yapëtaene Dioso, vaxaitsi ata nacanamuxunaeveta. Pajivi Dioso apo jitsipae, vaxaitsi ata apo nacanamuxunaevetsi. Nexata bajarapacuenia nayapëtaene pajivi tsijamatabëcatsi Espiritu Santo. Espiritu Santo baja cajena jivi pexaniajailivaisi petsipaebinë. Bajara pijinia pacuenia nayapëtaene pajivi ata tsijamatabëcatsi dovathi. Dovathi baja cajena penajumetsënëtsilivaisi jivi petsipaebinë.

Dioso vajanacaasivanë yabara pelivaisi

⁷ Tajamonae bitso patacaasivavi, daxitatsi namataenetsia benaasivatsi tsavanapae. Tsipaji Diosojavaverena pitsapa vajanacaasivajamatabëcuene. Pajivi peneta asiva Dioso penajuajumecovënëtsivi, bajarapajivi Dioso pexijivi. Bajarapajivi yapëtaene Dioso. ⁸ Pajivi apo asiva itsamonae ata, bajarapajivi apo yapëtae Dioso. Tsipaji baja cajena Dioso bitso asiva daxitajivi. ⁹ Dioso raja vajanacaasivajava, nacayapëtaeayaexana mapacueniaje. Dioso athëbëvetsica nacatoitorobica pepo caenë pexënato matacabi apo pevereverecaejava vajaxainaexa pexënato vajanacasivatëpaexae. ¹⁰ Bajarajamatabëcueneitsi Dioso bitso vajanacaasivajava. Vaxaitsi rajane bevelia Dioso jitsipatsi. Dioso ra picani bitso vaxaitsi nacajitsipa. Bajaraxuata Dioso nacatoitorobica pexënato cruzata vajanacasivatëpaenexa. Nexata Jesús vajanacasivatëpaexae, Dioso baja nacavecuajibiaexana daxita pibisiacuene vajaexanaeconimi.

¹¹ Tajamonae bitso patacaasivavi, itsa Dioso bajarapacuenia bitso nacaasiva, nexata vaxaitsi ata daxitatsi namataenetsia benaasivatsi tsavanapae. ¹² Itsajivi ata cajena abaxë Dioso apo tae. Itsiata baitsi jane vaxaitsi namataenetsia itsa nasivatsi, Dioso baja nacayajavaponapona. Dioso vajanacatojitsipaecuenia itsamonae ata vajaasivanexa, Dioso nacajamatabëcueneasaëyaexanapona. ¹³ Vaxaitsi yajavajinavanapatsi Dioso. Bajara pijinia pacuenia Dioso ata nacayajavaponapona. Yapëtanetsi pexaniajaicueene Dioso vajanacayajavaponapona. Tsipaji baja Dioso nacarajuta Espiritu Santo. ¹⁴ Vaxaitsi baja cajena tanetsi Dioso pexënato. Nexata vaxaitsi tsipaebabiabatsi itsamonaejavabelia Dioso pexënato pitorobijavatsica mapanacuayabetsicaje pecapanepaenexa daxita mapanacuapijivije. ¹⁵ Pajivi jumaitsi mapacueniaje: “Jesús raja Dioso pexënato,” jai, bajarapajivi Dioso yajavaponapona. Bajarapajivi pijinia Dioso ata yajavaponaponsi.

¹⁶ Nexata vaxaitsi jamatabëcueneyapëtanetsi pacuenia bitso Dioso nacaasiva. Dioso cajena piasivanë daxitanacuapijivi. Pamonae itsamonae ata namataenetsia naasiva tsavanapae, bajarapamonae Dioso yajavaponapona. Bajarapamonae ata pijinia Dioso yajavajinavanapa. ¹⁷ Nexata pacuenia Dioso nacatojitsipa itsamonae ata vajanasivatsavanapae, bajarapacuenia itsamonae ata asivatsi tsavanapae tsane. Nexata pamatacabi Dioso naneconitsiaexanaponaena daxita pibisiacuene pexanaevi, bajarapamatacabi vaxaitsi Dioso pitabarata apo junavitsi tsane. Apo junavitsi tsane Dioso pitabarata tsipaji baja mapanacuataje vaxaitsi asivatsi tsavanapae tsane itsamonae ata pacuenia Cristo daxitatsi nacaasiva. ¹⁸ Itsa yapëtanetsi Dioso vajanacaasivajava, apo cunjavitsi itsacuenajava ata. Tsipaji Dioso itsa nacaasiva, nacavecuajibiaexana vajajunavijavami. Pajivi Diosojavabelia naneconita, yapëtaene Dioso penaneconitsiaexanaejavanexatsi. Bajaraxuata daxitacuene cunjava. Pajivi cunjava daxitacuene, abaxë xaniavaetsia apo yapëtae pacuenia Dioso asivatsi. Bajaraxuata cunjava.

¹⁹ Vaxaitsi Dioso asivatsi tsipaji Dioso copiaya nacaasiva. ²⁰ Pajivi jumaitsi ata mapacueniaje: “Xanë raja Dioso asivanë,” jai ata, itsiata itsa itoya itsajivi Dioso pejumecovënëtsijivi ata, nexata saya bajarapajivi penajumetsënëtsijivi. Bajarapajivi itsa apo asiva itsajivi ata, petaeyabiabijivi ata, nexata biji bitsoyo bajarapajivi apo asiva Dioso. Tshipaji biji cajena caeto ata apo tae Dioso. ²¹ Pajivi asiva Dioso, bajarapajivi biasiva itsajivi ata, Dioso penajuajumecovënëtsijivi. Tshipaji baja cajena Cristo nacaitoroba vajaasivanexa itsamonae ata.

5

Pacuenia vaxaitsi mapanacuataje dovathi jamatabëcueneamoneyabatsi yabara pelivaisi

¹ Pajivi jumecovënëta: “Jesús raja Cristo, ponë Dioso athëbëvetsica itorobijitsiatsica vajanacapanepaenexa,” pejallivaisi, bajarapajivi Dioso pexijivi exanatsi. Pajivi asiva itsajivi ata, caejivi apo biasiva. Nexata bajarapajivi daxita pexi beyajavaasiva. ² Bajara pijinia pacuenia vaxaitsi ata hexanatsi itsa asivatsi Dioso. Itsa jumecovënëtsi pacuenia Dioso nacaitoroba, nexata beyajavaasivatsi itsamonae ata, Dioso vajanajuajumecovënëtsivi. Tshipaji bajarapamonae Dioso pexi exanatsi. ³ Vaxaitsi itsa asivatsi Dioso, nexata pacuenia Dioso nacaitoroba, jumecovënëtsi. Pacuenia Dioso nacaitorobapona vajatoexanaenexa, apo nacatsitaayapëbeje. ⁴ Apo nacatsitaayapëbeje tsipaji baja Dioso pexitsi. Nexata caejivitsi canacujitsia Dioso nacacajëpaeyaexanapona vajaexanaenexa pacuenia Dioso nacaitorobapona. Najamatabëcueneocopatatsi baja Cristojavabelia vajanacayavenonaenexa mapanacuapijijamatabëcuenevecuaje. Nexata bajarapacuenia mapanacuataje dovathi jamatabëcueneamoneyabaponatsi. ⁵ Pajivi jumecovënëta Jesús Dioso pexënatocuene, bajarapajivi cajëpatsi dovathi pejamatabëcueneamoneyabinexa.

Pacuenia yapëtanetsi Jesús pepacuenie Dioso pexënatocuene yabara pelivaisi

⁶ Jesucristo baja cajena athëbëvetsica pepatsinë. Yapëtanetsi Jesús pepacuenie Dioso pexënatocuene. Tshipaji copiaya bautisabatsi merata. Bajaraxuacujinae cruzata beyaxuabatsi. Nexata saya Jesús ëpebautisabicujinaetsi apo ponaponae. Biji rajane copiaya bautisabatsi. Bajaraxuacujinae cruzata beyaxuabatsi. Espiritu Santo ata nacayapëtaeyaexana Jesucristo pepacuenie Dioso pexënatocuene. Espiritu Santo baja cajena pexaniajainë. Nexata Espiritu Santo vajanacayapëtaeyaexanaejava, Jesús Dioso pexënatocuene, bejumecovënëtsi. ⁷ Athëbëtatsia jinavanapa acueyabi ponëbeje, penajamatabëcuenejëpaeivi, pevajunupaebivi Jesucristo Dioso pexënatocuene. Pamonae jinavanapa athëbëtatsia, mapamonaaje: Dioso, Jesucristo, Espiritu Santo. Bajarapamonae acueyabi ponëbeje, penajamatabëcuenejëpaeivi, caenë rabaja picani tsaponapone. ⁸ Mapanacuata ataje acueyabi xuabeje pejamatabëcueneta yapëtanetsi Jesucristo pepacuenie Dioso pexënatocuene. Yapëtanetsi Espiritu Santo pejamatabëcueneta. Yapëtanetsinua Jesús pebautisabijavatsi ata pejamatabëcueneta. Bajarapacueyabi xuabeje pejamatabëcueneta yapëtanetsi Jesucristo pepacuenie Dioso pexënatocuene. ⁹ Dioso baja cajena nacayapëtaeyaexana Jesús Dioso pexënatocuene. Mapanacuapijivi ata, itsa nacatsipaeba itsacuenelivaisiyo, nexata jumecovënëtabiatsi pacuenia nacatsipaebabiaba. Itsiata baitsi jane Dioso itsa nacatsipaeba, bejumecovënëtsi xaniavaetsia pacuenia nacatsipaeba. Tshipaji Dioso bitso pejumenamatomtsinë. Bitso pexaniajainë. ¹⁰ Pajivi jumecovënëta Jesús Dioso pexënatocuene, bajarapajivi pejamatabëthëtota yapëtane bajarapalivaisi pexaniajailivaisicuene. Pajivi apo jumecovënëtsi Jesús Dioso pexënatocuene, bajarapajivi Dioso bepenajumetsënëtsinë tane. Tshipaji bajarapajivi Dioso peyapëtaeyaexanaejavatsi, apo jumecovënëtsi, Jesús Dioso pexënatocuene. ¹¹ Dioso itsa nacayapëtaeyaexana Jesús Dioso pexënatocuene, nacayapëtaeyaexana mapalivaisije. Nacayapëtaeyaexana Dioso vajanacarajutsijavanexa matababi apo pevereverecejava. Nexata Dioso pexënatopejamatabëcueneta xainaenatsi matababi apo pevereverecejava. ¹² Pajivi yajavaponaponae Dioso pexënatopejamatabëcueneta, bajarapajivi xainaena matababi apo pevereverecejava. Pajivi apo yajavaponaponae tsane Dioso pexënatopejamatabëcueneta, bajarapajivi apo xinae tsane matababi apo pevereverecejava.

Pacuenia Juan muxujioba pecopatsivajënae baja petoyaquinaelivaisi mapabaxutotaje yabara pelivaisi

¹³ Pacatoyaquinatsi mapalivaisije panejumecovënëtsivi Dioso pexënatopejamatabëcueneta. Pacatoyaquinatsi paneyapëtaenexa matababi apo pevereverecejava panexainaevanexa.

¹⁴ Yapëtanetsi Dioso vajanacajumetaejava itsa vajëtatsi vajanacatojitsipaecuenia. Bajaraxuata apo jumejunavitsi vajavajëtsinexa Diosojavabelia. Jamatejematsi Dioso pitabarata. ¹⁵ Yapëtanetsi Dioso vajanacajumetaejava itsa vajëtatsi. Nexata yapëtanetsi Dioso vajanacarajutsijavanexa xua vajëtatsi.

¹⁶ Dioso panenajuajumecovēnētsivi itsa pataename pibisiacuene pexanaejava, patovajētsianame Diosojavabelia, Dioso pejamatabēcuenexaniavaetsinexatsi pibisiacuene pexanaejivi. Bajarapacuenia Diosojavabelia patovajētsianame itsa payapētaename paneconi yabara abaxē Dioso apo vecuanaxuabijitsia. Itsajava raja jivi pibisiacuene itsa exana, bajarapaneconi yabara pepacuene jivi Diosovecua naxuabiana. Nexata baja itsa payapētaename paneconi yabara pepacuene baja bajarapajivi Diosovecua naxuabijitsia, pētsa patovajētame Diosojavabelia. Bajarapitsineconi baja pexainaevi panetovajētsinexa Diosojavabelia, apo pacaitorobitsi. ¹⁷ Daxitacuene xua apo pexanepanaecuene jivi exana, pibisiacuene baja cajena. Itsiata baitsi jane bajarapapibisiacuene jivi pexanaejava itsa copabiana, nexata bajarapaneconi yabara itsiata jivi pepacuene Dioso apo vecuanaxuabi tsane.

¹⁸ Yapētanetsi baja cajena mapacueneje. Pajivi Dioso pexijivi exanatsi, bajarapajivi copata baja pibisiacuene pexanaejava. Tsipaji baja Dioso pexēnato, Jesucristo, evetatsi bajarapajivi. Nexata dovathi apo itsacueniabitsi.

¹⁹ Yapētanetsi daxita vaxaitsi Dioso pexicuenetsi. Yapētanetsinua itsamonae dovathi pitorobabiabijavatsi pibisiacuene pexanaenexa.

²⁰ Yapētanetsinua baja Dioso pexēnato, Jesucristo, athēbēvetsica pepatsijavatsica. Patsica vajanacajamatabēcuene yapētaeyaexanaenexa pepo Dioso. Vaxaitsi baja yajavajinavanapatsi Dioso. Tsipaji baja yajavajinavanapatsi Dioso pexēnato, Jesucristo. Bajaraponē ata pepo Dioso baja cajena, vajanacarajutsinēnexa matabi apo pevereverecejava. ²¹ Tajamonae, panayajiviitavere papecatsipaebianiva palivaisi tsipaebapona pamonae vajēcabiaba jumapecataeya pexanaenēnējavabelia.

Mapabaxutoje San Juan cotocaevi toyaquina Dioso pejumecovënëtsivijavabelia

Pexaniajailivaisi yabara, jivi ata penaasivacuene, yabara pelivaisi

¹ Xanë ancianonënë, pacatoyaquinatsi mapabaxutoje Dioso pecaitapetsiva, nexi yajava. Xanë bitso pacaasivatsi. Itsamonae ata, pamonaе jumecovënëta Dioso pejumelivaisi, bajarapamonaе ata pacaasiva. ² Bajarapacuenia pacaasivatsi tsipaji paxamë ata Dioso pejumelivaisi pajumecovënëtamе. Bajarapalivaisi cajinavanapatsi vajajamatabëëthëtota daxitamatacabijavabelianexa. ³ Pacatovajëtabiabatsi Diosojavabelia, Jesucristo, Dioso pexënatoyavabelia ata. Pacatovajëtabiabatsi papecayavenonabiabinexa, papecaitaxutotsonia taeyabiabinexanua. Pacatovajëtabiabatsinua jamatabëcuenexanepanaeya panejinavanapaenexa. Bajarapacuenia Dioso pacatoexanaena pexaniajailivaisi, Dioso pejumelivaisi, itsa pacajinavanapame, itsamonae ata asivaya itsa pajinavanapamenua.

⁴ Bitso sivajamatabëcuenobarëyanë itsa caxitajarabaxuabajë nexiyajuvënëvi, pejumecovënëtavapanaeви pacuenia vaxa Dioso nacaitoroba. ⁵ Tajabanava, aeconoxae catsipaeбatsi namataenetsia vajanasivanexa. Bajarapalivaisi apo pejanalivaisi picani. Bajayata palivaisi itsa copiaya jumetaneme Jesús pelivaisi, bajarapalivaisi jumejëpa. ⁶ Vaxaitsi itsa jitsipatsi Dioso, nexata pacuenia Dioso nacaitoroba, bejumecovënëtavapanatsi. Bajarapalivaisi papecatsipaebijavaveliacujinae, pacaitoroba baja cajena namataenetsia panenavatsavanapaenexa.

Penajumetsënëtsilivaisi daxitanacuanëjava petsipaebanajetarubenaevi yabara pelivaisi

⁷ Penajumetsënëtsilivaisi petsipaebanajetarubenaevi, ayaibitsaëto najetarubena daxitanacuanëjava. "Pacuenia vaxaitsi banaexanatsi, bajarapacuenia Jesucristo naexana mapanacuataje," pejailivaisi, bajarapamonaе apo pejumecovënëtsivi. Bajarapitsijamatabëcuenе pexainaevi peyamaxëitojorobivi baja cajena. Bajarapamonaе Cristo pijavajabitsaë. ⁸ Panayajivitaevanapare papecavecuaxuabiyaniava xua pasivanacuenebavanapame Dioso papecarajutsinexa. Bajarapacuenia panayajivitaevanapare Dioso papecarajutsinexa daxitajavayo panetonacuenebimatamo.

⁹ Pajivi tsiteca pevajënaeyabelia jumecovënëtaponapona palivaisi Cristo tsipaebapona, bajarapajivi vaxa Dioso yajavaponaponatsi. Vaxa Dioso pexënatoyavaponaponatsi. Pajivi pijinia copata pejumecovënëtsijava palivaisi Cristo tsipaebapona, bajarapajivi Dioso apo yajavaponaponaetsi. ¹⁰ Nexata bajarapitsijivi itsa pona paxamëjavabelia livaisi papecatsipaebinexa, pëtsa pacajunuame panijaboyaberena. Pëtsa pabajacobamenua bajarapitsijivi. ¹¹ Pajivi bajacobijitsipa bajarapitsijivi, jamatabëcueneyavenonaеjitsipa pibisiacuene pexanaejava. Bajaraxuata pëtsa pabajacobame bajarapitsijivi.

Pacuenia Juan jumaitsi pecopiarutaponaelivaisita yabara pelivaisi

¹² Xanë picani xainajë ayailivaisi patacamuxujobinexa. Itsiata abaxë apo jitsipaenë bajarapalivaisi patacatoyaquinaenexa mapabaxutotaje. Evetajë abaxë taponaejava paxamëjavabelia patacataenexa, patacabarëcuaicuaijainexanua, vajajamatabëcueneparëyanexa bitso.

¹³ Nejuyapijiva Dioso pitapetsivatsi pexi, catonajumeitoroba nebajacobinexa.

Mapabaxutoje, acueyabibaxuto, San Juan toyaquina Dioso pejumecovënëtsivijavabelia

Pacuenia Juan pexaniajamatabëcuenia tane Gayovënënë yabara pelivaisi

¹ Gayo bitso tacaasivanë. Xanë ancianonënë, catoyaquinatsi mapabaxutoje. Casivatsi bitso tsipaji xamë ata pexaniajailivaisi jumecovënëtame.

² Catovajëtabiabatsi Diosojavabelia. Catovajëtabiabatsi daxitacuenejavanë pecatox-anepanaenexa, jumalixanepanaeya neponaponaenexanua. Cavënëlvaisitanetsi rabaja Dioso pitabarata xaniavaetsia Dioso netoponaponaejava pibisiacuene exanaenejevamë. ³ Itsamonae Dioso pejumecovënëtsivi parena xanëjavaberena. Nexata bajarapamonae xanëjavaberena cavënëlvaisipaeba xaniavaetsia neponaponaejava. Netsipaeba xaniavaetsia asaëya nejumecovënëtaponaponaejava pexaniajailivaisi, Dioso pejumelivaisi. Nexata bitso casivajamatabëcuenebarëyatsi. ⁴ Pamonae tsipaebabiabajë Dioso pejumelivaisi, bajarapamonae taniji betaxicuenia. Nexata itsa vënëlvaisitaniji bajarapamonae Dioso pejumecovënëtavanapaejava, nexata bitso sivajamatabëcuenebarëyanë tsabiabi. Itsacuenejava ata pematatsënëa bajarapacuenia apo nejamatabëcuenebarëyayaexanae.

⁵ Xamë xaniavaetsia Dioso tonacuenebabiabame itsa yavenoname Dioso pejumecovënëtsivi. Bajarapamonae saicayanacuaverena pepatsivi ata, yavenoname. ⁶ Pamonae Dioso pejumecovënëtsivi parena xanëjavaberena, daxita majotaje Dioso pejumecovënëtsivi pitabarata, cavënëlvaisipaeba bajararotalia asivaya neyavenonaejava Dioso pejumecovënëtsivi. Bajarapamonae itsa ponaena pevajënaeyabelia, Dioso pejumelivaisi jivi petsipaebaponaenexa, yavenonaename pacuenia namatavenonaena pijanamutonexa. Bajarapacuenia bajarapamonae itsa yavenonaename, Dioso casivararëya tsane. ⁷⁻⁸ Bajarapamonae naropoba Jesucristo petonacuenebinexa pexaniajailivaisi, Dioso pejumelivaisi, daxitajivijava petsipaebanajetarubenaenexa. Bajarapamonae apo jitsipae peyavenonaenexatsi pamonae Dioso apo pejumecovënëtsivi. Bajaraxuata vaxaitsi Dioso vajajumecovënëtsivi, xanepana vajayavenonaenexa bajarapamonae. Bajarapacuenia itsa yavenonatsi, nexata Dioso nacatane bajarapamonaeta Dioso pijacuene bevajatonacuenebivi.

Pacuenia Diótreres pibisiacuene exana yabara pelivaisi

⁹ Xanë bajayata copiaya toyaquinajë Dioso pejumecovënëtsivi, panijatamarata pejinavanapaevi. Itsiata bajarapabaxutota taitorobicuenia Diótreres apo jumecovënëtsi. Jesucristo ata taneitorobinëcuene, apo jumecovënëtsi. Bajaraponë ayajamatabëcuene në jamatabënaexana papecanamatacaitorobinëxana. ¹⁰ Bajaraxuata itsa patsianajë xamëjavata, catsipaebianatsi daxita pacuenia Diótreres exana. Bajaraponë pibisiacuenia tanebaracuaicuaijajava, taneyabaranajumetsënëtsijava ata, catsipaebianatsi. Itsacuenejavanënuua pematatsënëa pibisiacuene exanabiaba. Diótreres apo copiapitabiabi xaniavaetsia pamonae Dioso pejumecovënëtsivi. Itsamonae ata itaveta pecopiapitsiyaniva pepatsivi. Nexata picani pamonae Diótreres itaveta, itsiata copiapitabiaba Dioso pejumecovënëtsivi. Nexata pamonae Diótreres itavetsi ata, itsiata copiapitabiaba, bajarapamonae Diótreres jamatabëvecuacapsapa Dioso pejumecovënëtsivi penacatuatsibovecua bajarapamonae pematatsënëa penajoneyaniva bajarapabota.

¹¹ Gayo, pëtsa exanaponame pacuenia pibisijamatabëcuene pexinaevi baexanavanapa. Exanapononare jane pacuenia pexaniacuene pexanaevi baexanavanapa. Pajivi Dioso pexijivi exanatsi, bajarapajivi pexaniacuene exanaponapona. Pajivi Dioso pexijivi apo exanaetsi, bajarapajivi pibisiacuene exanaponapona. Tspaji bajarapajivi Dioso apo yapëtae.

Pacuenia Demetrio pexaniacuene exana yabara pelivaisi

¹² Daxitajivi pexaniacuenia Demetrio vënëlvaisipaebatsi pexaniacuene pexanaponaponaejava. Espiritu Santo baja cajena pexaniajailivaisi jivi peyapëtaeyaexanaenë. Nexata Espiritu Santo jivi yapëtaeyaexanaponatsi pexaniacuene Demetrio pexanaponaponaejava. Paxonë ata baja cajena payapëtaniji Demetrio pexaniacuene pexanaponaponaejava. Nexata daxitajivijava patsipaebaponajë bajarapalivaisi. Paxamë ata paneyapëtaneme pexaniajailivaisi patatsipaebaponaejava.

Pacuenia Juan jumaitsi pecopiarutsilivaisiyota yabara pelivaisi

¹³ Xanë picani xainajë ayailivaisi tacamuxujiobinexa. Itsiata abaxë apo jitsipañë bajarapalivaisi tacatoyaquinaenexa mapabaxutotaje. ¹⁴ Tspaji jamatabëcatanetsi bepijia. Nexata abaxë tajacuata cabarëcuaicuaijajitsi tsane.

¹⁵ Catovajētatsi Diosojavabelia pecayavenonaenexa jamatabëcuenexanepanaeya nepon-
aponaenexa. Daxita pecayapëtaevi, majotaje pejinavanapaevi, cabajacobalia. Nebajaco-
biana caejivi canacujitsia, daxita vajayapëtaevibeje.

Mapabaxutoje San Judas toyaquina Dioso pejumecovënëtsivijavabelia

Pacuenia Judas mapabaxutoje toyaquina Dioso pejumecovënëtsivijavabelia yabara pelivaisi

¹ Xanë Judasnë, Jesucristo pijajivitonënë, Santiago pejujapijinënë. Pacatoyaquinatsi mapabaxutoje paxamë Dioso papecaasivaivi. Dioso pacajunata papijajivinxamë. Paxamë asaëya Dioso pajumecovënëtavanapame Jesucristo papecayajavaponaponaeaxae. ² Pacatovajëtatsi Diosojavabelia bitso papecaitaxutotsoniataenexa. Pacatovajëtatsinua Diosojavabelia itsamonae ata Dioso pitabarata barajamatabëcuenexanepanaeya panejinavanapaenexa. Pacatovajëtatsinua Diosojavabelia namataenetsia panenasivanexa.

Pacuenia Judas toyaquina Dioso pejumecovënëtsivijavabelia pejumecovënëtsivaniva penajumetsënëtsilivaisi petsipaebavanapaevitsi yabara pelivaisi

(2 Pe 2.1-7)

³ Tajamonae bitso patacaasivavi, jamatabëpacatoyaquinatsi picani matavëjëa paneyapëtaenexa Dioso papecacapanepaejavanexa panijaneconivecua. Jamatabëpatoyaquinatsinua picani paneyapëtaenexa paxanë ata Dioso patanecapanepaejavanexa. Itsiata bajaraxua yabara apo pacatoyaquinae tsanetsi mapabaxutotaje. Vënëlivaisitaniji paxamëjavata pepatsijava penajumetsënëtsilivaisi petsipaebaponaevi. Bajaraxuata jitsipajë patacatoyaquinaenexa panejumecovënëtsivaniva bajarapamonae papecatsipaebilivaisi. Tsipaji bajarapamonae pexaniajailivaisi, palivaisi vaxaitsi jumecovënëtsi, bajarapalivaisivecua, saicayalivaisi pacatsipaebavanapa. Nexata paxamë bajarapamonae ajumesaëya patsipaebare palivaisi jumecovënëtavanapatsi. ⁴ Tsipaji bajarapamonae, penajumetsënëtsilivaisi papecatsipaebavanapaevi, paxamë tuatujëta najoneyabiaba pacatsitanajamatabëcuene itajëtsinejeva. Bajarapamonae jamatabëcuenenavëxaniabiaya jumai tsabiabi: “Dioso baja cajena nacaitaxutotsoniatane vajanacacapanepaenexa. Bajaraxuata pibisiacuene exanae atatsi, apo itsacuene,” jai tsabiabi bajarapamonae. Bajarapamonae apo jumecovënëtsi caenë Dioso vajanacaevetsicuene. Apo jumecovënëtsinua caenë Jesucristo vajatuxanenëcuene. Bajarapamonae apo exanae pacuenia Dioso jitsipa. Apo exanaenua pacuenia Jesucristo ata jitsipa. Bajarapamonae itsamatacabi Dioso penaneconitsiaexanaejavanexatsi pijaneconi yabara, Dioso tajëvelia pejumelivaisibaxutota vajuupaeabatsi.

⁵ Payapëtaneme rabaja mapacueneje. Bajayata vajatuxanenë Dioso pijajivi capanepa Egipto nacuavecua, Israel nacuayaberena. Nexata baja payapëtae atamë bajarapacuene, itsiata jitsipajë panenajamatabënapitsinexa icatsia bajarapacuene. Bajarapacuenia vajatuxanenë Dioso pijajivi capanepae ata, pecapanepaecujinae icatsia verebiaba bajarapamonaemiyajuvënëvi. Bajarapacuenia verebiaba tsipaji bajarapamonae apo jumecovënëtsi. ⁶ Panajamatabënapirenuu pacuenia Dioso exana angelevijavabelia ata. Angelevi Dioso tonacuenebavanapa athëbëtsia. Angeleviyajuvënëvi apo exanae pacuenia Dioso itorobatsi. Apo jinavanapaenua itsajota picani Dioso tocopata pejinavanapaenexa. Bajaraxuata Dioso angeleviyajuvënëvi cëbiaya jinavanapaeyaexana itsanacuata, pitaquirinacuata. Bajarajota angelevi copiaevetavanapaeyaexanatsi Dioso penaneconitsiaexanaejavanexatsi. Nexata pamatacabi Dioso daxitamatacabijavabelianexa naneconitsiaexanaena daxita pamonaenaneconita Diosojavabelia, bajarapamatacabi Dioso bajarapaengelevi ata naneconitsiaexanaena daxitamatacabijavabelianexa.

⁷ Panajamatabënapirenuu Sodoma tomarami ata, Gomorra tomarami ata, pemuxuneneta penaetomaranëmi ata. Pamonaemi jinavanapa bajarapatomaranëta, bitso pibisiacuene exanabiaba. Bajarapamonaemi apo jumecovënëtsi Dioso. Apo jumecovënëtsinua angelevi ata. Bajarapamonaemi pivitota bitso pibisiacuene exanabiaba pevëna pebijivijavabelia. Bajaraxuata Dioso verebiaba bajarapamonaemi. Bajarapacuenia Dioso verebiaba bajarapamonaemi, pamonaecotocaevi jinavanapa mapamatacabitaje, peyapëtaenexa. Nexata bajarapamonae ata pibisiacuene pexanaeyaniva, apo pevereverecaesitotjavabelia Dioso penaneconitsiaexanaeyanivatsi.

⁸ Bajarapacuenia bajayata Dioso naneconitsiaexana pamonaemi pibisiacuene exanavanapa. Bajarapacuenia Dioso naneconitsiaexanae ata pamonaemi bajayata pibisiacuene exanavanapa, itsiata pamonaenajumetsënëtsilivaisi pacatsipaebavanapa, apo canaëjëtsi Dioso penaneconitsiaexanaejavanexatsi. Pamonaenajumetsënëtsilivaisi pacatsipaebavanapa, pibisiacuene exanabiaba. Bajarapamonae pina majitsinaebota tane papibisiacuene bajarapamonae exanaejitsia. Bajaraxuata nexata bajarapamonae pibisiacuene

exanabiaba pevitota. Apo jumecovënëtsi pacuenia Dioso itorobatsi. Dioso pijaängelevi ata bajarapamonae pibisiacuenia baracuaicuajai tsabiabi. ⁹ Angelnê Miguel bitso ayaijamatabêcuenenê ata, yaiyatane dovathi. Pibisiacuenia apo baracuaicuajai. Apo bijataenua. Bajayata Moiséspijinê petêpanuacænê jamatabêpitatsi picani dovathi. Nexata ángelnê Miguel apo copatsi Moiséspijinê dovathi pepitsinexatsi. Nexata dovathibeje, ángelnê Miguelbeje, najumenotabeje Moiséspijinêmi yabara. Itsiata bajarajota ángelnê Miguel pibisiacuenia apo bijatae dovathi. Saya xaniavaetsia ángelnê Miguel jumaitsi dovathijavabelia: “Dioso raja cabijataena,” jai. ¹⁰ Itsiata baitsi jane pamonaenê penajumetsênëtsilivaisi pacatsipaebavanapa, xaniavaetsia Ángelevi apo tae ata, apo yapêtae atanua, pibisiacuenia baracuaicuajai tsabiabi. Nexata pacuenia unupijidujuai apo cujarubi atatsi, itsiata pijacuata yapêtane pexanaejavanexa, bajara pijinia pacuenia bajarapamonae ata saya pijacuata yapêtane mapanacuapijicuene pexanaenexa. Nexata exananapa pibisiacuenia pacuenia jamatabêexana. Nexata itsamat-acabi Dioso verebiabiana bajarapamonae bajarapapibisiacuenie pexanaexae.

¹¹ ¡Bitso bejiobi tsane pamonaenê penajumetsênëtsilivaisi pacatsipaebavanapa! Bajarapamonae Dioso naneconitsiaexanaena. Tspaji pacuenia bajayata Cañpijinê jamatabêcueneitsi, bajarapamonae ata jamatabêcueneitsi tsavanapae. Bajayata Cañpijinê pibisiacuenie exanaponapona pacuenia jamatabêexana. Pacuenia bajayata Balaampijinë ata jamatabêcueneitsi, bajarajamatabêcueneitsi tsavanapae pamonaenê penajumetsênëtsilivaisi pacatsipaebavanapa. Bajayata Balaampijinë Dioso apo jumecovënëtsi pacuenia itorobatsi. Balaampijine palata pepitsinexa, jivi matacapona pibisiacuenie pexanaenexa. Pacuenia bajayata Corépijinê ata jamatabêcueneitsi, bajara jamatabêcueneitsi tsavanapae pamonaenê penajumetsênëtsilivaisi pacatsipaebavanapa. Bajayata Corépijinê apo jumecovënëtsi pacuenia Moiséspijinê itorobatsi. Nexata Corépijinê beyaxuabatsi Dioso. Bajara pijinia pacuenia pamonaenê penajumetsênëtsilivaisi pacatsipaebavanapa, pibisiacuenie pexanaexae, nexata Dioso verebiabiana bajarapamonae. ¹² Pamonaenê penajumetsênëtsilivaisi pacatsipaebavanapa, payajavanacaetuatabiabame ita panacaetuatabiabame panenabinexa. Paxamê panacaetuatabiabame namataenetsia panenasivaxae. Nexata bajarapamonae najoneyabiaba panenacaetuatsijavata. Bajarapamonae pibisiacuenie pexanabiabixae, bepiauxirajava paxamê tuatujêta. Bajarapamonae aurajibia ayaijava xaeyabiaba. Petocopsinexa itsamonae ata penaxaenexa, apo najamatabêxainabiabi. Pacuenia pijaoveja pevetsivi xaniavaetsia baeveta pijaoveja, bajarapacuenia itajara pacaeveta. Itsiata apo pacaevetsi xaniavaetsia. Epamonaenê saya naeveta. Bajarapamonae pexanaejava, itsucueniejavyonexa ata apo xanepanae. Yapêtanetsi pacuenia itsi vaita. Vaita itarêrebo pitsapae ata, itsiata ema apo jopae. Jovibo saya caponatsi. Nexata itsamonae peubijavaxi totsaquenae atatsi, apo jamatabêcueneiyavenonaetsi. Bajara saya jamatabêcueneitsi tsavanapae pamonaenê penajumetsênëtsilivaisi pacatsipaebavanapa. Tspaji apo jamatabêcueneiyavenonaenê itsajivi ata. Peubinae, ponae apo nacuaitabiabi penacuaitsimatacabita ata, bajaraponaenê apo xanepanaenê itsucueniejavyonexa ata. Bajara saya jamatabêcueneitsi tsavanapae pamonaenê penajumetsênëtsilivaisi pacatsipaebavanapa. Tspaji apo jamatabêcueneiyavenonaenê itsajivi ata. Peubinae, ponae apo nacuaitabiabi penacuaitsimatacabita ata, bajaraponaenê peubinê yatabutopaya juta petajuitsinexa isotojavabelia. Bajara pijinia pacuenia Dioso naneconitsiaexanaena pamonaenê penajumetsênëtsilivaisi pacatsipaebavanapa pibisiacuenie pexanabiabixae. Nexata bajarapamonae Dioso xuabianatsi infiernojavabelia. ¹³ Pacuenia malataca caecovêta apo rucae, caponanua piaxuirapêrê pitapayabelia, bajara saya jamatabêcueneitsi tsavanapae pamonaenê penajumetsênëtsilivaisi pacatsipaebavanapa. Caejamatabêcuene apo xainabiabi. Bajarapamonae piauracuene pexanabiabixae, nexata bepiauxirajava paxamê tuatujêta. Bajarapamonae pejamatabêcueneta jamatabêcuenebijianabiaba itsamonae Dioso pejumecovënëtsivi. Pacuenia athêbêvetsica tulupu othopaena pevereverecaenexa, bajara pijinia pacuenia bajarapamonae ata vereverecaena. Diosovecua naxuabiana. Tspaji copaba pejumecovënëtsijavami pexaniajailivaisi. Bajaraxuata Dioso bajarapamonae naneconitsiaexanaenatsi. Nexata bajarapamonae pitaquirinacuata jinavanapaena daxitamatacabijavabelianexa.

¹⁴ Enocpijinê bajayata ponapona. Bajaraponêmi Adánpijinë pemomoxiyajuvênênê. Nexata Enocpijinê Dioso pejamatabêcueneta bajayata tajêvelia vajunupaeba, pamonaenê aeconoxae mapamatacabitaje penajumetsênëtsilivaisi pacatsipaebavanapa. Enocpijinê baja cajena bajayata tajêvelia bajarapamonae yabara jumaitsi mapacueniaje: “Vajatuxanenê Cristo, pijajivi Ángelevi, ayaibitsaëttoxaneto yajava, najetarucaena. ¹⁵ Najetarucaena penaneconitsiaexanaenexa daxita pamonaenê apo exanae Dioso pitorobicueniatsi. Naje-

tarucaena penaneconitsiaexanaenexanua daxita pamonaē pibisiacuēnia baracuaicuajai Dioso,” jai baja cajena bajayata tajēvelia Enocpijinē. ¹⁶ Pamonaē penajumetsēnētsilivaisi pacatsipaebavanapa, apo sivajamatabēcuēnebarēya itsacuēnejavayo ata. Nexata pibisiacuēnia baracuaicuajai tsabiabi daxita xua bajarapamonaē tocopiapataponatsi. Apo jumecovēnētsi pacuēnia Dioso itorobatsi. Nexata bajarapamonaē exanavanapa pijacuata penatojitsipaecuēnia. Bajarapamonaē ayaijamatabēcuēnevi nataeya navajunupaebabiaba xua exana. Itsamonaējavabelia itsa cuaicuajai, pexaniacuēnia cuaicuajai tsabiabi. Bajarapacuēnia pexaniacuēnia cuaicuajai tsabiabi saya pebarēyataenexatsi, perajutsinexatsinua penamatavenonaējavanē.

Pacuēnia Dioso pejumecovēnētsivi muxujobatsi pejumecovēnētsiyaniva penajumetsēnētsilivaisi petsipaebavanapaevitsi yabara pelivaisi

¹⁷ Tajamonaē bitso patacaasivavi, panajamatabēnapire pacuēnia baja cajena tajēvelia pacatsipaeba apóstolevi, vajatuxanenē Jesucristo pijajivi. Apóstolevi baja cajena tajēvelia pacatsipaeba pepatsijavanexa penajumetsēnētsilivaisi papecatsipaebivinexa. ¹⁸ Apóstolevi baja cajena tajēvelia pacajumaitsi mapacuēniaje: “Nacua pecopiarucaevajēnaeyota, itsamonaē capocaponaena pexaniajailivaisi, Dioso pejumelivaisi. Bajarapamonaē exanavanapaena pibisiacuēne, pacuēnia pijacuata natojitsipa,” pacajai baja cajena tajēvelia apóstolevi. ¹⁹ Pamonaē penajumetsēnētsilivaisi pacatsipaebavanapa, bajarapamonaē papecatsipaebilivaisita, Dioso panejumecovēnētsivi pacanavecuanatsanaeyaexanapona. Bajarapamonaē saya najamatabēxaina ēmapanacuapijjamatabēcuēneje. Nexata pibisiacuēne exanavanapa pacuēnia pijacuata natojitsipa. Bajarapamonaē Espiritu Santo apo tsijamatabēcaetsi.

²⁰ Tajamonaē bitso patacaasivavi, asaēyata Dioso pajumecovēnētavanapare. Pacuēnia Espiritu Santo pacaitoroba, pavajētabiabare Diosojavabelia. ²¹ Paxamē bitso Dioso pacaasiva. Bajaraxuata pacuēnia Dioso pacaitoroba, pajinavanapare pibisiacuēne paneexanaeyaniva. Bajayajebi pacopatsinejevamē, pacopiaevetavanapare matacabi apo peverevecaejava papecarajutsinexa vajatuxanenē papecaitaxutotsoniataexae.

²² Itsamonaē jumecovēnētsi ata pexaniajailivaisi, Dioso pejumelivaisi, itsiata jumeabapona. Bajarapitsivi payavenonare xaniavaetsia pejumecovēnētsinexa bajarapalivaisi. ²³ Bajarapamonaē isotojavabelia bepejopaevinexa. Tsiapaji pibisiacuēnejavabelia jamatabējopa. Bajaraxuata payavenonare bajarapitsivi. Itsamonaē pijinia bitso pibisiacuēne exanavanapa. Bajarapapibisiacuēne paitoyamēre. Bajarapamonaē itsiata paitaxutobejiobiataema. Payavenonaponare bajarapapibisiacuēne pecopatsinexa. Itsiata baitsi jane xania. Panayajivitaema. Pētsa paxamē ata bajarapamonaeta pibisiacuēne panaexaname.

Pacuēnia apóstolenē Judas itoroba daxita Dioso pejumecovēnētsivi: “Dioso, bitso ayaijamatabēcuēnenēmē,” pejainexa Diosojavabelia yabara pelivaisi

²⁴ Dioso caējēpatsi papecaevetsinexa pibisiacuēne paneexanaeyaniva. Nexata pamatacabi Dioso naneconitsiaexanaena daxita pijaneconi pexainaevi, paxamē ata pacanubenaeyaexanaena bajaraponē Dioso, penivenivenaectotia pexainaenē, pitabarata. Itsiata baitsi jane paxamē paneconijibimē tsane. Bitso pabarēyamē tsane. ²⁵ Bajaraponē pepo caenē Dioso. Bajaraponē Dioso nacapanepaena vajatuxanenē Jesucristo cruzata vajanacasivatēpaexae vajaneconi yabara. Bajaraxuata daxitajivi bejumaitsi Diosojavabelia: “Diosomē, bitso ayaijamatabēcuēnenēmē,” bejai. Betsipaebaponanua itsamonaējavabelia Dioso bitso ayaijamatabēcuēne pexainaenēcuēne. Dioso cajena daxitanacua pevetsinē. Betsipaebaponanua itsamonaējavabelia Dioso pecaējēpaejavatsi pevetsinexa daxitajivi. Bajarapacuēnia Dioso jamatabēcuēneitsi tsaponaponae mapanacuaje pexanaevajēnaeya, mapamatacabi ataje, daxitamatacabijavabelianexa ata. Bajara itsi tsane.

San Juan peyaquinaelivaisi pacuenia tajëvelia Dioso tsitajëtatsi pacuenia itsijitsia mapanacuataje

Pacuenia tajëvelia Jesucristo Dioso tsitajëtatsi, juya bajarapacuenia Jesucristo petsitajëtsijava Juanjavabelia yabara pelivaisi

¹ Daxita xuanë Jesucristo tajëvelia Dioso tsitajëtatsi, daxita bajaraxuanë pelivaisi, xanë Juannë, yaquinajë mapabaxutotaje. Bajaraxuanë baja bepjiayo copiapatsiana. Xuanë tajëvelia Dioso tsitajëtatsi Jesús, bajaraxuanë juya Jesús tsitajëtatsiana pijajivijavabelia. Bajaraxuata nexata Jesús itorobica pijaängel xanëjavabetsica. Nexata bajaraxuanë jumapecataeya tajëvelia netsitajëta Jesús pijaängel. Neyapëtaeyaexananua pajamatabëcuenelivaisi xaina bajaraxuanë. ² Nexata daxita bajaraxuanë pacuenia taniji, pelivaisi yaquinajë mapabaxutotaje. Pacuenia Dioso nejumaitsi, yaquinajë. Pacuenia Jesucristo ata jumaitsi, bajaraxua ata yaquinajë.

³ Pajivi tsmuxulebiana mapabaxutoje Dioso pejumecovënëtsivi penacaetuatsijavata, jamatabëcuenebarëya tsane. Pamonaë ata namuxunaevetsiana mapalivaisije, nexata itsa jumecovënëtsiana pacuenia Dioso tajëvelia jumaitsi, bajarapamonaë ata jamatabëcuenebarëya tsane. Bajarapacuenia jamatabëcuenebarëya tsane tsipaji baja imoxoyo pevajënaë tsaponae pecopiapatsinexa daxita xuanë pelivaisi yaquinajë mapabaxutotaje.

Pacuenia Juan toyaquina siete patomarabejijivi, Dioso pejumecovënëtsivi, yabara pelivaisi

⁴ Xanë rabaja Juannë. Pacatoyaquinatsi siete papabitsaëtomëbeje, Dioso panejumecovënëtsivi, Asiavënë nacuata panejinavanapaevi. Ajena, mapamatacabitaje, Dioso ponapona. Dioso nacua pexanaevajënaeya ata, Dioso ponapona. Daxitamatacabijavabelianexa ata Dioso ponapona. Pacatovajëtatsi Diosojavabelia papecajamatabëcuene barëyayaexanaenexa, papecayavenonaenexanua. Siete paespiritubeje nubena Dioso peecaejava, tronovënëjava, pitabarata. Pacatojitsipatsi bajarapamonaë papecajamatabëcuene barëyayaexanaenexa, papecayavenonaenexanua. ⁵ Jesucristojavabelia ata bajarapacuenia pacatovajëtatsi. Jesucristo baja cajena pexaniajailivaisi, Dioso pejumelivaisi, jivi tsipaebabiaba. Daxita petëpaevivecua, Jesús baja namataxainaeja Dioso asaëyaxanatsi petëpaevjavavecua. Mapanacuata jivi pevetsivi ata matatoxenetsia, Jesús peo pevetsinë daxitacuene. Jesús vajanacaasivaxae, nacasivatëpa. Nexata baja nacavecuajaibiaexana daxita pibisiacuene vajaexanaeconimi. ⁶ Nexata baja Jesús pijajivitsi nacaexana itsamatacabi vajanacabarëevetsinexa daxitacuene. Jesús baja nacaexananua sacerdotevitsi, Jesús paxa Diosojavabelia jivi vajatovajëtabiabinexa. Nexata vaxaitsi daxitamatacabijavabelianexa ayaijamatabëcuene rajutabiabianatsi Jesúsjavabelia. ¡Apo vereverecae tsane Jesús daxitacuene pevetsijava! Bajara itsi tsane.

⁷ ¡Panenamuxunaevere mapalivaisije! Cristo raja najetarucaena athëbëvetsica itarërëbota. Pamatacabi Cristo najetarucaena athëbëvetsica, daxitajivi taenatsi. Pamonaë ata yencacuatatsi, bajarapamonaë ata taenatsi. Daxita nacuanëpjiivi, pamonaë Dioso apo pejumecovënëtsivi, itsa taena Cristo penajetarucaejava athëbëvetsica, nuena pecajunavi. Bajara itsi tsane jivi itsa taena Cristo athëbëvetsica penajetarucaejava.

⁸ Jesús nayabarajumaitsi mapacueniaje: “Xanë rajane baja daxitacuene pepo tataxuxuabinë. Xanë rajane baja icatsi daxitacuene tacopiarucaeyaxanaenënexa,” nayabarajai Jesús daxitacuene pevetsinë, daxitacuene pexanaenexa ata pecaëjëpaenëtsi. Ajena mapamatacabitaje Jesús ponapona. Dioso nacua pexanaevajënaeya ata, Jesús ponapona. Daxitamatacabijavabelianexa ata Jesús ponapona.

Pacuenia Juan Jesús yacotiaya tsitanaitajëtatsi yabara pelivaisi

⁹ Xanë Juannë, panijabananënë. Tsipaji najuajumecovënënavanapatsi Jesucristo. Nexata pacuenia paxamë ata itsamonae pacabejiobiaexanapona Dioso papijajivixae, bajara pijinia pacuenia xanë ata itsamonae nebejiobiaexanapona. Jesucristo pijajivitsi nacaexana itsamatacabi vajanacabarëevetsinexa daxitacuene. Jesucristo papecayavenonaëxae, pacaasaëmë tsavanapae Dioso panejumecovënëtsijava. Bajara pijinia xanë ata itsinë. Dioso pejumelivaisi jivi tatsipaebabiabixae, naneconitsia ponaponajë Patmosvënë tunaetota. Jesucristo pelivaisi ata jivi tatsipaebabiabixae, naneconitsiaponaponajë. ¹⁰ Nexata Patmosvënë tunaetota domingota Espiritu Santo netsijamatabëvënëca. Nexata tapënëverena pecuaicuaijajjava ayaijume, betrompetajume penajumetsijava, jumetaniji. ¹¹ Pecuaicuaijajjava nejumaitsi mapacueniaje:

–Xanē rajane baja daxitacuene pepo tataxuxuabinē. Daxitacuene icatsia tacopiarucaeyaexanaenēnēxa. Xua baja taneme, bajaraxua baja pelivaisi copiaya yaquinare. Xuanē ata icatsia aeconoxae taeponaename, bajaraxuanē ata pelivaisi yaquinaename. Bajaraxuacujinae bajarapalivaisi toitorobianame Dioso pejumecovēnētsivi, siete patomarabejepijivjavabelia, Asiavēnē nacuata pejinanapaevi. Toitorobianame bajarapalivaisi Efeso tomarapijivjavabelia, Esmirna tomarapijivjavabelia ata, Pērgamo tomarapijivjavabelia ata, Tiatira tomarapijivjavabelia ata, Sardis tomarapijivjavabelia ata, Filadelfia tomarapijivjavabelia ata, Laodicea tomarapijivjavabelia ata, nejai mapacueniaje tapēnēverena pecuaicuaijajava.

¹² Nexata napēnēyorotajē tataenēxa ponē tapēnēverena nebarēcuaicuaijai. Nexata taenubajē siete xuabeje orota pexanaejavanē. Bajaraxuanē pematatuta naitayotanubena. ¹³ Bajaraxuanē petuatuajēta taenutajē pebi. Bajaraponē yabara jamatabējumaitsinē:

–Jesūs raeta, Daxitajivi Pematapijinē, jamatabējanē.

Bajaraponē penaxatatsijava apiareca. Nacorobēcētanuca orota pexanaepana. ¹⁴ Mataniojai bitso pacuenia baniojai papaēputo. Pitaxutobeje naitayota. Pacuenia isotocotia bacotia itsi, bajara itaxutocotia itsi. ¹⁵ Petaxubeje ata nivenivenabeje pacuenia banivenivena broncevēnējava pesetsijava, beoronanitomī. Pecuaicuaijajava najumeta pacuenia banajumeta jonca. ¹⁶ Pecujanenia cobenanuca siete patuluputobeje. Pecubuatsina pitsapa anijabarēneniabeje pexiujaiespada. Pacuenia matabacipijijuameto itsa aitavajēnae, xaniavaetsia baitayota, bajarapacuenia itabaranaitayota.

¹⁷ Itsa taniji bajaraponē, betatēpaenē irataeya bocajunuajē bajaraponē pitabarata. Itsiata baitsi jane bajaraponē nejayarena pecujuacobeta. Nejumaitsi:

–Pētsa necujunavame. Xanē rajane baja daxitacuene pepo tataxuxuabinē. Daxitacuene icatsia tacopiarucaeyaexanaenēnēxa. ¹⁸ Xanē rajane baja pepo tasaēsaponaponaenē daxitamatabacijavabelianēxa. Xanē picani tēpajē. Itsiata baitsi jane icatsia asaēnē tatēpaecujinae. Nexata baja asaēnē tsaponaponaē daxitamatabacijavabelianēxa. Dioso netocopata tacapnepaenēxa tajajivi peponaeyaniva infiernojavabelia. Netocopatanua tananenacitsiaexanaenēxa pijaneconi pexainaevi peponaenēxa infiernojavabelia. ¹⁹ Xua baja taneme, bajaraxua baja pelivaisi yaquinare. Xuanē ata icatsia aeconoxae taeponaename, bajaraxuanē ata pelivaisi yaquinaename. ²⁰ Xuanē, siete patuluputobeje, tacujanenia cobenanucajē, mapajamatabēcuenelivaisi xainaje. Siete rabaja pijinia patomarabejepijivi Dioso pejumecovēnētsivi penamatacaitorobivi tsavanapae. Xuanē pijinia siete xuabeje orota pexanaejavanē pematatuta naitayotanubena, mapajamatabēcuenelivaisi xainaje. Siete rabaja pijinia patomarabejepijivi Dioso jumecovēnētavanapa, nejai Jesús, ponē taenutajē, siete xuabeje orota pexanaejavanē tuatuajēta penucaenē.

2

Pacuenia Juan vajatuxanenē Jesús itorobatsi petoyaquinaenēxa Efeso tomarata Dioso pejumecovēnētavanapaevi penamatacaitorobinējavabelia yabara pelivaisi

¹ Jesús icatsia nejumaitsi:

–Efeso tomarata peecaenē, Dioso pejumecovēnētavanapaevi penamatacaitorobinējavabelia, toyaquinare. Nexata daxita pijajivi yajava yapētaena mapalivaisije, nejai Jesús, ponē siete patuluputobeje pecujanenia cobenanuca, siete xuabeje orota pexanaejavanē pematatuta penaitayotanubenaējavanē tuatuajēta penucaenē.

Jesūs nitoroba Efeso tomarata peecaenē, Dioso pejumecovēnētavanapaevi penamatacaitorobinējavabelia, tatoyaquinaenēxa mapejumaitsilivaisije: ² “Yapētaniji daxita xua paexanavanapame. Yapētanjijinua ayaicuenia Dioso panetonacuenebijava. Yapētanjijinua ajamatabēcuenesaēya Dioso panejumecovēnētavanapaejava. Yapētanjijinua panecueneataejitsibijava pibisiacuene pexanaevi. Yapētanjijinua nayajivitaeya panejinavanapaejava itsamonae papecayamaxēitojorobianiva. Itsamonae picani papecayamaxēitojorobinēxa, pacajumi tsabiabi: ‘Paxanē raja paapóstolevinē,’ pacajai tsabiabi. Itsiata penajumētānsivicuene payapētaeyabiabame panenayajiviyapētaexae. ³ Paxamē bajayajebi pacaajamatabēcuenesaēmē tsavanapae Dioso panejumecovēnētavanapaejava, itsamonae pacabejiobiaexanabiabi ata. Ayaicuenia panacuenebame patacaitorobicuene. Apo payabaracueranaemē cajena. Bajarapacuenia panenacuenebavanapaexae, pacasivajamatabēbarēyatsi. ⁴ Itsiata baitsi jane caejavayo yabara pananeconitame xanējavaberena. Tsipaji aeconoxae apo panejitsipaemē pacuenia picani bajayata copiaya panejitsipame. ⁵ Panenajamatabēnapire icatsia pacuenia bajayata panejitsipame. Panajamatabēcuenepēnēyorore xanējavaberena. Panetonacuenebavanapare icatsia pacuenia bajayata xaniavaetsia panetonacuenebavanapame. Itsa baja apo panejitsipaemē tsane icatsia, nexata baja apo patajajivimē tsane. ⁶ Itsiata baitsi jane pacasivajamatabēcuenēbarēyatsi

patanejamatabëcuenejêpaexaemê mapacuene yabaraje. Pacujiruitoyamê nicolaítavi pibisiacue pexanaponaejava. Bajaraxua pexanaejava xanê ata cujiruitoyanê. ⁷ Itsa pamuxuvojorubename, panatojumetaema pacuenia Espiritu Santo jumaiti Dioso pejumecovênêtsivijavabelia. Jumaiti mapacueniaje: 'Pajivi Cristo jumecovênêtaponapona êpetêpaejavabelianexa, bajarapajivi Dioso tocopatsianatsi pejonenexa Dioso pijanacuayabet-sia,' jai Espiritu Santo," pejailivaisi toyaquinare Efeso tomarata peecaenê, Dioso pejumecovênêtavanapaevi penamatacaitorobinêjavabelia, nejai Jesús, siete xuabeje orota pexanae-javanê tuatujêta penucaenê.

Pacuenia Juan vajatuxanenê Jesús itorobatsi petoyaquinaenexa Esmirna tomarata Dioso pejumecovênêtavanapaevi penamatacaitorobinêjavabelia yabara pelivaisi

⁸ Jesús icatsia nejumaiti:

—Esmirna tomarata peecaenê, Dioso pejumecovênêtavanapaevi penamatacaitorobinêjavabelia, toyaquinare daxita pijajivi yajava peyapêtaenexa mapalivaisije, nejai Jesús, ponê daxitacuene pepo petaxuxuabinê, daxitacuene icatsia pecopiarucaeyaexanaenênexa.

Bajaronê picani têpa. Itsiata baitsi jane icatsia asaê petêpaecujinae. Nexata baja asaê tsaponapona daxitamatacabijavabelianexa. Jesús nitoroba Esmirna tomarata peecaenê, Dioso pejumecovênêtavanapaevi penamatacaitorobinêjavabelia, tatoyaquinaenexa mapejumaitisilivaisije: ⁹ "Yapêtanjiji daxita xua paexanavanapame. Yapêtanjijinau itsamonae papecabebiobaxanaponaejava. Yapêtanjijinau bepanejobivicuene. Itsiata baitsi jane itsamatacabi Diosojavatatsia bitso panexainaevi tsane. Yapêtanjijinau pibisiacuenia papecabaracuaicuaijajava judiovi, Dioso apo pejumecovênêtsivi. Bajarapona cajúna saya dovathi pijajivi. ¹⁰ Pêtsa pacujunavame itsamonae, pacabejobiobaxanaejitsia ata. Dovathi raja pejamatabëcueneata pananeconitsivi pejababi-abibota, pacananeconitsiaexanejebiana. Bajarapacuenia pacananeconitsiaexanejebiana dovathi papecajamatabëcuenejêbinexa, papecajamatabëcueneypêtaenexa xaniajai pepacuene patanejumecovênêtsijavamê. Pacabejobiobaxanaponaena diez pamatacabibeje. Bajarapacuenia pacaexanae ata tsane, itsiata panejumecovênêtsianame matapania panetêpaejavabelianexa. Nexata xanê pacarajutsianatsi matacabi apo pevereverecaejava. ¹¹ Itsa pamuxuvojorubename, panatojumetaema pacuenia Espiritu Santo jumaiti Dioso pejumecovênêtsivijavabelia. Jumaiti mapacueniaje: 'Pajivi Cristo jumecovênêtaponapona êpetêpaejavabelianexa, bajarapajivi apo itsacueniabi tsanetsi cotocaevi patêpaejava,' jai Espiritu Santo," pejailivaisi toyaquinare Esmirna tomarata peecaenê, Dioso pejumecovêtavanapaevi penamatacaitorobinêjavabelia, nejai Jesús, siete xuabeje orota pexanaejavanê tuatujêta penucaenê.

Pacuenia Juan vajatuxanenê Jesús itorobatsi petoyaquinaenexa Pérgamo tomarata Dioso pejumecovênêtavanapaevi penamatacaitorobinêjavabelia yabara pelivaisi

¹² Jesús icatsia nejumaiti:

—Pérgamo tomarata peecaenê, Dioso pejumecovênêtavanapaevi penamatacaitorobinêjavabelia, toyaquinare daxita pijajivi yajava peyapêtaenexa mapalivaisije, nejai Jesús, ponê pecuibuatsina pitsapa anijabarêneniabeje pexiuiaespada.

Jesús nitoroba Pérgamo tomarata peecaenê, Dioso pejumecovênêtavanapaevi penamatacaitorobinêjavabelia, tatoyaquinaenexa mapejumaitisilivaisije: ¹³ "Yapêtanjiji daxita xua paexanavanapame. Yapêtanjijinau dovathi pijajivi tuatujêta panejinavanapaejava. Itsiata baitsi jane pajamatabëcuenesaemê tsavanapae patanejumecovênêtavanapaejavamê. Bajayata Antipaspijinê tajumelivaisi jivijavabelia tsipaebabiaba. Nexata Antipaspijinê paxamê tuatujêta dovathi pijajivi pebeyaxubijavatsi, patae atamê, itsiata apo pacopatsimê patanejumecovênêtavanapaejavamê. Bajarapacuenia patanejumecovênêtavanapaexaemê, pacasivajamatabëcuenebarêyatsi. ¹⁴ Itsiata baitsi jane itsajamatabëcuenejavaxi yabara pananeconitame xanêjavaberená. Bajarajota Pérgamo tomarata paxamêyajuvênêvi muxubijipapenetaona itsamonae pibisiacue pexanaenexa. Bajayata Balaampijinêmi jivi peyamaxêitorobabiabinêmi ponapona. Nexata Israelpijinê pemomoxi penaneconitsinexa Diosojavabelia, Balaampijinêmi itoroba Balacpijinêmi pemuxubijipapenetaona Israelpijinê pemomoxijavabelia. Nexata Balacpijinêmi muxubijipapeneta Israelpijinê pemomoxi penaponaenexa fiestajavabelia. Nexata fiestajavata itsamonae dajubinê itsa beyaxuaba, jumapecataeya pexanaenêanêjavabelia ofrendacuenia perajutsiyajuvênêvi naxane Israelpijinê pemomoxi. Balacpijinêmi muxubijipapeneta Israelpijinê pemomoxi pibisiacue pexanaenexa pevitota. Bajara pijinia pacuenia aeconoxae paxamêyajuvênêvi ata exanapona. Pérgamo tomarapijivi pibisiacue pexanaenexa, muxubijipapenetaona. ¹⁵ Itsamonae pijinia paxamêyajuvênêvi nicolaítavi petsipaebaponaelivaisi jumecovênêtavanapa. Nexata tanejumecovênêtsivi pibisiacue pexanaenexa,

bajarapamonae muxubijapenetapona. ¹⁶ Bajaraxuata paxamē xaniavaetsia panajamatabēcuenepēnyorore Diosojavabelia. Itsa jume, xanē nexata naxanitsiayo ponae-najē paxamējavabereca tabarēnabenexa bajarapamonae tacuibuatsina pepitsapaeepadata. ¹⁷ Itsa pamuxuvojorubename, panatojumetaema pacuenia Espiritu Santo jumaiti Dioso pejumecovēnētsivijavabelia. Jumaiti mapacueniaje: 'Pajivi Cristo jumecovēnētaponapona ēpetēpaejavabelianexa, bajarapajivi rajutsianajē pexanexa manāvēnējava, athēbēpijijava, pejamatabēcuene asaēyaxanaejavanexatsi. Rajutsianajēnua penioponaeboto. Bajarapaiboto pijumata bajarapajivi vēnērtsianajē pejanavēnē. Itsjavi ata apo vēnēyapētae tsanetsi. Caejivi, bajarapaiboto pepitsijivi, navēnēyapētaena,' jai Espiritu Santo," pejailivaisi toyaquinare Pērgamo tomarata peacaenē, Dioso jumecovēnētavanapaevi penamatacaitorobinējavabelia, nejai Jesús, siete xuabeje orota pexanaejavanē tuatujēta penucaenē.

Pacuenia Juan vajatuxanenē Jesús itorobatsi petoyaquinaenexa Tiatira tomarata Dioso pejumecovēnētavanapaevi penamatacaitorobinējavabelia yabara pelivaisi

¹⁸ Jesús icatsia nejumaiti:

–Tiatira tomarata peacaenē, Dioso pejumecovēnētavanapaevi penamatacaitorobinējavabelia, toyaquinare pijajivi yajava peyapētaenexa mapalivaisije, nejai Dioso pexēnato, ponē pitaxutobeje naitayota. Pacuenia isotocotia bacotia itsi, bajara pitaxutocotiaitsinē, ponē petaxubejenivenivena ata pacuenia banivenivena broncevēnējava pesetsijava, beoronanitomi.

Jesús nitoroba Tiatira tomarata peacaenē, Dioso pejumecovēnētavanapaevi penamatacaitorobinējavabelia, tatoyaquinaenexa mapejumaitsilivaisije: ¹⁹ "Yapētanjivi daxita xua paexanavanapame. Yapētanjivina itsamonaē ata paneasivatsavanapaejava. Yapētanjivina patanesivanajamatabēcuene copatavanapaejavamē. Yapētanjivina panetonacuenebijava Dioso. Yapētanjivina paneajamatabēcuenesaē tsavanapaejava, itsamonaē pacaitacueniababiabi ata. Yapētanjivina pacuenia panetonacuenebavanapame pamatacabi ajena panejumecovēnētame. Yapētanjivina pacuenia jane baja aeconoxae bitsoyo panetonacuenebavanapame. Bajarapacuenia paneexanavanapaexae pacasivajamatabēbarēyatsi. ²⁰ Itsiata baitsi jane itsajamatabēcueneyo yabara pananeconitame xanējavaberena. Tsiipaji apo pacujiruitavetsimē Jezabelvēna pibisiacuene pexanaejava. Bajarapova beprofetava, Diosojumelivaisi bepepaebiva, natane. Nexata patajajivimē bajarapova pacayajuvēnyamaxēitojorobapona baja. Bajarapova papecayajuvēnē yamaxēitojorobinexa jumai tsabiabi: 'Pebijivi pijavavecua jaiti ata itsava, itsiata apo itsacuene. Bajara pijinia itsi petiriavi ata. Itsanē jaiti ata pamonavecua, itsiata apo itsacuene. Bajara pijinia itsi pevi ata. Dajubinē itsa beyaxuaba ofrendacuena pevi perajutsinexa jumapecataeya pexanaenēanējavabelia, bajarapaviyajuvēnējava xae atatsi, itsiata apo itsacuene,' jai tsabiabi bajarapova patajajivimē papecayajuvēnē yamaxēitojorobinexa. ²¹ Bajarapova picani pecipatsijava pibisiacuene pexanabiabijavavecua, bajayajebi evetaponaponajē. Itsiata baitsi jane apo jamatabēcopatsi pevitota pibisiacuene pexanabiabijava. Apo najamatabēcuenepēnyorotsi xanējavaberena. ²² Bajarapova nexata avitaniaexanaenajē camata pebobacaenexa. Nexata pamonaē paxamēyajuvēnēvi itsa apo copatsi tsane bajarapova pitorobicueniatsi pexanavanapaejava, pamatabēxēyo pevitota pibisiacuene exana bajarapova pitorobicueniatsi, nexata bajarapamonae ata bitso nabejiobitsiaexanaenajē. ²³ Bajarapova pexi ata verebiabianajē. Nexata daxita Dioso pejumecovēnētsivi nejamatabēcueneyapētaena. Nejamatabēcueneyapētaena daxitajivi bēpēnēa pejamatabēthētota, penajamatabēxainacuene ata, tayapētaenēcuene. Pacaejivimē canacujitsia xuavajēto panetonacuenebavanapame, bajara pijinia pitsijavavajēto pacarajutsianatsi. Xuavajēto pijinia panijaneconi paxainame, bajara pijinia panetonivajētota pacananeconitsiaexanaponaenatsi. ²⁴ Paxamē apo panejumecovēnētsivi, Jezabel pacaitorobi ata pibisiacuene picani paneexanaenexa, mapacuenia pacajumaitisijije. Paxamē apo pajumecovēnētsimē dovathi pijalivaisi, palivaisi Jezabel jivi tsipaebapona. Bajarapalivaisita cujarubapona dovathi pijacuene pevājēnaeyabelia peyapētaeyaexanaponaenexa. Bajaraxuata apo pacaitorobitsi panejumecovēnētsinexa pematatsēnēa itsalivaisi, piayapēbejelivaisi. ²⁵ Nexata pacaasaēmēre tsavanapae panejumecovēnētsijava Dioso pejumelivaisi matapania ētapatsimatacabitsica javabelianexa. ²⁶ Itsamonaē ēpetēpaejavabelianexa, catsitecavanapaena tanesivanajamatabēcuene copatavanapaejava. Tajitsipaecuene ata netoexanavanapaena. Bajarapamonae itsamatacabi tocopatsianajē pevetsinexa daxitanacuapijivi. ²⁷ Bajarapamonae itsamatacabi daxitanacuapijivi itsa evetsiana, ajumesaēya itorobabiabiana pejumecovēnētsinexatsi. Pacuenia xanē ata taxa netocopata daxitanacuapijivi taevetsinexa, bajara pijinia pacuenia bajarapamonae ata pevetsinexa daxitanacuapijivi,

tocopatsianajë. Pacuenia atsananito pefaratsicanalito toxobiaxuabatsi, hierronaebota itsa conitaxuabatsi, bajara pijinia itsanetsi pamonaë Dioso apo pejumecovënëtsivi. Tajajivi verebiabiana daxita Dioso apo pejumecovënëtsivi.²⁸ Pamonaë tajajivi, rajutsianajë pexainaenexa papinijicotia xainajë ayaijamatabëcuenevinexa.²⁹ Itsa pamuxuvojorubename, panatojumetaema pacuenia Espiritu Santo jumaiti Dioso pejumecovënëtsivijavabelia,” pejaillivaisi toyaquinare Tiatira tomarata peecaenë, Dioso pejumecovënëtavanaepaevi penamatacaitorobinëjavabelia, nejai Jesús, siete xuabeje orota pexanaejavanë tuatujëta penucaenë.

3

Pacuenia Juan vajatuxanenë Jesús itorobatsi petoyaquinaenexa Sardis tomarata Dioso pejumecovënëtavanaepaevi penamatacaitorobinëjavabelia yabara pelivaisi

¹Jesús icatsia nejumaiti:

–Sardis tomarata peecaenë, Dioso pejumecovënëtavanaepaevi penamatacaitorobinëjavabelia, toyaquinare pijajivi yajava peyapëtaenexa mapalivaisije, nejai Jesús, ponë xaina siete paespiritubeje, Dioso pijaespiritú, ponë cobenanuca siete patuluputobeje.

Jesús nitoroba Sardis tomarata peecaenë, Dioso pejumecovënëtavanaepaevi penamatacaitorobinëjavabelia, tatoyaquinaenexa mapejumaitsilivaisije: “Yapëtaniji daxita xua paexanavanapame. Yapëtanijina itsamonae papecasivajamatabëjumai tsabiabijava: ‘Bajarapamonaë bitso tonacuenebavanapa Dioso pijacuene,’ papecasivajamatabëjai tsabiabijava. Itsiata baitsi jane xanë yapëtaniji pibisiacuene paneexanaejava. Yapëtanijina bëpënëa panejamatabëcuenefaenaenajava patanejumecovënëtsijavamë.² Nexata namataenetsia panajamatabëcueneasaëyaexanare. Pajamatabëcueneitsamonae papecasivajamatabëjumai tsabiabijava: ‘Bajarapamonaë bitso tonacuenebavanapa Dioso pijacuene,’ papecasivajamatabëjai tsabiabijava. Itsiata baitsi jane xanë yapëtaniji pibisiacueneasaëya exanaenavena itsamonae ata, pamonaë pijinia jamatabëcuenefaenaenapona tanejumecovënëtsijava. Tsi-paji baja bajarapamonaë imoxo pecopatsi tanejumecovënëtsijavami. Xua paexanavanapame, bajaraxua picani paxamë pacatsitapexaniacuene. Itsiata baitsi jane bajaraxua Dioso apo tsitapexaniacuentsi.³ Panajamatabënapire palivaisi baja copijava itsamonae pacatsipaeba xanë patacacapanepaejavanexa yabara. Pacasaëmëre tsavanapae bajarapalivaisi panejumecovënëtavanaepajava. Pacopabare pibisiacuene paneexanabiabijava. Panajamatabëcuenepeñëyorore Diosojavabelia. Namataenetsia itsa apo panajamatabëcueneasaëyaexanaemë tsane patanejumecovënëtsijavamë, nexata jemata patsiarecajë patacananeconitsiaexanaenexa. Apo payapëtaemë tsane paepatota patsijitsianëreca. Tsi-paji paepatota apo panejamatabënajinaemë, jemata patsiarecajë. Pacuenia penacobetoxotsinënexa jemata bapata, paepatota apo jamatabënajinaetsi, bajara pijinia xanë ata itinë tsane.⁴ Paxamë Sardis tomarata panejinavanapaevi, itsamonae paxamëyajuvënëvi pibisiacuene apo exanaë. Pacuenia itsi pamonaë apo toxuiratsi penaxatabijavanë, bajara pijinia jamatabëcueneitsi tsavanapae bajarapamonaë Dioso pitabarata aneconijibia pejinavanapaexaë. Itsamatacabi bajarapamonaë xanëjavata jinavanapaena. Bajarapamonaë itsamatacabi xanëjavata itsa jinavanapaena, pianeconijibixae, naxatabiana penioponaejavanë.⁵ Pamonaë nejumecovënëtavanaepaena ëpetëpaejavabelianexa, bajarapamonaë naxatabiana penioponaejavanë. Bajarapamonaë apo vënëiquinaenë tsane pabaxutota vënërubena pamonaë matacabi apo peverevereceaajava pexainaevinexa. Biji rajane pamonaë tajajivi, vënëyapëtaeyaxanaponaenajë taxajavabelia, taxa pijaángelevijavabelia ata.⁶ Itsa pamuxuvojorubename, panatojumetaema pacuenia Espiritu Santo jumaiti Dioso pejumecovënëtsivijavabelia,” pejaillivaisi toyaquinare Sardis tomarata peecaenë, Dioso pejumecovënëtavanaepaevi penamatacaitorobinëjavabelia, nejai Jesús, siete xuabeje orota pexanaejavanë tuatujëta penucaenë.

Pacuenia Juan vajatuxanenë Jesús itorobatsi petoyaquinaenexa Filadelfia tomarata Dioso pejumecovënëtavanaepaevi penamatacaitorobinëjavabelia yabara pelivaisi

⁷Jesús icatsia nejumaiti:

–Filadelfia tomarata peecaenë, Dioso pejumecovënëtavanaepaevi penamatacaitorobinëjavabelia, toyaquinare pijajivi yajava peyapëtaenexa mapalivaisije, nejai Jesús, ponë pianeconijibinë, ponë copiaevetavanapatsi icatsia pepatsijavanexatsica vajanacacapanepaenexa.

Pacuenia bajayata Davidpijinë eveta Israelnagua, bajara pijinia pacuenia Jesús evetsiana mapanacuaje. Evetsiana athëbëtatsia ata, Dioso pijanagua. Nexata itsamatacabi Jesús pijajivi itorobiana daxitanacuanëjava jivi petsipaebanajetarubenaenexa Diosojavabelia pecapanepaelivaisinexatsi. Nexata panacuanëjava Jesús pijajivi itorobiana,

bajarapanacuanējāva pejinavanapaevi Jesūs pijajivi tsipaebanajetarubenaena Diosojavabelia pecapanepaelivaisinexatsi. Nexata itsajivi ata apo caējēpaetsi tsane Jesūs pijajivi pitavetsinexa petsipaebanajetarubenaeyaniva bajarapanacuanējāva pejinavanapaevi. Panacuanējāva pijinia Jesūs pijajivi apo tocopatsi tsane Diosojavabelia jivi pecapanepaelivaisinexatsi petsipaebanajetarubenaenexa, bajarapanacuanējāva pejinavanapaevi Jesūs pijajivi apo tsipaebanajetarubena tsane. Nexata itsajivi ata apo caējēpaetsi tsane Jesūs pijajivi pitorobinexa petsipaebanajetarubenaenexa bajarapanacuanējāva pejinavanapaevi. Jesūs nitoroba Filadelfia tomarata peecaenē, Dioso pejumecovēnētavanapaevi penamatacaitorobinējāvabelia, tatoyaquinaenexa mapejumaitsilivaisije: ⁸ “Yapētāniji daxita xua paexanavanapame. Apo pasaēmē. Itsiata panejumecovēnētavanapame. Apo panayavajunuaxainaemē patajajivicuenemē. Bajaraxuata pacatocopatatsi talivaisi jivi panetsipaebaponaenexa panevajēnaeyabelia. Nexata itsajivi ata apo caējēpaetsi tsane papecacopatsiaexanaenexa talivaisi jivi panetsipaebaponaejāva. ⁹ Panejumetaama. Itsamonaē pajajivi ata, dovathi pijajivi. Tspaji apo nejumecovēnētsi. Bajarapamonaē jamatabēcuenenavēxaniabiaya jumai tsabiabi: ‘Paxanē raja pajudjiovinē, Dioso papijajivinē,’ jai tsabiabi. Itsiata baitsi jane Dioso apo pijajivi. Tspaji apo nejumecovēnētsi. Bajarapamonaē itsamatacab paneitabarata pematabacabēta pacatonubenaeyaexanaenatsi. Nexata bajarapamonaē yapētaena taxamē patacaasivacuene. ¹⁰ Pacaitorobatsi patanejumecovēnētsijavamē bajajajebi panecasaētsavanapaenexa. Nexata baja bajarapacuenia panejumecovēnētavanapame. Bajaraxuata nexata pamatacabi daxitanacuapijivi piayaicuenē taeponaena, paxamē pacaevetsianatsi. Nexata paxamē apo pacaitacueniabi tsane. ¹¹ Naxanitsiayo rabaja ponaenajē paxamējāvabereca. Xaniavatsia baja pacaasaēmēre tsavanapae patanejumecovēnētavanapaejavamē. Nexata itsajivi ata apo pacavecuapitsi tsane xua taxa Dioso pacarajutsiana athēbētatsia. ¹² Pamonae nejumecovēnētavanapaena ēpetēpaejavabelianexa, bajarapamonaē taxa Dioso bepijatemplobonaesituronē taenatsi athēbētatsia. Bajarapacuenia taxa Dioso bepijatemplobonaesituronē taenatsi bitso pijamatabēcuenesaē tsavanapaexae tsane tanejumecovēnētavanapaejāva. Bajarapamonaē taxa Dioso athēbētatsia yajavajinavanapaena daxitamatacabijavabelianexa. Nexata taxa Dioso pevēnē yaquinarutsianajē bajarapamonaejāvabelia. Yajavyaquinarutsianajē taxa Dioso pijatomara pevēnē. Bajarapatomara, pejana Jerusalēntomara. Bajarapatomara athēbēvetsica patsianica, taxa Diosojavavetsica. Tavēnē ata, pejanavēnē, yaquinarutsianajē bajarapamonaejāvabelia. ¹³ Itsa pamuxuvojorubename, panatolumetaema pacuenia Espiritu Santo jumaiṣi Dioso pejumecovēnētsivijavabelia,” pejallivaisi toyauinare Filadelfia tomarata peecaenē, Dioso pejumecovēnētavanapaevi penamatacaitorobinējāvabelia, nejai Jesūs, siete xuabeje orota pexanaejavanē tuatujēta penucaenē.

Pacuenia Juan vajatuxanenē Jesūs itorobatsi petoyaquinaenexa Laodicea tomarata Dioso pejumecovēnētavanapaevi penamatacaitorobinējāvabelia yabara pelivaisi

¹⁴ Jesūs icatsia nejumaiṣi:

–Laodicea tomarata peecaenē, Dioso pejumecovēnētavanapaevi penamatacaitorobinējāvabelia, toyaquinare pijajivi yajava peyapētaenexa mapalivaisije, nejai Jesūs, ponē copiaevetavanapatsi icatsia pepatsijavanexatsica vajanaacapanepaenexa.

Bajaraponē pexaniajailivaisi jivi tsipaebabiaba. Pexanaenēnua daxitacuene, xua Dioso exana mapanacuataje. Jesūs nitoroba Laodicea tomarata peecaenē, Dioso pejumecovēnētavanapaevi penamatacaitorobinējāvabelia, tatoyaquinaenexa mapejumaitsilivaisije: ¹⁵ “Yapētāniji daxita xua paexanavanapame. Yapētānjinua patanejumecovēnētsivi amē, panejamatabēcuenēvetsina bevelia patanejitsipaejavamē. Yapētānjinua bevelia patanetonacuenēbavanapaejavamē. Pacuenia apo tanejumecovēnētsivi jamatabēcuenētsi xanējāvaberena, itsiata picani bitso apo pajamatabēcuenētsimē. Pacuenia pijinia xaniavatsia tanejumecovēnētsivi jamatabēcuenētsi xanējāvaberena, itsiata apo pajamatabēcuenētsimē. Pacuenia jamatabēcuenētsi pamonae apo tanejumecovēnētsivi, itsa pajamatabēcuenētsimē tsipae, nexata xanepanaejitsipa. Itsa jume, pacuenia jamatabēcuenētsi pamonae xaniavatsia tanejumecovēnētsivi, itsa pajamatabēcuenētsimē tsipae, nexata xanepanaejitsipa. Tspaji roviaia pajamatabēcuenētsi yapētaejitsipame pacuenia pajamatabēcuenētsimē tsavanapae xanējāvaberena. ¹⁶ Nexata pacuenia mera perēbēnaera apo cainejebi, bitso apo atajunua, bajara pajamatabēcuenētsimē xanējāvaberena. Bajarapitsira apo jitsipaetsi vajaapaenexa. Nexata vajaapaeyaniva, navecuapatajarabatsi penaxuabinexa. Bajara pijinia pacuenia pacanavecuaxuabianatsi. Tspaji apo jitsipaenē pacuenia bēpēnē panejamatabēcuenēvetsina pajamatabēcuenētsimē tsavanapae. Baitsi apo jitsipaenē bevelia patanejitsipaejavamē. Bajaraxuata pacanavecuaxuabianatsi. ¹⁷ Paxamē pajamatabējumaiṣimē tsabiabi: ‘Xanē baja cajena bitso daxitacuene taxainanē. Daxita xua nacuenēbaponaponajē taxainaejavanexa, netocapit-

sapapona. Nexata itsacuenejava ata apo namatavenonaenē, pajamatabējamē tsabiabi. Itsiata baitsi jane Diosojavabelia apo panejamatabēcuenexanepanaexae, pepacuene apo pajamatabēcuenebarēyamē tsavanapae. Apo payapētaemēnua bitso bepanejibicue Dioso pitabarata. Paxamē cajena Dioso pacatane bepaneitaxutotsēcēnaevi bitso, bepanejumasajinaevinua. ¹⁸ Bajaraxuata pacamuxujobijsiatsi. Panevecuapire bitso penamata-motsijava paricovinexamē jane baja Diosojavatatsia. Panevecuapirenua penioponaenaxatatsijava panenaxatatsinexa, panenaperabēcaranatsinexa Dioso pitabarata paneaurajavavecu. Panevecuapirenua paneitaxutotsēcēnaevaē panetaenexa jane baja xani-avaetsia. Nexata dovathi pijacuene panayajivitaename papecayamaxēitojorobiyani. ¹⁹ Daxita pamonaē tasivavi, muxujibajē pepapētaenexa. Naneconitsiaexanajēnua pecopatsinexa apo tajtisiapaecuene pexanaejava. Nexata asaēyata panejumecovēnēre. Pacopabare pibisiacuene paneexanabiabijava. Panajamatabēcuenepēnēyorore Diosojavabelia. ²⁰ Panejumetaema. Itsajivi itsa pata panijabota, nexata itsa pacajunata, patobaupatame pejonenexa. Bajara pijinia pacuenia xanē ata panejamatabēthēto itsa panetobaupatsianame, pacatsijamatabējonenatsi. Nexata pacayajavaponaponaenatsi daxitamatacabi-javabelianexa. ²¹ Xanē baja cajena taxa Dioso taneitorobicuenia jumecovēnētaponaponajē ētatēpaejavabelianexa. Nexata baja aeconoxae yajavaecajē taxa peecaejavata, pijatronovēnējavata. Pamonaē pijinia nejumecovēnētavanapaena ēpetēpaejavabelianexa, bajarapamonaē pijinia tocopatsianajē tayajavaecaenexa tronovēnējavata. ²² Itsa pamux-ujorubename, panatojumetaema pacuenia Espiritu Santo jumaitsi Dioso pejumecovēnētativajavelia, pejaillivaisi toyaquinare Laodicea tomarata peecaenē, Dioso pejumecovēnētavanapaevi penamatacaitorobinējavavelia, nejai Jesús, siete xuabeje orota pexanae-javanē tuatuaijēta penucaenē.

4

Pacuenia Juan tane Dioso pijajivi Dioso pijanacuatsia yabara pelivaisi

¹ Icatsia taniji baupa penabaupatanucaejava athēbētatsia. Ponē baja copiaya jumetaniji pecuacuajajava betrompetajume, bajaraponē icatsia pecuacuajajava jumetaniji. Ne-jumaitsi mapacueniaje:

–Junaimina xanējavabetsina. Catsitajētsianatsi majotatsinaje pacuenia pevajēnaeyabelia itsi tsaponaejitsia bajarapanacuatareca, nejai ponē jumetaniji pecuacuajajava.

² Nexata bajarapaepatota nayapētaniji athēbētatsia Espiritu Santo pesaē tayajavaponaponaejava. Athēbētatsia taniji tronovēnējava. Bajarapatronota Dioso taeyetajē. ³ Dioso, ponē eca bajarapatronota, itabaracotiabatsi. Pacuenia cotiaitsi penamatamotsiibotonē, bajara itabaracotiiaitsi. Pacuenia cotiaitsi jaspevēnēiboto, pacuenia cotiaitsi cornali-navēnēiboto ata, bajaraitabaracotia itsi. Bajarapatrono matatoyorotsia aravalibo taenu-tajē. Pacuenia esmeraldavēnēiboto cotiaitsi, bajaracotia itsanucaē bajarapaaravalibo.

⁴ Bajarapatrono matatoyorotsia taenubajēnua veinticuatro patronobeje. Caetronota canacujitsia ecapona ancianonēanē. Bajarapaancianovi naxatabena penioponaejavanē. Orota pexanaecononē mataena. ⁵ Patronota eca Dioso, bajarapatrono-javaverena yamaxē binebinejai. Najumetajunujunua. Siete xuabeje pitayotanube-naejavanē taenubajē bajarapatronoitabarata. Bajarapaitayotanubenaejavanē mapajamatabēcuenelivaisi xainaje. Siete rabaja pijinia patomarabejepijivi, Dioso pejumecovēnētavanapaevi, Espiritu Santo peyavenonabiabijavanexatsi. ⁶ Bajarapatronoitabarata taeyetajē bemanuamene picani. Itsiata baitsi jane piatajajava. Pacuenia vidriojava nasaba, bajarapitsijava.

Bajarapatronojavata taenubajē cuatro ponēbeje piatiothiavi, ayainēanē. Trono mata-toyorotsia nubena. Bajarapamonaē pitabarayareca, pejumareca ata, itaxutorubenaponareca. ⁷ Copiaya ponē, benevēthē petsobianē. Bajaraxuacujinae cotocaevinē, be-toro. Bajaraxuacujinae acueyabinē, bejiviitabaranē. Bajaraxuacujinae cuatronē, pacue-nia cotsala itsa punanajetaruca baitsi, bajaraitsi. ⁸ Ponēanē, cuatro ponēbeje piatiothiavi taniji, xainapona seis pacorofetobeje caenē canacujitsia. Bajarapamonaē daxitanēanēreca itaxutorubenaponareca. Bēpēnēaverena ata bajarapacuenia itaxutorubenaponareca. Mat-acabijebi, meravijebi ata, apo copatanubenaē pejumaitsanubenaejava Diosojavabelia.

Bitso nianeconijibinē. Bitso ayajamatabēcuenenēmē. Nexata cacaejēpa daxitacuene nexanaenexa. Ajena, mapamatacabitaje, ponaponame. Mapanacuaje nexanae-vajēnaeya ata, ponaponame. Daxitamatacabijavabelianexa ata ponaponame, jai tsanubenaē bajarapamonaē Diosojavabelia.

⁹ Pamonaē cuatro ponēbeje piatiothiavi, pexaniajamatabēcuenenua rajutabiaba Diosojavabelia. Bajarapamonaē pexaniajamatabēcuene itsa rajutabiaba Diosojavabelia, jumai tsabiabi mapacueniaje:

—jDiosomë, nivenivenaecotia bitso pinijicuene! jAyaijamatabëcuenenëmë bitso! jai tsabiabi.

Bajarapacuenia jumai tsabiabi tronota peecaenëjavabelia, daxitamatacabijavabelianexa peponaponaenëjavabelia. ¹⁰ Pamonaе cuatro ponëbeje piatiothiavi, bajarapacuenia itsa jumai tsanubenaе Diosojavabelia, nexata pijinia bajarapaepatota pamonaе veinticuatro ponëbeje ancianovi pematabacabëta tonubenajunua Dioso pitabarata, daxitamatacabijavabelianexa peponaponaenë pitabarata. Bajarapacuenia tonubenajunua Dioso pitabarata peyaiyataexae. Bajarapaancianovi Dioso pijatronojavabelia topenelia pijacoronanë. Bajarapaancianovi Diosojavabelia jumai tsanubenaе:

¹¹ Patajatuxanenëmë, patajaDiosonëmë. Xanepana itsamonaejavabelia patacavajunupaebaponaеjava nivenivenaecotia pexinaejava. “Diosomë, bitso ayaijamatabëcuenenëmë,” pacajai tsaponaetsinua. Xanepanua patajumaitsaponaеjava: “Dioso cajena bitso piasaënë,” patajaitsaponaеjava. Tsipaji baja daxitacuene nexanaenë. Nejetsipacuena daxitacuene exanama. Mapamatacabijavaberena ata abaxë tsiteca daxitacuene nexanaejava nexanaecujinae. Bajarapacuenia abaxë tsiteca daxitacuene nexanaejava xamë nejamatabëcueneta, jai tsanubenaе ancianovi Diosojavabelia.

5

Pacuenia Juan athëbëtsia cobetaeyeta Dioso pequionaecuyalatoxuto pecobenaecaejava yabara pelivaisi

¹ Athëbëtsia taeyetajë Dioso. Tronota eca. Pequionaecuyalatoxuto cobenaeca pecujanenia. Bajarapacuyalatoxuto peboxoverena, pejumavelia ata, xaina pitane. Bajarapacuyalatoxuto siete pasellotabeje upicatsanaruba. ² Nexata taenutajë bitso piasaëangelnë. Bajarapaangelnë pinijijumeta jumaitsi mapacueniaje:

—jJipatsa nexata jamatabëcuenecaëjëpatsi Dioso petocopatsinexatsi pesaracaenexa sell-ovënëjavaxi, bajarapacuyalatoxuto piupicatsanarubiseloxi? jai.

³ Itsiata baitsi jane ajibi pejamatabëcuenecaëjëpaejivitsi bajarapacuyalatoxuto piupicatsanarubiseloxi pesaracaenexa. Athëbëpjiivi ata, mapanacuapijivi ataje, petëpaevimi ata, apo jamatabëcuenecaëjëpaetsi cajena. Nexata itsajivi ata Dioso apo tocopatsi pesaracaenexa bajarapacuyalatoxuto piupicatsanarubiseloxi bëpënëa paitane rubena petaenexa. ⁴ Nexata xanë bajaraxua itsa taniji, bitso cajena nuajë. Bitso nuajë tsipaji baja ajibi pejamatabëcuenecaëjëpaejivitsi bajarapacuyalatoxuto pequionaеjava pebaxuisinaenexa pelebinae. ⁵ Nexata itsanë ancianoviyajuvënënë nejumaitsi:

—Pëtsa baja nuame. Caenë raja jamatabëcuenecaëjëpatsi bajarapacuyalatoxuto pequionaеjava pebaxuisinaenexa. Bajaraponë Judápijinë pemomoxiyajuvënënë. Piasaënë bitso. Nexata bajaraponë yabara itsamonae jumai tsabiabi: “León,” jai tsabiabi. Bajaraponë nacuaejetsinëmi Davidpijinë pemomoxiyajuvënënë. Bajaraponë jamatabëcueneamoneyaba baja dovathi. Nexata bajaraponë jamatabëcuenecaëjëpatsi pesaracaenexa bajarapacuyalatoxuto piupicatsanarubiseloxi, nejai ancianoviyajuvënënë Jesucristo yabara.

⁶ Nexata jane baja taenutajë Corderonë. Nuca veinticuatro ponëbeje ancianovi pitabarata. Nucanua trono pitabarata. Nucanua pamonaе cuatro ponëbeje piatiothiavi pitabarata. Cordero nayapëtane pebeyaxuabinëmitsicuene. Tsipaji cruzajavabelia pecobematabiabarutsivajënëmitsi ruca pecobeta. Corderonë xaina siete pamataetobeje, siete pijinia paitaxutobeje. Xuanë, siete paitaxutobeje, mapajamatabëcuenelivaisi xainaje. Siete rajaba pijinia paespiritubeje, Dioso pijaespirituanë. Bjarapasiete paespiritubeje Dioso baja itoroba daxitanacuanëjava. ⁷ Nexata jane baja Dioso, ponë eca tronota, ponë pequionaecuyalatoxuto cobenaeca pecujanenia. Corderonë cujitalalia. Corderonë jane baja vecuapita bajarapacuyalatoxuto. ⁸ Corderonë baja itsa pita bajarapacuyalatoxuto, nexata pamonaе cuatro ponëbeje piatiothiavi, Corderonë pitabarata pematabacabëta tonubenajunua. Bajara pijinia pacuenia pamonaе veinticuatro ponëbeje ancianovi, Corderonë pitabarata pematabacabëta tonubenajunua. Caeanciano canacujitsia saicaya xainapona pijaarpa. Bajarapaancianovi capona orota pexanaecopanë. Bajarapacopanë vënëca petuxujuvijava. Bajarapatuxujuvijava xaina mapajamatabëcuenelivaisije. Dioso pijajivi pevajëtaponaеjavami Diosojavabelia, Dioso tane bajarabepitsituxujuvijava. ⁹ Nexata pamonaе cuatro ponëbeje piatiothiavi, pamonaе pijinia veinticuatro ponëbeje ancianovi, daxita bajarapamonaе, naxëana Corderojavabelia mapapejanavajije. Penaxëanaejavata vajita jumaitsi Corderojavabelia mapacueniaje:

Cajamatabëcuenecaëjēpa rabaja Dioso pecatocopsixae nepitsinexa mapacuyalotobaxutoje. Nexata baja cajamatabëcuenecaëjēpanua bajarapacuyalotobaxuto piupicatsanarubiselloxi ata nesaracaenexa. Bajarapacuenia cajamatabëcuenecaëjēpa baja tsipaji baja cabeyaxuaba pataneneconimatamotsinexamē. Nexata padaxitavirijamevi atanē, padaxitanacuanēpijivi atanēna, nijanata baja panecomuatame Diosonexa. ¹⁰ Paneexanamenua baja Dioso papijajivinē itsamatacabi Dioso patanebarēevetsinexa daxitacuene. Paneexanamenua baja pasacerdotevinē jivi patatocuaicuaijajitsabiabivinexa Diosojavabelia. Paneexanamenua baja nacuanē pataevetsivinexa,

jai ancianovi Corderonējavabelia penaxēanaejavata mapapejanavajije.

¹¹ Trono matatoyorotsia nubena cuatro ponēbeje piaitothiavi. Nexata piaitothiavi pepēnēvelia matatoyorotsia nubena ancianovi. Bajaraxuacujinae jane baja ancianovi matatoyorotsia nubenatsi āngelevi. Angelevi bitso ayaibitsaēto, millones paāngelbeje nubena. Nexata bajarapaāngelvi pecuaicuaijajava jumetaniji. ¹² Angelevi ayaijumeta jumaitsi mapacueniaje:

Corderonē, ponē picani beyaxuabatsi, bitso ayaijamatabëcuenenē. Bajaraxuata Dioso tocopatsi pevetsinexa daxitacuene mapanacuataje. Tocopatatsinua daxitacuene pexainaenexa. Tocopatatsinua daxitacuene pepapētaenexa. Tocopatatsinua pinijisaē pexainaenexa. Tocopatatsinua itsamonaē pejumaitsinexatsi: “Xamē bitso ayaijamatabëcuenenēmē,” pejainexatsi. Tocopatatsinua pevajunupaebinxatsi penivenivenaecotia pexainaējava. Tocopatatsinua daxita pamonaē jume-covēnētatsi, pexaniajamatabëcuene perajutsinexatsi bajaraponējavabelia. Bajarapacuenia tocopatsi tsipaji ayaijamatabëcuenenē bitso,

jai tsanubenaē mapacueniaje āngelevi Jesús yabara.

¹³ Jumetanijinua icatsia daxita Dioso pexanaēvi pecuaicuaijajava. Athēbēpijivi cuaicuaijai. Mapanacuapijivi ata cuaicuaijai. Petēpaevimi ata cuaicuaijai. Manuamenianēpijivi ata cuaicuaijai. Nexata daxita bajarapamonae Diosobeje Jesúsbeje yabara jumaitsi mapacueniaje:

Diosomē, tronota neecaenē. Xamē pijinia Corderonēmē. Paxamēbejejavabelia pexaniajamatabëcuene pacarajutatsi. Paxamēbeje bitso ayaijamatabëcuene panexainaenēbeje. Panenivenivenaecotiabeje paxainamebeje. Nexata panenivenivenaecotiabeje panexainaējavabeje itsamonaējavabelia pacavajunupaebaponatsi. Pinijisaē bitso panexainaenēbeje. Bajarapajamatabëcuene panejamatabëcuenetsitecaenēbeje daxita matabijavabelianexa,

jai daxita Dioso pexanaēvi Diosobeje Jesúsbeje yabara.

¹⁴ Pamonaē pijinia cuatro ponēbeje piaitothiavi jumaitsi tsaponae mapacueniaje:

—¡Bajara itsi tsane! jai bajarapamonae.

Nexata pamonaē veinticuatro ponēbeje ancianovi, pematabacabēta tonubenajunua Dioso pitabarata. Pexaniajamatabëcuene rajutanubena Diosojavabelia, daxitamatacabi-javabelianexa peponaponaenējavabelia.

6

Siete pasellobeje yabara pelivaisi

¹ Corderonē taenutajē. Penamataxinaesello sarananua. Nexata pamonaē cuatro ponēbeje piaitothiaviyajuvēnēnē, caenē pecuaicuaijajava ayaijumeta, jumetaniji. Pecuaicuaijajava, beyamaxējume najumeta. Nexata jumetaniji: “¡Naxantsial!” pejaijava caballojumata peponaenējavabelia.

² Nexata bajaraxuacujinae icatsia taniji perenajava penioponaecaballota peyanajetarucaenē. Caballojumata peecaenē, cobenaeca bitsabi. Rajutatsi corona penamataxatatsinexa. Bajaraxuacujinae pona pijavajabitsaē pebarēnabenexa. Nexata pijavajabitsaē cueneamoneyabanajetaruca pepacuene ēpecopiarucaeya exanaējavabelianexa.

³ Bajaraxuacujinae icatsia Corderonē sarananua itsasello, pecotocaevijava. Nexata pamonaē cuatro ponēbeje piaitothiaviyajuvēnēnē, icatsia itsanē: “¡Naxantsial!” pejaijava, jumetaniji.

⁴ Nexata bajaraxuacujinae icatsia taniji perenajava petsobiacaballota peyanajetarucaenē. Caballojumata peecaenē, piapiaespada rajutatsi. Tocopatatsi pecopiarucaeyaexanaenexa mapanacuata jivi xaniavaetsia pejinavanapaecuenemi. Jivi jane baja namataenetsia nabeyaexanaejitsia daxita nacuanējava.

⁵ Bajaraxuacujinae icatsia Corderonē sarananua itsasello, acueyabijava. Nexata pamonaē cuatro ponēbeje piaitothiaviyajuvēnēnē, acueyabinē icatsia: “¡Naxantsial!” pejaijava, jumetaniji.

Nexata bajaraxuacujinae icatsia taniji perenajava petsaebiacaballota peyanajetaruaenē. Caballojumata peecaenē, cobenaeca pepesabaponaejava. ⁶ Icatsia jumetaniji pamonaē cuatro ponēbeje piaitothiavijavata pejumaitisijava mapacueniaje: “Janibomatacabixae, caedenariota pecomuatsinexa caējēpa saya caekilo trigoxu. Itsa pijinia cebadaxu, caējēpa saya acueyabi pakilobeje. Nexata caedenariota pecomuatsinexa aceitera, itsa jume, vinora, apo caējēpae. Tsipaji bajaraparanē bitso namatamota,” pejaijava, jumetaniji.

⁷ Bajaraxuacujinae icatsia Corderonē sarananuca itsasello, cuatrojava. Nexata pamonaē cuatro ponēbeje piaitothiavi, pecopiarucaenē jane baja: “¡Naxanitsial!” pejaijava, jumetaniji.

⁸ Nexata bajaraxuacujinae icatsia taniji perenajava pevayanaecaballota peyanajetaruaenē. Caballojumata peecaenē, pevēnē Jivi Petēpaeyaexanaponaenē. Itsanē pēnaponatsi. Bajaraponē pijinia ponē pevēnē Infiernonē. Bajaraponēbeje Dioso tocopatsianatsibeje jivi ayaibitsaēto pebeponaenexabeje. Pitsibitsaētovajēto beponaenabeje, bajarapitsibitsaētovajēto matatoxenetsia nacopatsiana mapanacuataje. Daxita mapanacuajavaje bajarapacuenia exanaponaenabeje. Bajaraponēbeje pejamatabēcueneta beyaexanaponaenabeje jivi vajabitsaēcuenia, janibocuenia ata, piavitanecuenia ata. Unupijinēanē piayainēanē pitsapaena. Nexata bajarapapiayainēanē jivi beponaenatsi. Bajarapacuenia itsi tsane mapanacuataje pamatacabi Dioso jivi nananeconitsiaexanaena pibisiacuene pexanaeneconi yabara.

⁹ Bajaraxuacujinae icatsia Corderonē sarananuca itsasello, cincojava. Nexata daxita pamonaemi bajayata beyejebatsi Dioso pejumelivaisi yabara, taeyejebajē pebobenaejava altarjavabēxēpanata. Bajarapamonaemi bajayata beyejebatsi apo pecopatsixae Dioso pejumelivaisi jivi petsipaebaponaejava. ¹⁰ Daxita pamonaemi bajayata beyejebatsi, Diosojavabelia pinijijumeta jumai tsanubenaē:

–Diosomē, pepo pexaniajamatabēcuenenēmē. Pacuenia najumecapanepaeya jumaitsimē, bajarapacuenia exanabiabame. ¿Detsa pamatacabibeje abaxē saica nenaneconitsiaexanaenexa mapanacuata pejinavanapaevije, pamonaē panebeyejeba? jai tsanubenaē altarjavabēxēpanata pebobenaevi.

¹¹ Nexata jane baja bajarapamonaē Dioso rajutatsi penioponaenaxatabijavanē. Abaxē Dioso itorobatsi bajarapamonaē penacueraevetanubenaenexa. Tsipaji abaxē saica itsamonaē Dioso pijajivi, Jesucristo ata petonacuenebivi, pebeyejebinxatsi. Bajaraxuata bajarapamonaē abaxē nacueraevetsiaexanejebatsi Dioso.

¹² Bajaraxuacujinae icatsia Corderonē sarananuca itsasello, seisjava. Nexata icatsia taniji bitso ira penajēabijava. Matacabipijijuumeto bitso itaxutotsaebia. Pacuenia meravi bitso itsa aitaquiri, bitso batsaebia, bajara itaxutoitsi. Meravipijijuumeto pijinia bitso itaxutotsobia. Pacuenia pijana batsobia, bajara itaxutoitsi. ¹³ Nexata tulupu irabet-sica othopaica. Pacuenia naejavacuai baothopaica, naejava ita najēaba pinijijovibota, bajarapacuenia othopaica tulupu. ¹⁴ Pacuenia cuyalato baquiona, bajarapacuenia quiona daxita itaboxomi. Ajibi baja nexata itaboxo. Daxita petsutonēmi, petunaetonēmi ata, najēaba. ¹⁵ Nexata daxita mapanacuanējavaje jivi pevetsivi, namatayaba ibovajuanējava. Namatayaba ibotoxanonē tuatuajējava ata. Daxita ayajamatabēcuenenēanē, bitso riconēanē ata, namatayaba. Vajabitsaē penamatacaitorobinēanē ata, piasaēnēanē ata, namatayaba. Dajubicuenia pecanajetsivitsi ata itsamonaejavabelia amoneya petonacuenebavanapaenexa, namatayaba. Apo pecanajetsivitsi ata itsamonaejavabelia amoneya petonacuenebavanapaenexa, namatayaba. Bajarapacuenia daxita namatayaba. ¹⁶ Nexata penamatayabivi jumaitis ibotsutonējavabelia, ibotoxanonējavabelia ata:

–Panetsimataothopare. Dioso, ponē eca tronota, bajaraponēvecua panematatatsianame. Pinijicuenia raeta panenaneconitsiaexanaena Corderonē. Bajaraxuavecua panematatatsianame, jai picani pamonaē penamatayabivi.

¹⁷ Tocopiapatatsi jane baja pinijicuenia Dioso penaneconitsiaexanaematacabitsi. It-sajivi ata cajena apo caējēpaetsi pevecuapanepaenexa Dioso penaneconitsiaexanaecuenetsi.

7

Pacuenia Juan tane athēbētatsia pacuenia itsamatacabi itapaitanerubijitsiatsi Israel nacuapijivi Dioso pijajivixae yabara pelivaisi

¹ Icatsia taniji cuatro ponēbeje ángelevi. Bajarapaángelevi nacua matatoyorotsia nubena. Caenē canacujitsia ángelevi caranatanubena jovibo. Irajava jovibo peponaeyaniva, caranatanubena. Manuamene atavecua caranatanubena. Caenae ata naejava penajēabiyaniva jovibota, caranatanubena ángelevi. ² Tanijinua icatsia itsaángelnē penajetaruaenē orientejavavetsina. Bajarapaángelnē caponapona piasaēnē Dioso pijasello. Bajarapasellota Dioso pijajivi pitapaitanerubaponaenexa. Bajarapaángelnē vavajai ayaijumeta cuatro paángelnēbejevavabelia. Pamonaē cuatro ponēbeje, ángelevi, Dioso tocopatsi

pebijianaenexa ira, manuamene ata. Nexata orientejavavetsina paángelnë najetaruca, cuatro paángelnëbejejavabelia jumaitsi mapacueniaje:

³—Dioso pijajivi yajava peitsacueneyaniva, pëtsa abaxë pabijianame ira, naejavanë ata, manuamene ata. Matapania baja Dioso pijajivi Dioso pijasellota vaxaitsi itapaitanerubianatsi, bajara jane pabijianaenename, jai ángelnë orientejavavetsina penajetarucaenë.

⁴Bajaraxuacujinae jumetaniji jivi ayaibitsaëtoxanetonë Dioso pijasellota pitapaitanerubijavatsi. Ciento cuarenta y cuatro mil pina pajivibeje itapaitanerubatsi Dioso pijasellota. Pamonae itapaitanerubatsi Dioso pijasellota, daxita bajarapamonae Israelpijinëmi pexi doce ponëmibeje pemomoxiyajuvënëvi. ⁵Nexata Dioso pijasellota itapaitanerubatsi doce mil pajivibeje, Judápijinëmi pemomoxiyajuvënëvi. Doce mil pijinia pajivibeje, Rubépijinëmi pemomoxiyajuvënëvi. Doce mil pijinia pajivibeje, Gadpijinëmi pemomoxiyajuvënëvi. ⁶Doce mil pijinia pajivibeje, Aserpijinëmi pemomoxiyajuvënëvi. Doce mil pijinia pajivibeje, Neftalípijinëmi pemomoxiyajuvënëvi. Doce mil pijinia pajivibeje, Manasépijinëmi pemomoxiyajuvënëvi. ⁷Doce mil pijinia pajivibeje, Simeónpijinëmi pemomoxiyajuvënëvi. Doce mil pijinia pajivibeje, Levípijinëmi pemomoxiyajuvënëvi. Doce mil pijinia pajivibeje, Isacarpijinëmi pemomoxiyajuvënëvi. ⁸Doce mil pijinia pajivibeje, Zabulónpijinëmi pemomoxiyajuvënëvi. Doce mil pijinia pajivibeje, Josépijinëmi pemomoxiyajuvënëvi. Doce mil pijinia pajivibeje, Benjamínpijinëmi pemomoxiyajuvënëvi. Nexata bajarapacuenia caejavata Dioso pijasellota itapaitanerubatsi ciento cuarenta y cuatro mil pajivibeje, Israelpijinëmi pexi doce ponëmibeje pemomoxiyajuvënëvi.

Pacuenia Juan athëbëtsatsi tane jivi ayaibitsaëtoxanetonë, penioponaejavanë penaxatabivi, yabara pelivaisi

⁹Icitsia taniji jivi ayaibitsaëtoxanetonë. Bajarapamonae daxitanacuanëpijiviyajuvënëvi, daxitaviriájumeyajuvënëvi. Bajarapamonae nubena Dioso peecaetrono pitabarata, Corderonë ata pitabarata. Jivi cajena ayaibitsaëtoxanetonë bitso. Itsajivi ata cajena apo cajëpëpaetsi penamatajëtsiscapanepaenexa bajarapajivibitsaëtoxanetonë. Daxita bajarapamonae ëpenioponaejavanë penaxatabivi. Cobenanubena benaxarebobaxutonë. ¹⁰Daxita bajarapajivibitsaëtoxanetonë vavajai tsanubenaë ayaijumeta. Jumaitsi tsanubenaë mapacueniaje:

VajaDioso, ponë Corderonë yajavaeca tronota, bajaraponë nacacapanepa pibisiacuene vajaxanaeconimivecua. Bajarapacuenia nacacapanepa Corderonë pejamatabëcueneta,

jai tsanubenaë bajarapajivibitsaëtoxanetonë.

¹¹Trono matatoyorotsia nubena cuatro ponëbeje piatiothiavi. Nexata piatiothiavi pepëñevelia matatoyorotsia nubena ancianovi. Bajaraxuacujinae jane baja ancianovi matatoyorotsia nubenatsi ángelevi. Daxita ángelevi ira taenubenaeya bobena irata Dioso peecaetrono pitabarata. Bobenaeya pexaniajamatabëcuene rajutanubena Diosojavabelia. ¹²Bajarapaángelevi ira taenubenaeya jumai tsanubenaë mapacueniaje:

¡Bajara itsi tsane! PatajaDiosomë, pexaniajamatabëcuene pacarajutabiabianatsi daxitamatacabijavabelianexa. Nenivenivenacotia nexainaejava, daxitacuene neyapëtaenëcuene ata, pacavajunupaebaponaenatsi daxitajivijavabelia. Daxitajivi casivajamatabëcuenebarëya tsabiabi tsanë itsa yavenonabiabianame bajarapamonae. Daxitajivi cayaiyataeyabiabiana. Bitso cajena niasaenë daxitamatacabijavabelianexa. Cajamatabëcuenecajëpëpa nexanaenexa daxitacuene ata daxitamatacabijavabelianexa. Bajara itsi tsane, jai tsanubenaë irataeya daxita bajarapaángelevi Diosojavabelia.

¹³Nexata itsanë ancianonë nejumaitsi:

—¿Detsa mapamonae penioponaejava penaxatabivije? ¿Detsa verena pata bajarapamonae? nejai ancianonë.

¹⁴Xanë nexata jumaitsinë:

—Xamë raeta jane yapëtaneme, janë ancianonëjavabelia.

Nexata ancianonë nejumaitsi:

—Mara pamonaeje nacua pecopiarucaevajënaeya, piayaijunavixaneto pecanicabanubenaevimije. Corderonë pesivatëpaexaetsi, bajarapamonae pibisiacuene pexanaeconimi vecuaajibiaexanatsi baja. Bajaraxuata penioponaejavanë naxataba. ¹⁵Bajaraxuata baja bajarapamonae nubena Dioso peecaetrono pitabarata. Copatsinejeva Dioso petonacuenebijaeva, tonacuenebavanapa Dioso pijatemplotota. Dioso, ponë eca tronota, bajaraponë evetsianatsi peyajavajinavanapaexae. ¹⁶Bajarapamonae baja apo namatavenonaë tsane pexaejava. Apo namatavenonaë tsane mera ata. Icotia ata apo tsajavi tsanetsi. Icotia piatajajava ata apo jamatabëitonotsi tsanetsi. ¹⁷Bajara itsane tsipaji Corderonë, ponë nuca trono pitabarata, evetsianatsi bajarapamonae. Evetsianatsi

xaniavaetsia. Pacuenia pijaoveja pevetsinē xaniavaetsia baeveta pijaoveja, bajarapacuenia evetsianatsi. Bajaraponē matacaponabiabianatsi itsabelia rubena iravetsina pepit-saparubenaemeranē, jivi piaitavayaexanaemeranējavabelia. Daxita bajarapamonae Dioso pijanacuataatsia jamatabēcuenebarēya tsavanapae tsane. Tsipaji ajibi tsane peyabaranuejavanexa, nejai ancianonē mapacueniaje.

8

Sietejava sello yabara pelivaisi

¹Icatsia Corderonē sarananuca cuyalatobaxuto piupicatsatarutsisello, sietejava. Nexata jane baja athēbētatsia ajumejibi. Bajayaepatovajēto ajumejibi. ²Bajaraxuacujinae icatsia taniji siete ponēbeje āngelevi. Dioso pitabarata nubena. Nexata bajarapaāngelevi rajutatsi siete patrompetabeje. ³Icatsia xuacujinae itsanē āngelnē najetaruca. Cobenanajetaruca orota pexanaevaxi. Bajarapavaxita pecaponae nexa pitatsajaviitairē. Nexata nucojopa altarvēnējava pitabarata. Nexata jane baja rajutatsi ayajava petuxujuvijava. Nexata bajarapatuxujuvijava Dioso tane daxita Dioso pijajivi pevajētaponaejumemi Diosojavabelia bepematajērēabijava. Nexata bajarapatuxujuvijava āngelnē buata altarjumata. Bajarapaaltar, orota pexanaealtar, nuca Dioso peecaetrono pitabarata. ⁴Nexata jane baja bajarapatuxujuvijavami āngelnē tajuita. Nexata petsēxē athēbēabetsia junaya. Patsēxē athēbēabetsia junaya altarjavavetsia, āngelnē pecobejavavetsia junaya Diosojavabetsia. Bajarapatsēxē yajavajunaya Dioso pijajivi pevajētaponaejumemi Diosojavabelia. ⁵Bajaraxuacujinae āngelnē altarjumavecuca nota pitatsajaviitairē. Bajarapaitatsajaviitairē vēnēta pijavaxi. Bajaraxuacujinae āngelnē bajarapaitatsajaviitairē bajarapavaxi ēnētuaajēvecua othotajarabareca irabereca. Nexata yamaxē iratareca najumeta. Yamaxē binebinejai iratareca. Iranē jane baja ayacuena najēaba.

Siete patrompetabeje yabara pelivaisi

⁶Siete paāngelbeje canaveretanubena pijatrompetanē piobinexa.

⁷Nexata jane baja penamataxainaeāngelnē oba pijatrompeta. Nexata bitso pecainejebimatarejetonē othopareca irabereca. Bajara pacainejebimatarejetonē matajērēaba isoto. Matajērēabanua pijana yajava. Nexata jane baja ira tajuepona daxita nacuanējava. Panacuanējava ira tajuepona, pairavajēto tajuepona matatoxenetsia itsiata yajuvēnēnacopatana. Daxitaira apo veriajavaponae. Nexata panacuanējava ira tajuepona, daxita naejavanēmi, pejuvujavanēmi ata, yajavatajuepona.

⁸Bajaraxuacujinae icatsia pecotocaeviāngelnē oba pijatrompeta. Taniji bepinijitsutoxaneto petajueyecaējava. Bajaraxua jopareca manuameniareca. Manuamenemi nexata pijana. Pamenevajēto ēpijanamene tsarucae, bajarapamenevajēto matatoxenetsia itsiata pijananejeva yajuvēnēnacopata. ⁹Pamanuamene ēpijanamene tsarucae, bajara pamanuamenepijidujauimi tēpa baja. Pamanuamene pijinia pijananejeva nacopata, bajara pamanuamenepijidujuai apo tēpae. Pamanuamene ēpijanamene tsarucae, bajarapamanuameneta perubenaebarcoxanetonēmi ata napaneta. Pamanuamene pijinia pijananejeva nacopata, bajarapamanuameneta perubenaebarcoxanetonē apo napanetsi.

¹⁰Bajaraxuacujinae icatsia acueyabiāngelnē oba pijatrompeta. Nexata pinijituluputoxaneto jopareca irabereca. Bajarapatuluputoxaneto tajuerucaponareca. Pacuenia bepinijisotocotiaxaneto bacotia itsi, bajaracotia itsi tsarunaereca. Panacuata jopa bajarapatuluputo, bajarapanacuata daxita perubenaemenianēmi, bijiana baja. Iravetsina mera pepitsaparubenaejavanēmi ata, bijiana baja. Nexata baja abeje daxita bajarapameranēmi. Panacuata apo jopae bajarapatuluputo, bajarapanacuata perubenaemenianē, apo bijiana. Nexata xanepana daxita bajarapameranē. Mera iravetsina pepitsaparubenaejavanējava ata, xanepanarubena. ¹¹Bajarapatuluputo pevēnē Ajenjo. Pamerajavareca jopareca bajarapatuluputo, bajarapamera atsaxa baja. Jivi ayaiBITSaētōxanetonē tēpa penatsiapaexae bajarapamera.

¹²Bajaraxuacujinae icatsia cuatroāngelnē oba pijatrompeta. Nexata jane baja itaxutobijiana matcabipijijuumeto. Itaxutobijiana meravipijijuumeto ata. Itaxutobijiana tuluputonē ata. Nexata matcabipijijuumeto bijiaya naitayota. Meravipijijuumeto ata bijiaya naitayota.

¹³Bajaraxuacujinae icatsia taniji itsanē āngelnē pepunanajetarucaenē. Pepunanajetarucaenē āngelnē jumai tsanajetarucaē ayajumeta:

—¡Toabejetsi baja tsaponae tsane mapanacuapijivije itsa obiana trompeta acueyabi paāngelnēbeje penacopabivi! Jai tsanajetarucaē āngelnē pepunanajetarucaenē.

9

¹ Bajaraxuacujinae icatsia cincoángelnē oba pijatrompeta. Nexata taniji athēbēvereca ángelnē perunaejavareca irabereca. Nexata bajarapaángelnē Dioso rajutatsi llave, iravetsina pepitsapaeméthēxaneto pijallave. ² Nexata jane baja bajarapallaveta ángelnē méthēxaneto vēpacasarana. Ángelnē jane baja vēpata méthēxaneto. Nexata bajarapaméthēxanetojavatsina pitsapaina étsēxēxaneto. Pitsitsēxēxaneto bapitsapa pinijipabixaneto itsa tajuita, bajarapitsitsēxēxaneto pitsapaina bajarapaméthēxanetojavatsina. Nexata bajarapatsēxēta matacabipijijuumetomi itaxutoaitaquiriayaexana. Itaboxo ata aitaquiriayaexana. ³ Bajarapatsēxējavaverena pitsapa bosome. Bajarapabose daxitanacuanējava punanajetarubena. Bajarapabose caējēpaeyaxanatsi jivi pecacuatsinexa pebosotota. Pacuenia aqueto cacuata pebosotota, bajarapacuenia jivi pecacuataponaenexa. ⁴ Bajarapabose apo itorobitsi pebijianaenexa itsacunejáva ata xua pejuvijava. Nexata bajarapabose apo bijianaponae pona. Apo bijianaponae naejavanē ata. Tsipaji itorobatsi pecacuatsinexa saya ējivi. Nexata pamonae Dioso pijasellota apo itapaitanerutsitsi, bajarapamonae pecacuatsinexa. ⁵ Itsiata baitsi jane apo tocopatsitsi caeuenia pebeyaxuabaponaenexa. Tocopatatsi saya jivi itsa cacuata, penavixaetaeyaxanaenexa cinco pajuametoheje. Nexata bajarapabose jivi itsa cacuatsianatsi, bitso jivi navixaetaena. Pavixaevajēto aqueto itsa cacuata, baatane, bajarapavixaevajēto jivi navixaetaena. ⁶ Nexata pamonae cacuatsianatsi bajarapabose, jitsipaena picani petēpaenexa bajayajebi penavixaetaeyaniva. Itsiata baitsi jane bajarapamonae Dioso abaxē apo tocopatsi tsane petēpaenexa. Penabeyaxuabinexa ata, Dioso apo tocopatsi tsane.

⁷ Bajarapabose ajumabocotaja. Pacuenia vajabitsaē itsa nabejitsia, pijacaballo bajumaxataba hierropananē pijavajabitsaē petojororonaeyanivatsi, bajara itsanubena bajarapabose. Beorota pexanaecoronanē namataxatabanubena. Pacuenia pebi itabaraitsi, bajaraitabaraitsi. ⁸ Pematana xaina. Pacuenia petriva matanaitsi, bajara matanaitsi. Pevonotonē pijinia benevēthēvonotonē. ⁹ Bajarapamonae pejumabocotonē yajavanaexana baja cajena behierrojumabocotonē pejorororonaeyanivatsi itsajivi ata. Pecorofe najumeta. Pacuenia vajabitsaē penabenexa itsa pona pijavajabitsaējavabelia, caballo itsa roboboca carrozavēnēmonē banajumeta, bajarapacuenia najumeta bosome pecorofe. ¹⁰ Bajarapabose pebosotonēcopiata xaina peetonē jivi pecacuatsinexa. Pacuenia aqueto pebosotocopiata xaina peeto, bajnia benevēthēvonotara itsi. Tocopatatsi peetota pecacuatsinexa jivi, jivi penavixaetaenexa cinco pajuametoheje. ¹¹ Bosome cajena xaina ángelnē pitorobinēxatsi, pinijiméthēxaneto pevetsinē. Bajarapaángelnē hebreojumeta pevēnē Abadón. Griegojumeta pijinia Apolión, “Peverebiabinē,” pejaijume.

¹² Bajarapapiayaicue ne namataxainaejava. Itsiata baitsi jane abaxē saica anijajavabeje.

¹³ Bajaraxuacujinae icatsia seisángelnē oba pijatrompeta. Paaltar nuca Dioso pitabarata, bajarapaaltarjavaverena penajumetsijava, ayaijume, jumetaniji. Bajarapaaltar orota pexanaealtar. Bajarapaaltar cuatro pamataetobeje xaina. Caepi canacujitsia materalcapona. Bajarapamataetonē tuatujéta jume pitsapa. ¹⁴ Bajarapaaltarjavaverena jumaitsi seisángelnē trompeta pexainaenējavabelia mapacueniaje:

—Isicare cuatro ponēbeje ángelevi, pamonae cēbejebatsi pinijimenejavata, Eufratesvēnē menejavata, jai bajarapaaltarjavaverena.

¹⁵ Nexata jane baja pecēbejebiángelevimitsi isicatsi. Isicatsi bajarapaángelevi pebenexa jivi. Bajarapaángelevi jivi ayaibitsaētonē beponaejitsia daxitanacuanējava. Bajara saya cajena ēxuanexa, paángelevi Dioso jamatabēcueta pexainaenējavabelia mapacueniaje:

—Isicare cuatro ponēbeje ángelevi, pamonae eenevetanubena Dioso pitorobinexatsi jivi pebeponaenexa paepatota tocajētatsi. ¹⁶ Nexata icatsia jumetaniji bajarapaángelevi pijajivi, vajabitsaēvi, pitorobijava peponaenexa caballota. Doscientos millones ponēbeje vajabitsaēvi pona jivi pebeponaenexa daxitanacuanējava.

¹⁷ Bemajitsinaebota taniji bajarapamonae caballota peponaejava. Vajabitsaēvi namēpabēxataba hierropananē pejorororonaeyanivatsi pijavajabitsaē. Vajabitsaēvi penamēpabēxatabijavanē itabēta acueyabi paviriabejevavata. Itabēta mapaviriabejevavataje. Itabēta petsobijavavata. Itabēta perajenaevavata. Itabēta pevayanaevavata. Bajarapaviriabejevavata itabēta. Pacuenia nevēthēmatabocoto itsi, bajaramataboco itsi bajarapacaballuanē. Pecuibovojotonējavavetsina pitsapa pitarunutsicota, étsēxē yajava, azufre ata yajava. ¹⁸ Xuanē caballuanē pecuibovojotonējavavetsina pitsapa, bajaraxuanē jivi ayaibitsaētoxonetonē yatēpaponae daxitanacuanējava. Pabitsaētovajēto tēpa, bajarapabitsaētovajēto matatoxenetsia nacopata mapanacuataje. ¹⁹ Bajarapacaballuanē caējēpatsi jivi pebeponaenexa pecuibovojotonēta, pebosotonēta ata. Bajarapacaballuanē

pebosotonëupianë bejomomatabocotonë. Pacuenia jomo pematabocotota caëjêpatsi jivi pësininexa pebeyaxuabinexa, bajara itsi bajarapacaballuanë pebosotonëupianë.

²⁰ Itsiata baitsi jane pamonae peyajuvënëtêpaevi, pamonae penacopabivi, bajarapamonae tsiteca pibisiacuene exanavanapa. Apo copatsi dovathivijavabelia penavajêcabiabijava. Apo copatsinua pecobeta jumapecataeya pexanaenëanëjavabelia ata penavajêcabiabijava. Bajaraxuanë saya pexanaenëanë oronanitonëta, platananitonëta, broncejavanëta ata, ibotonëta ata, naejavanëta ata. Nexata bajaraxuanë apo caëjêpaetsi petaenexa. Apo caëjêpaetsi pejumetaenexa ata. Apo caëjêpaetsi peponaenexa ata. ²¹ Pamonae peyajuvënëtêpaevi, pamonae penacopabivi, bajarapamonae apo copatsi jivi pebejaya. Apo copatsi penajorobijava ata. Apo copatsi pevitota pibisiacuene pexanaejava ata. Apo copatsi penacobetoxotsijava ata.

10

Pacuenia Juan tane ángelenë pecobenanucaejava cuyalatobaxutoyo yabara pelivaisi

¹ Icatsia taniji itsaángelnë athëbëvetsica perunaejavatsica. Runaica mapanacuayabet-sicaje. Bajarapaángelnë bitso piasaéángelnë. Itarêrëbo tuatuajëta najetaruca. Natsi-matatsënêrutanaajetaruca aravalibo. Itabaranaitayotanajetaruca. Pacuenia matabicipiji-juameto baitayota, bajarapacuenia itabaranaitayotanajetaruca. Petopabeje pijinia pacue-nia isotocotia tsobia, bajarapacuenia cotiatsobia. ² Cuyalatobaxutoyo baxupatanuca. Pecujanenia pataxu nataxunutanuca manuameneboxovereca. Petsavononia pijinia pataxu nataxunutanuca irajumavereca. ³ Nexata vavajai tsaxuabi ayaijumeta. Pacuenia nevêthë itsa fiaba ayaijume, bajarapacuenia ayaijume. Pevavajaiçujinae siete paya-maxêbeje najumeta athëbëtatsia. ⁴ Yamaxë penajumetsicujinae, yaquinaejitsianë pi-cani pajamatabëcuene yabara yamaxë penajumetsijava neyapêtaeyaexana. Itacarajeta athëbëvetsica tanejumaitsijava, jumetaniji. Nejumaitsi athëbëvetsica mapacueniaje:

–Muetsia saya xainare pajamatabëcuene yabara yamaxë penajumetsijava, cayapêtaeyaexana. Pëtsa yaquiname bajarapalivaisi, nejai athëbëvetsica.

⁵ Bajaraxuacujinae ángelnë, ponë nataxunutanuca manuameneboxovereca, irajumavereca ata, bajaraponë nacobeyotanuca athëbëabetsia pecujanenia pacobe.

⁶ Bajarapaángelnë nacobeyotsiaya jumai tsanuca:

–Dioso, daxitamatabijavabelianexa peponaponaenë, caecuenia exana mapanacuaje, itaboxo yajava. Nexata caecuenia yajavaexana mapanacuapijicueje, itaboxopijicueje ata yajava. Caecuenia yajavaexana manuamene ata, manuamenebijicueje ata yajava. Bajaraponë pitabarata najumecapanepaeya cajumaitsijsiatsi mapacueniaje. Copiapatsi-jitsia rabaja pacuenia Dioso tajëvelia najamatabëxaina pexanaenexa. ⁷ Itsa rabaja paepa-tota siete ángelnë obiana pijatrompeta, bajarapaepatota Dioso jane baja taxuxuabiana pexanaejava pacuenia baja cajena tajëvelia Dioso najamatabëxaina pexanaponaenexa jivi-javabelia. Muetsia pexainabuatsilivaisimi itajëtsiana. Copiapatsiana jane baja pacuenia bajayata Dioso tajëvelia najumecapanepaeya jumaitsi profetavimijavabelia, jai tsanucac nacobeyotsiaya ángelnë.

⁸ Copiaya pajume jumetaniji athëbëvetsica tanejumaitsiyava, bajarapajume icatsia jumetaniji. Nejumaitsi icatsia athëbëvetsica mapacueniaje:

–Ponë ángelnë nataxunutanuca manuameneboxovereca, irajumavereca ata, bajarapa-ángelnë kujiremelia. Vecuapire pacuyalatobaxutoyo bajarapaángelnë baxupatanuca, nejai athëbëvetsica.

⁹ Nexata kujiliajê ángelnë. Vajëtajê nexata tanerajutsinexa bajarapacuyalatobaxutoyo. Bajarapaángelnë nejumaitsi mapacueniaje:

–Ăjã, pire baja. Xaema necuiboxaicaenexa. Pacuenia jabëra xaica, bajara itsi ma-pacuyalatobaxutoyoje. Itsiata baitsi jane necotsorotubereca atsaxa tsane, nejai ángelnë.

¹⁰ Nexata baja ángelnë bajarapacuyalatobaxutoyo vecuapitajê. Xaniji jane baja. Nexata jane baja cuiboxaicajê. Pacuenia jabëra xaica, bajara itsi. Itsiata baitsi jane taquijonicuji-nae tacotsorotubereca atsaxa. ¹¹ Nexata icatsia ángelnë nejumaitsi:

–Tsipaebare pacuenia Dioso sivanajamatabëxaina daxitanacuanëpiviji. Tsipaebare pacuenia Dioso sivanajamatabëxaina caenacua canacujitsia pevetsinëanë ata, nejai ángelnë.

11

Pacuenia itsamatacabi anijanëbeje jivi tsipaebaponaenabeje palivaisi Dioso yapêtaeyaexanaenatsibeje yabara pelivaisi

¹ Icatsia taniji ángelnë. Nerajuta piapianaëbo. Nejumaitsi mapacueniaje:

—Nonotapunare. Caponare mapanaeboje necaējēbinexa Dioso pijatemplobo, necaējēbinexa altarvėnėjaya ata. Namataējėtsianamenua pajivibeje bajarapatemplobota navajėca Diosojavabelia. ² Itsiata pėtsa caējėtame templobopanabo. Tspijai bajarapapanabo tocopata baja Dioso apo pejumecovėnėtsivinexa, pamonaē saicayanacuaverena pepatsivi pejinavanapaenexa. Bajarapamonae jinavanapaena Jerusalėn tomarata cuarenta y dos pajuametoobeje. Saicayanacuaverena pepatsivi, apo yaiyataē tsane judiėvi pijatomara. ³⁻⁴ Bajayata profetanėmi peyaquinaebaxutota, comparaciėncuenia tajėvelia jumaitsi mapacueniaje: “Anijanaebeje, olivonaebeje, anijajavabeje pijinia pitayotancaejavabeje, nubenaena mapanacuapijivi pijatuxanenė Dioso pitabarata,” jai. Bajarapacuenia comparaciėncuenia tajėvelia ita jumaitsi, tajėvelia vajunupaeba anijanėbeje jivi petsipaebanajetarucaejavanexabeje palivaisi Dioso yapėtaeyaxanaenatsibeje. Nexata anijanėbeje Dioso itorobiana jivi petsipaebanajetarucaenexabeje palivaisi Dioso yapėtaeyaxanaenatsibeje. Palivaisi bajaronėbeje Dioso yapėtaeyaxanaenatsibeje, bajarapalivaisi mil doscientos sesenta pamatacabibeje jivi tspaebanajetarucaenabeje. Naxatatsianabeje piayopapaėbėrėjaya. Bajarapacuenia naxatatsianabeje bitso pesivajamatabėcuenėbėjaxaēbeje tsane pamonaē apo peyaiyataēvi Jerusalėntomara, nejai āngelnė.

⁵ Itsajivi ita jamatabėitsacueniabianatsibeje, bajaraponėbeje nayajivitajuitsianabeje pecuibovojotovetsina pepitsapaecotiata, pitarunutsicotiata. ⁶ Bajaraponebanajetarucaenabeje. Naxatatsianabeje piayopapaėbėrėjaya. Bajėbeje caējėpaenatsibeje pitavetsinexabeje ema pejopaeyaniva. Pamatacabibeje jivi tspaebanajetarucaenabeje palivaisi Dioso yapėtaeyaxanaenatsibeje, bajarapamatacabibeje abaxė ema apo jopaeayaxanaebeje tsane. Caējėpaenatsibejenua mera ata pijanara pexanaenexabeje. Caējėpaenatsibejenua daxitaviria piayaicuene pecapitsapaenexabeje pamatacabita jitsipaenabeje. ⁷ Bajaraponėbeje ita veretsianabeje palivaisi Dioso yapėtaeyaxanaenatsibeje jivi petsipaebanajetarucaejavabeje, bitso piayainė pitsapaenina pinijimėthėxanetojavatsina. Bitso piayainė pitsapaenina pebenexatsibeje bajaraponėbeje. Nexata amoneyabianatsibeje. Nexata baja beyaxuabianatsibeje. ⁸ Nexata petėpaenėbeje bocaenabeje Jerusalėn tomaraxaneto callejavata. Bajarapatomarata bajayatami vajatuxanenė ata cobematabiabarutatsi cruzajavabelia. Bajarapatomara yabara jivi itsajavata: “Sodomatomara raja,” jai tsabiabi. Itsajavata: “Egiptotomara raja,” jai tsabiabi. Bajarapacuenia jumai tsabiabi Jerusalėntomara yabara tspijai bajarapatomarapijivi bitso pibisiacuene exana. ⁹ Nexata bajaraponėbeje, Jerusalėntomara callejavata petėpaenėbeje, bocaenabeje acueyabi pamatacabibeje epatua. Tspijai Jerusalėntomara pevetsivi apo tocopatsi tsane itsajivi ata pemėthėtsinexatsibeje bajaraponėbeje. Nexata daxitaviriajumevi, daxitanacuanėpijivi ata, taeyabuatsianatsibeje. ¹⁰ Dioso apo pejumecovėnėtsivi sivajamatabėcuenėbarėyatsibeje tsane petėpanucaejavabeje. Bitso cajena barėya tsane Dioso apo pejumecovėnėtsivi. Nexata pebarėyajamatabėcuenė fiesta exanaena. Namataenetsia narajutsiana amoneya itsacuenėjavanė. Bajarapacuenia exanaena Dioso apo pejumecovėnėtsivi bajaraponėbeje petėpaejavabeje yabara. Tspijai Dioso apo pejumecovėnėtsivi jumaitsi tsane: “Copiaruca rabaja maponėbeje livaisi vajanacatsipaebabiabijavaje. Copiaruca baja vajanacamatatabėtonotabiabijava,” jai tsane. ¹¹ Itsiata baitsi jane petėpaejinaebeje, acueyabi pamatacabibejecujinae itsamatacabi epatua, icatsia Dioso piasaėjumali rajutsianatsibeje. Nexata petėpaejavabejevėcua namatacotsianabeje. Daxita cajena pamonaē taeyabuatsianatsibeje petėpanucaejavabeje, bitso cunavianatsibeje. ¹² Bajaraxuacujinae bajaraponėbeje jumetaenabeje athėbėvetsica pinijijumeta pejumaitsijavatsibeje: “Pajunaiminabeje,” pejaijavatsibeje. Nexata bajaraponėbeje junaeniabeje athėbėabetsia itarėrėbo tuatujėjavabetsia. Daxita pitoyavitsibeje pėtaenubenaenatsibeje. ¹³ Bajara jane paepatota ira najėbiana. Nexata Jerusalėn tomarata, itsajota diez pabobeje najuaenaena, caebo yajuvėnėjopaponaena. Nueve nexata pabobeje nacopataponaena. Nexata Jerusalėn tomarata ayaijaya bo othopaena. Siete mil pijinia pajivibeje bajarapairanajėbata tėpaena. Jerusalėn tomarapijivi, pamonaē nacopabiana, bitso cajena junaviana. Nexata bajarapamonae pecajunavi, Diosojavabelia jumaitsi tsane:

—Diosomė, ayaijamatabėcuenėnėmė bitso, jai tsane pecajunavi Diosojavabelia, athėbėtatsia peecaenėjavabelia.

¹⁴ Anijapiayaicuenebeje rabaja panepaena. Itsiata baitsi jane icatsia itsajava piayaicuenejaya bepijia najetarucaena, acueyabijaya.

Sietenė baja āngelnė pijatrompeta piobijaya yabara pelivaisi

¹⁵ Sietenė jame baja āngelnė oba pijatrompeta. Nexata athėbėvetsica pinijijumeta pejumaitsiyaya, jumetaniji. Jumaitsi mapacueniaje:

Daxitanacuanēpījivi rajane baja vajatuxanenē Cristobeje, Diosobeje, evetaponaponaenabeje. Bajaronēbeje evetaponaponaenabeje daxitamatacabijavabelianexa, pejaijava athēbēvetsica, jumetaniji.

¹⁶ Nexata pamonae veinticuatro ponēbeje ancianovi, pamonae ena pijatronota Dioso pitabarata, daxita bajarapamonae irataeya bobena. ¹⁷ Bajarapamonae ancianovi irataeya jumai tsanubenae Diosojavabelia:

Xamē Diosonēmē, nijamatabēcuenesaēnē daxita mapanacuanē pevetsivivecuaje. Ajena, pamatacabi, ponapona. Bajayata mapanacuae nexanaevajēnaeya ata, ponapona. Daxitamatacabijavabelianexa ata ponapona. Pexaniajamatabēcuenepacarajutatsi. Tspaji baja taxuxuabame pinijisaēta nevetaaponaponaenexa daxita mapanacuanēpijivije. ¹⁸ Daxita mapanacuanēpijivije cabaraanaepana bitso. Bajaraxuata tocopiapatatsi baja nenaneconitsiaexanaenexa daxita bajarapamonae. Tocopiapatatsinua baja petēpaevimi ata nenaneconitsiaexanaenexa. Tocopiapatatsinua baja nijajivi, xuavajēto catonacuenebavanapa, bajarapitsijavavajēto nerajutsinexa pecatonacuenebavanapaematamo. Pamonaecatotsipaebavanapanijumelivaisi itsamonaevabelia, bajarapamonae jane baja rajutsianame xua toxainame bajarapamonae nerajutsinexa. Pamonaeyajamatabēcuenepexainaevi ata, cavēnēlivaisiyaiyatane. Pamonaebvelijamatabēcuenepexainaevi ata, cavēnēlivaisiyaiyatane. Bajarapamonae ata jane baja rajutsianame xua toxainame bajarapamonae nerajutsinexa. Tocopiapatatsinua baja pijinia neverebiabinexa daxita pamonaebijiana mapanacuae, pamonaeta jamatabēcuenebijiana pecajumecovēnētsivi,

jai tsanubenae irataeya ancianovi Diosojavabelia.

¹⁹ Nexata athēbētatsia Dioso pijatemplobo nabaupata. Bajarapatemplobo enētatsia taeyabuatsijē baula. Bajarpabaulaēnēta jeba Dioso pejumelivaisi peyaquinajebijava. Bajarpaitane jumai tsarubenaepacuenia Dioso najumecapanepaeya jumaitsi pijajivi pecapanepaenexa pijaneconivecu. Yamaxē binebinejai. Najumetanua. Ira najēabanua. Bitso pecainejebimatarejetonē irabetsica othopaica pinijicuenia.

12

Pacuenia Juan athēbētatsia tane dragón bitso pianaešanajava yabara pelivaisi

¹ Athēbētatsia ayaiucene naitajēta vajanacayapētaeyaxanaenexa pacuenia itsamatacabi pevajēnaeyabelia itsi tsaponaejitsia mapanacuataje. Athēbētatsia petiriva taenutajē. Petiriva jumanava naitayotanua. Pacuenia matocabipijijuumeto baitayota, bajarapacuenia jumanava naitayotanua. Meravipijijuumetojavavelia nataxunutanua. Namataxatatanua doce patuluputoebe pexinaecorona. ² Bajarpova petiriva penacueto peyocotajinaeva. Pevixanotsijavatatsi bitso yaaēajai. ³ Nexata bajarajotatsia naitajēta playainē, petsobianē, pinijinēxaneto dragón, baitsi dovathi. Xaina siete pamatabocotoebe, diez pamataetobeje. Caematabocoto canacujitsia namataxatatapona corona. ⁴ Bajaronē, dragón, nabosovebabia. Nexata penabosovebabejavata tulupu ayaijava penetsica irabetsica. Xuavajēto tulupu othopaica irabetsica, bajaraxuavajēto matatoxenetsia nacopabarubena athēbētatsia. Bajaronē, dragón, nucojopa penacueto pevixanotsivatsi pitabarata, bajarapova itsa vecuanaexanatsi penacueto, pexoxinaexnatsi picani. ⁵ Nexata jane baja petiriva vecuanaexanatsi pebinēyo. Bajaronēyo caponatsi Diosojavabetsia Dioso pijatronota peecaenexa. Nexata baja bajaraponēyo apo xaetsi dragón. Bajaronē itsamatacabi mapanacuata jivi pepo pevetsinē tsane. Itsa evetsiana, ajumesaēya itorobabiabiana pejumecovēnētsinexatsi. ⁶ Nexata petiriva penacuetonēyo pevēcuaanaxanaecujinaetsi, najetabajirava petusato nacuayabelia, itsabelia Dioso tsivajēnaexaniavaetatsi peponaponaenexa. Bajarajota pexaejava baja Dioso rajutatsi mil doscientos sesenta pamatacabiabeje.

⁷ Bajaraxuacujinae athēbētatsia vajabitsaē exana. Angelevi penamatacatorobinē, Miguelvēnēnē, pijaangelevi yajava, barēnabia dragónjavabelia. Dragón pijinia, pijaangelevi yajava, barēnabia Migueljavabelia. ⁸ Itsiata baitsi jane dragón cujiruamoneyabatsi. Nexata apo tocopatsitsi caenē ata dragón pijajivitonē penacopatsinexa athēbētatsia. ⁹ Dragón cajena ayainēxaneto. Itsiata baitsi jane xuabicatsi athēbēvetsica daxita pijajivi yajava. Nexata bajaraponē pevēnē Dovathi. Itsavēnē Satanás. Bajaronē bajayata itsa naitajēta jivijavabelia, naitajēta bejomocuenia. Bajaronē jivi yamaxēitorobabiaba daxitanacuanējava.

¹⁰ Nexata jumetaniji pinijijumeta athēbēvetsica pejumaitsijava. Jumaitsi mapacueniaje:

—Copiapata rabaja Dioso vajanacapanepaejavanexa vajueneconivecua. Copiapata rabaja Dioso pesaëta jivi pevetaponaponaenexa. Copiapata rabaja Dioso piija-jivi pitorobaponaenexa. Copiapata rabaja Cristo ata pitorobaponaenexa mapanacuajavaje. Bajarapacuenia copiapata baja daxita bajarapacue ne tsipaji baja ponë neconitabi-aba Diosojavabelia Dioso vajanajuajumecovënëtavanapaevi, bajaraponë baja xuabicatsi athëbëvetsica. Baitsi dovathi. Bajaraponë picani Dioso pitabaratsia nuca. Nexta baja bajaraponë daxita matabijebi, daxitameravijebi ata, Diosojavabelia neconitabi-aba Dioso vajanajuajumecovënëtavanapaevi. ¹¹ Dioso vajanajuajumecovënëtavanapaevi pejumecovënëtsixae Cristo pesivatëpaejavatsi cruzata, cueneamoneyabapona dovathi. Bajarapacuenia cueneamoneyabapona tsipaji navajunupaebapona sua itsamonaejavabelia Cristo pecapanepaejavanexatsi pijaneconivecua. Dioso vajanajuacovënëtavanapaevi jamatabëjumai tsabiabi: “Itsa nebeyaxuabiana Dioso pejumelivaisi yabara, jema baja nebeyaxuabiana,” jamatabëjai tsabiabi. ¹² Athëbënacuatatsia panejinavanapaevi, pasivajamatabëcuenebarëyamëre Dioso mapanacuayabetsicaje papecavecuaxuabijavatsica dovathi. Mapanacuataje panejinavanapaevi, bitso cajena bepajiohimë tsane. Paxamë ata, manuameta panejinavanapaevi, bitso cajena bepajiohimë tsane. Bajarapacuenia bitso bepajiohimë tsane tsipaji baja panetuatuajëatsica dovathi xuabicatsi. Nexta baja aeconoxae bitso bajaraponë anaepanapona. Tsipaji baja yapëtane caematacabibeje saya petonacopatsijavatsi pexuabinevatsi infiernojavabelia, pejaijume athëbëvetsica pini-jijumeta, jumetaniji.

¹³ Nextata dragón, ponë dovathi, itsa yapëtane athëbëvetsica pexuabijavatsitsica irabetsica, nexata barajinapona pova vecuanaexanatsi pebinëyo. ¹⁴ Itsiata baitsi jane bajarapova rajutatsi anijacorofetobeje, becotsalacorofetobeje. Bajarapova nexata dragón vecuapuna tajëbelia, petusato nacuayabelia, bajarajotalia peponaponaenexa. Nextata bajarajotalia Dioso rajutabiabatsi pexaejava acueyabi pavaiibeje epatua. ¹⁵ Dragón pecuibovojotuatatsina capitsapa mera, ayaira. Pecuibovojotuatatsina pepitsapaemera naexana pepamene pecaponaenexatsi picani petiriva. ¹⁶ Itsiata baitsi jane petiriva Dioso yavenonatsi. Ira nexata navoconareca ayaijava. Nexata pamerami dragón pecuibovojotuatatsina pitsapaina, bajarapamëthëareca joneca. ¹⁷ Bajaraxuata nexata dragón bitso anaepana petirivajavabelia. Nextata baja icatsia dragón pona petiriva pexi penacopabivi pebeyejebinevatsi. Bajarapamonaevatsi jumecovënëtavanapa Dioso pejumelivaisi pitorobicueniatsi. Bajarapamonaevatsi caasaë tsavanapaenua penavajunupaebijava Jesucristo pejumecovënëtavanapaejava. Nextata bajarapamonaevatsi dragón tsmaxëponatsi pebeyejebinevatsi.

13

Pacuenia piayainëbeje pelivaisi Juan yaquina yabara pelivaisi

¹ Nucajë manuamene tajetabota. Nextata taenucajë manuamenejavatsina pepitsapaejavatsina piayainë. Siete pamatabocotobeje diez pamataetobeje pexainanë. Caemataeto canacujitsia xainapona corona. Caematabocoto canacujitsia Dioso apo pejiitsipaevenëanë itanerubena. ² Ponë piayainë taenucajë pepitsapaejavatsina, benevëthë picani. Itsiata petaxu betsonëtaxu. Pecuibovojoto pijinia benevëthë petsobianëcuibovojoto. Bajaraponë nasaërajutatsi dragón. Pijatrono ata rajutatsi. Jamatabëcuene cajëjpeyaexanatsinua ayaicuenia pitorobinexa daxitajivi mapanacuajavaje. ³ Piayainë caematabocoto matabocovajënëbatsi apo bepeyaasaëvajënënexa itajara. Itsiata baja bajarapavajënë matanacëta. Nextata daxitanacuanëpijivi itsa tane bajaraponë pematavajënënacëtsijava, bitso jamatabëcueneabenajaca. Nextata bajarapamonaevatsi jumecovënëta bajaraponë. ⁴ Dragón tocopatatsi pitorobinexa daxitajivi mapanacuajavaje. Bajaraxuata daxitajivi pematocabëta navajëcabiaba dragónjavabelia. Pematocabëta navajëcabiabanua piayainëjavabelia ata. Bajarapamonaevatsi najumaitsi mapacueniaje:

—Ajibi cajena itsanë ata pejamatabëcuenecajëjpeaenëtsi pacuenia itsi mapapiayainëje. Ajibi cajena itsanë ata pecajëjpeaenëtsi pebarënenabenexa maponëje pecueneamoneyabinevatsi, najai bajarapamonaevatsi piayainë yabara.

⁵ Piayainë tocopatatsinua pibisiacuenia Dioso pebaracuacuajainexa. Tocopatatsinua pejumaitsiabinevatsi: “Xanë cajena bitso ayaijamatabëcueneenë Dioso matatoxenetsia,” pejaiitsabiabinevatsi. Tocopatatsinua pitorobinexa jivi mapanacuajavaje cuarenta y dos pajumetobeje, baitsi acueyabi pavaiibeje epatua. ⁶ Bajaraponë exanapona pacuenia tocopatatsi. Bitso pibisiacuenia Dioso baracuacuajai tsabiabi. Dioso pijatemplobo ata pibisiacuenia baracuacuajai tsabiabi. Athëbëtsia pejinavanapaevi ata pibisiacuenia baracuacuajai tsabiabi. ⁷ Tocopatatsinua vajabitsaë pexanaenexa Dioso pijajivijavabelia. Tocopatatsinua pecueneamoneyabinevatsi vajabitsaë itsa exana Dioso pijajivijavabelia. Tocopatatsinua pitorobinexa daxitavirijumevatsi ata. Tocopatatsinua pitorobinexa daxita

nacuanēpijivi ata. ⁸ Nexata daxita mapanacuapijivije pematabacabēta navajēcabiaba pi-ayainējavabelia. Dioso nacua pexanaevajēnaeya, Dioso nacua pexanaecujinae ata, bajarapamonae apo vēnērubenaē Corderonē pijacuyalatobaxutota. Corderonē jivi rajuta matababi apo peverevereaejava pesivatēpaexae cruzata.

⁹ Itsa pamuxuvojorubename, panatojumetaema mapalivaisije. ¹⁰ Pamonaē Dioso pijajivi naneconitsiaexanaena, nexata penaneconitsivi pejebabiabibojavabelia jebiana, bajarapamonae juya itsamonae naneconitsiaexanaenatsi. Pamonaē pijinia Dioso pijajivi espadata bona, bajarapamonae juya itsamonae bajarapitsiespadata benatsi. Bajaraxuata itsamonae Dioso pijajivi bejiobiaexanabiabi atatsi, xanepana xaniavaetsia penajamatabēcuenecopatsinexa Diosojavabelia epatua copatsinejeva.

¹¹ Bajaraxuacujinae icatsia taenucaē iravetsina pepitsapeajava itsanē piayainē. Anijamataetobeje pexanaenē. Pacuenia oveja pebito mataeitsi, bajara pemataeitsinē. Itsiata baitsi jane pecuaicuaijajava, pacuenia dragón pecuaicuaijajava jumeitsi, bajarajumeitsi. ¹² Papiayainē copiaya pitsapaina manuamenejavatsina, bajaraponē yavajavaponapona. Nexata papiayainē copiaya pitsapaina manuamenejavatsina, nasaērajuta iravetsina papiayainē cotocaevi pitsapainajavabelia. Nexata papiayainē cotocaevi iravetsina pitsapaina, daxita mapanacuapijivi itoroba papiayainē copiaya manuamenejavatsina pitsapainajavabelia pematabacabēta penavajēcāenexa. Baitsi ponē apo bepeyaasaēvajēnēnēxata itajara matavajēnēnacēta baja, bajaraponējavabelia daxita mapanacuapijivije pematabacabēta penavajēcāenexa. ¹³ Nexata papiayainē iravetsina cotocaevi pitsapaina, ayaiucene pexanaejava jivi tsitaexanapona. Pitatsajaviitairē ata athēbēvetsica othopaeyaexana irabetsica daxitajivi petaenubenaevajava. ¹⁴ Bajarapacuenia ayaiucene pexanaejava pexanaponaexae, yamaxēitojoroba mapanacuajava pejinavanapaevi. Bajarapaayaiucene exanapona, papiayainē copiaya manuamenejavatsina pitsapaina, pitabarata. Bajaraxuacujinae, papiayainē cotocaevi iravetsina pitsapaina, itorobapona Dioso apo pejumecovēnētsivi pexanaenexa pejumapecataenē. Nexata Dioso apo pejumecovēnētsivi, papiayainē copiaya manuamenejavatsina pitsapaina, bajaraponē jumapecataeya exana jane baja. ¹⁵ Nexata papiayainē cotocaevi iravetsina pitsapaina, caējēpatsi piasaēyaexanaenexa Dioso apo pejumecovēnētsivi jumapecataeya pexanaenē. Nexata asaēyaexana. Bajarapacuenia asaēyaexana papiayainē copiaya manuamenejavatsina pitsapaina Dioso apo pejumecovēnētsivi jumapecataeya pexanaenē pecuaicuaijajinae. Pamonaē pematabacabēta apo nanavajēcāe bajarapajumapecataenējavabelia, beyaxuabiaexanapona. ¹⁶ Papiayainē cotocaevi iravetsina pitsapaina, bajaraponē jane baja pejamatabēcueneta, daxitajivi mapanacuata pejinavanapaevi, cobejumaitanerubaponatsi, pecujanenia pacobe. Itsa jume, pitapathaitota ata itapaitanerubaponatsi. Nexata bajaraponē pejamatabēcueneta itanerubaponatsi daxitajivi. Itanerubaponatsi beveliajamatabēcuenevi. Itanerubaponatsi ayaijamatabēcuenevi ata. Itanerubaponatsi ricovi ata. Itanerubaponatsi bepejiobivi ata. Itanerubaponatsi pamonaē ata dajubicuenia canajetatsi itsamonaejavabelia amoneya petonacuenebabiabinexa. Itanerubaponatsi pamonaē ata dajubicuenia apo canajetatsi itsamonaejavabelia amoneya petonacuenebabiabinexa. ¹⁷ Nexata pajivi aitanejibi, apo tocopatsitsi itsacuenējavayo ata pecomuatsinexa. Apo tocopatsitsinua itsacuenējavayo ata pecanajetsinexa. Paitanetota jivi itanerubaponatsi, papiayainē copiaya manuamenejavatsina pitsapaina, bajaraponē pevēnē. Itsa apo pevēnē, nexata pijanúmero. ¹⁸ Mapajamatabēcuenelivaisi bepacanaējētameje xaniavaetsia paneyapētaenexa. Pajivi yapētane, canaējētsi piayainē pijanúmero. Tsipaji bajaraponē panúmero xaina pevēnēnēxata. Panúmero bajaraponē xaina seiscientos sesenta y seis.

14

Pacuenia Juan tane 144.000 pajivibeje Dioso pijajivi penaxēanaejava yabara pelivaisi

¹ Taenutajē Corderonē penucaejava Siōnvēnē tsutojumata. Barēnuca ciento cuarenta y cuatro mil pajivibeje. Bajarapamonae pitapathaitota itanerubena Corderonē pevēnē, Corderonē paxa ata pevēnē. ² Bajaraxuacujinae jumetaniji athēbēvetsica pecuaicuaijajava. Pecuaicuaijajava najumeta pacuenia bitso banajumeta pinijijonca. Najumetanua beyamaxē penajumetsijume ata. Pecuaicuaijajava najumetanua pacuenia arpa banajumeta, ayaiBITSaētōxaneto itsa najuaracata. ³ Corderonē pijajivi naxēananubena pejanavaji trono pitabarata, cuatro ponēbeje piaithiavi pitabarata ata, ancianovi ata pitabarata. Itsjajivi ata cajena apo caējēpaetsi pecujaninexatsi bajarapavaji. Pamonaē ciento cuarenta y cuatro mil pajivibeje, ebajarapamonae, caējēpatsi penaxēanaenexa bajarapavaji. Bajarapamonae neconimatamotatsi Corderonē pijanata. Nexata baja bajarapamonae Dioso capanepatsi mapanacuavecuaje. ⁴ Bajarapapebijivi penaexanaejavaverenacujinae apo

naperabêquenetsiatae petirivajavabelia. Apo jamatabêcuenebijiánaetsi itsajivi ata. Bajaramonae pênajinavanapa Corderonê itsaxuayo ponapona. Bajaramonae Corderonê pijanata neconimatamotatsi. Nexata baja bajararamonae capanepatsi Diosojavabelia mapanacuavecuaje. Bajaramonae baja namataxainae ya capanepatsi Dioso pijajivinea, Corderonê ata pijajivinea. ⁵ Bajaramonae caeto ata apo najumetsênêtsi. Aneconijibi tsavanapae Diosojavabelia.

Pacuenia acueyabi ponêbeje ângelevi vajunupaeba pacuenia itsamatacabi itsijitsia mapanacuataje yabara pelivaisi

⁶ Icatsia ângelnê taniji pepunanajetaruaejava. Canajetaruca pexanialivaisi, apo peverevereacelivaisi. Tsipaebijitsia bajarapalivaisi mapanacuajava pejinavanapaevi. Tsipaebijitsia daxitanacuanêpijivi, daxitavirijumevi ata. ⁷ Ângelnê pinijijumeta jumai tsanajetaruae:

—Dioso cujunaviaya pajinavanapare. “Xamê bitso ayaijamatabêcuenenême,” pajamêre tsabiabi Diosojavabelia. Copiapata rabaja Dioso penaneconitsiaexanaxonaenexa daxitajivi. Ponê itaboxo exana, ira ata, manuamene ata, mera pepitsaparubenaejavanê ata, bajaraponêjavabelia panematabacabêta panavajêtabiabare, jai tsanajetaruae ângelnê pinijijumeta.

⁸ Icatsia cotocaevi taniji itsanê ângelnê pepunanajetaruaejava. Jumai tsanajetaruae bajarapaângelnê:

—Verebiabatsi rabaja Babilonia tomaraxanetomita pejinavanapaevimi. Tsipaji Babilonia tomarapijivimi navajêcabiaba jumapecataeya pexanaenêanêjavabelia. Nexata belia daxita nacuanêpijivi ata navajêcabiaba jumapecataeya pexanaenêanêjavabelia. Babilonia tomarapijivimi jumapecataeya pexanaenêanêjavabelia penavajêcaejamatabêcueneta, jamatabêcuenebijiánaepona daxitanacuanêpijivi. Nexata pacuenia pevitota pibisiacuen pexanabiabiva pejamatabêcueneta, daxitajivi jamatabêcuenebijiánaepona, bajara pijinia pacuenia Babilonia tomarapijivimi ata jumapecataeya pexanaenêanêjavabelia penavajêcabiabijamatabêcueneta, jamatabêcuenebijiánaepona daxitanacuanêpijivi. Bajaraxuata bajarapacuenia verebiabatsi, jai tsanajetaruae ângelnê, ponê cotocaevi taniji pepunanajetaruaejava.

⁹ Bajaraxuacujinae icatsia taniji acueyabiângelnê pepunanajetaruaejava. Bajara-paângelnê pinijijumeta jumai tsanajetaruae:

—Pajivi pematabacabêta navajêcabiaba playainêjavabelia, bajaraponê jumapecataeya pexanaenêtsijavabelia ata, bajarapajivi naneconitsiana Diosojavabelia. Bajarapajivi itsa nacopatanua playainê pevenêta pitapaitanerutsinexatsi, itsa jume, pecobejumata ata pecobejumaitanerutsinexatsi, nexata bajarapajivi naneconitsiana Diosojavabelia. ¹⁰ Dioso bitso pebaraanaepanaexaetsi, bajarapajivi bevelia apo naneconitsiaexanaetsi tsane. Ayaiacuenia naneconitsiaexanaenatsi isotojavabelia, azufre petajueisotojavabelia. Nexata bajarapajivi isoto petajuta bitso jamatabêfaenaena Dioso pijaângelevi pitabarata, Corderonê ata pitabarata. ¹¹ Athêbêbetsia bajarapaisototsêxê junaenia daxitamatacabi-javabelianexa. Ayaiacuenia bajarapajivi Dioso penaneconitsiaexanaejavatsi, tsitecaena daxitamatacabi-javabelianexa. Bajarapajivi isoto petajuta bitso pejamatabêfaenaejava, caeepatoyo ata apo copatsi tsane. Bajarapacuenia Dioso naneconitsiaexanaenatsi pajivi pematabacabêta navajêcabiaba playainêjavabelia, bajaraponê jumapecataeya pexanaenêtsijavabelia ata. Bajarapajivi itsa nacopatanua playainê pevenêta pitanerutsinexatsi, bajarapacuenia Dioso naneconitsiaexanaenatsi. ¹² Bajaraxuata Dioso pijajivi xaniavaetsia bejumecovênêtavanapa Dioso pitorobilivaisitsi. Becaasaênua tsavanapae Jesúsjavabelia penajamatabêcueneopatsijava, jai tsanajetaruae acueyabi ângelnê pepunanajetaruaejavata.

¹³ Bajaraxuacujinae jumetaniji athêbêvetsica tanejumaitsijava. Nejumaitsi athêbêvetsica mapacueniaje:

—Yaquinarure mapacuenia pejumaitsiitaneje: “Mapamatacabi-javaveliacujinaeje, pevajênayabelia ata, jamatabêcuenebarêya baja tsavanapae tsane pamonae tēpaponae Dioso pepua pejumecovênêtsivi,” pejaaitane, yaquinarure, nejai athêbêvetsica.

Espíritu Santo ata nejumaitsi bajararamonae yabara mapacueniaje:

—Xaniajai rabaja tsane. Bajaramonae nacueraevetsiana penacuenebijiava. Pamat-acabi abaxê bajararamonae asaê tsavanapae mapanacuataje, daxita xua pexaniacuenia exanavanapa, bajaraxuajamatabêcuene Dioso athêbêtatsia matamotsianatsi. Bajaraxuata jamatabêcuenebarêya tsavanapae tsane bajararamonae, nejai Espíritu Santo.

Pacuenia itsamatacabi Dioso naneconitsiaexanaejitsia daxita pamonae pijaneconi pexa-naevi yabara pelivaisi

¹⁴ Icatsia taniji penioponaetarêrêbo. Bajarapaitarêrêbo tuatujêta jivitonê eca. Itarêrêbo tuatujêta peccaenê yabara jamatabêjumaitsinê:

–Jesús raeta, Daxitajivi Pematapijinë, jamatabëjanë.

Namataxatateca orocrona. Cobenaeca bemasete pexiuajijava pecaucubinexa penaveretsiruanë. ¹⁵ Nexata icatsia itsanë ángelnë pitsaparena temploboënëverena. Bajarapaángelnë asaëyata vavajai itarërëbo tuatuajëta peecaenëjavabelia. Jumaitsi bajara-paángelnë:

–Caucubare jane baja penaveretsiruanë mapanacuayaberecaje. Copiapata rabaja pecaetuatsinexa penaveretsixu mapanacuatarecaje, jai ángelnë, ponë pitsaparena temploboënëverena.

¹⁶ Nexata bajaraxuacujinae ponë eca itarërëbo tuatuajëta, bemasete pexiuajijava yota irajumabereca. Caucuba jane baja penotsinexa penaveretsiruanë. Pecaucubijava penaveretsiruanë penotsinexa, mapajamatabëcuenelivaisi xainate. Pacuenia caucuba penaveretsiruanë penotsinexa, bajara pijinia pacuenia itsamatacabi daxita Jesús pijajivi pitsiana.

¹⁷ Bajaraxuacujinae icatsia athëbëtatsia itsaángelnë pitsaparena temploboënëverena. Bajaraponë ata capona bemasete pexiuajijava pecaucubinexa penaveretsiruanë. ¹⁸ Icatsia itsaángelnë pitsaparena altarjavaverena. Bajarapaángelnë altarpijiisoto pevetsinë. Junata pinijijumeta itsaángelnë, bemasete pexiuajijava pecaponaenëjavabelia. Jumaitsi bajara-paángelnëjavabelia mapacueniaje:

–Mapanacuayaberecaje caucubaremeca daxita uvaruanë, penaveretsiruanë, jai.

¹⁹⁻²⁰ Nexata jane baja bajarapaángelnë bemasete pexiuajijava yota irajumabereca. Caucuba jane baja uvaruanë, penaveretsiruanë. Nexata bajarapauvaruanë othotajarabaxuaba pinijivaxixaneto ënëabelia, bajarapavaxixanetoënëta pemarëbeneyujubataxuabinexa. Nexata jane baja uvacuaimarëbene yujubataxuaba tomara jumaverena. Nexata pemarëbeneyujubataxuabijavata, pinijijinaraxaneto pitsapona. Nexata bajarapajaraxaneto navotanucapona. Bajarapajaraxaneto penavotanucaponaejava, piapiajava xaina trescientos pakilómetrobeje. Piavajubujava pijinia xaina bejamatabëcuene caemetro epatua. Xua taniji, uvaruanë penaveretsiruanë pecaucubijava, xua ata taniji, pinijivaxixaneto ënëabelia piothotajarabijava pemarëbeneyujubataxuabinexa, xaina mapajamatabëcuenelivaisije. Itsamatacabi ángelnë caetuatsiana daxita pibisiacuene pexanaevi penaneconitsiaexanaenexa. Nexata pibisiacuene pexanaevi ayaiBITSaëtOXanetonë tēpaena. Nexata bajarapacuenia ayaijana xuabiana.

15

Pacuenia Juan tane athëbëtatsia siete ponëbeje ángelevi, siete xuabeje piayaijavanë pecaponaevi peverebiabinexa mapanacuaje, yabara pelivaisi

¹ Icatsia taniji athëbëtatsia pinijicuene pitajëtsijava pacuenia itsamatacabi itsijitsia mapanacuataje. Pinijicuene pitajëtsijava itsa taniji, nabenajacajë bitso. Siete paángelnëbeje capona siete xuabeje piayaijavanë peverebiabinexa mapanacuaje. Bajarapapiayacuene pepanepaecujinae, Dioso bitso jivi pebaraanaepanaejava, copiarucaena baja.

² Nexata icatsia taeyetajë bemanuamene picani. Itsiata baitsi jane piatajajava. Pacuenia vidriojava nasaba, bajarapitsijava. Itsiata bajarapaboxoya pitarunutsicotia xaina. Tanijinua jivi bajarapamene boxojumavereca penubenaevi. Bajarapamonae cuenea-moneyaba piayainë. Cuenea-moneyabanua bajaraponë jumapecataeya pexanaenëtsi ata. Tspaji pamonae nubena bajarapamene boxojumavereca, itorobi atatsi bajaraponëbejejavabelia pematabacabëta pevajëcaenexa, apo jumecovënëtsi. Apo nacopatsinua pitanerubinxatsi piayainë pijanúmerota, panúmero xaina piayainë pevënënexa. Bajaraxuata bajarapamonae canubena arpa, Dioso perajutsiarpatsi. ³ Bajarapamonae naxëananubena Moiséspijinë, Dioso pijajivitonë, pevaji. Bajarapavaji Corderonë ata pevaji. Penaxëanaejavata, bajarapamonae vajita jumai tsanubena mapacueniaje:

Xamë Diosomë, nijamatabëcuenesaenë daxita mapanacuata jivi pevetsivi matatox-enetsia. Xua pinijicuene exaname, bitso pexaniacuene. Xamë daxitanacuane nevetsinë. Daxita xua pexaniacuene, nexanaenë. Penajumetsënëtsicuene jivi neyamaxëitojorobinexa, apo nexanaenë. ⁴ Daxitajivi xamë pecacujunavinë tsane. “Dioso cajena bitso ayaijamatabëcuenenë,” cajai tsane. Xamë rabaja cajena caenëmë nianeconijibinë, caeto ata pibisiacuene apo nexanaenë. Daxita nacuanëpijivi xamëjavaberena patsiana pematabacabëta xamëjavabelia penavajëcaenexa. Bajarapacuenia catoitsane tspaji baja daxitajivi tane épexaniacuene nexanaponaponaejava,

jai tsanubena Diosojavabelia bajarapamonae penaxëanaejavata.

⁵ Bajaraxuacujinae icatsia taniji athëbëtatsia templobo ënëtuatujëalia peyatuucutsipana penapatsijava. Bajara paënyatuucutsijavaënëta bajayatami Dioso Moiséspijinëta penajumecopatsilivaisi peyaquinaeibopananë xaniavaetejeba. ⁶ Bajarapatemploboënëverena pitsaparena siete paängelnëbeje. Bajarapamonae capona siete xuabeje piayaijavanë, bajaraxuanëta mapanacuaje peverebiabinexa. Bajarapaängelevi naxataba pexaniaviriapapaëbërëjavanë, piaxuirajibijavanë. Peniojajivanë bitso. Nacrobëcëbanubena oropananë. ⁷ Bajaraxuacujinae pamonae cuatro ponëbeje piaitothiaviyajuvënë, Ángelevijavabelia rajuta copanë. Piayainë caeängelnë canacujitsia rajutapona caecopa. Bajarapacopanë orocopanë. Dioso, ponë daxitamatacabijavabelianexa peponaponaenë, ayaicuenia anaeya naneconitsiaexanaena pamonae naneconita bajaraponëjavabelia. Xuanë vënëba bajarapacopanë, bajaraxuanëta Dioso naneconitsiaexanaena bajarapamonae. ⁸ Bajarapatemplobo tuatujëmi bitso vënëca ëtsëxë. Bajarapatsëxë pitsapa Dioso ayaijamatabëcuenenëjavaverena. Itsajivi ata cajena apo cajëpaetsi pejonenexa bajarapatemplobo ënëtuatujëabelia. Xuanë siete paängelnëbeje capona, piayaijavanë, itsa baja panepaena, matapania jivi cajëpaenatsi pejonenexa bajarapatemplobo ënëtuatujëabelia.

16

Pacuenia Juan tane athëbëtatsia pacuenia itsamatacabi Dioso naneconitsiaexanaejitsia daxita pijaneconi pexainaevi yabara pelivaisi

¹ Icatsia jumetaniji templobojavaverena pinijijumeta pejumaitsijava. Siete paängelnëbejejavabelia jumaitis mapacueniaje:

—Paponare baja iranëjavabereca paneepacaponanexa jane baja xuanë siete pacopabeje vënëca, piayaijavanë. Dioso jane baja anaeya ayaicuenia penaneconitsiaexanaenexa, daxita pamonae naneconita bajaraponëjavabelia, pejaijava, templobojavaverena jumetaniji.

² Nexata jane baja pona penamataxainaeängelnë. Pecaponaera epatajaraba iranëjavabereca. Nexata daxita pamonae piayainë pevënëitanetota itanerubatsi, daxita bajarapamonae bajarapaepatota bitso perabëtsabanareca. Nexata bitso aperabëtane bajarapamonae. Bajarapamonae bajarapapiayainë jumapecataeya pexanaenëtsijavabelia ata pematabacabëta penavajëcaevi.

³ Bajaraxuacujinae icatsia pecotocaeviängelnë pijacopapijira epatajaraba manuamenejavabereca. Manuamenemi nexata naexana bepetëpaenë pijanara. Daxita baja tëpa manuameneta pejinavanapaevimi.

⁴ Bajaraxuacujinae icatsia acueyabiängelnë pijacopapijira epatajaraba menianëjavabereca mera, iravetsina pepitsaparubenaevajanëjavabereca ata. Nexata daxita bajarapameranëmi naexana ëpijanaranë. ⁵ Bajaraxuacujinae jumetaniji mera pevetsiängelnë pejumaitsijava Diosojavabelia. Jumaitis mapacueniaje:

—Diosomë, caeto ata pibisiacuene apo nexanaenë. Ajena, pamatacabi, ponaponame. Bajayata mapanacuaje nexanaevajënaeya ata, ponaponame. Pibisiacuene pexanaevi, paneconivajëto xaina, bajarapaneconivajëtota naneconitsiaexaname. Bajaraxuata meranëmi pijanaranë naexanaeyaexaname. Tobijianame meranë piayainë pijajivi bajarapameranë penatsiapaenexa. ⁶ Bajarapamonae bajayata beyejeba nijajivimi. Pamonae ata cavajunupaebapona, beyejeba. Bajaraxuata bajarapacuenia meranë pijanaranë naexanaeyaexaname penatsiapaenexa bajarapamonae, jai Diosojavabelia mera pevetsiängelnë.

⁷ Icatsia jumetaniji itsaängelnë altarjavaverena pejumaitsijava. Jumaitis mapacueniaje:

—Xamë Diosomë, najamatabëcuenesaënë daxita mapanacuata jivi pevetsivi matatoxenetsia. Itsa naneconitsiaexaname jivi, paneconivajëto xaina, bajarapaneconivajëtota bananeconitsiaexaname. Itsa aneonijibi tsipae, nexata cajena apo naneconitsiaexaname tsipae, pejaijava itsaängelnë altarjavaverena jumetaniji.

⁸ Bajaraxuacujinae icatsia cuatroängelnë pijacopapijira epatajaraba. Epatajaraba matcabipijijumetotujavabatsica. Nexata matcabipijijumetotocotia jivi bitso ayaicuenia tsajavatsi. ⁹ Itsiata bajarapamonae apo copabi pibisiacuene pexanabiabijava. Apo najamatabëcuenepënëyorotsi Diosojavabelia. “Xamë bitso ayaijamatabëcuenenëmë,” apo jai ata cajena Diosojavabelia. Bijl rajane Dioso, ponë cajëpatsi daxitacuene pexanaenexa, bajaraponë caranata pibisiacuena baracuaicuaijai.

¹⁰ Bajaraxuacujinae icatsia cincoängelnë pijacopapijira epatajaraba. Epatajaraba piayainë pijatronojavabereca. Piayainë jane baja pevetsinacuami aitaquiri tsanucuae. Piayainë jane baja pijajivi bitso penavixaetaexae, navonosine. ¹¹ Itsiata baitsi jane bajarapamonae apo copabi papibisiacuene exanavanapa. Apo najamatabëcuenepënëyorotsi Diosojavabelia. Bijl rajane Dioso, ponë athëbëtatsia peecaenë, bajaraponë caranata

bajarapamonae pibisiacuenia baracuaicuaijai. Bajarapacuenia bajarapamonae Dioso pibisiacuenia baracuaicuaijai penavixaetaexae, bitso peperabëtsabanaexaenua.

¹² Bajaraxuacujinae icatsia seisángelnë pijacopapijira epatajaraba. Epatajaraba pini-jimenexanetojavabetsica, Eufratesmenejavabetsica. Nexata Eufratesmenexaneto tse-vajunua. Nexata bajarapacuenia namuto torucarenatsi iranë pevetsivi penicabinexa, penajetarubenaevi orientejavavetsina.

¹³ Bajaraxuacujinae taniji acueyabi padovathibeje. Bajarapadovathivi becuaitox-icuenia pitsapa. Itsanë pitsapa dragón pecuibovojotuatsina. Itsanë pitsapa pi-ayainë pecuibovojotuatsina. Itsanë pitsapa peymaxëitoroboprofetanë pecuibovojotu-atsina. ¹⁴ Bajarapadovathivi pinijicuene pexanaejava, exanapona. Pona baja pecae-tuatsinexa daxitanacuanë pevetsivi. Bajarapadovathivi caetuatapona jivi vajabitsaë pebarëxanaenexa Diosojavabelia. Dioso piagamatabëcueneaenë daxitanacuanë pevetsivi matatoxenetsia. Bajarapamatacabi Dioso exanaena daxita pacuenia tajëvelia najume-capanepaeya jumaiti. ¹⁵ Bajaraxuacujinae jumetaniji Jesús pejumatsijava: “Pane-namuxunaevere. Itsajota apo panejamatabënajinaemë, bajarajota jemata patsianicajë. Pacuenia penacobetoxotsinë jemata bapata itsajota apo jamatabënajinaetsi, bajara itsinë tsane. Nexata pajivi jamatabëcueneaivavaya ponaponaena tanecopiapitsinexa, bajarapajivi barëya tsane. Pacuenia itsajavabelia peponaejivinxexa, baxaniavaeta penaxatatsijava pecaponaenexa pejumasajinaevaniva, bajara itsi tsane bajarapajivi. Nexata pamatacabi patsianicajë, apo aura tsane,” pejaijava Jesús, jumetaniji. ¹⁶ Nexata jane baja dovathi pijajivi caetuatsi daxitanacuanë pevetsivi. Caetuatsi caejavata penacaeuatsinexa. Itsajota nacaetuata daxitanacuanë pevetsivi hebreojumeta pevënë Armagedón.

¹⁷ Bajaraxuacujinae icatsia sieteanëngelnë pijacopapijira epatajaraba. Epatajaraba itabox-ovjavabetsia. Nexata athëbëtsia templobo ënëtuatujëta Dioso peecaetronojavaverena pinijijumeta jumaiti:

–Daxita rajane baja vereta, jai athëbëtsia templobo ënëtuatujëta.

¹⁸ Nexata jane baja binebinejai yamaxë. Pinijijovibo bitso najumeta. Yamaxë ata najumeta. Iranë ata najëba pinijicuenia. Jivi pejinavanapaejavaveliacujinae mapanacuataje, caeto ata bajarapacuenia ira penajëabijava pinijicuenia apo tae. ¹⁹ Pinijitomaraxanetomi, Babilonia tomarami, acueyabi xuabeje natsanaeya othopa. Bajarapacuenia itsanacuanëpijitomaranëmi ata othopa irata. Dioso nexata najamatabënapita pinijitomaraxanetopijivimi, Babilonia tomarapijivimi. Ayaicuenia Dioso baraanaepana Babilonia tomarapijivimijavabelia pibisiacuenia bitso pexanaexae. Bajaraxuata pinijicuenia Dioso naneconitsiaexana Babilonia tomarapijivimi. ²⁰ Itsa ira najëba, daxitatuatonëmi, daxitatsutonëmi ata, ajibi baja. Ira namatajëpa baja. ²¹ Athëbëvetsica othopaca jivjavabetsica bitso pecainejimatarejetonë. Bajarapamatarejetonë xaina piarevejava cuarenta pakilobeje. Nexata mapanacupijivi pibisiacuenia Dioso baracuaicuaijai. Tsipaji athëbëvetsica piothopaejava, bitso pecainejimatarejetonë, bitso piayaiacuene.

17

Pacuenia itsamatacabi Dioso naneconitsiaexanaena pamonae navajëcabiaba jumapecataeya pexanaenënejavabelia yabara pelivaisi

¹ Pamonae siete paángelnëbeje, siete pacopabeje pecaponaevi, bajara-paángleviyajuvënë, caenë rena xanëjavaberena. Bajarapaángelnë nejumaiti:

–Naxanitsia. Catsitajëtsianatsi pacuenia Dioso naneconitsiaexanaejitsia Babilonia tomarapijivi, patomaraxaneto eca menexanetonë imoxyojavata. Bajarapatomarapi-jivi Diosojavabelia apo navajëcabiabi. Caranata saya navajëcabiaba jumapecataeya pex-anaenënejavabelia. Nexata pacuenia petiriva pivitota bitso pibisiacuenia pexanabi-ativa jamatabëcueneitsi, bajarajamatabëcueneitsi Babilonia tomarapijivi. Pova petiriva pibisiacuenia pivitota exanabiaba, bajarapova pejamatabëcueneta jamatabëcuenebijiana itsamonae ata. Bajara pijinia pacuenia Babilonia tomarapijivi ata pexanabiabi-ava pejamatabëcueneta, jamatabëcuenebijiana ayaibitsaëtoxoneto itsanacuanëpijivi ata. ² Tsipaji itsanacuanë pevetsivi patabiaba Babilonia tomaraberena. Nexata bajarapa-monae ata copaba Diosojavabelia penavajëcabiabijava. Caranata saya Babilonia tomara-pijivi cuenejëpaeya navajëcabiaba jumapecataeya pexanaenënejavabelia. Nexata ja-matabëcuenebijianatsi bajarapamonae ata, nejai bajarapaángelnë.

³ Bajaraxuacujinae Espiritu Santo netsijamatabëvënëca. Nexata bemajitsinaebota ángelnë nebarëpona petusato nacuayabelia. Bajarajotalia taeyetajë petiriva. Bajarapova

eca piayainē, petsobianē, pejumata. Bajaraponē peperabētuaerca, Dioso apo pejitsi-pavevėnėnė, itanerubena. Bajarapapiayainē xaina siete pamatabocotobeje diez pamataetobeje. ⁴Nexata bajarapova penaxatatsijavareca itsajava pabanaeya saėjai. Itsajava tsobia. Naitabēteca orojavanėta, perlavėnėjavanėta ata, penamatamotsibotonėta ata. Cobenaeca orocopa. Pibisiacuene bitso pexanaejava pevitota, bajarapajamatabėcuenelivaisi vėnėca bajarapacopata. ⁵Bajarapova pitapathaitota vėnėyaquinarutatsi. Pajamatabėcuenelivaisi yabara bajarapova pitapathaitota vėnėyaquinarutatsi, itsajivi ata apo yapėtae. Pejumaitsijume picani mapacueniaje: “Pinijitomaraxaneto Babiloniatomara. Bajarapatomaraverena pitsapa jivi pejamatabėcuenebijianaevjavatsi, jumapecataeya pexanaenėnėjavabelia penavajėcabiabinexa. Bajarapatomaraverena pitsapanua jivi pejamatabėcuenebijianaevjavatsi, daxitaxua pibisiacuene pexanaenexa mapanacuataje,” pejaijume, picani bajarapova pitapathaitota vėnėyaquinarutatsi. ⁶Taeyetajė icatsia bajarapova. Aitajibi tsecae Dioso pijajivimi pijanarata. Pamonae ata beyejebatsi pevajuunupaebixae Jesús, bajarapamonae mi ata pijanarata aitajibi tsecae bajarapova. Bajarapitsecaejava itsa taniji, bitso baja cajena jamatabėcuenenajunaviacajė. ⁷Nexata ángelnė nejumaitsi:

—¿Detsa xuajitsia jamatabėcuenenajunaviacame? Cayapėtaeyaexanaenatsi pajamatabėcuenelivaisi xaina mapovaje. Ponė piayainė siete pamatabocotobeje diez pamataetobeje pexinaenė, ponėjumata bajarapova eca, bajaraponė ata pajamatabėcuenelivaisi xaina, cayapėtayaexanaenatsi. ⁸Mapapiayainė tanemeje, bajaraponė picani bajayata ponapona mapanacuataje. Itsiata baja aeconoxae bajaraponė ajibi. Itsiata baitsi jane itsamatacabi pinijimėthėxanetojavatsina pitsapaenina icatsia peponaponaenexa mapanacuataje. Bajaraxuacujinae bajaraponėmi beyaxuabianatsi pepacuene jane baja bajaraponė pecopiarucaenexa. Daxita mapanacuapijivije, pamona Corderonė pijacuyalatobaxutota apo vėnėrubenae Dioso nacua pexanaevajėnaeya, Dioso nacua pexanaecujinae ata, bajarapamonae matacabi apo pevereverecaejava apo xainae tsane. Bajarapamonae jamatabėcuenenajunaviacaena piayainė itsa pitsapaenina pinijimėthėxanetojavatsina, nejai ángelnė.

⁹Icatsia ángelnė nejumaitsi:

—Pamonae baja peyapėtaevi, pamonae baja caėjėpatsi pejumeyapėtaenexa, bajarapamonae pejumeyapėtaenexa mapalivaisije. Papiayainė xaina siete pamatabocotobeje, ponėjumata taeyetame petiriva, inijajamatabėcuenelivaisibeje itajėta. Bajaraponė pamatabocotonė, siete pamatabocotobeje, mapajamatabėcuenelivaisi xainaje. Siete rabaja pijinia patsutobeje eca Babilonia tomarata. Bajarapasiete pamatabocotobeje mapajamatabėcuenelivaisi yajavaxainaje. ¹⁰Siete rabaja pijinia ponėbeje Babiloniatomara pevetsivi. Nexata Babiloniatomara pevetsiviyajuvėnėvi cinco baja ponėbeje pitsapa. Seisnė abaxė aeconoxae eveta Babiloniatomara. Sietenė abaxė apo taxuxuabi pevetsinexa. Itsiata sietenė itsa evetsiana, bajayajebi apo evetsi tsane. ¹¹Papiayainė, petsobianė, taneme, mapajamatabėcuenelivaisi xainaje. Bajaraponė picani bajayata eveta Babiloniatomara. Itsiata baja aeconoxae bajaraponė apo evetsi. Tsipaji baja tėpa. Itsiata baitsi jane icatsia bajaraponė pinijimėthėxanetojavavetsina pitsapaenina Babiloniatomara icatsia pevetsinexa. Nexata icatsia bajaraponė itsa evetsiana, ochonė baja evetsiana Babiloniatomara. Bajaraponė abaxė bajayata itsa ponapona, siete ponėbeje Babiloniatomara pevetsiviyajuvėnėmi baja cajena. Bajaraponė icatsia Babiloniatomara itsa evetsiana, pevetsicujinae bajaraponėmi beyaxuabianatsi pepacuene jane baja bajaraponė pecopiarucaenexa, nejai ángelnė.

¹²Icatsia ángelnė nejumaitsi:

—Ponė piayainė pemataetonė taneme diez pamataetobeje, mapajamatabėcuenelivaisi xainaje. Diez rabaja pijinia ponėbeje, itsamatacabi nacuanė evetsiana. Nexata bajarapamonae itsamatacabi nacuanė itsa evetsiana, evetsiana diez panacuabeje. Tsipaji caenė canacujitsia evetaponaena caenacua. Bajarapamonae abaxė apo taxuxuabi bajarapanacuanė pevetaavanapaenexa. Itsiata baitsi jane itsa taxuxuabijitsia nacuanė jane baja pevetaavanapaenexa, copatsianatsi pijanacuanėjava pevetsinexa saya caeepatoyovajėto. Bajarapamonae itsa evetsiana pijanacuanėjava, piayainė barėevetsianatsi. ¹³Pamonae diez ponėbeje, diez pijinia panacuabeje itsamatacabi itsa evetsiana, barėenajamatabėcuenėjėpaenatsi piayainė. Nexata bajarapadiež ponėbeje jumaitsi tsane piayainėjavabelia:

—Xamė pacatocopatsianatsi patanematacaitorobinėnexamė, jai tsane.

¹⁴Pamatacabi bajarapadiež ponėbeje evetavanapaena pijanacuanė, piayainė vajabit-saė barėexanaenatsi Corderonėjavabelia. Daxita pamona Corderonė pijajivi, pamona Dioso pejunatsivi, bajarapamonae pijinia Corderonė barėbena piayainėjavabelia. Nexata Corderonė cueneamoneyabiana piayainėjavabelia. Cueneamoneyabiana tsipaji Corderonė

daxita petuxanevi pijatuxanenē baja cajena. Nexata Corderonē daxita nacuanē pevetsivi matatoxenetsia pepo pevetsinē, nejai āngelnē.

¹⁵ Angelnē icatsia nejumaitsi:

–Pamanuameneboxovereca taeyetame pibisiacuene pexanaeva, bajarapamanuamene mapajamatabēcuenelivaisi xainaje. Mapanacuata jinvanapa jivibitsaētōxanetonē daxitavirijamevi, daxitanacuanēpijivinua. Bajarapajamatabēcuenē yabara taneme bajarapamanuamene. ¹⁶ Pamonae diez panacuabeje pevetsivnexa, bajarapamonae piayainē barēitōya tsane pibisiacuene pexanaevajavabelia. Nexata bajarapamonae beyaxuabiana bajarapova. Jumasa xuababuatsiana. Xaeyabuatsiananua. Bajaraxuacujinae tajuitsiana isotota. ¹⁷ Pamonae diez ponēbeje itsamatacabi nacuanē itsa evetsiana, bajarapamonae najamatabēcuenējēpaena petocopatsinexa piayainē pijanacuanē petoevetsinexatsi. Bajarapacuenia najamatabēcuenējēpaena tsipaji baja cajena Dioso jamatabēcuenēitorobatsi bajarapacuenia pexanaenexa bajarapamonae. Nexata piayainē bajarapamonae pijanacuanē bajayajebi toevetsianatsi matapania pecopiapatsijavabelianexa daxita pacuenia Dioso tajēvelia najumecapanepaeya jumaitsi. ¹⁸ Pova pibisiacuene pexanaeva taeyetame manuameneboxovereca, bajarapova mapajamatabēcuenelivaisi xainaje. Pinijitomaraxaneto Babiloniatomara. Bajarapatomarapijivi pejamatabēcueneta mapanacuanē pevetsivi pibisiacuene exanapona, nejai āngelnē.

18

Pacuenia Babilonia tomaraxanetomi copiaruca yabara pelivaisi

¹ Icatsia itsaāngelnē taniji perunaejavatsica athēbēvetsica. Caējēpatsi pinijicuenia piayaicuene pitorobinexa. Bajarapaāngelnē pinijicotia yajavarunaica. Ira itayota daxitanacuanējava. ² Ayaijumeta vavajai. Jumaitsi mapacueniaje:

–Verebiabijitsiatsi rabaja Babilonia tomaraxanetota pejinavanapaevi. Nexata baja ējoriminacua tsarucae tsane. Daxita xua pibisiacuene pexanaedovathivi, juya bajarapatomarata jinvanapaena. Bitso pibisiavirivi pepunaevi, pamonae daxitajivi apo itajitsipae petaenexa, juya bajarapatomarata jinvanapaena. ³ Babilonia tomarapijivi navajēcabiaba jumapecataeya pexanaenēanējavabelia. Nexata belia daxitanacuanē pevetsivi ata, pijajivi yajava, navajēcapona jumapecataeya pexanaenēanējavabelia. Nexata Babilonia tomarapijivi jumapecataeya pexanaenēanējavabelia penavajēcabiabijamatabēcueneta, daxita xua pibisiacuene pexanaejamatabēcuenetanua, jamatabēcuenēbijianapona daxitanacuanēpijivi. Babilonia tomarapijivi bitso xainapona ayaijava palata pibisiacuene pexanaejamatabēcueneta. Nexata pijinia pamonae Babilonia tomaraberna capatabiaba daxitacuene pecanajetsinexa Babilonia tomarapijivijavabelia, bajarapamonae ata baja bitso ayaijava palata xainapona. Bajarapacuenia Babilonia tomarapijivimi pibisiacuene pexanabiabixae, ayaicuenia naneconita Diosojavabelia. Bajaraxuata Babilonia tomarapijivi Dioso baja verebiabijitsiatsi, jai āngelnē.

⁴ Bajaraxuacujinae icatsia athēbēvetsica jumetaniji itsajume. Jumaitsi mapacueniaje:

–Paxamē patajajivimē, papitsapare baja Babilonia tomaravecua. Papitsapare baja pibisiacuene paxamē ata paneexanaeyaniva, bajarapatomarapijivi yajava Dioso papecananeconitsiaexanaeyaniva. ⁵ Babilonia tomarapijivi pijaneconi baja bitso ayaijava xaina. Pijaneconi itsa napebetsipa, itsa najumaetaponaējitsipa, nexata copiapatsipa itaboxojavabetsia. Dioso cajena yapētane daxita Babilonia tomarapijivi pibisiacuene pexanaejava. ⁶ Bajarapamonae bejiobiaexanabiaba itsamonae. Nexata Dioso itsa naneconitsiaexanaena, bajarapamonae bitso ayaicuenia bejiobiaexanaena. ⁷⁻⁸ Babilonia tomarapijivi bitso beayaijamatabēcuenēvi natane. Natocomuacabiaba ayaijava penamatotsijavanē pibisiacuene pexanabiabimatamota. Bajarapamonae pejamatabēēthētota jamatabējumaitsi tsabiabi: “Xanē raja majota ecajē nacua betaevetsinē. Nexata apo jamatabēcuenēbējanē tsane itsacuenejavayo ata yabara. Apo namatavenonae tsane itsacuenejavayo ata,” jamatabējai tsabiabi bajarapamonae pejamatabēēthētota. Bajarapacuenia Babilonia tomarapijivi pejamatabējumaitsixae, ayaicuenia Dioso bejiobiaexanaenatsi. Babilonia tomarapijivi caecuenia caematacabita Dioso tocopiapatsiaexanaenatsi petēpaacuene, pemataneuyabacuene ata, janibocuene ata. Tajunenatsi isotota bajarapatomarapijivimi. Bajarapacuenia Dioso naneconitsiaexanaenatsi bajarapamonae tsipaji vajatuxanenē Dioso bitso piasaēnē.

⁹ Babilonia tomarapijivi pejamatabēcueneta daxitanacuanē pevetsivi jamatabēcuenēbijianapona. Nexata daxitanacuanē pevetsivi copaba Dioso pejumecovēnētsijavami. Natocomuacabiabanua ayaijava penamatamotsijavanē. Nexata bajarapamonae itsa tsēxētaena Babilonia tomarapijivimi petajuejavatsi, yaitaxutonueya

vavajai tsane. ¹⁰ Bajarapamonae pecajunavi, tajë vecuanubenaena Babilonia tomarapijivimi itsa tajuenatsi. Bajarapamonae najumai tsane:

—jBitso baja rovia bejiobi mapamonaeje! jPinijitomaraxanetota, Babilonia tomaraxanetota, pejinavanapaevimi peyaiyataevimitsi! Caepatoyocujinae baja veriajavatsi Dioso penaneconitsiaexanaexaetsi, najai tsane bajarapamonae.

¹¹ Daxitanacuanëjava, pamonae pecanajetabiabavanapaevi, yaitaxutonueya vavajai tsane. Bajarapacuenia yaitaxutonueya vavajai tsane tsipaji baja xua capatabiaba pecanajetsinexa, ajibi baja pecomuacaveitsi tsane. ¹² Bajarapamonae capatabiaba oronanita pexanaejavanë, platananita pexanaejavanë ata, perlavënëjavanë ata, penamatamotsiibotonë ata. Capatabiabanua pexaniaviriapapaëbërë ata. Itsapapaëbërë linovënëjavanë. Itsajava sedajavanë. Bajarapapaëbërë itsajavanë peraënaejavanë. Itsajavanë petsobiajavanë. Capatabiabanua daxitavirianaejava petuxujuvinaejavanë. Capatabiabanua pexaniajavanë, marfilvënëjavata pexanaejavanë, penamatamotsinaejavanë ata, broncenani ata, hierronani ata, mármolvënëibo ata. ¹³ Capatabiabanua canelavënëjavanë, especiaevënëjavanë ata, inciensovënëjavanë ata, mirravënëjavanë ata. Capatabiabanua petuxujuviranë, vinoranë ata, aceiteranë ata, pexaniaviriatribonenë ata, trigobultonë ata. Capatabiabanua baca, oveja ata, caballo ata, perobobocaemonë ata, carrozavënëmonë. Jivi ata capatabiaba dajubicuenia pecanajetsinexa itsamonaejavabela amoneya petonacuenebabiabivinexa. ¹⁴ Nexata daxita bajaraxua pecanajetabiabavanapaevi, yaitaxutonueya najumai tsane Babilonia tomarapijivi yabara:

—jDaxitacuenie pejjitsipaecuenemi tovereverecatsi baja! jTovereverecatsi baja bitso pexainaejavami, xua picani mapanacuapijivi tane penamatamotsijava! najai tsane bajarapamonae yaitaxutonueya.

¹⁵ Babilonia tomarapijivimi abaxë itsa apo tajueti, pamonae pecanajetabiabavanapaevi, ayaijava palata xainapona, xua capata, pecanajetabiabixae Babilonia tomarapijivimijavabela. Bajarapamonae itsa taena Babilonia tomarapijivimi petajuejavatsi, yaitaxutonueya vavajai tsane. Tajë vecuanubenaena pecajunavi. ¹⁶ Bajarapamonae daxita najumai tsanubenaenae tsane:

—jBejiobitatsi bitso pinijitomaraxanetota pejinavanapaevimi! Bajarapatomarapijivimi naxatababiaba pexaniaviriapapaëbërë, linovënëjavanë. Itsajava peraënaejava. Itsajava petsobiajava. Naitabëtabiaba orojavanëta, perlavënëjavanëta ata, penamatamotsiibotonëta ata. ¹⁷ jCaepatoyocujinae saya verevereca baja bitso pexainaejavami! najai tsanubenaenae tsane daxita bajarapamonae.

Daxita pamonae barcoxanetonë pevetsivi, bajarapamonëta penaponaevi ata, bajarapamonëta penacuenebivi ata, bajarapamonëta pecaponaejavanë pecanajetaponaevi ata, daxita bajarapamonae tajë vecuanubenaena pecajunavi Babilonia tomarapijivimi itsa tajuenatsi. ¹⁸ Bajarapabarcoxanetonëta peponaevi, tsëxëtaenubenaena Babilonia tomarami itsa tajuenatsi. Nexata vavajaija najumai tsanubenaenae tsane bajarapamonae:

—jItsanacuanëjava ata baja ajibi itsatomara mapitsipinijitomaraxanetoje! jCaetomarami baja maje pinijitomaraxanetomi, tajuatitsje! najai tsanubenaenae tsane.

¹⁹ Pamonaenae tsëxëtaenubenaena, natsimataothocaena atsabenonë, bitso pesivanajamatabëxainaeaxae Babilonia tomarapijivimi. Yaitaxutonueya najumai tsanubenaenae tsane:

—jBitso pinijicuenia bejiobitatsi pinijitomaraxanetomita pejinavanapaevimi! Babilonia tomarapijivimi ayaijava palata pexainaeaxae, bitso pexainaeivi naexana daxita pamonaenae barco pexainaeivi, pecanajetabiabixae xua capata bajarapatomaraberena. jCaepatoyocujinae saya bajarapatomarami verevereca baja! najai tsanubenaenae tsane bajarapamonae.

²⁰ Dioso baja cajena itsamatacabi naneconitsiaexanaena Babilonia tomarapijivi pebejiobiaexanabiabijamatabëcuene Dioso pijajivi. Nexata itsamatacabi, Babilonia tomarami itsa vereverecaena, pevereverecaejava yabara, sivajamatabëcuenebarëya tsane daxita athëbëatsia pejinavanapaevi. Daxita Dioso pijajivi, mapanacuata pejinavanapaevi ata, sivajamatabëcuenebarëya tsane. Apóstolevi ata, Diosojumelivaisi pepaebivi ata, sivajamatabëcuenebarëya tsane Babilonia tomarami itsamatacabi itsa vereverecaena.

²¹ Bajaraxuacujinae piasaëangelnë yotaxuaba ibotoxaneto. Bajarapaiboto pinijiiibotoxaneto bitso. Nexata ängelnë manumeniabereca asaëyata xua bareca bajarapaibotoxaneto. Ängelnë jumaitsi mapacueniaje:

—Pacuenia asaëyata xuarecajë mapaiibotoxanetoje, bajara pijinia pacuenia pinijitomaraxaneto, Babiloniatomara, itsamatacabi pinijicuenia xuanianatsi. Apo taetsi baja tsane icatsia matavëjëa. ²² Ajumejibi baja tsane pijacallejava arpa peracatabiibijava. Ajumejibi baja tsane flauta ata piobabiabijava. Ajumejibi baja tsane trompeta ata piobabiabijava. Itsajivi ata baja apo nacuenebi tsane bajarajota. Apo najumetsi baja tsane icatsia matavëjëa trigoxu pecaquiatabiibijava pecaquiatabiibibotoxanetota. ²³ Itsalämpara ata baja apo naitayotsi tsane bajarajota. Ajumejibi baja tsane

jivi penabarëcuaiquaijaitabiabijava. Penacasabifiesta ata baja pexanabiabijava, ajibi tsane. Bajarapatomarapijivi pexanaejava pecanajetabiabavanapaevi, daxitanacuanëjava pevënëjoneyabiabivimi, ajibi baja tsane. Ajibinua baja tsane bajarapatomarapijivi daxitanacuanëjava yamaxëitojorobiaya penajorobiabijava, jai bajarapaängelnë.

²⁴ Dioso yapëtane pacuenia Babilonia tomarapijivi pejamatabëcueneta, Diosojumepaebivimi profetavi beyejebiabatsi. Babilonia tomarapijivi pejamatabëcueneta, Dioso pijajivimi ata beyejebiabatsi. Bajaraxuata juya Dioso ayaicuenia naneconitsiaexanaena Babilonia tomarapijivi.

19

¹ Bajaraxuacujinae jumetaniji jivi ayaibitsaëtoxaneto athëbëtatsia. Pinijijumeta jumai tsaponae mapacueniaje:

“Diosomë, jayajamatabëcuenenëmë bitso!” jaiti vaxaiti Diosojavabelia. Bajaraponë nacacapanepa vjaneconivecua. Penivenivenaecotia pexainenë.

Pijamatabëcuenesaënë bitso. Daxitacuenë pexanaenexa pecaëjëpaenëtsi. ² Itsa naneconitsiaexana jivi, paneconivajëto jivi xaina bajaraponëjavabelia, bajarapanconivajëto bananeconitsiaexana. Pajivi aneconijibi, apo naneconitsiaexanae cajena. Nexata baja Dioso naneconitsiaexana pibisiacuenë bitso pexanaevi, Babilonia tomarapijivimi. Bajarapamonaemi pibisiacuenë pexanaejamatabëcueneta jamatabëcuenëbjianapona daxitanacuanëpijivi.

Bajarapamonaemi pejamatabëcueneta Dioso pijajivimi beyejebatsi. Bajaraxuata Dioso juya naneconitsiaexana bajarapamonaevi, jai jivi ayaibitsaëtoxaneto athëbëtatsia.

³ Bajaraxuacujinae bajarapamonaevi icatsia jumaiti:

—“Diosomë, ayajamatabëcuenenëmë bitso!” jaiti vaxaiti Diosojavabelia. Athëbëbetsia petsëxëjunaevajatsia Babilonia tomarapijivimi petajuetsëxëtsi, apo vereverecanuae tsane daxitamatacabijavabelianexa, jai bajarapamonaevi.

⁴ Pamonaevi veinticuatro ponëbeje ancianovi, pamonaevi pijinia cuatro ponëbeje piaitothiavi, daxita bajarapamonaevi Dioso yayiataeya irata bobena. Ira taenubena. Bajarapamonaevi irata jumai tsanubenaevi Diosojavabelia, tronota peecaenëjavabelia:

—¡Xanepana rabaja nexanaevajava! ¡Bitso ayajamatabëcuenenëmë! jai tsanubenaevi irata bajarapamonaevi Diosojavabelia.

⁵ Bajaraxuacujinae icatsia tronojavaverena daxita Dioso pijajivijavabelia jumaiti:

Dioso panecujunavivi, ayajamatabëcuenë panexainaevi, beveliajamatabëcuenë panexainaevinua, pexaniajamatabëcuenë parajutabiabare vaja Diosojavabelia, jai tronojavaverena.

Corderonë penacasabifiesta yabara pelivaisi

⁶ Icatsia jumetaniji ayaibitsaëtoxaneto jivi pecuaicuaijajava. Bajarapamonaevi pecuaicuaijajava, jumetaniji bepinijijoncajume. Beyamaxëjume ata, ayajume, najumeta. Jumai tsaponae bajarapamonaevi mapacueniaje:

Vaja Dioso pijamatabëcuenesaënë daxita mapanacuata jivi pevetsivi matatoxenetsia. Taxuxuaba rajane baja daxitanacuanëjava Dioso jivi pevetsinexa. Bajaraxuata vaxaiti jumaititsi: “Diosomë, jayajamatabëcuenenëmë bitso!” jaiti vaxaiti Diosojavabelia.

⁷ Sivajamatabëcuenëbarëyatsi Dioso. Nexata tsipaebatsi itsamonaejavabelia pacuenia sivajamatabëcuenëbarëyatsi Dioso. “Diosomë, jbitso pinijicuenë nexanaenë!” jaiti vaxaiti Diosojavabelia. Bajarapacuenia jumaititsi tsipaji baja copiapata fiesta pexanaematacabinexa, Corderonë penacasabifistanexa. Petiriva rabaja naxaniavaeta Corderonë penacasabivanexa. ⁸ Bajarapova rajutatsi bitso pexanaviriapapaëbërëjava penaxatatsinexa, piaxuirajibijava, bitso peniojaijava, jai bajarapamonaevi.

“Bajarapova rajutatsi bitso pexanaviriapapaëbërëjava penaxatatsinexa,” itsa jai, comparacióncuenia pejumaitsinexa picani mapacueniaje: “Dioso pijajivi aneconijibia tane Cristo pesivatëpaexaetsi pijaneconi yabara,” pejainexa picani. Bajarapajamatabëcuenelivaisi: “Bajarapova rajutatsi bitso pexanaviriapapaëbërëjava penaxatatsinexa,” pejaijava comparacióncuenia.

⁹ Nexata bajaraxuacujinae ängelnë nejumaiti:

—Yaquinare mapejumaitsilivaisije: “Jamatabëcuenëbarëya pamonaevi junatatsi Corderonë penacasabifiestajavaverena,” pejailivaisi. Daxita xua catsipaebatsi, bajaraxua pepacuenë Dioso taneitorobijava, nejai ängelnë.

¹⁰ Nexata tamatabacabëta tonucajunuajë ängelnë pitabarata. Pexaniajamatabëcuenë picani tarajutsinexa ängelnëjavabelia. Itsiata baitsi jane ängelnë nejumaiti:

—Pëtsa bajaraxua exaname. Tsipaji saya xanë ata Dioso pijajivitonënë. Pacuenia xamë, pacuenia itsamonae ata, Dioso panenajuajumecovënëtsivi xaniavaetsia pajumecovënëtavanapame papexaniajailivaisi Jesús pacatsipaeba, bajara saya xanë ata taitsinë. Nexata pexaniajamatabëcuene rajure Diosojavabelia, nejai ángelnë.

Papexaniajailivaisi Jesús pacatsipaeba, bajarapalivaisita jamatabëcueneasaëyaexanatsi pamonaë jivijavabelia tsipaebapona Dioso pejumelivaisi.

Pacuenia athëbëtsia Juan tane Cristo penioponaecaballojumata peecaejava yabara pelivaisi

¹¹ Taniji itaboxo penapatsijava. Tanijinua penioponaecaballo. Bajarapacaballojumata jivitonë eca. Ponë bajarapacaballojumata eca, pevënë Najumecapanepaya Pejumaitsicuenia Pexanaenë. Itsavënë Pepo Pexaniajailivaisi Petsipaëbinë. Bajaraponë jivi naneconitsiaexana paneconivajëtota jivi naneconita. Vajabitsaë ata exana pibisiacuene pexanaevijavabelia. ¹² Pitaxutobeje naitayota. Pacuenia isoto bacotiatsobia, bajara itaxutocotiatsi. Bajaraponë matapona ayaijava coronanë. Pitapata vënëruca. Itsiata baitsi jane itsajivi ata apo vënëyapëtaetsi. Èbajaraponë pijacuata navënëyapëtane. ¹³ Penaxatatsijavareca tsobia. Pijanarata pejabutsijava. Bajaraponë pevënë Diosojamatabëcuenelivaisi itajëtsinë. ¹⁴ Bajaraponë pënaponatsi vajabitsaë ayaibitsaëttoxaneto, athëbëpijivi. Bajarapamonae naxataba bitso pexaniaviriapapaëbërëjavanë, piaxuirajibijavanë, bitso peniojajavanë. Bajarapamonae ata yapona penioponaecaballuanëta. ¹⁵ Ponë vajabitsaë barëexana, bajaraponë pecuibuatsina pitsapa pexiujaespada paneconitsiaexanaenexa daxitanacuanëpijivi. Bajaraponë daxitanacuanëjava jivi pevetsinënexa. Itsa evetsiana, ajumesaëya itorobabiabiana pejumecovënëtsinexatsi. Pacuenia uvaruanë itsa barëmeneyubataxuaba, ayaiarëmene pitsapa pexanaenexa vinoranë, bajara pijinia pacuenia daxitanacuanëpijivi, pijaneconi pexainaeivi, Dioso itsa verebiabiana, ayajana xuabiana. Dioso, ponë pijamatabëcueneasënë daxitanacuanë pevetsivi matatoxenetsia, ayaicuena naneconitsiaexanaena bajarapamonae pebaraanaepanaexae. ¹⁶ Ponë vajabitsaë barëexana, bajaraponë pijacamisajumavelia penaxatatsijavata, pevënëitanebërëtoto ruca. Pethaëttojumata ata pevënëitanebërëtoto ruca. Jumai tsarucae bajarapaitanebërëtoto: “Maponëje daxitanacuanë pevetsivi ata pepo pevetsinë. Daxita petuxanevi ata pijatuxanënë,” jai tsarucae.

¹⁷ Bajaraxuacujinae taenutajë ángelnë, icotiata penucaenë. Pinijijumeta vavajai tsanuae daxita quequeremonaëjavabelia. Jumai tsanuae mapacueniaje:

—Naxanitsia. Panacaetuanare payaibitsaëttoxanetomë ayaijava panenabaninexa Dioso pejamatabëcueneta. ¹⁸ Naxanitsia. Daxita petëpaevi pevi panexaenexa. Paponaremena nacuanë pevetsivimi, vajabitsaë penamatacaitorobivimi ata, vajabitsaë piatatsacavimi ata, pevi panexaenexa. Caballuanëmi, caballuanëjumata peponaevimi ata, pevi panexaenexa. Pamonaemi dajubicuenia pecanajetsivimitsi itsamonaejavabelia amoneya petonacuenebinexa, apo pecanajetsivimitsi ata, beveliajamatabëcuene pexainaeivimi ata, ayaijamatabëcuene pexainaeivimi ata, daxita bajarapamonae pevi panexaenexa paponaremena, jai tsanuae ángelnë quequeremonaëjavabelia.

¹⁹ Bajaraxuacujinae taniji piayainë. Tanijinua daxitanacuanë pevetsivi pijajivi, vajabitsaë, pecaetuatsijava ata. Daxita bajarapamonae nacaetuaana vajabitsaë penaexanaenexa. Nexata barënabia penioponaecaballota peponaenëjavabelia, bajaraponë pijajivijavabelia ata. ²⁰ Nexata penioponaecaballota peponaenë vaetaba piayainë. Vaetaba peyamaxëitojorobiprofetanë ata. Ponë peyamaxëitojorobiprofetanë, jivi peyamaxëitojorobinexa, bajayata pinijicuene exanaponapona piayainë pitabarata. Bajarapacuenia bajayata pinijicuene pexanaexae, peyamaxëitojorobiprofetanë jivi yamaxëitojorobapona. Nexata jivi nacaeveta piayainë pevënëitanetota pitanerubaponaenexatsi. Bajarapacuenia bajayata peyamaxëitojorobiprofetanë jivi yamaxëitojorobapona piayainë jumapecataeya pexanaenëtsijavabelia ata jivi pematabacabëta penavajëcabiabinexa. Bajaraxuata nexata piayainëbeje, peyamaxëitojorobiprofetanëbeje, xuabaliatsibeje abaxë piasaenëbeje isotopucabelia. Bajarapapuca tajuëyabiaba azufre yajava. ²¹ Nexata daxita bajaraponëbeje pijajivi, pamonaë nacopaba, beyejebatsi. Beyejebatsi penioponaecaballota peponaenë, pecuibuatsina pepitsapaeespadata. Nexata jane baja daxita quequeremonaë napeneyaba bajarapamonaemi pevi.

20

Pacuenia Juan tane pacuenia itsamatacabi Cristo mil pavaije evetsijitsia mapanacuaje yabara pelivaisi

¹ Icatsia taniji ángelnë perunaejavatsica athëbëvetsica. Cobenarunaica pinijimëthëxaneto pijallave. Cobenarunaicanua ayaicadenamaëttoxaneto. ² Bajarapaángelnë vaetaba dragón,

ponë pevenë Dovathi. Itsavënë Satanás. Bajaraponë dovathi bajayata itsa naitajëta jivijavabelia, naitajëta bejomocuenia. Nexata ángelnë cëtabuata dovathi mil pavaibejenexa. ³ Piniyimëthëxanetojavareca xuareca. Yavëpaxatatabuata bajarapamëthëxanetojavareca. Pematatsënëa icatsia sellovënëjavata yamëthëvëpajumacatsata. Nexata dovathi apo cajëpëpaetsi tsane peyamaxëitojorobinexa mapanacuapijivi mil pavaibeje. Bajaraxuacujinae icatsia isinaenatsi caeepatoyo icatsia jivi peyamaxëitojorobaponaponaenexa.

⁴ Bajaraxuacujinae icatsia taniji jivi tronojumata penevi. Bajaratronojumata penevi, Dioso itorobatsi penaneconitsiaexanaenexa jivi, pijaneconi pexainaevi. Tanijinae itsamonae ata, pamonaebajayata vësiucubejebatsi. Bajarapacuenia bajarapamonae mi bajayata vësiucubejebatsi tsipaji jivi tsipaebapona Jesús pelivaisi. Tsipaebanajetarubenanua Dioso pejumelivaisi. Bajarapamonae apo navajëca pematabacabëta piayainëjavabelia, piayainë jumapecataeya pexanaenëtsijavabelia ata. Apo nacopatsinua piayainë pevenëitanetota pitapaitanerubinexatsi. Apo nacopatsinua pecobejumaitanerubinexatsi. Nexata bajarapamonae mi bajayata Dioso piasaëyaexanaejavatsi, taniji. Pacuenia ata bajarapamonae mi bajayata Cristo barëevetatsi mapanacuaje, taniji. ⁵⁻⁶ Bajarapamonae Dioso asaëyaexanatsi Dioso copiaya jivi piasaëyaexanaematacabita. Bajarapamonae Dioso asaëyaexanatsi caeucuenia ayaibitsaëto. ¡Pamonaecopiaya Dioso jivi piasaëyaexanaematacabita asaëyaexanatsi, bajarapamonae pejamatabëcuenebarëyavi, pi-aneconijibivinua! Cotocaevi patëpaejavanaxa, acuenebi baja itsacueni pexanaenexatsi bajarapamonae. Biji rajane bajarapamonae Dioso, Cristo ata, pijasacerdotevinexa, jivi petocuaicuajitsabiabivinxaxa Diosojavabelia. Bajarapamonae Cristo barëevetsianatsi mapanacuaje mi bajayata. Itsamonae petëpaevimi, pamonaebaxë nacopabanubena, Dioso icatsia asaëyaexanaenatsi bajarapamili bajayatejucujinae.

⁷ Itsa baja panepaena mi bajayate, dovathi icatsia isinaenatsi mëthëvecua pepit-sapaenexa. ⁸ Pitsapaena icatsia jivi peyamaxëitojorobinexa daxitanacuanëjava. Bajarapacuenia yamaxëitojorobiana jivi ayaibitsaëtoxanetonë, Dioso apo pejumecovënëtsivi. Nexata bajarapacuenia dovathi vajabitsaë caetuatsiana. Dovathi pijajivi bitso ayaibitsaëtoxaneto tsane. Pacuenia tajetaboatsapërë navita, bajara itsi tsane dovathi pijajivi, vajabitsaë. ⁹ Bajarapamonae vajabitsaë copiata jivi benajetarubenaena daxitanacuanëjava. Bajaraxuacujinae matatoyoronaena jane baja Jerusaléntomara peverebiabinexa picani Dioso pijajivi, Dioso piasivatomarata, Jerusalén tomarata, pejinavanapaevi. Itsata baitsi jane dovathi pijajivi Dioso tsixuabianicatsi isoto athëbëvetsica. Nexata tajue-natsi daxita vajabitsaëmi, dovathi jane baja pijajivimi. ¹⁰ Nexata dovathi, ponë jivi yamaxëitojorobaponaena daxitanacuanëjava, xuabialiatsi isotopucalia, azufre yajava petajueyabiabipucalia. Bajarapapucalia baja cajena copiaya xuabatsibeje piayainëbeje peyamaxëitojorobiprofetanëbeje. Nexata bajarajota bajarapamonae Dioso naneconitsiaexanaenatsi daxitamatacabijavabelianexa. Nexata bajarajota bajarapamonae isoto petajuta bitso jamatabëfaenaena. Bajarapamonae bitso pejamatabëfaenaejava isoto petajuta tsitecaena daxitamatacabijavabelianexa.

Pacuenia Juan tane pacuenia itsamatacabi jivi nubenaejtsia peniopoatreron pitabarata Dioso penaneconitsiaexanaenexatsi yabara pelivaisi

¹¹ Icatsia taniji peniopoatreronxanetojumata peecaenë. Bajaraponë nacua baja revererecaeyaexana. Itaboxxo ata baja revererecaeyaexana. ¹² Taenubajë daxita petëpaevimi penubenaevaxa Dioso pitabarata. Nubena Dioso penaneconitsiaexanaenexatsi. Bajarapamonae ayajamatabëcuene pexainaevimi. Itsamonae beveliajamatabëcuene pexainaevimi. Taeyejebajëna cuyalatobaxutonë. Bajarapacuyalatobaxutonë baxupanejeba. Bajarapacuyalatobaxutonë itanerubena daxita petëpaevimi pacuenia exanavanapa petëpaevajënaeya mapanacuataje. Itsacuyalatobaxuto ata taeyabuatajë. Bajarapacuyalatobaxuto ata baxupatabuata. Bajarapabaxutota vënërubena pamonaematacabi apo pevereverecaevaxa pexainaevinexa. Nexata caejivi canacujitsia Dioso pijaneconi peturutaponaexatsi, caejivi canacujitsia paneconivajëto xaina. Bajarapaneconivajëto Dioso naneconitsiaexanaponatsi. ¹³ Manuameneta petëpaevimi ata, daxita pitsapaina. Jivi ata petëpaeucujinae, pejinavanapaenacuajavavetsina, ira bëxëpanavetsina, daxita pitsapaina. Nexata caejivi canacujitsia paneconivajëto xaina, bajarapaneconivajëto Dioso naneconitsiaexanaponatsi. ¹⁴ Bajaraxuacujinae jivi petëpaeyaexanaejamatabëcuene, jivi petëpaeucujinae pejinavanapaenacuami ata yajava, Dioso xualia isotopucalia. Bajarapapuca jivi cotocaevi patëpaejava petëpaeyaexanaepuca. ¹⁵ Pamonaepo vënërubena, pabaxutota vënërubena pamonaematacabi apo pevereverecaevaxa pexainaevinexa, bajarapamonae peneliatsi bajarapapucalia.

21

Pacuenia Juan tane pacuenia itsamatacabi Dioso icatsia pejanaitaboxo, pejananacua yajava, exanaejitsia yabara pelivaisi

¹ Icatsia taniji pejanaitaboxo, pejananacua yajava. Paitaboxo, panacua ata, Dioso copi-aya exana, ajibi baja. Manuamene ata ajibi. ² Xanë rabaja Juannë. Taniji Dioso pijatomara, pejana Jerusaléntomara. Athëbëvetsica, Diosojavavetsica, runaica bajarapatomara. Daxita rabaja Dioso xaniavaeta. Pacuenia petiriva pamonanexa itsa sivapatsijitsiatsi, pevajënae banaxaniavaeteca, bajara pijinia pacuenia Dioso xaniavaeta baja Jerusaléntomara pijajivi petojinavanapaenexatsi. ³ Nexata jumetaniji pinijijume athëbëvetsica, tronojavavetsica. Jumaitsi mapacueniaje:

—Taema. Dioso rabaja jivijava ponapona. Dioso baja jivi yajavaponapona daxitamatacabi javabelianexa. Bajarapamonae pepo Diosonë pijajivi tsane. Dioso pijinia bajarapamonae pijatuxanenë tsane. ⁴ Dioso itaxutobarëmeneiquinaponaena bajarapamonae. Ajibi baja tsane petëpaeuene, penuecuene ata, bitso penajamatabëxainaeuene ata, penavixae-taeuene ata. Daxita bajarapatsienemi copiarucaena jane baja, jai athëbëvetsica.

⁵ Bajaraxuacujinae Dioso, tronojumata peecaenë, jumaitsi:

—Taema. Daxitacuene bajayata taexanaejavami, xuami baja picani vereverecaeyaex-anajë, pejanajava icatsia exanajë, jai.

Bajaraxuacujinae xanëjavaberena icatsia nejumaitsi:

—Yaquinare bajaraxuanë pelivaisi. Tsipaji baja palivaisi catsipaebatsi, bajarapalivaisi pexaniajailivaisi cajena. Xanepana nexata daxitajivi pejumecovënëtsinexa bajarapalivaisi, nejai.

⁶ Bajaraxuacujinae icatsia nejumaitsi Dioso, tronojumata peecaenë:

—Daxita rabaja icatsia pejanajava taexanaejava, veretajë. Xanë rajane baja daxitacuene tataxuxuabinë. Daxitacuene icatsia tacopiarucaeyaexanaenënexa. Pacuenia jivi pejamatabëthëtòjavavetsina bitso jitsipa mera piapaenexa, bajara pijinia pacuenia jivi bitso itsa jitsipaena tacapanepaejavanaxa, nexata bajarapamonae rajutsianajë matababi apo pevereverecaejava. Tocopatsianajë bajarapamonae amoneya pexainanexa matababi apo pevereverecaejava itsa jumecovënëta taxënato, Cristo, pesivatëpaejavatsi. Bajarap-onë Cristo jivi pejamatabëcueneasaëyaexanaenë. ⁷ Pajivi tsiteca jumecovënëtaponapona tajumelivaisi ëpetëpaejavabelianexa, bajarapajivi xanë pijaDiosonënë tsane. Bajarapa-jivi pijinia taxënatojivivo tsane. ⁸ Itsiata baitsi jane pamonaë pejunavivi tajumelivaisi yabara itsamonae pebejiobiaexanaeyanivatsi, pamonaë ata apo tanejumecovënëtsivi, pa-monaë ata pitoyavi itsamonae, pamonaë ata pevitota pibisiacuene pexanaevi, baja-rapamonae ponaena petajueyabi bipucajavabelia. Pamonaë ata penajorobivi, pamonaë ata jumapecataeya pexanaenëanëjavabelia penavajëcaevi, pamonaë ata penajumetsënëtsivi, daxita bajarapamonae ponaena petajueyabi bipucajavabelia. Bajarapapuca tajueyabi-aba azufre yajava. Bajarapatëpaejava cotocaevi jane baja petëpaejava tsane, nejai Dioso, tronojumata peecaenë.

Pacuenia Juan tane pejana Jerusaléntomara pacuenia itsamatacabi itsijitsia yabara peliv-aisi

⁹ Nexata jane baja rena caenë ängelnë. Bajarapaängelnë siete paängelnëbeje siete pa-copabeje piayaijavanë pevënëcaecopanë pepacaeviyajuvënënë. Bajarapaängelnë nexata nejumaitsi:

—Naxanitsia. Catsitajëtsianatsi pova Corderonë pijavanexa, nejai ängelnë.

¹⁰ Bajaraxuacujinae Espíritu Santo netsijamatabëvënëca. Nexata bemajitsinaebota ängelnë nebarëpona pinijitsutoxanetojavabelia, piapiatsutoxanetojavabelia. Nexata bajara patsutoxanetojavatalia ängelnë netsitajëta Dioso pijatomara, pinijitamaraxaneto, Jerusaléntomara. Athëbëvetsica Diosojavavetsica runaica bajarapatomara.

¹¹ Bajarapatomara cotianiveniveneca Dioso pijapenivenivena ecotiata. Pacuenia penamatamotsiiboto jaspevënëiboto cotianivenivena, bajarapacuenia cotianiveniveca. Nasabanua pacuenia nasaba vidriojava. ¹² Bajarapatomara matatoyorotsia yacaranata piaitayaëibopanaxanetota. Bajara payacaranatsijavaxaneto mataropotsia catsanaruba ibopananë. Bajara payacaranatsijavaxaneto apia athëbëabetsia pacuenia pinijinaejavaxaneto apia. Bajara payacaranatsijavaxaneto matatoyorotsia xaina doce pabaupabeje. Nexata ängelevi, caenë canacujitsia, nucapona caebaupa canacujitsia.

Bajarapabaupanëjava Israelpijnë pexi, doce ponëmibeje, pevënëanë vënërubena. ¹³ Acueyabi pabaupabeje xainapona caeyenepana canacujitsia. Estevënënenia payenepana xaina acueyabi pabaupabeje. Nortevënënenia pijinia payenepana xaina acueyabi pabaupabeje. Survënënenia pijinia payenepana xaina acueyabi pabaupabeje. ¹⁴ Jerusaléntomara

matatoyorotsia peyacaranatsiibopanaxanetonexa, ibo penajumaetaponaejavata, copiaya piniijibotoxanetonē sasavia jebapona, doce paibotoxanetobeje. Bajarapaibotoxanetonē, caeibotoxaneto canacujitsia pejumavelia, Corderonē pijajivi doce ponēbeje, apóstolevi, pevėnėanė rubena.

¹⁵ Paángelnė nebarėcuaiquaijai, cobenaponapona oronaebō. Bajarapaoronaebota pecaėjėbinexa Jerusalėntomara, pecaėjėbinexa baupanė ata, pecaėjėbinexa Jerusalėntomara matatoyorotsia peyacaranatsiibopanaxaneto ata. ¹⁶ Jerusalėntomara matatoyorotsia peyacaranatsiibopanaxaneto, daxitayenepananė namatajėpaeya apia. Pacuenia apiareca matonotsiareca payenepanabeje, bajara pijinia pacuenia apialia epatajėrėtsialia ata payenepanabeje. Nexata jane baja ángelnė pecaėjėbinaebota caėjėba Jerusalėntomara. Nexata Jerusalėntomara matonotsiareca piapiajava xaina dos mil doscientos pakilómetrobeje. Epatajėrėtsialia ata xaina bajarapacuenia, dos mil doscientos pakilómetrobeje. Athėbėabetsia ata piapiajava bajarapacuenia xaina, dos mil doscientos pakilómetrobeje. ¹⁷ Bajaraxuacujinae ángelnė caėjėba Jerusalėn tomara matatoyorotsia peyacaranatsiibopanaxaneto peyapėtaenexa paitayaėtovajėto xaina. Jerusalėntomara matatoyorotsia peyacaranatsiibopanaxaneto, piaitayaėjava xaina sesenta y cuatro pametrobeje. Pavirianaebota mapanacuapijivi bacaėjėba, bajarapavirianaebota ángelnė caėjėba.

¹⁸ Jerusalėntomara matatoyorotsia peyacaranatsiibopanaxaneto, exana jaspevėnėibota. Jerusalėntomara ėorojavanėta pexanaetomara. Nexata Jerusalėntomara nasaba bitso. Pacuenia bitso nasaba piaxuirajibividrijojava, bajara itsi. ¹⁹ Jerusalėntomara matatoyorotsia peyacaranatsiibopanaxanetonexa, itsa taxuxuaba pexanaejava, copiaya piniijibotoxanetonē sasavia tsivajėnaejeba. Bajarapaibotoxanetonė itabėtsiaya jumacatsanaruba daxitaviria ibotonėta, bitso penamatamotsiibotonėta. Penamataxainaeibotoxaneto itabėta jaspevėnėibotonėta. Pecotocaeviibotoxaneto itabėta zafirovėnėibotonėta. Acueyabiibotoxaneto itabėta ágatavėnėibotonėta. Cuatroibotoxaneto itabėta esmeraldavėnėibotonėta. ²⁰ Cincoibotoxaneto itabėta ónicevėnėibotonėta. Seisibotoxaneto itabėta cornalinavėnėibotonėta. Sieteibotoxaneto itabėta crisólitovėnėibotonėta. Ochoibotoxaneto itabėta berilovėnėibotonėta. Nueveibotoxaneto itabėta topaciovėnėibotonėta. Diezibotoxaneto itabėta crisoprasavėnėibotonėta. Onceibotoxaneto itabėta jacintovėnėibotonėta. Doceibotoxaneto itabėta amatistavėnėibotonėta. ²¹ Doce rabaja pabaupabeje. Doce rabaja pijinia paperlavėnėjavatabeje, bitso penamatamotsijavanėta, exana caebaupa canacujitsia. Bajarapatomarata caecalle ruca daxitacallevecua bitso ayaicallexaneto. Bajarapacalle ėorojavanėta pexanaecalle. Nasaba bitso. Pacuenia nasaba vidrijojava, bajara itsi.

²² Bajarapatomarata apo taenė templobo. Itsiata baitsi jane daxita bajarapatomara betemplo. Bajarapacuenia betemplobo tsipaji Dioso, daxita mapanacuata jivi pevetsivi matatoxenetsia piajamatabėcuenesaėnė, Corderonėbeje, ponaponabeje bajarapatomarata. ²³ Dioso ayaijamatabėcuenenė pijapenivenivenaecotiata itayota bajarapatomara. Corderonė ata itayota pijapenivenivenaecotiata bajarapatomara. Bajaraxuata apo namatavenonae bajarapatomarata pitayotsinexa matabacabipijijuameto, meravipijijuameto ata. ²⁴⁻²⁶ Daxitanacuanėpijivi, pamonae baja Dioso capanepatsi pijaneconivecua, bajarapamonae itsamatacabi jinavanapaena Diosobeje Corderonėbeje pijapenivenivenaecotiata. Daxitanacuanė pevetsivi pijatomananjavaverena capatsiana bajarapatomaraberena bitso penamatamotsijavanė, Dioso yayiataeya perajutsinexa. Daxitamatacabijavabelianexa, bajarapatomara baupatanutsiana. Bajarapatomarata ajibi tsane meravi. ²⁷ Itsiata baitsi jane bajarapatomaraberena pibisijamatabėcuenepexinaevi, apo jone tsane. Piauracuenepexinaevi, penajumėsenėtsivi ata, apo jone tsane. Jonena ėpamonae vėnėrubena Corderonė pijacuyalatobaxutota. Corderonė pijacuyalatobaxutota vėnėrubena pamonae matabacabi apo pevėreverecaejava pexinaevinexa.

22

¹ Bajaraxuacujinae icatsia ángelnė netsitajėta pepamene, bitso pitaranaemene. Nasaba bitso. Pacuenia vidrijojava nasaba, bajara itsi. Bajarapamene jivi petėpaejavavecua piavitavayaexanaemene. Bajarapamene pitsaparena Diosobeje Corderonėbeje pijatronojavaverena. ² Bajarapamene bocapona ayaicallexaneto tuatujėareca. Bajarapamene itapayareca anijamuxubėrėneniabeje nubena naejavanė, jivi petėpaejavavecua piavitavayaexanaenė. Bajaraponaenė caevaita nacuaitapona doce panacuaitsibeje. Caejuameto canacujitsia nacuaitapona. Bajaraponaenė pebaxuta xanepana daxitanacuanėpijivi penavaėbinexa, pejamatejemanexa piavitanejavavecua. ³ Nexata bajarapatomarata ajibi tsane jivi pejamatabėcuenėbijianaejavanaxatsi. Nexata jivi pibisiacuene apo exanae tsane.

Diosobeje Corderonēbeje pijatronota ecaenabeje pijajivi pitorobabiabinexabeje daxitamatabijavabelianexa bajarapatomarata. Nexata daxita pamonaē Dioso pijajivi, pexaniajamatabēcuene rajutsiana Diosojavabelia. ⁴ Bajarapamonae Dioso itabarataena. Dioso pevēnē ata rucaena bajarapamonae pitapathaitota. ⁵ Bajarapatomarata ajibi tsane meravi. Pepo petuxanenē Dioso pijapenivenivenaecotia itayotsiana. Nexata bajarapatomarata pejinavanapaevi apo namatavenonae tsane lāmparacotia, matacabipijijuame-tocotia ata. Pamonaē jinavanapaena Dioso pijanacuata, Dioso pijanacua barēēvetsianatsi daxitamatabijavabelianexa.

Pacuenia baja imoxoyo pevājēnaē Jesucristo pepatsijavanexatsica yabara pelivaisi

⁶ Icatsia āngelnē nejumlahtsi:

—Palivaisi baja yaquinae, pexaniajailivaisi cajena. Daxita xua yabara yaquinae, pepacuenē copiapatsiana. Dioso baja cajena bajayata tajēvelia yapētaeyaxana profetavimi peyapētaenexa pacuenia itsamatabi itsijitsia mapanacuataje. BajarapaDiosonē icatsia itoroba pijaāngelnē. Nexata Dioso pijaāngelnē tsitajēta Dioso pijajivijavabelia, Dioso pijajivi peyapētaenexa pacuenia baja imoxoyo pevājēnaē pecopiapatsinexa xua copiapatsijitsia mapanacuataje, nejai āngelnē.

⁷ Icatsia āngelnē nejumlahtsi:

—Jesús raja jumaitsi: “iBepijia patsianicajē!” jai. iNexata pajivi jumecovēnēta Dioso pejumelivaisi, neyaquinaelivaisi mapabaxutotaje, bajarapajivi jamatabēcuenebarēya tsane Jesús itsa patsianica! nejai āngelnē.

⁸ Xanē rabaja Juannē, daxita baja palivaisi yaquinajē, jumetaniji. Tanijinua. Bajaraxucujinae āngelnē, ponē netsitajēta daxita bajaraxua, pitabarata yayataeya picani tamatabacabēta tonuacajē. ⁹ Itsiata baitsi jane āngelnē nejumlahtsi:

—Pētsa bajaraxua exaname. Tspijai saya xanē ata Dioso pijajivitonēnē. Pacuenia xamē, pacuenia itsamonae ata, pamonaē Diosojumepaebivi profetavi, pacuenia ata pamonaē jumecovēnētsiana mapabaxutotaje neyaquinaelivaisi, bajara saya xanē ata taitsinē. Nexata Dioso yayataeya nematabacabēta tonucare nevajētsinexa Diosojavabelia, nejai āngelnē.

¹⁰ Icatsia āngelnē nejumlahtsi:

—Pētsa nejumeyavajunuaxainame Dioso pejumelivaisi, neyaquinaelivaisi mapabaxutotaje. Tspiaebianame daxitajivijava daxitajivi peyapētaenexa. Tspijai rabaja imoxoyo pevājēnaē pecopiarucae xua mapanacuaje. Pacuenia baja cajena Dioso tajēvelia najumecapanepaeya jumaitsi, bajarapacuenia Dioso exanaena. ¹¹ Neponaponaepato abaxē mapanacuataje, tocopare pibisiacuene pexanaponaevi, pibisiacuene pexanaejava pecatsitecaenexa. Ēpibisiacuene yabara penajamatabēxainaevi ata, tocopare pecatsitecaenexa penajamatabēxainaejava ēpibisiacuene yabara. Itsiata baitsi jane pijinia pamonaē pexanicuene pexanavanapaevi, catsitecae pevājēnaeyabelia pexanicuene pexanavanapaevaja. Pamonaē ata Dioso aneconijibia tanetsi pejumecovēnētsixae Jesucristo pesivatēpaejavatsi, casaē pevājēnaeyabelia aneconijibia pejinavanapaenexa, nejai āngelnē.

¹² Icatsia āngelnē nejumlahtsi:

—Jesús raja jumaitsi: “Panejumetaema. Bepijia patsianicajē. Capatsianicajē tajajivi tarajutsijavanexa. Bajaraxua rajutsianajē caejivi canacujitsia, pamonaē xaniavaetsia netonacuenebavanapa. Pamonaē pijinia pibisiacuene exanavanapa, naneconitsiaexanaenajē. ¹³ Xanē rajane baja daxitacuene tataxuxuabinē. Daxitacuene icatsia tacopiarucae yaexanaenēnexa,” jai raja Jesús, nejai āngelnē.

¹⁴ Icatsia āngelnē nejumlahtsi:

—Jamatabēcuenebarēya baja pamonaē pibisiacuene pexanaeconimi Dioso vecuaajibi-aexanatsi, pejumecovēnētsixae Jesucristo pesivatēpaejavatsi. Bajarapamonae itsamatabi Dioso tocopatsianatsi penajonenexa Dioso pijatoma baupanējava. Tocopatsianatsinua jivi petēpaejavavecuā piatavayaxanaenae pecuaixanexa. ¹⁵ Itsiata baitsi jane daxita pamonaē Dioso apo pejumecovēnētsivi, nacopabanubenaena Dioso pijatomarajumavelia. Nacopabanubenaena pamonaē bitso ēpibisiacuene pexanaevi, penajorobivi ata, pevītota pibisiacuene pexanaevi ata, jivibeivi ata, jumapecataeya pexanaenēanējavabelia penavajēcabibivi ata, bitso penajumetsēnētsivi ata. Daxita bajarapamonae nacopabanubenaena Dioso pijatomarajumavelia, nejai āngelnē.

¹⁶ Nexata Jesús nejumlahtsi:

—Xanē rabaja Jesús nē. Itorobajē tajaāngelnē pecatsipaebinxaxua palivaisi baja catsipaeba. Bajarapacuenia itorobajē daxita Dioso pejumecovēnētsivi peyapētaenexa palivaisi baja tajaāngelnē catsipaeba. Xanē rabaja nacuaevetsinēmi Davidpijinē pemomoxiyajuvēnēnē. Xanē rabaja tajamatabēcueneitayotsinē daxitajivi pexaniajailivaisita, nejai Jesús.

¹⁷ Espiritu Santo jumaitsi. Petiriva ata, pova Corderonē pijavanexa, bajarapova ata jumaitsi. Jumaitsibeje Jesúsjavabelia mapacueniaje:

—Naxanitsiayo patsianimica, jaijebe.

Pamonae jumetane bajarapacuenia pejumaitsijavabeje Jesúsjavabelia, bajarapamonae ata bejumaitsi Jesúsjavabelia:

—Naxanitsiayo patsianimica, bejai bajarapamonae ata.

Pacuenia jivi pejamatabëëthëtojavavetsina bitso jitsipa mera piapaenexa, bajara pijinia pacuenia jivi bitso itsa jitsipaena Dioso pecapanepaejavanaxatsi, nexata bajarapamonae Dioso rajutsianatsi matacabi apo peverevereaejava. Tocopatsianatsi bajarapamonae amoneya pexainaeenexa matacabi apo peverevereaejava itsa jumecovënëta Cristo pesivatëpaejavatsi. Tsipaji Cristo jivi petëpaejavavecua piatavayaexanaenë.

¹⁸ Daxita pamonae leba Dioso pejumelivaisi, tayaquinaelivaisi mapabaxutotaje, jamatabëcuenereviaya tsipaebijitsianë roviaia mapacueniaje. Mapabaxutotaje tayaquinaelivaisi itsajivi icatsia saicayalivaisi mataropotsia itsa yaquinaena, bajarapajivi naneconitsiana Diosojavabelia. Nexata Dioso naneconitsiaexanaenatsi. Papiayaicueneyabara jumaitsi mapabaxutotaje, bajarapacuenia Dioso taeyaexanaenatsi bajarapajivi. ¹⁹ Mapabaxutotaje tayaquinaelivaisi, itsajivi itsa xuabiana itsalivaisiyo, nexata bajarapajivi naneconitsiana Diosojavabelia. Nexata bajarapaneconijamatabëcueneta bajarapajivi vënëyaquinae atatsi pabaxutota vënërubena daxita pamonae matacabi apo peverevereaejava pexainaevinexa, matacabi apo peverevereaejava apo xainae tsane. Dioso pijatomarabetsia ata pejonenexa, apo tocopatsi tsanetsi. Pabaxutota vënërubena matacabi apo peverevereaejava pexainaevinexa pelivaisi, Dioso pijatomara ata pelivaisi, jumaitsi mapabaxutotaje.

²⁰ Jesús, ponë itoroba pijaángelnë tanetsipaebinexa pacuenia itsamatacabi itsijitsia mapanacuataje, bajaraponë nejumaitsi mapacueniaje:

—Bepijia patsianicajë, jai.

Nexata xanë jumaitsinë:

—Je. Xanepana rabaja. Jesús pepo petuxanenëmë, ¡naxanitsiayo patsianimica! janë.

²¹ Pacatovajëtsi daxita paxamë vajatuxanenë Jesucristo papecayavenonaenexa. Bajara itsi tsane.